


Nduudu n'dai ye^{n'}e Ndyuūs ye^{n'}e cuicateco ye^{n'}e

Tepeuxila



New Testament in Cuicatec, Tepeuxila (MX:cux:Cuicatec,
Tepeuxila)

Nduudu n'dai ye^{n'}e Ndyuūs ye^{n'}e cuicateco ye^{n'}e Tepeuxila
New Testament in Cuicatec, Tepeuxila (MX:cux:Cuicatec, Tepeuxila)

copyright © 1974 Wycliffe Bible Translators, Inc.

Language: Cuicatec, Tepeuxila

Translation by: Wycliffe Bible Translators, Inc.

Cuicateco, Tepeuxila [cux], Mexico

Copyright Information

© 1974, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Tepeuxila

© 1974, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 4 Mar 2019 from source files dated 22 Sep 2018
28b090dc-326e-56c7-994e-5d3354d1d54f

Contents

SAN MATEO	1
SAN MARCOS	58
SAN LUCAS	93
SAN JUAN	151
HECHOS	188
ROMANOS	235
1 CORINTIOS	260
2 CORINTIOS	284
GÁLATAS	300
EFESIOS	309
FILIPENSES	318
COLOSENSES	324
1 TESALONICENSES	330
2 TESALONICENSES	335
1 TIMOTEO	338
2 TIMOTEO	345
TITO	350
FILEMÓN	353
HEBREOS	355
SANTIAGO	373
1 PEDRO	380
2 PEDRO	387
1 JUAN	391
2 JUAN	396
3 JUAN	397
JUDAS	398
APOCALIPSIS	400

NDUUDU N'DÁÍ CHÍ DÍNGUŪⁿ APÓSTOL MATEO

Yeⁿé 'iⁿyāⁿ chi ndaata yeⁿē Jesucristo chí vmnááⁿ vmnaaⁿ
(Lc. 3.23-38)

¹ Chuū chí lista yeⁿe ndaata yeⁿe Jesucristo, ndíí na ndaata Abraham ndíí na ndaata David ndíí tiempo chi ch'iindiyááⁿ Jesucristo.

² Abraham miiⁿ ch'iindī daiya sa chi nguuvi Isaac. Isaac miiⁿ ní ch'iindī daiya sa chi nguuvi Jacob. Jacob miiⁿ ní ch'iindī daiya sa Judá ndúúⁿcū tanáⁿā 'díínu yā. ³ Judá miiⁿ ní ndúúⁿcū Tamar chi n'daataá yeⁿē sa ch'iindī daiyá yā chi cuates chi nguuvi Fares ndúúⁿcū Zara. Fares miiⁿ ní ch'iindī daiya sa Esrom. Esrom miiⁿ ní ch'iindī daiya sa Aram. ⁴ Aram miiⁿ ní ch'iindī daiya sa Aminadab. Aminadab miiⁿ ní ch'iindī daiya sa Naasón. Naasón miiⁿ ní ch'iindī daiya sa Salmón. ⁵ Salmón ndúúⁿcū Rahab chi n'daataá yeⁿē sa ní ch'iindī daiyá yā Booz. Booz miiⁿ ndúúⁿcū Rut chi n'daataá yeⁿē sa ní ch'iindī daiyá yā Obed. Obed miiⁿ ní ch'iindī daiya sa Isaí. ⁶ Isaí miiⁿ ní ch'iindī daiya sa rey David. Rey David miiⁿ ní ch'iindī daiyá yā Salomón taachi caneé yā ndúúⁿcū n'daataá chi vmnááⁿ vmnaaⁿ ní n'daataá yeⁿe saⁿā Urías.

⁷ Salomón miiⁿ ní ch'iindī daiya sa Roboam. Roboam miiⁿ ní ch'iindī daiya sa Abías. Abías miiⁿ ní ch'iindī daiya sa Asa. ⁸ Asa miiⁿ ní ch'iindī daiya sa Josafat. Josafat miiⁿ ní ch'iindī daiya sa Joram. Joram miiⁿ ní ch'iindī daiya sa Uzías. ⁹ Uzías miiⁿ ní ch'iindī daiya sa Jotam. Jotam miiⁿ ní ch'iindī daiya sa Acáz. Acáz miiⁿ ní ch'iindī daiya sa Ezequías. ¹⁰ Ezequías miiⁿ ní ch'iindī daiya sa Manasés. Manasés miiⁿ ní ch'iindī daiya sa Amón. Amón miiⁿ ní ch'iindī daiya sa Josías. ¹¹ Josías miiⁿ ní ch'iindī daiya sa Jeconías. Jeconías miiⁿ ndúúⁿcū tanáⁿā vi'i yā ch'iindiyááⁿ yā taachi chiidá yā ndúúⁿcū cheécú yā ní preso yā ndúúⁿcū tanáⁿā 'iⁿyāⁿ yeⁿe ndaata Israel ní taachi cueⁿé yā na cyúúⁿí na yáⁿā Babilonia.

¹² Cuayiivi chi cho'ó yā na yáⁿā Babilonia, Jeconías miiⁿ ní ch'iindī daiya sa Salatiel. Salatiel miiⁿ ní ch'iindī daiya sa Zorobabel. ¹³ Zorobabel miiⁿ ní ch'iindī daiya sa Abiud. Abiud miiⁿ ní ch'iindī daiya sa Eliaquim. Eliaquim miiⁿ ní ch'iindī daiya sa Azor. ¹⁴ Azor miiⁿ ní ch'iindī daiya sa Sadoc. Sadoc miiⁿ ní ch'iindī daiya sa Aquim. Aquim miiⁿ ní ch'iindī daiya sa Eliud. ¹⁵ Eliud miiⁿ ní ch'iindī daiya sa Eleazar. Eleazar miiⁿ ní ch'iindī daiya sa Matán. Matán miiⁿ ní ch'iindī daiya sa Jacob. ¹⁶ Jacob miiⁿ ní ch'iindī daiya sa José, 'iⁿyāⁿ chi isáⁿā yeⁿe María. Ní daiya ta ní Jesús chi nguuvi Cristo.

¹⁷ 'Tíicā nducuéⁿē ndaata yeⁿe Abraham ndíí rey David ní ndiichicúúⁿ ndaata yeⁿé yā o generaciones. Ní ndíí rey David miiⁿ ndíí taachi cueⁿe nducyáácá 'iⁿyāⁿ ndaata yeⁿe yā na país Babilonia ní ndiichicúúⁿ ndaata yeⁿé yā. Ní ndíí taachi cheⁿe yā na yáⁿā Babilonia ndíí taachi ndaā Cristo iⁿyéⁿdi 'cūú ní ndiichicúúⁿ ndaata yeⁿé yā.

'Túúⁿcā ch'iindiyááⁿ Jesucristo
(Lc. 2.1-7)

¹⁸ 'Túúⁿcā ch'iindiyááⁿ Jesucristo. Taachí María miiⁿ chi cheecu Jesús miiⁿ caⁿa yā chi 'caandavaacú yā ndúúⁿcū José níicú taachi 'āā cuéé 'caandavaacú yā ndúúⁿcū vi'í, véé 'áámá daiya yā cheetí yā cucááⁿvā Espíritu N'dai yeⁿé Ndyuūs. ¹⁹ José miiⁿ ní neⁿé yā 'caandavaacu yā ndúúⁿcū María miiⁿ. Ní José miiⁿ ní neéné n'dai yā. Ní cuayiivi nguéé neⁿé yā 'caandavaacú yā ndúúⁿcū táⁿā cucááⁿvā chi véé dacua'a cheetí yā. Ní nguéé neⁿé yā yaa'vi yā 'iⁿyāⁿ yeⁿe yááⁿ miiⁿya yeⁿe María chi nguéé n'daācā ti nguéé neⁿé yā chi María cuuví 'cuinaaⁿ yā. ²⁰ Ní taachí José miiⁿ nacadínuuⁿ yā chi cu'neeⁿ yā María miiⁿ, cuayiivi ní taachí cyaadu yā, 'áámá ángel yeⁿe Señor Ndyuūs che'enaáⁿ yā yeⁿé yā ní caⁿa yā chi José miiⁿ: Díí, José, saⁿā yeⁿe ndaata rey David, nguéé 'va'a di cuuví n'daataá yeⁿe di María, ti dacuáⁿā yeⁿē tá chi véé cheeti tá nguéé yeⁿe 'iⁿyāⁿ ti yeⁿē Espíritu N'dai yeⁿe Ndyuūs. ²¹ Ní táⁿā miiⁿ ní 'cuundiyááⁿ daiya tá 'áámá saⁿā 'lín. Díí

ní cu'neeⁿ di chí ngúúví sá JESÚS caati cucáávā Jesús miiⁿ ní nadanguáⁿai 'iiⁿyāⁿ yeⁿē íⁿ'yeeⁿdí 'cūū ní nadich'εεcú yā nuuⁿndi yeⁿe nducyaaca 'iiⁿyāⁿ.

²² Tanducuéⁿē chuū ní 'tíicā chií ndúúcu María ní 'íicú cuuvi cuaacu chí caⁿā profeta yeⁿe nduudu yeⁿé Ndyuūs ndíí cuaaⁿ vmnaaⁿ, nduudu chi canéé nguūⁿ na libro yeⁿé Ndyuūs 'tíicā:

²³ Níicú n'diichí nī. Tá 'cūū 'áámá chí cuiinuu tá 'cuūndī daiya tá. Taachí 'cuundiyáāⁿ 'áámá daiya tá ní cu'neeⁿ chi duuchi Emanuel chí neⁿe caaⁿ'maⁿ Ndyuūs ndúúcu s'uūúⁿ.

²⁴ Cuayivi miiⁿ ní taachi José miiⁿ nanduuchí yā, tuu'mi ní diíⁿ yā tan'dúúca chí ngaⁿā ángel yeⁿe Señor Ndyuūs níicú ch'iindivaacú yā ndúúcu María miiⁿ. ²⁵ Naati José miiⁿ nguéé n'diichi sá María miiⁿ ndíí ch'iindiyaāⁿ daiya tá, ní José s'neeⁿ sá chí ngúúví dacua'āa miiⁿ dúúchí JESÚS.

2

Yeⁿé 'iiⁿyāⁿ magos chí cheⁿe sa n'diichi sa Jesús

¹ Taachi Jesús ch'iindiyáāⁿ yā na yāāⁿ Belén yeⁿe yáⁿāa Judea, tiempo miiⁿ ní saⁿa Herodes miiⁿ ní rey yeⁿe yáⁿāa Judea. Ní n'duuví magos, 'iiⁿyāⁿ chí déenu ca yā yeⁿe 'ííⁿnyúⁿ ndiicá yaⁿáí yā ndíí cuaaⁿ ná ícan'daā 'yáⁿā. Ní magos ndaa yā na yāāⁿ Jerusalén.

² Magos ní ndaa yā nanááⁿ rey Herodes miiⁿ ní ntiinguuneeⁿ yā rey: ¿Tíí canéé 'iiⁿyāⁿ chí rey yeⁿe 'iiⁿyāⁿ Israel chí 'niindiyáāⁿ yā? Nús'uū ní n'diichí 'nū 'áámá 'ííⁿnyúⁿ ch'εεε cuááⁿ ná ican'dáá 'yáⁿā 'íicú chííⁿ chí cuchíí 'nū. Níicú ndaa 'nū chí cu'téenu 'nū saⁿā 'lííⁿ rey miiⁿ.

³ Taachí rey Herodes miiⁿ ch'iindiveéⁿ yā chuū, chistaⁿā vaanicadínūⁿ yeⁿe yā. 'Tiicá ntūūⁿ nducyaaca 'iiⁿyāⁿ yeⁿe yāāⁿ Jerusalén taachi ch'iindiveéⁿ yā. ⁴ Ní rey Herodes miiⁿ ní nádaamá yā nducyaaca chiidūu n'geeté chí ngaⁿa ntiiⁿnyúⁿ yā yeⁿe yaācū Israel ndúúcu 'iiⁿyāⁿ chí ngi'cuééⁿ ley 'iiⁿyāⁿ yeⁿe Israel. Ní itiinguuneeⁿ yā 'iiⁿyāⁿ s'eeⁿ: ¿Tíí 'niindiyáāⁿ Cristo? ⁵ 'Iiⁿyāⁿ s'eeⁿ ní caⁿa yā chíí yā rey miiⁿ: 'Cuundiyáāⁿ yā na yāāⁿ Belén yeⁿe yáⁿāa Judea caati 'tíicā canéé nguūⁿ na libro yeⁿe Ndyuūs cucáávā saⁿa profeta:

⁶ Ndís'tií 'iiⁿyāⁿ yeⁿe yāāⁿ Belén yeⁿe yáⁿāa Judá, ¿'áá nguéé yāāⁿ yeⁿe nī chí 'lííⁿ cá nguaaⁿ nducuéⁿē yāāⁿ yeⁿe yáⁿāa Judá naachi 'iiⁿyāⁿ ndíí tiííⁿ ngaⁿa ntiiⁿnyúⁿ yā? Nguéé chí 'tíicā, caati nguaaⁿ ndís'tií chí yeⁿē yāāⁿ Belén can'dáā 'áámá sáⁿā chí ngaⁿā ntiiⁿnyuⁿ sá yeⁿe nducyáácá 'iiⁿyāⁿ Israel chí judíos chí 'iiⁿyāⁿ s'eeⁿ chí Ndyuūs nndεεve yā.

⁷ Tuu'mi ní rey Herodes yaa'vi n'dé'éeí yā saⁿā magos ní ntiinguuneeⁿ cá yā saⁿa s'eeⁿ: ¿Dε'ē tiempo n'diichi nī 'ííⁿnyúⁿ miiⁿ? ⁸ Ní rey miiⁿ ní caⁿa yā chíí yā saⁿa s'eeⁿ: Ndís'tií magos, cueⁿe nī na yāāⁿ Belén ní in'nuūⁿ n'daāca nī dacua'a 'lííⁿ miiⁿ. Ní taachí ndaaca nī dacua'a mííⁿ, nanguεεcuneeⁿ nī ní caaⁿ'maⁿ nī yeⁿé. Maaⁿ níicú 'úú ntūūⁿ ní cuuvi caⁿ'á cu'teenú dacua'a 'lííⁿ miiⁿ.

⁹ Magos ní ch'iindiveéⁿ yā nduudu yeⁿe rey miiⁿ ní cúnaⁿa yā. Cuin'diichí nī. 'Ííⁿnyúⁿ chí 'iiⁿyāⁿ magos n'diichi yā cuaaⁿ na ican'daa 'yáⁿā, 'ííⁿnyúⁿ mííⁿ cueⁿé nanááⁿ yeⁿe magos taanduvéé ndaā ní cānee lugar naachi canéé dacua'a 'lííⁿ. ¹⁰ Ní taachi magos 'āā n'diichí yā 'ííⁿnyúⁿ miiⁿ, yéenu taaví yā. ¹¹ Ní taachi sndaá yā va'āí miiⁿ, n'diichí yā saⁿā 'lííⁿ dacua'ā miiⁿ ndúúcu chεεcu sá María. Ní chíntii'yá yā nanááⁿ dacua'ā miiⁿ ní s'téenu yā. Taachi n'guaaⁿ yā caja naachi snéé regalos yeⁿe yā, tuu'mi ní ca'á yā yeⁿē dacua'ā miiⁿ. Regalos ní 'dííⁿnguaāⁿ ndúúcu yáⁿā chí n'dεεve ngééⁿ ndúúcu mirra chí diitū taavi n'dai ngééⁿ. ¹² Cuayivi miiⁿ ní Ndyuūs yaa'vi yā magos na 'yúúduyaaⁿ yeⁿe yā chí 'āā ntéé naⁿa yā nanááⁿ rey Herodes miiⁿ. Níicú magos cunaⁿa yā na vaacu yā na taama yúúní.

Cueⁿe yā ngéenu yā na yáⁿāa Egipto

¹³ Taachi magos cunaⁿa yā, tuu'mi ní Ndyuūs dicho'ó yā 'áámá ángel níicú ángel miiⁿ ní ndaa yā nanááⁿ José miiⁿ taachi cyaadú yā ní caⁿa yā chíí yā José: Díí José, nducueeⁿ

di ní cuta'a di saⁿ'ā 'lín ní cueⁿ'e di cáanū di ndúúcū chεεcu sa ndí yáⁿ'āa Egipto. Ní 'cuεetinée nī miiⁿ ndí taachi 'úú caaⁿ'máⁿ caati canée chí rey Herodes miiⁿ ní nan'nuúⁿ yā saⁿ'ā 'lín chí 'caaⁿ'núⁿ yā saⁿ'ā.

¹⁴ José miiⁿ ní nanduuchí yā. 'Tiicá ntúūⁿ chεεcu sa. Ní sta'a yā saⁿ'ā 'lín miiⁿ ní nguiinū miiⁿ nūuⁿ cueⁿ'e yā ndúúcū chεεcu sa na yáⁿ'āa Egipto. ¹⁵ Níícú miiⁿ ch'εetinée yā ndí chí ch'iī rey Herodes. Níícú cúúnú ca'a chíⁿ chí Señor Ndyuūs caⁿ'a yā na libro yeⁿ'e yā ndii cuááⁿ vmaaⁿ cucáávā saⁿ'a profeta miiⁿ taachi caⁿ'a yā 'tíicā: Ná yáⁿ'āa Egipto 'caí daíyá.

Rey Herodes caⁿ'a ntiinnyúⁿ yā chí 'caaⁿ'núⁿ yā dacua'āa ngaiyā

¹⁶ Taachí rey Herodes miiⁿ tuumicadínuuⁿ yā chí 'iiⁿ'yāⁿ magos chinnche'éi yā 'iiⁿ'yāⁿ, tuu'mi ní nduuvi taáⁿ n'dai yā. Ní rey miiⁿ ní caⁿ'a ntiinnyuⁿ yā ní dichó'ó yā soldados chí ch'iīⁿnuⁿ yā nducyáácá dacua'āa chí saⁿ'ā ndí cuaacu 'uūví nduūyū chí véé na yāāⁿ Belén ndúúcū tanáⁿ'ā yāāⁿ chí na niiⁿnuúⁿ. 'Tíicā rey miiⁿ diiⁿ cuenta yā ti cho'ōo 'uuvi nduūyū chí magos n'diichí yā 'íiⁿ'nyúⁿ ch'εete miiⁿ yeⁿ'e nanguuvi. ¹⁷ Tuu'mi ní cho'ōo chuū chí cuuvi cuaacu tan'dúúcā chí canée nguūⁿ na libro yeⁿ'e Ndyuūs cucáávā chí caⁿ'a saⁿ'ā profeta Jeremías cuááⁿ vmaaⁿ 'túúcā:

¹⁸ Na yāāⁿ Ramá ch'iindiveéⁿ 'iiⁿ'yāⁿ chí ngeεcu yā ní n'gái yā ndúúcū 'áámá vaadi ya'ai ch'εeté cucáávā daiya yā chí ch'iī. N'daataá yeⁿ'ē Israel s'eeⁿ ngeεcu yā cucáávā daiya yā chí ch'iīⁿnuⁿ rey tan'dúúcā chí táⁿ'ā Raquel ngeεcu yā cucáávā daiya yā chí ch'iī. Ní nguée chíi ndaacā n'daataa s'eeⁿ 'viich'εetíinūuⁿ miiⁿ.

¹⁹ Cuayivi taachí ch'iī rey Herodes miiⁿ, José miiⁿ ní 'āā canee yā na yáⁿ'āa Egipto. Tuu'mi ní Señor Ndyuūs dicho'o yā 'áámá ángel ní ángel che'enaáⁿ yā yeⁿ'é José taachi cyaadú yā. ²⁰ Ní ángel miiⁿ caⁿ'a yā chíi yā José: Díí José, nducueeⁿ di ní cuta'a di saⁿ'ā 'lín dacua'āa ní cuinaⁿ'a di ndúúcū chεεcu sa na yáⁿ'āa Israel caati ch'iī 'iiⁿ'yāⁿ chí neⁿ'e yā 'caaⁿ'nuⁿ yā saⁿ'ā 'lín.

²¹ Tuu'mi ní José ncueeⁿ yā. 'Tiicá ntúūⁿ chεεcu sa. Ní sta'a yā saⁿ'ā 'lín miiⁿ ní cueⁿ'e yā ndúúcū chεεcu sa na yáⁿ'āa yeⁿ'e 'iiⁿ'yāⁿ Israel. ²² Taachí José miiⁿ ch'iindiveeⁿ yā chí saⁿ'ā Arquelao canée lado yeⁿ'e rey Herodes chí chiida sa, tuu'mi ní José miiⁿ ní 'va'á yā chí caⁿ'a yā na yáⁿ'āa Judea chí yáⁿ'āa yeⁿ'e 'iiⁿ'yāⁿ Israel. Naati tan'dúúcā chí ángel che'enaáⁿ yeⁿ'e yā na 'yuudiyaaⁿ yeⁿ'e yā, cueⁿ'e yā yáⁿ'āa Galilea chí yáⁿ'āa yeⁿ'e 'iiⁿ'yāⁿ Israel ntúūⁿ. ²³ Ní ndaá yā na yáⁿ'āa miiⁿ ní cueⁿ'e yā ch'εetinee yā na yāāⁿ Nazaret yeⁿ'e yáⁿ'āa Galilea. Ní 'iicu cuuvi cuaacu chí caⁿ'a profetas vmnááⁿ vmaaⁿ yeⁿ'e Jesús chí 'túúcā: Canée chí cuuvi nguúví yā 'iiⁿ'yāⁿ nazareno yā cucáávā chí cueⁿ'e yā na yāāⁿ Nazaret.

3

Yeⁿ'e chí Juan cuēdínuūⁿniⁿ yā ní ngaⁿ'a yā nduudu cuaacu

(Mr. 1.1-8; Lc. 3.1-9, 15-17; Jn. 1.19-28)

¹ Tiempo miiⁿ chiicá Juan chí cuēdínuūⁿniⁿ yā na lugar naachi nguée ch'εetinée 'iiⁿ'yāⁿ. Lugar miiⁿ chí yeⁿ'e yáⁿ'āa Judea ní miiⁿ ngaⁿ'a Juan nduudu cuaacu. ² Juan miiⁿ ní ngaⁿ'a yā chí 'túúcā: Ndís'tiī, ndaacadaamī nī yeⁿ'e chí díⁿ nī chí nguée n'dai caati 'āā ndaā niiⁿnuúⁿ nguuvi miiⁿ naachi Ndyuūs ngaⁿ'a ntiinnyúⁿ yā na va'ai chεeti nguuvi. ³ Níícú yeⁿ'e Juan 'cūú ní saⁿ'a profeta Isaiás caⁿ'a yā yeⁿ'e yā vmnááⁿ vmaaⁿ taachí caⁿ'a yā 'túúcā:

'Caandiveéⁿ nī. 'Áámá saⁿ'ā ngaⁿ'a yuudu sa 'túúcā na yáⁿ'āa cuūⁿmáⁿ naachi nguée ch'εetinée 'iiⁿ'yāⁿ: 'Cuundiyaáⁿ nī yúúní yeⁿ'ē Señor Ndyuūs caati cúchii yā. Nan'guááⁿ nī yúúní cuaacu caavá yā. Dideévē nī staava yeⁿ'é nī ní cuuvi cuaáⁿ nī 'iiⁿ'yāⁿ miiⁿ taachi ndaa yā.

⁴ Catecai Juan miiⁿ ní nin'dai ndúúcū yuūdū yeⁿ'ē 'iiti camello. Ní cinturón yeⁿ'ē sa ní diiⁿmaⁿ 'iiti. Níícú chí che'ē sa ní 'iiti langostas ndúúcū n'di'i yeⁿ'ē 'iiti 'yáaiⁿ chí vεε cuēti. ⁵ N'deeé 'iiⁿ'yāⁿ can'daa yā chí 'caandiveeⁿ yā nduudu yeⁿ'é Juan miiⁿ. Ní can'daa yā yeⁿ'e yāāⁿ Jerusalén, yeⁿ'e yáⁿ'āa Judea, ní yeⁿ'e yáⁿ'āa chí cuaaⁿ 'diituú yeⁿ'ē

yíicú Jordán. ⁶ 'Iiⁿ'yāⁿ ní caⁿ'a yā nuuⁿndi yeⁿ'é yā nanááⁿ Ndyuūs níicú Juan miiⁿ ní cheedínuuⁿnīⁿ sá 'iiⁿ'yāⁿ miiⁿ na yíicú Jordán miiⁿ.

⁷ Taachí Juan miiⁿ n'diichí sa chi neené 'yaaⁿ 'iiⁿ'yāⁿ fariseos ndúucū 'iiⁿ'yāⁿ saduceos neⁿ'é yā chí cuēdínúuⁿnīⁿ sa 'iiⁿ'yāⁿ, Juan miiⁿ caⁿ'a sa chii sa 'iiⁿ'yāⁿ miiⁿ: Ndís'tiī tan'dúucā cúu, 'tíicā ndís'tiī. ¿Du'ú chí 'cuééⁿ ndís'tiī chí cuuvi cáánu nī yeⁿ'e castigo taaⁿ chí cuchii? ⁸ N'daāca diiⁿ nī maaⁿ níicú 'cuuⁿ'míⁿ nī 'iiⁿ'yāⁿ chí 'āā ndaacadaamí nī yeⁿ'e nuuⁿndi yeⁿ'e nī. ⁹ Ndís'tiī ní 'āā ntéé nadacádíinuⁿ nī chí n'dai nī caati ndaata yeⁿ'e Abraham ndís'tiī. Naati 'úú ní ngaⁿ'á ngī ndís'tiī chí Ndyuūs cuuvi diiⁿ yā chí tuū s'tiī ní cuuvi daiya Abraham. ¹⁰ Cutíiⁿ míⁿ 'āā canéé na dii'yu yáⁿ'á. Nducyaaca yáⁿ'á chí nguéé n'dáacā ngii n'gui'i yeⁿ'ē canee chí 'caata yáⁿ'á míⁿ ní cūnuuⁿ na yaⁿ'ā. ¹¹ 'Úú ní cuaacu nínyúⁿ chí ngeēdínúuⁿnīⁿ ndís'tiī ndúucū nuūⁿnīⁿ caati 'āā ndaacadaamí nī yeⁿ'e nuuⁿndi yeⁿ'e nī. Naati ndáá táámá 'iiⁿ'yāⁿ cuayiivi yeⁿ'e 'úú chí ch'εεε taavi cá poder yeⁿ'e yā nguéé ti 'úú. 'Úú ní nguéé neené n'dai 'úú chí cuuvi candéé ndaacuú yeⁿ'e yā. 'Iiⁿ'yāⁿ miiⁿ ní n'dai taavi cá yā chí cuuvi 'úú. 'Iiⁿ'yāⁿ miiⁿ ní cuēdínúuⁿnīⁿ yā ndúucū Espíritu N'dai yeⁿ'é Ndyuūs ndúucū yaⁿ'ā. ¹² Ní taachi ndaa 'iiⁿ'yāⁿ miiⁿ chí nguuvi Jesús diiⁿ yā tan'dúucā 'áámá 'iiⁿ'yāⁿ chí didεεvé yā trigo 'tíicā diiⁿ yā ndúucū 'iiⁿ'yāⁿ. Ní sta'á yā zaranda yeⁿ'e yā ní nadidaamá yā trigo na cheeti dínūuⁿ. Ní dεεcú miiⁿ ní'neeⁿ yaⁿ'a yā ná nguuchí yaⁿ'ā chí 'āā ntéé n'tuūvi. Dεεcú miiⁿ ní tan'dúucā 'iiⁿ'yāⁿ chí nguéé i'téenu yā Ndyuūs.

Juan cheedínuuⁿnīⁿ sa Jesús

(Mr. 1.9-11; Lc. 3.21-22)

¹³ Tuu'mi ní Jesús chiicá yā na yáⁿ'āa Galilea ní ndaa yā na yíicú Jordán naachi canee Juan chí Juan miiⁿ ní cuēdínúuⁿnīⁿ sa Jesús miiⁿ. ¹⁴ Juan miiⁿ ní nguéé 'cuuⁿ sa. Ní caⁿ'a sa chii sa Jesús miiⁿ: 'Úú ní neⁿ'é chí dii cuēdínúuⁿnīⁿ di 'úú. ¿'Áá dii cuchii di nanááⁿ 'úú?

¹⁵ Jesús nan'guεεcútaⁿ'a yā: Diiⁿ dí maaⁿ 'tíicā; ní diiⁿ yú tan'dúucā chí Dendyuūs neⁿ'e yā chí diiⁿ yú. Tuu'mi ní Juan 'cuūⁿ sa.

¹⁶ Cuayiivi taachi 'āā cheedínúuⁿnīⁿ Juan miiⁿ Jesús miiⁿ, tuu'mi ní Jesús ní nan'daa yā na nuūⁿnīⁿ. Cuayiivi ní nanguaāⁿ nanguuvi. Ní Juan n'diichí sa Espíritu N'dai yeⁿ'é Ndyuūs miiⁿ chí tan'dúucā paloma 'tíicā. Chiica yeⁿ'ē na va'ai cheeti nguuvi ní ndaa vmnaaⁿ yeⁿ'e Jesús miiⁿ. ¹⁷ Tuu'mi ní n'giindiveéⁿ yā 'áámá nduudu yeⁿ'ē nanguuvi chí ngaⁿ'a: Saⁿ'a 'cūū Daiyá chí neⁿ'e taaví. Ní yeenú taaví cáávā sáⁿ'a 'cūū.

4

Yááⁿ'nguiinūuⁿ neⁿ'e sa tuu'vi neeⁿ sa Jesús

(Mr. 1.12-13; Lc. 4.1-13)

¹ Tuu'mi ní Espíritu N'dai yeⁿ'é Ndyuūs candéē Jesús miiⁿ ná yáⁿ'āa cuūⁿmáⁿ naachi nguéé ch'εεtinéé 'iiⁿ'yāⁿ chí yááⁿ'nguiinūuⁿ neⁿ'e sa chí Jesús díⁿ yā nuuⁿndi.

² Jesús canéé yā miiⁿ 'uūvū ngeεcu nguuvi ní 'uūvī ngeεcu n'gaaⁿ ní nguéé che'é yā. Ní cuayiivi ní cuiicú yā. ³ Yááⁿ'nguiinūuⁿ ní ndaa sa nanááⁿ Jesús chí n'diichineeⁿ sa 'iiⁿ'yāⁿ. Ní caⁿ'ā sa: Dii Jesús, nduuti chí dii chí Daiya Dendyuūs dii, caaⁿ'maⁿ dí cuuvi dí tuū 'cūū chí nduuví pan. Ní nduuví pan ní cuuvi che'e di.

⁴ Jesús miiⁿ nan'guεεcútaⁿ'a yā ní caⁿ'a yā: 'Túucā canee nguūⁿ na libro yeⁿ'é Ndyuūs: Nguéé dámaaⁿ pan che'é 'iiⁿ'yāⁿ ní cunduūchi yā caati ndúucū tanducuéⁿ'ē nduudu chí ngaⁿ'a Ndyuūs ní 'iiⁿ'yāⁿ cunduūchí yā nduuti chí cu'téenu yā.

⁵ Tuu'mi ní yááⁿ'nguiinūuⁿ miiⁿ candéε sa Jesús na yááⁿ Jerusalén chí yááⁿ yeⁿ'e Ndyuūs. Ní chin'duu sá 'iiⁿ'yāⁿ na yáácú yeⁿ'e yaácū. ⁶ Ní yááⁿ'nguiinūuⁿ caⁿ'a sa chii sa Jesús: Nduuti chí dii chí Daiya Dendyuūs dii, cáávā di ndii 'múúⁿ ndii na yáⁿ'āa; caati 'túucā canéé nguūⁿ na libro yeⁿ'é Ndyuūs:

Ndyuūs dichó'o yā ángeles yeⁿ'e yā chí diiⁿ yā cuidado yeⁿ'ē di. Ní ángeles cundéε yā dii ndúucū ta'á yā, ní nguéé cuuvi ya'ai ca'a di na tuū.

⁷ Jesús nán'guεεcútá'n'a yā: 'Tuucá ntúūn canéé nguūn na libro ye'n'é Ndyuūs: Nguéé dii'n di mar 'áámá cosa chi n'diichinee'n di Señor Ndyuūs ye'n'é di.

⁸ Tuu'mi candéε yáá'n'guiinūu'n mii'n Jesús mii'n na 'áámá yīcū yáácú ní ch'i'n'i sa tanducué'n'é naciones ye'n'é i'n'yee'ndí 'cūū ndúúcū chí nga'n'á ntii'nyu'n sa ye'n'é ndúúcū dendú'ū chí n'gεεεε chi véé ye'n'é. ⁹ Ní ca'n'a sa chii sa Jesús mii'n: Tanducué'n'é chuū teé dii nduuti chi caantí'ya dí nanaán ní cu'téénu di 'úú.

¹⁰ Tuu'mi ní Jesús mii'n ca'n'a yā chii yā sa'n'ā mii'n: Díí yáá'n'guiinūu'n, cuvii di nanaán caati 'túúcā canéé nguūn na libro ye'n'e Dendyuūs: Cu'téénu di Señor Ndyuūs ye'n'é di ni 'caandivee'n di ye'n'e 'ii'n'yā'n míí'n nūu'n.

¹¹ Tuu'mi ní yáá'n'guiinūu'n mii'n divii sa ye'n'e Jesús, ní nínndaā ángeles ní dichí'vε yā Jesús mii'n.

Jesús tucá'a yā ntii'nyu'n ye'n'e yā na yá'n'āa Galilea

(Mr. 1.14-15; Lc. 4.14-15)

¹² Taachi ch'iindivee'n Jesús mii'n chi Juan chi ngeεdinuū'n'nīn 'ii'n'yā'n canúú'n sá vácūū, nanguεεcunée yā cuna'n'a yā na yá'n'āa Galilea. ¹³ Chiicá yā na yáā'n Nazaret ní ndaa yā canee yā na yáā'n Capernaum. Yáā'n mii'n ní nii'nuú'n na nuū'nī'n'yá'n'ā canee, ní canee na yá'n'āa ye'n'e Zabulón ndúúcū yá'n'āa ye'n'e Neftalí. ¹⁴ Ní cuuvi cuaacu nduudu ye'n'e sa'n'ā profeta Isaías chí ca'n'a sa cuáá'n vmnaa'n 'tíícā:

¹⁵ Ná yá'n'āa ye'n'é Zabulón ndúúcū na yá'n'āa ye'n'e Neftalí chí canéé na yúúní chí nge'n'e ná nuū'nī'n'yá'n'ā ndúúcū na yá'n'āa chí canee taama lado ye'n'e yíícú chí nguuvi Jordán. Míí'n canéé yá'n'āa Galilea ye'n'e 'ii'n'yā'n chí nguéé ye'n'é ndaata 'ii'n'yā'n Israel.

¹⁶ 'Ii'n'yā'n chí snéé na maāi'n ti nguéé ye'n'e Ndyuūs, 'ii'n'yā'n s'ee'n n'diichí yā 'áámá dεεve ch'εεεε. Ní chii dεεvé mii'n naachi sneé 'ii'n'yā'n s'ee'n.

¹⁷ Ndíí tuu'mi tucá'ā Jesús ca'n'a yā nduudu cuaacu ní ca'n'a yā: Ndaacadaamí nī ye'n'e nuu'ndí ye'n'é nī caati tiempo chí Ndyuūs nga'n'a ntii'nyú'n yā na va'ai cheeti nguuvi 'āā ndaa nii'nuú'n.

Jesús yaa'vi yā cuūu'n sa'n'a chí itungáá'n 'yaācā

(Mr. 1.16-20; Lc. 5.1-11)

¹⁸ Cuayivi ní Jesús mii'n cachiicá yā cuaa'n 'diituú nuū'nī'n'yá'n'ā chí nguuvi Galilea, ní n'diichí yā na 'uuví sa'n'ā 'díínú sa vi'í. 'Áámá sa'n'a ní Simón Pedro nguuvi sa. Táámá sa'n'ā ní 'diínu sa ní Andrés nguuvi sa. Sa'n'ā s'uu'n ní n'gaa nuu'n sa yáanā ye'n'é 'yaācā mii'n na nuū'nī'n'yá'n'ā ti sa'n'ā s'ee'n itungáá'n sa 'yaācā na nuū'nī'n'yá'n'ā ti ntii'nyu'n ye'n'é sa. ¹⁹ Jesús ca'n'a yā chii yā sa'n'ā s'ee'n: Cuchíi nī nduucú, ní 'úú ní dii'n chí in'nuú'n nī 'ii'n'yā'n chí cuuvi ca'n'á yā nduucú. Ní tan'dúúcā chí tungaá'n nī 'yaācā ye'n'e nuū'nī'n'yá'n'ā, 'tíícā in'nuú'n nī 'ii'n'yā'n chí ca'n'á yā nduucú.

²⁰ Hora míí'n nūu'n ní sa'n'ā s'ee'n s'nee'n sa yaānā ye'n'é sa ni cue'n'e sa ndúúcū Jesús mii'n.

²¹ Tuu'mi ní Jesús mii'n cue'n'e ca yā ní n'diichi yā taama 'uuví sa'n'ā chí 'diínu sá vi'í chí nguuvi sa Jacobo ndúúcū Juan. Ní sa'n'ā s'uu'n ní daiya Zebedeo. Ní snee sa na barco mii'n ndúúcū chiida yā Zebedeo mii'n ní n'diyaatá yā yáanā ye'n'e yā. Jesús 'cai yā Juan ndúúcū Jacobo mii'n. ²² Tuu'mí nūu'n ní sa'n'ā s'uu'n ní s'nee'n sa barco mii'n ndúúcū chiida sa, ní cue'n'e sa'n'ā s'uu'n ndúúcū Jesús mii'n.

Jesús ngi'cuée'n yā 'yaa'n taavi 'ii'n'yā'n

(Lc. 6.17-19)

²³ Jesús cachiicá yā núú'n má'n ná yá'n'āa ye'n'e Galilea ní ngi'cuee'n yā na yaacū sinagogas na yáā'n ye'n'é yá'n'āa mii'n. Ní ca'n'á yā nduudu cuaacu ye'n'é naachi Ndyuūs nga'n'a ntii'nyú'n yā. Jesús mii'n ní dii'n yā chí nduūvā ye'n'é 'ii'n'yā'n ye'n'e nducué'n'é naa'n ca'ái ndúúcū 'ii'n'yā'n ye'n'e nducué'n'é chí ya'ai ye'n'e yā. ²⁴ Ní nducyáácá 'ii'n'yā'n ye'n'e núú'n má'n yáā'n ye'n'e yá'n'āa Siria ch'iindivee'n yā ye'n'e Jesús mii'n. Ní candéε yā 'ii'n'yā'n chí ya'ai ye'n'é, ndúúcū 'ii'n'yā'n chí n'deeé náá'n ca'ai ndii yā, ndúúcū 'ii'n'yā'n chí canee yā ndúúcū espíritus ye'n'e yáá'n'guiinūu'n, ndúúcū 'ii'n'yā'n chí ndistá'n'ā vaanicádiinūu'n ye'n'é, ndúúcū 'ii'n'yā'n

ndúúcū ca'āi chi in' dúuví cuerpo ye^{n'}e yā. Ní Jesús diíⁿ yā chi nducyaaca 'ii^{n'}yāⁿ nduūvā ye^{n'}é yā. ²⁵ Neené 'yaaⁿ 'ii^{n'}yāⁿ cue^{n'}é yā ndúúcū Jesús miiⁿ. 'Ii^{n'}yāⁿ s'eeⁿ ní ye^{n'}e yá^{n'}āa Galilea, ndúúcū distrito ye^{n'}ē Decápolis chi véé ndíchi yāⁿ ye^{n'}ē, ndúúcū yāⁿ Jerusalén, ndúúcū yá^{n'}āa ye^{n'}e Judea, ndúúcū yá^{n'}āa chi snéé táámá lado ye^{n'}ē yíícú Jordán.

5

Jesús nga^{n'}a yā nduudu cuaacu na 'áámá yiicu

(Lc. 6.20-23)

¹ Taachi Jesús n'diichí yā chi n'dee n'dái 'ii^{n'}yāⁿ cue^{n'}e yā ndúúcu yā tuu'mi ní Jesús cue^{n'}e yā 'áámá yiícū. Taachi Jesús miiⁿ ch'iindí yā tuu'mi ní discípulos ye^{n'}e yā ní ndaa yā nanáán yā. ² Jesús ní ca^{n'}a yā ní ngi'cuéeⁿ yā 'ii^{n'}yāⁿ s'eeⁿ.

³ De'ε chúúcā n'dai 'ii^{n'}yāⁿ chi deenú yā na staava ye^{n'}é yā chi ne^{n'}e deenu cá yā ye^{n'}e Ndyuūs, caati cuuvi ye^{n'}é yā ye^{n'}e naachi Ndyuūs nga^{n'}a ntii^{n'}nyúⁿ yā ná va'ai cheeti nguuví.

⁴ De'ε chúúcā n'dai 'ii^{n'}yāⁿ chi ndaachi 'iinú yā cáávā chi i'téenu yā Ndyuūs maaⁿ, caati cuayivi ní Ndyuūs ca'á yā 'viich'εtíinūⁿ 'ii^{n'}yāⁿ.

⁵ De'ε chúúcā n'dai 'ii^{n'}yāⁿ chi ndiicúⁿ yā na staava ye^{n'}e yā, ti 'ii^{n'}yāⁿ s'eeⁿ cuuvi ndaácá yā de'ē chi cuuvi ye^{n'}e yā chi Ndyuūs ca^{n'}a yā chi ca'a yā 'ii^{n'}yāⁿ s'eeⁿ.

⁶ De'ε chúúcā n'dai 'ii^{n'}yāⁿ chí ne^{n'}e ca yā diiⁿ yā chi n'daācā tan'dúúcā chi ne^{n'}e Ndyuūs. Ní Ndyuūs cúnnee yā 'ii^{n'}yāⁿ s'eeⁿ.

⁷ De'ε chúúcā n'dai 'ii^{n'}yāⁿ chi 'nuūⁿ ndii ya'ai 'iinú yā cáávā taná^{n'}ā 'ii^{n'}yāⁿ, caati Ndyuūs 'nuūⁿ ndii ya'ai 'iinú ntúⁿ yā cáávā 'ii^{n'}yāⁿ s'eeⁿ.

⁸ De'ε chúúcā n'dai 'ii^{n'}yāⁿ chi deεve staava ye^{n'}é yā, ti 'ii^{n'}yāⁿ s'eeⁿ ní snaaⁿ yā Ndyuūs.

⁹ De'ε chúúcā n'dai 'ii^{n'}yāⁿ chi diiⁿ yā chi nguéeⁿ 'caa'vá 'ii^{n'}yāⁿ, ti taná^{n'}ā 'ii^{n'}yāⁿ caa^{n'}mán yā ye^{n'}é 'ii^{n'}yāⁿ chi daiyá Dendyuūs 'ii^{n'}yāⁿ.

¹⁰ De'ε chúúcā n'dai 'ii^{n'}yāⁿ chi n'geenú yā ngii cáávā chi diíⁿ yā chíⁿ chi Ndyuūs ne^{n'}é yā, caati véé parte ye^{n'}e yā naachi Ndyuūs nga^{n'}a ntii^{n'}nyúⁿ yā ná va'ai cheeti nguuví.

¹¹ De'ε chúúcā n'dai ndís'tiī taachi 'ii^{n'}yāⁿ diíⁿ yā chi ndís'tiī 'cueenú nī cuuvi cucáávā 'úú, ní taachi 'ii^{n'}yāⁿ taán yā ndúúcū ndís'tiī ní n'dee n'dái caa^{n'}mán yā nduudu yaadi ye^{n'}e ndís'tiī cucáávā 'úú. ¹² Cuuvi yeenu taaví nī caati cuuvi ndaácá nī chí ch'εete ye^{n'}é nī ná va'ai cheeti nguuví. 'Túúcā 'ii^{n'}yāⁿ can'daa yā ndí cuaaⁿ vmnaaⁿ 'ii^{n'}yāⁿ profetas chi ndéé yā nduudu ye^{n'}e Ndyuūs. Ní profetas ch'eenú yā chii.

Yiimā ye^{n'}ē yá^{n'}āa

(Mr. 9.50; Lc. 14.34-35)

¹³ Jesús ca^{n'}a yā: Ndís'tiī, nduuti chi i'téenu nī chi 'úú chí Cristo, tuu'mi ni ndís'tiī, tan'dúúcā yiimā ye^{n'}ē yá^{n'}āa 'tiicá nī. Nduuti chí yiimā nguéeⁿ n'daācā sabor ye^{n'}ē, ¿de'ē cuuvi diíⁿ nī? Nguéeⁿ de'ē veε dichíí'vē yiimā miiⁿ. 'Āā taanduu rá chí cungéeⁿ 'ii^{n'}yāⁿ na yá^{n'}āa ní n'diivi neeⁿ ca'a yā.

Déévé ye^{n'}e i^{n'}yeēⁿdí 'cūū

¹⁴ Ndís'tiī chi i'téenu nī chi 'úú chí Cristo, tan'dúúcā deεve ye^{n'}e i^{n'}yeēⁿdí 'cūū 'tiicá nī, ti ca^{n'}á nī ch'i^{n'}i nī deεve ye^{n'}é Ndyuūs nanáán 'ii^{n'}yāⁿ. 'Áámá yāāⁿ chi canduūu na 'áámá yiícū nguéeⁿ cúuví cunuūⁿ n'de'ēi. ¹⁵ Ndíí nguéeⁿ ndúú 'ii^{n'}yāⁿ ra 'cuu^{n'}miⁿ yā 'áámá lámpara ní cu'nuúⁿ yā maaⁿ 'áámá caja; naati cun'duúⁿ yā na 'áámá mesa, ní íícú cuuví deεve ye^{n'}ē nducyaaca 'ii^{n'}yāⁿ chi snée yā cheeti va'āi. ¹⁶ Tan'dúúcā 'áámá lámpara chí ngii ndεεve, 'tíicā cuuvi n'daācā vida ye^{n'}é nī nanáán 'ii^{n'}yāⁿ chi snée yā i^{n'}yeēⁿdí 'cūū. Ní 'íícú 'ii^{n'}yāⁿ s'eeⁿ cuuvi snaaⁿ yā ntii^{n'}nyuⁿ chí n'daacā chi idiíⁿ nī. Ní 'ii^{n'}yāⁿ s'eeⁿ caa^{n'}mán yā: De'ε chúúcā ch'εete Ndyuūs chi Chiidá nī, Ndyuūs chi canée yā ná va'ai cheeti nguuví.

Jesús nga^{n'}a yā ye^{n'}e ley ye^{n'}e 'ii^{n'}yāⁿ Israel

¹⁷ Nguéeⁿ nadicádíinuuⁿ ndís'tiī chi 'úú chi Jesús ní cúchíi chi divií ley ye^{n'}e Moisés ndúúcū nduudu ye^{n'}e profetas chi canée nguūⁿ ndíí cuaaⁿ vmnaaⁿ. 'Úú nguéeⁿ ndaá chí

divíi ti ndaá chi dicuaácú yeⁿē. ¹⁸ Ti cuaacu níⁿnyúⁿ ngaⁿá ngíi ndís'tií: Neⁿe chi canéé cá nanguuvi ndúúcu 'iⁿ'yeeⁿdí 'cūū nguéé cuuvi chó'ōo mar 'áámá punto 'líiⁿ ndíi nguéé ndúú mar 'áámá coma yeⁿe ndúúdu yeⁿe ley, nuuⁿmaⁿ neⁿe chi tanducuéⁿē 'āā cuéé cuuvi cuaacu taanduvee chí canéé nguūⁿ na libro yeⁿe Ndyuūs. ¹⁹ 'Tíicā 'āā du'ú nūuⁿ 'iⁿ'yāⁿ chi nguéé díiⁿ yā cumplir 'áámá mandamiento 'líiⁿ ní 'tíicā ngi'cueeⁿ yā 'iⁿ'yāⁿ chi díiⁿ yā tan'dúúca maán yā diiⁿ yā, 'líiⁿ 'líiⁿ cá nūuⁿ cuuvi tuneeⁿ yā naachi Ndyuūs ngaⁿ'a ntiiⁿnyúⁿ yā na va'ai cheeti nguuvi nguéé tan'dúúca tanáⁿ'ā 'iⁿ'yāⁿ. Naati 'iⁿ'yāⁿ chi n'daāca idiíⁿ yā ní ngi'cueeⁿ yāⁿ 'iⁿ'yāⁿ táacā chi cuuvi diiⁿ n'daacá yā, 'iⁿ'yāⁿ miiⁿ cuuvi tuneeⁿ yā dendu'ū chi n'daacā ná va'ai cheeti nguuvi naachi Ndyuūs ngaⁿ'a ntiiⁿnyuⁿ yā. ²⁰ 'Úú ní ngaⁿ'á ngíi ndís'tií: Nduuti chi ndís'tií nguéé n'daācā ca idiíⁿ nī chi cuuvi 'iⁿ'yāⁿ chi ngi'cueeⁿ ley ndúúcu 'iⁿ'yāⁿ fariseos, tuu'mi ní ndís'tií nguéé cuuvi cundaa nī na va'ai cheeti nguuvi naachi Ndyuūs ngaⁿ'a ntiiⁿnyúⁿ yā.

Jesús ngaⁿ'a yā yeⁿe chi nduuvi tááⁿ 'iⁿ'yāⁿ

(Lc. 12.57-59)

²¹ Maaⁿ ní ch'íindiveéⁿ nī chí caⁿ'a yā chii yā 'iⁿ'yāⁿ ndii cuááⁿ vmnaaⁿ chi 'túúca: Nguéé 'caaⁿ'nuⁿ di 'iⁿ'yāⁿ. Du'u chí 'caāⁿ'nūⁿ 'iⁿ'yāⁿ véé nuuⁿndi yeⁿe yā nguuvi chí Ndyuūs caaⁿ'maⁿ yā yeⁿe nuuⁿndi. ²² Naati 'úú ní ngaⁿ'á ngíi ndís'tií 'tíicā: 'Āā du'ú nūuⁿ chi nduuvi taaⁿ yeⁿe vi'i, véé nuuⁿndi yeⁿe yā nguuvi chí Ndyuūs caaⁿ'maⁿ yā yeⁿe nuuⁿndi. 'Āā du'ú nūuⁿ chi caaⁿ'maⁿ cuuvi vi'i 'tíicā: De'ē chúúca cheechi tíiⁿ di, véé nuuⁿndi yeⁿe yā nanááⁿ juez. 'Āā du'ú nūuⁿ 'iⁿ'yāⁿ chi caaⁿ'maⁿ yā 'tíicā: De'ē chúúca zonzó dii, caⁿ'á yā na infierno naachi canéé 'áámá nguuchi yaⁿ'ā.

²³ Nduuti chí diiⁿ di tan'dúúca costumbre yeⁿe di ní ndeⁿ di ofrenda yeⁿe di ní ca'a di Ndyuūs vmnááⁿ nátaí yeⁿe yaacū templo, ní hora míiⁿ nūuⁿ ninán'gaacu di chí vi'i di ní véé vaadi 'caa'va yeⁿe di ndúúcu sa; ²⁴ tuu'mi ní cu'neeⁿ di ofrenda yeⁿe di niinuúⁿ nátaí. Ní cueⁿe di ntun'dáá n'dai di ndúúcu vi'i di. Cuayiivi ní cuuvi nguεecundíi di ní ca'a di ofrenda yeⁿe di nátaí.

²⁵ Tun'dáá n'dai di ndúúcu 'āā du'u nūuⁿ 'iⁿ'yāⁿ chí taaⁿ yeⁿe di maāⁿcheeⁿēⁿ nūuⁿ taachi canúu di yúúni ndúúcu yā, 'aatií caⁿ'a yā canguu yā dii nanááⁿ juez. Ní juez míiⁿ nca'a yā dii ta'ā policía. Ní policía miiⁿ ní cu'nuuⁿ sa dii vácuū. ²⁶ Cuaacu níⁿnyúⁿ ngaⁿ'á ngíi dii chí nguéé nan'daā di vácuū neⁿe chí nguéé 'cuiinu nadí'vē di tanducuéⁿē chí can'diicu di.

Jesús ngaⁿ'a yā yeⁿe adulterio

²⁷ N'giindiveéⁿ nī chí caⁿ'a 'iⁿ'yāⁿ yeⁿe nuuⁿndi chí adulterio 'túúca: Ndís'tií chí n'giindivaacú nī, nguéé in'nuúⁿ nī n'daataá o isaⁿ'ā chí nguεe yeⁿe di. ²⁸ Naati 'úú, Jesús ní ngaⁿ'á ngíi ndís'tií 'tíicā: 'Āā du'ú nūuⁿ chí n'giⁿ'nyūⁿ ndúúcu 'áámá saⁿ'ā o n'daataá ní neⁿe yā cuuvi n'dái yā ndúúcu vi'i, 'āā diiⁿ nuuⁿndí yā na staava yeⁿe yā tan'dúúca chí 'āā 'tíicā yā ndúúcu vi'i. Ní 'āā díiⁿ yā adulterio.

²⁹ Chuū ngaⁿ'á: Nduuti chí nduutinaaⁿ di lado tá cuaácú di diiⁿ chí diiⁿ di nuuⁿndi, 'caaca di nduutinaaⁿ di ní cun'dáa di. Ti n'dáacā ca chí cuuvi ndai di 'áámá parte yeⁿe cuerpo yeⁿe di, nguéé ti tanducuéⁿē cuerpo yeⁿe di caⁿ'a na infierno. ³⁰ Ndúúti chí ta'ā cuaácú di idiiⁿ chí diiⁿ di nuuⁿndi, 'caaca di ní cun'dáa di. Ti n'dáacā ca chí cuuvi ndai 'áámá parte yeⁿe cuerpo yeⁿe di, nguéé ti núúⁿmáⁿ ch'εete cuerpo yeⁿe dii caⁿ'a na infierno.

Jesús ngaⁿ'a yā yeⁿe chí i'tεechi vi'i yā

(Mt. 19.9; Mr. 10.11-12; Lc. 16.18)

³¹ Tiempo chí chó'ōo 'iⁿ'yāⁿ caⁿ'a yā 'túúca: 'Āā du'ú nūuⁿ 'iⁿ'yāⁿ chí 'tεechi n'daataá yeⁿe yā, canéé chí ca'a yā 'áámá caaca yeⁿe chí 'tεechi vi'i yā. ³² Naati 'úú ní ngaⁿ'á ngíi ndís'tií 'tíicā: Nduuti chí 'áámá saⁿ'ā chí 'tεechi sá n'daataá yeⁿe sa, nguéé cáavā chí véé saⁿ'ā chí n'dai ndúúcu tá, tuu'mi ní diiⁿ sa chí n'daātāa cuuvi adulterio tá. 'Āā du'ú nūuⁿ saⁿ'ā chí 'caandavaacu sá ndúúcu n'daataa chí i'nééⁿ isaⁿ'ā yeⁿe ta táⁿ'ā, saⁿ'ā miiⁿ idiiⁿ ntúúⁿ sa nuuⁿndi chí adulterio.

Jesús nga^a yā yeⁿe nduudu chi 'tíicā o nguεε 'tíicā

³³ Ndís'tiī ní ch'iindiveéⁿ nī chí caⁿ'a yā chíi yā 'iiⁿ'yāⁿ tiempo chi 'āā chó'ōo 'tuucā: Nguéé caaⁿ'maⁿ nī nduudu, “por Ndyuūs”, cáávā cosa chi cuaacu níⁿ'nyúⁿ chí díiⁿ nī ní nguéé 'tíicā díiⁿ nī. Taachi caaⁿ'máⁿ nī nduudu, “por Ndyuūs”, díiⁿ cuaacú nī tan'dúucā chí díiⁿ nī cáávā Ndyuūs. ³⁴ Naati 'úú ní ngaⁿ'á ngíi ndís'tiī: Nguéé caaⁿ'máⁿ nī nduudu, “por Ndyuūs”, yeⁿ'ē mar 'áámá naaⁿ. Ndíi nguéé caaⁿ'máⁿ nī nduudu, “cucáávā nanguuvi”, ti miiⁿ canéé trono yeⁿ'e Dendyuūs. ³⁵ Ndíi nguéé ndúú caaⁿ'máⁿ nī nduudu, “cáávā yáⁿ'āa 'cūū”, ti chíiⁿ chí banco 'líiⁿ yeⁿ'ē ca'a Ndyuūs; ndíi nguéé ndúú 'áámá nduudu, “cáávā yāⁿ Jerusalén”, ti chíiⁿ chí yāⁿ yeⁿ'ē Rey Ndyuūs chí ch'εεte yā. ³⁶ Ndíi nguéé ndúú caaⁿ'máⁿ nī nduudu, “cáávā tíiⁿ nī”, ti nguéé cúúví díiⁿ nī chí cuuvi cuéé naachi cuáíⁿ mar 'áámá yuūdū tíiⁿ nī. Ní nguéé cuuvi díiⁿ nī chí cuuvi cuáíⁿ naachi cuéé mar 'áámá yuūdū tíiⁿ nī. ³⁷ Naati ndís'tiī caaⁿ'máⁿ nī, “'tíicā”, nduuti chí 'tíicā; o nduuti chí nguéé 'tíicā, tuu'mi ní caaⁿ'maⁿ nī, “nguεε 'tíicā”, caati nduuti chí caaⁿ'máⁿ nī nduudu, “por Ndyuūs” o cáávā táámá yeⁿ'e chuū, tuu'mí ní nduudu miiⁿ ní nguéé n'daācā chí caaⁿ'maⁿ nī.

*Diné*ⁿ'e nī 'iiⁿ'yāⁿ chí nguéé ngíi n'diichí yā ndís'tiī

(Lc. 6.29-30)

³⁸ Jesús caⁿ'a yā: Ndís'tiī ní ch'iindiveéⁿ nī chí caⁿ'a 'iiⁿ'yāⁿ tiempo chí chó'ōo yeⁿ'e ley chí 'tíicā: Nduuti chí 'áámá 'iiⁿ'yāⁿ tun'dáa yā nduutinaaⁿ taama 'iiⁿ'yāⁿ, 'tiicá ntúūⁿ 'iiⁿ'yāⁿ miiⁿ ní cuuví tun'daá yā nduutinaaⁿ 'iiⁿ'yāⁿ chí díiⁿ nduucú yā 'tíicā. Ní 'áámá 'iiⁿ'yāⁿ chí tun'dáa yā 'diiⁿ'yuⁿ táámá 'iiⁿ'yāⁿ, 'tiicá ntúūⁿ cuuví tun'daa yā 'diiⁿ'yuⁿ 'iiⁿ'yāⁿ chí díiⁿ nduucú yā 'tíicā. ³⁹ Naati 'úú ní ngaⁿ'á ngíi ndís'tiī: Nguéé 'cuuⁿ'maⁿ nī ndúúcu 'iiⁿ'yāⁿ chí yaādii'yá yā. 'Āā du'ú nūuⁿ 'iiⁿ'yāⁿ chí 'cueⁿ'é yā tiicūnáaⁿ nī ti duuchineéⁿ yā yeⁿ'e nī 'cuuⁿ nī chí díiⁿ yā taama vmnéⁿ'ēe nduuti chí neⁿ'e yā. ⁴⁰ Ní nduuti chí 'aama 'iiⁿ'yāⁿ chí in'nuúⁿ yā vaadi 'caa'va ndúúcu nī, ní neⁿ'e yā diví yā tiinuuⁿ yúudūu yeⁿ'e nī, ca'a ntúūⁿ nī cotón yeⁿ'e nī. ⁴¹ Ní nduuti chí 'aama 'iiⁿ'yāⁿ chí cuuví yā ndís'tiī chí a fuerza canéé chí cándεε nī chéédí yeⁿ'e yā tan'dúucā 'uūví kilómetros 'tíicā yaⁿ'ai ca candéε nī yeⁿ'e yā ndii cuūuⁿ kilómetros. ⁴² Taachí caaca 'iiⁿ'yāⁿ ndís'tiī 'āā de'é nūuⁿ cosa ca'a nī 'iiⁿ'yāⁿ cosa miiⁿ. Nguéé nguεεcundí nī cuadáámí nī yeⁿ'é yā.

*Diné*ⁿ'e nī 'iiⁿ'yāⁿ chí taaⁿ ndúúcu nī

(Lc. 6.27-28, 32-36)

⁴³ Ndís'tiī ní ch'iindiveéⁿ nī chí caⁿ'a 'iiⁿ'yāⁿ tiempo chí 'āā chó'ōo: Dinéⁿ'e di 'iiⁿ'yāⁿ na niiⁿ'nuúⁿ vaacu dí. Nguéé dinéⁿ'e di 'iiⁿ'yāⁿ chí taáⁿ yā ndúúcu di. ⁴⁴ Naati 'úú ní ngaⁿ'á ngíi ndís'tiī: Dinéⁿ'e nī 'iiⁿ'yāⁿ chí taaⁿ yā ndúúcu nī. N'dáacā caaⁿ'maⁿ nī yeⁿ'e 'iiⁿ'yāⁿ chí nguéé n'dáacā ngaⁿ'a yā yeⁿ'e nī. N'dáacā díiⁿ nī ndúúcu 'iiⁿ'yāⁿ chí nguéé neⁿ'e yā ndís'tiī. Caaⁿ'máⁿ'ngua'á nī yeⁿ'e 'iiⁿ'yāⁿ chí 'cueⁿ'e ndís'tiī ní nguéé n'daācā idiíⁿ yā ndúúcu nī ní idiíⁿ yā chí ndís'tiī n'geenú nī ngii. ⁴⁵ Ní ndís'tiī ní 'cuuⁿ'miⁿ nī 'iiⁿ'yāⁿ s'een chí ndís'tiī ní daiya Dendyuūs ndís'tiī. Chiida yú chí cánéé na va'ai chεeti nguuvi idiíⁿ yā chí ican'daa 'yáⁿ'ā naachi snéé 'iiⁿ'yāⁿ chí n'dai ndúúcu 'iiⁿ'yāⁿ chí nguéé n'daācā díiⁿ yā. Ní Ndyuūs idiíⁿ yā chí ngeen cuūví yeⁿ'é 'iiⁿ'yāⁿ chí n'daācā idiíⁿ yā ndúúcu 'iiⁿ'yāⁿ chí nguéé n'daācā idiíⁿ yā. ⁴⁶ Ndúúti chí ndís'tiī dinéⁿ'e nī 'iiⁿ'yāⁿ chí neⁿ'e yā ndís'tiī, ¿de'ē premio chí ndaacá nī? ¿'Áá nguéé 'tiicá ntúūⁿ idiiⁿ 'iiⁿ'yāⁿ chí cobrador yā? ⁴⁷ Nduuti chí ndís'tiī díiⁿ nī saludar dámaāⁿ hermanos yeⁿ'e nī, ¿de'ē premio chí ndaacá nī? ¿'Áá nguéé 'tiicá ntúūⁿ idiíⁿ 'iiⁿ'yāⁿ chí nguéé yeⁿ'ē ndaata Israel chí nguéé i'téenu yā Ndyuūs? ⁴⁸ N'daācā n'dai ca díiⁿ ndís'tiī chí díiⁿ nī tan'dúucā chí díiⁿ Dendyuūs, Chiida yú, chí canéé na va'ai chεeti nguuvi.

6

Jesús nga^a yā yeⁿ'e chí nginneé yú 'iiⁿ'yāⁿ

¹ Ndís'tiī nguéé díiⁿ nī dendu'ū chí n'daācā yeⁿ'e yaācū nanááⁿ 'iiⁿ'yāⁿ caati snaaⁿ yā chí díiⁿ nī chí nadacadiinúúⁿ yā chí ndís'tiī ní n'daāca nī. Nduuti chí 'túucā idiíⁿ nī, tuu'mi ní

Ndyuūs Chiida yú nguéeé téé yā chi cuuvi yeⁿ'e nī yeⁿ'ē chi diíⁿ nī taachi ndaa nī ná va'ai cheeti nguuvi. ² Taachi ndís'tiī ca'a nī ofrenda yeⁿ'e nī, nguéeé diíⁿ yuudú nī nífcú nguéeé cuuvi cadíinuⁿ 'iiⁿ'yāⁿ. 'Tíicā idiiⁿ náⁿ'ā 'iiⁿ'yāⁿ chi 'uūví naaⁿ 'uūví cheendí yā taachi snée yā na yaācū sinagoga ndúúcu na cuaaⁿ cyúúni. Ní 'ífcú 'iiⁿ'yāⁿ ní cuuvi snaaⁿ yā ní caaⁿ'maⁿ yā chi 'iiⁿ'yāⁿ s'eeⁿ ní nn'dai yā. Cuaacu níⁿ'nyúⁿ 'úú ngaⁿ'á ngí ndís'tiī, chi 'iiⁿ'yāⁿ s'eeⁿ ní vεε chi 'āā ndaāca yā yeⁿ'e chi diíⁿ yā na iⁿ'yeeⁿdí 'cūū. ³ Taachi ndís'tiī ní ca'á nī cosas chi inneé nī 'iiⁿ'yāⁿ chi nguéeé yeⁿ'e yā, nguεε ca'a nī chi tuumícadíinuⁿ ta'ā 'cueé nī chi diíⁿ tá'ā cuaacú nī. ⁴ 'Tíicā ca'a n'de'éeí nī cosas miiⁿ yeⁿ'e nī ní 'iiⁿ'yāⁿ nguεε cuuvi snaaⁿ yā; 'ífcú Chiida yú chi cánée ná va'ai cheeti nguuvi inaáⁿ yā chi nguéeé n'diichi 'iiⁿ'yāⁿ s'eeⁿ. Ní Chiida yú téé yā chi cuuvi yeⁿ'e nī nanááⁿ 'iiⁿ'yāⁿ.

Jesús ngi'cueeⁿ yā yeⁿ'ē chí ngaⁿ'angua'áā

(Lc. 11.2-4)

⁵ Taachi ndís'tiī caaⁿ'maⁿ'ngua'á nī, nguéeé diíⁿ nī tan'dúúca 'iiⁿ'yāⁿ chí 'uūví naaⁿ 'uūví cheendí yā, caati 'iiⁿ'yāⁿ s'eeⁿ inee yiínú yā chi n'geetíndii yā na yaācū sinagogas ndúúcu cuaaⁿ cyúúni ní 'ífcú 'iiⁿ'yāⁿ ní snaaⁿ yā 'iiⁿ'yāⁿ s'eeⁿ. Cuaacu níⁿ'nyúⁿ ngaⁿ'á ngí ndís'tiī, chi 'iiⁿ'yāⁿ s'eeⁿ ní 'āā véé chí cuuvi yeⁿ'é yā na iⁿ'yeeⁿdí 'cūū. ⁶ Ndís'tiī, taachi caaⁿ'maⁿ'ngua'á nī, cundaa nī na cuarto 'lííⁿ yeⁿ'e va'ai yeⁿ'e nī ní n'gaadí nī cheendi va'āi cuarto 'lííⁿ miiⁿ. Ní caaⁿ'maⁿ'ngua'á nī ndúúcu Chiida yú chí inaaⁿ n'de'ei yā. Ní Chiida yú ntée yā chi cuuvi yeⁿ'e nī nanááⁿ 'iiⁿ'yāⁿ.

⁷ Ní taachi caaⁿ'maⁿ'ngua'á nī, nguéeé dachííⁿ dachííⁿ caaⁿ'maⁿ nī tan'dúúca chi diíⁿ náⁿ'ā 'iiⁿ'yāⁿ chi 'uūví naaⁿ 'uūví cheendí yā chi nguéeé i'téenu yā Ndyuūs ní nguεε yeⁿ'e ndaata Israel yā. Ní 'iiⁿ'yāⁿ s'eeⁿ nadicadíinuⁿ yā chi Ndyuūs caⁿ'á yā 'caandiveéⁿ yā nduudu yeⁿ'é yā ti neené n'deēe nduudu ngaⁿ'a yā. ⁸ Nguéeé diíⁿ nī tan'dúúca chi idiiⁿ 'iiⁿ'yāⁿ s'eeⁿ ti Chiida yú 'āā déenu yā dendu'ū chi neⁿ'e nī taachi 'āā cuée caaca nī. ⁹ Ní taachi ndís'tiī caaⁿ'maⁿ'ngua'á nī, 'túúca caaⁿ'maⁿ'ngua'á nī:

N'diī Chiidá nducyaaca 'nū, n'diī chi caneé nī ná va'ai cheeti nguuvi. Dε'ε chúúca dεεve chi ngúúví nī.

¹⁰ Canée chi ndaa tiempo naachi chí ngaⁿ'a ntiiⁿ'nyuⁿ nī. Cúúví tan'dúúca chi n'diī neⁿ'e nī tan'dúúca ná va'ai cheeti nguuvi 'tiicá ntúūⁿ na yáⁿ'āa 'cūū.

¹¹ Téé nī chi cuuví che'é 'nū nguuví 'cūū.

¹² Nadich'εεcú nī nuuⁿ'ndi yeⁿ'e 'nū tan'dúúca chí nús'uu inadich'εεcú 'nū yeⁿ'e 'iiⁿ'yāⁿ chi nguεε n'daācā diíⁿ yā nduucú 'nū.

¹³ Nguéeé 'cuáaⁿ nī chi ndaa nanaáⁿ 'nū cosas chi cheechi ca chi diíⁿ 'nū nuuⁿ'ndi naati nadanguáⁿ'ai nī nús'uu yeⁿ'é nducuéⁿ'ē chi nguεε n'daācā. Ti yeⁿ'é nī naachi ngaⁿ'a ntiiⁿ'nyúⁿ nī ndúúcu poder ndúúcu dεεve chi n'dáí taavi ca yeⁿ'e nī ndúúcu nducuéⁿ'ē nduuyū cueⁿ'e daāⁿ'maⁿ. 'Tíicā cuuvi.

¹⁴ Nduuti chi ndís'tiī nadich'εεcú nī yeⁿ'e 'iiⁿ'yāⁿ chi nguéeé n'daācā idiíⁿ yā nduucú nī, tuu'mi ní Chiida yú chí cánée yā ná va'ai cheeti nguuvi nadich'εεcú ntúūⁿ yā yeⁿ'é nī.

¹⁵ Ndúúti chi ndís'tiī nguéeé nadich'εεcú nī yeⁿ'e 'iiⁿ'yāⁿ chi nguéeé n'daācā idiíⁿ yā ndúúcu nī, 'tiicá ntúūⁿ Chiida yú nguéeé nadich'εεcú yā nuuⁿ'ndi yeⁿ'é nī.

Jesús ngaⁿ'a yā yeⁿ'e chi 'iiⁿ'yāⁿ nguéeé ca'diinú yā tiempo chi ngaⁿ'angua'á yā

¹⁶ Taachi nguéeé nga'dííⁿ'núⁿ nī caati ngaⁿ'angua'á nī nguéeé nduuví ndaachií naáⁿ nī tan'dúúca 'iiⁿ'yāⁿ chí 'uūví naaⁿ 'uūví cheendí yā chí neⁿ'é yā chí tanáⁿ'ā 'iiⁿ'yāⁿ snaaⁿ yā. 'Iiⁿ'yāⁿ s'eeⁿ idiví yā catecai vmnááⁿ yā ní 'cuuⁿ'mín yā tanáⁿ'ā 'iiⁿ'yāⁿ chí nguéeé nga'diíⁿ'núⁿ yā. Cuaacu níⁿ'nyúⁿ ngaⁿ'á ngí ndís'tiī, chi 'iiⁿ'yāⁿ s'eeⁿ ní 'āā véé chí ndaācā yeⁿ'e yā na iⁿ'yeeⁿdí 'cūū. ¹⁷ Naati ndís'tiī, ní taachi nguéeé nga'diíⁿ'núⁿ nī, 'cuiīnī aceite tííⁿ nī ní nááⁿ'nú nī naaⁿ nī. ¹⁸ Ní nguéeé 'cuuⁿ'mín nī nanááⁿ 'iiⁿ'yāⁿ chí nguéeé nge'é nī naati Chiida yú chí cánuuⁿ yā nán'de'ei snaáⁿ yā. Ní Chiida yú chí snaáⁿ yā chííⁿ chí diíⁿ nī taachi cánúúⁿ nī nán'de'ei ní téé yā nanááⁿ 'iiⁿ'yāⁿ dε'ē chí cuuví yeⁿ'e nī.

Véeé vaadi 'cuiica ná va'ai cheeti nguuvi

(Lc. 12.33-34)

¹⁹ Caⁿa Jesús: Ndís'tiī ní nguée dííⁿ nī chí cuuvi 'cuiica nī ná iⁿ'yeeⁿdí 'cūū naachi véé i'yéevē chí di'tuuví tī ndúú^{cū} che'e yáⁿ'āa chí tuuvī ní naachi véé chí duucu ní diduucú sa. ²⁰ Naati n'dáacā chí dííⁿ nī chí 'cuúndí yeⁿ'e nī ná va'ai chēeti nguuvī naachi nguée véé i'yéevē chí di'tuūví tī ndíí nguée ndúú^{cū} che'e yáⁿ'āa chí tuuvī, ndíí nguée ndúú^{cū} cuuvi cundaā chí duucu ní diduucú sa. ²¹ Caati naachí canéé vaadī 'cuiica yeⁿ'é nī, miíⁿ canee staava yeⁿ'e nī chí nadicadiinúúⁿ nī yeⁿ'e tanducuéⁿ'ē.

Chídeεve yeⁿ'e cuerpo yeⁿ'e yú ní nduutinaaⁿ yú
(Lc. 11.34-36)

²² Caⁿa Jesús chí chídeεve yeⁿ'e cuerpo yeⁿ'e yú chííⁿ chí nduutináaⁿ yú. Ndúúti chí nduutinaaⁿ nī n'daācā, tuu'mi ní núúⁿ'máⁿ nchēete cuerpo yeⁿ'e nī ní inaaⁿ chí deεve. ²³ Ní nduuti chí nduutinaaⁿ nī nguée n'dai, tuu'mi ní núúⁿ'máⁿ nchēete cuerpo yeⁿ'é nī cunéé na maāiⁿ. 'Tíicā nduuti chí deεve chí cánee nduucú nī nguée n'daācā, tuu'mi ní canéé nī na maāiⁿ chí díítūu n'dái.

Jesús ngaⁿ'a yā yeⁿ'e chí 'cuiica 'iiⁿ'yāⁿ
(Lc. 16.13)

²⁴ Mar 'áámá 'iiⁿ'yāⁿ nguée cuuvi dichíí'vε yā 'uūví 'iivi yā caati dinéⁿ'e yā 'aama yā ní nguεε dinéⁿ'e yā taama yā. Ní n'dáacā nadicadíínuuⁿ yā yeⁿ'e 'aama yā ní nguée n'daācā nadicadíínuuⁿ yā yeⁿ'e taama yā. Nguée cuuvi in'nuúⁿ nī vaadī 'cuiica yeⁿ'é nī ní dichíí'vε nī 'iivú Ndyuūs.

Ndyuūs idiíⁿ yā cuidado yeⁿ'e 'iiⁿ'yāⁿ yeⁿ'e yā
(Lc. 12.22-31)

²⁵ Chuū ngaⁿ'á ngii ndís'tiī: Nguée nadicadíínuuⁿ nī yeⁿ'e vida yeⁿ'e maaⁿ nī, o yeⁿ'ē chí che'é nī, o yeⁿ'ē chí cu'u nī, ndíí nguée ndúú^{cū} cáávā chí neⁿ'e cuerpo yeⁿ'e nī chí 'cuεetinúu nī. ¿'Áá nguée yaⁿ'ai ca vida yeⁿ'e nī nguée ti chí ngé'e nī? ¿'Áá nguεε yaⁿ'ai ca chíí'vε cuerpo yeⁿ'e nī nguée ti catecai nī? ²⁶ Cuin'diichí nī 'yaada yeⁿ'ē nanguuvi. Nguée ngiinú tī ndaata, ndíí nguée ngii cosecha yeⁿ'e tī, ndíí nguée ndúú^{cū} ín'guain'daí tī yeⁿ'e tī. Chiida yú chí cánéé ná va'ai chēeti nguuvī ngá'a yā chí nge'e tī. ¿'Áá nguée yaⁿ'ai cá chíí'vε ndís'tiī nguée ti 'yaada? ²⁷ ¿Chéé ndís'tiī chí nééné n'dai tííⁿ nī cúúví iintiineeⁿ nī 'áámá yūúchí yeⁿ'ē chí yaācu nī?

²⁸ ¿Dε'ē cáávā chí ínadicadíínuuⁿ nī yeⁿ'ē catecai nī? Nadacadíínuuⁿ nī yeⁿ'e naāndā cuéε yeⁿ'ē cuεeti táacā chí n'giita. Nguée dííⁿ ntiíⁿnyuⁿ ndíí nguée ndúú^{cū} idin'daí hilo. ²⁹ Naati 'úú ní ngaⁿ'á ngii ndís'tiī, chí rey Salomón miíⁿ ní ndúú^{cū} tanducuéⁿ'ē catecaí yā chí n'déévé n'dai ndii tuunu ngii 'yáⁿ'ā naati nguée neené n'deεvéε tan'dúú^{cū} yeⁿ'e naāndā s'een. ³⁰ Ndúútí chí Ndyuūs idiíⁿ yā cuidado yeⁿ'ē yáatā chí vεε cuεeti chí maāⁿ ní canee ní cavyaaⁿ ní nti'í ní n'nee yaⁿ'ā 'iiⁿ'yāⁿ. ¿'Áá nguée dííⁿ cá Ndyuūs cuidado yeⁿ'e ndís'tiī, 'iiⁿ'yāⁿ chí duū'vī i'téenu nī Ndyuūs? ³¹ Nguée nadicadíínuuⁿ ndís'tiī, ní caaⁿ'maⁿ nī 'tíicā: ¿Dε'ē che'é 'nū? o ¿dε'ē cu'ú 'nū? o ¿dε'ē 'cuεetinúu 'nū? ³² 'iiⁿ'yāⁿ chí nguée yeⁿ'e ndaata Israel in'nuúⁿ yā dendu'ū chí 'túú^{cā}. Chiida yú chí cánéé yā ná va'āi chēeti nguuvī déenu yā tanducuéⁿ'ē dendu'ū chí necesidades neⁿ'e yú. ³³ Naati ndís'tiī ní canee chí in'nuúⁿ nī vmnááⁿ vmnaaⁿ yeⁿ'é naachi Ndyuūs ngaⁿ'a ntiíⁿnyúⁿ yā ndúú^{cū} vaadī cuaacu yeⁿ'é Ndyuūs, ní 'íicú tanducuéⁿ'ē dendu'ú 'cūū ní ntiineeⁿ yā yeⁿ'é nī. ³⁴ Nguée nadicadíínuuⁿ nī yeⁿ'ē cavyaaⁿ caati cavyaaⁿ ní táámá nguuvī ndúú^{cū} yeⁿ'ē, ní 'íicú nguuvī ní 'āā véé nūuⁿ chí véé. Dámaāⁿ nadacadíínuuⁿ nī yeⁿ'ē maaⁿnguuvī, 'āā 'tiicā nūuⁿ.

7

'Túú^{cā} ngaⁿ'a Jesús: Nguée tun'daá nī nuuⁿndi yeⁿ'e táámá 'iiⁿ'yāⁿ
(Lc. 6.37-38, 41-42)

¹ Jesús caⁿ'a yā: Ndís'tiī ní nguée caaⁿ'maⁿ néen nī yeⁿ'e táámá 'iiⁿ'yāⁿ maaⁿ ní 'íicú Ndyuūs nguée caaⁿ'máⁿ yā nuuⁿndi yeⁿ'e nī. ² Caati ndúúti chí ndís'tiī caaⁿ'maⁿ nī nuuⁿndi yeⁿ'e 'iiⁿ'yāⁿ, 'tiicā ntūūⁿ Ndyuūs caaⁿ'máⁿ yā nuuⁿndi yeⁿ'e nī. Nduuti chí

n'deete n'dái caaⁿ máⁿ nī, 'tiicá ntúūⁿ caaⁿ máⁿ Dendyuūs yeⁿe nī. Nduuti chi duu'ví nūuⁿ, 'tiicá ntúūⁿ Ndyuūs caaⁿ máⁿ yā yeⁿe nī. ³ ¿De'ē cúúví chi maaⁿ nch'εεté nūuⁿ n'gíínu nī nuūⁿndī chi diiⁿ tanáⁿ'ā 'iiⁿ'yāⁿ ní nguéé inaaⁿ nī nuuⁿndī ch'εεte chi dííⁿ nī? ⁴ ¿De'ē cúúví chí caaⁿ máⁿ nī 'iiⁿ'yāⁿ yeⁿe chi dííⁿ yā chi nguεε n'daācā nduuti chi ndís'tiī dííⁿ nī cosas chi nguéé n'daācā? 'Caandivéēⁿ nī. Véé nuuⁿndi yeⁿ'é nī chi ch'εεte chi nguéé ndaacadaamí nī yeⁿ'ē. ⁵ Ndís'tiī 'iiⁿ'yāⁿ 'uūví naaⁿ 'uuví cheendi nī. Dííⁿ cā maáⁿ nī ndaacadaamí nī yeⁿ'e nuuⁿndi chi dííⁿ nī ní 'íicú cuuvi caaⁿ máⁿ nī yeⁿ'e 'iiⁿ'yāⁿ chi canéé chí din'daācā yā ní ndaacadaamí yā yeⁿ'e nuuⁿndi chi dííⁿ yā.

⁶ Nguéé ca'a nī dendu'ū chí yeⁿ'e Ndyuūs 'yaānā s'eeⁿ ti 'yaānā s'eeⁿ cuuvi contra yeⁿ'e nī. Ní caⁿ'á tī che'e tī ndís'tiī chí pedazos cánéé nī. Nguéé 'cuíí nī cosas yeⁿ'e nī chí dichíí'vē tan'dúúccā perlas nanááⁿ puercos ti cuuvi nanguεεcúndii tī ní ca'a ta'á tī ní ndís'tiī canéé nī maaⁿ ca'a tī.

Caacá nī, in'nuúⁿ nī, ní yaa'ví nī cheendi va'ai
(Lc. 11.9-13; 6.31)

⁷ Caⁿ'a Jesús: Caacá nī Ndyuūs, ní Ndyuūs téé yā yeⁿ'e nī. In'nuúⁿ nī ní ndaāca nī. Yaa'ví nī cheendi va'āi ní nan'guaaⁿ yeⁿ'é nī. ⁸ Caati nducyaaca 'iiⁿ'yāⁿ chí ngiica Ndyuūs ní Ndyuūs ca'a yā yeⁿ'e yā. Ní nducyáácá 'iiⁿ'yāⁿ chí in'nuuⁿ yā, ní inndaaca yā. Ní nducyáácá 'iiⁿ'yāⁿ chí yaa'vi yā cheendi va'āi, ní nan'guaaⁿ yeⁿ'é yā.

⁹ ¿Chéé yeⁿ'e ndís'tiī taachi caaca daiya nī 'aama pan, ca'a nī 'áámá tuūu? ¹⁰ O nduuti chí caaca daiyá nī 'áámá 'yaācā, ¿'áá ca'á nī 'áámá cúú? ¹¹ Nduuti chí ndís'tiī chí cú'ncheeⁿ nī deenú nī ca'a nī cosa chí n'daācā daiya nī, ndii 'tεε cá Chiida yú chí canéé yā na va'ai chεeti nguuvi ca'á yā cosas chí n'dáácā n'dai cá 'iiⁿ'yāⁿ chí caaca yā Ndyuūs.

¹² 'Tíicā chí tanducuéⁿ'ē chí neⁿ'é nī chí dííⁿ 'iiⁿ'yāⁿ ndúúcu nī, chuū ntúūⁿ dííⁿ nī ndúúcu 'iiⁿ'yāⁿ. Chuū chí ley yeⁿ'e Moisés ndúúcu chí canéé nguūⁿ yeⁿ'e profetas s'uuⁿ ndíí cuááⁿ vmnaaⁿ.

Cheendi va'āi chí 'tuūcuú
(Lc. 13.24)

¹³ Caⁿ'a Jesús: Cundáa nī chééndí va'āi chí 'tuūcuú, tí cheendi va'ai ch'εē'nū ndúúcu yúúní ch'εē'nū, chiiⁿ chí candéē 'iiⁿ'yāⁿ chí caⁿ'a yā na infierno. Nééné 'yaaⁿ 'iiⁿ'yāⁿ chí ndaa yā chééndí va'ai chí ch'εē'nū miiⁿ. ¹⁴ Naati chééndí va'āi 'tuūcuú miiⁿ ní yúúní cuéēⁿ miiⁿ chí candéē 'iiⁿ'yāⁿ chí caⁿ'a yā na vida cueⁿ'e daāⁿmaⁿ. Ní duu'ví 'iiⁿ'yāⁿ chí ndaāca yā chééndí va'āi miiⁿ.

Yáⁿ'á ní cucáávā n'gui'i yeⁿ'ē tuumicádíínuuⁿ nī
(Lc. 6.43-44)

¹⁵ Caⁿ'a Jesús: Dííⁿ nī cuidado ndís'tiī yeⁿ'e 'iiⁿ'yāⁿ profetas chí falsos yā chí ngaⁿ'a yā chí ndεε yā nduudu cuaacu yeⁿ'é Ndyuūs naati nguεε 'tíicā. Taachi mndaa yā nanááⁿ ndís'tiī cuaaⁿ dáámí 'iiⁿ'yāⁿ miiⁿ tan'dúúccā catecai 'iiti cuūchī naati cuááⁿ chεēti yā tan'dúúccā 'yáá'yāaⁿ ngaātāá chí taaⁿ tī. ¹⁶ Ní yeⁿ'e chí dííⁿ yā tuumicádíínuuⁿ nī yeⁿ'e yā. ¿'Áá cuta'a 'iiⁿ'yāⁿ uvas yeⁿ'e yááⁿ? o ¿'áá cuta'a 'iiⁿ'yāⁿ n'guiidíi yaaⁿ nguuvi yeⁿ'e yááⁿ? Nguεε 'tíicā. ¹⁷ 'Tíicā, nducyaaca yáⁿ'á chí n'dái, n'daācā ngíí n'gui'i n'dáacā yeⁿ'ē, naati yáⁿ'á chí nguéé n'daācā ní nguéé n'dai n'gui'i yeⁿ'ē. ¹⁸ 'Áámá yáⁿ'á chí n'dáacā nguéé 'cuūndi n'gui'i chí nguéé n'daācā, ndíí nguéé ndúú yeⁿ'e chí nguéé n'daācā 'cuūndi n'gui'i chí n'daācā yeⁿ'ē. ¹⁹ Nducyaaca yáⁿ'á chí nguéé n'daācā ngíí n'gui'i yeⁿ'ē, 'iiⁿ'yāⁿ ní 'cáaca yā ní 'cuíí yā na yaⁿ'ā. ²⁰ 'Tiicá ntúūⁿ ndís'tiī tuumicádíínuuⁿ nī yeⁿ'e 'iiⁿ'yāⁿ cáávā cosas chí dííⁿ yā yeⁿ'e chí n'daācā o yeⁿ'e chí nguéé n'daācā.

Nguéé cuuví cundaa nducyaaca 'iiⁿ'yāⁿ na va'ai chεeti nguuvi
(Lc. 13.25-27)

²¹ Jesús ngaⁿ'a yā 'tíicā: Nguéé nducyaaca 'iiⁿ'yāⁿ chí ngaⁿ'á yā yeⁿ'ē 'úú: N'díí Señor, Señor, ní cuuví cundaa yā naachí Ndyuūs ngaⁿ'a ntiiⁿnyuⁿ yā, dámaaⁿ 'iiⁿ'yāⁿ chí dííⁿ yā tan'dúúccā chí neⁿ'e Chiidá chí canee yā na va'ai chεeti nguuvi. ²² Nééné 'yaaⁿ 'iiⁿ'yāⁿ caaⁿ'maⁿ yā cuuvi yā 'úú nguuví yeⁿ'é juicio N'díí Señor, Señor, ¿'áá nguéé caⁿ'a 'nū

nduudu cuaacu ndúúcu chi duuchí nī ní tun'dáa 'nū yáá'n'guiinūuⁿ yeⁿe 'iiⁿ'yāⁿ ndúúcu chi duuchí nī? Ní néené n'deē vaadi n'gínú idiíⁿ 'nū ndúúcu chi duuchí nī. ²³ Tuu'mi ní 'úú Cristo caaⁿ'máⁿ cuaacú cuuví 'iiⁿ'yāⁿ s'eeⁿ: 'Úú nguéé n'diichí tandíi ndís'tiī. Cuví nī yeⁿe 'úú, ndís'tiī chi nguéé n'daācā díiⁿ nī.

Yeⁿe ndúú 'uūví cimientu yeⁿe va'ai s'eeⁿ

(Lc. 6.47-49; Mr. 1.22)

²⁴ Ní caⁿ'a ntúūⁿ Jesús: 'Āā du'ú nūuⁿ 'iiⁿ'yāⁿ chi n'giindiveéⁿ yā ndúúdu 'cūū yeⁿe nícu idiíⁿ yā chεe chi 'úú ngaⁿ'á, 'iiⁿ'yāⁿ miiⁿ ní tan'dúúca 'áamá saⁿ'ā chí n'dēēvee nadicadínuuⁿ sa. Saⁿ'ā miiⁿ din'dái sa vaacu sá na 'áamá yááva. ²⁵ Nícu chééⁿ cúvú naⁿ'ā ní ch'iita yíícu. Ní chéenu 'yúúné taaⁿ contra yeⁿe va'ai miiⁿ ní nguéé chindεeve caatí n'daacā chééndii na yááva miiⁿ. ²⁶ Āā du'ú nūuⁿ 'iiⁿ'yāⁿ chi n'giindiveéⁿ yā nduudú 'cūū yeⁿe ní nguéé idiíⁿ yā tan'dúúca chi ngaⁿ'á, 'iiⁿ'yāⁿ miiⁿ ní tan'dúúca 'aama saⁿ'ā chi nguéé n'daacā inadicadínuuⁿ sa. Saⁿ'ā miiⁿ ní din'dái sa vaacu sa na yáⁿ'āa ndúútiī. ²⁷ Ní cheeⁿ cuuví naⁿ'ā ní ch'iita yíícu miiⁿ. Ní chéenu 'yúúné taaⁿ contra yeⁿe va'ai miiⁿ ní va'ai chidεeve ní ntuūví.

²⁸ Taachí Jesús miiⁿ ch'iinu caⁿ'a yā ndúúdu 'cūū, 'iiⁿ'yāⁿ míⁿ cheⁿe yiinú yā yeⁿe chíⁿ chí ngi'cueeⁿ Jesús. ²⁹ Caati Jesús miiⁿ ngi'cueeⁿ yā 'iiⁿ'yāⁿ s'eeⁿ tan'dúúca 'áamá 'iiⁿ'yāⁿ chí déenu o 'áamá 'iiⁿ'yāⁿ chí ngaⁿ'a ntiīⁿnyúⁿ yā nguéé tan'dúúca 'áamá maestro chi ngi'cueeⁿ ley yeⁿe yā.

8

Jesús idiíⁿ yā chi nduūvā yeⁿe 'áamá saⁿ'ā yeⁿe ca'ai chi nguuvi lepra chí ín'duuti yuūtē yeⁿe sa

(Mr. 1.40-45; Lc. 5.12-16)

¹ Taachí Jesús cuch'eeⁿ yā na 'áamá yíicū, néené 'yaaⁿ 'iiⁿ'yāⁿ cueⁿ'é yā ndúúcu yā. ² N'diichí nī. Nanááⁿ Jesús ndaā 'áamá saⁿ'ā chí ndí sa 'áamá ca'ai chi nguuvi lepra chí ín'duuti yuūtē yeⁿe sa. Ní chíntii'ya sa nanááⁿ yā ní s'teenu sá ní caⁿ'a sa chí sa 'iiⁿ'yāⁿ: N'diī Señor, nduuti chi neⁿe nī, ní díiⁿ nī chi nduūvā yeⁿe.

³ Jesús ní n'doó yā ta'á yā ní tuu'ví yā saⁿ'ā miiⁿ ní caⁿ'a yā chí yā saⁿ'ā: 'Úú neⁿ'é. Nduūvā yeⁿe di. Tuu'mí nūuⁿ nduūvā n'daacā yeⁿe sa ní nduūví dεeve sa. ⁴ Tuu'mi ní Jesús ní caⁿ'a yā chí yā saⁿ'ā miiⁿ: Cuéⁿe di ní 'cuuⁿ'míⁿ dí cuerpo yeⁿe di nanááⁿ chiiduú ní ca'a di ofrenda nanááⁿ Ndyuūs tan'dúúca chí ngaⁿ'a na ley chí dinguuⁿ Moisés. 'Tíicā ní chiiduú caaⁿ'maⁿ cuaacú yā yeⁿe di nanááⁿ nducyaaca 'iiⁿ'yāⁿ, ní nguéé 'cuuⁿ'míⁿ di yeⁿe chí chí ndúúcu di mar 'áamá 'iiⁿ'yāⁿ.

Jesús díiⁿ yā chi nduūvā yeⁿe 'aama mozo yeⁿe capitán romano

(Lc. 7.1-10)

⁵ Taachí Jesús cáamá ndaa yā na yāāⁿ Capernaum, ndaā 'áamá saⁿ'ā capitán yeⁿe ndaata yeⁿe 'iiⁿ'yāⁿ romanos nguéé yeⁿe ndaata Israel. Ní ndaā sa nanááⁿ Jesús miiⁿ ní di'cuítu sa 'iiⁿ'yāⁿ. ⁶ Ní caⁿ'a sa chí sa Jesús: N'diī Señor, mozo yeⁿe candíttí sá na cama ndúúcu ca'ai chí in'dúúví cuerpo yeⁿe sa. Néené ya'ai ngiūtā sa.

⁷ Jesús caⁿ'a yā chí yā saⁿ'ā: 'Úú ní caⁿ'á ní díiⁿ chí saⁿ'ā ní nduūvā yeⁿe sa.

⁸ Saⁿ'ā capitán nan'guεεcútaⁿ'a sa ní caⁿ'a sa chí sa Jesús miiⁿ: N'diī Señor, 'úú nguéé neené n'dai 'úú chí cundaa nī chéétí va'ai yeⁿe. Dámaāⁿ chí caaⁿ'maⁿ núuⁿ nī ní saⁿ'ā mozo yeⁿe nduūvā yeⁿe sa. ⁹ 'Úú ní saⁿ'ā chí véé saⁿ'ā ndí tiiⁿ yeⁿe, ní ngaⁿ'ā ntiīⁿnyúⁿ yā yeⁿe 'úú. 'Úú ntúūⁿ ní ngaⁿ'á ntiīⁿnyúⁿ yeⁿe cien soldados chí maaⁿ poder yeⁿe. 'Úú ní ngaⁿ'á ngí 'aama sa: Cúnaⁿ'ā di, ní inaⁿ'ā sa. Ní ngaⁿ'á ngí taama sa: Cuchí di, ní chí sa. Ní ngaⁿ'á ngí mozo chí díiⁿ mandado yeⁿe: Díiⁿ di ntiīⁿnyúⁿ 'cūū, ní díiⁿ sa.

¹⁰ Taachi Jesús ch'iindiveéⁿ yā chuū cheⁿ'é yiinú yā. Ní caⁿ'a yā chí yā 'iiⁿ'yāⁿ chí ndúúcu yā: Cuaacu níⁿnyúⁿ ngaⁿ'á ngí ndis'tiī chí 'úú nguéé īndaacā 'iiⁿ'yāⁿ chí i'téenu n'dai yā mar 'áamá 'iiⁿ'yāⁿ yeⁿe ndaata Israel tan'dúúca saⁿ'á 'cūū. ¹¹ Ní ngaⁿ'á ngí ndís'tiī, chí neené 'yaaⁿ yā chí caaca yā caaⁿ ná ícan'daa 'yáⁿ'ā ndúúcu caaⁿ na ngiīya

'yá'nā ní 'cuēetē yā ná va'ai chēeti nguuví ndúúcu Abraham, ndúúcu Isaac, ndúúcu Jacob. ¹² Naati n'dee n'dái daiyá 'ii'n'yān ye'n'e ndaata Israel chí canéé chi 'cuēetinēe yā naachí Ndyuūs nga'n'a ntii'nyu'n yā ná va'ai chēeti nguuví, Ndyuūs tun'dáa yā 'ii'n'yān s'ee'n chuva'āi naachí maāi'n. Míí'n ní cuēecu yā ní che'e 'dii'n'yu'n yā ti nguéé i'téenu yā Dendyuūs.

¹³ Tuu'mi ní Jesús mii'n ca'n'a yā chii yā capitán mii'n: Cuna'nā di. Tan'dúúca chi i'téenu di chi 'úú idií'n chi nduūvā ye'n'e mozo ye'n'ē di, 'tíicā cuuví ndúúcu mozo ye'n'ē di. Ní hora míí'n nūu'n nduūvā ye'n'e mozo ye'n'ē sa.

Jesús dií'n yā chi nduūvā ye'n'e indá'nā Pedro

(Mr. 1.29-31; Lc. 4.38-39)

¹⁴ Cuayiivi ní ndaā Jesús ná va'ai ye'n'ē Pedro mii'n ní n'diichí yā chí indá'nā Pedro mii'n candiiti yā na cama. Ndēē 'ii'n'nūn taá'n tá'nā mii'n. ¹⁵ Jesús tuu'ví yā ta'ā tá ní 'ii'n'nūn míí'n ní chivii. Tuu'mi ní tá'nā mii'n ní nducuee'n tá ní dii'n ta mandado ye'n'ē 'ii'n'yān s'ee'n ní ca'a ta chi che'e yā.

Jesús dií'n yā chi nanduūvā ye'n'ē n'dee n'dái 'ii'n'yān

(Mr. 1.32-34; Lc. 4.40-41)

¹⁶ Taachi chi 'da'a nguuví mii'n, tuu'mi ní 'ii'n'yān ye'n'e yáā'n mii'n ndaa yā chi ndēe yā 'yaa'n n'dái 'ii'n'yān nanáá'n Jesús. Ndēē yā 'ii'n'yān chí snēe yā ndúúcu espíritus ye'n'e yáá'n'guiinūu'n. Jesús ca'n'a yā 'áámá nduudu nūu'n ní tun'dáa yā espíritus ye'n'e yáá'n'guiinuu'n ye'n'e 'ii'n'yān. Ní dií'n yā chí nduuva ye'n'ē nducyáácá 'ii'n'yān s'ee'n chí ngíita yā. ¹⁷ 'Tíicā ní cuuví cuaacu chí ca'n'a sa'nā profeta Isaías ndíi' cuaa'n vmnaa'n taachi ca'n'a yā 'túúca: 'Ii'n'yān maá'n yā sta'á yā ca'āi ye'n'e yú ní candēe yā vaadi ya'ai ye'n'e yú.

'Ii'n'yān 'āā ne'n'e yā ca'n'a yā ndúúcu Jesús

(Lc. 9.57-62)

¹⁸ Taachi Jesús n'diichi yā nducyaaca 'ii'n'yān cuaa'n 'diitú yā ca'n'a yā chii yā discípulos ye'n'e yā chí cho'ó yā táámá lado ye'n'e nuū'n'nī'yá'nā. ¹⁹ 'Áámá sa'nā chí ngi'cuee'n ley ndaā sa nanáá'n Jesús ní ca'n'a sa chii sa 'ii'n'yān: N'díi Maestro, ca'n'á ndúúcu ní 'āā tíi nūu'n naachi cá'n'a ní.

²⁰ Jesús ca'n'a yā chii yā sa'nā mii'n: 'Yuunēe'n ní véé yiivi yáává ye'n'e tí. 'Yáádá ye'n'ē nanguuvi véé 'dēēce tí naati 'úú chí Sa'nā chí Daiya Dendyuūs nguéé va'ai chí vaacú naachi cundiití tíí'n.

²¹ Táámá discípulo ye'n'ē yā ca'n'a sá chii sa Jesús: N'dii Señor, vmnáá'n vmnaa'n téé ní lugar 'úú tí ca'n'á 'cuúchí chiidá ní ca'n'a yú.

²² Jesús nga'n'a yā ngii yā sa'nā: Cuchíi di ndúúcu 'úú. Cu'nee'n dí 'ii'n'yān chí nguéé i'téenu yā chí 'cuuchí yā tiná'nā chí chiida di. Tí 'ii'n'yān s'ee'n tan'dúúca tiná'nā 'tíica yā.

Jesús chi'nee'n 'dií'n yā olas ye'n'ē nuū'n'nī'yá'nā nduūcu 'yúúné chí táán

(Mr. 4.35-41; Lc. 8.22-25)

²³ Jesús sndaā yā na 'áámá barco ní discípulos ye'n'e yā cue'n'e yā ndúúcu yā ní sndaā yā na barco mii'n. ²⁴ Hora míí'n nūu'n ní ndaā 'áámá 'yúúné táán chí olas ye'n'e nuū'n'nī'yá'nā mii'n ní ch'ēete cá chí ndaā nuū'n'nī'n chēeti barco mii'n. 'Téé 'téé nūu'n nguéé cánduūu ná barco. Jesús mii'n ní cyaadu yā. ²⁵ Discípulos ye'n'ē yā ndaa yā nanáá'n Jesús ní nanduūchí yā 'ii'n'yān mii'n ní nga'n'a yā ngii yā Jesús: N'dii Señor, nadanguá'n'ai ní s'uūú'n caati 'cuūvi yú. 'Āā 'cuēechi yú cuaa'n maa'n nuū'n'nī'yá'nā.

²⁶ Jesús ca'n'a yā chii yā discípulos ye'n'ē yā: ¿De'ē cúuví chí 'va'á ní? Ndís'tií ní dúú'vīi i'téenu ní. Tuu'mi ní Jesús nducuee'n yā ní yaa'vi yā 'yúúné míí'n ndúúcu nuū'n'nī'yá'nā chí cu'néé'n 'diií'n. Ní hora míí'n nūu'n canee 'diií'n. ²⁷ Discípulos ní che'n'e yiinú yā ní ca'n'a yā nguaa'n ví'i: ¿Du'u sá'nā chí 'túúca, ti ndii 'yúúné ndíi nuū'n'nī'yá'nā n'giindiveēe'n ye'n'ē sa?

Sa'nā s'ee'n ye'n'e yá'nā Gadara chí véé espíritus ye'n'e yáá'n'guiinūu'n ndúúcu sa

(Mr. 5.1-20; Lc. 8.26-39)

²⁸ Taachi Jesús ndúúcū discí pulos yeⁿé yā cho'ó yā nuūⁿnīⁿyáⁿā miiⁿ ní ndaá yā niiⁿnuúⁿ na yáⁿā Gadara miiⁿ, snéé na 'uuvu saⁿā chi snéé sa ndúúcū espíritus yeⁿe yááⁿn'guiinūⁿ ní nacan'dáa sa na yiive yáává chi nguaaⁿ yáinyāⁿ. Ní nééné taaⁿ sa chi mar 'áámá 'iiⁿyāⁿ nguéé ngí ngo'ó yā yúúⁿí miiⁿ. Saⁿā s'eeⁿ ní ndaa sa nanááⁿ Jesús. ²⁹ Ní 'cai yiicu sa: N'dii Jesús Daiya Dendyuūs, ¿dé'ē canéé yeⁿé nī ndúúcū nús'uu? ¿'Áá ndaá nī 'muuⁿ chi di'vaachí nī yeⁿē nús'uu taachi 'āā cuéé cúúnú ca'a tiempo taachi Dendyuūs ca'a yā castigo?

³⁰ Ní naachi snéé saⁿā s'eeⁿ ní yaⁿai 'téé na 'áámá yiicū. Ní niiⁿnuúⁿ saⁿā s'eeⁿ snéé 'yaaⁿ n'dái puercos, chi nge'é tī. ³¹ Ní espíritus yeⁿe yááⁿn'guiinūⁿ miiⁿ ní di'cuítu sa Jesús miiⁿ: N'dii Jesús, ndúúti chi tun'dáa nī nús'uu yeⁿe saⁿā s'uuⁿ, 'cuáaⁿ nī chi cundaa 'nū chēeti puercos miiⁿya. ³² Jesús miiⁿ caⁿa yā chii yā espíritus yeⁿe yááⁿn'guiinūⁿ: Cuéⁿe nī. Tuu'mi ní espíritus yeⁿe yááⁿn'guiinūⁿ cán'daa sa ní cueⁿe sa chēeti puercos. Cuin'diichí nī. Nducyaa ca puercos chéenu tī na yiicū miiⁿ ní chingéé nuúⁿ tī nguááⁿ nuūⁿnīⁿyáⁿā ní ch'í nuúⁿ tī nguááⁿ nuūⁿnīⁿ miiⁿ.

³³ 'Iiⁿyāⁿ chi diiⁿ cuidado puercos miiⁿ cunaⁿá yā ngéenu yā na yáāⁿ miiⁿ ní caⁿa yā tanducuéⁿē chí chí tan'dúúcā chí chó'oo yeⁿe 'iiⁿyāⁿ chi snéé ndúúcū espíritus yeⁿe yááⁿn'guiinūⁿ. ³⁴ Nducyaa ca 'iiⁿyāⁿ yeⁿe yáāⁿ miiⁿ cheⁿe yā n'diichi yā Jesús. Taachí ndaa yā naachi canéé Jesús miiⁿ, 'iiⁿyāⁿ s'eeⁿ ní di'cuítu yā Jesús miiⁿ chí cuéví yā yeⁿē yáāⁿ vaacú yā.

9

*Jesús diíⁿ yā chi nduuvā yeⁿe 'áámá saⁿā ndúúcū ca'āi chi in'dúuví sá
(Mr. 2.1-12; Lc. 5.17-26)*

¹ Tuu'mi ní Jesús miiⁿ sndáa yā na barco, ní cueⁿé yā táámá lado yeⁿē nuūⁿnīⁿyáⁿā ní cueⁿe yā ní ndaa yā yáāⁿ vaacú yā. ² Tuu'mi ní ndaa nanááⁿ Jesús 'iiⁿyāⁿ ní ndeε yā 'áámá saⁿā ndúúcū ca'āi chi in'dúuví cuerpo yeⁿe sa. Candúu sa na 'áámá yiive. Taachí Jesús miiⁿ tuumicadínuuⁿ yā chi saⁿā s'eeⁿ i'téenu sa yeⁿé yā, tuu'mi ní caⁿa yā chii yā saⁿa miiⁿ: Nduuví tiinú di daiyá. 'Úú 'āā nadach'εécú nuuⁿndi yeⁿē di.

³ Tuu'mi ní náⁿā saⁿā s'eeⁿ chi ngi'cueⁿ ley chi snee sa miiⁿ tucá'a sa nadacadínuuⁿ sa nguaaⁿ maāⁿ sa: Sáⁿa 'cūū ní ngaⁿa taaⁿ sa contra yeⁿe Ndyuūs. ⁴ Jesús miiⁿ tuumicadínuuⁿ yā vaanicadínuuⁿ yeⁿē sa ní caⁿa yā chii yā saⁿā s'eeⁿ: ¿De'ē cuuvi chi nguéé n'daācā inadicadínuuⁿ nī na staava yeⁿe nī? ⁵ ¿Chēε cá chi nguéé ngíⁿī chí caaⁿmáⁿ cuuví sáⁿa 'cūū: Nuuⁿndi yeⁿē di nch'εécú o chí caaⁿmáⁿ: Ndúcuééⁿ dí ní caaca dí? ⁶ 'Tíicā ngaⁿá chí ndís'tií cadínuuⁿ nī chí Saⁿā chí Daiya Dendyuūs ní véé poder yeⁿē sa na iⁿ'yeeⁿdí 'cūū chí nadach'εécú sa nuuⁿndi yeⁿé 'iiⁿyāⁿ. Tuu'mi ní caⁿa yā chii yā saⁿā ndúúcū ca'āi chí in'dúuví sá: Nducueeⁿ di ní nta'a di yiive yeⁿe di ní cunaⁿā di na vaacu di.

⁷ Tuu'mi ní saⁿā miiⁿ ní nducueéⁿ sá ní cúnaⁿā sa na vaacu sa. ⁸ Taachí 'iiⁿyāⁿ s'eeⁿ n'diichí yā chuū cheⁿe yiinú yā ní caⁿa yā: De'ε chúúcā ch'εete Dendyuūs chí ca'á yā poder 'cūū saⁿā iⁿ'yeeⁿdí cūū.

*Jesús yaa'vi yā saⁿā chí nguuvi Mateo
(Mr. 2.13-17; Lc. 5.27-32)*

⁹ Jesús cho'ó yā miiⁿ, ní cachiicá yā ní n'diichí yā 'áámá saⁿā chí nguuví sa Mateo. Mateo miiⁿ ní vεε sa na cuarto naachi nadí'vē 'iiⁿyāⁿ yeⁿē yáⁿā yeⁿe yā. Jesús caⁿa yā chii yā saⁿā: Díí, cuchí di caⁿā di nduucú. Ní Mateo miiⁿ nducueeⁿ sa ní cueⁿe sa ndúúcū Jesús.

¹⁰ Taachí Jesús vεε yā na mesa ná va'āi yeⁿe Mateo miiⁿ, hora míⁿ nééné 'yaaⁿ 'iiⁿyāⁿ publicanos chí cobradores chí inn'gueε yā yeⁿe impuesto ndúúcū 'iiⁿyāⁿ nuūⁿndí ní ndaa yā ní ch'εēté yā na mesa ndúúcū Jesús ndúúcū discí pulos yeⁿe yā. ¹¹ Taachí 'iiⁿyāⁿ fariseos n'diichí yā chuū, caⁿa yā chii yā discí pulos yeⁿe Jesús: ¿De'ē cúuví chí nge'e

maestro yeⁿe nī ndúúcu saⁿā publicanos chí cobradores chí inn'guεε yā yeⁿe impuesto ndúúcu 'iiⁿ'yāⁿ nuūⁿndíí?

¹² Taachí Jesús ch'iindiveeⁿ yā chuū, caⁿ'a yā chii yā 'iiⁿ'yāⁿ s'eeⁿ: 'Iiⁿ'yāⁿ chí nguéeⁿ ngiitā nguéeⁿ neⁿe yā 'aama médico, dámaaⁿ 'iiⁿ'yāⁿ chí ngiitā. ¹³ Cueⁿe nī ní tuumicádiinuuⁿ nī de'ε chí canéeⁿ nguūⁿ na libro yeⁿe Ndyuūs ndúúcu chí neⁿ'ē caaⁿ'maⁿ chí 'tíicā: 'Úú neⁿ'é chí 'iiⁿ'yāⁿ nduuví ya'āi 'iinú yā ndúúcu vi'í. 'Úú ní nguéeⁿ neⁿ'é chí 'caaⁿ'nuⁿ yā 'iiti ní ca'á yā 'iiti tan'dúúca ofrenda cucáavā 'úú. Ní 'úú ní nguéeⁿ cuchii iⁿ'yeeⁿdí 'cūū chí yaa'ví 'iiⁿ'yāⁿ chí nadacádíinuuⁿ yā chí n'dáaca yā ti nguéeⁿ dinuuⁿndí yā, naati 'iiⁿ'yāⁿ chí vééⁿ nuuⁿndi yeⁿe yā ní 'íicú ndaacadaamí yā yeⁿ'ē nuuⁿndi yeⁿe yā.

'Iiⁿ'yāⁿ ntiinguuneeⁿ yā yeⁿe chí nguéeⁿ ca'diiⁿnúⁿ yā ti caaⁿ'maⁿngua'a yā

(Mr. 2.18-22; Lc. 5.33-39)

¹⁴ Tuu'mi ní discípulos yeⁿe Juan chí cheédínūⁿnīn yā ndaá yā nanááⁿ Jesús miiⁿ ní caⁿ'a yā: N'dií Jesús, ¿de'ē cúúví chí nús'uu ndúúcu 'iiⁿ'yāⁿ fariseos neéneⁿ n'deeⁿ cuūví nguéeⁿ nga'diiⁿnúⁿ 'nū ní discípulos yeⁿe nī nga'dííⁿnúⁿ yā?

¹⁵ Jesús caⁿ'a yā chii yā 'iiⁿ'yāⁿ s'eeⁿ: ¿'Áá cuuví 'cuεetinéeⁿ 'iiⁿ'yāⁿ ndúúcu catecai 'cuáiⁿ tinaⁿ'ā taachí caⁿ'á yā naachi n'giindivaacu 'iiⁿ'yāⁿ neⁿ'e chí saⁿ'ā chí n'giindivaacu miiⁿ canéeⁿ sá? Naati ndaá nguuví chí isaⁿ'ā yeⁿe yā ní cuaví sa yeⁿ'é yā ti 'cuūví sa; tuu'mi ní nguεε ca'diiⁿnúⁿ yā.

¹⁶ Mar 'áámá 'iiⁿ'yāⁿ nguéeⁿ cúúví cuta'á yā 'áámá tiinūⁿ ngai chí nguéeⁿ naaⁿnu yā chí n'dyaatá yā na catecai ndiicūⁿ yeⁿe yā. Nduuti chí 'tíicā dííⁿ yā, caātā ndu'ū tiinūⁿ ndiicūⁿ. Ní cuuví ch'εete ca naachí ndíí nteeⁿ tiinūⁿ ndiicūⁿ. ¹⁷ Ndíí nguéeⁿ ndúú caaⁿ'yúⁿ 'iiⁿ'yāⁿ vino ngai chéétí bolsa yiiⁿmaⁿ ndiicūⁿ tan'dúúca chí díí 'iiⁿ'yāⁿ tiempo chí chó'ōo caati yiiⁿmaⁿ ndiicūⁿ miiⁿ ní cúteeⁿ ní vino miiⁿ ní cungéē. Ní cuuví ndái yiiⁿmaⁿ. Caaⁿ'yúⁿ yā vino ngai cheeti bolsa yiiⁿmaⁿ ngai; ní cuaví'í nduu 'uūví n'dáaca canéeⁿ yeⁿ'ē.

Jesús dííⁿ yā chí nanduūvā yeⁿe 'uūví n'daataá

(Mr. 5.21-43; Lc. 8.40-56)

¹⁸ Taachí Jesús miiⁿ ngaⁿ'a yā ndúúdu 'cūū, 'áámá saⁿ'ā chí ngaⁿ'a ntiinnyuⁿ yā yeⁿe yáacū sinagoga ndáa sa nanááⁿ Jesús, ní chiintii'ya sá ní chi'teenu sa. Ní caⁿ'a sa chí sa 'iiⁿ'yāⁿ: N'dií Jesús, minii'yuⁿ ch'íi daiyá; naati cuchíí nī ní cun'duu nī ta'a nī vmaaaⁿ yeⁿ'ē tá ní nnduuchi tá.

¹⁹ Ní Jesús nducueeⁿ yā ní cueⁿ'e yā ndúúcu discípulos yeⁿe yā ní ndáa yā ndúúcu saⁿ'ā miiⁿ na vacu sá. ²⁰ Tuu'mi ní 'áámá n'daataa chí canéeⁿ ndúúcu 'áámá ca'ai, chí ican'dáa yuúúⁿ yeⁿ'e cuerpo yeⁿ'ē tá 'āā ndiichúúví nduūyū ndaa niiⁿnuⁿ tá cuaaⁿ dáámí Jesús. Tuū'vi tá naachí ndεetúú yeⁿ'e catecai Jesús miiⁿ. ²¹ Ti taⁿ'ā miiⁿ maāⁿ tá nadicádiinuuⁿ tá 'tíicā: Ndúúti chí 'úú tuū'ví dámaaⁿ catecai yā, tuu'mi ní nduūvā yeⁿ'é. ²² Tuu'mi ní Jesús nguεεcúndii yā ní n'diichi yā táⁿ'ā, ní caⁿ'a yā chí yā táⁿ'ā: Cúúví dítiinú di, díí daiyá; 'āā nanduūvā yeⁿ'ē di ti i'téenu di 'úú. Hora mííⁿ nūuⁿ táⁿ'ā miiⁿ nanduūvā yeⁿ'ē tá.

²³ Taachí Jesús miiⁿ sndaⁿ yā na va'ai yeⁿ'ē sáⁿ'ā chí ngaⁿ'a ntiinnyuⁿ yā yeⁿe yáacū sinagoga tuu'mi ní n'diichi yā 'iiⁿ'yāⁿ chí i'tiiví yā flauta, ndúúcu 'iiⁿ'yāⁿ chí n'gai yā, ndúúcu 'iiⁿ'yāⁿ chí nguεécú yā ní snéeⁿ yā naachi candíítí tináⁿ'ā. ²⁴ Ní Jesús caⁿ'a yā chí yā 'iiⁿ'yāⁿ s'eeⁿ: Cuvíí nī; ti ta'díí miiⁿ nguéeⁿ n'dii tá, cyaadu tá. 'Iiⁿ'yāⁿ s'eeⁿ ní ch'ííⁿnyuⁿneeⁿ yā Jesús miiⁿ. ²⁵ Taachi tun'dáa yā 'iiⁿ'yāⁿ miiⁿ cheeti va'āi, Jesús ndaa yā va'āi ní sta'á yā ta'ā n'daataa 'lííⁿ miiⁿ, ní n'daata 'lííⁿ miiⁿ ní nducueeⁿ tá. ²⁶ Chuū chí díí Jesús ní ndōō fama miiⁿ nuuⁿmaⁿ ná yáāⁿ naachí chí chuū.

Jesús dííⁿ yā chí nanduūvā 'uuví 'iiⁿ'yāⁿ chí nguenaááⁿ

²⁷ Taachi Jesús cho'ó yā yeⁿ'ē miiⁿ, ní 'uuví saⁿ'ā chí nguenaááⁿ can'dáa sa 'iiⁿ'yāⁿ. 'Cai yíicú sá ní caⁿ'a sa: N'díí Daiya David, cunéeⁿ ya'ai 'iinu nī nús'uu.

²⁸ Taachi Jesús cueⁿ'é yā ndaa yā na va'ai tuu'mi ní ndaa ndúú 'uūví saⁿ'ā ngeenáán miiⁿ nanáán Jesús. Jesús caⁿ'a yā chii yā saⁿ'ā s'eeⁿ: ¿'Áá i'téenu nī chi 'úú cuuvi dííⁿ chi nanduūvā yeⁿ'é ní? Saⁿ'ā s'eeⁿ ní caⁿ'a sa: 'Tíicā Señor.

²⁹ Tuu'mi ní Jesús tuū'ví yā nduutináán saⁿ'ā s'eeⁿ ní caⁿ'a yā: 'Tíicā cuuví tan'dúúicā chi i'téenu nī yeⁿ'é.

³⁰ Nduutináán saⁿ'ā s'eeⁿ ní n'guaaⁿ ní nduuvā yeⁿ'ē sa. Ní Jesús caⁿ'a yā chii yā saⁿ'ā s'eeⁿ: Nguéé ca'a nī chi cadínúuⁿ 'iiⁿ'yāⁿ yeⁿ'e chuū.

³¹ Naati saⁿ'ā s'eeⁿ ní cueⁿ'e sa núúⁿ máⁿ ná yáⁿ'āa miiⁿ, ní caⁿ'a sa nducuéⁿ'ē chí Jesús miiⁿ dííⁿ yā.

Jesús dííⁿ yā chí nduūvā yeⁿ'ē 'áámá 'díí'mī

³² Taachi Jesús ndúúicū 'iiⁿ'yāⁿ s'eeⁿ nan'daa yā na va'ai miiⁿ, ndaa saⁿ'ā s'eeⁿ nanáán Jesús ní ndéε sa 'áámá 'díí'mī chi canee sa ndúúicū espíritu yeⁿ'e yáán'n'guiinūuⁿ. ³³ Ní taachi Jesús miiⁿ tun'dáa yā espíritu yeⁿ'e yáán'n'guiinūuⁿ miiⁿ, tuu'mi ní 'díí'mi miiⁿ ní chíí caⁿ'a sa. 'Iiⁿ'yāⁿ ní cheⁿ'e yiinú yā ní caⁿ'a yā: Nguéé in'diichí dendu'ū chi 'túúicā nguuaⁿ 'iiⁿ'yāⁿ yeⁿ'e Israel.

³⁴ Naati 'iiⁿ'yāⁿ fariseos caⁿ'a yā: Saⁿ'ā miiⁿ ní tun'dáa sa espíritu yeⁿ'e yáán'n'guiinūuⁿ cáávā saⁿ'ā chí ngaⁿ'a ntiiⁿnyuⁿ sa yeⁿ'e espíritus yeⁿ'e yáán'n'guiinūuⁿ.

Jesús ya'ai 'iinú yā 'iiⁿ'yāⁿ

³⁵ Jesús cachiica yā nuuⁿ máⁿ na yáán n'gεεε ndúúicū yaán n'gaiyáá, ní ngi'cueeⁿ yā na yáacū sinagogas yeⁿ'e 'iiⁿ'yāⁿ Israel. Ní ngaⁿ'a yā nduudu cuaacu yeⁿ'ē naachí Nduyūs ngaⁿ'ā ntiiⁿnyúⁿ yā na va'ai cheeti nguuví. Ní dííⁿ yā chí nduūvā yeⁿ'ē nducyaaca 'iiⁿ'yāⁿ yeⁿ'e nducuéⁿ'ē naaⁿ ca'ai yeⁿ'e yā ndúúicū 'iiⁿ'yāⁿ chí ya'ai yeⁿ'é yā. ³⁶ Ní taachi Jesús n'diichi yā nducyaaca 'iiⁿ'yāⁿ s'eeⁿ, tuu'mi ní yá'ai 'iinú yā caava 'iiⁿ'yāⁿ s'eeⁿ, ti 'iiⁿ'yāⁿ s'eeⁿ ndicúúnu yā ni snéε yā tan'duucā 'iiti cuūchī chí nguéé du'ū chí idiiⁿ cuidado 'iiti. 'Tiicá yā. ³⁷ Tuu'mi ní Jesús miiⁿ caⁿ'a yā chii yā discípulos yeⁿ'e yā: Cuaacu níínyúⁿ chí ngíí yeⁿ'ē néénε n'deēε chí dííⁿ yú cosechar naati 'iiⁿ'yāⁿ chí idiiⁿ ntiiⁿnyuⁿ nguéé 'yaaⁿ yā. ³⁸ Cáávā chuū cáácá nī Nduyūs chí véε cosecha yeⁿ'e yā chí dicho'ó yā mozos ní nadidáámá yā cosecha yeⁿ'é yā.

10

Jesús yaa'vi yā ndu'u ndiichúúví discípulos

(Mr. 3.13-19; Lc. 6.12-16)

¹ Tuu'mi ní Jesús yaa'ví yā ndu'ū ndiichúúví discípulos yeⁿ'e yā chí ndaa yā nanáán yā. Ní Jesús miiⁿ ca'a yā poder discípulos chí tun'daa yā espíritus yeⁿ'e yáán'n'guiinūuⁿ yeⁿ'é 'iiⁿ'yāⁿ, ní dííⁿ yā chí nduūvā yeⁿ'é 'iiⁿ'yāⁿ chí ngiitā yeⁿ'e nducuéⁿ'ē naaⁿ ca'ai yeⁿ'e yā ndúúicū 'iiⁿ'yāⁿ chí ya'ai yeⁿ'é yā.

² 'Túúicā duūchí ndu'u ndiichúúví apóstoles; Simón chí nguuví Pedro ndúúicū Andrés 'díinu sa, Jacobo ndúúicū Juan 'diinū sa chí daiya Zebedeo; ³ ndúúicū Felipe, ndúúicū Bartolomé, ndúúicū Tomás, ndúúicū Mateo chí sán'a publicano chí cobrador; ndúúicū Jacobo saⁿ'ā daiya Alfeo; ndúúicū Lebeo chí nguuví Tadeo; ⁴ ndúúicū Simón yeⁿ'e yáⁿ'āa Caná; ndúúicū Judas Iscariote saⁿ'a miiⁿ chí cuayiivi ch'iⁿ'i sá du'u chí Jesús miiⁿ chí cuuvi 'caaⁿ'núⁿ ya 'yā.

Ntiiⁿnyuⁿ yeⁿ'ē ndiichúúví apóstoles

(Mr. 6.7-13; Lc. 9. 1-6)

⁵ Jesús dicho'ó yā ndu'ū ndiichúúví apóstoles ní caⁿ'a yā chii yā 'iiⁿ'yāⁿ taacā chí canee chí dííⁿ yā. Ní Jesús caⁿ'a yā: Nguεε caⁿ'á nī cuaaⁿ yúúní yeⁿ'é 'iiⁿ'yāⁿ chí nguéé ndaata yeⁿ'ē Israel chí judíos. Nguéé cundaa nī yáán vaacú 'iiⁿ'yāⁿ Samaritanos. ⁶ Naati ndís'tií ní caⁿ'a nī nanáán 'iiⁿ'yāⁿ Israel s'eeⁿ tí 'iiⁿ'yāⁿ s'eeⁿ tan'dúúicā 'íití cuuchi chí nínđái tí na icyáⁿ'ā, 'tíica yā. ⁷ Ní taachi caⁿ'á nī 'túúicā caaⁿ'maⁿ nī nduudu cuaacu ní caaⁿ'maⁿ nī yeⁿ'ē naachí Dendyuūs ngaⁿ'a ntiiⁿnyúⁿ yā na va'ai cheeti nguuví chí 'āā ndaa niiⁿnuúⁿ. ⁸ Dííⁿ nī chí nduūvā yeⁿ'é 'iiⁿ'yāⁿ chí ngíita. Dííⁿ nī chí nduuchi 'iiⁿ'yāⁿ chí n'díí chí tináⁿ'ā.

Diín nī chi nduūvā ní nduuví δεεε cuerpo yeⁿe 'iiⁿ'yāⁿ chi véé vaadī ya'ai chi nguuvī lepra chi in'duuti yuūtē yeⁿe yā. Ní diín nī chí divíi nī espíritus yeⁿe yááⁿ'n'guiinūⁿ chi snéé ndúúcu 'iiⁿ'yāⁿ. Ndís'tiī ndaacá nī poder 'cūū yeⁿ'é Dendyuūs, ní nguéé cuta'a nī tuumī cáávā chuū. Chuū chi diín nī ndúúcu 'iiⁿ'yāⁿ nguéé cuuvi cún'di'i yeⁿ'é yā.

⁹ Nguéé candée nī 'dííⁿ'nguaaⁿ, ndíí nguéé ndúú 'dííⁿ'ngueε, ndíí nguéé ndúú tuūmī cheēyē ra. ¹⁰ Nguéé candée nī morral yeⁿe nī cuaaⁿ cyúúni chí cáⁿ'a nī. Ndíí nguéé ndúú 'uūvī ra catecai nī candée nī. Ndíí nguéé ndúú canduu ndaacuú yeⁿ'é nī, ndíí nguéé ndúú in'daacuú rá yeⁿ'e nī, ti 'iiⁿ'yāⁿ chí diín ntiíⁿ'nyuⁿ, na ntiíⁿ'nyúⁿ chí diín yā ní ndaacā chí ché'e yā ndúúcu necesidades chí neⁿ'e yā.

¹¹ 'Āā tíí nūuⁿ yááⁿ n'gεεε ndúúcu yááⁿ n'gaiyaá naachí cundáa nī tíínguuneeⁿ nī du'ú 'iiⁿ'yāⁿ yeⁿ'é yááⁿ miiⁿ chí n'dai yā ní cunée nī na vaacú yā ndii n'dáá cá nī. ¹² Taachí ndaa nī na vaacu 'iiⁿ'yāⁿ: Ndaí ndís'tiī, caaⁿ'máⁿ nī, tan'dúúca costumbre yeⁿ'e nī. ¹³ Ndúúti chí 'iiⁿ'yāⁿ yeⁿ'é va'āi miiⁿ n'dai yā tuu'mi ní vaadī 'diiⁿ yeⁿ'e nī cunée ndúúcu yā. Nduuti chí nguéé n'dai yā o nguéé vaadī 'diiⁿ ndúúcu yā, nacan'dáa nī va'āi miiⁿ ndúúcu 'áámá nduudu n'dai. ¹⁴ Nduuti chí 'iiⁿ'yāⁿ s'eeⁿ nguéé 'cuaaⁿ yā ndís'tiī ndíí nguéé ndúú 'caandiveeⁿ ra yā nduudu yeⁿ'e nī nan'dáa nī va'ai miiⁿ o yeⁿ'e yááⁿ miiⁿ ní n'dáadi nī iyaācáa yeⁿ'e ca'á nī ti nguéé n'giindiveeⁿ yā yeⁿ'é nī. ¹⁵ Cuaacu nííⁿ'nyúⁿ cuaacu nííⁿ'nyúⁿ ngaⁿ'á ngī ndís'tiī chí taachi ndaa nguuvī chí Ndyuūs n'diichí yā nuuⁿndi yeⁿ'e yááⁿ, castigo yeⁿ'e 'iiⁿ'yāⁿ yeⁿ'e yááⁿ 'cūū cunncaā ca chí cuuví castigo yeⁿ'e 'iiⁿ'yāⁿ yeⁿ'e yááⁿ Sodoma ndúúcu yááⁿ Gomorra chí yááⁿ s'eeⁿ yeⁿ'é 'iiⁿ'yāⁿ chí nguéé diín yā chí n'dai ndíí nguéé 'iiⁿ'yāⁿ yeⁿ'e ndaata Israel yā.

Ndáá nguuvī chí 'iiⁿ'yāⁿ din'gínu yā nduucú nī

¹⁶ Cun'diichí nī. 'Úú ní dicho'ó ndís'tiī tan'dúúca chí ndís'tiī ní 'iiti cuūchī náávtaⁿ'ā yeⁿ'é 'yááⁿ'yāⁿ n'gaātáā, 'tiicá nī. Canée chí diín nī chí listo nī tan'dúúca 'aama cúu. Ní canée chí din'daacá nī ní canée manso nī tan'dúúca 'áámá paloma. 'Tíicā diín nī. ¹⁷ Candée nī cuidado caati 'iiⁿ'yāⁿ s'eeⁿ ní nca'á yā ndís'tiī nanááⁿ 'iiⁿ'ntyeⁿ'é yeⁿ'e yaacū sinagoga. Ní cúúví 'cueⁿ'é yā ndís'tiī na yaacū sinagoga miiⁿ. ¹⁸ Ní 'iiⁿ'yāⁿ s'eeⁿ candée yā ndís'tiī nanááⁿ gobernadores ndúúcu nanááⁿ reyes cucáávā 'úú. Ní 'íicú ndís'tiī cuuví caaⁿ'máⁿ nī nduudu cuaacu yeⁿ'é 'úú nanááⁿ 'iiⁿ'yāⁿ s'eeⁿ ndúúcu 'iiⁿ'yāⁿ chí nguéé yeⁿ'e ndaata Israel. ¹⁹ Ní taachi 'iiⁿ'yāⁿ nca'a yā ndís'tiī nanááⁿ 'iiⁿ'yāⁿ s'eeⁿ, nguéé nadicadíinuⁿ nī yeⁿ'e chí caaⁿ'máⁿ nī ti hora mííⁿ nūuⁿ ní Ndyuūs téé yā nduudu chí caaⁿ'máⁿ nī. ²⁰ Ti nguéé ndís'tiī chí caaⁿ'máⁿ nī naati Espíritu N'dai yeⁿ'é Ndyuūs Chiida yú. Espíritu miiⁿ caaⁿ'máⁿ yā cáávā ndís'tiī ti canée yā nduucú nī.

²¹ Nguaaⁿ 'dííⁿū sa caⁿ'a sa caaⁿ'maⁿ sa contra yeⁿ'é ví'i chí canée chí 'cuūvī sa. 'Tiicá ntūūⁿ chiidá yā caⁿ'a yā caaⁿ'maⁿ yā contra yeⁿ'é daiya yā chí canée chí 'cuūvī yā. 'Tiicá ntūūⁿ daiyá yā ní caⁿ'á yā diiⁿ yā ndúúcu chiidá yā ti ndís'tiī candée nī nduudu yeⁿ'é. ²² Ní nducyáácá 'iiⁿ'yāⁿ nguéé cuuvi n'diichí yā ndís'tiī cucáávā 'úú ti cueⁿ'é nī nduucú. 'iiⁿ'yāⁿ chí cuchéε yā tanducuéⁿ'é chuū nducuéⁿ'é nguuvī yeⁿ'é yā 'iiⁿ'yāⁿ miiⁿ chí nanguaⁿ'ai yā. ²³ Taachí 'iiⁿ'yāⁿ can'daá yā ndís'tiī chí neⁿ'e yā chí ndís'tiī 'cuenú nī cuuvi, na 'áámá yááⁿ, tuu'mi ní caⁿ'ā nī cáanu nī ná taama yááⁿ ti cuaacu nííⁿ'nyúⁿ ngaⁿ'á ngī ndís'tiī chí Saⁿ'ā chí Daiya Ndyuūs miiⁿ ndaa sá taama vmnéⁿ'ēe vmnaaⁿ chí ndís'tiī cuuvi caaⁿ'maⁿ nī nduudu cuaacu yeⁿ'é nuuⁿmaⁿ na yáⁿ'āa Israel.

²⁴ Mar 'áámá discípulo ní nguéé n'gεεε ca ntiíⁿ'nyuⁿ sá chí cuuvi maestro yeⁿ'é sa, ndíí nguéé ndúú mar 'áámá mozo ní ng'εεε ca sa chí cuuvi 'iivi sa. ²⁵ N'daacā chí discípulo miiⁿ diiⁿ sa tan'dúúca chí īdiiⁿ maestro yeⁿ'e sa ní mozo miiⁿ diiⁿ sa tan'dúúca chí diiⁿ 'iivi sa. Ndúúti chí 'iiⁿ'yāⁿ chí ngaⁿ'a ntiíⁿ'nyuⁿ yeⁿ'e va'ai chí nguuví Beelzebú chí yááⁿ'n'guiinūⁿ, tuu'mi ní tanáⁿ'ā 'iiⁿ'yāⁿ chí nguéé yeⁿ'e familia yeⁿ'e Beelzebú miiⁿ cunncaā caⁿ'a yā caaⁿ'máⁿ yā yeⁿ'e 'iiⁿ'yāⁿ yeⁿ'e Beelzebú.

*Du'ū chí cuuvi 'va'ā yú
(Lc. 12.2-9)*

²⁶ Tuu'mi ní ndís'tiī nguéeé 'va'á nī 'ii'nyān ti nguéeé 'áámá chí canúún n'de'ei chi nguéeé cuuvi snaan yú, ndíí nguéeé ndúú canee 'áámá secreto chi 'ii'nyān nguéeé cuuvi cadíínuu yā. ²⁷ 'Iicu chii' chi 'úú nga'á ngíí ndís'tiī ye'n'e nduūdū n'de'ei chi nguéeé ituumicádíínuu 'ii'nyān, ndís'tiī caa'n'ma' nī nduudu chi túúmícádiinuun 'ii'nyān. Níícu de'ε chí nga'á ngíí ndís'tiī ní 'cuai nī ndii na yaacū ye'n'ē tiī va'āi ní túúmícádiinuun 'ii'nyān nduudú 'cūū. ²⁸ Nguéeé 'va'á nī 'ii'nyān chí 'caā'n'nūn cuerpo ye'n'e nī ní nguéeé cuuvi 'caa'n'nú' yā alma ye'n'e nī. Di'va'á ca nī Dendyuūs chí cuuvi 'caa'n'nú' yā alma ye'n'e nī ndúúcu cuerpo ye'n'e nī chí ca'á nī na infierno.

²⁹ ¿'Áá nguéeé in'díícuí yā na 'uūvī 'yaada cáávā 'aama tuūmī? Mar 'áámá 'yáadá s'ée'n nguéeé 'cuuvá tī na yá'n'āa 'cūū núú'n'mán ne'n'e chi nguéeé déenu Ndyuūs Chiida yú. ³⁰ Níícu nducyaaca yuudu tí'n nī ní ndii dúúché ndúúcu Ndyuūs. ³¹ Nguéeé di'vá'a ndís'tiī caati ch'εete cá nī chi cuuvi 'yaa' n'dái 'yaada.

'Ii'nyān chi nga'á yā iintii'naán yā Cristo nanáán 'ii'nyān
(Lc. 12.8-9)

³² 'Āā du'ú nūu' chí nga'n'a chi iintii'naa' 'úú nanáán 'ii'nyān, 'úú ntúū' ní caā'n'mán chi iintii'naán 'ii'nyān s'ee' nanáán Chiidá chi canée yā na va'ai chεeti nguuvi. ³³ 'Āā du'ú nūu' chí caā'n'mán chi nguéeé in'diichi 'úú nanáán 'ii'nyān, 'úú ntúū' ní caā'n'mán chi nguéeé in'diichi 'ii'nyān s'ee' nanáán chiidá chi canée yā na va'āi chεeti nguuvi.

Cáávā Jesús mii' véeé divisiones nguaa' 'ii'nyān
(Lc. 12.51-53; 14.26-27)

³⁴ Nguéeé nadicádíínuu' nī chí 'úú, Jesús, ndaá chi ndéé vaadī 'diīn 'ii'nyān na in'yee'ndí 'cūū. Nguéeé ndaá chí ndéé vaadī 'diīn caati ndéé vaadī 'caa'va ní tan'dúúca chí candéé 'áámá machete chí 'caā'n' nduu 'uuvī lados. ³⁵ Tí ndaá chí 'ii'nyān ní nguéeé cuuvi n'diichi yā chiidá yā, ní n'daataá nguéeé cuuvi n'diichi tá chεecu tá, n'daataá nguéeé cuuvi n'diichi ntúū' tá indán'a tá. ³⁶ Caati 'áámá 'áámá yā ní enemigos yā ye'n'e yā v'í' na vaacu yā.

³⁷ 'Ii'nyān chí ne'n'e cá yā chiidá yā o chεecu yā nguéeé ti 'úú, nguéeé neene n'dai yā chí cuuvi ye'n'é 'ii'nyān. 'Ii'nyān chí ne'n'e cá yā daiyá yā sa'n'ā o daiyá yā n'daataá nguéeé ti 'úú, nguéeé neene n'dai yā chí cuuvi ye'n'é 'ii'nyān. ³⁸ Ní 'ii'nyān chí nguéeé ne'n'e yā 'cueenú yā cuuvi cucáávā 'úú chí tan'dúúca chí cuta'á yā cruz ye'n'e yā ní ca'n'a yā nduucú, nguéeé neené n'dai yā chí cuuvi ye'n'é 'ii'nyān. ³⁹ 'Ii'nyān chí ne'n'e cá yā vida ye'n'e yā cáávā cosas chí véeé ná in'yee'ndí 'cūū nguéeé ti 'úú, tuu'mi ní táámá vida ní dindaí yā. 'Iicú 'ii'nyān chí dindaí yā vida ye'n'e yā na in'yee'ndí 'cūū cucáávā 'úú, ti dí'n yā chí 'úú ne'n'é ní ndaacá yā táámá vida ye'n'é yā.

Ye'n'e chí ndaācā ye'n'ē yú
(Mr. 9.41)

⁴⁰ 'Ii'nyān chí 'cuaa' yā ndís'tiī, 'cuaa' yā 'úú. 'Ii'nyān chí n'gúu' yā 'úú, n'gúu' yā 'ii'nyān chí dichó'o yā 'úú. ⁴¹ 'Ii'nyān chí n'gúu' yā 'áámá sa'n'a profeta caati profeta mii' chí yā lado ye'n'e Ndyuūs 'ii'nyān ní cuta'á yā premio chí ndaacā ye'n'ē chí tunéén 'ii'nyān chí profeta. 'Ii'nyān chí n'gúu' yā 'áámá 'ii'nyān chí n'dai caati 'ii'nyān mii' nī n'dai yā, 'ii'nyān ní cuta'á yā premio chí tunéén 'ii'nyān chí n'dai. ⁴² 'Āā du'ú nūu' 'ii'nyān chí ca'a 'áámá vaso nuū'n'nī' iiche 'áámá 'ii'nyān caati i'téenu yā 'úú, cuaacu ní'nyú' nga'á ngíí ndís'tiī chí véeé premio ye'n'e 'ii'nyān mii' chí cuuvi ndaāca yā ye'n'e yā.

11

Juan chí chεédínuū'n'nī sa dichó'o sa 'ii'nyān nanáán Jesús
(Lc. 7.18-35)

¹ Taachí Jesús ch'íínú chii yā ndu'u ndiichúúví discípulos ye'n'e yā táácā chí canée chí diín yā tuu'mi ní Jesús chiicá yā yáán mii' ní cue'n'é yā na tanán'ā yáán s'ee' chí ca'cueen yā ní caa'n'ma' yā nduudu cuaacu ye'n'é Ndyuūs.

² Juan chí chεédínuū'n'nī sa 'ii'nyān canúún sá vácūū. Ní taachí ch'iindivee' sá taacā idii' Jesús mii', tuu'mi ní dichó'o sa ná 'uuvi discípulos ye'n'e sa nanáán Jesús.

³ Ní 'iiⁿ'yāⁿ s'eeⁿ ndáa yā ní ntinguuneeⁿ yā Jesús miiⁿ: ¿'Áá n'dií chi Cristo chi canee chí ndaa o cunee ngínú 'nū taama yā?

⁴ Jesús miiⁿ nán'guεεcútaⁿa yā yeⁿ'e 'iiⁿ'yāⁿ s'eeⁿ ní caⁿ'a yā: Ndís'tiī cúnaⁿ'a nī ní cuuvi nī Juan miiⁿ yeⁿ'é dendu'ū chí inaaⁿ nī ndúú^cú chí n'giindiveeⁿ nī. ⁵ 'Iiⁿ'yāⁿ chí ngueenááⁿ ní inaaⁿ yā, 'iiⁿ'yāⁿ chí nguéé ngii ngiicá ní ngiicá yā, 'iiⁿ'yāⁿ chí ndíí ca'ai lepra chí in'duuti yuūtē yeⁿ'e yā ní nduuva δεενε yeⁿ'é yā, 'iiⁿ'yāⁿ chí cheεtúū ní n'giindiveeⁿ yā, 'iiⁿ'yāⁿ chí n'díí ní nnduuchí yā yeⁿ'e nguaaⁿ tináⁿ'ā, níícú 'iiⁿ'yāⁿ chí ndaachí snee yā ch'iindiveeⁿ yā nduudu cuaacu yeⁿ'é Ndyuūs chí nadanguáⁿ'ai 'iiⁿ'yāⁿ ti 'iiⁿ'yāⁿ candεε yā nduudu cuaacu miiⁿ nanáaⁿ yā. ⁶ De'ε chúú^cā n'dai 'iiⁿ'yāⁿ chí nguéé cunncáa ch'εεnú yā 'úú ndúú^cú nduudu yeⁿ'é.

⁷ Taachi cuinaⁿ'a yā 'iiⁿ'yāⁿ s'eeⁿ, Jesús tucá'a yā caⁿ'a yā chíi yā 'iiⁿ'yāⁿ yeⁿ'e Juan chí cheεdínuūⁿnīⁿ miiⁿ: ¿De'ε cheⁿ'e ndís'tiī n'diichi nī na yáⁿ'āa cuūⁿ máⁿ naachi nguéé ch'εetinéé 'iiⁿ'yāⁿ? ¿'Áá 'áámá ndúú chí n'giíⁿdi 'yúúⁿé? ⁸ O ¿de'ε tuu'mi cheⁿ'e nī n'diichí nī? ¿'Áá 'áámá saⁿ'ā chí cánuuⁿ sa catecái n'dai sa? Cuin'diichí nī. 'Iiⁿ'yāⁿ chí snúuⁿ yā catecai n'dai yā snee yā ná va'ai yeⁿ'ē rey. ⁹ Tuu'mi ní ¿de'ε cheⁿ'é nī n'diichi nī? ¿'Áá 'aama profeta chí ngaⁿ'a nduudu cuaacu yeⁿ'e Ndyuūs? 'Tíicā nduudu cuaacu. Ní 'úú ní ngaⁿ'á ngii ndís'tiī 'tíicā. Cheⁿ'é nī n'diichi nī 'áámá 'iiⁿ'yāⁿ chí ch'εεte ca yā chí cuuvi profeta. ¹⁰ Chuū cánéé nguūⁿ yeⁿ'e Juan miiⁿ nán' libro yeⁿ'é Ndyuūs ndii cuááⁿ vmnaaⁿ: Cuin'diichí nī. 'Úú ní dicho'ó 'áámá saⁿ'ā chí caaⁿ'maⁿ sa nduudu cuaacu yeⁿ'é nanáaⁿ di.

Saⁿ'ā miiⁿ ní nuūⁿ'nūⁿ cuaacú sa yúúⁿí cáávā di.

¹¹ Cuaacu níⁿ'nyúⁿ ngaⁿ'á ngii ndís'tiī: Nguááⁿ nducyaaca 'iiⁿ'yāⁿ chí n'giindiyáaⁿ yā yeⁿ'ē n'daataá nguéé taama yā chí ch'εεte ca yā ti Juan miiⁿ chí cheεdínuūⁿnīⁿ sa. Naati 'iiⁿ'yāⁿ chí ndiicuúⁿ ca yā naachí Ndyuūs ngaⁿ'a ntiiⁿ'nyuⁿ yā ní ch'εεte ca yā nguéé ti Juan miiⁿ.

¹² Caati ndíí tiempo chí ch'iindiyaāⁿ Juan chí cheεdínuūⁿnīⁿ sa ndíí maaⁿ yeⁿ'e naachí Ndyuūs ngaⁿ'a ntiiⁿ'nyuⁿ yā ndúú^cú 'iiⁿ'yāⁿ chí yeⁿ'é Ndyuūs ní n'geenu cá yā ngii. Ní 'iiⁿ'yāⁿ chí nguⁿ'u yā contra yeⁿ'e Ndyuūs neⁿ'e yā caaⁿ'maⁿ ntiiⁿ'nyúⁿ yā yeⁿ'e naachi Ndyuūs ngaⁿ'a ntiiⁿ'nyuⁿ yā. ¹³ Ní nducyaaca 'iiⁿ'yāⁿ profetas ndúú^cú ley yeⁿ'e Moisés ngaⁿ'ā nduudu cuaacu yeⁿ'é naachi Ndyuūs ngaⁿ'a ntiiⁿ'nyuⁿ yā ndíí tiempo chí ndā Juan miiⁿ ná iⁿ'yeeⁿdí 'cūū. ¹⁴ Ndúúⁿti chí ndís'tiī neⁿ'e nī 'caandiveeⁿ nī nduudu yeⁿ'e profetas ndúú^cú nduudu yeⁿ'e ley miiⁿ, tuu'mi ní cadíⁿnuuⁿ nī chí Juan miiⁿ ní saⁿ'ā chí profeta Elías dinguuⁿ yā chí canéé chí ndaa sa. ¹⁵ Ndís'tiī chí véé veéⁿ nī 'caandiveeⁿ nī yeⁿ'é.

¹⁶ ¿De'ε tan'dúú^cā 'iiⁿ'yāⁿ chí snéé yā na iⁿ'yeeⁿdí 'cūū maaⁿ? 'Iiⁿ'yāⁿ s'eeⁿ tan'dúú^cā saⁿ'ā n'gaiyāá chí n'geεteε nii'vēē ní duúchi sa ní n'gai sa compañeros yeⁿ'e sa. ¹⁷ Ní ngaⁿ'a sa: 'Tiiví 'nū flauta cáávā baile naati nguéé inde'éí nī. Ní chíita 'nū canción chí ndaachíí tan'dúú^cā canciones cáávā tináⁿ'ā naati nguéé cheεcu nī. ¹⁸ Juan chí cheεdínuūⁿnīⁿ sa ndā sa. Nguéé che'e sa pan, nguéé chí'i sa vino ní ndís'tiī ngaⁿ'á nī chí saⁿ'ā miiⁿ ní canee sa ndúú^cú espíritu yeⁿ'e yááⁿ'nguiinūⁿ. ¹⁹ 'Úú ní ndaa, 'úú chí Saⁿ'ā chí Daiyá Ndyuūs 'úú. Ní nge'é ní ngi'í. Tuu'mi ní ndís'tiī ngaⁿ'a nī yeⁿ'é: Cuin'dííchí nī. 'Áámá saⁿ'ā chí n'deēe n'dái nge'e sa ní ngi'i taavi sá vino. Ní ngaⁿ'á nī chí 'úú ní saⁿ'ā chí n'dai ndúú^cú 'iiⁿ'yāⁿ publicanos chí cobradores chí inn'guεε yā yeⁿ'e yáⁿ'āa ndúú^cú 'iiⁿ'yāⁿ chí dinuuⁿndi yā. Nducyaaca 'iiⁿ'yāⁿ deenu yā chí vaadí deenu miiⁿ ní yeⁿ'é Ndyuūs. Ní 'iiⁿ'yāⁿ ch'iⁿ'í yā vaadí deenu miiⁿ cáávā dendu'ū chí n'daācā chí díⁿ yā ti yeⁿ'é Ndyuūs 'iiⁿ'yāⁿ.

De'ε chúú^cā ya'āi 'iiⁿ'yāⁿ yeⁿ'e yááⁿ naachi nguéé indaacadaamí yā yeⁿ'ē nuuⁿndi yeⁿ'é yā

(Lc. 10.13-15)

²⁰ Jesús tucá'a yā díⁿ yā regañar 'iiⁿ'yāⁿ s'eeⁿ na yááⁿ s'eeⁿ naachi diiⁿ yā nééné n'deēe vaadí n'giinu ti 'iiⁿ'yāⁿ yeⁿ'e yááⁿ miiⁿ 'āā cuéé ndaacadaamí yā yeⁿ'ē núúⁿndí yeⁿ'e yā. Ní ngaⁿ'a yā 'tíicā: ²¹ De'ε chúú^cā ya'āi yeⁿ'é ndís'tiī 'iiⁿ'yāⁿ yeⁿ'e yááⁿ Corazín. De'ε chúú^cā ya'āi yeⁿ'ē ndís'tiī 'iiⁿ'yāⁿ yeⁿ'e yááⁿ Betsaida ti ndúúⁿti chí chíi vaadí n'giinu na yááⁿ Tiro

ndúúcu yáaⁿ Sidón tan'dúúcā chí chíi nguuaⁿ ndís'tií, tuu'mi ní 'iiⁿ'yāⁿ yeⁿe yáⁿ'āa s'eeⁿ 'āā 'naaⁿ tiempo ndaacadaamí yā yeⁿe nuuⁿndi yeⁿ'é yā. Ní ch'iⁿ'í yā 'iiⁿ'yāⁿ tan'dúúcā costumbre yeⁿ'é yā chí neené ya'ai yā. Ní ch'εetinúuⁿ yā catecaí yā yeⁿe chí dínnūⁿ ní ch'εeté yā nguuaⁿ yaíyāā. ²² 'Úú ngaⁿ'á ngí ndís'tií ti nguuvi chí Ndyuūs caaⁿ'máⁿ yā nuuⁿndi yeⁿ'é 'iiⁿ'yāⁿ nguéé ya'āi ca 'cueenú yā cuuvi 'iiⁿ'yāⁿ yeⁿ'é yáⁿ'āa Tiro ndúúcu 'iiⁿ'yāⁿ yeⁿ'é yáⁿ'āa Sidón nguéé ti ndís'tií. ²³ Ndís'tií 'iiⁿ'yāⁿ yeⁿ'é yáⁿ'āa Capernaum, ¿'áa cuuvi caⁿ'á nī na va'ai chεeti nguuvi? Nguéé cuuvi. Caⁿ'á nī infierno ti nguéé 't'éénu nī nduudu cuaacu yeⁿ'é ndúúcu vaadi n'giinu chí diiⁿ Ndyuūs. Ndúúti chí chíi vaadi n'giinu na yáⁿ'āa Sodoma tan'dúúcā chí chíi nguuaⁿ ndís'tií tuu'mi ní 'iiⁿ'yāⁿ yeⁿ'é yáⁿ'āa 'cūū 'āā 't'éénu yā. Ní yáⁿ'āa 'cūū 'āā canéé ndíi maaⁿ. ²⁴ 'Úú ngaⁿ'á ngí ndís'tií ti nguuvi chí Ndyuūs caaⁿ'máⁿ yā nuuⁿndi yeⁿ'é 'iiⁿ'yāⁿ nguéé ya'āi ca 'cueenú yā cuuvi 'iiⁿ'yāⁿ yeⁿ'é yáⁿ'āa Sodoma nguéé ti ndís'tií.

Cuchíi nī nanaaⁿ 'úú ní ntaavi'tuunúúⁿ nī (Lc. 10.21-22)

²⁵ Ní tiempo miiⁿ ní Jesús nan'guεεcútaⁿ a yā yeⁿ'é yā ní caⁿ'a yā: N'dií Chiidá chí 'iiví nī yeⁿ'é va'ai chεeti nguuvi ndúúcu yáⁿ'āa 'cūū, 'úú ca'á gracias n'dií caati snuuⁿ n'dé'ei nī nduudu 'cūū yeⁿ'é 'iiⁿ'yāⁿ chí déénu ca yā ndúúcu 'iiⁿ'yāⁿ chí n'dee n'dái tuumicádínuuⁿ yā, ní ca'a nī chí cadínuuⁿ 'iiⁿ'yāⁿ chí ndiicúuⁿ yā chí nguéé n'dee cá déénu yā. ²⁶ 'Tíicā díiⁿ nī Chiidá ti 'tíicā neⁿ'e nī chí n'daācā diiⁿ nī ti n'daācā.

²⁷ Ní Jesús caⁿ'a yā chíi yā discípulos yeⁿ'é yā: Chiidá ní teé yā 'úú tanducuéⁿ'é dendu'ū. Mar 'áámá 'iiⁿ'yāⁿ nguéé deenu yā táácā 'áámá n'dyáⁿ'ā Daiya Dendyuūs, dámaāⁿ Chiidá yā. Mar 'áámá 'iiⁿ'yāⁿ nguéé deenu yā táácā Dendyuūs Chiida yú, dámaāⁿ 'áámá n'dyáⁿ'ā Daiyá yā ndúúcu 'āā du'ú nūuⁿ 'iiⁿ'yāⁿ chí Daiyá Ndyuūs neⁿ'é yā 'cuuⁿ'miⁿ yā Chiida yā. ²⁸ Cuchíi nī nanaaⁿ 'úú, ndís'tií, chí véé n'dee n'dái cuidado yeⁿ'é nī chí tan'dúúcā 'áámá carga yeⁿ'é nī ní 'úú ní díiⁿ chí ntaavi'tuunúúⁿ nī. ²⁹ Ní díiⁿ nī tan'dúúcā chí can'dée nī yugo yeⁿ'é chí 'tíicā. 'Cueeⁿ nī yeⁿ'é 'úú caati 'úú ní ndiicúuⁿ 'úú ní nééné n'dai staava yeⁿ'é, tuu'mi ní ndaācā nī vaadi ntaavi'tuunúúⁿ yeⁿ'é alma yeⁿ'é nī. ³⁰ Caati yugo yeⁿ'é chí teé ndís'tií nguéé ngiⁿ'ií. Candée nī chεedí yeⁿ'é ní nguéé cuuvi n'gii yeⁿ'é nī.

12

Discípulos yeⁿ'é Jesús sta'á yā trigo nguuvi chí ntaavi'tuunúúⁿ 'iiⁿ'yāⁿ Israel (Mr. 2.23-28; Lc. 6.1-5)

¹ 'Áámá nguuvi sábadu chí ntaavi'tuunúúⁿ 'iiⁿ'yāⁿ Israel, Jesús cueⁿ'e yā ndúúcu discípulos yeⁿ'é yā cuaaⁿ naachí 'iiⁿ'yāⁿ 'āā ndíiⁿ ntiinnyúⁿ yā ní míiⁿ ní véé trigo. Discípulos yeⁿ'é Jesús miiⁿ chíi cuiicú yā ní sta'á yā trigo ní che'e yā. ² 'Iiⁿ'yāⁿ fariseos n'diichí yā chuū, ní caⁿ'a yā chíi yā Jesús miiⁿ: Cuin'diichí nī, discípulos yeⁿ'é nī ní nguéé díiⁿ yā tan'dúúcā chí ngaⁿ'a ley yeⁿ'é nguuvi chí ntaavi'tuunúúⁿ 'iiⁿ'yāⁿ.

³ Jesús caⁿ'a yā chíi yā 'iiⁿ'yāⁿ s'eeⁿ: ¿'Áa nguéé n'geeⁿ nī táácā díiⁿ David miiⁿ ndúúcu 'iiⁿ'yāⁿ chí cueⁿ'e ndúúcu sa taachi chíi cuiicú yā? ⁴ David miiⁿ sndáa yā ná yáacū yeⁿ'é Ndyuūs ní sta'á yā pan chí canéé na mesa yeⁿ'é nátaí. Ní che'é yā ní ca'a yā chí che'e 'iiⁿ'yāⁿ chí nduucú yā. Pan miiⁿ dámaāⁿ chiiduú s'eeⁿ cuuvi che'é yā. Ní tan'dúúcā chí ngaⁿ'a na ley miiⁿ nguéé canéé chí che'e rey David ní nguéé cánéé chí che'é 'iiⁿ'yāⁿ chí ndúúcu yā. ⁵ ¿'Áa nguéé n'geeⁿ ndís'tií na ley yeⁿ'é Moisés chí díiⁿ chíiduú s'eeⁿ? Nguéé ntaavi'tuunúúⁿ yā yeⁿ'é ntiinnyuⁿ yeⁿ'é yaācū tínnūⁿ nguuvi chí ntaavi'tuunúúⁿ 'iiⁿ'yāⁿ. Chiidu s'eeⁿ nguéé díiⁿ yā tan'dúúcā chí ngaⁿ'a ley yeⁿ'é Moisés ní nguéé nuuⁿndi yeⁿ'é yā. ⁶ 'Úú ngaⁿ'á ngí ndís'tií chí véé 'áámá 'iiⁿ'yāⁿ chí ch'εete ca yā chí yaācū templo ní canee yā ndúúcu ndís'tií. ⁷ Ndís'tií nguéé déénu nī de'ε chí neⁿ'e caaⁿ'maⁿ chí canéé nguūⁿ na libro yeⁿ'é Ndyuūs yeⁿ'é chuū: Neⁿ'é chí 'iiⁿ'yāⁿ ya'āi 'iinú yā 'iiⁿ'yāⁿ caavā 'úú. Nguéé neⁿ'é chí 'caaⁿ'nuⁿ yā 'iiti ní téé yā 'iiti caavā ofrenda yeⁿ'é 'úú. Nduuti chí cadínuuⁿ nī tuu'mi ní nguéé díiⁿ nī condenar 'iiⁿ'yāⁿ chí nguéé nuuⁿndi yeⁿ'é yā. ⁸ 'Tíicā Saⁿ'ā chí Daiyá Dendyuūs miiⁿ véé ntúūⁿ poder yeⁿ'é sa yeⁿ'é nguuvi chí ntaavi'tuunúúⁿ 'iiⁿ'yāⁿ.

Saⁿ'ā chi ntí'i ta'ā sa
(Mr. 3.1-6; Lc. 6.6-11)

⁹ Cuayiivi ní Jesús cheⁿ'e yā na yáacū sinagoga yeⁿ'é 'iiⁿ'yāⁿ yeⁿ'e yaāⁿ miiⁿ.
¹⁰ Cuin'diichí nī. Miiⁿ ní canéé 'áámá saⁿ'ā chi ntí'i ta'ā sa. Snéé 'iiⁿ'yāⁿ miiⁿ chi tiinguunéⁿ yā Jesús miiⁿ ní caⁿ'a yā: ¿'Áá canéé na ley yeⁿ'e yú chí nduuvā yeⁿ'é 'iiⁿ'yāⁿ nguuví chi ntaavi'tuunúúⁿ 'iiⁿ'yāⁿ? Chuū ní caⁿ'a yā ti neⁿ'é yā cuuvi caaⁿ'maⁿ yā núúⁿndí yeⁿ'e Jesús miiⁿ.

¹¹ Jesús caⁿ'a yā chii yā 'iiⁿ'yāⁿ s'eeⁿ: ¿Dú'u 'aama saⁿ'ā nguuaⁿ ndís'tií chi véé 'áámá 'iiti cuūchí yeⁿ'é sa? Ní ndúúti chi cun'daa nuúⁿ tī na 'áámá yiivi yáⁿ'āa nguuví chi ntaavi'tuunúúⁿ 'iiⁿ'yāⁿ, ¿'áá nguéé ntuun'dáa sa 'iiti nguuví miiⁿ? ¹² ¿'Áá nguéé yaⁿ'ai ca chií'vē 'áámá 'iiⁿ'yāⁿ nguéé ti 'áámá 'iiti cuūchí? 'Tíicā diiⁿ yú chí n'daācā nguuví chí ntaavi'tuunúúⁿ 'iiⁿ'yāⁿ.

¹³ Tuu'mi ní Jesús caⁿ'a yā chii yā saⁿ'ā chí ya'āi yeⁿ'é sa: N'doo dí ta'a di. Saⁿ'ā miiⁿ ní n'doō sá ta'ā sa ní ta'ā sa nduūví n'dáácā tan'dúúca taama. ¹⁴ 'Iiⁿ'yāⁿ fariseos nan'dáa yā cheeti yaācū ní nduuvidaamá yā chí caⁿ'a yā contra yeⁿ'e Jesús miiⁿ ti neⁿ'é yā 'caaⁿ'núⁿ yā 'iiⁿ'yāⁿ.

'Áámá nduudu chí caaⁿ'maⁿ yeⁿ'e Jesús

¹⁵ Taachí Jesús chicadínuuⁿ yā chuū nan'daa yā miiⁿ. Neené 'yaaⁿ 'iiⁿ'yāⁿ cueⁿ'e yā ndúúcu Jesús miiⁿ ní Jesús miiⁿ idiíⁿ yā chi nduūvā yeⁿ'e nducyáácá 'iiⁿ'yāⁿ. ¹⁶ Ní caⁿ'a yā chii yā 'iiⁿ'yāⁿ s'eeⁿ chi nguéé caaⁿ'maⁿ yā cuuví yā tanáⁿ'ā 'iiⁿ'yāⁿ du'u yā. ¹⁷ Ní 'iicu cuaacu chí profeta Isaiás miiⁿ caⁿ'a yā ndii cuááⁿ vmnaaⁿ taachí dinguuⁿ yā 'tíicā. Nduyūs ngaⁿ'a yā:

¹⁸ Sáⁿ'a 'cūū ni idichí'vē 'úú. 'Úú chínndēēvé saⁿ'á 'cūū chi neⁿ'é ní neene yeenú ndúúcu sa. 'Úú ní cu'neéⁿ Espíritu N'dai yeⁿ'é vmnááⁿ yeⁿ'e sa. Saⁿ'á 'cūū caaⁿ'maⁿ sa yeⁿ'e ley yeⁿ'é nanááⁿ nducyáácá naciones na iⁿ'yeeⁿdí 'cūū.

¹⁹ Nguéé 'cuuⁿ'maⁿ sa ndíí nguéé ndúú 'cuāi ra sa. Mar 'áámá 'iiⁿ'yāⁿ na yúúni nguéé 'caandiveéⁿ yā nduudú yeⁿ'e sa ti nguéé caaⁿ'maⁿ yúúdu sa cuaaⁿ na yúúni.

²⁰ Saⁿ'á 'cūū nginnee sa 'iiⁿ'yāⁿ chí véé ca cuidados yeⁿ'e yā, 'iiⁿ'yāⁿ chí tan'dúúca 'áámá taaⁿ ndúú chí 'aa ndēētuú 'tēé 'tēé, 'tiicá yā. Ndíí nguéé ndúú chí ntuūví sa 'aama mecha yeⁿ'e quinque chí ican'dáa ca 'yaāⁿ'míⁿ yeⁿ'e. Ndíí nguéé candéε sa nduudu cuaacu yeⁿ'é Nduyūs ndii taachi a fuerza 'āā cuéé dē'ē vεε chí cucheε sa ndúúcu vaadī cuaacu miiⁿ yeⁿ'e tanducuéⁿ'ē.

²¹ Ní 'íicú nducyáácá 'iiⁿ'yāⁿ yeⁿ'e naciones yeⁿ'e iⁿ'yeeⁿdí 'cūū cūnee ngínú yā yeⁿ'e saⁿ'á 'cūū chí cu'téenu yā yeⁿ'e sa.

'Iiⁿ'yāⁿ ngaⁿ'á yā chí Jesús véé poder yeⁿ'e yááⁿ'guiinūuⁿ ndúúcu yā

(Mr. 3.19-30; Lc. 11.14-23; 12.10)

²² Tuu'mi ní 'iiⁿ'yāⁿ ndaa yā nanááⁿ Jesús ní ndéé yā 'áámá saⁿ'ā chí canee sa ndúúcu espíritu yeⁿ'e yááⁿ'guiinūuⁿ yeⁿ'é chí ngueenáaⁿ sa ndúúcu chí nguéé ngii ngaⁿ'a sa. Jesús miiⁿ díⁿ yā chí nduūvā yeⁿ'é sa. Ní saⁿ'ā chí ngueenáaⁿ miiⁿ ní inaaⁿ sa ní ngíí ngaⁿ'ā sa. ²³ Nducyaaca 'iiⁿ'yāⁿ ngeⁿ'e yiinú yā ní ngaⁿ'a yā: ¿'Áá sáⁿ'a 'cūū Daiya 'iiⁿ'yāⁿ chí ndaataá yeⁿ'é David?

²⁴ Ní taachi 'iiⁿ'yāⁿ fariseos ch'iindiveéⁿ yā chuū ní caⁿ'a yā: Sáⁿ'a 'cūū nitun'dáa sa espíritu yeⁿ'e yááⁿ'guiinūuⁿ cáāvā Beelzebú, chí Satanás chí ngaⁿ'ā ntiinnyuⁿ sa yeⁿ'e espíritus yeⁿ'e yááⁿ'guiinūuⁿ.

²⁵ Jesús miiⁿ déenu yā chí nadacadínūuⁿ 'iiⁿ'yāⁿ s'eeⁿ ní caⁿ'a yā chii yā 'iiⁿ'yāⁿ s'eeⁿ: 'Áámá gobierno chí ngaⁿ'a ntiinnyúⁿ yā yeⁿ'e yáⁿ'āa chí véé 'uūví partido yā chí nguⁿ'u yā 'áámá yā ndúúcu taama yā, tuu'mi ní nguεε cuuvi 'naaⁿ chí 'iiⁿ'ntyéⁿ'e yā. Ní nducuéⁿ'ē yáⁿ'āa o va'ai naachi 'iiⁿ'yāⁿ véé 'uūví vaanicadínūuⁿ yeⁿ'e yā nguéé cuuvi nduuvidaamá yā. ²⁶ 'Tiicá ntúūⁿ nduuti chí yááⁿ'guiinūuⁿ tun'dáa sa espíritus yeⁿ'e yááⁿ'guiinūuⁿ véé 'uūví vaanicadínūuⁿ yeⁿ'é sa ní cuáácú chí nguⁿ'u sa yeⁿ'é maaⁿ sa ní véé 'uūví partido yeⁿ'e sa ní 'cuiinu sa. ²⁷ Ndís'tií ní ngaⁿ'a nī chí 'úú itun'daá espíritu yeⁿ'e yááⁿ'guiinūuⁿ

yeⁿe 'iiⁿ'yāⁿ ndúúcu poder yeⁿe Beelzebú chí Satanás chí ngaⁿa ntiiⁿnyuⁿ sa yeⁿe espíritus yeⁿe yááⁿ'n'guiinūⁿ. Ndúúti chí 'tíicā tuu'mi ní, ¿ndúúcu du'ū rá poder yeⁿe tun'daá 'iiⁿ'yāⁿ chí ndúúcu nī espíritu yeⁿe yááⁿ'n'guiinūⁿ? Chíin chí diiⁿ 'iiⁿ'yāⁿ chí ndúúcu nī n'giⁿ'i yā chí nguéé 'tíicā chí ngaⁿ'á nī. ²⁸ Ndúúti chí 'úú itun'daá espíritus yeⁿe yááⁿ'n'guiinūⁿ cáávā poder yeⁿe Espíritu N'dai yeⁿe Dendyuūs, cuaacu níⁿnyúⁿ naachí Ndyuūs ngaⁿ'a ntiiⁿnyúⁿ yā ndaā nanááⁿ ndis'tiī.

²⁹ Mar 'áámá 'iiⁿ'yāⁿ nguεε cuuví cundaa yā va'ai yeⁿe 'aama saⁿ'ā chí véé fuerzas yeⁿe sa ní divíi yā chí vεε yeⁿe sa. ¿Canéé chí cachiichí yā saⁿ'a vmnááⁿ vmnaaⁿ? Cuayiivi ní cuuví diíⁿ yā tun'daá yā dendu'ū chí snúūⁿ va'ai yeⁿe sa.

³⁰ 'Iiⁿ'yāⁿ chí nguéé canéé yā lado yeⁿ'é, 'iiⁿ'yāⁿ miiⁿ canéé yā contra yeⁿ'é. 'Iiⁿ'yāⁿ chí nguéé dáámá diíⁿ yā cosechar nduucú, tuu'mi ní diíⁿ yā tan'dúúca chí ingée tanducueⁿ'ē cosecha.

³¹ Chíin chí nduudu cuaacu chí 'úú ngaⁿ'á ngiiⁿ ndís'tiī: Tanducueⁿ'ē nuuⁿndi chí diíⁿ 'iiⁿ'yāⁿ ndúúcu nduudu taaⁿ chí nguéé n'dáacā chí ngaⁿ'a yā contra yeⁿe Ndyuūs, Ndyuūs nadach'εεcú yā yeⁿe yā. Naati 'iiⁿ'yāⁿ chí ngaⁿ'a yā nduudu taaⁿ chí nguéé n'dáacā chí contra yeⁿe Espíritu N'dai yeⁿe Ndyuūs ní nguéé nch'εεcú yēⁿe yā maaⁿ ní tiempo chí cuchii. ³² 'Aā du'ú nūuⁿ chí caaⁿ'maⁿ nduudu chí nguéé n'dáacā contra yeⁿe Saⁿ'ā chí Daiyá Ndyuūs ní cuuvi nach'εεcu yeⁿe yā. Naati 'iiⁿ'yāⁿ chí nguéé n'daācā ngaⁿ'a yā contra yeⁿe Espíritu N'dai yeⁿe Ndyuūs ní nguéé cuuvi nach'εεcú yeⁿe yā ndíi nguéé ndúú na iⁿ'yeeⁿdí 'cūū ndíi nguéé ndúú táámá iⁿ'yeeⁿdi chí cuchii.

'Áámá yáⁿ'á ní ngiiⁿ'i cucáávā n'gui'i yeⁿ'ē
(Lc. 6.43-45)

³³ 'Tiicā ntúūⁿ caⁿ'a Jesús: Ndúúti chí véé 'áámá yáⁿ'á chí n'dáacā yeⁿ'é nī tuu'mi ní cuuvi n'gui'i n'dáacā yeⁿ'ē. Níicú ndúutī chí véé 'áámá yáⁿ'á chí nguéé n'daācā yeⁿ'é nī nguεε n'dáacā cuuvi n'gui'i yeⁿ'ē. Cáávā n'gui'i yeⁿe yáⁿ'á ituumicadínuuⁿ yā táacā yáⁿ'á nduuti chí n'dai o nduuti chí nguéé n'dai. ³⁴ Ndís'tiī, tan'dúúca ndaata yeⁿ'ē cúú 'tiicā nī. ¿Táacā ngaⁿ'a nī cosas chí n'daācā ní idiiⁿ nī chí nguεε n'daācā? Ti chíin chí ngaⁿ'a nī ndúúcu cheendí nī ngiica na staava yeⁿ'é nī. ³⁵ Saⁿ'ā chí n'dái idiiⁿ sa dendú'ū chí n'daācā chí nadacadínuuⁿ sa na staava yeⁿe sa chí n'daācā. Saⁿ'a chí cunncaā idiiⁿ sa tanducueⁿ'ē chí nguεε n'daācā nadacadínuuⁿ sa caati staava yeⁿe sa nguéé n'dáacā. Nduudu chí ngaⁿ'ā sa ngiica sa yeⁿ'ē chí ndiituú na staava yeⁿe sa. ³⁶ Naati 'úú ní ngaⁿ'á ngiiⁿ ndís'tiī: Nducueⁿ'ē nduudu chí nguéé dε'ē vεε chíi'vε chí 'iiⁿ'yāⁿ ngaⁿ'a yā, nducyááca yā ní cánéé chí nca'á yā cuenta yeⁿe nduudu chí nguεε n'daācā chí caⁿ'a yā nguuvi chí Ndyuūs caaⁿ'maⁿ yā yeⁿe nuuⁿndi yeⁿe yā. ³⁷ Ti cáávā nduudu yeⁿe nī chí n'daācā nduuví n'dai nī ní 'iicu cáávā nduudu yeⁿ'é nī nduuti chí nguéé n'dáacā cuuví nī castigo.

'Iiⁿ'yāⁿ chí nguéé n'daācā néⁿe yā snaaⁿ yā señales
(Mr. 8.12; Lc. 11.29-32)

³⁸ Tuu'mi ní n'duuvi maestros yeⁿe ley ndúúcu n'duuvi saⁿ'ā fariseos ngaⁿ'a sá ngii sa Jesús miiⁿ ní caⁿ'a sa: N'díi maestro, néⁿe 'nū snaaⁿ 'nū 'áámá señal chí diíⁿ nī.

³⁹ Jesús nán'guεεcútaⁿ'a yā yeⁿe saⁿ'ā s'eeⁿ ní caⁿ'a yā: 'Iiⁿ'yāⁿ cunncaā ndúúcu 'iiⁿ'yāⁿ chí nguéé i'téenu yā Ndyuūs neⁿe yā snaaⁿ yā señal naati señal nguéé snaaⁿ yā. Dámaaⁿ snaaⁿ yā señal yeⁿe profeta Jonás chí ndíi cuaaⁿ vmnaaⁿ canee nguūⁿ na libro yeⁿe Ndyuūs. ⁴⁰ Ti tan'dúúca Jonás canúúⁿ sá chεeti 'yaācā ch'εete 'iinū nguuvi 'iinū n'gaaⁿ 'tíicā canee chí cūnee Saⁿ'ā chí Daiyá Ndyuūs mááⁿ yáⁿ'āa 'cúú 'iinū nguuvi 'iinū n'gaaⁿ.

⁴¹ Na nguuvi yeⁿe juicio 'iiⁿ'yāⁿ chí ch'εetinée yā na yáāⁿ chí nguuvi Nínive nducueⁿ'ē yā contra yeⁿe 'iiⁿ'yāⁿ chí snéé maaⁿnguuvi taachí Ndyuūs caaⁿ'máⁿ yā yeⁿ'ē nuuⁿndi yeⁿe 'iiⁿ'yāⁿ, ní cuuví yā condenado. 'Tíicā tí 'iiⁿ'yāⁿ yeⁿe yáāⁿ Nínive ní ndaacadaamí yā taachi profeta Jonás miiⁿ ndii cuááⁿ vmnaaⁿ caⁿ'a sá nduudu cuaacu yeⁿe Ndyuūs. Cuin'diichí nī 'áámá saⁿ'ā chí ch'εete ca nguéé tí profeta Jonás miiⁿ canee sa 'muuⁿ na lugar 'cūū. ⁴² 'Tiicā ntúūⁿ nguuvi yeⁿe juicio n'daataá reina chí tiempo chí chó'ōo ngaⁿ'ā

ntiiⁿnyuⁿ tá yeⁿ'e lado yeⁿ'e Sur caⁿ'a tá nducueeⁿ tá contra yeⁿ'e 'iiⁿ'yāⁿ chi snée yā maaⁿnguuvⁱ taachi Ndyuūs caāⁿ'māⁿ yā nuuⁿndi yeⁿ'é 'iiⁿ'yāⁿ. Ní táⁿ'ā miiⁿ ní diiⁿ tá condenar 'iiⁿ'yāⁿ chi snée yā maaⁿnguuvⁱ ti táⁿ'ā miiⁿ ndaā tá ndí na yaⁿ'ai taaví yeⁿ'ē yáⁿ'āa. Ní ngiica tá ní ch'iindiveeⁿ tá yeⁿ'ē vaadi deenu yeⁿ'e rey Salomón. Cuin'díichí nī 'áámá saⁿ'ā chi ch'εετε ca vaadi deenu yeⁿ'e sa canee sa 'muuⁿ nguéeⁿ ti Salomón miiⁿ.

Espíritu yeⁿ'e yááⁿ'n'guiinūuⁿ chí nanguεεcunée na saⁿ'ā

(Lc. 11.24-26)

⁴³ Caⁿ'a Jesús: Taachí espíritu yeⁿ'e yááⁿ'n'guiinūuⁿ nacan'daa na 'áámá saⁿ'ā cachiica na yáⁿ'āa cuūⁿ'māⁿ naachi nguεε ch'εεtinée 'iiⁿ'yāⁿ ní n'nuūuⁿ naachi cuuvi ntaavi'tuunūuⁿ ní nguéeⁿ ndaācā. ⁴⁴ Tuu'mi ní espíritu yeⁿ'e yááⁿ'n'guiinūuⁿ ngaⁿ'a: Nanguεεcuneeé na vaacú naachi chiicá. Taachí nguεεcūnéee ní ndaā na vaacu miiⁿ ndaācā saⁿ'a miiⁿ ní tan'dúúca 'aama va'āi chi n'dai ní nduuvⁱ deεvé ndúúcu nducueⁿ'e na lugar yeⁿ'ē. ⁴⁵ Tuu'mi ní espíritu miiⁿ cueⁿ'e ní in'nuuⁿ tá ná ndēechē espíritus chí cunncāa ca chí cuuví maāⁿ. Ní ndaā espíritu miiⁿ ndúúcu ndēechē espíritus ní ch'εεtinée na saⁿ'ā miiⁿ. Cuayivi ní n'geenu sa ngi taavi ca ní cunncāa ca canee sa nguéeⁿ ti vmnaaⁿ. 'Tiicá ntúūⁿ 'cuenú yā cuuvi 'iiⁿ'yāⁿ chi snée yā maaⁿ ti nguεε n'daacā idiíⁿ yā.

Chεεcú Jesús miiⁿ ndúúcu 'díinu yā

(Mr. 3.31-35; Lc. 8.19-21)

⁴⁶ Taachí Jesús miiⁿ índeé yā ndúúcu 'iiⁿ'yāⁿ, tuu'mi ní ndaā niiⁿnuúⁿ chεεcú yā ndúúcu 'díinu yā ní snée yā chuva'āi. Ní neⁿ'e yā ndeé yā ndúúcu Jesús miiⁿ. ⁴⁷ 'Áámá 'iiⁿ'yāⁿ caⁿ'a yā chii yā Jesús miiⁿ: N'dií Jesús, cuin'díichí nī. Chεεcú nī ndúúcu 'díinu nī snée yā chuva'āi ní neⁿ'e yā ndee yā ndúúcu nī.

⁴⁸ Jesús nan'guεεcútaⁿ'a yā ní caⁿ'a yā chii yā saⁿ'a miiⁿ: ¿Dú'ū chí chεεcú miiⁿ? o ¿dú'ū chí 'diinú miiⁿ?

⁴⁹ Ní n'doó yā ta'á yā naachi snée discípulos ní caⁿ'a yā: Cuin'diichí nī, 'iiⁿ'yāⁿ s'ūuⁿ ní tan'dúúca chí chεεcú ndúúcu 'diinú, 'tíica yā. ⁵⁰ Tí 'āa du'ú nūuⁿ 'iiⁿ'yāⁿ chí díⁿ yā tan'dúúca chí neⁿ'e Chiidá chí canee yā ná va'ai chεeti nguuvⁱ tuu'mi ní 'iiⁿ'yāⁿ s'eeⁿ chí 'diinú ndúúcu vi'í ndúúcu chεεcú.

13

'Áámá ejemplo yeⁿ'ē sáⁿ'ā chi ngiīnū ndaata

(Mr. 4.1-9; Lc. 8.4-8)

¹ Nguuvi miiⁿ Jesús can'dáa yā va'āi miiⁿ ní ch'iīndi yā niiⁿnuúⁿ ná nuūⁿnīⁿ'yáⁿ'ā. ² Ní nééné n'deēe 'iiⁿ'yāⁿ ndúúvidaamá yā naachi canée Jesús. Tuu'mi ní Jesús ndaa yā na 'áámá barco ní ch'iīndí yā. Nducyáácá 'iiⁿ'yāⁿ snée yā 'diituu núuⁿnīⁿ naachi vεε yáⁿ'āa ndúútiī. ³ Ní Jesús caⁿ'a yā nééné n'deēe náⁿ ndúúcu parábolas chí ejemplos tan'dúúca dendu'ū chí véé iⁿ'yeeⁿdí 'cūū. Ní caⁿ'a yā chuū: 'Áámá saⁿ'ā chí ngiīnū ndaata can'dáa sa chiīnū sa ndaata. ⁴ Taachí chiīnū sa, 'áámá duutu ndaata míⁿ ní chiiya cyúúní. Ndaā 'yaadá ni ch'iīnu che'e tī. ⁵ Náⁿ'ā duutu ndaata miiⁿ ní chiiya na tuūu naachi nguéeⁿ ch'εεte yáⁿ'āa. Maaⁿnchεεté nūuⁿ can'dáa ti nguéeⁿ ch'εεte yáⁿ'āa yeⁿ'ē. ⁶ Can'dáa 'yáⁿ'ā ní yaata miiⁿ ní ti'i ti nguéeⁿ dii'yu yeⁿ'ē. ⁷ 'Iicu náⁿ'ā duutu ndaata miiⁿ ní chiiya nguaaⁿ yááⁿ. Yááⁿ miiⁿ ní ch'iīta ní di'vaāchí yeⁿ'ē yaata miiⁿ. ⁸ 'Iicu náⁿ'ā duutu ndaata miiⁿ ní chiiya na yáⁿ'āa n'daacā ní n'daacā chiī cosecha yeⁿ'ē. 'Áámá ní chiī 'áámá ciento yeⁿ'ē, taama ní chiī 'iīnū ngεecu yeⁿ'ē, ni táámá ní chiī ndíicú ndiichi yeⁿ'ē. ⁹ 'Iiⁿ'yāⁿ chí véé veéⁿ yā ní 'caandiveéⁿ yā nduudu yeⁿ'é.

Chíⁿ chí neⁿ'ē caāⁿ'māⁿ ejemplo miiⁿ

(Mr. 4.10-20; Lc. 8.9-15)

¹⁰ Tuu'mi ní discípulos ndaá yā nanááⁿ Jesús miiⁿ ní caⁿ'a yā chii yā Jesús: ¿De'ε cáávā chí ndúúcu ejemplos ngi'cueeⁿ nī 'iiⁿ'yāⁿ?

¹¹ Jesús nan'guεεcútaⁿ'a yā ní caⁿ'a yā chii yā discípulos yeⁿ'e yā: 'Áa ndís'tií nūuⁿ ndaācā chicadínuuⁿ nī dendu'ū chí canúúⁿ n'de'ei yeⁿ'e naachí Ndyuūs ngaⁿ'a ntiiⁿnyuⁿ

yā ná va'ai cheeti nguuví, naatí taná'ā 'ii'yāⁿ s'eeⁿ nguéé canéé chí cadíínuuⁿ yā. ¹² 'Ii'yāⁿ chí véé yeⁿe yā Ndyuūs ca'a cá yā ní n'deē cá cuuvi yeⁿe yā. 'Ii'yāⁿ chí nguéé véé yeⁿe yā, 'áará chí dúú'ví nūuⁿ chí nadacádíínuuⁿ yā chí véé yeⁿe yā chuū ní Ndyuūs ndivíi yā yeⁿe yā. ¹³ Cáávā chííⁿ chí ngaⁿ'á ngii 'ii'yāⁿ ndúúcu ejemplos caati inaaⁿ yā naati n'geetinee yā tan'dúúca chí nguéé inaaⁿ yā. Ní n'giindiveéⁿ yā naati n'geetinee yā tan'dúúca chí nguéé n'giindiveéⁿ yā ndíi nguéé ndúú tuumicadiinuⁿ yā. ¹⁴ Ní 'íicú cuuvi cuaacu yeⁿe 'ii'yāⁿ s'eeⁿ chííⁿ chí caⁿ'a profeta Isaías ndii cuááⁿ vmaaaⁿ taachi caⁿ'a yā 'túúca ní canéé nguūⁿ na libro yeⁿe Ndyuūs:

Ndúúcu veéⁿ yā 'caandiveéⁿ yā ní nguεε tuumicadíínuuⁿ yā; ní snaaⁿ yā ní nguéé ca'a yā cuenta yeⁿe.

¹⁵ Caati staava yeⁿe 'ii'yāⁿ s'eeⁿ ní cheechi. Ndúúcu veéⁿ yā n'giindiveéⁿ yā naati nguéé tuumicadíínuuⁿ yā n'daācā. 'Ii'yāⁿ s'eeⁿ ní n'gaadí yā nduutinaaⁿ yā caati nguéé snaaⁿ yā ndúúcu nduutinaaⁿ yā; ní nguéé 'caandiveéⁿ yā ndúúcu veéⁿ yā, ndii nguεε ndúú ituumicadiinúúⁿ yā ndúúcu staava yeⁿe yā, ndii nguéé ndúú ndaacadaamí yā yeⁿe nuuⁿndi yeⁿe yā chí 'úú cuuví nadich'εεcú nuuⁿndi yeⁿe yā.

¹⁶ De'ε chúúca n'dai ndís'tií ti véé nduutinaaⁿ nī chí inaaⁿ nī ní veéⁿ nī chí n'giindiveéⁿ nī. ¹⁷ Ti cuaacu níínyúⁿ 'úú Jesús ngaⁿ'á ngii ndís'tií chí neené 'yaaⁿ 'ii'yāⁿ profetas ndúúcu 'ii'yāⁿ chí n'dai neⁿ'é yā snaaⁿ yā chííⁿ chí ndís'tií inaaⁿ nī naati nguéé n'diichi yā. Neⁿ'e yā 'caandiveéⁿ yā chííⁿ chí ndís'tií n'giindiveéⁿ nī naati nguéé ch'iindiveéⁿ yā.

¹⁸ 'Caandiveeⁿ ndís'tií ejemplo yeⁿe saⁿ'ā chí ngiinū ndaata. ¹⁹ 'Ii'yāⁿ chí n'giindiveéⁿ yā nduudu yeⁿe naachí Ndyuūs ngaⁿ'a ntiiⁿnyúⁿ yā yeⁿe va'ai cheeti nguuví ní nguéé ituumicadíínuuⁿ yā, 'ii'yāⁿ s'eeⁿ tan'dúúca duutu ndaata chí chiiya cuaaⁿ cyúúni. Ndaa yááⁿ n'guiinūⁿ ní sta'ā sa nduudu yeⁿe Ndyuūs chí canéé na staava yeⁿe yā. ²⁰ Ndaata chí chiiya nguaaⁿ tuū ní tan'dúúca 'ii'yāⁿ chí n'giindiveéⁿ yā nduudu yeⁿe Ndyuūs. Ní taachí n'giindiveéⁿ yā nduudu miiⁿ ní yeenú n'dai yā, ²¹ naati nguéé 'áamá cānee na staava yeⁿe yā ní nguéé 'nááⁿ tiempo cūnee. Taachí n'géenu yā ngii ti 'ii'yāⁿ cán'daa yā 'ii'yāⁿ s'eeⁿ cáávā nduudu yeⁿe Ndyuūs, tuu'mí nūuⁿ divíi yā nduudu miiⁿ ní nguéé canéé na staava yeⁿe yā. ²² Ndaata chí chiiya nguaaⁿ yááⁿ ní tan'dúúca 'ii'yāⁿ chí ch'iindiveéⁿ yā nduudu miiⁿ naati neⁿ'e cá yā nducuéⁿe yeⁿe iⁿ'yeeⁿdí 'cūú ndúúcu chí véé. Ní nginnche'éi yā 'ii'yāⁿ. Ní vaadí 'cuiica miiⁿ di'vaachí yeⁿe nduudu miiⁿ ní diiⁿ chí nguéé dichíí'vē nduudu miiⁿ na vida yeⁿe 'ii'yāⁿ s'eeⁿ. ²³ Ndaata chí chiiya na yáⁿ'āa n'dáacā chííⁿ chí tan'dúúca 'ii'yāⁿ chí n'giindiveéⁿ yā nduudu yeⁿe Ndyuūs ní tuumicadiinúúⁿ yā ní i'téenu yā nduudu miiⁿ. Ní n'daācā idiíⁿ yā. Ní nduudu miiⁿ tan'dúúca chí chíi 'aama ciento yeⁿe o chí chíi 'iinū ngeεcu yeⁿe o chí chíi ndiicú ndiichi yeⁿe. 'Tíicā chíi cosecha yeⁿe nduudu miiⁿ.

Ejemplo yeⁿe yaātā chí nguéé n'daācā chí véé nguaaⁿ trigo

²⁴ Jesús miiⁿ ngaⁿ'a yā ngii yā 'ii'yāⁿ s'eeⁿ: Cuuví ndís'tií táámá ejemplo. Ní caaⁿ'máⁿ yeⁿe naachí Ndyuūs ngaⁿ'a ntiiⁿnyúⁿ yā yeⁿe na va'ai cheeti nguuví ní tan'dúúca 'áámá saⁿ'ā chí ngiinū sa ndaata yeⁿe trigo chí n'daācā na campo yeⁿe sa. ²⁵ Taachí mozos cyaadu sa, tuu'mí ní saⁿ'ā chí enemigo yeⁿe sa ndaā sa ní chíinū sa 'daaⁿ'nuⁿ trigo na campo yeⁿe saⁿ'ā miiⁿ nguaaⁿ trigo chí n'daācā miiⁿ, ní cūnaⁿ'a sa. ²⁶ Taachí can'daa yaata yeⁿe ní chíi trigo, tuu'mí ní can'daa nguuví 'daaⁿ'nuⁿ trigo miiⁿ. ²⁷ Tuu'mí ní mozos chí idiiⁿ sa ntiiⁿnyuⁿ na campo miiⁿ ndaa sa nanááⁿ saⁿ'a chí 'iivi yeⁿe campo miiⁿ ní caⁿ'a sa chíi sa 'iivi: N'díi Señor, ¿'áá nguéé chíinū ndaata yeⁿe trigo chí n'daācā na campo yeⁿe nī? ¿Tíi chíicā ndaata 'daaⁿ'nuⁿ trigo? ²⁸ Saⁿ'ā 'iivi miiⁿ ní caⁿ'a sa chíi sa mozos chí idiiⁿ ntiiⁿnyuⁿ: 'Áámá saⁿ'ā enemigo yeⁿe nīnū sa. Mozos ní caⁿ'a sa chíi sa 'iivi sa: ¿'Áá neⁿ'e nī chí caⁿ'a 'nū ní tiicu 'nū yaātā miiⁿ chí nguéé n'daācā? ²⁹ 'Iivi miiⁿ ní caⁿ'a sa chíi sa mozos chí idiiⁿ ntiiⁿnyuⁿ: Nguéé tiicū di 'daaⁿ'nuⁿ trigo miiⁿ caati cuuví tiicú ntúuⁿ di trigo chí n'daācā miiⁿ. ³⁰ Ca'a di lugar chí dáámá 'cuiita ndíi taachi ndaa tiempo yeⁿe cosecha miiⁿ, tuu'mí ní 'úú caaⁿ'máⁿ cuuví 'ii'yāⁿ chí 'caacá yā trigo miiⁿ chí 'caacá yā

vmnáánⁿ vmnaaⁿ 'daaⁿ'nuⁿ trigo miiⁿ ní dichiiichí yā caadi ticuaá ní 'neeⁿ yaⁿ'a yā. 'Cuiinu maaⁿ ní nandéε yā trigo miiⁿ ní 'cuíi yā chēeti dínnūⁿ.

'Áámá ejemplo yeⁿ'ē ndaata yeⁿ'ē yivē ntí'yāa
(Mr. 4.30-32; Lc. 13.18-19)

³¹ Táámá ejemplo Jesús caⁿ'a yā chii yā 'iiⁿ'yāⁿ s'eeⁿ: Naachí Ndyuūs ngaⁿ'a ntiiⁿ'nyúⁿ yā na va'ai chēeti nguuvi ní tan'dúúcā 'aama nduutií yeⁿ'e yivē ntí'yāa chi 'áámá saⁿ'ā sta'ā sa ní chiinū sa na yá'āa yeⁿ'ē sa. ³² Ndaata yivē ntí'yāa 'cūū ní 'liiⁿ ca nguéé ti tanducuéⁿ'ē ndaata. Taachí n'giita yaātā miiⁿ, tuu'mi ní ch'εεε ca chi cuuvi taná'ā yaātā. Ní chii yá'á. Ní ndaá 'yáádá yeⁿ'ē nanguuvi ní din'dái tī 'dεεε tī na dúuⁿ'ē yá'á miiⁿ.

Ejemplo yeⁿ'e levadura yeⁿ'e pan
(Lc. 13.20-21)

³³ Táámá ejemplo Jesús caⁿ'a yā chii yā 'iiⁿ'yāⁿ s'eeⁿ: Naachí Ndyuūs ngaⁿ'a ntiiⁿ'nyúⁿ yā yeⁿ'ē na va'ai chēeti nguuvi ní tan'dúúcā 'áámá táán levadura yeⁿ'e pan. 'Áámá n'daataá sta'a tá levadura miiⁿ ní chistaⁿ'ā tá nguuaⁿ 'iinū medida yeⁿ'e harina ndíí chí nan'guiita tanducuéⁿ'ē yaāchī yeⁿ'ē.

Chuū chí ngaⁿ'ā Jesús miiⁿ ndúúcū ejemplos
(Mr. 4.33-34)

³⁴ Tanducuéⁿ'ē chuū ngi'cueeⁿ Jesús ní caⁿ'a yā chii yā 'iiⁿ'yāⁿ s'eeⁿ ndúúcū ejemplos. Ni nduuti chi nguéé ndúúcū ejemplos yeⁿ'e chi véé iⁿ'yeeⁿ'dí 'cuū, nguéé ngi'cueeⁿ yā 'iiⁿ'yāⁿ s'eeⁿ. ³⁵ Ní 'iicu cuuvi cuaacu chí caⁿ'a profeta ndii cuáán vmnaaⁿ taachí caⁿ'a yā 'túúcā. Ní canéé nguūⁿ ná libro yeⁿ'é Ndyuūs 'túúcā: Caaⁿ'mán ndúúcū ejemplos. Ca'cueén dendu'ū chi canúúⁿ n'de'ei ndíí taachi Ndyuūs din'dái yā iⁿ'yeeⁿ'dī.

Jesús ngaⁿ'a yā yeⁿ'e chi neⁿ'e caaⁿ'māⁿ ejemplo yeⁿ'e trigo

³⁶ Tuu'mi ní Jesús yaa'vi yā 'iiⁿ'yāⁿ s'eeⁿ chi cunaⁿ'á yā na vaacú yā. Jesús ntúūⁿ cunaⁿ'a yā ní sndaá yā 'áámá va'ai. Discípulos yeⁿ'e yā nndaá yā nanáán Jesús, ní caⁿ'a yā chii yā 'iiⁿ'yāⁿ: N'dií, Jesús, ca'cuéⁿ nī chí neⁿ'e caāⁿ'maⁿ ejemplo yeⁿ'e 'daaⁿ'nuⁿ trigo chi véé nguuaⁿ trigo na campo.

³⁷ Jesús nan'guεεcútaⁿ'a yā ní caⁿ'a yā chii yā 'iiⁿ'yāⁿ s'eeⁿ: 'Iiⁿ'yāⁿ chi ngiinu ndaata chi trigo chi n'dáacā, 'iiⁿ'yāⁿ miiⁿ chí Saⁿ'ā chí Daiya Ndyuūs. ³⁸ Campo miiⁿ ní tan'dúúcā iⁿ'yeeⁿ'dí 'cūū. Ndaata chi n'dáacā miiⁿ ní tan'dúúcā nducyáácá 'iiⁿ'yāⁿ chí daiya Ndyuūs ní yeⁿ'ē naachi Ndyuūs ngaⁿ'a ntiiⁿ'nyúⁿ yā. Yaātā yeⁿ'e ndaata chi nguéé n'daācā ní tan'dúúcā 'iiⁿ'yāⁿ chí nguéé n'daācā idiⁿ yā, 'iiⁿ'yāⁿ s'eeⁿ chí daiya yáán'nguiinūⁿ. ³⁹ Saⁿ'ā chí chiinū sa 'daaⁿ'nuⁿ trigo miiⁿ ní tan'dúúcā maāⁿ yáán'nguiinūⁿ. Ní cosecha yeⁿ'ē miiⁿ ní tan'dúúcā chí 'cuiinu iⁿ'yeeⁿ'dī. Saⁿ'ā s'eeⁿ chí ita'a sa cosecha miiⁿ ní tan'dúúcā ángeles. ⁴⁰ Tan'dúúcā chí tíicú yā 'daaⁿ'nuⁿ trigo ní nadidáámá yā ní 'neeⁿ yaⁿ'a yā, 'tíicā cuuvi tiempo taachi 'cuiinū iⁿ'yeeⁿ'dí 'cūū. ⁴¹ Saⁿ'ā chí Daiya Ndyuūs ní dichó'o yā ángeles yeⁿ'e yā chí nadidáámá yā 'iiⁿ'yāⁿ chí yeⁿ'ē naachí Ndyuūs ngaⁿ'a ntiiⁿ'nyúⁿ yā. Niicú tun'dáa yā nducyaaca 'iiⁿ'yāⁿ chí díⁿ yā chí nán'a yā idiⁿ nuuⁿ'ndí yā ndúúcū 'iiⁿ'yāⁿ chí idiⁿ chí nguεε n'daācā. ⁴² Ní cu'nuúⁿ yā 'iiⁿ'yāⁿ na nguuchí yaⁿ'ā. Mííⁿ 'iiⁿ'yāⁿ s'eeⁿ ní cuεεcú yā ní che'e 'diiⁿ'yúⁿ yā. ⁴³ Tuu'mi ní 'iiⁿ'yāⁿ chí n'dái nanáán Ndyuūs cuuvi dεévé yā ngii tan'dúúcā 'yá'ā taachi 'āā snée yā naachi Ndyuūs Chiidá yā ngaⁿ'a ntiiⁿ'nyúⁿ yā na va'ai chēeti nguuvi. Ndís'tií chí véé veéⁿ nī 'caandiveéⁿ nī nduudu yeⁿ'é.

Ejemplo yeⁿ'e vaadi 'cuiica chí canúúⁿ n'de'ei

⁴⁴ Caⁿ'a ca Jesús miiⁿ táámá ejemplo: Naachí Ndyuūs ngaⁿ'a ntiiⁿ'nyúⁿ yā yeⁿ'ē va'ai chēeti nguuvi ní tan'dúúcā vaadi 'cuiica chí canúúⁿ n'de'ei na 'áámá campo. 'Áámá saⁿ'ā ní ndaācā sa vaadi 'cuiica miiⁿ ní cunuuⁿ n'dé'ei ntúūⁿ sa lugar miiⁿ. Yeenú taavi sa. Cunaⁿ'a sa ní n'diicui sa tanducuéⁿ'ē chí véé yeⁿ'ē sa ní cuái sa campo miiⁿ.

Ejemplo yeⁿe 'áamá perla chi yaⁿai taavi chii^vē

⁴⁵ 'Tiicá ntúūⁿ. Naachí Ndyuūs ngaⁿa ntiiⁿnyúⁿ yā na va'ai chēeti nguuví ní tan'dúúcā 'áamá saⁿā chí n'diicui sa chí in'nuuⁿ sa perlas chí yaⁿai taavi chí^vē. ⁴⁶ Taachí ndaācā sa 'áamá perla chí n'dēevēé ní yaⁿai taavi chí^vē, tuu'mi ní cuinaⁿā sa ní n'diicui sa tanducuéⁿē chí vēé yeⁿe sa níicú cuai sa perla miiⁿ.

Yeⁿe ejemplo yeⁿe yaānā

⁴⁷ 'Tiicá ntuūⁿ. Naachí Ndyuūs ngaⁿa ntiiⁿnyúⁿ yā na va'ai chēeti nguuví ní tan'dúúcā 'áamá yaānā chí saⁿā n'gaa nuúⁿ sa na nuūⁿnīⁿyāⁿā ní ita'āa nducuéⁿē naaⁿ 'yaācā. ⁴⁸ Taachí 'āā ndiituú yaānā miiⁿ, intun'dāa yā cuaaⁿ 'diituú nuūⁿnīⁿyāⁿā miiⁿ. Ní n'daaviyaí yā ní nan'guaaⁿ yā 'yācā chí n'daācā. N'giū yā 'iiti 'cuéētēē. Ní 'iiti chí nguéé n'dāacā miiⁿ nginngēē yā 'iiti. ⁴⁹ 'Tíicā cuuvi taachi 'cuiinū in'yeeⁿdí 'cūū. Nandaā ángeles ní tun'dāa yā 'iiⁿyāⁿ chí n'dai yā nguaaⁿ 'iiⁿyāⁿ chí nguēē n'dāacā idiíⁿ yā. ⁵⁰ Ní 'cuíi yā 'iiⁿyāⁿ chí nguéé n'daācā ná nguuchi yaⁿā. Mííⁿ 'iiⁿyāⁿ s'eeⁿ cueⁿe daāⁿmaⁿ cuēcú yā ní cueⁿe daāⁿmaⁿ ché'é 'diiⁿyuⁿ yā.

Ejemplo yeⁿe vaadī 'cuíicá ngai ndúúcū chí ndiicúū

⁵¹ Jesús tiinguuneeⁿ yā 'iiⁿyāⁿ s'eeⁿ: ¿'Áá tuumicádíinuūⁿ ndís'tiī tanducuéⁿe dendu'ū chí 'túúcā? 'Iiⁿyāⁿ s'eeⁿ ní n'guēcútaⁿa yā: 'Tíicā Señor.

⁵² Jesús ní caⁿa yā chii yā 'iiⁿyāⁿ s'eeⁿ: 'Áamá 'aama maestro yeⁿe ley chí'neeⁿ yā yeⁿe naachi Ndyuūs ngaⁿa ntiiⁿnyúⁿ yā na va'ai chēeti nguuví, maestro miiⁿ ní cuuví yā tan'dúúcā 'áamá patrón chí vēé vaadī 'cuiica yeⁿe sa na va'ai yeⁿe sa. Ní deenu sa táacā tun'dāa sa yeⁿe vaadī 'cuiica yeⁿe sa dendu'ū cosa chí ngai ndúúcū cosa chí ndiicúū.

Jesús canee yā na yāāⁿ Nazaret

(Mr. 6.1-6; Lc. 4.16-30)

⁵³ Taachí Jesús miiⁿ chí'ínú caⁿá yā nduudu 'cūū, cueⁿé yā yeⁿe miiⁿya. ⁵⁴ Ní ndaá yā yāāⁿ vaacú yā chí nguuví Nazaret ní ngi'cueeⁿ yā yaācū sinagoga miiⁿ. 'Iiⁿyāⁿ s'eeⁿ ní cheⁿe yiinú yā yeⁿe chí chí'cueeⁿ Jesús. Ní ngaⁿa yā: ¿Tíí ndiicaá vaadī déenu yeⁿe saⁿá 'cūū? ¿Táacā cuuvi diíⁿ sa vaadī n'giinu chí idiíⁿ sa? ⁵⁵ Sáⁿa 'cūū chí daiya 'viichiyáⁿā ní María nguūvī chēecu sa. Ní 'dínū sa ní Jacobo, ndúúcū José, ndúúcū Simón, ndúúcū Judas. ⁵⁶ V'í'í ntúūⁿ sa snee yā ndúúcu yú. ¿Tíí ndiicaá tanducuéⁿē vaadī deenú 'cūū chí ngi'cuééⁿ sa? ⁵⁷ Ní cáāvā chuū 'iiⁿyāⁿ yeⁿe yāāⁿ miiⁿ cunncaā caⁿa yā yeⁿe Jesús miiⁿ, ní nguéé 't'éénu yā yeⁿe yā. Naati Jesús ní caⁿa yā chii yā 'iiⁿyāⁿ s'eeⁿ: Nguéé vēé mar 'áamá profeta chí candēē nduudu yeⁿe Ndyuūs chí 'iiⁿyāⁿ yeⁿe yāāⁿ vaacú yā ndúúcū 'iiⁿyāⁿ na vaacu yā dinéⁿe yā profeta miiⁿ.

⁵⁸ Jesús miiⁿ nguéé neenē n'deēē vaadī n'giinu diíⁿ yā miiⁿ caati 'iiⁿyāⁿ s'eeⁿ nguéé s't'éénu yā yeⁿe Jesús miiⁿ.

14

Ch'iíⁿnúⁿ yā Juan chí ngēedínuūⁿnīⁿ

(Mr. 6.14-29; Lc. 9.7-9)

¹ Tiempo 'cūū saⁿa rey Herodes, chí gobernador yeⁿe yāⁿā Galilea, chí'indiveeⁿ sá tan'dúúcā chí 'iiⁿyāⁿ ngaⁿa yā yeⁿe Jesús miiⁿ. ² Ní rey miiⁿ caⁿa sa chí sa mozos yeⁿe sa: Sáⁿā Jesús 'cūū ní Juan chí ngēedínuūⁿnīⁿ chí nnduuchi sá yeⁿe nguaaⁿ tináⁿā. Ní cáāvā chuū vēé poder yeⁿe sa chí idiíⁿ sa vaadī n'giinu.

³ Rey Herodes miiⁿ ní 'iiⁿyāⁿ chí caⁿa ntiiⁿnyúⁿ yā chí soldados sta'a sa Juan miiⁿ ní cāchiichí sa Juan ndúúcū cadenas ní chí'nuuⁿ sa Juan vácūū. 'Tíicā diíⁿ rey miiⁿ cucáāvā n'daataá yeⁿe yā chí nguuví Herodías ti vmnááⁿ vmnaaⁿ n'daataá miiⁿ ní n'daataá yeⁿe Felipe chí 'díínu rey miiⁿ. Ní diví rey miiⁿ táⁿā miiⁿ yeⁿe Felipe. ⁴ 'Tíicā diíⁿ rey ndúúcū Juan chí ngēedínuūⁿnīⁿ ti Juan miiⁿ ngaⁿa sá ngii sa Herodes miiⁿ chí tan'dúúcā chí ngaⁿa na ley, nguéé canee chí cuuvi n'daataá yeⁿe yā n'daataá miiⁿ.

⁵ Rey Herodes miiⁿ ní neⁿe yā 'caaⁿ'nuⁿ yā Juan miiⁿ, naati 'va'á yā 'iiⁿ'yāⁿ yeⁿe yáāⁿ miiⁿ; ti 'iiⁿ'yāⁿ s'eeⁿ ní s'téénu yā chí Juan miiⁿ ní 'iiⁿ'yāⁿ profeta chi dichó'o Ndyuūs. ⁶ Taachí 'iiⁿ'yāⁿ dííⁿ yā 'viicu yeⁿ'ē cumpleaños yeⁿ'e Herodes miiⁿ, n'daataá 'lííⁿ daiya táⁿ'ā Herodías miiⁿ nde'ei tá naavtaⁿ'ā yeⁿ'e 'iiⁿ'yāⁿ s'eeⁿ. Ní rey Herodes miiⁿ ní chíi yeenú yā chi nde'ei tá ní caⁿ'a yā: ⁷ Dii, n'daataá 'lííⁿ. 'Úú ngaⁿ'á ndúúcu nduudu, “por Dios”, chi teé dii 'āā de'é nūuⁿ chí neⁿ'e di. ⁸ Chεεcu tá ni caⁿ'a yā chíi yā n'daataa 'lííⁿ miiⁿ de'ē chí caaca tá. Ní n'daata 'lííⁿ caⁿ'a ta chíi tá rey miiⁿ: N'dií rey, téé nī 'úú tiíⁿ Juan chi ngeedínuūⁿnīⁿ cu'nuúⁿ chεeti 'áámá cu'u.

⁹ Tuu'mi ní rey Herodes miiⁿ s'neeⁿ ndaachii yiinú yā; naati rey miiⁿ caati 'āā caⁿ'a yā ndúúcu nduudu, “por Dios”, ní ch'iindiveén 'iiⁿ'yāⁿ chi snée yā ndúúcu yā na mesa miiⁿ, caⁿ'a yā chí 'āā ca'a núúⁿ yā chííⁿ chí ngiica táⁿ'ā miiⁿ. ¹⁰ Caⁿ'a ntiiⁿnyúⁿ yā chí 'caātā daandu Juan chi ngeedínuūⁿnīⁿ chí canúuⁿ sa vácuū. ¹¹ Ní ndεε sa tiíⁿ yā miiⁿ sn'núúⁿ chεeti cu'u ní ca'a sa n'daata 'lííⁿ miiⁿ. Ní táⁿ'ā miiⁿ ní ca'a tá chεεcu tá.

¹² Tuu'mi ní discípulos yeⁿ'e Juan chi ngeedínuūⁿnīⁿ ndaá yā ní sta'á yā cuerpo yeⁿ'e Juan miiⁿ ní ch'iichi yā. Ní cheⁿ'e yā chíi yā Jesús miiⁿ tan'dúúca chí chíi.

Jesús ca'á yā che'e nyuⁿ'u mil 'iiⁿ'yāⁿ

(Mr. 6.30-44; Lc. 9.10-17; Jn. 6.1-14)

¹³ Taachí Jesús miiⁿ ch'iindiveén yā chuū, cueⁿ'é yā ní sndáa yā na 'áámá barco, ní cueⁿ'e yā na 'áámá lugar cueti naachi nguéé 'iiⁿ'yāⁿ. Taachí 'iiⁿ'yāⁿ s'eeⁿ ch'iindiveén yā chuū, can'dáa yā yeⁿ'e yáāⁿ s'eeⁿ ní cueⁿ'e yā ndúúcu Jesús. ¹⁴ Ní taachí Jesús miiⁿ nan'dáa yā ná barco miiⁿ, n'diichí yā n'dee n'dái 'iiⁿ'yāⁿ, ní nnee ya'ai iinu yā 'iiⁿ'yāⁿ s'eeⁿ. Ní dííⁿ yā chi nduūvā yeⁿ'é 'iiⁿ'yāⁿ chí ngítā chí ndaā ndúúcu 'iiⁿ'yāⁿ chí candεε yā 'iiⁿ'yāⁿ s'eeⁿ. ¹⁵ Ní taachí 'āā chíinu discípulos yeⁿ'e Jesús miiⁿ ndaá yā nanááⁿ Jesús ní caⁿ'a yā chíi yā 'iiⁿ'yāⁿ: 'Āā chí chíínū maaⁿ, ní 'muuⁿ nguéé n'gεetinéé 'iiⁿ'yāⁿ. Yaa'ví nī 'iiⁿ'yāⁿ s'tíⁿ chí caⁿ'á yā cuááⁿ na yáāⁿ n'gaiyāā ní cuái yā chí che'e yā.

¹⁶ Jesús caⁿ'a yā chíi yā discípulos: 'iiⁿ'yāⁿ s'tíⁿ nguéé cánéé chí náⁿ'a yā. Ndís'tií ca'a nī chí che'e yā.

¹⁷ Discípulos ní caⁿ'a yā: Nguéé tunéén chí che'e yā. Dámāāⁿ nyuⁿ'u panes ndúúcu na 'uūvī 'yaācā véé.

¹⁸ Jesús caⁿ'a yā chíi yā discípulos: Candée nī panes ndúúcu 'yaācā 'muuⁿ.

¹⁹ Cuayiivi ní Jesús chíi yā 'iiⁿ'yāⁿ s'eeⁿ chí ch'εté yā ná yaātā miiⁿ. Jesús ní sta'á yā nduu nyúⁿ'ú panes miiⁿ ndúúcu 'uūvī 'yaaca ní n'diichí yā nanguuvi ní ca'a yā gracias Ndyuūs Chiidá yā. Cuayiivi ní n'dee yā panes ní ca'a yā discípulos yeⁿ'e yā. Discípulos miiⁿ ní ca'a yā 'iiⁿ'yāⁿ chí snée miiⁿ. ²⁰ Nducyáácá yā che'e yā ní chíitu 'iiⁿ'yāⁿ. Ní discípulos nān'guaáⁿ yā chí nángaāva panes yeⁿ'e miiⁿ ndúúcu 'yaācā miiⁿ ní chíitu tá ndiichúúví 'cúεētεε. ²¹ 'iiⁿ'yāⁿ chí che'ē miiⁿ nyuⁿ'u mil ngii yā, ndii nguéé chiduūche n'daataá, ndíi nguéé ndúú da'caīyāa ra.

Jesús ngiicá yā cuááⁿ vmnaaⁿ nuūⁿnīⁿ'yáⁿ'ā

(Mr. 6.45-52; Jn. 6.16-21)

²² Cuayiivi ní Jesús caⁿ'a yā chíi yā discípulos yeⁿ'e yā chí cundaa yā na barco ní caⁿ'á yā táámá 'díítuú nuūⁿnīⁿ'yáⁿ'ā, 'naaⁿ chí Jesús miiⁿ dííⁿ yā despedir yeⁿ'é 'iiⁿ'yāⁿ. ²³ Jesús dííⁿ yā despedir yeⁿ'é 'iiⁿ'yāⁿ s'eeⁿ ní divíi yā yeⁿ'e yā ní cuchεε yā na 'áámá yiicū ní caⁿ'angua'á yā. Taachí chíi 'da'a, 'āā dámaaⁿ Jesús canée yā miiⁿ. ²⁴ Barco miiⁿ ní 'āā cánduūu naavtaⁿ'ā yeⁿ'ē nuūⁿnīⁿ'yáⁿ'ā miiⁿ naachi olas yeⁿ'e nuūⁿnīⁿ miiⁿ neⁿ'e 'cuuchii na yaānūuⁿ yeⁿ'e nuūⁿnī miiⁿ. 'Yúúné ní ngeēnū taaⁿ ní diitu n'dái n'geⁿ'e na barco miiⁿ. Ní barco miiⁿ nguéé ngii ngiicá. ²⁵ Taachi 'da'a ca táámá nguuvi tan'dúúca n'gεεcu cuūuⁿ o n'gεεcu nyuⁿ'u, Jesús ndaá yā nanááⁿ discípulos ní ngiicá yā cuaaⁿ vmnaaⁿ nuūⁿnīⁿ'yáⁿ'ā miiⁿ. ²⁶ Taachí discípulos ní n'diichí yā Jesús miiⁿ chí ngiicá yā cuaaⁿ vmnaaⁿ nuūⁿnīⁿ'yáⁿ'ā miiⁿ ní dii'yá yā chíi. Ní chistaⁿ'a vaanicadiinūuⁿ yeⁿ'é yā. Ní 'cai yā: Chuū ní 'áámá bulto. Ní caⁿ'á yā ndúúcu vaadi 'va'a.

²⁷ Cuayiivi miiⁿ ní Jesús yaa'ví yā discipulos ní caⁿ'a yā: Ndís'tiī cúúví ditiinú nī caati 'úú. Nguéé di'va'á nī.

²⁸ Tuu'mi ní Pedro nán'guεεcútaⁿ'a sa ní caⁿ'a sa: N'dií Señor, ndúúti chí n'diī caaⁿ'maⁿ ntiiⁿnyúⁿ nī chí caⁿ'á naachi canee nī ní caacá cuaaⁿ vmnaaⁿ nuūⁿnīⁿ'yáⁿ'ā.

²⁹ Jesús miiⁿ ní caⁿ'a yā chii yā: Pedro, cuchí di. Pedro miiⁿ ní nan'dáa sa na barco miiⁿ ni tucá'a sa ngiica sa cuaaⁿ vmnaaⁿ nuūⁿnīⁿ miiⁿ. Ní cueⁿ'ē sa naachi canéé Jesús miiⁿ.

³⁰ Taachí Pedro miiⁿ n'diichi sa 'yúúné taaⁿ miiⁿ di'vá'a sa ní 'āā tucá'ā chεεchi sa nguaaⁿ nuūⁿnīⁿ miiⁿ. Tuu'mi ní 'cái yiicu sa ní caⁿ'a sa: Señor, nadanguáⁿ'ai nī 'úú.

³¹ Hora míⁿ nūuⁿ, Jesús miiⁿ n'doó yā ta'a yā ní sta'á yā ta'a Pedro ní caⁿ'a yā chii yā Pedro: Dii saⁿ'ā chí dúú'vī i'téénu di, ¿de'ē cúúví chí nadi'uūvī di staava yeⁿ'ē di ní nguéé i'téénu di?

³² Ní taachí Jesús ndúúcu Pedro sndáa yā na barco miiⁿ, canee 'diiⁿ 'yúúné míⁿ.

³³ Tuu'mi ní discipulos chí snúuⁿ yā na barco miiⁿ ní ndaá yā nanááⁿ Jesús ní s'téénu yā 'iiⁿ'yāⁿ. Ní caⁿ'a yā: N'dií Jesús, cuaacu níⁿnyúⁿ chí Daiya Ndyuūs n'dii.

Jesús diíⁿ yā chí nduuvā yeⁿ'e 'iiⁿ'yāⁿ yeⁿ'e yáⁿ'āa Genesaret

(Mr. 6.53-56)

³⁴ Tááchí ch'iinu cho'ó yā táamá lado yeⁿ'e nuūⁿnīⁿ'yáⁿ'ā miiⁿ ní ndaá yā na yáⁿ'āa Genesaret. ³⁵ 'Iiⁿ'yāⁿ s'eeⁿ yeⁿ'e yáⁿ'āa miiⁿ taachi tuumicadínuuⁿ yā chí Jesús canéé yā miiⁿ, tuu'mi ní 'iiⁿ'yāⁿ s'eeⁿ caⁿ'á yā ní chii yā 'iiⁿ'yāⁿ yeⁿ'e núúⁿmáⁿ cuaaⁿ yáāⁿ n'gaiyāā chí snéé niiⁿnuúⁿ chí Jesús canéé yā miiⁿ. Níⁿíⁿ 'iiⁿ'yāⁿ s'eeⁿ cándéé yā nducyaaca 'iiⁿ'yāⁿ chí ngíⁿta yā nanááⁿ Jesús miiⁿ. ³⁶ Ní 'iiⁿ'yāⁿ s'eeⁿ di'cuíⁿtu yā Jesús miiⁿ chí 'cuáaⁿ yā chí 'iiⁿ'yāⁿ s'eeⁿ tuu'ví yā naachi n'dééⁿtií yeⁿ'ē catecái yā. Ní nducyaaca 'iiⁿ'yāⁿ chí tuu'ví yā catecai Jesús miiⁿ ní nduūvā yeⁿ'e yā.

15

Yeⁿ'e chí diiⁿ chí vεε nuuⁿndi yeⁿ'e 'iiⁿ'yāⁿ

(Mr. 7.1-23)

¹ Tuu'mi ní duu'vi maestros chí ngi'cueeⁿ ley ndúúcu 'iiⁿ'yāⁿ fariseos chí chiicá yā yáāⁿ Jerusalén ndaá yā nanááⁿ Jesús miiⁿ, ní caⁿ'a yā chí yā 'iiⁿ'yāⁿ: ² ¿De'ē cúúví chí discipulos yeⁿ'e nī nguéé diíⁿ yā tan'dúúⁿcā costumbre yeⁿ'ē 'iiⁿ'yāⁿ ndiicúú? ¿De'ē cúúví chí nguéé inaaⁿnu yā ta'á yā taachi 'āā cuéé che'e yā pan?

³ Jesús nan'guεεcútaⁿ'a yā ní caⁿ'a yā chí yā 'iiⁿ'yāⁿ s'eeⁿ: ¿De'ē cúúví chí ndís'tiī ní nguéé diíⁿ nī tan'dúúⁿcā chí ngaⁿ'a ley yeⁿ'é Ndyuūs ní diíⁿ nī tan'dúúⁿcā costumbre yeⁿ'ē 'iiⁿ'yāⁿ ndiicúú? ⁴ Ti Ndyuūs ní ca'á yā ley yeⁿ'e yā ní caⁿ'a yā: Díⁿ nī honrar chiidá nī ndúúcu chεεcú nī. 'Iiⁿ'yāⁿ chí nguéé n'dáacā ngaⁿ'a yā yeⁿ'e chiidá yā o yeⁿ'ē chεεcú yā ní 'cuūvi yā. ⁵ Naati ndis'tiī ní ngaⁿ'a nī chí 'āā du'ú nūuⁿ 'iiⁿ'yāⁿ chí caaⁿ'máⁿ yā cuuvi yā chiidá yā ndúúcu chεεcú yā 'tíⁿcā: Nducuéⁿ'ē chí teé n'diī maaⁿ ní ca'á lado yeⁿ'é Ndyuūs caava ofrenda yeⁿ'e yā. ⁶ 'Iiⁿ'yāⁿ 'āā ntéé idiíⁿ yā chí neⁿ'é yā chiida yā ndúúcu chεεcú yā. 'Tíⁿcā caavā costumbre yeⁿ'é nī diíⁿ nī chí 'āā ntéé idichí'vē ley yeⁿ'é Ndyuūs yeⁿ'e yú. ⁷ Ndís'tiī 'uūvī naaⁿ 'uuvi cheendí nī. N'daācā caⁿ'a profeta Isaías miiⁿ yeⁿ'é nī taachi caⁿ'a sa ndíⁿ vmnaaⁿ ní canéé nguūⁿ na libro yeⁿ'e Ndyuūs 'tíⁿcā:

⁸ 'Iiⁿ'yāⁿ s'uuⁿ ní i'téénu yā 'úú ndúúcu nduudu yeⁿ'e yā, naati staava yeⁿ'é yā yaⁿ'ai canee yeⁿ'ē 'úú.

⁹ Nguéé de'ē vεε dichí'vē chí i'téénu yā 'úú, caati chí ngi'cueeⁿ yā ní ley yeⁿ'e saⁿ'ā yeⁿ'e iⁿ'yeeⁿdí 'cūū nguéé yeⁿ'é Ndyuūs.

¹⁰ Jesús n'gai yā n'dee n'dái 'iiⁿ'yāⁿ chí ndaa yā nanááⁿ yā. Ní caⁿ'a yā chí yā 'iiⁿ'yāⁿ s'eeⁿ: 'Caandivéⁿ nī ní tuumicadínuuⁿ nī. ¹¹ Nguéé tanducuéⁿ'ē chí nge'e saⁿ'ā chí ndaā cheendi saⁿ'ā idivaatí saⁿ'ā naati nduudu chí ican'daā cheendi saⁿ'ā, chíⁿ chí diiⁿ chí véé nuūⁿndí yeⁿ'ē saⁿ'ā.

¹² Tuu'mi ní discipulos yeⁿ'e Jesús ndaá yā nanááⁿ yā ní caⁿ'a yā chí yā Jesús miiⁿ: ¿'Áá nguéé déénu nī chí 'iiⁿ'yāⁿ fariseos taachí ch'iindiveéⁿ yā nduudú 'cūū nduuvi taáⁿ yā?

13 Naatí Jesús miiⁿ nan'guεεcútaⁿ a yā ní caⁿ a yā: Taanduvéé yaāta chi nguéé chiichi Chiidá chi canéé yā na va'ai chεeti nguuví canee chí tiicūu ndii díf'yú. 14 'Āā s'néén rá 'iiⁿ yāⁿ s'eeⁿ chí tan'dúúcā 'iiⁿ yāⁿ chí ngeenáán chí candée yā táámá 'iiⁿ yāⁿ chí ngeenáán ndúúcu yā. Nduuti chí 'áámá 'iiⁿ yāⁿ chí ngeenáán candée yā táámá 'iiⁿ yāⁿ chí ngeenáán ndúúcu yā, nduu 'uuví yā cungéé nuúⁿ yā na yiivi yáⁿ āⁿ.

15 Tuu'mi ní Pedro miiⁿ ní nan'guεεcútaⁿ a sa ní caⁿ a sa chí sa Jesús miiⁿ: Cúúví nī nús'uu de'ε néⁿ é caāⁿ māⁿ ejemplo 'cūū.

16 Jesús caⁿ a yā: ¿'Áá 'tiicá ntūūⁿ nguéé ituumicadínuuⁿ nī? 17 ¿'Áá nguéé ituumicadínuuⁿ nī chí tanducuéⁿ é chí indāā cheendi saⁿ ā ngeⁿ e chεēti sa ní cungéé cuaaⁿ chuva'āi? 18 Naati nduudu chí ícan'daa cheendi sa chí níngiica na staava yeⁿ ē sa, chuū idiīiⁿ chí véé núúⁿ ndí yeⁿ ē sáⁿ ā. 19 Caati yeⁿ e na staava yeⁿ e 'iiⁿ yāⁿ ngiicá dendú^u chí nguéé n'dáacā chí inadicadínuuⁿ yā. Chuū ní inadicadínuuⁿ yā yeⁿ ē chí 'caāⁿ nuⁿ yā 'iiⁿ yāⁿ, ndúúcu yeⁿ ē chí caⁿ á yā ndúúcu isaⁿ ā o n'daataá chí nguéé yeⁿ e yā, ndúúcu chí n'diichí yā 'aama saⁿ ā o n'daataá chí duuchí ví^l, ndúúcu yeⁿ ē chí ididuucú yā, ndúúcu yeⁿ ē chí testigo yā ní caaⁿ máⁿ yā nduudu yaadi, ndúúcu yeⁿ ē chí caaⁿ maⁿ taán yā contra yeⁿ e Ndyuūs. 20 Dendú^u 'cūū chí idiīiⁿ chí véé nuuⁿ ndi yeⁿ ē sa naati chí che' e sa taachi nguéé naaⁿ nú sa ta' a sa, chíiⁿ ní nguéé idinuuⁿ ndi sa.

Yeⁿ e 'áámá n'daataá chí ngeε yeⁿ e ndaata Israel ní i'téenu tá Jesús (Mr. 7.24-30)

21 Jesús chíicá yā yeⁿ ē yāāⁿ miiⁿ ní cueⁿ e yā na yáⁿ āa yeⁿ e Tiro ndúúcu Sidón. 22 Cuin'díichí nī. 'Áámá n'dáátā yeⁿ e yáⁿ āa Canaán chí can'daā tá yeⁿ e yāāⁿ vaacu tá. N'gai yiicu tá ní ngaⁿ a tá ngii tá Jesús miiⁿ: N'díi Señor chí Daiya David, nnéé ya'ai 'iinu nī 'úú. 'Áámá espíritu yeⁿ e yááⁿ n'guiinūuⁿ idindú^u taaví táⁿ ā daíyá.

23 Jesús nguéé nan'guεεcútaⁿ a yā yeⁿ ē tá. Tuu'mi ní discípulos yeⁿ ē Jesús miiⁿ ndaá yā nanááⁿ yā ní di'cuítu yā Jesús ní caⁿ a yā chíi yā 'iiⁿ yāⁿ: N'díi Jesús, díiⁿ nī despedir yeⁿ ē ta ti táⁿ a 'cūū ní n'gai tá cūchiitá cuaaⁿ daami yú.

24 Jesús nan'guεεcútaⁿ a yā ní caⁿ a yā: Dendyuūs dicho'ó yā 'úú cucáāvā 'iiⁿ yāⁿ yeⁿ e Israel chí tan'dúúcā 'iiti cuūchí chí nindái, 'tiicá yā.

25 Tuu'mi ní taⁿ ā miiⁿ ndaā ta nanááⁿ Jesús ní chíintiī'ya tá ní caⁿ a tá chíi tá 'iiⁿ yāⁿ: N'díi Señor, cunneé nī 'úú.

26 Jesús miiⁿ ní nan'guεεcútaⁿ á yā yeⁿ ē tá ní caⁿ a yā chíi yā táⁿ ā: Nguéé n'daācā chí divíi pan yeⁿ ē daiyá 'nū ní ca' á chí che' e 'yaānā.

27 Táⁿ ā miiⁿ ní caⁿ ā ta: 'Tíicā Señor, naati 'yāānā miiⁿ ngé' e tī yeⁿ ē cheeyéé chí ngéé yeⁿ ē na mesa yeⁿ ē 'iiví tī.

28 Tuu'mi ní Jesús miiⁿ nan'guεεcútaⁿ a yā ní caⁿ a yā chíi yā táⁿ ā: Díi n'daataá, dé'ε chúúcā ch'εεte vaadi i'téenu yeⁿ ē di. Cuuví ndúúcu dí tan'dúúcā chí neⁿ ē di. Daiya tá miiⁿ ní hora míiⁿ nūuⁿ nduuva yeⁿ ē ta.

Jesús idiⁿ yā chí nduūvā yeⁿ e 'yaaⁿ n'dai 'iiⁿ yāⁿ

29 Jesús chíicá yā yeⁿ ē yáⁿ āa miiⁿ ní ndaá yā 'diituú nuūⁿ nī' yáⁿ ā Galilea. Cuayiivi ní cuchéé yā ná yiicū miiⁿ ní ch'iīndi yā. 30 Nééné 'yaaⁿ 'iiⁿ yāⁿ ndaā nīiⁿ nuúⁿ yā nanááⁿ Jesús miiⁿ ní ndéé yā 'iiⁿ yāⁿ chí ngaā yó'ōo, ndúúcu 'iiⁿ yāⁿ chí ngeenáán, ndúúcu 'iiⁿ yāⁿ 'díi'mī, ndúúcu 'iiⁿ yāⁿ chí ló'ō ta'á yā o ca' a yā, ndúúcu 'yaaⁿ n'dái 'iiⁿ yāⁿ chí véé cá tanáⁿ ā ca'ai chí ndíi yā. Ní s'neeⁿ yā 'iiⁿ yāⁿ s'eeⁿ nanááⁿ Jesús miiⁿ. Ní Jesús díiⁿ yā chí nduūvā yeⁿ e 'iiⁿ yāⁿ s'eeⁿ. 31 Nducyáácá 'iiⁿ yāⁿ cheⁿ e yiinú yā taachí n'diichi yā chí 'iiⁿ yāⁿ 'díi'mī ní ngíi ngaⁿ a, ní 'iiⁿ yāⁿ chí ló'ō ta'á yā o ca' a yā nduuva yeⁿ e yā, ní 'iiⁿ yāⁿ chí nguéé ngii ngiicá, ngiica yā; ní 'iiⁿ yāⁿ ngeenáán, inaaⁿ yā; ní tucá' a yā caⁿ a yā: De'ē chúúca ch'εεte Ndyuūs yeⁿ e 'iiⁿ yāⁿ Israel.

Jesús ca' a yā chí che' e cuūuⁿ mil 'iiⁿ yāⁿ (Mr. 8.1-10)

³² Jesús 'caí yā discípulos yeⁿ'é yā ní caⁿ'a yā chii yā discípulos: Ya'ái cáávā 'iiⁿ'yāⁿ s'tí ti 'āā 'iīnū nguuvī snée yā nduucú ní 'muuⁿ ní nguéeé de'ē vee chi che'e yā. Nguéeé neⁿ'é nadicho'ó 'iiⁿ'yāⁿ chi nguéeé che'e yā. 'Áátii cuuví cúunu yā cuaaⁿ cyúúni chí náⁿ'a yā.

³³ Tuu'mi ní discípulos yeⁿ'e yā caⁿ'a yā chíi yā Jesús: ¿Tíí cáⁿ'a 'nū nguaí 'nū pan chí n'dee n'dái chí ché'é nducyaaca 'iis'tíi na lugar 'cūū naachi nguεε ch'εetinéeé 'iiⁿ'yāⁿ?

³⁴ Jesús caⁿ'a yā chíi yā discípulos: ¿'Áá 'yaaⁿ ca pan yeⁿ'é nī vee? Discípulos caⁿ'a yā: Ndeēchē panes ndúúcū n'duuvī 'yaācā n'gaiyāā vee.

³⁵ Jesús ca'a yā orden 'iiⁿ'yāⁿ s'eeⁿ chí 'cuεεtē yā na yáⁿ'āa miiⁿ. ³⁶ Tuu'mi ní Jesús sta'á yā ndu'ū ndeēchē panes miiⁿ ndúúcū 'yaācā miiⁿ. Ní ca'a yā gracias Ndyuūs cáávā panes miiⁿ. Ní n'dee yā panes miiⁿ ní ca'a yā discípulos yeⁿ'e yā. Ní discípulos ní ca'a yā 'iiⁿ'yāⁿ chí snéeé miiⁿ. ³⁷ Nducyáaca yā che'e yā ní chíitu 'iiⁿ'yāⁿ. Discípulos ní nān'guaáⁿ yā chí nángaāva ní chíitu tá ndeēchē 'cuéētēε. ³⁸ 'Iiⁿ'yāⁿ chí che'e yā miiⁿ ní taanduu cuūⁿ mil ngii sáⁿ'ā. Nguéeé diduuche yā n'daataá ndíi nguéeé ndúú da'caiyāa. ³⁹ Tuu'mi ní Jesús yaa'ví yā 'iiⁿ'yāⁿ s'eeⁿ chí cunaⁿ'á yā. Ní Jesús ndaá yā na barco miiⁿ ní cueⁿ'e yā na yáⁿ'āa yeⁿ'e Magdala.

16

'Iiⁿ'yāⁿ s'eeⁿ ngiica yā vaadī n'giinu

(Mr. 8.11-13; Lc. 12.54-56)

¹ 'Iiⁿ'yāⁿ fariseos ndúúcū 'iiⁿ'yāⁿ saduceos ndaá yā nanááⁿ Jesús chí neⁿ'e n'diichíneeⁿ yā Jesús. Ní chíica yā Jesús 'áámá vaadī n'giinu yeⁿ'ē va'ai chēeti nguuvi.

² Naati Jesús nan'guεεcútaⁿ'a yā yeⁿ'é 'iiⁿ'yāⁿ s'eeⁿ ní caⁿ'a yā: Taachí ngii chíinū ní nanguuvi ní ndíi cuá'āa, ndís'tíi ní ngaⁿ'á nī chí n'dáacā diiⁿ tiempo. ³ Ní cuááⁿ ná nguεetyaaⁿ taachí meēⁿ ngíi cuá'aa, ndís'tíi ngaⁿ'a nī chí nguéeé n'dáacā diiⁿ tiempo maaⁿ. Ndís'tíi 'uūvī naaⁿ 'uūvī cheendí nī chí déenu nī de'ē chí cúuví yeⁿ'ē nanguuvi naati nguéeé tuumicadínuuⁿ nī de'ē chí cuuvi tiempo 'cūū ndúúcū señales chí inaaⁿ nī. ⁴ 'Iiⁿ'yāⁿ chí cunncāa idiíⁿ yā ndúúcū 'iiⁿ'yāⁿ chí nguéeé i'téenu yā Ndyuūs 'iiⁿ'yāⁿ miiⁿ néⁿ'e yā snaaⁿ yā 'áámá vaadī n'giinu naati señal miiⁿ nguéeé ndaāca yā. Dámaāaⁿ cánéeé señal yeⁿ'e profeta Jonás chí ndíi cuaaⁿ vmnaaⁿ chí canéeé nguuⁿ na libro yeⁿ'e Ndyuūs. Jesús s'néeⁿ yā 'iiⁿ'yāⁿ s'eeⁿ ní cueⁿ'e yā.

Levadura yeⁿ'e 'iiⁿ'yāⁿ fariseos

(Mr. 8.14-21)

⁵ Discípulos yeⁿ'e Jesús ndaá yā táámá lado yeⁿ'e nuūⁿnīⁿ'yáⁿ'ā ní chinaáⁿ yā chí cāndεε yā pan. ⁶ Jesús ca'a yā chíi yā 'iiⁿ'yāⁿ s'eeⁿ: Cundéε ndís'tíi cuidado yeⁿ'e levadura yeⁿ'e 'iiⁿ'yāⁿ fariseos ndúúcū 'iiⁿ'yāⁿ saduceos ti levadura miiⁿ ní chíi chí chí'cueeⁿ yā.

⁷ Discípulos ní tuca'á yā caⁿ'a yā nguaaⁿ maaⁿ yā. ¿'Áá chí nguéeé ndεε yú pan chíi chí t'íicā ngaⁿ'a yā?

⁸ Jesús miiⁿ tuumicadínuuⁿ yā yeⁿ'ē chí inadicadínuuⁿ discípulos ní caⁿ'a yā chíi yā discípulos: ¿De'ē cúuví chí inadacadínuuⁿ nī 'túúcā na staava yeⁿ'é nī chí cáávā chí nguéeé ndεε nī pan? Ndís'tíi ní dúú'vii i'téenu nī. ⁹ ¿'Áá nguéeé ituumicadínuuⁿ nī, ndii nguεε ndúú inan'gaacú nī yeⁿ'ē nyuⁿ'u panes chí che'e nyuⁿ'u mil saⁿ'ā? ni ¿'áá n'deē 'cuéētēε ca panes nángaāva? ¹⁰ ¿'Áá ndíi nguéeé nduu inan'gaacú nī yeⁿ'ē ndeēchē panes chí che'e cuūⁿ mil saⁿ'ā? ni ¿'áá n'deē 'cuéētēε ca panes nángaāva? ¹¹ ¿De'ε cuuvi chí nguεε ituumicadínuuⁿ nī chí nguéeé cáávā pan miiⁿ chí caⁿ'á chí cundεε nī cuidado yeⁿ'e levadura yeⁿ'e 'iiⁿ'yāⁿ fariseos ndúúcū 'iiⁿ'yāⁿ saduceos?

¹² Tuu'mi ní discípulos tuumicadínuuⁿ yā chí Jesús miiⁿ nguéeé caⁿ'a yā chíi yā chí discípulos nguéeé cundεε yā cuidado yeⁿ'e levadura yeⁿ'e pan ti yeⁿ'e chí chí'cueeⁿ 'iiⁿ'yāⁿ fariseos ndúúcū 'iiⁿ'yāⁿ saduceos.

Pedro miiⁿ caⁿ'a sa nduudu cuaacu chí Jesús chí Cristo yā

(Mr. 8.27-30; Lc. 9.18-21)

¹³ Jesús ndaá yā yeⁿe yáⁿ'āa yeⁿe Cesarea yeⁿe yáⁿ'āa yeⁿe Filipino ní itinguuneéⁿ yā discípulos yeⁿe yā ní caⁿ'a yā: ¿Du'ú 'úú ngaⁿ'a 'iiⁿ'yāⁿ yeⁿ'ē 'úú chi Saⁿ'ā chi Daiya Dendyuūs 'úú?

¹⁴ Discípulos ní caⁿ'a yā: Náⁿ'a yā ní ngaⁿ'a yā chí díí chí Juan chí chēdinuūⁿ díí. Náⁿ'a yā ní ngaⁿ'a yā chí díí chí profeta Elías miiⁿ díí. Níícú náⁿ'a yā ní ngaⁿ'a yā chí díí chí profeta Jeremías o 'āā du'ú nūⁿ profeta.

¹⁵ Jesús caⁿ'a yā chí yā discípulos: ¿Du'ú 'úú ngaⁿ'a ndís'tiī?

¹⁶ Simón Pedro miiⁿ nan'guēcútaⁿ'a sa ní caⁿ'a sa: N'diī ní Cristo chí Daiya Dendyuūs chí cánduuchī cueⁿ'e daāⁿmaⁿ.

¹⁷ Tuu'mi ní Jesús miiⁿ nan'guēcútaⁿ'a yā yeⁿ'ē sa ní caⁿ'a yā: De'ē chúúcā n'dai díi Simón, daiya Jonás, ti 'úú nguéé ch'iⁿ'í díi ndii nguēe nduu táámá 'iiⁿ'yāⁿ, naati Chiidá chí canée yā ná va'ai chēeti nguuví ch'iⁿ'í yā díi. ¹⁸ 'Úú ntúūⁿ ngaⁿ'á ngií díi chí díi ní nguuví Pedro díi ní nguuví di neⁿ'e caaⁿ'maⁿ tuūu. Ní vmnaaⁿ 'áámá tuūu ch'ēetē 'cūū chí neⁿ'e caaⁿ'maⁿ Cristo, ní 'úú din'daí yaācū yeⁿ'é. Ní ndíí mar 'áámá poder yeⁿ'e yááⁿ'guiinūⁿ nguéé cuuvi din'nú'u tuūu miiⁿ. ¹⁹ 'Úú teé díi, Pedro, poder tan'dúúcā chí teé díi llaves yeⁿ'e va'ai chēeti nguuví yeⁿ'e naachí Ndyuūs ngaⁿ'a ntiiⁿ'nyúⁿ yā 'tíicā díí. Ní tanducuéⁿ'ē chí cachiichí di na iⁿ'yeeⁿ'dí 'cūū cuchiichi ntúūⁿ ná va'ai chēeti nguuví. Ní tanducuéⁿ'ē chí n'gúuⁿ di na iⁿ'yeeⁿ'dí 'cūū 'cuaāⁿ ntúūⁿ ná va'ai chēeti nguuví.

²⁰ Tuu'mi ní Jesús ca'á yā chí yā discípulos yeⁿ'e yā chí nguéé caaⁿ'maⁿ yā cuuvi yā mar 'áámá 'iiⁿ'yāⁿ chí Jesús miiⁿ chí Cristo yā.

Jesús caⁿ'a yā chí canee chí 'cuūvi yā

(Mr. 8.31-9.1; Lc. 9.22-27)

²¹ Tuu'mi ní Jesús miiⁿ tucá'a yā chí cueeⁿ yā discípulos yeⁿ'e yā. 'Úú cánéé chí caⁿ'á na yāāⁿ Jerusalén ní cánéé chí 'cueenu taaví cuuvi nééné n'deēe dendu'ū yeⁿ'é 'iiⁿ'yāⁿ ndiicūū chí ngaⁿ'ā ntiiⁿ'nyuⁿ yeⁿ'e yaācū miiⁿ, ndúúcū chiiduú n'gēetē, ndúúcū yeⁿ'e maestros yeⁿ'e ley. Cuayivi ní 'iiⁿ'yāⁿ s'eeⁿ 'caaⁿ'núⁿ yā 'úú. Ní 'cuūví. Ndiichi ndii 'íínú nguuví ní 'úú nduūchí yeⁿ'e nguaaⁿ tináⁿ'ā. ²² Tuu'mi ní Pedro miiⁿ ní cueⁿ'e sa ndúúcū Jesús 'áámá lado ní caⁿ'a sa chí sa Jesús: N'diī Señor, nguéé 'cuāāⁿ nī Ndyuūs 'iivi yú ndii mar 'áámá naaⁿ chí cuuvi chuū ndúúcu nī.

²³ Jesús nan'guēcútaⁿ'a yā yeⁿ'e Pedro miiⁿ ní caⁿ'a yā chí yā saⁿ'ā: Diví di nanaáⁿ, díi chí tan'dúúcā yááⁿ'guiinūⁿ. Díi ní nguéé nadicádíínuuⁿ di tan'dúúcā Ndyuūs nadicádíínuuⁿ yā ti nadicádíínuuⁿ di yeⁿ'e dendú'ū yeⁿ'e iⁿ'yeeⁿ'dí 'cūū.

²⁴ Tuu'mi ní Jesús caⁿ'a yā chí yā discípulos yeⁿ'e yā: Nduuti chí 'áámá 'iiⁿ'yāⁿ néⁿ'e yā caⁿ'á yā nduucú, canéé chí cu'neeⁿ maāⁿ yā tanducuéⁿ'ē dendu'ū chí véé yeⁿ'e yā ní cuta'á yā cruz yeⁿ'e yā chí tan'dúúcā chí 'cueenu taaví yā cuuvi cucáāvā 'úú. Ní 'íícú caⁿ'a yā nduucú. ²⁵ Tí nducyáácá 'iiⁿ'yāⁿ chí neⁿ'e yā nadanguáⁿ'ai maāⁿ yā vida yeⁿ'e yā na iⁿ'yeeⁿ'dí 'cūū ní dindaí yā táámá vida yeⁿ'e yā nanááⁿ Ndyuūs. Ní nducyáácá 'iiⁿ'yāⁿ chí dindaí yā vida yeⁿ'e yā cucáāvā 'úú ní nandaācá yā táámá vida yeⁿ'e yā nanááⁿ Ndyuūs. ²⁶ ¿De'ē dichíí'vē yeⁿ'e saⁿ'ā ndúúti chí díi sa ganar nducuéⁿ'ē chí véé núúⁿmaⁿ iⁿ'yeeⁿ'dí 'cūū ní dindaí sa alma yeⁿ'e sa? ¿'Áá n'deēe cuuvi nadíí'vē sa 'áámá 'iiⁿ'yāⁿ cucáāvā alma yeⁿ'e sa? ²⁷ Naati 'úú chí Saⁿ'á chí Daiya Dendyuūs 'úú ní ndaá ndúúcū deēve ch'ēete n'dai yeⁿ'e Chiidá chí canée yā na va'ai chēeti nguuví. Ní ndaá ndúúcū ángeles yeⁿ'é. Tuu'mi ní 'úú díí chí nadíí'vē ca'áámá ca'áámá yā tuunu tuunu ca chí ndiíⁿ yā. ²⁸ Cuaacu níⁿ'nyúⁿ ngaⁿ'á ngií ndís'tiī chí véé náⁿ'a nī chí snée nī 'muuⁿ chí nguéé 'cuūvi nī taanduvéé ndíí snaaⁿ nī Saⁿ'a chí Daiya Dendyuūs ndaa sá chí caaⁿ'maⁿ ntiiⁿ'nyuⁿ sa yeⁿ'e tanducuéⁿ'ē.

17

Jesús n'dáaⁿ yā cuerpo yeⁿ'e maaⁿ yā

(Mr. 9.2-13; Lc. 9.28-36)

¹ Chó'ōo jaāⁿ nguuví, ní Jesús candéé yā Pedro ndúúcū Jacobo ndúúcū Juan chí 'dínū Jacobo. Ní Jesús cueⁿ'é yā ndúúcū saⁿ'ā s'eeⁿ na 'áámá yiicū yaacu. ² Ní Jesús n'dáaⁿ yā

cuerpo yeⁿe maáⁿ yā nanááⁿ saⁿā s'eeⁿ. Ní chín'gai naaⁿ yā tan'dúúca 'yáⁿā 'iicu catecai yā ní nduuví cuéē tan'dúúca dεεε. ³ Cuin'diichí nī. Tuu'mí nūuⁿ che'enaāⁿ Moisés ndúúcu profeta Elías. 'Iiⁿ'yāⁿ s'eeⁿ chi n'díí ndíí cuaaⁿ vmnaaⁿ ní nndeé yā ndúúcu Jesús miiⁿ. ⁴ Tuu'mi ní Pedro caⁿ'a sá chii sa Jesús: Señor, de'ε chúúca n'dáacā yeⁿe yú chí 'cuεetinée yú 'muuⁿ. Ndúúti chí neⁿ'é nī din'daí 'nū ná 'iinū va'ai n'gaiyāā, 'áámá ní yeⁿ'é n'diī, táámá ní yeⁿ'e Moisés, táámá ní yeⁿ'e profeta Elías.

⁵ Taachí Pedro ngaⁿ'a sá chuū, 'áámá meēeⁿ cuéē chí ngii yáⁿā ndii sn'díí 'iiⁿ'yāⁿ s'eeⁿ ní discípulos ch'iindiveéⁿ yā 'áámá nduudu ná meēeⁿ miiⁿ chí ngaⁿ'ā: Sáⁿ'a 'cūū Daiyá chí neⁿ'e taaví ní yeenú cááv sáⁿ'a 'cūū. 'Cu'neeⁿ veéⁿ nī yeⁿ'ē sa.

⁶ Taachí discípulos ch'iindiveéⁿ yā nduudu 'cūū candiitín'dii yā ní dii'yaa n'dái yā chíi. ⁷ Tuu'mi ní Jesús miiⁿ ndaa niiⁿnuúⁿ yā ní tuu'ví yā discípulos ní caⁿ'a yā: Nducueeⁿ nī. Nguéé 'va'a nī.

⁸ Taachí nducueeⁿ discípulos 'āā ntéé n'diichí yā du'ū vεε caati 'āā dámaāⁿ Jesús miiⁿ n'diichi yā.

⁹ Taachi nangua'á yā yeⁿ'e yiicū miiⁿ ní na yúúni naachi cunaⁿ'a yā, Jesús caⁿ'a yā chíi yā 'iiⁿ'yāⁿ s'eeⁿ chí nguéé cuuví yā mar 'áámá 'iiⁿ'yāⁿ yeⁿ'e chí n'diichí yā ndíí taachi Saⁿ'ā chí Daiya Ndyuūs nduuchí yā yeⁿ'e nguaaⁿ tináⁿ'ā.

¹⁰ Tuu'mi ní discípulos ntiinguunéeⁿ yā Jesús ní caⁿ'a yā: ¿De'ē cúúví chí ngaⁿ'a maestros yeⁿ'e ley chí canéé chí profeta Elías miiⁿ ndaa sa vmnaaⁿ?

¹¹ Jesús miiⁿ nán'guεεcútaⁿ'a yā ní caⁿ'a yā chíi yā discípulos: Cuaacu níⁿ'nyúⁿ profeta Elías miiⁿ ndaa sá vmnááⁿ vmnaaⁿ ní 'cuundiyaāⁿ sa tanducuéⁿ'ē. ¹² Naati 'úú ní ngaⁿ'á ngii ndís'tiī chí profeta Elías miiⁿ ní 'āā ndaa yā. Ní 'iiⁿ'yāⁿ s'uuⁿ nguéé tuumicadínuuⁿ yā yeⁿ'e yā du'u chí Elías miiⁿ naati dííⁿ yā ndúúcu Elías miiⁿ tan'dúúca chí neⁿ'e yā ní n'geenu sá ngii. 'Tiicá ntúúⁿ Saⁿ'ā chí Daiyá Ndyuūs 'cueenu sá cuuvi yeⁿ'e 'iiⁿ'yāⁿ s'uuⁿ.

¹³ Tuu'mi ní discípulos tuumicadínuuⁿ yā chí Jesús ngaⁿ'a yā ngii yā discípulos yeⁿ'e Juan chí cheédínuuⁿnī.

Jesús idiⁿ' yā chí nduūvā yeⁿ'e 'áámá saⁿ'ā 'dííⁿ chí ndii sa ataques (Mr. 9.14-29; Lc. 9.37-43)

¹⁴ Taachí ndaa Jesús ndúúcu discípulos yeⁿ'e yā naachi snéé n'deeé n'dái 'iiⁿ'yāⁿ, tuu'mi ní ndaa 'áámá saⁿ'ā nanááⁿ Jesús ní chiintii'ya sá ní caⁿ'a sá: ¹⁵ Señor, nnéé ya'ai 'iinú nī daiyá ti sta'a ataques daiyá ní neené n'geenu sá ngii. Néené n'deeé cuūvi in'daa nuūⁿ sa na yaⁿ'ā ní 'āā neené n'deēe cuūví chí in'daa nuūⁿ sa nguaaⁿ nuūⁿnī. ¹⁶ Ní 'āā chí nguú saⁿ'ā nanááⁿ discípulos yeⁿ'e nī naati nguéé ngii dííⁿ yā chí nduūvā yeⁿ'e sa.

¹⁷ Jesús nan'guεεcútaⁿ'a yā ní caⁿ'a yā chíi yā saⁿ'ā: Ndís'tiī 'iiⁿ'yāⁿ chí nguεε i'téenu nī ndíí nguéé ndúú idiiⁿ n'daacā nī. ¿'Áá 'naaⁿ tiempo cánéé chí cuneé ndúúcu nī? ¿'Áá 'naaⁿ cuhéé ndúúcu ndís'tiī? Candéε nī 'muuⁿ saⁿ'ā 'dííⁿ.

¹⁸ Jesús miiⁿ yaa'vi neeⁿ yā espíritu yeⁿ'e yááⁿ'nguiinūⁿ ní espíritu miiⁿ nan'daa yeⁿ'e saⁿ'ā 'dííⁿ miiⁿ ní tuu'mí nūuⁿ ndúúvā yeⁿ'e sa.

¹⁹ Tuu'mi ní discípulos ní ndaa yā nanááⁿ Jesús na 'áámá lado naachi nguéé snéé 'iiⁿ'yāⁿ ní caⁿ'a yā chíi yā Jesús: ¿De'ē cúúví chí nús'uū nguéé chíi tun'daa 'nū espíritu yeⁿ'e yááⁿ'nguiinūⁿ miiⁿ yeⁿ'e saⁿ'ā 'díí?

²⁰ Jesús miiⁿ ní caⁿ'a yā chíi yā discípulos: Nguéé ch'εεε vaadi i'téenu yeⁿ'e nī. Cuaacu níⁿ'nyúⁿ ngaⁿ'á ngii ndís'tiī chí nduuti chí véé vaadi i'téenu yeⁿ'e nī ní tan'dúúca 'áámá duuti yeⁿ'é yiivē ntíi'yaá chí 'lííⁿ ca cuuvi nī yiicū 'cúú: Yiicū, cuví ndii 'muuⁿ ní cuéⁿ'é ndíí taama lugar. Ní yiicū ní caⁿ'ā. Tanducuéⁿ'ē cuuvi dííⁿ nī nduuti chí cuaacu chí i'téenu nī. ²¹ Naati tanducuéⁿ'ē espíritus yeⁿ'e yááⁿ'nguiinūⁿ chí 'túúca nguéé nan'daa yeⁿ'e 'iiⁿ'yāⁿ chí 'tiicá nūuⁿ caati dámaāⁿ ndúúcu chí ngaⁿ'angua'a yā ndúúcu chí nguεε 'āā ca'diínúⁿ yā nguuví chí ngaⁿ'angua'á yā.

Jesús caⁿ'a ntuúⁿ yā táámá yeⁿ'ē chí 'cuūvi yā (Mr. 9.30-32; Lc. 9.43-45)

²² Taachi 'iiⁿyāⁿ s'eeⁿ snée yā na yáⁿāa Galilea Jesús caⁿ'a yā chii yā discípulos yeⁿ'e yā: Saⁿ'ā chi Daiya Ndyuūs ní 'iiⁿyāⁿ canée chi caⁿ'a yā saⁿ'ā na tá[']ā 'iiⁿyāⁿ. ²³ Ní 'iiⁿyāⁿ 'caaⁿ'nuⁿ yā saⁿ'ā miiⁿ naati saⁿ'a miiⁿ ndii chíⁿ ndii 'íínúⁿ nguuvu nduuchi sa yeⁿ'e nguaaⁿ tináⁿā. Discípulos ní s'neeⁿ ndaachi yiínú yā.

Yeⁿ'ē chi nadí[']vē yā yeⁿ'ē yáacū templo

²⁴ Taachí ndaa Jesús ndúú^cū discípulos yeⁿ'e yā na yáⁿā Capernaum, 'iiⁿyāⁿ s'eeⁿ chi indaaca tuumī yeⁿ'e yaacū templo ní ndaá yā nanááⁿ Pedro miiⁿ. Ní caⁿ'a yā chii yā saⁿ'ā: ¿'Áá nguéeⁿ nadí[']vē maestro yeⁿ'é nī tuūmī chi cáávā yeⁿ'ē yaacū templo?

²⁵ Pedro miiⁿ ní caⁿ'ā sa chi 'tíicā va. Taachí sndaⁿ yā va'ai yeⁿ'e sa Jesús miiⁿ caⁿ'a yā ndúú^cū Pedro: ¿Táácā chi ngí['] yeⁿ'e di, dí['] Simón Pedro? ¿Du'ú nadí[']vē impuestos yeⁿ'ē yáⁿāa nanááⁿ reyes yeⁿ'ē iⁿ'yeeⁿdí 'cūū? ¿'Áá daiya 'iiⁿyāⁿ yeⁿ'e yáⁿāa naachi rey ngaⁿ'a ntiiⁿnyúⁿ yā nadí[']vē sa o 'iiⁿyāⁿ chi cuchii táámá lado?

²⁶ Pedro miiⁿ nan'guuecútaⁿ'a sa ní caⁿ'a sa chii sa Jesús: 'Iiⁿ'yāⁿ chi chiica táámá lado nadí[']vē yā. Jesús caⁿ'a yā chii yā Pedro: Daiya 'iiⁿyāⁿ yeⁿ'e yáⁿāa naachi rey ngaⁿ'a ntiiⁿnyúⁿ yā miiⁿ ní nguéeⁿ canée chí nadí[']vē sa. ²⁷ Nguéeⁿ neⁿ'e yú chi nduuvu taaⁿ yā. Maaⁿ ní cueⁿ'e di ná nuūⁿnīⁿ'yáⁿā ní caⁿ'nuuⁿ di 'áámá gancho yeⁿ'ē 'yaacā nguaaⁿ nuūⁿnīⁿ. 'Yaacā chí ndaācā di vmnááⁿ vmnaaⁿ cutá'a di ní nn'guaaⁿ di cheendí tī. Mííⁿ ní ndaāca di 'aama tuūmī. Ndúú^cū tuūmī miiⁿ ní caⁿ'a di cá[']ā di yeⁿ'ē 'úú ndúú^cū yeⁿ'e maaⁿ di chí nadí[']vē yú yeⁿ'e yaacū templo.

18

¿Du'u 'iiⁿ'yāⁿ chi ch'εεte ca yā?

(Mr. 9.33-37; Lc. 9.46-48)

¹ Nguuvu mííⁿ discípulos yeⁿ'e Jesús ndaá yā nanááⁿ yā ní caⁿ'a yā chii yā Jesús: N'díi Jesús, ¿du'u cá chi ch'εεte cá naachi Ndyuūs ngaⁿ'a ntiiⁿnyuⁿ yā na va'ai cheeti nguuvu?

² Jesús 'cai yā 'áámá saⁿ'ā 'lííⁿ ní ch'ííndi yā saⁿ'ā 'lííⁿ náávtaⁿ'a yeⁿ'e discípulos. ³ Ní caⁿ'a yā: Cuaacu nííⁿnyúⁿ ngaⁿ'á ngí['] ndís'tií. Ndúú^ti chi ndís'tií nguéeⁿ dííⁿ nī tan'dúú^cā 'áámá saⁿ'ā 'lííⁿ nguéeⁿ cuuvi ndaa nī naachí Ndyuūs ngaⁿ'a ntiiⁿnyúⁿ yā na va'ai cheeti nguuvu. ⁴ 'Tíicā 'āā du'ú nūuⁿ 'iiⁿ'yāⁿ chi ndiicúūⁿ maáⁿ yā tan'dúú^cā saⁿ'a 'lííⁿ 'cūū, 'iiⁿ'yāⁿ 'cūū chi ch'εεte ca yā naachí Ndyuūs ngaⁿ'a ntiiⁿnyúⁿ yā na va'ai cheeti nguuvu. ⁵ 'Āā du'ú nūuⁿ 'iiⁿ'yāⁿ chi 'cuaáⁿ yā 'áámá saⁿ'ā 'lííⁿ ndúú^cū chi duuchi, tuu'mi ní 'cuaáⁿ yā 'úú.

Dendu'ū chi idiííⁿ chí 'iiⁿ'yāⁿ dinuuⁿndi yā

(Mr. 9.42-48; Lc. 17.1-2)

⁶ Ní caⁿ'a Jesús: 'Āā du'ú nūuⁿ 'iiⁿ'yāⁿ chí dííⁿ yā chí 'áámá chee chí n'gaiyāā chí i'téenu yā 'úú dinuuⁿndí yā n'daācā ca cáávā 'iiⁿ'yāⁿ miiⁿ chí 'iiⁿ'yāⁿ s'eeⁿ cāchiichí yā 'áámá tuūu yúú^dú chí íngúú 'iiⁿ'yāⁿ na daandú yā ní canuúⁿ yā 'iiⁿ'yāⁿ miiⁿ naachi yáanūuⁿ yeⁿ'e nuūⁿnīⁿ'yáⁿā ní 'iiⁿ'yāⁿ miiⁿ cun'dáá nuúⁿ yā. ⁷ Dε'ε chúú^cā ndaachií yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū cáávā dendu'ū chí 'túú^cā chí diíⁿ chí cuuvá yā na nuuⁿndi. 'Āā véé nūuⁿ cosas chí 'tíicā naati dε'ε chúú^cā ndaachií yeⁿ'e 'iiⁿ'yāⁿ chí dííⁿ yā chí táámá 'iiⁿ'yāⁿ cuuva yā na nuuⁿndi.

⁸ Ní nduuti chí ta'a di o ca'a di idiííⁿ chí dinuuⁿndí nī, 'caacá nī ta'a di o ca'a di ní diví['] di. N'daācā ca chí ndaa di ló'ō ta'a di o ló'ō ca'a di na vida cueⁿ'e daāⁿmaⁿ ní nguéeⁿ chí caⁿ'a di ndúú^cū 'uūvi ta'a di o nduu 'uūvi ca'a di na infierno naachí nguuchi yaⁿ'ā chí 'áámá cūnee. ⁹ Nduutí chí nduutináaⁿ di idiííⁿ chí idinuuⁿndí di, tun'dáa di ní diví['] di. N'daācā ca chí cūnee di ndúú^cū 'áámá nduutináaⁿ di nguéeⁿ tī chí cūnee di ndúú^cū nduu 'uūvi nduutináaⁿ di ní caⁿ'a di ná nguuchi yaⁿ'ā chí 'áámá cūnee cueⁿ'e daāⁿmaⁿ.

'Áámá ejemplo yeⁿ'e 'iiti cuūchī chí nindái

(Lc. 15.3-7)

¹⁰ Ní caⁿ'a Jesús: Tandii ra dííⁿ nī ndúú^cū mar 'áámá da'caiyāā n'gaiyāā ní dííⁿ nī chí cuuvi dinuuⁿndí nī. Nguéeⁿ cunncāā dííⁿ nī yeⁿ'ē tī 'úú ngaⁿ'á ngí['] ndis'tií chí ángeles yeⁿ'ē

da'caīyaá snée yā ná va'ai chæeti nguuvī nanááⁿ Chiidá ni īnaaⁿ yā cucáávā da'caīyaá. ¹¹ Ti Saⁿā Daiyá Ndyuūs miiⁿ ní ndaa sa chi nadinguáⁿ ai sa chíⁿ chí nínⁿdái.

¹² ¿De'ē inadícadiinuⁿ ndís'tiī? Nduuti chi 'áámá saⁿā véé 'áámá ciento 'iiti cuūchī yeⁿē sa ní cuuvi ndái 'áámá tī ¿'áá nguée cū'neeⁿ sa 'iiti chí cuūⁿ ngeécú ndítiiⁿ yuⁿ cuúⁿ tī ní caⁿ'a sa cuááⁿ yīcū miiⁿ ní cun'nuuⁿ sa 'áámá 'iiti chí nindái miiⁿ. ¹³ Ndúúti chí ndaācā sa 'iiti, cuaacu níⁿnyúⁿ ngaⁿ'á ngíí ndís'tiī ti yeenú taavi sa cáávā 'iiti chí nínⁿdai nguée ti ndu'ū chí cuūⁿ ngeécú ndítiiⁿ yuⁿ cuúⁿ tī chí nguée chí nindái tī. ¹⁴ 'Tíicā Chiidá yú chí canée yā ná va'ai chæeti nguuvī nguée neⁿe yā chí mar 'áámá chí n'gaiyáá s'ūuⁿ cuuvi ndái.

'Iiⁿyāⁿ canee chí nadich'εécú yā yeⁿē vi'i

(Lc. 17.3)

¹⁵ 'Tiicá ntúūⁿ ngaⁿ'á ngíí ndís'tiī: Ndúúti chí 'díinū di diiⁿ sa chí nguée n'daācā ndúúcu di, cueⁿe di ní ndee di ndúúcu sa nguaaⁿ maáⁿ nī yeⁿe chí nguεε n'daācā chí diiⁿ sa. Nduuti chí cu'neeⁿ veeⁿ sa yeⁿe di, 'āā nan'dāā n'dai di ndúúcu 'díinū di. ¹⁶ Naati nduuti chí nguée cu'neeⁿ veeⁿ sa yeⁿe di 'cuai di ná 'uūvi o 'iīnu 'iiⁿyāⁿ. Ní chí yā na 'uūvi yā o na 'iīnu yā chí 'caandiveéⁿ yā tanducuéⁿē chí caaⁿ'maⁿ di ní véé testigos yeⁿé di tan'dúúcu chí canée nguūⁿ na ley. ¹⁷ Ndúúti chí 'díinu di nguée cu'nēēⁿ veeⁿ sa yeⁿé yā ndúúcu yeⁿe di cúúví dí 'iiⁿyāⁿ chí ngaⁿ'a ntiiⁿnyúⁿ yā yeⁿē 'iiⁿyāⁿ chí i'téenu yā Ndyuūs. Ndúúti chí 'díinu di miiⁿ nguée cu'nēēⁿ veeⁿ sa yeⁿé 'iiⁿyāⁿ chí ngaⁿ'a ntiiⁿnyúⁿ yā yeⁿe 'iiⁿyāⁿ chí i'téenu yā Ndyuūs, cu'neeⁿ di 'díinū di tan'dúúcu 'áámá 'iiⁿyāⁿ ndiica yáⁿ'ái chí nguée yeⁿē ndaata yeⁿe di o tan'dúúcu chí 'aama saⁿā chí inn'guεε sa yeⁿē yáⁿ'āa.

¹⁸ Cuaacu níⁿnyúⁿ ngaⁿ'á ngíí ndís'tiī: Tanducuéⁿē chí nguée 'cuaaⁿ nī chí 'iiⁿyāⁿ díⁿ yā na iⁿ'yeeⁿdí 'cūū Ndyuūs chí canée ná va'ai chæeti nguuvī nguée 'cuaaⁿ ntuúⁿ yā. Tanducuéⁿē chí 'cuáaⁿ nī chí 'iiⁿyāⁿ díⁿ yā na iⁿ'yeeⁿdí 'cūū Ndyuūs chí canée ná va'ai chæeti nguuvī 'cuaaⁿ ntuúⁿ yā.

¹⁹ Taama vmnéⁿēe ngaⁿ'á ngíí ndís'tiī: Nduuti chí ná 'uūvi ndís'tiī nduuvidaamá nī ná yáⁿ'āa 'cūū yeⁿe 'āā de'é nūuⁿ chí caacá nī yeⁿē Chiidá chí canée yā na va'ai chæeti nguuvī, Chiidá tée yā ndís'tiī. ²⁰ Tiī naachí snée 'uūvi o 'iīnu 'iiⁿyāⁿ chí nduuvidaama yā cucáávā chí duuchí, miiⁿ canee nduucú yā.

²¹ Tuu'mi ní ndaā Pedro miiⁿ nanááⁿ Jesús ní caⁿ'a yā chí yā 'iiⁿyāⁿ: N'dí Señor, ¿'áá n'deē cuūví canee chí nádich'εécú yeⁿē 'díinū chí nguée n'daācā idiiⁿ sa nduucú? ¿'Áá ndēēchē cuūví?

²² Jesús caⁿ'a yā chí yā Pedro: Nguée ngaⁿ'á ngíí dii chí ndēēchē cuuvi tiī 'iīnū ngeecu ndiichi veces chí ndēēchē ngaⁿ'á ngíí dii.

Ndúú 'uūvi 'iiⁿyāⁿ chí sn'diicu yā

²³ Ní caⁿ'a Jesús: 'Tíicā naachí Ndyuūs ngaⁿ'a ntiiⁿnyúⁿ yā ná va'ai chæeti nguuvī tan'dúúcu 'áámá rey chí neⁿe yā tun'dāa yā cuenta ndúúcu mozos yeⁿé yā. ²⁴ Taachí neⁿe yā tuca'a yā tun'daa yā cuenta, candéε yā 'áámá mozo yeⁿé rey nanáaⁿ yā chí can'diicū sa n'dee n'dái mil tuūmī. ²⁵ Mozo miiⁿ ní nguée cuuvi diiⁿ sá nadí'vē sa. Tuu'mi ní rey chí 'iiví sa caⁿ'a yā chí yā táámá mozo miiⁿ chí n'diicui sa mozo ndúúcu n'daatāá yeⁿē sa ndúúcu daiya sa ndúúcu tanducuéⁿē chí véé yeⁿē sa ní nadí'vē mozo miiⁿ chí can'díicū sa yeⁿé yā. ²⁶ Tuu'mi ní mozo miiⁿ candiitin'dí sa nanááⁿ 'iivi sa ní di'cuítu sa 'iiⁿyāⁿ ní caⁿ'a sa chí sa 'iiⁿyāⁿ: N'dí Señor, cunee ngíinū nī 'áámá tiempo ní 'úú ní nadí'vé tanducuéⁿē yeⁿé nī. ²⁷ 'Iivi sa miiⁿ ní nneé ya'ai 'iīnu yā saⁿā ní caⁿ'a yā chí yā saⁿā: Cunaⁿ'ā di ní 'āā ntéé cun'diicū di yeⁿé. ²⁸ Sáⁿ'a 'cūū cuínaⁿ'a sa ní nan'daā sa ní ndaācā sa mozo chí daama idiiⁿ sa ntiiⁿnyuⁿ ndúúcu sa. Táámá mozo miiⁿ can'díicu ntúūⁿ sa 'aama ciento tuūmī yeⁿē sa. Ní mozo miiⁿ chita'ā sa daandu sáⁿ'ā miiⁿ ní tucá'a sa chí sa yaācū sa ní caⁿ'a sa: Nadí'vē di chí can'díicu di. ²⁹ Tuu'mi ní mozo miiⁿ candiitin'dí sa nanáaⁿ sa ní caⁿ'a sa chí sa: Cunee ngíinū dí 'téé ní nadi'vé yeⁿē di. ³⁰ Naati saⁿ'ā miiⁿ nguée 'cuūⁿ sa. Cheⁿe sa chíca sa nuūⁿndī yeⁿe mozo miiⁿ ndúúcu

sa ní s'nuún yā mozo vácūū ndíí nadíí'vē sa chi cán'díicū sa. ³¹ Taná'ā mozos ndúúcu sa n'diichi yā chi chií ní s'nee'ndaachi yiinú yā. Ní che'n'e yā nanáán 'iivi yā ní ca'n'a yā chii yā 'iivi yā tanducué'n'ē chí chií. ³² Tuu'mi ní 'iivi mozos 'cai yā mozo 'cūū chi ndaa sa nanáán yā. Ní ca'n'a yā chii yā mozo mii'n: Dii mozo, nguéé n'daacā di. Tanducué'n'ē chí cán'díicū di ye'n'ē 'āā chíí dii chí 'āā ntéé nadíí'vē di ti di'cuítu di 'úú. ³³ ¿'Áá nguéé nnee ya'āi 'iinu di mozo ndúúcu di tan'dúúca chí 'úú nneé ya'ai 'iinú dii? ³⁴ Tuu'mi ní nduuví taán 'iivi sa ní chiicá yā nuū'ndi ye'n'ē sa. Ní cue'n'e sa vácūū chí ch'e'n'ē yā sa'n'ā ní mii'n canee sa ndii nadíí'vē sa tanducué'n'ē chí cán'díicū sa ye'n'e yā.

³⁵ 'Tiicá ntúū' Chiidá chí canéé na va'ai che'eti nguuví 'tíicā díí' yā ndúúcu ndís'tíi nduuti chí ndís'tíi ní nguéé nadich'εεcú nī ndúúcu nuu'ma' staava ye'n'e nī ye'n'e 'áámá 'áámá 'díinu nī ye'n'e chí nguéé n'daacā ndíí' yā ndúúcu nī.

19

Jesús ngi'cuee' yā ye'n'ē chí 'tεεchí vi'i 'ii'yā'n

(Mr. 10.1-12; Lc. 16.18)

¹ Taachí Jesús ch'íínú ca'n'a yā ndúúdu 'cūū chíicá yā na yá'n'āa Galilea ní cue'n'e ya'n'ai cá yā na yá'n'āa ye'n'e Judea chí táámá lado ye'n'e yíicú Jordán. ² Nééné 'yaa' 'ii'yā'n cue'n'ē yā n'daa yā Jesús mii'n ní Jesús díí' yā chí nduūvā ye'n'e 'ii'yā'n s'ee'n chí ngiitā.

³ Tuu'mi ní 'ii'yā'n fariseos ndaa yā nanáán Jesús mii'n ti ne'n'ē yā chí n'diichínee' yā Jesús mii'n. Ní nga'n'a yā ngií yā 'ii'yā'n: N'dií Jesús, ¿'áá canéé ná ley chí sa'n'ā ní cu'nee'n sa n'daataá ye'n'ē sa chí nguéé ch'εεte de'ε chí ndiín tá?

⁴ Jesús mii'n nan'guεεcúta'n'a yā ní ca'n'a yā chii yā 'ii'yā'n s'ee'n: ¿'Áá nguéé n'gee'n nī naachi canéé nguū'n na libro ye'n'ē Ndyuūs naachí nga'n'ā chí Ndyuūs díin'dái yā taanduvéé cosas ndíí cuáán vmnaa'n ní díin'dái yā sa'n'ā ndúúcu n'daataá? ⁵ Ní ca'n'a yā: Chíín chí sa'n'ā cu'nee'n sá chíida sa ndúúcu cheεcu sá ní ndūūvidaama sa ndúúcu n'daataá ye'n'ē sa ní nduu 'uuví yā ní nduūvī 'aama yā nduucū vi'í. ⁶ Tuu'mi ní 'āā ntéé 'uuví ngií yā tí 'āā 'aama núún yā. Chíín chí Ndyuūs nádaama yā, 'ii'yā'n nguεε cánéé chí idiví yā.

⁷ 'Ii'yā'n fariseos ca'n'a yā chí yā Jesús: ¿De'ε cáávā chí Moisés ca'n'a ntii'nyu'n sa chí ca'á yā carta chí i'tεεchi vi'í yā ní cu'neé'n yā n'daataá ye'n'e yā?

⁸ Jesús ca'n'a yā chí yā 'ii'yā'n fariseos: Moisés mii'n ní 'cuū'n sa chí s'nee'n sa'n'ā n'daataá ye'n'e sa cucáávā chí staava ye'n'e sa ní nééné cheεchi. Naati cuáán vmnaa'n naachí chí nga'a, nguεε 'tíicā chíí. ⁹ 'Úú ní nga'n'á ngií ndís'tíi chí 'āā du'ú nūu'n sa'n'ā chí cu'nee'n sa n'daataá ye'n'ē sa ndúúti chí nguéé cáávā chí cue'n'e tá ndúúcu taama sa'n'ā ní sa'n'ā mii'n cunee sa ndúúcu taama tá, véé nuū'ndi ye'n'ē sa. Sá'n'ā chí 'caandavaacu sa ndúúcu n'daataá chí s'nee'n tá isa'n'ā ye'n'ē tá, véé ntúū'n nuu'ndi ye'n'ē sa chí adulterio.

¹⁰ Tuu'mi discípulos ye'n'e Jesús ní ca'n'a yā chí yā Jesús: Ndúúti chí sa'n'ā mii'n cú'nee'n sa n'daataá ye'n'ē sa tuu'mi ní n'daacā ca chí nguéé 'caandavaacu sa.

¹¹ Tuu'mi ní Jesús mii'n ca'n'a yā chí yā discípulos: Nguéé nducyaaca 'ii'yā'n cuuvi deenu yā chuū naati 'āā dámaā'n 'ii'yā'n chí Ndyuūs nca'a yā chuū. ¹² Véé 'yaa'n razones chí nguéé 'caandavaacu sa'n'ā. Véé sa'n'a chí ndii taachi n'giindiyáa' sa ye'n'ē cheεcu sa 'āā nguéé cuuvi 'caandavaacu sa. Ní véé ntúū'n sa'n'ā eunucos chí 'ii'yā'n idiín yā chí nguéé cuuvi 'caandavaacu sa. Véé ntúū'n sa'n'ā chí maa'n sa nguéé ne'n'e sa 'caandavaacu sa cáávā chí dii' sa ntii'nyu'n ye'n'e naachí Ndyuūs nga'n'a ntii'nyú'n yā. Nduuti chí 'ii'yā'n cuuvi ca'cuee'n yā nduudú 'cūū tuu'mi ní 'āā deenú yā.

Jesús idi'viicú yā dá'caiyā

(Mr. 10.13-16; Lc. 18.15-17)

¹³ Tuu'mi ní ndaa 'ii'yā'n chí ndεε yā da'cáiyā nanáán Jesús. Ní 'íicú Jesús mii'n cun'du'ú yā ta'a yā vmnáán ye'n'ē da'caiyā s'ee'n ní ca'n'angua'á yā ye'n'ē dá'caiyā. Discípulos yaa'vi néen yā 'ii'yā'n chí índaa ndúúcu dá'caiyā. ¹⁴ Jesús mii'n ní ca'n'a yā chí yā discípulos: 'Cuaán nī chí chíí da'caiyā nanaán. Nguéé caaca taa'n nī ye'n'ē da'caiyā s'tíi

ti naachí Ndyuūs chi canéé na va'ai cheeti nguuvi ngaⁿa ntiiⁿnyúⁿ yā ní yeⁿē da'caiyāa s'tíi. 'Tíica chíi.

¹⁵ Ch'iinu chin'du'ū ta'á yā vmnaaⁿ yeⁿē da'caiyāa s'eeⁿ ní chiicá yā lugar miiⁿ.

Saⁿā 'díiⁿ chí 'cuiica ní indeē sa ndúucū Jesús

(Mr. 10.17-31; Lc. 18.18-30)

¹⁶ Tuu'mi ní ndaā 'áamá saⁿā 'díiⁿ nanááⁿ Jesús miiⁿ ní caⁿ'a sa chíi sa Jesús: N'diī maestro chí n'dai, ¿de'ē chi n'daacā chí cuuví díiⁿ ní cuuví ndaācá vida cueⁿe daāⁿmaⁿ chí cuuvi yeⁿé?

¹⁷ Jesús caⁿ'a yā chíi yā saⁿā 'díiⁿ miiⁿ: ¿De'ē cúuví chí ngaⁿ'ā di chí n'dai 'úú? Mar 'áamá 'iiⁿ'yāⁿ nguéé n'dai yā ti dámaáⁿ Ndyuūs. Naati ndúúti chí neⁿe di cundaā di na va'ai cheeti nguuvi naachí Ndyuūs ngaⁿ'a ntiiⁿnyuⁿ yā, idiiⁿ di tan'dúucā chí ngaⁿ'a mandamientos.

¹⁸ Saⁿā 'díiⁿ míiⁿ ní caⁿ'a sa: ¿Cheé chíiⁿ? Jesús caⁿ'a yā: Nguéé 'caāⁿ'nūⁿ di. Nguéé caⁿ'a di ndúucū 'aama n'daatáa chí nguéé yeⁿē di. Nguéé diduucú di. Nguéé caaⁿ'maⁿ di nduudu yaadi yeⁿé mar 'áamá 'iiⁿ'yāⁿ. ¹⁹ Dinéⁿe di cheecu di ndúucū chíida di. Dinéⁿe di 'iiⁿ'yāⁿ na niiⁿnuúⁿ vaacú di tan'dúucā chí neⁿe di maāⁿ di.

²⁰ Saⁿā 'díiⁿ miiⁿ ní caⁿ'ā sa: Tanducuéⁿē chuū 'āā idiiⁿ ndíi taachi saⁿ'ā 'líiⁿ 'úú. ¿De'ē cá indai yeⁿé?

²¹ Jesús caⁿ'a yā chíi yā saⁿ'ā: Ndúúti chí neⁿe di chí cúuví n'dai ca di tuu'mi ní cueⁿe di ní n'diicui di tanducuéⁿē chí véé yeⁿē di ní ca'a di 'iiⁿ'yāⁿ chí nguéé yeⁿe yā. Tuu'mi ní ndaācā chí véé vaadi 'cuiica yeⁿē ná va'ai cheeti nguuvi chí cuuví yeⁿē di. Ní cuchí di ní caⁿ'a di nduucú.

²² Taachí saⁿ'ā 'díiⁿ miiⁿ ch'iindiveeⁿ sa chuū, cunáⁿ'a sa ní s'neeⁿ ndaachi yiinú sa ti neené 'cuiica sa.

²³ Tuu'mi ní Jesús caⁿ'a yā chíi yā discípulos yeⁿe yā: Cuaacu níiⁿnyúⁿ ngaⁿ'á ngíi ndís'tiī chí ngíⁿ'iī chí cundaā 'áamá saⁿ'ā 'cuiica naachí Ndyuūs ngaⁿ'a ntiiⁿnyúⁿ yā na va'ai cheeti nguuvi. ²⁴ Táamá cosa ngaⁿ'á ngíi ndís'tiī chí 'áama iti camello chí ch'ete ca nguéé ti 'yuudūu 'tiicá tī, nguéé ngíⁿ'iī ca chí cho'ó tī na nduutinááⁿ 'iini chí cheendi va'ai 'líiⁿ nguéé ti 'áamá 'iiⁿ'yāⁿ 'cuiica cu'téenu yā Ndyuūs ní cundáa yā naachí Ndyuūs ngaⁿ'a ntiiⁿnyúⁿ yā na va'ai cheeti nguuvi.

²⁵ Taachí ch'iindiveeⁿ discípulos yeⁿé yā chuū, néené nadicádíiⁿnuuⁿ yā ní caⁿ'a yā nguááⁿ maaⁿ yā: ¿Du'u cuuví nanguaⁿ'āi?

²⁶ Jesús ch'íiⁿnu yā discípulos ní caⁿ'a yā: Saⁿ'ā yeⁿe iⁿ'yeeⁿdí 'cūū ní nguéé cuuví diiⁿ sa chuū naati Ndyuūs cuuví díiⁿ yā tanducuéⁿē.

²⁷ Tuu'mi ní Pedro miiⁿ ní nan'guεcútaⁿ'a sa ní caⁿ'a sa chíi sa Jesús: N'diī Señor, cuin'diichí nī. Nús'ūū ní sn'neeⁿ 'nū tanducuéⁿē chí véé yeⁿé 'nū ní cuchíi 'nū ndúucū n'diī. ¿De'ē ndaācā yeⁿé 'nū?

²⁸ Jesús caⁿ'a yā chíi yā discípulos: Cuaacu níiⁿnyúⁿ, ngaⁿ'á ngíi ndís'tiī, chí tiempo chí cuchíi taachí nducuéⁿē nduuví ngai ní Saⁿ'a chí Daiyá Dendyuūs 'cuūndí sa na trono yeⁿē sa ndúucū dεεve ch'ete yeⁿe maaⁿ sa ní 'cuai sa ndís'tiī chí cueⁿe nī ndúucū sa. Ní ndís'tiī ní 'cuεté nī na ndiichuuví tronos ní díiⁿ nī juzgar ndu'u ndiichúúví ndaata yeⁿe 'iiⁿ'yāⁿ Israel chí judíos yā. ²⁹ 'Āā du'ú nūuⁿ chí cu'neeⁿ ná vaacu yā o 'díiⁿnu yā o ví'i yā o chíidá yā o cheécú yā o n'daataá yeⁿe yā o daiya yā o yáⁿ'āa yeⁿe yā cáāvā chí duuchí, 'iiⁿ'yāⁿ miiⁿ ndaāca cá yā táámá ciento más cá. Ní Ndyuūs ca'á yā 'iiⁿ'yāⁿ miiⁿ vida cueⁿe daāⁿmaⁿ yeⁿe yā ná va'ai cheeti nguuvi. ³⁰ Néené 'yaaⁿ 'iiⁿ'yāⁿ chí maaⁿ snée yā cuááⁿ chí vmnaaⁿ ní 'iiⁿ'yāⁿ s'eeⁿ 'cuεtinée yā cuaaⁿ chí cuayiivi ní néené 'yaaⁿ 'iiⁿ'yāⁿ chí maaⁿ snée yā cuaaⁿ chí cuayiivi ní 'iiⁿ'yāⁿ s'eeⁿ 'cuεtinée yā cuaaⁿ chí vmnaaⁿ.

20

Ejemplo yeⁿe 'iiⁿ'yāⁿ chí díiⁿ yā ntiiⁿnyuⁿ

¹ Caⁿ'a Jesús: Naachí Ndyuūs ngaⁿ'a ntiiⁿnyúⁿ yā yeⁿe na va'ai cheeti nguuvi ní tan'dúucā 'áamá dueño chí véé yáⁿ'āa yeⁿe yā. Dueño miiⁿ ní can'dáa yā cuaaⁿ ná

ngueetiyaaⁿ chí in'nuuⁿ yā mozos chi diiⁿ ntiiⁿnyuⁿ naachi véé dí'yú uvas yeⁿ'é yā.
² Ní indeé yā ndúúcu mozos taaca chi nadí'vé yā mozos. Ní caⁿ'a yā chi ca'a yā 'aama caadi plata nguuví miiⁿ ní dicho'ó yā mozos miiⁿ chi diiⁿ sa ntiiⁿnyuⁿ naachi véé dí'yú uvas yeⁿ'é yā.
³ Dueño miiⁿ can'dáa yā na vaacu yā taandúú cuááⁿ nááⁿ n'gεécú nuuuⁿ gueetiyaaⁿ ní cuéⁿ'e yā cuaaⁿ nii'vεē ní n'diichi yā ta n'duuví sáⁿ'ā chí snée sa chí nguéé ndaācā ntiiⁿnyuⁿ yeⁿ'e sa.
⁴ Ní caⁿ'a yā chí yā saⁿ'ā s'eeⁿ: Ndís'tiī, cuéⁿ'e ní díⁿ ní ntiiⁿnyuⁿ yeⁿ'é naachi véé dí'yú uvas yeⁿ'é. 'Úú ní nadí'vé ndís'tiī tan'dúúca chí tuumicadiinúúⁿ chí n'daācā. Saⁿ'ā s'eeⁿ ní cueⁿ'e sa diiⁿ sa ntiiⁿnyuⁿ miiⁿ.
⁵ Ní can'dáa ntuuⁿ yā taandúú cuááⁿ naaⁿ ingyáⁿ'ā. 'Tiicá ntúūⁿ cun'daa yā táandu cuaaⁿ nááⁿ n'gεécú 'íínú chíinū, 'tiicá ntúūⁿ díⁿ yā n'nuúⁿ yā mozos chí diiⁿ sa ntiiⁿnyuⁿ.
⁶ Ní taandúú n'gεecu juⁿ'u chíinū cueⁿ'e ntúūⁿ yā ní ndaācā yā taandu 'uuví saⁿ'ā chí nguéé índaācā ntiiⁿnyuⁿ yeⁿ'e sā. Ní caⁿ'a yā chí yā saⁿ'ā s'eeⁿ: ¿De'ē cúúví chí ndís'tiī snée ní 'muuⁿ ní núúⁿmán nguuví chí nguéé ntiiⁿnyuⁿ chí idiíⁿ ní?
⁷ Saⁿ'ā s'eeⁿ caⁿ'a sa: Ti mar 'áámá 'iⁿ'yāⁿ nguéé tee yā ntiiⁿnyuⁿ yeⁿ'é 'nū. Dueño miiⁿ caⁿ'a yā chí yā saⁿ'ā s'eeⁿ: Ndís'tiī, cueⁿ'e ní díⁿ ní ntiiⁿnyuⁿ naachi véé dí'yú uvas yeⁿ'é ní nadii'vé ndís'tiī tan'dúúca chí ituumicadiinúúⁿ chí n'daācā.
⁸ Taachí cueⁿ'e yā 'yáⁿ'ā, dueño miiⁿ naachí véé dí'yú uvas miiⁿ caⁿ'a yā chí yā saⁿ'a chí ngaⁿ'a ntiiⁿnyuⁿ sa yeⁿ'e mozos: 'Cuai dí mozos ní nadí'vé di mozos chí ndaa sa cuayiivi. 'Cuiinu maaⁿ ní nadí'vé di mozos chí ndaa sā cuayiivi. 'Cuiinu maaⁿ ní nadí'vé di mozos chí ndaa sā vmnaaⁿ.
⁹ Ndaa mozos chí cheⁿ'e sā na ntiiⁿnyuⁿ miiⁿ taandu na n'gεécú juⁿ'u chíinū ní nadí'vé sa mozos. 'Áámá 'áámá sā ndaācā sā 'áámá caadi plata yeⁿ'é sā.
¹⁰ Taachí ndaa mozos chí cheⁿ'e sā vmnaaⁿ ná ntiiⁿnyuⁿ miiⁿ, nadacadiinuuⁿ sā n'deē cá tuūmī ndaācā sā. Mozos ntúūⁿ ndaācā sā 'áámá caadi tuūmī yeⁿ'e sā.
¹¹ Taachí nadí'vé sā mozos ní neené n'dee caⁿ'a mozos yeⁿ'e dueño yeⁿ'e naachi véé dí'yú uvas miiⁿ.
¹² Mozos ní caⁿ'a sa: Sáⁿ'a s'tiī ti 'āā 'ai chíinū ndaā sa ní 'áámá hora nūⁿ diiⁿ sa ntiiⁿnyuⁿ ní dáámá nūⁿ nadí'vé ní sáⁿ'a s'tiī ndúúcu nús'uū. Nús'uū ní díⁿ 'nū ntiiⁿnyuⁿ ní ch'εetinée 'nū na 'yáⁿ'ā.
¹³ Dueño miiⁿ ní nan'gueécútaⁿ'á yā ní caⁿ'a yā chí yā 'áámá cheε mozos: Ndís'tiī saⁿ'ā chí n'dai nduucú, nguéé nduuví taaⁿ di nduucú. Nguéé cunncāá idiíⁿ nduucú ndís'tiī. ¿'Áá nguéé ndeé ndúúcu ní chí nadii'vé ndís'tiī 'áámá caadi plata ní 'āā canéé yiinú ní?
¹⁴ Cuta'á ní chí tunééⁿ ndís'tiī ní cunaⁿ'a ní. 'Úú ní nadicadiinúúⁿ chí nadii'vé mozos chí ndaā sa cuayiivi tan'dúúca chí nadii'vé ndís'tiī.
¹⁵ ¿'Áá nguéé cuuvi diiⁿ 'úú tan'dúúca chí neⁿ'é ndúúcu tuūmī yeⁿ'é? ¿'Áá ngíí nguee ní ti 'úú ní n'daí?
¹⁶ 'Túúca 'iⁿ'yāⁿ chí snée cuááⁿ vmnááⁿ 'cuεetinée yā ndii cuaaⁿ cuayiivi. 'iⁿ'yāⁿ chí snée cuayiivi ní 'cuεetinée yā cuááⁿ vmnaaⁿ ti néené 'yaaⁿ n'deeé 'iⁿ'yāⁿ chí 'cai Ndyuūs naati duu'vii 'iⁿ'yāⁿ chí ndεεve Ndyuūs.

Jesús ngaⁿ'a ntuuⁿ yā yeⁿ'é chí 'cuūvi yā

(Mr. 10.32-34; Lc. 18.31-34)

¹⁷ Jesús cuheε yā na yāāⁿ Jerusalén ní cueⁿ'é yā ndúúcu ndu'ū ndiichúúví discípulos yeⁿ'é yā 'áámá lado. Ní Jesús caⁿ'a yā chí yā discípulos taachi ngiicá yā: ¹⁸ Ndís'tiī ní maaⁿ ní cuheε yú na yāāⁿ Jerusalén miiⁿ. 'Úú chí Saⁿ'ā chí Daiya Dendyuūs 'iⁿ'yāⁿ s'eeⁿ nca'á yā 'úú tá'āa chíiduú n'gεeté ndúúcu maestros chí ngi'cueeⁿ ley. 'iⁿ'yāⁿ s'eeⁿ ní díⁿ yā condenar 'úú ní 'cuūví. ¹⁹ Ní nca'a yā 'úú ta'a 'iⁿ'yāⁿ chí nguéé ndaata yeⁿ'e 'iⁿ'yāⁿ Israel. 'iⁿ'yāⁿ s'eeⁿ ní 'cááⁿnyuⁿneeⁿ yā 'úú ní 'cueⁿ'e yā 'úú ní cu'neeⁿnga'á yā 'úú. Ní 'úú chí Saⁿ'ā chí Daiya Ndyuūs miiⁿ nanduuchí ndiichi ndii 'íínú nguuví yeⁿ'é nguaaⁿ tináⁿ'ā.

Chí cheεcu Jacobo ndúúcu Juan chiica tá yeⁿ'é 'áámá naaⁿ

(Mr. 10.35-45)

²⁰ Tuu'mi ní ndaā n'daataá yeⁿ'e saⁿ'ā Zebedeo nanááⁿ Jesús miiⁿ ndúúcu daiya tá ní chiintii'ya tá nanááⁿ Jesús miiⁿ ní dich'εete tá 'yā ní chiica ta 'áámá favor. ²¹ Jesús ní caⁿ'a yā: ¿Dé'ε neⁿ'é dí? Táⁿ'ā miiⁿ ní caⁿ'a tá: Taachí ndaa di naachí caaⁿ'maⁿ ntiiⁿnyuⁿ di, caaⁿ'maⁿ ntiiⁿnyuⁿ di chí ndúú 'uūví saⁿ'ā daiyá 'cuεete sa 'diituu dí, 'aama sa ní lado tá cuaacu di ní taama sa ní lado tá 'cuéé di.

²² Tuu'mi ní Jesús nan'guεεcúta'a yā ní ca'n'a yā chii yā 'ii'n'yān: Nguéé déenu nī de'ē chi ngiica nī. ¿'Áá cuuvi diin nī chí cú'u nuún nī ye'n'e chi n'gee'n ye'n'e vaso chi ye'n'ē chi 'cueenú cuuvi? ¿'Áá cuuvi cuta'á nī maa'n ngeēdínuū'nīn chí cuta'á? Juan ndúúcū Jacobo mii'n ní nga'n'a yā chí cuuvi diin yā. ²³ Jesús mii'n ca'n'a yā chí yā 'ii'n'yān s'ee'n: Cuaacu ní'nnyú'n canéé chí cu'ú nī ye'n'e vaso ye'n'ē ye'n'e chí 'cueenú cuuvi ní canéé chí cuta'á nī chí cheēdínuū'nīn chí 'úú ita'á. Naati nguéé tunéé'n 'úú chí ca'á du'ū chí 'cuundi lado tá cuaācú o lado tá 'cuēe. Lugar 'cūū ní Ndyuūs ca'á yā 'ii'n'yān chí Ndyuūs 'cuundiyaá'n yā cáāvā 'ii'n'yān.

²⁴ Taachí ndu'u ndííchí discípulos ch'iindiveé'n yā chuū, nduuvi taán yā ye'n'e nduu 'uūvi discípulos chí daiya sa'n'ā Zebedeo. ²⁵ Tuu'mi ní Jesús yaa'ví yā discípulos ní ca'n'a yā chí yā 'ii'n'yān s'ee'n: 'Āā deenu ndís'tiī chí 'ii'n'yān ye'n'e naciones chí nga'n'a ntiinnyu'n veε poder ye'n'ē yā nguaa'n 'ii'n'yān ye'n'e naciones ye'n'ē yā. Ní 'ii'n'yān chí n'geete cá ye'n'ē naciones ní nga'n'a ntiinnyú'n yā ye'n'e tanán'a yā. ²⁶ Naati nguéé 'tíicā cuuvi nguaa'n ndis'tiī. Sa'n'ā chí ne'n'e sa cúúví ch'εete sa nguaa'n ndís'tiī canéé chí dichí've sa ndís'tiī. ²⁷ Sa'n'ā chí ne'n'e sa cūnee cuaa'n vmnaa'n ca ye'n'e ndís'tiī canéé chí dichí've ca sa ndís'tiī. ²⁸ Naati Sa'n'ā chí Daiya Ndyuūs nguéé ndaa sa chí 'íi'n'yān dichí've yā sa'n'ā ti maā'n sa dichí've sa 'ii'n'yān, ní chí ca'a sa vida ye'n'ē maa'n sa tan'dúúcā chí precio ye'n'ē nuu'ndi cáāvā chí nadangua'n'ai yā 'yaa'n n'dái 'ii'n'yān.

'Uūvi chí ngueenáá'n nduūvā ye'n'ē sa

(Mr. 10.46-52; Lc. 18.35-43)

²⁹ Taachí Jesús ndúúcū discípulos ye'n'ē yā can'daa yā ye'n'e yáā'n Jericó nééné 'yaa'n 'ii'n'yān can'daa yā 'ii'n'yān s'ee'n. ³⁰ 'Uuvi sa'n'ā chí ngueenáá'n chí veēte sa niinnyú'n cyúúni taachí ch'iindivee'n sa chí Jesús cho'ó yā mii'n, 'cai yiicú sa ní ca'n'a sa: N'diī Señor, Daiya David, nneé ya'ai 'iinu nī nús'uu.

³¹ Nééné 'yaa'n 'ii'n'yān yaa'vi nee'n yā sa'n'a s'ee'n chí cunēē 'dii'n cheendi sa naati sa'n'a s'ee'n ní n'gaī yiicú cá sa: N'diī Señor, Daiya David, nneé ya'āi 'iinu nī nús'uu.

³² Jesús mii'n cheendii yā ní 'cai yā sa'n'ā s'ee'n ní ca'n'a yā chí yā sa'n'ā s'ee'n: ¿De'ē ne'n'ē nī chí 'úú diin ndúúcu nī?

³³ Sa'n'ā s'ee'n ní ca'n'a sa: N'diī Señor, diin nī chí snaa'n 'nū.

³⁴ Tuu'mi ní Jesús, Daiya David, nneé ya'ai 'iinu yā sa'n'ā s'ee'n ní tuu'ví yā nduutináa'n sa. Ní hora míi'n nūu'nduutináa'n sa nguuaa'n ní chí snaa'n sa. Sa'n'ā s'ee'n ní cue'n'e sa ndúúcū Jesús.

21

Jesús sndaá yā na yáā'n Jerusalén tan'dúúcā 'áámá rey

(Mr. 11.1-11; Lc. 19.28-40; Jn. 12.12-19)

¹ Taachi Jesús ndaa niinnyú'n yā na yáā'n Jerusalén ní ndaa yā ná yiicū chí nguuvi Olivos chí ye'n'ē yáā'n 'líi'n chí nguuvi Betfagé, dichó'o yā na 'uūvi discípulos ye'n'ē yā. ² Ní ca'n'a yā chí yā discípulos: Cue'n'e nī na yáā'n 'líi'n chí canéé niinnyú'n. Mii'n ní ndaaca nī 'áámá burra chí n'dēēchiichí tī ndúúcū daiya tī. Ndís'tiī ní n'daatí nī 'iiti ní candéé nī 'iiti 'muu'n. ³ Ní ndúúti chí 'áámá 'ii'n'yān yaa'vi yā ndís'tiī ye'n'e 'iiti mii'n, caa'n'ma'n nī cuuvi nī 'ii'n'yān tī Señor ye'n'e yú ne'n'e yā 'iiti mii'n. Ní 'ii'n'yān mii'n caama nadicho'ó yā 'iiti.

⁴ Tanducué'n'ē 'túúcā chí ní 'iicu cuuví cuaacu chí ca'n'a profeta chí ndεε yā nduudu ye'n'ē Ndyuūs ndii cuáán vmnaa'n taachí dinguú'n yā chuū na libro ye'n'e Ndyuūs:

⁵ Cuuví nī 'ii'n'yān chí snée yā na yáā'n Sió'n 'tíicā. Cun'diichí nī, Rey ye'n'e nī cuchíí yā nanáa'n nī. Rey mii'n ní ndiicuú'n yā ní canduú yā burra 'líi'n. Ní burra 'líi'n ní daiya 'iiti chí candéé.

⁶ Discípulos cue'n'e yā ní diin yā tan'dúúcā chí Jesús mii'n dichó'o yā 'ii'n'yān s'ee'n. ⁷ Ní candεε yā burra mii'n ndúúcū daiyá tī. Ní sn'duú yā cotón ye'n'ē yā vmnáá'n ye'n'ē burra 'líi'n. Ní Jesús mii'n ní canduú yā 'iiti. ⁸ 'Ii'n'yān chí n'dee n'dái n'doo yā cotón ye'n'ē yā cuaa'n cyúúni. Tanán'a yā ch'iica yā dúu'nē yá'n'á ní n'doo yā cuaa'n cyúúni. ⁹ 'Ii'n'yān chí cue'n'e yā cuáán vmnaa'n ndúúcū 'ii'n'yān chí cue'n'e yā cuaa'n dáámí yā tucá'a yā 'cai yiicú

yā, ní caⁿ'a yā: De'ē chúúca ch'εεε n'dai 'iiⁿ'yāⁿ chi Daiya rey David. De'ε chúúca n'dai 'iiⁿ'yāⁿ chí cuchii ndúúcu chi duuchi Señor miiⁿ. Dich'εεε yú Ndyuūs chi snée ná va'ai chεēti nguuvi.

¹⁰ Taachí Jesús miiⁿ sndaa yā na yāāⁿ Jerusalén nducyáácá 'iiⁿ'yāⁿ yeⁿ'e yāāⁿ miiⁿ tuumicadíínuuⁿ yā ní caⁿ'a yā nguuaⁿ maaⁿ yā: ¿Du'u rá sáⁿ'a 'cūū?

¹¹ 'Iiⁿ'yāⁿ mííⁿ ngaⁿ'a yā: Sáⁿ'a 'cūū saⁿ'a profeta Jesús chí cuchii sá cuaaⁿ na yāāⁿ Nazaret yeⁿ'e yāⁿ'āa Galilea.

Jesús inadidεεvé yā yaācū templo

(Mr. 11.15-19; Lc. 19.45-48; Jn. 2.13-22)

¹² Jesús miiⁿ sndaa yā ná yaācū templo yeⁿ'é Ndyuūs ní tun'daa yā nducyaaca 'iiⁿ'yāⁿ chí in'diicui yā ndúúcu 'iiⁿ'yāⁿ chi ngái yā na yaācū miiⁿ. Ní chεεcundaa yā mesas yeⁿ'e 'iiⁿ'yāⁿ chí n'dáaⁿ yā tuūmī yeⁿ'e 'iiⁿ'yāⁿ. Ní chεεcú yā sillas yeⁿ'é 'iiⁿ'yāⁿ s'eeⁿ chí in'diicui yā 'yáádá palomas. ¹³ Ní Jesús caⁿ'a yā chii yā 'iiⁿ'yāⁿ s'eeⁿ: Na libro yeⁿ'e Ndyuūs naachi canéé nguūⁿ 'túúca ngaⁿ'a: Vá'ai yeⁿ'é canéé chí duuchi va'ai naachi 'iiⁿ'yāⁿ caaⁿ'maⁿ'ngua'á yā, naati ndís'tií ní dííⁿ ní chí yiivi yáává yeⁿ'e 'iiⁿ'yāⁿ chí díduucu.

¹⁴ Ní chεeti yaācū miiⁿ ndaa nanááⁿ Jesús 'iiⁿ'yāⁿ chí ngeenááⁿ ndúúcu 'iiⁿ'yāⁿ chí ngaā yó'ōo, ní Jesús miiⁿ dííⁿ yā chí nduūvá yeⁿ'e nducyaaca yā. ¹⁵ Naati chiiduu n'gεεtēē ndúúcu maestros yeⁿ'e ley nduuvi taāⁿ yā taachí n'diichi yā chí 'tíicā idiiⁿ Jesús miiⁿ ní ch'iindiveéⁿ yā chuū. Ní saⁿ'ā dá'caiyāa n'gai sa ní caⁿ'a sa: De'ē chúúca ch'εεε saⁿ'ā chí Daiya rey David miiⁿ. ¹⁶ Ní 'iiⁿ'yāⁿ s'eeⁿ caⁿ'a yā chii yā Jesús miiⁿ: ¿'Áá n'giindiveéⁿ ní chí saⁿ'ā da'caiyāa ngaⁿ'ā sa? Jesús caⁿ'a yā: N'giindiveéⁿ. ¿'Áá nguéé n'geeⁿ ndís'tií Nduudu yeⁿ'e Ndyuūs naachi canéé nguūⁿ? Ní ngaⁿ'a 'túúca: 'Āā diiⁿ di chí da'caiyāá ndúúcu dacua'aá caata yā chí n'daāca n'dai yeⁿ'é Ndyuūs.

¹⁷ Jesús ní nan'daa yā yeⁿ'e yaācū miiⁿ. Ní nan'daa yā yeⁿ'e yāāⁿ miiⁿ ní cueⁿ'e yā na yāāⁿ 'lííⁿ chí nguuvi Betania. Ní mííⁿ canee yā nguūinū miiⁿ.

Jesús ngaⁿ'a yā chí ngeεε n'dáacā yá'á yeⁿ'e n'guídii yaaⁿ nguuvi chí nguéé n'gui'i yeⁿ'ē

(Mr. 11.12-14, 20-26)

¹⁸ Chídéévé táámá nguuvi, ní Jesús ndaa ntúuⁿ yā ná yāāⁿ miiⁿ ní chíi cuiicú yā. ¹⁹ Cuaaⁿ cyúúní ní n'diichi yā 'áámá yá'á yeⁿ'e n'guídii yaaⁿ nguuvi niiⁿ'nuúⁿ cyúúní, ní cueⁿ'e yā naachí cutá'a yā n'guiidii miiⁿ, ní nguéé ndaaca yā n'gui'i yeⁿ'ē, dámaāⁿ tá'āa. Ní Jesús caⁿ'a yā chii yā yá'á 'túúca: Dii yá'á, 'āā ntéé ngeεcunéé 'cuūndi n'gui'i yeⁿ'ē di. Tuu'mí nūuⁿ yaⁿ'á miiⁿ nti'i. ²⁰ Taachí discípulos n'diichí yā chuū, ngeⁿ'ē yiinú yā yeⁿ'ē ní caⁿ'a yā: ¿De'ē cúúví chí maāⁿ'nchεεtē nuūⁿ nti'i n'guídii yaaⁿ nguuvi?

²¹ Jesús nán'gεεcútaⁿ'a yā ní caⁿ'a yā chii yā discípulos: Cuaacu nííⁿ'nyúⁿ ngaⁿ'á ngí ndís'tií, ndúúti chí ndís'tií i'téenu ní ní nguéé n'deēe nadicadíínuuⁿ ní, nguéé dámaāⁿ chuū cuuvi dííⁿ ní yeⁿ'ē n'guídii yaaⁿ nguuvi naati cuuvi dííⁿ ní ndúúcu yiicū 'lííⁿ 'cūū chí caaⁿ'maⁿ ní cuuvi ní: Dii yiicū, cuvii dí 'múúⁿ ní cueⁿ'e di cundáá nuūⁿ di ná nuūⁿ'ní'yá'ā, ní cuuvi. ²² Tanducuéⁿ'ē chí caaca ní naachí caaⁿ'maⁿ'ngua'á ní, ndúúti chí cu'téenu ní, ní ndaācā yeⁿ'e ní.

Jesús ngaⁿ'a ntiíⁿ'nyúⁿ yā tan'dúúca 'iiⁿ'ntyéⁿ'ē

(Mr. 11.27-33; Lc. 20.1-8)

²³ Taachí Jesús miiⁿ ndaa yā chεeti yaācū templo miiⁿ, chiiduu n'gεεtēē ndúúcu 'iiⁿ'yāⁿ ndiicúú chí ngaⁿ'a ntiíⁿ'nyúⁿ yā yeⁿ'e yaācū ndaa yā nanááⁿ Jesús miiⁿ taachí ngi'cueeⁿ yā, ní caⁿ'a yā chii yā Jesús: ¿Du'ú 'ííⁿ'ntyéⁿ'ē ngaⁿ'a yā chí 'túúca idiiⁿ ní? ¿Du'ú 'iiⁿ'yāⁿ tee yā poder chí caaⁿ'maⁿ ntiíⁿ'nyúⁿ ní 'túúca?

²⁴ Nan'gεεcútaⁿ'a Jesús miiⁿ ní caⁿ'a yā chii yā 'iiⁿ'yāⁿ s'eeⁿ: 'Úú ntúūⁿ ní intiinguuneéⁿ ndís'tií. Nduuti chí nan'gεεcútaⁿ'a ní yeⁿ'é, tuu'mi ní cuuvi ndís'tií du'ú 'iiⁿ'ntyéⁿ'ē tee yā poder 'úú chí idiiⁿ dendú'u chuū. ²⁵ Yeⁿ'ē chí chεedinúūⁿ'ní Juan, ¿tíí chíicā? ¿'Áá yeⁿ'e Ndyuūs chí canéé na va'ai chεeti nguuvi o yeⁿ'e saⁿ'ā in'yeeⁿ'dí

'cūū? Tuu'mi ní 'ii'nyān s'ee'ndeé yā nguáán maán yā ní ca'na yā: Nduuti chi caa'ma'na yú chi ye'nē nanguuvi, tuu'mi ní Jesús caa'ma'na yā cuuvi yā s'uūu: ¿De'ē cuuví chi nguée s'teenu nī ye'nē chi nga'na Juan mii'? ²⁶ Ní nduuti chi caa'ma'na yú chi ye'nē sa'nā i'n'ye'ndí 'cūū, 'va'a yú 'ii'nyān ye'nē yáān ti nducyaaca yā ní déenu yā chi Juan chí cheédínū'nīn ní 'aama profeta ye'nē Ndyuūs.

²⁷ Ní nan'guεcúta'na yā ye'nē Jesús mii'ni ní ca'na yā: Nguée déenu 'nū. Jesús mii'ni ní ca'na ntúu'na yā: 'Tiicá ntúū'n 'úú ní nguée cuuvi ndís'tiī du'u 'í'ntyē'nē tee yā poder 'úú chí idiīn chuū.

'Áámá ejemplo ye'nē 'uuví daiya yā

²⁸ Jesús ca'na yā: ¿De'ē inadacadiinúū'n ndís'tiī ye'nē chuū? Ca'na caa'má'n ndúúcu ndís'tiī ye'nē 'áámá sa'nā chí véé 'uūví daiya sa. Ndaā sa nanáán 'áámá daiya sa ní ca'na sa: Díí daiyá, cué'né di ní diīn dí ntiī'nyu'na naachi véé dí'yú uvas ye'né. ²⁹ Daiya sa ní nan'guεcúta'na sa ní ca'na sa: Nguée ne'né. Ch'iinu maa'ni ní nadicádínūu'na sa chí nguée n'daācā diīn sa ní cué'né sa diīn sa ntiī'nyu'na mii'n. ³⁰ Ní cue'né ntúu'na sa'nā mii'ni ní yaa'vi sa táámá daiya sa, ní 'tiicá ntúū'n ca'na sa chí sa daiya sa. Ní daiya sa mí'ni nán'guεcúta'na sa ní ca'na sa: 'Tíicā, n'diī chiidá, ca'ná. Naati nguée cue'né sa diīn sa ntiī'nyu'na. ³¹ ¿De'ē inadacadiinūu'na ndís'tiī? Naachi 'uūví daiya yā ¿chee chí diīn tan'dúúca chí ne'nē chiidá yā? 'Ii'nyān s'ee' ca'na yā: Sa'nā chí yaa'ví yā vmnaa'n. Jesús ca'na yā chí yā 'ii'nyān s'ee'n: Cuaacu ní'nyu'na nga'ná ngií ndís'tiī, chí 'ii'nyān chí inn'guée ye'nē impuestos ndúúcu n'daataá chí véé cá sa'nā ye'nē tá ca'ná yā vmnaa'n ye'né nī naachí Ndyuūs nga'na ntiī'nyu'na yā. ³² Ti Juan chí cheédínū'nīn ndaā sa vmnáán ndís'tiī. Chiica sá na 'áámá yúúni cuaacu ní nga'na sa ye'nē yúúni cuaacu ye'nē Ndyuūs ní nguée s'téenu nī ye'nē sa. Naati sa'nā publicanos chí inn'guée ye'nē impuestos ndúúcu n'daataá chí véé sa'nā s'ee ndúúcu tá s'téenu yā nduudu ye'nē sa. Ndís'tiī, taachí n'diichí nī chuū chí 'āā diīn Juan, nguée ndaacadaamí nī ye'nē nuu'ndi ye'né nī ní nguée s'téenu nī chíin chí nga'na Juan mii'n.

'Áámá ejemplo ye'nē 'ii'nyān chí nguεε n'dáacā idiīn yā ntiī'nyu'na

(Mr. 12.1-12; Lc. 20.9-19)

³³ Tuu'mi ní ca'na Jesús: 'Caandiveé'n nī táámá ejemplo chí 'tεε nguεε dáámá. Canéé 'áámá 'ii'nyān chí véé yá'nā ye'nē yā ní chíinu yā dii'yu ye'nē uvas na yá'nā ye'nē yā. Ní din'dái yā 'áámá chee'n ye'nē yá'ná 'lín núúnmá'n cuaa'n diitúú. Din'dái yā 'aama tanque naachi cuuví tun'dáa yā nuū'nīn ye'nē uvas mii'n. Ní din'dái yā 'áámá torre nguaa'n dii'yu uvas naachi mozos ye'nē yā 'cuεtiné'e sa diīn sa cuidado n'gui'i uvas mii'n. Dueño mii'n ca'a yā yá'nā ye'nē yā sa'nā s'ee'n chí diīn sa ntiī'nyu'na mii'ni ní cue'né yā táámá país. ³⁴ Taachí snuū ca'a ye'nē tiempo ye'nē n'gui'i uvas mii'n chí túúmá yā, dueño dicho'ó yā mozos ye'nē yā chí sa'nā s'ee'n nca'a sa n'gui'i uvas ye'nē yá'nā, parte ye'nē n'gui'i chí tune'e dueño. ³⁵ Sa'nā chí diīn ntiī'nyu'na na yá'nā mii'n sta'a sa mozos. 'Áámá ní ch'e'nē sa, táámá ní ch'iī'nū'na sa ní táámá ní chíituu sa. ³⁶ Dueño mii'n dicho'ó yā taandúú 'uūví mozos, 'āā ví'í mozos chí che'nē vmnaa'n. 'Tiicá ntúū'n diīn sa ndúúcu mozos.

³⁷ Cuayiivi mí'ni dicho'ó yā daiya yā ti dueño mii'ni ní nga'na yā: Sa'nā s'ee'n ní diīn sa honrar daiyá. ³⁸ Taachí sa'nā s'ee'n chí diīn sa ntiī'nyu'na ye'nē yá'nā mii'n n'diichi sa daiya dueño mii'n, ca'na sa nguáán maa'na sa: Sá'ná 'tī chí cuuvi ye'nē sa yá'nā 'cūū. 'Caa'nū'na yú sá'nā mii'ni ní ndúúcu chí véé naa'n chí cuuvi ye'nē sa ní cuuvi ye'nē yú. ³⁹ Ní sta'ā sa daiya dueño mii'ni ní tun'daa sa sa'nā 'áámá lado ye'nē cheé'n ye'nē dí'yú uvas mii'ni ní ch'iī'nū'na sa sa'nā.

⁴⁰ Taachí ndaā dueño ye'nē dí'yú uvas ¿de'ē diīn yā ndúúcu sa'nā chí ídiīn ntí'nyu'na na yá'nā ye'né yā?

⁴¹ 'Ii'nyān s'ee'n ní ca'na yā: Dueño mii'ni ní 'caa'nú'na yā sa'nā chí cúunchee'n sa diīn sa. Ní ca'á yā yá'nā ye'nē yā naachi véé dí'yú uvas táámá 'ii'nyān chí diīn yā ntiī'nyu'na na yá'nā mii'n, 'ii'nyān chí ntée yā uvas chí tune'e'n yā na tiempo ye'nē n'gui'i.

⁴² Jesús ca'na yā chí yā 'ii'nyān s'ee'n: ¿'Áá nguée n'geé'n ndís'tiī naachi canéé nguū'na na libro ye'nē Ndyuūs chí nga'na 'túúca:

Tuūu chí 'iiⁿyāⁿ chi idin'dái yā va'ai sta'á yā ní ch'ēcú yā 'áamá lado ti nguéé neⁿe yā.
 Tuūú 'cūu tuūú ch'ēte ní dichí'vē ca ní canéé tuūu ch'ēte esquina yeⁿé va'āi.
 Chuū ní Señor Ndyuūs dííⁿ yā. Chuū ní 'áamá chí ngeⁿe yinu yú taachí inaaⁿ yú
 yeⁿē.

⁴³ Chííⁿ chí 'túucā nga'á ngíí ndís'tiī, chí naachí Ndyuūs ngaⁿa ntiīⁿnyúⁿ yā divíi yā yeⁿē
 ndís'tiī ní ca'á yā táamá 'iiⁿyāⁿ chi ca'á yā n'gui'i chí tuneⁿe lado yeⁿé Ndyuūs. ⁴⁴ 'Āā
 du'ú nūuⁿ 'iiⁿyāⁿ chí cun'dáá nduú yā vmaāⁿ na tuūu 'cūu ní caātū 'ííni yeⁿe yā. Naati
 'āā du'ú nūuⁿ 'iiⁿyāⁿ chí cun'dáá nduūu tuūu 'cūu vmaāⁿ yeⁿe yā, 'cuínú ndúúvi yuūni
 yā.

⁴⁵ Taachí 'iiⁿyāⁿ chiiduú n'gēte ndúucū 'iiⁿyāⁿ fariseos ch'iindiveéⁿ yā chuū, 'iiⁿyāⁿ
 s'eeⁿ tuumicadínuuⁿ yā chi yeⁿé yā ngaⁿa Jesús miiⁿ. ⁴⁶ Nadicadínuuⁿ yā taacā chi
 cuta'á yā Jesús miiⁿ naatí 'va'a yā 'iiⁿyāⁿ yeⁿe yāā tí 'iiⁿyāⁿ s'eeⁿ i'téenu yā Jesús miiⁿ
 tan'dúucā chi 'áamá profeta chí ngaⁿa nduudu yeⁿé Ndyuūs.

22

'Áamá ejemplo yeⁿē 'viicu chí n'giindivaacú yā

¹ Jesús tuca'á yā ndee yā taama vmnēⁿēe ndúucū ejemplos, ní caⁿa yā: ² Naachí
 Ndyuūs ngaⁿa ntiīⁿnyúⁿ yā yeⁿē va'ai chēti nguuvi tan'dúucā 'áamá rey chí chiica yā
 'viicu chí ch'iindivaacu saⁿa daiya yā. ³ Ní dichó'o yā mozos yeⁿe yā chí yaa'vi sa 'iiⁿyāⁿ
 chí ndíi yā invitado naati 'iiⁿyāⁿ s'eeⁿ nguéé néⁿe yā caⁿa yā. ⁴ Ní dichó'o yā tan'duuví
 mozos ní caⁿa yā chíi yā mozos: Caaⁿmaⁿ nī cuuvi nī 'iiⁿyāⁿ chí ndíi yā invitado 'tíicā.
 'Āā véé yaāⁿ comida miiⁿ. 'Āā ch'iīⁿnúⁿ i'tiindu yeⁿé ní 'iiti chí 'viicheé. Tanducuéⁿē 'āā
 véé yaāⁿ. Cuchíi nī 'viicu. ⁵ Naatí 'iiⁿyāⁿ s'eeⁿ nguéé diiⁿ yā cuenta. 'Áamá yā ní cueⁿe
 yā cuéétí yeⁿe yā. Taama yā ní cueⁿe yā negocio yeⁿe yā. ⁶ Tanáⁿa yā ní sta'á yā mozos.
 Cuⁿu yā ndúucū sa ní ch'iīⁿnuⁿ yā mozos. ⁷ Taachi rey miiⁿ ch'iindiveéⁿ yā chuū, ndúúvi
 taaⁿ yā. Ní dichó'o yā soldados yeⁿé yā ní caⁿa ntiīⁿnyúⁿ yā chí 'caaⁿnuⁿ sá 'iiⁿyāⁿ chí
 ch'iīⁿnuⁿ yā mozos yeⁿé yā. Ní 'neeⁿ yaⁿā sa yāāⁿ vaacú 'iiⁿyāⁿ s'eeⁿ. ⁸ Tuu'mi ní caⁿa
 yā chíi yā mozos yeⁿé yā: Cuaacu níⁿnyúⁿ 'viicu miiⁿ ní 'āā véé yaāⁿ caavā 'iiⁿyāⁿ chí
 chíi yā invitado naati nguéé n'dai taaví yā chí cuchii yā. ⁹ Maaⁿ ní cueⁿe nī na yúúni chí
 can'daā yeⁿe yāāⁿ ní dííⁿ nī invitar 'iiⁿyāⁿ chí chíi yā na 'viicu, 'iiⁿyāⁿ chí ndaāca
 nī. ¹⁰ Mozos ní can'daa sa ní cueⁿe sa cuaaⁿ cyúúni ní nadaama sa nducyaaca 'iiⁿyāⁿ
 chí ndaāca sa, 'iiⁿyāⁿ chí cúuncheeⁿ yā ndúucū 'iiⁿyāⁿ chí n'dai yā. Ní ndaā nducyaaca
 'iiⁿyāⁿ s'eeⁿ chí mozos 'cai sa ní n'deēe n'dái 'iiⁿyāⁿ ndaā yā 'viicu miiⁿ.

¹¹ Ní rey miiⁿ cheⁿe yā n'diichi yā 'iiⁿyāⁿ chí ndii yā invitado ní ndaācā yā 'áamá
 saⁿā chí nguéé cánúúⁿ sá catecai sa yeⁿē naachi n'giindivaacu yā. ¹² Ní caⁿa yā chíi
 yā saⁿā: N'diī amigo, ¿taacā chí ndāā nī 'muuⁿ chí nguéé canúuⁿ nī catecai nī yeⁿē chí
 n'giindivaacú 'iiⁿyāⁿ? Saⁿā miiⁿ ní nguéé nan'guēcútaⁿa sa yeⁿe yā. ¹³ Tuu'mi ní rey
 miiⁿ caⁿa yā chíi yā mozos yeⁿe yā: 'Caāchiichí nī ca'a sa ndúucū ta'a sa ní divíi nī saⁿā
 ndii 'múúⁿ ní 'cuēcú nī saⁿā cuaaⁿ chuvā'āi na maāiⁿ. Mííⁿ cuēcú sa ní ché'é 'diiⁿyuⁿ
 sa cueⁿe daāⁿmaⁿ. ¹⁴ Jesús caⁿa ntúuⁿ yā chuū: Nééⁿé 'yaaⁿ yā chí Ndyuūs 'cuai yā naati
 duu'ví yā chí Ndyuūs ndēvé yā.

Chííⁿ chí ntiinguuneeⁿ yā yeⁿe asunto yeⁿe impuestos

(Mr. 12.13-17; Lc. 20.20-26)

¹⁵ Tuu'mi ní 'iiⁿyāⁿ fariseos cueⁿé yā ní nduuvidaamá yā. Ní ndeé yā nguaaⁿ maāⁿ
 yā táacā cuuvi dííⁿ yā chí Jesús miiⁿ cástaⁿa nduudú yeⁿe yā chí caaⁿmáⁿ yā 'áamá
 nduudu yaadi. ¹⁶ Ní fariseos dicho'ó yā 'iiⁿyāⁿ yeⁿe yā ndúucū 'iiⁿyāⁿ yeⁿe Herodes
 miiⁿ chí caaⁿmáⁿ yā Jesús: N'diī maestro, déenu 'nū chí n'diī ní 'áamá saⁿā chí n'dai.
 N'diī ní dííⁿ nī chí n'dáacā. Ní cuaacu níⁿnyúⁿ ngi'cueeⁿ nī yúúni yeⁿe Ndyuūs. Ní nguéé
 'va'a nī 'iiⁿyāⁿ ti nguéé indeé nī cuidado táaca 'iiⁿyāⁿ. ¹⁷ Maaⁿ ní cúúvi nī nús'uu: ¿De'ē
 inadacadínuuⁿ nī? ¿'Áá canéé nguūⁿ na ley chí nadí've 'nū emperador César tuūmí yeⁿé
 'nū o nguéé?

¹⁸ Jesús tuumicádínúuⁿ yā chí 'iín'yāⁿ s'eeⁿ ní dííⁿ yā chí nguéé n'daācā ní caⁿ'a yā chí yā 'iín'yāⁿ s'eeⁿ: ¿Dē'ē cúúví chí neⁿ'e nī n'diichineéⁿ nī 'úú? Ndí's'tií ní veē 'uúví chí nadacádínúuⁿ nī. ¹⁹ Téé nī tuūmī chí nadíí'vē nī yeⁿ'e impuesto. 'Iín'yāⁿ s'eeⁿ ní ch'iⁿ'i yā 'áámá tuūmī Jesús miiⁿ. ²⁰ Tuu'mi ní Jesús miiⁿ caⁿ'a yā chí yā 'iín'yāⁿ s'eeⁿ: ¿Du'u nááⁿ chí canéé ná tuūmī? ¿Du'ū chí nguúví cánéé nguūⁿ?

²¹ 'Iín'yāⁿ s'eeⁿ ní caⁿ'a yā: Naaⁿ emperador César cānee. Ní Jesús caⁿ'a yā chí yā 'iín'yāⁿ s'eeⁿ: Nca'a nī tuūmī emperador César chííⁿ chí yeⁿ'ē sa ní ca'a nī Ndyuūs chí yeⁿ'e Ndyuūs.

²² Taachí ch'iindiveéⁿ yā chuū, cheⁿ'e yiinu yā ní cueⁿ'e yā.

Chiiⁿ chí ntiinguuneeⁿ yā yeⁿ'e chí 'iín'yāⁿ nduuchi yā yeⁿ'e nguuaⁿ tináⁿ'ā
(Mr. 12.18-27; Lc. 20.27-40)

²³ Nguuvi miiⁿ 'iín'yāⁿ saduceos ndaá yā nanááⁿ Jesús miiⁿ. 'Iín'yāⁿ saduceos ngaⁿ'a yā chí nguéé índuuchi 'iín'yāⁿ yeⁿ'ē nguuaⁿ tináⁿ'ā. Ní ntiinguuneeⁿ yā Jesús, ²⁴ ní caⁿ'a yā: N'dií maestro, Moisés miiⁿ caⁿ'a sá chí 'āā du'ú nūuⁿ saⁿ'ā chí 'cuúví sa ní nguéé ch'iindí daiya n'daataá yeⁿ'ē sa tuu'mi ní 'diínū sa 'caandavaacu sa ndúúcu n'daataá mííⁿ. Ní saⁿ'ā miiⁿ ní 'cuúndí daiya sá lado yeⁿ'ē 'díínu tináⁿ'ā. ²⁵ Maaⁿ ní véé ndēēchē sáⁿ'a nūuⁿ yeⁿ'ē chēcú sa yeⁿ'ē chíidá sa. Sáⁿ'ā vmnaaⁿ miiⁿ ní ch'iindivaacu sa ní ch'ií sa. Ní nguéé daiya n'daataá yeⁿ'ē sa. Ní canee n'daataá yeⁿ'ē sa. Ní 'díínu sa ní canee sá ndúúcu tá. ²⁶ 'Tiicá ntúūⁿ chó'ōo yeⁿ'ē ndii chíiⁿ ndii 'uuvi saⁿ'ā. 'Tiicá ntúūⁿ chó'ōo yeⁿ'e saⁿ'ā chí ndii 'iínū. 'Tiicá ntúūⁿ chó'ōo yeⁿ'ē saⁿ'a s'eeⁿ nduu ndēēchē sa. ²⁷ Ndíí ná ch'iínú ní ch'ií ntúūⁿ n'daataá miiⁿ. ²⁸ Taachí nduuchi 'iín'yāⁿ yeⁿ'e nguuaⁿ tináⁿ'ā, naachí ndēēchē saⁿ'ā s'eeⁿ ní ¿chē sa chí n'daataá yeⁿ'ē sa táⁿ'ā caati nducyaaca sá canee sá ndúúcu tá?

²⁹ Tuu'mi ní Jesús miiⁿ ní nan'guēcútaⁿ'a yā ní caⁿ'a yā chí yā 'iín'yāⁿ s'eeⁿ: Ndí's'tií ní nguéé n'daācā nadicádínúuⁿ nī, ti nguéé déenu nī taacā ngaⁿ'a na libro yeⁿ'é Ndyuūs naachi canéé nguūⁿ. Ndíí nguéé ndúú déenu nī poder yeⁿ'é Ndyuūs. ³⁰ Ti naachí nduuchi 'iín'yāⁿ yeⁿ'e nguuaⁿ tináⁿ'ā, nguéé 'caandavaacú yā. Ndíí nguéé ca'a ra yā chí 'caandavaacu daiya yā ti cuuví yā tan'dúúcā ángeles chí dichíí'vē Ndyuūs chí canéé yā na va'ai chēetí nguuvi. ³¹ Naati yeⁿ'ē chí nduuchi yā yeⁿ'e nguuaⁿ tináⁿ'ā, ¿'áá nguéé n'geeⁿ nī chí maáⁿ Ndyuūs caⁿ'a yā yeⁿ'ē taachí caⁿ'a yā 'túúcā?: ³² 'Úú ní Ndyuūs yeⁿ'ē Abraham ndúúcu Isaac ndúúcu Jacob. Ndyuūs miiⁿ ní nguéé Ndyuūs yeⁿ'e tináⁿ'ā ti yeⁿ'é 'iín'yāⁿ chí sндуuchi.

³³ Taachí nducyaaca 'iín'yāⁿ ch'iindiveéⁿ yā chuū, cheⁿ'e yiínú yā yeⁿ'ē nduudu yeⁿ'e Jesús miiⁿ tan'dúúcā chí ngi'cueeⁿ yā.

Mandamiento chí ch'ēte ca
(Mr. 12.28-34)

³⁴ Tuu'mi ní saⁿ'ā fariseos taachí ch'iindiveéⁿ yā yeⁿ'e chí Jesús dííⁿ yā, 'iín'yāⁿ saduceos 'āā ntéé caⁿ'a yā ndúúcu Jesús miiⁿ, fariseos miiⁿ nduuvidaamá yā. ³⁵ 'Áámá saⁿ'a fariseo abogado chí ngi'cueeⁿ sa chí ngaⁿ'ā ley miiⁿ neⁿ'e sa n'diichinééⁿ sa Jesús ní ntiinguuneeⁿ sa 'iín'yāⁿ. Ní caⁿ'a sá chí sa Jesús: ³⁶ N'dií Maestro, ¿chēé mandamiento chí ch'ēte n'dai ca yeⁿ'ē na ley yeⁿ'ē Moisés?

³⁷ Jesús caⁿ'a yā chí yā saⁿ'ā: Dinéⁿ'e di Señor Ndyuūs yeⁿ'ē di ndúúcu núúⁿ máⁿ stáává yeⁿ'ē di ndúúcu núúⁿ máⁿ alma yeⁿ'ē di ndúúcu núúⁿ máⁿ vaanicádínúuⁿ yeⁿ'ē di. ³⁸ Chuū chí vmnaaⁿ ní ch'éētē ca chí cuuvi tanáⁿ'ā mandamientos. ³⁹ Ndiichi ndii 'úúví tan'dúúcā chí vmnááⁿ vmnaaⁿ: Dinéⁿ'e di 'iín'yāⁿ na niiⁿ nuúⁿ vaacú di tan'dúúcā chí neⁿ'e dí maáⁿ di. ⁴⁰ Yeⁿ'ē ndúú 'uúví mandamientos miiⁿ canee tanducuéⁿ'ē yeⁿ'e ley Moisés miiⁿ ndúúcu nduudu chí ngaⁿ'a profetas ndii cuááⁿ vmnaaⁿ.

¿Du'u 'iín'yāⁿ chíí daiya Cristo?
(Mr. 12.35-37; Lc. 20.41-44)

⁴¹ Taachí 'iín'yāⁿ fariseos ndiidáámá yā Jesús ntiinguuneeⁿ yā fariseos, ⁴² ní caⁿ'a yā chí yā 'iín'yāⁿ s'eeⁿ: ¿Dē'ē nadicádínúuⁿ ndí's'tií yeⁿ'e Cristo? ¿Du'ū daiyá 'iín'yāⁿ 'cúú? Ní fariseos caⁿ'a yā chí yā: Daiya David miiⁿ.

⁴³ Ní Jesús caⁿ'a yā chii yā fariseos: ¿Táácā cuuvi David miiⁿ na espíritu yeⁿ'e sa ní caⁿ'a sa chi Cristo ní Señor? Ní caⁿ'a yā chuū:

⁴⁴ Caⁿ'a Señor Ndyuūs miiⁿ chii yā Señor Cristo yeⁿ'é: 'Cuūndi di lado tá cuaacú chi lado yeⁿ'e honor ndíí 'úú cu'neén 'iiⁿ'yāⁿ chi contra yeⁿ'ē di cuaaⁿ ndii yā na ca'a di tan'dúúca chi enimigos ní 'áámá banco 'lííⁿ.

⁴⁵ Maaⁿ ní nduuti chi David miiⁿ caⁿ'á yā yeⁿ'e Cristo chi Señor yeⁿ'é yā, ¿táácā cuuvi chií chi Señor miiⁿ ní daiya David 'iiⁿ'yāⁿ?

⁴⁶ Mar 'áámá 'iiⁿ'yāⁿ nguéeⁿ cuuvi nan'guεεcútaⁿ'a yā yeⁿ'ē mar 'áámá. Ndíí nguuvi miiⁿ s'neeⁿ naaⁿ yā ntiinguuneeⁿ yā Jesús miiⁿ.

23

Jesús ngaⁿ'a yā chi dííⁿ yā cuidado yeⁿ'e maestros chi ngi'cueeⁿ ley ndúúcu 'iiⁿ'yāⁿ fariseos

(Mr. 12.38-40; Lc. 11.37-54; 20.45-47)

¹ Jesús yaaⁿ'vi yā 'iiⁿ'yāⁿ ndúúcu discípulos yeⁿ'e yā ní caⁿ'a yā: ² Maestros chi ngi'cueeⁿ ley ndúúcu 'iiⁿ'yāⁿ fariseos, 'iiⁿ'yāⁿ s'uuⁿ deenu n'dai yā ní ngi'cueeⁿ yā ní caaⁿ'maⁿ cuaacú yā ley yeⁿ'e Moisés. ³ 'Tiicá ntúūⁿ cu'téenu ndís'tií ní dííⁿ nī tan'duucā 'iiⁿ'yāⁿ s'eeⁿ ngaⁿ'a yā, naati nguéeⁿ dííⁿ nī tan'dúúca 'iiⁿ'yāⁿ s'eeⁿ idiíⁿ yā tí 'iiⁿ'yāⁿ s'eeⁿ ní ngaⁿ'a yā yeⁿ'e ley naati nguéeⁿ 'tíicā idiíⁿ yā. ⁴ 'Iiⁿ'yāⁿ s'eeⁿ ní dííⁿ yā tan'dúúca chi 'caachiichí yā cheedi chi n'gii taaví chi 'iiⁿ'yāⁿ nguéeⁿ cuchée yā ní ngaⁿ'á yā chi 'iiⁿ'yāⁿ canéeⁿ chí cuchée yā. Naati 'iiⁿ'yāⁿ s'eeⁿ maáⁿ yā ndíí nguéeⁿ neⁿ'é yā 'neeⁿ nduutitá'a yā chi tuuⁿ'vi yā cheedi miiⁿ ní dííⁿ yā. ⁵ 'Iiⁿ'yāⁿ s'eeⁿ ní idiíⁿ yā nducuéⁿ'ē ntiiⁿ'nyuⁿ yeⁿ'e yā caati tanáⁿ'ā 'iiⁿ'yāⁿ snáaⁿ yā ní n'diichí yā táácā idiíⁿ yā. Neⁿ'é yā candεε yā chi canéeⁿ nguūⁿ chi yeⁿ'ē Nduudu yeⁿ'e Ndyuūs ní s'neeⁿ yā 'áámá caja 'lííⁿ ní dich'iichí yā 'áámá yiiⁿ'maⁿ ní s'neeⁿ yā maaⁿ ta'a yā ní ncheeté yā. Ní n'geēti núuⁿ yā vestido yeⁿ'e yā chí n'geē 'nūuⁿ ca. ⁶ 'Iiⁿ'yāⁿ s'eeⁿ ní neⁿ'e yā 'cuundí yā sillas chí yeⁿ'e 'iiⁿ'yāⁿ ch'εete taachi caⁿ'á yā 'áámá 'viicu chí che'é yā. Ní neⁿ'e yā 'cuundí yā sillas yeⁿ'e honor chi vmnááⁿ vmnaaⁿ ná yáacu sinagogas. ⁷ Ní neⁿ'e yā chí tanáⁿ'ā 'iiⁿ'yāⁿ diiⁿ n'daacá yā ní diiⁿ yā saludar 'iiⁿ'yāⁿ taachi sneé yā cuaaⁿ nií'vεē ní neⁿ'e yā chi 'iiⁿ'yāⁿ caaⁿ'máⁿ yā, maestro, maestro, taachi dííⁿ yā saludar 'iiⁿ'yāⁿ.

⁸ Naati ndís'tií ní nguéeⁿ neⁿ'e nī chí caaⁿ'maⁿ 'iiⁿ'yāⁿ yeⁿ'e nī maestro ti 'áámá 'iiⁿ'yāⁿ nūuⁿ chí maestro ní 'iiⁿ'yāⁿ miiⁿ chí Cristo. Ní nducyaaca ndís'tií ní hermanos yeⁿ'e nī vi'í. ⁹ Nguéeⁿ caaⁿ'maⁿ nī yeⁿ'ē mar 'áámá 'iiⁿ'yāⁿ yeⁿ'e yáⁿ'āa 'cúu: N'dií chiidúú padre, ti dámaaⁿ 'áámá chi Chiida yú chí Ndyuūs chi canéeⁿ na va'ai cheeti nguuvi. ¹⁰ Ndíí nguéeⁿ ndúú caaⁿ'maⁿ rá yā yeⁿ'e nī: Maestro, ti 'áámá chi maestro yeⁿ'e nī chi Cristo. ¹¹ 'Iiⁿ'yāⁿ chi ch'εete ca yā yeⁿ'é nī canee chi dichí'vεe yā ndís'tií. ¹² Ní 'iiⁿ'yāⁿ chi dííⁿ yā chi cuuví ch'εete maáⁿ yā, 'iiⁿ'yāⁿ miiⁿ cuuví ndiicuúⁿ yā. 'Iiⁿ'yāⁿ chi idiíⁿ yā chí maáⁿ yā ndiicuúⁿ yā, cuuví ch'εete yā.

Jesús caaⁿ'máⁿ yā yeⁿ'e nuuⁿndi yeⁿ'e 'iiⁿ'yāⁿ fariseos

(Mk. 12.40; Lc. 11.39-42, 44, 52; 20.47)

¹³ Naati de'ε chúúca ya'ai yeⁿ'é ndís'tií, maestros chi ngi'cueeⁿ ley ndúúcu 'iiⁿ'yāⁿ fariseos, ndís'tií 'uūvī naaⁿ 'uūvī cheendí nī, ti nguéeⁿ ngi'cueeⁿ nī yeⁿ'e naachí Ndyuūs ngaⁿ'a ntiiⁿ'nyúⁿ yā nanááⁿ 'iiⁿ'yāⁿ yeⁿ'e iⁿ'yeeⁿ'dí 'cūū. Ndíí nguéeⁿ ndúú maaⁿ ndís'tií cundáa nī va'ai cheeti nguuvi. Ndíí nguéeⁿ n'guúⁿ nī tanáⁿ'ā 'iiⁿ'yāⁿ chí neⁿ'e ndaaⁿ yā chí cūndaa yā.

¹⁴ De'ε chúúca ya'ai yeⁿ'ē ndís'tií, 'iiⁿ'yāⁿ chi dingúūⁿ ní ngi'cueeⁿ nī ley ndúúcu 'iiⁿ'yāⁿ fariseos, ti ndís'tií 'uūvī nááⁿ 'uūvī cheendí nī, ti ndiví nī va'ai yeⁿ'ē n'daataá nguáⁿ'āa. Ní néené n'deē ngaⁿ'a nī taachi ngaⁿ'anguaⁿ'á nī nanááⁿ nducyaaca 'iiⁿ'yāⁿ. 'Úú ngaⁿ'á chi ch'εete ca castigo yeⁿ'e nī nguuvi yeⁿ'e juicio.

¹⁵ De'ε chúúca ya'ai yeⁿ'ē ndís'tií, maestros chi ngi'cueeⁿ ley ndúúcu ndís'tií 'iiⁿ'yāⁿ fariseos ti ndís'tií 'uūvī naaⁿ 'uūvī cheendí nī. Ndís'tií ní chiicá nī ndíí yáⁿ'āa yaⁿ'ai táámá lado nuūⁿnī'yáⁿ'ā ní dííⁿ nī chí 'áámá 'iiⁿ'yāⁿ i'téenu yā tan'dúúca ndís'tií. Ní

taachí 'iiⁿ'yāⁿ cu'téenu yā tan'dúúcā ndís'tiī neⁿ'é nī, idiíⁿ nī chi 'iiⁿ'yāⁿ miiⁿ ní 'uūvī tanto cuuví yā yeⁿ'ē daiya infierno nguéé ti chi ndís'tiī. ¹⁶ De'ε chúúcā ya'ai yeⁿ'e ndís'tiī, chi ngi'cueéⁿ nī tan'dúúcā 'iiⁿ'yāⁿ chi ngeenááⁿ. De'ε inadacádíínuuⁿ ndís'tiī. Nduuti chi 'áámá 'iiⁿ'yāⁿ caⁿ'a yā chi diíⁿ yā 'áámá cosa ní 'cuaí yā, “cáávā yaacū templo”, tuu'mi ní nguéé de'ε vεε nacadíínuuⁿ nī yeⁿ'e chuū, naati nduuti chi 'iiⁿ'yāⁿ 'cuaí yā, “cáávā 'diiⁿ'nguaaⁿ” chi véé chεeti yaacū templo miiⁿ, tuu'mi ní 'iiⁿ'yāⁿ miiⁿ canee cuuⁿmiⁿ chi diíⁿ yā chi caaⁿ'máⁿ yā chi caⁿ'a yā chi diiⁿ yā. ¹⁷ Ndís'tiī ní 'iiⁿ'yāⁿ chi nguεε deenu ti tan'dúúcā 'iiⁿ'yāⁿ ngeenááⁿ 'tiicá nī. ¿Chεε cá ch'εete ca? ¿'Áá 'díí'nguāāⁿ miiⁿ o yáacū miiⁿ chí diiⁿ chi didεεve 'díí'nguāāⁿ miiⁿ cucááva Ndyuūs? ¹⁸ 'Tiicá ntúūⁿ ndís'tiī: Ndúúti chi 'áámá 'iiⁿ'yāⁿ caⁿ'a yā chi diíⁿ yā 'áámá cosa, ní n'gai yā, “cáávā nátaí”, nguéé de'ε vεε nacadíínuuⁿ nī yeⁿ'ē. Naati ndúúti chi 'iiⁿ'yāⁿ n'gai yā, “cáávā ofrenda” chi candúú vmnááⁿ yeⁿ'ē nátaí, tuu'mi ní 'iiⁿ'yāⁿ miiⁿ canee cúúⁿmíⁿ chi diíⁿ yā chi caⁿ'a yā chi diiⁿ yā. ¹⁹ Ndís'tiī ní tan'dúúcā 'iiⁿ'yāⁿ chi chεechí tiiⁿ o 'iiⁿ'yāⁿ chi ngeenááⁿ, 'tiicá nī ti ¿chεé ca chi ch'εete ca? ¿'Áá ofrenda miiⁿ o nátaí chi diiⁿ chí ofrenda miiⁿ ní didεεve cucáávā Ndyuūs? ²⁰ 'Tíicā. 'Iiⁿ'yāⁿ chí n'gai yā, “cáávā nátaí”, n'gai yā cáávā nátaí ndúúcū tanducuéⁿ'ē chi cánduū nátaí. ²¹ 'Iiⁿ'yāⁿ chí n'gai yā, “cáávā yaacū templo”, nguéé dámaāⁿ ngaⁿ'a yā cáávā yaacū templo miiⁿ naati cáávā maáⁿ Ndyuūs chi canéé na yaacū templo miiⁿ. ²² 'Iiⁿ'yāⁿ chi n'gai yā, “cáávā va'ai chεeti nguuví”, n'gai yā cáávā trono yeⁿ'e Ndyuūs ní cáávā Ndyuūs chi véé yā na trono miiⁿ.

²³ De'ε chúúcā ya'ai yeⁿ'e ndís'tiī, maestros chi ngi'cueéⁿ yā ley ndúúcū 'iiⁿ'yāⁿ fariseos, ndís'tiī 'uuvi naaⁿ 'uūvī cheendí nī. Ndís'tiī ní nga'á nī Ndyuūs 'áámá ndiichi parte yeⁿ'e yaātā chí yiivií, ndúúcū yaāta anís, ndúúcū yaātā comino. Ní ndís'tiī ní s'néeⁿ nī 'aama lado cosas chi n'gεete ca yeⁿ'e na ley, chíⁿ chí n'diichí nī nuuⁿndi yeⁿ'e 'iiⁿ'yāⁿ ndúúcū vaadī cuaacu ndúúcū vaadī ya'ai 'iinu ndúúcū vaadī i'téenu. Chuū canee chi diíⁿ nī ní diíⁿ nī táámá naaⁿ dendu'ū. ²⁴ Ndís'tiī 'iiⁿ'yāⁿ chi tan'dúúcā chi ngeenááⁿ chi candεε nī 'iiⁿ'yāⁿ. Dííⁿ nī tan'dúúcā chi i'yaáⁿ nī 'áámá 'yaacū yeⁿ'ē nuūⁿnīⁿ chí cu'ú nī naati cu'ú nī 'iiti camello chí ch'εete.

²⁵ De'ε chúúcā ya'ai yeⁿ'e ndís'tiī, maestros yeⁿ'e ley ndúúcū 'iiⁿ'yāⁿ fariseos, ndís'tiī ní 'uūvī naaⁿ 'uūvī cheendí nī, ti inadεεvé nī cuaaⁿ daami yeⁿ'e vaso ndúúcū cu'u, chí tan'dúúcā cuerpo yeⁿ'e maáⁿ nī, naati cuááⁿ chεētí nī ní ndiituú ndúúcū chí diduucú nī ndúúcū tanducuéⁿ'ē chí nguεε n'daācā. ²⁶ 'Caandiveéⁿ nī ndís'tiī 'iiⁿ'yāⁿ fariseos chí tan'dúúcā chí ngeenááⁿ. Dííⁿ cá nī chí didεεvé nī chí cuaaⁿ chεeti vaso ní 'tiicá ntúūⁿ cu'u, tuu'mi ní cuuvi dεεvé nī cuaaⁿ chuváⁿ'āi vaso miiⁿ.

²⁷ De'ε chúúcā ya'ai yeⁿ'e ndís'tiī, maestros yeⁿ'e ley ndúúcū 'iiⁿ'yāⁿ fariseos, ndís'tiī 'uuvi naaⁿ 'uūvī cheendí nī, ti ndís'tiī ní tan'dúúcā yaīnyāⁿ 'cuéé chí cuaaⁿ daami mííⁿ n'dεεvéé chí nneⁿ'ē yaāchī caaca, ti cuaacu níⁿnyúⁿ cuááⁿ chεētí miiⁿ ndiituú 'iini yeⁿ'ē tináⁿ'ā ndúúcū taanduvéé cosas chí vaati. ²⁸ 'Tíicā ndís'tiī ti cuaacu níⁿnyúⁿ n'giⁿ'i nī 'iiⁿ'yāⁿ chí ndís'tiī ní saⁿ'ā chí n'dai ndís'tiī naati cuaaⁿ chεētí nī ndiituú ndúúcū nduudu yaadi ndúúcū nuuⁿndi.

²⁹ De'ε chúúcā ya'ai yeⁿ'e ndís'tiī, maestros yeⁿ'e ley ndúúcū 'iiⁿ'yāⁿ fariseos, 'iiⁿ'yāⁿ 'uūvī naaⁿ 'uūvī cheendí nī, ti idin'dái nī yaīnyāⁿ yeⁿ'ē profetas ní n'dεεve nī yaīnyāⁿ yeⁿ'e 'iiⁿ'yāⁿ chí n'dai taachi snée yā iⁿ'yeeⁿdí 'cūū. ³⁰ Ndís'tiī ní nga'á nī 'tíicā: Ndúúti chí nús'uu ch'εetinée 'nū tiempo chí ch'εetinée chiidá 'nū cuááⁿ vmaaaⁿ, nguéé chinnee 'nū ch'iīⁿ'núⁿ 'nū profetas taachi cungéé yuūuⁿ yeⁿ'e yā. ³¹ 'Tíicā ndís'tiī ní nga'á nī nduudu cuaacu yeⁿ'ē maáⁿ nī ti ndís'tiī ní dáiyá 'iiⁿ'yāⁿ chí ch'iīⁿ'nuⁿ yā profetas. ³² Ndís'tiī ní canéé chí diíⁿ nī tan'dúúcā chiidá nī.

³³ Ndís'tiī ní tan'dúúcā cúú 'tíicā ndáátá yeⁿ'e nī. ¿Táacā cuuvi nguáⁿ'ai nī yeⁿ'e castigo yeⁿ'e infierno? ³⁴ Cáávā chuū 'úú ní dicho'ó nanááⁿ ndís'tiī profetas chí candεε yā Nduudu yeⁿ'é Ndyuūs, ndúúcū 'iiⁿ'yāⁿ chí déenū, ndúúcū 'iiⁿ'yāⁿ chí ngi'cueeⁿ ley. N'dúúví 'iiⁿ'yāⁿ s'eeⁿ ní ndís'tiī ní chita'á nī 'iiⁿ'yāⁿ ní chi'neeⁿnga'á nī 'iiⁿ'yāⁿ. Tá n'duuví yā ní ch'eⁿ'é nī 'iiⁿ'yāⁿ na yaacū sinagogas yeⁿ'e nī ní can'dáa nī 'iiⁿ'yāⁿ ndii na 'áámá yáāⁿ táámá yáāⁿ chí ch'eenú yā chii. ³⁵ Ní ndís'tiī ní ca'á nī cuenta yeⁿ'ē nducuéⁿ'e yuūúⁿ yeⁿ'e

'iiⁿyāⁿ chí n'dai chí 'iiⁿyāⁿ yeⁿé nī ch'iⁿnuⁿ yā 'iiⁿyāⁿ na yáⁿāa 'cūū ndii yuūⁿ yeⁿē Abel chí saⁿā n'dai ndii yuūⁿ yeⁿe Zacarías daiya saⁿā Berequías chí ndís'tiī ch'iⁿnuⁿ nī náávtaⁿā yeⁿē yaācū miiⁿ ndúúⁿcū nátaī miiⁿ. ³⁶ Cuaacu níⁿnyúⁿ ngaⁿá ngií ndís'tiī: Castigo yeⁿē tanducuéⁿē chuū canee vmnaaⁿ 'iiⁿyāⁿ chí snée yā maaⁿ tiempo 'cūū.

Jesús ngeεcu yā cáávā 'iiⁿyāⁿ yeⁿe yáāⁿ Jerusalén
(Lc. 13.34-35)

³⁷ Ní ngaⁿa Jesús: Ndís'tiī 'iiⁿyāⁿ yeⁿe yáāⁿ Jerusalén, ndís'tiī 'iiⁿyāⁿ yeⁿe yáāⁿ Jerusalén, chí ch'iⁿnuⁿ nī 'iiⁿyāⁿ profetas ní chi chiituú nī 'iiⁿyāⁿ chí Ndyuūs dicho'ó yā nanáaⁿ nī. Nééné n'deē 'cuūví neⁿé nadaamá daiya nī tan'dúúⁿcā tū'ū chí inadáámá tī daiya tī maaⁿ ngeεchi tī ní nguéé 'cuuⁿ nī. ³⁸ Ndís'tiī, n'diichí nī. Ndyuūs chí'neeⁿ yā ndís'tiī ndúúⁿcū vaacú nī dámaāaⁿ. ³⁹ Ti 'úú ní ngaⁿá ngií ndís'tiī, ti ndii maaⁿ ní 'āā ntéé snaaⁿ nī 'úú ndíí ndaā tiempo taachí caaⁿmaⁿ nī: De'ε chúúⁿcā n'dai 'iiⁿyāⁿ chí cuchii yā ndúúⁿcū chí duuchi Señor chí Daiyá Dendyuūs miiⁿ.

24

Jesús ngaⁿa yā chí yaācū templo miiⁿ ní ntuuvií
(Mr. 13.1-2; Lc. 21.5-6)

¹ Taachí Jesús miiⁿ nan'dáa yā yeⁿe yaācū templo cueⁿé yā. Discípulos yeⁿé yā ní ndaa yā nanáaⁿ yā ní n'giⁿi yā Jesús miiⁿ va'ai s'eeⁿ yeⁿe yaācū templo miiⁿ. ² Jesús miiⁿ ní n'guεcútaⁿa yā ní caⁿa yā: ¿'Áá inaaⁿ ndís'tiī nducyáácá chuū? Cuaacu níⁿnyúⁿ ngaⁿá ngií ndís'tiī, chí nguéé cunee tuūu cuaaⁿ vmnaaⁿ yeⁿe ví'ī chí nguéé ntuuvií.

Jesús ngi'cueeⁿ yā de'ē chí cuuvi taachi 'āā ndaa niⁿnuúⁿ nguuví chí 'cuiinu iⁿ'yeeⁿdī
(Mr. 13.3-23; Lc. 21.7-24; 17.22-24)

³ Jesús véε yā ná yiīcū chí nguuvi Olivos. Discípulos ndaa yā nanáaⁿ yā taachi canee yā damáaⁿ yā ní caⁿa yā chí yā Jesús: Cúúví nī nús'uu tíí cuaⁿā cuuví chuū. ¿De'ε señal 'cuuⁿmiⁿ nī taachi 'āā ndaa nī taama vmnéⁿē ní taachí 'cuiinu iⁿ'yeeⁿdī?

⁴ Jesús nan'guεcútaⁿa yā yeⁿe yā ní caⁿa yā: Cundée nī cuidado chí mar 'áámá 'iiⁿyāⁿ nguéé canche'éí yā ndís'tiī. ⁵ 'Yáá n'dái 'iiⁿyāⁿ ndaa yā ndúúⁿcū chí duuchí ní caaⁿmaⁿ yā 'tíicā: 'Úú chí Cristo 'úú. Ní canche'éí yā 'yaaⁿ n'dái 'iiⁿyāⁿ. ⁶ Ní 'caandiveéⁿ nī chí véé caandaá ní 'caandiveéⁿ nī chí 'cuūndī caandaá. Cundée nī cuidado chí 'iiⁿyāⁿ s'eeⁿ nguéé castaⁿa vaanicádiinúúⁿ yeⁿe nī ti canéé chí chíⁿ nducuéⁿē dendu'ū chí 'túúⁿcā cuuvi, naatí 'āā cuéé chí 'āā 'cuiinu iⁿ'yeeⁿdī. ⁷ Ti 'áámá nación 'cuuⁿmaⁿ ndúúⁿcū taama nación, ní 'áámá rey ndúúⁿcū nducuéⁿe país naachi ngaⁿa ntiⁿnyuⁿ yā contra yeⁿe taama rey ndúúⁿcū nducuéⁿe país naachi chí ngaⁿa ntiⁿnyuⁿ yā. Ndaá tiempos chí cuiicu ndúúⁿcū tiempos chí 'iiⁿyāⁿ 'cueenú yā cuuvi cáávā chí ya'ai yeⁿé yā, ní ndúúⁿcū tiempos chí inuⁿu yáⁿāa n'dee cuááⁿ n'dai. ⁸ Taachí cuuví dendú'ū chí 'túúⁿcā ní chíí tuu'mi ní cáámá cúūnga'a vaādī ya'ai.

⁹ Tuu'mi ní 'iiⁿyāⁿ s'eeⁿ ní nca'a yā ndís'tiī na ta'a 'iiⁿyāⁿ chí 'cueenu nī cuuvi ní 'caaⁿnuⁿ yā ndís'tiī. Ní nducyáácá 'iiⁿyāⁿ nguéé cuaaⁿ yā ndís'tiī caavā chí ngaⁿa nī chí duuchí. ¹⁰ Ní tiempo miiⁿ neené 'yaaⁿ 'iiⁿyāⁿ chí 'āā i'téénu yā yeⁿe 'úú ní 'cueenú yā cuuvi. Ní 'áámá yā caaⁿmáⁿ yā contra yeⁿe taama yā chí i'téénu yā. Ní 'āā ntéé neⁿé yā ví'ī. ¹¹ Ní nééné 'yaaⁿ 'iiⁿyāⁿ profetas falsos chí nguéé ngaⁿa yā nduudu cuaacu yeⁿé Ndyuūs ndaa yā ní canche'éí yā 'yaaⁿ n'dái 'iiⁿyāⁿ. ¹² Ní cáávā chí 'iiⁿyāⁿ neené dinuuⁿndí yā. 'Áā ntéé neⁿe yā 'áámá yā táámá yā ví'ī. ¹³ 'Iiⁿyāⁿ chí cuchée yā ní 'áámá i'téénu yā yeⁿé Ndyuūs ndii tiempo chí 'cuūví yā ní nguán'ai yā. ¹⁴ Ní nduūdū cuaacú 'cūū chí ngai yeⁿé naachi Ndyuūs ngaⁿa ntiⁿnyúⁿ yā 'iiⁿyāⁿ canéé chí caaⁿmaⁿ yā nanáaⁿ nducuéⁿē iⁿ'yeeⁿdī. Ní nduudu cuaacu yeⁿé Ndyuūs ní cūnee chí 'caandiveéⁿ 'iiⁿyāⁿ yeⁿe tanducuéⁿē nación yeⁿe núúⁿmán iⁿ'yeeⁿdī tuu'mi ní ndaa chí 'cuiinu iⁿ'yeeⁿdī.

¹⁵ Taachí ndís'tiī snaaⁿ nī tanducuéⁿē chí cunncā ca tan'dúúⁿcā chí dinguuⁿ profeta Daniel ndii cuááⁿ vmnaaⁿ taachi cheendíí yā na cuaaⁿ chí santo tuu'mi ní ndís'tiī ndúúⁿcū 'iiⁿyāⁿ chí n'geeⁿ yā túúmícadíínuuⁿ yā yeⁿē. ¹⁶ Ní tiempo yeⁿe chúū, 'iiⁿyāⁿ chí snée

yā na yáⁿāa Judea cáanu yā caⁿá yā cuaaⁿ yiicū. ¹⁷ Ní 'iiⁿyāⁿ chi sndúu yā tííⁿ va'āi nguée nguá'ái yā chí cuta'á yā 'tεε chi snúūⁿ chεeti va'āi ti cáanu yā. ¹⁸ 'Iiⁿyāⁿ chi canée yā cuεeti nguée nguεcundí yā na vaacu yā chí cuta'á yā tiinuⁿ yeⁿe yā ti cáanu yā. ¹⁹ Dε'e chúucā ya'ai yeⁿē n'daataá chí véé daiya tá chεeti tá ndúucū n'daataá chí ngiicu dacua'āa yeⁿē tá nguuví s'eeⁿ chí cáanu yā. ²⁰ Caaⁿmaⁿngua'á nī chí taachí ndaa nguuví chí cáanu nī, nguée tiempo chí 'iiche ndí nguée ndúu nguuví sábadó chí ntaavi'tuunúⁿ nī. ²¹ Tuu'mi ní ndaa nguuví chí néené 'cueenu cá nī cuuvi chí nguée n'diichi nī, ndí nguée ndúu ndí naachi chinga'ā yeⁿe iⁿyeeⁿdí, ndí máⁿ, ndí nguée ndúu snaaⁿ ra nī cuayiivi. ²² Ndúuti chí Ndyuūs nguée 'āā diduu'ví yā tiempo chí 'cueenu cá nī cuuvi mar 'áámá 'iiⁿyāⁿ nguée nguaⁿai yā. Naati cáávā 'iiⁿyāⁿ chí Ndyuūs dεεve yā, Ndyuūs diduu'ví yā tiempo miiⁿ.

²³ Tuu'mi ní ndúuti chí 'áámá 'iiⁿyāⁿ caaⁿmaⁿ yā cuuvi yā ndís'tií: Cuin'diichí nī, 'muuⁿ canee Cristo, o cuin'diichí nī, miiⁿ canée Cristo miiⁿya, nguée cu'teenú nī 'iiⁿyāⁿ miiⁿ. ²⁴ Ti ndaa 'yaaⁿ n'dái 'iiⁿyāⁿ chí ngaⁿá yā chí Cristo yā naati nguée Cristo 'iiⁿyāⁿ s'eeⁿ. Ndaa 'yaaⁿ n'dái profetas falsos chí nguée caaⁿmáⁿ yā nduudu cuaacu yeⁿe Ndyuūs. Ní 'iiⁿyāⁿ s'eeⁿ idiíⁿ yā señales chí n'gεete ndúucū vaadi n'giinu. Ní canche'ée yā 'iiⁿyāⁿ ndí 'iiⁿyāⁿ chí Ndyuūs ndεεve yā nduuti chí cuuví yā. ²⁵ 'Caandiveéⁿ nī. Áā ndí vmnaaⁿ, 'āā ngaⁿá ngí chuū ndís'tií. ²⁶ Ndúuti chí 'iiⁿyāⁿ caaⁿmaⁿ yā cuuvi yā ndís'tií 'tíicā: Cuin'diichí nī, Cristo canée yā na yáⁿāa cuūⁿmáⁿ, nguée caⁿá nī miiⁿ. O nduuti chí caaⁿmáⁿ yā: Cuin'diichí nī, Cristo canée yā ná 'aama cuarto chεeti va'ai, nguée cu'téenu nī. ²⁷ Tan'dúucā 'cuai chí ngiia cuááⁿ naachi ican'daa 'yáⁿā ní inaaⁿ yú ndí taachi ndaa cuaaⁿ na ngiia 'yáⁿā, 'tiicā ntúūⁿ cuuvi taachí 'úú nndaá, 'úú chí Saⁿā chí Daiya Ndyuūs. ²⁸ Tí 'āā tí nūuⁿ naachi candiiti cuerpo yeⁿe tináⁿā, mííⁿ nduuvidaama luutí.

Taaca ndaa Saⁿa chí Daiya Ndyuūs

(Mr. 13.24-37; Lc. 21.25-28)

²⁹ Jesús caⁿa yā: Tuu'mi ní taachi 'cuiinu 'cueenu yā cuuvi ní chó'ōo tiempo miiⁿ, tuu'mi ní 'yáⁿā ní cuuví maāiⁿ, ní 'iyyū miiⁿ ní nguée cunuūⁿ dεεve. 'Iiⁿnyuⁿ ní cun'daa yeⁿē nanguuvi ní nanguuvi ní nuⁿu ndúucū poder yeⁿē. ³⁰ Tuu'mi ní snaáⁿ yā señales nanguuvi chí yeⁿe Saⁿā chí Daiya Ndyuūs. Ní nducyáácá 'iiⁿyāⁿ yeⁿe nducuéⁿē nación yeⁿē iⁿyeeⁿdí ní cuεécú yā ní snaaⁿ yā chí ndaa Saⁿā chí Daiya Ndyuūs na meééⁿ yeⁿē nanguuvi ndúucū poder yeⁿe yā ndúucū chídεεvé n'dai yeⁿe maáⁿ yā. ³¹ Taachí dichó'o yā ángeles yeⁿe yā, tuu'mí nūuⁿ áámá yā ní di'cuεécú yā trompeta yeⁿe yā. Ní ángeles miiⁿ nadáámá yā 'iiⁿyāⁿ chí yeⁿe Cristo chí Cristo ndεεve yā yeⁿē cuaaⁿ núúⁿmáⁿ yáⁿā 'cūū ndii 'áámá 'diituú ndii táámá 'diituú yeⁿē nanguuvi.

³² Cuayiivi miiⁿ ní Jesús caⁿa yā: 'Cueéⁿ nī ejemplo yeⁿē yáⁿá yeⁿe n'guídii yaaⁿ nguuví taachí ínguaaⁿnu duūⁿnē n'gaiyāá ní ican'daa tá'āā 'āā déenu nī chí 'āā cuchii yáāⁿ. ³³ 'Tiicā ntúūⁿ, ndís'tií, taachí snaaⁿ nī tanducuéⁿē chúū, 'āā deenú nī chí 'āā cháā ndaa Saⁿā chí Daiya Dendyuūs. Ní 'āā neené niiⁿnuúⁿ cánée tiempo chí ndaa sa. ³⁴ Cuaacu nííⁿnyúⁿ ngaⁿá ngí ndís'tií, chí 'iiⁿyāⁿ chí snée yā maaⁿ nguée 'cuūvi yā neⁿe chí 'āā cuéeⁿ cuuvi tanducuéⁿē chuū. ³⁵ Nanguuvi ndúucū yáⁿā 'cūū chó'ōo naati nduudu yeⁿe nguεε chó'ōo.

³⁶ Naati nguuví miiⁿ ndúucū hora miiⁿ taachí ndaa Saⁿā chí Daiya Dendyuūs, nguεε véé mar 'áámá 'iiⁿyāⁿ chí deenú yā yeⁿē, ndí nguée ndúu ángeles yeⁿe va'ai chεeti nguuví, ti dámaaⁿ Ndyuūs Chiidá deenú yā.

³⁷ Tan'dúucā chí chí tiempo chí 'āā chó'ōo taachi canée Noé miiⁿ tiempo taachi chó'ōo diluvio, 'tíicā cuuvi taachí ndaa Saⁿā chí Daiya Dendyuūs. ³⁸ Ní tiempo taachi 'āā cuée chó'ōo diluvio chí cueeⁿ taaⁿ cuūvi, 'iiⁿyāⁿ ní gé'e yā, ní ngí'i yā, ní n'giindivaacu yā, ní nga'a yā daiya yā chí n'giindivaacu, ndí nguuví chí Noé miiⁿ ndaa yā na arca chí barco ch'εete ca chí din'dái yā. ³⁹ Ní 'iiⁿyāⁿ yeⁿe tiempo yeⁿe Noé nguée s'neeⁿ veéⁿ yā ndí taachi cheeⁿ taaⁿ cuūvi ní ch'iinū nducyáácá 'iiⁿyāⁿ ti ch'ií yā. 'Tiicā ntúūⁿ cuuvi taachí ndaa Saⁿā chí Daiya Ndyuūs. ⁴⁰ Tuu'mi ní nguuví taachi ndaa Daiya Ndyuūs snée 'uūvi saⁿā na cuεeti. 'Aama saⁿā ní Cristo candée yā saⁿā, taama saⁿā ní cūnee sa. ⁴¹ Ní na

'uūvī n'daataá snee ta ingúú tá 'áámá va'aī naachi ingúú yā. 'Aama tá ní candē yā tá'nā, taama ta ní cūnee ta.

⁴² Ndís'tiī cundēē nī cuidado, ti nguēē déénu nī de'ē hora chi nndaá Señor yeⁿe nī. ⁴³ Naati déénu nī chuū. Ndúúti chi saⁿā n'dai chi vaacu sa miiⁿ déénu sa de'ē hora ndaa chí duucu tuu'mi ní canduuchi sa. Ní nguēé ca'a sa lugar chí diduucú yā chí véé chēeti vaacu sa. ⁴⁴ Chí'n chí ndís'tiī ní 'cuētinéé yaaⁿ nī ti Saⁿā chí Daiya Ndyuūs miiⁿ ndaa yā hora chí ndís'tiī nguēé déénu nī.

*Ejemplo yeⁿe mozo chí n'daācā ní yeⁿe mozo chí nguēé n'daācā
(Lc. 12.41-48)*

⁴⁵ Caⁿa Jesús: ¿Du'ú dueño caⁿa yā ntiiⁿnyuⁿ chí s'nee yā vmaāⁿ yeⁿe va'ai yeⁿé yā nduuti chí nguēé 'aama mayordomo chí n'daācā n'dai ní deenu sa ní ca'a sa chí che'e mozos yeⁿé yā hora chí che'e sa? ⁴⁶ De'ē chúúcā n'dai mayordomo miiⁿ chí díiⁿ sa ntiiⁿnyuⁿ taachi dueño miiⁿ ní ndāa yā ní ndaaca yā mayordomo chí díiⁿ sa tan'dúúcā chí neⁿe yā. ⁴⁷ Cuaacu níⁿnyúⁿ ngaⁿá ngí ndís'tiī, chí dueño miiⁿ cu'neēⁿ yā mayordomo miiⁿ chí caaⁿmaⁿ ntiiⁿnyuⁿ sa yeⁿé chí véé yeⁿe yā. ⁴⁸ Ndúúti chí mayordomo miiⁿ ní nguēé n'dáacā idiīⁿ sá ní 'íicú nacádíinuⁿ sa na staava yeⁿé sa chí dueño cuuvi 'náaⁿ yā ní ndaa yā. ⁴⁹ Ní tucá'a sa ch'eⁿe sa mozos chí idiīⁿ sa ntiiⁿnyuⁿ ndúúcu sa ní ngé'e sa ní ngí'i sa ndúúcu amigos yeⁿe sa ní cuu'vi sa. ⁵⁰ Dueño miiⁿ ní ndaa yā nguuvi chí nguēē canéé ngíínú sa ní hora chí nguēē deenu sa. ⁵¹ Ní dueño miiⁿ ní ca'á yā 'aama castigo ch'ēete mayordomo miiⁿ. Ní 'caacá yā mayordomo chí cheeyē ní cu'neēⁿ yā mayordomo miiⁿ chuva'aī ndúúcu 'iiⁿyāⁿ 'uuvi nááⁿ 'uūvī cheendi yā. Lugar miiⁿ ní cuēecu sa ní che'e 'díiⁿyuⁿ sa cueⁿe daāⁿmaⁿ.

25

Ejemplo yeⁿe ndiichi n'daataá chí cuíínuú

¹ Jesús caⁿa yā taama ejemplo: Naachí Ndyuūs ngaⁿa ntiiⁿnyúⁿ yā na va'ai chēeti nguuvi tan'dúúcā ndiichi n'daataa chí cuíínuú chí sta'á yā lámparas yeⁿe yā ní can'dáa yā. Ní cueⁿe yā ndaāca yā saⁿā chí 'caandavaacú sa. ² Ní nyuⁿu yā candēē n'daāca yā cuidado ti lista yā. Tá nyuⁿu yā nguēé candēē yā cuidado ní díiⁿ yā tan'dúúcā chí n'daataá tonta yā. ³ N'daataa chí cuíínuú chí nguēé candēē yā cuidado, candēē yā lámparas yeⁿe yā ní nguēé candēē yā petróleo yeⁿé. ⁴ Ní nyuⁿu yā ní candēē n'daacá yā cuidado, candēē yā botellas yeⁿe petróleo ndúúcu yā ndúúcu lámparas yeⁿe yā. ⁵ Ní chí'naaⁿ saⁿā miiⁿ chí ndaa sa chí 'caandavaacu sa. Ní taachi 'āā cuéé ndaa sa, n'daataá s'eeⁿ chí ndaa yááⁿ nááⁿ yā ní ch'ēeti yaadú yā. ⁶ Chí maⁿā yaaⁿ, chí'iindiveén yā 'áámá nduudu chí 'caī. Ní ngaⁿa yā: Ndaa sáⁿā chí 'caandavaacu sa. Can'dáa nī ní díiⁿ nī recibir saⁿā. ⁷ Tuu'mi ní nducyaaca chí cuíínuú s'éeⁿ nducueeⁿ yā ní nuuⁿmí yā lámparas yeⁿe yā. ⁸ Chí cuíínuú chí nguēé lista yā caⁿa yā chíi yā chí cuíínuú chí lista yā: Téē nī 'téé petróleo yeⁿé nī nús'uu ti lámparas yeⁿé 'nū 'āā cháā 'āā n'tuuvi. ⁹ Chí cuíínuú chí candēē yā petróleo n'guēcútaⁿa yā ní caⁿa yā chíi yā tanáⁿa yā: Nguēé cuuvi téé 'nū ndís'tiī. Nús'uu ní neⁿe cá 'nū petróleo chí candēé 'nū ní 'íicú 'áatiī nguēé cuuvi falta yeⁿe yú. N'dáaca ca yeⁿe ndís'tiī chí caⁿa nī naachí in'diicuí yā petróleo ní cuái nī yeⁿé nī. ¹⁰ Neⁿe chí n'daātā s'eeⁿ chí nguēē lista yā cueⁿe yā cuái yā petróleo miiⁿ, saⁿā chí 'caandavaacu sa ndaa sa ní chí cuíínuú chí candēē n'daacá yā cuidado cueⁿé yā ndúúcu saⁿā naachí n'giindivaacu 'iiⁿyāⁿ. Ní saⁿā miiⁿ nan'gaādí sá cheendi va'aī miiⁿ. ¹¹ Cuayiivi miiⁿ ní ndaa tanáⁿa chí cuíínuú s'eeⁿ ní caⁿa yā: N'diī Señor, Señor, nan'guaaⁿ nī yeⁿé 'nū. ¹² Naati saⁿā miiⁿ chí 'caandavaacu sa ní nan'guēcútaⁿa yā ní caⁿa yā: Cuaacu níⁿnyúⁿ nga'á ngí ndís'tiī, 'úú ní nguēé n'diichí ndís'tiī.

¹³ Maaⁿ ní nducyaaca ndís'tiī candēē nī cuidado ti nguēé déénu nī de'ē nguuvi o de'ē hora chí Saⁿā chí Daiya Dendyuūs nndaá sa.

Ejemplo yeⁿe tuūmī

¹⁴ Tuu'mi ní caⁿ'a Jesús: Naachí Ndyuūs ngaⁿ'a ntiiⁿnyuⁿ yā na va'ai cheeti nguuvu tan'dúúcā 'áámá saⁿ'ā chi caⁿ'ā yaⁿ'ái yā ndii táámá yáⁿ'āa ní 'cai yā mozos yeⁿ'e yā ní nca'a yā mozos miiⁿ dendú'ū chi véé yeⁿ'e yā, chi diiⁿ sa cuidado yeⁿ'ē.

¹⁵ 'Aama mozo ní ca'a yā nyuⁿ'u mil caadi, táámá mozo ní 'uūvī mil caadi, táámá mozo ní 'aama mil caadi. Ní ca'a yā 'áámá 'áámá mozo tan'dúúcā chi chee sa. Ní cueⁿ'ē yaⁿ'ái yā. ¹⁶ Mozo chí sta'a nyuⁿ'u mil caadi cunaⁿ'ā sa ní diiⁿ sa negocio ndúúcū tuumī miiⁿ. Ní ndaācā sa tá nyuⁿ'u mil caadi yeⁿ'e daiya tuumī miiⁿ. ¹⁷ 'Tiicá ntúūⁿ mozo chí sta'a sa ná 'uūvī mil caadi miiⁿ ndaācā sa ná 'uūvī mil caadi yeⁿ'ē daiya tuumī miiⁿ. ¹⁸ Mozo chí sta'a sa 'aama mil caadi cheⁿ'e sa ní s'neeⁿ sa tuumī miiⁿ cheeti 'áámá 'cuutií cuééé ní ch'ii sa maaⁿ yáⁿ'āa. 'Tíicā chinuuⁿ n'dé'ei sa tuumī yeⁿ'e 'iiví sa.

¹⁹ Chi 'naáⁿ ní ndaā 'iivi mozos miiⁿ ní tun'dáa yā cuenta ndúúcū mozos. ²⁰ Ndaā mozo chí nca'a yā nyuⁿ'u mil caadi nanáaⁿ yā. Ndéé sa ta nyuⁿ'u mil caadi yeⁿ'ē daiya tuumī miiⁿ. Ní caⁿ'a sa chii sa 'iiví sa: N'diī señor, nyuⁿ'u mil caadi tee nī 'úú. 'Ííngā. Ndaācā ta nyuⁿ'u mil caadi daiya tuumī yeⁿ'e nī. ²¹ 'Iivi mozo miiⁿ ní caⁿ'a yā chii yā saⁿ'ā: Dii mozo yeⁿ'é chí n'daācā ní n'dai, n'daācā n'dai ndíⁿ di. Maaⁿ ti 'āā n'daācā diiⁿ di ndúúcū chí duū'vi, maaⁿ ní caaⁿ'maⁿ ntiiⁿnyuⁿ di yeⁿ'e n'deēe cá teé dii. Cho'o di cuaaⁿ cheeti va'āi ní cueⁿ'e daāⁿ'maⁿ cuuvi yeenú di nduucú. ²² Ndaā ntúūⁿ nanáaⁿ yā mozo chí nca'a yā na 'uūvī mil caadi. Mozo miiⁿ ní caⁿ'a sa chii sa 'iivi sa: N'diī señor, 'uūvi mil caadi tee nī 'úú. 'Ííngā tuumī yeⁿ'e nī. Ndaācā ta na 'uuvi mil caadi daiya tuumī miiⁿ. ²³ 'Iivi sá caⁿ'a yā chii yā saⁿ'ā: Díi mozo yeⁿ'é chí n'daācā ní n'dai, ní n'daācā idiiⁿ di. Nguéé ch'ete teé dii ní n'daācā díiⁿ di. Maaⁿ ní caaⁿ'maⁿ ntiiⁿnyuⁿ yeⁿ'e n'deēe ca chí teé dii. Cho'o di cuaaⁿ cheeti va'āi ní cueⁿ'e daāⁿ'maⁿ cuuvi yeenú di nduucú. ²⁴ Ndaa nanáaⁿ yā mozo chí nca'á yā 'áámá mil cáádí, ní caⁿ'a sa chii sa 'iivi sa: N'diī Señor, deenú tí n'diī ní cheechí nī, ní diiⁿ nī cosechar ndúúcū tuumī yeⁿ'é nī chí nguéé ngiinu nī, ní 'naaⁿ trigo ngaáⁿ nī naachí nguéé ngiinu nī ti yeⁿ'e nī. ²⁵ Chííⁿ chí díiⁿ ti 'va'á. Ní cheⁿ'é ní s'nuuⁿ n'de'ei tuumī yeⁿ'e nī na 'áámá yiivi yáává maaⁿ yáⁿ'āa. 'Ííngā tuumī yeⁿ'e nī chí tee nī 'úú. ²⁶ 'Iivi sa míiⁿ nan'guεcútaⁿ'a yā ní caⁿ'a yā chii yā mozo miíⁿ: Díi mozo chí nguεε n'dáacā ní 'daān'dí dii. Ní nguéé n'dáacā ídiiⁿ. Díi ní déenu di chí ntā'a cosecha naachi nguéé ndíiⁿ ntiiⁿnyuⁿ ní nn'guaáⁿ trigo naachi nguéé ngiinu ti yeⁿ'é. ²⁷ ¿De'ē cúúví chí nguéé s'neeⁿ di tuumī yeⁿ'é na banco? Ní taachi 'úú ndaá cuuvi ntee di tuumī yeⁿ'é ndúúcū daiya tuumī miiⁿ. ²⁸ 'Iivi miiⁿ caⁿ'a yā ndúúcū 'iiⁿ'yāⁿ chí snéé miiⁿ: N'diī, divíi nī tuumī yeⁿ'ē sa ní ca'a nī tuumī mozo chí ndeē ndiichi mil caadi. ²⁹ Ti 'iiⁿ'yāⁿ chí véé yeⁿ'e yā, ní ndaācā ca yeⁿ'e yā. Ní 'iiⁿ'yāⁿ miiⁿ n'deēe cá vεε yeⁿ'e yā. 'Iiⁿ'yāⁿ chí nguéé yeⁿ'e yā, ta 'Ííiⁿ duū'vi chí véé yeⁿ'e yā ní divíi yā yeⁿ'e yā. ³⁰ Mozo chí nguεε dichíí'vē ní cuta'á nī ní cu'nuuⁿ nī cuaaⁿ chuva'āi ná maaⁿ. Míiⁿ cuεεcu sa ní che'e 'díiⁿ'yúⁿ sá cueⁿ'e daāⁿ'maⁿ.

N'diichi Jesús nuuⁿndi yeⁿ'ē naciones

³¹ Ní caⁿ'a Jesús: Taachí ndaa Saⁿ'ā chí Daiyā Dendyuūs tan'dúúcā Rey chí ch'εete ca ní n'dεεve taavi ndúúcū tanducuéⁿ'ē ángeles yeⁿ'e yā, tuu'mi ní saⁿ'ā miíⁿ 'cuúndi sa na trono yeⁿ'e sa. ³² Ní nduuvidaama nanáaⁿ Rey miiⁿ 'iiⁿ'yāⁿ yeⁿ'e nducyaaca naciones ní Rey miiⁿ divíi yā 'iiⁿ'yāⁿ, 'áámá yā yeⁿ'e táámá yā tan'dúúcā chí 'iiⁿ'yāⁿ pastor chí idiiⁿ yā cuidado yeⁿ'e 'iiti cuūchī divíi yā chiivu nguaaⁿ 'iiti cuūchī. ³³ Ní cu'neeⁿ yā 'iiti cuūchī lado tá cuaacú yā ní chiivú miiⁿ lado ta 'cueé yā. ³⁴ Tuu'mi ní Rey miiⁿ caaⁿ'máⁿ yā cuuvi yā 'iiⁿ'yāⁿ lado ta cuaacu yā: Nds'tiī chí Chiidá ngaⁿ'a yā yeⁿ'e nī n'dái taavi nī. Cuchíi nī. 'Ííngā parte chí ituneeⁿ ndís'tiī yeⁿ'ē naachí Ndyuūs ngaⁿ'a ntiiⁿnyúⁿ yā ní nguaiⁿ'n'dai yā yeⁿ'ē ndís'tiī ndíi taachi Ndyuūs 'āā cuéé din'dái yā iⁿ'yeeⁿdí. ³⁵ Tí taachí cuiicú, ní tee nī chí che'é. Ní taachí chí yaācá, ní tee nī chí chí'í. Ní taachí canuúⁿ yúúni tan'dúúcā 'iiⁿ'yāⁿ chí ndiicá yā táámá yāāⁿ, ndís'tiī 'cuúⁿ nī 'úú. ³⁶ Ní taachi 'āā ntéé catecaí, ní tee nī catecaí. Ní taachi chíitā 'úú, dicuéénaaⁿ nī 'úú. Ní taachi cheⁿ'é vácūū, ní ndaa nī n'diichi nī 'úú. ³⁷ Tuu'mi ní 'iiⁿ'yāⁿ chí n'dái yā nan'guεcútaⁿ'a ní caⁿ'a yā cuuvi yā 'iiⁿ'yāⁿ: N'diī señor, ¿tií cuaⁿ'ā n'diichi 'nū n'diī chí cuiicu nī ní tee 'nū chí che'é nī, o yaacá nī ní tee 'nū chí chí'i nī? ³⁸ ¿Tií cuaⁿ'ā n'diichi 'nū n'diī cuaaⁿ cyúúni ní nta'á 'nū n'diī na vaacú

'nū, o nguée catecaí nī ní tee 'nū catecai nī? ³⁹ O ¿tíí cuaⁿā n'diichí 'nū n'dií chi ngífta nī o vácūū canuuⁿ nī, ní nínđáá 'nū nanáaⁿ nī? ⁴⁰ Rey miiⁿ ní nan'gueécútaⁿa yā ní caⁿa yā chii yā 'iiⁿyāⁿ s'uuⁿ: Cuaacu níⁿnyúⁿ 'úú ngaⁿá ngí ndís'tií, ti taachi dííⁿ nī 'tíicā ndúúⁿcū 'áámá hermano 'áará chi ndíicúúⁿ cá yā, tuu'mi ní 'tiicá ntúūⁿ dííⁿ nī nduucú.

⁴¹ Tuu'mi ní Rey caaⁿmaⁿ ntúūⁿ yā cuuvi yā 'iiⁿyāⁿ chi snée lado ta 'cueé yā: Cuví nī yeⁿē 'úú, ndís'tií, 'iiⁿyāⁿ condenado chi nguée n'daācā idiíⁿ nī. Ní caⁿa nī ná nguuchi yaⁿā chí 'áámá ngiichi cueⁿe daāⁿmaⁿ. Lugar 'cūū ní n'dai cááva yááⁿnguiinūⁿ ndúúⁿcū ángeles yeⁿe sa. ⁴² Tí taachí cuiicú, nguée tee nī chi che'é. Chií yaācá, ndíí nguée ndúú tee nī chi chí'í. ⁴³ Canuúⁿ yúúⁿí, ndíí nguée ndúú 'cuúⁿ nī 'úú. 'Āā ntée catecaí, ndíí nguée ndúú tee nī catecaí. Chíftā 'úú ní canuúⁿ vácūū, ndíí nguée ndúú dicuéénaaⁿ nī 'úú. ⁴⁴ Tuu'mi ní 'iiⁿyāⁿ s'eeⁿ nan'gueécútaⁿa yā ní caⁿa yā: N'dií señor, ¿tíí cuáⁿā n'diichí 'nū n'dií chi cuiicú nī, o yaācá nī, o canúⁿ nī yúúⁿí, o nguē catecai nī, o ngífta nī, o vácūū cánuuⁿ nī, ní nguée dichíí've 'nū n'dií? ⁴⁵ Tuu'mi ní Rey miiⁿ nan'gueécútaⁿa yā ní caaⁿmaⁿ yā cuuvi yā 'iiⁿyāⁿ s'eeⁿ: Cuaacu níⁿnyúⁿ ngaⁿá ngí ndís'tií, tan'dúúⁿcā chi nguée dííⁿ nī ndúúⁿcū 'áámá chi ndíicúúⁿ cá 'tiicá ntúūⁿ 'úú, nguée dííⁿ nī nduucú. ⁴⁶ 'Iiⁿyāⁿ s'eeⁿ ní caⁿa yā na 'áámá castigo chi 'áámá canee ní 'iiⁿyāⁿ chí n'dái yā caⁿá yā ná vida cueⁿe daāⁿmaⁿ.

26

'Iiⁿyāⁿ ní n'nuuⁿ yiinú yā táácā cuta'á yā Jesús

(Mr. 14.1-2; Lc. 22.1-2; Jn. 11.45-53)

¹ Taachí Jesús ch'iinu caⁿa yā tanducuéⁿē nduudú 'cūū, caⁿa yā chii yā discípulos yeⁿe yā: ² 'Āā déenu ndís'tií ná 'uūvī nguuvi maaⁿ cuūvā 'viicu yeⁿē pascua. 'Íicu 'úú Saⁿā chí Daiya Dendyuūs 'úú ní 'iiⁿyāⁿ nca'a yā 'úú ní cu'néⁿnga'a yā 'úú.

³ Tuu'mi ní chiiduú n'geete ndúúⁿcū maestros yeⁿe ley ndúúⁿcū 'iiⁿyāⁿ ndiicúū s'eeⁿ chí ngaⁿa ntiiⁿnyuⁿ yeⁿé yaācū nduuvidaamá yā na palacio yeⁿē chiiduú ch'eté ca chí nguuvi Caifás. ⁴ Ní ndeé yā taācā cuuvi canche'etí yā Jesús ní cuta'á yā 'iiⁿyāⁿ ní 'caaⁿnúⁿ yā 'iiⁿyāⁿ. ⁵ Ní caⁿa yā: Nguée dííⁿ yú nguuvi 'viicu ti 'iiⁿyāⁿ yeⁿe yáāⁿ Jerusalén miiⁿ didáⁿa yā ní dííⁿ yā vaadi 'caa'va ndúúⁿcū nús'uu.

Ch'eēndáa yā aceite vmnaaⁿ tiiⁿ Jesús na yáāⁿ Betania

(Mr. 14.3-9; Jn. 12.1-8)

⁶ Jesús canee yā na yáāⁿ Betania ná va'ai yeⁿe Simón chí cané ca'ai lepra chí in'duuti yuūtē yeⁿē sa. ⁷ Ní ndaā 'áámá n'daataá nanááⁿ Jesús miiⁿ chí ndéē tá 'áámá frasco tuūu alabastro chí s'néēⁿ aceite perfume chí yaⁿai n'dai chí'vē. Ní ch'eēndáa ta perfume miiⁿ na tííⁿ Jesús taachí vεε yā na mesa. ⁸ Ní discípulos taachi n'diichí yā chūū nduuvi taáⁿ yā. Ní caⁿa yā: ¿De'ē cúví chí chingēē aceite 'cūū? ⁹ Cuuví n'diicui ta chuū ti yaⁿai n'dai chí'vē chuū ní ca'a tá tuūmī miiⁿ 'iiⁿyāⁿ chí nguée yeⁿe yā.

¹⁰ Jesús tuumicadíinuuⁿ yā chí discípulos ngaⁿa yā 'tíicā, ní caⁿa yā chii yā discípulos: ¿De'ε cúví chí n'gaa'va ní ndúúⁿcū n'daataá 'tíí? Táⁿa 'tīí n'dáacā dííⁿ tá nduucú. ¹¹ Tí 'iiⁿyāⁿ chí nguée véé yeⁿé yā ní 'áámá cánée yā nduucú nī, naati 'úú ní nguée 'aama cuneé nduucú nī. ¹² Taachi tá 'tīí ch'eēndáa ta perfume vmnááⁿ cuerpo yeⁿé, ndaā ta 'úú tí taachí 'cuūví 'āā canee listo cuerpo yeⁿé chí 'cueēchí. ¹³ Cuaacu níⁿnyúⁿ ngaⁿá ngí ndís'tií, chí 'āā tíí nūⁿ chí caaⁿmáⁿ yā ndúúⁿdú ngai yeⁿe chí nanguaⁿai 'iiⁿyāⁿ na núúⁿmáⁿ iⁿyeēⁿdí, caaⁿmaⁿ ntuúⁿ yā chí tá 'tīí dííⁿ tá chuū ní n'gaacu yā yeⁿe tá.

Judas miiⁿ ngaⁿa maaⁿ sa chí nca'a sa Jesús

(Mr. 14.10-11; Lc. 22.3-6)

¹⁴ Tuu'mi ní 'áámá discípulo yeⁿē naachi ndiichúúví yā chí nguuvi sa Judas Iscariote, cheⁿe sá nanááⁿ chiiduú n'geetē. ¹⁵ Ní caⁿa sa chii sa 'iiⁿyāⁿ s'eeⁿ: ¿De'ē tée nī 'úú ní 'cuuⁿmíⁿ ndís'tií du'u chí Jesús? 'Iiⁿyāⁿ s'eeⁿ ní caⁿa yā chí nadii've yā Judas miiⁿ ndiicū ndiichi caadi 'dííⁿnguεε. ¹⁶ Ndíí tuu'mí nūⁿ in'nuuⁿ yíinú Judas miiⁿ de'ē tiempo ní táácā chí nca'a sa Jesús miiⁿ.

*Jesús yaa'ví yā yeⁿē chí che'e nguiinú yā 'viicu pascua
(Mr. 14.12-25; Lc. 22.7-23; Jn. 13.21-30; 1 Co. 11.23-26)*

¹⁷ Nguuvi vmnáán vmnaaⁿ yeⁿe 'viicu pascua, nguuvi yeⁿe pan chi nguée levadura yeⁿē, discípulos ní ndaa yā nanáán Jesús ní caⁿ'a yā chii yā 'iiⁿyāⁿ: ¿Tii neⁿe nī chi in'nuúⁿ 'nū chi che'e nguiinū yú mááⁿ yeⁿe 'viicu yeⁿe pascua?

¹⁸ Níicú Jesús caⁿ'a yā chii yā discípulos: Cueⁿ'é nī na yāāⁿ Jerusalén ni ndaacá nī 'áámá saⁿ'ā ní caaⁿ'maⁿ nī cuuvi nī saⁿ'ā: Maestro yeⁿe yú caⁿ'a yā 'túúcā: Tiempo yeⁿe chí 'cuúví 'āā snee niⁿnuúⁿ ní neⁿ'é díⁿ 'viicu yeⁿe pascua ndúúcū discípulos yeⁿ'é na va'ai yeⁿ'é nī.

¹⁹ Discípulos díⁿ yā tan'dúúcā chi Jesús dicho'ó yā chi diiⁿ yā. Ní in'nuúⁿ yā chi che'e yā yeⁿe 'viicu yeⁿe pascua.

²⁰ Taachi 'āā chii chiinū miiⁿ, Jesús ch'iindi yā na mesa ndúúcū ndu'u ndiichúví discípulos. ²¹ Ní taachí vεεté yā ní nge'e yā Jesús caⁿ'a yā: Cuaacu níⁿnyúⁿ ngaⁿ'á ngí ndís'tii, chi 'áámá chéé ndís'tii díⁿ nī entregar 'úú.

²² Discípulos s'neeⁿ ndaachi yiinú yā. 'Áámá 'áámá yā ní tucá'á yā caⁿ'a yā: N'díí Señor, ¿'áá 'úú?

²³ Tuu'mi ní Jesús nan'guεεcútaⁿ'a yā ní caⁿ'a yā: 'iiⁿyāⁿ chi nduucú ní di'caandá yā pan yeⁿ'é yā na cú'ú 'cūū nduucú, 'iiⁿyāⁿ 'cūū ní nca'a yā 'úú. ²⁴ Cuaacu níⁿnyúⁿ cuuvi ndúúcū Saⁿ'ā chi Daiya Dendyuūs tan'dúúcā chi canéé nguūⁿ yeⁿ'ē sa na libro yeⁿ'é Ndyuūs, naati de'ε chúúcā ya'āi yeⁿe saⁿ'ā chí nca'a sa 'úú chí Saⁿ'ā chi Daiya Dendyuūs. N'dáacā ca yeⁿ'ē sa nduuti chi nguée ch'iindiyáaⁿ sa.

²⁵ Tuu'mi ní Judas, saⁿ'a chi neⁿe nca'a sa Jesús, ní caⁿ'a sa: ¿'Áá 'úú, Maestro? Jesús caⁿ'a yā chii yā Judas: Díí, ngaⁿ'a di 'tíicā.

²⁶ Taachí 'iiⁿyāⁿ s'uuⁿ nge'e yā, Jesús miiⁿ sta'á yā pan ní ca'á yā gracias Ndyuūs cáávā pan miiⁿ. Ní n'deé yā pan ní ca'a yā discípulos yeⁿ'e yā. Ní caⁿ'a yā: Cuta'á nī, che'e nī pan caati tan'dúúcā cuerpo yeⁿ'é 'tíicā.

²⁷ Ní Jesús sta'á yā taza ndúúcū jugo yeⁿ'e uvas ní ca'á yā gracias Ndyuūs cáávā nuūⁿnīⁿ uvas miiⁿ, ní ca'a yā discípulos yeⁿ'e yā. Ní caⁿ'a yā: Nducyaaca ndís'tii, cu'u nī nuūⁿnīⁿ uvas yeⁿ'e taza 'cūū, ²⁸ ti jugo nuūⁿnīⁿ uvas miiⁿ ní tan'dúúcā yuūuⁿ yeⁿ'é ní yeⁿ'ē compromiso chi ngai yeⁿ'é. Yuūú yeⁿ'é chi cungéé cáávā 'yaaⁿ n'dai 'iiⁿyāⁿ, 'tíicā. Yuūúⁿ yeⁿ'é chíⁿ chi nch'εεcú nuuⁿndi yeⁿ'e nducyaaca 'iiⁿyāⁿ. ²⁹ 'Úú ní ngaⁿ'á ngí ndís'tii chí 'āā ntéé cu'ú jugo nuūⁿnīⁿ yeⁿ'ē uvas na iⁿ'yeeⁿdí 'cūū ndii nguuvi chi cu'ú ndúúcū ndís'tii naachi Chiidá ngaⁿ'a ntiiⁿnyúⁿ yā.

*Jesús ngaⁿ'a yā Pedro miiⁿ chí cuéⁿdíitu sa chi nguée n'diichi sa Jesús
(Mr. 14.26-31; Lc. 22.31-34; Jn. 13.36-38)*

³⁰ Taachí ch'iinu chiita yā 'áámá canción yeⁿ'é Ndyuūs nan'dáa yā va'āi ní cueⁿ'é yā na yiicū chi nguuvi Olivos. ³¹ Tuu'mi ní Jesús caⁿ'a yā chii yā discípulos: Nducyáacá ndís'tii cuuví 'cuináaⁿ nī yeⁿ'e 'úú maaⁿnguúinū. Caati ngaⁿ'a naachi canéé nguūⁿ na libro yeⁿ'é Dendyuūs 'túúcā: 'Úú Ndyuūs 'nuūcá'ai ní 'caaⁿ'núⁿ saⁿ'ā chí idiiⁿ sa cuidado 'iiti cuūchī, ní 'iiti s'eeⁿ ní caⁿ'á 'múúⁿ caⁿ'á miiⁿ tī ní cuuví ndai tī. ³² Taachí 'úú nduuchí nguaaⁿ tináⁿ'ā, caⁿ'á vmnaaⁿ yeⁿ'e ndís'tii na yáⁿ'āa Galilea.

³³ Tuu'mi ní Pedro miiⁿ ní nan'guεεcútaⁿ'a sa ní caⁿ'a sa chii sa Jesús: 'Áará chi nducyaaca yā cuuví 'cuinaaⁿ yā cáávā n'dii 'úú nguée cuuví 'cuinaaⁿ mar 'aamá naaⁿ.

³⁴ Tuu'mi ní Jesús caⁿ'a yā chii yā Pedro: Cuaacu níⁿnyúⁿ ngaⁿ'á ngí dii chi maaⁿnguúinū taachi 'āā cuéé 'cuaī túsaaⁿ'ā, dii ní 'āā 'iinū cuuvi cueeⁿdiitū di yeⁿ'ē 'úú chi nguée in'diichi di 'úú.

³⁵ Naati Pedro miiⁿ caⁿ'a sa: Ndúúti chi canéé chí 'cuúví nduucú nī maestro ní 'cuúví. Nguée caaⁿ'máⁿ chi nguée n'diichí n'dii. Ní nducyaaca discípulos ní 'tiicá ntúūⁿ caⁿ'a yā.

*Jesús ngaⁿ'angua'á yā na jardín chi nguuvi Getsemaní
(Mr. 14.32-42; Lc. 22.39-46)*

³⁶ Tuu'mi ní ndaā Jesús ndúúcu discípulos yeⁿé yā na 'áámá cuaaⁿ chi nguuví Getsemaní ní caⁿ'a yā chii yā discípulos yeⁿe yā: 'Cuēeté nī 'muuⁿ. 'Úú ní caⁿ'a niiⁿnuúⁿ miiⁿ ní caaⁿ'maⁿngua[']á.

³⁷ Jesús miiⁿ cueⁿ'e yā ndúúcu Pedro ndúúcu nduu 'uuví saⁿ'ā daiya Zebedeo. Tuu'mi ní Jesús s'neeⁿ ndaachi yiinú yā. ³⁸ Ní caⁿ'a yā chii yā 'iiⁿ'yāⁿ s'uuⁿ: Alma yeⁿé ní néené ndaachí yiinú chi ya'āi chí 'cuūví. 'Cuēetinée nī 'muuⁿ ní 'cuēeti nduuchí nī nduucú.

³⁹ Jesús ní cueⁿ'é yā ta 'líⁿ cuááⁿ vmnaaⁿ. Candiitin'dii yā ní caⁿ'angua'a yā ní caⁿ'a yā: N'dií Chiidá, ndúúti chi cuuvi, nguéé díⁿ nī chí 'cueenú cuuvi prueba 'cūú naati nguéé cuuvi tan'dúúca chí 'úú neⁿ'é naati tan'dúúca chí n'dií neⁿ'é nī.

⁴⁰ Tuu'mí nūuⁿ ndaá yā naachi snéé discípulos yeⁿe yā ní ndaāca yā 'iiⁿ'yāⁿ chí stiyaadú yā. Ní caⁿ'a yā chii yā Pedro: ¿'Áá 'tíicā nguéé íchéé dí chí induūchi dí nduucú 'áámá hora?

⁴¹ Ndís'tií ní candée nī cuidado ní caaⁿ'maⁿngua[']á nī níicú nguéé díⁿ nī nuuⁿndi. Cuaacu níⁿnyúⁿ espíritu yeⁿe nī neⁿ'e diiⁿ n'daacā naati cuerpo yeⁿ'é nī 'āā dūūvā.

⁴² Jesús cheⁿ'e chí ndii 'úúví cuuvi ní caⁿ'angua'a yā ní caⁿ'a yā: N'dií Chiidá, ndúúti chí neⁿ'é nī, díⁿ nī chí nguéé 'cueenú cuuvi prueba 'cuu chí n'daacā tuu'mi ní 'tíicā díⁿ nī, naati cuuvi tan'dúúca chí neⁿ'e nī.

⁴³ Jesús ndaa ntuuⁿ yā táámá vmnéⁿ'ēe naachi snéé discípulos yeⁿ'é yā ní ndaaca ntúuⁿ yā 'iiⁿ'yāⁿ stiyaadú yā ti 'iiⁿ'yāⁿ s'eeⁿ 'āā ntéé íchéé yā nduutináaⁿ yā chí yaāⁿnnáaⁿ yā. ⁴⁴ Jesús miiⁿ ní nguéé yaa'vi yā discípulos ní s'neeⁿ yā 'iiⁿ'yāⁿ chí stiyaadú yā. Ní cueⁿ'e ntúuⁿ yā ní caⁿ'angua'a ntúuⁿ yā ndii chí ndii 'íinú cuuvi ní caⁿ'a ntuuⁿ yā tan'dúúca chí 'āā ngaⁿ'a yā. ⁴⁵ Cuayiivi ní ndaa ntuuⁿ yā nanááⁿ discípulos ní cáⁿ'a yā chí yā discípulos: 'Cuēetiyaadú nī ní ntaavi'tuunúúⁿ nī. Cuin'diichí nī ti 'āā ndaā hora yeⁿ'e 'úú chí Saⁿ'ā chí Daiya Dendyuūs. 'Iiⁿ'yāⁿ nca'a yā 'úú tá'a saⁿ'ā s'eeⁿ chí véé nuuⁿndi yeⁿ'e sā. ⁴⁶ Nducueeⁿ ndís'tií ní cúⁿ'u yú. 'Āā cuchii niiⁿnuúⁿ saⁿ'ā chí nca'a 'úú.

Stá yā Jesús ní candée yā 'iiⁿ'yāⁿ presos

(Mr. 14.43-50; Lc. 22.47-53; Jn. 18.2-11)

⁴⁷ 'Naaⁿ chí Jesús indeé yā, ndaā Judas miiⁿ, 'áámá saⁿ'ā yeⁿ'ē ndu'u ndiichúví discípulos. Ní néené 'yaaⁿ 'iiⁿ'yāⁿ ndaá yā ndúúcu Judas miiⁿ ndúúcu machetes 'uūví lados 'caāiⁿ ndúúcu yáⁿ'á. Chiiduú n'gēeté ndúúcu 'iiⁿ'yāⁿ ndiicúú s'eeⁿ chí ngaⁿ'a ntiinnyuⁿ yeⁿ'e yaācū dichó'o yā 'iiⁿ'yāⁿ s'eeⁿ. ⁴⁸ Judas miiⁿ chí nca'a sá Jesús 'iiⁿ'yāⁿ s'eeⁿ, ca'a sa 'áámá seña ní 'túúca caⁿ'a sa: 'Iiⁿ'yāⁿ chí 'úú chí'neeⁿ cheendí, 'iiⁿ'yāⁿ miiⁿ chí 'iiⁿ'yāⁿ chí cuta'a nī chí preso yā.

⁴⁹ Tuu'mi ní Judas miiⁿ ní ndaa sa nanááⁿ Jesús miiⁿ ní caⁿ'a sa: Tavacho'onoó nī, n'dií Maestro. Ní 'neeⁿ cheendi sá Jesús. ⁵⁰ Jesús miiⁿ ní caⁿ'a yā chí yā Judas: Díí, amigo yeⁿ'é, ¿de'ē cáávā chí cuchii dí? Tuu'mi ní 'iiⁿ'yāⁿ s'eeⁿ ní ndaa yā nanááⁿ Jesús miiⁿ ní stá yā Jesús ní candée yā 'iiⁿ'yāⁿ preso.

⁵¹ Naati 'áámá saⁿ'ā chí canéé sá ndúúcu Jesús miiⁿ ní tun'dáa sa machete 'uūví lados 'caāiⁿ ná cheētí vaacu ní 'nuūcá'ai sa 'áámá mozo yeⁿ'ē chiiduú ch'ēeté ca ní ch'iica sa veēⁿ mozo miiⁿ. ⁵² Tuu'mi ní Jesús caⁿ'a yā chí yā saⁿ'ā: 'Nuūⁿ di machete 'uūví lados 'caāiⁿ yeⁿ'ē di vaacu. Nducyaaca 'iiⁿ'yāⁿ chí ita'á yā machete 'uūví lados 'caāiⁿ ní ndúúcu machete 'uūví lados 'caāiⁿ 'cuūví. ⁵³ ¿'Áá nguéé déénú dí chí 'úú cuuví caaⁿ'maⁿnguā'á ní caacá Chiidá ní miⁿníⁿnyúⁿ miⁿniiⁿnyuⁿ cho'ó yā nanááⁿ 'úú taanduu ngo'oó ndiichúví taāⁿ ángeles ní chiidá cuuvi díⁿ yā? ⁵⁴ Naati maaⁿ ní nduuti chí díⁿ chuu ¿táácā cuuvi cúúnú ca'a naachi canéé nguūⁿ na libro yeⁿ'é Ndyuūs, chí canéé chí cuuvi 'tíicā?

⁵⁵ Hora miiⁿ Jesús caⁿ'a yā chí yā 'iiⁿ'yāⁿ s'eeⁿ: ¿De'ē cúúví chí can'daa nī ndúúcu machetes 'uūví lados 'caāiⁿ ndúúcu yáⁿ'á s'eeⁿ tan'dúúca chí 'úú 'iiⁿ'yāⁿ chí duucu 'úú chí stá nī 'úú? Nguuvi nguuvi ch'iindí ndúúcu ndís'tií na yaācū templo ní ngi'cueeⁿ ndís'tií ní nguéé stá nī 'úú. ⁵⁶ Tanducueⁿ'ē chuū cuuví ní cúúnú ca'a yeⁿ'ē chí canéé nguūⁿ na libro yeⁿ'é Ndyuūs cáávā profetas ndii cuááⁿ vmnaaⁿ. Tuu'mi ní nducyaaca discípulos s'neeⁿ yā Jesús miiⁿ ní chéenu yā.

Jesús nanáán 'iiⁿntyéⁿē yeⁿe yaācū templo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ 'Iiⁿ'yāⁿ chi sta'á yā Jesús miiⁿ candēe yā 'iiⁿ'yāⁿ miiⁿ nanáán chiiduú ch'ēetē ca chí nguuvi Caifás. Míⁿ nduuvíⁿndáámá maestros yeⁿe ley ndúúⁿcū 'iiⁿ'yāⁿ ndiicúⁿ s'eeⁿ chí ngaⁿ'a ntiⁿ'nyúⁿ yā yeⁿe yaācū. ⁵⁸ Pedro miiⁿ cueⁿ'e ntúⁿ sa ní n'dáa yaⁿ'ai sa cuaaⁿ dáámí Jesús ndíⁿ chuva'āi yeⁿ'ē va'ai ch'ēete yeⁿ'ē chiiduú ch'ēete cá. Ní ndaa sa na patio ní ch'iindí sa ndúúⁿcū policías chí díⁿ yā cuidado yeⁿe va'āi miiⁿ. Pedro neⁿ'e sa snaaⁿ sa táacā chí díⁿ yā ndúúⁿcū Jesús miiⁿ.

⁵⁹ Chiiduú n'gēetē ndúúⁿcū 'iiⁿ'yāⁿ ndiicúⁿ s'eeⁿ chí ngaⁿ'a ntiⁿ'nyuⁿ yā yeⁿe yaācū ndúúⁿcū nducyaaca 'iiⁿ'yāⁿ chí ngaⁿ'a ntiⁿ'nyuⁿ yā in'nuúⁿ yā 'áámá testigo chí nguéé ngaⁿ'a cuaacu yeⁿ'ē Jesús miiⁿ. Ní 'íicú cuuvi nca'a yā Jesús miiⁿ chí 'cuuvi yā. ⁶⁰ Nguéé ndaaca yā mar 'áámá naaⁿ taacā chí 'caaⁿ'nuⁿ yā Jesús miiⁿ. 'Áará chí neenē 'yaaⁿ 'iiⁿ'yāⁿ caⁿ'a yā nduudu yaadi yeⁿe Jesús miiⁿ. Cuayiivi miiⁿ ní ndaa ntúⁿ tanaaⁿ 'uūⁿvī testigos chí ngaⁿ'a yā nduudu yaadi. ⁶¹ Testigos ní caⁿ'a yā: Sáⁿ'a 'cūⁿ ní caⁿ'a sa: 'Úú ní cuuvi díⁿ chuū. Natuūⁿvī yāacū templo 'cūⁿ chí yeⁿ'ē Ndyuūs naati cheetī 'iīnū nguuvi nadan'daí.

⁶² Chiiduú ch'ēete cá miiⁿ ní ncueeⁿ yā ní caⁿ'a yā chí yā Jesús: ¿'Áá nguéé nan'guēcútaⁿ'a nī mar 'áámá nduudu yeⁿe de'ē chí ngaⁿ'a 'íís'tiī yeⁿe nī?

⁶³ Naati Jesús nguéé de'ē veē caⁿ'a yā. Tuu'mi ní chiiduú ch'ēete cá miiⁿ caⁿ'a yā: 'Úú ní n'gaí, “por Ndyuūs chí canduuchi”. Cuuvi nī nús'uu ndúúⁿti chí n'diī chí Cristo, Daiya Ndyuūs chí cánduuchi.

⁶⁴ Jesús miiⁿ ní caⁿ'a yā chí yā chíiduú ch'ēete cá miiⁿ: 'Úú tan'dúúⁿcā chí n'diī ngaⁿ'a nī. Ngaⁿ'á ca ngiī ndís'tiī, chí ndii maaⁿ snaaⁿ nī Saⁿ'á chí Daiya Ndyuūs 'cuūⁿdi sa lado yeⁿe honor yeⁿ'ē Ndyuūs chí véé tanducuéⁿ'ē poder yeⁿ'ē yā ní ndaa sa na meēeⁿ yeⁿ'ē nanguuvi.

⁶⁵ Tuu'mi ní chiiduú ch'ēete cá miiⁿ chíín'cuúⁿ yā catecai yā ní caⁿ'a yā: Sáⁿ'a 'cūⁿ ní ngaⁿ'ā sa contra yeⁿ'ē Ndyuūs. ¿De'ē ca díⁿ yú testigos chí in'nuuⁿ yú? Cuin'díⁿchí nī. Maaⁿ ní ndís'tiī ní n'giindiveeⁿ nī táacā ngaⁿ'a sa contra yeⁿ'ē Ndyuūs. ⁶⁶ ¿De'ē nadacádíⁿnuuⁿ ndís'tiī? 'Iiⁿ'yāⁿ s'eeⁿ ní nan'guēcútaⁿ'a yā ní caⁿ'a yā: Véé nuuⁿndi yeⁿ'e sa chí canéé chí 'cuūⁿvī sa.

⁶⁷ Tuu'mi ní ca'a nee daiⁿ yā naaⁿ Jesús miiⁿ ní ch'eⁿ'é yā Jesús. Ní n'gaadi yā nduutináaⁿ sa ndúúⁿcū tiinūⁿ. Ní tanáⁿ'a yā ch'eⁿ'é yā 'iiⁿ'yāⁿ ndúúⁿcū ta'á yā. ⁶⁸ 'Iiⁿ'yāⁿ s'eeⁿ ní caⁿ'a yā: N'dii chí Cristo, cuuví nī nús'uu, ¿du'ū chí ch'eⁿ'é n'diī?

Pedro miiⁿ ní ngaⁿ'a sa chí nguéé n'diichi sa Jesús miiⁿ

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro miiⁿ ní veē sa na patio yeⁿe va'āi ch'ēete chíiduú ch'ēete cá ní ndaa niiⁿnuúⁿ 'áámá táⁿ'ā chí canéé caadi 'iīyū. Ní táⁿ'ā miiⁿ ní caⁿ'ā tá chí tá Pedro miiⁿ: Diī ntúⁿ nī canee di ndúúⁿcū Jesús yeⁿe yáⁿ'āa Galilea.

⁷⁰ Naati Pedro miiⁿ ní chéēⁿdiītu sa nanáán 'iiⁿ'yāⁿ s'eeⁿ ní caⁿ'a sa: Nguēe deenú chí ngaⁿ'ā di.

⁷¹ Ní taachí ndaā Pedro miiⁿ cheendi va'āi yeⁿe patio miiⁿ, táámá táⁿ'ā chí canéé caadi 'iīyū n'diichi ntuūⁿ tá saⁿ'ā miiⁿ ní caⁿ'a tá chí tá 'iiⁿ'yāⁿ chí snéé miiⁿ: 'Tiicá ntúⁿ sáⁿ'a 'cūⁿ ní canee sa ndúúⁿcū Jesús yeⁿe yáⁿ Nazaret.

⁷² Pedro miiⁿ ní cheeⁿdiītu ntúⁿ sa, ndíⁿ túⁿúⁿ 'caī sa, “por Ndyuūs”. Ní caⁿ'a sa: 'Úú ní nguéé in'diichi sáⁿ'a 'cūⁿ.

⁷³ Cuayiivi 'tēe 'tée ní 'iiⁿ'yāⁿ chí snéé yā cuaaⁿ na niiⁿnuúⁿ miiⁿ ndaa yā nanáán Pedro miiⁿ. Ní caⁿ'a yā chí yā Pedro: Cuaacu níⁿ'nyúⁿ diī ntúⁿ ní cachiica dí ndúúⁿcū 'iiⁿ'yāⁿ s'eeⁿ ti tan'dúúⁿcā chí ngaⁿ'a di ní n'gíⁿ'i di yeⁿ'e di chí dii ní nguaaⁿ 'iiⁿ'yāⁿ s'eeⁿ.

⁷⁴ Tuu'mi ní Pedro miiⁿ ní tucá'a sa caⁿ'a taaⁿ sa, ní 'caī sa, “por Ndyuūs”, ní caⁿ'a sa chí sa 'iiⁿ'yāⁿ miiⁿ: Nguéé in'diichi sáⁿ'a 'cūⁿ. Tuu'mi nūⁿ 'caī tusáⁿ'ā. ⁷⁵ Tuu'mi nūⁿ ní Pedro miiⁿ ní n'gaacū sa nduudu yeⁿ'é Jesús taachí caⁿ'a yā 'túúⁿcā: Taachi 'āa cuéé 'cuaī

tusá'nā, 'āā cheeⁿdiitū di 'iīnū cuuvi chi nguée' n'diichi di 'úú. Ní Pedro miiⁿ ní can'daa sa na lugar 'cūū ní chēecu taaví sa ti ya'ai staava yeⁿe sa.

27

Jesús nanááⁿ Pilato

(Mr. 15.1; Lc. 23.1-2; Jn. 18.28-32)

¹ Taachí 'āā chīdēve, nducyáácá chiiduú n'gēete ndúúcū 'iiⁿyāⁿ ndiicūú chí ngaⁿ'a ntiiⁿnyuⁿ yeⁿe yaācū nduuvidaamá yā chí ndeé yā taācā díⁿ yā ndúúcū Jesús miiⁿ ní nca'a yā 'iiⁿyāⁿ chí 'cuūvi yā. ² Ní n'dēéchiichí yā Jesús miiⁿ ní candée yā ní nca'a yā Jesús miiⁿ Poncio Pilato, 'iiⁿyāⁿ gobernador.

Judas miiⁿ ch'iī sa

³ Tuu'mi ní Judas miiⁿ, saⁿ'a chí nca'a Jesús miiⁿ, taachí n'diichī sa chí Jesús miiⁿ chí yā condenado chí 'cuūvi yā, ndaacadaamí sá yeⁿe nuuⁿndi chí díⁿ sa. Ní cheⁿe sa nanááⁿ chiiduú n'gēetē ndúúcū 'iiⁿyāⁿ ndiicūú chí ngaⁿ'a ntiiⁿnyuⁿ yeⁿe yaācū ní nca'a sa ndu'ū ndiicu ndííhí caadi 'diiⁿnguēε 'iiⁿyāⁿ s'eeⁿ. ⁴ Ní caⁿ'a sa chí sa 'iiⁿyāⁿ s'eeⁿ: 'Úú ní díⁿ 'áámá nuuⁿndi. Ncā'á 'áámá 'iiⁿyāⁿ chí nguée' nuuⁿndi yeⁿe yā. 'Iiⁿyāⁿ s'eeⁿ caⁿ'a yā: ¿Dé'ē ínneeⁿ nús'uū chíiⁿ? Chuū chí maaⁿ di can'díícu di.

⁵ Tuu'mi ní Judas chingée sa tuūmī miiⁿ chēeti yaācū ní cunaⁿ'a sa. Ní dicuái yaacu sa maaⁿ sa. Ní Judas ní ch'iī sa.

⁶ Chiiduú n'gēetē n'guáaⁿ yā tuūmī ní caⁿ'a yā: Na ley miiⁿ ní ngaⁿ'ā chí nguée' 'cuūi yú túúmi 'cūū na caja yeⁿe ofrendas yeⁿe yaācū, ti túúmi 'cūū ní túumī yeⁿe yuūúⁿ yeⁿe 'aama 'iiⁿyāⁿ.

⁷ Ch'iinu chuū ní nduuvidaama yā chí cái yā 'áámá táán yáⁿ'āa ndúúcū tuūmī chí cuuvi panteón cáávā 'iiⁿyāⁿ chí snúúⁿ yúúní. Miiⁿya yaⁿ'āa chí nguuvi Alfarero chí neⁿ'e caaⁿ'maⁿ yáⁿ'āa yeⁿe chí 'iiⁿyāⁿ din'dái 'cuūtíí cueēe. ⁸ Chíⁿ chí yáⁿ'āa chí panteón cánée chí dúúhí ndíí máán, Yáⁿ'āa yeⁿe Yuūūⁿ. ⁹ Tíicā ní cuunúú ca'a chí profeta Jeremías caⁿ'a yā chuū ndii cuáán vmnaaⁿ taachí dinguúⁿ yā na libro yeⁿ'é Ndyuūs 'tíicā: Ní sta'á yā ndu'ū ndiicu ndííhí caadi 'diiⁿnguēε. Tuūmī miiⁿ ní saⁿ'ā s'eeⁿ canée yinu sa chí ca'a sa Judas cucáávā chí ch'iīⁿnūⁿ sa Cristo. ¹⁰ Ní ca'a yā tuūmī miiⁿ yeⁿe yáⁿ'āa chí nguuvi Alfarero, tan'dúúcā Señor yeⁿe yú caⁿ'a yā chí yā 'úú.

Pilato intínguuneeⁿ yā Jesús

(Mr. 15.2-5; Lc. 23.3-5; Jn. 18.33-38)

¹¹ Jesús chééndii yā nanááⁿ gobernador Pilato ní gobernador íntínguuneeⁿ yā 'iiⁿyāⁿ ní caⁿ'a yā chí yā 'iiⁿyāⁿ: ¿'Áá dí chí Rey yeⁿe 'iiⁿyāⁿ Israel chí judíos? Jesús caⁿ'a yā chí yā gobernador: N'diī ngaⁿ'a cuaacú nī ti 'tíicā.

¹² Chiiduú n'gēetē ndúúcū 'iiⁿyāⁿ ndiicūú chí ngaⁿ'a ntiiⁿnyúⁿ yā yeⁿe yaācū caⁿ'a yā chí véé nuuⁿndi yeⁿe Jesús naati Jesús miiⁿ ní nguée' nan'guēεcútaⁿ'a yā mar 'áámá nduudu. ¹³ Tuu'mi ní Pilato miiⁿ caⁿ'a yā chí yā Jesús: ¿'Áá nguée' n'giindiveeⁿ di tanducuéⁿ'e chí ngaⁿ'a yā yeⁿe di?

¹⁴ Naati Jesús miiⁿ nguée' nan'guēεcútaⁿ'a yā mar 'áámá nduudu. Tuu'mi ní gobernador miiⁿ cheⁿ'e yinu taavi yā yeⁿe Jesús ní nguée' déenu yā táácā nadacádíínuuⁿ yā yeⁿe.

Jesús canée chí 'cuūvi yā

(Mr. 15.6-20; Lc. 23.13-25; Jn. 18.38-19.16)

¹⁵ Maaⁿ ní nguúví 'viicu miiⁿ véé 'áámá costumbre chí gobernador miiⁿ canée chí ín'dééchí yā 'áámá saⁿ'ā chí canúúⁿ sa vácūú 'viicu yeⁿe pascua 'aama saⁿ'ā chí preso sa chí 'iiⁿyāⁿ Israel neⁿ'e yā. ¹⁶ Ní canúúⁿ 'aama saⁿ'ā vácūú chí nguuvi Barrabás. Nducyáácá 'iiⁿyāⁿ ní déenu yā táácā idiiⁿ Barrabás miiⁿ. ¹⁷ Ní taachi 'iiⁿyāⁿ yeⁿ'ē yáāⁿ Jerusalén miiⁿ nduuvidaamá yā, gobernador Pilato miiⁿ ní caⁿ'a yā chí yā 'iiⁿyāⁿ s'eeⁿ: ¿Du'ū neⁿ'e nī chí 'úú n'dēechí? ¿'Áá neⁿ'e nī Barrabás o Jesús chí nguuvi Cristo chí 'úú caⁿ'á libre 'iiⁿyāⁿ?

¹⁸ Pilato miiⁿ ní deenu yā chi cáávā vaadi ngueee 'iiⁿ'yāⁿ s'eeⁿ nca'a yā Jesús chi preso yā.

¹⁹ Taachí Pilato miiⁿ ní vee yā na silla yeⁿ'e juez miiⁿ, n'daataá yeⁿ'e yā ní dichó'o tá 'áamá 'iiⁿ'yāⁿ chi caⁿ'a yā chii yā Pilato miiⁿ nduudú 'cūū: Nguéé de'ē vee díⁿ nī ndúúcu saⁿ'ā n'dái 'cūū ti taachí cyaadú néené n'deēe ch'eenú chii taachí ch'iinú cáávā sáⁿ'a 'tīi.

²⁰ Naati chiiduú n'geete ndúúcu 'iiⁿ'yāⁿ ndiicúú chí ngaⁿ'a ntiiⁿ'nyúⁿ yā yeⁿ'e yaacū néené n'deēe caⁿ'a yā chii yā 'iiⁿ'yāⁿ yeⁿ'e yāā Jerusalén miiⁿ chi caaⁿ'maⁿ yā chi Pilato miiⁿ n'déechii yā Barrabás miiⁿ ní 'cuūvī Jesús miiⁿ. ²¹ Gobernador miiⁿ caⁿ'a yā chii yā 'iiⁿ'yāⁿ s'eeⁿ: ¿Naachí na 'uuvi yā ní chéé yā chi neⁿ'e nī chi n'deēchí? 'Iiⁿ'yāⁿ s'eeⁿ ní caⁿ'a yā: Barrabás.

²² Pilato miiⁿ ní caⁿ'a yā chii yā 'iiⁿ'yāⁿ s'eeⁿ: ¿De'ē díⁿ ndúúcu Jesús chi nguuvi yā Cristo? Nducyaaca yā nan'gueecútaⁿ'a yā ní 'cai yā: Cu'nééⁿ'nga'á yā.

²³ Gobernador miiⁿ caⁿ'a yā chii yā 'iiⁿ'yāⁿ s'eeⁿ: ¿De'ē nuuⁿ'ndi yeⁿ'e yā vee? Naati 'iiⁿ'yāⁿ s'eeⁿ ní n'gái yiicú yā ní caⁿ'a yā: Cu'nééⁿ'nga'á yā.

²⁴ Taachi Pilato miiⁿ n'diichí yā chi nguéé de'ē vee chí díⁿ yā ndúúcu 'iiⁿ'yāⁿ ti yuudu n'dái ca n'gai yā, tuu'mi ní sta'á yā nuuⁿ'nī ní naaⁿ'nu yā ta'a yā nanááⁿ nducyaaca 'iiⁿ'yāⁿ yeⁿ'e yāā Jerusalén miiⁿ. Ní ngaⁿ'a yā: Limpia canéé 'úú yeⁿ'ē asunto 'cūū. 'Úú ní nguéé nuuⁿ'ndi yeⁿ'é chí 'cuūvī sáⁿ'a 'cūū ti n'dai sa. Ndis'tīi deenu nī táácā diiⁿ nī ndúúcu sa.

²⁵ Nducyaaca 'iiⁿ'yāⁿ nan'gueecútaⁿ'a yā ní caⁿ'a yā: Yuuúⁿ yeⁿ'ē sáⁿ'a 'cūū 'āā cūnee dáámí rá 'nū ndúúcu daiya 'nū.

²⁶ Tuu'mi ní Pilato miiⁿ ní n'deēchii yā Barrabás miiⁿ ní caⁿ'a ntiiⁿ'nyuⁿ yā chí soldados ch'eⁿ'é yā Jesús. Ch'íínú ch'eⁿ'e yā ní nca'a Pilato miiⁿ Jesús miiⁿ 'iiⁿ'yāⁿ chí cu'neeⁿ'nga'á yā 'iiⁿ'yāⁿ.

²⁷ Tuu'mi ní soldados romanos yeⁿ'e gobernador can'déé sa Jesús na vaacuyáā yeⁿ'e gobernador ní nducyáácá soldados nduuvidaama sa nanááⁿ Jesús miiⁿ. ²⁸ Ní diví sa catecaí vmnaaⁿ Jesús ní s'nuuⁿ sa tīnūuⁿ morado cuá'āa Jesús miiⁿ. ²⁹ Ní s'nuuⁿ sa tiiⁿ Jesús 'áámá corona chí ndeenyú ndúúcu yaaⁿ. Ní sn'duuⁿ sa 'áámá taaⁿ ndúú ná ta'ā cuaacú Jesús. Tuu'mi ní chiintii'ya sa nanááⁿ Jesús miiⁿ ní ch'íínnyuⁿ'neeⁿ sa 'iiⁿ'yāⁿ. Ní caⁿ'a sa: Cūnduuchí nī n'diī Rey yeⁿ'e 'iiⁿ'yāⁿ yeⁿ'e Israel.

³⁰ Ní ca'a nee daiⁿ sa cuerpo yeⁿ'ē Jesús ní sta'a sa 'áámá tááⁿ ndúú chí ndee sa ní ch'eⁿ'e sa tiiⁿ Jesús. ³¹ Ch'íínú ch'íínnyuⁿ'neeⁿ sa Jesús miiⁿ ní ndiví sa tīnūuⁿ yā chí morado cuá'āa ní chí'nuuⁿ sa catecai yā. Ní candee sa Jesús chí cu'nééⁿ'nga'a sa 'iiⁿ'yāⁿ.

*S'nééⁿ'nga'á yā Jesús miiⁿ ní ch'īi yā
(Mr. 15.21-32; Lc. 23.26-43; Jn. 19.17-27)*

³² Taachí can'daa yā ní cueⁿ'e yā na yúúni naachi cu'nééⁿ'nga'á yā ndaaca yā 'áámá saⁿ'ā yeⁿ'e yāā Cirene chí nguuvi sa Simón. Ní a fuerza soldados di'cuiitu sa Simón 'cūú chí candee sa cruz yeⁿ'e Jesús.

³³ Ní taachi ndaá yā na táámá lado yeⁿ'e yāā Jerusalén lugar chí nguuvi Gólgota chí neⁿ'e caaⁿ'maⁿ, Lugar yeⁿ'ē 'Iini Nga'ai Tiiⁿ, ³⁴ saⁿ'ā ca'a sa Jesús vinagre ndístaⁿ'a ndúúcu nuuⁿ'nī yeⁿ'ē yáatā yaā cáávā chí nguee cueenu cá cuuvi Jesús chí chí'í Jesús miiⁿ. Taachí Jesús n'diichineeⁿ yā, nguéé 'cuuⁿ yā chí'í yā.

³⁵ Taachí 'āā s'neeⁿ'nga'a sa Jesús, soldados ní tun'dáa sa suertes na catecai Jesús miiⁿ chí ca'a sa 'áámá sa nduūcū taama sa. Ní 'iicu cúúnúú ca'a tan'dúúcā chí caⁿ'a profeta ndii cuááⁿ vmnaaⁿ ní canéé nguúⁿ na libro yeⁿ'é Ndyuūs 'túúca: Tun'daá yā suerte na catecai Jesús miiⁿ ní nca'á yā nguaaⁿ 'iiⁿ'yāⁿ s'eeⁿ. ³⁶ Miiⁿ ch'ēētēe soldados ní diiⁿ sa cuidado 'iiⁿ'yāⁿ chí s'nééⁿ'nga'a. ³⁷ Ni 'áámá nduudu naaⁿ tīⁿ cruz miiⁿ chí canéé nguūⁿ 'túúca: Jesús miiⁿ chí Rey yeⁿ'e 'iiⁿ'yāⁿ yeⁿ'e ndaata Israel. Ní nduudu miiⁿ ngaⁿ'ā de'ē cáávā chí ch'īi Jesús miiⁿ.

³⁸ Tuu'mi ní miiⁿ ntúūⁿ s'neeⁿ'nga'á yā ndúúcu Jesús miiⁿ 'uūvī chí duucu, 'áámá ní lado ta cuaacú yā, taama ní lado tá 'cuae yā. ³⁹ 'Iiⁿ'yāⁿ chí cho'ó yā naachi canee cruz miiⁿ ch'íínnyuⁿ'neeⁿ yā Jesús miiⁿ. Ní idiⁿ'nú'u yā tīⁿ yā. ⁴⁰ Ní caⁿ'a yā: N'diī chí ngaⁿ'á

nī chi maáⁿ nī cuuvi nada'tuūví nī yaācū templo ní cheētī 'iīnū nguuvī nadan'dái nī, nadinguáⁿāi maáⁿ nī maaⁿ. Ndúúti chi Daiya Dendyuūs n'diī, nch'éeⁿ nī yeⁿē na cruz.

⁴¹ Tiicá ntúūⁿ chiiduú n'gēete ndúúⁿcū 'iīⁿyāⁿ fariseos chí dingúuⁿ yā ní ngi'cueeⁿ ley, ndúúⁿcū 'iīⁿyāⁿ ndiicúú chí ngaⁿ'a ntiīⁿnyúⁿ yā yeⁿe yaācū templo ch'íⁿnyuⁿneeⁿ yā Jesús miiⁿ ní ngaⁿ'a yā yeⁿe yā: ⁴² Tanáⁿ'ā 'iīⁿyāⁿ ní nadinguáⁿ'ai yā naati nguéé cuuvi maaⁿ yā nguáⁿ'ai yā. Ndúúti chi 'iīⁿyāⁿ miiⁿ ní Rey yeⁿe 'iīⁿyāⁿ Israel maaⁿ ní nch'éeⁿ yā yeⁿe na cruz ní cu'téenu 'nū 'iīⁿyāⁿ miiⁿ. ⁴³ Jesús miiⁿ ní i'téenu yā Ndyuūs. Maaⁿ ní Ndyuūs nadinguáⁿ'ai yā 'iīⁿyāⁿ nduuti chí cuaacu chí 'cuaáⁿ yā 'iīⁿyāⁿ. 'iīⁿyāⁿ ngaⁿ'á yā 'tíicā tí Jesús ngaⁿ'a yā: 'Úú ní daiya Dendyuūs 'úú.

⁴⁴ Tiicá ntúūⁿ ch'íⁿnyuⁿneeⁿ chí duucu s'eeⁿ chí s'nééⁿnga'a sa dáámá ndúúⁿcū Jesús.

Jesús ch'í yā

(Mr. 15.33-41; Lc. 23.44-49; Jn. 19.28-30)

⁴⁵ Ndíí maⁿ'a nguuvī miiⁿ ndíí taanduū n'gēecu 'iīnu chíinū chíí maāiⁿ núúⁿmáⁿ iⁿ'yeeⁿdi. ⁴⁶ 'Āā tááanduū n'gēecu 'iīnu, Jesús 'caī yīicú yā: Elí, Elí, ¿lama sabactani? Nduudu hebreo 'cūú ní neⁿē caaⁿ'maⁿ Ndyuūs yeⁿ'é, Ndyuūs yeⁿ'é, ¿de'ē cuuvi chí s'neéⁿ nī 'úú damaáⁿ?

⁴⁷ N'duuvī 'iīⁿyāⁿ chí snée yā 'miiⁿ taachí ch'iīndiveéⁿ yā chí caⁿ'a Jesús miiⁿ ní caⁿ'a yā: Sáⁿ'a 'cūú n'gaī sa profeta Elías.

⁴⁸ Hora mííⁿ nūuⁿ 'áámá chéé 'iīⁿyāⁿ s'eeⁿ chéⁿe yā ngeenu yā sta'a yā 'áámá esponja ní di'caānda yā ndúúⁿcū vinagre ní s'neeⁿ yā esponja miiⁿ na 'áámá táán ndúú ní ca'a yā chí chí'i Jesús miiⁿ. ⁴⁹ Tanáⁿ'a yā ní ngaⁿ'a yā: 'Āā canee ra yā. N'diichi yú ¿'áá chíi Elías miiⁿ nadinguáⁿ'ai yā 'iīⁿyāⁿ?

⁵⁰ Naati Jesús miiⁿ 'caī ntúūⁿ yā taama vmnéⁿēe ní maaⁿ yā nca'a yā espíritu yeⁿe yā na ta'a Ndyuūs ní ch'íi yā. ⁵¹ Hora mííⁿ nūuⁿ chí ch'íi Jesús, cortina yeⁿe yaācū templo s'teeⁿ naavtáⁿ'ā ndii cuaaⁿ 'niiⁿnuúⁿ ndíí cuááⁿ ndiīyā. Ní n'nuⁿ'u yáⁿ'āa ní tuū ní índee. ⁵² Tuu'mi ní yáinyāⁿ s'eeⁿ ní nguaaⁿ ní nééⁿé 'yaaⁿ cuerpos yeⁿe 'iīⁿyāⁿ chí n'díí chí i'téenu yā Ndyuūs ndii cuááⁿ vmnaaⁿ nan'dáa yā cheeti yaīnyāⁿ s'eeⁿ. ⁵³ Ní 'iīⁿyāⁿ s'uuⁿ chí 'āā n'dii miiⁿ taachi 'āā nduuchi Jesús miiⁿ yeⁿē nguaaⁿ tináⁿ'ā 'iīⁿyāⁿ s'uuⁿ ní nan'daa yā cheeti yaīnyāⁿ s'eeⁿ ní cueⁿe yā cachiica yā na yāāⁿ Jerusalén chí Ndyuūs deēve yā. Ní 'yaaⁿ n'dái 'iīⁿyāⁿ chinaáⁿ yā 'iīⁿyāⁿ chí 'āā n'dii.

⁵⁴ Saⁿ'a capitán ndúúⁿcū soldados chí snée yā ndúúⁿcū yā ní dííⁿ yā cuidado yeⁿe cuerpo yeⁿe Jesús taachi s'neeⁿ yā na cruz. Soldados miiⁿ, taachi n'diichí yā chí n'nuⁿ'u yáⁿ'āa ndúúⁿcū dendu'ū chí chíi, neené di'va'á yā ní caⁿ'a yā: Cuaacu nííⁿnyúⁿ, sáⁿ'a 'cūú ní Daiya Dendyuūs saⁿ'ā.

⁵⁵ 'Yaaⁿ n'dái n'daataá snée yaⁿ'ai yā ní n'gíinu yā tanducuéⁿē chí chó'ōo yeⁿe Jesús. N'daataá s'eeⁿ cachiica yā ndúúⁿcū Jesús ndii na yáⁿ'āa yeⁿe Galilea ní dichíí'vε yā Jesús miiⁿ. ⁵⁶ Ní nguaaⁿ n'daataá s'eeⁿ, miiⁿ canéé ta María Magdalena ndúúⁿcū María chí cheecu Jacobo ndúúⁿcū José. Ní canéé ntúūⁿ tá cheecuú da'cáiyā yeⁿe sáⁿ'ā Zebedeo.

Ch'íichí yā cuerpo yeⁿe Jesús cheeti yáinyāⁿ

(Mr. 15.42-47; Lc. 23.50-56; Jn. 19.38-42)

⁵⁷ Taachí chíinu nguuvī miiⁿ ndaā 'áámá saⁿ'ā chí nguuvī José chí yeⁿē yāāⁿ Arimatea. Saⁿ'ā miiⁿ ní 'cuiica sa ní discípulo yeⁿe Jesús. ⁵⁸ Sáⁿ'a 'cūú ní cheⁿe sa nanááⁿ Pilato miiⁿ ní chíica sa cuerpo yeⁿe Jesús miiⁿ. Tuu'mi ní Pilato caⁿ'a ntiīⁿnyúⁿ yā chí caⁿ'a capitán yeⁿe soldados chí ca'á yā cuerpo yeⁿe Jesús miiⁿ José miiⁿ. ⁵⁹ Tuu'mi ní José sta'ā sa cuerpo yeⁿe Jesús ní ch'ēēcū sa 'áámá sávana deēve tan'dúúⁿcā chí costumbre yeⁿe 'iīⁿyāⁿ s'eeⁿ. ⁶⁰ Ní s'nuūⁿ sa cuerpo yeⁿe Jesús na 'áámá yáinyāⁿ yeⁿe maaⁿ sa chí ngai chí maaⁿ sa nííⁿnuⁿ sa na 'aama yaava. Ch'íínú ch'íichi sa cuerpo yeⁿe Jesús, s'neeⁿ sa 'áámá tuū chí nééⁿé ch'ēete naachí níndaa yā yeⁿe cheendi yaīnyāⁿ miiⁿ. Ní cunáⁿ'a sa. ⁶¹ Mííⁿ véé María Magdalena ndúúⁿcū táámá María nííⁿnuúⁿ ná yáinyāⁿ.

Soldados ní idííⁿ yā cuidado yáinyāⁿ miiⁿ

⁶² Chó'ōo nguuvi chi in'nuún yā yeⁿe 'viicu yeⁿe pascua ní chidεεve táamá nguuvi chi sábadó ní chiiduú n'gεεté ndúúcu 'iiⁿyāⁿ fariseos ní nduuvidaamá yā ní cheⁿe yā nanáán Pilato miiⁿ. ⁶³ Ní caⁿ'a yā chii yā Pilato: N'dii Pilato, n'gaacú 'nū chí saⁿ'ā chi n'dii chí chinnche'ei sa taachí canee sa iⁿ'yeeⁿdí 'cūū ní caⁿ'a sa 'túúca: 'Cuínū 'iinu nguuvi ní nduúchí nguaaⁿ tináⁿ'ā. ⁶⁴ Maaⁿ ní dichó'o nī soldados chí diiⁿ yā cuidado yáinyāⁿ miiⁿ ndíí 'cuiinu 'iinu nguuvi. ¿'Áátī ndaá discípulos yeⁿe yā n'gaaⁿ ní diiⁿ iduucú yā cuerpo yeⁿe Jesús? Ní caaⁿ'maⁿ yā cuuvi yā 'iiⁿyāⁿ chí sáⁿ'ā miiⁿ ní nanduuchi sá yeⁿe nguaaⁿ tináⁿ'ā. Ní cunncā ca nduudu yaadi miiⁿ nguée ti chí 'āā chó'ōo.

⁶⁵ Pilato miiⁿ ní caⁿ'a yā chii yā 'iiⁿyāⁿ s'eeⁿ: 'Ingaā 'áamá taaⁿ soldados. Cueⁿe nī ní diiⁿ nī cuidado yáinyāⁿ miiⁿ tan'dúúca chí déenu nī chí n'daācā.

⁶⁶ Tuu'mi ní 'iiⁿyāⁿ s'eeⁿ ní cheⁿe yā yáinyāⁿ miiⁿ ní diiⁿ yā cuidado yáinyāⁿ miiⁿ. S'neeⁿ yā 'áamá sello na tuū ch'εεté ní s'neeⁿ yā soldados chí diiⁿ sa cuidado yáinyāⁿ miiⁿ.

28

Jesús nduuchi yā yeⁿe nguaaⁿ tináⁿ'ā

(Mr. 16.1-8; Lc. 24.1-12; Jn. 20.1-10)

¹ Chó'ōo nguuvi sábadó chí ntaavi'tuunúúⁿ yā ní chidεεve táamá nguuvi chí domingo, nguuvi chí ngaⁿ'a yú chí nguuvi vmnáán vmnaaⁿ yeⁿe ndεεtē, ní tá María Magdalena ndúúcu taama tá María cheⁿe ta n'diichí tá na yaínyāⁿ yeⁿe Jesús. ² Ní néené díítū nuⁿ'u yáⁿ'āa ti 'aama ángel yeⁿe Señor Ndyuūs chiya yā yeⁿe va'ai cheeti nguuvi. Ní taachi ndaa yā, diví yā tuū ch'εεte miiⁿ yeⁿe cheendi yaínyāⁿ ní ch'iindi yā vmnaaⁿ yeⁿe tuú miiⁿ. ³ Angel miiⁿ tan'dúúca chí ináán 'cuai 'tíca máaⁿ yā chí dεεve yā. Ní catecai yā ní cuéé tan'duucā yaāⁿ. ⁴ Soldados chí idiiⁿ yā cuidado yáinyāⁿ miiⁿ in'dúúví yā chí 'va'a yā. Ní nduuví yā tan'dúúca chí ch'ii yā. ⁵ Naati ángel miiⁿ caⁿ'a yā chii yā n'daataá s'eeⁿ: Nguée 'va'a ndís'ti; ti 'úú ní deenú ti in'nuún nī Jesús chí cā'neeⁿngaⁿ'ā. ⁶ 'Áā ntéé 'iiⁿyāⁿ miiⁿ ti nduuchi yā yeⁿe nguaaⁿ tináⁿ'ā tan'dúúca chí caⁿ'a yā. Cuchí nī ní n'diichí nī naachí cānuuⁿ cuerpo yeⁿe Señor miiⁿ. ⁷ Cuayiivi ní ngaⁿ'a ángel chí yā n'daataá s'eeⁿ: Cuinaⁿ'a núuⁿ nī maāⁿncheētē ní caaⁿ'máⁿ nī cuuvi nī discípulos yeⁿe yā chí nduuchi Jesús miiⁿ yeⁿe nguaaⁿ tináⁿ'ā. Cuin'diichí nī. Jesús miiⁿ caⁿ'a yā vmnáán ndís'ti na yáⁿ'āa Galilea. Mííⁿ snaaⁿ nī 'iiⁿyāⁿ. Chūú chí ngaⁿ'á ngii ndís'ti.

⁸ Tuu'mi ní n'daata s'éeⁿ nan'dáa yā cheeti yáinyāⁿ miiⁿ ní dii'yá yā chí ní duuvi yeenú yā. N'daata s'éeⁿ ní cueⁿe yā ngéenu yā ní caⁿ'a yā chí yā discípulos yeⁿe Jesús tan'dúúca chí n'diichí yā. ⁹ Tuu'mi ní taachi cueⁿe yā chí yaa'ví yā discípulos cuin'diichí nī, Jesús miiⁿ ndaá yā chí ndaacá yā n'daata s'eeⁿ ní caⁿ'a yā: Tavacho'onoó nī ndís'ti n'daata s'eeⁿ. Ní n'daata s'eeⁿ ní ndáá nīⁿnúⁿ yā Jesús miiⁿ ní túmaⁿ'a yā ca'a Jesús miiⁿ ní s'téenu yā 'iiⁿyāⁿ. ¹⁰ Tuu'mi ní Jesús caⁿ'a yā chí yā n'daataá s'éeⁿ: Nguée 'va'a nī. Cuéⁿe nī cuuví nī hermanos yeⁿe chí n'diichí nī 'úú. Ní hermanos caⁿ'a yā na yáⁿ'āa Galilea ní miiⁿ snaán yā 'úú.

Soldados ngaⁿ'a yā ngii yā chiiduú n'gεεte s'eeⁿ tan'dúúca chí chí

¹¹ Nchó'ōo n'daata s'uuⁿ cunaⁿ'á yā ní n'duuvi soldados chí dííⁿ yā cuidado yeⁿe yáinyāⁿ cheⁿ'é yā na yáⁿ Jerusalén ní caⁿ'a yā chí yā chiiduú n'gεεte yeⁿe tánducueⁿ'ē chí chí. ¹² Chiiduú n'gεεte nadidaamá yā ndúúcu 'iiⁿyāⁿ ndícuú chí ngaⁿ'a ntiinyuⁿ yeⁿe yaācū. Ní nduuvidaamá yā ní néené n'deēe túmī ca'a yā soldados. ¹³ Ní caⁿ'a yā chí yā soldados: Ndís'ti ní 'túúca caaⁿ'maⁿ nī: Taachi yaaⁿ stiyaadú 'nū discípulos yeⁿe Jesús ndaá yā ní diduucú yā cuerpo yeⁿe Jesús. ¹⁴ Ní nduuti chí gobernador 'caandíveéⁿ yā chíⁿ chí ndís'ti caaⁿ'maⁿ nī, nús'uu yaa'vi neeⁿ 'nū 'iiⁿyāⁿ ní nguaⁿ'āi ndís'ti.

¹⁵ Soldados ní sta'á yā tuūmī miiⁿ ní dííⁿ yā tan'dúúca chí chiiduú n'gεεte caⁿ'á yā chí yā soldados. Chííⁿ chí ndii maaⁿ ní 'iiⁿyāⁿ yeⁿe ndaataá Israel ngaⁿ'á yā 'tíca.

Jesús idichó'o yā discípulos yeⁿe yā

(Mr. 16.14-18; Lc. 24.36-49; Jn. 20.19-23)

¹⁶ Ndu'ū ndiicháámá discípuos cueⁿ'é yā na yáⁿ'āa Galilea ní ndaá yā ná yīcū naachí Jesús miiⁿ dichó'o yā 'iiⁿ'yāⁿ s'eeⁿ. ¹⁷ Taachí discípuos n'diichí yā Jesús miiⁿ, s'téenu yā 'iiⁿ'yāⁿ 'áará chí náⁿ'a yā ní 'uūvī vaanicádiinūⁿ yeⁿ'e yā. ¹⁸ Jesús ní ndaa niiⁿ'núⁿ yā ní yaa'vi yā discípuos ní caⁿ'a yā: Chiidá ní tee yā 'úú nducuéⁿ'e poder chí caaⁿ'maⁿ ntiiⁿ'nyúⁿ na va'āi cheeti nguuvi ndúúcū na iⁿ'yeeⁿ'dí 'cūū. ¹⁹ Maaⁿ ní cueⁿ'e nī ni ca'cueéⁿ nī nuuⁿ'maⁿ naciones, ní cuuvi nī discípuos yeⁿ'é. 'Iiⁿ'yāⁿ chí i'téenu yā nduudu cuaacu yeⁿ'é, ndís'tiī cuēdínūⁿ'niⁿ nī 'iiⁿ'yāⁿ miiⁿ ndúúcū chí duuchi Ndyuūs Chiida yú, ndúúcū Daiya yā, ndúúcū Espíritu N'dai yeⁿ'é Ndyuūs. ²⁰ Cá'cueeⁿ nī 'iiⁿ'yāⁿ s'eeⁿ chí díⁿ yā tanducuéⁿ'ē dendu'ū chí 'úú ngaⁿ'á ngí ndís'tiī. Ní cadínuuⁿ nī chí 'úú ní caneé ndúúcū ndís'tiī nducuéⁿ'ē tiempo ndí ntuuví iⁿ'yeeⁿ'dí. 'Tíicā cuuvi.

NDUUDU N'DÁÍ CHÍ DÍNGÚŪⁿ APOSTÓL MARCOS

Yeⁿe chi ngaⁿ'a Juan chi ngeedínuūⁿniⁿ

(Mt. 3.1-12; Lc. 3.1-9, 15-17; Jn. 1.19-28)

¹ 'Túúcā chí ngaⁿ'a nduudu ngai yeⁿe Jesucristo chí Daiya Dendyuūs.

² 'Iiⁿ'yāⁿ profeta Isaías miiⁿ chí ngaⁿ'a nduudu yeⁿ'é Ndyuūs ndíí cuááⁿ vmnaaⁿ dinguūⁿ yā tan'dúúcā chí caⁿ'a Ndyuūs, 'tíícā:

'Úú dicho'ó 'aama 'iiⁿ'yāⁿ chi caaⁿ'máⁿ yā nduudu yeⁿ'é nanááⁿ ndís'tií.

³ 'Iiⁿ'yāⁿ miiⁿ ní caⁿ'a yā ndúúúú ngai na yáⁿ'āa cuūⁿ'máⁿ naachi nguéé ch'εetinéé 'iiⁿ'yāⁿ. Ní caⁿ'a yā: Cuundiyaáⁿ nī yúúúni yeⁿ'e Señor Ndyuūs caati cuchii yā. Nan'guáaⁿ nī yúúúni cuaacu caavá yā Dideevé nī staava yeⁿ'é nī ní cuuvi 'cuaáⁿ nī 'iiⁿ'yāⁿ miiⁿ taachi ndaa yā.

⁴ 'Tíícā Juan miiⁿ ní cheedínuūⁿnīⁿ sa 'iiⁿ'yāⁿ s'eeⁿ na yáⁿ'āa cuūⁿ'máⁿ naachi nguéé ch'εetinéé 'iiⁿ'yāⁿ. Ní caⁿ'a cuáácú sá chí 'iiⁿ'yāⁿ ndaacadáámí yā yeⁿ'é nuuⁿndi yeⁿ'é yā ní cueedínúúⁿnīⁿ sa 'iiⁿ'yāⁿ chí n'giindiveéⁿ yā nduudu yeⁿ'e sa, naati Ndyuūs nadich'εecú yā nuuⁿndi yeⁿ'é yā. ⁵ Ní n'deee 'iiⁿ'yāⁿ yeⁿ'e yáⁿ'āa Judea ndúúúú 'iiⁿ'yāⁿ yeⁿ'e yáāⁿ Jerusalén can'dáa yā chí 'caandiveéⁿ yā chí ngaⁿ'a Juan miiⁿ. Ní taachi 'iiⁿ'yāⁿ s'eeⁿ caⁿ'a yā nuuⁿndi yeⁿ'é yā nanááⁿ Ndyuūs níícú Juan miiⁿ ní cheedínuūⁿnīⁿ sa 'iiⁿ'yāⁿ miiⁿ na yíícú Jordán.

⁶ Catecai Juan miiⁿ ní nín'dai ndúúúú yuūdū yeⁿ'e 'iiti camello. Ní cinturón yeⁿ'é sa ní dííⁿ'máⁿ 'iiti. Ní chí che'ē sa ní 'iiti langostas ndúúúú n'di'i yeⁿ'é 'iiti 'yáaiⁿ chí véé cuεeti. ⁷ Juan miiⁿ ngaⁿ'a sa nduudu cuaacu yeⁿ'é Ndyuūs. Ní caⁿ'a sa: Cuayiivi yeⁿ'e 'úú cuchii 'áámá 'iiⁿ'yāⁿ chí ch'εete taavi cá poder yeⁿ'é yā nguéé ti 'úú. 'Úú ní nguéé neené n'dai 'úú chí cuuvi dííⁿ n'daatií yííⁿ'máⁿ yeⁿ'é ndaacuú yeⁿ'e yā. ⁸ 'Úú ní ngeedínuūⁿnīⁿ ndís'tií ndúúúú nuūⁿnīⁿ naati 'iiⁿ'yāⁿ miiⁿ ní cueedínuūⁿnīⁿ yā ndúúúú Espíritu N'dai yeⁿ'é Ndyuūs.

Juan miiⁿ cheedínuūⁿnīⁿ sa Jesús

(Mt. 3.13-17; Lc. 3.21-22)

⁹ Nguuvi s'eeⁿ Jesús miiⁿ chíicá yā yeⁿ'e yáāⁿ Nazaret yeⁿ'e yáⁿ'āa Galilea ní ndaa yā na yíícú Jordán. Ní Juan miiⁿ ní cheedínuūⁿnīⁿ sa Jesús miiⁿ na yíícú Jordán. ¹⁰ Taachi Jesús can'daa yā na nuūⁿnīⁿ miiⁿ, cuin'diichí nī. N'diichí yā chí nanguaaⁿ nanguuvi ní Espíritu N'dai yeⁿ'é Ndyuūs ní cuch'éeⁿ vmnaaⁿ yeⁿ'é yā tan'dúúcā 'áámá paloma 'tíícā. ¹¹ Ch'iindiveéⁿ Jesús 'áámá nduudu chí chíicā yeⁿ'é nánguuvi chí caⁿ'a: Díí Daiyá chí neⁿ'e taavi ní yeenú taavi cáávā dii.

Yááⁿ'nguiinūⁿ neⁿ'e sa n'diichineeⁿ sa Jesús

(Mt. 4.1-11; Lc. 4.1-13)

¹² Cuayiivi miiⁿ ní Espíritu N'dai yeⁿ'é Ndyuūs candéē Jesús na 'áámá yáⁿ'āa cuūⁿ'máⁿ naachi nguéé ch'εetinéé 'iiⁿ'yāⁿ. ¹³ Jesús miiⁿ ní canéé yā miiⁿ 'uuvi ngeecu nguuvi naachi véé 'iiti chí taaⁿ. Ní yááⁿ'nguiinūⁿ miiⁿ ní n'diichineeⁿ sa Jesús chí dííⁿ yā nuuⁿndi naati nguéé dinuuⁿndí yā. Níícú ángeles ndaa yā ní dííⁿ yā cuidado Jesús miiⁿ.

Jesús tucá'a yā ntiiⁿnyuⁿ yeⁿ'é yā na yáⁿ'āa Galilea

(Mt. 4.12-17; Lc. 4.14-15)

¹⁴ Cuayiivi taachi s'nuún yā Juan chí cheedínuūⁿnīⁿ 'iiⁿ'yāⁿ vácūū, Jesús miiⁿ ndāa yā na yáⁿ'āa Galilea, ní caⁿ'a yā nduudu cuaacu chí ngai yeⁿ'e naachi Ndyuūs ngaⁿ'a ntiiⁿnyuⁿ yā. ¹⁵ Jesús miiⁿ ní caⁿ'a yā: 'Āā snuū ca'a tiempo naachí ngaⁿ'a ntiiⁿnyuⁿ Ndyuūs ní 'āā ndāa niiⁿnuún. Nandaacadaamí nī yeⁿ'é nuuⁿndi yeⁿ'é nī ní cu'teenú nī nduudu cuaacu chí ngai chí yeⁿ'e Cristo.

Jesús yaa'ví yā cuūúⁿ saⁿā chí itungááⁿ 'yaācā
(Mt. 4.18-22; Lc. 5.1-11)

¹⁶ Jesús miiⁿ ní cachiicá yā cuaaⁿ 'diituú nuūⁿnīⁿyáⁿā chí nguuvi Galilea, taachí n'diichí yā Simón ndúú^{cū} 'dí^{nū} sa Andrés. Sáⁿā s'eeⁿ ní saⁿā chí itungááⁿ 'yaācā, ní ngī sa yaānā yeⁿē sa cheeti nuūⁿnīⁿyáⁿā ti saⁿā s'eeⁿ itungááⁿ sa 'yaācā na nuūⁿnīⁿyáⁿā.
¹⁷ Ní Jesús ngaⁿ'a yā ngii yā saⁿā s'eeⁿ: Cuchí nī, caⁿ'á nī nduū^{cú} ní 'úú ní díⁿ chí in'nuúⁿ nī 'iiⁿ'yāⁿ chí cuuvi caⁿ'á yā nduucú. Ní tan'dúú^{cā} chí ndís'tii tungááⁿ nī 'yaācā yeⁿe nuūⁿnīⁿyáⁿā 'tíicā ngaⁿ'a nī ndúú^{cū} 'iiⁿ'yāⁿ chí caⁿ'á yā nduucú.

¹⁸ Hora míⁿ nūⁿ saⁿ'a s'uuⁿ s'neeⁿ sa yaānā yeⁿē sa ni cueⁿe sa ndúú^{cū} Jesús.

¹⁹ Tuu'mi Jesús miiⁿ ní cueⁿ'é yā 'tεε 'téé ní ndaacá yā saⁿ'a chí nguuvi Jacobo ndúú^{cū} Juan chí 'diinū sa. Saⁿā s'eeⁿ ní daiya Zebedeo ní snee sa na 'aama barco ní n'diyaata sá yaānā yeⁿē sa. ²⁰ Jesús 'caí yā saⁿ'ā s'eeⁿ. Saⁿā s'eeⁿ ní nan'dáa sa na barco naachi snee sa ndúú^{cū} chiida sa n'diyaata sá yaānā yeⁿē sa. Ní s'neeⁿ sa chiida sa Zebedeo ndúú^{cū} mozos yeⁿe yā ní cueⁿe sa ndúú^{cū} Jesús.

'Áámá saⁿ'ā chí vεε espíritu yeⁿe yááⁿ'n'guiinūⁿ
(Lc. 4.31-37)

²¹ Jesús miiⁿ ní ndaá yā na yáāⁿ Capernaum ndúú^{cū} saⁿ'ā s'eeⁿ. Ní ca'áámá ca'áámá sábadó, nguuvi chí ntaavi'tuunúúⁿ 'iiⁿ'yāⁿ s'eeⁿ, Jesús cueⁿ'é yā na yaacū sinagoga ní chí cueⁿe yā 'iiⁿ'yāⁿ. ²² 'Iiⁿ'yāⁿ s'eeⁿ ngeⁿe yiinu yā yeⁿe chí Jesús ngaⁿ'a yā; tí ngí cueⁿe yā tan'dúú^{cā} 'iiⁿ'yāⁿ chí ngaⁿ'ā ntii'nyúⁿ yā, nguéé tan'dúú^{cā} 'áámá maestro yeⁿē ley. ²³ Ní cheeti yaacū sinagoga míⁿ canéé 'áámá saⁿ'ā chí véé espíritu yeⁿe yááⁿ'n'guiinūⁿ ndúú^{cū} sa. Ní espíritu miiⁿ n'gai yeⁿē sá: ²⁴ N'dií Jesús yeⁿe yáāⁿ Nazaret, cu'néeⁿ nī nús'uu. ¿Dé'ē canéé yeⁿ'é 'nū nduucú nī? ¿'Áá ndaá nī chí di'cui^{nū} nī nús'uu? 'Úú ní n'diichí du'ú n'dií. N'dií ní 'iiⁿ'yāⁿ chí n'dai chí daiya Dendyuūs n'dií.

²⁵ Jesús miiⁿ ní yaa'vi néeⁿ yā espíritu yeⁿe yááⁿ'n'guiinūⁿ, ní caⁿ'a yā: Dii espíritu n'gáádí dí cheendi di, ní^{cú} nan'dáa di yeⁿe saⁿ'á tī.

²⁶ Tuu'mi ní espíritu yeⁿe yááⁿ'n'guiinūⁿ diíⁿ chí chitá'ā 'áámá ataque sáⁿ'a 'cū. Ní 'cai yiicú espíritu miiⁿ, ní nan'daā espíritu miiⁿ ná cuerpo yeⁿe sáⁿ'a 'cū. ²⁷ Ní nducyáácá 'iiⁿ'yāⁿ cheⁿe yiinu yā yeⁿe chuū ní tiingūūneeⁿ yā nguuaⁿ maaⁿ yā ndúú^{cū} vi'i: ¿Dé'ē chuū? ¿Dé'ē chí ngai chí ngí cueⁿe 'íiⁿ'yaⁿ 'cúū? 'Íiⁿ'yaⁿ 'cúū ní véé poder ca yeⁿ'é yā ní ngí ngaⁿ'a ntii'nyúⁿ yā yeⁿē espíritu yeⁿe yááⁿ'n'guiinūⁿ ní n'giindivéⁿ espíritu yeⁿ'é yā.

²⁸ Maā'nch'εεté nuūⁿ nducyaaca 'iiⁿ'yāⁿ n'giindiveⁿ yā yeⁿe chí dii Jesús miiⁿ, 'iiⁿ'yāⁿ yeⁿe núúⁿmáⁿ ná yáⁿ'āa yeⁿe yáⁿ'āa Galilea.

Jesús díⁿ yā chí nduū^{vā} yeⁿ'é indáⁿ'ā Simón Pedro
(Mt. 8.14-15; Lc. 4.38-39)

²⁹ Taachí n'daā Jesús na yaacū sinagoga Jesús miiⁿ ní cueⁿ'e yā ndúú^{cū} Jacobo, ndúú^{cū} Juan ná vaacu Simón ndúú^{cū} Andrés. ³⁰ N'daataá chí indáⁿ'ā Simón miiⁿ ní ngí^{tá} yā. Ndéé 'íiⁿ'nūⁿ 'iiⁿ'yāⁿ miiⁿ ní candiití yā. Ní 'iiⁿ'yāⁿ na vaacu yā caⁿ'a yā chí yā Jesús miiⁿ chí n'daataá miiⁿ ní ngí^{tá} yā. ³¹ Tuu'mi ní Jesús miiⁿ ní ndaa yā nanááⁿ n'daataá míⁿ ní sta'á yā ta'á tá ní nadicuéeⁿ yā táⁿ'ā. Ní^{cú} chivií 'iiⁿ'nūⁿ miiⁿ hora miiⁿ taachi nadicuéeⁿ yā n'daataa miiⁿ, ní tuc'á tá díⁿ tá mandados yeⁿ'é 'iiⁿ'yāⁿ s'eeⁿ chí che'e yā.

Jesús miiⁿ ní diiⁿ yā chí nééné 'yaaⁿ 'iiⁿ'yāⁿ nduū^{vā} yeⁿ'e yā
(Mt. 8.16-17; Lc. 4.40-41)

³² Cuayiivi taachí 'āā chíiya 'yáⁿ'ā ní 'āā 'da'a miiⁿ, 'iiⁿ'yāⁿ s'eeⁿ ní ndaa yā nanááⁿ Jesús miiⁿ ndúú^{cū} nducyaaca 'iiⁿ'yāⁿ chí ngí^{tá} yā ndúú^{cū} 'iiⁿ'yāⁿ chí véé espíritu yeⁿ'e yááⁿ'n'guiinūⁿ ndúú^{cū} yā. ³³ Ní nducyáácá 'iiⁿ'yāⁿ yeⁿ'e yáāⁿ miiⁿ ní ndaá yā na cheendi va'āi naachi canéé Jesús miiⁿ. ³⁴ Ní Jesús miiⁿ ní díⁿ yā chí nanduuva yeⁿ'e 'yaaⁿ n'dái 'iiⁿ'yāⁿ chí véé n'dee nááⁿ n'dai ca'ai yeⁿ'é yā. Ní diví yā n'dee n'dái espíritu yeⁿ'e

yáá'n'guiinuuⁿ yeⁿ'é 'iiⁿ'yāⁿ s'eeⁿ. Nguéé 'cuúⁿ yā chi espíritus s'uuⁿ caāⁿ'maⁿ, caati espíritus s'uuⁿ ní deenu du'ū chí Jesús miiⁿ.

Jesús ngaⁿ'a yā nduudu cuaacú yeⁿ'e Dendyuūs na yáⁿ'āa Galilea
(Lc. 4.42-44)

³⁵ Táámá nguεetiyaanⁿ 'da'ā ca, Jesús miiⁿ ní ncuééⁿ yā ní can'dáa yā na yāāⁿ Jerusalén miiⁿ ní cueⁿ'e yā 'áámá lado yeⁿ'e yāāⁿ miiⁿ naachi nguéé 'iiⁿ'yāⁿ ní miiⁿ caaⁿ'maⁿngua'á yā. ³⁶ Simón miiⁿ ndúúcu tanáⁿ'ā compañeros yeⁿ'e sa cheⁿ'e yā n'nuúⁿ yā Jesús. ³⁷ Taachí ndaaca yā Jesús miiⁿ, tuu'mi ní caⁿ'a yā chii yā Jesús: N'diī Jesús, nducyáácá 'iiⁿ'yāⁿ in'nuúⁿ yā n'diī.

³⁸ Jesús miiⁿ ní caⁿ'a yā chii yā 'iiⁿ'yāⁿ s'eeⁿ: Caⁿ'ā yú tanáⁿ'ā yāāⁿ chi snéé na niiⁿ'nuúⁿ, ní 'tiicá ntúūⁿ caaⁿ'maⁿ yú nduudu cuaacu yeⁿ'é Ndyuūs miiⁿ ti cáávā chuu chí cuchíí.

³⁹ Jesús miiⁿ ní cachiicá yā núúⁿmáⁿ yāāⁿ cuaaⁿ na yáⁿ'āa Galilea. Ní ngaⁿ'a yā nduudu cuaacú yeⁿ'é Ndyuūs miiⁿ na yáacū sinagogas yeⁿ'e yāāⁿ s'eeⁿ. Ní divíi yā espíritus yeⁿ'e yaaⁿ'n'giinūⁿ yeⁿ'e 'iiⁿ'yāⁿ.

Jesús diíⁿ yā chi nduūvā yeⁿ'e 'áámá saⁿ'ā ndúúcu ca'ai lepra
(Mt. 8.1-4; Lc. 5.12-16)

⁴⁰ 'Áámá saⁿ'ā chí canéé ca'ai chí ín'duuti yuutē yeⁿ'e sa ndaa sa nanááⁿ Jesús, ti neⁿ'e sa caaca sa 'áámá favor yeⁿ'é yā. Ní chíintii'ya sa ní caⁿ'a sa: N'diī Jesús, ndúútī chí n'diī neⁿ'e nī, diíⁿ nī chí nduūvā yeⁿ'é.

⁴¹ Jesús ní nduuvi ya'āi 'íinu yā saⁿ'ā miiⁿ, ní tuu'ví yā saⁿ'ā ndúúcu ta'a yā ní caⁿ'a yā: Táácā nguéē. 'Úú neⁿ'é. Dii saⁿ'ā, 'āā nduuvá yeⁿ'e di.

⁴² Taachí caⁿ'a Jesús 'tuucā, chivii ca'ai chí in'duuti yuute yeⁿ'e sa ní nduūvā yeⁿ'e sa, ní dεεve sa. ⁴³ Tuu'mi ní Jesús miiⁿ ní yaa'vi yā saⁿ'ā miiⁿ chí cunaⁿ'a sa na vaacu sa, naatí néé ca'á yā cuidado saⁿ'a miiⁿ ní yaa'ví yā saⁿ'a miiⁿ: ⁴⁴ Díí, cun'dííchí dí, nguéé cuuvi di mar 'áámá 'iiⁿ'yāⁿ chí nanduūvā yeⁿ'e di. Cueⁿ'e di ní 'cuuⁿ'miⁿ di maaⁿ cuerpo yeⁿ'e di nanááⁿ chiiduú chí nduūvā yeⁿ'e di. Ní ca'a di ofrenda tan'dúúcu chí ngaⁿ'a ley yeⁿ'e Moisés miiⁿ cáávā chí nduūvā yeⁿ'e di ní cáávā chí dεεve cuerpo yeⁿ'e di. 'Tíicā nducyáácá 'iiⁿ'yāⁿ snaaⁿ yā chí 'āā nduuvá yeⁿ'e di.

⁴⁵ Tuu'mi ní saⁿ'ā miiⁿ ní cunaⁿ'a sa ní caⁿ'a sa chí sa n'dee n'dái 'iiⁿ'yāⁿ tan'dúúcu chí chí ndúúcu sa. Ní cáávā chí diiⁿ sa 'túúcā, Jesús miiⁿ ní 'āā ntéé cheⁿ'e nguūvi yā mar 'áámá yāāⁿ, ti 'iiⁿ'yāⁿ s'eeⁿ snaaⁿ yā 'iiⁿ'yāⁿ. Ní Jesús cueⁿ'é yā yeⁿ'e yāāⁿ miiⁿ, ní cachiicá yā 'áámá lado yeⁿ'e yāāⁿ s'eeⁿ naachi nguéé ch'εetinéé 'iiⁿ'yāⁿ; naati 'iiⁿ'yāⁿ yeⁿ'e nducuéⁿ'é yāāⁿ ní n'dáa yā chí n'diichi yā Jesús miiⁿ.

2

Jesús diíⁿ yā chí nduūvā yeⁿ'e 'áámá saⁿ'ā chí nguéé ngii inuⁿ'u sa
(Mt. 9.1-8; Lc. 5.17-26)

¹ Cho'ōo nguuvi s'uuⁿ, Jesús miiⁿ ní nguεecunée yā nndaa yā na yāāⁿ Capernaum. Ní 'iiⁿ'yāⁿ ngaⁿ'a yā chí Jesús canéé yā na va'ai miiⁿ. ² Maaⁿnch'εeté nūⁿ na va'ai naachi canéé Jesús miiⁿ nduuvidaamá 'yaaⁿ n'dái 'iiⁿ'yāⁿ, ní 'āā ntéé tunéé cheendi va'āi miiⁿ chí ch'εeti núūⁿ 'iiⁿ'yāⁿ s'eeⁿ. Ní Jesús miiⁿ ngaⁿ'a yā nduudu yeⁿ'e Ndyuūs. ³ Tuu'mi ní ndaa na cuūⁿ sáⁿ'ā ndεε yā 'áámá saⁿ'ā ndúúcu ca'āi chí in'dúuví cuerpo yeⁿ'e sa. ⁴ Nguéé chí sndaa yā naachi canéé Jesús miiⁿ ti neené n'deēe 'iiⁿ'yāⁿ snúūⁿ yā. Cuchéε yā cuaaⁿ tíⁿ va'ai ni nadivíi yā na n'duuvi táátá tíⁿ va'āi miiⁿ. Ch'íínú n'guaaⁿ yā miiⁿya dichó'o yā saⁿ'ā ndúúcu ca'āi chí in'dúuví cuerpo yeⁿ'e sa na yiive yeⁿ'e sa ní ndεē sa naachi cheendii Jesús miiⁿ. ⁵ Taachi Jesús n'diichí yā chí 'iiⁿ'yāⁿ s'eeⁿ véé vaadi i'téenu nanááⁿ yā, caⁿ'a yā chí yā saⁿ'ā ndúúcu ca'āi chí in'dúuví cuerpo yeⁿ'e sa: Díí, daiyá, núúⁿndí yeⁿ'e dī 'úú ní nch'εécú.

⁶ N'duuvi maestros yeⁿ'e ley miiⁿ chí vεeté yā miiⁿ, nadacádíinuuⁿ yā 'tíicā na staava yeⁿ'é ya. ⁷ ¿Dε'ε cúví chí 'tíicā ngaⁿ'a sáⁿ'a 'tíi? Ngaⁿ'a sa yeⁿ'e dendu'ū chí nguéé n'daācā chí contra yeⁿ'e Ndyuūs, ti mar 'áámá 'iiⁿ'yāⁿ nguéé cuuvi díⁿ yā nadach'εécú yā

nuuⁿndi yeⁿe 'iiⁿ'yaⁿ, ti dámaaⁿ Ndyuūs. ⁸ Jesús miiⁿ ní deenu yā de'ē chi nadacadíínuuⁿ saⁿ'ā s'een, ní caⁿ'a yā chii yā 'iiⁿ'yaⁿ: ¿De'ē cúuví chí 'tíicā nadacadíínuuⁿ ndís'tií na staava yeⁿ'é nī? ⁹ ¿'Áá nguéé ngiⁿ'íi ca chi caaⁿ'máⁿ cuuvi saⁿ'a ndúucū ca'āi chi in'dúuví cuerpo yeⁿ'e sa: Nuunⁿdi yeⁿ'ē di ní 'āā ncheécú yeⁿ'ē di, o 'úú caaⁿ'máⁿ: Ndúcuééⁿ di, ní nadícuééⁿ di yiive yeⁿ'ē di ní caaca di? ¹⁰ Ní caāvā chi ndís'tií inaáⁿ nī chuū, níicú cadiinuⁿ nī chi Saⁿ'ā chi Daiya Dendyuūs ní véé poder yeⁿ'é yā na iⁿ'yeeⁿdí 'cūū chi nadach'εécú ya nuuⁿndi. Tuuⁿ'mi ní caⁿ'a yā chii yā saⁿ'ā ndúucū ca'āi chi in'dúuví cuerpo yeⁿ'e sa: ¹¹ Díí saⁿ'ā, nducuééⁿ di, ní nadacuééⁿ di yiive yeⁿ'e di ní cunaⁿ'a di na vaacu di.

¹² Saⁿ'a chi ngiitā miiⁿ nducueeⁿ sa, ní nadacuééⁿ sa yiive yeⁿ'e sa, ní nan'daa sa miiⁿ. Ní nducyaaca 'iiⁿ'yaⁿ n'diichí yā chuū ní cheⁿ'e yiinú yā ní dich'εeté yā Ndyuūs. Ní ngaⁿ'a yā: Mar 'áámá vmnéⁿ'ēe nguéé n'diichi yú dendu'ū chi 'tuucā.

Jesús yaa'ví yā 'áámá saⁿ'ā chi nguuvi Leví

(Mt. 9.9-13; Lc. 5.27-32)

¹³ Cuayivi Jesús miiⁿ cheⁿ'e yā cuaaⁿ 'díituú nuuⁿníⁿ'yáⁿ'ā. Ní taachi nducyaaca 'iiⁿ'yaⁿ ndaa yā nanáaⁿ yā, ní Jesús miiⁿ ní chí'cuééⁿ yā 'iiⁿ'yaⁿ s'een. ¹⁴ Ní taachi cachiicá Jesús miiⁿ, n'diichí yā 'áámá saⁿ'ā chi nguuvi Leví, chi daiya Alfeo. Véé sá naachi véé 'iiⁿ'yaⁿ chi ínn'guεε yeⁿ'e impuestos. Ní Jesús caⁿ'a yā chii yā saⁿ'ā miiⁿ: Díí saⁿ'ā, cuchí di caⁿ'ā di nduucú. Tuuⁿ'mi ní Leví miiⁿ nducueeⁿ sa ní cueⁿ'e sa ndúucū Jesús miiⁿ.

¹⁵ Tuuⁿ'mi ní Leví miiⁿ diiⁿ sa invitar Jesús miiⁿ chí caⁿ'á yā na vaacu sa ní cheⁿ'e yā ndúucū sa. Neené 'yaaⁿ 'iiⁿ'yaⁿ chi ínn'guεε yeⁿ'e impuestos ndúucū 'iiⁿ'yaⁿ chi véé nuuⁿndi yeⁿ'e yā ndaa ntúuⁿ yā. Ní 'yaaⁿ n'dái yā ch'εeté yā na mesa daama ndúucū Jesús ndúucū discípulos yeⁿ'e yā ti neené 'yaaⁿ 'iiⁿ'yaⁿ chi cueⁿ'e yā ndúucu yā. ¹⁶ Ní taachi maestros yeⁿ'e ley ndúucū 'iiⁿ'yaⁿ fariseos n'diichí yā chi Jesús ní ngeⁿ'e yā ndúucū nducyaaca 'iiⁿ'yaⁿ s'een, tuuⁿ'mi ní caⁿ'a yā chii yā discípulos yeⁿ'e Jesús: ¿De'ē cúuví chí maestro yeⁿ'é nī véε yā ngeⁿ'e yā ní ngiⁿ'i yā ndúucū 'iiⁿ'yaⁿ chí inn'guεε yeⁿ'e impuestos ndúucū 'iiⁿ'yaⁿ nuuⁿndi?

¹⁷ Taachí Jesús ch'iindiveéⁿ yā chuū, tuuⁿ'mi ní caⁿ'a yā chii yā 'iiⁿ'yaⁿ s'een: 'iiⁿ'yaⁿ chi nguéé ngíita yā nguéé neⁿ'e yā 'aama médico. Dámaaⁿ 'iiⁿ'yaⁿ chí ngiitā neⁿ'e yā chi cuuvi yíicú yā. 'Úú ní nguéé cuchíi chi yaa'ví 'iiⁿ'yaⁿ chi nadacadiinúúⁿ yā chi ch'εete maaⁿ yā chi nguéé dínuuⁿndí yā caati chí yaa'ví 'iiⁿ'yaⁿ chi véé nuuⁿndi yeⁿ'e yā.

'iiⁿ'yaⁿ nítiinguuneeⁿ yā Jesús miiⁿ yeⁿ'e chí nguεε ca'diinú yā

(Mt. 9.14-17; Lc. 5.33-39)

¹⁸ 'Áámá tiempo taachi discípulos yeⁿ'e Juan miiⁿ ndúucū fariseos ca'diinúⁿ yā, náⁿ'ā 'iiⁿ'yaⁿ ndaa yā nanáaⁿ Jesús miiⁿ ní ntiinguuneeⁿ yā Jesús: ¿De'ē cuuvi chí ca'diinúⁿ discípulos yeⁿ'e Juan miiⁿ ndúucū 'iiⁿ'yaⁿ fariseos miiⁿ naati discípulos yeⁿ'é nī nguéé ca'diinúⁿ yā?

¹⁹ Jesús nan'guεécútaⁿ'a yā 'iiⁿ'yaⁿ s'een: ¿'Áá ca'diinúⁿ 'iiⁿ'yaⁿ chi ndíí yā invitado naachí n'giindivaacu 'iiⁿ'yaⁿ 'naaⁿ chí sáⁿ'ā chí n'giindivaacu sa canéé sá ndúucu yā? Ndúúti chí canéé saⁿ'ā chí n'giindivaacu sa miiⁿ, nguéé cuuví ca'diinúⁿ yā. ²⁰ Naati cuchii tiempo taachí ch'ií saⁿ'ā chí n'giindivaacu sa tuuⁿ'mi ní cuuvi ca'diinúⁿ yā.

²¹ Mar 'áámá 'iiⁿ'yaⁿ nguéé cuta'á yā 'áámá tááⁿ tiinūuⁿ ngai chí 'āā nguéé naaⁿnu yā chí 'iindi'yaatá yā yeⁿ'ē na catecai ndiicúú yeⁿ'e yā. Ndúúti chí dííⁿ yā 'tíicā, maáⁿ tiinūuⁿ ngai miiⁿ ní cáancuūⁿ cú'teeⁿ tiinūuⁿ ndiicúú miiⁿ. Níicú cuuví ch'εete ca naachí ndíí n'teeⁿ. ²² 'Tiicá ntuūⁿ mar 'áámá 'iiⁿ'yaⁿ nguéé caaⁿ'nyúⁿ yā vino ngai na bolsa yíⁿmáⁿ ndiicúú yeⁿ'e vino tan'dúucā chí díiⁿ 'iiⁿ'yaⁿ ndiicúú. Nduuti chí dííⁿ yā 'tíicā vino ngai miiⁿ ní di'cuūní yíⁿmáⁿ ndiicúú miiⁿ ní cuuvi ndai vino miiⁿ ndúucú yíⁿmáⁿ. Chííⁿ chí vino miiⁿ canéé chí 'cueēⁿ na bolsa yíⁿmáⁿ ngai.

Discípulos yeⁿ'e Jesús miiⁿ ní tiicú yā trigo nguuvi sábadó chí ntaavi'tuunúúⁿ 'iiⁿ'yaⁿ Israel

(Mt. 12.1-8; Lc. 6.1-5)

²³ 'Áámá nguuvi chí sábadó chi ntaavi'tuunúúⁿ 'iiⁿ'yāⁿ Israel Jesús miiⁿ ndúú^{cū} discí^{pulos} yeⁿ'é yā cho'ó yā 'áámá campo naachi véé trigo ní discí^{pulos} yeⁿ'é yā ní tucá'a yā tiicú yā yááⁿ miiⁿ yeⁿ'e trigo taachi cho'ó yā. ²⁴ Tuu'mi ní 'iiⁿ'yāⁿ fariseos ní caⁿ'a yā chii yā Jesús miiⁿ: N'dií cuin'dí^{chí} ní, ¿d'é'ē cúú^{ví} chí diíⁿ discí^{pulos} yeⁿ'e ní chi nguē^e canéé chí diíⁿ yú nguuvi chí ntaavi'tuunúúⁿ 'iiⁿ'yāⁿ?

²⁵ Naati Jesús miiⁿ ní caⁿ'a yā chii yā saⁿ'ā fariseos: ¿'Áá nguéé n'geēⁿ nds'tií chí diiⁿ David miiⁿ ndúú^{cū} 'iiⁿ'yāⁿ chí cachiica ndúú^{cū} yā taachi cuiicu yā? ²⁶ David miiⁿ ní sndáa yā ná yáacū yeⁿ'é Ndyuūs taachi saⁿ'ā chí nguuvi Abiatar ngaⁿ'a ntiiⁿ'nyuⁿ sa yeⁿ'ē chiiduú ch'εε^{te} ca. Ní David che'é yā panes yeⁿ'e nátaí yeⁿ'é Ndyuūs chí dámaāⁿ chiiduú s'eeⁿ cuuvi che'é yā. Ní David miiⁿ ca'a yā pan miiⁿ 'iiⁿ'yāⁿ chí snéé ndúú^{cū} yā. Ní che'e yā.

²⁷ Jesús miiⁿ ní caⁿ'a yā chii yā 'iiⁿ'yāⁿ: Nguuvi chí ntaavi'tuunúúⁿ yā canéé chí cuuví yeⁿ'e saⁿ'ā yeⁿ'e iⁿ'yeeⁿdí' cūū naati nguéé saⁿ'ā chí cuuvi yeⁿ'ē nguuvi chí ntaavi'tuunúúⁿ saⁿ'ā. ²⁸ Cáávā chuū chíⁿ chí Saⁿ'ā chí Daiyá Dendyuūs cuuví caaⁿ'maⁿ ntiiⁿ'nyúⁿ ntúúⁿ sa yeⁿ'ē nguuvi chí ntaavi'tuunúúⁿ 'iiⁿ'yāⁿ.

3

Saⁿ'ā chí ntí'i ta'a sa
(Mt. 12.9-14; Lc. 6.6-11)

¹ Jesús miiⁿ ní chindáá ntúúⁿ yā na yáacū sinagoga. Ní miiⁿ canee 'áámá saⁿ'ā ndúú^{cū} ta'a sa chí ntí'i. ² 'Iiⁿ'yāⁿ fariseos ní neⁿ'é yā n'diichi yā nduuti chí Jesús miiⁿ chí ndúú^{vā} yeⁿ'ē saⁿ'ā miiⁿ caati nguuvi sábadó chí ntaavi'tuunúúⁿ 'iiⁿ'yāⁿ. Ní fariseos cuuví caaⁿ'máⁿ yā nuuⁿndi yeⁿ'e Jesús. ³ Tuu'mi ní Jesús miiⁿ ngaⁿ'a yā ngii yā saⁿ'ā chí ntí'i ta'a sa miiⁿ: Nducuééⁿ dí ní cueendii di naavtaⁿ'a yeⁿ'e 'iiⁿ'yāⁿ.

⁴ Jesús miiⁿ ní ntiinguuneeⁿ yā saⁿ'ā s'eeⁿ ní caⁿ'a yā: ¿D'é'ē diiⁿ yú nguuvi chí ntaavi'tuunúúⁿ yú? ¿'Áá cuuvi chí diiⁿ yú cosas chí n'daācā o cosas chí nguéé n'daācā? ¿'Áá n'daācā chí nguaⁿ'āi yú vida yeⁿ'e 'iiⁿ'yāⁿ o chí 'caaⁿ'nūⁿ yú 'iiⁿ'yāⁿ? 'Iiⁿ'yāⁿ s'eeⁿ ní ch'εε^{tinéé} 'diíⁿ yā. ⁵ Tuu'mi ní Jesús miiⁿ ní n'diichi yuudú yā saⁿ'ā s'eeⁿ ní s'neeⁿ ndaachi yiinú yā ti nguéé neⁿ'e cu'téenu sá yeⁿ'e yā. Ní Jesús caⁿ'a yā chii yā saⁿ'ā miiⁿ: N'doō di ta'a dí. Ní saⁿ'ā miiⁿ n'doō sa ta'a sa, ní ta'a sa ní nduū^{vā} n'daacā tan'dúú^{cā} taama. ⁶ Tuu'mi ní can'dáá 'iiⁿ'yāⁿ fariseos ní ndéé yā ndúú^{cū} 'iiⁿ'yāⁿ yeⁿ'e Herodes ní 'íicú n'diichi yā táacā díⁿ yā ní 'íicú cuuvi 'caaⁿ'núⁿ yā Jesús miiⁿ.

Nééné 'yaaⁿ 'iiⁿ'yāⁿ snéé yā na 'diituú nuūⁿnīⁿ'yáⁿ'ā

⁷ Jesús miiⁿ ndúú^{cū} discí^{pulos} yeⁿ'e yā cueⁿ'é yā cuaaⁿ na 'dí^{tuú} nuūⁿnīⁿ'yáⁿ'ā. Nééné 'yaaⁿ 'iiⁿ'yāⁿ yeⁿ'e yáⁿ'āa Galilea ndúú^{cū} yáⁿ'āa Judea cheⁿ'e yā can'dáa yā Jesús miiⁿ. ⁸ Taachi 'iiⁿ'yāⁿ yeⁿ'e yáⁿ'āa Galilea chicadíⁿnuuⁿ yā yeⁿ'é dendu'ū chí n'gεε^{te} n'dai chí Jesús díⁿ yā, nééné 'yaaⁿ 'iiⁿ'yāⁿ ndaa yā n'diichi yā Jesús miiⁿ. 'Iiⁿ'yāⁿ s'eeⁿ ní 'iiⁿ'yāⁿ yeⁿ'e yáⁿ'āa Judea, ndúú^{cū} 'iiⁿ'yāⁿ yeⁿ'e yáⁿ'āa Jerusalén, ndúú^{cū} 'iiⁿ'yāⁿ yeⁿ'e yáⁿ'āa Idumea, ndúú^{cū} 'iiⁿ'yāⁿ yeⁿ'e táamá 'diituú yí^{cú} Jordán, ndúú^{cū} 'iiⁿ'yāⁿ yeⁿ'e yáⁿ'āa Tiro ndúú^{cū} yáⁿ'āa Sidón. ⁹ Cáávā chí ndaa n'deeⁿ n'dái 'iiⁿ'yāⁿ, Jesús caⁿ'a yā chii yā discí^{pulos} yeⁿ'e yā chí cu'nee yaáⁿ yā 'áámá barco yeⁿ'e yā, ní^{cú} cuuví cuchée yā barco miiⁿ chí 'yaaⁿ n'dái 'iiⁿ'yāⁿ nguéé 'cuεε^{ti} núūⁿ chiichi yā yeⁿ'e Jesús miiⁿ. ¹⁰ Ní Jesús díⁿ yā chí 'yaaⁿ n'dái 'iiⁿ'yāⁿ nduū^{vā} yeⁿ'e yā. Ní nducyáácá 'iiⁿ'yāⁿ chí ngiitā neⁿ'é yā tuu'ví yā Jesús. ¹¹ Ní 'iiⁿ'yāⁿ chí canee yā ndúú^{cū} espí^{ritu} yeⁿ'e yááⁿ'nguiinūⁿ, espí^{ritu} miiⁿ diiⁿ chí 'iiⁿ'yāⁿ s'uuⁿ ndaa yā nanááⁿ Jesús ní espí^{ritu} ní 'cai yeⁿ'e 'iiⁿ'yāⁿ: Díⁿ ní Saⁿ'a chí Daiya Dendyuūs.

¹² Jesús caⁿ'a yuudu yā espí^{ritu} s'uuⁿ 'túú^{cā}: Nguéé caaⁿ'maⁿ dí du'u 'iiⁿ'yāⁿ 'úú.

Jesús ndεε^{ve} yā ndu'u ndiichúú^{ví} discí^{pulos}
(Mt. 10.1-4; Lc. 6.12-16)

¹³ Cuayiivi miiⁿ ní Jesús cuchée yā na 'áámá yiicū, naachí yaa'ví yā 'iiⁿ'yāⁿ chí neⁿ'e yā, ní 'iiⁿ'yāⁿ s'eeⁿ ndaa yā nanááⁿ Jesús miiⁿ. ¹⁴ Ní nduuvidaamá ndu'ū ndiichúú^{ví} discí^{pulos} chí canee yā ndúú^{cū} yā. Ní dicho'ó yā 'iiⁿ'yāⁿ s'eeⁿ chí caaⁿ'máⁿ yā nduudú

yeⁿe Ndyuūs chi nduudu cuaacu yeⁿe yā. ¹⁵ Ní Jesús ca'a yā poder discípulos yeⁿe yā chí cuuvi dííⁿ yā chí nduūvā yeⁿe 'iíⁿ'yāⁿ ní chí divíi yā espíritus yeⁿe yááⁿ'n'guiinūⁿ yeⁿe 'iíⁿ'yāⁿ. ¹⁶ 'Iíⁿ'yāⁿ s'eeⁿ ní ndiichúúví discípulos: Simón, chí duuchi ntúuⁿ sa Pedro, ¹⁷ ndúúⁿcū Jacobo ndúúⁿcū Juan 'diinū sa ní 'uūví sáⁿ'a s'eeⁿ chí daiya Zebedeo, ní saⁿ'ā s'eeⁿ ní Jesús s'neeⁿ yā nguuvi sa Boanerges chí neⁿ'e caaⁿ'maⁿ Daiya Δεενέ; ¹⁸ tanáⁿ'a yā ní nguuvi Andrés, ndúúⁿcū Felipe, ndúúⁿcū Bartolomé, ndúúⁿcū Mateo, ndúúⁿcū Tomas, ndúúⁿcū Jacobo chí daiya Alfeo, ndúúⁿcū Tadeo, ndúúⁿcū táámá Simón chí yeⁿe 'iíⁿ'yāⁿ yeⁿe yáⁿ'āa Canaan, ¹⁹ ndúúⁿcū Judas Iscariote, saⁿ'ā chí cuayiivi mííⁿ ch'iíⁿ'i sá du'u chí Jesús miiⁿ chí cuuvi 'caaⁿ'núⁿ yā 'yā. Ní Jesús ndúúⁿcū ndiichuuvi discípulos yeⁿe yā cueⁿ'e yā ní sndaā yā na 'áámá va'āi.

Ngaⁿ'a yā chí Jesús canée yā ndúúⁿcū poder yeⁿe yááⁿ'n'guiinūⁿ
(Mt. 12.22-32; Lc. 11.14-23; 12.10)

²⁰ Cuayiivi ní Jesús cueⁿ'e yā na vaacu yā. Táámá vmnéⁿ'ēe nééné n'deēe 'iíⁿ'yāⁿ ndaa yā nanááⁿ Jesús miiⁿ chí nguéeⁿ véé yaāⁿ chí che'e yā pan. ²¹ Taachí 'iíⁿ'yāⁿ yeⁿe familia yeⁿe Jesús chicadíínuuⁿ yā yeⁿe Jesús, yeⁿ'e chí 'iíⁿ'yāⁿ ngaⁿ'a yā chí Jesús ní nduuví loco yā, ndaa yā chí nandée yā Jesús.

²² 'Tiicá ntúūⁿ maestros chí ngi'cueeⁿ ley chí chiicá yā yeⁿ'e na yááⁿ Jerusalén ní caⁿ'a yā: Sáⁿ'a 'cūū canéeⁿ sá ndúúⁿcū espíritu chí nguuvi Beelzebú chí Satanás chí ngaⁿ'a ntiiⁿ'nyuⁿ sa yeⁿ'e espíritus yeⁿe yááⁿ'n'guiinūⁿ, ní cáávā poder yeⁿ'e espíritu miiⁿ chí tun'daá yā espíritus yeⁿe yááⁿ'n'guiinūⁿ yeⁿ'é 'iíⁿ'yāⁿ.

²³ Tuu'mi ní Jesús miiⁿ ní yaa'vi yā 'iíⁿ'yāⁿ s'eeⁿ ní s'neeⁿ yā 'áámá ejemplo. Ni caⁿ'a yā: ¿Táácā cuuví dííⁿ yááⁿ'n'guiinūⁿ divíi sa yááⁿ'n'guiinūⁿ? ²⁴ Ndúúⁿti chí 'áámá gobernador chí ngaⁿ'a ntiiⁿ'nyúⁿ yā yeⁿ'e yááⁿ naachi véé 'uūví partido chí n'guⁿ'u ná 'aamá yā ndúúⁿcū yeⁿ'e taama yā 'iíⁿ'ntyéⁿ'ē miiⁿ nguéeⁿ cuuvi 'nááⁿ yā chí 'iíⁿ'ntyéⁿ'e yā. ²⁵ Ndúúⁿti chí n'deēe nadacádíínuuⁿ yā na 'áámá familia chí véé partido yeⁿ'ē, familia miiⁿ ní nguéeⁿ cuuvi nduuvídáámá yā. ²⁶ 'Tiicá ntúūⁿ, ndúúⁿti chí yááⁿ'n'guiinūⁿ díiⁿ sa contra yeⁿ'e maaⁿ sa, nguéeⁿ cuuví cūnee sa ti chúū díiⁿ chí 'cuiinu sa.

²⁷ Mar 'áámá 'iíⁿ'yāⁿ nguéeⁿ cuuvi cundaa yā na vaacu 'áámá saⁿ'ā chí véé fuerzas yeⁿ'ē sa ní divíi yā dendu'u yeⁿ'ē sa. Canéeⁿ chí caāchiichí yā saⁿ'ā vmnááⁿ vmnaaⁿ. Cuayiivi ní cuuvi dííⁿ yā divíi yā dendu'ū chí snúūⁿ va'ai yeⁿ'ē sa.

²⁸ Nduudu cuaacu 'úú ngaⁿ'á ngií ndís'tií. Tanducuéⁿ'e nuuⁿndi chí dííⁿ 'iíⁿ'yāⁿ yeⁿ'e iⁿ'yeeⁿdí 'cūū ndúúⁿcū nduudu taaⁿ chí 'iíⁿ'yāⁿ s'eeⁿ ngaⁿ'a yā contra yeⁿ'e Ndyuūs, Ndyuūs nadich'εεcú yā nuuⁿndí yeⁿ'é yā. ²⁹ Naati 'iíⁿ'yāⁿ chí ngaⁿ'a yā nduudu taaⁿ chí nguεε n'dáacā yeⁿ'e Espíritu N'dai yeⁿ'é Ndyuūs, ní nguéeⁿ nch'εεcú yeⁿ'é yā maaⁿ ní tiempo chí cuchíi.

³⁰ 'Tiicā Jesús ngaⁿ'a yā ti náⁿ'ā 'iíⁿ'yāⁿ ngaⁿ'a yā chí Jesús mííⁿ ní véé espíritu yeⁿ'e yááⁿ'n'guiinūⁿ nduucú yā.

Chεεcú Jesús ndúúⁿcū 'díínu yā
(Mt. 12.46-50; Lc. 8.19-21)

³¹ Cuayiivi ní ndaa chεεcuú Jesús miiⁿ ndúúⁿcū 'díínu yā, ní ch'εetinée yā cuaaⁿ chuva'āi. Ní dichó'o yā 'áámá saⁿ'ā chí yaa'vi sa Jesús chí cuchíi yā nanááⁿ yā. ³² 'Yááⁿ 'iíⁿ'yāⁿ ní vεeté yā cuaaⁿ 'diitúú Jesús miiⁿ ní caⁿ'a yā: Chεεcú ní ndúúⁿcū 'diinú ní ní in'nuúⁿ yā n'dií cuaaⁿ chuva'āi.

³³ Jesús miiⁿ ní caⁿ'a yā chíi yā saⁿ'ā miiⁿ: ¿Dú'ū chí chεεcú miiⁿ? o ¿dú'ū chí 'diinú miiⁿ?

³⁴ Tuu'mi ní Jesús n'gíínu yā 'iíⁿ'yāⁿ chí vεeté yā cuaaⁿ 'diitúú yā ní ngaⁿ'a yā ngii yā 'iíⁿ'yāⁿ s'eeⁿ: N'diichí ní. 'Iíⁿ'yāⁿ chí snée yā nduucú miiⁿ, 'iíⁿ'yāⁿ s'eeⁿ tan'dúúⁿcā chí chεεcú ndúúⁿcū 'diinú. ³⁵ Ní 'āā du'ú nūuⁿ chí díiⁿ chíiⁿ chí Ndyuūs neⁿ'e yā chí dííⁿ yā, 'iíⁿ'yāⁿ s'eeⁿ chíí vi'í, 'iíⁿ'yāⁿ s'eeⁿ chíí 'diinú, ndúúⁿcū chεεcú.

4

'Aama ejemplo yeⁿe 'aama saⁿ'ā chi ngiīnū sá ndaata
(Mt. 13.1-9; Lc. 8.4-8)

¹ Taama vmnéⁿ'ēe Jesús miiⁿ ní tucá'a yā chi'cueeⁿ yā cuaaⁿ 'diituú nuūⁿnīⁿ'yáⁿ'ā. Ní nduuvídáámá n'dee n'dái 'iiⁿ'yāⁿ naachi canéé Jesús miiⁿ ndí 'āā ntéé lugar chí cuééndii Jesús. Ní chindáa yā na 'aama barco chi canuuⁿ vmnaaⁿ nuūⁿnīⁿ'yáⁿ'ā miiⁿ. Ní miiⁿ ch'iīndí yā chi ca'cueeⁿ yā. Nducyáácá 'iiⁿ'yāⁿ ch'εetinée yā na 'diituú nuūⁿnīⁿ miiⁿ.
² N'deē n'dái parábolos caⁿ'a Jesús 'iiⁿ'yāⁿ s'eeⁿ chi ejemplos chi tan'dúúcā dendu'u chí véé iⁿ'yeeⁿdí 'cūū. Ní taachí ngi'cueeⁿ yā caⁿ'a yā ndúúcū 'iiⁿ'yā s'eeⁿ 'tíicā. ³ Ndís'tiī ní 'caandiveéⁿ nī chuū. 'Áámá saⁿ'ā chi ngiīnū ndaāta ní cuéⁿ'e sá cuūnū sa ndaata miiⁿ.
⁴ Taachi chiīnū sa ní 'áámá duutu ndaata míⁿ chiiya na 'diituú yúúní ní ndaā 'yáádá ní che'e tí. ⁵ Náⁿ'ā duutu ndaata ní chiiya nguaaⁿ tuúú naachi nguéé dáana n'deē yáⁿ'āa véé. Duutu ndaata miiⁿ núúⁿ cān'daa tí yáⁿ'āa miiⁿ nguεε daanáá yáanūⁿ. ⁶ Ní taachi can'daā yaatū miiⁿ ní ti'i caati nguéé yaānūⁿ snúū dí'yú. ⁷ Náⁿ'ā duutu ndaata miiⁿ chiiya nguaaⁿ yááⁿ. Yááⁿ s'eeⁿ ní ch'iīta ní di'vaāchi yéⁿ'ē. Chíⁿ chí ndaata miiⁿ ní nguéé dichí'vē. ⁸ Náⁿ'ā duutu ndaata míⁿ na yáⁿ'āa n'dáacā chiiyā. Can'dāā ní ch'iīta n'dee n'dái cosecha yeⁿ'ē. N'duuví ní ch'εetinée tanduu ndiicu ndiichi ndaata yeⁿ'ē. Tan'duuví ní 'iīnū ngεecu ndiichi ndaata yeⁿ'ē ní tan'duuví ní 'áámá ciento ndaata yeⁿ'ē.

⁹ Tuu'mi ní Jesús caⁿ'a yā chí yā 'iiⁿ'yāⁿ s'eeⁿ: Ndís'tiī chí véé veéⁿ nī, 'caandiveéⁿ nī.

Chíⁿ chí neⁿ'ē caāⁿ'māⁿ ejemplo miiⁿ
(Mt. 13.10-23; Lc. 8.9-15)

¹⁰ Cuayivi taachí nduūví dámaāⁿ yā ndaa nanááⁿ Jesús náⁿ'ā 'iiⁿ'yāⁿ chí snéé nīⁿnūⁿ yā ndúúcū ndiichúúví discípulos ní ntinguunéeⁿ yā Jesús: ¿De'ē neⁿ'e caaⁿ'maⁿ ejemplo 'cūū?

¹¹ Ní Jesús caⁿ'a yā chí yā 'iiⁿ'yāⁿ s'eeⁿ: Ndís'tiī ní canéé chí cadiinuuⁿ nī chí canúúⁿ n'de'ei yeⁿ'é naachi Ndyuūs ngaⁿ'a ntiīnyúⁿ yā. Naati tanáⁿ'ā 'iiⁿ'yāⁿ chí nguéé sneé yā nduucú, 'úú ní ngaⁿ'á ngiī tanducuéⁿ'ē 'iiⁿ'yāⁿ s'eeⁿ ndúúcū ejemplos. ¹² Níicú 'iiⁿ'yāⁿ s'eeⁿ snaaⁿ yā naati ch'εetinée yā tan'dúúcā chí nguéé inaaⁿ yā, ní 'caandiveéⁿ yā naati ch'εetinée yā tan'dúúcā chí nguéé 'caandiveéⁿ yā, ní nguεε tuumicadínuuⁿ yā. Ndí nguéé ndaacadáámí yā ní cu'téenu yā Ndyuūs ní nch'εēcū nuuⁿndi yeⁿ'e yā.

¹³ Tuu'mi ní Jesús caⁿ'a yā chí yā discípulos yeⁿ'e yā: ¿'Áá nguéé ituumicadínuuⁿ nī yeⁿ'ē ejemplo 'cūū? ¿Táácā, túú'mí, cadíinuuⁿ nī yeⁿ'ē tanáⁿ'ā ejemplo? ¹⁴ 'iiⁿ'yāⁿ chí ngiīnū yā ndaata miiⁿ tan'dúúcā 'iiⁿ'yāⁿ chí candεε yā nduudu cuaacu yeⁿ'é Ndyuūs. ¹⁵ N'dúúví 'iiⁿ'yāⁿ ní tan'duūcā ndaata chí chiiya cyúúní míⁿ, 'tiicá yā ch'iīndiveéⁿ yā nduudu yeⁿ'é Ndyuūs. Ní cuayivi taachí ch'iīndiveéⁿ yā, chí yááⁿ'n'guiinūⁿ ní diví sa nduudu chí ch'iīndiveéⁿ yā chí canéé na staava yeⁿ'e yā. ¹⁶ Tán'duuví yā ní tan'dúúcā ndaata chí chiiya nguaaⁿ tuúú, 'tiicá yā. N'giīndiveéⁿ yā nduudu cuaacu yeⁿ'é Ndyuūs ní yeenú n'dái yā nduūcū. ¹⁷ Naati nguéé 'áámá cānee na staava yeⁿ'e yā ní nguéé 'nááⁿ tiempo cūnee. Taachi ndaa tiempo chí 'cueenu yā cuuvi o neⁿ'e chí n'gíínyuⁿneeⁿ 'iiⁿ'yāⁿ yeⁿ'é yā cáávā nduudu cuaacu miiⁿ, 'āā ntéé candii yā chí n'daacā miiⁿ. ¹⁸ Tán'duuví yā ní tan'dúúcā ndaata chí chiiya nguaaⁿ yááⁿ miiⁿ, 'tiicá yā. N'giīndiveeⁿ n'daacá yā nduudu cuaacu yeⁿ'é Ndyuūs. ¹⁹ Naati neené neⁿ'e cá yā dendu'ū yeⁿ'e iⁿ'yeeⁿdí 'cūū ndúúcū chí véé. Ní nginnche'élí yā 'iiⁿ'yā. Ní 'iiⁿ'yāⁿ s'eeⁿ ní dineⁿ'e yā cosas chí véé yeⁿ'e taama 'iiⁿ'yā. Tanducuéⁿ'ē chuū ní ndaá ní di'vaachií yeⁿ'e nduudu cuaacu yeⁿ'é Ndyuūs. Ní dííⁿ chí nguéé dichí'vεe nduudu miiⁿ na vida yeⁿ'e 'iiⁿ'yāⁿ s'eeⁿ. ²⁰ Naati tán'duuví yā ní tan'dúúcā ndaata chí chiiya na yáⁿ'āa n'daacā, 'tiicá yā. N'giīndiveeⁿ yā nduudu cuaacu yeⁿ'é Ndyuūs ní i'teenu n'daaca yā, ní véé n'gui'i yeⁿ'ē. N'duuví yā ní tan'dúúcā ndaata chí chí ndiīcū ndiichi yeⁿ'ē yeⁿ'e 'aama 'aama. N'duuví yā tan'dúúcā chí chí 'iīnu ngεecu ndiichí yeⁿ'ē, o tan'dúúcā chí chí 'aama ciento yeⁿ'ē.

Tanducuéⁿ'ē chí cunuúⁿ n'de'ei cunduú nguuvi
(Lc. 8.16-18)

²¹ 'Tiicá ntúūⁿ caⁿ'a Jesús táámá ejemplo chi 'téé nguéeé dáámá. ¿'Áá ndeε yā 'áámá lámpara chí cu'neeⁿ yā maaⁿ 'aama caja o maaⁿ 'aama cama? ¿'Áá nguéeé cu'neeⁿ yā lámpara miiⁿ na yaacu, 'íicú 'iiⁿ'yāⁿ cuuvi snaaⁿ yā? ²² Mar 'áámá cosa chí canúúⁿ n'de'ei nguéeé cunee chí nguéeé snaaⁿ 'iiⁿ'yāⁿ, ndíí nguéeé ndúú 'áámá cosa chí cánúúⁿ n'de'ei chí nguéeé cadíínuuⁿ 'iiⁿ'yāⁿ. ²³ Du'ū chí véé veéⁿ ní 'caandiveéⁿ.

²⁴ Ní Jesús caⁿ'a ntúūⁿ yā 'iiⁿ'yāⁿ s'eeⁿ: Cunndéē ndís'tií cuidado yeⁿ'e chí n'giindiveéⁿ nī. Ndúú^{cū} caādī chí ndís'tií idiíⁿ nī juzgar 'iiⁿ'yāⁿ, caadi mííⁿ ntúū Dendyuūs idiíⁿ yā juzgar ndís'tií. Ní n'deēe cá n'daācā yeⁿ'ē ndís'tií taachi Ndyuūs idiíⁿ yā juzgar ndís'tií. ²⁵ 'Iiⁿ'yāⁿ chí véé yeⁿ'e yā Ndyuūs ca'a cá yā 'yā. 'Iiⁿ'yāⁿ chí nguéeé ca yeⁿ'e yā, Ndyuūs ndivíí yā 'téé chí 'āā véé yeⁿ'e yā.

Ejemplo yeⁿ'e ndaata chí ngiita

²⁶ Jesús caⁿ'a ntúūⁿ yā: Naachi Ndyuūs ngaⁿ'a ntiiⁿnyúⁿ yā ní tan'dúú^{cā} 'áámá saⁿ'ā chí ngiīnu sa ndaata na yáⁿ'āa yeⁿ'e sa. ²⁷ Saⁿ'ā miiⁿ ngiīnū sa ndaata na yáⁿ'āa. Ní chíi maāíⁿ ní cyaadú sa ní nducueeⁿ sa taachí chideεεε. Cuayiivi ní cho'ōo nguūvī cho'ōo n'gááⁿ ní ndaata miiⁿ ní can'daa ní ch'iita naati saⁿ'ā miiⁿ ní nguéeé deenu sa táácā ch'iita. ²⁸ Yáⁿ'āa miiⁿ ngii maāⁿ yéⁿ'ē. Vmnaáⁿ vmaaaⁿ ican'dáa ta'ā n'gaiyāā. Cuayiivi ní can'daa yááⁿ miiⁿ yeⁿ'e. Cuayiivi ní n'giita ní ngii trigo chí ndiitūu n'daāca na yááⁿ miiⁿ. ²⁹ Taachí trigo miiⁿ 'āā ntí'i, tuu'mi ní ngeⁿ'e 'iiⁿ'yāⁿ chí yeⁿ'ē ní n'giica yā, ti 'āā snuū ca'a chí 'caātā.

Tan'dúú^{cā} ejemplo nduutií yeⁿ'e yíivē ntí'yāa

(Mt. 13.31-32; Lc. 13.18-19)

³⁰ Jesús miiⁿ ní ca'a ntúūⁿ yā: ¿De'é tan'dúú^{cā} naachí ngaⁿ'a ntiiⁿnyuⁿ Ndyuūs miiⁿ? o ¿de'é nduucū chí nadidáámá yú? ³¹ Chuū tan'dúú^{cā} nduutií yeⁿ'e yíivē ntí'yāa chí 'lííⁿ cá yeⁿ'ē tanducuéⁿ'ē nduutií chí véé iⁿ'yeeⁿdí 'cūū. Chííⁿ chí chíinu 'iiⁿ'yāⁿ na yáⁿ'āa yeⁿ'é yā. ³² Taachí 'āā niinú yā ndaata miiⁿ ní ngíí n'gēete yeⁿ'ē tanducuéⁿ'ē yaātā. Ní dúúⁿē miiⁿ ní n'gēete n'dáí ngii chí 'yáádá ngíí í'neeⁿ tī 'd'ééε tī na 'cuutí yeⁿ'ē.

Taama ejemplo chí ngi'cueeⁿ Jesús

(Mt. 13.34-35)

³³ 'Tíicā ngi'cueeⁿ Jesús 'iiⁿ'yāⁿ s'eeⁿ nduudu cuaacu yeⁿ'é Ndyuūs ndúú^{cū} n'deeé n'dái ejemplos tan'dúú^{cā} chuū, tanducuéⁿ'ē chí cuuvi cadíinuⁿ yā. ³⁴ Ní ngaⁿ'a yā ngii yā nducyaaca 'iiⁿ'yāⁿ ndúú^{cū} ejemplos, naati taachi canee yā dámaāⁿ ndúú^{cū} discípulos yeⁿ'e yā tanducuéⁿ'ē miiⁿ n'giⁿ'i yā discípulos yeⁿ'e yā de'ε chí neⁿ'e caaⁿ'maⁿ ejemplos chí 'āā caⁿ'a yā.

Jesús chí'neeⁿ 'diíⁿ yā 'yúúné ndúú^{cū} nuūⁿnīⁿ'yáⁿ'ā

(Mt. 8.23-27; Lc. 8.22-25)

³⁵ Taachi chí'da'á nguuvi miiⁿ, Jesús miiⁿ ngaⁿ'a yā ngii yā discípulos yeⁿ'e yā: Caⁿ'ā yú táámá 'diituú nuūⁿnīⁿ'yáⁿ'ā.

³⁶ Tuu'mi ní s'neeⁿ yā miiⁿ ní discípulos ní candéε yā Jesús miiⁿ na barco chí 'āā canéé na 'diituú nuūⁿnīⁿ'yáⁿ'ā ní cueⁿ'é yā. Miiⁿ ntúūⁿ canéé tanáⁿ'ā barcos. Ní 'iiⁿ'yāⁿ yeⁿ'e tanáⁿ'ā barcos cueⁿ'é ntúūⁿ yā. ³⁷ Tuu'mi ní chéenu 'áámá 'yúúné taaⁿ ní nuūⁿnīⁿ'yáⁿ'ā miiⁿ sndaā yaacú. Ní sndaā yaanūⁿ barco miiⁿ, ní chíitūu nuūⁿnīⁿ barco naachi canéé Jesús miiⁿ. ³⁸ Ní Jesús miiⁿ ní cyáádu yā cuaaⁿ 'diituú barco miiⁿ, ní candiitinee yā na cojín. Ní discípulos ní nanduūchí yā Jesús miiⁿ ní caⁿ'a yā chíi yā: N'dii Maestro, ¿'áá nguéeé de'ē veε inee ní chí 'cuūvi yú?

³⁹ Tuu'mi ní Jesús miiⁿ ní nducueeⁿ yā ní yaa'vi yā 'yúúné miiⁿ ní caⁿ'a yā chíi yā nuūⁿnīⁿ'yáⁿ'ā miiⁿ 'túú^{cā}: 'Diiⁿ nūⁿ cunee di. Hora mííⁿ nūⁿ 'yúúné miiⁿ ní canee 'diiⁿ ní nducuéⁿ'ē canee 'diiⁿ 'diiⁿ. ⁴⁰ Tuu'mi ní Jesús miiⁿ ní caⁿ'a yā chíi yā discípulos yeⁿ'e yā: ¿D'é'ē cuuvi tátíi 'va'a ní? ¿De'ē cúúví chí nguéeé cu'téenu cá ní?

⁴¹ Ní discípulos yeⁿ'é yā neené dii'yá yā chiī, ní ngaⁿ'a yā ngii yā nguaaⁿ maáⁿ yā ndúúcu vi'i: ¿Du'u rá 'iiⁿ'yāⁿ 'cūū, chí ndii 'yúúné ndí nuūⁿnīⁿ'yáⁿ'ā ch'iindiveéⁿ yeⁿ'e yā?

5

Saⁿ'ā yeⁿ'e yáⁿ'āa Gadara chi canéé sá ndúúcu espíritus yeⁿ'e yááⁿ'n'guiinūⁿ
(Mt. 8.28-34; Lc. 8.26-39)

¹ Jesús ndúúcu discípulos ndaa yā na táamá lado 'diituú nuūⁿnīⁿ'yáⁿ'ā miiⁿ yeⁿ'e yáⁿ'āa chi nguuví Gadara. ² Tuu'mi ní Jesús nan'daá yā na barco miiⁿ, ní ndaa 'áamá saⁿ'ā chi canéé ndúúcu espíritus yeⁿ'é yááⁿ'n'guiinūⁿ. Ní ngiicá sa ná vaacu sa chi 'áamá yiivi yáává chi canéé nguaaⁿ yaínyāⁿ ní ndaa sa nanááⁿ Jesús. ³ Saⁿ'ā miiⁿ ní mar 'áamá 'iiⁿ'yāⁿ nguéé chi cuuví cuta'á yā saⁿ'ā ní cachiichí yā saⁿ'ā, ndii nguéé ndúúcu cadenas. ⁴ Nééné n'deēe cuuví 'iiⁿ'yāⁿ s'eeⁿ cachiichí yā saⁿ'ā miiⁿ ndúúcu cadenas ca'a sa ndúúcu ta'ā sa, náátí ch'iica sa cadenas miiⁿ, ní dicheēyéi sa cadenas miiⁿ. Ní mar 'áamá 'iiⁿ'yāⁿ nguéé ichéé yā ndúúcu sa. ⁵ Cuéⁿ'é daáⁿmaⁿ cachiica sá n'gai sa cuaaⁿ ná yiicū ndúúcu cuaaⁿ nguaaⁿ yáinyāⁿ ndí nguuví ndí n'gaaⁿ, ní 'nuu cá'ai maāⁿ sa sáⁿ'ā ndúúcu tuū. ⁶ Ní taachi n'diichi yáⁿ'ái sa Jesús miiⁿ, cueⁿ'e sa ngéenu sā nanááⁿ yā ní chiintii'ya sa nanááⁿ yā. ⁷ Ní caⁿ'a sa chii sa Jesús miiⁿ ní 'cái yiicu sá: ¿De'ē cuuvi chi ndaa nī nanaáⁿ, n'dii Jesús, Daiya Dendyuūs chi canee yā na va'ai cheeti nguuví? Ngicá cáávā chi dúúchí Ndyuūs chi nguéé téé nī vaadī 'caa'va 'úú.

⁸ Saⁿ'ā miiⁿ ní caⁿ'a sa chuū caati Jesús miiⁿ ní caⁿ'a yā chiī yā espíritus yeⁿ'e yááⁿ'n'guiinūⁿ: Ndís'tiī, nan'dáa nī yeⁿ'e sáⁿ'a 'cūū.

⁹ Jesús miiⁿ tiinguuneeⁿ yā saⁿ'ā: ¿De'ē nguuví dí? Ní espíritus yeⁿ'e yááⁿ'n'guiinūⁿ chi canéé ndúúcu sáⁿ'a 'cūū nan'guēcútaⁿ'a sa: Legión nguuví, caati neené 'yaaⁿ 'nū.

¹⁰ Ní espíritus neené di'cuítuū ca Jesús miiⁿ chi nguéé tun'dáa yā espíritus chi caⁿ'ā yaⁿ'ai yeⁿ'e yáⁿ'āa miiⁿ. ¹¹ Ní neené n'deēe puercos nge'e tī cuaaⁿ na níⁿnúⁿ yiicū miiⁿ. ¹² Ní espíritus yeⁿ'e yááⁿ'n'guiinūⁿ idi'cuiitu Jesús: N'dii, dicho'ó nī nús'uu chi caⁿ'a 'nū cheeti puercos miiⁿ.

¹³ Tuu'mi ní Jesús ní ca'a yā permiso, ní espíritus yeⁿ'e yááⁿ'n'guiinūⁿ chínan'dáa sa yeⁿ'e saⁿ'ā miiⁿ chí ndáa sa cheeti puercos. Ní véé tan'duu 'uūví mil puercos miiⁿ. Ní taachi espíritus yeⁿ'e yááⁿ'n'guiinūⁿ sndáa sa cheeti puercos tuu'mi ní cheenu nducyaaca tī ní chingéé nuúⁿ tī cheeti yaāi miiⁿ. Ní chingéé tī nguaaⁿ nuuⁿnīⁿ'yáⁿ'ā. Ní chiitu nuūⁿnīⁿ veéⁿ tī duutu tī cheendi tī ní ch'ii tī nguaaⁿ nuūⁿnīⁿ miiⁿ.

¹⁴ 'Iiⁿ'yāⁿ chi idiiⁿ cuidado puercos cueⁿ'e yā ngéenu yā chi cuuvi yā 'iiⁿ'yāⁿ ná yáāⁿ miiⁿ ndúúcu 'iiⁿ'yāⁿ chi snéé na cueētí chí chiī miiⁿ. Ní 'iiⁿ'yāⁿ s'eeⁿ can'daa yā n'diichi yā chí chiī. ¹⁵ Taachí ndaa yā niiⁿnuúⁿ nanááⁿ Jesús miiⁿ, ní taachí n'diichí yā saⁿ'ā chi canéé sá ndúúcu espíritus yeⁿ'e yááⁿ'n'guiinūⁿ chi maaⁿ ní vee sa 'diiⁿ ndúúcu catecai sa ní 'āā n'daācā sa tuu'mi ní dí'va'a yā. ¹⁶ 'Iiⁿ'yāⁿ s'eeⁿ chi n'diichí yā chi diiⁿ Jesús miiⁿ, ní caⁿ'a yā chii yā táacā chiī ndúúcu saⁿ'ā miiⁿ chi canéé sá ndúúcu espíritus yeⁿ'e yááⁿ'n'guiinūⁿ, ní tan'duucā chí chiī ndúúcu puercos. ¹⁷ Tuu'mi ní 'iiⁿ'yāⁿ s'eeⁿ di'cuítu yā Jesús miiⁿ chí cáⁿ'a yā táamá lado yeⁿ'e yááⁿ miiⁿya.

¹⁸ Jesús cueⁿ'e yā. Ní taachi ndaa yā na barco miiⁿ ndaa saⁿ'ā chi vmnaaⁿ canéé sá ndúúcu espíritus yeⁿ'e yááⁿ'n'guiinūⁿ. Ní saⁿ'ā miiⁿ chiica sa Jesús chí caⁿ'a sa ndúúcu yā na barco miiⁿ. ¹⁹ Jesús ní nguéé 'cuuⁿ yā naatí caⁿ'a yā: Cunaⁿ'a dí ná vaacu di ndúúcu 'iiⁿ'yāⁿ yeⁿ'é di, ní cuuvi di 'iiⁿ'yāⁿ chí ch'ēete n'dai dendu'ū chí Señor 'iivú Ndyuūs miiⁿ díⁿ yā ndúúcu dii, ní tan'dúúcā Señor 'iivú Ndyuūs miiⁿ chí nduuví ya'āi 'iinú yā dii.

²⁰ Saⁿ'ā miiⁿ ní cunaⁿ'ā sa, ní tucá'a sa chii sa 'iiⁿ'yāⁿ nuuⁿmaⁿ yáāⁿ cuaaⁿ 'diituú chí nguuví Decápolis yeⁿ'e dendu'ū chí n'geete n'dai chí Jesús díⁿ yā ndúúcu sa. Ní nducyaaca yā che'e yiinú yā.

Táⁿ'ā daiya sáⁿ'ā Jairo, ndúúcu n'daataá chí tuū'vi tá catecai Jesús
(Mt. 9.18-26; Lc. 8.40-56)

²¹ Taachí Jesús miiⁿ nanguεεcunée yā ní cho'ó yā táámá lado yeⁿē nuūⁿnūⁿyáⁿā ní ndaa yā na yáⁿāa 'diituú nuūⁿnūⁿyáⁿā, neené n'deēe 'iiⁿyāⁿ ndaa yā naachi Jesús canee yā. ²² Ní ndaa 'áámá saⁿā chí nguuví sa Jairo, saⁿa chi ngaⁿa ntiⁿnyuⁿ sa yeⁿe yáacū sinagoga. Taachí n'diichi sa Jesús miiⁿ candiitin'dí sa na ca'a yā. ²³ Ní neené di'cuítu sa Jesús miiⁿ ní caⁿa sa: Daiyá ní neⁿē 'cuūví tá. Cuchí ní ní cún'du'u tá'a ní vmnaaⁿ yeⁿē tá, ní cuuví nduūvā yeⁿe tá ní nguéé 'cuūví tá.

²⁴ Tuu'mi ní Jesús miiⁿ ní cuéⁿe yā ndúúcu sa. Neené 'yaaⁿ 'iiⁿyāⁿ can'daa yā Jesús ní neéné chiiⁿnu chiichí yā Jesús. ²⁵ Ní nguaaⁿ nducyaaca 'iiⁿyāⁿ miiⁿ canéé 'áámá n'daataá chí ngítā tá, chí 'āā ndiichúví nduūyū canee tá ndúúcu ca'ai chí nguuví nguuví ngee yuuúⁿ yeⁿe cuerpo yeⁿe tá. ²⁶ Nééné n'geenu tá ngii ndúúcu médicos, ní 'āā ch'iinu diīⁿ tá gastar tanducuéⁿē chí véé yeⁿē tá, naati nguéé du'ū vεε dichii'vε yeⁿē tá ti dáyíicándí cá ca'ai yeⁿē ta cuaaⁿ vmnaaⁿ. ²⁷ 'Āā ch'iindiveeⁿ tá yeⁿe Jesús miiⁿ chí diīⁿ yā chí nduūvā yeⁿe 'iiⁿyāⁿ chí ngiitā. Ní cueⁿe tá nguaaⁿ 'iiⁿyāⁿ s'eeⁿ cuaaⁿ daamí Jesús ní tuū'vi tá catecai yā. ²⁸ Caati nadicádíinuⁿ tá maāⁿ tá 'tíicā. Ndúúti chí dámaāⁿ tuū'ví catecai yā, ní nduūvā yeⁿé. ²⁹ Hora míⁿ nūⁿ chí tuū'vi tá catecai Jesús miiⁿ 'tíicā canéé naaⁿ chí ngēē yuuúⁿ yeⁿē tá. Ní chicadiinuⁿ tá na cuerpo yeⁿe tá chí 'āā nduūvā yeⁿē tá. ³⁰ Tuu'mi ní Jesús miiⁿ tuumicádíinuⁿ yā chí 'āā nduūvā yeⁿē 'áámá 'iiⁿyāⁿ ndúúcu poder yeⁿé yā. Ní nguεεcundí yā ní n'diichi yā náávtāⁿ yeⁿe 'iiⁿyāⁿ ní ntiinguuneeⁿ yā: ¿Du'u túu'vii catecaí?

³¹ Tuu'mi ní discípulos yeⁿe yā caⁿa yā: Cuin'diichí ní 'iiⁿyāⁿ chí i'nūⁿ chiichí yā s'uūúⁿ miiⁿ ní maaⁿ ní ntiinguuneeⁿ ní: ¿Du'u tuū'vii 'úú?

³² Naati Jesús ní nguεεcúndii yā n'giinu yā 'áámá lado taama lado, ní 'iicu cuuvi snaaⁿ yā du'ū tuu'vi 'iiⁿyāⁿ. ³³ Tuu'mi ní n'daataá miiⁿ, ní in'duuví tá chí 'va'ā tá. Deenū tá de'ē chí chí. Cheⁿe tá ní chiintii'ya tá nanááⁿ Jesús. Ní caⁿa tá chí tá 'iiⁿyāⁿ tanducuéⁿē chí nduudu cuaacu. ³⁴ Jesús ngaⁿa yā ngii yā táⁿā: Dí daiyá, nduūvā yeⁿē dí cáávā chí i'téenu di 'úú. Dí 'diīⁿ nūⁿ cunáⁿa di, ní ndúuvā yeⁿē di yeⁿē ca'ai chí ndii di.

³⁵ Ngaⁿa Jesús miiⁿ ndúúcu táⁿā miiⁿ, taachí ndaa yā ná va'ai yeⁿe saⁿā Jairo chí ngaⁿa ntiⁿnyuⁿ sa yeⁿē 'iiⁿyāⁿ na yáacū sinagoga miiⁿ. Ní 'iiⁿyāⁿ yeⁿē va'ai miiⁿ ní caⁿa yā Jairo: Daiya dí 'āā n'di tá. ¿Dé'ē cuuví chí idindú'ū ca di maestro?

³⁶ Naati Jesús miiⁿ, ní ch'iindiveeⁿ yā chí caⁿá yā yeⁿē saⁿā chí ngaⁿa ntiⁿnyuⁿ sa. Ní caⁿa yā chí yā saⁿā miiⁿ chí ngaⁿā ntiⁿnyuⁿ sa yeⁿe 'iiⁿyāⁿ na yáacū sinagoga: Nguéé 'va'a di naati cu'téenu dí.

³⁷ Jesús nguéé 'cuuⁿ yā nducyaaca 'iiⁿyāⁿ chí cueⁿe ca yā cuaaⁿ cheeti va'ai ndúúcu yā, ti dámaāⁿ Pedro, ndúúcu Jacobo, ndúúcu Juan, saⁿā 'diinū Jacobo. ³⁸ Taachí ndaa yā va'ai yeⁿe sáⁿā chí ngaⁿa ntiⁿnyuⁿ yeⁿe 'iiⁿyāⁿ yeⁿe yaacū sinagoga miiⁿ, n'diichí yā 'iiⁿyāⁿ. Ní ch'iindiveeⁿ yā chí n'gai yā ní ngεecu yā. ³⁹ Tuu'mi ní taachi sn'daa yā cuaaⁿ cheeti va'āi miiⁿ, caⁿa yā: ¿De'ē táti yuudu idiīⁿ ní? ¿De'ē cúúví chí ngεecu ní? Tá'díⁿ nguéé n'dii tá, tí cyaadu tá.

⁴⁰ 'Iiⁿyāⁿ s'eeⁿ ní n'gíⁿnyūⁿneeⁿ yā yeⁿe Jesús miiⁿ. Tuu'mi ní Jesús miiⁿ diīⁿ yā chí can'daa nducyaaca yā. Ní Jesús can'dεe yā chiida tá ndúúcu cheecu tá ndúúcu discípulos chí canéé ndúúcu yā ní snda yā naachi candítí ta'díⁿ chí n'dii tá ní tináⁿā. ⁴¹ Ní sta'á yā ta'ā tá ní caⁿa yā: Talita cumi, chí neⁿe caāⁿmaⁿ na nduudu yeⁿe yú, dí n'daata 'líⁿ, 'úú ngaⁿá ngí di, ndúúcueeⁿ di.

⁴² Hora míⁿ nūⁿ ta'díⁿ miiⁿ ní nduucueēⁿ tá ní cachiica tá. N'daata 'líⁿ miiⁿ ní ngii tá ndiichuuví nduūyū. Tuu'mi ní 'iiⁿyāⁿ s'eeⁿ cueⁿe yiinú yā. ⁴³ Jesús míⁿ yaa'vi yuudú yā 'iiⁿyāⁿ chí nguéé caaⁿmaⁿ yā cuuvi yā chíⁿ mar 'áámá 'iiⁿyāⁿ. Ní caⁿa Jesús chí ca'a yā yuūdū chí che'e n'daata 'líⁿ miiⁿ.

¹ Jesús ní ndaācá yā miiⁿ ní cunaⁿá yā na yáāⁿ Nazaret chi yáāⁿ vaacú yā, ní discípulos yeⁿe yā ní cueⁿe yā ndúúcu yā. ² Taachí ndaā nguuvu sábadu chí ntaavi'tuunúúⁿ 'iiⁿ'yāⁿ, Jesús tucá'a yā chi'cueeⁿ yā na yaācū sinagoga miiⁿ. Néené 'yaaⁿ 'iiⁿ'yāⁿ ch'iindiveéⁿ yā chi caⁿ'a Jesús, ní cheⁿ'e yiinu yā. Ní caⁿ'a yā: ¿Tíí ch'eēⁿ sáⁿ'a 'cūū tanducuéⁿē chūū? ¿De'é vaadī déénu chí ca'a yā 'iiⁿ'yāⁿ miiⁿ, ndúúcu vaadī n'giinu chí díⁿ yā chūū? ³ ¿'Áá nguéé sáⁿ'a 'cūū daiya saⁿ'ā 'viichiyáⁿ'á miiⁿ, daiya María miiⁿ, saⁿ'ā chí 'diínū Jacobo, ndúúcu José, ndúúcu Judas, ndúúcu Simón, ndúúcu ví'i yā chí snée yā miiⁿ nguaaⁿ s'uūuⁿ? Cáāvā chí yeⁿe yáāⁿ miiⁿ chííⁿ chí nguéé s'teenu yā 'iiⁿ'yāⁿ. ⁴ Tuu'mi ní Jesús caⁿ'a yā chíí yā 'iiⁿ'yāⁿ s'tíí: Nducyáácá 'iiⁿ'yāⁿ dinéⁿe yā profetas naati nguéé dinéⁿe yā 'áámá profeta yeⁿ'ē yáāⁿ vaacú yā. Ní nguéé dinéⁿe 'iiⁿ'yāⁿ yeⁿ'é yā ndúúcu 'iiⁿ'yāⁿ na vaacu yā profeta miiⁿ. ⁵ Jesús ní nguéé chidiíⁿ yā mar 'áámá vaadī n'giinú miiⁿ, dámaaⁿ chí sn'duú yā ta'a yā vmnaaⁿ yeⁿ'e n'duuvu 'iiⁿ'yāⁿ chí ngítā ní nduūvā yeⁿ'é yā. ⁶ Ní cheⁿ'e yiinu Jesús tí 'iiⁿ'yāⁿ s'eeⁿ ní nguéé s'téenu yā. Cuayiivi miiⁿ ní Jesús cachiicá yā cuaaⁿ na yáāⁿ na niiⁿnuúⁿ ní ngi'cueeⁿ yā 'iiⁿ'yāⁿ.

Jesús dichó'o yā discípulos yeⁿ'e yā chí caaⁿ'máⁿ yā nduudu yeⁿ'é Ndyuūs

(Mt. 10.5-15; Lc. 9.1-6)

⁷ Ní Jesús yaaⁿ'vi yā nduū chí ndiichuuvu discípulos, ní tucá'a yā dicho'o yā 'iiⁿ'yāⁿ 'uuvu yā 'áámá 'áámá yáāⁿ. Ní ca'a yā poder discípulos chí tun'dáa yā espíritus yeⁿ'e yáāⁿ'n'guiinūuⁿ yeⁿ'é 'iiⁿ'yāⁿ. ⁸ Ní caⁿ'a yā chíí yā discípulos chí nguéé de'ē vεε candée yā chí cuuví yeⁿ'ē yúúní yeⁿ'e yā, dámaaⁿ in'daacuú. Nguéé canée chí candée yā ndii mar 'áámá moral, ndíí nguéé ndúú pan ra, ndíí nguéé ndúú tuūmī ra na bolsa. ⁹ Cunúúⁿ ca'a yā ndaacuú ndaachí, ní 'áámá nūuⁿ catecai yā, nguéé 'uūvī. ¹⁰ Ní caⁿ'a Jesús: Ndís'tií, taachi cúndaa nī cheeti 'áámá va'āī, 'cuetinéé nī miiⁿ taanduvéé ndii taachí nan'dáa nī yeⁿ'e yáāⁿ miiⁿ. ¹¹ Nduuti chí ndaá nī 'áámá yáāⁿ ní 'iiⁿ'yāⁿ s'eeⁿ nguéé 'cuaáⁿ yā 'cuetinéé nī miiⁿ, ndíí nguéé ndúú neⁿ'e ra yā chí 'caandiveéⁿ yā yeⁿ'e nī, tuu'mi ní nan'dáa nī yeⁿ'ē yáāⁿ miiⁿ. Ní n'dáadi nī yaācāā yeⁿ'ē ca'a nī. Chuū ní 'áámá señal chí 'cuuⁿ'miⁿ nī chí nguéé n'daācā idiíⁿ yā ti contra yeⁿ'é nī. Cuaacu níⁿnyúⁿ ngaⁿ'á ngií ndís'tií, chí nguuvu yeⁿ'e juicio duuⁿ'vi cá castigo yeⁿ'é 'iiⁿ'yāⁿ yeⁿ'e yáāⁿ Sodoma ndúúcu 'iiⁿ'yāⁿ yeⁿ'e yáāⁿ Gomorra, chí ndíí cuááⁿ vmnaaⁿ, ní nguéé ti 'iiⁿ'yāⁿ yeⁿ'e yáāⁿ naachí nguéé 'cuúⁿ yā ndís'tií.

¹² Tuu'mi ní discípulos ican'dáa yā, chí caⁿ'a yā nduudu cuaacu yeⁿ'é Ndyuūs yeⁿ'ē chí ndaacadáámí 'iiⁿ'yāⁿ yeⁿ'e nuuⁿndi yeⁿ'e yā. Ní chí n'daaⁿ yā chí cuuvi 'cuetinéé n'daāca yā. ¹³ 'Tuucá ntúūⁿ discípulos diví yā neené n'dee espíritus yeⁿ'e yáāⁿ'n'guiinūuⁿ yeⁿ'é 'iiⁿ'yāⁿ. Ní chí yā aceite n'dee n'dáí 'iiⁿ'yāⁿ chí ngítā ní nduūvā yeⁿ'e 'iiⁿ'yāⁿ.

Juan chí ngeēdinuūⁿnī ní chí sa

(Mt. 14.1-12; Lc. 9.7-9)

¹⁴ Rey Herodes ch'iindiveéⁿ ntúuⁿ yā chuū chí núuⁿmáⁿ íⁿ'yeēⁿdī miiⁿ ní ch'iindiveéⁿ yā chí díí Jesús miiⁿ. Rey Herodes míⁿ caⁿ'a yā: 'Áā nduūchi Juan chí ngeēdinuūⁿnī nguaaⁿ tináⁿ'ā, chííⁿ chí saⁿ'ā ní véé taavi poder yeⁿ'ē sa.

¹⁵ Naⁿ'a 'iiⁿ'yāⁿ ní ngaⁿ'a yā: Jesús miiⁿ ní Elías chí profeta ndíí vmnaaⁿ. Naⁿ'a 'iiⁿ'yāⁿ ní ngaⁿ'a yā: Jesús miiⁿ ní 'áámá profeta tan'dúúcā profetas chí ch'etinéé ndii cuaaⁿ vmnaaⁿ.

¹⁶ Taachí Herodes miiⁿ ch'iindiveéⁿ yā chuū, tuu'mi ní caⁿ'a yā: Juan sáⁿ'a 'cūū, chí 'úú chí caⁿ'a ntiíⁿnyúⁿ chí chíicá yā daandu sá ní 'āā nduuchi sa yeⁿ'e nguaaⁿ tináⁿ'ā.

¹⁷ Ti Herodes miiⁿ caⁿ'a ntiíⁿnyúⁿ yā soldados chí sta'a sa Juan ní chíicā chíichi sa ndúúcu cadenas ní chí'nuuⁿ sa saⁿ'ā vácū cáāvā n'daataá Herodías. Táⁿ'ā miiⁿ chí chíí n'daataá yeⁿ'ē Felipe cuááⁿ vmnaaⁿ ní canée tá ndúúcu sa. Ní Felipe miiⁿ ní 'diinu Herodes. ¹⁸ Juan miiⁿ ní caⁿ'a sa chíí sa Herodes miiⁿ: N'dií rey nguéé canée chí cunee nī ndúúcu n'daataá yeⁿ'ē 'diinu nī.

¹⁹ N'daataá yeⁿ'e Herodes miiⁿ nguéé canee yiinū tá ndúúcu chí caⁿ'a Juan miiⁿ. Ní neⁿ'e tá 'caaⁿ'nuⁿ tá Juan miiⁿ naati nguéé ngií díí tá. ²⁰ Herodes miiⁿ ní deenu yā chí Juan ní n'dai sa ní yeⁿ'e Ndyuūs saⁿ'ā miiⁿ. Ní rey miiⁿ 'va'á yā Juan miiⁿ. Chííⁿ chí nguéé

n'guuⁿ rey miiⁿ chi táⁿ'ā miiⁿ diiⁿ dañó tá ndúúcu Juan. Ní rey miiⁿ s'neeⁿ veéⁿ yā n'daacā ní ch'iindiveéⁿ yā yeⁿ'ē nduudu Juan 'áará chi nguéé tuumicadiinúuⁿ yā nducuéⁿ'ē chi ngaⁿ'a Juan miiⁿ. ²¹ Naati n'daataá yeⁿ'e rey miiⁿ nguuvi tá Herodías ní ndaāca tá táacā chi diiⁿ tá. Herodes miiⁿ díⁿ yā 'áámá 'viicu nguuvi cumpleaños yeⁿ'é yā. Díⁿ yā 'áámá 'viicu yeⁿ'ē chi nge'é yā chi che'é 'iiⁿ'yāⁿ chi ngaⁿ'a ntiiⁿnyuⁿ, ndúúcu saⁿ'ā s'eeⁿ chi 'neéⁿ vmnaaⁿ yeⁿ'e soldados, ndúúcu 'iiⁿ'yāⁿ yuudu yeⁿ'ē yáⁿ'āa Galilea. ²² Ní taachí nge'e yā n'daataá 'líⁿ daiya táⁿ'ā Herodías miiⁿ sndaā tá naachi nge'e yā. Ní nde'ei tá. Rey Herodes ndúúcu 'iiⁿ'yāⁿ chi snée yā ndúúcu sa chiiⁿ yeenú yā chi nde'ei tá. Ní miiⁿ caⁿ'a yā chii yā n'daataá 'líⁿ miiⁿ: Dii, n'daataá 'líⁿ, caaca di 'úú chí neⁿ'e dí ní 'úú ní teé dii.

²³ Ní caⁿ'a yā, “por Ndyuūs” chi ca'a yā n'daataá 'líⁿ miiⁿ 'āā de'é nūuⁿ chi neⁿ'e tá, 'áará chí ná maⁿ'a yeⁿ'ē yáⁿ'āa chi ngaⁿ'a ntiiⁿnyúⁿ yā. ²⁴ N'daataá 'líⁿ míⁿ ní can'daā tá ní caⁿ'a tá chii tá chæecu tá: Mamá, ¿dé'ē caacá? Ní chæecu tá ní caⁿ'a yā chii yā tá'ā: Caaca di tíⁿ Juan chi chæedínuūⁿnī.

²⁵ Maaⁿchæēté nūuⁿ sndaā ta'díⁿ miiⁿ naachi canúúⁿ rey miiⁿ, ní caⁿ'ā tá: Neⁿ'é chi maaⁿnguuví nūuⁿ teé ní 'úú chæeti 'áámá cu'u tíiⁿ Juan chí chæedínuūⁿnī. ²⁶ Tuu'mi ní rey miiⁿ ní s'neeⁿ ndaachi nuúⁿ yā naati cáávā chi caⁿ'a yā, “por Ndyuūs”, ní cáávā 'iiⁿ'yāⁿ chi snée yā ndúúcu rey miiⁿ, nguéé chi diiⁿ nuuⁿ yā cheeⁿdiitú yā yeⁿ'ē chi ngiica ta'díⁿ miiⁿ. ²⁷ Hora míⁿ nūuⁿ caⁿ'a ntiiⁿnyuⁿ rey miiⁿ 'áámá soldado chí cheⁿ'e sa 'caāca sa daandu Juan chí chæedínuūⁿnī ní nguāi sa tíⁿ yā. ²⁸ Soldado miiⁿ ní cheⁿ'e sa ná vácūú ní ch'iica sá daaⁿndu Juan miiⁿ. Ní sn'nuuⁿ sa tíiⁿ Juan miiⁿ chæeti 'áámá cu'u. Ní ndæe soldado miiⁿ ní ca'a sa ta'díⁿ miiⁿ. Ní ta'díⁿ miiⁿ ní ca'a tá chæecu tá.

²⁹ Taachí discípulos yeⁿ'e Juan miiⁿ ch'iindiveéⁿ yā chuū, cheⁿ'é yā chi nguai yā cuerpo yeⁿ'e Juan miiⁿ. Ní candée yā chí 'cuuchi yā.

Jesús ca'a yā chi che'e nyuⁿ'u mil 'iiⁿ'yāⁿ

(Mt. 14.13-21; Lc. 9.10-17; Jn. 6.1-14)

³⁰ Cuayivi miiⁿ ní apóstoles ní nduuvidaamá yā ndúúcu Jesús miiⁿ ní caⁿ'a yā chii yā Jesús tanducuéⁿ'ē chí diiⁿ yā, ndúúcu chí chi'cueeⁿ yā. ³¹ Jesús caⁿ'a yā chii yā apóstoles: Cuchí ní, ní caⁿ'a yú ntaavi'tuunúuⁿ yú na 'aama lugar chí 'aama lado yeⁿ'e yáāⁿ naachi nguéé 'iiⁿ'yā. Ngaⁿ'a yā 'tíicā, caati n'deeⁿ n'dái 'iiⁿ'yāⁿ indaá yā nanááⁿ Jesús ndúúcu n'deeⁿ n'dái 'iiⁿ'yāⁿ chí inaⁿ'a, ndíi maaⁿ rá chí nge'e yā, nguéé ngii. ³² Tuu'mi ní Jesús miiⁿ ndúúcu apóstoles yeⁿ'e yā cueⁿ'é yā dámaáⁿ yā na 'áámá barco na 'áámá lugar chí nguéé snée 'iiⁿ'yāⁿ. ³³ Naati nééⁿ 'yaaⁿ 'iiⁿ'yāⁿ n'diichí yā Jesús ndúúcu apóstoles, ní déénu yā du'u yā ní taachí cueⁿ'e yā. Ní nducuéⁿ'ē 'iiⁿ'yāⁿ yeⁿ'e yáāⁿ s'eeⁿ cueⁿ'e yā chiicá yā na yáⁿ'āa naachi ndaá Jesús ní vmnaaⁿ cá ndaa yā. Ní cuayivi ndaa Jesús miiⁿ ndúúcu apóstoles yeⁿ'e yā. ³⁴ Taachí Jesús nan'dáa yā na barco, n'diichí yā neené n'deeé 'iiⁿ'yāⁿ ní neené ya'ai 'iinú yā 'iiⁿ'yāⁿ s'eeⁿ, ti sneé yā tan'dúúcu 'iiti cuūchí chí nguéé du'ū chí idiiⁿ cuidado 'iiti, 'tíica yā. Ní Jesús tucá'a yā chí'cueeⁿ yā 'iiⁿ'yāⁿ s'eeⁿ n'deeⁿ n'dái dendu'ū. ³⁵ Taachí chí chiinū, discípulos yeⁿ'é yā ní ndaá yā nanáaⁿ yā ní caⁿ'a yā: N'dii Jesús, 'āā chíinū ní mar 'áámá 'iiⁿ'yāⁿ nguæe snée yā na yáⁿ'āa 'cūū. ³⁶ Yaa'ví ní 'iiⁿ'yāⁿ, ní caⁿ'á yā yáāⁿ n'gaiyāā ndúúcu yāāⁿ n'geete chí snée na niiⁿnuúⁿ ní cuái yā pan, ti nguéé ndæe yā chí che'e yā.

³⁷ Naati Jesús ní nan'guæecútaⁿ'a yā yeⁿ'e yā ní caⁿ'a yā: Ndís'tiī, ca'á ní che'e yā. Discípulos ní caⁿ'a yā: ¿'Áá cuuvi diiⁿ nús'uu chí caⁿ'a 'nū cuái 'nū 'uuvi ciento caadi pan, ní ca'á 'nū che'e yā?

³⁸ Jesús caⁿ'a yā chii yā discípulos: ¿'Áá n'deeⁿ panes yeⁿ'ē ndís'tiī vεε? Cuéⁿ'e ní n'diichi ní. Taachí 'āā n'diichí yā, tuu'mi ní yaa'ví yā: Véé nyuⁿ'u panes ndúúcu 'uuví 'yaācā.

³⁹ Tuu'mi ní caⁿ'a ntiiⁿnyuⁿ Jesús chí ch'æeté 'iiⁿ'yāⁿ s'eeⁿ caadi cuááⁿ caadi cuááⁿ naachí vεε yuuni cueēe. ⁴⁰ Ní naachí ch'æete yā 'áámá ciento yā ní naachi ch'éētē tá 'uūvī ngæecu ndiichí yā. ⁴¹ Tuu'mi ní Jesús miiⁿ ní sta'á yā ndu'ū nyuⁿ'u panes miiⁿ ndúúcu 'uuví 'yaācā. Ní chæenaⁿ yā nanguuvi ní ca'a yā gracias Ndyuūs cáávā pan miiⁿ ndúúcu 'yaācā. Ní ch'iinu ní n'dee yā panes miiⁿ ní nca'a yā discípulos yeⁿ'e yā chí ca'a

yā che'e 'iiⁿ'yāⁿ s'eeⁿ. Discípulos ca'a yā nducyaaca 'iiⁿ'yāⁿ s'eeⁿ 'yaācā miiⁿ ndúúcu pan miiⁿ. ⁴² Nducyáácá yā che'e yā ní chiitu 'iiⁿ'yāⁿ. ⁴³ Ní nanngaáⁿ yā chí ningaavā miiⁿ ní chiitu ndiichúúví 'cueētēē ndúúcu chí ningaāva miiⁿ yeⁿe pan ndúúcu 'yaācā miiⁿ. ⁴⁴ Nducyaaca saⁿ'ā chí che'ē sa panes miiⁿ ní ngii nyuⁿ'u mil sa.

Jesús ngíica yā vmnááⁿ nuūⁿnīⁿ'yáⁿ'ā

(Mt. 14.22-27; Jn. 6.16-21)

⁴⁵ Tuu'mi ní caⁿ'a Jesús chii yā discípulos yeⁿe yā chí cundaa yā na barco miiⁿ ní ndaá yā táámá lado yeⁿe nuūⁿnīⁿ'yáⁿ'ā miiⁿ vmnaaⁿ yēⁿ'e yā chí caⁿ'a yā na yáāⁿ Betsaida, nuuⁿmaⁿ neⁿ'e chi Jesús dííⁿ yā despedir 'iiⁿ'yāⁿ s'eeⁿ. ⁴⁶ Taachí Jesús dííⁿ yā despedir yeⁿe 'iiⁿ'yāⁿ s'eeⁿ, cueⁿ'é yā na yiicū miiⁿ chi caaⁿ'maⁿngua'á yā. ⁴⁷ Taachí chii 'da'a miiⁿ, barco miiⁿ ndúúcu discípulos 'āā cachíicá vmnaaⁿ yeⁿ'ē nuūⁿnīⁿ'yáⁿ'ā miiⁿ ní náávtaⁿ'a nuūⁿnīⁿ'yáⁿ'ā miiⁿ canéé. Ní 'āā dámaāⁿ Jesús miiⁿ canee yā na yáⁿ'āā miiⁿ. ⁴⁸ Ní Jesús n'diichí yā chi discípulos ní ch'eenu yā chí dííⁿ yā chí chiica barco miiⁿ ti 'yúúné miiⁿ ní contra yeⁿ'ē naachí cachiica barco miiⁿ. Na nguētiyaaⁿ 'da'a ca, Jesús ndaa yā nanááⁿ discípulos, ní ngiicá yā vmnaaⁿ nuūⁿnīⁿ miiⁿ. Ní neⁿ'é yā cho'o daamá yā. ⁴⁹ Taachí discípulos yeⁿe yā n'diichí yā Jesús chi ngiica yā cuaaⁿ vmnaaⁿ nuūⁿnīⁿ miiⁿ, discípulos nadacádíínuuⁿ yā chi 'áámá bulto ch'ēte ní 'cai yiicu yā. ⁵⁰ Ti nducyáácá discípulos n'diichí yā Jesús, ní díí'yá yā chí. Naati Jesús ní yaa'ví yā 'iiⁿ'yāⁿ s'eeⁿ ní caⁿ'a yā: Ndís'ti saⁿ'ā, nguéé 'va'á ní ti 'úú.

⁵¹ Ní Jesús miiⁿ cuchéé yā na barco miiⁿ naachi snúuⁿ discípulos. Ní canéé 'dííⁿ 'yúúné. Ní discípulos nadicádíínuuⁿ yā. De'ε chúúca ch'ēte Ndyuūs. Ní che'e yiinu yā. ⁵² Vaanicadíínuuⁿ yeⁿe discípulos ní chēchí caati nguéé tuumicádíínuuⁿ yā vaadi n'giinu yeⁿe panes miiⁿ.

Jesús dííⁿ yā chi nduūvā yeⁿe 'iiⁿ'yāⁿ chi ngíitā na yáⁿ'āā Genesaret

(Mt. 14.34-36)

⁵³ Cho'ó barco miiⁿ ndúúcu yā táámá lado yeⁿe nuūⁿnīⁿ'yáⁿ'ā miiⁿ ní ndaá yā ná yáⁿ'āā Genesaret, naachí cachiichí yā barco miiⁿ cuaaⁿ 'díituuⁿ nuūⁿnīⁿ'yáⁿ'ā. ⁵⁴ Ní taachi nacan'daa yā na barco miiⁿ, 'iiⁿ'yāⁿ s'eeⁿ chi 'āā ndaá yā miiⁿ ní ntiinaáⁿ yā Jesús miiⁿ. ⁵⁵ Ní 'iiⁿ'yāⁿ s'eeⁿ caⁿ'á yā chí yā 'iiⁿ'yāⁿ yeⁿe núúⁿmáⁿ cuaaⁿ na yáāⁿ n'gaiyāā chí snéé niiⁿnuúⁿ chí Jesús canéé yā. Ní 'iiⁿ'yāⁿ s'eeⁿ chinguai yā 'iiⁿ'yāⁿ chí ngíitā. Ní tuca'a yā ndaa yā ndúúcu 'iiⁿ'yāⁿ chí ngíitā na cama yeⁿ'é yā ní candē yā 'iiⁿ'yāⁿ nanááⁿ Jesús miiⁿ. ⁵⁶ Ní 'āā de'ε nūuⁿ lugar naachí cueⁿ'e Jesús miiⁿ, nduuti chí na yáāⁿ n'gaiyāā, o na yáāⁿ n'gēte, o na campo, 'iiⁿ'yāⁿ ní 'íneeⁿ yā 'iiⁿ'yāⁿ chí ngíitā cuaaⁿ cyúúni. Ní dí'cuítu yā Jesús chí ca'á yā lugar 'iiⁿ'yāⁿ chí ngíitā chí cuuví tuu'ví yā maaⁿ rá naachí ndēetií yeⁿ'ē catecai Jesús. Ní nducyaaca 'iiⁿ'yāⁿ chí tuu'ví yā tiinūuⁿ yeⁿe yā, nduūvā yeⁿe yā.

7

Chííⁿ chí dííⁿ chí ngii nuuⁿndi 'iiⁿ'yāⁿ

(Mt. 15.1-20)

¹ Tuu'mi ní 'iiⁿ'yāⁿ fariseos ndúúcu n'duuví maestros yeⁿe ley n'daa yā na yáāⁿ Jerusalén, ní ndaa yā nanááⁿ Jesús. ² 'iiⁿ'yāⁿ s'eeⁿ ní n'diichí yā chí discípulos yeⁿe Jesús miiⁿ ngé'e yā ndúúcu ta'a yā chí vaatí, ní vε nuuⁿndi yeⁿe yā ti nguéé inaaⁿnu yā ta'a yā taachí āā cuéé che'e yā tan'duucā chí ngaⁿ'a ley yeⁿ'é yā. ³ Chúú chii caati 'iiⁿ'yāⁿ fariseos ndúúcu nducyáácá 'iiⁿ'yāⁿ Israel candíi yā costumbres yeⁿ'é 'iiⁿ'yāⁿ ndiicúú s'eeⁿ chí nguéé che'e yā ndúúti chí nguéé n'deēe cuuví nnaaⁿnu yā ta'a yā. ⁴ Taachí indāā yā nii'vēē, nguéé che'e yā nduuti chí nguéé nnaaⁿnu yā ta'a yā n'deēe cuúví. Véé cá costumbres chí 'iiⁿ'yāⁿ s'eeⁿ icandiica yā, chí nnaaⁿnu yā vasos chí n'geē chí ngi'í yā, ndúúcu jarros, ndúúcu taza yeⁿe cūū, ndúúcu mesas. ⁵ Tuu'mi ní 'iiⁿ'yāⁿ fariseos ndúúcu maestros yeⁿe ley miiⁿ itiinguunéⁿ yā Jesús: ¿De'ē cúúví chí nguéé candíi discípulos yeⁿe ní costumbres yeⁿe 'iiⁿ'yāⁿ ndiicúú s'eeⁿ? Nge'é yā ndúúcu ta'a yā chí vaatí.

⁶ Jesús nan'guεεcútaⁿ a yā: N'dáacā caⁿ a profeta Isaías miiⁿ ndii cuááⁿ vmaaaⁿ yeⁿ e ndís'tiī chí 'uūvī naaⁿ 'uūvī cheendí nī. Chuū caⁿ a yā taachí dingúuⁿ yā 'túúcā: 'Iiⁿ yāⁿ s'uúⁿ ní dich'εεté yā 'úú ndúúcū cheendi yā, naati staava yeⁿ e yā yaⁿ 'āī canee yeⁿ e 'úú.

⁷ Nguéé de'ε vεε dichí'vε chí diiⁿ yā chí dich'εεté yā 'úú, ti chííⁿ chí ngi'cueeⁿ yā ní ley yeⁿ e saⁿ 'ā yeⁿ e iⁿ 'yeeⁿ dí 'cūū.

⁸ Naati ndís'tiī ní chí'neeⁿ nī leyes yeⁿ e Ndyuūs ní candíi nī costumbres yeⁿ e saⁿ 'ā yeⁿ e iⁿ 'yeeⁿ dí 'cūū. Chííⁿ chí neenē n'deēe cuūví nnaaⁿ nu yā jarros ndúúcū vasos naachi ngi'i nuúⁿ yā, ndúúcū chí diíⁿ yā ndúúcū neenē n'deēe cá dendu'ū. Tanducuéⁿ ē chuū ní nguéé dichí'vε.

⁹ 'Tíicā caⁿ a Jesús chii yā 'iiⁿ yāⁿ s'eeⁿ: Ndís'tiī ní cándii nī costumbres maáⁿ nī ní cáávā chuū i'neēⁿ nī 'áámá lado ley yeⁿ e Ndyuūs. ¹⁰ Moisés caⁿ a yā ley 'cūū: Diíⁿ nī honrar chiidá nī ndúúcū cheεcú nī ní 'iiⁿ yāⁿ chí nguéé n'dáacā ngaⁿ a yā yeⁿ e chiidá yā o yeⁿ e cheεcú yā canéé chí 'cuūvi yā. ¹¹ Naati ndís'tiī ní ngaⁿ a nī chí nga'a nī permiso 'aama saⁿ 'ā chí caaⁿ 'maⁿ sá cuuvi sa chiida sa o cheεcu sa, 'tíicā: 'Úú ní nguéé cuuvi nneé n'diī, caati nducuéⁿ ē chí yeⁿ e ní Corbán. (Nduudu Corbán miiⁿ ní neⁿ e caaⁿ 'maⁿ chí ca'á yā Ndyuūs.) ¹² Ndúúti chí saⁿ 'ā ngaⁿ a sa 'túúcā, tuu'mi ní ndís'tiī ngaⁿ a nī chí 'āā ntéé nga'a nī lugar chí cunnee sá chiida sá ndúúcū cheεcu sá. ¹³ Ndís'tiī ní diíⁿ nī chí 'āā ntéé dichí'vε Nduudu yeⁿ e Ndyuūs cáávā costumbre chí ngo'ó yeⁿ e 'áámá nī taama nī. Néené n'deēe dendú'ū diíⁿ nī tan'dúúcā chuū.

¹⁴ Caⁿ a ntúūⁿ Jesús chii yā 'iiⁿ yāⁿ taama vmnéⁿ ēe ní caⁿ a yā: Cu'neeⁿ veeⁿ nducyaaca nī yeⁿ e, ní tuumicadiinuuⁿ nī. ¹⁵ Mar 'áámá dendu'ū chí nge'e saⁿ 'ā chí 'āā cuéé che'e sa cuuvi diiⁿ chí 'āā ntéé deεve sa. Chííⁿ chí nadicadínuuⁿ saⁿ a na staava yeⁿ e sa ní ican'daā na staava yeⁿ e sa chííⁿ idiíⁿ chí 'āā ntéé deεve sa. ¹⁶ Ndís'tiī chí véé veéⁿ nī, 'caandiveéⁿ nī.

¹⁷ Taachí Jesús s'neeⁿ yā 'iiⁿ yāⁿ miiⁿ ní sndaa yā va'ai yeⁿ e discípulos yeⁿ e yā, discípulos yeⁿ e yā ní itinguuneeⁿ yā: ¿De'ε néⁿ e caaⁿ 'maⁿ ejemplo 'cūū?

¹⁸ Ní caⁿ a Jesús chii yā discípulos: ¿'Áá 'tiicá ntuūⁿ ndís'tiī nguéé ituumicadínuuⁿ nī? ¿'Áá nguéé deenu nī chí tanducuéⁿ ē chí nge'e saⁿ 'ā ní cungéε cuaaⁿ chuvia'āī ní nguéé cuuvi diiⁿ chí saⁿ 'ā miiⁿ ní vaati sa, ¹⁹ ti nguéé indaā na staava yeⁿ e sa naati na cheēti sa? Ní cuayivi míⁿ nan'daā na cuerpo yeⁿ e sa. 'Tíicā ní nducuéⁿ ē chí ngé'ε saⁿ 'ā ní deεve. Ní nguéé diiⁿ chí dinuuⁿ ndí yā. ²⁰ Ní caⁿ a Jesús: Chííⁿ chí can'daā na staava yeⁿ e sa chííⁿ chí diiⁿ chí véé nuuⁿ ndi yeⁿ e sa. ²¹ Ti chíiⁿ cuaaⁿ cheēti sáⁿ 'ā chí neⁿ e caaⁿ 'maⁿ chí yeⁿ e na staava yeⁿ e sa, ican'dáā yeⁿ e vaanicadínuuⁿ yeⁿ e sa chí nguéé n'daācā. Nadacadínuuⁿ yā yeⁿ e chí caⁿ a sa ndúúcū 'aama n'daataá o isáⁿ 'ā chí nguéé yeⁿ e yā, ndúúcū yeⁿ e chí n'diichí yā 'áámá saⁿ 'ā o n'daataá ní duuchinééⁿ vi'i yā, ní ndúúcū chí 'caaⁿ 'núⁿ yā 'iiⁿ yāⁿ, ²² ndúúcū yeⁿ e chí ididuucú yā, ndúúcū yeⁿ e chí neⁿ e yā cosas chí véé yeⁿ e taama yā, ndúúcū yeⁿ e dendú'ū chí yeⁿ e yááⁿ 'guinūuⁿ, ndúúcū yeⁿ e chí nginnche'éi yā 'iiⁿ yāⁿ, ndúúcū vicios, ndúúcū n'daataá chí caⁿ 'ā tá ndúúcū n'daataá chí duuchinee tá vi'i, ndúúcū yeⁿ e sáⁿ 'ā chí caⁿ a sa ndúúcū saⁿ 'ā chí duuchinee sa vi'i, ndúúcū yeⁿ e chí n'diichí yā cosas chí nguéé n'daācā, ndúúcū yeⁿ e chí caaⁿ 'maⁿ taáⁿ yā contra yeⁿ e Ndyuūs, ndúúcū yeⁿ e chí dich'εεté maáⁿ yā 'iiⁿ yāⁿ, ndúúcū nduudu chí nadicadínuuⁿ yā tan'duucā chí loco yā. ²³ Tanducuéⁿ ē dendú'ū 'cūū chí nguéé n'daācā ican'daā yeⁿ e na staava yeⁿ e yā. Chííⁿ chí diiⁿ chí véé nuuⁿ ndi yeⁿ e yā.

'Áámá n'daataá chí nguéé n'daataá Israel tá chí i'teenu tá Jesús (Mt. 15.21-28)

²⁴ Nan'dáā Jesús miiⁿ ní cunaⁿ a yā na yáⁿ 'āa Tiro ndúúcū Sidón. Ní chindáā yā na 'áámá va'ai. Ní nguéé neⁿ e yā chí 'iiⁿ yāⁿ s'eeⁿ cadínuuⁿ yā naachi cánéé yā naati nguéé chíi canúúⁿ n'de'ei yā. ²⁵ Maaⁿ ncheεté tuumicadiinuuⁿ 'áámá n'daataá chí véé 'áámá n'daataá 'líⁿ daiya tá chí cánéé ndúúcū espíritu yeⁿ e yááⁿ 'guinūuⁿ. N'daata miiⁿ ní ndaā tá ní chíintii'yā tá ná ca'a Jesús miiⁿ. ²⁶ N'daata míⁿ ní nguéé yeⁿ e ndaata yeⁿ e 'iiⁿ yāⁿ Israel

naati yeⁿe ndaataá yeⁿe 'iiⁿ'yāⁿ yeⁿe yáⁿ'āa Sirofenicia. Ndaā tá ní chiica tá Jesús miiⁿ chí tun'dáa yā espíritu yeⁿe yááⁿ'n'guiinūuⁿ yeⁿ'ē n'daataá 'líⁿ daiya tá. ²⁷ Naati Jesús miiⁿ ní caⁿ'a yā chii yā n'daataá miiⁿ: Ca'a di lugar chi che'e daiyá 'iiⁿ'yāⁿ Israel vmnááⁿ vmnaaⁿ ti nguéé cánéé chí divíⁿ pan yeⁿe daiyá 'nū ní ca'á 'nū chi che'e 'yaānā.

²⁸ Táⁿ'ā miiⁿ ní nan'guεεcútaⁿ'ā tá: 'Tíicā, Señor, naati 'yaānā chi snée tī maaⁿ mesa miiⁿ nge'é tī cheeyéi pan chi ngéē yeⁿ'ē da'caiyāá.

²⁹ Tuu'mi ní Jesús miiⁿ ní caⁿ'a yā chii yā táⁿ'ā: Dii n'daataá n'daācā ngaⁿ'a di. 'Āā cuuvi naⁿ'a di. Espíritu yeⁿe yááⁿ'n'guiinūuⁿ 'āā nan'dāā yeⁿ'ē daiya di.

³⁰ Taachí ndaā tá na vaacu tá, n'daataá 'líⁿ miiⁿ yeⁿ'ē tá canee tá na cama ní candiiti tá. Ní espíritu yeⁿe yááⁿ'n'guiinūuⁿ ní 'āā nan'dāā yeⁿ'ē n'daata 'líⁿ miiⁿ.

Jesús diⁿ yā chi nduūvā yeⁿe 'áámá sáⁿ'ā chi nguéé ngaⁿ'a sa ndíi nguéé ndúú n'giindiveeⁿ rá sá

³¹ Jesús nan'daa ntuuⁿ yā yeⁿe yáⁿ'āa Tiro ndúúⁿcū yáⁿ'āa Sidón ndúúⁿcū na yáāⁿ s'eeⁿ yeⁿe yáⁿ'āa Decápolis. Ní ndaa yā na yáⁿ'āa chi 'díⁿtūu nuūⁿ'n'íⁿ'yáⁿ'ā Galilea. ³² Miiⁿ ní ndaā 'iiⁿ'yāⁿ ndúúⁿcū 'áámá saⁿ'ā chi chēetūū chi nguéé ngii ngaⁿ'ā sa n'dáacā. Ní chiicá sá Jesús chi cun'duú yā ta'a yā vmnaaⁿ yeⁿ'ē sa. ³³ Jesús candéε yā saⁿ'ā miiⁿ 'áámá lado naachi 'āā ntéé snée 'iiⁿ'yāⁿ ní tingúúⁿ ndutá'a yā na veeⁿ sá ní chíidaiⁿ yā ní s'neeⁿ nduta'á yā na ch'iⁿya sa. ³⁴ Ní ch'íⁿu yā nanguuvi, ní nndaa niiⁿ'núⁿ yā ní caⁿ'a yā: Efata, chi neⁿ'e caaⁿ'maⁿ na nduudu yeⁿ'é, n'guaaⁿ di.

³⁵ Ndúúⁿcū chuū ní n'guaaⁿ veeⁿ sá ndúúⁿcū ch'iⁿya sa ní nduūvā yeⁿ'ē sa. Ní 'āā chí caⁿ'a n'dáacā sá. ³⁶ Jesús ní caⁿ'a yā chii yā 'iiⁿ'yāⁿ s'eeⁿ chi nguéé cuuvi yā mar 'áámá 'iiⁿ'yāⁿ. 'Áará chi neené ca'a cuidado yā 'iiⁿ'yāⁿ s'eeⁿ chi nguéé cuuvi yā 'iiⁿ'yāⁿ, 'iiⁿ'yāⁿ s'eeⁿ ní caⁿ'a yā chii yā n'dee n'dái 'iiⁿ'yāⁿ. ³⁷ Ní 'iiⁿ'yāⁿ s'eeⁿ ní neene cheⁿ'e yiinú yā, ní caⁿ'a yā: 'iiⁿ'yāⁿ miiⁿ ní tanducuéⁿ'ē idin'daacá yā, ndíi 'iiⁿ'yāⁿ chi chēetūū ní idiⁿ yā chí n'giindiveeⁿ yā. Ní 'iiⁿ'yāⁿ chi nguéé ngaⁿ'á yā ní díⁿ yā chí ngíi ngaⁿ'a yā.

8

Jesús ca'á yā che'e cuūuⁿ mil 'iiⁿ'yāⁿ
(Mt. 15.32-39)

¹ Tiempo 'cūū neené 'yááⁿ 'iiⁿ'yāⁿ nduuvuidaama yā ndúúⁿcū Jesús. Nguéé de'ē chí ca'á yā chí che'e 'iiⁿ'yāⁿ s'uuⁿ. Tuu'mi Jesús 'caí yā discípulos yeⁿ'e yā, ní caⁿ'á yā chii yā discípulos: ² 'Úú ní ya'ái cáávā 'iiⁿ'yāⁿ s'tíi, tí 'āā 'iinu nguūvī snée yā nduucú na lugar 'cūū ní nguéé de'ē vεε chí che'é yā. ³ Ndúúⁿti chí nadicho'ó 'iiⁿ'yāⁿ na vaacu yā ní nguéé che'é yā, 'áátii cuuvi cúúnú yā cuaaⁿ cyúúní chí naⁿ'a yā ti náⁿ'a yā ní yaⁿ'āi ndiicá yā.

⁴ Discípulos ní nan'guεεcútaⁿ'a yā: ¿Taacá ca'á nī chí ché'é 'iiⁿ'yāⁿ na lugar naachi nguéé ch'ētinéé 'iiⁿ'yāⁿ?

⁵ Jesús miiⁿ ntiinguunéeⁿ yā discípulos: ¿'Áá n'dee cá panes yeⁿ'é nī véé? Discípulos ní caⁿ'a yā: Tá ndēēchē vεε.

⁶ Tuu'mi ní chí Jesús 'iiⁿ'yāⁿ s'eeⁿ chí 'cuεεté yā na yáⁿ'āa miiⁿ. Ní Jesús sta'á yā ndēēchē panes miiⁿ. Ca'á yā gracias Nduyūs cáávā panes miiⁿ. Ní n'dee yā panes miiⁿ ní ca'á yā discípulos yeⁿ'é yā. Ní discípulos ca'á yā che'e 'iiⁿ'yāⁿ s'uuⁿ. ⁷ Véé ntúūⁿ n'duuvī 'yaācā. Jesús sta'á yā 'yaācā ní ca'á yā gracias Nduyūs cáávā 'yaācā ní ca'a yā discípulos chí ca'a ntúūⁿ yā 'yaācā 'iiⁿ'yāⁿ s'uuⁿ. ⁸ Nducyaaca 'iiⁿ'yāⁿ che'e yā ní chíitu 'iiⁿ'yāⁿ. Ní nin'guaáⁿ yā tá ndēēchē 'cuεētēε chí nángaava. ⁹ 'Iiⁿ'yāⁿ chí che'e yā ní ngii yā tan'dúú cuūuⁿ mil 'iiⁿ'yāⁿ. Tuu'mi ní Jesús miiⁿ ní díⁿ yā despedir yeⁿ'é 'iiⁿ'yāⁿ s'uuⁿ. ¹⁰ Ní Jesús ndaa yā na 'aama barco ndúúⁿcū discípulos yeⁿ'e yā ní cueⁿ'é yā na yáⁿ'āa chí nguuvī Dalmanuta.

Iiⁿ'yāⁿ fariseos chíca yā Jesús chí ch'iⁿ'i yā 'aama vaadī n'giinu
(Mt. 16.1-4; Lc. 12.54-56)

¹¹ Tuu'mi ní ndaā 'iiⁿ'yāⁿ fariseos ní tucá'a yā caⁿ'a yā n'dee n'dái ndúúⁿcū Jesús. Neⁿ'é yā n'diichi yā táacā caaⁿ'maⁿ Jesús. Chíca yā Jesús 'áámá vaadī n'giinu yeⁿ'ē na va'ai

cheeti nguuvi. ¹² Jesús nandaa yiinú yā tí ndaachí 'iinu yā na staava yeⁿ'é yā, ní caⁿ'a yā: ¿De'ē cúuví chí ngiica 'iiⁿ'yāⁿ s'uuⁿ 'áámá señal yeⁿ'ē vaadi n'giinu? 'Úú ngaⁿ'á cuaacu chí nguéé ca'á mar 'áámá señal 'iiⁿ'yāⁿ s'uuⁿ.

¹³ Cuayiivi chí caⁿ'a yā chí yā 'iiⁿ'yāⁿ s'uuⁿ chuū, Jesús nanguεεcunée yā snda yā na barco miiⁿ. Ní cueⁿ'e yā taama lado nuūⁿnīⁿ'yáⁿ'ā miiⁿ.

Levadura yeⁿ'e 'iiⁿ'yāⁿ fariseos

(Mt. 16.5-12)

¹⁴ Discípulos chinaán yā chí candεε yā chí che'e yā, naati ndée yā 'aama n'dyán'ā pan ndúúcu 'iiⁿ'yāⁿ s'eeⁿ na barco miiⁿ. ¹⁵ Tuu'mi ní Jesús caⁿ'á yā chí yā discípulos: Cuin'diichí nī, cundée nī cuidado yeⁿ'e levadura yéⁿ'e 'iiⁿ'yāⁿ fariseos ndúúcu levadura yeⁿ'e rey Herodes. Levadura miiⁿ ní chíⁿ chí díⁿ yā chí nguéé n'daācā.

¹⁶ Discípulos ní tucá'a yā caⁿ'a yā nguaaⁿ maán yā: ¿'Áá chí nguεε ndéé yú pan chíⁿ chí 'tiicā ngaⁿ'a yā?

¹⁷ Jesús miiⁿ ní déenu yā chí ngaⁿ'ā discípulos nguaaⁿ maán yā ní caⁿ'a yā: ¿De'ē cúuví chí ngaⁿ'a nī chí cáávā chí nguéé ndéé nī pan? ¿'Áá cuéé tuumicadiinúúⁿ nī? ¿'Áá cuéé i'téenu nī na staava yeⁿ'e nī? ¹⁸ ¿'Áá nguéé inaaⁿ ndís'tiī ndúúcu nduutináaⁿ nī, ndíí nguéé ndúú n'giindiveeⁿ rá nī ndúúcu veéⁿ nī? ¿'Áá nguéé inan'gaacú nī? ¹⁹ Taachí n'deé ndu'u nyu'u panes miiⁿ chí che'e nyu'u mil 'iiⁿ'yāⁿ, ¿'áá n'deē 'cuéētēε ca pan nángaāva? ¿'Áá nin'guaáⁿ nī? 'Iiⁿ'yāⁿ s'eeⁿ ní caⁿ'a yā: Ta ndiichuuví.

²⁰ Ní caⁿ'a Jesús: Taachí ca'á ndεēchē panes miiⁿ che'e cuūu mil 'iiⁿ'yāⁿ, ¿'áá n'deē 'cuéētēε ca nin'guaáⁿ nī? Discípulos ní caⁿ'á yā: Tá ndεēchē.

²¹ Tuu'mi ní Jesús caⁿ'a yā: ¿'Áá cuéé tuumicadiinúúⁿ nī?

Jesús díⁿ yā chí nduūvā yeⁿ'e 'áámá 'iiⁿ'yāⁿ chí ngueenááⁿ na yāāⁿ Betsaida

²² Cuayiivi miiⁿ mí ndā Jesús ndúúcu discípulos yeⁿ'e yā na yāāⁿ Betsaida. Nán'ā 'iiⁿ'yāⁿ ní ndée yā 'áámá chí ngueenááⁿ nanááⁿ Jesús ní ngiicá yā Jesús chí tuu'vi yā 'iiⁿ'yāⁿ chí ngueenááⁿ. ²³ Jesús sta'á yā ta'ā chí ngueenááⁿ ní tun'dáa yā 'iiⁿ'yāⁿ 'áámá lado yeⁿ'e yāāⁿ 'líⁿ miiⁿ. S'neeⁿ yā nuuⁿnīⁿ daíⁿ yā na nduutinááⁿ sa ní snduu tá'a yā vmnaaⁿ yeⁿ'e saⁿ'āⁿ miiⁿ ní itiinguunéeⁿ yā saⁿ'ā ndúúti chí 'āā inaaⁿ sa 'tεε. ²⁴ Chí ngueenááⁿ miiⁿ ní ch'iinu sa, ní caⁿ'ā sa: Inaaⁿ 'áámá saⁿ'ā tan'dúúcā chí 'áámá yáⁿ'ā 'tíicā saⁿ'ā, naati ngiicá sá.

²⁵ Tuu'mi ní Jesús miiⁿ ní sn'duu ntúuⁿ yā ta'a yā na nduutináaⁿ saⁿ'ā miiⁿ. Saⁿ'ā miiⁿ ní ch'íinu n'daācā sa ní nduuví n'dai nduutináaⁿ sa. 'Āā tanducuéⁿ'ē inaaⁿ n'dáacā sa. ²⁶ Tuu'mi ní Jesús miiⁿ dichó'o yā saⁿ'ā chí cuinaⁿ'a sa na vaacu sa. Ní caⁿ'a yā: Díí, nguéé cundaā di núúⁿ máⁿ na yāāⁿ miiⁿ ní cuuvi di chuū mar 'áámá 'iiⁿ'yāⁿ.

Pedro ní caⁿ'ā cuaacu sá chí Jesús chí Cristo yā

(Mt. 16.13-20; Lc. 9.18-21)

²⁷ Cuayiivi miiⁿ Jesús ndúúcu discípulos yeⁿ'é yā cheⁿ'é yā na yāāⁿ s'eeⁿ yeⁿ'e yáⁿ'āa Cesarea ndúúcu yāāⁿ s'eeⁿ yeⁿ'e yáⁿ'āa Filipo. Taachí snúuⁿ yā yúúⁿ ntiinguuneeⁿ Jesús miiⁿ discípulos yeⁿ'e yā, ní caⁿ'a yā: ¿Du'ū 'úú ngaⁿ'a 'iiⁿ'yāⁿ?

²⁸ Discípulos nan'guεεcútaⁿ'a yā: Nán'ā 'iiⁿ'yāⁿ ní ngaⁿ'a yā chí díí chí Juan chí cheédínuūⁿnīⁿ díí. Nán'a yā ní ngaⁿ'a yā chí díí chí profeta Elías díí. Nán'a yā ní ngaⁿ'a yā chí díí chí 'áámá profeta díí.

²⁹ Tuu'mi ní Jesús ntiinguunéeⁿ yā discípulos: ¿Du'ū 'úú ngaⁿ'á ndís'tiī? Tuu'mi ní Pedro miiⁿ ní caⁿ'ā sa: N'diī chí Cristo chí yeⁿ'e Ndyuūs.

³⁰ Jesús ní caⁿ'a yā chí nguéé cuuvi yā mar 'áámá 'iiⁿ'yāⁿ chuū.

Jesús ngaⁿ'a yā yeⁿ'e vaadi n'gii yeⁿ'e maán yā

(Mt. 16.21-28; Lc. 9.22-27)

³¹ Tuu'mi ní Jesús tuca'á yā chí'cueeⁿ yā yeⁿ'ē Saⁿ'ā chí Daiya Dendyuūs. Ní neené 'cueenu sa cuuvi. 'Iiⁿ'yāⁿ chiidúú n'gεεté ndúúcu 'iiⁿ'yāⁿ ndiicúú chí ngaⁿ'ā ntiinnyuⁿ yeⁿ'ē yáacu miiⁿ ndúúcu maestros yeⁿ'e ley, 'āā ntée neⁿ'e yā saⁿ'ā. Ní caⁿ'a yā chí yā

'iiⁿyāⁿ s'eeⁿ chi 'caaⁿnúⁿ yā saⁿā, naati saⁿā miiⁿ ní cheeti 'iīnū nguuvu nduuchi sa yeⁿe nguuaⁿ tináⁿā. ³² 'Úú ní ngaⁿá cuaācú chuū. Tuu'mi ní Pedro miiⁿ ní cueⁿe sa ndúú^c Jesús 'áámá lado ní tucá'a sa yaa'vi neeⁿ sa Jesús. ³³ Naati Jesús nan'guuecundíí yā ní n'diichí yā discípulos ní yaa'vi neeⁿ yā Pedro ní caⁿa yā: Díí, Pedro, tan'dúú^c yááⁿn'guiinūⁿ, 'tíicā dii. Cuvíi di yeⁿē 'úú, ti dii ní nguéé nadicádíínuuⁿ di tan'dúú^c Ndyuūs nadicádiinuuⁿ yā, ti nadicádíínuuⁿ di yeⁿe dendu'ū yeⁿe iⁿ'yeeⁿdí 'cūū.

³⁴ Tuu'mi ní Jesús yaa'ví yā discípulos yeⁿe yā ndúú^c tanáⁿā 'iiⁿyāⁿ, ní caⁿa yā chii yā 'iiⁿyāⁿ s'uuⁿ: Ndúú^ti chi 'áámá 'iiⁿyāⁿ neⁿe yā caⁿa yā nduucú, canéé chi cu'nééⁿ maáⁿ yā tanducuéⁿe dendu'ū chi véé yeⁿe yā ní cuta'á yā cruz yeⁿé yā chí tan'dúú^c chi 'cueenu taaví yā cuuvi cucáá^vā 'úú 'iicu caⁿá yā nduucú. ³⁵ Tí nducyáá^cá 'iiⁿyāⁿ chi neⁿe yā nadanguáⁿāi yā vida yeⁿe maáⁿ yā na iⁿ'yeeⁿdí 'cūū ní dindaí taama vida yeⁿé yā nanááⁿ Ndyuūs. Ní nducyáá^cá 'iiⁿyāⁿ chi dindaí yā vida yeⁿe yā cucáá^vā 'úú ní cucáá^vā nduudu cuaacu chí nguaⁿai 'iiⁿyāⁿ, tuu'mi ní nandaacá yā vida yeⁿe yā nanááⁿ Ndyuūs. ³⁶ ¿De'ē dichí'vē yeⁿe saⁿā ndúú^ti chi diiⁿ sa ganar nducuéⁿē chi véé iⁿ'yeeⁿdí 'cūū ní dindaí sa alma yeⁿē sa? ³⁷ ¿'Áá n'deēe cuuvi nadí'vē sa 'áámá 'iiⁿyāⁿ cucáá^vā alma yeⁿē sa? ³⁸ Nduuti chi 'áámá 'iiⁿyāⁿ cuuvi 'cuinaáⁿ yā yeⁿe 'úú ndúú^c nduudu yeⁿé nanááⁿ 'iiⁿyāⁿ chi véé nuuⁿndi yeⁿe yā, ní nguéé n'daācā idiíⁿ yā, 'tiicá ntūūⁿ 'úú chi Saⁿa chi Daiyá Ndyuūs, cuuví 'cuinaáⁿ yeⁿe yā taachi ndaá ndúú^c dēve ch'εete n'dai yeⁿē Chiidá ndúú^c ángeles chí dēve yā.

9

¹ Jesús ní caⁿa yā chii yā 'iiⁿyāⁿ s'eeⁿ: Cuaacu níⁿnyúⁿ ngaⁿá, chi véé ná'a nī chi snéé nī 'muuⁿ chi nguéé 'cuuví nī taanduvéé ndii snaaⁿ nī naachí Ndyuūs ngaⁿa ntiⁿnyúⁿ yā yeⁿē chi ndaa yā ndúú^c poder yeⁿé yā.

*Jesús n'daaⁿ yā cuerpo yeⁿe maáⁿ yā
(Mt. 17.1-13; Lc. 9.28-36)*

² Cho'ó jaāⁿ nguuvu, ní Jesús candéε yā Pedro, ndúú^c Jacobo, ndúú^c Juan. Ní cheⁿe yā ndúú^c 'iiⁿyāⁿ s'eeⁿ na 'áámá yīcū yaacu. Ní miiⁿ ní Jesús n'daaⁿ yā cuerpo yeⁿe yā nanááⁿ 'iiⁿyāⁿ s'eeⁿ. ³ Catecai yā nguuecundáā ngii n'gai ní cuéē tan'dúú^c nieve. Mar 'áámá 'iiⁿyāⁿ yeⁿe iⁿ'yeeⁿdí 'cūū nguéé cuuvi naáⁿnú yā 'áámá tīnūūⁿ táátii cuéē. ⁴ Ní che'enaāⁿ sáⁿā profeta Elías ndúú^c Moisés, 'iiⁿyāⁿ s'eeⁿ chí ch'iī ndíi cuááⁿ vmnaaⁿ. Ní ndeé yā ndúú^c Jesús. ⁵ Tuu'mi ní Pedro miiⁿ ní caⁿa sá chii sá Jesús: N'díi Maestro, de'ε chúú^c n'daācā yeⁿe yú chi 'cuēetinéé yú 'muuⁿ. Din'dái 'nū 'iīnū va'ai 'líiⁿ: 'Áámá yeⁿé nī, táámá yeⁿe Moisés, táámá yeⁿe profeta Elías.

⁶ Discípulos ní di'yáá yā chíi. Ní Pedro miiⁿ nguεε deenu sa de'ē chi ngaⁿa sa. ⁷ Tuu'mi ní ndaā vmnááⁿ yeⁿe 'iiⁿyāⁿ s'eeⁿ 'áámá meēeⁿ ní sn'dii 'iiⁿyāⁿ s'eeⁿ. Ní discípulos ch'iindiveéⁿ yā 'áámá nduudu chi ngaⁿa nguuaⁿ meēeⁿ miiⁿ chí ngaⁿā: Sáⁿa 'cūū Saⁿā Daiyá chí neⁿe n'dái. Cu'neeⁿ veéⁿ nī yeⁿē sa.

⁸ Hora míiⁿ nūūⁿ, taachi discípulos n'diichí yā, 'āā ntéé du'ū vεε snéé ndúú^c yā, 'āā dámaāⁿ Jesús miiⁿ nduucú yā.

⁹ Taachí nangua'á yā yeⁿe yīcū miiⁿ na yúúní miiⁿ naachi cunaⁿa yā Jesús caⁿa yā chíi yā 'iiⁿyāⁿ s'eeⁿ chi nguéé caaⁿmáⁿ yā yeⁿe chí n'diichi yā, ndíi taachi Saⁿa chí Daiya Ndyuūs nduuchi sa yeⁿē nguuaⁿ tináⁿā. ¹⁰ Cáá^vā chuū nanguáíⁿ daí yā chí canúúⁿ n'de'ei nguuaⁿ maáⁿ yā, naati ntiinguunéⁿ yā nguuaⁿ maáⁿ yā ¿de'ē chí 'túú^c chí nduuchi sa yeⁿē nguuaⁿ tináⁿā? ¹¹ Tuu'mi ní discípulos ntiinguunéⁿ yā Jesús ní caⁿa yā: ¿De'ē cúúví chí ngaⁿā maestros yeⁿe ley chí Elías miiⁿ canéé chí ndaa vmnaaⁿ sa?

¹² Jesús miiⁿ nan'guuecútaⁿa yā ní caⁿa yā chíi yā discípulos: Cuaacu níⁿnyúⁿ chí Elías miiⁿ 'āā ndaá sá vmnááⁿ vmnaaⁿ ní diiⁿ sa n'nεε sa tanducuéⁿē yeⁿé Ndyuūs. ¿De'é ngaⁿā naachi canéé nguūⁿ na libro yeⁿe Ndyuūs yeⁿe Saⁿā chí Daiya Ndyuūs? Ngaⁿa chí canéé chí 'cueenu sá cuuvi ní 'iiⁿyāⁿ s'eeⁿ díiⁿ yā despreciar saⁿā ní nguéé neⁿe yā saⁿā. ¹³ Naati maaⁿ ní ngaⁿá chí 'āā ndaā profeta Elías miiⁿ ní 'iiⁿyāⁿ s'eeⁿ 'āā díiⁿ yā chí

neⁿe yā ndúúcu sa, tan'dúúca chí ngaⁿa naachi canéé nguūⁿ na libro yeⁿ'é Ndyuūs yeⁿ'ē chí canéé chí chó'ōo.

Jesús divii yā espíritu yeⁿ'e yááⁿn'guiinūuⁿ yeⁿ'ē 'aama saⁿ'ā 'díⁿ
(Mt. 17.14-21; Lc. 9.37-43)

¹⁴ Cuayiivi míⁿ Jesús ndaa yā naachi snéé discípulos yeⁿ'e yā. N'diichí yā neené n'deē 'iiⁿ'yāⁿ cuaaⁿ 'diituú discípulos yeⁿ'é yā. Véé ntúūⁿ maestros yeⁿ'e ley miiⁿ chí ndeé yā n'deē n'dáí ndúúcu discípulos. ¹⁵ Ní taachi n'díchi nducyaaca yā Jesús miiⁿ cueⁿ'e yiinu yā ní ngéenu yā ní ndáa yā nanááⁿ Jesús chí díⁿ yā saludar Jesús. ¹⁶ Tuu'mi ní Jesús ntiinguuneeⁿ yā 'iiⁿ'yāⁿ s'eeⁿ: ¿De'é ngaⁿa nī ndúúcu 'iiⁿ'yāⁿ s'tíi?

¹⁷ 'Áamá chéé 'iiⁿ'yāⁿ s'eeⁿ chí snéé yā miiⁿ nn'guaacútaⁿ'a yā: N'díi Maestro, ndéé 'aama daiyá, chí canéé sá ndúúcu 'áamá espíritu yeⁿ'e yááⁿn'guiinūuⁿ chí díⁿ chí nguéé ngíi ngaⁿ'ā sa. ¹⁸ 'Āā tíi nūuⁿ naachi canéé sá espíritu 'cūū ní sta'a sáⁿ'ā ní n'geēcu sáⁿ'ā ná yáⁿ'āa. Ní saⁿ'ā miiⁿ ní ican'dáa yáⁿ cuaaⁿ cheendi sa. Ní n'geēcu r'íi 'díⁿ'yúⁿ sá. Chíⁿ chí neené nduuví duūvā sa. 'Āā ngíi discípulos yeⁿ'e nī chí tun'dáa yā espíritu yeⁿ'e yááⁿn'guiinūuⁿ, naati nguéé cuuvi díⁿ yā.

¹⁹ Jesús nan'guēcútaⁿ'a yā yeⁿ'e 'iiⁿ'yāⁿ s'eeⁿ: Ndís'tiī, 'iiⁿ'yāⁿ chí nguéé i'téenu nī. ¿Áá 'naaⁿ tiempo canéé chí cuneé ndúúcu ndís'tiī? ¿Áá 'naaⁿ tiempo canéé chí cucheé ndúúcu nī? Candéé nī 'muuⁿ saⁿ'ā 'díⁿ.

²⁰ Cheⁿ'e yā nguai yā saⁿ'ā 'díⁿ miiⁿ. Ní taachí n'diichi espíritu yeⁿ'e yááⁿn'guiinūuⁿ Jesús miiⁿ, yááⁿn'guiinūuⁿ miiⁿ chindēve saⁿ'a 'díⁿ miiⁿ. Chēcu ndáa sa ní n'gee yáⁿ cuááⁿ cheendi sa. ²¹ Tuu'mi ní Jesús ntiinguuneeⁿ yā chiida saⁿ'ā 'díⁿ: ¿Áá 'naaⁿ canee sa ndúúcu ca'ai 'cūū? Chiida sa miiⁿ ní caⁿ'a yā: Ndi chí 'líⁿ sa. ²² Néené n'deē cuuví espíritu yeⁿ'e yááⁿn'guiinūuⁿ miiⁿ ní n'gaanuuⁿ sáⁿ'ā nguaaⁿ nguuchi yáⁿ'ā ní nguaaⁿ nuūⁿnīⁿ va, chí neⁿ'e 'caāⁿ'nūⁿ saⁿ'ā. N'diī Jesús, ndúúti chí cúví díⁿ nī 'tē de'ē chí cunnee nī nús'uu, ní nuuⁿ nnee ya'āi 'iinú nī nús'uu ní cunnee nī nús'uu.

²³ Jesús caⁿ'a yā chí yā saⁿ'ā miiⁿ: Nduuti chí cuuvi cu'téenu dí, tuu'mi ní tanducuéⁿē ní cuuvi cáávā 'iiⁿ'yāⁿ chí i'téenu yā.

²⁴ Tuu'mi ní chiida sa néené 'caī ní ngēcú yā. Ní caⁿ'a yā: 'Úú cu'teenú. Cunnee nī 'úú ní cuuvi cu'teenú ca.

²⁵ Taachí Jesús n'diichí yā chí neené n'deē 'iiⁿ'yāⁿ nduuvidaamá yā, ngaⁿ'a diitú yā ndúúcu espíritu yeⁿ'e yááⁿn'guiinūuⁿ ní caⁿ'a yā: Dii espíritu chí díⁿ chí nguéé ngíi ngaⁿ'a ní nguéé n'giindiveéⁿ 'úú cuuví díⁿ chí nan'dáa dí yeⁿ'e cuerpo yeⁿ'e saⁿ'ā 'díⁿ 'cūū, ní 'āā ntéé nguēcunee dí cundaā dí na cuerpo yeⁿ'ē sa.

²⁶ Espiritu miiⁿ ní chindēve saⁿ'ā 'díⁿ miiⁿ ní chēcundáa saⁿ'ā taama vmnéⁿ'ēe ní nan'daā yeⁿ'ē sa. S'neeⁿ saⁿ'ā 'díⁿ miiⁿ tan'dúúca chí ch'ii sa. Taachí 'iiⁿ'yāⁿ s'uuⁿ n'diichí yā saⁿ'ā 'díⁿ miiⁿ neené 'yaaⁿ yā caⁿ'a yā chí n'díⁿ sá. ²⁷ Naati Jesús miiⁿ ní sta'á yā ta'ā sa, ní nadicúeeⁿ yā saⁿ'ā. Saⁿ'ā 'díⁿ miiⁿ ní chéendii sa.

²⁸ Cuayiivi ní Jesús sndaā yā na 'áamá va'ai, ní discípulos yeⁿ'e yā ntiinguuneeⁿ yā Jesús taachi snéé yā 'áamá lado: ¿De'ē cúví chí nús'uu nguéé chitun'dáa 'nū espíritu yeⁿ'e yááⁿn'guiinūuⁿ yeⁿ'e saⁿ'ā 'díⁿ?

²⁹ Ní Jesús caⁿ'a yā: Espiritu 'cūū chí 'túúca nguéé nan'daā yeⁿ'e 'iiⁿ'yāⁿ chí 'tiicá nūuⁿ caati dámaāⁿ chí ngaⁿ'angua'á yā ndúúcu chí nguéé 'āā ca'diinú yā nguuvi chí ngaⁿ'angua'á yā.

Jesús ngaⁿ'a ntúuⁿ yā yeⁿ'e vaadi n'gii yeⁿ'e yā
(Mt. 17.22-23; Lc. 9.43-45)

³⁰ Taachí can'daā Jesús ndúúcu discípulos na yááⁿ miiⁿ, cho'ó yā na yáⁿ'āa Galilea. Jesús miiⁿ nguéé neⁿ'e yā chí cadinuuⁿ mar 'áamá 'iiⁿ'yāⁿ chí canee yā miiⁿ, ³¹ ti Jesús miiⁿ ní ngi'cueeⁿ yā discípulos yeⁿ'e yā chí Saⁿ'a chí Daiya Dendyuūs miiⁿ ní canéé chí ca'a yā sáⁿ'ā na ta'āa 'iiⁿ'yāⁿ. Ní canéé chí 'caaⁿ'núⁿ yā saⁿ'ā. Ní taachí 'āā 'cuuví sa chēti 'iinū nguuvi canéé chí nduuchi sa yeⁿ'ē nguaaⁿ tináⁿ'ā. ³² Naati discípulos ní nguéé túúmicádíínuuⁿ yā chí ngaⁿ'a Jesús. Ní 'va'a yā chí ntínguuneeⁿ yā yeⁿ'e chúū.

¿Du'ū cá chí ch'εετε ca?

(Mt. 18.1-5; Lc. 9.46-48)

³³ Tuu'mi ní ndaa Jesús ndúúcu discípulos yeⁿe yā na yāāⁿ Capernaum; ní taachí ndaa yā 'áámá va'ai, Jesús ntinguuneéⁿ yā discípulos: ¿De'é ngaⁿa ndís'tiī cuaaⁿ cyúúní?

³⁴ Discípulos ní 'āā ntéé caⁿ'á yā mar 'áámá ti cuaaⁿ cyúúní míⁿ ntínguuneéⁿ vi'i yā cheé ca yā chí ch'εετε ca yā. ³⁵ Tuu'mi ní Jesús miiⁿ ch'iindí yā ní yaa'ví yā ndiichúúví discípulos yeⁿ'é yā chí cuchii yā nanáaⁿ yā. Ní cāⁿ'a yā: Ndúúti chí 'áámá ndís'tiī neⁿ'e nī cuuví nī cuááⁿ vmnaaⁿ, canéé chí cuuví nī ndii cuayiivi yeⁿ'ē nducyáácá yā ní ndiicuuⁿ ca nī. Ní canéé chí dichí'vē nducyaaca 'iiⁿ'yāⁿ.

³⁶ Tuu'mi ní Jesús sta'á yā 'áámá saⁿ'ā 'lííⁿ ní s'neeⁿ yā naavtáⁿ'ā yeⁿ'e discípulos. Ní sta'á yā saⁿ'a 'lííⁿ miiⁿ ní ca'nuúⁿ yā saⁿ'ā. Ní caⁿ'a yā chí yā discípulos yeⁿ'e yā: ³⁷ 'Iiⁿ'yāⁿ chí 'cuaáⁿ yā saⁿ'ā 'lííⁿ 'túúcā, nduúcu chí duuchí, 'iiⁿ'yāⁿ miiⁿ ní 'cuaáⁿ yā 'úú. 'Iiⁿ'yāⁿ chí 'cuaáⁿ yā 'úú, nguéé dámaāⁿ 'úú cuaáⁿ yā, naati 'cuaáⁿ ntúuⁿ yā 'iiⁿ'yāⁿ chí dichó'o yā 'úú.

Yeⁿ'e 'iiⁿ'yāⁿ chí lado yeⁿ'e Jesús

(Mt. 10.42; Lc. 9.49-50)

³⁸ Tuu'mi ní Juan miiⁿ ní caⁿ'a sa chí sa Jesús: N'dií Maestro, n'diichí 'nū 'áámá saⁿ'ā chí diví sa espíritus yeⁿ'e yáán'guiinūⁿ yeⁿ'e 'iiⁿ'yāⁿ ndúúcu chí dúúchí nī, naati sáⁿ'ā miiⁿ ní nguéé cachicá sá ndúúcu nús'uu. Nguéé 'cuúⁿ 'nū chí diiⁿ sa 'tíicā.

³⁹ Jesús caⁿ'a yā chí yā discípulos: Ndís'tiī 'cuáaⁿ nī chí diiⁿ sa 'túúcā; ti nguéé véé mar 'áámá 'iiⁿ'yāⁿ chí diíⁿ yā vaadī n'giinu ndúúcu chí duuchí, ní cuayiivi cúúví caaⁿ'máⁿ yā chí 'úú ní nguéé n'daācā 'úú. ⁴⁰ Ti 'iiⁿ'yāⁿ chí nguéé idiíⁿ yā contra yeⁿ'e s'uūuⁿ, ní yeⁿ'é yā favor yeⁿ'ē yú. ⁴¹ 'Āā du'ú nūuⁿ 'iiⁿ'yāⁿ chí téé yā ndís'tiī 'áará chí 'áámá vaso nuūⁿnīⁿ ndúúcu chí duuchí, ti ndís'tiī yeⁿ'e Cristo ndís'tiī, cuaacu níⁿnyúⁿ 'iiⁿ'yāⁿ miiⁿ ní véé chí ndaācā chí cuuvi yeⁿ'e yā ná va'ai cheeti nguuvi.

Yeⁿ'e dendu'ū chí diiⁿ chí 'iiⁿ'yāⁿ diiⁿ nuuⁿndí yā

(Mt. 18.6-9; Lc. 17.1-2)

⁴² Tuu'mi ní caⁿ'a Jesús: 'Āā du'ú nūuⁿ 'iiⁿ'yāⁿ chí diíⁿ yā chí 'áámá chee chí n'gaiyāá chí i'téenu yā 'úú diíⁿ yā nuuⁿndi, n'daācā ca cáávā 'iiⁿ'yāⁿ miiⁿ chí 'iiⁿ'yāⁿ s'eeⁿ cāchiichí yā 'áámá tuūu yúúdu chí inguú 'iiⁿ'yāⁿ na daandu yā ní canuúⁿ yā 'iiⁿ'yāⁿ miiⁿ naachí yaānuúⁿ yeⁿ'e nuūⁿnīⁿ'yāⁿ'ā. ⁴³ Ní ndúúti chí ta'ā di idiíⁿ chí dinuuⁿndi di, n'daacā ca chí 'caaca di ta'a di ní diví di. N'daacā ca chí ndaā di ndúúcu 'aama ta'á nūuⁿ di ná vida cueⁿ'e daāⁿmaⁿ, ní nguéé chí caⁿ'ā di ndúúcu 'uúvi ta'a di na infierno, naachí nguúchí yaⁿ'ā miiⁿ ní nguéé ín'tuúvī. ⁴⁴ Lugar miiⁿ naachi nguéé n'gii n'daāa ní nguuchi yaⁿ'ā miiⁿ ní 'āā ntéé n'tuúvī. ⁴⁵ Ndúúti chí ca'a di idiíⁿ chí dinuuⁿndi di 'caaca ntúuⁿ di ní diví di. N'daacā ca chí ndaa di lo'ō di na vida cueⁿ'e daāⁿmaⁿ miiⁿ, nguéé ti chí caⁿ'ā di ndúúcu 'uuví ca'a di na infierno naachí nguuchi yáⁿ'ā miiⁿ chí nguéé ín'tuúvī. ⁴⁶ Lugar miiⁿ ní naachi nguéé n'gii n'daāa ní nguuchi yáⁿ'ā miiⁿ 'āā ntéé ín'tuúvī. ⁴⁷ Ndúúti chí nduutináaⁿ di diiⁿ chí idinuuⁿndí di, tuu'mi ní tun'dáa di; ti n'dáácā ca chí ndaa di ndúúcu 'áámá nduutináaⁿ naachí Ndyuūs ngaⁿ'a ntiiⁿnyúⁿ yā, nguéé ti chí caⁿ'a di ndúúcu nduu 'uuvi nduutináaⁿ di na infierno, ⁴⁸ naachi n'daāa míⁿ nguéé n'gíi tī ní nguuchi yáⁿ'ā miiⁿ 'āā ntéé ín'tuúvī tan'díi nūuⁿ.

⁴⁹ Ti nducyaaca 'iiⁿ'yāⁿ chí i'téenu yā canéé chí n'diichi néⁿ yā 'cuenú yā cuuvi tan'dúúcā chí cho'ó ná nguuchi yaⁿ'ā, ní tanducuéⁿ'ē 'iiti chí 'iiⁿ'yāⁿ 'caaⁿ'núⁿ yā cáávā ofrenda yeⁿ'é Ndyuūs, diíⁿ yā preparar 'iiti miiⁿ ndúúcu yīimā. ⁵⁰ Yīimā ní n'dai. Ní nduuti chí nguεε ndaācā sabor yeⁿ'ē, ¿dé'ē cuuvi diíⁿ nī, ní cuuvi ndaācā sabor yeⁿ'ē? Ndís'tiī cuneé nī tan'dúúcā chí yīimā, 'tíica cuneé nī, ní canéé n'daaca nī 'aama nī taama nī ndúúcu vi'ī.

10

Jesús ngi'cueeⁿ yā yeⁿ'e divorcio chí i'teechí vi'i 'iiⁿ'yāⁿ

(Mt. 19.1-12; Lc. 16.18)

¹ Jesús can'daa yā yeⁿe yāāⁿ Capernaum, ní cueⁿe yā na yāⁿāa Judea ndúúcu yāⁿāa chi canee táámá lado yeⁿe yícu Jordán. Miiⁿ ní nduuvidaama ntúuⁿ 'iiⁿyāⁿ naachi canéé Jesús miiⁿ. Jesús tuca'a yā chi'cueⁿ yā 'iiⁿyāⁿ s'eeⁿ tan'dúúca costumbre yeⁿe yā. ² Tuu'mi ní n'duuvu 'iiⁿyāⁿ fariseos ndaa yā nanááⁿ Jesús ti neⁿé yā n'diichíneeⁿ yā Jesús miiⁿ. Ní ntiinguunéeⁿ yā Jesús ndúúti chi n'daācā chí saⁿā n'teēchi sá n'daataá yeⁿe sa. ³ Jesús miiⁿ ní nan'gueécútaⁿa yā: ¿Dē'ε caⁿa Moisés chii sa ndís'tiī na ley yeⁿe yú?

⁴ Fariseos ní caⁿa yā chii yā Jesús: Moisés miiⁿ ní 'cuūⁿ sa chi ca'a sá n'daataa miiⁿ 'áámá caaca yeⁿe chí i'teēchi vi'i yā. Tuu'mi ní cu'neeⁿ sa táⁿā sa.

⁵ Tuu'mi ní Jesús caⁿa yā chii yā fariseos: Moisés miiⁿ tee sa mandamiento 'cūū, ndís'tiī, caati ndís'tiī ní neenē cheēchi staava yeⁿe nī. ⁶ Naati ndíí cuaaⁿ vmnaaⁿ, taachi Ndyuūs din'dái yā tanducuéⁿe dendu'ū, din'dái yā sáⁿā ndúúcu n'daataá. ⁷ Chííⁿ chi saⁿā miiⁿ cun'nééⁿ sa chiida sa ndúúcu cheecu sá ní ndūūvidaama sa ndúúcu n'daataá yeⁿe sa, ⁸ ní nduu 'uuví yā ní nduūvī 'aama yā ndúúcu ví'ī. Chííⁿ chí 'āā ntéé 'uūvi yā tí 'āā 'aama núúⁿ yā. ⁹ Chííⁿ chí saⁿā miiⁿ nguéé canee chí nadvíi sa chí Ndyuūs nadaamā yā.

¹⁰ Cuayiivi miiⁿ taachí 'āā snée Jesús ndúúcu discípulos yeⁿe yā cheetí 'áámá va'āī, miiⁿ discípulos nguēcunée yā ntiinguuneeⁿ yā Jesús yeⁿe nduudu 'cūū. ¹¹ Jesús caⁿa yā chii yā discípulos: Saⁿā chi cu'neeⁿ sá n'daataá yeⁿe sa ní 'caandivaacu sa ndúúcu táámá n'daataá, saⁿā miiⁿ ní idinuuⁿndi sa chi véé táámá n'daataá yeⁿe sa. ¹² Ní ndúúti chi 'áámá n'daataá cu'neeⁿ ta isáⁿā yeⁿe tá ní 'caandivaacu tá ndúúcu táámá saⁿā, 'tiicá ntúūⁿ n'daataá miiⁿ idinuuⁿndi tá chi véé taama isáⁿā yeⁿe tá.

Jesús di'viicú yā dá'caiyā

(Mt. 19.13-15; Lc. 18.15-17)

¹³ Tuu'mi ní 'iiⁿyāⁿ s'eeⁿ níndeé yā da'caiyā nanááⁿ Jesús, chi Jesús tuu'ví yā da'caiyā miiⁿ; naati discípulos ní yaa'vi néen yā 'iiⁿyāⁿ s'eeⁿ chí ndéé da'caiyā s'eeⁿ. ¹⁴ Taachí Jesús n'diichi yā chuū, yaa'vi néen yā ní caⁿa yā chii yā discípulos: 'Cuaaⁿ nī chii da'caiyā nanaáⁿ, ní nguéé ndivíi nī yeⁿe, ti na va'ai cheeti nguuvu naachi Ndyuūs ngaⁿa ntiiⁿnyúⁿ yā ní yeⁿe da'caiyā s'tiī, 'tíicā. ¹⁵ Cuaacu níⁿnyúⁿ ngaⁿá ngíi ndís'tiī, 'iiⁿyāⁿ chi nguéé cu'téenu yā yeⁿe naachi Ndyuūs ngaⁿa ntiiⁿnyúⁿ yā tan'dúúca chí i'teenú 'aama dá'caiyā, nguéé cuuví cundaa yā naachi Ndyuūs ngaⁿa ntiiⁿnyúⁿ yā.

¹⁶ Ní Jesús sta'á yā da'caiyā miiⁿ ní ca'nuú yā ní di'viicú yā. Ní s'neeⁿ yā sn'duū tá'a yā vmnaaⁿ yeⁿe.

Yeⁿe saⁿa 'dííⁿ chi 'cuiica

(Mt. 19.16-30; Lc. 18.18-30)

¹⁷ Taachí Jesús candíí yā yúúni yeⁿe yā, ndaa 'áámá sáⁿā. Ngeenu sa nanááⁿ Jesús ní chíntii'ya sa nanááⁿ yā ní ntíinguuneeⁿ sa: N'diī Maestro chí n'dái nī, ¿dē'ε dííⁿ ní ndaacá vida cueⁿe daāⁿmaⁿ chi cuuvi yeⁿe?

¹⁸ Jesús caⁿa yā chii yā saⁿā: ¿Dē'ε cúúví chí ngaⁿā dí chí n'dai 'úú? Mar 'áámá 'iiⁿyāⁿ nguéé n'dai yā tí dámaaⁿ Ndyuūs. ¹⁹ Dii ní deenu di chí canéé nguūⁿ na ley chí 'tuucā: Nguéé caⁿa di ndúúcu táama n'daataá chí nguéé yeⁿe di. Nguéé 'caāⁿnuⁿ di. Nguéé diduucú di. Nguéé caaⁿmaⁿ nduudu yaadi yeⁿe mar 'áámá 'iiⁿyāⁿ. Nguéé cannche'ei di 'iiⁿyāⁿ. Dinéⁿe di chiida di ndúúcu cheecu di.

²⁰ Saⁿā miiⁿ ní nan'gueécútaⁿā sa: N'diī Maestro, tanducuéⁿe chuū 'āā idiíⁿ ndíi taachi saⁿā 'lííⁿ 'úú.

²¹ Jesús ní ch'iinu yā saⁿā 'dííⁿ ní dinéⁿe yā saⁿā. Ní caⁿa yā: Véé táámá chí indái yeⁿe di. Cuéⁿé dí n'diicú dí tanducuéⁿe chí véé yeⁿe di, ní ca'a di 'iiⁿyāⁿ chí nguéé yeⁿe yā. Tuu'mi ní ndaācā chí véé vaadi 'cuiica yeⁿe na va'ai cheeti nguuvu chí cuuvi yeⁿe di. Tuu'mi ní cutá'a di cruz yeⁿe di chí yeⁿe chí 'cueenu di cuuvi ní cuchii di ní caⁿa di nduucú.

²² Naatí taachi ch'iindiveeⁿ sá chuū, néenē s'neeⁿ ya'āī 'iinu sa ní neene ndaachi 'iinu sa. Ní cunaⁿa sa ti neenē 'cuiica sa.

²³ Tuu'mi ní Jesús ch'iinu yā cuaaⁿ 'diitúú yā ní caⁿ'a yā chii yā discipulos yeⁿ'e yā: De'ē chúúca ngíⁿ'i chi cundaā 'iiⁿ'yāⁿ 'cuiica naachí Ndyuūs ngaⁿ'a ntiiⁿ'nyúⁿ yā.

²⁴ Discipulos ní nge'e yiinu yā yeⁿ'e nduudu yeⁿ'e yā; naati Jesús ní caⁿ'a ntúuⁿ yā: Ndís'tií daiyá, de'e chúúca ngíⁿ'i chi 'iiⁿ'yāⁿ chi idinéⁿ'e ca yā chi véé yeⁿ'e yā chí cundaā yā naachí Ndyuūs ngaⁿ'a ntiiⁿ'nyúⁿ yā. ²⁵ Nguéé ngíⁿ'i cá chi 'áámá 'iiti camello, chi ch'εεε cá nguéé ti 'yúúduu chi cho'ó tī na nduutinááⁿ 'iini, chi cheendi va'ai 'lííⁿ nguéé ti 'áámá 'iiⁿ'yāⁿ 'cuiica i'téenu yā Ndyuūs ní cundaā yā naachí Ndyuūs ngaⁿ'a ntiiⁿ'nyúⁿ yā.

²⁶ Taachí discipulos ch'iindiveéⁿ yā chuū, nadicádíínuuⁿ taavi ca yā ní nguaaⁿ maaⁿ yā ntíínguunééⁿ yā vi'í. Tuu'mi ní ngaⁿ'a yā: ¿Du'ú cuuví nanguaⁿ'ái?

²⁷ Jesús miiⁿ ch'iinu yā discipulos ní caⁿ'a yā: Saⁿ'ā iⁿ'yeeⁿ'dí 'cūū nguéé cuuvi diiⁿ sa chuū, naati Ndyuūs cuuvi diíⁿ yā caati nanááⁿ Ndyuūs nguéé de'ē veε chi nguéé cuuvi diíⁿ yā.

²⁸ Tuu'mi ní Pedro miiⁿ tuca'a sa caⁿ'a sa ní caⁿ'a sa chii sa 'iiⁿ'yāⁿ: Nús'uu ní s'neéⁿ 'nū tanducuéⁿ'ē chi véé yeⁿ'é 'nū, ní cuchíí 'nū nduucú nī.

²⁹ Jesús nan'gueεcútaⁿ'a yā: Cuaacu níⁿ'nyúⁿ ngaⁿ'á ngíí ndís'tií. 'Áā du'ú nūuⁿ 'iiⁿ'yāⁿ chí cu'neéⁿ yā vaacu yā, o 'díínu yā, o ví'í, o cheεcú yā, o chiidá yā, o n'daataá yeⁿ'é yā, o daiya yā, o yáⁿ'āa yeⁿ'e yā, cáávā 'úú ní cáávā chi candεε yā nduudu chi nguaⁿ'ai 'iiⁿ'yāⁿ, ³⁰ cuta'á yā na iⁿ'yeeⁿ'dí 'cūū 'áámá ciento cúúví cá chí n'deeε ca dendu'ū yeⁿ'e va'ai s'eeⁿ ndúúcu 'díínu yā ndúúcu 'cεε've yā ndúúcu vi'í yā, ndúúcu chiidá yā, ndúúcu cheεcú yā, ndúúcu daiya yā, ní yeⁿ'ē yáⁿ'āa yeⁿ'e yā. Ní canéé chí n'géénu yā ngii chí 'iiⁿ'yāⁿ idiíⁿ yā naati ná iⁿ'yeeⁿ'dī chí cuchíí ndaācā vida cueⁿ'e daāⁿ'maⁿ yeⁿ'e yā. ³¹ Nééne 'yaaⁿ 'iiⁿ'yāⁿ chí maaⁿ snée yā cuaaⁿ vmnaaⁿ 'iiⁿ'yāⁿ s'eeⁿ 'cuεetinée yā cuaaⁿ chi cuayiivi. Ní neene 'yaaⁿ 'iiⁿ'yāⁿ chí maaⁿ snée yā cuaaⁿ chí cuayiivi, 'iiⁿ'yāⁿ s'eeⁿ 'cuεetinée yā vmnaaⁿ.

Jesús ngaⁿ'a ntúuⁿ yā yeⁿ'e chí 'cuúví yā

(Mt. 20.17-19; Lc. 18.31-34)

³² Jesús ndúúcu discipulos yeⁿ'e yā snúúⁿ yā yúúní ní cuheε yā na yāāⁿ Jerusalén. Jesús cueⁿ'é yā vmnááⁿ discipulos. Ní discipulos nadicádíínuuⁿ yā ní cueⁿ'e yiínú yā ní 'va'á yā. Tuu'mi ní Jesús miiⁿ nguεεcunée yā ní yaaⁿ'vi ndiichúúví discipulos yeⁿ'e yā ní tuca'a yā caⁿ'a yā chii yā discipulos yeⁿ'e chí canéé chí 'cuúví yā. ³³ Ní caⁿ'a yā Cun'diichí nī, caa yú na yāāⁿ Jerusalén, naachí 'úú chí Saⁿ'a chí Daiya Dendyuūs miiⁿ ní 'iiⁿ'yāⁿ nca'a yā 'úú chiiduú n'gεεε ndúúcu maestros yeⁿ'e ley. Ní 'iiⁿ'yāⁿ s'eeⁿ caacá yā yeⁿ'e 'úú chí 'cuúví. Ní nca'á yā 'úú 'iiⁿ'yāⁿ chí nguéé ndaata yeⁿ'ē Israel. ³⁴ Ní 'caaⁿ'nyuⁿ néen yā 'úú. Ní 'cueⁿ'é yā 'úú ní ca'a neeⁿ daiⁿ yā 'úú. 'Cuiinu chuū ní 'caaⁿ'núⁿ yā 'úú. Naati ndiichi ndii 'íínu nguuví miiⁿ, nduuchí yeⁿ'ē nguaaⁿ tináⁿ'ā.

Jacobo ndúúcu Juan ngííca sá 'áámá favor

(Mt. 20.20-28)

³⁵ Tuu'mi ní Jacobo ndúúcu Juan, chí daiya Zebedeo, ndaá yā nanááⁿ Jesús miiⁿ ní caⁿ'a sa: N'dií Maestro, neⁿ'é 'nū chí diíⁿ nī 'áámá favor chí ngiica 'nū.

³⁶ Tuu'mi ní Jesús ntiinguuneéⁿ yā: ¿De'ē neⁿ'e nī chí diíⁿ?

³⁷ Tuu'mi ní caⁿ'a sa chii sa Jesús miiⁿ: 'Cuááⁿ dí chí 'cuεēté 'nū 'áámá 'nū lado tá cuaācú di ní táámá 'nū ní lado tá 'cueē di taachi 'āā ndaá hora yeⁿ'e chí ngaⁿ'a ntiiⁿ'nyuⁿ dí yeⁿ'e nducuéⁿ'ē.

³⁸ Tuu'mi ní Jesús miiⁿ caⁿ'a yā: Ndís'tií nguéé déénu nī de'ē chí ngiica nī. ¿'Áá cuuvi diiⁿ di cu'u nuúⁿ nī yeⁿ'ē chí n'geēⁿ cheeti vaso chí yeⁿ'e chí 'cuenú cuuvi? ¿'Áá cuuvi cuta'á nī maaⁿ chí ngeédínuūⁿ chí cuta'á?

³⁹ Juan ndúúcu Jacobo miiⁿ ní nan'gueεcútaⁿ'a yā: Cuuvi diíⁿ 'nū. Tuu'mi ní Jesús caⁿ'a yā chii yā 'iiⁿ'yāⁿ s'eeⁿ: Cuaacu níⁿ'nyúⁿ canéé chí cu'ú nī yeⁿ'e vaso chí yeⁿ'e chí 'cuenú cuuvi ní canéé chí cuta'á nī chí ngeédínuūⁿ chí 'úú ita'á. ⁴⁰ Caati nguéé ituneeⁿ 'úú chí ca'á du'ū chí 'cuúndi lado tá cuaacú o lado ta 'cueē. Lugar 'cūū ní Ndyuūs ca'á yā 'iiⁿ'yāⁿ chí Ndyuūs diíⁿ yā 'cundiyaáⁿ yā cáávā 'iiⁿ'yāⁿ.

⁴¹ Taachí ch'iindiveéⁿ ndu'u ndiichí discípu^los chuū, ndu^uvi taáⁿ yā ndúú^c Jacobo ndúú^c Juan miiⁿ. ⁴² Jesús ní yaa[']vi yā discípu^los ní caⁿ'a yā: Tan[']dúú^cā chi ndís[']tiī deenu nī, 'iiⁿ'yāⁿ chí ngaⁿ'a ntiⁱ'nyúⁿ yā yeⁿ'e naciones véé poder yeⁿ'é yā nguaaⁿ 'iiⁿ'yāⁿ yeⁿ'e nación yeⁿ'e yā ní 'iiⁿ'yāⁿ chí n'gēete cá yeⁿ'ē naciones ngaⁿ'a ntiⁱ'nyúⁿ yā 'iiⁿ'yāⁿ s'eeⁿ. ⁴³ Naati nguaaⁿ ndís[']tiī, nguēē tífcā. 'Iiⁿ'yāⁿ chí neⁿ'e cuuvi ch'ēete yā nguaaⁿ ndís[']tiī canéé chí dichí[']ve yā 'iiⁿ'yāⁿ. ⁴⁴ 'Āā du[']ú nū^u ndís[']tiī chí neⁿ'e nī cunee nī cuaaⁿ vmaaaⁿ yeⁿ'e ndís[']tiī canéé chí dichí[']ve nī nducyaaca 'iiⁿ'yāⁿ. ⁴⁵ Naati Sáⁿ'ā chí Daiya Dendyuūs nguéé ndaā sa chí 'iiⁿ'yāⁿ dichí[']ve yā saⁿ'ā, ti maaⁿ sa dichí[']ve sa nducyaaca 'iiⁿ'yāⁿ, ní ca[']a sa vida yeⁿ'e maāⁿ sa tan[']dúú^cā precio yeⁿ'ē nuuⁿndi cáávā chí nanguaⁿ'ai yā n'dee n'daí 'iiⁿ'yāⁿ.

Jesús n'guaaⁿ yā nduutinááⁿ saⁿ'ā Bartimeo

(Mt. 20.29-34; Lc. 18.35-43)

⁴⁶ Tuu[']mi ní ndaā Jesús ndúú^c discípu^los na yāāⁿ Jericó. Ní taachí can[']daa yā yāāⁿ Jericó ndúú^c 'yaa['] n'daí 'iiⁿ'yāⁿ 'áámá sáⁿ'ā chí ngeenaáⁿ chí ngu^uvi Bartimeo, daiya Timeo, véé sá niiⁿ'nuúⁿ cyúúⁿ ní ngiica sá limosnas. ⁴⁷ Ní taachí ch'iindiveeⁿ sa chí Jesús yeⁿ'e yāāⁿ Nazaret cho[']o yā miiⁿ, saⁿ'a ngeenaáⁿ miiⁿ tuca[']a sa 'caí sa ní caⁿ'a sa: Jesús, Daiya David, nnéé ya[']āi 'iinúⁿ nī 'úú.

⁴⁸ Nééné 'yaa['] yā yaa[']vi neeⁿ yā saⁿ'ā miiⁿ chí cunēē 'díiⁿ sa cheendí sa, naati saⁿ'ā miiⁿ ní n'gai['] yiicú cá sá: N'diī Daiya David, nnéé ya[']āi 'iinúⁿ nī 'úú.

⁴⁹ Tuu[']mi ní Jesús cheendii yā ní caⁿ'a yā: Yaa[']vi nī saⁿ'ā chí cuchii sa 'muuⁿ. Ní cheⁿ'é yā ní chii yā saⁿ'ā chí ngeenaáⁿ miiⁿ: Canéé diitu di ní cáániicū di ndúú^ceeⁿ di ti Jesús n'gai['] yā dii.

⁵⁰ Tuu[']mi ní sn'dáa sa cotón yeⁿ'ē sa ní nadacueeⁿ sa ní chéⁿ'é sa ndaā sa nanááⁿ Jesús miiⁿ. ⁵¹ Tuu[']mi ní Jesús ntiinguunéⁿ yā saⁿ'ā: ¿De[']ē neⁿ'é di chí díⁿ ndúú^c dii? Sáⁿ'ā chí ngeenaáⁿ miiⁿ ní caⁿ'a sa: N'diī Maestro díⁿ nī chí snaáⁿ.

⁵² Jesús caⁿ'a yā: Cunaⁿ'ā di. 'Āā inaaⁿ di, ti s'téenu di. Hora 'cūū nū^u chí ngeenaáⁿ miiⁿ ní snaaⁿ sa ní cueⁿ'e sá ndúú^c Jesús miiⁿ na yúúⁿ.

11

Jesús ndaa yā na yāāⁿ Jerusalén

(Mt. 21.1-11; Lc. 19.28-40; Jn. 12.12-19)

¹ Taachí Jesús ndúú^c discípu^los ndaa yā niiⁿ'nuúⁿ na yāāⁿ Jerusalén, ndaa yā na yāāⁿ Betfagé, ndúú^c yāāⁿ Betania, niiⁿ'nuúⁿ na yiicū chí ngu^uvi Olivos. Ní Jesús dichó[']o yā na 'uū^uvi discípu^los yeⁿ'e yā. ² Ní caⁿ'a yā: Cuéⁿ'e nī na yāāⁿ 'líⁿ chí canéé niiⁿ'nuúⁿ ní taachí ndaa nī miiⁿ ndaaca nī 'áámá burro n'dēēchiichí tī. Burro miiⁿ ní mar 'áámá 'iiⁿ'yāⁿ 'āā cuéé cunduú yā 'iiti. N'daatí nī 'iiti ní candéē nī 'iiti 'múúⁿ. ³ Ndúú^ti chí 'áámá 'iiⁿ'yāⁿ tínguuneeⁿ yā ndís[']tiī: ¿De[']ē cúú^uví chí 'tífcā idiíⁿ nī? Caaⁿ'maⁿ nī cuuvi nī 'iiⁿ'yāⁿ tí Señor yeⁿ'e yú neⁿ'e yā 'iiti miiⁿ. Ní caama nadicho[']ó yā 'iiti.

⁴ 'Iiⁿ'yāⁿ s'eeⁿ ní 'tífcā cheⁿ'e yā, ní ndaāca yā burro miiⁿ n'déēchiichí tī na cyúúⁿ niiⁿ'nuúⁿ cheendiva[']āi. Ní n'daātí yā 'iiti. ⁵ N'dúú^uví 'iiⁿ'yāⁿ chí snéé yā miiⁿ ní caⁿ'a yā chí yā discípu^los: ¿De[']ē idiíⁿ nī? ¿De[']ē cúú^uví chí in'daatí nī burro?

⁶ Tuu[']mi ní discípu^los ní nan'guēcútaⁿ'a yā tan[']dúú^cā chí Jesús caⁿ'a yā chí yā 'iiⁿ'yāⁿ. Ní 'cuuⁿ yā chí discípu^los cueⁿ'e yā ndúú^c burro miiⁿ. ⁷ Tuu[']mi ní cueⁿ'e yā ndaá yā ndúú^c burro miiⁿ nanááⁿ Jesús miiⁿ. Ní sn'duú yā cotón yeⁿ'e yā vmaáⁿ yeⁿ'ē burro miiⁿ ní Jesús canduú yā 'iiti. ⁸ Taachí 'āā cueⁿ'e yā cuaaⁿ cyúúⁿ miiⁿ, nééné 'yaa['] 'iiⁿ'yāⁿ n'doó yā cotón yeⁿ'e yā cuaaⁿ cyúúⁿ miiⁿ. Taná[']a yā chí iicá yā dúúⁿē yá[']á ní chintaaví yā cuaaⁿ cyúúⁿ.

⁹ Nééné 'yaa['] ca yā chí cueⁿ'e yā cuááⁿ vmaaaⁿ miiⁿ yeⁿ'e Jesús ndúú^c 'yaa['] n'daí yā chí cuchii yā cuaaⁿ daami yā 'caí yā: De[']ē chúú^cā ch'ēete Ndyuūs. Ndyuūs di'viicú yā 'iiⁿ'yāⁿ chí cuchii yā ndúú^c chí dúú^uchí Señor miiⁿ. ¹⁰ De[']ē chúú^cā n'dai naachi ngaⁿ'a ntiⁱ'nyuⁿ Ndyuūs. Cúchiī tiempo maaⁿ chí tan[']dúú^cā yeⁿ'ē chiida yú David ngaⁿ'a

ntiiⁿnyúⁿ yā ndii cuááⁿ vmnaaⁿ. Hosanna. Nduudu miiⁿ ní nduudu Israel chi neⁿ'e caaⁿ'maⁿ na nduudu yeⁿ'e yú, chi ch'εete n'dai Ndyuūs chí canéé na va'ai cheeti nguuvi.

¹¹ Tíicā sndaā Jesús na yáāⁿ Jerusalén. Ní ndaá yā na yaacū templo yeⁿ'ē yáāⁿ Jerusalén miiⁿ. Ch'íinu yā tanducuéⁿ'ē dendu'ū nuuⁿmaⁿ cuaaⁿ 'diituú yā. Cueⁿ'e ntúuⁿ yā na yáāⁿ Betania ndúúcu ndu'ū ndiichuuví discípulos caati 'āā chi chiiⁿnū.

Jesús ngaⁿ'a yā ngii yā yáⁿ'á n'guídii yaaⁿ nguuví miiⁿ
(Mt. 21.18-19)

¹² Chidεεve táámá nguuvi miiⁿ, taachí Jesús ndúúcu discípulos yeⁿ'é yā can'daa yā na yaāⁿ Betania, Jesús miiⁿ chí cuiicu yā. ¹³ Ní n'diichi yaⁿ'ái yā 'áámá yáⁿ'á yeⁿ'e n'guídii yaaⁿ nguuvi chí véé tá'āa. Ní cueⁿ'é yā n'diichi yā chí 'áá snéé n'gui'i yeⁿ'ē. N'diichí yā chí nguéé ndaācā n'gui'i yeⁿ'ē ti ta'á nūuⁿ, ti nguéé tiempo yeⁿ'ē. ¹⁴ Tuu'mi ní Jesús miiⁿ caⁿ'a yā chii yā yáⁿ'á míⁿ, 'túúca: Dii yáⁿ'á, mar 'áámá 'iiⁿ'yāⁿ nguéé ché'e yā n'gui'i yeⁿ'ē di, tanducuéⁿ'ē tiempo. Discípulos yeⁿ'e yā ch'iindiveéⁿ yā tanducuéⁿ'ē chí caⁿ'a yā.

Jesús nadεεvé yā yaācū ch'εete
(Mt. 21.12-17; Lc. 19.45-48; Jn 2.13-22)

¹⁵ Cuayivi míⁿ 'iiⁿ'yāⁿ s'eeⁿ ndaá yā na yáāⁿ Jerusalén miiⁿ. Taachí Jesús ndaá yā na yáacū templo miiⁿ, tucá'a yā tun'dáa yā 'iiⁿ'yāⁿ na yaācū miiⁿ, 'iiⁿ'yāⁿ chí in'diicui yā ndúúcu 'iiⁿ'yāⁿ chí ngai yā. Ch'εεcundáa yā mesas yeⁿ'e 'iiⁿ'yāⁿ chí n'dáaⁿ yā tuūmī. Ní ch'εεcundáa yā sillas yeⁿ'e 'iiⁿ'yāⁿ chí in'diicui yā palomas. ¹⁶ Ní díⁿ yā chí 'āā ntéé candée 'iiⁿ'yāⁿ na yaācū miiⁿ mar 'áámá cosa. ¹⁷ Ní chí'cuéⁿ yā 'iiⁿ'yāⁿ ní caⁿ'a yā: Naachi canéé nguūⁿ na libro yeⁿ'é Ndyuūs ní 'túúca ngaⁿ'á: Va'ai yeⁿ'é canéé chí duuchi va'ai naachi caaⁿ'maⁿnguaⁿ'á 'iiⁿ'yāⁿ yeⁿ'ē nducuéⁿ'ē nación. Naati ndís'tií ní díⁿ nī chí yiive yáává yeⁿ'e 'iiⁿ'yāⁿ chí diduucu.

¹⁸ Chiiduú n'gεete chí ngaⁿ'a ntiiⁿnyuⁿ ndúúcu maestros yeⁿ'e ley ch'iindiveéⁿ yā chuū, ní tucá'a yā n'nuuⁿ yiinú yā taacā chí 'caaⁿ'nuⁿ yā Jesús, naati 'va'á yā 'iiⁿ'yāⁿ. Ní nducyaaca 'iiⁿ'yāⁿ ngeⁿ'e yiinú yā yeⁿ'ē chí ngi'cueeⁿ Jesús miiⁿ. ¹⁹ Taachí chí 'da'a, Jesús miiⁿ can'dáa yā na yáāⁿ Jerusalén miiⁿ ní cueⁿ'é yā táámá yáāⁿ 'líⁿ chí niiⁿnuúⁿ.

Yáⁿ'á in'guídii miiⁿ ntí'i
(Mt. 21.20-22)

²⁰ Chidεεve táámá nguuvi, ní Jesús ndúúcu discípulos cho'ó yā na yúúni ní n'diichí yā 'áámá yáⁿ'á n'guídii yaaⁿ nguuvi chí 'āā ntí'i ndii dí'yú yeⁿ'ē. ²¹ Tuu'mi ní Pedro miiⁿ ní nn'gaacu sa chí 'āā chó'ōo ní caⁿ'a sa chii sa Jesús miiⁿ: N'dii Maestro, cuin'diichí nī. N'guídii chí nguéé n'daācā caⁿ'a nī yeⁿ'ē 'āā ntí'i.

²² Jesús miiⁿ nan'guεécútaⁿ'a yā ní caⁿ'a yā: Ndís'tií, cuuvi cūnee chí véé confianza yeⁿ'e nī ndúúcu Ndyuūs. ²³ Cuaacu níⁿnyúⁿ ngaⁿ'á ngii ndís'tií: 'Āā du'ú nūuⁿ 'iiⁿ'yāⁿ chí caaⁿ'máⁿ yā cuuvi yā yiicū 'cúū 'tíicā: Dii yiicū, cuví di 'muuⁿ ní cundaā di nguaaⁿ nuūⁿnīⁿ'yáⁿ'ā. Ní nduuti chí nguéé 'uūví vaanicádiinūuⁿ yeⁿ'e yā ní i'téenu yā chí chíⁿ chí ngaⁿ'á yā chí cuuví cuaacu, tuu'mi ní cuuvi 'tíicā. ²⁴ Chíⁿ chí maaⁿ ngaⁿ'á ngii ndís'tií: Tanducuéⁿ'ē chí ndís'tií ngiicá nī Ndyuūs taachi ngaⁿ'anguaⁿ'á nī, nduuti chí cu'téenu nī chí ndaācā yeⁿ'e nī, tuu'mi ní tanducuéⁿ'ē ní ndaāca nī. ²⁵ Ní taachí ngaⁿ'anguaⁿ'á nī, nduuti chí 'áámá 'iiⁿ'yāⁿ idinuuⁿndí yā contra yeⁿ'é nī, nadach'εécú nī yeⁿ'e yā, 'tiicá ntúūⁿ Chiida yú chí canéé yā na va'ai cheeti nguuvi nádich'εécú yā nuuⁿndi yeⁿ'é nī. ²⁶ Ndúúti ndís'tií nguéé nadich'εécú nī nuuⁿndi yeⁿ'é 'iiⁿ'yāⁿ, 'tiicá ntúūⁿ Chiida yú chí canéé yā na va'ai cheeti nguuvi nguéé nadich'εécú yā nuuⁿndi yeⁿ'e nī.

Jesús ní ngaⁿ'a ntiiⁿnyúⁿ yā
(Mt. 21.23-27; Lc. 20.1-8)

²⁷ Tuu'mi ní Jesús ndúúcu discípulos nndaa yā na yáāⁿ Jerusalén. Taachí Jesús chiicá yā na yaācū templo, chiiduú n'gεete ndúúcu maestros chí ngi'cuéⁿ ley ndúúcu 'iiⁿ'yāⁿ ndiicúú chí ngaⁿ'a ntiiⁿnyúⁿ yā yeⁿ'e yaācū miiⁿ chindaá yā n'diichí yā Jesús. ²⁸ Ní

ntiinguuneeⁿ yā Jesús: ¿Du'ú 'iiⁿntyēⁿē diīⁿ nduucú nī chuū? O ¿du'ū tee poder dii chí idiīⁿ nī chuū?

²⁹ Jesús nan'guεεcútaⁿa yā: 'Úú ntúūⁿ ní tiinguuneeⁿ ndís'tiī, ní ndúúti chí cuuví n'guεεcútaⁿa nī yeⁿé, tuu'mi ní cuuví ndís'tiī du'ú 'iiⁿntyēⁿē tee yā poder 'úú chí idiīⁿ dendú'u 'cūū. ³⁰ Chí ngeēdínuuⁿnīⁿ Juan miiⁿ ¿tíí chíicā chíi? ¿'Áá yeⁿe sáⁿā iⁿ'yeeⁿdí 'cūū o yeⁿé va'ai chεeti nguuví? Nan'guεεcútaⁿa nī yeⁿé.

³¹ Tuu'mi ní tucá'a yā caⁿ'a yā nguááⁿ maáⁿ yā ní caⁿ'a yā chíi yā vi'ī: ¿Taacá caaⁿ'maⁿ yú? Ndúúti chí caaⁿ'maⁿ yú chí yeⁿé nanguuvi, 'iiⁿ'yāⁿ miiⁿ ní nan'guεεcútaⁿa yā yeⁿé yú 'tíicā: ¿De'ē cúúví chí nguéé i'téenu ní? ³² Ní ndúúti chí caaⁿ'maⁿ yú, chí yeⁿé saⁿā iⁿ'yeeⁿdí 'cūū tuu'mi ní 'va'a yú 'iiⁿ'yāⁿ s'eeⁿ caati nducyáácá 'iiⁿ'yāⁿ deenu yā chí Juan chí chεedínuuⁿnīⁿ miiⁿ ní 'áámá profeta chí cuaacu. ³³ Ní nan'guεεcútaⁿa yā yeⁿe Jesús miiⁿ ní caⁿ'a yā: Nguéé cuuví nī n'diī. 'Tíicā caⁿ'a yā chíi yā Jesús: Nguéé deenú 'nū. Tuu'mi ní Jesús caⁿ'a yā chíi yā 'iiⁿ'yāⁿ s'eeⁿ: 'Tíicā ntúūⁿ 'úú nguéé cuuví ndís'tiī du'ú 'iiⁿntyēⁿē idiīⁿ ndúúcu chuū.

12

Ejemplo yeⁿe 'iiⁿ'yāⁿ chí nguéé n'daācā dííⁿ yā ntiiⁿnyuⁿ

(Mt. 21.33-46; Lc. 20.9-19)

¹ Jesús miiⁿ tucá'a yā caⁿ'a yā 'iiⁿ'yāⁿ s'eeⁿ ndúúcu ejemplos chí 'téé nguéé dáámá. Ní caⁿ'a yā: Véé 'áámá 'iiⁿ'yāⁿ chí chíinu yā díí'yú uvas na yáⁿ'āa yeⁿé yā. Ní din'dái yā 'áámá cheēⁿ yeⁿé yáⁿ'āa 'lííⁿ. Ní din'dái yā 'áámá tanque naachí cuuvi tun'dáa yā nuūⁿnīⁿ yeⁿe uvas miiⁿ. Ní din'dái yā 'áámá torre nguaaⁿ yáⁿ'āa uvas naachi mozos yeⁿé yā 'cuetinée sa diīⁿ sa cuidado n'gui'i uvas miiⁿ. Cuayivi ní ca'a ya yáⁿ'āa miiⁿ mozos chí dííⁿ yā ntiiⁿnyuⁿ yeⁿe yáⁿ'āa, ní cueⁿ'e yáⁿ'ái yā. ² Taachí ndaā tiempo yeⁿe cosecha yeⁿe uvas miiⁿ, dueño miiⁿ dichó'o yā 'aama mozo yeⁿé yā nanááⁿ mozos chí idiīⁿ sa ntiiⁿnyuⁿ yeⁿe yáⁿ'āa yeⁿé yā chí nguai nca'a sa n'gui'i uvas parte yeⁿe cosecha chí ítuneeⁿ dueño miiⁿ. ³ Mozo miiⁿ ní cueⁿ'e sa, naati mozos ní sta'a sa mozo miiⁿ ní ch'eⁿ'e sa ní nadacho'o sa mozo miiⁿ ní nguéé de'ē veε ca'a sa mozo. ⁴ Tuu'mi ní dueño yeⁿé yáⁿ'āa miiⁿ nguεεcunée yā dichó'o yā taama mozo. Mozos ní chíi tuu sa mozo miiⁿ ní 'nuūca'ai sa tiīⁿ sa ní chíi taaⁿ sa saⁿā miiⁿ. ⁵ Dueño yeⁿe yáⁿ'āa miiⁿ dichó'o yā táámá mozo. Mozo miiⁿ, mozos chí diīⁿ ntiiⁿnyuⁿ na yáⁿ'āa miiⁿ ch'iiⁿ'nuⁿ sa. Cuayivi miiⁿ ní 'yaaⁿ n'dái mozos dichó'o yā. Mozos ní náⁿ'a mozos miiⁿ ní ch'eⁿ'e sa saⁿā, tanáⁿ'ā sa ní mozos miiⁿ ch'iiⁿ'nuⁿ sa saⁿā.

⁶ Cánée cá daiya yā chí neⁿ'e taavi yā. Cuayivi mííⁿ ní dueño miiⁿ dichó'o yā daiya yā ní nadicadíinuⁿ yā 'tíicā. Saⁿā daiyá ní diīⁿ sa honrar daiyá. ⁷ Naati mozos chí idiīⁿ sa ntííⁿnyuⁿ na yáⁿ'āa yeⁿé yā caⁿ'a sa nguaaⁿ maaⁿ sa: Sáⁿ'a 'cūū chí canee chí cuuví yeⁿé sa yáⁿ'āa herencia 'cūū. 'Caāⁿ'nuⁿ yú saⁿā ní cúúví yeⁿé yú yáⁿ'āa ndúúcu chí véé yeⁿé. ⁸ 'Tíicā ní sta'a sa saⁿā ní ch'iiⁿ'nuⁿ sa saⁿā ní tun'daa sa cuerpo yeⁿé sa 'áámá lado yeⁿe yáⁿ'āa miiⁿ.

⁹ Tuu'mi ní Jesús ntiinguuneeⁿ yā 'iiⁿ'yāⁿ s'eeⁿ: ¿De'ē ra diīⁿ dueño yeⁿé yáⁿ'āa 'cūū? Ndaā yā ní 'caāⁿ'núⁿ yā mozos chí idiīⁿ ntiiⁿnyuⁿ, ní ca'á yā yáⁿ'āa táanaⁿ'a 'iiⁿ'yāⁿ.

¹⁰ ¿'Áá nguéé n'geeⁿ ndís'tiī naachi canée nguūⁿ na libro yeⁿe Ndyuūs? Ngaⁿ'a 'túúcā: Tuūu chí 'iiⁿ'yāⁿ din'dái yā va'ai miiⁿ ní sta'á yā ní ch'εécú yā 'áámá lado ti nguéé neⁿ'e yā. Tuūu 'cúú chí tuūu ch'εεte ní canée tuūu ch'εεte yeⁿé na esquina yeⁿe va'ai.

¹¹ Chuū ní Señor Ndyuūs dííⁿ yā, chuū ní 'áámá cosa chí ngeⁿ'e yiinu yú taachi inaaⁿ yú yeⁿé.

¹² Tuu'mi ní 'iiⁿ'yāⁿ s'eeⁿ nadacádíinuⁿ yā chí cuta'á yā Jesús miiⁿ ní dííⁿ yā preso 'iiⁿ'yāⁿ ti déenu yā chí Jesús miiⁿ caⁿ'a yā ejemplo 'cūū chí 'téé nguéé dáámá chí yeⁿe yā. Naati 'va'á yā 'iiⁿ'yāⁿ yeⁿe yáⁿ'āa miiⁿya, ní s'néeⁿ yā Jesús ní cueⁿ'e yā.

Chúū chí yeⁿé impuestos

(Mt. 22.15-22; Lc. 20.20-26)

¹³ Cuayivi miiⁿ 'iiⁿyāⁿ chi ngaⁿ'a ntiiⁿnyuⁿ yeⁿ'e yaācū dicho'ó yā 'iiⁿyāⁿ yeⁿ'e Herodes ndúúcu n'duuvu 'iiⁿyāⁿ fariseos nanááⁿ Jesús miiⁿ. Ní neⁿ'é yā chi Jesús castáⁿ'a yā nduudu yeⁿ'e yā ní caaⁿ'máⁿ yā 'áámá nduudu yaadi. ¹⁴ 'Iiⁿyāⁿ s'eeⁿ ndaá yā nanááⁿ Jesús miiⁿ, ní caⁿ'a yā: N'dii Maestro, déenu 'nū chí n'dii ní ngaⁿ'a nī nduudu cuaacu ní nguéé díⁿ nī cuenta yeⁿ'e chí ngaⁿ'a 'iiⁿyāⁿ yeⁿ'ē. Ní nguéé ndéé nī cuidado táácā idinááⁿ 'iiⁿyāⁿ iⁿ'yeeⁿdí 'cūū naati ngi'cueeⁿ nī ndúúcu nduudu cuaacu yúúni yeⁿ'é Ndyuūs. ¿'Áá canéé chí nadí've 'nū na emperador César tuūmī yeⁿ'e recaudación yeⁿ'e yáⁿ'āa o nguéé?

¹⁵ Jesús miiⁿ ní déenu yā chi nguéé n'daācā chí 'iiⁿyāⁿ s'eeⁿ díⁿ yā. Ní caⁿ'a yā chii yā 'iiⁿyāⁿ s'eeⁿ: ¿Dē'ē cúúví chi neⁿ'é nī chí castaⁿ'á nī nduudu yeⁿ'é? Candéé nī 'áámá tuūmī, chi snaáⁿ.

¹⁶ 'Iiⁿyāⁿ ndéé yā tuūmī. Ní Jesús miiⁿ n'diichí yā ní tiinguuneeⁿ yā 'iiⁿyāⁿ s'eeⁿ: ¿Dú'u naaⁿ chuū? ¿Du'ū chí duuchi canéé nguūⁿ? 'Iiⁿyāⁿ s'eeⁿ ní n'guεεcútaⁿ'a yā: Nááⁿ emperador César cānee.

¹⁷ Tuu'mi Jesús miiⁿ ní caⁿ'a yā chii yā 'iiⁿyāⁿ s'eeⁿ: Nca'á nī tuūmī yeⁿ'e recaudación o impuestos chi yeⁿ'e emperador César miiⁿ chíⁿ chí yeⁿ'ē sa, ní nca'a nī Ndyuūs chí yeⁿ'é yā. 'Iiⁿyāⁿ s'eeⁿ ní cueⁿ'e yiinú yā yeⁿ'ē chí n'guεεcútaⁿ'a Jesús miiⁿ.

'Iiⁿyāⁿ ntíngúúneeⁿ Jesús yeⁿ'ē chi iiⁿyāⁿ nnduuchi yā nguaaⁿ tináⁿ'a

(Mt. 22.23-33; Lc. 20.27-40)

¹⁸ Tuu'mi ní ndaā n'duuvu 'iiⁿyāⁿ saduceos nanááⁿ Jesús. 'Iiⁿyāⁿ s'eeⁿ ní nguéé s'teenu yā chí tináⁿ'ā ní nduuchi yā. Ní ntiinguuneeⁿ yā Jesús chuū: ¹⁹ N'díí Maestro, Moisés miiⁿ ní s'neeⁿ nguūⁿ yā yeⁿ'e s'uuúⁿ tí chuū: Nduuti chí 'áámá saⁿ'ā 'cuūví sa ní cu'neeⁿ sa n'daataá yeⁿ'ē sa ní nguéé daiya sa, tuu'mi ní 'díínu sā cuuvi 'caandavaacu sá ndúúcu n'daataá miiⁿ. Ní saⁿ'ā miiⁿ ní 'cuūndí daiya sa lado yeⁿ'ē 'díínu tináⁿ'ā. ²⁰ 'Áámá saⁿ'ā véé ndéēchē 'díínu sa ndúúcu sa. Saⁿ'ā miiⁿ chí vmnááⁿ vmnaaⁿ ch'iidivaacu sá ní ch'ií sa ní nguéé ch'iíndí daiya sa ndúúcu n'daataá yeⁿ'ē sa. ²¹ Saⁿ'ā ndii chíⁿ ndii 'úúví míⁿ ch'iindivaacu sa ndúúcu n'daataá yeⁿ'ē tináⁿ'ā ní saⁿ'ā miiⁿ ch'ií ntúuⁿ sa ní nguéé ch'iíndí daiya sá ndúúcu n'daata miiⁿ. 'Tiicá ntúuⁿ ch'εenu saⁿ'ā ndii chíⁿ ndii 'íínu. ²² Ndu'ū ndéēche sá ch'iindivaacu sá ndúúcu tá ní mar 'áámá sá nguéé s'neeⁿ sa daiya sa ndúúcu tá. Cuayivi ní ch'ií ntúuⁿ n'daataá miiⁿ. ²³ Tuu'mi ní taachí nduuchí yā nguaaⁿ tináⁿ'ā, ¿cheé yā chí n'daataá yeⁿ'é yā taⁿ'ā miiⁿ, caati ndu'u ndéēche yā ch'iindivaacú yā ndúúcu tá?

²⁴ Tuu'mi ní Jesús míⁿ nan'guεεcútaⁿ'a yā 'iiⁿyāⁿ s'eeⁿ: Ndís'tií ní nguéé déenu nī chí ngaⁿ'a nī, ti nguéé n'diichí nī naachi canéé nguūⁿ na libro yeⁿ'é Ndyuūs yeⁿ'é chuū, ndíí nguéé ndúú n'diichi rá nī poder yeⁿ'é Ndyuūs. ²⁵ Taachí 'iiⁿyāⁿ nanduuchí yā yeⁿ'ē nguaaⁿ tináⁿ'ā, ndíí nguéé ndúú n'daataá rá, ndíí nguéé ndúú saⁿ'ā rá 'caandavaacu sa. 'Iiⁿyāⁿ s'eeⁿ 'cuεetinée yā tan'dúúcā ángeles yeⁿ'ē va'ai chēeti nguuvi chí nguéé ch'iindivaacu yā. ²⁶ Chuū chí yeⁿ'ē tináⁿ'ā miiⁿ chí nanduuchi yā nguaaⁿ tináⁿ'ā, ¿'áá nguéé n'geēⁿ ndís'tií na libro yeⁿ'é Ndyuūs chí dinguuⁿ Moisés tan'dúúcā Ndyuūs yaa'ví yā Moisés, ndíí taachi canee sa nanááⁿ yáⁿ'á 'líⁿ chí ngiichi? Ní 'túuca caⁿ'a Ndyuūs chii yā Moisés miiⁿ: 'Úú ní Ndyuūs yeⁿ'e Abraham, ndúúcu Isaac, ndúúcu Jacob. ²⁷ Ndyuūs miiⁿ nguéé Ndyuūs yeⁿ'ē tináⁿ'ā ti yeⁿ'e 'iiⁿyāⁿ chi sндуuchi. Chíⁿ chí ndís'tií nguéé déenu nī chí ngaⁿ'a nī.

Mandamiento chí ch'εete ca

(Mt. 22.34-40)

²⁸ 'Áámá maestro yeⁿ'e ley chí ch'iindiveéⁿ yā chí ndéē 'iiⁿyāⁿ saduceos s'eeⁿ, déenu yā chí Jesús miiⁿ nan'guεεcútaⁿ'a n'daaca yā. 'Iiⁿyāⁿ miiⁿ ní ntiinguuneeⁿ yā Jesús: ¿Cheé mandamiento chí canee nguūⁿ chí ch'εete n'dai ca?

²⁹ Jesús nan'guεεcútaⁿ'a yā: Mandamiento vmnááⁿ vmnaaⁿ miiⁿ ní chuū: 'Caandiveéⁿ nī, ndís'tií 'iiⁿyāⁿ yeⁿ'e Israel miiⁿ, Señor Ndyuūs yeⁿ'ē yú ní 'áámá n'dyáⁿ'ā Señor miiⁿ.

³⁰ Canéé chí dineⁿ'é nī Señor Ndyuūs yeⁿ'é nī ndúúcu nuuⁿmaⁿ staava yeⁿ'é nī, ndúúcu nuuⁿmaⁿ alma yeⁿ'e nī, ndúúcu nuuⁿmaⁿ vaanicadíínūⁿ yeⁿ'e nī, ndúúcu nducuéⁿ'ē

fuerzas yeⁿe nī. Chuū chi mandamiento chi vmnááⁿ vmnáaⁿ. ³¹ Mandamiento chí canéé nguūⁿ chi ndii chííⁿ ndii 'úúví mííⁿ tan'dúúccā chi vmnááⁿ vmnáaⁿ 'āā 'tiicá ntúūⁿ: Dinéⁿe di 'iiⁿyāⁿ na niiⁿnuúⁿ vaacú di tan'dúúccā chi neⁿe dí maāⁿ di. Nguéé 'áámá mandamiento chí canéé nguūⁿ chí ch'εεte ca nguéé ti mandamientos s'uuⁿ.

³² Tuu'mi ní maestro yeⁿe ley caⁿa yā chii yā Jesús miiⁿ: N'diī Maestro, cuáácú ngaⁿa nī. Cuaacu nííⁿnyúⁿ chí ngaⁿa nī chi vεε 'aama n'dyáⁿā Ndyuūs. Nguéé táámá 'āā tanduu rá 'iiⁿyāⁿ miiⁿ. ³³ Nííccú 'iiⁿyāⁿ canéé chi dinéⁿe yā Ndyuūs ndúúccū nuuⁿmaⁿ staava yeⁿe yā, ndúúccū nuuⁿmaⁿ vaanicadínūuⁿ yeⁿe yā, ndúúccū nuuⁿmaⁿ alma yeⁿe yā, ndúúccū tanducuén^lē fuerzas yeⁿe yā. Ní dineⁿe yā 'iiⁿyāⁿ na niiⁿnuúⁿ vaacú yā tan'dúúccā chi neⁿe yā maāⁿ yā. Chuū chi n'daāccā ca nguéé ti n'giiⁿnúⁿ 'iiti chí nga'a yā 'iiti lado yeⁿe ofrenda yeⁿé Ndyuūs ní yeⁿé tanducuén^lē ofrenda chí ngicyáⁿā nátai.

³⁴ Tuu'mi ní taachi ch'iindiveeⁿ Jesús tan'dúúccā chi n'guεεcutaⁿa cuaacu sa chí caⁿa sa, Jesús caⁿa yā chii yā saⁿā miiⁿ: Nguéé yaⁿai canee di yeⁿé naachí Ndyuūs ngaⁿa ntiiⁿnyuⁿ yā. Cuayiiⁿvi miiⁿ ní 'iiⁿyāⁿ 'āā nteε candii cá yā ntiinguuneeⁿ ca yā Jesús mar 'áámá.

¿Du'u chíí Daiya Cristo miiⁿ?

(Mt. 22.41-46; Lc. 20.41-44)

³⁵ Jesús ngi'cueeⁿ yā chεeti yaāccū templo ní ngaⁿa yā: ¿Dε'ē cúúví chí maestros yeⁿe ley ngaⁿá yā chí Cristo miiⁿ ní daiya David? ³⁶ Caati maaⁿ David miiⁿ caⁿa sá taachi yaa'vi Espíritu N'dai yeⁿé Ndyuūs chuū chí canéé nguūⁿ na libro yeⁿe Ndyuūs:

Señor miiⁿ caⁿa yā chíí yā Señor yeⁿé: 'Cuundi dí lado ta cuaāccū chí lado yeⁿe honor, ndíí taachi 'úú cu'neéⁿ 'iiⁿyāⁿ chí contra yeⁿé di ndiī cuaaⁿ ndiia maaⁿ ca'ā di tan'dúúccā chí 'aama banco 'lííⁿ, 'tiicá yā.

³⁷ David miiⁿ ngaⁿa sa chuū yeⁿe Señor yeⁿé yā. Maaⁿ ní ¿táāccā cuuví chíí chí Cristo miiⁿ ní daiya David miiⁿ? Nééⁿe n'deēe 'iiⁿyāⁿ ch'iindiveeⁿ yā yeⁿe Jesús ndúúccū vaadi yeenú.

Jesús ngaⁿa yā nuuⁿndi yeⁿe 'iiⁿyāⁿ chí ngi'cuéⁿ yā yeⁿe ley

(Mt. 23.1-36; Lc. 11.37-54; 20.45-47)

³⁸ Jesús ngaⁿa yā chuū taachi ngi'cueeⁿ yā: Cundéε di cuidado yeⁿe maestros yeⁿe ley. 'Iiⁿyāⁿ s'eeⁿ ní n'gεētínéé yiinú yā chí n'geenūu catecai yā. Ní taachi chíicá yā cuaaⁿ cyúúⁿí neⁿe yā chí 'iiⁿyāⁿ dííⁿ yā saludar 'yā ndúúccū respeto n'daāccā. ³⁹ Ní neⁿé yā sillas vmnááⁿ vmnáaⁿ yeⁿe honor taachí 'cuundí yā na yaāccū sinagogas ndúúccū lugar chí ch'εεte taachi cheⁿe yā naachi véé 'viicu chí che'é yā. ⁴⁰ Ní ndivíí yā va'ai yeⁿé n'daataá nguá'āa. Ní 'ííccú cuunuuⁿ n'dé'ei yā chí idiíⁿ yā miiⁿ nduucú nééⁿe n'deēe ngaⁿangua'á yā. 'Iiⁿyāⁿ s'eeⁿ ní ch'εεte ca castigo yeⁿé yā nguuvi yeⁿe juicio.

Ofrenda yeⁿe n'daataá nguá'āa

(Lc. 21.1-4)

⁴¹ 'Áámá vmnéⁿēe Jesús véε yā na yáaccū templo niiⁿnuúⁿ na cajas naachí 'iiⁿyāⁿ n'gíí yā ofrendas. N'gíínu yā tan'dúúccā chí dííⁿ 'iiⁿyāⁿ táāccā n'gíí yā tuumí lado yeⁿe ofrenda na cajas. N'diichí yā chí 'yaaⁿ n'dái 'iiⁿyāⁿ 'cuiica neené n'deēe tuumí ca'a yā. ⁴² Tuu'mi ní ndāā 'áámá n'daataá nguá'āa chí neene ndaachíí canee tá. Táⁿā miiⁿ ní s'nuūⁿ tá na caja miiⁿ na 'uūví centavos chí cobre. ⁴³ Tuu'mi ní Jesús yaa'vi yā discípulos yeⁿe yā ní caⁿa yā chii yā 'iiⁿyāⁿ s'eeⁿ: Cuaacu nííⁿnyúⁿ ngaⁿá ngíí ndís'tií chí n'daataá nguá'āa 'cúú ch'εεte ca nga'ā tá, nguéé ti tanáⁿa yā chí s'nuúⁿ yā tuumí na cajas. ⁴⁴ Tí 'iiⁿyāⁿ s'eeⁿ ní nga'a yā yeⁿe chí ngaava yeⁿe yā; naati n'daataá mííⁿ ní neené ndaachíí canee tá ní ca'ā tá tanducuén^lē chí yeⁿé tá chí che'e tá.

Jesús ngaⁿa yā chí yaāccū templo miiⁿ ní ntúúvíí

(Mt. 24.1-2; Lc. 21.5-6)

¹ Taachí Jesús miiⁿ nan'dáa yā yaācū templo miiⁿ 'áámá discípulo yeⁿe yā ní caⁿ'a yā chii yā Jesús: N'díí Maestro, n'diichí nī de'ē chúúcā n'gēete tuūu s'eeⁿ ní de'ε chúúcā n'gēete va'ai s'eeⁿ yeⁿe yaācū templo.

² Jesús nán'guεεcútaⁿ'a yā: ¿'Áá inaaⁿ nī va'ai templo? 'Muuⁿ ní nguéeé cunee mar 'áámá tuūu cuaaⁿ vmnááⁿ yeⁿe vi'ī ti tanducuéⁿ'ē ní cundεεε.

*Jesús ngaⁿ'a yā yeⁿ'ē chííⁿ chí 'cuuⁿ'miⁿ taachí 'āā cuéeé 'cuiinu iⁿ'yeēⁿdī
(Mt. 24.3-28; Lc. 21.7-24; 17.22-24)*

³ Tuu'mi ní cheⁿ'é yā 'áámá yiicū chi nguuvi Olivos, chi canéeé niiⁿnuúⁿ na yaācū templo miiⁿ. Ní taachi Jesús veé yā miiⁿ, Pedro ndúúcū Jacobo, ndúúcū Juan, ndúúcū Andrés ndaa yā nanáaⁿ yā chi caⁿ'a n'de'ei yā 'áámá nduudu ndúúcū Jesús. ⁴ Ní caⁿ'a yā: N'dií Señor, néⁿ'e 'nū chi cuuví nī nús'uu ¿tíí cuaⁿ'ā cuuví chuū? ¿De'ē senal 'cuuⁿ'míⁿ nī nús'uu yeⁿ'e tiempo chi cuuvi tanducuéⁿ'ē 'túúcā?

⁵ Jesús nan'guεεcútaⁿ'a yā: Cundéeé nī cuidado chí mar 'áámá 'iiⁿ'yāⁿ nguéeé cannche'éí yā ndís'tií. ⁶ Ti néénéé 'yááⁿ 'iiⁿ'yāⁿ chii yā ndúúcū chi duuchí ní cannche'éí yā 'iiⁿ'yāⁿ ní caaⁿ'máⁿ yā: 'Úú Cristo 'úú. 'Iiⁿ'yāⁿ s'eeⁿ ní cannche'éí yā 'yaaⁿ n'dái 'iiⁿ'yāⁿ.

⁷ Taachi ndís'tií 'caandiveén nī caandaá ní 'iiⁿ'yāⁿ 'va'a yā chí chí caandaá nguéeé idii'yá nī cuuvi ti 'tíicā canéeé chi cuuvi. Naati chiiⁿ ní 'āā 'cuéeé tiempo chi ntuuví íⁿ'yeēⁿdī. ⁸ Ti 'áámá nación ní 'cuuⁿ'maⁿ ndúúcū táámá nación nī 'áámá gobierno ní 'cuuⁿ'maⁿ yā ndúúcū táámá gobierno. Ní néénéé n'deeé cuaaⁿ nuⁿ'u yáⁿ'āa. Ní ndaa vaadī 'cuiicu ndúúcū dendu'ū chi di'vaachií. Taachí cuuví dendu'ū chí 'túúcā ní chiiⁿ ní cáámá cuunngá'á vaadī ya'ai.

⁹ Dííⁿ nī cuidado maáⁿ nī ndís'tií ti 'iiⁿ'yāⁿ nca'a yā ndís'tií tá'āa 'iiⁿ'ntyéⁿ'ē. Tuu'mi ní 'cueⁿ'é yā ndís'tií na yaācū sinagogas. Ndís'tií nī canee chi caⁿ'á nī nanááⁿ 'iiⁿ'yāⁿ chí ngaⁿ'a ntiiⁿ'nyuⁿ yā ndúúcū reyes cáávā ntiiⁿ'nyuⁿ yeⁿ'é. Ní 'íicú cuuvi caaⁿ'máⁿ nī yeⁿ'é ní 'caandiveén yā nduudu cuaacu. ¹⁰ Taachí 'āā cuéeé ndaa chí 'cuiinu iⁿ'yeēⁿdī, nduudu cuaacu 'cūū canéeé chí caaⁿ'maⁿ nanááⁿ nducyaaca 'iiⁿ'yāⁿ yeⁿ'e naciones yeⁿ'e núúⁿ'máⁿ íⁿ'yeēⁿdī. ¹¹ Taachí candéeé yā ndís'tií chí nca'a yā ndís'tií vmnááⁿ 'iiⁿ'ntyéⁿ'ē, nguéeé nadicádíínuuⁿ nī yeⁿ'ē chí caaⁿ'maⁿ nī. Nguéeé dííⁿ núúⁿ yííⁿ'nuⁿ nī yeⁿ'ē. Caaⁿ'maⁿ nī tan'dúúcā Espíritu N'dai yeⁿ'é Ndyuūs caaⁿ'maⁿ cuuvi ndís'tií hora miiⁿ; ti nguéeé ndís'tií chí caaⁿ'máⁿ nī ti Espíritu N'dai yeⁿ'é Ndyuūs. ¹² Ní yeⁿ'e tiempo miiⁿ nguaaⁿ 'díínu yā nca'a vi'ī yā chí 'cááⁿ'núⁿ yā 'iiⁿ'yāⁿ. Ní 'íicú chiidá yā ní ca'a yā daiya yā. Ní daiya yā ní ca'a yā chiidá yā ndúúcū chεεcú yā ní 'caaⁿ'núⁿ yā 'iiⁿ'yāⁿ. ¹³ Nducyáácá 'iiⁿ'yāⁿ nguéeé cunee yííⁿú yā chí ndís'tií dííⁿ nī ntiiⁿ'nyuⁿ caavā 'úú. Naati 'iiⁿ'yāⁿ chí cuchéeé yā ní 'aama canéeé yā ndúúcū chí i'teenu yā yeⁿ'e Ndyuūs ndíí tiempo chí 'cuuvi yā ní nnguáⁿ'ai yā. ¹⁴ Taachí ndís'tií 'āā snaaⁿ nī dendu'ū chí 'túúcā chí saⁿ'ā profeta Daniel dinguúⁿ yā na libro yeⁿ'e Ndyuūs tiempo chí chól'ōo tuu'mi ní 'iiⁿ'yāⁿ chí snéeé yā na yáⁿ'āa Judea canéeé chí caⁿ'á yā caanu yā ná yiicū n'gēete. ('Iiⁿ'yāⁿ chí 'cueēⁿ chuū canéeé chí cuuvi deenú yā yeⁿ'e chuū.) ¹⁵ Nguuvi miiⁿ ní ndúúti chí 'áámá 'iiⁿ'yāⁿ canduú yā tííⁿ va'āí ní nguéeé cuuvi núúⁿ nch'eeⁿ yā ní ndaa yā va'ai ní tun'dáa yā dendu'ū yeⁿ'e yā. ¹⁶ Ní ndúúti chí 'áámá 'iiⁿ'yāⁿ canéeé yā na campo, ní nguéeé cuuvi núúⁿ ndaa yā va'ai yeⁿ'e yā ní nta'a yā cotón yeⁿ'e yā. ¹⁷ De'ε chúúcā yaⁿ'ai yeⁿ'e n'daataá chí véé daiya tá chεeti tá ndúúcū n'daataá chí ngiicu dacuá'āa yeⁿ'e tá nguuvi chí cáánu yā. ¹⁸ Ndís'tií, caaca nī Ndyuūs chí nguéeé chól'ōo chuū tiempo chí 'iiche. ¹⁹ Ti nguuvi miiⁿ ní néénéé 'cueenu 'iiⁿ'yāⁿ cuuvi tan'dúúcā chí mar 'áámá vmnéⁿ'ēe 'āā cuéeé cuuvi 'tíicā ndíí taachí Ndyuūs dííⁿ dáí yā íⁿ'yeēⁿdī. 'Āā ntéeé ndúú cuayiivi ra chí snaaⁿ yā dendu'ū chí 'tíicā. ²⁰ Ndúúti chí Señor miiⁿ nguéeé nadidúú'vi yā tiempo miiⁿ mar 'áámá 'iiⁿ'yāⁿ nguéeé nnguaⁿ'ai yā. Naati ndííⁿ nadidúú'vi yā cáávā 'iiⁿ'yāⁿ chí yeⁿ'é yā ti 'iiⁿ'yāⁿ miiⁿ Señor ndεεε yā.

²¹ Tuu'mi ní ndúúti chí 'áámá 'iiⁿ'yāⁿ caaⁿ'maⁿ yā cuuvi yā ndís'tií: Cuín'dííchí nī, 'íngāā Cristo miiⁿ, o cuín'dííchí nī, miiⁿ canee Cristo miiⁿya, nguéeé cu'téenu nī 'iiⁿ'yāⁿ miiⁿ. ²² Ti ndaa 'iiⁿ'yāⁿ chí cristos chí falsos yā ndúúcū 'iiⁿ'yāⁿ chí profetas chí falsos yā. Ní dííⁿ yā señales ndúúcū vaadī n'giinu. Ní 'íicú cuuvi cannche'éí yā 'iiⁿ'yāⁿ, ndíí 'iiⁿ'yāⁿ

chí Ndyuūs ndεενε yā ndúúti chí chuū cuuvi dífn yā. ²³ Naati ndís'tiī ní 'cuεetinée yaaⁿ nī. Ngaⁿ'á ngíi ndís'tiī tanducuéⁿ'ē chuū 'náán chí 'āā cuée ndaa.

Táácā ndáá Saⁿ'a chí Daiya Ndyuūs
(Mt. 24.29-35, 42-44; Lc. 21.25-36)

²⁴ Cho'ōo chúū ní nguuví miiⁿ chí 'cueenu nī cuuvi, 'yáⁿ'āā miiⁿ ní cúúví maāiⁿ ní 'iīyū miiⁿ ní 'āā ntée cuuví δεενε. ²⁵ 'Iiⁿnyuⁿ miiⁿ ní cun'dáa yeⁿ'ē nanguuvi ní nducuéⁿ'ē chí véé nanguuvi ní nuⁿ'u. ²⁶ Tuu'mi ní snaaⁿ yā Saⁿ'ā chí Daiya Ndyuūs chí ndaa sa nguuaⁿ meēeⁿ ndúúcu poder yeⁿ'ē sa chí ch'εεte taavi ní ndεεvé n'dai ngíi n'gai maāⁿ sa. ²⁷ Tuu'mi ní Ndyuūs dicho'ó yā ángeles yeⁿ'e yā chí nadidáámá 'iiⁿ'yāⁿ yeⁿ'é yā chí Ndyuūs ndεενε yā yeⁿ'ē núúⁿ máⁿ íⁿ'yeeⁿdī, ndii na yáⁿ'āā nducuéⁿ'ē n'dai yeⁿ'e yáⁿ'āā ndúúcu ndii na nducueⁿ'e nanguuvi.

²⁸ Maaⁿ ní 'cueéⁿ nī yeⁿ'e ejemplo yeⁿ'e n'guídīi yaaⁿ nguuví: Taachí inguaaⁿnu duūⁿnē n'gaiyāá ní ican'daā tá'āā, 'āā déénu nī chí 'āā cuchīi tiempo yaāáⁿ. ²⁹ 'Tiicá ntúūⁿ taachi snaaⁿ ndís'tiī chí cuuvi dendú'ū chí 'túúca, 'āā deenú nī chí 'āā sneeⁿ niiⁿnuⁿ tiempo chí ndaa Saⁿ'ā chí Daiya Ndyuūs. Ní 'āā nééne niiⁿnuúⁿ cánee tiempo 'cūū. ³⁰ Cuaacu níⁿnyúⁿ ngaⁿ'á ngíi ndís'tiī: 'Iiⁿ'yāⁿ s'eeⁿ chí snée yā maaⁿ 'āā cuée 'cuúví yā neⁿ'e chí 'āā cuée cuuví tanducuéⁿ'ē chuū. ³¹ Nánguuví ndúúcu ná yáⁿ'āā 'cūū ní chó'ōo, naati nduudu yeⁿ'é nguée cho'óo.

³² Naati yeⁿ'ē nguuví miiⁿ ndúúcu hora miiⁿ nguée véé mar 'áámá 'iiⁿ'yāⁿ chí deenu yeⁿ'ē. Ndíi nguée ndúú ángeles, yeⁿ'e va'ai chεeti nguuví ndíi nguée ndúú Sáⁿ'ā chí Daiya Dendyuūs deenú yā yeⁿ'ē. Dámaāⁿ Chiida yú chí canée yā na va'ai chεeti nguuví deenu yā.

³³ Chífn chí ndís'tiī ní 'cuεetinée yaaⁿ nī. Dicuéeⁿnaaⁿ nī ní caaⁿ'maⁿnguaⁿ'á nī, ti nguée déénu nī tíí cuaⁿ'ā ndaa hora miiⁿ. ³⁴ Ejemplo chuū tan'dúúca 'áámá 'iiⁿ'yāⁿ chí caⁿ'a yā yaⁿ'ai. Taachi 'āā cuée can'dáa yā na vaācu yā, caⁿ'a yā chíi yā mozos yeⁿ'é yā chí ca'a yā ntiiⁿnyuⁿ 'áámá 'áámá mozo yeⁿ'ē sa. Ní cuuvi yā saⁿ'ā chí idiiⁿ cuidado yeⁿ'e cheendi va'āi miiⁿ chí cunée yaaⁿ sa. Ní cueⁿ'e yā. ³⁵ Maaⁿ ní ndís'tiī 'cuεetinée yaáⁿ nī, ti nguée déénu nī tíí cuaⁿ'ā ndaa dueño yeⁿ'e va'āi miiⁿ. Nguée déénu nī nduuti chí ndaa yā n'gaaⁿ, o yaaⁿ chεete, o taachí 'cuaī tú'u, o cuaaⁿ na nguεetiyaⁿ. ³⁶ 'Áá tiī dácanaaⁿ ndaa yā ní ndaāca yā ndís'tiī chí styaaⁿ nī. ³⁷ Chífn chí ngaⁿ'á ngíi ndís'tiī, ní ngíi nducyaaca 'iiⁿ'yāⁿ: 'Cuεetinée yaáⁿ yā.

14

Saⁿ'ā s'eeⁿ nadacádiinūūⁿ sa taacā cuta'a sa Jesús
(Mt. 26.1-5; Lc. 22.1-2; Jn. 11.45-53)

¹ Ná 'uūvī nguūvī ní cuuvā 'viicu yeⁿ'e pascua chí 'viicu yeⁿ'ē pan chí nguée levadura yeⁿ'ē. Chiiduú n'gεete ndúúcu maestros yeⁿ'e ley 'nuúⁿ yā taacā chí cuuvi canche'ée yā Jesús ní cuta'á yā 'iiⁿ'yāⁿ ní 'caaⁿ'núⁿ yā 'yā. ² Naati caⁿ'a yā: Nguée díiⁿ yú nguuví 'viicu tí 'iiⁿ'yāⁿ yeⁿ'e yāāⁿ Jerusalén miiⁿ didáⁿ'a yā ní dífn yā vaadi 'caaⁿ'va ndúúcu nús'uu.

'Áámá n'daataá n'gīi tá aceite na cuerpo yeⁿ'e Jesús
(Mt. 26.6-13; Jn. 12.1-8)

³ Jesús canee yā na yāāⁿ Betania na vaacu Simón chí canée sá ndúúcu ca'ai chí nguuví lepra chí in'duuti cuerpo yeⁿ'ē sa. Taachí Jesús miiⁿ véé yā na mesa, ndaa 'áámá n'daataá nanáaⁿ yā. Táⁿ'ā miiⁿ ní ndēē tá 'áámá frasco yeⁿ'e alabastro ndiitúú ndúúcu aceite perfume yeⁿ'e nardo chí ndεεve ngeēⁿ ní neenē ya'ai chíí'vē. Ní 'cuūⁿ tá frasco miiⁿ ní ch'eendáa tá aceite miiⁿ na tiīⁿ Señor Jesús miiⁿ. ⁴ N'duuví discípulos chí snée yā miiⁿ nduuví táaⁿ yā ní caⁿ'a yā nguuaⁿ maaⁿ yā: ¿De'ē cuuví chí chingéeⁿ ta aceite 'cūū? ⁵ Ti cuuvi n'diicui yú ní ngo'o 'iīnū ciento caadi ní cuuvi ca'a yú 'iiⁿ'yāⁿ chí nguée yeⁿ'e yā. Ní nduuví taáⁿ yā ndúúcu tá.

⁶ Naati Jesús miiⁿ ní caⁿ'a yā: 'Āā canee ra tá. Nguée yaa'vi nī táⁿ'ā. ¿De'ē cúúví chí yaa'ví nī táⁿ'ā? Tá 'tiī ní n'daāca idiiⁿ tá nduucú. ⁷ 'Iiⁿ'yāⁿ chí nguée yeⁿ'e yā ní 'aama

ca cánée yā ndúúcu nī. Ní ndís'tiī ní cuuvi din'daacá nī nduucú yā taachi neⁿe nī; naati 'úú nguéeé 'aama cuneé ndúúcu nī. ⁸ Tá 'cūū ní diīn tá tan'dúúccā chi ch'iī tá perfume cuerpo yeⁿ'é maaⁿ chi 'āā cuéeé 'cuūví, 'tíicā diīn tá. Ní 'āā nnee 'cuiī ta chuū 'úú taachí 'āā cuéeé 'cuēechí. ⁹ Cuaacu níⁿ'nyúⁿ ngaⁿ'á ngií ndís'tiī: 'Āā tíí nūūⁿ chí 'iīⁿ'yāⁿ caaⁿ'máⁿ yā nduudu ngai yeⁿ'é yeⁿ'ē chi nanguaⁿ'ai 'iīⁿ'yāⁿ na núúⁿmáⁿ íⁿ'yeeⁿdī caaⁿ'maⁿ ntuúⁿ yā chi diīⁿ n'daataá 'cūū ní n'gaacú yā yeⁿ'ē tá.

Judas Iscariote nca'a sa Jesús

(Mt. 26.14-16; Lc. 22.3-6)

¹⁰ Tuu'mi ní Judas Iscariote, 'áámá chéeé 'iīⁿ'yāⁿ naachi ndiichuuví discípuⁿlos, cheⁿ'e sá nanááⁿ chiiduú n'gēete. Ní ngaⁿ'a sa táácā chi cuuvi nca'a sa Jesús miiⁿ ná ta'a 'iīⁿ'yāⁿ s'eeⁿ. ¹¹ Taachí 'iīⁿ'yāⁿ s'eeⁿ ch'iindiveéⁿ yā chuū, neené yeenú yā, ní caⁿ'a yā chi ca'a yā tuumī Judas miiⁿ cáávā chuū. Judas ní in'nuuⁿ sa de'ē hora chi nca'a sa 'iīⁿ'yāⁿ s'eeⁿ Jesús miiⁿ.

Naachí che'e nguiinū yeⁿ'e Señor Jesús miiⁿ

(Mt. 26.17-29; Lc. 22.7-23; Jn. 13.21-30; I Co. 11.23-26)

¹² Ndaā nguuví vmnááⁿ vmnaaⁿ yeⁿ'e 'viicu chi che'é yā pan chi nguéeé levadura yeⁿ'ē, 'viicu taachi n'giiⁿ'núⁿ yā 'iiti cuūchī yeⁿ'e pascua miiⁿ. Ní discípuⁿlos yeⁿ'e Jesús miiⁿ ntiinguuneeⁿ yā Jesús: ¿Tií neⁿ'e di chi caⁿ'á 'nū in'nuúⁿ 'nū chi che'e nguiinū yú yeⁿ'e 'viicu pascua?

¹³ Tuu'mi ní Jesús dicho'ó yā na 'uūví discípuⁿlos yeⁿ'e yā, ní caⁿ'a yā chii yā 'iīⁿ'yāⁿ: Ndís'tiī cueⁿ'é nī yāā Jerusalén. Miiⁿ ní ndaacá nī 'áámá sáⁿ'ā chí ndéeé sa 'áámá 'cuuti cuéeé nuūⁿnīⁿ. Can'dáa nī saⁿ'ā. ¹⁴ Naachí ndaa sa va'ai miiⁿ, ní cuuví nī sáⁿ'ā chí yeⁿ'ē va'ai miiⁿ: Maestro yeⁿ'e yú ngaⁿ'a yā 'tíicā: ¿Tií canéé cuarto naachi che'e nguiinuú yeⁿ'e pascua ndúúccū discípuⁿlos yeⁿ'é? ¹⁵ Tuu'mi ní ch'iⁿ'i yā 'áámá cuarto ch'ēete ná ndiichi ndii 'úúví piso miiⁿ chí 'áá véé yaāⁿ. Miiⁿ ní in'nuúⁿ nī chí che'e yú.

¹⁶ Discípuⁿlos cueⁿ'e yā ní ndaa yā ná yāā Jerusalén miiⁿ ní ndaāca yā tanducueⁿ'ē tan'duucā chí Jesús ngaⁿ'a yā. Ní 'iīⁿ'yāⁿ s'eeⁿ in'nuúⁿ yā chí che'e nguiinú yā yeⁿ'e 'viicu yeⁿ'e pascua miiⁿ.

¹⁷ Taachí 'āā chii chiinū míⁿ ndaā Jesús ndúúccū ndiichuuví discípuⁿlos yeⁿ'e yā.

¹⁸ Taachí veteé yā na mesa miiⁿ chí che'e yā Jesús caⁿ'a yā chii yā 'iīⁿ'yāⁿ s'eeⁿ: Cuaacu níⁿ'nyúⁿ ngaⁿ'á ngií ndís'tiī, chí 'áámá chéeé ndís'tiī chí nge'é nī nduucú diīⁿ nī entregar 'úú.

¹⁹ Tuu'mi ní discípuⁿlos ní s'nee ndaachi núúⁿ yā ní tuca'a yā tiinguuneeⁿ yā Jesús ca'áámá ca'áámá yā: ¿'Áá 'úú? Ní táámá yā ngaⁿ'a ntúuⁿ yā: ¿'Áá 'úú rá?

²⁰ Jesús nan'gueεcútaⁿ'a yā: 'Áámá cheε naachi ndiichúúví chí di'caāndá yā pan yeⁿ'é yā na cú'ú 'cūū nduucú caⁿ'á yā diīⁿ yā 'tíicā. ²¹ Cuaacu, chí Saⁿ'ā chí Daiya Dendyuūs caⁿ'a sa 'cuenú sa cuuvi tan'dúúccā chí ngaⁿ'a yeⁿ'é yā naachi canéé nguūⁿ na libro yeⁿ'é Ndyuūs. De'ε chúúccā ya'ai yeⁿ'e saⁿ'ā chí nca'a sa 'úú chí Saⁿ'ā chí Daiya Ndyuūs. N'dáácā ca yeⁿ'ē sa ndúúti chí nguεε ch'iindiyaāⁿ sa.

²² Taachí veteé yā nge'e yā, tuu'mi ní Jesús sta'á yā pan, ní nca'a yā gracias Ndyuūs cáávā pan miiⁿ. Ní n'deé yā pan ní ca'a yā discípuⁿlos. Ní caⁿ'a yā: Che'é nī pan caati tan'dúúccā cuerpo yeⁿ'é 'tíicā.

²³ Ní Jesús sta'á yā taza ndúúccū nuūⁿnīⁿ yeⁿ'e uvas. Ní taachi nca'a yā gracias Ndyuūs, ca'a yā discípuⁿlos yeⁿ'é yā. Ní caⁿ'a yā. Nducyaaca ndís'tiī cu'ú nī nuūⁿnīⁿ uvas yeⁿ'e taza 'cūū. ²⁴ Ní caⁿ'a yā chii yā 'iīⁿ'yāⁿ s'eeⁿ: Nuūⁿnīⁿ uvas miiⁿ tan'dúúccā yuūuⁿ yeⁿ'é, ní yeⁿ'e 'áámá compromiso chí ngai yeⁿ'é. Yuūuⁿ yeⁿ'é chí cungeeⁿ ní cáávā 'yaaⁿ n'dái 'iīⁿ'yāⁿ. ²⁵ Cuaacu níⁿ'nyúⁿ ngaⁿ'á ngií ndís'tiī, chí 'āā ntéeé cu'ú nuūⁿnīⁿ yeⁿ'e uvas na iⁿ'yeeⁿdí 'cūū ndíí nguuví chí cu'ú naachí Ndyuūs ngaⁿ'a ntiiⁿ'nyúⁿ yā.

Jesús ngaⁿ'a yā chí Pedro ní caaⁿ'maⁿ sa chí nguéeé in'diichi sa Jesús

(Mt. 26.30-35; Lc. 22.31-34; Jn. 13.36-38)

²⁶ Taachí ch'iinu chiita yā himno, chi canción yeⁿe Ndyuūs nan'dáa yā va'āi ní cueⁿé yā na yiicū chi nguuvi Olivos. ²⁷ Tuu'mi ní Jesús caⁿ'a yā chii yā discípulos: Nducyaaca ndís'tií cuuví 'cuinaán nī yeⁿ'ē 'úú maaⁿnguínū caati ngaⁿ'a naachi canéé nguūⁿ na libro yeⁿ'é Ndyuūs 'túúcā: 'Nuūcá'ai yā 'caaⁿ'núⁿ yā saⁿ'ā chi idiiⁿ sa cuidado 'iiti cuūchī ní 'iiti cuūchī s'eeⁿ ní caⁿ'á 'muuⁿ caⁿ'á miíⁿ tī. ²⁸ Taachi 'úú nduuchí yeⁿ'e nguaaⁿ tináⁿ'ā, caⁿ'á vmnaaⁿ yeⁿ'é ndís'tií na yáⁿ'āa Galilea.

²⁹ Tuu'mi ní Pedro miiⁿ ní caⁿ'a sa chii sa 'iiⁿ'yāⁿ: 'Áará chí nducyaaca yā cuuví 'cuinaán yā, 'úú ní nguéé cuuví 'cuinaán.

³⁰ Tuu'mi ní Jesús ní caⁿ'a yā chiiya Pedro: Cuaacu níⁿnyúⁿ ngaⁿ'á ngíⁿ dii chi maaⁿnguínu taachi 'āā cuéé 'cuaī tusáⁿ'ā 'uūvī cuuvi, 'iinū cuuvi cueeⁿdíⁿtu di ngaⁿ'a di yeⁿ'ē 'úú chi nguéé in'diichi di 'úú.

³¹ Naati Pedro miiⁿ ní cheeⁿdiitū caⁿ'a sa: 'Áará chí 'cuūví ndúúcu nī, Maestro, nguéé ngaⁿ'á chi nguéé in'diichí N'dií. Ní nducyaaca discípulos ní 'tiicá ntúūⁿ caⁿ'a yā.

Jesús ngaⁿ'angua'á yā na jardín chi nguuvi Getsemaní

(Mt. 26.36-46; Lc. 22.39-46)

³² Tuu'mi ní ndaa yā na 'áamá jardín chi nguuvi Getsemaní, ní Jesús caⁿ'a yā chii yā discípulos yeⁿ'e yā: 'Cuēté nī 'muuⁿ, neⁿ'e chí 'úú caⁿ'á caaⁿ'māⁿngua'á.

³³ Ní Jesús candéε yā Pedro, ndúúcu Jacobo, ndúúcu Juan. Ní neené nadicádiinuⁿ Jesús ní neené s'neeⁿ ndaachí yiinú yā. ³⁴ Ní caⁿ'a yā chii yā 'iiⁿ'yāⁿ s'eeⁿ: Alma yeⁿ'é neené ndaachi yiinú chi ya'āi chí 'cuūví. 'Āā snéé núúⁿ nī 'muuⁿ, ní nguéé 'cuēti yaadú nī.

³⁵ Tuu'mi ní Jesús cueⁿ'e yā ta 'lííⁿ cuááⁿ vmnaaⁿ, ní candiitín'dii yā na yáⁿ'āa ní caⁿ'angua'á yā ní caⁿ'a yā: N'dií Chiidá, ndúúti chí cuuví ní nguéé dííⁿ nī yeⁿ'e chí 'cuenú cuuvi yeⁿ'e prueba 'cūū chí canéé chí cuuví hora chí cuchii. ³⁶ Tuu'mi ní naachí caⁿ'angua'á yā ní caⁿ'a yā: N'dií Chiidá, n'dií cuuvi dííⁿ nī tanducuéⁿ'ē. Nadinguáⁿ'ai nī 'úú yeⁿ'e chí 'cuenú cuuvi prueba 'cūū. Naati nguéé cuuví tan'dúúca chí 'úú neⁿ'é, naati tan'dúúca chí n'dií neⁿ'e nī.

³⁷ Tuu'mi ní ndaa ntúūⁿ yā naachi snee discípulos yeⁿ'é yā, ní ndaāca yā discípulos chí stiyaadú yā. Ní Jesús caⁿ'a yā chí yā Pedro miiⁿ: Díí Simón, ¿Áá cyaadu dí? ¿Áá nguéé ichéε di cánduuchi di mar 'áamá hora? ³⁸ Ndís'tií 'cuēti nduuchí nī ní caaⁿ'maⁿngua'á nī ní nguéé dííⁿ nī nuuⁿndi. Cuaacu níⁿnyúⁿ espíritu yeⁿ'e nī neⁿ'e diiⁿ n'daacáā, naati cuerpo yeⁿ'é nī ní 'āā duūvā.

³⁹ Tuu'mi ní Jesús cueⁿ'e ntúūⁿ yā ní ngaⁿ'angua'a yā, ní caⁿ'a ntúūⁿ yā tan'dúúca chí caⁿ'a yā vmnaaⁿ. ⁴⁰ Ní nguεcunée yā ndaa ntúūⁿ yā naachi snéé discípulos, ní ndaaca ntúūⁿ yā 'iiⁿ'yāⁿ s'eeⁿ stiyaadú yā. Ní 'āā ntéé ngii ichéε yā ndúúcu yaaⁿ ti nduutináaⁿ yā chí yaaⁿ náaⁿ yā. Ní 'iiⁿ'yāⁿ s'eeⁿ ní nguéé déenu yā chí n'guεcútaⁿ'a yā. ⁴¹ Cueⁿ'é yā ndii chíiⁿ ndii 'íínú cuuvi, ní ngaⁿ'angua'á yā. Ní taachi ndaa yā naachi snee discípulos, caⁿ'a yā: Ndís'tií 'cuētiyaadú nī ní ntaavi'tuunúúⁿ nī. 'Āā tiiní cā. 'Āā ndaa hora chí 'iiⁿ'yāⁿ nca'a yā 'úú Saⁿ'ā chí Daiya Dendyuūs na tá'ā saⁿ'ā s'eeⁿ chí dinuuⁿndi. ⁴² Nducueeⁿ ndís'tií ní cuⁿ'ū yú. 'Āā cuchii niiⁿnuúⁿ saⁿ'ā chí nca'a 'úú.

Chiichí yā Jesús ní candéε yā 'iiⁿ'yāⁿ preso

(Mt. 26.47-56; Lc. 22.47-53; Jn. 18.2-11)

⁴³ Naaⁿ chí Jesús indée yā ndaa Judas chí saⁿ'ā 'áamá yeⁿ'ē ndiichuuví discípulos. Ní ndaa sa ndúúcu n'dee n'dái 'iiⁿ'yāⁿ ndúúcu machete 'uūvī lados 'caāiⁿ ndúúcu yáⁿ'á. Chiiduú n'gēεε ndúúcu maestros yeⁿ'e ley, ndúúcu 'iiⁿ'yāⁿ ndiicúú chí ngaⁿ'a ntiⁿ'nyuⁿ yeⁿ'e yaācū dichó'o yā 'iiⁿ'yāⁿ s'eeⁿ. ⁴⁴ Judas miiⁿ chí nca'a sa Jesús 'iiⁿ'yāⁿ s'eeⁿ, ní ca'a sa 'aama seña. Ní caⁿ'a sa 'túúcā: 'Iiⁿ'yāⁿ chí 'úú chí'neeⁿ cheendí, 'iiⁿ'yāⁿ miiⁿ chíí. Cuta'á nī 'iiⁿ'yāⁿ ní candéé nī 'iiⁿ'yāⁿ ní din'daacá nī seguro 'iiⁿ'yāⁿ.

⁴⁵ Taachí ndaa Judas nanááⁿ Jesús ní caⁿ'a sa: N'dií Maestro, Maestro. Ní 'neeⁿ cheendi sa 'iiⁿ'yāⁿ. ⁴⁶ Tuu'mi ní sta'á yā Jesús ní candéε yā preso 'iiⁿ'yāⁿ. ⁴⁷ Naati 'áamá chéé 'iiⁿ'yāⁿ chí snéé miiⁿ itun'dáa yā machete chí 'uuví lados 'caāiⁿ yeⁿ'e yā ní 'nuucá'ai yā

mozo yeⁿe chiiduú ch'εεte ca ní ch'iica sa veēⁿ mozo miiⁿ. ⁴⁸ Tuu'mi ní Jesús caⁿa yā chii yā nducyaaca 'iiⁿyāⁿ s'eeⁿ: ¿'Áá can'daā ndís'tiī ndúúcu machete chi 'uūví lados 'caāiⁿ ndúúcu yáⁿ'á chí cuta'á ní 'úú tan'dúúca chi 'úú 'áámá duucu 'úú? ⁴⁹ Nguuvi nguuvi caneé na yáacū templo miiⁿ nguaaⁿ ndís'tiī chi ngi'cueéⁿ ní ndís'tiī ní nguεε sta'á ní 'úú. Chúu canéé chí cuuvi ní cuuvi cunnuū ca'ā naachi canéé nguūⁿ na libro yeⁿ'é Ndyuūs.

⁵⁰ Tuu'mi ní nducyaaca discípulos s'néeⁿ yā Jesús miiⁿ dámaáⁿ yā ní cheenu yā.

Saⁿ'ā 'díí chí cueⁿ'e ngéenu

⁵¹ Naati 'áámá saⁿ'ā 'dííⁿ ndaā sa ní cueⁿ'e sa ndúúcu 'iiⁿyāⁿ s'eeⁿ. Ndeecu sa 'áámá n'dyáⁿ'ā sávana. 'Áámá yā sta'á yā saⁿ'a 'díí miiⁿ. ⁵² Naati saⁿ'ā 'dííⁿ miiⁿ ní s'neeⁿ sa sávana ní cueⁿ'ē sa dáca yuúcu sa.

Jesús nanááⁿ 'iiⁿntyéⁿ'ē chí n'gεεte ca yeⁿ'e yaācū

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tuu'mi ní candée yā Jesús miiⁿ nanááⁿ chiiduú ch'εεte ca. Ní miiⁿ nduuvidaamá yā nducyaaca chiiduú n'gεεté ndúúcu 'iiⁿyāⁿ ndiicúu chí ngaⁿ'a ntiinyuⁿ yeⁿ'e yaācū ndúúcu maestros yeⁿ'e ley. ⁵⁴ Pedro miiⁿ ní cueⁿ'ē yaⁿ'ai sa n'dáa sa Jesús miiⁿ. Ní ndaa sa ndii chuva'āi yeⁿ'e va'ai chiiduú ch'εεte ca ní ch'iindī sa ndúúcu policías ní in'taavi cuutú sa dáámá ndúucu yā ti miiⁿ ní ngiichi yaⁿ'ā yeⁿ'é yā.

⁵⁵ Chiiduú n'gεεte ndúúcu nducyaaca yā chí nduuvidaama in'nuúⁿ yā 'áámá prueba contra yeⁿ'e Jesús miiⁿ chí dííⁿ yā condenar Jesús chí 'caaⁿ'núⁿ yā Jesús; naati nguée ndaaca yā. ⁵⁶ Neené 'yaaⁿ 'iiⁿyāⁿ ngaⁿ'a yā nduudu yaadi yeⁿ'e Jesús miiⁿ naati mar 'áámá yā nguée dáámá ngaⁿ'a yā. ⁵⁷ N'duuví yā ní ncueeⁿ yā ní caⁿ'a yā nduudu yaadi, ní caⁿ'a yā: ⁵⁸ Nús'uu ní ch'iindiveéⁿ 'nū chí Jesús caⁿ'a yā 'túúca: 'Úú ní nadituūví yáacu 'cūú chí saⁿ'ā yeⁿ'e iⁿ'yeeⁿdí 'cūú din'dái sa. Ní cheeti 'iinū nguuvi nadin'dái taama chí nguée saⁿ'ā iⁿ'yeeⁿdí 'cūú din'dái sa.

⁵⁹ Naati nguée nduuvidaámá nduudu yā yeⁿ'e chí ngaⁿ'a yā.

⁶⁰ Tuu'mi ní chiiduú ch'εεte ca chí ngaⁿ'a ntiinyuⁿ yeⁿ'e tanáⁿ'ā chiidū, ndúcueeⁿ yā nguaaⁿ nducyáácá 'iiⁿyāⁿ s'eeⁿ ní ntiinguuneeⁿ yā Jesús miiⁿ: ¿'Áá nguée de'ē veε nan'guεεcútaⁿ'a ní? ¿De'ē chí ngaⁿ'á yā yeⁿ'e ní? ¿De'é ngaⁿ'a ní maáⁿ ní yeⁿ'e ní?

⁶¹ Jesús mííⁿ 'āā ntéeⁿ caⁿ'a yā. Ní nguée n'guéécútaⁿ'a yā yeⁿ'ē mar 'áámá. Chiiduú ch'εεte ca miiⁿ ntiinguunééⁿ ntúuⁿ yā Jesús, ní caⁿ'a yā: ¿'Áá dii Cristo, Daiya Dendyuūs chí n'dai taavi?

⁶² Jesús caⁿ'a yā chii yā 'iiⁿyāⁿ s'eeⁿ: 'Tíicā 'úú. Ndís'tiī ní caⁿ'a ní snaaⁿ ní Saⁿ'ā chí Daiya Dendyuūs chí 'cuūndī sa lado yeⁿ'e honor yeⁿ'é Ndyuūs chí véé tanducuéⁿ'ē poder yeⁿ'e yā. Ní ndaa sa nguaaⁿ meééⁿ yeⁿ'ē nanguuvi.

⁶³ Tuu'mi ní chiiduú ch'εεte ca chíín'cuūⁿ sa catecai sa, ní caⁿ'ā sa: ¿De'ē ca diiⁿ yú testigos chí n'nuuⁿ yú? ⁶⁴ 'Āā ch'iindiveéⁿ ní dendu'ū chí ngaⁿ'ā sa contra Ndyuūs. ¿Táácā tuumicadínuuⁿ ní? Nducyaaca 'iiⁿyāⁿ ngaⁿ'a yā chí condenado Jesús chí 'cuuví yā.

⁶⁵ Tuu'mi ní n'duuví yā ní ca'a nee daíⁿ yā Jesús ní n'gaadí yā nduutináaⁿ yā ndúúcu tíínūⁿ. Ní policías ndúúcu ta'á yā ch'eⁿ'e yā naaⁿ Jesús. Ní caⁿ'a yā: Caaⁿ'maⁿ dí ¿du'ū ch'eⁿ'e dii?

Pedro miiⁿ ní ngaⁿ'ā sa chí nguée n'diichi sá Jesús

(Mt. 26.69-75; Lc. 22.56-62; Jn. 18.15-18, 25-29)

⁶⁶ Pedro miiⁿ ní canee sa chuva'ai cuaaⁿ ndiyyā. Ní ndaā 'áámá n'daataá chí dííⁿ mandado yeⁿ'ē chiiduú ch'εεte ca nanááⁿ Pedro miiⁿ. ⁶⁷ Ní n'diichi tá chí in'taavi cúutū sa na yaⁿ'ā. Ní cānee táⁿ'ā miiⁿ ní ch'iinu tá Pedro. Tuu'mi ní caⁿ'a tá: Diī ntúūⁿ di canee dí ndúúcu Jesús yeⁿ'e yāāⁿ Nazaret.

⁶⁸ Naati Pedro miiⁿ cheeⁿdiitū sa, ní caⁿ'ā sa: 'Úú ní nguée in'diichí 'iiⁿyāⁿ, ndíí nguée deenú chí ngaⁿ'ā di. Ní can'dáa sa cuaaⁿ chuva'āi naachi indaa yā. Tuu'mi ní 'caī tusáⁿ'ā. ⁶⁹ Táⁿ'ā chí idiiⁿ mandado miiⁿ ch'íínú ntuūⁿ ta sáⁿ'ā, ní caⁿ'a tá chí tá 'iiⁿyāⁿ chí snée yā miiⁿ: Sáⁿ'a 'cūú 'áámá chéeⁿ saⁿ'ā chí cachiica ndúúcu Jesús.

⁷⁰ Naati Pedro miiⁿ ní nngueēcunée sa cheeⁿdíftu sa. Cuayiivi miiⁿ ní 'iiⁿ'yāⁿ chi snée yā miiⁿ ní caⁿ'a ntúuⁿ yā Pedro: Cuaacu chí dii ní dáámá chi cachiica di ndúúcu Jesús ti dii ní yeⁿ'ē yáⁿā Galilea, ní nduudu yeⁿ'ē di tan'dúúca 'iiⁿ'yāⁿ s'eeⁿ.

⁷¹ Tuu'mi ní Pedro miiⁿ ní 'caa'va sa, ní cunncāa caⁿ'ā sa. Ní 'cái sa “por Ndyuūs”: Nguéé n'diichi 'íiⁿ'yaⁿ 'cúu.

⁷² Tuu'mi ní túsaⁿ'ā miiⁿ 'cai ntúuⁿ tī ndii 'úúví cuuvi. Ní Pedro miiⁿ ní n'gaācu sa chi Jesús caⁿ'a yā chii yā saⁿ'ā: 'Naaⁿ chi 'āā cuéé 'cuaī túsaⁿ'ā 'uūví cuuvi, 'āā 'íínú cuuvi cheeⁿdiitu di chí ngaⁿ'a di chi nguéé n'diichi di 'úú. Taachi nádicādínúuⁿ sa chuū, ní cheēcū sa.

15

Jesús nanááⁿ Pilato

(Mt. 27.1-2, 11-14; Lc. 23.1-5; Jn. 18.28-38)

¹ Taachí chideεve, chiiduú n'gēetē ní nduuvi daamá yā ndúúcu 'iiⁿ'yāⁿ ndiicúu chi ngaⁿ'a ntiiⁿnyuⁿ yeⁿ'e yācū, ndúúcu maestros yeⁿ'e ley, ndúúcu nducyaaca 'iiⁿ'yāⁿ n'gēete. Ní ndēē chiichi yā Jesús ní candēe yā 'iiⁿ'yāⁿ nanááⁿ gobernador Pilato. ² Tuu'mi ní Pilato miiⁿ intiinguuneeⁿ yā Jesús: ¿'Áá díí Rey yeⁿ'e 'iiⁿ'yāⁿ Israel s'eeⁿ chi judíos? Ní Jesús nan'guεcútaⁿ'a yā: N'dií ngaⁿ'a cuaacú nī ti 'tíicā. ³ Chiiduú n'gēete ní neené n'dee nááⁿ chí ngaⁿ'á yā contra yeⁿ'e Jesús naati Jesús nguéé nan'guεcútaⁿ'a yā yeⁿ'ē mar 'áámá. ⁴ Tuu'mi ní Pilato miiⁿ ní nan'guεcunée yā ntinguunéeⁿ yā Jesús miiⁿ: ¿'Áá nguéé de'ē veε nán'guεcútaⁿ'á nī? 'Cuin'díichí nī yeⁿ'é tanducuéⁿ'ē chí nguéé n'daacā ngaⁿ'á yā yeⁿ'e nī.

⁵ Naati Jesús miiⁿ ní nguéé de'ē veε nan'guεcútaⁿ'á yā. Chíⁿ chí Pilato miiⁿ cheⁿ'e yiinú yā ní nguéé déenu yā de'ē nadicádínúuⁿ yā.

Pilato caⁿ'a yā chi 'íiⁿ'yāⁿ s'eeⁿ candēe yā Jesús chi 'caaⁿ'núⁿ yā 'iiⁿ'yāⁿ

(Mt. 27.15-31; Lc. 23.13-25; Jn. 18.38-19.16)

⁶ Canée 'áámá costumbre yeⁿ'e 'iiⁿ'yāⁿ Israel s'eeⁿ chí n'dεechi yā 'áámá saⁿ'ā chi canuuⁿ vácūu nguuvi 'viicú yeⁿ'e pascua. 'Áámá saⁿ'ā chí preso sa chí 'iiⁿ'yāⁿ Israel neⁿ'e yā, 'tíicā canee chí diiⁿ Pilato miiⁿ. ⁷ Ní canuuⁿ 'áámá saⁿ'ā vácūu chí nguuvi Barrabás ndúúcu ta n'duuvi saⁿ'ā chí 'niⁿ'nuⁿ sa 'iiⁿ'yāⁿ taachi 'āā diiⁿ caandá yā contra gobierno miiⁿ. ⁸ Ní 'iiⁿ'yāⁿ Israel s'eeⁿ ní ndaa yā nanááⁿ Pilato miiⁿ, ní chiica yā chí Pilato ní diiⁿ yā tan'dúúca costumbre yeⁿ'e yā. ⁹ Ní Pilato miiⁿ nan'guεcútaⁿ'a yā: ¿'Áá neⁿ'e nī chí n'dēēchí Rey yeⁿ'ē 'iiⁿ'yāⁿ Israel?

¹⁰ Tí Pilato miiⁿ deenu yā chí chiiduú n'gēete nca'á yā Jesús miiⁿ cáāvā vaadi nguēē. ¹¹ Naati chiiduú n'gēete chinúu yā 'iiⁿ'yāⁿ yeⁿ'e yāā Jerusalén chí caaca yā Barrabás ti n'daacā chí n'dεechi yā saⁿ'ā chí nguuvi Barrabás. ¹² Tuu'mi ní Pilato miiⁿ intiinguuneeⁿ yā: ¿De'ē neⁿ'e nī chí diiⁿ ndúúcu 'iiⁿ'yāⁿ chí ndís'tií ngaⁿ'a nī Rey yeⁿ'e 'iiⁿ'yāⁿ Israel?

¹³ 'Iiⁿ'yāⁿ s'eeⁿ nan'guεcútaⁿ'a yā ní 'cai yiicú yā: Cu'neeⁿnga'á nī 'iiⁿ'yāⁿ.

¹⁴ Pilato miiⁿ ní caⁿ'a yā chí yā 'iiⁿ'yāⁿ s'eeⁿ: ¿De'ē chí nguéé n'daacā ndíⁿ sáⁿ'a 'cūu? Naati 'iiⁿ'yāⁿ s'eeⁿ ní nan'guεcúnée yā 'cai yā: Cu'neeⁿnga'á nī 'iiⁿ'yāⁿ.

¹⁵ Tuu'mi ní Pilato miiⁿ chí nguéé neⁿ'e yā chí nduuvi táaⁿ 'iiⁿ'yāⁿ s'eeⁿ yeⁿ'é yā, n'dεechi sá Barrabás miiⁿ. Cuayiivi ní caⁿ'a ntiiⁿnyuⁿ sa chí 'cueⁿ'é yā Jesús miiⁿ. Ch'iinu ch'eⁿ'é yā Jesús miiⁿ ní nca'a sa Jesús miiⁿ 'iiⁿ'yāⁿ chí cu'nééⁿnga'á yā.

¹⁶ Tuu'mi ní soldados romanos candēe sa Jesús vaacuyāⁿ na cuarto yeⁿ'e palacio miiⁿ chí nguuvi Pretorio, ní yaa'ví yā tanáⁿ'ā soldados ní nduuvidaamá yā miiⁿ. ¹⁷ Ní s'nuúⁿ yā catecai morado cuá'āa Jesús miiⁿ. Ní s'nuúⁿ yā tiiⁿ Jesús miiⁿ 'áámá corona chí ndeenyú ndúúcu yaaⁿ. ¹⁸ Tuu'mi ní tucá'a yā 'cai yā: Cunduuchi nī n'dií, Rey yeⁿ'e 'iiⁿ'yāⁿ Israel.

¹⁹ Ní ch'eⁿ'é yā tíiⁿ yā ndúúcu 'áámá taaⁿ nduu. Ní ca'a nee dáⁿ yā Jesús ní nchiintii'yá yā nanááⁿ yā, ní diiⁿ yā honrar 'iiⁿ'yāⁿ. ²⁰ Ch'iinu ch'iinnyuⁿnéⁿ yā yeⁿ'e Jesús 'tíica, ndivíi yā catecai chí morada ní 'nuuⁿ 'nuūⁿ ntúuⁿ yā catecai maáⁿ yā. Cuayiivi tun'dáa yā Jesús ní s'neeⁿnga'á yā 'iiⁿ'yāⁿ.

S'nééⁿnga'á yā Jesús

(Mt. 27.32-44; Lc. 23.26-43; Jn. 19.17-27)

²¹ 'Áámá saⁿā yeⁿe yáⁿāa Cirene chi nguuvu sa Simón, chí chiidá Alejandro ndúúcu Rufo, ndáa sa cheⁿe sa cuēeti. Taachí cho'o sa cyúúni miiⁿ, soldados a fuerza di'cuítu yā saⁿā chi candēε sa cruz yeⁿe Jesús miiⁿ.

²² Ní candēε yā Jesús 'áámá lado yeⁿe yáāⁿ Jerusalén na lugar chi nguuvu Gólgota chi neⁿe caaⁿmaⁿ nduudu yeⁿe yú, Lugar ní 'lini Nga'ai Tíiⁿ. ²³ Ní ca'á yā chí chi'i Jesús vino chi staⁿa yā ndúúcu yāātā yaāa chi nguuvu mirra, naati Jesús nguēé chí'i yā. ²⁴ Tuu'mi ní chi'neeⁿnga'á yā Jesús. Ní soldados ní tun'dáa yā suertes yeⁿe yā ndúúcu na catecai Jesús miiⁿ, ní n'diichí yā cheē chí candēε 'aama 'aama yā.

²⁵ N'gēecú nuuⁿ yeⁿe ngēetiyaaⁿ miiⁿ taachí s'neeⁿnga'á yā 'iiⁿyāⁿ. ²⁶ Ni s'nééⁿ yā 'áámá letrero na tíiⁿ cruz yeⁿe Jesús miiⁿ. Ní letra chí cánéé nguūⁿ na tabla miiⁿ ní ngaⁿā yeⁿe nuūⁿndi yeⁿe yā. Ní cánéé nguūⁿ chuū: Rey yeⁿe 'iiⁿyāⁿ yeⁿe ndaata Israel. ²⁷ Dáámá ndúúcu Jesús s'neeⁿnga'á yā 'uūvi sáⁿā chí duucu. 'Áámá ní lado tá cuaacú yā táámá ní lado ta 'cueé yā. ²⁸ 'Tíicā ní chí cuaacu naachi canéé nguūⁿ na libro yeⁿe Ndyuūs 'tíicā: Chídídúúché yā ndúúcu 'iiⁿyāⁿ chí véé nuuⁿndi yeⁿe yā.

²⁹ 'Iiⁿyāⁿ chí ngo'ó yā nanááⁿ cruz miiⁿ cunncáa ngaⁿa yā yeⁿe Jesús. Idi'núⁿu yā tíiⁿ yā ní cunncáa n'dai cheendi yā ní ngaⁿa yā: Díí chí ndiituū'ví di yaācū ní nadacueéⁿ di cheeti 'iinū nguuvu, ³⁰ nadanguáⁿāi maāⁿ di. Dii ní nch'eeⁿ di na cruz.

³¹ 'Tiicá ntúūⁿ chiiduú n'gēete ndúúcu maestros yeⁿe ley duuchinéeⁿ yā Jesús. Ní ngaⁿa yā nguuaⁿ maāⁿ yā: 'Iiⁿyāⁿ miiⁿ nadinguáⁿai yā táámá 'iiⁿyāⁿ naati maaⁿ ní nguéé ngíí nadinguáⁿai yā maāⁿ yā 'iiⁿyāⁿ. ³² Nduúti chí 'iiⁿyāⁿ miiⁿ chí Cristo miiⁿ snaaⁿ yú 'iiⁿyāⁿ nch'éeⁿ yā na cruz maaⁿ. Tuu'mi ní cu'téenu yú. Ní ndíí 'iiⁿyāⁿ chí ca'neeⁿnga'á yā daama ndúúcu Jesús miiⁿ ní cunncáa ngaⁿa yā yeⁿe yā.

Jesús ch'ii yā

(Mt. 27.45-56; Lc. 23.44-49; Jn. 19.28-30)

³³ Taachí chí maⁿa nguuvu miiⁿ chí maāⁿ núúⁿmáⁿ íⁿyeeⁿdí ndii ná n'gēecu 'íinú chíinū. ³⁴ 'Áā táanduū n'gēecu 'iinū Jesús miiⁿ ní 'cai yiicú yā: Eloi, Eloi, ¿lama sabactani? (chí neⁿe caaⁿmaⁿ nduudu yeⁿe yú: N'díí Ndyuūs yeⁿe, n'díí Ndyuūs yeⁿe, ¿de'ē cuuvi chí s'neé nī maaⁿ 'úú dámaáⁿ?)

³⁵ N'dúú'ví 'iiⁿyāⁿ chí snee yā miiⁿ ní ch'iindiveéⁿ yā ní caⁿa yā: 'Caandiveéⁿ nī, n'gai yā yeⁿe profeta Elías miiⁿ.

³⁶ Ní ndāā 'áámá soldado ngeenu yā ní taachi chíitu 'áámá esponja yeⁿe vinagre s'nééⁿ yā esponja miiⁿ na 'áámá ndúú ní ca'a yā chí chí'i Jesús. Ní caⁿa yā: 'Áā canee rá yā. N'diichi yú nduuti chí 'áá chí profeta Elías miiⁿ ní nádich'eeⁿ sa 'iiⁿyāⁿ.

³⁷ Tuu'mi ní Jesús 'cai yiicú yā ní ch'ii. ³⁸ Ní cortinas yeⁿe yaācū templo chí 'uuvi taāⁿ, steēⁿ naavtáⁿā ndíí cuááⁿ 'niinúⁿ ndíí cuááⁿ ndiiyā. ³⁹ Ní 'áámá saⁿā romano chí ngaⁿa ntiinnyuⁿ yeⁿe cien soldados chééndii sa nanááⁿ Jesús miiⁿ. Taachí n'diichí sa ní ch'iindiveéⁿ sa taacá 'cai Jesús ní taacá ch'ii yā, soldado miiⁿ ní caⁿa sa: Cuaacu níⁿnyúⁿ chí sáⁿa 'cūú ní Dáiyá Dendyuūs saⁿā.

⁴⁰ Snée ntúūⁿ n'duuvu n'daataá n'giinu yaⁿai tá. Ní ndúúcu n'daata s'éeⁿ míⁿ canee ta María yeⁿe yáāⁿ Magdala, ndúúcu tá María chí cheecuú José ndúúcu Jacobo chí nguuvu Menor, ndúúcu n'daataá chí nguuvu Salomé. ⁴¹ N'daata s'éeⁿ ní can'dáa yā Jesús miiⁿ ní dichíí'vé yā Jesús taachi cachiicá yā yáⁿā Galilea. Ní neené 'yaaⁿ ca n'daataá snée yā miiⁿ, n'daataá chí ngaⁿa yā daama ndúúcu Jesús miiⁿ na yáāⁿ Jerusalén.

Ch'iiichí yā cuerpo yeⁿe Jesús miiⁿ

(Mt. 27.57-61; Lc. 23.50-56; Jn. 19.38-42)

⁴² Taachí chíinū nguuvu miiⁿ chí viernes chí ch'iindiyááⁿ yā cáávā 'viicu pascua miiⁿ nguuvu chí cuuvi deēve nguuvu chí ntaavi'tuunúúⁿ yā 'iiⁿyāⁿ, ⁴³ ndāā José yeⁿe yáāⁿ Arimatea. Saⁿā miiⁿ ní saⁿa ch'ēete yeⁿe Junta Ch'ēete yeⁿe 'iiⁿyāⁿ Israel. Ní cunee ngiinu sa nguuvu chí Ndyuūs ndaa yā ní ngaⁿa ntiinnyuⁿ yā. Ní ndúúcu valor ndāā sa

nanáán gobernador Pilato miiⁿ. Ní caⁿ'a sa Pilato miiⁿ chí nca'a yā cuerpo yeⁿ'e Jesús. ⁴⁴ Pilato miiⁿ ní cueⁿ'e yiinú yā chí 'āā ch'iī Jesús miiⁿ ní yaa'vi yā saⁿ'ā chi ngaⁿ'a ntiinyuⁿ yeⁿ'e soldados chi cuchii sa nanáán yā. Taachí ndaa sa ní 'iicu tiinguuneeⁿ yā saⁿ'ā: ¿'Áá cuaacu chi ch'iī Jesús? ⁴⁵ Taachí soldado centurión miiⁿ ngaⁿ'a sa chi cuaacu, tuu'mi ní Pilato miiⁿ ca'a yā orden chi ca'a sa cuerpo yeⁿ'e Jesús miiⁿ José miiⁿ. ⁴⁶ Cuayivi ní José cái sa 'áámá sámana chi fina ní nadicheeⁿ sa cuerpo miiⁿ ní sta'a sa ní ch'ēēcū sa cuerpo miiⁿ ná sámana miiⁿ. Ch'iinu maaⁿ ní s'nuūⁿ sa cheeti 'áámá yáinyāⁿ ní níⁿnuūⁿ canee 'áámá tuūu ch'ēēté. Ní s'nuūⁿ yā tuūu ch'ēēte cheendi yáinyāⁿ miiⁿ. ⁴⁷ Tá María Magdalena ndúucū María chi cheecuú José cueⁿ'é yā ní n'diichí yā naachí ch'ēēchi Jesús miiⁿ.

16

Jesús nduuchi yā yeⁿ'ē nguuaⁿ tináⁿ'ā

(Mt. 28.1-10; Lc. 24.1-12; Jn. 20.1-10)

¹ Taachi chó'ōo sámano, nguuvi chi ntaavi'tuunúúⁿ yā, María yeⁿ'e yáān Magdala, ndúucū María chí cheecuú Jacobo, ndúucū n'daata chi Salomé cai yā perfumes chi cueendái yā vmnáán yeⁿ'ē cuerpo yeⁿ'ē Jesús miiⁿ ní cueⁿ'e yā. ² Neené tyaaⁿ yeⁿ'ē nguuvi vmnáán vmnaaⁿ yeⁿ'é ndēēte chi domingo taachí can'dáá 'yáⁿ'ā n'daata s'eeⁿ ndaa yā na yáinyāⁿ miiⁿ. ³ Ní ngāⁿ'a yā nguááⁿ maáⁿ yā: ¿Du'ū ndiví tuūu yeⁿ'ē yú taachí ndaa yú cheendi yáinyāⁿ?

⁴ Taachí ndaa yā, tuu'mi ní n'diichi yā chi tuūu ch'ēēté n'dai miiⁿ 'āā ntéé canéé na lugar yeⁿ'ē. ⁵ Ní taachí ndaa yā cheeti yáinyāⁿ, miiⁿ n'diichí yā 'áámá saⁿ'ā 'díⁿ vee sa lado tá cuaacú ní canúúⁿ sá catecai ch'éenūu sa ní cuēē. Ní n'daata s'eeⁿ dii'yá yā chí. ⁶ Sáⁿ'ā miiⁿ ní caⁿ'ā sa: Nguéé dii'yá ní cuuvi. Ndís'tiī ní in'nuūⁿ ní cuerpo yeⁿ'e Jesús yeⁿ'e yáān Nazaret, 'iiⁿ'yāⁿ chí iiⁿ'yāⁿ s'eeⁿ ca'néénga'a yā. Nááti 'iiⁿ'yāⁿ miiⁿ ní 'āā ndúúchí yā yeⁿ'ē nguuaⁿ tináⁿ'ā ní nguéé yā 'muuⁿ. Cuin'diichí ní naachí canuúⁿ yā. ⁷ Ndís'tiī cuinaⁿ'á ní ní cuuvi ní discípulos yeⁿ'e yā, ndúucū Pedro, chí Jesús miiⁿ ní caⁿ'á yā vmnáán ndís'tiī na yáⁿ'ā Galilea. Míⁿ snaáⁿ ní 'iiⁿ'yāⁿ tan'dúúca chí Jesús caⁿ'a yā chí yā ndís'tiī ndúucū tanáⁿ'ā 'iiⁿ'yāⁿ.

⁸ N'daata s'eeⁿ ní cunaⁿ'á yā ngeenu yā yeⁿ'e na yáinyāⁿ, ti neené cueⁿ'e yiinú yā ní yiinuuvi yā. Nguéé de'ē vee caⁿ'á yā chí yā mar 'áámá 'iiⁿ'yāⁿ, ti 'va'á yā.

Jesús che'enaáⁿ yā yeⁿ'e ta María Magdalena

(Jn. 20.11-18)

⁹ Taachí Jesús nduuchi yā chideeve nguuvi domingo chí nguuvi vmnáán vmnaaⁿ yeⁿ'e ndēēte miiⁿ, vmnáán vmnaaⁿ che'enaáⁿ yā nanáán María Magdalena, n'daata chí nn'diví yā ndēēchē espíritus yeⁿ'e yááⁿ'nguiinūuⁿ yeⁿ'ē ta. ¹⁰ Táⁿ'ā miiⁿ ní caⁿ'a tá ní chí tá 'iiⁿ'yāⁿ chí chíicá yā ndúucū Jesús miiⁿ. Ní ngeecú 'iiⁿ'yāⁿ s'eeⁿ chí neené ndaachí yiinū yā. ¹¹ Ní taachí 'iiⁿ'yāⁿ s'eeⁿ ch'iindiveéⁿ yā chí Jesús miiⁿ nduuchi yā yeⁿ'e nguuaⁿ tináⁿ'ā ní chí táⁿ'ā miiⁿ n'diichi tá Jesús, nguéé s'teenú yā.

Jesús che'enaáⁿ yā yeⁿ'ē 'uūvi discípulos yēⁿ'e yā

(Lc. 24.13-35)

¹² Cho'ōo chúu, ní Jesús che'enaáⁿ yā yeⁿ'ē 'uuvi 'iiⁿ'yāⁿ chí cueⁿ'é yā na yúúni. Ní Jesús diiⁿ yā tan'dúúca chí nguēe déenu yā yeⁿ'e chí chó'ōo. ¹³ Ní cuayivi 'iiⁿ'yāⁿ s'eeⁿ ní cunaⁿ'á yā ní caⁿ'a yā chí yā tanáⁿ'ā discípulos. 'Tiicá ntúúⁿ discípulos ní nguéé s'teenú yā.

Jesús idichó'o yā 'iiⁿ'yāⁿ apóstoles yeⁿ'e yā

(Mt. 28.16-20; Lc. 24.36-49; Jn. 20.19-23)

¹⁴ Chí ch'íinū nguuvi domingo miiⁿ, ní Jesús che'enaáⁿ yā yeⁿ'ē ndu'ū ndiicháámá discípulos yēⁿ'e yā, taachi 'iiⁿ'yāⁿ s'eeⁿ vēēté yā na mesa. Ní Jesús tuūvi iinú yā ndúucu yā ti discípulos nguéé s'teenú yā ní cheechi staava yeⁿ'é yā ti discípulos nguéé s'teenú yā 'iiⁿ'yāⁿ chí ngaⁿ'a yā chí n'diichí yā Jesús chí 'āā nduuchí yā yeⁿ'ē nguuaⁿ tináⁿ'ā.

¹⁵ Ní caⁿ'a yā chii yā discípulos: Cuéⁿ'e nī núúⁿ'máⁿ nación yeⁿ'e íⁿ'yeeⁿdī ní caaⁿ'máⁿ nī ndúú^dú cuaacu yeⁿ'ē chí nanguáⁿ'ai yā nanááⁿ nducyaaca 'iiⁿ'yāⁿ. ¹⁶ 'Iiⁿ'yāⁿ chí i'teenú yā ní ngēédínúúⁿ'niⁿ yā, ní nanguaⁿ'ai yā yeⁿ'e nuuⁿ'ndi yeⁿ'e yā. Naati 'iiⁿ'yāⁿ chí nguéé i'téénu yā cuuví yā condenado. ¹⁷ Níicú señales yeⁿ'e poder miiⁿ canéé ndúú^cū 'iiⁿ'yāⁿ chí i'téénu yā 'úú. Ndúú^cū chí duūchí tun'daá yā espíritus yeⁿ'e yááⁿ'guiinūⁿ yeⁿ'e 'iiⁿ'yāⁿ ní cuuví caⁿ'á yā táámá davaacu chí ngai. ¹⁸ Ní nduuti chí cuta'á yā ndúú^cū ta'a yā 'áámá cúú ní nguéé de'ē daño dííⁿ tī ndúú^cū yā. Ní nduuti chí cu'ú yā de'ē chí veneno miiⁿ nguéé diiⁿ daño 'iiⁿ'yāⁿ. Ní cun'duú yā ta'a yā vmnaaⁿ yeⁿ'ē 'iiⁿ'yāⁿ chí ngítā ní 'iiⁿ'yāⁿ s'eeⁿ ní nduūvā yēⁿ'e yā.

Jesús cundáa yā va'ai chēeti nguuvi

(Lc. 24.50-53)

¹⁹ Ch'íínú caⁿ'a Señor Jesús ndúú^dú 'cūú ndúú^cū discípulos yēⁿ'e yā ní cundáa yā na va'ai chēeti nguuvi. Ní ch'iindí yā lado yeⁿ'e honor yeⁿ'é Ndyuūs. ²⁰ Discípulos ní cueⁿ'e yā, ní caⁿ'a yā nduudu cuaacu yeⁿ'ē chí nanguaⁿ'ai yā ndu'ū cuaaⁿ. Maaⁿ Señor Jesucristo ngiinnee yā discípulos 'íicú canee n'daācā ndúú^dú yeⁿ'e yā cáávā señales ndúú^cū vaadi n'giinu chí dííⁿ yā. 'Tíicā chíi.

NDUUDU N'DÁÍ CHÍ DÍNGUŪⁿ APÓSTOL LUCAS

Yeⁿe cáávā chí idingúuⁿ yā carta 'cūū

¹ Nééné 'yaaⁿ 'iiⁿ'yāⁿ nguaaⁿ s'uuúⁿ neⁿ'é yā idingúuⁿ yā dendú'ū chí chíī, chíⁿ chí s'uuúⁿ deenu yú chí nduudu cuaacu. ² 'Tíicā tan'dúúccā chí 'iiⁿ'yāⁿ s'eeⁿ n'diichí yā tanducuéⁿ'ē ndíí taachí chí nga'ā, 'iiⁿ'yāⁿ s'eeⁿ ní chí 'cueeⁿ yā s'uuúⁿ. 'Iiⁿ'yāⁿ s'eeⁿ candéε yā nduudu cuaacu yeⁿ'é Ndyuūs ní ngaⁿ'á yā nduudu miiⁿ. ³ 'Úú, Lucas, idingúuⁿ yeⁿ'é díí Teófilo cáávā chí deenú chí díí ní n'dai di. 'Tiicá ntúūⁿ 'úú ní nadicádiinúúⁿ chí idingúuⁿ yeⁿ'é di tanducuéⁿ'ē chí chíī. Diiⁿncā n'diichí tanducuéⁿ'ē ndúúccū cuidado ndíí taachí nga'ā. ⁴ 'Túúccā idingúuⁿ ní tuumicadínnuuⁿ di chεε chí nduudu cuaacu yeⁿ'é dendú'ū chí 'iiⁿ'yāⁿ chí 'cuéⁿ yā dii.

Yeⁿe chí ángel yaa'vi yā chí ch'iindiyaāⁿ Juan

⁵ Tiempo miiⁿ chí 'iiⁿ'yāⁿ Herodes miiⁿ chí chíī yā rey yeⁿe yāⁿ'āa Judea, canéε 'áámá chiiduú chí nguuví yā Zacarías. Chiiduú miiⁿ ní yeⁿe grupo yeⁿe Abías. Ní n'daataá yeⁿe Zacarías ní nguuvi tá Elisabet. Ní Elisabet miiⁿ ní yeⁿe ndaata yeⁿe Aarón. ⁶ Ndúú 'uuví yā ní n'dai taaví yā nanááⁿ Ndyuūs. 'Iiⁿ'yāⁿ s'eeⁿ nguéé dε'ε vεε dííⁿ yā chí nguéé n'daacā ndúúccū 'iiⁿ'yāⁿ caati s'neeⁿ veéⁿ yā nducuéⁿ'ē nduudu chí ngaⁿ'a 'iivú Ndyuūs. ⁷ 'Iiⁿ'yāⁿ s'eeⁿ nguéé daiyá yā, ti Elisabet miiⁿ nguéé taaví yā daiyá yā. Ní nduu 'uuví yā ní 'āā ndiicú yā.

⁸ 'Áámá nguuvi, taachi tuneⁿ turno yeⁿe grupo yeⁿe Zacarías chí diiⁿ ntiiⁿnyuⁿ yeⁿe chiiduú chí dichí'vε yā na yáacū templo yeⁿ'é Ndyuūs, 'tíicā dííⁿ Zacarías ntiiⁿnyuⁿ yeⁿe chiiduú nanááⁿ Ndyuūs. ⁹ Ní tan'dúúccā costumbre yeⁿe chiiduú s'eeⁿ, tuneⁿ Zacarías miiⁿ chí cunndaa yā na yáacū templo yeⁿe Ndyuūs ní 'neeⁿ yaⁿ'a yā incienso. ¹⁰ Ní nducyaaca 'iiⁿ'yāⁿ snée yā cuaaⁿ chuva'āi yáacū templo ní ngaⁿ'angua'á yā neⁿ'e chí ngiichi incienso chεeti yaacū templo. ¹¹ Zacarías miiⁿ canee yā na yaacū. Ní che'enaāaⁿ yeⁿe Zacarías miiⁿ 'áámá ángel chí Ndyuūs dichó'o yā. Ní ángel mííⁿ chééndii yā lado tá cuaacu yeⁿ'ē nátaí naachi n'giichi incienso miiⁿ. ¹² Ní taachi Zacarías miiⁿ n'diichí yā ángel miiⁿ 'āā ntéé deenú yā dε'ε chí dííⁿ yā ní dii'ya taaví yā chíī. ¹³ Naati ángel miiⁿ ní caⁿ'a yā: N'dií Zacarías, nguéé 'va'á nī, ti Ndyuūs ní ch'iindiveéⁿ yā chí caⁿ'angua'á nī. Ní 'cuúndiyāāⁿ 'áámá daiya n'daataá yeⁿ'é nī Elisabet miiⁿ, ní cu'neéⁿ nī nguuvi sa Juan. ¹⁴ Ní cuuvi yeenu taaví nī cáávā saⁿ'ā 'lííⁿ. Ní 'yaaⁿ n'dái 'iiⁿ'yāⁿ cuuvi yeenu yā cáávā chí 'cuúndiyāāⁿ dacua'ā miiⁿ. ¹⁵ Caati daiyá nī miiⁿ ní cuuvi ch'εεte sa nanááⁿ Ndyuūs. Nguéé cu'u sa vino ndíí nguéé ndúú cu'u sa dε'ε vεε chí cuuvi cuū'vī sa. 'Āā canee sa ndúúccū Espíritu N'dai yeⁿ'é Ndyuūs ndíí taachi 'āā cuéé 'cuúndiyāāⁿ sa. ¹⁶ Saⁿ'ā miiⁿ ní diiⁿ sa chí 'yaaⁿ taavi ca daiyā 'iiⁿ'yāⁿ Israel nguεεcunee yā ní i'téenu yā Ndyuūs yeⁿ'e yú. ¹⁷ Daiyá nī, Juan 'cūū, ní caⁿ'a sa vmnaaⁿ yeⁿ'ē Señor Jesucristo. Ní canee sa ndúúccū espíritu ndúúccū poder tan'dúúccā chí canee profeta Elías ndii cuááⁿ vmnaaⁿ. Saⁿ'ā miiⁿ ní diiⁿ sa chí 'cuεetinéé n'daacā 'iiⁿ'yāⁿ chí n'gεεte ndúúccū daiya yā. Níicú 'iiⁿ'yāⁿ cuuvi cu'téenu yā tan'dúúccā Ndyuūs neⁿ'é yā chí cu'téenu yā, ní tan'dúúccā taná'ā 'iiⁿ'yāⁿ chí n'dai i'téenu yā. Ní 'tíicā caⁿ'a sa diiⁿ sa chí 'iiⁿ'yāⁿ s'eeⁿ 'cuεetinéé yaáⁿ yā chí cuuvi cu'téenu yā Señor Jesús taachi ndaa yā.

¹⁸ Tuu'mi ní Zacarías miiⁿ ní tiinguunéⁿ yā ángel miiⁿ: ¿Táacā cu'teenú chí ngaⁿ'a nī? caati 'úú ní 'āā ndiicúú 'úú, 'tiicá ntúūⁿ n'daataá yeⁿ'é.

¹⁹ Angel miiⁿ n'guεεcútáⁿ'a yā ní caⁿ'á yā: 'Úú ángel chí nguuvi Gabriel chí canee chí dííⁿ ntiiⁿnyuⁿ nanááⁿ Ndyuūs. Dendyuūs dichó'o yā 'úú. Ní 'úú yaa'ví n'dií ní cuuvi nduudu n'dái 'cūū n'dií. ²⁰ Maaⁿ ní cuuvi 'díí'mi ní ní 'āā ntéé cuuvi caaⁿ'máⁿ nī ndii chó'ōo chúú taachi cunuuⁿ ca'ā tiempo yeⁿ'ē, ti nguéé chí'teenú nī nduudu yeⁿ'é taachi ngaⁿ'á chí chuū chí cuuvi.

²¹ Neⁿe chí chíi chuū, 'iiⁿ'yāⁿ s'eeⁿ chí snée yā chuva'ai yáacū templo chí snée ngiinu yā Zacarías miiⁿ cueⁿ'e yíínú yā chí Zacarías miiⁿ ní chí'naáⁿ yā cheeti yaacū templo yeⁿ'é Ndyuūs. ²² Taachi Zacarías miiⁿ ní nan'dáa yā cheeti yaacū 'āā ntéé ngii ngaⁿ'a yā. 'iiⁿ'yāⁿ s'eeⁿ ní tuumicadínuuⁿ yā chí véé 'áámá visión chí n'diichí Zacarías miiⁿ taachí canée yā cheeti yaacū templo. Zacarías miiⁿ díta'á yā de'ē chí neⁿ'e caaⁿ'máⁿ yā ti chíi 'díí'mí yā.

²³ Taachí ch'iinū turno chí 'áámá ndeete yeⁿ'e servicio chí diiⁿ yā ntiiⁿ'nyuⁿ cheeti yaacū templo Zacarías miiⁿ ní cunaⁿ'á yā na vaacu yā. ²⁴ Cho'ō tiempo 'cūū ní n'daataá yeⁿ'é yā chí Elisabet miiⁿ ní ch'iindi dácu'a yeⁿ'é yā ní 'áámá canúuⁿ ta na vaacu ta nyuⁿ'u 'iiyū. Ní neené nacadínuuⁿ ta. Ní ngaⁿ'a ta maaⁿ ta: ²⁵ Chuū chí Señor Ndyuūs miiⁿ ní dííⁿ yā nduucú na nguuví 'cūū ní dííⁿ yā chí 'āā ntéé 'cuinaáⁿ nanááⁿ 'iiⁿ'yāⁿ.

Angel caⁿ'á yā chí 'cuundiyáāⁿ Jesús

²⁶ Cuayivi chí ch'iínú jaaⁿ 'iiyū chí Elisabet miiⁿ ch'iindi dácu'a yeⁿ'e tá ní Ndyuūs dicho'ó yā ángel Gabriel taama vmnéⁿ'ēe. Ní cueⁿ'é yā na 'áámá yáāⁿ chí nguuvi Nazaret chí yeⁿ'ē yáⁿ'āa Galilea. ²⁷ Ndyuūs dicho'ó yā ángel Gabriel miiⁿ nanááⁿ 'áámá n'daataá chí cuiínú chí nguuvi tá María. María miiⁿ ní caⁿ'á yā chí 'caandavaacú yā ndúúcu 'aama saⁿ'ā chí nguuvi José. Saⁿ'á 'cuū ní yeⁿ'e ndaata yeⁿ'e rey David chí ndíí tiempo chí 'āā chó'ōo. ²⁸ Angel miiⁿ ní sndaá yā naachi canée María ní caⁿ'a yā: N'dií, María, yeenú taavi ní chí Ndyuūs neⁿ'e taavi yā n'dií. Señor Ndyuūs canée yā ndúúcu n'dií. Ndyuūs di'viicu cá yā n'dií nguaaⁿ nducyaaca n'daataá yeⁿ'ē iⁿ'yeeⁿdí 'cūū.

²⁹ Taachi María miiⁿ ch'iindiveéⁿ yā chuū, cueⁿ'ē yiínú yā ní chistaⁿ'a vaadi cadínuuⁿ yeⁿ'é yā yeⁿ'e nduudu yeⁿ'e ángel miiⁿ. Ní nadicadínuuⁿ yā: ¿De'ē neⁿ'e caaⁿ'maⁿ nduudu 'cūū? ³⁰ Tuu'mí ángel miiⁿ ní caⁿ'a yā: N'dií, María, nguée 'va'a ní, ti véé taavi favor yeⁿ'é ní nanááⁿ Ndyuūs, ti Ndyuūs dineⁿ'é yā n'dií. ³¹ Ní cuuvi daiyá ní ní 'cuūndí 'áámá saⁿ'ā daiyá ní, ní cuuvi nguuví yā JESÚS. ³² Daiyá ní cuuvi ch'ēete n'daí yā ní 'iiⁿ'yāⁿ s'eeⁿ ngaⁿ'á yā chí daiyá ní ní Daiyá Dendyuūs chí ch'ēete taavi ca. Ní Señor Ndyuūs caⁿ'a yā dííⁿ yā chí daiyá ní ní cuuví yā rey lado yeⁿ'e rey David tan'dúúca nguuvi chí 'āā cho'óo. ³³ Ní caaⁿ'maⁿ ntiiⁿ'nyúⁿ yā yeⁿ'e 'iiⁿ'yāⁿ yeⁿ'e Israel cueⁿ'e daāⁿ'maⁿ. Ní naachi caaⁿ'maⁿ ntiiⁿ'nyúⁿ yā ní 'áámá cūnee.

³⁴ Tuu'mi ní María caⁿ'á yā chíi yā ángel: ¿Taaca cuuví chuū, ti 'úú ní nguée isaⁿ'ā yeⁿ'é?

³⁵ Angel miiⁿ ní nan'guεεcútaⁿ'á yā: Ndúúcu poder yeⁿ'é Ndyuūs chí canée na va'ai cheeti nguuvi Espíritu N'dai yeⁿ'é Ndyuūs ní ndaá yā vmnaaⁿ yeⁿ'é n'dií. Ní cu'neéⁿ yā 'daaⁿ'núⁿ yā tan'dúúca meééⁿ vmnaaⁿ yeⁿ'é n'dií ní 'iicu cuuvi chó'ōo yeⁿ'é ní chí dacua'ā 'lííⁿ chí 'cuundiyáāⁿ miiⁿ 'tíicā cunée yā yeⁿ'é Ndyuūs ní cuuvi nguuví yā 'iiⁿ'yāⁿ chí deeve chí Daiya Dendyuūs 'iiⁿ'yāⁿ. ³⁶ Ní n'diichí ní. Prima yeⁿ'e ní chí nguuví Elisabet miiⁿ, 'cuundii ntúūⁿ 'áámá daiyá yā maaⁿ chí 'āā ndiicú yā. 'Āā jaaⁿ 'iiyu daiyá yā cheeti yā, n'daataa miiⁿ chí 'iiⁿ'yāⁿ s'eeⁿ ngaⁿ'a yā chí nguεε 'cuūndí daiya yā. ³⁷ 'Tíicā diiⁿ Ndyuūs caati 'iivú Ndyuūs cuuvi dííⁿ yā tanducuéⁿ'ē chí neⁿ'é yā dííⁿ yā.

³⁸ Tuu'mi ní María miiⁿ ní caⁿ'á yā: 'Úú criada chí ngaⁿ'ā ntiiⁿ'nyuⁿ 'iivú Ndyuūs yeⁿ'é. Maaⁿ ní Ndyuūs dííⁿ yā nduucú tan'dúúca chí caⁿ'a yā chí dííⁿ yā. Taachi ch'iinu caⁿ'a yā chuū, ángel miiⁿ ní cunaⁿ'a yā.

María miiⁿ cheⁿ'é yā n'diichi yā Elisabet

³⁹ Gnuuvi s'eeⁿ María miiⁿ nūuⁿ cueⁿ'é yā na yúúní ní ndāa yā na yāāⁿ Judá. ⁴⁰ Ní ndāa yā na vaacu Zacarías miiⁿ ní yaa'ví yā Elisabet. ⁴¹ Taachi Elisabet miiⁿ ch'iindiveéⁿ yā nduudu yeⁿ'e María dacua'āá miiⁿ ní nuⁿ'u cheeti Elisabet miiⁿ. Ní Elisabet mííⁿ chiitu Espíritu N'dai yeⁿ'é Ndyuūs táⁿ'ā. ⁴² Ní caⁿ'a yā ndúúcu nduudu díítuú: De'ē chúúca n'dai n'dií nguaaⁿ nducyaaca n'daataá. Ní n'dai taavi daiyá ní chí 'cuūndí yā. ⁴³ ¿Du'ū 'úú chí ndāa cheεcu Señor Ndyuūs yeⁿ'é chí yaa'ví yā 'úú? ⁴⁴ Ti taachí ch'iindiveéⁿ nduudu yeⁿ'e ní, dacua'ā yeⁿ'é nuⁿ'u cheētí tan'dúúca chí yeenu taavi yeⁿ'ē. ⁴⁵ De'ē chúúca n'dai dii chí chí'téenu dí caati cúví cuaacu tan'dúúca chí Señor Ndyuūs caⁿ'a yā.

⁴⁶ Tuu'mi María ní caⁿ'a yā:

Alma yeⁿé i'teenú taavi Ndyuūs ní dich'eté Ndyuūs.

⁴⁷ Ní staava yeⁿé ní yeenú n'dai chi i'teenú Ndyuūs. Ní Ndyuūs nadinguáⁿai yā 'úú yeⁿe nuuⁿndi yeⁿé.

⁴⁸ Ti Ndyuūs n'diichí yā 'úú chi pobre 'úú ní dichii'vé Ndyuūs, ti ndíí maaⁿ nducyáácá 'iiⁿyāⁿ caaⁿmaⁿ yā yeⁿe 'úú: De'ε chúúca n'dai 'úú.

⁴⁹ Ti Ndyuūs chi véé taavi poder yeⁿé yā dííⁿ yā nduucú cosas chí ch'εεε n'dai. Ní Ndyuūs ní deēvē taavi yā.

⁵⁰ Ní Ndyuūs ya'ai 'iinu taavi yā caavā nducyaaca 'iiⁿyāⁿ chi i'téenu yā yeⁿe yā tiempo chí chó'ōo, 'tiicá ntúūⁿ tiempo maaⁿ, ní 'tiicá ntúūⁿ tiempo chí cuchíí.

⁵¹ Dendyuūs 'aā dííⁿ yā vaadí n'dai ch'εεε ndúúcu poder yeⁿé yā, nícu dííⁿ yā ganar yeⁿe staava yeⁿé 'iiⁿyāⁿ chí dich'eté yā maáⁿ yā.

⁵² Ndyuūs divíí yā 'iiⁿntyéⁿē chí ngaⁿa ntiiⁿnyuⁿ yeⁿe trono yeⁿé yā, ní dich'eté yā 'iiⁿyāⁿ ndiicúúⁿ.

⁵³ Ndyuūs ca'á yā cosas chí n'dai taavi 'iiⁿyāⁿ chí ch'iindiveéⁿ yā yeⁿe yā. Ní nguéé dííⁿ yā de'ε vεε cáávā 'iiⁿyāⁿ s'eeⁿ chí nguéé neⁿé yā chí Ndyuūs nneé yā 'iiⁿyāⁿ s'eeⁿ.

⁵⁴ Ndyuūs chinneé yā s'uuúⁿ chí 'iiⁿyāⁿ yeⁿe Israel ti dichíí'vε yú 'iiⁿyāⁿ. Ní nn'gaacú yā yeⁿe s'uuúⁿ ní nduuvi ya'ái taavi yā yeⁿe s'uuúⁿ.

⁵⁵ Ndyuūs cueⁿe daāⁿmaⁿ idííⁿ yā tan'dúúca chí caⁿa yā 'iiⁿyāⁿ yeⁿe ndaata yeⁿe yú, ní ndúúcu chiida yú Abraham ndúúcu 'iiⁿyāⁿ yeⁿé yā ndíí cuaaⁿ vmnaaⁿ.

'Túúca ngaⁿa María miiⁿ.

⁵⁶ Tuu'mi ní María miiⁿ canée yā ndúúcu Elisabet tan'dúúca 'íínú 'iiyū. Cuayiivi ní cunaⁿá yā na vaacu yā.

Yeⁿé chí ch'iindiyaāⁿ Juan chí cheedínuūⁿníⁿ

⁵⁷ Taachí snuū ca'ā 'iiyū yeⁿe dacua'ā miiⁿ, Elisabet miiⁿ ch'iindiyaāⁿ 'áámá daiya yā chí saⁿā. ⁵⁸ 'Iiⁿyāⁿ na niiⁿnuúⁿ va'āí ndúúcu 'iiⁿyāⁿ yeⁿé yā yeenú n'dai yā ndúúcu yā taachí ch'iindiveéⁿ yā chí Ndyuūs ní ya'ai taavi yā Elisabet miiⁿ. ⁵⁹ Ch'íínú dacua'ā 'lííⁿ niiⁿníⁿ nguuvi, ní 'iiⁿyāⁿ ndāa yā na vaacú Elisabet chí dííⁿ yā circuncidar dacua'ā miiⁿ. Nícu 'iiⁿyāⁿ s'eeⁿ neⁿé yā cu'neeⁿ yā chí cuuvi nguuvi sá Zacarías tan'dúúca chí nguuvi chiida sa Zacarías. ⁶⁰ Naati cheecu sa mííⁿ caⁿa yā: Nguéé 'tíicā. Juan cuuvi nguúví sá.

⁶¹ Tuu'mi caⁿa 'iiⁿyāⁿ s'eeⁿ chíí yā cheecu sá miiⁿ: ¿Dé'ε cáávā? Mar 'áámá 'iiⁿyāⁿ yeⁿe ní nguéé nguuví yā 'tíicā.

⁶² Ndúúcu chí ditá'a yā ntiinguunéeⁿ yā chiida sa taacā néⁿe yā chí cuūvī nguúví sá. ⁶³ Zacarías miiⁿ ní 'neeⁿ ta'á yā naachi canee 'áámá caaca ní dingúuⁿ yā chuū: Chí Juan duuchi sa. Tuu'mi ní nducyaaca 'iiⁿyāⁿ ní cueⁿe yiinú yā. ⁶⁴ Caati hora mííⁿ nūuⁿ, Zacarías miiⁿ nacan'dāa nduudu yeⁿe yā. Nícu tuu'mi tuca'á yā caⁿa yā: De'ε chúúca ch'εεε Dendyuūs. ⁶⁵ Ní nducyáácá 'iiⁿyāⁿ niiⁿnuúⁿ va'āí 'dii'ya taavi cá yā chíí. Ní yeⁿe chí chó'ōo, chuū ní caⁿa nducyáácá 'iiⁿyāⁿ na yáāⁿ chí snúūⁿ cuaaⁿ yaⁿāi yeⁿe chí snéé na yīicū s'eeⁿ yeⁿe yáⁿāa Judea. ⁶⁶ Ní nducyáácá 'iiⁿyāⁿ chí cadiinuuⁿ yā yeⁿe chuū ní nacádiinuuⁿ yā na staava yeⁿe yā. Ní caⁿa yā 'áámá yā ndúúcu taama yā: ¿De'ε cuuvi ndúúcu dacua'a 'lííⁿ chí 'tíicā? Caati 'tíicā Dendyuūs miiⁿ ní canée ndúúcu dacua'ā miiⁿ.

Zacarías caⁿa yā yeⁿe chí Dendyuūs caⁿá yā dííⁿ yā ndúúcu dacua'āa miiⁿ

⁶⁷ Zacarías, chíídāa dacua'āa miiⁿ, chiitúú 'iiⁿyāⁿ ndúúcu Espíritu N'dai yeⁿé Ndyuūs ní caⁿa Zacarías nduudu chí caⁿa Ndyuūs chí caaⁿmáⁿ yā. Ní caⁿa yā tan'dúúca 'áámá profeta chí candεε nduudu yeⁿé Ndyuūs:

⁶⁸ De'ε chúúca n'dai Señor Ndyuūs yeⁿe 'iiⁿyāⁿ Israel chí ndāa yā nanaaⁿ s'uuúⁿ chí nadinguáⁿai yā s'uuúⁿ, ní yeⁿé yā s'uuúⁿ.

⁶⁹ Ní tee yā s'uuúⁿ 'áámá 'iiⁿyāⁿ chí néénε vεε poder yeⁿe yā chí nadinguáⁿai yā s'uuúⁿ chí 'iiⁿyāⁿ miiⁿ yeⁿe ndaata yeⁿe rey David chí dichíí'vε Ndyuūs ndíí cuaaⁿ vmnaaⁿ.

⁷⁰ Ní Ndyuūs dííⁿ yā chí cuaacu tan'dúúca chí caⁿa yā cáávā nduudu yeⁿe profetas chí caⁿa yā tiempo chí 'āā 'naaⁿ n'dai.

- ⁷¹ Ní caⁿ'a yā chi Ndyuūs nadinguáⁿ'ai yā s'uuúⁿ yeⁿ'e 'iiⁿ'yāⁿ chi taáⁿ yā yeⁿ'e yú. Ní nadinguáⁿ'ai yā s'uuúⁿ yeⁿ'e nducyáácá 'iiⁿ'yāⁿ chi nguéé ngii n'diichí yā s'uuúⁿ.
- ⁷² Ní neene ya'ai 'iinú Ndyuūs 'iiⁿ'yāⁿ yeⁿ'e yú ndíí cuaaⁿ vmnaaⁿ, ní nan'gaacú yā yeⁿ'ē chi caⁿ'a yā chi diiⁿ yā chi n'daacā ndii cuááⁿ vmnaaⁿ.
- ⁷³ Chuū ní compromiso chi Ndyuūs caⁿ'ā cuaacu yā ndúú^cū chiida yú Abraham chi tee yā s'uuúⁿ.
- ⁷⁴ Taachi Ndyuūs nadanguáⁿ'ai yā s'uuúⁿ yeⁿ'e 'iiⁿ'yāⁿ chi nduuvi tááⁿ yā yeⁿ'ē yú, díⁿ yā 'túú^cā caati dichíⁿ'vē yú Ndyuūs ní nguéé nduú^cū vaadi 'va'a.
- ⁷⁵ Tanducuéⁿ'ē vida yeⁿ'e yú ní dichíⁿ'vē yú Ndyuūs, ní diiⁿ yú tan'dúú^cā 'iiⁿ'yāⁿ chi dēve ní n'dai nanááⁿ Ndyuūs.
- ⁷⁶ Díí, saⁿ'ā 'lííⁿ chi daiyá, cūnee chi dúú^chí dí profeta yeⁿ'é Ndyuūs chi ch'etē n'dai chi canéé na va'ai chēti nguuví caati caⁿ'ā di cuááⁿ vmnaaⁿ yeⁿ'e Señor Jesucristo. Ní 'cuúndiyāⁿ di 'iiⁿ'yāⁿ s'eeⁿ chi 'cuētinéé ngiinu yā taachi ndaa Jesús.
- ⁷⁷ Ní diiⁿ di chi 'iiⁿ'yāⁿ cadiinúúⁿ yā yeⁿ'e chí nguaⁿ'ai yā yeⁿ'e nuuⁿndi yeⁿ'e yā ní Ndyuūs nadich'εεcú yā yeⁿ'e yā.
- ⁷⁸ Ní cucáávā Ndyuūs yeⁿ'ē yú nééne ya'ai 'iinú yā s'uuúⁿ tee yā 'áámá dēve yeⁿ'e yā s'uuúⁿ, dēve chi chiicā yeⁿ'e va'ai chēti nguuvi.
- ⁷⁹ Ní chi dēve miiⁿ chí Ndyuūs ní cuuvi dēvé yā yeⁿ'e nducyaaca 'iiⁿ'yāⁿ chi snée yā na maāiⁿ ndúú^cū nuuⁿndi yeⁿ'é yā. Ní Ndyuūs nacandéε yā s'uuúⁿ na yúúni yeⁿ'e vaadi 'diiⁿ.
- ⁸⁰ Ní saⁿ'ā 'lííⁿ ní ch'iita sa ní 'āā deenū sa ní ditiinú sa na espíritu yeⁿ'ē sa. Ní taachi 'āā ch'etē sa, saⁿ'ā miiⁿ ní cueⁿ'e sa cuēti ní canee sa miiⁿ ndii ndaa tiempo taachi caⁿ'a sa nduudu cuaacu yeⁿ'é Ndyuūs nanááⁿ 'iiⁿ'yāⁿ yeⁿ'e Israel.

2

Yeⁿ'e chi ch'iindiyáaⁿ Jesús

(Mt. 1.18-25)

¹ Nguuvi s'eeⁿ emperador Augusto César caⁿ'a ntiiⁿnyúⁿ yā chi 'cuētinéé nguūⁿ nducyaaca 'iiⁿ'yāⁿ yeⁿ'e núúⁿmáⁿ yáⁿ'āa naachi caⁿ'a ntiiⁿnyúⁿ yā. ² Ní taachi Cirenio ní gobernador yā yeⁿ'e yáⁿ'āa Siria, 'āā díⁿ yā chuū chí n'gēetinéé nguūⁿ yā. ³ Ní nducyaaca 'iiⁿ'yāⁿ snaⁿ'a yā na yáāⁿ naachi ch'iindiyáaⁿ yā ní ca'a yā chi nguúví yā. ⁴ 'Tíicā chí José miiⁿ ní n'dāa yā na yáāⁿ Nazaret miiⁿ yeⁿ'ē yáⁿ'āa Galilea ní ndaa yā na yaāⁿ Belén yeⁿ'e yáⁿ'āa Judea. Yáāⁿ miiⁿ ní duuchi Yáāⁿ yeⁿ'e David caati José miiⁿ ní na ndaata yeⁿ'ē rey David miiⁿ 'iiⁿ'yāⁿ. ⁵ Cueⁿ'e José miiⁿ ndúú^cū María ti chiida tá ndúú^cū cheecu tá diiⁿ yā prometer chi 'caandavaacu tá ndúú^cū José miiⁿ. María miiⁿ ní véé daiya tá chēti tá. Miiⁿ ní ndaa yā ca'a yā nguúví yā. ⁶ Taachi miiⁿ snée yā, snuū ca'a nguuví yeⁿ'ē María miiⁿ chi 'cuúndiyāⁿ daiya yā. ⁷ Miiⁿ ch'iindiyāⁿ saⁿ'a 'lííⁿ, daiya tá chi vmnááⁿ vmnaaⁿ, ní cheecú yā tíínūu saⁿ'a 'lííⁿ, ní sn'diití yā saⁿ'ā 'lííⁿ miiⁿ naachi snúúⁿ 'iiti. Ní ch'ēetinee yā miiⁿ caati nguéé ndaacá yā va'āi chi n'dai.

Angeles ndeé yā ndúú^cū 'iiⁿ'yāⁿ chí idiiⁿ cuidado 'iiti cuūchī

⁸ Ná campo yeⁿ'ē yáāⁿ Belén miiⁿ véé 'iiⁿ'yāⁿ chi snée cuidado 'iiti cuūchī. Ní n'gēetí nduuchí yā n'gaaⁿ na cuēti cucáávā 'iiti cuūchī miiⁿ. ⁹ Ní n'gaaⁿ miiⁿ 'áámá ángel chi Señor Ndyuūs dich'o yā che'enaáⁿ yā nanááⁿ 'iiⁿ'yāⁿ s'eeⁿ chi snée cuidado 'iiti cuūchī. Ní chi dēve ch'etē n'dai yeⁿ'é Ndyuūs chíiya nanááⁿ yā ní 'dii'yā n'dái yā chíi. ¹⁰ Angel miiⁿ ní caⁿ'a yā chíi yā 'iiⁿ'yāⁿ s'eeⁿ: Ndís'tií, nguεε 'va'a ní ti 'úú nindeé 'áámá nduudu chí n'dai níicú cuuvi yeenu taavi ndís'tií ndúú^cū nducyaaca 'iiⁿ'yāⁿ. ¹¹ Tí maaⁿ ní na yáāⁿ yeⁿ'e David ch'iindiyáāⁿ cááva ndís'tií 'áámá saⁿ'a 'lííⁿ chi nadanguáⁿ'ai yā 'iiⁿ'yāⁿ yeⁿ'ē nuuⁿndi yeⁿ'e yā. Saⁿ'ā 'lííⁿ mííⁿ ní CRISTO chi Señor chi Ndyuūs dicho'ó yā. ¹² Ní deenú ní chi cuaacu ndúú^cū señaal 'cūū. Ndís'tií ní nndaaca ní dacua'a mííⁿ ndēecu tíínūu ní candiiti sa na lugar naachí snúúⁿ 'iiti.

¹³ Hora mííⁿ nūuⁿ n'dee n'dái ángeles yeⁿ'ē va'ai chēti nguuvi che'enaáⁿ yā naachi canéé ángel miiⁿ. Angeles ní ngaⁿ'a yā chí ch'etē n'dai Ndyuūs miiⁿ. 'Tíicā ngaⁿ'a yā:

14 Ch'εετε n'dái Ndyuūs chi canée na va'ai chεeti nguuvi. Ni véé vaadi 'diín na yán'āa nguuaan 'iin'yān chi cunée n'daacā n'dai ti snée yā ndúucū favor yeⁿ'é Ndyuūs.

15 Cho'ōo chúu ní ángeles s'eeⁿ cunaⁿ'á yā va'ai chεeti nguuvi. Saⁿ'a chi snée cuidado 'iiti cuūchí miiⁿ caⁿ'a sa chii sa vi'i: Cú'u yú maaⁿ na yāāⁿ Belén ní n'diichi yú chuū chi Señor Ndyuūs miiⁿ chii yā s'uūúⁿ.

16 Maaⁿnch'εεté nūuⁿ cueⁿ'e yā. Ní ndaacá yā María ndúucū José, ndúucū saⁿ'ā 'lín dacua'a miiⁿ cándiiti sa na lugar naachi snúuⁿ 'iiti. 17 Ní taachi n'diichí yā saⁿ'ā 'lín mííⁿ, caⁿ'a yā chii yā 'iin'yān tan'dúucā ángel caⁿ'a yā chii yā maáⁿ yā yeⁿ'é dacua'a miiⁿ. 18 Nducyáácá 'iin'yān chi ch'iindiveén yā chuu chí caⁿ'a 'iin'yān chi snée cuidado 'iiti cuūchí cueⁿ'ē yiinu taaví yā yeⁿ'e chuū. 19 Naati María miiⁿ ní nguain'dai yā nducuéⁿ'ē chuū na staava yeⁿ'e tá. Ní nacadínuuⁿ yā de'ε cuuvi. 20 'Iin'yān chi snée cuidado 'iiti cuūchí cuínaⁿ'a yā ní ngaⁿ'a yā chi ch'εεte n'dai Dendyuūs. Ní s'téenu yā Ndyuūs yeⁿ'e tanducuéⁿ'ē chi ch'iindiveén yā ní n'diichi yā ti tan'dúucā chi ángel miiⁿ caⁿ'á yā chii yā 'iin'yān.

Yeⁿ'e saⁿ'ā chi nguuvi Simeón ní yeⁿ'e 'áámá n'daataá chi nguuvi tá Ana

21 Ch'iinu dacua'ā miiⁿ níⁿniⁿ nguuvi ní ndaā nguuvi chi dííⁿ yā circuncidar dacua'ā miiⁿ. Ní s'néeⁿ yā chi nguuvi JESÚS, tan'dúucā chi caⁿ'a ángel miiⁿ cuááⁿ vmnaaⁿ ndí taachi 'āā cuée sa chεeti María.

22 Taachí snuū ca'a niⁿniⁿ nguuvi chi 'aama n'daataá ní canée deεve taachi véé dacua'a 'lín yeⁿ'e tá tan'dúucā chi canée nguūⁿ na ley yeⁿ'e Moisés, tuu'mi ní José ndúucū María candée yā dacua'ā miiⁿ na yāāⁿ Jerusalén. Candée yā chi dííⁿ yā presentar dacua'ā miiⁿ nanááⁿ Señor 'iivú Ndyuūs. 23 'Tíicā caⁿ'a yā dííⁿ yā ti canée nguūⁿ na ley yeⁿ'e 'iiví Ndyuūs chi tanducuéⁿ'ē dacua'ā, chi vmnááⁿ vmnaaⁿ chi 'cuundiyāāⁿ yeⁿ'ē chéécūu chi sán'ā canée lado yeⁿ'é Ndyuūs. 'Tíica chiiⁿ chi dííⁿ yā chuū. 24 Ní cheⁿ'e yā ca'a yā ofrenda yeⁿ'e 'áámá n'daataá chi 'cuundiyāāⁿ daiya tá tan'dúucā chi ngaⁿ'a ley yeⁿ'e Señor 'iivú Ndyuūs. Ofrenda miiⁿ ní ná 'uūví 'yaada palomas o na 'uūví 'yaada pichones.

25 Na yāāⁿ Jerusalén miiⁿ canee 'aama saⁿ'ā chi nguuvi sa Simeón. Sáⁿ'a 'cūū ní néené n'dai sa ní chiⁿ'i sá chi i'téenu sa Ndyuūs, ní yeⁿ'é Ndyuūs saⁿ'ā. Canée Espíritu N'dai yeⁿ'é Ndyuūs ndúucū sa. Ní cánée ngiinu sa 'áámá 'iin'yān chi nadanguáⁿ'āi 'iin'yān yeⁿ'e ndaata Israel. 26 Espíritu N'dai yeⁿ'é Ndyuūs chii yā saⁿ'á 'cūū chi nguée canée chi 'cuūví sa neⁿ'e chí 'āā cuée n'diichi sá Cristo chi Señor Ndyuūs dichó'ó yā íⁿ'yeeⁿdí 'cūū. 27 Ní Espíritu N'dai yeⁿ'é Ndyuūs canée ndúucū Simeón miiⁿ. Ní diiíⁿ guiar Simeón miiⁿ. Ní cueⁿ'é yā na yaacū templo taachi José miiⁿ ndúucū María ndāa yā na yaacū templo ndúucū saⁿ'a 'lín Jesús miiⁿ. Ní 'lícú cuuvi dííⁿ yā presentar dacua'a miiⁿ nanááⁿ Ndyuūs tan'dúucā chi ngaⁿ'a ley miiⁿ. 28 Tuu'mi ní Simeón miiⁿ ca'nuúⁿ yā Jesús ní caⁿ'a yā chi ch'εεte n'dai Dendyuūs. 'Túucā caⁿ'a yā:

29 Maaⁿ ní n'dií Señor Ndyuūs, dííⁿ nī chi cuaacu tan'dúucā chi ngaⁿ'ā nduudu yeⁿ'e nī.

Maaⁿ ní dííⁿ nī chí cuuví 'cuūví nduucú n'dai, 'úú chí dichii'vé n'dií.

30 Caati 'āā n'diichí ndúucū nduutinaáⁿ 'iin'yān chi dichó'o nī chi inadanguáⁿ'āi nús'uu.

31 'Iin'yān miiⁿ chííⁿ chí s'néeⁿyaáⁿ nī chi cáávā nducyaaca 'iin'yān chí nadanguáⁿ'ai yā 'iin'yān yeⁿ'e nuuⁿndí yeⁿ'é yā.

32 'Iin'yān miiⁿ chí deεve ní cuuví deεve yeⁿ'ē nducyaaca 'iin'yān chi nguée yeⁿ'ē ndaata Israel. Ní ca'a yā honor 'iin'yān yeⁿ'e nī chi 'iin'yān Israel yā.

33 José ndúucū María ngeⁿ'e yiinu yā yeⁿ'e chi Simeón ngaⁿ'a yā yeⁿ'e saⁿ'ā 'lín Jesús miiⁿ. 34 Simeón miiⁿ di'viicú yā María ndúucū José. Ní caⁿ'a yā chii yā chεecu sa María: 'Caandiveén nī. Saⁿ'ā 'lín 'cūū ndaā sa chi neené 'yaaⁿ 'iin'yān na yán'āa nguée i'téenu yā ní 'tiicá ntúūⁿ 'yaaⁿ 'iin'yān cu'téenu yā. Ní saⁿ'a 'lín 'cūū 'áámá seña ti néené 'yaaⁿ 'iin'yān caaⁿ'maⁿ yā contra yeⁿ'ē sa. 35 Chuū ní diiíⁿ chi 'iin'yān cuuvi cádiinuuⁿ yā yeⁿ'e ca'áámá cā'aama 'iin'yān taacā nadicádiinuuⁿ yā na staava yeⁿ'e yā. Chuū ní tan'dúucā 'áámá machete 'uūví lados 'caāiⁿ chi cho'ōo alma yeⁿ'e n'dií María.

36 Ná yaacú templo 'cūū, mííⁿ ntúūⁿ canee 'áámá n'daataá n'dai chi nguuvi Ana. Ní ngaⁿ'a tá dendu'ū chi cuchii. N'daataá miiⁿ ní daiya Fanuel, chí yeⁿ'e ndaataá yeⁿ'e Aser.

Ní Ana miiⁿ 'āā neené ndiicúú ta. Ch'iindivaacu tá taachi 'lííⁿ tá ní ndeēchē ndúuyū nūuⁿ cánee tá ndúúcū isaⁿ'ā yeⁿ'e tá. Maaⁿ ní 'āā n'daataá nguá'ā tá. ³⁷ 'Āā cuūuⁿ ngeēcū cuūuⁿ nduuyūú chi nduuví tá n'daataá nguá'ā. 'Áámá canee tá na yáacū templo yeⁿ'é Ndyuūs ní canéé tá ndíí nguuví ndii n'gaaⁿ ní dichíí'vε tá Ndyuūs. Ní ndii nguεε nga'diinú tá ti dámaāⁿ chí ngaⁿ'āngua'a tá. ³⁸ Hora mííⁿ nūuⁿ Ana miiⁿ cheⁿ'e tá yaacū templo ní ndee tá nduucú Dendyuūs, 'tíicā ngaⁿ'a ta: N'dii, Ndyuūs teé gracias n'dii cáávā dacua'a 'lííⁿ miiⁿ. Cuayivi ní caⁿ'a ta chíí ta nducyáácá 'iiⁿ'yāⁿ chi canéé ngiinu 'áámá 'iiⁿ'yāⁿ chi nadinguáⁿ'ai yā 'iiⁿ'yāⁿ Israel yā yeⁿ'ē saⁿ'ā 'lííⁿ miiⁿ.

José ndúúcū María ndúúcū dacua'a 'lííⁿ nandaá yā na yáāⁿ Nazaret

³⁹ Taachi José ndúúcū María ch'iinu dííⁿ yā nducuéⁿ'ē chi ngaⁿ'a ley yeⁿ'e Señor Dendyuūs, tuu'mi ní cueⁿ'e ntuúⁿ yā ndúúcū saⁿ'ā 'lííⁿ na yáāⁿ vaacú yā chi nguuví Nazaret yeⁿ'e yáⁿ'āa Galilea. ⁴⁰ Saⁿ'ā 'lííⁿ Jesús miiⁿ ngiita sa ní ngii ditiínu sa. Néené deenu sa. Ní Ndyuūs di'viicú taavi cá yā saⁿ'ā 'lííⁿ miiⁿ.

Saⁿ'ā 'lííⁿ Jesús cheeti yáacū yeⁿ'e Ndyuūs ndúúcū maestros

⁴¹ Nduuyu nduuyu taachi ndaā tiempo yeⁿ'e 'viicu yeⁿ'e pascua, tuu'mi ní chiida Jesús ndúúcū cheecu sa ngeⁿ'e yā yáāⁿ Jerusalén. ⁴² Ní taachi Jesús chíí yā ndiichúúví nduuyū, 'iiⁿ'yāⁿ s'eeⁿ cueⁿ'e ntúuⁿ yā na yáāⁿ Jerusalén ndúúcū Jesús miiⁿ tan'dúúcā chí 'āā ngeⁿ'e yā nduuyu nduuyu cáávā 'viicú mííⁿ. ⁴³ Cho'ōo 'viicú miiⁿ, ní José ndúúcū María miiⁿ ní cunaⁿ'a yā. Nguéé tuumicadínuuⁿ yā chí saⁿ'ā 'lííⁿ Jesús miiⁿ canee sá na yáāⁿ Jerusalén. ⁴⁴ 'Iiⁿ'yāⁿ s'eeⁿ ní nadicadínuuⁿ yā chí Jesús miiⁿ ní cunaⁿ'a sa ndúúcū 'iiⁿ'yāⁿ parientes yeⁿ'e yā. 'Iiⁿ'yāⁿ s'eeⁿ núnúⁿ máⁿ nguuví ní chiica yā. Tuu'mi nan'nuúⁿ yā Jesús nguuaⁿ 'iiⁿ'yāⁿ yeⁿ'e yā ndúúcū 'iiⁿ'yāⁿ chí n'dai nduucú yā, ⁴⁵ naati nguéé ndaacá yā saⁿ'ā 'lííⁿ Jesús miiⁿ. Ní nguεεcunéé yā snaⁿ'a yā na yáāⁿ Jerusalén miiⁿ chí n'nuúⁿ yā Jesús miiⁿ.

⁴⁶ Ndíí ch'iinu 'iínū nguuví ní ndaacá yā Jesús na yáacū templo. Véé sá ndúúcū maestros chí ngi'cuééⁿ yā ley. Jesús miiⁿ ní í'neeⁿ veeⁿ sa chí ngaⁿ'a yā ní tiinguuneeⁿ sá maestros yeⁿ'e chí ngaⁿ'a yā. ⁴⁷ Nducyáácá 'iiⁿ'yāⁿ chí n'giindiveéⁿ yā chí ngaⁿ'ā saⁿ'a 'lííⁿ Jesús miiⁿ ngeⁿ'e yíínú yā yeⁿ'e sa chí déénu sa ní nan'guεεcútaⁿ'ā sa chí ítiingúúneeⁿ yā saⁿ'a 'lííⁿ miiⁿ. ⁴⁸ Taachi chíídá sá ndúúcū cheecu sa n'diichí yā Jesús miiⁿ cueⁿ'e yíínú yā yeⁿ'ē sa. Tuu'mi ní cheecu sa ní caⁿ'á yā chíí yā saⁿ'ā 'lííⁿ: Díí, daiyá, ¿de'ē cuuvi chí 'tíicā dííⁿ di nduucú 'nū? Cuin'díí chí dí. Chiida di ndúúcū 'úú ya'āi n'dai staava yeⁿ'é 'nū 'íicú chíicá 'nū in'nuúⁿ 'nū díí.

⁴⁹ Tuu'mi ní nan'guεεcútaⁿ'ā sa yeⁿ'é yā: ¿Dé'ē vεε? ¿Dé'ē cúví chí in'nuúⁿ ní 'úú? ¿'Áá nguéé deenu ndís'tíí chí 'úú ní canéé chí cūnéé ndúúcū dendu'ū yeⁿ'e Chiidá?

⁵⁰ 'Iiⁿ'yāⁿ s'eeⁿ ní nguéé tuūmicadiinúúⁿ yā nduudu chí caⁿ'a daiyá yā Jesús miiⁿ chíí sá 'iiⁿ'yāⁿ.

⁵¹ Tuu'mi ní cunaⁿ'a Jesús nduucú yā na yáāⁿ Nazaret miiⁿ ní 'neeⁿ veeⁿ sa yeⁿ'e yā. Cheecu sa miiⁿ ní nadacadiinúúⁿ yā tanducuéⁿ'ē na staava yeⁿ'e yā. ⁵² Jesús miiⁿ ní n'giita sa ndúúcū n'deeé n'dái vaadi deenu, níicú véé favor yeⁿ'ē sa nanááⁿ Ndyuūs ní nanááⁿ 'iiⁿ'yāⁿ na in'yeeⁿdí 'cū. Níicú 'āā ngeénū nduuyu yeⁿ'ē sa.

3

Juan chí ngeedínūⁿnī sa ngaⁿ'a sa chí ndaacadaamí 'iiⁿ'yāⁿ yeⁿ'e nuuⁿndi yeⁿ'e yā (Mt. 3.1-12; Mr. 1.1-8; Jn. 1.19-28)

¹ Saⁿ'a chí nguuví Tiberio César, 'āā ndíítiiⁿ'yuⁿ nduuyū chí ngaⁿ'a ntiiⁿ'nyúⁿ yā chí emperador yā. Ní saⁿ'ā chí nguuví Poncio Pilato, ní gobernador yā yeⁿ'e yáⁿ'āa Judea. Saⁿ'ā chí nguuví Herodes ní rey yā yeⁿ'e yáⁿ'āa Galilea. 'Íicú 'diínū Herodes miiⁿ chí nguuví Felipe ní rey yā yeⁿ'e yáⁿ'āa Iturea ndúúcū yáⁿ'āa Trachonite Ní saⁿ'ā chí nguuví Lisaniás ní rey yā yeⁿ'e yáⁿ'āa Abilinia. ² Ní saⁿ'a Anás ndúúcū Caifás, saⁿ'ā s'uūⁿ ní chiiduú n'gεεte ca yeⁿ'e yāacū yeⁿ'e 'iiⁿ'yāⁿ Israel. Tiempo miiⁿ ní Ndyuūs ní ca'á yā 'áámá nduudu n'dai Juan, chí daiya Zacarías. Juan miiⁿ canee sa na yáⁿ'āa cuūⁿ'máⁿ naachi nguéé ch'εetinéé 'iiⁿ'yāⁿ. ³ Juan miiⁿ ní cachíí ca sa nducuéⁿ'ē yáⁿ'āa chí snéé níiⁿ'nuúⁿ ná yíicú

Jordán. Ní Juan miiⁿ chii sá 'iiⁿ'yāⁿ chi canéé chi cuεédínuūⁿnīⁿ yā níccú ndaacadaamí yā yeⁿ'ē nuuⁿndi yeⁿ'é yā, níccú Ndyuūs nadich'εēcú yā nuuⁿndi yeⁿ'é yā. ⁴ Chuū ní chiī tan'dúúccā chi profeta Isaías dingúuⁿ yā ndii cuaaⁿ vmnaaⁿ na libro yeⁿ'e Ndyuūs yeⁿ'ē:

'Caandiveeⁿ yú nduudu yeⁿ'ē 'áámá 'iiⁿ'yāⁿ chi caaⁿ'máⁿ yā yuudū na yáⁿ'āa cuūⁿ'máⁿ naachi nguéeé ch'εetinéeé 'iiⁿ'yāⁿ ní caⁿ'a yā 'tuuca: Cuundiyaáⁿ nī yúúní yeⁿ'e Señor Ndyuūs caati cuchii yā; nan'guáaⁿ nī 'aama yúúní cuaacu caavá yā. Didεεvé nī staava yeⁿ'é nī ní cuuvi 'cuaáⁿ nī 'iiⁿ'yāⁿ miiⁿ taachi ndaa yā.

⁵ Naachi yaanúū ní nduūtī, núúⁿ'máⁿ icyaⁿ'ā ndúúccū nducyaaca yiicū nduuví neⁿ'e, yúúní 'cuéé nduuví cuaacu, yúúní chí nguéeé neⁿ'e ní nduuví neⁿ'e.

⁶ Nducyaaca 'iiⁿ'yāⁿ snaaⁿ yā 'iiⁿ'yāⁿ yeⁿ'e Ndyuūs, 'iiⁿ'yāⁿ chí nadinguáⁿ'ai yā nducyaaca 'iiⁿ'yāⁿ.

⁷ Juan miiⁿ ní ngaⁿ'a sá ngii sa 'iiⁿ'yāⁿ chí ndaa yā chí cuεédínuūⁿnīⁿ sa 'iiⁿ'yāⁿ: Ndís'tiī ní tan'dúúccā cúú 'tíicā ndís'tiī. ¿Du'ú chi 'cueeⁿ ndís'tiī chi cuuvi cáanu nī yeⁿ'e castigo taaⁿ chí cúchiī? ⁸ Díⁿ nī dendu'ū chi n'dáacā maaⁿ níccú 'cuuⁿ'mí nī 'iiⁿ'yāⁿ chí 'āā ndaacadaamí nī yeⁿ'e nuuⁿndi yeⁿ'é nī. Nguεε tucá'a nī caaⁿ'maⁿ nī nguaaⁿ maaⁿ nī chí Abraham miiⁿ ní chiidá nī caati 'úú ngaⁿ'á ngii ndís'tiī chí Ndyuūs ní cuuvi díⁿ yā chí tuū s'eeⁿ ní chí cuuvi daiya Abraham. ⁹ Ní cutiīiⁿ míⁿ ní 'āā canéé na dii'yu yáⁿ'á. Nducyaaca yáⁿ'á chí nguéeé ngii n'gui'i n'daacā yeⁿ'ē canee chí 'caaca yáⁿ'á míⁿ ní cūnuuⁿ na yaⁿ'ā. 'Tiicá ntúūⁿ Ndyuūs díⁿ yā juzgar nducyaaca 'iiⁿ'yāⁿ.

¹⁰ 'Iiⁿ'yāⁿ s'uuⁿ ntiinguuneeⁿ yā Juan miiⁿ: ¿Dε'ē cuuvi díⁿ 'nū?

¹¹ Juan miiⁿ ní nan'gueēcútaⁿ'ā sa: 'Iiⁿ'yāⁿ chí 'uuví catecai yā, canéé chí ca'a yā 'áámá catecai 'iiⁿ'yāⁿ chí nguéeé yeⁿ'e yā. 'Iiⁿ'yāⁿ chí véé chí nge'e yā, canéé chí ca'a yā 'iiⁿ'yāⁿ chí nguéeé yeⁿ'é yā.

¹² Ndaá ntúūⁿ 'iiⁿ'yāⁿ chí inn'guεε yeⁿ'e yáⁿ'āa chí Juan miiⁿ cuεédínuūⁿnīⁿ sa 'iiⁿ'yāⁿ. Ní 'iiⁿ'yāⁿ s'eeⁿ caⁿ'a yā chí yā Juan: N'dií, maestro, ¿dε'ē cuuvi díⁿ 'nū?

¹³ Juan miiⁿ ní caⁿ'a sa chí sa 'iiⁿ'yāⁿ: Nguéeé caaca nī chí mar 'aama ndo'o tan'dúúccā chí ngaⁿ'a na ley.

¹⁴ Tuu'mi ní soldados tiinguunéeⁿ sá Juan: Nús'uu, ¿dε'ē cuuvi díⁿ 'nū? Ní Juan caⁿ'a sa chí sa 'iiⁿ'yāⁿ: Nguéeé diduucú nī yeⁿ'ē mar 'áámá 'iiⁿ'yāⁿ. Nguéeé cunncā caaⁿ'maⁿ nī yeⁿ'ē tanáⁿ'ā 'iiⁿ'yāⁿ. Níccú 'cuεetinéeé nī ndúúccū vaadi yeenú ndúúccū chí inadí'vε yā ndís'tiī.

¹⁵ 'Iiⁿ'yāⁿ s'uuⁿ snee yiinu yā Juan ní nducyaaca yā ní nadicádíinuūⁿ yā na staava yeⁿ'e yā chí ¿'áá nguéeé Juan chí Cristo? ¹⁶ Tuu'mi ní Juan miiⁿ ní caⁿ'a sa chí sa nducyaacá yā: Cuaacu níⁿ'nyúⁿ 'úú ní ngεédínuūⁿníⁿ ndúúccū nuūⁿ'nīⁿ; naati cuayiivi cuchii taamá yā chí n'dáacā n'dai ca ndúúccū poder yeⁿ'é yā chí ch'εete taavi nguéeé ti 'úú. Ní 'úú ní nguéeé n'daacā ca chí cuuvi díⁿ n'daatií yíⁿ'máⁿ yeⁿ'e ndaacuú yeⁿ'é yā. 'Iiⁿ'yāⁿ miiⁿ ní cuεédínuūⁿnīⁿ yā ndúúccū Espíritu N'dai yeⁿ'é Ndyuūs ndúúccū yaⁿ'ā. ¹⁷ 'Iiⁿ'yāⁿ miiⁿ ndée yā ní diiⁿ yā tan'dúúccā 'iiⁿ'yāⁿ chí didεεvé yā trigo. 'Tíicā díⁿ yā ndúúccū 'iiⁿ'yāⁿ. Ndaá yā ndúúccū zaranda na ta'a yā. Naachí nadεεvé yā trigo miiⁿ, divíi yā trigo miiⁿ ní nguain'dai yā chεeti díⁿnuū. Ní 'neeⁿ yáⁿ'a yā dεεcú miiⁿ na nguuchí yaⁿ'ā chí 'āā ntée n'tuūvi. Dεεcú miiⁿ ní tan'dúúccā 'iiⁿ'yāⁿ chí nguéeé i'téenu yā Ndyuūs.

¹⁸ 'Túúccā ní ndúúccū n'deeé n'dái ca chí caⁿ'ā Juan miiⁿ, caⁿ'a sá chí 'cueeⁿ sa nduudu n'dai chí ngai 'iiⁿ'yāⁿ s'eeⁿ. ¹⁹ Tiempo miiⁿ Juan miiⁿ ní yaa'vi neeⁿ sa rey Herodes miiⁿ chí canéé sá ndúúccū n'daataá yeⁿ'ē 'díⁿnu sa ní yeⁿ'e tanducuéⁿ'ē chí nguεε n'daacā chí díⁿ yā. N'daataá miiⁿ ní nguuvi tá Herodías. ²⁰ Tuu'mi ní rey Herodes miiⁿ ní díⁿ yā táámá nuuⁿndi chí ch'εete ca ní s'nuūⁿ chiichí yā Juan vácū.

Juan miiⁿ chεēdinúūⁿnīⁿ yā Jesús

(Mt. 3.13-17; Mr. 1.9-11)

²¹ Cuayiivi taachí Juan ngεédínuūⁿnīⁿ yā n'deeé n'dái 'iiⁿ'yāⁿ, chεēdinúūⁿnīⁿ ntúūⁿ yā Jesús miiⁿ. Ní taachi Jesús miiⁿ ngaⁿ'angua'á yā nánguuví ní nánguaaⁿ. ²² Ní ndaa Espíritu N'dai yeⁿ'é Ndyuūs vmnaaⁿ yeⁿ'é yā tan'dúúccā 'áámá paloma. Ní 'iiⁿ'yāⁿ s'eeⁿ

ch'hiindivéen yā 'áámá nduudu yeⁿē va'ai ch'eti nguuvi chí ngaⁿā: Díí, daiyá chi neⁿe taavi ní yeenú taavi cáávā dii.

'Iiⁿyāⁿ vmnááⁿ vmnaaⁿ yeⁿe ndaata yeⁿē Jesús
(Mt. 1.1-17)

²³ Jesús miiⁿ ní chíí yā ndíicú ndiichi ndúuyū taachí tucá'a yā ntíⁿnyúⁿ yeⁿé yā. Ndaata yeⁿe Jesús ní 'tíicā: 'Iiⁿyāⁿ nadicádíínuuⁿ yā chí Jesús miiⁿ ní daiya José. José miiⁿ ní daiya Elí. ²⁴ Elí miiⁿ ní daiya Matat. Matat miiⁿ ní daiya Leví. Leví miiⁿ ní daiya Melqui. Melqui miiⁿ ní daiya Jana. Jana miiⁿ ní daiya José. ²⁵ José miiⁿ ní daiya Matatías. Matatías miiⁿ ní daiya Amós. Amós miiⁿ ní daiya Nahum. Nahum miiⁿ ní daiya Esli. Esli miiⁿ ní daiya Nagai. ²⁶ Nagai miiⁿ ní daiya Maat. Maat miiⁿ ní daiya Matatías. Matatías miiⁿ ní daiya Semei. Semei miiⁿ ní daiya José. José miiⁿ ní daiya Judá. ²⁷ Judá miiⁿ ní daiya Joana. Joana miiⁿ ní daiya Resa. Resa miiⁿ ní daiya Zorobabel. Zorobabel miiⁿ ní daiya Salatiel. Salatiel miiⁿ ní daiya Neri. ²⁸ Neri miiⁿ ní daiya Melqui. Melqui miiⁿ ní daiya Adi. Adi miiⁿ ní daiya Cosam. Cosam miiⁿ ní daiya Elmodam. Elmodam miiⁿ ní daiya Er. ²⁹ Er miiⁿ ní daiya Josué. Josué miiⁿ ní daiya Eliezar. Eliezar miiⁿ ní daiya Jorim. Jorim miiⁿ ní daiya Matat. ³⁰ Matat miiⁿ ní daiya Leví. Leví miiⁿ ní daiya Simeón. Simeón miiⁿ ní daiya Judá. Judá miiⁿ ní daiya José. José miiⁿ ní daiya Jonán. Jonán miiⁿ ní daiya Eliaquim. ³¹ Eliaquim miiⁿ ní daiya Melea. Melea miiⁿ ní daiya Mainán. Mainán miiⁿ ní daiya Matata. Matata miiⁿ ní daiya Natán. ³² Natán miiⁿ ní daiya David. David miiⁿ ní daiya Isaí. Isaí miiⁿ ní daiya Obed. Obed miiⁿ ní daiya Booz. Booz miiⁿ ní daiya Salmón. Salmón miiⁿ ní daiya Naasón. ³³ Naasón miiⁿ ní daiya Aminadab. Aminadab miiⁿ ní daiya Aram. Aram miiⁿ ní daiya Esrom. Esrom miiⁿ ní daiya Fares. Fares miiⁿ ní daiya Fares. Fares miiⁿ ní daiya Judá. ³⁴ Judá miiⁿ ní daiya Jacob. Jacob miiⁿ ní daiya Isaac. Isaac miiⁿ ní daiya Abraham. Abraham miiⁿ ní daiya Taré. Taré miiⁿ ní daiya Nacor. ³⁵ Nacor miiⁿ ní daiya Serug. Serug miiⁿ ní daiya Ragau. Ragau miiⁿ ní daiya Peleg. Peleg miiⁿ ní daiya Heber. Heber miiⁿ ní daiya Sala. ³⁶ Sala miiⁿ ní daiya Cainán. Cainán miiⁿ ní daiya Arfaxad. Arfaxad miiⁿ ní daiya Sem. Sem miiⁿ ní daiya Noé. Noé miiⁿ ní daiya Lamec. ³⁷ Lamec miiⁿ ní daiya Matusalén. Matusalén miiⁿ ní daiya Enoc. Enoc miiⁿ ní daiya Jared. Jared miiⁿ ní daiya Mahalaleel. Mahalaleel miiⁿ ní daiya Cainán. ³⁸ Cainán miiⁿ ní daiya Enós. Enós miiⁿ ní daiya Set. Set miiⁿ ní daiya Adán. Adán miiⁿ ní yeⁿe Dendyuūs.

4

Yááⁿ'guiinūⁿ neⁿē sá tuu'vineeⁿ sa Jesús
(Mt. 4.1-11; Mr. 1.12-13)

¹ Jesús ní ndiituú yeⁿe Espiritu N'dai yeⁿé Ndyuūs 'iiⁿyāⁿ ní n'daa yā na yíicú Jordán. Espiritu N'dai yeⁿe Ndyuūs candéε yā Jesús na yáⁿāa cuūⁿmáⁿ naachi nguéé ch'etinéé 'iiⁿyāⁿ. ² 'Uūvī ngeεcu nguuvi canéé yááⁿ'guiinūⁿ nanááⁿ Jesús miiⁿ chí n'diichineeⁿ sa 'iiⁿyāⁿ. Nguéé de'ē vεε che'é Jesús nguuvi s'eeⁿ. Cuayiivi míⁿ chíí cuiicú yā. ³ Tuu'mi ní yááⁿ'guiinūⁿ caⁿ'a sa chíi sa Jesús: Dii Jesús, ndúútí chí dii chí Daiya Dendyuūs dii caaⁿ'maⁿ dí cuuvi dí tuūu 'cūū chí nduuví pan. Ní nduuví pan ní cuuvi che'e di.

⁴ Jesús nan'gueεcútáⁿ'a yā: 'Túúicā cánéé nguūⁿ ná libro yeⁿé Dendyuūs: Nguéé dámaāⁿ pan che'é 'iiⁿyāⁿ ní cunduūchí yā caati ndúúicū tanducuénⁿē nduudu chí ngaⁿá Ndyuūs cunduuchí yā nduuti chí cu'téénu yā.

⁵ Yááⁿ'guiinūⁿ candéε sa Jesús na 'áámá yīicū yáácú. Maaⁿ nch'εεté nūuⁿ ch'iⁿ'i sa Jesús tanducuénⁿē naciones yeⁿé íⁿ'yeeⁿdí 'cūū. ⁶ Tuu'mi ní yááⁿ'guiinūⁿ caⁿ'a sa chíi sa Jesús. 'Úú ní teé dii nuuⁿmaⁿ iⁿ'yeeⁿdí 'cuū chí cuuví yeⁿé di chí caaⁿ'maⁿ ntíⁿnyuⁿ dí yeⁿé ndúúicū nuuⁿmáⁿ ch'εεte naciones 'cūū ndúúicū chí ngaⁿ'a ntiiⁿnyuⁿ yeⁿé caati poder 'cūū yeⁿé. 'Āā du'ú nūuⁿ chí neⁿé chííⁿ chí ca'á. ⁷ Ndúútí chí caantii'ya di nanaáⁿ níicú cu'téénu di 'úú cuuví yeⁿé di tanducuénⁿē chuū.

⁸ Jesús caⁿ'a yā chii yā saⁿ'ā miiⁿ: Dii yááⁿ'guiinūⁿ cuví di nanaáⁿ caati 'túúcā canéé nguūⁿ na libro yeⁿ'e Dendyuūs: Cu'téenu di Señor Ndyuūs yeⁿ'ē di, ní dámaāⁿ 'caandiveeⁿ di yeⁿ'é 'iiⁿ'yāⁿ míⁿ nūⁿ.

⁹ Cuayivi candéε yááⁿ'guiinūⁿ Jesús miiⁿ na yāāⁿ Jerusalén ní cuheε sá ndúúcu yā na yáácú yeⁿ'ē yáacū templo. Ní caⁿ'a sa: Nduuti chi dii chi Daiya Dendyuūs dii, cáávā di ndii 'múúⁿ ndii na yáⁿ'āa. ¹⁰ Caati 'túúcā canéé nguūⁿ cuááⁿ vmaāⁿ na libro yeⁿ'é Ndyuūs:

Ndyuūs dichó'o yā ángeles yeⁿ'e yā chi díⁿ yā cuidado yeⁿ'ē di.

¹¹ Ní ángeles cundéε yā dii ndúúcū ta'á yā, ní nguéé cuuvi ya'ai ca'a di na tuūu.

¹² Jesús miiⁿ nán'guεcútaⁿ'a yā: 'Tuucá ntúúⁿ canéé nguūⁿ na libro yeⁿ'é Ndyuūs: Nguéé diiⁿ di mar 'áámá cosa chí n'diichineeⁿ di Señor Ndyuūs yeⁿ'ē di.

¹³ Taachí ch'iinu chi diiⁿ yááⁿ'guiinūⁿ chi n'diichineeⁿ sa Jesús diví sa yeⁿ'é yā 'áámá tiempo.

Jesús tucá'a yā ntiⁿ'nyuⁿ yeⁿ'é yā na yáⁿ'āa Galilea

(Mt. 4.12-17; Mr. 1.14-15)

¹⁴ Jesús miiⁿ nnguεcúnée yā na yáⁿ'āa Galilea ní canéé poder yeⁿ'e Espíritu N'dai yeⁿ'e Ndyuūs ndúúcu yā. Nducyáácá 'iiⁿ'yāⁿ chicadínuuⁿ yā na nuuⁿ máⁿ na yáⁿ'āa cuaaⁿ 'diitúú yeⁿ'e chi n'daācā n'dai idiíⁿ Jesús. ¹⁵ Ní Jesús ngi'cueeⁿ yā na yaācū sinagogas yeⁿ'e 'iiⁿ'yāⁿ Israel yeⁿ'e nducuéⁿ'ē yāāⁿ ní nducyaaca 'iiⁿ'yāⁿ idich'εeté yā Jesús.

Jesús canee yā na yáāⁿ Nazaret

(Mt. 13.53-58; Mr. 6.1-6)

¹⁶ Ndaá Jesús na yāāⁿ Nazaret naachí ch'iita yā. Ní tan'dúúcā chi costumbre yeⁿ'é yā, nguuvi sábadó chí ntaavi'tuunúúⁿ 'iiⁿ'yāⁿ yeⁿ'e ndaata Israel ndāa yā na yaācū sinagoga miiⁿ ní Jesús chééndii yā ní ch'eeⁿ yā yeⁿ'e libro yeⁿ'e Ndyuūs. ¹⁷ Ní nan'guáaⁿ yā libro miiⁿ naachi ngaⁿ'a yeⁿ'ē profeta Isaías. Taachí nan'guaaⁿ yā libro miiⁿ, ndaacá yā naachi canéé nguūⁿ chúū:

¹⁸ Espíritu yeⁿ'é Ndyuūs canéé yā nduucú, tí Espíritu N'dai yeⁿ'é Ndyuūs ndεεvé yā 'úú chi 'úú ní caaⁿ'máⁿ nduudu chí ngai yeⁿ'é Ndyuūs nanááⁿ 'iiⁿ'yāⁿ chí ndaachí sneeⁿ ndúúcū nuuⁿndi yeⁿ'e yā. Dichó'o yā 'úú chi díⁿ chi nduūvā yeⁿ'e 'iiⁿ'yāⁿ chí ya'ai staava yeⁿ'e yā, ní caaⁿ'máⁿ chí nánguaⁿ'ai 'iiⁿ'yāⁿ yeⁿ'e nuuⁿndi yeⁿ'é yā chí tan'duucā chí ca'á libertad 'iiⁿ'yāⁿ chí snúūⁿ vácūū, ní díⁿ chí inaaⁿ 'iiⁿ'yāⁿ cosa chí n'daacā chí nguéé déenu yā yeⁿ'ē caati maaⁿ canee yā tan'dúúcā 'iiⁿ'yāⁿ chí ngueenááⁿ, 'tiicá yā. Ní nadan'guai 'iiⁿ'yāⁿ chí nguéé n'daacā idiiⁿ ndúúcu yā caati cuuvi n'daacā idiiⁿ ndúúcu yā.

¹⁹ Ní caaⁿ'máⁿ yeⁿ'e tiempo chí n'dai taavi chí Ndyuūs ndεεvé yā chí caaⁿ'máⁿ, yeⁿ'ē vaadi n'dai taavi yeⁿ'é yā.

²⁰ Tuu'mi ní Jesús nan'gaadí yā libro yeⁿ'é Ndyuūs ní nanca'a yā 'iiⁿ'yāⁿ chí díⁿ yā ntiⁿ'nyuⁿ yeⁿ'e yaācū sinagoga miiⁿ. Ní cuayivi Jesús ch'iindí yā. Nducyaca 'iiⁿ'yāⁿ snee yā n'gínu yā yeⁿ'e Jesús. ²¹ Jesús tucá'a yā caⁿ'a yā 'iiⁿ'yāⁿ s'eeⁿ: Maaⁿ cunuūⁿ ca'a chuū chí canee nguūⁿ cuááⁿ vmaāⁿ chí yeⁿ'e ndís'tiī, chuū chí ch'iinu ch'iindiveéⁿ nī.

²² Nducyáácá 'iiⁿ'yāⁿ n'dáácā ngaⁿ'a yā yeⁿ'e Jesús. Ngeⁿ'e yínu yā yeⁿ'ē nduudu chí n'dai chí ngaⁿ'a Jesús miiⁿ ní ngaⁿ'a yā: ¿'Áá nguéé sáⁿ'a 'cūū daiya José?

²³ Ní caⁿ'a Jesús miiⁿ: Ndís'tiī ní cuuvi nī nduudu 'cūū 'úú. N'diī 'iiⁿ'yāⁿ chí déenu nī diiⁿ yiicú nī 'iiⁿ'yāⁿ, diiⁿ yiicú maáⁿ nī n'diī. Tanducuéⁿ'ē chí ch'iindiveéⁿ 'nū chí díⁿ nī na yāāⁿ Capernaum, 'tiicá ntúūⁿ díⁿ nī 'muuⁿ yáāⁿ vaacú nī.

²⁴ Naati 'uu ní caⁿ'á chí ndís'tiī: Cuaacu níⁿ'nyúⁿ mar 'áámá profeta ní nguéé ngí inee yā na yāāⁿ vaacú yā. ²⁵ Cuaacu níⁿ'nyúⁿ ngaⁿ'á ngí ndís'tiī: Tiempo chí chó'oo neené 'yaaⁿ n'daataá nguá'āa vεε tá nguuaⁿ 'iiⁿ'yāⁿ Israel taachi profeta Elías cānee yā in'yeeⁿdí 'cūū ní 'āā ntéé cheeⁿ cuuvi 'iinu ndúuyū canéé maⁿ'a tiempo miiⁿ. Ní ch'iidí cuiicu nuuⁿ máⁿ yáⁿ'āa yeⁿ'e 'iiⁿ'yāⁿ Israel. ²⁶ Ní Ndyuūs nguéé dichó'o yā Elías miiⁿ nanááⁿ nducyaaca n'daataá nguá'āa, dámaāⁿ 'áámá n'daataá nguá'āa yeⁿ'e táámá nación. Ní

canee tá na yáān Sarepta chi niiⁿnuúⁿ na yáⁿāa Sidón. ²⁷ Ní tiempo taachi canéé profeta Eliseo na iⁿ'yeeⁿdí 'cūū, 'tiicá ntūūⁿ neéné 'yaaⁿ 'iiⁿ'yāⁿ ndúú^{cū} ca'ai chi lepra chí in'duuti yúutē yeⁿ'e yā naati nguéé nducyaaca 'iiⁿ'yāⁿ s'eeⁿ nduuva yeⁿ'e yā, dámaāⁿ saⁿ'ā Naamán yeⁿ'e táámá nación chí yeⁿ'e yáⁿāa Siria.

²⁸ Taachí 'iiⁿ'yāⁿ ch'iindiveéⁿ yā chuū nducyaaca yā na yaācū sinagoga miiⁿ neéné nduuvu taaⁿ yā. ²⁹ Ní ch'εeti ndii yā tí neⁿ'é yā tun'daa yā Jesús cuaaⁿ chuva'āi yáāⁿ miiⁿ ní candéε yā Jesús miiⁿ ndii na yaacu n'dai yeⁿ'e yiicū chí yaacú ca yeⁿ'e yáāⁿ miiⁿ. Ní 'iicu cuuví cun'dáa yā Jesús miiⁿ. ³⁰ Naati nguéé cuuví díⁿ yā ti Jesús miiⁿ ní cho'ó yā náávtaⁿ'ā yeⁿ'e 'iiⁿ'yāⁿ s'eeⁿ ní cunaⁿ'a yā na vaacu yā.

'Áámá saⁿ'ā chí canéé sa ndúú^{cū} espíritu chí nguεε n'daācā yeⁿ'e yááⁿ'n'guiinūⁿ
(Mr. 1.21-28)

³¹ Cuayiiⁿ Jesús nangua'ái yā na yáāⁿ Capernaum yeⁿ'e yáⁿāa Galilea ní miiⁿ ngi'cueeⁿ yā 'iiⁿ'yāⁿ nguuvu sábadu chí nguuvu chí ntaavi'tuunúⁿ yā. ³² Ní 'iiⁿ'yāⁿ na yáāⁿ miiⁿ ngeⁿ'e yiinú yā yeⁿ'e chí ngi'cueeⁿ Jesús, ti ngi'cueeⁿ yā ndúú^{cū} poder tan'dúú^{cā} 'áámá 'iiⁿ'yāⁿ chí ngaⁿ'ā ntiiⁿnyúⁿ yā.

³³ Ní taachi snee Jesús na yaacu sinagoga míⁿ canee 'áámá saⁿ'ā ndúú^{cū} espíritu yeⁿ'e yááⁿ'n'guiinūⁿ. Espíritu miiⁿ diiⁿ chí saⁿ'ā miiⁿ neéné yuudu 'caí sa. ³⁴ Ní espíritu miiⁿ ní caⁿ'ā: N'diī, Jesús, yeⁿ'e yáāⁿ Nazaret, cu'néeⁿ nī nús'uu. ¿Dé'ē canee yeⁿ'é 'nū nduucú nī? ¿'Áá ndāa nī chí dí'cuinú nī nús'uu? 'Úú n'diichí du'ú n'diī. N'diī ní 'iiⁿ'yāⁿ chí N'dai chí Daiya Dendyuūs n'diī.

³⁵ Jesús ní yaa'vineeⁿ yā ní caⁿ'a yā: Dii espíritu n'gáádí dí cheendi di ní nan'dáa di yeⁿ'e sá 'tī. Tuu'mi ní espíritu yeⁿ'e yááⁿ'n'guiinūⁿ chindeēve sa sáⁿ'a 'cūū náávtaⁿ'ā yeⁿ'e 'iiⁿ'yāⁿ s'eeⁿ ní nan'daā sa yeⁿ'e sáⁿ'a 'cūū. Nguéé de'ē vεε diiⁿ sa ndúú^{cū} sáⁿ'a 'cūū.

³⁶ Nducyaaca yā ní ngeⁿ'e yiinú yā ní ngaⁿ'a yā ngii yā vi': ¿Dé'ē nduudu chí 'túúca? 'iiⁿ'yāⁿ 'cūū ngaⁿ'a ntiiⁿnyúⁿ yā espíritu yeⁿ'e yááⁿ'n'guiinūⁿ ndúú^{cū} poder tan'dúú^{cā} 'áámá 'iiⁿ'ntyéⁿ'ē. Ngaⁿ'á yā chí nan'daā espíritu yeⁿ'e yááⁿ'n'guiinūⁿ ní nacan'daā.

³⁷ Ní nducyaaca 'iiⁿ'yāⁿ ngaⁿ'a yā yeⁿ'e Jesús miiⁿ nducueⁿ'ē cuaaⁿ nducueⁿ'ē yáāⁿ cuááⁿ 'diituú.

Jesús diiⁿ yā chí nduūvā yeⁿ'e indáⁿ'a Simon Pedro
(Mt. 8.14-15; Mr. 1.29-31)

³⁸ Tuu'mi ní Jesús miiⁿ nan'dáa yā yaācū sinagoga miiⁿ ní ndaa yā va'ai yeⁿ'ē Simón Pedro. Ní indáⁿ'ā Simón Pedro miiⁿ ndéε 'aama 'iiⁿ'nūⁿ taaⁿ n'daataa ní 'iiⁿ'yāⁿ yeⁿ'e vaacu tá dí'cuíⁿ yā Jesús miiⁿ chí cunée yā ní nanduūvā yeⁿ'ē tá. ³⁹ Jesús can'dii yā naachi canéé n'daataa miiⁿ ní caⁿ'a yā chí cuavii 'iiⁿ'nūⁿ miiⁿ. Hora miiⁿ 'iiⁿ'nūⁿ miiⁿ chivii yeⁿ'ē tá. N'daataa miiⁿ ní hora miiⁿ ncuueⁿ nuuⁿ tá ní diiⁿ tá mandados yeⁿ'é 'iiⁿ'yāⁿ s'eeⁿ ní ca'a tá chí che'e yā.

Jesús diiⁿ yā chí nduūvā yeⁿ'e 'yaaⁿ n'dái 'iiⁿ'yāⁿ chí ngiitā
(Mt. 8.16-17; Mr. 1.32-34)

⁴⁰ Taachí chiiya 'yáⁿ'ā, 'yááⁿ n'dái 'iiⁿ'yāⁿ ndéε yā 'iiⁿ'yāⁿ chí ngiitā nanááⁿ Jesús. Nééné n'dee naaⁿ ca'ai ndii yā. Jesús miiⁿ ní yiin'duu tá'a yā vmaaaⁿ ca'áámá ca'áámá 'iiⁿ'yāⁿ ní 'tíicā nduuvā yeⁿ'e yā. ⁴¹ Ní yeⁿ'ē 'yaaⁿ 'iiⁿ'yāⁿ chí ngiíta yā yinan'dáa espíritus yeⁿ'e yááⁿ'n'guiinūⁿ chí 'caí yā ní ngaⁿ'a yā: N'diī ní Daiya Dendyuūs n'diī. Tuu'mi ní Jesús miiⁿ ní yaa'vineeⁿ yā espíritus yeⁿ'e yááⁿ'n'guiinūⁿ ní nguéé 'cuúⁿ yā chí caaⁿ'maⁿ sa ti espíritus yeⁿ'e yááⁿ'n'guiinūⁿ ní deenu sá chí Jesús miiⁿ chí Cristo.

Jesús ní caⁿ'a yā nduudu yeⁿ'é Ndyuūs na yáⁿ'āa Judea
(Mr. 1.35-39)

⁴² Chideεve táámá nguuvu Jesús miiⁿ ní cueⁿ'e yā chuva'ai yáāⁿ miiⁿ na 'áámá lugar naachi nguéé ch'εetinéé 'iiⁿ'yāⁿ. Ní 'iiⁿ'yāⁿ s'eeⁿ yeⁿ'e yáāⁿ miiⁿya in'nuúⁿ yā Jesús ní ndaa yā naachi canéé Jesús miiⁿ. Ní dí'cuuitú yā chí nguéé cuvii Jesús yeⁿ'e yā. ⁴³ Naati Jesús miiⁿ ní ngaⁿ'a yā ngii yā 'iiⁿ'yāⁿ s'eeⁿ: Canéé chíⁿ chí 'úú ní caaⁿ'máⁿ yeⁿ'e nduudu

ngai yeⁿē naachi Ndyuūs ngaⁿ'a ntiiⁿnyúⁿ yā, nanááⁿ 'iiⁿ'yāⁿ yeⁿ'e tanáⁿ'ā yáāⁿ ti yeⁿ'ē chūú chí Dendyuūs dícho'ó yā 'úú.

⁴⁴ Ní Jesús miiⁿ cueⁿ'é yā yáāⁿ ndíí yáāⁿ yeⁿ'e yáⁿ'āa Galilea ní ngaⁿ'á yā nduudu yeⁿ'é Ndyuūs na yaācū sinagogas naachi cueⁿ'é yā.

5

Ndúúcu vaadi n'giinu yeⁿ'ē chi itungaáⁿ yā 'yaācā

(Mt. 4.18-22; Mr. 1.16-20)

¹ 'Áámá tiempo taachi Jesús canée yā niiⁿnuúⁿ ná nuūⁿnīⁿ'yáⁿ'ā chi nguuvi Genesaret, néené 'yaaⁿ 'iiⁿ'yāⁿ ndaa yā nanáaⁿ yā ní chiitu yā chi cuuvi 'caandiveéⁿ yā nduudu yeⁿ'e Dendyuūs. ² Jesús n'diichi yā ná 'uūvī barcos chi snée nííⁿnuúⁿ na nuūⁿnīⁿ'yáⁿ'ā. 'Iiⁿ'yāⁿ chi itungaaⁿ 'yaācā miiⁿ 'āā nan'daa yā na barco s'eeⁿ ní cueⁿ'é yā naaⁿnú yā yáanā yeⁿ'e 'yaācā na nuūⁿnīⁿ'yáⁿ'ā. ³ Tuu'mi Jesús sndaa yā na 'áámá barco chi yeⁿ'e Simón Pedro miiⁿ ní chii yā Simón Pedro chí 'āā caⁿ'a rá barco miiⁿ ndíí niiⁿnuúⁿ 'diitúú nuūⁿnīⁿ miiⁿ. Tuu'mi ní Jesús ch'iindii yā na barco miiⁿ ní chi'cueeⁿ yā 'iiⁿ'yāⁿ. ⁴ Taachi Jesús ch'iinu chi'cueeⁿ yā 'iiⁿ'yāⁿ, tuu'mi ní caⁿ'a yā chii yā Simón: Cueⁿ'e di ndúúcu barco ndíí ná yáanūⁿ ní 'caanuūⁿ dí yaanā yeⁿ'e di nguuaⁿ nuūⁿnīⁿ ní tungaaⁿ dí 'yaācā.

⁵ Simón miiⁿ ní nan'guεcútaⁿ'a yā ní caⁿ'a yā chii yā Jesús: N'dii Maestro, 'āā núúⁿmán yaaⁿ ch'εeti nduuchí 'nū ní dííⁿ ntiiⁿnyúⁿ 'nū ní nguéeⁿ de'ē veε ndaāca 'nū; naati ndúúcu nduudu yeⁿ'e nī 'caanuūⁿ 'nū yaānā yeⁿ'é 'nū cheeti nuūⁿnīⁿ miiⁿ.

⁶ Taachi 'caanuúⁿ yā yaānā miiⁿ chiitu 'yaācā cheeti yaānā miiⁿ chí yaānā miiⁿ ndiitúú nūūⁿ chífteeⁿ. ⁷ Tuu'mi ní dita'a yā yeⁿ'ē tanáⁿ'a 'iiⁿ'yāⁿ chi snúuⁿ yā cheeti taamá barco miiⁿ chí caⁿ'a yā ní cunneeⁿ yā Simón. 'Iiⁿ'yāⁿ s'eeⁿ ní ndaa yā ní chiitu 'yaācā nduu 'uuvi barcos chí nduu 'uuvi barcos neⁿ'e 'cuεechi ndii mááⁿ nuūⁿnīⁿ. ⁸ Taachi Simón Pedro n'diichi yā chuū chíntii'yá yā nanááⁿ Jesús miiⁿ ní caⁿ'a yā chii yā Jesús miiⁿ: N'dii Señor, 'úú nguéeⁿ n'daācā 'úú chí cuchií nanááⁿ n'dií, ti 'úú ní 'iiⁿ'yāⁿ nuūⁿndi 'úú.

⁹ Simón Pedro miiⁿ ní néené ngeⁿ'e yiinú yā. 'Tiicá ntúūⁿ 'iiⁿ'yāⁿ chi snée yā ndúúcu sa ngeⁿ'e yiinú yā cáavā yeⁿ'ē chi dii Jesús chí 'iiⁿ'yāⁿ s'eeⁿ itúngaáⁿ yā 'yaācā chí 'yaaⁿ taaví tī. ¹⁰ 'Tiicá ntúūⁿ Jacobo ndúúcu Juan, chí daiya Zebedeo, chí dáámá diiⁿ yā ntiiⁿnyuⁿ ndúúcu Simón, dii'yá yā chíí. Ní Jesús caⁿ'a yā chii yā Simón: Díí, Simón, nguéeⁿ 'va'a dí; ndii maaⁿ ní tan'dúúcā chí ituungaaⁿ di 'yaācā yeⁿ'e nuūⁿnīⁿ, 'tíicā maaⁿ ní 'úú idiíⁿ chí in'nuuⁿ dí 'iiⁿ'yāⁿ chí cuuvi caⁿ'á yā nduucú.

¹¹ Taachi ndaa yā ndúúcu barco miiⁿ niiⁿnuúⁿ 'diitúú nuūⁿnīⁿ, tuu'mi ní 'iiⁿ'yāⁿ s'eeⁿ s'neeⁿ yā ntiiⁿnyuⁿ yeⁿ'é yā ndúúcu barco miiⁿ ndúúcu nducueⁿ'ē chí snúūⁿ cheeti barco miiⁿ ní cueⁿ'e yā ndúúcu Jesús.

Jesús diiⁿ yā chí nduūvā yeⁿ'e 'áámá saⁿ'ā ndúúcu ca'ai lepra

(Mt. 8.1-4; Mr. 1.40-45)

¹² Taachi Jesús miiⁿ ndaa yā na 'áámá yáāⁿ ní canée yā miiⁿ, ndaa nanááⁿ Jesús 'áámá saⁿ'ā chí ndii sa 'áámá ca'ai chí nguuvi lepra chí ín'duuti yuūtē yeⁿ'ē sa. Taachí saⁿ'ā miiⁿ n'diichi sa Jesús miiⁿ, chíntii'ya sa can'dií sa ndii na yáⁿ'āa nanááⁿ Jesús miiⁿ. Ní chíica sa Jesús: N'dií Señor, ndúúti chí n'dií neⁿ'e nī, ní dííⁿ nī chí nduūvā yeⁿ'é.

¹³ Tuu'mi ní Jesús miiⁿ n'doo ta'á yā ní tuu'ví yā saⁿ'ā ní caⁿ'a yā: 'Úú ní neⁿ'é chí nduūvā yeⁿ'ē di. Tuu'mí nūūⁿ ndúuvā yeⁿ'ē sa ní nduūvī dεeve sá. ¹⁴ Ní Jesús caⁿ'a yā chíí yā saⁿ'ā miiⁿ: Nguéeⁿ cuuvi di mar 'áámá 'iiⁿ'yāⁿ chí nduuva yeⁿ'ē di. Cueⁿ'e di ní 'cuuⁿ'miⁿ dí maaⁿ cuerpo yeⁿ'e di nanááⁿ chiiduú. Ní ca'a di nanááⁿ Ndyuūs ofrenda yeⁿ'ē di yeⁿ'e chí nanduuva yeⁿ'ē di tan'dúúcā chí ngaⁿ'a ley yeⁿ'e Moisés. Ní 'iicu cadínuúⁿ nducyaaca 'iiⁿ'yāⁿ chí nduūvā yeⁿ'e di.

¹⁵ Yeⁿ'e chí dííⁿ Jesús miiⁿ dándoō ca, ní neené 'yaaⁿ 'iiⁿ'yāⁿ ndaa yā chí 'caandiveéⁿ yā nduudu yeⁿ'e Jesús miiⁿ. Ní Jesús dííⁿ yā chí nduūvā yeⁿ'e 'iiⁿ'yāⁿ. ¹⁶ Jesús cueⁿ'e yā na lugar naachi nguéeⁿ ch'εetinéeⁿ 'iiⁿ'yāⁿ chí caaⁿ'maⁿgua'á yā.

*Jesús diiⁿ yā chi nduūvā yeⁿe 'áámá saⁿā chi in'dúuví cuerpo yeⁿe sa
(Mt. 9.1-8; Mr. 2.1-12)*

¹⁷ 'Áámá nguuví Jesús ní ngi'cueeⁿ yā 'iiⁿ'yāⁿ ní miiⁿ véē 'iiⁿ'yāⁿ fariseos chi dingúuⁿ leyes ndúúcū maestros chí ngi'cueeⁿ ley. 'Iiⁿ'yāⁿ s'eeⁿ ní ngiicá yā yeⁿe táámá yáāⁿ ní yeⁿe nducyáácá yāāⁿ yeⁿe yáⁿ'āa Galilea ndúúcū yáⁿ'āa Judea, níícú yeⁿe yāāⁿ Jerusalén. Jesús miiⁿ cuuvi diiⁿ yā chí nduūvā 'iiⁿ'yāⁿ s'eeⁿ ti poder yeⁿe Ndyuūs canéé nduucú yā. ¹⁸ Tuu'mi ní ndaa ntúūⁿ n'duuví saⁿā chi n'diichí yā Jesús. Ní saⁿā s'eeⁿ ní ndεε yā 'áámá saⁿā ndúúcū ca'āi chi in'dúuví cuerpo yeⁿe sa na 'áámá camilla. Ní ndiíⁿ yā chi ndaā saⁿā miiⁿ chεeti va'āi nanáāⁿ Jesús miiⁿ. ¹⁹ Nguéé ndaāca yā taacā cundāa yā ndúúcū saⁿa miiⁿ ti neené n'deēé 'iiⁿ'yāⁿ snuuⁿ yā. Tuu'mi ní 'iiⁿ'yāⁿ s'eeⁿ ní chεε yā tííⁿ va'āi ni diví yā n'duuví táátá tííⁿ va'āi. Ní di'cua'ái yā saⁿā na yiive naachi candíítí saⁿā miiⁿ nanáāⁿ Jesús. ²⁰ Taachí Jesús miiⁿ tuumicadíínuuⁿ yā chí véé vaadī i'teenu yeⁿe saⁿā s'eeⁿ caⁿa yā chíi yā saⁿā: Díí saⁿā, 'úú nadach'εεcú nuuⁿndí yeⁿe di.

²¹ Tuu'mi ní 'iiⁿ'yāⁿ chí ngi'cueeⁿ ley ndúúcū 'iiⁿ'yāⁿ fariseos tuca'a yā nadicadíínuuⁿ yā ní caⁿa yā: ¿Du'u sáⁿa 'cūū chí duuchineeⁿ yā yeⁿe Ndyuūs? ¿Du'ū nadich'εεcu nuuⁿndí yeⁿe yú? Dámaaⁿ Ndyuūs cuuvi diiⁿ yā 'tíicā.

²² Jesús tuūmicadiinúúⁿ yā chí nadicadíínuuⁿ 'iiⁿ'yāⁿ s'eeⁿ. Tuu'mi ní caⁿa yā chíi yā 'iiⁿ'yāⁿ s'eeⁿ: Ndís'tií, ¿dé'ē cúúví chí 'tíicā inadicadíínuuⁿ ndís'tií na staava yeⁿe ní? ²³ ¿Chεε cá nguéé ngíⁿ'i chí caaⁿ'máⁿ: 'Āā nuuⁿndí yeⁿe di ní nch'εεcū o ndúúncuééⁿ dí ní caaca dí? ²⁴ 'Túúcā caⁿ'á chíi saⁿā chí ndís'tií cuuvi déénu ní ti 'úú ní Saⁿ'a chí Daiyá Dendyuūs 'úú. Ní véé poder iⁿ'yeeⁿdí 'cūū chí inadach'εεcú nuuⁿndí. Tuu'mi ní Jesús caⁿa yā chíi yā saⁿa miiⁿ: Ncueeⁿ di, nta'a di yiive yeⁿe di ní cunaⁿ'ā di na vaacu di.

²⁵ Tuu'mi ní saⁿā miiⁿ chí ndii chí ca'āi sa 'āā ndúúvā yeⁿe sa ní sta'ā sa yiive yeⁿe sa naachi cándiiti sa ní ngaⁿ'a sa: De'ε chúúcā ch'εete Dendyuūs. Ní cunaⁿ'ā sa naavtaⁿ'ā yeⁿe 'iiⁿ'yāⁿ s'eeⁿ. ²⁶ Nducyáácá 'iiⁿ'yāⁿ cheⁿe yiinú yā ní neene di'va'á yā ní caⁿ'a yā: De'ē chúúcā ch'εete Dendyuūs. Ní caⁿ'a yā: Maaⁿ ní n'diichi yú dendu'ū chí nguéé ta nn'diichi yú chí caⁿ'a yiinu yú.

*Jesús yaa'ví yā saⁿā chí nguuví Leví
(Mt. 9.9-13; Mr. 2.13-17)*

²⁷ Cho'ōo chúū, ní Jesús miiⁿ can'daa yā cachiicá yā ní n'diichi yā 'áámá saⁿā chí inn'guεε yeⁿe impuestos yeⁿe yáⁿ'āa chí nguuví sa Leví. Saⁿā miiⁿ ní véε sa naachí n'gεeteé saⁿā chí inn'guεε yeⁿe impuestos. Jesús miiⁿ ní yaa'ví yā: Dii, sáⁿ'ā, cuchí di caⁿ'a di nduucú.

²⁸ Tuu'mi ní s'neeⁿ sá ntiinnyuⁿ yeⁿe sa ndúúcū nducuéⁿ'ē dendu'ū ní ndúccueeⁿ sá ní cueⁿ'ē sa ndúúcū Jesús.

²⁹ Saⁿ'a Leví miiⁿ caⁿ'a ntiinnyuⁿ sá chí in'nuūuⁿ 'áámá comida ch'εete n'dai na vaacu sa. Na vaacu sa miiⁿ véé 'yááⁿ saⁿā chí inn'guεε yeⁿe impuestos ndúúcū tanáⁿ'ā saⁿā. Nducyaaca yā ní véēté yā ndúúcū Leví na mesa miiⁿ. ³⁰ Tuu'mí maestros chí ngi'cueeⁿ ley miiⁿ ndúúcū 'iiⁿ'yāⁿ fariseos chí diíⁿ yā ley cunncaā caⁿ'a yā yeⁿe discípulos yeⁿe Jesús ní caⁿ'a yā: ¿Dé'ē cúúví chí ndís'tií ndúúcū Jesús nge'é ní ní ngi'i ní ndúúcū 'iiⁿ'yāⁿ chí inn'guεε yeⁿe impuestos ndúúcū 'iiⁿ'yāⁿ nuuⁿndí? Chuū nguéé n'daācā.

³¹ Jesús ní n'guεεcútaⁿ'a yā: 'Iiⁿ'yāⁿ chí nguéé ngiitā nguéé neⁿe yā chí cuuvi yíícú yā. Dámaāⁿ 'iiⁿ'yāⁿ chí ngiitā neⁿe yā chí cuuvi yíícú yā. ³² 'Úú nguéé cuchí chí yaa'ví 'iiⁿ'yāⁿ chí nadacadiinúúⁿ yā chí n'dááca yā chí nguéé dinuuⁿndí yā naati 'iiⁿ'yāⁿ chí véé nuuⁿndí yeⁿe yā ní 'íícú ndáácadáámí yā yeⁿe nuuⁿndí yeⁿe yā.

*Jesús ngaⁿ'a yā yeⁿe chí nguéé ca'diinú 'iiⁿ'yāⁿ
(Mt. 9.14-17; Mr. 2.18-22)*

³³ Tuu'mi ní 'iiⁿ'yāⁿ s'eeⁿ tiingūūnéeⁿ yā Jesús: ¿Dé'ē cúúví chí discípulos yeⁿe Juan chí ngeédínūⁿnīⁿ ndúúcū discípulos yeⁿe fariseos nééne n'deēe cuūví ní ca'diínúⁿ yā ní ngaⁿ'angua'á yā ní discípulos yeⁿe ní nge'e yā ní ngi'i yā?

³⁴ Jesús ní caⁿa yā chii yā 'iiⁿ'yāⁿ: ¿Chee yeⁿ'ē maáⁿ nī cuuvi díⁿ nī chi nguéeⁿ che'e 'iiⁿ'yāⁿ chí nandaa naachi n'giindivaacu saⁿ'ā neⁿ'e chi canéeⁿ saⁿ'ā chi n'giindivaacu sa miiⁿ ndúúcu yā? Nguéeⁿ cuuvi nī. ³⁵ Naati ndaaⁿ nguuvi chí 'cuūvi sā ní 'āā ntéeⁿ sa ndúúcu yā, tuu'mi ní 'iiⁿ'yāⁿ ca'diiⁿ'núⁿ yā nguuvi miiⁿ.

³⁶ Caⁿ'a ntúūⁿ Jesús chii yā 'iiⁿ'yāⁿ táamá ejemplo chí 'tεε nguεε daama: Mar 'áámá 'iiⁿ'yāⁿ nguéeⁿ 'caaca yā 'áámá 'taaⁿ tiinūⁿ ngai chí nguéeⁿ 'āā naaⁿ'nu yā chí n'dyaatá yā 'áámá catecaí yā ndicūⁿ caati tiinūⁿ ngai miiⁿ ní cū'teeⁿ tíⁿūⁿ ndiicúⁿ. Ní ndiicúⁿ miiⁿ nguéeⁿ n'daacā dinááⁿ diiⁿ naachi nn'dyaatá ndúúcu chí ngai miiⁿ. ³⁷ 'Tiicá ntúūⁿ mar 'áámá 'iiⁿ'yāⁿ nguéeⁿ ca'nuúⁿ yā vino ngai cheeti bolsa díⁿ'máⁿ 'iiti chí ndiicúⁿ tan'dúúca chí diiⁿ 'iiⁿ'yāⁿ ndiicúⁿ ti vino ngai miiⁿ ní chó'ōo yaadi yeⁿ'ē ní diiⁿ chí 'cááncuūⁿ yíⁿ'máⁿ ndiicúⁿ. Ní vino miiⁿ ní cungéé ndíⁿ yíⁿ'máⁿ miiⁿ tuuvií. ³⁸ Cáávā chuū ca'nuúⁿ yā vino ngai miiⁿ cheeti bolsa díⁿ'máⁿ ngai ní nduu 'uuvi ní n'daacā canee yeⁿ'ē. ³⁹ Mar 'áámá 'iiⁿ'yāⁿ chí ngi'i yā vino ndiicúⁿ neⁿ'é yā cu'u yā vino ngai cuayiivi caati ngaⁿ'a yā chí vino chí ndiicúⁿ chíⁿ chí n'dai nguéeⁿ ti vino ngai.

6

Discípulos yeⁿ'e Jesús sta'á yā trigo nguuvi chí ntaavi'tuunúⁿ 'iiⁿ'yāⁿ Israel (Mt. 12.1-8; Mr. 2.23-28)

¹ 'Áámá nguuvi sábadó chí ntaavi'tuunúⁿ 'iiⁿ'yāⁿ Israel, Jesús cho'ó yā ndúúcu discípulos yeⁿ'é yā 'áámá campo naachi véé trigo. Discípulos yeⁿ'e yā ní sta'á yā trigo ní chii yā tíiⁿ ndúúcu ta'á yā ní che'e yā trigo. ² Tuu'mi ní n'duuvi fariseos caⁿ'a yā chí yā discípulos yeⁿ'e Jesús: ¿De'ē cúúví chí ndís'tií díⁿ nī cosas chí nguéeⁿ canee chí diiⁿ nī ti contra yeⁿ'e ley yeⁿ'e nguuvi chí cánéeⁿ chí ntaavi'túúnúⁿ?

³ Jesús nan'guεcútaⁿ'a yā: ¿'Áá nguéeⁿ n'geēⁿ ndís'tií na libro yeⁿ'é Ndyuūs tan'duucā chí diiⁿ rey David ndúúcu 'iiⁿ'yāⁿ chí snéeⁿ ndúúcu yā taachi cuūcu yā? ⁴ David sndáa yā yaacū ndúúcu 'iiⁿ'yāⁿ chí snéeⁿ ndúúcu yā ní David sta'a yā pan chí canéeⁿ nátaí yeⁿ'e Ndyuūs ní che'e yā ní ca'á yā chí che'e 'iiⁿ'yāⁿ chí snéeⁿ ndúúcu yā. David miiⁿ nguéeⁿ canee chí che'e yā pan ndúúcu 'iiⁿ'yāⁿ chí snéeⁿ ndúúcu yā ti dámaāⁿ chiiduú s'eeⁿ canee chí che'e yā pan miiⁿ.

⁵ Ní Jesús caⁿ'a yā chii yā 'iiⁿ'yāⁿ s'eeⁿ: 'Úú ní Saⁿ'ā chí Daiya Dendyuūs ní 'úú ngíí ngaⁿ'á ntiin'nyuⁿ yeⁿ'e nguuvi chí ntaavi'tuunúⁿ 'iiⁿ'yāⁿ.

Jesús diiⁿ chí nduuvā yeⁿ'e saⁿ'ā chí ndíⁿ cheechi ta'ā sa (Mt. 12.9-14; Mr. 3.1-6)

⁶ Táámá nguuvi sábadó chí ntaavi'tuunúⁿ 'iiⁿ'yāⁿ Israel, Jesús miiⁿ ní ndaa yā na yaacū sinagoga ní chí'cueeⁿ yā 'iiⁿ'yāⁿ. Mííⁿ canee 'áámá saⁿ'ā chí ntí'i ta'a sa ta cuaacú sa. ⁷ Maestros yeⁿ'e ley ndúúcu 'iiⁿ'yāⁿ fariseos ngeenu yā Jesús miiⁿ caati neⁿ'e yā n'diichi yā nduuti chí idiiⁿ Jesús chí nduuva yeⁿ'e sa nguuvi chí intaavi'tuunúⁿ yā, ní 'tíicā cuuvi caaⁿ'máⁿ yā nuuⁿ'ndi yeⁿ'e Jesús miiⁿ. ⁸ Naati Jesús miiⁿ déenu yā yeⁿ'ē chí nadicádiinuⁿ 'iiⁿ'yāⁿ ní caⁿ'a yā chii yā saⁿ'a chí ntí'i 'áámá ta'ā sa: Díⁿ saⁿ'ā, nducueeⁿ dí ní cuééndii dí náávtaⁿ'ā yeⁿ'e 'iiⁿ'yāⁿ s'eeⁿ. Saⁿ'ā miiⁿ ní cuééndii sa náávtaⁿ'ā yeⁿ'e 'iiⁿ'yāⁿ s'eeⁿ. ⁹ Tuu'mi ní Jesús miiⁿ caⁿ'a yā chii yā 'iiⁿ'yāⁿ s'eeⁿ: 'Úú intiinguuneéⁿ ndís'tií. ¿De'ē chí cuuvi diiⁿ yú nguuvi chí ntaavi'tuunúⁿ 'iiⁿ'yāⁿ? ¿'Áá diiⁿ yú cosas chí n'daacā o cosas chí nguéeⁿ n'daacā? ¿'Áá n'daacā chí nanguaⁿ'āi yú vida yeⁿ'e 'iiⁿ'yāⁿ o 'caaⁿ'nuⁿ yú 'iiⁿ'yāⁿ?

¹⁰ Jesús ch'iinu yā nducyaaca 'iiⁿ'yāⁿ chí snéeⁿ yā cuaaⁿ 'diitú yā ní caⁿ'a yā chii yā saⁿ'ā: N'doo di ta'ā di. Saⁿ'ā miiⁿ ní n'doo ta'ā sa ní ta'ā sa míⁿ 'āā nduūvā yeⁿ'ē sa. ¹¹ 'Iiⁿ'yāⁿ s'eeⁿ ní n'duuvi taaⁿ n'daí yā ní yaa'vi yā vi'i: ¿Dé'ē diiⁿ yú chí cuuvi tun'daa yú nuuⁿ'ndi yeⁿ'e Jesús miiⁿ?

Jesús ndεεve yā ndu'u chí ndiichúúví discípulos yeⁿ'e yā (Mt. 10.1-4; Mr. 3.13-19)

¹² Nguuvi s'eeⁿ Jesús cueⁿe yā 'áámá yiicū chi caaⁿmaⁿngua'á yā ní Jesús miiⁿ ní núúⁿmáⁿ yaaⁿ caⁿ'angua'á yā. ¹³ Ní taachí chideεve Jesús yaa'vi yā discípulos yeⁿe yā ní ndεεve yā ndiichúúví 'iiⁿ'yāⁿ yeⁿe n guaaⁿ discípulos s'uuⁿ ní caⁿ'a yā chi ndiichúúví 'iiⁿ'yāⁿ s'eeⁿ chi apóstoles. ¹⁴ 'Iiⁿ'yāⁿ s'eeⁿ ní 'túúcaⁿ nguuvi yā: Simón chi nguuvi ntúúⁿ yā Pedro; ndúúⁿcū Andrés chi 'dínū Simón Pedro miiⁿ, ndúúⁿcū Jacobo, ndúúⁿcū Juan, ndúúⁿcū Felipe, ndúúⁿcū Bartolomé, ¹⁵ ndúúⁿcū Mateo, ndúúⁿcū Tomás, ndúúⁿcū Jacobo chi saⁿ'a daiya Alfeo, ndúúⁿcū Simón chi nguuvi sa Zelote, ¹⁶ ndúúⁿcū Judas chi 'dínū Jacobo ndúúⁿcū Judas Iscariote chi cuayiivi chiⁿ'i sá du'ū chí Jesús miiⁿ chi cuuvi 'caaⁿ'núⁿ yā 'yā.

Jesús chi'cuéⁿ yā 'yaaⁿ tááví 'iiⁿ'yāⁿ

(Mt. 4.23-25)

¹⁷ Jesús nangua'ái yā yeⁿe yīicū miiⁿ ndúúⁿcū apóstoles yeⁿe yā ní ndúúⁿcū n'deēe n'dái discípulos yeⁿe yā ní cueⁿe yā 'áámá yáⁿ'āa chi yúúⁿdūu. Ní canee ntúúⁿ nduucú yā n'deēe n'dái 'iiⁿ'yāⁿ yeⁿe yáⁿ'āa Judea ndúúⁿcū yāⁿ Jerusalén ní yeⁿe yáⁿ s'eeⁿ 'diitúú nuúⁿnīⁿ'yáⁿ'ā ní yeⁿe yáⁿ'āa Tiro ndúúⁿcū yáⁿ'āa Sidón. 'Iiⁿ'yāⁿ s'eeⁿ ní 'āā ndāa yā chi 'caandiveⁿ yā yeⁿe chi ngi'cueⁿ Jesús miiⁿ. Ní 'iiⁿ'yāⁿ chi ngíⁿta yā neⁿ'é yā chi Jesús diiⁿ chi nduūⁿvā yeⁿe yā. ¹⁸ Ní 'iiⁿ'yāⁿ chi snée yā ndúúⁿcū espíritu yeⁿe yááⁿ'nguiinūⁿ ní Jesús diiⁿ yā chi nacan'dāa yeⁿe 'iiⁿ'yāⁿ s'eeⁿ ní ch'εenuu chiⁿ yeⁿ'é 'iiⁿ'yāⁿ s'eeⁿ. Ní 'iiⁿ'yāⁿ s'eeⁿ nduūⁿvā yeⁿ'é yā. ¹⁹ Ni nducyááca 'iiⁿ'yāⁿ chi ngiⁿta neⁿ'e yā tuu'vi yā Jesús miiⁿ ti véé cá poder yeⁿe yā chi diiⁿ yā chi nanduūⁿvā yeⁿe yā.

Yeⁿ'é vaadi yeenú ndúúⁿcū yeⁿ'e chi nguéé vaadi yeenú

(Mt. 5.1-12)

²⁰ Tuu'mi ní Jesús n'diichí yā discípulos yeⁿe yā ní caⁿ'a yā chii yā 'iiⁿ'yāⁿ s'eeⁿ: Dé'ε chúúⁿcā n'dai ndís'tiī chi nguéé de'ē veε yeⁿ'e nī ti yeⁿ'e ndís'tiī cuuví naachí Ndyuūs ngaⁿ'a ntiiⁿnyúⁿ yā na va'ai cheeti nguuvi.

²¹ De'ē chúúⁿcā n'dai ndís'tiī chi 'cueⁿ cá nī libro yeⁿ'é Ndyuūs chi n'daācā ca canee staava yeⁿ'é nī. De'ε chúúⁿcā n'dai ndís'tiī chi maaⁿ ní nngεecu nī nanááⁿ Ndyuūs ti neⁿ'e diiⁿ nī nducuéⁿ'e chi cuaacu ti Ndyuūs ya'āi 'iinú yā ndís'tiī.

²² De'ē chúúⁿcā n'dai ndís'tiī taachi 'iiⁿ'yāⁿ yeⁿ'e iⁿ'yeeⁿdí 'cūū nguéé cuuvi snaaⁿ yā ndís'tiī ní taachi 'iiⁿ'yāⁿ s'eeⁿ cuví yā yeⁿ'e ndís'tiī. Ní cunncāa diiⁿ yā ndúúⁿcū ndís'tiī. Ní 'āā ntéé neⁿ'e yā 'caandiveⁿ yā chi duuchí nī. Caaⁿ'máⁿ yā chi nguéé n'daaca ndís'tiī cucááⁿvā 'úú chi Saⁿ'ā chi Daiyá Ndyuūs. ²³ Ndís'tiī canéé chí yeenú n'dai nī ní nguuvi miiⁿ cuuví yeenú n'dai ca nī caati Ndyuūs téε yā chi cuuvi yeⁿ'é nī dendu'ū chi ch'εete n'dai taachi ndaa nī na va'ai cheeti nguuvi. Ti ndii cuááⁿ vmnaaⁿ 'tiicá ntúúⁿ idiíⁿ 'iiⁿ'yāⁿ cosas chi nguéé n'daācā ndúúⁿcū 'iiⁿ'yāⁿ profetas chi candée yā nduudu yeⁿ'e Ndyuūs.

²⁴ De'ε chúúⁿcā ndaachii yeⁿ'e ndís'tiī chi véé cá yeⁿ'e nī caati 'āā yeenú nī yeⁿ'e nducuéⁿ'e yeⁿ'e iⁿ'yeeⁿdí 'cūū.

²⁵ De'ε chúúⁿcā ndaachii yeⁿ'e ndís'tiī chi nadacádíⁿnuuⁿ nī chí n'daācā canee nī nanááⁿ Dendyuūs ní nguéé n'giindiveⁿ nī nduudu yeⁿ'é Ndyuūs ti cuayiivi naachi neⁿ'é nī 'caandiveⁿ nī ní nguéé cuuví 'caandiveⁿ nī. De'ē chúúⁿcā ndaachii yeⁿ'e ndís'tiī chi maaⁿ ní n'gíⁿnyuⁿ nī ti cuayiivi ní cuεécú nī ti ndaāchii nī.

²⁶ De'ē chúúⁿcā ndaachii yeⁿ'e ndís'tiī taachi nducyaaca 'iiⁿ'yāⁿ caaⁿ'maⁿ n'daācā yeⁿ'e nī. Caati ndíⁿ cuááⁿ vmnaaⁿ 'tíicā ngaⁿ'a 'iiⁿ'yāⁿ yeⁿ'e 'iiⁿ'yāⁿ profetas chi falso yā ní nguéé profetas yeⁿ'é Ndyuūs, ní nguéé candεε yā nduudu yeⁿ'é Ndyuūs.

Dineⁿ'e yú 'iiⁿ'yāⁿ chi taaⁿ yā nduucú yú

(Mt. 5.38-48; 7.12)

²⁷ 'Úú, Jesús, ní ngaⁿ'á ngī ndís'tiī chi n'giindiveⁿ nī nduudu chi ngaⁿ'á: Dinéⁿ'e ntúúⁿ nī 'iiⁿ'yāⁿ 'áará chi taāⁿ yā yeⁿ'e nī. Ní diiⁿ n'daacá nī ntúúⁿ ndúúⁿcū 'iiⁿ'yāⁿ 'áará chi nguéé neⁿ'e yā ndís'tiī. ²⁸ Di'viicú nī 'iiⁿ'yāⁿ 'áará chi caⁿ'a cunncāa yā ndúúⁿcū nī. Ní caaⁿ'maⁿngua'a nī caavā 'iiⁿ'yāⁿ 'áará chi nguéé n'daācā diiⁿ yā ndúúⁿcū nī. ²⁹ Nduuti chi 'áámá 'iiⁿ'yāⁿ duuchineeⁿ yā yeⁿ'e nī ní n'geⁿ'e yā 'áámá tiicuaa náaⁿ nī, 'cuúⁿ nī chi diiⁿ yā táámá vmnéⁿ'ēe nduuti chi neⁿ'é yā. 'Iiⁿ'yāⁿ chi divíⁿ yā cotón yeⁿ'e nī, ca'a ntúúⁿ nī

catecai nī. ³⁰ 'Āā du'ú nūuⁿ 'iiⁿ'yāⁿ chi caaca yā cosa yeⁿ'é nī caavā necesidades yeⁿ'e yā, ca'á nī. 'Iiⁿ'yāⁿ chi cuta'á yā chi yeⁿ'e nī, 'āā ntéé nguεεcunée nī ndaaca nī. ³¹ Tan'dúúca chi ndís'tiī neⁿ'e nī chi tanáⁿ'ā saⁿ'ā miiⁿ n'dáacā diiⁿ sa nduucú nī, 'tiicá ntúūⁿ diiⁿ ndís'tiī ndúúcu saⁿ'ā s'eeⁿ.

³² Ndúúti chi ndís'tiī dinéⁿ'e nī 'iiⁿ'yāⁿ chi neⁿ'e ndís'tiī, ¿dé'ē chi n'daacā idiíⁿ nī? Caati 'iiⁿ'yāⁿ chi nguéé n'daacā, 'tiicá ntúúⁿ idiíⁿ yā. ³³ Ndúúti chi ndís'tiī n'daacā idiíⁿ nī ndúúcu 'iiⁿ'yāⁿ chi din'daacā nduucú nī, ¿dé'ē chi n'daacā idiíⁿ nī? Caati 'iiⁿ'yāⁿ chi nguéé n'daacā, 'tiicá ntuūⁿ idiíⁿ yā. ³⁴ 'Tiicá ntúūⁿ, nduuti chi dííⁿ nī prestar chiiⁿ chi yeⁿ'é nī 'iiⁿ'yāⁿ ní cunee ngiinú nī chi 'iiⁿ'yāⁿ miiⁿ caⁿ'á yā tee yā chiiⁿ chi yeⁿ'é nī, ¿dé'ē cuuvi chi 'iiⁿ'yāⁿ téé yā gracias ndís'tiī? 'Tiicá ntúūⁿ idiíⁿ 'iiⁿ'yāⁿ chi nguεε n'daacā. ³⁵ Ndís'tiī dineⁿ'é nī 'iiⁿ'yāⁿ s'eeⁿ chi taáⁿ yā yeⁿ'e nī. 'Tíicā din'daacā nī ndúúcu 'iiⁿ'yāⁿ chi nguéé ngii n'diichí yā ndís'tiī. Dííⁿ nī prestar cosa chi yeⁿ'é nī ní nguéé de'ē veε nadacadiinuⁿ cá nī yeⁿ'ē. Ní Ndyuūs téé yā ndís'tiī cosas chi dendu'ū chi ch'εεte ca yeⁿ'é yā taachi caⁿ'a nī na va'ai cheeti nguuví ní cuuví ndís'tiī daiyá Dendyuūs chi ch'εεte taavi ca. 'Tíicā Ndyuūs téé yā cosas chí n'daaca 'iiⁿ'yāⁿ chi cunncāā chi nguéé caaⁿ'máⁿ yā: N'dii Ndyuūs gracias. ³⁶ 'Tiicá ntúūⁿ yá'ai 'iinú nī cáava 'iiⁿ'yāⁿ tan'dúúca Chiidá nī Ndyuūs ya'ái 'iinú yā ndís'tiī.

Nguéé caaⁿ'maⁿ nī nuuⁿndi yeⁿ'e mar 'áámá 'iiⁿ'yāⁿ

(Mt. 7.1-5)

³⁷ Nguéé caaⁿ'máⁿ nī nuuⁿndi yeⁿ'é 'iiⁿ'yāⁿ ní Ndyuūs ní nguéé caaⁿ'maⁿ ntúúⁿ yā yeⁿ'é nī. Nguéé dííⁿ nī condenar 'iiⁿ'yāⁿ ní Ndyuūs nguéé dííⁿ yā condenar ndís'tiī. Nadich'εεcú nī nuuⁿndi yeⁿ'e 'iiⁿ'yāⁿ ní Ndyuūs nadich'εεcú yā nuuⁿndi yeⁿ'e nī. ³⁸ Ca'á n'daacá nī 'iiⁿ'yāⁿ chi véé necesidades yeⁿ'é yā ní 'íicú Ndyuūs téé yā ndís'tiī ní dicaadi n'dáaca yā chi cúunú chiichi ndíí tuunu cungéē na morral yeⁿ'é nī, caati Ndyuūs dicaadí yā ndís'tiī ndúúcu maaⁿ caadi chí dicaadí nī.

³⁹ Jesús ngii yā 'iiⁿ'yāⁿ s'eeⁿ 'áámá ejemplo yeⁿ'e 'áámá nduudu chi 'téé nguεε daama. ¿'Áá cúuví diiⁿ 'áámá chi ngeenááⁿ candēē táámá chi ngeenááⁿ? ¿'Áá nguεε cun'dáa nūuⁿ nduu 'uuví yā na yiivi yáⁿ'āa? ⁴⁰ 'Áámá discípulo miiⁿ ní nguéé ch'εεte cá yā nguéé ti maestro yeⁿ'e yā. 'Āā du'ú nūuⁿ chí neⁿ'e cuuvi Maestro, canee chí 'cuiinu 'cueeⁿ yā din'daacā yā ní cuuví yā tan'dúúca maestro yeⁿ'e yā.

⁴¹ Táacā cuuví chi maaⁿ nch'εεté nūuⁿ n'gíínu nī nuūⁿndi chi diiⁿ tanáⁿ'ā 'iiⁿ'yāⁿ ní nguéé inaaⁿ nī nuuⁿndi ch'εεte chi dííⁿ nī. ⁴² Nguéé n'daacā chi caaⁿ'máⁿ nī 'iiⁿ'yāⁿ yeⁿ'e chí dííⁿ yā chi nguéé n'daacā nduuti chi ndís'tiī diiⁿ nī cosas chi nguεε n'daacā. N'daacā ca chi ndaacadaamí nī yeⁿ'ē nuuⁿndi chí diiⁿ nī ní 'íicú cuuvi caaⁿ'máⁿ nī yeⁿ'e 'iiⁿ'yāⁿ chí canéé chí din'daacá yā.

'Áámá yáⁿ'á ní ngíⁿ'í cucáávā n'gui'i yeⁿ'ē

(Mt. 7.17-20; 12.34-35)

⁴³ N'gui'i yeⁿ'e yáⁿ'á chí n'dai, n'daacā chí cuuví n'gui'i yeⁿ'ē ní yáⁿ'á chí nguéé n'dai ní nguéé n'daacā n'gui'i yeⁿ'ē. Naati yáⁿ'á chí nguéé n'daacā nguéé cuuvi n'gui'i chí n'daacā yeⁿ'ē. ⁴⁴ 'Tíicā ti tuunu tuunu ca yáⁿ'á n'gíⁿ'i n'gui'i yeⁿ'ē. Nguéé n'gíichi yā yaaⁿ chí 'cuūndi n'guídii yaaⁿ nguuví yeⁿ'ē, ndíí nguéé ndúú tuūⁿmá yā uvas yeⁿ'ē diiⁿyu nduuti yaaⁿ. ⁴⁵ 'Tiicá ntúūⁿ saⁿ'ā chí n'dai idiíⁿ sa dendu'ū chí n'daacā chí nadacadiínuuⁿ sa na staava yeⁿ'ē sa chí n'daacā. Saⁿ'ā chí cunncāā idiíⁿ sa tanducuéⁿ'ē chí nadacadiínuuⁿ sa na staava yeⁿ'ē sa caati staava yeⁿ'ē sa nguéé n'daacā. Nduudu chí ngaⁿ'ā sa ngiica yeⁿ'e chí ndiituu na staava yeⁿ'ē sa.

Yeⁿ'ē ndúú 'uūví cimientos yeⁿ'é nduu 'uuví va'āi

(Mt. 7.24-27)

⁴⁶ Caⁿ'a ntúūⁿ Jesús: ¿De'ē cúuví chí ndís'tiī ngaⁿ'á nī ngiiⁿ nī 'úú: N'diī, Señor yeⁿ'é, n'diī, Señor yeⁿ'é, ní nguéé 'caandiveéⁿ nī chí ngaⁿ'á? ⁴⁷ 'Úú cuuví ndís'tiī, du'ū 'iiⁿ'yāⁿ chí chíi nanaáⁿ ní n'gíindiveēⁿ nduudu yeⁿ'é ní n'daacā idiíⁿ yā tan'dúúca chí ngaⁿ'á, ⁴⁸ 'iiⁿ'yāⁿ miiⁿ tan'dúúca 'áámá saⁿ'ā chí din'dái sa vacu sá. Chiinú yáanūuⁿ n'daaca sá

ní s'nuūⁿ sa cimientu yeⁿē vmaāⁿ 'áámá yáává. Ní taachi chiiya 'áámá cuuvi naⁿā ní ch'iita yíicú ní diitūu n'dái cheⁿē nuūⁿnīⁿ miiⁿ. Ní nuūⁿnīⁿ miiⁿ nguéé cuuvi diiⁿ di'núⁿu va'āi miiⁿ ti n'daacā candúūu na yáává miiⁿ. ⁴⁹ Naati 'iiⁿyāⁿ chí nguéé ch'iindiveéⁿ yā nduudu yeⁿé ní nguéé idiíⁿ yā tan'dúúⁿcā chí ngaⁿ'á 'iiⁿyāⁿ miiⁿ tan'dúúⁿcā 'áámá saⁿā chí din'dái sa vaacu sa na yaⁿ'á ndúútii ní nguéé ndúúⁿcū cimientu. Ní díitūu n'dai cheⁿé nuūⁿnīⁿ miiⁿ ní va'āi miiⁿ maaⁿnch'εtεé nūuⁿ chindεεve ní cunncāā ntuūvii va'āi miiⁿ.

7

Jesús idiíⁿ yā chí nduuvā yeⁿe 'áámá mozo yeⁿe capitán romano

(Mt. 8.5-13)

¹ Taachí Jesús ch'íinú ngi'cueeⁿ yā 'iiⁿyāⁿ, tuu'mi ní cueⁿé yā na yaāⁿ Capernaum. ² Ná yāāⁿ miiⁿya canéé 'áámá saⁿā capitán romano yeⁿē soldados. Ní na vaacu capitán miiⁿ cánéé 'áámá saⁿā mozo chí idiíⁿ mandado yeⁿē sa. Néené neⁿe sa mozo yeⁿē sa ní néené ya'āi 'iinu sa ti mozo ní neené ya'āi ngítā sa. 'Āā cháā 'cuūvī sa. ³ Taachi capitán miiⁿ ch'iindiveeⁿ sa chí Jesús miiⁿ dííⁿ yā vaadī n'giinu, capitán miiⁿ dicho'o sa n'dúúvī 'iiⁿyāⁿ Israel chí caaⁿ'maⁿ ntiíⁿnyúⁿ yā na yaacū yeⁿe 'iiⁿyāⁿ Israel chí 'iiⁿyāⁿ s'eeⁿ di'cuíftu yā Jesús miiⁿ chí caⁿ'a yā na vaacu sa ní dííⁿ yā chí nduūvā yeⁿe mozo yeⁿē sa. ⁴ 'iiⁿyāⁿ s'eeⁿ cueⁿe yā nanáāⁿ Jesús miiⁿ. Ní di'cuíftu yā Jesús, ní caⁿ'a yā chí yā 'iiⁿyāⁿ: N'dií Jesús, 'caandiveeⁿ ní caati capitán yeⁿé 'nū ní neené n'dai yā chí diíⁿ ní chí nduūvā yeⁿe mozo yeⁿe yā. ⁵ Caati capitán romano miiⁿ ní idinéⁿe yā 'iiⁿyāⁿ yeⁿe yú chí yeⁿe ndaata Israel, ní din'dái yā yāacū sinagoga yeⁿe yú.

⁶ Tuu'mi ní Jesús miiⁿ cueⁿe yā ndúúⁿcū 'iiⁿyāⁿ s'eeⁿ. Ní taachi 'āā cháā ndaa niiⁿnuúⁿ yā ná va'ai yeⁿē sa, capitán miiⁿ dicho'o sa n'duuvī amigos yeⁿe sa chí caaⁿ'māⁿ yā cuuvi yā Jesús miiⁿ: N'dií, Señor, nguéé tuuviinúuⁿ ní ti 'úú nguéé neené n'dai 'úú chí cundaa ní cheeti va'ai yeⁿé. ⁷ Maaⁿ ní deenú chí mar 'áámá 'iiⁿyāⁿ ní neené n'dai chí cuuvi ndaa nanáāⁿ ní. Dámaāⁿ chí caaⁿ'maⁿ ntiíⁿnyuⁿ núúⁿ ní nduūvā yeⁿe mozo chí diíⁿ mandado yeⁿé. ⁸ 'Āā de'ε nuūⁿ chí caaⁿ'maⁿ ntiíⁿnyuⁿ ní yeⁿē tuu'mi ní cuuvi chó'ōo. 'Tiicá ntúūⁿ 'úú ní véé 'iiⁿyāⁿ chí ngaⁿ'a ntiíⁿnyuⁿ yā yeⁿé. 'Úú ní capitán ní ngaⁿ'a ntiíⁿnyuⁿ yeⁿe soldados chí canee maaⁿ poder yeⁿé. Ngaⁿ'á ngí 'áámá sa: Cunaⁿ'a di, ní inaⁿ'a sa. Ní ngaⁿ'á ngí taama sa: Cuchí di, ní chí sa. Ní ngaⁿ'á ngí mozo chí diíⁿ mandado yeⁿé: Diíⁿ di ntiíⁿnyuⁿ cū, ní diíⁿ sa.

⁹ Ní taachí Jesús ch'iindiveeⁿ yā nduudu yeⁿē sa chí ngaⁿ'a amigos yeⁿe capitán miiⁿ chéⁿé yiinu yā yeⁿe capitán. Ní nguεεcundí yā n'diichi yā 'iiⁿyāⁿ chí snée yā cuaaⁿ daami yā ní caⁿ'a yā. 'Úú ní ngaⁿ'á ngí ndís'tií: 'Úú nguéé indaacá mar 'áámá 'iiⁿyāⁿ yeⁿe ndaata Israel chí i'teenú n'dai cá yā Ndyuūs tan'dúúⁿcā capitán miiⁿ.

¹⁰ Taachí ndaa 'iiⁿyāⁿ s'eeⁿ va'ai chí capitán miiⁿ dichó'o sa, 'iiⁿyāⁿ s'eeⁿ n'diichi yā chí mozo miiⁿ chí néené ngíta sa ní 'āā nduuvā yeⁿē sa.

Jesús nadanduuchi yā daiya 'áámá n'daata nguá'āa chí 'āā tináⁿā sa

¹¹ Cuayiivi, Jesús miiⁿ cheⁿe yā na yāāⁿ Naín ndúúⁿcū discípulos yeⁿe yā ndúúⁿcū 'yaaⁿ n'dái 'iiⁿyāⁿ chí cueⁿe ndúúⁿcu yā. Ní chúū chí. ¹² Taachí Jesús ndaa yā niiⁿnuúⁿ ná cheendi va'āi yeⁿe yaāⁿ miiⁿ, n'diichi yā chí ndεε 'iiⁿyāⁿ 'áámá caja tináⁿā canuúⁿ yúúní chí cueⁿe yā cuεεchi yā. Tináⁿā miiⁿ 'áámá n'dyáⁿā sa yeⁿē cheεcú sá. Ní n'daata miiⁿ ní n'daataá ngua'a yā. Ní neené 'yaaⁿ 'iiⁿyāⁿ yeⁿe yāāⁿ miiⁿ snee yā ndúúⁿcu yā. ¹³ Taachí Jesús n'diichi yā n'daataá miiⁿ, néené ya'ai 'iinú yā n'daataá ní caⁿ'a yā chí yā n'daataá miiⁿ: Nguéé cuεεcú di.

¹⁴ Tuu'mi ní Jesús miiⁿ ní cueⁿe ndaa yā ní tuu'ví yā caja yeⁿe tinaⁿā. Ní 'iiⁿyāⁿ chí ndée yā caja miiⁿ ch'εtindii yā. Ní Jesús caⁿ'a yā: Saⁿ'ā 'dííⁿ 'úú yaa'ví dii, nducueeⁿ di.

¹⁵ Tuu'mi ní 'nuūⁿndi saⁿ'ā 'dííⁿ chí n'dii ní tucá'a sa ndeē sa. Ní Jesús miiⁿ ní nca'á yā saⁿ'a 'dííⁿ cheεcu sa. ¹⁶ Nducyaaca 'iiⁿyāⁿ di'va'á yā yeⁿe chí n'diichi yā ní caⁿ'a yā: De'ē chúúⁿcā ch'εtε Ndyuūs. Ní caⁿ'a yā chí 'áámá profeta ch'εtε ndaa yā nguaaⁿ nús'uu chí Ndyuūs dicho'ó yā caati ya'ai 'iinú yā yeⁿē s'uuúⁿ chí nación yeⁿé yā.

¹⁷ 'Tíicā ngaⁿa 'iiⁿ'yāⁿ s'eeⁿ yeⁿe Jesús miiⁿ. Ní caⁿ'a yā chuū núúⁿmáⁿ na yáⁿ'āa Judea ndúú^cū nuuⁿmáⁿ yāāⁿ cuaaⁿ 'diituú.

*Juan chi nge*εδίνuūⁿnīⁿ dichó'o yā nduu 'uuvi 'iiⁿ'yāⁿ nanááⁿ Jesús
(Mt. 11.2-19)

¹⁸ Discípulos yeⁿe Juan chi ngeεδίνuūⁿnīⁿ caⁿ'a yā chii yā Juan miiⁿ yeⁿ'é tanducuéⁿē dendu'ū chi diiⁿ Jesús. Tuu'mí Juan miiⁿ yaa'vi yā 'uuvi discípulos yeⁿe yā nanááⁿ yā.

¹⁹ Ní dichó'o yā discípulos s'eeⁿ chí ntiinguuneeⁿ yā Jesús miiⁿ chuū: ¿'Áá n'dií Cristo chí canéé chí ndaā o 'āā cūnee ngíínú 'nū taama yā? ²⁰ Discípulos yeⁿe Juan miiⁿ cueⁿ'e yā ní ndaá yā nanááⁿ Jesús miiⁿ ní caⁿ'a yā chii yā Jesús: N'dií Señor, Juan chí ngeεδίνuūⁿnīⁿ dichó'o yā nús'uu chí ntíngúúneeⁿ 'nū n'dií: ¿'Áá n'dií chí canéé chí ndaā o 'āā cūnee ngíínú 'nū taama yā?

²¹ Tiempo miiⁿ Jesús diíⁿ yā chí nnduūvā yeⁿe 'yaaⁿ n'dai 'iiⁿ'yāⁿ yeⁿ'ē ca'ai chí ndí yā ní yeⁿ'e ca'ai chí véé espíritu yeⁿe yááⁿ'n'guiinūⁿ ndúú^cū yā. 'Tiicā ntúūⁿ diíⁿ yā chí snaaⁿ 'iiⁿ'yāⁿ chí ngeenááⁿ. ²² Tuu'mí Jesús nán'gueεcútaⁿ'a yā yeⁿ'e nduu 'uuvi discípulos yeⁿe Juan miiⁿ ní caⁿ'a yā: Ndís'tií, cunaⁿ'a nī ní cuuvi nī Juan miiⁿ yeⁿ'e nducuéⁿē chí n'diichi nī ndúú^cū chí n'giindiveéⁿ nī. 'Iiⁿ'yāⁿ chí ngeenááⁿ ní inaaⁿ yā, 'iiⁿ'yāⁿ chí nguéé ngii ngíicá yā ní ngiica yā, 'iiⁿ'yāⁿ chí ndíí ca'ai chí lepra chí in'duuti yuūtē yeⁿ'é yā ní nduuva yeⁿ'é yā, 'iiⁿ'yāⁿ chí chεtúū ní n'giindiveéⁿ yā, 'iiⁿ'yāⁿ chí n'díí ní nnduuchí yā yeⁿ'ē nguaaⁿ tináⁿ'ā, ní 'iiⁿ'yāⁿ chí ndaachíí snee yā 'úú ní ngaⁿ'á nanááⁿ yā nduudu yeⁿ'é Ndyuūs, nduudu ngai chí yeⁿ'ē chí nanguaⁿ'āi 'iiⁿ'yāⁿ. ²³ De'ē chúú^cā n'dai 'iiⁿ'yāⁿ chí nguéé cunncāā ch'eenú yā 'úú ndúú^cū nduudu yeⁿ'é.

²⁴ Taachi cueⁿ'e discípulos yeⁿe Juan chí dicho'ō Juan miiⁿ, tuu'mí ní Jesús tucá'a yā caⁿ'a yā chii yā 'iiⁿ'yāⁿ chí snee yā ndúú^cū yā yeⁿ'e Juan chí ngeεδίνuūⁿnīⁿ miiⁿ: ¿De'ε cheⁿ'e nī n'diichi nī na yáⁿ'āa cuuⁿmaⁿ naachi nguéé ch'εetinéé 'iiⁿ'yāⁿ? ¿'Áá 'áámá ndúú chí idin'núⁿ'u 'yúúné? Nguεε 'tíicā. ²⁵ ¿Du'ú cheⁿ'e nī n'diichi nī tuu'mí? ¿'Áá 'aama saⁿ'ā chí canúⁿ sa catecai n'dai sa? Deenu nī chí 'iiⁿ'yāⁿ chí n'daācā catecai yā nguéé n'geenu yā ngii ní snée yā na va'ai yeⁿ'ē rey. ²⁶ ¿Du'ú cheⁿ'e nī n'diichí nī tuu'mí? ¿'Áá 'áámá profeta chí ngaⁿ'a nduudu cuaacu yeⁿ'é Ndyuūs? 'Úú ní ngaⁿ'á ngíí ndís'tií chí 'tíicā. Cheⁿ'é nī n'diichí nī 'áámá 'iiⁿ'yāⁿ ch'εete ca yā nguéé ti tanáⁿ'ā profetas. ²⁷ Chuū canéé nguūⁿ yeⁿ'e Juan miiⁿ na libro yeⁿ'é Ndyuūs ndii cuááⁿ vmaⁿ'a:

Cun'diichí nī. 'Úú ní dicho'ó 'áámá saⁿ'ā chí caaⁿ'maⁿ sā nduudu cuaacu yeⁿ'é nanááⁿ dii. Ní saⁿ'ā miiⁿ ní 'cuundiyaáⁿ sa yúúní cáávā dii.

²⁸ 'Úú ní ngaⁿ'á ngíí ndís'tií chí nguaaⁿ nducyaaca saⁿ'ā chí ch'iindiyaāⁿ sa na iⁿ'yeeⁿdí 'cūū nguéé táámá saⁿ'ā chí ch'εete ca sa ti 'āā Juan miiⁿ chí chεδίνuūⁿnīⁿ sa. Naati 'iiⁿ'yāⁿ chí ndiicuúⁿ ca yā naachí Ndyuūs ngaⁿ'a ntiíⁿ'nyúⁿ yā ní ch'εete cá yā nguéé ti Juan miiⁿ.

²⁹ Neené n'dai 'iiⁿ'yāⁿ ndúú^cū 'iiⁿ'yāⁿ chí inn'gueε yeⁿ'ē yáⁿ'āa ch'iindiveéⁿ yā nduudu chí ngaⁿ'a Jesús. Ní 'iiⁿ'yāⁿ s'eeⁿ chí téénu yā nduudu yeⁿ'e Juan miiⁿ ní diíⁿ yā tan'duucā Ndyuūs neⁿ'e yā. Ní Juan miiⁿ chεδίνuūⁿnīⁿ yā 'iiⁿ'yāⁿ. ³⁰ Naati 'iiⁿ'yāⁿ fariseos miiⁿ ndúú^cū maestros yeⁿ'e ley, 'iiⁿ'yāⁿ s'eeⁿ nguéé neⁿ'e yā Juan ndíí nguéé s'téénu yā nduudu yeⁿ'e Juan miiⁿ. Ní nguéé chεδίνuūⁿnīⁿ yā. ³¹ Jesús miiⁿ caⁿ'a yā chíí yā 'iiⁿ'yāⁿ: ¿Dé'ε cuuví nadidaamá ndúú^cū tan'dúú^cā 'iiⁿ'yāⁿ chí snée yā na iⁿ'yeeⁿdí 'cūū maaⁿ? ¿De'ε tan'duucá yā? ³² 'Iiⁿ'yāⁿ s'eeⁿ tan'dúú^cā saⁿ'ā ngaiyāá chí n'geεtεε sa niiⁿ'vεē ní duūchí sa ndúú^cū vi'i ní n'gai sa compañeros yeⁿ'e sa. Ní ngaⁿ'á sa ngii sa vi'i: Tiiví 'nū flauta cáávā baile ní nguéé nde'éi nī. Ngiiita 'nū canciones chí ndaachíí ní nguéé chεēcu nī. ³³ Ní ndaā Juan chí ngeεδίνuūⁿnīⁿ chí 'aama 'iiⁿ'yāⁿ chí nguéé che'e yā pan ní nguéé chí'i yā vino ní ndís'tií ní ngaⁿ'a nī yeⁿ'e yā: Juan miiⁿ ní cánée yā ndúú^cū espíritu yeⁿ'e yááⁿ'n'guiinūⁿ. ³⁴ 'Úú ní ndaá, 'úú Saⁿ'ā chí Daiya Dendyuūs 'úú. Ní nge'é ní ngí'í ní ndís'tií ngaⁿ'a nī yeⁿ'e 'úú: 'Cuin'díichí nī, 'iiⁿ'yāⁿ chí n'deē nge'é yā ní yaāⁿ n'dái ngí'í taaví yā vino. Ní ngaⁿ'a ntuúⁿ nī chí 'úú 'áámá amigo yeⁿ'e 'iiⁿ'yāⁿ chí inn'gueε yeⁿ'e yáⁿ'āa ndúú^cū 'iiⁿ'yāⁿ chí diiⁿ nuuⁿndi. ³⁵ Caati nducyaaca 'iiⁿ'yāⁿ deenu yā chí vaadī deenu miiⁿ ní yeⁿ'e Ndyuūs.

Ní 'iiⁿyāⁿ ch'iⁿí yā vaadī deenu miiⁿ cáávā dendu'ū chi n'daācā chi dííⁿ yā ti yeⁿe Ndyuūs 'iiⁿyāⁿ.

Jesús cueⁿe yā na vaacu Simón chi saⁿā fariseo

³⁶ 'Áámá saⁿā fariseo di'cuíⁿtu sa Jesús chi ché'é yā ná váácu sá. Tuu'mi ní Jesús sndaá yā ná va'ai yeⁿe saⁿā fariseo miiⁿ ní ch'iⁿdi yā na mesa ndúúcu sa. ³⁷ Tuu'mi ní 'áámá n'daataá chi véé nuuⁿndi yeⁿe ta chí canee tá yeⁿe yáāⁿ miiⁿ, taachí chicádíⁿnuuⁿ tá chi Jesús miiⁿ canee yā na va'ai yeⁿe saⁿā fariseo ní véé yā na mesa, n'daataá míⁿ ndaa ta ní ndéé ta 'áámá caja yeⁿe aceite perfume. ³⁸ N'daataa míⁿ chíntii'ya tá na ca'a Jesús ní ngēecu tá. Ní ndúúcu nuūⁿnīⁿ nduutináⁿ tá naaⁿnu tá ca'a yā ní nadídeēve tá ca'a yā ndúúcu yuūdū tiíⁿ tá. Ní 'neeⁿcheendi ta ca'a yā ní chíⁿ tá aceite perfume ca'a yā. ³⁹ Taachí sáⁿā fariseo miiⁿ n'díⁿchi sa chí diíⁿ n'daataá miiⁿ, tuu'mi nadícadíⁿnuuⁿ sa ní caⁿā sa nguááⁿ maāⁿ sa 'tíicā: Ndúúti chí sáⁿa 'cūū profeta sa, tuu'mi ní deēnū sa du'ū n'daātaa 'cūū chí ituu'vī tá saⁿā ti véé nuuⁿndi yeⁿe tá. ⁴⁰ Tuu'mi ní Jesús miiⁿ caⁿa yā chí yā saⁿa fariseo miiⁿ: Dii, Simón, véé de'ē chí cuuvi dii. Simón miiⁿ ní n'guēcútaⁿa sa ní caⁿa sa: Maestro, caaⁿmaⁿ nī.

⁴¹ Jesús caⁿa yā ejemplo 'cūū: 'Uūvi 'iiⁿyāⁿ can'díⁿcu yā yeⁿe 'áámá saⁿā. 'Áámá yā ní can'díⁿcu yā nyuⁿu ciento caadi, taama yā ní 'uūvi ngēecu ndiichi caadi. ⁴² Naati 'iiⁿyāⁿ s'eeⁿ ní nguēé tuūmī miiⁿ yeⁿe yā chí nadí've yā. 'Aā ntéé ndaaca yā tuūmī. Sáⁿā chí chinnee miiⁿ ní nadach'ēcú sa yeⁿe ndúú 'uuvi sa. Maaⁿ ní cuuvi di 'úú, ¿cheē cá saⁿā s'eeⁿ neⁿe cá yā 'iiⁿyāⁿ miiⁿ?

⁴³ Simón miiⁿ nan'guēcútaⁿa yā: 'Úú inadacádíⁿnuúⁿ chí dinéⁿe ca yā saⁿā chí n'deē ca can'díⁿcū miiⁿ. Jesús nan'guaacútaⁿa yā: N'daācā inadacádíⁿnuuⁿ di.

⁴⁴ Tuu'mi ní nguēcundí Jesús naachi canee n'daataá míⁿ ní caⁿa yā chí yā Simón: ¿'Áá ínaaⁿ di chí diíⁿ n'daātaa 'cūū? 'Úú indaa na vaacu di ní nguēé tee di nuūⁿnīⁿ chí naaⁿnú ca'á tan'dúúca costumbre yeⁿe yú naati n'daātaa 'cūū ní cheendaa tá nuūⁿnīⁿ nduutinaaⁿ tá ca'á ní nadídeēve tá ca'á ndúúcu 'yuūdū tiíⁿ ta. ⁴⁵ Taachí ndaa ní nguēé 'neeⁿcheendi di 'úú tan'dúúca costumbre yeⁿe yú naati n'daātaa 'cūū 'áámá i'neeⁿcheendi tá ca'á, ndíⁿ taachi sndaá. ⁴⁶ Ndíⁿ nguēé ndúú cheendaa di aceite perfume tíⁿ tan'dúúca costumbre yeⁿe yú naati n'daātaa 'cūū cheendaa tá aceite perfume na ca'á chí diíⁿ tá honrar 'úú. ⁴⁷ Chuū ngaⁿá ngí, dii Simón; ti tanducuéⁿe nuuⁿndi chí n'deē n'dái yeⁿe tá nadach'ēcú yeⁿe tá caati neenē neⁿe ta 'úú, ní diíⁿ tá 'túúca cáávā chí nadach'ēcú yeⁿe tá. Ní 'iiⁿyāⁿ chí duū'vī neⁿe yā 'úú ní duū'vī nadich'ēcú yeⁿe yā.

⁴⁸ Tuu'mi Jesús caⁿa yā chí yā táⁿā: Díí n'daataá 'úú nadich'ēcú nuuⁿndi yeⁿe di.

⁴⁹ 'iiⁿyāⁿ chí vééⁿe yā na mesa miiⁿ tucá'a yā caⁿa yā chí yā vī'i: ¿Du'u sáⁿā chuū chí nadicádíⁿnuuⁿ sa chí cuuvi nadich'ēecu sa nuuⁿndi yeⁿe 'iiⁿyāⁿ?

⁵⁰ Tuu'mi Jesús miiⁿ caⁿa yā chí yā n'daataá míⁿ: Cáávā chí i'téenu di 'úú, ndiíⁿ chí nanguáⁿai di. Maaⁿ ní cunaⁿā di ndúúcu vaadī 'diíⁿ.

8

N'daataa s'eeⁿ chí chinnee yā Jesús

¹ Cuayívi miiⁿ, ní cheⁿe Jesús nuuⁿmán yáāⁿ n'gēete ndúúcu nuuⁿmán yáāⁿ 'líⁿ ní ngaⁿa yā nduudu cuaacu yeⁿe Ndyuūs yeⁿe naachi Ndyuūs ngaⁿa ntiiⁿnyúⁿ yā. Ní ndu'u ndiichúúví apóstoles yeⁿe Jesús miiⁿ cueⁿe yā ndúúcu yā. ² 'Tiicá ntúūⁿ n'duuvi n'daataá chí Jesús dííⁿ yā chí nanduūvā yeⁿe ca'ai yeⁿe yā ní chí dííⁿ yā chí nacan'dáā espíritu yeⁿe yááⁿn'guiinūⁿ yeⁿe náⁿā n'daataa s'eeⁿ. Ní nguaaⁿ n'daataa s'eeⁿ canee María yeⁿe yáāⁿ Magdala. N'daata miiⁿ ní Jesús dííⁿ yā chí nán'daā ndēchē espíritu yeⁿe yááⁿn'guiinūⁿ yeⁿe ta. ³ Cueⁿe ntúūⁿ Juana chí n'daataa yeⁿe saⁿā chí nguuvi Chuza chí ngaⁿa ntiiⁿnyuⁿ sá yeⁿe cosas yeⁿe rey Herodes, ndúúcu táⁿā Susana, ndúúcu 'yaaⁿ n'dái ca n'daataá chí ca'a tá tuūmī yeⁿe tá ní cuaí tá 'āā de'ē nūⁿ chí neⁿe Jesús.

'Áámá ejemplo chí nguuvi parábola chí yeⁿe 'áámá saⁿā chí ngiīnū sa ndaata (Mt. 13.1-9; Mr. 4.1-9)

⁴ Taachí nduuvidaama 'yaaⁿ n'dái 'iiⁿ'yāⁿ chi chiica yā yeⁿ'e 'yaaⁿ n'dai yāāⁿ tuu'mi ní ndaa yā nanááⁿ Jesús. Ní Jesús yaa'vi yā 'iiⁿ'yāⁿ s'eeⁿ ndúú^{cū} 'áámá ejemplo tan'dúú^{cā} 'áámá dendu'ū chi véé iⁿ'yééⁿdi 'cūū. Ní caⁿ'a yā 'tíicā: ⁵ 'Áámá saⁿ'ā chi cuūnū ndaata mííⁿ cuéⁿ'e sa cuūnū sa. Taachí chiinū sa 'áámá duutu ndaata chiiya 'diitūú cyúúⁿ ní ch'iinca'a 'iiⁿ'yāⁿ ní 'yaada ní che'e tī. ⁶ Duutu ndaata ní chiiya naachi véé n'dee n'dái tuū. Taachí can'daā, ní ti'i ti nguéé ya'ai yeⁿ'ē. ⁷ Duutu ndaata ní chiiya nguaaⁿ yááⁿ. Yááⁿ miiⁿ chi dáámá ch'iita ndúú^{cū} yaatá ní di'vaachí yeⁿ'ē vi'ī. ⁸ Náⁿ'ā duutu ndaata ní chiiya na yáⁿ'āa n'dáacā ní taachí can'daā n'dee n'dái cosecha chii yeⁿ'ē. Ní yeⁿ'ē 'áámá ndaata ní chi 'aama ciento ndaata yeⁿ'ē. Taachí Jesús caⁿ'a yā nduudú 'cūū, yuūdū n'dái caⁿ'a yā, ní caⁿ'a yā: Ndís'tī chi véé veéⁿ nī, ní 'caandiveéⁿ nī.

Jesús caⁿ'a yā yeⁿ'e chí neⁿ'ē caāⁿ'māⁿ ejemplo miiⁿ

(Mt. 13.10-23; Mr. 4.10-20)

⁹ Tuu'mi ní discípulos yeⁿ'e Jesús caⁿ'a yā chii yā Jesús: ¿Dé'ē néⁿ'é caaⁿ'maⁿ nduudú 'cūū?

¹⁰ Jesús miiⁿ ní caⁿ'a yā: Ndís'tī ní maaⁿ ní cuuvi déénu nī chí cánuuⁿ n'de'ei yeⁿ'e Ndyuūs naachi ngaⁿ'a ntiiⁿ'nyúⁿ yā naati 'úú ní ngaⁿ'á ndúú^{cū} nduudu chí 'tεε nguεε dáámá. Ní taachi 'iiⁿ'yāⁿ s'eeⁿ snaaⁿ yā nguéé cuuvi snaaⁿ n'daaca yā, ní taachí 'caandiveeⁿ yā nguéé tuumicadiínuuⁿ yā yeⁿ'ē.

¹¹ Chuū chí neⁿ'e caāⁿ'māⁿ ejemplo miiⁿ. Ndaata miiⁿ ní chííⁿ chi tan'dúú^{cā} nduudu yeⁿ'e Ndyuūs. ¹² Duutu ndaata chí chiiya ná 'diitūú cyúúⁿ, chííⁿ chí tan'dúú^{cā} nduudu cuaacu yeⁿ'é Ndyuūs chí 'iiⁿ'yāⁿ ch'iindiveeⁿ yā. Daacá nūuⁿ ndaa yááⁿ'n'guiínuuⁿ miiⁿ ní diví sa nduudu miiⁿ na staava yeⁿ'e 'iiⁿ'yāⁿ ti nguéé cuuvi cu'téenu yā ní nguéé ndúú cuuvi n'guaaⁿ'ai yā. ¹³ Ndaata chí chiiya nguaaⁿ tuū chi nguéé dii'yu yeⁿ'ē ni tan'dúú^{cā} nduudu cuaacu yeⁿ'é Ndyuūs chí 'iiⁿ'yāⁿ n'giindiveeⁿ yā ní yeenú taavi yā. Cánéé yā tan'dúú^{cā} 'áámá milpa chi nguéé véé dii'yu yeⁿ'ē. 'Iiⁿ'yāⁿ s'eeⁿ ni 'áámá tiempo nūuⁿ i'téenu yā ní taachí ndaa nguuvi chí chííⁿ'nyúⁿ'nééⁿ 'iiⁿ'yāⁿ yeⁿ'e yā chí 'cuinaaⁿ yā cáávā nduudu miiⁿ ní 'iiⁿ'yāⁿ s'eeⁿ diví yā nduudu miiⁿ na staava yeⁿ'e yā. ¹⁴ Dúútú ndaata chí chiiya nguaaⁿ yááⁿ tan'dúú^{cā} nduudu cuaacu yeⁿ'é Ndyuūs chí 'iiⁿ'yāⁿ ch'iindiveeⁿ yā. Ní 'iiⁿ'yāⁿ s'eeⁿ damááⁿ nadacadiinúúⁿ yā yeⁿ'e vaadī 'cuiica ndúú^{cū} dendu'ū chí idi'vaachí yeⁿ'e iⁿ'yeeⁿdí 'cūū ndúú^{cū} dendu'ū chí vicio yeⁿ'e yā. Nducuéⁿ'ē di'vaachi nduudu miiⁿ ní diiⁿ chí nguéé dichí'vε nduudu miiⁿ na vida 'iiⁿ'yāⁿ s'eeⁿ. ¹⁵ Duutu ndaata chí chiiya na yáⁿ'āa n'dáacā chííⁿ chí tan'dúú^{cā} nduudu cuaacu yeⁿ'é Ndyuūs chí 'iiⁿ'yāⁿ ch'iindiveeⁿ yā ní din'daacá yā ndúú^{cū} 'viich'εtíínūuⁿ. Ní i'téenu yā nduudu miiⁿ na staava yeⁿ'é yā. Ní ch'iⁿ'í yā tanáⁿ'ā 'iiⁿ'yāⁿ chí i'téenu yā nduudu cuaacu miiⁿ.

'Áámá ejemplo yeⁿ'e 'áámá lámpara

(Mr. 4.21-25)

¹⁶ Ní Jesús chí 'cueeⁿ yā 'túú^{cā}: 'Áámá 'iiⁿ'yāⁿ nguéé ngi'i yā 'áámá lámpara ní cu'nuuⁿ yā maaⁿ 'áámá 'cuéétεε o cu'nuúⁿ yā maaⁿ 'áámá cama ti cu'nuúⁿ yā na 'áámá mesa ní 'iiⁿ'yāⁿ chí cundáa yā ní snaaⁿ yā. ¹⁷ 'Tiicá ntūúⁿ, nducuéⁿ'ē chí nguéé deenu 'iiⁿ'yāⁿ yeⁿ'e chí cunúúⁿ n'de'ei nguéé cunee chí nguéé snaaⁿ yā. Ní nguéé chí cunúúⁿ n'de'ei chí nguεε cadíínūuⁿ 'iiⁿ'yāⁿ yeⁿ'ē.

¹⁸ 'Caandiveeⁿ n'daacá nī cáávā chí cuuvi deenu nī ti 'iiⁿ'yāⁿ chí véé yeⁿ'e yā ní Ndyuūs ca'a cá yā ní n'deē cá cuuvi yeⁿ'e yā. Ní 'iiⁿ'yāⁿ chí nguéé yeⁿ'e yā 'áará chí dúú'ví nūuⁿ chí nadacadiinúúⁿ yā chí véé yeⁿ'e yā, chuū ní Ndyuūs diví yā yeⁿ'e yā.

Chεεcu Jesús miiⁿ ndúú^{cū} 'díínu yā chí ndāa yā

(Mt. 12.46-50; Mr. 3.31-35)

¹⁹ Tuu'mi ní 'díínu Jesús ndúú^{cū} chεεcú yā neⁿ'e yā ndaa yā nanááⁿ Jesús naati nguéé cuuvi ndaa yā caati neené 'yaaⁿ n'dai 'iiⁿ'yāⁿ snéé yā miiⁿ. ²⁰ Ní 'áámá 'iiⁿ'yāⁿ cueⁿ'e yā nanááⁿ Jesús ní caⁿ'a yā: N'dií Jesús, chεεcú nī ndúú^{cū} 'díínu nī snéé yā cuaaⁿ chuva'āi ní neⁿ'e yā snaaⁿ yā n'dií.

²¹ Tuu'mi ní Jesús miiⁿ caⁿ'a yā chii yā 'iiⁿ'yāⁿ s'ee: 'Iiⁿ'yāⁿ chí n'giindiveéⁿ yā nduudu yeⁿ'é Ndyuūs ní i'téenu yā 'iiⁿ'yāⁿ, 'iiⁿ'yāⁿ s'eeⁿ chíí chεεcú ní 'iiⁿ'yāⁿ s'eeⁿ chíí 'diinú.

Jesús chin'neeⁿ 'dííⁿ yā 'yúúné ndúúcū nuūⁿnīⁿ'yáⁿā
(Mt. 8.23-27; Mr. 4.35-41)

²² Chúú chii. 'Áámá nguuvi Jesús miiⁿ sndaā yā na 'áámá barco ndúúcū discípulos yeⁿ'e yā ní caⁿ'a yā chii yā 'iiⁿ'yāⁿ s'eeⁿ: Cho'o yú táámá 'díítuú nuūⁿnīⁿ'yáⁿā. Ní cueⁿ'e yā. ²³ Taachí chiica yā na barco miiⁿ, Jesús miiⁿ ní cyaadu yā. Chéenū 'aama 'yúúné taaⁿ ní diiⁿ chí chindaā nuūⁿnīⁿ chεeti barco miiⁿ ti barco miiⁿ neⁿ'e 'cuεεchi nguááⁿ nuūⁿnīⁿ. Ní discípulos 'va'a yā. ²⁴ Tuu'mi ní discípulos s'eeⁿ ndaa yā naachi canéé Jesús miiⁿ ná nadin'duuchí yā 'iiⁿ'yāⁿ ní caⁿ'a yā: N'dii Maestro, n'dii Maestro, 'cuεεchi yú nguááⁿ nuūⁿnīⁿ. Taachi Jesús miiⁿ nduuchi yā, tuu'mi ní caⁿ'a yā chi cūnéé 'diiⁿ' 'yúúné miiⁿ ndúúcū nuūⁿnīⁿ, ní canéé 'diiⁿ'. Tuu'mi ní 'āā ntéé chéenū 'yúúné miiⁿ ní canéé 'diiⁿ ní n'daacā cueⁿ'e yā ndúúcū barco miiⁿ. ²⁵ Jesús ní caⁿ'a yā: ¿De'ε cúúvī chi nguéé cu'téenu cá ní? Discípulos ní 'va'a n'daí yā ní cheⁿ'e yiinú yā ní ngaⁿ'a yā ngii yā ví'I: ¿Du'u sáⁿ'a 'cūū chí ngaⁿ'ā ntiⁿnyuⁿ sa yeⁿ'é 'yúúné ndúúcū nuūⁿnīⁿ ní n'giindiveéⁿ yeⁿ'é sa?

Jesús diiⁿ yā chi nanduūva 'áámá saⁿ'ā yeⁿ'e yáⁿ'āa Gadara chi canéé sá ndúúcū espíritus yeⁿ'e yááⁿ'n'guiinūⁿ

(Mt. 8.28-34; Mr. 5.1-20)

²⁶ Jesús ndúúcū discípulos yeⁿ'e yā cueⁿ'e yā na yáⁿ'āa Gadara. Yáⁿ'āa miiⁿ ní canee 'diitúú nuūⁿnīⁿ'yáⁿā Galilea. ²⁷ Taachí Jesús nacan'dáa yā na barco miiⁿ ní ndaa yā na yáⁿ'āa, ndaa niⁿnuúⁿ Jesús miiⁿ 'áámá saⁿ'ā yeⁿ'e yáⁿ'āa miiⁿ. 'Āā 'naaⁿ tiempo canéé sá ndúúcū espíritus yeⁿ'e yááⁿ'n'guiinūⁿ. Nguéé catecai sa ndíí nguéé ndúú canúúⁿ rá sá va'āi ti na yiivi yááⁿ'vā cānuuⁿ sa. Ní ndaa sa ní ndaāca sa Jesús miiⁿ. ²⁸ Ní taachi sáⁿ'a 'cūū n'dííchi sa Jesús miiⁿ chiintii'ya sá nanáaⁿ yā ní 'caī yiicú sa: N'dii Jesús, Daiya Ndyuūs chi ch'εεte n'dai poder yeⁿ'e ní, ¿de'ē dííⁿ ní nduucú? 'Úú di'cuiitú n'dii chi nguéé dííⁿ ní chi dííⁿ sufrir.

²⁹ 'Túúca caⁿ'a sa ti Jesús caⁿ'a ntiⁿnyúⁿ yā chí nan'daā espíritus yeⁿ'e yááⁿ'n'guiinūⁿ yeⁿ'e sáⁿ'ā miiⁿ. 'Āā nééné 'naaⁿ tiempo chi espíritus ichéé ndúúcū saⁿ'ā miiⁿ. 'Iiⁿ'yāⁿ s'eeⁿ yeⁿ'e yááⁿ miiⁿ ní ngaā chiichí yā saⁿ'ā miiⁿ ndúúcū cadenas naati ch'iica sá cadenas ní espíritu yeⁿ'e yááⁿ'n'guiinūⁿ candée sa saⁿ'ā naachi nguéé 'iiⁿ'yāⁿ. ³⁰ Tuu'mi ní Jesús tiinguunééⁿ yā saⁿ'ā miiⁿ: ¿DÉ'ē nguuvi di? Saⁿ'ā miiⁿ ní caⁿ'a sa: Legión nguūví. 'Tííca ngaⁿ'a 'iiⁿ'yāⁿ yeⁿ'é sa ti neené 'yaaⁿ espíritus yeⁿ'e yááⁿ'n'guiinūⁿ canee ndúúcu sa. ³¹ Ní espíritus idi'cuítū Jesús chi nguéé dichó'o yā na abismo chí canéé cuaaⁿ maaⁿ yáⁿ'āa. ³² Ní niⁿnuúⁿ ná snée yā nééné n'deē cuuchí vεε tī 'cuεeti miiⁿ chí in'nuúⁿ ti chí ché'e ti. Ní espíritus di'cuítū Jesús miiⁿ chí ca'á yā lugar chí cundáa chεētī cuuchí s'eeⁿ. Jesús miiⁿ ní 'cuúⁿ yā. ³³ Tuu'mi ní espíritus yeⁿ'e yááⁿ'n'guiinūⁿ nan'dáa na cuerpo yeⁿ'e saⁿ'ā miiⁿ ní sndaā na cuerpo yeⁿ'e cuuchi s'eeⁿ. Ní 'iiti s'eeⁿ ní chéenu tī na yiivi yaavā yeⁿ'e yiicū miiⁿ ní chingéé nuúⁿ tī nguaaⁿ nuūⁿnīⁿ ní ch'íí nuúⁿ tī nguaaⁿ nuūⁿnīⁿ miiⁿ.

³⁴ 'Iiⁿ'yāⁿ chí idiⁿ cuidado cuuchí s'eeⁿ taachí n'diichí yā chuū, cueⁿ'é yā ngéenu yā ní cuuvi yā 'iiⁿ'yāⁿ na yááⁿ ndúúcū 'iiⁿ'yāⁿ chí snée na 'cuεeti nducuéⁿ'é chí chíí. ³⁵ 'Iiⁿ'yāⁿ yeⁿ'e yááⁿ miiⁿ ní cheⁿ'e yā n'diichí yā chí chíí. Ndaá yā nanááⁿ Jesús miiⁿ ní n'diichí yā saⁿ'a chí nacan'daā espíritus yeⁿ'e yááⁿ'n'guiinūⁿ. Saⁿ'ā miiⁿ ní véé sa na ca'a Jesús. Canúúⁿ sá catecai sa ní 'āā n'daāca idiⁿ sa. 'Iiⁿ'yāⁿ s'eeⁿ ní dii'yā yā chíí. ³⁶ Ní 'iiⁿ'yāⁿ s'eeⁿ chí n'diichí yā nducuéⁿ'é chí chó'ōo caⁿ'a yā 'iiⁿ'yāⁿ chí caama ndaa yā táacā espíritus yeⁿ'e yááⁿ'n'guiinūⁿ nan'dáa na cuerpo yeⁿ'e saⁿ'ā miiⁿ. ³⁷ Tuu'mi ní nducyáacá 'iiⁿ'yāⁿ yeⁿ'e yáⁿ'āa Gadara di'cuítū yā Jesús chí cuεεví yā yeⁿ'e 'iiⁿ'yāⁿ s'eeⁿ ti neené 'va'á yā. Tuu'mi ní Jesús ndaa yā barco miiⁿ. ³⁸ Ní saⁿ'ā chí nān'daa espíritus yeⁿ'e yááⁿ'n'guiinūⁿ di'cuítū sa Jesús miiⁿ chí cundáa sa na barco miiⁿ ndúúcu yā. Jesús yaa'vi yā saⁿ'a miiⁿ ní caⁿ'a yā: ³⁹ Cunaⁿ'ā di ná vaacu di ní caaⁿ'maⁿ di cuuvi di 'iiⁿ'yāⁿ dendu'ū chí ch'εεte n'dai chí Ndyuūs dííⁿ yā ndúúcū di. Saⁿ'ā miiⁿ ní cunaⁿ'a sa ní caⁿ'a sa chíí sa 'iiⁿ'yāⁿ núúⁿ'máⁿ na yááⁿ dendú'ū chí ch'εεte n'dai chí Jesús dííⁿ yā ndúúcū sa.

Yeⁿe daiya Jairo chí ngítā ní yeⁿe n'daataá chí tuu'vi tá catecai Jesús
(Mt. 9.18-26; Mr. 5.21-43)

⁴⁰ Taachí Jesús cueⁿe yā cho'o yā táámá 'diituú nuūⁿnīⁿyáⁿā, ní ndaa yā yāāⁿ miiⁿ, 'iiⁿyāⁿ 'cuúⁿ yā Jesús ndúúcu vaadī yeenú ti n'dee n'daí 'iiⁿyāⁿ ní snee ngiinu yā Jesús miiⁿ. ⁴¹ Miiⁿ cánéé 'aama saⁿa chí nguuví sa Jairo. Saⁿa miiⁿ ngaⁿa ntiiⁿnyuⁿ sa yeⁿe yaācū sinagoga ní ndaā sa nanááⁿ Jesús ní chiintii'ya sa na ca'a Jesús miiⁿ. Ní di'cuíftú sa 'iiⁿyāⁿ chí cundáa yā na vaācū sa, ⁴² caati 'áámá n'dyáⁿā daiya sa 'āā 'nááⁿ tá tan'duu ndiichúúví nduūyū tá 'āā cháá 'cuuvi tá. Taachí cueⁿe Jesús miiⁿ neené n'dee 'iiⁿyāⁿ cueⁿe yā ndúúcu yā ní ndii tuunúúⁿ ngēenūū chiichi yā.

⁴³ Nguaaⁿ 'iiⁿyāⁿ s'eeⁿ canéé 'áámá n'daataá chí 'āā ndiichúúví nduūyū canee tá ndúúcu 'áámá ca'āi chí ngéé yuuúⁿ yeⁿe cuerpo yeⁿe ta. 'Āā diiⁿ tá gastar ndúúcu médicos tanducueⁿē chí vεε yeⁿe tá. Mar 'áámá médico nguéé ngii diyiicú yā táⁿā miiⁿ. ⁴⁴ Ndaā niiⁿnuⁿ tá cuaaⁿ daami Jesús ní tuū'vi tá naachi n'dεε tíí yeⁿe catecai Jesús miiⁿ. Tuu'mí nūⁿ canee naaⁿ chí ingéé yuuúⁿ yeⁿe cuerpo yeⁿe tá.

⁴⁵ Tuu'mi ní Jesús miiⁿ caⁿa yā: ¿Du'u tuū'vi 'úú? Nducyáácá 'iiⁿyāⁿ ní caⁿa yā: Nguεε 'úú. Pedro miiⁿ ní caⁿa sa: N'dii Maestro, 'iiⁿyāⁿ miiⁿ ní i'nuuⁿ chiichí yā n'diī ní táácā chí ngaⁿa nī: ¿Du'ú tuū'vi 'úú?

⁴⁶ Jesús caⁿa yā: Véé du'ū chí tuū'vi 'úú. 'Úú ní deenú chí ndúúcu poder yeⁿe nduūvā yeⁿe 'áámá 'iiⁿyāⁿ.

⁴⁷ Taachi n'daata míⁿ tuumicádiinuⁿ tá chí Jesús deenú yā in'duuví n'dai tá ní ndaā tá nanááⁿ Jesús miiⁿ ní chiintii'yā ta nanáaⁿ yā. Ní caⁿa cuaacu tá nanááⁿ nducyáácá 'iiⁿyāⁿ de'ē cáávā chí tuū'vi tá catecai Jesús. Ní hora míⁿ nūⁿ chí tuu'vi ta nduūvā yeⁿe tá. ⁴⁸ Jesús miiⁿ ní caⁿa yā: Díí, daiyá, cáávā chí i'teenú di 'úú, ní nduūvā yeⁿe di. Maaⁿ ní cunaⁿa di na vaacu di ndúúcu vaadī 'diīⁿ.

⁴⁹ Ní taachi Jesús ngaⁿa yā chuū ndaā 'áámá saⁿa yeⁿe na vaacu saⁿa chí ngaⁿa ntiiⁿnyuⁿ yeⁿe yaācū sinagoga. Ndaā sa nanááⁿ Jairo ní caⁿa sa: 'Āā ch'iī daiya di. 'Āā ntéé yaa'vi di Maestro.

⁵⁰ Jesús miiⁿ ch'iindiveéⁿ yā nduudu 'cūū ní caⁿa yā: Nguéé 'va'ā di. Cu'téenu di 'úú ní nanduūchi ta yeⁿe nguaaⁿ tináⁿā.

⁵¹ Tuu'mi ní Jesús sndaā yā na vaacu Jairo. Nguéé 'cuuⁿ yā chí nducyaaca 'iiⁿyāⁿ sndaá yā ndúúcu yā cuaaⁿ cheeti va'āi miiⁿ, dámaaⁿ Pedro ndúúcu Jacobo, ndúúcu Juan, ndúúcu cheecu n'daata 'lííⁿ, ndúúcu chiida tá. ⁵² Nducyaaca yā cuaaⁿ ch'va'āi ch'εetinée yā ní ngeecu yā ní n'gai yā ti ya'ái yā caavā tá. Ní Jesús caⁿa yā: Nguéé cuεecú nī. Nguéé n'diī tá ti cyaadu tá.

⁵³ 'iiⁿyāⁿ s'eeⁿ ní taachi n'giindiveéⁿ yā nduudu yeⁿe Jesús miiⁿ ch'ííⁿnyuⁿneeⁿ yā yeⁿe Jesús miiⁿ ti 'āā deenú yā chí 'āā n'diī tá. ⁵⁴ Tuu'mi ní Jesús ndaa yā cuaaⁿ cheeti va'āi ní sta'á yā ta'ā tá ní caⁿa yuudú yā: Dii, ta'dííⁿ, nducueeⁿ di.

⁵⁵ Hora míⁿ nūⁿ espíritu yeⁿe ta'dííⁿ míⁿ nnguεecunéé ndúúcu ta. Tuu'mí nūⁿ nducueⁿē tá. Jesús caⁿa ntiiⁿnyúⁿ yā chí ca'á yā chí che'e tá. ⁵⁶ Chiida tá ndúúcu cheecu tá neené ngeⁿe yiinu yā ní Jesús caⁿa yā chí yā 'iiⁿyāⁿ s'eeⁿ chí nguéé cuuví nī chí nduuchi tá yeⁿe nguaaⁿ tináⁿā.

9

Jesús dichó'o yā ndu'u ndiichúúví discípulos yeⁿe yā
(Mt. 10.5-15; Mr. 6.7-13)

¹ Jesús yaa'ví yā ndu'u ndiichúúví discípulos yeⁿe yā ní ca'a yā poder. Ní caⁿa yā chí tun'dáa yā espíritus yeⁿe yááⁿnguiniūⁿ yeⁿe 'iiⁿyāⁿ ní dííⁿ yā chí nduūvā yeⁿe 'iiⁿyāⁿ chí ngítā. ² Ní Jesús dichó'o yā discípulos chí caaⁿmaⁿ yā nduudu n'dai yeⁿe naachí Nduūⁿ ngaⁿa ntiiⁿnyúⁿ yā ní dííⁿ yā chí nduūvā yeⁿe 'iiⁿyāⁿ chí ngítā. ³ Ní caⁿa yā chí yā discípulos yeⁿe yā: Ndís'tiī nguéé de'ē vεε candée nī cuaaⁿ cyúúⁿ. Nguéé ndúú in'daacú, ndíí nguéé ndúú morral, ndíí nguéé ndúú pan ra, ndíí nguéé ndúú tuūmī ra, ndíí nguéé nduu candée nī 'uūvī catecai. ⁴ Ní 'āā tíí nūⁿ va'ai naachi ndaa nī 'cuεetinée

nī miiⁿ ní ndíí taachi ndaá nī ndíí taachi nan'dáa nī yeⁿe yaāⁿ miiⁿ. ⁵ Ní naachi ndaa nī 'áamá yáāⁿ ní 'iiⁿ'yāⁿ nguéé 'cuaaⁿ yā ndís'tiī, tuu'mi ní nan'dáa nī yeⁿe yáāⁿ miiⁿ ní n'dáadi nī yaācāⁿ yeⁿe ca'a nī. Chuū ní 'áamá señal chi 'cuuⁿ'míⁿ nī chi nguéé n'daacā idiíⁿ yā ti contra yeⁿé nī.

⁶ Discípulos ican'dáa yā ní cheⁿ'é yā nuuⁿ'máⁿ cuaaⁿ yáāⁿ s'eeⁿ ní nduu cuááⁿ ní ngaⁿ'a yā nduudu ngai yeⁿ'é Ndyuūs, nduudu chi nanguaⁿ'āi 'iiⁿ'yāⁿ. Ní diíⁿ yā chi nduūvā yeⁿ'é 'iiⁿ'yāⁿ chi ngiitā.

Rey Herodes nguéé s'teenu yā yeⁿ'e Jesús

(Mt. 14.1-12; Mr. 6.14-29)

⁷ Ch'iindiveeⁿ rey Herodes tanducuéⁿ'ē chí Jesús miiⁿ idiíⁿ yā ní 'āā ntεε déénu yā de'ē nadicadiínuuⁿ yā. Ní véé 'uūvī vandiicadiinúúⁿ yā caati náⁿ'ā 'iiⁿ'yāⁿ ní ngaⁿ'a yā chí Jesús chí Juan miiⁿ chí nduuchi yā yeⁿ'ē nguaaⁿ tináⁿ'ā. ⁸ Náⁿ'a yā ní ngaⁿ'a yā chí profeta Elías miiⁿ ní 'āā che'enaáⁿ yā. Náⁿ'a yā ní ngaⁿ'a yā chí 'áamá profeta chí n'dií yā ndíí yeⁿ'e tiempo chí 'āā 'naaⁿ nandúúchi yā yeⁿ'ē nguaaⁿ tináⁿ'ā. ⁹ Ní rey Herodes miiⁿ ní caⁿ'a yā: 'Úú caⁿ'ā ntiiⁿ'nyúⁿ chí 'chiitá daandu saⁿ'ā chí Juan chí cheédínuūⁿnīⁿ sa. ¿Dú'ū chí saⁿ'ā miiⁿ chí ch'iindiveeⁿ tanducuéⁿ'ē yeⁿ'ē sa? 'Úú neⁿ'é cadiinúúⁿ ní neⁿ'é snaáⁿ sáⁿ'a 'cūū.

Jesús ca'a yā che'e nyuⁿ'u mil 'iiⁿ'yāⁿ

(Mt. 14.13-21; Mr. 6.30-44; Jn. 6.1-14)

¹⁰ Taachi discípulos ndaá yā naachí canee Jesús, tuu'mi ní caⁿ'a yā Jesús tanducuéⁿ'e chí diíⁿ yā. Cuayiivi ní Jesús cueⁿ'é yā ndúúⁿcū discípulos yeⁿ'e yā níⁿ'nuúⁿ na yáāⁿ Betsaida ní cueⁿ'é yā cuēti yeⁿ'ē yáāⁿ miiⁿ'ya. ¹¹ Taachí 'iiⁿ'yāⁿ cadíínuuⁿ yā yeⁿ'e Jesús miiⁿ, cueⁿ'é yā n'dáa yā 'iiⁿ'yāⁿ. Ní Jesús 'cuuⁿ yā 'iiⁿ'yāⁿ s'eeⁿ ní caⁿ'a yā chí yā 'iiⁿ'yāⁿ s'eeⁿ yeⁿ'e naachí Ndyuūs ngaⁿ'a ntiiⁿ'nyúⁿ yā. Ní diíⁿ yā chí nduūvā yeⁿ'é 'iiⁿ'yāⁿ chí ngiita yā.

¹² Taachí chí chiinū, ndu'u chí ndiichúúví yā ndaá yā nanááⁿ Jesús ní caⁿ'a yā chí yā Jesús: Yaa'vi nī 'iiⁿ'yāⁿ s'eeⁿ chí caⁿ'a yā cuaaⁿ yáāⁿ s'eeⁿ, ní cuaaⁿ yáāⁿ 'lííⁿ naachi snéé 'iiⁿ'yāⁿ ní véé naachi 'cuētinéé yā ní ndaaca yā chí che'e yā, ti nguéé de'ē vεε naachi snéé yú.

¹³ Jesús caⁿ'a yā chí yā discípulos: Ndís'tiī ní ca'a nī chí che'e yā. Discípulos ní caⁿ'a yā: 'Āā ntéé n'deēe yeⁿ'é 'nū véé ti táá nyuⁿ'u nūuⁿ pan ndúúⁿcū 'uūvī 'yaācā. Nguéé cuuvi diíⁿ 'nū cuái 'nū chí che'e nducyaaca 'iiⁿ'yāⁿ s'tíí.

¹⁴ Miiⁿ ní snéé taandu nyuⁿ'u mil saⁿ'ā. Tuu'mi ní Jesús miiⁿ caⁿ'á yā chí yā discípulos yeⁿ'e yā: Caaⁿ'maⁿ ntiiⁿ'nyúⁿ nī 'iiⁿ'yāⁿ s'eeⁿ chí 'cuēté yā 'uūvī ngεecu ndiichí yā 'aama 'áamá cuaaⁿ.

¹⁵ 'Tííⁿcā diíⁿ discípulos ní ch'εeté nducyaaca 'iiⁿ'yāⁿ s'eeⁿ. ¹⁶ Tuu'mi ní Jesús miiⁿ sta'á yā ndu'u nyuⁿ'u pan ndúúⁿcū nduu 'uuví 'yaācā. Ní 'iicu n'diichí yā nanguuvi ní ca'á yā gracias Dendyuūs cáāvā pan ndúúⁿcū 'yaācā miiⁿ. Cuayiivi ní Jesús n'deé yā pan ndúúⁿcū 'yaācā ní ca'a yā discípulos yeⁿ'e yā. Ch'iinu ní discípulos ca'a ntúuⁿ yā 'iiⁿ'yāⁿ s'eeⁿ chí che'e yā. ¹⁷ Che'e nducyaaca yā ní chiitúú 'iiⁿ'yāⁿ. Cuayiivi ní discípulos nan'gaáⁿ yā chí ningaavā ní chiitúú tá ndiichuuví 'cuēētē chí ningaāvā.

Pedro miiⁿ ní caⁿ'ā cuaacu sa chí Jesús miiⁿ chí Cristo yā

(Mt. 16.13-19; Mr. 8.27-29)

¹⁸ 'Áamá nguuví taachí Jesús ndúúⁿcū discípulos yeⁿ'é yā canéé yā 'aama lado ní ngaⁿ'āngua'á yā, tuu'mi ní Jesús itiinguunééⁿ yā discípulos: ¿Du'ū 'úú ngaⁿ'a 'iiⁿ'yāⁿ?

¹⁹ 'Iiⁿ'yāⁿ s'eeⁿ ní n'guεεcútaⁿ'a yā: Náⁿ'a yā ní ngaⁿ'a yā chí díí Juan chí cheédínuūⁿnīⁿ sa díí. Náⁿ'a yā ní ngaⁿ'a yā chí díí ní profeta Elías díí; ní náⁿ'a yā ní ngaⁿ'a ntuúⁿ yā chí díí ní 'aama profeta chí 'āā 'naaⁿ tiempo chí n'dií ní nnduuchí yā yeⁿ'e nguaaⁿ tinaⁿ'ā.

²⁰ Jesús miiⁿ ní caⁿ'a yā: Ndís'tiī, tuu'mi, ¿du'ū 'úú ngaⁿ'a ní? Tuu'mi ní Simón Pedro nan'guεεcútaⁿ'a yā ní caⁿ'a yā: N'dií chí Cristo yeⁿ'é Ndyuūs.

²¹ Jesús chí yā 'iiⁿ'yāⁿ s'eeⁿ chí nguéé cuuvi yā chuū mar 'áamá 'iiⁿ'yāⁿ.

Jesús ngaⁿa yā yeⁿe chí taācā 'cuūvi yā
(Mt. 16.20-28; Mr. 8.30-9.1)

²² Tuu'mi ní Jesús caⁿa yā: Cánéé chí 'úú chí Saⁿā chi Daiyá Ndyuūs n'deeē n'dái 'cueenú cuuvi ní 'ífcú saⁿā ndiicúú chí ngaⁿa ntiiⁿnyuⁿ yeⁿe yaācū ndúúccū chiiduú n'gēete chí ngaⁿa ntiiⁿnyúⁿ yā ndúúccū maestros yeⁿe ley ní nguéé neⁿe yā snaaⁿ yā 'úú chí Saⁿā chi Daiya Ndyuūs. Ní canéé chí 'caaⁿnúⁿ yā 'úú. Ní 'úú nduuchí yeⁿe nguaaⁿ tináⁿā ndii 'cuínú 'iīnū nguuvi.

²³ Cuayiivi ní Jesús ngaⁿa yā ngii yā nducyáácá 'iiⁿyāⁿ: Ndúútí chí 'áámá 'iiⁿyāⁿ neⁿe yā caⁿa yā nduucú, canéé chí cuⁿnééⁿ maáⁿ yā tanducuéⁿe denduⁿū chí véé yeⁿe yā, ní nguuvi nguuvi cutaⁿá yā cruz yeⁿe yā chí tanⁿduúccā chí 'cueenu taaví yā cuuvi cucáávā 'úú ní caⁿa yā nduucú. ²⁴ Caati nducyaaca 'iiⁿyāⁿ chí neⁿe cá yā nadanguáⁿai yā vida yeⁿe maaⁿ yā na iⁿ'yeeⁿdí 'cūú dindaí yā táámá vida yeⁿe yā nanááⁿ Ndyuūs. Ní nducyaaca 'iiⁿyāⁿ chí dindaí yā vida yeⁿe yā cucáávā 'úú ndaāca yā táámá vida yeⁿe yā nanááⁿ Ndyuūs. ²⁵ ¿De'ε dichí'vē saⁿā ndúúti chí diiⁿ sa ganar nducuéⁿe chí véé na iⁿ'yeeⁿdí 'cūú ní díⁿ sa chí dindaí sa vida cueⁿe daāⁿmaⁿ chí táámá vida yeⁿe yā ní idituuví sa maāⁿ vida yeⁿe sa? ²⁶ Ní 'iiⁿyāⁿ chí cuuvi 'cuináⁿ yā yeⁿe 'úú nanááⁿ 'iiⁿyāⁿ ndúúccū nduudu yeⁿe túu'mi ní 'úú chí Saⁿa chí Daiya Dendyuūs cuuví 'cuinaáⁿ yeⁿe 'iiⁿyāⁿ 'cūú taachi 'úú ndaá taama vmnéⁿēe tanⁿduúccā Rey ndúúccū poder yeⁿe Chiidá ndúúccū poder yeⁿe maáⁿ ní ndúúccū ángeles. ²⁷ 'Úú ngaⁿa cuaacú ndúúccū ndís'tiī, chí vε náⁿa nī chí snee nī 'muuⁿ chí nguéé 'cuūvi nī taanduvéé ndíí snaaⁿ nī yeⁿe naachi Ndyuūs ngaⁿa ntiiⁿnyúⁿ yā.

Jesús n'daaⁿ yā cuerpo yeⁿe maáⁿ yā
(Mt. 17.1-8; Mr. 9.2-8)

²⁸ Ch'íínú ní'ín'ín nguuvi chí Jesús caⁿa yā nduudu 'cūú, Jesús cueⁿe yā ndúúccū Pedro, ndúúccū Juan ndúúccū Jacobo ní cheε yā na yiīcū chí caaⁿmaⁿnguaⁿá yā. ²⁹ Ní taachi Jesús ngaⁿanguaⁿá yā, n'dááⁿ naaⁿ yā ní catecai yā nduuví cuéē ní ngii n'gai. ³⁰ Ní tuu'mí nūuⁿ che'enaāⁿ na 'uuví saⁿā ndúúccū Jesús. Saⁿā s'eeⁿ chíiⁿ Moisés ndúúccū profeta Elías chí 'āā 'naaⁿ tiempo chí n'dīi yā. ³¹ Nduu 'iīnū yā ní na chidεεve chí ngíí n'gai yeⁿe va'ai cheeti nguuvi snée yā. Ní ngaⁿa yā yeⁿe chí 'cuūvi Jesús ní 'cueenu taaví yā na yāāⁿ Jerusalén. ³² N'dáá rá chí cyaadu Pedro ndúúccū Juan ndúúccū Jacobo nadacueéⁿ yā ní n'diichi yā chí ngíí n'gai naaⁿ Jesús ndúúccū saⁿā s'eeⁿ chí canee ndúúccū yā. ³³ Ní taachí Elías ndúúccū Moisés chivíi yā yeⁿe Jesús ní 'āā cuéé caⁿa yā, tuu'mi ní Pedro miiⁿ ní caⁿa yā chíi yā Jesús: N'díí Maestro, de'ε chúúccā n'daācā yeⁿe yú chí 'cuēetinée yú 'muuⁿ. Ní dín'dái 'nū 'iīnū va'ai n'gaiyāā; 'áámá yeⁿe nī, 'áámá yeⁿe Moisés, nī 'áámá yeⁿe Elías. Pedro miiⁿ ní nguéé déenu yā de'ε chí ngaⁿa yā. ³⁴ Ní neⁿe chí ngaⁿa Pedro miiⁿ ndaā 'áámá meēⁿ ní sn'díi 'iiⁿyāⁿ s'eeⁿ ní 'va'a yā chí ndaa meēⁿ vmaāⁿ yā. ³⁵ Tuu'mi ní ch'iindiveéⁿ yā 'áámá nduudu chí ngaⁿā nguaaⁿ meēⁿ: Sáⁿa 'cūú ní Daiyá chí neⁿe taaví. Cu'neeⁿ veéⁿ nī nducuéⁿe chí ngaⁿa sa.

³⁶ Ch'íínú ch'iindiveéⁿ yā nduūdū miiⁿ ní discípulos n'diichí yā chí Jesús miiⁿ canéé yā dámaaⁿ yā nduucú yā. Ní discípulos ch'εetinee 'diīiⁿ cheendí yā nguuvi s'eeⁿ ní nguéé chíi yā mar 'áámá 'iiⁿyāⁿ yeⁿe chí n'diichi yā.

Jesús diiⁿ yā chí nanduūvā yeⁿe 'áámá saⁿā 'lín yeⁿe espíritu yeⁿe yááⁿn'guinūuⁿ
(Mt. 17.14-21; Mr. 9.14-29)

³⁷ Táámá nguuvi cuayiivi, 'iiⁿyāⁿ s'eeⁿ ní nanguaⁿá yā yeⁿe yiīcū miiⁿ ní nééné 'yaaⁿ 'iiⁿyāⁿ can'dáa yā na yāāⁿ ní cueⁿe yā chí ndaacá yā Jesús. ³⁸ Tuu'mi ní 'áámá saⁿā chí canéé ndúúccū 'iiⁿyāⁿ s'eeⁿ 'cái sa: N'díí Maestro di'cuíftūu n'diī chí snaaⁿ nī daiyá tí 'áámá n'dyáⁿā daiyá. ³⁹ Ti 'áámá espíritu yeⁿe yááⁿn'guinūuⁿ ita'a saⁿā ní ndaāca naāⁿ nn'gai sa ní 'caí diitú sa ní ican'daā yáíⁿ cuaaⁿ cheendi sa ní n'deeē n'dái tiempo chí nééné taaⁿ idiiⁿ espíritu yeⁿe yááⁿn'guinūuⁿ ndúúccū sa ní nguéé ngii vii espíritu yeⁿe yááⁿn'guinūuⁿ yeⁿe sa. ⁴⁰ Ní 'āā dííⁿ 'cuíftuú discípulos yeⁿe nī chí divíi yā espíritu miiⁿ yeⁿe daiyá naati nguéé cuuvi dííⁿ yā.

⁴¹ Jesús nan'guεεcútaⁿa yā: Ndís'tiī, 'iiⁿyāⁿ chi nguéeé i'téenu nī ndíí nguéeé ndúú idiīⁿ n'daacá nī. ¿'Áá 'naaⁿ tiempo canéeé chí cuneé ndúúcu ndis'tiī? ¿'Áá 'naaⁿ tiempo ní canéeé chí cuchéé ndúúcu ndis'tiī? Ní ngaⁿa yā ngii yā sáⁿ'ā miiⁿ: Cuchíí di nanaáⁿ ndúúcu daiya di.

⁴² Taachí saⁿ'ā 'dííⁿ miiⁿ ndaa niiⁿnuúⁿ sá nanááⁿ Jesús miiⁿ, espíritu yeⁿ'e yááⁿ'n'guiinūⁿ miiⁿ chindēēve saⁿ'ā 'díí miiⁿ ní ch'εεcundāā saⁿ'ā. Ní Jesús yaa'vineeⁿ yā espíritu yeⁿ'e yááⁿ'n'guiinūⁿ chí divíi yeⁿ'e saⁿ'a 'dííⁿ miiⁿ, ní nanduūvā yeⁿ'ē sa. Tuu'mi ní Jesús nca'á yā saⁿ'ā 'dííⁿ miiⁿ chiida sa. ⁴³ Nducyáácá 'iiⁿyāⁿ ngeⁿ'e yiinu yā yeⁿ'ē poder yeⁿ'e Dendyuūs chí ch'εete n'dai. Ní taachi nducyaaca yā cheⁿ'e yiinu yā yeⁿ'e tanducueⁿ'ē chí dííⁿ Jesús miiⁿ, Jesús caⁿ'a yā.

Jesús caⁿ'a yā táámá cuuvi yeⁿ'ē chi 'cuuvi yā

(Mt. 17.22-23; Mr. 9.30-32)

⁴⁴ Ní chii yā discípulos yeⁿ'e yā: 'Caandiveéⁿ nī n'daācā yeⁿ'e tanducueⁿ'ē nduudu chi caaⁿ'máⁿ ní nguéeé cuuvi naáⁿ nī yeⁿ'ē. 'Úú Saⁿ'ā chi Daiya Ndyuūs 'úú ní 'iiⁿyāⁿ canee chí naca'a yā 'úú ta'ā 'iiⁿyāⁿ.

⁴⁵ Discípulos ní nguéeé tuumicádiinuuⁿ yā nduudu chi ngaⁿ'a Jesús. Canúúⁿ n'de'ei nduudú 'cūū yeⁿ'e yā. Ní nguéeé túúmícádiinuuⁿ yā. Ní 'va'á yā chi ntiinguuneeⁿ yā Jesús de'ē neⁿ'e caaⁿ'maⁿ nduudú 'cūū.

Nduudu yeⁿ'e du'ū chi ch'εete ca

(Mt. 18.1-5; Mr. 9.33-37)

⁴⁶ Tuu'mi ní discípulos yeⁿ'e yā tuc'á yā caⁿ'a yā ndúúcu vi'í: ¿Du'ū ca chi ch'εete ca nguaaⁿ s'uúúⁿ? ⁴⁷ Jesús tuumicadíinuuⁿ yā táácā chí discípulos nadicádiinuuⁿ yā na staava yeⁿ'e yā ní sta'á yā 'áámá saⁿ'ā 'lííⁿ ní s'neeⁿ yā saⁿ'ā nanááⁿ yā. ⁴⁸ Ní caⁿ'a yā chii yā discípulos yeⁿ'e yā: 'Āā du'ú nūūⁿ 'iiⁿyāⁿ chí 'cuaaⁿ yā saⁿ'ā 'lííⁿ 'cūū ndúúcu chí duuchí 'cuaáⁿ yā 'úú. 'Āā du'ú nūūⁿ 'iiⁿyāⁿ chí 'cuaáⁿ yā 'úú 'cuaáⁿ yā 'iiⁿyāⁿ chí dichó'o yā 'úú. 'Iiⁿyāⁿ chí ndiicuuⁿ ca yā nguaaⁿ ndis'tiī ní 'iiⁿyāⁿ 'cúū, ní ch'εete ca yā nguaaⁿ ndis'tiī.

'Iiⁿyāⁿ chí nguéeé contra yeⁿ'ē yú ní snée yā favor yeⁿ'ē yú

(Mr. 9.38-40)

⁴⁹ Tuu'mi ní Juan caⁿ'a yā chii yā Jesús: N'dií, Maestro, 'āā n'diichí 'nū 'áámá saⁿ'ā chí divíi sa espíritus yeⁿ'ē yááⁿ'n'guiinūⁿ yeⁿ'e 'iiⁿyāⁿ ndúúcu chí duuchí nī; ní nguéeé cuúⁿ 'nū ti nguéeé canee sa ndúúcu yú.

⁵⁰ Jesús caⁿ'a yā chii yā Juan: 'Cuaáⁿ nī chí diiⁿ sa 'túúcā; ti 'iiⁿyāⁿ chí nguéeé dííⁿ yā contra yeⁿ'e s'uúúⁿ, 'iiⁿyāⁿ miiⁿ snée yā favor yeⁿ'ē yú.

Jesús yaa'vineeⁿ yā 'uūvī discípulos yeⁿ'e yā

⁵¹ Taachi snuū ca'a nguuvi miiⁿ chí Jesús miiⁿ canéeé chí caⁿ'á yā na va'ai chēeti nguuvi, Jesús 'āā deenú yā de'ē chí dííⁿ yā ní cueⁿ'e yā ndúúcu valor na yáāⁿ Jerusalén. ⁵² Ní dicho'ó yā na 'úúví saⁿ'ā vmnááⁿ yeⁿ'e yā. Saⁿ'ā s'eeⁿ ní cueⁿ'ē sa ní sndaā sa na 'áámá yáāⁿ yeⁿ'e yáⁿ'āa Samaria chí in'nuuⁿ sa nááchí 'cuēetinée yā. ⁵³ Ní 'iiⁿyāⁿ samaritanos nguéeé 'cuuⁿ yā Jesús miiⁿ ti chicadiinuuⁿ yā chí Jesús caⁿ'a yā yáāⁿ Jerusalén. ⁵⁴ Taachí discípulos yeⁿ'e yā n'giindiveéⁿ yā chuū, Jacobo ndúúcu Juan caⁿ'a yā: N'dií, Señor, ¿'áá neⁿ'e nī chí caaⁿ'maⁿ ntiiⁿnyuⁿ yú chí cun'geēⁿ yaⁿ'ā yeⁿ'ē nanguuvi ní di'cuiinú yú 'iiⁿyāⁿ 'muuⁿ tan'dúúcā chí diiⁿ profeta Elías miiⁿ tiempo chí chó'ōo caati 'iiⁿyāⁿ s'eeⁿ nguéeé neⁿ'é yā 'cuaāⁿ yā s'uúúⁿ?

⁵⁵ Tuu'mi ní Jesús miiⁿ yaa'vineeⁿ yā Jacobo ndúúcu Juan ní caⁿ'a yā chii yā saⁿ'ā s'eeⁿ: Ndís'tiī ní nguéeé tuumicádiinuuⁿ nī de'ε espíritu yeⁿ'ē chí ngaⁿ'a nī. ⁵⁶ 'Úú, ní Saⁿ'ā chí Daiyá Ndyuūs. 'Úú ní nguéeé cúchíí chí dindaí vida yeⁿ'e 'iiⁿyāⁿ s'eeⁿ naati chí nadinguaⁿ'aí vida yeⁿ'e 'iiⁿyāⁿ s'eeⁿ. Tuu'mi ní cho'ó yā yáāⁿ miiⁿ ní cueⁿ'e yā táámá yáāⁿ.

Yeⁿe 'iiⁿ'yāⁿ chi neⁿe yā caⁿ'a yā ndúúcu Jesús
(Mt. 8.19-22)

⁵⁷ Taachi snúuⁿ yā yúúni, 'áamá saⁿ'ā ní caⁿ'a sa chii sa Jesús miiⁿ: N'díí, Señor, caⁿ'á nduucú nī 'āā tíí nūuⁿ naachi caⁿ'a nī.

⁵⁸ Jesús caⁿ'a yā chii yā saⁿ'ā miiⁿ: 'Yuunéé ni véé yiivi yáává yeⁿe tī ní 'yaada ní véé 'dééce tī; naati 'úú, Saⁿ'ā chi Daiya Dendyuūs, nguéé mar 'áamá cuaaⁿ naachi cundiití tííⁿ.

⁵⁹ Ní caⁿ'a yā chii yā 'áamá saⁿ'ā: Cuchíí nī nduucú. Ní saⁿ'ā miiⁿ ní caⁿ'a sa: N'díí Señor, téé nī lugar 'úú ti caⁿ'á 'cuúchí chiidá ní caⁿ'ā yú.

⁶⁰ Jesús caⁿ'a yā: Cu'neeⁿ dí 'iiⁿ'yāⁿ chi nguéé i'téenu yā chi 'cuúchí yā tinaⁿ'ā yeⁿe yā ti 'iiⁿ'yāⁿ s'eeⁿ chi tan'dúúca tinaⁿ'ā miiⁿ, 'tiicá yā. Dii ní cueⁿe di ní caaⁿ'maⁿ di nduudu yeⁿ'é Ndyuūs yeⁿ'e naachi Ndyuūs ngaⁿ'a ntiiⁿnyúⁿ yā.

⁶¹ Tuu'mi ní táamá saⁿ'ā caⁿ'a sa chii sa Jesús miiⁿ: N'díí, Señor, 'úú neⁿ'é caⁿ'á nduucú nī naati téé nī lugar 'úú ti caⁿ'á yaa'ví 'iiⁿ'yāⁿ chi snúuⁿ yā ndavaacú chi caⁿ'á ndúúcu nī.

⁶² Jesús caⁿ'a yā chii yā saⁿ'ā miiⁿ: 'Āā du'ú nūuⁿ saⁿ'ā chi cuúndū tá'a sa na laatú ní 'cuíínu sa cuaaⁿ dáámí sá, nguéé dichíí'vē sa chi cuuvi sa caⁿ'a sa nduucú ní diiⁿ sa ntiiⁿnyuⁿ yeⁿ'é naachi Ndyuūs ngaⁿ'a ntiiⁿnyúⁿ yā.

10

Jesús dichó'o yā 'iīnū ngeεcu ndiichí discipulos yeⁿe yā chí ngaⁿ'ā nduudu cuacu

¹ Cuiinú chuū ní Jesús nandεεve yā tá 'iīnū ngeεcu ndiichi discipulos yeⁿe yā ní dichó'o yā cá'uúvī ca'uuví yā. Ní cueⁿe yā cuáán vmnaaⁿ yeⁿ'e Jesús cuaaⁿ nducyáácá yáán ndúúcu nduu cuaaⁿ naachi Jesús canéé chi cáⁿ'a yā. ² Ní Jesús ngaⁿ'a yā ngii yā 'iiⁿ'yāⁿ s'eeⁿ: 'Cuaacu níínyúⁿ chi nééné n'deé cosecha véé chi nééné n'deé 'iiⁿ'yāⁿ chi canéé chi 'caandiveeⁿ yā nduudu yeⁿ'é Ndyuūs naati saⁿ'ā chi idiiⁿ ntiiⁿnyuⁿ nguéé 'yaaⁿ sa. Cáávā chuū di'cuíítu nī 'iiví Ndyuūs chí dichó'o yā 'iiⁿ'yāⁿ chi caaⁿ'maⁿ yā nduudu cuacu yeⁿ'é Ndyuūs ní nadacuéeⁿ yā cosecha yeⁿ'é Ndyuūs. Cosecha miiⁿ ní tan'dúúca 'iiⁿ'yāⁿ chi cu'téenu yā Ndyuūs. ³ Ndís'tiī cueⁿe nī caati 'úú dicho'ó ndís'tiī chí ndís'tiī ní caⁿ'a nī tan'dúúca 'iiti cuúchī caⁿ'a tī nguaaⁿ lobos. ⁴ Nguéé candée nī bolsa ndúúcu tuūmī, ndíí nguéé nduu morral, ndíí nguéé ndúú ndaacuú yeⁿ'e nī. Ní taachi dííⁿ nī saludar 'iiⁿ'yāⁿ cuaaⁿ cyúúni, ní nguéé cuuvi 'naaⁿ nī. ⁵ Ní tanducueⁿ'ē va'āi chí ndaá nī caaⁿ'máⁿ nī vmnáán vmnaaⁿ 'túúca: Cuneé 'iiⁿ'yāⁿ yeⁿ'e va'ái 'cūū ndúúcu vaadī 'diíí. ⁶ Ní nduuti chí 'iiⁿ'yāⁿ ní ndiicúuⁿ yā na va'ai miiⁿ, tuu'mi ní vaadī 'diíí cunéé ndúúcu yā. Ní nduuti chí nguéé véé 'iiⁿ'yāⁿ ndiicúuⁿ na va'ai miiⁿ, vaadī 'diíí nguéé cunéé ndúúcu yā. ⁷ Cuεetinée núúⁿ nī va'āi naachí 'iiⁿ'yāⁿ 'cuaán yā ndís'tiī. Che'é nī ní cu'u nī chí téé yā caati 'iiⁿ'yāⁿ chí idiiⁿ ntiiⁿnyuⁿ canéé chí nduuvi 'íí'vε yā. Ndís'tiī nguéé caⁿ'a nī nduu va'āi nduu va'āi. ⁸ 'Āā tíí nūuⁿ yáán naachi cūndaa nī ní 'iiⁿ'yāⁿ mííⁿ 'cuaán yā, che'é nī 'āā de'é nūuⁿ chí téé yā chí che'é nī. ⁹ Idiíⁿ nī chí índuūvā yeⁿ'é 'iiⁿ'yāⁿ chí ngiitā chí sneé yā na yáán. Ní cuuvi nī 'iiⁿ'yāⁿ yeⁿ'ē naachi Ndyuūs ngaⁿ'a ntiiⁿnyúⁿ yā ní 'āā ndaā niiⁿnuúⁿ naachi snée yā. ¹⁰ Naati 'āā tíí nūuⁿ yáán naachi ndaá nī ní 'iiⁿ'yāⁿ ní nguéé 'cuáán yā ndís'tiī, tuu'mi ní can'daa nī cuaaⁿ cyúúni ní caaⁿ'maⁿ nī 'túúca: ¹¹ Ndíí yaácáá yeⁿ'ē yáán 'cūū chí caí na ca'á 'nū n'dáádi 'nū ti nguéé cu'teenu nī yeⁿ'é 'nū. Naati cadíínuuⁿ nī chuū chí yeⁿ'ē naachi Ndyuūs ngaⁿ'a ntiiⁿnyúⁿ yā ní 'āā ndaā niiⁿnuúⁿ naachi snée nī. ¹² 'Úú, Jesús, ngaⁿ'á ngií ndís'tiī chí nguuví taachi Ndyuūs caaⁿ'máⁿ yā nuuⁿndi yeⁿ'e 'iiⁿ'yāⁿ, castigo yeⁿ'e 'iiⁿ'yāⁿ yeⁿ'e yáán s'tiī ní diitu cá ní nguéé ti chí cuuvi yeⁿ'e 'iiⁿ'yāⁿ chí nguéé din'daāca yeⁿ'e yáán Sodoma.

Yeⁿ'e yáán s'eeⁿ naachi 'iiⁿ'yāⁿ ngeε i'téenu yā Ndyuūs
(Mt. 11.20-24)

¹³ Caⁿ'a Jesús: De'ē chúúca ya'ai yeⁿ'e 'iiⁿ'yāⁿ yeⁿ'e yáán Corazín. De'ē chúúca ya'ai yeⁿ'e 'iiⁿ'yāⁿ yeⁿ'e yáán Betsaida. Ti ndúútī chí 'iiⁿ'yāⁿ na yáⁿ'āa Tiro ndúúcu 'iiⁿ'yāⁿ na yáⁿ'āa Sidón n'diichí yā vaadī n'giinu chí chíí nguaaⁿ ndís'tiī, 'iiⁿ'yāⁿ yeⁿ'e yáⁿ'āa s'eeⁿ 'āā 'naaⁿ ndaācādaamí yā yeⁿ'ē nuuⁿndi yeⁿ'e yā. Ní ch'εetinúuⁿ yā catecai yā tan'dúúca díínūuⁿ ní ch'εeté yā nguaaⁿ yaiyāā tan'dúúca costumbre yeⁿ'e 'iiⁿ'yāⁿ miiⁿ ndíí vmnaaⁿ taachi

chiⁿ'i yā chi neené yaⁿ'ai yā. ¹⁴ Cáávā chuū ní 'iiⁿ'yāⁿ yeⁿ'e yáⁿ'āa Tiro ndúú^cū 'iiⁿ'yāⁿ yeⁿ'e yáⁿ'āa Sidón 'duū^v'i cá castigo yeⁿ'é yā nguéé ti yeⁿ'e ndís'tiī taachí ndaā nguuví chí Ndyuūs caaⁿ'maⁿ yā nuuⁿ'ndi yeⁿ'e 'iiⁿ'yāⁿ. ¹⁵ Ndís'tiī, 'iiⁿ'yāⁿ yeⁿ'e yāā Capernaum, neⁿ'é nī dííⁿ nī chí maáⁿ nī n'gē^té nī naati caⁿ'á nī na infierno.

¹⁶ 'Iiⁿ'yāⁿ chí n'giindiveéⁿ yā nduudu yeⁿ'ē ndís'tiī ní nduudu yeⁿ'ē 'úú n'giindiveéⁿ yā. 'Iiⁿ'yāⁿ chí nguéé neⁿ'e yā ndís'tiī, nguē^e neⁿ'e yā 'úú. Ní nguéé neⁿ'e yā Ndyuūs ti 'iiⁿ'yāⁿ miiⁿ dichó'o yā 'úú.

Nanguεεcuunéé 'iīnū ngeεcu ndííchí discípulos yeⁿ'é Jesús

¹⁷ Nguεεcuunéé ndu'u 'iīnū ngeεcu ndííchí discípulos ndúú^cū vaadī yeenú. Ní caⁿ'a yā: N'dií, Señor, espíritus yeⁿ'e yááⁿ'n'guiinūⁿ n'giindiveeⁿ sa yeⁿ'e 'nū chí caaⁿ'maⁿ ntiiⁿ'nyúⁿ 'nū ndúú^cū chiduuchí nī.

¹⁸ Jesús caⁿ'a yā: Cuáácú 'úú ní inaán yááⁿ'n'guiinūⁿ tan'dúú^cā chí sn'daā sa yeⁿ'ē nánguuví tan'dúú^cā 'cuai. ¹⁹ Ní Jesús caⁿ'a yā chí yā discípulos yeⁿ'e yā: 'Úú ní teé poder ndís'tiī chí cunnca'á nī cúú ndúú^cū 'iiti dán'āi, níicu cuché^e nī ndúú^cū 'iiⁿ'yāⁿ chí contra yeⁿ'e nī. Ní nguéé du'u vεε cuuvi cuché^e yeⁿ'e ndís'tiī. Ní nguéé idiiⁿ daño ndís'tiī. ²⁰ Ndís'tiī nguéé ngii yeenú nī taachi caaⁿ'máⁿ nī ntiiⁿ'nyuⁿ yeⁿ'ē espíritus yeⁿ'e yááⁿ'n'guiinūⁿ ní n'giindiveeⁿ yeⁿ'e nī naati yeenú nī chí canéé nguūⁿ chí dúú^chí nī na libro yeⁿ'é Ndyuūs na va'ai chεeti nguuví.

Jesús chí yeenú yā

(Mt. 11.25-27; 13.16-17)

²¹ Hora mííⁿ nūⁿ Jesús yeenú n'dai yā cáávā Espíritu N'dai yeⁿ'é Ndyuūs ní caⁿ'a yā: N'diī, Chiidá, 'úú ní teé gracia n'diī chí 'iiví nī yeⁿ'e va'ai chεeti nguuví ndúú^cū yáⁿ'āa 'cúú caati snuūⁿ n'dé'ei nī nduudú 'cūú yeⁿ'e 'iiⁿ'yāⁿ chí déénu ca yā ndúú^cū 'iiⁿ'yāⁿ chí n'deē n'dáí túúmícadíínuūⁿ yā. Ní ca'á nī chí cadíínuūⁿ 'iiⁿ'yāⁿ chí ndiicúuⁿ yā chí nguéé n'deē cá déénu yā caati 'tíicā neⁿ'e nī diiⁿ nī ti n'daācā.

²² N'diī Chiidá, 'āā tee nī tanducuéⁿ'ē 'úú. Mar 'áámá 'iiⁿ'yāⁿ nguéé déénu yā du'ū chí 'aama n'dyaⁿ'ā Daiya Dendyuūs, dámaaⁿ n'diī Chiidá. Mar 'aama 'iiⁿ'yāⁿ nguéé déénu yā du'ū chí n'diī Chiidá dámaaⁿ 'áámá n'dyaⁿ'ā daiyá nī, ndúú^cū 'āā du'ú nūⁿ 'iiⁿ'yāⁿ chí Daiyá Dendyuūs neⁿ'é yā 'cuuⁿ'míⁿ yā.

²³ Tuu'mi ní Jesús ngaⁿ'a yā ngii yā discípulos yeⁿ'e yā: Dε'ε chúú^cā n'dai ndís'tiī chí ngii naaⁿ nī dendu'ū chí ndís'tiī n'gíínu nī. ²⁴ 'Úú ní ngaⁿ'á ngii ndís'tiī chí neené 'yaaⁿ profetas ndúú^cū reyes chí yeⁿ'ē ndii cuááⁿ vmaaaⁿ néⁿ'e yā snaaⁿ yā chí ndís'tiī ínaaⁿ nī naati nguéé n'diichí yā. Ní neⁿ'é yā 'caandiveeⁿ yā chí ndís'tiī n'giindiveeⁿ nī naati nguéé ch'iindiveeⁿ yā.

Saⁿ'ā samaritano chí n'dai

²⁵ 'Áámá maestro yeⁿ'e ley chí neⁿ'e sa n'diichineeⁿ sa Jesús ndaa sa nanáaⁿ yā ní ntiinguuneeⁿ sa Jesús: N'dií, Maestro, ¿dε'ε chí canee chí dííⁿ chí ndáácā vida cueⁿ'e daāⁿmaⁿ?

²⁶ Jesús nan'guεεcútaⁿ'a yā: ¿Taacā canéé nguūⁿ na ley yeⁿ'é chuū? ¿Dε'ε tuumicadiinuūⁿ di yeⁿ'e ley yeⁿ'e chuū?

²⁷ Maestro yeⁿ'e ley miiⁿ nan'guεεcútaⁿ'ā sa: 'Túú^cā canéé nguūⁿ: Dinéⁿ'e di Señor Ndyuūs yeⁿ'ē di ndúú^cū núúⁿmáⁿ staava yeⁿ'ē di, ndúú^cū núúⁿmáⁿ alma yeⁿ'ē di, ndúú^cū tanducuéⁿ'ē fuerzas yeⁿ'ē di, ndúú^cū tanducuéⁿ'ē vaadī cadíínuūⁿ yeⁿ'ē di. Ní dinéⁿ'e di nducyaaca 'iiⁿ'yāⁿ na niiⁿnuúⁿ va'āi yeⁿ'e di tan'dúú^cā chí neⁿ'e di maāⁿ di.

²⁸ Jesús nan'guεεcútaⁿ'a yā: N'dáácā nan'guεεcútaⁿ'ā di. Diⁿ di chuū, ní cunduūchi di cueⁿ'e daāⁿmaⁿ.

²⁹ Saⁿ'ā miiⁿ neⁿ'e sa cunéé n'daāca sa ní caⁿ'a sa chí sa Jesús: ¿Dú'ū chí 'iiⁿ'yāⁿ chí canéé chí neⁿ'é chí niiⁿnuúⁿ va'āi yeⁿ'é?

³⁰ Tuu'mi ní Jesús miiⁿ nán'guεεcútaⁿ'ā yeⁿ'ē sa ndúú^cū 'áámá cuento chí ejemplo chí 'tíicā: 'Áámá saⁿ'ā ngua'āi sa yeⁿ'ē yāā Jerusalén miiⁿ ní cúnaⁿ'a sa na yāā Jericó. Taachi canúúⁿ sá yúúⁿ 'iiⁿ'yāⁿ duucu ní sta'á yā saⁿ'ā miiⁿ ní diví yā ndii catecai sa ní ch'eⁿ'e yā

saⁿā ndíí chi ya'āi ca yeⁿē sa ní 'tεε 'tée nguée ch'li sa ní cunaⁿa yā. ³¹ Tuu'mi ní 'áámá chiiduú cho'ó yā yúúni miiⁿ ní taachi n'diichi yā saⁿā miiⁿ, divíi yā cuáán 'diituú yúúni ní cho'ó yā ní cueⁿé yā. ³² 'Tiicá ntúūⁿ saⁿā levita chi chiiduú chi diiⁿ ntiiⁿnyuⁿ yeⁿe nátai cho'ó yā naachi candíítí saⁿā miiⁿ. N'diichí yā saⁿā miiⁿ ní divíi yā cuaaⁿ 'diituú yúúni. Ní cho'ó yā ní cueⁿé yā. ³³ Cuayiivi ní 'áámá saⁿā yeⁿe yáⁿāa Samaria cho'ó sa yúúni miiⁿ. Taachí ndaa niiⁿnuúⁿ sa naachi candíítí saⁿā miiⁿ, n'diichi sa saⁿā nnee ya'āi 'iinu sa saⁿā. ³⁴ Ní ndaā sa naachi candíítí saⁿā miiⁿ ní idiiⁿ yiicú sá naachi ya'āi ndúúcu aceite ndúúcu vino ní ch'εεcu sa tínūuⁿ naachí ya'āi yeⁿē sa. Ní sn'duū sa saⁿā 'yúúduu yeⁿe sa ní candēē sa saⁿā na yāāⁿ. Ní 'nuūⁿ sa 'áámá va'ai naachí cuuvi cu'neen sa saⁿā miiⁿ naachi 'iiⁿyāⁿ diíⁿ yā cuidado saⁿā miiⁿ. ³⁵ Chidεεve táámá nguuvi, taachi neⁿe caⁿa sa tun'dáa sa na 'uūvī caadi yeⁿe bolsa ní ca'ā sa saⁿā vaacu miiⁿ. Ní caⁿa sa chii sa saⁿā: N'dií, diíⁿ nī cuidado saⁿā, ti 'āā taa véé nūuⁿ chi diíⁿ nī gastar ndúúcu sa, taachí nguεεcuneé nadíí'vé yeⁿe nī. ³⁶ Maaⁿ ní Jesús ntiinguunéeⁿ yā saⁿā miiⁿ: Naachi 'iinū saⁿā s'eeⁿ ¿cheε sá chi saⁿā chi neⁿe sa saⁿā na niiⁿnuúⁿ ya'āi chi 'nuū cá'ai chi duucu miiⁿ?

³⁷ Saⁿā miiⁿ ní caⁿā sa: Saⁿā chi nnee ya'āi 'iinu sa. Tuu'mi ní Jesús miiⁿ caⁿa yā: Díí, cueⁿe di, ní diiⁿ ntúūⁿ di 'túúca.

Jesús canee yā na vaacu Marta ndúúcu María

³⁸ Cuayiivi ní cueⁿe Jesús na 'áámá yāāⁿ 'lííⁿ ní ndaa yā na vaacu 'áámá n'daataá chi nguuvi tá Marta. Ní 'cuūⁿ tá chi canee yā na vaacu tá. ³⁹ Ní Marta miiⁿ ní véé 'aama v'í yā chi nguuvi tá María. Ní María miiⁿ ch'iindí tá ná ca'a Señor Jesús miiⁿ, ní n'giindiveen tá nduudu chí chi'cueeⁿ yā. ⁴⁰ Marta miiⁿ ní nééne n'deēe ntiiⁿnyuⁿ idiiⁿ tá ní ndaā tá nanáán Jesús ní caⁿa tá: N'díí Señor, ¿'áá nguée inadiciadiinūⁿ yeⁿé chi dámaaán n'nééⁿ v'í 'úú chí diíⁿ mandado? Cuuvi nī táⁿā ní cunnee tá 'úú.

⁴¹ Jesús caⁿa yā: Dii, Marta, Marta, nééne n'deēe dendu'ū chi nadicadínuuⁿ di yeⁿē dendu'ū chí idi'vaachií. ⁴² Véé 'áámá nūuⁿ dendu'ū chi n'daacā ca. Tá María miiⁿ ndεεve tá chí n'daacā ca. Ní chuū nguée ndivíi 'iiⁿyāⁿ yeⁿē tá.

11

Jesús ngi'cueeⁿ yā táacā chi 'iiⁿyāⁿ cuuvi caaⁿmaⁿngua'á yā

(Mt. 6.9-15; 7.7-11)

¹ 'Áámá vmnéⁿēe ní Jesús ngaⁿangua'á yā 'áámá cuaaⁿ, ní taachí ch'iinu caⁿangua'á yā, discípulos yeⁿe yā caⁿa yā chii yā Jesús: N'díí Señor, ca'cuéeⁿ nī nús'uu taacá chi cuuvi caaⁿmaⁿngua'á 'nū tan'dúúca chí Juan chí cheedínuūⁿnī chí'cueeⁿ yā discípulos yeⁿe yā.

² Tuu'mi ní Jesús caⁿa yā chii yā discípulos yeⁿe yā: Taachí ndís'tií caaⁿmaⁿngua'á nī 'túúca caaⁿmaⁿ nī:

N'dií, chí Chiidá 'nū chí canee na va'ai cheeti nguuvi. N'daacā n'dai chí 'iiⁿyāⁿ dich'εεté yā n'dií. Cuchii tiempo chí ngaⁿa ntiiⁿnyúⁿ nī yeⁿe tanducueⁿē. Cúúví tan'dúúca chí n'dií neⁿe nī tan'dúúca ná va'ai cheeti nguuvi, 'tiicá ntúūⁿ ná yáⁿāa 'cúú.

³ Tée nī chí cuuvi che'é 'nū maaⁿnguuvi.

⁴ Nadich'εécú nī nuuⁿndi yeⁿé 'nū, tan'dúúca chí nús'ūū nadach'εécú 'nū yeⁿe 'iiⁿyāⁿ chí nguεε n'daacā diíⁿ yā nduucú 'nū. Nguée 'cuáán nī chí ndaā nanaán 'nū cosas chí cheεchi ca chí diiⁿ chí diíⁿ 'nū nuuⁿndi naati cunnee nī nús'uu chí nguée diíⁿ 'nū nuuⁿndi ní cuheé 'nū.

⁵ Tuu'mi ní Jesús caⁿa yā 'áámá ejemplo. ¿Du'ú ndís'tií chí véé amigo yeⁿe nī ní caⁿá nī nduu vaacu amigo ná maⁿa yaaⁿ ní caaⁿmán nī: N'díí amigo, teé nī 'iinū panes yeⁿe nī 'úú, ⁶ caati 'áámá amigo yeⁿé chí canuuⁿ sa yúúni ndaā sa na vaacú ní nguée de'ē veε chí ca'á chí che'e sa? ⁷ Ní 'iiⁿyāⁿ chí canúuⁿ yā va'ai miiⁿ nán'guεécútaⁿa yā: Nguée diíⁿ ndu'ú nī 'úú. 'Áā nduudí cheendi va'āi ní dá'caiyāá yeⁿé ní candiití yā nduucú na cama. 'Úú nguée cuuví nducueéⁿ ní teé n'dií chíiⁿ chí neⁿe nī. ⁸ Jesús ngaⁿá yā: 'Úú ngaⁿá ngií ndís'tií. 'Áará chí nguée nducueeⁿ amigo yeⁿē sa chí ca'a yā pan saⁿā miiⁿ cáava chí

amigo yeⁿē sa, naati nducueeⁿ yā ní ca'a yā amigo miiⁿ ti amigo miiⁿ nguée^e 'cuinaaⁿ sa chi ngiica sa n'deeē n'dái vueltas. ⁹ Ní 'úú ní ngaⁿ'á ngii ndís'tií: Cáácá nī ní Ndyuūs ní téē yā yeⁿ'é nī, in'nuúⁿ nī ní ndaāca nī, 'yááví nī cheendi va'āi ní nan'guaaⁿ yeⁿ'é nī. ¹⁰ Nducyáácá 'iiⁿ'yāⁿ chi ngiica yā Ndyuūs ní Ndyuūs ca'á yā yeⁿ'e yā. Ní nducyáácá 'iiⁿ'yāⁿ chi in'nuúⁿ yā ní ínndaaca yā. Ní nducyáácá 'iiⁿ'yāⁿ chi yaa'vi yā cheendi va'ai, ní nan'guaaⁿ yeⁿ'e yā.

¹¹ Maaⁿ ní cheé ndís'tií chi véé daiya nī, ndúúti chi daiya nī caaca pan, ¿'áá ca'á nī lado yeⁿ'e pan 'áámá túúu? O ndúúti chi caaca daiyá nī 'aama 'yaācā, ¿'áá ca'a nī lado yeⁿ'e 'yaācā miiⁿ ní 'áámá cúú? ¹² O ndúúti chi caaca 'áámá dūtu'u, ¿'áá ca'á nī lado yeⁿ'e dūtu'u 'áámá 'iitidaⁿ'āi? ¹³ Ndúúti chi ndís'tií chi cúnncheeⁿ nī déénu nī ca'a nī dendu'ū chi n'daācā daiya nī, tuu'mi ní Chiidá nī chi canéé na va'ai cheeti nguuvu n'deēē cá cá'a yā caati cá'a yā Espíritu N'dai yeⁿ'é Ndyuūs 'iiⁿ'yāⁿ chí caaca yā chiida yú.

'Iiⁿ'yāⁿ s'eeⁿ ngaⁿ'a yā chi Jesús miiⁿ véé poder yeⁿ'e yááⁿ'n'guiinūⁿ ndúúcu yā (Mt. 12.22-30; Mr. 3.19-27)

¹⁴ Jesús miiⁿ tun'daa yā yeⁿ'ē 'áámá saⁿ'ā 'lííⁿ 'áámá espíritu yeⁿ'e yááⁿ'n'guiinūⁿ chi diiⁿ chi nguée^e ngii ngaⁿ'ā sa. Ní taachí nan'daa espíritu yeⁿ'e yááⁿ'n'guiinūⁿ saⁿ'ā 'dííⁿ mī miiⁿ, ní caⁿ'a sa. Níicú 'iiⁿ'yāⁿ s'eeⁿ n'diichí yā chuū ní chéⁿ'é yiinú yā yeⁿ'ē. ¹⁵ Náⁿ'ā 'iiⁿ'yāⁿ ní caⁿ'a yā: Sáⁿ'a 'cūú ní nitun'daa sa espíritu yeⁿ'e yááⁿ'n'guiinūⁿ cáávā poder yeⁿ'ē Beelzebú chi Satanas chí ngaⁿ'ā ntiinnyuⁿ sa yeⁿ'e espíritus yeⁿ'e yááⁿ'n'guiinūⁿ.

¹⁶ Tanáⁿ'a yā ní neⁿ'e n'diichineeⁿ yā Jesús ní ngiica yā Jesús chi dííⁿ yā 'áámá señal yeⁿ'ē na va'ai cheeti nguuvu chi cuuvi n'diichí yā. ¹⁷ Jesús déénu yā chi nacadíínuuⁿ 'iiⁿ'yāⁿ s'eeⁿ ní caⁿ'a yā chii yā 'iiⁿ'yāⁿ s'eeⁿ: 'Áámá gobernador chi ngaⁿ'ā ntiinnyúⁿ yā yeⁿ'e yáⁿ'āa naachi véé 'uuví partido yā chi nguⁿ'u 'aamá yā ndúúcu táámá yā, tuu'mi ní nguée^e cuuvi 'naaⁿ tiempo chí 'iiⁿ'ntyéⁿ'ē yā. 'Tiicá ntúūⁿ naachi 'áámá familia yā ndúúti chí n'deēē nadacadíínuuⁿ yā chí véé partido yeⁿ'e familia miiⁿ nguēē cuuvi nduuvidaamá yā. ¹⁸ 'Tiicá ntúūⁿ nduuti chí yááⁿ'n'guiinūⁿ 'cuuⁿ'maⁿ sa ndúúcu maaⁿ sa, ¿táácā canee naachí ngaⁿ'ā ntiinnyuⁿ sa? Caaⁿ'máⁿ nī 'úú: ¿De'ē cáávā chí ngaⁿ'a ndís'tií chí caavā yááⁿ'n'guiinūⁿ chí duuchi Beelzebú chí Satanas itun'daa espíritus yeⁿ'e yááⁿ'n'guiinūⁿ yeⁿ'é 'iiⁿ'yāⁿ? ¹⁹ Nduuti chí 'úú idivií espíritus yeⁿ'e yááⁿ'n'guiinūⁿ cáávā Beelzebú, tuu'mi ní 'iiⁿ'yāⁿ ndúúcu nī ní ¿du'ū poder itun'daa yā espíritus yeⁿ'e yááⁿ'n'guiinūⁿ? Chiiⁿ chí diiⁿ 'iiⁿ'yāⁿ chí ndúúcu nī n'gíⁿ'í yā chí nguēē 'tíicā chí ngaⁿ'a nī. ²⁰ Ndúúti chí cáávā poder yeⁿ'é Ndyuūs 'úú itun'daa espíritus yeⁿ'e yááⁿ'n'guiinūⁿ yeⁿ'é 'iiⁿ'yāⁿ, tuu'mi ní cuaacu níⁿ'nyúⁿ chí naachi Ndyuūs ngaⁿ'a ntiinnyúⁿ yā nndaā nanááⁿ ndís'tií.

²¹ Taachi saⁿ'ā dítiinú diiⁿ cuidado sa ná vaacu sa ndúúcu íngaatu, tuu'mi ní na vaacu sa canéé seguro. ²² Taachí ndaa táámá saⁿ'ā chí véé fuerzas yeⁿ'e sa ní ichēē sa nduucú yā ní idivií sa tanducuéⁿ'ē íngaatu yeⁿ'é yā chí ngii cheetinúⁿ yā yeⁿ'e va'āi miiⁿ tuu'mi ní diiⁿ sa repartir íngaatu s'eeⁿ ndúúcu compañeros yeⁿ'ē sa.

²³ 'Iiⁿ'yāⁿ chí nguée^e canéē yā lado yeⁿ'é, 'iiⁿ'yāⁿ miiⁿ ní canéē yā contra yeⁿ'é. 'Iiⁿ'yāⁿ chí nguée^e daama dííⁿ cosechar nduucú tuu'mi ní dííⁿ yā tan'dúúcā chí ingéē tanducuéⁿ'ē cosecha.

Espíritu yeⁿ'e yááⁿ'n'guiinūⁿ chí inguēēcunéé na saⁿ'ā (Mt. 12.43-45)

²⁴ Caⁿ'a Jesús: Taachí espíritu yeⁿ'e yááⁿ'n'guiinūⁿ nacan'daa na 'áámá saⁿ'ā, cachiica na yáⁿ'āa cuuⁿ'maⁿ naachi nguée^e ch'ēetinee 'iiⁿ'yāⁿ ní in'nuūⁿ naachi cuuvi ntaavi'tuunuuⁿ ní nguée^e ndaācā. Tuu'mi espíritu miiⁿ nadicadíínuuⁿ ní ngaⁿ'a: Nanguēēcunéé na vaacú naachi chiicá. ²⁵ Taachí nndaā na vaacu miiⁿ ndaācā chí saⁿ'ā miiⁿ tan'dúúcā 'áámá va'ai chí 'āā déévé n'dai ndúúcu nducuéⁿ'e na lugar yeⁿ'ē. ²⁶ Tuu'mi ní espíritu miiⁿ cueⁿ'e ní in'nuūⁿ tá ndēēchē espíritus chí cunncāā ca chí cuuví maāⁿ. Ní ndaā espíritus ní ch'ēetinee na saⁿ'ā miiⁿ. Cuayivi ní n'geenu sa ngii ca ní cunncāā ca canéé sá nguée^e ti cuááⁿ vmnaaⁿ.

Véé vaadi yeenú yeⁿ'e 'iiⁿ'yāⁿ chí i'téenu yā Ndyuūs

²⁷ Taachí Jesús ngaⁿa yā dendú'u 'cūū 'áámá n'daataá 'caī yuudu tá nguaaⁿ 'iiⁿ'yāⁿ s'eeⁿ: De'ē chúúca n'dai n'daataá chi ch'iindiyáaⁿ nī ní ntaavi tá n'diī.

²⁸ Jesús ní caⁿ'a yā: N'daacā ca yeⁿ'e 'iiⁿ'yāⁿ chi n'giindiveéⁿ yā nduudu yeⁿ'é Ndyuūs, ní i'téenu yā nduudu miiⁿ.

'Iiⁿ'yāⁿ chi nguéé n'daacā yā ngiica yā 'áámá señal

(Mt. 12.38-42; Mr. 8.12)

²⁹ Taachí nduuvidaama 'iiⁿ'yāⁿ ndúúcu Jesús, Jesús tucá'a yā caⁿ'a yā nduudu miiⁿ: 'Iiⁿ'yāⁿ chi véé yā nguúví 'cūū néené cúncheeⁿ yā. In'nuúⁿ yā señales naati nguéé ndaacā táámá señal caati dámaāⁿ snaaⁿ yā señal chi diiⁿ Ndyuūs ndúúcu profeta Jonás tiempo chi 'āā chó'ōo. ³⁰ Tan'dúúca Ndyuūs diíⁿ yā señal ndúúcu profeta Jonás yeⁿ'e 'iiⁿ'yāⁿ na yáāⁿ Nínive, 'tiicá ntuūⁿ Saⁿ'ā chi Daiya Ndyuūs cuuvi cunée yā lado yeⁿ'e señal tiempo 'cūū. ³¹ Taachi ndaa nguuví yeⁿ'e juicio chi Ndyuūs caaⁿ'máⁿ yā yeⁿ'ē nuuⁿndi yeⁿ'é 'iiⁿ'yāⁿ, n'daataá reina chi tiempo chi chó'ōo ngaⁿ'a ntiiⁿnyuⁿ tá yeⁿ'ē lado yeⁿ'e sur chi caⁿ'a ta ní nducueeⁿ tá contra yeⁿ'e 'iiⁿ'yāⁿ chi snée yā maaⁿnguuví. Ní táⁿ'ā miiⁿ ní diiⁿ tá condenar 'iiⁿ'yāⁿ chi snée yā maaⁿnguuví caati táⁿ'ā miiⁿ yaⁿ'āi n'dai ngiica tá chi neⁿ'e tá ch'iindivee tá yeⁿ'ē vaadí deenu yeⁿ'e rey Salomón. Maaⁿ ní 'muuⁿ canée 'áámá yā chi ch'εεte ca vaadí deenu yeⁿ'é yā nguéé ti rey Salomón. ³² 'Iiⁿ'yāⁿ chi ch'εetinée na yáāⁿ Nínive ndii cuááⁿ vmaaaⁿ nducueeⁿ yā ní caaⁿ'máⁿ yā nuuⁿndi yeⁿ'e 'iiⁿ'yāⁿ chi snée yā maaⁿ caati 'iiⁿ'yāⁿ yeⁿ'e yáāⁿ Nínive ndaacadaamí yā yeⁿ'ē nuuⁿndi yeⁿ'é yā cáávā nduudu yeⁿ'e Ndyuūs chi caⁿ'a profeta Jonás miiⁿ. 'Tiicā caⁿ'á yā diíⁿ yā nguuví chi Jesús caaⁿ'máⁿ yā nuuⁿndi yeⁿ'e 'iiⁿ'yāⁿ. 'Caandiveéⁿ nī. 'Múúⁿ ní véé 'áámá saⁿ'ā chi ch'εεte ca sa nguéé ti profeta Jonás.

'Áámá ejemplo chi tan'dúúca 'áámá δεενε yeⁿ'e cuerpo yeⁿ'e yú

(Mt. 5.15; 6.22-23)

³³ Caⁿ'a Jesús: Mar 'áámá 'iiⁿ'yāⁿ nguéé cunuuⁿ n'dé'ei yā 'aama lámpara chí ngiichi ní nguéé ndúú i'nuūⁿ ra yā maaⁿ 'aama caja naati s'nuúⁿ yā na 'áámá mesa ní 'iiⁿ'yāⁿ chí cundaa yā ní snaaⁿ yā δεενε miiⁿ. ³⁴ Ndúútináaⁿ yú chiiⁿ chí tan'dúúca 'aama lámpara yeⁿ'ē cuerpo yeⁿ'e yú. Taachí n'daí nduutináaⁿ nī 'tiicá ntúūⁿ n'daí cuerpo yeⁿ'é nī ní inaaⁿ chí δεενε. Naati taachí nguεε n'daacā nduutináaⁿ nī tan'dúúca lámparas chí nguéé ngiichi ní 'tiicá ntúūⁿ cuerpo yeⁿ'e nī cunee ná maāiⁿ. ³⁵ N'diichi nī, cundéé nī cuidado nduutináaⁿ nī chí δεενε yeⁿ'e cuerpo yeⁿ'é nī chí nguéé canee nī na maāiⁿ. ³⁶ 'Tiicá ntúūⁿ inaaⁿ n'dáaca nī ní nguéé maāiⁿ naachi canee nī nduuti chí candéε nī cuidado nduutináaⁿ nī. Ní véé δεενε nanáaⁿ nī tan'dúúca 'áámá lámpara ngiichi ní naáⁿ nī chí δεενε yeⁿ'é.

Jesús ngaⁿ'a nuuⁿndi yeⁿ'e maestros yeⁿ'e ley ndúúcu 'iiⁿ'yāⁿ fariseos

(Mt. 23.1-36; Mr. 12.38-40; Lc. 20.45-47)

³⁷ Taachí Jesús miiⁿ ch'iinu cāⁿ'a yā chuū, 'áámá saⁿ'ā fariseo ndaa sá nanáaⁿ Jesús ní di'cuítu sa Jesús chí ché'e yā ndúúcu sa. Ní cueⁿ'e yā ndúúcu sa. Ní ndaa yā na vaacu sa ní chεεté yā na mesa. ³⁸ Taachí ndaa tiempo chí ché'e yā ní saⁿ'a fariseo miiⁿ n'diichi sa chí nguéé naāⁿnū Jesús ta'á yā, (tan'dúúca costumbre yeⁿ'e 'iiⁿ'yāⁿ Israel) tuu'mi ní cueⁿ'ē yiinu sa. ³⁹ Ní Señor Jesús caⁿ'a yā chii yā saⁿ'a fariseo: Díí ndúúcu tanáⁿ'ā saⁿ'ā fariseos inadéévé nī cuāāⁿ daami vaso ndúúcu cu'u chí tan'dúúca cuerpo yeⁿ'e nī naati cuááⁿ chεēti chí tan'dúúca staava yeⁿ'é nī ndiituú ndúúcu vaadí 'caa'va ndúúcu dendú'u chí nguεε n'daacā. ⁴⁰ Ndís'tií chí chεεchi tíⁿ nī, ζ'áá nguéé deenú nī chí Ndyuūs din'dái yā 'iiⁿ'yāⁿ ndúúcu staava yeⁿ'é yā ndúúcu cuerpo yeⁿ'e yā, ní neⁿ'é yā 'iiⁿ'yāⁿ chí nadεεvé cuerpo yeⁿ'é yā ndúúcu staava yeⁿ'e yā ndúúcu taanduvéé chí vεε chεeti cuerpo yeⁿ'é yā? ⁴¹ Ndís'tií canée chí ca'á nī limosnas yeⁿ'é nī ndúúcu nuuⁿmaⁿ staava yeⁿ'é nī caati chuū ní cosa chí n'daacā.

⁴² De'ε chúúca ya'āi yeⁿ'e ndís'tií 'iiⁿ'yāⁿ fariseos caati nadicádíínuuⁿ nī chí n'daacā nī chí diíⁿ nī chí ngaⁿ'ā ley yeⁿ'é Ndyuūs ti ca'a nī Ndyuūs décima chí ndiichi parte yeⁿ'e nducuéⁿ'ē cosecha yeⁿ'e nī chí yiiví ndúúcu 'iicudaáⁿ ndúúcu tanducuéⁿ'ē yaātā ngaiyáā. Nguéé véé vaadí neⁿ'e yeⁿ'é Ndyuūs ndúúcu nī ndíí nguéé diíⁿ nī dendu'u chí cuaacu.

Canéé chi díñ nī tanducuéñē chi ngañā ley yeñ'é Ndyuūs ní dinéñ'e nī nducyaaca 'iñ'yāñ nī ca'á nī décima dendu'ū.

⁴³ De'ε chúúcā ya'āi yeñ'e ndís'tiī chí neñ'e nī 'cuēetē nī na silla yeñ'e 'iñ'yāñ chi ngañ'a ntiñnyuñ yeñ'e yaācū sinagogas. Ní ndís'tiī neñ'é nī chi 'iñ'yāñ díñ yā saludar ndís'tiī taachi snée nī na yúúñí.

⁴⁴ De'ε chúúcā ya'āi yeñ'e ndís'tiī chi ngi'cueeñ nī ley ndúúcū 'iñ'yāñ fariseos. Ndís'tiī ngañ'a nī chi n'daacā idiñ nī ní nguéé n'daacā idiñ nī. Ndís'tiī ní tan'dúúcā 'áámá yáinyāñ chi 'iñ'yāñ nguéé inaañ yā ní nguéé déenu yā yeñ'e ní chiicá yā vmnááñ yeñ'e yáinyāñ, 'tiicá nī.

⁴⁵ Tuu'mi ní nan'gucēcútañ'a 'áámá abogado, chi maestros yeñ'e ley. N'diī, Maestro, taachí ngañ'a nī chuū, ídiiñ nī chí induuvi táañ 'nū.

⁴⁶ Naati Jesús cañ'a yā: De'ε chúúcā ya'āi ntúūñ yeñ'e ndís'tiī, abogados, maestros yeñ'e ley. Ndís'tiī idiñ nī n'dee cá leyes chí chēchi cá ní ngañ'a nī tan'dúúcā chí chēēdī chí sañ'ā nguéé cuuvi candēe sa. Ní ndís'tiī ní ndii mar 'áámá ta'a nī ní nguéé ituu'ví nī chēédí miiñ. Ní nguéé díñ nī, ní nguéé ginneeñ nī 'iñ'yāñ.

⁴⁷ De'ε chúúcā ya'āi yeñ'e ndís'tiī chí nadin'dái nī yañyāñ yeñ'e sañ'ā profetas chí 'āā candēe yā nduudu yeñ'é Ndyuūs tiempo chí 'āā chó'ōo. Ní 'iñ'yāñ yeñ'e ndaata yeñ'é nī ndii cuááñ vmnáañ chí 'iñ'yāñ yā sañ'ā profetas. ⁴⁸ Cuaacu níñnyúñ chí ndís'tiī ní n'gñ'iñ nī chí yeenúñ nī yeñ'e chí 'iñ'yāñ yeñ'e nī ndii cuááñ vmnáañ ti cuaacu níñnyuñ 'iñ'yāñ yeñ'e ndaata yeñ'e nī chí 'iñ'yāñ yā sañ'ā profetas ní maañ ní ndís'tiī idin'dái nī yañyāñ yeñ'e profetas.

⁴⁹ Ní cáávā chuū ní cáávā chí Ndyuūs deenú yā tanducuéñē, Ndyuūs cañ'a yā 'tíicā: 'Úú dicho'ó profetas ndúúcū apóstoles ní náñ'a yā 'caañ'núñ yā 'iñ'yāñ ní tanáñ'a yā can'dáa yā 'iñ'yāñ ní díñ yā chí 'iñ'yāñ s'eeñ n'geenú yā ngii. ⁵⁰ Ndyuūs cañ'á yā díñ yā castigar 'iñ'yāñ chí maañ snéeñ iñ'yeeñdí 'cūñ ti 'iñ'yāñ yeñ'e ndaata yeñ'é yā chí 'iñ'yāñ yā profetas ndíñ tiempo taachí Ndyuūs din'dái yā iñ'yeeñdí. ⁵¹ Ní ndii tiempo taachi chí 'iñ'yāñ yā Abel ní chingēe yuúñ yeñ'e sa, ndíñ taachi chí 'iñ'yāñ yā Zacarías miiñ naavtañ'ā yeñ'e náñai ndúúcū yeñ'é yaacu templo. Chuū ní ngañ'á ngii ndís'tiī, caati Ndyuūs cañ'á yā díñ yā castigar 'iñ'yāñ chí maañ sneeñ iñ'yeeñdí 'cūñ cáávā yuúñ yeñ'e 'iñ'yāñ s'eeñ.

⁵² De'ε chúúcā ya'āi yeñ'e ndís'tiī chí 'cuéñ nī ley ní nguéé ca'cueeñ nī chí cadíñnúñ 'iñ'yāñ vaadī deenu yeñ'é Ndyuūs, ní nguéé díñ nī tan'dúúcā chí deenu nī chí canéé chí díñ nī.

⁵³ Taachí Jesús chí 'iñ'yāñ cañ'a yā dendu'u 'cūñ, tuu'mi ní maestros yeñ'e ley ndúúcū 'iñ'yāñ fariseos nduuví taáñ yā yeñ'e Jesús ní tucá'a yā itiinguunéñ yā n'dee n'dái ní cañ'a yā chíñ yā Jesús. ⁵⁴ Ní n'diichineeñ yā Jesús ndúúcū nduudu yeñ'e yā. Ní canéé ngiiñ yā Jesús miiñ chí cucáávā nduudu yeñ'e yā ní Jesús cásta'a yā vaanicadíñnūñ yeñ'e yā ní cañ'a yā nduudu chí nguéé cuaacu. Ní 'íicú cuuvi caañ'máñ yā nuuñndi yeñ'é Jesús.

12

Levadura yeñ'é 'iñ'yāñ fariseos

¹ Tuu'mi ní neené 'yaañ 'iñ'yāñ nduuvídaama yā chí táñ tīñ n'dee 'iñ'yāñ miiñ chingúñndai yā 'aamá yā taamá yā. Tuu'mi ní Jesús miiñ tucá'a yā cañ'a yā chíñ yā discípulos yeñ'e yā: Díñ nī cuidado yeñ'e chí ca'cueeñ 'iñ'yāñ fariseos ti tan'dúúcā levadura yeñ'e pan. Nguéé díñ nī daaca yā yeñ'e chí ngi'cueeñ yā. ² Ti nguéé de'ē vee chí nin'díñ naañ chí nguéé cuuvi nánguāñ naañ. Ní nguéé 'áámá dendu'ū chí cánúñ n'de'ei chí nguéé cuuvi cadíñnūñ yā. ³ 'Tiicá ntúūñ dendu'ū chí ngañ'a n'de'ei ndís'tiī, tuu'mi ní 'iñ'yāñ ní 'caandiveñ yā. Ní chíñ chí ndís'tiī ngañ'a nī ndúúcū 'iñ'yāñ chēti va'āi tuu'mi ní 'iñ'yāñ caañ'mañ yā cuuvi yā nducyáácá 'iñ'yāñ ndíñ na yaacū yeñ'e va'āi.

Du'ū dí'va'a yú

(Mt. 10.28-31)

⁴ Cañ'a Jesús: Ndís'tiī chí n'dai nduucú, 'úú ngañ'á ngii ndís'tiī chí nguéé 'va'á nī 'iñ'yāñ chí 'caañ'núñ yā cuerpo yeñ'e 'iñ'yāñ, ti 'āā ntēeñ cuuvi díñ yā cosa chí nguéé n'daacā ca

ti chuū. ⁵ 'Úú ní cuuví ndís'tiī du'ū chi diín 'va'á nī: Ndís'tiī ní 'va'á nī Ndyuūs chi taachí 'āā n'dií 'iīn'yān, Ndyuūs cuuví diín yā 'caanuún yā 'iīn'yān infierno. 'Túúcā nga'ná ngií ndís'tiī 'iīn'yān mii'n chí di'va'a nī.

⁶ ¿'Áá nguée in'diicuí yā na 'uūvī 'yáádā cáávā 'uūvī taa'n tuūmī? Ndyuūs ní nguée ngiinaán yā mar 'áámá 'yáádá. ⁷ Níicú ndií nducyaaca yuūdū tii'n ndís'tiī ndii dúúché ndúúcū Ndyuūs. Cáávā chuū nguée 'va'á ndís'tiī. ¿'Áá nguée ya'ai ca chí'vē ndís'tiī nguée ti 'aama 'yáádá?

Ye'n'e 'iīn'yān chi i'teenú yā Cristo ní nga'n'a yā ye'n'e chuū nanáán 'iīn'yān
(Mt. 10.32-33; 12.32; 10.19-20)

⁸ Ca'n'a Jesús: 'Úú nga'ná ngií ndís'tiī chi nducyaaca 'iīn'yān chi nga'n'a yā chi ye'n'e 'úú nguāan 'iīn'yān 'tiicá ntúūn 'úú Sa'nā chi Daiya Ndyuūs caa'n'mán nanáán ángeles ye'n'é Ndyuūs chi 'iīn'yān s'ee'n ní ye'n'e 'úú. ⁹ Nducyaaca 'iīn'yān chi nguée nga'n'a yā chi ye'n'e 'úú nguāan 'iīn'yān 'tiicá ntúūn 'úú Sá'nā chi Daiya Ndyuūs caa'n'mán nanáán ángeles ye'n'é Ndyuūs chi 'iīn'yān s'ee'n ní nguée ye'n'e 'úú.

¹⁰ Nducyáácá 'iīn'yān chí ca'n'a yā nduudu taa'n chi nguée n'daacā chi contra ye'n'e 'úú chi Sá'nā chi Daiya Dendyuūs, Ndyuūs nadach'εεcú yā ye'n'e yā. Nducyáácá 'iīn'yān chí ca'n'a yā nduudu taa'n chi nguée n'daacā chi contra ye'n'e Espíritu N'dai ye'n'é Ndyuūs, Ndyuūs nguée nadach'εεcú yā ye'n'e yā. Ndií nguée ndúú i'n'yee'n'dí 'cūū, ndií nguée ndúú táámá i'n'yee'n'di chi cuchíi.

¹¹ Taachí 'iīn'yān ndée yā ndís'tiī na yaácū sinagogas nanáán 'iīn'tyén'e ndúúcū jueces, nguée nadicádíinuun nī de'ē chí nan'gucécúta'n'a nī o de'ē chi caa'n'ma'n nī. ¹² Espíritu N'dai ye'n'e Ndyuūs cuuvi ndís'tiī hora mí'n nūn de'ē chí caa'n'ma'n nī.

Jesús ngi'cuee'n yā ye'n'e peligro ye'n'e vaadī 'cuiica

¹³ 'Áámá sa'nā ca'n'a sa ngií sa Jesús: N'dií, Maestro, cuuví nī 'diinú chi ntée sa vaadī n'gua'áa ye'n'e chiidá 'nū cuuvi ye'n'é.

¹⁴ Jesús mii'n ní ca'n'a yā chíi yā sa'nā: N'dii, sán'ā, ¿du'ú s'neēn 'úú vmnaa'n ye'n'e n'dii tan'dúúcā juez chi nca'á chi cuuvi ye'n'é nī ye'n'e 'taa chi véé ye'n'e chiidá nī?

¹⁵ 'Úú ní nga'ná ngií nducyáácá ndís'tiī: Cuin'diichí nī ní cundée nī cuidado ye'n'e chi ne'n'é nī ye'n'e vaadī 'cuiica caati 'iīn'yān nguée ndaaca yā vida cue'n'e daā'ma'n cáávā chi véé n'dee n'dái ye'n'e yā.

¹⁶ Tuu'mi ní Jesús mii'n ca'n'a yā chíi yā ejemplo 'cūū 'iīn'yān: 'Áámá sa'nā 'cuiica véé yá'nāa ye'n'e sa chi neenē n'dee chíinu sa. ¹⁷ Sá'nā mii'n ní nadicádíinuun sa ní ca'nā sa: ¿Táácā diín ti nguée cuescomate ch'εεte naachi nadidaamá cosecha ye'n'é? ¹⁸ Ní ca'n'a sa: 'Túúcā diín. Cúndεεv cuescomate ye'n'é ní ndiīn taama chi ch'εεté ca ní mii'n nadaamá tanducué'n'é cosecha ye'n'é ndúúcū dendú'ū ye'n'é. ¹⁹ Tuu'mi ní caa'n'mán māa'n cuuví alma ye'n'é. Dii alma ye'n'é de'ε chúúcā n'dai dii. Néénē n'dee véε ye'n'e di chi nguáin'dái chí 'nāán n'dai cuchée. Maa'n ní ntaavi'tuunūn cuchée, cu'u, ní cuuvi yéénú. ²⁰ Naatí Ndyuūs ca'n'a yā chíi yā sa'nā: Díi sa'nā chi chechi tii'n di. Maa'nguuiún 'cūū ca'n'a di 'cuūvī di. Ní chíi'n chí nguáin'dái di chi vaadī 'cuiica ye'n'e di, ¿du'ū cuuvi ye'n'e? ²¹ Ní Jesús nga'n'a yā: 'Tíicā 'iīn'yān chi nguain'dai yā chí véé ye'n'e maán yā cáávā maa'n yā naati 'iīn'yān s'ee'n ní nguée véé ye'n'é yā nanáán Ndyuūs.

Ndyuūs idi'n yā cuidado nducyaaca 'iīn'yān chi daiyá yā
(Mt. 6.25-34)

²² Jesús nga'n'a yā ngií yā discípulos ye'n'e yā: Cáávā chuū chí nga'ná ngií ndís'tiī. Nguée nadicádíinuun nī ye'n'e vida ye'n'e maa'n nī ye'n'e chí nge'e nī cáávā vida ye'n'e nī ndii nguεε ndúú cáávā catecaí nī ye'n'e cuerpo ye'n'é nī. ²³ Vida ní ya'ai ca chí'vē nguée ti chí nge'é nī. Ní cuerpo ní ya'ai ca chí'vē nguée ti catecaí nī. ²⁴ Nadicádíinuun nī ye'n'e 'yaādā chí nguuvī tī cuervos. 'Yaada s'ee'n ní nguée ngiīnū tī ndaata; ndií nguée ndúú ingiī cosecha ye'n'é tī chí che'e tī; ndií nguée ndúú véé ra vaacú tī chí nguain'dai tī; ndií nguée ndúú cuescomates ye'n'e tī. Ní Ndyuūs nga'n'a yā chí nge'e tī. ¿'Áá ya'ai ca chí'vē ndís'tiī

nguéeé tí 'yaada s'eeⁿ? ²⁵ ¿Du'u 'áamá chéeé ndís'tiī cuuví cundeéé nī cuidado ní n'dee n'dái nacadiinúúⁿ nī ní ntiinee nī maⁿ'a metro yeⁿ'ē chí yaacu nī? ²⁶ Ndúúti chí nguée cuuvi díⁿ nī chuū chí 'líⁿ ¿de'ē cúúví chí indeéé nī cuidado ní n'dee n'dái nadicadínuuⁿ nī yeⁿ'e dendu'ū chí n'geete cá?

²⁷ Cuin'diichí nī naāndā táácā n'giita. Nguéeé din'dái tínnūⁿ, ndíí nguéeé ndúú idin'dái hilo. 'Úú ngaⁿ'á ngíí n'dís'tiī ti rey Salomón canúuⁿ yā catecaí yā chí n'deevéé n'dai yeⁿ'e rey nguéeé neené n'deevéé tan'dúú^{cā} 'áamá naāndā s'eeⁿ. ²⁸ Nduuti chí Ndyuūs nga'a yā catecaí n'daacā naāndā chí maaⁿ ní snéé cuēeti ní cavyaaⁿ ní nti'í ní 'iiⁿ'yāⁿ 'neeⁿ yáⁿ'a yā, n'deē cá Ndyuūs téé yā ndís'tiī ti Ndyuūs díⁿ yā cuidado yeⁿ'e ndís'tiī chí dúu'vī i'téenu nī Ndyuūs. ²⁹ Ndís'tiī ní nguéeé in'nuúⁿ nī chí che'e nī o cu'ú nī. Nguéeé nadicadínuuⁿ nī yeⁿ'e ní 'cuēetinéé 'diiⁿ nī. ³⁰ Ti 'iiⁿ'yāⁿ chí nguéeé yeⁿ'e ndaata Israel o judíos in'nuúⁿ yā tanducuéⁿ'ē dendu'ú 'cūū. Naati ndís'tiī ní véé 'aama Chiidá nī chí 'āā déenu yā yeⁿ'e tanducuéⁿ'ē dendu'ū chí necesidades yeⁿ'e ndís'tiī. ³¹ Vmnaáⁿ vmnaaⁿ ndís'tiī ní cánéé chí in'nuúⁿ nī Ndyuūs ní yeⁿ'e nducuéⁿ'ē yeⁿ'e chí Ndyuūs ngaⁿ'a ntiⁿ'nyúⁿ yā, ní 'íicú Ndyuūs téé yā ndís'tiī tánducueⁿ'ē dēndu'ū.

Vaadī 'cuiica chí véé na va'ai cheeti nguuvi
(Mt. 6.19-21)

³² Caⁿ'a Jesús: Ndís'tiī chí tan'dúú^{cā} 'iiti cuūchí yeⁿ'é 'tiicá nī. Nguéeé 'va'á nī ti Ndyuūs Chiida yú neⁿ'é yā téé yā ndís'tiī dendu'ū yeⁿ'e naachí ngaⁿ'a ntiⁿ'nyúⁿ yā. ³³ Cuin'díicui nī chí véé yeⁿ'e nī ní ca'á nī 'iiⁿ'yāⁿ chí nguéeé véé yeⁿ'e yā. Diiⁿ n'daacá nī caati cuuvi yeⁿ'é nī vaadī 'cuiica yeⁿ'e va'ai cheeti nguuvi naachi 'iiⁿ'yāⁿ duucu nguéeé cuuvi cundaa yā, ndii nguée nduu 'íyéevē cuuvi di'tuuví tí. ³⁴ Caati naachi canéé vaadī 'cuiica yeⁿ'é nī, miiⁿ canee staava yeⁿ'é nī chí nadicadiinúúⁿ nī yeⁿ'e nducuéⁿ'ē.

Canéé chí candéé nī cuidado yeⁿ'e nducuéⁿ'ē

³⁵ 'Cuēetinee chiichi n'daacā ndúú^{cū} catecai nī. Cuēechiichí nī paño cheēti nī 'íicú candéé nī lámparas yeⁿ'e nī chí ngiichi. ³⁶ 'Cuēetinéé ndís'tiī tan'dúú^{cā} 'áamá saⁿ'ā chí snéé ngiinu sa chí ndaa patrón yeⁿ'ē sa naachi n'giindivaacú 'iiⁿ'yāⁿ. Ní maaⁿ nda'ai sa cheendi va'āí ní taachi ndaa yā chí di'cuēecú yā tuu'mí nūⁿ nn'guaāⁿ sa yeⁿ'e yā. ³⁷ De'ē chúú^{cā} n'dai mozos chí diiⁿ mandado ní taachi ndaa Señor miiⁿ ní ndaaca yā mozos chí sндуuchí yā. Cuaacu níⁿ'nyúⁿ ngaⁿ'á ngíí ndís'tiī chí Señor miiⁿ ní cuēechiichí n'daacá yā paño cheēti yā. Ní Señor miiⁿ ní díⁿ yā chí mozos 'cuēete sa na mesa. Tuu'mi ní Señor miiⁿ 'cuí yā cu'u che'e mozos. ³⁸ 'Áará chí Señor miiⁿ ndaa yā maⁿ'a yaaaⁿ o taachi 'āā cuéé chideeve nguuvi ní ndaacá yā mozos chí sндуuchi sa. De'e chúú^{cā} n'dai mozos ti sндуuchí yā. ³⁹ Ndís'tiī ní cadínuuⁿ nī chuū. Ndúúti chí 'iiⁿ'yāⁿ vaacu déenu yā de'ē hora chí ndaa chí duucu, cuaacu níⁿ'nyúⁿ 'cuēetí nduuchí yā ní nguéeé 'cuaaⁿ yā chí duucu na vaacú yā. ⁴⁰ 'Tiicá ntúūⁿ ndís'tiī 'cuēetinéé yaáⁿ nī ti hora chí nguéeé inacadínuuⁿ nī 'úú chí Saⁿ'ā chí Daiyá Dendyuūs ní ndaa taama vmnéⁿ'ēe.

Yeⁿ'e mozo chí din'daacá ndúú^{cū} mozo chí nguée din'daacá
(Mt. 24.45-51)

⁴¹ Tuu'mi ní Pedro miiⁿ ní caⁿ'a yā chí yā Jesús: N'dií, Señor, ¿'áá caⁿ'a nī ejemplo 'cūū caavā nús'uu o caavā nducyaaca 'iiⁿ'yāⁿ?

⁴² Jesús miiⁿ ní caⁿ'a yā: ¿Du'ú dueño ca'a yā ntiⁿ'nyuⁿ chí s'neeⁿ yā vmnaaⁿ yeⁿ'ē va'ai yeⁿ'e yā 'áamá mayordomo nduuti chí nguée ca'a sa chí che'e mozos yeⁿ'é yā hora chí che'e sa? ⁴³ De'e chúú^{cā} n'dai mayordomo chí diiⁿ sa ntiⁿ'nyuⁿ taachí dueño miiⁿ ní ndaa yā ní nandaaca yā mayordomo chí diiⁿ sa tan'dúú^{cā} chí neⁿ'e yā. ⁴⁴ Cuaacu níⁿ'nyúⁿ ngaⁿ'á ngíí ndís'tiī chí dueño miiⁿ ní cu'néeⁿ yā mayordomo miiⁿ chí caaⁿ'maⁿ ntiⁿ'nyuⁿ sa yeⁿ'ē tanduvéé chí veē yeⁿ'e yā. ⁴⁵ Ndúúti chí mayordomo miiⁿ nadicadínuuⁿ sa na staava yeⁿ'e sa chí dueño cuuvi 'náaⁿ yā nndaa yā tuu'mi ní tuca'a sa 'cueⁿ'e sa mozo ndúú^{cū} n'daataá chí snéé caadi 'iiyū ní nge'e sa ní ngi'i sa ndúú^{cū} amigos yeⁿ'e sa ní cuu'vi sa. ⁴⁶ Tuu'mi ní dueño miiⁿ ní ndaa yā nguuvi chí mayordomo nguéeé cānee ngíinu

sa ní 'áamá hora chi nguée déenu sa. Ní dueño miiⁿ ca'á yā castigo ch'εεε ca mayordomo miiⁿ tan'dúucā chi Ndyuūs ca'a yā castigo 'iiⁿ'yāⁿ chi nguée i'téenu yā 'yā. ⁴⁷ Mayordomo chi deenu sa chí neⁿ'e dueño yeⁿ'e sa naati nguée véé yaaⁿ sa ndíi nguée ndúú diiⁿ sa chi ngaⁿ'a dueño yeⁿ'e sa cuuvi sa castigado ndúúcu neené n'dee cuuvi 'cueⁿ'é yā saⁿ'ā. ⁴⁸ Naati mayordomo chi nguée déenu sa taacā neⁿ'e dueño yeⁿ'e sa chí diiⁿ sa, ní diiⁿ sa chí nguée n'daacā chí cuuvi sa castigado, tuu'mi ní cuuvi sa castigado ndúúcu 'téé nūuⁿ cuuvi cueⁿ'é yā saⁿ'ā. 'Āā du'ú nūuⁿ saⁿ'ā chí n'dee nga'a dueño yeⁿ'e sa, dueño miiⁿ ní n'dee cá caaca yā cuenta yeⁿ'e chí diiⁿ sa. 'Iiⁿ'yāⁿ chí nga'a n'dee cá táámá yā, 'iiⁿ'yāⁿ miiⁿ n'dee cá caaca yā cuenta yeⁿ'e chí diiⁿ taamá yā.

Vée 'áamá 'uūví taaⁿ 'iiⁿ'yāⁿ cáávā Jesús miiⁿ

(Mt. 10.34-36)

⁴⁹ 'Úú Jesús ní ndāa chí cu'neéⁿ yaⁿ'ā ná iⁿ'yeeⁿdí 'cūū. De'ē ca neⁿ'é diiⁿ nduuti chí 'āā ngiichi. ⁵⁰ Canée chí 'úú 'cuenú cuuvi n'dee n'dái ní neⁿ'é chí 'cuenú cuuvi ndíi taachi 'āā cuuvi cuaacu tanducuéⁿ'ē. ⁵¹ ¿'Áá nadicadínuuⁿ nī chí 'úú ndaá chí ndéé vaadī 'diiⁿ 'iiⁿ'yāⁿ yeⁿ'e iⁿ'yeeⁿdí 'cūū? 'Úú ní ngaⁿ'á ngí ndís'tiī chí nguée cuaacu caati ndéé vaadī 'caa'va, ní 'iiⁿ'yāⁿ 'caa'vá yā ndúúcu táámá 'iiⁿ'yāⁿ. ⁵² Ndíi tiempo miiⁿ ndíi tiempo chí cuchii, nduuti chí nyuⁿ'u 'iiⁿ'yāⁿ na 'áamá va'āi ndúúcu vaadī 'caa'va 'cuētinée yā, 'iinu yā ní caⁿ'a yā contra yeⁿ'e na 'uuvi yā ní 'uuvi yā ní caⁿ'a yā contra yeⁿ'e ná 'iinú yā. ⁵³ Saⁿ'ā chí véé daiya sa ní 'caa'va sa ndúúcu daiya sa, 'íicú daiya sa ní 'caa'vá sa ndúúcu chiidá sa. Ní 'áamá n'daataá nguée cuuvi n'diichi tá daiya tá, 'íicú daiya ntúūⁿ tá nguée cuuvi n'diichi tá cheecu tá. Ní taⁿ'ā indá'ā tá ní 'caa'vá yā ndúúcu dicuūnú ta, ní dicuūnú ta ní 'caa'vá yā ndúúcu táⁿ'ā indá'a tá.

Señales yeⁿ'e tiempo 'cūū

(Mt. 16.1-4; Mr. 8.11-13)

⁵⁴ 'Tiicá ntúūⁿ ngaⁿ'a Jesús ngii yā 'iiⁿ'yāⁿ: Taachí ndís'tiī inaaⁿ nī méēē chí íneeⁿ naachí ngiia 'yáⁿ'ā, tuu'mi ní ngaⁿ'a nī chí 'cuenú cúúví. Ní 'tíicā ngii. ⁵⁵ Ní taachí ngéenu 'yúúné cuááⁿ ndiiyā ngaⁿ'a nī chí cuuvi yáāⁿ 'iicu ní ngii. ⁵⁶ Ndís'tiī chí 'uūví naaⁿ 'uūví cheendi nī déenu nī taaca canée nánguuvu ndúúcu na yaⁿ'á, taachi ndāa 'íi' nūuⁿ ni taachi cuuvi 'cuenú cuuvi. ¿De'ē cúúví chí nguée déenu nī yeⁿ'e señales chí inaaⁿ nī yeⁿ'e tiempo 'cūū?

Diiⁿnú yiiⁿnu di tun'dáa n'dai di ndúúcu 'iiⁿ'yāⁿ chí táaⁿ yā yeⁿ'e di

(Mt. 5.25-26)

⁵⁷ Tuu'mi ní caⁿ'a Jesús: ¿Dé'ē cúúví chí nguée indéē ndís'tiī cuidado chee chí n'daacā chí diiⁿ nī? ⁵⁸ Taachi caⁿ'á nī ndúúcu sáⁿ'ā chí táāⁿ ndúúcu nī nanááⁿ juez, n'diichí nī chí indee nī ndúúcu vi'ī cuaaⁿ cyúúni ní diiⁿ nī chí 'cuētinée n'dáaca nī ndúúcu vi'ī ni 'iicu nguée caⁿ'a nī nanááⁿ juez. Ní juez miiⁿ nca'á yā ndís'tiī ta'ā policía, ní policía miiⁿ ní cu'nuūⁿ sá ndís'tiī vácūū. ⁵⁹ 'Úú ngaⁿ'á ngii ndís'tiī ti nguée nan'dáa nī vácūū neⁿ'e chí nguée 'cuiinu nadí'vē tanducuéⁿ'ē chí ndiicuí nī.

13

N'dáacā n'dai chí ndaacadaamí nī yeⁿ'e nūuⁿndi yeⁿ'e nī

¹ Ndāa n'duuvu saⁿ'ā nanááⁿ Jesús ní caⁿ'a sa chíi sa Jesús tan'dúúcu chí diiⁿ gobernador Pilato. Ca'a yā orden chí ch'iⁿ'nuⁿ sa n'dúúví 'iiⁿ'yāⁿ yeⁿ'e yáⁿ'āa Galilea ní staⁿ'a yā yuúúⁿ yeⁿ'e 'iiⁿ'yāⁿ s'eeⁿ ndúúcu yuúúⁿ yeⁿ'e 'iiti chí 'āā 'nín'núⁿ 'iiⁿ'yāⁿ Israel s'eeⁿ chí ca'a yā ofrenda yeⁿ'é Ndyuūs. ² Jesús ní caⁿ'a yā chíi yā 'iiⁿ'yāⁿ s'eeⁿ: ¿'Áá nadicadínuuⁿ ndís'tiī chí 'iiⁿ'yāⁿ s'eeⁿ yeⁿ'e yáⁿ'āa Galilea ch'eenu yā 'tíicā ti véé ca nūuⁿndi yeⁿ'e yā nguée ti tanáⁿ'ā 'iiⁿ'yāⁿ yeⁿ'e yáⁿ'āa Galilea? ³ 'Úú ngaⁿ'á ngii ndís'tiī: Nguée 'tíicā. Ndúúti chí ndís'tiī nguée ndaacadaamí nī yeⁿ'e nūuⁿndi yeⁿ'e nī, tuu'mi ní nducyaaca ndís'tiī 'cuuvi ntúūⁿ nī cueⁿ'e daāⁿmaⁿ. ⁴ ¿De'ē nadicadínuuⁿ ndís'tiī yeⁿ'é ndu'ū ndítiiⁿ'yu 'iinu 'iiⁿ'yāⁿ chí ndíi cuaaⁿ vmnaaⁿ sndaā nduūu torre na yáāⁿ Siloé vmnááⁿ yā ní nducyáacá

yā ch'iī yā? ¿'Áá nadicádíínuuⁿ ndís'tiī chi 'iiⁿyāⁿ s'eeⁿ véé ca nuūⁿndī yeⁿe yā nguée ti tanáⁿa yā chi snée yā na yāāⁿ Jerusalén? ⁵ 'Úú ní ngaⁿ'á ngii ndís'tiī chi nguée 'tíicā. Nduuti chi ndís'tiī ntúūⁿ nguée ndaacadaamí nī yeⁿe nuuⁿndi yeⁿ'é nī, tuu'mi ní nducyaaca ndís'tiī 'cuūvi nī cueⁿe daāⁿmaⁿ.

Ejemplo yeⁿe yáⁿ'á yeⁿe n'guídii yaaⁿ nguuvi chi nguée n'gui'i yeⁿ'ē

⁶ Tuu'mi ní Jesús caⁿ'a yā ejemplo 'cūū: 'Áámá saⁿ'ā ní catá'āi 'áámá yáⁿ'á yeⁿ'ē n'guídii yaaⁿ nguuvi yeⁿe sa naachi véé yáⁿ'āa chēeti chēēⁿ yeⁿ'ē sa. Chó'ōo tiempo ní cheⁿe sa in'nuuⁿ sa n'gui'i yeⁿe yáⁿ'á yeⁿe sa ní nguée ndaācā sa n'gui'i yeⁿ'ē. ⁷ Tuu'mi ní caⁿ'a sa chii sa 'iiⁿyāⁿ chi diíⁿ yā ntiiⁿnyuⁿ yeⁿe yáⁿ'āa yeⁿe sa: 'Āā 'iinu nduūyū chí ichii ní nguée indaāca n'gui'i na yáⁿ'á 'cūū. 'Caaca nī yáⁿ'á. ¿De'ε cuuvi chi yáⁿ'á di'vaachi na yáⁿ'āa naachi snée yáⁿ'á 'cūū? ⁸ Naati saⁿ'ā chi idiiⁿ ntiiⁿnyuⁿ na yaⁿ'ā miiⁿ nán'guεcútaⁿ'ā sa: N'dií, señor, 'āā canée rá nduuyú 'cūū ní 'úú nadidεevé yáⁿ'á yeⁿ'ē ní caⁿ'á taavi abono yeⁿ'ē. ⁹ Ní nduuti chi 'cuūndī n'gui'i yeⁿ'ē ní n'daacā. Nduuti chi nguée, ní 'caaca nī.

Jesús diíⁿ yā chi nduūvā yeⁿe 'áámá n'daataá chí neené n'guutí

¹⁰ Nguuvi sábadō chi ntaavi'tuunúúⁿ 'iiⁿyāⁿ Israel s'eeⁿ, Jesús ngi'cueeⁿ yā na 'áámá yaācū sinagoga. ¹¹ Miiⁿ ní canée 'áámá n'daataá chí 'āā ndítiiⁿyu 'iinu ndúuyū chí ndii n'guuti ta cáavā chi diiⁿ espíritu yeⁿe yááⁿ'nguiinūuⁿ 'tíicā ndúucū ta. Ndíí mar 'áámá naaⁿ nguée ngii ndaa cuaacú ta. ¹² Taachí Jesús n'diichí yā n'daata miiⁿ yaa'ví yā táⁿ'ā ní caⁿ'a yā chii yā táⁿ'ā: N'dií, n'daataá, ¿'áá neⁿe nī chi nduuvi cuaacú nī?

¹³ Jesús sn'duú yā ta'a yā vmnaaⁿ yeⁿe n'daātā miiⁿ. Tuu'mí nūuⁿ ndaā cuaacu n'daataá mííⁿ ní n'daataá mííⁿ ní ngaⁿ'a yā: De'ē chúucā ch'εete Ndyuūs. ¹⁴ 'Iiⁿyāⁿ chí ngaⁿ'ā ntiiⁿnyúⁿ yā yeⁿ'ē yaacu sinagoga nduuvi taáⁿ yā ti Jesús miiⁿ ní diyicú yā n'daataá mííⁿ nguuvi chi 'iiⁿyāⁿ ntaavi'tuunúúⁿ yā. Ní ngaⁿ'a yā ngii yā nducyaaca 'iiⁿyāⁿ: Jaāⁿ nguuví nūuⁿ canee chi diiⁿ 'iiⁿyāⁿ ntiiⁿnyuⁿ ní nguuvi s'eeⁿ 'iiⁿyāⁿ cuuvi chíí yā nanááⁿ Jesús miiⁿ ní cuuvi diiⁿ yiicú yā 'iiⁿyāⁿ s'eeⁿ, naati nguée cuuvi diíⁿ yā 'tíicā nguuvi chi ntaavi'túunūuⁿ 'iiⁿyāⁿ.

¹⁵ Tuu'mi ní Jesús nan'guεcútaⁿ'a yā yeⁿ'ē sa: Ndís'tiī saⁿ'ā 'uūvī naaⁿ 'uūvī cheendí nī, ¿'áá nguée in'daatí ndís'tiī 'iiti yeⁿe nī naachi snée 'iiⁿyu tī ní ngeⁿ'é nī nga'a nī nuūⁿnīⁿ 'iiti nguuvi chi ntaavi'tuunúúⁿ nī? ¹⁶ N'daataa 'cūū ní yeⁿ'ē ndaata yeⁿe Abraham. 'Āā ndítiiⁿyu 'iinu nduūyū ncachiichí yááⁿ'nguiinūuⁿ táⁿ'ā. ¿'Áá nguée canee chi n'daatí táⁿ'ā miiⁿ yeⁿe ca'ai nguuvi chi ntaaví'tuunúúⁿ nī?

¹⁷ Taachí Jesús miiⁿ caⁿ'a yā chuū, taanduvée yā chi taaⁿ yā yeⁿe yā ní 'cuináaⁿ yā. Nducyáácá 'iiⁿyāⁿ yeⁿe yáāⁿ miiⁿya yeenú n'dai yā yeⁿ'é tanducueⁿ'ē dendu'ū chí n'gεete chí diiⁿ Jesús miiⁿ.

Ejemplo yeⁿ'ē nduuti yéⁿ'ē yíivē ntí'yāa

(Mt. 13.31-32; Mr. 4.30-32)

¹⁸ Jesús caⁿ'a yā: ¿De'ē tan'dúucā naachí Ndyuūs ngaⁿ'ā ntiiⁿnyúⁿ yā? ¿De'ē nadídaamá nduūcū? ¹⁹ Tan'dúucā nduutií yeⁿ'ē yíivē ntíí'yaá chí 'áámá saⁿ'ā ní sta'ā sa ní chiinū sa na yáⁿ'āa yeⁿ'ē sa. Yaāta miiⁿ ní ch'iīta tan'dúucā 'áámá yáⁿ'á ch'εete. 'Yááadá yeⁿ'ē nanguuvi dín'dái tī 'dεécé tī na dúuⁿnē.

Ejemplo yeⁿe levadura yeⁿe pan

(Mt. 13.33)

²⁰ Jesús ní caⁿ'a ntúūⁿ yā: ¿De'ē tan'dúucā naachí Ndyuūs ngaⁿ'ā ntiiⁿnyúⁿ yā? ²¹ Tan'dúucā 'aama tááⁿ levadura yeⁿe pan chí 'áámá n'daataá chistaⁿ'ā tá nguaaⁿ 'iinu medidas harina ndíí chí nan'guiita tanducueⁿ'ē yaāchī yéⁿ'ē.

Cheendi va'āi 'tuucuú

(Mt. 7.13-14; 21-23)

²² Taachi Jesús canúúⁿ yā yúúní chí cho'ó yā na yáāⁿ Jerusalén cueⁿ'é yā tanáⁿ'ā yáāⁿ n'gεete ndúucū yáāⁿ n'gaiyāā ní ngi'cueeⁿ yā 'iiⁿyāⁿ. ²³ Tuu'mi ní 'áámá saⁿ'ā ndaā sa

nanáaⁿ yā ní ntinguuneeⁿ sa: N'dií, Señor, ¿'áá duū'ví 'iiⁿ'yāⁿ chí nnguaⁿ'ai yā? Jesús miiⁿ ní caⁿ'a yā chii yā saⁿ'ā miiⁿ: ²⁴ Diíⁿ nī tanducueⁿ'ē chi cuuví nī chi cundaá nī cheendi va'āi 'tuucuú caati ngaⁿ'á ngií ndís'tiī chi néené 'yaaⁿ 'iiⁿ'yāⁿ neⁿ'e yā cundaá yā cheendi va'ai 'tuucuú chi candéē naachi Ndyuūs nadanguaⁿ'ai yā 'iiⁿ'yāⁿ naati nguéé cuuvi dííⁿ yā. ²⁵ Taachi 'iiⁿ'yāⁿ yeⁿ'e va'ai nducueeⁿ yā ní n'gaadí yā cheendi va'āi yeⁿ'ē ndís'tiī, tuu'mi ní ndís'tiī snee nī cuaaⁿ chuva'āi. Ní di'cuεεcú nī cheendi va'āi ní caaⁿ'máⁿ nī: Señor, Señor, nn'guaáⁿ nī yeⁿ'e 'nū. 'Iiⁿ'yāⁿ yeⁿ'e va'ai ní nan'guεεcutaⁿ'a yā: Nguéé in'diichí ndís'tiī ndii nguεε deenú tiī ndiicá nī. ²⁶ 'Áará chí ndís'tiī ni tucá'a nī caaⁿ'maⁿ nī 'tíicā: Che'é 'nū ní chi'i 'nū ndúucu nī taachi n'diī ní chi'cueeⁿ nī 'iiⁿ'yāⁿ na yúúni yeⁿ'e yáāⁿ vaacú 'nū. ²⁷ 'Iiⁿ'yāⁿ yeⁿ'e va'ai miiⁿ ní caaⁿ'maⁿ yā cuuvi yā 'iiⁿ'yāⁿ s'eeⁿ: 'Úú ngaⁿ'á ngií ndís'tiī ti nguéé in'diichí ndís'tiī ndíí nguéé deenú tíí ndiica nī. Cueevii nī yeⁿ'é nducyaaca ndís'tiī ti nguéé n'daācā idiíⁿ nī. ²⁸ Cuaacu chi ndís'tiī snaaⁿ nī chiida yú s'eeⁿ Abraham, ndúucū Isaac, ndúucū Jacob, ndúucū nducyaaca profetas chi ndii cuááⁿ vmaaaⁿ snée yā naachí Ndyuūs ngaⁿ'a ntiiⁿnyuⁿ. Ní ndís'tiī ní 'cuεetinée nī cuááⁿ chuva'āi. Miiⁿ ní cuεεcú nī ní che'é nī 'diiⁿ'yúⁿ nī. ²⁹ 'Iiⁿ'yāⁿ s'eeⁿ chii yā yeⁿ'e nducueⁿ'ē cuaaⁿ yeⁿ'e in'yeeⁿ'dí 'cūū ní ndaa yā nanááⁿ Ndyuūs. Chii yā ndíí cuaaⁿ na ican'dáā 'yáⁿ'ā, ndii cuaaⁿ na ngiia 'yáⁿ'ā, ndíí cuaaⁿ 'niiⁿ'nūⁿ, ndíí cuaaⁿ ndiia, ní 'cuεeté yā na mesa yeⁿ'e banquete naachí Ndyuūs ngaⁿ'a ntiiⁿnyuⁿ yā. ³⁰ Tuu'mi ní náⁿ'ā 'iiⁿ'yāⁿ chi n'geete chi ngaⁿ'a ntiiⁿnyuⁿ yā maaⁿ na in'yeeⁿ'dí 'cūū ní cuuvi ndiicuuⁿ cá yā naachi snée Ndyuūs ní naⁿ'a 'iiⁿ'yāⁿ chi ndiicuuⁿ cá maaⁿ na in'yeeⁿ'dí 'cūū ní cuuvi n'geete yā naachi snée Ndyuūs.

Jesús cheεcú yā cáāvā 'iiⁿ'yāⁿ yeⁿ'e yáāⁿ Jerusalén
(Mt. 23.37-39)

³¹ Nguuví 'cuú nūⁿ 'áámá chée 'iiⁿ'yāⁿ fariseos ndáa yā nanááⁿ Jesús ní caⁿ'a yā: N'diī, Jesús, cueⁿ'e nī ti rey Herodes neⁿ'é yā 'caaⁿ'núⁿ yā n'diī.

³² Naati Jesús caⁿ'a yā chii yā 'iiⁿ'yāⁿ s'eeⁿ: Cunaⁿ'á nī nanááⁿ rey miiⁿ ní caaⁿ'maⁿ nī cuuvi nī: N'diī rey, tan'dúucā 'yuūnéē, 'tiicá nī. Cuin'diichí nī, Jesús miiⁿ ngaⁿ'á yā 'túúicā: 'Úú itun'daá espíritu yeⁿ'e yááⁿ'nguiinūⁿ yeⁿ'é 'iiⁿ'yāⁿ ní dííⁿ chi nduūvā yeⁿ'e 'iiⁿ'yāⁿ maaⁿnguuvii ndúucū cavyaaⁿ, tuu'mi ní 'cuiinu ntiiⁿnyuⁿ yeⁿ'é damáíⁿ. 'Tíicā canee chi dííⁿ ná 'iinū nguuvii. ³³ Naati 'úú ní canéé chi caacá cuaaⁿ cyúúni ní dííⁿ ntiiⁿnyuⁿ yeⁿ'é maaⁿ ndúucū cavyaaⁿ ndúucū damáíⁿ, caati nguéé canéé chí 'cuuvi 'áámá saⁿ'ā profeta ch'εete chi diiⁿ ntiiⁿnyuⁿ yeⁿ'é Ndyuūs 'áámá lado yeⁿ'e yáāⁿ Jerusalén ti na yáāⁿ Jerusalén chi 'caaⁿ'núⁿ yā saⁿ'ā profetas.

³⁴ Jesús caⁿ'a yā chii yā 'iiⁿ'yāⁿ yeⁿ'e yáāⁿ Jerusalén: Ndís'tiī chi 'muuⁿ n'giiⁿ'nuⁿ nī 'iiⁿ'yāⁿ profetas ní ngíítuú nī 'iiⁿ'yāⁿ chi Ndyuūs dicho'ó yā chi ndεε yā nduudu yeⁿ'é yā. Ní Jesús caⁿ'a yā: Neené n'deēe cuūví neⁿ'é nadaamá daiyá 'iiⁿ'yāⁿ yáāⁿ Jerusalén miiⁿ tan'dúucā 'áámá tú'u nadaamá tī daiya tī mááⁿ ngeēchi tī, ní nguéé 'cuúⁿ nī. ³⁵ 'Túúicā caⁿ'a yā: N'diichí ndís'tiī. Vaacú nī cu'nééⁿ maāⁿ. Ní ngaⁿ'á ngií ndís'tiī chí 'āā ntée snaaⁿ nī 'úú ndíí ndáá tiempo chi caaⁿ'maⁿ nī yeⁿ'é: De'ε chúucā n'dai 'iiⁿ'yāⁿ chí cuchii yā ndúucū chí duuchi Señor 'iivú Ndyuūs ti 'iiⁿ'yāⁿ yeⁿ'é Ndyuūs.

14

Jesús diíⁿ yā chí nduūvā yeⁿ'e 'áámá saⁿ'ā

¹ 'Áámá sábadu, nguuvii chí ntaavi'túúnuuⁿ 'iiⁿ'yāⁿ, Jesús sndaá yā ní cheⁿ'e yā 'áámá va'ai yeⁿ'e 'áámá saⁿ'ā fariseo chí ngaⁿ'a ntiiⁿnyuⁿ sa. Ní tanáⁿ'ā saⁿ'ā fariseos canee ngiinu sa Jesús de'ē chí caⁿ'á yā chí diiⁿ yā. ² Tuu'mi ní ndaa nanááⁿ Jesús 'áámá saⁿ'ā chí ngiitā ní ndiituú núúⁿ'máⁿ ch'εete sa. ³ Jesús caⁿ'a yā chí yā maestros yeⁿ'e ley ndúucū saⁿ'ā fariseos: ¿'Áá 'cuaaⁿ ley miiⁿ chí cuuví dííⁿ chí nduūvā yeⁿ'e 'iiⁿ'yāⁿ nguuvii chí ntaavi'tuunúúⁿ yā?

⁴ Saⁿ'ā s'eeⁿ ní 'diiⁿ 'diiⁿ ch'εetinee sa ní nguéé nan'guεεcutaⁿ'a sa. Tuu'mi ní Jesús sta'á yā ta'a saⁿ'ā chí ndiituú ní dííⁿ yā chí nduūvā yeⁿ'e saⁿ'ā miiⁿ. Ni yaa'vi yā saⁿ'ā chí cunaⁿ'a sa. ⁵ Cuayiivi ní Jesús yaa'vi yā saⁿ'ā s'eeⁿ ní caⁿ'a yā: ¿Cheē ndís'tiī ndúúti chí

'áámá burro o 'áámá itiindu yeⁿe nī cun'dáá nuúⁿ tī na 'áámá viini ní nguéé tuu'mí nūuⁿ ntun'dáa nī 'iiti 'áará chí nguuvi chi ntaavi'tuunuúⁿ 'iiⁿ'yāⁿ?

⁶ Saⁿ'ā s'eeⁿ nguéé chiī nan'guεεcútaⁿ'a sa cucáávā nduudu chi ngaⁿ'a yā.

'Iiⁿ'yāⁿ chi invitado yā naachi n'giindivaacu 'iiⁿ'yāⁿ

⁷ Taachí Jesús n'diichí yā táácā diiⁿ 'iiⁿ'yāⁿ chi invitados chi ndεεve yā silla yeⁿe mesa chi lugar chí n'daacā ca, tuu'mi ní caⁿ'a yā 'áámá ejemplo chi 'tεε nguεε dááma ndúúcu 'iiⁿ'yāⁿ chi diiⁿ yā invitados. ⁸ Ngaⁿ'a yā 'tíicā. Taachí 'áámá 'iiⁿ'yāⁿ diiⁿ yā invitar dii naachí n'giindivaacu 'iiⁿ'yāⁿ nguéé 'cuūndī di na silla vmnááⁿ vmnaaⁿ caati cuuvi ndaa táámá 'iiⁿ'yāⁿ invitado chi ch'εεtē yā nguéé ti dii. Ní silla miiⁿ ní caava 'iiⁿ'yāⁿ miiⁿ. ⁹ Ní taachí ndaa 'iiⁿ'yāⁿ chi ch'εεtē ca yā, tuu'mi ní 'iiⁿ'yāⁿ chi diiⁿ yā invitar di ndaa yā nanáaⁿ di ní caaⁿ'máⁿ yā cuuvi yā dii: Cu'neeⁿ di lugar 'cūū yeⁿe 'iiⁿ'yāⁿ 'cūū. Tuu'mi ní cuuví 'cuináaⁿ di ní 'cuūndī di na silla n'díi naaⁿ n'giinu. ¹⁰ Taachí 'iiⁿ'yāⁿ diiⁿ yā invitar dii caⁿ'a di 'cuūndī di na silla ndíi naaⁿ n'giinu. Ní taachí ndaa nanáaⁿ dii 'iiⁿ'yāⁿ chi diiⁿ yā invitar dii, tuu'mi ní caaⁿ'máⁿ yā cuuvi yā dii: Díi sán'ā chí n'dai nduucú, caaca dí cuaaⁿ 'niiⁿ'nuⁿ. Ní 'āā n'daacā cuuvi yeⁿe di nanáaⁿ 'iiⁿ'yāⁿ chí vεεtē yā na mesa. ¹¹ 'Iiⁿ'yāⁿ chí dich'εεtē maáⁿ yā táámá 'iiⁿ'yāⁿ ní diiⁿ yā chí ndiicuuⁿ yā. Ní 'iiⁿ'yāⁿ chí maaⁿ yā diiⁿ chí ndiicuuⁿ yā tááma 'iiⁿ'yāⁿ ní diiⁿ yā chí ch'εεtē yā.

¹² Tuu'mi ní Jesús ngaⁿ'á yā ngii yā saⁿ'ā chí diiⁿ invitar 'iiⁿ'yāⁿ s'eeⁿ: Dii taachí in'nuuⁿ di chí che'e nguaiⁿ di o chí che'e nguínū di, nguéé 'cuai di 'iiⁿ'yāⁿ chí n'dai ndúúcu di, ndíi nguéé ndúú ví'i rá di, ndíi nguéé ndúú 'iiⁿ'yāⁿ yeⁿe di, ndíi nguéé ndúú 'iiⁿ'yāⁿ na niiⁿ'nuúⁿ va'āi yeⁿe di chí 'cuíica yā caati 'iiⁿ'yāⁿ s'uuⁿ ní diiⁿ ntúuⁿ yā invitar dii chí che'e di nduucú yā. 'Tíicā ní nadíi'vε yā diiⁿ cáávā chí ca'a di chí che'e yā. ¹³ Naatí taachi idin'dái di 'aama comida n'dai, 'cuai dí 'iiⁿ'yāⁿ chí ndaachí snee yā, ndúúcu 'iiⁿ'yāⁿ chí nguéé ngii ngiicá yā, ndúúcu chí ngai yó'o, ndúúcu 'iiⁿ'yāⁿ chí ngeenaáaⁿ. ¹⁴ Ní caaⁿ'maⁿ 'iiⁿ'yāⁿ s'eeⁿ yeⁿe di: De'ε chúúca n'dai di. Ti 'iiⁿ'yāⁿ s'eeⁿ nguéé nteé yā dii. Naati Ndyuūs nadíi'vε yā dii taachí ndaa nguuvi chí 'iiⁿ'yāⁿ chí n'dai nduuchí yā yeⁿe nguaaⁿ tináⁿ'ā.

Ejemplo yeⁿe 'iiⁿ'yāⁿ chí che'e yā cena chí ch'εεtē

¹⁵ Taachí 'áámá 'iiⁿ'yāⁿ chí véε yā na mesa miiⁿ ch'iindiveéⁿ yā chuū, caⁿ'a yā chíi yā Jesús: De'ε chúúca n'dai chí caⁿ'á yā che'e yā pan naachí Ndyuūs ngaⁿ'a ntiin'nyúⁿ yā.

¹⁶ Tuu'mi ní Jesús caⁿ'a yā ejemplo 'cūū: 'Áámá saⁿ'ā ca'ā sa chí din'dái yā 'áámá chí che'e nguínū 'yaaⁿ 'iiⁿ'yāⁿ, ní idiiⁿ sa invitar n'deeé n'dái 'iiⁿ'yāⁿ. ¹⁷ Ní taachí 'āā chaa che'e nguínū yā dicho'o yā 'áámá mozo chí caⁿ'a sa cuuvi sa 'iiⁿ'yāⁿ chí ndii yā invitado: Cuchíi nī. 'Āā véé tanducuéⁿ'ē chí che'e nguínu yú. ¹⁸ Nducyaaca yā ní tucá'a yā caⁿ'a yā 'tíicā: Ch'εεtinúuⁿ nī yeⁿ'é. Ní 'áámá saⁿ'ā ní caⁿ'ā sa: Cáámá ch'iinū 'caí 'áámá finca ní cánéé chí caⁿ'á n'diichí finca, chíiⁿ chí ch'εεtinúuⁿ nī yeⁿ'é. ¹⁹ Táámá yā ní caⁿ'a yā: 'Caí nyuⁿ'u yáandā itiindu ní neⁿ'é diiⁿ ntiin'nyuⁿ ndúúcu tī. Ngiiicá favor. Ch'εεtinúuⁿ nī yeⁿ'é. ²⁰ Táámá yā ní caⁿ'a yā: Cáámá ch'iinu ch'iindivaacú chí chíiⁿ nguéé cuuvi caⁿ'á. ²¹ Taachí nguεεcunéé mozo, caⁿ'a sa chuū chíi sa 'iivi sa. Tuu'mi ní 'iivi miiⁿ nduuvi taáⁿ yā ní caⁿ'a yā chíi yā mozo miiⁿ: Cueⁿ'e di cuaaⁿ ní'vεε ndúúcu cuaaⁿ cyúúni yeⁿ'e yáāⁿ ní candéε di 'iiⁿ'yāⁿ ndaachíi, ndúúcu 'iiⁿ'yāⁿ chí nguéé ngii ngiicá yā, ndúúcu 'iiⁿ'yāⁿ chí ngai yó'o, ndúúcu 'iiⁿ'yāⁿ chí ngeenaáaⁿ. ²² Sán'ā mozo ní cueⁿ'ē sa. Cuayiivi ní ndaā sa ní caⁿ'ā sa chíi sa 'iivi sa: N'díi, señor, 'āā diiⁿ tan'dúúca chí ngaⁿ'a nī ní véé cá lugar chí 'cúεtēé 'iiⁿ'yāⁿ na mesa. ²³ Caⁿ'a señor miiⁿ chíi yā saⁿ'ā mozo miiⁿ: Cueⁿ'e di cuaaⁿ cyúúni n'gεεtē ndúúcu yúúni chí véé chí neēē cuááⁿ 'diitū ní di'cuítu di 'iiⁿ'yāⁿ chí chíi yā na vaacú ní 'íicú cuuvi diitū na vaacú. ²⁴ Ti 'úú ní ngaⁿ'á ngii ndís'ti chí mar 'áámá saⁿ'ā chí diiⁿ invitar saⁿ'ā vmnaaⁿ nguéé 'cuúⁿ ndáa sa che'ē nguínū sa nduucú na mesa yeⁿ'é.

'Iiⁿ'yāⁿ chí caⁿ'a yā ndúúcu Jesús canee chí 'cuéenu yā cuuvi

²⁵ Cuayiivi míiⁿ nééné n'deeé 'iiⁿ'yāⁿ cueⁿ'e yā ndúúcu Jesús. Ní Jesús miiⁿ ní caⁿ'a yā chíi yā 'iiⁿ'yāⁿ s'eeⁿ 'áámá ejemplo: ²⁶ Ndúúti chí 'áámá 'iiⁿ'yāⁿ neⁿ'e ca yā chíidá

yā o chεεcú yā o n'daataá yeⁿe yā o daiya yā o 'díinu yā o vi'i yā o vida yeⁿe maáⁿ yā nguée ti 'úú chi Jesús, nguée cuuvi discípulo yeⁿe. ²⁷ 'Āā du'ú nūⁿ chi caⁿa yā nduucú ní nguée ndée yā cruz yeⁿe yā chi tan'dúucā nducuéⁿe chi 'cueenu taavi yā cuuvi cucáāvā 'úú nguée cuuvi discípulo yeⁿe. ²⁸ ¿'Áá chée nūⁿ 'áámá ndís'tiī taachí neⁿe nī din'dái nī 'áámá torre, ¿'áá nguée n'gεεtē nī ní ididuuché nī? ¿'Áá n'deēe díⁿ nī gasto ndúúti chi tu'née chí'vεε yeⁿe nī chí 'cuiinu din'dái nī torre yeⁿe nī? ²⁹ Ní nduuti chi cu'nuúⁿ nī cimientos yeⁿe torre ní cuayiivi nguée cuuvi din'dái nī torre yeⁿe nī, tuu'mi ní nducyaaca yā chi snaaⁿ yā 'cáⁿnyūⁿneeⁿ yā ndís'tiī. ³⁰ 'Iiⁿyāⁿ s'eeⁿ ní caaⁿmaⁿ yā: Sáⁿa 'cūú tucá'a sa din'dái sa ní nguée ch'iinu di'cuiinú sa. ³¹ Ní Jesús ngaⁿa yā 'tíicā: ¿Du'ú rey ndúúti chi canee chi díⁿ yā caandaá ndúúcū táámá rey, 'áá nguée n'giindi yā ndúúcū táámá saⁿā ní ididuuché yā? Nduuti chi tunéeⁿ ndiicu mil soldados ní 'iicu ndúúcū chuú nūⁿ cuuvi 'cuuⁿmaⁿ yā ndúúcū soldados chi ndiichi mil yeⁿe táámá rey. ³² Ní nduuti chi nguée cucheε yā, taachi cuchíⁿ yā táámá rey ndúúcū soldados yeⁿe yā chí díⁿ yā caandaá ní canée yaⁿai ca yā miiⁿ tuu'mi ní rey miiⁿ dicho'ó yā 'iiⁿyāⁿ chí candéε nduudu miiⁿ. Ní 'iicu caaca yā taama rey chí 'cuetinéε 'diiⁿ yā. Ní nguée díⁿ yā caandaá ndúúcū rey yeⁿe yā. ³³ 'Tiicá ntúūⁿ. 'Āā chée nūⁿ ndís'tiī nduuti chí nguée cu'nee nī tanducuéⁿe chí véε yeⁿe nī, nguée cuuvi cuuvi ndís'tiī discípulos yeⁿe.

Jesús ngaⁿa yā yeⁿe yiima chí nguée n'daācā sabor yeⁿe
(Mt. 5.13; Mr. 9.50)

³⁴ Jesús ngaⁿa yā: Yiima ní n'dai. Nduuti chí nguée n'daācā sabor yeⁿe, ¿de'ε ca'ā sabor yeⁿe? ³⁵ Nguée dichí'vε, ndii nguεε cáāvā yáⁿāa, ndii nguεε ndúú naachi véε abono, caati canangée yā yiima miiⁿ. 'Iiⁿyāⁿ chí véε veéⁿ yā, 'caandiveéⁿ yā yeⁿe.

15

Ejemplo yeⁿe 'íití cuūchī chí nindai

¹ Nducyáácá saⁿā chí inn'guεε sa yeⁿe yáⁿāa ndúúcū 'iiⁿyāⁿ nuuⁿndi ndaá yā nanááⁿ Jesús chí 'caandiveéⁿ yā nduudu yeⁿe yā. ² Cáāvā chuū 'iiⁿyāⁿ fariseos ndúúcū maestros chí ngi'cueeⁿ ley ngaⁿa yā n'de'ei yā nguááⁿ maáⁿ yā contra yeⁿe Jesús. 'Túuca ngaⁿá yā: Jesús miiⁿ n'gúuⁿ yā chí ndaá nanááⁿ yā 'iiⁿyāⁿ chí véε nuuⁿndi yeⁿe yā. Ní 'iiⁿyāⁿ miiⁿ ngé'e yā ndúúcu yā.

³ Tuu'mi ní Jesús miiⁿ ní caⁿa yā 'aama chí 'téε nguεε daama ndúúcū 'iiⁿyāⁿ miiⁿ. ⁴ Chée ndís'tiī ndúúti chí véε 'áámá ciento 'iiti cuūchī yeⁿe nī ní nduuti chí 'áámá chεε 'iiti s'uuⁿ cuuví ndái tī, ¿'áá nguée cu'nee nī ndu'u chí cuūⁿ ngeεcú nditiiⁿyú cuuúⁿ tī na 'cuééti? Ní caⁿá nī in'nuúⁿ nī 'iiti chí nindái míⁿ ndíⁿ taachí ndaacá nī 'iiti miiⁿ. ⁵ Ní taachí ndaacá nī 'iiti miiⁿ cun'duú nī 'iiti ná 'diimi nī ní candéε nī 'iiti cuūchī miiⁿ naachi canée tanáⁿā 'iiti cuūchī. Ní yeenú n'dai nī. ⁶ Ní taachi mndaa nī na vaacu nī, tuu'mi ní nadidaama nī 'iiⁿyāⁿ chí n'dai ndúúcu nī ndúúcū 'iiⁿyāⁿ na niiⁿnuúⁿ na va'ai yeⁿe nī. Ní caaⁿmaⁿ nī cuuvi nī, 'iiⁿyāⁿ s'eeⁿ: Ndís'tiī cuuvi yeenú n'dai nī nduucú ní di'viicu yú ti 'āā n'daacá 'iiti cuūchī yeⁿe chí nindái. ⁷ Tuu'mi ní Jesús ngaⁿá ntúuⁿ yā, 'úú ngaⁿá ngii ndís'tiī: 'Tíicā véε vaādī yeenú taavi na va'ai chεeti nguuví yeⁿe 'áámá 'iiⁿyāⁿ chí véε nuuⁿndi yeⁿe yā ní ndaacadaami yā yeⁿe nuuⁿndi yeⁿe yā nguée ti yeⁿe cuūⁿ ngeεcú nditiiⁿyú cuūⁿ 'iiⁿyāⁿ chí n'dai chí nguée canee cuumi chí ndaacadaami yā yeⁿe nuuⁿndi yeⁿe yā.

Ejemplo yeⁿe 'áámá cáádí chí nindái

⁸ Ní caⁿa Jesús: Du'u 'áámá n'daataá chí véε ndiichi cáádí yeⁿe ta nduuti chí dindai tá 'áámá ¿'áá 'cuuⁿmiⁿ tá lámpara ní n'daaca tá va'āī, ní in'nuuⁿ tá ndúúcū cuidado taanduvée ndíⁿ ndaācā ta tuūmī miiⁿ? ⁹ Taachí ndaācā tá nadaama tá 'iiⁿyāⁿ chí n'dai ndúúcu ta ndúúcū 'iiⁿyāⁿ na niiⁿnuúⁿ va'ai yeⁿe ta ní caⁿa tá: Cuuvi yeenú nī nduucú ní di'viicu yú ti 'āā ndaācá 'áámá cáádí yeⁿe chí chindái miiⁿ. ¹⁰ 'Úú ngaⁿá ngii ndís'tiī caati 'tiicá ntúūⁿ véε vaādī yeenú nguaaⁿ ángeles yeⁿe Ndyuūs cucáāvā 'áámá 'iiⁿyāⁿ nuuⁿndi chí ndaacadaamí yā yeⁿe nuuⁿndi yeⁿe yā.

Ejemplo yeⁿe saⁿā n'gaiyāā pródigo chi s'neeⁿ sa chiida sa

¹¹ Jesús ngaⁿa ntúuⁿ yā ejemplo 'cūū: 'Áámá saⁿā véé 'uūvī daiya sa. ¹² Saⁿā n'gaiyāā daiya sa chi 'lín ca miiⁿ caⁿa sá chii sá chiida sa: N'diī, chiidá, téé nī parte chi ituneeⁿ 'úú yeⁿe vaādi ngua'aá yeⁿe nī. Chiida sa ní nacaⁿá yā ní nca'a yā saⁿā chi parte yeⁿe sa. ¹³ Nguéé chi 'naaⁿ, saⁿā 'lín ca miiⁿ ní nadídaamá sá tanducuén^e déndu'ū yeⁿe sa. Ní cueⁿe yaⁿai sa táámá país. Mííⁿ ch'iinu diiⁿ sa gastar tanducuén^e ti diiⁿ sa nducuén^e chi nguεε n'daacā. ¹⁴ Ní taachi ch'iinu tuūmī yeⁿe sa tanducuén^e chi ca'a chiida sa, ndaā 'áámá cuiicu ch'εεte na país miiⁿ. Sáⁿā miiⁿ ní ch'eenū n'dai sa chiī caati nguéé chí che'e sa. ¹⁵ Saⁿā miiⁿ ní ndaā sa nanáán 'áámá 'iiⁿyāⁿ yeⁿe país miiⁿ. Ní caⁿa sa chi neⁿe sa diiⁿ sa ntiiⁿnyuⁿ. 'Iiⁿyāⁿ miiⁿ ní caⁿa yā chii yā saⁿa miiⁿ chi cueⁿe sa tan'dúúca mozo yeⁿe yā ní diiⁿ sa cuidado cuūchí s'eeⁿ yeⁿe yā. ¹⁶ Saⁿā miiⁿ ní nacádiinuuⁿ sa chí neⁿe sa che'e sa chi yeⁿe cuuchí s'eeⁿ caati mar 'áámá 'iiⁿyāⁿ nguéé ca'a yā de'ē vεε saⁿā. ¹⁷ Tuu'mi ní n'gaācu sa ní caⁿā sa nguaaⁿ maaⁿ sa: N'deeē n'dái mozos yeⁿe chiidá chí nge'e yā pan ní neenē n'deeē chí nge'e yā vεε, 'iicu 'muuⁿ 'úú ní idiíⁿ ntiiⁿnyuⁿ ní neⁿe 'cuūvi chi cuiicú. ¹⁸ N'daa cá 'muuⁿ. Naⁿá n'diichí chiidá ní caaⁿmáⁿ cuuvi 'iiⁿyāⁿ: N'diī chiidá véé nuūⁿndī yeⁿe nanáán Ndyuūs chi canéé na va'ai cheeti nguūvi ní nanáán n'diī. ¹⁹ 'Āā ntéé n'dai ca 'úú chi tuneē 'úú chi caaⁿmaⁿ nī chi daiya nī 'úú. Cu'neē nī 'úú tan'dúúca 'aama mozo yeⁿe nī. ²⁰ Tuu'mi ní cunaⁿā sa ndaā sa nanáán chiidā sa. Taachi indái ca nndaā sa, tuu'mi ní chiida sa ní n'diichí yā saⁿā ní nnee ya'āi 'iinú yā saⁿā. Chiida sa ní cueⁿe yā ngeenu yā naachi canéé sá ní tumaⁿá yā daiyá yā ní tuu'vi yā cheendi sa. ²¹ Daiya yā miiⁿ ní caⁿa sa chii sa chiida sa: N'diī, chiidá, véé nuūⁿndi yeⁿe nanáán Ndyuūs chi canee na va'ai cheeti nguūvi ndúúcu nanáán n'diī. 'Āā n'téé n'dai ca 'úú chí ituneeⁿ 'úú chi caaⁿmáⁿ nī chi daiya nī 'úú. ²² Naati chiida sa mííⁿ ní caⁿa yā chii yā mozos yeⁿe yā: Dii mozos, maaⁿ nch'εεté nūu tun'dáa di tfinūuⁿ chí n'dai ca ní cu'nuúⁿ di saⁿā daiyá. Ní ca'a di chiinūta'āa cunuuⁿ ta'ā sa ndúúcu ndaacuú chi cunuuⁿ ca'ā sa. ²³ Cuéⁿe di canguaiⁿ di itiindu 'lín chi 'viicheé. Ní 'caaⁿnuⁿ di 'iiti chi che'é 'nū. Ní dííⁿ 'nū 'viicu. ²⁴ Ti sán'a 'cūū daiyá cueⁿe sa yaⁿai ní 'āā tan'dúúca chi n'dií sá. Maaⁿ ní navaacunéē sa ní nduuchi sa. Ní tan'dúúca chí nindái sá ní ndaacā sa. Ní 'iiⁿyāⁿ s'eeⁿ ní yeenú taavi yā ní diíⁿ yā 'áámá 'viicu.

²⁵ Ní saⁿā daiyá yā chí vmnaaⁿ canee sa cuēti. Ní taachí ndaā níⁿnūuⁿ sa ná va'ai, ch'iindiveeⁿ sa chí itiivi saⁿā flauta ní 'iiⁿyāⁿ nde'ei yā. ²⁶ Tuu'mi ní saⁿā miiⁿ ní 'caī sa 'aama mozo ní itiinguuneeⁿ sa mozo miiⁿ de'ē chí véé. ²⁷ Mozo miiⁿ ní caⁿā sa chii sa 'iiⁿyāⁿ: 'Āā ndāā 'dínu nī. Ní nguéé de'ē vεε yeⁿe sa. Ní chiidá nī ní caⁿa ntiiⁿnyuⁿ yā chí ch'iī itiindu 'lín chi 'viiche. ²⁸ Saⁿā miiⁿ ní nduūvi taaⁿ sa. Nguéé 'cuuⁿ sa nndaā sa va'āi. Tuu'mi ní chiida sa miiⁿ ní cun'dáa yā va'āi ní di'cuítu yā daiya yā chí nuūⁿ ndaā sa va'āi. ²⁹ Naati saⁿā miiⁿ ní nán'guεεcútaⁿā sa yeⁿe chiida sa: 'Āā 'naaⁿ n'dái idichí'vē 'úú n'diī, ní diíⁿ tanducuén^e chí ngaⁿa nī ní mar 'áámá vmnéⁿēe nguéé tee nī mar 'áámá 'iiti cuūchí 'lín chi 'caaⁿnúⁿ ní diíⁿ 'viicu. Ní 'úú cuuvi yeenú ndúúcu amigos yeⁿe. ³⁰ Naatí taachi ndaā daiya nī sán'a 'cūū, 'níⁿnuúⁿ 'tuū'vī sa tanducuén^e chí vaadī n'guá'āa yeⁿe sa ndúúcu n'daataa s'eeⁿ chí véé saⁿā s'eeⁿ yeⁿe. Ní ngaⁿa ntiiⁿnyuⁿ nī chí mozos ch'iin'núⁿ yā itiindu 'lín chí 'viicheé chí che'e sa. ³¹ Tuu'mi ní chiida sa miiⁿ caⁿa yā chii yā saⁿā: Díí, daiyá, 'áámá canee di nduucú ní tanducuén^e dendu'ū chí yeⁿe ní yeⁿe di. ³² Canéé chí diiⁿ yú 'viicu ti saⁿā 'diinu di chí 'úú nacadiinú chí tan'duucā chí 'āā n'dií sá ní nduuchí sa. 'Āā nindāa sa na vacu yú ní maaⁿ ní ndaacā yú saⁿā.

16

Ejemplo yeⁿe 'áámá patrón chi nguéé n'daacā diiⁿ yā ndúúcu mozos yeⁿe yā

¹ Jesús ní caⁿa ntúuⁿ yā chii yā discípulos yeⁿe yā: 'Áámá dueño 'cuiica s'neéⁿ 'áámá mayordomo yeⁿe yán'āa yeⁿe yā. Náⁿā mozos ndaa sa nanáán dueño ní tun'dáa nuūⁿndi sa yeⁿe mayordomo miiⁿ ní ngaⁿā sa de'ē chí diiⁿ mayordomo chí nguεε n'daacā ndúúcu dendu'ū chí yeⁿe dueño. ² Tuu'mi ní dueño miiⁿ ní yaa'vi yā mayordomo yeⁿe yán'āa

ní caⁿa yā chii yā sáⁿā: N'diī, ¿de'ε 'túúcā n'giindiveéⁿ yeⁿe nī? Teé nī cuenta 'úú yeⁿe n'tiīnyuⁿ chi díⁿ nī tí 'āā ntéé cuuvi nī mayordomo. ³ Saⁿā mayordomo yeⁿe yáⁿāa miiⁿ nadicádíinuⁿ sa 'túúcā: ¿Taācā díⁿ maaⁿ caati dueño yeⁿe yáⁿāa ndiví yā 'úú yeⁿe chi mayordomo 'úú yeⁿe n'tiīnyuⁿ? Nguéé ditiīnu 'úú chí díⁿ n'tiīnyuⁿ chi n'gii ní nduuti chi caācá limosnas, 'cuinaáⁿ. ⁴ 'Āā deenú de'ε chí díⁿ ní taachi 'āā ntéé ngaⁿa n'tiīnyúⁿ yeⁿe mayordomo tuu'mi ní amigos yeⁿe 'cuaáⁿ yā 'úú na vaacu yā. ⁵ Tuu'mi ní mayordomo miiⁿ yaa'vi sa nducyáácá 'iiⁿyāⁿ chí cán'díícu yā yeⁿe dueño yeⁿe yáⁿāa yeⁿe yā ní caⁿa sa chii sa 'iiⁿyāⁿ vmnááⁿ vmnaaⁿ: ¿'Áá n'deēe cán'díícu di yeⁿe dueño? ⁶ Saⁿā miiⁿ ní caⁿa sa: 'Úú can'diicú 'áámá ciento toneles aceite. Tuu'mi ní mayordomo miiⁿ ní caⁿa sa saⁿā: Cuta'a dí caaca naachi canéé nguūⁿ yeⁿe di. Cuundi dí ní n'nee nguūⁿ di 'uūvī ngeεcu ndiichí toneles aceite. ⁷ Ch'iīnu maaⁿ ní caⁿa sa chii sa taama saⁿā: Díí, ¿'áá n'deēe cán'díícu di? Saⁿā miiⁿ ní caⁿa sa: 'Úú can'diicú 'áámá ciento maquilas yeⁿe trigo. Tuu'mi ní mayordomo miiⁿ caⁿa sa: Cuta'a dí caaca naachi canéé nguūⁿ yeⁿe di ní 'neeⁿ nguūⁿ di cuūⁿ ngeεcú maquilas. ⁸ Tuu'mi ní dueño miiⁿ tuumicádíinuⁿ yā yeⁿe mayordomo chí nguéé n'daacā ní chuuné listo sa ndúúcu asuntos yeⁿe sa. Ní dueño míⁿ caⁿa yā chii yā saⁿā: Tiempo miiⁿ sáⁿā chí snéé iⁿ'yeeⁿdí 'cūū nguéé n'daaca sa ní neene listo ca sa ndúúcu asuntos yeⁿe sa ndúúcu vaadī 'cuiica chí véé iⁿ'yeeⁿdí 'cūū nguéé ti 'iiⁿyāⁿ chí díⁿ yā chíⁿ chí Ndyuūs neⁿe yā chí snéé yā na deεve.

⁹ Cáāvā chuū 'úú ní ngaⁿá ngii nds'tiī: Ndúúcu vicios yeⁿe vaadi 'cuiica chí véé iⁿ'yeeⁿdí 'cūū díⁿ nī n'daacā ndúúcu 'iiⁿyāⁿ ti véé amigos yeⁿe nī caati taachi 'cuūvi nī 'iiⁿyāⁿ s'eeⁿ chí nnee nī ní ngaⁿá yā: N'dai nds'tiī ¿'áá cuuvi ndaa nī na va'ai chεeti nguūvi 'tíicā?

¹⁰ 'Iiⁿyāⁿ chí n'daacā idiíⁿ yā ndúúcu cosas chí 'lííⁿ 'tiicá ntúūⁿ n'daacā idiíⁿ yā ndúúcu cosas chí n'deēe n'dái ní n'geεε. ¹¹ Nduuti chí nds'tiī nguéé n'daacā idiíⁿ nī ndúúcu tuūmī chí véé iⁿ'yeeⁿdí 'cūū, ¿du'ú 'iiⁿyāⁿ cuuvi teé yā nds'tiī n'tiīnyuⁿ yeⁿe Ndyuūs chí n'tiīnyuⁿ yeⁿe vaadi 'cuiica chí véé chí yeⁿe Ndyuūs? ¹² Ndúúti chí nds'tiī ngeε n'daacā idiíⁿ nī ndúúcu dendu'ū chí véé yeⁿe taamá yā, ¿du'ú 'iiⁿyāⁿ téé yā chí véé yeⁿe nī?

¹³ Mar 'áámá saⁿā nguéé cuuvi diiⁿ sa mandados yeⁿe 'uūvī 'iivi sa; ti neⁿe ca sa 'aama yā nguéé ti taama yā, o n'daacā ca diiⁿ sa n'tiīnyuⁿ yeⁿe 'aama yā nguéé ti taama yā. Nds'tiī ní nguéé cuuvi dichíí'vε Ndyuūs nduuti chí neⁿe ca nī vaadī 'cuiica chí véé iⁿ'yeeⁿdí 'cūū.

¹⁴ 'Iiⁿyāⁿ fariseos n'giindiveéⁿ ntúūⁿ yā dendu'ū chí 'túúcā ngaⁿa Jesús miiⁿ ní 'iiⁿyāⁿ s'eeⁿ dinéⁿe n'dai yā tuūmī ní yaa'vi neeⁿ yā Jesús. ¹⁵ Jesús miiⁿ ní caⁿa yā chí yā 'iiⁿyāⁿ fariseos: Nds'tiī ní nadicádíinuⁿ nī chí nds'tiī ní 'iiⁿyāⁿ n'dai nds'tiī nanááⁿ saⁿā iⁿ'yeeⁿdí 'cūū naati Ndyuūs ní n'diichí yā staava yeⁿe nds'tiī. Chíⁿ chí 'iiⁿyāⁿ nadicádíinuⁿ yā chí ch'εεε ca, chíⁿ chí Ndyuūs díⁿ yā cuenta chí nguéé de'ε vεε.

Jesús ngaⁿa yā chí ley ní n'daacā

¹⁶ Ley yeⁿe Moisés ndúúcu chíⁿ chí 'cúeeⁿ profetas canee nanááⁿ nds'tiī ndí taachi ndaa Juan chí chεdínúūⁿ nī na iⁿ'yeeⁿdí 'cūū. Ndí tiempo miiⁿ 'iiⁿyāⁿ caⁿa yā nduudú n'dai chí ngai yeⁿe naachí Ndyuūs ngaⁿa n'tiīnyúⁿ yā ní nducyáácá 'iiⁿyāⁿ neⁿe yā cu'téénu yā nduudu miiⁿ.

¹⁷ Ngíⁿ'ii ca chí 'cuiīnu nanguuvi ndúúcu na yáⁿāa nguéé ti 'cuiīnū 'áámá letra 'lííⁿ yeⁿe ley.

Jesús ngi'cúeeⁿ yā yeⁿe divorcio

(Mt. 19.1-12; Mr. 10.1-12)

¹⁸ 'Āā du'ú nūūⁿ sáⁿā chí cū'neeⁿ sa n'daataá yeⁿe sa ní 'caandivaacu sá ndúúcu taama tá diiⁿ nuuⁿndí sa. Sáⁿā chí cúnee sá ndúúcu n'daataá chí s'neeⁿ tá isaⁿā yeⁿe tá 'āā dinuuⁿndí ntúūⁿ sa.

Yeⁿe sáⁿā 'cuiica ndúúcu saⁿā chí nguūvi Lázaro

19 Caⁿa Jesús: Tiempo chi chó'ōo canéé 'áámá saⁿā 'cuiica chí 'nuuⁿ sa catecai n'dai sa ní diiⁿ sá 'viicu. Ní nge'e sa cosas chi n'dai nguuvi nguuvi. 20 Canéé ntúūⁿ 'áámá saⁿā chi nguuvi sa Lázaro chí ngiica limosnas. Ní diituú n'duu'vi núúⁿmáⁿ cheete sa. Ní vee sa cheendi va'āi yeⁿ'é saⁿā 'cuiica miiⁿ. 21 Saⁿā miiⁿ ní neⁿ'e sa che'e sa cosas chi ingēe yeⁿ'e mesa yeⁿ'e saⁿ'a 'cuiicá miiⁿ. Ndaā 'yaānā s'eeⁿ naachi vee sa ní yaā'vi nēe tī naachí ya'āi yeⁿ'e Lázaro miiⁿ. 22 Cuayivi miiⁿ ní ch'iī Lázaro. Ángeles yeⁿ'é Ndyuūs candée yā Lázaro naachi canéé chiida yú Abraham na lugar paraíso chí yeⁿ'e 'iiⁿ'yāⁿ chí n'dái. Ch'iī ntúūⁿ saⁿ'a 'cuiica miiⁿ ní ch'iichi yā saⁿā. 23 Taachi sáⁿ'ā 'cuiica miiⁿ ch'eenu sa chí na infierno n'diichi sa cuaaⁿ 'niiⁿnuⁿ ní n'diichi sa chiida yú Abraham ndúú^{cū} Lázaro miiⁿ. 24 Tuu'mi ní 'caī saⁿ'ā 'cuiica miiⁿ: N'dií, chiidá Abraham, inneé ya'ai 'iinú nī 'úú, ní dichó'o nī Lázaro chí di'caandá yā tī nduuti tá'ā nguaaⁿ nuūⁿnīⁿ ní cun'duú yā na ch'iīyá ní di'caanda ch'iīyá ti neené n'geenú ngii ná nguuchi yaⁿ'ā 'cúū. 25 Abraham miiⁿ ní caⁿ'a yā chí yā saⁿ'ā: Díí, daiyá, n'gaacú di tí taachí canee dí iⁿ'yeēⁿdī miiⁿ ch'iīndī ndii n'dee n'dái chí n'daācā yeⁿ'ē di. Lázaro miiⁿ nguée vee yeⁿ'ē sa naati maaⁿ ní 'muuⁿ ní vee 'viich'ēētíⁿūⁿ yeⁿ'ē sa ní díí ní 'cuéénú dí cuuvi miiⁿ. 26 Mííⁿ vee 'áámá yííⁿ yáⁿāa chí neene ch'ēete nguaaⁿ nús'uu ndúú^{cū} ndís'tiī. 'Iiⁿ'yāⁿ chí neⁿ'e yā chó'o yā ndii 'muuⁿ ndíí naachi snée ndís'tiī nguée cúúví dííⁿ yā. Ndíí nguée ndúú 'iiⁿ'yāⁿ chí snée yā taa nguée cuuví cho'o yā ní ndaā yā naachi snée 'nū. 27 Tuu'mi ní saⁿ'ā 'cuiica mííⁿ ngaⁿ'ā sa: N'dií, chiidá Abraham, idi'cuítú n'dií chí dichó'o nī Lázaro iⁿ'yeēⁿdī ndii vaacu chiidá, 28 ti vee nyuⁿ'u 'diinú chí saⁿ'ā miiⁿ ní Lázaro cuuvi sa 'diinú chí nguée ndaa yā lugar 'cūū chí 'cueenu yā cuuvi. 29 Abraham miiⁿ ní caⁿ'a yā chí yā saⁿ'a: Cane nguūⁿ na libro yeⁿ'é Ndyuūs naachi canee nguūⁿ yeⁿ'e Moisés miiⁿ ndúú^{cū} profetas ní cuuví yā 'iiⁿ'yāⁿ chí 'caandiveén yā yeⁿ'é 'iiⁿ'yāⁿ s'eeⁿ. 30 Tuu'mi ní saⁿ'ā 'cuiica miiⁿ ní caⁿ'ā sa: N'dií, chiidá Abraham, nguée n'giindiveén yā yeⁿ'e yā. Ndúúti chí 'áámá 'iiⁿ'yāⁿ chí 'āā n'dii caⁿ'a yā nanááⁿ 'diinú, tuu'mi ní 'caandiveén yā yeⁿ'é 'iiⁿ'yāⁿ miiⁿ ní ndaacadaamí yā yeⁿ'ē nuuⁿndi chí dííⁿ yā. 31 Abraham miiⁿ ní caⁿ'a yā chí yā saⁿ'a 'cuiica: Ndúúti chí nguée cu'téenu yā chí canéé nguūⁿ na libro yeⁿ'é Ndyuūs yeⁿ'e Moisés ndúú^{cū} 'iiⁿ'yāⁿ profetas ndíí cuááⁿ vmaaaⁿ, nguée cu'téenu ntúūⁿ yā yeⁿ'é 'iiⁿ'yāⁿ 'cúū chí cuuví yā 'iiⁿ'yāⁿ s'eeⁿ 'áará chí 'iiⁿ'yāⁿ 'cúū ncuéeⁿ yā yeⁿ'e nguaaⁿ tinaⁿ'ā.

17

Jesús ngi'cueeⁿ yā chí nguée canee chí diiⁿ yú nuuⁿndi

(Mt. 18.6-7; 21-22; Mr. 9.42)

1 Jesús caⁿ'a yā chí yā discípulos yeⁿ'e yā: Cuaacu níⁿnyúⁿ chí vee de'e cáávā chí diiⁿ chí 'iiⁿ'yāⁿ dinuuⁿndi yā naati de'e chúú^{cā} ya'ai yeⁿ'e 'iiⁿ'yāⁿ chí dííⁿ yā chí taama 'iiⁿ'yāⁿ dinuuⁿndi yā. 2 N'daacā ca chí cuuvi 'túú^{cā} ndúú^{cū} 'iiⁿ'yāⁿ miiⁿ. 'Iiⁿ'yāⁿ s'eeⁿ caāchiichí yā 'áámá tuū yúú^{dú} chí inguúⁿ 'iiⁿ'yāⁿ na daandu 'iiⁿ'yāⁿ miiⁿ ní 'caanuú yā 'iiⁿ'yāⁿ miiⁿ naachi yāānūⁿ yeⁿ'ē nuuⁿni'yáⁿ'ā ní nguée cuuvi diiⁿ 'iiⁿ'yāⁿ miiⁿ chí taama da'caiyāā idinuuⁿndi yā.

3 Cundée ndís'tiī cuidado. Ndúúti 'dííⁿu nī dinuuⁿndí sa contra yeⁿ'e 'aama nī, yaa'vi neén nī saⁿ'ā. Ndúúti chí ndaacadaami sa yeⁿ'ē nuuⁿndi yeⁿ'ē sa nadich'ēccū nī yeⁿ'ē sa. 4 'Áará chí ndēēchē cuuvi idinuuⁿndí sa contra yeⁿ'e nī 'áámá nguuvi ní ndēēchē cuuvi ndaa sa nanááⁿ ndís'tiī ní caaⁿ'maⁿ sa cuuvi sá ndís'tiī: Ndaacadaamí yeⁿ'ē nuuⁿndi yeⁿ'é, tuu'mi ní nadich'ēccū nī yeⁿ'ē sa.

Poder yeⁿ'ē vaadī i'teenu

5 Apóstoles caⁿ'a yā chí yā Señor Jesús: N'dií, Señor, dííⁿ nī chí nús'uu cuuvi cu'téenu cá 'nū.

6 Tuu'mi Jesús caⁿ'a yā chí yā apóstoles: Ndúúti chí ndís'tiī duu'vi i'téenu nī, tuu'mi ní vaadī i'teenu yeⁿ'é nī ní tan'dúú^{cā} 'áámá nduuti yeⁿ'ē yīivē ntíí'yaá. Ní cuuvi caaⁿ'maⁿ nī 'tíí^{cā} ndúú^{cū} yáⁿ'á: Díí yáⁿ'á cuví dí 'muuⁿ ní cueⁿ'e di ná nuūⁿnīⁿyáⁿ'ā. Ní 'caandiveén yáⁿ'á miiⁿ yeⁿ'e dii.

Yeⁿe táácā cuuvi diiⁿ yú ntiiⁿnyuⁿ ndúúcu Ndyuūs 'iivu yú

⁷ Ngaⁿa Jesús: Du'u ndís'tiī ndúútī chi vεε 'áámá mozo chi di'cuūndú 'iiti o diiⁿ sa cuidado 'iiti cuūchī yeⁿe nī taachi nguεεcunée sa yeⁿe campo miiⁿ, ¿'áá hora mííⁿ nūuⁿ caaⁿmaⁿ nī cuuvi nī saⁿā?: Cho'o di 'cuūndī di na mesa. ⁸ ¿'Áá nguéeⁿ vmnááⁿ vmnaaⁿ caaⁿmaⁿ nī cuuvi nī mozo miiⁿ 'tíicā?: N'nuuⁿ di chi che'e nguiinu yú. Ní 'cuiinduū di yeⁿé na mesa, 'cuii di ní 'úú cu'ú che'é. 'Cuiinu che'é 'cuiinu cu'ú tuu'mi ní dii cuuvi ché'e di cu'u di. ⁹ ¿'Áá aama patrón nca'a yā gracias mozo miiⁿ ti diiⁿ sa mandados chi cāⁿa patrón yeⁿé sa? Nguéeⁿ díⁿ yā 'tíicā. ¹⁰ 'Tiicá ntúūⁿ, ndís'tiī, taachí 'cuiinu díⁿ nī tanducuéⁿé ntiiⁿnyuⁿ chí ngaⁿá Ndyuūs ndís'tiī, tuu'mi ní caaⁿmaⁿ nī 'tiicā: Ndyuūs, nús'uu ní mozos yeⁿe nī naati nús'uu ní díⁿ 'nū dámaāⁿ chi canee chi díⁿ 'nū.

Jesús idiíⁿ yā chi nduūvā yeⁿe ndiichi 'iiⁿ'yāⁿ yeⁿe ca'āi lepra chi ín'duuti yuūtē yeⁿe yā

¹¹ Taachí Jesús miiⁿ canúuⁿ yā yúúⁿ chí cueⁿe yā na yāā Jerusalén, cho'ó yā naavtaⁿā yeⁿe na 'uuvī yáⁿāa chi Samaria ndúúcu Galilea. ¹² Ní taachí Jesús sndaā yā 'áámá yāā 'lííⁿ snéeⁿ ndiichi saⁿā chí induuti yuūtē yeⁿé sa chí ndii sa ca'ai lepra. Ndaā sa nanááⁿ Jesús miiⁿ ní ch'ééⁿtíndii yaⁿai sa. ¹³ Ní 'cai sa: N'diī, 'iivú Jesús, nnéeⁿ ya'ai 'iinu nī nús'uu.

¹⁴ Taachí Jesús n'diichi yā saⁿā s'eeⁿ, tuu'mi ní yaa'vi yā: Ndís'tiī, cueⁿe nī ní 'cuuⁿ'miⁿ nī nanááⁿ chiiduú s'eeⁿ. Ch'íínú caⁿa Jesús ndúúúⁿ 'cūū saⁿā s'eeⁿ ní nduuvá yeⁿe sa. ¹⁵ Tuu'mi 'áámá chééⁿ saⁿā s'eeⁿ taachí n'diichi yā chí 'āā nduuvá yeⁿe yā, nguεεcunée yā ní cheⁿe yā naachi canéeⁿ Jesús miiⁿ ní caⁿa yuudu yā: De'ē chúúⁿcā ch'εete Ndyuūs. ¹⁶ Ní chiintii'yā yā nanááⁿ Jesús ní chí snaaⁿ na yáⁿāa, ní ca'a yā gracias 'iiⁿ'yāⁿ. Saⁿā miiⁿ ní 'áámá saⁿā yeⁿe yáⁿāa Samaria. ¹⁷ Tuu'mi ní Jesús miiⁿ caⁿa yā: ¿'Áá nguεε ndiichi saⁿā chí nduūvā yeⁿé sa? Ta nuuⁿ sa, ¿tíi snéeⁿ sa? ¹⁸ ¿'Áá nguεε táámá yā chí canéeⁿ chí caaⁿmaⁿ yā chí ch'εete Dendyuūs? Dámaāⁿ saⁿā miiⁿ chí canuuⁿ yúúⁿ chí ca'a sa gracias.

¹⁹ Tuu'mi ní Jesús caⁿa yā chí yā saⁿā chí ngiita miiⁿ: Nducueⁿ dí. Cúnaⁿā di. 'Āā nanduuva yeⁿé di caati i'téenu nī.

Yeⁿe taaca Ndyuūs ngaⁿa ntiiⁿnyúⁿ yā

(Mt. 24.23-28, 36-41)

²⁰ Taachí 'iiⁿ'yāⁿ fariseos intínguúneeⁿ yā Jesús miiⁿ: ¿Tíi cua'a ndáá naachí Ndyuūs ngaⁿa ntiiⁿnyúⁿ yā? Jesús miiⁿ ní nan'guεεcútaⁿa yā: Naachí Ndyuūs ngaⁿa ntiiⁿnyúⁿ yā nguéeⁿ ndaa tan'dúúⁿcā 'áámá manera chí ndís'tiī cunee ngiinu nī yeⁿé. ²¹ Ní nguéeⁿ ndúú 'iiⁿ'yāⁿ caaⁿmaⁿ ra yā 'tíicā: 'Muuⁿ canee o miiⁿ canee ti Ndyuūs 'āā ngaⁿa ntiiⁿnyúⁿ yā nguaaⁿ ndís'tiī.

²² Tuu'mi ní Jesús caⁿa yā chí yā discípulos yeⁿe yā: Tiempo miiⁿ ndaa nguuvi taachi ndís'tiī neⁿe nī snaaⁿ nī taachi canéeⁿ Saⁿā chí Daiya Dendyuūs, naati nguéeⁿ snaaⁿ nī saⁿā miiⁿ. ²³ Ní 'iiⁿ'yāⁿ caaⁿmaⁿ yā cuuvi yā nduudu yaadí ndís'tiī: 'Muuⁿ canéeⁿ Saⁿa chí Daiya Dendyuūs, o miiⁿ canee sa. Nguéeⁿ caⁿa nī ndíí nguéeⁿ ndúú can'dáa nī 'iiⁿ'yāⁿ cuayiivi. ²⁴ Tan'dúúⁿcā chí inaaⁿ yú chí ngéⁿé 'cuai maaⁿ ncheeté nūuⁿ ngiiyā, 'tiicá ntúūⁿ cuuvi taachi 'úú chí Saⁿā chí Daiya Dendyuūs ndaa nguuvi miiⁿ. ²⁵ Naati vmnááⁿ vmnaaⁿ 'úú chí Saⁿā chí Daiya Ndyuūs ní neené 'cueenú cuuvi. Ní 'iiⁿ'yāⁿ chí maaⁿ snéeⁿ iⁿ'yeeⁿdí 'cūū díⁿ yā condenar 'úú. ²⁶ Tan'dúúⁿcā chí canee tiempo chí 'āā chó'oo taachí canee saⁿā Noé iⁿ'yéⁿdi 'cūū, 'tiicá ntúūⁿ cuuvi tiempo yeⁿé Saⁿa chí Daiyā Dendyuūs taachi ndaa sa. ²⁷ Tiempo yeⁿe Noé 'iiⁿ'yāⁿ s'eeⁿ ngéⁿe yā ngi'i yā ní n'gíindivaacu yā. Ní ca'a yā daiya yā chí n'gíindivaacu ndii nguuvi chí Noé sndaá yā na arca. Tuu'mi ní chee taaⁿ cuūvī ní chíitu iⁿ'yeeⁿdí 'cūū ndúúⁿcū nūⁿnīⁿ ní ch'iī nducyaaca 'iiⁿ'yāⁿ. ²⁸ 'Tiicá ntúūⁿ chíi tiempo chí 'āā chó'oo taachi canee saⁿa Lot iⁿ'yeeⁿdí 'cūū. 'Iiⁿ'yāⁿ s'eeⁿ nge'e yā ngi'i yā. Ngai yā ní n'diicui yā. Ní ngiinu yā ní idin'dái yā vacu yā. ²⁹ Taachi can'daā saⁿā Lot miiⁿ ná yāā Sodoma chí cheeⁿ nguuchi yaⁿā ndúúⁿcū azufre chí tuūú chí ngiichi chí yeⁿe nanguuvi. Cáávā chuū ch'iī nducyaaca 'iiⁿ'yāⁿ na yāāⁿ miiⁿ. ³⁰ 'Tíicā cuuvi nguuvi miiⁿ taachi 'úú Saⁿā chí Daiya Dendyuūs ndaa taama vmnéⁿé.

³¹ Ní nguūvī chi ndaá, taachí 'ii'nyān chi snée yā tiín va'āi n'daacā ca chi 'ii'nyān miiⁿ ní nguéé nch'éeⁿ yā ní cuta'a yā dendu'ū chi véé yeⁿe yā chēetí va'āi. 'Tiicá ntúūⁿ 'ii'nyān chi snée yā cuēeti n'daacā ca chi nguéé naⁿa yā nduvaacu yā. ³² Nan'gáacú nī tan'dúucā chí ch'iī n'daataa yéⁿe saⁿā Lot. ³³ 'Āā du'ú nūuⁿ 'ii'nyān chí neⁿe cá yā vida yeⁿe yā nguéé ti 'úú, dindaí yā táámá vida yeⁿe yā. 'Āā du'ú nūuⁿ 'ii'nyān chí dichí'vē yā 'úú ní dindaí yā vida yeⁿe maáⁿ yā cucáavā 'úú, ní nndaacá yā táámá vida yeⁿe yā.

³⁴ 'Úú ngaⁿá ngí ndís'tiī chi nguiīnū miiⁿ 'uuvi yā chi ndiiti yā na 'áámá cama, 'aama yā ní ndaā naáⁿ ní taama yā ní canée yā. ³⁵ Níicú naachi 'uuvi n'daataá daama snee ta ingúu tá, 'aama ta ní ndaā naáⁿ tá ní taama tá ní canee ta. ³⁶ Naachí 'uūvi yā snée yā cuēeti, 'áámá yā ní ndaā naáⁿ yā, níicú taama yā ní canee yā.

³⁷ Taachí 'ii'nyān s'eeⁿ ch'iindiveéⁿ yā chuū itinguuneéⁿ Jesús: Señor, ¿tií cuuví chuū? Jesús miiⁿ ní caⁿa yā yeⁿe tiempo miiⁿ: Naachi candiití cuerpo yeⁿe tináⁿā, miiⁿ ní nduuvidaamá luutí ní che'e tī, tuu'mi ní cuuví chuū.

18

Ejemplo yeⁿe n'daataa nguá'āa chi cueⁿe tá nanaaⁿ juez ndúucū 'áámá asunto

¹ Jesús caⁿa yā 'aama ejemplo chi 'téé nguéé daama yeⁿe chi 'ii'nyān canée chi caaⁿmaⁿngua'á yā cuéⁿe daāⁿmaⁿ nguéé ndúucū vaadī 'daan'di. ² Ní caⁿa yā chii yā 'ii'nyān s'eeⁿ ejemplo 'cūū: Canée 'áámá juez na 'aama yāāⁿ chí nguéé 'va'a sa Dendyuūs. Ní ndí nguéé ndúú idiiⁿ rá yā respetar 'ii'nyān chi ch'iindiveéⁿ yā asuntos yeⁿe yā. ³ Canée ntúūⁿ na yāāⁿ miiⁿ 'áámá n'daataa nguá'āa chi ndaa yā nguuvi nguuvi nanááⁿ juez miiⁿ ní ngiica tá justicia juez yeⁿe 'ii'nyān chi taaⁿ ndúucu tá. ⁴ Juez miiⁿ ní nguéé 'cuuⁿ yā 'naaⁿ tiempo naati cuayiivi nadicádiinuⁿ yā: 'Áará chí nguéé 'va'á Dendyuūs ndí nguéé ndúú idiiⁿ rá respetar 'ii'nyān, ⁵ naati n'daataa nguá'āa 'cūū nééné ididú'ū ta 'úú ní maaⁿ ní caⁿá díⁿ n'daacā ndúucū tá chí 'āā ntéé candiī tá dindú'u ta ti 'cuiinu paciencia yeⁿe.

⁶ Naati Señor miiⁿ caⁿa yā: 'Caandiveéⁿ nī chí ngaⁿā juez chí nguéé n'daacā táacā idiíⁿ yā. ⁷ ¿'Áá Ndyuūs nguēe nnee ntúūⁿ yā 'ii'nyān chí ndēve yā, 'ii'nyān chí caaⁿmaⁿngua'á yā ndii nguuvi ndí n'gaaⁿ ní Ndyuūs díⁿ yā castigar 'ii'nyān chí contra yeⁿe 'ii'nyān chí ndēve yā? ¿'Áá cuuvi 'naaⁿ Ndyuūs chí cunnee yā 'ii'nyān? Nguéé 'tíicā. ⁸ 'Úú ní ngaⁿá ngí ndís'tiī chí Ndyuūs maaⁿ nch'ēeté nadanguáⁿai yā 'ii'nyān. Naati taachi 'úú chí Saⁿā chí Daiya Dendyuūs ndaá, ¿'áá nndaaca ntúūⁿ 'ii'nyān chí i'téenu yā Ndyuūs ná iⁿ'yeeⁿdí 'cūū?

Saⁿā fariseo ndúucu saⁿā chí inn'guēe yeⁿe yáⁿāa

⁹ Jesús caⁿa yā ejemplo 'cūū chí 'téé nguéé dáámá caava n'dúuví 'ii'nyān chí idin'gēeté maáⁿ yā ní nguéé díⁿ yā respetar tanáⁿā 'ii'nyān. Ní caⁿa yā: ¹⁰ Na 'úuví saⁿā cheⁿe sa yáacū templo chí caaⁿmaⁿngua'ā sa. 'Aama sa ní saⁿā fariseo, taama sa ní saⁿā chí inn'guēe yeⁿe yáⁿāa. ¹¹ Saⁿā fariseo chí ndii sa ní 'túucā caⁿangua'a sa: N'dí Señor, nteé gracias n'diī ti 'úú ní nguéé tan'dúucā tanáⁿā saⁿa 'cūū. 'Úú nguéé ididuucú, nguéé yáádí'yā 'úú, nguéé caⁿá ndúucū taama n'daataá chí nguēe n'daataá yeⁿe, nguéé idiíⁿ tan'dúucā chí idiíⁿ saⁿa 'cūū chí inn'guēe sa yeⁿe yáⁿāa. ¹² 'Úú ní nguéé nga'diīⁿnuⁿ 'uūvī cuuvi 'áámá ndēete taachi caaⁿmaⁿngua'á. 'Úú ní teé décima yeⁿe tanducuéⁿe chí véé yeⁿe chí lado yeⁿe Ndyuūs chiiⁿ chí tunéⁿ Ndyuūs. ¹³ Naati saⁿā chí inn'guēe yeⁿe yáⁿāa yaⁿai canee sa ní nguéé neⁿe sa snaaⁿ sa nánguuvi. Dámaāⁿ chí n'geⁿe sá niiⁿnuⁿ sa ní ngaⁿā sa: N'dí Ndyuūs, ya'ai iinu nī 'úú, ti 'úú 'ii'nyān nuūⁿndí 'úú. ¹⁴ 'Úú ngaⁿá ngí ndís'tiī: Sáⁿa 'cūū cunaⁿā sá ndavaacu sa ní Ndyuūs nadich'ēecú yā nuūⁿndí yeⁿe sa. Saⁿā fariseo miiⁿ nguéé 'tíicā. 'Āā du'ú nūuⁿ 'ii'nyān chí dich'ēeté maāⁿ, cuuví yā ndicūⁿ nanááⁿ Ndyuūs. Ní 'ii'nyān chí nguéé dich'ēeté maáⁿ yā 'ii'nyān, Ndyuūs dich'ēeté yā 'ii'nyān miiⁿ.

*Jesús idi'viicú yā da'caiyāa
(Mt. 19.13-15; Mr. 10.13-16)*

¹⁵ 'Iiⁿ'yāⁿ ní candee yā da'cáiyāa nanaáⁿ Jesús ní 'iicu Jesús tuu'ví yā da'cáiyāa. Taachí discípu^los yeⁿ'e Jesús n'diichi yā chuū, yaa'vi née yā 'iiⁿ'yāⁿ s'eeⁿ chí indáa yā ndúú^cú dá'caiyāa. ¹⁶ Tuu'mi ní Jesús yaa'vi yā discípu^los yeⁿ'e yā ní caⁿ'a yā: 'Cuááⁿ nī chí dá'caiyāa chí yā nanaáⁿ. Nguéé 'caaca taaⁿ nī caati naachí Ndyuūs ngaⁿ'a ntiⁿ'nyúⁿ yā ní yeⁿ'e 'iiⁿ'yāⁿ chí ndiicuúⁿ yā tan'dúú^cá dá'caiyāa. ¹⁷ Cuaacu níⁿ'nyúⁿ ngaⁿ'á ngíí ndí^s'tíi: 'Iiⁿ'yāⁿ chí nguéé cu'téenu yā Ndyuūs tan'dúú^cá 'áámá dá'caiyāa i'téenu yā nguéé cuuvi ndaa yā naachí ngaⁿ'a ntiⁿ'nyuⁿ yā.

*'Áámá saⁿ'ā chí 'cuiica ndeē sa ndúú^cú Jesús
(Mt. 19.16-30; Mr. 10.17-31)*

¹⁸ 'Áámá saⁿ'ā chí ngaⁿ'ā ntiⁿ'nyuⁿ sa itínguuneeⁿ sa Jesús miiⁿ: N'dií, Maestro chí n'dai, ¿de'ē cuuvi diíⁿ ní ndaācá vida cueⁿ'e daāⁿ'maⁿ chí cuuvi yeⁿ'é?

¹⁹ Jesús ní caⁿ'a yā chí yā saⁿ'ā: ¿De'ē cúúví chí ngaⁿ'a di ngii di 'úú chí 'úú n'daí 'úú? Mar 'áámá 'iiⁿ'yāⁿ nguéé n'dai yā, dámaāⁿ Dendyuūs. ²⁰ Dii ní déenu di chí canéé nguūⁿ na ley 'tíicā: Nguéé 'caāⁿ'nūⁿ di; nguéé caⁿ'a di ndúú^cú táámá n'daataá chí nguεε yeⁿ'ē di; nguεε diduucú di; nguéé caaⁿ'maⁿ di nduudu yaadi ndúú^cú mar 'áámá 'iiⁿ'yāⁿ; dinéⁿ'e di ch'εεcu di ndúú^cú chíida di.

²¹ Saⁿ'ā miiⁿ n'guεεcútaⁿ'ā sa ní caⁿ'ā sa: Tanducueⁿ'ē chuū 'āā idiíⁿ taachi saⁿ'ā 'lííⁿ 'úú.

²² Taachí Jesús ch'iindiveéⁿ yā chuū, caⁿ'a yā chí yā saⁿ'ā: Véé 'áámá cosa nūⁿ chí canéé chí diíⁿ di. N'diicu di tanducueⁿ'ē chí véé yeⁿ'ē di ní ca'a di 'iiⁿ'yāⁿ chí nguéé yeⁿ'e yā, ní ndaācā chí véé vaadī 'cuiica na va'ai cheeti nguuvi chí cuuvi yeⁿ'ē di. Ní cuchí di ní caⁿ'a di nduucú.

²³ Taachí saⁿ'ā miiⁿ ch'iindiveeⁿ sá chuū, neené s'neeⁿ ndaachí yíinú sa, ti neené 'cuiica sa. ²⁴ Ní taachí Jesús n'diichi yā saⁿ'ā miiⁿ chí neené s'neeⁿ ndaachi yíinú sa, tuu'mi ní caⁿ'a yā: De'ē chúú^cá ngíⁿ'íi chí cundaa 'iiⁿ'yāⁿ chí 'cuiica naachí Ndyuūs ngaⁿ'a ntiⁿ'nyúⁿ yā. ²⁵ Ní tan'dúú^cá ejemplo 'cūū 'tíicā. Nguéé ngíⁿ'íi cá yeⁿ'e 'áámá 'iiti camello chí ch'εεte cá ti 'yúú^dúu chí cho'ó tī nduutinááⁿ 'iini chí cheendi va'ai 'lííⁿ nguéé ti 'aama saⁿ'ā chí 'cuiica i'téenu sa Ndyuūs ní cundáa sa na va'ai cheeti nguuvi.

²⁶ Taachi discípu^los n'giindiveéⁿ yā chuū, caⁿ'a yā: ¿Du'ū cuuvi nánguaⁿ'āi?

²⁷ Ní Jesús caⁿ'a yā: Saⁿ'ā iⁿ'yeeⁿdí 'cūū nguéé ngíí diiⁿ sa chuū naati Ndyuūs cuuvi diíⁿ yā tanducueⁿ'ē.

²⁸ Tuu'mi ní Pedro miiⁿ ní caⁿ'a yā: Señor, cuin'dííⁿ chí nī. Nús'uu ní s'neeⁿ 'nū chí véé yeⁿ'é 'nū, ní cuchí 'nū ndúú^cú nī.

²⁹ Jesús miiⁿ ní caⁿ'a yā chí yā 'iiⁿ'yāⁿ s'eeⁿ: Cuaacu níⁿ'nyúⁿ ngaⁿ'á ngíí ndí^s'tíi chí 'āā du'ú nūⁿ 'iiⁿ'yāⁿ chí cu'nee yā vacu yā, o chíidá yā, o cheécú yā, o 'dííⁿu yā, o n'daataa yeⁿ'e yā, o daiya yā, cáávā chí diíⁿ yā ntiⁿ'nyuⁿ yeⁿ'é naachí Ndyuūs ngaⁿ'a ntiⁿ'nyúⁿ yā, ³⁰ 'iiⁿ'yāⁿ miiⁿ n'deē ca ndaācā yeⁿ'e yā ná iⁿ'yeeⁿdí 'cūū. Ní cuayiivi ní ndaacá yā vida cueⁿ'e daāⁿ'maⁿ ná va'ai cheeti nguuvi.

*Jesús ngaⁿ'a yā chí 'cuuvi yā
(Mt. 20.17-19; Mr. 10.32-34)*

³¹ Jesús cueⁿ'e yā 'áámá lado ndúú^cú ndu'ū ndiichúúví discípu^los yeⁿ'e yā ní caⁿ'a yā chí yā 'iiⁿ'yāⁿ s'eeⁿ: Maaⁿ ní caⁿ'ā yú na yááⁿ Jerusalén ní miiⁿ cúnuuⁿ ca'a tanducueⁿ'ē chí profetas díngúuⁿ yā ndíí cuááⁿ vmnaaⁿ yeⁿ'e 'úú chí Saⁿ'ā chí Daiya Dendyuūs. ³² Ní 'iiⁿ'yāⁿ s'eeⁿ diíⁿ yā entregar 'úú 'iiⁿ'yāⁿ chí nguéé yeⁿ'e ndaata Israel. Ní 'iiⁿ'yāⁿ s'uuⁿ ní dūūchinéⁿ yā 'úú ní diiⁿ taaⁿ yā nduucú níicú ca'a neeⁿ daíⁿ yā 'úú. ³³ 'Cuííⁿú 'cueⁿ'é yā 'úú ní 'caaⁿ'núⁿ yā 'úú naati 'cuííⁿú 'iínū nguuvi ní nnduūchí yeⁿ'e nguaaⁿ tináⁿ'ā.

³⁴ Discípu^los s'eeⁿ nguéé tuumicádíínuuⁿ yā yeⁿ'é dendū'u 'cūū ti canúúⁿ n'de'ei yeⁿ'e 'iiⁿ'yāⁿ s'eeⁿ. Nguéé tuumicádíínuuⁿ yā de'ē chí caⁿ'a Jesús.

*Jesús diiⁿ yā chí nduūvā yeⁿ'e 'áámá saⁿ'ā chí ngeenaáⁿ yeⁿ'e yááⁿ Jericó
(Mt. 20.29-34; Mr. 10.46-52)*

³⁵ Taachí Jesús ndaā niinuuúⁿ yā na yāāⁿ Jericó, 'áámá saⁿā ngueenááⁿ véé sa niinuuúⁿ cyúúni. Ngiica sá limosnas. ³⁶ Sáⁿa 'cūū tááchí ch'iindiveeⁿ sa chí cho'ó n'deē n'dái 'iiⁿyāⁿ, itinguunééⁿ sá: ¿D'é ē chí chíi?

³⁷ Ní 'iiⁿyāⁿ caⁿa yā chíi yā saⁿā chí ngueenááⁿ chí chó'oo Jesús chí yeⁿē yāāⁿ Nazaret.

³⁸ Tuu'mi ní saⁿā nguénaaⁿ miiⁿ 'caī sa: N'dií Jesús, Daiya David, nneé ya'ai 'iinu nī 'úú.

³⁹ 'iiⁿyāⁿ chí cueⁿe vmnaaⁿ yeⁿe Jesús ngaⁿa yā ngii yā saⁿā miiⁿ chí 'āā ntéé 'cuaī sa, naati saⁿā miiⁿ ní n'gaī yiicu ca sa: N'dií, Daiya David, nneé ya'ai 'iinu nī 'úú.

⁴⁰ Tuu'mi ní Jesús miiⁿ chééndii yā ní caⁿa yā chí canguai yā saⁿa chí nguéé inaaⁿ. Taachí saⁿā miiⁿ ndaā sa nanááⁿ Jesús, Jesús miiⁿ ní itinguunééⁿ yā saⁿā: ⁴¹ ¿D'é ē neⁿe di chí diíⁿ ndúúcu dii? Saⁿā miiⁿ ní caⁿā sa: Señor, diíⁿ nī chí snāaⁿ.

⁴² Jesús caⁿa yā chíi yā saⁿā: Cáávā chí i'téenu di nduūvā yeⁿē di.

⁴³ Tuu'mí nūuⁿ snaāⁿ sa ní cuéⁿe sa ndúúcu Jesús. Ní ngaⁿa sa: D'e'ε chúúca ch'εete Ndyuūs. Ní nducyaaca 'iiⁿyāⁿ yeⁿe yāāⁿ miiⁿ chí n'diichí yā chuū ní caⁿa yā: D'e'ε chúúca ch'εete Dendyuūs.

19

Jesús ndúúcu saⁿā chí nguuvi Zaqueo

¹ Taachí Jesús sndaā yā na yāāⁿ Jericó, cánúuⁿ yā yúúni ní cho'ó yā náávtaⁿā yāāⁿ Jericó miiⁿ. ² Na yāāⁿ miiⁿ canee 'áámá saⁿā chí 'cuiica sa chí nguuvi sa Zaqueo. Saⁿā miiⁿ, ní saⁿā ndíí tiiⁿ yeⁿé 'iiⁿyāⁿ chí inn'guεe yeⁿe impuestos yeⁿe yáⁿāa. ³ Saⁿa miiⁿ ní neⁿe sa snaaⁿ sa chéé yā chí Jesús miiⁿ naati nguéé ngii inaaⁿ sa ti neené n'deē 'iiⁿyāⁿ ti nguéé yaacu sá. ⁴ Tuu'mi ní cueⁿe sa ngéenu sa cuááⁿ vmnaaⁿ ní cucheε sá 'áámá tiiⁿ yáⁿá sicómoro caati cuuvi sa snaaⁿ sa 'iiⁿyāⁿ, ti Jesús miiⁿ canee chí cho'ó yā miiⁿ. ⁵ Taachí Jesús miiⁿ ndaá yā miiⁿ, n'diichí yā Zaqueo miiⁿ, ní caⁿa yā chíi yā saⁿā: Díí, Zaqueo, maaⁿ nch'εete nūuⁿ nch'éeⁿ dí ti maaⁿ ní neⁿé cuneé na vaacu dí.

⁶ Tuu'mí ní Zaqueo miiⁿ maaⁿ nch'εete nūuⁿ nch'eeⁿ sa ní 'cuuⁿ sa chí cueⁿe Jesús miiⁿ ndúúcu sa na vaacu sa. Ní yeenú taavi sa. ⁷ Taachí 'iiⁿyāⁿ n'diichí yā chuū, nducyaaca yā ní neené n'deē caⁿa yā. Ní caⁿa yā chí Jesús miiⁿ ní chinndaá yā chí cunee yā ndúúcu 'aama saⁿā chí véé nuuⁿndi yeⁿē sa. ⁸ Tuu'mi ní taachi ch'iindiveeⁿ Zaqueo chuū, chééndii sa nanááⁿ Jesús miiⁿ ní caⁿa sá chíi sa 'iiⁿyāⁿ: Señor, 'caandiveéⁿ nī yeⁿé. Ná maⁿa chí véé yeⁿé ca'á 'iiⁿyāⁿ chí nguéé yeⁿe yā. Ndúúti chí d'e'ε ndivií yeⁿē 'áámá 'iiⁿyāⁿ, tuu'mi ní n'guεecunee cuūuⁿ tanto yeⁿe yā.

⁹ Jesús caⁿa yā chíi yā saⁿā: Maaⁿ ní nnguá'ái 'iiⁿyāⁿ yeⁿe va'ai Zaqueo yeⁿe nuuⁿndi yeⁿe yā ti Zaqueo miiⁿ ní yeⁿe ndaata Abraham. ¹⁰ Ti 'úú chí Saⁿā chí Daiya Dendyuūs ní ndaá chí in'nuúⁿ ní 'úú nadinguaⁿái 'iiⁿyāⁿ chí nindái ndúúcu nuuⁿndi yeⁿe yā.

Ejemplo yeⁿe dueño chí ca'a tuumī mozos yeⁿé yā chí cuuvi diiⁿ sa negocio

¹¹ Taachí Jesús miiⁿ 'āā canéé niinúⁿ yā na yāāⁿ Jerusalén, 'iiⁿyāⁿ chí ch'iindiveeⁿ yā chuū nadicádínuuⁿ yā chí 'āā maáⁿ nūuⁿ ndaá naachi Ndyuūs ngaⁿa ntiinnyuⁿ yā. Tuu'mi ní Jesús miiⁿ ní caⁿa yā 'áámá ejemplo. ¹² 'Áámá saⁿā chí n'dai chí yeⁿe familia chí ngaⁿā ntiinnyuⁿ cueⁿe sa na 'aama país chí yaⁿai chí cunee sa rey yeⁿē país miiⁿ. Cueⁿe sa ní cuayiivi nguεecunee sa. ¹³ Taachi 'āā cháā caⁿā sa, yaa'vi sa ndiichi saⁿā mozos yeⁿē sa ní ca' a sa 'áámá cáádí 'diiⁿnguāⁿ 'áámá 'áámá mozo yeⁿē sa. Ní caⁿa sa chíi sa mozos: Diíⁿ nī negocio ndúúcu tuumī 'cūū nuuⁿmaⁿ neⁿe chí caⁿá. ¹⁴ 'iiⁿyāⁿ yeⁿe país chí yaⁿai nguéé neⁿe yā saⁿa miiⁿ ní nguéé neⁿé yā chí cuuvi rey yeⁿé yā saⁿā. Dich'ó yā n'duuvu 'iiⁿyāⁿ chí caaⁿmaⁿ ya 'tuúca: Nguéé neⁿe 'nū chí saⁿá 'cūū ní cúuvi sá rey yeⁿē nús'uu. ¹⁵ Saⁿā miiⁿ chí rey chí ngaⁿa ntiinnyúⁿ yā cueⁿe yā ní nguεecunee yā ndāā yā na vaacu yā. Dich'ó sa 'iiⁿyāⁿ chí yaa'ví yā mozos chí ca'a sa tuumī miiⁿ chí ndaa sa nanááⁿ yā ní cuuvi cadínuuⁿ yā, ¿'áá n'deē daiyā tuumi ndaacá 'aama 'aama yā? ¹⁶ Ndaa saⁿā chí vmnááⁿ vmnaaⁿ ní caⁿa sa chíi sa 'iiⁿyāⁿ: N'dií, señor, yeⁿe 'aama caadi 'diiⁿnguāⁿ yeⁿe nī, daiya tuumī miiⁿ diiⁿ ganar ndiichi caadi 'diiⁿnguāⁿ. ¹⁷ 'iiⁿyāⁿ 'cuiica miiⁿ ní caⁿa yā chíi yā mozo miiⁿ: Díí, n'daacā idiiⁿ di; ní díí 'áámá mozo chí

n'dai. Tan'dúucā chi n'daacā chí diiⁿ di ndúucū chi 'téé chi teé dii maaⁿ ní díí ní caaⁿ'maⁿ ntiinnyuⁿ di yeⁿ'e ndiichi yáaⁿ. ¹⁸ Cuayiivi ndaā táamá sá ní caⁿ'ā sa: N'diī, señor, yeⁿ'e 'aama caadi 'díínguāaⁿ yeⁿ'e nī, daiya tuūmī miiⁿ diiⁿ ganar nyuⁿ'u cáádí 'díínguāaⁿ. ¹⁹ Tuu'mi ní caⁿ'a 'iiⁿ'yāⁿ 'cuiica miiⁿ chii yā mozo 'cūū: 'Tiicá ntuūⁿ dii ní caaⁿ'maⁿ ntiinnyuⁿ di yeⁿ'e nyuⁿ'u yáaⁿ. ²⁰ Ndaā táamá mozo ní caⁿ'ā sa chii sa 'iiⁿ'yāⁿ 'cuiica miiⁿ: N'diī, señor, ingāa tuumī yeⁿ'e nī chí cachiīchí na pañuelo ní chi'neeⁿ n'dai. ²¹ 'Úú ní 'va'á n'diī ti neenē chēechí n'diī chí nanguai nī cosas naachi nguéeé idiíⁿ nī ntiinnyuⁿ ní ndúucū tuūmī yeⁿ'é nī diiⁿ nī cosechar naachi nguéeé niiⁿnuⁿ nī ti yeⁿ'é nī. ²² Tuu'mi ní 'iiⁿ'yāⁿ 'cuiica miiⁿ caⁿ'a yā chii yā mozo miiⁿ: Díí, mozo chi nguéeé n'daacā idiíⁿ di, cáávā nduudu chi ngaⁿ'a di canee di condenado. Dii ní déenu di chí chēēchi 'úú ní nanangaáⁿ chi nguéeé yeⁿ'é nī idiíⁿ cosechar chi nguéeé dííⁿ ntiinnyuⁿ ti yeⁿ'é. ²³ ¿De'ē cúuví chí nguéeé s'nuūⁿ di tuūmī yeⁿ'é na banco? Maaⁿ níicú taachi nindaá nī cuta'á tuūmī yeⁿ'é ndúucū daiya. ²⁴ Tuu'mi ní 'iiⁿ'yāⁿ 'cuiica caⁿ'a yā chii yā 'iiⁿ'yāⁿ s'eeⁿ chí snée yā miiⁿ: Diví nī tuūmī yeⁿ'e sa ní ca'á nī saⁿ'a chí véé n'diichí caadi 'díínguāaⁿ yeⁿ'e sa. ²⁵ 'Iiⁿ'yāⁿ s'eeⁿ ní caⁿ'a yā: N'diī, señor, saⁿ'ā miiⁿ ní 'āā véé ndiichi cáádí 'díínguāaⁿ yeⁿ'e sa. ²⁶ 'Iiⁿ'yāⁿ 'cuiica nan'guēcútaⁿ'a yā ní caⁿ'a yā: 'Úú ní ngaⁿ'á ngí ndís'tiī chí 'iiⁿ'yāⁿ chí véé yeⁿ'e yā cuta'a cá yā chí cuuvi yeⁿ'e yā naati 'iiⁿ'yāⁿ chí dúú'vī vee yeⁿ'e yā 'téé chí véé yeⁿ'e yā ní 'iiⁿ'yāⁿ ndiví yā yeⁿ'e yā. ²⁷ 'Tiicá ntúūⁿ, 'iiⁿ'yāⁿ chí nguéeé neⁿ'e n'diichí yā chí táaⁿ yā nduucú, ní nguéeé neⁿ'e yā chí 'úú cuuvi rey yeⁿ'e yā, tuu'mi ní candée nī 'iiⁿ'yāⁿ s'eeⁿ nanaáⁿ 'muuⁿ ní 'caaⁿ'nuⁿ nī 'iiⁿ'yāⁿ 'muuⁿ.

Jesús ndáa yā na yáaⁿ Jerusalén

(Mt. 21.1-11; Mr. 11.1-11; Jn. 12.12-19)

²⁸ Ch'íinú caⁿ'a yā chuū, Jesús cueⁿ'e yā cuááⁿ vmnaaⁿ ní cueⁿ'é yā ní ndaa yā na yáaⁿ Jerusalén. Cuayiivi cueⁿ'e ntúūⁿ discípulos yeⁿ'e yā. ²⁹ Taachí ndaā niiⁿnúⁿ yā yeⁿ'e yáaⁿ Betfagē ndúucū yáaⁿ Betania niiⁿnuúⁿ naachi canee yiicū chí nguuvi Olivos, tuu'mi ní Jesús dichó'o yā ná 'uūvī discípulos yeⁿ'e yā vmnaaⁿ yā. ³⁰ Ní Jesús caⁿ'a 'túucā: Cueⁿ'e nī na yáaⁿ 'lííⁿ chí caneeé niiⁿnuúⁿ ní taachí cundaá nī yáaⁿ miiⁿ ndaacá nī 'áamá burro 'lííⁿ chí n'déechiichí tī. Mar 'áamá 'iiⁿ'yāⁿ 'āā cuéeé cunduú yā 'iiti. N'daatí nī 'iiti ní candée nī 'iiti 'muuⁿ. ³¹ Ní nduuti chí 'áamá 'iiⁿ'yāⁿ tiinguuneen yā 'túucā: Ndís'tiī, ¿de'ē cúuví chí n'daatí nī 'iiti? 'Túucā nan'guēcútaⁿ'a nī chí Señor yeⁿ'e yú ní neⁿ'e yā 'iiti.

³² Discípulos chí dicho'ó Jesús cueⁿ'e yā ní ndaāca yā 'iiti tan'dúucā chí Jesús miiⁿ caⁿ'a yā. ³³ Taachí n'daātí yā burro 'lííⁿ miiⁿ, 'iiví tī ní caⁿ'a yā chii yā 'iiⁿ'yāⁿ s'eeⁿ: ¿De'ē cúuví chí in'daatí nī burro 'lííⁿ yeⁿ'é?

³⁴ Ní 'iiⁿ'yāⁿ s'eeⁿ ní caⁿ'a yā: Señor yeⁿ'e yú ní neⁿ'e yā 'iiti.

³⁵ Tuu'mi ní candée yā 'iiti nanaáⁿ Jesús. 'Iiⁿ'yāⁿ s'eeⁿ sn'dúu yā cotón yeⁿ'e yā vmnááⁿ yeⁿ'e tī ní Jesús canduú yā 'iiti miiⁿ. ³⁶ Ní taachí Jesús cho'ó yā cyúúní miiⁿ, 'iiⁿ'yāⁿ s'uuⁿ ní n'doo yā cotón yeⁿ'e yā cuaaⁿ cyúúní mííⁿ. ³⁷ Taachí Jesús ndaa niiⁿnúⁿ yā naachi nga'ái yúúní mííⁿ yeⁿ'e yiicū chí nguuvi Olivos, nducyáácá discípulos yeⁿ'e yā ní yeenú taavi yā. Ní tuca'á yā caⁿ'a yā chí ch'εεε n'dai Ndyuūs cucáávā chí vaadī n'giinu chí n'diichí yā chí Jesús diiⁿ yā. Níicú diitūu n'dai 'cai yā ti yeenu taavi yā. ³⁸ Ní 'cai yā: De'ē chúucā n'dai Rey chí cuchii yā ndúucū chí duuchi Señor Ndyuūs. Ní cuneé vaadī 'diīⁿ ná va'ai chēeti nguuvi. Ní caⁿ'á yā ndúucū vaadī yeenú. De'ē ch'εεε ca n'dai Ndyuūs chí dēevé n'daí yā ndúucū poder yeⁿ'é yā.

³⁹ Tuu'mi ní n'duuvi 'iiⁿ'yāⁿ fariseos chí snée yā nguaaⁿ 'iiⁿ'yāⁿ caⁿ'a yā chii yā Jesús miiⁿ: N'diī, Maestro, yaa'vi neenē 'iiⁿ'yāⁿ s'eeⁿ chí nguéeé caaⁿ'maⁿ yā tíicā.

⁴⁰ Jesús miiⁿ ní nán'guēcútaⁿ'a yā yeⁿ'e fariseos ní caⁿ'a yā: Ndúúti chí 'iiⁿ'yāⁿ s'uuⁿ ní 'tíicā nguéeé caaⁿ'maⁿ yā, tuu'mi ní tuūu miiⁿ ní caaⁿ'maⁿ 'tíicā.

⁴¹ Taachí ndaa niiⁿnúⁿ yā chí n'diichí yā yáaⁿ Jerusalén miiⁿ, tuu'mi ní Jesús chēecú yā cucáávā 'iiⁿ'yāⁿ yeⁿ'e yáaⁿ miiⁿ ti ya'ai 'iinu yā caavā 'iiⁿ'yāⁿ s'eeⁿ. ⁴² Ní caⁿ'a yā 'túucā: Ndís'tiī, 'iiⁿ'yāⁿ yeⁿ'e yáaⁿ Jerusalén, nduuti chí incheenaáⁿ nī yeⁿ'e nguuví 'cūū chí cuuvi nanguaⁿ'ai nī tuu'mi ní 'úú cuuví teé ndís'tiī vaadī 'diīⁿ. Naati maaⁿ ní Ndyuūs canuuⁿ

n'de'elí yā yeⁿe nī ní nguéé cuuvi deenu nī. ⁴³ Ti ndaá nguuvi taachí 'iiⁿ'yāⁿ chi taaⁿ ndúúcu nī chééndii yā núúⁿ máⁿ 'diituú yáāⁿ yeⁿe nī ní nguéé cuuví cáanu nī yeⁿe yā. ⁴⁴ Ní dííⁿ yā chi cundεε nī ti nguεε cuchéé nī ndúúcu yā. Ní 'caaⁿ'núⁿ yā nducyaaca ndís'tií ndúúcu daiyá nī, ní dituuví yā yáāⁿ Jerusalén yeⁿe nī ti 'iiⁿ'yāⁿ nguéé deenu yā chi tiempo maaⁿ ní nguuvi chi Ndyuūs s'neéⁿ yā chi cuuvi nanguaⁿ'ai yā.

Jesús nadīεεvé yā yaācū templo

(Mt. 21.12-17; Mr. 11.15-19; Jn. 2.13-22)

⁴⁵ Tuu'mi ní Jesús sndaá yā na yaācū templo ní tucá'a yā tun'dáa yā nducyaaca 'iiⁿ'yāⁿ chi in'diicui yā ní ngái ntúuⁿ yā miiⁿ. ⁴⁶ Jesús caⁿ'a yā chii yā 'iiⁿ'yāⁿ s'eeⁿ: 'Túúcā canéé nguūⁿ na libro yeⁿ'é Ndyuūs: Yáacū yeⁿ'é ní naachi caaⁿ'maⁿngua'a 'iiⁿ'yāⁿ naati ndís'tií ní dííⁿ nī tan'dúúca chi yiive yaava yeⁿ'é 'iiⁿ'yāⁿ chí diduucu.

⁴⁷ Jesús miiⁿ nguuvi nguuvi ngi'cueeⁿ yā ná yáacū templo; naati 'iiⁿ'yāⁿ chiiduú n'gεεté, ndúúcu 'iiⁿ'yāⁿ chi ngi'cueeⁿ ley, ndúúcu 'iiⁿ'yāⁿ chi ngaⁿ'a ntiiⁿnyuⁿ yeⁿ'e yáāⁿ miiⁿ nduuvidaamá yā ti neⁿ'é yā n'diichí yā táacā chi cuuvi 'caaⁿ'núⁿ yā Jesús miiⁿ. ⁴⁸ Nguéé indaacá yā táacā chi 'caaⁿ'núⁿ yā Jesús, ti nducyáacá 'iiⁿ'yāⁿ s'nee veeⁿ n'daacá yā yeⁿ'é chi ngi'cueeⁿ Jesús miiⁿ.

20

Jesús ngaⁿ'a ntiiⁿnyúⁿ yā

(Mt. 21.23-27; Mr. 11.27-33)

¹ 'Áamá nguuvi taachí Jesús miiⁿ ngi'cueeⁿ yā chεeti yaācū templo ní ngi'cueeⁿ yā nduudu chí ngái yeⁿ'e Ndyuūs, ndaā nanáán Jesús miiⁿ chiiduú n'gεεté ndúúcu maestros yeⁿ'e ley, ndúúcu 'iiⁿ'yāⁿ ndiicúú chí ngaⁿ'a ntiiⁿnyuⁿ yeⁿ'e yaācū. ² Ní ntinguunéⁿ yā Jesús: ¿Du'ú caⁿ'a ntiiⁿnyuⁿ chi ca'cueeⁿ nī déndu'ú chí 'tuucā? O ¿du'ú 'iiⁿ'ntyéⁿ'é tee yā orden chí dííⁿ ni 'tíicā?

³ Tuu'mi ní Jesús miiⁿ nan'guεεcútaⁿ'a yā: 'Úú ntúūⁿ ní ntinguunéⁿ 'áamá ndís'tií. Nan'guεεcútaⁿ'a nī yeⁿ'é: ⁴ ¿Dú'u ca'a orden Juan chí chεedínúūⁿniⁿ yā 'iiⁿ'yāⁿ? ¿'Áá yeⁿ'e Ndyuūs o saⁿ'a iⁿ'yeeⁿdí 'cūū?

⁵ 'Iiⁿ'yāⁿ s'eeⁿ nduuvidaamá yā ní caⁿ'a yā nguaaⁿ maaⁿ yā: Ndúúti chí caaⁿ'maⁿ yú chí yeⁿ'e Ndyuūs, Jesús miiⁿ ní cuuvi yā s'uūúⁿ: ¿Dε'ē cuuvi chí nguéé chí'téenu nī? ⁶ Nduuti chí caaⁿ'maⁿ yú chí yeⁿ'e saⁿ'a iⁿ'yeeⁿdí 'cūū, nducyaaca 'iiⁿ'yāⁿ ní cuiituú yā s'uūúⁿ ti 'iiⁿ'yāⁿ s'eeⁿ nadicádíínuuⁿ yā chí cuaacu níⁿnyúⁿ Juan miiⁿ ní 'áamá profeta chí Ndyuūs dicho'ó yā.

⁷ Tuu'mi ní 'iiⁿ'yāⁿ s'eeⁿ nan'guεεcútaⁿ'a yā yeⁿ'e Jesús chí nguéé déenu yā tíí ndiicá yeⁿ'é chí ngεedínúūⁿniⁿ Juan miiⁿ. ⁸ Tuu'mi ní Jesús caⁿ'a yā chii yā 'iiⁿ'yāⁿ s'eeⁿ: Ndíí nguéé ndúú 'úú ra cuuví ndís'tií du'u 'iiⁿ'ntyéⁿ'é tee yā orden 'úú chí idiíⁿ chuū.

Yáⁿ'āa yeⁿ'e saⁿ'a chí diiⁿ cuidado díí'yú uvas

(Mt. 21.33-44; Mr. 12.1-11)

⁹ Jesús tucá'a yā caⁿ'a yā chii yā 'iiⁿ'yāⁿ s'eeⁿ 'áamá ejemplo chí 'téé nguéé dáamá: 'Áamá saⁿ'a chíinū sa díí'yú uvas ná yáⁿ'āa yeⁿ'é sa. Dueño miiⁿ ca'a yā n'duuví saⁿ'a chí idiíⁿ sa ntiiⁿnyuⁿ ní nadíí'vε yā saⁿ'a. Ní chíica yā yáāⁿ vaacú yā ni cueⁿ'e yā chí cuuvi 'náaⁿ yā. ¹⁰ Taachí ndaā tiempo yeⁿ'e cosecha yeⁿ'e uvas miiⁿ, dueño miiⁿ dicho'ó yā 'aama mozo yeⁿ'é yā chí cueⁿ'e sa cuta'a sa parte yeⁿ'e cosecha chí tuneⁿ dueño miiⁿ. 'Iiⁿ'yāⁿ chí idiíⁿ ntiiⁿnyuⁿ yeⁿ'e yáⁿ'āa ch'eⁿ'é yā mozo ní nadichó'ó yā mozo miiⁿ. Ní nguéé de'ē vεε ca'a yā mozo miiⁿ. ¹¹ Dueño nguεεcunéⁿ yā dicho'ó yā táamá mozo nanáán saⁿ'a chí idiíⁿ ntiiⁿnyuⁿ na yáⁿ'āa yeⁿ'e yā. 'Tiicá ntúūⁿ nguéé n'daacā diiⁿ sa ndúúcu mozo miiⁿ. Ch'eⁿ'é sa saⁿ'a ní nadicáanu sa saⁿ'a miiⁿ. Ní nguéé de'ē vεε ca'a sa saⁿ'a mozo miiⁿ. ¹² Dueño yeⁿ'e yáⁿ'āa miiⁿ nguεεcunéⁿ ntúūⁿ yā dicho'ó yā táamá mozo nanáán 'iiⁿ'yāⁿ chí idiíⁿ ntiiⁿnyuⁿ na yáⁿ'āa yeⁿ'e yā naati 'nuucá'a sa saⁿ'a ní nadicaanu sa saⁿ'a.

¹³ Tuu'mi ní dueño yeⁿ'e yáⁿ'āa miiⁿ caⁿ'a yā: ¿Táacā dííⁿ? Dicho'ó saⁿ'a daiyá chí neⁿ'e taaví. ¿'Áá nguéé taachí snaaⁿ sa saⁿ'a diiⁿ sa honrar saⁿ'a daiyá? ¹⁴ 'Iiⁿ'yāⁿ

chi idiiⁿ ntiiⁿnyuⁿ na yáⁿáa miiⁿ taachiⁿ n'diichi sa saⁿá daiya dueño yeⁿe yáⁿáa miiⁿ nadicádiinuⁿ sa ní caⁿa sa chiiⁿ sa viⁿ: Sáⁿa 'cuu chi cuuvi yeⁿē sa yáⁿáa 'cū. 'Caāⁿnuⁿ yú saⁿá ni yáⁿáa ndúúcu chi véé naaⁿ cuuvi yeⁿe yú. ¹⁵ Tuu'mí tun'dáa sa saⁿá daiya dueño 'áamá lado yeⁿe chéeⁿ yeⁿe díí'yú uvas ní ch'iinuⁿ sa saⁿá. Jesús caⁿa yā: Maaⁿ ní, ¿de'ē dííⁿ dueño yeⁿe yáⁿáa nduucú saⁿá s'eeⁿ chi diiⁿ 'tíicā? ¹⁶ Dueño miiⁿ taachi ndaa yā ni divíi yā saⁿá chi idiiⁿ ntiiⁿnyuⁿ na yáⁿáa yeⁿé yā ní 'caaⁿnúⁿ yā saⁿá s'eeⁿ. Ní ca'á yā yáⁿáa miiⁿ yeⁿe yā táamá 'iiⁿyāⁿ. Taachiⁿ 'iiⁿyāⁿ fariseos ch'iindiveéⁿ yā chuū, tuu'mi ní caⁿa yā: N'daacā chi Ndyuūs nguéé 'cuaaⁿ yā chi 'tíicā.

¹⁷ Jesús ch'iinuⁿ yā 'iiⁿyāⁿ s'eeⁿ, ní caⁿa yā: ¿De'ē neⁿe caaⁿmaⁿ nduudu chi canéé nguūⁿ na libro yeⁿé Ndyuūs chi 'tuucā?

Tuūu ch'eteté chí 'iiⁿyāⁿ chi din'dái yā va'āi miiⁿ ní sta'á yā ní ch'ēcú yā 'áamá lado, ní tuūu 'cūú chí tuūu ch'etete miiⁿ dichíí've ca ní canéé tuūu ch'eteté yeⁿe esquina yeⁿe va'āi.

¹⁸ 'Áa du'ú nūuⁿ 'iiⁿyāⁿ chí cun'daa nduú yā vmnaaⁿ na tuūu 'cūú ní caātū 'ííni yeⁿe yā. Naati 'āa du'ú nūuⁿ 'iiⁿyāⁿ chí cun'dáa nduūu tuūu 'cūú vmnaaⁿ yeⁿe yā, 'cuínú ndúúví yuūni yā.

Yeⁿe tuumī chi ca'á yā emperador César

(Mt. 21.45-46; 22.15-22; Mr. 12.12-17)

¹⁹ 'Iiⁿyāⁿ chiiduú n'gēetē ndúúcu maestros yeⁿe ley neⁿé yā cuta'á yā Jesús ní dííⁿ yā chi preso yā naati di'va'á yā 'iiⁿyāⁿ yeⁿe yāāⁿ miiⁿ. Tuu'mí nūuⁿ tuumicádiinuⁿ yā chi Jesús miiⁿ caⁿa yā ejemplo 'cūú chi 'téé nguéé dáamá ní yeⁿe yā. ²⁰ Tuu'mi ní dichó'o yā 'iiⁿyāⁿ chí 'cueenuúⁿ Jesús miiⁿ. 'Iiⁿyāⁿ s'eeⁿ ní ndaacá yā táacā chi cástaⁿa yā nduudu Jesús miiⁿ chí Jesús cuuvi caaⁿmáⁿ yā 'aama nduudu yaadi. 'Tíicā ní cuuvi dichó'o yā Jesús nanááⁿ gobernador. ²¹ Chiiⁿ chí 'iiⁿyāⁿ s'eeⁿ ní ntiinguunéⁿ yā Jesús nduudú 'cūú: N'dií, maestro, déenu 'nū chí ngaⁿa nī ní ngi'cueeⁿ nī chiiⁿ chí n'daacā. Ní nguéé dííⁿ nī juzgar 'iiⁿyāⁿ tan'dúúca chí n'gee nī chí n'daacā o nguéé, naati ngi'cueeⁿ nī yúúni yeⁿe Ndyuūs ndúúcu nduudu cuaacu. ²² Maaⁿ ní cuuvi nī chuū: ¿'Áa n'daacā chí nadíí've 'nū emperador César tuumī yeⁿe yáⁿáa o nguéé?

²³ Jesús tuumicadíinuⁿ yā chí 'iiⁿyāⁿ s'eeⁿ ní nguéé n'daacā chí dííⁿ yā ní caⁿa yā chiiⁿ yā 'iiⁿyāⁿ s'eeⁿ: ¿De'ē cúúví chí neⁿe nī castaⁿá nī nduudu yeⁿé? ²⁴ 'Cuuⁿmiⁿ nī 'áamá tuumī. Jesús n'diichí yā tuumī ní caⁿa yā: ¿Du'ū naaⁿ ndéē tuumī miiⁿ? ¿Du'ū chí nguuví canee nguūⁿ naaⁿ? Tuu'mi ní saⁿa s'uūⁿ nan'guēcútaⁿā sa: Naaⁿ emperador César cānee.

²⁵ Tuu'mi ní Jesús caⁿa yā chiiⁿ yā 'iiⁿyāⁿ s'eeⁿ: Nca'a nī tuumī emperador César miiⁿ chííⁿ chí yeⁿé yā ní ca'á nī Ndyuūs chííⁿ chí yeⁿé yā.

²⁶ Nguéé cuuvi dííⁿ yā chistaⁿa mar 'áamá nduudu yeⁿe Jesús miiⁿ ní cheⁿe yiinuⁿ yā yeⁿé chí nan'guēcútaⁿā Jesús. Ní 'āa ntéé caⁿa yā mar 'áamá.

'Iiⁿyāⁿ itiinguuneeⁿ yā Jesús yeⁿé chí nduuchi tináⁿā

(Mt. 22.23-33; Mr. 12.18-27)

²⁷ Cuayiivi ní n'duuvi 'iiⁿyāⁿ saduceos ndaa yā nanááⁿ Jesús. Saduceos nguéé s'téenu yā chí nduuchi tináⁿā. Ní caⁿa yā chiiⁿ yā Jesús: ²⁸ N'dií, Maestro, Moisés dingúuⁿ yā na ley 'tíicā: Ndúúti chí 'áamá saⁿá 'cuuvi sa ní cu'neeⁿ sa n'daataá yeⁿé sa ní nguéé daiya tá, tuu'mi ní 'díínu sa cuuvi 'caandavaacu sa ndúúcu n'daataá miiⁿ ní 'cuundi daiya sa lado yeⁿe 'díínu tináⁿā. ²⁹ Maaⁿ ní véé ndēēchē 'díínu yā. Saⁿá vmnaaⁿ mííⁿ canee sa ndúúcu n'daataá yeⁿé sa ní ch'íi sa. Nguéé ch'etinéé daiya sa. ³⁰ Saⁿá 'díínu sa ndiichi ndii 'úúví canee sá ndúúcu n'daataá yeⁿé tináⁿā. 'Diinu sa miiⁿ ch'íi ntúūⁿ saⁿá miiⁿ. Nguéé ch'etinéé ntuūⁿ daiya sa. ³¹ Saⁿá 'díínu sa ndiichi ndii 'íínu canéé ntúūⁿ sa ndúúcu n'daataá mííⁿ. 'Tiicá ntúūⁿ ch'íi sa ní nguéé ch'etinéé ntúūⁿ daiya sa. Nduu ndēēche yā ch'etinéé yā ndúúcu n'daataá mííⁿ ní ca'áamá ca'áamá yā ch'íi yā ní nguéé ch'etinéé mar 'áamá daiya yā. ³² Cuayiivi miiⁿ ní ch'íi n'daataá mííⁿ. ³³ Taachiⁿ ndaa nguuvi chí

nduuchi 'iiⁿ'yāⁿ chi n'díí, ¿chéé saⁿ'ā s'eeⁿ n'daataá yeⁿ'ē sa táⁿ'ā? Tí nduu ndēēche yā ch'εetinée yā ndúúcu n'daataá mííⁿ.

³⁴ Tuu'mi ní Jesús miiⁿ nan'guéécútaⁿ'a yā yeⁿ'e 'iiⁿ'yāⁿ s'eeⁿ ní caⁿ'a yā: 'Iiⁿ'yāⁿ chi snée yā iⁿ'yeeⁿdí 'cūū n'giindivaacu yā ní 'iiⁿ'yāⁿ yeⁿ'e yā nga'a yā chi n'gíndivaacu yā. ³⁵ 'Iiⁿ'yāⁿ chi túneeⁿ chi ndaá yā na táámá iⁿ'yeeⁿdí, taachi nduuchí yā yeⁿ'ē nguaaⁿ tináⁿ'ā, na yáⁿ'āa miiⁿ'ya ní nguεε 'caandavaacu yā, ndíí nguéeⁿ ndúú chi ca'a 'iiⁿ'yāⁿ yeⁿ'e yā chi 'caandavaacu yā. ³⁶ Yáⁿ'āa miiⁿ'ya 'āā ntéeⁿ 'cuūvi yā ti daama yā ndúúcu ángeles. 'Iiⁿ'yāⁿ s'eeⁿ chi daiya Ndyuūs tí induuchi yā yeⁿ'ē nguaaⁿ tináⁿ'ā. ³⁷ Ndíí cuaaⁿ vmaaaⁿ ndíí taachi maaⁿ Moisés miiⁿ dingúuⁿ yā yeⁿ'ē yáⁿ'á 'lííⁿ chí ngiichi iteé cadíínuuⁿ yú caati tináⁿ'ā ninduuchi yā. Ní Moisés miiⁿ ngaⁿ'á yā chi Señor Ndyuūs miiⁿ ní Ndyuūs yeⁿ'e Abraham, ndúúcu Isaac, ndúúcu Jacob. ³⁸ Ti Ndyuūs ní nguéeⁿ Ndyuūs yeⁿ'e tináⁿ'ā ti yeⁿ'e 'iiⁿ'yāⁿ chí sндуuchí yā. Caati nanááⁿ Ndyuūs miiⁿ nducyaaca 'iiⁿ'yāⁿ ní sндуuchí yā cueⁿ'e daāⁿmaⁿ.

³⁹ Tuu'mi ní n'duuvu maestros chi ngi'cueeⁿ ley caⁿ'a yā chii yā Jesús miiⁿ: N'díí, Maestro, n'daacā ngaⁿ'a nī.

⁴⁰ 'Iiⁿ'yāⁿ s'eeⁿ 'āā ntéeⁿ neⁿ'e yā ntiinguuneeⁿ ca yā.

¿Du'ū 'iiⁿ'yāⁿ chi Cristo?

(Mt. 22.41-46; Mr. 12.35-37)

⁴¹ Jesús caⁿ'a yā chii yā 'iiⁿ'yāⁿ s'eeⁿ: Ndís'tií, ¿táácā chí ngaⁿ'a nī chi Cristo miiⁿ ní daiya David? ⁴² Maāⁿ David miiⁿ ní ngaⁿ'a yā na libro yeⁿ'é Ndyuūs chi Salmos 'túúca: Caⁿ'a Señor Ndyuūs chii yā Señor yeⁿ'é: 'Cuundi di lado tá cuaācū yeⁿ'é chí lado yeⁿ'e honor,

⁴³ ndíí taachi 'úú cu'neéⁿ 'iiⁿ'yāⁿ chi enemigos chí contra yeⁿ'ē di cuaaⁿ ndii yā ca'a di tan'dúúca chí 'aama banco 'lííⁿ.

⁴⁴ Ndúúti chí David miiⁿ caⁿ'a yā chí Cristo miiⁿ ní Señor yeⁿ'e yā, ¿táácā cuuvi chí chí chí Cristo miiⁿ ní daiya David?

Jesús ngííca nuuⁿ ndi yeⁿ'e maestros chí ngi'cueeⁿ ley

(Mt. 23.1-36; Mr. 12.38-40; Lc. 11.37-54)

⁴⁵ Nducyáácá 'iiⁿ'yāⁿ n'giindiveéⁿ yā taachi Jesús caⁿ'a yā ndúúcu discípulos yeⁿ'e yā ní tuca'á yā caⁿ'a yā chuū: ⁴⁶ Dííⁿ nī cuidado, ndís'tií, yeⁿ'é maestros chí ngi'cueeⁿ ley. 'Iiⁿ'yāⁿ s'eeⁿ ní neⁿ'e yā 'cuεeti núuⁿ yā catecai n'geēnúú yā, ní neⁿ'e yā chí ndís'tií ní dííⁿ nī saludar 'iiⁿ'yāⁿ s'eeⁿ taachi snée yā nii'veε ní neⁿ'é yā chí dííⁿ nī respetar 'iiⁿ'yāⁿ s'eeⁿ. Ní neⁿ'e yā 'cuεeté yā na sillas vmaááⁿ vmaaaⁿ yeⁿ'ē honor ná yaacū sinagogas ní sillas yeⁿ'e honor yeⁿ'e 'viicu naachi ché'e yā. ⁴⁷ 'Iiⁿ'yāⁿ s'eeⁿ ní ndivíi yā va'ai yeⁿ'e n'daataá nguá'āa. Ní nééⁿ n'deēe ngaⁿ'angua'á yā ní neⁿ'e yā chí snaaⁿ tanáⁿ'ā 'iiⁿ'yāⁿ chí dííⁿ yā 'tííca. 'Iiⁿ'yāⁿ s'eeⁿ ní neene ch'εete ca castigo yeⁿ'e yā nguuvi yeⁿ'e juicio.

21

Ofrenda yeⁿ'e n'daataá nguá'āa

(Mr. 12.41-44)

¹ Jesús snée yā na yaācu templo ní n'diichi yā chí 'iiⁿ'yāⁿ 'cuiica ngii yā ofrendas yeⁿ'e yā na cajas naachí inúūⁿ ofrendas. ² N'diichí ntúuⁿ yā 'áámá n'daataá nguá'āa chí neene ndaachí cānee tá. Táⁿ'ā miiⁿ ní s'nuūⁿ tá chεeti caja miiⁿ 'uūvī centavos chí cobre. ³ Jesús miiⁿ ní ngaⁿ'a yā ngii yā 'iiⁿ'yāⁿ s'eeⁿ: Cuaacu nííⁿnyuⁿ 'úú ngaⁿ'á ngii ndís'tií chí n'daataá nguá'āa 'cūū ch'εete ca tuūmí chí tá, nguéeⁿ ti tanáⁿ'ā 'iiⁿ'yāⁿ. ⁴ Tí 'iiⁿ'yāⁿ s'eeⁿ ní nga'a yā yeⁿ'ē chí ngaāva yeⁿ'e yā chí cuuvi ofrenda yeⁿ'e Ndyuūs; naati n'daataá 'cūū chí neene ndaachí canee tá ní ca'a tá tanducuéⁿ'ē chí véé yeⁿ'e ta chí che'e tá.

Jesús nn'geeⁿ yā táámá ejemplo chí yeⁿ'e yaācá chí ntuvíí

(Mt. 24.1-2; Mr. 13.1-2)

⁵ Náⁿ'ā 'iiⁿ'yāⁿ ní ngaⁿ'a yā yeⁿ'e yaācū templo miiⁿ chí yaāva canéé ndúúcu tuūu n'dēē cheeⁿ ndúúcu adornos yeⁿ'ē regalos chí lado yeⁿ'e ofrenda. Jesús caⁿ'a yā chii yā 'iiⁿ'yāⁿ

s'eeⁿ: ⁶ Ndís'tiī ní inaaⁿ nī dendú'ū chi 'túúcā. Ndáá nguuvi taachí nadituuví yā yaācū miiⁿ ní 'āā ntéé cūnee tuūu cuaaⁿ vmnááⁿ yeⁿe vi'í chi nguéeⁿ ntuuvíí.

Ejemplo yeⁿe tiempo taachi 'āā cuéeⁿ ndaa nguuvi chi 'cuiinū íⁿyeēⁿdī
(Mt. 24.3-28; Mr. 13.3-23)

⁷ Tuu'mi ní 'iiⁿyāⁿ s'eeⁿ ntiinguunéeⁿ yā Jesús miiⁿ: N'diī, Maestro, ¿tíí cuaⁿā cuuvi chuū? ¿De'ē señal 'cuuⁿmíⁿ nī taachi 'āā cuuvi chi 'tiicā?

⁸ Jesús caⁿa yā: Cundéeⁿ nī cuidado chi 'iiⁿyāⁿ nguéeⁿ canche'éeⁿ yā ndís'tiī caati neené n'deēe 'iiⁿyāⁿ chíí yā caaⁿmáⁿ yā ndúúcū chi duuchí 'tííca: 'Úú chí Cristo; ní 'āā snéeⁿ nguuvi chi 'cuiinū íⁿyeēⁿdī. Naati ndís'tiī, nguéeⁿ caⁿá nī ndúúcu yā. ⁹ Ní taachí 'caandiveeⁿ nī chi vεε caandaá ní 'iiⁿyāⁿ 'cuuⁿmaⁿ yā contra yeⁿe taama yā nguéeⁿ dii'yá nī cuuvi. Tanducuéⁿē chuū canéeⁿ chí cuuvi vmnááⁿ vmnaaⁿ naati 'āā cuεε 'cuiinū íⁿyeēⁿdī.

¹⁰ Tuu'mi ní Jesús caⁿa yā chíí yā 'iiⁿyāⁿ s'eeⁿ: 'Áámá nación ní 'cuuⁿmáⁿ contra yeⁿe taama nación ní 'iiⁿyāⁿ yeⁿe 'áámá país ní 'cuuⁿmáⁿ yā contra yeⁿe 'iiⁿyāⁿ yeⁿe taama país. ¹¹ Ní n'deēe cuuvi nuⁿu taaⁿ yáⁿāā, ndúúcū tiempos chi 'cuūndī cuiicu, ndúúcū ca'ai taaⁿ n'deēe cuaaⁿ n'dai, ní 'iiⁿyāⁿ snaaⁿ yā dendu'ū chí vaadī n'giinu yeⁿe va'ai cheeti nguuvi ní dii'yá yā cuuvi.

¹² Ni taachi 'āā cuéeⁿ cuuvi tanducuéⁿē dendu'ū chi 'túúcā, 'iiⁿyāⁿ ní cuiítuú yā ndís'tiī ní cuta'á yā ndís'tiī chí presos nī. Ní nca'á yā ndís'tiī 'iiⁿyāⁿ chí ngaⁿa ntiíⁿnyuⁿ yeⁿe yaācū sinagogas ní 'cuii yā ndís'tiī vácūū. Cuayíivi ní candée yā ndís'tiī nanááⁿ 'iiⁿyāⁿ reyes ndúúcū gobernadores cáávā chí ngaⁿa nī chí duuchí. ¹³ Chuū 'cueenu ndís'tiī cuuvi ti cueⁿé nī nduucú ní nanááⁿ 'iiⁿyāⁿ s'eeⁿ cuuvi caaⁿmáⁿ nī nduudu cuaacu yeⁿe. ¹⁴ Cundéeⁿ n'daaca nī cuidado ná staava yeⁿe nī ní nguéeⁿ nadacadíínuuⁿ nī vmnaaⁿ yeⁿe taacā nán'guεεcútaⁿa nī yeⁿe 'iiⁿyāⁿ s'eeⁿ. ¹⁵ Ti hora mííⁿ nūuⁿ 'úú ní yaa'ví ndís'tiī nduudu chí caaⁿmáⁿ nī. Ní teé ndís'tiī vaadī deenu yeⁿe ní 'iiⁿyāⁿ s'eeⁿ nguéeⁿ cuchεε yā ndúúcū ndís'tiī, ndíí nguéeⁿ ndúú cuuvi caaⁿmaⁿ yā contra yeⁿe ndís'tiī. ¹⁶ Naati chíidá nī, ndúúcū 'díínu nī, ndúúcū 'iiⁿyāⁿ yeⁿe nī, ndúúcū amigos yeⁿe nī ní caaⁿmáⁿ yā contra yeⁿe ndís'tiī chí 'iiⁿyāⁿ 'caaⁿnúⁿ yā náⁿā ndís'tiī. ¹⁷ Ní nducyaaca 'iiⁿyāⁿ nguéeⁿ cuuvi n'diichí yā ndís'tiī cucáávā 'úú ti cueⁿé nī nduucú. ¹⁸ Naati mar 'áámá yuūdū tííⁿ nī nguéeⁿ cuuví ndái. ¹⁹ Nduuti chí ndís'tiī ngiinū ngiinū cuchéeⁿ nī na staava yeⁿe ní ní 'cuεetinéé n'daāca nī, tuu'mi ní ndáá nguuvi chi ndaaca nī vida cueⁿe daāⁿmaⁿ yeⁿe nī.

²⁰ Taachi ndís'tiī snaaⁿ nī soldados nuuⁿmaⁿ ndííví yā yáāⁿ Jerusalén, tuu'mi ní cadiinuuⁿ nī chí yáāⁿ Jerusalén miiⁿ 'āā ntuvíí. ²¹ Tuu'mi ní n'daacā chí 'iiⁿyāⁿ chí snée yā na yáⁿāā Judea caⁿá yā cáanu yā cuaáⁿ yíicū. Ní 'iiⁿyāⁿ chí snée yā na yáāⁿ Jerusalén miiⁿ ní nan'dáa yā miiⁿ. Ní 'iiⁿyāⁿ chí snée yā campo nguéeⁿ nguεεcunee nndaa yā na yáāⁿ Jerusalén. ²² Ti nguuvi s'eeⁿ ní nguuví chí cuchíi 'cueenu yā cuuvi cáávā nuuⁿndí yā. Níícu canéeⁿ chí cuuvi cuaacu tanducuéⁿē chí canéeⁿ nguūⁿ na libro yeⁿe Ndyuūs. ²³ Naati de'ē chúúcā ya'āi yeⁿe n'daataá chí véé daiya tá cheeti tá ndúúcū n'daataá chí ngiicú da'cua'āa daiya tá nguuvi chí cáanu yā. Ní 'iiⁿyāⁿ miiⁿ nééné 'cueenu yā cuuvi na yáⁿāā 'cúū. ²⁴ Ní 'yááⁿ 'iiⁿyāⁿ ní 'cuūvi yā ndúúcū machete 'uūví lados 'caāiⁿ taachi dííⁿ yā caandaá. Ní candεε yā 'yaaⁿ 'iiⁿyāⁿ chí presos yā ní caⁿá yā ndíí nducyaaca países. Níícu yáāⁿ Jerusalén miiⁿ cūnee ndúúcū 'iiⁿyāⁿ gentiles chí 'iiⁿyāⁿ chí nguéeⁿ yeⁿe ndaata Israel ní 'iiⁿyāⁿ s'eeⁿ canéeⁿ yā na yáⁿāā miiⁿ ndíí tiempo chí Ndyuūs 'cuaaⁿ yā 'iiⁿyāⁿ gentiles cuuvi yeⁿe yā.

Táácā ndaá Saⁿā chí Daiya Dendyuūs
(Mt. 24.29-35, 42-44; Mr. 13.24-37)

²⁵ Tuu'mi ní Ndyuūs 'cuuⁿmiⁿ yā ndúúcū vaadī n'giinu señales ná yáⁿāā, ndúúcū ná 'iiⁿyu, ndúúcū na 'ííⁿnyúⁿ. Nééné ya'āi 'cueenu 'iiⁿyāⁿ yeⁿe tanáⁿā naciones ní nducyaaca 'iiⁿyāⁿ dii'ya cá yā cuuvi. Ní nguéeⁿ déenu yā taacā chí idiíⁿ yā cucáávā chí 'yuudu n'dai 'cuεecu nuūⁿnīⁿyáⁿā ní can'dái yaacu nuūⁿnīⁿ miiⁿ. ²⁶ 'iiⁿyāⁿ s'eeⁿ cuuvi cúúnu yā chí 'va'á yā ndúúcū dendu'ū chí ndaa vmnááⁿ yáⁿāā 'cúū ní cucáávā nducuéⁿē

nanguuvi ní 'nuⁿu. ²⁷ Tuu'mi ní 'iiⁿyāⁿ snááⁿ yā 'úú chi Saⁿā chi Daiya Dendyuūs chi ndaa na 'áámá meēⁿ ndúúcu poder ch'εεte yeⁿé ndúúcu chi dεεvé n'dai yeⁿe maán cuerpo yeⁿé. ²⁸ Taachí cunga'ā tanducuéⁿē chuū cu'neeⁿ diitú nī na staava yeⁿé nī tí ndaa nguuvi chí nnguaⁿāi ndís'tiī ní canéé niiⁿnuúⁿ.

²⁹ 'Úú ní ngaⁿá ngií ndís'tiī 'áámá ejemplo: Cuin'diichí nī yáⁿá yeⁿe n'guídii yaaⁿ nguuvi ndúúcu nducyaaca yáⁿá. ³⁰ Taachí snaaⁿ nī chi 'āā ndaa tá'āa yáⁿá míⁿ, tuu'mi ní 'āā deenú nī ti 'āā snee niiⁿnuúⁿ tiempo chi cuchii yāāⁿ. ³¹ 'Tiicá ntúūⁿ cuuvi taachi snaaⁿ nī dendu'ū chuū chi ngaⁿá, 'āā deenú nī chí naachí Ndyuūs ngaⁿa ntiinⁿnyúⁿ yā 'āā snee niiⁿnuúⁿ.

³² 'Úú ngaⁿá ngií ndís'tiī, chi cuaacu níⁿnyúⁿ 'iiⁿyāⁿ chi snée yā maaⁿ 'āā cuéé 'cuuvi yā nenⁿe chi 'āā cuéé cuuvi tanducuéⁿē chuū. ³³ Nanguuvi ndúúcu yáⁿāa ní chó'ōo naati nduudu yeⁿé nguéé chó'ōo.

³⁴ Ndís'tiī ní cundéε nī cuidado chi staava yeⁿe nī nguéé nduuvi cheechí ndúúcu vicios chi véé inⁿyeedí 'cūū. Nguéé nadicadiinúⁿ ca nī yeⁿe chi che'é nī o cu'ú nī o yeⁿé n'dee yeⁿe vida yeⁿe nī ti nguuvi miiⁿ ní dácanaāⁿ ndaa nanááⁿ yeⁿe ndís'tiī. Ní canéé chi canéé listo nī. ³⁵ Ti nguuvi s'eeⁿ ní ndaa nanááⁿ ndís'tiī ndúúcu 'iiⁿyāⁿ chi snée yā inⁿyeedí 'cūū ní nducyaacá yā ní 'cuenú yā cuuvi tí ndaa nguuvi s'eeⁿ tan'dúúca 'áámá tuūvī dácanaāⁿ índuudi. ³⁶ 'Cuεeti nduuchi nī ní caaⁿmaⁿngua'á nī nguuvi nguuvi chí cuuvi nnguaⁿai nī yeⁿe dendu'ū vaadi ya'ai chi cuchii. Ní cuuvi ndaa nī nanááⁿ 'úú, Saⁿā chi Daiya Ndyuūs.

³⁷ Nguuvi nguuvi Jesús miiⁿ ngi'cueeⁿ yā na yáacū templo ní n'gaaⁿ ní nn'daa yā ná yīcū 'lín chi nguuvi Olivos. ³⁸ Ní nguuvi nguuvi cuaaⁿ ná nguεetiyaaⁿ ní nducyaaca 'iiⁿyāⁿ ndaa yā na yaacū templo nanááⁿ Jesús miiⁿ chí 'caandiveéⁿ yā nduudu yeⁿe yā.

22

'Iiⁿyāⁿ chi contra Jesús ngaⁿa yā táácā chi diín yā chi cuuvi cuta'á yā Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ 'Āā snee niiⁿnuúⁿ nguuví yeⁿe 'viicu yeⁿe pascua chi 'viicu chi che'é yā pan chi nguéé levadura yeⁿé. ² Ní 'iiⁿyāⁿ chiiduú n'gεεté ndúúcu maestros yeⁿe ley nduuvidaamá yā ní ngaⁿá yā taacā chi cuuvi 'caaⁿnúⁿ yā Jesús naati 'va'á yā 'iiⁿyāⁿ yeⁿe yāāⁿ Jerusalén miiⁿ.

³ Espíritu yeⁿe yááⁿn'guinūⁿ sndaa na staava yeⁿe saⁿā chi nguuvi Judas Iscariote chi 'aama discípulo yeⁿe Jesús naachí ndiichuuvi yā. ⁴ Judas miiⁿ cheⁿe sa nanááⁿ chiiduú n'gεεté ndúúcu capitanes ní yaa'vi sá 'iiⁿyāⁿ táácā chi cuuvi diiⁿ sa chi naca'a sa Jesús miiⁿ 'iiⁿyāⁿ s'eeⁿ. ⁵ 'Iiⁿyāⁿ s'eeⁿ ní yeenú n'dai yā ní nduuvidaamá yā chí ca'a yā tuūmī Judas miiⁿ. ⁶ Judas sta'a sa tuūmī ní caⁿa sa. Nadacadiinuuⁿ sa táácā cuuvi nta'a sa Jesús miiⁿ na ta'a 'iiⁿyāⁿ s'eeⁿ manera chi 'iiⁿyāⁿ yeⁿe yāāⁿ Jerusalén miiⁿ nguéé ntuumicadiinúⁿ yā yeⁿé.

N'nuúⁿ yā chi che'e yā cáávā 'vícú yeⁿe pascua

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Ndaā nguuvi yeⁿe pascua, 'viicu chi nducyaaca 'iiⁿyāⁿ che'e yā pan chi nguéé levadura yeⁿé. Nguuvi miiⁿ ní 'iiⁿyāⁿ 'caaⁿnúⁿ yā 'áámá 'iiti cuūchī 'lín chí sacrificio yeⁿe pascua. ⁸ Jesús dicho'ó yā Pedro miiⁿ ndúúcu Juan ní caⁿa yā chii yā 'uuvi yā: Cuéⁿé nī ní n'nuúⁿ nī naachi che'e nguiinū yú yeⁿe 'viicu yeⁿe pascua.

⁹ 'Iiⁿyāⁿ s'eeⁿ ní caⁿa yā chii yā Jesús miiⁿ: ¿Tíí neⁿe nī chi in'nuúⁿ 'nū chi che'e nguiinū yú?

¹⁰ Jesús n'guεécútaⁿa yā: Taachí cundaa nī na yāāⁿ Jerusalén miiⁿ ndaāca nī 'áámá saⁿā chi ndéε sa 'cuuti cuéé nuūⁿnīⁿ. Caⁿá nī ndúúcu sa ndíí ná va'ai naachi ndaā sa. ¹¹ Ní caaⁿmáⁿ nī cuuvi nī saⁿā chi va'ai yeⁿé miiⁿ: N'diī, señor Maestro yeⁿe yú ngaⁿá yā 'túúca: ¿Tíí cánéé cuarto chi che'é nguiinū yeⁿe pascua ndúúcu discípulos yeⁿé? ¹² Saⁿā miiⁿ ní 'cuuⁿmiⁿ sa ndís'tiī 'áámá cuarto ch'εεte yeⁿe va'āi chí ndii 'uūvī piso ní 'aa véé yaāⁿ. Miiⁿ in'nuúⁿ nī chi che'e yú yeⁿe pascua.

¹³ Apóstoles ní cueⁿe yā ní ndaaca yā tanducueⁿē tan'dúúcā chi Jesús ngaⁿa yā ngii yā, ní n'nuúⁿ yā chí che'e yā yeⁿe pascua.

¹⁴ Taachí ndaā snuū ca'a hora chi che'e nguiinú yā, Jesús miiⁿ ndúúcū apóstoles yeⁿe yā ch'εεté yā na mesa chi che'e nguiinú yā. ¹⁵ Jesús caⁿa yā chii yā 'iiⁿyāⁿ s'eeⁿ: De'ε chúúcā neⁿé che'é ndúúcū ndís'tiī 'viicu yeⁿe pascua 'cūū neⁿe chí 'āā 'cuéé 'cuūví. ¹⁶ Caati ngaⁿá ngii ndís'tiī ti 'úú ní 'āā ntéé che'é ndúúcu nī táámá 'viicu pascua ndíí taachi cuuvi cuaacu chi neⁿe caaⁿmaⁿ yeⁿē naachí Ndyuūs ngaⁿa ntiiⁿnyúⁿ yā.

¹⁷ Tuu'mi ní Jesús sta'á yā taza ndúúcū vino ní ca'a yā gracias Ndyuūs. Ní caⁿa yā chii yā apóstoles yeⁿe yā: Cuta'á nī chuū ní cu'u nī nguaaⁿ nducyaaca nī. ¹⁸ Ti 'úú ní ngaⁿá ngii ndís'tiī, chí 'āā ntéé cu'ú jugo yeⁿe uvas, ndii ndaá nguuví yeⁿe naachí Ndyuūs ngaⁿa ntiiⁿnyúⁿ yā.

¹⁹ Tuu'mi ní sta'a Jesús pan miiⁿ ní ca'a yā gracias Ndyuūs. Ní n'deé yā ní ca'a yā apóstoles ní caⁿa yā: Chuū chi tan'dúúcā cuerpo yeⁿé 'tíicā. Ní teé lugar 'iiⁿyāⁿ chí 'caaⁿnúⁿ yā 'úú cáávā ndís'tiī. Díⁿ nī chuū taachi n'gaacú nī yeⁿe 'úú.

²⁰ 'Tiicá ntúūⁿ díⁿ yā ndúúcū taza. Taachí ch'íinú che'e yā ní caⁿa yā: Jugo yeⁿe uvas yeⁿe taza chí cuuvi cuaacu ní chuū tan'dúúcā chí yuūuⁿ yeⁿé chí cungéé cáávā ndís'tiī.

²¹ Maaⁿ ní saⁿā chí naca'ā 'úú vεε sa ndúúcu yú na mesa. ²² Saⁿā chí Daiya Dendyuūs chí 'úú cuaacu níⁿnyúⁿ caⁿa sa 'cuūví sa tan'dúúcā chí neⁿe Dendyuūs. De'ε chúúcā ya'ai yeⁿē saⁿā chí naca'ā sa 'úú.

²³ Tuu'mi ní apóstoles tucá'a yā ntiingūūneeⁿ vi'i yā: ¿Du'u ra chí diiⁿ chuū?

Ngaⁿa yā nguaaⁿ maaⁿ yā: ¿Du'ū chí ch'εεte ca?

²⁴ Tuu'mi ní apóstoles tuca'a yā caⁿa yā nguaaⁿ maaⁿ yā chéé yā chí ch'εεte ca yā.

²⁵ Tuu'mi ní Jesús miiⁿ caⁿa yā chii yā 'iiⁿyāⁿ s'eeⁿ: Reyes yeⁿe tanáⁿā naciones ngaⁿa ntiiⁿnyuⁿ yā tan'dúúcā chí 'iivi chεεchi ní 'iiⁿyāⁿ yeⁿe naciones ní ngaⁿa yā chí rey yeⁿe yā n'daacā idiⁿ yā. ²⁶ Naati nguaaⁿ ndís'tiī nguéé 'tíicā. 'Iiⁿyāⁿ chí ch'εεte ca nguaaⁿ ndís'tiī canéé chí díⁿ yā tan'dúúcā saⁿā da'caiyāa chí diiⁿ mandados. 'Iiⁿyāⁿ chí ngaⁿa ntiiⁿnyúⁿ yā nguaaⁿ ndís'tiī canee chí díⁿ yā tan'dúúcā 'áámá 'iiⁿyāⁿ chí dichíí'vεε 'iiⁿyāⁿ. ²⁷ Chεε cá yā chí ch'εεté yā. ¿'Áá 'iiⁿyāⁿ chí n'giindí yā na mesa o 'iiⁿyāⁿ chí n'giī chí cho'o chí cu'u? ¿'Áá nguéé 'iiⁿyāⁿ chí n'giīndi na mesa? N'diichí nī. 'Úú ní canee nguaaⁿ ndís'tiī tan'dúúcā 'iiⁿyāⁿ ndíicūūⁿ chí dichíí'vεε.

²⁸ Ndís'tiī ní ch'εetinée nī nduucú nguuví nguuví taachi 'úú n'geenú ngii tanducueⁿē.

²⁹ Ní tan'dúúcā Chiidá tee yā 'úú naachí ngaⁿā ntiiⁿnyúⁿ 'tiicá ntúūⁿ 'úú ní teé ndís'tiī 'áámá chí caaⁿmaⁿ ntiiⁿnyúⁿ nī. ³⁰ Ní ndís'tiī 'cuεεté nī na mesa nduucú chí che'é nī ní cu'ú nī naachi 'úú ngaⁿá ntiiⁿnyuⁿ. Ní 'cuεεté nī na sillas yeⁿe juez ní n'diichí nī nuuⁿndi yeⁿē ndichúúví ndaata yeⁿe 'iiⁿyāⁿ Israel chí judíos.

Jesús caaⁿmaⁿ yā chí Pedro caaⁿmaⁿ yā chí nguéé deenu sa Jesús

(Mt. 26.31-35; Mr. 14.27-31; Jn. 13.36-38)

³¹ Jesús yaa'ví yā Pedro ní caⁿa yā: N'dii, Simón Pedro, Simón Pedro, cuin'diichí nī ti yááⁿn'guiinūūⁿ ngiicá sa yeⁿe ndís'tiī chí cuuvi diiⁿ sa. N'diichineeⁿ sa ndís'tiī tan'dúúcā 'iiⁿyāⁿ ndáádi yā trigo 'tíicā diiⁿ sa. Ní véé permiso yeⁿe sa. ³² Naati 'úú ní ngaⁿangua'á cáávā dii, Pedro, chí cu'téénu ca di. Ní taachi ndaacadaamí di yeⁿē nuuⁿndi yeⁿe di ní cu'téénu ca di tuu'mi ní cunnee di tanáⁿā hermanos yeⁿe di chí cu'téénu cá yā.

³³ Simón caⁿa yā chii yā Jesús miiⁿ: Señor, 'āā véé yaáⁿ chí caⁿá nduucú nī ndíí vácūū; ní ndúúti chí 'cuuví nī, 'úú ní 'cuuví ndúúcu nī.

³⁴ Jesús caⁿa yā chii yā Pedro: Ngaⁿá ngii dii chí tusáⁿā ní nguéé 'cuai tī ndíí taanduvéé cueeⁿdiitú di 'iīnū cuuvi yeⁿe 'úú chí nguéé in'diichi di 'úú.

Jesús ngaⁿa yā yeⁿe chí cuchii.

³⁵ Tuu'mi ní Jesús itiinguunéeⁿ yā apóstoles: Taachí dicho'ó ndís'tiī nguéé cándεε nī bolsa yeⁿe tuumi nī, ndíí nguéé ndúú morral yeⁿe nī, ndíí nguéé ndúú ndaacuú yeⁿe nī, ¿'áá véé de'ε vεε chí chii faltar yeⁿe nī? Apóstoles ní caⁿa yā: Nguéé de'ε vεε.

³⁶ Ní Jesús caⁿ'a yā: Maaⁿ ní ndís'tiī chi véé bolsa yeⁿ'e nī, candεε nī. 'Tiicá ntúūⁿ ndís'tiī chi véé morral yeⁿ'e nī, candεε nī. Ndís'tiī chi nguéeé 'aama machete 'uūvī lados 'caāiⁿ yeⁿ'e nī, n'diicuī nī cotón yeⁿ'e nī ní cuái nī. ³⁷ Ti ngaⁿ'á ngií ndís'tiī chi canéé chí cuuvi cuaacú tanducuén^{'ē} chi canéé nguūⁿ yeⁿ'é: Ní 'iiⁿ'yāⁿ caⁿ'a yā chi véé nuūⁿndi yeⁿ'e 'úú tan'dúúca tanáⁿ'ā 'iiⁿ'yāⁿ chi véé nuūⁿndi yeⁿ'e yā. Tí tanducuén^{'ē} chi canéé nguūⁿ yeⁿ'e 'úú canéé chí cuuvi cuaacu.

³⁸ Tuu'mi ní discípulos ní caⁿ'a yā: N'diī, Señor, íngāā na 'uuvi machete 'uūvi lados 'caāiⁿ. Jesús ní caⁿ'a yā: Ndúúcu stīī 'āā véé.

Jesús ngaⁿ'angua'á yā na jardín chi nguuvi Getsemani

(Mt. 26.36-46; Mr. 14.32-42)

³⁹ Cuayiivi ní can'daā Jesús tan'dúúca costumbre yeⁿ'e yā ní cueⁿ'é yā na yiīcū yeⁿ'e Olivos. Ní discípulos yeⁿ'e yā cueⁿ'é yā ndúúcu yā. ⁴⁰ Ní taachí ndaa yā na lugar miiⁿ, tuu'mi ní Jesús miiⁿ ní caⁿ'a yā chii yā discípulos yeⁿ'e yā: Ndís'tiī caaⁿ'maⁿngua'á nī chí yááⁿ'giiⁿūⁿ nguéeé n'diichineeⁿ sa ndís'tiī chí dííⁿ nī nuūⁿndi.

⁴¹ Jesús ní cueⁿ'e yā yeⁿ'e discípulos yeⁿ'e yā tanduu naaⁿ chí naachi ndaa 'áámá tuūⁿ chí ngii ya ní Jesús caantii'yā yā ní caⁿ'angua'á yā. ⁴² Ní caⁿ'a yā: N'diī, Chiidá, ndúútí chí neⁿ'e nī ní diviī nī yeⁿ'e chí canee chí 'cueenú cuuvi yeⁿ'e prueba 'cūū. Naati nguéeé cuuví tan'dúúca chí 'úú neⁿ'é naati tan'dúúca chí n'diī neⁿ'e nī.

⁴³ Ní che'enaāⁿ 'áámá ángel yeⁿ'ē nanguuvi ní ca'á yā fuerzas Jesús miiⁿ. ⁴⁴ Ti neené ya'ai Jesús miiⁿ ní ndiituu n'dai ca ngáⁿ'angua'á yā. Ní nuūⁿniⁿyaaⁿ yeⁿ'e yā tan'dúúca yuuúⁿ chí ndii na yáⁿ'āā ingéē.

⁴⁵ Nducueeⁿ yā naachí ngaⁿ'angua'á yā ní ndaa yā nanááⁿ discípulos yeⁿ'e yā ní ndaaca yā chí styaadú yā, ti discípulos ní neené ndaachi núúⁿ yā ti ya'ai yā cáávā Jesús miiⁿ.

⁴⁶ Tuu'mi ní Jesús caⁿ'a yā chii yā discípulos: ¿De'ē cúúví chí styaadú nī? Nducueeⁿ nī ní caaⁿ'maⁿngua'á nī ní yááⁿ'guiiⁿūⁿ nguéeé n'diichineeⁿ sa ndís'tiī chí dííⁿ nī nuūⁿndi.

Sta'a yā Jesús miiⁿ ní candéé yā preso

(Mt. 26.47-56; Mr. 14.43-50; Jn. 18.2-11)

⁴⁷ Taachí Jesús indée yā neené n'dee 'iiⁿ'yāⁿ ndaa yā ní saⁿ'ā chí nguuvi Judas miiⁿ chí 'áámá chéé naachí ndiichuuví discípulos yeⁿ'é yā cueⁿ'é yā vmnááⁿ yeⁿ'ē 'iiⁿ'yāⁿ s'eeⁿ ní ndaa niiⁿnuúⁿ yā Jesús miiⁿ chí 'neeⁿcheendí yā. ⁴⁸ Tuu'mi ní Jesús miiⁿ ní caⁿ'a yā chí yā saⁿ'ā: Díí, Judas, ¿'áá ndúúcu 'áámá beso ínaca'a di 'úú chí Saⁿ'ā chí Daiya Ndyuūs 'iiⁿ'yāⁿ?

⁴⁹ Discípulos chí snée yā ndúúcu Jesús taachí snaaⁿ yā chí cuuvi, tuu'mi ní caⁿ'a yā chí yā Jesús: N'dií, Señor, ¿'áá 'caaca taaⁿ 'nū ndúúcu machete 'uūvī lados 'caāiⁿ yeⁿ'ē yú?

⁵⁰ Tuu'mi ní 'áámá chéé discípulos 'nuūcá'ai yā 'áámá mozo yeⁿ'ē chiiduú ch'εεté ca ní ch'iica yā veeⁿ sa lado tá cuaacú sa. ⁵¹ Ní Jesús caⁿ'a yā: 'Āā ntéé 'cuuⁿ'miⁿ dí. 'Āā snée ra yā. Ní Jesús tuu'ví yā veeⁿ sa ní nduūvā yeⁿ'ē sa. ⁵² Cuayiivi ní Jesús caⁿ'a yā chí yā chiiduú n'gεεte ndúúcu soldados chí capitanes chí dííⁿ sa cuidado yaacū templo ndúúcu 'iiⁿ'yāⁿ ndicūú chí ngaⁿ'ā ntiiⁿnyúⁿ yā yeⁿ'e yaacū chí ndaa yā ndúúcu Judas miiⁿ: ¿'Áá ndaa ndís'tiī ndúúcu machetes 'uūvī lados 'caāiⁿ ndúúcu yáⁿ'á yeⁿ'e soldados tan'dúúca chí caⁿ'a nī cutá'a nī 'áámá chí duūcū? ⁵³ Taachí canéé ndúúcu ndís'tiī nguuvi nguuvi ná yaacū templo nguéeé neⁿ'é nī cuta'á nī 'úú. Naati maaⁿ ní hora 'cūú chí yeⁿ'ē ndís'tiī ti hora taachí maāiⁿ miiⁿ, chííⁿ chí yááⁿ'guiiⁿūⁿ ngaⁿ'a ntiiⁿnyuⁿ sa.

Pedro miiⁿ ní ngaⁿ'a sa chí nguéeé in'diichi sa Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tuu'mi ní 'iiⁿ'yāⁿ s'eeⁿ sta'a yā Jesús miiⁿ ní candéé yā Jesús va'ai yeⁿ'ē chiiduú ch'εεté ca. Pedro miiⁿ ní ndáá yaⁿ'ai sa 'iiⁿ'yāⁿ. ⁵⁵ Náⁿ'ā 'iiⁿ'yāⁿ tiivií yā yaⁿ'ā náávtaⁿ'ā chuva'ai ní ch'εεté yā cuaaⁿ 'diituu yaⁿ'ā miiⁿ chí dicuutú yā. Pedro miiⁿ ní ch'iīndi sa ntúúⁿ sa ndúúcu 'iiⁿ'yāⁿ s'eeⁿ. ⁵⁶ Tuu'mi ní 'áámá tán^{'ā} chí cánéé caadi 'iīyū, n'diichī tá Pedro miiⁿ chí vε sa 'diituu na yaⁿ'ā. Ní n'giinu n'dai tá saⁿ'ā ní caⁿ'a tá: Sáⁿ'a 'cūú ní canee sa ndúúcu 'iiⁿ'yāⁿ chí preso yā.

⁵⁷ Pedro miiⁿ ní caⁿ'a sa chii sa n'daātā miiⁿ: 'Úú nguéé in'diichí 'iiⁿ'yāⁿ miiⁿ.

⁵⁸ Cuayivi miiⁿ ní 'aama saⁿ'ā n'diichi n'dai sa ní caⁿ'a sa chii sa Pedro miiⁿ: Dii, ní ndúú^{cū} di nguaaⁿ 'iiⁿ'yāⁿ s'eeⁿ. Pedro miiⁿ ní caⁿ'a sa chii sa saⁿ'ā miiⁿ: Nguεε 'úú.

⁵⁹ Cho'ōo 'áámá hora, ni táámá yā ní caⁿ'a yā: Cuaacu níⁿnyúⁿ sáⁿ'a 'cūū ní canéé sa ndúú^{cū} 'iiⁿ'yāⁿ chi preso yā ti sáⁿ'a 'cūū ní yeⁿ'ē yáⁿ'āa Galilea ntúūⁿ.

⁶⁰ Pedro miiⁿ ní caⁿ'ā sa chii sa saⁿ'ā miiⁿ: Díí, sáⁿ'ā, nguéé deenú chi ngaⁿ'ā di. Taachí Pedro miiⁿ 'āā cuéé 'cuiinu sa caⁿ'a sa chúū, tusáⁿ'ā miiⁿ ní 'cai tī. ⁶¹ Tuu'mi ní Jesús miiⁿ nguεεcundí yā ní n'diichi yā Pedro. Pedro miiⁿ nán'gaācū sa nduudu chí caⁿ'a Jesús miiⁿ chii yā saⁿ'ā 'túú^{cā}: 'Āā 'iinu cúúví caaⁿ'maⁿ dí chi nguéé n'diichi di 'úú, taachi 'āā cuéé 'cai 'áámá vmnéⁿ'ēe tusáⁿ'ā. ⁶² Tuu'mi ní Pedro miiⁿ ní can'dáa sa cuaaⁿ va'ai, ní chεεcu taavi sa ti ya'ai staava yeⁿ'ē sa.

Saⁿ'ā s'eeⁿ ch'eⁿ'e sa Jesús

(Mt. 26.67-68; Mr. 14.65)

⁶³ Sáⁿ'ā s'eeⁿ chi diiⁿ cuidado Jesús miiⁿ chíⁿnyuⁿneeⁿ sa Jesús miiⁿ ní ch'eⁿ'e sá 'iiⁿ'yāⁿ.

⁶⁴ Ní n'gaadi sa nduutináaⁿ yā ndúú^{cū} 'aama tíínuuⁿ. Tuu'mi ní ch'eⁿ'e sá naaⁿ Jesús ní ngaⁿ'a sa ngii sa 'iiⁿ'yāⁿ: Dii, caaⁿ'maⁿ di, ¿du'ú ch'eⁿ'ē dii?

⁶⁵ Ní neene cuncāā nduudu ngii sá Jesús.

Jesús nanááⁿ 'iiⁿntyéⁿ'ē yeⁿ'e yaācū templo

(Mt. 26.59-66; Mr. 14.55-64; Jn. 18.19-24)

⁶⁶ Taachí chidεεve táámá nguuvi, 'yaaⁿ n'dái 'iiⁿ'yāⁿ ndiicūū yeⁿ'e yáāⁿ miiⁿ chi ngaⁿ'a ntiiⁿnyuⁿ yā yeⁿ'e yaācū, ndúú^{cū} chiiduú n'gεεtē, ndúú^{cū} maestros chi ngi'cueéⁿ ley miiⁿ candéε yā Jesús nanááⁿ 'iiⁿntyéⁿ'ē yeⁿ'e yaācū templo.

⁶⁷ Mííⁿ íntiinguunéⁿ yā Jesús: ¿'Áá díí chí Cristo? Jesús miiⁿ nan'guεεcutaⁿ'a yā yeⁿ'e 'iiⁿ'yāⁿ s'eeⁿ: Ndúúti chi caaⁿ'máⁿ chí 'tíí^{cā}, ní nguéé cu'téénu nī yeⁿ'é. ⁶⁸ Nduuti chí 'úú ntiinguunéⁿ ndís'tií, nguéé n'guεεcutaⁿ'a nī yeⁿ'é, ndíí nguéé ndúú n'dεεchi ra nī 'úú.

⁶⁹ Naati hora chí cuchií ní Saⁿ'ā chí Daiya Ndyuūs ní 'cuūndi sa lado yeⁿ'e honor yeⁿ'é Ndyuūs chí véé tanducuéⁿ'ē poder yeⁿ'e yā.

⁷⁰ Tanducuéⁿ'ē 'iiⁿ'yāⁿ s'eeⁿ caⁿ'a yā: ¿'Áá dii Daiya Dendyuūs miiⁿ? Ní Jesús ní caⁿ'a yā: Ndís'tií maáⁿ nī ngaⁿ'a nī chí 'úú ní 'tíí^{cā}.

⁷¹ Tuu'mi ní 'iiⁿ'yāⁿ s'eeⁿ ní caⁿ'a yā: ¿Dε'ē cá nduudu cuaacu yeⁿ'e 'iiⁿ'yāⁿ chí neⁿ'e yú? Tí maāⁿ yú ch'iindiveeⁿ cuaacú yú nduudu chí caⁿ'a sa.

23

Jesús nanááⁿ gobernador Pilato

(Mt. 27.1-2, 11-14; Mr. 15.1-5; Jn. 18.28-38)

¹ Tuu'mi ní nducyaaca 'iiⁿ'yāⁿ ní candεε yā Jesús miiⁿ nanááⁿ gobernador Pilato. ² Ní tuca'a yā caⁿ'a yā nuuⁿndi yeⁿ'ē Jesús miiⁿ ní caⁿ'a yā: Inndaacá 'nū sáⁿ'a 'cūū chí diiⁿ sa chí 'iiⁿ'yāⁿ nguéé i'téénu yā chí ngaⁿ'a ley yeⁿ'é 'nū. Ní nguéé neⁿ'e sa chí nadíí've 'nū yeⁿ'e yáⁿ'āa emperador César tan'dúú^{cā} chí ngaⁿ'a ley yeⁿ'é nī. Ní sáⁿ'a 'cūū ní ngaⁿ'ā sa chí maāⁿ sa chí Cristo, chí Rey yeⁿ'é 'nū.

³ Tuu'mi ní saⁿ'ā Pilato miiⁿ ní itiinguunéⁿ sa Jesús: ¿'Áá dii chí Rey yeⁿ'e 'iiⁿ'yāⁿ Israel s'eeⁿ? Jesús nan'guεεcutaⁿ'a yā: N'dií ngaⁿ'á cuaacú nī ti 'tíí^{cā}.

⁴ Pilato miiⁿ ní caⁿ'a yā chii yā chiiduú n'gεεtē ndúú^{cū} 'iiⁿ'yāⁿ s'eeⁿ: 'Úú nguéé inndaacá mar 'áámá nuuⁿndi yeⁿ'e sáⁿ'a 'cūū.

⁵ 'Iiⁿ'yāⁿ s'eeⁿ ní diitu n'dái 'cai yā: Sáⁿ'a 'cūū ní idií sa chí 'iiⁿ'yāⁿ n'g'éécú cheendi yā nguaaⁿ maaⁿ yā ndúú^{cū} chí ngi'cueeⁿ yā ní ngi'cueeⁿ yā nuuⁿmáⁿ yáⁿ'āa Judea ndíí na yáⁿ'āa yeⁿ'ē Galilea ndii 'muuⁿ.

Jesús nanááⁿ rey Herodes

⁶ Tuu'mi ní Pilato, taachi ch'iindiveeⁿ yā chí Jesús cheⁿ'e yā ndii yáⁿ'āa yeⁿ'e Galilea, ní ntiinguunéⁿ yā Jesús nduuti chí yeⁿ'e yáⁿ'āa yeⁿ'e Galilea. ⁷ Ní taachí Pilato ch'iindiveeⁿ

sa chi Jesús miiⁿ ní yeⁿē yáⁿā Galilea yeⁿe yáⁿā naachi rey Herodes ngaⁿ'a ntiinyúⁿ yā, Pilato miiⁿ ngaⁿ'a ntiinyúⁿ yā chi Jesús can^{'a} yā nanááⁿ rey Herodes tii canée yā na yáāⁿ Jerusalén nguuvⁱ miiⁿ.

⁸ Taachí rey Herodes n'dííchi sa Jesús miiⁿ, neené yeenú sa ti 'āā 'nááⁿ n'dai tiempo néⁿé sá snaaⁿ sa Jesús. Tí neené n'deēe 'nááⁿ chí ch'iindiveeⁿ sa yeⁿé yā ní canée ngíínú sá chí snaaⁿ sa 'áámá vaadī n'giinu chí dííⁿ Jesús miiⁿ. ⁹ Néené n'deēe 'naaⁿ chí ntiingūūneeⁿ sa Jesús miiⁿ, naati nguéé de'ē vεε nan'guεεcútaⁿ'a Jesús. ¹⁰ Tuu'mi ní miiⁿ canee ntuuⁿ chiiduú n'gεεté ndúúcū maestros chí ngi'cuéeⁿ ley miiⁿ chí n'deēe 'nááⁿ n'dai ngaⁿ'a yā chí nuuⁿndi yeⁿē Jesús. ¹¹ Tuu'mi ní Herodes ndúúcū soldados yeⁿe yā chí nuuⁿ yā 'áámá tiinūuⁿ n'dáí tan'dúúcā catecai rey Jesús miiⁿ ní chiiⁿnyuⁿneeⁿ yā Jesús miiⁿ ní cunncaá caⁿ'a yā yeⁿe Jesús miiⁿ. Cuayiivi ní dicho'o ntúuⁿ yā Jesús nanááⁿ Pilato miiⁿ. ¹² Ndíí nguuvⁱ miiⁿ tuu'mi ní Pilato ndúúcū Herodes naaⁿ n'daá n'dai yā ndúúcū vi'í ti cuááⁿ vmnaaⁿ ní nguéé n'diichí yā vi'í.

Pilato nca'a sa Jesús chí 'cuūvi

(Mt. 27.15-26; Mr. 15.6-15; Jn. 18.39-19.16)

¹³ Tuu'mi ní Pilato nduuvidaamá yā chiiduú n'gεεté ndúúcū 'iinyéⁿe ndúúcū nducyaaca 'iinyāⁿ yeⁿē yáāⁿ Jerusalén miiⁿ. ¹⁴ Ní caⁿ'a yā chii yā 'iinyāⁿ s'eeⁿ: Ndís'tií ní ndaá ní chí 'cúúⁿ ní sáⁿ'a 'cūū chí dííⁿ sa chí 'iinyāⁿ ní nguéé n'gεεtinéé 'diíⁿ yā ndúúcū chí ngi'cuéeⁿ sa. Taachí intiinguuneéⁿ saⁿ'ā nanááⁿ ndís'tií nguéé nindaācá mar 'áámá nuuⁿndi yeⁿē sa chí ngaⁿ'a ndís'tií yeⁿē sa. ¹⁵ Ndíí nguéé ndúú rey Herodes miiⁿ ndaāca yā nuuⁿndi yeⁿē sáⁿ'a 'cūū chí canée chí 'cuūvi sa ti Herodes 'āā dicho'ó yā sáⁿ'a 'cūū nanaáⁿ. Sáⁿ'a 'cūū nguεε dííⁿ sa nuuⁿndi ch'εεte chí 'cuūvi sa. ¹⁶ Maaⁿ ní dííⁿ 'cueⁿ'é saⁿ'ā miiⁿ ní cuáyíívi n'dεechí saⁿ'ā.

¹⁷ Canée 'áámá costumbre yeⁿ'é ní chí gobernador canee chí n'dεechi yā 'áámá preso 'viicu pascua ní gobernador Pilato miiⁿ ní canée yā dííⁿ yā 'tíicā. ¹⁸ Nducyáácá 'iinyāⁿ 'cai yā: N'dεechi ní saⁿ'ā chí nguúví Barrabás. Ní 'āā 'cuuvi rá sáⁿ'a 'cūū.

¹⁹ Barrabás miiⁿ canúúⁿ sá vácūū chí dííⁿ sa chí 'iinyāⁿ yeⁿe yáāⁿ Jerusalén miiⁿ ní 'cuuⁿmíⁿ yā contra yeⁿe gobierno ní ch'iinyāⁿ sa 'áámá tináⁿ'ā. ²⁰ Gobernador Pilato miiⁿ ní neⁿ'e sa n'dεechi sa Jesús, ní caⁿ'a sa chí sa 'iinyāⁿ s'eeⁿ taama vmnéⁿ'ēe chí n'dεechi sá Jesús. ²¹ Naati 'iinyāⁿ s'eeⁿ 'cai ntúuⁿ yā: Cu'nééⁿnga'á ní saⁿ'ā, cu'nééⁿnga'á ní saⁿ'ā.

²² Gobernador Pilato miiⁿ ní caⁿ'a ntúuⁿ yā ndii chííⁿ ndii 'íínú cuuvi: ¿Dé'ē chí nguéé n'dáacā ndííⁿ sáⁿ'a 'cūū? 'Úú nguéé inndaācá mar 'áámá núúⁿndí ch'εεte yeⁿē sa chí 'cuūvi sa. 'Úú ní ca'á orden chí ch'eⁿ'é yā sáⁿ'a 'cūū ní n'dεechí sáⁿ'a 'cūū.

S'nééⁿnga'á yā Jesús

²³ 'iinyāⁿ s'eeⁿ chí canndii cá yā 'cai yā chí chíica yā chí cu'neeⁿngá'ā Jesús miiⁿ. Ní 'iinyāⁿ s'eeⁿ ndúúcū chiiduú n'gεεté díituu n'dáí ca 'cai yā. ²⁴ Tuu'mi ní gobernador Pilato miiⁿ ní ca'a yā orden chí dííⁿ yā tan'dúúcā chí neⁿ'e 'iinyāⁿ s'eeⁿ. ²⁵ Ní n'dεechi yā saⁿ'ā chí nguuvⁱ Barrabás miiⁿ chí canúúⁿ vácūū. Sáⁿ'ā miiⁿ ní dííⁿ sa chí 'cuuⁿmíⁿ 'iinyāⁿ yeⁿ'e Israel contra yeⁿ'e gobierno ní 'niiⁿ'nuⁿ sa 'áámá tináⁿ'ā. Sáⁿ'a 'cūū chí chíica 'iinyāⁿ s'eeⁿ chí n'dεechí yā saⁿ'ā. Ní nca'a yā Jesús miiⁿ chí soldados cu'neeⁿnga'a sa tan'dúúcā chí neⁿ'e 'iinyāⁿ s'eeⁿ.

Yeⁿ'é chí cu'neeⁿnga'á yā Jesús

(Mt. 27.32-44; Mr. 15.21-32; Jn. 19.17-27)

²⁶ Taachí cueⁿ'e yā cuaaⁿ cyúúⁿ miiⁿ ndúúcū Jesús miiⁿ, soldados sta'á yā 'áámá saⁿ'ā yeⁿ'e yáⁿā Cirene chí nguuvⁱ sa Simón. Saⁿ'ā miiⁿ ní yúúⁿ canuuⁿ sa chí cueⁿ'e sa cuεεti. Soldados a fuerza di'cuíftu yā Simón miiⁿ chí candée sa cruz yeⁿ'e Jesús miiⁿ ní cueⁿ'e sa cuaaⁿ daami Jesús miiⁿ.

²⁷ Néené 'yaaⁿ 'iinyāⁿ yeⁿ'e yáāⁿ Jerusalén miiⁿ cueⁿ'e yā n'dáa yā Jesús miiⁿ ndúúcū n'daataá chí díituu ngeecu yā ní ya'ai yā cáāvā Jesús miiⁿ. ²⁸ Jesús miiⁿ ní ch'íínú yā n'daataá s'ééⁿ ní caⁿ'a yā chí yā táⁿ'ā s'eeⁿ: Ndís'tií, daiya 'iinyāⁿ yeⁿ'e yáāⁿ Jerusalén,

nguéeé cuεεcú nī cáávā 'úú, naati cuεεcú nī cáávā maán nī ní caavā daiya nī. ²⁹ Ti ndaá nguuvi chí caaⁿ'maⁿ 'iiⁿ'yāⁿ: ¿De'ē chúúccā n'dai n'daataá chi nguéeé ncuuvi daiya tá ní n'daataá chi nguéeé ntaavi daiya tá ní n'daataá chi nguéeé daiya tá chi ca'a ta daiya tá chí chiicu? ³⁰ Tuu'mi ní 'iiⁿ'yāⁿ s'eeⁿ tucá'a yā caⁿ'a yā 'tuucā: Díi yīicū cun'daá nduú nī vmnaaⁿ yeⁿ'é 'nū. Caⁿ'a ntúuⁿ yā chii yā yīicū n'gaiyáā: Cun'díi neeⁿ dí nús'uu. ³¹ Caati ndúúti chí 'iiⁿ'yāⁿ chí taaⁿ yā 'caaca yā yáⁿ'á cueeé chí tan'dúúccā 'úú, ¿'áá nguéeé caniicu cá yā 'caaca yā yáⁿ'á chí cuuⁿ'maⁿ chí tan'dúúccā ndís'tii? 'Tíicā ngaⁿ'a Jesús.

³² Nguuvi miiⁿ ní candée ntúuⁿ yā na 'uuvi saⁿ'ā chí n'giiⁿ'nuⁿ 'iiⁿ'yāⁿ chí cu'neeⁿ'nga'a yā saⁿ'ā s'eeⁿ dáámá ndúúccū Jesús miiⁿ. ³³ Taachí ndaa yā lugar yeⁿ'ē 'áámá yīicū 'líiⁿ chí nguuvi Calavera, miiⁿya chí'néeⁿ'nga'a yā Jesús miiⁿ ndúúccū nduu 'uúví saⁿ'ā chí n'giiⁿ'núⁿ 'iiⁿ'yāⁿ, 'áámá sa lado ta cuaacú Jesús miiⁿ, ní táámá sá lado tá 'cueé yā. ³⁴ Tuu'mi ní taachi snée yā i'neeⁿ'nga'á yā, Jesús miiⁿ caⁿ'a yā: N'diī, Chiidá, nadich'εεcú nī yeⁿ'e saⁿ'ā s'uuⁿ caati nguεε déénu sá de'ē chí 'túúccā idiī sa. Tuu'mi ní soldados tun'dáa sa suerte na catecai Jesús chí ca'a sa 'áámá sá ndúúccū taama sa. ³⁵ 'Iiⁿ'yāⁿ yeⁿ'e yáāⁿ Jerusalén miiⁿ snée yā n'giinu yā níicú 'iiⁿ'ntyēⁿ'ē n'giiⁿ'nyuⁿ'neéⁿ yā Jesús miiⁿ. Ní ngaⁿ'a yā ngii yā yeⁿ'e Jesús: Sáⁿ'a 'cūū ní nadanguáⁿ'ai sa tanáⁿ'ā 'iiⁿ'yāⁿ. ¿De'ē cuuvi chí nguéeé nadinguáⁿ'ai maāⁿ sa saⁿ'ā nduuti chí saⁿ'ā miiⁿ chí Cristo chí Ndyuūs dicho'ó yā?

³⁶ 'Tiicá ntúūⁿ soldados n'giiⁿ'nyuⁿ'neeⁿ sa Jesús miiⁿ. Cheⁿ'e niiⁿ'núⁿ yā ní ca'a yā vinagre. ³⁷ Ní caⁿ'a yā chii yā Jesús miiⁿ: Ndúúti chí díi chí Rey yeⁿ'e 'iiⁿ'yāⁿ Israel, nadanguáⁿ'ai maāⁿ di díi.

³⁸ Ní canée nguūⁿ na tiiⁿ cruz yeⁿ'e Jesús miiⁿ nduudu griego ndúúccū nduudu latín ndúúccū nduudu hebreo, chí ngaⁿ'a: Sáⁿ'a 'cūū Rey yeⁿ'ē 'iiⁿ'yāⁿ yeⁿ'e ndaata Israel.

³⁹ 'Áámá chεε saⁿ'ā chí véé nuuⁿ'ndi yeⁿ'ē sa chí ca'néeⁿ'nga'a yā 'áámá lado yeⁿ'e Jesús cunncaā caⁿ'a sa ní caⁿ'a sa chí sa Jesús: Ndúúti chí dii chí Cristo miiⁿ nadinguáⁿ'ai di maaⁿ di ní nadinguáⁿ'ai ntuuⁿ di nús'uu. ⁴⁰ Táámá saⁿ'ā chí cu'neeⁿ'nga'a yā táámá lado yeⁿ'e Jesús 'caa'va sa ndúúccū sáⁿ'a 'cūū ní caⁿ'a sa chí sa saⁿ'ā: Díi ¿'áá nguéeé 'va'a di Ndyuūs? Dii ní dáámá condenado ndúúccū nús'uu. ⁴¹ S'uúⁿ ní cuaacu níⁿ'nyúⁿ n'geenu yú ngii ti véé nuuⁿ'ndi yeⁿ'ē yú chí nadíⁿ'vē yú nuuⁿ'ndi yeⁿ'e yú naati sáⁿ'a 'cūū nguéeé de'ē vεε nuuⁿ'ndi díiⁿ sa.

⁴² Saⁿ'ā miiⁿ ní caⁿ'a sa chí sa Jesús miiⁿ: N'diī, Jesús, n'gaacú nī yeⁿ'ē 'úú taachí ndaá nī naachi caaⁿ'maⁿ ntiiⁿ'nyuⁿ yeⁿ'ē.

⁴³ Tuu'mi ní Jesús miiⁿ caⁿ'a yā chí yā saⁿ'ā: Cuaacu níⁿ'nyúⁿ ngaⁿ'á ngii dii, ti maaⁿ ní cunee di nduucú na lugar chí nguuvi paraíso.

Jesús ch'iī yā

(Mt. 27.45-56; Mr. 15.33-41; Jn. 19.28-30)

⁴⁴ Taachí chíi maⁿ'a nguuvi chíi maāⁿ núúⁿ'máⁿ íⁿ'yeeⁿ'di ndíi taanduū n'gεεcu 'íínú chíinū. ⁴⁵ 'Yáⁿ'ā ní nduuvi maāⁿ ní cortina yeⁿ'e yaacū templo nda'ai náávtáⁿ'ā. ⁴⁶ Tuu'mi ní Jesús miiⁿ 'cai yā: N'diī, Chiidá, na ta'á nī cu'neeⁿ espíritu yeⁿ'é. Ch'íínú caⁿ'a yā chuū, ní Jesús ch'iī yā.

⁴⁷ Taachí saⁿ'ā chí ngaⁿ'a ntiiⁿ'nyuⁿ yeⁿ'e soldados romanos n'diichi sa chí ch'iī Jesús, tuu'mi ní caⁿ'a sa: De'ε chúúccā ch'εεte Ndyuūs. Cuaacu níⁿ'nyúⁿ sáⁿ'a 'cūū saⁿ'ā chí nguéeé nuuⁿ'ndi yeⁿ'ē sa.

⁴⁸ Nducyáácá 'iiⁿ'yāⁿ chí cheⁿ'e yā ní n'diichi yā chí chíi, nguεεcundíi yā ch'eⁿ'e niiⁿ'nuⁿ yā taachi cueⁿ'é yā vaacu yā. ⁴⁹ Ní nducyáácá 'iiⁿ'yāⁿ chí n'diichí yā Jesús miiⁿ, ndúúccū n'daataá chí cheⁿ'e ndúúccū Jesús miiⁿ ndii yáⁿ'āa yeⁿ'e Galilea, ch'εetinéeⁿ yaⁿ'ai yā ch'íínú yā dendu'ū chí 'túúccā.

Ch'iichi yā Jesús

(Mt. 27.57-61; Mr. 15.42-47; Jn. 19.38-42)

⁵⁰ Véé 'áámá saⁿ'ā chí n'dai ní n'daacā sa chí ngúúví sá José. Sáⁿ'ā miiⁿ ní saⁿ'ā ch'εεte yeⁿ'é 'iiⁿ'ntyéⁿ'ē ch'εεte yeⁿ'é 'iiⁿ'yāⁿ Israel. ⁵¹ Saⁿ'ā miiⁿ ní yeⁿ'e yáāⁿ Arimatea chí yáⁿ'āa yeⁿ'e 'iiⁿ'yāⁿ Israel. Ní saⁿ'ā nguéeé ndúúvídaama sa ndúúccū tanáⁿ'ā 'iiⁿ'ntyéⁿ'ē ti nguéeé

canee yiinú sa ndúúcū chi dííⁿ yā. Tí saⁿā miiⁿ canee ngíínú sá tiempo chi Ndyuūs ndaa yā inⁿyeedíⁿ 'cūū ní ngaⁿa ntiíⁿnyúⁿ yā. ⁵² Ní cueⁿe sa ndaa sa nanááⁿ gobernador Pilato ní chiica sa cuerpo yeⁿe Jesús miiⁿ. ⁵³ Cuayiivi taachi José ndivií sa cuerpo yeⁿe Jesús na cruz ní ch'ēēcu sa áámá sámana na cuerpo yeⁿe yā tan'dúúcā costumbre yeⁿe 'iiⁿyāⁿ Israel ní ch'iichi sa na 'áámá yáinyāⁿ ngai chi din'dái yā cheeti yiivi yaava naachí mar 'áámá 'iiⁿyāⁿ nguéé nnúuⁿ yā. ⁵⁴ Nguuvi miiⁿ ní nguuvi viernes chi 'iiⁿyāⁿ ch'iindiyaáⁿ yā tanducuéⁿē cáávā 'viicu pascua ní cáávā nguuvi chi cuchii chi sábadō chi nguuvi chi ntaavi'tuunúúⁿ 'iiⁿyāⁿ Israel.

⁵⁵ N'daata s'eeⁿ chí can'daa Jesús ndii na yáⁿā Galilea, cueⁿe tá ní n'diichi tá yáinyāⁿ ní táácā canuúⁿ cuerpo yeⁿe Jesús. ⁵⁶ Ní taachí n'daataá s'eeⁿ ndaa tá vaacu tá, n'nuuⁿ tá perfumes ndúúcū pomadas chi n'dēevé ngeeⁿ. Ní nguuvi cuayiivi, ní nguuvi sábadō chi ntaavi'tuunúúⁿ 'iiⁿyāⁿ tan'dúúcā chi ngaⁿa ley yeⁿe yā.

24

Jesús nanduuchi yā yeⁿe nguaaⁿ tináⁿā
(Mt. 28.1-10; Mr. 16.1-8; Jn. 20.1-10)

¹ Nguuvi domingo chi maaⁿ ní nguuvi vmnááⁿ vmnaaⁿ yeⁿe ndēete, tyaaⁿ n'dái cueⁿe n'daataá s'leeⁿ ní cueⁿe yā ndúúcū tanáⁿā n'daataá. Candéε yā especias chi dēevé ngeéⁿ chí 'āā véé yaáⁿ yā. ² Taachí ndaa yā na yáinyāⁿ miiⁿ, 'āā ntéé tuúú ch'eté miiⁿ na cheendi yáinyāⁿ ti canee 'aama lado. ³ Tuu'mi ní taachí sndaā yā cheeti yáinyāⁿ miiⁿ, nguéé ndaacá yā cuerpo yeⁿe Jesús. ⁴ Taachí n'diichí yā chuū, ní dii'yá yā chíi, tuu'mi ní neéⁿ na 'uuvi saⁿā 'diituú yā ndúúcū catecai chi dēevé ngii. ⁵ Ní n'daataá s'eeⁿ dii'ya n'dai yā chíi ní n'diichí yā ndii na yáⁿā. Saⁿā s'eeⁿ ní caⁿa sa: ¿De'ē cuuví chí in'nuúⁿ nī 'iiⁿyāⁿ chi candúúchí yā yeⁿe nguaaⁿ tináⁿā? ⁶ 'Iiⁿyāⁿ miiⁿ ní 'āā ntéé canee yā 'muuⁿ. 'Āā nnduuchi yā nguaaⁿ tináⁿā. N'gáácú nī yeⁿe nduudu chí caⁿa yā taachi canee yā ndúúcu nī na yáⁿā Galilea taachí 'āā cuéé 'cuūvi yā. ⁷ Ní Jesús miiⁿ ní caⁿa yā chíi yā ndís'tiī: 'Úú Saⁿa chi Daiya Ndyuūs ní 'iiⁿyāⁿ canee chí nca'á yā 'úú ta'tā 'iiⁿyāⁿ chi dinuuⁿndí yā. Ní 'iiⁿyāⁿ s'eeⁿ cu'neeⁿnga'á yā 'úú; naati ndiichi ndii 'íínú nguuvi 'úú nduuchi yeⁿe nguaaⁿ tinaⁿā.

⁸ Tuu'mi ní n'daata s'eeⁿ n'gaacu tá yeⁿe nduudu yeⁿe Jesús miiⁿ. ⁹ Ní cueⁿe tá yeⁿe yáinyāⁿ ní cunaⁿā ta ní caⁿā tá chíi tá ndu'u ndiicháámá apóstoles ndúúcū tanáⁿā 'iiⁿyāⁿ chí snée yā miiⁿya. ¹⁰ N'daata s'eeⁿ chi caⁿa ta chíi tá apóstoles ní ta María yeⁿe yáāⁿ Magdala, ndúúcū ta Juana, ndúúcū tá María chí cheecuú Jacobo, ndúúcū tanáⁿā n'daata s'eeⁿ. ¹¹ Apóstoles ní nadicadiinúúⁿ yā chí táⁿā s'eeⁿ ní loca tá cáávā chí ngaⁿa tá. Ní nguéé s'téenu yā nduudu yeⁿe tá.

¹² Tuu'mi ní Pedro miiⁿ ní ncueⁿ sa ní cueⁿe sa ngéenu sa na yáinyāⁿ. Taachí ndaa sa, tuu'mi ní n'diichi núúⁿ sa cheeti yaínyāⁿ ní 'āā dámaāⁿ sábanas canee miiⁿ. Saⁿā ní cueⁿe yiinu sá yeⁿe chí chó'ōo ní cunaⁿā sa na vaacu sa.

Saⁿā s'eeⁿ ní cueⁿe sa cuaaⁿ cyúúni chí ngeⁿe cuaaⁿ na yáāⁿ Emaús
(Mr. 16.12-13)

¹³ Nguuvi mííⁿ nūuⁿ, 'uuvi saⁿā s'eeⁿ cueⁿe yā 'áámá yáāⁿ 'lííⁿ chí nguuvi Emaús chí canee taanduū ndiichúúví kilómetros yeⁿe yáāⁿ Jerusalén. ¹⁴ Ní taachí cueⁿe yā cuaaⁿ cyúúni ní índéé yā yeⁿe tanducueⁿē dendu'ū chí chíi. ¹⁵ 'Nááⁿ chí índéé yā ní itinguuneeⁿ vi'i yā, maaⁿ Jesús miiⁿ ndaa niiⁿnúⁿ yā ní cueⁿe yā ndúúcū 'iiⁿyāⁿ s'eeⁿ. ¹⁶ Taachí n'diichí yā Jesús miiⁿ nguéé iintiinaaⁿ yā 'iiⁿyāⁿ. ¹⁷ Jesús caⁿa yā chíi yā 'iiⁿyāⁿ s'eeⁿ: ¿De'ē índéé ndís'tiī? ¿De'ē cuuví tatiī ndaachi yiinú nī?

¹⁸ Saⁿā chí nguuvi Cleofas nan'guεcútaⁿa yā. ¿'Áá díí, 'áámá n'dyáⁿā dii chí canuuⁿ di yúúni na yáāⁿ Jerusalén chí nguéé déenu di de'é chíi nguuvi s'eeⁿ na yáāⁿ Jerusalén miiⁿ?

¹⁹ Tuu'mi ní Jesús caⁿa yā chíi yā 'iiⁿyāⁿ s'eeⁿ: ¿De'é chíi yáāⁿ miiⁿya? 'Iiⁿyāⁿ s'eeⁿ ní caⁿa yā: Jesús yeⁿe yáāⁿ Nazaret, chí 'áámá saⁿā profeta ní dííⁿ yā 'áámá ntiíⁿnyuⁿ n'dai

ndúúcū poder. Ní dííⁿ yā n'dee n'dái vaadi n'giinu ní ngaⁿ'a yā nduudu yeⁿ'é Ndyuūs nanááⁿ Ndyuūs ní nanááⁿ nducyaaca 'iiⁿ'yāⁿ. ²⁰ Chiiduú n'gɛɛtɛ ndúúcū 'iiⁿ'ntyéⁿ'ē yeⁿ'ē yú tun'dáa nuuⁿndi yeⁿ'e Jesús ní nca'a yā Jesús 'iiⁿ'yāⁿ ní caⁿ'a yā chí 'cuuvi yā. Níícu s'neeⁿnga'á yā Jesús. ²¹ Nús'uu ní snéé yúúní 'nū ní cunee ngiinú 'nū chí sáⁿ'a 'cūū ní nadinguáⁿ'ai sa 'iiⁿ'yāⁿ yeⁿ'é nación Israel chí nación yeⁿ'é 'nū. Maaⁿ ní 'iinū nguuví chí chíi chuū. ²² Ní ná n'duuví n'daataá chí chíicá yā dáámá nduucú 'nū cheⁿ'é yā tyaaⁿ na yáinyāⁿ ní cueⁿ'e yíínú 'nū. ²³ Ní ndaá yā nanaáⁿ 'nū ní caⁿ'a yā chí nguéé ndaaca yā cuerpo yeⁿ'e Jesús miiⁿ. Ní n'diichí yā n'duuví ángeles chí caⁿ'a yā chíi yā 'iiⁿ'yāⁿ s'eeⁿ chí Jesús miiⁿ 'āā nduuchí yā yeⁿ'e nguaaⁿ tináⁿ'ā. ²⁴ Ní cheⁿ'é n'duuví saⁿ'ā chí chíicá nduucú 'nū na yáinyāⁿ ní ndaāca sa tan'dúúcā chí ngaⁿ'a n'daataá s'eeⁿ naati nguéé n'diichi sa Jesús.

²⁵ Tuu'mi ní Jesús caⁿ'a yā chíi yā saⁿ'ā s'eeⁿ: De'ē chúúcā vaadicadínūⁿ yeⁿ'e ndís'tiī ndúúcū staava yeⁿ'e nī chí chɛɛchi chí nguéé s'téenu nī tanducuéⁿ'ē chí caⁿ'a saⁿ'ā profetas. ²⁶ ¿'Áá nguéé canee nguūⁿ na libro yeⁿ'é Ndyuūs chí Cristo miiⁿ canéé chí 'cueenú yā cuuvi cosas chí 'túúcā ní cuayiivi míⁿ cunaⁿ'á yā ná va'ai chɛɛti nguuví?

²⁷ Tucá'a Jesús caⁿ'a yā yeⁿ'e tanducuéⁿ'ē chí canéé nguūⁿ na libro yeⁿ'é Ndyuūs ndíí taachí dinguuⁿ Moisés ndúúcū chí dingúūⁿ nducyaaca profetas. Ní ngaⁿ'a Jesús yeⁿ'e chí dingúūⁿ yā yeⁿ'ē Cristo ndíí cuááⁿ vmnaaⁿ yeⁿ'e chí canéé chí ch'ó'ōo yeⁿ'é yā.

²⁸ Tuu'mi ní taachi ndaá yā na yāāⁿ 'lííⁿ chí cueⁿ'e yā, Jesús miiⁿ ní dííⁿ yā chí candiicá ca yā. ²⁹ Saⁿ'ā s'eeⁿ di'cuíftu sa Jesús chí canee yā ndúúcū sa, ní caⁿ'a sa chíi sa Jesús: N'díí cunéé nī nduucú 'nū, ti cuuvi chíinū yeⁿ'e nī. 'Āā cuéé cuuvi 'da'ā. Tuu'mi ní Jesús cueⁿ'e yā ndúúcū saⁿ'ā s'eeⁿ cuaaⁿ chɛɛti va'āí ní canéé yā ndúúcū sa. ³⁰ Taachí Jesús miiⁿ vɛɛ yā na mesa ní che'é yā ndúúcū 'iiⁿ'yāⁿ s'eeⁿ, tuu'mi ní sta'á yā pan ní caⁿ'angua'á yā ní ca'a yā gracias Ndyuūs caavā pan miiⁿ. Ní n'dee yā pan ní ca'a yā 'iiⁿ'yāⁿ s'eeⁿ. ³¹ Tuu'mi nūⁿ saⁿ'ā s'eeⁿ iintiinaaⁿ sa Jesús miiⁿ, naati Jesús ndaanaáⁿ yā yeⁿ'e saⁿ'ā s'eeⁿ. ³² Ní saⁿ'ā s'eeⁿ ngaⁿ'a sa ngii sa vi'i: ¿'Áá nguéé chicadiinuuⁿ yú na staava yeⁿ'e yú chí ya'ai taachi snúuⁿ yú yúúní taachí índéé yā ndúúcū yú, ní ngi'cueéⁿ yā nduudu yeⁿ'é Ndyuūs s'uuúⁿ?

³³ Hora mííⁿ nūⁿ nducueeⁿ sa ní cunaⁿ'á sa na yāāⁿ Jerusalén. Ní ndaaca sa nduū ndiicháámá apóstoles ndúúvídaama yā ndúúcū tanáⁿ'ā 'iiⁿ'yāⁿ chí snéé yā ndúúcū yā. ³⁴ 'Iiⁿ'yāⁿ s'eeⁿ ní ngaⁿ'a yā nguaaⁿ maáⁿ yā: Cuaacu níínyúⁿ Jesús nduuchi yā nguaaⁿ tináⁿ'ā ní che'enaáⁿ yā yeⁿ'e Simón.

³⁵ Tuu'mi ní 'uuví saⁿ'ā s'eeⁿ ní caⁿ'a yā táácā chíi yúúní chí cueⁿ'e yā. Tiī ní iintiinaaⁿ Jesús miiⁿ taachí n'deé yā pan.

Jesús che'enaáⁿ yā yeⁿ'e discípulos yeⁿ'e yā

(Mt. 28.16-20; Mr. 16.14-18; Jn. 20.19-23)

³⁶ Taachí saⁿ'a s'eeⁿ ngaⁿ'a sa chuū, Jesús miiⁿ ní cheⁿ'e naáⁿ yā naavtaⁿ'a 'iiⁿ'yāⁿ s'eeⁿ ní caⁿ'á yā chíi yā 'iiⁿ'yāⁿ s'eeⁿ: Cuuví 'diiⁿ ndúúcū ndís'tiī.

³⁷ Tuu'mi ní 'iiⁿ'yāⁿ s'eeⁿ dii'yá yā chíi ti nadicadíinuuⁿ yā chí n'diichi yā 'aama espíritu. ³⁸ Naati Jesús miiⁿ caⁿ'á yā chíi yā 'iiⁿ'yāⁿ s'eeⁿ: ¿De'ē cúúví chí dii'yá nī chíi? ¿De'ē cúúví chí 'tíicā nadacadíinuuⁿ nī na staava yeⁿ'e nī? ³⁹ Cuin'diichí nī ta'á ndúúcū ca'á. 'Úú maáⁿ chuū. Cuituu'ví nī 'úú. Cuin'diichí nī. 'Úú nguéé 'aama espíritu tan'dúúcā chí nadacadíinuuⁿ nī. 'Áámá espíritu nguéé 'iini ní nguéé yuūtē tan'dúúcā chí inaaⁿ ndís'tiī chí véé yeⁿ'ē 'úú.

⁴⁰ Taachi Jesús caⁿ'a yā nduudú 'cūū, ch'iⁿ'i yā ta'a yā ndúúcū ca'a yā. ⁴¹ Naati 'iiⁿ'yāⁿ s'eeⁿ ní nguéé s'téenu yā ti yeenú n'dai yā ní ngeⁿ'e yiinu yā. Ní cáāvā chuū Jesús caⁿ'a yā chíi yā 'iiⁿ'yāⁿ s'eeⁿ: ¿'Áá nguéé de'ē vɛɛ 'muuⁿ chí che'e yú?

⁴² Tuu'mi ní ca'a yā 'áámá tááⁿ 'yaācā ndúúcū 'aama taaⁿ va'ai ndi'i. ⁴³ Cristo miiⁿ ní sta'a yā ní che'e yā nanaáⁿ 'iiⁿ'yāⁿ s'eeⁿ. ⁴⁴ Ní caⁿ'a yā chíi yā 'iiⁿ'yāⁿ s'eeⁿ: Ndúúúú 'cūū caⁿ'á taachi canéé ndúúcū ndís'tiī. Canéé chí cúúví cuaacu tanducuéⁿ'ē denduū chí

canéé nguūⁿ yeⁿē 'úú na libro yeⁿé Ndyuūs chi canéé nguūⁿ na ley yeⁿē Moisés ndúúcū yeⁿe profetas ndúúcū yeⁿe salmos.

⁴⁵ Tuu'mi ní Jesucristo diiⁿ yā chi tuumicadiinuunⁿ 'iiⁿ'yāⁿ s'eeⁿ chi canéé nguūⁿ na libro yeⁿé Ndyuūs. ⁴⁶ Ní caⁿ'a yā chii yā 'iiⁿ'yāⁿ s'eeⁿ: 'Tíicā canéé yeⁿē 'úú chí Cristo 'úú. 'Tíicā canee chi 'cuenú cuuvi ní 'cuūví. Ní nduuchí yeⁿe nguaaⁿ tináⁿ'ā ndii chíí ndii 'íínú nguuvi. ⁴⁷ Ní 'iiⁿ'yāⁿ s'eeⁿ canéé chí caaⁿ'maⁿ yā nduudu miiⁿ chi ndaacadaami 'iiⁿ'yāⁿ yeⁿē nuuⁿndi yeⁿe yā vmnaaⁿ núúⁿmáⁿ na yāāⁿ ní Ndyuūs nadach'εεcú yā nuuⁿndi yeⁿe yā cáávā chi duuchí. Ní vmnááⁿ vmnaaⁿ nanááⁿ 'iiⁿ'yāⁿ yeⁿe yāāⁿ Jerusalén. Cuayiiⁿ yeⁿe 'iiⁿ'yāⁿ yeⁿe núúⁿmáⁿ naciones yeⁿe íⁿ'yeeⁿdī. ⁴⁸ Ndís'tiī ní cuuví nī testigos yeⁿe chuū ti n'diichí nī chuū ní canéé chí caaⁿ'máⁿ nī 'iiⁿ'yāⁿ. ⁴⁹ Cuin'diichí nī. 'Úú dicho'ó Espíritu N'dai yeⁿé Ndyuūs chi caⁿ'ā Chiidá chi ndaā nanááⁿ ndís'tiī. 'Cuεεtinéé nuúⁿ nī na yāāⁿ Jerusalén ndíí chí ndaāca nī poder yeⁿe Ndyuūs, poder chí cuchii yeⁿē cuaaⁿ 'níⁿnúⁿ.

Jesús cunaⁿ'a yā va'ai chεeti nguuvi

(Mr. 16.19-20)

⁵⁰ Cheⁿ'e Jesús ndúúcū 'iiⁿ'yāⁿ s'eeⁿ na yāāⁿ 'líⁿ Betania ní di'viicú yā 'iiⁿ'yāⁿ s'eeⁿ. ⁵¹ Taachí ch'iinu di'viicú yā 'iiⁿ'yāⁿ s'eeⁿ, cueⁿ'é yā yeⁿe 'iiⁿ'yāⁿ s'eeⁿ ní cundaa yā va'ai chεeti nguuvi. ⁵² Cuayiiⁿ 'iiⁿ'yāⁿ s'eeⁿ dich'εεté yā Ndyuūs ní cunaⁿ'a ntuúⁿ yā na yāāⁿ Jerusalén. Ní neené yeenu taavi yā. ⁵³ Ní 'áámá chεetinée yā na yaācū templo ní ngaⁿ'á yā chí ch'εεte Ndyuūs. Ní i'téenu yā Ndyuūs. 'Tíicā chii.

NDUUDU N'DÁÍ CHÍ DÍNGÚŪⁿ APÓSTOL JUAN

N'dií ní saⁿā chi Nduudu

¹ Cuááⁿ nááchí chínge'a 'āā ngaⁿa Dendyuūs ndúúcū Nduudu, ní Nduudu mííⁿ 'āā ngaⁿā ndúúcū Dendyuūs, ní Nduudu miiⁿ ní Dendyuūs. ² Chuū chíí naachi chínge'a ndúúcū Dendyuūs miiⁿ. ³ Tanducuéⁿē chi vεε ní cucáávā 'iiⁿyāⁿ miiⁿ din'dái yā chi véé. Nduuti chi nguée yā, nguée véé mar 'aama cosa chi véé. ⁴ 'Iiⁿyāⁿ miiⁿ canée ndúúcū vida cueⁿe daāⁿmaⁿ ní vida miiⁿ ní dεεve yeⁿe 'iiⁿyāⁿ. ⁵ Níícú dεεve chīdεεvé na maaiⁿ, chí maaiⁿ mííⁿ 'iiⁿyāⁿ nguεε tuumicadíínuuⁿ yā.

⁶ Dendyuūs nidichó'o yā 'áámá saⁿā, chi nguuvi sa Juan. ⁷ Saⁿā miiⁿ ndaa sa chí caⁿa sa nduudu cuaacu. Ní caaⁿmáⁿ sá nduudu cuaacu yeⁿe chi dεεve caati nducyaacá yā cu'téenu yā cáávā saⁿā miiⁿ. ⁸ Nguée saⁿā miiⁿ chi dεεve; naati chi ngaⁿā sa nduudu cuaacu yeⁿe dεεve. ⁹ Chííⁿ chí nduudu cuaacu chí dεεve. Chííⁿ ngaⁿā dεεve yeⁿe nducyáácá yā chi sneé yā íⁿyeeⁿdí 'cūū.

¹⁰ 'Iiⁿyāⁿ miiⁿ chi dεεve ní canée yā íⁿyeeⁿdí 'cūū, ní din'dái yā íⁿyeeⁿdí, ní 'iiⁿyāⁿ yeⁿe íⁿyeeⁿdí nguée n'diichi yā 'yā. ¹¹ Ndaá yā caavā ndaata yeⁿe yā 'íícú 'iiⁿyāⁿ yeⁿe yā nguée 'cuúⁿ yā chí canée yā. ¹² Nducyáácá 'iiⁿyāⁿ chí 'cuúⁿ yā chí 'iiⁿyāⁿ miiⁿ canée yā nducú yā, Ndyuūs ca'a yā poder 'iiⁿyāⁿ miiⁿ chí cuuvi daiya Dendyuūs 'iiⁿyāⁿ, 'iiⁿyāⁿ chí i'téenu yā chí nguúví yā. ¹³ Nguée cuuvi yā daiya yā cáávā yuúúⁿ, ní nguée caava yuútē, ní nguée caavā isáⁿā, caati cáávā 'iivú Ndyuūs.

¹⁴ Níícú Nduudu miiⁿ ní ch'iindiyáaⁿ yā tan'dúúcā s'uuúⁿ ní canée yā ndúúcū s'uuúⁿ. N'dái taavi yā ndúúcū favor ndúúcū nduudu cuaacu. Ní n'diichi yú poder yeⁿe yā, poder tan'dúúcā yeⁿe 'áámá n'dyáⁿā yeⁿe Chiidá yā chí Dendyuūs miiⁿ. Ndiituú taaví yā ndúúcū favor ndúúcū nduudu cuaacu. ¹⁵ Juan caⁿa sa nduudu cuaacu yeⁿe yā ní 'caí sa ní ngaⁿā sa yeⁿe 'iiⁿyāⁿ 'cúú: 'Iiⁿyāⁿ chí cuchíí yā cuaaⁿ daamí ní vmnaaⁿ cá yā yeⁿe 'úú caati 'āā 'naaⁿ cá yā niicu 'úú.

¹⁶ Níícú nducyaaca yú ita'a yú favor ndúúcū favor yeⁿe Jesús chí ndiituú yā ndúúcū favor. ¹⁷ Caati véé ley miiⁿ cucáávā Moisés ca'a yā naati véé favor ndúúcū nduudu cuaacu cucáávā Jesucristo ca'a yā. ¹⁸ Mar 'áámá 'iiⁿyāⁿ nguée n'diichí yā Dendyuūs miiⁿ. Jesús 'áámá n'dyáⁿā yeⁿe Chiidá yā chí canée nducú yā, Jesús mííⁿ dííⁿ yā chí 'iiⁿyāⁿ deenú yā yeⁿe Chiidá yā.

Nduudu cuaacu yeⁿe Juan chí ngeedinuūⁿníⁿ

(Mt. 3.11-12; Mr. 1.7-8; Lc. 3.15-17)

¹⁹ Taachi 'iiⁿyāⁿ Israel yeⁿe yáāⁿ Jerusalén dichó'o yā chiiduú s'eeⁿ ndúúcū 'iiⁿyāⁿ levitas s'eeⁿ ní ndaá yā nanááⁿ Juan miiⁿ chí itinguunéeⁿ yā: ¿Díí, du'ū dii? chuū chí nduudu cuaacu chí n'guεεcútaⁿā Juan. ²⁰ Ní Juan miiⁿ ntumiiⁿnúⁿ yā ní nguée cheēⁿdiitú yā ní caⁿa cuaacú yā: Nguée 'úú chí Cristo.

²¹ Ní natiinguunéeⁿ yā saⁿā: ¿Du'ū dii, tuu'mi? ¿Áá díí profeta Elías? Ngaⁿā Juan: Nguée 'úú. Ní natiinguunéeⁿ yā saⁿā: ¿Áá díí chí profeta? Ngaⁿā ntúuⁿ sa: Nguée 'úú.

²² Ngaⁿā ntúuⁿ yā ngii yā saⁿā: ¿Du'ū di, tuu'mi? Ní 'tíicā caaⁿmáⁿ 'nū cuuvi 'nū 'iiⁿyāⁿ chí dichó'o yā nús'uu. ¿De'é ngaⁿā di yeⁿe maāⁿ di?

²³ Tuu'mí caⁿa Juan: 'Úú nduudu chí caⁿa na yáⁿāa naachi nguée ch'εetinéeⁿ 'iiⁿyāⁿ: Nan'guáaⁿ ní yúúní cuaacu yeⁿe Dendyuūs, tan'dúúcā chí ngaⁿa profeta Isaías miiⁿ naachi canée nguūⁿ na libro yeⁿe Ndyuūs.

²⁴ 'Íícú 'iiⁿyāⁿ s'eeⁿ chí ndaá yā miiⁿ ní 'iiⁿyāⁿ yeⁿe fariseos. ²⁵ Níícú ntinguunéeⁿ yā saⁿā ní ngaⁿa yā ngii yā saⁿā: ¿De'ε cúúví chí ngeedinúuⁿníⁿ di, ndúúti chí dii nguée Cristo dii, ní nguée Elías dii, ní nguée profeta 'cūū dii?

²⁶ Níícú Juan nan'guεεcútaⁿa yā yeⁿe yā ní caⁿa ya: 'Úú ní ngeedinúuⁿníⁿ ndúúcú nuūⁿníⁿ; naati nguaaⁿ ndís'tií ní canée 'áámá yā ní nguée ináaⁿ ní 'iiⁿyāⁿ. ²⁷ 'Iiⁿyāⁿ 'cūū

chi cuchii cuayiivi ní vmnaaⁿ ca yā yeⁿē 'úú. Niicu 'úú nguεε n'dai 'úú, chi cuuvi diíⁿ n'daatiíi yíⁿmán yeⁿe ndaacuú yeⁿé yā.

²⁸ Cosa 'cūū chi chíi ná yáⁿāa Betábara na táamá lado yeⁿe yíicú Jordán, naachi Juan chéédinuūⁿní sa 'iiⁿyāⁿ.

'Íiti cuūchī yeⁿe Dendyuūs

²⁹ Chi dεεve táamá nguuvi ní Juan n'diichi sa Jesús ndaá yā naachi canee sa, níicú ngaⁿā sa: Cun'diichí nī. 'Íngaā Jesucristo chi nguuví yā 'Íiti Cuūchī yeⁿé Dendyuūs chi nadvíí yā nuūⁿndí yeⁿe 'iiⁿyāⁿ yeⁿe íⁿyeēⁿdí. ³⁰ Chuū chi ngaⁿá yeⁿé yā: Cuchii 'áamá saⁿā cuayiivi yeⁿe 'úú níicú 'āā vmnaaⁿ sa yeⁿē 'úú, caati 'āā 'naaⁿ ca sa niicu 'úú. ³¹ 'Úú ní nguéé n'diichí 'iiⁿyāⁿ naati deenú chi snaaⁿ 'iiⁿyāⁿ Israel yā. Cáávā chuū 'úú cuchíí ní nguεεdinuūⁿní ndúúcu nuūⁿní.

³² Juan míⁿ ní ngaⁿā sa nduudu cuaacu: 'Úú ní n'diichí Espíritu N'dai yeⁿe Dendyuūs chi cuch'éeⁿ nanguuvi tan'dúúcā paloma ní ndaa vmnaaⁿ yeⁿé yā ní canéé yā ndúúcu yā. ³³ 'Úú nguéé n'diichí 'iiⁿyāⁿ miiⁿ naati 'iiⁿyāⁿ chi dichó'o yā 'úú chí nguεεdinuūⁿní ndúúcu nuūⁿní, 'iiⁿyāⁿ miiⁿ chi ngaⁿa yā ngii yā 'úú: Du'ū chí n'diichí di chi ndeē Espíritu N'dai yeⁿe Ndyuūs ní canéé yā nduucú yā, 'iiⁿyāⁿ 'cūū chi nguεεdinuūⁿní ndúúcu Espíritu N'dai yeⁿé Ndyuūs. ³⁴ 'Úú ní n'diichí ní ngaⁿa cuaacú chi chuū chi Daiya Dendyuūs.

Discípulos chí vmnááⁿ vmnaaⁿ

³⁵ Chi dεεve táamá nguuvi canéé ntuūⁿ Juan ndúúcu 'uuvi discípulos yeⁿé sa. ³⁶ Ní inaaⁿ sa Jesús miiⁿ chi cachiicá yā cuaaⁿ miiⁿ. Ní ngaⁿā sa: N'diichí nī. 'Íngaā Jesucristo chi nguuví yā 'Íiti Cuūchī yeⁿé Dendyuūs.

³⁷ Ndúú 'uuví discípulos yeⁿe Juan chi ch'iindiveéⁿ yā chíiⁿ chi ngaⁿā sa, ní cueⁿé yā ndúúcu Jesús. ³⁸ Nguεεcundí Jesús ní n'diichí yā chi n'dáa yā 'yā. Ní ngaⁿa yā ngii yā 'iiⁿyāⁿ s'eeⁿ: ¿Dé'ε in'nuuⁿ di? Ngaⁿā 'iiⁿyāⁿ s'eeⁿ ngii yā 'yā: Rabí (nduudu míⁿ neⁿe caaⁿmaⁿ chí Maestro), ¿tíi canééⁿ vaacu dí?

³⁹ Tuu'mi ngaⁿa yā ngii yā saⁿā: Cuchíí nī níicú n'diichí nī. Ní ndaá yā ní n'diichí yā tii canéé yā. Ní ch'εetinéé yā nduucú yā nguuvi miiⁿ caati 'āā tandúú n'gεεcú cuūⁿ chíiⁿū.

⁴⁰ Ní yeⁿe 'uuví yā chí ch'iindiveéⁿ yā yeⁿē Juan ní cueⁿé yā ndúúcu Jesús. 'Áamá saⁿā miiⁿ ní nguuvi sa Andrés 'diīnū Simón Pedro. ⁴¹ Ní Andrés miiⁿ ndaacá sa maaⁿ 'díinu sa Simón ní ngaⁿa sa ngii sa sáⁿā: Nndaaca 'nū Mesías miiⁿ (neⁿe caaⁿmaⁿ nduudu miiⁿ chí Cristo).

⁴² Ní candéε sa Simón nanááⁿ Jesús. Ní taachi Jesús miiⁿ n'gíinu yā saⁿā miiⁿ, ní ngaⁿá yā: Díi Simón Pedro, daiya Jonás miiⁿ. Mááⁿ ní cu'neeⁿ yú chí duuchi Cefas (nduudu míⁿ neⁿé caaⁿmaⁿ tuūú).

Jesús yaa'ví yā Felipe ndúúcu Natanael

⁴³ Chi déévé táamá nguuvi Jesús neⁿé yā caⁿa yā na yáⁿāa Galilea, ní cueⁿé yā. Ndaaca yā Felipe ní ngaⁿa yā ngii yā saⁿā: Cuchíí di nduucú.

⁴⁴ Ní yāāⁿ vaacú Felipe ní yeⁿē yāāⁿ Betsaida ní dáamá yāāⁿ vaacú sa ndúúcu Andrés ndúúcu Pedro. ⁴⁵ Felipe míⁿ ndaacá sá Natanael, níicú ngaⁿā sa ngii sa sáⁿā: 'Āā ndaacá 'nū Jesús daiya José yeⁿe yāāⁿ Nazaret. Dingúūⁿ Moisés yeⁿé 'iiⁿyāⁿ 'cūū na ley, ní dingúūⁿ profetas yeⁿe 'iiⁿyāⁿ 'cūū.

⁴⁶ Ní ngaⁿa Natanael: ¿'Áá véé cosa chí n'daacā na yāāⁿ Nazaret? Ní ngaⁿā Felipe miiⁿ: Cuchíí di ní n'diichi di.

⁴⁷ Jesús miiⁿ ní n'diichí yā Natanael chí cuchii sa nanáaⁿ yā. Ní ngaⁿá yā yeⁿē sa: N'díichí nī 'áamá saⁿā chí cuaacu níⁿnyúⁿ yeⁿē ndaata Israel miiⁿ. Ní nguéé nginnche'ei sa 'iiⁿyāⁿ.

⁴⁸ Ngaⁿa Natanael ngii sa 'iiⁿyāⁿ: ¿Tíi n'diichi di 'úú? Ní ngaⁿā Jesús ngii yā saⁿā: Taachi 'āā cuéé yaa'ví Felipe dii ní taachi canéé dí maaⁿ yáⁿá yeⁿe n'guídii yaaⁿ nguuvi, 'āā n'diichí díi.

⁴⁹ Ní nan'guεcutáⁿā Natanael miiⁿ ni ngaⁿ'a sa ngii sa 'iiⁿ'yāⁿ: Maestro, n'diī chí Daiya Dendyuūs miiⁿ. N'diī chí Rey yeⁿ'e Israel.

⁵⁰ Ní ngaⁿ'a Jesús ngii yā saⁿ'ā: ¿'Áá cáávā chí ngaⁿ'á ngíí dii chí n'diichí dii maaⁿ n'guíídiī yaaⁿ nguuví chí 'āā i'teenu di 'úú? Ch'εεε n'dai ca n'diichí dí dendú'ū nguéé ti chúū.

⁵¹ Ní ngaⁿ'á yā ngii yā saⁿ'ā: Cuaacu níⁿnyúⁿ cuāācū niiⁿnyuⁿ ngaⁿ'á ngii dii. Ngúúví maaⁿ ní ngúúví chí cuíchiī cunéé chí n'diichi di chí nanguaāⁿ nanguuvi níícú ángeles yeⁿ'é Dendyuūs miiⁿ ní ngéε yā ní ngua'á yā nanááⁿ Saⁿ'ā chí Daiya Dendyuūs.

2

Ch'iindivaacu 'iiⁿ'yāⁿ yeⁿ'e yāāⁿ Caná

¹ Chiī ndii chííⁿ ndii 'íínú nguuví miiⁿ ní ch'iindivaacú 'áámá 'iiⁿ'yāⁿ na yāāⁿ Caná yeⁿ'ē yáⁿ'āa Galilea. Ní miiⁿ cánéé chεεcú Jesús. ² Ní idiíⁿ yā invitar Jesús ndúúⁿcū discipulos yeⁿ'é yā nááchí ch'iindivaacú 'iiⁿ'yāⁿ. ³ Ní ch'iinu vino yeⁿ'é yā. Ní chεεcú Jesús ngaⁿ'á yā ngii yā Jesús: 'Āā ntéé vino yeⁿ'é yā.

⁴ Ní ngaⁿ'ā Jesús ngii yā chεεcú yā: ¿De'ē caneé yeⁿ'é ndúúⁿcū dii n'dataá? 'Āā cuéé ndaa hora yeⁿ'é miⁿniiⁿnyuⁿ.

⁵ Chεεcú yā miiⁿ ngaⁿ'á yā ngii yā saⁿ'ā s'eeⁿ chí diiⁿ mandado: Dii sáⁿ'ā s'eeⁿ, diiⁿ di tan'dúúⁿcā chí Jesús caaⁿ'máⁿ yā cuuví yā ndis'tíí.

⁶ Miiⁿ snéé níyaaⁿ 'cuutíí n'gεεε chí nin'dai ndúúⁿcū tuū chí ngεε nuūⁿnīⁿ. 'Iiⁿ'yāⁿ naaⁿnú yā 'cuutíí s'eeⁿ tan'dúúⁿcā costumbre yeⁿ'e 'iiⁿ'yāⁿ Israel. 'Aama 'aama 'cuutíí ch'εεε tunéēⁿ nn'geēⁿ nduuví cuūⁿ ngεεcu ndii 'áámá ciento litros yeⁿ'e nuūⁿnīⁿ.

⁷ Ní ngaⁿ'a Jesús ngii yā saⁿ'ā chí idiíⁿ mandado: Diīcuutú nī ndúúⁿcū nuūⁿnīⁿ 'cuutíí n'gεεε chí nin'dai ndúúⁿcū tuū. Ní 'iiⁿ'yāⁿ s'eeⁿ diīcuutú yā ndiitúú n'dai ndúúⁿcū nuūⁿnīⁿ. ⁸ Ní ngaⁿ'á Jesús ngii yā saⁿ'ā s'eeⁿ chí idiíⁿ mandado: Tun'dáa nī naachi s'néēⁿ nuūⁿnīⁿ, ní tun'dáa nī nuūⁿnīⁿ, ní candéε nī nanááⁿ 'iiⁿ'yāⁿ chí chééⁿ ndii vmnaaⁿ yeⁿ'e 'viicū. Ní candéε yā ch'iⁿ'í yā na 'iiⁿ'yāⁿ chí chééⁿndii vmnaaⁿ yeⁿ'e 'viicū. ⁹ Ní taachi 'iiⁿ'yāⁿ chí chééⁿndii vmnaaⁿ yeⁿ'e 'viicū canéé yīínú yā nuūⁿnīⁿ chí 'āā ndii vino naati nguéé déénú yā tii ngiica vino miⁿ. Naati 'iiⁿ'yāⁿ chí idiíⁿ mandado ní déénú yā caati cheⁿ'é yā nguai yā nuūⁿnīⁿ. Tuu'mi ní yaaⁿ'ví yā saⁿ'ā chí n'giindivaacu miiⁿ. ¹⁰ Ní ngaⁿ'á yā ngii yā saⁿ'ā chí n'giindivaacu: Tanducuⁿ'ē saⁿ'ā miiⁿ dííncā vino chí n'dai ca nga'a sa vmnaaⁿ 'iiⁿ'yāⁿ. Ní taachi 'āā ndiitú yeⁿ'é yā, tuu'mi nnga'a sa vino chí nguéé n'dai ngi'i. Naati dii ní nnguain'dai di vino chí n'dai ndíí maaⁿ.

¹¹ Chiiⁿ ní vmnááⁿ vmnaaⁿ señal chí diīⁿ Jesús ná yāāⁿ Caná yeⁿ'e yáⁿ'āa Galilea. Ní ch'iⁿ'í yā poder yeⁿ'é yā. Ní discipulos yeⁿ'é yā chí'teenú sa 'yā.

¹² Cho'o chuū ní cuinaⁿ'á Jesús ndúúⁿcū chεεcú yā, ndúúⁿcū 'díínu yā ndúúⁿcū discipulos yeⁿ'é yā na yāāⁿ Capernaum. Ní duu'vī nguuví canéé yā miiⁿ.

Jesús didεεvé yā yāacū templo

(Mt. 21.12-13; Mr. 11.15-18; Lc. 19.45-46)

¹³ Ní 'āā snee níⁿnuúⁿ nguuví chí ndaā 'viicū yeⁿ'ē pascua yeⁿ'ē 'iiⁿ'yāⁿ Israel, ní cuhεε Jesús na yāāⁿ Jerusalén. ¹⁴ Ní ndaacá yā chεεti cheendi chéēⁿ yāacu templo 'iiⁿ'yāⁿ s'eeⁿ chí ch'εεté yā n'diicuí yā 'itiindu ndúúⁿcū 'iiti 'cuūchī ndúúⁿcū palomas, ní ndaacá yā 'iiⁿ'yāⁿ chí inñ'daaⁿ tuūmī. ¹⁵ Taachí Jesús din'dái yā cuerda ní dichó'o yā nducyáácá 'iiⁿ'yāⁿ chuva'āi cheendi cheēⁿ yaacū templo miiⁿ, ndúúⁿcū 'iiti 'cuūchi s'eeⁿ ndúúⁿcū 'itiindu s'ééⁿ. Ní ch'iinu ngéé yā tuūmī yeⁿ'é 'iiⁿ'yāⁿ s'eeⁿ chí inñ'daaⁿ tuūmī ní chingúúⁿndaa yā mesas yeⁿ'é yā. ¹⁶ Níícú ngaⁿ'a Jesús ngii yā saⁿ'ā chí n'diicuí palomas: Divíí nī chuū 'muuⁿ ni nguéé dííⁿ nī va'āi yeⁿ'e Chiidá va'ai chí n'diicuí 'iiⁿ'yāⁿ.

¹⁷ Tuu'mí ní n'gaacu discipulos yeⁿ'é yā yeⁿ'e chí cánéé nguūⁿ na libro yeⁿ'e Ndyuūs chí vaādī n'diitē yeⁿ'ē vaacu di, ní di'cuiinú 'úú.

¹⁸ Níícú 'iiⁿ'yāⁿ Israel nan'guεcutaⁿ'á yā ní caⁿ'a yā Jesús: ¿De'ē señal chí cu'neeⁿ di nús'uū chí véé poder yeⁿ'ē di chí diiⁿ di 'túúⁿcā?

¹⁹ Nan'guεεcútaⁿá Jesús ní caⁿa yā: Nadtuuví nī yáácū templo 'cūū ní 'iīnū nguuví 'úú nadācúeéⁿ.

²⁰ Tuu'mi caⁿa 'iīn'yāⁿ Israel: Ch'εeti na 'uūvī ngeεcu jaaⁿ ndúuyū chi n'dai yáácū templo 'cūū. Níícú dii, ¿'áá na 'iīnū nguuví neⁿe di nadācúeéⁿ di?

²¹ Naati Jesús caⁿa yā yeⁿē yaácū templo chi cuerpo yeⁿē maán yā. ²² Taachi Jesús nanduuchí yā yeⁿē nguaaⁿ tináⁿā tuu'mi discípulos yeⁿé yā nan'gaacú yā chí caⁿa yā chuū. Ní i'téenu yā chí canéé nguūⁿ na libro yeⁿé Dendyuūs ndúúcu nduudu chi ngaⁿa Jesús miiⁿ.

Jesús deenú yā nducyáácá saⁿā

²³ Taachi Jesús canéé yā yāāⁿ Jerusalén, nguuví 'viicú yeⁿe pascua neené 'yaáⁿ yā chí'téenu yā Jesús caati 'āā n'diichí yā señales chí dííⁿ yā. ²⁴ Naati maaⁿ Jesús miiⁿ ní nguéé ngíi chεetinuúⁿ yā 'iīn'yāⁿ s'eeⁿ caati déénú Jesús yeⁿe nducyáácá yā. ²⁵ Ní nguéé neⁿé yā chí ndii 'áámá 'iīn'yāⁿ caaⁿmaⁿ cuaacu yeⁿe saⁿā ti deenú yā de'ε chí canéé ndúúcu saⁿā.

3

Jesús ndúúcu Nicodemo

¹ Níícú canee 'áámá sáⁿā yeⁿē fariseos chí nguuví sa Nicodemo. Saⁿā miiⁿ, saⁿā chí chééⁿndii vmnááⁿ 'iīn'yāⁿ Israel. ² Sáⁿa 'cūū nndaa sa nanááⁿ Jesús ngiūnū miiⁿ. Níícú ngaⁿa sa ngii sá 'iīn'yāⁿ: N'dii Maestro, déénú 'nū chí ndaá nī yeⁿé Dendyuūs chí lado yeⁿe maestro caati mar 'áámá 'iīn'yāⁿ nguéé cuuvi dííⁿ yā señales chí idiíⁿ nī ndúúti chí nguéé canee Dendyuūs ndúúcu yā.

³ Jesús ní nan'guεεcútaⁿá yā ní ngaⁿa yā ngii yā saⁿā: Cuaacu níⁿnyúⁿ cuāacū nīⁿnyuⁿ ngaⁿá ngíi dii, du'ū chí nguéé nguεεcundíi 'cundiyaāⁿ táámá vmnéⁿēe nguéé cuuví n'diichí yā naachi 'iivú Dendyuūs ngaⁿa ntiiⁿnyúⁿ yā.

⁴ Ní ngaⁿā Nicodemo ngii sa Jesús: ¿Táácā nanguεεcundíi 'áámá 'iīn'yāⁿ saⁿā ndiicūú 'cuundiyaāⁿ ntuúⁿ yā? ¿Táácā cuuví nuuⁿ ndaá ntuúⁿ yā na chεeti chεécú yā ní 'cuundiyaāⁿ ntuúⁿ yā?

⁵ Jesús ngaⁿa yā ngii yā saⁿā: Cuaacu níⁿnyúⁿ cuāacū nīⁿnyuⁿ ngaⁿá ngíi dii, du'ū chí nguéé 'cuundiyaāⁿ yā cáávā nuūⁿnīⁿ ní cáávā Espíritu N'dai yeⁿe Ndyuūs nguéé cuuvi cundáa yā naachi canéé 'iivú Dendyuūs. ⁶ Du'u chí ch'iindiyāāⁿ yeⁿe 'iīn'yāⁿ, 'iīn'yāⁿ canee ndúúcu. Níícú du'ū chí ch'iindiyāāⁿ yeⁿē Espíritu, espíritu canee ndúúcu. ⁷ Nguéé caⁿā yiinu di chí ngaⁿá ngíi dii chí nducyaaca 'iīn'yāⁿ cánéé chí 'cuundiyaāⁿ ntúuⁿ yā taama. ⁸ 'Yúúné ní na neⁿe miiⁿ ngéenu. Níícú n'giindiveeⁿ di chí ngeēnū. Ní nguéé déenu di tíi chíicā tíi caⁿā. 'Tíicā nducyáácá 'iīn'yāⁿ chí 'niindiyāāⁿ yā yeⁿe Espíritu N'dai yeⁿe Ndyuūs.

⁹ Ní nan'guεεcútaⁿā Nicodemo yeⁿé yā ní ngaⁿa sa ngii sa Jesús: ¿Táácā cuuví chuū?

¹⁰ Nan'guεεcútaⁿā Jesús ní ngaⁿá yā ngii yā sáⁿā: ¿'Áá díi maestro yeⁿē 'iīn'yāⁿ Israel ní nguéé deenu di chuū? ¹¹ Cuaacu níⁿnyúⁿ cuāacū nīⁿnyuⁿ ngaⁿá ngíi dii chí déenu 'nū chíi chí ngaⁿa 'nū. Níícú chí n'diichí 'nū chíi chí ngaⁿa cuaacu 'nū ní nguéé n'diichí 'nu chíi chí ngaⁿā cuaacu 'nū. Níícú nguéé 'caandiveeⁿ di chí caaⁿmaⁿ 'nū nduudu cuaacu. ¹² Nduuti chí ngaⁿá cosa chí véé iⁿ'yeeⁿdí 'cūū niicu nguéé i'téenu dí, ¿táácā cu'téenu di nduuti chí caaⁿmáⁿ cosa chí véé na va'ai chεeti nguūvī?

¹³ Ndií 'áámá 'iīn'yāⁿ nguéé chεε yā na va'ai chεeti nguuví nduuti chí nguéé 'iīn'yāⁿ chí ch'eēⁿ yeⁿe va'ai chεeti nguuví. 'Iīn'yāⁿ miiⁿ, Sáⁿā chí Daiya Dendyuūs, chí canéé na va'ai chεeti nguuví. ¹⁴ Tan'dúúcā Moisés miiⁿ chinadācúeéⁿ sa cúú na yáⁿāa cuūⁿmáⁿ naachi nguéé ch'εetinéé 'iīn'yāⁿ 'tíicā canee chí nicueēⁿ Saⁿa chí Daiyá Dendyuūs. ¹⁵ Caati nducyaaca 'iīn'yāⁿ chí cu'téenu yā 'iīn'yāⁿ nguéé cuuvi ndái yā caati cunduuchí yā cueⁿe daāⁿmaⁿ.

'Tíicā Dendyuūs dineⁿé yā 'iīn'yāⁿ yeⁿe íⁿ'yeeⁿdí

¹⁶ Caati chuū dínéⁿe Dendyuūs 'iⁿ'yāⁿ yeⁿe íⁿ'yeeⁿdī chí dichó'o yā 'aama n'dyáⁿā Daiya yā, caati nducyáácá 'iⁿ'yāⁿ chí cu'téenu yā 'iⁿ'yāⁿ nguéeⁿ cuuvi ndái yā. Níicú cunduuchi yā cueⁿe daāⁿmaⁿ. ¹⁷ Caati Dendyuūs ní dicho'o yā Daiyá yā iⁿ'yeeⁿdī chí Daiyá yā nguéeⁿ diiⁿ yā juzgar 'iⁿ'yāⁿ chí snéeⁿ iⁿ'yeeⁿdī, naati chí cuchii yā nadanguáⁿ'ai yā 'iⁿ'yāⁿ yeⁿe íⁿ'yeeⁿdī cááva yā.

¹⁸ Du'u chí i'téenu 'iⁿ'yāⁿ nguéeⁿ condenado yā, niicu du'u chí nguéeⁿ i'téenu 'iⁿ'yāⁿ 'āā condenado yā caati nguéeⁿ chi'teenu chí nduuchi 'áámá n'dyáⁿā yeⁿe Chiida yā chí Dendyuūs. ¹⁹ Níicú chuū ní condenación. Chí dεεve 'cūū ndaa íⁿ'yeeⁿdī 'cūū naati saⁿ'ā yeⁿe iⁿ'yeeⁿdī 'cūū dinéⁿe sa na maaiⁿ nguéeⁿ ti chí dεεve caati diiⁿ sa chí nguéeⁿ n'daacā. ²⁰ Caati nducyáácá 'iⁿ'yāⁿ chí díⁿ yā chí nguεε n'daacā, nguéeⁿ dinéⁿe yā chí dεεve. Ní nguεε indaa yā chí dεεve miiⁿ caati nguéeⁿ neⁿe yā chí cuuvi déénú 'iⁿ'yāⁿ ní caaⁿ'maⁿ 'iⁿ'yāⁿ chí nuuⁿndí yā. ²¹ Naati 'iⁿ'yāⁿ chí díⁿ yā ntiiⁿnyuⁿ chí n'daacā, indaa yā naachi chí dεεve caati 'iⁿ'yāⁿ snááⁿ yā ntiiⁿnyuⁿ yeⁿé yā chí yeⁿé Dendyuūs.

Juan chí ngεεdínúⁿnīⁿ ngaⁿ'a sa ndúúcu Jesús táámá vmnéⁿ'ēe

²² Cho'ōo chúú, ndaa Jesús ndúúcu discípulos yeⁿé yā na yáⁿ'āa Judea. Ní cunée yā ndúúcu 'iⁿ'yāⁿ s'eeⁿ. Níicú Jesús chεεdinúúⁿnīⁿ yā 'iⁿ'yāⁿ. ²³ Ní Juan míⁿ ngεεdinuūⁿnīⁿ ntúuⁿ yā na yāā Enón niiⁿnuúⁿ na yaāⁿ Salim ti míⁿ neené vεε ca nuūⁿnīⁿ. Ní ndaa 'iⁿ'yāⁿ ní chεεdinúúⁿnīⁿ yā. ²⁴ Caati Juan miiⁿ 'āā cuéeⁿ cunúuⁿ yā vácūū.

²⁵ Discípulos yeⁿé Juan ch'εεcu cheendí yā ndúúcu 'iⁿ'yāⁿ Israel yeⁿé táácā 'iⁿ'yāⁿ nduuví dεεvé yā. ²⁶ Níicú mndaa sá nanááⁿ Juan ní ngaⁿ'a sa ngiⁿ sa saⁿ'ā: Dii, Maestro, 'iⁿ'yāⁿ chí canéeⁿ ndúúcu di na táámá lado yeⁿé yíicú Jordán 'iⁿ'yāⁿ chí díⁿ caaⁿ'maⁿ cuaacu di yeⁿé yā; n'diichi di, 'iⁿ'yāⁿ miiⁿ ngεεdinuūⁿnīⁿ yā. Niicu nducyáácá 'iⁿ'yāⁿ ndaa yā nanááⁿ yā.

²⁷ Nan'guεεcútaⁿ'ā Juan ní caⁿ'a sa: Nguéeⁿ cúúví cuta'a 'iⁿ'yāⁿ de'ē vεε nduuti chí nguéeⁿ cuchii yeⁿe va'ai chεeti nguuvi. ²⁸ Ndís'tii testigo yeⁿé chí caⁿ'á: 'Úú ní nguéeⁿ Cristo 'úú, caati dichó'o Dendyuūs 'úú vmnaaⁿ yeⁿé yā. ²⁹ Du'ū chí véé n'daataá yeⁿe yā, 'iⁿ'yāⁿ miiⁿ ní isáⁿ'ā yeⁿé tá. Amigo yeⁿé isáⁿ'ā miiⁿ ní 'iⁿ'yāⁿ chí cánéeⁿ ndúúcu yā ní n'giindiveéⁿ yā yeⁿé yā. Yeenú taavi yā cáávā nduudu yeⁿé isáⁿ'ā miiⁿ. 'Tíicā vaadi yeenu yeⁿé ní 'áámá ndiitúú taavi ca. ³⁰ 'iⁿ'yāⁿ miiⁿ ní canéeⁿ chí ch'εεtē yā, niicu 'úú dánduu'vi 'lín 'úú.

'iⁿ'yāⁿ chí cuchii yā yeⁿe va'ai chεeti nguuvi

³¹ Du'ū chí mndaa yeⁿé va'ai chεeti nguuvi ch'εεte ca yeⁿé nducyaaca 'iⁿ'yāⁿ. Du'ū chí yeⁿe yáⁿ'āa ní yeⁿé yáⁿ'āa ní ngaⁿ'a yeⁿé cosas yeⁿé yáⁿ'āa. 'iⁿ'yāⁿ chí mndaa yā yeⁿé va'ai chεeti nguuvi, ch'εεte cá yā yeⁿé nducyáácá 'iⁿ'yāⁿ. ³² 'iⁿ'yāⁿ miiⁿ ngaⁿ'a cuaacú yā yeⁿé chí n'diichí yā ndúúcu chí ch'iindiveéⁿ yā ní mar 'áámá 'iⁿ'yāⁿ ní nguéeⁿ neⁿé yā 'caandiveéⁿ yā nduudu cuaacu yeⁿé yā. ³³ 'iⁿ'yāⁿ chí n'gúuⁿ yā nduudu cuaacu yeⁿe Jesús nduuvídamá yā ndúúcu yā ní ngaⁿ'a yā chí Dendyuūs miiⁿ chí cuaacu. ³⁴ Du'ū chí Dendyuūs dichó'o yā, 'iⁿ'yāⁿ miiⁿ ngáⁿ'a yā nduudu yeⁿe Dendyuūs miiⁿ, caati Dendyuūs nga'a yā 'iⁿ'yāⁿ Espíritu N'dai yeⁿe Nduuūs nguéeⁿ ndúúcu caadi. ³⁵ Dendyuūs Chiida yú dinéⁿe yā Daiyá yā. Níicú tanducuéⁿē dendu'ū ca'á yā ta'ā Daiyá yā. ³⁶ 'iⁿ'yāⁿ chí i'téenu yā Daiya Dendyuūs miiⁿ canéeⁿ yā ndúúcu vida cueⁿe daāⁿmaⁿ. Naati 'iⁿ'yāⁿ chí nguéeⁿ i'téenu yā Daiya Dendyuūs miiⁿ nguéeⁿ snaaⁿ yā vida cueⁿe daāⁿmaⁿ miiⁿ naati caⁿ'á yā cuta'á yā castigo yeⁿe Dendyuūs chí diitúú n'dai.

4

Jesús ndúúcu n'daataá yeⁿe yáⁿ'āa Samaria

¹ Tááchí Jesús ituumicádiinuun yā 'tíicā chí saⁿ'ā fariseos ch'iindiveeⁿ sa chíⁿ chí Jesús díⁿ yā ní chí chεεdinuūⁿnīⁿ yā 'yaaⁿ ca 'iⁿ'yāⁿ ní véé 'yaaⁿ ca discípulos yeⁿé yā nguéeⁿ ti Juan miiⁿ; ² 'áará chí nguéeⁿ Jesús chí ngεεdinuūⁿnīⁿ yā caati discípulos yeⁿe yā ngεεdinuūⁿnīⁿ yā; ³ Jesús s'néeⁿ yā yáⁿ'āa Judea ní cheⁿe ntuúⁿ yā yáⁿ'āa Galilea.

⁴ Ni canéé chi cho'ó yā yáⁿāa Samaria. ⁵ Ní ndaá yā na 'áamá yáⁿ yeⁿē Samaria chi nguuvu Sicar, niiⁿnuúⁿ ná yáⁿāa chí ca'a Jacob yeⁿē daiya sa José. ⁶ Ní míⁿ canéé vaacunuúⁿnīⁿ yeⁿē Jacob. Jesús chicúúⁿnu yā chi ngiica yā ní ch'iindí yā niiⁿnuúⁿ na vaacunuúⁿnīⁿ. Ní 'āa tanduu n'gεecu ndiichuuvu. ⁷ Ndaā 'áamá n'daataá yeⁿē yáⁿāa Samaria chi sta'a tá nuúⁿnīⁿ. Ní Jesús caⁿa yā chii yā táⁿā: Díí n'daataá, téé dí tíí nuúⁿnīⁿ cu'ú.

⁸ Discípulos yeⁿé yā cueⁿē sa yáⁿā Sicar chi cuaī sa chi che'é yā. ⁹ Ní n'daataá yeⁿē yáⁿāa Samaria ngaⁿa tá ngii tá Jesús: ¿Táacā chi ngiica di nuúⁿnīⁿ chi cu'u di 'úú ti dii ní 'iiⁿyāⁿ Israel dii niicu 'úú yeⁿē yáⁿāa Samaria 'úú? Saⁿā Israel s'eeⁿ ní nguéé n'diichi sa 'iiⁿyāⁿ yeⁿe yáⁿāa Samaria. ¹⁰ Ní n'guεecútaⁿa Jesús, ní ngaⁿa yā ngii yā táⁿā: Ndúúti chí n'diichi di regalo yeⁿe Dendyuūs miiⁿ, ní du'ú chí ngaⁿā ngii dii, tee di nuúⁿnīⁿ cu'ú, tuu'mi ní caaca di nuúⁿnīⁿ yeⁿé yā. Ní 'iiⁿyāⁿ miiⁿ caⁿa yā teé yā nuúⁿnīⁿ chi cu'u di, nuúⁿnīⁿ chi diiⁿ chi canduuchi 'iiⁿyāⁿ.

¹¹ N'daataa míⁿ ní ngaⁿa tá ngii tá Jesús: Señor, nguéé de'ē chi cuta'á nduucú nī tíí vaacunuúⁿnīⁿ yáanuūⁿ. ¿Tíí cuuvi canguaī nuúⁿnīⁿ yeⁿé nī chi diiⁿ chi canduuchi 'iiⁿyāⁿ? ¹² ¿'Áá vmnaaⁿ ca n'diī yeⁿē chiida 'nū Jacob? 'iiⁿyāⁿ miiⁿ din'dái yā vaacunuúⁿnīⁿ 'cūū cáávā nús'uu. 'Múúⁿ sta'á yā nuúⁿnīⁿ ndúúcu daiya yā ndúúcu 'iiti yeⁿé yā.

¹³ Nan'guεecútaⁿa Jesús ngaⁿa yā ngii yā táⁿā: Nducyáácá 'iiⁿyāⁿ chi ngi'i yā nuúⁿnīⁿ 'cūū canéé chi cuuvi yaaca ntúuⁿ yā. ¹⁴ Naati du'ú 'iiⁿyāⁿ chí cú'u yā nuúⁿnīⁿ chí 'úú chí ca'á, 'āa ntéé cuuvi yaacá yā. Nuúⁿnīⁿ chí 'úú ca'á 'iiⁿyāⁿ míⁿ, nuúⁿnīⁿ miiⁿ tan'dúúcu chí cuuvi nduucú yā 'áamá vaacunuúⁿnīⁿ chí ngáāa nuúⁿnīⁿ miiⁿ yeⁿé yā caavā vida cueⁿe daāⁿmaⁿ.

¹⁵ N'daataá miiⁿ ní ngaⁿa tá ngii tá Jesús: Dii Señor, téé nī 'úú nuúⁿnīⁿ 'cūū. Cu'ú ní 'aa ntéé cuuvi yaacá, ní 'aa ntéé chíí cuta'á nuúⁿnīⁿ.

¹⁶ Jesús ngaⁿa yā ngii yā táⁿā: Cuéⁿé dí ní cananguaī di isaⁿā yeⁿē di. Ní cuchii di ndúúcu sa 'muuⁿ.

¹⁷ N'guεecútaⁿa n'daataa míⁿ ní ngaⁿa tá ngii tá 'iiⁿyāⁿ: Nguéé isaⁿā yeⁿé. Ngaⁿa Jesús ngii yā táⁿā: N'daacā chí ngaⁿa di chí nguéé isaⁿā yeⁿe di. ¹⁸ Caati nyuⁿu isaⁿā canéé ndúúcu dii, ní saⁿā chí canéé ndúúcu dii miⁿniiⁿyuⁿ nguéé isaⁿā yeⁿe di. Chiiⁿ chuū ní ngaⁿā cuaacú dí.

¹⁹ Ngaⁿa n'daataá ngii ta Jesús: N'diī Señor, deenú chí n'diī ní 'áamá profeta n'diī. ²⁰ Chiida 'nū ní diíⁿ yā adorar ná cuéétí 'cūū naati 'iiⁿyāⁿ Israel chí judíos ngaⁿā ntuuⁿ yā chí na yáⁿ Jerusalén chí cánéé chí diíⁿ yā adorar Ndyuūs.

²¹ Ní ngaⁿā Jesús ngii yā táⁿā: N'daataá, cu'téenu di 'úú. Ndaā hora taachi ní nguéé cuεeti 'cūū ní nguéé yáⁿ Jerusalén 'iiⁿyāⁿ diíⁿ yā adorar Chiida yú. ²² Ndís'tiī ní diíⁿ nī adorar chí nguéé deenú nī. Nús'uu ní idiíⁿ 'nū adorar chí déenu 'nū naati vaadi nguaⁿai ndaā lado yeⁿe 'áamá 'iiⁿyāⁿ chí nadanguáⁿāi ní yeⁿe 'iiⁿyāⁿ Israel. ²³ Naati hora miiⁿ ní cúchiī ní cúcu hora miiⁿ ní ndaā, taachi cuaacu níⁿnyúⁿ 'iiⁿyāⁿ s'eeⁿ diíⁿ yā adorar Dendyuūs Chiida yú ndúúcu chideεve yeⁿé yā ndúúcu vaadi cuaacú. Caati 'tíicā Chiida yú míⁿ in'nuúⁿ yā 'iiⁿyāⁿ chí diíⁿ yā adorar 'yā ní cu'téenu yā 'yā. ²⁴ Dendyuūs ní Espíritu 'yā. Ní 'iiⁿyāⁿ cánéé chí diíⁿ yā adorar 'yā cánéé chí diíⁿ yā adorar 'yā ndúúcu chideεve yeⁿé yā ndúúcu vaadi cuaacu.

²⁵ N'daataá míⁿ ngaⁿa ta ngii ta Jesús: Deenú chí Mesías canéé chí ndaá chí duuchi Cristo. Taachí 'iiⁿyāⁿ miiⁿ ndaá yā, tuu'mí caaⁿmaⁿ yā nducuéⁿē cosas.

²⁶ Ní ngaⁿa Jesús ngii yā táⁿā: 'Úú chí Cristo chí indeé ndúúcu di.

²⁷ Taachí indeé yā ndúúcu n'daataá míⁿ, ndáa discípulos yeⁿé yā. Ní cueⁿe yíínú sá chí indeé yā ndúúcu n'daataá miiⁿ. Mar 'áamá saⁿā nguéé natiinguuneeⁿ sa Jesús: ¿De'ē iⁿnuuⁿ di? ¿De'ē cuuvi chí ndee di ndúúcu tá? ²⁸ Ní n'daataá míⁿ ní s'neeⁿ tá 'cuuti cuééé yeⁿe tá ní cueⁿē tá ná yáⁿ miiⁿ. Ní caⁿa tá chíí tá 'iiⁿyāⁿ s'eeⁿ: ²⁹ Cuchíí nī ní n'diichí nī 'áamá saⁿā chí caⁿa sa chíí sa 'úú tanducuéⁿē chí ndiíⁿ. ¿'Áá nguéé 'iiⁿyāⁿ miiⁿ chí Cristo?

³⁰ Ní 'iiⁿ'yāⁿ s'eeⁿ can'dáa yā na yāāⁿ miiⁿ. Cueⁿ'e yā n'diichí yā Jesús. ³¹ Ní taachi cueⁿ'ē n'daataa míⁿ na yāāⁿ tuu'mi ní discípulos yeⁿ'é yā ngaⁿ'a sa ngii sá Jesús: N'dií Maestro, che'é nī yuūndū nduucú 'nū.

³² Ní Jesús miiⁿ ngaⁿ'a yā ngii yā saⁿ'ā s'eeⁿ: 'Úú ní véé 'áámá comida yeⁿ'é chi che'é. Ndís'tií nguéeé déenu nī.

³³ Níicú discípulos ngaⁿ'a sa ngii sa vi'i: ¿'Áá ndaā 'iiⁿ'yāⁿ chi cuú yā chí che'é yā?

³⁴ Ní ngaⁿ'a Jesús ngii yā saⁿ'ā s'eeⁿ: Comida yeⁿ'é chíⁿ chí cuuvi díⁿ tan'dúucā chí neⁿ'ē 'iiⁿ'yāⁿ chi dichó'o yā 'úú. Ní di'cuinú ntiiⁿ'nyuⁿ yeⁿ'é yā. ³⁵ Ngaⁿ'a ndis'tií: ¿'Áá nguéeé véé cá tá cuūⁿ 'iīyū taachi ndaá tiempo yeⁿ'ē cosecha? N'diichí nī. 'Úú ngaⁿ'á ngii ndís'tií: N'diichí nī cuaaⁿ 'niiⁿ'nuⁿ. Snaáⁿ nī cuééⁿ yeⁿ'é nī. 'Áā ndaa nguuvi chí díⁿ nī cosechar. ³⁶ 'Iiⁿ'yāⁿ chí nadacuéeⁿ yā cosecha vε chii'vεε yeⁿ'é yā. Ní véé n'gui'i yeⁿ'é yā chí cūnee cueⁿ'e daāⁿ'maⁿ. Níicú 'iiⁿ'yāⁿ chí niinu yā ndúucú 'iiⁿ'yāⁿ chí nadacuéeⁿ yā cosecha ní nduu 'uuví yā yeenú taaví yā. ³⁷ Caati chuū chí cuaacu níⁿ'nyúⁿ chí nduudu cuaacu: 'Áámá 'iiⁿ'yāⁿ ní ngiinu yā ní táámá yā ní nadacuéeⁿ yā. ³⁸ 'Úú nidicho'ó ndís'tií ní nadacuéeⁿ nī cosecha chí nguéeé ndiíⁿ nī ntiiⁿ'nyuⁿ. Táámá yā díⁿ yā ntiiⁿ'nyuⁿ. Ní ndís'tií chí ndaá nī tuu'ví nī ntiiⁿ'nyuⁿ ndiíⁿ yā.

³⁹ Ní neené 'yaaⁿ 'iiⁿ'yāⁿ samaritanos yeⁿ'ē yāāⁿ miiⁿ s'teenú yā Jesús cucáávā nduudu yeⁿ'e n'daātāa miiⁿ chí caⁿ'a yā nduudu cuaacu: 'Iiⁿ'yāⁿ míⁿ ní caⁿ'a yā chí yā 'úú tanducuéⁿ'ē cosa chí ndiíⁿ. ⁴⁰ Ndaa saⁿ'ā samaritanos nanááⁿ Jesús. Di'cuítu sa 'iiⁿ'yāⁿ chí canée yā ndúucu sa. Ní canée yā miiⁿ 'uuvi nguuvi. ⁴¹ Neené 'yaaⁿ cá yā s'teenú yā cucáávā nduudu yeⁿ'e Jesús. ⁴² Níicú 'iiⁿ'yāⁿ s'eeⁿ ngaⁿ'a yā ngii yā n'daataá miiⁿ: 'Áā ntéé cu'teenú 'nū caavā chí ch'iindiveéⁿ 'nū chí cuaacu níⁿ'nyúⁿ nguéeé dámaaⁿ yeⁿ'e chí ngaⁿ'ā di. Caati maáⁿ 'nū n'diichí 'nū ní ch'iindiveéⁿ 'nū chí cuaacu níⁿ'nyúⁿ chí 'iiⁿ'yāⁿ 'cūu nguuvi Cristo chí inadan'guáⁿ'ai yā 'iiⁿ'yāⁿ yeⁿ'e iⁿ'yeeⁿ'dí 'cūu.

Jesús díⁿ yā chí nduuvā yeⁿ'e daiya 'áámá rey

⁴³ Ch'íinú 'uuvi nguuvi ní Jesús cueⁿ'é yā yáⁿ'āa Galilea. ⁴⁴ Caatí maaⁿ Jesús miiⁿ caⁿ'a cuaacú yā chí 'iiⁿ'yāⁿ nguéeé díⁿ yā honrar 'áámá 'iiⁿ'yāⁿ profeta taachi ngaⁿ'a yā yāāⁿ vaacú yā. ⁴⁵ Ní ndaá yā yáⁿ'āa Galilea ní 'iiⁿ'yāⁿ yeⁿ'e yáⁿ'āa Galilea miiⁿ tuu'mi di'cuúⁿ yā chí canee yā. 'Áā n'diichí yā tanducuéⁿ'ē chí díⁿ yā na yāāⁿ Jerusalén, nguuvi yeⁿ'e 'viicu yeⁿ'e pascua, caati 'iiⁿ'yāⁿ s'uúⁿ cheⁿ'e ntuúⁿ yā 'viicu miiⁿ.

⁴⁶ Ndaa ntúūⁿ Jesús na yāāⁿ Caná yeⁿ'e yáⁿ'āa Galilea naachi díⁿ yā vino ndúucú nuūⁿ'nīⁿ. Míⁿ caneeé 'áámá rey yeⁿ'e yāāⁿ Capernaum. Ngiitā 'áámá daiya rey miiⁿ. ⁴⁷ 'Iiⁿ'yāⁿ 'cūu míⁿ ch'iindiveéⁿ yā chí ndaā Jesús yeⁿ'ē yáⁿ'āa Judea na yáⁿ'āa Galilea. Cheⁿ'é yā nanááⁿ Jesús ní di'cuítu yā 'yā chí caⁿ'a yā n'diichí yā daiya sa chí nanduūvā yeⁿ'ē caati 'aa cháā 'cuuvi. ⁴⁸ Tuu'mi ní ngaⁿ'ā Jesús ngii yā saⁿ'ā: Ndúúti chí nguéeé snaaⁿ di señales ndúucú milagros chí vaadi n'giinu nguéeé cu'téenu di.

⁴⁹ 'Iiⁿ'yāⁿ yeⁿ'e rey ngaⁿ'á yā ngii yā Jesús: Señor, cú'u yú caati 'āā cuéé 'cuūvī saⁿ'ā 'lín yeⁿ'é.

⁵⁰ Ngaⁿ'ā Jesús ngii yā 'iiⁿ'yāⁿ: Cúnaⁿ'a di, daiya dí cánduuchi sa. Ní saⁿ'ā miiⁿ ní chí'téenu sa nduudu chí caⁿ'ā Jesús miiⁿ. Ní cuinaⁿ'a sa. ⁵¹ Taachi 'āā ndaa niinuúⁿ vaacu sa 'iiⁿ'yāⁿ chí idiiⁿ mandado yeⁿ'ē sa can'dáa yā n'diichi yā saⁿ'ā. Ní ngaⁿ'a yā ngii yā saⁿ'ā: Daiyá nī miiⁿ candúuchi sa.

⁵² Tuu'mi ní itiinguunéeⁿ sa 'iiⁿ'yāⁿ s'eeⁿ: ¿Dε'ε hora naachi cuaáⁿ yeⁿ'ē sa? Níicú ngaⁿ'a yā ngii yā saⁿ'a: 'licu taachi n'gεεcu 'áámá ní ch'iinu 'iⁿ'nūúⁿ miiⁿ sáⁿ'ā.

⁵³ Tuu'mi ní chiida saⁿ'ā 'lín miiⁿ tuumicádíinuⁿ yā chí hora miiⁿ chí ngaⁿ'a Jesús ngii yā: Daiya dí ní cánduuchi sa. Ní 'iiⁿ'yāⁿ miiⁿ ndúucú nducyaaca familia yeⁿ'e yā s'téenu yā Jesús.

⁵⁴ Chuū ndii 'úúví señal chí Jesús díⁿ yā cuayiivi chí ndáa yā yeⁿ'e yáⁿ'āa Judea ndii yáⁿ'āa Galilea.

5

Saⁿā chi nguεε ngii ngíicá

¹ Chó'oo tanducuéⁿē cosa 'túucā. Véé 'áámá 'viicu yeⁿē 'iiⁿyāⁿ Israel. Níicu Jesús cuchée yā yāāⁿ Jerusalén. ² Míiⁿ canée 'áámá viini ch'εεte niiⁿnuⁿ cheendi chéeⁿ, cuaaⁿ naachí indáa yā ndúucū 'iiti cuūchí chí n'diicui yā na yāāⁿ Jerusalén. Viini ch'εεte miiⁿ nguuvu Betesda na nduudu hebreo. Véé nyuⁿu corredor nuuⁿmaⁿ ndiivi viini ch'εεte. ³ Na corredor miiⁿ ndiitú ndúucū n'deē n'dái 'iiⁿyāⁿ ngíitā; 'iiⁿyāⁿ ngueenááⁿ, ndúucū 'iiⁿyāⁿ chi nguée ngii ngiicá yā, ndúucū 'iiⁿyāⁿ chí ntí'í ta'á yā o ca'a yā. 'iiⁿyāⁿ miiⁿ canée ngíínú yā chí in'nuⁿu nuūⁿnīⁿ. ⁴ Caati vεε tiempo chi 'áámá ángel nch'eéⁿ yā níicú idi'núⁿu yā nuūⁿnīⁿ chi snéē ná viini ch'εεte. Ní cuayiivi 'iiⁿyāⁿ chi ndáa yā vmnááⁿ vmnáaⁿ chεεtí viini mífíⁿ nanduuva yeⁿé yā yeⁿē 'āā dε'é nūuⁿ ca'āi chí ndii yā. ⁵ Ní miiⁿ canée 'áámá sáⁿā ndiicú nditiiⁿ'yuⁿ 'iinu ndúuyū chí ngíitā sa. ⁶ Taachí Jesús n'diichí yā saⁿā chi candítí sá, níicú 'āā deenú yā chí 'āā 'naáⁿ ngíitā sa, tuu'mi ní ngaⁿa yā ngii yā saⁿā: ¿'Áá néⁿé dí chí nduūvā yeⁿē di?

⁷ Ní saⁿā chi ngíitā miiⁿ nan'guεεcútaⁿā sa yeⁿé yā: Señor, nguée mar 'áámá saⁿā chi cu'nuūⁿ sa 'úú chééti viinī taachi í'nuⁿu nuūⁿnīⁿ. Caati taachí ndaá, 'āā ndāā taamá yā chεεtí viinī.

⁸ Ní ngaⁿa Jesús ngii yā saⁿā: Nacuéeⁿ di. Nadacuéeⁿ di yiive yeⁿē di ní cunaⁿa di.

⁹ Tuu'mí nūuⁿ nduūvā yeⁿē sa. Ní nadacuéeⁿ sa yiive yeⁿē sa. Ní cunaⁿa sá. Ní nguuvu miiⁿ ní sábadu nguuvu chí ntaavi'tuunúuⁿ 'iiⁿyāⁿ Israel. ¹⁰ Níicú 'iiⁿyāⁿ Israel ngaⁿa yā ngii yā saⁿā chí 'āā nanduuvá yeⁿē sa: Caati maaⁿ ní sábadu miiⁿ, tan'dúucā chí caⁿa ley, nguée cuuví nandée di yiive yeⁿē di.

¹¹ Ní n'guεεcútaⁿā sa yeⁿé yā: 'iiⁿyāⁿ chí díⁿ yā chí nduuvā yeⁿé, 'iiⁿyāⁿ miiⁿ ní ngaⁿa yā ngii yā 'úú: Nadacuéeⁿ di yiive yeⁿē di. Ní cuinaⁿa di.

¹² Tuu'mi ní tiinguunéeⁿ 'iiⁿyāⁿ Israel saⁿā: ¿Du'ú chí 'tíicā ngaⁿā ngii di: Nadacuéeⁿ di yiive yeⁿē di, ní cuinaⁿa di?

¹³ Níicú saⁿā chí 'āā nduuvá yeⁿē sa nguée déenú sá du'ū 'iiⁿyāⁿ miiⁿ, caati Jesús diví yā yeⁿe saⁿā miiⁿ. Ní neené n'deē 'iiⁿyāⁿ snéē yā miiⁿ. ¹⁴ Cuayiivi Jesús nandaacá yā saⁿā na yáacū templo. Ní ngaⁿa Jesús ngii yā saⁿā: Cun'díichí dí maaⁿ 'āā nduuvá yeⁿē di. 'Aa ntée diiⁿ di nuuⁿndi niicu nguée cuta'āa táámá ca'ai chí más cā taaⁿ di.

¹⁵ Tuu'mí saⁿā miiⁿ cunaⁿā sa ní caⁿa sa chí sa 'iiⁿyāⁿ Israel chí Jesús chí díⁿ yā chí ndúuvā yeⁿe sa. ¹⁶ Ni cáávā chuū ní can'dáā 'iiⁿyāⁿ Israel Jesús miiⁿ chí neⁿé sa 'caaⁿnúⁿ sa 'iiⁿyāⁿ caati díⁿ yā cosa chí 'tíicā miiⁿ nguuvu chí sábadu chí ntaavi'túúnuuⁿ 'iiⁿyāⁿ. ¹⁷ Jesús nan'guεεcútaⁿa yā yeⁿē sa: Chiidá ní ndíⁿ maaⁿ chí idiiⁿ cá yā ntiiⁿnyuⁿ. Ní 'úú idiiⁿ ntiiⁿnyuⁿ dendu'ū.

¹⁸ Tuu'mi ní 'iiⁿyāⁿ Israel neⁿe taaví sa 'caaⁿnúⁿ sa Jesús, caati nguée damaāⁿ chí nguée díⁿ yā cumplir chí ngaⁿā na ley yeⁿe sábadu, caati ngaⁿá yā chí Dendyuūs Chiidá yā, ní díⁿ yā chí nduuvídáámá yā ndúucū Dendyuūs.

Dendyuūs dicho'ó yā Daiya yā

¹⁹ Nan'guεεcútaⁿá Jesús ní ngaⁿa yā ngii yā saⁿā: Cuaacu níⁿnyúⁿ, cuāacū niiⁿnyuⁿ chí ngaⁿá ngii ndis'tiī chí nguée cuuvi diiⁿ Daiyá Dendyuūs mar 'áámá cosa dámaāⁿ ndúutí chí nguée n'diichí yā chí diiⁿ Chiidá yā. Caati tanducuéⁿē chí diiⁿ Chiidá yā, 'tiicá ntúūⁿ diiⁿ Daiyá yā. ²⁰ Caati Dendyuūs Chiidá ní dinéⁿe yā 'úú chí Daiya yā. Ní n'giⁿi yā 'úú tanducuéⁿe dendu'ū chí díⁿ yā. Niicu Chiidá n'giⁿi cá yā 'úú ntiiⁿnyuⁿ n'gεεte ca nguée tii chuū. Níicú ndis'tiī caⁿa yíⁿú ní yeⁿē. ²¹ Tan'dúucā Chiidá nadacuéeⁿ yā 'iiⁿyāⁿ chí 'āā n'dii ní nga'a yā vida yeⁿé yā, 'tiicá ntúūⁿ 'úú Daiyá yā ní nadacuéeⁿ 'iiⁿyāⁿ chí 'āā n'díⁿ ní nga'á vida 'iiⁿyāⁿ miiⁿ chí neⁿé nga'á. ²² Caati Chiidá nguée díⁿ yā juzgar mar 'aama 'iiⁿyāⁿ naatí ca'á yā 'úú chí Daiya yā chí díⁿ juzgar tanducuéⁿē. ²³ Caati tanducuéⁿē 'iiⁿyāⁿ díⁿ yā honrar 'úú chí Daiyá yā tan'dúucā tanducuéⁿē 'iiⁿyāⁿ díⁿ yā honrar Chiidá. Du'ū chí nguée idiⁿ yā honrar 'úú chí Daiyá Dendyuūs ní nguée idiⁿ yā honrar Chiidá chí dicho'ó yā 'úú.

²⁴ Cuaacu níí'nyú'n, cuāacū nii'nyu'n nga'á ngíi ndis'tií: 'Ii'nyā'n chi n'giindiveé'n yā nduudu chi nga'á, ní i'téenu yā ye'n'e 'ii'nyā'n chi dicho'o 'úú, véé vida cue'n'e daā'ma'n ye'n'é yā. Niicu nguéé condenado yā. Nguéé canee yā dácaā ye'n'e chi n'gii caati véé vida cue'n'e daā'ma'n ye'n'é yā. ²⁵ Cuaacu níí'nyú'n, cuāacū nii'nyu'n nga'á ngíi ndis'tií: Cuchii hora ní hora mii'n chuū taachi 'ii'nyā'n s'ee'n chi 'āā n'dií yā, 'caandiveé'n yā nduudu ye'n'e 'úú chi Daiyá Dendyuūs. 'Ii'nyā'n chí i'teenu yā nduudu ye'n'é cunduuchi yā cue'n'e daā'ma'n. ²⁶ Tan'dúúca Chiidá véé vida ye'n'e maā'n yā, 'tiicá ntúū'n ca'a yā 'úú chi Daiya yā vida ye'n'e maā'n. ²⁷ 'Tíicā ca'á yā poder 'úú chi díi'n juzgar 'ii'nyā'n caati 'úú Sa'n'ā chi Daiya Dendyuūs 'úú. ²⁸ Nguéé ca'n'ā yiinu di ye'n'e chúū, caati cuchii hora taachi nducyáacá 'ii'nyā'n chi chinúu yā maa'n ya'n'āa 'caandiveé'n yā nduudu ye'n'é. ²⁹ Ní nadacué'e'n yā ye'n'e nguaa'n tiná'n'ā. 'Ii'nyā'n chi díi'n yā chi n'daacā, ní ca'n'á yā cuneé yā ndúúcu vida cue'n'e daā'ma'n ye'n'é yā. Ní 'ii'nyā'n chi nguéé n'daacā idií'n yā, ca'n'á yā na condenación.

'Ii'nyā'n s'ee'n ca'n'a cuaacú yā ye'n'e Jesús

³⁰ Ní ca'n'a Jesús: 'Úú ní damaá'n ní nguéé de'ē vee cuuvi díi'n. Tan'dúúca chi n'giindiveé'n, 'tíicā díi'n juzgar. Ní chi díi'n juzgar ní cuaacu caati nguéé in'nuú'n chi ne'n'é maā'n naati chi ne'n'e maā'n Chiidá chi dicho'o yā 'úú. ³¹ Ndúúti chi ye'n'é māa'n chi nga'á cuaacu ní nguéé cuaacu. ³² Táámá 'ii'nyā'n chi díi'n yā caa'n'ma'n cuaacú yā ye'n'e 'úú. 'Úú ní deenú tii chí nga'n'a yā ye'n'e 'úú chi cuaacu. ³³ Ní ndis'tií ní dicho'o ní 'ii'nyā'n s'ee'n nanáán Juan. Ní Juan mii'n ca'n'a sa nduudu cuaacu ye'n'e 'úú. ³⁴ Caati 'úú nguéé ita'á nduudu cuaacu ye'n'e sá'n'ā ye'n'e i'nyee'dí 'cūū naati nga'á tanducué'n'e chuū caati ndis'tií ní cuuvi nanguá'n'ai nī. ³⁵ Níicú Juan chi cheedínuū'n'i'n yā 'ii'nyā'n mii'n tan'dúúca 'áámá chi deeve ngiichi ní ngíi n'gai, 'tíica yā. Ní ndis'tií ní diné'n'e nī vaadī yeenú ye'n'é nī 'áámá tiempo ndúúcu chi deeve ye'n'é yā. ³⁶ Naati 'úú ní nga'á nduudu cuaacu chi ch'εete ca chi ca'n'a Juan mii'n caati ntii'nyu'n chi teē Chiidá 'úú, ní chuū idií'n. Tan'dúúca maā'n ntii'nyu'n chi díi'n ní nga'n'ā nduudu cuaacu ye'n'é chi Chiidá dicho'o yā 'úú. ³⁷ Níicú maa'n Chiidá chi dicho'o yā 'úú nga'n'a yā nduudu cuaacu ye'n'e 'úú. Ndís'tií mar 'áámá vmné'n'ee nguéé n'giindiveé'n nī nduudu ye'n'e chiidá, ndíi' nguéé ndúú n'diichí nī 'ii'nyā'n taacá yā. ³⁸ Ní ndis'tií ní nguéé 'áámá canee nī ndúúcu nduudu ye'n'é yā caati ndis'tií nguéé s'téenu nī chi 'úú ní 'ii'nyā'n chi Dendyuūs dicho'o yā. ³⁹ In'nuú'n nī naachi cánée nguū'n na libro ye'n'e Ndyuūs, níicú cadiinúú'n nī chi véé vida cue'n'e daā'ma'n ye'n'é nī. Ní míi'n nga'n'ā cuaacu ye'n'e 'úú. ⁴⁰ Ndis'tií nguéé ne'n'é nī chii nī nanaán tii cuūvī vida cue'n'e daā'ma'n ye'n'é nī.

⁴¹ 'Úú ní nguéé cuta'á honra ye'n'e sa'n'ā ye'n'e i'nyee'dí 'cūū. ⁴² Naati 'úú ideenú táacā ndis'tií ní nguéé ne'n'é nī Dendyuūs. ⁴³ 'Úú ní cuchii ndúúcu chi duuchi Chiidá. Ní nguéé 'cuaa'n nī ndis'tií 'úú. Ndúúti chi taamá yā cuchii yā ndúúcu nduudu ye'n'e maā'n yā, tuu'mi ní 'cuaa'n nī 'ii'nyā'n mii'n. ⁴⁴ ¿Táacā cu'téenu ndis'tií chi díi'n nī honrar 'áámá nī ye'n'e taamá nī ní nguéé ne'n'é nī chi Dendyuūs díi'n yā honrar n'dií? ⁴⁵ Nguéé nadacadíinuū'n ndis'tií chi 'úú nga'n'á nuu'ndi ye'n'e ndis'tií nanáán Chiidá. Véé 'áámá 'ii'nyā'n chi nga'n'a nuu'ndi ye'n'e ndis'tií chi Moisés chi 'ii'nyā'n chi i'téenu nī. ⁴⁶ Ndúúti chi ndis'tií chi'téenu nī ye'n'e Moisés mii'n tuu'mi ní cu'téenu nī 'úú caati ye'n'e 'úú chi dingúu'n sa. ⁴⁷ Ndúúti chi nguéé i'téenu nī chi dingúu'n Moisés, ¿táaca cu'téenu nī nduudu ye'n'e 'úú?

6

Jesús ca'á yā chi che'é nyu'n'u mil sa'n'ā

(Mt. 14.13-21; Mr. 6.30-44; Lc. 9.10-17)

¹ Cho'o cosa chuū, ní cue'n'e Jesús taama lado ye'n'e nuu'ni'nyā'n'ā Galilea chi nguuví ntúū'n Tiberias. ² Néené n'deēe 'ii'nyā'n cue'n'e yā n'dáa yā Jesús caati n'diichí yā señales ye'n'é yā chi díi'n yā ndúúcu 'ii'nyā'n chi ngiitā. ³ Ní cuchεe Jesús 'áámá cuεeti ní míi'n ch'iindí yā ndúúcu discípulos ye'n'é yā. ⁴ Ní chinee nii'nuú'n nguuví ye'n'e pascua ye'n'e 'ii'nyā'n Israel s'ee'n. ⁵ Tuu'mi n'diichi Jesús cuaa'n 'nii'nuú'n níicú snaa'n yā chí n'deēe n'dái 'ii'nyā'n cuchii yā nanáán yā. Ní Jesús nga'n'a yā ngii yā Felipe: ¿Tií ca'n'a yú cuaī yú pan chi che'e 'ii'nyā'n s'tíi?

⁶ Ní chuū Jesús ngaⁿa yā ti díⁿ yā probar saⁿā miiⁿ táácā diiⁿ sá maāⁿ sa, caati Jesús maāⁿ yā deenú yā de'ē chi díⁿ yā. ⁷ Nan'guεεcútaⁿa Felipe miiⁿ yeⁿé yā: Ndúúcu nyuⁿu ciento caadi tuūmī chi caⁿá nguai pan nguée tunééⁿ chí cuta'á 'iiⁿyāⁿ s'tiī 'aama taaⁿ chí che'e yā.

⁸ 'Áámá discípulo yeⁿé yā chí nguúví Andrés chi 'dínu yā Simón Pedro, ngaⁿa sá ngii sa Jesús: ⁹ 'Áámá saⁿā 'líⁿ chi canee 'muuⁿ ndéε sa nyuⁿu panes cebada ndúúcu na 'uuvi 'yaācā n'gaiyāā. ¿De'ē tunééⁿ chuū chi che'e 'iiⁿyāⁿ s'tiī?

¹⁰ Tuu'mi ní nan'guεεcútaⁿā Jesús miiⁿ ngaⁿa yā ngii yā saⁿā: Cúúví nī 'iiⁿyāⁿ s'tiī ní 'cuεεté núúⁿ yā. Néené véé yuune lugar miiⁿ nícu ch'εεte 'áámá número tan'duucā nyuⁿu mil saⁿā. ¹¹ Ní Jesús miiⁿ sta'á yā panes miiⁿ nícu taachi ngaⁿa yā ngii yā: Gracias N'dii Ndyuūs, tucá'a yā ca'a yā discípulos, ní discípulos ní ca'á yā 'iiⁿyāⁿ chi veēté miiⁿ. 'Tiicá ntúūⁿ diiⁿ Jesús ndúúcu 'yaācā. Ní 'iiⁿyāⁿ miiⁿ sta'á yā 'yaācā. Sta'á yā nducuéⁿē chi neⁿé yā. ¹² Taachi 'āā nteε véé chi neⁿe yā, Jesús ngaⁿa yā ngii yā discípulos yeⁿé yā: Nadicuéⁿ di nducuéⁿē tááⁿ panes chi nángaāva caati nguée cuuvi ndái de'ē veε.

¹³ Nadicuéⁿ yā tanducuéⁿē taaⁿ panes chi nángaāva. Nícu chiitu ndiichúúví 'cuεεtē naachi nyuⁿu pan cebada chi ningaāva naachi che'e 'iiⁿyāⁿ s'eeⁿ. ¹⁴ Taachi n'diichi 'iiⁿyāⁿ s'eeⁿ señal chi diiⁿ Jesús miiⁿ tuu'mi ní ngaⁿa yā ngii yā vi'i: Cuaacu níⁿnyúⁿ 'iiⁿyāⁿ 'cúú chi profeta chi canee chi ndaá yā in'yééⁿdi 'cúú.

¹⁵ Taachi tuumicádínuuⁿ Jesús chi 'iiⁿyāⁿ s'eeⁿ neⁿé yā cuta'á yā 'yā ní cu'néⁿ yā 'yā lado yeⁿé rey tuu'mi ní cueⁿé máaⁿ yā na 'áámá cuεεti.

Jesús ngiica yā vmnaaⁿ nuūⁿnīⁿyáⁿā

(Mt. 14.22-27; Mr. 6.45-52)

¹⁶ 'Āā chii chíⁿū miiⁿ ní cueⁿe discípulos yeⁿé yā na nuūⁿnīⁿyáⁿā. ¹⁷ Ní chi ndaa yā 'áámá barco ní cueⁿé yā ná nuūⁿnīⁿyáⁿā. Ní 'āā ntéé ndaá yā na yāā Capernaum. 'Āā chii 'da'a ní nguée ndāā Jesús naachi snée yā. ¹⁸ Ní cho'ō 'aama 'yúúné taaⁿ ní nadācuéⁿ n'dai nuūⁿnīⁿyáⁿā. ¹⁹ Taachi 'āā cueⁿé yā tanduu nyuⁿu candúú nyaaⁿ kilómetros, tuu'mi n'diichi yā chí cúchi Jesús miiⁿ. Ngiicá yā cuaaⁿ vmnaaⁿ nuūⁿnīⁿ. Ní taachi 'aa cháá ndaa Jesús niⁿnuúⁿ na barco miiⁿ discípulos dii'yā sá chii. ²⁰ Ní Jesús ngaⁿa yā ngii yā saⁿā s'eeⁿ: Nguée 'va'ā ndís'tiī ti 'úú.

²¹ Tuu'mi ngaⁿa sá ngii sa Jesús: Cho'ó nī cuaaⁿ chεεti barco. Yeenu n'dai sa chí sndaā Jesús na barco. 'Āā nuúⁿ ndaa barco miiⁿ na yāⁿā naachi cuéⁿē.

'Iiⁿyāⁿ in'nuúⁿ yā Jesús

²² Chi deεve táámá nguuvi ní 'iiⁿyāⁿ chí snée yā táámá lado yeⁿe nuūⁿnīⁿyáⁿā n'diichi yā 'áámá barco nūuⁿ, barco miiⁿ chí 'āā cueⁿē discípulos. Ní n'diichi yā chí nguée cueⁿe Jesús ndúúcu discípulos yeⁿé yā. Ní discípulos yeⁿé yā cuinaⁿá yā dámaáⁿ yā. ²³ Tan'duuvi barcos yeⁿē Tiberias ndāā niⁿnuúⁿ na lugar naachi ch'εεté yā chí che'é yā pan 'iicū cuayiivi chí Jesús ngāⁿa yā: Gracias n'dii Dendyuūs Chiidá. ²⁴ Taachi 'iiⁿyāⁿ n'diichi yā chí nguée Jesús miiⁿ ndí nguée ndúú discípulos yeⁿé yā, tuu'mi ní chí ndaá yā chεεti barcos. Ní cueⁿé yā na yāā Capernaum. N'nuūⁿ yā Jesús miiⁿ.

Jesús tan'dúúcu yuūndū chí ca'a vida

²⁵ Taachi 'iiⁿyāⁿ s'eeⁿ ndaacá yā Jesús táámá lado yeⁿē nuūⁿnīⁿyáⁿā tuu'mi ní ngaⁿa yā ngii yā 'iiⁿyāⁿ: N'dii Maestro, ¿tíⁿ cuaⁿa ndaá nī 'muuⁿ?

²⁶ Nan'guεεcútaⁿa Jesús yeⁿe yā ní ngaⁿa yā ngii yā: Ndís'tiī, cuaacu níⁿnyúⁿ cuācū niⁿnyuⁿ nguée in'nuúⁿ nī 'úú ti n'diichi nī chí díⁿ señales naati chí teé pan, ní che'é nī ní chiitu ndís'tiī. ²⁷ Nguée díⁿ nī ntiⁿnyuⁿ yeⁿe comida chí chó'ōo ti yeⁿe comida chí cunéé cueⁿe daāⁿmaⁿ, chεε chí tee Saⁿā chí Daiya Dendyuūs ndís'tiī caati Dendyuūs Chiidá ca'á yā poder Daiyá yā.

²⁸ Tuu'mi ní ngaⁿa saⁿā s'eeⁿ ngii sá 'iiⁿyāⁿ: ¿Taacā díⁿ 'nū chí cuuví díⁿ 'nū ntiⁿnyuⁿ chí ntiⁿnyuⁿ yeⁿé Dendyuūs miiⁿ?

²⁹ Nan'guεcutáⁿā Jesús yeⁿē sa ní ngaⁿá yā ngii yā saⁿā: Chuū chi ntiiⁿnyuⁿ yeⁿe Dendyuūs miiⁿ chi cu'téenu di yeⁿē 'iiⁿyāⁿ chi Ndyuūs dichó'o yā 'iiⁿyāⁿ.

³⁰ Tuu'mí ngaⁿa sa ngii sa 'iiⁿyāⁿ: ¿De'ε señal chí cu'neeⁿ nī chí snaáⁿ 'nū, ní cu'téenu 'nū n'diī? ¿De'ε ntiiⁿnyuⁿ idiíⁿ nī? ³¹ Chiida yú ní che'é yā yuūndū maná na yáⁿāa naachi nguée ch'εtinée 'iiⁿyāⁿ tan'dúúcā chi canée nguūⁿ na libro yeⁿe Ndyuūs 'tíicā: Yuūndū yeⁿē nanguuvi Ndyuūs ca'á yā chí che'é 'iiⁿyāⁿ s'eeⁿ.

³² Nan'guεcutáⁿā Jesús yeⁿē sa: Cuaacu níⁿnyúⁿ, cuāacū niiⁿnyuⁿ ngaⁿá ngii ndis'tiī: Nguée teé yā Moisés miiⁿ yuūndū chí maná chí yeⁿē nanguuvi, naati Chiidá teé yā n'diī pan chí cuaacu níⁿnyúⁿ chí yeⁿe va'ai chεeti nguuvi. ³³ Caati pan chí yeⁿé Dendyuūs ní 'iiⁿyāⁿ miiⁿ chí inch'eeⁿ yā yeⁿe va'ai chεeti nguuvi ní nga'á yā vida cueⁿe daāⁿmaⁿ yeⁿē 'iiⁿyāⁿ yeⁿeⁿ íⁿ'yeēⁿdī.

³⁴ Tuu'mi ní ngaⁿā sa ngii sa Jesús: Señor, téé nī pan 'cūū nús'uu cueⁿe daāⁿmaⁿ.

³⁵ Jesús ngaⁿa yā ngii yā saⁿā: 'Úú ní tan'dúúcā pan 'tíicā 'úú ní ca'á vida cueⁿe daāⁿmaⁿ. Du'u chí chii nanaáⁿ nguée cúúví cuiicú yā. Ní du'ū chí cu'teenu 'úú 'āā ntée cuuví yaacá yā. ³⁶ Naati 'úú ní ngaⁿá ndis'tiī: 'Āā n'diichí nī 'úú, níicú ndíí nguée s'téenu nī 'úú. ³⁷ Tanducuéⁿē 'iiⁿyāⁿ chí itée Chiidá 'úú, 'iiⁿyāⁿ s'tíi cuchii nanaáⁿ. Du'ū chí chí nanaáⁿ nguée tun'daá 'iiⁿyāⁿ chufa'āi. ³⁸ Caati 'úú chiicá yeⁿē na va'ai chεεtε nguuvi ní nguée dííⁿ chí 'úú neⁿé maáⁿ, caati dííⁿ chí neⁿe maāⁿ 'iiⁿyāⁿ chí dichó'o yā 'úú. ³⁹ Chuú chí neⁿē Chiidá chí dichó'o yā 'úú, caati 'úú ní nguée nindaí mar 'áámá yeⁿē tanducuéⁿē chí tee yā 'úú. 'Úú ní nadin'duuchí tanducuéⁿē 'iiⁿyāⁿ yeⁿe nguuaⁿ tináⁿā nguuvi chí 'cuiīnū iⁿ'yeēⁿdī. ⁴⁰ Chuū chí neⁿe 'iiⁿyāⁿ chí dichó'o yā 'úú: Nducyaaca 'iiⁿyāⁿ chí n'diichí yā Daiya Ndyuūs, ní i'téenu yā 'iiⁿyāⁿ, véé vida cueⁿe daāⁿmaⁿ yeⁿé yā. Niicu 'úú ní nadicueéⁿ 'iiⁿyāⁿ s'eeⁿ nguuvi chí 'cuiīnū iⁿ'yeēⁿdī.

⁴¹ Tuu'mí ngaⁿā 'iiⁿyāⁿ Israel yeⁿé yā: Nguée n'daacā chí ngaⁿa yā: 'Úú tan'dúúcā pan chí cuch'éeⁿ nanguuvi, 'tíicā 'úú. ⁴² Ní ngaⁿa yā: ¿'Áá nguée sáⁿa 'cūū chí Jesús daiya José? Ní n'diichí yú chiidá yā ndúúcū chεécú yā. ¿Taacā chí ngaⁿā sa: 'Úú chí cuch'eeⁿ yeⁿe na va'ai chεeti nguuvi?

⁴³ Ní Jesús nan'guεcutáⁿá yā yeⁿē sa, ní ngaⁿa yā ngii yā saⁿā: Nguée caaⁿmáⁿ ndis'tiī nguááⁿ maáⁿ nī. ⁴⁴ Mar 'áámá 'iiⁿyāⁿ nguée cuuvi ndaá yā nanaáⁿ ndúútī chí Chiidá chí dichó'o yā 'úú nguée nndée yā 'iiⁿyāⁿ. 'Úú nadan'duuchí 'yā nguuvi chí 'cuiīnū iⁿ'yeēⁿdī. ⁴⁵ Canée nguūⁿ na libro yeⁿē Ndyuūs naachi ngaⁿa profetas 'tíicā: Dendyuūs ca'cueeⁿ yā nducyaaca yā. Nducyaaca 'iiⁿyāⁿ chí ch'iindiveéⁿ yā yeⁿē Chiidá ní 'āā cueéⁿ yā yeⁿē Chiidá, cuchíí yā nanááⁿ 'úú.

⁴⁶ Mar 'áámá 'iiⁿyāⁿ 'āā n'diichí yā Chiidá, dámaaⁿ Cristo chí yeⁿe Dendyuūs ti Daiyá Ndyuūs. 'Iiⁿyāⁿ 'cūū dámaaⁿ n'diichí yā Chiidá. ⁴⁷ Cuaacu níⁿnyúⁿ, cuāacū niiⁿnyuⁿ ngaⁿá ngii ndis'tiī: Du'ū chí i'téenu yā 'úú cunduuchí yā cueⁿe daāⁿmaⁿ. ⁴⁸ 'Úú tan'dúúcā pan chí canduuchi, 'tíicā 'úú. ⁴⁹ Chiidá nī che'é yā pan maná na yáⁿāa naachi nguée 'iiⁿyāⁿ ní ch'ii yā. ⁵⁰ Chuū chí pan chí cuch'éeⁿ na va'ai chεeti nguuvi caati 'iiⁿyāⁿ chí che'é yā yeⁿē nguée 'cuūvi yā. ⁵¹ 'Úú tan'dúúcā pan chí canduuchi chí cuch'eeⁿ na va'ai chεeti nguuvi. Du'u 'iiⁿyāⁿ chí ch'é yā pan 'cūū, cunduuchí yā cueⁿe daāⁿmaⁿ. Níicú pan miiⁿ chí 'úú caⁿá ní yuūtē yeⁿé maáⁿ. Chuū chí ca'á cáávā vida yeⁿé 'iiⁿyāⁿ yeⁿe iⁿ'yeēⁿdí 'cūū.

⁵² Tuu'mi ní 'iiⁿyāⁿ Israel ch'εecu cheendí sá nguuaⁿ maāⁿ sa: ¿Táacā cuuvi téé sá cuerpo yeⁿē sa chí che'é 'nū?

⁵³ Tuu'mí ngaⁿa Jesús ngii yā saⁿā: Cuaacu níⁿnyúⁿ, cuāacū niiⁿnyuⁿ ngaⁿá ngii ndis'tiī: Nduuti chí nguée che'e nī cuerpo yeⁿe Saⁿā chí Daiya Dendyuūs ní nduuti chí nguée cu'ú nī yuúúⁿ yeⁿē sa, nguε cūnee vida cueⁿe daāⁿmaⁿ ndúúcu nī. ⁵⁴ Du'u chí che'e cuerpo yeⁿé ní cu'u yuúúⁿ yeⁿé, cunée vida cueⁿe daāⁿmaⁿ ndúúcū. Níicú 'úú nadicueéⁿ 'iiⁿyāⁿ s'eeⁿ nguuvi chí 'cuiīnū iⁿ'yeēⁿdī. ⁵⁵ Caati cuerpo yeⁿé, cuaacu níⁿnyúⁿ yuūtē chí che'e yā. Ní yuúúⁿ yeⁿé, cuaacu níⁿnyúⁿ chí yuúúⁿ chí cu'u yā. ⁵⁶ Du'u chí che'e cuerpo yeⁿé ní cu'ú yuúúⁿ yeⁿé cunee yā nduucú, ní 'úú cunee ndúúcu yā. ⁵⁷ Tan'dúúcā

chi Chiidá canduuchí yā ní dichó'o yā 'úú, ní 'úú canduuchí cáávā 'ii'yān miiⁿ. 'Tiicá ntúūⁿ 'ii'yāⁿ chi che'e yā 'úú, 'ii'yāⁿ miiⁿ ní cunduuchi ntúúⁿ yā cáávā 'úú. ⁵⁸ Chuū pan chi cuch'eéⁿ yeⁿē na va'ai chæti nguuví. Nguéé tan'dúú^{cā} pan maná chi che'ē chiidá nī miiⁿ tiempo chi 'āā chó'ōo ní ch'iī yā. Du'u chi che'e pan 'cūū cunduuchí yā cueⁿe daāⁿmaⁿ.

⁵⁹ Chuū chí caⁿ'a Jesús na yáacū sinagoga taachi cueⁿ'é yā na yāāⁿ Capernaum.

Nduudu yeⁿ'e vida cueⁿ'e daāⁿmaⁿ

⁶⁰ Tuu'mi n'dee n'dái discípulos yeⁿ'é yā taachi ch'iindiveéⁿ yā chuū ní caⁿ'a yā: Chæchí 'téé nduudu 'cūū. ¿Du'ū rá 'caandiveeⁿ rá?

⁶¹ Taachí déénú maāⁿ Jesús chi discípulos yeⁿ'é yā indeē sa nguááⁿ maāⁿ sa yeⁿ'e chuū tuu'mi ní ngaⁿ'á yā ngii yā saⁿ'ā s'eeⁿ: ¿'Áá chuū chi nguεε ineéⁿ nūūⁿ ndís'tiī? ⁶² ¿De'ē ca dííⁿ ndís'tiī, taachí n'diichí nī Saⁿ'ā chí Daiya Dendyuūs chí ch'ee sa na va'ai chæti nguuví naachí canéé sa vmnááⁿ vmnaaⁿ? ⁶³ Espíritu chuū chí nga'a vida yeⁿ'é 'ii'yāⁿ ní 'ii'yāⁿ canéé ndúú^{cū} espíritu yeⁿ'é yā. Yuūtē miiⁿ nguéé de'ē veε idiīⁿ. Nduudu chi ngaⁿ'á ngii ndís'tiī, ní yeⁿ'ē espíritu ní ca'a vida 'ii'yāⁿ. ⁶⁴ Véé n'duuví ndís'tiī chi nguéé i'téénú nī. Caati Jesús ndíí cuaaⁿ vmnaaⁿ 'āā deenú yā du'ū 'ii'yāⁿ s'eeⁿ chi nguéé cu'téénú yā, ní cú du'ū 'ii'yāⁿ chí dííⁿ yā entregar 'ii'yāⁿ. ⁶⁵ Ní Jesús ngaⁿ'a yā: Cáávā chuū chí ngaⁿ'á ngii ndís'tiī, caati mar 'áámá 'ii'yāⁿ nguéé cuchíí yā nanaáⁿ ndúúti chi nguéé cáávā chí Dendyuūs 'cuúⁿ yā 'ii'yāⁿ. ⁶⁶ Ndiī tuu'mi, neenē 'yaaⁿ discípulos yeⁿ'é yā ndaacadáámí sá ní 'āā ntéé cachiica sa ndúú^{cū} Jesús. ⁶⁷ Tuu'mi ní ngaⁿ'a Jesús ngii yā saⁿ'ā chí ndiichúúví: ¿'Áá neⁿ'é nī ntúūⁿ ndís'tiī ndaacadáámí nī yeⁿ'é?

⁶⁸ Tuu'mi ní nan'guεεcútaⁿ'ā Simón Pedro: Señor, ¿du'u chí caⁿ'ā ndúúcu 'nū? N'diī ní canéé nī ndúú^{cū} nduudu yeⁿ'ē vida cueⁿ'e daāⁿmaⁿ. ⁶⁹ Nús'uu i'téénú 'nū ní deenú 'nū chí n'diī chí Cristo, Daiya Dendyuūs chí canduuchi cueⁿ'e daāⁿmaⁿ.

⁷⁰ Ní Jesús nan'guεεcútaⁿ'á yā: ¿'Áá nguéé 'úú chí ndεεvé ndís'tiī ndiichúúví nī? Ní 'áámá chéé ndís'tiī nī yááⁿ'n'guinūⁿ.

⁷¹ Ní ngaⁿ'a yā yeⁿ'e Judas Iscariote, daiya Simón caati sáⁿ'a 'cūū chí canee chí diīⁿ sa entregar 'ii'yāⁿ. Saⁿ'ā miiⁿ 'áámá sá yeⁿ'ē naachi ndiichúúví sá.

7

'Diīnū Jesús nguéé i'teenú yā

¹ Cho'ōo tanducueⁿ'ē chuū, Jesús cachiicá yā na yáⁿ'āā Galilea. Nguéé neⁿ'é yā cuchiicá yā na yáⁿ'āā Judea caati saⁿ'ā Israel s'eeⁿ canéé ngiinu sa chí 'caaⁿ'núⁿ sa Jesús. ² Ní 'āā chinee nīⁿnuúⁿ nguuví 'viicu yeⁿ'ē va'āi chí 'neeⁿ n'dái yā arco yeⁿ'ē testamento yeⁿ'ē 'ii'yāⁿ Israel s'eeⁿ. ³ Tuu'mi ní ngaⁿ'a 'díínu yā ngii yā 'ii'yāⁿ: Nan'dáa di 'múúⁿ ní cueⁿ'e di na yáⁿ'āā Judea caati discípulos yeⁿ'ē di cuuví snaaⁿ yā dendu'ū ntiīⁿnyuⁿ chí idiīⁿ di. ⁴ Caati ndiī 'áámá 'ii'yāⁿ nguéé dííⁿ yā 'áámá chí canúúⁿ n'de'ei. Ní cú maáⁿ yā ní neⁿ'é yā chí 'ii'yāⁿ n'diichí yā 'yā. Ndúúti chí diī chí diīⁿ di cosa chí 'tíicā tuu'mi ní 'cuuⁿ'miⁿ di maāⁿ di nanááⁿ 'ii'yāⁿ yeⁿ'e iⁿ'yeeⁿdí 'cūū.

⁵ Ní mar 'áámá 'díínu yā nguéé chí'teenú yā 'ii'yāⁿ. ⁶ Tuu'mi ngaⁿ'a Jesús ngii yā saⁿ'ā: 'Aa ntéé véé chí 'aacu hora yeⁿ'é, caati tiempo yeⁿ'é nī 'āā canéé. ⁷ 'Ii'yāⁿ yeⁿ'ē iⁿ'yéⁿdí cuuvi n'diichí yā ndís'tiī. Nguéé cuuvi n'diichí yā 'úú caati 'úú ní ngaⁿ'á cuaacú chεε chí nguéé n'daacā idiīⁿ 'ii'yāⁿ yeⁿ'e iⁿ'yéⁿdí 'cūū. ⁸ Ndís'tiī caⁿ'a nī 'viicú 'cūū. 'Úú ní nguεε caⁿ'á maaⁿnguuví, caati 'āā cuéé cunuūⁿ ca'a hora yeⁿ'é.

⁹ Taachi ch'iinu caⁿ'a yā chí yā nduudú 'cūū 'díínu yā, tuu'mi Jesús canéé ca yā yáⁿ'āā Galilea.

Jesús cueⁿ'e yā 'viicu yeⁿ'ē va'āi chí 'neeⁿ n'dái yā arco yeⁿ'ē testamento

¹⁰ Taachi cueⁿ'é saⁿ'a 'díínu yā 'viicu, 'tiicá ntúūⁿ miiⁿ ní cueⁿ'é Jesús cuayiivi. Nguéé ch'iⁿ'í yā chí Jesús miiⁿ. Cheⁿ'e n'de'ei núuⁿ yā. ¹¹ Tuu'mi ní saⁿ'a Israel s'eeⁿ ní in'nuuⁿ sa 'ii'yāⁿ na 'viicu miiⁿ. Ní ngaⁿ'a sa: ¿Tíí cánéé 'ii'yāⁿ miiⁿ?

¹² 'Iiⁿ'yāⁿ yāāⁿ miiⁿ neen^e n'deēe ngaⁿ'a yā yeⁿ'é yā. N'duuví yā ngaⁿ'a yā: 'Iiⁿ'yāⁿ miiⁿ n'dai taavi yā. Ta n'duuví yā ngaⁿ'a yā: Nguéé, caati nginnche'éei yā 'iiⁿ'yāⁿ.

¹³ Mar 'áámá saⁿ'ā chí cheⁿ'e sa 'viicu nguéé caⁿ'a sa yeⁿ'é yā ti 'va'a sa 'iiⁿ'yāⁿ Israel.

¹⁴ Chí maⁿ'ā 'viicu, tuu'mi ní Jesús cuhéé yā chēeti yáacū templo ní chi'cueeⁿ yā.

¹⁵ Níicú saⁿ'a Israel ngeⁿ'e yiinu sa ní ngaⁿ'ā sa: ¿Táácā déenu sáⁿ'a 'cūū letrās caati sáⁿ'a 'cūū nguēe 'néen sa?

¹⁶ N'guēecutáⁿ'a Jesús ní caⁿ'a yā: Chiiⁿ chí ngi'cueeⁿ chi deenú ní nguéé yeⁿ'é, ti yeⁿ'e 'iiⁿ'yāⁿ chi dichó'o yā 'úú. ¹⁷ Ndúuti chi 'iiⁿ'yāⁿ neⁿ'é yā díⁿ yā voluntad yeⁿ'é Dendyuūs, tuu'mi ní deenú yā chi ngi'cueeⁿ nduuti chi yeⁿ'é Dendyuūs o nduuti chi 'úú ngaⁿ'á yeⁿ'é maáⁿ. ¹⁸ 'Iiⁿ'yāⁿ chí ngaⁿ'a yā yeⁿ'é maáⁿ yā in'nuúⁿ yā poder yeⁿ'é maáⁿ yā. Naati 'iiⁿ'yāⁿ chi in'nuúⁿ yā poder yeⁿ'e 'iiⁿ'yāⁿ chi dichó'o yā 'yā, 'iiⁿ'yāⁿ miiⁿ ní cuaacú yā. Ní nguéé chi nguéé cuaacu nduucú yā.

¹⁹ ¿'Áá nguéé ca'a Moisés ndís'tiī yeⁿ'é ley? Ní mar áámá ndís'tiī nguéé idiíⁿ nī chi ngaⁿ'a ley miiⁿ. ¿De'ē cáávā chí neⁿ'e 'caan'nuⁿ ndís'tiī 'úú?

²⁰ N'guēecutáⁿ'ā 'iiⁿ'yāⁿ ní caⁿ'a yā Jesús: Yááⁿ'n'guinūūⁿ canéé ndúúⁿ di. ¿Du'ū idiíⁿ núúⁿ yiinu chí neⁿ'é 'caan'nūⁿ dii?

²¹ Jesús ní n'guēecutáⁿ'a yā ní ngaⁿ'a yā ngii yā 'iiⁿ'yāⁿ: Díⁿ 'áámá ntiīⁿnyuⁿ ní nducyaaca ndís'tiī ngeⁿ'e yiinu nī. ²² Cuaacu chí Moisés miiⁿ tee sa ley yeⁿ'e circuncisión ndís'tiī. (Nguéé chíⁿ yeⁿ'é Moisés miiⁿ chí yeⁿ'é chiidá nī.) Ní sábadó chí nguuvi chí 'iiⁿ'yāⁿ Israel ntaavi'tuunúúⁿ yā, ndís'tiī idiíⁿ nī circuncidar saⁿ'ā 'líⁿ. ²³ Ndúúti chí cuaáⁿ nī chí díⁿ yā circuncidar saⁿ'ā 'líⁿ nguuvi sábadó caati ley yeⁿ'é Moisés canéé chí díⁿ nī cumplir, ¿de'ē induuvi táaⁿ nī nduucú caati sábadó idiíⁿ chí nduūⁿ n'dáacā yeⁿ'e 'áámá saⁿ'ā? ²⁴ Nguéé díⁿ nī juzgar tan'dúúⁿ chí nadacadíⁿnuuⁿ nī naati díⁿ nī juzgar chí cuaacu ndúúⁿ chí n'daí miiⁿ.

¿'Áá saⁿ'ā miiⁿ chí Cristo?

²⁵ Tuu'mí ngaⁿ'a n'duuví 'iiⁿ'yāⁿ yeⁿ'e yāāⁿ Jerusalén: ¿'Áá nguéé 'iiⁿ'yāⁿ 'cūū chí neⁿ'e 'caan'núⁿ yā? ²⁶ N'diichí nī. Jesús nguéé 'va'á yā ngaⁿ'a yā nanááⁿ nducyáacá 'iiⁿ'yāⁿ. Ní nguéé du'ū veē 'iiⁿ'yāⁿ ngaⁿ'a yā ngii yā 'yā. ¿'Áá cuaacu níⁿnyúⁿ chí 'iiⁿ'yāⁿ n'geete chí ngaⁿ'ā ntiīⁿnyúⁿ yā ní déenú yā chí 'iiⁿ'yāⁿ 'cūū chí cuaacu níⁿnyúⁿ chí Cristo? ²⁷ 'Iiⁿ'yāⁿ 'cūū deenu yú tí ndiicá yā naati taachi ndiicá Cristo miiⁿ, mar 'áámá 'iiⁿ'yāⁿ nguēe deenú yā tí ndiicá yā.

²⁸ Tuu'mi ní ngaⁿ'a yuudu Jesús taachí chí'cueeⁿ yā na yáacu templo ní ngaⁿ'a yā: Ndís'tiī, ní 'āā n'diichí nī 'úú. Ní 'āā deenú nī tiī yāāⁿ yeⁿ'é. Níicú 'úú ní nguéé cuchí yeⁿ'é maáⁿ, naati 'iiⁿ'yāⁿ chí dichó'o yā 'úú ní cuaacú yā. Ndís'tiī nguéé n'diichí nī 'iiⁿ'yāⁿ miiⁿ. ²⁹ Naati 'úú ní n'diichí 'iiⁿ'yāⁿ miiⁿ caati 'úú ndiicá yeⁿ'é yā, ní 'iiⁿ'yāⁿ miiⁿ dichó'o yā 'úú.

³⁰ Tuu'mi ní idiíⁿ núúⁿ yiinu 'iiⁿ'yāⁿ chí cuta'á yā Jesús naati mar 'áámá 'iiⁿ'yāⁿ nguéé che'ē ta'á yā Jesús, caati 'āā cuéé ndaa hora yeⁿ'é yā. ³¹ Níicú 'yaaⁿ n'daí 'iiⁿ'yāⁿ yeⁿ'e 'iiⁿ'yāⁿ chí snéē miiⁿ chí'téenu yā Jesús. Ní ngaⁿ'a yā ngii yā 'iiⁿ'yāⁿ s'eeⁿ: Taachi ndaa Cristo miiⁿ, ¿'áá nguéé cuuvi díⁿ yā más cā señales chí diiⁿ sáⁿ'a 'cūū?

Saⁿ'ā fariseos dicho'ó yā policías chí sta'á yā Jesús

³² Tuu'mi ní saⁿ'ā fariseos chí'indiveeⁿ sa yeⁿ'e 'iiⁿ'yāⁿ chí neen^e n'deēe ngaⁿ'a yā 'túúⁿ yeⁿ'é Jesús miiⁿ. Chiiduú n'geeté ndúúⁿ saⁿ'ā fariseos dicho'ó yā policías chí cuta'a sa Jesús. ³³ Tuu'mi ní Jesús ngaⁿ'a yā ngii yā saⁿ'ā s'eeⁿ: 'Āā nteē 'nááⁿ cuneé ndúúⁿ ndís'tiī ní naⁿ'á n'diichí 'iiⁿ'yāⁿ chí dichó'o yā 'úú. ³⁴ In'nuúⁿ nī 'úú ní 'āā nteē ndaacá nī 'úú. Ní naachi 'úú caneé, ndís'tiī ní nguéé cuuvi ndaa nī.

³⁵ Tuu'mi ní ngaⁿ'a 'iiⁿ'yāⁿ Israel nguaaⁿ maáⁿ yā: ¿Tií cáⁿ'ā 'iiⁿ'yāⁿ 'cūū chí nguéé nindaaca yú 'iiⁿ'yāⁿ? ¿'Áá caⁿ'á yā n'diichi 'iiⁿ'yāⁿ Israel chí cueⁿ'é yā 'muuⁿ cueⁿ'é yā miiⁿ yā nguaaⁿ 'iiⁿ'yāⁿ chí nguēe yeⁿ'e ndaata Israel ní ca'cueeⁿ yā 'iiⁿ'yāⁿ miiⁿ? ³⁶ ¿De'ē

chi ntúūn ngaⁿá Jesús: In'nuúⁿ nī 'úú ní nguée nindaāca nī 'úú; ní naachi 'úú caneé, nguée cuuvi cundaā ndís'tií?

Yíicú yeⁿe nuūⁿnīⁿ chi canduuchi

³⁷ Ngúúví chí ch'iinū 'viicu ch'εεε miⁿ, Jesús cheendii yā caⁿā diitú yā: Du'u chí yaaca chíi nanaáⁿ ní 'úú ca'á chi cu'u yā. ³⁸ Du'ū chi i'teenu 'uú, véé vida yeⁿé yā. Ní vida canéé tan'dúúca 'áámá yíicú nuūⁿnīⁿ chi ca'a vida cueⁿe daāⁿmaⁿ 'iiⁿ'yāⁿ miⁿ. Chuū canee nguūⁿ na libro yeⁿe Dendyuūs.

³⁹ Ní chuū ngaⁿá yā yeⁿé Espíritu N'dai yeⁿe Ndyuūs. 'Iiⁿ'yāⁿ chi cu'téenu yā Jesús canéé chí cuta'á yā Espíritu N'dai yeⁿe Ndyuūs. Ní Dendyuūs nguée ca'a yā Espíritu N'dai yeⁿe yā ti Jesús miⁿ ní 'āā cuée cheⁿé yā na va'ai chεeti nguuvi.

Vée división nguaaⁿ 'iiⁿ'yāⁿ

⁴⁰ Tuu'mí ní neené 'yaaⁿ 'iiⁿ'yāⁿ taachí ch'iindiveéⁿ yā chuū ngaⁿa yā: Cuaacu níⁿnyuⁿ 'iiⁿ'yāⁿ 'cúū chi profeta.

⁴¹ Ta n'duuví yā ngaⁿa yā: 'Iiⁿ'yāⁿ 'cúū chi Cristo. Naati n'duuví yā ngaⁿa yā: ¿'Áá yeⁿé yáⁿā Galilea chí cánéé chí ndaa Cristo? ⁴² ¿'Áá nguée ngaⁿā naachi canéé nguūⁿ na libro yeⁿe Ndyuūs chí Cristo ní cuchí yā yeⁿé ndaata yeⁿé rey David, ní yeⁿe yáāⁿ 'líⁿ Belén, yáāⁿ chí chiica David miⁿ?

⁴³ Tuu'mí neene véε división nguaaⁿ 'iiⁿ'yāⁿ cucáāvā Jesús miⁿ. ⁴⁴ N'duuvi 'iiⁿ'yāⁿ neⁿe yā cuta'á yā Jesús naati mar 'áámá saⁿā miⁿ nguée tuu'vi sa 'iiⁿ'yāⁿ.

Mar 'áámá saⁿā ndii tíiⁿ nguée i'téenu sa Jesús miⁿ

⁴⁵ Policías ndaa sa nanááⁿ chiiduú n'gεεté ndúúcu saⁿa fariseos. Ní 'iiⁿ'yāⁿ s'eeⁿ ní ngaⁿa yā ngii yā policías: ¿De'ē cuuvi chí nguée candéé nī saⁿā?

⁴⁶ Policías n'guεεcutáⁿa yā 'iiⁿ'yāⁿ: Mar 'áámá saⁿā nguée ngaⁿa sa tan'dúúca chí ngaⁿā 'iiⁿ'yāⁿ 'cúū.

⁴⁷ Tuu'mí saⁿā fariseos n'guεεcutaⁿa sa policías: ¿'Áá nginnche'éei yā ntúūⁿ ndis'tií?

⁴⁸ ¿'Áá i'teenu n'duuví 'iiⁿ'yāⁿ chí caⁿā ntiⁿnyuⁿ yā o saⁿā fariseos nduudu Jesús miⁿ?

⁴⁹ 'Iiⁿ'yāⁿ chí nguée déenu yā chí cánéé nguūⁿ na ley, 'āā condenado 'iiⁿ'yāⁿ.

⁵⁰ Sáⁿā miⁿ nguuvi Nicodemo chí 'āā ndaa nanááⁿ Jesús n'gaaⁿ, saⁿā miⁿ canéé sa ndúúcu yā. Tuu'mí ngaⁿa Nicodemo ngii sa 'iiⁿ'yāⁿ: ⁵¹ ¿'Áá ley yeⁿé yú cuuvi caaⁿmaⁿ nuuⁿndi yeⁿe 'iiⁿ'yāⁿ, ndúúti chí nguée n'diichi di 'iiⁿ'yāⁿ, ní 'caandiveeⁿ dí yeⁿe 'iiⁿ'yāⁿ ní túúmícadíínuuⁿ di chí díⁿ yā?

⁵² Nan'guεεcutáⁿa yā ní ngaⁿa yā ngii yā saⁿā: ¿'Áá 'iiⁿ'yāⁿ yeⁿe yáⁿā Galilea ntúūⁿ dii? In'núúⁿ dí níicú n'diichi di chí canéé nguūⁿ na libro yeⁿe Ndyuūs caati yeⁿé yáⁿā Galilea mar 'áámá vnnéⁿéε nguée can'dáā 'áámá profeta.

⁵³ Ní cunaⁿa nducyaacá yā na vacu yā.

8

'Áámá n'daataá chí cueⁿe tá ndúúcu saⁿā

¹ Jesús miⁿ ní cueⁿe yā cuééti chí nguuvi Olivos. ² Tyaaⁿ tyaaⁿ chí dεεve táámá nguuvi ndaa ntúūⁿ yā yaacū templo. Nuuⁿmán yáāⁿ 'iiⁿ'yāⁿ ndaa yā nanáāⁿ yā. Ch'iindí yā ní ca'cueéⁿ yā 'iiⁿ'yāⁿ s'eeⁿ. ³ Tuu'mi ní ndaa n'duuvi saⁿā chí ngi'cueeⁿ ley ndúúcu n'duuvi saⁿā fariseos. N'dée sa nanááⁿ Jesús 'áámá n'daataá chí cyaadu tá ndúúcu 'aama saⁿā chí 'āā 'niinivaacu. Níicú chí canee sa chí nuuⁿ sa táⁿā náávtaⁿā yeⁿé 'iiⁿ'yāⁿ s'eeⁿ. ⁴ Ngaⁿa saⁿā s'eeⁿ: Maestro, n'daataá 'cūū ní tunéé 'nū táⁿā ndúúcu táámá saⁿā. ⁵ Naachi cánéé nguūⁿ ley yeⁿé Moisés miⁿ ní ngaⁿā chí cuítuú 'nū n'daataá chí 'tíicā. N'díi túú'mi, ¿de'ē ngaⁿa n'dií?

⁶ Chuū ngaⁿā saⁿā s'eeⁿ chí neⁿe sá n'diichi sa táácā dii Jesús 'iicu tun'dáā nuuⁿndi sa yeⁿé yā. Jesús ní can'dii yā ní dingúuⁿ yā na yáⁿā miⁿ ndúúcu nduutita'á yā. Díⁿ yā tan'dúúca chí nguée ch'iindiveéⁿ yā yeⁿé 'iiⁿ'yāⁿ miⁿ. ⁷ Taachí nitiinguunééⁿ ntuūⁿ sáⁿā

'iiⁿyāⁿ, tuuⁿmi nanguaacundii yā ni ngaⁿa yā ngii yā: Du^u ndís'tiī chi nguéé nuuⁿndi yeⁿé nī, cuta^a ná nī vmnááⁿ vmnaaⁿ 'áámá túūu ní ca^a ná tán^a.
 8 Canⁿdíí ntuuⁿ yā ní dingúūⁿ ntúūⁿ yā ná yán^a. 9 'Iiⁿyāⁿ chi ch'iindiveéⁿ yā chuu tuumicádíínuuⁿ yā chi véé nuuⁿndi yeⁿé yā. Ní ca^a'áámá ca^a'áámá inanⁿ'daá yā, 'iiⁿyāⁿ ndiicúū 'āā ndíí ná ch'iinuū maaⁿ. Nanⁿ'daā nducyáácá yā. Ní 'aa dámaāⁿ Jesús canee yā ndúúcu tán^a chi canéé naavtaⁿ. 10 Nacueeⁿ Jesús ní n'diichí yā 'āā ntéé du^u vεε ti 'āā dámaāⁿ n'daataá miiⁿ. Ní ngaⁿa yā ngii yā tán^a: Dii n'daataá, ¿tií canéé 'iiⁿyāⁿ chi tunⁿ'dáá nuuⁿndi yā yeⁿé di? ¿'Áá ndii 'áámá 'iiⁿyāⁿ nguεε ngaⁿa yā nuuⁿndi yeⁿé di?

11 N'daata mííⁿ ní ngaⁿa tá: Señor, mar 'áámá 'iiⁿyāⁿ. Tuuⁿmi ní Jesús ngaⁿa yā ngii yā tán^a: 'Úú nguéé caaⁿ'máⁿ nuūⁿndi yeⁿé di. Cunaⁿa di ní 'āā ntéé diiⁿ nuuⁿndí di.

Jesús chí dεεve íⁿyeēⁿdí

12 Cuayiivi Jesús ní ngaⁿa ntúūⁿ yā ngii yā 'iiⁿyāⁿ: 'Úú tanⁿ'dúúccā dεεve yeⁿe iⁿ'yeeⁿdí 'cūū, 'tíicā 'úú. Du^u chi canⁿ'daā 'úú nguéé caⁿ'a yā na maaⁿ caati cunée yā ndúúcu chi dεεve yeⁿé vida.

13 Tuuⁿmi ní ngaⁿa saⁿ'ā fariseos ngii sa Jesús: Dii ní yeⁿé maaⁿ di nduudu cuaacu chí ngaⁿa di. Nduudu chí ngaⁿa di nguéé nduudu cuaacu.

14 Nanⁿ'guεεcútaⁿ'ā Jesús ngaⁿa yā ngii yā saⁿ'ā: 'Úú ní ngaⁿa nduudu cuaacu yeⁿé maáⁿ. Nduudu chí ngaⁿa ní nduudu cuaacu miiⁿ. Deenú tíí ndiicá ní tiī caⁿ'á. Naati ndís'tiī nguéé déenu nī tíí ndiicá ní nguéé déenú nī tiī caⁿ'á. 15 Ndís'tiī ní ngaⁿa nī nuuⁿndi yeⁿe 'iiⁿyāⁿ dacaā 'iiⁿyāⁿ. Naati 'úú nguéé ngaⁿ'á nuuⁿndi yeⁿé mar 'áámá 'iiⁿyāⁿ. 16 Ndúúti chi 'úú ngaⁿ'á nuuⁿndi yeⁿe 'iiⁿyāⁿ, nduudu yeⁿé ní nduudu cuaacu chii, caati 'úú ní nguεε damaāⁿ ti 'úú ní ndúúcu Chiidá chi dichó'o yā 'úú. 17 Caati naachi canéé nguūⁿ na ley yeⁿé nī naachi ngaⁿ'ā na 'uuvi 'iiⁿyāⁿ, chii chi nduudu cuaacu. 18 'Úú chí ngaⁿ'á nduudu cuaacu yeⁿé maaⁿ. Ní Chiidá chi dichó'o yā 'úú ngaⁿ'á yā nduudu cuaacu yeⁿé.

19 Tuuⁿmi ngaⁿ'ā sán^a'ā s'eeⁿ ngii sa Jesús: ¿Tií canéé Chiida di? Nanⁿ'guεεcútaⁿ'ā Jesús: Nduuti chi nguéé 'āā n'diichi nī 'úú, ndíí nguéé ndúú 'āā n'diichi nī Chiidá. Ndúúti chi 'āā n'diichi nī 'úú, 'tiicá ntúūⁿ 'āā n'diichi nī Chiidá.

20 Ndúúdu 'cūū ngaⁿ'ā Jesús taachi canée yā naachi snúūⁿ cajas yeⁿe ofrendas. Tuuⁿmi ní taachí ngi'cueén yā chεeti yáácū templo mar 'áámá 'iiⁿyāⁿ inátuuⁿ'vi yā Jesús caati 'āā 'cuéé cunuūⁿ caⁿ'a hora yeⁿé yā.

Naachi 'úú caⁿ'á ndís'tiī ní nguéé cuuvi ndaá nī

21 Jesús ngaⁿ'a ntúūⁿ yā ngii yā saⁿ'ā: 'Úú ní caⁿ'á ní ndís'tiī inⁿ'nuūⁿ nī 'úú. Ná nuuⁿndi yeⁿé nī 'cūūvi nī. Naachi 'úú caⁿ'á ndís'tiī ní nguéé cuuvi ndaá nī.

22 Tuuⁿmi saⁿ'ā Israel s'eeⁿ ngaⁿ'a sa: ¿'Áá 'caaⁿ'nuⁿ maáⁿ yā 'iiⁿyāⁿ caati ngaⁿ'a yā: Naachi 'úú caⁿ'á, ndís'tiī nguéé cuuvi ndaa nī?

23 Tuuⁿmi ní Jesús ngaⁿ'a yā ngii yā saⁿ'ā: Ndís'tiī ní yeⁿé cuaaⁿ ndiiyā ndís'tiī niicu 'úú ní yeⁿé cuaaⁿ 'niiⁿnuⁿ 'úú. Ndís'tiī ní yeⁿe iⁿ'yeeⁿdí 'cūū ndís'tiī naati 'úú ní nguéé yeⁿé iⁿ'yeeⁿdí 'cūū 'úú. 24 Caavā chúū chi ngaⁿ'á ngii ndís'tiī chi 'cuūvi nī na nuuⁿndi yeⁿe nī. Ndúúti chi nguéé cu'téenu nī chí 'úú chí Cristo miiⁿ tuuⁿmi ní na nuuⁿndi yeⁿé nī ní 'cuūvi nī.

25 Ní ngaⁿ'a sa ngii sa 'iiⁿyāⁿ: ¿Díí du^u dii? Tuuⁿmi ní Jesús ngaⁿ'a yā ngii yā saⁿ'ā: Tanⁿ'dúúccā nūūⁿ chí ngaⁿ'á ndii cuaaⁿ vmnaaⁿ, 'tíicā 'úú. 26 Nééné n'deé dendú^u chí canéé chí caāⁿ'máⁿ ndúúcu ndis'tiī ní dííⁿ juzgar ndis'tiī. 'Iiⁿyāⁿ chí dichó'o yā 'úú, 'iiⁿyāⁿ mííⁿ chí cuaacu yā. Chííⁿ chí n'giindiveéⁿ yeⁿe yā, chiiⁿ ngaⁿ'á na iⁿ'yeeⁿdí 'cūū.

27 'Iiⁿyāⁿ s'eeⁿ nguéé tuumicádíínuuⁿ yā chí 'iiⁿyāⁿ miiⁿ ní ngaⁿ'á yā yeⁿé Chiidá yā. 28 Tuuⁿmi ngaⁿ'ā Jesús ngii yā saⁿ'ā: Taachí nadacuééⁿ nī Saⁿ'ā chí Daiya Dendyuūs, tuuⁿmi ní cuuvi déenu nī chí 'úú. Nguéé du^u vεε chí dííⁿ chí yeⁿé maáⁿ naati Chiidá chí'cueé yā 'úú. Ní chííⁿ chí ngaⁿ'á. 29 Ní 'iiⁿyāⁿ chí dichó'o yā 'úú canée yā nduucú. Chiidá ní nguéé chí'neeⁿ yā 'úú dámaāⁿ. Naati 'úú ní dííⁿ tanducuééⁿ chí neⁿe yā.

30 Taachí ngaⁿ'á Jesús chuū nééné 'yaaⁿ 'iiⁿyāⁿ chí'téenu yā yeⁿé yā.

Nduūdū Cuaacu chi nanguaⁿai 'iiⁿyāⁿ

³¹ Tuu'mí ngaⁿā Jesús ngii yā saⁿā Israel seⁿe chi i'téenu sa 'yā: Ndúúti chi ndís'tiī cunée nī ndúúcu nduudu yeⁿé tuu'mi ní cuaacu chí ndís'tiī discípulos yeⁿé. ³² Ní n'diichí nī nduudu cuaacu. Ní caavā nduudu cuaacú miiⁿ ndís'tiī nanguáⁿai nī.

³³ Nan'guεεcutáⁿā saⁿā yeⁿé yā: Nús'uu ní ndaata yeⁿē Abraham. Ní cú mar 'áámá 'iiⁿyāⁿ nguée dichii've 'nū. ¿Táácā chí ngaⁿa di chi ndís'tiī ní canee chí nanguáⁿai nī?

³⁴ Jesús ní nan'guεεcutáⁿa yā yeⁿē sa: Cuaacu níⁿnyúⁿ, cuāacū niiⁿnyuⁿ ngaⁿá ngii ndís'tiī chi nducyáácá 'iiⁿyāⁿ chí díⁿ yā nuuⁿndi, 'iiⁿyāⁿ s'tí dichii've yā yeⁿē nuuⁿndi.

³⁵ 'iiⁿyāⁿ chí diiⁿ mandado yeⁿē 'iiví yā nguée 'áámá ineéⁿ yā ndúúcu familia yeⁿe 'iiví yā naati daiya 'iiví miiⁿ ní 'áámá cuneéⁿ yā. ³⁶ Ndúúti chí Daiyá yā nadinguáⁿai yā, cuaacu níⁿnyúⁿ chí ndís'tiī ní nínguaⁿai nī. ³⁷ 'Úú deenú chí ndís'tiī chí ndaata yeⁿé Abraham. Naati dinúúⁿ yiinu nī chí neⁿe 'caaⁿnúⁿ nī 'úú, caati nduudu yeⁿé nguée ngii neé ndúúcu ndís'tiī. ³⁸ Chiiⁿ chí n'diichí ndúúcu Chiidá, chiiⁿ chí 'úú ngaⁿá. Ndís'tiī ní díⁿ nī chí n'diichí nī chiidá nī.

Ndís'tiī yeⁿē yááⁿn'guiinūⁿ chí chiidá nī

³⁹ 'iiⁿyāⁿ s'eeⁿ nan'guεεcutáⁿa yā yeⁿé yā ní ngaⁿá yā: Chiidá 'nū Abraham. Ngaⁿa Jesús ngii yā saⁿā: Nduuti chí daiya Abraham ndís'tiī tuu'mi ní ntiiⁿnyuⁿ yeⁿē sa idíⁿ nī.

⁴⁰ Naati maaⁿ ní idinúúⁿ yiinu nī chí 'caaⁿnuⁿ nī 'úú, caati 'úú saⁿā chí ngaⁿa nduudu cuaacu chí ch'iindiveéⁿ yeⁿē Dendyuūs. Abraham nguée diiⁿ sa chuū. ⁴¹ Ndís'tiī ní díⁿ nī ntiiⁿnyuⁿ yeⁿe chíidá nī. Tuu'mi ní ngaⁿa sa ngii sa Jesús: Nús'uū nguée ch'iindiyááⁿ 'nū yeⁿē daiya sa saⁿā cyúúⁿ. Canée 'áámá chíidá 'nū chí Dendyuūs miiⁿ.

⁴² Tuu'mi ní ngaⁿa Jesús ngii yā saⁿā s'eeⁿ: Ndúúti chí chíidá nī chí Dendyuūs miiⁿ cuaacu níⁿnyúⁿ chí dinéⁿe nī 'úú, caati 'úú ní yeⁿé Dendyuūs chiicá ní ndaá. Ní nguée ndaá yeⁿé maáⁿ ti Ndyuūs maáⁿ yā dichó'o yā 'úú. ⁴³ ¿De'ε cuuvi chí nguεε n'gúúⁿ nī nduudu yeⁿé? Ti nguεε n'giindiveéⁿ nī nduudu yeⁿé. ⁴⁴ Ndís'tiī ní yááⁿn'guiinūⁿ chíidá nī. Ndís'tiī ní neⁿé nī díⁿ nī tanducueⁿē chí neⁿē chíida nī. Yááⁿn'guiinūⁿ chí n'giiⁿnūⁿ 'āā canée núuⁿ yā ndíⁿ naachi ngaⁿā. Nguée 'áámá canee yā na nduudu cuaacu ti nguée nduudu cuaacu nduucú yā. Taachí yááⁿn'guiinūⁿ ngaⁿā sa nduudu yaadi yeⁿē maaⁿ sa ngaⁿa sa ti saⁿā yeⁿē nduudu yaadi ní chíida nduudu yaadi sáⁿā. ⁴⁵ Naati 'úú ní ngaⁿá nduudu cuaacu ní nguée i'téenu nī yeⁿé. ⁴⁶ ¿Du'ú yeⁿē ndís'tiī ngaⁿa chí idiíⁿ nuuⁿndi? Ní nduuti chí 'úú ní ngaⁿá nduudu cuaacu, ¿de'ε chí nguée i'téenu nī 'úú? ⁴⁷ Du'u chí yeⁿē Dendyuūs miiⁿ nduudu yeⁿē Dendyuūs n'giindiveéⁿ yā. Chiiⁿ chí ndís'tiī ní nguée n'giindiveéⁿ nī ti nguée yeⁿé Dendyuūs ndís'tiī.

Jesús canée yā vmnááⁿ vmnaaⁿ chí iⁿ'yeēⁿdī

⁴⁸ Tuu'mi ní nan'guεεcutáⁿā saⁿa Israel s'eeⁿ ní ngaⁿa sa ngii sa Jesús: ¿'Áá nguée cuaacu ngaⁿā nús'uū chí samaritano dii, ní cánée dí ndúúcu yááⁿn'guiinūⁿ?

⁴⁹ Nan'guεεcutáⁿā Jesús: 'Úú nguée cánée ndúúcu yááⁿn'guiinūⁿ. 'Úú díⁿ honrar Chiidá. Ndís'tiī nguée i'téenu nī 'úú. ⁵⁰ 'Úú ní nguée in'nuúⁿ honra yeⁿé māaⁿ. Véé 'iiⁿyāⁿ chí in'nuúⁿ yā honra yeⁿé ní díⁿ yā juzgar 'iiⁿyāⁿ. ⁵¹ Cuaacu níⁿnyúⁿ, cuāacū niiⁿnyuⁿ ngaⁿá ngii ndís'tiī: Du'u chí n'giindiveéⁿ nduudu yeⁿé nguée n'diichí yā vaadi n'gii taanduvéeⁿ nguuvi.

⁵² Tuu'mi ní saⁿa Israel s'eeⁿ ngaⁿā sa ngii sa Jesús: Maaⁿ ní tuumicádíⁿnuuⁿ 'nū yeⁿē di. Canee di ndúúcu yááⁿn'guiinūⁿ. Abraham miiⁿ ní ch'iī ndúúcu profetas 'iicu díⁿ ní ngaⁿā di: Du'u chí n'giindiveéⁿ nduudu yeⁿé nguée n'diichíneéⁿ yā vaadi n'gii taanduvéeⁿ nguuvi. ⁵³ ¿'Áá vmnaaⁿ ntuūⁿ ca dii yeⁿē chíida yú Abraham chí ch'iī yā ní yeⁿe profetas chí ch'iī yā? ¿Du'ū nadacádiⁿnuuⁿ di chí máaⁿ di?

⁵⁴ Nan'guεεcutáⁿā Jesús: Ndúúti chí 'úú díⁿ honrar māaⁿ tuu'mi ní honra yeⁿé ní nguée de'ε veε. Chíidá míⁿ chí idiíⁿ yā honrar 'úú. Ní yeⁿe chíidá chí ngaⁿā ndís'tiī chí Dendyuūs yeⁿé nī. ⁵⁵ Ní nguée 'āā n'diichí nī 'iiⁿyāⁿ naati 'úú 'āā nin'diichí 'iiⁿyāⁿ. Ndúúti chí ngaⁿá chí nguée nin'diichí 'iiⁿyāⁿ tan'dúúcā chí yaadi ndís'tiī, 'tíicā ntúúⁿ

'úú. Caati 'āā n'diichí 'ii'yāⁿ ní n'giindive^{én} nduudu yeⁿ'é yā. ⁵⁶ Chiidá nī Abraham yéénú taavi sa chi 'āā n'diichī sa nguuvī yeⁿ'é. Ní 'āā n'diichī sa. Ní yéénú taavi sa.

⁵⁷ Tuu'mi ní ngaⁿ'a 'ii'yāⁿ Israel s'eeⁿ: ¿'Áá 'āā cuéé cuuvi 'uuvi ngæecu ndiichi nduūyū ní 'āā n'diichi di Abraham?

⁵⁸ Ní ngaⁿ'a Jesús ngii yā saⁿ'a: Cuaacu níⁿnyúⁿ, cuāacū niiⁿnyuⁿ ngaⁿ'á ngii ndís'tiī chi 'úú vmnááⁿ vmaaⁿ chi Abraham.

⁵⁹ Tuu'mi ní saⁿ'ā s'eeⁿ sta'á sa tuūu chi ca'a sa Jesús, naati Jesús ní canúúⁿ n'de'ei yā ní nan'dáa yā chæeti yāacū templo ní cho'ó yā náavtaⁿ'á yā 'ii'yāⁿ s'eeⁿ. Ní cunaⁿ'á yā.

9

Jesús ca'á yā vista yeⁿ'e 'áámá sáⁿ'ā chi ngueenááⁿ ndii taachi chi ch'iindiyāⁿ sa

¹ Níicú taachi cho'ōo Jesús ní n'diichí yā 'áámá saⁿ'ā chi ngueēe nduutináaⁿ sa ndíi taachí ch'iindiyāⁿ sa. ² Níicú discípulos yeⁿ'é yā ntiinguuneeⁿ yā Jesús ní ngaⁿ'a yā ngii yā 'ii'yāⁿ: N'dii Maestro, ¿du'u dínuūⁿndí? ¿'Áá chiida sa ndúúⁿcū chæecu sa vee nuuⁿndi yeⁿ'é yā? ¿'Áá maaⁿ sa 'tíicā sa chí ngueēe nduutináaⁿ sa taachí ch'iindiyāⁿ sa?

³ Nan'guæecútaⁿ'ā Jesús ní nguéé ndúú sáⁿ'a cūū ní nguéé chiida sa ndúúⁿcū chæecu sa vee nuuⁿndí yeⁿ'é yā chi ngueēe nduutináaⁿ sa. 'Tíicā saⁿ'ā ní 'cuuⁿ'miiⁿ chi diiⁿ Déndyuūs miiⁿ nduucú yā. ⁴ Cánéé chí díiⁿ ntiiⁿnyuⁿ chi idiiⁿ 'ii'yāⁿ chi dicho'ó yā 'úú neⁿ'e chi véé nguuví. Ndaá chi cuuvi 'da'a taachi mar 'áámá 'ii'yāⁿ ní nguéé díiⁿ yā ntiiⁿnyuⁿ. ⁵ Nuuma neⁿ'e chí cuneé iⁿ'yeēⁿdí 'úú chi cuneé tan'dúúⁿcā dæevæ yeⁿ'e iⁿ'yeēⁿdí 'úú.

⁶ Taachí níngaⁿ'a yā chuū chiidaiⁿ yā na yáⁿ'āa níicú in'dái yā inchæeti ndúúⁿcū nuuⁿniⁿ daíⁿ yā. Níicú s'néeⁿ yā nchæeti nduutináaⁿ saⁿ'ā ngueenááⁿ. ⁷ Ní ngaⁿ'a yā: Cúnaⁿ'ā dí. Nááⁿnú dí nduutináaⁿ di na cheendi yíive yeⁿ'e Siloé. (Nduudu miiⁿ neⁿ'e caaⁿ'maⁿ Dich'ó Yā.) Tuu'mi ní cunaⁿ'ā sa ní naāⁿnu sa ní ngueecundí sa 'āā inaaⁿ sa. ⁸ Tuu'mi ní 'ii'yāⁿ na níⁿnúⁿ va'ai yeⁿ'e sa ndúúⁿcū 'ii'yāⁿ chí 'āā ndíi vmaaⁿ n'diichí yā saⁿ'ā chí ngueenáaⁿ ní ngaⁿ'a yā: ¿'Áá nguéé sáⁿ'a 'cūū n'giindí ngiica limosna?

⁹ N'duuví yā ngaⁿ'a yā: Sáⁿ'a 'cūū. Ta n'duuví yā ní ngaⁿ'a yā: Tan'dúúⁿcā saⁿ'ā miiⁿ, 'tíicā saⁿ'ā. Saⁿ'ā miiⁿ ngaⁿ'a sa: 'Úú.

¹⁰ Ngaⁿ'a yā ngii yā saⁿ'ā: ¿Taaca nínguuaⁿ nduutináaⁿ di?

¹¹ N'guæecútaⁿ'ā sa ní ngaⁿ'ā sa: Saⁿ'ā chí nguuvi Jesús miiⁿ din'dái sa nchæeti ní chí'neeⁿ sa nduutinaáⁿ. Ní ngaⁿ'ā sa ngii sa 'úú: Cueⁿ'e di cheendi yiive nuūⁿniⁿ yeⁿ'e Siloé. Naaⁿnu di nduutináaⁿ dí. Níicú cheⁿ'é, ní naāⁿnu nduutinaáⁿ, ní 'āā inaaⁿ.

¹² Tuu'mi ní ngaⁿ'a yā ngii yā saⁿ'ā: ¿Tii canéé saⁿ'ā miiⁿ? Tuu'mí ngaⁿ'ā sa: Nguéé deenú.

Fariseos itiinguunéeⁿ yā saⁿ'ā ngueenaaⁿ chí 'āā nduuva yeⁿ'e sa

¹³ Tuu'mi ní candée yā saⁿ'ā chí ngueenaáⁿ ndíi cuaaⁿ vmaaⁿ nanááⁿ saⁿ'ā fariseos. ¹⁴ Ní sábadó miiⁿ nguuvi chí ntaavi'túúnuuⁿ 'ii'yāⁿ Israel chí Jesús idin'dái yā nchæeti míiⁿ. Ní nin'guáaⁿ yā nduutinaaⁿ sa. ¹⁵ Tuu'mi ní ntiinguuneeⁿ ntúuⁿ yā fariseos: ¿Táácā 'āā inaaⁿ dí? Tuu'mi ní ngaⁿ'ā sa: S'néeⁿ yā nchæeti na nduutinaáⁿ, níicú naāⁿnú. Maaⁿ ní inaaⁿ.

¹⁶ Tuu'mi ní 'áámá saⁿ'ā fariseo ngaⁿ'a sa: Sáⁿ'a 'cūū ní nguéé yeⁿ'é Dendyuūs saⁿ'ā caati nguéé diiⁿ sa nguuvi sábadó tan'dúúⁿcā chí ngaⁿ'a ley yeⁿ'e yú. Ta n'duuví sa ngaⁿ'a sa: ¿Táácā saⁿ'ā chí véé nuuⁿndi yeⁿ'e sa diiⁿ sa señales chí 'tuucā? 'Uuvi nuúⁿ díiⁿ sa vaanicadínuūⁿ yeⁿ'e sa. ¹⁷ Nguæecundí ntúuⁿ sa ní ngaⁿ'a sa ngii sa saⁿ'ā chí ngueenáaⁿ sa: Díi, ¿de'é ngaⁿ'a di yeⁿ'e saⁿ'a chí nan'guaaⁿ nduutináaⁿ di? Saⁿ'ā miiⁿ ngaⁿ'ā sa: 'Ii'yāⁿ miiⁿ profeta.

¹⁸ Saⁿ'a Israel s'eeⁿ nguéé i'téenu sa yeⁿ'e saⁿ'ā chí chingueēnáaⁿ sa ní inaaⁿ sa ndíi 'cai yā chíida sa ndúúⁿcū chæecu sa yeⁿ'e sáⁿ'ā chí 'āā inaaⁿ sa. ¹⁹ Ní ntiinguunéeⁿ saⁿ'ā s'eeⁿ 'ii'yāⁿ, ní ngaⁿ'ā sa: ¿'Áá sáⁿ'a 'cūū daiyá nī, saⁿ'ā chí ngaⁿ'ā ndís'tiī chí ch'iindiyāⁿ sa 'āā ngueenáaⁿ sa? ¿Táácā chí maaⁿ inaaⁿ sa?

²⁰ Nan'gueεcutáⁿa yā chiida sa ndúúcu chεεcu sa ní ngaⁿa yā 'iiⁿyāⁿ: Déenu 'nū daiya 'nū saⁿá 'cūū 'āā ngueéé nduutináⁿ sa taachi ch'iindiyáⁿ sa. ²¹ Maaⁿ ní inaaⁿ sa. Nguéé déenu 'nū táácā ínaaⁿ sa. Du'ú yā chi nin'guaaⁿ yā nduutináⁿ sa nús'uu nguéé déenu 'nū. Saⁿá tii 'āā 'naaⁿ sa, ntiingúúneeⁿ nī saⁿá. Saⁿá tii caaⁿmaⁿ sa yeⁿē maaⁿ sa.

²² Chuū chi nan'gueεcutáⁿa sa chiida sa ndúúcu chεεcu sa, caati 'va'á yā 'iiⁿyāⁿ Israel s'eeⁿ. Caati 'iiⁿyāⁿ Israel s'eeⁿ 'āā indeē sa chi du'ū chi caaⁿmaⁿ chi Mesías chí Cristo miiⁿ chuū ní tun'daa yā chεeti yaācū. ²³ Chii chi 'tíicā caⁿá chiida sa ndúúcu chεεcu sa: Sáⁿá 'caa 'āā 'nāaⁿ sa. Ntíingúúneeⁿ nī saⁿá.

²⁴ 'Tíicā ní 'caī ntúuⁿ yā saⁿá chí ngueenáⁿ níicú ngaⁿa yā ngii yā saⁿá: Dii, ní ca'a di honra Dendyuūs. Nús'uu deenu 'nū chí sáⁿa 'cūū véé nuuⁿndi yeⁿē sa.

²⁵ Tuu'mi ní nan'gueεcutáⁿa sa ní caⁿá sa: Ndúúti chi nuuⁿndi yā o nguéé nuuⁿndi yā nguéé deenú. 'Áámá chi deenú chi ngueéé nduutinaáⁿ ní maaⁿ ní ināaⁿ.

²⁶ Ní ngaⁿá ntúuⁿ yā ngii yā saⁿá: ¿Dé'ē díiⁿ yā ndúúcu díi? ¿Táácā 'āā inaaⁿ di?

²⁷ Nan'gueεcutáⁿa sa yeⁿé yā: 'Áā ngaⁿá ngii ndís'tii ní nguéé ch'iindiveéⁿ nī. ¿De'ē cúúví chi neⁿē ntúuⁿ nī 'caandiveéⁿ nī? ¿'Áá neⁿé nī ntúuⁿ ndís'tii chi cuuvi discípulos yeⁿé yā ndís'tii?

²⁸ Ní 'caa'vá yā ndúúcu sa ní caⁿa yā: Díi, chí discípulo yeⁿé yā díi, naati nús'uū discípulos yeⁿē Moisés nús'uu. ²⁹ Nús'uu ní déenu 'nū chi Dendyuūs ní yaa'vi yā Moisés naati nguéé déenu 'nū tíi ndiica sáⁿa 'cūū.

³⁰ Nan'gueεcutáⁿa saⁿá miiⁿ ní caⁿa sa: Chuū ní cuaacu ní cosa chi 'āā ngeⁿe yiinu yú caati ndís'tii nguéé déenu nī tíi ndiicá yā ní nn'guaaⁿ yā nduutinaáⁿ. ³¹ Ní deenu yú chí Dendyuūs ní nguéé n'giindiveé yā yeⁿe 'iiⁿyāⁿ nuuⁿndi. Du'ú 'iiⁿyāⁿ chi neⁿē Dendyuūs níicú idiíⁿ yā chiiⁿ chi neⁿē Dendyuūs, tuu'mi ní Dendyuūs míiⁿ nn'giindiveéⁿ yā yeⁿē 'iiⁿyāⁿ 'cūū. ³² Ní taachi chi nga'á iⁿ'yeeⁿdí 'cūū, nguéé ch'iindiveeⁿ yú chi mar 'áámá 'iiⁿyāⁿ nn'guaaⁿ yā nduutinaáⁿ 'iiⁿyāⁿ chi ngueenáⁿ ndíi ch'iindiyáⁿ yā. ³³ Ndúúti chi 'iiⁿyāⁿ 'cúú chi nguéé yeⁿé Dendyuūs 'iiⁿyāⁿ, tuu'mi ní nguéé du'ū véε cuuvi díiⁿ yā.

³⁴ Nan'gueεcutáⁿa 'iiⁿyāⁿ s'eeⁿ ní caⁿa yā chii yā saⁿá: Dii ní na nuuⁿndi ch'iindiyáⁿ di. ¿'Áá díi ngi'cuééⁿ dí nús'uū? Ní tun'daa yā saⁿa chεeti yaācū.

Ngueenáⁿ yeⁿē cosa chi yeⁿē Espíritu

³⁵ Jesús ch'iindiveéⁿ yā chí 'āā tun'daa yā saⁿá chiva'āi yaacu templo. Taachi nindaaca yā saⁿá ní ngaⁿa yā ngii yā saⁿá: ¿'Áá i'téenu dí Daiya Dendyuūs miiⁿ?

³⁶ Tuu'mi ní nan'gueεcutáⁿa sa ní caⁿa sa: Señor, ¿du'ū míiⁿ, ní 'tíicā cu'teenú?

³⁷ Ní ngaⁿa Jesús ngii yā saⁿá: In'diichi dí 'iiⁿyāⁿ ní 'iiⁿyāⁿ miiⁿ ní 'iiⁿyāⁿ chí indeé yā ndúúcu di.

³⁸ Tuu'mi ní ngaⁿá sa ngii sa Jesús: Señor, cu'teenú n'dií. Ní díiⁿ sa adorar yā.

³⁹ Ní ngaⁿá Jesús: 'Úú nindaá iⁿ'yeeⁿdí 'cūū chí caaⁿmáⁿ nuuⁿndi yeⁿé 'iiⁿyāⁿ caati 'iiⁿyāⁿ chí nguéé inaaⁿ yā ní naáⁿ yā. Ní 'iiⁿyāⁿ chí cuuvi inaaⁿ yā cuuvi ngueenáⁿ yā.

⁴⁰ N'duuvi 'iiⁿyāⁿ fariseos chí canée yā ndúúcu yā ch'iindiveéⁿ yā chuū ní caⁿá yā Jesús: ¿'Áá ngueéé ntúuⁿ nduutináⁿ 'nū tuu'mi?

⁴¹ Tuu'mi ní ngaⁿa Jesús ngii yā saⁿá s'eeⁿ: Ndúúti ngueenáⁿ nī nguéé nuuⁿndi yeⁿe nī. Naati maaⁿ ní ngaⁿa nī: Inaaⁿ 'nū. Chiiⁿ chí nuuⁿndi yeⁿé nī 'áámá cunée nūⁿ.

10

Cuenta yeⁿē 'iiⁿyāⁿ chí véé 'iiti yeⁿe yā

¹ Cuaacu níⁿnyúⁿ cuācū níⁿnyuⁿ ngaⁿá ngii ndís'tii: Du'u chí nguéé indaa cuaaⁿ cheendi chéēⁿ yeⁿē 'iiti cuūchī naati nge'é yā na chéēⁿ táámá lado, tuu'mi ní 'iiⁿyāⁿ 'cúú duucú yā ní diduucú yā. ² Du'ú 'iiⁿyāⁿ chí indaa yā cuaaⁿ cheendi chéēⁿ miiⁿ, 'iiⁿyāⁿ miiⁿ ineenaáⁿ yā 'iiti. ³ 'Iiⁿyāⁿ ineenaáⁿ yā cheendi chéēⁿ ní inin'guaaⁿ yā cheendi chéēⁿ caavā 'iiⁿyāⁿ miiⁿ ní 'iiti cuūchī n'giindiveéⁿ tī nduudu yeⁿé yā. Ní n'gaí yā duuchi 'iiti cuūchī yeⁿé yā. Ní n'daá tī saⁿá. ⁴ Taachi intuun'daa yā tanducuéⁿē 'iiti yeⁿé yā cuaaⁿ dáámí chéēⁿ candée tī vmaaaⁿ yeⁿé tī. Níicú 'iiti cuūchī cueⁿé tī cuayiivi 'iiví tī. Caati

'caandiveén tī nduudu yeⁿé yā. ⁵ Nguéé can'dáa tī 'iiⁿyāⁿ chi nguéé 'iiví tī níicú ngéenu tī yeⁿé yā caati nguéé 'caandiveén tī nduudu yeⁿé yā chi nguéé 'iiví tī 'iiⁿyāⁿ.

⁶ Chuū cuenta chi caⁿ'a Jesús 'iiⁿyāⁿ ní 'iiⁿyāⁿ miiⁿ nguéé tuumicadínuuⁿ yā de'ē chí caⁿ'ā Jesús miiⁿ.

Jesús chi n'dai ca pastor yā

⁷ Nguεεcúndíí ntuūⁿ Jesús ní ngaⁿ'a yā: Cuaacu níⁿnyúⁿ, cuāacū niiⁿnyuⁿ ngaⁿ'á ngíí ndís'tií: 'Úú tan'dúucā cheendi cheēⁿ naachi cho'ō 'iiti cuūchī. ⁸ Tanducuéⁿē 'iiⁿyāⁿ chí ndaa yā vmnaaⁿ yeⁿ'ē 'úú, 'iiⁿyāⁿ s'eeⁿ ní duucu yā ní diduucúū ntúuⁿ yā. Caati nguéé ch'iindiveén yā 'iiti cuūchī miiⁿ yeⁿ'é yā. ⁹ 'Úú tan'dúucā cheendi cheēⁿ 'úú. Du'ú 'iiⁿyāⁿ chí indaa caavā yeⁿ'é, ninguaⁿ'ai yā. Ní can'dáa yā. Ní ndaa ntuúⁿ yā. Ní ndacá yā chi che'é yā.

¹⁰ Duucú míⁿ taachi ndaa sa miiⁿ, iduucu sa. Ní n'giiⁿ'nuⁿ sa ní nadi'tuuví sa. 'Úú nindāa chí ca'á vida níicú ca'á vida chi yeenu taavi yā. ¹¹ 'Úú 'iiví 'iiti cuūchī chi n'dai taaví. 'Iiví 'iiti cuūchī chi n'dai taaví yā, nga'á yā vida yeⁿ'e maán yā caavā 'iiti. ¹² 'Iiⁿyāⁿ chí canee naán 'iiti cuūchī chi nguéé yeⁿ'é yā 'iiti ní nguéé 'iiví tī 'iiⁿyāⁿ. Taachí ináaⁿ yā yáá'yāaⁿ ngaatāa chi cuchíí tī ní cu'néeⁿ yā 'iiti cuūchī ní ngeⁿ'e yā ngéenu yā. Ní yáá'yāaⁿ ngaatāa cúchíí tī miiⁿ ní cuta'á tī 'iiti cuūchī ní 'iiti cuūchī miiⁿ idií'yáa tī ngii ní ngéenu tī. ¹³ 'Iiⁿyāⁿ chi nguéé yeⁿ'e yā 'iiti ngéenu yā caati nguéé yeⁿ'é yā 'iiti. Ní nguéé idiíⁿ yā cuidado 'iiti cuūchī.

¹⁴ 'Úú 'iiví n'dai taavi 'iiti cuūchī. Ní canúnaán 'iiti cuūchī yeⁿ'é. Ní 'iiti cuūchī yeⁿ'é ní canúnaán tī 'úú. ¹⁵ Tan'dúucā chi Chiidá in'diichí yā 'úú, 'tíicā 'úú in'diichí Chiidá. Ní nga'á vida yeⁿ'é cucaava 'iiti cuūchī. ¹⁶ Véé ntúūⁿ ta n'duuví 'iiti cuūchī yeⁿ'é chi nguéé yeⁿ'ē cheēndí chéeⁿ 'cūū 'iiti. 'Iiti miiⁿ ntúūⁿ ní cánée chí candéé 'iiti. Ní 'caandiveén tī chí caāⁿ'máⁿ níicú 'áámá cheēⁿ nduuví tī ní 'áámá nūuⁿ 'íiví 'iiti.

¹⁷ Caavā chiiⁿ chí neⁿ'e Chiidá 'úú caati 'úú ca'á vida yeⁿ'e maán chí ní nanguεεcundíí ntuúⁿ cuta'á. ¹⁸ Mar 'áámá 'iiⁿyāⁿ nguéé cuuvi 'caaⁿ'núⁿ yā 'úú naati 'úú ca'á vida yeⁿ'e maán. Cuuví dííⁿ cu'neéⁿ vida yeⁿ'é ní cuuví dííⁿ cuta'á. Chuū mandamiento chí dííⁿ chí ngaⁿ'ā Chiidá.

¹⁹ Ch'ííndi ntúūⁿ vaadí 'caa'va nguaaⁿ náⁿ'ā 'iiⁿyāⁿ Israel s'eeⁿ cáavā nduudú 'cūū. ²⁰ Nééné 'yaaⁿ 'iiⁿyāⁿ Israel caⁿ'a yā chuū: Canée yā ndúucū yááⁿ'nguiinūuⁿ ní nguεε ndéé yā vaanicadiinúúⁿ yeⁿ'é yā. ¿De'ē cúuví chí n'giindiveén ní yeⁿ'e yā?

²¹ Tá n'duuví yā ní ngaⁿ'a yā: Ndúúdú 'cāa ní nguéé yeⁿ'ē 'iiⁿyāⁿ chí canée ndúucū yááⁿ'nguiinūuⁿ. ¿'Áá cúuví nán'guaaⁿ yááⁿ'nguiinūuⁿ nduutinaán 'iiⁿyāⁿ chí nguēenāⁿ?

'Iiⁿyāⁿ Israel s'eeⁿ nguéé 'cuún yā Jesús

²² Ch'iindí 'víicú yeⁿ'ē dedicación na yāāⁿ Jerusalén tiempo chí 'iicheε. ²³ Níicú Jesús cachiicá yā cheeti yaacū templo na corredor chí nguuví Salomón. ²⁴ 'Iicu saⁿ'a Israel s'eeⁿ ní cheⁿ'e sa nduuvidaama sa nanáaⁿ yā ní caⁿ'a sa chíi sa Jesús: ¿Tíi cuaⁿ'ā castaⁿ'ā di chídeεve yeⁿ'e 'nū? Ndúúti chí díi chí Cristo miiⁿ, caaⁿ'maⁿ cuaacú dí cuuvi dí nús'uū.

²⁵ Nan'guεεcútaⁿ'a Jesús yeⁿ'ē sa: 'Āā ngíí ndís'tií ní nguéé i'teenu ní. Ntiiⁿnyuⁿ chí dííⁿ ndúucū chí dúuchí Chiidá, chuū ngaⁿ'ā nduudu cuaacu yeⁿ'é. ²⁶ Ndís'tií nguéé i'téenu ní caati nguéé 'iiti cuūchī yeⁿ'é ndís'tií, tan'duucā 'āā ngaⁿ'á. ²⁷ 'Iiti cuūchī yeⁿ'é n'giindiveén tī nduūdū yeⁿ'é ní 'úú in'diichí ntúuⁿ 'iiti. Ní 'iiti miiⁿ can'daa tī 'úú. ²⁸ 'Úú ní nga'á vida cueⁿ'e daāⁿ'maⁿ yeⁿ'é tī ní nguéé 'cūūvi tī. Ní mar 'áámá 'iiⁿyāⁿ cuuví cuta'á yā 'iiti s'eeⁿ taachí 'āā canée ta'á. ²⁹ Chiidá chí tée yā 'iiⁿyāⁿ s'eeⁿ 'úú vmnaán yā yeⁿ'ē nducyáácá 'iiⁿyāⁿ. Mar 'áámá 'iiⁿyāⁿ cuuví cuta'á yā taachi 'āā canée ta'ā Chiidá. ³⁰ 'Úú ndúucū Chiidá 'áámá núúⁿ 'nū.

³¹ Tuu'mi ní sta'ā ntúūⁿ saⁿ'a Israel s'eeⁿ túūu chí neⁿ'e ca'á sa Jesús. ³² Nan'guεεcútaⁿ'a Jesús 'iiⁿyāⁿ: Nééné n'deē n'daacā ntiiⁿnyuⁿ chí n'giⁿ'i yeⁿ'ē Chiidá. ¿Chéé ntiiⁿnyuⁿ chí nguéé innée yiinú ndís'tií chí ngiituu ní 'úú?

³³ Nan'guεcútaⁿā saⁿa Israel s'eeⁿ ní ngaⁿā sa ngii sá Jesús: Nguéé caavā ntiiⁿnyuⁿ n'daacā chi ngiitúú 'nū dii naati cáávā chi ngaⁿā di chi nguéé n'daacā, ní caati dii chí saⁿā iⁿ'yeeⁿdí 'cūú ní diiⁿ di chi Dendyuūs dii.

³⁴ Nan'guεcútaⁿa Jesús yeⁿē sa: ¿'Áá nguéé cánéé nguūⁿ na ley 'tíicā: 'Úú ningaⁿá chi ndyuūs s'eeⁿ ndís'tiī? ³⁵ Ndúúti chí ngaⁿá yā chi 'iiⁿ'yāⁿ miiⁿ ní ndyuūs s'eeⁿ, 'iiⁿ'yāⁿ chí sta'á yā nduudu yeⁿe Dendyuūs níicú naachi cánéé nguūⁿ canéé chí cuuvi cuaacu. ³⁶ Chiidá indεεve nuúⁿ yā 'úú ní dicho'ó yā 'úú iⁿ'yeeⁿdí 'cūú. ¿'Áá ndís'tiī ní ngaⁿa nī chí nguéé n'daacā yeⁿé chí 'úú nduuvidaamá ndúúcu Dendyuūs caati caⁿá chí 'úú Daiya Dendyuūs 'úú? ³⁷ Nduuti chí nguéé diíⁿ ntiiⁿnyuⁿ yeⁿē Chiidá, nguéé cu'téénu di 'úú. ³⁸ Naati ndúúti chí diíⁿ ntiiⁿnyuⁿ miiⁿ 'áará chí nguéé i'téénu di 'úú, cu'téénu di na ntiiⁿnyuⁿ chí diíⁿ. 'Iicu cuuvi deenu di ní cu'téénu di chí Chiidá canee nduucú níicú 'úú ní cánéé ndúúcu Chiidá.

³⁹ Ní neⁿe ntuuⁿ sa cuta'a sa Jesús, naati Jesús miiⁿ ní nan'dáa yā na ta'a sa s'uuⁿ.

⁴⁰ Níicú nguεcúndii yā taama lado yeⁿē yíicú Jordán na yáⁿāa miiⁿ naachi vmnáāⁿ vmnaaⁿ nachεεdinúⁿnīⁿ Juan. Níicú canéé yā miiⁿ. ⁴¹ Níicú nééné 'yaaⁿ 'iiⁿ'yāⁿ ndaá yā nanáaⁿ yā, ní ngaⁿá yā: Nduudu cuaacu tii Juan miiⁿ ní 'áamá señaⁿl nguéé diiⁿ sa naati tanducuéⁿē chí caⁿā Juan yeⁿé yā, chuū nduudu cuaacu.

⁴² Níicú nééné 'yaaⁿ 'iiⁿ'yāⁿ miiⁿ ní chí'téénu yā Jesús na yáⁿāa miiⁿ.

11

Lázaro ch'iī yā

¹ Véé 'áamá sáⁿā ngiitā sa chí nguuvi sa Lázaro na yāāⁿ Betania. Yāāⁿ miiⁿ vaacú tá María nduucú ví'i tá Marta. ² Niicu tá María ní vi'i ta Lázaro. N'daataa miiⁿ ch'eendái tá aceite Jesús ní nātí'i tá ca'a yā ndúúcu yuūdú tiīⁿ tá. ³ Vi'i sa miiⁿ ní dicho'ó ta 'áamá 'iiⁿ'yāⁿ chí yaa'ví yā yeⁿē Jesús miiⁿ chí caⁿa yā: Señor, n'diichí nī. Saⁿā chí néⁿe nī ní ngiitā sa.

⁴ Taachi ch'iindiveeⁿ Jesús chuū, ní caⁿa yā: Ca'āi miiⁿ ní nguéé ca'āi chí 'cuūvi sa, naati ca'āi chí diiⁿ honrar Dendyuūs, níicú cuuví yā honrar Daiyá Dendyuūs caava ca'ai 'cūú.

⁵ Niicu Jesús ní ya'āi 'iinu yā Marta ndúúcu ví'i tá María ndúúcu ví'i tá Lázaro. ⁶ Taachí Jesús ch'iindiveeⁿ yā chí ngiitā saⁿā miiⁿ canéé yā tá 'uuvi nguuvi lugar naachi canéé yā. ⁷ Cho'o 'uuvi nguuvi ngaⁿa Jesús ngii yā discípulos yeⁿé yā: Cuⁿ'u ntuūⁿ yú na yáⁿāa Judea.

⁸ Ní discípulos ní ngaⁿá yā ngiī yā 'iiⁿ'yāⁿ: N'dii Maestro, ngiitūú 'iiⁿ'yāⁿ Israel s'eeⁿ n'diī. ¿'Áá neⁿe ntúuⁿ nī caⁿā nī miiⁿ?

⁹ Nan'guεcútaⁿā Jesús: ¿'Áá nguéé ndεε nguuvi ndiichúúví hora? 'Iiⁿ'yāⁿ chí chiicá yā nguuvi nguéé indεε ca'a yā tii inaaⁿ yā chí dεεve yeⁿé iⁿ'yeeⁿdí 'cūú. ¹⁰ 'Iiⁿ'yāⁿ chí ngiica na maāiⁿ indεε ca'á yā, ti nguéé chí dεεve ndúúcu yā.

¹¹ Caⁿa yā chuū, ní caⁿa yā chíi yā 'iiⁿ'yāⁿ s'eeⁿ: Lázaro amigo yeⁿe yú cyaadu sa. Caⁿá nanduūchí saⁿā chí cyaadu sa.

¹² Tuu'mí caⁿá discípulos yeⁿé yā: Señor, ndúúti chí cyaadu sa ní 'āā ninguaⁿāi sa.

¹³ Chuū ngaⁿā Jesús miiⁿ yeⁿē vaadī n'dii yeⁿē Lázaro níicú 'iiⁿ'yāⁿ s'eeⁿ ní cadínuuⁿ yā chí ngaⁿa yā chí cyaadu n'dai Lázaro. ¹⁴ Tuu'mi ní Jesús caⁿa cuaacú yā: Lázaro miiⁿ ch'iī sa. ¹⁵ 'Úú ní yeenú cáávā ndís'tiī chí nguéé canéé miiⁿ ní 'íicú cu'téénu nī. Naati caⁿā yú n'diichi yú saⁿā.

¹⁶ Tuu'mi ní caⁿā Tomás, saⁿā chí duuchi Dídimó chí Gemelo ní ngaⁿa sa ngii sa saⁿā s'eeⁿ chí discípulos ndúúcu sa: Cúⁿ'u ntúúⁿ s'uuⁿ ní 'cuūvi yú ndúúcu yā.

Jesús chí nanduuchi niicu teé yā vida yeⁿé yā

¹⁷ Taachi ndaā Jesús miiⁿ ní 'āā cuūⁿ nguuví n'dii Lázaro canúúⁿ sa na cheetī yáinyāⁿ. ¹⁸ Ní yāāⁿ Betania 'āā niiⁿnuúⁿ ná yāāⁿ Jerusalén tan'dúúcu 'iinu kilómetro. ¹⁹ Neené 'yaaⁿ 'iiⁿ'yāⁿ ndaá yā na vaacu Marta ndúúcu María chí nica'á yā 'viicheetínūⁿ n'daata s'eeⁿ

yeⁿē vi'i yā Lázaro. ²⁰ Tuu'mi ní Marta miiⁿ taachí ch'iindiveéⁿ yā chí ndaā Jesús miiⁿ can'dáa yā chuva'ai ní nandaaca yā 'iiⁿyāⁿ. Naati María miiⁿ canúuⁿ yā cheeti va'ai. ²¹ Ní Marta miiⁿ ní ngaⁿa yā ngii yā Jesús: Señor, ndúúti chi canée nī ndúúcu 'nū nguée ch'iī vi'í. ²² Naati maaⁿ deenú chí tanducuéⁿē chí caaca di Dendyuūs miiⁿ ní tée yā dii.

²³ Tuu'mí ngaⁿa Jesús ngii yā Marta: Nnduuchi ntuūⁿ ví'i di.

²⁴ Marta ngaⁿa ta ngii ta Jesús: 'Úú ní deenú chí nduuchi ntuūⁿ sa ní nacueeⁿ sa nguuvi chi 'cuiinu iⁿyeēⁿdī.

²⁵ Ní ngaⁿa Jesús ngii yā táⁿā: 'Úú chí nanduuchi niicu 'úú teé vida yeⁿé yā. Du'ū chi i'téenu 'úú 'aara n'díi yā, 'tíicā nduuchi yā. ²⁶ Ní nducyáácá 'iiⁿyāⁿ chí véé vida yeⁿe yā chí i'téenu yā 'úú, nguée 'cuuvi yā cueⁿe daāⁿmaⁿ. ¿'Áá i'teenu di chuū?

²⁷ Tuu'mi ní Marta ngaⁿa yā: I'teenú Señor. 'Úú i'teenú dii chí Cristo Daiya Dendyuūs chí ndaá nī iⁿyeeⁿdí 'cūū.

cuεεcu Jesús taachi snée yā na yáinyāⁿ yeⁿē Lázaro

²⁸ Taachi Marta ch'iinu caⁿa ta chuū cueⁿe tá ní yaa'vi n'dé'ei ta vi'i María ní ngaⁿa ta: Dii María, Maestro caneé yā ní n'gai yā dii.

²⁹ Taachi María ch'iindiveeⁿ ta chuū ní ncueeⁿ ta ngéeniicu tá ní ndaa ta nanááⁿ Jesús. ³⁰ Jesús miiⁿ 'āā cuée nindáa yā yaaⁿ miiⁿ. Naati canée yā miiⁿ naachi nandaaca María 'iiⁿyāⁿ. ³¹ Tuu'mi ní 'iiⁿyāⁿ Israel s'eeⁿ chí snée yā na vacu tá ndúúcu tá ní inca'á yā 'viichetínūu María. Taachi n'diichí yā chí María miiⁿ ní nnicueeⁿ tá ngéeniicu tá, tuu'mi ní can'dáa yā cuaaⁿ chuva'āi. 'Iiⁿyāⁿ s'eeⁿ cueⁿe yā ndaá yā ní ngaⁿa yā: Táⁿā 'cāā ní caⁿa tá na yáinyāⁿ. Caⁿa tá cuεεcu ta.

³² María miiⁿ taachi ndaa ta nanááⁿ Jesús ní n'diichi ta 'iiⁿyāⁿ ní chiin'tiia tá ná ca'ā Jesús. Ní ngaⁿa ta ngii ta Jesús: Señor, ndúúti chí caneé nī 'muuⁿ, ní nguée ch'iī vi'í.

³³ Tuu'mi ní taachi n'diichi Jesús miiⁿ chí ngεεcu María ndúúcu 'iiⁿyāⁿ Israel s'eeⁿ chí ndaá yā ndúúcu María ngεεcu ntuūⁿ yā ní neené yaⁿāi 'iinu Jesús ndii Espíritu yeⁿé yā.

³⁴ Ní ngaⁿa yā: ¿Tíi s'neeⁿ yā saⁿā? Ní ngaⁿa yā ngii yā 'iiⁿyāⁿ: Señor, cuchí nī ní n'diichí nī.

³⁵ Ní cheēcu Jesús. ³⁶ Tuu'mi ní 'iiⁿyāⁿ Israel s'eeⁿ ní caⁿa yā: Cún'díichí nī tan'dúúca chí dinéⁿe yā saⁿā.

³⁷ Ní n'duuví 'iiⁿyāⁿ s'eeⁿ ní caⁿa yā: ¿'Áá nguée ngii dii 'iiⁿyāⁿ 'cūū chí inin'guaáⁿ yā nduutináaⁿ 'iiⁿyāⁿ chí ngueenáaⁿ, nguée cuuvi díⁿ yā chí saⁿa 'cūū nguée ní ch'ii sa?

Nanduuchi Lázaro yeⁿē nguaaⁿ tináⁿā

³⁸ Ní Jesús neené ya'ai 'iinu ntuūⁿ yā maáⁿ yā ní ndaá yā na yáinyāⁿ. Ní yáinyāⁿ miiⁿ 'áámá yiivi yáává. Níicú canee 'aama túūu vmnaaⁿ yeⁿē. ³⁹ Ngaⁿā Jesús miiⁿ: Ndiví nī túūu. Marta vi'í saⁿā chí ch'iī ngaⁿa ta ngii ta Jesús miiⁿ: Señor, 'āā ngeéⁿ sá. 'Āā cuūūⁿ nguuvi n'dii sa.

⁴⁰ Jesús ní ngaⁿa yā ngii yā Marta: ¿'Áá nguée ngii dii chí nduuti chí cu'téenu dí tuu'mi ní n'diichi di poder yeⁿē Dendyuūs?

⁴¹ Tuu'mi ní ndiví yā túūu naachí canée tináⁿā. Níicú Jesús ní n'diichí yā cuaaⁿ 'niiⁿnuⁿ ní caⁿa yā: N'dii Chiidá, 'úú ca'á gracias n'dii Dendyuūs chí n'giindiveéⁿ nī yeⁿé.

⁴² 'Úú ní deenú chí 'āā cueⁿe daaⁿmáⁿ nūuⁿ n'giindiveéⁿ nī yeⁿé ti cáávā 'iiⁿyāⁿ chí snée nanaáⁿ cuuvi cu'téenu yā chí n'dii dicho'ó nī 'úú.

⁴³ Ní ch'iinú caⁿa yā chuū neéne yuudu caⁿa yā: Lázaro, cuchí di.

⁴⁴ Saⁿā chí n'dii miiⁿ ní nan'dáa sa. Nandéécú sá ndíi ta'ā sa ndíi ca'ā sa ndúúcu cintas tiinūuⁿ. Ndeεcuú nuuⁿmáⁿ cuerpo yeⁿē sa ndii naaⁿ sa. Níicú pañuela canee naaⁿ sa. Tuu'mí ngaⁿa Jesús míⁿ 'iiⁿyāⁿ: Nn'daatí nī saⁿā ní 'āā naⁿā sa.

Nduuvidaamá yā chí diíⁿ yā 'caaⁿnúⁿ yā Jesús

(Mt. 26.1-5; Mr. 14.1-2; Lc. 22.1-2)

⁴⁵ Néené 'yaaⁿ 'iiⁿyāⁿ Israel s'eeⁿ chí ndaá yā ndúúcu María ní n'diichí yā chí dii Jesús miiⁿ chí'teenú yā 'iiⁿyāⁿ. ⁴⁶ Taná'a yā ní cheⁿé yā nanááⁿ saⁿā fariseos ní chii

yā saⁿā s'eeⁿ chí diiⁿ Jesús miiⁿ. ⁴⁷ Tuu'mi ní saⁿā chiiduú n'geeté ndúúcu saⁿā fariseos nduuvidaamá yā ndeé yā. Ní ngaⁿa yā: ¿De'ē diiⁿ yú? Tií sáⁿa 'cū caati neené n'deé chí n'giⁿi sa señales nanáⁿ yú. ⁴⁸ Nduúti chí cu'nee yú saⁿā chí 'tíica nūuⁿ nducyáacá yā ní cu'téenu yā saⁿā. Ní ndaa saⁿā romanos ní ndivíi yā lugar yeⁿē yáacū yeⁿē yú ndúúcu nación yeⁿē yú.

⁴⁹ 'Áámá chéé saⁿā s'eeⁿ chí nguuvi Caifás miiⁿ, saⁿā chí chiiduú ch'εεε ca yeⁿē nduuyu miiⁿ caⁿa sa chíi sa saⁿā s'eeⁿ: Ndís'tií ní nguéé du'ū vεε deenú nī. ⁵⁰ Ní nguéé nacádiinúúⁿ nī chí 'áámá saⁿā 'cuūvī sa yeⁿe nducyaacá yā níicú nguéé ti nación yeⁿē yú cuuvi ndái.

⁵¹ Chuū ní nguéé caⁿa yā yeⁿē maán yā caati 'iiⁿyāⁿ miiⁿ chiiduú ch'εεé ca yeⁿē nduuyu miiⁿ. Caⁿā cuaacú sa chí cuchií chí 'cuūvī Jesús cáávā nación 'cū. ⁵² Ní Jesús nduuvidaamá yā nguéé damaāⁿ 'iiⁿyāⁿ nación miiⁿ naati ndúúcu tanáⁿā daiyá Dendyuūs miiⁿ chí snéé 'muuⁿ chí snéé miiⁿ. ⁵³ 'Tíica ndíi tuu'mi ndeé yā chí 'caaⁿnuⁿ yā Jesús.

⁵⁴ Tuu'mi ní 'aa ntéé cuchiica nguuvi Jesús nguuaⁿ 'iiⁿyāⁿ Israel s'eeⁿ naati cueⁿé yā na 'áámá yāⁿ niiⁿnuúⁿ yáⁿā cuuⁿmáⁿ naachi nguéé ch'εεtinéé 'iiⁿyāⁿ chí nguuvi Efraín. Ní canéé yā miiⁿ ndúúcu discípulos yeⁿé yā.

⁵⁵ Ní 'viicu pascua yeⁿē 'iiⁿyāⁿ Israel s'eeⁿ 'āā chí néé niiⁿnuúⁿ nguuvi. Nééné 'yaaⁿ yā cuchéé yā yeⁿe yāⁿ yeⁿé yā na yāⁿ Jerusalén, vmnaaⁿ tiempo yeⁿē 'viicu pascua. Ní 'iiⁿyāⁿ s'eeⁿ didεεv yā vida yeⁿé yā tan'dúúca costumbre yeⁿé yā. ⁵⁶ Ní in'nuúⁿ yā Jesús miiⁿ. Ní 'iiⁿyāⁿ s'eeⁿ indeé yā ndúúcu vi'ī naachi canéé yā cheeti yaacū templo taacā chí ngii yeⁿē ndís'tií: ¿'Áá nguéé chíi Jesús 'viicu?

⁵⁷ 'Iiⁿyāⁿ chiiduú n'geeté ndúúcu saⁿā fariseos 'āā s'néen yā caaca 'tíicā. Nduúti du'ū chí déenú tií canéé Jesús miiⁿ caaⁿmaⁿ yeⁿē chiiduú n'geeté níicú cuta'á yā 'iiⁿyāⁿ.

12

Cheēndáa yā aceite Jesús na yáāⁿ Betania (Mt. 26.6-13; Mr. 14.3-9)

¹ Níicú indaá cá taaⁿ jááⁿ nguuvi chí ndaa 'viicu yeⁿē pascua. Ndaā Jesús yáāⁿ Betania naachi canee Lázaro, saⁿā chí 'āā chíi ní n'duuchí ntuūⁿ Jesús miiⁿ saⁿā yeⁿe nguuaⁿ 'iiⁿyāⁿ chí n'dii. ² Ní miiⁿ ca'a yā chí che'e nguūnū Jesús. Marta miiⁿ ní n'gii yā cu'ū na mesa. Ní Lázaro miiⁿ vεε sa ndúúcu Jesús na mesa. ³ Tuu'mi ní sta'ā María miiⁿ 'áámá libre yeⁿē aceite perfume yeⁿē nardo nūuⁿ chí yaⁿai chíi'vē. Ní cheēndáa tá ca'a Jesús miiⁿ. Ní ndúúcu yuūndū tiíⁿ tá miiⁿ nadεεvε tá ca'ā Jesús miiⁿ. Niicu nuuⁿmáⁿ ch'εεε cheeti va'āi cheēⁿ perfume yeⁿe aceite miiⁿ. ⁴ 'Áámá chéé discípulo yeⁿé yā chí nguuvi Judas Iscariote chí daiya Simón chí saⁿā chí canéé chí díiⁿ sa entregar Jesús, ngaⁿa sa: ⁵ ¿De'ē cúúví chí nguéé n'diicuí yú aceite 'cū ndúúcu ndεēchē ciento caadi canéé 'uūvī ngeecu ndiichi centavo ní ca'a yú 'iiⁿyāⁿ chí nguéé yeⁿe yā?

⁶ Ní caⁿa sa chuū ní nguéé chí ya'āi sa 'iiⁿyāⁿ chí ndaachí snéé yā, naati cáávā chí duucu sa. Ní ndεē sa bolsa miiⁿ snúúⁿ tuūmī. ⁷ Tuu'mi ní ngaⁿā Jesús: 'Āā canéé 'nū tá, taachi n'dai tá chuū cáávā nguuvi chí caⁿá 'cuεechí. ⁸ Caati 'iiⁿyāⁿ chí nguéé yeⁿe yā 'āā canee núúⁿ nī nduucú yā cueⁿe daāⁿmaⁿ, naati 'úú ní nguéé 'áámá cuneé núúⁿ nduucú nī.

Nduuvidaamá yā contra yeⁿe Lázaro

⁹ Tuu'mi neené 'yaaⁿ 'iiⁿyāⁿ yeⁿē 'iiⁿyāⁿ Israel tuumicadínuuⁿ yā chí Jesús miiⁿ ní cunéé yā na yáāⁿ Betania. Ní níndaá yā nguεε cáávā damaāⁿ chí neⁿe n'diichí yā Jesús miiⁿ ti neⁿe n'diichí yā Lázaro, saⁿā chí 'āā n'dii ní nduuchi. ¹⁰ Saⁿā s'eeⁿ chí chiiduú n'geeté nduuvidaáma yā chí neⁿé 'caaⁿnuⁿ ntúuⁿ yā Lázaro. ¹¹ Ti nééné 'yaaⁿ 'iiⁿyāⁿ Israel s'eeⁿ ngeⁿe yā ní i'téenu yā Jesús miiⁿ caavā Lázaro.

Jesús ndaá yā yáāⁿ Jerusalén lado yeⁿe rey (Mt. 21.1-11; Mr. 11.1-11; Lc. 19.28-40)

¹² Chi δεενε táámá nguuvi ni neené 'yaaⁿ 'iiⁿ'yāⁿ ndaá yā 'viicu taachi ch'iindiveéⁿ yā chi Jesús miiⁿ ndaa yā Jerusalén. ¹³ Sta'a yā n'duuvu tiicuaá yíⁿ'yúⁿ ní can'daa yā Jesús. Ní ndaacá yā Jesús ní 'caí yā: Hosanna. N'dáí taavi 'iiⁿ'yāⁿ chí cuchíí yā ndúúcu chí dúúchí Señor chí Rey yeⁿ'ē Israel ntúūⁿ.

¹⁴ Ní ndaacā Jesús 'aama burro 'lííⁿ ni canduú yā 'iiti tan'dúúca chí canéé nguūⁿ na libro yeⁿ'e Ndyuūs 'tíicā:

¹⁵ Táⁿ'ā daiya Sión nguéé 'va'a di. N'díichí dí, cuchii Rey yeⁿ'ē di. Canduú yā 'aama daiya burro.

¹⁶ De'ε ndúúcu chí 'tuucā nguéé tuumicadiinúúⁿ yā discípulos yeⁿ'é yā nguuvi miiⁿ. Taachi Jesús cánéé yā na va'ai chæeti nguuvi tuu'mi ní discípulos yeⁿ'e yā nn'gaacú yā tanducuéⁿ'ē de'ē chí canee nguūⁿ yeⁿ'é yā, 'íicú dííⁿ yā de'ε ndú'ū chí 'túúca.

¹⁷ 'Iiⁿ'yāⁿ chí canéé yā ndúúcu Jesús ngaⁿ'a cuáacú yā: Taachí yaa'ví yā Lázaro na yáinyāⁿ ní nnduuchi sa nguaaⁿ tinaⁿ'ā.

¹⁸ Cáávā chuū ní n'daā 'yaaⁿ 'iiⁿ'yāⁿ caati n'giindiveéⁿ yā chí Jesús ní dííⁿ yā señal miiⁿ.

¹⁹ Saⁿ'ā fariseos ní ngaⁿ'a sa nguaaⁿ maāⁿ sa: Inaaⁿ nī ti nguéé de'ε veε idiiⁿ nī aprovechar yeⁿ'e asunto 'cūū. N'díichí nī. Núúⁿ'maⁿ iⁿ'yeēⁿdi ní caⁿ'ā can'dáā Jesús.

Saⁿ'ā griegos in'nuúⁿ yā Jesús

²⁰ 'Iicu véé 'iiⁿ'yāⁿ griegos chí chεε yā yeⁿ'ē 'viicū miiⁿ ní dííⁿ yā adorar. ²¹ 'Iiⁿ'yāⁿ s'uuⁿ ndaá yā nanááⁿ Felipe yeⁿ'é yāāⁿ Betsaida chí yeⁿ'ē yáⁿ'āa Galilea. Ní di'cuutú yā 'iiⁿ'yāⁿ, ní ngaⁿ'a yā ngii yā 'iiⁿ'yāⁿ: Señor, neⁿ'é 'nū n'diichí 'nū Jesús.

²² Ndaā Felipe miiⁿ ni ngaⁿ'a yā ngii yā chuū Andrés. Tuu'mi ní Andrés ndúúcu Felipe ngaⁿ'a yā ngii yā Jesús. ²³ Tuu'mi ní Jesús nan'guεεcutáⁿ'a yā, ní ngaⁿ'a yā ngii yā saⁿ'ā s'eeⁿ: Hora mííⁿ cuchii taachi Saⁿ'ā chí Daiya Dendyuūs cánéé chí caⁿ'á yā na va'ai chæeti nguuvi. ²⁴ Cuaacu níⁿ'nyúⁿ cuāacū niiⁿ'nyuⁿ ngaⁿ'á ngii ndís'tii: Nduuti chí 'áámá trigo nguéé cuuvā na yáⁿ'āa ní 'cuūví damaāⁿ canee. Naati ndúúti chí trigo 'cuūví neené n'dee nduuví trigo 'cúuⁿndí. ²⁵ Du'u chí neⁿ'e vida yeⁿ'é yā na iⁿ'yeeⁿdí 'cūū n'dái yā vida yeⁿ'e yā cueⁿ'e daāⁿmaⁿ. ²⁶ Du'u 'iiⁿ'yāⁿ chí dichíí'vε yā 'úú ní chíi yā can'daa yā 'úú, naachi 'úú chí canéé, mííⁿ ntúūⁿ snée 'iiⁿ'yāⁿ chí dichíí'vε 'úú. Nduuti 'áámá 'iiⁿ'yāⁿ chí dichii'vε yā 'úú, Chiidá ní dííⁿ yā honrar 'iiⁿ'yāⁿ.

Jesús yaa'ví yā yeⁿ'ē vaadī n'gii yeⁿ'é yā

²⁷ Ní caⁿ'a Jesús: Maaⁿ ní neené ndístaⁿ'ā alma yeⁿ'é. ¿De'é caāⁿ'maⁿ? N'dií Chiidá, ¿'áá nadanguáⁿ'ai ní 'úú yeⁿ'e hora 'cūū? Cáávā chuū chí cuchíí hora 'cūū. ²⁸ N'dií Chiidá, ch'iⁿ'i ní poder yeⁿ'e chí duuchi yeⁿ'é nī. Tuu'mi ní cuchii 'áámá nduudu yeⁿ'ē nanguuvi chí ngaⁿ'a: 'Úú ní 'āā ch'iⁿ'i poder yeⁿ'é ní cuuvi 'cuuⁿ'míⁿ poder yeⁿ'é ntúūⁿ taama vmnéⁿ'ēe.

²⁹ 'Iiⁿ'yāⁿ chí chinée yā miiⁿ ní ch'iindiveéⁿ yā 'áámá nduudu ní ngaⁿ'a yā: Daavi miiⁿ. Ta n'dúúvi yā ní ngaⁿ'a yā: Angel yaa'ví yā 'iiⁿ'yāⁿ.

³⁰ Nan'guεεcutaⁿ'ā Jesús ní caⁿ'a yā: Nguéé ndaā nduudu 'cūū caavā 'úú, ti cáávā ndís'tii. ³¹ Maaⁿ ní véé chí diiⁿ juzgar 'iiⁿ'yāⁿ yeⁿ'e iⁿ'yeeⁿdí 'cūū. Maaⁿ ní 'aama saⁿ'ā chí ch'εεtε yeⁿ'é iⁿ'yeeⁿdi 'cūū 'cuεεcú yā cuaaⁿ chuva'āi. ³² Ndúúti chí 'úú chí ncueéⁿ yeⁿ'é yáⁿ'āa 'cūū tuu'mi candéé nducyaacá yā nanááⁿ 'úú.

³³ Ní chuū ngaⁿ'a Jesús ngii yā 'iiⁿ'yāⁿ chí ngaⁿ'á yā de'é vaadī n'gii 'cuuví yā.

³⁴ Nan'guεεcutaⁿ'ā 'iiⁿ'yāⁿ s'eeⁿ yeⁿ'é yā: Nús'uū ní n'giindiveéⁿ 'nū chí canéé nguūⁿ na libro yeⁿ'e Ndyuūs chí Cristo cuneé yā cueⁿ'e daāⁿmaⁿ. ¿Táácā chí ngaⁿ'ā dii, cánéé chí níncueeⁿ Saⁿ'ā chí Daiya Dendyuūs? ¿Du'ū chí Saⁿ'ā chí Daiya Dendyuūs?

³⁵ Tuu'mí ngaⁿ'a Jesús ngii yā 'iiⁿ'yāⁿ s'eeⁿ: 'Téé nūūⁿ chí canéé chí δεενε nanááⁿ nī. Cúchiicá nī naachi canéé chí δεενε neⁿ'e chí canéé chí δεενε nduucú nī, ní nguéé ndaā maāⁿ naachí canéé yā. 'Iiⁿ'yāⁿ chí cachiicá yā na maāⁿ nguéé deenú yā tíí caⁿ'a yā.

³⁶ Naachi canéé chí δεενε ndúúcu nī cu'téenu nī chí δεενε miiⁿ ní cuuvi daiya chí δεενε ndís'tii. Chuū caⁿ'a Jesús, ní cueⁿ'e yā ní canúúⁿ n'de'ei yā maāⁿ yā yeⁿ'é 'iiⁿ'yāⁿ s'eeⁿ.

'Iiⁿ'yāⁿ Israel s'eeⁿ nguéé i'téenu yā

³⁷ Nééné ch'i'n'i Jesús señales dendu'ū nanáān 'ii'n'yān s'eeⁿ naati nguéé chi'teenú yā 'ii'n'yān. ³⁸ 'Iicu cuuví cuaacu chí ca'n'ā sa'n'ā profeta Isaías naachí canéé nguūⁿ na libro yeⁿe Ndyuūs 'tíicā:

Señor, ¿du'ū i'teenú chí ngaⁿ'a yā? ¿Du'ū n'diichi chi n'giⁿ'i yā poder yeⁿe Señor?

³⁹ Cáávā chuū chi nguéé i'téenu yā chí táámá vmnéⁿ'ēe caⁿ'a Isaías naachí ndii nguūⁿ na libro yeⁿe Ndyuūs 'tíicā:

⁴⁰ Nan'gaadí yā nduutinaán 'ii'n'yān s'eeⁿ ní diīⁿ cheechí yā staaⁿve yeⁿ'é yā, caati nguéé inaaⁿ yā ndúúcu nduutináaⁿ yā, ní nguéé deenú yā yeⁿ'ē staaⁿve yeⁿ'é yā, ndíi nguéé ndúú cu'téenu yā, ni 'úú diyiicú 'ii'n'yān s'eeⁿ.

⁴¹ Chuū caⁿ'a Isaías miiⁿ taachí n'diichi sa Dendyuūs ndúúcu poder yeⁿ'é yā ní caⁿ'a sa yeⁿ'e yā ní 'āā dinguūⁿ sa yeⁿ'ē.

⁴² Caavā yeⁿ'ē nducuéⁿ'ē chuū nééné 'yaaⁿ 'ii'n'yān chí n'geete ca chi'téenu yā Jesús naati nguéé ntumiiⁿ'núⁿ yā chí chi'téenu yā ti 'va'a yā chí nan'daa yā yaacū cáávā sa'n'ā fariseos. ⁴³ Caati neⁿ'é ca yā honra yeⁿ'e sa'n'ā iⁿ'yeeⁿdí 'cūū, nguéé ti honra yeⁿ'ē Dendyuūs miiⁿ.

Nduudu yeⁿ'ē Jesús diiⁿ juzgar sa'n'ā s'eeⁿ

⁴⁴ Naati Jesús ní caⁿ'a yuudú yā: Du'ū chí i'téenu 'úú, nguéé 'úú i'téenu yā ti 'ii'n'yān chí dichó'o yā 'úú. ⁴⁵ Du'ú 'ii'n'yān chí inaaⁿ yā 'úú, inaaⁿ yā 'ii'n'yān chí dichó'o yā 'úú.

⁴⁶ 'Úú tan'dúúca dεεve ní ndaa iⁿ'yeeⁿdí 'cūū. Ní 'iicu nducyáácá 'ii'n'yān chí cu'téenu yā 'úú nguéé cunee yā ndúúcu maáiⁿ. ⁴⁷ 'Ii'n'yān chí n'giindiveeⁿ yā nduudu yeⁿ'é ní nguéé i'téenu yā nduudu yeⁿ'é, 'úú nguéé diīⁿ juzgar 'ii'n'yān miiⁿ. Caati nguéé ndaa diīⁿ juzgar 'ii'n'yān yeⁿ'e iⁿ'yeeⁿdí 'cūū, ti ndaa chí nadanguaⁿ'ái 'ii'n'yān yeⁿ'e iⁿ'yeeⁿdí. ⁴⁸ Du'ū chí nguéé neⁿ'ē 'úú, ní nguéé n'gúuⁿ yā nduudu yeⁿ'é. Véé 'ii'n'yān chí diīⁿ yā juzgar 'ii'n'yān s'eeⁿ nguuvi chí 'cuiinu iⁿ'yeeⁿdí. ⁴⁹ Caati 'úú nguéé ngaⁿ'á yeⁿ'e maáⁿ. Chiidá chí dichó'o yā 'úú, 'ii'n'yān míⁿ teé yā nduudu cuaacu chí ngaⁿ'á ní yeⁿ'ē chí canéé chí caaⁿ'máⁿ. ⁵⁰ 'Úú deenú chí cucáávā nduudu cuaacu yeⁿ'é yā cúnduuchi yú cueⁿ'e daāⁿmaⁿ. 'Tíicā ngaⁿ'ā 'úú, tan'dúúca chí ngaⁿ'a Chiidá ngii yā 'úú.

13

Jesús naaⁿ'nú yā ca'a discípulos yeⁿ'é yā

¹ Ní vmnáán vmnaaⁿ 'viicu yeⁿ'e pascua 'āā deenu Jesús chí hora 'āā cuéé ndaa chí cho'ó yā yeⁿ'e iⁿ'yeeⁿdí 'cūū chí ndaa yā nanáán Chiidá yā. Tan'dúúca chí dineⁿ'e Jesús 'ii'n'yān yeⁿ'é yā chí snée yā iⁿ'yeeⁿdí 'cūū, 'āā dinéⁿ'e núúⁿ yā 'ii'n'yān ndii cuáán ná ch'iinu.

² Ch'íinú che'e nguiinú yā. Yáán n'guiinūⁿ 'āā s'neeⁿ sa na staaⁿve yeⁿ'ē Judas Iscariote chí daiya Simón chí canéé chí diīⁿ yā entregar Jesús. ³ Déénú Jesús chí tanducuéⁿ'ē ní ca'a Chiidá yā ta'a daiyá yā ní chí nan'daa yā yeⁿ'é Dendyuūs ní duu'vī tiempo tuu'mí naⁿ'á yā nanáán Dendyuūs. ⁴ Nadacuéⁿ yā naachi chí che'e nguiinú yā ní ndivíi yā catecaí yā. Ní sta'á yā 'aama toalla cheecu vmnaaⁿ cuerpo yeⁿ'e yā. ⁵ Ní ch'iinuúⁿ yā nuūⁿnīⁿ cheeti tina ní tucá'a yā naaⁿnu yā ca'a discípulos. Ní natí'i yā ndúúcu toalla chí ndεεcú yā.

⁶ Ndaá yā naachi canéé Simón Pedro ní sáⁿ'a 'cūū ngaⁿ'a sa ngii sa 'ii'n'yān: Señor, ¿'áá n'diī ntúúⁿ naaⁿ'nú nī ca'á?

⁷ Nan'guεεcútaⁿ'ā Jesús ní ngaⁿ'a yā ngii yā sa'n'ā: 'Úú ní chí diīⁿ nguéé deenu di maaⁿ naati cadíinuⁿ di cuayiivi.

⁸ Ngaⁿ'ā Pedro ngii sa 'ii'n'yān: N'diī, nguéé náánú nī ca'á mar 'áámá tiempo. Nan'guεεcútaⁿ'ā Jesús yeⁿ'ē sa: Ndúúti chí nguεε naaⁿ'nú yeⁿ'ē di nguéé 'áámá parte yeⁿ'ē di nduucú.

⁹ Tuu'mi ní ngaⁿ'a Simón Pedro: Señor, nguéé dámaāⁿ ca'á ti ndii ta'á ntúúⁿ ndúúcu tíiⁿ.

¹⁰ Tuu'mi ní ngaⁿ'a Jesús ngii yā sa'n'ā: Du'u chí chiinē nguéé neⁿ'ē sa chí naaⁿnu sa cuerpo yeⁿ'e sa ti dámaāⁿ ca'a sa caati tanducuéⁿ'ē cuerpo yeⁿ'ē sa ní dεεve. Ndís'tiī ní 'āā dεεvé nī 'āā n'dáá rá chí nguéé nducyaaca nī.

¹¹ Ti deenú yā du'u chí dííⁿ entregar 'iíⁿyāⁿ ní cáávā chííⁿ chí caⁿ'a yā: Nguéé nducyaaca nī dεεε nī.

¹² Taachí ch'iinu naaⁿnú yā ca'a discípulos, ní sta'á yā catecaí yā nguεεcundí ntuúⁿ yā 'cuundi yā. Ngaⁿ'a yā ngii yā saⁿ'ā s'eeⁿ: ¿'Áá déénú nī dε'ē chí idííⁿ nduucú nī? ¹³ Ndís'tií ngaⁿ'a nī chí 'úú ní Maestro, chí 'úú ní Señor. N'daācā ngaⁿ'a nī caati 'tíicā 'úú. ¹⁴ 'Úú ní Señor yeⁿ'é nī, 'úú ní Maestro yeⁿ'é nī. 'Úú inaaⁿnú ca'a nī. Ndís'tií canéé nī ntúūⁿ chí naaⁿnu nī 'aama nī ca'a taama nī. ¹⁵ Caneéⁿ chí dííⁿ chuū. Tan'dúúⁿcā chí 'úú chí dííⁿ 'tíicā nī ntúūⁿ diiⁿ ndís'tií. ¹⁶ Cuaacu nííⁿnyúⁿ cuāācū nííⁿnyuⁿ ngaⁿ'á ngii ndís'tií: 'Iiⁿ'yāⁿ chí diiⁿ mandado nguéé 'āā 'naaⁿ ca yā chí 'iíⁿ'yāⁿ chí ngaⁿ'a ntiiⁿnyūⁿ yeⁿ'é yā. Ndíí nguéé ndúú 'iíⁿ'yāⁿ chí dicho'ó yā nguéé 'āā 'naaⁿ cá yā chí 'iíⁿ'yāⁿ chí dicho'ó yā 'iíⁿ'yāⁿ. ¹⁷ Nduuti chí deenu nī taanduvéé dendu'ū ní yeenu taaví nī ndúúti chí dííⁿ nī chuū.

¹⁸ Nguéé ngaⁿ'á yeⁿ'ē nducyaaca ndis'tií. 'Úú ní deenú 'iíⁿ'yāⁿ chí ndεεvé. Ní 'iicu canéé chí cuuví cuaacu chí canéé nguūⁿ. Du'ū chí nge'é pan nduucú, canéé chí caⁿ'á yā contra yeⁿ'ē 'úú. ¹⁹ Ndíí maaⁿ 'āā ngaⁿ'á 'aara chí 'āā cuéé cuuvi nííⁿnuúⁿ. Taachi 'āā cho'ōo chuū cuuví cu'téénu nī chí 'úú. ²⁰ Cuaacu nííⁿnyúⁿ cuāācū nííⁿnyuⁿ 'úú ngaⁿ'á ngii ndís'tií: 'Iiⁿ'yāⁿ chí 'cuáaⁿ yā 'iíⁿ'yāⁿ chí 'úú dicho'ó 'cuáaⁿ yā 'úú. Ní 'iíⁿ'yāⁿ chí 'cuáaⁿ yā 'úú 'cuáaⁿ yā 'iíⁿ'yāⁿ chí dicho'ó yā 'úú.

*Jesús dííⁿ yā anunciar chí Judas dííⁿ yā entregar 'iíⁿ'yāⁿ
(Mt. 26.20-25; Mr. 14.17-21; Lc. 22.21-23)*

²¹ Taachí ngaⁿ'a Jesús chuū ya'ai 'iínú yā na espíritu yeⁿ'é yā ní caⁿ'a cuaacú yā: Cuaacu nííⁿnyúⁿ cuāācū nííⁿnyuⁿ ngaⁿ'á ngii ndís'tií chí 'áámá chéé ndís'tií dííⁿ nī entregar 'úú.

²² Tuu'mi discípulos n'gíínú yā na 'áámá yā na táámá yā. Nguéé tuumicadiínúúⁿ yā du'u yeⁿ'ē chí ngaⁿ'a yā. ²³ 'Áámá discípulo, chí nééⁿé neⁿ'é Jesús, candííⁿtí neeⁿ yā na nííⁿnúⁿ Jesús. ²⁴ Simón Pedro ca'a yā señas saⁿ'á 'cūū ní ngaⁿ'a yā saⁿ'ā chí natiingúúneeⁿ sa yeⁿ'ē sáⁿ'ā chí ngaⁿ'a Jesús. ²⁵ Níícú taachi candiití neeⁿ yā nííⁿnúⁿ Jesús, tuu'mí ngaⁿ'á yā: Señor, ¿du'ū chíi?

²⁶ Nan'guεεcútaⁿ'ā Jesús: Caⁿ'á di'caandá pan ní ca'á 'iíⁿ'yāⁿ ní 'iíⁿ'yāⁿ miiⁿ chííⁿ. Ní di'caandá yā pan ní ca'á yā Judas Iscariote, daiya Simón. ²⁷ Ch'íínú che'e sa pan miiⁿ ní yááⁿn'guiínūⁿ ndaa sa na staava yeⁿ'ē sa. Tuu'mí Jesús ní ngaⁿ'a yā ngii yā saⁿ'ā: Chíí chí neⁿ'e di diiⁿ dí miiⁿ, diiⁿ núúⁿ yiiⁿnu nuuⁿ di.

²⁸ Naati mar 'áámá 'iíⁿ'yāⁿ chí véé na mesa miiⁿ nguéé tuumicadiínúúⁿ yā dε'ē chúú chí 'tíicā caⁿ'a yā. ²⁹ N'duuví yā nnacadíínūⁿ yā chí caati Judas ndéε sa bolsa chí Jesús ní 'āā ngaⁿ'a yā ngii yā saⁿ'ā: Cuái di chí neⁿ'e yú yeⁿ'e 'viicu o cuica'a dí 'tεε 'iíⁿ'yāⁿ chí ndaachíí snéε yā. ³⁰ Ch'iínú che'é yā pan can'daā núúⁿ Judas chuva'ai ní 'āā chí 'da'a.

Mandamiento chí ngāi

³¹ Taachí Judas miiⁿ can'daā sa miiⁿ tuu'mi ní ngaⁿ'ā Jesús: Maaⁿ ní canéé chí cuuvi ch'εεte Saⁿ'ā chí Daiya Dendyuūs. Ní Dendyuūs miiⁿ canéé chí ch'εεte ndúúcu yā. ³² Ndúúti chí Dendyuūs canéé chí ch'εεte yā, 'tiicā ntúūⁿ dííⁿ yā chí ch'εεte maáⁿ yā. Ní 'cuiinu ní dííⁿ yā chí ch'εεte 'iíⁿ'yāⁿ. ³³ N'dií daiya n'gaiyáá 'téé 'téé nuúⁿ cuneé ndúúcu ndis'tií. In'nuúⁿ nī 'úú tan'dúúⁿcā chí 'úú chí ngaⁿ'á ngii 'iíⁿ'yāⁿ Israel s'eeⁿ: Naachi 'úú caⁿ'á ndís'tií ní nguéé cuuvi ndaá nī. 'Tíicā ngaⁿ'á ndis'tií maaⁿ. ³⁴ 'Áámá ley ngai iteé ndis'tií chí diiⁿ yá'āi 'iinu nī vi'í 'aama nī taama nī tan'dúúⁿcā chí idííⁿ yá'āi 'iínú ndis'tií. 'Tiicā ntúūⁿ diyá'ai 'iínú nī vi'í 'aama nī taama nī. ³⁵ 'Íícú chúū tuumicadiínūⁿ nducyaaca 'iíⁿ'yāⁿ chí ndís'tií ní discípulos yeⁿ'é ndúúti chí neⁿ'é nī 'áámá nī taama nī.

*Jesús ngaⁿ'a yā chí Pedro caaⁿ'máⁿ yā chí nguεε n'diichí yā Jesús
(Mt. 26.31-35; Mr. 14.27-31; Lc. 22.31-34)*

³⁶ Tuu'mí ngaⁿ'ā Simón Pedro ngii sa Jesús: Señor, ¿tíí cáⁿ'a di? Nan'guεεcútaⁿ'ā Jesús miiⁿ: Naachi 'úú caⁿ'á nguéé cuuví chíí ndís'tií can'dáa nī 'úú. Naati canéé chí chíi nī can'dáa nī 'úú cuayiivi.

³⁷ Tuu'mí ngaⁿā Pedro miiⁿ: Señor, ¿de'ē cuuví chi 'āā nteε cuuví chi can'daá dii maaⁿ? Vida yeⁿ'é cu'neéⁿ lugar yeⁿ'ē di.

³⁸ Nan'guεεcútaⁿā Jesús miiⁿ: ¿'Áá 'cuūvī di lado yeⁿ'e 'úú? Cuaacu níⁿnyúⁿ cuācū niiⁿnyuⁿ ngaⁿ'á ngíi dii chi nguéé 'cai tusáⁿā taachí nguéé cueeⁿdítū di 'úú 'iinū cuuvi vuelta.

14

Jesús ní tan'dúúccā yúúni chí candéε 'iiⁿ'yāⁿ nanááⁿ Chiidá yā

¹ Caⁿ'a Jesús: Nguéé ndii 'úúví staava yeⁿ'é nī. Cu'téenu nī Dendyuūs. Cu'téenu nī 'úú dendu'ū. ² Na vaacu Chiidá véé taavi naachi 'cuεetinée yú. Ndúúti chí nguéé nduudu cuaacu, tuu'mi ní 'úú nguéé caaⁿ'máⁿ 'tiicā. Caⁿ'á nanguain'daí naachi 'cuεetinée ndís'tiī. ³ Ndúúti chí naⁿ'á ní nnguain'daí 'áámá cuaaⁿ yeⁿ'ē ndís'tiī chí 'cuεetineé ndís'tiī, cuchii ntuúⁿ táámá vmnéⁿ'ēe ní candéé māaⁿ ndís'tiī. Naachí cuneé miiⁿ ndís'tiī ní 'cuεetinée nī ntúuⁿ nī. ⁴ Ní déénu nī naachi caⁿ'á mííⁿ, ní n'diichí ní yúúni.

⁵ Tuu'mi ní ngaⁿ'a Tomás ngii sa Jesús: Señor, nguéé déénu 'nū tíi caⁿ'á nī. ¿Táacā n'diichí 'nū yúúni?

⁶ Jesús nan'guεεcutáⁿ'a yā yeⁿ'e sa: 'Úú tan'dúúccā yúúni, 'úú ngaⁿ'á nduudu cuaacu, 'úú teé vida. Nguéé du'ū véε ndaá nanááⁿ Chiidá ndúúti chí nguεε cáávā 'úú. ⁷ Ndúúti chí n'diichí nī 'úú in'diichí nī ntúuⁿ Chiidá. Ní ndii maaⁿ ní n'diichí nī 'iiⁿ'yāⁿ. Ní n'diichí nī ntúuⁿ 'iiⁿ'yāⁿ.

⁸ Tuu'mí ngaⁿ'a Felipe miiⁿ ngii sa 'iiⁿ'yāⁿ: Señor, 'cuuⁿ'míⁿ nī Chiida yú ní 'cuεetinée 'nū ndúúccū vaadi yeenú.

⁹ Jesús ní ngaⁿ'a yā ngii yā saⁿ'ā: Dii Felipe, 'naaⁿ n'daí ntúūⁿ caneé ndúúccū ndís'tiī ní ¿'áá nguéé nin'diichi di 'úú, Felipe? Du'ú 'iiⁿ'yāⁿ chí n'diichí yā 'úú, n'diichí yā Chiidá. ¿Táacā caaⁿ'maⁿ di: 'Cuuⁿ'míⁿ nī Chiida yú? ¹⁰ ¿'Áá nguéé i'téenu di chí 'úú ní caneé ndúúccū Chiidá ní Chiidá caneé yā nduucú? Nduudu chí ngaⁿ'á nanááⁿ ndís'tiī nguéé ngaⁿ'á yeⁿ'é mááⁿ ti yeⁿ'ē Chiidá chí canée yā nduucú. 'Iiⁿ'yāⁿ miiⁿ dííⁿ yā ntiiⁿnyuⁿ. ¹¹ Cu'téenu di 'úú ti 'úú caneé ndúúccū Chiidá ní Chiidá mííⁿ canée yā nduucú, o cu'téenu di 'úú cáávā ntiiⁿnyuⁿ chí dííⁿ. ¹² Cuaacu níⁿnyúⁿ cuācū niiⁿnyuⁿ ngaⁿ'á ngíi ndís'tiī: Du'ū chí i'teenu 'úú, ní ntiiⁿnyuⁿ chí 'úú idiíⁿ, 'tiicā ntúūⁿ dííⁿ yā. Ní ch'εεte ca ntiiⁿnyuⁿ nidiíⁿ yā nguéé ti chuū caati 'úú ní caⁿ'á nanááⁿ Chiidá. ¹³ Ní tanducuéⁿ'ē chí caaca nī Chiidá ndúúccū chí duuchí, chuū 'úú idiíⁿ niicu Chiidá miiⁿ ní 'cuuví 'cuuⁿ'míⁿ yā poder caavā 'úú. ¹⁴ Ndúúti chí de'ē chí caaca nī ndúúccū chí duuchí, 'úú ní dííⁿ.

Jesús caⁿ'a yā dicho'ó yā Espíritu N'dai yeⁿ'e Dendyuūs

¹⁵ Ndúúti chí neⁿ'e nī 'úú, dííⁿ nī chí ngaⁿ'a ley yeⁿ'é. ¹⁶ 'Úú di'cuíⁿtū Chiidá ní teé yā taama yā chí teé yā poder ndís'tiī. Ní cuneé yā ndúúccū nī cueⁿ'e daāⁿmaⁿ. ¹⁷ Espíritu ngaⁿ'a yā vaadi cuaacu. Chiiⁿ chí nguéé 'cuúⁿ 'iiⁿ'yāⁿ yeⁿ'e iⁿ'yeēⁿdī caati nguéé 'iiⁿ'yāⁿ s'eeⁿ inaaⁿ yā ní nguéé ntúūⁿ ní n'diichí yā Espíritu miiⁿ. Naati ndís'tiī n'diichí nī ti Espíritu miiⁿ canée ndúúccū ndís'tiī ní cunée ntúūⁿ yeⁿ'ē ndís'tiī. ¹⁸ Nguéé cu'neéⁿ ndís'tiī da'caiya nguá'āa. Ndaá nanaáⁿ ndís'tiī. ¹⁹ 'Tεε 'téé nūuⁿ 'āā ntéé snaāⁿ iⁿ'yeēⁿdī 'úú. Ndís'tiī ní snaāⁿ nī 'úú. Caati 'úú ní canduūchí, ní ndís'tiī canduuchi ntuúⁿ nī. ²⁰ Tuu'mí nguuví miiⁿ ní canée chí n'diichí nī 'úú chí canée ndúúccū Chiidá. Ní ndís'tiī canée nī nduucú. Ní 'úú canée ndúúccū nī. ²¹ Du'ú 'iiⁿ'yāⁿ chí canée yā ndúúccū ley yeⁿ'é ní dííⁿ yā tan'dúúccā chí ngaⁿ'a ley yeⁿ'é, 'iiⁿ'yāⁿ miiⁿ chí neⁿ'é yā 'úú. Ní 'iiⁿ'yāⁿ chí neⁿ'é yā 'úú, Chiidá neⁿ'e ntúūⁿ yā 'iiⁿ'yāⁿ miiⁿ ní 'úú ní neⁿ'é ntuúⁿ 'iiⁿ'yāⁿ miiⁿ. Ní 'úú 'cuuⁿ'míⁿ mááⁿ nanááⁿ 'iiⁿ'yāⁿ miiⁿ.

²² Tuu'mí ngaⁿ'ā Judas ngii sá Jesús (nguéé saⁿ'ā Judas Iscariote): Señor, ¿de'ε véé chí 'cuuⁿ'míⁿ nī nanááⁿ nús'uu ní nguéé nanááⁿ 'iiⁿ'yāⁿ yeⁿ'e iⁿ'yeēⁿdī?

²³ Nan'guεεcútaⁿā Jesús ní caⁿ'a yā: Dú'ū 'iiⁿ'yāⁿ chí neⁿ'e yā 'úú, nduudu yeⁿ'é n'giindiveéⁿ yā. Ní Chiidá mííⁿ neⁿ'é yā 'iiⁿ'yāⁿ. Ní ndaá 'nū nanááⁿ yā. Ní ndaāca 'nū naachi 'cuεetinée 'nū nduucú yā. ²⁴ Du'u 'iiⁿ'yāⁿ chí nguéé neⁿ'é yā 'úú ní nguéé

n'giindiveéⁿ yā nduudu yeⁿé. Nduudu chí n'giindiveéⁿ nī nguéé yeⁿé caati yeⁿē Chiidá chí dichó'o yā 'úú.

²⁵ Chuū ngaⁿá taachi caneé ndúúcu ndís'tiī. ²⁶ 'Iiⁿyāⁿ chí tée yā poder s'uuúⁿ, 'iiⁿyāⁿ miiⁿ ní Espíritu N'dai yeⁿe Ndyuūs. Chuū chí dichó'ó Chiidá ndúúcu chí duuchí. 'Iiⁿyāⁿ mííⁿ ca'cueeⁿ yā ndís'tiī tanducuéⁿē dendu'ū. Ní nin'gaacú yā ndís'tiī tanducuéⁿē chí caⁿá nanááⁿ ndís'tiī.

²⁷ Chí cunee 'diiíⁿ cu'neéⁿ ndúúcu ndís'tiī. Chí cu'neéⁿ 'diiíⁿ yeⁿé māaⁿ teé ndís'tiī. Nguéé tan'dúúca chí iⁿ'yeēⁿdī teē chí 'úú teé ndís'tiī. Nguéé 'cuūndi daānā yeⁿe staava yeⁿé nī, ndíí nguéé ndúú 'va'a rá nī. ²⁸ Ch'iindiveéⁿ nī chí 'úú ngaⁿá: Caⁿá ní cuchii ntūuⁿ nanááⁿ ndís'tiī. Ndúúti chí neⁿé nī 'úú, tuu'mi ní cuaacu nííⁿnyúⁿ chí yeenú taavi nī ti ngaⁿá chí caⁿá nanááⁿ Chiidá. Ní Chiidá vmnaaⁿ cá yā ní chí cuuvi 'úú. ²⁹ Maaⁿ ní ngaⁿá yeⁿe chí cuuvi, ní 'iicu taachi chó'ōo chuū cuuvi cu'téenu nī.

³⁰ 'Āā ntéé 'yaaⁿ caⁿá ndúúcu ndís'tiī caati ndaa saⁿā chí 'iiⁿntyéⁿē yeⁿe iⁿ'yeēⁿdī 'cūū. Ní nguéé du'ū vεε canéé yeⁿé yā nduucú. ³¹ 'Iicu cuuvi cu'téenu 'iiⁿyāⁿ yeⁿe iⁿ'yeēⁿdī chí 'úú neⁿé Chiidá. Ní tan'dúúca chí Chiidá ca'á yā mandamiento 'úú 'tiicā chí dííⁿ. Ncuaeⁿ yú ní caⁿa yú maaⁿ.

15

Jesús tan'dúúca 'áamá dii'yu dúnde'e chí cuaacu

¹ Caⁿa Jesús: 'Úú tan'dúúca dii'yu dúnde'e chí cuaacu, ní Chiidá dííⁿ yā cuidado yeⁿe dii'yu dúnde'e. ² Tanducuéⁿe duuⁿnē yeⁿé chí nguéé de'ē vεε n'gui'i yeⁿē 'caacá yā ní divíi yā. Ní nducuéⁿē duuⁿnē chí véé n'gui'i yeⁿē ní didεεvé yā 'iicu cuuvi n'deē ca n'gui'i yeⁿē. ³ Ndís'tiī 'āā dεεvé nī cáāvā nduudu chí ngaⁿá. ⁴ Ndís'tiī cunée nī nduucú ní 'úú cunee ndúúcu nī. Tan'dúúca duúⁿne nguéé 'cuεεtinéē n'gui'i yeⁿē nduūtī chí nguεε canéé na dii'yu dúnde'e, 'tiicá ntúūⁿ ndís'tiī nduuti chí nguéé cunee nī nduucú.

⁵ 'Úú tan'dúúca dii'yu dúnde'e ní ndís'tiī ní dúuⁿnē. 'Iiⁿyāⁿ chí canee yā nduucú ní 'úú caneé nduucú yā, 'iiⁿyāⁿ miiⁿ nééne n'dee n'gui'i candéε yā. Ndúúti chí nguéé 'úú nduucú yā ní nguéé de'ē vεε cuuvi dííⁿ yā. ⁶ Du'u 'íiⁿyāⁿ chí nguεε canee yā nduucú cun'dáa yā tan'dúúca dúuⁿne chí nguéé n'gui'i yeⁿē ní ntí'i. Ní 'iiⁿyāⁿ ita'á yā ní ngii yā na yaⁿā. Ní ngiichi.

⁷ Ndúúti chí canee nī nduucú, ní nduudu yeⁿé canee nduucú nī, caaca nī tanducuéⁿē chí neⁿé nī ní cuuvi. ⁸ Taachi candéε nī n'deē n'dái n'gui'i yeⁿé nī, ní ch'ííⁿ nī chí discípulos yeⁿé tuu'mi ní ndúúcu chuū ní ch'ííⁿ nī poder Chiidá. ⁹ Tan'dúúca chí neⁿe Chiidá 'úú 'tiicá ntúūⁿ 'úú neⁿé ndís'tiī. Cunee nī ndúúcu vaadī neⁿe yeⁿé. ¹⁰ Ndúúti chí dííⁿ nī tan'dúúca chí ngaⁿa ley yeⁿé, tuu'mi cunee nī ndúúcu vaadī neⁿe yeⁿé. Ní chuū tan'dúúca chí 'úú idiíⁿ nducuéⁿē chí ngaⁿa ley yeⁿē Chiidá ní caneé ndúúcu vaadī neⁿe yeⁿé yā.

¹¹ Dendú'ū chí 'tuucā ngaⁿá. Níícu vaadī yeenú yeⁿé cunee nduucú nī. Ní vaadī yeenú yeⁿé nī dííⁿ cumplir. ¹² Chuū ley yeⁿé chí dineⁿé nī vi'í 'aama nī taama nī tan'dúúca chí 'úú neⁿé ndís'tiī. ¹³ Mar 'áamá saⁿā nguéé vaadī neⁿe chí ch'εεte cá yeⁿē chí 'cuuvi 'áamá saⁿā caavā amigo yeⁿē sa. ¹⁴ Ndís'tiī ní amigos yeⁿé ndís'tiī ndúúti chí dííⁿ nī cosa chí 'úú ngaⁿá. ¹⁵ 'Āā ntéé caaⁿmáⁿ chí ndís'tiī ní mozos yeⁿé ti mozos nguεε deenu sa de'ē chí dííⁿ 'iiⁿyāⁿ chí ngaⁿa ntiiⁿnyúⁿ yā yeⁿē sa. Naati ngaⁿá chí ndís'tiī ní amigos yeⁿé ti tanducuéⁿē chí n'giindiveéⁿ yeⁿē Chiidá, ngaⁿá ngíí ndís'tiī. ¹⁶ Ndís'tiī nguéé ndεεve nī 'úú, naati 'úú nindεεvé ndís'tiī. Ní 'neéⁿ ndís'tiī caati cuuvi candéε nī n'gui'i. Ní n'gui'i yeⁿe nī 'áamá cūnee. Ní tanducuéⁿē chí caaca nī Chiidá ndúúcu chí duuchí, 'iiⁿyāⁿ miiⁿ ní tée yā ndís'tiī. ¹⁷ Chuū ní ngaⁿá ndís'tiī chí dinéⁿe nī vi'í 'áamá nī táámā nī.

'Iiⁿyāⁿ yeⁿe iⁿ'yeēⁿdī nguéé n'diichi ndís'tiī

¹⁸ Ndúúti chí 'iiⁿyāⁿ yeⁿe iⁿ'yeēⁿdī nguéé neⁿe yā ndís'tiī 'āā déenu nī chí vmnáán vmnaaⁿ nguéé neⁿe yā 'úú. ¹⁹ Ndúúti chí canee nī ní dííⁿ nī cosas ndúúcu 'iiⁿyāⁿ yeⁿe iⁿ'yeēⁿdī, 'iiⁿyāⁿ yeⁿe iⁿ'yeēⁿdī dinéⁿe yā ndís'tiī, naati ndís'tiī nguéé yeⁿē iⁿ'yeēⁿdī

ndís'tiī. Ndεεvé ndís'tiī vmnaán yeⁿē chi din'dái iⁿyeēⁿdī. Cáávā chuū chi iⁿyeēⁿdī nguée neⁿe ndís'tiī. ²⁰ N'gaacu nī yeⁿe nduudu chi 'úú ngaⁿ'á ngií ndis'tiī: Nguée vmnaaⁿ ca 'iiⁿ'yāⁿ chi diiⁿ mandado ti 'iiⁿ'yāⁿ chi ngaⁿ'a ntiiⁿnyuⁿ. Ndúúti chi 'iiⁿ'yāⁿ s'tíí ní can'daa yā 'úú 'tiicá ntúūⁿ can'daa yā ndís'tiī. Nduuti chi diíⁿ yā tan'dúúⁿcā chi ngaⁿ'á 'tiicá ntúūⁿ diíⁿ yā tan'dúúⁿcā chi ngaⁿ'á nī. ²¹ Tanducuéⁿē chuū diíⁿ yā ndúúⁿcū ndis'tiī caavā chi duuchí ti nguée n'diichí yā 'iiⁿ'yāⁿ chi dichó'o yā 'úú.

²² Ndúúti chi nguée ndaá ndíí nguée ndúú yaa'ví rá 'iiⁿ'yāⁿ tuu'mi 'iiⁿ'yāⁿ ní nguée déenu yā chi véé nuuⁿndi yeⁿ'é yā. Maaⁿ ní nguée mar 'áámá yā chi cuuvi caaⁿ'máⁿ yā chi nguée véé nuuⁿndi yeⁿ'e yā. ²³ 'Iiⁿ'yāⁿ chi nguée neⁿ'é yā 'úú 'tiicá ntúūⁿ Chiidá míⁿ ní nguée neⁿ'e yā 'iiⁿ'yāⁿ. ²⁴ Ndúúti chi 'úú nguée diíⁿ nguaaⁿ yā ntiiⁿnyūⁿ chi mar 'áámá 'iiⁿ'yāⁿ nguée diíⁿ yā, nguée déenu yā chi véé nuuⁿndi yeⁿ'e yā. Naati maaⁿ ní n'diichí yā 'úú, ní nguée neⁿ'é yā 'úú ndúúⁿcū Chiidá. ²⁵ 'Iicu cuuvi cuaacu nduudu chi canée nguūⁿ na ley yeⁿ'e yā: Nguée de'ē caavā chi nguεε neⁿ'é yā 'úú.

²⁶ Naati taachi ndaá yā 'iiⁿ'yāⁿ chi Espíritu N'dai yeⁿ'e Dendyuūs ní tée yā poder s'uuuⁿ. Ní 'úú ní dicho'ó Espíritu N'dai chi yeⁿ'ē Chiidá. Espíritu N'dai yeⁿ'e Dendyuūs ní cuaacu ní cuchii yeⁿ'ē Chiidá. Espíritu miiⁿ caaⁿ'maⁿ cuaacú yā yeⁿ'ē 'úú. ²⁷ 'Iicu ndís'tiī ní caaⁿ'maⁿ cuaacú nī yeⁿ'ē 'úú caati canée nī nduucú ndii cuááⁿ naachi chi nga'ā.

16

¹ Caⁿ'a Jesús: Chuū ngaⁿ'á ngií ndis'tiī 'iicu nguée nduuvi taán nī. ² 'Iiⁿ'yāⁿ ní 'cuεεcú yā ndís'tiī cuaaⁿ chuva'āi yaācū. Ní taachí ndaá hora chi 'caaⁿ'núⁿ yā ndís'tiī, nacádiinúúⁿ yā chi n'daacā idiíⁿ yā ntiiⁿnyuⁿ yeⁿ'é Dendyuūs. ³ Ní 'iiⁿ'yāⁿ s'tíí ní 'tíicā idiíⁿ yā ti nguεε n'diichí yā Chiidá, ndii nguée nduu 'úú ra. ⁴ Maaⁿ ní ngaⁿ'á ngií chuū ndis'tiī caati taachí ndaa hora miiⁿ n'gáácú nī ti 'úú ní 'āā caⁿ'á. Chuū ni nguée caⁿ'á ndíí cuaaⁿ vmnaaⁿ ti 'úú canée ndúúⁿcū ndis'tiī.

Ntiiⁿnyuⁿ yeⁿ'ē Espíritu N'dai yeⁿ'e Ndyuūs

⁵ Caⁿ'a Jesús: Naati maaⁿ ní caⁿ'á n'diichí 'iiⁿ'yāⁿ chi dichó'o 'úú. Ní mar 'áámá ndís'tiī nguée ntiinguuneéⁿ nī 'úú: ¿Tíí caⁿ'a nī? ⁶ Chiiⁿ chi caⁿ'á chi 'túúⁿcā, ní néené chii ndaāchíí staava yeⁿ'é nī. ⁷ 'Úú ngaⁿ'á nduudu cuaacu miiⁿ: N'daacā cáávā ndís'tiī chi caⁿ'á. Ndúúti chi 'úú nguée caⁿ'á tuu'mi ní Espíritu N'dai yeⁿ'e Dendyuūs chi tée yā poder ndís'tiī nguée ndai yā nanááⁿ ndís'tiī. Ndúúti chi 'úú caⁿ'á ní 'úú dicho'ó 'iiⁿ'yāⁿ. ⁸ Taachí 'iiⁿ'yāⁿ miiⁿ ní ndāa yā, ní caaⁿ'máⁿ yā ndúúⁿcū 'iiⁿ'yāⁿ yeⁿ'e iⁿyeēⁿdī yeⁿ'ē nuuⁿndi, ní yeⁿ'ē vaadī cuaacu, ní yeⁿ'ē 'iiⁿ'yāⁿ chi diiⁿ juzgar. ⁹ Caaⁿ'máⁿ yā yeⁿ'ē nuuⁿndi chi nguée i'téenu yā 'úú. ¹⁰ Caaⁿ'máⁿ yā yeⁿ'e vaadī cuaacu chi 'úú caⁿ'á nanááⁿ Chiidá ní 'āā ntée n'diichí yā 'úú. ¹¹ Caaⁿ'máⁿ yā nuuⁿndi yeⁿ'e 'áámá 'iiⁿ'ntyeⁿ'ē ch'εεte yeⁿ'e iⁿ'yeeⁿdí 'cūū 'āā canée juzgado sa.

¹² Néené n'dee dendu'ū chi véé chi cuuvi ndis'tiī naati maaⁿ ní nguεε cuuvi cūnee ná vaanicadiinūⁿ yeⁿ'é nī. ¹³ Taachí ndaá Espíritu yeⁿ'é vaadī cuaacu, 'iiⁿ'yāⁿ miiⁿ ní ca'cuéeⁿ yā ndís'tiī na tanducuéⁿē vaadī cuaacu. Ni nguée caaⁿ'máⁿ yā yeⁿ'ē maáⁿ yā ti caaⁿ'máⁿ yā tanducuéⁿē chi n'giindiveéⁿ yā. Ní ch'iⁿ'i yā ndis'tiī de'ē chí cuchii. ¹⁴ 'Iiⁿ'yāⁿ miiⁿ ní ch'iⁿ'i yā poder yeⁿ'é ti cuta'á yā poder yeⁿ'e 'úú ní ch'iⁿ'i yā ndis'tiī. Ní cuuvi cádiinúúⁿ nī. ¹⁵ Nducuéⁿē chi véé yeⁿ'ē Chiidá, chuū ní yeⁿ'é. Cáávā chuū ngaⁿ'á chi Espíritu yeⁿ'e vaadī cuaacu cuta'á yā yeⁿ'ē 'úú ní ch'iⁿ'i yā ndís'tiī. Ní cádiinúúⁿ nī.

Chi ndaachíí yeⁿ'é nī ní nduuvi vaadī yeenú

¹⁶ Caⁿ'a Jesús: Taa 'lííⁿ ní 'āā ntée snaáⁿ nī 'úú. Taama vmnéⁿ'ee, taa 'lííⁿ ní snaáⁿ nī 'úú ti 'úú ní caⁿ'á nanááⁿ Chiidá.

¹⁷ Tuu'mí caⁿ'a n'duuvi discípulos yeⁿ'é yā ngii yā 'áámá yā táámá yā: ¿De'ε chi 'tíicā ngaⁿ'a yā ngii yā s'uuúⁿ taaⁿ 'lííⁿ ní 'āā ntée chinaáⁿ nī 'úú ní taama vmneⁿ'ēe taaⁿ 'lííⁿ ní chinaáⁿ nī 'úú, ti 'úú ní caⁿ'á nanááⁿ Chiidá? ¹⁸ Tuu'mi ní ngaⁿ'a yā. ¿De'ε chi 'tíicā taaⁿ 'lííⁿ? Nguée tuumicadiinuuⁿ yú.

¹⁹ Ní tuumicadíínuuⁿ Jesús chi neⁿe ntiinguuneeⁿ saⁿ'ā s'eeⁿ, ní ngaⁿ'a yā: ¿'Áá ntíngúúneeⁿ vi'í nī chi 'túúcā caⁿ'á chíí taaⁿ 'lín' ní 'āā ntéé chi naaⁿ nī 'úú, ní taama vmnéⁿ'ēe, taa 'lín' ní chi naaⁿ nī 'úú? ²⁰ Cuaacu níⁿnyú cuāacū níⁿnyuⁿ ngaⁿ'á ngíí ndís'tiī: Maaⁿ ní cuεecu nī ní ya'ai nī. Ní iⁿ'yeēⁿdī ní cuuvi yeenú naati ndís'tiī ní chí n'daaⁿ chí yá'ai nī ndúúcū vaadī yeenú. ²¹ N'daataá chí canee chí 'āā 'cuundiyāāⁿ daiyā tá, véé vaadī ya'ai yeⁿ'ē ta, ti 'āā chéé ndaa hora yeⁿ'ē tá. Taachí 'āā véé daiya tá 'āā ntéé n'gaacu tá yeⁿ'e vaadī ya'ai yeⁿ'ē tá chí yeenú tá chí véé 'áámá daiya tá yeⁿ'é iⁿ'yeēⁿdī. ²² Tiicá ntúūⁿ ndís'tiī ní canéé vaadī ndaachíí nanáaⁿ nī. Naati taama vmnéⁿ'ēe ní n'diichí ntuúⁿ ndís'tiī. Ní cuneé nī vaadī yeenú na staava yeⁿ'é nī. Ní mar 'áámá 'iⁿ'yāⁿ ní nguéé divíí yā vaadī yeenú yeⁿ'é ndís'tiī.

²³ Ní nguuvi miiⁿ nguéé ntiinguuneeⁿ nī du'ū vεe yeⁿ'é. Cuaacu níⁿnyúⁿ cuāacū níⁿnyuⁿ ngaⁿ'á ngíí ndís'tiī chí tanducuéⁿ'ē chí caaca nī Chiidá ndúúcū chí duuchí ní Chiidá téé yā ndís'tiī. ²⁴ Ndií maaⁿ nguéé du'ū vεe ngiica nī ndúúcū chí duuchí. Caaca nī ní Chiidá téé yā ndís'tiī. Ní vaadī yeenú yeⁿ'é nī cuuvi yeenu taavi.

Jesús chichéé yā ndúúcū iⁿ'yeēⁿdī

²⁵ Chuū chí ngaⁿ'á ndúúcū cuentas yeⁿ'é ndúúcū ndís'tiī. Maaⁿ ní ndaa hora chí 'āā ntéé caⁿ'á yeⁿ'é ndís'tiī ndúúcū cuentas naati caaⁿ'máⁿ cuaacu yeⁿ'ē Chiidá. ²⁶ Nguuvi miiⁿ ní caaca nī ndúúcū chí duuchí. Ní 'úú nguéé ngaⁿ'á chí 'úú nídí'cuíftú Chiidá cáávā ndís'tiī. ²⁷ Maaⁿ Chiidá neené neⁿ'é yā ndís'tiī caati ndís'tiī neⁿ'é nī 'úú. Ní i'teenu nī chí 'úú chíicá yeⁿ'ē Chiidá. ²⁸ Chíicá yeⁿ'ē Chiidá ní ndaa iⁿ'yeēⁿdī 'cūū. Cu'neeⁿ ntuúⁿ iⁿ'yeēⁿdī. Ní naⁿ'á n'diichí Chiidá.

²⁹ Tuu'mí ngaⁿ'a discípulos yeⁿ'é yā: Cun'dííchí dí maaⁿ ní ngaⁿ'ā cuaacu di nguéé ndúúcū cuentas. ³⁰ Maaⁿ ní tuumicadiínúúⁿ 'nū chí deenú nī tanducuéⁿ'ē dendu'ū. Ní nguéé canee ngiinú nī chí ntiinguuneeⁿ 'iⁿ'yāⁿ n'dií. Cáávā chuū i'teenú 'nū chí chíica nī yeⁿ'é Dendyuūs.

³¹ Nan'guεεcútaⁿ'ā Jesús: ¿'Áá i'téénu nī maaⁿ? ³² Cun'diichí nī. Hora miiⁿ ní cuchíí. Ní 'āā ndaa chí caⁿ'ā 'muuⁿ caⁿ'ā miiⁿ ndís'tiī na vaacú nī. Ní cu'neéⁿ nūuⁿ nī 'úú dámaaⁿ. Naati nguéé canee dámaaⁿ ti Chiidá canéé yā nduucú. ³³ Chuū ní ngaⁿ'á ngíí ndís'tiī chí cucáávā 'úú canee 'diííⁿ nī. Iⁿ'yeēⁿdī ní 'cúeenú nī cuuvi. Cuuvi ch'εētiínúu nī. 'Úú ní chicheé ndúúcū iⁿ'yeēⁿdī.

17

Jesús ndee yā ndúúcū Chiidá yā caavā discípulos yeⁿ'é yā

¹ Chuū caⁿ'a Jesús ní n'diichí yā cuaaⁿ nanguuvi ní caⁿ'a yā: N'dií Chiidá, hora yeⁿ'é ní 'āā ndaa. Dííⁿ nī dich'εeté nī Daiya nī. 'Tiicā ntúūⁿ 'úú chí Daiya nī cuuvi dich'εeté n'dií. ² Tan'dúúcā chí tee nī poder 'úú chí Daiya nī yeⁿ'e de'ē chí dííⁿ nducyaaca 'iⁿ'yāⁿ cáávā chí ca'á vida cueⁿ'e daāⁿmaⁿ 'iⁿ'yāⁿ chí tee nī 'úú. ³ Chuū chí vida cueⁿ'e daāⁿmaⁿ chí n'diichí yā n'dií chí 'áámá n'dyaⁿ'ā Dendyuūs chí cuaacu níⁿnyúⁿ chí Dendyuūs ndúúcū Jesucristo chí dichó'o nī.

⁴ 'Úú ní dich'εeté n'dií na yáⁿ'āa 'cūū. 'Āā ch'iínú dííⁿ ntiiⁿnyuⁿ chí teé nī chí dííⁿ. ⁵ Maaⁿ ní n'dií, Chiidá, dich'εeté nī 'úú, n'dií ndúúcū maáⁿ nī, ndúúcū poder chí canéé nduucú maáⁿ taachi 'āā 'cuéé cunee iⁿ'yeēⁿdī.

⁶ Ngaⁿ'a cuaacú yeⁿ'ē chí duuchi yeⁿ'é nī nanáaⁿ saⁿ'ā s'eeⁿ yeⁿ'e iⁿ'yeēⁿdī 'cūū chí teé yā 'úú. Saⁿ'ā s'eeⁿ yeⁿ'é nī. Ní teé nī 'úú. Ní n'giindiveéⁿ yā nduudu yeⁿ'é nī. ⁷ Maaⁿ ní déénú yā chí tanducuéⁿ'ē dendu'ū chí teé nī 'úú ní yeⁿ'é nī. ⁸ Ti ndúúdú chí teé nī 'úú ní caⁿ'á nanáaⁿ 'iⁿ'yāⁿ ní 'iⁿ'yāⁿ s'eeⁿ ní n'giindiveéⁿ yā nduudu miiⁿ. Ní deenu cuaacu yā chí chíicá nanáaⁿ n'dií. Ní i'téénu yā chí n'dií dicho'ó nī 'úú.

⁹ 'Úú ngiicá caavā 'iⁿ'yāⁿ s'eeⁿ. Nguéé nídí'cuíftú cáávā iⁿ'yeēⁿdī ti cáávā 'iⁿ'yāⁿ chí teé nī 'úú, ti yeⁿ'é n'dií. ¹⁰ Ní taanduvéé dendu'ū yeⁿ'é ní yeⁿ'é nī. Ní taanduvéé dendu'ū yeⁿ'é nī ní yeⁿ'é. Ní chuū ch'iⁿ'i poder yeⁿ'é.

¹¹ Ní 'āā ntéé cūneé iⁿ'yeēⁿdī naati 'iⁿ'yāⁿ s'eeⁿ snée yā iⁿ'yeēⁿdī. 'Úú ní cuchií nanáaⁿ nī. N'dií Chiidá chi dεεve, diíⁿ nī cuidado 'iⁿ'yāⁿ chi teé nī 'úú ndúúcu chi duuchí nī. Ní chi cuuví 'áámá yā tan'dúúca s'uuúⁿ ní 'áámá yú. ¹² Taachí caneé ndúúcu 'iⁿ'yāⁿ iⁿ'yeēⁿdī ní diíⁿ cuidado 'iⁿ'yāⁿ ndúúcu chi duuchi nī, 'iⁿ'yāⁿ chi nteé nī 'úú. 'Úú ní diíⁿ cuidado 'iⁿ'yāⁿ ní mar 'áámá yā nguéé chindāi yā. 'Áámá nūuⁿ saⁿ'ā daiya yááⁿ'guiinūuⁿ chindai sa. Ní 'iicu naachi cánéé nguūⁿ ní cúuví cuaacu.

¹³ Naati maaⁿ ní cuchií nanáaⁿ nī. Ní ngaⁿ'á chuū taachi cuneé iⁿ'yeēⁿdī 'cūū caati vaadī yeēnu yeⁿ'é canéé nduucú yā, ní cuuvi yeenu taavi yā. ¹⁴ 'Úú ní ca'á 'iⁿ'yāⁿ nduudu yeⁿ'e nī. Iⁿ'yeēⁿdī nguéé dinéⁿ'e 'iⁿ'yāⁿ ti nguéé yeⁿ'e iⁿ'yeēⁿdī 'iⁿ'yāⁿ. 'Tiicá ntúūⁿ nguéé yeⁿ'e iⁿ'yeēⁿdī 'úú. ¹⁵ Nguéé di'cuítūu chi ndivíi nī 'iⁿ'yāⁿ yeⁿ'e iⁿ'yeēⁿdī. Diíⁿ nī cuidado 'iⁿ'yāⁿ s'eeⁿ yeⁿ'e yááⁿ'guiinūuⁿ. ¹⁶ Nguéé yeⁿ'e iⁿ'yeēⁿdī 'iⁿ'yāⁿ s'eeⁿ tan'dúúca chi nguéé yeⁿ'e iⁿ'yeēⁿdī 'úú. ¹⁷ Diíⁿ nī didεévē nī 'iⁿ'yāⁿ cucáávā nduudu cuaacu yeⁿ'é nī. Nduudu yeⁿ'é nī ní nduudu cuaacu. ¹⁸ Tan'dúúca chi dicho'ó nī 'úú iⁿ'yeēⁿdī 'tiicá ntúūⁿ dicho'ó 'iⁿ'yāⁿ s'eeⁿ iⁿ'yeēⁿdī. ¹⁹ Cáávā 'iⁿ'yāⁿ s'eeⁿ 'úú māaⁿ didεévē maáⁿ. Ní 'iⁿ'yāⁿ s'eeⁿ cuuví yā dεεve na nduudu cuaacu.

²⁰ Nguéé di'cuiitúú dámaaⁿ caavā 'iⁿ'yāⁿ miiⁿ ti cáávā 'iⁿ'yāⁿ chi cu'téenu yā 'úú cáávā nduudu yeⁿ'e 'iⁿ'yāⁿ s'eeⁿ. ²¹ Ní nducyaaca yā ní 'áámá nūuⁿ cuuví yā tan'dúúca n'dií canéé nī nduucú, ní caneé nduucú nī. Níicú 'iⁿ'yāⁿ s'eeⁿ ní canéé ntúūⁿ yā 'áámá nūuⁿ ndúúcu yú. Ní 'iicu cu'téenu 'iⁿ'yāⁿ yeⁿ'e iⁿ'yeēⁿdī chi n'dií dicho'ó nī 'úú. ²² Ní poder chi téé nī 'úú, miiⁿ ni ca'á 'iⁿ'yāⁿ. Ní 'áámá nūuⁿ cuuví yā tan'dúúca chi 'áámá nus'ūu. ²³ 'Úú ní ndúúcu 'iⁿ'yāⁿ s'eeⁿ. Ní n'dií ní ndúúcu 'úú. Níicú 'áámá nūuⁿ chi n'daacā cuuví yā. Ní iⁿ'yeēⁿdī ní cuuvi deenu chi dicho'ó nī 'úú ní chí dinéⁿ'e nī 'iⁿ'yāⁿ s'eeⁿ tan'dúúca chi neⁿ'é nī 'úú.

²⁴ N'dií Chiidá, 'iⁿ'yāⁿ s'eeⁿ chi teé nī 'úú, neⁿ'é chi naachi 'úú cuneéⁿ, 'iⁿ'yāⁿ s'eeⁿ cūnéé yā nduucú. Ní cuuvi n'diichí yā poder yeⁿ'é chi teé nī 'úú caati n'dií nī neⁿ'é nī 'úú ndií taachi 'āā 'cuéé iⁿ'yeēⁿdī. ²⁵ N'dií Chiidá chi dεεve, 'aa ntéé rá chi iⁿ'yeēⁿdī nguéé n'diichí n'dií 'úú n'diichí n'dií. Ní 'iⁿ'yāⁿ s'tíi ní deenu yā chi n'dií dicho'ó nī 'úú. ²⁶ 'Úú ní ngaⁿ'á yeⁿ'e chi duuchí nī, ní caⁿ'á ngāⁿ'aⁿ yeⁿ'e chi duuchí nī. Níicú maaⁿ vaadī neⁿ'e chi néⁿ'e nī 'úú cuuvi cunéé ndúúcu yā. Ní 'úú caneé ndúúcu yā.

18

Sta'á yā Jesús

(Mt. 26.47-56; Mr. 14.43-50; Lc. 22.47-53)

¹ Taachí Jesús caⁿ'á yā chuū, caⁿ'á yā ndúúcu discípulos yeⁿ'é yā táámá lado yíicú 'líiⁿ chi nguuvi Cedrón naachi canéé 'áámá cheēⁿ yeⁿ'e naāndā. Ní miiⁿ sndaā Jesús ndúúcu discípulos yeⁿ'é yā. ² Judas chí diiⁿ sa entregar Jesús ní n'diichi ntúūⁿ saⁿ'ā na cheēⁿ miiⁿ ti 'āā cánéé n'dee cuuví nduuvídáámá yā Jesús ndúúcu discípulos yeⁿ'é yā na cheēⁿ miiⁿ. ³ Saⁿ'ā chiiduú n'gεεté ndúúcu saⁿ'ā fariseos teé yā Judas Iscariote soldados ndúúcu policías ní Judas cueⁿ'e sa ndúúcu 'aama taaⁿ soldados ndúúcu policías. Ndaa yā na cheēⁿ miiⁿ ndúúcu lámparas, ndúúcu antorchas, ndúúcu armas. ⁴ Naati Jesús chi déenu yā tanducuéⁿ'ē dendu'ū chí cuchií, cueⁿ'e yā ní ndaa yā nanáaⁿ 'iⁿ'yāⁿ s'eeⁿ ní caⁿ'a yā: ¿Du'u in'nuúⁿ nī?

⁵ Ní nan'guεεcutáⁿ'a sa yeⁿ'e yā: Jesús yeⁿ'e yāāⁿ Nazaret miiⁿ. Tuu'mí ngaⁿ'a Jesús ngíi yā 'iⁿ'yāⁿ s'eeⁿ: 'Úú 'iⁿ'yāⁿ miiⁿ. Canéé ntúūⁿ Judas miiⁿ, saⁿ'ā chí diíⁿ nca'a sa 'iⁿ'yāⁿ. ⁶ Taachí Jesús caⁿ'a yā: 'Úú 'iⁿ'yāⁿ miiⁿ, tuu'mi ní saⁿ'ā s'eeⁿ ndaacadaamí yā ní ch'εetindiití yā na yáⁿ'āa. ⁷ Nan'guεεcúnéé ntuúⁿ yā tiinguuneeⁿ yā: ¿Du'u ra in'nuúⁿ nī? Ní 'iⁿ'yāⁿ s'eeⁿ ní caⁿ'a yā: Jesús yeⁿ'e yāāⁿ Nazaret miiⁿ.

⁸ Nan'guεεcutáⁿ'ā Jesús: 'Āā ngaⁿ'á ngíi ndís'tií chi 'úú. Ndúúti chi 'úú chi in'nuúⁿ nī, 'cuáaⁿ nī chi naⁿ'a 'iⁿ'yāⁿ s'tíi.

⁹ Ní cuuvi cuaacu chi 'úú chi caⁿ'á: 'Iⁿ'yāⁿ chí teé nī 'úú, mar 'áámá yā nguéé chi ndai yā. ¹⁰ Tuu'mi Simón Pedro chi ndée sa espada ní tun'dáa sa ní 'nuūcá'ai sa ní ch'iica sa

veeⁿ sa lado tá cuaacu yeⁿē sáⁿā chi diiⁿ mandado yeⁿe chiiduú ch'εεte ca. Ní saⁿā miiⁿ ní nguuvi sa Malco. ¹¹ Tuu'mí Jesús ngaⁿ'a yā ngii yā Pedro: N'nuūⁿ dí espada vaacu. Prueba chí teē Chiidá 'úú, ¿'áá nguéé cánéé chí 'cuenú cuuvi yeⁿē?

Jesús nanááⁿ chiiduú ch'εεté ca

(Mt. 26.57-58; Mr. 14.53-54; Lc. 22.54)

¹² Tuu'mi ní 'iiⁿ'yāⁿ yeⁿē 'áámá taaⁿ soldado ndúúcu soldado chi yuudu ndúúcu policías yeⁿē 'iiⁿ'yāⁿ Israel s'eeⁿ ní sta[']á sa Jesús ní cachiichí sa 'iiⁿ'yāⁿ. ¹³ Ní candéé sa vmnááⁿ vmaaaⁿ nanááⁿ saⁿ'ā chi nguuvi Anás, tii sáⁿ'ā miiⁿ ní nchaⁿ'ā ndiicú Caifás miiⁿ. 'Iiⁿ'yāⁿ miiⁿ ní chiiduú ch'εεté ca nduuyu miiⁿ. ¹⁴ Ní Caifás miiⁿ ca'a sá consejo saⁿ'ā Israel s'eeⁿ chí cánéé chí 'cuūvī 'aama saⁿ'ā cáávā 'iiⁿ'yāⁿ.

Pedro canéé yā chuva'ai yeⁿē Anás

(Mt. 26.69-70; Mr. 14.66-68; Lc. 22.55-57)

¹⁵ Ní n'daā Simón Pedro Jesús miiⁿ ní táámá discípulos. Ní chiiduú ch'εεté ca n'diichi yā discípulos miiⁿ chí sndaá sa ndúúcu Jesús corredor yeⁿē va'ai yeⁿē chiiduú ch'εεté ca miiⁿ. ¹⁶ Naati Pedro miiⁿ canéé sá cuaaⁿ dáámí cheendi va'āi. Ní can'dáā taama discípulo chí chiiduú ch'εεté ca n'diichi yā 'iiⁿ'yāⁿ. Ní yaa'ví yā n'daataá chí cánéé cheendi va'āi. Ní diiⁿ'yúⁿ yā Pedro míⁿ cheeti va'āi. ¹⁷ Tuu'mi ní n'daataá chí diiⁿ mandado chí cánéé cheendi va'āi ngaⁿ'a tá: ¿'Áá nguéé díí ntúūⁿ 'áámá discípulo yeⁿē saⁿ'a 'cūū? Tuu'mí Pedro ngaⁿ'ā sa: Nguéé 'úú.

¹⁸ Ní chééndii saⁿ'ā chí dichí'vē ndúúcu policías, saⁿ'ā miiⁿ tiivi sa yaⁿ'ā yeⁿe yíyū ti 'áámá 'iicheε. Saⁿ'ā miiⁿ nga'a tavii'nu sa. Ní canéé nī ntúūⁿ Pedro ndúúcu sa. Ní chééndii sa nga'a tavii'nu sa ca'a sa.

Anás tiinguunééⁿ sa Jesús

(Mt. 26.59-66; Mr. 14.55-64; Lc. 22.66-71)

¹⁹ Ní chiiduú ch'εεté cá miiⁿ nítiinguuneeⁿ sa Jesús yeⁿe discípulos yeⁿé yā ndúúcu yeⁿe chí Jesús chí'cueéⁿ yā. ²⁰ Jesús nan'guεεcutáⁿ'a yā yeⁿē sa: 'Úú ní ngaⁿ'á cuaacú nanááⁿ 'iiⁿ'yāⁿ yeⁿe iⁿ'yeēⁿdī. 'Úú ní chí'cueéⁿ na yaacū sinagogas ní na yaacū templo ntúūⁿ naachí nduuvidaama nducyaaca 'iiⁿ'yāⁿ Israel s'eeⁿ ní nguéé de'ē vεε chí ngaⁿ'a n'de'éeí. ²¹ ¿De'ē tínguúnééⁿ di 'úú? Tínguúnééⁿ dí 'iiⁿ'yāⁿ chí ch'iindiveéⁿ yā chí caⁿ'á chí 'iiⁿ'yāⁿ. N'diichi nī. 'Iiⁿ'yāⁿ s'eeⁿ déénú yā chí caⁿ'á.

²² Taachí Jesús ch'iinu caⁿ'á yā chuū, 'áámá policía chí cánéé miiⁿ ch'éⁿe sá Jesús, ní caⁿ'a sa: ¿'Áá 'tíicā nan'guεεcutáⁿ'a di yeⁿē chiiduú ch'εεte ca?

²³ Nan'guεεcutáⁿ'ā Jesús: Ndúúti chí nguεε n'daacā chí ngaⁿ'á caaⁿ'maⁿ di de'ē chí nguεε n'daacā chí ngaⁿ'á. Ndúúti chí n'daacā, ¿de'ē cuuvi chí n'geⁿ'ē di 'úú?

²⁴ Anás miiⁿ ní dichó'o sa Jesús ch'εεchiichí yā nanááⁿ saⁿ'ā chí nguuvi Caifás miiⁿ, saⁿ'ā chí chiiduú ch'εεté cá miiⁿ.

Pedro miiⁿ ngaⁿ'a sa taama vmnéⁿ'ēe chí nguéé n'diichi sa Jesús miiⁿ

(Mt. 26.71-75; Mr. 14.69-72; Lc. 22.58-62)

²⁵ Chééndii Simón Pedro miiⁿ ní nga'a tavii'nu sa saⁿ'ā. Ní ngaⁿ'a yā ngii yā saⁿ'ā: ¿'Áá nguéé 'tíicā chí díí ní discípulo yeⁿ'é yā? Pedro cheeⁿdítu sa ní ngaⁿ'ā sa: Nguéé 'úú.

²⁶ 'Áámá saⁿ'ā chí diiⁿ mandado yeⁿē chiiduú ch'εεté cá ní saⁿ'ā miiⁿ ní 'iiⁿ'yāⁿ yeⁿe saⁿ'ā chí chíca Pedro miiⁿ veeⁿ sa. Ngaⁿ'a sa ngii sa saⁿ'ā: ¿'Áá nguéé n'diichi dii cheeti chééⁿ naandā miiⁿ ndúúcu yā?

²⁷ Taama vmnéⁿ'ēe ní cheeⁿdiitú táaⁿ Pedro: Nguéé 'úú. Ní minⁿ'niinyu miⁿ'niiⁿ'yu ní tusaⁿ'ā chiita tī.

Jesús nanááⁿ Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Ní candéé sa Jesús miiⁿ tyaaⁿ tyaaⁿ yeⁿē nanááⁿ Caifás miiⁿ ndii naachi cánéé cuarto yeⁿē juzgado. Ní 'iiⁿ'yāⁿ s'eeⁿ ní nguéé chí ndaá yā cuaaⁿ cheeti va'ai ch'εεte miiⁿ cáávā chí nguéé neⁿ'e yā chí cuneedáámí yā nuuⁿndi taachi ch'éⁿe yā nguiínú yeⁿē pascua.

²⁹ Tuu'mi ní can'daā Pilato chuva'aī nanáán 'ii'nyān s'eeⁿ ní caⁿ'a sa: ¿De'ē nuuⁿndi yeⁿ'ē saⁿ'a 'cūū vεε?

³⁰ Nan'guεεcutáⁿ'a yā ní caⁿ'á yā 'ii'nyān: Ndúúti chi saⁿ'a 'cūū chi nguεε du'ū vεε diiⁿ sa, nguéeⁿ teé 'nū saⁿ'ā n'diī.

³¹ Tuu'mi ní ngaⁿ'ā Pilato ngii sa 'ii'nyān s'eeⁿ: Cuta'á nī 'ii'nyān. Ní n'diichí yā de'ē nuuⁿndi yeⁿ'e yā véé tan'dúúca chi canéeⁿ na ley yeⁿ'é nī. Níicú 'ii'nyān Israel s'eeⁿ ní caⁿ'a yā: Nús'uu ní nguéeⁿ cánéeⁿ chí 'caaⁿ'nuⁿ 'nū mar 'áámá 'ii'nyān.

³² Ní cuuvi cuaacu chi caⁿ'a Jesús miiⁿ. Ní caⁿ'a yā chí cadiinuuⁿ 'ii'nyān de'é vaadi n'gii 'cuuvi yā. ³³ Níiⁿnuuⁿ ndáá ntúūⁿ Pilato cuarto yeⁿ'ē juzgado. Ní 'cái sa Jesús miiⁿ ní caⁿ'a yā: ¿'Áá díi chi Rey yeⁿ'ē 'ii'nyān Israel s'eeⁿ chi judíos?

³⁴ Nan'guεεcútaⁿ'ā Jesús: ¿'Áá ngaⁿ'a dii chuū yeⁿ'e maāⁿ di o 'ii'nyān 'cūū ch'iⁿ'i yā ní ngaⁿ'a yā n'diī yeⁿ'ē 'úú?

³⁵ Pilato miiⁿ ní n'guεεcutáⁿ'a sa: ¿'Áá 'úú chi saⁿ'a Israel 'úú? 'Ii'nyān yeⁿ'e nación yeⁿ'ē di ndúúcu chiiduú n'geeté nteé yā dii 'úú. ¿De'ē ndiíⁿ di?

³⁶ Nan'guεεcútaⁿ'ā Jesús: Cuaaⁿ naachi 'úú chi 'ii'ntyēⁿ'e nguéeⁿ canéeⁿ iⁿ'yeeⁿdí 'cūū. Ndúúti chi yeⁿ'ē iⁿ'yeeⁿdí 'cūū naachi caaⁿ'maⁿ ntiiⁿnyúⁿ tuu'mi ní 'ii'nyān chi diiⁿ mandado yeⁿ'é ní 'cuuⁿ'maⁿ yā cáávā 'úú ni nguéeⁿ nica'á yā 'úú 'ii'nyān Israel s'eeⁿ. Maaⁿ ní cuaaⁿ naachi 'úú chi 'ii'ntyēⁿ'e nguéeⁿ yeⁿ'ē iⁿ'yeeⁿdí 'cūū.

³⁷ Tuu'mi ngaⁿ'a Pilato ngii sa 'ii'nyān: Tuu'mi, ¿'áá díi chi rey miiⁿ? Nan'guεεcútaⁿ'ā Jesús: Díi ngaⁿ'ā di chi rey 'úú ní 'tíicā 'úú. 'Úú ní cáávā chuū ch'iindiyaán, ní cáávā chuū chi ndáá iⁿ'yeeⁿdí 'cūū, caavā chi caaⁿ'maⁿ cuaacú yeⁿ'ē nduudu cuaacu. Nducyáácá 'ii'nyān chi yeⁿ'ē vaadi cuaacu miiⁿ, n'giindiveéⁿ yā nduudu yeⁿ'é.

Jesús canéeⁿ chí 'cuuvi yā

(Mt. 27.15-31; Mr. 15.6-20; Lc. 23.13-25)

³⁸ Tuu'mí ngaⁿ'ā Pilato: ¿Chεε chí vaadi cuaacu? Taachí caⁿ'a Pilato chúū ní can'dáá ntuúⁿ sa nanáán 'ii'nyān Israel s'eeⁿ ní caⁿ'a sa 'ii'nyān Israel s'eeⁿ: 'Úú ní nguéeⁿ ndaācá mar 'áámá nuuⁿndi yeⁿ'é yā. ³⁹ Naati cáávā costumbre yeⁿ'e ndís'tiī ní 'úú caneecúⁿmíⁿ chí ín'dεεchí 'áámá saⁿ'ā chi preso sa 'viicu yeⁿ'e pascua. ¿'Áá neⁿ'é nī chi in'dεεchí Rey yeⁿ'ē 'ii'nyān Israel s'eeⁿ?

⁴⁰ Tuu'mi ní 'cai ntúūⁿ nducyaaca yā, ní ngaⁿ'a yā: Nguéeⁿ 'ii'nyān 'cūū ti Barrabás. Níicú saⁿ'ā Barrabás miiⁿ ní neené duucu sa.

19

¹ Tuu'mi ní sta'āa Pilato Jesús miiⁿ ni ch'eⁿ'e sa 'ii'nyān. ² Ní soldados ní din'dáa sa 'áámá corona yeⁿ'ē yáán ní chi n'duu sá na tíⁿ yā. Ní chi nuúⁿ sa 'áámá catecai morado 'ii'nyān. ³ Ní caⁿ'a sa: Néené 'náán cānee di iⁿ'yeeⁿdi, dii, Rey yeⁿ'e 'ii'nyān yeⁿ'e Israel. Ní n'geⁿ'é sa 'ii'nyān.

⁴ Tuu'mí can'dáa ntuūⁿ Pilato chuva'aī. Ní caⁿ'ā sa chii sa 'ii'nyān s'eeⁿ: Cuin'diichí nī, tun'daá 'ii'nyān chuva'aī niicu tuumicadiinúⁿ nī chi nguéeⁿ n'diichí mar 'áámá nuuⁿndi yeⁿ'é yā.

⁵ Ní can'daā Jesús chuva'aī. Can'dée yā corona yeⁿ'e yáán ndúúcu catecai morado yā. Ní ngaⁿ'a Pilato miiⁿ: Cun'díichí nī saⁿ'ā.

⁶ Taachí n'diichí yā 'ii'nyān tuu'mi ní chiiduú n'geeté ndúúcu policías n'gai yiicu sa: Cu'nééⁿnga'á nī 'ii'nyān. Cu'nééⁿnga'á nī 'ii'nyān. Tuu'mi ngaⁿ'ā Pilato ngii yā 'ii'nyān s'eeⁿ: Cuta'a ndis'tiī 'ii'nyān, ní cu'nééⁿnga'á nī 'ii'nyān, ti 'úú ní nguéeⁿ indaacá mar 'áámá nuuⁿndi yeⁿ'e yā.

⁷ Nan'guεεcútaⁿ'ā 'ii'nyān Israel s'eeⁿ: Nús'uu ní cánéeⁿ ley yeⁿ'é 'nū. Ní tan'dúúca chi ngaⁿ'a ley miiⁿ canee chi 'cuuvī caati caⁿ'a yā chí maán yā Daiya Dendyuūs 'ii'nyān.

⁸ Taachí ch'iindiveeⁿ Pilato chuū dii'yā ca sá chii. ⁹ Chindáa ntuūⁿ sa cuarto yeⁿ'ē juzgado ní caⁿ'á yā chii yā Jesús: ¿Tíí 'ii'nyān dii? Naati Jesús ní nguéeⁿ caⁿ'a yā.

¹⁰ Tuu'mi ní caⁿa Pilato Jesús: Dii, ¿'áá nguεε ngaⁿá di yeⁿé? ¿'Áá nguéeé deenu di chi 'úú ní cúuví caaⁿmaⁿ ntiinyúⁿ chi cu'nééⁿnga'á nī dii, ní cuuvi n'tεechí ntúuⁿ dii?

¹¹ Nan'guεεcútaⁿá Jesús miiⁿ: Nguéeé du'ū vεε cuuvi diiⁿ di ndúúⁿcū 'úú ndúúⁿti chi nguéeé du'ū vεε ndii ca'a yeⁿé di yeⁿé va'ai chεeti nguuvi. 'Iiⁿyāⁿ chi tee yā 'úú chi preso 'úú nanáá n'diī, 'iiⁿyāⁿ miiⁿ dich'εεte ca nuuⁿndi yēⁿe yā.

¹² Ndíí tuu'mi ní neⁿe Pilato n'tεechi sa 'iiⁿyāⁿ. Naati 'iiⁿyāⁿ Israel s'eeⁿ n'gai yiicú yā ní ngaⁿa yā: Ndúúⁿti chi saⁿá 'cūū n'tεechi di, nguéeé dii amigo yeⁿé César. Nducyáácá 'iiⁿyāⁿ chi ngaⁿa yeⁿé yā chi maánⁿ yā rey ngaⁿa yā contra César.

¹³ Tuu'mí Pilato, taachi ch'iindiveeⁿ sa chuū, candée sa Jesús chuva'āi. Ní ch'iindi sa ná silla yeⁿe juzgado chí nguuvi Enlosado, ní nduudu hebreo neⁿe caaⁿmaⁿ Gabata. ¹⁴ Ní nguuvi chí dííⁿ yā ntiinyuⁿ yeⁿé 'viicu yeⁿé pascua, tan'dúúⁿcā ndiichúúví na nguuvi. Tuu'mí ngaⁿa Pilato 'iiⁿyāⁿ Israel s'eeⁿ: Cuin'diichí nī Rey yeⁿé nī.

¹⁵ Naati 'iiⁿyāⁿ s'eeⁿ 'caí yā diitú yā: Diví nī 'iiⁿyāⁿ, diví nī 'iiⁿyāⁿ, cu'nééⁿnga'á nī 'iiⁿyāⁿ. Tuu'mí ngaⁿa Pilato: ¿'Áá rey yeⁿé nī chí cu'nééⁿnga'á nī? Tuu'mí nan'guεεcútaⁿá saⁿá chiiduú n'gεεtε: Nguéeé rey yēⁿe 'nū caati 'āā César nuúⁿ.

¹⁶ Tuu'mi ní Pilato ca'á yā Jesús miiⁿ 'iiⁿyāⁿ s'eeⁿ ní 'iicu cu'nééⁿnga'á yā. Ní 'iiⁿyāⁿ s'eeⁿ sta'á yā Jesús miiⁿ ní candée yā 'iiⁿyāⁿ.

Cu'nééⁿnga'a yā Jesús ní ch'iī yā

(Mt. 27.32-44; Mr. 15.21-32; Lc. 23.26-43)

¹⁷ Ní Jesús candée yā cruz yēⁿe yā. Ní can'dáa yā na lugar chí 'áámá lado yeⁿe yáāⁿ Jerusalén chí nguuvi Calavera chí lugar 'Iini Nga'ai Tíiⁿ, 'iicu nduudu hebreo neⁿe caaⁿmaⁿ Gólgota. ¹⁸ Naachí cu'nééⁿnga'á yā Jesús ndúúⁿcū taa na 'uuví yā. 'Áámá yā 'áámá 'áámá lado 'iicu Jesús miiⁿ ní naavtáⁿá canuúⁿ yā. ¹⁹ Ní 'neeⁿ Pilato miiⁿ 'áámá letra chí n'duu sá nanááⁿ cruz ní canée nguūⁿ miiⁿ, Jesús yeⁿé yāāⁿ Nazaret, Rey yeⁿe 'iiⁿyāⁿ yeⁿe ndaata yeⁿe Israel. ²⁰ Ní neené 'yaaⁿ 'iiⁿyāⁿ Israel s'eeⁿ ch'eéⁿ yā letra 'cūū ti nááchí cu'nééⁿnga'a yā Jesús miiⁿ niiⁿnuúⁿ na yáāⁿ Jerusalén miiⁿ. Canée nguūⁿ miiⁿ na nduudu hebreo ndúúⁿcū nduudu griego ndúúⁿcū nduudu latín. ²¹ Ní ngaⁿa saⁿá chiiduú n'gεεtε yeⁿé 'iiⁿyāⁿ Israel s'eeⁿ ngii sa Pilato: Nguéeé 'neeⁿ di Rey yeⁿé 'iiⁿyāⁿ yeⁿe ndaata yeⁿe Israel naati maánⁿ yā ngaⁿa yā: 'Úú Rey yeⁿe 'iiⁿyāⁿ yeⁿe Israel 'úú.

²² Nan'guεεcútaⁿá Pilato saⁿá miiⁿ: Chiiⁿ 'neéⁿ 'āā 'neéⁿ.

²³ Taachi soldados chí 'neeⁿnga'á sa Jesús, sta'á sa catecai yā ní diīⁿ sa repartir catecai yā. Niicu 'áámá 'áámá táánⁿ catecai yā 'aama soldado. Abrigo catecai yā miiⁿ nguéeé n'deenyú ndii 'nííⁿnúⁿ ndíí cuaaⁿ ndiyya. ²⁴ Ní caⁿa sa nguaaⁿ maánⁿ sa: Nguéeé 'canuu cuūⁿ yú naati tun'daí yú suerte yeⁿé yú nduūcū. Du'ú yeⁿé cuuvi. Ní 'iicu cuuví cuaacu naachí canee nguūⁿ chí ngaⁿá:

Nca'á yā catecaí nguaaⁿ maánⁿ yā, ní na catecaí ch'ií yā suerte.

Ní soldados ní diīⁿ sa chuū.

²⁵ Ní chεecuú Jesús miiⁿ canée yā niiⁿnuúⁿ ná cruz yeⁿe Jesús ndúúⁿcū ví'í chεecuú yā chí nguuvi María chí n'daataá yeⁿé Cleofas, ndúúⁿcū María Magdalena. ²⁶ Taachí n'diichi Jesús chεecú yā ndúúⁿcū discípulos chí ya'āi 'iinú yā chí canee niiⁿnuúⁿ tuu'mi ní Jesús ngaⁿá yā ngii yā chεecú yā: N'diī n'daataá, cun'dííⁿchí nī daiya nī. ²⁷ Tuu'mi ní ngaⁿa yā ngii yā discípulo: Cun'diichi di, 'ííngaā chεecu di. Ndíí tuu'mi ní discípulo miiⁿ ní dichεecú yā 'iiⁿyāⁿ.

Jesús ch'iī yā

(Mt. 27.45-56; Mr. 15.33-41; Lc. 23.44-49)

²⁸ Cho'ó tanducueⁿé chuū ní déénú Jesús chí tanducueⁿé dendu'ū ní 'āā chii cuaacu. Niicu naachi canee nguūⁿ nííⁿcú cuuvi cuaacu. Ngaⁿa Jesús: Yaacá.

²⁹ Mííⁿ canee 'áámá vaso ndiitu vinagre. Tuu'mi ní 'áámá soldado dicuutu yā 'áámá esponja ndúúⁿcū vinagre. Ní chí 'neeⁿ yā na áámá yáⁿá hisopo. Ní s'neeⁿ yā na cheendi Jesús. ³⁰ Taachí Jesús chí'í yā vinagre, caⁿa yā: Ch'ííⁿú tanducueⁿé dendu'ū. Ní nadicua'á yā tiiⁿ yā chí n'neéⁿ maánⁿ yā espíritu yēⁿe yā.

Soldado n'da'ai yā 'iini 'tiicua Jesús ndúúcu 'aama lanza

³¹ Tuu'mi ní caati nguuví viernes chi díñ yā ntiinyuⁿ yeⁿ 'ē 'viicu pascua miiⁿ, ní 'iiⁿ yāⁿ Israel s'eeⁿ di'cuíftu sa Pilato chi 'cúuⁿ māⁿ sa 'ííni ca'a saⁿ ā s'eeⁿ ní candéε sa cuerpo yeⁿ 'é yā. Caati nguéé neⁿ 'é sa chi canée cuerpo yeⁿ 'é yā na cruz nguuví sábado miiⁿ caatí sábado ní nguuví ch'εεte yeⁿ 'e 'viicu pascua. ³² Ní ndaā soldados ní ndaa sa nanááⁿ saⁿ ā chi vmnááⁿ vmnaaⁿ. 'Tíicā 'cuúⁿ sa ca'a sa. 'Tíicā 'cuúⁿ ntúūⁿ sa ca'ā taama sa. ³³ Naati taachí ndaa sa nanááⁿ Jesús miiⁿ, ní caati n'diichí yā chi 'āā n'dii Jesús nguéé 'cuúⁿ sa ca'a yā.

³⁴ Naati 'áámá soldado n'da'ai sa tiicua Jesús ndúúcu 'aama lanza ní can'daā yuuúⁿ ndúúcu nuūⁿ nīⁿ. ³⁵ 'iiⁿ yāⁿ chí n'diichí yā ngaⁿ 'á yā nduudu cuaacu. Níicú chiiⁿ chí ngaⁿ 'á yā. Miiⁿ ní cuaacu chííⁿ. 'Iicu déenu yā chí ngaⁿ 'á yā nduudu cuaacu níicú ndís'tií ntúūⁿ ní cu'teenú nī. ³⁶ Níicú chuū cho'ōo ní cúuví cuaacu chí canée nguūⁿ na libro yeⁿ 'e Ndyuūs: Mar 'áámá 'iini yeⁿ 'é yā nguéé 'cúuⁿ sa. ³⁷ Ní taama naachi canée nguūⁿ ní ngaⁿ 'ā: N'diichí yā 'iiⁿ yāⁿ chí cho'ōo nééⁿ tiicua yā.

S'nuúⁿ yā Jesús chεeti yáinyāⁿ

(Mt. 27.57-61; Mr. 15.42-47; Lc. 23.50-56)

³⁸ Cho'ōo chuū. José yeⁿ 'ē yāāⁿ Arimatea chí 'áámá discípulo yeⁿ 'e Jesús n'de'ei n'de'íi nūuⁿ ti 'va'a sa 'iiⁿ yāⁿ Israel s'eeⁿ, di'cuíftu sa Pilato miiⁿ chí cuuví candéε sa cuerpo yeⁿ 'ē Jesús. Ní 'cuūⁿ Pilato saⁿ ā miiⁿ. Tuu'mi ní ndaā sa ní nadvíi sa cuerpo yeⁿ 'ē Jesús miiⁿ ní candéε sa cuerpo miiⁿ. ³⁹ Ndaa ntúūⁿ Nicodemo, saⁿ ā chí vmnaaⁿ indaá sá nanááⁿ Jesús miiⁿ 'aama n'gaaⁿ, ní ndéε sa 'áámá perfume chí ndístaⁿ ā perfume yeⁿ 'ē mirra ndúúcu áloes. Ngí tanduu 'áámá ciento libras. ⁴⁰ Sta'á yā cuerpo yeⁿ 'e Jesús ní ch'εécú yā ná tiinūuⁿ ndúúcu perfume miiⁿ, tan'dúúcā costumbre yeⁿ 'ē 'iiⁿ yāⁿ Israel s'eeⁿ taachí n'giichí yā tinaⁿ ā. ⁴¹ Ní lugar miiⁿ naachi chí'neeⁿ nga'a yā, miiⁿ canée 'áámá chéēⁿ naāndā. 'Íicú chεeti chéēⁿ miiⁿ canée 'áámá yáinyāⁿ ngai. Mar 'áámá 'iiⁿ yāⁿ nguéé in'nuúⁿ yā chεeti. ⁴² Cáávā chí nguuví viernes chí ch'iindiyaáⁿ yā yeⁿ 'e 'viicú yeⁿ 'e pascua yeⁿ 'ē 'iiⁿ yāⁿ Israel s'eeⁿ, s'nuúⁿ yā cuerpo Jesús miiⁿ chεeti yáinyāⁿ miiⁿ chí canee niiⁿ nuúⁿ.

20

Jesús nduuchi yā yeⁿ 'e nguaaⁿ tináⁿ ā

(Mt. 28.1-10; Mr. 16.1-8; Lc. 24.1-12)

¹ 'Áámá domingo chí nguuví vmnááⁿ vmnaaⁿ yeⁿ 'e ndεetē miiⁿ tá María Magdalena nééne 'da'a ca ndaā tá na yáinyāⁿ. Ní n'diichi tá tuūu miiⁿ chí ndiivíi na yáinyāⁿ. ² Tuu'mi ní n'daataá ngéenu tá nanááⁿ Simón Pedro ndúúcu táámá discípulo, 'iiⁿ yāⁿ chí dinéⁿ 'e taavi yā Jesús. Tuu'mí ngaⁿ 'ā tá ngii tá saⁿ ā s'eeⁿ: 'Āā ndiivíi yā Jesús miiⁿ ná chεeti yáinyāⁿ, ní nguéé deenu yú tíi n'nééⁿ yā 'iiⁿ yāⁿ.

³ Ní can'dáā Pedro miiⁿ ndúúcu taama discípulo ní ndaá yā na yáinyāⁿ. ⁴ Ngéenu, ngéenu nduu 'uuví yā. Táámá discípulo diitu cá chéenu sa nguéé ti Pedro, ní ndaá vmnaaⁿ sa na yáinyāⁿ. ⁵ Can'díi sa ní n'diichi sa. Ní n'diichi sá chí 'aa dámaaⁿ tiinūuⁿ miiⁿ snúūⁿ naati nguéé chí ndaa sa chεeti yáinyāⁿ. ⁶ Simón miiⁿ ní sndaā sa chεeti yáinyāⁿ. Ní n'diichi sa tiinūuⁿ miiⁿ naachi snúūⁿ. ⁷ Niicu pañuelo ch'εεte ca tíiⁿ nguéé dáámá tiinūuⁿ lino. Ndéetií nduu cánéé táámá cuaaⁿ. ⁸ Tuu'mi ní sndaā ntúūⁿ táámá discípulo chí ndaā vmnááⁿ vmnaaⁿ ná yáinyāⁿ ní n'diichí yā ní chí'téenu yā. ⁹ Tii nguéé déenu yā chí canée nguūⁿ chí Jesús miiⁿ cuuví nduuchí yā yeⁿ 'ē nguaaⁿ tináⁿ ā. ¹⁰ Ní nguεcundií discípulos ná vaacu yā.

Jesús nndaaca yā María Magdalena

(Mr. 16.9-11)

¹¹ Naati tá María canee ta chúva'āi yáinyāⁿ. Neené ngεecu tá. Ní di'cua'ái naaⁿ tá n'diichi tá chεeti yáinyāⁿ. ¹² Ní n'diichí tá na 'uuví ángeles ndúúcu catecaí yā cuéē. 'Áámá ángel miiⁿ vεε yā cuaaⁿ tíiⁿ naachi canúúⁿ cuerpo Jesús miiⁿ ní táámá yā vεε yā cuaaⁿ

ndiia. ¹³ Ní caⁿá yā: Díí n'daataá, ¿de'ē cúúví chí ngeecu di? Tuu'mí ngaⁿa tá: Caati candée yā Señor yeⁿé, ní nguée deenú tíí s'neeⁿ yā 'iiⁿyāⁿ.

¹⁴ Taachi caⁿa tá chuū, ndaacadaami tá. Ní n'diichi ta Jesús chi canée yā miiⁿ naati nguée deenu tá chi Jesús miiⁿ. ¹⁵ Tuu'mí ngaⁿa Jesús ní ngii yā táⁿā: Díí n'daataá, ¿de'ē cúúví chí ngeecu di? ¿Du'ū in'nuuⁿ di? 'Iicu n'daataá miiⁿ ní nacadínuuⁿ tá chi 'iiⁿyāⁿ 'cūū ní 'iiⁿyāⁿ chi diiⁿ cuidado yeⁿē chēē yeⁿe naāndā miiⁿ. Ní caⁿa tá: Señor, ndúúti chi dii candée di 'iiⁿyāⁿ cuuvi di 'úú tíí chi'neeⁿ dí 'iiⁿyāⁿ ní 'úú ní candée 'iiⁿyāⁿ.

¹⁶ Tuu'mi ngaⁿa Jesús miiⁿ: María. Nguēcundíí ntuūⁿ ta ní ngaⁿā ta: Raboni. (Nduudu 'cūū neⁿe caaⁿmaⁿ, Maestro.)

¹⁷ Tuu'mí ngaⁿa Jesús: Nguée tuū'ví di 'úú caati 'āā cuée caⁿá nanááⁿ Chiidá. Naati dii, cuéⁿe di n'diichi di hermanos yeⁿe yú ní caaⁿmaⁿ di cuuvi di 'iiⁿyāⁿ: Caⁿá nanááⁿ Chiidá ní nanááⁿ Chiida yú, nanááⁿ Ndyuūs yeⁿé ní nanááⁿ Ndyuūs yeⁿé yú.

¹⁸ Cheⁿe tá María Magdalena nanááⁿ discípulos ní caⁿa tá chi n'diichi tá Jesús miiⁿ. Caⁿa tá chii tá discípulos nduudu chi Jesús miiⁿ caⁿa yā chii yā táⁿā.

Jesús ndaacá yā discípulos

(Mt. 28.16-20; Mr. 16.14-18; Lc. 24.36-49)

¹⁹ Chii chí nguiñū yeⁿe maāⁿ nguuvi domingo mííⁿ, nguuvi vmnááⁿ vmnaaⁿ yeⁿē ndeete miiⁿ ní naachi snūūⁿ discípulos ní nduudí cheendi va'āi miiⁿ caati 'va'á yā 'iiⁿyāⁿ Israel s'eeⁿ. Ndaa Jesús miiⁿ. Ní canée yā naavtaⁿā 'iiⁿyāⁿ s'eeⁿ. Ní caⁿa yā: Cuuvi 'diiⁿ ndúúcu ndís'tií.

²⁰ Taachí caⁿa yā chuū, ní ch'iⁿi yā ta'á yā ndúúcu tiicuáá yā. Ní discípulos yeenú taaví yā chí n'diichí yā Jesús. ²¹ Tuu'mí ngaⁿā ntúūⁿ Jesús ngii yā 'iiⁿyāⁿ: Cuuvi 'diiⁿ ndúúcu ndís'tií. Tan'dúúca chi dichó'o Chiidá 'úú, 'tiicá ntúūⁿ 'úú dicho'ó ndís'tií.

²² Taachí caⁿa yā chuū tiivineeⁿ yā 'iiⁿyāⁿ ní caⁿa yā: Cuta'á nī Espíritu N'dai yeⁿé Ndyuūs. ²³ 'Iiⁿyāⁿ chí ndís'tií nadich'εecu nī nuūⁿndi yeⁿé yā, ní 'āā nach'εecu yeⁿé yā. 'Iiⁿyāⁿ chí nguée nadich'εecu nī nuūⁿndi yeⁿé yā, 'āā nguée nach'εecu yeⁿé yā.

Nguée chi'teenú Tomás

²⁴ Naati Tomás 'áamá discípulo chi nguuvi Dídimó chi Gemelo nguée cúnée sá ndúúcu saⁿā s'eeⁿ taachi Jesús miiⁿ ndaá yā. ²⁵ Chíí tan'duuvi discípulos miiⁿ ngaⁿa yā ngii yā saⁿā: N'diichí 'nū Señor miiⁿ. Saⁿā miiⁿ ní ngaⁿa sa ngii sá 'iiⁿyāⁿ s'eeⁿ: 'Úú ní nguée cu'teenú ndúúti chí nguée n'diichí, ní nguée tiinguú nduutita'á naachí ch'εechi clavos, ní tiinguú ta'á ná tiicuáá yā.

²⁶ Ch'iinu niini nguuvi vete ntúūⁿ discípulos snée yā cheti va'āi. Mííⁿ canée Tomás ndúúcu yā. Ní nduudí cheendi va'āi miiⁿ. Ndaa ntúūⁿ Jesús miiⁿ. Ní canúuⁿ yā naavtaⁿā ní caⁿa yā: Cuuvi 'diiⁿ ndúúcu ndís'tií.

²⁷ Tuu'mí ní Jesús ngaⁿa yā ngii yā Tomás miiⁿ: Tiingúú nduutitá'a di 'muuⁿ ní n'diichi di ta'á. Ní tiingúú ta'a di ndii 'muuⁿ ní tiingúú ta'a di tiicuáá. Ní nguée chí nguée cu'téenu dí, canée chí cu'téenu dí.

²⁸ Tuu'mi ní Tomás miiⁿ ní caⁿā sa: N'dií Señor yeⁿé. N'dií Dendyuūs yeⁿé.

²⁹ Tuu'mi ní ngaⁿa Jesús miiⁿ: Tomás, díí ní chi'téenu di tii n'diichi di 'úú. N'daí 'iiⁿyāⁿ chí nguée n'diichi yā 'úú ní chi'téenu yā.

¿De'ε cúúví chí véé libro 'cūū?

³⁰ Ní néené n'deē ca señales chí ch'iⁿi Jesús nanááⁿ discípulos yeⁿé yā chí nguée canée nguūⁿ na libro 'cūū. ³¹ Naati chuū ní canée nguūⁿ nícu cuuvi cu'téenu di chí Jesús miiⁿ chí Cristo chí Daiya Dendyuūs. Ní chí cu'téenu di 'iiⁿyāⁿ ní cunee ndúúcu vida cueⁿe daāⁿmaⁿ cáāvā chí duuchi yā.

21

Jesús ndaacá yā ndεēchē discípulos yeⁿé yā

¹ Cuayivi chí cho'ōo chuū chiináāⁿ ntúūⁿ maaⁿ Jesús miiⁿ yeⁿē discípulos yeⁿé yā niiⁿnuúⁿ ná yaana nuuⁿniⁿyáⁿā chí nguuvi Tiberias ní 'túúca chiináāⁿ yā. ² Ndidaama yā

Simón Pedro ndúúcu Tomás miiⁿ chi nguuvi Dídimó chi Gemelo, ndúúcu Natanael saⁿá yeⁿe yááⁿ Caná yeⁿe yáⁿá Galilea, ndúúcu na 'úúví saⁿá daiya Zebedeo ndúúcu táá na 'uuvi discípulos yeⁿe Jesús. ³ Tuu'mí ngaⁿa Simón Pedro: Caⁿá tungaáⁿ 'yaācā. Tuu'mí ngaⁿá 'iiⁿyāⁿ s'eeⁿ ngii yā saⁿá: Caⁿá ntúuⁿ nús'uu ndúúcu di. Ní cueⁿe yā ní chindáa yā na 'áámá barco. Nguīnū miiⁿ nguéé sta'á yā mar 'áámá tī. ⁴ Chi deēve táámá nguuvi, Jesús ní caneé yā cuaaⁿ 'diitú yā yaana nuuⁿniⁿyāⁿ naati discípulos nguéé túmicadínuuⁿ yā chi Jesús miiⁿ. ⁵ Ní caⁿa yā chii yā saⁿá s'eeⁿ: Ndís'tiī, saⁿá n'gaiyāāⁿ ¿'áá véé chi tungaaⁿ di chi che'e yú? Nan'guēcutáⁿa yā yeⁿe yā: Nguéé.

⁶ Tuu'mi ní ngaⁿa yā ngii yā saⁿá s'eeⁿ: Caⁿnuúⁿ nī yaāna lado ta cuaacu yeⁿe barco miiⁿ ní ndaacá nī. Tuu'mi ní chi'nuúⁿ yā yaāna tíí ní 'āā ntεε ngii dííⁿ yā tun'dáa yā chi neené tááⁿ n'gii 'yaācā. ⁷ Tuu'mi ní discípulo chi neené diya'āi 'íínu Jesús ngaⁿá sa ngii sa Pedro: Señor miiⁿ 'iiⁿyāⁿ s'tíí. Ní Simón Pedro, taachi ch'iindiveeⁿ sa chi Jesús miiⁿ nuⁿnuúⁿ sá catecai sa ti dámaāⁿ ngáaⁿ sa, ní chindáa sa chεeti yaana nuūⁿniⁿyāⁿ. ⁸ Ni tanduu 'uuvi discípulos ndaá yā ndúúcu barco ti nguéé dáanā yaⁿái chi chinée yā yeⁿe yáⁿáa miiⁿ ti tandúú na cuūúⁿ ngeecu ndiichi metros. Ngíí n'daā yā yaāna yeⁿe 'yaācā. ⁹ Taachí n'cheéⁿ yā yáⁿáa miiⁿ n'diichí yā n'giichi yáⁿá. Ní 'áámá 'yaācā nduú tī nanááⁿ nduucyáⁿá. Ní n'diichí yā pan. ¹⁰ Tuu'mí ngaⁿa Jesús ngii yā saⁿá: Teé nī ta n'duuvi 'yaācā chí caama sta'á nī maaⁿ.

¹¹ Cucheε Simón Pedro ní nandée sa yaāna na yáⁿáa miiⁿ ndiituu 'yaācā n'geeté, ngii 'áámá ciento 'uuvī ngeecu n'diichi 'íínu, ní yaāna miiⁿ nguéé chi teēⁿ n'dáá rá chi n'dee taaví 'yaācā. ¹² Tuu'mi Jesús ngaⁿa yā ngii yā saⁿá s'eeⁿ: Cuchií nī ca'diinú nī. Mar 'áámá discípulo miiⁿ nguéé tiinguuneeⁿ yā 'iiⁿyāⁿ: ¿Du'u rá díí? Ti 'āā deenú yā chi Jesús miiⁿ. ¹³ Ndaā Jesús miiⁿ ní sta'á yā pan ní ca'a yā 'iiⁿyāⁿ. 'Tííca nī ntúūⁿ dííⁿ yā ndúúcu 'yaācā.

¹⁴ 'Áā chíí 'iinu cuuvi chi n'geenaāⁿ Jesús yeⁿe discípulos yeⁿe yā taachí 'āā nnduuchi yā nguaaⁿ tináⁿá.

Ca'a di chi ché'é 'iiti cuūchī yeⁿe

¹⁵ Taachí ch'iinu ca'diinú yā, Jesús ngaⁿa yā ngii yā Simón Pedro: Simón, díí daiya Jonás, ¿'áá neⁿe ca di 'úú, nguéé ti chuū? Tuu'mí ngaⁿa sa ngii sa Pedro: 'Tííca, Señor, n'diī ní déénú nī chi neⁿe n'diī. Ngaⁿa yā ngii yā saⁿá: Ca'á di 'iiti cuūchī 'lín yeⁿe chí che'é tī.

¹⁶ Jesús ní ntinguuneeⁿ ntuúⁿ yā yeⁿe saⁿá naachi ndii 'uuvi cuuvi: Simón, díí daiya Jonás, ¿'áá neⁿe di 'úú? Nan'guēcutáⁿa sa yēⁿe yā: 'Tííca, Señor, n'diī ní déénú nī chi neⁿe n'diī. Tuu'mí ngaⁿa yā ngii yā saⁿá: Ca'á dí 'iiti cuūchī yeⁿe chí che'é tī.

¹⁷ Tuu'mí ngaⁿa yā ngii yā saⁿá naachi ndii chííⁿ ndii 'íínu cuuvi: Simón, dii saⁿá daiya Jonás, ¿'áá neⁿe di 'úú? Canée ndaachi yiínú Pedro chí 'āā naachi ndii chííⁿ ndii 'íínu cuuvi yaa'ví yā saⁿá: ¿'Áá neⁿe di 'úú? Tuu'mí ngaⁿa sa ngii sa 'iiⁿyāⁿ: Señor, n'diī déénú nī tanducuéⁿe dendu'ū. Maaⁿ ní deenu nī chi neⁿe n'diī. Tuu'mí ngaⁿa Jesús ngii yā saⁿá: Ca'á dí 'iiti cuūchī yeⁿe, chí che'é tī. ¹⁸ Cuaacu níínyúⁿ cuācū niiⁿnyuⁿ ngaⁿá ngii dii: Taachi saⁿá 'lín dii in'nuuⁿ canúúⁿ dí catecai di ní cheⁿe di naachi neⁿe di. Naati taachí 'āā cuuvi ndiicú di ndoo tá'a di ní táámá 'iiⁿyāⁿ in'nuúⁿ yā catecai di ní candée yā dii naachi nguéé neⁿe di.

¹⁹ Ní chuū Jesús caⁿa yā ní ngá'a yā chi cádiinuuⁿ sa de'é vaadī n'giī diiⁿ honrar Dendyuūs miiⁿ. Ch'iinu caⁿa yā chuū, tuu'mí ngaⁿa yā ngii yā Simón Pedro: Can'dáa di 'úú.

Discípulo chi neⁿe taavi Jesús

²⁰ Nguēcundí Pedro miiⁿ n'diichi sá discípulo chi dineⁿe Jesús, discípulo chi cueⁿe sa ndúúcu Jesús. Sáⁿá chi candiitínee sa 'iiⁿyāⁿ taachi 'āā caama chí che'e nguīnú yā. Ní 'āā caⁿa yā chii yā saⁿá: Señor, ¿du'ū chí canée chí diiⁿ entregar n'diī? ²¹ Taachi Pedro miiⁿ n'diichi sa discípulo miiⁿ tuu'mí ngaⁿa yā ngii yā Jesús: Señor, ¿de'ε idiiⁿ sáⁿá tíí?

²² Tuu'mí ngaⁿá Jesús ngii yā saⁿá: Ndúúti chí 'úú chí neⁿe chí cunee sá ndii taachi nindaá, ¿de'é ineeⁿ di chííⁿ? Díí can'dáa di 'úú.

²³ Caāvā nduudu 'cūū tuumicadiinuuⁿ vi'ī s'eeⁿ chi discípulo miiⁿ nguéeé canéeé chi 'cuūvī sa. Naati Jesús ní nguéeé caⁿ'á yā chi nguéeé 'cuūvī sa, naati Jesús caⁿ'a yā: Ndúúti chi 'úú chi neⁿ'é chi cunee sá ndii taachi nindaá, ¿de'é ineeⁿ di chííⁿ?

²⁴ Saⁿ'á 'cūū discípulo chi ngaⁿ'ā cuaacu sa yeⁿ'ē chúū. Ní idingúuⁿ sa chuū. Ní deenu yú chi chiiⁿ chi ngaⁿ'a sa ní nduudu cuaacu ní cuaacu nííⁿnyúⁿ chi nduudu cuaacu.

²⁵ Neené n'deēe n'dái cosa chi diíⁿ Jesús miiⁿ. Ndúúti chi canéeé nguūⁿ 'áámá 'áámá cosa 'úú nadacadíinúúⁿ chi maaⁿ rá iⁿ'yeēⁿdí 'cūū nguéeé tunéeⁿ libros chi canéeé nguūⁿ yeⁿ'e chuū. 'Tíicā chiī.

CHUŪ CHI DIIⁿ APÓSTOLES

Dendyuūs caⁿ'a yā chi tée yā Espíritu N'dai

¹ Dii Teófilo, taachí vmnááⁿ vmnaaⁿ dinguún yeⁿ'e di, caⁿ'á yeⁿ'e tanducueⁿ'ē chi 'túucā diiⁿ Jesús ní ca'cueén yā, ² ndii nguuvi chí cunaⁿ'ā Jesús va'ai chēeti nguuvi. Vmnááⁿ vmnaaⁿ chi cunaⁿ'ā Jesús miiⁿ ch'íínú ca'a yā orden yeⁿ'é yā apóstoles caava Espíritu N'dai yeⁿ'e Ndyuūs. Jesús ndēevé yā ní dichó'o yā apóstoles. ³ Jesús ch'eenú yā chiī ní ch'iī yā. Cuayiivi taachi 'āā ch'iī yā néené n'dee nááⁿ chíín ch'iⁿ'i maáⁿ yā yeⁿ'é yā tan'dúucā chí 'āā cueē 'cuuvi yā vmnááⁿ apóstoles caati apóstoles cuuvi déenu yā chi cánduuchi ntuuⁿ yā. Canée yā ndúucū apóstoles yeⁿ'é yā 'uuvi ngēecu nguuvi ní caⁿ'a yā yeⁿ'ē chi Dendyuūs ngaⁿ'a ntiiⁿnyúⁿ yā. ⁴ Taachí ndii dáámá yā tuu'mi ní Jesús caⁿ'a ntiiⁿnyúⁿ yā apóstoles. Nguéé náⁿ'a nī yeⁿ'e yááⁿ Jerusalén naati cunee ngínú nī yeⁿ'ē chi caⁿ'a Chiida yú chi tée yā. Chuū chi 'āā ch'iindiveén nī yeⁿ'ē 'úú. ⁵ Juan cuaacu nííⁿnyúⁿ chi ndúucū nuuⁿnīⁿ chēdinuūⁿnīⁿ sa naati ndís'tiī ní cueēdinuūⁿnīⁿ nī ndúucū Espíritu N'dai yeⁿ'e Ndyuūs.

Jesús cuchée yā

⁶ Tuu'mi ní saⁿ'a chi ndúúvidáámá nitinguunéeⁿ yā 'iiⁿ'yāⁿ ní ngaⁿ'á yā: Señor Jesús, ¿'áá nadicueén ntuuⁿ nī taama saⁿ'ā Israel chí caaⁿ'maⁿ ntiiⁿnyuⁿ sa yeⁿ'e 'iiⁿ'yāⁿ Israel maaⁿ nguuví 'cūū? ⁷ Ní ngaⁿ'a Jesús ngii yā 'iiⁿ'yāⁿ: Nguéé ituneeⁿ ndís'tiī chí cadíínuuⁿ nī dē'ε tiempo o dē'ε nguuvi yeⁿ'ē chuū chí Chiida yú s'neeⁿ yā na poder yeⁿ'e maáⁿ yā. ⁸ Naati cuta'á nī poder chí diitú nī taachi 'āā ndaa Espíritu N'dai yeⁿ'e Ndyuūs vmnaaⁿ yeⁿ'é nī. Ní ndís'tiī ní caaⁿ'máⁿ nī nduudu cuaacu yeⁿ'é na yááⁿ Jerusalén ndii nuuⁿmaⁿ yáⁿ'āa Judea, ndii yáⁿ'āa Samaria, ndii núúⁿmáⁿ iⁿ'i'yeēⁿdī. ⁹ Ní ch'íínú caⁿ'a yā chuū taachi n'diichi saⁿ'ā s'eeⁿ Jesús cuchée yā ní che'enaāⁿ sa 'iiⁿ'yāⁿ ná meēⁿ. Ní 'āā ntée snaaⁿ saⁿ'a s'eeⁿ 'iiⁿ'yāⁿ.

¹⁰ Ní saⁿ'ā s'eeⁿ ní n'gínú sá nanguuvi. Taachí 'āā cuchée Jesús, n'diichi sa na 'uuvi saⁿ'ā chí ángel chineē ndúucu sa ndúucū catecai cueē sa. ¹¹ 'Úuvi 'iiⁿ'yāⁿ miiⁿ ní ngaⁿ'a yā ngii yā saⁿ'ā s'eeⁿ: Ndís'tiī saⁿ'a yeⁿ'e yáⁿ'āa Galilea, ¿dē'ε n'gínú nī nanguuvi? Maāⁿ Jesús chí cunaⁿ'a yā yeⁿ'e ndís'tiī nanguuvi 'tíicā ndaa túuⁿ yā tan'dúucā chí n'diichí nī 'iiⁿ'yāⁿ cuinaⁿ'á yā nanguuvi.

Ndēevé yā saⁿ'ā lado yeⁿ'e Judas

¹² Can'dáa yā ná yiicū 'lííⁿ chí nguuvi Olivos chí canée niiⁿnuⁿ ná yááⁿ Jerusalén ní ndáá yā na yááⁿ Jerusalén. Distancia 'cūū chí ngaⁿ'a ley chí cuuvi caacá yā sábadu nguuvi chí ntaavi'tuunuúⁿ yā. ¹³ Ndaá yā na yááⁿ miiⁿ. Chéé yā na cuarto yaacu naachi cānee Pedro, ndúucū Jacobo, ndúucū Juan, ndúucū Andrés, ndúucū Felipe, ndúucū Tomás, ndúucū Bartolomé, ndúucū Mateo, ndúucū Jacobo dáiyā saⁿ'ā chí nguuvi Alfeo, ndúucū Simón Zelote, ndúucū Judas chí 'diinū Jacobo. ¹⁴ Nducyáácá 'iiⁿ'yāⁿ s'eeⁿ ndúucū n'daata s'eeⁿ ndúucū María chí chēecu Jesús ndúucu 'díínu Jesús nduuvidaamá yā ní 'áámá vaādī cadíinúúⁿ yeⁿ'é yā ní ngaⁿ'angua'á yā ní di'cuiitú yā Dendyuūs. ¹⁵ 'Iiⁿ'yāⁿ chí nduuvídaama miiⁿ ngii yā tan'dúucā 'áámá ciento canee ndiicú yā. Hora miiⁿ nacueén Pedro naavtaⁿ'a yeⁿ'e 'iiⁿ'yāⁿ s'eeⁿ chí i'téenu yā Cristo ní caⁿ'a sa: ¹⁶ Ndís'tiī hermanos, canee cuuⁿmiⁿ chí cuuvi cuaacu Escritura chí Espíritu N'dai yeⁿ'e Ndyuūs caⁿ'a David cuaaⁿ vmnaāⁿ ní David miiⁿ dinguún yā yeⁿ'e Judas. Judas miiⁿ ch'iⁿ'i sá du'u chí Jesús. Maaⁿ níicú chiī chita'á yā Jesús. ¹⁷ Judas miiⁿ ní ndúucū nús'uu ní diiⁿ sa ntiiⁿnyuⁿ ndúucū nús'uu.

¹⁸ Sáⁿ'a miiⁿ ní cái sa 'áámá tááⁿ yáⁿ'āa ndúucū tuūmī yeⁿ'ē nuuⁿndi yeⁿ'ē sa. Ní chin'daā sa dácaā n'dí sa ní nda'ai naavtaⁿ'a cuerpo yeⁿ'ē sa ní tanducueⁿ'ē ngēeti sa ch'iinu cān'daa. ¹⁹ Nducyáácá 'iiⁿ'yāⁿ yeⁿ'e yááⁿ Jerusalén chicadíínuuⁿ yā chuū. Ní

yáⁿáa miiⁿ ní 'tíicā canee chi duuchi Acéldama davaacu yeⁿé yā chí neⁿe caaⁿmaⁿ campo yeⁿé yuūⁿ.

²⁰ Ti canéé nguūⁿ na libro yeⁿe Ndyuūs naachi chi duuchi Salmos: Naachí navaacu sa míⁿ nduuvi díyáaí. Ndíí nguéé 'iiⁿyāⁿ chi 'cuεetinée yā miiⁿ. Níicú canéé nguūⁿ:

Cuta'a taamá yā ntiiⁿnyuⁿ yeⁿe saⁿā ndíí tiiⁿ.

²¹ 'Iiⁿyāⁿ sáⁿā miiⁿya canee cuuⁿmiⁿ chi canéé yā ndúúcu 'nū nducueⁿe tiempo chi Señor Jesús canéé yā ndúúcu 'nū. ²² 'Iiⁿyāⁿ miiⁿ canee cuuⁿmiⁿ chi canéé yā ndúúcu 'nū taachi tucá'a yā chεedinuūⁿnī Juan ndíí nguuvi chi Jesús cunaⁿá yā cuaaⁿ 'niiⁿnuⁿ nanguuvi. 'Túúca canee cuuⁿmiⁿ chi 'áámá yā caaⁿmaⁿ yā ndúúcu nús'uu nduudu cuaacu yeⁿé chí nduuchi Jesús ngaaⁿ tináⁿā. ²³ Ní 'neeⁿ ndutá'a yā ná 'uuvi 'iiⁿyāⁿ. 'Áámá saⁿā miiⁿ ní nguuvi sa José Barsabás chi nguuvi Justo ndúúcu taama saⁿā miiⁿ chi nguuvi sa Matías. ²⁴ Ní caⁿangua'á yā ní caⁿa yā: N'diī, Señor Ndyuūs, chi n'diichi nī staava yeⁿé nducyáácá yā, 'cuuⁿmíⁿ nī nús'uu 'áámá chéé sáⁿā s'ūuⁿ chí 'āā ndεεvé nī. ²⁵ Níicú cunee ndúúcu sa ntiiⁿnyuⁿ ndúúcu apóstoles lado yeⁿe Judas. Ní diiⁿ sa ntiiⁿnyuⁿ yeⁿé Judas ntiiⁿnyuⁿ chi nguéé diiⁿ sa cumplir cucáávā nuuⁿndi yeⁿé sa. 'Tíicā ní Judas cunaⁿa sa na lugar naachí tuneen saⁿā. ²⁶ Níicú dinguúⁿ yā na 'úúví caaca ndúúcu 'uuví chi nguuví 'iiⁿyāⁿ, José miiⁿ ndúúcu Matías. Ní tun'dáá yā 'áámá chi nguuvi Matías ní Matías miiⁿ tuneen. Ní nduuvidaama sa chíí ndicháámá apóstoles chi 'iiⁿyāⁿ chi dichó'ó Dendyuūs.

2

Ndaa Espíritu N'dai

¹ Nducyáácá yā nduuvidaamá yā taachi ndaā nguuvi yeⁿe Pentecostés chi 'viicu yeⁿe cosecha. ² Tuu'mí nūuⁿ tucá'ā ch'éēcu ruuⁿ cuchii nanguuvi tan'dúúca 'áámá 'yúúné tááⁿ chí ngéenū. Ch'iindiveén yā ruūⁿ miiⁿ chí chíítú va'āi naachi snée yā miiⁿ. Ní 'iiⁿyāⁿ s'úuⁿ vεeté yā. ³ Ní che'enaááⁿ n'dee n'dai cosas tan'dúúca ch'ííyā yeⁿe yaⁿā n'gaiyāā. Ní ch'εete ndúúu vmnaaⁿ yeⁿé 'iiⁿyāⁿ. ⁴ Níicú canéé yā nducyáácá yā chiitu ndúúcu Espíritu N'dai yeⁿe Ndyuūs. Níicú Espíritu N'dai miiⁿ dííⁿ yā chí tucá'a yā caⁿa yā táámá naaⁿ davaacu s'eeⁿ tan'dúúca nduudu chí ca'ā Espíritu N'dai miiⁿ.

⁵ Tuu'mi ní na yāā Jerusalén ch'εetinée 'iiⁿyāⁿ yeⁿe Israel chí saⁿā chí i'téénú Dendyuūs yeⁿé nducyaaca naciones yeⁿe iⁿ'yeeⁿdí 'cūū. ⁶ Taachí ndaā chí 'εecu ruuⁿ mííⁿ nduuvidaamá n'dee n'dái yā ní chidáanā yeⁿé yā ti ca'áámá ca'áámá yā ch'iindiveén yā chí ngaⁿā davaacu yeⁿe maáⁿ yā. ⁷ Nducyáácá yā 'áámá cheⁿe yiinu yā ní 'áámá nínacadínuuⁿ yā, ní ngaⁿá yā: N'diichí nī, ¿'áá nguéé yeⁿé yáⁿā Galilea nducyaaca saⁿā s'eeⁿ chí ngaⁿā sa? ⁸ ¿'Taacā chííⁿ n'giindiveen yú nduudu yeⁿé yú tan'dúúca naachí ch'iindiyaāⁿ yú? ⁹ Véé 'iiⁿyāⁿ yeⁿe país Partia, 'iiⁿyāⁿ país Media, país Elam, ndúúcu 'iiⁿyāⁿ chí snée yā na país Mesopotamia, 'iiⁿyāⁿ yáⁿā Judea, yáⁿā Capadocia, yáⁿā Ponto, yáⁿā Asia, ¹⁰ 'iiⁿyāⁿ yáⁿā Frigia ndúúcu país Panfilia, país Egipto, yáⁿā s'eeⁿ yeⁿe Africa chí canee cuaāⁿ 'diituú 'áámá lado cuaaⁿ yeⁿé yáⁿā Cirene, ndúúcu 'iiⁿyāⁿ yeⁿe yāā Roma chí snée yā miiⁿ. Tan'dúúca ntúūⁿ 'iiⁿyāⁿ Israel s'eeⁿ 'tiicā ntúūⁿ 'iiⁿyāⁿ chí 'āā maaⁿ 'iiⁿyāⁿ Israel. ¹¹ Níicú 'iiⁿyāⁿ isla Creta, ndúúcu 'iiⁿyāⁿ país Arabia snée yā miiⁿ. Nducyaaca yú n'giindiveen yú davaacu yeⁿe yú. Ngaⁿá yā yeⁿé chí ch'εete taavi cá yeⁿé Dendyuūs.

¹² Nducyaacá yā ní 'áámá cheⁿé yeⁿé yā, ní ndiiniⁿ 'uuví yā vaanicadiinuun yeⁿé yā. Ní ngaⁿá yā 'aamá yā ndúúcu taamá yā: ¿'DÉ'É neⁿe caaⁿmaⁿ chuū? ¹³ Tanáⁿa yā ní sta'á yā tan'dúúca 'áámá duuchi ní ngaⁿa yā: 'Āā chí'í yā.

Chuū ngaⁿa Pedro vmnááⁿ vmnaaⁿ

¹⁴ Tuu'mi ní Pedro mííⁿ cheendii sa ndúúcu ndiicháámá yā ní caⁿa yuudu sá ní ngaⁿa sā ngii sa 'iiⁿyāⁿ: Ndís'tiī saⁿā s'eeⁿ yeⁿe Israel ndúúcu nducyaaca chí snée yā na yāā Jerusalén. Ní cánéé chí 'cuuⁿmíⁿ ndís'tiī ní tumicadínuuⁿ nī chuū. Ní 'caandiveén nī

nduudu yeⁿē 'úú. ¹⁵ Sáⁿā s'uuⁿ nguéé cúú'ví sá tan'dúúcā chí nadacádiinúúⁿ ndís'tiī caati maaⁿ ní n'gēecu nuuⁿ 'yáⁿā. ¹⁶ Chuū canéé nguūⁿ na libro yeⁿe Ndyuūs naachi caⁿa profeta Joel chí ngaⁿa chí cuchii:

¹⁷ Ndyuūs ní caⁿa yā taachi ndaā nguuvi cuayiivi chí cuchii, chí teé Espíritu yeⁿé vmnaaⁿ nducyaacá 'iiⁿyāⁿ. Ní daiyá nī saⁿā ndúúcu daiyá nī n'daataá caaⁿmán yā nduudu yeⁿé. Ní saⁿā n'gaiyāā n'deēe nááⁿ chí 'cuuⁿmíⁿnááⁿ yeⁿē sa. Ní 'iiⁿyāⁿ ndiicúú yeⁿé nī n'deēe nááⁿ chí 'cuíinu yā.

¹⁸ 'Tíicā yeⁿe nguuvi miiⁿ, 'úú teé Espíritu yeⁿé vmnaaⁿ yeⁿe saⁿā chí dichí'vē 'úú ndúúcu n'daataa chí dichí'vē 'úú. Ní caaⁿmaⁿ yā nduudu yeⁿé.

¹⁹ Níicú 'cuuⁿmíⁿ vaadi n'giinu yeⁿé cuaaⁿ 'niⁿnuⁿ nanguuvi, ndúúcu señales yeⁿé cuaaⁿ ndiyyā na yáⁿā, ndúúcu yuúúⁿ, ndúúcu yaⁿā, ndúúcu yaaⁿmi,

²⁰ 'iicu 'yáⁿā miiⁿ nduuvi maāiⁿ. Níicú 'iiyū míⁿ ndúúví yuúúⁿ, taachi 'aa cuéé ndaa nguuví yeⁿē Señor. Nguuvi miiⁿ ch'ēete ní chí 'cuuⁿmiⁿ yā.

²¹ Níicú nducyaaca 'iiⁿyāⁿ chí caaca: Señor 'iivú, ní Ndyuūs nanguáⁿai yā.

²² Ndís'tiī saⁿā yeⁿe 'iiⁿyāⁿ Israel, 'caandiveéⁿ nī nduudu 'cūú: Jesús yeⁿe yáāⁿ Nazaret ní 'áamá saⁿā chí Dendyuūs n'diichí yā chí n'daācā sa nguaaⁿ ndís'tiī. Ní Dendyuūs díⁿ yā vaadi n'gínú ndúúcu señales ndúúcu ntiⁿnyuⁿ ch'ēete cáávā saⁿā miiⁿ nguaaⁿ ndís'tiī tan'dúúcā ndís'tiī deenú nī. ²³ Sáⁿa 'cūú Ndyuūs ní ca'a yā saⁿā cáávā voluntad yeⁿe maaⁿ yā tan'dúúcā chí déenu n'dai yā ndí vmnaaⁿ. Ndís'tiī ní chiicá nī chí sta'á yā sáⁿa 'cūú chí'neéⁿnga'á yā saⁿā. Ní chí'iiⁿnúⁿ yā saⁿā cucáávā 'iiⁿyāⁿ s'eeⁿ chí nguéé n'daacā. ²⁴ Sáⁿa 'cūú Ndyuūs nadacuéⁿe yā saⁿā yeⁿē nguaaⁿ tináⁿā. Sáⁿa 'cūú nguéé cuuví cunée sa nguaaⁿ tináⁿā. Cáávā chuū ní Dendyuūs nadacuéⁿe yā saⁿā nguaaⁿ tináⁿā. ²⁵ David caⁿa sá yeⁿe sáⁿa 'cūú:

Ti cueⁿe daāⁿmaⁿ inaáⁿ Señor 'iivú Ndyuūs vmnááⁿ yeⁿé. Ní canée yā lado yeⁿe honor, ní mar 'aamá 'iiⁿyāⁿ nguéé cuuví di'vaachí yā 'úú.

²⁶ Cáávā chuū caaⁿmán ndúúcu 'áamá vaadi yeenú yeⁿē staava yeⁿé ndúúcu vaadi yeenú yeⁿe cheendí. 'licu cuerpo yeⁿé 'intaavi'tuunúúⁿ ndúúcu chí canee ngiinú yeⁿé Ndyuūs.

²⁷ Ti nguéé cu'neéⁿ nī alma yeⁿé na lugar Hades chí lugar yeⁿē alma. Ní nguéé 'cuaaⁿ nī 'úú chí daiyá nī 'úú chí 'iiⁿyāⁿ chí nguéé nuuⁿndi 'úú chí choō cuerpo yeⁿé.

²⁸ Díⁿ nī chí n'diichí chí yúúni cuaacu yeⁿe vida. N'diī dích'ēetē nī vaadi yeenú 'úú ti canéé nī nduucú.

²⁹ Ndís'tiī ví'í, cuuví caaⁿmaⁿ cuaacú ndís'tiī yeⁿe chiida yú David. Ch'tiī yā ní ních'ēechí yā na yáinyāⁿ. Ní yáinyāⁿ yeⁿé yā canee ndúúcu yú ndii nguuví 'cūú. ³⁰ Saⁿa miiⁿ saⁿā profeta miiⁿ chí ngaⁿa nduudu yeⁿe Dendyuūs. Ní deenú sa chí Ndyuūs ngaⁿa cuaacú yā ndúúcu nduudu cuaacu chí 'áamá 'iiⁿyāⁿ chí cuchii na ndaata yeⁿé yā. Ní Dendyuūs nadacuéⁿe yā Cristo chí 'cuundi yā na trono yeⁿé yā ní caaⁿmaⁿ ntiⁿnyúⁿ yā. ³¹ David déenu sa chí cuaaⁿ vmnaaⁿ ní caⁿa sa chí Cristo nanduuchí yā yeⁿē nguaaⁿ tináⁿā. Nguéé cunee alma yeⁿé yā na lugar Hades chí lugar yeⁿē alma ní nguéé yúute yeⁿé yā chí choo. ³² Ndyuūs nadin'duuchí yā Jesús yeⁿe nguaaⁿ tináⁿā ní cáávā 'iiⁿyāⁿ miiⁿ nducyaaca 'nū cuuví caaⁿmaⁿ 'nū nduudu cuaacu yeⁿé yā. ³³ 'Tíicā Jesús canée yā ná yaacu na lado yeⁿe honor yeⁿe Dendyuūs ní díⁿ yā recibir yeⁿē Chiidá yā miiⁿ yeⁿe chí caⁿā Chiidá yā chí ca'a yā Espíritu N'dai. Chuū ní Jesús teé yā ndís'tiī ní inaáⁿ nī ní n'giindiveéⁿ nī. ³⁴ Ti David miiⁿ nguéé cuchee sa nanguuvi; ti maāⁿ sa ngaⁿa sa:

Caⁿa Señor chí yā Señor yeⁿé: 'Cuundi dí lado yeⁿe honor,

³⁵ ndí cu'neéⁿ 'iiⁿyāⁿ chí táaⁿ yā yeⁿe di chí tun'dáá n'dai di ndúúcu yā ní cunée yā na poder yeⁿē di.

³⁶ Cuaacu niⁿnyuⁿ cádiinuⁿ nducyáacá 'iiⁿyāⁿ yeⁿe ndaata Israel chí Jesús chí ndís'tiī ní chí'neéⁿnga'á nī 'iiⁿyāⁿ, Ndyuūs díⁿ yā chí Señor ní Cristo yā ní 'iiⁿyāⁿ ch'ēete taavi.

³⁷ Taachí ch'iindiveéⁿ yā chuū ní neéⁿe ya'ai chí staava yeⁿé yā. Ní caⁿa yā chí yā 'iiⁿyāⁿ s'eeⁿ Pedro ndúúcu taa na 'uuví apóstoles: Ndís'tiī saⁿā ví'í, ¿de'ē díⁿ 'nū?

³⁸ Pedro miiⁿ ngaⁿa sa ngii sa 'iiⁿ'yāⁿ s'eeⁿ: Nguεεcúndií nī yeⁿ'ē nuuⁿndi yeⁿ'é nī ní cuεedinúuⁿnīⁿ ca'áámá ca'áámá nī cucáávā chi chi duuchi Jesús. Níícú Ndyuūs nadach'εεcú yā nuuⁿndí yeⁿ'e ndís'tiī; ni cuta'á nī chi tee Ndyuūs miiⁿ chi Espíritu N'dai yeⁿ'é yā. ³⁹ Caati Espíritu N'dai caⁿ'ā Chiida yú chi teé yā cucáávā ndís'tiī ndúúcu daiya nī ní cucáávā nducyaaca 'iiⁿ'yāⁿ chi snée yā yaⁿ'ai, ni cucááva nducyaaca 'iiⁿ'yāⁿ chi 'cuaī Señor 'iivú Ndyuūs yeⁿ'ē yú 'iiⁿ'yāⁿ.

⁴⁰ Pedro miiⁿ ngaⁿ'á yā nduudu cuaacu nanááⁿ na 'uuví yā ndúúcu n'dee taaví nduudu ní ngaⁿ'a diitú yā 'iiⁿ'yāⁿ s'eeⁿ ní ngaⁿ'a yā: Nanguáⁿ'ai nī yeⁿ'e 'iiⁿ'yāⁿ chi nguéé n'daacā.

⁴¹ 'Tíicā 'iiⁿ'yāⁿ chi 'cuún yā nduudu yeⁿ'e yā chεedinúuⁿ'niⁿ yā, ní chi 'yaáⁿ yā nguuvi miiⁿ tan'dúúca 'iiⁿ'yāⁿ mil 'iiⁿ'yāⁿ. ⁴² Ní 'áámá caneé yā ndúúcu chí chi'cueeⁿ apóstoles ní nduuvidaama yā ní n'dee yā pan ní caⁿ'angua'á yā.

Vida yeⁿ'e 'iiⁿ'yāⁿ s'eeⁿ yeⁿ'e Evangelio yeⁿ'e Jesucristo vmnááⁿ vmnaaⁿ

⁴³ Ní vaadī 'va'a níndaā nanááⁿ nducyaaca yā. Nééné n'deēe vaadī n'giinu ndúúcu señales chí diíⁿ apóstoles chí dichó'ó Dendyuūs. ⁴⁴ Ní nducyaacá yā chi i'téenu yā nduuvidaama yā. Ní nducuéⁿ'ē chí véé yeⁿ'é yā canéé yeⁿ'ē nducyaaca yā. ⁴⁵ Ní n'diicuí yā yáⁿ'āa yeⁿ'é yā ndúúcu chí véé yeⁿ'e yā ní nga'a yā 'téé 'téé nducyáácá 'iiⁿ'yāⁿ tuunu tuunu cá chí ngi'vaachí 'iiⁿ'yāⁿ. ⁴⁶ 'Áámá ninduuvidaamá yā na yáacu nguuvi nguuvi. Ní ninduuvidaamá yā ní yeenú taaví yā staava yeⁿ'é yā ndúúcu 'áámá vaanicadiinúúⁿ yeⁿ'e yā taachi n'deé yā pan ní taachí che'é yā na vaacú yā. ⁴⁷ 'Iiⁿ'yāⁿ miiⁿ dich'εεté yā Dendyuūs. Ní véé favor yeⁿ'é yā ndúúcu 'iiⁿ'yāⁿ yeⁿ'e yááⁿ miiⁿ. Ní Señor Ndyuūs nguuvi nguuvi idi'yáaⁿ yā 'iiⁿ'yāⁿ chí i'teenú yā 'iiⁿ'yāⁿ.

3

Saⁿ'ā chí nguéé ngii ngíicá sá ní nānduūvā yeⁿ'ē sa

¹ Pedro mííⁿ ndúúcu Juan dáámá cueⁿ'e yā cuchεε yā na yaacū templo cuaaⁿ nan'gεεcú 'ííⁿ'núⁿ chíinu, hora chí caⁿ'angua'á yā. ² Ní ná'a yā ndée yā 'áámá saⁿ'ā chí ndii dúúvá sá ndíí chεeti chεecu sa. Saⁿ'ā miiⁿ ni nguúví nguúví i'néeⁿ yā saⁿ'ā cheendi yaacū chí nguuvi Hermosa o N'dεεveé. Saⁿ'a miiⁿ ngiica sa limosna 'iiⁿ'yāⁿ chí ngeⁿ'e yaacū templo. ³ Sáⁿ'a 'cūú taachi n'diichí sa Pedro ndúúcu Juan chí chindáa yā yáacū ch'εεte, chiica sá limosna 'iiⁿ'yāⁿ s'eeⁿ. ⁴ Pedro ndúúcu Juan ch'εetinée yā ch'íínu yā saⁿ'ā miiⁿ, ní caⁿ'á yā chíi yā saⁿ'ā: Cun'diichi dí nús'uu.

⁵ Tuu'mi ní saⁿ'ā miiⁿ ch'íínu sa 'iiⁿ'yāⁿ s'eeⁿ chí canee ngíínu sá de'ē ca'á yā saⁿ'ā. ⁶ Naati Pedro miiⁿ caⁿ'á yā: Nguéé tuūmī 'dííⁿ'nguεε yeⁿ'é ní nguéé 'diiⁿ'nguāaⁿ yeⁿ'é chí canéé yeⁿ'é chí teé dii, cucáávā Jesucristo yeⁿ'e yááⁿ Nazaret miiⁿ, nacuééⁿ dī ní caaca di.

⁷ Ní sta'á yā ta'ā sa lado tá cuaacū sa ní nadacuéeⁿ yā saⁿ'ā. Hora mííⁿ nūuⁿ ní ndaā dítiínú ca'a sa ndúúcu 'ííⁿ' ruundi ca'a sa. ⁸ Ní caí yaacú sa, ní chééndii sá, ní chíicā sa. Sndáa sa ndúúcu Pedro ndúúcu Juan chεeti yaacū templo miiⁿ. Ngica sá ní ngái yaacú sa ní i'téenu sá Dendyuūs. ⁹ Núúⁿ'máⁿ yááⁿ 'iiⁿ'yāⁿ n'diichí yā saⁿ'ā chí ngiica sa ní i'téenu sa Dendyuūs. ¹⁰ Ní nntíinaaⁿ yā chí saⁿ'ā miiⁿ chí saⁿ'ā chí n'giíndi cheendi yaacū templo chí nguuvi Hermosa, ní ngiica sa limosnas. Ní cheⁿ'e yiinu yā ní 'iiⁿ'yāⁿ s'eeⁿ dii'yá yā chíi chí 'tíicā nanduuvá yeⁿ'ē sa.

Pedro ngaⁿ'á yā na corredor chí nguuvi Salomón

¹¹ Saⁿ'ā chí nguεε ngiica ní chí nduūvā yeⁿ'ē sa sta'ā sa Pedro ndúúcu Juan ní nuuⁿ'maⁿ yáaⁿ yā ngeⁿ'e yiínú yā 'iiⁿ'yāⁿ. Ní cueⁿ'é yā na corredor chí nguuvi Salomón chí 'áámá corredor yeⁿ'e yaacū ch'εεte. ¹² Taachi Pedro n'diichi sa 'iiⁿ'yāⁿ s'uúⁿ Pedro nan'guεεcútáⁿ'a sa yeⁿ'é 'iiⁿ'yāⁿ yááⁿ: Ndís'tiī saⁿ'ā yeⁿ'e Israel, ¿de'ē cuuvi chí ngeⁿ'e yiínú nī yeⁿ'e chúú? O ¿de'ε cuuví chí n'gíínu nī nús'uū? ¿'Áá caava chí diitú 'nū o chí n'dái 'nū chí dííⁿ 'nū chí ngíicá sáⁿ'a 'cūú? ¹³ Ndyuūs yeⁿ'e saⁿ'ā s'eeⁿ, Abraham ndúúcu Isaac ndúúcu Jacob ní Ndyuūs yeⁿ'ē chiida yú, Ndyuūs dííⁿ yā honrar Daiyá yā Jesús. Ndís'tiī ní ca'á nī 'iiⁿ'yāⁿ miiⁿ ní cheeⁿdiitú nī nanááⁿ Pilato miiⁿ taachi Pilato neⁿ'é yā ca'á yā libertad yeⁿ'é yā. ¹⁴ Ndís'tiī ní cheeⁿdiitú nī chí Jesús chí n'daaca yā, Jesús chí n'dai

taaví yā, ní chiica nī chi canéé libre 'áámá saⁿā chi 'nínⁿnúⁿ 'iínⁿyāⁿ. ¹⁵ Ní ch'iínⁿnuⁿ nī Jesús chi cā'a yā vida yeⁿe 'iínⁿyāⁿ. 'Iínⁿyāⁿ miiⁿ ní nadin'dūúchí Dendyuūs 'iínⁿyāⁿ yeⁿe nguaaⁿ tináⁿā ní nús'uú caaⁿmaⁿ cuaacú 'nū yeⁿé yā. ¹⁶ Sáⁿa 'cūū chi nguεε ngiica chí ndís'tiī inaáⁿ nī ní n'diichí nī, sáⁿa 'cūū ní ditiinú sa cucáávā chi i'téenu sa Jesús. Ndúúcū vaadī i'téenu chí ca'a Jesús, sáⁿa 'cūū 'āā nduuvī n'dáí sá tan'dúúcā chi n'diichī nducyaacá ndís'tiī.

¹⁷ Naati maaⁿ ní, ndís'tiī vi'í, deenú chí ndís'tiī diīⁿ nī chuū cucáávā chi nguεε déenu nī tan'dúúcā chí díⁿ 'iínⁿyāⁿ s'eeⁿ chí ngaⁿa ntiínⁿnyúⁿ yā yeⁿe ndís'tiī. ¹⁸ 'Tíicā Dendyuūs ní snuūⁿ ca'a chí caⁿa yā vmnááⁿ vmnaaⁿ cáávā cheendi nducyaaca profetas chí n'dai chí caⁿa nduudu yeⁿe Dendyuūs yeⁿe chí Cristo Daiyá yā. Ní cánéé chí Cristo ní 'cueenú yā cuuvi. ¹⁹ 'Tíicā maaⁿ ní nacadínuuⁿ nī ní ndaacadáámí nī yeⁿe nuuⁿndi yeⁿé nī ní cu'téenu nī. Níicú Ndyuūs nadvíi yā nuuⁿndi yeⁿé nī. Níicú ndaa tiempo chí ntaavi'tuunúúⁿ nī nanááⁿ Señor 'iivú Ndyuūs. ²⁰ Ndyuūs ní ndεεv'ē yā Jesucristo ndíí vmnaaⁿ níicú caⁿa yā chí dichó'ó yā Jesucristo tan'dúúcā chí caⁿa yā ndíí cuááⁿ vmnaaⁿ. ²¹ Cuaacu nííⁿnyúⁿ chí 'iínⁿyāⁿ miiⁿ canee cúúⁿmíⁿ chí canéé yā va'āī chεeti nguuvi ndíí taachi ndáá nguuvi chí Dendyuūs díⁿ yā taanduvéé dendú'ū chí Dendyuūs caⁿá yā vmnááⁿ vmnaaⁿ cucáávā cheendi profetas yeⁿe yā. Profetas chí n'dai caⁿa yā chí cuchíi ndíí cuááⁿ vmnaaⁿ. ²² Caati Moisés miiⁿ ní caⁿa yā chíi yā chíida yú s'eeⁿ ndíí vmnaaⁿ: Señor Ndyuūs yeⁿe yú nadacuéeⁿ yā 'áámá profeta nguaaⁿ 'iínⁿyāⁿ yeⁿe yú tan'dúúcā 'úú. Ní yeⁿé 'iínⁿyāⁿ miiⁿ 'caandiveéⁿ nī yeⁿe taanduvéé dendú'ū chí caaⁿmaⁿ yā ndúúcū ndís'tiī. ²³ Ní cuuvi chí nducyaaca yā chí nguéé 'caandiveéⁿ yā yeⁿe 'iínⁿyāⁿ profeta miiⁿ canéé chí can'dáa yā yeⁿe nguaaⁿ 'iínⁿyāⁿ.

²⁴ Tanducuéⁿe profetas ní ndii tiempo yeⁿe Samuel ndii tiempo chí cuchí 'yaaⁿ n'dáí yā ní caⁿa yā, ní 'āā caⁿa ntúuⁿ yā yeⁿe nguuvi 'cūū. ²⁵ Ndís'tiī daiya profetas chí caⁿa nduudu yeⁿé Dendyuūs ní yeⁿe compromiso chí Dendyuūs caⁿa cuaacú yā ndúúcū chíida yú s'eeⁿ ní caⁿa yā chíi yā Abraham: Ná ndaatá yeⁿe di'íi chíi 'áámá saⁿā cuayiivi, caati sáⁿā miiⁿ cúúv'í di'viicú sa tanducuéⁿe 'iínⁿyāⁿ yeⁿe iⁿ'yeeⁿdí 'cūū. ²⁶ Ndyuūs nadicuéeⁿ yā Daiyá yā vmnááⁿ vmnaaⁿ cáávā ndís'tiī. Ní dichó'ó yā 'iínⁿyāⁿ miiⁿ chí di'viicú yā ndís'tiī chí 'áámá 'áámá nī ndaacadaamí nī yeⁿe nuuⁿndí yeⁿé nī.

4

Pedro ndúúcū Juan nanááⁿ 'iínⁿtyéⁿe Concilio

¹ Taachi Pedro ndúúcū Juan yaaⁿvi yā nanaaⁿ 'iínⁿyāⁿ miiⁿ chí nduuvídáámá yā tuuⁿmí ndáá nanááⁿ 'iínⁿyāⁿ s'eeⁿ chíiduú s'eeⁿ yeⁿé Israel ndúúcū soldados ndíí tíiⁿ yeⁿe soldados chí diⁿ cuidado yeⁿe yáacú templo yeⁿe 'iínⁿyāⁿ Israel ndúúcū 'iínⁿyāⁿ saduceos chí nguéé i'teenú yā chí nnduuchí 'iínⁿyāⁿ yeⁿe nguaaⁿ tináⁿā. ² 'Iínⁿyāⁿ s'eeⁿ miiⁿ ya'āī chíi yeⁿe staava yeⁿé yā taachi ch'iindiveéⁿ yā chíi chí Pedro ndúúcū Juan caⁿa yā chí chí'cuéeⁿ yā 'iínⁿyāⁿ yáāⁿ miiⁿ. Ní caⁿa yā chí Dendyuūs nadacuéeⁿ yā 'iínⁿyāⁿ s'eeⁿ yeⁿe nguaaⁿ tináⁿā cucáávā Jesús miiⁿ. ³ Ch'íinū nguuvi míⁿ ní 'iínⁿyāⁿ s'eeⁿ chita'á yā Pedro ndúúcū Juan ní chinuúⁿ yā saⁿa s'eeⁿ vácūú ndíí chidεεve miiⁿ. ⁴ Naati nguaaⁿ tanducuéⁿe yā neené 'yaaⁿ yā chí ch'iindiveéⁿ yā ní n'dee taaví yā chí chí'teenú yā, ní 'iínⁿyāⁿ s'eeⁿ ní ngii yā taanduu nyuⁿu mil.

⁵ Chidεεve táámá nguuvi miiⁿ nduuvídaamá na yáāⁿ Jerusalén 'iínⁿyāⁿ s'eeⁿ chí ngaⁿā ntiínⁿnyuⁿ ndúúcū 'iínⁿyāⁿ ndiicúú chí ngaⁿā ntiínⁿnyuⁿ yeⁿe yáacú ndúúcū maestros yeⁿe ley, ⁶ ndúúcū chíiduú ch'εεte cá yeⁿe Israel chí nguuvī Anás, ndúúcū Caifás, ndúúcū Juan, ndúúcū Alejandro, ndúúcū nducyáácá 'iínⁿyāⁿ yeⁿe familia chíiduú ch'εεte cá yeⁿe Israel. ⁷ Ní ch'iínú yā Juan ndúúcū Pedro naavtaⁿā, ní ntiinguunééⁿ yā saⁿā s'eeⁿ: ¿De'ē poder, o de'ē duuchí 'iínⁿyāⁿ chí teē poder chí díⁿ nī chuū?

⁸ Tuuⁿmi ní Pedro miiⁿ ní diituú Espíritu N'dai yeⁿe Ndyuūs 'iínⁿyāⁿ caⁿa yā chíi yā saⁿa: Ndís'tiī 'iínⁿyāⁿ chí ngaⁿā ntiínⁿnyúⁿ yā ndúúcū 'iínⁿyāⁿ ndiicúú chí ngaⁿā ntiínⁿnyúⁿ yā yeⁿe yáacú yeⁿe 'iínⁿyāⁿ Israel; ⁹ ndúúti chí ndís'tiī maaⁿ ní díⁿ nī juzgar nús'uu yeⁿe saⁿā chí ngiitā miiⁿ ní n'daacá 'nū ndúúcū sa, ní sáⁿa 'cūū miiⁿ nanduuva yeⁿe

sa, ¹⁰ cadíinuun nducyaaca ndís'tiī ndúúcu nducyáácá 'ii'nyān ye'ē Israel mii' chi sá'n'a 'cūu chi canéé sá ndúúcu yú nanduuvá ye'ē sa cucáávā Jesucristo ye'ē yáān Nazaret. 'Ii'nyān mii' ndís'tiī ní s'néé'nga'á nī 'ii'nyān ní Dendyuūs nadicuée' yā 'ii'nyān ye'e nguaa' tiná'nā. ¹¹ Jesús tan'dúúca tuūu 'cūu chi ndís'tiī 'ii'nyān chi din'dái va'ai ní nguée' canee yiinú nī, naati maa' ní Ndyuūs chi cu'née' yā tuuú 'cūu ye'ē lado tuūu ch'εεté ye'ē esquina ye'e va'ai. ¹² Véé dámaān 'áámá n'dyá'nā sá'n'a 'cūu chi cuuvi nadanguá'n'ai sa 'aa du'ú nūu' 'ii'nyān. Ne'e chi nguée' ndúúcu 'ii'nyān mii' nguée' níngua'nāi yú, ti nguée' táámá 'ii'nyān ná i'nyee'dí 'cūu chi nadanguá'n'ai yā s'uuún.

¹³ Tuu'mi ní taachí n'diichi yā chi Juan ndúúcu Pedro ditiinú taavi sa, nguée' di'vá'a sa ní cudéenu yā chi nguée' sa'nā chi deenu sa letra ti tonto sa, che'e yiinú yā chiī. Ní deenu yā chi sa'nā s'ee' ch'εεtinéé sa ndúúcu Jesús. ¹⁴ Taachí n'diichí yā chi chééndii sa'nā chi 'āā nnduuvá ye'ē ndúúcu 'ii'nyān s'ee' nguée' ngí'nga'a yā contra ye'e sa. ¹⁵ Tuu'mi nga'nā 'ii'nyān s'ee' ngii yā sa'nā s'ee' mii' chí nacan'dáa sa nguaa' 'ii'nyān s'ee'. Ní 'ii'nyān s'ee' chí nndeé yā nguaa' maán yā. ¹⁶ Ní nga'nā yā: ¿De'ē dii' yú ndúúcu sa'nā s'ee'? Cuaacu ní'nyú' chi vεε 'aama señaal caavā sa'nā s'ee' dii' sa 'tíicā ní cadíinuun nducyaaca yā na yáān Jerusalén mii'. Ní nguée' cuuvi 'cuεεcutá'n'a yú ye'e chúu. ¹⁷ Naati chi 'aa ntéé caa'n'ma' sa chi 'yaa' cá chuū nguaa' yáān, tuu'mi ní 'ii'nyān chi nga'nā ntii'nyú' yā ye'ē yáān mii' nga'nā yā: Yáá'ví yúúdu yú ye'ē sa'nā s'ee' chí 'aa ntéé caa'n'ma' sa mar 'áámá ye'e Jesús ndii máán ndíi nguuvi chi cuchii.

¹⁸ Ní 'cai yā sa'nā s'ee' ní ca'nā yúúdu yā chii yā sa'nā s'ee' chi 'āā ntéé caa'n'ma' sa ní 'aa ntéé ca'cuée' sa ye'ē Jesús mii'. ¹⁹ Naati Pedro ndúúcu Juan nán'guεεcutá'n'a sa ye'e yā ní ca'nā sa ye'e yā: Canéé chí tuumicadiinuun nī nanáán Dendyuūs. ¿'Áá canéé chí cu'téenu 'nū ye'e ndís'tiī vmnáán vmnān o cu'teenú 'nū ye'ē Dendyuūs? ²⁰ Ti nguée' cuuvi chi 'aa ntéé caa'n'má' nús'uū de'ε chí n'diichi 'nū o chí' chí ch'iindiveé' 'nū.

²¹ Tuu'mi ní taachi yaa'vi yuudú yā sa'nā s'ee' ní nadichó'o yā sa'nā s'ee' cáávā nducyáácá yā i'téenu yā Dendyuūs cucáávā chí' 'āā chiī. Ní nguée' indaacá yā mar 'áámá nuu'ndi ch'εεte ye'e sa'nā s'ee' chi cuuvi di' yā castigar sa'nā s'ee' cáávā chí 'va'á yā 'ii'nyān yáān mii'. ²² Níicú di' yā 'áámá milagro ndúúcu sa'nā mii' chí nduūvā ye'ē sa. Sa'nā mii' 'āā ngo'o sá 'uūvī ngεεcu nduūyū ye'ē sa.

'Ii'nyān chi i'teenu caacá yā confianza ndúúcu ánimo

²³ Taachí 'āā nduuví yā libre cue'é yā nanáán compañeros ye'é yā. Tuu'mi ní ca'nā yā nducue'né' chí nca'nā chiiduú n'gεεté ye'e Israel ndúúcu 'ii'nyān ndiicúu chí nga'nā ntii'nyu' ye'e yáacū. ²⁴ Ní 'ii'nyān s'ee' ní taachí ch'iindiveé' yā chuū, nduuvidaamá yā ní ca'nā yā ndúúcu Dendyuūs: N'díi, Señor Dendyuūs chí ch'εεte n'dai ca, n'diī 'ii'nyān chí din'dái nī nanguuvi ndúúcu yá'nā ndúúcu nuū'nī'yá'nā ndúúcu tanducue'né' chí véé. ²⁵ Caati ndúúcu cheendi David, sa'nā chí n'diī chí 'āā dii' mandado ye'é nī ní 'āā ca'nā nī: ¿De'ē cuchii chí rebelde 'ii'nyān chí nguée' 'ii'nyān ye'ē ndaata Israel? Níicú 'ii'nyān ye'ē naciones mii' inacádiinú' yā cosa chí nguée' dichii'vē.

²⁶ Nduuvidaamá reyes ye'ē yá'nā 'cūu, 'íicú sa'nā n'gεεte chí nga'nā ntii'nyú' yā nduuvidaamá yā contra ye'e Señor Dendyuūs, ndúúcu Cristo ye'é yā.

²⁷ Maa' ní cuaacu ní'nyú' chí nduuvidaamá yā Herodes ndúúcu Poncio Pilato, ndúúcu 'ii'nyān chí nguée' 'ii'nyān ye'ē ndaata Israel ndúúcu 'ii'nyān ye'e Israel na yáan 'cūu contra ye'e Jesús chí Daiya nī chí n'dai. Ní n'díi ca'á nī ntii'nyu' chí di' yā. ²⁸ 'Ii'nyān mii' di' yā chí cuuvi tan'dúúca chí ne'é nī vmnáán vmnān chí cuuvi 'tíicā. ²⁹ Maa' ní n'diī Señor, n'diichí nī chí tan'dúúca chí chiiduú n'gεεté ye'ē Israel nga'nā taán yā ndúúcu nús'uu. N'diī Señor, teé nī nús'uu chí idi' mandado ye'é nī chí nguée' 'va'á 'nū ní caa'n'má' 'nū nduudu ye'é nī. ³⁰ Ch'í'í maán nī chí diitú nī chí 'ii'nyān di' yā chí nánduūvā ye'e 'ii'nyān, ní di' yā señaales ndúúcu vaadi n'giinu cucáávā Daiyá nī chí Jesús chí n'dai taavi.

³¹ Taachí ch'iinu ca'n'ángua'á yā naachi nduuvídaámá yā, nu'n'u va'āi mii'n. Ní nducyaaca yā ní chiitu Espíritu N'dai ye'n'e Ndyuūs 'ii'n'yā'n. Nguéé 'va'á yā chí ca'n'a yā nduudu ye'n'e Dendyuūs.

Nducué'n'ē chi véé ye'n'ē nducyáácá 'ii'n'yā'n

³² 'Ii'n'yā'n n'dee n'dáí chí chi'téenu yā nduuvídaamá yā ní 'áámá staava ye'n'é yā, 'áámá alma ye'n'é nducyaaca yā. Mar 'áámá 'ii'n'yā'n nguεε ca'n'a yā chí ye'n'é yā dendu'ū chí vεε ye'n'é yā ti nducué'n'ē chí véé ní ye'n'ē nducyáácá yā. ³³ Apóstoles chí dichó'ó Ndyuūs nga'n'á yā nduudu cuaacu ndúúcū poder ch'εεte ye'n'ē Señor Jesús chí nadacuéen yā ye'n'e nguaa'n tiná'n'ā. Níícú favor ch'εεte taavi cá ye'n'é Dendyuūs cánéé nanáán 'ii'n'yā'n s'ee'n. ³⁴ Mar 'áámá 'ii'n'yā'n nguεε ngii 'vaachí yā. Nducyáácá 'ii'n'yā'n chí véé ye'n'ē chiidá yā chí ye'n'e yā ndúúcū dendu'u ye'n'é yā ín'diicuí yā. Ní ndéε yā chí ndāaca yā chí n'diicuí yā chii'n. ³⁵ Ní 'nee'n yā na ca'a apóstoles chí dichó'ó Dendyuūs. Ní nga'á yā ca'áámá 'ii'n'yā'n tuunu tuunu ca ngii 'vaachí 'ii'n'yā'n. ³⁶ Tuu'mi ní José, ní 'ii'n'yā'n chí s'nee'n apóstoles chí duuchi Bernabé (chí ne'n'e caa'n'ma'n, 'Ii'n'yā'n chí nga'n'a 'viich'εεtínūn). José mii'n 'ii'n'yā'n ye'n'e ndaata ye'n'e levita ní ch'iindiyáa'n yā na isla Chipre. ³⁷ 'Ii'n'yā'n mii'n véé 'áámá vaadi ngua'aá ye'n'é yā. N'diicuí yā ní ndéε yā tuumi ye'n'ē mii'n, ní s'nee'n yā na ca'a apóstoles chí dichó'ó Ndyuūs.

5

Ananías ndúúcū Safira

¹ Véé 'áámá sa'n'ā chí nduuvi sa Ananías ndúúcū Safira n'daataá ye'n'ē sa chí n'diicuí sá 'áámá vaadi ngua'aá ye'n'ē sa. ² Nguéé tanducué'n'ē tuumi chí sta'a sa ye'n'e yá'n'āa ndεε sa, ní n'daataá ye'n'ē sa chicadínúú'n tá chuū. Sa'n'ā mii'n ní 'téé nūu ndéε sa chí 'nee'n sa na ca'ā apóstoles chí dichó'ó Dendyuūs. ³ Tuu'mí nga'n'ā Pedro mii'n: Díí, Ananías, ¿de'ē cuuví chí yáán'n'guiinūn chista'n'a sa na staavá ye'n'ē di, ní nguéé ca'n'a cuaacú dí nanáán Espíritu N'dai ye'n'e Ndyuūs, ní nguéé ndéε di tanducué'n'ē tuumí ye'n'ē yá'n'āa mii'n? ⁴ 'Naa'n chí cánéé ta'ā di, ¿'áá nguéé ye'n'ē di? Ni taachi 'āā n'diicuí di, ¿'áá nguéé ye'n'ē di dendu'ū? ¿De'ε cúuví chí chí'nee'n di na staava ye'n'ē di? Nguéé ca'n'a di nduudu yaadi mii'n ná sa'n'ā i'n'yee'n dí 'cūū naati nanáán Dendyuūs.

⁵ Taachi Ananías ch'iindivee'n sa nduudú 'cūū sndεεve sá ní ch'iī sa. Ní nducyáácá yā chí ch'iindivee'n yā chuū dii'yā taavi yā chii. ⁶ Ní sa'n'ā da'cáiyāa chí s'nee'n mii'n nadicuéen sa 'ii'n'yā'n, ní ch'εecu sa tীনūn 'ii'n'yā'n, ní tun'dáa sa 'ii'n'yā'n chuva'āi. Ní ch'iichi sá 'ii'n'yā'n na panteón.

⁷ Cho'ōo tan'dúúcā 'ii'n'nūn hora chí ndāā n'daataá ye'n'ē sa chεeti yaācū. Tá'n'a 'cūū ní nguéé deenū tá de'ē chí chii. ⁸ Tuu'mi ní Pedro nga'n'a sa ngii sa tá'n'ā: Cuuvi di 'úú, ¿'áá n'deē tuumí sta'a di ye'n'e yá'n'āa mii'n chí n'diicuí sa? Ní tá mii'n ní ca'n'a tá: 'Tíicā. ⁹ Pedro mii'n nga'n'a sa ngii sa tá'n'ā: ¿De'ē cáávā chí dii'n di ndúúcū isan'a ye'n'ē di chí chinnche'ei dí Espíritu ye'n'e Señor 'iivú Ndyuūs? N'diichí dí. 'Ii'n'yā'n chí che'n'e chí n'guuchi isan'ā ye'n'ē di sneé yā cheendi yaācū ní cánéé chí tun'dáa ntúūn yā dii. ¹⁰ Tuu'mi ní chí ndεεvé túūn tá 'cūū na ca'a Pedro ní ch'iī tá. Taachi ndāa sa'n'ā s'ee'n yáacū ní nndaaca sa tá'n'a 'āā n'dii ntúūn tá. Ní tun'dáa nī ntúūn sa'n'ā da'cáiyāa s'ee'n tá'n'ā. Ní ch'iichi sa tá'n'ā nii'n'nuún ná yáinyā'n ye'n'ē sa'n'a ye'n'ē tá. ¹¹ Nducyáácá 'ii'n'yā'n ye'n'ē yáacū ndúúcū 'ii'n'yā'n chí ch'iindivee'n yā chuū neené dii'yā yā chii.

N'dee taavi señaal s'ee'n ndúúcū vaadi n'giinu s'ee'n

¹² Cáávā ta'a apóstoles neené n'dee náán señaales ndúúcū vaadi n'giinu s'ee'n diín yā na yāā'n mii'n. Ní nducyáácá yā 'áámá nduuvídaamá yā corredor chí nguuvi Salomón ye'n'e yaācū templo ye'n'e 'ii'n'yā'n Israel. ¹³ 'Ii'n'yā'n chí nguéé nduuvídaamá yā ndúúcū 'ii'n'yā'n ye'n'e yáacū 'va'á yā chí nduuvídaāma yā nduucú yā. Naati 'ii'n'yā'n ye'n'e yáā'n mii'n dii'n yā honrar 'ii'n'yā'n ye'n'e yáacū. ¹⁴ 'Ii'n'yā'n chí i'téenu Señor 'iivú Ndyuūs chí 'yaa'n cá yā tan'dúúcā chí 'yaa'n sán'ā 'tiicá ntúūn n'daataá; ¹⁵ tun'dáa yā 'ii'n'yā'n s'ee'n chí ngíta mii'n cyuuni. Ní sn'duú yā 'ii'n'yā'n na cama, ní sn'duú yā 'ii'n'yā'n na colchones, ti taachi

cho'o Pedro miiⁿ ní 'aa cunee 'cuutií yeⁿ'ē Pedro miiⁿ vmnaaⁿ yeⁿ'ē 'áámá chee 'iiⁿ'yāⁿ s'eeⁿ. ¹⁶ Níicú 'iiⁿ'yāⁿ yāāⁿ na niiⁿnuúⁿ míⁿ neené 'yāaⁿ yā ndaá yā yāāⁿ Jerusalén ndúúcu 'iiⁿ'yāⁿ chí ngiitā ndúúcu 'iiⁿ'yāⁿ chí sta'a 'yúúné chí nguée n'dāacā yeⁿ'e yāáⁿ'n'guinūuⁿ. Nducyáacá yā nduuva yeⁿ'é yā.

'Iiⁿ'yāⁿ s'eeⁿ can'dáa yā chí n'nuuⁿ cá'ai yā Pedro ndúúcu Juan

¹⁷ Tuu'mi ní chiiduú ch'εεte ca yeⁿ'e Israel ndúúcu 'iiⁿ'yāⁿ chí snée yā ndúúcu yā chí yeⁿ'ē saduceo s'eeⁿ chí nguée i'téenu yā chí nduuchi 'iiⁿ'yāⁿ nguaaⁿ tináⁿ'ā díⁿ yā contra yeⁿ'e 'iiⁿ'yāⁿ s'eeⁿ. Ní díⁿ nguée yā. ¹⁸ Ní sta'á yā apóstoles chí dichó'ó Ndyuūs ní s'nuúⁿ yā saⁿ'ā s'eeⁿ vácū yeⁿ'e yāāⁿ miiⁿ. ¹⁹ Naati 'áámá ángel yeⁿ'e Señor 'iivú Dendyuūs miiⁿ ní nn'guaaⁿ yā cheendi vácū miiⁿ n'gaaⁿ, ní tun'dáa yā 'iiⁿ'yāⁿ s'eeⁿ ní caⁿ'a yā: ²⁰ Cunaⁿ'á nī, ní 'cueetíndí nī na yāacū templo ní caaⁿ'maⁿ nī tanducuéⁿ'ē nduudu yeⁿ'e vida ngái 'cūū nanááⁿ nducyaaca 'iiⁿ'yāⁿ yeⁿ'ē yāāⁿ miiⁿ.

²¹ Taachí ch'iindiveén yā chuū ní snda yā yaacū templo miiⁿ tyaaⁿ tyaaⁿ ní ca'cueeⁿ yā. 'Naaⁿ chí snée yā cheeti yaacū miiⁿ ní nduividáámá chiiduú ch'εεte ca yeⁿ'e Israel ndúúcu 'iiⁿ'yāⁿ chí snée nduucú yā. Ní 'cai yā 'iiⁿ'yāⁿ chí ngaⁿ'a ntiiⁿ'nyuⁿ ndúúcu nducyaaca 'iiⁿ'yāⁿ ndicū yeⁿ'e 'iiⁿ'yāⁿ Israel. Ní dichó'o yā soldado s'eeⁿ chí caⁿ'ā sa na vácū chí canguái sa 'iiⁿ'yāⁿ. ²² Taachi ndáā soldado s'eeⁿ nguée indaāca sa 'iiⁿ'yāⁿ s'eeⁿ vácū tuu'mi ní nguεεcundí sa ní yaaⁿ'vi sa 'iiⁿ'yāⁿ s'eeⁿ. ²³ Ní ngaⁿ'ā sa: Cuaacu níⁿ'nyúⁿ taachí ndaá 'nū, ní nduudí vácū ní canée candado, ní 'iiⁿ'yāⁿ chí snée cuidado vácū snée yā cheendi vácū. Taachí nan'guaaⁿ 'nū míⁿ, mar 'áámá 'iiⁿ'yāⁿ nguée yā cheeti vácū miiⁿ. ²⁴ Taachi chiiduú ch'εεté ca yeⁿ'e Israel miiⁿ ndúúcu soldado ndítiiⁿ yeⁿ'e soldado s'eeⁿ chí idiⁿ cuidado yaacū templo miiⁿ ndúúcu chiiduú n'gεεte ch'iindiveén yā nduudu 'cūū, neéné nadacadíⁿ'nuuⁿ yā chí chí chuū. ²⁵ Naati 'áámá 'iiⁿ'yāⁿ ndaá yā ní chí yā 'iiⁿ'yāⁿ s'eeⁿ chuū: Cun'diichí nī, sáⁿ'ā chí s'nuúⁿ nī vácū miiⁿ yāacū templo snúuⁿ sa. Ní ngi'cuéeⁿ sa 'iiⁿ'yāⁿ yāāⁿ.

²⁶ Tuu'mi ní cueⁿ'ē soldado ndíⁿ tíiⁿ yeⁿ'e soldado s'eeⁿ chí diiⁿ cuidado yeⁿ'ē yāacū ndúúcu soldado s'eeⁿ ní nguée ndúúcu vaadí caaⁿ'va chí nguái yā saⁿ'ā, ti 'va'á yā chí cuíⁿ'tuū 'iiⁿ'yāⁿ yāāⁿ miiⁿ. ²⁷ Taachi ndée yā saⁿ'ā s'eeⁿ ní díⁿ yā presentar saⁿ'ā s'eeⁿ nanááⁿ 'iiⁿ'ntyéⁿ'e yeⁿ'e concilio tuu'mi ní chiiduú ch'εεte cá yeⁿ'e Israel miiⁿ ntiinguunéeⁿ yā saⁿ'ā s'eeⁿ.

²⁸ Ní ngaⁿ'a yā saⁿ'ā s'eeⁿ: ¿'Áá nguée caⁿ'a 'nū chí 'nū diituú ndís'tií chí nguée ca'cueeⁿ nī yeⁿ'e Jesús? Maaⁿ ní 'āā dicutú ntúⁿ nī na yāāⁿ Jerusalén ndúúcu nduudu náⁿ'á yeⁿ'é nī. Ní neⁿ'e cu'neéⁿ nī nuuⁿ'ndi nús'uu ndúúcu nuuⁿ'ndi yeⁿ'ē vaadí n'gii yeⁿ'ē sáⁿ'a 'cūū. ²⁹ Nanguεεcútaⁿ'ā Pedro ndúúcu apóstoles ní caⁿ'a yā: Canee chí díⁿ 'nū o cu'téenu 'nū yeⁿ'é Dendyuūs vmnááⁿ vmnaaⁿ chí 'cuiinu ní cu'téenu 'nū yeⁿ'é saⁿ'ā iⁿ'yeeⁿ'dí 'cūū. ³⁰ Dendyuūs yeⁿ'ē chíida yú nadācúeⁿ yā Jesús. Ní ndís'tií ní ch'iⁿ'núⁿ nī 'iiⁿ'yāⁿ ní dicuái nī 'iiⁿ'yāⁿ ná 'áámá yáⁿ'á. ³¹ Ndyuūs nadicúeⁿ yā Jesús lado yeⁿ'e honor. Ní chí'neéⁿ yā 'iiⁿ'yāⁿ chí ch'εεte ní Salvador chí nadach'εecu Jesús 'iiⁿ'yāⁿ yeⁿ'ē nuuⁿ'ndi yeⁿ'é yā. Ní chuū ní cáāvā chí Jesús ca'a yā 'iiⁿ'yāⁿ Israel chí cuuvi ndaacadáámí yā yeⁿ'ē nuuⁿ'ndi yeⁿ'e yā. Níicú Dendyuūs nadach'εecú yā nuuⁿ'ndi yeⁿ'é yā. ³² Níicú nús'uū ní testigo 'nū yeⁿ'é yā yeⁿ'e cosa 'cūū ndúúcu Espíⁿ'itu N'dai yeⁿ'e Ndyuūs. Dendyuūs miiⁿ ca'a yā Espíⁿ'itu N'dai miiⁿ 'iiⁿ'yāⁿ chí ch'iindiveén yā yeⁿ'é yā.

³³ Taachí 'iiⁿ'yāⁿ s'eeⁿ ch'iindiveén yā chuū neené nduuvi taán yā ní neⁿ'e 'caaⁿ'núⁿ yā saⁿ'ā s'eeⁿ. ³⁴ Tuu'mi ní nguaaⁿ 'iiⁿ'ntyéⁿ'ē yeⁿ'e concilio ncueeⁿ 'áámá saⁿ'ā yeⁿ'é 'iiⁿ'yāⁿ fariseo s'eeⁿ chí nguuví sa Gamaliel, chí saⁿ'ā chí déenu taavi yeⁿ'ē ley. Saⁿ'ā miiⁿ 'áámá sá chí neené induuvi 'iiⁿ'yāⁿ yāāⁿ sáⁿ'ā. Caⁿ'a ntiiⁿ'nyuⁿ sa chí can'daa apóstoles chí dichó'ó Ndyuūs chuva'ai miiⁿ 'áámá rato 'líⁿ. ³⁵ Tuu'mi ní caⁿ'a sa: Ndís'tií, 'iiⁿ'yāⁿ Israel, cuin'díichí nī chí díⁿ nī ndúúcu sáⁿ'a s'eeⁿ. ³⁶ Caati nguuví chí 'āā chó'ōo nācúeⁿ saⁿ'ā chí nguuví Teudas chí caⁿ'a sá 'iiⁿ'yāⁿ chí 'áámá 'iiⁿ'yāⁿ ch'εεte. Ní nduuvidaamá 'iiⁿ'yāⁿ ndúúcu saⁿ'ā miiⁿ tan'dúúcā cuuⁿ ciento 'iiⁿ'yāⁿ. Sáⁿ'a 'cūū ní ch'ií sa, ní 'iiⁿ'yāⁿ chí ch'iindiveén yā yeⁿ'ē sa, tuunu tuunu ca na vaacú yā cuináⁿ'a yā. Mar 'áámá yā 'āā

ntéé ch'etinéé yā. ³⁷ Chó'oo chúu ní nācúeeⁿ Judas, saⁿ'ā yeⁿ'ē yāⁿ'āa Galilea taachi nduūvi duuché 'iiⁿ'yāⁿ. Ní neené 'yaaⁿ 'iiⁿ'yāⁿ n'dáa yā saⁿ'ā. Saⁿ'ā miiⁿ ní ch'ii ntúuⁿ sa ní nducyaaca 'iiⁿ'yāⁿ chi ch'iindiveéⁿ yā cueⁿ'e 'múúⁿ cueⁿ'e miiⁿ yā. ³⁸ Maaⁿ ní ngaⁿ'á ngii ndís'tii: Cuvíⁿ ní yeⁿ'ē sáⁿ'ā s'eeⁿ. Ní 'āā snée ra sa ti ndúúti chí consejo 'cūū o ntiiⁿ'nyuⁿ 'cūū yeⁿ'e saⁿ'ā iⁿ'yeeⁿdí 'cūū tuuⁿ'mi ní nguéé de'ē vεε dichíí'vε. ³⁹ Nguéé cuuvi díⁿ ní chí nadituuví ní chuū ndúúti chí yeⁿ'e Dendyuūs ní nguéé díⁿ ní chí cuuvi cuuⁿ'máⁿ ní ndúúcu Dendyuūs.

⁴⁰ Caneé yiinu yā chí caⁿ'a sa. Ní 'cai yā apóstoles chí dichó'ó Dendyuūs ní cheⁿ'é yā saⁿ'ā s'eeⁿ. Ní yaaⁿ'vi yuudu yā saⁿ'ā s'eeⁿ chí nguéé caaⁿ'maⁿ sa yeⁿ'e Jesús miiⁿ. Ní n'dεechí yā saⁿ'ā s'eeⁿ. ⁴¹ Saⁿ'ā s'eeⁿ ní nan'dáa sa nguaaⁿ 'iiⁿ'yāⁿ concilio s'eeⁿ, ní yeenú taaví sa caati Dendyuūs 'cuúⁿ yā chí ch'εenu sa chíi cucáávā Jesús. ⁴² Nguéé i'neeⁿ naaⁿ yā chí ndii ngi'cúeeⁿ yā, ní ngaⁿ'a yā yeⁿ'e Jesucristo miiⁿ chēti yáacū templo ndúúcu ná vaacú 'iiⁿ'yāⁿ nguuvi nguuvi.

6

Diⁿ yā votar ndēchē sáⁿ'ā diáconos

¹ Nguuvi miiⁿ chí'yááⁿ 'iiⁿ'yāⁿ s'eeⁿ chí i'téenu yā Jesús. Ch'iindiveéⁿ yā nduudú vaadi caaⁿ'va nguáaⁿ yā. 'iiⁿ'yāⁿ s'eeⁿ chí griego yā caⁿ'a yā chí 'iiⁿ'yāⁿ Israel s'eeⁿ nguéé díⁿ yā cuenta ndii nguεε ca'á yā nguuvi nguuvi n'dáataa nguá'aā chí cuta'a tá chēē chí che'ē tá.

² Tuuⁿ'mi ní ndiichúúví apóstoles nadidaama yā nducyáácá 'iiⁿ'yāⁿ chí i'téenu yā Jesús, ní caⁿ'a yā: Nguéé n'daacā chí cu'neeⁿ 'nū chí caaⁿ'máⁿ 'nū yeⁿ'ē nduudu yeⁿ'e Dendyuūs ní ca'á 'nū chí che'é 'iiⁿ'yāⁿ. ³ Ndís'tii hermanos, in'nuúⁿ ní nguaaⁿ s'uuúⁿ ndēchē saⁿ'ā chí n'daacā vida yeⁿ'e yā ní chí diitú yā ndúúcu Espíritu N'dai yeⁿ'e Ndyuūs ndúúcu vaadi cadíínū. Saⁿ'ā s'eeⁿ ca'ā yú ntíí'nyúⁿ 'cūū saⁿ'ā. ⁴ Ní nús'uū 'cuεetinée 'nū caaⁿ'maⁿngua'á 'nū ní 'cuεetinée 'nū lado yeⁿ'ē chí caaⁿ'máⁿ 'nū nduudu yeⁿ'e Dendyuūs.

⁵ Nducyáácá yā ní canee yiinu yā chuū. Ní díⁿ yā votar Esteban saⁿ'ā chí i'teenu taavi ní ndiitúú ndúúcu Espíritu N'dai yeⁿ'e Ndyuūs, ndúúcu Felipe, ndúúcu Prócoro, ndúúcu Nicanor, ndúúcu Timón, ndúúcu Parmenas, ndúúcu Nicolás 'aama chí i'teenu yeⁿ'e yáāⁿ Antioquía ní maaⁿ ní 'āā saⁿ'ā Israel. ⁶ Nducyaacá yā chí'néeⁿ yā saⁿ'ā s'eeⁿ ní cueⁿ'e sa nanááⁿ apóstoles chí dichó'ó Dendyuūs. Ní cuayííví chí caⁿ'angua'á yā tuuⁿ'mi ní sn'dúu yā ta'á yā vmnááⁿ yeⁿ'e saⁿ'ā s'eeⁿ cáávā ntiiⁿ'nyūⁿ chí ca'a yā saⁿ'ā.

⁷ Níicú chíi 'yaāⁿ 'iiⁿ'yāⁿ chí chí'teenú yā nduudu yeⁿ'e Dendyuūs miiⁿ. Ní 'iicu 'iiⁿ'yāⁿ s'eeⁿ chí i'teenú yā Jesús neené chíi 'yaaⁿ taaví sá ná yáāⁿ Jerusalén. Neené 'yáāⁿ chíiduú s'úúⁿ yeⁿ'e Israel chí'téenu yā tan'dúúcu chí 'iiⁿ'yāⁿ s'eeⁿ chí'téenu yā.

Sta'á yā Esteban

⁸ Esteban miiⁿ ní 'áámá 'iiⁿ'yāⁿ chí i'teenú taavi yā níicú chí diitú yā ndúúcu poder. Ní neene n'gεεtε vaadi n'giinu ndúúcu señales díⁿ yā nguaaⁿ 'iiⁿ'yāⁿ yáāⁿ. ⁹ Tuuⁿ'mi ní tanáⁿ'ā 'iiⁿ'yāⁿ chí caⁿ'á yā yaacū sinagoga yeⁿ'e yáāⁿ yeⁿ'e yā 'iiⁿ'yāⁿ chí nguuvi Libertos, ndúúcu 'iiⁿ'yāⁿ yeⁿ'e yáāⁿ Cirene, ndúúcu 'iiⁿ'yāⁿ yeⁿ'e yáāⁿ Alejandría, ndúúcu dendu'ū 'iiⁿ'yāⁿ yeⁿ'e yáⁿ'āa Cilicia, ndúúcu 'iiⁿ'yāⁿ yeⁿ'e yáāⁿ Asia, 'iiⁿ'yāⁿ s'eeⁿ ch'εεcu cheendí yā ndúúcu Esteban. ¹⁰ Naati nguéé chí chēé yā ndúúcu Esteban cáávā vaadi deenu yeⁿ'é yā ndúúcu chíi Espíritu N'dai yeⁿ'e Ndyuūs caⁿ'a chí caaⁿ'maⁿ Esteban. ¹¹ Tuuⁿ'mi ní n'de'ei n'de'ei caⁿ'a yā chíi yā náⁿ'ā 'iiⁿ'yāⁿ chí caaⁿ'máⁿ yā chí 'āā n'giindiveéⁿ yā chí Esteban miiⁿ caⁿ'a yuudú yā contra Moisés ndúúcu Dendyuūs. ¹² 'Iiⁿ'yāⁿ s'eeⁿ ní chicadiinuⁿ yā chí nducyaaca 'iiⁿ'yāⁿ yeⁿ'e yáāⁿ miiⁿ ní nééné ch'εεcu cheendí yā ní ndástaⁿ'a vaadi cadíínúⁿ yeⁿ'é 'iiⁿ'yāⁿ ndicúú ndúúcu maestros yeⁿ'e ley. Ní nducyáácá 'iiⁿ'yāⁿ s'eeⁿ ndaacá yā Esteban, ní sta'á yā 'iiⁿ'yāⁿ, ní ndéε yā nanááⁿ 'iiⁿ'ntyéⁿ'ē concilio. ¹³ Ní 'nēēⁿ yā testigos chí ngaⁿ'a nduudu yaadi ní ngaⁿ'a sa: Esteban 'cūū ní nguéé í'nēēⁿnaaⁿ sa chí ngaⁿ'a taaⁿ sá yeⁿ'e lugar 'cūū yeⁿ'é Dendyuūs ní contra yeⁿ'e ley. ¹⁴ N'giindiveéⁿ 'nū chí ngaⁿ'a sa chí Jesús miiⁿ yeⁿ'e yáāⁿ Nazaret nadatuuví yā lugar 'cūū ní n'daáⁿ yā costumbre chí teē Moisés s'uúúⁿ.

¹⁵ Tuu'mi ní nducyaacá 'iiⁿntyéⁿē concilio vεεté yā ní n'diichí yā saⁿā miiⁿ. N'diichí yā naaⁿ sa tan'dúúcā naaⁿ ángel chi saⁿā yeⁿe va'ai chεeti nguuvi chi diiⁿ ntiiⁿnyuⁿ yeⁿé Ndyuūs.

7

Esteban caⁿá yā yeⁿē maán yā nī ch'iī yā

¹ Tuu'mi ní ngaⁿā chiiduú ch'εete cá miiⁿ yeⁿē Israel: ¿'Áá 'tíicā chuū? ² Ní Esteban miiⁿ ní ngaⁿā sa: Ndís'tiī saⁿā vi'í ndúúcū chiida yú s'tiī, 'caandiveéⁿ nī yeⁿē 'úú: Chiida yú Abraham n'diichí yā Ndyuūs chi dεεve taavi ca taachi canée yā na yáⁿā Mesopotamia taachí 'āā cuéé cuneé yā na yáⁿ Harán. ³ Ní Ndyuūs caⁿa yā chiī yā 'iiⁿyāⁿ: Can'dáa di yeⁿē yáⁿ vaacú di ndúúcū yeⁿē 'iiⁿyāⁿ yeⁿē di, ní cuchii di na yáⁿā chi 'cuuⁿmín dii. ⁴ Tuu'mi ní Abraham miiⁿ nan'dáa yā yeⁿē ná yáⁿā yeⁿe 'iiⁿyāⁿ s'eeⁿ yeⁿe yáⁿā Caldea ní canée yā na yáⁿ Harán. Cuayiivi chi ch'iī chiidá yā, tuu'mi ní Ndyuūs nadachó'o yā 'iiⁿyāⁿ miiⁿ ná yáⁿā 'cūū naachi snée ndís'tiī maaⁿ. ⁵ Tiempo miiⁿ Ndyuūs nguéé ca'a yā Abraham dε'ε vεε chi cuuvi yeⁿé yā yeⁿe na yáⁿā miiⁿ, mar 'aama naachi 'canca'á yā naati caⁿa Ndyuūs chi ca'á yā cuayiivi yáⁿā 'cūū chi yeⁿē Abraham, ní yeⁿē daiyá yā chi cuchiiica ndíi cuayiivi ca taachi 'āā cuéé daiya yā. ⁶ Ní Ndyuūs ní 'túúcā caⁿa yā chiī yā: Daiyá nī chi cuchii ní 'iiⁿyāⁿ chi snúún yúúní caⁿá yā yáⁿ vaacú 'iiⁿyāⁿ. Ní 'iiⁿyāⁿ yáⁿā miiⁿ ní cuta'á yā daiyá yā chi dichíi'vε 'iiⁿyāⁿ yáⁿā miiⁿ. Ní 'iiⁿyāⁿ yáⁿā miiⁿ ní nguéé n'daacā ti 'cueenu yā cuuvi chεeti cuūū ciento nduūyū. ⁷ Tuu'mí caⁿa Ndyuūs: 'Úú ca'á castigo 'iiⁿyāⁿ na yáⁿā chi cuuví yā mozos yeⁿe yáⁿā miiⁿ. Ní cuayiivi chi chó'oo chúū, ní nan'dáa yā. Níicú cu'téenu yā 'úú na lugar 'cūū ní diíⁿ yā chεε chi neⁿé. ⁸ Ní Ndyuūs diíⁿ yā 'áámá compromiso yeⁿē circuncisión ndúúcū Abraham. Circuncisión miiⁿ 'áámá señal chi 'caacá yā na cuerpo. Ní Abraham miiⁿ véé daiyá yā chi nguuvi Isaac, ní diíⁿ yā circuncidar daiyá yā Isaac nguuvi chi niini nguuvi sa. 'Tiicá ntúū Isaac ndúúcū daiyá yā Jacob, ní Jacob ndúúcū ndichúuvi daiyá yā chi saⁿā patriarcas chi chiida yú s'eeⁿ. ⁹ Ní chiida yú s'eeⁿ chinn'gueé yā yeⁿe 'díinu yā José. Ní n'diicui yā 'díinu yā José miiⁿ na 'iiⁿyāⁿ yeⁿe yáⁿā Egipto. Ní cueⁿē José na yáⁿā Egipto naati Dendyuūs canée yā ndúúcu yā. ¹⁰ Dendyuūs nadanguá'ai yā saⁿā yeⁿe tanducueⁿē chi ch'eēnu sa chiī na yáⁿā Egipto. Ní Dendyuūs diíⁿ yā chi rey Faraón yeⁿe yáⁿā Egipto n'diichí yā José chí saⁿā n'dai ní saⁿā chi déenu taavi ndúúcū taanduvéé vaadi deenu chí ca'a Dendyuūs. Ní cucáavā chuū rey Faraón chi'neeⁿ yā José lado yeⁿe gobernador nanááⁿ yeⁿē yán'āa Egipto ndúúcū taanduvéé chi véé na vaacú yā.

¹¹ Ndaā cuiicú ní nuuⁿmán na yáⁿā Egipto ndúúcū yáⁿā Canaán, ní nch'eenu n'dái yā chiī. Chiida yú s'eeⁿ ní nguéé índaāca yā chi che'e yā. ¹² Taachí ch'iindiveeⁿ Jacob miiⁿ chi véé trigo ná yáⁿā Egipto, dichó'o yā daiyá yā chi chiida yú s'eeⁿ ndíi vmnááⁿ vmaaaⁿ ní cueⁿé yā 'áámá viaje. ¹³ Ndiichi ndii 'úúví viaje ntiinaaⁿ sá chi José miiⁿ ní 'diinū sa cáavā chi José ch'i'ni maán sa chi 'diinū sa. Tuu'mi ní rey Faraón miiⁿ ní n'diichí yā ti 'iiⁿyāⁿ yeⁿē José saⁿā s'eeⁿ. ¹⁴ José miiⁿ ní diiⁿ sa chí ndaā chiidá sa Jacob ndúúcū nducyaaca 'iiⁿyāⁿ yeⁿē sa. 'Iiⁿyāⁿ yeⁿē sa ní ngii yā 'iiⁿnūⁿ ngeεcu ndíitiⁿyu yā. ¹⁵ 'Tíicā cueⁿe Jacob na yáⁿā Egipto naachi ch'íi yā ndúúcū chiida yú s'eeⁿ. ¹⁶ Ní cuerpo yeⁿē tinán'ā s'eeⁿ candée yā 'iiⁿyāⁿ na yáⁿ Siquem ní ch'iichí yā 'iiⁿyāⁿ na yáinyāⁿ chi caī Abraham. Abraham miiⁿ ní ndúúcū túumī yeⁿé yā caī yā yáⁿā miiⁿ na yáⁿ Siquem yeⁿē daiya saⁿā s'eeⁿ Hamor yeⁿē yáⁿ Siquem miiⁿ.

¹⁷ Ní taachi 'āā snee niinuⁿ nguuví chi Dendyuūs diíⁿ yā chi cā'a yā chiī yā Abraham, ch'iitá 'iiⁿyāⁿ Israel ní chiī 'yáaⁿ yā na yáⁿā Egipto. ¹⁸ Ní nducueēⁿ táámá rey na yáⁿā Egipto chi nguéé in'diichí yā José. ¹⁹ Ní rey miiⁿ ní nguéé n'daacā diíⁿ sa ndúúcū ndaata yeⁿe yú ndúúcū chiida yú s'eeⁿ. Ní chí cu'neeⁿ sa daiyá yā na peligro chi 'cuūvī. Ní nguéé cuuvi 'yáaⁿ yā. ²⁰ Tiempo miiⁿ ní ch'iindiyáaⁿ Moisés, ní Ndyuūs n'diichí yā saⁿā 'lííⁿ chi n'daacā sa. Ch'iita sá na vaacu chiida sa 'iiⁿnuⁿ 'iyyū taaví yā saⁿā. ²¹ Ní taachí chiida Moisés chi cu'neeⁿ yā saⁿa 'lííⁿ na peligro chi 'cuūvī sa, tuu'mi ní tán'ā 'díi daiya rey Faraón chinguaī tá saⁿā 'lííⁿ ní taaví tá saⁿā tan'dúúcā 'áámá daiya tá. ²² Ní Moisés miiⁿ

ní ch'eēⁿ sa yeⁿē taanduvéé vaadi deenu yeⁿē yáⁿāa Egipto. Ní diitinú taavi sa ndúúcū nduudu yeⁿē sa ndúúcū ntiiⁿnyuⁿ yeⁿē sa.

²³ Taachi chii sá 'uuvi ngeecu ndúuyū, nacádiinuuⁿ sa na staava yeⁿē sa chi caⁿa sa n'diichi sa 'iiⁿyāⁿ yeⁿē sa chi saⁿā Israel miiⁿ. ²⁴ Taachí n'diichí yā 'áámá saⁿa yeⁿē yáⁿāa Egipto chi nguεε n'daacā idiiⁿ sa ndúúcū 'áámá 'iiⁿyāⁿ yeⁿē ndaata yeⁿé yā, Moisés miiⁿ ní dííⁿ yā nadanguáⁿai yā 'iiⁿyāⁿ. Ní ch'eⁿe ca yā ní 'nuūcáⁿai yā saⁿā Egipto 'cūū ní ch'iī sa. ²⁵ Moisés miiⁿ nacádiinuuⁿ sa chi 'iiⁿyāⁿ yeⁿē sa tuumicadiinúúⁿ yā chi Dendyuūs caⁿá yā ca'a yā libertad 'iiⁿyāⁿ s'eeⁿ cáávā ta'ā sa. 'Iiⁿyāⁿ s'eeⁿ ní nguéé tuumicadiinúúⁿ yā chi 'tíicā. ²⁶ Táámá nguuvi miiⁿ ní Moisés cueⁿē sa naachí nguⁿu 'iiⁿyāⁿ yeⁿē sa. Neⁿe sa chi ntun'dáá n'dai yā ndúúcū paz. Ní ngaⁿa sa ngii sa 'iiⁿyāⁿ: Ndís'tii saⁿā 'diinú, nguéé 'cuuⁿmáⁿ nī, ¿de'ē cáávā chi nguⁿu nī ndúúcū vi'í? ²⁷ 'Áámá saⁿā Israel chí n'geⁿe vi'í miiⁿ chingúúⁿ ndaā sa Moisés ní nadiví sa 'iiⁿyāⁿ 'áámá lado ní ngaⁿa sá ngii sa 'iiⁿyāⁿ: ¿Du'ú s'neeⁿ n'diī tan'dúúcā 'iiⁿntyéⁿē o juez nanááⁿ nús'uū? ²⁸ ¿'Áá neⁿé nī 'caāⁿnuⁿ nī 'úú tan'dúúcā chi ch'iīⁿnuⁿ nī saⁿā yeⁿe yáⁿāa Egipto 'iicu? ²⁹ Tááchí Moisés ch'iindiveéⁿ yā nduudú 'cūū, chéenu yā ní chindaa sa na yáⁿāa Madián. Cánéé yā tan'dúúcā 'áámá sáⁿā canuuⁿ yúúⁿ. Ní ch'iīndi na 'uūvi daiyā yā.

³⁰ Cho'ōo 'úúvi ngeecu ndúuyū, nī 'áámá ángel che'enaáⁿ yā yeⁿē Moisés ní 'cai yā 'iiⁿyāⁿ naachi ngiichi yaⁿa 'lííⁿ na yiīcū 'lííⁿ chi nguuvi Sinaí. ³¹ Moisés miiⁿ n'diichí yā ní cueⁿē yíínu yā yeⁿē chi n'diichi yā miiⁿ. Ndaa niiⁿnúⁿ yā chi cuuvi n'diichi yā. Saⁿā miiⁿ ch'iindiveéⁿ yā nduudu yeⁿē Dendyuūs miiⁿ chi ngaⁿā: ³² 'Úú Ndyuūs yeⁿē chiidá nī s'eeⁿ, Ndyuūs yeⁿē Abraham, Ndyuūs yeⁿe Isaac, ní Ndyuūs yeⁿe Jacob. Moisés miiⁿ ní nééné dii'yá yā chiī ndíí 'āā ntéé nēⁿe yā n'diichi yā. ³³ Ní caⁿa Señor Ndyuūs chii yā 'iiⁿyāⁿ: Tun'dáá ca'a di ndaacuú yeⁿē di caati naachi canéé dí chíí chééndiī di nanááⁿ Dendyuūs. ³⁴ Cuaacu níⁿnyuⁿ chí n'diichí chi ch'eēnu taavi chiī 'iiⁿyāⁿ yeⁿé chi snéé yā yáⁿāa Egipto. N'giindiveéⁿ chi n'gai ya'ái yā. Ní caⁿá chi nadinguaⁿái 'iiⁿyāⁿ. Maaⁿ ní cuchí di. 'Úú dicho'ó dii na yáⁿāa Egipto.

³⁵ Moisés miiⁿ ní 'iiⁿyāⁿ chi saⁿa diiⁿ sa chi cheenu yā chuva'āi yáⁿāa miiⁿ taachi caⁿa sa: ¿Dú'ū s'neeⁿ n'diī tan'dúúcā 'iiⁿntyéⁿē o juez? Maaⁿ ní Moisés miiⁿ Ndyuūs dich'ó yā chi cuuví yā saⁿa ntyéⁿē, ní nadinguáⁿai yā 'iiⁿyāⁿ. Dendyuūs diiⁿ yā chi canéé Moisés ndúúcū nduudu yeⁿé yā cucáávā ángel chí che'enaáⁿ yā yeⁿe Moisés na yáⁿá 'líí. ³⁶ Moisés cuayiivi taachi dííⁿ yā vaadi n'gíínú ndúúcū señales na yáⁿāa Egipto, na nuūⁿnīⁿyáⁿā chi nguuvi Cuá'ā, ní na yáⁿāa cuuⁿmáⁿ cheeti 'uuvi ngeecu ndúuyū, ní tun'dáa yā 'iiⁿyāⁿ. ³⁷ Moisés miiⁿ chiiⁿ chi ngāⁿa yā ngii yā 'iiⁿyāⁿ Israel: Señor Dendyuūs yeⁿē yú caⁿá yā s'neéⁿ yā profeta chi caaⁿmaⁿ nduudu yeⁿé yā nguaaⁿ vi'í yú. 'Iiⁿyāⁿ miiⁿ tan'dúúcā 'úú. Ní 'caandiveéⁿ nī yeⁿē 'iiⁿyāⁿ profeta miiⁿ. ³⁸ Sáⁿa 'cūū Moisés 'cūū chí canee sa naati nduuvidaamá yā na yáⁿāa cuūⁿmáⁿ ndúúcū ángel chi yaa'vi yā saⁿā na yiīcū chi nguuvi Sinaí, ní canee sa ndúúcū chiida yú. Ní Dendyuūs ca'á yā nduudu yeⁿē vida chi tee sa 'uúú. ³⁹ Chiida yú ní nguéé ch'iindiveéⁿ yā yeⁿē Moisés miiⁿ ní chí'neéⁿ yā saⁿā 'áámá lado, ní diví yā vaanicadiinuuⁿ yeⁿe yā, ní neⁿé yā nanguεεcúndiī yā yáⁿāa Egipto. ⁴⁰ Ní caⁿá yā chii yā Aarón 'iiⁿyāⁿ chi chiida yú: Din'dái nī nús'uu dendyuūs s'eeⁿ chí cuuvi caⁿa yā vnnááⁿ yeⁿe yú caati Moisés 'cūū chí tun'dáa sa nús'uu yeⁿē yáⁿāa Egipto, nguéé deenu yú de'ē chíí ndúúcū sa. ⁴¹ Tuu'mi ní din'dái yā 'áámá ídolo 'itiindu 'lííⁿ yeⁿe 'dííⁿnguāⁿ chí n'duúⁿ yā 'iiti nátaí ní 'caaⁿnúⁿ yā 'iiti cuūchí 'lííⁿ ní ca'a yā ídolo miiⁿ tan'dúúcā sacrificio. Ní yeenú taaví yā caavā ntiiⁿnyuⁿ yeⁿē ta'ā saⁿā s'eeⁿ. ⁴² Níicú Ndyuūs chiví yā yeⁿe 'iiⁿyāⁿ s'eeⁿ. Ní chí'neéⁿ yā 'iiⁿyāⁿ s'eeⁿ chí i'teenú yā tanducuéⁿē cosa chí véé nanguuvi tan'dúúcā 'yáⁿā ndúúcū 'iīyū, ndúúcū 'ííⁿnyúⁿ. 'Tíicā canee ngúūⁿ na libro yeⁿe Ndyuūs naachi ngúūⁿ profetas:

N'diī 'iiⁿyāⁿ Israel miiⁿ, ¿'áá tee nī 'úú 'iiti sacrificio chí 'āā 'nííⁿnúⁿ nī ndúúcū dendú'ū na yaⁿāa cuuⁿmáⁿ cheeti 'uuvi ngeecu ndúuyū?

⁴³ Nguéé de'ē vεε tee nī 'úú. Candéé nī yaacū tíínūⁿ yeⁿē ídolo Moloc, ndúúcū 'ííⁿnyúⁿ yeⁿe ndyuūs yeⁿé nī chí nguuvi Renfán, ndúúcū cosa chuū chííⁿ chí din'dái nī

chi cu'téenu nī. Níicú 'úú dichó'ó ndis'tiī táámá lado yeⁿe yáⁿāa Babilonia.

⁴⁴ Chiida yú s'eeⁿ ní canéé yeⁿé yā na yáacū tiinūuⁿ yeⁿé Ndyuūs chi caⁿā nduucu yā na yáⁿāa cuuⁿmáⁿ. Ní caⁿa Ndyuūs chíi yā Moisés miiⁿ chí din'dái sa yáacū tiinūuⁿ tan'dúucā chi n'diichi sa. ⁴⁵ Chííⁿ yáacū tiinūuⁿ miiⁿ ní sta'a chiida yú s'eeⁿ ní candéé yā ndúucū Josué tiempo miiⁿ taachi sta'á yā yáⁿāa yeⁿe 'iiⁿ'yāⁿ chi nguéé 'iiⁿ'yāⁿ yeⁿe ndaata Israel. Ndyuūs nadacaanú yā 'iiⁿ'yāⁿ s'eeⁿ chi nguéé 'iiⁿ'yāⁿ yéⁿē ndaata Israel nanááⁿ chiida yú s'eeⁿ. Ní yaācu tíinūuⁿ snee ndúucu yā ndii nguuvi yeⁿē David miiⁿ. ⁴⁶ David miiⁿ nandaāca sa favor nanááⁿ Dendyuūs ní chiica sa chí din'dái sa yaācū ch'εete yeⁿé Ndyuūs chi i'téenu Jacob miiⁿ. ⁴⁷ Salomón nídín'dái sa yaācū ch'εete yeⁿe Dendyuūs. ⁴⁸ Naati Ndyuūs chí canéé yā na va'ai chēeti nguuvi, nguéé canéé yā na yaācu chí din'dái 'iiⁿ'yāⁿ ndúucū ta'á yā, ti tan'dúucā chí ngaⁿā profeta nduudu Dendyuūs tiempo chí chó'ōo:

⁴⁹ Nángúúvī mííⁿ chí tan'dúucā trono yeⁿé, ní yáⁿāa miiⁿ ní tan'dúucā banco yeⁿē ca'á. ¿Dé'é va'āi idín'dái dí yeⁿé? ngaⁿa Señor 'iivú Ndyuūs. O ¿de'ε lugar chí ntaavi'tuūnuúⁿ?

⁵⁰ ¿'Áá nguéé 'úú dín'dái ndúucū ta'á tanducuéⁿē dendu'ū?

⁵¹ Chééchéi tííⁿ nī ní chēechí staava yeⁿé nī ní nduudí veéⁿ nī. Ndís'tiī ní nguéé diíⁿ díveéⁿ nī yeⁿe Espíritu N'dai yeⁿe Ndyuūs cueⁿe daāⁿmaⁿ. Tan'dúucā chiidá nī 'tiicá ntúūⁿ ndís'tiī. ⁵² ¿Du'u profeta chí caⁿa nduudu yeⁿe Dendyuūs chí chiidá nī nguéé can'dáa yā chí ya'ái yā 'iiⁿ'yāⁿ? Ní ch'iiⁿ'nuⁿ yā 'iiⁿ'yāⁿ chí caⁿa yā vmnááⁿ vmnaaⁿ chí cuchii 'iiⁿ'yāⁿ chí n'dai taavi. Ní 'iiⁿ'yāⁿ miiⁿ chí n'dai taavi ndís'tiī ní sta'á nī 'iiⁿ'yāⁿ ní ch'iiⁿ'núⁿ yā 'iiⁿ'yāⁿ. ⁵³ Ndís'tiī ní sta'á nī ley chí tee ángeles ní nguéé diíⁿ nī cumplir.

⁵⁴ Taachi ch'iindiveeⁿ saⁿā s'uuⁿ chuū chí caⁿa Esteban nduuvi taaⁿ n'dái sa na staava yeⁿe sa ní ndiitunuúⁿ ngé'é 'diiⁿ'yuⁿ sa contra yeⁿe Esteban. ⁵⁵ Naati Esteban miiⁿ ndiitu Espíritu N'dai yeⁿe Ndyuūs che'enaáⁿ yā nanguuvi ní n'diichi yā Dendyuūs chí neené ngii 'yáⁿā ní n'diichi yā Jesús miiⁿ chí canéé yā lado yeⁿē honor yeⁿe Dendyuūs. ⁵⁶ Tuu'mi ní Esteban caⁿa yā: Cuin'dííchí nī, inaaⁿ nanguuvi canda'āi 'íicú Daiyá Dendyuūs canéé lado yeⁿe honor yeⁿe Dendyuūs. ⁵⁷ Tuu'mi ní 'iiⁿ'yāⁿ s'eeⁿ ní 'caí yiicú yā ní n'gaadí yā veéⁿ yā ní tanducuéⁿe yā ndaá yā nanááⁿ Esteban. ⁵⁸ Ní tun'dáa yā saⁿā yáāⁿ miiⁿ ní chíítuú yā saⁿā. Ní 'iiⁿ'yāⁿ testigos s'nééⁿ yā cotón ná ca'a 'áámá saⁿā 'dííⁿ chí nguuvi Saulo. ⁵⁹ Tuu'mi ní nga'a yā tuū Esteban. 'Iicu Esteban miiⁿ ní 'cai sá Ndyuūs ní ngaⁿā sa: Señor Jesús, nánguái nī espíritu yeⁿé.

⁶⁰ Chiintii'ya sá ní 'caí yiicu sá: Señor, nguéé diíⁿ cuenta nī núúⁿndí 'cūū yeⁿē 'iis'tíí. Ní taachi caⁿā sa chuū, ní ch'íi sa.

8

Saulo diíⁿ sa chí 'iiⁿ'yāⁿ yeⁿe yaācū chéenu yā

¹ Ní Saulo miiⁿ canee yiinú sa chí 'cuūvī Esteban miiⁿ. Nguuvi miiⁿ n'dee n'dái 'iiⁿ'yāⁿ ní nduuvi taáⁿ yā yeⁿe 'iiⁿ'yāⁿ ná yáacū chí canéé yáāⁿ Jerusalén ní nducyaaca yā chí i'teenu Jesús cueⁿē 'muuⁿ cueⁿé miiⁿyā. Chéenu yā cuaaⁿ na yáⁿāa Judea ndúucū yáⁿā Samaria. Dámaaⁿ apóstoles chí dichó'ó Dendyuūs nguεε chéenu yā. ² Saⁿā s'eeⁿ chí n'dai nanááⁿ Dendyuūs candéé sa Esteban. Ní ch'íiichi sá 'iiⁿ'yāⁿ ní chēecu taavi sá yēⁿe yā. ³ Saulo mííⁿ ní can'dáa sa 'iiⁿ'yāⁿ chí ngeⁿe yaācū chí n'nuūⁿ cá'ai sa 'iiⁿ'yāⁿ. Cheⁿe sa ndúú va'ai nduu vā'āi ní candéé sa 'iiⁿ'yāⁿ ndíí n'daataá ndíí saⁿā. Ní n'gíí sa 'iiⁿ'yāⁿ vácūū.

Caⁿa yā ndúúúú ngai na yáāⁿ Samaria

⁴ 'Iiⁿ'yāⁿ chí chéenu miiⁿ cheⁿé yā nduu yáāⁿ nduu yáāⁿ ní caⁿa yā ndúúúú ngai yeⁿe Jesucristo chí evangelio. ⁵ Tuu'mi ní Felipe miiⁿ can'dáa sa na yáāⁿ Samaria ní ngaⁿa sa yeⁿe Cristo. ⁶ Ní nducyáácá 'iiⁿ'yāⁿ ch'iindiveeⁿ miiⁿnyúⁿ yā de'ε ndu'ū chí ngaⁿā Felipe miiⁿ. Ch'iindiveeⁿ yā ní inaaⁿ yā señales chíiⁿ idiiⁿ sa. ⁷ Neené 'yaaⁿ 'iiⁿ'yāⁿ chí snée yā ndúucū 'yúúné chí espíritus chí nguεε n'daacā yeⁿe yáāⁿ'guiinūuⁿ taachí can'daa 'yúúné na cuerpo yeⁿé yā néené 'cai espíritus. Ní neené 'yaaⁿ 'iiⁿ'yāⁿ ndúucū ca'āi chí

in'dúuví cuerpo yeⁿ'é yā ndúúcū 'iiⁿ'yāⁿ chi nguéé ngíicá ní nducyaacá yā nanduūvā yeⁿ'é yā. ⁸ 'Iiⁿ'yāⁿ yeⁿ'ē yāāⁿ miiⁿ ní yeenú taaví yā.

⁹ Cánéé 'áámá saⁿ'ā chi nguuvi Simón chi déenu sa magia chi cuaaⁿ vmnaaⁿ neené diiⁿ sa na yāāⁿ miiⁿ. Ní nginnche'ei sá 'iiⁿ'yāⁿ na yāāⁿ Samaria. Ngaⁿ'ā sá ngii sa 'iiⁿ'yāⁿ chi ch'εεεε sa. ¹⁰ Chi'neeⁿ veeⁿ ndii n'gaiyāā ndii n'gεεεε yā 'iiⁿ'yāⁿ miiⁿ. 'Iiⁿ'yāⁿ s'eeⁿ ní caⁿ'á yā: Chuū poder ch'εεεε yeⁿ'e Dendyuūs.

¹¹ Ní s'neeⁿ veéⁿ yā yeⁿ'ē sa ti ndúúcū artes magias yeⁿ'ē sa neené 'nááⁿ chinnche'ei sá 'iiⁿ'yāⁿ. ¹² Taachi 'iiⁿ'yāⁿ s'eeⁿ chi'téenu yā yeⁿ'ē Felipe miiⁿ chi ngaⁿ'á yā ndúúdu ngai yeⁿ'e chi Ndyuūs ngaⁿ'á yā ntiiⁿ'nyuⁿ ní yeⁿ'ē ndúúdu ngai yeⁿ'e Jesucristo miiⁿ, tuu'mí cheēdinúⁿ'niⁿ ndii n'daataá ndii sáⁿ'ā 'iiⁿ'yāⁿ. ¹³ S'teenú ntúūⁿ Simón. Cheēdinúⁿ'niⁿ sa. 'Áámá cānee sa ndúúcū Felipe. Taachi n'diichi sa señales ndúúcu vaadi n'giinu ch'εεεε chi diiⁿ Felipe miiⁿ tuu'mi ní cheⁿ'e yiinu sá.

¹⁴ Taachi ch'iindiveéⁿ apóstoles chi dichó'ó Dendyuūs chí snée yā yāāⁿ Jerusalén chi 'iiⁿ'yāⁿ yeⁿ'e yāāⁿ Samaria i'téenu yā nduudu yeⁿ'e Dendyuūs miiⁿ, dicho'ó yā Pedro ndúúcū Juan miiⁿ. ¹⁵ Taachí ndaa 'iiⁿ'yāⁿ s'eeⁿ tuu'mi caⁿ'angua'á yā cáávā 'iiⁿ'yāⁿ s'eeⁿ chi cuuvi diíⁿ yā recibir Espíritu N'dai yeⁿ'e Ndyuūs, ¹⁶ ti Espíritu N'dai yeⁿ'e Ndyuūs miiⁿ 'āā cuéé caⁿ'ā nanááⁿ ndii 'áámá 'iiⁿ'yāⁿ s'eeⁿ. Dámaāⁿ chi cheēdinúⁿ'niⁿ núuⁿ yā ndúúcū chi duuchi Jesús miiⁿ. ¹⁷ Apóstoles sn'duú yā ta'a yā vmnaaⁿ yeⁿ'ē 'iiⁿ'yāⁿ s'eeⁿ ní diíⁿ yā recibir Espíritu N'dai yeⁿ'e Ndyuūs.

¹⁸ Taachi Simón n'diichí sa chi cáávā chi sn'duu tá'ā apóstoles diíⁿ yā recibir Espíritu N'dai yeⁿ'e Ndyuūs, tuu'mi ní caⁿ'a sa chi ca'a sa tuumí. ¹⁹ Ní caⁿ'ā sa: Tée ntúuⁿ nī poder 'cūū 'úú ní 'āā du'ú nūⁿ chi cun'duū ta'á vmnaaⁿ yeⁿ'ē, 'iiⁿ'yāⁿ miiⁿ cunéé yā ndúúcū Espíritu N'dai yeⁿ'e Ndyuūs.

²⁰ Tuu'mi ní Pedro mííⁿ caⁿ'a sá chii sa 'iiⁿ'yāⁿ: Túumí yeⁿ'ē di 'cuiinú ndúúcū di caati nacádiinuuⁿ di chi regalo yeⁿ'é Ndyuūs ní ndúúcū tuūmí cuai di. ²¹ Nguéé ítuneeⁿ di ndíí nguéé ndúú suerte yeⁿ'ē di na asunto 'cūū ti staava yeⁿ'ē di nguéé n'daacā nanááⁿ Dendyuūs. ²² Ndáácádáámí dí yeⁿ'ē nuuⁿ'ndi yeⁿ'ē di, ní caaca di Dendyuūs ti neⁿ'e Ndyuūs nadāch'εεcú yā yeⁿ'ē di chí nacádiinuuⁿ di na staava yeⁿ'ē di. ²³ Ti 'úú inaāⁿ dii ní cunee di na vaadi ngueēe yeⁿ'ē di. Ní n'dεē chiichí di ndúúcū nuuⁿ'ndi yeⁿ'ē di.

²⁴ Tuu'mi ní Simón nan'guεεcútaⁿ'ā sa yeⁿ'é yā ní caⁿ'ā sa: N'diī caacá nī Señor caavā 'úú chi nadach'εεcú yā nuuⁿ'ndi yeⁿ'é ti mar 'áámá chi ngaⁿ'a nī nguéé chiī nanááⁿ yeⁿ'ē 'úú.

²⁵ 'Iiⁿ'yāⁿ s'eeⁿ caⁿ'a cuaacú yā nduudu yeⁿ'e Ndyuūs miiⁿ. Ní caⁿ'a yā yeⁿ'ē evangelio chi ndúúdu ngai yeⁿ'e Cristo. Ní cueⁿ'e yā ndíí néené n'deeé yāāⁿ yeⁿ'e yáⁿ'āa Samaria. Ní ndaa ntúuⁿ yā na yāāⁿ Jerusalén miiⁿ.

Felipe ndúúcū saⁿ'a yeⁿ'e yáⁿ'āa Etiopía

²⁶ 'Áámá ángel yeⁿ'e Señor miiⁿ yaa'vi yā Felipe ní caⁿ'a yā: Nducuééⁿ dí ní cuéⁿ'é dí ndii cuaaⁿ ndiīya sur na yúúni chi nga'ai yeⁿ'ē yāāⁿ Jerusalén ndii yāāⁿ Gaza. Yúúni miiⁿ ní cho'ō na yáⁿ'āa cuūⁿ'máⁿ. ²⁷ Tuu'mi ní Felipe miiⁿ nducueeⁿ sá ní cueⁿ'e sa. Ní chó'ōo chi 'áámá saⁿ'a yeⁿ'ē yáⁿ'āa Etiopía canuuⁿ sa yúúni ní sáⁿ'ā miiⁿ eunuco. Saⁿ'ā miiⁿ chi idiiⁿ sá ntiiⁿ'nyuⁿ yeⁿ'e n'daataá reina chi duuchi Candace. Saⁿ'ā miiⁿ ní diiⁿ sa cuidado nducuéⁿ'ē tuūmí yeⁿ'e reina. Ndaa sa yāāⁿ Jerusalén miiⁿ chi diiⁿ sa chi cu'teenu sá Ndyuūs. ²⁸ Nanguεεcunééⁿ sá yāāⁿ yeⁿ'é yā ní ch'iīndi sa na carreta yeⁿ'ē sa. Ní n'geeⁿ sa libro yeⁿ'e Ndyuūs naachi profeta Isaías chi caⁿ'a nduudu Dendyuūs tiempo chi chó'ōo. ²⁹ Ní Espíritu miiⁿ ní ngaⁿ'a yā ngii yā Felipe miiⁿ: Cueⁿ'e di ní ndaa niīⁿ'nūⁿ di na carreta 'cūū.

³⁰ Ní Felipe miiⁿ cueⁿ'ē sa ngeēnū sa ni ch'iindiveeⁿ sa chi n'geēⁿ saⁿ'a miiⁿ naachi dinguūⁿ profeta Isaías miiⁿ. Ní caⁿ'a sa: ¿'Áá túúmícadíinuuⁿ nī chi n'geēⁿ nī?

³¹ Saⁿ'ā miiⁿ caⁿ'a sa: ¿Taacā cuuvi diíⁿ ti mar 'áámá 'iiⁿ'yāⁿ nguéé ngi'cuaeⁿ yā 'úú? Ní neⁿ'e sa chi Felipe miiⁿ caa sa ní 'cuūndi sa ndúúcu sa.

³² Naachí n'geēⁿ sa yeⁿ'ē Escritura, chuū chii:

Tan'dúúcā 'iiti cuūchī candée yā 'iiti ní 'caan'núⁿ yā 'iiti. Tan'dúúcā 'iiti cuūchī 'línⁿ nguée ngii n'gai tī taachi ngii yā duudú tī 'tíicā nguée n'dai yā cheendi yā.

³³ Caati ndiicuuⁿ yā 'iiⁿ'yāⁿ n'dái yā ní nguée ca'a sa justicia yeⁿ'é yā; ¿du'u caaⁿ'maⁿ yeⁿ'e ndaatá yeⁿ'é yā? Caati diví 'iiⁿ'yāⁿ vida yeⁿ'é yā na iⁿ'yeēⁿdī.

³⁴ Saⁿ'ā eunuco nan'guεεcútaⁿ'ā sa ní caⁿ'a sa chii sa Felipe miiⁿ: Ngii cá chi cuuvi nī 'úú: ¿Du'ú yeⁿ'é chi caⁿ'a profeta 'túúcā? ¿'Áá yeⁿ'é maán yā o yeⁿ'é taama 'iiⁿ'yāⁿ?

³⁵ Tuu'mi ní Felipe miiⁿ nan'guεεcútaⁿ'ā sa. Tucá'ā sa yeⁿ'é libro 'cūū ní caⁿ'a sa yeⁿ'é evangelio chi ndúúdú ngai yeⁿ'é Jesús. ³⁶ Canúuⁿ yā yúúní chíí cueⁿ'é yā ndaá yā naachi vεε nuūⁿnīⁿ. Ní caⁿ'a saⁿ'ā eunuco: 'Muuⁿ ní vεε nuūⁿnīⁿ. ¿De'ē cucáávā chi nguée cueεdinúūⁿnīⁿ?

³⁷ Felipe miiⁿ ngaⁿ'ā sa: Nduuti chi i'téénú nī ndúúcū núúⁿmáⁿ staava yeⁿ'é nī tuu'mí cuuvi cueεdinuūⁿnīⁿ nī. Nan'guεεcútaⁿ'ā sa yeⁿ'é yā nī ngaⁿ'ā sa: I'teenú chi Jesucristo miiⁿ ní Daiyá Dendyuūs 'iiⁿ'yāⁿ.

³⁸ Ní caⁿ'a sa chi cuéndii carreta. Nduu 'uuví yā, Felipe ndúúcū eunuco cueⁿ'e yā naachi véé nuūⁿnīⁿ ní chεεdinuūⁿnīⁿ sa. ³⁹ Taachí cuícheε yā naachi véé nuūⁿnīⁿ Espíritu N'dai yeⁿ'e Ndyuūs candēε Felipe miiⁿ. Ní saⁿ'ā eunuco 'āā ntéé n'diichi sa saⁿ'ā. Ní cuinaⁿ'ā sa ní yeenú taavi sa. ⁴⁰ Felipe miiⁿ ndaaca sa na yáāⁿ Azoto. Cho'o sá nduu yáāⁿ nduu yáāⁿ ndii ndaā sa yáāⁿ Cesarea ní caⁿ'a sa yeⁿ'é evangelio chi ndúúdú ngai yeⁿ'e Jesucristo nanááⁿ tanducuéⁿ'é 'iiⁿ'yāⁿ yeⁿ'e yáāⁿ miiⁿ.

9

Saulo ndaacadaami sa yeⁿ'e nuūⁿndī yeⁿ'é sa ní i'téénu sa (Hch. 22.6-16; 26.12-18)

¹ Taachi Saulo taaⁿ sa ní yaāⁿ'vī yuudu sa yeⁿ'e chí 'cuūvī 'iiⁿ'yāⁿ chi i'téénu yā Señor Jesucristo, ndaa sá nanááⁿ chiiduú ch'εεte cá yeⁿ'e 'iiⁿ'yāⁿ Israel. ² Ní chiica sa carta s'eeⁿ chí 'cuuⁿ'miⁿ sá nanááⁿ 'iiⁿ'yāⁿ yeⁿ'e yaācu sinagogas yeⁿ'e yáāⁿ Damasco chí ndúútī chi ndaācā sa saⁿ'ā o n'daataá miiⁿ yeⁿ'e Yúúní yeⁿ'é vaadī i'téénú yeⁿ'e Jesucristo miiⁿ cúúví diiⁿ sa nandée sa 'iiⁿ'yāⁿ chi preso yā ní nndaa yā na yáāⁿ Jerusalén. ³ Taachi canúuⁿ sá yúúní mííⁿ taachi 'āā cháā ndaa sa yaāⁿ Damasco dácānaāⁿ chiiya 'áámá dεεvé yeⁿ'é nanguuvi naachi canée sa. ⁴ Taachí sndεεve sá ná yaⁿ'āa miiⁿ ch'iindiveeⁿ sa 'áámá nduudu chi ngaⁿ'ā: Saulo, Saulo, ¿de'ē cúúví chí nn'daā di 'úú?

⁵ Saⁿ'ā miiⁿ ní caⁿ'ā sa: ¿Du'ú n'diī, Señor? Tuu'mi ní ngaⁿ'á yā: 'Úú Jesús chi n'daā dī. Nguée n'daacā chi diiⁿ di ti diiⁿ di tan'dúúcā 'iiti chi ca'a ca'a tī na yáⁿ'á cuiⁿnyuⁿ.

⁶ Saulo miiⁿ ní in'duuvī sa, ní 'va'a sa, ní caⁿ'a sa: Señor, ¿de'ē néⁿ'e nī chi diiⁿ? Señor Jesús miiⁿ ngaⁿ'á yā ngii yā saⁿ'ā: Nducueeⁿ dí ní cueⁿ'e di yáāⁿ, ní cuuví yā dii de'ē diiⁿ di.

⁷ Ní 'iiⁿ'yāⁿ chi cuéⁿ'é ndúúcū Saulo neé yā n'giīnu yā. N'giindiveeⁿ cuaacú yā nduudu ti nguée du'ū vεε inaaⁿ yā. ⁸ Tuu'mi ní Saulo nducueeⁿ sá ná yáⁿ'āa miiⁿ naachi chí ndεεve sá. Nán'guaaⁿ sa nduutináⁿ sa naati nguée inaaⁿ sa. Candéeⁿ neeⁿ yā ta'ā sa, ní ndaā sa yáāⁿ Damasco. ⁹ Miiⁿ ní canee sa 'iīⁿūⁿ nguuvī ní nguée inaaⁿ sa, ní nguée che'e sa, ní nguée chi'i sa.

¹⁰ Na yáāⁿ Damasco canée 'áámá saⁿ'ā chí n'geeⁿ chi i'téénū sa Jesucristo chi nguuvī sa Ananías. Tuu'mi ní Señor Jesús miiⁿ ní caⁿ'a yā chii yā saⁿ'ā na visión yeⁿ'é sa: Dii Ananías. Ananías miiⁿ nan'guεεcutáⁿ'a sa: Señor, 'úú canee.

¹¹ Ní Señor Jesús miiⁿ ngaⁿ'a yā ngii yā saⁿ'ā: Nadacueeⁿ di ní cueⁿ'e di yúúní chi nguuvī Cuaacú miiⁿ ní in'nuuⁿ dí vacu Judas. Miiⁿ canee 'áámá saⁿ'ā chi nguuvī sa Saulo ní sáⁿ'ā yeⁿ'é yáāⁿ Tarso. N'diichí nī, saⁿ'ā miiⁿ ngaⁿ'angua'a sa. ¹² Ní Saulo miiⁿ n'diichi sa na visión yeⁿ'é sa 'áámá saⁿ'ā chi nguuvī sa Ananías. Ní Ananías miiⁿ cho'o sá cuaaⁿ cheeti va'āí ní chi n'duūⁿ sá tá'a sá vmnááⁿ yeⁿ'e Saulo, ní ninguaāⁿ nduutináⁿ sa. 'Tíicā n'diichi Saulo miiⁿ na visión yeⁿ'é sa.

¹³ Naati Ananías miiⁿ nan'guεεcútaⁿ'ā sa: Señor Jesús, n'giindiveeⁿ chí neené ngaⁿ'a 'iiⁿ'yāⁿ yeⁿ'e sáⁿ'a 'cūū. Saⁿ'ā miiⁿ ní nguée n'daacā diiⁿ sa ndúúcū 'iiⁿ'yāⁿ chi i'téénú

Jesucristo na yáaⁿ Jerusalén. ¹⁴ Chiiduú n'gēete yeⁿe Israel ca'á yā poder Saulo miiⁿ chi cuta'a sa ní candée sa vácū 'iiⁿ'yāⁿ chi ngaⁿ'angua'á yā ndúú^{cū} chi duuchi Cristo.

¹⁵ Señor miiⁿ ngaⁿ'a yā ngii yā saⁿ'ā: Cunaⁿ'ā di. Saⁿ'ā miiⁿ 'úú ndēēvé saⁿ'ā chi cándē sa chi duuchí nanááⁿ 'iiⁿ'yāⁿ s'eeⁿ chi nguéé 'iiⁿ'yāⁿ yeⁿ'ē ndaata Israel ndúú^{cū} rey s'eeⁿ ndúú^{cū} 'iiⁿ'yāⁿ Israel. ¹⁶ Ti 'úú 'cuuⁿ'míⁿ naaⁿ sa chi cánéé chí 'cueenu sa cuuvi caavā 'úú.

¹⁷ Tuu'mi ní cueⁿ'ē Ananías ní chindaā sa va'ai ní sn'duū sa ta'a sa vmnááⁿ yeⁿ'ē Saulo. Ní caⁿ'a sa: Díí, Saulo hermano, Señor Jesús miiⁿ chi che'enaáⁿ yā yeⁿ'ē di na yúúⁿí chí cuchií di. 'Iiⁿ'yāⁿ miiⁿ dichó'o yā 'úú 'íicú cuuvi nanguaāⁿ nduutináaⁿ di. Ní cuuvi cuūtū di ndúú^{cū} Espiritu N'dai yeⁿ'e Ndyuūs.

¹⁸ Hora miiⁿ chiya na nduutináaⁿ sa cosa tan'dúú^{cā} dííⁿmáⁿ 'yaacā ní inguaāⁿ nduutináaⁿ sa. Nacueeⁿ sá ní cheēdinuūⁿní sa. ¹⁹ Taachí che'ē sa yuūndū miiⁿ ndaaca tiínú sa. Saulo miiⁿ cánéé sá nguuvi chi ch'ēetinee sa ndúú^{cū} 'iiⁿ'yāⁿ s'eeⁿ chi i'teenú yā Cristo chi snée yā yáaⁿ Damasco.

Saulo ngaⁿ'ā sa nduudu cuaacu na yáaⁿ Damasco

²⁰ Cuayiivi mííⁿ chí 'cueéⁿ sa yeⁿ'e Cristo na yaacū sinagoga. Ní ngaⁿ'ā sa 'iiⁿ'yāⁿ miiⁿ chí Cristo ní Daiya Dendyuūs. ²¹ Nducyáácá 'iiⁿ'yāⁿ chí ch'iindiveéⁿ yā cheⁿ'e yiinú yā ní ngaⁿ'á yā: ¿Áá nguéé sáⁿ'a 'cūú chí n'gaā'vā sa ndúú^{cū} 'iiⁿ'yāⁿ chí ngaⁿ'angua'á yā ndúú^{cū} chí duuchi Cristo na yáaⁿ Jerusalén? ¿Áá nguéé cáávā chíⁿ chí cuchií sáⁿ'a 'cūú chí candée sa 'iiⁿ'yāⁿ 'cuēe chíichí yā nanááⁿ chiiduú n'gēeté yeⁿ'e Israel?

²² Saulo miiⁿ ditiínú taavi sa. Ní véé 'uuvi nadacádiinūⁿ 'iiⁿ'yāⁿ yeⁿ'e Israel yeⁿ'ē yáaⁿ Damasco. Saⁿ'ā miiⁿ ní ch'iⁿ'i sá chí Jesús miiⁿ chí Cristo.

Saulo nanguáⁿ'ai yā yeⁿ'e 'iiⁿ'yāⁿ Israel s'eeⁿ

²³ Cheēnū n'deēe nguuví ní 'iiⁿ'yāⁿ Israel s'eeⁿ nduuvidaamá yā ní nndeé yā chí 'caaⁿ'nuⁿ yā Saulo. ²⁴ Saulo 'āā deenu sa de'ē chí neⁿ'e dííⁿ yā. 'Iiⁿ'yāⁿ s'eeⁿ ní ch'ēetinée yā cuidado cheendi va'ai yeⁿ'e pared yeⁿ'e yáaⁿ miiⁿ ndii nguuvi ndíí n'gaaⁿ ti cuuvi 'caaⁿ'núⁿ yā sáⁿ'ā. ²⁵ Tuu'mi ní 'iiⁿ'yāⁿ s'eeⁿ chí i'teenú yā Cristo ní tun'dáa yā saⁿ'ā chēeti va'ai n'gaaⁿ. Ní s'núuⁿ yā saⁿ'ā chēeti 'áámá 'cuéétē. Tun'dáa yā saⁿ'a na tiín pared yeⁿ'e yáaⁿ miiⁿ i'cuáa yā saⁿ'ā ndúú^{cū} 'cuéétē.

Saulo na yáaⁿ Jerusalén

²⁶ Taachi ndaā Saulo na yáaⁿ Jerusalén neⁿ'e sa nduuvidaama sa ndúú^{cū} 'iiⁿ'yāⁿ s'eeⁿ chí i'téenu yā Cristo. Nducyáácá yā ní 'va'a yā saⁿ'ā ti nguéé i'téenu yā chí i'teenú saⁿ'ā miiⁿ. ²⁷ Tuu'mi ní Bernabé ndáa yā ndúú^{cū} sa nanááⁿ apóstoles chí dichó'ó Dendyuūs. Ní chíi yā 'iiⁿ'yāⁿ s'eeⁿ táácā n'diichi Saulo miiⁿ Señor Jesús na yúúⁿí. Ní Señor yaa'vi yā saⁿ'ā. Ní 'túuca caⁿ'ā Saulo miiⁿ nduudu cuaacu yeⁿ'é Jesús miiⁿ na yáaⁿ Damasco, ní nguéé ndúú^{cū} vaadí 'va'ā. ²⁸ Saulo miiⁿ canee sa ndúú^{cū} 'iiⁿ'yāⁿ s'eeⁿ yáaⁿ Jerusalén miiⁿ. ²⁹ Caⁿ'a sa nduudu cuaacu yeⁿ'e Señor Jesús nguéé ndúú^{cū} vaadí 'va'ā. Ní n'dee n'dái ngaⁿ'ā sa ndúú^{cū} 'iiⁿ'yāⁿ chí nguéé ndaata Israel naati 'iiⁿ'yāⁿ s'uúⁿ nacádiinúúⁿ yā chí 'caaⁿ'núⁿ yā Saulo. ³⁰ Taachi hermanos chicádiinuuⁿ yā chuū, candée yā Saulo ndii yáaⁿ Cesarea, ní dichó'o yā saⁿ'ā yáaⁿ Tarso.

³¹ Tuu'mi ní nducyaaca yáacū canéé 'dííⁿ tan'dúúca ná yáⁿ'āa Judea ndúú^{cū} yáⁿ'āa Galilea ndúú^{cū} yáⁿ'āa Samaria. Ní ngi'cueeⁿ yā ná nduudu cuaacu ní chí chíicá yā ná vaadí i'teenú yeⁿ'ē Señor Jesús miiⁿ. Ní Espiritu N'dai yeⁿ'e Ndyuūs miiⁿ ca'á yā vaadí diituú 'iiⁿ'yāⁿ s'eeⁿ, ní chí'yaaⁿ yā.

Saⁿ'ā Eneas nanduuvá yeⁿ'ē sa

³² Chíi chúu Pedro miiⁿ ní cueⁿ'e yā nduu cuáaⁿ ndaa yā ntúuⁿ yā naachi snée 'iiⁿ'yāⁿ chí i'téenu na yáaⁿ Lida. ³³ Ní ndaaca yā 'áámá saⁿ'ā chí nguuvi sa Eneas. 'Áá níⁿ'nⁿ nduūyū chí canee sa na cama. Ní saⁿ'ā canee sa ndúú^{cū} ca'āi chí in'dúuví cuerpo yeⁿ'e sa. ³⁴ Ní caⁿ'a Pedro miiⁿ: Eneas, Jesucristo miiⁿ ní dííⁿ yā chí nduūvā yeⁿ'ē di. Nacueeⁿ di ní cuta'a di yivē yeⁿ'ē di. Hora mííⁿ nūⁿ nacueeⁿ sá. ³⁵ Nducyáácá 'iiⁿ'yāⁿ chí snée yā

na yáāⁿ Lida ndúúcu yáāⁿ Sarón n'diichí yā sáⁿa 'cūū. 'Iiⁿ'yāⁿ s'eeⁿ ndaacadaamí yā ní chi'téenu yā Ndyuūs Señor.

Nadacuéeⁿ yā táⁿ'ā Dorcas yeⁿ'e nguuaⁿ tínáⁿ'a

³⁶ Canéé 'áámá n'daataá chi i'teenu Jesucristo na yáāⁿ Jope chi nguuvi tá Tabita chi neⁿ'ē caaⁿ'maⁿ ndúúcu dávaacu griego Dorcas. Tá 'cūū neené n'daacā diiⁿ tá ní ca'ā tá limosnas. ³⁷ Nguuvi miiⁿ ní chiiⁿ tá ní ch'iī ta. Ch'iinu naaⁿ'nú yā cuerpo yeⁿ'ē táⁿ'ā ní chin'diiti yā cuerpo yeⁿ'e táⁿ'ā na 'áámá sala. ³⁸ Yáāⁿ Lida miiⁿ canéé niiⁿ'nuúⁿ ná yáāⁿ Jope. 'Iiⁿ'yāⁿ s'eeⁿ chí i'téenu Jesucristo ch'iindiveeⁿ yā chi Pedro canéé sá miiⁿ. Dichó'o yā na 'uuvi sáⁿ'ā chi caⁿ'a sa cuuvi sa Pedro. Nguéé cuuvi 'naaⁿ di ní chiī di naachi sneé 'nū.

³⁹ Tuu'mi ní Pedro miiⁿ ní ncueeⁿ sa ní cueⁿ'e sa ndúúcu yā. Taachi ndaā sa miiⁿ candéε yā saⁿ'ā na sala naachi ndúúvídaama nducyaaca n'daataá nguá'āa. Ngeεcu yā ní n'giⁿ'i yā ntúuⁿ yā camisas yeⁿ'e yā ndúúcu vestidos yeⁿ'é yā chi Dorcas miiⁿ din'dái tá taachí canduūchi tá. ⁴⁰ Tun'dáá Pedro nducyaaca yā chuva'āī. Pedro miiⁿ chiintii'yá yā ní caⁿ'angua'á yā, ní nguεcundí yā naachi canéé cuerpo yeⁿ'ē tináⁿ'ā ní caⁿ'a yā: Tabita, nacuééⁿ di. Taⁿ'ā miiⁿ ní nn'guaāⁿ tá nduutinaaⁿ tá ní taachi n'diichi tá Pedro, 'nuūⁿ ndii tá. ⁴¹ Pedro miiⁿ ní ca'ā sa ta'ā sa táⁿ'ā miiⁿ ní nadacuéeⁿ sa táⁿ'ā. Tuu'mi ní n'gai sa 'iiⁿ'yāⁿ chi i'téenu yā Ndyuūs miiⁿ ndúúcu n'daataá nguá'āa. Ní ch'iⁿ'i sa táⁿ'ā nááⁿ 'iiⁿ'yāⁿ chi 'āa canduūchi ta. ⁴² Nducyáácá 'iiⁿ'yāⁿ yáāⁿ Jope ch'iindiveeⁿ yā chuū. Ní neené 'yaáⁿ yā s'téenu yā Señor miiⁿ. ⁴³ Ní chó'ōo chí Pedro miiⁿ canéé yā 'áámá tiempo na yáāⁿ Jope na vaacu 'áámá saⁿ'ā chi nguuvi Simón chi idicuuⁿ'nuⁿ sa díí'mán' iiti.

10

Pedro ndúúcu Cornelio

¹ Cánéé 'áámá saⁿ'ā na yáāⁿ Cesarea chi nguuvi sa Cornelio. Saⁿ'ā miiⁿ capitán yeⁿ'ē 'áámá taaⁿ soldado chi nguuvi Italiano. ² Saⁿ'ā miiⁿ ní n'dai taavi sa ní i'téenu sa Dendyuūs ndúúcu nducyaaca 'iiⁿ'yāⁿ na vaacu sá. Saⁿ'ā miiⁿ neéneé nga'a sa limosnas yeⁿ'e 'iiⁿ'yāⁿ chí nguá'āa yeⁿ'e na yáāⁿ. Cueⁿ'é daāⁿ'maⁿ ngaⁿ'angua'ā sa Ndyuūs. ³ Sáⁿ'a 'cūū ní claro n'diichi cuaacú sa ná 'áámá visión tan'dúúca chi n'gεεcu 'iiⁿ'nuⁿ yeⁿ'ē nguuvi miiⁿ. 'Áámá ángel yeⁿ'ē Dendyuūs chindáa yā naachi cánéé sa miiⁿ. Ní ngaⁿ'a ángel ngii yā saⁿ'ā: Díí, Cornelio.

⁴ Sáⁿ'ā miiⁿ ní ch'íínú cuaacú sa ndúúcu vaadi 'va'ā, ní caⁿ'a sa: ¿Du'u n'diī, Señor? Ní ngaⁿ'a ángel ngii yā saⁿ'ā Cornelio: Chííⁿ chi ngaⁿ'āngua'a di ndúúcu limosnas chi nga'ā di, Dendyuūs n'giindiveeⁿ yā ní nan'gaacú yā dii. ⁵ Ángel ngaⁿ'a yā ngii yā Cornelio: Dicho'ó di 'iiⁿ'yāⁿ s'eeⁿ na yáāⁿ Jope ní diiⁿ di chi cuchii saⁿ'ā Simón chi nguuvi sa Pedro. ⁶ Sáⁿ'a 'cūū ní canee sa na vaacu sáⁿ'ā chi nguuvi Simón, saⁿ'ā chi idicuuⁿ'nuⁿ sa díí'mán' iiti. Va'ai yeⁿ'e saⁿ'ā miiⁿ canéé niiⁿ'nuúⁿ na nuūⁿ'ni'yáⁿ'ā. Saⁿ'ā miiⁿ cuuvi sa díí de'ē chi diiⁿ di.

⁷ Cueⁿ'e ángel chi caⁿ'a yā ndúúcu Cornelio, níícu Cornelio miiⁿ ní 'cai sa 'uuvī saⁿ'ā chí diiⁿ mandado yeⁿ'ē sa ndúúcu 'áámá soldado chi i'téenu Dendyuūs chí sneé ndúúcu sa. ⁸ Dichó'o sa 'iiⁿ'yāⁿ s'eeⁿ yáāⁿ Jope taachí ch'íínú caⁿ'a sa tanducuéⁿ'ē chí chó'ōo.

⁹ Chidεεve táama nguuvi taachí snúuⁿ yā yúúni ní taachí snee niiⁿ'nuúⁿ yā yáāⁿ miiⁿ Pedro miiⁿ ncheε sa tiiⁿ va'āi chí caaⁿ'maⁿ'ngua'ā sa tan'dúúca chi n'gεεcu ndichúúví nguuvi. ¹⁰ Saⁿ'ā miiⁿ ndaa cuiicú sá. Ní neⁿ'e sa che'e sa naati nuuⁿ'mán' ne'ē chí idin'dái yā chí che'e sa miiⁿ, n'diichi sa 'áámá visión. ¹¹ N'diichi sá nanguuvi chí candá'āi ní cuich'éeⁿ nanguuvi 'áámá cosa tan'dúúca 'áámá tiinūuⁿ ch'εεε chí n'déé chiichí nduū cúūuⁿ esquinas cuch'éeⁿ cuaacu na yáⁿ'āa miiⁿ. ¹² Ní miiⁿ ní n'diichi sa nducyaaca naaⁿ 'iiti chí cuuúⁿ ca'a tī chí véé ná yáⁿ'āa ndúúcu nducyaaca naaⁿ cúú ndúúcu 'yaada chí véé nanguuvi. ¹³ Ní ndaā 'áámá nduudu ní caⁿ'a: Díí Pedro, nducueeⁿ di, 'caaⁿ'nuⁿ di ní che'e di.

¹⁴ Tuu'mi ní Pedro miiⁿ ní caⁿ'ā sa: Nguéé, Señor. Mar 'áámá chí vaatí ndúúcu chí nguεε n'daacā, nguéé che'é.

¹⁵ Yáá'ví ntuūⁿ nduudu miiⁿ ndiichi ndii 'úúví cuuvi ni ngaⁿ'ā: Chuū chí nadindeεvé Ndyuūs miiⁿ, nguéé caaⁿ'maⁿ di yeⁿ'ē chi vaatí.

¹⁶ Chuū ní chíi 'iīⁿnūⁿ cuuvi ní tiīnūⁿ miiⁿ cuinaⁿ'ā ntūūⁿ nanguuvi. ¹⁷ Naachí Pedro miiⁿ nadācadíínuuⁿ sa yeⁿ'ē visión de'ε chí neⁿ'ē caaⁿ'maⁿ, tuu'mi ní 'iiⁿ'yāⁿ s'eeⁿ chí nadicho'ó Cornelio, 'iiⁿ'yāⁿ s'eeⁿ itiingúúnéⁿ yā tíí va'ai yeⁿ'e Simón. Ní ndaa yā cheendi va'āi. ¹⁸ Ní 'cai yā ní ntínguuneⁿ yā: ¿Áá miiⁿ canee Simón chí nguūví sa Pedro? ¹⁹ Taachi 'āā chicadíínuuⁿ Pedro yeⁿ'ē visión chí n'diichi sa Espíritu N'dai yeⁿ'e Ndyuūs miiⁿ ngaⁿ'a ngii saⁿ'ā: Cun'diichí dí. 'Iiⁿnūⁿ saⁿ'ā in'nuuⁿ sá dii. ²⁰ Nducueeⁿ dí ní nangua'ai di ní nguéé n'deēe nacadíínuuⁿ di chí caⁿ'ā di nduucú yā, ti 'úú dicho'ó 'iiⁿ'yāⁿ.

²¹ Tuu'mi ní ca'āi Pedro miiⁿ ní cueⁿ'ē sa naachí snéé 'iiⁿ'yāⁿ s'eeⁿ chí dicho'ó Cornelio, ní caⁿ'a sa: N'diichi nī. 'Úú saⁿ'ā chí in'nuúⁿ nī. ¿De'ē cáávā chí cuchíí nī?

²² 'Iiⁿ'yāⁿ s'eeⁿ ní caⁿ'a yā: Cornelio, capitán romano, 'áámá saⁿ'ā chí n'dái taavi ní i'téenu sa Dendyuūs. Sáⁿ'ā miiⁿ, 'iiⁿ'yāⁿ Israel s'eeⁿ déenu yā chí saⁿ'ā miiⁿ n'daacā n'dai sa. Saⁿ'ā miiⁿ ní caⁿ'a 'áámá ángel yeⁿ'ē Ndyuūs chíi yā saⁿ'ā, chí neⁿ'e yā chí ndaa nī na vaacú yā ní 'caandiveéⁿ yā nduudu yeⁿ'é nī.

²³ Tuu'mi ní Pedro miiⁿ 'cai yā saⁿ'ā na vaacú yā ní canee sa ndúúcu yā. Chideεve táámá nguuvi miiⁿ nacueeⁿ sá ní cueⁿ'e sa ndúúcu yā. Ní cueⁿ'e n'duuví hermanos yeⁿ'e yáān Jope miiⁿ ndúúcu sa.

²⁴ Táámá nguuvi mííⁿ ndaa yā yáān Cesarea. Ní Cornelio cunee ngíínú yā. Ní 'cai yā 'iiⁿ'yāⁿ yeⁿ'e yā ndúúcu nducyaaca 'iiⁿ'yāⁿ chí amigo chí n'dai ndúúcu yā ní nduuvídaama nducyaaca yā. ²⁵ Taachí ndaa Pedro miiⁿ, can'daa Cornelio miiⁿ ní dííⁿ yā recibir saⁿ'ā s'eeⁿ. Chintíi'yá yā na ca'a Pedro mííⁿ ní chí'téenu yā 'iiⁿ'yāⁿ. ²⁶ Pedro miiⁿ nadacuéⁿ sa Cornelio miiⁿ ní caⁿ'a sá chíi sa 'iiⁿ'yāⁿ: Nacueeⁿ dí. 'Úú saⁿ'ā ntūūⁿ 'úú.

²⁷ Ní neⁿ'e chí indeé yā ndúúcu sa ní candéε yā saⁿ'ā cheeti va'āi. Néené 'yaaⁿ yā nduuvídaámá yā miiⁿ. ²⁸ Ní caⁿ'ā Pedro: Ndís'tiī ní deenu nī chí nguéé n'daacā chí 'áámá saⁿ'ā Israel nduuvídaámá sá o ndaa niiⁿnuúⁿ sá ndúúcu 'iiⁿ'yāⁿ chí nguéé 'iiⁿ'yāⁿ yeⁿ'ē ndaata Israel. Ndyuūs ní ch'iⁿ'i yā 'úú chí nguéé canéé chí caaⁿ'maⁿ yā mar 'áámá saⁿ'ā vaatí sa o chí nguéé n'daacā sa. ²⁹ Taachí Dendyuūs 'cai yā 'úú, núúⁿ ndaa. Maaⁿ ní intínguuneéⁿ ndís'tiī: ¿De'ē neⁿ'é nī 'úú chí cuchíi? ³⁰ Tuu'mi ní Cornelio caⁿ'á yā: Maaⁿ cuūⁿ nguūví chí 'āā hora 'cūū nūⁿ chí n'gεecu 'iiⁿnúⁿ chíinū taachi 'āā cuéé ca'diinú, cucáávā chí ngaⁿ'angua'á na vaacú. N'díí chí 'áámá saⁿ'ā. Neené ngii 'yáⁿ'ā catecai sa. ³¹ Ní ngaⁿ'ā sa ngii sa 'úú: Díí Cornelio, chííⁿ chí caⁿ'angua'a di ndúúcu limosnas yeⁿ'ē di Dendyuūs n'giindiveéⁿ yā ní nan'gaacu yā. ³² Díí, dichó'o di saⁿ'ā na yáān Jope ní diiⁿ di chí chíi Simón chí nguuvi Pedro miiⁿ. Saⁿ'ā miiⁿ cánéé sa na vaacu sa Simón, saⁿ'ā chí idicúúⁿnuⁿ dííⁿmáⁿ 'iiti. Vaacu sa niiⁿnuúⁿ ná nuūⁿnī'yáⁿ'ā. Taachí ndaa saⁿ'ā miiⁿ ní yaa'vi sa díí. ³³ Tuu'mi ní Cornelio ngāⁿ'a yā ngii yā Pedro: Hora miiⁿ dicho'ó 'iiⁿ'yāⁿ cáávā di. N'dááca diiⁿ di chí cuchíi di. Maaⁿ ndúcyaacá 'nū ní snéé 'nū 'muuⁿ ndúúcu Dendyuūs. Ní sneé 'nū chí 'caandiveéⁿ 'nū tanducuéⁿ'ē chí Dendyuūs caⁿ'á yā chíi yā dii.

³⁴ Tuu'mi ní Pedro ngaⁿ'a sa ngii sa: Maaⁿ ní, 'úú tuumicadiinúⁿ chí Ndyuūs ní neⁿ'e yā nducyaaca 'iiⁿ'yāⁿ daama daama. ³⁵ Nducyáácá 'iiⁿ'yāⁿ yeⁿ'ē nducyaaca yáⁿ'āa chí i'téenu yā Dendyuūs ní dííⁿ yā n'daacā ní Ndyuūs ní 'cuaáⁿ yā 'iiⁿ'yāⁿ. ³⁶ Ndyuūs ní dicho'ó yā 'áámá nduudu yeⁿ'e yā nanáán 'iiⁿ'yāⁿ yeⁿ'é Israel. Caⁿ'a yā nduudú ngai yeⁿ'ē evangelio ní véé vaadi 'dííⁿ cucáávā Jesucristo. 'Iiⁿ'yāⁿ 'cúū Señor 'iivú Ndyuūs yeⁿ'ē nducyáácá 'iiⁿ'yāⁿ. ³⁷ Ndís'tiī ní déenu nī nduudu chí caⁿ'a yā nuuⁿmáⁿ yáⁿ'āa Judea. Tucá'a yā ndii yáⁿ'āa Galilea, cuayiivi ch'iinu chí caⁿ'a Juan yeⁿ'e chí cheedinuūⁿníⁿ yā. ³⁸ 'Tíicā Dendyuūs tee yā Jesús yeⁿ'e yáān Nazaret Espíritu N'dai ndúúcu poder. Jesús miiⁿ ní chíica yā dííⁿ yā chí n'daacā. Ní dííⁿ yā chí nduuvā yeⁿ'e nducyáácá 'iiⁿ'yāⁿ chí canee yā ndúúcu espíritus yeⁿ'e yáán'guinūⁿ caatí Ndyuūs miiⁿ canee yā ndúúcu Jesús. ³⁹ Ní nús'uū ní testigo 'nū yeⁿ'ē tanducuéⁿ'ē chí Jesús dííⁿ yā na yáⁿ'āa Judea ndúúcu na yáān Jerusalén. 'Iiⁿ'yāⁿ s'eeⁿ miiⁿ ní ch'iⁿ'i nuⁿ yā 'iiⁿ'yāⁿ. Ní chí'nééⁿnga'á yā 'iiⁿ'yāⁿ na 'áámá yáⁿ'á. ⁴⁰ Jesús 'cūū Ndyuūs nadicuéⁿ yā 'iiⁿ'yāⁿ yeⁿ'e nguaaⁿ tináⁿ'ā ndiichi

ndii 'íí'núⁿ nguuví miiⁿ ní diíⁿ yā chí che'enaáⁿ yā nguaaⁿ 'iiⁿyāⁿ. ⁴¹ Nguéé che'enaáⁿ yā yeⁿē nducyaaca 'iiⁿyāⁿ caati yeⁿē testigo chí Dendyuūs ndεεve yā cuááⁿ vmnaaⁿ. Nús'uū ní che'é 'nū ní chí'í 'nū nduucú yā cuayiivi taachí nducueeⁿ yā yeⁿe nguaaⁿ tináⁿā. ⁴² Ní dichó'o yā nús'uū chí caaⁿmáⁿ 'nū evangelio chí nduudú ngai nanááⁿ 'iiⁿyāⁿ. Ní ngaⁿa cuaacú 'nū chí Cristo miiⁿ ní s'neéⁿ Ndyuūs 'iiⁿyāⁿ lado yeⁿe Juez yeⁿé 'iiⁿyāⁿ chí nduuchi ndúúⁿcū 'iiⁿyāⁿ chí n'díí. ⁴³ Nducyaaca profeta s'eeⁿ chí caⁿa nduudú yeⁿe Dendyuūs caⁿa yā yeⁿe 'iiⁿyāⁿ miiⁿ. Nducyáácá 'iiⁿyāⁿ chí cu'téenu yā 'iiⁿyāⁿ, véé vaadi nadich'εεcú nuūⁿndí yeⁿé yā cucaavā Jesús miiⁿ.

⁴⁴ Taachi ngaⁿā Pedro nduudú 'cūū, Espíritu N'dai yeⁿe Ndyuūs ní ndaā vmnaaⁿ yeⁿē nducyaaca 'iiⁿyāⁿ chí ch'iindiveéⁿ yā nduudu 'cūū. ⁴⁵ Ní 'iiⁿyāⁿ yeⁿe Israel chí'téenu yā chí ndaā yā ndúúⁿcū Pedro, 'iiⁿyāⁿ s'eeⁿ ch'εεtinéé n'giinu yā chí vmnaaⁿ yeⁿe 'iiⁿyāⁿ s'uuⁿ chí nguéé 'iiⁿyāⁿ yeⁿe ndaata Israel, Dendyuūs ca'a ntuúⁿ yā regalo yeⁿē Espíritu N'dai yeⁿe Ndyuūs, ⁴⁶ caati ch'iindiveéⁿ yā chí ngaⁿa 'iiⁿyāⁿ s'eeⁿ tanáⁿā davaacu. Ní ngaⁿá yā chí ch'εεte taaví Dendyuūs. ⁴⁷ Tuu'mi ní nan'guεεcútaⁿā Pedro: ¿'Áá cúúví chí 'āā du'ú nuūⁿ 'iiⁿyāⁿ chí nguéé 'cuááⁿ yā yeⁿé nuūⁿnī chí cuεεdinúūⁿnī 'iiⁿyāⁿ chí diíⁿ yā recibir Espíritu N'dai yeⁿe Ndyuūs tan'dúúⁿcā s'uūúⁿ?

⁴⁸ Ní dichó'o yā 'iiⁿyāⁿ chí cuεεdinúūⁿnī yā ndúúⁿcū chí duuchi Jesús. Tuu'mi ní 'iiⁿyāⁿ s'eeⁿ chiica yā Pedro chí cunée yā 'áámá tiempo ndúúⁿcu yā.

11

Pedro caⁿa yā chuū ná yaacū templo yeⁿe yāāⁿ Jerusalén

¹ Ch'iindiveeⁿ apóstoles chí dichó'ó Dendyuūs ndúúⁿcū hermanos chí snée yā na yáⁿāa Judea chí 'tiicá ntúūⁿ 'iiⁿyāⁿ s'eeⁿ chí nguéé 'iiⁿyāⁿ yéⁿē ndaata Israel chí diíⁿ yā recibir nduudu yeⁿe Dendyuūs. ² Taachí Pedro miiⁿ cuchεε sa yāāⁿ Jerusalén, hermanos yeⁿe 'iiⁿyāⁿ Israel ch'εεcu cheendí yā ndúúⁿcū Pedro. ³ Ngaⁿá yā: ¿De'ē cúúví chí sndáa di va'ai yeⁿe 'iiⁿyāⁿ chí nguéé yeⁿe 'iiⁿyāⁿ Israel, ní che'e di ndúúⁿcu yā?

⁴ Tuu'mi ní Pedro miiⁿ ní tuca'a sa chí sa 'iiⁿyāⁿ s'eeⁿ táácā chíí. Ní caⁿa sa: ⁵ Caneé na yāāⁿ Jope ní ngaⁿ'anguā'á ní nnduúchí ní n'diichí 'áámá visión dácaā 'áámá tiinūūⁿ ch'εεté cuch'éeⁿ nanguuvi n'déé chíichí nduū cūūⁿ esquinas ndaā ndii vmnááⁿ. ⁶ Taachi n'diichí, nacádiinúúⁿ. Tuu'mi ní n'diichí yeⁿé icyáⁿā 'iiti chí cuūūⁿ cá'a tī ndúúⁿcū 'iiti taaⁿ ndúúⁿcū cúú ndúúⁿcū 'yaada yeⁿē nanguuvi. ⁷ Ní ch'iindiveéⁿ 'áámá nduudu chí caⁿā chíí 'úú: Díí Pedro, nacueeⁿ di. 'Caaⁿnuⁿ dí 'iiti, ní ch'éé dí 'iiti. ⁸ Ní caⁿá chuū: Señor, nguéé; ti mar 'áámá chí vaatí chí nguεε n'daacā che'é. ⁹ Tuu'mi ní nduudu yeⁿē nanguuvi caⁿa ntuūⁿ ndiichi ndii 'úúví: Chííⁿ chí Ndyuūs nádindεεvé yā, nguéé caaⁿmaⁿ di yeⁿē chí vaatí. ¹⁰ Chuū ní 'iiⁿnuⁿ cúúví chíí. Cuinaⁿā ntúūⁿ tanducueéⁿē nandéε yā cuááⁿ 'niiⁿnuⁿ nanguuvi. ¹¹ Ní n'diichí nī. Hora miiⁿ ndaā na 'iiⁿnuⁿ saⁿā na va'āī naachi 'úú caneé. 'Áámá 'iiⁿyāⁿ chí nguuvi Cornelio dichó'o yā saⁿā yeⁿe yāāⁿ Cesarea ndíí naachi caneé. ¹² Ní Espíritu N'dai yeⁿe Ndyuūs ngaⁿa ngii 'úú chí caⁿá ndúúⁿcu sa. Ní nguéé de'ē vεε nadicádiinúúⁿ. Cheⁿé ndúúⁿcū niyaaⁿ hermanos ní sndáa 'nū vaacu Cornelio. ¹³ Saⁿā miiⁿ caⁿa sá chíí sá nús'uū, táaca n'diichi sa 'áámá ángel vaacū sa chí cheendii yā ní cāⁿa yā: Díí Cornelio, dicho'ó dí saⁿā s'eeⁿ yāāⁿ Jope ní diíⁿ dí chí ndaa sáⁿā Simón chí nguuvi Pedro mííⁿ. ¹⁴ Saⁿā miiⁿ ní caaⁿmaⁿ sá nduudu chí nanguaⁿāí dii ndúúⁿcu nducyáácá 'iiⁿyāⁿ yeⁿe di na vaacu di. ¹⁵ Ní taachí tucá'á caⁿá, ndaā Espíritu N'dai yeⁿe Ndyuūs yeⁿe cuaaⁿ 'niiⁿnuⁿ vmnaaⁿ yeⁿē nducyaaca 'iiⁿyāⁿ s'eeⁿ dendu'ū, tan'dúúⁿcā chí chíí ndúúⁿcū s'uūúⁿ vmnááⁿ vmnaaⁿ. ¹⁶ Tuu'mi ní nn'gaacú chí caⁿa Señor miiⁿ, chí caⁿa yā: Juan mííⁿ chεεdinúūⁿní yā ndúúⁿcū nuūⁿnī naati ndís'tií ní cuéédinúūⁿnī nī ndúúⁿcū Espíritu N'dai yeⁿe Ndyuūs. ¹⁷ Nduuti chí Dendyuūs chí ca'a yā regalo miiⁿ 'iiⁿyāⁿ tan'dúúⁿcā chí teé yā s'uūúⁿ chí i'teenu yú Señor Jesucristo, ¿du'ū 'úú chí di'vaachí yeⁿē Dendyuūs miiⁿ?

¹⁸ Tuu'mi ní ch'iindiveéⁿ yā nduudu miiⁿ ní ch'εεtinéé 'diíⁿ yā ní cāⁿa yā chí ch'εεté yā Ndyuūs, ní caⁿa yā: 'Tiicá ntúūⁿ ca'a Dendyuūs 'iiⁿyāⁿ s'eeⁿ chí nguéé 'iiⁿyāⁿ yeⁿe

ndaata Israel chi ndaacadaamí yā yeⁿē nuuⁿndi yeⁿé yā ní nndaāca yā vida cueⁿe daāⁿmaⁿ.

Yáacū yeⁿe yāāⁿ Antioquía

¹⁹ Maaⁿ ní 'iiⁿ'yāⁿ chi cueⁿē 'múúⁿ cueⁿe miiⁿ yā cucáāvā chiiⁿ chi díⁿ 'iiⁿ'yāⁿ ndúú^{cū} Esteban, 'iiⁿ'yāⁿ miiⁿ cho'ó yā ndii yáⁿāa Fenicia, ndúú^{cū} isla Chipre, ndii yāāⁿ Antioquía. Ní nguéé cāⁿ'a yā nduudu yeⁿe Dendyuūs ndúú^{cū} nducyáácá 'iiⁿ'yāⁿ, dámaāⁿ 'iiⁿ'yāⁿ Israel s'eeⁿ caⁿ'a yā nduucú yā. ²⁰ Nguaaⁿ 'iiⁿ'yāⁿ s'eeⁿ ni snéé saⁿ'ā yeⁿe isla Chipre yeⁿe yāāⁿ Cirene. Saⁿ'ā s'eeⁿ ní taachi ndaā sa yāāⁿ Antioquía yaaⁿvi sá 'iiⁿ'yāⁿ s'eeⁿ chi nguéé 'iiⁿ'yāⁿ yéⁿē ndaata Israel dendú'ū ní caⁿ'a sa evangelio chi ndúú^{dú} ngai yeⁿē Señor Jesús. ²¹ Ní ta'ā Señor 'iivú Ndyuūs miiⁿ canéé ndúú^{cū} sa. Chii 'yaaⁿ n'dái 'iiⁿ'yāⁿ chi'téenu yā Señor miiⁿ. Ní can'dáa yā Señor miiⁿ.

²² Cho'ōo chi 'iiⁿ'yāⁿ yeⁿe yáacū chi snéé yā yāāⁿ Jerusalén ch'iindiveén yā chuū. Ní dichó'o yā Bernabé chi caⁿ'a sa yāāⁿ Antioquía. ²³ Sáⁿ'a 'cūū taachi ndaā sa ní n'diichi sa favor ch'εετε taavi yeⁿē Dendyuūs miiⁿ, yeenú taavi sa. Ní chi'cueeⁿ sa chí nducyáácá yā 'cuetinéé yā ndúú^{cū} nuuⁿmaⁿ staava yeⁿé yā ndúú^{cū} Señor 'iivú Dendyuūs miiⁿ. ²⁴ Saⁿ'ā Bernabé miiⁿ ní n'dai sa, ní ndiituú saⁿ'ā Espíritu N'dai yeⁿe Ndyuūs ní i'téenu sá ndúú^{cū} núúⁿmáⁿ staava yeⁿe sa. Chii 'yaaⁿ n'dái 'iiⁿ'yāⁿ chi'téenu yā Señor miiⁿ.

²⁵ Cuayiivi miiⁿ ní cueⁿē Bernabé na yāāⁿ Tarso chi in'nuuⁿ sa Saulo miiⁿ; ní ndaācā sa saⁿ'ā ní nandē sa saⁿ'ā na yāāⁿ Antioquía. ²⁶ Ní nduuvidaamá yā 'áámá nduuyu na yaācū miiⁿ, ní chi'cuéén yā neené 'yaaⁿ 'iiⁿ'yāⁿ. Chíí vmnááⁿ vmnaaⁿ na yāāⁿ Antioquía 'iiⁿ'yāⁿ s'eeⁿ yeⁿe yāāⁿ miiⁿ caⁿ'a yā chi duuchí cristiano s'eeⁿ, 'iiⁿ'yāⁿ chi i'teenu Cristo.

²⁷ Nguuvi s'uúⁿ tanáⁿ'ā profetas chi ngaⁿ'ā nduudu yeⁿe Dendyuūs can'dáa yā na yāāⁿ Jerusalén. Ndaá yā na yāāⁿ Antioquía. ²⁸ Nadacueeⁿ 'áámá yā chi nguuví yā Agabo ní díⁿ yā chí inadacádinūuⁿ 'iiⁿ'yāⁿ s'eeⁿ cáāvā Espíritu N'dai yeⁿe Ndyuūs chí ndaa 'áámá cuiicu ch'εετε núúⁿmáⁿ yáⁿāa chi véé 'iiⁿ'yāⁿ. Cho'ōo chuū nguuvi yeⁿe saⁿ'ā Claudio. ²⁹ Tuu'mi ní 'iiⁿ'yāⁿ s'eeⁿ chi i'téenu Cristo díⁿ yā chí dicho'ó yā ofrendas yeⁿē hermanos chi snéé yā yáⁿāa Judea. 'Áámá 'áámá yā tuunu tuunu ca tan'dúú^{cā} chi cuuvi ca'á yā. ³⁰ Chuū ní díⁿ yā ní ca'á yā 'iiⁿ'yāⁿ ndiicúū. Ní 'iiⁿ'yāⁿ ndiicúū dichó'o yā limosna ndúú^{cū} Bernabé ndúú^{cū} Saulo.

12

Herodes 'caaⁿ'núⁿ yā Jacobo, ní s'nuúⁿ yā Pedro vácūū

¹ Tiempo miiⁿ ní rey Herodes diiⁿyuⁿ ta'á yā chi neⁿe 'caaⁿ'núⁿ yā náⁿ'ā 'iiⁿ'yāⁿ chi ngeⁿe yaācū. ² Níicú ch'iiⁿ'nuⁿ rey miiⁿ ndúú^{cū} machete chí 'caāⁿ ndúú 'uuví lados Jacobo chí 'dínū Juan. ³ N'diichí yā chí 'iiⁿ'yāⁿ Israel s'eeⁿ canee yiinú yā chuū. Dichó'o yā saⁿ'a s'eeⁿ chí cuta'ā ntúuⁿ sa Pedro dendu'ū. Nguuvi míⁿ ní nguuvi yeⁿē pan chí nguéé yiinūuⁿ levadura miiⁿ. ⁴ Sta'á yā Pedro ní s'nuúⁿ yā saⁿ'ā vácūū naachi snéé cuūuⁿ taáⁿ soldado, 'áámá tááⁿ soldado miiⁿ cuūuⁿ ngí sa. Soldado s'eeⁿ cunun'dai sa Pedro ní cho'ó yeⁿē pascua ní rey Herodes tun'dái yā saⁿ'ā. ⁵ Cunun'dai sa Pedro miiⁿ chí canuuⁿ sa vácūū. 'Iiⁿ'yāⁿ chí ngeⁿe yaācū miiⁿ ngáⁿ'ánguā'á yā ní ngíicá yā Dendyuūs ndii nguuvi ndí n'gaaⁿ cucáāvā Pedro miiⁿ.

Nanguaⁿ'ai Pedro yeⁿe vácūū

⁶ Taachi neⁿe ntun'dáa Herodes miiⁿ Pedro miiⁿ, nguiinū míⁿ nūuⁿ ní cyaadu Pedro miiⁿ naavtaⁿ'a yeⁿe 'uuví soldado s'eeⁿ. Ndeē chiichí sa ndúú^{cū} 'uuví cadena s'eeⁿ. Saⁿ'ā s'eeⁿ chí diiⁿ cuidado vácūū míⁿ snéé sa cheendi vácūū miiⁿ. ⁷ 'Caandiveén nī, ndaā 'áámá ángel yeⁿē Señor. Ní 'áámá δεεvé canéé na vácūū. Tuu'vi yā tíicuaa Pedro ní nanduuchí yā Pedro. Ní caⁿ'a yā: Nacueeⁿ di cániicū di. Cadena s'ūuⁿ ní chiví na ta'ā sa. ⁸ Tuu'mi ní ngaⁿ'a ángel miiⁿ ní ngii yā saⁿ'ā: Cu'neeⁿ di cinto yeⁿē di ní cunuūⁿ cá'a di ndaacuú yeⁿē di ní diiⁿ chiichí di cinta yeⁿē. 'Tíicā diiⁿ sa. Ní caⁿ'a yā: Nunúúⁿ dí catecai vmnaaⁿ di ní cuchí di, ní can'daā dī 'úú.

⁹ Ní n'daa sa ní cueⁿe sa n'daā sa 'iiⁿ'yāⁿ. Pedro miiⁿ ní nguéé deenu sa chí cuaacu chí diiⁿ ángel miiⁿ. Nadacádinuuⁿ sa chí 'áámá visión chí n'gíⁿ'nuⁿ sa nguuaⁿ na 'yúúduyaāⁿ

yeⁿē sa. ¹⁰ Cho'ó yā, yeⁿē 'áámá táán soldado s'eeⁿ, ní cho'ó yā ndii chiiⁿ ndii 'úúví táán soldado s'eeⁿ. Ní ndaá yā ná cheendi va'ái cūū chí canéé cuaaⁿ na yáāⁿ miiⁿ. Chii ní nánguáán máāaⁿ cheendi va'ai yeⁿé yā. Can'dáa yā ní cho'ó yā 'áámá yúúni, ní ángel miiⁿ ní chivíi yā yeⁿe yā. ¹¹ Tuu'mi ní Pedro miiⁿ ní nduuchi sa. Ní caⁿā sa: Maaⁿ ní ituumicadiinúuⁿ chí Ndyuūs miiⁿ nidicho'ó yā ángel yeⁿé yā ní nanguáⁿai yā 'úú yeⁿē ta'a rey Herodes. Nífcú yeⁿē tanducueⁿē yáāⁿ chí yáāⁿ yeⁿē 'iiⁿyāⁿ Israel s'eeⁿ chi snéé ngiinu yā chí 'cuūvi 'úú.

¹² Taachí Pedro nacadínuuⁿ yā yeⁿē chuū cueⁿé yā, ní ndaa yā na vaacu María cheecu Juan, chí ngúúví ntúuⁿ sa Marcos, naachí neení 'yaaⁿ yā snéé yā chí nduuvídáámá yā ní ngaⁿangua'á yā. ¹³ Taachí di'cuēcú Pedro cheendi va'āi yeⁿe patio, can'dáa 'áámá n'daataá chí nguuvi tá Rode. ¹⁴ Tá 'cūū ní 'naanaveeⁿ tá nduudu yeⁿē Pedro ní chiiⁿ yeenú tá. Ní nguéé nn'guaaⁿ tá cheendi va'āi. Cunaⁿā tá ngeēnū tá cheeti va'āi ní caⁿa tá chí Pedro miiⁿ canee sa cheendi va'āi. ¹⁵ 'Iiⁿyāⁿ s'eeⁿ ní ngaⁿá yā ngii yā táⁿā: Loca dii. Taⁿā miiⁿ dicuaācu tá saⁿā miiⁿ. Tuu'mí 'iiⁿyāⁿ s'eeⁿ caⁿa yā: Ángel chí díⁿ cuidado saⁿā.

¹⁶ Pedro miiⁿ ní iyaa'vi ca sá. Taachí nn'guaaⁿ yā ní n'diichi yā saⁿā dii'yá yā chí. ¹⁷ Pedro miiⁿ ní ditá'a sa yeⁿé yā chí 'cuētinéé 'díⁿ cheendi yā. Ní chí sa 'iiⁿyāⁿ táácā ángel yeⁿe Señor ntun'dáa yā saⁿā vácūū. Pedro ní caⁿa sa: Díⁿ nī chí cadiinuⁿ Jacobo ndúúcu hermanos. Pedro can'dáa sa ní cueⁿe sa taama lugar.

¹⁸ Chí δεενε míⁿ ní dii'yā n'dái soldado s'eeⁿ chí chí ndúúcu Pedro. ¹⁹ Herodes miiⁿ ní n'nuúⁿ yā saⁿā. Nguéé ndaaca yā saⁿā. Ch'iinu maaⁿ ní tiinguuneéⁿ yā saⁿā s'eeⁿ chí diiⁿ cuidado. Caⁿa yā chí 'cuūvi saⁿa s'eeⁿ. Cuayiivi cueⁿe Herodes miiⁿ yáⁿāa Judea ná yáāⁿ Cesarea ní canee yā miiⁿ.

Ch'iī rey Herodes

²⁰ Herodes miiⁿ taaⁿ n'dai yā yeⁿē 'iiⁿyāⁿ yáāⁿ Tiro ndúúcu 'iiⁿyāⁿ yáāⁿ Sidón. Naati 'iiⁿyāⁿ yeⁿe yáāⁿ s'eeⁿ ní ndaá yā nanáán rey Herodes miiⁿ chí neⁿe taaví yā chí canéé 'diíⁿ, ti chí nge'é yā chí yeⁿē yáⁿāa yeⁿe rey. Cuta'á yā tan'dúúca amigo yeⁿé yā saⁿā chí nguuvi Blasto chí diiⁿ cuidado va'ai yeⁿe rey, cuarto naachi cyaadú yā. Neⁿé yā chí cuuví caaⁿmaⁿ sa ndúúcu rey cáava yā. ²¹ 'Áámá nguuvi chí diiⁿ señalado cáavā chuū, Herodes canuuⁿ yā catecai rey. Ch'iindí yā na trono yeⁿé yā ní caⁿa yā chí yā 'iiⁿyāⁿ 'áámá nduudu. ²² Ní 'iiⁿyāⁿ yáāⁿ miiⁿ 'cai yiicú yā ní caⁿa yā: Ndúúdu miiⁿ yeⁿē Dendyuūs, nguéé yeⁿe saⁿā iⁿ'yeeⁿdí 'cūū.

²³ Hora miiⁿ ní 'áámá ángel yeⁿe Señor miiⁿ n'nuuⁿ cá'ai yā saⁿā Herodes caati nguéé caⁿa sa chí yeⁿe Dendyuūs chí ch'εεte taavi chí ngaⁿa sa. Ní che'ē taavi n'dáa rey miiⁿ ní ch'iī sa.

²⁴ Nduudú yeⁿē Señor Jesucristo miiⁿ ndíⁿ ch'εεte ca ní 'iiⁿyāⁿ chí i'téenu ngíⁿ 'yaaⁿ cá yā.

²⁵ Bernabé ndúúcu Saulo miiⁿ nndaá ntúuⁿ yā yáāⁿ Jerusalén ti 'āā díⁿ yā cumplir ntiiⁿnyuⁿ yeⁿé yā. Ndeē ntúuⁿ yā Juan chí nguuvi Marcos.

13

Bernabé ndúúcu Saulo tucaⁿá yā viaje vmnáán vmnaaⁿ

¹ Véé 'iiⁿyāⁿ profetas chí caaⁿmaⁿ nduudu yeⁿe Dendyuūs ndúúcu maestros yeⁿe yaācū yeⁿe yáāⁿ Antioquía. 'Iiⁿyāⁿ s'eeⁿ ní Bernabé, ndúúcu Simón chí nguuvi sa Niger, ndúúcu Lucio yeⁿē yáāⁿ Cirene, ndúúcu Manaén saⁿā chí dáámá chiita sá ndúúcu rey Herodes, ndúúcu Saulo. ² 'Iiⁿyāⁿ s'eeⁿ ní taachí snéé yā i'téenu yā Señor Jesucristo. Ní taachí 'āā cuéé che'é yā tuu'mí Espíritu N'dai yeⁿe Ndyuūs caⁿa yā: Cu'neeⁿ ví'i nī 'āā ví'i Bernabé ndúúcu Saulo cáavā ntiiⁿnyuⁿ chí 'úú ca'á saⁿā s'eeⁿ. ³ Taachi 'āā cuéé che'é yā ní ngaⁿangua'á yā nífcú sn'duúⁿ yā ta'á yā vmnaaⁿ yeⁿe saⁿā s'eeⁿ ní díⁿ yā despedir yeⁿē sa.

Apóstoles caⁿa yā nduudu cuaacu na isla Chipre

⁴ Espíritu N'dai dichó'o yā 'ii'nyān s'eeⁿ ní cueⁿ'é yā yāāⁿ Seleucia. Ndií miiⁿ ní cueⁿ'é yā na barco isla Chipre. ⁵ Ndaá yā na yāāⁿ Salamina ní ngaⁿ'a yā nduudu yeⁿ'e Dendyuūs miiⁿ na yāacū sinagogas yeⁿ'e 'ii'nyān Israel s'eeⁿ. Ní canéé ntúuⁿ yā ndúucū Juan miiⁿ chí nginneé sá 'ii'nyān. ⁶ Ní ch'iinu snee yā cheⁿ'e yā núúⁿmáⁿ yāāⁿ yeⁿ'e isla Chipre ní ndaá yā na yāāⁿ Pafos, ní ndaacá yā 'áámá saⁿ'ā Israel chí nguuví Barjesús. Saⁿ'ā miiⁿ saⁿ'ā chí idin'dái magia ní profeta chí nguéé ngaⁿ'ā nduudu cuaacu yeⁿ'e Dendyuūs nanááⁿ 'ii'nyān. ⁷ Saⁿ'ā miiⁿ canéé sá ndúucū saⁿ'ā gobernador Sergio Paulo ní 'áámá saⁿ'ā chí déenu sa. Sergio Paulo miiⁿ ní 'cai sa Bernabé ndúucū Saulo. Neⁿ'e sa 'caandiveeⁿ sa nduudú yeⁿ'e Dendyuūs. ⁸ Sáⁿ'ā Elimas (nguuví sá neⁿ'e caaⁿ'māⁿ davaacú 'cūū saⁿ'ā chí idin'dái magia) nguéé 'cūū sa saⁿ'ā. Neⁿ'e sa diví sa chí i'teenu Sergio Paulo chí gobernador. ⁹ Tuu'mí ní Saulo chí nguuví Pablo dendú'ū, ndiituú sa ndúucū Espíritu N'dai ní n'gíinu sa saⁿ'ā Elimas miiⁿ. ¹⁰ Pablo caⁿ'a sa: Dii, sáⁿ'ā diitú yeⁿ'e tanducueⁿ'ē vaadí nginnche'éi ndúucū nducueⁿ'ē chí nguεε n'daācā, daiya yāáⁿ'n'guiinūⁿ ní contra yeⁿ'ē tanducueⁿ'ē vaadí cuaacu. ¿'Áá nguéé cu'nēēⁿ 'naaⁿ di chí di'vááchí di yeⁿ'e yúúni cuaacu yeⁿ'ē Señor Jesucristo? ¹¹ Maaⁿ ní ta'ā Señor miiⁿ canee contra yeⁿ'e di ní cúúví nngueenāⁿ di. Nguéé n'díichi di 'yáⁿ'ā 'áámá tiempo. Tuu'mí nūⁿ chí nngueenāⁿ sa ní 'áámá chí maāi yeⁿ'ē sa. Ní cachiica 'múúⁿ cachiicá miiⁿ sa ní in'nuūⁿ sa du'ū chí cundéé neeⁿ ta'ā sa. ¹² Tuu'mí ní gobernador Sergio Paulo n'diichi sa chí chíi, ní s'teenu sa. Ngeⁿ'e yíínú sá yeⁿ'ē nduudu yeⁿ'ē Señor Ndyuūs.

Pablo ndúucū Bernabé cuēⁿ'e yā na yāāⁿ Antioquía yeⁿ'ē distrito Pisidia

¹³ Pablo ndúucū 'ii'nyān chí ndúucū sa cueⁿ'é yā na barco yeⁿ'ē yāāⁿ Pafos ní cueⁿ'é yā na yāāⁿ Perge yeⁿ'ē país Panfilia. Naati Juan miiⁿ ní cueⁿ'e sa yēⁿ'e yā na yāāⁿ Jerusalén. ¹⁴ 'Ii'nyān s'eeⁿ ní cueⁿ'é yā yeⁿ'ē yāāⁿ Perge ní ndaá yā yāāⁿ Antioquía yeⁿ'ē distrito Pisidia. Ní ndaa yā na yaācū sinagoga nguuví sábadu, 'áámá nguuví chí ntaavi'tuunúúⁿ yā tiempo miiⁿ. Ní ch'εεtē yā na silla. ¹⁵ Cuayiivi chí saⁿ'a ch'εεtē yeⁿ'ē yaācū sinagoga ch'eeⁿ sa ná libro yeⁿ'e ley ndúucū ná libro yeⁿ'e profetas, saⁿ'ā ch'εεtē dichó'o sa saⁿ'ā s'eeⁿ chí caāⁿ'māⁿ sa ní caⁿ'a sa: Ndís'tií saⁿ'ā vi'í, ndúúti chí canee 'áámá nduudu yeⁿ'ē chí ca'cueeⁿ di 'ii'nyān 'cūū, caaⁿ'maⁿ di.

¹⁶ Tuu'mí ní Pablo miiⁿ ní nacueeⁿ sa. Diíⁿ sá ndúucū ta'a sa chí cuuvi 'diíⁿ. Ní caⁿ'a sa: Ndís'tií saⁿ'ā yeⁿ'e Israel ndúucū 'ii'nyān chí i'téenu Ndyuūs, 'caandiveeⁿ ní. ¹⁷ Ndyuūs yeⁿ'ē 'ii'nyān yeⁿ'e yú Israel ndεεve yā chiida yú s'eeⁿ ní díin yā chí 'ii'nyān ch'εεtē. Ní 'ii'nyān s'eeⁿ snéé yā yáⁿ'āa Egipto tan'dúucā 'ii'nyān snúúⁿ yúúni. Ní Ndyuūs ndúucū poder yeⁿ'e yā ndúucū ta'á yā ní tun'dáa yā 'ii'nyān. ¹⁸ Ní taandúú 'úúví ngeεcu nduūyū díin yā cuidado 'ii'nyān na yáⁿ'āa cuūⁿmaⁿ. Ní chí cheé yā taanduvéé chí 'ii'nyān s'eeⁿ díin yā. ¹⁹ Ní taachí Ndyuūs diíⁿ tuuví yā ndεēchē nación yeⁿ'e 'ii'nyān chí nguéé ndaata Israel na yáⁿ'āa Canaán, ca'á yā yáⁿ'āa miiⁿ chí cuuvi yeⁿ'e 'ii'nyān Israel. ²⁰ Cho'ó chuū chεeti cuūⁿ ciento canéé 'uūvī ngeεcu ndiichi ndúuyū ca'a yā juez yeⁿ'é yā ndii nguuví profeta Samuel miiⁿ chí caⁿ'a nduudu Ndyuūs. ²¹ Tuu'mí ní tiempo miiⁿ chiica yā rey ní Ndyuūs ní ca'á yā Saúl miiⁿ chí cuuvi sa rey. Chεeti 'uuvi ngeεcu nduūyū Saúl miiⁿ rey miiⁿ. Saúl miiⁿ saⁿ'a daiya Cis, 'áámá saⁿ'ā yeⁿ'ē 'ii'nyān yeⁿ'ē Benjamín. ²² Diví yā saⁿ'ā ní Ndyuūs nadicueeⁿ yā táámá rey chí David chí caⁿ'a yā nduudu cuaacu yeⁿ'é yā. Ní Ndyuūs ngaⁿ'á yā: 'Úú ndaacá David daiya Isaí miiⁿ 'áámá saⁿ'ā tan'dúucā chí neⁿ'e staava yeⁿ'é. Saⁿ'ā miiⁿ ní diíⁿ sa tanducueⁿ'ē chí neⁿ'é. ²³ Yeⁿ'e ndaata sáⁿ'a 'cūū miiⁿ tan'dúucā chí Ndyuūs ngaⁿ'a chí cā'a yā, Ndyuūs nadicueeⁿ yā Jesús yeⁿ'e 'ii'nyān Israel lado yeⁿ'e Salvador chí 'ii'nyān chí nadanguáⁿ'ai yā 'ii'nyān yeⁿ'e nuuⁿndi yeⁿ'é yā. ²⁴ Taachí 'aa cuéé ndaá Jesús miiⁿ, caⁿ'ā Juan miiⁿ chí cuεdinuūⁿniⁿ yā yeⁿ'ē chí nducyaaca 'ii'nyān yeⁿ'e Israel ndaacadaamí yā yeⁿ'ē nuuⁿndí yeⁿ'e yā. ²⁵ Juan miiⁿ taachi ch'iinu diíⁿ sa ntíinnyūⁿ yeⁿ'ē sa, caⁿ'a sa: ¿Du'ū 'úú nadicádiinuun ndis'tií? Nguéé 'ii'nyān miiⁿ 'úú. Cun'diichí ní. Cuchii 'áámá na cuaaⁿ daami 'úú ní 'úú nguéé n'daācā 'úú chí cuuví díin n'daatí yíⁿ'māⁿ naaⁿ ndaacuú yéⁿ'ē chí cánúúⁿ ca'a.

²⁶ Ndis'tiī sa'nā vi'í, daiya 'ii'yān ye'n'e Abraham ndúúcu 'ii'yān chi snée yā ndúúcu ndis'tiī chi i'téenu yā Ndyuūs, caavā ndis'tiī dicho'ō Ndyuūs nduudu chí nngua'n'ai 'ii'yān. ²⁷ 'Ii'yān chi snée yā na yān Jerusalén mii' ndúúcu nducyáácá yā chi nga'nā ntiinnyu' ye'n'e yā nguée' n'diichí yā Jesús ní nguée' nduudu ye'n'e profetas chi n'gee' yā nducué'n'e nguuvi sábadó chi intaavi'tuunúú' yā. Ní 'ii'yān s'ee' dí'n yā condenar Jesús. ²⁸ 'Íicu ní nguée' ndaacá yā falta ye'n'e yā chi 'caa'n'nu' yā 'ii'yān. Chiica 'ii'yān nanáán Pilato mii' ní 'ii'yān s'ee' nga'n'a yā chi Pilato 'caa'n'nú' yā Jesús ní 'cuūvi yā. ²⁹ Taachí ch'iinu chiī tánducué'n'e chi canée' nguū' ye'n'e yā, 'ii'yān diví yā Jesús na yá'n'á cruz ní s'nuún' yā 'ii'yān na yáinyān. ³⁰ Ndyuūs nadicuee' yā 'ii'yān ye'n'e nguaa' tina'nā. ³¹ Jesús mii' ch'i'n'í maán' yā néené' n'deēe' nguuvi nanáán' 'ii'yān chí dáámá cuhéé' yā ndúúcu yā ye'n'e yá'nā Galilea ní ndaá yā yān Jerusalén. 'Ii'yān s'uu' testigos ye'n'e yā nanáán' 'ii'yān.

³² Nús'uú ntuū' nga'n'á 'nū ndúúdu' ngai. Chuū chi nduudu chi Ndyuūs ca'a yā chiida yú s'ee' taachi Ndyuūs ca'n'a yā chi dí'n yā. ³³ Chuū chí Ndyuūs mii' ní dicuaacú yā ní Ndyuūs dí'n yā cáavā s'uuún' chi 'ii'yān daiyá chiida yú s'ee' ye'n'e Israel tááchí Ndyuūs nadacuee' yā Jesús mii'. Chuū chi canée' nguū' na libro ye'n'e Ndyuūs naachi nguū' salmo ndii' 'úúví chí nga'nā: Dii daiyá dii, maa' nguuvi 'úú' n'gi'n'í chí daiyá dii 'tíicā. ³⁴ Ndyuūs nadacuee' yā 'ii'yān ye'n'e nguaa' tiná'nā. 'Āā ntéé' nguεεcunée' choó yā. 'Túúcā ca'n'a yā: 'Úú teé dii cosa chí n'dai chí cā'n'a chí ca'á David. Chuū chi cuaacu. ³⁵ Cáavā chuū nga'n'á yā na táámá salmo: Nguée' 'cuaán' nī chí Daiyá nī chí n'dai chí nguεεcunée' choó cuerpo ye'n'e yā. ³⁶ Cuaacu ní'nnyú' chí David mii' tááchí dichí'v'e yā 'ii'yān yē'n'e yā tan'dúúcā chí ne'n'e Dendyuūs, ch'iī yā ní'cú ch'εechí yā naachi ch'εechi chiidá yā. Ní choo yā. ³⁷ Naati 'ii'yān chí Dendyuūs nadacuee' yā ye'n'e nguaa' tiná'nā ní nguée' choo yā. ³⁸ Nadacadíinuu' nī chuū, ndis'tiī sa'nā vi'í. Ca'n'a 'nū ndis'tiī nduudu ye'n'e Ndyuūs chí Ndyuūs nadach'εecu yā nuu'ndi ye'n'e nī cucáávā 'ii'yān 'cūū. ³⁹ Cucáávā 'ii'yān mii' Ndyuūs nadach'εecu yā nducué'n'e nuu'ndi ye'n'e nducyáácá 'ii'yān chí i'téenu yā Dendyuūs. 'Ii'yān mii' ní dí'n yā chí nduuví n'dai dii nanáán' Dendyuūs, naati ley ye'n'e Moisés nguée' cuuví nach'εecu nuu'ndi ye'n'e 'ii'yān. ⁴⁰ Cuin'díichí nī chí nguée' chí nanáán' ndis'tiī chí cánée' nguū' cáávā profetas chí ca'n'a nduudu ye'n'e Dendyuūs, ní canée' nguū' na libro ye'n'e Ndyuūs:

⁴¹ Cuin'díichí nī ndis'tiī chí taa' nī, ní nge'n'e yii'núú' nī, ní 'cuuví nī; caati 'úú' ní dí'n 'áámá ntiinnyu' ne'n'e chí ndis'tiī snée nī i'n'yee'dí 'cūū, 'Áámá ntiinnyu' chí nguée' i'téenu nī ndúúti chí du'ū 'ii'yān caa'n'ma' yā ye'n'e chuū.

⁴² Taachí nan'daa yā na yaacū sinagoga ye'n'e 'ii'yān Israel s'ee', 'ii'yān s'ee' chí nguée' ye'n'e ndaata Israel di'cuítu yā 'ii'yān, chí cúúví deēve táámá nguuvi sábadó, nguuvi chí ntaavi'tuunúú' nī chí caa'n'mán' nī ye'n'e chuū. ⁴³ Ní taachi 'āā dí'n yā despedir 'ii'yān ye'n'e yaacū sinagoga neené' 'yaa' 'ii'yān ye'n'e Israel ndúúcu 'ii'yān chí n'daacā chí 'āā maa' ní 'ii'yān Israel s'ee', can'dáa yā Pablo ndúúcu Bernabé. Pablo ndúúcu Bernabé ní ca'n'a yā 'ii'yān s'ee' chí 'áámá 'cuεetinée' yā na favor ch'εete ye'n'e Dendyuūs.

⁴⁴ Chidεeve táámá nguuvi sábadó, nguuvi chí ntaavi'tuunúú' yā, nduuvídáámá yā n'dee' taavi 'ii'yān 'téé' nuu'ma' yáa' yā chí 'caandivee' yā nduudu ye'n'e Dendyuūs. ⁴⁵ Naati 'ii'yān Israel s'ee' taachi n'diichí yā chí n'dee' n'daí 'ii'yān mii' ní ndiitú yā ndúúcu vaadī nguēē, ca'n'a yā chí nguée' n'daacā chí nga'nā Pablo mii'. Ní ca'n'a taán' yā contra ye'n'e yā ní contra ye'n'e Dendyuūs. ⁴⁶ Tuu'mi ní Pablo ndúúcu Bernabé mii' ca'n'a yā nguée' ndúúcu vaadī 'va'a ca'n'a yā: Ndis'tiī cuaacu ní'nnyú' cánée' chí caa'n'mán' 'nū ndúúcu ndis'tiī nduudu ye'n'e Dendyuūs vmnáán' vmaaa' naati ndis'tiī ní diví nī ye'n'e veé' nī. Ní túúmícadíinúú' maán' nī chí nguée' n'daacá nī chí tune'e nī vida cue'n'e daā'nma'. Cáavā chí dí'n nī, Ndyuūs nguée' teé yā ndis'tiī vida cue'n'e daā'nma' ndis'tiī. Cuin'diichí nī. Nguεεcunée' 'nū ca'n'a ntuún' 'nū ndúúcu 'ii'yān s'ee' chí nguée' ye'n'e ndaata Israel. ⁴⁷ Caati 'tíicā chidichó'ó Señor 'iivú Ndyuūs mii' nús'uu, ní Ndyuūs cá'n'a yā chí yā nús'uu:

'Úú chí'neéⁿ ndís'tiī tan'dúú^{cā} chíδεεεε ye^{n'ē} 'ii^{n'yā} s'eeⁿ chi nguée^e ye^{n'e} ndaata Israel, chi cuuvi caa^{n'má} nī nduudu chí nanguan^{'āi} 'ii^{n'yā} ndii núú^{má} in^{'yee}ndī.

⁴⁸ Taachí ch'iindiveéⁿ 'ii^{n'yā} s'eeⁿ chi nguée^e ye^{n'e} ndaata Israel chuū ndiitú yā ndúú^{cū} vaadī yeenú ní ca^{n'a} yā chí ch'εεεε taavi Ndyuūs cáávā nduudu ye^{n'e} Señor Ndyuūs miiⁿ. Ní s'teenú yā nducyáácá 'ii^{n'yā} s'eeⁿ chi Ndyuūs chíndeεεεε yā ní tee yā vida cue^{n'e} daā^{n'ma}. ⁴⁹ Ní nduudu Señor miiⁿ 'āā chí chiicadífínuuⁿ 'ii^{n'yā} ti che^{n'e} núú^{má} yáāⁿ estado miiⁿ. ⁵⁰ Naati 'ii^{n'yā} Israel s'eeⁿ dííⁿ yā chí nguée^e snée^e 'dííⁿ yā n'daataá chí n'dai taaví chí n'dááca taaví ndúú^{cū} 'ii^{n'yā} chí nga^{n'a} ntiī^{n'nyu} ye^{n'e} yáāⁿ miiⁿ. 'Ii^{n'yā} miiⁿ ndúú^{cū} n'daataá ndúú^{cū} 'ii^{n'tyē}n'ē nadacuéeⁿ yā vaadī 'caa^{'va} contra ye^{n'e} Pablo ndúú^{cū} Bernabé ní ndivíi yā 'ii^{n'yā} ye^{n'ē} na yáāⁿ naachí snée^e yā. ⁵¹ Pablo ndúú^{cū} Bernabé ní n'dáádi yā iyaacá ye^{n'e} ca'a yā ti 'ii^{n'yā} ye^{n'e} yáāⁿ miiⁿ ní contra yā. Cue^{n'e} yā ní ndaa yā yáāⁿ Iconio. ⁵² 'Ii^{n'yā} s'eeⁿ chí i'téenu yā Cristo ní yeenú taavi yā ndúú^{cū} vaadī yeenú ndúú^{cū} Espíritu N'dai.

14

Pablo ndúú^{cū} Bernabé na yáāⁿ Iconio

¹ Chiī na yáāⁿ Iconio chí Pablo ndúú^{cū} Bernabé sndaā yā daama daama na yaācū sinagoga ye^{n'ē} 'ii^{n'yā} Israel s'eeⁿ. Ní 'túú^{cā} ca^{n'a} yā. Ní neené n'dai 'ii^{n'yā} Israel s'eeⁿ s'téenu yā. 'Tiicá ntúūⁿ 'ii^{n'yā} s'eeⁿ chí nguée^e ye^{n'ē} ndaata Israel. ² Naati 'ii^{n'yā} Israel s'eeⁿ chí nguée^e i'téenu yā, n'gεεcu cheendí yā ndúú^{cū} 'ii^{n'yā} s'eeⁿ chí nguée^e ye^{n'ē} ndaata Israel ní dííⁿ yā chí 'ii^{n'yā} s'eeⁿ chí nguée^e ye^{n'ē} ndaata Israel nguée^e nacadífínuuⁿ yā n'daacā ye^{n'e} 'ii^{n'yā} chí i'téenu yā. ³ Tuu^{'mi} ní Pablo miiⁿ ndúú^{cū} Bernabé 'naaⁿ n'dái ch'εetinée yā miiⁿ ní Señor Jesucristo dííⁿ yā chí 'ii^{n'yā} s'eeⁿ nguée^e 'va^{'á} yā ca^{n'a} yā ye^{n'ē} Señor Jesucristo. Señor Jesucristo miiⁿ ní ch'i^{n'i} yā chí nduudu cuaacu miiⁿ chí nduudú ye^{n'ē} yā ye^{n'ē} favor ch'εεεε ye^{n'ē} yā. Ní Señor miiⁿ dííⁿ yā chuū ní cā'a yā poder chí Pablo ndúú^{cū} Bernabé dííⁿ yā señales ndúú^{cū} vaadī n'giinu. ⁴ Níicú 'ii^{n'yā} s'eeⁿ ye^{n'ē} yáāⁿ miiⁿ ní 'uūvī vaanicadiinúúⁿ ye^{n'ē} yā. Nán'a yā ní lado ye^{n'e} 'ii^{n'yā} Israel s'eeⁿ ní tanán'a yā ní lado ye^{n'ē} apóstoles chí dichó'ó Dendyuūs. ⁵ 'Ii^{n'yā} Israel s'eeⁿ ndúú^{cū} 'ii^{n'yā} s'eeⁿ chí nguée^e ye^{n'ē} ndaata Israel ndúú^{cū} 'ii^{n'yā} chí nga^{n'a} ntiī^{n'nyū} in^{'núú} yā vaadī 'caa^{'va} chí tun'dáa yā Pablo ndúú^{cū} Bernabé ní chí cuitú yā 'ii^{n'yā} s'eeⁿ. ⁶ Taachí chicadífínuuⁿ sa^{n'ā} s'eeⁿ chuū, cue^{n'ē} yā ngeenu yā na yáāⁿ Listra ndúú^{cū} yáāⁿ Derbe chí distrito ye^{n'e} Licaonia ndúú^{cū} nducyaaca yáāⁿ nuu^{n'ma} ndiivií ná yá^{n'ā}. ⁷ Ní miiⁿ ca^{n'a} yā evangelio chí ndúú^{dú} ngaī ye^{n'e} Jesucristo miiⁿ.

'Ii^{n'yā} ca^{'ā} tuú yā Pablo na yáāⁿ Listra

⁸ Cánée 'áámá sa^{n'ā} ye^{n'e} yáāⁿ Listra chí véé sá ti mar 'áámá fuerza ye^{n'ē} ca'a sa. Nguée^e ngiica sa ndíi ch'iindiyaāⁿ sa. ⁹ Sá^{n'a} 'cūū ní ch'iindiveeⁿ sa chí ca^{n'a} Pablo. Ní Pablo miiⁿ ní n'gíínu yā sa^{n'ā} miiⁿ ní nacádiinúúⁿ yā ye^{n'ē} sa^{n'ā} miiⁿ ti i'téenu sa chí cuuví nduūvā ye^{n'ē} sa. ¹⁰ Ní ca^{n'a} yuudú yā: Nducueeⁿ cuaacú di ndúú^{cū} ca'a di. Hora miiⁿ ní sa^{n'ā} miiⁿ nducueeⁿ sa ní chiica sa. ¹¹ 'Ii^{n'yā} chí n'diichí yā chí dííⁿ Pablo 'cai diitú yā ní ca^{n'á} yā ndúú^{cū} davaacu ye^{n'e} yá^{n'ā} Licaonia chí ndyuūs s'eeⁿ ndáa yā nanáāⁿ yā tan'dúú^{cā} sa^{n'ā} in^{'yee}ndí 'cūū.

¹² Ca^{n'a} yā ye^{n'e} Bernabé chí Júpiter, ní Pablo miiⁿ ní Mercurio ti Pablo miiⁿ ní chindée yā nduudu. ¹³ Yáacū ye^{n'ē} Júpiter cánée chuva^{'āi} yáāⁿ miiⁿ. Chiiduū ye^{n'ē} Júpiter ndée yā itiindu s'éeⁿ ndúú^{cū} corona s'eeⁿ ye^{n'e} naāndā nanáāⁿ chééndí cheēⁿ yáāⁿ miiⁿ. Ní ne^{n'e} yā 'caa^{n'nú} yā 'iití chí ca'a yā sacrificios. 'Tiicá ntúūⁿ n'deeē taaví 'ii^{n'yā} ye^{n'e} yáāⁿ miiⁿ ne^{n'e} yā dííⁿ yā. ¹⁴ Ní naachí ch'iindiveeⁿ apóstoles Bernabé ndúú^{cū} Pablo chuū chíín'cuuⁿ yā catecai yā tí neené ndachíí ní cue^{n'ē} yā nguaaⁿ 'ii^{n'yā}. Ní 'cai yā. ¹⁵ Ní ca^{n'a} yā: Ndís'tiī sa^{n'ā}, ¿dē'ē cuuvi chí 'tíicā idiíⁿ ní? Nús'uu sá^{n'ā} ntuuⁿ nús'uu tan'dúú^{cā} ndís'tiī. Ní nga^{n'a} 'nū nduudu cuaacu chí divíi ní ye^{n'ē} nducué^{n'ē} dendu'ū ní cu'téenu ní Ndyuūs chí cánduuchi chí din'dái yā nanguuvi ndúú^{cū} yá^{n'ā} ndúú^{cū} nuū^{n'ní} yá^{n'ā} ndúú^{cū} nducyáácá dendu'ū chí véé. ¹⁶ Nguuvi chí 'āā cho'ōo Ndyuūs s'neeⁿ yā nducyaaca

'iiⁿyāⁿ s'eeⁿ chi cáⁿa yā yúⁿí damaáⁿ yā. ¹⁷ Nguéé s'neeⁿ yā ti nguéé cosa chí ch'iⁿi dú'úu 'iiⁿyāⁿ yā. Din'daacá yā. Ní teé yā cuuvi yeⁿé nanguuvi ndúú^cū tiempo yeⁿé n'deēe taaví n'gui'i o cosecha. Ní di'cuiitá yā staava yeⁿé yú ndúú^cū vaadī yeenu ti teé yā chí neⁿé cuerpo yeⁿé yú.

¹⁸ Caⁿa yā chuū, ngii n'dái naati idiíⁿ yā chí 'iiⁿyāⁿ yáāⁿ miiⁿ nguéé idiíⁿ yā sacrificio.

¹⁹ Tuu'mi ní ndaā náⁿā 'iiⁿyāⁿ Israel s'eeⁿ yeⁿe yáāⁿ Antioquía ní yeⁿé yáāⁿ Iconio chí yaa'ví yā nducyáácá yā contra yeⁿe Pablo. Ní ca'a tuú yā saⁿā ní chíⁿí n'dai yā saⁿā 'áámá lado chuva'ai yáāⁿ miiⁿ ní 'áácú yā chí 'āā n'dií sa. ²⁰ 'Iiⁿyāⁿ s'eeⁿ chí i'téenu yā Cristo ní nuuⁿmaⁿndiiví nanáāⁿ yā. Pablo miiⁿ ní nacueeⁿ sá ní nuuⁿ ndáá tuuⁿ sa na yaāⁿ miiⁿ. Ní chidεεve táámá nguuví cueⁿe sa ndúú^cū Bernabé na yáāⁿ Derbe.

²¹ Ní caⁿa yā evangelio chí ndúú^dú ngai yeⁿe Jesucristo yáāⁿ miiⁿ. Ní diíⁿ yā chí néené 'yaaⁿ 'iiⁿyāⁿ chí i'teenu. Pablo ndúú^cū Bernabé nguεεcunée yā yáāⁿ Listra, yáāⁿ Iconio, ndúú^cū yáāⁿ Antioquía. ²² Ní diíⁿ yā chí ditiinú yā ndúú^cū vaadī i'teenu na alma yeⁿé 'iiⁿyāⁿ s'eeⁿ chí i'téenu yā Cristo ndúú^cū staava yeⁿé yā. Ní ngi'cueén yā 'iiⁿyāⁿ chí 'áámá cunee yā ndúú^cū vaadī i'teenu. Ní caⁿa yā ndúú^cū 'iiⁿyāⁿ s'eeⁿ: Cánée chí néené n'deēe chí cho'o núuⁿ yú maaⁿ níⁿíⁿíⁿ ndaā yú va'ai chεeti nguuvi. ²³ S'nééⁿ yā 'iiⁿyāⁿ ndiicú^ū chí saⁿa ndii tíiⁿ yeⁿé 'áámá 'áámá yaacū ní caⁿ'angua'á yā taachi 'āā cuee ca'diinú yā. Ní s'nééⁿ yā na ta'a Señor 'iivú Ndyuūs 'iiⁿyāⁿ chí i'téenu.

Nguéécundií yā ní cueⁿé yā yáāⁿ Antioquía yeⁿe yáⁿā Siria

²⁴ Cuayiivi chí cho'ó yā distrito yeⁿé Pisidia ní ndaá yā yáⁿā Panfilia. ²⁵ Taachi caⁿa yā nduudu cuaacú miiⁿ na yáāⁿ Perge cunaⁿá yā na yáāⁿ Atalia. ²⁶ Yeⁿe yáāⁿ miiⁿ cunaⁿá yā na barco na yaāⁿ Antioquía. Miiⁿ ní naachí hermanos s'eeⁿ vmnááⁿ vmaaaⁿ tucá'a yā Pablo ndúú^cū Bernabé na ta'a Dendyuūs ndúú^cū favor yeⁿe Dendyuūs cáávā ntiinnyūⁿ chí 'āā diíⁿ yā. ²⁷ Ní ndaá yā na yáāⁿ Antioquía. Ní taachi nduuvidaamá yā na yaacū caⁿa yā tanducuéⁿé cosa ch'εεte chí 'āā diíⁿ Dendyuūs ndúú^cū yā. Ní táácā Dendyuūs ca'á yā permiso 'iiⁿyāⁿ chí nguéé yeⁿé ndaata Israel chí cu'téenu yā nduudu yeⁿe yā. ²⁸ 'Nááⁿ tiempo canéé yā ndúú^cū 'iiⁿyāⁿ s'eeⁿ chí i'téenu yā Cristo.

15

Concilio na yáāⁿ Jerusalén

¹ Tuu'mi ní náⁿa yā chí nndaá yā yeⁿé yáⁿā Judea chí cueéⁿ yā hermanos chuū: Ndúú^ti chí nguéé diíⁿ di circuncidar 'iiⁿyāⁿ tan'dúú^cā chí ngaⁿa 'áámá ley yeⁿe Moisés tuu'mi ní nguéé cuuvi níⁿguaⁿai di. ² Pablo ndúú^cū Bernabé ch'εεcu cheendí yā ndúú^cū 'iiⁿyāⁿ yeⁿe yáāⁿ miiⁿya ní néené n'deēe caⁿa yā. Ní 'iiⁿyāⁿ yeⁿe yáāⁿ miiⁿ caⁿa yā chí caⁿa Pablo ndúú^cū Bernabé ndúú^cū tan'duuví 'iiⁿyāⁿ s'eeⁿ na yáāⁿ Jerusalén. Ní caⁿá yā ní tiinguuneeⁿ yā yeⁿé chuū nanááⁿ 'iiⁿyāⁿ ndiicú^ū chí 'iiⁿyāⁿ ndíⁿ tíiⁿ yeⁿe yaacū ndúú^cū apóstoles chí dich'ó Dendyuūs.

³ 'Iiⁿyāⁿ s'eeⁿ yeⁿe yaacū ch'εεtinúúⁿ yúⁿí yā ndúú^cū 'iiⁿyāⁿ s'eeⁿ. Ní cho'ó yā 'iiⁿyāⁿ s'eeⁿ na yáⁿā Fenicia ndúú^cū yáⁿā Samaria. Ní 'iiⁿyāⁿ s'eeⁿ caⁿa yā taacā chí i'teenu 'iiⁿyāⁿ s'eeⁿ chí nguéé yeⁿé ndaata Israel. Ní nducyaaca hermanos miiⁿ yeenu taaví yā.

⁴ Ní ndaá yā na yáāⁿ Jerusalén. Ní apóstoles ndúú^cū 'iiⁿyāⁿ ndiicú^ū ndúú^cū 'iiⁿyāⁿ yeⁿe yaacū miiⁿ diíⁿ yā recibir 'iiⁿyāⁿ s'eeⁿ. Ní 'iiⁿyāⁿ s'eeⁿ caⁿa yā tanducuéⁿé chí Dendyuūs diíⁿ yā ndúú^cū yā. ⁵ Naⁿa 'iiⁿyāⁿ yeⁿe fariseos chí s'teenu yā ní diíⁿ yā costumbre yeⁿé yā nacueeⁿ yā ní caⁿa yā: Cánée chí diíⁿ yú circuncidar 'iiⁿyāⁿ ní canee cúúⁿmíⁿ yā diíⁿ yā chí ngaⁿā ley yeⁿe Moisés.

⁶ Ní nduuvidaamá yā apóstoles ndúú^cū 'iiⁿyāⁿ ndiicú^ū chí 'iiⁿntyén^e yeⁿe yaacū chí n'diichí yā yeⁿe chuū. ⁷ Ní ch'iinu caⁿa yā n'deēe n'dái, ní Pedro miiⁿ ní ncueeⁿ sá ní caⁿā sa: Ndís'tií, saⁿā hermanos, deenú ní tan'dúú^cā 'āā 'naaⁿ tiempo chí Dendyuūs ndεēvé yā 'úú nguaaⁿ s'uúúⁿ ní cáávā cheendí ní 'iiⁿyāⁿ s'eeⁿ chí nguéé yeⁿé ndaata Israel chí iindiveéⁿ yā nduudu cuaacu ní s'téenu yā. ⁸ Ní Ndyuūs chí inaaⁿ yā staava yeⁿé yú chí iⁿi yā chí i'téenu 'iiⁿyāⁿ s'eeⁿ. Ní ca'a yā Espíritu N'dai 'iiⁿyāⁿ s'eeⁿ chí nguéé

yeⁿē ndaata Israel tan'dúúcā s'uūúⁿ. ⁹ Dáámá nducyaaca yú ndúúcū 'iiⁿ'yāⁿ s'eeⁿ ní Ndyuūs nadidεεvé yā staava yeⁿe 'iiⁿ'yāⁿ s'eeⁿ cáávā chi i'téenu yā. ¹⁰ Maaⁿ ní ¿de'ē cáávā chi di'vaachi nī yeⁿe Ndyuūs, ní s'néeⁿ nī na tīiⁿ 'iiⁿ'yāⁿ s'eeⁿ chi i'téenu yā Cristo tan'dúúcā 'áámá yugo chi s'uūúⁿ nguéeⁿ cuuvi candεε yú ndii nguεε chii candεε yā chiida yú s'eeⁿ dendú'ū? ¹¹ Maaⁿ ní i'téenu yú cucáávā favor ch'εεε taavi yeⁿe Señor Jesús cuuvi nanguaⁿ'āi yú dáámá dáámá ndúúcū 'iiⁿ'yāⁿ s'eeⁿ chi nguéeⁿ yeⁿē ndaata Israel.

¹² Tuu'mi ní nducyaaca 'iiⁿ'yāⁿ s'eeⁿ 'aa ntéeⁿ caⁿ'á yā mar 'áámá. Ní ch'iindiveéⁿ yā yeⁿe Bernabé ndúúcū Pablo chi caⁿ'a yā n'dee n'dái señales ndúúcū vaadi n'giinu chí Ndyuūs díⁿ yā cáávā 'iiⁿ'yāⁿ miiⁿ nguááⁿ 'iiⁿ'yāⁿ s'eeⁿ chi nguéeⁿ yeⁿē ndaata Israel.

¹³ Taachí 'iiⁿ'yāⁿ s'eeⁿ miiⁿ snéeⁿ 'díⁿ yā tuu'mi Jacobo nan'guεεcutaⁿ'ā sa ní caⁿ'a sa: Ndís'tiī saⁿ'ā hermanos cu'neeⁿ veeⁿ nī yeⁿ'é. ¹⁴ Simón miiⁿ 'āā caⁿ'a sá tááca Dendyuūs vmnááⁿ vmnaaⁿ n'diichí yā 'iiⁿ'yāⁿ s'eeⁿ chi nguéeⁿ yeⁿē ndaata Israel ní sta'á yā 'iiⁿ'yāⁿ nguaaⁿ 'iiⁿ'yāⁿ s'eeⁿ chí 'iiⁿ'yāⁿ yeⁿ'é yā cáávā chi i'téenu yā Jesucristo. ¹⁵ Ndúúcū nduudu 'cūú ní ndíⁿ tiempo vmnaaⁿ cunee yiinú profetas chi caⁿ'a chi cuchii tan'dúúcā chi cunee nguūⁿ na libro yeⁿe Ndyuūs:

¹⁶ Cho'ōo chúú nanguεεcúndií ní nadin'daí va'ai yeⁿe David chí sndεεve ní nadin'daí to'o ndiicúú, ní va'aī miiⁿ nanguεεcuneeⁿ nādacuéeⁿ ntuúⁿ.

¹⁷ Ní tanáⁿ'a yā 'iiⁿ'yāⁿ n'nuuⁿ ntuúⁿ yā Señor Jesucristo, ní yeⁿē nducyaaca 'iiⁿ'yāⁿ chi nguéeⁿ yeⁿē ndaata Israel miiⁿ chi Dendyuūs caⁿ'a yā chi cuuvi déenu yā.

¹⁸ Chuū ngaⁿ'a Señor miiⁿ chi din'dái tuuū ndεεvéé ní dendú'ū díⁿ yā chi cadiinuuⁿ 'iiⁿ'yāⁿ chúú ndíⁿ tiempo ndii cuaaⁿ vmnaaⁿ.

¹⁹ Maaⁿ ní 'úú díⁿ inacádiinúúⁿ yeⁿe chuū, chi nguéeⁿ di'vaachi yú yeⁿē 'iiⁿ'yāⁿ s'eeⁿ chi nguéeⁿ yeⁿe ndaata Israel chi cu'téenu yā Dendyuūs. ²⁰ Miiⁿ dingúúⁿ yú yeⁿē 'iiⁿ'yāⁿ chi cūvii yā yeⁿē tanducuéⁿ'ē chi yeⁿē ídolos ndúúcū yeⁿē 'áámá saⁿ'ā 'áámá n'daataá chi nguéeⁿ sneé yā ndúúcū vi'ī ní nguéeⁿ n'giindivaacu yā, ndíⁿ nguéeⁿ che'é yā yuūtē yeⁿē 'áámá 'iiti chi idi'núú yā daandú tī, ndíⁿ nguéeⁿ che'é yā ingée yā yuúúⁿ yeⁿ'é tī. ²¹ Ndíⁿ tiempo yeⁿē Moisés miiⁿ ní ndíⁿ cuááⁿ vmnaaⁿ ndíⁿ nducyáácá yááⁿ véé 'aama yā chí ngaⁿ'a yā yeⁿē Dendyuūs na yaácū sinagoga naachí n'geeⁿ yā libro yeⁿe Dendyuūs nguuvu nguuvu chi intaavi'tuunúúⁿ yā chi sábado.

²² Apóstoles chi dichó'ó Dendyuūs ndúúcū 'iiⁿ'yāⁿ ndiicúú chi ngaⁿ'a ntiiⁿnyuⁿ yeⁿe yáacu ndúúcū nducuéⁿ'ē 'iiⁿ'yāⁿ na yaácū canéeⁿ yiinú yā chí n'daacā chí nínδεεve yā yeⁿē nguááⁿ yā 'uuvu saⁿ'ā. Ní dicho'ó yā saⁿ'ā s'eeⁿ ndúúcū Pablo ndúúcū Bernabé na yáāⁿ Antioquía. Ní ndεεve yā Judas chi nguuvu sa Barsabás, ndúúcū Silas. Saⁿ'ā s'eeⁿ n'gεεε sá nguaaⁿ hermanos. ²³ Ní dicho'ó yā caaca ndúúcū 'iiⁿ'yāⁿ s'eeⁿ. Apóstoles ndúúcū 'iiⁿ'yāⁿ ndicúú ndúúcū hermanos nínguúⁿ yā chuu yeⁿē hermano chi nguéeⁿ yeⁿē ndaata Israel chi snée yā na yáāⁿ Antioquía, na yáⁿ'āa Siria, ndúúcū na yáⁿ'āa Cilicia: N'dai n'diī.

²⁴ Nús'uū ní n'giindiveéⁿ 'nū chi náⁿ'a yā cueⁿ'é yā yeⁿ'é 'nū ní díⁿ yā chí ndís'tiī nguéeⁿ ch'εetinéeⁿ 'díⁿ nī ndúúcū nduudu yeⁿ'é yā. Ní nguéeⁿ caⁿ'a ntiiⁿnyuⁿ 'nū chi can'dáa yā. 'Iiⁿ'yāⁿ miiⁿ díⁿ yā chí staⁿ'a yā alma yeⁿ'é nī ní chi'cueeⁿ yā chí diiⁿ circuncidar 'iiⁿ'yāⁿ ní díⁿ yā chí ngaⁿ'a ley yeⁿe Moisés. ²⁵ N'daacā n'dai canéeⁿ nus'ūu chí 'āā ndúúvídaama nducyáácá 'nū chí δεεve 'nū saⁿ'ā s'eeⁿ ní dicho'ó 'nū nanááⁿ ndís'tiī saⁿ'a s'eeⁿ ndúúcū Bernabé ndúúcū Pablo, 'iiⁿ'yāⁿ s'eeⁿ chi neⁿ'e taavi yú. ²⁶ Saⁿ'ā s'eeⁿ n'deē cuúví cueⁿ'é yā naachi deenú yā chí veε peligro chí 'cuúvi yā cáávā Señor Jesucristo yeⁿē yú. ²⁷ Chíⁿ chí dicho'ó 'nū Judas ndúúcū Silas. 'Iiⁿ'yāⁿ s'eeⁿ ní 'tiicá ntúúⁿ caaⁿ'mán yā chí cuuvi deenú nī. ²⁸ Chuū ní n'daacā canee ndúúcū Espíritu N'dai ndúúcū nús'uu díⁿ 'nū chí nguéeⁿ i'neeⁿ 'nū vmnaaⁿ ndís'tiī mar 'áámá carga chí ngo'o ca ndís'tiī caati 'āā chí neⁿ'e nūⁿ. ²⁹ Nguéeⁿ tuu'ví nī cosa chí nga'á yā na ídolos ndíⁿ nguéeⁿ yeⁿe yuúúⁿ ndíⁿ nguéeⁿ yuute yeⁿe 'iiti chí nge'e yícu ndíⁿ nguéeⁿ diiⁿ nī chí cunee nī ndúúcū 'áámá 'iiⁿ'yāⁿ chí nguéeⁿ n'giindivaacu ndúúcū nī. Ndúúti chí díⁿ nī chuū tuu'mi ní n'daacā idiíⁿ nī. N'dáácā cho'ó nī. Chuū chí ngaⁿ'á.

³⁰ 'Tíicā chí 'iiⁿ'yāⁿ chí dicho'ó yā cueⁿ'é na yáāⁿ Antioquía. Ní nduuvidaamá yā ndúúcū nducyaaca hermanos. Ní nica'á yā carta 'iiⁿ'yāⁿ. ³¹ Taachí ch'eeⁿ yā carta miiⁿ ní yeenú

taavi yā cáāvā nduudu 'viich'εtínūⁿ. ³² Judas ndúúcu Silas chí profetas ntúūⁿ chi caⁿ'a nduudu yeⁿ'e Dendyuūs ní ca'a yā 'viich'εtínūⁿ ní didiitú yā hermanos ndúúcu neene n'dái nduudu. ³³ Canée yā 'áámá tiempo miiⁿ ní hermanos díⁿ yā despedir 'iiⁿ'yāⁿ ní neⁿ'é yā chi n'daacā canée yā chí 'cuεtinée' díⁿ yā ndúúcu vaadi 'diiⁿ'. Ní 'iiⁿ'yāⁿ miiⁿ nguεεcunéeⁿ yā na yáāⁿ naachi snée' 'iiⁿ'yāⁿ chi dich'ó yā. ³⁴ Silas miiⁿ canée yínu sa chí canée sa miiⁿ. ³⁵ Pablo ndúúcu Bernabé miiⁿ canee yā na yáāⁿ Antioquía. Ngi'cuéeⁿ yā nduudu Dendyuūs miiⁿ ní ngaⁿ'a yā evangelio chí ndúúdu ngai yeⁿ'e Jesucristo ndúúcu náⁿ'ā 'yááⁿ 'iiⁿ'yāⁿ.

Pablo diví yā yeⁿ'ē Bernabé ní cueⁿ'é yā ndii 'uuvi viaje

³⁶ Cuayiivi chí cho'ō tan'duuvi nguuvi, Pablo ngāⁿ'a yā ngii yā Bernabé: Nanguεεcunée ntuūⁿ yú, caⁿ'ā yú n'diichi yú hermano s'eeⁿ yeⁿ'ē nducyaaca yáāⁿ naachi cheⁿ'e yú, ní caⁿ'a yú nduudu yeⁿ'ē Señor. Ní n'diichi yú táácā snée yā.

³⁷ Ní Bernabé miiⁿ neⁿ'ē sa chí caⁿ'á Juan chí nguuvi Marcos ndúúcu sa. ³⁸ Naati Pablo miiⁿ ní nguée canee yínu sa chí candée sa 'iiⁿ'yāⁿ chí diví yā yeⁿ'ē saⁿ'ā s'eeⁿ ndii yáⁿ'āa Panfilia. Ní 'iiⁿ'yāⁿ miiⁿ nguée cheⁿ'é yā chí díⁿ yā ntiiⁿ'nyuⁿ. ³⁹ Nguée canée yínu yā nguaaⁿ maán yā ní ndaacādaamí yā hermanos Bernabé ndúúcu Marcos ní cueⁿ'é yā isla Chipre na barco. ⁴⁰ Pablo miiⁿ ní ndεεve sa saⁿ'ā Silas ní náⁿ'ā hermanos caⁿ'a yā chí yā chí vaadi ch'εete yeⁿ'e Dendyuūs cunée ndúúcu Pablo ndúúcu Silas miiⁿ. ⁴¹ Ní cuayiivi cho'ó yā yáⁿ'āa Siria ndúúcu yáⁿ'āa Cilicia. Ch'εetinée chíichi yā 'iiⁿ'yāⁿ yeⁿ'e yaacū.

16

Timoteo cueⁿ'é yā ndúúcu Pablo ndúúcu Silas

¹ Cuayiivi miiⁿ índaa sa yáāⁿ Derbe ndúúcu yáāⁿ Listra, ní 'caandiveéⁿ nī. Canee 'áámá saⁿ'ā discípulo chí ch'eēⁿ chí nguuvi sa Timoteo, daiya 'áámá n'daataá 'iiⁿ'yāⁿ Israel chí i'téenu tá Dendyuūs, ní chiidá sa miiⁿ nguée yeⁿ'ē ndaata 'iiⁿ'yāⁿ Israel. ² Ní hermanos chí snée yā yáāⁿ Listra ndúúcu yáāⁿ Iconio ngaⁿ'a cuaacú yā yeⁿ'ē sáⁿ'ā miiⁿ chí neené n'dai sa. ³ Pablo miiⁿ ní neⁿ'e yā chí caⁿ'a sa nduucú yā. Ní sta'á yā saⁿ'ā ní díⁿ yā circuncidar saⁿ'ā miiⁿ caavā 'iiⁿ'yāⁿ Israel s'eeⁿ ti déénú yā nducyaaca 'iiⁿ'yāⁿ yeⁿ'e yáāⁿ miiⁿ chí saⁿ'ā miiⁿ daiya sa saⁿ'ā chí nguée yeⁿ'ē ndaata Israel. ⁴ Ní taachi cho'ó yā yáāⁿ s'eeⁿ caⁿ'a yā orden chí nn'gaacú yā chí caⁿ'a apóstoles chí caⁿ'a nduudu yeⁿ'e Dendyuūs ndúúcu 'iiⁿ'yāⁿ ndiicúú chí ngaⁿ'a ntiiⁿ'nyuⁿ yeⁿ'e yáacū chí snée yā na yáāⁿ Jerusalén chí díⁿ yā nducuéⁿ'ē chuū. ⁵ 'iiⁿ'yāⁿ s'eeⁿ yeⁿ'e yaacū s'eeⁿ 'āā neē chíichí yā ndúúcu vaadi i'teenu. Ní ngí 'yaaⁿ ca yā 'áámá nguuvi taama nguuvi.

Pablo n'diichí yā na visión yeⁿ'é yā 'áámá saⁿ'ā yeⁿ'e yáⁿ'āa Macedonia

⁶ Ní cho'ó yā yáⁿ'āa Frigia ndúúcu yáⁿ'āa Galacia. Espíritu N'dai yeⁿ'e Ndyuūs miiⁿ nguée 'cuūⁿ chí caⁿ'á yā caaⁿ'máⁿ yā nduudu cuaacu na yáⁿ'āa Asia. ⁷ Ndaá yā yáⁿ'āa Misia ní neⁿ'e caⁿ'a yā yáⁿ'āa Bitinia naati Espíritu miiⁿ nguée 'cuūⁿ. ⁸ Ní cho'ó yā 'diituú yáⁿ'āa Misia ní cueⁿ'é yā na yáāⁿ Troas. ⁹ Nguiinū miiⁿ ní Pablo miiⁿ ní ch'iⁿ'i 'yúúdiyaaⁿ sáⁿ'ā na yaāⁿ yeⁿ'e sa. Ní n'diichi sa 'áámá saⁿ'ā yeⁿ'e yáⁿ'āa Macedonia chéendii sa ní di'cuítu sa Pablo ní caⁿ'a sa: Cho'ó dí yáⁿ'āa Macedonia miiⁿ ní cunee di nús'uu. ¹⁰ Ní Pablo miiⁿ taachi n'diichi sa na 'yúúdiyaaⁿ yeⁿ'ē sa, cuayiivi míⁿ nacádínuuⁿ 'nū chí caⁿ'a 'nū yáⁿ'āa Macedonia. Déénú 'nū chí Dendyuūs ndεεvé yā nús'uu chí caaⁿ'maⁿ 'nū yeⁿ'ē evangelio chí ndúúdu ngai yeⁿ'e Jesucristo.

Cueⁿ'é yā vácū na yáāⁿ Filipos

¹¹ Cheⁿ'é 'nū na barco yeⁿ'e yáāⁿ Troas ní ndaá 'nū yúúni cuaacu na isla Samotracia. Chidεεve táámá nguuvi ní ndaá 'nū yáāⁿ Neápolis. ¹² Ndií míⁿ cueⁿ'é 'nū na yáāⁿ Filipos chí yeⁿ'e 'iiⁿ'yāⁿ romanos ní yáāⁿ miiⁿ vmnááⁿ vmaaaⁿ yeⁿ'ē yáⁿ'āa Macedonia. Ní ch'εetinée 'nū 'aama tiempo yáāⁿ miiⁿ. ¹³ 'Áámá nguuvi sábadu chí intaavi'tuunuúⁿ yā tan'dúúcā ley yeⁿ'é yā can'daa 'nu cuaaⁿ dáámí cheendi va'āi yeⁿ'e yáāⁿ miiⁿ niiⁿ'nuuⁿ

yíicú naachi caⁿ'angua'á yā ní ch'eté 'nū. Ní caⁿ'a n'deéé 'nū ndúúcu n'daataá chí nduuvidaama.

¹⁴ Miiⁿ canéé 'áámá n'daataá chí nguuvi tá Lidia. N'diicui tá tীনūuⁿ morada cua'áá yeⁿ'ē yāāⁿ Tiatira. Ní i'téenu tá Dendyuūs. Táⁿ'ā miiⁿ ní n'giindiveeⁿ tá. Ní Señor miiⁿ ní nnda'ai yā vaanicadiinūuⁿ yeⁿ'ē tá chí cu'neeⁿ veeⁿ tá chí caaⁿ'maⁿ Pablo. ¹⁵ Ní taachí chēdinuūⁿnīⁿ tá ndúúcu 'iiⁿ'yāⁿ yeⁿ'ē tá, di'cuítu tá nús'uu ní ngaⁿ'a tá: Ndúúti chí deenu nī chí 'úú 'áámá canéé ndúúcu Dendyuūs, cundáa nī vaacú ní 'cuetinée nī. Ní di'cuítu tá nús'uu ní ch'etinée 'nū. ¹⁶ Taachí cueⁿ'e 'nū na lugar chí caⁿ'angua'a 'nū tuu'mi ní ndaacá 'nū 'áámá n'daata 'lín chí canee tá ndúúcu espíritu yeⁿ'e yááⁿ'guiniūuⁿ chí diiⁿ adivinar. Ní ndaā tá nanáaⁿ 'nū. N'daata míⁿ néené n'deēe idiiⁿ tá ganar yeⁿ'ē 'iivi tá ndúúcu espíritu yeⁿ'ē chí diiⁿ adivinar. ¹⁷ Tá 'cūū ní cán'daa tá Pablo ndúúcu nús'uu ní n'gai yiicu ta ní caⁿ'a tá: Saⁿ'ā s'uuⁿ ní saⁿ'ā chí dichí'vē Dendyuūs chí ch'ete n'dai chí canéé na va'ai chēti nguuvi. Saⁿ'ā s'eeⁿ n'giⁿ'i sa yúúni chí nanguaⁿ'āi yú.

¹⁸ N'daata miiⁿ diiⁿ tá 'túúca neené 'yaaⁿ nguuvi. Pablo miiⁿ ní nguéé canéé yīnū sa ní caⁿ'a sá chí sa espíritu miiⁿ: 'Úú dicho'ó dii ndúúcu chí duuchi Jesucristo chí nan'dáa di yeⁿ'ē tá 'tiī. Ní nan'dáa espíritu miiⁿ hora miiⁿ. ¹⁹ Taachí n'diichí 'iivi tá chí cueⁿ'e espíritu yeⁿ'ē adivinanza chí diiⁿ tá ganar cáava yā, tuu'mi sta'á yā Pablo ndúúcu Silas. Ní candēe yā saⁿ'ā s'eeⁿ na vaacūyāāⁿ nanáaⁿ 'iiⁿ'ntyéⁿ'e. ²⁰ Ní ch'iⁿ'i yā saⁿ'ā s'eeⁿ nanáaⁿ 'iiⁿ'ntyéⁿ'e ní caⁿ'a yā: Sáⁿ'a s'uuⁿ, 'iiⁿ'yāⁿ Israel s'eeⁿ díⁿ yā chí véé vaadi 'caa'va na yāāⁿ yeⁿ'e yú. ²¹ Ní ngí'cueeⁿ yā s'uuúⁿ costumbre chí nguēe 'cuaaⁿ yú ní nguéé canéé chí diiⁿ yú, caati s'uuúⁿ ní 'iiⁿ'yāⁿ romanos s'uuúⁿ.

²² Ní 'iiⁿ'yāⁿ yeⁿ'e yāāⁿ miiⁿ nduividáama yā ndúúcu 'iiⁿ'ntyéⁿ'e. Ní 'iiⁿ'ntyéⁿ'e s'eeⁿ chíⁿ'cuúⁿ yā catecai sa ní ca'á orden yā chí 'cueⁿ'é yā saⁿ'ā ndúúcu nduucu. ²³ Ch'íⁿú ch'eⁿ'é yā saⁿ'ā s'eeⁿ n'deēe taaví vueltas ní s'nuúⁿ yā saⁿ'ā s'eeⁿ vácūū. Ní chí yā saⁿ'ā chíⁿ idiiⁿ yā cuidado chééndí vácūū chí diiⁿ yā cuidado n'daacā saⁿ'a s'eeⁿ. ²⁴ Taachí ch'iindiveeⁿ yā chuū s'nuúⁿ yā saⁿ'ā s'eeⁿ vácūū chí yāanū ca ní snuūⁿ chíichí yā ca'a sa na cepo.

²⁵ Maⁿ'a yāāⁿ míⁿ taachi Pablo ndúúcu Silas ngáⁿ'ángua'á yā ní ngiita yā canciones yeⁿ'é Dendyuūs ní 'iiⁿ'yāⁿ chí snúūⁿ vácūū miiⁿ ní n'giindiveeⁿ yā. ²⁶ Hora miiⁿ diitú nuⁿ'u yáⁿ'āa ní cimientos yeⁿ'ē vácūū miiⁿ ní nuⁿ'u. Ní hora míⁿ nūuⁿ nducyaaca cheendi vácūū míⁿ ní náanguaāⁿ. Ní ndaatí ca'a yā ndúúcu ta'a yā nducyáácá 'iiⁿ'yāⁿ chí snúūⁿ vácūū. ²⁷ Saⁿ'ā soldado chí canéé cuidado vácūū miiⁿ taachí nduuchi sa chí cyaadu sa, ní n'diichi sa chí sdá'aī nducyaaca cheendi vácūū. Tuu'mi ní nntun'dáa sa espada yeⁿ'ē sa ní neⁿ'e sa 'caaⁿ'nuⁿ maaⁿ sa saⁿ'ā, caati nadacadínuuⁿ sa chí 'iiⁿ'yāⁿ chí snúūⁿ vácūū miiⁿ cheenú yā. ²⁸ Pablo miiⁿ 'cai yiicu sa ní ngaⁿ'a sa: Nguéé diiⁿ di ndúúcu di 'tíicā. Nducyaacá 'nū snée 'nū.

²⁹ Tuu'mi ní saⁿ'ā miiⁿ ngiica sa dēve. Chindáa sa ngeēnū sa chēti cuarto miiⁿ. Ní yinduuvi sa ní chíntii'ya sa na ca'a Pablo ndúúcu Silas. ³⁰ Ní tun'dáa sa saⁿ'ā s'eeⁿ ní caⁿ'a sa: Ndís'tiī Señores, ¿táácā diiⁿ ní 'iicu nanguaⁿ'ái?

³¹ Saⁿ'ā s'eeⁿ ní caⁿ'a sa: Cu'téenu dí Señor Jesucristo níicú nanguaⁿ'āi di ndúúcu 'iiⁿ'yāⁿ yeⁿ'ē di ná vaacu di.

³² Ní caⁿ'a yā nduudu yeⁿ'e Señor saⁿ'ā miiⁿ ndúúcu nducyaaca 'iiⁿ'yāⁿ ná vaacu sa. ³³ Saⁿ'ā miiⁿ ní hora míⁿ nūuⁿ yeⁿ'ē yāāⁿ sta'a sa 'iiⁿ'yāⁿ ní naāⁿnū sa chí ya'aī yeⁿ'e yā. Cuayiivi miiⁿ ní chēdinuūⁿnīⁿ saⁿ'ā miiⁿ ndúúcu nducyaaca 'iiⁿ'yāⁿ yeⁿ'ē sa. ³⁴ Ní candēe sa 'iiⁿ'yāⁿ na vaacu sa ní ca'a sa chí che'e yā. Nducyááca yā navaacu sa yeenú taavi yā chí s'téenu yā Dendyuūs miiⁿ.

³⁵ Chidēve táámá nguuvi miiⁿ 'iiⁿ'ntyéⁿ'e s'eeⁿ dichó'o yā policía chí yaa'vi sa saⁿ'ā ní caⁿ'a sa: N'dēchi yā saⁿ'ā s'eeⁿ. ³⁶ Ní saⁿ'ā soldado chí canee cuidado cheendi vácūū chí sa Pablo nduudú 'cūū: 'Iiⁿ'ntyéⁿ'e yaa'ví yā 'úú chí 'úú tun'daa ndís'tiī. Maaⁿ ní cho'ó nī ní caⁿ'á nī ndúúcu cuidado. ³⁷ Naati Pablo miiⁿ ní ngaⁿ'a sa ngii sa 'iiⁿ'yāⁿ: Cuayiivi chí ch'íⁿú ch'ēⁿ'e yā nús'uu nanáaⁿ 'iiⁿ'yāⁿ ndí nguéé itiinguuneéⁿ yā yeⁿ'e asunto miiⁿ

de'ē chi caaⁿmáⁿ 'nū ní candée yā nús'uu vácūū, ¿'áá ntun'dáá n'de'éi yā nús'uu, ti nús'uu 'iiⁿyāⁿ romanos s'uuuⁿ ní s'nuúⁿ yā nús'uu vácūū?

³⁸ Ní soldado s'eeⁿ ní ca'a sa chi cádiinuuⁿ 'iiⁿntyéⁿē. Taachí ch'iindiveéⁿ yā chuū ní dii'yá yā chiī taachi chicadiinúúⁿ yā chi romanos 'iiⁿyāⁿ s'eeⁿ. ³⁹ Ní 'iiⁿntyéⁿē ndaá yā ní di'cuiitú yā 'iiⁿyāⁿ. Ní tun'dáa yā 'iiⁿyāⁿ vácūū. Ní chii yā saⁿā s'eeⁿ chi nan'daa sa na yáāⁿ miiⁿ. ⁴⁰ Tuu'mi ní taachi nan'dáa yā vácūū sndaá yā na vaacu 'áámá n'daataá chi nguuví Lidia. Ní n'diichí yā hermanos ní chii yā 'iiⁿyāⁿ chi caⁿá yā ndúúcu cuidado. Ní cunaⁿa yā.

17

Nduuvitaáⁿ yā na yáāⁿ Tesalónica

¹ Cho'ó yā yáāⁿ Anfípolis, cho'ó yā yáāⁿ Apolonia ní ndaá yā na yáāⁿ Tesalónica. Naachi véé 'áámá yaacū sinagoga yeⁿe 'iiⁿyāⁿ Israel s'eeⁿ. ² Ní Pablo miiⁿ ti 'āā ndii níⁿnuⁿ yā chēⁿe yā naachi snée 'iiⁿyāⁿ. Ní 'iiⁿnuⁿ sábadó chi ntaavi'tuunúuⁿ yā, caⁿa yā ndúúcu nducyaaca yā nduudú yeⁿe Dendyuūs. ³ Chi'cueeⁿ sá ní caⁿa sa yeⁿē chi neené nguūⁿ na Escrituras. Ngaⁿā sa chi canée chi Cristo 'cuūvi yā ní nnduuchí yā nguaaⁿ tináⁿā. Ní Jesús yeⁿe chi 'úú chi ngaⁿá, Jesús miiⁿ chi Cristo chi Ndyuūs deeve yā.

⁴ Náⁿa 'iiⁿyāⁿ s'eeⁿ s'téenu yā ní nduuvidaamá yā ndúúcu Pablo ndúúcu Silas ndúúcu n'dee n'dái 'iiⁿyāⁿ s'eeⁿ chi nguée yeⁿē ndaata Israel chi 'iiⁿyāⁿ n'dai taavi, ndúúcu n'dee n'dái n'daataá chi n'dái taavi, nguée duu'ví yā. ⁵ Tuu'mi ní 'iiⁿyāⁿ Israel s'eeⁿ chi nguée i'téenu yā ní ngueé yā sta'á yā náⁿā saⁿā chi nguée n'daacā saⁿā chi 'daān'dī. Ní n'deeé nduuvidaamá yā ní nduuví taáⁿ yā 'iiⁿyāⁿ yáāⁿ miiⁿ ní ndaa staⁿa vaadicadiinuuⁿ yeⁿé yā. Ní sta'á yā 'iiⁿyāⁿ yeⁿe vaacu Jasón. Ní neⁿé yā tun'dáa yā Pablo ndúúcu Silas nanááⁿ 'iiⁿyāⁿ yáāⁿ miiⁿ. ⁶ Naati nguée nindaāca yā 'iiⁿyāⁿ s'eeⁿ. Candée yā Jasón ndúúcu náⁿā hermanos nanááⁿ 'iiⁿntyéⁿē yeⁿe yáāⁿ miiⁿ. Ní 'cai yiicú yā: Sáⁿā s'ūūⁿ nidi'vaachi sā nducyáácá 'iiⁿyāⁿ yeⁿē núúⁿmáⁿ iⁿyeēⁿdī ní ndaa sa ndii 'múúⁿ. ⁷ Ní Jasón miiⁿ snée yā 'iiⁿyāⁿ s'eeⁿ na vaacu sa. Ní nducyaaca yā nguée idiíⁿ yā tan'dúúcā chi ngaⁿā César. 'iiⁿyāⁿ s'eeⁿ ngaⁿá yā ti véé táámá rey chi Jesús.

⁸ Ní 'iiⁿyāⁿ s'eeⁿ ndúúcu 'iiⁿntyéⁿē yeⁿe yáāⁿ 'cūū nduuví taáⁿ yā taachí ch'iindiveéⁿ yā chuū. ⁹ Tuu'mi ní sta'á yā tuumi yeⁿē Jasón ndúúcu náⁿa yā ní n'deeci yā 'iiⁿyāⁿ.

Pablo ndúúcu Silas na yáāⁿ Berea

¹⁰ Tuu'mí nūⁿ hermanos dichó'o yā Pablo ndúúcu Silas ndii yáāⁿ Berea. Ní taachí ndaá yā miiⁿ ní sndaá yā na yaacū sinagoga yeⁿe 'iiⁿyāⁿ Israel s'eeⁿ. ¹¹ 'iiⁿyāⁿ s'uuⁿ n'daacá yā nanááⁿ Dendyuūs nguée tan'dúúcā 'iiⁿyāⁿ chi snée yā na yáāⁿ Tesalónica. Sta'á yā nduudu miiⁿ ndúúcu vaadī yeenú ní ch'eeⁿ yā nguuví nguuví Escrituras. Neⁿé yā n'diichí yā, ¿'áá cuaacu chi 'tíicā? ¹² Neené 'yaaⁿ yā s'téenu yā, n'daataá chi nguée yeⁿe ndaata Israel chi táⁿā n'dai taavi ndúúcu neené 'yaaⁿ saⁿā. ¹³ Taachi 'iiⁿyāⁿ Israel s'eeⁿ yeⁿe yáāⁿ Tesalónica chicadínuuⁿ yā chi 'iiⁿyāⁿ yeⁿe yáāⁿ Berea 'aa deenú ntúuⁿ yā yeⁿē nduudu yeⁿe Dendyuūs cáāvā chi ngaⁿa Pablo, tuu'mi ní cheⁿé yā miiⁿ. 'Tíicá ntúuⁿ ca'á yā vaadī 'caa'va 'yaaⁿ 'iiⁿyāⁿ. ¹⁴ Hora míⁿ nūⁿ hermanos dichó'o yā Pablo ndíí na nuūⁿníⁿyáⁿā. Ní Silas ndúúcu Timoteo ch'εetinée yā miiⁿ. ¹⁵ 'iiⁿyāⁿ chí cánéé chi can'dáa yā Pablo, candée yā saⁿa miiⁿ na yáāⁿ Atenas. Ní Pablo ca'a sa orden 'iiⁿyāⁿ s'eeⁿ chi dichó'o yā Silas ndúúcu Timoteo naachí cunée sa chinúúⁿ cueⁿé 'nūūⁿ. Ní cueⁿē 'iiⁿyāⁿ s'eeⁿ.

Pablo na yáāⁿ Atenas

¹⁶ Pablo miiⁿ canee ngiinu sa 'iiⁿyāⁿ na yáāⁿ Atenas. Ní neené ndaachi ndíí espíritu yeⁿē sa taachí n'diichi sa nducyaaca 'iiⁿyāⁿ yeⁿē yáāⁿ chi neené i'téenu yā ídolos. ¹⁷ Caⁿa yā n'dee n'dái ná yaacū sinagoga ndúúcu 'iiⁿyāⁿ Israel s'eeⁿ ndúúcu 'iiⁿyāⁿ chi i'téenu yā chi maaⁿ ní 'iiⁿyāⁿ Israel. Ní nguuví nguuví caⁿa ntuúⁿ yā ndúúcu 'iiⁿyāⁿ chi snée yā nii'veē. ¹⁸ Ní náⁿā 'iiⁿyāⁿ chi ch'eeⁿ chi neené n'dái tíiⁿ, 'iiⁿyāⁿ s'eeⁿ yeⁿe 'iiⁿyāⁿ epicúreos, yeⁿē 'iiⁿyāⁿ estoicos ní n'gεecú cheendí yā ndúúcu yā. Ní n'dúúví

'ii'yān nga'n'á yā: ¿De'ε ne'n'é caa'n'ma'n sán'a 'cūū chí tá'tiī n'deēé nga'n'ā sá? Ní ná'n'a yā ní ca'n'a yā: Nga'n'ā sa tan'dúúccā chí 'ii'yān chí nga'n'a ye'n'é ndyuūs ngai. Pablo mii'n ca'n'a yā ye'n'ē evangelio chí ndúúdu ngai ye'n'ē Jesucristo ní ye'n'ē 'ii'yān chí nnduuchí yā nguuaa'n tiná'n'ā. ¹⁹ Ní sta'á yā sa'n'ā ní ndaá yā nanáá'n 'ii'ntyé'n'ē ndúúcu sa yīicū chí nguuví Areópago. Ní ca'n'a yā: ¿Áá cuuvi cádiínuu'n 'nū de'ε chí ca'cueén nī chí ngai chí nga'n'a nī? ²⁰ Nga'n'a nī dendu'ū chí n'daa'n ní ne'n'é 'nū cadiínuu'n 'nū de'ε ne'n'e caa'n'mā'n chuū.

²¹ (Naati 'ii'yān ye'n'e yāān Atenas ndúúccū 'ii'yān chí snúu'n yúúni chí snée yā mii'n, nguéé tuumicadiínuu'n yā ye'n'ē taama naa'n, caati dámaā'n ne'n'e yā 'caandiveén yā ní caa'n'ma'n yā cosa chí ngai.)

²² Tuu'mi ní Pablo mí'n chééndii sa náávta'n'ā 'ii'ntyé'n'ē yīicū chí nguuví Areópago, ní ca'n'a sa: Ndís'tiī sa'n'a ye'n'e yāān Atenas, 'úú tuumicadiínúú'n ye'n'e nī chí neené i'téenu nī ndyuūs s'ee'n. ²³ Cho'ó ní n'diichí lugar naachi cu'téenu nī ndyuūs s'ee'n ye'n'ē nī. Ndaacá 'áámá na santo naachi canéé nguū'n nduudu 'cūū, NDYUŪS CHI NGUÉÉ N'DIICHI YÚ. Ndyuūs chí ndís'tiī nguéé n'diichí nī ní i'téenu nī, Ndyuūs mii'n chí 'úú ní nga'n'á.

²⁴ Ndyuūs chí din'dái yā i'n'yee'n'dī ndúúccū tanducué'n'ē chí véé i'n'yee'n'dī, Señor mii'n chí ye'n'é yā nanguuvi ndúúccū ye'n'ē na yá'n'āa mii'n. Ní nguéé canúu'n yā yaacū chí nín'dai ta'ā 'ii'yān. ²⁵ Ndíí nguéé ndúú chí ne'n'é yā de'ε vεe ye'n'e 'ii'yān caati 'ii'yān mii'n ní ca'a yā vida nducyaaca 'ii'yān ye'n'e í'n'yee'n'dī ndúúccū 'yúúné chí yíicú yā ndúúccū tanducué'n'ē dendu'ū.

²⁶ Ndyuūs dii'n yā chí 'áámá ndaata nducyáácá 'ii'yān chí 'cuεetinée yā vmnaa'n yá'n'āa. Ní vmnáá'n vmnaa'n dií'n yā señalar yá'n'āa naachi 'cuεetinée yā ndúúccū tiempo chí 'cuεetinée yā na yá'n'āa. ²⁷ Dendyuūs s'neén yā 'ii'yān na yá'n'āa chí n'nuú'n yā Dendyuūs mii'n ndúúti chí cuuvi ndaā nī'n'nú'n yā níicú ndaacá yā 'ii'yān, 'áará chí cuaacu ní'n'nyú'n nguéé ya'n'ai canéé yā ye'n'e ca'áámá ca'áámá s'uúu'n. ²⁸ Ní cucáávā 'ii'yān mii'n canduuchi yú ní inu'n'u yú ndúúcu yā ní s'uúú'n 'cuεetinée yú ndúúcu yā. Tan'dúúccā chí ca'n'a taná'n'ā 'ii'yān poetas ye'n'é nī: Tí ndáátá ye'n'ē Ndyuūs s'uúú'n. ²⁹ Canee yú na ndaata ye'n'é Dendyuūs. Nguéé cánéé chí nadacadíínuu'n yú chí Dendyuūs mii'n tan'dúúccā 'dí'n'nguaa'n 'ii'yān, tan'dúúccā 'dí'n'ngueε 'ii'yān, tan'dúúccā tuúú 'ii'yān, tan'dúúccā chí sa'n'ā din'dái ndúúccū vaadi cadiínúu'n ye'n'ē sa. ³⁰ Tuu'mi ní Dendyuūs nguéé dií'n cuenta ye'n'ē tiempo ye'n'e vaadi tonto ye'n'e 'ii'yān. Maa'n ní Ndyuūs ca'á yā orden nducyaaca 'ii'yān nducué'n'ē cuaa'n chí 'ii'yān ndaacadáámí yā ye'n'ē nuu'ndí ye'n'é yā. ³¹ Cáávā chuū Dendyuūs 'cuu'n'mi'n yā 'áámá nguuví chí dií'n yā juzgar 'ii'yān ye'n'e i'n'yee'n'dī ndúúccū justicia cucáávā sa'n'ā mii'n chí ndεεε. Cáávā sa'n'ā mii'n Dendyuūs dií'n yā chí nducyaaca 'ii'yān deenú yā chí cuaacu chí Dendyuūs nadacuéé'n yā sa'n'ā nguuaa'n tiná'n'ā.

³² Taachí ch'iindiveén yā chí nnduuchi yā nguuaa'n tiná'n'ā, ná'n'ā yā dií'n duuchí yā 'ii'yān. Níicú ná'n'a yā ca'n'a yā: 'Áā 'caandivee'n ntúu'n 'nū ye'n'é nī ndii táámá.

³³ Pablo mii'n nan'daa sa naavta'n'ā ye'n'é yā. ³⁴ Ná'n'a yā chí'téenu yā ní nduuvidaamá yā ndúúccū Pablo mii'n. Nguuaa'n 'ii'yān mii'n canee 'áámá sa'n'ā Dionisio ye'n'ē 'ii'ntyé'n'ē concilio chí nduuvidaamá yā na lugar Areópago ndúúccū 'áámá n'daataá chí nguuví tá Dámaris, ndúúccū táámá 'ii'yān s'ee'n ndúúccū 'ii'yān mii'n.

18

Pablo na yáān Corinto

¹ Cuayiivi chí chó'ōo chúū Pablo mii'n ní nan'dáa sa ye'n'ē yāān Atenas ní cue'n'e sa na yáān Corinto. ² Ní nndaaca sa 'áámá sa'n'ā Israel chí nguuví sá Aquila. Sa'n'ā mii'n ye'n'e yá'n'āa Ponto chí cáámá ndaā sa ye'n'e yá'n'āa Italia ndúúccū tá'n'ā sa chí nguuví Priscila ti Claudio mii'n chí rey ch'εεε ní ca'a sa orden chí nan'daā nducyaaca 'ii'yān Israel s'ee'n ye'n'e yāān Roma. Pablo cue'n'e sa naachi canéé 'ii'yān s'ee'n. ³ Sa'n'ā mii'n ní dáámá dii'n sa ntii'nyū'n ní canéé sá ndúúcu yā. Dáámá nūu dií'n yā ntii'nyu'n. Ntii'nyu'n ye'n'e 'ii'yān s'ee'n chí din'dái yā va'ai tíínūu'n. ⁴ Ní nguuví nguuví sá'bado mii'n Pablo n'deeé indeé yā na

yáacū sinagoga. Ní díín yā chi nduuvidaamá yā 'iiⁿyāⁿ Israel s'eeⁿ ndúúcu 'iiⁿyāⁿ s'eeⁿ chi nguéeⁿ yeⁿē ndaata Israel lado yeⁿé yā.

⁵ Taachi Silas ndúúcu Timoteo ndaá yā yeⁿē yáⁿā Macedonia, Pablo miiⁿ 'aama canée sá chi ngaⁿā sa nduudu yeⁿé Dendyuūs. Ní ngaⁿā sa nduudu cuaacu ní ngaⁿa sa ngii sa 'iiⁿyāⁿ Israel s'eeⁿ chi Jesús miiⁿ chi Cristo. ⁶ Ní 'iiⁿyāⁿ s'eeⁿ ngaⁿá yā contra yeⁿe Pablo ní 'caaⁿ'va yā yeⁿē sa. Pablo ch'íidí sa tiinuúⁿ yeⁿē sa. Ní Pablo caⁿ'a sa chii sa 'iiⁿyāⁿ: Ndís'tií ní canée chí 'āā maáⁿ nī can'díicu nī chi cuuvi ndúúcu nī. 'Úú nguéeⁿ can'diicu yeⁿē chuū. Maaⁿ ní caⁿ'á ndúúcu 'iiⁿyāⁿ s'eeⁿ chi nguéeⁿ yeⁿē ndaata Israel.

⁷ Nan'dáa sa miiⁿ ní cueⁿ'e sa na vaacu 'áámá saⁿā chi nguuvi Justo chi i'téenu sa Dendyuūs. Vaacu sa canée sá na niiⁿnuúⁿ na yaācū sinagoga. ⁸ Nífcú saⁿā Crispo saⁿā chi ndii tiíiⁿ yeⁿē yáacū sinagoga s'téenu sa Señor 'iivú Ndyuūs ndúúcu nducyaacá yā na vaacu sa. Ní neené 'yaaⁿ 'iiⁿyāⁿ yeⁿe yáāⁿ Corinto miiⁿ ch'indiveéⁿ yā. Ní s'téenu yā ní chεdinuūⁿniⁿ yā. ⁹ Tuu'mi ní Señor caⁿ'a yā ndúúcu Pablo na 'yúúdyaaⁿ yeⁿē sa: Nguéeⁿ 'va'a di caāⁿ'māⁿ di. Nguéeⁿ cunēē 'diiⁿ cheendí di. ¹⁰ Caati 'úú canee ndúúcu di ni mar 'áámá 'iiⁿyāⁿ nguéeⁿ díín n'gíinu yā ndúúcu di. Ti 'úú neené n'dee 'iiⁿyāⁿ chi véé ní yeⁿé na yáāⁿ 'cūū.

¹¹ Ní canee sá miiⁿ 'áámá nduūyū canee maⁿā. Chi'cueeⁿ sa nduudu yeⁿe Dendyuūs 'iiⁿyāⁿ s'eeⁿ.

¹² Taachi saⁿā Galión canée sá 'iintyēⁿē gobernador yeⁿe yáⁿā Acaya, tuu'mi ní 'iiⁿyāⁿ Israel s'eeⁿ ní nducueeⁿ yā ti nduuvidaamá yā contra Pablo. Ní candéε yā saⁿā nanáán silla yeⁿe juez miiⁿ. ¹³ Ní caⁿ'a yā: Saⁿ'a 'cūū ngaⁿ'a sa chi 'iiⁿyāⁿ s'eeⁿ cu'téenu yā Dendyuūs nguéeⁿ tan'dúúca chi ngaⁿ'a ley.

¹⁴ Taachí Pablo miiⁿ ní tuca'a sa caⁿ'a sa, tuu'mi saⁿ'a Galión ngaⁿ'a sa ngii sa 'iiⁿyāⁿ Israel s'eeⁿ: Ndís'tií 'iiⁿyāⁿ Israel s'eeⁿ, ndúúti chi 'áámá cosa chi ya'ai n'dai chii o 'áámá tinaⁿ'ā n'dii yā tuu'mi ní cuaacu cuchéé ndúúcu nī. ¹⁵ Ndúúti chí vaadī tiinguuneéⁿ yeⁿē nduudu yeⁿé nī ndúúcu chi duuchi 'iiⁿyāⁿ ndúúcu yeⁿē ley yeⁿé nī, tuu'mi ní, ndís'tií, díín nī juzgar chuū. Ti 'úú nguéeⁿ neⁿé díín juzgar chi 'túúca.

¹⁶ Tuu'mi ní tun'dáa yā 'iiⁿyāⁿ chuva'aí yeⁿe cuarto yeⁿe juez. ¹⁷ Tuu'mi ní nducyaacā 'iiⁿyāⁿ chi nguéeⁿ yeⁿe ndaata Israel sta'á yā saⁿā Sóstenes chí chééndii vmnaaⁿ yeⁿē yáacū sinagoga ní ch'eⁿé yā saⁿā nanáán silla yeⁿē juez. Naati Galión miiⁿ nguéeⁿ díín yā cuenta yeⁿe nducuéⁿē chuū.

¹⁸ Nífcú Pablo miiⁿ neené 'naaⁿ canee sa miiⁿya ní caⁿ'a sa hermanos: Cuidado 'cuεetinée nī. Cueⁿ'e sa na barco na yáⁿā Siria ndúúcu 'áámá táⁿā chi nguuvi Priscila ndúúcu 'áámá saⁿā chi nguuvi Aquila. Vmnaán vmnaaⁿ na yáāⁿ Cencrea Pablo miiⁿ 'chiica sa yuūdū tiíⁿ sa ti 'áámá seña chí díín sa compromiso ndúúcu Dendyuūs. ¹⁹ Tuu'mi ní ndaā sa yáāⁿ Efeso ní Pablo s'neeⁿ sá 'iiⁿyāⁿ miiⁿ. Ní sndaā maāⁿ sa na yáacū sinagoga miiⁿ. Ní caⁿ'a sa ní n'deēē ndeē sa ndúúcu 'iiⁿyāⁿ Israel s'eeⁿ. ²⁰ 'Iiⁿyāⁿ s'eeⁿ di'cuítu yā saⁿā chí 'náāⁿ cunee sa ndúúcu yā naati nguéeⁿ chíi 'tuucā. ²¹ Naatí yaa'vi sá 'iiⁿyāⁿ ní caⁿ'a sa: Cánée chí nguεcúndíi na yáāⁿ Jerusalén cáávā 'viicu chí cuchíi. Nguεcunée ntuúⁿ n'diichí ndis'tií ndúúti chí Dendyuūs neⁿe yā. Ní chiica sá yeⁿē yáāⁿ Efeso ní cueⁿ'e sa ná barco.

Pablo ndaá yā yáāⁿ Antioquía ní cueⁿ'e yā ndii chí 'iínūⁿ viaje

²² Cuchεε sá na yáāⁿ Cesarea ní cheⁿ'e sá díín sa saldar hermanos chí caⁿ'á yā na yaācū. Tuu'mi ní cueⁿ'e sa na yáāⁿ Antioquía. ²³ Canée sá míín 'áámá tiempo. Cun'dáa sa ní cueⁿ'e sá na orden yeⁿē nducyaaca yáⁿā Galacia ndúúcu yáⁿā Frigia. Ní s'neeⁿ chíichi sa nducyaaca 'iiⁿyāⁿ chí i'téenu yā Cristo ná vaadī i'teenu.

Apolos ngaⁿ'á yā nduudu cuaacu na yáāⁿ Efeso

²⁴ 'Áámá saⁿā Israel chí nguuvi sa Apolos ndáa sa yáāⁿ Efeso yeⁿe yáāⁿ vacú sa chí nguuvi Alejandría. Saⁿ'ā miiⁿ saⁿ'ā chí deenú taavi sa. Neené n'dεεve nduudu yeⁿē sa ní véé valor sa chí caāⁿ'māⁿ sa Escrituras chí canée nguūⁿ. ²⁵ Saⁿ'ā miiⁿ ní 'áámá 'iiⁿyāⁿ chí 'cueéⁿ yā saⁿ'a yúúni yeⁿē Señor miiⁿ. Ní saⁿ'ā miiⁿ ní díín sa ndúúcu núúⁿmáⁿ espíritu

yeⁿē sa. Ní ngaⁿa sá ngí'cueéⁿ sa cuéⁿe daāⁿmaⁿ nduudu yeⁿe Dendyuūs miiⁿ, 'áará chí dámaāⁿ deenu sa yeⁿē chi cheēdinuūⁿnīⁿ Juan. ²⁶ Ní Apolos miiⁿ tucá'a sa caⁿa sa nguée ndúúcu vaadī 'va'a chēeti yaācū sinagoga taachí saⁿā Aquila ndúúcu táⁿā sa Priscila ch'iindiveéⁿ yā, s'nééⁿ vi'i yā saⁿā ní chi'cuééⁿ cá yā saⁿā más ca yeⁿē yúúni cuaacu yeⁿē Ndyuūs. ²⁷ Apolos neⁿe sa cho'o sa yáⁿāa Acaya, ní hermanos ní caⁿa yā chí caⁿā sáⁿā miiⁿya. Ní hermanos dingúuⁿ yā yeⁿe 'iiⁿ'yāⁿ s'eeⁿ chí i'téenu yā Cristo chí 'cuaáⁿ yā saⁿā. Tuu'mi ní ndaā sa miiⁿ ní chinnee taaví sa 'iiⁿ'yāⁿ chí i'téenu yā cáávā favor ch'ēete yeⁿe Dendyuūs. ²⁸ Ndúúcu nducuéⁿē poder n'deéé ch'éécū cheendi sa ndúúcu 'iiⁿ'yāⁿ Israel s'eeⁿ nanááⁿ nducyaaca 'iiⁿ'yāⁿ s'eeⁿ ní n'giⁿi sa chí Jesús miiⁿ chí Cristo chí ndēēve Dendyuūs cáávā Escrituras.

19

Pablo na yáāⁿ Efeso

¹ Taachí canéé Apolos miiⁿ yáāⁿ Corinto, Pablo miiⁿ ch'ínú cheⁿe sa yáⁿāa yeⁿe distrito cuaaⁿ niiⁿnuúⁿ ní ndaa sá yáāⁿ Efeso. Ní nndaaca sá n'dúúví saⁿā chí i'téenu yā Cristo. ² Ní caⁿa sa: ¿'Áá diiⁿ di recibir Espíritu N'dai yeⁿe Ndyuūs taachí chí'teenu di? Ní 'iiⁿ'yāⁿ s'eeⁿ miiⁿ ní caⁿa yā: Nguéeé n'giindiveeⁿ 'nū chí vééé Espíritu N'dai yeⁿe Ndyuūs.

³ Tuu'mi ní caⁿa sa: ¿Du'u cheēdinuūⁿnīⁿ dii? 'Iiⁿ'yāⁿ s'eeⁿ ní cāⁿa yā: Cheēdinuūⁿnīⁿ nū cucáávā nduudu Juan.

⁴ Pablo miiⁿ ní caⁿa sa: Juan miiⁿ cheēdínúuⁿnīⁿ sa chí cuēdínúuⁿnīⁿ 'iiⁿ'yāⁿ yeⁿē chí indaacadaamí yā yeⁿē nuuⁿndi yeⁿe yā, ní Juan ngaⁿa sa ngii sa 'iiⁿ'yāⁿ chí cu'téenu yā 'iiⁿ'yāⁿ chí cuchii yā cuaaⁿ dáámí sá. 'Iiⁿ'yāⁿ 'cúu chí Cristo Jesús miiⁿ.

⁵ Taachí ch'iindiveéⁿ yā chuū cheēdinuūⁿnīⁿ yā ndúúcu chí duuchi Señor Jesús miiⁿ. ⁶ Taachí Pablo sn'duun ta'á yā vmnaaⁿ yeⁿe 'iiⁿ'yāⁿ s'eeⁿ tuu'mi ní ndaá vmnaaⁿ yeⁿe 'iiⁿ'yāⁿ s'eeⁿ Espíritu N'dai yeⁿe Ndyuūs. Ní caⁿa yā davaacu chí n'dááⁿ ní caⁿa yā chíiⁿ chí Dendyuūs yaa'vi yā. ⁷ Saⁿā s'eeⁿ ní ngii sa tan'dúúcā ndiichúúví sá.

⁸ Sndáá Pablo miiⁿ na yaācū sinagoga miiⁿ ní caⁿa cuaacú sá taandúú cuuví 'iiⁿ'nuⁿ 'iiyū, nguéeé ndúúcu vaadī 'va'a. Ní n'cueeⁿ sa ní ngaⁿa sa ndíí neⁿe sa chí cu'téenu yā yeⁿē chí Dendyuūs ngaⁿa yā ntiiⁿnyuⁿ. ⁹ Naatí diiⁿ cheēchí náⁿa yā na staava yeⁿé yā ní nguéeé chí'téenu yā. Nguéeé caⁿa yā n'daacā yeⁿe yúúni yeⁿe Dendyuūs miiⁿ nanaaⁿ nducyaaca 'iiⁿ'yāⁿ. Ndaacadaamí Pablo yeⁿé yā ní snee vi'i sa 'iiⁿ'yāⁿ chí i'teenú yā Cristo. Ngí'cueeⁿ sá nguuvi nguuví ná escuela chí nguuvi Tiranno. ¹⁰ Canéé sá taanduu 'úúvi nduūyū. 'Tíicā chí nducyaaca 'iiⁿ'yāⁿ chí snée yā na yáⁿāa Asia, 'iiⁿ'yāⁿ Israel s'eeⁿ ndúúcu 'iiⁿ'yāⁿ s'eeⁿ chí nguéeé yeⁿē ndaata Israel ch'iindiveéⁿ yā nduudu yeⁿē Señor Jesús. ¹¹ Dendyuūs miiⁿ diiⁿ yā vaadī n'giinu ch'ēete n'dai cáávā ta'a Pablo miiⁿ. ¹² Manera chí 'tíicā sta'á yā paños ndúúcu delantales chí tuu'vi cuerpo yeⁿe Pablo ní candéε yā nanááⁿ 'iiⁿ'yāⁿ ngiita. 'Iicu ndiiví ca'ai yeⁿé yā ndúúcu 'yúúné s'eeⁿ chí nguéeé n'daacā yeⁿé yááⁿ'guiinūuⁿ.

¹³ Tuu'mi ní náⁿā 'iiⁿ'yāⁿ Israel s'eeⁿ chí ngiicá yā ndíí miiⁿ ndíí 'muuⁿ chí ngaⁿa yā ndúúcu espíritu chí nguéeé n'daacā yeⁿé yááⁿ'guiinūuⁿ neⁿé yā caaⁿ'máⁿ yā chí yeⁿē Jesús miiⁿ. Ní ngaⁿá yā: 'Úú ní caacá cáávā Jesús miiⁿ, 'iiⁿ'yāⁿ chí ngaⁿa Pablo yeⁿē chí can'daā na cuerpo miiⁿ.

¹⁴ 'Áamá saⁿā chí nguuvi Esceva véé ndēēchē daiya sa chí saⁿā s'eeⁿ. Saⁿā miiⁿ ní saⁿā Israel ní saⁿā chí ngaⁿa ntiiⁿnyuⁿ yeⁿe chiiduú s'eeⁿ yeⁿē Israel. Ní daiya sa diiⁿ yā chuū. ¹⁵ Nan'guēcútaⁿā espíritu chí nguéeé n'daacā yeⁿe yááⁿ'guiinūuⁿ ní caⁿá yā: 'Úú ní n'diichi Jesús miiⁿ ní deenú ntúuⁿ du'ū chí Pablo. Ndís'tiī, ¿du'u ndís'tiī?

¹⁶ Ní 'iicu saⁿā chí canee sa ndúúcu espíritu chí nguéeé n'daacā cúⁿu sá ndúúcu 'iiⁿ'yāⁿ s'eeⁿ, ní chícheε sa ndúúcu 'iiⁿ'yāⁿ s'eeⁿ ní diiⁿ ca sá ndúúcu 'iiⁿ'yāⁿ s'eeⁿ. 'Iiⁿ'yāⁿ s'eeⁿ ní chéenu yā yeⁿé va'āi miiⁿ. 'Áā ntéé snúúⁿ yā catecai vmnáaⁿ yā ní nca'ái yā. ¹⁷ Chuū chicadiinúúⁿ nducyaaca 'iiⁿ'yāⁿ chí snee na yááⁿ Efeso, tan'dúúcā 'iiⁿ'yāⁿ Israel s'eeⁿ 'tiicá

ntúūⁿ 'iiⁿ'yāⁿ s'eeⁿ chi nguéé yeⁿ'e ndaata Israel. Ní nducyaaca yā dii'yá yā chii. Ní chí ch'εετε ca Señor Jesús miiⁿ.

¹⁸ Neené 'yaaⁿ yā chi s'téenu yā ní ndaá yā. Ní caⁿ'a yā chi véé nuuⁿndi yeⁿ'é yā. ¹⁹ Neené 'yaaⁿ 'iiⁿ'yāⁿ chi ch'ēeⁿ yā cosas magias ndéε yā libros yeⁿ'é yā ní chicyáⁿ'a yā nanááⁿ nducyaaca 'iiⁿ'yāⁿ. Ntun'dáa yā cuenta yeⁿ'e libros ní chicadiinúúⁿ yā chí ngíí 'uūví ngεεcu ndiichi mil tuūmī yeⁿ'e 'dííⁿngueε. ²⁰ 'Tíicā chií 'yaaⁿ 'iiⁿ'yāⁿ chi chi'teenu nduudu yeⁿ'e Señor 'iivú Dendyuūs miiⁿ. Ní 'áámá canéé chiichi yā nduudú Dendyuūs miiⁿ.

²¹ Cho'ōo chúū ní Pablo miiⁿ nacadiinu sa na staava yeⁿ'ē sa chi cho'ō sa na yáⁿ'āa Macedonia ndúúcu yáⁿ'āa Acaya ní cuayiivi caⁿ'ā sa na yāāⁿ Jerusalén. Ní ngaⁿ'ā sa: Cuayiivi chí 'āa cheⁿ'é yāāⁿ s'eeⁿ canee chi n'diichi ntúūⁿ yāāⁿ Roma. ²² Ní dicho'o na yáⁿ'āa Macedonia 'uūví saⁿ'a, Timoteo ndúúcu Erasto chi cunnée yā 'iiⁿ'yāⁿ. Pablo miiⁿ canee sa 'áámá tiempo na yáⁿ'āa Asia.

'Caa'vá yā na yāāⁿ Efeso

²³ Tiempo miiⁿ ch'iīndi 'áámá vaadi 'caa'va ch'εετε yeⁿ'ē yúúni yeⁿ'e Dendyuūs miiⁿ. ²⁴ Caati cunee 'áámá saⁿ'ā chi nguuvi sa Demetrio chi din'dái sa yaācū n'gaiyāā yeⁿ'e imagen chi nguuvi Diana. Damaāⁿ 'diiⁿngueε din'dái sa. Ní diiⁿ sa ganar n'dee taavi tuūmī yeⁿ'ē ntiiⁿnyuⁿ yeⁿ'ē sa ndúúcu saⁿ'ā s'eeⁿ chidin'dái yā yaācū n'gaiyāā s'eeⁿ. ²⁵ Demetrio míⁿ ní diiⁿ sa chí nduuvidaamá saⁿ'ā s'eeⁿ chi idiīⁿ ntííⁿnyuⁿ miiⁿ. Caⁿ'a Demetrio: Ndís'tiī saⁿ'ā, déenu nī chi véé tuumī yeⁿ'ē yú yeⁿ'ē ntiiⁿnyúⁿ 'cūū. ²⁶ Naati inaāⁿ nī ní n'giindiveéⁿ nī chi Pablo 'cūū taanduvéé diiⁿ sa chi neené n'dai 'iiⁿ'yāⁿ s'téenu yā. Nguéé dámaaⁿ yāāⁿ Efeso ti nuuⁿmaⁿ yáⁿ'āa Asia. Ní ngaⁿ'ā sa chi nguéé dendyuūs s'eeⁿ chi din'dái yā ndúúcu ta'á yā. ²⁷ Nguεε dámaaⁿ negocio yeⁿ'ē yú chi véé peligro yeⁿ'ē chi 'aa ntéé du'ū véε. 'Tiicā ntúūⁿ yaācū yeⁿ'ē imagen Diana chi ch'εετε míⁿ, mar 'áámá 'iiⁿ'yāⁿ 'āa ntéé neⁿ'e yā. Ní tuca'á yā natuuví yā chi ch'εεte yeⁿ'ē Diana miiⁿ chi i'teenu nuuⁿmaⁿ nación yeⁿ'e yáⁿ'āa Asia ndúúcu núúⁿmaⁿ iⁿ'yeeⁿdí 'cūū.

²⁸ Taachí ch'iindiveéⁿ yā chuū nduuvi taāⁿ yā ní 'cai yā, ngaⁿ'a yā: Ch'εεte n'dai tá táⁿ'ā imagen Diana yeⁿ'e 'iiⁿ'yāⁿ yeⁿ'ē yāāⁿ Efeso.

²⁹ 'Iiⁿ'yāⁿ yāāⁿ miiⁿ chiidáánā yeⁿ'é yā. Ní sta'á yā saⁿ'ā chi nguuvi Gayo ndúúcu saⁿ'ā chi nguuvi Aristarco ní candéε yā saⁿ'ā s'eeⁿ na teatro. Saⁿ'ā miiⁿ ní yeⁿ'ē yáⁿ'āa Macedonia ní compañeros yeⁿ'e Pablo. ³⁰ Pablo miiⁿ neⁿ'e sa can'dáa sa nanááⁿ 'iiⁿ'yāⁿ yāāⁿ miiⁿ naati 'iiⁿ'yāⁿ s'uúⁿ chi i'téenu yā Cristo nguéé 'cuúⁿ yā. ³¹ Dendú'ū náⁿ'a 'iiⁿ'ntyéⁿ'ē saⁿ'ā yeⁿ'e yáⁿ'āa Asia, saⁿ'ā chi amigo yeⁿ'ē Pablo dichó'o yā caaca yeⁿ'ē chí ngaⁿ'á yā chi nguéé caⁿ'ā sa na teatro. ³² Náⁿ'a yā n'gaí yā 'áámá cosa, náⁿ'a yā táámá cosa ti ngiídáánā yeⁿ'é yā. Náⁿ'a yā miiⁿ ní nguéé déenu yā de'ē cáávā nduuvidaamá yā. ³³ Ní 'iiⁿ'yāⁿ yeⁿ'e Israel tun'dáa yā Alejandro nguaaⁿ 'iiⁿ'yāⁿ chi n'dee n'dái. 'Iiⁿ'yāⁿ Israel s'eeⁿ ingúúndaí yā saⁿ'ā. Tuu'mi ní Alejandro míⁿ ca'a sa ndúúcu ta'a sa chi cunee 'diiⁿ. Neⁿ'e sa caaⁿ'maⁿ sa yeⁿ'ē maaⁿ sa nanááⁿ 'iiⁿ'yāⁿ yāāⁿ miiⁿ. ³⁴ Taachí tuumicadiinúúⁿ yā chi saⁿ'a Israel saⁿ'a miiⁿ nducyáácá yā 'caí yā taanduu 'uuví hora: Ch'εεte n'dai imagen ndyuūs Diana yeⁿ'é 'iiⁿ'yāⁿ yeⁿ'e yāāⁿ Efeso.

³⁵ Tuu'mi ní saⁿ'ā 'iiⁿ'ntyéⁿ'ē chi idingúūⁿ diiⁿ sa chí 'caadií nducyaaca yā cheendi yā ní caⁿ'a sá: Ndís'tiī saⁿ'ā s'eeⁿ yeⁿ'e yāāⁿ Efeso, ¿du'u saⁿ'ā chi nguéé deenu sa chi 'iiⁿ'yāⁿ yeⁿ'e yāāⁿ Efeso diiⁿ yā cuidado yaācū yeⁿ'e táⁿ'ā ch'εεte n'dai chi imagen Diana ní imagen yeⁿ'ē tá chí ndaā yeⁿ'e nanguuvi? ³⁶ Deenu yú chuū chí mar 'áámá 'iiⁿ'yāⁿ nguéé cuuvi caaⁿ'máⁿ yā contra yeⁿ'e chuū. Ndís'tiī canéé chi 'cuεetinéé 'dííⁿ nī ní inadacadiinúúⁿ nī. Ní nguéé dííⁿ nī de'ē véε. ³⁷ Naatí candéε nī saⁿ'ā s'eeⁿ ti nguéé dííⁿ duucú sá 'áámá cosa yeⁿ'ē yaācū ndíí nguéé ndúú ngaⁿ'a rá yā chi nguεε n'daaca lado yeⁿ'e imagen dendyuūs n'daataá yeⁿ'e yú. ³⁸ Nduuti chi Demetrio miiⁿ ndúúcu tanáⁿ'ā 'iiⁿ'yāⁿ chí dííⁿ yā ntiiⁿnyuⁿ miiⁿ véé vaadi 'caa'va ndúúcu sa o dendú'ū contra 'áámá 'iiⁿ'yāⁿ, tuu'mi ní, can'déε yā saⁿ'ā vaacuyāāⁿ ní véé saⁿ'a 'iiⁿ'ntyéⁿ'ē. Míⁿ ní cuuvi caaⁿ'maⁿ 'áámá yā táámá yā. ³⁹ Ndúúti chí ngiicá nī yeⁿ'ē táámá naaⁿ dendu'ū 'iiⁿ'ntyéⁿ'ē s'eeⁿ cuuvi cāāⁿ'maⁿ yā chéé

chí cuaacu. ⁴⁰ Tí cáándá yeⁿe yú chi caaca nuuⁿndí yā yeⁿe yú ní cadiinúúⁿ yā yeⁿe chí 'caī yú 'maaⁿ. Nguéé mar 'áámá nduudu chi caaⁿ'maⁿ yú yeⁿ'é chuū.

⁴¹ Taachí caⁿ'á yā chuū ní díⁿ yā despedir nducyaaca yā.

20

Pablo cueⁿ'é yā yáⁿ'āa Macedonia ndúúcu yáⁿ'āa Grecia

¹ Taachí canee 'díⁿ 'iiⁿ'yāⁿ, yaaⁿ'vi Pablo miiⁿ 'iiⁿ'yāⁿ s'eeⁿ chi i'téenu yā Cristo. Ní taachí Pablo ca'a sa consejo 'iiⁿ'yāⁿ s'eeⁿ ní 'cuētinéé n'daāca yā ndúúcu Dendyuūs miiⁿ. Ní diiⁿ sa despedir yeⁿ'é yā ní tu'maⁿ'á sá 'iiⁿ'yāⁿ s'eeⁿ. Tuuⁿ'mí can'dáa sa ní cueⁿ'ē sa yáⁿ'āa Macedonia. ² Cuayiivi míⁿ cheⁿ'e ntúuⁿ sa yáⁿ'ā s'eeⁿ chi chí'cueeⁿ taavi sa 'iiⁿ'yāⁿ yeⁿ'e ndúúdu yeⁿ'e Dendyuūs miiⁿ ní ndaā sa yáⁿ'āa Grecia. ³ Cuayiivi taachi 'āā cānee sa 'iiⁿ'nuⁿ 'iiyū miiⁿ ní cuayiivi taachí nadacadínuuⁿ sa chí 'iiⁿ'yāⁿ Israel s'eeⁿ chí díⁿ n'gíinu yā ndúúcu sa hora chí neⁿ'e sa tucá'a sa sndáa sa na barco miiⁿ na yáⁿ'āa Siria, tuuⁿ'mi ní nadacadínuuⁿ sa chuū chí cho'o ntúuⁿ sa na yáⁿ'āa Macedonia. ⁴ Ní sáⁿ'ā s'uuⁿ cheⁿ'e sá ndúúcu Pablo ndii yáⁿ'āa Asia. Sáⁿ'ā s'uuⁿ ní Sópater yeⁿ'e yáⁿ'ā Berea, ndúúcu Aristarco ní saⁿ'ā chí nguuví Segundo saⁿ'ā s'eeⁿ yeⁿ'ē yáⁿ'ā Tesalónica, ndúúcu saⁿ'ā chí nguuví Gayo yeⁿ'e yáⁿ'ā Derbe, ndúúcu Timoteo, ndúúcu saⁿ'ā s'eeⁿ yeⁿ'e yáⁿ'āa Asia chí sáⁿ'ā Tíquico ndúúcu sáⁿ'ā Trófimo. ⁵ 'Iiⁿ'yāⁿ s'eeⁿ néé can'dáa naaⁿ yā ní canéé ngíinu yā nús'uuⁿ na yáⁿ'ā Troas chí niiⁿ'nuúⁿ nuūⁿ'nī'yáⁿ'ā. ⁶ Taachi 'aa chó'ōo nguuví yeⁿ'ē pan chí nguéé levadura, tuuⁿ'mi cueⁿ'é 'nū na barco yeⁿ'ē yáⁿ'ā Filipos. Cho'ōo nyuⁿ'u nguuví ní ndaá 'nū ní nduuvidaamá 'nū ndúúcu 'iiⁿ'yāⁿ s'eeⁿ yeⁿ'ē na yáⁿ'ā Troas. Ní ch'ētinéé 'nū ndēēchē nguuví miiⁿ.

Pablo na yaāⁿ Troas

⁷ Nguuví domingo vmnáⁿ vmnaaⁿ yeⁿ'ē ndaata miiⁿ nduuvidaamá 'iiⁿ'yāⁿ s'eeⁿ chí i'téenu yā Cristo chí n'deé yā pan. Pablo miiⁿ ní ngi'cueeⁿ sa 'iiⁿ'yāⁿ. Canéé chí can'dáa sa nguuví chí cuchii. Ní chí'cueeⁿ sa taanduu ndíⁿ maⁿ'a yaaⁿ. ⁸ Ní na cuarto yáacū naachi nduuvidaama yā néené n'deēe lámparas vεε. ⁹ 'Náá tiempo caⁿ'a Pablo miiⁿ ní 'áámá saⁿ'a 'díⁿ chí nguuví sá Eutico chí véé sá na ventana, cyaadú n'dai sa. Saⁿ'ā miiⁿ chin'dáa sa ndiichí ndii 'iiⁿ'nuⁿ piso. Taachí nadacuéⁿ yā saⁿ'ā miiⁿ ní 'āā n'dii sa. ¹⁰ Tuuⁿ'mi ní nangua'āi Pablo miiⁿ ní tu'maⁿ'á yā saⁿ'ā ní can'nuu yā saⁿ'ā. Ní caⁿ'a Pablo chí yā saⁿ'ā s'uuⁿ: Nguéé 'va'á nī. Canduuchi ntúuⁿ staava yeⁿ'ē sa taama vmnéⁿ'ēe. ¹¹ Ch'iinu maáⁿ ní Pablo cuindáá tuuⁿ yā cuaaⁿ 'niiⁿ'nuúⁿ. Ní n'dee yā pan. Ní che'é yā ndúúcu yā chí candií yā chí'cueeⁿ ntúuⁿ yā nuuⁿ'máⁿ yaaⁿ ndii chídeεve. Níⁿcu cuēⁿ'e yā. ¹² Candéε yā saⁿ'ā 'díⁿ miiⁿ ní candúúchi sa. Ní yéénú n'dai yā ndúúcu 'viich'ētínūuⁿ ch'εεε.

Cueⁿ'é yā yeⁿ'e yáⁿ'ā Troas ndii yáⁿ'ā Mileto

¹³ Nús'uuⁿ ní can'dáa naaⁿ 'nū ní cueⁿ'e 'nū na barco na yáⁿ'ā Asón chí ndaacá 'nū Pablo yáⁿ'ā miiⁿ. Pablo miiⁿ 'āā neⁿ'e sa chí caaca sa na yáⁿ'āa. ¹⁴ Taachí Pablo nduuvidaama sa nduucú 'nū na yáⁿ'ā Asón miiⁿ, ní cueⁿ'é 'nū na barco miiⁿ, ní ndaá 'nū na yáⁿ'ā Mitilene. ¹⁵ Cueⁿ'é 'nū na barco miiⁿ ní chídeεve táámá nguuví ndaa 'nū niiⁿ'nuúⁿ na isla Quío. Ní chídeεve táámá nguuví chí ndaa 'nū isla Samos. Ní cueⁿ'é 'nū ndaa 'nū na yáⁿ'ā Trogilio. Ch'ētinéé 'nū nguiinū miiⁿ. Chídeεve táámá nguuví cueⁿ'é 'nū na barco ní ndaa 'nū yáⁿ'ā Mileto. ¹⁶ Pablo miiⁿ nacadínuuⁿ sa chí chó'o sa yáⁿ'āa Asia. Canéé chí cacyiinu sa chí cunee ngiinu sa nguuví yeⁿ'ē Pentecostés chí 'viicu yeⁿ'e cosecha na yáⁿ'ā Jerusalén ndúúti chí cuūvi.

Pablo ngaⁿ'a sa nduudu cuaacu ní diiⁿ sa despedir 'iiⁿ'yāⁿ yeⁿ'e yáⁿ'ā Mileto

¹⁷ Pablo dichó'o sa 'iiⁿ'yāⁿ yeⁿ'ē yáⁿ'ā Mileto ndii yáⁿ'ā Efeso chí 'cái yā 'iiⁿ'yāⁿ ndiicū chí ngaⁿ'a ntiiⁿ'nyuⁿ yeⁿ'ē yaācū. ¹⁸ Taachí ndaa 'iiⁿ'yāⁿ s'eeⁿ nanáⁿ Pablo, caⁿ'a sá chí sa 'iiⁿ'yāⁿ s'eeⁿ: Ndís'tií deenú nī ti ndii nguuví vmnáⁿ vmnaaⁿ chí ndaá yáⁿ'āa Asia táácā díⁿ ní canéé nduucú nī tanducuéⁿ'ē tiempo. ¹⁹ Díⁿ ntiiⁿ'nyuⁿ yeⁿ'e Señor ndúúcu vaadī ndiicúúⁿ taavi. Ch'eenú chí taanduvéé chí nguéé n'daacā chí diiⁿ 'iiⁿ'yāⁿ Israel s'eeⁿ nduucú. Ch'ēcú níⁿcu tun'daa nuūⁿ'nī nduutinaáⁿ. ²⁰ Ní 'áámá ngaⁿ'á tanducuéⁿ'ē

dendú'ū chi n'daacā yeⁿ'é nī. Ní chi'cueén nanáán nducyaacá 'iiⁿ'yāⁿ nduu va'ai nduu va'āi. ²¹ Ní caⁿ'á nduudu cuaacu 'iiⁿ'yāⁿ Israel s'eeⁿ ndúúcu 'iiⁿ'yāⁿ s'eeⁿ chi nguée yeⁿ'ē ndaata Israel yeⁿ'ē chi ndaacādaamí yā yeⁿ'é nducueⁿ'ē nuuⁿndi yeⁿ'é yā nanáán Dendyuūs. Ní cu'téenu yā yeⁿ'ē Señor Jesucristo yeⁿ'ē yú. ²² Maaⁿ ní cun'diichi nī. Canée chi díⁿ cucaava espíritu yeⁿ'é. Caⁿ'á na yáāⁿ Jerusalén ní nguée deenú de'ē 'cueēnú miiⁿ. ²³ Maaⁿ deenú chi Espíritu N'dai yeⁿ'e Ndyuūs miiⁿ ngaⁿ'a yā ngii yā 'úú na nducyáacá yáāⁿ chi caⁿ'á cunee ngíínú chi 'cueēnú cuuví ní caⁿ'á vácū. ²⁴ Naati mar 'áámá naaⁿ nguée idiíⁿ cuenta ndii nguée ndúú ya'ái 'úú vida yeⁿ'é maáⁿ. Canee ngiinú chi di'cuiínú ntiiⁿnyuⁿ yeⁿ'é, ntiiⁿnyuⁿ chi teē Señor Jesús 'úú chi caaⁿ'máⁿ nduudu cuaacu yeⁿ'é yā yeⁿ'ē evangelio chí ndúúdu ngai ndúúcu vaadī yeenú. Nduūdū miiⁿ yeⁿ'e favor ch'εete yeⁿ'é Dendyuūs. ²⁵ Maaⁿ ní 'caandiveéⁿ nī. 'Úú ní deenú ti mar 'áámá ndís'tiī nguaaⁿ 'iiⁿ'yāⁿ naachí chō'o ní caⁿ'á yeⁿ'e chi Dendyuūs ngaⁿ'a yā ntiiⁿnyuⁿ mar 'áámá nī 'aa ntéé n'diichi nī naáⁿ. ²⁶ Tanducueⁿ'ē chuū ngaⁿ'á ngii ndís'tiī maaⁿnguuvi caati 'úú nguée canee chi díⁿ responder yeⁿ'ē mar 'áámá nī yeⁿ'ē tanducueⁿ'ē vida yeⁿ'ē tanducueⁿ'ē 'iiⁿ'yāⁿ. ²⁷ Nguée cheeⁿdiitú ti caⁿ'á tanducueⁿ'ē consejo yeⁿ'e Dendyuūs ndúúcu ndís'tiī. ²⁸ Tuu'mi ní cundεε nī cuidado yeⁿ'ē maáⁿ nī ndúúcu nducyáacá 'iiⁿ'yāⁿ chí i'téenu yā ti Espíritu N'dai yeⁿ'e Ndyuūs chi'neéⁿ yā ndís'tiī cáávā chí cuuvi díⁿ nī cuidado yeⁿ'e 'iiⁿ'yāⁿ chí i'téenu Señor, 'iiⁿ'yāⁿ chí caⁿ'á yā yaacū yeⁿ'e Señor. Señor miiⁿ ní cai yā 'iiⁿ'yāⁿ ndúúcu yuúúⁿ yeⁿ'ē maáⁿ yā. ²⁹ 'Úú ní deenú chí cuayiivi taachí 'āá ntéé canduuchí ní ndaa 'iiⁿ'yāⁿ tan'dúúcā lobos nguaaⁿ ndís'tiī ní díⁿ yā chí nguée díⁿ n'daāca nī ndúúcu tanducueⁿ'ē 'iiⁿ'yāⁿ. ³⁰ Nguaaⁿ ndís'tiī nūⁿ nacueeⁿ sáⁿ'ā s'eeⁿ chí ngaⁿ'a nduudu chí nguée n'daacā chí cuuvi candéé sa 'iiⁿ'yāⁿ s'eeⁿ chí i'téenu yā Cristo ndúúcu sa. ³¹ Cáávā chuū cuin'diichi n'daaca nī. N'gáácú nī ti chεeti 'iiⁿ'nūⁿ nduuyū ndii nguuvi ndii n'gaaⁿ nguée chí'neéⁿ naáⁿ caⁿ'á ndúúcu nuūⁿnīⁿ nduutinaáⁿ 'áámá 'áámá ndís'tiī. ³² Maaⁿ ní ndís'tiī hermanos, i'neéⁿ ndís'tiī yeⁿ'e Dendyuūs ndúúcu nduudu yeⁿ'ē favor ch'εete taavi yeⁿ'é yā. Nduudu miiⁿ diitu ch'εete chí 'cuiitá ndís'tiī ní teē ndís'tiī 'áámá cosa chí véé chí cuuvi yeⁿ'e nī ndúúcu nducyaaca 'iiⁿ'yāⁿ chí Dendyuūs didεεvé yā. ³³ Nguée díⁿ ngueēe ndíí nguée tuumi 'díⁿngueε ndíí nguée ndúú tuumi 'díⁿnguaāⁿ ndíí nguée ndúú catecai 'iiⁿ'yāⁿ. ³⁴ Ndís'tiī ní deenú nī chí ta'á dichíí'vē 'úú ndúúcu 'iiⁿ'yāⁿ chí snéé nduucú yeⁿ'ē nducueⁿ'ē chí neⁿ'é 'nū. ³⁵ Tanducueⁿ'ē chuū chí'cueén ndís'tiī chí díⁿ yú ntiiⁿnyuⁿ 'túúcā. Canee chí cuuvi cunnee yú 'iiⁿ'yāⁿ chí ngi'vaachí. Ní nn'gaacu yú nduudu yeⁿ'ē Señor Jesús miiⁿ chí caⁿ'a yā: N'dai taavi ca chí ca'a yú nguée ti chí cuta'ā yú.

³⁶ Taachi caⁿ'a yā chuū chiintii'yá yā ní caⁿ'angua'á yā ndúúcu nducyaaca 'iiⁿ'yāⁿ s'úúⁿ. ³⁷ Tuu'mi ní nducyaaca yā chεecu taaví yā ní tú'maⁿ'á yā Pablo, maaⁿ ní 'neen cheendi yā 'iiⁿ'yāⁿ. ³⁸ Nééné ya'ai taaví yā cáávā nduudu chí caⁿ'ā Pablo miiⁿ chí 'āá ntéé nangueεcunee n'diichi nī naáⁿ. Ní cueⁿ'e yā canguu yúúúⁿ yā saⁿ'ā ndii na barco.

21

Pablo cueⁿ'e sa na yáāⁿ Jerusalén

¹ Cuayiivi chí n'daā cá 'nū yeⁿ'ē 'iiⁿ'yāⁿ s'eeⁿ, cueⁿ'e 'nū na barco ní cueⁿ'e 'nū yúúúⁿ cuaacu ní ndaa 'nū na isla Cos. Chidεεve táámá nguuvi cueⁿ'e 'nū na barco ní cho'ó 'nū na isla Rodas ní ndii yeⁿ'ē isla miiⁿ ndaa 'nū na yaāⁿ Pátara. ² Ní ndaaca 'nū 'áámá barco chí caⁿ'a na yáⁿ'āa Fenicia, cuch'ée 'nū cueⁿ'é 'nū na barco. ³ Ní n'diichí 'nū isla Chipre chí snee lado tá 'cueē. Ní cueⁿ'é 'nū na yáⁿ'āa Siria, ní ndii miiⁿ ndaa 'nū na yaāⁿ Tiro ti barco miiⁿ míⁿ cu'neen carga yeⁿ'ē. ⁴ Nndaacá 'nū 'iiⁿ'yāⁿ s'eeⁿ chí i'téenu Cristo ní canée 'nū miiⁿ ndεēchē nguuvi. 'iiⁿ'yāⁿ s'eeⁿ ní ngaⁿ'a yā ngii yā Pablo miiⁿ cáávā Espíritu N'dai yeⁿ'e Ndyuūs chí nguée caⁿ'a sa yáāⁿ Jerusalén. ⁵ Taachi snuūⁿ ca'a nguuvi miiⁿ nan'dáa 'nū nducyaaca 'iiⁿ'yāⁿ ndaa yā chí cunee ngíínú yā nús'uu ndúúcu n'daataá yeⁿ'e yā ndúúcu daiya yā ndii 'áámá lado yeⁿ'ē yáāⁿ. Ní nducyaaca yā chiintii'yá yā na 'diitú nuūⁿnī'yáⁿ'ā. ⁶ Ní tu'maⁿ'a 'nū hermanos 'áámá 'nū taama 'nū ní cueⁿ'é 'nū na barco. Ní 'iiⁿ'yāⁿ s'eeⁿ ní cunaⁿ'a yā na vaacu yā.

⁷ Nús'uū ní ch'iinu cheⁿ'é 'nū na barco. Cueⁿ'é 'nū yeⁿ'ē yāāⁿ Tiro ní ndāa 'nū yāāⁿ Tolemaida. Ní taachí yaa'vi hermanos nús'uu ch'εetineé 'nū ndúúcu yā 'áámá nguuvi. ⁸ Chidεεve táámá nguuvi miiⁿ ni Pablo ndúúcu nús'uu chi snéé 'nū ndúúcu sa, can'dāa 'nū. Cueⁿ'é 'nū na yāāⁿ Cesarea. Ní sndāa 'nū va'āi yeⁿ'e Felipe chí ngaⁿ'a sa evangelio chi ndúúdu ngai yeⁿ'e Jesucristo. Felipe miiⁿ 'áámá saⁿ'ā naachi ndεēchē diáconos. Ní canéé 'nū ndúúcu sa. ⁹ Saⁿ'ā miiⁿ cuūuⁿ n'daataá n'gáiyāa daiya sa chi ngaⁿ'ā tá chi Ndyuūs yaa'ví yā. ¹⁰ Ch'εetinéé 'nū n'deeε nguuví. Cuch'éeⁿ 'áámá saⁿ'ā profeta chi caaⁿ'maⁿ chi cuchí chí yeⁿ'e yáⁿ'āa Judea. Saⁿ'ā miiⁿ nguuvi sa Agabo. ¹¹ Saⁿ'ā miiⁿ ní n'diichi sá nús'uū. Staⁿ'ā sá cinta yeⁿ'ē Pablo miiⁿ ní ca'ā chiichi sá ca'a Pablo ndúúcu ta'á yā. Ní caⁿ'ā sá: Chuū ngaⁿ'a Espíritu N'dai yeⁿ'e Ndyuūs: 'Tíicā 'iiⁿ'yāⁿ Israel s'eeⁿ yeⁿ'e yāāⁿ Jerusalén ca'ā chiichí yā saⁿ'a yeⁿ'e cinta 'cūū. Ní nca'á yā sa'ā ta'a 'iiⁿ'yāⁿ s'eeⁿ chi nguéé yeⁿ'ē ndaata Israel.

¹² Taachí ch'iindiveéⁿ 'nū ndúúcu 'iiⁿ'yāⁿ yāāⁿ miiⁿ nducyáácá 'nū chiica 'nū Pablo miiⁿ chi nguéé cáⁿ'a sa yāāⁿ Jerusalén. ¹³ Tuu'mi ní Pablo miiⁿ nan'guεεcútaⁿ'ā sa: ¿Dε'ē cúúví chí ngεεcú ndís'tií ní néené i'neeⁿ ya'ai nī staāvā yeⁿ'é? Ti 'úú ní nguéé dámaāⁿ chi 'caāchiichí yā 'úú caati canéé chí 'cuuví na yāāⁿ Jerusalén cucáāvā Jesús miiⁿ.

¹⁴ Nguéé cuuvi di'cuútu 'nū 'iiⁿ'yāⁿ chí cu'neeⁿ 'nū 'iiⁿ'yāⁿ ní ngaⁿ'á 'nū: Cuuvi tan'dúúca chí neⁿ'e Señor.

¹⁵ Cho'ōo ngúúví miiⁿ cúchεε 'nū na yāāⁿ Jerusalén ndúúcu dendu'ū yeⁿ'é 'nū. ¹⁶ Ní ndaa ntúuⁿ yā ndúúcu nús'uu náⁿ'a yā chí i'téénú Jesucristo yeⁿ'e yāāⁿ Cesarea. Ní 'iiⁿ'yāⁿ s'eeⁿ ndéε yā nús'uu na vaacu 'áámá saⁿ'ā chí nguuvi Mnasón chí yeⁿ'e isla Chipre. Saⁿ'ā miiⁿ i'teenu sa cuaaⁿ vmnaaⁿ ní nús'uu ch'εetineé 'nū ndúúcu sa.

Sta'á yā Pablo na yaācū templo

¹⁷ Taachí ndaá 'nū na yāāⁿ Jerusalén, hermanos yeenú taavi yā taachi sndaa 'nū. ¹⁸ Chidεεve táámá nguuvi Pablo miiⁿ cueⁿ'e sa ndúúcu 'nū ní snaán 'nū Jacobo ndúúcu nducyáácá 'iiⁿ'yāⁿ ndiicúú s'eeⁿ chí 'āā nduuvidaama yā. ¹⁹ Taachi diiⁿ sa saludar 'iiⁿ'yāⁿ s'eeⁿ, Pablo caⁿ'a sá chí sa 'iiⁿ'yāⁿ ca'áámá ca'áámá nducuéⁿ'ē dendu'u chí Dendyuūs díⁿ yā nguaaⁿ 'iiⁿ'yāⁿ s'eeⁿ chí nguéé yeⁿ'ē ndaata Israel caavā ntiⁿ'nyúⁿ yā. ²⁰ Taachí 'iiⁿ'yāⁿ s'eeⁿ ch'iindiveéⁿ yā chuū, s'téénu yā Dendyuūs ní caⁿ'a yā chí yā saⁿ'ā: 'Caandiveéⁿ nī, hermanos. Véé cá 'iiⁿ'yāⁿ Israel s'eeⁿ chí s'téénu yā tan'duucā 'yaaⁿ millares. Ní nducyaaca yā ní neené chí t'éénu yā ley yeⁿ'e Moisés. ²¹ Naati 'āā caⁿ'a yā chí yā 'iiⁿ'yāⁿ s'eeⁿ yeⁿ'ē ndís'tií chí ndís'tií ca'cuééⁿ nī nducyaaca 'iiⁿ'yāⁿ Israel s'eeⁿ chí snéε yā nguaaⁿ 'iiⁿ'yāⁿ s'eeⁿ chí nguéé yeⁿ'ē 'iiⁿ'yāⁿ Israel. Ca'cueéⁿ nī chí 'iiⁿ'yāⁿ Israel s'eeⁿ nguéé cánéé chí díⁿ yā chí ngaⁿ'a ley yeⁿ'ē Moisés ndí nguéé díⁿ yā circuncidar daiya yā, ndí nguéé ndúú díⁿ yā costumbres yeⁿ'e Moisés. ²² ¿Dε'ε chí tuu'mi? Neené n'deeé 'iiⁿ'yāⁿ caⁿ'á yā ní nduuvidadáámá yā taachi ch'iindiveéⁿ yā chí nndaá nī. ²³ Díⁿ dí chuū chí ngaⁿ'a 'nū ndúúcu dii: Véé cuūuⁿ saⁿ'ā nguaaⁿ nús'uū chí véé compromiso yeⁿ'ē sa ndúúcu Dendyuūs. ²⁴ Candéε di saⁿ'ā s'eeⁿ. Tan'dúúca costumbre yeⁿ'e religión yeⁿ'ē di, nínduuví dεεvé di ndúúcu yā yeⁿ'e nducuéⁿ'ē. Niicú cuayiivi nadí'vé di saⁿ'ā chí cuū tiⁿ sa. Ní nducyáácá 'iiⁿ'yāⁿ tuumícadiiⁿ'úúⁿ yā ti nguéé de'ε véε chí caⁿ'á yā cucaavā yeⁿ'ē di. Ní tuumícadiiⁿ'úúⁿ yā chí ngíicá cuaacu di ní chí diiⁿ di chí ngaⁿ'a ley. ²⁵ Naati 'iiⁿ'yāⁿ s'eeⁿ chí nguéé yeⁿ'e ndaata Israel chí i'téénu yā nguéé canéé chí díⁿ yā chúū. Nús'uū ní idingúuⁿ 'nū chí nguéé du'ū chí canéé chí diiⁿ chuū. Dámaāⁿ chí nguéé cuta'á yā yuute yeⁿ'ē 'iiti chí 'caaⁿ'núⁿ yā caavā ídolos, ndí nguéé ndúú yuúúⁿ yeⁿ'é tī, ndí nguéé ndúú yuúúⁿ yeⁿ'e 'iiti chí nduuchi dí'nú yā daandu tī. Ní nguéé cánéé chí cunéé sa ndúúcu 'áámá n'daataa chí nguéé n'daataa yeⁿ'ē sa.

²⁶ Tuu'mi ní Pablo miiⁿ nícāndéε sa 'iis'uūⁿ. Ní chidεεve táámá nguuvi tan'dúúca costumbre yeⁿ'é yā Pablo 'āā nididεεvé sa maaⁿ sa ndúúcu saⁿ'ā s'eeⁿ. Ní sndāa yā yaācū templo chí caaⁿ'máⁿ yā chí cúúnú ca'ā nguuvi yeⁿ'ē compromiso yeⁿ'é yā, chí cánéé chí ca'a yā 'áámá 'aama yā ofrenda yeⁿ'é yā.

²⁷ Taachi cánéé chí cúúnú ca'ā chí ndεēchē nguuvi, taachí 'iiⁿ'yāⁿ Israel yeⁿ'ē yáⁿ'āa Asia n'diichí yā Pablo chεeti yaācū templo n'gaā'vá yā ndúúcu sa. Ní díⁿ yā chí nduuvi

taán yā nducyaaca yā. Ní sta'á yā Pablo. ²⁸ N'gaí yiicú yā: Ndís'tiī sa'nā Israel, cúnneé nī. Sán'a 'cūū chí nduu cuaa'n ngi'cuee'n sa nducyaaca 'ii'n'yā'n contra yāā'n mii'n ndúúcu ye'nē contra ye'n'e ley ndúúcu ye'nē contra ye'n'e lugar 'cūū. N'déee ca nguéé ti chuū. Ní candēe sa 'ii'n'yā'n chi nguéé ye'n'e ndaata Israel chēeti yaācū templo. Ní divaatí sa yaācū templo chí dēeεε.

²⁹ Tii cuáán vmnaa'n ní ná'nā 'ii'n'yā'n n'diichí yā ndúúcu sa sá'nā chi nguuvi Trófimo ye'nē yāā'n Efeso. Ní nadacádínuu'n yā chí Pablo mii'n nicandēe sa sa'nā chēeti yaācū templo. ³⁰ Nducyáácá 'ii'n'yā'n mii'n n'gēεcú cheendí yā ní ch'ii dáanā ye'n'é yā. Ní din'gínu yā ní sta'á yā Pablo mii'n ní tun'dáa yā sa'n'a chēeti yaācū templo. Ní hora mí'n nūu'n n'gaadí yā cheendi va'aī yācū templo. ³¹ Ní dii'nú yīnu yā chí 'caa'n nu'n yā Pablo. 'Áámá yā ca'n'a yā ye'nē comandante, chí nducyáácá 'ii'n'yā'n yāā'n Jerusalén nguεε 'diii'n snée yā. ³² Tuu'mí nūu'n comandante sta'á yā soldado s'ee'n ndúúcu capitán ní chéenu yā 'ii'n'yā'n s'ee'n naachi canéé Pablo mii'n. Taachí nducyaaca yā n'diichí yā comandante ndúúcu soldado s'ee'n tuu'mi s'nee'n naa'n yā chí n'ge'n'é yā Pablo mii'n. ³³ Taachí ndaā comandante tuu'mi ní sta'á yā Pablo ní ca'n'á yā orden chí chēē chiichí sá ndúúcu 'uuvi cadenas. Ní comandante tiinguuneé'n yā: ¿Du'u rá sa'nā mii'n ní de'ē vεε mii'n ní de'ē idii'n sa? ³⁴ Naachi n'deeε n'dai 'ii'n'yā'n, ná'n'a yā ní n'gaí yā 'aama naa'n, ná'n'a yā n'gaí yā taama naa'n, ní 'ii'n'yā'n s'ee'n nguéé itumicádiinúú'n yā ye'nē sa chí tatiī n'gaí yā. Ca'á yā orden chí cho'ó yā sa'nā na vácūū naachi sneé soldado s'ee'n. ³⁵ Taachi Pablo mii'n cúchēε sa nandēε, candēε yā yaācū soldado s'ee'n sa'n'a cáāvā chí taā'n 'ii'n'yā'n s'ee'n ndúúcu sa. ³⁶ Ti n'deēε n'dái 'ii'n'yā'n ye'n'e yāā'n mii'n cue'n'e yā cuaa'n dáámí sa'nā mii'n ní n'gaí yā: 'Cuuvi sa.

Pablo nga'n'a sa ye'nē maa'n sa na yāā'n Jerusalén

³⁷ Taachí tucá'a yā dii'nyú yā na vácūū tuu'mi ní Pablo mii'n nga'n'a sa ngii sa comandante: ¿'Áá 'cuáán nī chí caa'n má'n 'tεε ndúúcu n'diī? Ní comandante ca'nā sa: ¿'Áá déénú dí davaacu griego? ³⁸ ¿'Áá nguéé dí sa'nā ye'n'e yá'nāa Egipto chí dii'n dí chí nduuví taán yā 'ii'n'yā'n vmnaa'n ye'n'e nguuvi mii'n ní tun'dáa di cuūu'n mil 'ii'n'yā'n chí duucu na yá'nāa cuu'n má'n?

³⁹ Tuu'mi ní ca'nā Pablo: 'Úú ní sa'nā Israel ye'nē yāā'n Tarso, sa'nā ye'nē 'áámá yāā'n ch'εεtē ye'n'e yá'nāa Cilicia. Ngicá nanáa'n nī, 'cuaa'n nī chí yaa'ví 'ii'n'yā'n.

⁴⁰ Taachí sa'nā mii'n ca'a sa lugar, Pablo mii'n chééndii sa nāndēε ní ca'a sa señal 'ii'n'yā'n ndúúcu ta'ā sa, ní taachí 'diii'n ní ca'n'a sa ndúúcu davaacu hebreo. Ní ca'n'a sa:

22

¹ Ndís'tiī sa'nā ní ndís'tiī ví'í ndúúcu 'ii'n'yā'n ndicúū, 'caandiveé'n nī chí nga'n'á ye'nē maá'n nanáa'n ndís'tiī.

² Taachí ch'iindiveé'n yā chí nga'nā sa davaacu hebreo, ch'εεtinéé 'diii'n cá yā. Pablo mii'n ní ca'nā sa: ³ Cuaacu ní'nnyú'n sa'nā Israel 'úú. Ch'iindiyaá'n na yāā'n Tarso ye'nē yá'nāa Cilicia, naatí ch'iitá na yaá'n 'cūū. Ch'eé'n ndúúcu maestro Gamaliel mii'n. Tan'dúúca chí nga'nā na ley ye'nē chiida yú. 'Úú chí diī'n ndúúcu núú'má'n staava ye'n'é tan'dúúca chí maa'n nducyaaca nī diī'n nī ndúúcu Dendyuūs. ⁴ 'Ii'n'yā'n chí cué'n'ē Yúúní 'cūū 'úú can'daá 'ii'n'yā'n mii'n. Ní sta'á ndii n'daataá ndíí sa'nā ní nca'á 'ii'n'yā'n chí cuεetinúú'n yā vácūū chí 'cuūvi yā. ⁵ 'Tiicá ntúū'n chiiduú ch'εεtε cá ye'n'e Israel mii'n testigo ye'n'é ndúúcu nducyaaca 'ii'n'yā'n ndiicúū. 'Tiicá ntúū'n 'úú sta'á carta ndúúcu orden chí 'cuu'n mí'n 'ii'n'yā'n s'ee'n ní cue'n'é naachi snéé hermanos. Ní cue'n'é yāā'n Damasco ní cue'n'é chí candēε presos hermano s'ee'n ndii yāā'n Jerusalén. 'Tiicá ntúū'n 'ii'n'yā'n chí sneé yā mii'n ní cuuví yā castigados.

Pablo nga'n'a yā taacā i'teenú yā

(Hch. 9.1-19; 26.12-18)

⁶ Naatí chí taachi yúúni canuún, ndaá nii'nnyúú'n yāā'n Damasco tan'dúúca ma'n'a nguuvi dáácánaā'n nndaā 'áámá dēεε ye'nē nanguuvi naachi 'úú caneé. ⁷ Ní sndēεvé ná yá'nāa. Ní ch'iindiveé'n 'áámá nduudu chí nga'n'a ngiī 'úú: Saulo, Saulo, ¿de'ē cúú chí nn'daā dī

'úú chi nééné ya'ai 'úú? ⁸ Tuu'mi nan'guεεcutaⁿá: ¿Du'ú n'diī, Señor? Ní caⁿa yā chīi yā 'úú: 'Úú Jesús yeⁿe yāāⁿ Nazaret miiⁿ chí n'daā di 'úú ní nguéeⁿ neⁿē di n'diichi di 'úú. ⁹ 'Iiⁿyāⁿ chí snée nduucú cuaacu níⁿnyúⁿ n'diichí yā dεεve miiⁿ. Ní dii'yá yā chii. Naati nguéeⁿ ch'iindiveeⁿ yā nduudu chí ngaⁿ'a Señor Jesús nduucú. ¹⁰ Ní caⁿá: ¿De'ē diīⁿ, Señor? Señor miiⁿ ngaⁿ'á yā ngīi yā 'úú: Nducueeⁿ dí ní cueⁿe di na yāāⁿ Damasco. Miiⁿ cadiinuuⁿ di tanducueⁿē chí canee chí diiⁿ di. ¹¹ 'Úú ní nguéeⁿ inaán cáávā chí ch'εedi nduutinaán yeⁿē vaadi dεεve ch'εete ca chí dεεve miiⁿ. 'Iiⁿyāⁿ chí snée yā nduucú candéeⁿ nee yā ta'á ní ndaá yāāⁿ Damasco.

¹² Tuu'mi ni miiⁿ canee 'áámá saⁿā chí nguuvu Ananías, saⁿā chí diiⁿ sa tan'dúúccā chí ngaⁿ'a ley miiⁿ. Ní nguuaⁿ nducyaaca 'iiⁿyāⁿ Israel s'eeⁿ chí snée yā, ngaⁿ'á yā chí saⁿā miiⁿ n'dai taavi sa. ¹³ Ndaá yā nanaán ní ndaa niiⁿnúⁿ yā ní caⁿ'a yā: Dii hermano Saulo, nan'guaāⁿ nduutināⁿ di. Ní hora miiⁿ nūⁿ n'guaaⁿ nduutinaán ní snaán. ¹⁴ Saⁿā miiⁿ ní caⁿ'á sa: Ndyuūs yeⁿē chiida yú ndεεve yā dii chí cuuvi déénú dí chí neⁿe yā. Ní cuuvi n'diichí di Jesús chí n'dai taavi. Ní 'caandiveeⁿ di chí ngaⁿ'a yā. ¹⁵ Ti cuuvi di caaⁿ'maⁿ di nduudu cuaacu yeⁿé yā yeⁿē cosa chí 'aa n'diichi di ndúúccū chí 'aa ch'iindiveeⁿ di nanáán nducyaaca 'iiⁿyāⁿ. ¹⁶ Maaⁿ ní ¿de'ē ínee ngiinu di? Cuééndii di ní cuεεdinuūⁿnīⁿ di ní didεεvⁿ di dii yeⁿē nuuⁿndi yeⁿē di. Caaⁿ'maⁿngua'a di nanáán Señor Jesús.

Dicho'ó yā Pablo nanaaⁿ 'iiⁿyāⁿ s'eeⁿ chí nguéeⁿ yeⁿē ndaata Israel

¹⁷ 'Túúccā chíi. Taachí nanguεεcúndii na yāāⁿ Jerusalén miiⁿ ní taachí caⁿ'angua'á na yaāccū templo n'diichí 'áámá visión, cosa tan'dúúccā chíi ch'iiⁿnú. ¹⁸ Ní n'diichí 'iiⁿyāⁿ ní caⁿ'á yā chíi yā 'úú: Diinú yiiⁿnu di ní cueenu di yeⁿe yāāⁿ Jerusalén, ti nguéeⁿ 'cúaaⁿ yā nduudu cuaacu yeⁿé. ¹⁹ 'Úú ní caⁿ'á: Señor 'iiⁿyāⁿ s'eeⁿ deenú yā yeⁿē nducyáácá yā chí snúuⁿ yā yaāccū sinagoga s'eeⁿ ti 'úú ní ch'íí 'iiⁿyāⁿ vácūū ní ch'eⁿé 'iiⁿyāⁿ chí i'teenú yā n'dii. ²⁰ Ní taachi ch'ii Esteban saⁿā chí caⁿ'a nduudu cuaacu yeⁿé nī, 'úú ntúūⁿ ni canee nanáán sa. 'Úú ní 'cuúⁿ chí ch'ii sa. Ní nguain'daí cotón yeⁿe 'iiⁿyāⁿ chí ch'iiⁿnūⁿ saⁿā. ²¹ Tuu'mi caⁿ'a Jesús chíi yā 'úú: Cuéⁿé dí, ti 'úú idicho'ó dii yáⁿái n'dai ndúúccū 'iiⁿyāⁿ s'eeⁿ chí nguéeⁿ yeⁿē ndaata Israel.

Pablo nanáánⁿ comandante

²² Ní taachi 'iiⁿyāⁿ s'eeⁿ ch'iindiveeⁿ yā ndii nduudú 'cūū tuu'mi ní caⁿ'a yuudú yā: Diví di sáⁿ'a 'cūū na yáⁿāa ti nguéeⁿ canée chí cunduuchi sa.

²³ Taachí 'cai yā ní chíín'cuuⁿ yā catecai yā ní chingée yā iyaācá na 'yúúné, ²⁴ comandante chí ngaⁿ'a ntiiⁿnyuⁿ caⁿ'ā sa chí cu'nuúⁿ yā Pablo vácūū. Ní caⁿ'ā orden chí caⁿ'á yā tiingúúneeⁿ yā Pablo ní ch'eⁿé yā Pablo, maaⁿ niicu cadíínuuⁿ yā de'ē cáávā chí n'gāi yā contra yeⁿē sa. ²⁵ Taachí dichíichí yā Pablo ndúúccū yiiⁿmaⁿ, Pablo miiⁿ ní caⁿ'ā sa capitán chí sneé yā miiⁿ: ¿'Áá canée chí 'cueⁿé nī 'áámá saⁿā romano ndúúti chí nguéeⁿ ndaaca nī nuuⁿndi yeⁿē sa?

²⁶ Taachí capitán miiⁿ ch'iindiveeⁿ sa chuū, cueⁿe sa níccú caⁿ'a sa yeⁿe comandante ní yaa'vi sa: N'diichí nī, ¿de'ē diīⁿ nī caati sáⁿ'a 'cūū ní saⁿā romano sa?

²⁷ Ndaa comandante ní caⁿ'a sa: Cuuvi di 'úú. ¿'Áá díí saⁿā romano? Pablo miiⁿ ní caⁿ'a yā: 'Tíicā.

²⁸ Nan'guεεcútaⁿā comandante: 'Úú caí māaⁿ 'úú. N'deē tuūmī ca'á ní ndii chíí saⁿā romano 'úú. Tuu'mi ní Pablo miiⁿ ní caⁿ'a sa: 'Úú ní ch'iindiyááⁿ na yáⁿāa romano 'tíicā.

²⁹ Ní cueⁿé yā yeⁿē sa 'iiⁿyāⁿ chí sta'a orden chí 'cueⁿé yā saⁿā. Taachí comandante tuumicádiinuuⁿ sa chí saⁿā romano sa, tuu'mi dii'yá ntúuⁿ sa chíi, chí dichíichí sa Pablo.

Pablo nanáánⁿ concilio

³⁰ Chidεεve táámá nguuvu sáⁿā miiⁿ neⁿe sa cadíínuuⁿ sa de'ē cáávā chí tun'dáá nuuⁿndi 'iiⁿyāⁿ Israel s'eeⁿ. Diví yā cadenas yeⁿē Pablo miiⁿ ní ca'a yā orden chí cho'ó yā Pablo nanáán chíidúú n'gεεtⁿ yeⁿe Israel ndúúccū nducueⁿē 'iiⁿntyéⁿē yeⁿe concilio. Ní tun'dáá yā Pablo miiⁿ. Ní ch'iiⁿi yā saⁿā nanáán 'iiⁿyāⁿ s'eeⁿ.

23

¹ Tuu'mi ní Pablo miiⁿ ch'íínú cuaacu sa saⁿá s'eeⁿ yeⁿē concilio. Ní caⁿa sa: Ndís'tiī saⁿá vi'í, Ndyuūs ní n'diichí yā taanduvéé chi 'úú dííⁿ ní nguéé dííⁿ 'uūvī staava yeⁿé yeⁿe cosa chi dííⁿ.

² Ananías, saⁿá chi chiiduú ch'εεte cá yeⁿe Israel caⁿa yā chii yā 'iiⁿyāⁿ chi canee daama yā ndúúcu sa chí 'cueⁿe yā cheendi sa. ³ Tuu'mi ní Pablo mííⁿ ní caⁿa sa: Ndyuūs 'cueⁿé yā dii, saⁿá chi tan'dúúca 'aama cheeti cuéē. ¿'Áá diiⁿ di juzgar 'úú tan'dúúca ley miiⁿ, 'iicu nguéé idiiⁿ di cumplir chi ngaⁿá ley, nícu maaⁿ ní ngaⁿá di chi 'cueⁿé yā 'úú?

⁴ 'Iiⁿyāⁿ chi snée yā nanááⁿ Pablo caⁿa yā: ¿'Áá chiiduú ch'εεte ca yeⁿé Dendyuūs ngaⁿá taaⁿ di ngii di 'tíicā?

⁵ Pablo miiⁿ ní caⁿa sa: Ndís'tiī vi'í, 'úú ní nguéé deenú chi sáⁿa 'cāā chi chiiduú ch'εεte cá yeⁿe Israel. Naati cánéé nguūⁿ. Nguéé caaⁿmaⁿ taaⁿ di yeⁿe 'áámá saⁿá ch'εεte yeⁿe Israel yeⁿé 'iiⁿyāⁿ yeⁿē di.

⁶ Tuu'mi Pablo miiⁿ tuumicádiinuⁿ sa chi 'áámá taaⁿ yā yeⁿē 'iiⁿyāⁿ saduceo s'eeⁿ chi nguéé i'téenu yā chi nanduuchi 'iiⁿyāⁿ ni táámá taaⁿ yā yeⁿē 'iiⁿyāⁿ fariseos chi i'téenu chí nanduuchi 'iiⁿyāⁿ. Ní 'cai yuudu sa nanááⁿ nducyaaca 'iiⁿyāⁿ yeⁿē concilio: Ndís'tiī saⁿá vi'í, 'úú ní saⁿá fariseo 'úú ní daiyá saⁿá fariseo 'úú. Dííⁿ yā juzgar 'úú yeⁿē chi canee ngíínú yā chí nadacuéeⁿ yā yeⁿē nguaaⁿ tináⁿá.

⁷ Taachí caⁿa yā chuū véé 'uuvī vaanicadiinuⁿ yeⁿe saⁿá fariseos ndúúcu saⁿá saduceos. Ní 'iiⁿyāⁿ s'eeⁿ ní diví yā 'áámá taaⁿ táámá taaⁿ. ⁸ Caati 'iiⁿyāⁿ saduceos ngaⁿá yā chi nguéé iniduuchi 'iiⁿyāⁿ ndii nguéé nduu ángel ra ndíí nguεε nduu espíritus. 'Iiⁿyāⁿ fariseos ngaⁿá yā ti véé 'tíicā. ⁹ Ní n'dee n'dái caⁿa yā 'iiⁿyāⁿ s'eeⁿ. Ní nacuéⁿ 'iiⁿyāⁿ chi déenú taavi ley lado yeⁿē fariseos ní caⁿa yā chi chuū chi cuaacu. Ní ngaⁿa yuudu yā: Nguéé de'ē vεε chi nguεε n'daacā inndaacá 'nū yeⁿe saⁿá miiⁿ. Ndúúti 'áámá espíritu o 'áámá ángel yaa'vi yā Pablo miiⁿ nguéé n'daacā chi 'cuuⁿmaⁿ yú ndúúcu Dendyuūs.

¹⁰ Taachi véé vaadī 'caa'va chi ch'εεte ca tuu'mi ní comandante 'va'á yā chí 'caaⁿnúⁿ yā Pablo. Ní comandante miiⁿ dicho'ó yā soldado s'eeⁿ chi cueⁿē sa ní cuta'a sa Pablo miiⁿ nguaaⁿ 'iiⁿyāⁿ s'eeⁿ ní candéε sa Pablo na vácūū. ¹¹ Táámá nguūnū miiⁿ ndaā Señor Jesús nanáaⁿ yā ní caⁿa yā: Pablo, nguéé cu'neeⁿ duuva di. Tan'dúúca chi ngaⁿa di nduudu cuaacu yeⁿe 'úú na yáāⁿ Jerusalén 'tiicā ntúūⁿ caaⁿmaⁿ di yeⁿē 'úú na yáāⁿ Roma.

'Iiⁿyāⁿ s'eeⁿ dííⁿ yā compromiso chí 'caaⁿnúⁿ yā Pablo

¹² Chidεεve táámá nguuvi, náⁿá 'iiⁿyāⁿ Israel s'eeⁿ nduuvidaamá yā ni dííⁿ yā compromiso chí nguéé che'e yā ndíí nguéé cu'ú yā neⁿe chí 'āā cuéé 'caaⁿnúⁿ yā Pablo miiⁿ. ¹³ Ngo'o 'úúvi ngeεcu 'iiⁿyāⁿ chí nduuvidaamá yā yeⁿe chúū. ¹⁴ 'Iiⁿyāⁿ s'uúⁿ ní cheⁿé yā nanááⁿ chiiduú n'geεté yeⁿe Israel ndúúcu 'iiⁿyāⁿ ndiicūú ní caⁿa yā: Nús'uu ní nduuvidáámá 'nū ní dííⁿ 'nū compromiso chí dííⁿ 'nū sufrir ní nguéé du'ū vεε 'nuú 'nū che'é 'nū taanduvéé ndíí 'caaⁿnúⁿ 'nū Pablo. ¹⁵ Maaⁿ ní ndís'tiī ndúúcu 'iiⁿyāⁿ yeⁿe concilio, cavyaaⁿ cáácá yā nanááⁿ comandante chí candéε yā Pablo ní chicuú yā nanááⁿ nús'uu. Dííⁿ nī tan'dúúca chí neⁿe di tiinguuneeⁿ di cosa chí cuaacu yeⁿé yā. Niicu nús'uu, 'aa snée ngiínú 'nū chí 'caaⁿnúⁿ 'nū saⁿá taachí ndaa sa.

¹⁶ Tuu'mi ní 'áámá saⁿá daiya táⁿá vi'í Pablo, taachí ch'iindiveén sá chí caⁿa yā de'ε chí dííⁿ yā, cheⁿe sa ní chí ndaa sa cheeti vácūū miiⁿ ní caⁿa sa chí sa Pablo miiⁿ. ¹⁷ Pablo miiⁿ 'cai sa capitán ní caⁿa sa: Candéε di saⁿá 'dííⁿ 'cūū nanááⁿ comandante ti canéé chí cuuvi sa 'iiⁿyāⁿ de'ē chí deenu sa.

¹⁸ Saⁿá miiⁿ sta'a sa saⁿá 'dííⁿ ní candéε sa saⁿá nanááⁿ comandante ní caⁿa sa: Pablo chí canúúⁿ vácūū di'cuíftu sá 'úú chí candéé saⁿá 'dííⁿ 'cūū nanáaⁿ nī. Véé chí déenú sá chí caaⁿmaⁿ sa ndúúcu nī.

¹⁹ Comandante miiⁿ ní sta'á yā ta'ā sa ní cueⁿé yā taama lado ndúúcu sa ní ntiinguuneeⁿ yā saⁿá: ¿De'ē chí cuuvi di 'úú?

²⁰ Ní caⁿa sa chí sá 'iiⁿyāⁿ: 'Iiⁿyāⁿ Israel s'eeⁿ ní chíí yā ní caacá yā nanáaⁿ nī chí cavyaaⁿ ní candéε nī Pablo nanááⁿ 'iiⁿyāⁿ yeⁿe concilio. 'Iiⁿyāⁿ s'eeⁿ nduuvidaamá yā ní itiinguuneeⁿ yā Pablo miiⁿ 'áámá chí cuaacu níínyúⁿ yeⁿē sa. ²¹ Naati n'diī, nguéé

cu'téenu nī. Ngo'o'ō 'uuvi ngεεcu sa'nā s'ee'n ye'n'e 'ii'n'yān Israel chi 'cuεetinúú n'de'ei yā 'diituú cyúúni. 'Ii'n'yān s'ee'n nduuvidaama yā chi diín yā compromiso ní cadíínuu'n yā chi nguée' n'daacā chi nguée' ndúú che'e yā ndíí nguée' ndúú cu'u ra yā taanduvéé ndii yā chi 'caa'n'nú'n yā Pablo. Maa'n ní listas canee yā ní canee ngíínú yā cáávā chi caa'n'mán n'dií.

²² Tuu'mi ní comandante dichó'o sa sa'n'a 'díí'n chi nguée' caa'n'ma'n sa cuuvi sa mar 'áámá 'ii'n'yān chi ca'n'a sa chii sa 'ii'n'yān ye'n'ē chūū.

Dicho'ó yā Pablo nanáán Félix sa'n'a gobernador

²³ Comandante mii'n 'cai yā na 'uuvi capitán. Ní ca'n'á yā chiī yā sa'n'a soldados chi nduuvidaamá sá taandu n'gεεcu nuún yaaa'n na 'uuvi ciento soldado s'ee'n ndúúcu 'ii'n'nū'n ngεεcu ndiichí soldados chi sndúu'n sa 'yúúdūu ndúúcu 'uuvī ciento soldado chi véé lanza ye'n'ē yā. Ní cho'ó nducyaaca yā yāā'n Cesarea. ²⁴ Ní cundiyaán nī 'iiti ti cunduū Pablo ní candéε nī sa'n'a ndúúcu cuidado nanáán Félix chi gobernador. ²⁵ Ní dingúu'n sa 'áámá carta ndúúcu nduudú 'cūū:

²⁶ 'Úú Claudio Lisias idinguún ye'n'ē nī Félix sa'n'a gobernador chi n'dai taavi: N'dái nī. ²⁷ Sa'n'a 'cūū ní sta'a 'nū sa'n'a caava 'ii'n'yān Israel s'ee'n chí ne'n'e 'caa'n'nu'n yā sa'n'a. 'Úú ninguá'n'ái sa'n'a mii'n ndúúcu soldado s'ee'n tí deenú chí sa'n'a romano sa'n'a mii'n. ²⁸ Ní ne'n'ē deenú de'ē cáávā tun'dáa yā nuu'ndi ye'n'ē sa. Candéε sa'n'a nanáán 'ii'n'tyén'ē ye'n'ē concilio ye'n'ē yā. ²⁹ Ní táácā chí tun'dáa nuu'ndí yā ye'n'ē sa caavā ley ye'n'ē yā naati mar 'áámá nuu'ndi ch'εεte ye'n'ē sa chi 'caa'n'nú'n yā sa'n'a o cunúú'n sa vácūū. ³⁰ Taachí 'úú chicadiinúú'n chi nduuvidaamá yā contra ye'n'ē sa'n'á 'cūū, hora mii'n dicho'ó sa'n'a nanáán n'dií. Ní nga'n'á ngíí sa'n'a chi tun'dáa nuu'ndi ye'n'ē sa chi chiī yā nanáán nī. Ní cuuví yā n'dií de'ē chi canée yā ndúúcu sa. N'dáácā canée nī.

³¹ Soldado s'ee'n sta'á yā Pablo tan'dúúca chi ca'n'a yā chiī yā sa'n'a ní nguiinū mii'n candéε yā sa'n'a ná yāā'n Antípatris. ³² Chidεεve táámá nguuvi ní soldado chi sndúū 'yuúdūu cue'n'ē yā ndúúcu Pablo ní ná'n'a yā nguεεcunée yā na va'aī ch'εεte naachi canée vácūū. ³³ Taachí ndaá yā 'ii'n'yān s'ee'n na yāā'n Cesarea, ca'á yā carta gobernador Félix ní diín yā presentar ntúu'n Pablo nanáán gobernador. ³⁴ Gobernador mii'n ch'ee'n yā carta ní tiinguunée'n yā: ¿Tíí yá'n'āa sa'n'a? Ní tumicadíínuu'n yā chi sa'n'a ní ye'n'e yá'n'āa Cilicia. ³⁵ Ní ca'n'a yā chii yā Pablo: Cu'nee'n veén ye'n'ē di taachi ndaa sa chi tun'dáa nuu'ndi ye'n'ē di. Ní dicho'ó yā 'áámá sa'n'a soldado chi diín cuidado sa'n'a na vácūū Herodes naachi diín juzgar 'ii'n'yān.

24

Pablo ca'n'a sa ye'n'ē maa'n sa nanáán Félix

¹ Cho'o'ō nyu'n'u nguuvi ní ca'aí chiiduú ch'εεte ca ye'n'e Israel chi nguuvi Ananías ndúúcu ná'n'ā 'ii'n'yān ndiicúú ndúúcu 'áámá sa'n'a chi nguuvi sa Tértulo. Sa'n'a mii'n neené n'dεεvé indee sa. 'Ii'n'yān s'ee'n chiī yā nanáán gobernador ní caa'n'mán yā contra ye'n'e Pablo mii'n. ² Taachí gobernador Félix 'cai yā Pablo mii'n tuu'mi ní sa'n'a chi nguuvi Tértulo ca'n'a sa nuu'ndí ye'n'ē Pablo mii'n ní ca'n'a sa: Déenu 'nū ti cááva nī, n'dií Félix, véé vaadī yeenú 'nū ní 'āā nin'guεetinée 'nū ndúúcu vaadī 'diíín ch'εεte. Néené n'dee n'dái déndu'ū chi n'dai na yāā'n vaacú 'nū cáávā vaanicadiinúu'n n'dái ye'n'ē nī. ³ N'dií, Félix chi n'dai taavi n'dií, nús'uū ní ch'iindiveén 'nū nduudu ye'n'ē nī nducué'n'ē tiempo nducué'n'ē cuaa'n ní ca'n'á 'nū Ndyuūs nadí've n'dií cáávā chi diín nī. ⁴ Chi 'āā ntéé tee 'nū vaadī 'caa'va n'dií 'naa'n tiempo ngiicá nanáán n'dií chi n'dai chi 'caandivee'n nī ye'n'e 'nū ndúúcu vaadī n'dai ye'n'ē nī. ⁵ Sá'n'a 'cūū néené itee sa vaadī 'caā'vā nús'uū yāā'n vaacú 'nū. Níícú ididán'a sa 'ii'n'yān nguaa'n nducyáácá 'ii'n'yān Israel s'ee'n chi snée yā núú'mán i'n'yee'ndi. Ní sa'n'a mii'n nga'n'ā ntiinnyu'n sa ye'n'ē 'ii'n'yān chi nazarenos chi i'téenu yā Jesús. ⁶ Ní ne'n'e ntúu'n sa divaatí sa yaācū templo. Sta'á 'nū sa'n'a ní ne'n'ē 'nū cadíínuu'n 'nū ye'n'ē sa tan'dúúca ley ye'n'ē 'nū. ⁷ Comandante ye'n'ē 'áámá taa'n soldado chi nguuvi Lisias ndaa sa naachi snée 'nū ni sta'a sa Pablo ndúúcu vaadi diituú ye'n'ē sa ni divíí sa Pablo na ta'á 'nū. ⁸ Dicho'ó yā sa'n'a s'ee'n chi tun'dáa nuu'ndi ye'n'e Pablo chi ndaa sá nanáán n'dií.

Maaⁿ ní taachi diiⁿ nī juzgar cadíínuuⁿ nī yeⁿ'é nducuéⁿ'ē dendu'ū de'ē cáávā chi tun'dáá 'nū nuūⁿndī yeⁿ'ē sa.

⁹ 'Iiⁿ'yāⁿ Israel s'eeⁿ ngaⁿ'á yā chi 'tíicā chi caⁿ'a Tértulo miiⁿ. ¹⁰ Tuu'mi ní ca'a gobernador señal Pablo chi caaⁿ'maⁿ sa. Pablo miiⁿ n'guεεcútaⁿ'ā sa: 'Úú deenú ti 'āā nééné 'āā 'naaⁿ canee nī juez yeⁿ'ē nación 'cūū. 'Úú ngaⁿ'á yeⁿ'ē maáⁿ ndúúcu confianza. ¹¹ Ti ní deenu nī maaⁿ taandúū ndichúúví nguuví chí chéé na yāāⁿ Jerusalén chi cuuvi cu'teenú Dendyuūs. ¹² Nguéé ndaāca yā 'úú chi nguⁿ'ú ndúúcu mar 'áámá 'iiⁿ'yāⁿ, ní nguéé dííⁿ chi n'dee n'dái 'iiⁿ'yāⁿ nguεε snéé 'dííⁿ yā, ní nguéé ndúú ná yāacū templo miiⁿ, ní nguéé ndúú ná yāacū sinagoga, ní nguéé na yāāⁿ 'cūū. ¹³ Ní nguéé cuuví caaⁿ'máⁿ yā chi chuū idiíⁿ. ¹⁴ Chuū ngaⁿ'á ngíi n'dií. Tan'dúúca chi 'iiⁿ'yāⁿ s'eeⁿ ngaⁿ'á yā chi nguéé cuaacu, 'tíicā 'úú i'teenú Ndyuūs yeⁿ'ē chiidá 'nū s'ééⁿ. Ní 'úú i'teenú tanducuéⁿ'ē dendu'ū chi cánéé nguūⁿ na ley ndúúcu nduudu yeⁿ'ē profetas chi caⁿ'a nduudu yeⁿ'e Ndyuūs. ¹⁵ Véé chí cánéé ngiínú 'áámá cosa yeⁿ'é Dendyuūs tan'dúúca 'iiⁿ'yāⁿ s'eeⁿ canee ngiínu ntúúⁿ yā, chí Dendyuūs nduuchí yā 'iiⁿ'yāⁿ yeⁿ'e nguaaⁿ tinaⁿ'ā, tan'dúúca 'iiⁿ'yāⁿ chí n'dai taaví ndúúcu 'iiⁿ'yāⁿ chí nguεε n'dai taavi. ¹⁶ Cáávā chuū cueⁿ'e daāⁿmaⁿ deenú chí nguéé véé nuuⁿndi na staava yeⁿ'é nanááⁿ Dendyuūs ndíí nguéé ndúú nanááⁿ 'iiⁿ'yāⁿ.

¹⁷ Cho'ó 'áámá na 'uuvi nduūyū ndaá ní nga'á limosnas 'iiⁿ'yāⁿ vaacú ní nga'á ofrenda. ¹⁸ Cuneé na yāacū templo taachi náⁿ'ā 'iiⁿ'yāⁿ Israel s'eeⁿ yeⁿ'e yáⁿ'āā Asia ndáácá yā 'úú ná yāacū templo ndúúcu compromiso chí nadidεεvé tan'dúúca costumbre yeⁿ'ē religión yeⁿ'é. Nguéé dííⁿ ndúúcu n'dee n'dái 'iiⁿ'yāⁿ ní nguéé n'deē n'dái 'caí 'iiⁿ'yāⁿ s'eeⁿ. ¹⁹ 'Iiⁿ'yāⁿ s'eeⁿ cánéé chí cuuvi yā n'dií ní caaⁿ'maⁿ yā nuuⁿndi yeⁿ'é, ndúúti véé de'ē chí canéé yā nduucú. ²⁰ Ní canéé cúúⁿmíⁿ yā chí caaⁿ'máⁿ maáⁿ yā ndúúti chí nndaacá yā chí nguéé n'daacā chí dííⁿ taachí canéé ndúúcu saⁿ'ā 'iiⁿ'ntyéⁿ'ē concilio s'eeⁿ. ²¹ Ndúúti chí chuū chí 'caí yiicú, caⁿ'á yeⁿ'ē chí nduuchí yā yeⁿ'ē nguaaⁿ tináⁿ'ā taachí canee nanaáⁿ 'iiⁿ'yāⁿ s'eeⁿ. Cáávā chuū maaⁿnguuví dííⁿ yā juzgar 'úú.

²² Tuu'mi ní Félix ch'iindiveéⁿ yā chuū. Déenú cuaacú yā yeⁿ'ē Yúúni cuaacu yeⁿ'e Ndyuūs ní s'nééⁿ ca yā chí caāⁿ'māⁿ sa ní caⁿ'a yā: Taachí ndaa Lisias miiⁿ chí comandante 'cuiinu tuumicádiinuúⁿ yeⁿ'ē asunto yeⁿ'e di.

²³ Félix cho'ó yā chíi yā capitán chí diiⁿ sa s'neeⁿ sa Pablo preso ní ca'a sa duu'vi libertad yeⁿ'ē sa naati s'nééⁿ sa Pablo arrestado. Ní capitán miiⁿ cuuvi yā Pablo chí cuchíi 'iiⁿ'yāⁿ yeⁿ'ē sa nanááⁿ sa ndúúcu 'iiⁿ'yāⁿ chí dichí'vε yā yeⁿ'ē sa ní ca'á yā chí neⁿ'e sa.

²⁴ N'duuvi nguuví cuayiivi ndaā Félix ndúúcu n'daataá yeⁿ'é yā chí nguuví Drusila chí ndaataá yeⁿ'ē Israel. 'Caí sa Pablo ní ch'iindiveeⁿ sa yeⁿ'e vaadí i'teenú yeⁿ'ē Jesucristo. ²⁵ Taachí caⁿ'a Pablo yeⁿ'ē nduudu cuaacu yeⁿ'e chí dííⁿ yā chí nguéé n'daacā ní yeⁿ'ē juicio chí cuchíi, tuu'mi ní Félix miiⁿ dii'yā sá chíi ní caⁿ'a sa: Cunaⁿ'a di maaⁿ. Ní taachí véé cuaáⁿ tuu'mi ní 'cuaí díí.

²⁶ Félix canee ngíínú yā chuū chí Pablo miiⁿ ní ca'a sa tuūmí yeⁿ'é yā tuu'mi ní n'dεechi yā saⁿ'ā. Caavā chuū chí neene n'deé cuuvi 'caí yā ní ndaā sa ní ndee sa nduucú yā.

²⁷ Ch'iinu 'uūvī nduuyū miiⁿ ní nan'daā Félix miiⁿ yeⁿ'ē lado gobernador ní sndaā saⁿ'ā chí nguuví Porcio Festo. Naati Félix miiⁿ ní neⁿ'e sa cunée sa chí ch'εεte sa lado yeⁿ'e 'iiⁿ'yāⁿ Israel s'eeⁿ ní snuūⁿ ntuūⁿ sa Pablo vácū.

25

Pablo ngaⁿ'a sa chí caⁿ'ā sa nanááⁿ César

¹ Taachí ndaā saⁿ'ā Festo na yáⁿ'āā yeⁿ'é yā cho'ōo 'iiⁿ'nūⁿ nguuví ní cuchéé yā yeⁿ'ē yāāⁿ Cesarea ní ndaa yā na yāāⁿ Jerusalén. ² Ní 'iiⁿ'yāⁿ chiiduú ch'εεte ca yeⁿ'e chiiduú n'gεεté yeⁿ'e Israel ndúúcu 'iiⁿ'ntyéⁿ'ē yeⁿ'e 'iiⁿ'yāⁿ Israel s'eeⁿ cheⁿ'e yā nanááⁿ Festo miiⁿ ní ngaⁿ'á yā contra yeⁿ'e Pablo miiⁿ. Ní chiicá yā saⁿ'ā. ³ Ngaⁿ'á yā contra Pablo miiⁿ ní ngiica yā 'áámá favor chí nandée yā Pablo na yāāⁿ Jerusalén. Ti 'iiⁿ'yāⁿ s'eeⁿ ní canéé listo yā ní nadicadíínuuⁿ yā chí 'caaⁿ'núⁿ yā saⁿ'ā cuaaⁿ cyúúni. ⁴ Naati Festo mííⁿ nan'guεεcútaⁿ'ā sa chí Pablo miiⁿ canuuⁿ sa vácū na yāāⁿ Cesarea ní 'úú cáámá can'daá

yeⁿē yāāⁿ 'cūū. ⁵ Tuu'mi ní ngaⁿā sa: Ndís'tiī chi ngii diíⁿ nī, caⁿá nī nduucú na yāāⁿ miiⁿ ní nduutī chi véé nuūⁿndī yeⁿē saⁿá 'cūū tuu'mi caaⁿmáⁿ nī cheē nuuⁿndī yeⁿē sa.

⁶ Ní canéé chi Festo cuuví 'náaⁿ yā ndúúⁿcū 'iiⁿyāⁿ s'eeⁿ tan'dúúⁿcā nííⁿ nguuví ndííⁿchi nguuví. Ní ndaá yā na yāāⁿ Cesarea. Chidēve táámá nguuví ní Festo ch'iindí yā na silla yeⁿē juez ní caⁿá yā chi cinguai yā Pablo. ⁷ Sáⁿa 'cūū taachí ndaā sa, 'iiⁿyāⁿ Israel s'eeⁿ chi ndaá yā yeⁿē yāāⁿ Jerusalén 'iiⁿyāⁿ miiⁿ nanguēcundií yā Pablo miiⁿ ní caⁿa yā neené n'deē nuuⁿndī yeⁿē sa. Mar 'áámá 'iiⁿyāⁿ cuuvi ngaⁿa yā cheē chi cuaacu. ⁸ Tuu'mi ní Pablo miiⁿ ní caⁿa maāⁿ sa yeⁿē sa: Nguē nuūⁿndī yeⁿé mar 'áámá, ndii nguéé ndúú yeⁿē ley yeⁿe 'iiⁿyāⁿ Israel s'eeⁿ ndii nguéé ndúú yeⁿē costumbre yeⁿē yaācū templo ndíí nguéé ndúú yeⁿē rey César.

⁹ Naati Festo miiⁿ neⁿe sa caⁿa sa favor yeⁿē 'iiⁿyāⁿ Israel s'eeⁿ. Ni nan'guēcútaⁿā sa yeⁿē Pablo, ní caⁿā sa: ¿'Áá neⁿe di caⁿā di na yāāⁿ Jerusalén ní mííⁿ 'cuundicaadi yeⁿē di de'ε ndu'ū miiⁿ nanááⁿ 'úú nííⁿcū cádiinuⁿ de'ε falta yeⁿē di?

¹⁰ Pablo miiⁿ ní caⁿa sa: Nanááⁿ saⁿā ntyeⁿē canéé na juzgado yeⁿe César naachi canéé, chi 'cuūndicaadi yeⁿé. 'Iiⁿyāⁿ Israel s'eeⁿ nguéé de'ε veē ndííⁿ ndúúⁿcū yā, tan'dúúⁿcā chi n'dai deenú nī. ¹¹ Caati nduutí chi de'ε chi 'áámá ch'ētē ndííⁿ o n'niíⁿnúⁿ tinaⁿā, nguéé 'va'á chí 'cuūví. Ndúúⁿti chi nguéé de'ε veē ndííⁿ yeⁿē chí ngiica 'iiⁿyāⁿ s'tíí, mar 'áámá 'iiⁿyāⁿ nguéé cuuvi ca'a yā 'úú saⁿa s'tií. 'Úú neⁿé caⁿá caaⁿmáⁿ nanááⁿ César.

¹² Tuu'mi ní Festo miiⁿ taachí caⁿa sá chii sa saⁿā ntyeⁿe yeⁿē concilio, ní n'guēcútaⁿā sa: Ngaⁿa ntúuⁿ di chí naⁿa di nanááⁿ César miiⁿ tuu'mi ní naⁿa di.

Pablo nanááⁿ Agripa ndúúⁿcū Berenice

¹³ Cho'ōo 'áámá nduu 'úúví nguuví ní rey Agripa ndúúⁿcū táⁿā Berenice ndaá yā yāāⁿ Cesarea chi diíⁿ yā saludar Festo. ¹⁴ 'Naaⁿ 'tεε ch'etinée yā ndúúⁿcū Festo miiⁿ ní Festo miiⁿ caⁿa cuáacú sá rey yeⁿē nuuⁿndī yeⁿē Pablo ní ngaⁿā sa: 'Áámá saⁿā canúúⁿ sa vácūū caavā Félix miiⁿ. ¹⁵ Chuū chi yeⁿē saⁿā miiⁿ. Taachí cheⁿé na yāāⁿ Jerusalén tuu'mi ní chiiduú n'gēté yeⁿe Israel ndúúⁿcū 'iiⁿyāⁿ ndiicúū yeⁿē 'iiⁿyāⁿ Israel s'eeⁿ ndaá yā nanaáⁿ ní chiica yā chi 'úú diíⁿ condenar saⁿā. ¹⁶ Nan'guēcútaⁿá yeⁿē 'iiⁿyāⁿ s'eeⁿ. Nguéé costumbre yeⁿe 'iiⁿyāⁿ romano s'eeⁿ chi 'caaⁿnúⁿ yā 'áámá 'iiⁿyāⁿ neⁿe chí 'āā cuéé 'cuūndicaadi yeⁿé yā ní caaⁿmáⁿ yā yeⁿē maāⁿ yā nanááⁿ 'iiⁿyāⁿ chí ngiica nuuⁿndī yeⁿé yā. ¹⁷ Nguéé chí 'naáⁿ. Nduuvidaamá yā 'muuⁿ. Chidēve táámá nguuví 'úú ch'iindí na silla yeⁿē juez ní ca'á orden, ní dicho'ó chí canguaī saⁿā miiⁿ. ¹⁸ 'Āā snée saⁿā chí ngiica nuuⁿndī yeⁿē sa. Nguéé caⁿa yā mar 'áámá nuuⁿndī tan'dúúⁿcā chí 'úú nacádiinuúⁿ. ¹⁹ Ti véé vaadī 'caa'va yeⁿé yā ndúúⁿcū sa lado yeⁿē religión yeⁿe 'áámá Jesús chí 'āā n'dii yā. Ní Pablo miiⁿ ngaⁿa cuaacu sa chí nguéé n'díí yā. ²⁰ 'Úú nguéé deenú de'ε ra idiíⁿ yeⁿé chuū ní tiinguūneéⁿ saⁿā miiⁿ: ¿'Áá neⁿe di chí caⁿa di na yāāⁿ Jerusalén ní miiⁿ 'cuundicaadi yā nuūⁿndī yeⁿē di? ²¹ Naati Pablo miiⁿ chiica sa chí 'cuētinée ngííⁿ sa saⁿā Augusto ní saⁿā miiⁿ ní cadíinuⁿ sa nuuⁿndī yeⁿē sa. 'Úú ní chiicá chí cu'núuⁿ yā saⁿā vácūū neⁿe chí caⁿá dicho'ó saⁿā nanááⁿ César Augusto.

²² Tuu'mi ní Agripa ngaⁿā sa ngii sa Festo: 'Úú ní neⁿé 'caandiveéⁿ yeⁿē sa. Saⁿā miiⁿ ngaⁿa sa ngii sa saⁿā: Cavyaaⁿ ní 'caandiveeⁿ di.

²³ Chidēve táámá nguuví Agripa ndúúⁿcū táⁿā Berenice ndaá yā tan'dúúⁿcā costumbre yeⁿē rey. Ní sndaā yā naachi snée 'iiⁿyāⁿ ndúúⁿcū comandante ndúúⁿcū saⁿā n'gētε yeⁿe yāāⁿ miiⁿ. Ní Festo miiⁿ caⁿa yā chí dicho'ó yā Pablo miiⁿ, ní caⁿá yā nguaí yā saⁿā. ²⁴ Tuu'mi ní Festo miiⁿ ní caⁿā sa: N'dií rey Agripa ndúúⁿcū nducyáácá ndis'tií 'iiⁿyāⁿ chí snée nī nduucú 'nū. 'Muuⁿ canéé sáⁿa 'cūū. Nducyáácá 'iiⁿyāⁿ Israel s'eeⁿ yeⁿē yāāⁿ Jerusalén ní yeⁿē yāāⁿ 'cūū ngiicá yā nuūⁿndī yeⁿē sáⁿa 'cūū. N'gai yuudú yā chí 'cuūví sa. Ní 'āā ntéé cunéé sá. ²⁵ Nguéé ndaacá mar 'áámá falta yeⁿē sa chí 'cuūví sa. Maaⁿ sa ngiica sa chí caⁿā sa nanááⁿ yeⁿē sáⁿā Augusto César. Ní 'úú dicho'ó saⁿā. ²⁶ 'Úú nguéé de'ε veē chí deenú chí dinguúⁿ yeⁿē Augusto César yeⁿé saⁿā miiⁿ. Candéé saⁿā nanááⁿ ndis'tií ní vmnááⁿ vmnaaⁿ nanaáⁿ n'dií saⁿā rey Agripa ti taachí 'cuiinu tascaadi yeⁿē

sa, canee chi dinguún. ²⁷ Caati deenú chi nguée n'daacā chi 'úú dicho'ó sa'nā ndí nguée cadiinuún nuū'ndí ye'n'e sa chi dii'n nguún tandii ra.

26

*Pablo ca*ⁿa sa ye'n'e maaⁿ sa nanááⁿ rey Agripa

¹ Tuu'mi ní rey Agripa ngaⁿa sa ngii sa Pablo: Teé lugar chi caaⁿ'maⁿ di ye'n'e maaⁿ di. Tuu'mi ní Pablo miiⁿ ndo'ō sa ta'a sa. Tucá'a sa caⁿ'a sa ye'n'é maāⁿ sa: ² N'diī rey Agripa, de'ē chúucā n'daacā chi cuuví caaⁿ'máⁿ ye'n'é maāⁿ nanáaⁿ nī ye'n'e tanducuéⁿ'e nuuⁿ'ndi chi ngaⁿ'a 'iiⁿ'yāⁿ Israel s'eeⁿ. ³ N'diī ní deenú nī tanducuéⁿ'e costumbre ndúucū chi itiinguuneeⁿ ye'n'e chi véé nguaaⁿ 'iiⁿ'yāⁿ Israel s'eeⁿ. Ní ngiicá n'diī chi 'caandiveéⁿ nī ye'n'é ndúucū n'dai.

*Vida ye*ⁿ'ē Pablo

⁴ Ndiī cuááⁿ vmnaaⁿ ndii sa'nā 'líiⁿ 'úú canéé na yáāⁿ Jerusalén ndúucū 'iiⁿ'yāⁿ Israel. N'diichi 'iiⁿ'yāⁿ Israel s'eeⁿ 'úú. ⁵ 'Iiⁿ'yāⁿ s'eeⁿ ntúūⁿ déenu yā ye'n'é ndíi cuaaⁿ vmnaaⁿ. Ní nduuti chi neⁿ'e yā caaⁿ'maⁿ cuaacú yā, canee tan'dúucā sa'nā fariseo chi chεεchi taavi ye'n'e religión ye'n'é 'nū ndúucū costumbre ye'n'é 'nū. ⁶ Maaⁿ ní caavā chi 'úú i'teenú chi Dendyuūs caⁿ'á yā nadacuéeⁿ yā 'iiⁿ'yāⁿ ye'n'e nguaaⁿ tináⁿ'ā tan'dúucā chi ngaⁿ'a yā ngii yā chiida 'nū 'iiⁿ'yāⁿ s'eeⁿ n'gai yā 'úú nanááⁿ juez. ⁷ 'Iiⁿ'yāⁿ ye'n'e ndiichúví daiyá yā 'iiⁿ'yāⁿ Israel ye'n'é 'nū i'teenu yā chi Ndyuūs caⁿ'a yā chi diiⁿ yā. Ní cáávā chuū cueⁿ'e daāⁿmaⁿ idiíⁿ yā ntiiⁿnyuⁿ ye'n'é Dendyuūs ndii nguuvi ndii n'gaaⁿ. N'diī rey Agripa, caati cáávā chuū chi cunee ngíiⁿntuúⁿ 'iiⁿ'yāⁿ Israel ngiicá yā ye'n'é. ⁸ ¿De'ē nacadiinúúⁿ nī ye'n'e chúú? ¿De'ē cuuvi chí ndís'tiī nadacadiinúúⁿ nī chi Dendyuūs nguée cuuvi nadin'duuchí yā 'iiⁿ'yāⁿ ye'n'e nguaaⁿ tináⁿ'ā?

*Pablo ditaá*ⁿ yā ndúucū 'iiⁿ'yāⁿ

⁹ 'Úú ní cuaacu níⁿ'nyúⁿ s'teēnú chi cánéé chi n'deē n'dái diiⁿ contra ye'n'e Jesús ye'n'e yáāⁿ Nazaret. ¹⁰ 'Tiicá ntúūⁿ díiⁿ na yáāⁿ Jerusalén. 'Úú ch'íi 'iiⁿ'yāⁿ chi i'téenu Jesús vácūū. Chiiduú n'gεεté ye'n'e Israel tee yā poder 'úú. Ní taachí ch'iiⁿ'núⁿ yā 'iiⁿ'yāⁿ, 'úú caⁿ'á ti 'tíicā. ¹¹ Néené n'dee cuūvi ch'íi 'iiⁿ'yāⁿ s'eeⁿ chi i'teenu na nducyáácá yaacū sinagoga na vácūū. Díiⁿ chi 'iiⁿ'yāⁿ cuuví caaⁿ'maⁿ yā chi nguée i'téenu yā Jesús. Neené taaⁿ díiⁿ ndúucū 'iiⁿ'yāⁿ s'eeⁿ chí i'téenu yā Jesús. Ní can'daá 'iiⁿ'yāⁿ ndíi na yáāⁿ chi nguée n'diichi.

*Pablo ca*ⁿ'a yā taacā chi i'téenu yā

(Hch. 9.1-19; 22.6-16)

¹² Taachí díiⁿ chuū cueⁿ'e na yáāⁿ Damasco ní candéé caaca ndúucū orden ye'n'e chiiduú n'gεεté ye'n'e Israel. ¹³ N'diī rey, taachi canuúⁿ yúúni taanduu ná maⁿ'a nguuvi n'diichi 'áámá deēve nanguuvi chi ch'εεte n'dái cá deēve nguée tii déēve ye'n'e 'yáⁿ'ā. Deēvé miiⁿ ní nuuⁿ'maⁿ ndiivii 'úú ndíi 'iiⁿ'yāⁿ chi sneé yā nduucú. ¹⁴ Chindeēve nducyaaca nús'ūu na yáⁿ'āa. 'Úú ch'iindiveéⁿ 'áámá nduudu chi yaāⁿ vī 'úú ndúucu davaacu hebreo chi ngaⁿ'ā: Saulo, Saulo, ¿de'ē cáávā n'daā di 'úú? Chééchi taavi chí diiⁿ di tan'dúucā 'áámá 'iiti ca'a ca'a tī na yáⁿ'á cuiiⁿnyuⁿ. ¹⁵ 'Úú ní caⁿ'á: ¿Du'ú n'diī, Señor? Ní Señor miiⁿ ní caⁿ'a yā: 'Úú Jesús chi n'daā di. ¹⁶ Naati nacuééⁿ di, ní cueendi di. Cáávā chuū che'enaáⁿ ye'n'e di. Ní cu'neéⁿ dii lado ye'n'e 'iiⁿ'yāⁿ ndíi tiiⁿ chi diiⁿ ntiiⁿnyuⁿ ye'n'é ní caaⁿ'maⁿ di nduudu cuaacu ye'n'e dendú'ū chi n'díichi di ye'n'e dendú'ū chi 'úú díiⁿ chi 'cuuⁿ'míⁿ náāⁿ ye'n'e di. ¹⁷ Maaⁿ ní 'úú ní dicho'ó dii nanááⁿ 'iiⁿ'yāⁿ ye'n'e di ndúucū ye'n'e 'iiⁿ'yāⁿ s'eeⁿ chí nguée ye'n'e ndaata Israel. Ní taachi neⁿ'é yā sta'a yā dii ní 'úú nneé dii. ¹⁸ Ní cuuví diiⁿ di chi 'iiⁿ'yāⁿ chi nguεε snaaⁿ yā ní snaaⁿ yā ní tun'dáa di 'iiⁿ'yāⁿ s'eeⁿ ná maāⁿ ní naⁿ'á yā na deēve. Ní tun'dáa di 'iiⁿ'yāⁿ ye'n'e poder ye'n'e yááⁿ'nguiinūuⁿ ní naⁿ'á yā lado ye'n'e Dendyuūs. Ní ndaācá yā 'úú ní 'úú inadach'εεcú nuuⁿ'ndi ye'n'é yā ní caavā chi cu'téenu yā ye'n'é. Ní véé herencia ye'n'é yā ndúucū 'iiⁿ'yāⁿ chi Dendyuūs dindeēve yā.

*Pablo dii*ⁿ yā tan'dúucā visión

¹⁹ Cáávā chuū, n'diī rey Agripa, nguéeé dííⁿ chi cheeⁿdiitú dííⁿ n'diichí cosa yeⁿē Dendyuūs. ²⁰ Naati caⁿ'á vmaāⁿ vmaāⁿ 'iiⁿ'yāⁿ chi snée na yāāⁿ Damasco, ní cuayiivi caⁿ'á na yāāⁿ Jerusalén ndúú^cū nuuⁿmaⁿ na yāⁿ'āa yeⁿe Judea ndúú^cū 'iiⁿ'yāⁿ s'eeⁿ chi nguéeé yeⁿē ndaata Israel chi canee cuuⁿmíⁿ yā chi ndaacadaamí yā yeⁿē nuuⁿndi yeⁿ'é yā níícu cu'téenu yā Dendyuūs. Ní dííⁿ yā ntiiⁿnyuⁿ chí n'daacā n'dai ní ch'iⁿ'í yā tanáⁿ'ā 'iiⁿ'yāⁿ chi ndaacadaamí yā yeⁿē nuuⁿndi yeⁿ'e yā. ²¹ Cáávā chuū 'iiⁿ'yāⁿ Israel s'eeⁿ sta'á yā 'úú na yáacū templo ní nadacadiínuuⁿ yā chi 'caaⁿ'nuⁿ yā 'úú. ²² Ndyuūs chinnee yā 'úú chi cheé ndíí maaⁿ ní caⁿ'á nduudu cuaacu ndúú^cū 'iiⁿ'yāⁿ ndiicūⁿ ní 'iiⁿ'yāⁿ chi ngaⁿ'a ntiiⁿnyúⁿ yā. Nguéeé n'deēe cá caⁿ'á yeⁿ'e dendu'ū chi caⁿ'a profetas ndúú^cū Moisés yeⁿ'é dendu'ū chi canée chí chiī. ²³ Caati Cristo miiⁿ cánée chí 'cueenu yā cuuvi ní 'iiⁿ'yāⁿ miiⁿ vmaāⁿ vmaāⁿ nnduuchí yā yeⁿ'e nguaaⁿ tináⁿ'ā. Ní ngaⁿ'a cuaacú yā yeⁿē deēve nanááⁿ 'iiⁿ'yāⁿ Israel yeⁿ'é ndúú^cū 'iiⁿ'yāⁿ s'eeⁿ chi nguéeé yeⁿē ndaata Israel.

Pablo ngaⁿ'a sa Agripa chi canée chí cu'téenu yā

²⁴ Caⁿ'a Pablo chúú cáávā maāⁿ sa. Festo gobernador miiⁿ ní caⁿ'a yuudu sa: Loco dii, Pablo. Cáávā chí n'geēⁿ taaví dí chííⁿ chí nduuví loco dí.

²⁵ Naati saⁿ'ā miiⁿ ní caⁿ'ā sa: Nguéeé loco 'úú, n'diī Festo, chí n'dai taavi. Ngaⁿ'á nduudu cuaacu chí n'dai. ²⁶ Rey Agripa miiⁿ deenú ntúuⁿ yā chuū. 'Úú ngaⁿ'á nduucú yā yeⁿē tanducuéⁿ'ē ndúú^cū confianza. 'Úú nadacadiinúⁿ chí déenu yā chuū. Nguēe chó'ōo chuū ná n'de'ei. ²⁷ N'diī rey Agripa, ¿'áá i'téenu ní 'iiⁿ'yāⁿ profetas chí caⁿ'a nduudu yeⁿ'e Dendyuūs? 'Úú deenú chí i'téenu ní.

²⁸ Tuu'mi ní Agripa miiⁿ caⁿ'a sa chí sa Pablo: 'Tēe 'tēe nūuⁿ diiⁿ di chí cu'teenú ndaacá Dendyuūs.

²⁹ Pablo miiⁿ ní caⁿ'ā sa: 'Úú ngiicá Dendyuūs ndii ta'lííⁿ o ndii ch'ēte, nguéeé dámaāⁿ n'diī tí 'tiicá ntúuⁿ nducyaaca 'iiⁿ'yāⁿ chí n'giindiveéⁿ yā yeⁿ'é, cuuví cu'téenu ntuuⁿ yā Ndyuūs miiⁿ tan'dúú^cā 'úú, naati nguéeé cuneé yā ndúú^cū cadenas 'cū.

³⁰ Taachí caⁿ'a sa chuū ncueeⁿ rey ndúú^cū gobernador ndúú^cū Berenice ndúú^cū 'iiⁿ'yāⁿ chí canee yā ndúú^cū 'iiⁿ'yāⁿ s'eeⁿ. ³¹ Taachí 'iiⁿ'yāⁿ s'uuⁿ cueⁿ'é yā 'áámá lado caⁿ'á yā nguaaⁿ maāⁿ yā: Mar 'áámá nuuⁿndi ch'ēte nguéeé véé yeⁿ'ē sa 'cūu nguēe chí 'caaⁿ'nuⁿ yú saⁿ'ā, ndíí nguéeé chí caⁿ'a sa vácū.

³² Níícu Agripa ngaⁿ'ā sa ngii sa Festo: Sá 'cūu cúuví nguáⁿ'ai sa nduuti chí nguéeé caⁿ'ā sa 'tíicā: 'Úú caⁿ'á nanááⁿ César.

27

Dicho'ó yā Pablo na yaāⁿ Roma

¹ Taachí Festo ca'á yā orden chí cueⁿ'é 'nū na barco na yāⁿ'āa Italia, dííⁿ yā entregar Pablo ndúú^cū tanáⁿ'ā 'iiⁿ'yāⁿ chí preso yā capitán chí nguuvi sa Julio. Capitán miiⁿ chí yeⁿ'ē 'áámá taaⁿ soldados chí nguuvi Augusto. ² Cueⁿ'ē ntúuⁿ 'nū na 'aama barco yeⁿ'e yāāⁿ Adramitio chí caama cáácá ní caⁿ'ā ná cheendi va'ai s'eeⁿ yeⁿ'ē nuūⁿnīⁿ'yáⁿ'ā na yāāⁿ s'eeⁿ yeⁿ'e yāⁿ'āa Asia. Sndaá 'nū na barco ní cueⁿ'é 'nū. Ní canee sa ndúú^cū nús'uu 'áámá saⁿ'ā chí nguuvi Aristarco yeⁿ'ē yāⁿ'āa Macedonia chí yeⁿ'ē yāāⁿ Tesalónica. ³ Táámá nguuvi ndaá 'nū cheendi va'ai yeⁿ'e nuūⁿnīⁿ'yáⁿ'ā níiⁿnuúⁿ na yāāⁿ Sidón. Julio miiⁿ dííⁿ yā ndúú^cū Pablo miiⁿ tan'dúú^cā amigo n'dai. 'Cuún yā chí cueⁿ'e sa naachi canee amigos yeⁿ'ē sa. Amigos ca'á yā chí neⁿ'ē Pablo miiⁿ. Ní Pablo miiⁿ ntaavi'tuunúúⁿ sa. ⁴ Ní cueⁿ'e ntúuⁿ 'nū na barco ní cho'ó 'nū cuaaⁿ ndiia lado sur yeⁿ'ē isla Chipre caati 'yúúné ní contra yeⁿ'ē barco miiⁿ. ⁵ Taachi cho'ōo cuaacú 'nū nuūⁿnīⁿ'yáⁿ'ā cueⁿ'é 'nū níiⁿnuúⁿ yāⁿ'āa Cilicia ndii yāⁿ'āa Panfilia. Ndaá 'nū na yāāⁿ Mira chí 'áámá yāāⁿ yeⁿ'ē yāⁿ'āa Licia.

⁶ Ní capitán chí ngaⁿ'a ntiiⁿnyúⁿ yā nndaaca yā 'áámá barco yeⁿ'ē yāāⁿ Alejandría chí naⁿ'ā yāⁿ'āa Italia. Cuchéé 'nū na barco miiⁿ ní cuinaⁿ'a 'nū. ⁷ Ní ngíínū ngiínū cueⁿ'é 'nū na barco chí 'nááⁿ taavi n'deēe nguuví. Ní cueⁿ'é 'nū ndúú^cū nééné n'deēe peligro na barco níiⁿnuúⁿ ná yaāⁿ Gnido ní 'āā ntéé 'cuūⁿ 'yúúné chí caⁿ'á 'nū cuááⁿ vmaāⁿ. Tuu'mi ní cueⁿ'é 'nū na nduu 'uuvi isla, isla Salmón chí canee níiⁿnuúⁿ ndúú^cū isla Creta

caati nguée 'yúúné taaⁿ miiⁿ. ⁸ Níicú a fuerza dííⁿ 'nū ndaá 'nū niiⁿnuúⁿ 'áámá yáāⁿ chi nguuvi Buenos Puertos ní niiⁿnuúⁿ yáāⁿ miiⁿ canée yáāⁿ Lasea.

⁹ Taachí cho'ōo 'naaⁿ tiempo cueⁿ'é 'nū na barco ndúúcu nééné n'deēe peligro. 'Āā cho'ōo nguuvi yeⁿ'ē 'viicu chi nguée che'é 'nū. Tuu'mi ní Pablo caⁿ'a yā chíi yā 'iiⁿ'yāⁿ s'uuⁿ. ¹⁰ Ní cāⁿ'a yā: Ndís'tiī saⁿ'ā, 'úú inaáⁿ chí 'āā nééné n'deēe peligro cueⁿ'ē ndúúcu yú chí cuuvi ndaa yú. Nguée dámaāⁿ carga yeⁿ'ē barco cuuvi ndái caati ndii s'uuúⁿ cuuvi ndai yú.

¹¹ Naati capitán miiⁿ ní n'giindiveéⁿ yā nduudu yeⁿ'ē saⁿ'ā chí ndeēe barco ndúúcu saⁿ'ā chí ngaⁿ'a ntiⁿ'nyuⁿ yeⁿ'ē barco miiⁿ ti 'āā chí caaⁿ'maⁿ 'nūū Pablo miiⁿ. ¹² N'deēe n'dái ináaⁿ yā chí 'āā ntée n'daacā chí canee barco na cheendi va'āi yeⁿ'e nuūⁿnīⁿ'yáⁿ'ā miiⁿ tiempo chí 'iiche. Ní n'deēe n'dái 'iiⁿ'yāⁿ nduuvidaamá yā chí caⁿ'a yā nuūⁿnīⁿ'yáⁿ'ā yeⁿ'ē miiⁿ. Ní neⁿ'é yā chí ndaá yā na yáāⁿ Fenice chí 'áámá cheendi va'āi yeⁿ'e nuūⁿnīⁿ'yáⁿ'ā yeⁿ'e isla Creta chí canee cuaaⁿ ndiia sur, cuaaⁿ naachi n'giiya 'yáⁿ'ā. Ní miiⁿ cánée tiempo chí 'iiche.

'Yúúné tááⁿ na nuūⁿnīⁿ'yáⁿ'ā

¹³ Ndaā 'yúúné ngínu yeⁿ'ē cuaaⁿ ndiia tan'dúúca chí nacadiinuuⁿ yā chí n'daāca. Candée yā anclas cūū chí 'caanu barco miiⁿ ní cueⁿ'é yā canée diituú nuūⁿnīⁿ'yáⁿ'ā niiⁿnuúⁿ isla Creta. ¹⁴ Nguée neé 'naaⁿ ndaā táámá 'yúúné taāⁿ taavi chí nguuvi Euroclidón tan'dúúca ciclón chí contra yeⁿ'ē barco miiⁿ. ¹⁵ Taachi 'yúúné míⁿ diiⁿ chí barco 'āā ntée cuuvi caⁿ'a barco miiⁿ contra yeⁿ'ē 'yúúné, tuu'mi s'neeⁿ maáⁿ 'nū candée 'yúúné barco miiⁿ naachi neⁿ'ē. Ní nús'uu cueⁿ'é 'nū 'tíicā. ¹⁶ Ndaá 'nū na 'áámá isla chí nguuvi Clauda naachi nguée véé 'yúúné taaⁿ. 'Āā nééné ngíⁿ'iī candée yā barco 'liiⁿ vmnaaⁿ barco ch'εete ní dichii chí yā barco 'líⁿ miiⁿ. ¹⁷ Taachi 'āā chí n'dái yā dichii chí yā barco 'líⁿ ndúúcu 'ii'yū cuaaⁿ náavtaⁿ'ā, tuu'mi ní 'va'á yā chí ndaa yā Sirte chí 'áámá cuaaⁿ cheeti nuūⁿnīⁿ'yáⁿ'ā naachi canée yáⁿ'āa dúúⁿ naachi 'āā ntée cuuvi caaca barco miiⁿ. Tuu'mi di'cua'á yā tíinūⁿ yeⁿ'e barco miiⁿ. Tuu'mi ní chí 'néⁿ yā barco miiⁿ chí cueⁿ'e maāⁿ ntúūⁿ. ¹⁸ Ní diiⁿ 'yúúné miiⁿ chí cueⁿ'ē barco ndúúcu peligro ti 'yúúné tááⁿ. Chidεεve táámá nguuvi tucá'a yā ndaavi yaí yā carga yeⁿ'ē barco na nuūⁿnīⁿ'yáⁿ'ā. ¹⁹ Ndiichí ndii 'ííⁿnúⁿ nguuvi miiⁿ ndúúcu ta'á yā chíi yā nducuéⁿ'ē dendú'ū chí ndeēe barco na nuūⁿnīⁿ'yáⁿ'ā. ²⁰ Nguuvi nguuvi s'eeⁿ 'āā ntée n'diichí 'nū 'yáⁿ'ā ndii nguεε ndúú 'ííⁿnyúⁿ cucááⁿ 'yúúné tááⁿ míⁿ chí nuuⁿ'maⁿ ndiiví 'nū. Tuu'mi 'āā ntée nacadiinúⁿ 'nū chí nanguáⁿ'ai 'nū.

²¹ 'Āā 'nááⁿ nguuvi chí nguée nge'é 'nū. Tuu'mi Pablo miiⁿ cheendii yā naavtaⁿ'ā yeⁿ'é nducyaaca 'nū ní caⁿ'a yā: Ndúúti chí ndís'tiī chí chí'téenu nī yeⁿ'é ní nguée cueⁿ'ē yú na barco yeⁿ'ē isla Creta chí cuta'a yú peligro miiⁿ ndúúcu dendu'ū chí dindēe yú. ²² Maaⁿ ní cuuví ndis'tiī. Canee cúúⁿmíⁿ nī más cā ánimo caati nguée mar 'áámá 'iiⁿ'yāⁿ chí dindaí yā vida yeⁿ'é yā nguaāⁿ yú, dámaāⁿ barco miiⁿ chí cuuvi ndái. ²³ Caati maaⁿ nguiinú 'cūū canée ángel yeⁿ'e Dendyuūs nduucu. 'Úú ní yeⁿ'e Dendyuūs 'úú ní 'úú dichii'vé 'iiⁿ'yāⁿ. ²⁴ Caⁿ'a ángel miiⁿ chíi yā 'úú: Pablo, nguée 'va'ā di. Canee chí cuéendii di nanááⁿ César. Nducyáácá 'iiⁿ'yāⁿ chí caⁿ'á yā na barco ndúúcu di cunduū chí 'iiⁿ'yāⁿ. ²⁵ N'diichí nī compañeros. Cuneé ngínú nī ánimo caati 'úú i'teenú Dendyuūs. Canée chí cuuvi tan'dúúca chí chíi yā 'úú. ²⁶ Canée chí ca'ā naaⁿ yú na 'áámá isla.

²⁷ Chií ndiichí cuūⁿ yaaⁿ níicú tan'dúúca chí cuchii 'nū na nuūⁿnīⁿ'yáⁿ'ā chí nguuvi Adriático, ní cúchii ná maⁿ'a yaaⁿ ní saⁿ'ā s'eeⁿ chí diiⁿ manejar barco chí tuumicádíinuuⁿ sa chí 'āā snée 'nū niiⁿnuúⁿ na yáⁿ'āa. ²⁸ Tuu'mi ní ca'a nuuⁿ sá sonda ní ndaaca sa ngii ndiicú 'ya'āa chí yáánūⁿ ní cho'ō ca ta'líⁿ cuaaⁿ vmnaaⁿ nnguεεcunée sa ca'a nuuⁿ ntúūⁿ sa sonda. Ndaaca ntuuⁿ sa ndíiⁿ'yu 'ya'āa chí yáánūⁿ. ²⁹ 'Va'á yā chí ca'a naáⁿ yā na 'vaachií. Tuu'mi ní ca'ā nuúⁿ ya ná cuūⁿ ancla cūū yeⁿ'ē cuaaⁿ dáámí, cosa chí cuendii barco miiⁿ ní 'āā ntée caaca. Ní snee ngínú yā chí cúví dεεve. ³⁰ Tuu'mi ní saⁿ'ā chí dííⁿ yā manejar barco ch'εeti yaaⁿ sá chí caanu sa yeⁿ'ē barco. Ní ca'a nuúⁿ yā barco 'líⁿ na nuūⁿnīⁿ'yáⁿ'ā. Dííⁿ yā tan'dúúca chí cangúu yā ancla cūū yeⁿ'e cuaaⁿ vmnaaⁿ barco miiⁿ.

³¹ Pablo miiⁿ caⁿ'a yā chii yā capitán: Ndúúti chi saⁿ'ā s'eeⁿ nguéé canee sa na barco miiⁿ ndís'tiī ní nguéé cuuvi nanguaⁿ'ai nī.

³² Tuu'mi ní soldados ch'iica sa lazo yeⁿ'ē barco 'lííⁿ. Diiⁿ sá chí cueⁿ'e maāⁿ ní chindai.

³³ Taachí caama chidēve Pablo caⁿ'a yā chii yā nducyáácá 'iiⁿ'yāⁿ chi che'é yā. Ní caⁿ'a yā: Maaⁿ ní ndiichi cuūúⁿ nguuvi chí 'āā ntéé ché'e nī ní 'cuētínée nī ndúúcu cuidado. Ní nguéé che'é nī mar 'áámá yuūdū. ³⁴ 'Úú ngiicá ndis'tiī chí ché'e nī maaⁿ níícú véé fuerza yeⁿ'é nī ti mar 'áámá yuūdū tííⁿ nī nguéé cuuvi ndai.

³⁵ Taachí caⁿ'a yā chuū, sta'á yā pan. Ca'á yā gracia Ndyuūs nanááⁿ nducyaaca yā ní taachi n'déé yā pan tucá'a yā che'é yā. ³⁶ Tuu'mi ní nducyaaca yā canee cúúⁿ'míⁿ yā más ca ánimo ní che'é ntuúⁿ yā. ³⁷ Nducyáácá 'nū chí snúuⁿ 'nū na barco tan'dúúca 'uūví ciento canéé 'iiⁿ'nūⁿ ngeecu nditiiⁿ'yu 'áámá 'nū. ³⁸ 'Āā nduuví ditiinú yā. Dííⁿ yā chí nan'daa ca'ái barco miiⁿ. 'Canuúⁿ yā trigo chí ndéē barco miiⁿ na nuūⁿ'nīⁿ'yáⁿ'ā.

Chindai barco

³⁹ Taachí chidēve táámá nguuvi nguéé 'íintinaáⁿ 'nū tíí yáⁿ'āa naachí snée 'nū naati n'diichi 'nū 'áámá lugar naachi veē 'áámá playa o yáⁿ'āa ndúútiī. Nduuvidáámá 'nū neⁿ'e 'nū cundaa 'nū na playa miiⁿ ndúúcu barco. ⁴⁰ Ní chiica ntúuⁿ yā 'iiⁿ'yu yeⁿ'ē cucáávā chí ancla cūū chí canuúⁿ na nuūⁿ'nīⁿ'yáⁿ'ā. Tuu'mi ní cuaaⁿ dáámí barco miiⁿ nadatí yā remos chí tan'dúúca 'áámá tabla chí diiⁿ guiar barco miiⁿ. Ní ch'eeⁿ yā tiinūⁿ miiⁿ yeⁿ'é cuaaⁿ vmnaaⁿ barco miiⁿ na 'yúúné ni cueⁿ'é 'nū na playa chí yáⁿ'āa ndúútiī. ⁴¹ Caⁿ'a 'naaⁿ 'nū naachi 'áámá lugar chí 'uūví nuūⁿ'nīⁿ ní dííⁿ yā chí ndaā barco miiⁿ na yáⁿ'āa cuaaⁿ diituú chēeti nuūⁿ'nīⁿ. Dííⁿ yā chí nacan'dáā barco 'iicu cuááⁿ vmnaaⁿ yeⁿ'ē barco miiⁿ chí canúúⁿ ca nguaaⁿ nuūⁿ'nīⁿ 'āā na yáⁿ'āa canéé chēchi. Chééndii chí 'āā ntéé chiicā 'iicu cuaaⁿ dáámí barco miiⁿ neⁿ'e nda'ai ndúúcu fuerza yeⁿ'ē nuūⁿ'nīⁿ miiⁿ. ⁴² Tuu'mi ní soldado s'eeⁿ caⁿ'a yā chí 'caaⁿ'nuⁿ yā preso s'uuⁿ níícú mar 'áámá yā nguéé cuuvi cáaⁿ'yuuⁿ yā nuūⁿ'nīⁿ níícú cunaⁿ'a yā na yáⁿ'āa. ⁴³ Naati capitán miiⁿ neⁿ'e sa dinguáⁿ'ai sa Pablo miiⁿ. Tuu'mí chícataáⁿ yā chí neⁿ'e soldado s'uuⁿ. Tuu'mi ní capitán chí ngaⁿ'ā ntiiⁿ'nyuⁿ caⁿ'á sa chí nducyáácá yā chí cuuvi 'caaⁿ'yuuⁿ yā nuūⁿ'nīⁿ níícú chí cun'daa yā vmnaāⁿ nuūⁿ'nīⁿ ní 'caaⁿ'yuuⁿ yā ní nandaá yā na yáⁿ'āa ní nnguaⁿ'ái yā. ⁴⁴ Níícú tanáⁿ'a yā ní na tablas yeⁿ'ē barco ndúúcu yáⁿ'á yeⁿ'ē barco cuuví nacan'daa yā. 'Tíicā chíi nducyááca yā nanguáⁿ'ai yā nandaa yā na yáⁿ'āa cuūⁿ'máⁿ.

28

Pablo snée yā na isla Malta

¹ Taachi 'āā nnguaⁿ'ái 'nū chicadínuuⁿ 'nū isla miiⁿ nguuvi Malta. ² 'Iiⁿ'yāⁿ chí snée na isla miiⁿ dííⁿ yā tratar nús'uu n'daacā caati tiiví yā yáⁿ'ā ní dííⁿ yā recibir nducyaaca 'nū cáávā chí 'iiche miiⁿ ndúúcu chí ngeee cúúví. ³ Tuu'mi ní Pablo miiⁿ nanguáiⁿ yā nduuví táā dúuⁿ'nē yáⁿ'á cuuⁿ'maⁿ ní ch'íí yā na yáⁿ'ā. Ní 'áámá cúú cueⁿ'e tī chéenu tī caavā chí 'íí'nūⁿ ní chēcú tī na tá'a Pablo miiⁿ. ⁴ Taachi 'iiⁿ'yāⁿ chí snée miiⁿ'yā n'diichi yā cúú can'díicu tī na ta'ā Pablo tuu'mi ní caⁿ'a yā nguááⁿ maáⁿ yā: Nduudu cuáácú sáⁿ'a 'cūū 'nííⁿ'núⁿ sa 'iiⁿ'yāⁿ. 'Áará chí nanguáⁿ'ái sa na nuūⁿ'nīⁿ'yáⁿ'ā nguéé 'cuááⁿ chí cunduūchi sa.

⁵ Naati Pablo miiⁿ ch'íidi sa cúú miiⁿ na yaⁿ'ā. Nguéé de'ē veē dííⁿ tī ndúúcu sa. ⁶ 'Iiⁿ'yāⁿ s'uuⁿ snée ngíínú yā chí n'diichi yā chí cundiitu ta'ā sa o cundéévé sá chí 'cuūví. 'Iiⁿ'yāⁿ s'éeⁿ ní ch'ēetinée ngíínú yā de'ē cuuví ndúúcu sa. Ní n'diichi yā chí nguēe de'ē veē chíi ndúúcu sa. Tuu'mi ní na'dááⁿ yā vaanicadínūⁿ yeⁿ'é yā cucáávā chí n'diichi yā. Tuu'mi ní caⁿ'a yā: Pablo miiⁿ ní dendyuūs saⁿ'ā.

⁷ Na yáāⁿ miiⁿ véé yáⁿ'āa yeⁿ'e 'iiⁿ'yāⁿ chí ngaⁿ'ā ntíiⁿ'nyúⁿ yā chí nguúví yā Publio. 'Iiⁿ'yāⁿ yáāⁿ miiⁿ diiⁿ yā recibir nus'uū. Ní tee yā naachí ch'ēetinée 'nū 'iiⁿ'nūⁿ nguuvi. ⁸ Ní chiida Publio canéé yā na cama chí ngííta yā yeⁿ'ē ca'ai 'íí'nūⁿ ndúúcu ca'ai yuúúⁿ. Tuu'mí chí ndaā Pablo ní n'diichi yā 'iiⁿ'yāⁿ. Ní ch'íínú caⁿ'angua'á yā niicu s'néé Pablo miiⁿ ta'á yā cuerpo yeⁿ'é yā. Níícú nduuva yeⁿ'é yā. ⁹ Ch'íínú chí dííⁿ yā chuū tuu'mi ní cuchii tanáⁿ'a yā chí snée yā na isla chí veē ntúúⁿ ca'ai yeⁿ'é yā. Ndaá yā naachi canéé

Pablo ní nduuvá ntúuⁿ yeⁿe yá. ¹⁰ 'Iiⁿ'yāⁿ s'úuⁿ dinéⁿe yá nús'uu ni díⁿ yá n'daacá nduucú 'nū. Taachí chi ndaá 'nū na barco tee yá taanduvéé cosa chi neⁿe 'nū.

Pablo ndaá yá na yáāⁿ Roma

¹¹ Ch'εetinéⁿ 'nū 'iiⁿnūⁿ 'iiyu miiⁿ ní cueⁿ'é 'nū na barco chi yeⁿ'ē yáāⁿ Alejandría chi ch'εetinéⁿ 'áámá tiempo 'iiche na isla miiⁿ. Barco miiⁿ ní cuaaⁿ vmnaaⁿ canéé imágenes yeⁿ'e Cástor ndúucū Pólux chi dendyuūs s'eeⁿ yeⁿ'e 'iiⁿ'yāⁿ miiⁿ. ¹² Ní ndaa ntúuⁿ 'nū na yáāⁿ Siracusa ní ch'εetinéⁿ ntuuⁿ 'nū yáāⁿ miiⁿ na 'iiⁿnūⁿ nguuvi. ¹³ Yeⁿ'e yáāⁿ miiⁿ cueⁿ'e ntuúⁿ 'nū na barco niiⁿnuúⁿ ná 'diituú nuūⁿnīⁿ'yaⁿ'ā miiⁿ. Ndaa ntúuⁿ 'nū niiⁿnuúⁿ na yáāⁿ Regio. Táámá nguuvi cuayiivi chi ndáá 'yúúné yeⁿ'ē cuaaⁿ ndiia sur ni ndii chiiⁿ ndii 'úúví nguuvi ndaa ntúuⁿ 'nū na yáāⁿ Puteoli. ¹⁴ Miiⁿ ní naachi ndaāca 'nū hermanos chi i'téenu yá Cristo di'cuítu yá nús'uu ní 'cuεetinéⁿ 'nū ndúucu yá ndeēchē nguuvi. Ch'iinu ní cueⁿ'e 'nū chiicá 'nū yáāⁿ Roma. ¹⁵ Taachi ch'iindiveeⁿ hermano s'uuⁿ yeⁿ'é 'nū ní can'dáa yá ní díⁿ yá recibir nús'uu ndíí yáāⁿ Apio naachi veε niiⁿ'vēē ní ndii yáāⁿ chi nguuvi Tres Tabernas. Taachí Pablo n'diichi yá 'iiⁿ'yāⁿ, ca'á yá gracias Ndyuūs níicú veε ca ánimo yeⁿ'e yá. ¹⁶ Taachí ndaá 'nū yáāⁿ Roma, capitán diiⁿ sa entregar preso s'eeⁿ jefe. Níicú jefe miiⁿ 'cuuⁿ yá chi cunéé 'āā vi'i Pablo ndúucū 'aama soldado chi diiⁿ sa cuidado 'iiⁿ'yāⁿ.

Pablo ngaⁿ'á yá nduudu cuaacu na yáāⁿ Roma

¹⁷ Ch'íinú tá 'iiⁿnūⁿ nguuvi Pablo miiⁿ ní ca'á yá chi cádiinuuⁿ saⁿ'ā n'gεete yeⁿ'ē 'iiⁿ'yāⁿ Israel s'eeⁿ. Níicú taachi nduuvídaama sa Pablo miiⁿ caⁿ'á yá chii yá saⁿ'ā: Ndís'tii ví'í, 'úú ní nguéé de'ē veε díⁿ ndúucū 'iiⁿ'yāⁿ ndíí nguéé ndúú contra yeⁿ'e costumbre yeⁿ'e chiidá yú chi yeⁿ'ē ndíí vmnaaⁿ. Ní 'iiⁿ'yāⁿ díⁿ yá entregar 'úú ndíí yáāⁿ Jerusalén na ta'ā saⁿ'ā romano s'uuⁿ. ¹⁸ Saⁿ'ā s'eeⁿ, ní taachi tuumicadiinúúⁿ sa yeⁿ'é chi nguéé nuūⁿndi ch'εete yeⁿ'e neⁿ'e sa nn'dεechii sa 'úú caati nguéé indaaca sa mar 'áámá nuūⁿndi yeⁿ'é chi 'cuúví. ¹⁹ Naati 'iiⁿ'yāⁿ Israel s'eeⁿ snéé yá contra yeⁿ'é, chíí obligado chi canéé chi caⁿ'á n'diichí saⁿ'ā chi rey César. Nguéé de'ē caavā chi caacá contra 'iiⁿ'yāⁿ yeⁿ'é. ²⁰ Chííⁿ chi cucáavā 'úú chiicá n'diichí ndis'tii maaⁿ níicú snaaⁿ nī, níicú ndee nduucú nī. Caati cucáavā chí canee ngiinú cosa yeⁿ'ē Israel, canéé chí díⁿ sufrir ndúucū cadena 'cūu.

²¹ Tuu'mí caⁿ'a sa chii sa Pablo: Nús'uu ní nguéé ndííⁿ 'nū recibir carta yeⁿ'e yáⁿ'āa Judea cucáavā dii, ndíí nguéé ndúú chiiⁿ ndaá mar 'áámá vi'i yú chi caaⁿ'māⁿ yá nuuⁿndi yeⁿ'ē di. ²² Naati neⁿ'é 'nū 'caandiveeⁿ 'nū chí nadicadiinuuⁿ di caati cucáavā chí i'téenu dí. Nús'uu ní déenu 'nū chi nducuéⁿ'e cuaaⁿ ngaⁿ'a yá contra cosa chí i'téenu di.

²³ Tuu'mi ndεeve yá 'áámá nguuvi ní ndaá taaví 'iiⁿ'yāⁿ na vacu sa. Ní Pablo miiⁿ caaⁿ'maⁿ cuaacú yá ní ch'iⁿ'í yá 'iiⁿ'yāⁿ yeⁿ'e chí Ndyuūs ngaⁿ'a yá ntiiⁿ'nyúⁿ yá ndíí naachi ngíí ndεeve ndíí naachi ngíí 'da'a. Ní ngaⁿ'a yá nduudu cuaacu yeⁿ'é Jesús tan'dúucā chí yeⁿ'ē Moisés. 'Āā 'tíica nūuⁿ yeⁿ'ē profetas chí ca'ā nduudu yeⁿ'é Dendyuūs.

²⁴ 'Iicu náⁿ'a yá ní i'téenu yá chí caⁿ'a sa. Niicu náⁿ'a yá nguéé i'téenu yá. ²⁵ Naati nguéé nduuvídaamá yá. Ní cuindaacadáámí yá naati vmnááⁿ vmnaaⁿ chí cuindaacadaámí yá Pablo miiⁿ caⁿ'a sa nduudu 'cūu ndúucū 'iiⁿ'yāⁿ s'eeⁿ tan'dúucā chí caⁿ'a cuaacu Espíritu N'dai yeⁿ'e Ndyuūs cucáavā profeta Isafas ndúucū chiidá yú. Ní cāⁿ'a Espíritu N'dai chuū:

²⁶ Cueⁿ'e di yáāⁿ 'cūu níicú cuuvi di 'iiⁿ'yāⁿ: N'giindiveeⁿ di ndúucū veeⁿ di ní nguéé tuumicadiinuuⁿ di; inaaⁿ di ndúucū nduutináⁿ di ní nguéé i'téenu di;

²⁷ caati staava yeⁿ'e 'iiⁿ'yāⁿ yáāⁿ 'cūu nééné cheechi, níicú nguéé cuuvi tuumicadíinuuⁿ yá ndúucū staava yēⁿ'e yá ndúucū veéⁿ yá nguéé n'dáacā ch'iindiveeⁿ yá, ndíí nguéé n'giindiveeⁿ yá ndúucū veéⁿ yá, nduutináⁿ yá ní nduudí maaⁿ, tí nguéé chinaáⁿ yá ndúucū nduutinaáⁿ yá, ndíí nguéé nanguεecundií yá yeⁿ'ē nuuⁿndi yeⁿ'é yá caatí 'úú idiíⁿ chí nduuví n'dái yá nanduūvā yeⁿ'é yá.

²⁸ Maaⁿ ní cádiinúúⁿ nī chiiⁿ chí Ndyuūs nadach'εecú yá nuuⁿndi yeⁿ'ē nducyáácá 'iiⁿ'yāⁿ s'eeⁿ chí nguéé yeⁿ'ē ndaata Israel cáavā chí 'tíicā 'iiⁿ'yāⁿ s'eeⁿ 'caandiveeⁿ yá yeⁿ'e chuū.

²⁹ Níicú taachi caⁿ'a sa nduudu 'cūu, 'iiⁿ'yāⁿ Israel s'eeⁿ caⁿ'a yá. Nééné n'deeé caⁿ'a yá nguaaⁿ maáⁿ yá.

³⁰ Pablo miiⁿ ní canée yā 'uūvī ndúuyū na 'áámá va'ai chí nadí've yā. 'Iiⁿyāⁿ míⁿ díⁿ yā recibir ndúcyáácá yā chi nndaā na vaacú yā. ³¹Caⁿ'á yā yeⁿ'ē chi Dendyuūs ngaⁿ'ā ntiiⁿnyúⁿ yā níⁿcú chí'cueeⁿ yā yeⁿ'ē Señor Jesucristo. Caⁿ'a yā ndúúcū nducyaaca 'iiⁿyāⁿ. Mar 'áámá 'iiⁿyāⁿ nguéeⁿ chiicatáaⁿ yā yeⁿ'e yā.

PABLO IDINGUÚⁿ YĀ CARTA 'CŪŪ YEⁿE 'IIⁿ'YĀⁿ CHI SNÉE YĀ YĀĀⁿ ROMA

Pablo idinguúⁿ yā yeⁿe 'iiⁿ'yāⁿ yeⁿe yaacū yeⁿe yāāⁿ Roma

¹ 'Úú Pablo 'úú ní 'úú dichíí'vē Señor Jesucristo. Ndyuūs yaa'ví yā 'úú ni ndεεvé yā 'úú. Ní dichó'o yā 'úú chi cuuví apóstol chi candéé nduudu yeⁿé Ndyuūs chi nduudu yeⁿe evangelio yeⁿe chi nanguaⁿ'ai 'iiⁿ'yāⁿ.

² Ndyuūs ní caⁿ'a yā n'dee n'dái tiempo chi 'āā chó'ōo chi ca'a yā evangelio chí nduudu cuaacu chi nadanguáⁿ'ai yā taachi profetas ngaⁿ'á yā yeⁿē. Ní dingúuⁿ yā na libro yeⁿe Dendyuūs yeⁿē chúū. ³ Nduudu 'cūū chi evangelio ní yeⁿe Señor Jesucristo yeⁿe yú chi Daiya Dendyuūs. Cristo ní ndāa yā iⁿ'yeeⁿ'dí 'cūū ndúúcu cuerpo tan'dúúca s'uuúⁿ cáávā na ndaata yeⁿē rey David. ⁴ Ní cucááva Espíritu chi n'dai taavi yeⁿe Cristo, Cristo dicuaacú yā chí Daiyá Ndyuūs ndúúcu poder yeⁿé Ndyuūs chi ch'εεε taavi ca taachi nducueⁿ yā yeⁿe nguaaⁿ tináⁿ'ā. ⁵ Ní cáávā Cristo miiⁿ Ndyuūs tee yā 'aama favor 'úú ti dicho'ó yā 'úú chi 'úú cuuvi apóstol yeⁿé yā cáávā chi duuchi Cristo. Ní cáávā chi 'úú cuuvi 'cuuⁿ'mín 'iiⁿ'yāⁿ yeⁿe nducueⁿ'ē nación táácā cuuvi cu'téenu yā Ndyuūs. Ní 'caandiveén yā nduudu yeⁿe yā. ⁶ Ní ndís'tiī ní yeⁿe 'iiⁿ'yāⁿ chi i'téenu yā Jesucristo caati Ndyuūs yaa'ví yā ndís'tiī chi cuuvi yeⁿé Cristo ndís'tiī.

⁷ 'Úú idinguúⁿ carta 'cūū yeⁿe nducyáácá ndís'tiī chi snée nī na yāāⁿ Roma, ndís'tiī chi Ndyuūs neⁿe yā ní yaa'ví yā ndís'tiī chi cuuví yeⁿé yā ndís'tiī. Neⁿ'é chi Ndyuūs Chiida yú ndúúcu Señor Jesucristo téé yā ndís'tiī vaadi n'dai ca yeⁿ'é yā ndúúcu vaadi 'diiⁿ' yeⁿ'é yā.

Pablo neⁿe yā caⁿ'á yā yāāⁿ Roma

⁸ Vmnááⁿ vmnaaⁿ ca'á gracias Ndyuūs cáávā Jesucristo cucáávā nducyaaca ndís'tiī caati 'iiⁿ'yāⁿ yeⁿe núúⁿ'máⁿ iⁿ'yeeⁿ'dí ch'iindiveén yā tan'dúúca chi ndís'tiī i'téenu nī Jesucristo ní ngaⁿ'á yā yeⁿe ndís'tiī. ⁹ 'Úú ndúúcu nuuⁿ'maⁿ staavā yeⁿ'é dichii'vé Ndyuūs. Ní candéé nduudu ngai yeⁿe evangelio yeⁿe Daiyá yā. Ndyuūs deenú yā chi 'úú cueⁿ'e daāⁿ'maⁿ nan'gaacú yeⁿe ndís'tiī ní taachí ngaⁿ'āngua'á ní ngaⁿ'āngua'á cucáávā ndís'tiī. ¹⁰ Ní ngiicá Ndyuūs chi nduuti chi neⁿ'é yā chi téé yā lugar 'úú chi tiempo 'cūū cuuví ndáá nanááⁿ ndís'tiī. ¹¹ Neⁿ'e cá snaáⁿ ndís'tiī ní cunneé ndís'tiī ndúúcu Espíritu N'dai yeⁿ'é Ndyuūs chi cu'téenu cá nī ní 'íicú ndís'tiī diitūu 'cuεetinée nī ndúúcu chi i'téenu nī. ¹² Ní 'íicú ndís'tiī ndúúcu 'úú ca'á díttuu yú 'aama yú taama yú ndúúcu chi i'téenu yú ti daama daama i'téenu yú.

¹³ Ndís'tiī hermanos yeⁿ'é, neⁿ'é chí cádiinuuⁿ ndís'tiī chi neené n'dee cuuví neⁿ'é chí n'diichí ndís'tiī naati ndii mááⁿ nguéé ngii chí chíí. Neⁿ'é n'diichí ndís'tiī caati tan'dúúca chi véé n'gui'i yeⁿe cosecha 'tiicá ntúūⁿ ndís'tiī cuuvi tan'dúúca n'gui'i yeⁿe cosecha yeⁿe ntiiⁿ'nyuⁿ yeⁿ'é caati 'tíicā véé n'gui'i yeⁿ'é nguaaⁿ 'iiⁿ'yāⁿ yeⁿe tanáⁿ'ā naciones yeⁿe iⁿ'yeeⁿ'dí 'cūū. ¹⁴ Ní 'úú cánéé chi cunneé 'iiⁿ'yāⁿ chi yeⁿe ndaata yeⁿ'é ndúúcu 'iiⁿ'yāⁿ chi yeⁿe tanáⁿ'ā naciones, 'iiⁿ'yāⁿ chi deenu ndúúcu 'iiⁿ'yāⁿ chi nguéé deenū. ¹⁵ Ní 'tiicá ntúūⁿ 'úú caneé listo chi caaⁿ'máⁿ nduudu cuaacu yeⁿe evangelio chi nanguaⁿ'ai 'iiⁿ'yāⁿ. Ní caaⁿ'máⁿ nanááⁿ ndís'tiī chi snee nī na yāāⁿ Roma.

Poder yeⁿe evangelio chí nduudu ngai yeⁿ'é Cristo

¹⁶ Ní nguéé 'cuinaáⁿ chi caaⁿ'máⁿ nduudu cuaacu yeⁿe evangelio ti nduudu miiⁿ ní poder yeⁿ'é Ndyuūs. Ní nanguaⁿ'āi nducyáácá 'iiⁿ'yāⁿ chi i'téenu yā Cristo, vmnááⁿ vmnaaⁿ 'iiⁿ'yāⁿ chi 'iiⁿ'yāⁿ Israel chi judío s'eeⁿ. 'Tiicá ntúūⁿ 'iiⁿ'yāⁿ s'eeⁿ chi nguéé yeⁿe ndaata Israel. ¹⁷ Ní nduudu cuaacu yeⁿe evangelio miiⁿ ní n'giⁿ'i chi Ndyuūs ní diiⁿ yā aceptar s'uuúⁿ chi cuuvi yeⁿ'é yā s'uuúⁿ cáávā chi i'téenu yú Jesucristo, ni dámaaⁿ cáávā chí i'téenu yú Jesucristo. 'Tíicā canee nguūⁿ na libro yeⁿ'é Ndyuūs: 'iiⁿ'yāⁿ chi Ndyuūs diiⁿ yā aceptar chi cuuvi yeⁿ'é yā, 'cuεetineé yā cucáávā chi i'téenu yā.

*Núú*ⁿndí yeⁿe 'iiⁿ'yāⁿ chi snee yā na iⁿ'yeeⁿdí 'cūū

¹⁸ Déenu yú chi Ndyuūs ca'á yā castigo chi neené díftūū nducyaaca 'iiⁿ'yāⁿ chi nguée n'daacā idiíⁿ yā ndúúⁿcū 'iiⁿ'yāⁿ chi dinuuⁿndí yā. Ní cucááⁿvā nuuⁿndi yeⁿ'é yā nguεε n'gúúⁿ chi 'iiⁿ'yāⁿ cuuví deenú yā nduudu cuaacu yeⁿ'é Ndyuūs. Castigo yeⁿ'é yā ngíicá ndíí na va'ai chεeti nguuvi. ¹⁹ Ní 'iiⁿ'yāⁿ s'eeⁿ chi deenu n'dái yā cuuvi cadíínuuⁿ yā chí yeⁿ'e Ndyuūs caati Ndyuūs ch'íⁿ'í yā 'iiⁿ'yāⁿ s'eeⁿ chuū. ²⁰ Dendu'ū chi yeⁿ'é Ndyuūs chi nguée inaaⁿ yú cuuvi déenu yú cucááⁿvā nducuéⁿ'ē chi Ndyuūs din'dái yā ndúúⁿcū poder yeⁿ'é yā chí 'áámá cānee. Ní chuū cuuví snaaⁿ 'iiⁿ'yāⁿ ndii tiempo chi Ndyuūs din'dái yā iⁿ'yeeⁿdí. Ní deenú yā chi Ndyuūs ní Ndyuūs nuuⁿmáⁿ cuaacu. Ní nguée cuuví caaⁿ'máⁿ yā chi nguée cuuví n'diichí yā Ndyuūs. ²¹ 'Iiⁿ'yāⁿ s'eeⁿ n'diichí yā Ndyuūs naati nguée chí'tēenu yā Ndyuūs miiⁿ chí ch'εete yā ní nguée ca'á yā gracias Ndyuūs. Nguée 'tíicā diíⁿ yā. Naati nadicadíínuuⁿ yā yeⁿ'e dendu'u chi nguée dichíí'vē chi yeⁿ'e maāiⁿ. Ní cááⁿvā chi necio yā ch'εetinée yā na maāiⁿ. ²² 'Iiⁿ'yāⁿ s'eeⁿ ní ngaⁿ'a yā chi deenu ca yā naati diíⁿ yā chi tonto yā. ²³ Ní n̄'daáⁿ yā vaadí δεενε ngii yeⁿ'é Ndyuūs chi canduuchí yā cueⁿ'e daāⁿmaⁿ cááⁿvā santos ídolos o imágenes chi idin'dái 'iiⁿ'yāⁿ, santos chi tan'dúúⁿcā 'iiⁿ'yāⁿ chi n'díí. 'Tíicā santos miiⁿ ndúúⁿcū ídolos yeⁿ'e 'yááⁿdā, ndúúⁿcū ídolos yeⁿ'ē cúú ndúúⁿcū ídolos yeⁿ'ē 'iiti chi cuūⁿ cá'a tī.

²⁴ Ní cááⁿvā chi 'iiⁿ'yāⁿ s'eeⁿ ni nguée neⁿ'e yā tuumicadíínuuⁿ yā ní Ndyuūs s'neéⁿ yā chi diíⁿ yā dendú'ū chi nguée n'daacā chi neⁿ'e diiⁿ cuerpo yeⁿ'é yā. Ní diíⁿ yā ndúúⁿcū cuerpo yeⁿ'é yā nguááⁿ maáⁿ yā dendu'ū chí vaadí 'cuíínuúⁿ. ²⁵ Ní diíⁿ yā 'túúⁿcā ti nguée i'téenu yā nduudu cuaacu yeⁿ'e Ndyuūs ti i'téenu yā nduudu yaadi. Ní dich'εeté yā dendu'ū chi Ndyuūs din'dái yā naati nguée dich'εeté yā maáⁿ Ndyuūs chi din'dái yā dendu'ū. Nducyááⁿcā 'iiⁿ'yāⁿ cueⁿ'é daāⁿmaⁿ canée chi dich'εeté yā Ndyuūs. 'Tíicā canee chi diíⁿ yā.

²⁶ Ní cááⁿvā chi diíⁿ yā 'tuucā Ndyuūs diíⁿ yā chi'nééⁿ maáⁿ yā 'iiⁿ'yāⁿ chi diíⁿ yā dendu'ū chi nguεε n'daacā chí 'cuináaⁿ yā. Ní n'daataá s'eeⁿ nguée caⁿ'á yā ndúúⁿcū saⁿ'a naati caⁿ'á yā ndúúⁿcū n'daataá ní diíⁿ yā tan'dúúⁿcā chí ch'iindivaacú yā ndúúⁿcū vi'í. ²⁷ 'Tiicá ntúūⁿ saⁿ'ā s'eeⁿ nguée caⁿ'á yā ndúúⁿcū n'daataá naati caⁿ'á yā ndúúⁿcū saⁿ'ā ni diíⁿ yā tan'dúúⁿcā chí ch'iindivaacú yā ndúúⁿcū vi'í. Diíⁿ yā nguaaⁿ maáⁿ yā cosas chí vaadí 'cuíínuuⁿ ní sta'á yā castigo na cuerpo yeⁿ'é yā yeⁿ'e chí nguεε n'daacā chí diíⁿ yā.

²⁸ Ní cááⁿvā chí nguée neⁿ'é yā ntiinaáⁿ yā Ndyuūs, Ndyuūs chí'nééⁿ yā 'iiⁿ'yāⁿ chí diíⁿ yā nducuéⁿ'ē chí 'iiⁿ'yāⁿ s'eeⁿ nadacadíínuuⁿ yā chí nguεε n'daacā. Ní diíⁿ yā cosas chí nguée canee chí diíⁿ yā. ²⁹ 'Iiⁿ'yāⁿ s'eeⁿ nééⁿ nadacadiinúúⁿ yā yeⁿ'e nducuéⁿ'ē chí nguεε n'daacā. Ní caⁿ'á yā ndúúⁿcū n'daataá o saⁿ'ā chí nguεε yeⁿ'e yā. Ní neené yaadi'yá yā ní diíⁿ yā cosas yeⁿ'e yááⁿ'n'guiinūuⁿ. Ní neⁿ'é yā dendú'ū chí nguεε yeⁿ'e yā. Ní neene idiíⁿ yā cosa chí nguεε n'daacā ti neⁿ'e yā diiⁿ yā 'tíicā. Ní neené nnguée yā. Ní n'giiⁿ'núⁿ yā 'iiⁿ'yāⁿ. Ní neené n'gεecu cheendí yā ndúúⁿcū 'iiⁿ'yāⁿ, ní nginnche'ée yā 'iiⁿ'yāⁿ. Ní nééⁿ nguεε n'daacā staava yeⁿ'é yā. Ní neené n'gεecu cheendí yā yeⁿ'e chí 'iiⁿ'yāⁿ diiⁿ yā yeⁿ'e chí nguεε n'daacā. ³⁰ Ngaⁿ'á yā yeⁿ'e chí nguée n'daacā yeⁿ'e taama yā. Nguée neⁿ'é yā Dendyuūs. Ngaⁿ'á yā nanááⁿ 'iiⁿ'yāⁿ yeⁿ'ē s'uuúⁿ ní ngii 'cuináaⁿ 'iiⁿ'yāⁿ yeⁿ'ē s'uuúⁿ. Maáⁿ yā dich'εeté yā 'iiⁿ'yāⁿ. Ní idiyaadi taaví yā ní nadacadíínuuⁿ yā cosa chí ngai chí nguεε n'daacā. Ní nguée i'téenu yā yeⁿ'ē chεecu yā yeⁿ'e chiida yā. ³¹ Nguée itúúmicadíínuuⁿ yā, nguée idiíⁿ yā chí ngāⁿ'a yā chí diíⁿ yā. Nguée idinén'e yā 'iiⁿ'yāⁿ ní nguée déenu yā nadach'εecu yā nuuⁿndi yeⁿ'e 'iiⁿ'yāⁿ 'áará chí ngaⁿ'a yā chí nadach'εecu yā yeⁿ'e yā. Ní nguée ya'āi 'iinú yā 'iiⁿ'yāⁿ. ³² 'Iiⁿ'yāⁿ s'eeⁿ nééⁿ déenu yā chí Ndyuūs ngaⁿ'a yā chí canée chí diiⁿ yā. Ni déenu yā chí 'iiⁿ'yāⁿ chí nguée diíⁿ 'tíicā, tuu'mí chí 'cuuvi yā naati icandíicá yā chí idiíⁿ yā 'tíicā. Yeenú taaví yā taachi inaaⁿ yā 'iiⁿ'yāⁿ chí diíⁿ yā 'tíicā.

2

Ndyuūs ináaⁿ yā 'iiⁿ'yāⁿ yeⁿ'e nuuⁿndi ní yeⁿ'e chí cuaacu

¹ Ndís'tiī amigos yeⁿé, ¿'áá n'diichí nī de'ē chi idiiⁿ taamá yā o 'āā du'ú nūuⁿ 'iiⁿyāⁿ? Véeⁿ nuuⁿndi yeⁿe maáⁿ yā taachi díⁿ yā 'tíicā. Taachi n'diichí yā nuuⁿndi chi idiiⁿ taamá yā, ní maáⁿ yā díⁿ yā 'tiicā, tuuⁿmi ní dich'εεté maáⁿ yā nuuⁿndi yeⁿé yā. ² Deenu yú chi Ndyuūs díⁿ yā cosa chi cuaacu taachi díⁿ yā condenar 'iiⁿyāⁿ chi díⁿ yā chi 'túúicā. ³ ¿'Áá 'aacu nī chi Ndyuūs nguéeⁿ inaaⁿ yā nuuⁿndi yeⁿe 'iiⁿyāⁿ chi idiiⁿ yā 'túúicā taachi n'diichí yā nuuⁿndi yeⁿe taamá yā? Nguεε 'tíicā. ⁴ ¿'Áá nguéeⁿ inee yiinú nī yeⁿé Ndyuūs cucáávā chi ya'ai 'iinú yā ndís'tiī ní ndai yā ndúúicū ndís'tiī ní teé yā ndís'tiī n'dee n'dái favores yeⁿé yā ndúúicū vaadī 'diiⁿ yeⁿe yā? Ní nguéeⁿ díⁿ nī cuenta chi Ndyuūs tee yā ndís'tiī favores yeⁿe yā ní n'gíⁿí yā ndís'tiī taaca cuuvi ndaacadaamí nī yeⁿe nuuⁿndi chi idiiⁿ nī. ⁵ Naati 'iiⁿyāⁿ chi díⁿ yā 'túúicā ní dichεεchi yā staava yeⁿe yā. Ní nguéeⁿ ndaacadaamí yā yeⁿe nuuⁿndi yeⁿé yā. Cáávā chi idiiⁿ yā 'tíicā ní nduuvadáámá castigo yeⁿe maáⁿ yā nguuvi taachi Ndyuūs díⁿ yā juzgar nuuⁿndi yeⁿe yú ní téé yā castigo yeⁿe chi diiⁿ yú ndúúicū vaadī cuaacu. ⁶ Ní Ndyuūs ní ca'a yā ca'áámá cā'aama 'iiⁿyāⁿ nadí'vē yā yeⁿe chi díⁿ yā. ⁷ Ní ca'a yā vida cueⁿe daāⁿmaⁿ 'iiⁿyāⁿ chi cheé yā chi díⁿ yā nducuéⁿē chi n'daacā, ní n'nuún yā, ní díⁿ yā nducuéⁿē chi yeⁿe va'ai cheeti nguuví, ní díⁿ yā chi honrado yā. ⁸ Naati 'iiⁿyāⁿ chi neⁿe nducuéⁿē yeⁿe maáⁿ yā ní nguéeⁿ i'téenu yā nduudu cuaacu yeⁿé Ndyuūs naati díⁿ yā nducuéⁿē chi nguεε n'daacā, Ndyuūs nguéeⁿ canee yiinú yā yeⁿe 'iiⁿyāⁿ s'eeⁿ. Ní ca'á yā castigo 'iiⁿyāⁿ s'eeⁿ. ⁹ Ní nducyáácá 'iiⁿyāⁿ chí nguéeⁿ n'daacā idiiⁿ yā canéé chi n'dee n'dái 'cuéenu yā cuuvi, vmnááⁿ vmnaaⁿ 'iiⁿyāⁿ chi yeⁿe ndaata Israel chí judíos ní cuayiivi ní 'iiⁿyāⁿ chi nguéeⁿ yeⁿe ndaata Israel. ¹⁰ Naati Ndyuūs díⁿ yā chí dεεvé 'iiⁿyāⁿ ní dich'εεté yā 'iiⁿyāⁿ ní ca'a yā vaadī 'diiⁿ yeⁿé nducyáácá 'iiⁿyāⁿ chí dín'daacá yā, vmnááⁿ vmnaaⁿ 'iiⁿyāⁿ yeⁿe ndaata Israel ní cuayiivi 'iiⁿyāⁿ chí nguéeⁿ yeⁿe ndaata Israel.

¹¹ Caati nanááⁿ Ndyuūs ní 'āā daamá nūuⁿ nducyaaca 'iiⁿyāⁿ. ¹² Ní 'iiⁿyāⁿ chi idinuuⁿndí yā chí nguéeⁿ ndúúicū ley yeⁿe Moisés miiⁿ ní cuuvi ndái yā nguéeⁿ ndúúicū ley miiⁿ. Ní 'iiⁿyāⁿ chí idinuuⁿndí yā ní ndεε yā ley yeⁿe Moisés miiⁿ tuuⁿmi ní ley miíⁿ nūuⁿ ní cuuví yā castigo. ¹³ Caati nguéeⁿ cuaáⁿ Ndyuūs 'iiⁿyāⁿ chí dámaaⁿ chí n'diichí yā ley miiⁿ naati Ndyuūs cuaáⁿ yā 'iiⁿyāⁿ chí díⁿ yā tan'dúúicā chí ngaⁿ'a ley miiⁿ. ¹⁴ Ní taachi 'iiⁿyāⁿ chí nguéeⁿ yeⁿe ndaata Israel s'eeⁿ ní nguéeⁿ déenu yā yeⁿe ley Moisés, naati neⁿe yā cadiinúúⁿ yā díⁿ yā cosa chí cuaacu tan'dúúicā chí ngaⁿ'a ley miiⁿ, 'áará chí nguéeⁿ ndúúicū ley miiⁿ véé 'aama ley yeⁿé yā chí 'āā ví'í cā nguaaⁿ maáⁿ yā. ¹⁵ Ní ch'iⁿí yā cáávā chí idiiⁿ yā chí ley yeⁿé Ndyuūs tan'dúúicā chí canéé nguūⁿ na staava yeⁿé yā 'tíicā canéé. Ní chiiⁿ chí díⁿ yā ní 'áámá prueba yeⁿe chuū ní chiiⁿ chí nadacadiinúúⁿ yā díⁿ yā condenar maáⁿ yā o caaⁿ'maⁿ cuaacu yeⁿé maáⁿ yā. ¹⁶ Ní taachi ndaá nguuví chí Ndyuūs díⁿ yā juzgar cáávā Jesucristo miiⁿ nducyáácá 'iiⁿyāⁿ ndúúicū nducuéⁿē chí yeⁿe 'iiⁿyāⁿ maáⁿ yā canúúⁿ n'de'ei na staava yeⁿé yā, tuuⁿmi ní Ndyuūs díⁿ yā chuū ndúúicū nduudu cuaacu yeⁿe yā chí nadanguaⁿ'ai 'iiⁿyāⁿ. Chuū ní nduudu cuaacu chí 'úú Pablo ngaⁿ'á.

'Iiⁿyāⁿ Israel s'eeⁿ ndúúicū ley yeⁿe Moisés

¹⁷ Diiⁿ ní ngaⁿ'a di chí 'iiⁿyāⁿ Israel di. Ní ngaⁿ'a di chí i'téenu dí ley yeⁿe Moisés ní dich'εεté maāⁿ di dii. Ní dii ngaⁿ'a di chí yeⁿé Ndyuūs dii. ¹⁸ ¿'Áá déenu di de'ε chí neⁿe Ndyuūs ní ley chí 'cuuⁿ'miⁿ di chí cuuvi in'nuuⁿ di dendu'ū chí n'daacā ca chí diiⁿ di? ¹⁹ ¿'Áá déenu di chí cuaacu chí cuuvi ca'cueeⁿ di 'iiⁿyāⁿ chí ngueenááⁿ o 'iiⁿyāⁿ chí nguéeⁿ de'ε véε deenu, ní ndεε di nduudu chí tan'dúúicā chidεεve nanááⁿ 'iiⁿyāⁿ chí ngiica yā na maāⁿ? ²⁰ ¿'Áá i'teenu di chí cuuví diiⁿ di ca'cueeⁿ di 'iiⁿyāⁿ chí tonto yā ní táácā chí ngi'cueeⁿ di da'caiyáá? ¿Ní ndúúicū ley yeⁿe di véé nducuéⁿē chí diiⁿ chí cuuví deenu di vaadī cuaacu? ²¹ Díⁿ chí ngi'cueeⁿ di tanáⁿ'a yā, ¿de'ε cáávā chí nguéeⁿ ngi'cueeⁿ maāⁿ di dii? Díⁿ chí ngaⁿ'a di 'iiⁿyāⁿ chí nguéeⁿ canéé chí diduucú yā, ¿de'ε cáávā chí diduucú di? ²² Díⁿ saⁿ'ā o n'daataá chí ngaⁿ'a di chí 'iiⁿyāⁿ nguéeⁿ caⁿ'á yā ndúúicū isaⁿ'ā o n'daataá chí nguéeⁿ yeⁿé yā, ¿de'ε cáávā chí maaⁿ dí caⁿ'a di ndúúicū n'daataá o isaⁿ'ā chí nguéeⁿ yeⁿe di? Díⁿ chí nguéeⁿ ngii n'diichí di santos ídolos, ¿de'ε cáávā chí diduucu di vaadī 'cuiica yeⁿe yáacū yeⁿe santos ídolos? ²³ Díⁿ chí ngaⁿ'a maaⁿ di yeⁿe di chí ch'εεte di cucáávā

chi canee di ndúúcū ley yeⁿ'é Ndyuūs ¿de'ē cáávā chi nguéeⁿ diiⁿ di honrar Ndyuūs? 'Tiicá diiⁿ di caati nguéeⁿ diiⁿ di tan'dúúcā chi ngaⁿ'a ley chi Ndyuūs tee yā dii. ²⁴ Canéeⁿ nguūⁿ na libro yeⁿ'é Ndyuūs 'tiicā: 'Iiⁿ'yāⁿ chi nguéeⁿ yeⁿ'e ndaata Israel nguéeⁿ n'daacā ngaⁿ'a yā yeⁿ'e chi duuchi Ndyuūs. Ní chuū ni nuuⁿndi yeⁿ'e di.

²⁵ Cuaacu níⁿnyúⁿ chí ley yeⁿ'e circuncisión yeⁿ'e saⁿ'a Israel s'eeⁿ ní dichíí'vē cáávā di nduuti chi diiⁿ di chi ngaⁿ'a ley yeⁿ'e Moisés. Ní ndúúti chi nguéeⁿ diiⁿ di chi ngaⁿ'a ley miiⁿ, tuu'mi ní canee di tan'dúúcā saⁿ'ā chi nguéeⁿ circuncidado di. 'Tíicā canee di. ²⁶ Ní ndúúti chí 'áámá saⁿ'ā chí nguéeⁿ yeⁿ'e ndaata Israel ní nguéeⁿ circuncidado yā tan'dúúcā chí ngaⁿ'a ley yeⁿ'e Moisés, naati saⁿ'ā miiⁿ diiⁿ sa chí ngaⁿ'a ley miiⁿ, saⁿ'ā miiⁿ 'aara chí nguéeⁿ circuncidado sa, Ndyuūs díⁿ yā cuenta yeⁿ'e saⁿ'ā miiⁿ chí tan'dúúcā chí circuncidado, 'tiica sa. ²⁷ Saⁿ'ā chí nguéeⁿ circuncidado na cuerpo yeⁿ'e sa ní diiⁿ sa tan'dúúcā chí ngaⁿ'a ley, saⁿ'ā miiⁿ diiⁿ sa condenar dii chí nguéeⁿ diiⁿ di tan'dúúcā chí ngaⁿ'a ley 'áará chí véé ley yeⁿ'e di ní canee circuncidado di na cuerpo yeⁿ'e di. ²⁸ Cuaacu níⁿnyúⁿ nguéeⁿ nduudu cuaacu chí 'áámá saⁿ'ā ní saⁿ'ā Israel chí ndíi sa circuncidado ndúúcū seña na cuerpo yeⁿ'e sa. Ndíi nguéeⁿ ndúú chí nduudu cuaacu chí circuncisión chí seña chí canee na cuerpo yeⁿ'e sa diiⁿ chí Israel sa. ²⁹ Nguéeⁿ 'tíicā. Saⁿ'ā chí cuaacu níⁿnyúⁿ chí saⁿ'ā Israel miiⁿ, saⁿ'ā miiⁿ ní saⁿ'ā chí circuncidado na staava yeⁿ'e sa. Chuū ní circuncisión chí cuaacu níⁿnyúⁿ chí cuaacu. Nguéeⁿ tan'dúúcā chí canee nguūⁿ na ley yeⁿ'e sa naati chí yeⁿ'e Espíritu N'dai yeⁿ'é Ndyuūs. Saⁿ'ā chí circuncidado na staava yeⁿ'e sa, Ndyuūs n'diichinee yā chí saⁿ'a n'dai sa. Nguéeⁿ cuuvi n'diichinee saⁿ'ā s'eeⁿ yeⁿ'e iⁿ'yeeⁿdí 'cūū.

3

¹ Tuu'mi ní ¿de'ē chíí'vē cáávā chí saⁿ'ā miiⁿ chí saⁿ'ā yeⁿ'e ndaata Israel? ¿O dé'ē dichíí'vē nduuti chí saⁿ'ā ní circuncidado sa? ² N'dáácā n'dai dichíí'vē cáávā n'dee n'dái razones. Vmnáán vmaaaⁿ Ndyuūs s'neeⁿ yā nduudu cuaacu yeⁿ'e ley yeⁿ'é yā vmaaaⁿ ndís'tií chí 'iiⁿ'yāⁿ Israel. ³ Ní nduuti chí náⁿ'ā 'iiⁿ'yāⁿ Israel nandaacadaamí yā yeⁿ'e chí i'téenu yā, ¿'áá cucáávā chíiⁿ chí díⁿ Ndyuūs chí nguéeⁿ dichíí'vē chíiⁿ chí Ndyuūs ngaⁿ'a yā chí caⁿ'á yā diiⁿ yā? Nguéeⁿ 'tíicā. ⁴ Ndyuūs ní cuaacu ní díⁿ yā nducuéⁿ'ē chí cuaacu naati nducyaaca 'iiⁿ'yāⁿ yeⁿ'e iⁿ'yeeⁿdí 'cūū ngaⁿ'a nduudu yaadi. Canéeⁿ nguūⁿ na libro yeⁿ'e Dendyuūs ní Ndyuūs ngaⁿ'á yā 'tíicā:

Canee chí 'cuuⁿ'miⁿ di 'iiⁿ'yāⁿ cáávā nduudu chí ngaⁿ'a di chí díⁿ diiⁿ di chí cuaacu ní naachi n'diichí yā dii, deenú yā chí díⁿ ní diiⁿ di chí cuaacu.

⁵ Ní taachi diiⁿ yú cosas chí nguéeⁿ n'daacā, tuu'mi ní más ca 'cuuⁿ'miⁿ chí Ndyuūs chí cuaacu, ¿de'ē cuuvi caaⁿ'maⁿ yú? ¿'Áá caaⁿ'maⁿ yú chí Ndyuūs nguéeⁿ díⁿ yā cosas chí cuaacu taachi díⁿ yā castigar s'uūuⁿ? Nguéeⁿ 'tíicā. ('Úú ngaⁿ'á tan'dúúcā chí ngaⁿ'a 'iiⁿ'yāⁿ yeⁿ'e iⁿ'yeeⁿdí 'cūū.) ⁶ Nduuti chí Ndyuūs nguéeⁿ díⁿ yā tanducuéⁿ'e chí n'daacā, ¿táácā cuuvi diiⁿ yā juzgar nuuⁿndi yeⁿ'e 'iiⁿ'yāⁿ yeⁿ'e iⁿ'yeeⁿdí? Díⁿ yā juzgar 'iiⁿ'yāⁿ caati díⁿ yā tanducuéⁿ'e chí n'daacā.

⁷ Ní ndúúti chí nduudu yaadi miiⁿ yeⁿ'e yú dichíí'vē chí cuuvi dich'εεte ca yú Ndyuūs, ¿de'ē cúúvī chí Ndyuūs díⁿ yā juzgar nuuⁿndi yeⁿ'e yú chí nuuⁿndi yú? ⁸ ¿De'ē cúúvī chí nguéeⁿ ngaⁿ'a yú 'tíicā? S'uuúⁿ ní diiⁿ yú cosas chí nguéeⁿ n'daacā ní cuuvi candεε cosas chí n'daacā yeⁿ'e. 'Tíicā ngaⁿ'a tanáⁿ'a yā chí s'uuúⁿ ngi'cueeⁿ yú 'tíicā ní nguéeⁿ n'daacā yeⁿ'e yú. 'Iiⁿ'yāⁿ s'eeⁿ ní canee chí condenado yā.

Nducyáácá 'iiⁿ'yāⁿ ní dinuuⁿndi yā

⁹ ¿De'ē tuu'mi ngaⁿ'a yú? ¿'Áá n'daacā ca s'uuúⁿ chí 'iiⁿ'yāⁿ Israel s'uuúⁿ nguéeⁿ ti 'iiⁿ'yāⁿ chí nguéeⁿ 'iiⁿ'yāⁿ Israel? Nguéeⁿ 'tíicā. Ndís'tií deenú ní tan'dúúcā chí ngaⁿ'á chí s'uuúⁿ dinuuⁿndi yú tan'dúúcā 'iiⁿ'yāⁿ chí nguéeⁿ yeⁿ'e 'iiⁿ'yāⁿ Israel dinuuⁿndí yā. Ní nducyaaca 'iiⁿ'yāⁿ dinuuⁿndí yā ní na poder yeⁿ'e nuuⁿndi snée yā. ¹⁰ Canéeⁿ nguūⁿ na libro yeⁿ'e Dendyuūs 'tiicā:

Nguéeⁿ 'iiⁿ'yāⁿ chí n'dái yā, nguéeⁿ mar 'áámá yā.

- 11 Nguéé véé mar 'áámá 'iiⁿyāⁿ chi tuumicadíínuuⁿ yā, nguéé véé mar 'áámá 'iiⁿyāⁿ chi inⁿnuuⁿ yā Ndyuūs.
- 12 Nducyáácá yā ndaacadaamí yā yeⁿe Ndyuūs, nducyáácá yā dííⁿ yā cosas chi nguεε n'daacā. Nguéé 'áámá yā chi n'daacā idiíⁿ yā, nguéé ndíí mar 'áámá yā.
- 13 Daandú yā canéé tan'dúúcā 'áámá yáinyāⁿ chi candá'āī, 'tíicā daandú yā; ní nginnche'éí yā 'iiⁿyāⁿ ndúúcū cheendi yā. Ní chεeti cheendí yā ní snūū tan'dúúcā chi veneno yeⁿe cúú 'tíicā cheendí yā ndúúcū nduudu chi tan'dúúcā veneno, 'tíicā.
- 14 Dámaāⁿ ngaⁿ'á yā ndúúúú taaⁿ contra yeⁿe 'iiⁿyāⁿ ndúúcū nduudu chi nguéé n'daacā.
- 15 Ní neene nadacádíínuuⁿ yā chi 'caaⁿnuⁿ yā 'iiⁿyāⁿ.
- 16 Ní nducuéⁿ'ē cuaaⁿ naachí caⁿ'á yā, dííⁿ yā chi 'iiⁿyāⁿ cunncāā 'cueenú yā cuuvi ní dituūví yā nducuéⁿ'ē dendu'ū ndúúcū vaadi cadíínuuⁿ yeⁿ'é 'iiⁿyāⁿ s'eeⁿ.
- 17 Ní nguéé déenu yā yeⁿe yúúúⁿ chi candēē na vaadi 'diiⁿ yeⁿ'é Ndyuūs.
- 18 Ní nguéé nadacádíínuuⁿ yā chi canee chi 'va'a yā Ndyuūs.

19 Maaⁿ ní s'uuúⁿ deenu yú chi tanducuéⁿ'ē chi canéé nguūⁿ na ley yeⁿe Moisés ní cáávā 'iiⁿyāⁿ chi n'gεetinee yā ndúúcū ley miiⁿ. Ní cáávā 'iiⁿyāⁿ s'eeⁿ 'āā ntéé caaⁿmaⁿ yā nanááⁿ Ndyuūs chi nguεε deenú yā yeⁿ'ē. Ní 'íicú ley miiⁿ diiⁿ chi Ndyuūs caⁿ'á yā n'diichi yā nuuⁿndi yeⁿ'é nducyaaca 'iiⁿyāⁿ yeⁿ'e núúⁿmán iⁿ'yeeⁿdí. 20 Ní Ndyuūs nguéé dííⁿ yā recibir 'iiⁿyāⁿ cáávā chi dííⁿ yā tan'dúúcā chi ngaⁿ'a ley miiⁿ caati ley miiⁿ n'g'iⁿi s'uuúⁿ chi véé nuuⁿndi yeⁿ'e yú nanááⁿ Ndyuūs.

Ndyuūs nadinguaⁿ ai yā 'iiⁿyāⁿ caati i'téenu yā Jesucristo

21 Maaⁿ ní nduudu cuaacu yeⁿ'é Ndyuūs n'g'iⁿi s'uuúⁿ chi Ndyuūs dííⁿ yā recibir s'uuúⁿ manera chi 'āā vi'í cā yeⁿ'e ley miiⁿ. Ní canéé nguūⁿ na libro yeⁿ'é ley yeⁿ'e Ndyuūs yeⁿ'e chuū naachi saⁿ'a profetas ngaⁿ'a yā nduudu cuaacu yeⁿ'e chuū. 22 Ndyuūs dííⁿ yā recibir nducyáácá 'iiⁿyāⁿ dámaāⁿ cáávā chi i'téenu yā Jesucristo ní nanááⁿ Ndyuūs nducyáácá 'iiⁿyāⁿ yeⁿ'e núúⁿmán iⁿ'yeeⁿdí 'āā daamá nūuⁿ. Ndyuūs nguéé n'dáaⁿ yā. 23 Ní nducyáácá 'iiⁿyāⁿ yeⁿ'e núúⁿmán iⁿ'yeeⁿdí ní dinuuⁿndí yā ní nguéé cuuvi diiⁿ 'iiⁿyāⁿ s'eeⁿ chi dεeve n'dai tan'dúúcā Ndyuūs chi dεeve n'dai. 24 Naati Ndyuūs cáávā chi n'dai taavi yā dííⁿ yā recibir 'iiⁿyāⁿ cucáávā Jesucristo chi nadanguáⁿ'ai yā 'iiⁿyāⁿ. Ní Jesucristo nadí've yā nuuⁿndi yeⁿ'é 'iiⁿyāⁿ lado yeⁿ'é 'iiⁿyāⁿ. 25 Ní Ndyuūs dicho'ó yā Jesucristo iⁿ'yeeⁿdí 'cūū lado yeⁿ'e ofrenda chi ch'ií yā caava nuuⁿndi yeⁿ'e nducyáácá 'iiⁿyāⁿ. Ní cáávā chi ch'ií Cristo, Cristo cuuvi nadach'εεcú yā nuuⁿndi yeⁿ'e nducyaaca 'iiⁿyāⁿ chi i'téenu yā Jesucristo. 'Tíicā Ndyuūs ch'iⁿi yā 'iiⁿyāⁿ táácā cuuvi ndaa yā nanááⁿ Ndyuūs. Ní tiempo chi chó'ōo ní Ndyuūs chi n'dai taavi ch'iⁿi yā 'iiⁿyāⁿ chi Ndyuūs dííⁿ yā cosas chi cuaacu taachi nguéé dííⁿ yā cuenta yeⁿ'e nuuⁿndi yeⁿ'e 'iiⁿyāⁿ taachi 'āā 'cuéé dicho'ó yā Cristo. 26 Ní 'tíicā ntúūⁿ tiempo 'cūū Ndyuūs cáávā chi nadach'εεcú yā nuuⁿndi yeⁿ'e 'iiⁿyāⁿ ní ch'iⁿi yā chi caⁿ'á yā chi dííⁿ yā recibir 'iiⁿyāⁿ chí cuuvi yeⁿ'é yā 'iiⁿyāⁿ. 'Tíicā Ndyuūs ch'iⁿi yā chi cuaacu yā. Ní dííⁿ yā chi nducyáácá 'iiⁿyāⁿ chi i'téenu yā Cristo ní yeⁿ'e yā 'iiⁿyāⁿ.

27 Maaⁿ ní ¿dé'ē cúúví chi 'iiⁿyāⁿ cuuvi caaⁿ'mán yā chi ch'εεtē yā? Nguéé cuuvi yā. ¿Dε'ē cáávā? ¿'Áá cáávā chi diiⁿ yā tan'dúúcā chi ngaⁿ'a ley miiⁿ? Nguéé 'tíicā. Naati maaⁿ ní Ndyuūs dííⁿ yā recibir s'uuúⁿ dámaāⁿ cáávā chi i'teenu yú Jesucristo. 28 Maaⁿ ní n'diichi yú chi Ndyuūs dííⁿ yā recibir 'iiⁿyāⁿ caati cucáávā chi i'téenu yā Jesucristo ní nguéé caavā chi dííⁿ yā chi ngaⁿ'a ley miiⁿ.

29 ¿'Áá Ndyuūs ní dámaāⁿ Ndyuūs yeⁿ'e 'iiⁿyāⁿ Israel s'eeⁿ chi judíos? ¿'Áá nguéé Ndyuūs ní yeⁿ'e 'iiⁿyāⁿ chi nguéé yeⁿ'e ndaata Israel? Cuaacu chi Ndyuūs ní Ndyuūs dendú'ū yeⁿ'e 'iiⁿyāⁿ chi nguéé yeⁿ'e ndaata Israel. 30 Cuaacu chi véé 'áámá n'dyáⁿ'ā Ndyuūs. Ní Ndyuūs dííⁿ yā recibir nducyáácá 'iiⁿyāⁿ chi i'téenu yā Cristo 'iiⁿyāⁿ chi Israel s'eeⁿ ní 'tíicā ntuūⁿ 'iiⁿyāⁿ chi nguéé yeⁿ'e ndaata Israel. 31 Maaⁿ ní ¿'áá cucáávā chi i'téenu yú Jesucristo chi diiⁿ yú chi nguéé 'caandiveeⁿ yú tan'dúúcā chi ngaⁿ'a ley miiⁿ? Ní ley miiⁿ 'āā vi'í cā yeⁿ'e yú. Ní nguéé dichí'vē s'uuúⁿ. Mar 'áámá naaⁿ, nguεε 'tíicā. N'giindiveeⁿ ca yú chí ngaⁿ'ā ley miiⁿ.

4

Tan'dúúcā chí diiⁿ Abraham

¹ ¿De'ē ngaⁿa yú yeⁿe chiida yú Abraham chi chiida ndaata yeⁿe yú? ¿De'ē nndaacá yā nanááⁿ Ndyuūs? ² Nduuti chi Ndyuūs diíⁿ yā recibir Abraham miiⁿ cáávā cosa chi diíⁿ yā, tuu'mi ní Abraham cuuvi caaⁿmáⁿ yā chi ch'etete maáⁿ yā. Nguéé cuuvi caaⁿmáⁿ yā chi ch'etete maáⁿ yā nanááⁿ Ndyuūs. ³ Canéé nguūⁿ na libro yeⁿe Dendyuūs 'tíicā: Abraham i'téenu yā Ndyuūs ní cáávā chi i'téenu yā Ndyuūs, Ndyuūs diíⁿ yā recibir Abraham miiⁿ chi yeⁿé yā 'iiⁿ'yāⁿ. ⁴ Maaⁿ ní 'iiⁿ'yāⁿ chi idiiⁿ ntiiⁿnyuⁿ ní sta'a yā chí'vē yeⁿe ntiiⁿnyuⁿ yeⁿé yā. Nguéé nadacadíínuuⁿ yā chí'vē yeⁿe ntiiⁿnyuⁿ yeⁿé yā ní 'aama regalo naati tan'dúúcā 'áámá cosa chi can'diicú yā. ⁵ Maaⁿ ní nduuti chi 'áámá 'iiⁿ'yāⁿ i'téenu yā Jesucristo ní nguéé cuuvi diíⁿ yā ntiiⁿnyuⁿ cáávā chi cuuvi cu'téenu yā. Ní Ndyuūs diíⁿ yā recibir 'iiⁿ'yāⁿ nuuⁿndi chi cuuvi yeⁿé yā, tuu'mi ní Ndyuūs diíⁿ yā recibir 'iiⁿ'yāⁿ miiⁿ caati i'téenu yā Jesucristo. ⁶ 'Tiicá ntúūⁿ tiempo chi 'āā chó'ōo David ngaⁿá yā 'tíicā yeⁿe chuū. N'dai saⁿā chí Ndyuūs diíⁿ yā recibir chi yeⁿé yā saⁿa. Ní saⁿā miiⁿ ní n'dai sa n'dáá rá chi nguéé idiiⁿ sa ntiiⁿnyuⁿ chí cuuvi yeⁿé Ndyuūs. ⁷ 'Tíicā ngaⁿa sa: De'ē chúúcā n'dai 'iiⁿ'yāⁿ chi Ndyuūs nadach'εεcú yā nuuⁿndi yeⁿe yā ní diví yā nuuⁿndi yeⁿé yā chí 'āā ntéé vεε.

⁸ De'ē chúúcā n'dai 'iiⁿ'yāⁿ chi Ndyuūs diiⁿ cuenta yā chí nguεε véé nuuⁿndi yeⁿé yā.

⁹ Ní yeⁿe chí ngaⁿa David yeⁿe chí de'ē chúúcā n'dai 'iiⁿ'yāⁿ, ¿'áá dámaāⁿ caava 'iiⁿ'yāⁿ Israel chí yeⁿe na circuncisión? Nguεε 'tíicā, ti cáávā 'iiⁿ'yāⁿ chí nguéé yeⁿe 'iiⁿ'yāⁿ Israel ní nguéé véé ley yeⁿe circuncisión yeⁿe yā. 'Āā ngaⁿa 'nū chí canéé nguūⁿ na libro yeⁿé Ndyuūs 'tíicā. Abraham i'téenu yā Ndyuūs ní cáávā chí i'téenu yā Ndyuūs, Ndyuūs diíⁿ yā recibir Abraham miiⁿ chí yeⁿé yā 'iiⁿ'yāⁿ. ¹⁰ ¿De'ē tiempo chí Ndyuūs diíⁿ yā recibir Abraham miiⁿ? ¿'Áá taachi 'āā cuéé cuuvi circuncidado o cuayiivi taachi chí yā circuncidado? Ndyuūs 'āā diíⁿ yā recibir 'iiⁿ'yāⁿ taachi 'āā cuéé cuuvi yā circuncidado. ¹¹ Cuayiivi chí Abraham i'téenu yā Ndyuūs, tuu'mi ní chí yā circuncidado. Ní chuū ní 'áámá seña chí Ndyuūs diíⁿ yā recibir Abraham miiⁿ cáávā chí i'téenu yā Ndyuūs. Ní chuū ní diíⁿ yā chí Abraham miiⁿ ní cuuvi yā chiidaá nducyáácá 'iiⁿ'yāⁿ chí i'téenu yā Ndyuūs 'áará chí nguéé chí yā circuncidado. Ní 'tíicā Ndyuūs ngaⁿá yā chí diíⁿ yā recibir 'iiⁿ'yāⁿ chí nguéé circuncidado yā. ¹² Cuaacu chí Abraham ní chiidaá 'iiⁿ'yāⁿ circuncidado yā chí Israel. Naati 'tíicā chiidaá 'iiⁿ'yāⁿ s'eeⁿ nguéé dámaāⁿ cáávā chí circuncidado yā naati cáávā chí i'téenu yā Ndyuūs tan'dúúcā chí Abraham chí i'téenu yā Ndyuūs vmnááⁿ vmaāⁿ taachi 'āā cuéé cuuvi yā circuncidado yā.

Compromiso chí diíⁿ Ndyuūs ní chí cucáávā chí chí'teenú 'iiⁿ'yāⁿ

¹³ Ndyuūs caⁿa yā chí yā Abraham chí iⁿ'yeeⁿdí 'cūū cuuvi yeⁿe Abraham ndúúcū 'iiⁿ'yāⁿ yeⁿé yā chí chí cuayiivi ní Ndyuūs caⁿa yā chí yā Abraham 'tíicā. Ní nguéé cáávā chí idiiⁿ Abraham chí ngaⁿa ley caati cáávā chí i'téenu yā Ndyuūs. Ní cáávā chí i'téenu yā Ndyuūs, Ndyuūs diíⁿ yā cuenta chí saⁿā Abraham miiⁿ ní yeⁿé yā. ¹⁴ Ní nduuti chí 'iiⁿ'yāⁿ chí véé ley yeⁿe yā ní diíⁿ yā chí ngaⁿa ley miiⁿ ní cuuvi yeⁿé yā chí chí chí Ndyuūs caⁿa yā chí ca'a yā, tuu'mi ní nguéé dichí'vē yeⁿe 'iiⁿ'yāⁿ chí i'téenu yā Ndyuūs. Ní nguéé dichí'vē chí chí chí Ndyuūs caⁿa yā chí ca'a yā chí cuuvi yeⁿé yā cáávā chí i'téenu yā. ¹⁵ Naachi véé ley, véé castigo cáávā 'iiⁿ'yāⁿ chí nguéé diíⁿ yā chí chí chí ngaⁿā. Naachi nguéé véé ley, 'iiⁿ'yāⁿ nguéé cuuvi diíⁿ yā nuuⁿndi chí contra ley.

¹⁶ Ndyuūs caⁿa yā chí ca'a yā compromiso yeⁿé yā, compromiso chí n'dai taavi 'iiⁿ'yāⁿ chí cuuvi yeⁿé yā cucáávā chí i'téenu yā Ndyuūs ní nguεε nadí'vε yā yeⁿe. Ní 'tíicā seguro cānee chí Ndyuūs caⁿa yā chí ca'a yā chí cuuvi yeⁿe nducyáácá 'iiⁿ'yāⁿ chí yeⁿe ndaata Israel ní nguéé dámaāⁿ caava 'iiⁿ'yāⁿ chí véé ley yeⁿé yā ní diíⁿ yā chí ngaⁿa ley miiⁿ, naati cáávā nducyaaca 'iiⁿ'yāⁿ chí i'téenu yā Ndyuūs tan'dúúcā chí Abraham chí i'téenu yā Ndyuūs. 'Tíicā Abraham miiⁿ ní cuuvi chiidaá nducyaaca s'uuúⁿ. ¹⁷ Ní canéé nguūⁿ na libro yeⁿé Ndyuūs 'tíicā. Ndyuūs ngaⁿa yā ngii yā Abraham: Díí Abraham, 'úú idiiⁿ chí díí cuuvi chiidaá 'yaaⁿ n'dái naciones. Ní nanááⁿ Ndyuūs chuū ní n'daacā canee,

ní Abraham ní i'téenu yā Ndyuūs chi cuaacu ca'á yā vida 'iin'yān chi n'díi. Ní ca'n'á yā din'dai yā cosas chi 'āā cuéé snaaⁿ yú.

¹⁸ Abraham miiⁿ taachi 'āā cuéé de'ē vεε chi cānee ngínú yā, chi'teēnu yā Ndyuūs. Ní Ndyuūs ní díiⁿ yā chí cūnee ngiinú yā yeⁿ'ē chi Ndyuūs caⁿ'a yā ca'a yā chi cuuví yeⁿ'e yā. Ní cáāvā chuū ni Abraham miiⁿ ní chiī chiidaá 'yaaⁿ n'dáí naciones tan'dúúca chi Ndyuūs 'āā ngaⁿ'a yā yeⁿ'e yā. Ní Ndyuūs ngaⁿ'á yā: 'Tíicā cuuví 'yaaⁿ taavi ndaata yeⁿ'ē dii. ¹⁹ Saⁿ'a Abraham miiⁿ 'āā ngii sa tan'dúúca 'aama ciento nduūyū yeⁿ'e sa. Ní 'tiicá ntūūⁿ véé nduūyū yeⁿ'e Sara chi n'daata yeⁿ'ē sa. Ní canéé yā tan'dúúca 'iin'yān chi n'diī caati Abraham ndúúcu Sara miiⁿ nguéé ch'iīndi daiya tá. 'Áará chi 'tíicā ní nguéé ch'iīndi daiya yā Abraham miiⁿ chi'téenu yā Ndyuūs. ²⁰ Ní nguéé díiⁿ yā 'uūvī vaanicadínūūⁿ yeⁿ'e yā yeⁿ'e chi Ndyuūs caⁿ'a yā chi diiⁿ yā cááva yā naati chi'teēnu cá yā ní véé ca confianza yeⁿ'é yā ndúúcu Ndyuūs. Ní dich'εeté yā Ndyuūs. ²¹ Ní deenú n'dai yā chi Ndyuūs cuuví díiⁿ yā nducuéⁿ'ē chi caⁿ'a yā chi cuuví díiⁿ yā. ²² Ni cucáāvā chi Abraham i'téenu yā 'tíicā Ndyuūs díiⁿ yā chi cuuvi yeⁿ'é yā 'iin'yān.

²³ Ní nduudu chi canéé nguūⁿ chi Ndyuūs ngaⁿ'a yeⁿ'e Abraham miiⁿ chi díiⁿ yā chi cuuví yeⁿ'é yā cáāvā chi i'téenu yā Ndyuūs nguéé dámaāⁿ caavā Abraham. ²⁴ 'Tiicá ntūūⁿ ní cáāvā s'uūūⁿ cánéé nguūⁿ. Ndyuūs díiⁿ yā recibir s'uuúⁿ chi cuuvi yeⁿ'é yā s'uuúⁿ chi cu'téenu yú Ndyuūs chi nadicuéⁿ yā Señor Jesucristo yeⁿ'e yú yeⁿ'e nguaaⁿ tináⁿ'ā. ²⁵ Ndyuūs dicho'ó yā Jesucristo caati ch'iī yā cucáāvā nuuⁿndi yeⁿ'e yú. Ní nadicuéⁿ yā Jesucristo yeⁿ'e nguaaⁿ tináⁿ'ā caati Ndyuūs cuuvi díiⁿ yā recibir s'uuúⁿ ní yeⁿ'é Ndyuūs s'uuúⁿ.

5

Véé chi cuuvi yeⁿ'e yú taachi Ndyuūs ngaⁿ'a yā chi nguéé véé nuuⁿndi yeⁿ'e yú

¹ Maaⁿ ní chi Ndyuūs díiⁿ yā recibir s'uuuⁿ cáāvā chi i'téenu yú Jesucristo véé vaadī 'diiⁿ yeⁿ'e yú ndúúcu Ndyuūs caava Señor Jesucristo yeⁿ'e yú. ² Ní cáāvā Señor Jesucristo ndaa yú nanááⁿ Ndyuūs. Ní Ndyuūs itée yā s'uuúⁿ dendu'ū chi n'dai taavi yeⁿ'é yā. Ní díitú i'téenu yú ndúúcu dendu'ū chi n'dai yeⁿ'é yā chi itée yā s'uuúⁿ. Ní yeenú n'dai yú ní canéé ngiinu yú chíiⁿ chí cuuvi yeⁿ'e yú na va'ai chεeti nguuvi naachi canéé Ndyuūs chi deεvé n'dai. ³ Ní 'tiicá ntūūⁿ yeenú taavi yú taachi n'geenu yú ngii caati deenu yú chi taachi n'geenu yú ngii ní n'daacā ca yeⁿ'e yú ti véé cá paciencia yeⁿ'e yú. ⁴ Ní taachi cuchεε yú yeⁿ'e nducuéⁿ'ē, tuu'mi ní deenu yú chi diiⁿ yú chi Ndyuūs neⁿ'e yā chi diiⁿ yú 'túúca. Ní cūnee ngiinu yú chi cuuvi yeⁿ'e yú chi Ndyuūs caⁿ'á yā tée yā s'uuúⁿ. ⁵ Ní deenu yú chi cuaacu chi cuuvi yeⁿ'e yú chi cūnee ngiinu yú. Ní nguéé 'cuināaⁿ yú caati Ndyuūs 'āā tee yā s'uūūⁿ na staava yeⁿ'e yú vaadī neⁿ'e yeⁿ'é yā cucáāvā Espíritu N'dai yeⁿ'é yā chi 'āā tee yā s'uūūⁿ.

⁶ Taachi 'āā cuéé cuuvi nanguaⁿ'āi yú cucáāvā maaⁿ yú, tuu'mi ní Ndyuūs dicho'ó yā Cristo tiempo chi neⁿ'e yā caati Cristo ch'iī yā cáāvā 'iin'yān chi véé nuuⁿndi yeⁿ'e yā. ⁷ Nguéé n'gín'iī chi 'áámá 'iin'yān 'cuūvi yā cucáāvā táámá 'iin'yān chi nguéé nuuⁿndi yeⁿ'e yā. Ní n'dáá rá chi 'áámá 'iin'yān 'cuūvi yā cáāvā táámá 'iin'yān chi n'daāca díiⁿ yā, 'áará chi 'iin'yān chi cuaacu chi n'daāca yā. ⁸ Ní Ndyuūs ch'iⁿ'í yā chi neⁿ'é yā s'uuúⁿ taachi dicho'ó yā Cristo iⁿ'yeeⁿdí 'cūū chi ch'iī yā cáāvā s'uuúⁿ caati s'uuúⁿ véé nuūⁿndi yeⁿ'e yú. ⁹ Maaⁿ ní Ndyuūs díiⁿ yā recibir s'uuúⁿ cáāvā Cristo chi ch'iī yā chi nadanguáⁿ'ai yā s'uuúⁿ. Ní Ndyuūs caⁿ'á yā nadanguaⁿ'ai cá yā s'uuúⁿ yeⁿ'e castigo cucáāvā Cristo. ¹⁰ Ní taachi s'uuúⁿ 'āā cuéé cuuvi n'diichi yú Ndyuūs, Ndyuūs díiⁿ yā chi cuuvi yeⁿ'é yā s'uuúⁿ cáāvā Jesucristo chi ch'iī yā. Maaⁿ ní s'uuúⁿ ní yeⁿ'e Ndyuūs s'uuúⁿ ní nanguaⁿ'ai cā yú cáāvā chi Cristo cánduuchi yā ní yeⁿ'e yā s'uuúⁿ. ¹¹ Ní yeenu ca yú nanááⁿ Ndyuūs nguéé damaāⁿ cáāvā chuū ti yeⁿ'é Ndyuūs s'uuúⁿ cáāvā Señor Jesucristo yeⁿ'e yú. Ní cáāvā Cristo miiⁿ véé vaadī 'diiⁿ yeⁿ'e yú nanááⁿ Ndyuūs.

Yeⁿ'e saⁿ'ā Adán ndúúcu Cristo

¹² 'Tíicā caati cáāvā 'áámá saⁿ'ā chi duuchi Adán ndaā nuuⁿndi iⁿ'yeeⁿdí 'cūū. Ní cáāvā nuuⁿndi miiⁿ 'iin'yān n'diī yā. Maaⁿ ní chíiⁿ chi nducyaaca 'iin'yān ní 'cuūvi yā

caati nducyáaca yā ní dinuuⁿndi yā. ¹³ Ní nuuⁿndi miiⁿ canéé iⁿ'yeeⁿdí 'cūū. Ni 'iiⁿ'yāⁿ idinuuⁿndí yā vmnaaⁿ chi ndaā ley yeⁿ'e Moisés. Ní nguéé diíⁿ yā cuenta yeⁿ'e nuuⁿndi taachi nguéé ley miiⁿ chi ch'iⁿ'i 'iiⁿ'yāⁿ yeⁿ'ē nuuⁿndi. ¹⁴ ¿DÉ'ē yeⁿ'e chuū? Ndi tiempo chi canéé Adán ní dinuuⁿndi sa ndii tiempo chi canéé Moisés. Ní Moisés ca'á yā ley miiⁿ 'iiⁿ'yāⁿ s'eeⁿ chi dinuuⁿndí yā ní canéé chi 'cuūvi yā. Ní ch'iⁿ'i yā 'áará chi nguéé dinuuⁿndí yā tan'dúúcā Adán chi nguéé n'giindiveéⁿ yā chi ngaⁿ'a Ndyuūs. Ní cáávā chi Adán miiⁿ dinuuⁿndí yā, chuū ch'iⁿ'i 'iiⁿ'yāⁿ chi Daiyá Ndyuūs canéé chí cúchií ní 'iiⁿ'yāⁿ s'eeⁿ 'caandiveéⁿ yā nduudu yeⁿ'é Ndyuūs.

¹⁵ Ní nguéé cuuvi nduuvídaámá cosa chi Ndyuūs tee yā s'uuúⁿ ndúúcū nuuⁿndi chi diiⁿ Adán miiⁿ. Cáávā chi 'áámá saⁿ'ā Adán miiⁿ idinuuⁿndí yā, nducyaaca 'iiⁿ'yāⁿ canéé chi 'cuūvi yā caati condenado yā. Ní cáávā 'áámá saⁿ'ā Jesucristo, Ndyuūs dátēe yā s'uuúⁿ chi nadinguaⁿ'ái yā s'uuúⁿ ní nguéé nadíí'vē yú yeⁿ'é yā. Ní chuū chi tee Ndyuūs ní n'daacā ca ní cáávā n'deēe n'dái 'iiⁿ'yāⁿ. ¹⁶ Ní 'āā vi'í cā nuuⁿndi chi diiⁿ Adán yeⁿ'e chiiⁿ chi Ndyuūs tee yā 'iiⁿ'yāⁿ chi nadinguáⁿ'ai yā 'iiⁿ'yāⁿ. Cuayiivi chi Adán idinuuⁿndí yā nducyaaca 'iiⁿ'yāⁿ ní canéé yā condenado. Maaⁿ ní Ndyuūs nadinguáⁿ'ai yā 'iiⁿ'yāⁿ chi cuuvi yeⁿ'é yā 'iiⁿ'yāⁿ. Ní 'iiⁿ'yāⁿ s'eeⁿ nguéé nadíí'vē yā ní Ndyuūs nadinguáⁿ'ai yā 'iiⁿ'yāⁿ chi n'deēe n'dái nuuⁿndi idiíⁿ yā. ¹⁷ Cuaacu chi 'iiⁿ'yāⁿ canéé chi 'cuūvi yā cáávā chi 'áámá saⁿ'ā dinuuⁿndi sa. Ní maaⁿ ní n'daacā ca chi diiⁿ 'áámá 'iiⁿ'yāⁿ chi Jesucristo miiⁿ. Ni cucáávā Jesucristo miiⁿ Ndyuūs diíⁿ yā recibir 'iiⁿ'yāⁿ s'eeⁿ chi cuuvi yeⁿ'é yā. Ní 'iiⁿ'yāⁿ s'eeⁿ nguéé nadíí'vē yā yeⁿ'e chuū. 'iiⁿ'yāⁿ s'eeⁿ ní véé poder yeⁿ'é Ndyuūs ndúúcu yā chi 'cuēetinéé n'dáaca yā na vida yeⁿ'é yā chi ngai.

¹⁸ 'Tíicā nducyáacá 'iiⁿ'yāⁿ canee condenado yā cáávā 'áámá saⁿ'ā Adán chi dinuuⁿndí yā. Naati cáávā Jesucristo miiⁿ chi diíⁿ yā chi neⁿ'e Ndyuūs, Ndyuūs diíⁿ yā recibir nducyaaca 'iiⁿ'yāⁿ chi cuuví yeⁿ'é yā ni véé vida cueⁿ'e daāⁿmaⁿ yeⁿ'é yā. ¹⁹ Chuū ní neⁿ'e caaⁿ'maⁿ 'tíicā. Cáávā chi 'áámá saⁿ'ā Adán nguéé ch'iindiveeⁿ sa nduudu chi ngaⁿ'a Ndyuūs nducyaaca 'iiⁿ'yāⁿ snée yā maaⁿ poder yeⁿ'ē nuuⁿndi. 'Tiicá ntúūⁿ. Cáávā chi 'áámá saⁿ'a Cristo ch'iindiveeⁿ yā nduudu chi ngaⁿ'a Ndyuūs néené 'yaaⁿ 'iiⁿ'yāⁿ cuuví ndaa yā nanááⁿ Ndyuūs, ní cuuvi yeⁿ'é Ndyuūs 'iiⁿ'yāⁿ s'eeⁿ.

²⁰ Ndyuūs tee yā ley miiⁿ caati 'iiⁿ'yāⁿ cuuví n'diichi cá yā chi dinuuⁿndi cá yā. Ní taachi dinuuⁿndi cá yā Ndyuūs tee yā vaadí n'dai ca yeⁿ'e yā chí ch'εεε ca chi nadanguáⁿ'ai yā 'iiⁿ'yāⁿ nguéé ti nuuⁿndi miiⁿ. ²¹ Maaⁿ ní cho'ó chuū caati taachi 'iiⁿ'yāⁿ idinuuⁿndí yā ní canéé chi 'cuūvi yā cáávā poder yeⁿ'e nuuⁿndi. 'Tiicá ntúūⁿ vaadí n'dai ca yeⁿ'é Ndyuūs ndúúcu poder yeⁿ'é yā diiⁿ chi diíⁿ yā aceptar s'uuúⁿ chi cuuvi yeⁿ'é yā s'uuúⁿ ní diiⁿ chi véé vida cueⁿ'e daāⁿmaⁿ yeⁿ'e yú cucáávā Señor Jesucristo yeⁿ'e yú.

6

N'dii yú cucáávā nuuⁿndi yeⁿ'e yú naati canduuchi yú cucáávā Cristo

¹ Maaⁿ ní ¿de'é caaⁿ'māⁿ yú? ¿'Áá dinuuⁿndi yú caati Ndyuūs cuuvi tée yā s'uuúⁿ vaadí n'dai ca yeⁿ'é yā? ² Nguéé diiⁿ yú 'tíicā. 'Āā ch'iⁿ'i yú yeⁿ'e nuuⁿndi chi diiⁿ yú, ¿táacā cuuvi 'cuēetinéé chiichi yú ndúúcū nuuⁿndi chi diiⁿ yú? ³ ¿'Áá nguéé déenu ndís'tií chi nducyaaca s'uuúⁿ chi cheēdínuūⁿniⁿ yú cáávā chi s'uuúⁿ ní yeⁿ'e Cristo s'uuúⁿ, ní véé 'aama parte yeⁿ'e yú ndúúcū Cristo taachi ch'iⁿ'i yā? ⁴ Ní caavā chí cheēdínuūⁿniⁿ yú tan'dúúcā chi daama ch'eēchi yú ndúúcū Cristo, ní tan'dúúcā chi ch'iⁿ'i yú ndúúcu yā caati cuuvi nnduuchi yú yeⁿ'ē nguaaⁿ tináⁿ'ā ndúúcū Cristo. Ní tiicá ntúūⁿ véé vida ngai yeⁿ'e yú ti 'tíicā Cristo nduuchi yā yeⁿ'e nguaaⁿ tinaⁿ'ā cáávā poder chi ch'εεé ca yeⁿ'e Chiida yú.

⁵ Ní nduuti chi tan'dúúcā chi daama cueⁿ'e yú ndúúcu yā taachi ch'iⁿ'i yā, 'tiicá ntúūⁿ cuaacu níⁿ'nyúⁿ chi dáámá cunee yú ndúúcu yā. Ní nnduuchi yú tan'dúúcā chí maáⁿ yā nnduuchi yā yeⁿ'ē nguaaⁿ tináⁿ'ā. ⁶ Ní chuū ní deenu yú vida ndiicū yeⁿ'e yú tan'dúúcā chí dáámá ca'neeⁿngá'āa na cruz ndúúcū Señor Jesucristo yeⁿ'e yú caati vida ndiicū yeⁿ'e yú ndúúcū chi neⁿ'e chi diiⁿ yú ní canee tan'dúúcā chí n'dií ndúúcū poder yeⁿ'e

nuuⁿndi caati nguéé cuuvi caaⁿmaⁿ ntiiⁿnyuⁿ vida yeⁿe yú chi dinuuⁿndi yú. ⁷ Deenu yú chi taachi 'iiⁿyāⁿ 'āā ch'iī yā 'āā ntéé cuuvi dinuuⁿndí yā. ⁸ Ní nduuti chi s'uuuⁿ ní 'āā ch'iī yú dáamá ndúúcu Cristo miiⁿ, tuu'mi ní i'téenu yú chi canduuchi yú ní cunee yú ndúúcu Cristo. ⁹ Deenu yú chi taachi Cristo 'āā ch'iī yā ní nduuchí yā yeⁿe nguaaⁿ tináⁿā, 'āā ntéé nguεεcunée yā 'cuūví yā caati vaadī n'gii míⁿ nguéé de'ē veε cuuvi diiⁿ ndúúcu yā. ¹⁰ Taachi Cristo ch'iī yā, ch'iī yā 'áamá vmneⁿé nūuⁿ ní cáávā nducyáácá 'iiⁿyāⁿ ní cáávā nuuⁿndi yeⁿé yā. Maaⁿ ní nduuchí yā ní vida yeⁿe yā nduuchi yā cáávā Ndyuūs. ¹¹ Tiicá ntúūⁿ ndís'tiī diíⁿ nī cuenta chi n'diī nī ndúúcu nuuⁿndi yeⁿe nī ní maaⁿ ní canduuchí nī cáávā Ndyuūs caati ndís'tiī ní yeⁿe Jesucristo ndís'tiī ní Jesucristo ní Señor yeⁿe yú.

¹² Ní cáávā chuū ndís'tiī nguéé ca'á nī lugar chi nuuⁿndi caaⁿmaⁿ ntiiⁿnyuⁿ yeⁿe cuerpo yeⁿe nī ti ndís'tiī diíⁿ nī nuuⁿndi tan'dúúca chi neⁿe cuerpo yeⁿé nī. ¹³ Ní nguéé nca'á nī cuerpo yeⁿe maaⁿ nī na poder yeⁿe nuuⁿndi chi cuuvi dinuuⁿndí nī tan'dúúca chi neⁿe cuerpo yeⁿé nī. Nguéé diíⁿ nī 'tíicā. Nca'á nī vida yeⁿe maáⁿ nī ndúúcu cuerpo yeⁿe maáⁿ nī maaⁿ poder yeⁿe Ndyuūs tan'dúúca chi 'āā n'diī nī ní 'āā nduuchí nī ndúúcu 'áamá vida ngái. Maaⁿ ní cuuvi din'daacá nī. ¹⁴ Ní nuuⁿndi ní nguéé véé poder yeⁿe nanááⁿ ndís'tiī caati nguéé caneé nī maaⁿ yeⁿe ley miiⁿ naati canee nī maaⁿ nducuéⁿē vaadī n'dai yeⁿé Ndyuūs.

Yeⁿe ejemplo yeⁿe 'iiⁿyāⁿ chi 'áamá idiíⁿ yā ntiiⁿnyuⁿ yeⁿé Ndyuūs

¹⁵ ¿Tuu'mi ní de'ē diiⁿ yú? ¿Áá diiⁿ yú nuuⁿndi caati 'āā ntéé canee yú maaⁿ ley miiⁿ naati canee yú maaⁿ dendu'ū chi n'dai taavi chi yeⁿé Ndyuūs? Nguεε yeⁿe mar 'áamá naaⁿ. ¹⁶ Ndís'tiī ní deenu nī chi nduuti chi ca'á nī vida yeⁿe maáⁿ nī na ta'a 'áamá patrón yeⁿe nī ní 'áamá caneé nī chi diíⁿ nī ntiiⁿnyuⁿ chi ngaⁿ'a 'iiví nī, tuu'mi ndís'tiī ní esclavos ndís'tiī yeⁿe 'iiví nī. Ní canéé chí diíⁿ nī nducuéⁿē chí ngaⁿ'a 'iiví nī chi diíⁿ nī. 'Tiicá ntúūⁿ nduuti chi diíⁿ nī chi ngaⁿ'a nuuⁿndi chi diíⁿ nī tuu'mi ní canee nī tan'dúúca chi nuuⁿndi miiⁿ patrón yeⁿe nī. Ní cuuvi 'cuūví nī cueⁿe daāⁿmaⁿ. Ní nduuti chi diíⁿ nī chi ngaⁿ'a Ndyuūs, tuu'mi ní n'daacā diíⁿ nī nanááⁿ Ndyuūs. ¹⁷ 'Úú ní ca'á gracias Ndyuūs caava ndís'tiī caati ndís'tiī 'áará chi tiempo chi chó'ōo ní ndís'tiī esclavos yeⁿe nuuⁿndi ndís'tiī naati maaⁿ ní ch'iindiveén nī ndúúcu nuuⁿmaⁿ staava yeⁿé nī nduudu cuaacu yeⁿé Ndyuūs chi 'iiⁿyāⁿ s'eeⁿ 'āā chi'cueén yā ndís'tiī. ¹⁸ Ní taachi canee libre nī yeⁿe poder yeⁿe nuuⁿndi, tuu'mi ní ndís'tiī diíⁿ nī nducuéⁿē chi n'daacā cáávā poder yeⁿé Ndyuūs chí ngaⁿ'a ntiiⁿnyuⁿ yeⁿé nī. ¹⁹ Ngaⁿ'á ndúúcu ndís'tiī ndúúcu nduudu chi tuumicadiinúúⁿ nī caati ndís'tiī cuuvi tuumicadiinuuⁿ cá nī. Tiempo chi chó'ōo ndís'tiī s'neéⁿ nī cuerpo yeⁿé nī cáávā nuuⁿndi ní dinuuⁿndí nī tan'dúúca chi maaⁿ cuerpo yeⁿé nī neⁿe chi diíⁿ nī. Ní diiⁿ cá nī chi nguéé n'daacā. Maaⁿ ní 'āā 'neéⁿ nī cuerpo yeⁿe nī cáávā chi diíⁿ nī cosa chi n'daacā ní nducuéⁿē chi diíⁿ nī, diíⁿ nī cáávā Ndyuūs.

²⁰ Taachi ndís'tiī canee nī maaⁿ poder yeⁿe nuuⁿndi, nguéé cuuvi diíⁿ nī dendu'ū chi n'daacā. ²¹ Ní ¿de'ē chi n'daacā chi diíⁿ nī aprovechar yeⁿe nuuⁿndi chi diíⁿ nī chí ngii 'cuináaⁿ nī yeⁿe? Chíⁿ chi diiⁿ chi caⁿ'á nī 'cuūví nī cueⁿe daāⁿmaⁿ. ²² Naati maaⁿ ní nguéé caneé nī maaⁿ poder yeⁿe nuuⁿndi caati dichí'vε nī Ndyuūs chi diíⁿ nī ntiiⁿnyuⁿ yeⁿé Ndyuūs. Ní cuayiivi ní véé vida cueⁿe daāⁿmaⁿ chi yeⁿe nī. ²³ Chí chii'vε yeⁿe nuuⁿndi miiⁿ ní diiⁿ chi 'iiⁿyāⁿ ch'iī yā cueⁿe daāⁿmaⁿ naati chiiⁿ chi Ndyuūs téε yā 'iiⁿyāⁿ s'eeⁿ ní regalo chi vida cueⁿe daāⁿmaⁿ ti 'iiⁿyāⁿ s'eeⁿ ní yeⁿe Jesucristo chi Señor yeⁿe yú.

7

Ejemplo yeⁿe 'iiⁿyāⁿ chi n'giindivaacu yā

¹ Ndís'tiī hermanos yeⁿé chí véé ley yeⁿé nī, deenu nī chi 'iiⁿyāⁿ canéé chí 'caandiveén yā ley miiⁿ nuuⁿmáⁿ neⁿe chí canduuchí yā. ² Maaⁿ ní ca'á 'aama ejemplo. 'Áámá n'daataá chi n'giindivaacu tá ní véé isaⁿ'ā yeⁿe tá, n'daataá miiⁿ ní n'daataá yeⁿe isaⁿ'ā tá tanducuéⁿē tiempo chi canduuchi sa tan'dúúca chi ngaⁿ'a ley. Ní taachi ch'iī isaⁿ'ā yeⁿe

tá canee tá libre yeⁿe ley miiⁿ chi ngaⁿa yeⁿe isaⁿā yeⁿē tá. ³ Naati taachi cánduuchi isaⁿā yeⁿe tá ní caⁿa tá ndúúcu táámá saⁿā, tuuⁿmi ní idinuūⁿndí ta. Ní nduuti chi ch'iī isaⁿā yeⁿe tá, nguéé canee yā maaⁿ ley yeⁿe 'iīⁿyāⁿ chi n'giindivaacú yā ní cuuvi 'caandavaacú yā ndúúcu táámá saⁿā ní nguéé dinuuⁿndí tá.

⁴ Ní 'tiicá ntúūⁿ ndís'tiī hermanos yeⁿé chi yeⁿe Cristo, ley miiⁿ tan'dúúca esposo yeⁿe nī chi 'āā n'díí, ní 'āā n'diī ley miiⁿ cáávā ndís'tiī. Ní maaⁿ ní cuuvi yeⁿe táámá yā ndís'tiī ní yeⁿe Cristo ndís'tiī. 'Iīⁿyāⁿ miiⁿ ní nducuéen yā yeⁿe nguaaⁿ tináⁿā ní cucáávā 'iīⁿyāⁿ miiⁿ dichii've yú Ndyuūs. ⁵ Ní tiempo chi chó'ōo taachi diiⁿ yú tan'dúúca chi neⁿe maaⁿ cuerpo yeⁿe yú tuumicadíínuuⁿ yú chi véé nuuⁿndí yeⁿe yú cáávā chi ngaⁿa ley miiⁿ chi diiⁿ yú 'tíicā. Ní nuuⁿndí chi diiⁿ yú diiⁿ chi 'cuūvi yú cueⁿe daāⁿmaⁿ. ⁶ Naati maaⁿ ní diiⁿ yú cuenta chi n'diī yú yeⁿe ley miiⁿ. Ní nguéé canee yú maaⁿ poder yeⁿē ley miiⁿ. Maaⁿ ní libre canee yú chi dichii've yú Ndyuūs ndúúcu vida yeⁿe yú chi ngai. Ní vida yeⁿe yú ní yeⁿe Espíritu N'dai yeⁿé Ndyuūs. Ní nguéé canee yú maaⁿ poder yeⁿe ley ndiicúu chi canéé nguūⁿ.

Nuuⁿndí chi idiiⁿ yú

⁷ Maaⁿ ní ¿de'ē caaⁿmaⁿ yú? ¿'Áá ley miiⁿ chi nuuⁿndí? Nguéé yeⁿē mar 'áámá naaⁿ. 'Úú ní nguéé n'diichí nuuⁿndí nduuti chi nguéé cáávā ley miiⁿ. Ní 'tiicá ntúūⁿ, 'úú ní nguéé deenú chi nuuⁿndí 'úú nduuti chi neⁿé dendu'ū chi véé yeⁿe tanáⁿā 'iīⁿyāⁿ nduuti chi ley miiⁿ nguéé 'tíicā ngaⁿa: Nguéé dinéⁿe nī dendu'ū chi véé yeⁿe tanáⁿā 'iīⁿyāⁿ. ⁸ Ní cáávā ley miiⁿ tuumicadiinúúⁿ nuūⁿndí miiⁿ chi cuuvi neⁿé dííⁿ tanducuéⁿē dendu'ū chi nuuⁿndí. Ní ndúúti chi nguéé cáávā ley miiⁿ, nuuⁿndí miiⁿ canéé tan'dúúca chi n'diī. Ní nguéé deenú yeⁿē. ⁹ Tiempo chi chó'ōo 'úú ní nadacadíínuuⁿ chi n'daacā canéé nguéé ndúúcu ley miiⁿ naati taachi n'diichí ley miiⁿ, tuuⁿmi n'diichí nuuⁿndí, ní 'úú ní canéé tan'dúúca chi ch'iī. ¹⁰ Ní 'tíicā ley miiⁿ ch'iīⁿ 'iīⁿyāⁿ táácā cuuvi cunduuchí yā cueⁿe daāⁿmaⁿ, naati cucáávā 'úú n'giⁿi chi idiiⁿ nuuⁿndí tuuⁿmi ní cuuvi 'cuūvi cueⁿe daāⁿmaⁿ. ¹¹ Ní cáávā ley miiⁿ deenú chi nuuⁿndí chi dííⁿ chííⁿ chí chinnche'ei 'úú ti nguéé dííⁿ tan'dúúca chi ch'iindiveⁿ ley miiⁿ. Naati cáávā ley miiⁿ, deenú nuuⁿndí chi dííⁿ ní diiⁿ chi ch'iī cueⁿe daāⁿmaⁿ.

¹² Ní ley miiⁿ ní deēve ní yeⁿe Ndyuūs. Ní mandamiento yeⁿe ley miiⁿ 'tiicá ntúūⁿ ní deēve ní cuaacu ní n'dáácā. ¹³ Tuuⁿmi ní ley ¿'áá cucáávā chi n'daacā diiⁿ chi 'úú 'cuūvi cueⁿe daāⁿmaⁿ? Nguéé 'túúca. Nuūⁿndí chi dííⁿ, diiⁿ chi 'úú 'cuūvi. Ní 'tíicā cuuvi deenú nuuⁿndí ti nuuⁿndí miiⁿ ch'iīⁿ chi cuáácú chí nuuⁿndí cáávā ley miiⁿ chi cosa chi n'daacā. Ní cosa chi n'daacā miiⁿ ní mandamiento chi ch'iīⁿ chi nguēe n'daacā chí nuūⁿndí miiⁿ.

¹⁴ Deenu yú chi ley miiⁿ ní yeⁿe Espíritu N'dai yeⁿé Ndyuūs. Naati 'úú ní saⁿā yeⁿe iīⁿyeⁿdí 'cūū. 'Úú chi dinuuⁿndí ní canéé maaⁿ poder yeⁿe nuuⁿndí chi idiiⁿ nuuⁿndí. ¹⁵ 'Úú nguéé deenú de'ε cáávā chi dííⁿ chiiⁿ chi dííⁿ. 'Úú nguéé dííⁿ chi neⁿé dííⁿ naati dííⁿ chi nguéé neⁿé dííⁿ ti nguéé neⁿé dííⁿ. ¹⁶ Ní nduuti chi nguéé neⁿé dííⁿ ní chííⁿ chí dííⁿ, tuuⁿmi ní deenú chi ley miiⁿ ní n'dai. ¹⁷ 'Tíicā nguéé 'úú chí dííⁿ, naati nuuⁿndí chi canéé nduucú chííⁿ diiⁿ chi dinuuⁿndí. ¹⁸ Caati deenú chi maaⁿ 'úú chí cuerpo yeⁿé nguēe veē mar 'áámá dendu'ū chi n'daacā. Cuaacu chi 'úú neⁿé dííⁿ chi n'daacā naati nguéé deenú táácā cuuvi dííⁿ chi n'daacā. ¹⁹ Dendu'ū chi n'dai chi neⁿé dííⁿ, nguéé dííⁿ naati chi nguéé n'daacā chi nguéé neⁿé dííⁿ, chííⁿ chí dííⁿ. ²⁰ Maaⁿ ní nduuti chi dííⁿ chi nguéé neⁿé dííⁿ, tuuⁿmi nguéé 'úú chí dííⁿ naati nuuⁿndí ndúúcu poder yeⁿē chí canéé nduucú chííⁿ diiⁿ chí dinuuⁿndí.

²¹ Ní 'tíicā canee nduucú. Taachi neⁿé dííⁿ chí n'daacā miiⁿ, dámaāⁿ chí nguéé n'daacā canee nduucú. ²² Cuáácú chí neⁿé dííⁿ chiiⁿ chí ngaⁿā ley yeⁿé Ndyuūs. ²³ Naati deenú chí véé táámá cosa na cuerpo yeⁿé chí nguéé neⁿé chí 'úú idiiⁿ cosa chí n'daacā tan'dúúca chí nadacadiinúúⁿ chí dííⁿ. Chuū ní ley yeⁿe nuūⁿndí chí véé na cuerpo yeⁿé. Ní 'úú canéé tan'dúúca preso yeⁿe ley yeⁿe nuuⁿndí. 'Tíicā 'úú.

²⁴ Dé'ε chúúca nndaachií yeⁿé maaⁿ. ¿Du'ú cuuvi nadanguáⁿai 'úú yeⁿe cuerpo yeⁿé chí dííⁿ chí 'cuūvi cueⁿe daāⁿmaⁿ? ²⁵ Maaⁿ ní 'úú ní ncā'a gracias Ndyuūs chí dámaaⁿ

Ndyuūs cuuvi nadinguáⁿai yā 'úú cáávā Jesucristo Señor yeⁿe yú. 'Úú ní dichíí'vē 'úú ley yeⁿe Ndyuūs ndúú^cū núúⁿmáⁿ staāvā yeⁿé naati cuerpo yeⁿé ní neⁿe dinuuⁿndi cáávā ley yeⁿe nuuⁿndi chi canéé nduucú.

8

Vida chi véé cáávā Espíritu N'dai yeⁿé Ndyuūs

¹ Maaⁿ ní 'iiⁿyāⁿ s'eeⁿ chi yeⁿe Señor Jesucristo nguéé condenado yā. Ní 'iiⁿyāⁿ s'eeⁿ nguéé n'gēetineé yā chi díⁿ yā chiiⁿ chi neⁿe cuerpo yeⁿe maáⁿ yā naati n'gēetineé yā tan'dúú^cā chi neⁿe Espíritu N'dai yeⁿé Ndyuūs. ² Caati ley yeⁿe Espíritu N'dai yeⁿé Ndyuūs chiiⁿ diiⁿ chi véé vida cueⁿe daāⁿmaⁿ yeⁿe 'iiⁿyāⁿ chi yeⁿe Jesucristo. Ní diiⁿ chi 'úú caneé libre yeⁿē nuuⁿndi chi diiⁿ chi ch'íí cueⁿe daāⁿmaⁿ. ³ Ní Ndyuūs díⁿ yā chiiⁿ chi nguéé cuuvi diiⁿ ley yeⁿe Moisés miⁿ caati 'iiⁿyāⁿ ní duūvá yā na cuerpo yeⁿe yā. Ní Ndyuūs díⁿ yā condenar nuuⁿndi chi véé na cuerpo yeⁿé 'iiⁿyāⁿ yeⁿe iⁿ'yeeⁿdí 'cūū taachi dicho'ó yā 'áámá n'dyáⁿā Daiya yā ndúú^cū cuerpo tan'dúú^cā s'uuúⁿ cáávā chi divíi yā nuuⁿndi yeⁿé 'iiⁿyāⁿ. ⁴ Ní chúū Ndyuūs diiⁿ yā cáávā chi s'uūuⁿ cuuvi ch'ēetinee yú tan'dúú^cā chi ngaⁿa ley miⁿ ti yeⁿe Espíritu N'dai s'uuúⁿ. Ní nguéé diiⁿ yú chiiⁿ chi neⁿe maaⁿ cuerpo yeⁿe yú ti diiⁿ yú tan'dúú^cā chi neⁿe Espíritu N'dai yeⁿé Ndyuūs.

⁵ 'Iiⁿyāⁿ chi n'gēetineé yā ní díⁿ yā chi neⁿe maaⁿ cuerpo yeⁿé yā nacadiinúúⁿ yā ní diiⁿ yā dendu'ū chi neⁿé yā. 'Iiⁿyāⁿ chi yeⁿe Espíritu N'dai yeⁿé Ndyuūs nadacadiinúúⁿ yā ní díⁿ yā chi neⁿe Espíritu N'dai yeⁿe Ndyuūs. ⁶ Ní 'iiⁿyāⁿ chi nadacadiinúúⁿ yā ní díⁿ yā de'ē chi cuerpo yeⁿē maáⁿ yā neⁿe, ní 'cuūvi yā cueⁿe daāⁿmaⁿ naati 'iiⁿyāⁿ chi nadacadiinúúⁿ yā ní díⁿ yā dendu'ū chi neⁿe Espíritu N'dai yeⁿe Ndyuūs ní véé vida cueⁿe daāⁿmaⁿ yeⁿe yā ní n'gēetineé yā ndúú^cū vaadī 'diiⁿ. ⁷ 'Iiⁿyāⁿ chi nadacadiinúúⁿ yā dendu'ū chi yeⁿe cuerpo yeⁿé yā, 'iiⁿyāⁿ s'eeⁿ ní contra yeⁿé Ndyuūs 'iiⁿyāⁿ ti nguéé neⁿé yā díⁿ yā chi ngaⁿa ley miⁿ, ní nguéé cuuvi díⁿ yā. ⁸ Ní cáávā chuū 'iiⁿyāⁿ s'eeⁿ chi díⁿ yā tan'dúú^cā chi neⁿe cuerpo yeⁿe yā Ndyuūs nguéé inee yiinú yā chíⁿ chí díⁿ yā.

⁹ Naati maaⁿ ní ndís'tiī nguéé díⁿ nī tan'dúú^cā chi neⁿe cuerpo yeⁿe maáⁿ nī naati díⁿ nī tan'dúú^cā chi neⁿe Espíritu N'dai yeⁿé Ndyuūs ti maaⁿ ní Espíritu N'dai yeⁿé Ndyuūs cánée yā ndúú^cū ndís'tiī. Ní nduuti chi 'áámá 'iiⁿyāⁿ nguéé cánée yā ndúú^cū Espíritu yeⁿé Cristo, tuu'mi ní 'iiⁿyāⁿ 'cūū nguéé yeⁿe Cristo 'iiⁿyāⁿ. ¹⁰ Ní nduuti chí ndís'tiī ní yeⁿe Cristo ndís'tiī, 'áará chi cuerpo yeⁿé nī cuuvi n'diī cucáávā nuuⁿndi yeⁿé nī, tuu'mi ní canduuchí nī cáávā Espíritu N'dai yeⁿe Ndyuūs miⁿ caati Ndyuūs díⁿ yā aceptar ndís'tiī chi yeⁿé yā ndís'tiī. ¹¹ Ní ndúú^ti chi canéé nī ndúú^cū Espíritu N'dai yeⁿé Ndyuūs, Espíritu N'dai yeⁿé Ndyuūs chi nadacuéeⁿ yā Cristo yeⁿe nguaaⁿ tináⁿā, tuu'mi ní maaⁿ Ndyuūs miⁿ chi nadacuéeⁿ yā Cristo caⁿa yā chi tée yā cáávā Espíritu N'dai yeⁿé Ndyuūs chi canéé nduucú nī vida ngai na cuerpo yeⁿé nī chi 'āā n'díí.

¹² Ní cáávā chuū, ndís'tiī hermanos yeⁿé, véé chi canéé chi diiⁿ yú naati nguéé 'cuēetinee yú ní nguéé diiⁿ yú tan'dúú^cā chi neⁿe cuerpo yeⁿe yú. ¹³ Caati ndúú^ti chi diiⁿ yú tan'dúú^cā chi neⁿe cuerpo yeⁿe maaⁿ yú, tuu'mi ní cuuvi 'cuūvi yú cueⁿe daāⁿmaⁿ. Naati nduuti chi nguéé diiⁿ yú cuenta chí diiⁿ cuerpo yeⁿe yú, tuu'mi ní cáávā Espíritu N'dai yeⁿé Ndyuūs chi canee ndúú^cū yú 'cuēetinee yú.

¹⁴ Ní nducyáácá 'iiⁿyāⁿ chi Espíritu N'dai yeⁿé Ndyuūs ngaⁿa yā chi cuuvi díⁿ yā 'iiⁿyāⁿ s'eeⁿ ní daiya Dendyuūs 'iiⁿyāⁿ. ¹⁵ Ní Ndyuūs 'āā tee yā s'uuúⁿ Espíritu N'dai yeⁿé yā nguéé cáávā chí diiⁿ yú ntiⁿnyuⁿ yeⁿé yā chí di'va'a yú ley cáávā chí condenado yú taama vmnéⁿēe naati cáávā chí s'uuúⁿ ní daiya Ndyuūs s'uuúⁿ. 'Ícú cucáávā Espíritu N'dai yeⁿé Ndyuūs ní s'uuuⁿ ní cuuvi caaⁿmaⁿ yú: N'diī, Ndyuūs ní Chiidá. ¹⁶ Ní maaⁿ Espíritu N'dai yeⁿé Ndyuūs ngaⁿá yā ndúú^dú cuaacu ndúú^cū espíritu yeⁿe yú chí s'uuuⁿ ní daiya Dendyuūs s'uuúⁿ. ¹⁷ Ní nduuti chí s'uuuⁿ ní daiyá Ndyuūs s'uuuⁿ, tuu'mi ní véé chí cuuvi yeⁿe yú chí Ndyuūs caⁿa yā chí tée yā s'uuúⁿ. Ní cuta'a yú chí cuuvi yeⁿe yú ndúú^cū Cristo maáⁿ yā nduuti chí s'uuuⁿ ní 'cueenu yú cuuvi maaⁿ cáávā chí yeⁿe Cristo

s'uuún. Cuayivi ní vée parte yeⁿe yú ndúúcū Cristo ndúúcū vaadī dæεve n'dái taavi yeⁿé yā.

¹⁸ Maaⁿ ní inadacadiinúún chí dendu'ū chi n'geenu yú ngii maaⁿ nguée dé'ē vεε chí ch'εεte nguée tan'dúúcā dendu'ū chi dæεve ca ní ch'εεte ca chi Ndyuūs 'cuuⁿ'mín yā s'uuún. ¹⁹ Tanducuéⁿē yeⁿe iⁿ'yeeⁿdī chi din'dái Ndyuūs cuáácú cunee ngiinu tiempo chi cuuvi n'diichi 'iⁿ'yāⁿ s'eeⁿ chi daiya Ndyuūs. ²⁰ Caati tanducuéⁿē chi din'dái Ndyuūs ndāā nguuvi chi 'āā ntéé n'daacā. Ní nguée cucáávā chi maāⁿ néⁿe naati cucáávā chi Ndyuūs neⁿé yā chí 'tíicā. Ní maaⁿ ní tanducuéⁿē tiempo miiⁿ ní tanducuéⁿē dendu'ū cunee ngiinu chí Ndyuūs dííⁿ yā chí canée n'daacā cáávā yeⁿē. ²¹ Ní tanducuéⁿē chí din'dái Ndyuūs canée chí natuuví. Naati ndāā tiempo chí nguée natúúví caati vée parte yeⁿē ndúúcū libertad chí n'dai taavi chí yeⁿē 'iⁿ'yāⁿ s'eeⁿ chí daiyá Dendyuūs. ²² Ní s'uūuⁿ ní deenu yú chí ndí nguuvi maaⁿ tanducuéⁿē chí din'dái Ndyuūs ní n'gai ya'āi ngeεcū yeⁿē tan'dúúcā 'áámá n'daataá ndúúcū vaadī ya'ai yeⁿē chí 'cundiyáaⁿ daiya tá. ²³ Ní nguée dámaāⁿ tanducuéⁿē chí din'dái Ndyuūs ní n'gái ya'āi naati 'tiicá ntúūⁿ s'uuún n'geenu yú ngii. 'Áará chí canee yú ndúúcū Espíritu N'dai yeⁿé Ndyuūs chí Ndyuūs datee yā s'uuún chí vmnááⁿ vmnaaⁿ sta'a yú yeⁿé Ndyuūs. Ní 'cueenu taavi yú cuuvi 'naaⁿ chí canée ngiinu yú tiempo chí Ndyuūs cuta'á yā s'uūuⁿ chí daiyá Ndyuūs s'uuún. Ní nanguaⁿ'ái yā s'uūuⁿ yeⁿe cuerpo yeⁿe yú chí vée maaⁿ. Ní 'āā ntéé vée cuerpo ndíicū yeⁿe yú naati vεε cuerpo chí ngai yeⁿe yú. ²⁴ Ní s'uuún nuaⁿ'ai yú cáávā chí canee ngiinu yú chí Ndyuūs caⁿ'a yā chí téé yā s'uuún. Nduuti chí 'āā inaaⁿ yú de'ē chí canee ngiinu yú 'āā ntéé canee ngiinu yú yeⁿē. Chííⁿ chí 'āā inaaⁿ 'iⁿ'yāⁿ 'āā ntéé canée ngiinu yā yeⁿē. ²⁵ Naati nduuti chí canée ngiinu yú chí 'āā cuée snaaⁿ yú canée chí cunee ngiinu yú ndúúcū 'víich'εεtíinūⁿ.

²⁶ Ní Espíritu N'dai yeⁿé Ndyuūs nnginnée yā s'uūuⁿ taachi dúuvā yú. S'uuún nguée deenu yú táácā canée chí caaⁿ'maⁿngua'a yú tan'dúúcā chí Ndyuūs neⁿé yā, ní maaⁿ ní Espíritu N'dai yeⁿé Ndyuūs inneé yā s'uuún taachi ngaⁿ'angua'a yú nanááⁿ Ndyuūs taachi n'gai ya'ái yā ní nguée cuuvi caaⁿ'maⁿ yú chuū ndúúcū nduudu. ²⁷ Ní Ndyuūs chí n'diichí yā staava yeⁿe yú deenú yā chí nadacadiinuuⁿ Espíritu N'dai yeⁿé Ndyuūs caati Espíritu N'dai yeⁿe Ndyuūs ngiica yā dámaāⁿ yeⁿe chí neⁿe Ndyuūs ní cáávā 'iⁿ'yāⁿ chí yeⁿe Ndyuūs.

Cuchεε ca yú yeⁿe nducuéⁿē

²⁸ Ní deenu yú chí Ndyuūs dííⁿ yā chí tanducuéⁿē chí ch'ó'ō yeⁿe s'uūuⁿ chí yeⁿe s'uūuⁿ ní cáávā chí n'daacā yeⁿe yú caati neⁿe yú Ndyuūs. Ní Ndyuūs yaa'ví yā 'iⁿ'yāⁿ s'eeⁿ chí cuuvi yeⁿé yā 'iⁿ'yāⁿ s'eeⁿ. ²⁹ Ní Ndyuūs ndεεve yā 'iⁿ'yāⁿ chí cuuvi yeⁿé yā ní diví yā 'iⁿ'yāⁿ s'eeⁿ lado yeⁿé yā ndii vmnááⁿ vmnaaⁿ caati 'iⁿ'yāⁿ s'eeⁿ cuuvi daiyá yā tan'dúúcā Daiyá yā Jesucristo. Ní 'íicú Cristo chí Daiya Ndyuūs ní Daiyá yā vmnááⁿ vmnaaⁿ nguaaⁿ n'dee n'dái vi'i yā.

³⁰ Ní 'iⁿ'yāⁿ s'eeⁿ chí Ndyuūs chínδεεve yā ndí vmnááⁿ vmnaaⁿ Ndyuūs yaa'ví yā 'iⁿ'yāⁿ s'eeⁿ chí cuuvi yeⁿé yā 'iⁿ'yāⁿ s'eeⁿ. Ní yaa'ví yā 'iⁿ'yāⁿ chí sta'á yā 'iⁿ'yāⁿ s'eeⁿ chí cuuvi daiyá yā. Ní Ndyuūs chí sta'a yā 'iⁿ'yāⁿ s'eeⁿ chí cuuvi yeⁿé yā ní cuayivi dich'εεté yā 'iⁿ'yāⁿ s'eeⁿ.

³¹ ¿Dé'ē cuuvi caaⁿ'maⁿ yú yeⁿé dendu'ū s'eeⁿ? Dámaāⁿ cuuvi caaⁿ'maⁿ yú chuū. Nduuti chí Ndyuūs canée yā ndúúcū s'uuún, ¿du'ū cuchée cūnee contra yeⁿe s'uuún? ³² Ní Ndyuūs nguée diya'āi 'íinu yā Daiya yā cáávā s'uuún naati dicho'ó yā Daiyá yā caati ch'ií Daiya yā caavā nducyaaca s'uuún. Ní nduuti chí 'tíicā dííⁿ yā ndúúcū Daiya yā, ¿'áá nguée tee Ndyuūs tanducuéⁿē s'uuún daama ndúúcū Daiyá yā ní n'dee n'dái yeⁿé? ³³ ¿Dú'ū cuuvi caaⁿ'maⁿ nuuⁿndi yeⁿé 'iⁿ'yāⁿ chí Ndyuūs ndεεve yā? Ndyuūs maáⁿ yā dííⁿ yā aceptar 'iⁿ'yāⁿ chí yeⁿé yā. ³⁴ ¿Dú'ū tuu'mi cuuvi dííⁿ yā condenar s'uuún? Cristo ní 'iⁿ'yāⁿ chí ch'ií yā cáávā nuuⁿndi yeⁿe yú ní nduuchí yā yeⁿe nguaaⁿ tina'ā. Ní maaⁿ ní Cristo canee yā na lado yeⁿe honor yeⁿé Chiidá yā. Ní ngaⁿ'angua'á yā cáávā s'uuún. ³⁵ ¿Du'ū cuuvi diví yā s'uūuⁿ yeⁿe Cristo chí neⁿé yā s'uuún? ¿'Áá chíiⁿ chí n'geenu

yú ngii, 'áá cuuvi nadvíi s'uūuⁿ, o dendu'ū chi diiiⁿ chi idi'vaachi yú o dendu'ū chi diiⁿ 'iiⁿyāⁿ chi 'cueenu yú cuuvi o taachi cuuví cuiica yú o taachi 'āā ntéé catecai yú o cáanda yeⁿe yú o taachi ch'iin'núⁿ yā s'uūuⁿ ndúúcu machete chi 'uūvī lados 'caāiⁿ? ¿'Áá cuuvi diiⁿ nducuéⁿē chuū nadvíi s'uūuⁿ ná vaadī neⁿe yeⁿe Cristo? Nguéé cuuvi. ³⁶ 'Tíicā canéé nguūⁿ na libro yeⁿe Ndyuūs:

Cáávā chi s'uūuⁿ ní yeⁿe di s'uūuⁿ nuuⁿmaⁿ nguuví canee yú listo chi 'caaⁿnúⁿ yā s'uūuⁿ cáávā di. Ní 'iiⁿyāⁿ diiⁿ cuenta yā chi s'uūuⁿ tan'dúúca 'iiti cuūchī chi caⁿá yā 'caaⁿnuⁿ yā, 'tíicā s'uūuⁿ.

³⁷ Naati yeⁿe nducuéⁿē dendu'ū cucheε cá yú cáávā Cristo chi dinéⁿe yā s'uūuⁿ. ³⁸ 'Tíicā 'úú ní deenú chi cuaacu chi mar 'áámá 'iiⁿyāⁿ nguéé cuuvi divíi yā s'uūuⁿ yeⁿe Ndyuūs chi dinéⁿe yā s'uūuⁿ. Ndíi nguéé ndúú vaadī n'gii, ndíi nguéé ndúú chi cunduūchi yú, ndíi nguéé ndúú ángeles, ndíi nguéé ndúú espíritus chi ngaⁿa ntiiⁿnyuⁿ ndúúcu poder yeⁿe espíritus, ndíi nguéé ndúú dendu'ū chi véé maaⁿ, ndíi nguéé ndúú dendu'ū chi cuchii, ³⁹ ndíi nguéé ndúú yeⁿe chi véé chí na yáácú, ndíi nguéé ndúú yeⁿe chi véé ndii na yáanūⁿ, ndíi nguéé ndúú táámá naaⁿ chi véé, tanducuéⁿē chuū nguéé cuuví divíi s'uūuⁿ yeⁿe Ndyuūs chi dinéⁿe yā s'uūuⁿ caati s'uūuⁿ ní yeⁿe Jesucristo s'uūuⁿ.

9

Ndyuūs ndεεve yā 'iiⁿyāⁿ Israel chí judíos chi cuuvi 'iiⁿyāⁿ yeⁿe yā

¹ 'Úú Pablo ní ngaⁿá nduudu cuaacu ti 'úú ní yeⁿe Cristo 'úú, ní nguéé ngaⁿá nduudu yaadi. Chíiⁿ chi nadacádiinúⁿ na staava yeⁿe ní yeⁿe Espíritu N'dai yeⁿe Ndyuūs. Cáávā chuū cuaacu niiⁿnyúⁿ deenú chi ngaⁿá nduudu cuaacu. ² Neené ndaachií yiinú ní neené ya'ai staava yeⁿe cáávā 'iiⁿyāⁿ yeⁿe ndaata yeⁿe, ³ ndíi chí 'úú maáⁿ neⁿe chí cuneé condenado 'úú ní canéé 'aama lado yeⁿe Cristo nduuti chí chíiⁿ cuuví díiⁿ, ní cuuví 'cuεstinéé n'daacā 'iiⁿyāⁿ yeⁿe ndaata yeⁿe, ní cuuví yā yeⁿe Cristo 'iiⁿyāⁿ. ⁴ 'Iiⁿyāⁿ s'eeⁿ ní yeⁿe 'iiⁿyāⁿ yeⁿe ndaata Israel. Ní Ndyuūs sta'á yā 'iiⁿyāⁿ s'eeⁿ chí cuuvi daiyá yā. Ní Ndyuūs chí dεεve n'dái taavi ca canéé yā nguaaⁿ 'iiⁿyāⁿ s'eeⁿ. Ní díiⁿ yā 'áámá compromiso ndúúcu yā. Ní ca'á yā 'iiⁿyāⁿ s'eeⁿ ley yeⁿe yā chí ley yeⁿe Moisés. Ní 'iiⁿyāⁿ s'eeⁿ canéé yā ndúúcu ntiiⁿnyuⁿ yeⁿe yaācū ní ndúúcu compromiso yeⁿe Ndyuūs chí Ndyuūs caⁿa yā chí ca'a yā 'iiⁿyāⁿ s'eeⁿ. ⁵ Ní 'iiⁿyāⁿ s'eeⁿ ní daiya chiida yú cuááⁿ vmnaaⁿ ní yeⁿe ndaata 'iiⁿyāⁿ s'eeⁿ. Ní yeⁿe ndaata 'iiⁿyāⁿ s'eeⁿ Cristo ní ndaa yā ndúúcu cuerpo tan'dúúca 'iiⁿyāⁿ s'eeⁿ. Ní Cristo miiⁿ ní Ndyuūs, ní ch'εete taavi yā yeⁿe nducuéⁿē. Cueⁿe daāⁿmaⁿ dich'εete yú Ndyuūs. 'Tíicā.

⁶ 'Úú nguéé ngaⁿá chí compromiso chí ngaⁿa Ndyuūs nanááⁿ 'iiⁿyāⁿ Israel chí nguéé dichíiⁿvē. N'daacā ca chí ngaⁿá chí nducyaaca 'iiⁿyāⁿ yeⁿe ndaata Israel miiⁿ cuaacu chí nguéé yeⁿe 'iiⁿyāⁿ Israel. ⁷ Naati nguéé nducyaaca 'iiⁿyāⁿ yeⁿe ndaata Israel ní daiya Abraham 'iiⁿyāⁿ. Naati 'túúca ngaⁿa Ndyuūs: Dii Abraham, cáávā saⁿá daiya di chí nguuví Isaac véé 'iiⁿyāⁿ yeⁿe di cuayiivi. ⁸ Ní cáávā nduudu chí ngaⁿa Ndyuūs cuuvi deenú chí mar 'áámá 'iiⁿyāⁿ cuuvi daiya Ndyuūs cáávā chí ch'iindiyáaⁿ yā na ndaata yeⁿe Abraham. Nguεε 'tíicā. 'Iiⁿyāⁿ s'eeⁿ ní daiya Dendyuūs nduuti chí cucáávā compromiso yeⁿe Ndyuūs, 'iiⁿyāⁿ s'eeⁿ cuaacu chí daiyá Ndyuūs. ⁹ Nduudú 'cūū nduudu chí canéé nguūⁿ yeⁿe compromiso miiⁿ chí Ndyuūs ca'a yā Abraham: Tiempo chí ch'iⁿí, 'úú nndaá ní ch'iⁿí poder yeⁿe ní Sara chí n'daataá yeⁿe di ní 'cuundi 'aama daiya tá.

¹⁰ Ní nguéé dámaaⁿ chuū. Nduu 'uuví daiya táⁿā Rebeca míiⁿ ní cuaāchī. Ní nguuví yā Esaú ndúúcu Jacob ní yeⁿe 'áámá chiidaá ní chiidá yā ní Isaac chí yeⁿe ndaata yeⁿe 'iiⁿyāⁿ vmnááⁿ vmnaaⁿ yeⁿe yú. ¹¹⁻¹³ Ní taachi daiyá Rebeca miiⁿ chí cuaāchí 'āā cuéé 'cuεetiyáaⁿ yā ní 'āā cuéé díiⁿ yā cosa chí n'daacā o cosa chí nguéé n'daacā, Ndyuūs yaa'ví yā táⁿā Rebeca miiⁿ 'tíicā: Daiya di chí saⁿá vmnaaⁿ chí Esaú díiⁿ sa servir daiya di chí saⁿá chí cuchii cuayiivi chí Jacob. Ní chuū ní tan'dúúca chí canéé nguūⁿ naachí Ndyuūs ngaⁿa yā 'tíicā: 'Úú dineⁿe saⁿa Jacob miiⁿ, naati sáⁿā Esaú miiⁿ 'úú nguéé neⁿe. Déenu yú chí canéé cuaacu chí Ndyuūs cuuvi ndεεve yā 'āā du'ú nūuⁿ 'iiⁿyāⁿ chí neⁿe

yā tan'duucā chi neⁿe yā. Ní cuuvi yaa'vi yā 'iiⁿ'yāⁿ chi neⁿ'é yā yaa'ví yā chi cuuvi yeⁿ'e yā. Ní nguéé diíⁿ yā cuenta chiiⁿ chi diiⁿ 'iiⁿ'yāⁿ chi yaa'ví yā. Ní ndeévé yā Jacob.

¹⁴ ¿De'ē cuuvi caaⁿ'maⁿ s'uūuⁿ yeⁿ'e chi diiⁿ Ndyuūs? ¿'Áá diiⁿ Ndyuūs cosa chi nguéé cuaacu? Nguéé mar 'áámá naaⁿ. ¹⁵ Ndyuūs ní caⁿ'a yā chii yā Moisés miiⁿ 'tíicā: 'Úú ní ya'ái cáávā 'iiⁿ'yāⁿ chi 'úú neⁿ'é chi caⁿ'á chí ya'ái yeⁿ'e yā; ní 'úú ya'āi 'iinú cáávā 'iiⁿ'yāⁿ chi 'úú neⁿ'é chi caⁿ'á chí ya'āi 'iinú cááva yā. ¹⁶ Maaⁿ ní nguéé tan'dúucā chi 'iiⁿ'yāⁿ s'eeⁿ neⁿ'é yā o diíⁿ yā chi cuuvi yeⁿ'é Ndyuūs 'iiⁿ'yāⁿ, naati dámaāⁿ tan'dúucā chi Ndyuūs ya'ai 'iinú yā caava 'āā du'ú nūuⁿ chi neⁿ'é yā chi cuuvi yeⁿ'é yā. ¹⁷ Ní canéé nguūⁿ na libro yeⁿ'e Ndyuūs taachi Ndyuūs yaa'ví yā rey yeⁿ'e yáⁿ'āa Egipto 'tíicā: Dii Faraón, 'úú s'neéⁿ dii rey caati 'úú cuuvi 'cuuⁿ'míⁿ poder yeⁿ'é cucáávā dii. Ní 'iiⁿ'yāⁿ yeⁿ'e núúⁿmaⁿ íⁿ'yeeⁿdí cuuvi déénú yā chi duuchí ní caaⁿ'máⁿ yā chi duuchí. ¹⁸ Ní 'tíicā diiⁿ Ndyuūs. Ya'ái yā cáávā 'iiⁿ'yāⁿ s'eeⁿ chi maán yā neⁿ'é yā, ní 'tiicā ntúūⁿ Ndyuūs dichεechí yā staava yeⁿ'e 'iiⁿ'yāⁿ s'eeⁿ chi maán yā neⁿ'é yā dichεechí yā.

¹⁹ Tuu'mi ní 'aamá ní caⁿ'a ní chíi ní 'úú 'tíicā: Nduuti chi 'tíicā, ¿de'ε cúúvī chi Ndyuūs ngaⁿ'á yā chi nuuⁿndi ní yeⁿ'e saⁿ'ā? Ní ¿dú'ū cuuvi diiⁿ cosa chi contra yeⁿ'e chi Ndyuūs neⁿ'é yā chi diiⁿ? ²⁰ 'Úú ní ngaⁿ'á ngii díí saⁿ'ā: ¿Dú'ú dii chí díí cuuvi n'guεεcútaⁿ'a di yeⁿ'é Ndyuūs? ¿'Áá cuaacu chí 'áámá 'cúutii yeⁿ'ē ínchεētí cuuvi caaⁿ'maⁿ ndúucū 'iiⁿ'yāⁿ chí din'dái yā 'cúutii miiⁿ ní caaⁿ'maⁿ 'tíicā: ¿De'ē cúúvī chí din'dái ní 'úú 'túucā? ²¹ Deenu yú chí 'iiⁿ'yāⁿ chí din'dái yā 'cúutii cuuvi din'dái yā yeⁿ'e ínchεētí tan'dúucā chí neⁿ'é yā din'dái yā. Cuuvi din'dái yā yeⁿ'e 'áámá taaⁿ ínchεētí 'uūvī 'cúutii, 'áámá chí yaⁿ'ai chíí'vē ní táámá chíi nguéé yaⁿ'ai chíí'vē.

²² Ní 'tiicā ntúūⁿ chí diiⁿ Ndyuūs. Ndyuūs neⁿ'é yā 'cuuⁿ'míⁿ yā 'iiⁿ'yāⁿ táácā cuuvi diíⁿ yā castigar 'iiⁿ'yāⁿ ní ch'íⁿ'í yā poder yeⁿ'é yā. Ní n'dee 'nááⁿ tiempo Ndyuūs cheé yā ndúucū vaadī ngiinu yeⁿ'é yā ndúucū 'iiⁿ'yāⁿ s'eeⁿ chí nguéé n'daacā idiíⁿ yā. Ní Ndyuūs canéé chí diíⁿ yā castigar 'iiⁿ'yāⁿ s'eeⁿ. Ní Ndyuūs dituūví yā 'iiⁿ'yāⁿ s'eeⁿ. ²³ Ní Ndyuūs neⁿ'é yā ch'íⁿ'í yā s'uūuⁿ chí chεete ca vaadī dεeve taavi yeⁿ'é yā ní nééné ya'ai 'iinú yā cááva s'uūuⁿ. Ní ndii vmnááⁿ vmnaaⁿ diíⁿ yā chí s'uuúⁿ ní véé parte yeⁿ'e yú ndúucū yā ndúucū dεeve taavi ca yeⁿ'é yā. ²⁴ Ní Ndyuūs yaa'ví yā s'uūuⁿ chí cuuvi yeⁿ'é yā s'uūuⁿ, náⁿ'ā s'uūuⁿ chí 'iiⁿ'yāⁿ Israel s'eeⁿ chí judíos s'uūuⁿ ní tanáⁿ'a s'uūuⁿ chí nguéé 'iiⁿ'yāⁿ Israel s'eeⁿ chí judíos s'uuúⁿ. ²⁵ Tan'dúucā chí canéé nguūⁿ na libro yeⁿ'é Ndyuūs naachi dinguūⁿ profeta Oseas ní Ndyuūs ngaⁿ'á yā 'tíicā:

'iiⁿ'yāⁿ chí nguéé yeⁿ'e ndaata yeⁿ'é, 'úú yaa'ví 'iiⁿ'yāⁿ s'eeⁿ chí cuuvi yeⁿ'é; 'iiⁿ'yāⁿ chí nguéé dineⁿ'é vmnaáⁿ tí nguéé 'iiⁿ'yāⁿ yeⁿ'e 'úú maaⁿ ní ngaⁿ'á 'iiⁿ'yāⁿ s'eeⁿ chí neené neⁿ'é 'iiⁿ'yāⁿ s'eeⁿ.

²⁶ Ní lugar miiⁿ nūuⁿ naachi Ndyuūs caⁿ'a yā chíi yā 'iiⁿ'yāⁿ s'eeⁿ 'túucā: Ndís'tií ní nguéé 'iiⁿ'yāⁿ yeⁿ'é ndís'tií, miiⁿ nūuⁿ ní ngaⁿ'á 'iiⁿ'yāⁿ s'eeⁿ ní chí duuchí yā daiya Dendyuūs chí canduuchi.

²⁷ Ní saⁿ'a profeta Isaías caⁿ'a sá yeⁿ'e 'iiⁿ'yāⁿ Israel 'tíicā: 'Áará chí 'iiⁿ'yāⁿ yeⁿ'e ndaata Israel ní n'dee n'dái yā tan'dúucā yáⁿ'āa ndúútii yeⁿ'ē yiicu dámaāⁿ n'duu'vi núúⁿ yā nnguaⁿ'ai yā. ²⁸ Ní Señor Ndyuūs diíⁿ yā chí cuuvi cuaacu nduudu chí 'āā caⁿ'a yā yeⁿ'e yáⁿ'āa 'cūú ní nuuⁿ diíⁿ yā nducuéⁿ'ē. ²⁹ Ní 'tíicā ngaⁿ'a profeta Isaías cuaaⁿ vmnaaⁿ:

Nduuti chí Señor chí ngaⁿ'a ntiiⁿnyúⁿ yā yeⁿ'e nducuéⁿ'ē nguéé s'neéⁿ yā 'iiⁿ'yāⁿ yeⁿ'e yú ndúucu yú, tuu'mi ní s'uuúⁿ canee yú tan'dúucā nducyáácá 'iiⁿ'yāⁿ yeⁿ'e yáāⁿ Sodoma ndúucū yáāⁿ Gomorra chí ch'íi yā cucáávā nuuⁿndi yeⁿ'é yā. 'Tíicā s'uuúⁿ.

Yeⁿ'e 'iiⁿ'yāⁿ Israel s'eeⁿ ní yeⁿ'ē nduudu cuaacu yeⁿ'ē evangelio

³⁰ ¿Dé'ē cuuvi caaⁿ'maⁿ yú tuu'mi? 'Tíicā cuuvi caaⁿ'maⁿ yú. 'iiⁿ'yāⁿ chí nguéé yeⁿ'e ndaata Israel chí judíos 'iiⁿ'yāⁿ s'eeⁿ nguéé in'nuúⁿ yā Ndyuūs ní nguéé diíⁿ yā chí canee n'daacā yā nanááⁿ Ndyuūs. Naati cuayiivi miiⁿ ní 'iiⁿ'yāⁿ s'eeⁿ canee n'daacā yā nanááⁿ Ndyuūs cáávā chí i'téenu yā Ndyuūs. Ní Ndyuūs diíⁿ yā aceptar 'iiⁿ'yāⁿ s'eeⁿ chí yeⁿ'é yā 'iiⁿ'yāⁿ s'eeⁿ. ³¹ Nguéé 'tíicā ndúucū 'iiⁿ'yāⁿ chí yeⁿ'e ndaataá Israel. Caneé yā ndúucū ley yeⁿ'e Moisés chí cuuvi diiⁿ chí n'daacā canee yā nanááⁿ Ndyuūs. Ní 'áará chí neⁿ'é

yā canéé n'daacā nanááⁿ Ndyuūs naati nguéeⁿ cuuvi díⁿ yā cumplir chiiⁿ chi ngaⁿ'a ley miiⁿ. ³² ¿De'ē cúuví chi 'tíicā? 'Tíicā canee, caati 'iiⁿ'yāⁿ yeⁿ'e ndaata Israel nguéeⁿ n'daacā canee yā nanááⁿ Ndyuūs cáávā ntiⁿ'nyuⁿ chi díⁿ yā cáávā ley yeⁿ'é yā, ní nguéeⁿ neⁿ'é yā cu'téenu yā Jesucristo. Ní cáávā chuū 'iiⁿ'yāⁿ s'eeⁿ canee tan'dúúicā chi candéē ca'a yā ná tuūu chi Jesucristo chi diiⁿ chí indē ca'a 'iiⁿ'yāⁿ. ³³ Ní 'tíicā canéé nguūⁿ na libro yeⁿ'e Ndyuūs yeⁿ'e tuūu miiⁿ:

'Úú Ndyuūs ní cu'neéⁿ na yāāⁿ Sión 'áámá 'iiⁿ'yāⁿ chi Jesucristo chi nguuvi tuūu chi cuundē ca'a 'iiⁿ'yāⁿ ní tuūú miiⁿ ní 'áámá tuūú ch'ēte chi diiⁿ chi cundēve 'iiⁿ'yāⁿ; ní nducyáácá 'iiⁿ'yāⁿ chi cu'téenu yā 'iiⁿ'yāⁿ miiⁿ, nguéeⁿ cuuvi 'cuináaⁿ yā.

10

¹ Ndís'tiī hermanos yeⁿ'é, neⁿ'é ndúúicū núúⁿ'máⁿ staava yeⁿ'é chi nducyaaca 'iiⁿ'yāⁿ Israel yeⁿ'e ndaata yeⁿ'é cuuvi nnguaⁿ'ai yā. Ní 'úú ní ngaⁿ'angua'á cááva yā. ² Deenú chi cuaacu chi 'iiⁿ'yāⁿ yeⁿ'e ndaataá yeⁿ'é ní neⁿ'é yā dich'ēte cá yā Ndyuūs naati nguéeⁿ díⁿ yā tan'dúúicā chi neⁿ'e Ndyuūs caati nguéeⁿ déenu yā táácā cuuvi diiⁿ yā. ³ Ní nguéeⁿ déenu yā táácā Ndyuūs díⁿ yā aceptar 'iiⁿ'yāⁿ chi cuuvi yeⁿ'é yā 'iiⁿ'yāⁿ. Ní díⁿ yā chee chi nadacádíinuⁿ yā chi n'daacā. Ní nguéeⁿ neⁿ'é yā díⁿ yā tan'dúúicā chi Ndyuūs neⁿ'e yā chi diiⁿ yā caati n'daacā canee yā nanááⁿ Ndyuūs. ⁴ Ní taachi ndaā Cristo díⁿ yā chi 'āā vi'í cá ley yeⁿ'e Moisés. Ní maaⁿ ní nducyáácá 'iiⁿ'yāⁿ chi i'téenu yā Cristo, 'iiⁿ'yāⁿ s'eeⁿ n'daacā canee yā nanááⁿ Ndyuūs.

⁵ Ní Moisés miiⁿ dinguuⁿ yā yeⁿ'e 'iiⁿ'yāⁿ chi neⁿ'é yā canee n'daāca yā nanááⁿ Ndyuūs cáávā chi díⁿ yā chi ngaⁿ'a ley miiⁿ. 'Tíicā dinguuⁿ yā: 'iiⁿ'yāⁿ chi diiⁿ yā tanducuéⁿ'ē dendu'ū chi ngaⁿ'a ley yeⁿ'e Moisés canduuchí yā cueⁿ'e daāⁿmaⁿ cucáávā ley miiⁿ. ⁶ Naati chuū ní ngaⁿ'a yeⁿ'e 'iiⁿ'yāⁿ chi canee n'daacā nanááⁿ Ndyuūs cáávā chi i'téenu yā Jesucristo. Díⁿ nguéeⁿ ngaⁿ'a di na staava yeⁿ'e di 'tíicā: ¿Du'u caⁿ'ā na va'ai cheeti nguuvi? Taachi ngaⁿ'a di 'tíicā, nadicua'ái di Cristo yeⁿ'é va'āi cheeti nguuvi. ⁷ Ní nguéeⁿ caaⁿ'maⁿ di na staava yeⁿ'e di 'tíicā: ¿Du'ū cuuvi caⁿ'á yā iⁿ'yeēⁿ dí chí yāanūⁿ tan'dúúicā chi cheⁿ'e Cristo? Taachi diiⁿ di 'tíicā, diiⁿ di chi Cristo nadacuéⁿ yā yeⁿ'ē nguaaⁿ tináⁿ'ā. ⁸ Chuū chi canee chi caaⁿ'maⁿ yú: Nduudu cuaacu yeⁿ'é Ndyuūs 'āā niiⁿ'nuúⁿ canee yeⁿ'é nī ní canee na cheendí nī ní canee na staava yeⁿ'é nī. Nduudu cuaacu miiⁿ ní nduudu chi ngaⁿ'á 'nū nanááⁿ ndís'tiī cááva chi cuuvi cu'téenu nī. ⁹ Nduuti chi caaⁿ'máⁿ nī ndúúicū 'iiⁿ'yāⁿ ní ngaⁿ'a nī 'tíicā chi Jesús miiⁿ chíⁿ chí 'iiví nī ní i'téenu nī ndúúicū núúⁿ'máⁿ staava yeⁿ'é nī chi Ndyuūs nadicuéⁿ yā Cristo miiⁿ yeⁿ'e nguaaⁿ tináⁿ'ā, tuu'mi ní díⁿ nanguáⁿ'ai di. ¹⁰ Canéé chi cu'teenú nī ndúúicū núúⁿ'máⁿ staava yeⁿ'e nī ní Ndyuūs cuaáⁿ yā ndís'tiī. Canéé chi caaⁿ'máⁿ nī ndúúicū 'iiⁿ'yāⁿ ní ngaⁿ'á nī chi i'téenu nī Jesucristo ní cuuvi nanguaⁿ'ai nī.

¹¹ Ní canéé nguūⁿ na libro yeⁿ'é Ndyuūs 'tíicā: Nducyáácá 'iiⁿ'yāⁿ chi cu'téenu yā Cristo nguéeⁿ cuuví 'cuináaⁿ yā. ¹² Nguéeⁿ n'dáaⁿ yā 'iiⁿ'yāⁿ Israel s'eeⁿ ndúúicū 'iiⁿ'yāⁿ yeⁿ'e tanáⁿ'ā naciones. Maaⁿ Señor Jesucristo miiⁿ ní maaⁿ Señor yeⁿ'e nducyáácá 'iiⁿ'yāⁿ. Ní Señor miiⁿ itée yā yeⁿ'e nducuéⁿ'ē chi n'dai yeⁿ'é yā nducyaaca 'iiⁿ'yāⁿ chi ngaⁿ'angua'á yā nanááⁿ Ndyuūs cáávā chi duuchi yā. ¹³ Caati 'tíicā canéé nguūⁿ na libro yeⁿ'é Ndyuūs: Nducyáácá 'iiⁿ'yāⁿ chi ngaⁿ'a yā ngii yā: “N'díⁿ Señor Jesucristo yeⁿ'é,” ní cuuví nanguaⁿ'ai yā. ¹⁴ ¿Táácā cuuvi caaⁿ'máⁿ yā ndúúicū Señor miiⁿ nduuti chi nguēe i'téenu yā 'iiⁿ'yāⁿ? ¿Ní táácā cuuvi cu'téenu yā yeⁿ'ē 'áámá 'iiⁿ'yāⁿ chi nguéeⁿ n'giindiveéⁿ yā yeⁿ'e yā? ¿Ní táácā cuuvi caandiveéⁿ yā nduuti chi nguéeⁿ 'aama 'iiⁿ'yāⁿ chi caaⁿ'máⁿ yā nduudu cuaacu yeⁿ'e Ndyuūs? ¹⁵ ¿Ní táácā cuuvi caaⁿ'máⁿ yā nduudu cuaacu yeⁿ'é Ndyuūs miiⁿ nduuti chi nguéeⁿ du'ū vεε dicho'ó? 'Tíicā canéé nguūⁿ na libro yeⁿ'é Ndyuūs: De'ε chúúicā n'daacā chi ndaā 'iiⁿ'yāⁿ s'eeⁿ chi candéē yā nduudu cuaacu yeⁿ'e vaadī 'diiⁿ ní ngaⁿ'á yā nduudu ngai yeⁿ'é Cristo.

¹⁶ Naati nguéeⁿ nducyaaca 'iiⁿ'yāⁿ i'téenu yā nduudu cuaacu yeⁿ'é Cristo. Ní tan'dúúicā chi ngaⁿ'a profeta Isaías ndii cuááⁿ vmnaaⁿ taachi ngaⁿ'a 'tíicā: N'diī Señor, ¿dú'ū i'téenu

nduudu cuaacu chí ngaⁿā cuaacu yú? ¹⁷ 'Tíicā tuu'mi, 'iiⁿ'yāⁿ i'téenu yā nduudu cuaacu yeⁿe Jesucristo cáávā chi n'giindiveéⁿ yā nduudu miiⁿ, ní n'giindiveéⁿ yā nduudu cuaacu yeⁿe Cristo.

¹⁸ Naati 'úú itiinguuneéⁿ ndís'tiī: ¿'Áá cuaacu chi nguéeⁿ n'giindiveéⁿ yā nduudu cuaacu yeⁿe Ndyuūs? Cuaacu chi n'giindiveéⁿ yā. 'Tíicā canéeⁿ nguūⁿ na libro yeⁿe Ndyuūs: Nduudu cuaacu chi ngaⁿ'a yā, ngaⁿ'a yā na núúⁿmáⁿ íⁿ'yeeⁿdī. Ní nduudu yeⁿe yā ní ngaⁿ'a yā ní ndíí núúⁿmáⁿ cuaaⁿ chi yaⁿ'ai ca yeⁿe íⁿ'yeeⁿdī.

¹⁹ Táámá vmnéⁿ'ēe itiinguuneéⁿ ndís'tiī: ¿'Áá nguéeⁿ díⁿ cuenta 'iiⁿ'yāⁿ Israel chi judíos s'eeⁿ yeⁿe nduudu cuaacu yeⁿe Ndyuūs? Moisés miiⁿ, 'iiⁿ'yāⁿ chi vmnááⁿ vmaaaⁿ nguεεcuneé yā yeⁿe chuū, ní 'tíicā canéeⁿ nguūⁿ:

'Úú ní díⁿ chi cuuvi nngueéⁿ nī yeⁿe 'iiⁿ'yāⁿ yeⁿe táámá nación chi nguéeⁿ véé nación yeⁿe Ndyuūs. 'Úú ní díⁿ chi nduuví táaⁿ nī ndúúⁿcū 'iiⁿ'yāⁿ chi nguéeⁿ yeⁿe chí yeⁿe táámá nación caati caⁿ'á díⁿ cosa chi n'daacā nduucú yā.

²⁰ Ní profeta Isaías miiⁿ claro ca chi ngaⁿ'á yā ndúúⁿcū nduudú 'cūū. Ndyuūs ngaⁿ'á yā 'tíicā:

'Iiⁿ'yāⁿ chi nguéeⁿ n'nuúⁿ yā 'úú ní indaacá yā 'úú. 'Iiⁿ'yāⁿ chi nguéeⁿ itiinguuneéⁿ yā yeⁿe, 'úú ní ch'iⁿ'í mááⁿ 'úú nanáaⁿ yā.

²¹ Ní taachi Isaías miiⁿ ngaⁿ'a yā nanááⁿ 'iiⁿ'yāⁿ yeⁿe Israel, 'tíicā ngaⁿ'a yā: Ndyuūs ngaⁿ'a 'tíicā: Nguuvi nguuvi n'doó ta'á ní yaa'ví 'iiⁿ'yāⁿ chi nguéeⁿ n'giindiveéⁿ yā nduudu yeⁿe. Ní cheechi staava yeⁿe yā.

11

Iiⁿ'yāⁿ yeⁿe Israel chí nanguáⁿ'ai yā

¹ Maaⁿ ní intíinguuneéⁿ ndís'tiī: ¿'Áá díⁿ Ndyuūs chi s'neéⁿ yā 'iiⁿ'yāⁿ Israel yeⁿe ndaata yeⁿe yā? Nguéeⁿ díⁿ yā 'tíicā. 'Úú Pablo maáⁿ 'iiⁿ'yāⁿ yeⁿe ndaata Israel 'úú ní yeⁿe ndaata yeⁿe Abraham 'úú, ní yeⁿe 'iiⁿ'yāⁿ yeⁿe ndaata Benjamín 'úú. ² Ndií cuááⁿ vmaaaⁿ Ndyuūs díⁿ yā recibir 'iiⁿ'yāⁿ yeⁿe ndaata yeⁿe yā, 'iiⁿ'yāⁿ Israel chi ndeēve yā chi cuuvi yeⁿe yā 'iiⁿ'yāⁿ. Ní ndís'tiī, ¿'áá nguéeⁿ déenu nī yeⁿe chi canéeⁿ nguūⁿ na libro yeⁿe Ndyuūs naachi profeta Elías ngaⁿ'angua'á yā ní di'cuiitú yā Ndyuūs contra yeⁿe 'iiⁿ'yāⁿ Israel? Ní caⁿ'a yā 'tíicā: ³ N'díí Señor Ndyuūs, 'iiⁿ'yāⁿ Israel s'eeⁿ ní 'niⁿ'núⁿ yā saⁿ'ā profetas yeⁿe nī ní dituūví yā nátaí s'eeⁿ yeⁿe nī, n'dií Ndyuūs chí canduuchi. Ní maaⁿ dámaaⁿ 'úú caneeⁿ ní 'tiicá ntúūⁿ neⁿ'é yā 'caaⁿ'nuⁿ yā 'úú. ⁴ Naati Ndyuūs nan'guεεcútaⁿ'a yā yeⁿe profeta Elías miiⁿ, 'tíicā: Canéeⁿ lado yeⁿe ndeēchē mil saⁿ'ā chi nguéeⁿ chiintii'yá yā nanááⁿ santo ídolo chi nguuvi Baal. ⁵ Ní 'tiicá ntúūⁿ yeⁿe tiempo 'cūū canéeⁿ duu'ví 'iiⁿ'yāⁿ yeⁿe Israel chi i'téenu yā Ndyuūs ní Ndyuūs ndeεve yā 'iiⁿ'yāⁿ s'eeⁿ. Ní díⁿ yā cosa chi n'dai taavi cááva yā. ⁶ Ní nduuti chi yeⁿe Ndyuūs 'iiⁿ'yāⁿ s'eeⁿ cáávā chi Ndyuūs ní diⁿ n'dai taaví yā ní ndeεve yā 'iiⁿ'yāⁿ s'eeⁿ, tuu'mi ní nguéeⁿ cáávā cosa chi 'iiⁿ'yāⁿ s'eeⁿ maáⁿ yā cuuvi diⁿ yā. Ní ndúúⁿti chi cáávā cosa chi 'iiⁿ'yāⁿ s'eeⁿ cuuví díⁿ yā, tuu'mi ní nguéeⁿ cáávā vaadí n'dai yeⁿe Ndyuūs chi yeⁿe Ndyuūs 'iiⁿ'yāⁿ.

⁷ ¿D'é ra tuu'mí? 'Iiⁿ'yāⁿ Israel nguéeⁿ ndaaca yā de'ē chi in'nuúⁿ yā. Naati 'iiⁿ'yāⁿ chi Ndyuūs ndeεve yā, 'iiⁿ'yāⁿ s'eeⁿ ndaaca yā. Ní tanáⁿ'ā 'iiⁿ'yāⁿ nguéeⁿ n'giindiveéⁿ yā nduudu yeⁿe Ndyuūs ti ndii cheechí maáⁿ yā 'iiⁿ'yāⁿ. ⁸ 'Tíicā canéeⁿ nguūⁿ na libro yeⁿe Ndyuūs: Ndyuūs díⁿ yā chi nguéeⁿ tuumicadíⁿnuuⁿ yā na staava yeⁿe yā dendu'ū yeⁿe Espíⁿitu N'dai yeⁿe Ndyuūs; ní díⁿ yā chi nduutináaⁿ yā nguéeⁿ snaaⁿ yā ní veéⁿ yā nguéeⁿ 'caandiveéⁿ yā. Ní 'tíicā 'iiⁿ'yāⁿ Israel ndii tiempo 'cūū. ⁹ 'Tiicá ntúūⁿ David ngaⁿ'a yā: 'Viicu yeⁿe chi che'é yā ní nduuvi tan'dúúⁿcā tuūví cáávā 'iiⁿ'yāⁿ s'eeⁿ. Ní tiempo chi che'é yā ndaā enemigos yeⁿe yā ní nadituu'ví ya 'iiⁿ'yāⁿ s'eeⁿ. Ní 'tíicā Ndyuūs cuuvi diⁿ yā castigar 'iiⁿ'yāⁿ s'eeⁿ.

¹⁰ Ní nduutinaáⁿ yā tan'dúúⁿcā chi cuuvi nguēē chí nguéeⁿ snaaⁿ yā. Ní dáámí yā 'áámá nūuⁿ can'dí yā cueⁿ'e daāⁿmaⁿ.

Nanguaⁿ'ai 'iiⁿ'yāⁿ chi nguéeⁿ 'iiⁿ'yāⁿ Israel

¹¹ Maaⁿ ní itiinguuneéⁿ ndís'tií: Taachi 'iiⁿ'yāⁿ Israel s'eeⁿ candéé ca'a yā chí cundεεve yā caati nguéeⁿ i'téenu yā Ndyuūs, ¿'áá 'áámá canee chi chindεεve yā? Nguεε 'tíicā mar 'áámá naaⁿ. Naati chó'ōo chuū caati 'iiⁿ'yāⁿ Israel chi judíos s'eeⁿ nguéeⁿ n'giindiveéⁿ yā nduudu yeⁿ'é Ndyuūs. Ní 'íicú 'iiⁿ'yāⁿ chi nguéeⁿ yeⁿ'e ndaata Israel cuuvi nánguaⁿ'ai yā. Ní diiⁿ chi 'iiⁿ'yāⁿ yeⁿ'e ndaata Israel nngueé yā yeⁿ'e tanáⁿ'ā 'iiⁿ'yāⁿ ní cu'téenu cá yā Ndyuūs. ¹² Ní caati 'iiⁿ'yāⁿ Israel s'eeⁿ nguéeⁿ ch'iindiveéⁿ yā nduudu yeⁿ'e Ndyuūs ní chó'ōo chi tuneéⁿ 'iiⁿ'yāⁿ yeⁿ'e núúⁿmánⁿ iⁿ'yeeⁿdí chi cuuvi cu'teenú yā Ndyuūs. Ní sta'á yā yeⁿ'e vaadī n'dai yeⁿ'é Ndyuūs. Ní nduuti chi 'iiⁿ'yāⁿ chi nguéeⁿ yeⁿ'e ndaata Israel cuuvi cu'téenu yā caava 'iiⁿ'yāⁿ yeⁿ'e ndaata Israel nguéeⁿ ch'iindiveéⁿ yā nduudu yeⁿ'é Ndyuūs, tuu'mi n'dee ca n'daacā ca yeⁿ'e nducyáácá 'iiⁿ'yāⁿ taachi 'iiⁿ'yāⁿ Israel s'eeⁿ nanguεεcúndií yā ní cu'téenu yā nduudu yeⁿ'é Ndyuūs taama vmnéⁿ'ēe.

¹³ Maaⁿ ní neⁿ'é caāⁿ'mánⁿ nduucú ndís'tií chi nguéeⁿ 'iiⁿ'yāⁿ Israel ndís'tií. Maaⁿ chi Ndyuūs dicho'ó yā 'úú chi 'úú ní apóstol chi candéé nduudu yeⁿ'é yā nanáánⁿ 'iiⁿ'yāⁿ chi nguéeⁿ Israel s'eeⁿ. Úú deenú chi ch'εεte ntiⁿ'nyuⁿ yeⁿ'é. ¹⁴ Ni 'úú neⁿ'é chi 'iiⁿ'yāⁿ yeⁿ'e ndaata yeⁿ'é nguéeⁿ yā yeⁿ'e ndís'tií niicu cu'téenu yā Ndyuūs tan'dúúicā chi ndís'tií i'téenu nī Ndyuūs. Ní 'iicú cuuvi nánguaⁿ'ai n'duuvi 'iiⁿ'yāⁿ yeⁿ'e ndaata yeⁿ'é tan'dúúicā ndís'tií nánguaⁿ'ai nī. ¹⁵ Ní taachi Ndyuūs s'neéⁿ yā 'áámá lado 'iiⁿ'yāⁿ Israel s'eeⁿ diiⁿ yā 'tíicā caati nducyaaca 'iiⁿ'yāⁿ yeⁿ'e iⁿ'yeeⁿdí 'cūū chi nguéeⁿ yeⁿ'e 'iiⁿ'yāⁿ Israel cuuvi cunee 'diiⁿ yā ndúúicū Ndyuūs. ¿Táácā cuuvi yeⁿ'e 'iiⁿ'yāⁿ Israel s'eeⁿ taachi Ndyuūs cuaāⁿ ntuúnⁿ yā 'iiⁿ'yāⁿ Israel s'eeⁿ? Ndyuūs nca'á yā vida cueⁿ'e daāⁿmaⁿ yeⁿ'é yā lugar yeⁿ'e vaadī n'gii cueⁿ'e daāⁿmaⁿ. ¹⁶ N'giindiveéⁿ nī yeⁿ'e chuū chi caaⁿ'mánⁿ: Nduuti chi ca'a yú Ndyuūs 'áámá taaⁿ yeⁿ'e masa yeⁿ'é pan cáávā ofrenda, 'tiicá ntúūⁿ nducuéⁿ'ē masa yeⁿ'e pan miiⁿ ní yeⁿ'é Ndyuūs. Ní nduuti chi ca'a yú Ndyuūs cáávā ofrenda dii'yu yeⁿ'e yáⁿ'á, 'tiicá ntúūⁿ nducuéⁿ'ē yáⁿ'á ní yeⁿ'é Ndyuūs. 'Tiicá ntúūⁿ Ndyuūs di'viicú yā 'iiⁿ'yāⁿ yeⁿ'e ndaata Israel caati 'āā di'viicú yā 'iiⁿ'yāⁿ vmnáánⁿ vmnaaⁿ yeⁿ'e ndaata yeⁿ'é yā.

¹⁷ Náⁿ'á dúuⁿnē yeⁿ'e yáⁿ'á olivo chi canéé na yáⁿ'āa 'iiⁿ'yāⁿ, ní 'iiⁿ'yāⁿ 'caaca yā ní sta'á yā dúuⁿnē yeⁿ'e yáⁿ'á olivo chi canéé icyáⁿ'ā ní diiⁿ yā chi yeⁿ'e yáⁿ'á olivo yeⁿ'é yā. 'Tíicā ndís'tií, 'iiⁿ'yāⁿ chi nguéeⁿ yeⁿ'e ndaata Israel. Ní ndís'tií tan'dúúicā dúuⁿnē yeⁿ'e yáⁿ'á olivo yeⁿ'e icyáⁿ'ā miiⁿ 'tiicá nī naati maaⁿ ní véé parte yeⁿ'é nī ndúúicū 'iiⁿ'yāⁿ Israel chí tan'dúúicā yáⁿ'á olivo chi canéé yáⁿ'āa 'iiⁿ'yāⁿ. Ní maaⁿ ní ndís'tií chi nguéeⁿ yeⁿ'e ndaata Israel cuuvi yeⁿ'é nī nducuéⁿ'ē chi n'dai taavi yeⁿ'e 'iiⁿ'yāⁿ chi Israel yā. ¹⁸ Maaⁿ ní ndís'tií chi nguéeⁿ Israel nī, nguéeⁿ caaⁿ'mánⁿ nī chi ch'εεte maánⁿ nī ndís'tií, caati nguéeⁿ 'iiⁿ'yāⁿ chí Israel yā chí tan'dúúicā chí nguéeⁿ yeⁿ'e yáⁿ'á. Ní 'iiⁿ'yāⁿ 'caaca yā dúuⁿnē miiⁿ, 'tíica yā. Nds'tií n'gaacú nī chí ndís'tií ní tan'dúúicā 'áámá dúuⁿnē 'tíicā ndís'tií. Tan'dúúicā dúuⁿnē nguéeⁿ ca'a fuerzas yeⁿ'e dii'yu yeⁿ'e yáⁿ'á naati yáⁿ'á ca'a fuerzas yeⁿ'e dúuⁿnē, 'tíicā ndís'tií. Cuta'á nī fuerzas yeⁿ'e 'iiⁿ'yāⁿ chí Israel yā.

¹⁹ 'Úú nguéeⁿ deenú nduuti chí ndís'tií caaⁿ'mánⁿ nī 'tíicā yeⁿ'e chuū: 'iiⁿ'yāⁿ ch'iicá yā dúuⁿnē s'eeⁿ caati 'úú cuuvi canéé lado yeⁿ'e dúuⁿnē chí ch'iicá yā. 'Úú chí nguéeⁿ Israel 'úú canéé lado yeⁿ'e 'iiⁿ'yāⁿ chí Israel yā. ²⁰ N'daacā ngaⁿ'a nī naati deenú nī chí 'iiⁿ'yāⁿ s'eeⁿ tan'dúúicā dúuⁿnē chí ch'iicá yā, 'tiicá yā, ti nguéeⁿ i'téenu yā Cristo. Ní maaⁿ ní ndís'tií tan'dúúicā dúuⁿnē yeⁿ'e yáⁿ'á míⁿ 'tiicá nī caati i'téenu nī Cristo. Maaⁿ ní ndís'tií nguεε diiⁿ nguεε nī naati cundéε nī cuidado táácā chí 'cuεetinée nī. ²¹ Caati nduuti chí Ndyuūs nguéeⁿ diiⁿ yā perdonar 'iiⁿ'yāⁿ Israel chí nguεε i'téenu chí tan'dúúicā dúuⁿnē yeⁿ'e yáⁿ'á, nguéeⁿ diiⁿ yā nadach'εεcú yā nuuⁿndi yeⁿ'e ndís'tií chí vmnáánⁿ vmnaaⁿ tan'dúúicā dúuⁿnē chí yeⁿ'e yáⁿ'á yeⁿ'e icyáⁿ'ā nduuti chí nguéeⁿ candéé nī cuidado táácā chí 'cuεetineé nī. ²² Cuin'diichí nī, tuu'mi Ndyuūs ní neené n'dai taavi yā ndúúicū 'iiⁿ'yāⁿ chí i'téenu yā naati neene chεechí ntúūⁿ yā vaa. Chεechí yā ndúúicū 'iiⁿ'yāⁿ ti nguéeⁿ i'téenu yā. Naati Ndyuūs ní neené n'dai taavi yā ndúúicu nī nduuti chí 'áámá cunee nī chí cu'téenu nī. Ní nduuti chí nguéeⁿ diiⁿ nī 'tuucā, tuu'mi 'tiicá ntúūⁿ Ndyuūs caⁿ'á yā diiⁿ yā castigar ndís'tií tan'dúúicā chí ch'iicá yā dúuⁿnē yeⁿ'e maaⁿ yáⁿ'á. ²³ Ní nduuti chí 'iiⁿ'yāⁿ Israel cu'téenu yā Cristo, tuu'mi ní Ndyuūs ní cuta'á yā ní nguεεcunée diiⁿ yā

chi 'iiⁿ'yāⁿ s'eeⁿ ní táámá vmnéⁿ'ēe canee yā tan'dúúcā 'āā dúuⁿnē yeⁿ'e maaⁿ yáⁿ'á míⁿ'tííca yā. Ní véé poder yeⁿ'e Ndyuūs chi cuuvi díⁿ yā 'tííca. ²⁴ Ní nduuti chi ndís'tiī chi nguéé 'iiⁿ'yāⁿ Israel ndís'tiī, ní Ndyuūs sta'á yā ndís'tiī tan'dúúcā chí n'giicá yā dúuⁿnē yeⁿ'e táámá yáⁿ'á olivo yeⁿ'e icyáⁿ'ā ní díⁿ yā chi yeⁿ'e yáⁿ'á olivo yeⁿ'é yā, 'tííca ndís'tiī maaⁿ. 'Tiicá ntúūⁿ n'dáácā n'dai ca díⁿ Ndyuūs ndúúcū 'iiⁿ'yāⁿ Israel chi vmnááⁿ vmnaaⁿ tan'dúúcā dúuⁿnē yeⁿ'e yáⁿ'á yeⁿ'é yā, ní cuuvi díⁿ yā chi táámá vmnéⁿ'ēe ní yeⁿ'ē maaⁿ yáⁿ'á mijⁿ.

Yeⁿ'e chi nanguaⁿ'ai 'iiⁿ'yāⁿ Israel yeⁿ'e tiempo chi cuchī

²⁵ Maaⁿ ní hermanos yeⁿ'é, neⁿ'é chi ndís'tiī cadíínúúⁿ nī chi canúúⁿ n'de'ei. Ní nguéé nadicadíínúuⁿ nī chi deenu ca nī. 'Áámá tiempo nūuⁿ 'iiⁿ'yāⁿ Israel dichεεchí yā staava yeⁿ'é yā dámaāⁿ 'naaⁿ tiempo taachi nducyaaca 'iiⁿ'yāⁿ chi nguéé 'iiⁿ'yāⁿ Israel ní Ndyuūs ndεεve yā nducyaaca 'iiⁿ'yāⁿ s'eeⁿ chi neⁿ'é yā chi cuuvi yeⁿ'é yā. ²⁶ Ní taachi cho'ōo tiempo miiⁿ nducyáácá 'iiⁿ'yāⁿ Israel ní caⁿ'a yā cu'téenu yā caati 'tííca canéé nguūⁿ na libro yeⁿ'é Ndyuūs:

'Iiⁿ'yāⁿ chi nadanguáⁿ'ai yā 'iiⁿ'yāⁿ Israel chiicá yā yeⁿ'e yáāⁿ Sión, ní divíi yā nducuéⁿ'ē nuuⁿndi yeⁿ'e 'iiⁿ'yāⁿ yeⁿ'e ndaata Israel.

²⁷ Ní 'úú Ndyuūs dicuaacú compromiso yeⁿ'é ndúúcū 'iiⁿ'yāⁿ s'eeⁿ, taachi 'úú nadivíi nuuⁿndi yeⁿ'e yā.

²⁸ Ní 'iiⁿ'yāⁿ Israel nguéé i'téenu yā nduudu cuaacu yeⁿ'e Ndyuūs yeⁿ'e chi nadanguáⁿ'ai yā. Ní maaⁿ ní contra yeⁿ'é Ndyuūs 'iiⁿ'yāⁿ s'eeⁿ caati ndís'tiī chi nguéé 'iiⁿ'yāⁿ Israel ndís'tiī, cuuvi yeⁿ'é Ndyuūs ndís'tiī. Ní 'áará chi 'iiⁿ'yāⁿ Israel s'eeⁿ nguéé i'téenu yā Cristo, Ndyuūs dineⁿ'é yā 'iiⁿ'yāⁿ s'eeⁿ caati Ndyuūs níndεεvé yā 'iiⁿ'yāⁿ s'eeⁿ chi vmnááⁿ vmnaaⁿ chi yeⁿ'e ndaata yeⁿ'é yā. ²⁹ Ní Ndyuūs nguéé ndaacadaamí yā yeⁿ'é 'iiⁿ'yāⁿ s'eeⁿ chi yaa'ví yā chi cuuvi yeⁿ'é yā 'iiⁿ'yāⁿ s'eeⁿ. Ní Ndyuūs di'viicú ntúūⁿ yā 'iiⁿ'yāⁿ s'eeⁿ. ³⁰ Ní tiempo chi chó'ōo ndís'tiī chi nguéé 'iiⁿ'yāⁿ Israel ndís'tiī, nguéé n'giindiveéⁿ nī nduudu cuaacu yeⁿ'é Ndyuūs naati maaⁿ ní 'iiⁿ'yāⁿ Israel s'eeⁿ nguéé n'giindiveéⁿ yā nduudu yeⁿ'é Ndyuūs. Ní Ndyuūs yá'ai yā caavā ndís'tiī chi nguεε i'téenu nī. ³¹ Ní 'tiicá ntúūⁿ, 'iiⁿ'yāⁿ Israel s'eeⁿ nguéé n'giindiveéⁿ yā nduudu cuaacu yeⁿ'é Ndyuūs ní díⁿ yā 'tííca caati cuayiivi Ndyuūs cuuvi ya'ái yā cáávā 'iiⁿ'yāⁿ s'eeⁿ tan'dúúcā chi ya'ái yā cáávā ndís'tiī. ³² Ní Ndyuūs 'āā daamá nūuⁿ s'néⁿ yā nducyaaca 'iiⁿ'yāⁿ chi nguéé ch'iindiveéⁿ yā nduudu yeⁿ'é yā cáávā chi Ndyuūs cuuvi ya'ái yā caavā nducyaaca 'iiⁿ'yāⁿ.

³³ De'ε chúúcā n'dee cá vaadī n'dai yeⁿ'é Ndyuūs. De'ε chúúcā n'dee cá chi tuumicadíínúuⁿ yā ndúúcū chi déenu yā. S'uuúⁿ ní nguéé cuuvi caaⁿ'maⁿ yú de'ε cuuvi chi tuumicadiínúuⁿ yā 'tííca; ní nguéé cuuvi tuumicadiínúuⁿ yú chiiⁿ chi díⁿ yā. ³⁴ Ní 'tííca canéé nguūⁿ na libro yeⁿ'é Ndyuūs: ¿Dú'ū cuuvi túmíicadíínúūⁿ vaadī cadíínúuⁿ yeⁿ'e Señor Ndyuūs? ¿Du'ū cuuvi ca'a consejo Ndyuūs? ³⁵ ¿Du'ú 'iiⁿ'yāⁿ ca'a yā algo Ndyuūs vmnááⁿ vmnaaⁿ ní cuayiivi Ndyuūs ca'á yā tan'dúúcā chi nadí'vε yā yeⁿ'é? ³⁶ Tanducuéⁿ'ē dendu'ū chí véé ní Ndyuūs din'dái yā ní tee yā s'uuúⁿ tanducuéⁿ'e. Ní cucáávā 'iiⁿ'yāⁿ mijⁿ véé tanducuéⁿ'ē dendu'ū chi yeⁿ'é yā. Maaⁿ ní cueⁿ'e daāⁿmaⁿ dich'εεte yú Ndyuūs. 'Tííca.

12

Ca'a yú vida yeⁿ'e yú Ndyuūs ní diiⁿ yú tanducuéⁿ'ē chi neⁿ'é yā

¹ Maaⁿ ní ndís'tiī, hermanos yeⁿ'é, cáávā chi Ndyuūs ya'ai 'iinú yā yeⁿ'e ndís'tiī, di'cuíftūu ndís'tiī chi ca'á nī vida yeⁿ'e maáⁿ nī tan'dúúcā 'áámá ofrenda chí canduuchi nanááⁿ Ndyuūs cáávā ntiiⁿnyuⁿ yeⁿ'é Ndyuūs. Ní díⁿ nī ntiiⁿnyuⁿ chi neⁿ'é yā chi díⁿ nī. Chuū chi díⁿ nī ní cuaacu chi n'dai taavi chi inee yiinú Ndyuūs. Ní canéé chi díⁿ nī 'tííca. ² Ní nguéé díⁿ nī tan'dúúcā chi neⁿ'e 'iiⁿ'yāⁿ yeⁿ'e iⁿ'yeeⁿdí 'cūū naati cuaáⁿ nī lugar Ndyuūs chi n'daáⁿ yā vaanicadíínúuⁿ yeⁿ'é nī nī 'tiicá ntuūⁿ n'daáⁿ yā vida yeⁿ'é nī. Ní 'íícu cuuví deenú nī cheé chi Ndyuūs neⁿ'é yā chi diiⁿ nī, cheé chi n'daacā, cheé chi cunee yiinú Ndyuūs nī cheé chi n'dai taavi ca.

³ Ní cáávā chi Ndyuūs tee yā 'úú chi n'dai taavi ntiiⁿnyuⁿ yeⁿ'é yā 'úú ní ngaⁿ'á ngii ca'áámá ca'aama ndís'tiī chi nguée nadacádíínuuⁿ nī chi n'gæte cá nī ngo'o ca chi canée chi nadacádíínuuⁿ nī naati nadacádíínuuⁿ nī ní n'diichí nī yeⁿ'e maáⁿ nī ndúúcu chí i'téenu nī chi Ndyuūs itée yā ndís'tiī. ⁴ Caati 'tíicā tan'dúúca 'áámá cuerpo yeⁿ'e 'iiⁿ'yāⁿ chí neené n'dee nááⁿ chi véé yeⁿ'ē ní nguée dáámá ntiiⁿnyuⁿ chi yeⁿ'ē n'dee nááⁿ yeⁿ'ē; ⁵ 'tiicá ntúúⁿ s'uuúⁿ 'áará chi néené 'yaaⁿ yú ní s'uuúⁿ ní tan'dúúca chi 'áámá cuerpo ti yeⁿ'e Cristo s'uuúⁿ, 'tíicā s'uuúⁿ ní s'uuúⁿ ní tan'dúúca chi nduvidaama yú 'aama yú taama yú tan'dúúca chi n'dee nááⁿ yeⁿ'e 'áámá cuerpo yeⁿ'e maaⁿ yú, 'tíicā s'uuúⁿ.

⁶ Ní Ndyuūs tee yā yeⁿ'e vaadi n'dai yeⁿ'é yā ntiiⁿnyuⁿ chi n'dááⁿ ca'áámá ca'aama s'uuúⁿ tan'dúúca chi neⁿ'é yā dííⁿ yā. Ní canee chi diiⁿ yú n'dai ntiiⁿnyuⁿ yeⁿ'e yú. Ní nduuti chi Ndyuūs tee yā ntiiⁿnyuⁿ yeⁿ'e yú chi candε yú nduudu cuaacu yeⁿ'é yā chi tee yā s'uuúⁿ canée chi caaⁿ'maⁿ yú nduudu miiⁿ tan'dúúca chi i'téenu yú. ⁷ Ní nduuti chi Ndyuūs tee yā s'uuúⁿ ntiiⁿnyuⁿ chi nginnee yú, tanáⁿ'ā 'iiⁿ'yāⁿ canee chi cunnee yú n'daacā ca. Ní s'uuúⁿ chi véé ntiiⁿnyuⁿ yeⁿ'e yú chí ngi'cueeⁿ yú canée chi ca'cueeⁿ yú n'daacā. ⁸ S'uuúⁿ chi dííⁿ ntiiⁿnyuⁿ chi yaa'vi nées yú 'iiⁿ'yāⁿ chi cu'téenu cá yā canée chi diiⁿ yú n'daacā ca. S'uuúⁿ chi véé ca yeⁿ'e yú chi cuuvi ca'a yú taama yā, canée chi ca'a yú ndúúcu núúⁿmáⁿ staava yeⁿ'e yú. S'uuúⁿ chi ngaⁿ'a ntiiⁿnyuⁿ yeⁿ'e tanáⁿ'ā s'uuúⁿ canee chi nga'a ntiiⁿnyuⁿ yú n'daacā ca. S'uuúⁿ chi ca'a yú tanáⁿ'ā s'uuúⁿ chi nguée véé necesidades yeⁿ'é yā canée chi diiⁿ yú ní yeenu yú.

Yeⁿ'e chi canée chi diiⁿ yú ti yeⁿ'e Cristo s'uuúⁿ

⁹ Canée chi dineⁿ'e yú 'aama yú taama yú ndúúcu núúⁿmáⁿ staava yeⁿ'e yú. Ní nguée dineⁿ'e yú cosa chi nguεε n'daacā naati canée chi diiⁿ yú tanducuéⁿ'ē chi n'daacā.

¹⁰ Canée chi dineⁿ'e yú 'aama yú taama yú tan'dúúca chi 'aama vi'i yú chi cuaacu chi 'áámá yuuuⁿ yú ní dineⁿ'e yú 'aama yú ndúúcu taama yú.

¹¹ Ní n'daacā idiíⁿ ca yú ntiiⁿnyuⁿ ní nguée 'daan'dí yú ní diiⁿ yú ntiiⁿnyuⁿ yeⁿ'e Señor ndúúcu núúⁿmáⁿ staava yeⁿ'e yú ti neⁿ'e yú Señor yeⁿ'e yú.

¹² Ní cáávā chi Ndyuūs caⁿ'á yā chi tée yā s'uuúⁿ chi cuuvi yeⁿ'e yú canée chi yeenu yú. Ní taachi n'geenu yú ngii canée chi cuchée yú ngiinū ngiinū. Ní cuéⁿ'é daáⁿmaⁿ canée chi caaⁿ'maⁿngua'a yú.

¹³ Ní canée chi cunnee yú 'iiⁿ'yāⁿ chi i'téenu yā Ndyuūs ni tée yú yeⁿ'e necesidades chi nguée véé yeⁿ'é yā. Canée chi cuaaⁿ yú 'iiⁿ'yāⁿ chi dííⁿ yā visitar s'uuúⁿ.

¹⁴ Canée chi caaⁿ'maⁿ yú: Dé'ε chúúca n'dai yeⁿ'é 'iiⁿ'yāⁿ chi nguée n'daacā idiíⁿ yā ndúúcu s'uuúⁿ. Ní ngiica yú Ndyuūs chi di'viicú yā 'iiⁿ'yāⁿ s'eeⁿ ní nguée taaⁿ yú nduucú yā.

¹⁵ Ní canée chí cuuvi yeenu yú ndúúcu 'iiⁿ'yāⁿ chi yeenu yā. Ní canée chi cuεεcu yú ndúúcu 'iiⁿ'yāⁿ chí ngεεcú yā.

¹⁶ Ní 'cuεεtinee yú n'daacā ndúúcu 'áámá yú taama yú. Nguée nadacádíínuuⁿ yú yeⁿ'ē maaⁿ yú chi ch'εεté naati ndiicúúⁿ n'dai 'cuεεtinee yú ní nguée nadacádíínuuⁿ yú yeⁿ'ē maaⁿ yú chi s'uuúⁿ chí deenu yú.

¹⁷ Nguée nanguεεcundii yú ní diiⁿ yú cosa chi nguεε n'daacā ndúúcu 'iiⁿ'yāⁿ chi 'āā dííⁿ yā cosa chi nguée n'daacā ndúúcu yú. Diiⁿ núúⁿ yiiⁿnuⁿ yú chí diiⁿ yú dámaaⁿ chí n'daacā ndúúcu nducyaaca 'iiⁿ'yāⁿ. ¹⁸ Ní diiⁿ yú nducuéⁿ'ē chí n'daacā chí cuuvi diiⁿ yú caati 'diiⁿ cuuvi cunee yú nguaaⁿ nducyaaca 'iiⁿ'yāⁿ. ¹⁹ Ní ndís'tiī hermanos yeⁿ'é chí neⁿ'é taavi, nguée diiⁿ yú castigar 'iiⁿ'yāⁿ naati cu'neeⁿ yú nanááⁿ Ndyuūs ní nguée cuuvi 'cuinaaⁿ yú. Ní 'íicú Ndyuūs cā'a yā castigo 'iiⁿ'yāⁿ. Canée nguūⁿ na libro yeⁿ'é Ndyuūs 'tíicā: 'Úú chí Señor ní ngaⁿ'á chí 'úú ní dííⁿ castigar 'iiⁿ'yāⁿ yeⁿ'e 'úú ní nadíí've yā yeⁿ'e chí nguée n'daacā chí dííⁿ yā. ²⁰ Naati s'uuúⁿ ní diiⁿ yú tan'dúúca chí canée nguūⁿ na libro yeⁿ'é Ndyuūs 'tíicā: Nduuti chí 'iiⁿ'yāⁿ chí taán yā yeⁿ'é nī nadich'εεcú nī yeⁿ'e yā. Nduuti chí cuiicu yā, ca'a nī chí che'e yā. Ní nduuti chí yaaca yā, ca'á nī chí cu'u yā. Tí caati dííⁿ nī 'túúca, tuu'mi ní dííⁿ nī chí 'cuinaaⁿ yā yeⁿ'e chí dííⁿ yā chí taán yā ndúúcu nī. ²¹ Maaⁿ ní

cuchεε yú cáávā cosa chi nguεε n'daacā chi diiⁿ yú naati cuchεε yú yeⁿe tanducuéⁿē chi nguεε n'daacā cáávā chi n'daacā chi idiⁿ yú.

13

¹ Nducyaaca yú canee chi cu'neenⁿ veenⁿ yú yeⁿe 'iiⁿntyéⁿē caati nguéeⁿ véeⁿ mar 'áámá 'iiⁿntyéⁿē chi nguéeⁿ Ndyuūs ca'á yā 'iiⁿyāⁿ chi véeⁿ lugar yeⁿe yā chi 'iiⁿntyéⁿē. Ní Ndyuūs s'neénⁿ yā nducuéⁿē 'iiⁿntyéⁿē chi véeⁿ na lugar yeⁿe yā. ² Ní 'iiⁿyāⁿ chi nguéeⁿ idiⁿ yā chi ngaⁿ'a 'iiⁿntyéⁿē 'tiicá ntúūⁿ 'iiⁿyāⁿ ní contra yeⁿe chi Ndyuūs ngaⁿ'a ntiiⁿnyúⁿ yā. Ní 'iiⁿyāⁿ chi diíⁿ yā 'túúcā idinuuⁿndí yā ní cuuví yā condenado. ³ Ní 'iiⁿyāⁿ chi n'daacā idiⁿ yā nguéeⁿ canee chi di'va'á yā yeⁿe 'iiⁿntyéⁿē naati 'iiⁿyāⁿ chi nguéeⁿ n'daacā idiⁿ yā 'va'á yā yeⁿe 'iiⁿntyéⁿē. ¿Áá neⁿé nī chi nguéeⁿ 'va'á nī yeⁿe 'iiⁿntyéⁿē? Dííⁿ nī chi n'daacā ní 'iiⁿntyéⁿē miiⁿ ní cuuví ngaⁿ'á yā chi n'daacā idiⁿ nī, ⁴ caati 'iiⁿntyéⁿē chi ngaⁿ'a yā ntiiⁿnyuⁿ dichíí'vē Ndyuūs cáávā chi cuuvi n'daacā yeⁿe nī. Naati nduuti chi idiⁿ nī chi nguéeⁿ n'daacā, tuu'mi ní di'va'á nī yeⁿe 'iiⁿntyéⁿē. Caati cuaacu chi 'iiⁿntyéⁿē cuuvi diíⁿ yā castigar 'iiⁿyāⁿ tiiⁿ 'iiⁿntyéⁿē ní véeⁿ poder yeⁿe yā. 'Iiⁿntyéⁿē ní dichíí'vē Ndyuūs ní canéeⁿ chi diíⁿ yā dendu'ū chi cuaacu. Ní diíⁿ yā castigar 'iiⁿyāⁿ caati Ndyuūs nguéeⁿ inee yiinú yā yeⁿe 'iiⁿyāⁿ chi nguéeⁿ n'daacā idiⁿ yā. ⁵ Ni cáávā chuū canee chi 'caandiveénⁿ nī chi ngaⁿ'a 'iiⁿntyéⁿē nguéeⁿ dámaāⁿ caavā chi cuuví nī castigo ti cáávā deenú nī chi n'daacā chi nacadiinúúⁿ nī na staaava yeⁿe nī. ⁶ Ni 'tiicá ntúūⁿ caavā chúū, ca'á nī tuumī cobrador yeⁿe gobierno. 'Iiⁿntyéⁿē miiⁿ dichíí'vē Ndyuūs taachi diíⁿ yā ntiiⁿnyuⁿ yeⁿe yā.

⁷ Canee yú chi ca'a yú tuumī cobrador yeⁿe gobierno. Canee yú chi ca'a yú tuumī yeⁿe yáⁿāa yeⁿe yú cobrador miiⁿ. Canee yú chi diiⁿ yú chí cu'teenu yú 'iiⁿyāⁿ 'iiⁿntyéⁿē ní diiⁿ yú estimar 'iiⁿyāⁿ s'eeⁿ. ⁸ Nguéeⁿ cun'diicú nī yeⁿe mar 'áámá 'iiⁿyāⁿ nguéeⁿ du'ū veε. Dámaāⁿ canee chi dineⁿe yú nducyaaca 'iiⁿyāⁿ. 'Iiⁿyāⁿ chi dineⁿe nducyaaca 'iiⁿyāⁿ diíⁿ yā tan'dúúcā chi ngaⁿ'a ley yeⁿe yú. ⁹ Ní mandamiento yeⁿe ley yeⁿe yú ní chuū chiiⁿ: Nguéeⁿ caⁿ'á nī ndúúcū n'daata o isaⁿ'ā chi nguéeⁿ yeⁿe nī. Nguéeⁿ 'caaⁿ'núⁿ nī 'iiⁿyāⁿ. Nguéeⁿ diduucú nī. Nguéeⁿ caaⁿ'maⁿ nī nduudu yaadi yeⁿe mar 'áámá 'iiⁿyāⁿ. Nguéeⁿ dinéⁿe nī dendu'ū chi véeⁿ chi yeⁿe táámá yā. Ní nducuéⁿē mandamiento 'cūū ndúúcū tanáⁿ'ā mandamiento yeⁿe ley yeⁿe yú chi véeⁿ, ní cuuví cuaacú nduudu ní tuumicádíínuuⁿ yú na nduudú 'cūū: Dinéⁿe nī 'iiⁿyāⁿ niiⁿnuúⁿ vaacú nī tan'dúúcā chi dineⁿe nī maánⁿ. ¹⁰ 'Iiⁿyāⁿ chi dineⁿe yā 'iiⁿyāⁿ niiⁿnuúⁿ vaacú yā nguéeⁿ cunncāā idiⁿ yā ndúúcu yā. Ni 'tíicā. Taachi dineⁿe yú 'iiⁿyāⁿ diiⁿ yú tan'dúúcā chi ngaⁿ'a ley yeⁿe yú.

¹¹ N'deeé cá ní nguéeⁿ dámaāⁿ chúū. Nadacádíínuuⁿ yú yeⁿe nguuvi s'eeⁿ chi canee yú iⁿ'yeeⁿdí 'cūū. Canéeⁿ chi 'cuεetinéeⁿ ngiinu yú caati yeⁿe hora chi nguaⁿ'ai yú ní 'āā snee niiⁿnuúⁿ cá yeⁿe s'uuúⁿ nguéeⁿ ti taachi caama i'téénu yú Cristo. ¹² Maaⁿ ní hora miiⁿ tan'dúúcā chi 'āā chéeⁿ cuuvi dεεve ní 'āā cūchii nguuvi taachi ndaá Cristo maaⁿ. Ní nguéeⁿ canee chi diiⁿ yú dendu'ū chi nguεε n'daacā chi diiⁿ yú tan'dúúcā chi na maaíⁿ, naati n'daacā 'cuεetinee yú tan'dúúcā chi canee yú na dεεve yeⁿe Ndyuūs ní n'daacā canee cáávā s'uuúⁿ. ¹³ Ní 'cuεetinee yú n'daacā tan'dúúcā chi canéeⁿ chi diiⁿ yú na dεεve yeⁿe Ndyuūs. Nguéeⁿ cuuvi cuu'vi yú ní nguéeⁿ idiⁿ yú 'viicu yeⁿe chi che'e yú ndúúcū n'deeé n'dái ruido. Ní nguéeⁿ 'cuáaⁿ yú caⁿ'a yú ndúúcū n'daataá o isaⁿ'ā chi nguéeⁿ yeⁿe yú. Ndíí nguéeⁿ ndúú canee yú ndúúcū vicio yeⁿe yú. Nguéeⁿ 'caa'va yú ní nguéeⁿ ngueē yú yeⁿe táámá 'iiⁿyāⁿ. ¹⁴ Naati 'cuεetinee yú n'daacā ní diiⁿ yú tan'dúúcā chi Señor Jesucristo yeⁿe yú diíⁿ yā. Ní nguéeⁿ diiⁿ yú tan'dúúcā chi neⁿe maaⁿ cuerpo yeⁿe yú.

14

Nguéeⁿ caaⁿ'maⁿ nī yeⁿe chi idiⁿ hermano yeⁿe nī

¹ Ndís'tií ní cuta'á nī nguaaⁿ ndís'tií hermanos yeⁿe yú chí duūva yā yeⁿe chi i'téénu yā; ní nguéeⁿ nééné n'deē caaⁿ'máⁿ nī nduucú yā yeⁿe chi nadacádíínuuⁿ yā chi nguéeⁿ ituumicádíínuuⁿ yú yeⁿe. ² Ti 'tíicā, véeⁿ 'iiⁿyāⁿ chi i'téénu yā Ndyuūs ní nadicádíínuuⁿ

yā chi cuuvi che'é yā nducuéⁿē chi véé. Ní náⁿá 'iiⁿyāⁿ chi nguéeé i'téenu n'daaca yā ní nguéeé cuuvi che'é yā nducuéⁿē. Taachi caⁿá yā che'é yā níⁿvēē nguéeé che'e yā yuūte cáávā religión yeⁿe yā. ³ 'Iiⁿyāⁿ chi che'é yā tanducuéⁿē chi véé nguéeé cánéé chi caaⁿmáⁿ yā yeⁿe chi nguéeé ineeⁿ yiinú yā yeⁿé 'iiⁿyāⁿ chi nguéeé nge'é yā nducuéⁿē. Ní 'iiⁿyāⁿ chi nguéeé che'é yā nducuéⁿē nguéeé cánéé chí n'diichí yā 'iiⁿyāⁿ chi che'e tanducuéⁿē chi véé caati Ndyuūs sta'á ntúuⁿ yā 'iiⁿyāⁿ s'eeⁿ chi cuuvi yeⁿé yā 'iiⁿyāⁿ. ⁴ Ndís'tiī, ¿du'ū ndís'tiī chi n'diichí nī chi diiⁿ 'iiⁿyāⁿ chi dichíí'vē táámá yā? nduuti chi diíⁿ yā chi n'daacā o chi nguéeé n'daacā. Dámaāⁿ 'iiví yā cánéé chi n'diichí yā 'iiⁿyāⁿ chi dichíí'vē yā. Ní n'daacā cuuvi canee caavá yā, caati Señor Ndyuūs yeⁿe yú cuuví diíⁿ yā chi cánéé n'daacā yeⁿé yā caati Señor Ndyuūs véé poder yeⁿé yā chi inneé yā 'iiⁿyāⁿ chi dichíí'vē yā.

⁵ Ní 'tiicá ntúuⁿ, 'áámá 'iiⁿyāⁿ nadacadíínuuⁿ yā chi 'áámá nguuvi ní ch'εεte ca nguéeé ti táámá nguuvi. Táámá 'iiⁿyāⁿ nadacadíínuuⁿ yā chi 'āā daamá nūuⁿ nducuéⁿē nguuvi. Ní ca'áámá ca'aama ní ní cánéé nī tan'dúucā chi diitu nadicádiiⁿúúⁿ nī. ⁶ 'Iiⁿyāⁿ chi diíⁿ yā cuenta chi 'áámá nguuvi ní ch'εεte ca nguéeé ti tanáⁿā nguuvi, 'iiⁿyāⁿ miiⁿ nadicádiiⁿnuuⁿ yā 'tíicā cáávā chi dich'εεté yā Señor Ndyuūs yeⁿé yā. 'Iiⁿyāⁿ chi nadicádiiⁿnuuⁿ yā dáámá nūuⁿ nducuéⁿē nguuvi 'tiicá ntúuⁿ diíⁿ yā cáávā chi dich'εεté yā Señor Ndyuūs yeⁿé yā. Ní 'iiⁿyāⁿ chi nguéeé che'é yā yeⁿe tanducuéⁿē chi véé diíⁿ yā 'túucā cáávā chi i'téenu yā Señor ní ca'á yā gracias Ndyuūs cáávā chi che'e yā. Ní 'tiicá ntúuⁿ 'iiⁿyāⁿ chi che'é yā yeⁿe tanducuéⁿē chi véé diíⁿ yā 'túucā cáávā chi i'téenu yā Señor ní 'tiicá ntúuⁿ ca'á yā gracias Ndyuūs cáávā chi che'e yā.

⁷ Ní 'tíicā mar 'áámá s'uuúⁿ nguéeé sндуuchi yú cucáávā maaⁿ yú ndíí nguéeé ndúú 'cuūvi yú cucáávā maaⁿ yú. ⁸ Ndúúti chi sндуuchi yú, sндуuchi yú cáávā Señor. Ní nduuti chi 'cuūvi yú, 'cuūvi yú cáávā Señor. Maaⁿ ní ndúúti chi sндуuchi yú o n'dií yú yeⁿe Señor s'uuúⁿ. ⁹ Ní Cristo ch'iī yā ní nduuchi ntuúⁿ yā yeⁿe nguaaⁿ tináⁿā caati cuuví yā Señor yeⁿe tináⁿā, ní 'tiicá ntuúⁿ yeⁿé 'iiⁿyāⁿ chí sндуuchi.

¹⁰ Maaⁿ ní dii, ¿de'ē cúví chí n'díichí nuuⁿndi yeⁿe hermano yeⁿé di? ¿O dé'ē cúví chi nguéeé neⁿe di hermano yeⁿé di? 'Tíicā nducyaaca yú canee chi naⁿa yú nanááⁿ Cristo. Ní Cristo miiⁿ caⁿá yā n'diichí yā nuuⁿndi yeⁿe yú. ¹¹ Cánéé nguūⁿ na libro yeⁿé Ndyuūs 'tíicā:

Cuaacu níⁿnyúⁿ tan'dúucā chi 'úú chí canduuchí, ngaⁿa Señor Ndyuūs, nducyaáca 'iiⁿyāⁿ cánéé chi cáántii'yá yā nanááⁿ 'úú, ní nducyaaca yā canee chi caaⁿmáⁿ yā chi 'úú ní Ndyuūs 'úú.

¹² Ní 'tíicā vaa. Ca'áámá ca'aama s'uuuⁿ canee chi ca'a yú cuenta nanááⁿ Ndyuūs yeⁿe chi maaⁿ yú diiⁿ yú.

Nguéeé diíⁿ nī chi hermano yeⁿé nī dinuuⁿndí yā

¹³ Cáávā chuū nguéeé cánéé chi n'diichi yú yeⁿe chi diiⁿ hermanos yeⁿe yú. Nguéeé idiin yú 'túucā. Cánéé chi nadacadíínuuⁿ nī chi nguéeé idiíⁿ nī mar 'áámá naaⁿ chi hermanos yeⁿé nī nguéeé cūnee yiinú yā ní cuuvá yā na nuuⁿndi. ¹⁴ Maaⁿ ní chí 'úú ní yeⁿé Jesucristo 'úú, deenú chi cuaacu chi nguéeé véé mar 'áámá dendu'ū chi nguéeé n'daacā yeⁿé maāⁿ. Ní nduuti chi 'iiⁿyāⁿ nadacadíínuuⁿ yā chí 'áámá dendu'ū nguéeé n'daacā, tuu'mi ní chuū ní cáávā 'iiⁿyāⁿ miiⁿ cuaacu chi nguéeé n'daacā. ¹⁵ Ní nduuti chí cáávā 'áámá dendu'ū chí che'é nī ní diíⁿ nī chí hermano yeⁿé nī cuuvi ya'ái yā, tuu'mi ní nguéeé diíⁿ nī 'túucā cáávā chí dineⁿé nī hermano yeⁿé nī. Nguéeé diíⁿ nī chí cuuvi ndaí hermano yeⁿe nī cáávā 'áámá dendu'ū chí che'é nī caati Cristo ní ch'iī yā cáávā 'iiⁿyāⁿ miiⁿ. ¹⁶ Nguéeé diíⁿ nī cosas chí 'iiⁿyāⁿ cuuvi caaⁿmáⁿ yā yeⁿe chí ndís'tiī chí nguéeé n'daacā idiíⁿ nī yeⁿe chí ndís'tiī deenú nī chí n'daacā. ¹⁷ Naati chííⁿ chí yeⁿé Ndyuūs chí ngaⁿa ntiiⁿnyuⁿ yeⁿé nguéeé yeⁿé chí nge'e yú ndúucū chí ngi'i yú. Ndyuūs ngaⁿa ntiiⁿnyuⁿ yā yeⁿé dendu'ū chí cuaacu ndúucū vaadí 'diíⁿ ndúucū vaadí yeenú chí Espíritu N'dai yeⁿé Ndyuūs tee yā s'uuúⁿ. ¹⁸ Ní 'iiⁿyāⁿ chí dichíí'vē Cristo ní diíⁿ yā dendu'ū chí 'túucā, 'iiⁿyāⁿ miiⁿ diíⁿ yā

tan'dúúcā chi neⁿe Ndyuūs. 'Tiicá ntuūⁿ 'iiⁿ'yāⁿ yeⁿe iⁿ'yeeⁿdí 'cūū ngaⁿ'a yā chi n'daācā idiinⁿ 'iiⁿ'yāⁿ miiⁿ.

¹⁹ Maaⁿ ní 'tíicā canee chi diiⁿ yú. Canéé chi diiⁿ yú dendu'ū cáávā chi 'iiⁿ'yāⁿ 'cuētinéé yā ndúúcū vaadī 'diiⁿ ní ndúúcū chi diiⁿ yú cunnee yú 'aama yú taama yú chi cu'téénu ca yú yeⁿe Ndyuūs. ²⁰ Ní nguéé n̄dituuví n̄i dendú'ū n̄tiiⁿnyuⁿ chi diiⁿ Ndyuūs cáávā 'áámá dendu'ū chi nge'é n̄i. Cuaacu chi tanducuéⁿē dendu'ū ní δεενε naati nguéé n'daacā idiinⁿ yú. Nduuti chi che'e yú 'áámá dendu'ū, ní cáávā chi che'e yú tuu'mi ní diiⁿ yú chi táámá 'iiⁿ'yāⁿ dinuuⁿndí yā. ²¹ N'daacā ca chi nguéé diiⁿ yú mar 'áámá dendu'ū chi diiⁿ chi hermano yeⁿe yú cuuvi dinuuⁿndí yā o diiⁿ chi nguéé i'téénu yā n'daacā. Nguéé che'e yú yuutē o nguéé ngi'i yú vino o nguéé diiⁿ yú 'áámá dendu'ū chi 'túúcā chí diiⁿ chi hermano yeⁿe yú nduuví duūva yā yeⁿe chi i'téénu yā. ²² Ní yeⁿe chi ndís'tiī i'téénu n̄i yeⁿe chi ngaⁿ'a maáⁿ n̄i canéé chi i'téénu n̄i yeⁿe nanááⁿ Ndyuūs. De'ε chúúcā n'dai taavi 'iiⁿ'yāⁿ chi staava yeⁿ'é yā nguéé diiⁿ condenar maáⁿ yā cáávā cosa chi diiⁿ yā chi nguéé n'daacā. ²³ 'Iiⁿ'yāⁿ chi che'é yā 'áámá dendu'ū ní n'dee nadicadínuuⁿ yā yeⁿe nduuti chi n'daacā o chi nguéé n'daacā cuuví yā condenado caati nguéé nge'é yā ndúúcū núúⁿmáⁿ staava yeⁿ'é yā. Ní nducuéⁿē chi diiⁿ yú taachi nguéé deenu yú nduuti chi n'daacā o nguéé n'daacā, tuu'mi ní dinuuⁿndí yú.

15

Dinéⁿ e yú 'iiⁿ'yāⁿ niiⁿnuⁿ ná vaacu yú nguéé dinéⁿ e yú maāⁿ yú

¹ S'uuúⁿ chi i'téénu ca yú Jesucristo canee chi cunnee yú 'iiⁿ'yāⁿ chi duu'vi i'téénu yā Jesucristo. Ní nguéé diiⁿ yú tan'dúúcā chi neⁿe maaⁿ yú chi canee nn'daacā yú. ² Ní ca'áámá ca'aama yú canéé chi diiⁿ yú chi n'daacā ndúúcū 'iiⁿ'yāⁿ niiⁿnuúⁿ vaacu yú cáávā chi n'daacā canéé yā ní cuuvi cu'téénu cá yā. ³ Deenu yú chi ní nguéé Cristo díⁿ yā chi neⁿe maáⁿ yā ti 'tíicā tan'dúúcā chi canéé nguūⁿ na libro yeⁿ'é Ndyuūs. Cristo ngaⁿ'á yā yeⁿe maáⁿ yā nanááⁿ Ndyuūs: Chíⁿ chi nguεε n'daacā chi 'iiⁿ'yāⁿ ngaⁿ'a yeⁿe di ní canéé vmnaaⁿ yeⁿ'é. ⁴ Ní nducuéⁿē chi vmnááⁿ vmnaaⁿ canéé nguūⁿ na libro yeⁿ'é Ndyuūs ní canéé nguūⁿ caavā chi 'cueēⁿ yú; ní cáávā chi 'áámá canee yú ndúúcū chi i'téénu yú ní cáávā chi diiⁿ animar s'uuúⁿ chi cunnee ngiinu yú yeⁿe chi cuuvi yeⁿe yú. 'Tíicā diiⁿ nduudu yeⁿ'é Ndyuūs cáávā s'uuúⁿ. ⁵ Ndyuūs chi tee yā vaadī yeenú s'uuuⁿ ndúúcū chi cunnee ngiinu yú chi cuuvi yeⁿe yú, Ndyuūs ní inneé yā ndís'tiī chi cuuvi 'diiⁿ 'diiⁿ 'cuētinéé n̄i 'áámá n̄i ndúúcū taama n̄i tan'dúúcā Cristo neⁿ'é yā chí díⁿ n̄i. ⁶ Tuu'mi ní nducyáácá n̄i tan'dúúcā chi 'áámá n̄i cuuvi dich'εεté n̄i Ndyuūs chi chiidá Señor Jesucristo yeⁿe yú.

'Iiⁿ'yāⁿ candéé yā nduudu cuaacu yeⁿe Cristo nanááⁿ 'iiⁿ'yāⁿ chi nguéé yeⁿe ndaata Israel

⁷ Ní 'tíicā 'cuaáⁿ n̄i ndúúcū núúⁿmáⁿ staava yeⁿ'é n̄i 'áámá n̄i taama n̄i tan'dúúcā Cristo 'cuúⁿ yā s'uuúⁿ ní 'iicu cuuvi dich'εεte yú Ndyuūs. ⁸ Ní chuū maaⁿ ngaⁿ'á ngií ndís'tiī. Cristo ndaa yā iⁿ'yeeⁿdí 'cūū chi dichí'vé yā 'iiⁿ'yāⁿ Israel s'eeⁿ ní idicuaacú yā chi Ndyuūs caⁿ'a yā chí ca'a yā chiida yú tiempo chí 'āā chó'ōo. Ní 'tíicā Cristo ch'iⁿ'í yā chí Ndyuūs ní díⁿ yā tanducuéⁿē chí caⁿ'a yā chí díⁿ yā. ⁹ Ní 'tiicá ntūūⁿ ndáí yā cáávā chí tanáⁿā 'iiⁿ'yāⁿ chí nguéé yeⁿe ndaata Israel cuuvi dich'εεté yā Ndyuūs caati Ndyuūs ya'āi 'iinú yā yeⁿe tanáⁿā 'iiⁿ'yāⁿ dendú'ū. Ní 'tiicá ntūūⁿ canéé nguūⁿ na libro yeⁿ'é Ndyuūs: Cáávā chuū 'úú ní dich'εεté n'diī Señor nguaaⁿ na nducyáácá nación, ní 'úú ní caatá canciones chí díⁿ honrar n'diī.

¹⁰ Ní táámá cuaaⁿ naachi canéé nguūⁿ na libro yeⁿe Ndyuūs ngaⁿ'a 'tíicā:

'Iiⁿ'yāⁿ yeⁿe nducyáácá nación canéé chí yeenú yā ndúúcū 'iiⁿ'yāⁿ chí Ndyuūs n̄ndeεvé yā chí cuuvi yeⁿ'é yā 'iiⁿ'yāⁿ s'eeⁿ.

¹¹ Táámá cuaaⁿ yeⁿe libro yeⁿ'é Ndyuūs ngaⁿ'a 'tíicā:

'Iiⁿ'yāⁿ yeⁿe nducyáácá nación canee chí dich'εεté yā Ndyuūs, ní nducyáácá yā ngaⁿ'á yā chí n'diī Ndyuūs ní ch'εεte n'dai n'diī.

¹² Ní 'tíicá ntúūⁿ canéé nguūⁿ na libro yeⁿ'é Ndyuūs naachi profeta Isaías dingúūⁿ yā 'tíica yeⁿ'e 'iiⁿ'yāⁿ chi Ndyuūs ngaⁿ'á yā chi caⁿ'á yā chi dichó'o yā:

'Úú idiíⁿ chi ndaa 'iiⁿ'yāⁿ yeⁿ'e ndaata yeⁿ'e saⁿ'ā Isaías, ní 'iiⁿ'yāⁿ miiⁿ ncuééⁿ yā chi gobernador chi caaⁿ'maⁿ ntiiⁿ'nyuⁿ yā yeⁿ'ē nducuéⁿ'ē nación. Ní véé chi 'iiⁿ'yāⁿ s'eeⁿ ní cūnee ngiinú yā nanáaⁿ yā cáávā chi caⁿ'a yā chi diiⁿ yā.

¹³ Ní Ndyuūs chi caⁿ'á yā ndís'tiī chi véé chi cūnee ngiinú nī nanáaⁿ yā, neⁿ'é chi téé yā ndís'tiī n'deeé n'dái vaadī yeenu ndúucū vaadī 'diiⁿ, ti ndís'tiī ní i'téenu nī Jesucristo. Caati cáávā poder yeⁿ'ē Espíritu N'dai yeⁿ'é Ndyuūs cuuvi cá nī cūnee ngiinu cá nī yeⁿ'e chi cuuví yeⁿ'é nī.

¹⁴ Ndís'tiī hermanos yeⁿ'é, 'úú ní deenú chi cuaacu chi ndís'tiī ní diíⁿ nī dendu'ū chi n'dai. Ní ndís'tiī ní 'iiⁿ'yāⁿ chi deenu ndís'tiī. Ní deenú nī ca'a nī consejo 'áamá nī ndúucū taama nī. ¹⁵ Naati maaⁿ ní na carta 'cūū 'úú diitu idinguúⁿ n'deeé n'dái cá yeⁿ'é nī yeⁿ'e dendu'ú 'cūū caati ndís'tiī ní cuuvi n'gaacu nī yeⁿ'ē chi 'āā deenú nī. Chuū ní dingúūⁿ chεεchi caati Ndyuūs chí n'dai taavi nduucú nī tee yā 'úú yeⁿ'e chi n'dai taavi yeⁿ'é yā chí diíⁿ. ¹⁶ Ní 'úú ní dichíí'vē Cristo 'úú nguaaⁿ 'iiⁿ'yāⁿ chi nguéé Israel yā. Ní nguaaⁿ 'iiⁿ'yāⁿ miiⁿ 'úú diíⁿ ntiiⁿ'nyuⁿ yeⁿ'ē chi ngaⁿ'á nduudu cuaacu yeⁿ'e evangelio chi nduudu ngai yeⁿ'e Jesucristo chi nadanguáⁿ'āi 'iiⁿ'yāⁿ. Ní 'tíicā cuuvi candéé 'iiⁿ'yāⁿ chi nguéé Israel yā nanáaⁿ Ndyuūs tan'dúucā chi ofrenda n'dai yā chi Ndyuūs 'cuaáⁿ yā 'iiⁿ'yāⁿ s'eeⁿ, caati Espíritu N'dai yeⁿ'é Ndyuūs s'née yā 'iiⁿ'yāⁿ s'eeⁿ cáávā ntiiⁿ'nyuⁿ yeⁿ'é Ndyuūs.

¹⁷ Ní 'úú ní cáávā chi i'teenú Jesucristo, 'úú ní yeenu chi diíⁿ ntiiⁿ'nyuⁿ n'dai yeⁿ'é Ndyuūs. ¹⁸ Tí 'úú ní nguéé du'ū vεε ngaⁿ'á, dámaāⁿ chííⁿ chi Cristo diíⁿ yā cáávā 'úú. Ní 'íicú 'iiⁿ'yāⁿ chi nguéé Israel yā cuuvi cu'téenu yā Ndyuūs. Ní chúū idiíⁿ cáávā nduudu cuaacu chi ngaⁿ'á ní cáávā nducuéⁿ'ē chi diíⁿ. ¹⁹ Ní 'úú ní ngāⁿ'a cuaacú tanducuéⁿ'ē yeⁿ'e evangelio yeⁿ'e Cristo nducuéⁿ'ē yāāⁿ taachí chō'ó ndíí yāāⁿ Jerusalén ndii yāāⁿ Ilírico. Ní diíⁿ ntiiⁿ'nyuⁿ yeⁿ'é ndúucū poder yeⁿ'e Espíritu N'dai yeⁿ'é Ndyuūs, ndúucū señales chi inaaⁿ yú ndúucū vaadī n'giinu. ²⁰ Ní idiíⁿ ca ntiiⁿ'nyuⁿ caati cuuvi caaⁿ'máⁿ nduudu cuaacu chi nadanguaⁿ'āi 'iiⁿ'yāⁿ ndii nducuéⁿ'ē yāāⁿ naachi 'āā cuéé 'caandivééⁿ yā chi duuchí Cristo, caati 'úú nguéé neⁿ'é caaⁿ'máⁿ nduudu cuaacu yeⁿ'e Cristo naachi táamá yā 'āā candéé yā nduudu miiⁿ ní diíⁿ yā ntiiⁿ'nyuⁿ yeⁿ'e Cristo. ²¹ Naati neⁿ'é diíⁿ tan'dúucā chi canéé nguūⁿ na libro yeⁿ'é Ndyuūs 'tíicā:

'Iiⁿ'yāⁿ chi 'aa cuéé ndaa tááma yā nanáaⁿ yā chi caaⁿ'máⁿ yā yeⁿ'e Cristo, 'iiⁿ'yāⁿ s'eeⁿ cuuví cadíínuuⁿ yā yeⁿ'é yā. Ní 'iiⁿ'yāⁿ chi mar 'áamá vmnéⁿ'ēe nguéé n'giindivééⁿ yā yeⁿ'e Cristo ní 'caandivééⁿ yā ní cuuvi tuumicadíínuuⁿ yā yeⁿ'e yā.

Pablo neⁿ'é yā caⁿ'a yā na yāāⁿ Roma

²² Neené n'deeé cuuví nadicadiinúúⁿ chi neⁿ'é chíí nanáaⁿ ndís'tiī naati nguéé chíí ndāa. ²³ Naati maaⁿ ní 'āā ch'iinū ntiiⁿ'nyuⁿ yeⁿ'é na yāāⁿ s'uuⁿ. Néené n'deeé nduūyú chi neⁿ'é ndaa n'diichí ndís'tiī. ²⁴ Ní neⁿ'é naⁿ'á ndii yāāⁿ España ní taachi caⁿ'á cyúúúⁿ neⁿ'é n'diichí ndís'tiī ní cuneé nduucú nī 'áamá tiempo nūuⁿ. Ní cuayiivi chi yeenu chi caneé ndúucū ndís'tiī neⁿ'é chí ndís'tiī cunneé nī 'úú taachi naⁿ'á ndii yāāⁿ Roma. ²⁵ Maaⁿ ní caⁿ'á na yāāⁿ Jerusalén ní ndéé ofrenda chí cunneé hermanos Israel yeⁿ'e yú chi i'téenu yā Cristo. ²⁶ Caati hermanos yeⁿ'e yú yeⁿ'e yáⁿ'āa Macedonia ndúucū hermanos yeⁿ'e yú yeⁿ'e yáⁿ'āa Acaya maáⁿ yā neⁿ'é yā caⁿ'á yā ofrenda ní nadacadíínuuⁿ n'daaca yā taachi staⁿ'á yā 'aama ofrenda yeⁿ'e tuumī nguaaⁿ yeⁿ'é yā chi dichó'o yā tuumi miiⁿ yeⁿ'e hermanos yeⁿ'e yú chi snée yā na yāāⁿ Jerusalén, yeⁿ'e hermanos chi pobre yā chi nguéé véé necesidades yeⁿ'e yā. ²⁷ Ní 'tíicā diíⁿ yā naati cuaacu níⁿ'nyúⁿ hermanos canéé chi cunneé yā hermanos Israel s'eeⁿ chi pobre yā chi snée yā na yāāⁿ Jerusalén caati hermanos Israel s'uuⁿ ní 'āā diiⁿ yā chi hermanos chi nguéé Israel yā staⁿ'á yā yeⁿ'e dendú'ū chi n'dai chi yeⁿ'e Espíritu N'dai yeⁿ'é Ndyuūs. Ní cáávā hermanos Israel yeⁿ'e yú 'túucā diíⁿ yā hermanos chi nguéé Israel yā ndúucū chi n'deeé n'dái yeⁿ'é yā canéé chi cunneé yā 'iiⁿ'yāⁿ Israel chi i'téenu yā Cristo. ²⁸ Maaⁿ ní taachi 'cuiinū diíⁿ asunto 'cūū ní taachi ngaⁿ'á ofrenda 'cūū hermanos Israel, tuu'mi ní naⁿ'á na yáⁿ'āa España. Ní

taachi caⁿ'á cyúúní ní ndaá na yáāⁿ yeⁿ'é nī, cho'ó n'diichí ndís'tiī. ²⁹ Ní deenú chi taachi ndaá nanááⁿ ndís'tiī seguro chi ndaá ndúú^{cū} tanducuéⁿ'ē chi n'dai taavi chi véé chi yeⁿ'ē nduudu n'dai yeⁿ'é Cristo.

³⁰ Maaⁿ ní ndís'tiī hermanos yeⁿ'é di'cuiitú ndís'tiī cáávā Señor Jesucristo yeⁿ'e yú ní cáávā Espíritu N'dai yeⁿ'é Ndyuūs chi dinéⁿ'e yā s'uuúⁿ chi 'tiicá ntúūⁿ ndís'tiī caaⁿ'maⁿ'ngua'a cá nī cáávā 'úú. Ní 'úú ngaⁿ'angua'á chi Ndyuūs cunnée yā 'úú. ³¹ Caaⁿ'maⁿ'ngua'á nī chi Ndyuūs nadanguáⁿ'ai yā 'úú yeⁿ'e ta'a 'iiⁿ'yāⁿ Israel chi snée yā na yáⁿ'āa Judea, 'iiⁿ'yāⁿ chi nguéé i'téenu yā Cristo. Ní caaⁿ'maⁿ'ngua'á nī chi ntiiⁿ'nyuⁿ chi diíⁿ cáávā hermanos chi snée yā na yáāⁿ Jerusalén, Ndyuūs inee yiinú yā ntiiⁿ'nyuⁿ chi diíⁿ. ³² Ní 'íicú nduuti chi Ndyuūs neⁿ'é yā, 'úú ní yeenú taachi ndaá nanááⁿ ndís'tiī ní cuntaavi'tuūnúú ndúú^{cū} ndís'tiī. ³³ Neⁿ'é chi Ndyuūs téé yā nducyaaca ndís'tiī vaadī 'diíⁿ chi 'cuεtinéé 'diíⁿ nī. 'Tíicā.

16

Pablo dicho'ó yā, N'dai ndís'tiī, hermanos yeⁿ'é yā

¹ 'Úú ní ngaⁿ'á ngī ndís'tiī chi 'cuaáⁿ nī Febe chi hermana yeⁿ'e yú. N'daata miiⁿ dichíí'vε yā 'iiⁿ'yāⁿ yeⁿ'e yáacū chi canée na yáāⁿ Cencrea. ² Ní n'daacā 'cuaáⁿ nī n'daata miiⁿ ndúú^{cū} chi duuchi Señor yeⁿ'e yú, tan'dúú^{cā} chi canée chi 'cuaáⁿ nī hermanos yeⁿ'e yú chi i'téenu yā Cristo. Ní cunnée nī n'daata miiⁿ yeⁿ'e tanducuéⁿ'ē chi neⁿ'e tá ti n'daata miiⁿ neené 'yaaⁿ 'iiⁿ'yāⁿ chinnee tá 'iiⁿ'yāⁿ. 'Tiicá ntúūⁿ chinnee tá 'úú.

³ Ní n'dís'tiī caaⁿ'máⁿ nī hermano Aquila ndúú^{cū} n'daataá Priscila chi n'daata yeⁿ'é yā, N'dai ndís'tiī. 'Iiⁿ'yāⁿ s'eeⁿ idiíⁿ yā ntiiⁿ'nyuⁿ yeⁿ'e Señor Jesucristo dáámá nduucú. ⁴ 'Iiⁿ'yāⁿ s'eeⁿ n'geenú yā ngī cáávā 'úú ndíí chi cuuvi 'cuūvi yā cáávā chi cuuvi nadanguáⁿ'ai yā 'úú. Ní 'úú ní ca'á 'iiⁿ'yāⁿ s'eeⁿ gracias. Ní nguéé dámaaⁿ 'úú, 'tiicá ntúūⁿ diiⁿ nducyaaca hermanos yeⁿ'e yú chi nguéé na'á yā yaacú yeⁿ'e 'iiⁿ'yāⁿ Israel s'eeⁿ. ⁵ Ní 'iiⁿ'yāⁿ yeⁿ'e yaacū chi nduvidaamá yā na vaacu táⁿ'ā Priscila ndúú^{cū} isáⁿ'ā yeⁿ'é yā chi Aquila: N'dai ndís'tiī, caaⁿ'máⁿ nī. Ní Epeneto amigo chi neené neⁿ'é: N'dai dii, caaⁿ'máⁿ nī. Epeneto miiⁿ saⁿ'a vmnáⁿ vmnaaⁿ chí'teenu sá Cristo na yáⁿ'āa Acaya. ⁶ Ní tá María chi neené diiⁿ tá ntiiⁿ'nyuⁿ nguaaⁿ ndís'tiī: N'dai tá, caaⁿ'máⁿ nī. ⁷ Ní saⁿ'ā Andrónico ndúú^{cū} sáⁿ'ā Junias canée yā vácū taachi 'úú canée vácū, ní saⁿ'ā s'eeⁿ ní n'gεεtε nguaaⁿ 'iiⁿ'yāⁿ chi apóstoles. Ní saⁿ'ā s'eeⁿ i'téenu yā Cristo vmnaaⁿ cá níicú 'úú: N'dai ndís'tiī, caaⁿ'máⁿ nī.

⁸ Ní sáⁿ'ā Amplias chi neené neⁿ'é ti yeⁿ'e Señor saⁿ'a miiⁿ: N'dai dii, caaⁿ'máⁿ nī. ⁹ Ní saⁿ'ā Urbano chi dáámá diiⁿ sa ntiiⁿ'nyuⁿ yeⁿ'é Señor nduucú 'nū: N'dai dii, caaⁿ'máⁿ nī. Ní saⁿ'a Estaquis chi neené neⁿ'é: N'dai dii, caaⁿ'máⁿ nī. ¹⁰ Ní saⁿ'ā Apeles chi neené ch'eenú yā chii cáávā chi i'téenu yā Cristo: N'dai dii, caaⁿ'máⁿ nī. 'Tiicá ntúūⁿ nducyaaca 'iiⁿ'yāⁿ yeⁿ'e vaacu Aristóbulo: N'dai ndís'tiī, caaⁿ'máⁿ nī. ¹¹ Ní saⁿ'a Herodión chi yeⁿ'e yáāⁿ vaacú: N'dai dii, caaⁿ'máⁿ nī. Ní 'iiⁿ'yāⁿ chi i'téenu yā yeⁿ'e vaacu Narciso: N'dai ndís'tiī caaⁿ'máⁿ nī. ¹² Ní n'daataá Trifena ndúú^{cū} n'daataá Trifosa chi diíⁿ yā ntiiⁿ'nyuⁿ chi ntiiⁿ'nyuⁿ yeⁿ'e Señor: N'dai ndís'tiī caaⁿ'máⁿ nī. Ní n'daataá Pérsida, hermana yeⁿ'é chi neené neⁿ'é chi n'dee n'dái ntiiⁿ'nyuⁿ diíⁿ tá yeⁿ'ē ntiiⁿ'nyuⁿ yeⁿ'e Señor: N'dai tá, caaⁿ'maⁿ nī. ¹³ Ní saⁿ'ā Rufo, chi saⁿ'ā ch'εεtε nguaaⁿ 'iiⁿ'yāⁿ chi i'téenu yā Cristo ndúú^{cū} chεεcu sa chi tan'dúú^{cā} chεεcú dendúⁿ'ū: N'dai ndís'tiī, caaⁿ'maⁿ nī. ¹⁴ Ní saⁿ'a s'eeⁿ Asíncrito ndúú^{cū} Flegonte ndúú^{cū} Hermas ndúú^{cū} Patrobas ndúú^{cū} Hermes ndúú^{cū} tanáⁿ'ā hermanos chi snée yā ndúú^{cū} yā: N'dai ndís'tiī, caaⁿ'máⁿ nī. ¹⁵ 'Tiicá ntúūⁿ saⁿ'a Filólogo ndúú^{cū} n'daataá Julia ndúú^{cū} saⁿ'ā Nereo ndúú^{cū} n'daataá ví'i yā, ndúú^{cū} saⁿ'a Olimpás ndúú^{cū} nducyáácá hermanos yeⁿ'e yú chi snée yā ndúú^{cū} 'iiⁿ'yāⁿ s'eeⁿ: N'dai ndís'tiī, caaⁿ'máⁿ nī.

¹⁶ Maaⁿ ní nguaaⁿ maáⁿ nī chi i'téenu nī Cristo: N'dai dii, caaⁿ'máⁿ nī, ní ca'á nī 'áámá beso 'áámá nī ndúú^{cū} taama nī tan'dúú^{cā} costumbre yeⁿ'é nī caati néⁿ'e nī ví'i. Nducyáácá 'iiⁿ'yāⁿ yeⁿ'e nducyáácá yaacū: N'dai ndís'tiī ngaⁿ'a yā.

¹⁷ Maaⁿ ní di'cuiitú ndís'tiī hermanos yeⁿ'é chi cundéε nī cuidado yeⁿ'é 'iiⁿ'yāⁿ chi diiⁿ 'úúví vaadi cadínūⁿ nguaaⁿ ndís'tiī. Ní diíⁿ yā chi ndís'tiī dinuuⁿndí nī. 'Iiⁿ'yāⁿ s'eeⁿ ní contra yeⁿ'é chi 'iiⁿ'yāⁿ ca'cueéⁿ yā ndís'tiī. Ní contra yeⁿ'é chí ch'eeⁿ nī. Divíi nī 'iiⁿ'yāⁿ s'eeⁿ yeⁿ'é nguaaⁿ ndís'tiī. ¹⁸ Caati 'iiⁿ'yāⁿ s'eeⁿ nguéé dichíí'vε yā Señor Jesucristo yeⁿ'e yú ti diíⁿ yā tan'dúúccā chi neⁿ'e yā. Ní nginnche'éí yā staava yeⁿ'e 'iiⁿ'yāⁿ chi ndiicūⁿ caati ngaⁿ'á yā ndúúccū nduudu cúuⁿnūⁿ yeⁿ'é yā chi cunee ngíínu yā. ¹⁹ Nducyáácá 'iiⁿ'yāⁿ 'āā deenú yā tan'dúúccā chí ndís'tiī n'giindiveéⁿ nī nduudu yeⁿ'é Ndyuūs ni cáávā chuū 'úú ní yeenú. Neⁿ'é chi ndís'tiī listo canee nī chi diíⁿ nī dendu'ū chi n'daacā. Nguéé chi diíⁿ nī cosa chi nguéé n'daacā. ²⁰ Ní Ndyuūs chi véé nducuéⁿ'ē vaadi 'diiⁿ nduucú yā maaⁿ nch'εēté cu'néeⁿ yā yááⁿ'n'guiinūⁿ miiⁿ cuaaⁿ mááⁿ ca'á nī. Neⁿ'é chi Jesucristo téε yā nducyáácá ndís'tiī nducuéⁿ'ē vaadi n'dai yeⁿ'é yā.

²¹ Saⁿ'a Timoteo chi dáámá idiiⁿ sa ntiíⁿnyuⁿ nduucú ndúúccū sáⁿ'ā Lucio ndúúccū sáⁿ'ā Jasón ndúúccū sáⁿ'ā Sosípater chi sáⁿ'ā s'eeⁿ yeⁿ'e yáāⁿ vaacú: N'dai ndís'tiī, ngaⁿ'á yā.

²² Ní 'úú, sáⁿ'ā chi nguuví Tercio chi dinguúⁿ carta 'cūū cáávā Pablo: N'dai ndís'tiī, ngaⁿ'á ti yeⁿ'é Cristo s'uuúⁿ.

²³ Ní 'tiicá ntúūⁿ saⁿ'a Gayo: N'dai ndís'tiī, ngaⁿ'a sa. 'Úú ní canee na vaacu sa ní nduuvidaamá yā 'iiⁿ'yāⁿ yeⁿ'e yaacū na vaacu sa. Ní sáⁿ'ā Erasto ntúūⁿ chi sáⁿ'ā tesorero yeⁿ'e yáāⁿ 'cūū, ndúúccū hermano Cuarto: N'dai ndís'tiī, ngaⁿ'a yā.

²⁴ Neⁿ'é chi Señor Jesucristo yeⁿ'e yú di'viicú yā nducyaaca ndís'tiī. 'Tíicā.

'Cuíinū carta 'cūū ndúúccū chi dich'εεε yú Ndyuūs

²⁵ Maaⁿ ní dich'εεε yú Ndyuūs. Ndyuūs cuuvi diiⁿ cá yā chi díitū canee di ndúúccū chi i'téenu di tan'dúúccā chí 'úú caⁿ'á nduudu cuaacu chi Cristo nadanguáⁿ'ai yā ndís'tiī. Ní chi'cueéⁿ ndís'tiī yeⁿ'e evangelio chi nduudu ngai yeⁿ'e Cristo. Chuū chí ngaⁿ'á ní chííⁿ chi Ndyuūs snúúⁿ n'de'éí yā ndii tiempo vmnááⁿ vmnaaⁿ chi canee iⁿ'yeeⁿdī ní Ndyuūs ch'iⁿ'í yā 'úú nduudu yeⁿ'e Cristo. ²⁶ Ní maaⁿ ní deenu yú chuū cáávā chi profetas dingúúⁿ yā na libro yeⁿ'é Ndyuūs yeⁿ'é chuū. Ní diíⁿ yā tan'dúúccā Ndyuūs ngaⁿ'a yā yeⁿ'e chuū. Ní Ndyuūs cuéⁿ'é daāⁿmaⁿ canee yā. Ní maaⁿ ní Ndyuūs ch'iⁿ'í yā nduudu cuaacu yeⁿ'é Cristo nanááⁿ 'iiⁿ'yāⁿ yeⁿ'e nducuéⁿ'ē naciones cáávā chi 'caandiveéⁿ yā ní cu'téenu yā.

²⁷ Cuéⁿ'é daāⁿmaⁿ canee chi dich'εεε yú Ndyuūs chi 'aama n'dyáⁿ'ā Ndyuūs chi deenú yā tanducuéⁿ'ē dendu'ū. Ní diiⁿ yú 'tíicā cáávā Jesucristo Señor yeⁿ'e yú. 'Tíicā diiⁿ yú.

CARTA VMNÁÁⁿ VMNAAⁿ YEⁿE 'Iiⁿ'YĀⁿ YEⁿE YÁĀⁿ CORINTO

Pablo idinguúⁿ yā carta 'cūū yeⁿe 'iiⁿ'yāⁿ yeⁿe yaacū na yāāⁿ Corinto

¹ 'Úú Pablo 'úú. Dendyuūs yaa'ví yā 'úú chi cuuvi apóstol yeⁿē Jesucristo tan'dúúcā chi Ndyuūs neⁿé yā. 'Úú ndúúcū hermano Sóstenes yaa'ví 'nū ndís'tiī. ² 'Úú idinguúⁿ carta 'cūū yeⁿe 'iiⁿ'yāⁿ chi i'téenu yā Ndyuūs, 'iiⁿ'yāⁿ chi snée yā na yāāⁿ Corinto. 'Iiⁿ'yāⁿ s'eeⁿ, Ndyuūs yaa'ví yā 'iiⁿ'yāⁿ chi cuuvi yeⁿé yā 'iiⁿ'yāⁿ s'eeⁿ ti yeⁿe Cristo Jesús. Idinguúⁿ dendu'ū yeⁿe nducyaaca 'iiⁿ'yāⁿ yeⁿē nducyáácá yāāⁿ, 'iiⁿ'yāⁿ s'eeⁿ chi ngaⁿ'angua'á yā ndúúcū Señor Jesucristo. Señor Jesucristo miiⁿ 'iivú Ndyuūs yeⁿé yā ndúúcū s'uūūⁿ. ³ Ndyuūs Chiida yú ndúúcū Señor Jesucristo cuuvi téé yā s'uūūⁿ cosa chí n'dáácā n'dai yeⁿé yā, ní 'íicú cunée vaadī 'diiⁿ yeⁿé yā na staava yeⁿe yú.

Pablo caaⁿmaⁿ yā gracias Ndyuūs caava chi Ndyuūs dateé yā 'iiⁿ'yāⁿ

⁴ Cueⁿé daāⁿmaⁿ ngaⁿ'á gracias Ndyuūs cáávā cosa chi n'daacā n'dai yeⁿé Ndyuūs chi dátee yā s'uūūⁿ chi yeⁿe Jesucristo. ⁵ Dendyuūs dateé yā tanducuéⁿē dendu'ū chi véé yeⁿé yā ti maaⁿ ní ndís'tiī ní yeⁿe Cristo ndis'tiī. Ní Ndyuūs chinnee yā ndís'tiī chi caaⁿmáⁿ nī nduudu yeⁿé yā, ní téé yā ndís'tiī vaadī deenu. ⁶ 'Tíicā chiiⁿ chi 'úú ngaⁿ'á nduudu cuaacu miiⁿ yeⁿē Jesucristo miiⁿ. Ní ndís'tiī n'giindiveéⁿ nī ní díⁿ nī 'tíicā, ní ch'iⁿ'í nī chi nduudu miiⁿ chi cuaacu. ⁷ Ní cuuvi yeⁿé nī nducuéⁿē chi dateé Ndyuūs, ní ndís'tiī nguéeⁿ diⁿ faltar mar 'áámá. Neⁿé chi ndís'tiī 'cuēetinéeⁿ ngiinu nī Señor Jesucristo yeⁿē yú chi ndaa yā taama vmnéⁿēe. ⁸ Ní Cristo miiⁿ ní téé yā fuerzas ndís'tiī, ní 'cuēetinéeⁿ nī n'daacā ndíi nguuvi chí Jesucristo ndaa ntuúⁿ yā. Ní nguéeⁿ véé nuuⁿndi yeⁿé nī nguuvi chí ndaa Señor Jesucristo yeⁿe yú. ⁹ Ndyuūs ní díⁿ yā chí caⁿ'a yā chí díⁿ yā. Ní yaa'ví yā ndís'tiī chí 'cuēetineéⁿ nī ndúúcū daiyá yā chí Señor Jesucristo yeⁿē yú.

Véeⁿ divisiones nguaaⁿ 'iiⁿ'yāⁿ chi caⁿ'á yā na yāacū

¹⁰ Ndís'tiī hermanos yeⁿé, 'úú ngiicá ndís'tiī cáávā chi duuchi Señor Jesucristo yeⁿē yú chi 'cuēetinéeⁿ ngiínú nī, ní nguéeⁿ véé divisiones nguaaⁿ ndís'tiī. N'dáácā n'dai 'cuēetinéeⁿ nī ní daama daamá nī ndúúcū 'aama vaanicadiinūⁿ yeⁿe ndís'tiī chí n'daacā ndúúcū tanducuéⁿē chí díⁿ nī. ¹¹ N'duuví 'iiⁿ'yāⁿ yeⁿē familia yeⁿe n'daataá Cloé yaa'ví yā 'úú yeⁿe ndís'tiī hermanos yeⁿé. Ní ngaⁿ'á yā chí ndís'tiī n'gεecu cheendí nī. ¹² Chuū chí yeⁿē chí caaⁿmáⁿ. 'Áámá 'áámá ndís'tiī ngaⁿ'á nī yeⁿē 'áámá saⁿ'ā 'tíicā. 'Áámá yā ní ngaⁿ'a yā: 'Úú yeⁿē saⁿ'a Pablo; taamá yā ní ngaⁿ'a yā: 'Úú yeⁿē saⁿ'a Apolos; taamá yā ní ngaⁿ'a yā: 'Úú yeⁿē saⁿ'a Pedro; taamá yā ní ngaⁿ'a yā: 'Úú yeⁿe Cristo. ¹³ ¿'Áá cuaacu chí Cristo yeⁿē yú chí 'yaaⁿ yā? Nguéeⁿ 'tíicā. ¿'Áá ca'neeⁿngá'āa Pablo cáávā nuuⁿndi yeⁿē ndís'tiī? Nguéeⁿ. ¿'Áá cheēdinuūⁿniⁿ nī ndúúcū chí duuchi Pablo? Nguéeⁿ 'tíicā. ¹⁴ 'Úú cāⁿ'a: Gracias Dendyuūs, ti 'úú chí Pablo, nguéeⁿ cheēdinúⁿniⁿ mar 'áámá ndís'tiī. Dámaāⁿ cheēdínúⁿniⁿ saⁿ'ā Crispo ndúúcū saⁿ'ā Gayo. ¹⁵ Maaⁿ ní mar 'áámá ndís'tiī nguéeⁿ cuuvi caaⁿmáⁿ nī chí ndeēdínúⁿniⁿ ndúúcū chí duūchí. ¹⁶ Cheēdinuūⁿniⁿ ntúúⁿ 'iiⁿ'yāⁿ yeⁿe familia yeⁿe saⁿ'ā Estéfanas. Ní yeⁿe tanáⁿ'ā 'iiⁿ'yāⁿ 'úú nguéeⁿ deenú chí ndeēdínúⁿniⁿ du'ū ca táámá 'iiⁿ'yāⁿ. ¹⁷ Cristo nguéeⁿ dichó'o yā 'úú chí cuēēdínúⁿniⁿ 'iiⁿ'yāⁿ caati dichó'o yā 'úú chí caaⁿmáⁿ nduudu yeⁿē evangelio chí nduudu ngai yeⁿe Cristo. 'Úú nguéeⁿ caaⁿmáⁿ ndúúcū nduudu deenu yeⁿe saⁿ'ā yeⁿē iⁿ'yeeⁿdí 'cūū, ní 'iicu nducuéⁿē chí ngaⁿ'á ní yeⁿe poder yeⁿē Cristo chí ch'iī yā na cruz.

Cristo miiⁿ ní poder yeⁿē Ndyuūs ndúúcū vaadī deenu

¹⁸ 'Úú deenú chí taachi 'iiⁿ'yāⁿ chí nguéeⁿ deenú yā du'ū chí Cristo miiⁿ ní n'giindiveéⁿ yā nduudu yeⁿē cruz, 'iiⁿ'yāⁿ miiⁿ nacadínuuⁿ yā chí 'áámá cosa chí duuchi. S'uūūⁿ chí nanguaⁿ'āi yú, deenu yú chí Ndyuūs ch'iⁿ'í yā poder yeⁿé yā cucáávā nduudu yeⁿé yā. ¹⁹ Naati canéeⁿ nguūⁿ na libro yeⁿé Ndyuūs ndíi vmnaaⁿ chí ngaⁿ'a 'tíicā:

'Úú dituūví vaadī deenu yeⁿe 'iiⁿ'yāⁿ chi deenu, ní idifⁿ chi nguéé dichíí'vē nduudu yeⁿe 'iiⁿ'yāⁿ chi deenu taavi.

²⁰ ¿Dε'ē dichíí'vē vaadī deenu yeⁿe 'iiⁿ'yāⁿ chi deenu? ¿Dε'ē dichíí'vē vaadī deenu yeⁿe maestro chi deenu taavi? ¿Dε'ē dichíí'vē vaadī deenu yeⁿe 'iiⁿ'yāⁿ chi deenu taavi ní caaⁿmán yā ndúúcu compañeros yeⁿe yā yeⁿe cosas chi véé iⁿ'yeeⁿdí 'cūū? Ndyuūs ch'iⁿ'i yā chí vaadī deenu yeⁿe iⁿ'yeeⁿdí 'cūū ni dúú'vī vεε ní nguéé dε'ē vεε. ²¹ 'Iiⁿ'yāⁿ yeⁿe iⁿ'yeeⁿdí 'cūū nguéé cuuvi n'diichí yā Dendyuūs cucáávā vaadī deenu yeⁿe iⁿ'yeeⁿdí 'cūū. Ndyuūs canee yiinú yā ní nadanguaⁿ'ái yā 'iiⁿ'yāⁿ chi i'téenu yā nduudu cuaacu yeⁿe yā, naati tanáⁿ'ā 'iiⁿ'yāⁿ yeⁿe iⁿ'yeeⁿdí 'cūū ngaⁿ'á yā chí nduudu cuaacu miiⁿ ní tan'dúúcā 'áámá cosa chí duuchi.

²² 'Iiⁿ'yāⁿ Israel s'eeⁿ chi judíos ngiicá yā señales Ndyuūs ní 'iicu 'iiⁿ'yāⁿ griegos ní in'nuuⁿ cá yā vaadī deenu yeⁿe iⁿ'yeeⁿdí 'cūū. ²³ S'uūúⁿ ní ca'cueeⁿ yú yeⁿe Cristo chi ca'nééⁿnga'āa na cruz cáávā nuūⁿndi yeⁿe nducyáácá 'iiⁿ'yāⁿ. 'Iiⁿ'yāⁿ Israel s'eeⁿ nguéé neⁿe 'caandiveéⁿ yā nduudú 'cūū, ní tanáⁿ'ā 'iiⁿ'yāⁿ sta'á yā nduudú 'cūū tan'dúúcā 'áámá cosa chí duuchi. ²⁴ Nduuti chí 'iiⁿ'yāⁿ Israel s'eeⁿ o nduuti chí 'iiⁿ'yāⁿ griegos, Ndyuūs yaa'ví yā 'iiⁿ'yāⁿ s'eeⁿ chi cuuvi yeⁿe yā 'iiⁿ'yāⁿ. Cristo ní poder yeⁿe Ndyuūs ní Cristo miiⁿ vaadī deenu yeⁿe Ndyuūs cucááva nducyaaca 'iiⁿ'yāⁿ. ²⁵ Nduudu yeⁿe Ndyuūs chi 'iiⁿ'yāⁿ ngaⁿ'á yā chi cosa chí duuchi, nduudu miiⁿ nduudu déenu ca nguéé tí nduudu yeⁿe san'ā yeⁿe iⁿ'yeeⁿdí 'cūū. Ní cosa chí sta'á yā tan'dúúcā chi duuvā yeⁿe Dendyuūs chííⁿ chí ditiinú ca, nguéé ti yeⁿe 'iiⁿ'yāⁿ yeⁿe iⁿ'yeeⁿdí 'cūū. ²⁶ Ndís'tiī hermanos yeⁿe, nadacádiinúúⁿ nī yeⁿe maán nī. Nguéé 'yaaⁿ ndís'tiī 'iiⁿ'yāⁿ chi deenu taavi, nguéé 'yaaⁿ ndís'tiī 'iiⁿ'yāⁿ ndíí tiiⁿ, ndíí nguéé 'yaaⁿ ndís'tiī 'iiⁿ'yāⁿ 'cuiica. ²⁷ Ndyuūs ndεεvé yā 'iiⁿ'yāⁿ chi nguεε deenu taaví yā ní 'íicú 'iiⁿ'yāⁿ chi deenu taaví yā cuuví 'cuiináⁿ yā. Ní Ndyuūs ndεεvé yā 'iiⁿ'yāⁿ yeⁿe iⁿ'yeeⁿdí 'cūū chí véé duu'vī fuerzas yeⁿe yā ní 'íicú 'iiⁿ'yāⁿ chí véé fuerza yeⁿe yā cuuví 'cuiináⁿ yā. ²⁸ Ndyuūs ndεεvé yā 'iiⁿ'yāⁿ chí nguéé du'ū vεε nanááⁿ 'iiⁿ'yāⁿ yeⁿe iⁿ'yeeⁿdí 'cūū ní ndεεvé yā 'iiⁿ'yāⁿ chí nguéé inuūⁿndi ní ya'ai 'iinú yā 'iiⁿ'yāⁿ. Ní 'iicu Ndyuūs dííⁿ yā chí nguéé dε'ē vεε cosa chí ch'εεtε chí 'iiⁿ'yāⁿ yeⁿe iⁿ'yeeⁿdí 'cūū dííⁿ yā. ²⁹ 'Tíicā Ndyuūs idiíⁿ yā ti mar 'áámá 'iiⁿ'yāⁿ nguéé cuuvi dich'εεtε yā 'iiⁿ'yāⁿ nanááⁿ Dendyuūs. ³⁰ 'Tíicā Dendyuūs maán yā teé yā vida cueⁿe daāⁿmaⁿ yeⁿe ndís'tiī tí i'teenú nī Cristo Jesús. Ndyuūs dichó'o yā Jesucristo iⁿ'yeeⁿdí 'cūū chí cuuvi deenu yú nducuéⁿe cáávā Cristo. Ní cáávā Cristo miiⁿ nguéé nuūⁿndi yeⁿe yú nanááⁿ Ndyuūs ti Cristo miiⁿ ch'iī yā na cruz cucáávā nuūⁿndi yeⁿe nducyaaca 'iiⁿ'yāⁿ, ní 'iicu s'uūúⁿ chí cuuvi yeⁿe yā s'uūúⁿ. ³¹ Cáávā chuū canéé nguūⁿ na libro yeⁿe Ndyuūs ndíí vmaāⁿ 'tíicā: 'Iiⁿ'yāⁿ chí ngaⁿ'a chí idich'εεtε maán yā 'iiⁿ'yāⁿ, nguéé n'daacā idiíⁿ yā. Dámaāⁿ canéé chí dich'εεtε yā 'iivú Ndyuūs.

2

Ngaⁿ'a yā chí Cristo ca'nééⁿnga'á yā

¹ Ndís'tiī hermanos yeⁿe, taachí ndāa ní canéé ndúúcu nī 'tíicā caⁿ'á nduudu cuaacu yeⁿe Dendyuūs. Nguéé caⁿ'á nduudu miiⁿ ndúúcu núúⁿmáⁿ vadicadíinūuⁿ yeⁿe vaadī deenu. ² 'Tíicā ngaⁿ'á, ti nguéé neⁿe caāⁿmaⁿ táámá cosa nanááⁿ ndís'tiī, dámaaⁿ neⁿe caaⁿmán yeⁿe Jesucristo chí ca'nééⁿnga'á yā. ³ Taachi canéé ndúúcu ndís'tiī ndii cuūⁿnūⁿ 'úú; ní 'va'ā 'úú; ní nééⁿ in'duuví vaa. ⁴ Nguéé ngaⁿ'á nduudu miiⁿ ndúúcu vaadī deenu chí cadiinuuⁿ 'iiⁿ'yāⁿ yeⁿe iⁿ'yeeⁿdí 'cūū, naati ngaⁿ'á nduudu cuaacu miiⁿ ndúúcu nduudu chí nguéé ngíⁿ'i. Ngaⁿ'á chiiⁿ chí Espíritu N'dai yeⁿe Ndyuūs ch'iⁿ'í yā 'úú ndúúcu poder yeⁿe yā chí nduudu cuaacu miiⁿ ní yeⁿe Dendyuūs. Níicú 'iiⁿ'yāⁿ cuuvi deenú yā chí nduudu cuaacu miiⁿ ní nduudu yeⁿe Dendyuūs. ⁵ 'Tíicā ngaⁿ'á ti chííⁿ chí i'teenú yú nguéé chiicā na vaanicadiinuuⁿ yeⁿe 'iiⁿ'yāⁿ yeⁿe iⁿ'yeeⁿdí 'cūū ti yeⁿe poder yeⁿe Dendyuūs.

Dendyuūs dííⁿ yā chí deenu 'iiⁿ'yāⁿ cucáávā Espíritu N'dai yeⁿe yā

⁶ Taachi caneeé 'nū nguuaⁿ 'iiⁿ'yāⁿ chi i'teenú yā Dendyuūs ní 'áamá caneeé yā ndúúcū Dendyuūs, tuu'mi ní ngaⁿ'á 'nū ndúúcū nduudu ngiⁿ'ii yeⁿ'e vaanicádiinūⁿ. Nguéé ti vaadī deenu chi nadacadiinúⁿ 'iiⁿ'yāⁿ yeⁿ'ē iⁿ'yeeⁿ'dí 'cūū, 'iiⁿ'yāⁿ chi nguéé i'téenu yā Dendyuūs yeⁿ'ē yú. Ndíí nguéé ti yeⁿ'é saⁿ'ā chi ndii tííⁿ yeⁿ'ē iⁿ'yeeⁿ'dí 'cūū chi chó'ōo poder yeⁿ'e yā. ⁷ Naati ngaⁿ'á 'nū vaadī déenu yeⁿ'é Dendyuūs. Ní nguéé deenú 'iiⁿ'yāⁿ yeⁿ'ē iⁿ'yeeⁿ'dí 'cūū vaadī deenu miiⁿ, ti Ndyuūs caⁿ'a yā vaadī deenú 'cūū chi yeⁿ'e maán yā vmnááⁿ vmnaaⁿ chi din'dái yā iⁿ'yeeⁿ'dí 'cūū, ní 'iicu cuuvi nadinguáⁿ'ai yā s'uūúⁿ. ⁸ Mar 'áamá 'iiⁿ'yāⁿ n'gæetε yeⁿ'ē iⁿ'yeeⁿ'dí 'cūū déenū yā yeⁿ'e vaadī deenú 'cūū, ti nduuti chi déenu yā, tuu'mi ní nguéé s'neeⁿngaⁿ'á yā Señor Jesucristo chi chīca yā yeⁿ'ē va'ai chæeti nguūⁿ. ⁹ Caneeé nguūⁿ ndii cuááⁿ vmnaaⁿ ná libro yeⁿ'é Ndyuūs 'tíicā: Nducueⁿ'ē chi din'dái Dendyuūs ní yeⁿ'é 'iiⁿ'yāⁿ chí i'teenu 'iivú Ndyuūs, tanáⁿ'ā 'iiⁿ'yāⁿ yeⁿ'ē iⁿ'yeeⁿ'dí 'cūū nguéé n'diichí yā Jesucristo, ndíí nguéé n'giindiveéⁿ yā yeⁿ'é yā, ndíí nguéé nadicadiinúⁿ yā yeⁿ'e dendu'ū chuū na staava yeⁿ'e yā. ¹⁰ Ndyuūs ch'iⁿ'í yā nducueⁿ'ē s'uūúⁿ cucaavā Espíritu N'dai yeⁿ'é yā. Espíritu N'dai yeⁿ'é Dendyuūs ní deenú yā nducueⁿ'ē, ní deenú yā nducueⁿ'ē vaadī deenu yeⁿ'é Ndyuūs. ¹¹ ¿Du'ú 'iiⁿ'yāⁿ cuuvi deenú yā chi nadacadiinúⁿ taama 'iiⁿ'yāⁿ? Dámaaⁿ espíritu yeⁿ'e maán yā deenu chi maán yā nadacadiinúⁿ yā. 'Tíicā ntúūⁿ mar 'áamá 'iiⁿ'yāⁿ nguεe cádiinúⁿ yā chi Ndyuūs nadicadiinúⁿ yā, ti dámaaⁿ Espíritu N'dai yeⁿ'é Dendyuūs deenu yā yeⁿ'é Dendyuūs. ¹² S'uūúⁿ ní nguéé sta'ā yú espíritu chi yeⁿ'ē iⁿ'yeeⁿ'dí ti sta'ā yú Espíritu N'dai chí cuchii yeⁿ'é Ndyuūs. Maaⁿ ní cuuvi deenu yú nducueⁿ'ē chí n'daacā n'dai ti Ndyuūs teé yā s'uūúⁿ Espíritu N'dai yeⁿ'é yā. ¹³ Ngaⁿ'a ntúūⁿ yú yeⁿ'e nducueⁿ'ē chuū. Nguéé ngaⁿ'a yú ndúúcū nduudu chi ngi'cueeⁿ 'iiⁿ'yāⁿ yeⁿ'e iⁿ'yeeⁿ'dí 'cūū. Espíritu N'dai yeⁿ'é Ndyuūs ca'cueeⁿ yā nducyaaca 'iiⁿ'yāⁿ chi canee ndúúcū Espíritu N'dai miiⁿ. ¹⁴ 'iiⁿ'yāⁿ chi nguéé i'téenu yā Jesucristo yeⁿ'ē yú nguéé ituumicádiinúⁿ yā dendu'ū chí yeⁿ'ē Espíritu N'dai yeⁿ'é Dendyuūs, ti sta'á yā nduudu miiⁿ tan'dúúcā 'áamá cosa chí duuchi. Ní nguéé cuuvi tuumicadiinúⁿ yā nduudu miiⁿ ti caneeé chi cadiiinúⁿ yā nduudu miiⁿ cáavā Espíritu N'dai yeⁿ'é Dendyuūs. ¹⁵ 'iiⁿ'yāⁿ chi caneeé ndúúcū Espíritu N'dai yeⁿ'é Dendyuūs n'diichí yā tanducueⁿ'ē dendu'ū, naati 'iiⁿ'yāⁿ chi nguéé i'téenu yā Jesucristo nguéé cuuvi tuumicadiinúⁿ yā táácā idiíⁿ 'iiⁿ'yāⁿ chi canee ndúúcū Espíritu N'dai yeⁿ'é Dendyuūs. ¹⁶ Caneeé nguūⁿ na libro yeⁿ'é Ndyuūs ndíí vmnaaⁿ chi ngaⁿ'a tíicā: 'iiⁿ'yāⁿ chi nguéé i'téenu yā Jesucristo, ¿táácā cuuvi deenú yā chi nadacadiinúⁿ 'iivú Ndyuūs? ¿Du'ú 'iiⁿ'yāⁿ cuuvi ca'cueeⁿ yā Ndyuūs? S'uūúⁿ chí canee yú ndúúcū Espíritu N'dai yeⁿ'é Dendyuūs snee yú ndúúcū vaanicadíinūⁿ yeⁿ'é Cristo chi 'iivú Ndyuūs yeⁿ'ē yú.

3

S'uūúⁿ ní compañeros yeⁿ'ē yú vi'í ní diiⁿ yú ntiiⁿnyuⁿ yeⁿ'é Dendyuūs

¹ Ndís'tií hermanos yeⁿ'é, nguéé cuuvi caaⁿ'máⁿ ndúúcū ndís'tií tan'dúúcā chi ndís'tií ní 'iiⁿ'yāⁿ chi 'áamá caneeé ndúúcū Espíritu N'dai yeⁿ'é Ndyuūs, ní 'iiⁿ'yāⁿ chí n'giindiveéⁿ yā yeⁿ'e yā. Naati caⁿ'á nduucú nī tan'dúúcā chi ndís'tií daiya yeⁿ'é Ndyuūs ndís'tií, tan'dúúcā chi ndís'tií 'iiⁿ'yāⁿ chi caama i'téenu yā Cristo ndís'tií. ² Tan'dúúcā da'caiyāa chi ngi'i leche ti 'āā cuéé cuuvi che'é yā, 'tiicā ntúūⁿ ndís'tií. Ca'cueeⁿ ndís'tií ndúúcū dendu'ū nduudu chi nguéé ngiⁿ'ii, tí nguéé diíⁿ nī tan'dúúcā chi ngaⁿ'a Espíritu N'dai yeⁿ'é Ndyuūs. ³ Naati tan'dúúcā 'iiⁿ'yāⁿ yeⁿ'ē iⁿ'yeeⁿ'dí 'cūū diíⁿ yā chi neⁿ'e maán yā, 'tíicā idiíⁿ nī. Ndís'tií ní 'téé ní nguⁿ'u nī ní nguéé nduuvidaamá nī. Nguéé idiíⁿ n'daacā nī tan'dúúcā 'iiⁿ'yāⁿ chi i'téenu yā 'iivú Ndyuūs chi idiíⁿ yā, ti idiíⁿ nī tan'dúúcā 'iiⁿ'yāⁿ chi nguéé i'teenú yā 'iivú Ndyuūs chi idiíⁿ yā 'tíicā, ní idiíⁿ 'tíicā nī. ⁴ Caati náⁿ'ā ndís'tií ngaⁿ'á nī: 'Úú ní i'teenú tan'dúúcā chi ngaⁿ'a Pablo, ní táámá nī ngaⁿ'a nī: 'Úú i'teenú tan'dúúcā chi ngaⁿ'a saⁿ'a Apolos. ¿'Áá nguéé ngaⁿ'á nī tan'dúúcā chi caⁿ'a nī tiempo chi 'āā chó'ōo taachi 'āā cuéé cu'téenu nī Jesucristo? ⁵ ¿Du'ú saⁿ'a Pablo 'úú? ¿Du'ú saⁿ'a Apolos miiⁿ? ¿'Áá nguéé nús'ūu 'iiⁿ'yāⁿ chi dichí'vē Dendyuūs? Ngaⁿ'á 'nū nduudu chi ch'iⁿ'i Dendyuūs nús'ūu ní ndís'tií ní i'teenú nī. ⁶ 'Úú ngaⁿ'á nduudu yeⁿ'é Dendyuūs

nanáán ndís'tiī ní dífn tan'dúúcā chí chiínú ndaata na staava yeⁿé nī. Sáⁿā Apolos miiⁿ canee sa ndúúcu nī ní ngi'cueeⁿ sá ndís'tiī ní diiⁿ sa tan'dúúcā chí ch'iiⁿyú sa ndaata miiⁿ. Dendyuūs dífn yā chí 'cuiita ndaata miiⁿ. ⁷ Cáávā chuū 'iiⁿyāⁿ chí ngaⁿa nduudu yeⁿé Dendyuūs o 'iiⁿyāⁿ chí ca'cueeⁿ nduudu miiⁿ nguéé ch'εεté yā. Dámaaⁿ Ndyuūs chí 'cuiitá yā nduudu miiⁿ ní ch'εεté cá yā. ⁸ 'Iiⁿyāⁿ chí caaⁿmáⁿ yā nduudu miiⁿ ní 'iiⁿyāⁿ chí ca'cueeⁿ yā nduudu miiⁿ, 'āā daamá nūuⁿ dífn yā ntiiⁿnyuⁿ yeⁿé Ndyuūs. Ndyuūs ca'á yā 'iiⁿyāⁿ miiⁿ chiiⁿ chí cuuvi yeⁿé yā caavā ntiiⁿnyuⁿ yeⁿe yā chí dífn yā. ⁹ Nús'uu ní daama dáámá nuúⁿ idiíⁿ 'nū ntiiⁿnyúⁿ ndúúcu Dendyuūs. Ndís'tiī ní tan'dúúcā 'áámá campo yeⁿé Ndyuūs chí Ndyuūs chidi'cuiitá yā 'tíicā ndís'tiī. Tan'dúúcā 'áámá va'ai chí idin'daí Dendyuūs, 'tíicā ndís'tiī. ¹⁰ Ndyuūs teé yā 'úú vaadī deenū yeⁿé yā ní tan'dúúcā 'áámá saⁿā deenu din'dai sa cimientu yeⁿe va'ai, 'tíicā 'úú. 'Úú ngaⁿá nduudu cuaacu chí tan'dúúcā cimientu miiⁿ chí din'dai sa. Táámá 'iiⁿyāⁿ 'iicandíí yā ndúúcu va'ai miiⁿ. Ca'áámá ca'aama 'iiⁿyāⁿ chí 'iicandíí yā nduúcu canéé chí 'iicandíí yā ndúúcu va'āi ndúúcu cuidado. ¹¹ Mar 'áámá 'iiⁿyāⁿ nguéé cuuví cu'neeⁿ yā táámá cimientu chí n̄'daaⁿ yeⁿé chí 'úú chí'neéⁿ, ti tuūú yeⁿé cimientu miiⁿ ní Jesucristo. ¹² 'Iiⁿyāⁿ s'eeⁿ chí 'iicandíí yā vmnaaⁿ cimientu miiⁿ ndúúcu 'díínguuaⁿ, o ndúúcu 'díínguueε, o ndúúcu tuūu ndεε cheeⁿ, o ndúúcu yáⁿá, o ndúúcu yaāta o ndúúcu 'í'voōo canéé chí cadiinúúⁿ yā, ti chuū chí ngaⁿá. ¹³ Nguuvi chí Jesucristo dífn yā juzgar ntiiⁿnyuⁿ yeⁿé ca'áámá ca'áámá 'iiⁿyāⁿ, ní 'íicú 'iiⁿyāⁿ cádiinuuⁿ yā de'ē ntiiⁿnyuⁿ chíiⁿ yeⁿé 'áámá 'áámá yā. Ntiiⁿnyuⁿ miiⁿ ní canéé chí cho'ōo naavtaⁿā ngiichi yāⁿá ní deenú yā 'iiⁿyāⁿ yeⁿe ntiiⁿnyuⁿ yeⁿé yā. ¹⁴ Nduuti chí cunee ntiiⁿnyuⁿ yeⁿe 'iiⁿyāⁿ s'eeⁿ chí 'iicandíí yā vmnaaⁿ cimientu miiⁿ, ntiiⁿnyuⁿ chí 'āā chó'ōo naavtaⁿā ngiichi yāⁿá ní nguεε chiichi, tuu'mi ní 'iiⁿyāⁿ s'eeⁿ véé chí cuuvi yeⁿe yā. ¹⁵ Ndúúti chí cuucu ntiiⁿnyuⁿ chí 'iicandíí yā ndúúcu yāⁿá, tuu'mi ní di'cuiinú ntiiⁿnyuⁿ miiⁿ. 'Iiⁿyāⁿ s'eeⁿ ní nanguáⁿai yā tan'dúúcā 'iiⁿyāⁿ chí chéenu yā yeⁿe va'ai yeⁿe yā taachi ngiichi va'ai yeⁿé yā.

¹⁶ ¿'Áá nguéé déenu ndís'tiī chí i'teenú nī Jesucristo chí cuerpo yeⁿe nī ní yáacū yeⁿe Dendyuūs, ní canéé Espíritu N'dai yeⁿe Ndyuūs ndúúcu ndís'tiī? ¹⁷ Ndúúti chí 'áámá 'iiⁿyāⁿ dítuuví yā yaacū yeⁿé Ndyuūs, Ndyuūs ní di'cuiinú yā 'iiⁿyāⁿ miiⁿ. Yáacū yeⁿé Ndyuūs ní deεε. Ndís'tiī ní yaacū yeⁿé Ndyuūs ndís'tiī.

¹⁸ Mar 'áámá nī ní nguéé nginche'éí maáⁿ nī ndís'tiī. Taachi 'aamá ndís'tiī nadacadiinuuⁿ nī chí nge'e taaví nī yeⁿé vaadī deenu yeⁿe iⁿ'yeeⁿdí 'cūū, tuu'mi ní canee cuuⁿmiⁿ chí dífn nī tan'duucā 'áámá 'iiⁿyāⁿ chí nguéé deenu. Ní cuuvi ndaācā vaadī deenu yeⁿé nī chí yeⁿé Dendyuūs. ¹⁹ Vaadī déenu yeⁿé 'iiⁿyāⁿ yeⁿe iⁿ'yeeⁿdí 'cūū tan'dúúcā 'áámá cosa chí duuchi nanáán Ndyuūs. 'Āā canéé nguūⁿ na libro yeⁿé Ndyuūs ndíí vmnaaⁿ 'tíicā: Ndyuūs dífn yā chí vaadī deenu yeⁿé 'iiⁿyāⁿ yeⁿé iⁿ'yeeⁿdí 'cūū díífn chí 'cuuvi 'iiⁿyāⁿ ní 'iiⁿyāⁿ miiⁿ canee yā tan'dúúcā chí cundaí yā na trampa yeⁿe maáⁿ yā. ²⁰ Canéé nguūⁿ ntuuⁿ táámá chí 'tuucā: 'Iivú Ndyuūs déenu yā vaanicadiinūuⁿ yeⁿé 'iiⁿyāⁿ chí deenu yeⁿé iⁿ'yeeⁿdí 'cūū. Nguéé de'ē vεε dichí'vē chí nadacadiinūuⁿ 'iiⁿyāⁿ s'eeⁿ. ²¹ Mar 'áámá 'iiⁿyāⁿ nguéé cuuvi caaⁿmáⁿ yā chí dich'εεté yā saⁿā iⁿ'yeeⁿdí 'cūū. Tanducuéⁿē dendu'ū ní yeⁿe ndís'tiī. ²² Nduuti chí 'úú chí Pablo, o saⁿā Apolos, o saⁿā Pedro, o nduuti chí yeⁿé iⁿ'yeeⁿdí, o yeⁿe vida yeⁿé yú, o yeⁿe vaadī n'gii, o yeⁿe cosa chí 'āā vεε o yeⁿé dendu'ū chí caama cuchíi, tanducuéⁿē chuū ní yeⁿe ndís'tiī. ²³ Ní ndís'tiī ní yeⁿe Cristo ndís'tiī. Ní Cristo miiⁿ ní yeⁿe Dendyuūs chí cánduuchi yā cueⁿe daāⁿmaⁿ.

4

Ntiiⁿnyuⁿ yeⁿe apóstoles

¹ Ndís'tiī ní didúúché nī nús'uu tan'dúúcā 'iiⁿyāⁿ chí idiíⁿ ntiiⁿnyúⁿ yā yeⁿe Jesucristo. Nús'uu ní ngaⁿá 'nū nduudu cuaacu yeⁿé Ndyuūs nanaaⁿ ndís'tiī. Vmnaáⁿ vmnaaⁿ ní nguéé chí cádiinuuⁿ nī naati maaⁿ ní cádiinuuⁿ nī nduudu cuaacu miiⁿ. ² 'Iiⁿyāⁿ chí dífn ntiiⁿnyuⁿ yeⁿe 'iivú Ndyuūs canee cuuⁿmiⁿ chí dífn yā cumplir tanducuéⁿe chí caaⁿmaⁿ Ndyuūs yeⁿé ntiiⁿnyuⁿ chí dífn yā. ³ Nguéé de'ē vεε tuneé 'úú nduuti chí 'iiⁿyāⁿ dífn yā

juzgar 'úú, o nduuti chí ndís'tií, o táamá 'ii'yāⁿ o 'úú maáⁿ n'diichí nuuⁿndi yeⁿé. ⁴ 'Áará chi staava yeⁿé ngéé diiⁿ condenar 'úú cáávā chiiⁿ chi dííⁿ, 'úú nguéé cuuvi caaⁿmáⁿ chi nguéé nuuⁿndi yeⁿé. Dámaāⁿ Señor Jesucristo dííⁿ yā juzgar 'úú, ní caaⁿmáⁿ yā nuuⁿndi yeⁿé. ⁵ Ndís'tií nguéé dííⁿ nī juzgar 'ii'yāⁿ. Taachí ndáá Señor Jesucristo yeⁿé yú taama vmnéⁿēe tuu'mi 'cuuⁿmíⁿ yā tanducuéⁿē chi cadiiuuⁿ yú 'aama 'aama yú ndii na staava yeⁿé yú. Tiempo miiⁿ ní 'iivú Ndyuūs téé yā s'uuúⁿ chi cuuvi yeⁿé yú caavā ntiinⁿnyuⁿ chí dííⁿ yú.

⁶ 'Úú ngaⁿá yeⁿé chi 'úú ndúúⁿcū saⁿā Apolos dííⁿ 'nū. Ní 'íicú ndís'tií cuuvi 'cueéⁿ nī tan'dúúⁿcā chi cuuvi dííⁿ nī tan'dúúⁿcā chi canéé nguūⁿ ndíí vmnaaⁿ na libro yeⁿe Ndyuūs. Ndís'tií nguéé n'diichí nī 'ii'yāⁿ. Ní nguéé caaⁿmáⁿ nī chí 'áamá 'ii'yāⁿ chí ch'εεε ca yā nguéé ti táamá yā. ⁷ ¿Dé'ē cuuvi chí ngaⁿa nī chí naⁿa 'ii'yāⁿ chí ch'εεε yā? ¿'Áá nguéé tee Ndyuūs tanducuéⁿē chí vεε yeⁿé nī? ¿De'ē cuuvi chí ngaⁿa nī chí tanducuéⁿe chí vεε chí yeⁿé nī ní maáⁿ nī sta'á nī, ní nguéé dííⁿ nī cuenta yeⁿé chiiⁿ chí tee Ndyuūs ndís'tií?

⁸ Ndís'tií ní nadacadíinuuⁿ nī chí deenú nī nducuéⁿē chí yeⁿe nduudu yeⁿe Dendyuūs. Ní dííⁿ nī tan'dúúⁿcā 'ii'yāⁿ chí 'cuiica. Taachi nguéé ch'εεtineé 'nū ndúúⁿcū ndís'tií, tuu'mi ní ndís'tií dííⁿ nī tan'dúúⁿcā chí reyes ndís'tií. Nduuti chí ndaa tiempo chí ndís'tií caaⁿmáⁿ nī ntiinⁿnyuⁿ ti rey ndís'tií, tuu'mi ní nús'uu caaⁿmaⁿ ntiinⁿnyúⁿ 'nū nduucú nī. ⁹ Tan'dúúⁿcā chí 'úú nadacadíinúúⁿ, nús'uu chí apóstoles ní candéε 'nū nduudu yeⁿe Ndyuūs. Ndyuūs s'neéⁿ yā nus'ūú lugar chí ndii na n'giinū yeⁿe fila. Ní nús'uu canéé 'nū tan'dúúⁿcā 'ii'yāⁿ chí niiⁿnuúⁿ cánee nguuvi chí 'cuūvi yā, ní niiⁿnuúⁿ canéé nguuvi chí ch'iiⁿnúⁿ yā nús'uu. 'Tíicā snéé nús'uu. 'Ii'yāⁿ yeⁿe iⁿyeeⁿdí 'cūū ndúúⁿcū ángeles yeⁿé nanguuvi n'gííⁿu yā nús'uu. ¹⁰ 'Ii'yāⁿ yeⁿe iⁿyeeⁿdí 'cūū ngaⁿá yā chí nús'uu tonto 'nū ti neⁿé 'nū Cristo, naati ngaⁿá yā ti ndís'tií ní saⁿā deenu ndís'tií. Ngaⁿá yā ti nús'uu ní 'va'á 'nū naati ndís'tií ní ditiinú nī. Ngaⁿá yā chí nús'uu ní nguéé n'dááca 'nū naati ndís'tií ní n'dááca nī. ¹¹ Ndií nguuvi miiⁿ ní cuíicu 'nū ní yaaca 'nū va. Ní 'āā ntéé n'dee catécai 'nū chí n'daacā. Ní 'iiche yeⁿé 'nū. Ní 'ii'yāⁿ ch'eⁿé yā nús'uu. Ní dííⁿ yā chí chéénú 'nū ndii mííⁿ ní ndii 'múúⁿ ní nguéé vaacu 'nū. ¹² Ní dííⁿ 'nū ntiinⁿnyuⁿ ndúúⁿcū ta'á 'nū chí cuuvi che'é 'nū. Taachi 'caa'va yā yeⁿé 'nū tuu'mi ní 'ii'yāⁿ miiⁿ dí'viicú yā nús'uu. Dííⁿ yā chí nééné ch'eenu 'nū chíí ní nús'uu ní chí chéé 'nū yeⁿé nducuéⁿē. ¹³ Caⁿa yā cunncā yeⁿé 'nū ní chéε 'nū ndúúⁿcū vaadī ngiinu. Ndií nguuvi miiⁿ 'ii'yāⁿ nacadiinúúⁿ yā chí nús'uu tan'dúúⁿcā dεεcūū yeⁿe iⁿyeeⁿdí 'cūū 'tíica nús'uu.

¹⁴ 'Úú nguéé idinguúⁿ yeⁿe dendu'ú 'cūū yeⁿe ndís'tií caati chí cuuvi 'cuinaáⁿ nī. Yaa'ví ndís'tií yeⁿe nducuéⁿē chuū tí ndís'tií tan'dúúⁿcā daiyá chí nééné neⁿé, 'tíicā ndís'tií. ¹⁵ 'Áará chí véé ndiichi mil maestros chí ngi'cueéⁿ yā ndís'tií yeⁿe Cristo, nguéé nééné 'yaaⁿ 'ii'yāⁿ chí snéé yā tan'dúúⁿcā chiidá nī. 'Úú ní tan'dúúⁿcā chiidá nī na ndaata yeⁿé Dendyuūs, ti candéε evangelio chí nduudu cuaacu chí ngai yeⁿé Cristo nanááⁿ ndís'tií. Ní ndís'tií ní chí'téenu nī ní ch'iindiyááⁿ ntúuⁿ nī na ndaata yeⁿé Ndyuūs. ¹⁶ Cáávā chííⁿ 'úú idi'cuítú ndís'tií. Dííⁿ nī tan'dúúⁿcā chí 'úú idiíⁿ.

¹⁷ Cáávā chuū dicho'ó Timoteo nanááⁿ ndís'tií. Saⁿā miiⁿ tan'dúúⁿcā daiyá, 'tíica sa. Ní saⁿa chí neⁿé. Saⁿā miiⁿ ní 'áamá canee sa ndúúⁿcū 'iivú Ndyuūs. Saⁿā miiⁿ ní ca'cueéⁿ sa ndís'tií yeⁿe Cristo. Ní n'gaacu nī yeⁿé tanducuéⁿē chí cuuvi dííⁿ nī maaⁿ chí i'teenú nī Cristo tan'dúúⁿcā chí 'úú ngi'cueéⁿ nduu cuaaⁿ nducuéⁿē yáacū va. ¹⁸ Maaⁿ ní deenú chí náⁿā ndís'tií ngaⁿa nī chí n'gεεε ndai maaⁿ nī. Ní nadacadíinuuⁿ nī chí 'úú ní 'aa ntéé ndaa naachi cánéé nī. ¹⁹ Ndaa nuúⁿ yeⁿé ndís'tií nduuti chí Ndyuūs neⁿé yā chí ndaa. Taachi ndaa tuu'mi 'úú cadiiinúúⁿ yeⁿe chí 'ii'yāⁿ chí ngaⁿa maáⁿ yā chí n'gεεε yā. Cadiinúúⁿ nduuti chí 'ii'yāⁿ miiⁿ dííⁿ yā tan'dúúⁿcā chí Ndyuūs neⁿé yā chí dííⁿ yā. ²⁰ Nducuéⁿē yeⁿe naachi Ndyuūs ngaⁿa ntiinⁿnyuⁿ yā nguéé dámaāⁿ yeⁿe chí ngaⁿa yā, ti chííⁿ chí dííⁿ yā ti poder yeⁿé Ndyuūs. ²¹ De'ē neⁿé ndís'tií. ¿'Áá neⁿe nī chí taachi ndaa ní dííⁿ regañar ndís'tií, o taachi ndaa caaⁿmáⁿ nduucú ndís'tií ndúúⁿcū vaadī néⁿé?

5

*Nga*ⁿ a yā nuuⁿndi yeⁿē 'áámá saⁿ a chi caⁿ'á yā na yaācū

¹ N'giindiveéⁿ 'nū chi nguááⁿ ndis'tiī véé 'áámá saⁿā chí diiⁿ nuuⁿndi ca tí canee sa ndúúⁿcū n'daataá chi nguéé yeⁿē sa. Nguéé 'tíicá nguaaⁿ 'iiⁿ'yāⁿ gentiles chi nguεε i'téenu yā Jesucristo. N'giindiveéⁿ 'nū chi saⁿā miiⁿ sta'a n'daataá yeⁿē chiida sa ní canee sá ndúúⁿcū tá. ² Ní ndís'tiī ngaⁿ a maáⁿ nī yeⁿe nī chi n'gεεte nī n'dáará chí idiⁿ saⁿā miiⁿ nuuⁿndi 'tíicā. ¿De'ē cuuvi chi nguéé divíi nī saⁿ a miiⁿ na yaacū yeⁿé Ndyuūs yeⁿē yú? ³ N'dáará chí 'úú nguéé canee ndúúⁿcū ndís'tiī inacádiinúúⁿ yeⁿé ndís'tiī. 'Úú ní caaⁿ'máⁿ nuuⁿndi yeⁿe saⁿā miiⁿ yeⁿe dendú'u chí idiⁿ sa tan'dúúⁿcā chí 'úú canee ndúúⁿcū ndís'tiī. ⁴ Taachí nduuvídáámá ndís'tiī ná chí duuchi Señor Jesucristo tuu'mi ní poder yeⁿē Señor Jesucristo canee ndúúⁿcū ndís'tiī. Ní diíⁿ nī tan'dúúⁿcā chí 'úú canee ndúúⁿcū ndís'tiī. ⁵ 'Tíicā nadacádiinúúⁿ chí ndís'tiī canee cuuⁿmiⁿ chí diíⁿ nī. Divíi nī saⁿā miiⁿ nguaaⁿ ndís'tiī ti saⁿā miiⁿ ní canee sa yeⁿē na poder yeⁿe yááⁿ'guinūuⁿ. 'Tíicā castigo yeⁿē sa. Ní cuuvi cadíinuuⁿ sa yeⁿe alma yeⁿe sa. Ní cuuvi nanguaⁿ'ai alma yeⁿē sa nguuví chí ndaa ntúūⁿ Señor Jesucristo yeⁿē yú.

⁶ Nguéé n'dáácā ndís'tiī ní ngaⁿ'á nī chí n'dái ndís'tiī, ní véé 'iiⁿ'yāⁿ chí idiíⁿ yā nuuⁿndi nguaaⁿ ndís'tiī. ¿'Áá nguéé deenú nī ti ta 'lín' chuundi levadura ichéé ndúúⁿcū tanducueⁿē yaāchí? ⁷ Saⁿā miiⁿ tan'dúúⁿcā levadura 'tíicā sa. Ndís'tiī divíi nī saⁿā miiⁿ ní cūnee n'dáácā nī. Cuneé nī tan'dúúⁿcā yaāchí chí nguéé levadura yeⁿē, tan'dúúⁿcā pan chí che'e yā yeⁿē pascua. 'Iiⁿ'yāⁿ ch'iiⁿ'núⁿ yā Cristo. Ní Cristo miiⁿ ní tan'dúúⁿcā 'iiti cuūchí chí ch'iiⁿ'núⁿ yā cáávā 'viicu pascua. Cáávā s'uuūⁿ ní Cristo miiⁿ ní sta'á yā lugar yeⁿē 'iiti cuūchí yeⁿe 'viicu pascua ti ch'iī yā cucáávā s'uuúⁿ. ⁸ Maaⁿ ní nguéé dich'εεte yú 'viicu yeⁿe pascua miiⁿ tan'dúúⁿcā 'iiⁿ'yāⁿ chí véé nuuⁿndi yeⁿé yā ti nguéé yeⁿe Cristo 'iiⁿ'yāⁿ s'eeⁿ. Ní nguéé dich'εεte yú ndúúⁿcū vaadí n'giinu na staava yeⁿē yú o ndúúⁿcū cosa chí nguéé n'daacā, ti chuū ní tan'dúúⁿcā levadura 'tíicā. Dich'εεte yú pascua miiⁿ dámaaⁿ ndúúⁿcū nducueⁿē chí n'dáácā na staava yeⁿē yú ti tan'dúúⁿcā pan chí nguéé levadura yeⁿē, 'tíicā canee yú.

⁹ 'Áá dinguúⁿ yeⁿe ndís'tiī chí nguéé cáⁿ'a nī ndúúⁿcū saⁿā chí canee sa ndúúⁿcū n'daataá chí nguεε yeⁿē sa ndíi nguéé cáⁿ'a nī ndúúⁿcū n'daataá miiⁿ. ¹⁰ 'Úú nguéé ngaⁿ'á chí nguéé n'diichí nī sáⁿ'ā chí véé n'daataá yeⁿē sa, o n'daataá chí véé saⁿā yeⁿē tá, o 'iiⁿ'yāⁿ chí nginnche'éi yā 'iiⁿ'yāⁿ, o 'iiⁿ'yāⁿ chí duūcú, o 'iiⁿ'yāⁿ chí i'teenú yā ídolos. Ndís'tiī nguéé cuuvi cuneé nī na iⁿ'yeeⁿdí 'cūū ní nguéé n'diichí nī 'iiⁿ'yāⁿ yeⁿe iⁿ'yeeⁿdí 'cūū. ¹¹ Naati maaⁿ ní 'āā dinguúⁿ yeⁿé ndís'tiī chí nguéé cáⁿ'a nī ndúúⁿcū 'iiⁿ'yāⁿ s'eeⁿ chí ngaⁿ'á yā chí hermanos yeⁿé nī ní nguéé n'daacā idiíⁿ yā, ti saⁿā chí canee ndúúⁿcū n'daataá chí nguεε yeⁿe sa, o n'daataa chí canee ndúúⁿcū saⁿ'a chí nguεε yeⁿē tá. Ndíi nguéé cáⁿ'a nī ndúúⁿcū 'iiⁿ'yāⁿ chí i'teenú yā ídolos. Ndíi nguéé cáⁿ'a nī ndúúⁿcū 'iiⁿ'yāⁿ chí ngaⁿ'á yā nduudu yaadí, o ndúúⁿcū 'iiⁿ'yāⁿ chí nginnche'éi yā 'iiⁿ'yāⁿ, o ndúúⁿcū 'iiⁿ'yāⁿ chí ngii cuu'vi, o ndúúⁿcū 'iiⁿ'yāⁿ chí duucu. Ní nguéé che'é nī ndúúⁿcū 'iiⁿ'yāⁿ s'eeⁿ. ¹² ¿De'ē cúúví chí 'úú n'diichí nuuⁿndi yeⁿe 'iiⁿ'yāⁿ chí nguéé i'téenu yā Jesucristo yeⁿē yú? Chuū ní nguéé ntiinnyuⁿ yeⁿé ti yeⁿé Dendyuūs. Ndís'tiī canee chí n'diichi nī nuuⁿndi yeⁿe 'iiⁿ'yāⁿ chí caⁿ'á yā yaacū ndúúⁿcū nī. ¹³ Jesucristo n'diichí yā nuuⁿndi yeⁿe 'iiⁿ'yāⁿ chí nguéé i'téenu yā Ndyuūs. Maaⁿ ní ndís'tiī divíi nī saⁿā miiⁿ nguaaⁿ ndís'tiī.

6

'Iiⁿ'yāⁿ chí i'téenu yā Señor Jesucristo naⁿ'á yā nanááⁿ juez ndúúⁿcū vaadí 'caa'va yeⁿé yā

¹ Nduuti chí 'aama chéé ndís'tiī véé vaadí 'caa'va ndúúⁿcū taama chéé ndís'tiī, ¿de'ē cúúví chí caⁿ'á nī nanááⁿ juez yeⁿe yaāⁿ vaacú nī, ní nguéé caⁿ'á nī nanááⁿ 'iiⁿ'yāⁿ chí chéé vmnaaⁿ yeⁿe yáacū yeⁿé nī? ² ¿'Áá nguéé deenu ndís'tiī ti s'uuúⁿ chí i'teenú yú Jesucristo ndáá nguuví chí cuuvi n'diichi yú nuuⁿndi yeⁿe 'iiⁿ'yāⁿ yeⁿe iⁿ'yeeⁿdí 'cūū? Nduuti chí ndís'tiī caⁿ'á nī n'diichí nī nuuⁿndi chí idiíⁿ 'iiⁿ'yāⁿ yeⁿe iⁿ'yeeⁿdí 'cūū, ¿'áá

nguéeé cuuvi n'diichí nī ta 'lín nuuⁿndi yeⁿe nī chí nguaaⁿ ndís'tiī? ³ ¿'Áá nguéeé deenu ndís'tiī chi s'uuúⁿ caⁿ'a yú n'diichi yú nuuⁿndi yeⁿe ángeles? Ní nduuti chi cuuvi diiⁿ yú 'tíicā tuu'mi ní cuuvi n'diichi yú dendu'ū nuuⁿndi chí véé yeⁿe yú iⁿ'yeeⁿdí 'cūū. ⁴ Nduuti chí canéeé chí n'diichí nī dendu'ū vaadí 'caa'va nguaaⁿ ndís'tiī, n'daacā chí caⁿ'á nī nanááⁿ 'iiⁿ'yāⁿ yeⁿe yaācū 'aara chí nguéeé 'iiⁿ'yāⁿ chí duū'vī néⁿ'e yā vi'ī. ⁵ Ngaⁿ'á chuū chí cuuvi 'cuinaáⁿ nī. ¿'Áá cadiinuuⁿ nī chí nguéeé véé mar 'áámá 'iiⁿ'yāⁿ nguaaⁿ ndís'tiī, mar 'áámá 'iiⁿ'yāⁿ chí nguéeé cuuvi n'diichí yā du'u hermano chí véé nuuⁿndi yeⁿe yā? ⁶ Nduuti chí véé 'aama hermano chí deenu ca nguaaⁿ ndís'tiī, ¿de'ē cúúví chí ngeⁿ'e hermanos ndúúcu vaadí 'caa'va yeⁿ'é yā nanááⁿ 'iiⁿ'yāⁿ chí nguéeé i'téenu yā Señor Jesucristo yeⁿ'ē yú?

⁷ Cuaacu níⁿnyúⁿ nguéeé n'gíⁿ'i ndís'tiī chí yeⁿe Ndyuūs ndís'tiī ti véé vaadí 'caa'va yeⁿe 'áámá nī táámá nī ndúúcu vi'ī. ¿De'ē cúúví chí nguéeé ichéeé nī nguaaⁿ ndís'tiī dendu'ū chí nguεε n'daacā chí hermano díⁿ yā nduucú nī? N'daacā n'dai chí ichéeé nī tanducueⁿ'ē ní nguéeé caⁿ'á nī nanááⁿ 'iiⁿ'yāⁿ cucáávā hermanos chí idiⁿ'n yā ndúúcu nī. ⁸ Ndís'tiī, hermanos, ní nguéeé n'daacā idiⁿ'n nī chí nginnche'éeí nī 'áámá nī ndúúcu taama nī chí hermano yeⁿ'e nī.

⁹ Ndís'tiī nguéeé 'caandiveéⁿ nī chíiⁿ chí 'iiⁿ'yāⁿ ngaⁿ'a yā chí cuaacu ní nguéeé cuaacu. ¿'Áá nguéeé deenu nī chí 'iiⁿ'yāⁿ chí nguéeé idin'daacá yā nguéeé ndaa yā naachí Ndyuūs ngaⁿ'a ntiⁿ'nyúⁿ yā? Ní nguéeé 'iiⁿ'yāⁿ s'eeⁿ ndíⁿ nguεε 'iiⁿ'yāⁿ chí sta'á yā n'daataá yeⁿ'e taama sa, o isaⁿ'ā yeⁿ'e taama ta, ní nguéeé n'daataá chí n'diichi tá saⁿ'ā chí nguéeé yeⁿ'e tá, ní nguéeé saⁿ'ā chí n'diichi sa n'daataá chí nguéeé yeⁿ'e sá, ndúúcu 'iiⁿ'yāⁿ chí i'teenu ídolos chí santos, ndúúcu saⁿ'ā chí iduuchinééⁿ ví'í sa. ¹⁰ 'Tiicá ntúūⁿ 'iiⁿ'yāⁿ duucu, ndúúcu 'iiⁿ'yāⁿ chí neⁿ'e cá yā dendu'u chí véé yeⁿ'e taama 'iiⁿ'yāⁿ, ndúúcu 'iiⁿ'yāⁿ chí ngii cúú'ví, ndúúcu 'iiⁿ'yāⁿ chí ngaⁿ'a taán yā yeⁿ'ē taama 'iiⁿ'yāⁿ, ndúúcu 'iiⁿ'yāⁿ chí itá'á yā yeⁿ'ē taama yā. Nducueⁿ'ē 'iiⁿ'yāⁿ s'eeⁿ nguéeé cuuvi nndaá yā naachi Ndyuūs ngaⁿ'a ntiⁿ'nyuⁿ yā. ¹¹ 'Tiicá ntúūⁿ díiⁿ'n ndís'tiī. Dinuuⁿndí nī tiempo chí 'āā chó'ōo naati maaⁿ ní Ndyuūs n'diichí yā ndís'tiī tan'dúúca chí 'āā ntéeé vεε nuuⁿndi yeⁿ'é nī cáávā Jesucristo. Maaⁿ ní ndís'tiī ní díⁿ'n nī nducueⁿ'ē chí n'daacā ti yeⁿ'é Jesucristo ndís'tiī. Ní Espíritu N'dai yeⁿ'é Ndyuūs yeⁿ'ē yú canéeé ndúúcu nī.

Yeⁿ'e chí n'daacā chí diiⁿ yú

¹² Tanducueⁿ'ē chí nguéeé nuuⁿndi cuuvi díⁿ, naati nducueⁿ'ē chí n'daacā nguéeé neⁿ'é díⁿ, ti nguéeé n'dai chí díⁿ. Cuuvi díⁿ tanducueⁿ'ē chí neⁿ'é chí n'daacā, naati nguéeé necio canéeé yeⁿ'ē mar 'áámá dendu'ū. ¹³ Cuaacu chí yúutē chí che'e yú ní caavā chεeti yú. Chεeti yú ní neⁿ'e che'e yuūtē. Naati Ndyuūs dí'cuiinú yā yuūtē chí che'e yú ndúúcu cuerpo yeⁿ'e yú ndúúcu chí véé yeⁿ'ē. Nguéeé cuuvi caaⁿ'maⁿ yú chí Ndyuūs teé yā cuerpo yeⁿ'e yú chí n'daataá n'diichí yā saⁿ'ā. Ndyuūs díⁿ yā chí s'uuúⁿ chí cuuvi yeⁿ'é yā ní cuerpo yeⁿ'ē yú ní yeⁿ'é Dendyuūs. ¹⁴ Jesucristo chí 'iivi yú, Ndyuūs nducueⁿ'ē yā yeⁿ'ē nguaaⁿ tináⁿ'ā. 'Tiicá ntúūⁿ Ndyuūs nadacueⁿ'ē ntúūⁿ yā s'uuúⁿ ndúúcu poder yeⁿ'é yā.

¹⁵ ¿'Áá nguéeé deenu ndís'tiī chí cuerpo yeⁿ'é nī ní yeⁿ'e Cristo? ¿'Áá cuta'á nī 'áámá saⁿ'ā chí yeⁿ'e Cristo ní díⁿ nī chí saⁿ'ā miiⁿ yeⁿ'ē 'áámá n'dáátāa chí 'yaaⁿ saⁿ'ā yeⁿ'ē tá? Ndyuūs nguéeé 'cuááⁿ yā chí 'tíicā. ¹⁶ ¿'Áá nguéeé deenu ndís'tiī chí saⁿ'ā chí caⁿ'a sa ndúúcu n'daātāa chí 'yaaⁿ saⁿ'ā yeⁿ'ē tá nduuvi 'aama nú yā? 'Iivú Ndyuūs ngaⁿ'a yā ndii cuááⁿ vmaaaⁿ naachi canéeé nguūⁿ na libro yeⁿ'e yā 'tiicā: Naachí na'uuví yā ní nduuvi 'aama cuerpo núú yā. ¹⁷ S'uuúⁿ chí i'teenu yú Jesucristo chí 'iivi yú canee yú ndúúcu dáámá espíritu chí yeⁿ'ē Jesucristo.

¹⁸ Ndís'tiī n'daataá, nguéeé caⁿ'á nī ndúúcu saⁿ'ā, o saⁿ'ā nguéeé caⁿ'á nī ndúúcu n'daataá, chí idinuuⁿndí nī ti idiⁿ'n nuuⁿndí nī ndúúcu cuerpo yeⁿ'e maáⁿ nī. Castigo yeⁿ'ē nuuⁿndi miiⁿ 'áámá cūnee na cuerpo yeⁿ'é nī. Tanáⁿ'a ca nuuⁿndi chí idiⁿ'n nī ní nguéeé contra cuerpo chí yeⁿ'e maáⁿ nī. ¹⁹ ¿'Áá nguéeé deenu ndís'tiī chí cuerpo yeⁿ'é nī chíiⁿ chí yaācū yeⁿ'e Espíritu N'dai yeⁿ'é Ndyuūs chí canéeé ndúúcu ndís'tiī? Ndyuūs tee yā Espíritu N'dai yeⁿ'e yā ndís'tiī. Maaⁿ ni cuerpo yeⁿ'e nī nguéeé yeⁿ'e maáⁿ nī ti yeⁿ'e Espíritu N'dai chí yeⁿ'e Ndyuūs. Ní Ndyuūs tee yā ndís'tiī Espíritu N'dai yeⁿ'é yā. ²⁰ Chuū ní cáávā Jesucristo

cái yā ndís'tiī ndúúcu 'áámá precio chi néené yaⁿai chii'vē. Cáávā chuū dich'εεté nī Dendyuūs ndúúcu nuuⁿmáⁿ cuerpo yeⁿe nī ti ndís'tiī ní yeⁿé Ndyuūs ndís'tiī.

7

Pablo ca'á yā consejo 'iiⁿ'yāⁿ chí n'giindivaacu yā

¹ Maaⁿ ní idinguúⁿ ní nan'guεεcútāⁿa yeⁿe preguntas chi dingúuⁿ nī yeⁿé. N'daacā chi 'aama saⁿā nguéeⁿ 'caandavaacu sa. ² Naati 'tíicā. Deenú chi saⁿā neⁿe sa cūnee sa ndúúcu n'daataá. Cáávā chuū n'dáaca chi 'caandavaacu sá ní véé n'daataá yeⁿē sa. 'Tiicá ntúūⁿ chi 'aama n'daataá 'caandavaacu tá ní véé saⁿā yeⁿē tá. 'Tíicā ní nguéeⁿ dííⁿ yā nuuⁿndi. ³ Saⁿā ní canéeⁿ chí cun'diití sá ndúúcu n'daataá yeⁿē sa. 'Tiicá ntúūⁿ n'daata miiⁿ canéeⁿ chí cun'diití tá ndúúcu sáⁿā yeⁿē tá. ⁴ N'daataá chi n'gíindivaacu tá, cuerpo yeⁿē tá nguéeⁿ yeⁿē tá dámaāⁿ tá ti yeⁿe sa ndúúcu tá. 'Tiicá ntúūⁿ saⁿā miiⁿ. Cuerpo yeⁿē sa nguéeⁿ yeⁿē sa dámaāⁿ sa ti yeⁿē sa ndúúcu tá. ⁵ Dííⁿ nī cumplir ndúúcu n'daata yeⁿe nī o isaⁿā yeⁿé nī. Nduuti chí nduu 'uuví nī canee yiinú nī yeⁿé 'áámá tiempo chi 'áámá caaⁿ'maⁿngua'á nī ní ndeé nī ndúúcu 'iivú Ndyuūs, tuu'mí chuū ní chí dííⁿ nī cumplir tiempo 'cūū. 'Cuiinū caaⁿ'maⁿngua'á nī ndúúcu 'iivú Ndyuūs, tuu'mi ní dííⁿ nī cumplir ndúúcu isaⁿā o n'daataá yeⁿe nī. Nduuti chí nguéeⁿ dííⁿ nī 'tuucā, tuu'mi ní cuuvi neⁿé nī caⁿ'á nī ndúúcu táámá saⁿā o n'daataá. Ní yááⁿ'guinūuⁿ n'diichínēⁿ sa ndís'tiī neⁿe chí nguéeⁿ dííⁿ nī cumplir ndúúcu isáⁿā o n'daataá yeⁿe nī. Ní cuuvi dííⁿ nī nuuⁿndi.

⁶ 'Úú nguéeⁿ caaⁿ'máⁿ ndis'tiī chiiⁿ chí dííⁿ nī, ndís'tiī chí neⁿé nī 'caandavaacu nī. Nguéeⁿ teé chuū tan'dúúca 'áámá ley. ⁷ Ti neⁿé chí nducyaaca saⁿā nguéeⁿ 'caandavaacu sa ní cūnee sa dámaāⁿ sa tan'dúúca chí 'úú canee, naati nguεε cuuví chí 'tíicā. 'Úú deenu chí Ndyuūs ca'á yā 'áámá 'áámá 'iiⁿ'yāⁿ chiiⁿ chí cuuvi dííⁿ yā.

⁸ 'Úú ngaⁿ'á ngī saⁿā n'gaiyáa o n'daataá n'gaiyáa ndúúcu n'daataá n'guá'āa chí n'daacā chí 'iiⁿ'yāⁿ s'eeⁿ nguéeⁿ 'caandavaacu yā ní cūnee yā dámaāⁿ yā tan'dúúca chí 'úú canee. ⁹ Nduuti chí nguéeⁿ cuuvi 'cuεetinée yā damaáⁿ yā, tuu'mi ní 'caandavaacu yā. Ti n'daacā chí 'caandavaacu yā ní nguéeⁿ cūnee yā ndúúcu deseo chí saⁿā neⁿe sa n'daataá o n'daataá neⁿe tá saⁿā.

¹⁰ Chuū ngaⁿ'á yeⁿé 'iiⁿ'yāⁿ chí n'giindivaacu yā. Saⁿā miiⁿ nguéeⁿ diví sa n'daataá yeⁿē sa, o táⁿā miiⁿ nguéeⁿ diví tá isáⁿā yeⁿē tá. Chuū chí ley yeⁿe Ndyuūs. ¹¹ Ndúúti chí 'áámá n'daataá diví tá yeⁿe isaⁿā yeⁿē ta caati nguéeⁿ yaaⁿ yiinú tá ndúúcu isaⁿā yeⁿē tá, tuu'mi ní 'āā ntéeⁿ 'caandavaacu tá ndúúcu taama sáⁿā. 'Tiicá ntúūⁿ saⁿā yeⁿē tá nguéeⁿ cu'neeⁿ sá n'daataá yeⁿē sa cucáávā taama n'daataá.

¹² Maaⁿ ní chuū chí ngaⁿ'á ngī tanáⁿ'ā 'iiⁿ'yāⁿ ni cosa tan'dúúca chí deenú chí n'daacā cááva yā. Ní chuū ní nguéeⁿ ley yeⁿe Ndyuūs. Nduuti chí 'áámá saⁿā chí i'teenu Ndyuūs ní n'daataá yeⁿē sa ní nguéeⁿ i'teenu tá, tuu'mi nguéeⁿ cu'neeⁿ sa n'daataá yeⁿē sa nduuti chí táⁿā miiⁿ n'daacā canee tá ndúúcu sa. ¹³ 'Tiicá ntúūⁿ, n'daataá chí i'teenu tá ní saⁿā yeⁿe tá nguéeⁿ i'téenu sa ní n'dáaca canee tá ndúúcu sa, tuu'mi nguéeⁿ cu'neeⁿ tá isáⁿā yeⁿē tá. ¹⁴ Sáⁿā yeⁿē tá chí nguéeⁿ i'téenu sa ní cuuvi yeⁿé Jesucristo saⁿā miiⁿ cucáávā n'daataá yeⁿē sa chí i'teenu tá. 'Tiicá ntúūⁿ, n'daataá chí nguéeⁿ i'teenu tá ní cuuvi yeⁿé Jesucristo n'daataá miiⁿ cucáávā isaⁿā yeⁿe tá chí i'teenu sa. Ndúúti chí nguéeⁿ 'tíicā, tuu'mi ní nguéeⁿ cuuví yeⁿe Jesucristo daiyá yā. Naati 'tíicā, tuu'mi ní cuuvi yeⁿe Jesucristo daiyá yā. ¹⁵ Naati nduuti chí saⁿā o n'daata chí nguéeⁿ i'téenu yā Señor Jesucristo nguéeⁿ cūnee n'dáaca saⁿā miiⁿ ndúúcu n'daataá yeⁿē sa, o n'daataá míⁿ ndúúcu isaⁿā yeⁿē tá chí i'téenu yā Señor Jesucristo, tuu'mi ní cuuvi diví yā yeⁿe víⁱ. 'Iiⁿ'yāⁿ chí i'téenu yā Jesucristo nguéeⁿ a fuerza chí cūnee yā ndúúcu 'iiⁿ'yāⁿ chí nguεε i'téenu yā Señor Jesucristo. Ndyuūs neⁿé yā chí 'iiⁿ'yāⁿ chí i'téenu yā Señor Jesucristo cūnee n'dáaca yā ndúúcu vaadí 'diiⁿ. ¹⁶ Ndís'tiī 'iiⁿ'yāⁿ chí i'téenu nī Señor Jesucristo, ¿táacā cuuvi deenú nī nduuti chí cuuvi dingúáⁿai nī isaⁿā yeⁿé nī o n'daataá yeⁿé nī? Nguéeⁿ cuuvi déenu nī chuū chí 'tíicā.

¹⁷ Ndyuūs yeⁿē yú yaa'ví yā s'uuúⁿ chi yeⁿé yā s'uuúⁿ. Ní tee yā 'áámá 'áámá s'uuúⁿ ntiinⁿnyuⁿ s'uuúⁿ chí yeⁿé yā chí ituneen s'uuúⁿ. Ní 'íicú véé ntiinⁿnyuⁿ yeⁿé Ndyuūs yeⁿē 'áámá 'áámá s'uuúⁿ. Ní canee chi 'cuεetinee yú n'daacā tan'dúú^{cā} Ndyuūs neⁿe yā chí diiⁿ yú. 'Tíicā ngaⁿ'a ntiinⁿnyuⁿ 'úú yeⁿē nducyáácá yáacū. ¹⁸ Nduuti chi Ndyuūs yaa'ví yā 'áámá saⁿ'ā yeⁿē ndaata Israel chí cuuvi yeⁿe yā ní 'iiⁿ'yāⁿ 'āā díⁿ yā circuncidar cuerpo yeⁿe saⁿ'ā miiⁿ ndii chí 'líⁿ sa tan'dúú^{cā} chí ngaⁿ'a ley yeⁿe 'iiⁿ'yāⁿ ndaata Israel, 'āā canee sa 'tíicā. Ndúú^{ti} chí Ndyuūs yaa'ví yā 'áámá saⁿ'ā chí cuuvi yeⁿé yā ní saⁿ'ā miiⁿ nguéé yeⁿē ndaata Israel ní nguéé díⁿ yā circuncidar cuerpo yeⁿe saⁿ'ā miiⁿ, 'āā canee sa 'tíicā. ¹⁹ Nguéé de'ē vεε nanááⁿ Ndyuūs nduuti chí díⁿ yā circuncidar cuerpo yeⁿe saⁿ'ā o nguéé. Damaāⁿ dichíí'vε nduuti chí cu'teenu yú Jesucristo ní diiⁿ yú tan'dúú^{cā} chí Ndyuūs neⁿé yā. ²⁰ Tan'dúú^{cā} chí ndís'tiī 'āā canee nī taachí Ndyuūs yaa'vi yā 'áámá 'áámá ndís'tiī 'tiicá ntúúⁿ cuneé nī. ²¹ Taachi Ndyuūs yaa'ví yā n'diī chí cuuvi yeⁿé yā, nduuti chí n'diī canéé nī tan'dúú^{cā} chí canéé 'iiⁿ'yāⁿ chí canéé caadi 'iiyu ní nguéé cuuvi naⁿ'a yā nguéé nacádiinúúⁿ nī de'ē vεε yeⁿē chúū. Ní nduuti chí cuuvi canee libre ndís'tiī, chí díⁿ nī ntiinⁿnyuⁿ caadi 'iiyu tuu'mi ní caⁿ'á nī. Ní cunee nī libre. ²² Taachí Ndyuūs yaa'ví yā 'iiⁿ'yāⁿ chí canéé caadi 'iiyu ní 'iiⁿ'yāⁿ miiⁿ i'téenu yā Jesucristo, 'iiⁿ'yāⁿ canéé yā tan'dúú^{cā} chí libre, tī canee libre yā yeⁿe nuuⁿndi yeⁿé yā. 'Iiⁿ'yāⁿ chí canéé libre taachí Ndyuūs yaa'ví yā 'iiⁿ'yāⁿ, 'iiⁿ'yāⁿ miiⁿ nguéé libre ti dichíí'vε yā Ndyuūs. ²³ 'Iivú Ndyuūs ní cái yā ndís'tiī ndúú^{cū} 'áámá precio chí nééné yaⁿ'ai chíi'vε ti yuuúⁿ yeⁿe daiyá yā. Maaⁿ ní ndís'tiī ní yeⁿé Ndyuūs ndís'tiī. Ní díⁿ nī ntiinⁿnyuⁿ yeⁿé Ndyuūs. Nguéé díⁿ nī tan'dúú^{cā} 'iiⁿ'yāⁿ yeⁿe iⁿ'yeeⁿdí 'cūū chí nguεε i'téenu yā Jesucristo ngaⁿ'a yā chí díⁿ nī. ²⁴ Ndís'tiī hermanos yeⁿé, ca'áámá ca'áámá ndís'tiī canéé nī ndúú^{cū} Ndyuūs. Naachi canéé nī mííⁿ canéé Dendyuūs ndúú^{cū} nī.

²⁵ 'Úú ca'á 'áámá consejo yeⁿē n'daataá chí nguéé n'giindivaacu tá. Deenu chí ngaⁿ'á tan'dúú^{cā} chí Dendyuūs néⁿé yā, naati chuū ní nguéé ley yeⁿé yā. 'Úú Pablo 'úú chí i'teenú Ndyuūs. Ní Ndyuūs ch'iⁿ'í yā 'úú chíiⁿ chí 'úú díⁿ ní ngaⁿ'á. ²⁶ 'Úú nadacádiinúúⁿ chí n'daacā chí saⁿ'ā s'eeⁿ 'cuεetinée sa damaāⁿ sa. Ti maaⁿ ní deenu yú chí ndaā tiempo chí n'geenu yú ngii. ²⁷ Ndís'tiī saⁿ'ā chí véé n'daataá yeⁿé nī, nguéé cu'neeⁿ nī táⁿ'ā. Ndís'tiī saⁿ'ā chí nguéé n'daataá yeⁿé nī nguéé in'nuúⁿ nī n'daataá chí cuuvi yeⁿé nī. ²⁸ Nduuti chí 'áámá saⁿ'ā ch'iindivaacu sa, nguéé dinuūⁿndí sa. Nduuti chí n'daataá mííⁿ 'caandavaacú tá, nguéé dinuūⁿndí tá. 'Úú nadacádiinúúⁿ chí 'iiⁿ'yāⁿ chí ch'iindivaacu yā ní 'cueenu cá yā cuuvi. Nguéé neⁿé chí ndís'tiī 'cueenu cá nī cuuvi.

²⁹ Chuū ngaⁿ'á ngī ndís'tiī hermanos yeⁿé: Nguéé 'naaⁿ tiempo 'cuεetinée yú iⁿ'yeeⁿdí 'cūū. Saⁿ'ā chí véé n'daataá yeⁿē sa n'diīⁿ sa ntiinⁿnyuⁿ yeⁿe 'iivú Ndyuūs vmnááⁿ vmaaaⁿ nguéé ti neⁿe n'daataá yeⁿē sa. ³⁰ Nguéé díⁿ nī cuenta yeⁿe de'ē vεε chí chó'ōo yeⁿé nī. Nduuti chí nguεεⁿ nī yeⁿe 'aama tináⁿ'ā nguéé 'naaⁿ tiempo cuεεⁿ nī. Nduuti chí yeenú nī ti véé 'áámá 'viicu nguéé 'naaⁿ tiempo cunéé vaadi yeenú nanáaⁿ nī. Nduuti chí ngái nī tuu'mi ní ngáácú nī chí nguéé 'naaⁿ tiempo cunee. ³¹ Ní ndís'tiī chí véé negocio yeⁿé nī yeⁿē cosa chí véé ná iⁿ'yeeⁿdí 'cūū, nguéé 'cuεetinee nī dámaāⁿ yeⁿe chuū, ti iⁿ'yeeⁿdí ndúú^{cū} nducuéⁿē chí vεε yeⁿē ní chó'óo.

³² 'Úú neⁿé chí nguéé nadacádiinuuⁿ nī yeⁿé dendu'ū chí véé. Saⁿ'ā s'eeⁿ chí nguéé n'giindivaacu sa ndée sa cuidado yeⁿe dendu'ū chí yeⁿē 'iivú Ndyuūs. Ní idiīⁿ sa tan'dúú^{cā} chí neⁿé Ndyuūs. ³³ Saⁿ'ā chí n'giindivaacu sa ndée sa cuidado yeⁿē chí véé na iⁿ'yeeⁿdí 'cūū táácā cuuvi cunee yíinūu n'daataá yeⁿē sa. ³⁴ 'Tiicá ntúúⁿ idiīⁿ n'daataá chí n'gíindiváacu tá. 'Áámá n'daataá chí nguéé n'giindivaacu tá ndée tá cuidado yeⁿe dendu'ū yeⁿe 'iivú Ndyuūs. Ní diiⁿ tá ndúú^{cū} nuuⁿmaⁿ staava yeⁿē tá nducuéⁿē chí neⁿe Ndyuūs. Nguéé 'tíicā idiīⁿ n'daataa chí n'gíindivaacu tá. Ndée tá cuidado yeⁿe nducuéⁿē yeⁿē vaacu tá ni táácā chí cuuvi cunee yíinūu isaⁿ'ā yeⁿē tá.

³⁵ Ngaⁿ'á ngī ndis'tiī chuū: Nguéé chí nguéé 'caandavaacú nī ti neⁿé chí ndís'tiī ní cuuvi cunee n'daaca cá nī. Neⁿé chí ndís'tiī díⁿ nī ndúú^{cū} nuuⁿmaⁿ staava yeⁿe nī chíiⁿ chí cuuvi dichíí'vε ca Ndyuūs. Ní cu'neéⁿ nī nducuéⁿē chí véé iⁿ'yeeⁿdí 'cūū chí cuuvi nī.

³⁶ Nduuti chi 'áámá saⁿā nadacádiinuuⁿ sa chi n'daacā chi daiya sa chi n'daataa cuiinu 'caandavaacu tá ti véé nduuyu yeⁿē tá tuu'mi ní cuuvi diiⁿ sa n'daacā caava tá. Ní 'caandavaacú tá. Chuū ní nguéeⁿ nuuⁿndi. ³⁷ Nduuti chi táámá saⁿā miiⁿ nguéeⁿ neⁿe sa chi daiya sa 'caandavaacu tá ti canéeⁿ ditiinú sa na staava yeⁿē sa chi nguéeⁿ neⁿe sa 'caandavaacu tá, tuu'mi ní cunee libre sa. Ní cuuvi diiⁿ sa chee chí neⁿē sa. Ní diiⁿ sa cuidado táⁿā daiya sa. Ní n'daacā idiiⁿ sa. ³⁸ Saⁿā chí ngaⁿa sa chí n'gūndivaacu tá, o saⁿā chí nguéeⁿ neⁿe sa chí 'caandavaacú tá, nduu 'uuví saⁿā miiⁿ din'daacá sa. Naati n'daacā ca idiiⁿ saⁿā chí nguéeⁿ neⁿe sa chí 'caandavaacú tá.

³⁹ N'daataá chí n'gíídívaacu tá canéeⁿ chí 'cuetinee tá ndúúⁿcū isaⁿā yeⁿē tá núúⁿmán neⁿe chí cándúúⁿ chí sá. Ndúúⁿ chí 'cuúvī saⁿā yeⁿe tá tuu'mi ní cuuvi 'caandavaacu tá ndúúⁿcū táámá saⁿā chí i'téenu sa Jesucristo. ⁴⁰ Úú inadacádiinúúⁿ chí n'daacā ca yeⁿē tá chí 'aa ntéé 'caandavaacu tá. Chuū chí ngaⁿá nguéeⁿ dámaāⁿ yeⁿe chí 'úú nadicádiinúúⁿ ti tan'dúúⁿcā chí neⁿe Espíritu N'dai yeⁿé Ndyuūs.

8

Yeⁿe yuūtē chí 'iiⁿyāⁿ cá'a yā yeⁿē nátaí yeⁿe ídolos

¹ Maaⁿ ní idinguúⁿ taama chí yeⁿe yuūtē yeⁿe 'iiti chí 'iiⁿyāⁿ 'caaⁿnúⁿ yā ní cá'a yā yuūtē miiⁿ yeⁿē nátaí cáávā ídolos. Deenu yú chí nducyaaca yú deenu yú 'tēe yeⁿe chuū. 'Iiⁿyāⁿ chí nadacádiinúúⁿ yā chí deenú cá yā cuuvi dich'eté maán yā 'iiⁿyāⁿ. 'Iiⁿyāⁿ chí neⁿé yā Ndyuūs ní neⁿé yā hermanos, 'iiⁿyāⁿ miiⁿ néⁿé yā chí tanáⁿā hermanos chí cuuvi déenu cá yā yeⁿe Ndyuūs. ² 'Iiⁿyāⁿ chí nadacádiinúúⁿ yā chí deenu yā nguéeⁿ tanducuéⁿē deenu yā tan'dúúⁿcā chí canéeⁿ chí cuuvi deenu yā. ³ Nduuti chí 'áámá 'iiⁿyāⁿ dinéⁿe yā Ndyuūs, tuu'mi ní Ndyuūs inaaⁿ yā 'iiⁿyāⁿ miiⁿ. ⁴ Maaⁿ ní 'úú neⁿé chí cadíinúúⁿ nī yeⁿe yuūtē chí 'iiⁿyāⁿ cá'a yā yeⁿe nátaí yeⁿe ídolos. Deenu yú chí ídolos nguéeⁿ cánduuchi. Deenu yú ti 'áámá n'dyáⁿā Ndyuūs chí vee yā ní nguéeⁿ ca táámá yā. ⁵ 'Iiⁿyāⁿ ngaⁿa yā chí nééné véé cá ídolos na yáⁿāa 'cūú nííⁿcú nanguuvi váá. Ní 'iiⁿyāⁿ ngaⁿá yā chí cosa s'eeⁿ ní dendyuūs s'eeⁿ. ⁶ S'uuúⁿ deenu yú chí véé 'áámá nuúⁿ Ndyuūs yeⁿē yú. Ndyuūs Chiida yú chí din'dái yā tanducuéⁿē dendu'ū. Ní Ndyuūs díⁿ yā chí cuuvi yeⁿé yā s'uuúⁿ. Véé 'áámá n'dyáⁿa 'iivú Ndyuūs yeⁿē yú chí Jesucristo. Ndyuūs Chiida yú ndúúⁿcū Jesucristo daiyá yā din'dái yā tanducueⁿē dendu'ū chí véé. Jesucristo yeⁿē yú tee yā vida yeⁿē yú cueⁿe daāⁿmaⁿ.

⁷ Nguéeⁿ nducyaaca 'iiⁿyāⁿ chí i'téenu yā Jesucristo deenú yā chí 'aama n'dyáⁿā Dendyuūs vee yā. Ndií maaⁿ ní náⁿa yā ní i'téenu yā chí canduuchi ídolos. Taachi 'iiⁿyāⁿ cá'a yā yuūtē yeⁿē nátaí yeⁿe ídolos, ní i'téenu yā chí ca'a yā yuūtē nátaí yeⁿé dendyuūs s'eeⁿ. Ní taachi 'iiⁿyāⁿ chí duu'ví deenú yā yeⁿe Ndyuūs che'é yā yuūtē yeⁿe nátaí s'eeⁿ, 'iiⁿyāⁿ miiⁿ nadacádiínuuⁿ yā chí véé nuūⁿndi yeⁿe yā. ⁸ Ndyuūs nguéeⁿ diiⁿ cuenta yā yeⁿē s'uuúⁿ nduuti chí nge'e yú yuūtē miiⁿ o nguéeⁿ. Nduuti chí nge'e yú yuūtē miiⁿ nguéeⁿ idiiⁿ chí n'daacā ca yú. Nduuti chí nguéeⁿ che'e yú nguéeⁿ idiiⁿ chí nguéeⁿ n'daacā ca yú. ⁹ Ndís'tií chí déenu nī chee chí Ndyuūs neⁿé yā chí diiⁿ nī, 'caandiveéⁿ nī. Nguéeⁿ diiⁿ nī dē'ē vee chí 'iiⁿyāⁿ chí duu'vī déenu yā yeⁿe Jesucristo cuuvi nacádiínuuⁿ yā chí vee nuuⁿndi yeⁿe yā. ¹⁰ Úú ngaⁿá ngī ndís'tií chí canee diituu cá nī chí i'téenu cá nī Ndyuūs. Deenú nī chí nguéeⁿ véé nuuⁿndi yeⁿe nī taachi chí snéé na mesa yeⁿe ní'vēē yeⁿe yaacū yeⁿe ídolos. Naati 'iiⁿyāⁿ chí duu'vī déenu yā yeⁿé Jesucristo cuuvi n'diichí yā ndís'tií, tuu'mi ní 'iiⁿyāⁿ miiⁿ chí nadacádiinúúⁿ yā chí ndís'tií 'tēe 'tēe i'téenu nī ídolos. 'Iiⁿyāⁿ miiⁿ cuuvi díⁿ yā tan'dúúⁿcā ndís'tií idíⁿ nī. Caⁿá yā che'é yā yuūtē miiⁿ ní díⁿ yā sentir chí véé nuuⁿndi yeⁿé yā. ¹¹ Áará chí cuuvi che'é nī yuuté 'cūú ní nguéeⁿ véé nuuⁿndi yeⁿé nī nguéeⁿ neⁿé nī chí hermanos chí duu'vī deenú yā yeⁿē Jesucristo díⁿ yā 'tíicā, caati nguēcúndí yā ní 'tēe 'tēe i'téenu yā ídolos. Ní 'tíicā idiiⁿ hermanos ní Cristo ch'ii yā na cruz ntúúⁿ caavá yā. ¹² Taachí díⁿ nī 'tuucā 'tíicā idinuuⁿndí nī contra Cristo nííⁿcú contra yeⁿe hermano chí duu'vī déenu yā yeⁿē Jesucristo. Caati hermanos miiⁿ 'tēe 'tēe i'téenu yā ídolos, ní véé nuuⁿndi yeⁿe yā. ¹³ Úú nacádiinúúⁿ yeⁿe chuū 'tíicā. Nduuti chí 'úú

che'é yuūtē miiⁿ, ni 'úú dííⁿ chi hermano chi duu'vī deenú yā yeⁿē Jesucristo che'é yā ní véé nuuⁿndí yā, tuu'mi ní 'āā ntéé che'é yuūtē miiⁿ.

9

Pablo ca'á yā orden ti 'áamá apóstol yeⁿé Jesucristo

¹ ¿'Áá nguéé 'úú Pablo 'áamá apóstol 'úú ní cuuvi dííⁿ nducueⁿē chi nguéé nuuⁿndí? ¿'Áá nguéé 'úú nnguaⁿāi 'úú? 'Úú n'diichí Señor Jesucristo yeⁿē yú. 'Úú candéé nduudu cuaacu yeⁿe Ndyuūs. Ni ndís'tiī i'téenu nī nduudu miiⁿ caavā ntiiⁿnyuⁿ yeⁿé. ² Nduuti chi tanáⁿa yā nguεε i'téenu yā chi 'úú apóstol 'úú, ndís'tiī i'téenu nī chi cuaacu. Ndís'tiī ní tan'dúúcā sello 'tiicá nī, ti i'téenu nī Señor Jesucristo. Ní deenú nī chi 'úú 'aama apóstol yeⁿe Señor Jesucristo. Ndís'tiī ní yeⁿe Jesucristo caavā chi 'úú candéé nduudu miiⁿ.

³ 'Iiⁿyāⁿ chi itínguuneeⁿ yā 'úú yeⁿē chi 'úú chi 'aama apóstol, 'túúcā nan' guεεcútaⁿ'á yeⁿe yā. ⁴ Nús'uu chi apóstoles ¿'áá nguéé tuneéⁿ 'nū chi ché'é 'nū ní cú'ú 'nū ndúúcū ndís'tiī na vaacu ní? ⁵ ¿'Áá nguéé tuneéⁿ 'nū chi 'áamá 'áamá 'nū candéé 'nū n'daataá yeⁿe 'nū taachi caⁿ'a 'nū cuaaⁿ cyúúni? 'Túúcā diīⁿ tanáⁿā apóstoles, ndúúcū hermanos chi yeⁿe Jesucristo, ndúúcū hermano Pedro. ⁶ Dámaāⁿ 'úú ndúúcū Bernabé dííⁿ 'nū ntiiⁿnyuⁿ cáavā chi ché'é 'nū. ⁷ ¿Du'ú soldado diiⁿ sa gastar tuumi caavā gastos yeⁿe sa taachi diiⁿ sa ntiiⁿnyuⁿ miiⁿ? ¿Du'ú saⁿā ngiichi sa dí'yú uvas ní 'áá nguéé cuuvi ché'é sá yeⁿē? ¿Du'ú 'iiⁿyāⁿ chi diiⁿ cuidado 'áamá taaⁿ 'iiti cuūchī ní 'áá nguéé cuuvi cu'ú yā leche yeⁿē 'iiti miiⁿ? ⁸ 'Úú nguéé ngaⁿ'á chuū tan'dúúcā chi ngaⁿ'a saⁿa chi ca'a orden. Ngaⁿ'á chuū, ti 'tíicā ngaⁿ'a ley yeⁿe Moisés miiⁿ. ⁹ Caneε nguūⁿ na libro yeⁿé Ndyuūs chi ley chi Moisés dinguúⁿ yā chi 'tíicā: Nguéé cu'nuúⁿ nī yaana duutú tī chi inde'ei nuúⁿ tī nguaaⁿ trigo chi nguéé cuuvi che'é tī: ¿'Áá ndεε cuidado Ndyuūs dámaāⁿ 'iiti? Nguéé 'túúcā. ¹⁰ Cáavā nús'uu, ní cuaacu níⁿnyuⁿ canéε nguūⁿ 'tíicā: 'Iiⁿyāⁿ chí di'cuūndú yā 'iiti ndúúcū 'iiⁿyāⁿ chi yiinenaáⁿ yā 'iiti chi inde'ei nuúⁿ tī nguaaⁿ trigo, 'iiⁿyāⁿ s'eeⁿ ní cunee ngiinú yā cosechā yeⁿe yā. ¹¹ Candéé 'nū nduudu yeⁿé Ndyuūs nguaaⁿ ndís'tiī taachi 'āā cuéé 'caandiveéⁿ nī nduudu miiⁿ. ¿'Áá nguéé tée nī nús'uu necesidades yeⁿé 'nū? ¹² Nduuti chi tanáⁿā apóstoles cuuvi cuta'á yā necesidades yeⁿé yā yeⁿe ndís'tiī, ¿'áá nguéé cuuvi cuta'á 'nu necesidades yeⁿé 'nū dendú'ū? Nguéé caaⁿ'máⁿ 'nū chi ndís'tiī tée nī necesidades yeⁿé 'nū naatí chi chéé 'nū nducueⁿē dendu'ū, caati 'iiⁿyāⁿ cuuvi cu'téenu yā nduudu yeⁿe 'iivú Ndyuūs. ¹³ ¿'Áá nguéé déenú ndís'tiī chuū ndii tiempo chi 'aa chó'ōo yeⁿe 'iiⁿyāⁿ chi diiⁿ ntiiⁿnyuⁿ yeⁿe yaacū templo? 'Iiⁿyāⁿ miiⁿ che'é yā comida yeⁿe yaacū. 'Tiicá ntúūⁿ, 'iiⁿyāⁿ chí dííⁿ yā ntiiⁿnyuⁿ yeⁿe nátai, 'iiⁿyāⁿ miiⁿ che'é ntúūⁿ yā chí véé nátai chí 'iiⁿyāⁿ ndéε yā ndaa yā nátai. ¹⁴ 'Tíicā ngaⁿ'a Señor 'iivú Ndyuūs yeⁿé 'iiⁿyāⁿ chí candéé yā nduudu yeⁿe evangelio chí nduudu ngai yeⁿé Jesucristo. 'Iiⁿyāⁿ miiⁿ 'cuεetinée yā ndúúcū 'iiⁿyāⁿ chí i'téenu yā Señor Jesucristo, ní ca'á yā 'iiⁿyāⁿ s'uuⁿ chí che'é yā. ¹⁵ 'Úú nguéé sta'á túumī yeⁿé nī, ní nguéé che'é de'ε vεε, ti téε túumī ndís'tiī. Nguéé dinguúⁿ chuū chí 'tíicā dííⁿ nī nduucú. N'dáácā ca yeⁿé chí 'cuūví ní mar 'áamá 'iiⁿyāⁿ nguéé cuuvi caaⁿ'maⁿ yā chí 'úú candéé ndúúdu cuaacu yeⁿe Dendyuūs cáavā chí nadí'vε yā 'úú.

¹⁶ 'Áará chí ngaⁿ'á evangelio chí ndúúdu ngai yeⁿé Jesucristo 'úú nguéé cuuvi caaⁿ'máⁿ chí 'úú chí ch'εεtε. Canéé chí caaⁿ'máⁿ yeⁿé evangelio, ti cáavā chuū chííⁿ chí Ndyuūs dicho'ó yā 'úú. Néené 'cuenú cuuvi nduuti chí nguéé caaⁿ'máⁿ yeⁿé evangelio. ¹⁷ Ndúúti chí caaⁿ'máⁿ yeⁿe evangelio ti dííⁿ buscar ntiiⁿnyuⁿ miiⁿ tuu'mi ní Ndyuūs nadí'vε yā 'úú, naati nguεε 'tíicā. Cáavā chuū canéé chí caaⁿ'máⁿ evangelio chí ndúúdu ngai yeⁿé Jesucristo. ¹⁸ ¿De'ε ndaacā yeⁿé 'úú? Nguéé de'ε vεε ndaacā yeⁿé. Cáavā 'úú nadí'vε yeⁿé chíiⁿ chí ngaⁿ'á ndúúdu ngai. 'Úú caaⁿ'máⁿ nduudu ngai yeⁿé Jesucristo ní yeenú taavi 'úú ti nguéé cutaⁿ'á dendú'ū yeⁿe nī. Nguéé caaⁿ'máⁿ chí ndís'tiī tee nī 'úú de'ε vεε cáavā ntiiⁿnyuⁿ yeⁿé 'aara chí cuaacu chí canéé chí dííⁿ nī.

¹⁹ N'daacā canéé 'tíicā. Nguéé du'ū vεε cuuvi caaⁿ'maⁿ ntiiⁿnyuⁿ yeⁿé, ti 'iiⁿyāⁿ nguéé nadí'vε yā 'úú. 'Úú dichí'vε nducyáácá 'iiⁿyāⁿ 'iicu cuuvi cu'téenu yā Jesucristo yeⁿé

yú. ²⁰ 'Áará chi maaⁿ nguéé costumbre yeⁿé chi idiíⁿ tan'dúúcā chi ngaⁿa ley yeⁿé Moisés, naati taachi caneé nguaaⁿ 'iiⁿ'yāⁿ hebreo s'eeⁿ chi diíⁿ yā tan'dúúcā chi ngaⁿa ley yeⁿé Moisés, 'tíicā idiíⁿ dendu'ū. Idiíⁿ 'tiicā ní 'iicu 'iiⁿ'yāⁿ hebreo s'eeⁿ cuuvi cu'téenu yā Jesucristo. ²¹ Taachi 'úú caneé ndúúcū 'iiⁿ'yāⁿ chi 'āā vi'i cā ley yeⁿé yā nguéé ti ley yeⁿé Moisés miiⁿ, 'úú idiíⁿ tan'dúúcā 'iiⁿ'yāⁿ s'eeⁿ. Naati nguéé idiíⁿ cosa chi Ndyuūs nguéé neⁿé yā chi 'úú diíⁿ. 'Tíicā idiíⁿ, ní 'íicú 'iiⁿ'yāⁿ miiⁿ cuuvi cu'téenu yā Jesucristo. ²² Taachi caneé nguaaⁿ 'iiⁿ'yāⁿ chi duūvā tuu'mi 'úú idiíⁿ tan'dúúcā 'aama chi duūvā, ní 'iicu cuuvi cu'téenu yā Jesucristo. Nduu cuaaⁿ naachi caⁿ'á 'úú idiíⁿ nducuéⁿé tan'dúúcā chi idiíⁿ 'iiⁿ'yāⁿ s'uuⁿ. Idiíⁿ 'tíicā ní 'iicu diíⁿ chí nanguáⁿ'ai náⁿ'a yā. ²³ 'Úú idiíⁿ tanducuéⁿé chuū chi 'úú cuuvi caaⁿ'máⁿ nduudu yeⁿe Ndyuūs nanááⁿ 'iiⁿ'yāⁿ. Ní cuuvi cuta'a yú cosa chi n'dai chi Ndyuūs téé yā s'uúúⁿ.

²⁴ ¿'Áá nguéé déenu ndís'tií yeⁿe 'iiⁿ'yāⁿ chi ngéenu yā na juego? Nducyaaca yā ngéenu yā na juego naati 'áámá núuⁿ yā chi diíⁿ yā ganar ní ndaaca regalo yeⁿe yā. Maaⁿ ní ndís'tií diíⁿ ní tan'duucā 'aama chi ngéenu yā ní diíⁿ ní ganar. 'Tíicā diíⁿ ní chiiⁿ chí Ndyuūs neⁿé yā, ní tunéé ndís'tií chi cuuvi yeⁿé ní chεε chí Ndyuūs téé yā ndís'tií. ²⁵ Ca'áámá ca'aama saⁿ'ā chi ngeēnū sa nguéé cuuvi diiⁿ sa nducuéⁿé chi neⁿe sa. Dámaāⁿ idiiⁿ sa cosas chi n'daācā caavā sa cucáāvā chi ditiinú sa. 'Tíicā idiiⁿ sa ní cuuvi ndaacā sa 'áámá corona yeⁿe naāndā chi ngo'o yéⁿé. S'uúúⁿ ní idiiⁿ cá yú tan'dúúcā chí Dendyuūs neⁿé yā chi diiⁿ yú, ní ndaaca yú 'áámá corona chi nguéé tuvií yeⁿé chí Dendyuūs téé yā s'uúúⁿ. ²⁶ 'Úú idiíⁿ ntiiⁿnyuⁿ yeⁿé Ndyuūs tan'dúúcā 'áámá chi ngeenu na juego ní diíⁿ yā ganar. 'Úú idiíⁿ ntiiⁿnyuⁿ díttū tan'dúúcā 'iiⁿ'yāⁿ chi nguⁿ'ú yā ndúúcū taamá yā, nguéé tan'duucā chi nguⁿ'ú yā ní ngéⁿé yā na 'yúúné. ²⁷ 'Úú idiíⁿ sufrir cáāvā ntiiⁿnyuⁿ yeⁿé Ndyuūs, ní diiⁿ n'dai cá ntiiⁿnyuⁿ miiⁿ. 'Tíicā idiíⁿ, ti nguéé neⁿé chi cuayiivi chí caaⁿ'máⁿ nduudu cuaacu miiⁿ, Ndyuūs cuuvi caaⁿ'máⁿ yā yeⁿe 'úú chi nguéé n'daacā diíⁿ ntiiⁿnyúⁿ yeⁿe yā.

10

Pablo ca'á yā consejo chi 'iiⁿ'yāⁿ nguéé canee chi i'teenú yā ídolos

¹ Ndís'tií hermanos yeⁿé, neⁿé chi ndís'tií nan'gáácú ní yeⁿe tiempo chí 'āā chó'ōo. 'Iiⁿ'yāⁿ hebreos diíⁿ yā seguir 'áámá meēⁿ chí ngíicá nanguuvi. Ndyuūs dicho'ó yā méééⁿ miiⁿ. Ní nducyaaca 'iiⁿ'yāⁿ n'diichí yā tíí cueⁿé méééⁿ miiⁿ. Ní ngíicá yā ní cho'ó yā naavtaⁿ'ā yíicú chí nuūⁿnīⁿ'yáⁿ'ā chí nguuvi Roja naachí Ndyuūs diíⁿ yā chí nduūvi cuuⁿmáⁿ 'áámá yáanū yeⁿé caavá yā. ² Nducyaaca 'iiⁿ'yāⁿ ní cueⁿé yā ndúúcū Moisés. Ní meééⁿ miiⁿ ch'iⁿ'ī yúúní 'iiⁿ'yāⁿ s'eeⁿ. Ní cho'ó yā naavtaⁿ'ā nuūⁿnīⁿ'yáⁿ'ā ndúúcū Moisés miiⁿ. Chuū ní tan'dúúcā chí Ndyuūs chεεdínūⁿ'niⁿ yā 'iiⁿ'yāⁿ s'eeⁿ ndúúcū Moisés miiⁿ. ³ Nducyáácá yā che'é yā pan chí Ndyuūs dicho'o. Ní pan miiⁿ chí chiicā ndii nanguuvi. ⁴ Ndyuūs ca'a yā 'iiⁿ'yāⁿ s'eeⁿ nuūⁿnīⁿ chí can'daā na tuūu, ní nducyáácá yā chí 'i yā nuūⁿnīⁿ miiⁿ. Ní tuūu miiⁿ ní tan'dúúcā chí Cristo miiⁿ, 'tíicā. Espíritu yeⁿé Cristo cueⁿé ndúúcu yā naachí cueⁿe yā. ⁵ Ndyuūs nguéé canee yiinú yā tan'dúúcā chí idiiⁿ n'deēe n'dai 'iiⁿ'yāⁿ ti nguéé ch'iindiveéⁿ yā yeⁿé Ndyuūs. Ní 'iiⁿ'yāⁿ s'eeⁿ ch'i yā cuaaⁿ naachi nguéé 'iiⁿ'yāⁿ na yáⁿ'āa cuūⁿmáⁿ.

⁶ Dendú'ū chuū chí chó'ōo ní 'íicú n'diichi yú, 'íicú s'uúúⁿ nguéé neⁿe yú yeⁿe dendú'ū chí nguéé n'daacā tan'dúúcā 'iiⁿ'yāⁿ s'eeⁿ chí idinéⁿe yā. ⁷ Cáāvā chuū nguéé idiiⁿ yú 'viicu cáāvā ídolos, tan'dúúcā chí idiiⁿ tanáⁿ'ā 'iiⁿ'yāⁿ tiempo chí 'āā chó'ōo. Canéé nguūⁿ ndii cuááⁿ vmaaaⁿ na libro yeⁿé Ndyuūs 'tíicā: 'Iiⁿ'yāⁿ s'eeⁿ diíⁿ yā 'viicu cáāvā ídolos, ní ch'εεté yā, ní che'e yā, ní chí'í yā ní ch'iinu chuū, ní nacueeⁿ yā, ní nde'ei yā. Cuayiivi ní saⁿ'a s'eeⁿ n'diichí yā n'daataa s'eeⁿ ní dinuuⁿndí yā. ⁸ Nguéé n'diichi yú 'áámá sáⁿ'ā o 'aama n'daataá taachí 'āā cuéé 'caandavaacu yú ndúúcu yā, tan'dúúcā chí idiiⁿ tanáⁿ'ā 'iiⁿ'yāⁿ s'eeⁿ. Ní cáāvā nuūⁿndi yeⁿé yā, na 'áámá nguuvi nūuⁿ n'diicu 'íínú mil 'iiⁿ'yāⁿ ch'i yā ná yáⁿ'āa cuūⁿmáⁿ naachi nguéé 'iiⁿ'yāⁿ. ⁹ Nguéé diiⁿ yú chí tuu'vī yú Ndyuūs, ti neⁿe yú n'diichí yú nduutī chí Ndyuūs diíⁿ yā castigar s'uúúⁿ tan'dúúcā chí Ndyuūs

diín yā ndúúcu tanáⁿā 'iiⁿyāⁿ. Ní Ndyuūs dichó'o yā cúu taaⁿ chí che'é tī 'iiⁿyāⁿ s'eeⁿ ní ch'ií yā. ¹⁰ Ní nguée caaⁿmaⁿ taaⁿ yú yeⁿe Ndyuūs tan'dúúcu chí diín tanáⁿā 'iiⁿyāⁿ s'eeⁿ. Cáávā chuū ní Ndyuūs dichó'o yā ángel yeⁿé yā ní ch'ií yā.

¹¹ Tiempo chí 'āā chó'ōo ndíí cuááⁿ vmnaaⁿ, chó'ōo tanducuéⁿē chuū ní canée nguūⁿ na libro yeⁿé Ndyuūs. Maaⁿ ní s'uūúⁿ cuuvi deenu yú yeⁿe 'iiⁿyāⁿ s'eeⁿ ní nguée diín yú tan'dúúcu chí diín yā. ¹² Cáávā chuū 'iiⁿyāⁿ chí nadacadiinúúⁿ yā chí i'teenu diítú yā Ndyuūs canee chí nadacadiinúúⁿ yā chεε chí diín yā, ní nguée 'cuūvá yā na nuuⁿndi. ¹³ Ndís'tií 'caandiveéⁿ nī yeⁿé. Mar 'áámá cosa chí nguée n'daacā nguée ndaā nanááⁿ ndís'tií nduuti chí nguée ndaā nanááⁿ tanáⁿa ca 'iiⁿyāⁿ. Ndyuūs ní n'dai ca yā ndúúcu ndís'tií, ní nguée 'cuúⁿ yā chí ndaā nanááⁿ ndís'tií dendu'ū chí nguεε cuuví cuchée nī. Taachi ndaā dendu'ū chí nguée n'daacā nanaaⁿ ndís'tií Ndyuūs teé yā fuerzas ndís'tií chí nguée diín nī dendu'ū chí nguée n'daacā. Ní 'íícu cuuví cuchée nī.

¹⁴ Cáávā chuū ndís'tií hermanos chí neⁿé taavi, diví nī yeⁿe nducyaaca ídolos. ¹⁵ 'Úú ngaⁿá ngii ndís'tií chí 'iiⁿyāⁿ chí deenu, ní ndís'tií cuuvi deenú nī yeⁿe chííⁿ chí ngaⁿá nduuti chí nduudu cuaacu o nguée. ¹⁶ Taachi diín yú 'viicu ní che'e yú Santa Cena yeⁿe Señor Jesucristo ní sta'a yú taza chí cu'u yú vino, tuu'mi ní caaⁿmaⁿ yú gracias Ndyuūs chí di'viicú yā vino miiⁿ. Diín yú chuū ti maaⁿ ní ch'iⁿi yú chí yeⁿé Cristo s'uūúⁿ. Ní véé vida yeⁿe yú cueⁿe daāⁿmaⁿ cucáávā yuūúⁿ yeⁿé Cristo chí n'geeⁿ. Pan yeⁿe Santa Cena chí n'dee yú, n'dee yú ti maaⁿ ní yeⁿé Cristo s'uūúⁿ. Ní cuerpo yeⁿe yā ca'nééⁿngá'āa na cruz cáávā s'uūúⁿ. ¹⁷ S'uūúⁿ ní 'yaaⁿ yú ní nducyaacu yú che'e yú yeⁿe 'áámá pan nūuⁿ. 'Tíicā s'uūúⁿ ní tan'dúúcu 'áámá cuerpo nūuⁿ ti yeⁿé Cristo s'uūúⁿ.

¹⁸ Cuin'diichí nī 'iiⁿyāⁿ yeⁿe ndaata Israel tiempo chí 'āā chó'ōo. 'Iiⁿyāⁿ s'eeⁿ 'caaⁿnúⁿ yā 'iiti ní tee yā yuūtē vmnaaⁿ nátaí yeⁿe Ndyuūs. Ní i'téenu yā 'iivú Ndyuūs yeⁿe yú. Cuayivi ní che'é yā yuūtē miiⁿ. 'Tíicā 'iiⁿyāⁿ ch'iⁿi chí yeⁿé Ndyuūs. ¹⁹ Neⁿé caāⁿmán yeⁿé yuūtē chí 'iiⁿyāⁿ che'é yā maaⁿ chí yeⁿe nátaí yeⁿe ídolos. Nguée véé poder yeⁿe ídolos. Nguée véé poder yeⁿe yuūtē miiⁿ. ²⁰ Chúú ní ngaⁿá. 'Iiⁿyāⁿ chí ch'iⁿiⁿúⁿ yā 'iiti s'eeⁿ ní tee yā yuūtē nátaí yeⁿe ídolos diín yā chuū cáávā yááⁿ'guinūuⁿ s'eeⁿ. Ní nguée diín yā cáávā 'iivú Ndyuūs. 'Úú nguée neⁿé chí che'é nī yuūtē miiⁿ yeⁿe nátaí miiⁿ, ní ndís'tií ní nguée caⁿá nī lado yeⁿe yááⁿ'guinūuⁿ. ²¹ Ndís'tií nguée cuuvi cu'ú nī vino yeⁿe taza ní yeⁿe chí véé na mesa yeⁿe Santa Cena yeⁿe Jesucristo nduuti chí cu'ú nī yeⁿe chí véé na mesa yeⁿe yááⁿ'guinūuⁿ. Nguée cuuvi yeⁿé Ndyuūs ndís'tií nduuti chí yeⁿé yááⁿ'guinūuⁿ ndís'tií. ²² ¿'Áá neⁿe ní 'cuuⁿmiⁿ nī 'iivú Ndyuūs chí ca'á nī lado yeⁿe yááⁿ'guinūuⁿ? ¿'Áá ditiinú cá ndís'tií nguée ti 'iivú Ndyuūs ti Ndyuūs nguée diín yā castigar ndís'tií?

Yeⁿe chí 'iiⁿyāⁿ cuuvi diín yā ti i'teenú yā Jesucristo ní canee yā ndúúcu vaadí neⁿe yeⁿé Ndyuūs

²³ Cuuvi diín yú tanducuéⁿe chí n'daacā, naati nguée diín yú cosa chí nguée n'daacā ti nguée véé nuuⁿndi yeⁿe yú. Nguée nducuéⁿe chí n'daacā chí diín yú nginnee s'uūúⁿ chí yeⁿe Cristo. Ní dendu'ū miiⁿ chí n'daacā, nguée n'daacā cá caavā s'uūúⁿ chí i'téenu yú 'iivú Ndyuūs. ²⁴ Mar 'áámá 'iiⁿyāⁿ chí yeⁿe Cristo damaáⁿ yā nadacadíinuuⁿ yā dendu'ū chí yeⁿe maáⁿ yā, naati nadacadíinuuⁿ ntúuⁿ yā yeⁿe chí neⁿe tanáⁿā 'iiⁿyāⁿ.

²⁵ Yúútē chí 'iiⁿyāⁿ in'diicuí yā ní'vēē cuuvi che'é nī. Ní nguée itíinguuneeⁿ nī yeⁿe yuūtē miiⁿ. 'Tíicā diín nī ní nguée dinuuⁿndí nī. ²⁶ Ní yáⁿāa ndúúcu nducuéⁿe chí véé vmnaaⁿ yeⁿe ní yeⁿe 'iivú Ndyuūs.

²⁷ Nduuti chí 'aama 'iiⁿyāⁿ chí nguée i'téenu yā Jesucristo diín yā invitar ndís'tií chí che'é nī ndúúcu yā, ní nduuti chí neⁿé nī tuu'mi ní caⁿá nī ndúúcu yā. Tanducuéⁿe chí cun'duú yā na mesa ní che'é nī. Nguée tiinguuneeⁿ nī dε'ε vεε yeⁿe chí che'é nī. 'Tíicā nguεε dinuuⁿndí nī. ²⁸ Nduuti chí 'áámá 'iiⁿyāⁿ ngaⁿa yā ngii yā ndís'tií chuu: Yúúte 'cūú ní canée vmnaaⁿ nátaí yeⁿe ídolos, tuu'mi ní nguée ché'e nī yuūtē miiⁿ. Ní nguée diín nī chí 'iiⁿyāⁿ miiⁿ cuuvi nadacadiinúúⁿ yā chí dinuuⁿndí nī. Ní yáⁿāa ndúúcu nducuéⁿe chí véé vmnaaⁿ yeⁿe ní yeⁿé 'iivú Ndyuūs. ²⁹ 'Úú ngaⁿá ngii ndís'tií chuū. Nguée che'é

nī yuūtē miiⁿ chi yeⁿē nátaī taachi 'iiⁿyāⁿ ngaⁿá yā chi che'é nī yuūtē miiⁿ, ti 'iiⁿyāⁿ nadacádiinúúⁿ yā chi véé nuuⁿndi yeⁿé nī taachi che'é nī yuūtē miiⁿ. 'Úú deenú chi cuuvi che'é yuūtē miiⁿ ní nguée idinuuⁿndí. 'Iiⁿyāⁿ chi duu'vī déenu yā yeⁿē Jesucristo nguée cuuvi ché'e yā. 'Túúcā yúúte 'cūū, ní dííⁿ yā juzgar cosa chi nguée ituneeⁿ yā. 'Úú deenú chi nguée véé poder yeⁿe ídolos. 'Úú caⁿá, gracias Ndyuūs caava yuūtē miiⁿ, ní che'é yuūtē miiⁿ.

³⁰ Ndúúti chi caⁿá, gracias Ndyuūs cáávā yuūtē chi che'é, ¿de'ē cuuvi chi cunncāā ngaⁿa yā yeⁿe 'úú yeⁿē chi che'é? ³¹ Dííⁿ nī tan'dúúcā chi ngaⁿá. Ní nduuti chi nge'e nī, o ngi'i nī, o yeⁿē táámá cosa chi dííⁿ nī, ndís'tií dííⁿ nī tanducuéⁿē cucáávā chi cuuvi dich'εεté n'dai nī Ndyuūs. ³² Nguée dííⁿ nī cosa chi 'iiⁿyāⁿ Israel s'eeⁿ o 'iiⁿyāⁿ s'eeⁿ chi nguée ndaata Israel, o 'iiⁿyāⁿ s'eeⁿ chi i'téenu yā Jesucristo yeⁿē yú cuuvi nadacadínnuⁿ yā chi véé nuuⁿndi yeⁿé nī. ³³ 'Āā tií nūuⁿ lugar taachi 'úú caneé, 'úú idiíⁿ tanducuéⁿē chi cunée yīinu 'iiⁿyāⁿ na lugar miiⁿ. Nguée idiíⁿ cosa chi neⁿé maán, ti dííⁿ tanducuéⁿē ní 'iicu cuuvi nanguáⁿai 'iiⁿyāⁿ.

11

¹ Ndís'tií ní dííⁿ nī tan'dúúcā chi 'úú idiíⁿ ti 'úú idiíⁿ tan'dúúcā chi Cristo chi'cueeⁿ yā 'úú.

Yeⁿē n'daata s'éeⁿ chí caⁿá yā yaācū

² 'Úú ngaⁿá n'daacā yeⁿe ndís'tií hermanos yeⁿé ti n'gaacú nī yeⁿe 'úú, ndúúcū tanducueⁿē dendu'ū. Ní dííⁿ nī tan'dúúcā chi 'úú ngi'cueeⁿ ndís'tií. ³ 'Úú neⁿé chi cadíínūūⁿ ndís'tií chi Cristo miiⁿ ní ngaⁿa ntiíⁿnyúⁿ yā yeⁿē nducyaaca saⁿā. 'Ícú saⁿā ní ngaⁿā ntiíⁿnyuⁿ sa yeⁿe n'daataá yéⁿe sa. 'Ícú Ndyuūs Chiida yú ngaⁿā ntiíⁿnyúⁿ yā yeⁿe Cristo miiⁿ. ⁴ Nducyáácá saⁿā chí ngaⁿángua'a sa o ngaⁿa sa nduudu yeⁿé Ndyuūs ndúúcū sndiíⁿ yeⁿē sa chi canúúⁿ tiíⁿ sa, ngíí 'cuinááⁿ sa. ⁵ Nducyáácá n'daataá chi ngaⁿángua'a tá o ngaⁿa tá nduudu yeⁿé Ndyuūs ní nguée ndεecu paño yeⁿe tá tiíⁿ tá, ngíí 'cuinááⁿ tá ti idiíⁿ tá tan'dúúcā chi ndíí tiíⁿ ta. ⁶ Ndúúti chi nguée ndεecu paño yeⁿe tá tiíⁿ tá tuu'mi ní cuū tá yuudū tiíⁿ tá. Nduuti chi 'aama n'dáátaá ngíí 'cuinááⁿ tá chi ndíí tiíⁿ tá, tuu'mi ní canée chi chεecu paño yeⁿe tá tiíⁿ tá. ⁷ Saⁿā ní nguée cánée chi caaⁿmaⁿ sa nduudu yeⁿé Ndyuūs ndúúcū sndiíⁿ yeⁿē sa chi canuuⁿ tiíⁿ sa, ti Ndyuūs din'dái yā saⁿā tan'dúúcā maán yā chi caaⁿmaⁿ ntiíⁿnyuⁿ sa, 'tíicā. Saⁿā s'uūuⁿ, saⁿā ní diíⁿ sa ntiíⁿnyuⁿ yeⁿe Ndyuūs. N'daataá nguée 'tíicā. Idiíⁿ tá chííⁿ chí ngaⁿa isaⁿā yeⁿe tá, ti saⁿā miiⁿ caaⁿmaⁿ ntiíⁿnyuⁿ sa yeⁿē n'daata miiⁿ. ⁸ Ti Ndyuūs nguée din'dái yā saⁿā yeⁿe n'daataá naati din'dái yā n'daataá yeⁿe sáⁿā. ⁹ Ti Ndyuūs nguée din'dái yā saⁿā chí dichíí'vē sa n'daataá, naati din'dái yā n'daataá chí dichíí'vē tá saⁿā. ¹⁰ N'daataá ní canée chi ndεecu paño yeⁿē tá tiíⁿ tá ti ch'iⁿi tá chi nguée caaⁿmaⁿ ntiíⁿnyuⁿ tá. 'Tiicá ntúūⁿ ángel s'eeⁿ ní chí canuúⁿ tiínuú náaⁿ yā taachí caneé yā nanááⁿ 'iivú Ndyuūs. ¹¹ Ndyuūs dííⁿ yā chí sáⁿā nguée canē sa dāmāⁿ sa, ndíí nguée n'daataá canē tá dámaāⁿ tá. Ndyuūs diíⁿ cuenta chí saⁿā ní n'daataá daama daamá yā nanaáⁿ yā ti Jesucristo ch'ií yā cucáávā nduu 'uuví 'iiⁿyāⁿ s'uuⁿ. ¹² Vmnaáⁿ vmnaaⁿ n'daata miiⁿ ní yeⁿe saⁿā. Maaⁿ ní saⁿā ch'iindiyáaⁿ sa yeⁿē n'daataá naati tanducuéⁿē dendu'ū ní yeⁿé 'iivú Ndyuūs.

¹³ ¿De'ē nadacadiinúúⁿ nī yeⁿe chuū? ¿'Áá n'daacā chí n'daata caaⁿmaⁿngua'a tá ndúúcū Ndyuūs 'aara chí nguée ndεecu paño yeⁿē tá tiíⁿ tá? ¹⁴ Nducyáácá 'iiⁿyāⁿ deenú yā chí saⁿā chí n'géeenūu yuudū tííⁿ sa ti 'cuinááⁿ sa. ¹⁵ Nduuti chí n'daata n'géeenūu tiíⁿ tá n'daacā yeⁿē tá. Ní yuudū tiíⁿ tá n'daacā chí in'díí tiíⁿ tá chí tan'dúúcā 'áámá paño. ¹⁶ Nduuti chí 'iiⁿyāⁿ neⁿe caaⁿmaⁿ taán yā yeⁿe chuū, 'úú nguée cuuvi caaⁿmaⁿ cá yeⁿē ti 'tíicā costumbre yeⁿē yú. 'Tiicá ntúūⁿ costumbre yeⁿe nducyaaca 'iiⁿyāⁿ chí i'téenu yā Jesucristo.

Cosas chí nguεε n'daacā idiíⁿ yā taachi che'é yā Santa Cena yeⁿē Señor Jesucristo

¹⁷ Maaⁿ ní 'úú idinguúⁿ yeⁿé ndís'tií ti nguée n'daacā dííⁿ nī. Taachi nduuvidaamaⁿ nī nguée n'daacā ca idiíⁿ nī ti cunncāā ca idiíⁿ nī. ¹⁸ 'Úú n'giindiveeⁿ chí ndís'tií nguée

daama vaadi cadiinuuⁿ yeⁿe nī taachi nduuvidaamá nī ná yaācū. Véé 'téé chi i'teenú chi cuaacu chi ch'iindiveéⁿ. ¹⁹ Canéé chi véé chi nduuvidaamá 'āā vi'í caā ndís'tiī chi i'téenu nī Jesucristo, ti cuuvi deenú nī cheé hermanos nguaaⁿ ndís'tiī chi 'áámá canee yā chí i'téenu cá yā. ²⁰ Taachi 'āā vi'í caā nduuvidaamá nī ní che'é nī Santa Cena yeⁿe Señor Jesucristo nguéé che'é nī Cena miiⁿ tan'dúúcā chi Jesucristo caⁿ'a ntiiⁿnyúⁿ yā. ²¹ Ndís'tiī nguéé canee ngíínú nī taachí ndaa nducyaaca hermanos naati ca'áámá ca'aamá nī diiⁿ núúⁿ yiinu nī ní caⁿ'á nī na yáacū ní che'é nī Cena yeⁿe nī. Ní taachi ndaa tiempo chi che'é nī Santa Cena náⁿ'a nī ní cuiicu nī. Tanáⁿ'a nī ní cuuⁿ'vi nī. ²² ¿Dé'ē chuū? ¿'Áá nguéé véé va'ai yeⁿe nī naachi cuuvi che'e nī ní cu'u nī? Nduuti chi nguéé neⁿ'é nī repartir Cena yeⁿ'é nī, ¿dé'ē cuuví chí candéé nī Cena yeⁿ'é nī chεeti yaācū? Nguéé n'daacā idiíⁿ nī taachi nduuvidaamá nī na yaācū yeⁿe 'iivú Ndyuūs. Dííⁿ nī cosa chi cuuvi 'cuináán 'iiⁿ'yāⁿ chi nguéé véé chi che'e yā. ¿Dé'ē neⁿ'é nī chi 'úú caaⁿ'máⁿ ndúúcū ndís'tiī yeⁿ'e chuū? ¿'Áá neⁿ'é nī chi 'úú caaⁿ'máⁿ ndúúcū ndís'tiī chi n'daacā idiíⁿ nī? Nguéé cuuvi caaⁿ'máⁿ 'tiicā.

Chuū historia yeⁿ'ē Santa Cena yeⁿ'e Señor Jesucristo

(Mt. 26.26-29; Mr. 14.22-25; Lc. 22.14-20)

²³ 'Iivú Señor Jesucristo chii yā 'úú chiiⁿ chi 'úú ca'cueéⁿ ndís'tiī. Nguinū miiⁿ chi 'āā cuéé nca'a Judas Iscariote miiⁿ Jesucristo chi ndíi yā preso na ta'á 'iiⁿ'ntyéⁿ'ē, Jesús miiⁿ ní sta'a yā pan. ²⁴ Ch'iinu Jesús nca'a gracias Ndyuūs cáávā pan miiⁿ, tuu'mi ní n'deé yā pan. Ní Jesús ní caⁿ'a yā chii yā discípulos yeⁿ'e yā: Ndís'tiī cuta'á nī ní che'e nī. Pan 'cūū chi 'úú n'deé tan'dúúcā cuerpo yeⁿ'é 'tíicā. Ní cuerpo yeⁿ'é ca'á chí n'deé cucáávā ndís'tiī. Nadiíⁿ nī chuū, ní taachi nache'é nī pan miiⁿ ní nan'gaacú nī yeⁿ'ē 'úú cueⁿ'e daāⁿmaⁿ. ²⁵ Cuayiivi chi che'é nī pan 'cūū Jesús sta'a ntúuⁿ yā taza chi s'néeⁿ vino ní ngaⁿ'a yā: Vino chεeti taza 'cūū ní tan'dúúcā yuuúⁿ yeⁿ'é 'tíicā. Ndúúcū yuuúⁿ yeⁿ'é idiíⁿ 'áámá compromiso chí ngai. Nadiíⁿ nī chuū ní taachi nangi'í nī vino miiⁿ nan'gáacú nī yeⁿ'ē 'úú cueⁿ'e daāⁿmaⁿ. ²⁶ Maaⁿ ní taachi che'é nī pan 'tíicā, ní cu'ú nī vino yeⁿ'e taza 'tíicā, tuu'mi ní ch'iⁿ'í nī 'iiⁿ'yāⁿ chi Jesucristo ch'iī yā caavā ndís'tiī. Nadiíⁿ nī Cena 'cūū ndii tiempo chi ndaa Jesucristo taama vmnéⁿ'ēe.

Yeⁿ'e táácā cuuvi che'e yú Santa Cena yeⁿ'e Señor Jesucristo

²⁷ 'Iiⁿ'yāⁿ chi nge'é yā pan yeⁿ'e Cena 'cūū ní ngi'í ntúuⁿ yā vino yeⁿ'e taza yeⁿ'e Santa Cena yeⁿ'ē Jesucristo, canéé chi canéé ndúúcū staaava yeⁿ'é yā δεενε nanáán Dendyuūs. Nduuti chi nguéé δεενε staaava yeⁿ'é yā nanáán Dendyuūs taachi che'é yā Cena miiⁿ, tuu'mi ní diiⁿ nuuⁿ'ndí yā contra cuerpo yeⁿ'e Señor Jesucristo ndúúcú yuuúⁿ yeⁿ'e yā dendu'ū, ti nguéé dííⁿ yā respetar Jesucristo. ²⁸ Caava chúū 'áámá 'áámá 'iiⁿ'yāⁿ chi neⁿ'é yā che'é yā yeⁿ'ē Santa Cena yeⁿ'ē Señor Jesucristo, canéé chi n'diichi maán yā ndúúti chí δεενε staaava yeⁿ'é yā nanáán Dendyuūs. Taachí δεενε staaava yeⁿ'é yā nanáán Dendyuūs tuu'mi ní cuuvi che'e yā pan yeⁿ'e Santa Cena yeⁿ'ē Señor Jesucristo, ní cu'ú yā vino yeⁿ'e taza yeⁿ'ē Cena 'cūū. ²⁹ 'Iiⁿ'yāⁿ chi nge'é yā ní ngi'í yā yeⁿ'e Cena yeⁿ'ē Señor Jesucristo ní nguéé nacádiinúúⁿ yā yeⁿ'e cuerpo yeⁿ'e Jesús chí ch'iī caava s'uúúⁿ, Dendyuūs dííⁿ yā castigar 'iiⁿ'yāⁿ miiⁿ. Véé nuuⁿ'ndi yeⁿ'é yā nanáán 'iivú Ndyuūs. Maán yā dinuuⁿ'ndí yā ní diiⁿ yā chí cuuví castigado yā. ³⁰ Cáávā chi dííⁿ nī 'túúcā, 'yaaⁿ n'dái ndís'tiī ní duuva nī, ní náⁿ'a nī ní ngííta nī, tanáⁿ'ā ní ch'iī nī nguaaⁿ ndís'tiī. ³¹ Ndúúti chi s'uúúⁿ n'diichi maaⁿ yú chi n'daacā canee yú nanáán Ndyuūs yeⁿ'ē yú, Ndyuūs nguéé dííⁿ yā castigar s'uúúⁿ. ³² Taachi 'iivú Ndyuūs n'diichí yā nuuⁿ'ndi yeⁿ'ē yú ní nguéé δεενε staaava yeⁿ'ē yú taachi che'e yú Santa Cena yeⁿ'ē Jesucristo, tuu'mi ní teé yā 'aama castigo s'uúúⁿ. Níicú nadacadíinuuⁿ yú yeⁿ'e nuuⁿ'ndi yeⁿ'e yú. Ní 'íicú nguéé canee yú condenado tan'dúúcā tanáⁿ'ā 'iiⁿ'yāⁿ yeⁿ'e iⁿ'yeeⁿ'dí 'cūū chi nguéé i'téenu yā 'iivú Ndyuūs.

³³ Maaⁿ ní ndís'tiī hermanos yeⁿ'é, taachi nduuvidaamá nī ní che'é nī Santa Cena yeⁿ'e Jesucristo 'cuεetinee ngiinú nī ti ndaā tanáⁿ'ā hermanos yeⁿ'é nī. ³⁴ Nduuti chi 'áámá 'iiⁿ'yāⁿ cuiicú yā, canéé chí ch'éé yā na vaacú yā. Tuu'mi ní nducyaaca nī nduuvidaama nī na yaācū ní che'é nī Santa Cena yeⁿ'e Señor Jesucristo. 'Tíicā cuuvi che'é nī pan ní ngi'í

nī vino ní dífn nī respetar Señor Jesucristo. Ní n'diichí Ndyuūs chi nguéeé vée nuuⁿndi yeⁿé nī. Tan'dúúcā tanáⁿā chi vée 'úú caaⁿmaⁿ yeⁿé taachi ndaá ní cuneé ndúúcu nī.

12

Yeⁿé nducuéⁿē chi Espíritu N'dai yeⁿé Ndyuūs tée yā s'uuúⁿ ti yeⁿé Señor Jesucristo

¹ Maaⁿ ní 'úú neⁿé idinguúⁿ yeⁿe chi nca'a Espíritu N'dai yeⁿé Ndyuūs s'uuúⁿ. Neⁿé chi cadínuuⁿ nī chuū. ² Ndís'tiī chi nguéeé 'iiⁿyāⁿ yeⁿe ndaata Israel ndís'tiī, ti taachi 'āā cuéeé i'teenú nī Señor Jesucristo dífn nī tan'dúúcā costumbre yeⁿé nī ní s'téenu nī ídolos chi nguéeé cuuvi caāⁿmaⁿ. ³ Neⁿé chi ndis'tiī cadiinúúⁿ nī chuū. 'iiⁿyāⁿ chi canee ndúúcu Espíritu N'dai yeⁿé Ndyuūs ní ngaⁿá yā nduudu cuaacu yeⁿé Dendyuūs, nguéeé cuuvi caaⁿmaⁿ yā contra yeⁿe Jesucristo. 'iiⁿyāⁿ chi ngaⁿá yā chi Jesucristo ní 'iivú Ndyuūs yeⁿe yā, ngaⁿa yā 'túúcā ti Espíritu N'dai yeⁿé Ndyuūs dífn yā chi 'túúcā chí ngaⁿa yā.

⁴ Espíritu N'dai yeⁿé Ndyuūs tee yā ntiiⁿnyuⁿ s'uuúⁿ chí 'āā vi'i caā ntiiⁿnyuⁿ yeⁿé 'áámá 'áámá s'uuúⁿ. Ní tee yā poder s'uuúⁿ chi cuuvi dífn yú ntiiⁿnyuⁿ miiⁿ chí 'āā vi'i caā. Niicu vée 'áámá n'dyáⁿā Espíritu N'dai yeⁿé Ndyuūs. ⁵ Idiīⁿ yú n'dee nán ntiiⁿnyuⁿ chi 'āā vi'i caā chi yeⁿe 'iivú Ndyuūs, naati nducyaaca ntiiⁿnyuⁿ miiⁿ ní yeⁿe 'áámá n'dyáⁿā 'iivú Ndyuūs. ⁶ N'dee nán ntiiⁿnyuⁿ yeⁿe Dendyuūs vée chí idiīⁿ yú ní Ndyuūs ngínnee yā 'áámá 'áámá s'uuúⁿ. ⁷ Ndyuūs tee yā Espíritu N'dai yeⁿé yā s'uuúⁿ ní Espíritu miiⁿ ngínnee s'uuúⁿ. Ní s'uuúⁿ cuuvi cunnee yú nducyaaca 'iiⁿyāⁿ chi i'téenu yā Señor Jesucristo chí 'iivi yú. ⁸ Espíritu N'dai miiⁿ ní cunnee tanáⁿā 'iiⁿyāⁿ chi ngaⁿa n'dáaca yā nduudu yeⁿé Ndyuūs. Espíritu N'dai yeⁿé Ndyuūs ngínnee naⁿa 'iiⁿyāⁿ chi cuuvi caaⁿmaⁿ yā ndúúcu vaadī deenú ca. Dámaāⁿ 'áámá n'dyáⁿā Espíritu N'dai miiⁿ dífn chuū. ⁹ Ní Espíritu N'dai miiⁿ ní ngínnee nducyaaca 'iiⁿyāⁿ chi i'téenu cá yā Dendyuūs. Ní Espíritu N'dai ngínnee náⁿā 'iiⁿyāⁿ ní ca'á poder miiⁿ 'iiⁿyāⁿ s'uuⁿ chí 'iiⁿyāⁿ s'uuⁿ cuuvi dífn yā chí nduūvā yeⁿé 'iiⁿyāⁿ chí ngiītā. ¹⁰ Espíritu N'dai miiⁿ ca'á naⁿa 'iiⁿyāⁿ chí idiīⁿ yā vaadī n'giinuú ní nga'a poder náⁿā 'iiⁿyāⁿ chí cuuvi candéé yā nduudu cuaacu yeⁿé Ndyuūs. Espíritu N'dai miiⁿ ní dífn chí náⁿā 'iiⁿyāⁿ cuuvi déenu yā chee 'iiⁿyāⁿ ngaⁿá yā caavā Espíritu N'dai yeⁿé Ndyuūs o cáávā espíritu yeⁿe yááⁿnguiinūⁿ. Ní Espíritu N'dai ca'a náⁿa yā poder chí caaⁿmaⁿ yā n'dee nán davaacu, ní náⁿa yā chí caⁿa yā chíⁿ chí neⁿe caāⁿmaⁿ nduudu miiⁿ. ¹¹ 'Áámá n'dyáⁿā Espíritu N'dai yeⁿé Ndyuūs tee yā poder 'áámá 'áámá s'uuúⁿ chí cuuvi dífn yú ntiiⁿnyuⁿ yeⁿé yā tan'dúúcā chí néⁿe yā.

S'uuúⁿ ní tan'dúúcā chí s'uuúⁿ ní 'áámá cuerpo nūⁿ s'uuúⁿ

¹² 'Tíicā vée 'áámá cuerpo yeⁿé yú ní néené n'dee nán chí vée yeⁿé. Ní ndúúcu n'dee nán chí vée yeⁿé, ni yeⁿé 'áámá cuerpo nūⁿ, 'túúcā. Cucáávā chí yeⁿe Jesucristo s'uuúⁿ, tuu'mi s'uuúⁿ ní tan'dúúcā chí s'uuúⁿ ní 'áámá cuerpo nūⁿ s'uuúⁿ. Ní cuerpo miiⁿ ní Jesucristo miiⁿ. ¹³ Ti cááva Espíritu N'dai yeⁿé Ndyuūs miiⁿ ngeēdinuūⁿnī yú ní maaⁿ ní s'uuúⁿ ní yeⁿé 'áámá cuerpo s'uuúⁿ. Nduuti chí 'iiⁿyāⁿ Israel chí judíos s'uuúⁿ, o 'iiⁿyāⁿ griegos s'uuúⁿ o 'iiⁿyāⁿ chí snéé caadi 'iiyu s'uuúⁿ, o 'iiⁿyāⁿ chí dífn ntiiⁿnyuⁿ cáávā maán yā s'uuúⁿ, nducyaaca s'uuúⁿ ní yeⁿé 'áámá Espíritu N'dai yeⁿé Dendyuūs.

¹⁴ 'Tíicā cuerpo yeⁿé yú, ní nguéeé 'áámá n'dyáⁿā nūⁿ ti 'yaaⁿ n'dái yeⁿé. ¹⁵ Ndúúti chí ca'a yú chí ngíí ngaⁿa ní miiⁿ ní caāⁿmaⁿ: Caati 'úú nguéeé 'áámá ta'á 'úú nguéeé yeⁿe cuerpo yeⁿe yú. ¿'Áá nadacadínuuⁿ nī chí cáávā chífn chí caⁿa ca'a yú, ní ca'a yú nguéeé yeⁿe cuerpo yeⁿe yú? Nguéeé 'tíicā. ¹⁶ Ndúúti chí veeⁿ yú chí ngíí ngaⁿa ní miiⁿ ní caāⁿmaⁿ: Caati 'úú ní nguéeé 'áámá nduutináⁿ 'úú nguéeé yeⁿe cuerpo yeⁿé yú. ¿'Áá nadacadínuuⁿ nī chí cáávā chífn chí caⁿa veeⁿ yú, ní veeⁿ yú nguéeé yeⁿé cuerpo yeⁿe yú? Nguéeé 'tíicā. ¹⁷ Nduuti chí nuuⁿmaⁿ cuerpo yeⁿé yú ní 'áámá nduutináⁿ yú tuu'mi ní ¿taacā cúúví caandiveeⁿ yú? Ní ndúúti chí nuuⁿmaⁿ cuerpo yeⁿé yú ní veeⁿ yú tuu'mi ní ¿taacā cuuvi 'táaⁿnuⁿ yú? ¹⁸ Dendyuūs s'néⁿ yā ca'áámá ca'áámá chí canee yeⁿé cuerpo yeⁿé yú na lugar naachi canee yiinú yā. ¹⁹ Nduuti chí cuerpo yeⁿé yú ní 'áámá

parte nūuⁿ ¿tií canéé nducuéⁿē cuerpo yeⁿē yú? ²⁰ 'Tíicā Dendyuūs din'dái yā 'áámá cuerpo yeⁿē yú chi n'dee n'áán chi vεε naati véé 'áámá cuerpo yeⁿē yú.

²¹ Nduuti chi nduutinaaⁿ yú chi ngíí ngaⁿ'a ní miiⁿ ní caāⁿ'maⁿ yeⁿ'e ta'ā yú 'tíicā: Dii ta'ā, nguéé dichíí'vē di. 'Tiicā ntúūⁿ tiíⁿ ra yú ni caaⁿ'maⁿ yeⁿ'ē ca'ā yú 'tiicā: Díí ca'á, nguéé dichíí'vē dii. Nguéé cuuvi 'tíicā. ²² Dendu'ū chi snée na cuerpo yeⁿ'e yú chi duūvā ni 'lííⁿ chi nguéé diiⁿ yú cuenta yeⁿ'ē, chííⁿ chi neené dichíí'vē s'uuúⁿ. ²³ Dendu'u chi yeⁿ'e cuerpo yeⁿ'ē yú chí nacadiinuuⁿ yú chi nguéé importante, chuū ní diiⁿ yú cuidado yeⁿ'ē tan'dúúccā chí ch'εεte ca. Dendu'ū yeⁿ'e cuerpo yeⁿ'e yú chi nguéé neⁿ'e yú chi 'iiⁿ'yāⁿ n'diichi yā chí n'díí yú ndúúccū catecai yú. ²⁴ Tanáⁿ'ā parte yeⁿ'e cuerpo yeⁿ'e yú 'āā n'daacā canee 'āā tiiní caā. Dendyuūs diíⁿ yā cuerpo yeⁿ'e yú ní dííⁿ yā chí cundεε ca yú cuidado yeⁿ'ē nducuéⁿē chí nadacādiinuuⁿ yú chi nguéé importante yeⁿ'e cuerpo yeⁿ'e yú. ²⁵ Chuū ní dííⁿ Dendyuūs chí nducuéⁿē parte yeⁿ'e cuerpo n'daacā diiⁿ n'tiiⁿnyūⁿ yeⁿ'ē cuerpo yeⁿ'e yú. Ní nducuéⁿē cuerpo yeⁿ'e yú diiⁿ yú cuidado 'áámá parte yeⁿ'ē yú ndúúccū táámá parte yeⁿ'e yú. ²⁶ Nduuti chí diiⁿ yú cuidado yeⁿ'e 'áámá dendú'ū nūuⁿ yeⁿ'e cuerpo yeⁿ'e yú ti diiⁿ sufrir, tuu'mi ní nuuⁿ'maⁿ ch'εεte cuerpo yeⁿ'e yú diiⁿ sufrir. Nduuti chí dich'εεté yā 'áámá dendu'ū yeⁿ'e cuerpo yeⁿ'ē yú tuu'mi ní núúⁿ'máⁿ cuerpo yeⁿ'e yú ní yeenú taavi.

²⁷ Chuū chí caaⁿ'máⁿ. Maaⁿ ní nducyaaca ndís'tií ní yeⁿ'e cuerpo yeⁿ'e Cristo Jesús. Ní ca'áámá ca'áámá nī véé parte yeⁿ'e cuerpo yeⁿ'e Cristo Jesús. ²⁸ Ndyuūs tee yā n'tiiⁿnyuⁿ ca'áámá ca'áámá s'uuúⁿ chí i'teenu yú Jesucristo. Vmnáán vmnaaⁿ ca'a yā n'tiiⁿnyuⁿ chí ch'εεte ca chí n'tiiⁿnyuⁿ yeⁿ'e apóstoles chí dichó'ó Dendyuūs. Cuayiivi ní tee yā tanáⁿ'ā yú n'tiiⁿnyuⁿ yeⁿ'e profetas chí ndεε yú nduudu yeⁿ'ē 'iivú Ndyuūs. Cuayiivi ní tee yā tanáⁿ'ā yú n'tiiⁿnyuⁿ chí maestros yeⁿ'e nduudu yeⁿ'é Ndyuūs. Ní tanáⁿ'ā yú Ndyuūs tee yā n'tiiⁿnyuⁿ s'uuúⁿ chí diiⁿ yú vaadī n'giinu. Tuu'mi ní tee yā tanáⁿ'ā yú n'tiiⁿnyuⁿ chí diiⁿ yú chí induūvā yeⁿ'e 'iiⁿ'yāⁿ. Tee yā tanáⁿ'ā yú n'tiiⁿnyuⁿ chí cunnee yú 'iiⁿ'yāⁿ. Tee yā tanáⁿ'ā yú n'tiiⁿnyuⁿ chí caaⁿ'maⁿ n'tiiⁿnyuⁿ yú yeⁿ'e 'iiⁿ'yāⁿ chí cunnee yā 'iiⁿ'yāⁿ chí dííⁿ yā n'tiiⁿnyuⁿ yeⁿ'e Ndyuūs. Ní teé yā n'tiiⁿnyuⁿ tanáⁿ'ā yú chí ngaⁿ'a yú n'dee 'náán davaacu. ²⁹ ¿'Áá nadacadíínuuⁿ nī chí nducyaaca yú apóstoles? ¿'Áá nadacadíínuuⁿ nī chí nducyaaca yú profetas chí ndεε nduudu yeⁿ'e 'iivú Ndyuūs? ¿'Áá nadacadíínuuⁿ nī chí nducyaaca yú maestros yeⁿ'ē nduudu yeⁿ'é Ndyuūs? ¿'Áá nducyaaca yú diiⁿ yú vaadī n'giinu? ³⁰ ¿'Áá nducyaaca yú cuuvi diiⁿ yú chí nduuvā yeⁿ'e 'iiⁿ'yāⁿ? ¿'Áá nducyaaca yú ngaⁿ'a yú n'dee 'naaⁿ davaacu? ¿'Áá nducyaaca yú cuuvi caaⁿ'maⁿ yú chí neⁿ'e caaⁿ'maⁿ táámá davaacu? Nguéé 'tíicā. ³¹ Canéé chí diiⁿ yú n'tiiⁿnyuⁿ yeⁿ'é Dendyuūs tan'dúúccā chí Dendyuūs neⁿ'é yā chí diiⁿ yú. Ní caavā s'uuúⁿ ní n'tiiⁿnyuⁿ miiⁿ ní n'daacā ca. Maaⁿ ní 'úú 'cuuⁿ'míⁿ ndís'tií táácā cuuvi chí diiⁿ yú chí más cā n'daacā ca.

13

Yeⁿ'e vaadī neⁿ'e chí ch'εεte n'daí

¹ Nduuti chí s'uuúⁿ caaⁿ'maⁿ yú tan'dúúccā chí ngaⁿ'a 'iiⁿ'yāⁿ chí deenu, o tan'duuccā chí ngaⁿ'a ángeles, ní nguéé neⁿ'e yú nducyaaca 'iiⁿ'yāⁿ, tuu'mi ní nduudu yeⁿ'e yú tan'duuccā 'áámá cūū 'lííⁿ chí n'gεεcu, o tan'dúúccā 'áámá cu'u lata chí di'cuεēcú yú. ² Ndúúti chí Ndyuūs tee yā n'tiiⁿnyuⁿ s'uuúⁿ chí cuuvi caaⁿ'maⁿ yú dendú'ū chí cuchii, ní nduuti chí cadíinuuⁿ yú nducuéⁿē chí yeⁿ'é Ndyuūs chí nguεε deenu tanáⁿ'a yā, ní nducuéⁿ'e vaadī deenu chí yeⁿ'ē iⁿ'yeeⁿdí 'cūū, ní nguéé neⁿ'e yú nducyaaca 'iiⁿ'yāⁿ, tuu'mi ní chiiⁿ chí diiⁿ yú nguéé dichíí'vē nanáán Dendyuūs. Ní nduuti chí i'teenu ca yú Dendyuūs chí cuuvi caaⁿ'maⁿ yú yeⁿ'ē 'áámá yiicū 'tíicā: N'dii yiicū, diví nī yeⁿ'ē 'muuⁿ, ní yiicū miiⁿ caⁿ'ā taama lado. Ní nduuti chí nguéé neⁿ'e yú nducyaaca 'iiⁿ'yāⁿ, tuu'mi ní chiiⁿ chí diiⁿ yú nguéé dichíí'vē nanáán Dendyuūs. ³ Ndúúti chí ca'a yú nducuéⁿē chí véé yeⁿ'e yú 'iiⁿ'yāⁿ chí nguéé yeⁿ'é yā, ní 'áará chí ca'a yú maaⁿ cuerpo yeⁿ'e yú chí 'iiⁿ'yāⁿ cuucú yā s'uuúⁿ cucáavā chí ngaⁿ'a yú nduudu cuaacu, ní nguéé neⁿ'e yú nducyaaca 'iiⁿ'yāⁿ, tuu'mi ní nguéé de'ε vεε chí diiⁿ yú chí dichíí'vē nanáán Dendyuūs.

⁴ Ndúúti chi s'uuúⁿ ní neⁿe yú nducyaaca 'iiⁿ'yāⁿ ní nguéeⁿ caaⁿ'maⁿ taaⁿ yú ndúúcu 'iiⁿ'yāⁿ ní cuchεε yú tanducuéⁿe tuu'mi ní neene n'dai yú. Ndúúti chi s'uuúⁿ neⁿe yú nducyaaca 'iiⁿ'yāⁿ ní nguéeⁿ ngueē yú chiiⁿ chi naaⁿ yú chi véé yeⁿe 'iiⁿ'yāⁿ. Ní nguéeⁿ nadacadíínuuⁿ yú chi ch'εεte n'dai yú. Ní nguéeⁿ maāⁿ yú caaⁿ'maⁿ yú chi ch'εεte n'dai maāⁿ yú. ⁵ Ndúúti chi s'uuúⁿ neⁿe yú nducyaaca 'iiⁿ'yāⁿ nguéeⁿ a fuerza diiⁿ yú dámaāⁿ chiiⁿ chi neⁿe yú. Ní nguéeⁿ nadacadíínuuⁿ yú dámaāⁿ yeⁿe maaⁿ yú, naati nginne yú 'iiⁿ'yāⁿ chi di'vaachi. Ní cuchεε yú taachí 'iiⁿ'yāⁿ s'eeⁿ dí'vaāchí yā s'uuúⁿ. Ní nguéeⁿ nadacadíínuuⁿ yú yeⁿe chi nguéeⁿ n'daacā. ⁶ Nduuti chi s'uuúⁿ neⁿe yú nducyaaca 'iiⁿ'yāⁿ nguéeⁿ yeenu yú taachi táámá 'iiⁿ'yāⁿ diiⁿ yā chi nguεε n'daacā, ti yeenu yú taachi 'iiⁿ'yāⁿ diiⁿ yā dendu'ū chi n'daacā. ⁷ Nduuti chi s'uuúⁿ neⁿe yú nducyaaca 'iiⁿ'yāⁿ tuu'mi ní cuchéeⁿ yú tanducuéⁿe dendu'ū chi chó'ōo ndúúcu yú. Ní nguéeⁿ i'teenu yú tanducuéⁿe dendu'ū chi n'giindiveeⁿ yú chí 'iiⁿ'yāⁿ ngaⁿ'a yeⁿe táámá 'iiⁿ'yāⁿ yeⁿe chi nguéeⁿ n'daacā idiíⁿ yā. Ní cunee yíínu yú nducuéⁿe chi n'daacā. Ní cuchéeⁿ yú yeⁿe tanducuéⁿe dendu'ū chi diitu n'dái taachí chó'ōo yeⁿe yú.

⁸ Nduuti chi s'uuúⁿ neⁿe yú nducyaaca 'iiⁿ'yāⁿ, tuu'mi ní 'áámá canee yú ndúúcu vaadi neⁿe yeⁿe Dendyuūs chi 'áámá cūneé ndúúcu yú. Ndaā tiempo chi profetas chi ngaⁿ'a nduudu yeⁿe Dendyuūs 'āā ntéeⁿ caaⁿ'maⁿ yā 'tiicā. Ní 'iiⁿ'yāⁿ chi ngaⁿ'a yā n'dee 'nááⁿ davaacu 'āā ntéeⁿ caaⁿ'máⁿ yā 'tíicā. Ní vaadi déenū ntúūⁿ chi 'iiⁿ'yāⁿ ngaⁿ'a ní cho'ōo yeⁿe. Dámaāⁿ canee vaadi neⁿe. ⁹ Maaⁿ ní caaⁿ'maⁿ yú nduudu yeⁿe Dendyuūs tan'dúúca chi n'giⁿ'í yā s'uuúⁿ naati Ndyuūs nguéeⁿ ch'iⁿ'í yā s'uuúⁿ vaadi déenū yeⁿe tanducuéⁿe. ¹⁰ Taachi chó'ōo tanducuéⁿe dendu'ū chi canéeⁿ chi cuchiiⁿ tuu'mi ní deenu yú nducuéⁿe, nguéeⁿ dámaāⁿ 'téé nūuⁿ.

¹¹ Taachí saⁿ'a 'líiⁿ 'úú, ngaⁿ'á tan'dúúca chi ngaⁿ'ā da'cáiyāa ní nadacádiinúúⁿ tan'duucā da'cáiyāa. Taachí chi ch'εεte 'úú 'āā ntéeⁿ diiⁿ tan'dúúca da'cáiyāa. ¹² Maaⁿ ní inaaⁿ yú tanducuéⁿe tan'dúúca chi inaaⁿ yú chεeti 'áámá espejo yaāⁿ yāāiⁿ, ní nguéeⁿ inaaⁿ yú n'daacā. Cuayivi miiⁿ ní n'diichi yú 'iivú Señor Jesucristo dánaaⁿ dánaaⁿ yú. Maaⁿ ní 'téé nuúⁿ deenu yú. Cuayivi miiⁿ ní snaaⁿ yú tan'dúúca 'iivu Señor Jesucristo n'diichi yā s'uuúⁿ. 'Tíicā snaaⁿ yú. ¹³ Ná vida yeⁿe s'uuúⁿ véé 'iinū chi n'daacā. Véé chi i'teenu yú Dendyuūs, ní véé chi canee ngiinu yú chi diiⁿ Dendyuūs ndúúcu yú, ní véé chi neⁿe yú Dendyuūs. Nduu 'iinú naaⁿ chuū ní chiiⁿ chi ch'εεte n'dai, ní chíiⁿ chi neⁿe yú 'iivú Dendyuūs ní neⁿe yú nducyaaca 'iiⁿ'yāⁿ.

14

Yeⁿe chi 'iiⁿ'yāⁿ ngaⁿ'a yā táámá davaacu

¹ Nducuéⁿe chi diiⁿ yú canéeⁿ chi diiⁿ yú chi n'daacā, ti neⁿe yú nducyaaca 'iiⁿ'yāⁿ. Véé ntiinⁿyuⁿ ch'εεte yeⁿe Ndyuūs. Ntiinⁿyuⁿ miiⁿ chuū chi vmnááⁿ vmnaaⁿ chi ndís'tiī cuuvi neⁿe ní chi diiⁿ ní. Chíiⁿ chí caaⁿ'máⁿ ní nduudu cuaacu chi Ndyuūs ch'iⁿ'í yā ndís'tiī. ² 'Áámá hermano yeⁿe yú chi ngaⁿ'a táámá davaacu chi n'dááⁿ chi nguéeⁿ deēnū yú, hermano miiⁿ nguéeⁿ ngaⁿ'a sa ndúúcu 'iiⁿ'yāⁿ ti ngaⁿ'a sa ndúúcu Ndyuūs. S'uuúⁿ nguεε n'giindiveeⁿ yú nduudu miiⁿ, naati Ndyuūs n'giindiveeⁿ yā, ní hermano miiⁿ ngaⁿ'a sa yeⁿe espíritu yeⁿe maaⁿ sa. ³ 'Iiⁿ'yāⁿ chi ngaⁿ'a yā nduudu yeⁿe Ndyuūs na veedi diiⁿ yā chi hermanos chi i'téenu cá yā Ndyuūs. Ní cá'cueeⁿ yā hermanos. Ní cá'a yā 'viich'εεtíinūⁿ hermanos. ⁴ 'Iiⁿ'yāⁿ chi ngaⁿ'á yā nduudu chi n'dááⁿ chi nguéeⁿ deenú tanáⁿ'ā 'iiⁿ'yāⁿ, 'iiⁿ'yāⁿ miiⁿ ngi'cueeⁿ maáⁿ yā. Ní 'iiⁿ'yāⁿ chi candéē nduudu yeⁿe Ndyuūs chí n'giindiveeⁿ tanáⁿ'a yā, 'iiⁿ'yāⁿ miiⁿ ngi'cueeⁿ yā tanáⁿ'a yā chi snúūⁿ yaācū.

⁵ Neⁿe chi nducyaaca ndís'tiī cuuvi caaⁿ'máⁿ ní tanáⁿ'ā davaacu chi n'dááⁿ naati n'daacā ca chi caaⁿ'máⁿ ní nduudu yeⁿe Ndyuūs na veedi ní n'giindiveeⁿ yā 'iiⁿ'yāⁿ. 'Iiⁿ'yāⁿ chi ngaⁿ'á yā tanáⁿ'a davaacu chi n'dááⁿ chi nguéeⁿ deenu yú, 'iiⁿ'yāⁿ s'eeⁿ nguéeⁿ ca'cueeⁿ yā s'uuúⁿ. Dámaāⁿ n'giindiveeⁿ yú nduuti chi táámá yā caaⁿ'máⁿ yā de'é neⁿe caaⁿ'maⁿ nduudu miiⁿ. ⁶ Ndís'tiī hermanos yeⁿe, ndúúti chi 'úú ndaá ní caaⁿ'máⁿ ndúúcu táámá davaacu chi n'dááⁿ chi nguéeⁿ n'giindiveeⁿ ní, ¿táácā cuuvi cuneeⁿ ndís'tiī? Naati nduuti chi caaⁿ'máⁿ na veedi tuu'mi ní cuuvi caaⁿ'máⁿ yeⁿe cosas chi cuchiiⁿ, o yeⁿe

nduudu cuaacu chí n'dai chí yeⁿ'é Ndyuūs. Tuu'mi ní cuuvi 'cuētinée nī tan'dúúcā chi ngaⁿ'á nduudu yeⁿ'é Ndyuūs, ní ca'cueéⁿ ndís'tiī.

⁷ Taachí 'iiⁿ'yāⁿ itii'ví yā 'áámá flauta, o tuu'ví yā 'áámá guitarra, ní nguéeⁿ n̄'daaⁿ tono chi itii'ví yā, o tuu'ví yā tuu'mi ní ζtáácā cuuvi deenú tanáⁿ'ā 'iiⁿ'yāⁿ de'ē música chi itii'ví yā o tuu'ví yā? ⁸ Nduuti chi 'áámá soldado itii'ví yā trompeta yeⁿ'e música yeⁿ'e caanda, ní nguē n̄'daáⁿ tono chi itii'ví yā, ζtáácā cuuvi deenú tanáⁿ'ā soldados ní cuundiyaáⁿ yā chi 'āā ndaá caandaá? ⁹ 'Tiicá ntúūⁿ. Nduuti chi ndís'tiī ní caaⁿ'maⁿ nī ndúúcū nduudu chi nguéeⁿ deenu tanáⁿ'a yā ζtáácā tuumicadiinúúⁿ yā chi ngaⁿ'á nī? Ndís'tiī ní diíⁿ nī tan'dúúcā chi ngaⁿ'á nī na 'yúúné. ¹⁰ Nééné n'dee 'nááⁿ davaacu véé iⁿ'yeeⁿdí 'cūū. Ní 'iiⁿ'yāⁿ cuuvi caaⁿ'máⁿ yā maaⁿ na nduudu yeⁿ'e yā nducueⁿ'ē chi neⁿ'é yā ní tanáⁿ'ā 'iiⁿ'yāⁿ s'eeⁿ 'caandiveéⁿ yā nduudu yeⁿ'e yā. ¹¹ Nduuti chi 'úú nguē n'giindiveéⁿ nduudu yeⁿ'e tanáⁿ'a 'iiⁿ'yāⁿ tuu'mi ní 'iiⁿ'yāⁿ miiⁿ canée yā tan'dúúcā 'áámá 'iiⁿ'yāⁿ chi canúúⁿ yúúní. 'Tíica ntúūⁿ, 'úú ní canee tan'dúúcā 'áámá 'iiⁿ'yāⁿ chi canúúⁿ yúúní ti nguéeⁿ n'giindiveéⁿ yā nduudu yeⁿ'é. ¹² Ndís'tiī chi neⁿ'é nī diíⁿ nī ntiiⁿ'nyuⁿ ch'εεε yeⁿ'é Ndyuūs, ngiicá nī Espíritu N'dai yeⁿ'é Ndyuūs chi téé yā ntiiⁿ'nyuⁿ ndís'tiī, ntiiⁿ'nyuⁿ chi cuuví ca'cueéⁿ nī nduudu yeⁿ'é Ndyuūs 'iiⁿ'yāⁿ. Ní 'íicú 'iiⁿ'yāⁿ cuuvi déenu ca yā yeⁿ'e Ndyuūs.

¹³ 'Iiⁿ'yāⁿ mííⁿ chi caaⁿ'maⁿ yā táámá davaacu chi n̄'dááⁿ caneeⁿ chi ngiicá yā Ndyuūs de'ε chi neⁿ'é caaⁿ'maⁿ nduudu chí caⁿ'a yā. Ní cuuvi caaⁿ'máⁿ yā tanáⁿ'a yā nduudú miiⁿ. ¹⁴ Nduuti chi 'úú caaⁿ'máⁿngua'á ndúúcū táámá davaacu chi n̄'dááⁿ ní nguéeⁿ deenú chííⁿ chí caaⁿ'máⁿ tuu'mi ní dámaāⁿ espíritu yeⁿ'é caāⁿ'maⁿ. Ní 'úú ní nguéeⁿ tuumicadiinúúⁿ dé'ē vee chi caaⁿ'máⁿ. ¹⁵ ζDe'ē diíⁿ tuu'mi? Caaⁿ'maⁿngua'á ndúúcū nduudu na veedi ní espíritu yeⁿ'é ní túúmícadíinúúⁿ chííⁿ chi diíⁿ. Ní caatá ndúúcū nduudu na veedi ní espíritu yeⁿ'é ní túúmícadíinúúⁿ chííⁿ chi caatá dendu'ū. ¹⁶ Ndúúti chi ndís'tiī caaⁿ'maⁿngua'á nī ndúúcū táámá davaacu chi n̄'dááⁿ ní ngaⁿ'á nī 'tíicā: N'dií Ndyuūs, gracias, ní diíⁿ nī ndúúcū espíritu yeⁿ'é nī, tuu'mi ní ζtáácā cuuvi caaⁿ'maⁿ tanáⁿ'a yā chí 'tíicā chiiⁿ chí ngaⁿ'a nī? ¹⁷ 'Áará chí n'daacā ngaⁿ'a nī, nguéeⁿ cunnee nī 'iiⁿ'yāⁿ chí caⁿ'á yā yaacū. ¹⁸ 'Úú Pablo nca'á gracias Ndyuūs yeⁿ'e yú chí ngaⁿ'á cá n'dee 'nááⁿ davaacu chí n̄'dááⁿ ndúúcū espíritu yeⁿ'é nguē ti ndís'tiī. ¹⁹ Taachí ngaⁿ'á na yaacū n'daacā ca chí caaⁿ'máⁿ nyuⁿ'u nduudu na veedi chí 'úú cadíinúúⁿ ní 'iicu ca'cueéⁿ tanáⁿ'a yā, ti 'úú ngaⁿ'á ta ndiichi mil nduudu táámá naaⁿ davaacu chí n̄'dááⁿ chí nguéeⁿ itúúmícadíinuuⁿ tanáⁿ'a yā.

²⁰ Ndís'tiī hermanos yeⁿ'é, nguéeⁿ nadacadíinuuⁿ nī tan'dúúcā dá'caiyaā, o tan'dúúcā 'áámá da'cuá'āa chí nguéeⁿ inadacadíinuuⁿ yā yeⁿ'é nuuⁿ'ndi yeⁿ'e yā 'tíicā nī. Maaⁿ ní nducueⁿ'ē chí diíⁿ nī ní nadacadíinuuⁿ nī yeⁿ'é tan'dúúcā saⁿ'ā n'gεεε nadacadíinuuⁿ sa. ²¹ Caneeⁿ nguūⁿ na libro yeⁿ'é Ndyuūs ndii cuááⁿ vmnaaⁿ 'tíicā: 'Úú chí 'iivú Ndyuūs ngaⁿ'á chuū. 'Úú dicho'ó 'iiⁿ'yāⁿ chí canúúⁿ yúúní chí ngaⁿ'á yā nduudu cuaacu yeⁿ'é ndúúcū táámá naaⁿ davaacu. Ndaa yā nanááⁿ 'iiⁿ'yāⁿ s'eeⁿ ní 'iiⁿ'yāⁿ s'eeⁿ nguéeⁿ neⁿ'é yā 'caandiveéⁿ yā nduudu yeⁿ'é. 'Tíicā ngaⁿ'a Ndyuūs. ²² Cáávā chiiⁿ ní Ndyuūs ca'á yā poder 'iiⁿ'yāⁿ chí caaⁿ'máⁿ yā n'dee 'naaⁿ davaacu chí 'iiⁿ'yāⁿ nguéeⁿ tuumicadíinuuⁿ yā. Ní chííⁿ chí n'giⁿ'i Ndyuūs ní 'aama seña chí poder yeⁿ'e yā cááva 'iiⁿ'yāⁿ chí nguéeⁿ i'téenu yā Ndyuūs. Nguéeⁿ caavā s'uuúⁿ chí i'téenu yú. 'Iiⁿ'yāⁿ chí ca'cueéⁿ yā nduudu yeⁿ'é Ndyuūs ní ngaⁿ'a yā cáávā s'uuúⁿ chí i'teenu yú nguéeⁿ ti cáávā 'iiⁿ'yāⁿ chí nguéeⁿ i'téenu yā Dendyuūs yeⁿ'é yú. ²³ Ndúúti chí 'iiⁿ'yāⁿ chí nguéeⁿ i'téenu yā 'iivú Ndyuūs, o 'iiⁿ'yāⁿ chí canúúⁿ yúúní, ndaa yā na yáacū ní nduuvídaamá yā ndúúcu yú ní nducyaaca yú ngaⁿ'a yú davaacu chí n̄'dááⁿ. ζ'Áá nguéeⁿ caaⁿ'máⁿ yā chí s'uuúⁿ ní loco yú? ²⁴ Ndúúti chí nducyaaca nī ca'cueéⁿ nī nduudu yeⁿ'é Ndyuūs na veedi ní ndaa 'áámá 'iiⁿ'yāⁿ chεeti yaacū, 'iiⁿ'yāⁿ chí nguéeⁿ i'téenu yā 'iivú Ndyuūs o nguéeⁿ déenu yā 'iivú Ndyuūs yeⁿ'é yú, tuu'mi ní 'iiⁿ'yāⁿ miiⁿ cuuvi diíⁿ yā sentir nuuⁿ'ndi yeⁿ'é yā. Ní nadacadíinúúⁿ yā yeⁿ'é nuuⁿ'ndi yeⁿ'é yā na staava yeⁿ'é yā. ²⁵ 'Iiⁿ'yāⁿ miiⁿ ní cuuvi deenú yā de'ē chí maáⁿ yā nadacadíinúúⁿ yā na staava yeⁿ'e yā chí nguē cuuvi n'diichí yā. Ní 'iiⁿ'yāⁿ miiⁿ

cundiitín'díi yā ní cu'téenu yā Ndyuūs. Ní ngaⁿ'á yā 'tiicā: Cuaacu níⁿ'nyúⁿ Ndyuūs canee yā ndúúcū ndís'tií.

Diiⁿ n'daacá nī tanducuéⁿe ndúúcū orden

²⁶ Ndís'tií ní 'tíicā díiⁿ nī taachi nduuvídaámá nī. Naⁿ'a ndís'tií ní candéε nī 'aama canción. Ní naⁿ'a nī ch'eeⁿnee listo nī chi ca'cueéⁿ nī tanáⁿ'a yā. Naⁿ'á nī ní ch'eeⁿnee listo nī chi caaⁿ'máⁿ nī 'áámá nduudu cuaacu yeⁿ'é Ndyuūs. Naⁿ'á nī ní caaⁿ'máⁿ nī táámá naaⁿ davaacu chí ñ'dááⁿ naati n'nuúⁿ nī vmnaaⁿ vmnaaⁿ 'áámá hermano chí cuuvi caaⁿ'máⁿ de'ē chí neⁿ'e caaⁿ'maⁿ nduudu s'eeⁿ chí ñ'dááⁿ. 'Tíicā cuuvi, ní cu'téenu cá nī yeⁿ'ē 'iivú Ndyuūs. ²⁷ Damaāⁿ 'uuví o 'iinú nī 'aama 'aamá nī caaⁿ'máⁿ nī ndúúcū naaⁿ davaacu, nduudú chí ñ'dááⁿ, naatí táámá nī ch'eeⁿnee listo chí caaⁿ'máⁿ nī de'ē neⁿ'é caaⁿ'māⁿ nduudu s'eeⁿ chí ñ'dááⁿ. ²⁸ Nduuti chí nguéeⁿ véé 'áámá yā nguaaⁿ ndís'tií chí cuuvi caaⁿ'maⁿ de'ε neⁿ'e caaⁿ'māⁿ nduudu s'eeⁿ chí ñ'dááⁿ tuu'mi 'iin'yāⁿ nguéeⁿ cuuvi caaⁿ'máⁿ yā ndúúcū davaacu chí ñ'dááⁿ naachi nduuvídaamá nī. Naati 'iin'yāⁿ miiⁿ cuuvi ndeé yā cúūnū cúūnū ndúúcū Dendyuūs ndúúcū davaacu chí ñ'dááⁿ. ²⁹ Taachí nduuvídaamá nī, 'uuví nī o 'iinū nī candéε nī nduudu cuaacu yeⁿ'é Ndyuūs ní ca'aama ca'aama nī caaⁿ'máⁿ nī nduudu na veedi ní tanaⁿ'á yā nadacadíínuuⁿ yā yeⁿ'e nduudu chí ngaⁿ'a nī. ³⁰ Ní nduuti Ndyuūs ní n'giⁿ'i yā 'áámá ndís'tií chí véε nī 'áámá nduudu yeⁿ'é yā chí caaⁿ'máⁿ nī, tuu'mi ní 'iin'yāⁿ chí candéε yā nduudu miiⁿ canee chí téε yā lugar chí caaⁿ'máⁿ nī nduudu yeⁿ'é Ndyuūs. ³¹ 'Tíicā nducyaaca nī cuuvi caaⁿ'máⁿ nī nduudu yeⁿ'é Ndyuūs ca'áámá ca'áámá nī. Tanáⁿ'a nī n'giindiveéⁿ nī. Ní 'tíicā ní cuuvi déenu cá nī yeⁿ'é Ndyuūs ní cu'téenu cá nī yeⁿ'é yā. ³² 'iin'yāⁿ chí caaⁿ'máⁿ yā nduudu yeⁿ'é Ndyuūs deenu yā de'ε tiempo chí caaⁿ'máⁿ yā. ³³ Ndyuūs neⁿ'é yā chí véé orden cheeti yáacū yeⁿ'é yā ní véé vaadí 'diiⁿ. 'Tíicā ní ch'eeⁿnee 'diiⁿ nī dendu'ū na staava yeⁿ'é nī. 'Tíicā cānee tanducuéⁿē yaacū yeⁿ'é Ndyuūs. ³⁴ Taachi nduuvídaámá nī n'daataá nguéeⁿ cuuvi candéε tá nduudu yeⁿ'e Dendyuūs, naati 'diiⁿ 'diiⁿ nūⁿ 'cuεtinéé cheendí tá. 'Tíicā canee nguūⁿ na ley yeⁿ'é Ndyuūs. ³⁵ Nduuti chí 'áámá n'daataá nguéeⁿ tuumicadíínuuⁿ tá yeⁿ'e nducuéⁿē chí ngaⁿ'a yā cheeti yaacū, tuu'mi taachi ndaa tá ná vaacu tá cuuvi ní tínguuneeⁿ ta isaⁿ'ā yeⁿ'e tá. Nduuti chí 'ááma n'daataá candéε tá nduudu yeⁿ'é Ndyuūs cheeti yaacū, tuu'mi 'cuináⁿ tá.

³⁶ ¿'Áá nguéeⁿ neⁿ'é nī 'caandiveéⁿ nī chí dinguúⁿ yeⁿ'e nī? ¿D'É'ε ra tuu'mi? ¿'Áá yeⁿ'e ndís'tií nduudu yeⁿ'e Ndyuūs o ndaā dāmáāⁿ nanááⁿ ndís'tií nduudu miiⁿ? ³⁷ Nduuti chí 'áámá saⁿ'ā nguaaⁿ ndís'tií nadacadíínuuⁿ sa chí cuaacu chí ntiiⁿ'nyuⁿ yeⁿ'ē sa chiiⁿ chí caaⁿ'maⁿ sa nduudu cuaacu yeⁿ'é Ndyuūs, ní Espíritu N'dai yeⁿ'é Ndyuūs ca'cueéⁿ yā saⁿ'a miiⁿ, tuu'mi ní cuuvi deenu sa chíⁿ chí idinguúⁿ tan'dúúcā chí Ndyuūs ch'iⁿ'í yā 'úú. ³⁸ Nduuti chí saⁿ'ā miiⁿ nguéeⁿ 'caandiveeⁿ sa nduudu yeⁿ'é, tuu'mi ní ndís'tií nguéeⁿ 'caandiveeⁿ nī nduudu yeⁿ'ē sa.

³⁹ 'Tíicā díiⁿ nī, ndís'tií hermanos yeⁿ'é. Caaⁿ'máⁿ nī nduudu cuaacu ní ca'á nī lugar chí 'iin'yāⁿ caaⁿ'máⁿ yā táámá davaacu chí ñ'dááⁿ. ⁴⁰ Diiⁿ n'daacá nī tanducuéⁿē ndúúcū orden.

15

Jesucristo 'āā nnduuchi yā yeⁿ'ē nguaaⁿ tináⁿ'ā

¹ Ndís'tií hermanos yeⁿ'é, maaⁿ ní chuū ngaⁿ'a cuaacú ngí ndís'tií nduudu yeⁿ'e evangelio chí ndúúdú ngai yeⁿ'ē Jesucristo. Chííⁿ 'āā ngaⁿ'á, ní ngi'cueéⁿ ndís'tií. Ní ndís'tií ní n'giindiveéⁿ nī ní s'téenu nī. Ní 'aama canee n'daacá nī ná nduudu 'cūū. ² Cáāvā nduudu cuaacu yeⁿ'é Dendyuūs ndís'tií ní nnguáⁿ'ai nī yeⁿ'é nuuⁿ'ndi yeⁿ'é nī nduuti chí 'áámá cānee na staava yeⁿ'é nī chíⁿ chí ca'cueéⁿ ndís'tií. Nduuti chí ndís'tií nguéeⁿ i'teenú nī nguéeⁿ dichíⁿ'vē nduudu miiⁿ cáāvā ndís'tií.

³ Vmnááⁿ vmnaaⁿ ní chí'cueéⁿ ndís'tií cheε chí más ca importante tan'dúúcā chí Cristo chí'cueéⁿ yā 'úú. Chuū chiiⁿ chí Cristo ní ch'ií yā cáāvā nuuⁿ'ndi yeⁿ'ē yú tan'dúúcā chí canee nguūⁿ ndii cuááⁿ vmnaaⁿ na libro yeⁿ'é Ndyuūs. ⁴ 'iin'yāⁿ ní ch'iichi yā Cristo ní cho'ōo ndii 'íinú nguuví ní Dendyuūs nadin'duuchí yā Cristo yeⁿ'e nguaaⁿ tináⁿ'ā

tan'dúucā chi canéé nguūⁿ na libro yeⁿ'é Dendyuūs. ⁵ Cuayiivi chi Cristo nduuchi yā yeⁿ'e nguaaⁿ tináⁿ'ā saⁿ'ā Pedro n'diichi sá Cristo. Cuayiivi chi cho'ōo chuū ní ndichuuvu apóstoles n'diichi yā Cristo. ⁶ Cuayiivi miiⁿ ní 'áámá tiempo nūuⁿ nyuⁿ'u ciento hermanos nduuvidaamá yā ní n'diichi yā Cristo chi 'āā nduuchi yā yeⁿ'ē nguaaⁿ tináⁿ'ā. N'dee cá yā yeⁿ'e nyuⁿ'u ciento hermanos sндуuchí yā ndíí maaⁿ, naati duu'ví yā n'díi yā. ⁷ Cuayiivi miiⁿ ní Jacobo, apóstol chi ndēē nduudu yeⁿ'é Dendyuūs n'diichi ntúuⁿ yā Cristo. Ní cuayiivi ní nducyaaca apóstoles n'diichi yā Cristo.

⁸ Cho'ōo 'yááⁿ n'dai nguuvu ni 'úú, Pablo, n'diichi ntuúⁿ Cristo, 'áará chí 'úú nguéé intiinaáⁿ Cristo taachi cánéé yā iⁿ'yeeⁿ'dí 'cūū. ⁹ 'Úú, Pablo, nacadiinúúⁿ chi 'úú nguéé n'daacā 'úú, tan'dúucā yeⁿ'e tanáⁿ'ā apóstoles chi candéé yā nduudu yeⁿ'é Ndyuūs. 'Úú nguéé canéé chi cuuví apóstol ti vmnááⁿ vmnaaⁿ can'daá 'iiⁿ'yāⁿ yeⁿ'e yaācū yeⁿ'é Dendyuūs, ti neⁿ'é chi 'iiⁿ'ntyéⁿ'ē ca'á yā orden chi 'caaⁿ'núⁿ yā 'iiⁿ'yāⁿ chi naⁿ'á yā yaacū yeⁿ'é Ndyuūs. ¹⁰ Maaⁿ ní 'úú 'aama apóstol 'úú ti Ndyuūs dííⁿ yā n'daacā n'dai nduucú. Caati Ndyuūs dííⁿ yā n'daacā n'dai nduucú maaⁿ ní 'úú idiíⁿ ntiiⁿ'nyuⁿ yeⁿ'é yā. Ní chííⁿ chi Ndyuūs dííⁿ yā nduucú dichíí'vē. Nguéé dámaāⁿ 'úú chi diiⁿ ca ntiiⁿ'nyuⁿ yeⁿ'é yā ti Ndyuūs. Ndyuūs chi dííⁿ yā n'daacā n'dai nduucú ní canéé yā nduucú ní nginneé yā 'úú. ¹¹ Nguéé de'ē vee ndii nduuti chi 'úú o náⁿ'a yā chi candéé nduudu yeⁿ'é Ndyuūs, tí nús'úū ngaⁿ'a 'nū nduudu miiⁿ. Ní ndís'tii ní i'téenu nī nduudu miiⁿ.

'Iiⁿ'yāⁿ caⁿ'á yā nnduuchí yā yeⁿ'ē nguaaⁿ tináⁿ'ā

¹² Ndís'tii ní i'téenu nī chí ngaⁿ'a 'nū chi Cristo nduuchí yā yeⁿ'ē nguaaⁿ tináⁿ'ā. ¿Táacā cuuvi chí ngaⁿ'á nī chi nguéé nnduuchí 'iiⁿ'yāⁿ s'eeⁿ yeⁿ'ē nguaaⁿ tináⁿ'ā? ¹³ Nduuti chi nguéé nnduuchi 'iiⁿ'yāⁿ s'eeⁿ yeⁿ'ē nguaaⁿ tináⁿ'ā Cristo ntúūⁿ ní nguéé 'āā nduuchí yā yeⁿ'ē nguaaⁿ tináⁿ'ā. Ní cuerpo yeⁿ'e Cristo canee na yáinyāⁿ ndíí maaⁿ. ¹⁴ Ndúúti chi Cristo nguéé 'āā nduuchí yā yeⁿ'e nguaaⁿ tináⁿ'ā tuu'mi ní nduudu chi ngaⁿ'á 'nū nguéé dichíí'vē. 'Tiicá ntúūⁿ nguéé dichíí'vē chiiⁿ chi i'téenu 'nū yeⁿ'e Cristo. ¹⁵ 'Tiicá ntuūⁿ chiiⁿ chi ngaⁿ'á 'nū chi nduudu cuaacu yeⁿ'é Ndyuūs, tuu'mi ní nduudu yaadi nduuti chi nguéé 'tíicā. Naati ngaⁿ'a cuaacú 'nū chi Ndyuūs dííⁿ yā chi 'āā nduuchi Cristo yeⁿ'ē nguaaⁿ tináⁿ'ā. Nduuti chi nguéé nnduuchí tanáⁿ'ā 'iiⁿ'yāⁿ yeⁿ'ē nguaaⁿ tináⁿ'ā 'tiicá ntuūⁿ nguéé 'āā nduuchí Ndyuūs Cristo yeⁿ'ē nguaaⁿ tinaⁿ'ā. ¹⁶ Ndúúti chi tanáⁿ'a 'iiⁿ'yāⁿ nguéé nnduuchí yā yeⁿ'ē nguaaⁿ tináⁿ'ā, 'tiica ntúūⁿ, Cristo nguéé 'āā nduuchí yā yeⁿ'ē nguaaⁿ tináⁿ'ā. ¹⁷ Nduuti chi Cristo nguéé 'āā nduuchí yā yeⁿ'ē nguaaⁿ tináⁿ'ā nguéé dichíí'vē chi i'téenu yú Ndyuūs. Ní s'uuúⁿ canee yú condenado ndúúcu nuūⁿ'ndí yeⁿ'ē yú. ¹⁸ Nduuti chi 'tíicā, tuu'mi ní 'iiⁿ'yāⁿ chi 'āā i'téenu yā Cristo, ní maaⁿ ní 'āā n'díi yā, 'āā chindái yā ndúúcu nuuⁿ'ndí yeⁿ'é yā. ¹⁹ Nduuti chi nguéé nduuchi Cristo yeⁿ'ē nguaaⁿ tináⁿ'ā tuu'mi ní s'uuúⁿ chi i'teenu yú Cristo, núúⁿ'máⁿ neⁿ'e chi snée yú na iⁿ'yeeⁿ'dí 'cūū neené ndaachi yíinu yú nguéé ti tanáⁿ'ā 'iiⁿ'yāⁿ.

²⁰ Naati cuaacu chi Cristo miiⁿ 'āā nduuchi yā yeⁿ'e nguaaⁿ tináⁿ'ā. Ní Cristo miiⁿ ní 'iiⁿ'yāⁿ vmnááⁿ vmnaaⁿ chi nduuchí yā yeⁿ'e nguaaⁿ tináⁿ'a yeⁿ'ē nducyaáca 'iiⁿ'yāⁿ chi n'díí. ²¹ Ti cáávā nuuⁿ'ndí yeⁿ'e 'áámá saⁿ'a Adán, canéé chi nducyaaca yú 'cuúvi yú. Ní cáávā chi diiⁿ 'aama saⁿ'ā Cristo mííⁿ, canéé chí nduuchi yú yeⁿ'ē nguaaⁿ tináⁿ'ā. ²² S'uuúⁿ ní yeⁿ'e Adán chi diiⁿ nuuⁿ'ndí sa. S'uuúⁿ ní 'iiⁿ'yāⁿ chi diiⁿ nuuⁿ'ndí s'uuúⁿ. Taachí 'iiⁿ'yāⁿ diiⁿ nuuⁿ'ndí yā tuu'mi canee chi 'cuúvi yā. S'uuúⁿ ní yeⁿ'e Cristo s'uuúⁿ ní 'cuēeti nduuchí yú. ²³ Ti 'áámá 'áámá 'iiⁿ'yāⁿ caⁿ'á yā nnduuchi yā yeⁿ'e nguaaⁿ tináⁿ'ā tan'dúucā chi itunééⁿ 'iiⁿ'yāⁿ. Cristo 'āā nduuchí yā vmnááⁿ vmnaaⁿ yeⁿ'e nguaaⁿ tináⁿ'ā. Ní cuayiivi taachi ndaá Cristo na iⁿ'yeeⁿ'dí 'cūū taama vmnéⁿ'ēe, tuu'mi ní 'iiⁿ'yāⁿ chi n'díí chi yeⁿ'e Cristo, 'iiⁿ'yāⁿ s'eeⁿ ní caⁿ'á yā nnduuchi yā yeⁿ'ē nguaaⁿ tináⁿ'ā. ²⁴ Tuu'mi ní ndaā nguuvu chi 'cuiinū iⁿ'yeeⁿ'dí 'cūū cuayiivi taachi chó'ōo tanducuéⁿ'ē chi Dendyuūs Chiida yú neⁿ'é yā chí chó'ōo. Ní Cristo caaⁿ'maⁿ ntiiⁿ'nyúⁿ yā yeⁿ'ē nducyaaca 'iiⁿ'yāⁿ ndíí tiiⁿ yeⁿ'e iⁿ'yeeⁿ'dí 'cūū ndúúcu poder yeⁿ'ē. Tuu'mi ní Cristo ncaⁿ'á yā Chiida yā tanducuéⁿ'ē chi yeⁿ'e chí ngaⁿ'a ntiiⁿ'nyúⁿ yā. ²⁵ Ti maaⁿ ní Cristo miiⁿ canéé yā tan'dúucā 'áámá Rey. Ní taachi chí cuchéé yā yeⁿ'ē tanducuéⁿ'ē enemigo yeⁿ'e yā, tuu'mi

ní enemigos yeⁿé yā canéé yā tan'dúúcā chi canéé yā mááⁿ ca'a Cristo; ²⁶ tuu'mi ní chi 'cuiinu enemigo yeⁿe Cristo chi vaadī n'gii. Ní Cristo chichee yā yeⁿē. ²⁷ Dendyuūs 'āā ca'a yā nducuéⁿē dendu'u na ta'ā Cristo ní Cristo ngaⁿa ntiiⁿnyúⁿ yā yeⁿe tanducuéⁿē. Ní nducuéⁿē canee tan'dúúcā chi canee maaⁿ ca'a Cristo. Cristo miiⁿ nguéé ngaⁿa ntiiⁿnyúⁿ yā yeⁿē Chiidá yā naati Chiidá yā 'āā ca'a yā Cristo tanducuéⁿē. ²⁸ Taachí Cristo cheé yā yeⁿe tanducuéⁿē, tuu'mi ní Cristo, chi daiya Dendyuūs, ca'a yā nducuéⁿē na ca'a Dendyuūs chi Chiidá yā. Ní Cristo miiⁿ maáⁿ yā canéé yā maaⁿ poder yeⁿē Chiidá yā.

²⁹ ¿De'ε rā tuu'mi? Nduuti chi nguéé nnduuchi 'iiⁿyāⁿ s'eeⁿ yeⁿe nguaaⁿ tináⁿā, ¿de'ε cúúví chi dííⁿ yā 'iiⁿyāⁿ chi ndéédínuūⁿniⁿ yā cáávā tanáⁿā 'iiⁿyāⁿ s'eeⁿ chi n'dií? ¿De'ε cáávā idiíⁿ yā 'tíicā? Nduuti chi nguéé i'téénu yā chi 'iiⁿyāⁿ chi n'dií caⁿá yā nduuchi yā yeⁿē nguaaⁿ tináⁿā.

³⁰ 'Tiicá dendu'ū. ¿De'ε cúúví chí 'úú cuneé ndúúcū cáándá chi 'iiⁿyāⁿ 'caanⁿnúⁿ yā 'úú ndii hora miiⁿ? ³¹ Cuáácú chi nguuvi nguuvi 'iiⁿyāⁿ neⁿe 'caanⁿnúⁿ yā 'úú cucáávā chi i'teenú Cristo. Cuáácú chi yeenú, ti cáávā Señor Jesucristo chi Señor yeⁿe yú ndís'tií i'téénu ní Jesucristo ti 'úú ngaⁿá nduudu cuaacu yeⁿe Jesucristo nanááⁿ ndis'tií. ³² ¿De'ε chi cuuvi yeⁿé chi cuchéé yeⁿé 'iiⁿyāⁿ yáā Efeso chi dííⁿ yā nduucú tan'dúúcā 'iiti taaⁿ nduuti chi nguéé nduuchi 'iiⁿyāⁿ s'eeⁿ yeⁿe nguaaⁿ tináⁿā? Tuu'mi ní ngaⁿa yú 'tiicā: Che'e yú vaa, cu'u yú vaa, ti cavyaaⁿ ní 'cuūví yú.

³³ Nguéé dííⁿ nī chi 'iiⁿyāⁿ canche'éi yā ndís'tií. Nduuti chi caⁿá nī ndúúcū 'iiⁿyāⁿ chi nguéé n'daacā idiíⁿ yā tuu'mi ndís'tií cuuví dííⁿ nī tan'dúúcā chí idiíⁿ 'iiⁿyāⁿ s'eeⁿ. Nguéé n'daacā chi dííⁿ nī 'tíica. ³⁴ Nadacadíínuuⁿ nī chee chi dííⁿ nī. Ní dííⁿ nī cosa chi n'daacā. Ní nguéé dinuuⁿndí nī. Tanáⁿā 'iiⁿyāⁿ nguéé deenú yā yeⁿe Dendyuūs. Chuū ní ngaⁿá yeⁿe ndís'tií ní cuuví 'cuináaⁿ nī.

Yeⁿe tan'dúúcā chi 'iiⁿyāⁿ caⁿá yā nnduuchí yā yeⁿē nguaaⁿ tináⁿā

³⁵ Nduu'ví 'iiⁿyāⁿ ní cuuvi caaⁿmáⁿ yā chuu. ¿Táácā chí 'iiⁿyāⁿ chi 'āā tináⁿā chi nnduuchí yā yeⁿe nguaaⁿ tináⁿā? Ní vεε cuerpo ngai yeⁿé 'iiⁿyāⁿ s'eeⁿ, ¿táácā canéé? ³⁶ Ndís'tií chi ngaⁿa nī 'túúcā nguéé nadacadíínuuⁿ nī yeⁿe chí ngaⁿa nī. Ndís'tií chi ngiīnu nī ndaata deenú nī chi ndaata miiⁿ canéé chí n'dii vmnááⁿ vmnaaⁿ chi dichíí'vε ní ndéε n'gui'i yeⁿē. ³⁷ Ndaata miiⁿ chi ndís'tií ngiīnu nī. ¿'Áá nguéé tan'dúúcā 'áámá planta chi cuchii, nduuti chi trigo, o nduuti chi niīⁿnuⁿ, o de'ε vεε ndaata chi véé? ³⁸ Dendyuūs dííⁿ yā chi 'cuiita ca'áámá ca'áámá ndaata miiⁿ tan'dúúcā chi neⁿe yā, ni 'āā vi'í cā ca'áámá ca'áámá yaata naaⁿ yeⁿē ndaata miiⁿ. ³⁹ 'Tíicā ntúūⁿ na iⁿ'yeeⁿdí 'cūū. Nguε dáámá cuerpo yeⁿe 'iiⁿyāⁿ. 'Āā vi'í caā cuerpo yeⁿe 'iiti, 'āā vi'í caā cuerpo yeⁿē 'yáádá, ní 'āā vi'í caā cuerpo yeⁿē 'yáacā. ⁴⁰ Véé cuerpo yeⁿe cosa s'eeⁿ chi véé nanguuvi. Ní véé cuerpo yeⁿe 'iiⁿyāⁿ chi canéé na iⁿ'yeeⁿdí 'cūū. Ní cuerpo yeⁿe cosa chi véé nanguuvi ní δεενε. Ní 'aa vi'í caā cuerpo chi ndεενε yeⁿe 'iiⁿyāⁿ yeⁿe iⁿ'yeeⁿdí 'cūū. ⁴¹ 'Tiicá ntúūⁿ 'yáⁿā, ní 'iīyū, ní 'iīnyúⁿ, ni nducyaaca ní δεενε cá ní 'āā vi'í caā. Nguaaⁿ 'iīnyuⁿ s'eeⁿ chi δεενέ, nguεε dáámá tí 'āā vi'í caā. ⁴² 'Tiicá ntúūⁿ cuerpo yeⁿē yú, ch'iī yú ní choō cuerpo yeⁿē yú, naati taachi nnduuchi yú yeⁿe nguaaⁿ tináⁿā, 'āā ntéé nuuⁿndi yú. ⁴³ Maaⁿ ní idinuuⁿndi yú ni 'cuináaⁿ yú cáávā cuerpo yeⁿe yú. Naati taachi nnduuchi yú yeⁿē nguaaⁿ tináⁿā, tuu'mi ní cuerpo yeⁿē yú ní δεενε, ní n'daacā canéé. ⁴⁴ Maaⁿ ní cuerpo yeⁿē yú ní yeⁿe iⁿ'yeeⁿdí 'cūū ni 'cuūví yú. Ní taachi nnduuchi yú yeⁿē nguaaⁿ tináⁿā, tuu'mi ní cuerpo yeⁿe yú ní yeⁿe espíritu. Nduuti chi véé cuerpo yeⁿē yú chi yeⁿe iⁿ'yeeⁿdí 'cūū, tuu'mi ni véé cuerpo yeⁿē yú chi yeⁿe espíritu.

⁴⁵ Canéé nguūⁿ ndii cuááⁿ vmnaaⁿ na libro yeⁿé Dendyuūs 'tíicā: Dendyuūs din'dái yā cuerpo yeⁿe saⁿā Adán chi sáⁿā chí cunduuchi sá vmnááⁿ vmnaaⁿ. Naati táámá Adán chí cuayiivi ní nguuvi yā Jesucristo. Ní Jesucristo miiⁿ ní yeⁿē vida chi espíritu chi canduuchi. Ní Jesucristo ca'á yā vida 'iiⁿyāⁿ s'eeⁿ yeⁿe iⁿ'yeeⁿdí 'cūū chi vida chi yeⁿe espíritu. ⁴⁶ Nadacadíínuuⁿ nī yeⁿe chuū. Vmnááⁿ vmnaaⁿ véé cuerpo tan'dúúcā cuerpo yeⁿe s'uúúⁿ, ní cuayiivi véé cuerpo chi yeⁿē espíritu. ⁴⁷ Dendyuūs din'dái yā Adán chi saⁿa vmnááⁿ vmnaaⁿ yeⁿe yaⁿá 'cūū. Naati saⁿā cuayiivi miiⁿ chiicā sa ná

va'ai chæeti nguuví ní saⁿá miiⁿ chí Jesucristo. ⁴⁸ Nducyaáacá 'iiⁿ'yāⁿ yeⁿe iⁿ'yeeⁿdí 'cūū canéé ndúú^{cū} cuerpo tan'dúú^{cā} 'iiⁿ'yāⁿ yeⁿe iⁿ'yeeⁿdí 'cūū. Nducyaáacá 'iiⁿ'yāⁿ chí yeⁿe Cristo cuuvi canéé ndúú^{cū} cuerpo tan'dúú^{cā} cuerpo yeⁿe Jesucristo chí yeⁿe va'ai chæeti nguuví. ⁴⁹ Maaⁿ ní cuerpo yeⁿe yú tan'dúú^{cā} cuerpo yeⁿe 'iiⁿ'yāⁿ yeⁿe iⁿ'yeeⁿdí 'cūū. Cuayiiⁿ ní ndaāca yú 'áámá cuerpo yeⁿe yú tan'dúú^{cā} chí véé na va'ai chæeti nguuví.

⁵⁰ Maaⁿ ní chuū ngaⁿ'á ngii ndís'tiī hermanos yeⁿé: Ndúú^{cū} cuerpo yeⁿe yú ndúú^{cū} yuūtē yeⁿe ndúú^{cū} yuūⁿ yeⁿe nguéé cuuvi ndaa yú na va'ai chæeti nguuví. Ndíí nguéé véé 'áámá cuaaⁿ dendú'ū chí nchoo ndúú^{cū} chí nguéé nngoō. ⁵¹ Cuin'diichí nī. 'Úú ní ngaⁿ'á n'gii'í ndís'tiī yeⁿe 'áámá cosa chí 'iiⁿ'yāⁿ nguεε deenu yā. Nguéé nducyaaca yú 'cuūvi yú. Naati Ndyuūs téé yā nducyaaca s'uuúⁿ 'áámá cuerpo chí ngai tan'dúú^{cā} cuerpo yeⁿe yā chí yeⁿe espíritu. ⁵² Ní 'áámá tiempo 'lííⁿ 'lííⁿ nūⁿ tan'dúú^{cā} chí 'áámá ingaaⁿ 'áámá in'gaadi nduutinaaⁿ yú, mááⁿ n'chæeté nūⁿ, ní n'daaⁿ cuerpo yeⁿe yú, taachi 'cuεεcú trompeta chí ndii na 'cuiinu. Ní taachi 'cuεεcu trompeta miiⁿ, tuu'mi ní 'iiⁿ'yāⁿ chí i'téenu yā Señor Jesucristo chí maaⁿ ní 'āā tináⁿ'ā ní nducuéⁿ yā yeⁿe nguuaⁿ tináⁿ'ā ndúú^{cū} cuerpo ngai yeⁿé yā chí 'āā ntéé choo. Ní 'tiicá ntúūⁿ. S'uuúⁿ chí i'teenu yú Jesucristo ní canduuchi yú, ní n'daaⁿ cuerpo yeⁿe yú. ⁵³ Cuerpo yeⁿe yú chí ngoō. Ní Ndyuūs canéé chí n'daaⁿ yā cuerpo yeⁿe yú ní téé yā s'uuúⁿ táámá cuerpo chí nguéé nchoo. Cuerpo yeⁿe yú chí n'gii, Ndyuūs canéé chí téé yā s'uuúⁿ táámá cuerpo chí 'āā ntéé ndaa nguuví chí 'cuūvi. ⁵⁴ Taachí cuerpo yeⁿe yú chí n'gii ní ngoo, 'āā n'daaⁿ cuerpo yeⁿe chí nguéé cuuvi n'gii ndíí nguéé cuuvi chōō. Tuu'mi cuuvi cuaacu chí canéé nguūⁿ ndii cuááⁿ vmaaaⁿ na libro yeⁿe Ndyuūs 'tíicā: Vida cueⁿe daāⁿmaⁿ miiⁿ ní chicheé yeⁿe vaadī n'gii miiⁿ ti 'āā ntéé ch'ii 'iiⁿ'yāⁿ. ⁵⁵ Vaadī n'gii ní 'āā chó'ōo. ¿Táácā cuuvi cuchéé vaadī n'gii yeⁿe 'iiⁿ'yāⁿ chí nguéé cuuví 'cuūvi yā? ¿Táácā cuuví diiⁿ vaadī n'gii miiⁿ tan'dúú^{cā} chí 'áámá 'iiti chí nga'a tī 'iiⁿ'yāⁿ ní n'gii yā? Nguéé cuuvi. ⁵⁶ Nuūⁿndi miiⁿ chí diiⁿ yú, chííⁿ chí tee lugar vaadī n'gii, ní n'gii yú. Ní vaadī n'gii miiⁿ diiⁿ tan'dúú^{cā} chí nga'a tī 'iiⁿ'yāⁿ ní n'gii yā. Ley miiⁿ chííⁿ chí diiⁿ chí 'iiⁿ'yāⁿ deenu yā chí véé nuūⁿndi yeⁿe yā. ⁵⁷ Nca'a yú gracias Ndyuūs, ti nginneé yā s'uuúⁿ chí ichεε yú yeⁿe nducuéⁿe chí yeⁿe yááⁿn'guiinūⁿ cáávā Señor Jesucristo yeⁿe yú. ⁵⁸ Cáávā chuū ndís'tiī hermanos yeⁿé chí neⁿe taaví, 'cuεetinéⁿ n'daaca nī ndúú^{cū} chíiⁿ chí i'téenu nī. Ní nguéé n'daaⁿ chííⁿ chí i'téenu nī. Ní cueⁿe daāⁿmaⁿ diíⁿ nī ntiiⁿnyuⁿ yeⁿe Señor Jesucristo yeⁿe yú. Ní deenú nī chí ntiiⁿnyuⁿ miiⁿ ní véé chíi'vē.

16

Yeⁿe ofrenda caavā hermanos

¹ Maaⁿ ní neⁿé caaⁿ'máⁿ ndís'tiī yeⁿe ofrenda yeⁿé nī chí ca'á nī 'iiⁿ'yāⁿ chí i'téenu yā Jesucristo cáávā 'iiⁿ'yāⁿ ndaachíí snée yā ní nguéé dendu'ū yeⁿe. Dííⁿ nī tan'dúú^{cā} chí 'úú ngaⁿ'á ngii 'iiⁿ'yāⁿ yeⁿe tanáⁿ'ā yáacū s'eeⁿ na yáⁿ'āa Galacia. ² 'Tíicā dííⁿ nī. Nguuví vmaáⁿ vmaaaⁿ yeⁿé ndεētē chí domingo miiⁿ, ca'áámá ca'áámá ndís'tiī ní cu'néeⁿ nī 'āā vi'í caā parte yeⁿé nī chí tunééⁿ Ndyuūs chí yeⁿe nducuéⁿ chí Ndyuūs tee yā ndís'tiī. Ní ndís'tiī ca'a nī ofrenda yeⁿé nī na ta'a 'iiⁿ'yāⁿ chí ngaⁿ'a ntiiⁿnyuⁿ yeⁿe yáacū. Ní taachi 'úú ndaa nguéé canéé chí ca'a nī ofrenda yeⁿe nī. ³ Ní taachi ndaa, 'úú dicho'ó 'iiⁿ'yāⁿ chí ndis'tiī ne'éⁿ nī chí candéε yā ofrenda yeⁿé nī ndíí yáāⁿ Jerusalén. 'Iiⁿ'yāⁿ miiⁿ candéε yā carta yeⁿé ndúú^{cū} ofrenda yeⁿe nī. ⁴ Nduuti chí 'úú caneé chí caⁿ'á yáāⁿ Jerusalén tuu'mi 'iiⁿ'yāⁿ s'eeⁿ caⁿ'á yā nduucú.

Pablo caⁿ'a yā chí caⁿ'á yā yaāⁿ s'eeⁿ

⁵ Caneé chí cho'ó na yáⁿ'āa Macedonia. Ní taachi cho'ó na yáⁿ'āa miiⁿ cuayiiⁿ ní ndaa na yāāⁿ Corinto ní cuneé ndúú^{cū} ndís'tiī. ⁶ Neⁿé chí cūnēe ndúú^{cū} ndis'tiī tiempo chí 'iichεε. Ní cuayiiⁿ ní ndís'tiī cuuvi caⁿ'á nī nduucú 'téé nūⁿ naachi 'úú naⁿ'á cuaaⁿ cyúúⁿ. ⁷ Nguéé neⁿé n'diichí ndís'tiī taachi cho'ó yáāⁿ vaacú nī, naati canéé ngiinú chí ndaa n'diichí ndís'tiī 'áámá tiempo nduuti chí Ndyuūs téé yā lugar 'úú. ⁸ Naati cuneé na yáāⁿ Efeso ndii tiempo yeⁿe 'viicu yeⁿe Pentecostés. ⁹ Miiⁿ ní véé n'dee ca ntiiⁿnyuⁿ chí

diíⁿ. Ní yááⁿ Efeso miiⁿ tan'dúúcā 'áámá cheendi va'āi chi ch'εεε n'dai ni ndεεvéé n'dai caavā 'úú, ti véé cá ntiiⁿnyuⁿ chi diíⁿ. Miiⁿ ntúúⁿ neene vεε 'iiⁿyāⁿ chi induuví taaⁿ yā yeⁿ'é.

¹⁰ Ndúúti chi ndaa saⁿā Timoteo nanááⁿ ndís'tiī, canéé chi diíⁿ nī recibir saⁿā miiⁿ tan'dúúcā 'áámá saⁿā chi diiⁿ ntiiⁿnyuⁿ sa yeⁿ'é Ndyuūs, ti saⁿā miiⁿ ní idiiⁿ sa ntiiⁿnyuⁿ yeⁿ'é Ndyuūs tan'dúúcā 'úú. ¹¹ Mar 'áámá ndís'tiī nguéeé diíⁿ nī ndúúcū Timoteo tan'dúúcā chi saⁿā chi nguεε n'daacā, ní nguéeé deenu sa. Cuaviivi taachi dicho'ó nī Timoteo miiⁿ cuaaⁿ cyúúni, dicho'ó nī saⁿa miiⁿ ndúúcū n'dai. Canee ngiinú chi ndaa sa ndúúcū tanáⁿā hermanos nanááⁿ 'úú.

¹² 'Úú neⁿ'é chi hermano Apolos ndaa sa nanááⁿ ndís'tiī taachi ndaa tanáⁿā hermanos. Apolos miiⁿ nguéeé neⁿ'e sa ndaa sa maaⁿ, naatí ndaa sa nanááⁿ ndís'tiī taachi véé yaaⁿ sa.

Pablo diíⁿ yā saludar hermanos

¹³ 'Cuééte n'daacá nī ndúúcū cuidado. Ní 'cuεetinéé n'daacá nī ndúúcū chi i'téenu nī chi yeⁿ'e Ndyuūs. Ní tan'dúúcā saⁿā n'gεεε diíⁿ yā ní 'tíicā diíⁿ nī. Ní cunéé diitú nī.

¹⁴ Tanducuéⁿ'ē chi diíⁿ nī, ní diíⁿ nī ti neⁿ'e nī Ndyuūs.

¹⁵ Ndís'tiī ní deenú nī chi 'iiⁿyāⁿ yeⁿ'e va'āi saⁿa Estéfanos s'téenu yā Jesucristo vmnááⁿ vmaaaⁿ taachi snee yā na yáⁿ'āa Acaya. 'Úú yaa'ví ndís'tiī chi 'iiⁿyāⁿ s'eeⁿ neⁿ'é yā diíⁿ yā ntiiⁿnyuⁿ chi nginnee nducyaaca 'iiⁿyāⁿ chi i'téenu yā Señor Jesucristo yeⁿ'ē yú. ¹⁶ 'Úú ngiicá ndís'tiī hermanos yeⁿ'é, chi 'caandiveéⁿ nī yeⁿ'e chi ngaⁿ'ā 'iiⁿyāⁿ s'eeⁿ yeⁿ'e va'ai Estéfanos ní cunneé nī 'áámá 'áámá 'iiⁿyāⁿ chí idiiⁿ ntiiⁿnyuⁿ yeⁿ'é Dendyuūs. ¹⁷ Yeenú chi ndaa hermano Estéfanos ndúúcū hermano Fortunato ndúúcū hermano Acaico. N'daacā chi canéé yā ndúúcu nī na lugar yeⁿ'é. ¹⁸ 'Iiⁿyāⁿ s'eeⁿ ní nduūví n'daí yā na espíritu yeⁿ'é ní caⁿ'á yā nduūví n'daí yā na espíritu yeⁿ'e nī dendú'ū. Canéé chi diíⁿ nī aceptar tanáⁿā 'iiⁿyāⁿ chi diíⁿ yā tan'dúúcā 'iiⁿyāⁿ s'eeⁿ.

¹⁹ 'Iiⁿyāⁿ yeⁿ'e yaācū yeⁿ'e yáⁿ'āa Asia dicho'ó yā saludos yeⁿ'é nī: N'daí nī, ngaⁿ'a yā. Saⁿa Aquila ndúúcū n'daataá Priscila ndúúcā 'iiⁿyāⁿ yeⁿ'e yaācū chi snee yā ndavaacú yā dicho'ó yā saludos yeⁿ'e nī: N'daí nī, ngaⁿ'a yā. ²⁰ Nducyáácá hermanos ní dicho'ó yā saludos yeⁿ'e nī: N'daí nī, ngaⁿ'a yā. Ndís'tiī ní caaⁿ'maⁿ nī 'tíicā yeⁿ'e hermanos: N'daí yā, ngaⁿ'a nī. Ní ca'á nī ta'a nī taachi diíⁿ nī saludar hermanos ti ndís'tiī ní neⁿ'é nī Dendyuūs.

²¹ 'Úú Pablo dinguúⁿ carta miiⁿ ndúúcū ta'á, ní: N'daí nī, ngaⁿ'á.

²² Nduuti chi 'áámá saⁿā nguéeé idinéⁿ'e yā Señor Jesucristo yeⁿ'e yú 'āā cuuví yā condenado. Niiⁿnuⁿ niiⁿnuⁿ canee tiempo chi Señor Jesucristo yeⁿ'ē yú cuuvi ndaa ntúúⁿ yā.

²³ Ní Señor Jesucristo yeⁿ'e yú tée yā ndís'tiī nducuéⁿ'ē chi n'daacā yeⁿ'e yā. ²⁴ 'Úú neⁿ'é ndís'tiī ti ndís'tiī ní yeⁿ'e Cristo Jesús ndís'tiī. 'Tíicā.

CARTA CUAYIIVI YEⁿE 'IIⁿ'YĀⁿ CHI SNÉE YĀ YĀĀⁿ CORINTO

Pablo idinguúⁿ yā carta 'cūū yeⁿe 'iiⁿ'yāⁿ yeⁿe yaacū na yāāⁿ Corinto

¹ 'Úú Pablo 'úú. Ní Ndyuūs neⁿ'é yā chi 'úú cuuvi 'áámá apóstol chi candéé nduudu cuaacu yeⁿ'ē Jesucristo. 'Úú ndúúcu Timoteo chi hermano yeⁿ'e yú idinguúⁿ carta 'cūū yeⁿ'e 'iiⁿ'yāⁿ yeⁿ'e yāāⁿ Corinto chi caⁿ'á yā yāacū yeⁿ'e 'iivú Ndyuūs, ní yeⁿ'ē nducyaaca 'iiⁿ'yāⁿ chi i'teenú yā Jesucristo, 'iiⁿ'yāⁿ chi snée yā na núúⁿmáⁿ yáⁿ'āa yeⁿ'e Acaya. ² Ndyuūs Chiida yú ndúúcu Señor Jesucristo cuuvi téé yā s'uuúⁿ cosa chi n'daacā yeⁿ'é yā ní 'íicú cunée vaadī 'diiiⁿ yeⁿ'é yā na staava yeⁿ'e yú.

Pablo ch'eenú yā chíi

³ Dich'εετε yú Ndyuūs ti nééné n'dai Ndyuūs Chiida yú chí Chiida Señor Jesucristo yeⁿ'ē yú. Ndyuūs Chiida yú ya'ai 'iinú yā s'uuúⁿ ní tee yā 'viich'εεtínūⁿ s'uuúⁿ. ⁴ Ndyuūs yeⁿ'e yú itee yā 'viich'εεtínūⁿ nús'uu yeⁿ'e tanducuéⁿ'ē chi n'geenú 'nū ngii ti nús'uu ní cuuvi ca'á 'nū dáámá 'viich'εεtínūⁿ 'iiⁿ'yāⁿ chi n'geenú yā ngii ndúúcu dáámá 'viich'εεtínūⁿ chi Ndyuūs tee yā nús'uu. ⁵ Nús'uu ní n'geenú 'nū ngii n'dee ca cáavā chi idíⁿ 'nū ntiiⁿnyuⁿ yeⁿ'e Señor Jesucristo. Ní Señor Jesucristo tee ca yā 'viich'εεtínūⁿ nús'uu. ⁶ Maaⁿ ní, nduuti chi n'geenú 'nū ngii, chuú ní cáavā ndís'tiī cuuvi cuta'á nī 'viich'εεtínūⁿ yeⁿ'é Ndyuūs ní cuuvi nnguaⁿ'ai nī. Ní nduuti chí Ndyuūs tee yā nús'uu 'viich'εεtínūⁿ, chuú ní cáavā ndís'tiī cuuvi cuta'á nī 'viich'εεtínūⁿ yeⁿ'é Ndyuūs, ní cuuvi nnguaⁿ'ai nī. 'Tiicá ntúūⁿ ndís'tiī cuuvi cuchée nī nducuéⁿ'ē chí n'geenu nī ngii tan'dúúca chí nús'uu n'geenú 'nū ngii. ⁷ Ní canee ngiinú 'nū yeⁿ'e ndís'tiī chí cunee n'daaca nī. Ti deenú 'nū ti taachi ndís'tiī n'geenu nī ngii tan'dúúca nús'uu 'tiicá ntúūⁿ Ndyuūs tee yā, 'viich'εεtínūⁿ ndís'tiī tan'dúúca chí tee yā nús'uu.

⁸ Ní ndís'tiī hermanos yeⁿ'é 'nū. Neⁿ'é 'nū chí cadiinuuⁿ nī yeⁿ'e tanduvée vaadī caa'va chí cho'ō nuúⁿ 'nū na yáⁿ'āa yeⁿ'e Asia. Chíⁿ chí ch'eenu taaví 'nū chíi ní nééné n'dee ca, ní nadacadiinúⁿ 'nū chí nguée fuerzas yeⁿ'é 'nū chí cuchéé 'nū yeⁿ'e nducuéⁿ'ē ti cuuví 'cuūvi 'nū. ⁹ Nacadiinúⁿ 'nū chí ca'á yā orden chí 'cuūvi 'nū naati chuū ní chíi chí ch'íⁿ'i nús'uu chí cu'téenu cá 'nū Ndyuūs chí nadacuéⁿ yā 'iiⁿ'yāⁿ yeⁿ'ē nguaaⁿ tináⁿ'ā. Ní nguεε i'téenu 'nū yeⁿ'e maáⁿ 'nū. ¹⁰ 'Tíicā Ndyuūs nadanguáⁿ'ai yā nús'uu yeⁿ'e peligro chí 'āā chée 'cuūvi 'nū. 'Tiicá ntúūⁿ cunee ngiinu 'nū Ndyuūs chí nadanguáⁿ'ai yā nús'uu yeⁿ'e nducuéⁿ'ē chí n'geenú 'nū ngii ní yeⁿ'é chí ch'εεte n'dai. ¹¹ Ní ndís'tiī ní nginnee ntúūⁿ nī nús'uu ti ngaⁿ'anguá'á nī caavā nús'uu. Caati ndúútí chí 'yááⁿ ca hermanos ngaⁿ'angua'á yā yeⁿ'é 'nū, tuu'mi ní ca'á yā gracias Ndyuūs, ti Ndyuūs díⁿ yā n'dai ca cáavā nús'uu.

Pablo chí'naaⁿ yā chí ndaá yā na yāāⁿ Corinto

¹² Ní yeenú 'nū ti deenú 'nū na staava yeⁿ'é 'nū chí chíi chí idíⁿ 'nū ní cáavā 'iiⁿ'yāⁿ yeⁿ'e iⁿ'yeeⁿ'dí 'cūū. Ní n'daacā díⁿ 'nū. Ní n'daacā díⁿ 'nū cáavā ndís'tiī. Ndyuūs chí n'dai taavi chíinneé yā nús'uu chí 'túúca dín'daacá 'nū. Chuū nguée cuuvi díⁿ 'nū cáavā vaadī deenu yeⁿ'e maáⁿ 'nū. ¹³ Chíⁿ chí dinguúⁿ 'nū yeⁿ'e ndís'tiī ní ndís'tiī ní cuuvi 'cúeéⁿ nī ní intiinaáⁿ nī. Cunee ngínú 'nū chí túúmícadíinúⁿ nī nducuéⁿ'ē. ¹⁴ Tan'dúúca chí ndís'tiī túúmícadíinúⁿ nī 'téé maaⁿ naati taachi ndaa Señor Jesucristo taama vmnéⁿ'ēe tuu'mí ndís'tiī cuuvi yeenú nī cáavā nús'uu tan'dúúca chí cuuvi yeenú 'nū cáavā ndís'tiī.

¹⁵ Caati véé confianza yeⁿ'é 'nū ndúúcu ndís'tiī, vmnáⁿ vmaaⁿ nadacadiinúⁿ chí chíi ní ndaá ní canee nduucú nī 'áámá tiempo ní cuayiivi ndaá taama vmnéⁿ'ēe ní cunee nduucú nī chí cuuvi yeenu cá nī. ¹⁶ Nadacadiinúⁿ chí cho'ó yaa'ví ndís'tiī taachi caⁿ'á na yáⁿ'āa Macedonia. Ní cuayiivi míⁿ taachi n'daá yáⁿ'āa Macedonia miiⁿ tuu'mi ní nandaa ntuúⁿ yaa'ví ndís'tiī ní cunee ndúúcu nī. Ní taachi can'daá yeⁿ'e nī, ndís'tiī cuuvi cunee nī 'úú ndúúcu necesidades yeⁿ'é caati caⁿ'á yáⁿ'āa Judea. ¹⁷ 'Tíicā nadacadiinúⁿ chí díⁿ. 'Úú nguée díⁿ tan'dúúca 'iiⁿ'yāⁿ chí díⁿ yā tan'dúúca chí maáⁿ yā neⁿ'e yā. Ní ngaⁿ'a yā:

Júūⁿ, júūⁿ chuū chi diíⁿ, ní cuayivi ngaⁿá yā chi nguéé diíⁿ yā ti diíⁿ yā tan'dúú^{cā} chi neⁿé yā. ¹⁸ Naatí Ndyuūs deenú yā nduudu chi ngaⁿá 'nū chi nguéé ngaⁿá 'nū 'tíicā idiíⁿ 'nū ní cuayivi nguéé idiíⁿ 'nū 'tíicā. ¹⁹ Ti taachi 'úú ndúú^{cū} saⁿā Silvano ndúú^{cū} Timoteo candéé 'nū nduudu cuaacu yeⁿe Señor Jesucristo chi Daiya Dendyuūs nguéé ngaⁿá 'nū chi Jesucristo miiⁿ ngaⁿá yā chi júūⁿ 'tíicā, ní cuayivi nguéé 'tíicā diíⁿ yā. Cristo ní ngaⁿá yā ní diíⁿ yā tanducuéⁿē dendu'ū chí cuaacu. ²⁰ Ti Cristo miiⁿ ngaⁿá yā chi 'tíicā, yeⁿe nducuéⁿē chi Ndyuūs Chiida yú caⁿá yā chi téé yā 'iiⁿyāⁿ ndúú^{cū} s'uuúⁿ chi i'téenu yú Ndyuūs. Cáávā chuū idich'εεte yú Ndyuūs ti cucáávā Cristo caⁿa yú chi 'tiicā. ²¹ Ní Chiida yú diíⁿ yā chi ndís'tiī ndúú^{cū} nús'uu cunee diitu ca yú ndúú^{cū} chi i'teenu yú yeⁿe Cristo. Ní Ndyuūs nadidεεvé yā s'uuúⁿ chi diíⁿ yú ntiíⁿnyuⁿ yeⁿé yā. ²² Ndyuūs tee yā s'uuúⁿ 'áámá sello yeⁿé yā na cuerpo yeⁿe yú ti yeⁿé yā s'uuúⁿ. Tee yā Espíritu N'dai yeⁿé yā na staava yeⁿé yú. Ní cáávā Espíritu N'dai yeⁿé yā deenu yú chi cuuvi yeⁿe yú chiiⁿ chi Ndyuūs caⁿa yā chi téé yā s'uuúⁿ.

²³ Nguéé cueⁿé yāāⁿ Corinto ti neⁿé yaa'vi neéⁿ ndís'tiī ní nguéé neⁿé 'caa'vá cucáávā chi 'cuεetinéé ya'ai nī. Maaⁿ ní Ndyuūs deenú yā staava yeⁿé ní testigo yeⁿé. ²⁴ Nguéé neⁿé 'nū caaⁿmáⁿ 'nū ntiíⁿnyuⁿ yeⁿé nī yeⁿé chiiⁿ chi canee chi i'téenu nī ti 'āā canee diitú nī ndúú^{cū} chi i'téenu nī. Naati neⁿé 'nū cuneeé 'nū ndís'tiī. Nús'uu diíⁿ 'nū ntiíⁿnyuⁿ ndúú^{cū} ndís'tiī ní cuuvi yeenú nī. Ní ndís'tiī snéé n'daaca nī caavā chi i'teenu nī Jesucristo.

2

¹ 'Úú nadicádiinúúⁿ māaⁿ chi nguéé ndaá nanááⁿ ndís'tiī chi cuuvi ndaachí nī. ² 'Úú nguεε neⁿé ndaá nanááⁿ ndís'tiī nduuti chi 'úú idiíⁿ chi ngii ndaachi yiinú ndís'tiī. ¿De'ē cúúví chi diíⁿ chi ngii ndaachi yiinú ndís'tiī ti nguéé du'ū chi cuuvi tee yā 'úú vaadī yeenú nduuti chi ndaachi yiinú ndís'tiī? ³ Chuū idinguúⁿ yeⁿé ndís'tiī ti taachi ndaá nguéé cu'neeⁿ ndaachi nuúⁿ cucáávā ndís'tiī ti ndís'tiī cuuvi tee nī 'úú vaadī yeenú. Véé 'viich'εetiinúúⁿ 'cúú nanááⁿ nducyáácá ndís'tiī chi vaadī yeenu chi véé yeⁿé, maaⁿ vaadī yeenú miiⁿ cuneeé ndúú^{cū} nducyaaca nī. ⁴ Ní taachi dinguúⁿ yeⁿé ndís'tiī neené di'vaachi 'úú ndii ná staava yeⁿé ndíí tuunu cheécú. Nguéé diíⁿ 'tuucā ti cu'neeⁿ ndaachi yiinú ndís'tiī ti neⁿé chi ndís'tiī cuuvi déenu nī chi neené neⁿé taavi cá ndís'tiī.

Ndyuūs nadach'εεcú yā nuuⁿndi yeⁿé 'iiⁿyāⁿ

⁵ Ndúútí chi 'aama 'iiⁿyāⁿ diíⁿ yā 'aama cosa chi véé de'ē cáávā chi cu'neeⁿ ndaachi yiinú náⁿā ndís'tiī 'úú ntúūⁿ cu'neeⁿ ndaachi yiinú 'úú ndúú^{cū} nducyáácá ndís'tiī dendu'ū 'téé nūuⁿ. 'Úú nguéé neⁿé caaⁿmáⁿ yeⁿe 'iiⁿyāⁿ miiⁿ chi véé cá nuuⁿndi yeⁿé yā yeⁿé chi dinuuⁿndí yā. ⁶ Deenú ntúūⁿ chi n'deē cá ndís'tiī 'āā n'diichí nī nuuⁿndi yeⁿé yā ní nadacádiinúúⁿ chi 'āā véé castigo yeⁿé 'iiⁿyāⁿ miiⁿ, ní nguéé diíⁿ nī más ca ndúú^{cū} 'iiⁿyāⁿ miiⁿ. ⁷ Maaⁿ ní caneeé chi nca'á nī 'viich'εetinúuⁿ 'iiⁿyāⁿ 'cúú ní nadach'εεcú yā yeⁿe 'iiⁿyāⁿ 'cúú ní nguéé neené taaⁿ cu'neeⁿ ndaachi yiinú yā. ⁸ Caavā chuū chi ngaⁿá chí ndís'tiī 'cuuⁿmiⁿ nī chi dinéⁿe ca nī 'iiⁿyāⁿ 'cúú. ⁹ Níicu taachi idinguúⁿ chuū yeⁿe ndís'tiī yeⁿe 'iiⁿyāⁿ 'cúú neⁿé cadíinúúⁿ ní n'diichí nduuti chi ndís'tiī ní diíⁿ nī ndúú^{cū} yā tan'dúú^{cā} chi 'āā ngaⁿá ngii ndís'tiī na carta yeⁿé. ¹⁰ 'Úú dendú'ū caⁿá inadich'εεcú nuuⁿndi yeⁿe 'āā de'é nūuⁿ 'iiⁿyāⁿ chi ndís'tiī nadich'εεcú yā nuuⁿndi yeⁿé yā. Ní taachi 'úú nadich'εεcú yeⁿé yā, ní 'túúca diíⁿ cucáávā ndís'tiī ní nanááⁿ Cristo. ¹¹ Nduuti chí diíⁿ yú 'túúca tuu'mi ní yááⁿ n'guinúuⁿ nguéé cuuvi cuchée sa yeⁿé yú ti deenu yú de'ē chi nginnche'ei sá.

Pablo nguεε yeenú yā chi ndaa yā na yāāⁿ Troas

¹² Taachi cueⁿé cuaaⁿ cyuuni ní ndaá na yāāⁿ Troas chi caaⁿmáⁿ nduudu yeⁿe evangelio yeⁿe Cristo, tuu'mi ní Ndyuūs nn'guaáⁿ yā yāāⁿ miiⁿ tan'dúú^{cā} chi nn'guaaⁿ 'iiⁿyāⁿ 'áámá cheendi va'āi. 'Tíicā diíⁿ Ndyuūs cucaavā 'úú chi caaⁿmáⁿ nduudu yeⁿé evangelio. ¹³ Ní neené nadacádiinúúⁿ na staava yeⁿé ti nguéé nndaacá saⁿā Tito, hermano yeⁿé yú. Cáávā chuū diíⁿ despedir 'iiⁿyāⁿ yeⁿe yāāⁿ miiⁿ ní chiicá ni cueⁿé na yáⁿā Macedonia.

Chεε yú yeⁿe nducuéⁿē ti yeⁿe Cristo s'uuúⁿ

¹⁴ 'Úú ní ca'á gracia Ndyuūs caati Ndyuūs caⁿ'á yā nduucú 'nū 'āā tí nūuⁿ lugar naachi caⁿ'á 'nū caati nús'uu cuuvi chεé 'nū yeⁿe nducuéⁿē cucáāvā s'uuúⁿ ní yeⁿe Cristo s'uuúⁿ. Níicú Ndyuūs díⁿ yā cáāvā nús'uu chi deenu 'nū yeⁿē Cristo chi cuuvi caaⁿ'máⁿ 'nū yeⁿe Cristo nanááⁿ nducyaaca 'iiⁿ'yāⁿ yeⁿe núúⁿmáⁿ iⁿ'yeeⁿdī. Ní 'iiⁿ'yāⁿ cuuvi deenú yā yeⁿē Cristo dendú'ū. Ní chuū ní tan'dúúcā 'áámá cosa chi n'dēēveε ngééⁿ chi véé nducuéⁿē yāāⁿ naachi cueⁿ'é 'nū. ¹⁵ S'uuúⁿ tan'dúúcā 'áámá cosa chi n'dēēveε ngééⁿ chi incienso nanááⁿ Dendyuūs. 'Tíicā s'uuúⁿ chi i'teenu yú Cristo. 'Tiicá ntúūⁿ s'uuúⁿ nanááⁿ 'iiⁿ'yāⁿ chi caⁿ'á yā cu'téenu yā Jesucristo ní caⁿ'á yā na va'ai chεeti nguuvi. Ní nanááⁿ 'iiⁿ'yāⁿ chi nguéé i'téenu yā ní caⁿ'á yā ná vaadi n'gii cueⁿ'e daāⁿmaⁿ, ¹⁶ s'uuúⁿ tan'dúúcā 'áámá cosa chi ngééⁿ chi n'díí chí 'āā n'tεε n'dáaca, 'tíicā s'uuúⁿ nanááⁿ 'iiⁿ'yāⁿ chi nguéé i'téenu yā Jesucristo. Ní chuū ch'iⁿ'i chi caⁿ'á yā 'cuūvi yā cueⁿ'e daāⁿmaⁿ. Ní s'uuúⁿ ní tan'dúúcā 'áámá cosa chi n'dēēveε ngééⁿ ti véé vida yeⁿē. 'Tíicā s'uuúⁿ nanááⁿ 'iiⁿ'yāⁿ chi caⁿ'á yā cu'téenu yā Jesucristo ni caⁿ'á yā na va'ai chεeti nguuvi. ¿Dú'ū cuuvi diiⁿ yeⁿe chuū 'tuucā? ¹⁷ Nús'uu ní nguéé caaⁿ'máⁿ 'nū nduudu cuaaco yeⁿ'é Ndyuūs chi 'iiⁿ'yāⁿ nadí'vε yā nús'uu, tan'dúúcā chi diiⁿ n'deēe n'dái 'iiⁿ'yāⁿ. Naati Ndyuūs dichó'o yā nús'uu ní nús'uu ní caaⁿ'máⁿ 'nū nduudu miiⁿ ndúúcū núúⁿmáⁿ staava yeⁿ'é 'nū. Ní Ndyuūs inaaⁿ yā nús'uu ti diiⁿ 'nū tan'dúúcā chi Cristo neⁿ'é yā chí dííⁿ 'nū, ti yeⁿ'é Cristo nús'uu.

3

Yeⁿ'ē Nduudu Ngai yeⁿ'é Ndyuūs

¹ Taachi dinguúⁿ 'nū chuu, ¿'áá nadacadiinúúⁿ nī chí nús'uu caaⁿ'maⁿ cá 'nū chí n'daacā idiíⁿ 'nū? O ¿'áá canee chí ndéé 'nū taama carta chí ndéé recomendación, nanááⁿ ndís'tiī, o 'áámá carta chí dinguúⁿ nī chí ngíicá nī recomendación yeⁿ'é nī tan'dúúcā chí ndéé tanáⁿ'ā 'iiⁿ'yāⁿ? Nguεε 'tíicā. ² Ndís'tiī ní tan'dúúcā carta yeⁿ'é 'nū 'tíicā ndís'tiī ti yeⁿ'é Cristo ndís'tiī. Ní ndís'tiī tan'dúúcā chí carta yeⁿ'é 'nū chí canéé nguūⁿ na staava yeⁿ'é 'nū 'tíicā ndís'tiī. Ní 'íicú nducyáácá 'iiⁿ'yāⁿ cuuvi 'cueeⁿ yā níicú cadíínuuⁿ yā chí ndís'tiī i'téenu nī Jesucristo. ³ Ní nducyáácá 'iiⁿ'yāⁿ deenú yā chí ndís'tiī ní tan'dúúcā 'áámá carta chí dinguúⁿ Cristo ní tee yā nús'uu 'tiicā ndís'tiī cáāvā ntiiⁿnyuⁿ yeⁿ'e Cristo chí dííⁿ 'nū nanááⁿ ndís'tiī. Carta miiⁿ nguéé cánéé nguūⁿ ndúúcū tinta ndíí nguéé ndúú tan'dúúcā chí Ndyuūs diiⁿ nguúⁿ yā ley na tabla yeⁿ'e tuū ti Espíritu N'dai yeⁿ'é Ndyuūs chí canduuchi dinguūⁿ carta 'cūū staava yeⁿ'ē yú.

⁴ Ní seguro chí Ndyuūs ndεεve yā ndís'tiī ní véé 'viich'εetiinūuⁿ yeⁿ'é 'nū caati Jesucristo innee yā 'úú. Ní deenú chí dichíí'vε Ndyuūs ndúúcū ntiiⁿnyuⁿ n'daacā chí dííⁿ cucááva Cristo. ⁵ Nguéé nadacadiinúúⁿ 'nū chí cuuvi cundεε yú cuidado yeⁿ'e nducuéⁿē chí diiⁿ yú. Ndyuūs nginnee yā nús'uu ní téε yā poder nús'uu ní cuuvi dííⁿ 'nū nducuéⁿē. ⁶ Ndyuūs tee yā nús'uu ntiiⁿnyuⁿ chí candéé 'nū táámá compromiso yeⁿ'é yā chí ngai. Ní compromiso chí ngai miiⁿ nguéé yeⁿ'e ley yeⁿ'e yú chí canéé nguūⁿ ti yeⁿ'e Espíritu N'dai yeⁿ'é Dendyuūs. Nduudu yeⁿ'e ley yeⁿ'e yú diiⁿ chí condenado s'uuúⁿ ní 'cuūvi yú naati Espíritu N'dai miiⁿ itee vida cueⁿ'e daāⁿmaⁿ s'uuúⁿ.

⁷ Ley yeⁿ'ē yú chí Ndyuūs dinguúⁿ yā na tabla yeⁿ'e tuū nanááⁿ Moisés ní dichíí'vε chí deenu yú chí véé nuuⁿndi yeⁿ'e yú, ní chíndai yú. Ní taachi ndaā ley miiⁿ chí dεεve n'dai ca yeⁿ'é Ndyuūs tuu'mi ní ngii na naaⁿ Moisés miiⁿ. Ní 'iiⁿ'yāⁿ yeⁿ'e Israel nguéé cuuvi n'diichí yā naaⁿ Moisés miiⁿ cáāvā chí neené dεεve ngii naáⁿ yā, naati dεεvé miiⁿ na naáⁿ yā 'āā ntuūvī. ⁸ Taachi ndaā ley miiⁿ ní dεévε cá ngii ní chó'ōo dεεve yeⁿ'ē ¿'áá nguéé cuuvi ch'εεte n'dái cá ngii ntiiⁿnyuⁿ yeⁿ'e Espíritu N'dai yeⁿ'é Ndyuūs nguéé ti ntiiⁿnyuⁿ yeⁿ'e ley miiⁿ? ⁹ Ní nduuti chí ntiiⁿnyuⁿ yeⁿ'e ley miiⁿ chí dεévéé n'dai ní diiⁿ condenar 'iiⁿ'yāⁿ chí ndai yā, tuu'mi ní ¿'áá nguéé más cá ch'εεte taavi cá ngii ntiiⁿnyuⁿ yeⁿ'é nduudu yeⁿ'é Ndyuūs ndúúcū Espíritu N'dai ti dííⁿ yā aceptar 'iiⁿ'yāⁿ nguéé ti ley miiⁿ? 'Tíicā váá. ¹⁰ Caati 'aara chí dεévε n'dai ley miiⁿ nguéé dεévε chí chí cuuvi tan'dúúcā chí dεévε n'dai ca yeⁿ'é Ndyuūs. Maaⁿ ní ley miiⁿ canee tan'dúúcā chí nguéé dεévéé n'dai. ¹¹ Caati

chí ley miiⁿ chí δεενέέ ní cunee 'áámá tiempo nūⁿ tuu'mi ní chuunee δεενέέ taavi cá nduudu yeⁿé Ndyuūs chííⁿ chí 'áámá cūnee.

¹² Cáávā chuū deenú 'nū chi compromiso chi ngai canéé cueⁿe daāⁿmaⁿ ní 'tíicā cuuvi. Maaⁿ ní caaⁿ'máⁿ 'nū nduudu ngai yeⁿé Ndyuūs ní nguéé 'va'a 'nū mar 'áámá. ¹³ Nguéé diíⁿ 'nū tan'dúucā chi diiⁿ Moisés taachi sндуú yā 'áámá velo naán yā ti 'iiⁿ'yāⁿ Israel nguéé cuuvi snáaⁿ yā naaⁿ Moisés miiⁿ cucáávā δεενε yeⁿe Ndyuūs chi canéé na náaⁿ yā. Δεενέ miiⁿ nguéé chíí 'naaⁿ. ¹⁴ Ní 'iiⁿ'yāⁿ Israel s'eeⁿ nguéé tuumicadiinúúⁿ yā yeⁿe δεενέé chi canéé náaⁿ Moisés miiⁿ. Ndií nguuví 'cūū taachi 'iiⁿ'yāⁿ Israel s'eeⁿ ch'eeⁿ yā compromiso ndiicū miiⁿ, nguεε cuuvi deenú yā caati canéé yā tan'dúucā chi canéé 'aama velo na naán yā. Velo miiⁿ Cristo diiⁿ chí chó'ōo yeⁿē. ¹⁵ Ndií nguuví 'cūū taachí 'iiⁿ'yāⁿ s'eeⁿ 'cueeⁿ yā ley yeⁿe Moisés, cunee velo miiⁿ ti nan'gaadi vaanicadiinūⁿ yeⁿe yā. ¹⁶ Ní ndií taachi cu'téenu yā Señor Jesucristo Daiyá Dendyuūs tuu'mi ní velo miiⁿ ní cuavii. ¹⁷ Señor miiⁿ ní Espíritu yeⁿe Cristo. Ní naachi véé Espíritu miiⁿ yeⁿe Señor miiⁿ tuu'mi ní 'iiⁿ'yāⁿ canéé libre yā. ¹⁸ Maaⁿ ní cáávā chuū nducyaaca yú nguéé snee yú tan'dúucā chí véé 'áámá velo na naaⁿ yú. Maaⁿ ní 'iiⁿ'yāⁿ n'diichi yā δεενε yeⁿe Señor Jesucristo yeⁿe yú na vida yeⁿe yú ti s'uuúⁿ tan'dúucā 'áámá espejo, 'tíicā s'uuúⁿ. Ní taachi n'diichi yú Señor Jesucristo yeⁿē yú tuu'mi ní n'daaⁿ vida yeⁿe yú chí cuuvi tan'dúucā vida yeⁿé Cristo. Ní cūnee ngiinu yú chí n'daāⁿ vida yeⁿe yú tan'dúucā chí ch'εετε ca δεενε vida yeⁿē Señor Jesucristo yeⁿē yú. Chuū chí idiíⁿ Espíritu yeⁿe Cristo cáávā s'uuúⁿ.

4

¹ Deenu yú chí Señor Jesucristo tee yā s'uuúⁿ cosas chí n'dai ca. Cáávā chuū diíⁿ 'nū ntiiⁿnyuⁿ yeⁿé yā ní caaⁿ'máⁿ 'nū nduudu cuaacu yeⁿé yā ní nguεε cuuvi cúunū 'nū. ² Maaⁿ ní nguεε diíⁿ 'nū cosas chí nguεε n'daacā chí cuuvi snááⁿ 'iiⁿ'yāⁿ, cosa chí diíⁿ 'nū chí 'cuináaⁿ 'nū nanááⁿ 'iiⁿ'yāⁿ. Ní nguéé cachiicá 'nu nginnche'éeí 'nū 'iiⁿ'yāⁿ. Ní nguéé ndastaⁿ'á 'nū nduudu cuaacu yeⁿé Ndyuūs ndúucū nduudu yaadi. 'Tíicā idiíⁿ 'nū ní caaⁿ'maⁿ 'nū dámaāⁿ nduudu cuaacu yeⁿé Dendyuūs ní cuuvi deenú nducyaaca 'iiⁿ'yāⁿ, ní Dendyuūs n'diichí yā nús'uu. ³ Nduuti chí 'iiⁿ'yāⁿ nguéé ituumicadiinuuⁿ yā nduudu cuaacu chí ngaⁿ'á 'nū tuu'mi ní 'iiⁿ'yāⁿ miiⁿ nguéé i'téenu yā Señor Jesucristo yeⁿē yú ní cuuvi ndái yā. ⁴ 'iiⁿ'yāⁿ nguéé i'téenu yā Señor Jesucristo caati ndyuūs yeⁿē iⁿ'yeeⁿdí 'cūū chí yááⁿ'nguiinūⁿ n'gaadi sá ná vaadi cadinúúⁿ yeⁿe yā, caati yaaⁿ'nguiinūⁿ nguéé n'gúúⁿ sá chí n'diichí yā δεενε yeⁿe Dendyuūs. Maaⁿ ní 'iicu 'iiⁿ'yāⁿ nguéé snaaⁿ yā δεενé n'dai yeⁿe nduudu yeⁿe Cristo chí δεενε. Ní s'uuúⁿ taachí inaaⁿ yú Cristo miiⁿ inaaⁿ yú Ndyuūs. ⁵ Ní taachi ngaⁿ'á 'nū nduudu yeⁿe Dendyuūs nguéé ngaⁿ'á 'nū nduudu yeⁿe maá 'nū ti ngaⁿ'á 'nū chí Jesucristo miiⁿ ní Señor yeⁿē yú. Tii nús'uu ní dichí've 'nū ndís'tii cucáávā chí Cristo neⁿ'é yā nducyaaca 'iiⁿ'yāⁿ. ⁶ Ní taachi Ndyuūs din'dái yā iⁿ'yeeⁿdí ngaⁿ'a yā 'tíicā: Yeⁿe naachí maaiⁿ miiⁿ canéé δεενε. Maaⁿ Ndyuūs miiⁿ ní diíⁿ yā chí δεενε miiⁿ canéé na staava yeⁿé 'nū. Ní ndúucū δεενε miiⁿ cuuvi deenú 'nū vaadi deenu yeⁿé Ndyuūs chí n'dai taavi ca. Ní nús'uu n'diichí 'nū δεενε yeⁿé Ndyuūs taachi n'diichi 'nū naaⁿ Jesucristo miiⁿ.

Vida yeⁿé 'iiⁿ'yāⁿ chí i'téenu yā Jesucristo

⁷ Ní nduudu cuaacu yeⁿe Ndyuūs chí i'téenu 'nū canéé na staava yeⁿe 'nū tan'dúucā tesoro 'tíicā. Ní 'áará chí cuerpo yeⁿé 'nū tan'dúucā 'cuutí yáⁿ'aa chí nguεε δεενέé, nú'suu ch'iⁿ'í 'nū cáávā ntiiⁿnyuⁿ chí diíⁿ 'nū chí poder chí cānee nduucú 'nū ní ch'εετε ca ní yeⁿé Ndyuūs. Ní nguéé yeⁿē nús'uu. ⁸ 'Áará chí nduū cuaaⁿ n'geenú 'nū ngii mar 'áámá naāⁿ nguéé diíⁿ chí dúú'va 'nū. 'Áará chí n'dee nááⁿ inadacadiinúúⁿ 'nū deenú chεε chí diíⁿ 'nū. ⁹ 'Áará chí 'iiⁿ'yāⁿ ní n'daa yā chí neⁿe 'caaⁿ'núⁿ yā nús'uu Dendyuūs canee yā nduucú 'nū. 'Áará chí 'iiⁿ'yāⁿ cun'dáa yā nús'uu na yáⁿ'aa nguεε 'cuūvi 'nū. ¹⁰ 'Áá tíí nūⁿ cuááⁿ naachi caⁿ'á 'nū cueⁿe daāⁿmaⁿ canee na staava yeⁿé 'nū chí cuuvi 'cuūví 'nū tan'dúucā chí ch'ií Señor Jesucristo yeⁿe yú. Ní 'íicú 'iiⁿ'yāⁿ cuuvi n'diichí yā chí Jesucristo nadanguáⁿ'ai yā nús'uu. Ní cuuvi deenú yā chí Jesucristo canduuchí

yā. ¹¹ Ní nducuéⁿe tiempo chi sндуuchí 'nū na iⁿ'yeeⁿdí 'cūū deenú 'nū chi cuuvi 'cuuvi 'nū cucáāvā chi nús'uu diiⁿ 'nū ntiⁿ'nyuⁿ yeⁿ'e Cristo. Ní 'íicú 'iiⁿ'yāⁿ cuuvi n'diichí yā chi poder yeⁿ'e Cristo Jesús canéé ndúúcu nús'uu. ¹² 'Tíicā ní vaadi n'gii diiⁿ ntiⁿ'nyuⁿ yeⁿ'ē na vida yeⁿ'é 'nū 'tiicá ntuūⁿ vida cueⁿ'e daāⁿmaⁿ diiⁿ ntiⁿ'nyuⁿ yeⁿ'ē na vida yeⁿ'é ndís'tiī.

¹³ 'Tíicā canéé nguūⁿ na libro yeⁿ'é Ndyuūs ndii cuááⁿ vmnaaⁿ: 'Úú i'teenú, ní cáāvā chiiⁿ chi ngaⁿ'á. Ní 'tiicá ntúūⁿ nús'uu i'téenu 'nū ní cáāvā chuū ngaⁿ'á 'nū. Ní daama chi'téenu 'nū ndúúcu yā. ¹⁴ Caati deenu yú chi 'iiⁿ'yāⁿ chi nadacuéⁿe yā Señor Jesucristo yeⁿ'e nguaaⁿ tinaⁿ'ā, 'iiⁿ'yāⁿ miiⁿ nadacuéⁿe ntúūⁿ yā s'uuúⁿ yeⁿ'e nguaaⁿ tináⁿ'ā. Ní Dendyuūs candéé yā nús'uu ndúúcu ndís'tiī nanááⁿ Jesucristo. ¹⁵ Nducuéⁿe chi diiⁿ 'nū ní cucáāvā chi ndís'tiī cuuvi cuta'á nī tanducuéⁿ'ē chí n'dai. Ní 'íicú n'dee 'nááⁿ 'iiⁿ'yāⁿ cuuvi cuta'á yā cosa chi n'dai yeⁿ'é Dendyuūs. Ní n'dee n'dái 'iiⁿ'yāⁿ cuuvi caaⁿ'maⁿngua'á yā, ní ca'a yā gracia, Dendyuūs, ní cuuvi ch'ετε cá yā Dendyuūs chi δεεε taavi ca.

¹⁶ Cáāvā nducuéⁿ'ē chuū nguéé ngii cúunu yú 'aara chi cuerpo yeⁿ'e yú n'gii néén nguuvi nguuvi naati Dendyuūs téé yā fuerzas s'uuúⁿ nguuvi nguuvi. ¹⁷ Níicú chuū chi n'geenu yú ngii na iⁿ'yeeⁿdí 'cūū nguéé ch'ετε ní nuuⁿ nūuⁿ chó'ōo, ní diiⁿ cáāvā s'uuúⁿ chí véé yeⁿ'e yú 'aama lugar chí n'dεεε n'dai ca ní n'deē ca chi 'áámá cunee cueⁿ'e daāⁿmaⁿ. ¹⁸ Maaⁿ ní nguεε diiⁿ yú cuenta yeⁿ'e dendu'ū chi inaaⁿ yú ti chíⁿ chí inaaⁿ yú ní ngo'o yéⁿ'ē. Naati chíⁿ chí nguéé inaaⁿ yú cunee cueⁿ'e daāⁿmaⁿ.

5

¹ Maaⁿ ní deenu yú chi cuerpo yeⁿ'e yú 'cuiinu ti tan'dúúca 'áámá va'ai chi nguéé 'áámá cūnee 'tíicā cuerpo yeⁿ'e yú naati Ndyuūs idin'dái yā 'aama va'āi yeⁿ'e yú ná va'ai chεeti nguuvi chí 'áámá cūnee. Ní nguéé saⁿ'ā yeⁿ'e iⁿ'yeeⁿdí 'cūū din'dái sa ndúúcu ta'a sa va'ai miiⁿ. ² Maaⁿ ní chí n'dai yiinu yú ti nééné neⁿ'é yú n'daaⁿ yú cuerpo yeⁿ'e yú ní snee yú na va'ai chεeti nguūvī ndúúcu cuerpo ngai ní δεεε chi yeⁿ'e va'ai chεeti nguuvi. ³ Nguuvi miiⁿ ní Ndyuūs ca'á yā chi téé yā 'aama cuerpo ngai yeⁿ'e yú chi tan'dúúca chi 'aama vestido. Ní Ndyuūs nguéé cuuvi ndaacá yā s'uuúⁿ chi nguéé chí δεεε cuerpo yeⁿ'e yú. ⁴ Neⁿ'e chi snée yú na iⁿ'yeeⁿdí 'cūū na va'ai yeⁿ'e yú chí cuerpo yeⁿ'e yú, nandái yiinu yú ti n'geenu yú ngii. Nguéé cucaavā chi neⁿ'e yú chi cuerpo ndiicúu yeⁿ'e yú 'cuūvī naati neⁿ'e yú chí Ndyuūs téé yā chi'caadí na cuerpo yeⁿ'e yú chí ngai chí tan'dúúca chí catecai ngai yú. Ní 'iicú cuerpo ndiicúu yeⁿ'e yú yeⁿ'ē iⁿ'yeeⁿdí 'cūū ní 'cuiinu ti snée yú ndúúcu cuerpo chí ngai ní véé vida cueⁿ'e daāⁿmaⁿ yeⁿ'e yú. ⁵ Ní cáāvā chuū ní Ndyuūs ch'iindiyaáⁿ yā yeⁿ'e yú cuerpo chí ngai ní tee yā Espíritu N'dai yeⁿ'e yā s'uuúⁿ chi cuuvi deenu yú chi cuaacu chi tee yā chuū chi cuuvi yeⁿ'e yú.

⁶ 'Tíica rā va, cueⁿ'e daāⁿmaⁿ véé confianza yeⁿ'e yú ndúúcu Dendyuūs. Deenu yú chi neⁿ'e chi snée yú na iⁿ'yeeⁿdí 'cūū ndúúcu cuerpo ndiicúu yeⁿ'e yú nguéé cuuvi cunee yú ndúúcu Señor yeⁿ'e yú na va'ai chεeti nguuvi. ⁷ Maaⁿ ní chiiⁿ chí diiⁿ yú, diiⁿ yú ti i'teenu yú Jesucristo ní nguéé idiiⁿ yú cucáāvā chi n'diichi yú cosa chi yeⁿ'ē iⁿ'yeeⁿdí 'cūū. ⁸ 'Íicú vεε confianza yeⁿ'ē yú. Neⁿ'e yú caⁿ'a yú yeⁿ'ē vaacu yú chi cuerpo ndiicúu yeⁿ'e yú ní cunee yú ndúúcu cuerpo ngai yeⁿ'e yú na va'ai chεeti nguuvi ndúúcu Señor yeⁿ'ē yú. ⁹ Cáāvā chuū neⁿ'e yú diiⁿ yú cueⁿ'e daāⁿmaⁿ chiiⁿ chí Ndyuūs neⁿ'é yā chí diiⁿ yú nduuti chí snée yú na va'āi yeⁿ'e yú na iⁿ'yeeⁿdí 'cūū o nduuti chí snée yú na va'āi yeⁿ'e yú na va'āi chεeti nguuvi ndúúcu Señor Jesucristo. ¹⁰ Ti 'tíicā nducyaaca yú canee chí naⁿ'a yú nanááⁿ juez chí Cristo ní 'íicú ca'aama ca'aama s'uuúⁿ cuuvi cuta'ā yú chuū chí cuuvi yeⁿ'ē yú tan'dúúca chí diiⁿ yú ntiⁿ'nyuⁿ yeⁿ'é yā neⁿ'e chí snee yú na cuerpo ndiicúu yeⁿ'e yú na iⁿ'yeeⁿdí 'cūū, nduuti chí ntiⁿ'nyuⁿ chí n'daacā o nguεε n'daacā.

Nduudu cuaacu yeⁿ'e vaadi 'diiⁿ

¹¹ Nús'uu ní deenú 'nū chí Señor Jesucristo caⁿ'á yā n'diichí yā nducyaaca 'iiⁿ'yāⁿ. Ní neⁿ'é 'nū diiⁿ 'nū n'daacā. Ní cáāvā chuū ní nús'uu diitu diiⁿ 'nū nducuéⁿ'ē chí ch'iⁿ'í 'nū 'iiⁿ'yāⁿ chí ngaⁿ'á 'nū nduudu cuaacu yeⁿ'e Señor Jesucristo. Ndyuūs déenu yā chiiⁿ chí

diín 'nū ní cunee ngiinú 'nū chi ndís'tiī cuuvi déénu nī chuū dendu'ū. ¹² Nguéé nga'n'á 'nu taama vmné'n'ēe ye'n'e vida ye'n'é 'nū nanáán ndís'tiī naati ca'á 'nū 'áámá lugar ndís'tiī ti cuuvi caa'n'mán nī chi n'daacā idiín 'nū. Nga'n'á 'nū nduudu cuaacu nanáán ndís'tiī. Maa'n ní iicu ndís'tiī cuuvi nan'gucēcútá'n'a nī ye'n'e 'ii'n'yān chi itiinguuneé'n nī, 'ii'n'yān chi nga'n'a yā ye'n'e maán yā chi n'daacā yā tan'dúúcā chi taná'n'ā 'ii'n'yān snaa'n yā, ní 'ii'n'yān mii'n nguéé nacádiinúú'n yā ye'n'ē chíín chi vεε na staava ye'n'é yā. ¹³ Ní nduuti chi nadacadiinúú'n nī chi nús'uu tan'dúúcā loco nús'uu, 'tíicā nga'n'á 'nū ní diín 'nū chi Ndyuūs ní ch'εεtē yā nanáán ndís'tiī. Ní nduuti chí nguéé loco 'nū ní cáávā chi diín 'nū ntii'nyu'n ye'n'e Ndyuūs cucáávā ndís'tiī. ¹⁴ Jesucristo nga'n'a ntii'nyu'n ye'n'é 'nū ti ne'n'é yā nús'uu. Deenu yú chi cuaacu chi 'áámá sa'n'a chi Cristo ch'iī sa, ní cucáávā sa'n'ā mii'n ní tan'dúúcā chi nducyaaca 'ii'n'yān ní ch'iī. ¹⁵ 'Tíicā Cristo ch'iī yā cucáávā nducyaaca 'ii'n'yān maa'n ní 'ii'n'yān chi snéé yā na i'n'yee'dí 'cūū. 'ii'n'yān s'ee'n 'āā ntéé snéé yā cucáávā vida ye'n'e maán yā caati snéé yā ye'n'e Jesucristo chi ch'iī yā ní nduuchi ntuu'n yā ye'n'e nguaa'n tiná'n'ā cucáávā 'ii'n'yān. ¹⁶ Maa'n ní cáávā chuū chi chó'ōo nús'uu nguéé inaán 'nū 'téé ye'n'ē 'ii'n'yān tan'dúúcā taná'n'ā 'ii'n'yān ye'n'ē i'n'yee'dí 'cūū. Tiempo chi 'āā chó'ōo nús'uu inaán 'nū Cristo ndúúcū ye'n'ē chi diín yā taachi canee yā na i'n'yee'dí 'cūū naati maa'n ní nguεε inaán 'nū 'tíicā. Inaán 'nū chi Cristo ní Ndyuūs. ¹⁷ 'Tíicā ní 'ii'n'yān chi i'téénu yā Cristo ní ye'n'é Cristo. Ní 'ii'n'yān mii'n 'áámá 'ii'n'yān ngai. Cosas chi diín yā vmnaa'n nguéé diín yā maa'n ti nducué'n'ē chí diín yā ní ye'n'e vida ngai ye'n'e yā.

¹⁸ Ní tanducue'n'ē chúū ní Ndyuūs diín yā. Cucáávā Cristo mii'n ní Ndyuūs diín yā chi s'uuú'n ní ye'n'é yā s'uuú'n ní nguéé contra ye'n'e yā s'uuú'n. Ní Ndyuūs nga'n'a ntii'nyu'n yā ye'n'é 'nū chi caa'n'mán 'nū nduudu ye'n'é yā chí 'ii'n'yān na i'n'yee'dí 'cūū cuuví ye'n'é yā 'ii'n'yān. ¹⁹ 'Tíicā canee chi caa'n'mán 'nū nduudu cuaacu ye'n'e Cristo chi 'ii'n'yān s'ee'n cuuvi ye'n'é yā 'ii'n'yān. Ní cucáávā Cristo mii'n Ndyuūs diín yā chí véé vaadí 'diiín nguaa'n 'ii'n'yān nduucú yā. Ní nguéé diín Ndyuūs cuenta ye'n'e nuu'ndi ye'n'e 'ii'n'yān s'ee'n. Níicu Ndyuūs tee yā nús'uu ntii'nyu'n chi caa'n'mán 'nū nduudú 'cūū ye'n'é yā chí vaadí 'diiín. ²⁰ Maa'n ní 'tíicā ndaá 'nū nanáán ndís'tiī ndúúcū nduudu ye'n'e Cristo ní caa'n'mán 'nū nduudu mii'n na lado ye'n'e Ndyuūs. Ní tan'dúúcā chi Cristo nga'n'á yā chí ndaacadaamí nī, cáávā chuū nús'uu ngiicá 'nū ndís'tiī cááva Cristo chí ndaacadaamí nī ye'n'e nuu'ndi ye'n'é nī ní 'íicú véé vaadí 'diiín ye'n'e ndís'tiī ndúúcū Ndyuūs. ²¹ Cristo nguéé dinuu'ndí yā mar 'áámá. Caati cucáávā s'uuú'n Ndyuūs diín cuenta yā ní diín yā tan'dúúcā chí Cristo dinuu'ndí yā. Ní 'íicú taachi ye'n'e Cristo s'uuú'n Ndyuūs n'diichí yā s'uuú'n chí nduuví n'dai vida ye'n'ē yú nanáán yā.

6

¹ 'Tiicá ntúū'n nús'uu diín 'nū ntii'nyu'n tan'dúúcā chí ntii'nyu'n chí ne'n'e Ndyuūs. Ngiiicá 'nū ndís'tiī chí cuta'á nī vaadí n'dai chí itée Ndyuūs chí vaadí n'dai chí Ndyuūs ch'i'n'í yā s'uuú'n. ² Caati 'tíicā Ndyuūs nga'n'a yā. Ni canéé nguū'n na libro ye'n'é yā: 'Úú ch'iindiveé'n nduudu ye'n'é nī tiempo chí n'daacā. Ní chinneé ndís'tiī nguuvi chí nangua'n'ái nī.

Nguuvi 'cūū ní 'áámá nguuvi chí cuuvi n'dai cáávā ndís'tiī, nguuvi 'cūū ní nguuvi chí cuuvi nangua'n'ai nī.

³ Maa'n ní nguéé diín 'nū mar 'áámá cosa chí di'vaachí 'ii'n'yān ti 'ii'n'yān cuuvi caa'n'mán yā chí ntii'nyu'n ye'n'e Ndyuūs chí diín 'nū nguéé n'daacā. ⁴ Naati diín 'nū nducué'n'ē ntii'nyu'n mii'n chí n'daacā ti ne'n'é 'nū ch'i'n'í 'nū nducyáácá 'ii'n'yān chí ntii'nyu'n chí diín 'nū ní ye'n'e Ndyuūs. Ní cucáávā ntii'nyu'n mii'n chí chéé 'nū ye'n'e nducué'n'ē chí ch'eenú 'nū chíi nguuvi nguuvi. Ní neéné n'deēe dendu'ū chíín chí di'vaachi nús'uu ndúúcū chí vεε necesidades ye'n'é 'nū ndúúcū vaadí 'caa'va. ⁵ Ní ch'e'n'é yā nús'uu chí cu'néé'n yā nús'uu na vacūū. Ní neené 'yaa'n 'ii'n'yān nduuvidaamá yā ye'n'e chí ne'n'e 'cuen'e yā nús'uu. Ní diín 'nū n'deeé n'dái ntii'nyu'n chí neéné díitūu. Ní cho'ōo 'náán nguuvi chí nguéé cheetiyaadú 'nū, ní nguéé che'e 'nū va. ⁶ Níicú nducué'n'ē dendu'ū chuū ní ch'i'n'í 'nū 'ii'n'yān chí vida ye'n'é 'nū ní n'daacā. Ní ch'i'n'í 'nū chí deenú 'nū nduudu cuaacu ye'n'é

Ndyuūs. Ní diín 'nū ntiinnyuⁿ miiⁿ ndúúcuⁿ vaadī ngiīnū ní ndúúcuⁿ vaadī n'dai. Ní diín 'nū nducuéⁿē cucáávā Espíritu N'dai yeⁿé Ndyuūs canee nduucú 'nū. Diín 'nū túúcā ti cuaacu níⁿnyúⁿ dineⁿé 'nu nducyaaca 'iiⁿyāⁿ. ⁷ Ní ngaⁿ'á 'nū nduudu cuaacu cucáávā poder yeⁿe Ndyuūs chi canee nduucú 'nū ní caavā chi n'daacā canee 'nū nanááⁿ Ndyuūs. 'Tíicā diín 'nū. Ní diín 'nū defender nús'uu ndúúcuⁿ vaadī cuaacu. Ndúúcuⁿ vaadī cuaacu miiⁿ ní tan'dúúca chi ndéé 'nū 'áámá machete chí 'uúvi lados 'caaiⁿ ní diín 'nū defender nús'uu nduucú. 'Tíicā diín 'nū. ⁸ Ní náⁿ'ā 'iiⁿyāⁿ ngaⁿ'á yā chí n'dái 'nū ní tanáⁿ'a yā ngaⁿ'á yā chi nguée n'dái 'nū. Ní náⁿ'ā 'iiⁿyāⁿ ngaⁿ'á n'daaca yeⁿé 'nū ní tanáⁿ'a yā nguée ngaⁿ'a n'daaca yeⁿé 'nū. 'Áámá tiempo ní diín yā tratar nduucú 'nū tan'dúúca chi ngaⁿ'á 'nū nduudu yaadi ní taama tiempo tan'dúúca chi ngaⁿ'á 'nū chi cuaacu. ⁹ Ní 'áámá tiempo 'iiⁿyāⁿ diín yā tan'dúúca chi nguée n'diichí yā nús'uu 'tíicā diín yā, ní táámá tiempo diín yā tan'dúúca chi nús'uu amigos yeⁿé yā, 'tíicā diín yā. Ní n'dee n'dái tiempo cuuví 'cuúvi 'nū ní nguée 'cuúvi 'nū. Ní tee yā nús'uu 'áámá castigo chi neené díitū n'dee n'dái tiempo naati nguεε 'caaⁿnúⁿ yā nús'uu. ¹⁰ 'Áará chí di'vaachí yā nús'uu, nús'uu ní yeenú 'nū. 'Áará chí pobre nús'uu, diín 'nū ntiinnyuⁿ ni n'dee n'dái 'iiⁿyāⁿ véé vaadī 'cuiica yeⁿé yā. 'Áará chí nguée de'ε véε yeⁿé 'nū nducuéⁿē chi véé ní yeⁿé 'nū.

¹¹ Ndís'tiī hermanos yeⁿe yú yeⁿe yāāⁿ Corinto, dinguúⁿ 'nū nduudu yeⁿé 'nū yeⁿe nducuéⁿē chi véé tan'dúúca chi véé ca. Ní nduudu miiⁿ cachiica yeⁿē staava yeⁿé 'nū ti neⁿé 'nū ndís'tiī. ¹² Nús'uu ch'iⁿ'í 'nū nducuéⁿē chi canee na staava yeⁿé 'nū naati ndís'tiī nguée diín nī 'túúcā nduucú 'nū ti nguée ch'iⁿ'í nī nús'uu chi neⁿé nī nús'uu ndúúcuⁿ núúⁿmáⁿ staava yeⁿé nī. ¹³ Nús'uu ngiica 'nū ndís'tiī tan'dúúca 'áámá chiida ngiica yā daiya yā 'tíicā ngiica 'nū ndís'tiī ti cuuví dinéⁿe nī nús'uu ndúúcuⁿ núúⁿmáⁿ staava yeⁿé nī. Ní ndís'tiī cuuví caaⁿmáⁿ nī nduudu cuaacu yeⁿé nducuéⁿē tan'dúúca chi nús'uu diín 'nū ndúúcu nī.

Cuerpo yeⁿe yú miiⁿ ní yáacū yeⁿé Ndyuūs chí canduuchi

¹⁴ Ndís'tiī, nguée caⁿ'á nī ndúúcuⁿ 'iiⁿyāⁿ chí nguée i'téenu yā Jesucristo ti nguée cuuvi diín nī dáámá ntiinnyúⁿ ndúúcu yā. Ní diín nī tan'dúúca 'áámá yunta chí nguεε daamá tī, 'tíicā diín nī. ¿'Áá cuuví cuuvi dáámá chí n'daacā ndúúcuⁿ chí nguεε n'daacā? O ¿'Áá daama canee chí dεεve ndúúcuⁿ chí maāiⁿ? Nguée cuuvi. ¹⁵ ¿'Áá cuuvi nduuvidaamá Cristo ndúúcuⁿ Satanás? O ¿'Áá daama véε parte yeⁿe 'iiⁿyāⁿ chí i'téenu yā Cristo ndúúcuⁿ 'iiⁿyāⁿ chí nguée i'téenu yā Cristo? Nguée cuuvi. ¹⁶ ¿'Áá nduuvidaama templo yeⁿe Ndyuūs ndúúcuⁿ ídolos? Nguée cuuvi. Cuerpo yeⁿe ndís'tiī ní yáacū yeⁿé Ndyuūs. Ndyuūs maáⁿ yā ngaⁿ'a yā na libro yeⁿé yā 'tíicā:

'Úú Ndyuūs canee nduucú 'iiⁿyāⁿ yeⁿé ní cachiicá nguaaⁿ 'iiⁿyāⁿ yeⁿé. 'Úú ní cuuvi Ndyuūs yeⁿé yā ní 'iiⁿyāⁿ cuuvi 'iiⁿyāⁿ yeⁿé.

¹⁷ Cááva chuū Ndyuūs ngaⁿ'á yā ní canee nguūⁿ 'tíicā:

Nan'dáa nī nguaaⁿ 'iiⁿyāⁿ s'eeⁿ ní diví nī yeⁿe 'iiⁿyāⁿ s'eeⁿ. 'Tíicā ngaⁿ'a Señor 'iivú Ndyuūs. Nguée tuu'ví nī dendu'ū chí vaatí. Ní 'iicu 'úú Ndyuūs diín aceptar ndís'tiī.

¹⁸ Ni 'úú Ndyuūs cuuví Chiidá nī. Ní ndís'tiī cuuvi daiyá ndís'tiī, 'tíicā ngaⁿ'a 'iivú Ndyuūs caati nducuéⁿē poder chí véé ní yeⁿé yā.

7

¹ 'Tiicá ndís'tiī hermanos yeⁿé chí neené neⁿé. Nducuéⁿē chuū ní promesa chí Ndyuūs téé yā s'uúuⁿ. Cáávā chuū canee ntúūⁿ chí diín yú ndúúcuⁿ cuerpo yeⁿé yú ní ndúúcuⁿ espíritu yeⁿé yú nducuéⁿē chí n'daacā 'iicu ní dεεve yú. Ní nguée diín yú mar 'áámá cosa chí nguée n'daacā ti véε nuūⁿndí yeⁿé yú. Ní néⁿé chí canduuchi yú na iⁿ'yeeⁿdí 'cūū canee chí diín yú chí dεεve ca yú tan'dúúca chí neⁿe Ndyuūs. 'Tíicā diín yú ti 'va'a yú Ndyuūs.

'Iiⁿyāⁿ chí i'teenú yā Cristo na yāāⁿ Corinto nanguεεcunée yā din'daacá yā

² Maaⁿ ní ngiica 'nū ndís'tiī chi 'cuáaⁿ nī nduudu yeⁿ'é 'nū na staava yeⁿ'é nī. Nús'uū nguεε diiⁿ daño 'nū yeⁿ'ē mar 'áamá nī, ndíi nguée díiⁿ 'nū chi diiⁿ nuuⁿndí nī ndíi nguée nginnche'éi 'nū mar 'áamá 'iiⁿ'yāⁿ. ³ 'Úú nguεε ngaⁿ'á chuū ti díiⁿ condenar ndís'tiī chi nguée n'daacá nī. Naati tan'dúúcā chi ngaⁿ'á vmnááⁿ vmnaaⁿ, neⁿ'é taavi ndís'tiī. Ní canee yú tan'dúúcā chi daama snée yú. 'Tiicá ntúūⁿ ní canduuchi yú daama vida yeⁿ'ē yú na iⁿ'yeeⁿdí 'cūū ní dáamá 'cuūvi yú. ⁴ Vεε 'viich'εetiínúúⁿ n'dai yeⁿ'é ndúúcu nī ní yeenú yeⁿ'e nī. Ní maaⁿ ní ndúúcu nducuéⁿ'ē chi ch'eenú chii nguée di'vaachi 'úú ti neéné véé vaadi yeenú yeⁿ'é.

⁵ Ní ndíi tiempo taachi ndaá 'nū na yáⁿ'āa Macedonia nguée ntaavi'tuūnuúⁿ cuerpo yeⁿ'é 'nū naati n'geenú 'nū ngíi nducuéⁿ'ē cuaaⁿ. Ní nguⁿ'u 'iiⁿ'yāⁿ nduucú 'nū ní di'va'á 'nū na staava yeⁿ'é 'nū. ⁶ Naati Ndyuūs chi ca'a yā 'viich'εetiínúúⁿ 'iiⁿ'yāⁿ chi chicuūnū, maaⁿ Ndyuūs ní tee yā 'viich'εetiínúúⁿ nús'uu taachi ndaā saⁿ'ā Tito hermano yeⁿ'é 'nū. ⁷ Nguée dámaāⁿ caavā chi ndaā saⁿ'ā Tito miiⁿ ti cáávā chi chiiⁿ sá chi ndís'tiī ca'a nī 'viich'εetiínúúⁿ saⁿ'ā miiⁿ. Ní saⁿ'ā miiⁿ yaa'vi sá nús'uu chi ndís'tiī neené neⁿ'é nī n'diichi nī nús'uu, ní neene dindaachí nī yeⁿ'é 'nū ndii ná stááva yeⁿ'é nī. Ní neené neⁿ'é nī díiⁿ nī nducuéⁿ'ē chi 'úú neⁿ'é chi díiⁿ nī. Ní cucáávā chíiⁿ ní yeenú taavi ca.

⁸ Vmnááⁿ vmnaaⁿ díiⁿ sentir yeⁿ'e carta chi dinguúⁿ yeⁿ'é nī. 'Aara chi s'neeⁿ ndaachi yiinu nī cáávā carta miiⁿ. Maaⁿ ní nguée díiⁿ sentir yeⁿ'e chi dinguúⁿ yeⁿ'é nī. Vmnaaⁿ vmnaaⁿ nduuti chi s'neeⁿ ndaachi núúⁿ nī, deenú chi carta miiⁿ diiⁿ chí ch'εetinée ndaachí nī 'áamá tiempo nūⁿ. ⁹ Maaⁿ ní véé vaadi yeenú yeⁿ'é. Nguée cucáávā chi s'neeⁿ ndaachi núúⁿ nī naati s'neeⁿ ya'ai 'iinú nī taanduvée ní ndaacadaamí nī yeⁿ'e nuuⁿndi chi díiⁿ nī. Ní ndís'tiī s'neeⁿ ndaachí nī tan'dúúcā chi Ndyuūs neⁿ'e yā chi díiⁿ nī ní 'íicú nús'uu nguée díiⁿ 'nū mar 'áamá chi cuuvi ndái nī cucáávā nús'uu. ¹⁰ Caati chíiⁿ chi díiⁿ Ndyuūs chi inee ya'ai 'iinú yú ní diiⁿ chi ndaacadaami yú yeⁿ'e nuuⁿndi yeⁿ'e yú ní nnguaⁿ'ai yú. Ní 'íicú cáávā chuū nguée diiⁿ yú chi cunée ya'āi 'íinu yú yeⁿ'e chi nadacadaami yú yeⁿ'ē nuuⁿndi yeⁿ'e yú. 'Iiⁿ'yāⁿ chi nguée i'téenu yā Ndyuūs ní ndaachi canee yā na iⁿ'yeeⁿdí 'cūū ní 'cuūvi yā cueⁿ'e daāⁿmaⁿ. ¹¹ Naati ndís'tiī cucheε nī chi inée ndaachí nī. N'diichí nī maaⁿ ntiinⁿnyuⁿ yeⁿ'e vaadi ndaachi táácā idiiⁿ na vida yeⁿ'é nī. ¿'Áá diiⁿ chi nadacadiinúúⁿ nī n'daacā yeⁿ'e nuuⁿndi chi díiⁿ nī ní caaⁿ'máⁿ nī chi nguεε n'daacā idiíⁿ nī? ¿'Áá diiⁿ chi ndís'tiī nguée canee yiinu nī yeⁿ'e chíiⁿ chi díiⁿ nī? ¿'Áá 'va'á nī cucááva nuuⁿndi chi díiⁿ nī? Cuayiivi ní neⁿ'é nī n'diichí nī 'úú ní neⁿ'é nī chi ca'a castigo yeⁿ'e 'iiⁿ'yāⁿ chi dinuuⁿndí yā. Ní yeⁿ'ē nducueⁿ'é chuū ch'iⁿ'í nī ndúúcu chiiⁿ chi díiⁿ nī chi ndís'tiī díiⁿ nī chíiⁿ chí n'daacā. ¹² 'Tíicā taachi dinguúⁿ carta miiⁿ yeⁿ'e ndís'tiī, nguée dinguúⁿ cáávā 'iiⁿ'yāⁿ chi dinuuⁿndi o cáávā 'iiⁿ'yāⁿ chi ch'eenú yā chii caavā nuuⁿndi miiⁿ. Dinguúⁿ yeⁿ'e nī ti ndís'tiī cuuvi deenú nī chi nús'uu ní n'giⁿ'í 'nū chi véé cuidado yeⁿ'é 'nū ndúúcu ndís'tiī nanááⁿ Dendyuūs. ¹³ Ní cáávā chuū sta'á 'nū 'viich'εetiínúúⁿ yeⁿ'é ndís'tiī. Nguée dámaāⁿ chi sta'á 'nū 'viich'εetiínúúⁿ yeⁿ'é ndís'tiī naati saⁿ'ā Tito miiⁿ diiⁿ sá chi yeenú taavi 'nū taachi yaa'vi sá nús'uu yeⁿ'é nī tan'dúúcā ndís'tiī díiⁿ nī ndúúcu sa. Ní yeenú taavi sā. ¹⁴ 'Úú ngaⁿ'á ngīi saⁿ'ā Tito miiⁿ chi ndís'tiī ní n'daacá nī ní 'caandiveéⁿ nī nduudu yeⁿ'e carta miiⁿ. Ní nguεε 'cuinaáⁿ cucáávā chi ngaⁿ'á 'tuucā yeⁿ'é nī ti 'tíicā díiⁿ nī. Nducuéⁿ'ē chi ngaⁿ'á 'nū ndúúcu ndís'tiī ní nduudu cuaacu. 'Tiicá ntúūⁿ nduudu chi ngaⁿ'á 'nū ngíi 'nū Tito miiⁿ yeⁿ'é ndís'tiī ní chiiⁿ chi n'giindiveéⁿ nī nduudu yeⁿ'e carta miiⁿ ní 'tíicā díiⁿ nī. ¹⁵ 'Tiicá ntúūⁿ Tito miiⁿ dineⁿ'e cá sa ndís'tiī taachi nan'gaācu sa yeⁿ'ē ndís'tiī tan'dúúcā ndís'tiī ch'iindiveéⁿ nī nduudu yeⁿ'ē sa ní díiⁿ nī 'tuucā. Ní ndís'tiī ní 'cuúⁿ nī saⁿ'ā miiⁿ ní din'daaca nī caatí 'va'a nī. ¹⁶ Cáávā chuū véé 'viich'εetiínúúⁿ yeⁿ'é ndúúcu ndís'tiī yeⁿ'e tanducuéⁿ'ē dendu'ū chi díiⁿ nī.

8

Tiⁿ'yāⁿ ca'á yā n'dee n'daí ofrenda

¹ Ndís'tiī, hermanos yeⁿ'é, maaⁿ ní caaⁿ'máⁿ 'nū ndís'tiī ti deenú nī yeⁿ'e vaadi n'dai ch'εete yeⁿ'é Dendyuūs ní táácā chi díiⁿ 'nū ntiinⁿnyuⁿ yeⁿ'ē na nducuéⁿ'ē yaacū yeⁿ'é

Ndyuūs chi snee na nducuéⁿē yáⁿāa yeⁿe Macedonia. ² 'Aara chi 'iiⁿyāⁿ s'eeⁿ yeⁿe yáacū s'eeⁿ diitū n'dái n'geenú yā ngiī cucáāvā chi ch'ó'ōo yeⁿe yā yeenú taavi cá yā. Ní 'áará chi pobre yā ca'á yā n'dee n'dái ofrenda tan'dúúcā chi 'áámá 'iiⁿyāⁿ chi 'cuiica, 'tíica dííⁿ yā caava hermanos chi snée yā na yáⁿāa Judea. ³ 'Úú ngaⁿ'á nduudu cuaacu yeⁿé yā. Ndúúcū núúⁿmáⁿ staava yeⁿé yā ca'á yā ofrenda, ní ca'á yā nducuéⁿē chi cuuví yeⁿe yā. Ní ndii ca'á yā más cā chi cuuví yeⁿe yā. ⁴ Caⁿ'a diitú yā ndúúcu 'nū chi 'cuaaⁿ 'nū ofrenda chi 'áámá ayuda yeⁿe chi cuuvi yeⁿe hermanos yeⁿé yú chi nguéeⁿ véé yeⁿe yā ní ca'á 'nū hermanos s'uuúⁿ. ⁵ Ní dííⁿ yā más cā chi cunee ngiinú 'nū chi dííⁿ yā. Vmnaáⁿ vmnaaⁿ ca'á yā vida yeⁿe maáⁿ yā na ta'a Señor Jesucristo yeⁿé yú. Ní cuayivi, tan'dúúcā chi Ndyuūs neⁿé yā chi dííⁿ yā, 'iiⁿyāⁿ s'eeⁿ téé yā vida yeⁿé yā nús'uu chi dííⁿ yā ntiiⁿnyuⁿ cáávā nús'uu. ⁶ Nducuéⁿe chuū vmnaáⁿ vmnaaⁿ cuuví 'nū Tito ní dicho'ó 'nū saⁿ'ā chi caaⁿ'maⁿ yā yeⁿe ofrendá yeⁿé ndís'tiī. 'Tiicá ntúūⁿ maaⁿ ní dicho'ó 'nū Tito chi 'cuiū n'ntiiⁿnyuⁿ miiⁿ ní cutá'a sa ofrenda yeⁿé nī chi ntiiⁿnyuⁿ chi n'dai taavi chi yeⁿé Ndyuūs. ⁷ Ní ndís'tiī ní tan'dúúcā chi 'cuiicá nī 'tiicá nī ti i'téenu cá nī Ndyuūs. Ní ngaⁿ'a cá nī nduudu cuaacu, ní déenu cá nī. Ní néené neⁿé nī cunee nī nús'uu, ní neⁿé nī nús'uu. Maaⁿ ní neⁿé 'nū chi ndís'tiī ní ca'a cá nī ofrenda yeⁿé nī ní din'dai ca ntiiⁿnyúⁿ 'cū chi cunee nī hermanos yeⁿe yú.

⁸ 'Úú nguéeⁿ ca'á orden yeⁿé chuū. Dámaāⁿ neⁿé chi deenú nī tan'dúúcā chi diiⁿ tanáⁿā hermanos yeⁿe yáⁿāa yeⁿe Macedonia ní 'íicú cuuvi deenú chi cuaacu chi ndís'tiī dinéⁿe nī Ndyuūs caavā ofrenda chi ca'á nī. ⁹ Ní ndís'tiī ní 'āā deenú nī chéé chí vaadi n'dai taavi ca yeⁿé Señor Jesucristo yeⁿé yú. Cristo miiⁿ 'āā 'cuiicá yā naati dííⁿ yā chi pobre yā cucáāvā chi néⁿe yā s'uuúⁿ. Ní 'íicú ndís'tiī cuuvi cuta'á nī vaadi 'cuiica yeⁿé yā cáávā Cristo chi dííⁿ yā chi pobre yā.

¹⁰ Ní yeⁿé ofrenda 'cū 'úú yaa'vi neéⁿ ndís'tiī chuū. N'daacā ca chi 'cuiinú nī chεε chi dííⁿ nī nduuyu chi 'āā ch'ó'ōo. Ndís'tiī ní vmnaáⁿ vmnaaⁿ 'iiⁿyāⁿ chi dííⁿ yā 'tuucā ní 'tíicā ní neⁿé chi di'cuiinú nī yeⁿe ofrenda miiⁿ nguuvi chi cuchíi. ¹¹ Maaⁿ ní dííⁿ nī 'tiicā ní di'cuiinú nī ntiiⁿnyuⁿ yeⁿe nī chi 'āā neⁿé nī tan'dúúcā chi cuchíi nī diiⁿ nī ndii cuááⁿ vmnaaⁿ. Ní ca'á nī ofrenda chεε chi cuuvi dííⁿ nī. ¹² Ní nduuti chi 'áámá ndís'tiī cuaacu níⁿnyúⁿ neⁿé nī ca'a nī ofrenda, tuu'mi ní Ndyuūs dííⁿ yā aceptar ofrenda yeⁿé nī ní diiⁿ cuenta yā yeⁿé chi véé yeⁿé nī nguéeⁿ yeⁿe chi nguéeⁿ véé yeⁿé nī.

¹³ 'Úú nguéeⁿ neⁿé chi ndís'tiī ca'á nī más cā ofrenda chi cuuví nī nī 'āā ntéé véé necesidades yeⁿé nī cucáāvā chi inneé nī náⁿā hermanos. ¹⁴ Maaⁿ ní véé ca yeⁿé nī ní cuuvi dííⁿ nī completar ofrenda yeⁿé nī ní ca'á nī 'iiⁿyāⁿ chi nguéeⁿ véé yeⁿé yā. Ní cunee nī 'iiⁿyāⁿ. Ní cuuvi ca'á nī daamá nduucú yā. Cuayivi ní taachi nguéeⁿ véé yeⁿé nī ní 'iiⁿyāⁿ s'eeⁿ vεε ca yeⁿé yā, 'iiⁿyāⁿ s'eeⁿ cuuvi téé yā ofrenda yeⁿé nī ní téé yā ofrenda ndís'tiī. Ní nginnee yā ndís'tiī. 'Tíicā ca'á nī daama ndúúcu yā. ¹⁵ 'Tíicā canee nguūⁿ na libro yeⁿe Ndyuūs ndii cuááⁿ vmnaaⁿ: 'iiⁿyāⁿ chi véé cá yeⁿé yā nguéeⁿ nacaāva yeⁿé yā. 'Iiⁿyāⁿ chi duū'vī vεε yeⁿé yā nguéeⁿ chii faltar yeⁿé yā.

Yeⁿé saⁿ'ā Tito ndúúcū compañeros yeⁿé yā

¹⁶ Maaⁿ ní 'úú ca'á gracias Ndyuūs ti Ndyuūs chi'neéⁿ yā na staava yeⁿe Tito chí neⁿe yā cunee cá yā ndís'tiī tan'dúúcā chi nús'uu dííⁿ 'nū. ¹⁷ Ní neⁿé yā dííⁿ yā tan'dúúcā chi ngaⁿ'á 'nū nduucú yā yeⁿé ndís'tiī. Ní néené neⁿé yā nginnee yā ndís'tiī caati neⁿé yā n'diichí yā ndís'tiī.

¹⁸ Ní dicho'ó 'nū ndúúcū Tito miiⁿ táámá hermano yeⁿe yú ní nducyáácá 'iiⁿyāⁿ yeⁿe nducyáácá yaacū ngaⁿ'á yā chi hermano miiⁿ ní neené n'dai diiⁿ sa ntiiⁿnyuⁿ. Ní ngaⁿ'a sa nduudu cuaacu yeⁿe evangelio chi nduudú ngai yeⁿe Jesucristo. ¹⁹ Nguéeⁿ damáāⁿ chuū idiiⁿ saⁿ'ā miiⁿ ti nducyáácá 'iiⁿyāⁿ yeⁿe nducyáácá yaacū s'eeⁿ naachi caⁿ'á 'iiⁿyāⁿ chi i'teenú yā Señor Jesucristo yeⁿé yú nndéévé yā saⁿ'ā miiⁿ chi caⁿ'a sa ndúúcū nús'uu caati cuuvi cunee sa nús'uu ndúúcū ofrenda chi cuuvi cunee hermanos. Ní 'íicú hermanos cuuví yā dich'εεε cá yā Señor yeⁿé yú. Ní cuuvi 'cuuⁿ'míⁿ 'nū hermanos chi ndís'tiī neⁿé nī cunee nī hermanos. ²⁰ 'Tíicā ní 'iiⁿyāⁿ nguéeⁿ cuuví caaⁿ'maⁿ neeⁿ yā nús'uu yeⁿe chi

diín 'nū ndúúcu ofrenda miiⁿ chi cuta'á 'nū yeⁿe hermanos. ²¹ Ní 'tíicā neⁿé 'nū diín 'nū nducuéⁿe n'daacā nanááⁿ Ndyuūs ní 'tíicā ntúūⁿ nanááⁿ nducyáácá 'iiⁿyāⁿ.

²² Maaⁿ ní dicho'ó 'nu taama hermano yeⁿe yú ndúúcu Tito miiⁿ. Ní 'aa diín 'nū probar hermano miiⁿ n'dee n'dái naaⁿ ni ch'iⁿí saⁿā miiⁿ n'dee n'dái naaⁿ chi neⁿe sa nginnee sa nús'uu. Maaⁿ ní saⁿa miiⁿ neené neⁿe sa nginnee sa ndís'tiī ti vee 'viich'εetiinūⁿ ca yeⁿé 'nū ndúúcu ndís'tiī. ²³ Ní ndúúti chi 'áámá 'iiⁿyāⁿ ítiinguuneéⁿ yā yeⁿe saⁿā Tito miiⁿ tuu'mi ní ndís'tiī caaⁿmáⁿ nī chi saⁿā miiⁿ compañero yeⁿé. Ní diín sa ntiinnyuⁿ dáámá nduucú ní diín sa ntiinnyuⁿ chí dichí'vē ndís'tiī. O nduuti chi itinguuneéⁿ yā yeⁿe tanáⁿā hermanos chi dicho'ó tuu'mi ní ndís'tiī caaⁿmaⁿ nī chi 'iiⁿyāⁿ yeⁿe nducyaaca yaācū s'eeⁿ dichó'o yā hermanos s'eeⁿ. Ní hermanos ní dich'εeté cá yā Cristo yeⁿé yú. ²⁴ Ca'á nī ofrenda yeⁿé nī ní 'tíicā cuuvi deenú 'iiⁿyāⁿ yeⁿe yaacu s'eeⁿ chi dineⁿé nī hermanos chi dicho'ó. Nds'tiī ní 'cuuⁿmiⁿ nī nducyáácá 'iiⁿyāⁿ cáávā ofrenda yeⁿé nī chi cuaacu niiⁿnyúⁿ neⁿé nī hermanos. Ní nús'uu deenú 'nū chi caⁿá nī diín nī 'tíicā. Ní yeenú 'nū cucáávā ndís'tiī. Ní 'iiⁿyāⁿ cuuvi deenú yā chiiⁿ chi ngaⁿá yeⁿe nī ní cuaacu.

9

Ofrenda cáávā hermanos yeⁿe yú

¹ Nds'tiī hermanos yeⁿé nguéé canee chi dinguúⁿ yeⁿe ndís'tiī yeⁿe ofrenda chi nga'a nī hermanos chi i'téenu yā Jesucristo yeⁿé yú. ² Úú tuumicadiinúúⁿ chi ndís'tiī neⁿé nī cunneé nī hermanos. Ní yeenú cucáávā ndís'tiī taachi 'úú yaa'ví 'iiⁿyāⁿ yeⁿe yáⁿāa yeⁿe Macedonia yeⁿe ndís'tiī chi snée nī na yáⁿāa Acaya táácā idiín nī. Ní 'úú yaa'ví 'iiⁿyāⁿ s'eeⁿ chi ndís'tiī canee yaaⁿ nī ndii nduuyu chi chó'ōo chi nginneé nī hermanos yeⁿe yú. Ní maaⁿ ní n'dee 'nááⁿ hermanos yeⁿe yáⁿāa Macedonia neⁿé yā nginneé yā hermanos cáávā chi ndís'tiī caⁿá nī chi ca'a nī ofrenda yeⁿé nī. ³ Ní cáávā chuū dicho'ó Tito ndúúcu 'uuvu hermanos. Ní nguéé cúúví chó'ōo 'áámá cosa chi nguéé cuaacu yeⁿé nī yeⁿe chi 'úú yaa'ví 'iiⁿyāⁿ s'eeⁿ yeⁿe tan'dúúcā chi ndís'tiī n'daacā diín nī yeⁿe ofrenda 'cūū. Ní ndís'tiī 'cuēti yaáⁿ nī ofrenda yeⁿe nī chi cunneé nī hermanos. ⁴ Nguéé deenú nduuti chi naⁿa 'iiⁿyāⁿ yeⁿe yáⁿāa Macedonia caⁿá yā nduucú. Ní taachi ndaá 'nū nanááⁿ ndís'tiī nguéé véé yaáⁿ nī ndúúcu ofrenda yeⁿé nī. Ní nús'uu cuuvi 'cuinaáⁿ 'nū ti yaa'ví 'nū hermanos yeⁿe yáⁿāa Macedonia ti véé 'viich'εetíinuuⁿ ch'εete yeⁿé 'nū nduucú nī. Ní ndís'tiī cuuvi 'cuinaáⁿ nī dendú'ū. ⁵ Ní caavā chíⁿ 'úú nadicadiinúúⁿ chi chiicá hermanos chí chíi yā vmnááⁿ vmaaaⁿ nanááⁿ ndís'tiī ní cunee yā nduucú nī. Ní 'íicú ndís'tiī ca'a nī ofrenda yeⁿe nī hermanos chi dicho'ó. Níicú cuuvi cunneé nī hermanos yeⁿe yáⁿāa Judea ndúúcu ofrenda yeⁿe nī, ofrenda miiⁿ chi nga'a nī chi ca'a nī. 'Tíicā níicú 'cuēti yaáⁿ nī ndúúcu ofrenda yeⁿe nī ní ch'iⁿí nī 'iiⁿyāⁿ s'eeⁿ chi cuaacu chi neⁿé nī ca'á nī ofrenda yeⁿe nī. Ní nguéé a fuerza canee chi ca'á nī ofrenda.

⁶ Maaⁿ ní ndís'tiī ní n'gaacú nī yeⁿe chuū chí caaⁿmáⁿ. 'Iiⁿyāⁿ chi duu'ví cá ngīnu yā cuta'á yā duu'ví ca cosecha yeⁿé yā ní 'iiⁿyāⁿ chi n'dee ca ngīnu yā cuta'á yā n'dee cá cosecha yeⁿé yā. ⁷ Ca'áámá cá'áámá nī ca'á nī ofrenda yeⁿé nī tan'duucā chi nacádiinuuⁿ nī chi diín nī na staava yeⁿe nī. Nguéé ca'á nī nduuti chi nguéé neⁿe nī, ní nguéé a fuerza ca'a nī. Ndyuūs neⁿé yā 'iiⁿyāⁿ chi ca'a yā ofrenda yeⁿé yā tí yeenú yā chi ca'á yā. ⁸ Ní Ndyuūs ní cuuví tée yā ndís'tiī n'dee cá yeⁿe nducuéⁿe chi n'dai taavi ca. Ní 'tíicā ndís'tiī ní cuuví 'cuūndī necesidades yeⁿé nī. Ní cuuvi cunneé nī hermanos ndúúcu nducuéⁿe necesidades yeⁿé yā. ⁹ Ní canee nguūⁿ na libro yeⁿé Ndyuūs ndii cuááⁿ vmaaaⁿ 'tíicā:

Nduuti chí 'iiⁿyāⁿ ca'á yā n'dee cá yeⁿe 'iiⁿyāⁿ chi pobre yā; tuu'mi ní vee ca yeⁿe maáⁿ yā chi cuuvi ca'á yā 'iiⁿyāⁿ ní 'áámá canee yā 'tíicā.

¹⁰ Ní Ndyuūs chí nga'á yā ndaata chi 'iiⁿyāⁿ cuūnu yā ndaata miiⁿ, nga'a ntuúⁿ yā pan chi che'é yā. Maaⁿ ní Ndyuūs miiⁿ tée yā ndaata ndís'tiī nducuéⁿe chi cuūnu nī. Ní diín yā chí véé ca cosecha yeⁿe ntiinnyuⁿ chi n'daacā chí diín nī. ¹¹ 'Tiicá ntúūⁿ ndís'tiī cuuvi cuta'á nī yeⁿe nducuéⁿe vaadi 'cuiica ní 'íicú cuuvi ca'a cá nī ofrenda yeⁿe nī. Ní cucáávā nús'uu, ca'a yā ofrenda yeⁿé nī hermanos, tuu'mi ní hermanos ngaⁿá yā:

Ndyuūs nadíí'vε n'diī cáávā ofrenda miiⁿ. ¹² Ní ndúúcu ofrenda yeⁿe nī chi ca'a nī nguée damāāⁿ ca'á nī ti véé yeⁿe hermanos naati diíⁿ nī chi hermanos ca'a yā n'deéé cá gracias Ndyuūs. ¹³ Ní 'íicú hermanos dich'εeté yā Ndyuūs nduuti chi ndís'tiī ch'iⁿí nī hermanos chi i'téenu nī nduudu cuaacu yeⁿe Cristo. 'Tiicá ntúūⁿ hermanos dich'εeté yā Ndyuūs ti ndís'tiī ca'a cá nī ofrenda yeⁿe nī cáávā hermanos miiⁿ ní caavā tanáⁿā hermanos. ¹⁴ 'Tiicá ntúūⁿ hermanos ngaⁿ'angua'á yā caavā ndís'tiī. Ní dineⁿe cá yā ndís'tiī. 'Tíicā diíⁿ yā ti Ndyuūs s'neéⁿ yā na staava yeⁿe nī chi ndís'tiī diíⁿ nī cosa chi n'daacā. ¹⁵ Maaⁿ ní ca'a yú gracias Ndyuūs ti tee yā s'uuúⁿ nducuéⁿē chi vaadī n'dai ca yeⁿe yā chi ch'εete taavi cá chi nguée cuuvi caaⁿ'maⁿ yú yeⁿe nducuéⁿē.

10

Pablo caaⁿ'máⁿ yā chi cuaacu chi apóstol yā yeⁿe Señor Jesucristo

¹ 'Úú Pablo di'cuiitú ndís'tiī chuū. 'Úú ní ndiicuúⁿ ní véé cá paciencia yeⁿe ní tan'dúúca Cristo ngaⁿ'a yā, 'tíicā ngaⁿ'á. 'Iiⁿ'yāⁿ ngaⁿ'a yā yeⁿe 'úú chi 'úú 'aama saⁿ'ā ndiicuúⁿ taachi caneé nduucú ndís'tiī ní naati nguée caneé nduucú ndís'tiī tuu'mi ní chεechí yaa'ví ndís'tiī. ² 'Úú di'cuiitú ndís'tiī chi diiⁿ n'daacá nī ti taachi ndaá n'diichí ndís'tiī nguée canee chi caaⁿ'máⁿ nduudu chεechi ndúúcu ndís'tiī. Náⁿ'ā 'iiⁿ'yāⁿ ní ngaⁿ'á yā yeⁿe 'nū chi nús'uu diíⁿ 'nū ntiiⁿ'nyuⁿ yeⁿe Ndyuūs tan'dúúca chi neⁿ'é 'nū diíⁿ 'nū. 'Úú vεε yaáⁿ chi nandaācá 'iiⁿ'yāⁿ s'eeⁿ ní caaⁿ'maⁿ taáⁿ nduucú yā. ³ Cuaacu chi neⁿ'e chi nús'uu ní 'iiⁿ'yāⁿ yeⁿe iⁿ'yeeⁿdí 'cūū nús'uu diiⁿ 'nū ntiiⁿ'nyuⁿ yeⁿe Ndyuūs. Nguée diíⁿ 'nū ntiiⁿ'nyuⁿ cucáávā chi véé chi cuuvi yeⁿe 'nū na iⁿ'yeeⁿdí 'cūū tan'dúúca chi diiⁿ tanáⁿā 'iiⁿ'yāⁿ yeⁿe iⁿ'yeeⁿdí 'cūū chi nguée i'téenu yā Cristo. ⁴ Caati ntiiⁿ'nyuⁿ chi diíⁿ 'nū nguée diíⁿ 'nū ndúúcu vaadī deenu yeⁿe iⁿ'yeeⁿdí 'cūū tí diíⁿ 'nū ndúúcu poder yeⁿe Ndyuūs. Ní Ndyuūs nginneé yā s'uuúⁿ chi cuuvi dituūví 'nū dendu'ū chi yeⁿe enemigo yeⁿe 'nū chi yááⁿ'guiinūⁿ miiⁿ. ⁵ 'Tíicā chuū cuuvi diíⁿ 'nū. Dituuví 'nū nducuéⁿē vaanicadínūⁿ yeⁿe 'iiⁿ'yāⁿ chi contra yeⁿe Ndyuūs. Ní 'íicú 'iiⁿ'yāⁿ cuuví nadacadínúúⁿ yā yeⁿe Cristo ní cuuví cu'téenu yā yeⁿe yā. ⁶ Maaⁿ ní taachi ndís'tiī n'giindiveéⁿ nī nduudu chí ngaⁿ'á tuu'mi ní nús'uu canee yaáⁿ 'nū chi diíⁿ 'nū castigar nducyáácá nī chi nguée n'giindiveéⁿ nī nduudu chi ngaⁿ'á.

⁷ Ndís'tiī ní n'diichí nī dendu'u chi véé tan'duucā chi cánéé. Ní ndúútí chi 'áámá yā yeⁿe ndís'tiī deenú yā chi seguro chi yeⁿe Cristo 'iiⁿ'yāⁿ miiⁿ, tuu'mí canee cúúⁿmíⁿ yā chi nadacadínūⁿ yā chi nús'uu ntúūⁿ ní yeⁿe Cristo nús'uu. Tan'dúúca yā 'tiicá ntúūⁿ nús'uu. ⁸ 'Áará chi 'úú Pablo ngaⁿ'á chi 'úú ch'εeté 'úú na ntiiⁿ'nyuⁿ yeⁿe Señor Jesucristo nguée 'cuinaáⁿ cáávā chi caaⁿ'máⁿ 'túúca. Deenú 'nū chi Señor yeⁿe yú tee yā nús'uu ntiiⁿ'nyuⁿ chi diíⁿ 'nū ndúúcu poder yeⁿe yā ti ndís'tiī cuuvi cu'téenu ca nī Ndyuūs, ní nguée cáávā chi diíⁿ chi nguée i'téenu nī Ndyuūs. ⁹ 'Úú nguée neⁿ'é chi ndís'tiī nadacadínūⁿ nī chi dinguúⁿ carta yeⁿe nī cucaavā chi candií ndís'tiī chí 'va'á nī. ¹⁰ 'Iiⁿ'yāⁿ ngaⁿ'a yā chi cartas yeⁿe chí nguúⁿ ní neené ditiīnu nduudu yeⁿe ní taachi caneé nanááⁿ ndís'tiī ní 'úú ní duūvā 'úú. Ní nduudu chi ngaⁿ'á ní nguée de'ē véé yeⁿe. ¹¹ Neⁿ'é chi 'iiⁿ'yāⁿ chi ngaⁿ'a yā 'túúca yeⁿe, cadíínuⁿ yā chuū. 'Túúca tan'dúúca chi dinguuⁿ 'nū na cartas ti ya'ai caneé 'nū yeⁿe nī, 'tiicá ntúūⁿ taachi ndaá 'nū nanááⁿ ndís'tiī ngaⁿ'á 'nū ndúúcu yā ní dáámá diíⁿ 'nū ndúúcu yā.

¹² Nguée caaⁿ'máⁿ 'nū chi nduuvidaamá 'nū ndúúcu tanáⁿ'a yā chi ngaⁿ'á yā chi maáⁿ yā ní n'gεeté yā. 'Iiⁿ'yāⁿ s'eeⁿ ngaⁿ'á yā tan'dúúca chi tonto yā tí dicaadi maáⁿ yā ndúúcu 'áámá yā táámá yā hermanos. ¹³ Nús'uu ní nguεε caaⁿ'máⁿ 'nū yeⁿe nducuéⁿe chi n'gεete chi nguée candéé 'nū cuidado yeⁿe. Ndyuūs ch'iⁿí yā nús'uu naachi cuuvi cuchiiá 'nū ní diíⁿ 'nū ntiiⁿ'nyuⁿ yeⁿe yā. Ní ch'iⁿí yā chi nús'uu cho'ó 'nū nanááⁿ ndís'tiī chi snéé na yááⁿ Corinto. ¹⁴ Cáávā chuū ní deenú 'nū chi nguée cueⁿ'é 'nū mar 'áámá yáⁿ'āa nduuti chi Ndyuūs nguée ch'iⁿí yā nús'uu chi caⁿ'á 'nū miiⁿya. Ní cáávā chuū ndaá 'nū nanááⁿ ndís'tiī ní candéé 'nū nduudu cuaacu chi nduudu ngai yeⁿe Señor Jesucristo yeⁿe yú. ¹⁵ Nguée ngaⁿ'á 'nū chi n'gεete ntiiⁿ'nyuⁿ yeⁿe táámá yā tan'dúúca chi nús'uu diíⁿ 'nū

ntiiⁿnyuⁿ yeⁿ'é yā. Dámaāⁿ ngaⁿ'á 'nū yeⁿ'ē ntiiⁿnyuⁿ chi díⁿ 'nū. Cuneē ngiinú 'nū chi ndís'tiī cu'téenu cá nī ní nús'uu cuuvi diiⁿ 'nū ntiiⁿnyuⁿ chi más cā ch'εεte ca nguaaⁿ ndís'tiī, naati dámaāⁿ diíⁿ 'nū ntiiⁿnyuⁿ naachi Ndyuūs ch'iⁿ'í yā nús'uu chi díⁿ 'nū. ¹⁶ Cuayiivi miiⁿ ní neⁿ'é 'nū caⁿ'á 'nū táámá cuaaⁿ chí táámá lado yeⁿ'ē ndís'tiī chi cuuvi caaⁿ'máⁿ 'nū nduudu cuaacu yeⁿ'é Ndyuūs. Ní nguéé cánéé chí caaⁿ'máⁿ yeⁿ'ē ntiiⁿnyuⁿ yeⁿ'e táámá yā tan'dúúcā chi nús'uu diíⁿ 'nū ntiiⁿnyuⁿ yeⁿ'é yā.

¹⁷ Ní nduuti chí 'áámá 'iiⁿ'yāⁿ neⁿ'é yā caaⁿ'máⁿ yā yeⁿ'e cosa chi ch'εεte ca tuu'mi ní canee chi caaⁿ'máⁿ yā chi Ndyuūs diíⁿ yā chiiⁿ chi ch'εεte ca. ¹⁸ Nduuti chi Ndyuūs deenu yā chi 'áámá 'iiⁿ'yāⁿ ní n'daacā idiíⁿ yā tuu'mi ní cuaacu. Nduuti chi maáⁿ yā ngaⁿ'a yā chi n'daacā chi díⁿ yā tuu'mi ní ¿du'ū deenu chí cuaacu?

11

Pablo ndúúcū 'iiⁿ'yāⁿ chi ngaⁿ'á chi apóstoles 'iiⁿ'yāⁿ ní nguéé cuaacu

¹ Neⁿ'é chi ndís'tiī cuchéε nī yeⁿ'é 'aara chí nadacadiinúúⁿ nī yeⁿ'é chi duuchi ngaⁿ'á nduucú nī. ² Caati 'úú ní neⁿ'é ndís'tiī tan'duucā chi Ndyuūs neⁿ'é yā ndís'tiī. Ní 'úú ngaⁿ'á ngī ndís'tiī chi yeⁿ'e Jesucristo yeⁿ'ē yú chi ndís'tiī caⁿ'á nī lado yeⁿ'é Cristo. Ní neⁿ'é chi ndís'tiī cunee nī nanááⁿ Ndyuūs. Ní tan'dúúcā 'áámá n'daataá chí cuínú chi caⁿ'a 'caandavaacu tá ndúúcū 'áámá saⁿ'á nuūⁿ. 'Tíicā ndís'tiī nanááⁿ Ndyuūs. ³ Ní 'úú 'va'á cáávā ndís'tiī. Caati tan'dúúcā chí 'áámá cúú chinnche'éí tī táⁿ'ā Eva ndúúcū nduudu yaadi yeⁿ'é tī chi nduudu yeⁿ'e yááⁿ'guinuūⁿ, 'tiicá ntúūⁿ 'iiⁿ'yāⁿ cannche'éí yā ndís'tiī níicú divíⁿ yā vaadi cadinúúⁿ yeⁿ'é nī ní nguéé dineⁿ'é nī Jesucristo ndúúcū nuuⁿmaⁿ staava yeⁿ'é nī. ⁴ Caati ndís'tiī ca'á nī lugar 'āā du'ú nuūⁿ 'iiⁿ'yāⁿ chí caaⁿ'máⁿ yā nduudu chí n'dááⁿ yeⁿ'e Jesucristo yeⁿ'ē yú nguéé tan'dúúcā nduudu cuaacu chí caⁿ'a 'nū nanááⁿ ndís'tiī. Ní ndís'tiī ní n'giindiveéⁿ nī yeⁿ'ē taama espíritu chí n'dááⁿ ní nguéé n'giindiveéⁿ nī yeⁿ'e Espíritu N'dai yeⁿ'e Ndyuūs chí sta'á nī yeⁿ'e Ndyuūs taachi ngaⁿ'a 'nū nduudu cuaacu nanááⁿ ndís'tiī. Ní ch'liindiveéⁿ nī nduudu chí n'dááⁿ chí ngaⁿ'á yā yeⁿ'e chí nadinguáⁿ'ai yā. Nguéé tan'dúúcā nduudu cuaacu chí nús'uu caⁿ'á 'nū nguaaⁿ ndís'tiī. Ní yeenú nī yeⁿ'ē chuū. ⁵ 'Úú nadacadiinúúⁿ chí nguéé n'gεεte ca tanáⁿ'ā 'iiⁿ'yāⁿ chí ngaⁿ'á yā chí apóstoles naati nguεε 'tíicā. N'dááⁿ yā nduudu yeⁿ'e Cristo ní ndís'tiī cu'teenú nī yeⁿ'e yā. ⁶ 'Áará chí nguεε caⁿ'á nduudu cuaacu yeⁿ'e Cristo ndúúcū nduudu deenu ca, deenú ca yeⁿ'ē nduudu chí ngaⁿ'á. 'Tíica ch'iⁿ'í 'nū ndís'tiī yeⁿ'ē nducuéⁿ'ē ntiiⁿnyuⁿ chí díⁿ 'nū nguááⁿ ndís'tiī.

⁷ O nguéé n'daacā diíⁿ chí ngaⁿ'á nduudu cuaacu yeⁿ'é Cristo nanááⁿ ndís'tiī ní nguéé nadí'vε nī 'úú caavā ntiiⁿnyuⁿ chí díⁿ. Nguéé nadicadiinúúⁿ yeⁿ'ē maáⁿ naati neⁿ'é chí ndís'tiī cuuvi n'gεεté nī. ⁸ 'Úú ní nguéé chita'á tuumi yeⁿ'e 'iiⁿ'yāⁿ yeⁿ'e tanáⁿ'ā yaacū cucáávā chí cuuvi díⁿ ntiiⁿnyuⁿ yeⁿ'é Cristo nguaaⁿ ndís'tiī. ⁹ Ní neⁿ'e chí canee ndúúcū ndís'tiī ní véé necesidades yeⁿ'é tuu'mi ní hermanos yeⁿ'e yú ndaá yā yeⁿ'e yáⁿ'ā Macedonia ní tee yā 'úú chiiⁿ chí nguεε vεε yeⁿ'é. 'Tíicā nguéé di'vaachí mar 'áámá ndís'tiī caavā necesidades yeⁿ'é ní nguéé ndaá di'vaachí ndís'tiī tiempo chí cuchii. ¹⁰ Neené seguro chí nduudu cuaacu yeⁿ'e Cristo canee nduucú. Ní 'íicú mar 'áámá 'iiⁿ'yāⁿ cuuvi díⁿ yā chí nguεε cuuvi caaⁿ'máⁿ nduudu cuaacu miiⁿ na núúⁿ'máⁿ yáⁿ'ā Acaya caati nguéé sta'á tuumí cáávā ntiiⁿnyuⁿ chí díⁿ. ¹¹ ¿De'ē cáávā chí caaⁿ'máⁿ 'túúcā? ¿'Áá cáávā chí nguéé neⁿ'é ndís'tiī? Nguéé 'tíicā. Ndyuūs deenú yā chí neené neⁿ'é ndís'tiī.

¹² Ní ntiiⁿnyuⁿ chí díⁿ canee chí díⁿ naati nguéé cuta'á tuu'mi yeⁿ'e ntiiⁿnyuⁿ chí díⁿ. Ní 'íicú 'iiⁿ'yāⁿ chí neⁿ'e caaⁿ'máⁿ yā chí ntiiⁿnyuⁿ yeⁿ'é yā chí dáámá ndúúcū ntiiⁿnyuⁿ chí díⁿ 'nū nguéé lugar chí cuuví caaⁿ'máⁿ yā chí 'tíicā tī sta'á yā tuumi yeⁿ'e ntiiⁿnyuⁿ chí díⁿ yā. ¹³ 'Iiⁿ'yāⁿ miiⁿ nguéé apóstoles yeⁿ'e Cristo tī apóstoles chí falso yā. Ní nginnche'éí yā 'iiⁿ'yāⁿ ní díⁿ yā tan'dúúcā chí maáⁿ yā apóstoles yeⁿ'e Jesucristo chí candéé yā nduudu yeⁿ'é Cristo. ¹⁴ Ní nguéé nadacadiinúúⁿ yú yeⁿ'ē chí vεε ca apóstoles chí falso yā na iⁿ'yeeⁿ'dí 'cūū. Maaⁿ yááⁿ'guinuūⁿ míⁿ ní díⁿ sa chí maáⁿ sa ní tan'dúúcā 'áámá ángel yeⁿ'e Ndyuūs. 'Tíicā diiⁿ sa. ¹⁵ Cáávā chuū ní nguéé cosa chí ch'εεte chí

'iiⁿyāⁿ diíⁿ yā ntiíⁿnyuⁿ yeⁿ'e yááⁿn'guiinūⁿ tan'dúú^cā chi ntiíⁿnyuⁿ yeⁿ'é Ndyuūs. Taachí 'cuuinu iⁿ'yeeⁿdí 'cuū caⁿ'á yā cuta'a yā chi cuuvi yeⁿ'é yā.

Pablo nééné ch'eenú yā chii cáávā chi apóstol yeⁿ'e Jesucristo

¹⁶ Maaⁿ ní taama vmnéⁿ'ēe neⁿ'é caaⁿ'máⁿ ndúú^cū ndís'tií ní nguéé nadacadíínuuⁿ nī chi 'úú ngaⁿ'á tan'dúú^cā chi 'aama chi loco yā, ti ngaⁿ'á chi ch'εε^té maáⁿ. Ní 'aara chi nadacadíínuuⁿ nī yeⁿ'é 'tíicā, ¿'áá 'tíicā 'caandiveéⁿ nī yeⁿ'é? ¹⁷ 'Úú nguéé caⁿ'á chuū chi Señor Jesucristo yeⁿ'e yú yaa'ví yā 'úú chi caⁿ'á 'tíicā. Caati caⁿ'á tan'dúú^cā 'aama chi loco 'tíicā caⁿ'á. Ní 'íicú māaⁿ cuuvi caaⁿ'máⁿ chi dich'εε^té 'úú. ¹⁸ Ní n'dee n'dái 'iiⁿyāⁿ ngaⁿ'á yā yeⁿ'ē maáⁿ yā chi ch'εε^té yā cucáávā chiiⁿ chi diíⁿ yā na iⁿ'yeeⁿdí 'cuū. Ní maaⁿ ní 'úú ntúūⁿ ngaⁿ'á chi 'úú ní ch'εε^té maáⁿ. ¹⁹ Ní ndís'tií ní nadacadíínuuⁿ nī chi deenu cá nī ní chicheé nī yeⁿ'e 'iiⁿyāⁿ chi ngaⁿ'á yā chi maáⁿ yā ch'εε^té yā tan'dúú^cā chi loco yā, ní yeenú yā. ²⁰ Ní chicheé nī yeⁿ'é 'iiⁿyāⁿ s'eeⁿ ní ch'iindiveéⁿ nī yeⁿ'e yā ní diíⁿ nī tan'dúú^cā chi 'iiⁿyāⁿ s'eeⁿ ngaⁿ'á yā chi a fuerza diíⁿ nī. Ní tan'dúú^cā chi s'neéⁿ yā 'áámá trampa 'tíicā diíⁿ yā ndúú^cū ndís'tií. Ní n'diichí yā ndís'tií tan'dúú^cā 'iiⁿyāⁿ chí nguéé du'ū vεε 'tíicā ndís'tií. Ni caaⁿ'máⁿ yā chi ch'εε^té maáⁿ yā. Ní ch'eⁿ'é yā naaⁿ nī. Ní cuchéé nī yeⁿ'e nducuéⁿ'ē. ²¹ Nús'uu nguéé cuuvi diíⁿ 'nū ndúú^cū nī 'tíicā 'aara chi nadacadiinúúⁿ nī chi n'daacā diíⁿ yā ndúú^cū nī 'tíicā. Maaⁿ ní 'áará chí 'cuinaáⁿ yeⁿ'ē chi caaⁿ'máⁿ, 'tíicā caaⁿ'máⁿ. Nús'uu diíⁿ 'nū chi duūva 'nū ní 'iicu cuuvi diíⁿ 'nū ntiíⁿnyuⁿ yeⁿ'é 'nū. Maaⁿ ní caaⁿ'máⁿ tan'dúú^cā chi loco 'úú. Ní 'úú ní caaⁿ'máⁿ chi ch'εε^té maáⁿ yeⁿ'e ntiíⁿnyuⁿ chí diíⁿ tan'dúú^cā chi tanáⁿ'ā 'iiⁿyāⁿ chí ngaⁿ'a yā chi ch'εε^té yā maáⁿ yā cáávā ntiíⁿnyuⁿ chí diíⁿ yā. ²² ¿'Áá 'iiⁿyāⁿ hebreos 'iiⁿyāⁿ s'eeⁿ? 'Tiicá ntúūⁿ 'úú. ¿'Áá 'iiⁿyāⁿ s'eeⁿ yeⁿ'e ndaata Israel? 'Tiicá ntúūⁿ 'úú. ¿'Áá 'iiⁿyāⁿ s'eeⁿ yeⁿ'e ndaataá Abraham? 'Tiicá ntúūⁿ 'úú. ²³ ¿'Áá 'iiⁿyāⁿ s'eeⁿ 'iiⁿyāⁿ chí idiíⁿ ntiíⁿnyuⁿ yeⁿ'e Cristo? Deenú chi caaⁿ'máⁿ tan'dúú^cā 'iiⁿyāⁿ chí loco yā taachi caaⁿ'máⁿ 'tiicā. 'Úú idiíⁿ más ca ntiíⁿnyúⁿ yeⁿ'e Cristo nguéé ti 'iiⁿyāⁿ s'eeⁿ. Ní canéé taavi yaātū na cuerpo yeⁿ'é chí ch'eⁿ'é yā 'úú. Neené n'dee cuuvi cheⁿ'é vácūū. Ní neené n'dee cuūví chí 'āā cháá 'caaⁿ'núⁿ yā 'úú. ²⁴ Ní cho'ó nyuⁿ'u cuuvi chí 'iiⁿyāⁿ Israel s'eeⁿ ch'eⁿ'é yā ndiicu ndíitiiⁿnyuⁿ cuūⁿ vuelta 'úú ndúú^cū cuarta. ²⁵ Ní cho'ó 'iinū tiempo chí ch'eⁿ'é yā 'uu ndúú^cū nduucu. Ní 'áámá cuuvi nūⁿ chíítuú yā 'úú. Ní cho'ó 'iinū cuuvi chí chεε^té barco naachi cueⁿ'é na nuūⁿnīⁿyáⁿ'ā. Ni 'áámá vmnéⁿ'ēe cánéé nguaaⁿ nuūⁿnīⁿyáⁿ'ā núúⁿmáⁿ yaaⁿ núúⁿmáⁿ nguuvi. ²⁶ N'dee n'dái cuūví cachiicá ní n'diichi peligros yeⁿ'é, peligros yeⁿ'e yíicú, ndúú^cū peligros cáávā 'iiⁿyāⁿ chí duucu yā, ndúú^cū peligros nguaaⁿ 'iiⁿyāⁿ yeⁿ'e yááⁿ yeⁿ'é ní yeⁿ'e 'iiⁿyāⁿ yeⁿ'e táámá yááⁿ, ndúú^cū peligros taachi cánéé ná yááⁿ n'gεε^té, ní taachi caneé na yáⁿ'āa cuūⁿmáⁿ naachi nguéé ch'εε^tinéé 'iiⁿyāⁿ, ní taachí cachiicá na barco vmaaⁿ nuūⁿnīⁿyáⁿ'ā. Ní chó'oo peligros yeⁿ'é taachi caneé nguaaⁿ 'iiⁿyāⁿ chí ngaⁿ'a yā chí hermanos yeⁿ'e 'nū ní nguéé 'tíicā yā. ²⁷ 'Úú diíⁿ ntiíⁿnyuⁿ chí nééné díitū ndúú^cū vaadí 'caa'va ní chicuūnū 'úú. Ní n'dee taaví nguiinū nguéé chíi cyaadú, ní cho'oo n'dee taaví cuuvi chí ch'eenú chíi ti 'āā ntéé che'é ní 'āā ntéé chíi nuūⁿnīⁿ va. Ní 'āā 'iiche yeⁿ'é ní nguéé catecaí.

²⁸ Ní 'āā víí cá yeⁿ'e nducuéⁿ'ē chuū chí chó'oo na cuerpo yeⁿ'é, vεε más cá dendu'ū ti nguuvi nguuvi candéé cuidado yeⁿ'é nducyáácá 'iiⁿyāⁿ yeⁿ'e nducyáácá yaácū. ²⁹ Ní nduuti chí 'áámá 'iiⁿyāⁿ duūvá yā ní 'úú ntúūⁿ diíⁿ tan'dúú^cā chí duūva 'úú. Ni nduuti chí 'áámá 'iiⁿyāⁿ diíⁿ yā chí taama 'iiⁿyāⁿ dinuunⁿdí yā, 'úú ntúūⁿ n'geenú ngii ní 'cuinaáⁿ 'úú, ní nduuvi taáⁿ. ³⁰ Maaⁿ ní nduuti chí caneé chí dich'εε^té yeⁿ'ē maáⁿ, tuu'mí dich'εε^té yeⁿ'ē maáⁿ yeⁿ'e nducuéⁿ'ē chí chó'oo yeⁿ'é níicu 'cuuⁿ'míⁿ ti duūva 'úú. ³¹ Dendyuūs chí Chiidá Señor Jesucristo yeⁿ'ē yú ní n'dai taavi cá yā cueⁿ'e daāⁿmaⁿ. Ndyuūs ní deenú yā chí nguéé ngaⁿ'á nduudu yaadí. ³² Chó'oo chí taachí caneé na yááⁿ Damasco chí gobernador chí maaⁿ poder yeⁿ'e rey Aretas, gobernador miiⁿ s'neeⁿ yā soldados na cheendi va'ai s'eeⁿ chí n'gεε^té yeⁿ'ē yááⁿ Damasco miiⁿ caati neⁿ'e sa cuta'a sa 'úú ní candεε sa 'úú chí preso 'úú. ³³ Naati hermanos yeⁿ'ē yú s'nuúⁿ yā 'úú chεε^ti 'áámá 'cuéé^tεε ch'εε^té ní dicua'ái yā 'úú na 'áámá ventana yeⁿ'e ncheé^ti yeⁿ'e yááⁿ miiⁿ ní 'tíicā ca'ái na

ta'a soldado s'eeⁿ caati yáāⁿ miiⁿ ní nuuⁿmaⁿ ndiivi canéé ncheētī chí yaacū tan'dúúccā coral.

12

*Visión yeⁿ*e Pablo ndúúccū chi n'diichí yā

¹ Cuaacu níⁿnyúⁿ chi nguεε de'ē vεε n'daacá chi caaⁿmáⁿ yeⁿē 'úú maáⁿ chi 'úú ch'εεté 'úú. N'dáaca ca chi 'úú caaⁿmáⁿ yeⁿe n'dee n'ááⁿ chí canéé chí snaáⁿ yeⁿe Señor Jesucristo ní yeⁿe chí canúúⁿ n'de'ei chí n'g'iⁿí yā 'úú. ² Cuayiivi chí i'teenú Cristo chó'ōo ndiichi cúūⁿ nduuyúú chí n'diichí 'áámá visión tan'dúúccā chí ch'iinú. Ní 'aama 'iiⁿyāⁿ candéε yā 'úú ndii va'āi chεeti nguuvi. Nguéé deenú nduuti chí candéε yā cuerpo yeⁿé o nguéé. Dámaaⁿ Ndyuūs deenú yā chuū. ³ Naati chíí ní nguεε deenú nduuti chí cueⁿé ndúúccū cuerpo yeⁿé o nguéé ndúúccū cuerpo yeⁿé naati dámaaⁿ Ndyuūs deenú yā táaccā cueⁿé. ⁴ 'Úú deenú chí candéε yā 'úú ní cueⁿé ndii paraíso chí va'ai chεeti nguuvi. Ní 'úú n'giindiveéⁿ nduudu chí nguéé tan'duuccā nduudu yeⁿe 'iiⁿyāⁿ yeⁿe iⁿ'yeeⁿdí 'cūū ti yeⁿe Ndyuūs. Nguéé véé permiso chí cuuvi caaⁿmáⁿ yeⁿē chí n'giindiveéⁿ. ⁵ 'Úú cuuvi caaⁿmáⁿ chí 'úú ní ch'εεte maáⁿ yeⁿē chí Ndyuūs díⁿ yā nduucú. 'Úú nguéé caaⁿmáⁿ yeⁿe maáⁿ chí ch'εεté maáⁿ. Dámaaⁿ caaⁿmáⁿ chí duūvā 'úú. ⁶ 'Áará chí caaⁿmáⁿ chí 'úú ch'εεté maáⁿ nguéé caaⁿmáⁿ tan'dúúccā chí zonso 'úú ti caaⁿmáⁿ nduudu cuaacu yeⁿé naati nguéé caaⁿmáⁿ 'tíicā ti nguéé neⁿé chí mar 'áámá 'iiⁿyāⁿ nadacadíinuuⁿ yā chí 'úú ch'εεte ca 'úú. Neⁿé chí 'iiⁿyāⁿ miiⁿ nadacadíinuuⁿ yā yeⁿe 'úú tan'dúúccā chí n'diichí yā 'úú, ní n'giindiveéⁿ yā nduudu yeⁿé.

⁷ Chuū chí Cristo ch'iⁿí yā 'úú ní 'áámá visión chí ch'εεte ní deεve taavi ca. Ní Cristo tee yā 'úú 'áámá ya'ai na cuerpo yeⁿé chí 'áámá canéé ní tan'dúúccā chí 'áámá yááⁿ chí cata'āi na cuerpo yeⁿé. Ní chíí tan'dúúccā chí yááⁿ n'guiinūⁿ s'neeⁿ sa yááⁿ miiⁿ chí neⁿe sa chí 'cueenú cuuvi. Ní Ndyuūs tee yā permiso chí 'úú canee ndúúccū dolor miiⁿ cáávā chí nguéé cuuvi caaⁿmáⁿ yeⁿe maáⁿ chí ch'εεté 'úú. ⁸ Ní 'iinū cuuvi chíicá Señor Jesucristo yeⁿē yú chí divíi yā vaadi ya'ái 'cūū yeⁿé. ⁹ Naati Señor yeⁿe yú ngaⁿ'á yā ngii yā 'úú 'tíicā: Vaadi neⁿe yeⁿé ní tūneeⁿ di ní nguéé más ca neⁿe ní ti chuū. Ní poder yeⁿé chuū chí n'g'iⁿi cá taachí 'iiⁿyāⁿ chí duūva cuerpo yeⁿé yā. Maaⁿ ní cucáávā chí yaa'ví Señor 'úú 'túúccā, 'úú yeenú ti 'úú duūvā 'úú ti Cristo cuuvi 'cuuⁿmíⁿ yā poder yeⁿé yā ti canéé yā na cuerpo yeⁿé. ¹⁰ Cáávā chuū ní yeenú ti duūvā. Ní yeenú 'aara chí 'iiⁿyāⁿ ngaⁿ'a taaⁿ yā yeⁿé, ní nguéé véé necesidades yeⁿé, ní 'iiⁿyāⁿ díⁿ yā chí n'geenú ngii. Ní yeⁿe dendú'ū díitūu chí cho'ōo yeⁿé ní n'geenú ngii nducuéⁿē chuū cáávā Cristo. 'Tíica rā va. Taachi duūvā cuerpo yeⁿé tuuⁿmi ní más ca ditiinu 'úú.

Pablo nadacadiinuuⁿ cá yā yeⁿe 'iiⁿyāⁿ yeⁿe yaacū yeⁿe yáāⁿ Corinto

¹¹ 'Úú deenú chí ngaⁿ'á tan'dúúccā chí loco 'úú taachi ngaⁿ'á yeⁿē maáⁿ naati ndís'tií díⁿ ní chí a fuerza canee chí caaⁿmáⁿ yeⁿe maáⁿ ti ndís'tií nguεε ngaⁿ'á ní yeⁿé 'túúccā. N'daacā ca chí ndís'tií caaⁿmaⁿ n'dáaca ní yeⁿé. 'Úú nguéé duu'ví 'úú yeⁿē tanáⁿ'ā 'iiⁿyāⁿ chí ngaⁿ'á yā chí apóstoles ní nguéé 'tíicā 'aara chí 'úú nguéé de'ē vεε 'úú. ¹² Ní taachi canéé nduucú ní ch'iⁿí ndís'tií chí cuaacu chí 'úú 'áámá apóstol yeⁿe Jesucristo 'úú ndúúccū vaadi n'giinu ch'εεte chí díⁿ ní ndúúccū ntiⁿnyuⁿ ch'εεte chí díⁿ ní nduūccū vaadi n'giinu n'dai chí díⁿ. ¹³ De'ē vεε chí nguéé díⁿ ndúúccū ndis'tií taachi canéé ndúúccū ní tan'dúúccā chí díⁿ ndúúccū nducyaaca 'iiⁿyāⁿ yeⁿē tanáⁿ'ā yaacū. 'Āā daamá nūuⁿ idiíⁿ nduucú ní. Deenú chí nguéé ngiicá ndís'tií chí cunneé ní 'úú caavā necesidades yeⁿé. Maaⁿ ní nadich'εεcú ní yeⁿé caavā falta 'cūū ti nguéé díⁿ daamá ndúúccū ní.

¹⁴ Maaⁿ ní vεε yaáⁿ chí ndaá nanááⁿ ndís'tií ndiichi ndii 'iínú cuuvi, ní taachi ndaá nguéé di'vaachí ndís'tií. Ní nguéé neⁿé de'ē véé yeⁿe ní chí maáⁿ ní in'nuúⁿ ní naati 'úú neⁿé ndís'tií. Deenu yú chí 'iiⁿyāⁿ chí chíidá yā canéé chí in'nuúⁿ yā necesidades yeⁿē daiyá yā, nguéé ti daiyá yā in'nuúⁿ yā necesidades yeⁿē chíidá yā. ¹⁵ Ni 'úú díⁿ gastar tuūmī yeⁿé chí díⁿ ntiⁿnyuⁿ cáávā ndís'tií ní ndíí chí cuūnū 'úú cáávā almas yeⁿe ní níicú 'cuεetinéé n'daacá ní. 'Áará chí neⁿe cá ndís'tií ní nguéé ti ndís'tií neⁿé ní 'úú.

¹⁶ Ní 'áará chi 'úú nginneé ndís'tiī, ná'nā 'ii'nyān nguaa'n ndís'tiī chi deenú yā chi nguée sta'á tuumi ye'né nī, nga'ná yā chi 'úú nginnche'ée 'ii'nyān s'ee'n. ¹⁷ ¿'Áá nginnche'ée ndís'tiī cucáavā 'ii'nyān s'ee'n chi dicho'ó nanáán ndís'tiī? Nguεε 'tíicā. ¹⁸ 'Úú chiicá sa'nā Tito chi na'ná yā. Ní dicho'ó Tito ndúucū táámá hermano ye'né yú nanáán ndís'tiī. ¿'Áá cuaacu chi Tito mii'n chinnche'ée yā ndís'tiī? Nguεε 'tíicā. O ¿'Áá cuaacu chi 'úú ndúucū 'ii'nyān mii'n nguée dí'n 'nū dáámá ntii'nyu'n nguaa'n ndís'tiī ní nguée ndúucū dáámá sentido ye'né 'nū? Nguεε 'tíicā.

¹⁹ Maa'n ní ndís'tiī, ¿'Áá nadacadiinuu'n nī chi nga'ná 'nū chi chí'n chi dí'n 'nū ní cuaacu caatí chi idi'n 'nū defender ntii'nyu'n ye'né 'nū? Nguée 'tíicā. Nga'ná 'nū nanáán Ndyuūs nduudú 'cūū cáávā chi nús'uu ní ye'né Jesucristo. Ní nducué'nē chi dí'n 'nū, dí'n 'nū ti ndís'tiī hermanos chi ne'né 'nū cuuvi cu'téenu cá nī Ndyuūs. ²⁰ Ni 'úú ni 'va'á ti taachi ndáá nanáán ndís'tiī 'úú nguée ndaācá chi ndís'tiī dí'n nī tan'dúucā chi 'úú ne'né chi dí'n nī. Ní ndís'tiī nguée ndaācā nī 'úú tan'dúucā chi ne'né nī chi 'úú idi'n tí canée chi 'caa'vá ndúucū ndís'tiī. Ní ndaācá ndís'tiī tan'dúucā chi nguée canée chi 'cuεetineé nī. Ní ndaācá chi véé nguaa'n ndís'tiī 'ii'nyān chi n'gεεcu cheendí yā, ndúucū 'ii'nyān chi ne'né yā cosas tan'dúucā chi véé ye'né taama yā ndúucū 'ii'nyān chi nduuví taán yā. Ní 'ii'nyān s'ee'n chí 'caa'vá yā ndúucū táámá hermano ní maán yā diví yā ye'né yā ti ne'né yā nga'ná yā chi ch'εεte maán yā. Ní 'ii'nyān nga'ná yā contra ye'né taama yā. Ní 'ii'nyān néené ne'né caa'n má'n yā ye'né chí dí'n taama yā. Ní 'ii'nyān nga'ná yā chí maán yā ní ch'εεté yā, ní nguée véé vaadí 'dií'n nguaa'n ndís'tiī. ²¹ Ni 'va'á chí 'cuinaán nanáán Ndyuūs cáávā ndís'tiī taachi ndáá nanáán ndís'tiī taama vmné'nē. Ní taachi canée ndúucu nī ngii ya'ái 'iinú ye'né 'yáán ndís'tiī chi dinuu'ndí nī ní nguée nadaacadaamí nī ye'né nuu'ndí nī chí dí'n nī ye'né chi ne'né cuerpo ye'né nī. Ní dí'n nī cosas chi nguεε n'daacā. Chí'n ní dí'n nī chí sánā sta'a sa n'daataá ye'né táama sa'nā.

13

Pablo dingúū n diitú yā ye'né 'ii'nyān ye'né yáán Corinto ní nga'ná yā: N'dai ndís'tiī

¹ Chuū ní ndii 'íinú cuuvi chí ca'ná ndáá nanáán ndís'tiī ní taachi ndáá nduuti chí 'ii'nyān caa'n ma'n nuu'ndí ye'né táámá 'ii'nyān canée chí véé 'uúvi o 'iinú testigo ndúucu yā. Ní cunee n'daacā nduudu mii'n tan'dúucā chí canée nguū'n na libro ye'né Ndyuūs. ² 'Áá nga'ná cuáán vmaān taachi cānee nduucú nī ndúucū 'ii'nyān chí dinuu'ndí yā ní ndúucū nducyaacá nī. Maa'n ní chí canee ya'ái ye'né ndís'tiī dingúū'n taama vmné'nē ye'né chúū tan'dúucā chí nga'ná cuaa'n vmaān nanáán ndís'tiī. Taachi ndáá nanáán ndís'tiī taama vmné'nē n'diichí nuu'ndí ye'né nducyaaca hermanos. ³ Ní 'úú idi'n ti ndís'tiī cadiiinuu'n nī nduuti chí Cristo ye'né yú ch'i'ní yā 'úú nduudu chí nga'ná o nguée. Ní Cristo ye'né yú nguée duūvá taachi dí'n yā tratar nduucú nī. Ca'ná yā ch'i'ní yā chí dítiinú yā nguée ti ndís'tiī. ⁴ Cuáácú chí 'ii'nyān chí 'néé'nga'á yā Cristo tan'dúucā chí Cristo ní 'aama 'ii'nyān chí duūvá, naati maa'n ní Cristo mii'n canduuchí yā ye'né nguaa'n tinánā cucáavā poder ye'né Ndyuūs. 'Tiicá ntúū'n nús'uu ní ye'né Cristo. Nús'uu ní duūvá 'nū naati poder ye'né Ndyuūs canee ndúucu 'nū. Ní cáávā chuū cuuví n'diichi 'nū nuu'ndí ye'né nī ní dichí've 'nū ndís'tiī.

⁵ Maa'n ní ndís'tiī n'diichi maán nī nduuti chí ndís'tiī 'āā canee diitú nī ndúucū chí i'téenu nī ye'né Cristo. N'diichi maán nī chí cuaacu chí i'téenu nī. ¿'Áá nguée déenú ndís'tiī nduuti chí Cristo canee nduucú nī o nguée? Ní nduuti chí cuaacu chí nguée i'téenu nī cáávā nuu'ndí ye'né nī tuu'mi ní nguée ye'né Ndyuūs ndís'tiī. ⁶ Ne'né chí ndís'tiī cadiiinú nī chí nús'uu ní dichí've 'nū Ndyuūs ní ti ye'né Ndyuūs nús'uu. Nguée falso 'nū. ⁷ Maa'n ní nga'ná angua'á 'nū Ndyuūs caavā ndís'tiī chí ndís'tiī nguée dinuu'ndí nī ye'né mar 'áámá chí nguée n'daacā. Ne'né 'nū chí ndís'tiī ní dí'n nī nducué'nē chí n'daacā. Nguée ti cuuvi 'cuu'mí'n 'nū chí dí'n 'nū ntii'nyu'n chí n'daacā. 'ii'nyān ní cuuvi n'diichí yā ntii'nyu'n ye'né 'nū, ní caa'n má'n yā chí nguée n'daacā idi'n 'nū. Dámaān ne'né 'nū chí ndís'tiī dí'n daacá nī. ⁸ Nús'uu ní nguée de'ē veε dí'n 'nū chí contra ye'né nduudu cuaacú naati nducué'nē chí dí'n 'nū ní ye'né nduudu cuaacu mii'n. ⁹ Cáávā chuū nús'uu

ní yeenú taaví 'nū taachi duūva 'nū ní taachi ndís'tiī ditiinú nī ndúúcu chi i'téenu nī. Ní ngaⁿ'angua'a cá 'nū ní ngiicá 'nū Ndyuūs chi ndís'tiī cuuvi diíⁿ nī chi n'daacā n'dai ní 'cuētineé nī tan'dúúca chi Jesucristo neⁿ'é yā chi diíⁿ nī. ¹⁰ Idingúuⁿ 'nū yeⁿ'e ndís'tiī vmnaaⁿ taachi 'āa cuéé ndaá 'nū nanááⁿ ndís'tiī caati taachi ndaa 'nū nanááⁿ ndís'tiī nguéé chεchi caaⁿ'máⁿ ndúúcu nī cucáavā poder chi Señor Jesucristo tee yā 'úú. Ní Señor yeⁿ'ē yú tee yā poder 'úú caavā chi ndís'tiī ní cuuvi cu'téenu cá nī nguéé caava chi cuuvi ndái nī.

¹¹ Maaⁿ ní 'cuiinū carta yeⁿ'é. Ni na carta yeⁿ'é ní ngaⁿ'á ti n'dai taavi ndís'tiī ní diíⁿ nī chi 'cuētineé n'daacā nī ndúúcu vaadi 'diiⁿ na vida yeⁿ'e nī. Níicú cunée nī ndúúcu dáámá vaanicádiinūuⁿ yeⁿ'é nī ní Ndyuūs chi véé vaadi 'diiⁿ yeⁿ'e yā ní dinéⁿ'e yā ndís'tiī Ndyuūs miiⁿ canee nduucú nī. ¹² Ní nguaaⁿ maáⁿ nī diíⁿ nī saludar 'áámá nī ndúúcu taamá nī. Caaⁿ'máⁿ nī chi n'dai hermano yeⁿ'é nī ní túú'ví nī cheendi hermano yeⁿ'é nī tan'dúúca costumbre yeⁿ'é nī ti yeⁿ'é Ndyuūs ndís'tiī. ¹³ Nducyáácá 'iiⁿ'yāⁿ chi i'teenú yā Jesucristo yeⁿ'e yú dichó'o yā saludos na carta 'cūu yeⁿ'é nī ní ngaⁿ'á yā: N'dai ndís'tiī.

¹⁴ Ní neⁿ'é chi Señor Jesucristo téé yā ndís'tiī vaadi n'dai taavi yeⁿ'é yā. Ní vaadi neⁿ'e yeⁿ'é Ndyuūs ní Espíritu N'dai yeⁿ'é Ndyuūs canéé nduucú nī. Chuū carta chi 'úú Pablo dingúuⁿ yeⁿ'e nī. 'Tíicā chii.

CARTA YEⁿE 'IIⁿ'YĀⁿ YEⁿE YĀⁿĀA GALACIA

Pablo idinguúⁿ yā carta 'cūū yeⁿe 'iiⁿ'yāⁿ chi caⁿ'á yā yaācū s'eeⁿ na yāⁿā Galacia

¹ 'Úú Pablo 'úú ni 'úú 'áámá apóstol chi dichó'ó Ndyuūs. Mar 'áámá saⁿā nguéé dichó'o sa 'úú chi 'úú ngaⁿ'á nduudu yeⁿ'é Ndyuūs, ndíí nguéé ndúú ndεεve sá 'úú, ti Ndyuūs Chiida yú ndúúcu Señor Jesucristo dichó'o yā 'úú. Ní Chiida yú nadacuéeⁿ yā Jesucristo yeⁿ'ē nguaaⁿ tináⁿā. ² Nducyaaca vi'i yú s'tiī chi 'cuεetinée yā yāāⁿ miiⁿ ndúúcu 'úú, idinguúⁿ carta 'cūū yeⁿe ndís'tiī chi i'téenu nī Jesucristo ní caⁿ'á nī yaācū s'eeⁿ na yāⁿā Galacia. ³ Neⁿ'é chi Chiida yú ndúúcu Señor Jesucristo yeⁿ'ē yú tée yā s'uuúⁿ dendú'ū chi n'dai. Ní ndís'tiī canee nī ndúúcu vaadi 'diīⁿ chi Ndyuūs itée yā s'uuúⁿ. ⁴ Jesucristo miiⁿ ca'a yā vida yeⁿ'e maáⁿ yā cucáāvā nuuⁿndi yeⁿ'e yú. Maaⁿ ní nadanguáⁿ'ai yā s'uuúⁿ yeⁿ'e dendú'ū chi nguéé n'daacā chi véé iⁿ'yeeⁿdí 'cūū. 'Tíicā neⁿ'e Ndyuūs Chiida yú. ⁵ Cueⁿ'e daāⁿmaⁿ canee Ndyuūs ndúúcu dεεve yeⁿ'é yā. Nducyáácá 'iiⁿ'yāⁿ canee chi dich'εεte cá yā Ndyuūs chi dεεve cueⁿ'e daāⁿmaⁿ. 'Tíicā.

Nguéé véé táámá nduudu yeⁿ'e chi Cristo nanguáⁿ'ai yā s'uuúⁿ

⁶ Neené nge'e yiinú chi ndís'tiī neené nīⁿnuúⁿ nūⁿ idivíi nī yeⁿ'e Ndyuūs chi n'gaí yā ndís'tiī, ní yeⁿ'e cosas chi n'dai ca chi Cristo tee yā ndís'tiī. Ní n'giindiveéⁿ nī nduudu chi nguéé cuaacu yeⁿ'ē táámá 'iiⁿ'yāⁿ chi ngaⁿ'a nduudu miiⁿ tan'dúúcu chi táámá evangelio. ⁷ Cuaacu chí nguéé véé táámá evangelio chí nduudu yeⁿ'e Dendyuūs naati véé n'dúúví yā chi idi'vaachí yā ndís'tiī. Ní neⁿ'e yā n'daaⁿ yā evangelio chí nduudu ngai yeⁿ'e Cristo. ⁸ 'Aara chi s'uuúⁿ o 'áámá ángel chi ndaa yeⁿ'e va'ai chēēti nguuví ngaⁿ'a yā táámá evangelio chi n'daaⁿ nguéé tan'dúúcu chi caⁿ'a 'nū chii 'nū ndís'tiī, tuu'mi 'iiⁿ'yāⁿ s'eeⁿ cuuví yā condenado. ⁹ 'Āā caⁿ'á chuū maaⁿ ní neⁿ'é caaⁿ'maⁿ ntuúⁿ táámá vmnéⁿ'ēe: Nduuti chi 'áámá 'iiⁿ'yāⁿ caaⁿ'maⁿ yā táámá evangelio chi n'daaⁿ nguéé tan'dúúcu chi caⁿ'a 'nū chii 'nū ndís'tiī, tuu'mi ní 'iiⁿ'yāⁿ s'eeⁿ cuuvi yā condenado.

¹⁰ Taachi ngaⁿ'á chuū, ¿de'ē inadacadíinuⁿ nī nduucú? Nguéé neⁿ'é chi cunee yiinú nī yeⁿ'é caati neⁿ'é chi Ndyuūs cunee yiinú yā yeⁿ'é. O ¿'áá canee chi 'úú idiíⁿ chi cunee yíinū saⁿā iⁿ'yeeⁿdí 'cūū? Nduuti chi 'úú idiíⁿ chiiⁿ ti inee yíinū saⁿā iⁿ'yeeⁿdí 'cūū, tuu'mi ní nguéé idiíⁿ ntiíⁿnyuⁿ yeⁿ'é Cristo.

Taacā chí chí Pablo apóstol

¹¹ 'Úú ngaⁿ'á cuaacu ní ngii ndís'tiī hermanos yeⁿ'é. Nduudu ngai chi evangelio yeⁿ'ē Jesucristo chi 'úú ngaⁿ'á, nguéé yeⁿ'ē mar 'áámá saⁿā yeⁿ'e iⁿ'yeeⁿdí 'cūū. ¹² Ti 'úú nguéé sta'á nduudu miiⁿ yeⁿ'e saⁿā, ndíí nguéé ndúú ch'eēéⁿ yeⁿ'ē mar 'áámá saⁿā caati Jesucristo ch'iⁿ'i yā 'úú nduudu cuaacu yeⁿ'é yā.

¹³ Ndís'tiī ch'iindiveéⁿ nī tan'dúúcu chi 'úú i'teenú tiempo chi chó'ōo ní canee chεεchí na religión yeⁿ'e 'iiⁿ'yāⁿ judíos chi Israel. Ní deenú nī taacā chi dííⁿ. Ní dííⁿ chi dícaānú 'iiⁿ'yāⁿ chi i'téenu yā Jesucristo ti caⁿ'á yā na yaācū yeⁿ'é Ndyuūs. Ní dííⁿ chuū ti neⁿ'é can'daá 'iiⁿ'yāⁿ s'eeⁿ yeⁿ'e nducyáácá yaācū yeⁿ'é Ndyuūs ti neⁿ'é di'cuiínú 'iiⁿ'yāⁿ s'eeⁿ.

¹⁴ Ní chi'teenú más ca yeⁿ'e religión yeⁿ'e 'iiⁿ'yāⁿ chi ndaata yeⁿ'e Israel s'eeⁿ nguaaⁿ nducyaaca yā chi dáamá ndaata yeⁿ'é ndúúcu yā ti neⁿ'é dííⁿ nducuéⁿ'ē tan'dúúcu chi diīⁿ 'iiⁿ'yāⁿ ndiicúū chi 'āā n'díí. ¹⁵ Naatí Ndyuūs ndεεve yā 'úú taachi 'āā cuéé 'cuundiyaáⁿ. Ní taachi ndaa tiempo chi Ndyuūs neⁿ'e yā, Ndyuūs yaa'ví yā 'úú cáāvā chi neⁿ'é yā 'úú chi 'úú n'giindiveéⁿ nduudu yeⁿ'é yā ní cu'teenú Ndyuūs. ¹⁶ Ní Ndyuūs yaa'ví yā 'úú yeⁿ'ē Daiyá yā Jesucristo chi 'úú i'teenú 'yā, ti 'úú ní caaⁿ'máⁿ nduudu yeⁿ'e Cristo nguaaⁿ 'iiⁿ'yāⁿ gentiles, 'iiⁿ'yāⁿ chi nguεε yeⁿ'e ndaata Israel. Ndíí tuu'mi nguéé tiinguuneéⁿ mar 'aama saⁿā yeⁿ'e nduudu yeⁿ'ē Cristo. ¹⁷ Ndíí nguéé ndúú ndaa na yāāⁿ Jerusalén chi intiinguuneéⁿ apóstoles chi dichó'ó Ndyuūs vmnaaⁿ chi dichó'o yā 'úú, naati 'úú cheⁿ'é na yāⁿā Arabia. Ní cuayiivi miiⁿ ní nguεεcuneeⁿ na yāāⁿ Damasco.

¹⁸ Cuayiivi chi cho'ó 'iinū nduūyū ndii tiempo chi 'āā i'teenú Jesucristo tuu'mí ní cueⁿ'é yāā Jerusalén tuu'mí n'diichí Pedro tí 'āā cuéé n'diichí saⁿ'ā. Ní canee nduúcu sa ndíitiⁿ'yuⁿ nguuví. ¹⁹ Yāā miiⁿ nguéé n'diichí táamá apóstol chi dichó'ó Ndyuūs. Dámaāⁿ n'diichí Jacobo saⁿ'ā 'diinū Jesús miiⁿ. ²⁰ Chuū idinguúⁿ yeⁿ'e ndís'tiī. 'Cuin'díichí ndís'tiī. 'Úú nguéé ngaⁿ'á nduudu yaadi ti Ndyuūs n'diichí yā 'úú ní deenú yā chi cuaacu ngaⁿ'á.

²¹ Cuayiivi ní ndaá na yáⁿ'āā yeⁿ'e Siria nduúcu yáⁿ'āā Cilicia. ²² 'Iiⁿ'yāⁿ yeⁿ'e yáⁿ'āā Judea chi cueⁿ'é yā na yaācū naachi ngeⁿ'é yā yeⁿ'e Cristo nguéé iitiinaāⁿ yā 'úú ti nguéé in'diichí yā 'úú. ²³ 'Iiⁿ'yāⁿ s'eeⁿ dámaāⁿ n'giindiveéⁿ yā yeⁿ'ē 'úú cuáāⁿ vmnaaⁿ 'tíicā, 'iiⁿ'yāⁿ chi can'dáa yā s'uuúⁿ ti neⁿ'é yā di'cuiinú yā s'uuúⁿ maaⁿ ní ngaⁿ'a yā nduudu cuaacu yeⁿ'e Jesucristo. Cuáāⁿ vmnaaⁿ nguéé neⁿ'é yā chi 'iiⁿ'yāⁿ i'téenu yā nduudu cuaacu yeⁿ'e Jesucristo. ²⁴ Ní yeⁿ'ē chúú 'iiⁿ'yāⁿ s'eeⁿ dich'eté yā Ndyuūs caavā chi maaⁿ ní 'úú i'teenú Jesucristo.

2

*Taná*ⁿ'ā apóstoles diíⁿ yā aceptar Pablo chi 'áamá apóstol ndúucu yā

¹ Cho'ōo ndiichi cúuⁿ nduuyúú chi 'úú cheⁿ'e ntuúⁿ yāā Jerusalén. Cheⁿ'é nduúcu saⁿ'ā Bernabé chi compañero yeⁿ'é nduúcu saⁿ'ā Tito. ² Ní ndaá ti Ndyuūs ch'iⁿ'i yā 'úú chi canee chi caⁿ'á. Vmnaāⁿ vmnaaⁿ caⁿ'á nanáāⁿ apóstoles chi n'gēete yeⁿ'e yaācū miiⁿ. Ní chií 'iiⁿ'yāⁿ s'eeⁿ taacā chi ngaⁿ'á nduudu ngai yeⁿ'e Cristo nanáāⁿ 'iiⁿ'yāⁿ gentiles chi nguéé yeⁿ'e ndaata Israel. Chuū diíⁿ chí 'iiⁿ'yāⁿ s'eeⁿ cu'téenu yā chi dichí'vē ntiinⁿ'yuⁿ yeⁿ'ē Ndyuūs chi diíⁿ nguaaⁿ 'iiⁿ'yāⁿ gentiles. Ni apóstoles n'gēete nguéé caⁿ'a yā chi nguéé 'cuúⁿ yā 'úú. ³ Ní apóstoles n'gēete ní canee yiinú yā nduúcu nduudu chi ngaⁿ'á. Ni saⁿ'ā Tito chi saⁿ'ā griego chi canee sa nduucú, nguéé canee chi cuuví circuncidar Tito tan'dúucā chi ngaⁿ'a ley yeⁿ'e 'iiⁿ'yāⁿ Israel s'eeⁿ ti nguéé yeⁿ'ē ndaata Israel. ⁴ Chuū diíⁿ ti naachi nduuvidaama yú chí ndaā n'dé'í 'iiⁿ'yāⁿ chi diíⁿ yā tan'dúucā chi hermanos yeⁿ'ē yú 'yā, naati nguéé 'tíicā. Ní ndaa yā chí n'diichí yā s'uuúⁿ caati 'āā cuéé diiⁿ yú tan'dúucā chi ngaⁿ'a ley yeⁿ'e circuncisión ti s'uuúⁿ ní yeⁿ'e Cristo s'uuúⁿ ní diiⁿ yú chi ngaⁿ'a Cristo. Neⁿ'é yā chi diiⁿ yú tan'dúucā chi ngaⁿ'a ley yeⁿ'e Moisés miiⁿ. ⁵ Nús'uu ní nguéé diíⁿ 'nū tan'dúucā chi 'iiⁿ'yāⁿ s'eeⁿ neⁿ'é yā yeⁿ'e ley yeⁿ'e circuncisión caati neⁿ'é 'nū chi nduudu cuaacu chi 'āā ngaⁿ'á 'nū yeⁿ'e evangelio yeⁿ'e Señor Jesucristo, ní 'áamá cūnee nduúcu ndís'tiī. 'Tíicā diíⁿ 'nū.

⁶ Apóstoles n'gēete yeⁿ'e yaācū miiⁿ nguéé de'ē vee más cā ca'cueéⁿ yā 'úú yeⁿ'ē chi 'úú caaⁿ'máⁿ. 'Áará chí n'gēete n'dai yā nguéé de'ē vee tuneⁿ 'úú ti Ndyuūs neⁿ'e yā nducyaaca 'iiⁿ'yāⁿ 'āā daamá nūⁿ. ⁷ Apóstoles n'gēete yeⁿ'é yaācū 'āā deenú yā chi Ndyuūs dicho'ó yā 'úú. 'Úú, Pablo, ngaⁿ'á nduudu ngai yeⁿ'e Cristo nanáāⁿ 'iiⁿ'yāⁿ chi nguéé yeⁿ'e ndaata Israel. 'Tiicā ntúūⁿ deenú yā chi Ndyuūs dicho'ó yā Pedro chi ngaⁿ'á yā nduudu ngai yeⁿ'e Cristo nguaaⁿ 'iiⁿ'yāⁿ yeⁿ'e ndaata Israel. ⁸ Ti Ndyuūs yeⁿ'ē yú ní nginnee yā Pedro miiⁿ chi ngaⁿ'a nduudu cuaacu yeⁿ'é yā nguaaⁿ 'iiⁿ'yāⁿ Israel s'eeⁿ chi diíⁿ yā tan'dúucā chi ngaⁿ'a ley yeⁿ'ē circuncisión. Maaⁿ Señor miiⁿ nginnee yā 'úú chi caaⁿ'máⁿ nduudu yeⁿ'é yā nguaaⁿ 'iiⁿ'yāⁿ chi nguéé yeⁿ'ē ndaata Israel. Ní nguéé véé ley yeⁿ'e circuncisión yeⁿ'é yā.

⁹ Apóstoles n'gēete yeⁿ'e yaācū chi Jacobo nduúcu Pedro nduúcu Juan ní deenu ntúūⁿ yā chi Ndyuūs dín'daacá yā nduucú chi 'úú idiíⁿ ntiinⁿ'yuⁿ yeⁿ'e apóstol nguaaⁿ 'iiⁿ'yāⁿ chi nguéé yeⁿ'ē ndaata Israel. Tuu'mi ní sta'á yā tá'ā cuaacú 'nū ní nduuvidaamá nduudu yú nanáāⁿ Ndyuūs ti 'úú nduúcu Bernabé ní caaⁿ'máⁿ 'nū nduudu cuaacu yeⁿ'é Jesucristo nanáāⁿ 'iiⁿ'yāⁿ gentiles ní 'iiⁿ'yāⁿ s'eeⁿ nanáāⁿ 'iiⁿ'yāⁿ yeⁿ'e ndaata Israel. ¹⁰ Ní ngaⁿ'á yā ngii yā nús'uu chi n'gáacú 'nū yeⁿ'é hermanos chi véé necesidades yeⁿ'é yā. 'Úú ntúūⁿ ní ngaⁿ'á, 'tíicā.

*Pablo ca*ⁿ'a chechi yā nduúcu Pedro

¹¹ Ndaá 'nū na yáāⁿ Antioquía ní taachí ndaa Pedro miiⁿ na yáāⁿ Antioquía 'úú ní caⁿa cheēchí ndúúcu sa yáāvēnaaⁿ sa nanáán 'iiⁿ'yāⁿ s'eeⁿ ti Pedro miiⁿ nguéé idiiⁿ sa tan'dúúccā chi deenu sa chi canee chi diiⁿ sa. ¹² Ti taachi 'āā cuéé ndaa saⁿ'ā s'eeⁿ chi dichó'ó Jacobo yeⁿ'ē yáāⁿ Jerusalén, Pedro miiⁿ ní che'é sa ndúúccū 'iiⁿ'yāⁿ gentiles chi hermanos yeⁿ'e yú. Ní taachi ndaa saⁿ'ā s'eeⁿ tuu'mi 'āā ntéé che'e sa ndúúccū 'iiⁿ'yāⁿ gentiles chi hermanos yeⁿ'e yú ti 'va'a sá yeⁿ'ē 'iiⁿ'yāⁿ yeⁿ'ē sa chi yeⁿ'ē ndaata Israel chi díⁿ yā tan'dúúccā chi ngaⁿ'a ley yeⁿ'e circuncisión. ¹³ Ni tanáⁿ'ā hermanos chi yeⁿ'ē ndaata Israel díⁿ yā tan'dúúccā chi ídiiⁿ Pedro miiⁿ. 'Tiicá ntúūⁿ Bernabé díⁿ yā chi maaⁿ ní 'āā ntéé che'é yā ndúúccū 'iiⁿ'yāⁿ gentiles. 'Tiicā nducyaaca yā díⁿ yā 'áará chi deenú yā chi n'daacā chi che'é yā ndúúccū 'iiⁿ'yāⁿ gentiles. ¹⁴ Taachi n'diichí chi 'iiⁿ'yāⁿ s'eeⁿ nguéé din'daacá yā ti nguéé che'é yā ndúúccū 'iiⁿ'yāⁿ gentiles chi hermanos yeⁿ'e yú tan'dúúccā chi ngaⁿ'a nduudu cuaacu yeⁿ'e Cristo, tuu'mi ní 'úú Pablo caⁿ'á chí Pedro miiⁿ nanáán nducyaaca yā 'túúccā: Díⁿ chi saⁿ'ā Israel, díⁿ chí maaⁿ ní nguéé diiⁿ di tan'dúúccā chi ngaⁿ'a ley yeⁿ'e Israel ti maaⁿ ní i'téenu di Cristo, táaccā cúúví chí nguéé che'e di ndúúccū hermanos yeⁿ'e yú chi 'iiⁿ'yāⁿ gentiles ní diiⁿ di chi 'iiⁿ'yāⁿ s'eeⁿ nadacadíⁿnuuⁿ yā chi cánéé chí díⁿ yā tan'dúúccā chi ngaⁿ'a ley yeⁿ'e 'iiⁿ'yāⁿ Israel chi judíos.

'Iiⁿ'yāⁿ Israel s'eeⁿ dáamá yā ndúúccū tanáⁿ'ā 'iiⁿ'yāⁿ yeⁿ'e iⁿ'yeeⁿdí 'cūū nánguāⁿ'ai yā caavā chi i'téenu yā Jesucristo

¹⁵ Ní s'uuúⁿ ní 'iiⁿ'yāⁿ Israel s'uuúⁿ ti 'tíicā ch'εetiyáaⁿ yú ní nguéé diiⁿ nuuⁿndí yú daama tan'dúúccā chi diiⁿ tanáⁿ'ā 'iiⁿ'yāⁿ gentiles chi nguεε yeⁿ'e ndaata yeⁿ'e yú. ¹⁶ Ní s'uuúⁿ chi 'iiⁿ'yāⁿ Israel deenu yú chi Ndyuūs nguéé nadach'εεcú yā nuuⁿndi yeⁿ'e yú ti idiiⁿ yú dámaaⁿ chi ngaⁿ'a ley yeⁿ'e yú. 'Tiicá ntúūⁿ Ndyuūs nguéé nadach'εεcú yā nuuⁿndi yeⁿ'e nducyaaca 'iiⁿ'yāⁿ yeⁿ'e iⁿ'yeeⁿdí 'cūū ti díⁿ yā dámaaⁿ tan'dúúccā chi ngaⁿ'a ley yeⁿ'e Moisés. Ndyuūs nadach'εεcú yā nuuⁿndi yeⁿ'e 'iiⁿ'yāⁿ chi i'téenu yā Jesucristo. Cáávā chuū s'uuúⁿ ní i'teenu yú Jesucristo ní Ndyuūs nadach'εεcú yā nuuⁿndi yeⁿ'e yú. Ti cucáávā ley yeⁿ'e yú mar 'áámá 'iiⁿ'yāⁿ chi díⁿ yā chi ngaⁿ'a ley miiⁿ cuuví yā perdonado, ti nguéé nadach'εεcú ley miiⁿ nuuⁿndi yeⁿ'é yā.

¹⁷ S'uuūⁿ ní i'téenu yú Jesucristo chi Jesucristo miiⁿ nadach'εεcú yā nuuⁿndi yeⁿ'e yú. 'Tíicā s'uuūⁿ ní ch'iⁿ'i yú chi dinuuⁿndi yú tan'dúúccā tanáⁿ'ā 'iiⁿ'yāⁿ yeⁿ'e iⁿ'yeeⁿdí 'cūū. Maaⁿ ní, ¿'áá cuaacu chi Cristo nginneé yā s'uuūⁿ ti idinuuⁿndi yú? Nguéé 'tíicā. ¹⁸ Nduuti chi s'uuúⁿ nadi'tuuvi yú 'áámá cosa chi ley yeⁿ'e yú ní 'cuiinuu ní nadin'dái ntuūⁿ yú ley miiⁿ chi n'giindiveeⁿ yú yeⁿ'ē, tuu'mi ní dinuuⁿndi yú. ¹⁹ Vmnaáⁿ vmnaaⁿ idiiⁿ yú tan'dúúccā chi ngaⁿ'a ley yeⁿ'ē yú naati nguéé ngii idiiⁿ yú nducuéⁿ'ē yeⁿ'ē. Ní ley miiⁿ diiⁿ condenar s'uuúⁿ. Ní canee yú tan'dúúccā 'iiⁿ'yāⁿ chi 'āā ví'í cā yeⁿ'ē ley yeⁿ'e yú. Cáávā chuū ní maaⁿ ní ch'εetinée yú tan'dúúccā chi neⁿ'e Ndyuūs. Ní Ndyuūs nadach'εεcú yā yeⁿ'ē yú yeⁿ'e nuūⁿndi yeⁿ'e yú. Ní cáávā chuū cunduuchi yú cueⁿ'e daāⁿ'maⁿ. ²⁰ Taachi ca'neeⁿnga'á yā Cristo, tuu'mi ní cánéé tan'dúúccā chi 'úú ntúūⁿ ca'neeⁿnga'á nduucú yā. Maaⁿ ní nguéé idiíⁿ tan'dúúccā chi 'úú neⁿ'é ti idiíⁿ chiiⁿ chi neⁿ'é Jesucristo ti Jesucristo chi daiya Dendyuūs canée yā na staava yeⁿ'é. Ní maaⁿ ní 'úú canduuchí ti i'teenú Daiyá Ndyuūs miiⁿ. Cristo miiⁿ dinéⁿ'e yā 'úú ní ca'a maáⁿ yā vida yeⁿ'e maáⁿ yā ní ch'iⁿ yā caavā 'úú. ²¹ 'Uú nguéé cuta'á vaadī n'dai yeⁿ'e Ndyuūs tan'dúúccā 'áámá cosa chiduuchi. Nduuti chi ley miiⁿ cuuví nach'εεcú nuuⁿndi yeⁿ'e yú tuu'mi ní nguéé ch'iⁿ Cristo cucáávā s'uuúⁿ.

3

¿'Áá i'teenu yú ley miiⁿ o i'teenu yú Cristo?

¹ Ndís'tiī 'iiⁿ'yāⁿ yeⁿ'e yáⁿ'āa Galacia, de'ē chúúccā cheεchi tíⁿ nī. ¿Dú'ú chi nche'ei ndís'tiī chi maaⁿ ní nguéé n'giindiveeⁿ nī nduudu cuaacu? Ngaⁿ'á nduudu cuaacu nanáán ndís'tiī ní ndís'tiī déenu nī chi iiⁿ'yāⁿ chi'neeⁿnga'á yā Jesucristo na cruz cucáávā nuuⁿndi yeⁿ'e nducyaaca 'iiⁿ'yāⁿ. ² Chuū neⁿ'é chi 'cuuvi nī 'úú: ¿'Áá sta'á nī Espíⁿritu N'dai yeⁿ'é Ndyuūs cucáávā chi díⁿ nī tan'dúúccā chi ngaⁿ'ā ley yeⁿ'é Moisés, o cucáávā chi n'giindiveeⁿ nī nduudu cuaacu yeⁿ'é Ndyuūs ní i'téenu nī? ³ ¿De'ē chúúccā cheεchi tíⁿ

nī? 'Āā i'téenu nī nduudu yeⁿ'é Ndyuūs ni sta'á nī Espíritu N'dai yeⁿ'é Ndyuūs. Maaⁿ ní neⁿ'é nī ndúúcu fuerzas yeⁿ'e maáⁿ nī díⁿ nī tan'dúúca chi ngaⁿ'a ley caati Ndyuūs cuuvi n'diichí yā chi n'daacā idiⁿ nī. ⁴ 'Āā ch'eenu taaví nī chi cucáávā chi i'téenu nī Cristo. Maaⁿ ní chuū nguée dichíí'vē ndís'tiī, nduuti chi nadacadaamí nī yeⁿ'e yā. 'Āā deenú chi dichíí'vē ndís'tiī nduuti chi 'cuestinée nī ndúúcu Cristo. ⁵ Ndyuūs tee yā ndís'tiī Espíritu N'dai yeⁿ'é Ndyuūs ní díⁿ yā vaadī n'giinu nguaaⁿ ndís'tiī. ¿'Āá díⁿ Ndyuūs chuū caati ndís'tiī 'āā díⁿ nī tan'duucā chi ngaⁿ'a ley? Νγεε 'tíicā. Ndyuūs díⁿ yā vaadī n'giinu nguaaⁿ ndís'tiī caati i'téenu nī nduudu cuaacu yeⁿ'é yā.

⁶ Ndií cuááⁿ vmnaaⁿ nduudu yeⁿ'é Ndyuūs ngaⁿ'a yeⁿ'e Abraham chi 'āā n'dii. Abraham chi'téenu yā Ndyuūs ní Ndyuūs diiⁿ cuenta yā chi'téenu Abraham ní nadach'εεcú yā nuuⁿndi yeⁿ'é yā. ⁷ Cáávā chuū deenu nī chi 'iiⁿ'yāⁿ chi i'téenu yā nduudu yeⁿ'é Ndyuūs, cuaacu níⁿ'nyúⁿ ní yeⁿ'e ndaata Abraham, caati i'téenu yā tan'dúúca chi'téenu Abraham miiⁿ. ⁸ Ndií cuaaⁿ vmnaaⁿ canée nguūⁿ na libro yeⁿ'e Ndyuūs chi Ndyuūs caⁿ'á yā nadach'εεcú yā nuuⁿndi yeⁿ'e 'iiⁿ'yāⁿ gentiles chi nguée yeⁿ'e ndaata Abraham o Israel nduuti chi i'téenu yā Ndyuūs. Chuū Ndyuūs ngaⁿ'á yā ngii yā Abraham ndii tiempo chi 'āā chó'ōo, vmnaaⁿ chi díⁿ yā. 'Tíicā ngaⁿ'a Ndyuūs ndúúcu Abraham: 'Úú caaⁿ'máⁿ chi di'viicú 'iiⁿ'yāⁿ yeⁿ'e nuuⁿmáⁿ íⁿ'yeēⁿdī nduuti chi cu'téenu yā 'úú tan'dúúca chi dí i'téenu di 'úú. ⁹ Tan'dúúca Abraham chi'téenu yā Ndyuūs ní Ndyuūs ca'a yā Abraham vaadī n'dai yeⁿ'é yā ní 'tiicā ntúūⁿ Ndyuūs ca'a yā vaadī n'dai yeⁿ'é yā nducyáácá 'iiⁿ'yāⁿ chi cu'téenu yā Ndyuūs.

¹⁰ Nducyáácá 'iiⁿ'yāⁿ chi nadacadínuuⁿ yā na staava yeⁿ'e yā chi Ndyuūs nadach'εεcú yā nuuⁿndi yeⁿ'e yā ti díⁿ yā tan'dúúca chi ngaⁿ'a ley miiⁿ 'iiⁿ'yāⁿ s'eeⁿ nan'dai yā ní cánée yā condenado, ti mar 'áámá 'iiⁿ'yāⁿ cuuvi díⁿ yā nducuéⁿ'ē chi ngaⁿ'a ley miiⁿ. Canée nguūⁿ ndii cuááⁿ vmnaaⁿ na libro yeⁿ'é Ndyuūs 'tiicā: 'Iiⁿ'yāⁿ chi nguée díⁿ yā tanducuéⁿ'ē chi canée nguūⁿ na ley yeⁿ'e Moisés chi yā condenado. ¹¹ S'uuúⁿ ní deenu yú chi Ndyuūs nguée nadach'εεcú yā nuuⁿndi yeⁿ'é 'iiⁿ'yāⁿ caava chi diiⁿ yā chi ngaⁿ'a ley ti 'tíicā canée nguūⁿ na libro yeⁿ'é Ndyuūs: Ndyuūs nadach'εεcú yā nuuⁿndi yeⁿ'é 'iiⁿ'yāⁿ chi i'téenu yā ní ca'a yā 'iiⁿ'yāⁿ s'eeⁿ vida cueⁿ'e daāⁿmaⁿ. ¹² Ní ley yeⁿ'e Moisés miiⁿ ní nguée ngaⁿ'a chi 'iiⁿ'yāⁿ cu'téenu yā Jesucristo caati 'tíicā canée nguūⁿ na libro yeⁿ'e Ndyuūs ndii cuááⁿ vmnaaⁿ: 'Iiⁿ'yāⁿ chi diiⁿ tanducuéⁿ'ē dendu'ū chi ngaⁿ'a ley miiⁿ 'cuestinée yā ndúúcu vida cueⁿ'e daāⁿmaⁿ.

¹³ Cucáávā ley miiⁿ deenu yú chi diiⁿ yú nuuⁿndi ní canee yú condenado. Ní nguée canee yú condenado cáávā ley miiⁿ ti Jesucristo díⁿ yā tan'dúúca chí canee yā condenado. Ní sta'á yā lugar yeⁿ'e nducyaaca 'iiⁿ'yāⁿ chi véé nuuⁿndi yeⁿ'é yā ní can'diicú yā na cruz. 'Tíicā canée nguūⁿ na libro yeⁿ'é Ndyuūs: Condenado taanduvée 'iiⁿ'yāⁿ chi ch'ií tí can'diicú yā na 'áámá yáⁿ'á. ¹⁴ Chuū chí chií. Maaⁿ níⁿ'cú 'iiⁿ'yāⁿ gentiles cuuvi diiⁿ yā recibir vaadī n'dai yeⁿ'é Ndyuūs tan'dúúca Ndyuūs caⁿ'a yā ndúúcu Abraham, ní chi ca'a yā nducyaaca 'iiⁿ'yāⁿ gentiles chi i'téenu yā Jesucristo. 'Íicú s'uuúⁿ ndúúcu 'iiⁿ'yāⁿ gentiles chi i'teenu yú Jesucristo cuta'a yú Espíritu N'dai yeⁿ'e Ndyuūs chi Ndyuūs caⁿ'a yā chi ca'a yā 'iiⁿ'yāⁿ.

Ley yeⁿ'e Moisés ndúúcu compromiso chi Ndyuūs ca'a yā

¹⁵ Nds'tiī hermanos yeⁿ'é, n'diichí nī tan'dúúca 'aama ejemplo yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū tan'dúúca chí idiⁿ yā taachi véé papel chí cuaacu yeⁿ'ē 'áámá compromiso yeⁿ'é yā. Canee ngiinú yā ní dinguúⁿ yā 'aama papel chí cuaacu. Maaⁿ ní chi canée nguūⁿ ní cuaacu chí mar 'áámá 'iiⁿ'yāⁿ nguεε nadiví yā ndí nguée ndúú íntiinee ra yā chiiⁿ chi canée nguūⁿ. ¹⁶ 'Tiicá ntúūⁿ, Ndyuūs ndii vmnááⁿ vmnaaⁿ ca'a yā promesa Abraham ndúúcu nducyaaca 'iiⁿ'yāⁿ ndaata yeⁿ'e yā chí cuchí cuayiivi. Canée nguūⁿ na libro yeⁿ'e Ndyuūs 'tíicā: Nguée ngaⁿ'a yeⁿ'ē ndaata chi n'dee n'dái yeⁿ'e Abraham tan'dúúca chi 'yaaⁿ yā ti ngaⁿ'a tan'dúúca chi yeⁿ'e 'aama 'iiⁿ'yāⁿ yeⁿ'e Abraham ní 'iiⁿ'yāⁿ miiⁿ chí Jesucristo. ¹⁷ Chuū ngaⁿ'á cuaacu yeⁿ'e compromiso chi idi'cuaacú yā cáávā Cristo: Ndyuūs díⁿ yā 'áámá compromiso ndúúcu Abraham chi canée nguūⁿ. Cho'ōo cuūⁿ

ciento canee ndiicú ndíichí nduuyū ní Ndyuūs ca'a yā ley Moisés. Ley miiⁿ nguée cuuvi diví 'aama lado compromiso yeⁿe Ndyuūs chi ca'a yā vmnááⁿ vmnaaⁿ ní diiⁿ chi nguée dichí'vē compromiso yeⁿe yā. ¹⁸ Nduúti chi Ndyuūs téé yā chi cuuvi yeⁿe yú cáávā chi diiⁿ yú tan'dúúcā chí ngaⁿa ley miiⁿ tuu'mi ní 'āā ntéé téé yā chi cuuvi yeⁿe yú cáávā compromiso. Ndyuūs ca'a yā Abraham chi cuuvi yeⁿe yā cáávā compromiso chi díⁿ yā ndúúcu yā.

¹⁹ ¿De'ē dichí'vē ley tuu'mi? Ndyuūs ca'a yā 'iiⁿyāⁿ ley miiⁿ chi cuuvi deenu yú chi véé nuuⁿndi yeⁿe yú. Ní ley miiⁿ canee ndii tiempo chí ndāā Cristo Daiya Dendyuūs iⁿ'yeeⁿdí 'cūū. Cristo miiⁿ 'iiⁿyāⁿ yeⁿe compromiso chi Ndyuūs caⁿa yā chi ca'a yā. Ndyuūs dichó'o yā ángeles chí ca'a yā ley Moisés. Moisés miiⁿ ní saⁿ'ā chí canee naavtaⁿ'ā yeⁿe 'iiⁿyāⁿ ndúúcu Ndyuūs. ²⁰ Taachi Ndyuūs ca'á yā compromiso ndúúcu Abraham, nguée cānee 'aama saⁿ'ā naavtaⁿ'ā yeⁿe yā ndúúcu Abraham, nguée ti tan'dúúcā Moisés miiⁿ.

Yeⁿe chi diiⁿ ley yeⁿe Moisés

²¹ ¿'Áá ley miiⁿ contra compromiso yeⁿe Dendyuūs? Nguεε 'tíicā. Nduuti chi Ndyuūs cuuvi ca'a yā 'áámá ley chí cuuvi ca'a vida cueⁿe daāⁿmaⁿ 'iiⁿyāⁿ, tuu'mi ní 'āā ntéé vεε nuuⁿndi yeⁿe 'iiⁿyāⁿ caavā ley miiⁿ. ²² Naati canée nguūⁿ na libro yeⁿe Ndyuūs chí nducyáácá 'iiⁿyāⁿ véé nuuⁿndi yeⁿe yā ti nguée díⁿ yā cumplir ley miiⁿ. Cáávā chuū canée chí i'téenu yú Jesucristo ní Ndyuūs cuuvi téé yā s'uuúⁿ vida cueⁿe daāⁿmaⁿ cucáávā compromiso miiⁿ.

²³ Taachi 'āā cuée ndāā Jesucristo caavā chí cuuvi cu'téenu yú Jesucristo, tuu'mi ní ch'εetinée yú maaⁿ poder yeⁿe ley. 'Tíicā ch'εetinée yú ndí tiempo chí Ndyuūs dichó'o yā Jesucristo na iⁿ'yeeⁿdí 'cūū ní 'íicú cuuvi cu'téenu yú Jesucristo. ²⁴ Ley miiⁿ canee tan'dúúcā criada yeⁿe s'uuúⁿ chí diiⁿ cuidado s'uuúⁿ ndí tiempo chí ndāā Cristo. Maaⁿ ní cucáávā chí i'téenu yú Jesucristo tuu'mi ní Ndyuūs nadich'εecú yā nuuⁿndi yeⁿe yú. ²⁵ Ní taachi ndāā Jesucristo miiⁿ ní i'teenu yú 'yā, nguée canee yú maaⁿ poder yeⁿe ley miiⁿ chí ley miiⁿ nguée diiⁿ cuidado s'uuúⁿ.

²⁶ Maaⁿ ní nducyaaca yú ní daiya Dendyuūs s'uuúⁿ caavā chí i'teenu yú Jesucristo. ²⁷ Caati nducyaaca yú chí chεedínuūⁿní ti i'teenu yú Jesucristo, s'uuúⁿ ní canee yú tan'dúúcā chí véé vestido ngai yeⁿe yú ní canee yú tan'dúúcā Jesucristo ti yeⁿe yā s'uuúⁿ. 'Tíicā s'uuúⁿ. ²⁸ Maaⁿ ní nguée de'ē vεε ndí nduuti chí s'uuúⁿ ní 'iiⁿyāⁿ yeⁿe ndaata Israel, o 'iiⁿyāⁿ yeⁿe ndaata griego, o criada chí yeⁿe 'áámá patrón, o 'iiⁿyāⁿ chí libre yā, o saⁿ'ā o n'daataá ti nducyaaca s'uuúⁿ ní tan'dúúcā 'áámá s'uuúⁿ nūuⁿ cucáávā chí i'teenu yú Jesucristo ní yeⁿe Cristo s'uuúⁿ. ²⁹ Nduúti chí s'uuúⁿ ní yeⁿe Cristo s'uuúⁿ tuu'mi ní s'uuúⁿ ní yeⁿe ndaata Abraham s'uuúⁿ, ní véé chí cuuvi yeⁿe yú yeⁿe compromiso ti 'tíicā Ndyuūs caⁿa yā ndúúcu Abraham chí téé yā s'uuúⁿ.

4

¹ Maaⁿ ní neⁿe caaⁿ'máⁿ chuū ndís'ti yeⁿe 'áámá saⁿ'ā n'gaiyāá chí véé chí cuuvi yeⁿe sa. Taachi saⁿ'ā 'líⁿ sa canee sa tan'dúúcā 'aama mozo ni idiⁿ sa chíiⁿ chí ngaⁿ'ā 'iiⁿyāⁿ chí ch'εetinée yā ná vaacu sa. 'Áará chí vεε chí cuuvi yeⁿe sa nducuéⁿē. ² Saⁿ'ā 'líⁿ sa canee sa ndúúcu 'iiⁿyāⁿ chí diiⁿ cuidado yeⁿe sa ní ndúúcu 'iiⁿyāⁿ chí ngaⁿ'ā ntiiⁿnyuⁿ yeⁿe nducuéⁿē chí yeⁿe sa. 'Tíicā canee sa ndii tiempo chí ngaⁿ'ā chíida sa ní véé nduuyu yeⁿe sa. Tuu'mi ní 'iiⁿyāⁿ ca'a yā nducuéⁿē chí cuuvi yeⁿe sa. ³ 'Tiicā ntúūⁿ s'uuúⁿ Taachi nguée deenu yú yeⁿe Cristo, tuu'mi ní canee yú tan'dúúcā n'gaiyāá yú chí nguée iincheenaⁿ yú. Ní canee yú maaⁿ poder yeⁿe ley yeⁿe yú ní diiⁿ yú chí ngaⁿ'ā ley yeⁿe yú ndúúcu costumbre yeⁿe yú. ⁴ Taachi snuūⁿ ca'ā nguuvi miiⁿ Ndyuūs dichó'o yā Daiya yā iⁿ'yeeⁿdí 'cūū. Ní ch'iindiyāⁿ yā yeⁿe 'áámá n'daataá chí yeⁿe ndaata Israel, yeⁿe 'iiⁿyāⁿ chí díⁿ yā chí ngaⁿ'ā ley yeⁿe Moisés. ⁵ Ní saⁿ'ā miiⁿ ní ndāā sa ní nadanguáⁿ'ai sa s'uuúⁿ chí 'iiⁿyāⁿ Israel s'eeⁿ chí snée yú ndúúcu ley yeⁿe Ndyuūs ndúúcu 'iiⁿyāⁿ gentiles ndúúcu costumbres yeⁿe yā, 'iiⁿyāⁿ s'eeⁿ chí nguée yeⁿe ndaata Israel, níicú nducyaaca yú cuuvi daiya sa s'uuúⁿ.

⁶ Maaⁿ ní nducyaaca s'uuúⁿ ní daiya Ndyuūs s'uuúⁿ. Ní Ndyuūs dicho'ó yā Espíritu yeⁿ'ē Daiya yā chi Cristo na staava yeⁿ'e yú. Espíritu miiⁿ chíⁿ chí diiⁿ chi cuuvi caaⁿ'maⁿ yú 'tíicā: N'dií Ndyuūs Chiidá. ⁷ Maaⁿ ní s'uuúⁿ nguée tan'dúucā mozos s'uuúⁿ ti daiyá Dendyuūs s'uuúⁿ. Ní ndúúti chi daiyá yā s'uuúⁿ tuu'mí Ndyuūs caⁿ'a yā ca'a yā s'uuúⁿ chi cuuvi yeⁿ'e yú tan'dúucā chi ngaⁿ'a yā ti i'téenu yú Cristo.

Pablo idiíⁿ yā cuidado yeⁿ'e 'iiⁿ'yāⁿ chi i'téenu Jesucristo

⁸ Vmnááⁿ vmaaaⁿ taachi nguεε n'diichí nī Ndyuūs, ndís'tií chi nguée yeⁿ'ē 'iiⁿ'yāⁿ yeⁿ'e ndaata Israel diíⁿ nī ntiíⁿnyuⁿ caavā ídolos chi nguée dendyuūs s'eeⁿ. ⁹ Maaⁿ ní chi n'diichí nī Ndyuūs o más cā n'daacā chi caaⁿ'máⁿ chí Ndyuūs chi n'diichí yā ndís'tií chi yeⁿ'é yā taacā chi maaⁿ ní nguεεcúndii ntúuⁿ nī ní neⁿ'é nī diíⁿ nī dendúⁿ cosas chi nguée cuuvi nanguaⁿ'ai yú. Dé'ē cuuvi chi neⁿ'é nī cunée nī tan'duucā 'áamá mozo yeⁿ'ē cosas chi 'tíicā. ¹⁰ Ndís'tií ní di'viicú nī nguuvu s'eeⁿ, ndúucū 'iyyū, ndúucū tiempo, ndúucū nduūyū ti neⁿ'é nī caⁿ'á nī favor yeⁿ'é Ndyuūs. ¹¹ Ndís'tií hermanos yeⁿ'é, 'va'á yeⁿ'e ndís'tií ti nguée dichí'vē nduudu cuaacu chi ngaⁿ'á nguaaⁿ ndís'tií.

¹² Ndís'tií hermanos yeⁿ'é di'cuiitú nī chi diíⁿ nī tan'dúucā chi 'úú idiíⁿ, ní diví nī yeⁿ'e ley ti 'úú diví yeⁿ'e ley miiⁿ ti neⁿ'é diíⁿ tan'dúucā ndís'tií chi nguée deenú nī ley. Taachí ngaⁿ'á nduudu cuaacu nguaaⁿ ndís'tií, ndís'tií ní din'dái nī nduucú. ¹³ Ndís'tií deenu nī chi vmaáⁿ vmaaaⁿ chi'cueéⁿ ndís'tií nduudu yeⁿ'é Ndyuūs ní ngíitā 'úú. ¹⁴ Ndís'tií nguée taanduvéé diíⁿ nī nduucú chi nguée neⁿ'é nī 'úú cáavā ca'ai chi canuuⁿ 'úú chi idiíⁿ sufrir. Ní 'cuuⁿ nī 'úú ní sta'a nī 'úú tan'dúucā chi 'úú 'áamá ángel yeⁿ'é Dendyuūs chi ndaā nanááⁿ ndís'tií. Ní sta'á nī 'úú tan'dúucā chi 'úú ní Cristo 'úú. ¹⁵ ¿De'ē cuuvi chi maaⁿ ní nguée yeenú nī nduucú ní nguée neⁿ'é nī 'úú? 'Úú ngaⁿ'á nduudu cuaacu chi vmaáⁿ vmaaaⁿ neⁿ'é nī 'úú ti nduuti chí cuuvi tun'dáa nī nduutinaáⁿ nī maáⁿ nī chi téé nī 'úú. ¹⁶ Maaⁿ ní 'áá enemigo yeⁿ'é nī 'úú ti ngii cheεchí ndís'tií nduudu cuaacu.

¹⁷ Véé 'iiⁿ'yāⁿ chi ndaā nguaaⁿ ndís'tií chi ngaⁿ'á yā chi neⁿ'é yā ndís'tií naati nguεε n'daacā idiíⁿ yā. Neⁿ'é yā chi ndaacadáámí ndís'tií yeⁿ'ē nduudu cuaacu ní 'caandiveéⁿ nī yeⁿ'e 'iiⁿ'yāⁿ. ¹⁸ N'dáacā chi 'iiⁿ'yāⁿ ngaⁿ'a yā chi neⁿ'e yā ndís'tií nduuti chi diíⁿ yā chi n'daacā ndúucu nī. Ní 'iiⁿ'yāⁿ s'eeⁿ ní diíⁿ yā 'túucā nguée dámaaⁿ taachi 'úú caneé nguaaⁿ ndís'tií. ¹⁹ Ndís'tií hermanos yeⁿ'é, ndís'tií tan'dúucā daiyá 'tíicā ndís'tií. Ti taachi ngaⁿ'á nduudu cuaacu nanááⁿ ndís'tií, 'úú diíⁿ sufrir tan'dúucā 'aama n'daataa diiⁿ tá sufrir taachi ch'iindiyaāⁿ dacuá'āa. 'Tíicā idiíⁿ ndii tiempo chi i'téenu nī Jesucristo ní yeⁿ'é yā ndís'tií. 'Tíicā idiíⁿ sufrir taama vmaáⁿ'ēe ti neⁿ'é chi ndís'tií ch'iⁿ'í nī chi cuaacu níⁿ'nyúⁿ i'téenu nī Cristo. ²⁰ Maaⁿ ní neⁿ'é cunee ndúucū ndís'tií ní cunee ndís'tií ti nguée deenú táacā cuuvi diíⁿ nduucú ndís'tií taachi yaⁿ'ái caneé yeⁿ'e nī.

'Áamá ejemplo chi historia yeⁿ'ē n'daataa Agar ndúucū n'daataa Sara

²¹ Ndís'tií chi neⁿ'é nī caneé nī ndúucū ley yeⁿ'e Moisés, 'cuuvi nī 'úú: ¿'Áá nguée déenu nī chi ngaⁿ'a ley miiⁿ? ²² Caneé nguūⁿ na libro yeⁿ'é Ndyuūs chi Abraham ní véé 'uūvī daiya yā. 'Aama daiya yā ní yeⁿ'e táⁿ'ā chi caneé caadi 'iyyū. Ní táamá daiya yā ní yeⁿ'ē n'daataa yeⁿ'e yā chi nguée criada. ²³ Daiya yā chi yeⁿ'e táⁿ'ā chi caneé caadi 'iyyū ch'iindiyaāⁿ sa ti Abraham neⁿ'e yā daiya yā. Naati táamá daiya táamá n'daataa chi n'daataa yeⁿ'é yā, ch'iindiyaāⁿ sa cucáavā compromiso chi diíⁿ Ndyuūs. Ni maaⁿ níicú chií compromiso chí caⁿ'a Ndyuūs chí ca'a yā daiya Abraham. ²⁴ Chuū ní 'áamá historia ní 'áamá comparación yeⁿ'e táⁿ'ā criada miiⁿ ndúucū táⁿ'ā chi n'daataa yeⁿ'e Abraham. Ndyuūs diíⁿ yā contratar cucáavā nduu 'uuvi cosas chi Ndyuūs cānee yiinú yā chi diiⁿ yā. Táⁿ'ā criada miiⁿ ní nguuvu tá Agar ní 'áamá seña tan'dúucā chi Ndyuūs cānee yiinú yā ní ca'a yā ley Moisés miiⁿ na 'cuεeti Sinaí. Nducyaaca 'iiⁿ'yāⁿ chi caneé yā maaⁿ poder yeⁿ'e ley miiⁿ tan'dúucā criada yeⁿ'e ley 'tíica yā. Ní tan'dúucā criada Agar ndúucū daiyá yā caneé caadi 'iyyū, 'tíica yā. ²⁵ Ndyuūs ch'iⁿ'í yā s'uuúⁿ chi Agar miiⁿ ní 'áamá seña tan'dúucā chi 'cuεeti Sinaí na yáⁿ'āa Arabia 'tíica yā. 'Tiicá ntúūⁿ táamá seña tan'dúucā 'iiⁿ'yāⁿ Israel s'eeⁿ chi ye'e yāāⁿ Jerusalén ti 'iiⁿ'yāⁿ yeⁿ'e yāāⁿ Jerusalén miiⁿ caneé yā maaⁿ poder yeⁿ'e ley yeⁿ'e Moisés. Ní caneé yā tan'dúucā criados yeⁿ'ē ley miiⁿ. ²⁶ Naati

Ndyuūs ch'i'ní yā s'uuúⁿ chi n'daataá chi nguuvi Sara chi nguée criada ní 'áamá seña tan'dúucā chi yāⁿ Jerusalén chí ngai chí canee na va'ai chēti nguuvi. Ní yāⁿ yeⁿe nducyaaca yú chi i'teenu yú Jesucristo. ²⁷ Canée nguūⁿ ndii cuááⁿ vmaaaⁿ na nduudu yeⁿe Ndyuūs, 'tiicā:

Ndís'tiī n'daata s'eeⁿ chi nguée chiindī daiyá nī cuuvi yeenu taaví nī. Ní 'cuai nī ní caaⁿ máⁿ nī ndúucū vaadī yeenu 'aara chi nguée véé daiya nī. Ti ndís'tiī chi libre chi nguée daiyá nī cuuvi más ca daiyá nī nguée ti n'daataá criada chi véé daiyá yā yeⁿe isaⁿā yeⁿe nī.

²⁸ Ndís'tiī hermanos yeⁿe, 'tíicā s'uuúⁿ tan'dúucā daiya chi nguuvi Isaac chi yeⁿe Abraham ndúucū Sara 'tíicā s'uuúⁿ. Ní Ndyuūs tee yā compromiso s'uuúⁿ ti 'tiicā Ndyuūs ngaⁿa yā chi ca'a yā Abraham miiⁿ daiyá yā Isaac miiⁿ tí Isaac miiⁿ ní yeⁿe compromiso, 'tíicā s'uuúⁿ. ²⁹ 'Tíicā tiempo chi 'āā chó'ōo Ndyuūs idiíⁿ yā chi saⁿā daiya criada chi daiya Abraham caati neⁿe yā daiya yā, daiya criada miiⁿ can'dáa sa saⁿā daiya Sara caati daiya Sara ndúucū Abraham ní yeⁿe compromiso chi diiⁿ Ndyuūs ndúucū Abraham. 'Tíicā maaⁿ ní, 'iiⁿyāⁿ chi cānee yā maaⁿ poder yeⁿe ley yeⁿe Moisés ní nguée yeⁿe Señor Jesucristo. 'Iiⁿyāⁿ s'eeⁿ can'dáa yā s'uuúⁿ ní díⁿ yā chi diiⁿ yú sufrir ti i'teenu yú Jesucristo. Ní canée yú ndúucū Espíritu N'dai yeⁿe Ndyuūs cáávā compromiso yeⁿe yā. ³⁰ Naati canée nguūⁿ na libro yeⁿe Ndyuūs ndii cuááⁿ vmaaaⁿ 'tíicā: Cuaaⁿ chuva'āi í'neēⁿ táⁿā chi canée caadi 'iiyū ndúucū daiya tá ti nguée de'ē vee chi tuneⁿ daiya táⁿā chi canée caadi 'iiyū yeⁿe chi cuuvi yeⁿe saⁿā chi daiya táⁿā Sara chi libre. ³¹ Ndís'tiī hermanos yeⁿe, cáávā chuū s'uuúⁿ ní nguée tan'dúucā chi daiya táⁿā chi canée caadi 'iiyū s'uuúⁿ, ti s'uuúⁿ tan'dúucā chi daiya táⁿā chi libre 'tíicā s'uuúⁿ.

5

Cunée diitū yú ndúucū chi i'teenu yú ti libre yú

¹ Maaⁿ ní Cristo nadanguáⁿai yā s'uuúⁿ yeⁿe maaⁿ poder yeⁿe ley. Caavā chúū 'cuētinéⁿ n'daaca yú caati i'teenu yú Cristo. Ní nguée nguēecunée yú ní diiⁿ yú tan'duucā chi ngaⁿa ley. Ní nguée canee yú tan'dúucā 'iiⁿyāⁿ chi canée caadi 'iiyū.

² Ndís'tiī 'caandiveⁿ nī. 'Úú, Pablo, ngaⁿá ngii ndís'tiī. Nduuti chi ndís'tiī saⁿā ca'a nī lugar chí 'iiⁿyāⁿ díⁿ yā circuncidar ndís'tiī tuu'mi ni nguée cuuvi cuta'á nī yeⁿe vaadī n'dai chi Cristo neⁿe yā tēe yā ndís'tiī. ³ Ngaⁿá ntuūⁿ chi nducyaaca saⁿā chi canée sá circuncidado canée chi diiⁿ sa cumplir nducuéⁿe chi ngaⁿa ley miiⁿ. ⁴ Nduuti chi nadacadíⁿnuuⁿ nī chi ndís'tiī nanguáⁿai nī yeⁿe nuuⁿndi yeⁿe nī cucáávā ley miiⁿ tuu'mi ní 'āā diví nī Cristo 'áamá lado. Ní Cristo miiⁿ nguée tēe yā ndís'tiī dendú'ū chi n'dai ca yeⁿe yā cucáávā chi dineⁿe cá yā s'uuúⁿ. ⁵ Ti s'uuúⁿ chi i'teenu yú Jesucristo canée yú ndúucū Espíritu N'dai yeⁿe Ndyuūs chi nginneⁿ s'uuúⁿ. Ní canee ngiinu yú chi nguée véé nuuⁿndi yeⁿe yú nanááⁿ Ndyuūs. ⁶ S'uuúⁿ chi saⁿā s'uuúⁿ nguée dichí'vē nduuti chi 'iiⁿyāⁿ díⁿ yā circuncidar s'uuúⁿ o nguée. Chuū dichí'vē chi i'teenu yú Jesucristo. Ní cáávā chuū neⁿe yú 'iiⁿyāⁿ.

⁷ Nguuvi chi chó'ōo ndís'tiī n'daacā i'téenu nī Jesucristo naati maaⁿ ní nguēe 'tíicā. ¿Du'ú di'vaachi yeⁿe nī chi nguēe n'giindiveⁿ nī nduudu cuaacu yeⁿe Cristo? ⁸ Ndyuūs nguée dí'vaachi yā ndís'tiī ti Ndyuūs miiⁿ yaa'ví yā ndís'tiī chi cuuvi yeⁿe yā ndís'tiī. ⁹ 'Iiⁿyāⁿ chi di'vaachi yā ndís'tiī ní tan'duucā ta 'líⁿ chúúndí levadura chí nadicuéⁿ tanducuéⁿe yaāchī, 'tíica yā. ¹⁰ Véé confianza yeⁿe ndúucū Señor Jesucristo ní 'úú ní deenú chi ndís'tiī nguée n'giindiveⁿ nī nduudu yeⁿe 'iiⁿyāⁿ chí di'vaachi yā ndís'tiī. Ndyuūs díⁿ yā castigar 'āā du'ú nūuⁿ 'iiⁿyāⁿ chí di'vaachi ndís'tiī.

¹¹ Ndís'tiī hermanos yeⁿe, nduuti chi ndíⁿ maaⁿ 'úú ngaⁿá chi saⁿā gentiles canee chi canée circuncidado tuu'mi ní 'iiⁿyāⁿ Israel chí judío s'eeⁿ nguée can'dáa yā 'úú chi ya'āi 'úú. Nguée 'tíicā. 'Iiⁿyāⁿ Israel s'eeⁿ can'dáa yā 'úú ti 'úú ngaⁿá chi Jesucristo nadanguáⁿai yā 'iiⁿyāⁿ ti ch'ii yā na cruz cáávā nuuⁿndi yeⁿe yā. ¹² N'daacā chi 'iiⁿyāⁿ chi di'vaachi yā ndís'tiī diví yā yeⁿe nguaaⁿ ndís'tiī.

¹³ Ndís'tiī hermanos yeⁿé, Ndyuūs yaa'ví yā s'uuúⁿ ní nguéeé canée yú maaⁿ poder yeⁿe ley ti libre yú. Maaⁿ ní chi libre yú nguéeé diiⁿ yú dendu'ū chi neⁿe yú yeⁿe cosas chi véé iⁿ'yeeⁿdī, naati dineⁿe yú 'aama yú ndúúⁿcū taama yú. Ní cunnee yú vi'ī cucáāvā chi neⁿe yú vi'ī. ¹⁴ S'uuúⁿ cuuvi diiⁿ yú nducueⁿéⁿē chi ngaⁿ'a ley ndúúⁿti chí diiⁿ yú tan'dúúⁿcā chí ngaⁿ'a 'tíicā: Dinéⁿe yú nducyaaca 'iiⁿ'yāⁿ tan'duucā chi dinéⁿe yú maāⁿ yú. ¹⁵ Ndúúⁿti chi nguéeé neⁿe yú 'aama yú taama yú tuu'mi ní diiⁿ yú tan'dúúⁿcā chi che'e yú 'aama yú taama yú; cuin'diichi yú ti cuuvi ituuvi yú 'aama yú taama yú.

Lo que chi neⁿe yú diiⁿ yú ndúúⁿcū chi neⁿe Espíritu N'dai yeⁿe Ndyuūs chi diiⁿ yú

¹⁶ 'Caandiveén nī chuū chi ngaⁿ'á: Caneé yú chí 'cuēti chiicá yú tan'dúúⁿcā chi Espíritu N'dai yeⁿé Ndyuūs ch'iⁿ'i s'uuúⁿ. Ní nguéeé diiⁿ yú tan'dúúⁿcā chi neⁿe cuerpo yeⁿé yú. ¹⁷ Ti chííⁿ chí neⁿe cuerpo yeⁿe yú chí diiⁿ yú nguéeé tan'dúúⁿcā chi neⁿe Espíritu N'dai yeⁿé Ndyuūs chi diiⁿ yú. Ní Espíritu N'dai yeⁿé Ndyuūs ndúúⁿcū chi neⁿe diiⁿ cuerpo yeⁿe yú nguéeé neⁿe 'aama taama na staava yeⁿé yú. Chííⁿ chí nguéeé cuuvi diiⁿ yú ní chííⁿ chí neⁿe yú diiⁿ yú. ¹⁸ Nduuti chi s'uuuⁿ idiiⁿ yú tan'dúúⁿcā chi ch'iⁿ'i Espíritu N'dai yeⁿé Ndyuūs s'uuúⁿ tuu'mi ní nguéeé canee yú maaⁿ poder yeⁿe ley.

¹⁹ Ti nuuⁿndi yeⁿe cuerpo chí 'iiⁿ'yāⁿ diiⁿ yā ní inaaⁿ yú, ní chúū: 'iiⁿ'yāⁿ chi n'giindivaacú yā ngaⁿ'á yā ndúúⁿcū n'daataá o saⁿ'ā yeⁿe taama yā. Saⁿ'ā da'caiyāā caⁿ'á sa ndúúⁿcū 'áámá n'daataá chi duuchi née sa taⁿ'ā. 'Iiⁿ'yāⁿ chí diiⁿ yā dendu'ū chi nguéeé n'daacā, 'iiⁿ'yāⁿ s'eeⁿ ní nguéeé nadacadíinūⁿ yā taacā chí diiⁿ yā. ²⁰ 'Iiⁿ'yāⁿ i'teenú yā ídolos ndúúⁿcū cosas chí nguéeé Ndyuūs ndúúⁿcū nducueⁿéⁿē chí diiⁿ 'iiⁿ'yāⁿ chí yeⁿe chíngaatu. 'Iiⁿ'yāⁿ nduuvitaáⁿ yā ní n'dííte yā. Ní taáⁿ yā ní in'nuúⁿ yā vaadi 'caa'va. 'Iiⁿ'yāⁿ 'iiⁿ'nuⁿ cheendí yā ní 'iiⁿ'yāⁿ diiⁿ yā chí véé divisiones nguaaⁿ vi'ī yā. Ní diiⁿ yā chí véé vaadi 'caa'va. ²¹ 'Iiⁿ'yāⁿ neⁿé yā cosas tan'dúúⁿcā chí véé yeⁿé tanáⁿ'a yā. Ní 'iiⁿ'yāⁿ n'giíⁿnúⁿ yā 'iiⁿ'yāⁿ. Ní 'iiⁿ'yāⁿ chí cúú'ví ndúúⁿcū 'iiⁿ'yāⁿ chí n'deeé n'dái nge'e ní idiíⁿ yā dendu'ū chí nguéeé n'daacā chí tan'dúúⁿcā chuū. 'Úú ní ngaⁿ'á ngī ndís'tiī chí diví nī yeⁿe dendu'ū chuū tan'dúúⁿcā chí 'āā ngaⁿ'á nguuvi chí 'āā cho'ōo. 'Iiⁿ'yāⁿ chí idiíⁿ yā s'tuucā nguéeé de'ē veē cuuvi yeⁿé yā naachi Ndyuūs ngaⁿ'a ntiiⁿnyúⁿ yā.

²² Naati nduuti chí 'cuēti chiicá yú tan'dúúⁿcā chí ch'iⁿ'i Espíritu N'dai yeⁿé Ndyuūs s'uuúⁿ tuu'mi ní dineⁿe yú 'iiⁿ'yāⁿ. Ni yeenú taavi yú. Ní canée vaadi 'diiiⁿ na staava yeⁿe yú. Ní cucheē yú yeⁿe tanducueⁿéⁿē chí n'gēenu yú ngii. Ní din'daaca yú ndúúⁿcū vi'ī ní diiⁿ yú nducueⁿéⁿē chí n'dai ndúúⁿcū vi'ī. Ní 'áámá canee yú ndúúⁿcū chí i'teenú yú. ²³ Ní canee yú ndiicúúⁿ. Ní diiⁿ yú cuidado chí diiⁿ yú cosas chí n'daacā. Espíritu N'dai yeⁿé Ndyuūs nginnee s'uuúⁿ chí diiⁿ yú nducueⁿéⁿē chuū chí n'daacā. Ní ley yeⁿe Moisés miiⁿ nguéeé ngaⁿ'a chí nguéeé cuuvi diiⁿ yú s'túúⁿcā. ²⁴ S'uuúⁿ chí 'āā i'teenú yú Señor Jesucristo yeⁿe yú nguéeé diiⁿ yú tan'duucā chí neⁿe cuerpo yeⁿe yú. Ní canee yú tan'dúúⁿcā chí 'āā ca'neeⁿnga'ā yú nducueⁿéⁿē chí nguéeé n'daacā chí neⁿe diiiⁿ cuerpo yeⁿe yú, 'tíicā canee yú. ²⁵ Nduuti chí candúúⁿchí yú ndúúⁿcū Espíritu N'dai yeⁿé Ndyuūs tuu'mi ní canée chí 'cuēti chiicá yú tan'dúúⁿcā chí n'gíⁿ'i Espíritu N'dai yeⁿé Ndyuūs s'uuúⁿ.

²⁶ Nguéeé canée chí din'geete yú chí véé vaadi 'caa'va nguaaⁿ s'uuúⁿ. Ní nguéeé nguee yú 'aama yú taama yú.

6

S'uuúⁿ cunnee yú 'aama yú ndúúⁿcū taama yú

¹ Ndís'tiī hermanos yeⁿé chí diiⁿ nī tan'dúúⁿcā chí ch'iⁿ'i Espíritu N'dai yeⁿé Ndyuūs, nduuti chí 'áámá hermano yeⁿe yú 'āā diiⁿ yā nuuⁿndi ndís'tiī canée chí cunnee nī hermano miiⁿ. Diiⁿ n'daacā nī ndúúⁿcū yā. Ní ch'iⁿ'i nī hermano miiⁿ cheē nuuⁿndi chí diiⁿ yā caati cuuvi nguēcúndii yā yeⁿe nuuⁿndi yeⁿe yā. Ndís'tiī ntúúⁿ 'cuētinée nī cáacá nī ndúúⁿcū cuidado ti nguéeé dinuuⁿndí nī. ² Cunnée yú 'aama yú taama yú ní ya'āi 'iinu yú hermanos caava dendu'ū vaadi ya'āi chí yeⁿé 'aama yú taama yú. 'Tíicā ní diiⁿ yú tan'dúúⁿcā chí Cristo caⁿ'a ntiiⁿnyúⁿ yā s'uuúⁿ.

³ Nduuti chí 'áámá saⁿā nadacadíínuuⁿ sa chí neené ch'εετε sa ní nguεε 'tíicā, saⁿā miiⁿ nginnche'éí máaⁿ sa saⁿā. ⁴ Ca'áámá ca'aama s'uuúⁿ ní canee chí tuumicadíínuuⁿ yú nducuéⁿē chí diiⁿ yú. Tuu'mi ní cuuvi yeenu yú ti n'daacā cosas chí diiⁿ yú. Ní nguée nadacadíínuuⁿ yú yeⁿē ntiiⁿnyuⁿ yeⁿē taama 'iiⁿ'yāⁿ táacā chí diiⁿ yā. ⁵ Caati ca'áámá ca'aama s'uuúⁿ canee chí cuchεε yú yeⁿe nducuéⁿē chí chó'ōo yeⁿē maaⁿ yú ní diiⁿ yú cuenta yeⁿē maaⁿ yú yeⁿe chí diiⁿ yú nguée yeⁿē taamá yā.

⁶ 'Iiⁿ'yāⁿ chí n'geēⁿ nduudu yeⁿé Ndyuūs canée chí cunnee yā tanáⁿ'ā 'iiⁿ'yāⁿ chí ngi'cueeⁿ nduudu miiⁿ.

⁷ Ndís'tiī nguée canee chí canche'éí nī maaⁿ nī. Ndyuūs n'diichí yā ndís'tiī ní nguée cuuví canche'éí nī Ndyuūs. Nducuéⁿē cosa chí idiiⁿ saⁿā tan'dúucā chí cúunū sa, ní chíiⁿ ntúūⁿ cútā'ā sa cosecha yeⁿē sa. ⁸ Nduuti chí diiⁿ yú tan'dúucā chí neⁿe cuerpo yeⁿē yú chí dinuuⁿndi yú tuu'mi ní dindai yú ní canee yú tan'dúucā 'áámá cosecha chí ngiīnū chí ngo'oó yeⁿē. Naati nduuti chí diiⁿ yú cosas chí ch'iⁿ'i Espíritu N'dai yeⁿé Ndyuūs s'uuúⁿ tuu'mi ní Espíritu N'dai yeⁿé Ndyuūs téé yā s'uuúⁿ vida cueⁿe daāⁿmaⁿ. Ní dendu'ū tan'dúucā cosecha yeⁿē chí diiⁿ yú téé yā s'uuúⁿ. ⁹ Cáāvā chuū nguée canee chí cuuví 'daān'di yú chí diiⁿ yú nducueⁿē chí n'daacā. ti ndaá nguuvi yeⁿē chí cuuvi cuta'a yú cosecha yeⁿē chí n'daacā idiiⁿ yú nduuti chí nguée cuūnu yú. ¹⁰ Tan'dúucā chí véé yaaⁿ yú din'daacā yú ndúucū nducyaaca 'iiⁿ'yāⁿ. 'Tiicā ntúūⁿ din'daacā ca yú ndúucū hermanos yeⁿe yú chí i'téenu yā Jesucristo.

Consejo yeⁿe Pablo ndúucū saludos yeⁿé 'iiⁿ'yāⁿ

¹¹ N'diichí nī 'téé chεετε 'áámá caaca dinguúⁿ yeⁿé nī ndúucū ta'á. ¹² 'Iiⁿ'yāⁿ s'eeⁿ chí ngaⁿ'a yā ndís'tiī chí canée chí cuuví nī circuncidado, 'iiⁿ'yāⁿ s'eeⁿ dííⁿ yā 'túucā, ti neⁿé yā caⁿ'á yā favor yeⁿe 'iiⁿ'yāⁿ judíos chí Israel chí yeⁿe circuncisión chí canée ndúucū ley yeⁿe yā. Ní nguée neⁿé yā chí 'cueenu yā cuuvi cáāvā Jesucristo chí ch'iī yā na cruz. ¹³ Saⁿ'a Israel s'eeⁿ chí 'āā circuncidado yā ní mar 'áámá yā nguée cuuví diiⁿ yā tanducuéⁿe chí canée nguūⁿ na ley yeⁿé yā. Neⁿé yā chí ndís'tiī saⁿā cuuví nī circuncidado. Ní 'iiⁿ'yāⁿ s'eeⁿ cuuvi yeenu yā ní ngaⁿ'á yā chí dich'εετε yā maaⁿ yā 'iiⁿ'yāⁿ tí ndís'tiī ntúūⁿ dííⁿ nī tan'duucā chí dííⁿ yā, ní candεε nī marca yeⁿe circuncisión na cuerpo yeⁿe nī. ¹⁴ 'Úú nguée neⁿé caaⁿ'máⁿ chí ch'εετε yeⁿē mar 'áámá dendu'ū yeⁿē iⁿ'yeeⁿdí 'cūū. Neⁿé caaⁿ'máⁿ chí Jesucristo ch'iī yā na cruz caava nuuⁿndi yeⁿē nducyáácá 'iiⁿ'yāⁿ. Taachi Cristo ch'iī yā na cruz, 'tíicā tan'duucā chí cuerpo yeⁿé ch'iī ntúūⁿ. 'Tiicā ntúūⁿ ní caavā 'úú nducuéⁿē chí yeⁿe iⁿ'yeeⁿdí canee tan'duucā chí n'díí.

¹⁵ Maaⁿ ní s'uuúⁿ saⁿā chí i'teenu yú Señor Jesucristo yeⁿe yú nguée dichí'vē nduuti chí véé marca yeⁿe circuncisión na cuerpo yeⁿe yú o nguée. Chuū ní dichí'vē chí 'iiⁿ'yāⁿ ngai s'uuúⁿ ní véé vida ngai yeⁿe yú tan'dúucā chí nuuⁿmaⁿ ch'iindiyāāⁿ ntúūⁿ yú táámá.

¹⁶ Nducyaaca yú chí 'cueti chiicá yú tan'dúucā chí ch'iⁿ'í ndís'tiī tuu'mi ní Ndyuūs téé yā vaadī 'diiⁿ na staava yeⁿe yú. Ní Ndyuūs ya'ai 'iinú yā caavā ndís'tiī. Ní nducyaaca s'uuúⁿ chí i'teenu yú Jesucristo, s'uuúⁿ ní yeⁿé ndaata yeⁿe Ndyuūs chí cuaacu nííⁿnyúⁿ ndaata yeⁿe 'iiⁿ'yāⁿ Israel chí judíos.

¹⁷ Ndíí maaⁿ ndíí cuaaⁿ chí cuchii nguée neⁿé chí mar 'áámá 'iiⁿ'yāⁿ dííⁿ nndú'u yā 'úú, caati 'úú ndéé yaātū na cuerpo yeⁿé naachi 'iiⁿ'yāⁿ ch'eⁿé yā 'úú, ti 'úú idiíⁿ ntiiⁿnyuⁿ yeⁿē Señor Jesucristo yeⁿē yú.

¹⁸ Ndís'tiī hermanos yeⁿé, Señor Jesucristo yeⁿe yú canée yā nduucú nī ní cueⁿe daāⁿmaⁿ itée yā ndís'tiī nducuéⁿē chí n'daacā n'dai yeⁿé yā. 'Tíicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ EFESO

Pablo idinguúⁿ yā carta 'cūū yeⁿe 'iiⁿ'yāⁿ chi naⁿ'á yā yaācū na yāāⁿ Efeso

¹ 'Úú Pablo 'úú, ní 'úú apóstol yeⁿe Señor Jesucristo caavā chi 'tíicā neⁿe Ndyuūs chi dichó'o yā 'úú. 'Úú idinguúⁿ carta 'cūū yeⁿe nducyaaca 'iiⁿ'yāⁿ chi snée yā na yāāⁿ Efeso, 'iiⁿ'yāⁿ chi yeⁿe Ndyuūs ni i'téenu yā Señor Jesucristo. ² Ndyuūs Chiida yú ndúúcu Señor Jesucristo yeⁿe yú ngingneé yā ndís'tiī ní tée yā cosas chi n'daacā n'dai, ní tée yā ndís'tiī vaadī 'diiⁿ yeⁿ'é yā.

Yeⁿe dendu'ū chi n'daacā n'dai chi Cristo ca'á yā 'iiⁿ'yāⁿ yeⁿ'é yā

³ Nducyaaca yú canee chi dich'εεté yú Ndyuūs chi Chiidá Señor Jesucristo. Maaⁿ ní caavā chi s'uuúⁿ ní yeⁿe Cristo s'uuúⁿ, Ndyuūs tée yā s'uuúⁿ dendu'ū yeⁿ'é yā chi n'dai taavi ca yeⁿe nducueⁿ'ē chi n'dai tan'dúúca chi s'uuúⁿ snee yú na va'ai chεeti nguuvī. ⁴ Ní 'tíicā Ndyuūs nadidεεvé yā s'uuúⁿ chi cuuvi yeⁿ'é yā s'uuúⁿ ní cuuvi yeⁿe Cristo s'uuúⁿ ndíí taachi 'āā 'cuéé din'dái yā iⁿ'yeēⁿdī. Ní nduuví n'dai yú ní i'teenu n'dāca yú Cristo ní nguéé véé nuuⁿndi yeⁿe yú nanāāⁿ yā. ⁵ Ní Ndyuūs 'āā deenú yā chiiⁿ chi neⁿ'é yā dííⁿ yā cáāvā chi neⁿ'é yā s'uuúⁿ. Cáāvā chi neⁿ'é yā chi cuuvi yeⁿ'é yā s'uuúⁿ, sta'á yā s'uuúⁿ chi cuuvi daiyá yā s'uuúⁿ cucáāvā Cristo Jesús. ⁶ Cucáāvā chuū cueⁿe daāⁿmaⁿ dich'εεté taavi yú Ndyuūs chi itée yā s'uuúⁿ dendu'ū chi ch'εεte n'dai yeⁿ'é yā caati maaⁿ ní s'uuúⁿ ní yeⁿe Cristo s'uuúⁿ. Ndyuūs dííⁿ yā recibir s'uuúⁿ caati neⁿe taavi cá yā Cristo. ⁷ Ní cáāvā Ndyuūs neⁿe taavi cá yā nducyaaca yú dichó'o yā Daiya yā chi ch'iī yā cáāvā s'uuúⁿ. Ní Ndyuūs nadich'εεcú yā nuuⁿndi yeⁿe yú cáāvā yuūuⁿ yeⁿ'é Cristo. Ní cáāvā chi Ndyuūs 'tíicā neⁿ'é yā s'uuúⁿ itée yā dendu'u chi n'daacā yeⁿ'é yā. ⁸ Níicú Ndyuūs ch'iⁿ'í yā s'uuúⁿ chi neⁿe taavi cá yā s'uuúⁿ. Ní dííⁿ yā chi deenu yú taanduvéé vaadī n'dai yeⁿ'é yā ní tuumicadíínuuⁿ yú nducueⁿ'ē. ⁹ Ní Ndyuūs 'āā dííⁿ yā chiiⁿ chi neⁿ'é yā dííⁿ yā. Ní dííⁿ yā chí n'diīchi yú chiiⁿ chi canúúⁿ n'de'ei yeⁿ'é yā ndii cuááⁿ vmnaaⁿ cucááva Cristo. ¹⁰ Ní chuū chi canuuⁿ n'de'ei yeⁿ'é Ndyuūs chi Ndyuūs caⁿ'a yā chi dííⁿ yā chi Cristo ngaⁿ'a ntiīⁿnyúⁿ yā yeⁿe nducueⁿ'ē chi snée nanguuvi ndúúcu chi snée ná yáⁿ'āa. Ní Ndyuūs caⁿ'á yā chi nduuvidaamá tanducueⁿ'ē dendu'ū nanāáⁿ Cristo.

¹¹ Ndyuūs dííⁿ yā chi nducueⁿ'ē chi chó'ōo ní chó'ōo tan'dúúca chi neⁿe yā. Ní Ndyuūs ndεεvé yā s'uuúⁿ ndii cuááⁿ vmnaaⁿ níicú chi cuuvi yeⁿe yú cosas chi caⁿ'a yā chi tée yā s'uuúⁿ, caati s'uuúⁿ ní yeⁿe Cristo s'uuúⁿ. ¹² Ní Ndyuūs 'tíicā dííⁿ yā ti neⁿ'é yā chi nús'uu ní ch'iⁿ'í 'nū vaadī dεεve ca yeⁿ'é Ndyuūs nanāáⁿ 'iiⁿ'yāⁿ ti nús'uu ní yeⁿe 'iiⁿ'yāⁿ Israel nús'uu chi vmnááⁿ vmnaaⁿ i'téenu 'nū Cristo. ¹³ Chuū dendu'ū ní yeⁿe ndís'tiī chi nguéé yeⁿe 'iiⁿ'yāⁿ Israel s'eeⁿ ti taachi ch'iindiveéⁿ nī nduudu cuaacu yeⁿe evangelio chi ndúúdu ngai yeⁿe Cristo chi nadanguaⁿ'āi ndís'tiī ní s'téenu nī yeⁿ'ē. Tuu'mi ní canéé 'áámá sello yeⁿ'é Ndyuūs ndúúcu nī. Ní sello miiⁿ ní Espíritu N'dai yeⁿe Ndyuūs chí 'áámá compromiso chi Ndyuūs caⁿ'a yā chi tée yā s'uuūⁿ ndíí cuááⁿ vmnaaⁿ. ¹⁴ Ní Espíritu N'dai yeⁿ'é Ndyuūs ní 'áámá seña chi cuta'a yú chi cuuvi yeⁿe yú chiiⁿ chi Ndyuūs caⁿ'a yā chi tée yā chi cuuvi yeⁿe yú. Ní Ndyuūs yaa'vi yā s'uuúⁿ chi cuuvi yeⁿ'é yā s'uuúⁿ. Taachi ndaa nguuvī chi neⁿe Ndyuūs, Ndyuūs caⁿ'á yā dííⁿ yā chi s'uuúⁿ tan'dúúca máāⁿ yā 'tíicā s'uuúⁿ. Ní Espíritu N'dai yeⁿ'é Ndyuūs ní 'áámá seña yeⁿ'é chuū. Ní 'íicú nducyaaca yú ndúúcu 'iiⁿ'yāⁿ chi cuuvi cu'téenu yā Cristo cuuvi nadich'εεte yú Ndyuūs cucáāvā chi ch'εεté n'dai yā.

Pablo ngiicá yā Ndyuūs chi ca'á yā vaadī deenu 'iiⁿ'yāⁿ chi cu'téenu yā Cristo

¹⁵ Cucaavā chuū, taachi 'úú Pablo ch'iindiveéⁿ chi ndís'tiī i'téenu nī Señor Jesucristo ní dinéⁿe nī nducyaaca 'iiⁿ'yāⁿ chi i'téenu yā Señor Jesucristo 'iivú Ndyuūs, ¹⁶ tuu'mi ní nguéé ngíí 'daan'dí chi ca'á gracias Ndyuūs cucáāvā ndís'tiī. Ní taachi in'gaacú yeⁿe ndís'tiī, tuu'mi ní ngaⁿ'angua'á cucáāvā ndís'tiī. ¹⁷ Ní ngiicá Ndyuūs yeⁿe Señor

Jesucristo yeⁿē yú chi Ndyuūs miiⁿ chi Chiida yú chi d̄eeve taavi ca, ní ngiicá Ndyuūs chi tée yā ndís'tiī vaadī deenu yeⁿe Espíritu N'dai yeⁿé Ndyuūs, ní 'ífcú cuuvi déenu cá nī ní 'iintiinaáⁿ nī chíⁿ chí neⁿe Ndyuūs. ¹⁸ Ní ngiicá Ndyuūs chi díⁿ yā chi cuuvi déenu nī ní cadíⁿuuⁿ nī ch̄ee chi cūnee ngiinu yú chi Ndyuūs tée yā s'uuúⁿ, ti nd̄eeve yā s'uuúⁿ. Ní deenú nī d̄e'ē chúú^{cā} n'dai ca ní d̄eeve ca chi cuuvi yeⁿé nī chi Ndyuūs ca'á yā 'iiⁿ'yāⁿ chi yeⁿe yā. ¹⁹ Ní ngiicá Ndyuūs chi cuuvi deenú nī chi poder chi ch'̄eete taavi ca chi yeⁿe Ndyuūs. Ní nguéé mar 'áámá dendu'ū chi Ndyuūs nguεε cuuvi díⁿ yā. Ní Ndyuūs díⁿ yā ntiiⁿnyuⁿ caavā s'uuúⁿ chi i'teenu yú 'iiⁿ'yāⁿ. Maaⁿ ní díⁿ yā ntiiⁿnyuⁿ ndúú^{cū} poder yeⁿé yā cáávā s'uuúⁿ, ní ch'iⁿ'í yā poder yeⁿé yā chí ch'̄eete ní ndúú^{cū} fuerzas yeⁿé yā. ²⁰ 'Tíicā Ndyuūs ch'iⁿ'i yā maaⁿ poder yeⁿé yā taachi nadicuéeⁿ yā Cristo yeⁿe nguaaⁿ tináⁿā. Ní s'néeⁿ yā Cristo na va'ai ch̄eeti nguuvi ní Cristo ch'iindí yā lado tá cuaacu yeⁿé Ndyuūs chiidá yā chi lado yeⁿē honor. ²¹ Ní ca'á yā Cristo nducuéⁿē poder tan'dúú^{cā} 'áámá 'iiⁿ'ntyéⁿē chi caaⁿ'maⁿ ntiiⁿnyúⁿ yā yeⁿe tanáⁿ'ā 'iiⁿ'ntyéⁿē ndúú^{cū} yeⁿē nducyaá^{cá} 'iiⁿ'yāⁿ chí ngaⁿ'a ntiiⁿnyúⁿ yā ndúú^{cū} yeⁿē nducuéⁿē poder chi véé yeⁿe nducyaaca patrón chi ngaⁿ'a ntiiⁿnyúⁿ yā. Ní Cristo ní más ca ch'̄eete ca yeⁿe nducuéⁿē chi véé chi cuuvi caaⁿ'maⁿ yú yeⁿē, nguéé dámaāⁿ yeⁿē chi véé mááⁿ, 'tiicá ntúúⁿ yeⁿe nducuéⁿē chi cuchii. ²² Ní Ndyuūs s'néeⁿ yā tanducuéⁿē dendu'ū maaⁿ poder yeⁿe Cristo. Ní Ndyuūs s'néeⁿ yā Cristo lugar más cā ch'̄eete. Ní Cristo miiⁿ tan'duucā chi tíⁿ yā yeⁿe nducyaaca 'iiⁿ'yāⁿ chi i'téenu yā ní cán'a yā yaacū yeⁿe Cristo, 'tíicā Cristo miiⁿ. ²³ 'Iiⁿ'yāⁿ chi i'téenu yā Cristo ní nducyaaca 'iiⁿ'yāⁿ s'eeⁿ ní tan'duucā cuerpo yeⁿé Cristo, 'tíicā yā. Ní cuaacu nducyaaca 'iiⁿ'yāⁿ s'eeⁿ ní yeⁿe Cristo. Ní Cristo miiⁿ ní n'daacā taavi yā ní canée yā yeⁿe tanducuéⁿē dendu'ū ndúú^{cū} tanducuéⁿē cuaaⁿ.

2

Ndyuūs nadanguáⁿ ai yā s'uuúⁿ ti neⁿé yā nducyaaca 'iiⁿ'yāⁿ

¹ Nguuvi chi chó'ōo ndís'tiī dinuuⁿndí nī ní sneé nī tan'dúú^{cā} 'iiⁿ'yāⁿ chi n'díⁿ caavā nducuéⁿē dendu'ū chi díⁿ nī chi nguεε n'daacā. Naati maaⁿ ní Ndyuūs tee yā ndís'tiī vida cueⁿe daāⁿmaⁿ dáámá ndúú^{cū} Cristo caati nadacuéeⁿ yā Cristo yeⁿe nguaaⁿ tináⁿā. ² Ní nguuvi chi chó'ōo ndís'tiī díⁿ nī nuuⁿndi ní dinuuⁿndí nī ndúú^{cū} tanáⁿ'ā 'iiⁿ'yāⁿ yeⁿe iⁿ'yeeⁿdí 'cūū. Ní díⁿ nī tan'dúú^{cā} chi neⁿe espíritu chi nguéé n'dai. Espíritu miiⁿ ní yááⁿ'nguiinūⁿ ní espíritu chi canée na 'yúúné ní ngaⁿ'ā ntíⁿnyúⁿ yeⁿe iⁿ'yeeⁿdí ní ngaⁿ'ā ntíⁿnyúⁿ yeⁿe nducyaaca 'iiⁿ'yāⁿ chi nguéé n'giindiveéⁿ yā nduudu yeⁿé Ndyuūs. ³ Ní nducyaaca s'uuúⁿ 'tíicā diiⁿ yú nguuvi chi chó'ōo ní diiⁿ yú tan'dúú^{cā} chi neⁿe yú ní diiⁿ yú tan'dúú^{cā} chi neⁿe cuerpo yeⁿe yú ní tan'dúú^{cā} chi nadicadiinuuⁿ yú. Ní cáávā chuū nducyaaca yú canée chí cuta'a yú ndúú^{cū} tanáⁿ'ā 'iiⁿ'yāⁿ castigo chi diitu n'dái chi ca'a Ndyuūs 'iiⁿ'yāⁿ chi dinuuⁿndí yā. ⁴ Naati Ndyuūs ní nééné ya'āi 'iinu cá yā nducyaaca 'iiⁿ'yāⁿ ní neⁿe taavi cá yā s'uuúⁿ. ⁵ Ní 'áará chí n'diī yú cucáávā chi dinuuⁿndi yú Ndyuūs itée yā vida cueⁿe daāⁿmaⁿ yeⁿē yú dáámá dáámá ndúú^{cū} Jesucristo caati nadacuéeⁿ yā Cristo yeⁿe nguaaⁿ tináⁿā. Maaⁿ ní ninnguaⁿ'ai yú caavā chi Ndyuūs ní n'dai taavi cá yā ní neⁿe cá yā s'uuúⁿ. ⁶ Ndyuūs díⁿ yā chi nanduuchí yā s'uuúⁿ dáámá dáámá ndúú^{cū} Cristo ti s'uuúⁿ ní yeⁿé Cristo s'uuúⁿ. Ní 'tiicá ntúúⁿ díⁿ yā chi s'uuúⁿ tan'dúú^{cā} chí snee yú ná va'ai ch̄eeti nguuvi ndúú^{cū} Jesucristo 'tíicā s'uuúⁿ. ⁷ Ní Ndyuūs díⁿ yā 'tuucā chi cuuvi 'cuuⁿ'miⁿ cá yā s'uuúⁿ nguuvi chi cuchii tan'dúú^{cā} chi dineⁿe taavi cá yā s'uuúⁿ ndúú^{cū} n'dee n'dái dendu'ū chi n'dai taavi chi itée yā s'uuúⁿ, ti yeⁿe Cristo Jesús s'uuúⁿ. ⁸ Ní cucáávā chi Ndyuūs ní neⁿe taavi cá yā s'uuúⁿ, ndís'tiī ní ninnguaⁿ'ai nī tí i'téenu nī Cristo. Ndís'tiī nguéé díⁿ nī mar 'áámá chi nanguaⁿ'ai nī naati Ndyuūs chi datée yā vida cueⁿe daāⁿmaⁿ yeⁿé nī. ⁹ Ní nguéé nanguaⁿ'ai nī cucáávā ntiiⁿnyuⁿ chi díⁿ nī caati nguéé cuuvi caaⁿ'máⁿ nī chi ch'̄eete n'dai nī maáⁿ nī cucáávā chi díⁿ nī. ¹⁰ Taachi Ndyuūs nadinguáⁿ'ai yā s'uuúⁿ díⁿ yā chi s'uuúⁿ ní yeⁿe Jesucristo s'uuúⁿ ní cuuvi diiⁿ yú ntiiⁿnyuⁿ chi n'daacā. Ndyuūs 'āā ch'iindiyaáⁿ yā ntiiⁿnyuⁿ chi canée chí diiⁿ yú ndii cuááⁿ vmaaⁿ.

Véé vaadī 'diiín yeⁿē yú cucáávā Cristo

¹¹ Maaⁿ ní n'gaacú nī tan'dúúcā chi sneé nī nguuvī chi 'āā chó'ōo. Ndís'tiī ní nguéeé 'iiⁿyāⁿ yeⁿe ndaata Israel naati 'iiⁿyāⁿ gentiles ndís'tiī. Ní 'iiⁿyāⁿ yeⁿe ndaata Israel diín yā circuncidar ca'áámá ca'áámá saⁿā ní 'caacá yā 'áámá seña na cuerpo yeⁿe saⁿā s'eeⁿ. Ní canéé na cuerpo yeⁿe saⁿā s'eeⁿ seña 'cūū chi saⁿā s'eeⁿ ní yeⁿe ndaata yeⁿé Ndyuūs. Cáávā chuū 'iiⁿyāⁿ yeⁿe ndaata Israel nguuvī yā maán yā 'iiⁿyāⁿ circuncidado yā, ní caⁿ'a yā yeⁿē ndís'tiī chi nguuvī nī 'iiⁿyāⁿ chi nguéeé ndíi nī circuncidado, ní caⁿ'a yā yeⁿe nī chi nguéeé 'iiⁿyāⁿ yeⁿe Ndyuūs ndís'tiī. ¹² Ní tiempo miiⁿ ní ndís'tiī nguéeé déenu nī yeⁿe Cristo, ní canéé nī tan'dúúcā 'iiⁿyāⁿ chi canúúⁿ yúúni. Ní nguéeé ndís'tiī yeⁿe 'iiⁿyāⁿ Israel ndís'tiī. Ndyuūs nndεεve yā 'iiⁿyāⁿ chi cuuvi yeⁿé yā 'iiⁿyāⁿ. Nguéeé véé 'áámá parte yeⁿé nī ndúúcū 'iiⁿyāⁿ chi nndεεvé yā ní ca'á yā compromisos ndúúcū promesas nduucú yā. Ndís'tiī ch'εetinée nī na iⁿ'yeeⁿdí 'cūū nguéeé ndúúcū de'ε veε chi canee ngiinú nī chi cuuvi yeⁿé nī. Ní nguéeé ch'εetinée nī ndúúcū Ndyuūs ndís'tiī. ¹³ Ndís'tiī chi yaⁿ'ai canéé nī yeⁿe Ndyuūs cuáán vmnaaⁿ naati maaⁿ ní 'āā nduuvidaamá nī nduucú yā caavā chi ch'iī Cristo cucáávā nuuⁿndi yeⁿe yú. Ní maaⁿ ní ndís'tiī ní yeⁿé Cristo ndís'tiī. ¹⁴ Ní cáávā Cristo miiⁿ véé vaadī 'diiín yeⁿe yú. Ní Cristo diín yā chi 'iiⁿyāⁿ yeⁿe ndaata Israel ndúúcū 'iiⁿyāⁿ chi nguéeé yeⁿē ndaata Israel nduuvidaamá yā tan'dúúcā 'áámá raza nūuⁿ. Ní Cristo miiⁿ divíi yā vaadī 'caa'va chi canéé nguaaⁿ 'iiⁿyāⁿ Israel s'eeⁿ ndúúcū tanáⁿ'ā 'iiⁿyāⁿ s'eeⁿ chi nguéeé 'iiⁿyāⁿ Israel yā. Vaadī 'caa'va ch'εete míiⁿ chi cu'néeⁿ yā ní tan'dúúcā 'áámá cheētī náávtaⁿ'a 'iiⁿyāⁿ s'eeⁿ, 'tíicā. ¹⁵ Ní cucáávā chi Cristo maán yā ch'iī yā tuu'mi ní divíi yā ley yeⁿe 'iiⁿyāⁿ Israel ndúúcū mandamientos yeⁿē ndúúcū reglas yeⁿē. Cristo míiⁿ diín yā chi naachi nduu 'uuvī clase yeⁿe 'iiⁿyāⁿ nadáámá yā ní véé 'áámá clase nūuⁿ 'iiⁿyāⁿ, ní 'iiⁿyāⁿ s'eeⁿ ní yeⁿe Cristo. 'Tíicā diiín Cristo chi véé vaadī 'diiín. ¹⁶ 'Tíicā diiín Cristo taachi ch'iī yā na cruz. Ní diín yā chi 'āā nteε véé vaadī 'caa'va nguaaⁿ 'iiⁿyāⁿ s'eeⁿ. Ní diín yā chi véé vaadī 'diiín nguaaⁿ 'iiⁿyāⁿ s'eeⁿ ndúúcū Ndyuūs. 'Tíicā Cristo diín yā chi véé 'áámá clase nūuⁿ 'iiⁿyāⁿ.

¹⁷ Cristo ndaá yā na iⁿ'yeeⁿdí 'cūū ní maaⁿ ní cuuvi deenú nī yeⁿē vaadī 'diiín, ndís'tiī chi nguéeé 'iiⁿyaⁿ yeⁿe ndaata Israel chi yaⁿ'ai ch'εetinée nī yeⁿe Cristo. 'Tiicā ntúūⁿ cuuvi deenú 'iiⁿyāⁿ yeⁿē ndaata Israel chi ch'εetinée nīiⁿnuⁿ yā. ¹⁸ Ní cucáávā Cristo miiⁿ nducyaaca yú nduuti chi 'iiⁿyāⁿ Israel s'uuúⁿ o nguéeé 'iiⁿyāⁿ Israel s'uuúⁿ, nducyaaca yú, cucáávā Cristo miiⁿ cuuvi cundáa yú nanááⁿ Ndyuūs Chiida yú ndúúcū 'áámá Espíritu N'dai yeⁿé Ndyuūs. ¹⁹ Ní ndís'tiī chi nguéeé yeⁿē ndaata Israel chi ndaata yeⁿe Ndyuūs, maaⁿ ní 'āā ntéé 'iiⁿyāⁿ chi snúúⁿ yā yúúni ndís'tiī ní sneé nī na yáⁿ'āa chi nguéeé yeⁿé nī. Maaⁿ ní dáámá sneé nī ndúúcū 'iiⁿyāⁿ chi yeⁿe Ndyuūs. Ní ndís'tiī ní yeⁿe ndaata yeⁿe nducyaaca 'iiⁿyāⁿ chi yeⁿé Dendyuūs. ²⁰ Ní ndís'tiī ní tan'dúúcā 'áámá va'ai ch'εete taavi ca chi 'iiⁿyāⁿ diⁿ'dái yā 'tíicā ndís'tiī. Ní yeⁿē va'ai ch'εete miiⁿ Cristo miiⁿ ní tan'dúúcā tuūu ch'εete yeⁿe esquina, 'tíicā yā. Ní apóstoles chi candsé yā nduudu yeⁿé Ndyuūs ndúúcū profetas chi ngaⁿ'a yā nduudu yeⁿé Ndyuūs 'iiⁿyāⁿ s'eeⁿ ní tan'dúúcā tuūu yeⁿe cimientó yeⁿe va'āi miiⁿ, 'tiicá yā. Ní ndís'tiī ní tan'dúúcā tuūu vmnaaⁿ tuūu ch'εeté yeⁿē esquina, 'tiicá nī. ²¹ Ní vmnaaⁿ tuūu ch'εete yeⁿe esquina chi Cristo miiⁿ nducuéⁿē tuūu ní yeⁿe va'āi ch'εete chi diⁿ'dái Cristo. Ní Cristo diín yā chi n'daacā canee nducuéⁿē na lugar yeⁿē cucáávā chi dichíí'vε Ndyuūs. Ní Cristo diín yā chi va'āi ch'εete taavi ca ní 'áámá templo yeⁿe 'iivú Ndyuūs. ²² 'Tiicá ntúūⁿ, ndís'tiī chi yeⁿe Cristo nduuvidaamá nī ndúúcū tanáⁿ'ā 'iiⁿyāⁿ chi yeⁿe Cristo ní tan'dúúcā 'áámá va'ai naachi Ndyuūs canee yā cucáávā Espíritu N'dai yeⁿe yā, 'tíicā nducyaaca 'iiⁿyāⁿ chi yeⁿe Cristo.

3

Ndyuūs dichó'o yā Pablo chi ngaⁿ'a yā evangelio chí nduudu ngai yeⁿe Jesucristo nanááⁿ 'iiⁿyāⁿ chi nguéeé yeⁿe ndaata Israel

¹ Cáávā chuū 'úú Pablo canéé preso ná vácūū ti dichíí'vε 'úú Jesucristo ní ngaⁿ'a nduudu cuaacu yeⁿé yā cucáávā ndís'tiī chi nguεε yeⁿe 'iiⁿyāⁿ yeⁿē ndaata Israel. Ní ngaⁿ'angua'á cáávā ndís'tiī. ² Cuaacu níⁿnyúⁿ 'āā deenú nī chi Ndyuūs chi n'dai taavi cá

yā dichó'o yā 'úú chi ngaⁿá ngii ndís'tiī chi Ndyuūs neⁿe taavi cá yā ndís'tiī. ³ Ndyuūs ch'iⁿí yā 'úú dendu'ū yeⁿe yā chi canúúⁿ n'de'ei ní diíⁿ yā chi deenú chi canúúⁿ n'de'ei tan'dúú^cā chi 'āā dinguúⁿ yeⁿé nī ndúú^cū duū'vī nduudu. ⁴ Ní taachi ndís'tiī ch'eéⁿ nī caacá 'cūū chídinguúⁿ tuu'mi ní cuuvi deenú nī chi 'úú deenú chiiⁿ chi canúúⁿ n'de'ei yeⁿé Ndyuūs, chiiⁿ chi yeⁿē Jesucristo. ⁵ Ní tiempo chi 'āā chó'ōo Ndyuūs nguéé ch'iⁿí yā mar 'áámá 'iiⁿ'yāⁿ nduudu yeⁿé yā chi canúúⁿ n'de'ei naati tiempo miiⁿ Ndyuūs ch'iⁿí yā chuū apóstoles chi didεεvé yā yeⁿe nuuⁿndi yeⁿé yā ndúú^cū profetas chi ngaⁿa nduudu yeⁿé yā cucáá^vā Espíritu N'dai yeⁿé yā. ⁶ Ní chuū chi canúúⁿ n'de'ei cáá^vā nduudu cuaacu chí nduudu ngai yeⁿe Jesucristo. 'Iiⁿ'yāⁿ chi nguéé yeⁿe ndaata Israel chi yeⁿe Jesucristo, 'iiⁿ'yāⁿ s'eeⁿ ní cuuvi yeⁿé yā dáámá dáámá ndúú^cū chi cuuvi 'iiⁿ'yāⁿ yeⁿe Israel. Ní dáámá canée yā ndúú^cū 'iiⁿ'yāⁿ Israel. Ní sneé yā tan'dúú^cā 'áámá cuerpo yeⁿe Cristo. Ní véé 'áámá parte yeⁿé yā yeⁿe compromiso chi Ndyuūs dííⁿ yā. ⁷ Ní 'úú nguéé n'daaca ca 'úú naatí Ndyuūs tee yā privilegio 'úú chi caaⁿ'máⁿ nduudu yeⁿe yā cucáá^vā poder yeⁿé yā. ⁸ Ní 'úú chí 'lííⁿ chuundí nguaaⁿ nducyáá^cá 'iiⁿ'yāⁿ chi yeⁿé Ndyuūs naati Ndyuūs tee yā 'úú privilegio 'cūū chi 'úú ngaⁿá nduudu cuaacu yeⁿé yā nanááⁿ 'iiⁿ'yāⁿ chi nguéé yeⁿē ndaata judíos chi Israel. Ní ngaⁿá nduudu cuaacu yeⁿē n'dee n'dái vaadí 'cuiica taavi ca yeⁿe Cristo. Ní nguéé cuuvi diiⁿ yú cuenta yeⁿe vaadí 'cuiica miiⁿ. ⁹ Ní ngaⁿá nduudu cuaacu yeⁿé yā. Ní 'íí^cú nducyaaca 'iiⁿ'yāⁿ cuuvi deenu yā tan'dúú^cā Ndyuūs caⁿ'á yā dííⁿ yā yeⁿe chi canúúⁿ n'de'ei yeⁿé yā. Ní Ndyuūs chi dííⁿ yā nducuéⁿē chi véé ní chi'neeⁿ n'de'ei yā chuū nducuéⁿē tiempo chi 'āā chó'ōo. ¹⁰ Ní 'tíí^cā dííⁿ Ndyuūs caati maaⁿ ní nducyáá^cá chi canée na va'ai chεeti nguuvi chí ngaⁿā ntiinⁿyuⁿ o chi 'iiⁿ'ntyéⁿē cuuvi n'diichi nducuéⁿē vaadí deenu yeⁿé Ndyuūs cucáá^vā vaadí n'giinu yeⁿé Ndyuūs chi dííⁿ yā ndúú^cū 'iiⁿ'yāⁿ ná iⁿ'yeeⁿdí 'cūū, 'iiⁿ'yāⁿ chi i'téenu yā Cristo ní caⁿ'á yā yaacū yeⁿé yā. ¹¹ Ní 'túú^cā diiⁿ Ndyuūs ti tan'dúú^cā chi neⁿé yā dííⁿ yā ndii vmnááⁿ vmaaaⁿ. Ní dííⁿ yā chi cuaacu yeⁿē cucáá^vā Jesucristo chi 'iivi yú. ¹² Ní caavā chi s'uuúⁿ ní yeⁿe Cristo s'uuúⁿ ní cáá^vā chi i'teenu yú Jesucristo, cuuvi ndaā yú nanááⁿ Ndyuūs ndúú^cū confianza. ¹³ Cáá^vā chuū 'úú di'cuítū ndís'tiī chi nguéé cuuvi ngáaⁿ nī cucaavā chi 'úú n'geenú ngii ti chuū chi n'geenú ngii ní cosa chi n'daacā chi cuuvi ndís'tiī ní canee chi yeenú nī.

Cristo neⁿé yā nducyaaca 'iiⁿ'yāⁿ

¹⁴ Ní cucaavā chuū 'úú ca'á gracias Ndyuūs ní 'úú ní ngiintii'yá nanááⁿ Ndyuūs Chiidá Señor Jesucristo yeⁿē yú. ¹⁵ Ndyuūs ní Chiida nducyaaca yú ní cuaacu Chiida nducyaaca 'iiⁿ'yāⁿ yeⁿé yā chi sneé nanguuvi, 'tiicá ntúūⁿ nducyaaca 'iiⁿ'yāⁿ yeⁿé yā chi sneé iⁿ'yeeⁿdí 'cūū. ¹⁶ Caⁿ'angua'á ní ngiicá Ndyuūs Chiida yú chi yeⁿē nééné n'dee n'dái chi n'daacā yeⁿé yā ní tée yā ndís'tiī fuerza na staava yeⁿé nī chi ditiinú nī cucáá^vā Espíritu N'dai yeⁿé yā. ¹⁷ Ní ngiicá Ndyuūs chi Cristo canée yā na staava yeⁿé nī cáá^vā chi i'téenu nī Cristo. Ní 'íí^cú ndís'tiī snee diitú nī ndúú^cū vaadí neⁿe yeⁿe Cristo. Ní snee nī tan'dúú^cā chi véé dii'yu na yáⁿ'āa yeⁿē 'áámá yáⁿ'á. 'Tíí^cā cunée vaadí neⁿe yeⁿé Cristo na staava yeⁿé nī. 'Tíí^cā snee nī. ¹⁸ Tuu'mí ndís'tiī ndúú^cū nducyaaca 'iiⁿ'yāⁿ chi i'téenu yā Cristo n'daacā cuuvi cádiinuuⁿ nī yeⁿē chi vaadí neⁿe yeⁿé Cristo ní tan'dúú^cā Cristo neⁿé taavi cá yā nducyaaca 'iiⁿ'yāⁿ. ¹⁹ Ní ngiicá Ndyuūs chi ndís'tiī ní cádiinuuⁿ nī chεē chí vaadí neⁿe yeⁿé Cristo, 'áará chí ch'εεte taavi ca chi nguéé cuuvi deenu yú nducuéⁿē yeⁿē. Ní ngiicá chi staava yeⁿe ndís'tiī ní canee diitú ndúú^cū nducuéⁿē chi n'daacā n'dai taavi caavā chí ndís'tiī ní yeⁿe Ndyuūs ndís'tiī.

²⁰ Ní Ndyuūs yeⁿe yú cuuvi dííⁿ yā tanducuéⁿē ní n'deē ca cuuvi dííⁿ ya ní nguéé tí chi ngiica yú o chí tuumicádiinuuⁿ yú. Tan'dúú^cā chi n'dee n'dái idiíⁿ yā cucáá^vā poder yeⁿé yā 'tíí^cā idiíⁿ yā ntiinⁿyuⁿ yeⁿé yā ndúú^cū s'uúúⁿ. ²¹ Maaⁿ ní nducuéⁿē tiempo ní cueⁿe daāⁿmaⁿ canée Ndyuūs chi ch'εεte taavi ca ní dεeve taavi cá yā nanááⁿ 'iiⁿ'yāⁿ chi caⁿ'á yā yaacū yeⁿé yā. 'Tiicá ntúūⁿ nanááⁿ Cristo.

4

Nduuvidaama yú cucáávā Espíritu N'dai yeⁿé Ndyuūs

¹ 'Úú Pablo chi preso caneé vácuū caati dííⁿ ntiiⁿnyuⁿ yeⁿé 'iivú Ndyuūs. Ní 'úú dí'cuiitú ndís'tií chi n'daacā n'dai dííⁿ nī nducuéⁿé tan'dúúccā Ndyuūs neⁿé yā chi dííⁿ nī caati yaa'ví yā ndís'tií chi cuuvi yeⁿe yā. ² 'Úú ngiicá chi 'cuēetinée nī chi maáⁿ nī ndiicúúⁿ nī. Ní dííⁿ nī nducuéⁿé ndúúccū 'viich'etfínūuⁿ ndúúccū 'aama nī taama nī ni cucheé nī yeⁿe nducuéⁿé ti dinéⁿe nī 'áámá nī taama nī. ³ Ní cucáávā Ndyuūs itée yā vaadī 'diiíⁿ yeⁿé yā chi diiⁿ chi nduuvidaamá nī, 'úú ngiicá chi cueⁿe daāⁿmaⁿ dííⁿ nī nducuéⁿe chi cuuvi nī chi nduuvidaamá nī caati Espíritu N'dai yeⁿé Ndyuūs nginneé yā ndís'tií. ⁴ Véé 'áámá cuerpo nūuⁿ ndúúccū 'áámá nūuⁿ Espíritu N'dai yeⁿé Ndyuūs. 'Tiicá ntúúⁿ Ndyuūs yaa'ví yā s'uuúⁿ chi cuuvi yú yeⁿé yā ní ndúúccū 'áámá nūuⁿ chi cunee ngiinu yeⁿe yú. ⁵ Ní véé 'áámá nūuⁿ Señor Jesucristo chí 'áámá nūuⁿ 'iiⁿ'yāⁿ chi i'teenu yú, ní véé 'áámá nūuⁿ chi duuchi chi ngeēdínūⁿnī 'iiⁿ'yāⁿ. ⁶ Véé 'áámá nūuⁿ Ndyuūs chi Chiidá nducyáácá 'iiⁿ'yāⁿ ní 'iivú Ndyuūs miiⁿ ngaⁿ'a ntiiⁿnyúⁿ yā yeⁿe nducuéⁿé. Ní dííⁿ yā ntiiⁿnyuⁿ cucáávā nducueⁿé, ní caneé yā ndúúccū nducueⁿé.

⁷ Naati Ndyuūs tee yā ca'áámá ca'áámá s'uuúⁿ vaadī n'dai yeⁿé yā cáávā ntiiⁿnyuⁿ yeⁿe yú tan'dúúccā chi deenú yā chi cuuvi diiⁿ yú, ní ntiiⁿnyuⁿ miiⁿ ní chííⁿ chi tee Cristo ca'áámá ca'áámá s'uuúⁿ. ⁸ Níicú canéé nguūⁿ na libro yeⁿé Ndyuūs ndii cuááⁿ vmaāⁿ 'tíicā:

Chicheé yā yeⁿe enemigos yeⁿe yā ní cuicheé yā ná va'ai cheeti nguuvi, ní candéε yā n'deeé n'dáí 'iiⁿ'yāⁿ yeⁿé yā chi snúuⁿ yā vácuū, ní ca'á yā regalos 'iiⁿ'yāⁿ s'eeⁿ yeⁿé yā.

⁹ ¿Dé'ē neⁿe caaⁿ'maⁿ nduudú 'cūū chiiⁿ chi cheé yā? Nduudú 'cūū neⁿe caaⁿ'maⁿ chi vmaáⁿ vmaāⁿ 'iiⁿ'yāⁿ miiⁿ caⁿ'á yā 'áámá cuaaⁿ yáánūuⁿ ca chi cheeti yáⁿ'āa. ¹⁰ 'Iiⁿ'yāⁿ chí cáⁿ'ā miiⁿ maáⁿ 'iiⁿ'yāⁿ miiⁿ cucheé yā cuaaⁿ naachi yaacu taavi ca chí va'ai cheeti nguuvi caati maáⁿ yā cuuvi caneé yā tanducuéⁿé dendúū cuaaⁿ. ¹¹ Ní itée yā ca'áámá ca'áámá s'uuúⁿ ntiiⁿnyuⁿ chi cuuvi diiⁿ yú. Itée yā naⁿ'a yú ntiiⁿnyuⁿ yeⁿe apóstoles chi candéε yú nduudu yeⁿe Ndyuūs. Ní itée yā naⁿ'a yú ntiiⁿnyuⁿ chi caaⁿ'maⁿ yú nduudu chi sta'a yú yeⁿé Ndyuūs. Ní itée yā ntiiⁿnyuⁿ naⁿ'a yú chi ngaⁿ'a yú nduudu chi nanguaⁿ'ai 'iiⁿ'yāⁿ. Ní itée yā ntiiⁿnyuⁿ naⁿ'a yú chi candéε yú nduudu yeⁿé yā na yaācū. Ní itée yā naⁿ'a yú ntiiⁿnyuⁿ chi maestro yeⁿe nduudu yeⁿé yā. ¹² 'Tíicā diiⁿ Ndyuūs chi chí'cueén yā nducyaaca 'iiⁿ'yāⁿ chí i'téenu yā Cristo ní 'íicú 'iiⁿ'yāⁿ s'eeⁿ cuuvi dííⁿ yā ntiiⁿnyuⁿ chí tunéⁿ yā. Ní nducyaacá yā chí yeⁿé cuerpo yeⁿe Cristo cuuvi cu'téenu cá yā Ndyuūs. ¹³ Ní nducyaaca s'uuúⁿ ní cuuvi nduuvidaama yú ti maaⁿ ní s'uuúⁿ ní tan'dúúccā chí 'aama yú ndúúccū chí i'teenu yú ní ndúúccū chí deenu yú yeⁿe Cristo chí Daiya Dendyuūs. Ní nguuvi nguuvi cuuvi diitū ca yú ndúúccū chí i'teenu yú ndúúccū vaanicadiinūⁿ yeⁿe yú ndíí tiempo chí s'uuúⁿ din'daaca yú ní tan'dúúccā Cristo 'tíicā s'uuúⁿ. ¹⁴ 'Āā ntéé diiⁿ yú tan'dúúccā da'caiyáā dííⁿ yā chí ch'iindiveén yā yeⁿe 'aamá yā taamá yā chí ca'cueén yā cosa chí n'dááⁿ ní dííⁿ yā tan'dúúccā chí 'yúúné candéε 'iiⁿ'yāⁿ 'múúⁿ miiⁿ. Ní nguéé canéé chí i'téenu yú nduudu yeⁿe 'iiⁿ'yāⁿ chí nginnche'éí yā s'uuúⁿ. 'Iiⁿ'yāⁿ s'eeⁿ neⁿé yā candéε yā s'uuūⁿ lado yeⁿé yā chí i'téenu yú chiiⁿ chí nguéé cuaacu. ¹⁵ Nguéé diiⁿ yú 'túúccā naati canee chí caaⁿ'maⁿ yú nduudu cuaacu yeⁿé Ndyuūs ti neⁿe yú 'iiⁿ'yāⁿ ndúúccū núúⁿmáⁿ staava yeⁿe yú. Ní cuuvi cu'teenu ca yú ní diiⁿ yú nducuéⁿé chí n'daacā tan'dúúccā chí diiⁿ Cristo chí tiiíⁿ 'áámá cuerpo yeⁿe nducyaaca yú. Ní s'uuúⁿ tan'dúúccā cuerpo yeⁿé yā, 'tíicā s'uuúⁿ. ¹⁶ Ní nducyaaca yú ní canee yú maaⁿ poder yeⁿe Cristo chí tiiíⁿ nducyaaca yú. Ní canee yú n'daacā na lugar chí tuneⁿ yú ti yeⁿé Cristo s'uuúⁿ. Ní nducuéⁿé coo yeⁿe cuerpo yeⁿé yā n'daacā n'dai snéé ní 'áámá 'áámá coo ní inuⁿ'u tan'dúúccā chí canéé chí diiⁿ. 'Tíicā s'uuúⁿ chí yeⁿe Cristo canee chí diiⁿ yú ntiiⁿnyuⁿ chí tuneⁿ yú cáávā chí n'giita yú, ní ditiinu yú, ní dineⁿe yú nducyaaca 'iiⁿ'yāⁿ.

Véé vida ngai yeⁿe 'iiⁿ'yāⁿ chí yeⁿe Cristo

¹⁷ Maaⁿ ní 'úú ngaⁿ'á cáávā Señor Jesucristo ní ngaⁿ'á chi din'daacá nī. Nguéé 'cuëtinéé nī tan'duucā tanáⁿ'ā 'iiⁿ'yāⁿ chi nguëe i'téenu yā Ndyuūs. 'Iiⁿ'yāⁿ s'eeⁿ nadacadínnuⁿ yā yeⁿ'e dendu'ū chi nguëe dichí'vē. ¹⁸ Ní chiiⁿ chi nadacadínnuⁿ yā ní yeⁿ'ē ná maāíⁿ. 'Iiⁿ'yāⁿ s'eeⁿ nguéé véé vida cueⁿ'e daāⁿmaⁿ yeⁿ'é yā chi Ndyuūs ca'á yā 'iiⁿ'yāⁿ chi yeⁿ'é yā ti 'iiⁿ'yāⁿ s'eeⁿ caneé yā ndúúcuⁿ staava yeⁿ'é yā chí cheëchi. Ní cáávā chuū 'iiⁿ'yāⁿ s'eeⁿ caneé yā chi nguéé deenú yā Ndyuūs. ¹⁹ 'Iiⁿ'yāⁿ s'eeⁿ 'āā ntéé dííⁿ yā sentir chi cuuvi 'cuinaáⁿ yā caavā nuuⁿndi chi dííⁿ yā. Ní dííⁿ yā tan'dúúcuⁿ chi véé vicio yeⁿ'e yā. Ní dííⁿ yā nducuéⁿ'ē dendu'ū chi nguëe n'daacā. Ní nguéé nadacadínnuⁿ yā yeⁿ'e chi dííⁿ yā. ²⁰ Naati ndís'tiī nguéé 'tiicā ch'eéⁿ nī yeⁿ'e Cristo. ²¹ Nduuti chi cuaacu chi ch'iindiveéⁿ nī nduudu yeⁿ'e Cristo ní Cristo chi'cueéⁿ yā ndís'tiī ní i'téenu nī nduudu cuaacu chi yeⁿ'é Cristo, tuu'mi ní nduudu cuaacu yeⁿ'é yā cūnee ndúúcuⁿ nī. ²² Maaⁿ ní 'āā ntéé dííⁿ nī tan'dúúcuⁿ chi dííⁿ nī vmnaaⁿ chi i'téenu nī. Divíi nī yeⁿ'e nducuéⁿ'ē chi dííⁿ nī tiempo chi chó'ōo caati chuū nginnche'éi ndís'tiī ndúúcuⁿ nducuéⁿ'ē chi neⁿ'e chi dííⁿ nī chi nguéé n'daacā. ²³ Ndís'tiī ní canee chi nadíngai nī espíritu yeⁿ'é nī ndúúcuⁿ vaanicadínnuⁿ yeⁿ'e maáⁿ nī. ²⁴ Ní canéé chi cuta'á nī vida ngai yeⁿ'e Cristo tan'dúúcuⁿ chi 'áámá vestido ngai ní cunúuⁿ nī vestido ngai. Ní dííⁿ nī nducuéⁿ'ē tan'dúúcuⁿ chi Ndyuūs neⁿ'é yā chi dííⁿ nī. Ní 'tíicā vida yeⁿ'e maáⁿ nī ní cuaacu níⁿnyúⁿ chí n'daacā ní dēeve.

²⁵ Cáávā chuū nguéé caaⁿ'máⁿ nī nduudu yaadi. Ca'áámá ca'áámá s'uuúⁿ ní caaⁿ'maⁿ yú nduudu cuaacu ndúúcuⁿ nducyaaca 'iiⁿ'yāⁿ na nīⁿnuúⁿ va'āi. Caati s'uuúⁿ ní yeⁿ'ē 'áámá cuerpo nūuⁿ ti yeⁿ'e Cristo s'uuúⁿ.

²⁶ Ní nduuti chi nduuvi taáⁿ nī, nguéé ca'a nī lugar chi vaadi taaⁿ yeⁿ'é nī diiⁿ chi dinuunⁿdi nī. Ní nguéé 'naaⁿ tiempo nduuvi taáⁿ nī. ²⁷ Nguéé ca'á nī mar 'áámá lugar yááⁿ'guiinūuⁿ chi cuuvi tuu'vi sa vida yeⁿ'é nī.

²⁸ Ní ndís'tiī chi diduucú nī 'āā ntéé diduucú nī. Dííⁿ nī ntiⁿnyuⁿ n'daacā caati véé yeⁿ'e nī. Ní 'íicú cuuvi ca'á nī 'iiⁿ'yāⁿ chi pobre yā chi nguéé véé yeⁿ'é yā.

²⁹ Nguéé caaⁿ'máⁿ nī nduudu yaadi 'yāa, dámaāⁿ caaⁿ'máⁿ nī nduudu chí n'daacā chi diiⁿ chi cu'téenu cá yā ni diiⁿ chi cunneé nī 'iiⁿ'yāⁿ chi 'caandiveéⁿ yā nduudu yeⁿ'é nī.

³⁰ Ndís'tiī nguéé dííⁿ nī dendu'ū chi cuuvi ndaachíi Espíritu N'dai yeⁿ'é Ndyuūs ti maaⁿ Espíritu yeⁿ'e Ndyuūs miiⁿ chi véé yeⁿ'e yú ní diiⁿ chi sellado nī chi yeⁿ'é Ndyuūs s'uuúⁿ. Ní diiⁿ chi cuuvi cuaacu chi Ndyuūs nadanguáⁿ'ai yā s'uuúⁿ.

³¹ Ní ndís'tiī 'āā ntéé cuneé nī ndúúcuⁿ vaadi taaⁿ, ní nguéé dííⁿ nī chi nguéé neⁿ'e nī 'iiⁿ'yāⁿ, ndíi nguéé 'cuaī taáⁿ nī, ndíi nguéé caaⁿ'máⁿ nī dendu'ū chi nguëe n'daacā yeⁿ'e taamá yā, ndíi nguéé dííⁿ nī yeⁿ'e taama yā cosas chi nguëe n'daacā. ³² Caati diiⁿ nī d'aaⁿca nī ní diya'ai 'íinu nī 'aamá nī taamá nī vi'ī, ní nadích'εecú nī nuuⁿndi yeⁿ'é nī yeⁿ'e 'áámá nī taamá nī vi'ī tan'dúúcuⁿ Ndyuūs nadāch'εecú yā nuuⁿndi yeⁿ'é nī ti yeⁿ'é Cristo ndís'tiī.

5

Táacā canee chi 'cuëtinéé 'iiⁿ'yāⁿ chi daiya Ndyuūs

¹ Cuaacu chi ndís'tiī ní daiya Dendyuūs ndís'tiī. Maaⁿ ní cáanu nī dííⁿ nī tan'dúúcuⁿ Ndyuūs dííⁿ yā. ² Ní dinéⁿ'e nī nducyaaca 'iiⁿ'yāⁿ tan'dúúcuⁿ Cristo dinéⁿ'e yā s'uuúⁿ ní ca'a maáⁿ yā vida yeⁿ'e maáⁿ yā cáávā s'uuúⁿ. Ní dííⁿ yā tan'dúúcuⁿ chi maáⁿ yā ni 'áámá 'íití cuūchī chi 'iiⁿ'yāⁿ dííⁿ yā 'caaⁿ'núⁿ yā 'iiti chi ofrenda yeⁿ'é yā ní ca'á yā nátai nanááⁿ Ndyuūs. Ní Cristo maáⁿ yā ofrenda chi n'dēeve ngééⁿ nanááⁿ Ndyuūs. Ní yeenu Ndyuūs ndúúcuⁿ ofrenda miiⁿ chí Cristo miiⁿ.

³ Maaⁿ ní chi ndís'tiī ní yeⁿ'é Ndyuūs ndís'tiī nguéé canee chí caaⁿ'máⁿ nī mar 'áámá yeⁿ'e nuuⁿndi chi saⁿ'ā n'diichi sa n'daataá. Ní nguéé canee chí caaⁿ'máⁿ nī yeⁿ'e táámá dendu'ū chi nguëe n'daacā ní nguéé dēeve, ndíi nguëe dínngueé nī yeⁿ'ē chí véé chí yeⁿ'e taamá yā. ⁴ Ndíi nguéé canee chí caaⁿ'máⁿ nī dendu'ū chí cuuvi 'cuinaáⁿ nī, ndíi nguéé caaⁿ'máⁿ nī nduudu tonto o nduudu chi nguéé n'daacā, caati nducuéⁿ'ē chuū ní nguéé n'daacā yeⁿ'é nī. Naati ndís'tiī ní canee chí caaⁿ'máⁿ nī Ndyuūs 'tíicā: Gracias n'diī Ndyuūs. ⁵ Ní ndís'tiī 'āā deenú nī chí saⁿ'ā chí caⁿ'a sá ndúúcuⁿ n'daataá chí nguéé yeⁿ'e sa o n'daataá chí caⁿ'a tá ndúúcuⁿ saⁿ'ā chí nguéé yeⁿ'e ta, o 'iiⁿ'yāⁿ chí diiⁿ dendu'ū chí

nguéeé n'daacā o 'iiⁿ'yāⁿ chí dínngueé yā yeⁿ'ē chi véé yeⁿ'ē taama yā ti tanducueⁿ'ē chuū ní tan'dúúcā chi i'téenu yā santos ídolos. Nducyáácá 'iiⁿ'yāⁿ s'eeⁿ ní nguéeé véé parte yeⁿ'é yā naachi Cristo ndúúcū Ndyuūs ngaⁿ'a ntiiⁿ'nyúⁿ yā. ⁶ Nguéeé ca'á nī lugar chi caaⁿ'maⁿ 'iiⁿ'yāⁿ chi canche'etí yā ndís'tiī ndúúcū nduudu chi tonta ti ngaⁿ'á yā chi cuuvi díⁿ nī nducueⁿ'ē chi nguéeé n'daacā. Caati cáávā nducueⁿ'ē chuū ní Ndyuūs díⁿ yā diituu cá castigar 'iiⁿ'yāⁿ s'eeⁿ chi nguéeé n'giindiveéⁿ yā nduudu yeⁿ'e Ndyuūs. ⁷ Ní ndís'tiī nguéeé nduuvudaamá nī ndúúcū 'iiⁿ'yāⁿ s'eeⁿ ní nguéeé díⁿ nī mar 'áámá chi díⁿ yā.

⁸ Ndís'tiī ní tiempo chi 'āā chó'ōo ch'εetinée nī ndúúcū yááⁿ'n'guiinūuⁿ na maāiⁿ, naati maaⁿ ní chi ndís'tiī ní yeⁿ'ē Señor Jesucristo, ndís'tiī canée nī na chidεεve yeⁿ'e Señor miiⁿ. Ní maaⁿ ní cuēeti chiicá nī na chidεεve miiⁿ tan'dúúcā chi ndís'tiī ní daiyá Ndyuūs ndís'tiī. ⁹ Ní chuū 'iiⁿ'yāⁿ díⁿ yā taachi snée yā chidεεve yeⁿ'é Ndyuūs. Tanducueⁿ'ē chi n'daacā ndúúcū tanducueⁿ'ē chí cuaacu díⁿ yā. Ní ch'iⁿ'í yā na vida yeⁿ'e maāⁿ yā chi n'daacá yā. Chuū ní tan'dúúcā n'gui'i yeⁿ'e yá'á ti n'gui'i yeⁿ'ē chidεεve miiⁿ ní 'tíicā. ¹⁰ Ní caanú nī díⁿ nī ca'cueéⁿ nī nducueⁿ'ē chi Ndyuūs neⁿ'é yā chí díⁿ nī. ¹¹ Ní ndís'tiī nguéeé díⁿ nī mar 'áámá chi nguéeé dichí'vē ndúúcū 'iiⁿ'yāⁿ chí chiicá yā na maāiⁿ naati caaⁿ'máⁿ nī 'iiⁿ'yāⁿ chí chiicá yā na maāiⁿ chéé chí nguéeé n'daacā chí díⁿ yā nanááⁿ Dendyuūs. ¹² S'uuúⁿ cuuvi 'cuinaaⁿ yú nduuti chí caaⁿ'maⁿ yú yeⁿ'e dendu'ū nuuⁿndi ch'εete chí 'iiⁿ'yāⁿ díⁿ yā taachi din'dé'ei yā. ¹³ Ní taachi ngaⁿ'á nī 'iiⁿ'yāⁿ s'eeⁿ yeⁿ'e tanducueⁿ'ē chí nguéeé n'daacā chí díⁿ yā tuu'mi ní canée na chidεεve. Ní Ndyuūs ch'iⁿ'í yā 'iiⁿ'yāⁿ nducueⁿ'ē tan'dúúcā chí díⁿ yā, ti 'āā ntée canúúⁿ n'de'ei. ¹⁴ Canée nguūⁿ na libro yeⁿ'é Ndyuūs. Cáávā chuū ní Ndyuūs ngaⁿ'a yā 'tíicā:

Ndís'tiī 'iiⁿ'yāⁿ chí ch'iī; nadacueéⁿ nī yeⁿ'e nguaaⁿ tináⁿ'ā, ní 'íicú Cristo chí chidεεve ní téé yā chidεεve ndís'tiī.

¹⁵ Cáávā chuū ndís'tiī ní nadacadíinuuⁿ n'daacá nī yeⁿ'e chí díⁿ nī. Nguéeé díⁿ nī tan'duucā chí ndís'tiī 'iiⁿ'yāⁿ zongo ndís'tiī naati díⁿ nī tan'duucā chí ndís'tiī 'iiⁿ'yāⁿ deenu ndís'tiī. ¹⁶ Ní díⁿ nī aprovechar tiempo chí véé yeⁿ'é nī chí din'daacá nī caati tiempo 'cūū 'iiⁿ'yāⁿ díⁿ yā dendu'ū chí nguéeé n'daacā. ¹⁷ Nguéeé díⁿ nī tan'dúúcā 'iiⁿ'yāⁿ chí nguéeé tuumicadíinuuⁿ yā ti zongo yā naati diiⁿ'núú yiiⁿ'nuⁿ nī maaⁿ níicú tuumicadíinuuⁿ nī chεε chí Ndyuūs neⁿ'é yā chí díⁿ nī. ¹⁸ Nguéeé cuuvi cuu'ví nī ti diiⁿ' chí cuuvi ndái nī, naati itée nī lugar chí Espíritu N'dai yeⁿ'é Ndyuūs cuuví cūnee nduucú nī. ¹⁹ Ní ndéé nī 'áámá nī ndúúcū taama nī ndúúcū salmos, ndúúcū himnos, ndúúcū canciones chí ngaⁿ'a yeⁿ'é Ndyuūs. Ní ngiitá nī ní dinéⁿ'e nī Señor Jesucristo yeⁿ'ē yú ndúúcū núúⁿmáⁿ staava yeⁿ'é nī. ²⁰ Ní cueⁿ'e daāⁿ'maⁿ nca'á nī gracias Ndyuūs Chiida yú ndúúcū chí dúúchí Señor Jesucristo yeⁿ'ē yú caava nducueⁿ'ē chí véé.

Yeⁿ'e vida yeⁿ'e familia s'eeⁿ chí yeⁿ'e Jesucristo

²¹ Nguéeé dich'εeté nī maāⁿ nī. Dinéⁿ'e nī vi'í 'áámá nī ndúúcū taama nī caati 'āā díⁿ nī respetar Ndyuūs.

²² Ní ndís'tiī táⁿ'ā chí ch'iindivaacu canee chí 'caandiveéⁿ nī yeⁿ'e isaⁿ'ā yeⁿ'é nī tan'dúúcā chí ch'iindiveéⁿ nī nduudu yeⁿ'é Ndyuūs ti isaⁿ'ā yeⁿ'é nī tan'duucā 'iiví nī, 'tíicā sa. ²³ Caati isaⁿ'ā yeⁿ'é nī ní tan'dúúcā tiiⁿ yeⁿ'e familia, 'tíicā sa. 'Tiicá ntúūⁿ tan'dúúcā Cristo ní tiiⁿ 'iiⁿ'yāⁿ chí i'téenu yā 'yā, Cristo ntúūⁿ 'iiⁿ'yāⁿ chí nadanguáⁿ'ai yā nducyaaca 'iiⁿ'yāⁿ chí i'téenu yā 'yā. Ní nducyáácá 'iiⁿ'yāⁿ chí i'téenu yā Cristo, 'iiⁿ'yāⁿ s'eeⁿ tan'duucā cuerpo yeⁿ'e Cristo, 'tiicá yā. ²⁴ Ní tan'duucā 'iiⁿ'yāⁿ chí i'téenu yā Cristo canee yā maaⁿ poder yeⁿ'e Cristo 'tiicá ntúūⁿ táⁿ'ā canee tá maaⁿ poder yeⁿ'e isaⁿ'ā yeⁿ'e tá ní canee chí 'caandiveeⁿ tá yeⁿ'ē sa.

²⁵ Ní ndís'tiī chí isaⁿ'ā chí ch'iindivaacu canee chí neⁿ'é nī n'daataá yeⁿ'é nī tan'duucā Cristo neⁿ'é yā 'iiⁿ'yāⁿ yeⁿ'e yaacu yeⁿ'é yā. Ní Cristo nca'a maāⁿ yā vida yeⁿ'e maāⁿ yā ní ch'iī yā cáávā 'iiⁿ'yāⁿ chí yeⁿ'é yā. ²⁶ Ní 'tíicā ch'iī Cristo caati s'uuúⁿ cuuvi 'iiⁿ'yāⁿ yeⁿ'é yā s'uuúⁿ caavā ntiiⁿ'nyuⁿ chí díⁿ yā. Ní Cristo didεεvé yā 'iiⁿ'yāⁿ cucáávā nuūⁿnīⁿ ní cucáávā nduudu yeⁿ'é yā. ²⁷ Ní Cristo candée yā 'iiⁿ'yāⁿ chí yeⁿ'é yā nanááⁿ Ndyuūs. Ní 'iiⁿ'yāⁿ s'eeⁿ ní ngii n'gai ní dεεve yā. Ní nguéeé falta yeⁿ'é yā, ndíí nguéeé véé mar 'áámá

nuuⁿndi yeⁿ'é yā, ndíí nguéé 'áámá dendu'ū chi nguéé cuaacu na vida yeⁿ'é yā, ndíí nguéé véé mar 'áámá dendu'ū chi 'túúcā. Ní 'iiⁿ'yāⁿ chi yeⁿ'é yā ní núúⁿmáⁿ yā ní yeⁿ'é Cristo. Ní nguéé véé mar 'áámá chi nguéé n'daacā yeⁿ'é 'iiⁿ'yāⁿ s'eeⁿ. ²⁸ Ní isaⁿ'ā chí ch'iindivaacú canéé chí dinéⁿ'e sa n'daataá yeⁿ'ē sa tan'dúúcā chi neⁿ'e sa maaⁿ sa cuerpo yeⁿ'e sa, 'tíicā n'daataá yeⁿ'ē sa. Ní saⁿ'a chí dinéⁿ'e sa n'daataá yeⁿ'ē sa neⁿ'e maaⁿ sa saⁿ'ā. ²⁹ Nguéé véé mar 'áámá 'iiⁿ'yāⁿ chi nguéé neⁿ'é maáⁿ yā cuerpo yeⁿ'é yā, naati nga'a maáⁿ yā chíiⁿ chi n'daacā chi cuuvi yeⁿ'é yā. Ní maáⁿ yā dííⁿ yā cuidar cuerpo yeⁿ'e maáⁿ yā. 'Tiicá ntúūⁿ Cristo dinéⁿ'e yā ní dííⁿ yā cuidar nducyaaca 'iiⁿ'yāⁿ chi i'téenu yā 'yā. ³⁰ 'Tíicā dííⁿ Cristo ti 'iiⁿ'yāⁿ s'eeⁿ chi yeⁿ'é yā ní tan'dúúcā cuerpo yeⁿ'é yā 'tíicā 'iiⁿ'yāⁿ s'eeⁿ. Ní s'uuúⁿ ní tan'dúúcā 'áámá parte yeⁿ'e cuerpo yeⁿ'e Cristo 'tíicā s'uuúⁿ. ³¹ Ní 'tiicá ntúūⁿ saⁿ'ā i'neeⁿ sa chεecu sa ndúúcū chiida sa ní nduuvidaama sa ndúúcū n'daataá yeⁿ'ē sa ní nduu 'uuví yā nduuvidaamá yā ní dííⁿ yā tan'dúúcā chi 'áámá cuerpo nūuⁿ. ³² Chuū ní 'áámá vaadí cuaacu na libro yeⁿ'é Ndyuūs, ní ngaⁿ'á ngíí ndís'tií yeⁿ'e chuū. Nduudu miiⁿ ngaⁿ'ā yeⁿ'e Cristo ndúúcū 'iiⁿ'yāⁿ chí i'téenu yā Cristo ní yeⁿ'é yā 'iiⁿ'yāⁿ s'eeⁿ. ³³ Maaⁿ ní neⁿ'é caaⁿ'máⁿ ca'áámá cā'aama ndís'tií chí saⁿ'ā chí 'nínívaacu, canee chí neⁿ'e ní n'daataá yeⁿ'e ní tan'dúúcā chí neⁿ'é ní maáⁿ ní. Ní ndís'tií n'daataá canéé chí dinéⁿ'e ní isaⁿ'ā yeⁿ'é ní ni 'caandiveéⁿ ní yeⁿ'e sa.

6

¹ Ndís'tií da'caiyá chí i'téenu ní Cristo, canee chí 'caandiveéⁿ ní yeⁿ'e chiidá ní caati chuū chí cosa chí n'daacā chí dííⁿ ní. ² Ní mandamiento yeⁿ'e Ndyuūs chí vmnááⁿ vmaaaⁿ chí Ndyuūs teé yā compromiso yeⁿ'ē ní chuū: Cu'téenu ní chiidá ní ndúúcū chεecú ní, ³ ní 'iicu nduuti chí dííⁿ ní 'tíicā cuuvi yeenú ní níicú cuneé ní na iⁿ'yeeⁿdí 'cūū n'dee n'dái nduuyu.

⁴ Ní ndís'tií saⁿ'ā chí véé daiyá ní, nguéé dííⁿ ní chí nduuvi taaⁿ daiyá ní naati di'cuiitá ní daiya ní ní yaa'ví ní daiya ní taachi nguéé din'daacā ní ca'cuéⁿ ní daiyá ní yeⁿ'e Señor Jesucristo caati cuuvi cu'téenu yā yeⁿ'é yā.

⁵ Ní ndís'tií 'iiⁿ'yāⁿ chí dííⁿ ntiiⁿnyuⁿ ndúúcū 'iiví ní, 'caandiveéⁿ ní yeⁿ'e 'iiví ní chí véé na iⁿ'yeeⁿdí 'cūū. Ní dííⁿ ní respetar 'iiví ní ní 'va'á ní yeⁿ'e yā. Ní dííⁿ ní ntiiⁿnyuⁿ yeⁿ'e yā ndúúcū núúⁿmáⁿ staava yeⁿ'e ní. Ní dííⁿ ní nducuéⁿ'ē ntiiⁿnyuⁿ yeⁿ'é yā tan'duucā chí dííⁿ ní caavā Cristo. ⁶ Ní dííⁿ ní n'dai ntiiⁿnyuⁿ yeⁿ'é yā nguéé dāmáāⁿ taachi 'iiví ní inaáⁿ yā ndís'tií caati n'daacā canéé ní ndúúcu yā. Naati dííⁿ ní ntiiⁿnyuⁿ yeⁿ'é yā tan'dúúcā chí ntiiⁿnyuⁿ yeⁿ'e Cristo chí dííⁿ ní ní ndúúcū núúⁿmáⁿ staava yeⁿ'é ní. Chuū ní chíiⁿ chí Ndyuūs neⁿ'é yā chí dííⁿ ní. ⁷ Ní dinéⁿ'e ní din'daacá ní ntiiⁿnyuⁿ yeⁿ'e yā tan'dúúcā chí ntiiⁿnyuⁿ yeⁿ'e Señor Jesucristo chí dííⁿ ní, nguéé tan'dúúcā chí ntiiⁿnyuⁿ yeⁿ'e 'iiⁿ'yāⁿ yeⁿ'ē iⁿ'yeeⁿdí 'cūū. ⁸ Ní nducyáácá ní ní déénu ní nduuti chí 'iiⁿ'yāⁿ chí dííⁿ ntiiⁿnyuⁿ caadi 'iiyu o nduuti chí 'iiⁿ'yāⁿ libre yā nducyáácá yā cuta'á yā yeⁿ'e Señor Jesucristo chí 'iivi yú chííⁿ chí téé yā 'iiⁿ'yāⁿ caavā ntiiⁿnyuⁿ n'daacā chí dííⁿ yā.

⁹ Ní ndís'tií chí 'iiví yeⁿ'e 'iiⁿ'yāⁿ, 'tiicá ntúūⁿ din'daacá ní ndúúcū 'iiⁿ'yāⁿ chí dichíí'vē ndís'tií. Nguéé caaⁿ'máⁿ ní chí caⁿ'á ní 'cueⁿ'é ní 'iiⁿ'yāⁿ chí dichíí'vē ndís'tií. N'gaacu ní chí ndís'tií ndúúcū 'iiⁿ'yāⁿ chí dichíí'vē ndís'tií ní snée ní na poder yeⁿ'e 'iiví Señor Jesucristo chí canéé na va'ai chεeti nguuvi. Ní 'āā daamá nūuⁿ nducyáácá 'iiⁿ'yāⁿ nanááⁿ Señor Jesucristo yeⁿ'ē yú.

Armas yeⁿ'e Espíritu N'dai yeⁿ'é Ndyuūs cáava 'iiⁿ'yāⁿ chí i'téenu yā Ndyuūs

¹⁰ Maaⁿ ní ndís'tií hermanos yeⁿ'é dííⁿ ní chí ditiinú 'cuεetinée ní nanááⁿ Señor Jesucristo yeⁿ'e yú ndúúcū nducuéⁿ'ē poder chí véé yeⁿ'é Cristo. ¹¹ Ní cuuví dííⁿ ní defender maáⁿ ní ndúúcū nducuéⁿ'ē armadura chí tan'dúúcā armadura catecai soldados chí Ndyuūs dátee yā s'uuúⁿ chí yeⁿ'e Cristo. Ní 'íicú cuuvi cuchéé ní yeⁿ'e nducuéⁿ'ē dendu'ū chí dííⁿ yááⁿ'guiinūuⁿ taachi ngínnc'ei sa ndís'tií. ¹² Nguéé 'cuuⁿ'maⁿ yú contra 'iiⁿ'yāⁿ chí nguéé n'daacā naati 'cuuⁿ'maⁿ yú ní contra fuerzas yeⁿ'e espíritus chí nguéé n'daacā chí canéé na 'yúúné ndúúcū espíritus chí 'iiⁿ'ntyéⁿ'ē yeⁿ'é tanáⁿ'ā espíritus chí ca'a orden yeⁿ'e espíritus chí nguéé n'dai ndúúcū nducuéⁿ'ē yeⁿ'e iⁿ'yeeⁿdí chí canéé

na maaⁿ chi yeⁿe yááⁿ'guiinūⁿ. ¹³ Cáávā chuū tan'dúú^{cā} 'áámá soldado cuta'a sa catecai yeⁿe soldado ní maaⁿ ní cuta'á nī nducueⁿ'ē armadura chi tan'dúú^{cā} catecai nī chi Ndyuūs dátee yā ndís'tiī. Ní 'íicú cuuvi cuchéé nī contra enemigo nguuvi taachi ndaa nanááⁿ nī nducueⁿ'e dendu'ū chi nguεε n'daacā. Ní taachi chichεε nī yeⁿe nducueⁿ'ē chi nguéé n'daacā ndíí chí 'cuiinū, tuu'mi ní cuuvi 'cuεetinéé diitú nī ndúú^{cū} chi i'téenu nī. ¹⁴ Ní canéé diitú nī ndúú^{cū} armadura yeⁿ'é Ndyuūs. Cáávā caandaá 'tiicá ntúūⁿ ndís'tiī cuta'á nī cinturón ní chiichi cunéé cinturón yeⁿ'é nī chi armadura yeⁿ'e Ndyuūs chi vaadī cuaacu. Ní véé fuerzas yeⁿ'é nī. Ní diiⁿ n'daacá nī caati canéé diitú nī. 'Tiicá ntúūⁿ ndís'tiī cuta'á nī chaleco cūū yeⁿ'e Ndyuūs chí vaadī cuaacu. Ní canéé chi diiⁿ nī nducueⁿ'ē chi n'daacā caati cuuvi diiⁿ nī proteger pecho maáⁿ nī yeⁿ'e nducueⁿ'ē chi nguεε n'daacā chí dardos yeⁿ'e enemigo. ¹⁵ 'Tiicá ntúūⁿ ndís'tiī snúúⁿ ca'a nī zapatos chi yeⁿ'é Ndyuūs chí yeⁿ'e vaadī 'diiⁿ. Ní 'cuεetinéé listo nī chi caaⁿ'maⁿ nī 'iiⁿ'yāⁿ nduudu cuaacu yeⁿ'e Jesucristo ní 'íicú cuuvi cunéé vaadī 'diiⁿ yeⁿ'é yā. ¹⁶ 'Tiicá ntúūⁿ ndís'tiī sta'á nī escudo yeⁿ'é Ndyuūs chi vaadī i'teenu. Ní 'íicú díitú canéé nī ndúú^{cū} chi i'téenu nī. Ní diiⁿ nī protejer maáⁿ nī yeⁿ'e dardos chí ngiichi yeⁿ'e yááⁿ'guiinūⁿ. Ní yááⁿ'guiinūⁿ nguéé cuuvi cuchéé sá yeⁿ'e ndís'tiī ndúú^{cū} cosas yeⁿ'e sa chi nguéé n'daacā. ¹⁷ 'Tiicá ntúūⁿ ndís'tiī sta'á nī cachucha cūū yeⁿ'e Ndyuūs chí vaadī nguaⁿ'ai yeⁿ'é nī chi diiⁿ proteger tiíⁿ nī. Ní n'gáácú nī chi Jesucristo nadanguáⁿ'ai yā ndís'tiī ní itée yā fuerzas ndís'tiī chí nguéé 'va'á nī ní nguéé véé 'uuvī vaanicádiinuuⁿ yeⁿ'é nī. 'Tiicá ntúūⁿ ndís'tiī sta'á nī espada yeⁿ'e Ndyuūs chí Espíritu N'dai yeⁿ'é Ndyuūs. Ní Espíritu N'dai yeⁿ'e Ndyuūs ndúú^{cū} Nduudu Cuaacu yeⁿ'é Ndyuūs inneé yā ndís'tiī chí nguéé n'giindiveéⁿ nī nduudu yeⁿ'e yááⁿ'guiinūⁿ naati yááⁿ'guiinūⁿ caⁿ'a sa caanu sa yeⁿ'é nī. ¹⁸ Ní cueⁿ'e daāⁿmaⁿ caaⁿ'maⁿngua'á nī yeⁿ'e tanducueⁿ'ē chuū. Ní cueⁿ'e daāⁿmaⁿ di'cuiitú nī Ndyuūs cucáávā Espíritu N'dai yeⁿ'é yā, ní ngiicá nī caati cuuvi cuta'á nī yeⁿ'e poder yeⁿ'e Ndyuūs. Ní 'íicú cuuvi diiⁿ nī nducueⁿ'ē chuū. Ní canee listo nī. Ní nguéé cuuvi cúúnu nī. Ní caaⁿ'maⁿngua'á nī caavā nducyaaca 'iiⁿ'yāⁿ chí i'téenu yā Ndyuūs. ¹⁹ Ní caⁿ'angua'á nī caavā 'úú dendu'ū ti Ndyuūs téé yā nduudu yeⁿ'é yā 'úú taachi ngaⁿ'á nduudu cuaacu yeⁿ'é yā. Ní 'íicú 'úú cuuvi caaⁿ'máⁿ nduudu miiⁿ ndúú^{cū} valor caati 'iiⁿ'yāⁿ cuuvi déénu yā nduudu chí ngaⁿ'á táácā chí cuuvi nanguáⁿ'ai 'iiⁿ'yāⁿ, nduudu chí canéé n'de'ei cuááⁿ vmnaaⁿ. ²⁰ Ndyuūs yeⁿ'e yú ní dichó'o yā 'úú tan'dúú^{cā} chí 'úú embajador yeⁿ'é yā 'úú chí 'úú caaⁿ'máⁿ nduudu cuaacu yeⁿ'é yā. Ní cááva chuū ní 'úú ní preso 'úú ní maaⁿ canuúⁿ vácūū. Ní ndís'tiī ní caⁿ'angua'á nī caavā 'úú chí 'úú cuuvi caaⁿ'máⁿ nduudu cuaacu miiⁿ ndúú^{cū} valor tan'dúú^{cā} chí 'úú canéé chí caaⁿ'máⁿ.

Saludos yeⁿ'e Pablo naachi ch'iinū carta 'cuū

²¹ Hermano Tíquico, chí neⁿ'e nducyaaca s'uuúⁿ, ní n'daacā diiⁿ sa ntiiⁿnyuⁿ yeⁿ'e Señor Jesucristo nduucú. Ní saⁿ'ā miiⁿ caaⁿ'maⁿ sa ndúú^{cū} ndís'tiī yeⁿ'e 'úú ní yeⁿ'e chí 'úú idiíⁿ. ²² Cáávā chuū dicho'ó hermano Tíquico nanááⁿ ndís'tiī ti caaⁿ'maⁿ sa táácā snéé 'nū ní 'iicu diiⁿ sa chí diituu 'cuεetinééⁿ nī na staava yeⁿ'é nī.

²³ Maaⁿ ní 'úú neⁿ'é chí Ndyuūs Chiida yú ndúú^{cū} Señor Jesucristo yeⁿ'e yú ca'á yā nducyaaca hermanos yeⁿ'é vaadī 'diiⁿ na staava yeⁿ'é yā. Ní neⁿ'é chí Ndyuūs diiⁿ yā chí ndís'tiī cu'téenu cá nī Ndyuūs, ní dineⁿ'e cá nī nducyaaca 'iiⁿ'yāⁿ. ²⁴ Ní neⁿ'é chí Ndyuūs ca'á yā vaadī n'dai yeⁿ'é yā nducyaaca 'iiⁿ'yāⁿ chí cuaacu níⁿnyúⁿ neⁿ'é yā Señor Jesucristo yeⁿ'e yú. Ní 'áámá neⁿ'é yā, ní nguéé n'daáⁿ yā. 'Tiicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ FILIPOS

Taachi Pablo canúuⁿ yā vácūū idingúuⁿ yā yeⁿe 'iiⁿ'yāⁿ yeⁿe yāāⁿ Filipos, 'iiⁿ'yāⁿ chi i'téenu yā Jesucristo

¹ 'Úú Pablo ndúúcū Timoteo ní nús'uu ní dichíí've 'nū Jesucristo. Maaⁿ ní idinguúⁿ 'nū carta 'cūū yeⁿe nducyáácá hermanos chi i'téenu yā Jesucristo ndúúcū obispos chi saⁿ'ā ndíí tīiⁿ yeⁿe 'iiⁿ'yāⁿ chi i'téenu yā Jesucristo ndúúcū diáconos chi nginneé yā obispos, nducyaaca yā chi snee yā na yāāⁿ Filipos. ² Neⁿ'é 'nū chí Ndyuūs Chiida yú ndúúcū Señor Jesucristo yeⁿe yú tée yā ndís'tiī yeⁿe vaadī n'dai taavi yeⁿ'é yā ní 'cuēetinée nī ndúúcū vaadī 'diiⁿ yeⁿ'é Ndyuūs.

Pablo ngaⁿ angua'á yā cáávā 'iiⁿ'yāⁿ chi i'téenu yā Jesucristo

³ 'Úú nca'á gracias Ndyuūs yeⁿe yú ca'áámá ca'áámá vuelta taachi n'gaacú yeⁿe ndís'tiī. ⁴ Ní taachi caⁿ'anguā'á, nducuéⁿ'ē tiempo caⁿ'anguā'á yeⁿe nducyaaca ndís'tiī ndúúcū vaadī yeenú. ⁵ Caati ndís'tiī ní nduucú ní dáámá diiⁿ yú ntiiⁿ'nyuⁿ ti inneé nī 'úú chi 'úú candéé nduudu yeⁿe evangelio chí nduudu ngai yeⁿe Cristo, ndii nguuvi chi i'téenu nī Jesucristo ndíí maaⁿ. ⁶ Ní deenú chi seguro canee chiiⁿ chi yeⁿe Ndyuūs ti Ndyuūs chi tuca'á yā diiⁿ yā ntiiⁿ'nyuⁿ n'daacā n'dai na vida yeⁿe ndís'tiī ní idiíⁿ yā chi ndís'tiī 'cuēetinée nī diíⁿ nī ntiiⁿ'nyuⁿ chi n'daacā nguuvi nguuvi ndíí nguuvi chí ndaa Jesucristo taama vmnéⁿ'ēe. ⁷ Ní 'tíicā chi n'dai chí 'úú nacádiinúúⁿ chuū yeⁿ'ē nducyaaca ndís'tiī caati neⁿ'é taavi ndís'tiī. Ní nducyaaca ndís'tiī ní véé parte yeⁿ'é nī nduucú yeⁿe nducuéⁿ'ē chi n'dai taavi chí Ndyuūs itée yā s'uuúⁿ. Ní ndís'tiī nginneé nī 'úú 'áará chí canúúⁿ vácūū o 'áará chí canee nanááⁿ 'iiⁿ'yāⁿ 'iiⁿ'ntyéⁿ'ē 'úú ní ngaⁿ'á nduudu cuaacu yeⁿ'ē nduudu ngai yeⁿ'é Cristo chí cuaacu chí 'tíicā. ⁸ Ní Ndyuūs yeⁿe yú ní deenú yā chí 'úú neⁿ'é ndís'tiī tan'dúúcā chí Cristo neⁿ'é yā s'uuúⁿ. ⁹ Ní 'úú ngiicá Ndyuūs chí ndís'tiī cuuvi dinéⁿ'e ca nī nducyaaca 'iiⁿ'yāⁿ. Ní cuuvi deenu cá nī yeⁿ'ē nduudu cuaacu ní cuuvi nadacadíinuuⁿ n'daāca nī yeⁿ'ē nducuéⁿ'ē chí cuaacu. ¹⁰ Caati cuuví ndēeve nī nducuéⁿ'ē tiempo chéé chí n'daacā taavi ca. Ní 'tíicā cuuvi 'cuēetinée nī n'daacā n'dai. Ní taachi ndaa Jesucristo taama vmnéⁿ'ēe nguéé véé mar 'áámá nuuⁿ'ndi yeⁿ'é nī. ¹¹ Ní neⁿ'é chí Jesucristo ndaacá yā ndís'tiī chí 'cuēetinée nī daacá nī cucáávā poder yeⁿ'e Cristo ní diíⁿ nī ntiiⁿ'nyuⁿ yeⁿ'e evangelio chí nduudu ngai yeⁿ'e Cristo. Ní 'íicú nducyaaca 'iiⁿ'yāⁿ cuuvi caaⁿ'máⁿ yā chí ch'ēete taavi Ndyuūs. Ní diíⁿ yā honrar Ndyuūs.

Cáávā 'úú vida yeⁿ'é ní Cristo

¹² Maaⁿ ní ndís'tiī hermanos yeⁿ'é, neⁿ'é chí cadíinuuⁿ nī chí tanducuéⁿ'ē chí ch'eenú chíí ní diiíⁿ chí 'yaaⁿ ca 'iiⁿ'yāⁿ ngíí n'giindiveéⁿ yā nduudu cuaacu chí ngai yeⁿ'e Cristo. ¹³ 'Tíicā chíí chí taanduvéé soldados chí dííⁿ ntiiⁿ'nyuⁿ na palacio yeⁿ'e César ndúúcū taanduvéé 'iiⁿ'yāⁿ, nducyaaca yā deenu yā chí 'úú canee preso na vácūū cucáávā chí diíⁿ ntiiⁿ'nyuⁿ yeⁿ'e Cristo. ¹⁴ Ní neéⁿ'é 'yaaⁿ hermanos chí i'téenu yā Señor Jesucristo taachi cadíinuuⁿ yā chí canee vácūū nguéé di'va'á yā naati neⁿ'é yā caaⁿ'maⁿ cá yā nduudu ngai chí nduudu cuaacu yeⁿ'e Ndyuūs ndúúcū confianza nanááⁿ Cristo miiⁿ.

¹⁵ Cuaacu chí náⁿ'a yā ní ngaⁿ'a yā nduudu ngai yeⁿ'e Cristo cáávā chí dingueé yā yeⁿ'é ní cáávā chí neⁿ'e yā 'caa'va yā nduucú. Ní tanáⁿ'a yā ní ngaⁿ'á yā nduudu ngai miiⁿ ti cuaacu chí neⁿ'é yā diíⁿ yā ní neⁿ'é yā cunnee yā 'úú. ¹⁶ Naati 'iiⁿ'yāⁿ s'eeⁿ vmnaaⁿ nguεε ngaⁿ'a yā nduudu ngai yeⁿ'e Cristo ndúúcū nuuⁿ'maⁿ staava yeⁿ'é yā naati diíⁿ yā chí 'iiⁿ'yāⁿ caⁿ'a yā ndúúcū yā. Dííⁿ yā ti neⁿ'é yā chí 'úú ní ngueé yeⁿ'é yā. Ní cadíinuuⁿ yā chí diíⁿ yā chí 'úú n'geenú ngii ca taachi canúúⁿ vácūū. ¹⁷ Ní 'iiⁿ'yāⁿ cuayiiⁿ ní ngaⁿ'á yā nduudu ngai miiⁿ ti neⁿ'é yā 'úú. Ní deenú yā chí Ndyuūs tee yā 'úú ntiiⁿ'nyuⁿ yeⁿ'é yā chí ngaⁿ'á nanááⁿ 'iiⁿ'ntyéⁿ'ē táácā chí diíⁿ ntiiⁿ'nyuⁿ yeⁿ'é Ndyuūs ní ngaⁿ'á nduudu cuaacu yeⁿ'e evangelio chí nduudu ngai yeⁿ'e Cristo. ¹⁸ Naati ¿de'ē ituneéⁿ? 'Āā 'tuucá nūⁿ nduuti chí 'iiⁿ'yāⁿ caaⁿ'máⁿ yā nduudu ngai miiⁿ ndúúcū nuuⁿ'máⁿ staava yeⁿ'é yā o

cáávā chi nguéé neⁿ'é yā 'úú, nducyaacá yā ngaⁿ'a yā nduudu ngai yeⁿ'e Cristo. Ní cáávā chuū 'úú ní yeenú, ní yeenú taavi cá.

¹⁹ Caati deenú chi yeⁿ'e nducuéⁿ'ē chi ch'ó'ōo yeⁿ'é, n'daacā cuuvi yeⁿ'é caati ndís'tiī ní ngaⁿ'angua'á nī cáávā 'úú. Ní Jesucristo nginneé yā 'úú cucáávā Espíritu yeⁿ'é yā. ²⁰ Ní maaⁿ chuū chi neⁿ'é chi dicuaacu chi cuuvi díⁿ. Nguéé 'cuinaán yeⁿ'ē mar 'áámá naaⁿ naati ngaⁿ'á nduudu ngai yeⁿ'e Cristo cueⁿ'e daāⁿmaⁿ ndúúⁿcū nducuéⁿ'ē confianza tan'dúúⁿcā chi díⁿ maaⁿ, 'tiicá ntúūⁿ cuuvi díⁿ cueⁿ'e daāⁿmaⁿ. Ní 'íicú 'iiⁿ'yāⁿ cuuvi n'diichi cá yā Cristo chi ch'εεε ca yā cucáávā 'úú, 'áará chí 'úú cunduūchí o 'áará chí 'úú 'āā n'dií. ²¹ Ní cucaavā 'úú, vida yeⁿ'é ní Cristo níicú nduuti chí 'cuūví 'āā díⁿ ganar caati 'úú caneé ndúúⁿcū Cristo. ²² Ní nduuti chi candií ca cuneé ca na iⁿ'yeeⁿdí 'cūū ndúúⁿcū cuerpo yeⁿ'é, tuu'mi ní cuuvi díⁿ ca ntiⁿ'nyuⁿ yeⁿ'e Señor Jesucristo yeⁿ'ē yú. Ní candéé nduudu yeⁿ'e yā nanáán 'iiⁿ'yāⁿ níicú 'iiⁿ'yāⁿ cuuvi cu'téenu yā Ndyuūs. Maaⁿ ní nguéé deenú de'ē chi n'daacā ca chi ndεεvé cáávā 'úú ²³ caati 'úú canuūⁿ nguuaⁿ nduu 'uuví vaanicadíⁿnūⁿ. Ní neⁿ'é chí 'cuūví níicú caⁿ'á cunēe ndúúⁿcū Cristo caati deenú chi neenē n'daacā caavā 'úú. ²⁴ Naati cáávā ndís'tiī ní n'daacā ca chi 'úú cuneé ca na cuerpo yeⁿ'é 'tεε 'téé ndúúⁿcū ndís'tiī. ²⁵ Seguro caneé maaⁿ yeⁿ'e chuū. Ní deenú ti 'úú cuneé ca 'tεε 'téé ndúúⁿcū ndís'tiī caati ndís'tiī cuuvi 'cuεetinée nī n'daacā ca ní yeenu taaví nī caati i'téenu nī Ndyuūs. ²⁶ 'Túúⁿcā cuneé 'tεε 'téé ndúúⁿcū ndís'tiī ní taachi ndaá nanáán ndís'tiī tuu'mi ní ndís'tiī cuuvi yeenu cá nī nduucú ti s'uúúⁿ ní yeⁿ'e Cristo s'uúúⁿ.

²⁷ Di'cuiitú ndís'tiī chi dámaāⁿ diiⁿ núú yiiⁿ'nuⁿ nī chi 'cuεetinée n'daacā nī taanduvéé chi n'daacā tan'dúúⁿcā chi ngaⁿ'a nduudu n'dai yeⁿ'e Cristo. Níicú ndúúⁿti chi ndaá n'diichí ndís'tiī o ndúúⁿti chi caneé yaⁿ'ai yeⁿ'é ndís'tiī neⁿ'é 'caandiveéⁿ yeⁿ'é ndís'tiī. Neⁿ'é chí 'iiⁿ'yāⁿ cuuví yaa'ví yā 'úú yeⁿ'é ndís'tiī chi ndís'tiī ní n'daacā sneé nī. Ní nduuvidaamá nī ndúúⁿcū 'áámá espíritu nūⁿ ndúúⁿcū 'áámá vaanicadíⁿnūⁿ yeⁿ'é nī. Ní 'áámá díⁿ nī ntiⁿ'nyuⁿ yeⁿ'é Ndyuūs ní ngaⁿ'á nī nduudu ngai yeⁿ'e Cristo chi evangelio caati 'iiⁿ'yāⁿ cuuvi cu'téenu yā Cristo. ²⁸ Neⁿ'é 'caandiveéⁿ yeⁿ'é nī chi nguéé di'va'á nī mar 'áámá yeⁿ'é 'iiⁿ'yāⁿ chi contra yeⁿ'e nī. Caati chuū ní 'áámá seña yeⁿ'é yā chi nguéé i'téenu yā Cristo ní caⁿ'á yā infierno. Naati chuū ní 'áámá seña yeⁿ'é nī chi ndís'tiī ní cuuví ninguaⁿ'ái nī yeⁿ'e infierno caati chuū ní yeⁿ'é Ndyuūs. ²⁹ Ní Ndyuūs díⁿ yā 'áámá favor ndúúⁿcū ndís'tiī caati nguéé dámaāⁿ chi cu'téenu nī Cristo naati canéé chi 'cuenú nī cuuvi caavā chi i'téenu nī Cristo. ³⁰ Ní ndís'tiī ndúúⁿcū 'úú 'āā daamá nūⁿ snée yú chí n'geenu yú ngii cucáávā chi ngaⁿ'a yú nduudu cuaacu yeⁿ'é Cristo. Ndís'tiī 'āā n'diichí nī cuáán vmnaaⁿ tan'dúúⁿcā chí díⁿ ntiⁿ'nyuⁿ ní ch'eenú chii. Ní maaⁿ ní n'giindiveéⁿ ntúúⁿ nī tan'dúúⁿcā chí díⁿ ntiⁿ'nyuⁿ ní tan'dúúⁿca chi n'geenú ngii.

2

Cristo ní ndiicúúⁿ yā ní cuayiivi chich'εεté yā

¹ Ndís'tiī hermanos yeⁿ'é, nduuti chi Cristo díⁿ yā animar ndís'tiī ní nduuti chi Cristo tee yā 'viich'εεtíⁿnūⁿ ndís'tiī ti neⁿ'é yā ndís'tiī ní nduuti chi Espíritu N'dai yeⁿ'é Ndyuūs canéé yā ndúúⁿcū ndís'tiī ní nduuti chi neⁿ'é nī nducyaaca 'iiⁿ'yāⁿ ní ya'ai 'íinú nī 'iiⁿ'yāⁿ tuu'mi ní 'tíicā díⁿ nī. ² Díⁿ nī chi cuuvi yeenú taavi cá caati snée nī 'túúⁿcā. N'dáácā 'cuεetinée nī ndúúⁿcū 'aama vaadí cadíⁿnūⁿ yeⁿ'é nī. Ní neⁿ'é nī dáámá nūⁿ 'aama nī ndúúⁿcū taama nī tan'dúúⁿcā Cristo neⁿ'é yā s'uúúⁿ. Ní 'tiicá ntúūⁿ neⁿ'é nī vi'í 'aama nī ndúúⁿcū taama nī. Ní nduuvidaamá nī ndúúⁿcū 'áámá espíritu yeⁿ'é nī ndúúⁿcū 'áámá staava yeⁿ'é nī. ³ Ní nguéé díⁿ nī dendu'ū chi neⁿ'e maáⁿ nī o caavā chi neⁿ'é nī ch'εεε maáⁿ nī caati ndiicúúⁿ 'cuεetinée nī. Maaⁿ ní ca'áámá ca'aamá nī canéé chí nadacadíⁿnūⁿ nī yeⁿ'e hermanos yeⁿ'é nī chí néenē n'dai ca hermanos yeⁿ'é nī nguéé ti maáⁿ nī. ⁴ Ní mar 'áámá nī nguéé n'nuúⁿ nī dendu'ū chi cuuví yeⁿ'ē maáⁿ nī caati n'nuúⁿ nī ntúúⁿ dendu'u chi n'daacā chi cuuvi yeⁿ'e tanáⁿ'ā hermanos yeⁿ'é nī.

⁵ Ní nguuaⁿ ndís'tiī ní tan'dúúⁿcā chi Cristo nadacadíⁿnūⁿ yā yeⁿ'ē maáⁿ ya 'tiicá ntúūⁿ ndís'tiī canee chi nadacadíⁿnūⁿ nī yeⁿ'e maaⁿ nī. ⁶ Ní n'dáá rá chí Cristo miiⁿ ti Ndyuūs 'yā, Cristo nguéé 'āā fuerza díⁿ yā chi cuuvi daamá yā ndúúⁿcū Ndyuūs Chiidá yā. ⁷ Naati

Cristo s'neeⁿ yā chi ch'εεε yeⁿ'é yā tanducuéⁿe chi canéé na va'ai chεeti nguuvi. Ní tan'dúúcā s'uúúⁿ 'tiicá yā. Ní tan'dúúcā 'áámá saⁿ'ā chi dichíí'vē 'iiⁿ'yāⁿ, 'tiicā núúⁿ yā. Ní ch'iindiyāⁿ yā tan'dúúcā 'áámá saⁿ'a yeⁿ'ē iⁿ'yeeⁿdí 'cūū. ⁸ Ní taachi canéé yā tan'dúúcā saⁿ'a na iⁿ'yeeⁿdí 'cūū ndiicúúⁿ n'dai díⁿ yā ní ch'iindiveéⁿ yā taanduvéé chi ngaⁿ'ā Chiidá yā chi canéé na va'ai chεeti nguuvi. 'Áará chí ch'iⁿ yā na cruz, ch'iindiveéⁿ yā nduudu yeⁿ'e Chiidá yā ní ca'á yā lugar 'iiⁿ'yāⁿ s'eeⁿ chi 'caaⁿ'núⁿ yā 'iiⁿ'yāⁿ. ⁹ Ní cáávā chi diiⁿ Jesús, Ndyuūs díⁿ yā chi Jesús ní ch'εεε cundaá yā na va'ai chεeti nguuvi. Ní Ndyuūs ca'á yā 'áámá chi duuchí yā chi ch'εεε n'dai nguéé ti tanáⁿ'ā 'iiⁿ'yāⁿ yeⁿ'e iⁿ'yeeⁿdí 'cūū. ¹⁰ Ní nducyáácá yā canéé chi caāntii'ya yā taachi 'caandiveéⁿ yā chi duuchi Jesús miiⁿ. 'Tiicá ntúūⁿ nducyaacá yā chi snee yā na va'ai ch'εεeti nguuvi. 'Tiicá ntúūⁿ nducyaaca yā chi snee yā na yáⁿ'āa. 'Tiicá ntúūⁿ nducyaaca yā chi snee yā na infierno. ¹¹ 'Tiicá ntúūⁿ canee chi caaⁿ'maⁿ cuaacú yā chi Jesucristo miiⁿ ní 'iivú Ndyuūs. Ní caaⁿ'maⁿ cuaacú yā chi nééné ch'εεε n'dai Ndyuūs chi Chiida yú.

'Iiⁿ'yāⁿ chi i'téenu yā Cristo ní tan'duucā chi dεεve yeⁿ'e iⁿ'yeeⁿdí 'cūū 'tiicá yā

¹² Maaⁿ ní ndís'tiī hermanos yeⁿ'é chi neⁿ'e taaví, tan'dúúcā chi cueⁿ'e daāⁿmaⁿ i'téenu nī nduudu yeⁿ'é Ndyuūs taachi canéé ndúúcū ndís'tiī, maaⁿ ní i'téenu nī taachi 'āā yaⁿ'ai canéé yeⁿ'é ndís'tiī. Maaⁿ ní 'va'á nī Ndyuūs. Ní ndís'tiī díⁿ n'daacá nī ti Ndyuūs nadinguáⁿ'ai yā ndís'tiī ní díⁿ n'daacá nī ndúúcū cuidado yeⁿ'e nducuéⁿ'ē. ¹³ Cuaacu chi Ndyuūs díⁿ yā chi ndís'tiī neⁿ'é nī díⁿ nī nducuéⁿ'ē chi n'daacā. Ní Ndyuūs cunneé yā ndís'tiī chí díⁿ nī. Ní 'cuiinú nī chiiⁿ chí díⁿ nī tan'dúúcā chí neⁿ'é yā chíⁿ chí n'daacā n'dai.

¹⁴ Maaⁿ ní ndís'tiī diiⁿ nī nducuéⁿ'ē ní nguéé cueēⁿdiitú nī ndíí nguéé 'cuuⁿ'máⁿ nī.

¹⁵ Ní ndúúti chí díⁿ nī 'tuucā mar 'áámá 'iiⁿ'yāⁿ nguéé cuuvi caaⁿ'máⁿ yā nuuⁿndi yeⁿ'é nī o nguéé n'daacā idiíⁿ nī caati deenú yā chí ndís'tiī daiyá Dendyuūs ndís'tiī. Ní nguéé véé nuuⁿndi yeⁿ'é nī nguaaⁿ 'iiⁿ'yāⁿ chí nguéé i'téenu yā Ndyuūs ní nguéé n'daacā idiíⁿ yā. Ní tan'dúúcā 'áámá 'ííⁿnyúⁿ ngíí yáⁿ'āa taachi maāiⁿ 'tiicá nī. ¹⁶ Ní candéé nī nduudu cuaacu yeⁿ'e Cristo nanááⁿ 'iiⁿ'yāⁿ ti nduudu miiⁿ diiⁿ chí 'iiⁿ'yāⁿ cuuvi cunduuchí yā cueⁿ'e daāⁿmaⁿ caati 'úú ní cuuví yeenú taavi nguuvi chí ndaa Cristo taama vmnéⁿ'ēe. Ní deenú chí nguéé tandii rá díⁿ ndu'ú 'úú ndíí nguéé nduu tandii rá díⁿ ntiiⁿnyuⁿ yeⁿ'é Ndyuūs nguaaⁿ ndís'tiī. ¹⁷ Ndúúti chí nca'á vida yeⁿ'e maáⁿ ní ch'iⁿ caavā ntiiⁿnyuⁿ yeⁿ'é Ndyuūs, tuu'mi ní cáávā chí 'āā itéenu nī Ndyuūs ní díⁿ nī ntiiⁿnyuⁿ yeⁿ'é yā, tanducuéⁿ'ē chuū ní tan'dúúcā 'áámá ofrenda nanááⁿ Ndyuūs 'tíicā. Ní 'úú ní yeenú, ní cuuvi yeenú ndúúcu nī. ¹⁸ 'Tiicá ntúūⁿ cáávā chuū ndís'tiī cuuvi yeenú nī. Ní cuuvi yeenú ntúūⁿ nī nduucú.

Yeⁿ'ē hermano Timoteo ndúúcū hermano Epafrodito

¹⁹ Nduuti chí Señor Jesucristo neⁿ'é yā chí 'úú idiíⁿ chiiⁿ chí nadacadíínuúⁿ chí díⁿ, tuu'mi ní caⁿ'á dicho'ó Timoteo nanááⁿ ndís'tiī nguuvi chí cuchí. Maaⁿ níicú cuuvi yeenú taachi cadiinúúⁿ ní cuuvi deenú táácā snee ndís'tiī. ²⁰ Ti nguéé véé táámá compañero yeⁿ'é chí dáámá nadacadíínuuⁿ sa nduucú tan'dúúcā Timoteo miiⁿ. Ní n'daacā idiíⁿ sa cuidado yeⁿ'é ndís'tiī. ²¹ N'dee n'dái 'iiⁿ'yāⁿ i'nuúⁿ yā chí n'daacā yeⁿ'ē maáⁿ yā ní nguéé díⁿ yā dendu'ū chí ntiiⁿnyuⁿ yeⁿ'e Cristo Jesús. ²² Naati ndís'tiī ní deenú nī yeⁿ'e Timoteo chí n'daacā canee sa yeⁿ'e nducuéⁿ'ē. Ní deenú nī chí saⁿ'a miiⁿ tan'dúúcā daiyá chí dichíí'vε sa 'úú, 'tíicā sa taachi ngaⁿ'á 'nū evangelio chí nduudu ngai yeⁿ'é Cristo. ²³ Sáⁿ'a 'cūū nadacadíínuúⁿ chí dicho'ó saⁿ'ā nanááⁿ ndís'tiī naati neⁿ'é cadiinúúⁿ vmnaaⁿ táácā 'cueenú asuntos yeⁿ'é núúⁿ niⁿ'yūⁿ. ²⁴ Maaⁿ ní véé confianza yeⁿ'é ndúúcū Ndyuūs chí núúⁿ niⁿ'yūⁿ cuuví ndaa maáⁿ ní n'diichí ndís'tiī.

²⁵ Ní nadacadíínuúⁿ ntúūⁿ chí dicho'ó yeⁿ'e ndís'tiī hermano Epafrodito. Saⁿ'ā miiⁿ idiíⁿ sa ntiiⁿnyuⁿ nduucú ní diiⁿ sá luchar nduucú. Saⁿ'ā miiⁿ ndís'tiī maáⁿ nī dicho'ó nī saⁿ'ā nanaáⁿ chí cuuvi cunnee sa 'úú ndúúcū necesidades yeⁿ'é. ²⁶ Saⁿ'ā miiⁿ neené neⁿ'e sa n'diichi sa nducyaaca ndís'tiī ní neené nadacadíínuuⁿ sa yeⁿ'e ndís'tiī caati ndís'tiī n'giindiveéⁿ nī chí ngíitā sa. ²⁷ Cuaacu níⁿ'yūⁿ chí nééné ya'ai chíitā sa ti 'āā cháa 'cuūvī

sa. Naati Ndyuūs ní ya'āi 'iinú yā sa'nā ní nguée dámaān sa'nā miiⁿ caati ndúúcū 'úú ti 'úú nguεε cunee ndaāchī yiinú cá de'ē ca chi canée ye'né. ²⁸ Ní cáávā chuū ne'nē cá dicho'ó sa'nā Epafrodito nanáán ndís'tiī ní ndís'tiī cuuvi yeenú nī taachi snaaⁿ nī taama vmnéⁿē sa'nā. Ní 'tiicá ntúūⁿ 'úú nguée nadacadíínuuⁿ ndaachí ye'né nī. ²⁹ Ní taachi ndaa sa nanáán ndís'tiī, 'cuáaⁿ nī Epafrodito ndúúcū vaadí yeenú caati sa'nā miiⁿ hermano ye'né nī ti i'téenu sa Señor Jesucristo ye'nē yú. Ní dííⁿ nī honrar taná'a yā chi dííⁿ yā ntiinⁿyuⁿ ye'né Ndyuūs tan'dúúcā sa'nā miiⁿ. ³⁰ Caati 'áará chí neéné chíitā sa nī 'āā cháa 'cuūvī sa cucáávā chi diiⁿ sa ntiinⁿyuⁿ ye'nē Cristo, nguée nadacadíínuuⁿ sa ye'nē vida ye'nē maāⁿ sa ndúúcū peligro chi cuuvi 'cuūvī sa caati dichíí'vē sa 'úú. Ní diiⁿ sa ntiinⁿyuⁿ ye'né chi ndís'tiī maāⁿ nī ne'né nī dííⁿ nī naati nguεε cuuvi dííⁿ nī.

3

Pablo yaa'ví yā contra ye'nē 'iinyān Israel chi necio ye'nē ley ye'né yā

¹ Maaⁿ ní ndís'tiī hermanos ye'né nga'ná ngii ndís'tiī chi canée chi cuuvi yeenú nī ti ye'nē Señor Jesucristo ndís'tiī. Ní cáávā 'úú nguée de'ē veε chí di'vaachi 'úú taachi dinguúⁿ ye'nē ndís'tiī táamá vmnéⁿē chi cuuvi yeenú nī, ti canée chí dííⁿ nī cáávā chi cho'ōo n'dai ye'né nī. ² Ndís'tiī ní dííⁿ nī cuidado ye'nē 'iinyān chi tan'dúúcā 'yaānā ti 'tiicá yā ti ne'né yā circuncidar cuerpo ye'nē sa'nā chi nguée sa'nā Israel sa. Nguée n'daacā dííⁿ yā chi nadacadíínuuⁿ yā chi canee chi díí yā circuncidar cuerpo ye'nē sa'nā s'eeⁿ. ³ Ní cuaacu níínyúⁿ s'uúúⁿ ní tan'dúúcā chi 'āā circuncidado s'uúúⁿ caati s'uúúⁿ dich'εεε yú Ndyuūs ndúúcū espíritu ye'nē maāⁿ yú. Ní s'uúúⁿ ní yeenu yú ti ye'nē Señor Jesucristo s'uúúⁿ. Ní nguée véé confianza ye'nē yú ye'nē tan'dúúcā chi 'āā circuncidado cuerpo ye'nē yú. ⁴ Ní 'úú dendú'ū cuuví cunee ndúúcū confianza na vida ye'né nanáán 'iinyān tí 'úú canée circuncidado. Ní nguεε veε mar 'áamá 'iinyān chi cuuvi nadacadíínuuⁿ cá yā ye'nē nducuéⁿē chuū ndúúcū confianza tan'dúúcā chi cuuvi 'úú. ⁵ Caati taachi chíí niinⁿ nguuví chi ch'iidiyaán 'iinyān dííⁿ yā circuncidar 'úú ní 'caacá yā seña na cuerpo ye'né tan'dúúcā chi dííⁿ yā ndúúcū nducyaaca sa'nā 'lííⁿ ye'nē ndaata Israel chí judíos. Ní 'úú ní ye'nē 'iinyān Benjamín 'úú. Ní 'úú ní sa'nā ye'nē 'iinyān hebreo o Israel 'úú ndíí taachi ch'iidiyaán caati chiidá ní sa'nā hebreo yā. Ní 'úú ní sa'nā fariseo 'úú ní dííⁿ ndúúcū núúⁿ máⁿ staava ye'né chiiⁿ chi nga'nā ley ye'nē 'iinyān ye'nē ndaata ye'né. ⁶ Ní 'úú ní neené necio 'úú chi dííⁿ ntiinⁿyuⁿ ye'nē yaācū ye'nē ndaata ye'né. Ní 'úú i'nuuca'ái 'iinyān chi nge'nē yaācū ye'nē 'iinyān chi i'téenu yā Cristo. Ní dííⁿ nducuéⁿē chí nga'nā ley ye'nē yú. Ní 'iinyān nguée cuuvi caa'n máⁿ yā chí véé nuuⁿndi ye'né. ⁷ Naati nducuéⁿē chuū chí nadacadíínuuⁿ chí cosas chí ch'εεε chí neené dichíí'vē caavā 'úú, ní nducuéⁿē dendu'ū ye'né 'āā chí'neéⁿ. Ní maaⁿ ní dichíí'vē 'úú chí i'teenú Jesucristo. ⁸ Ní nguée nadacadíínuuⁿ cá ye'nē nducuéⁿē dendu'ū ye'né chí 'úú chí'neéⁿ ti dííⁿ cuenta chí dindaí nducuéⁿē dendu'ū ye'né cáávā chí n'dai taavi ca chí maaⁿ ní i'teenú Jesucristo chí 'iivú. Ní dííⁿ cuenta chí nducuéⁿē dendu'ū ye'né ní tan'dúúcā yaācā, 'tíicā veε, cáávā chí n'daán nducuéⁿē dendu'ū ye'né cáávā chí i'teenú Cristo. Ní sta'á Cristo tan'dúúcā chí 'iivú 'tíica yā. ⁹ Ní 'tíicā idiíⁿ ti maaⁿ ní 'úú ní ye'nē Cristo 'úú. Maaⁿ ní canee n'daacā nanáán Ndyuūs. Nguée cucáávā chí ne'né canee n'daacā nanáán Ndyuūs cucáávā ley miiⁿ naati cucáávā chí i'teenú Cristo. Ní 'úú ní n'daacā ca 'úú nanáán Ndyuūs caati ne'né Jesucristo. ¹⁰ Níicú 'úú ní dámaāⁿ ne'nē chí 'úú snaán Cristo ní canee cuuⁿmiⁿ chí canee ndúúcū maaⁿ poder chí diiⁿ chí nduuchi Cristo ye'nē nguaaⁿ tináⁿā. Níicú cuuví daamā nduucú yā chí 'cuenú cuuvi tan'dúúcā chí Cristo ch'eenú yā chíí ndíí cuuví 'cuūvī tan'dúúcā Cristo chí'ii yā. ¹¹ Ní 'tiicá ntúūⁿ 'úú cuuvi deenú chí 'āā cuuví nduuchí ye'nē nguaaⁿ tináⁿā.

Diiⁿ yú luchar cáávā premio chí Ndyuūs ca'nā yā téé yā s'uūuⁿ

¹² 'Úú nguée ne'né caa'n máⁿ ndís'tiī chí 'āā tuneéⁿ tanducuéⁿē chuū caati 'āā cuéeⁿ ndaa n'daacā 'úú. Naati 'úú candíí cá cuáán vmnaaⁿ ndúúcū chí i'teenú ní ngiínú ndíí taanduvée tuneéⁿ ye'nē premio chí cuuvi ye'né. Ní vmnáán vmnaaⁿ Cristo miiⁿ dííⁿ yā chí 'úú ní ye'né yā 'úú, caati cuuvi cuta'á premio miiⁿ. ¹³ Ní ndís'tiī hermanos ye'né, 'úú māāⁿ nguée nacadíínuuⁿ chí 'āā tuneéⁿ dendú'u 'cūū. Naati chuū idiíⁿ chí cuuvi naán nducuéⁿē

chi 'āā diín nguuví chi ch'ó'ōo. Ní diín chi cuuvi tuneé nducuéⁿē chi cuuvi yeⁿ'é nguuví chi cuchii. ¹⁴ Ní 'íicū 'úú cuuvi diín nducuéⁿē caati cuuvi diín ganar vida cueⁿ'e daāⁿmaⁿ chi premio chi cuuvi yeⁿ'é chi cūneé na va'ai chēeti nguuví ndúúcu Ndyuūs. Ndyuūs chi canéé na va'ai chēeti nguuví yaa'ví yā s'uuúⁿ chí dátee yā s'uuúⁿ chi cuuvi yeⁿ'e yú vida cueⁿ'e daāⁿmaⁿ caati s'uuúⁿ ní yeⁿ'é Cristo s'uuúⁿ.

¹⁵ Ní nducyaaca yú chí n'daacā snéé yú ndúúcu chi i'teenu yú, canee cuuⁿmiⁿ chi nadacadíinuⁿ yú 'tíicā chi nguéé tuneen yú. Ní nduuti chi tanáⁿ'a ndís'tiī nguéé nadacadíinuⁿ nī 'tíicā, tuu'mi ní Ndyuūs ní 'cuuⁿ'míⁿ yā ndís'tiī chēē chi cuaacu. ¹⁶ Níicú chuū ní néené neⁿ'e cunéé chí dáamá nūⁿ cadíinuⁿ yú n'daacā ní 'cuēetinee yú n'daacā ndúúcu chi 'āā deenu yú yeⁿ'é Ndyuūs.

¹⁷ Ndís'tiī hermanos yeⁿ'é diín nī tan'dúúcā chi 'úú idiín. Ní nadacadíinuⁿ n'dai nī yeⁿ'e 'iiⁿ'yāⁿ chi 'cuēetinee n'daacā yā tan'dúúcā chi ch'iⁿ'í 'nū 'iiⁿ'yāⁿ ní 'tíicā ntúūⁿ ch'iⁿ'í 'nū ndís'tiī. ¹⁸ Ní néené n'dee cuuví caⁿ'á ndís'tiī chí véé 'yaaⁿ taavi 'iiⁿ'yāⁿ chí neⁿ'é yā diín yā tan'dúúcā chí maán yā neⁿ'é yā. Ní nguéé neⁿ'e yā Cristo chí maán yā ch'tiī yā na cruz. Maaⁿ ní ngaⁿ'á chuū taama vmnéⁿ'ēe ní néené ya'āi 'iinu ndí chí ngēcú yeⁿ'ē. ¹⁹ Ní cáāvā 'iiⁿ'yāⁿ s'eeⁿ ndaā tiempo chí ndái yā. 'Iiⁿ'yāⁿ s'eeⁿ ní dámaāⁿ neⁿ'é yā n'nuuⁿ yā chí che'e yā ndúúcu nducuéⁿē chí neⁿ'e yā. Ní dich'ēete maán yā 'iiⁿ'yāⁿ taachi canee chí 'cuinaáⁿ yā caavā chí diín yā. 'Iiⁿ'yāⁿ s'eeⁿ dámaāⁿ nadacadíinuⁿ yā yeⁿ'e nducuéⁿē vicio chí véé iⁿ'yeeⁿ'dí 'cūū. ²⁰ Naati s'uuúⁿ chí yeⁿ'e Cristo ní yāāⁿ vaacu yú ní va'ai chēeti nguuví. Ní snéé ngiinu yú Señor Jesucristo yeⁿ'e va'ai chēeti nguuví chí ndaa yā taama vmnéⁿ'ēe ní nadinguáⁿ'ái yā s'uuúⁿ. ²¹ Ní taachi Cristo ndaa yā, tuu'mi ní n'dáán yā cuerpo yeⁿ'e yú chí cuerpo ndúúcu nuūⁿndi ndii cuerpo ngai yeⁿ'e yú chí tan'dúúcā cuerpo yeⁿ'é yā chí δεενε n'dai, 'tíicā cuerpo s'uuúⁿ. Ní 'tíicā Cristo caⁿ'a yā chí diín yā ndúúcu dáamá poder yeⁿ'ē maán yā chí yeⁿ'ē chí ngaⁿ'a ntiiⁿnyuⁿ yā yeⁿ'e taanduvéé chí véé.

4

Canee chí yeenu yú nducuéⁿē tiempo ti s'uuúⁿ ní yeⁿ'e Cristo s'uuúⁿ

¹ Maaⁿ ní ndís'tiī hermanos yeⁿ'é chí neⁿ'é cáāvā nducuéⁿē chuū neené neⁿ'é n'diichi ndís'tiī. Ndís'tiī ní diín nī chí 'úú ní yeenú ní véé premio yeⁿ'é tan'dúúcā chí corona yeⁿ'é caati ndís'tiī ní i'téenu nī Jesucristo. Canee diitú nī ndúúcu chí i'téenu nī yeⁿ'e 'iivu yú chí Cristo. 'Úú yaa'ví ndís'tiī 'tíicā ti neⁿ'é taavi ndís'tiī.

² 'Úú di'cuítú táⁿ'ā Euodias ní di'cuítú táⁿ'ā Síntique chí diín yā chí dáamá nūⁿ cuuví vaanicadíinuⁿ yeⁿ'é yā tan'dúúcā chí canee chí diín hermanos chí i'téenu yā Señor Jesucristo yeⁿ'ē yú. ³ Ní di'cuítú n'diī, saⁿ'ā chí 'áamá canee nduucú na ntiiⁿnyuⁿ chí cúnnee nī n'daataá hermanas chí diín yā ntiiⁿnyuⁿ nduucú. N'daataá s'eeⁿ ní dichíí'vε yā 'úú naachi 'úú ngaⁿ'á nduudu ngai yeⁿ'é Cristo chí nadanguáⁿ'ai yā nducyaaca 'iiⁿ'yāⁿ. Ní cúnnee nī saⁿ'ā Clemente ndúúcu tanáⁿ'a yā chí nginneé yā 'úú ní 'iiⁿ'yāⁿ s'eeⁿ chí duuchí yā ní canéé nguūⁿ na libro yeⁿ'é Ndyuūs naachi canéé nguūⁿ chí dúúchí nducyáácá 'iiⁿ'yāⁿ chí canduuchí yā cueⁿ'e daāⁿmaⁿ.

⁴ Ndís'tiī canéé chí yeenú nī nducuéⁿē tiempo caati ndís'tiī ní yeⁿ'e Señor Jesucristo ndís'tiī. Ní 'tíicā caaⁿ'máⁿ ntuúⁿ taama vmnéⁿ'ēe chí canee chí cuuví yeenú nī. ⁵ Ní nducyaaca 'iiⁿ'yāⁿ cuuvi snaán yā ndís'tiī chí 'iiⁿ'yāⁿ n'dái taavi ndís'tiī. Ní ndís'tiī deenu nī chí niiⁿnuúⁿ canee Señor Jesucristo yeⁿ'ē yú.

⁶ Ní nguéé de'ē vεε nadicadíinuⁿ nī yeⁿ'e tanducuéⁿē. Ní taachi caaⁿ'maⁿnguaⁿ'á nī cuuví nī Ndyuūs nducuéⁿē chí neⁿ'é nī. Ní taachi caacá nī Ndyuūs cucáāvā chíiⁿ chí neⁿ'é nī ní ca'a ntuúⁿ nī gracias Ndyuūs. ⁷ Tuu'mi ní Ndyuūs téé yā vaadi 'diiⁿ yeⁿ'é yā chí ch'ēete ca chí nguéé cuuvi tuumicadíinuⁿ nī yeⁿ'ē. Níicú vaadi 'diiⁿ miiⁿ ní nguáin'dai nī na staava yeⁿ'é nī ndúúcu vaanicadíinuⁿ yeⁿ'é nī caati ndís'tiī ní yeⁿ'e Cristo ndís'tiī.

Nadacadíinuⁿ nī yeⁿ'e nducuéⁿē chí n'daacā

⁸ Ní ndís'tiī ní yeⁿe nducuéⁿē dendú'ū nadacadíínuuⁿ nī yeⁿe nducuéⁿē chi nduudu cuaacu, ní yeⁿe nducuéⁿē chí n'dai chi diiⁿ yú respetar, ní yeⁿe nducuéⁿē vaadi cuaacu, ní yeⁿe nducuéⁿē chí δεεε, ní yeⁿe nducuéⁿē chi neⁿe Ndyuūs chi nadacadíínuuⁿ nī, ní yeⁿe nducuéⁿē chi 'iiⁿyāⁿ deenu n'dái yā chi n'daacā. Ní nadacadíínuuⁿ nī yeⁿe tanducuéⁿē chi n'daacā ca chi cuuvi nī caaⁿmaⁿ nī yeⁿe 'tíicā, de'ε chúucā n'daacā chuū.

⁹ Níicú diiⁿ nī dendu'ū chí ch'eeⁿ nī yeⁿé tan'dúucā chi ch'iⁿí ndís'tiī. Ní diiⁿ nī tan'dúucā chi ch'iindiveéⁿ nī yeⁿé chi n'geéⁿ ndís'tiī ní tan'dúucā chi n'diichí nī chi 'úú idiíⁿ. Diíⁿ nī nducuéⁿē chuū. Ndyuūs chi canee ndúucū vaadi 'diiíⁿ yeⁿé yā ní canée yā ndúucū ndís'tiī ndúucū vaadi 'diiíⁿ yeⁿé yā.

'Iiⁿyaⁿ yeⁿe yāāⁿ Filipos ca'á yā ofrendas Pablo

¹⁰ 'Uú ní yeenú taavi ti yeⁿé Señor Jesucristo ní caati ndís'tiī ní 'āā n'gaacu ntúuⁿ nī ní nadacadíínuuⁿ nī yeⁿé 'úú. Deenú chi ndís'tiī 'āā n'gaacú nī yeⁿe tiempo chi chó'ōo naati nguéeⁿ cuuvi cunneé nī 'úú, 'áará chi neⁿé nī. ¹¹ Ní 'úú nguéeⁿ ngaⁿ'á ndís'tiī yeⁿé chi nguεε véé yeⁿé caati maaⁿ ní 'āā deenú chi cuuvi yeenú ndúucū de'ε chi véé yeⁿé. ¹² Ní 'āā deenú táacā chi diiⁿ taachi pobre 'úú, ní 'āā deenú táacā chi diiⁿ taachi véé cá yeⁿé. Ní 'āā deenú ntúūⁿ táacā chi cuneé ndúucū 'āā de'ε nūuⁿ chí cúchiⁿ yeⁿé, nduuti chi véé cá chí che'ε o nduuti chi nguéeⁿ véé chí che'ε, o nduuti chi véé taavi ca yeⁿé o nduuti chi nguéeⁿ de'ε veε yeⁿé. Ní yeⁿé taanduvéeⁿ chuū ní deenú táacā cuuvi diiⁿ. ¹³ Ní 'úú ní cuuvi diiⁿ tanducuéⁿē chí cho'ō yeⁿé caati Cristo itée yā fuerzas 'úú. ¹⁴ Ní ndís'tiī ní n'daacā idiíⁿ nī chí chinnee nī 'úú taachi n'geenú ngii.

¹⁵ Ní ndís'tiī 'iiⁿyāⁿ yeⁿe yāāⁿ Filipos deenu n'daacā nī taachi cho'ó na yāⁿāa Macedonia ní tuca'á cāⁿa nduudu yeⁿe Cristo chí nadanguáⁿai yā 'iiⁿyāⁿ na yāⁿāa Macedonia miiⁿ. Deenú nī chí taachi can'daá cueⁿé chí dámaāⁿ ndís'tiī chí yeⁿé yaācū Filipos tee nī 'úú tuumi chí ofrenda yeⁿe yaācū yeⁿé nī chí nnee nī 'úú. ¹⁶ Ní taachi 'úú canee na yāāⁿ Tesalónica, ndís'tiī ní tee nī 'áámá 'uúví cuuvi ayuda ndúucū tuumi taachi 'āā véé necesidades yeⁿé. ¹⁷ Nguéeⁿ dámaāⁿ nacadíínuuⁿ yeⁿe chí cuta'á de'ε tuūmī chí ndís'tiī tée nī 'úú naati neⁿé chí snāāⁿ chí cuuvi véé cá yeⁿe ndís'tiī, chiiⁿ chí Ndyuūs caⁿ'á yā tée yā ndís'tiī cucáāvā chí ndís'tiī nnee nī 'úú. ¹⁸ 'Uú ní yaa'ví ndís'tiī chí 'āā sta'á nducuéⁿē chí tee nī 'úú ní ngo'o ca cáāvā necesidades yeⁿé. Ní maaⁿ ní chí sta'á yeⁿe hermano Epafrodito dendu'ū ofrenda chí dicho'o ndís'tiī. Ndúucū chuū ní véé cá yeⁿé. Ní nducuéⁿē ofrenda chí dicho'o ndís'tiī 'úú, ní chuū ní 'áámá ofrenda chí n'dai taavi nanáāⁿ Dendyuūs. Ní tan'dúucā 'áámá ofrenda chí ca'á nī Ndyuūs, tíicā ofrenda yeⁿé nī. Ní ofrenda miiⁿ cosas chí Ndyuūs neⁿe taavi yā. ¹⁹ Ní maaⁿ ní Ndyuūs yeⁿé yú tée yā ndís'tiī nducuéⁿē dendu'ū chí necesidades yeⁿé nī yeⁿé vaadi 'cuiica n'dai chí véé yeⁿé yā chí n'dee taavi ca. Chuū ní Ndyuūs diiⁿ yā ti s'uuúⁿ ní yeⁿé Cristo Jesús s'uuúⁿ. ²⁰ Maaⁿ ní caaⁿmaⁿ yú chí Ndyuūs Chiida yú, ní ch'εεε ca ní ndεεvε n'dái cá caati cueⁿé daāⁿmaⁿ 'tiicá yā.

'Cuiinū carta miiⁿ ndúucū saludos

²¹ Maaⁿ ní ngaⁿ'á ndúucū nducyaaca ndís'tiī chí i'téenu nī Jesucristo: N'dái nī, ngaⁿ'á. Hermanos yeⁿé yú chí canee nduucú: N'dái ndís'tiī, ngaⁿ'a yā. ²² Ní nducyáácá 'iiⁿyāⁿ chí snée yā 'muuⁿ nduucú ní i'téenu yā Cristo: N'dai ndís'tiī, ngaⁿ'a yā. 'Tiicá ntúūⁿ 'iiⁿyāⁿ chí snée na va'ai yeⁿe César chí emperador yeⁿe Roma: N'dai ndís'tiī, ngaⁿ'á yā.

²³ Ní Jesucristo yeⁿe yú itée yā nducyaaca ndís'tiī nducuéⁿē chí n'dai taavi ca yeⁿé yā. 'Tíicā cuuvi.

CARTA YEⁿE 'IIⁿ'YĀⁿ YEⁿE YĀĀⁿ COLOSAS

Pablo idinguúⁿ yā yeⁿe 'iiⁿ'yāⁿ chi naⁿ'a yāacū na yāāⁿ Colosas

¹ 'Úú Pablo 'úú ní 'úú apóstol yeⁿe Señor Jesucristo caati 'tíicā neⁿ'é Ndyuūs. ² 'Úú ní ndúúⁿcū hermano Timoteo idinguúⁿ carta 'cūū yeⁿe 'iiⁿ'yāⁿ chi yeⁿe Ndyuūs ní i'téenu yā Jesucristo, 'iiⁿ'yāⁿ chi snée yā na yāāⁿ Colosas. Neⁿ'é chi Ndyuūs Chiida yú tée yā ndís'tiī vaadi n'dai ca yeⁿ'é yā ndúúⁿcū vaadi 'diiⁿ yeⁿ'é yā.

Pablo ngaⁿ'angua'á yā caava 'iiⁿ'yāⁿ chi i'téenu yā Jesucristo

³ Taachi ngaⁿ'angua'á 'nū, 'úú ndúúⁿcū Timoteo cueⁿ'e daāⁿmaⁿ ca'á 'nū gracias Ndyuūs Chiida Señor Jesucristo yeⁿe yú caavā ndís'tiī. ⁴ 'Tíicā diiⁿ 'nū ti caati náⁿ'ā hermanos yeⁿe yú ndaá yā nanááⁿ nús'uu 'āā yaa'ví yā yeⁿ'ē ndís'tiī tan'dúúⁿcā chi i'téenu nī Cristo Jesús ní tan'dúúⁿcā chi dineⁿ'e nī nducyáácá 'iiⁿ'yāⁿ chi yeⁿe Ndyuūs. ⁵ Chuū ní cucáāvā chí snée ngiinú nī chiiⁿ chi cuuvi yeⁿ'é nī chi Ndyuūs nguáin'dai yā na va'ai cheeti nguuví cáāvā ndís'tiī. Ní 'āā ch'iindiveéⁿ nī nduudu cuaacu chi yeⁿ'é Cristo. Ní nduudu cuaacu miiⁿ ní cuuvi nanguaⁿ'ai 'iiⁿ'yāⁿ ní véé chi cuuvi yeⁿ'é nī. ⁶ Ní nduudu miiⁿ ní 'iiⁿ'yāⁿ ngaⁿ'á yā nanááⁿ ndís'tiī, ní maaⁿ ní 'iiⁿ'yāⁿ ngaⁿ'á yā nanááⁿ 'iiⁿ'yāⁿ chi snee núúⁿmán iⁿ'yeeⁿdī. Ní tan'dúúⁿcā 'áámá cosecha chi véé n'gui'i yeⁿ'ē, 'tíicā nduudu miiⁿ caati n'giita nduudu miiⁿ. 'Tiicá ntúūⁿ nduudu miiⁿ 'cuiita na staava yeⁿ'e ndís'tiī ndii nguuví chí ch'iindiveéⁿ nī yeⁿ'ē. Ní tuumicadínnuⁿ cá nī cheē chi cuaacu yeⁿ'e vaadi n'dai yeⁿ'e Ndyuūs yeⁿ'ē yú chi Ndyuūs tee yā s'uuúⁿ ní taacā Ndyuūs dineⁿ'é yā s'uuúⁿ. ⁷ Chuū ní ch'eeⁿ nī yeⁿ'e saⁿ'ā Epafraⁿ chi saⁿ'ā chi neené neⁿ'e yú. Ní dáámá nginne sa s'uuúⁿ. Ní 'áámá canee sa na ntiiⁿnyuⁿ yeⁿ'é Cristo. Ní diiⁿ sa ntiiⁿnyuⁿ yeⁿ'e Cristo nguaaⁿ ndís'tiī. ⁸ Saⁿ'ā miiⁿ ní ndaa sa nanááⁿ nús'uu ní ngaⁿ'a cuaacu sa yeⁿ'e ndís'tiī. Ní ngaⁿ'a sa chi ndís'tiī dineⁿ'é nī 'iiⁿ'yāⁿ caati Espíritu N'dai yeⁿ'é Ndyuūs canee yā ndúúⁿcū ndís'tiī.

⁹ Ní cáāvā chuū ntúūⁿ nús'uu ndii tiempo chi ch'iindiveéⁿ 'nū yeⁿ'e ndís'tiī nguée s'neeⁿ naaⁿ 'nū caⁿ'angua'á 'nū caavā ndís'tiī. Ngiicá 'nū chi maaⁿ Ndyuūs ch'iⁿ'í yā ndís'tiī nducueⁿ'ē chi neⁿ'é yā chi diiⁿ nī. Ní ngiicá 'nū Ndyuūs chi Espíritu N'dai yeⁿ'é Ndyuūs tée yā ndís'tiī nducueⁿ'e vaadi deenu ndúúⁿcū vaanicadínnuⁿ chi yeⁿ'é Ndyuūs. ¹⁰ Ngaⁿ'angua'á 'nū chi ndís'tiī cuuvi 'cuetinéeⁿ n'daacá nī nanááⁿ Jesucristo ti yeⁿ'é yā s'uuúⁿ. Ní cueⁿ'e daāⁿmaⁿ diiⁿ nī tan'dúúⁿcā chi neⁿ'e Señor yeⁿ'e yú. Ní 'íicú véé n'gui'i yeⁿ'é nī yeⁿ'e tanducueⁿ'ē chi n'daacā chi idiⁿ nī. Ní cuuvi 'cueēⁿ ca nī yeⁿ'e vaadi deenu chí yeⁿ'e Dendyuūs. ¹¹ Ngiicá 'nū Ndyuūs chi tée yā ndís'tiī poder yeⁿ'é yā chí ch'εete ca chí cuuvi diiⁿ nī ntiiⁿnyuⁿ yeⁿ'é nī ndúúⁿcū poder chi yeⁿ'é Ndyuūs. Ní 'íicú ndúúⁿcū paciencia cuuvi cucheéⁿ nī yeⁿ'e tanducueⁿ'ē chi 'iiⁿ'yāⁿ diiⁿ yā ndúúⁿcū nī. Ní yeenú nī. ¹² Ní ndís'tiī caneeⁿ chi ca'á nī gracias Ndyuūs Chiida yú caati Ndyuūs diiⁿ yā ndúúⁿcū yú chí véé parte yeⁿ'e yú naachi cuuvi yeⁿ'e yú ndúúⁿcū 'iiⁿ'yāⁿ s'eeⁿ chi i'téenu yā Cristo. Ní caⁿ'a yā chi tée yā s'uuúⁿ chi cuuvi yeⁿ'e yú ndúúⁿcū 'iiⁿ'yāⁿ s'eeⁿ chi yeⁿ'é yā taachi ndaa yú na lugar chí dεeve ca naachi Ndyuūs ngaⁿ'a ntiiⁿnyúⁿ yā yeⁿ'ē. ¹³ Caneeⁿ chi ca'á nī gracias Ndyuūs caati nadanguáⁿ'ai yā s'uuúⁿ yeⁿ'e saⁿ'ā chi ngaⁿ'a ntiiⁿnyuⁿ yeⁿ'e maaiⁿ. Ní Ndyuūs dicho'ó yā s'uuúⁿ naachi caneeⁿ Jesucristo chí ngaⁿ'a ntiiⁿnyúⁿ yā. Jesucristo ní Daiyá Ndyuūs chi Ndyuūs neⁿ'e taavi yā. ¹⁴ Níicú Jesucristo cuai yā s'uuúⁿ ndúúⁿcū precio chi yuúⁿ yeⁿ'é yā taachi ch'iⁿ yā na cruz cucáāvā s'uuúⁿ. Ní cáāvā chuū Ndyuūs nadach'εecú yā s'uuúⁿ yeⁿ'e nuūⁿndí yeⁿ'e yú.

Chi nduuvidaama yú ndúúⁿcū Ndyuūs cucáāvā chi Cristo ch'iī yā

¹⁵ Jesucristo ní tan'dúúⁿcā Ndyuūs chiida yú chi nguée inaaⁿ yú, 'tiicá yā. Ní Cristo miiⁿ 'āā caneeⁿ yā vmnááⁿ vmnaaⁿ chi din'dái yā núúⁿmán iⁿ'yeeⁿdī. ¹⁶ Ní Ndyuūs yeⁿ'e yú ndúúⁿcū Cristo miiⁿ din'dái yā tanducueⁿ'ē dendu'ū chi véé. Din'dái yā tanducueⁿ'ē dendu'ū chi véé nanguuvi. 'Tiicá ntúūⁿ na yáⁿ'āā yeⁿ'ē chi inaaⁿ yú ndúúⁿcū yeⁿ'ē chi nguée inaaⁿ yú. N'dáá rá chi véé ángeles chi yeⁿ'e Ndyuūs ndúúⁿcū ángeles chi yeⁿ'e

yáá'n'guiinūuⁿ chi ngaⁿ'ā ntiin'nyuⁿ na 'yúúné ndúúcu 'iiⁿ'ntyéⁿ'ē chi ngaⁿ'á yā ntiin'nyuⁿ yeⁿ'ē naciones na iⁿ'yeeⁿdí 'cūū ndúúcu 'iiⁿ'ntyéⁿ'ē ndúúcu poder yeⁿ'e yā, tanducuéⁿ'ē ní Cristo miiⁿ din'dái yā ní 'iivi yeⁿ'e tanducuéⁿ'ē. ¹⁷ Cristo miiⁿ ní ngaⁿ'a ntiin'nyuⁿ yā yeⁿ'e tanducuéⁿ'ē dendu'ū. Ní Cristo miiⁿ díⁿ yā chi tanducuéⁿ'ē dendu'ū chi véé canéé lugar yeⁿ'ē ndúúcu orden. ¹⁸ Ní Cristo miiⁿ ní tíⁿ yā yeⁿ'e cuerpo chi yaácū yeⁿ'e yā chi nducyaaca 'iiⁿ'yāⁿ chi i'téenu yā Cristo. Ní ca'á yā vida 'iiⁿ'yāⁿ chi yeⁿ'e cuerpo yeⁿ'é yā. Ní Cristo miiⁿ vmnááⁿ vmnaaⁿ 'iiⁿ'yāⁿ chi nduuchí yā yeⁿ'ē nguaaⁿ tináⁿ'ā, caati lugar chi vmnááⁿ vmnaaⁿ cuuvi yeⁿ'é yā yeⁿ'e nducuéⁿ'ē dendu'ū chi véé. ¹⁹ Ní Ndyuūs Chiida yú neⁿ'é yā chi Cristo miiⁿ canéé yā ndúúcu nducuéⁿ'ē poder chi yeⁿ'é Ndyuūs. ²⁰ Ní cucáávā Cristo miiⁿ Ndyuūs Chiida yú neⁿ'é yā díⁿ yā chi cuuvi yeⁿ'é Cristo tanducuéⁿ'ē dendu'ū taama vmnéⁿ'ēe tan'dúúca tanducuéⁿ'ē chi véé vmnááⁿ vmnaaⁿ na va'ai chæeti nguuvi. 'Tiicá ntúūⁿ cuuvi yeⁿ'é yā tanducuéⁿ'ē chi véé na iⁿ'yeeⁿdí 'cūū. Ní díⁿ yā chi véé vaadī 'diiⁿ cáávā yuuúⁿ yeⁿ'ē Jesucristo chi can'daā taachi ch'ii yā na cruz.

²¹ Ní tiempo chi 'āā ch'ó'ōo ndís'tiī ní tan'dúúca 'iiⁿ'yāⁿ chi snúuⁿ yā yúúní 'tíicā ndís'tiī. Ní nguε deenú nī Ndyuūs caati díⁿ nī cosas chi nguéé n'daāca. Ní ndís'tiī ní contra yeⁿ'e Ndyuūs ndís'tiī. Ní nguéé n'daacā staava yeⁿ'é nī. Naati maaⁿ ní Ndyuūs nch'εcú yā nuuⁿndi yeⁿ'e ndís'tiī. Maaⁿ ní amigos yeⁿ'é Ndyuūs ndís'tiī. ²² Ní díⁿ yā chi nduuvidaamá nī ndúúcu Ndyuūs cáávā chi cuerpo yeⁿ'e Jesucristo ch'ii na cruz. Ní Jesucristo ch'ii yā caavā s'uuúⁿ chi ndaa yā ndúúcu s'uuúⁿ nanááⁿ Ndyuūs Chiida yú. Ní Cristo ch'iⁿ'í yā chi s'uuúⁿ ní yeⁿ'é Ndyuūs s'uuúⁿ ní dæεε vida yeⁿ'ē yú. Níicu 'āā ntéé caaⁿ'maⁿ Ndyuūs chi véé nuuⁿndi yeⁿ'e yú. ²³ Maaⁿ ní canee chi i'téenu n'daacá nī nduudu cuaacu ní cunee diitú nī ndúúcu chi i'téenu nī chi yeⁿ'e Cristo. Ní cu'téenu cá nī nduudu cuaacu yeⁿ'e Jesucristo chi ch'iⁿ'i chéé chi cuuvi yeⁿ'e yú ní yeⁿ'ē chi cunee ngiinu yú. Ní nguéé diví nī yeⁿ'e nduudu cuaacu yeⁿ'e Jesucristo ti n'daacā canee nī nanááⁿ yā ní cunee ngiinu cá nī. Nduudu cuaacú 'cūū yeⁿ'e Jesucristo miiⁿ maaⁿ ní 'iiⁿ'yāⁿ s'eeⁿ cheⁿ'e yā candæ yā chí cuuvi yeⁿ'ē nducyáácá 'iiⁿ'yāⁿ chi snéé na iⁿ'yeeⁿdí 'cūū. Ní nduudu cuaacu miiⁿ chiiⁿ chi 'úú Pablo ngaⁿ'a caati 'tíicā ntiin'nyuⁿ yeⁿ'é.

Pablo nginneé yā 'iiⁿ'yāⁿ chi yeⁿ'e Jesucristo

²⁴ Maaⁿ ní yeenú taaví yeⁿ'ē chi n'geenú ngii cucáávā ndís'tiī chi i'téenu nī nduudú 'cūū. Ní 'tíicā maaⁿ ní yeenú taaví chi 'cuenú cuuvi na cuerpo yeⁿ'é tan'dúúca chi ch'eenú chiī Cristo na cuerpo yeⁿ'e yā cucáávā 'iiⁿ'yāⁿ chi i'téenu yā 'iiⁿ'yāⁿ ní yeⁿ'e cuerpo yeⁿ'e yā. Ní 'tíicā díⁿ cumplir vaadī ya'ai yeⁿ'e Cristo cucáávā 'iiⁿ'yāⁿ yeⁿ'e yā. ²⁵ Ndyuūs tee yā ntiin'nyuⁿ 'cūū yeⁿ'é chi díⁿ ntiin'nyuⁿ yeⁿ'e yaacū yeⁿ'é yā. Ní díⁿ ntiin'nyuⁿ yeⁿ'e Ndyuūs nguaaⁿ ndís'tiī chi nguéé yeⁿ'ē ndaata Israel caati 'tíica cuuvi cuaacu nduudu yeⁿ'e Ndyuūs chi ngaⁿ'a ndii cuááⁿ vmnaaⁿ. ²⁶ Ní nduudú 'cūū nguéé deenú 'iiⁿ'yāⁿ caati canúúⁿ n'de'ei ndii tiempo chi 'āā 'cuéé 'iiⁿ'yāⁿ iⁿ'yeeⁿdí 'cūū, naati maaⁿ ní chuū ch'iⁿ'i Cristo nanááⁿ 'iiⁿ'yāⁿ yeⁿ'é yā. ²⁷ Níicu Ndyuūs neⁿ'é yā chi nducyáácá 'iiⁿ'yāⁿ chi yeⁿ'é yā, 'iiⁿ'yāⁿ chi Israel s'eeⁿ yā ndúúcu 'iiⁿ'yāⁿ chí nguéé Israel s'eeⁿ yā, nducyaaca yā cuuvi deenú yā vaadī 'cuiica yeⁿ'ē chi canúúⁿ n'de'ei. Chuū ní secreto miiⁿ. Cristo canéé yā ndúúcu ndís'tiī chi nguéé 'iiⁿ'yāⁿ Israel yā. Ní ndúúcu Cristo miiⁿ snee ngiinu nī chi caⁿ'á nī na va'ai chæeti nguuvi.

²⁸ Nús'uu ní ngaⁿ'á 'nū nduudu cuaacu yeⁿ'é Cristo nanááⁿ nducyaaca 'iiⁿ'yāⁿ. Ní nducuéⁿ'ē ngi'cueéⁿ 'nū 'iiⁿ'yāⁿ ndúúcu vaadī deenu caati cuuvi deenú n'daacá yā nduudu cuaacu yeⁿ'é Ndyuūs. Ní cuuvi yeⁿ'é Cristo 'iiⁿ'yāⁿ ní n'daacā canéé yā nanááⁿ Jesucristo. ²⁹ Ní cáávā chuū 'úú idiíⁿ ntiin'nyuⁿ 'cūū, ní díⁿ diitú taavi nducuéⁿ'ē tiempo ndúúcu nducuéⁿ'ē poder chi Ndyuūs itée yā 'úú.

2

¹ 'Úú neⁿ'é chi ndís'tiī cadíinuⁿ nī chi díitú díⁿ ntiin'nyuⁿ caavā ndís'tiī ní cáávā 'iiⁿ'yāⁿ chi snéé na yāā Laodicea, ní cáávā 'iiⁿ'yāⁿ chi nguéé n'diichi tandii yā naáⁿ.

² Neⁿ'é chi nducyáácá 'iiⁿ'yāⁿ s'eeⁿ ndúúcu ndís'tiī cuuvi diitú nī ndúúcu staava yeⁿ'é nī. Ní nguéé 'va'á nī. Ní dáámá nadacadíinuⁿ nī, ní dineⁿ'é nī 'aamá nī taama nī. Ní

deenu cá nī yeⁿe nducueⁿē vaadī cuaacu, ní diituu caneé nī ndúúcu chi i'téenu nī. Ní 'íicú cuuvi deenu cá nī chiiⁿ chi Ndyuūs cunuuⁿ n'de'éi yā chi yeⁿe maaⁿ Jesucristo miiⁿ. Ní 'íicú cuuvi diituu cá nī ndúúcu chi i'téenu nī yeⁿe Jesucristo. ³ Caati ndúúcu Cristo miiⁿ tanducueⁿē chi véé yeⁿe vaadī deenu ndúúcu vaadī cadiinuuⁿ ní yeⁿe yā ndúúcu nducueⁿē cosa chi cunúúⁿ n'de'ei yeⁿe nducyáácá 'iiⁿyāⁿ. ⁴ Ní nducueⁿē chuū ngaⁿ'á chi nguéé du'ū vεε canche'ei ndís'tiī ndúúcu nduūdū yaadi yeⁿe yā. ⁵ Ní chuū ngaⁿ'á caati 'áará chi nguεε caneé ndúúcu ndís'tiī cuuvi deenú nī chi nadacadíinuúⁿ taavi yeⁿe ndís'tiī. Ní yeenú taavi 'úú taachi n'giindiveéⁿ chi n'daacā idiíⁿ nī ní díttuu caneé nī ndúúcu nduudu cuaacu yeⁿe Cristo chi i'téenu nī.

⁶ Maaⁿ ní tan'dúúca chi i'téenu nī Señor Jesucristo yeⁿe yú 'tiicá ntúúⁿ ndís'tiī chi yeⁿe Cristo canéé chi n'gεεtinéé n'daacá nī cáávā Señor Jesucristo yeⁿe yú nginnee yā ndís'tiī. ⁷ Ní canéé chi diiⁿ n'daacā nī ndúúcu nducueⁿē caati cu'téenu cá nī Jesucristo. Ní cu'téenu cá nī nguuvi nguuvi tan'dúúca chi ch'eēⁿ ndís'tiī. Ní nguéé ndaacadaamí nī yeⁿe chi i'teenú nī. Ní cuéⁿé daāⁿmaⁿ ngaⁿ'á nī, gracias Ndyuūs ti yeⁿe yā ndís'tiī.

Yeⁿe vida ngai yeⁿe 'iiⁿyāⁿ chi yeⁿe Cristo

⁸ Maaⁿ ní diíⁿ nī cuidado ndís'tiī yeⁿe maáⁿ nī chí mar 'áámá saⁿ'ā nguéé castaⁿ'a sa ndís'tiī caavā vaanicadínūuⁿ ch'εεtē yeⁿe sa ndúúcu nduudu yaadi yeⁿe sa. Ní nguéé canche'ei sa ndís'tiī caati nduudu yeⁿe sa chí sta'a sa yeⁿe vaanicadínūuⁿ yeⁿe 'iiⁿyāⁿ ní yeⁿe costumbre yeⁿe 'iiⁿyāⁿ yeⁿe iⁿ'yeēⁿdī. Ndí nguéé sta'a sa yeⁿe vaanicadínūuⁿ yeⁿe Cristo.

⁹ Caati nducueⁿē chi véé ní yeⁿe Ndyuūs ndúúcu daiya yā Jesucristo. Jesucristo miiⁿ ní Ndyuūs 'yā ní dáámá yā ndúúcu chiidá yā. 'Tíica yā. ¹⁰ Ní nducueⁿē chi véé ní yeⁿe ndís'tiī caati ndís'tiī ní yeⁿe Cristo ndís'tiī. Jesucristo miiⁿ ní ndíiⁿ tiiⁿ yā yeⁿe tanducueⁿē 'iiⁿyāⁿ ní yeⁿe tanducueⁿē 'iiⁿntyéⁿē yeⁿe tanducueⁿē nación ní yeⁿe tanducueⁿē poder yeⁿe yáánⁿ guinūuⁿ chi véé na iⁿ'yeēⁿdí 'cū. ¹¹ Ndís'tiī nguéé 'iiⁿyāⁿ circuncidado yā na cuerpo yeⁿe yā. Naati cáávā chi ndís'tiī ní yeⁿe Jesucristo ndís'tiī, Cristo ní diíⁿ yā cuenta chi ndís'tiī tan'dúúca 'iiⁿyāⁿ chí circuncidado yā ndís'tiī taachi Jesucristo nadanguáⁿ'ai yā ndís'tiī yeⁿe poder yeⁿe nuūⁿndī chi véé na cuerpo yeⁿe nī. ¹² Ní taachi chεεdinūuⁿniⁿ yā ndís'tiī, tuuⁿ'mi ní caneé nī tan'dúúca chí ch'εεchí nī na yáinyāⁿ ndúúcu Cristo ní caneé nī tan'dúúca chi nadacueéⁿ nī yeⁿe nguuaⁿ tináⁿ'ā ndúúcu Cristo. 'Tíica rā váá caati i'téenu nī poder yeⁿe Ndyuūs chi diiⁿ chi nacueeⁿ Jesucristo yeⁿe nguuaⁿ tináⁿ'ā. ¹³ Ní tiempo chi chó'oo espíritu yeⁿe ndís'tiī ní n'diī cucáávā nuuⁿndi chi diíⁿ nī. Ní nguéé ndís'tiī 'iiⁿyāⁿ circuncidado yā ndís'tiī. Naati maaⁿ ní Ndyuūs tee yā vida cueⁿe daāⁿmaⁿ ndís'tiī dáámá dáámá ndúúcu Cristo ti Ndyuūs nadanch'εεcú yā yeⁿe tanducueⁿē nuuⁿndi yeⁿe nī. ¹⁴ Cuááⁿ vmnaaⁿ canee yú ndúúcu nducueⁿē cuenta yeⁿe nuuⁿndi yeⁿe yú ti nguεε diiⁿ yú tan'dúúca chi ngaⁿ'a ley yeⁿe Ndyuūs. Ní cáávā ley miiⁿ ní cuenta yeⁿe nuuⁿndi yeⁿe yú diiⁿ condenar s'uuúⁿ. Naati Cristo nadíiⁿ've yā 'áámá vmnéⁿ'ēe cuenta yeⁿe nuuⁿndi yú taachi ch'iī yā na cruz cáávā s'uuúⁿ. Ní cáávā chi ch'iī yā cáávā s'uuúⁿ ní tan'dúúca chí nadatuūví yā ley miiⁿ ti nguéé cuuvi condenar s'uuuⁿ. ¹⁵ Ní taachi Cristo ch'iī yā na cruz cucheé yā yeⁿe nducueⁿē 'iiⁿntyéⁿē yeⁿe espíritu chi nguéé n'daacā ndúúcu poder yeⁿe yā. Ní diíⁿ yā chí 'cuinaaⁿ espíritu s'eeⁿ nanááⁿ nducyáácá espíritus. Ní Cristo ch'iⁿ'í yā nducyáácá 'iiⁿyāⁿ chí chée yā yeⁿe espíritus.

In'nuúⁿ nī nducueⁿē chi yeⁿe va'ai chεεti nguuvi

¹⁶ Maaⁿ ní nguéé nacadínūuⁿ nī yeⁿe 'iiⁿyāⁿ chí diíⁿ yā condenar ndís'tiī caavā dendu'ū chí nguéé chí nge'é nī ndúúcu chí ngi'i nī o ndúúcu yeⁿe chí diíⁿ nī taachi véé 'viicu s'eeⁿ ndúúcu 'viicu yeⁿe 'iīyū ngai ndúúcu 'viicu yeⁿe sábadó chí nguuvi chí ntaavi'tuunūuⁿ 'iiⁿyāⁿ. ¹⁷ Nducueⁿē 'viicu ndúúcu chí diíⁿ 'iiⁿyāⁿ ní ch'iⁿ'i yeⁿe Cristo chí cuchii, naati nducueⁿē chuū cuaacu níⁿnyúⁿ ngaⁿ'ā chí yeⁿe Cristo miiⁿ. ¹⁸ Nguéé nadacadínūuⁿ nī yeⁿe 'iiⁿyāⁿ chí diíⁿ yā condenar ndís'tiī caati ngaⁿ'a yā chí n'diichí yā visiones. 'iiⁿyāⁿ s'eeⁿ nadacadínūuⁿ yā chí n'gεεtε maáⁿ yā caavā cosas chí n'diichí yā.

'iⁿ'yāⁿ s'eeⁿ ngaⁿ'a yā chi canee chi ndiicuúⁿ nī maáⁿ nī ní dich'εεté nī ángeles. 'iⁿ'yāⁿ s'eeⁿ díⁿ yā cosas chi nguéeⁿ deenú yā yeⁿ'ē ní n'gεεte maáⁿ yā caavā chi nadacadíⁿnuuⁿ yā yeⁿ'e cosas chi candēⁿ yeⁿ'ē maaⁿ tíⁿ yā. ¹⁹ 'iⁿ'yāⁿ s'eeⁿ nguéeⁿ canee yā ndúúⁿcū nduudu cuaacu yeⁿ'é Jesucristo. Cristo miiⁿ ní tiiiⁿ yeⁿ'e cuerpo yeⁿ'é yā chi 'iⁿ'yāⁿ chi i'téenu yā 'yā. Ní Cristo miiⁿ ní díⁿ yā chi nducuéⁿ'ē 'iⁿ'yāⁿ yeⁿ'é yā ní n'giita yā caati i'téenu cá yā yeⁿ'é yā. Ní Cristo miiⁿ díⁿ yā chi nducyaaca 'iⁿ'yāⁿ yeⁿ'é yā canee yā tan'dúúⁿcā chi nduuví daamá yā tan'dúúⁿcā cuerpo yeⁿ'e yú nduuvidaama yeⁿ'ē ndúúⁿcū 'iini ndíⁿ nduú. 'Tíicā díⁿ Cristo tan'dúúⁿcā chi neⁿ'e Ndyuūs.

²⁰ Maaⁿ ní ndís'tií 'āā ch'ií nī taachi ch'ií Jesucristo. Ní canee nī libre yeⁿ'e reglas yeⁿ'e iⁿ'yeeⁿdí 'cūū. Maaⁿ ní, ¿d'éⁿ cuuvi chi n'gεεtinée ndís'tií tan'dúúⁿcā chi yeⁿ'e iⁿ'yeeⁿdí 'cūū ndís'tií? ¿D'éⁿ cuuvi chi i'téenu nī reglas yeⁿ'e iⁿ'yeeⁿdí 'cūū chi ngaⁿ'a 'tíicā? ²¹ Nguéeⁿ tuu'ví nī chuū, nguéeⁿ che'é nī cosa 'cūū, ní nguéeⁿ cuta'á nī cosa 'cūū na ta'á nī. ²² Ní reglas miiⁿ chíⁿ chi 'iⁿ'yāⁿ din'dái yā ní chíⁿ chí ca'cueeⁿ yā 'iⁿ'yāⁿ. Nducuéⁿ'ē reglas 'cūū nguéeⁿ dichíⁿ'vē caati Ndyuūs ca'á yā 'iⁿ'yāⁿ cosas caati cuuvi che'é yā yeⁿ'ē. ²³ Cuaacu chi 'iⁿ'yāⁿ sta'á yā reglas miiⁿ tan'dúúⁿcā chi ch'iⁿ'i chi yeⁿ'ē vaadī deenu yeⁿ'é 'iⁿ'yāⁿ. Reglas miiⁿ ch'iⁿ'i chi yeⁿ'ē religión chi ngaⁿ'ā chi 'iⁿ'yāⁿ canee chí dich'εεté yā ángeles. Ní reglas miiⁿ ch'iⁿ'i chí 'iⁿ'yāⁿ canee chí ndiicuúⁿ yā maáⁿ yā ní ch'iⁿ'i chi 'iⁿ'yāⁿ canee chí 'cuenú yā cuuvi na cuerpo yeⁿ'e yā. Naati nguéeⁿ dichíⁿ'vē mar 'áamá regla yeⁿ'ē chí diiⁿ ayudar 'iⁿ'yāⁿ caati nguεε dinuuⁿndí yā tan'dúúⁿcā chi neⁿ'e diiⁿ cuerpo yeⁿ'é yā.

3

¹ Maaⁿ ní chi ndís'tií ní 'āā nduuchí nī yeⁿ'ē nguaaⁿ tináⁿ'ā dáámá ndúúⁿcū Jesucristo, ndís'tií in'nuúⁿ nī dendu'ū chi yeⁿ'ē va'ai chεeti nguuví naachi Cristo véé yā lado yeⁿ'e honor yeⁿ'ē Ndyuūs chí lado tá cuaacú yā. ² Ní nadacadíⁿnuuⁿ nī yeⁿ'e nducuéⁿ'ē chi yeⁿ'e Ndyuūs ní nguéeⁿ yeⁿ'ē nducuéⁿ'ē chí véé iⁿ'yeeⁿdí 'cūū. ³ 'Tíicā ndís'tií ní ch'ií nī dáámá ndúúⁿcū Cristo ní canee nī tan'duucā chi ch'ií cuerpo yeⁿ'é nī. Maaⁿ ní canúúⁿ n'de'ei vida yeⁿ'é nī ndúúⁿcū Cristo nanááⁿ Ndyuūs. ⁴ Maaⁿ vida yeⁿ'e yú ní cuaacu chí Cristo. Ní taachi ndaa Cristo taama vmnéⁿ'ēe tuu'mi ní s'uuúⁿ ndaa yú nduucú yā ní véé parte yeⁿ'e yú nduucú yā na va'ai chεeti nguuví.

Yeⁿ'e vida ndiicú yeⁿ'ē yú ní yeⁿ'e vidā ngai yeⁿ'ē yú

⁵ Maaⁿ ní diiⁿ yú cuenta chí ch'ií cuerpo yeⁿ'e yú ní 'āā ntéé diiⁿ yú nuuⁿndi. N'diichí nī, véé nuuⁿndi nguaaⁿ nī. Neⁿ'é nī 'áámá saⁿ'ā o 'aama n'daataá chí nguéeⁿ yeⁿ'é nī. Ní neⁿ'é nī díⁿ nī cosa chí nguéeⁿ yeⁿ'é Ndyuūs. Ní neⁿ'é nī n'diichí nī 'áámá n'daataá o 'áámá sánⁿ'ā chí nguéeⁿ yeⁿ'é nī. Ní neⁿ'é nī dendu'ū chí nguéeⁿ yeⁿ'e nī. 'Tiicā nī. Ní canee nī tan'dúúⁿcā chí i'téenu nī ídolos chí imágenes. ⁶ Nducuéⁿ'ē chuū ní nuuⁿndi. Ní Ndyuūs díⁿ yā castigar nducyáácá 'iⁿ'yāⁿ chí nguéeⁿ díⁿ yā tan'dúúⁿcā chí ngaⁿ'a yā. ⁷ 'Tíicā 'āā dinuuⁿndí ndís'tií tiempo chí 'āā chó'ōo. ⁸ Maaⁿ ní 'āā ntéé díⁿ nī nuuⁿndi. Nguéeⁿ ditaán nī, nguéeⁿ caaⁿ'maⁿ taáⁿ nī. Nguéeⁿ díⁿ nī cosas chí nguεε n'daācā 'aamá nī ndúúⁿcū taamá nī. Nguéeⁿ caaⁿ'mán nī 'iⁿ'yāⁿ chíⁿ chí nguéeⁿ n'daāca chí maáⁿ yā díⁿ yā. Nguéeⁿ caaⁿ'mán nī mar 'áámá nduudu chí nguéeⁿ n'daācā. ⁹ Nguéeⁿ caaⁿ'mán nī nduudu yaadī 'aama nī ndúúⁿcū taama nī. Nguéeⁿ díⁿ nī 'túúⁿcā caati 'āā dicuenta nī tan'dúúⁿcā chí 'āā ch'ií cuerpo yeⁿ'é nī ndúúⁿcū nducuéⁿ'ē chí nguéeⁿ n'dáāca chí 'āā díⁿ nī. ¹⁰ Ní maaⁿ ní cuerpo yeⁿ'é nī ní tan'dúúⁿcā cuerpo chí ngai chí Ndyuūs din'dái yā. Ní nguuví nguuví díⁿ yā chí ndís'tií cuuví nī tan'dúúⁿcā Ndyuūs, 'tiicā nī. Ní 'íicú Ndyuūs díⁿ yā chí cuuvi deenu cá nī yeⁿ'é Ndyuūs. ¹¹ Caati nanááⁿ Jesucristo miiⁿ nguéeⁿ de'ē vεε nduuti chí 'iⁿ'yāⁿ nguéeⁿ yeⁿ'ē ndaata 'iⁿ'yāⁿ Israel o 'iⁿ'yāⁿ chí yeⁿ'e ndaata 'iⁿ'yāⁿ Israel. Nguéeⁿ de'ē vεε nduuti chí 'iⁿ'yāⁿ ní circuncidado yā o nguéeⁿ circuncidado yā. Nguéeⁿ de'ē vεε nduuti chí 'iⁿ'yāⁿ tan'dúúⁿcā chí snéé yúúⁿí, o nduuti chí 'iⁿ'yāⁿ tan'dúúⁿcā chí 'iiti 'cuεeti. Nguéeⁿ de'ē vεε nduuti chí 'iⁿ'yāⁿ chí dichíⁿ'vē 'iivi yeⁿ'é yā, o 'iⁿ'yāⁿ chí snéé libre yā. Dámaāⁿ dichíⁿ'vē chí 'iⁿ'yāⁿ s'eeⁿ ní yeⁿ'e Cristo ní Cristo canee yā nduucú yā.

¹² Ndís'tiī ní yeⁿ'é Ndyuūs ndís'tiī. Ní Ndyuūs dineⁿ'é yā ndís'tiī ní nndεενε yā ndís'tiī chi cuuvi yeⁿ'é yā ndís'tiī. Maaⁿ ní ndís'tiī canee chi diya'ái nī 'iiⁿ'yāⁿ ní din'daāca cá nī. Nguéé dich'εεté nī maáⁿ nī naati dííⁿ nī nducuéⁿ'ē ndúúcu vaadī ndiicúúⁿ. ¹³ Ní nginneé nī 'aamá nī taama nī. Ní cuchéé nī yeⁿ'e nducuéⁿ'ē. Ní nadach'εεcú nī 'iiⁿ'yāⁿ chí dííⁿ yā 'áámá falta ndúúcu nī. Ní tan'dúúca chi Cristo nadach'εεcú yā nuuⁿndi yeⁿ'é nī, 'tiicá ntúúⁿ nadach'εεcú nī yeⁿ'e 'aama nī ndúúcu taama nī. ¹⁴ Nguaaⁿ nducuéⁿ'ē chí dííⁿ nī, dineⁿ'e taavi cá nī 'iiⁿ'yāⁿ ti taachi dííⁿ nī 'túúca canee nī tan'dúúca chi nduuvidaamá nī yeⁿ'ē nducuéⁿ'ē chi véé. Ní dííⁿ nī cumplir nducuéⁿ'ē dendu'ū. ¹⁵ Ní vaadī 'diiⁿ chi Ndyuūs itée yā ndís'tiī na staava yeⁿ'é nī canee chi ch'iⁿ'i ndís'tiī nducuéⁿ'ē chí dííⁿ nī caati Ndyuūs yaa'ví yā nducyáácá ndís'tiī chí cuuvi yeⁿ'é nī vaadī 'diiⁿ miiⁿ. Ní nducyáácá nī ní canee nī tan'dúúca 'áámá cuerpo nūuⁿ, 'tiicá nī. Maaⁿ ní ca'á nī gracias Ndyuūs caavā chuū.

¹⁶ Ní 'áámá canee nī daacā na staava yeⁿ'é nī nducuéⁿ'ē nduudu cuaacu chí n'daacā taavi ní yeⁿ'e Ndyuūs. Ca'cueéⁿ nī ní ch'iⁿ'i nī 'áámá nī taama nī ndúúcu nducuéⁿ'ē vaadī deenu. Ngiitá nī salmos ndúúcu himnos ndúúcu canciones chí ngaⁿ'ā yeⁿ'é Ndyuūs. Ní ndúúcu núúⁿmáⁿ staava yeⁿ'é nī nca'á nī gracias Ndyuūs. ¹⁷ Níicú nducuéⁿ'ē cosa chí diiⁿ nī 'áará chí caaⁿ'máⁿ nī o dííⁿ nī ntiiⁿnyuⁿ, dííⁿ nī nducuéⁿ'ē caavā Señor Jesús ní nca'á nī gracias Ndyuūs Chiida yú cáávā Cristo.

Tan'dúúca chí canee chí diiⁿ yú ti yeⁿ'e Cristo s'uuúⁿ

¹⁸ Ndís'tiī n'daataá chí 'nínívaacu, cu'teenú nī yeⁿ'e isaⁿ'ā yeⁿ'é nī caati 'tíicā canee chí dííⁿ nī ti yeⁿ'é Ndyuūs ndís'tiī. ¹⁹ 'Tiicá ntúúⁿ isaⁿ'ā yeⁿ'é yā, dinéⁿ'e nī n'daataá yeⁿ'é nī ní nguéé nduuvi taáⁿ nī ndúúcu n'daataá yeⁿ'é nī. ²⁰ Ndís'tiī daiyá yā chí yeⁿ'e Cristo 'caandiveéⁿ nī yeⁿ'e chiidá nī ní chεεcu nī yeⁿ'e tanducuéⁿ'ē caati 'tíicā neⁿ'e Ndyuūs. ²¹ Ní ndís'tiī chí véé daiyá nī, nguéé dííⁿ nī chí nduuvi táaⁿ daiyá nī caati cuayiivi ní nguéé cu'téenu yā chεε chí caaⁿ'máⁿ nī yeⁿ'e yā. ²² Ndís'tiī chí dichí'vε 'iiⁿ'yāⁿ, 'caandiveéⁿ nī yeⁿ'ē tanducuéⁿ'ē chí ngaⁿ'ā 'iivi nī yeⁿ'ē iⁿ'yeeⁿdí 'cūū. Nguéé dííⁿ nī tan'dúúca chí neⁿ'é yā dámaaⁿ taachi nanáaⁿ yā ndís'tiī. Ní 'iivi nī cuuvi deenú yā chí n'daacā idiíⁿ nī, naati dííⁿ nī nducuéⁿ'ē ntiiⁿnyuⁿ ndúúcu núúⁿmáⁿ staava yeⁿ'é nī. Ní 'va'á nī Ndyuūs. ²³ Ní tanducuéⁿ'ē chí dííⁿ nī, dííⁿ nī ndúúcu núúⁿmáⁿ staava yeⁿ'é nī. Ní dííⁿ nī ntiiⁿnyuⁿ miiⁿ tan'dúúca chí ntiiⁿnyuⁿ yeⁿ'é Ndyuūs ní nguéé ntiiⁿnyuⁿ yeⁿ'ē 'iivi nī. ²⁴ Ní ndís'tiī deenú nī chí cuuvi cuta'á nī yeⁿ'e chí véé yeⁿ'é nī chííⁿ chí téε Cristo ndís'tiī. Cuaacu chí ndís'tiī dichí'vε nī Jesucristo ní cuaacu níⁿnyúⁿ Cristo ní 'iivi nī. ²⁵ Ní 'iiⁿ'yāⁿ chí nguéé n'daāca idiíⁿ yā caⁿ'á yā cuta'á yā ná díí'vε yā yeⁿ'ē chí dííⁿ yā chí nguéé n'daācā. Ndyuūs 'āā daamá nūuⁿ dííⁿ yā tratar ndúúcu nducyáácá 'iiⁿ'yāⁿ.

4

¹ Ndís'tiī patrones chí véé mozos yeⁿ'é nī, dííⁿ nī chí cuaacu ndúúcu chí n'daacā ndúúcu mozos yeⁿ'é nī. N'gaacú nī chí véé 'iivi nī chí canee na va'ai chεeti nguuvi.

² Nducuéⁿ'ē tiempo caaⁿ'maⁿngua'á nī ní 'cuεeti nduuchí nī. Ní ca'á nī gracias Ndyuūs. ³ Caaⁿ'maⁿngua'á ntuúⁿ nī yeⁿ'ē nús'uu ti Ndyuūs téε yā lugar nús'uu chí cuuvi caaⁿ'máⁿ 'nū nduudu cuaacu yeⁿ'é yā. Ní nduudu miiⁿ ní yeⁿ'e Cristo. Ní nguéé déenu 'iiⁿ'yāⁿ naati maaⁿ ní ngaⁿ'ā 'nū nduudu miiⁿ. Ní cucáávā nduudu miiⁿ maaⁿ 'úú canuúⁿ vácūū ndúúcu cadena 'cūū. ⁴ Caaⁿ'maⁿngua'á nī cáávā 'úú chí cuuvi caaⁿ'máⁿ n'daacā nduudu miiⁿ tan'dúúca chí canee chí caaⁿ'máⁿ.

⁵ Maaⁿ ní ndís'tiī 'cuεetinéé n'daacá nī ndúúcu 'iiⁿ'yāⁿ chí nguéé i'téenu yā Ndyuūs. Dííⁿ nī n'daacā nducuéⁿ'ē tiempo. ⁶ Cuéⁿ'é daāⁿmaⁿ caaⁿ'máⁿ nī chí n'daacā ndúúcu nduudu n'dai. Ní canee chí déenu nī táácā chí cuuvi nan'guεεcuta'á nī ca'áámá ca'áámá 'iiⁿ'yāⁿ.

'Cuūnu carta miiⁿ ndúúcu saludos

⁷ Hermano Tíquico chí neⁿ'e yú, 'áámá canee sa chí diiⁿ sa ntiiⁿnyuⁿ yeⁿ'é Jesucristo ní diiⁿ sa dáámá ntiiⁿnyuⁿ nduucu. Saⁿ'ā miiⁿ cuuvi sa ndís'tiī tan'dúúca chí 'úú canee ní dííⁿ. ⁸ Ní cáávā chiiⁿ dicho'ó Tíquico nanááⁿ ndís'tiī caati cuuvi sa ndís'tiī táácā n'gεetineé

'nū. Ní tée sa 'viich'εετίίνūⁿ na stava yeⁿ'é nī. ⁹ Ní dicho'ó ntúūⁿ hermano Onésimo, saⁿ'ā chi neⁿ'e yú, ní 'áámá canee sa chi diiⁿ ntiⁿ'nyuⁿ yeⁿ'é Ndyuūs. Ní yeⁿ'e 'áámá chεε ndís'tiī. Hermanos s'eeⁿ yaa'ví yā ndís'tiī tanducuéⁿ'ē chi diíⁿ 'nū 'muuⁿ.

¹⁰ Saⁿ'ā Aristarco chi canúúⁿ vácūū nduucú idichó'o sa: N'dai ndís'tiī. 'Tiicá ntúūⁿ dicho'o saⁿ'ā Marcos chi dácūū saⁿ'ā Bernabé. Ní ndís'tiī 'āā sta'á nī orden chi 'cuaaⁿ nī hermano Marcos miiⁿ nduuti chi ndaa sa nanáán ndís'tiī. ¹¹ 'Tiicá ntúūⁿ Jesús chi nguuvi Justo dicho'o sa: N'dai ndís'tiī. Dámaāⁿ saⁿ'ā s'uuⁿ chi yeⁿ'ē ndaata 'iiⁿ'yāⁿ Israel ní i'téenu yā Jesucristo diíⁿ yā ntiⁿ'nyuⁿ nduucú yeⁿ'ē naachi Ndyuūs ngaⁿ'a ntiⁿ'nyúⁿ yā. Saⁿ'ā s'uuⁿ ntée ca yā 'viich'εετίίνūⁿ 'úú. ¹² Saⁿ'ā Epafra ntúūⁿ chi diiⁿ ntiⁿ'nyuⁿ yeⁿ'e Cristo ní yeⁿ'e 'áámá chεε ndís'tiī dicho'o sa: N'dai ndís'tiī. Saⁿ'ā miⁿ neené ngaⁿ'angua'ā sa yeⁿ'e ndís'tiī chi ndís'tiī 'áámá canee nī ndúúcū chi i'téenu nī níicú chi dámaāⁿ neⁿ'é nī diíⁿ nī tanducuéⁿ'ē tan'dúúcā chi Ndyuūs neⁿ'e yā chi diiⁿ nī. ¹³ 'Úú ní ngaⁿ'á nduudu cuaacu yeⁿ'e Epafra miiⁿ. Neené inadacadiínuⁿ sa yeⁿ'é ndís'tiī ndúúcū 'iiⁿ'yāⁿ chi snée yā na yāāⁿ Laodicea ndúúcū yāāⁿ Hierápolis. ¹⁴ Saⁿ'ā Lucas chi doctor chi neⁿ'e yú ndúúcū saⁿ'ā Demas dicho'ó yā: N'dai ndís'tiī, ngaⁿ'á yā.

¹⁵ Maaⁿ ní ndís'tiī dicho'ó nī: N'dai ndís'tiī, nga'á nī hermanos chi snée na yāāⁿ Laodicea. Dicho'ó nī: N'dai ndís'tiī, n'daataá Ninfas ndúúcū 'iiⁿ'yāⁿ chi i'téenu yā Jesucristo ní nduuvidaamá yā na vaacu tá chi yaācū yeⁿ'é yā. ¹⁶ Ní taachi 'cuiinū n'geéⁿ nī carta 'cūū nguuaⁿ ndís'tiī dicho'ó nī carta 'cūū 'iiⁿ'yāⁿ yeⁿ'e yāāⁿ Laodicea chi 'cueén yā na yaacū yeⁿ'é yā. Ní canee chi 'cueén nī ntúūⁿ 'áámá carta chi dicho'ó 'iiⁿ'yāⁿ yeⁿ'e yāāⁿ Laodicea. ¹⁷ Ní ndís'tiī cuuvi nī saⁿ'ā Arquipo chi 'úú caaⁿ'mán 'tíicā: Díí Arquipo, diiⁿ di cuidado chi diiⁿ n'daacā di ní 'cuiinu di ntiⁿ'nyuⁿ yeⁿ'e Señor chi Señor tee yā díí.

¹⁸ 'Úú, Pablo, dinguúⁿ saludos 'cūū ndúúcū ta'á ndúúcū letras yeⁿ'é. N'gaacú nī yeⁿ'é chi canúúⁿ vácūū. Neⁿ'é chi Ndyuūs itée yā vaadī n'dai yeⁿ'é yā. 'Tíicā cuuvi.

CARTA VMNÁÁⁿ VMNAAⁿ YEⁿE 'IIⁿ'YĀⁿ YEⁿE YĀĀⁿ TESALÓNICA

Pablo ndúúcu compañeros yeⁿ'é yā idinguúⁿ yā carta 'cūu yeⁿ'e 'iiⁿ'yāⁿ yeⁿ'e yaācū na yāāⁿ Tesalónica

¹ 'Úú, Pablo, idinguúⁿ carta 'cūu ndúúcu saⁿ'a Silvano ndúúcu saⁿ'ā Timoteo yeⁿ'e hermanos yeⁿ'e yú chi caⁿ'á yā na yaācū yeⁿ'e yāāⁿ Tesalónica, 'iiⁿ'yāⁿ chi yeⁿ'é Ndyuūs Chiida yú níícu yeⁿ'é Señor Jesucristo. Neⁿ'é 'nū chi Ndyuūs Chiida yú ndúúcu Señor Jesucristo téé yā ndís'tiī nducuéⁿ'ē vaadī n'dai yeⁿ'é yā, ní vaadī 'diīⁿ yeⁿ'é yā canee na staava yeⁿ'é nī.

Tiⁿ'yāⁿ yeⁿ'e yāāⁿ Tesalónica din'daacá yā ní diitu i'téenu yā Jesucristo

² Ca'á 'nū gracias nanááⁿ Ndyuūs cáávā nducyaaca ndís'tiī ní taachi caaⁿ'maⁿngua'á 'nū inin'gáácú 'nū yeⁿ'e ndís'tiī. ³ Ní taachi ngaⁿ'angua'á 'nū nanááⁿ Ndyuūs Chiida yú, ngaⁿ'angua'á 'nū yeⁿ'e ntiīⁿnyuⁿ chi díⁿ nī caati i'téenu cá nī ní chí neⁿ'e cá nī nducyaaca 'iiⁿ'yāⁿ ní chí nginnee yā 'iiⁿ'yāⁿ. Ní cuchéε nī yeⁿ'e tanducuéⁿ'ē. Ní 'áámá canee nī ndúúcu chi i'téenu nī caati cūnee ngiinú nī chi Señor Jesucristo yeⁿ'é yú caⁿ'á yā téé yā chiiⁿ chi cuuvi yeⁿ'é nī. ⁴ Ndís'tiī, hermanos yeⁿ'é 'nū, Ndyuūs neⁿ'é yā ndís'tiī. Ní deenú 'nū chi Ndyuūs ndεεε yā ndís'tiī chi ndís'tiī cuuvi yeⁿ'é yā ndís'tiī. ⁵ Taachi ngaⁿ'a 'nū nduudu cuaacu yeⁿ'é Ndyuūs nanááⁿ ndís'tiī nguεε dámaaⁿ ngaⁿ'á 'nū nduudu miiⁿ ndúúcu nduudu yeⁿ'é 'nū ti ndúúcu poder yeⁿ'é Espíritu N'dai yeⁿ'é Ndyuūs. Ní deenú 'nū chi nduudu cuaacu miiⁿ ní cuaacu. Ndís'tiī ní deenú nī du'u saⁿ'ā nús'uu taachi canee 'nū ndúúcu ndís'tiī ní táácā díⁿ 'nū caati maáⁿ nī cuuvi 'cuetinéé n'daacā nī.

⁶ Ní ndís'tiī ní 'āā diiⁿ nī tan'dúúca chi nús'uu díⁿ 'nū ní tan'dúúca chi diiⁿ Señor Jesucristo yeⁿ'é yú. Ní i'téenu nī nduudu cuaacu yeⁿ'é Ndyuūs. Ní yeenú nī ndúúcu vaadī yeenú chi Espíritu N'dai yeⁿ'é Ndyuūs tee yā ndís'tiī 'áará chí ch'eenú nī chiī cucáávā chi i'téenu nī. ⁷ Ní cucáávā chi díⁿ nī 'tuucā nducyáácá 'iiⁿ'yāⁿ chi i'téenu yā Señor Jesucristo, 'iiⁿ'yāⁿ yeⁿ'e núúⁿmáⁿ yáⁿ'āa Macedonia ndúúcu núúⁿmáⁿ yáⁿ'āa Acaya cuuvi cuta'á ndís'tiī tan'dúúca 'áámá ejemplo ní díⁿ yā tan'dúúca chi díⁿ nī. ⁸ Ní ndís'tiī diiⁿ nī chi tanáⁿ'ā 'iiⁿ'yāⁿ cuuvi déenu yā nduudu cuaacu yeⁿ'e Señor. Nguεε dámaaⁿ 'iiⁿ'yāⁿ yeⁿ'e yáⁿ'āa Macedonia ndúúcu 'iiⁿ'yāⁿ yeⁿ'e yáⁿ'āa Acaya naati 'iiⁿ'yāⁿ yeⁿ'e nducuéⁿ'ē cuaāⁿ 'āā deenú yā chi ndís'tiī i'téenu nī Ndyuūs. Ní nguεε canee chí caaⁿ'maⁿ cá 'nū dε'ē vεε yeⁿ'e nī ti n'daacā i'téenu nī. ⁹ Ní nducyaaca 'iiⁿ'yāⁿ ngaⁿ'a yā nús'uu yeⁿ'e visita yeⁿ'é 'nu taachi canee 'nū nguaaⁿ ndís'tiī. Ní ngaⁿ'a yā tan'dúúca chi ndís'tiī s'néeⁿ nī ídolos caavā chi cu'téenu nī Ndyuūs chí canduuchi, Ndyuūs chí cuáácú chí Ndyuūs. Ní tuca'á nī díⁿ nī ntiīⁿnyuⁿ yeⁿ'é Ndyuūs. ¹⁰ Tiicá ntúūⁿ ngaⁿ'a yā chí ndís'tiī cūnee ngiinú nī chí Jesucristo chí Daiya Ndyuūs ní ndaa yā taama vmnéⁿ'ēe yeⁿ'é va'ai chεeti nguuvi. Ndyuūs nada'cueeⁿ yā Jesús miiⁿ yeⁿ'é nguaaⁿ tináⁿ'ā. Níícu Jesucristo miiⁿ ní 'iiⁿ'yāⁿ chí nadanguáⁿ'ai yā s'uuúⁿ yeⁿ'é castigo chí neené díftūu yeⁿ'e tiempo chí cuchii.

2

Ntiīⁿnyuⁿ chí diiⁿ Pablo naachi canee yā na yāāⁿ Tesalónica

¹ Ndís'tiī, hermanos yeⁿ'e yú, deenú nī chí tiempo chí canee 'nū nguaaⁿ ndís'tiī chí nguεε tandii rá díⁿ 'nū ntiīⁿnyuⁿ yeⁿ'é Ndyuūs. ² 'Āā deenú nī chí 'āā cuen'é 'nū yāāⁿ Filipos vmnaaⁿ chí ndaa 'nū nanááⁿ ndís'tiī. Ní déenu nī chí 'iiⁿ'yāⁿ miiⁿya nguεε n'daacā díⁿ yā nduucú 'nū. Ní ngaⁿ'a taāⁿ yā yeⁿ'é 'nū chí ch'eenú 'nū chí. Níícu taachi ndaa 'nū nanááⁿ ndís'tiī, nguεε 'va'á 'nū chí caaⁿ'máⁿ 'nū nduudu cuaacu chí ngai yeⁿ'e Cristo 'áará chí deenú 'nū chí vεε cá 'iiⁿ'yāⁿ chí contra yeⁿ'e nús'uu, 'iiⁿ'yāⁿ chí nguée n'daacā díⁿ yā nduucú 'nū. ³ Caati deenú 'nū chí ngaⁿ'á 'nū nduudu cuaacu miiⁿ nguée ndúúcu vaanicadínuuⁿ yeⁿ'é 'nū chí nguée n'daacā ndíí nguée ndúú nginnche'ée 'nū 'iiⁿ'yāⁿ. ⁴ Naati Ndyuūs n'diichí ya vida yeⁿ'é 'nū chí n'daacā n'gεεtineé 'nū. Ní tee yā ntiīⁿnyuⁿ nús'uu chí caaⁿ'máⁿ 'nū nduudu cuaacu yeⁿ'é chí cuuvi nanguáⁿ'ai 'iiⁿ'yāⁿ yeⁿ'e nuuⁿndi

yeⁿé yā. Ní nguεε dííⁿ 'nū ntiiⁿnyuⁿ miiⁿ chi cūnee yíínūu 'iiⁿyāⁿ naati dííⁿ 'nū chiiⁿ chi neⁿe Ndyuūs chi snaaⁿ yā nducuéⁿē chi vεε na staava yeⁿe yú. ⁵ Ní ndís'tiī deenú nī chi nguéé ngaⁿá 'nū nduudu cuaacu miiⁿ ndúúcu n'dee n'dái nduudu chi n'dai taavi chi cūnee yiinú nī yeⁿé 'nū. Ní nguéé ngaⁿá 'nū cáávā chi dííⁿ 'nū ganar tuūmī. Ndyuūs ní deenú yā yeⁿé 'nū yeⁿe chi dííⁿ 'nū. ⁶ Mar 'áámá vmnéⁿēe dííⁿ 'nū ntiiⁿnyuⁿ yeⁿé Ndyuūs caavā chi 'iiⁿyāⁿ cuuvi caaⁿmaⁿ yā chi n'gεεtē 'nū. Ní nguéé nanááⁿ ndís'tiī, ndíí nguεε nduu nanááⁿ tanáⁿa yā. Ní deenú 'nū chi cuuvi ch'iⁿí 'nū 'iiⁿyāⁿ chi ch'εεte maáⁿ 'nū caati Cristo dichó'o yā nús'uu chi dííⁿ 'nū ntiiⁿnyuⁿ yeⁿe apóstoles ní candéé 'nū nduudu yeⁿé yā. ⁷ Naati 'tíicā dííⁿ 'nū ndúúcu nī tan'dúúcā chi ndís'tiī da'caiyāā daiyá 'nū. Niicu tan'dúúcā chi diiⁿ 'áámá n'daataá ndúúcu daiyá yā taachi idi'cuiitá yā ní dííⁿ yā cuidado daiyá yā, 'tíicā dííⁿ 'nū ndúúcu nī. Ní n'daacā ngaⁿá 'nū ndúúcu nī ndúúcu vaadī n'giinu. ⁸ Ní 'tíicā neⁿe cá 'nū ndís'tiī chi neⁿé 'nū tee 'nū ndís'tiī nguéé dámaāⁿ nduudu cuaacu yeⁿé Ndyuūs, naati 'tiicā ntuūⁿ neⁿé 'nū 'cuuví 'nū cáávā ndís'tiī caati 'āā neⁿe taavi cá 'nū ndís'tiī. ⁹ Ndís'tiī hermanos yeⁿe yú, n'gaacu nī yeⁿé ntiiⁿnyuⁿ chi diiⁿ cá 'nū ni ngaⁿá 'nū nduudu cuaacu yeⁿé Ndyuūs nanááⁿ ndís'tiī. Ní dííⁿ 'nū ntiiⁿnyuⁿ ndúúcu ta'á 'nū ndíí nguuvi ndíí n'gaaⁿ cáávā chi véé necesidades yeⁿé 'nū. Ní nguéé di'vaachí 'nū ndís'tiī yeⁿé dé'ε vεε. ¹⁰ Ní ndís'tiī ní testigos yeⁿé 'nū. 'Tiicā ntúūⁿ Ndyuūs ní testigo yeⁿé 'nū tan'dúúcā chi 'cuεetinee n'daacá 'nū ní dííⁿ 'nū dendu'ū chi cuaacu taachi canee 'nū nguaaⁿ ndís'tiī chi i'téenu nī Señor Jesucristo. Ní nguéé mar 'áámá 'iiⁿyāⁿ cuuvi caaⁿmaⁿ yā chi nguéé n'daacā dííⁿ 'nū. ¹¹ Ní 'tiicā ntúūⁿ ndís'tiī deenú nī tan'dúúcā chi dííⁿ 'nū ndúúcu ca'áámá ca'áámá ndís'tiī. Ní dííⁿ 'nū tan'dúúcā chi nús'uu ní chiidá nī ni ndís'tiī ní daiyá 'nū ní tee 'nū consejo ndís'tiī ndúúcu 'viich'εεtíínūⁿ. ¹² Ní ch'iⁿi 'nū ndís'tiī tan'dúúcā chi cuuvi n'gεεtinee n'daacá nī nanááⁿ Ndyuūs caati ndís'tiī ní yeⁿé Ndyuūs ndís'tiī. Ní Ndyuūs ní yaa'ví yā ndís'tiī chi cuuvi ndaa nī naachi Ndyuūs ngaⁿa ntiiⁿnyuⁿ yā. Ní véé nducuéⁿē cosas chí n'dai yeⁿé nī. ¹³ Níicú cáávā nducuéⁿē chuū cueⁿe daāⁿmaⁿ ní ca'á 'nū gracias Ndyuūs caati taachi ndís'tiī ní ch'iinniveéⁿ nī nduudu yeⁿé Ndyuūs chi ngaⁿá 'nū nanááⁿ ndís'tiī, chi'téenu nī nduudu miiⁿ chi nduudu yeⁿé Ndyuūs ní nguéé nduudu chi yeⁿe 'iiⁿyāⁿ. Ní cuaacu chi nduudu miiⁿ ní yeⁿé Ndyuūs caati diiⁿ ntiiⁿnyuⁿ na vida yeⁿé ndís'tiī chi i'téenu nī. ¹⁴ Ndís'tiī, hermanos yeⁿé 'nū. Dáámá cho'o yeⁿe ndís'tiī taachi n'geenú nī ngii cucáávā chi diiⁿ 'iiⁿyāⁿ Israel chi paisanos yeⁿé nī ndúúcu nī. Chó'ōo ntúūⁿ yeⁿe 'iiⁿyāⁿ chi naⁿá yā yāacū naachi 'iiⁿyāⁿ i'téenu yā Jesucristo na yáⁿāā Judea caati 'tíicā diiⁿ 'iiⁿyāⁿ Israel chi paisanos yeⁿé yā ndúúcu yā. ¹⁵ Maaⁿ 'iiⁿyāⁿ paisanos chi 'iiⁿyāⁿ Israel ch'iⁿnuⁿ yā Señor Jesucristo yeⁿé yú tan'dúúcā chi dííⁿ yā ndúúcu profetas chi ngaⁿá yā nduudu cuaacu yeⁿé Ndyuūs tiempo chi 'āā chó'ōo. Ní 'iiⁿyāⁿ s'eeⁿ can'dáa yā s'uuúⁿ ní diiⁿ chi n'geenu yú ngii. Ní nguéé dííⁿ yā chiiⁿ chi Ndyuūs neⁿé yā chi dííⁿ yā ní contra yā nducyaaca 'iiⁿyāⁿ. ¹⁶ Ní taachi neⁿé 'nū ngaⁿá 'nū nduudu cuaacu nanááⁿ 'iiⁿyāⁿ chi nguéé yeⁿe ndaata yeⁿé yā caati cuuví nnguaⁿai yā, 'iiⁿyāⁿ s'eeⁿ chi paisanos yeⁿé nī nguéé n'guúⁿ yā chí ngaⁿá 'nū. 'Tíicā ní véé cá nuuⁿndi yeⁿé yā. 'Tíicā dííⁿ yā maaⁿ naati cuayiivi Ndyuūs caⁿá yā chí ca'a yā 'iiⁿyāⁿ s'eeⁿ 'áámá castigo chí neené diitū ca.

Pablo neⁿé yā caⁿá yā taama vmnéⁿēe ní n'diichí yā 'iiⁿyāⁿ yeⁿe yāāⁿ Tesalónica

¹⁷ Ndís'tiī hermanos yeⁿe yú 'áará chí maaⁿ ní yaⁿai snée 'nū yeⁿe ndís'tiī ní nguéé cuuvi naáⁿ 'nū ndís'tiī nadacadiinúúⁿ 'nū yeⁿe ndís'tiī. Néené neⁿé 'nū cunee 'nū ndúúcu ndís'tiī ní n'diichí 'nū ndís'tiī. ¹⁸ Ní dííⁿ 'nū nducuéⁿē chi cuuví 'nū ti cuuvi ndaa 'nū nanááⁿ ndís'tiī. Ni 'úú Pablo 'naaⁿ tiempo canee listo chí naⁿá naati yááⁿnguiinūⁿ diiⁿ sa chí nguεε cuuvi ndaa. ¹⁹ ¿De'ε cáávā chí snée ngiinu 'nū ní yeenú 'nū? Snée ngiinu 'nū ní yeenú 'nū ti cuuvi candéé 'nū ndís'tiī nanááⁿ Jesucristo taachi ndaa yā taama vmnéⁿēe. ²⁰ Cuaacu níⁿnyúⁿ chí ndís'tiī chí i'téenu nī ní diiⁿ chí néené yeenú 'nū cáávā chí dííⁿ 'nū ntiiⁿnyuⁿ yeⁿé Ndyuūs nguaaⁿ ndís'tiī.

3

¹ Ní taachi 'āā ntéé cuhéé 'nū chí nguéé ndaa 'nū nanááⁿ ndís'tiī, tuu'mi ní nadi-

cadíinuⁿ 'nū chi n'daacā chi maáⁿ 'nū n'gɛetineé 'nū na yáāⁿ Atenas. ² Ní dicho'ó 'nū Timoteo chi hermano yeⁿ'ē yú chi cuuvi n'diichi sa ndís'tiī taacā snée nī. Saⁿ'ā miiⁿ 'āā diiⁿ sa ntiⁿ'nyuⁿ yeⁿ'é Ndyuūs daama nduucú 'nū ní ngaⁿ'a sa nduudu cuaacu yeⁿ'é Cristo chi diiⁿ chi nadinguáⁿ'ai 'iiⁿ'yāⁿ. Saⁿ'ā miiⁿ ní cuuví cūnnee sa ndís'tiī ní tée sa 'viich'ɛetíínūⁿ ndís'tiī. Ní cuuví cūnee diitu cá nī ndúúcū chi i'téenu nī. Cáāvā chuū dichó'o 'nū Timoteo. ³ Nguεε neⁿ'é 'nū chi ndís'tiī ndaacadaamí nī yeⁿ'e Jesucristo chi nguεε i'téenu nī Jesucristo cucáāvā chi n'geenú nī ngii. 'Āā deenú nī chi canee chi 'cueenú nī cuuvi caati i'téenu nī Jesucristo. ⁴ Ní cuaacú taachí ch'ɛetineé 'nū ndúúcū ndís'tiī chii 'nū ndís'tiī chi ndaa tiempo chi canéé chi 'cueenu yú cuuvi tan'dúúcā chi chó'ōo yeⁿ'é nī. Chuū ní ndís'tiī déenu nī. ⁵ Ní cáāvā chuū taachi 'āā ntéé chéé chi nguéé n'giindiveéⁿ yeⁿ'é ndís'tiī cho'ó hermano Timoteo chi 'úú cuuvi deenú táacā sneé nī ndúúcū chi i'téenu nī. Caati 'úú 'va'á chi yááⁿ'guiinūⁿ diiⁿ chi nguéé i'téenu nī ní maaⁿ ní nguéé dichíí'vē ntiⁿ'nyuⁿ chi 'āā diiⁿ 'nū nguuaⁿ ndís'tiī.

⁶ Naati maaⁿ ní Timoteo chi chiīca sá yeⁿ'e ndís'tiī chi snee na yáāⁿ Tesalónica ndaā sa nanaáⁿ 'nū. Ní yaa'vi sa nús'uuⁿ chi n'daacā n'dai snee nī ti i'téenu nī Ndyuūs. Ní ngaⁿ'a ntúūⁿ sā chi neⁿ'e nī nducyaaca 'iiⁿ'yāⁿ. Ní yaa'vi sa nús'uu chi cueⁿ'e daāⁿ'maⁿ n'gaacu nī yeⁿ'é 'nū ní neⁿ'é nī nús'uu. Ní néené neⁿ'é nī n'diichí nī nús'uu. Ní nús'uu neⁿ'e ntúūⁿ 'nū n'diichi 'nū ndís'tiī. ⁷ Ní ndís'tiī hermanos yeⁿ'é 'nū cucáāvā chi n'giindiveéⁿ 'nū yeⁿ'ē ndís'tiī chi díftū canee nī ndúúcū chi i'téenu nī yeⁿ'e Señor Jesucristo yeⁿ'e yú maaⁿ ní véé 'viich'ɛetíínūⁿ yeⁿ'é 'nū yeⁿ'ē tanducueⁿ'ē chi ch'eenú 'nū chiī. ⁸ Ní snéé 'nū tan'dúúcā chi véé vida ngai yeⁿ'é 'nū ti n'giindiveéⁿ 'nū chí n'daacā n'dai canéé nī maaⁿ chi ndís'tiī ní yeⁿ'e Señor Jesucristo ndís'tiī. ⁹ Maaⁿ ní gracias cuuvi nca'á 'nū Ndyuūs Chiida yú cucáāvā ndís'tiī ní cucáāvā chi ndís'tiī dííⁿ nī chi yeenu taaví 'nū taachi ngaⁿ'angua'á 'nū caavā ndís'tiī ndúúcū Ndyuūs Chiida yú. ¹⁰ Ní ngaⁿ'angua'á 'nū ndíí nguuví ndii n'gaaⁿ chi Ndyuūs dííⁿ yā chi ndaá 'nū naachi snée nī. Níicú cūnnee 'nū ndís'tiī níicú cuuvi cu'téenu cá nī yeⁿ'e Señor Jesucristo yeⁿ'e yú.

¹¹ Neⁿ'é 'nū chi Ndyuūs Chiida yú ndúúcū Señor Jesucristo yeⁿ'e yú cūnnee yā nús'uu caati cuuvi ndaa 'nū nanááⁿ ndís'tiī. ¹² Ní Señor Jesucristo yeⁿ'e yú cūnnee yā ndís'tiī caati cuuvi neⁿ'e cá nī nducyaáacá 'iiⁿ'yāⁿ. Ní dineⁿ'e taavi cá nī tan'dúúcā nús'uu neⁿ'e taavi cá 'nū ndís'tiī. ¹³ Ní Ndyuūs cuuvi cūnnee yā ndís'tiī chi 'áámá canéé vaadī neⁿ'e yeⁿ'é yā na staava yeⁿ'é nī. Ní nguéé véé nuuⁿ'ndi yeⁿ'é nī. Ní canéé deeve staava yeⁿ'é nī nanááⁿ Ndyuūs Chiida yú taachi ndaa Señor Jesucristo yeⁿ'ē yú ndúúcū nducyaáacá 'iiⁿ'yāⁿ chi i'téenu yā 'yā.

4

Yeⁿ'ē tan'dúúcā chi Ndyuūs neⁿ'é yā chi 'cuεetinee yú

¹ Maaⁿ ní di'cuíftu ca 'nū ndís'tiī hermanos yeⁿ'e yú ní ngiicá 'nū ndís'tiī nanááⁿ Jesucristo chi dííⁿ nī chuū. Tan'dúúcā chi ca'cueéⁿ 'nū ndís'tiī táacā chi cuuvi n'gɛetineé nī tan'dúúcā Ndyuūs neⁿ'é yā, 'tíicā 'āā dííⁿ nī. Ní 'tiicá ntúūⁿ diiⁿ cá nī cueⁿ'e daāⁿ'maⁿ ní ngo'o cá dííⁿ nī.

² Ndís'tiī ní deenú nī tan'dúúcā chí chi'cueeⁿ 'nū nanááⁿ ndís'tiī caati Ndyuūs dicho'ó yā nús'uu. ³ Ní Ndyuūs neⁿ'é yā chi ndís'tiī n'gɛetinéé n'daacá nī. Ní nducueⁿ'ē chi dííⁿ nī, dííⁿ nī ti yeⁿ'é Ndyuūs ndís'tiī. Ní nguéé caⁿ'á nī ndúúcū 'iiⁿ'yāⁿ chi nguéé isaⁿ'a o n'daataá yeⁿ'é nī. ⁴ Ní ca'áámá ca'aama ndís'tiī chi saⁿ'ā canee chi déenu nī tan'dúúcā chi cuuvi cuta'á nī n'daataá yeⁿ'é nī ní 'caandavaacú nī. Ní canee n'daacá nī ndúúcū n'daataá yeⁿ'é nī. Ní dinéⁿ'e nī n'daataá yeⁿ'é nī. ⁵ Nguéé diiⁿ nī cosa chi nguéé n'daacā ndúúcū cuerpo yeⁿ'ē tá tan'dúúcā chi diiⁿ tanáⁿ'ā 'iiⁿ'yāⁿ chi nguéé yeⁿ'ē ndaata 'iiⁿ'yāⁿ Israel, 'iiⁿ'yāⁿ chi nguéé déenu yā Ndyuūs. ⁶ Ní mar 'áámá yú chi sáⁿ'ā nguéé caⁿ'a sa ndúúcū n'daataá chi nguéé yeⁿ'e sa o n'daataá nguéé caⁿ'a tá ndúúcū 'áámá isáⁿ'ā chi nguéé yeⁿ'e tá caati Señor Jesucristo yeⁿ'ē yú ca'á yā 'iiⁿ'yāⁿ miiⁿ 'áámá castigo chí ch'εete caavā nuuⁿ'ndi chi 'tíicā yeⁿ'é yā. Ní yeⁿ'é chuū 'āā n'diichi yú na vida yeⁿ'e hermanos yeⁿ'e yú chi dííⁿ yā 'túúcā chi nginnche'éi yā hermano yeⁿ'é yā. Ní nguéé n'daacā chuū. ⁷ 'Tíicā Ndyuūs yaa'ví yā

s'uuúⁿ chi cuuvi yeⁿ'é yā s'uuúⁿ cáávā chi diiⁿ yú nducuéⁿ'ē chi n'daacā nguéé caavā chi diiⁿ yú cosas chi nguéé n'daacā. ⁸ 'Tíicā 'iiⁿ'yāⁿ chi nguéé diiⁿ yā tan'dúúccā chi ngi'cueéⁿ 'nū. Ndís'tiī nguéé idi'vaachí yā mar 'áámá 'iiⁿ'yāⁿ. Dámaāⁿ di'vaachí yā Ndyuūs caati Ndyuūs téé yā Espíritu N'dai yeⁿ'é yā s'uuúⁿ. ⁹ 'Úú nguéé caneé chi dinguúⁿ yeⁿ'é ndís'tiī tan'dúúccā chi canee chi neⁿ'é nī nducyaaca 'iiⁿ'yāⁿ chi yeⁿ'e Cristo chi hermanos yeⁿ'ē yú. Deenú chi Ndyuūs maáⁿ yā ngi'cueéⁿ yā ndís'tiī tan'duuccā chi canee chi dineⁿ'é nī 'áámá nī ndúúccū taama nī. ¹⁰ Cuáácú chi neⁿ'é nī nducyaaca hermanos yeⁿ'ē yú chi snéé na yáⁿ'āa Macedonia naati maaⁿ ní di'cuítu caⁿ'a 'nū chi dinéⁿ'e ca nī hermanos yeⁿ'e nī. ¹¹ Ngii'cā 'nū chi ch'εetinéé n'daacā nī nguaaⁿ nducyaaca nī ndúúccū vaadi 'diiⁿ. Ní diiⁿ nī ntiíⁿ'nyuⁿ yeⁿ'ē maáⁿ nī ndúúccū ta'á nī tan'dúúccā chi n'giⁿ'i 'nū ndís'tiī. ¹² Ní diiⁿ nī 'tuuccā caati 'iiⁿ'yāⁿ chi nguεε i'téenu yā Jesucristo yeⁿ'e yú cuuvi diiⁿ yā respetar ndís'tiī ní véé necesidades yeⁿ'é nī.

Yeⁿ'ē chi ndaa Jesucristo taama vmnéⁿ'ēe

¹³ Ndís'tiī hermanos yeⁿ'é 'nū, nguéé neⁿ'é 'nū chi nguéé cadíinuuⁿ nī yeⁿ'e chi cuchī yeⁿ'e 'iiⁿ'yāⁿ chi n'díi caati nguéé cuuvi ndaachii nuuⁿ nī tan'dúúccā tanáⁿ'ā 'iiⁿ'yāⁿ chi nguéé cunee ngiinú yā chí ndaa Jesucristo taama vmnéⁿ'ēe. ¹⁴ Ní 'tíicā tan'duuccā chi i'teenu yú chí Jesucristo ch'iī yā ní nduuchí yā yeⁿ'ē nguaaⁿ tináⁿ'ā, 'tiicā ntúūⁿ i'teenu yú chi taachi Ndyuūs dicho'ó yā Jesucristo taama vmnéⁿ'ēe, Cristo miiⁿ ní ndεε yā ndúúccū yā nducyaaca 'iiⁿ'yāⁿ chi 'āā n'díi ní 'āā i'téenu yā Señor Jesucristo yeⁿ'ē yú. ¹⁵ Ní cáávā chuū yaa'ví 'nū ndís'tiī chuū tan'dúúccā chi Señor chi'cueéⁿ yā nús'uu. S'uuúⁿ chi canduuchi yú ní canee yú na iⁿ'yeeⁿdí 'cūū ndíi ndaa Señor yeⁿ'ē yú nguéé can'dáánaaⁿ yú yeⁿ'e 'iiⁿ'yāⁿ chi 'āā n'díi. ¹⁶ Caati maaⁿ Señor Jesucristo yeⁿ'e yú nch'éeⁿ yā yeⁿ'ē va'ai chεeti nguuvi taachí Ndyuūs ca'á yā orden. Ní ángel chí ch'εεε ca ní caaⁿ'máⁿ yā ní di'cuεécú yā trompeta yeⁿ'é Ndyuūs. Ní 'iiⁿ'yāⁿ s'eeⁿ chi 'āā n'díi chí ch'i'téenu yā Jesucristo taachi 'iiⁿ'yāⁿ s'eeⁿ snéé yā iⁿ'yeeⁿdí 'cūū ní snuuⁿ yā maaⁿ yáⁿ'āa, 'iiⁿ'yāⁿ s'eeⁿ vmnááⁿ vmnaaⁿ nduuchi yā yeⁿ'ē nguaaⁿ tináⁿ'ā. ¹⁷ Tuu'mi ní s'uuúⁿ chi sduuchi yú chí snee yú na iⁿ'yeeⁿdí 'cūū, Cristo míiⁿ cuta'á yā s'uuúⁿ na 'yúúné. Ní ndaa yú na meēⁿ ndúúccū tanáⁿ'a yā chí 'āā n'díi, ní nducyaaca yú ní dáámá ndaa yú nanááⁿ Jesucristo na 'yúúné. 'Tíicā ní 'áámá cūnee yú ndúúccū Señor yeⁿ'ē yú. ¹⁸ Níicú cáávā chíiⁿ chí nca'a nī 'viich'εetiínūⁿ 'áámá nī taama nī ndúúccū nduudu 'cūū.

5

¹ Ndís'tiī hermanos yeⁿ'é 'nū, nguéé canee chi dinguúⁿ 'nū yeⁿ'e ndís'tiī yeⁿ'e chεē fecha o de'ē tiempo nduuti chi tiempo 'iiche o 'í'ínūⁿ taachi ndaa Señor Jesucristo taama vmnéⁿ'ēe. ² 'Āā deenu n'daacā nī chi nguuvi chi ndaa Señor Jesucristo ní nguuvi chi nguéé du'ū vεε deenu. Hora miiⁿ tan'dúúccā hora yeⁿ'e n'gaaⁿ chi ndaa 'áámá duucu chí 'iiⁿ'yāⁿ nguéé déenu yā. ³ Níicú taachi 'tíicā ngaⁿ'a 'iiⁿ'yāⁿ: Maaⁿ ní véé vaadi 'diiⁿ ndúúccū yú ní seguro chí n'daacā canee yú tuu'mi dácanaaⁿ ní ndaa nanááⁿ yeⁿ'é 'iiⁿ'yāⁿ s'eeⁿ tiempo chí dí'cuinú yā 'iiⁿ'yāⁿ. Ní tiempo miiⁿ ndaa tan'dúúccā chí ndaa vaadi ya'āi ngii yeⁿ'e 'áámá n'daataá taachi 'cuundiyaāⁿ daiya tá. Ní yeⁿ'e tiempo miiⁿ 'iiⁿ'yāⁿ s'eeⁿ ní nguéé cuuvi nánguaⁿ'ai yā yeⁿ'ē. ⁴ Naati ndís'tiī hermanos yeⁿ'é nguéé canee nī tan'duuccā chí nguéé deenú nī yeⁿ'e chuū, ní ndaa tiempo miiⁿ tan'dúúccā tiempo chí ndaa 'áámá chí duucu. ⁵ Ní nducyaaca s'uuúⁿ ní yeⁿ'e dεεve s'uuúⁿ ní s'uuúⁿ yeⁿ'e nguuvi s'uuúⁿ. Nguéé yeⁿ'e n'gaaⁿ s'uuúⁿ ndíi nguéé yeⁿ'e na maaiⁿ s'uuúⁿ. ⁶ Ní cáávā chuū nguéé ch'εetinee yú tan'dúúccā chí 'cuεeti yaadu yú tan'dúúccā tanáⁿ'ā 'iiⁿ'yāⁿ chí nguεε cūnee ngiinú yā Señor Jesucristo yeⁿ'e yú naati 'cuεeti nduuchi yú, níicú cadíinuuⁿ yú. ⁷ 'Iiⁿ'yāⁿ chí cyaadu ní cyaadú yā n'gaaⁿ. Ní 'iiⁿ'yāⁿ chí ngii cú'ví, ní cuuvi cú'ví yā n'gaaⁿ. ⁸ Naati s'uuúⁿ chí yeⁿ'ē nguuvi s'uuúⁿ ní 'cuεetinéé yaaⁿ yú nguuvi chí ndaa Señor yeⁿ'e yú. Ní diiⁿ yú cuidado s'uuúⁿ chí 'aama canee yú lado yeⁿ'é Ndyuūs cucáávā chí i'teenu yú. Ní canee chí neⁿ'e yú nducyaaca 'iiⁿ'yāⁿ. Ní diiⁿ yú tan'dúúccā 'áámá soldado diiⁿ yā defender maáⁿ yā ndúúccū armadura yeⁿ'é yā. Ní canee yú cūnee ngiinú yú nguuvi chí Ndyuūs nadanguáⁿ'ai yā s'uuúⁿ yeⁿ'e castigo. Ní chuū ní tan'dúúccā 'aama soldado sta'á yā cachucha yeⁿ'e

cūu yeⁿé yā ní dííⁿ yā defender tííⁿ yā nduūcū. ⁹ Ní Ndyuūs nguéé yaa'ví yā s'uuúⁿ chi cuuvi yeⁿé yā s'uuúⁿ caati téé yā s'uuúⁿ castigo chi díítūu naati caati nadanguáⁿ'ai yā s'uuúⁿ yeⁿé castigo cucáávā Señor Jesucristo yeⁿé yú. ¹⁰ Níícu Jesús ch'íi yā na cruz cucááva s'uuúⁿ caati maaⁿ ní cuuvi caⁿ'a yú 'cuētinéé yú nduucú yā taachi ndaa yā 'áará chí n'gētinéé yú na iⁿ'yeeⁿdí 'cūū o 'áará chi 'āā ch'íi yú. ¹¹ Ní cáávā chuū ndís'tií ní nca'á nī 'viich'εtíínūuⁿ ndís'tií ní di'cuíítu nī 'aamá nī ndúúcu taamá nī tan'dúúca chi maaⁿ 'āā idiíⁿ nī 'aamá nī ndúúcu taamá nī.

Pablo nca'á yā consejo hermanos chi yeⁿe yāāⁿ Tesalónica

¹² Ní di'cuíítu 'nū ndís'tií chi 'caandiveéⁿ nī yeⁿe 'iiⁿ'yāⁿ chi diiⁿ ntiiⁿnyuⁿ yeⁿé Ndyuūs nguuaⁿ ndís'tií caati 'iiⁿ'yāⁿ miiⁿ ngaⁿ'a ntiiⁿnyúⁿ yā ní itée yā consejo ndís'tií. 'Iiⁿ'yāⁿ s'eeⁿ ní 'iiⁿ'yāⁿ chi Ndyuūs dich'ó o yā nanááⁿ ndís'tií. ¹³ Ní canee chi n'giindiveéⁿ nī ní dineⁿe cá nī 'iiⁿ'yāⁿ s'eeⁿ cucáávā chi dííⁿ yā ntiiⁿnyuⁿ yeⁿé Ndyuūs. Maaⁿ ní 'cuētinéé n'daacā nī 'aamá nī ndúúcu taama nī ndúúcu vaadī 'diiíⁿ.

¹⁴ Ní di'cuíítu cá 'nū ndís'tií hermanos yeⁿe yú chi dííⁿ nī chuū tan'dúúca chi idinguúⁿ 'nū. Caaⁿ'máⁿ nī cuuví nī 'iiⁿ'yāⁿ chi nguéé neⁿe diiⁿ ntiiⁿnyuⁿ ní cunnee nī 'iiⁿ'yāⁿ chi 'va'a. Ní ca'á nī 'viich'εtíínūuⁿ yeⁿe 'iiⁿ'yāⁿ chi duūvá yā. Ní canéé chi véé paciencia yeⁿé nī ndúúcu nducyaaca 'iiⁿ'yāⁿ.

¹⁵ Ní n'diichí nī chi din'daacā nī ndúúcu 'iiⁿ'yāⁿ chi nguéé din'daacā yā nduucú nī. Naati 'tíicā diiⁿ núⁿú yiiⁿnuⁿ nī chi din'daacā nī 'áámá nī ndúúcu taamá nī ndúúcu nducyaaca 'iiⁿ'yāⁿ.

¹⁶ Nducuéⁿe tiempo ní yeenú nī. ¹⁷ Cueⁿe daāⁿ'maⁿ ngaⁿ'angua'á nī. ¹⁸ Níícu ca'á nī gracias Ndyuūs caava nducuéⁿé chi cho'ō nuúⁿ nī caati 'tíicā neⁿé Ndyuūs yeⁿé yú chi dííⁿ nī ti maaⁿ ní i'téenu nī Cristo Jesús.

¹⁹ Nguεε dííⁿ nī chi nguéé n'giindiveéⁿ nī nduudu yeⁿe Espíritu N'dai yeⁿé Ndyuūs. ²⁰ Ní nguéé dííⁿ nī despreciar nduudu yeⁿé Ndyuūs chi ngaⁿ'a 'iiⁿ'yāⁿ, nduudu chi Espíritu N'dai yeⁿé Ndyuūs ca'a yā 'iiⁿ'yāⁿ. ²¹ N'diichínee nī nducuéⁿé dendu'ū nduuti chi n'daacā o nguéé. Níícu cuta'á nī yeⁿe nducuéⁿé chi n'daacā ní din'daacā nī. ²² Ní diví nī yeⁿe nducuéⁿé chi n'diichi nī chi nguéé n'daacā.

²³ Ní maaⁿ ní Ndyuūs yeⁿe yú tee yā vaadī 'diiíⁿ s'uuúⁿ ní didεεvé n'daacā yā ndís'tií. Ní candéε yā cuidado ndís'tií ndúúcu espíritu yeⁿé nī ndúúcu alma yeⁿé nī ndúúcu cuerpo yeⁿé nī ndúúcu nducuéⁿé vida yeⁿé nī. Ní 'íicú 'iiⁿ'yāⁿ cuuvi caaⁿ'máⁿ yā chi nguεε véé mar 'áámá nuuⁿndi yeⁿé nī taachi ndaa Señor Jesucristo yeⁿé yú taama vmnéⁿé na iⁿ'yééⁿdi 'cūū. ²⁴ Níícu Ndyuūs chi yaa'ví yā ndís'tií chi cuuvi yeⁿé yā ndís'tií dííⁿ yā chí véé confianza yeⁿe yú ndúúcu yā. Ní Cristo miiⁿ ntúūⁿ dííⁿ yā cumplir nducuéⁿé chi ngaⁿ'a yā chí cuuvi diiⁿ yā.

Pablo ca'a yā saludos 'iiⁿ'yāⁿ ní neⁿé yā chí Ndyuūs ca'a yā cosas n'dai yeⁿé yā

²⁵ Ndís'tií hermanos yeⁿe yú ngaⁿ'angua'a ndís'tií cáávā nús'uu.

²⁶ Caaⁿ'máⁿ nī nducyaaca hermanos yeⁿe yú: N'dai ndís'tií. Ní ituu'ví nī cheendi yā taachi dííⁿ nī saludar hermanos yeⁿe yú tan'dúúca costumbre yeⁿe yú ti yeⁿe yú Ndyuūs.

²⁷ 'Úú ndúúcu poder yeⁿe Señor ngaⁿ'á ngii chí 'cueéⁿ nī carta 'cūū nanááⁿ nducyaaca hermanos yeⁿe yú.

²⁸ Neⁿé chí Señor Jesucristo yeⁿé yú téé yā ndís'tií nducueⁿe cosas chí n'daacā taavi ca yeⁿé yā. 'Tíicā cuuvi.

CARTA CUAYIIVI YEⁿE 'IIⁿ'YĀⁿ YEⁿE YĀĀⁿ TESALÓNICA

Pablo ndúúcu compañeros yeⁿé yā idinguúⁿ yā carta 'cūū yeⁿe 'iiⁿ'yāⁿ yeⁿe yāāⁿ Tesalónica, 'iiⁿ'yāⁿ chi i'téenu yā Ndyuūs

¹ 'Úú Pablo idinguúⁿ carta 'cūū ndúúcu hermano Silvano ndúúcu hermano Timoteo. Ní idinguúⁿ yeⁿe hermanos chi caⁿ'á yā na yaācū yeⁿe yāāⁿ Tesalónica. Ní hermanos ní yeⁿe Ndyuūs Chiida yú ní yeⁿe Señor Jesucristo yeⁿe yú. ² Neⁿ'é chi Ndyuūs Chiida yú ndúúcu Señor Jesucristo cuuví téé yā ndís'tiī cosas chí n'daacā n'dai yeⁿ'é yā ndúúcu vaadī 'diiíⁿ yeⁿe yā.

Ndyuūs caⁿ'á yā dííⁿ yā juzgar 'iiⁿ'yāⁿ chi véé nuuⁿndi yeⁿ'é yā taachí ndaa Cristo taama vmnéⁿ'ēe

³ Ndís'tiī hermanos yeⁿe yú, cueⁿe daāⁿmaⁿ canéé chi caⁿ'á 'nū gracias Ndyuūs cucáāvā ndís'tiī caati n'daacā chi dííⁿ 'nū 'tíicā. Caati deenú 'nū chi nguuví nguuví ca'áámá ca'áámá ndís'tiī ní i'téenu ca nī ní neⁿe cá nī nducyaaca nī 'aamá nī ndúúcu taama nī.

⁴ Níicú taachi ngaⁿ'á 'nū ngii 'nū hermanos yeⁿe yú yeⁿe ndís'tiī, tuu'mi ngaⁿ'á 'nū chi yeenú 'nū caati ch'εtinéé n'daacá nī nducyaaca nī chi caⁿ'á nī na yaācū yeⁿ'é Ndyuūs yeⁿ'ē yú, ní cáāvā chi ndís'tiī ní ch'iⁿ'í nī ndúúcu nducuéⁿ'ē chi n'geenú nī ngii ní ndúúcu cosas chi díitūu chi chó'ōo yeⁿ'é nī chi véé paciencia yeⁿ'é nī. Ní n'daacā i'teenú nī. ⁵ Ní chuū ní cuaacu ch'iⁿ'i chi Ndyuūs ní dííⁿ yā juzgar 'iiⁿ'yāⁿ ndúúcu vaadī cuaacu caati Ndyuūs dííⁿ yā chi ndís'tiī ch'iⁿ'í nī chi n'dai taaví nī chi cuuvi ndaa nī naachi Ndyuūs ngaⁿ'a ntiiⁿnyúⁿ yā. Ní cáāvā chuū chííⁿ chi ndís'tiī ní n'geenú nī ngii.

⁶ Caati n'daacā nducú Ndyuūs chi Ndyuūs nadííⁿ'vē 'iiⁿ'yāⁿ chi idiiⁿ chí ndís'tiī n'geenú nī ngii ndúúcu chi 'cueenú yā cuuvi. ⁷ Tiempo taachi Señor Jesucristo miiⁿ ngiicá yā yeⁿ'ē va'ai chεeti nguuví ndúúcu ángeles yeⁿ'é yā ndúúcu poder yeⁿ'e yā, tuu'mi ní 'iiⁿ'yāⁿ s'eeⁿ ndaa yā ná nguuchi yaⁿ'ā. Ní tiempo miⁿ Ndyuūs teé yā ndís'tiī chi 'āā ntéé 'cueenú nī cuuvi. 'Tiicá ntúūⁿ ní teé ya nús'uu chi 'āā ntéé 'cueenú 'nū cuuvi. ⁸ Ní ndaa yā chí ca'a yā castigo 'iiⁿ'yāⁿ chi nguéé n'diichí yā Ndyuūs ndúúcu 'iiⁿ'yāⁿ chi nguéé n'giindiveén yā nduudu cuaacu yeⁿ'e evangelio yeⁿ'e Señor Jesucristo yeⁿ'e yú chi nadanguáⁿ'ai yā 'iiⁿ'yāⁿ. ⁹ 'iiⁿ'yāⁿ s'eeⁿ ní cuuví yā castigados ní cueⁿe daāⁿmaⁿ Ndyuūs di'cuiinú yā 'iiⁿ'yāⁿ s'eeⁿ ní Ndyuūs s'neeⁿ yā 'iiⁿ'yāⁿ s'eeⁿ yaⁿ'ai yeⁿ'é yā. Ní nguéé cuuvi n'diichí yā naaⁿ Ndyuūs. Ndíí nguéé ndúú cuuvi n'diichí yā δεενε taavi ca yeⁿ'é yā ndúúcu poder yeⁿ'é yā. ¹⁰ Ní tiempo chi ndaa Jesucristo miiⁿ nducyaaca 'iiⁿ'yāⁿ chi 'āā i'téenu yā Jesucristo ní caⁿ'a yā dich'εté yā Ndyuūs. Ní 'iiⁿ'yāⁿ s'eeⁿ ntúūⁿ caⁿ'a yā dich'εté yā Ndyuūs caati i'téenu nī nduudu cuaacu yeⁿ'é Ndyuūs chi ngaⁿ'a 'nū nanááⁿ nī. Ní 'iiⁿ'yāⁿ s'eeⁿ ngeⁿ'e yiiⁿnuⁿ yā.

¹¹ Ní cáāvā chuū cueⁿe daāⁿmaⁿ ngaⁿ'angua'á 'nū caavā ndís'tiī. Ní ngiicá 'nū Ndyuūs yeⁿ'e yú chí diiⁿ cuenta yā chi ndís'tiī ní n'daacā ti yaa'ví yā ndís'tiī chi cuuvi yeⁿ'é yā ndís'tiī. Ní ngiicá 'nū Ndyuūs chi dííⁿ yā ndúúcu ndís'tiī ndúúcu poder yeⁿ'é yā chi ndís'tiī ní cuuvi dííⁿ nī nducuéⁿ'ē chi n'daacā. Ní cuuvi dííⁿ nī cumplir ntiiⁿnyuⁿ n'dai chí dííⁿ nī cáāvā chí i'téenu nī Jesucristo. ¹² Ní 'iicu 'iiⁿ'yāⁿ cuuvi dich'εté yā Señor Jesucristo yeⁿ'ē yú cáāvā chiiⁿ chí diiⁿ ndís'tiī. Ní 'iiⁿ'yāⁿ s'eeⁿ dich'εté yā ndís'tiī caati Ndyuūs yeⁿ'ē yú ndúúcu Señor Jesucristo nginneé yā ndís'tiī.

2

Yeⁿ'é 'áámá 'iiⁿ'yāⁿ chí dinuuⁿndi yā

¹ Maaⁿ ní hermanos yeⁿ'é di'cuiitú 'nū ndís'tiī chí cūnee ngiinú nī yeⁿ'e tiempo chí nindaa Señor Jesucristo ní yeⁿ'e taachi nduuvidaama yú ndúúcu yā. ² Di'cuiitú 'nū chí nguéé na'daaⁿ nī chííⁿ chí nadacadíinuuⁿ nī. Nguéé diiⁿ 'va'á nī yeⁿ'e chí 'iiⁿ'yāⁿ ngaⁿ'á yā chí Cristo 'āā ndaa yā taama vmnéⁿ'ēe ti ngaⁿ'á yā tan'dúúcā chí cáāvā Espíritu N'dai yeⁿ'é Ndyuūs, naati nguéé 'tíicā. Ndíí nguéé ndúú 'va'a nī yeⁿ'ē táámá nduudu

chi n'giindiveén nī yeⁿe chuū. Ndíí nguéeé ndúú caavā carta chi sta'á nī chi tan'dúúca chi dinguún 'nū yeⁿe nī naati nguéeé 'tíicā. Ní yeⁿe nducuéⁿe chuū ní chiiⁿ chi ngaⁿā chí 'āā ndāā Señor Jesucristo yeⁿe yú, nguéeé 'va'á nī. ³ Nguéeé ca'á nī lugar 'iiⁿyāⁿ chi cuuvi canche'etí yā ndís'tiī mar 'áámá vmnéⁿēe. Vmnaaⁿ chi ndaa tiempo chi cuuvi nindaá Jesucristo taama vmnéⁿēe, 'iiⁿyāⁿ na iⁿ'yeeⁿdí 'cūū canéé chi ndaacadaamí yā yeⁿe Señor ní canee yā contra yeⁿe Señor. Tuu'mi ní ndāā 'áámá Saⁿā Nuunⁿdi, saⁿā chi Ndyuūs ngaⁿá yā chi 'āā condenado sa ní caⁿa sa infierno. ⁴ Saⁿā miiⁿ ní caaca taaⁿ sa ní contra nducuéⁿe chi yeⁿe Ndyuūs ndúúcu nducuéⁿe chi 'iiⁿyāⁿ i'téenu yā. Saⁿā miiⁿ ní dich'εεte sa maaⁿ sa nguéeé tan'dúúca tanáⁿā 'iiⁿyāⁿ. Ní ndaa sa cuaaⁿ chεeti yaacū templo yeⁿe Ndyuūs ní 'cuūndī sa. Ní máaⁿ sa sta'a sa lugar yeⁿe Ndyuūs. Ní diiⁿ sa máaⁿ sa chi cu'téenu 'iiⁿyāⁿ saⁿā. Ní diiⁿ sa tan'dúúca Ndyuūs saⁿā.

⁵ ¿'Áá nguéeé n'gaacú nī ndís'tiī yeⁿe tiempo chi canee nduucú nī ní caⁿá chí ndís'tiī nduudú 'cūū? ⁶ Maaⁿ ní 'āā deenú nī de'ē idiiⁿ chi 'āā 'cuéeé ndaa saⁿā miiⁿ caati cuuvi ndaa saⁿā miiⁿ taachi ndaa tiempo yeⁿe sa chi ndāā sa. ⁷ Niicu maaⁿ poder yeⁿe nuunⁿdi chi idiiⁿ chi 'iiⁿyāⁿ dinuuⁿndí yā ní 'āā ngii. Chííⁿ chi diiⁿ chi Saⁿā Nuunⁿdi nguéeé cuuvi 'cuuⁿmiⁿ sa maaⁿ sa chi Saⁿā Nuunⁿdi. 'Tíica rā vaa ndii tiempo chi 'iiⁿyāⁿ chi diiⁿ chi nguéeé cuuvi 'cuuⁿmiⁿ Saⁿā Nuunⁿdi, 'iiⁿyāⁿ miiⁿ caⁿá yā táámá lado. ⁸ Tuu'mi ní ndaa Saⁿā Nuunⁿdi ní 'iiⁿyāⁿ cuuvi n'diichí yā saⁿā níicú Señor Jesucristo caⁿá yā 'caaⁿnún yā Saⁿā Nuunⁿdi ndúúcu 'yúúné chi candaā yeⁿe cheendí yā ní di'cuinú yā Saⁿā Nuunⁿdi miiⁿ ndúúcu deevé yeⁿe yā taachi nndaa yā. ⁹ Ní Saⁿā Nuunⁿdi miiⁿ ndaa sa ndúúcu n'dee n'dái poder yeⁿe Satanás chi yááⁿ'guiinūⁿ. Ní diiⁿ sa vaadi n'giinu ndúúcu milagros chi nguéeé vaadi cuaacu. ¹⁰ Ní ndúúcu nducuéⁿe chi nguéeé n'daacā idiiⁿ sa ntiiⁿnyuⁿ yeⁿe sa ní nginnche'ei sa 'iiⁿyāⁿ caati cuuvi diiⁿ sa ganar 'iiⁿyāⁿ lado yeⁿe yā, 'iiⁿyāⁿ chi caⁿá yā infierno. Ni chó'oo nducuéⁿe chuū caati 'iiⁿyāⁿ nguéeé neⁿé yā 'caandiveén yā nduudu cuaacu yeⁿe Ndyuūs, nduudu chi diiⁿ chi ninguáⁿ'ai yā. ¹¹ Níicú cucáavā chi diíⁿ yā 'túúca, Ndyuūs caⁿá yā diíⁿ yā ndúúcu 'iiⁿyāⁿ s'eeⁿ chi cu'téenu yā nduudu yaadi yeⁿe Saⁿā Nuunⁿdi. ¹² Ní nducyáácá 'iiⁿyāⁿ chi nguéeé neⁿé yā cu'téenu yā nduudu cuaacu caati neⁿe ca yā cosas chi nguéeé n'daacā ní cuuvi yā condenado.

Ndyuūs ndεevé yā nducyaaca 'iiⁿyāⁿ chi nadanguáⁿ'ai yā 'iiⁿyāⁿ

¹³ Níicú ndís'tiī hermanos yeⁿe yú, Señor neⁿé yā ndís'tiī. Ní nús'uu ní cuéⁿé daāⁿmaⁿ ca'á 'nū gracias Ndyuūs cucáavā ndís'tiī caati Ndyuūs ndεevé yā ndís'tiī vmnááⁿ vmnaaⁿ chi cuuvi nadanguáⁿ'ai yā ndís'tiī cucáavā Espíritu N'dai yeⁿe yā. Espíritu N'dai yeⁿe Ndyuūs miiⁿ ní cuuvi didεevε ndís'tiī caati ndís'tiī cuuvi cu'téenu nī nduudu cuaacu yeⁿe Ndyuūs. ¹⁴ Ní Ndyuūs yaa'ví yā ndís'tiī chi cuuvi yeⁿe yā ndís'tiī cucáavā nduudu cuaacu yeⁿe yā chi n'giindiveén nī ní diiⁿ chi cuuvi nanguáⁿ'ai nī. Ní nduudu cuaacu miiⁿ nús'uu ngaⁿá 'nū nanááⁿ ndís'tiī. Ní Ndyuūs neⁿé yā chi ndís'tiī tunéⁿ nī chi cuuvi canee nī tan'dúúca Señor Jesucristo yeⁿe yú.

¹⁵ 'Tíicā maaⁿ ní 'cuεetinéé n'daacá nī ndúúcu chi i'téenu nī. N'gaacú nī yeⁿe chi ngi'cueéⁿ 'nū ndís'tiī taachi sneé 'nū nduucú nī ní yeⁿe chi idinguún 'nū yeⁿe nī. ¹⁶ Maaⁿ Señor Jesucristo yeⁿe yú ndúúcu Ndyuūs Chiida yú dinéⁿe yā s'uuún caati Ndyuūs ní n'dai taavi. Ní cueⁿe daāⁿmaⁿ itée yā s'uuún 'viich'εεtíinūⁿ ní cānee ngiinu yú vaadi n'dai taavi yeⁿe Ndyuūs chi Ndyuūs caⁿa yā chi tée yā s'uuún. ¹⁷ Neⁿé chi Ndyuūs ní tée yā 'viich'εεtíinūⁿ ndís'tiī na staava yeⁿe nī ní tée yā fuerzas n'dís'tiī caati ndís'tiī ní cuuvi diíⁿ nī nducuéⁿe chi n'daacā ní caaⁿ'máⁿ nī dámaaⁿ nduudu chi n'daacā.

3

Caaⁿ'maⁿngua'á nī caavā nús'uu

¹ Maaⁿ ní yeⁿe nducuéⁿe, ndís'tiī hermanos yeⁿe 'nū caaⁿ'maⁿngua'á nī cucáavā nús'uu chi niiⁿnúúⁿ nūuⁿ cuuvi candéé 'nū nduudu cuaacu yeⁿe Ndyuūs na núúⁿmáⁿ cuaaⁿ. Ní 'iiⁿyāⁿ cuuvi cu'téenu yā nduudu cuaacu miiⁿ ní cuuvi din'daacá yā ní diíⁿ yā chiiⁿ chi Ndyuūs neⁿé yā tan'dúúca chi ndís'tiī diíⁿ nī. ² Caaⁿ'maⁿngua'á nī ntúūⁿ chi cuuvi nadanguáⁿ'ai 'nū yeⁿe 'iiⁿyāⁿ chi nguéeé n'daacā idiíⁿ yā chi perverso yā caati

nguée nducyaaca 'ii'yāⁿ i'téenu yā Señor Jesucristo. ³ Naati Señor Jesucristo ní dámaāⁿ n'daacā dííⁿ yā ní nducuéⁿē tiempo nginneé yā ndís'tiī chi 'áamá canee nī ndúúcū chi i'téenu nī. Ní candee yā cuidado ndís'tiī yeⁿe dendu'ū chi nguεε n'daacā. ⁴ Ni véé 'viich'εētínūⁿ yeⁿé 'nū ndúúcū Señor ndúúcū ndís'tiī caati ndís'tiī ní idiíⁿ nī nducuéⁿē chi caⁿa 'nū nduucú nī chi canee chi dííⁿ nī ní 'tíicā caⁿá nī dííⁿ nī. ⁵ Neⁿé 'nū chi Señor Jesucristo cunneé yā ndís'tiī chi cuuvi deenú nī na staava yeⁿé nī de'ē chi vaadi neⁿe yeⁿé Ndyuūs. Ní cuuvi yeⁿe nī maāⁿ 'viich'εētínūⁿ chi yeⁿe Cristo. Ní cuuvi cucheé nī yeⁿe tanducuéⁿē chi cuchii.

Canee chi diiⁿ yú ntiiⁿnyuⁿ

⁶ Maaⁿ ní ndís'tiī hermanos yeⁿe yú, itée 'nū orden ndís'tiī ndúúcū chi dúúchí Señor Jesucristo chi divii nī yeⁿe hermanos yeⁿe yú chi nguée neⁿé yā dííⁿ yā ntiiⁿnyuⁿ ní nguée dííⁿ yā tan'dúúcā chi nús'uu chi'cueéⁿ 'nū 'ii'yāⁿ. ⁷ Ndís'tiī ní deenú nī tan'dúúcā chi cánéé chi ch'εetineé nī. Ní dííⁿ nī ntiiⁿnyuⁿ tan'dúúcā chi dííⁿ 'nū taachi sneé 'nū ndúúcū nī ní dííⁿ 'nū ntiiⁿnyuⁿ. ⁸ Ní nguée sta'á 'nū pan yeⁿe mar 'áamá ndís'tiī chi nguée cáí 'nū. Naati 'tíicā dííⁿ 'nū. Dííⁿ 'nū ntiiⁿnyú ndii nguuvi ndíí n'gaaⁿ chi nguée di'vaachí 'nū mar 'áamá ndís'tiī. ⁹ Ní 'áará chí cuuvi ngiicá ndís'tiī chi tée nī necesidades yeⁿé 'nū nguεε dííⁿ 'nū 'tíicā. Idiiⁿ 'nū ntiiⁿnyúⁿ chi neⁿé 'nū cu'neéⁿ 'nū cáávā 'áamá ejemplo nanááⁿ ndís'tiī caati cuuvi dííⁿ nī tan'dúúcā chi dííⁿ 'nū. ¹⁰ Ní taachi ch'εetineé 'nū ndúúcū ndís'tiī caⁿa 'nū nduucú nī nduudú 'cūū. 'Ii'yāⁿ chi nguée neⁿé yā dííⁿ yā ntiiⁿnyuⁿ nguée che'é yā. ¹¹ Ch'iindiveéⁿ 'nū chi duu'vi 'ii'yāⁿ chiicá yā nguaaⁿ ndís'tiī nguée chiicá n'daaca yā ti nguée idiíⁿ yā ntiiⁿnyuⁿ ní neené n'dee n'dái dííⁿ yā cosas chi nguée dichíí'vē. ¹² 'Ii'yāⁿ chi diiⁿ 'tíicā, ca'á 'nū orden ní di'cuítu 'nū 'ii'yāⁿ ndúúcū chi duuchi Señor Jesucristo yeⁿé yú chi dííⁿ yā ntiiⁿnyuⁿ ndúúcū vaadi yeenú. Níicú dííⁿ yā ganar cáávā gastos yeⁿé yā.

¹³ Ndís'tiī hermanos yeⁿé 'nū nguée cánéé chi cuuvi 'daan'dí nī chi dííⁿ nī dendu'ū chi n'daacā. ¹⁴ Ndúútí chi 'áamá 'ii'yāⁿ nguée cu'neeⁿveéⁿ yā nduudu chí idinguúⁿ 'nū na carta 'cūū, n'diichí nī du'u chi 'ii'yāⁿ miiⁿ ní nguée dííⁿ nī de'ē vεε ndúúcū yā. 'Tíicā ní cuuvi 'cuináaⁿ yā. ¹⁵ Ní nguée dííⁿ nī ndúúcū yā tan'dúúcā chi contra yeⁿé nī naati ca'á nī consejo 'ii'yāⁿ miiⁿ tan'dúúcā chi 'díínu nī 'ii'yāⁿ.

Yeⁿe vaadi n'dai yeⁿé Ndyuūs

¹⁶ Neⁿé chi maaⁿ Señor Jesucristo chi vεε vaadi 'diiⁿ yeⁿé yā cueⁿe daāⁿmaⁿ itée yā ndís'tiī vaadi 'diiⁿ nducuéⁿē tiempo ní nducuéⁿē cuaaⁿ. Señor miiⁿ ní cunéé yā ndúúcū nducyaaca ndís'tiī.

¹⁷ 'Úú Pablo idinguúⁿ nduudu 'cūū yeⁿe carta 'cūū ndúúcū ta'á ní canéé letra yeⁿé. 'Tíicā dinguúⁿ ní 'tíicā dííⁿ firmar nducuéⁿē cartas yeⁿé. ¹⁸ Neⁿé chi Señor Jesucristo yeⁿe yú tée yā nducyáacá ndís'tiī nducuéⁿē vaadi n'dai yeⁿé yā. 'Tíicā cuuvi.

CARTA VMNÁÁⁿ VMNAAⁿ YEⁿE SAⁿĀ TIMOTEO

¹ 'Úú Pablo 'úú. Ní 'úú apóstol yeⁿe Señor Jesucristo caati Ndyuūs ndúú^{cū} Señor Jesucristo dichó'o yā 'úú. Ní snéé ngiinu yú 'iiⁿ'yāⁿ miiⁿ yeⁿe yú chi nadanguáⁿ'ai yā s'uuúⁿ. ² 'Úú ngiicá compañero yeⁿ'é chi idingúuⁿ yā carta 'cū^ū yeⁿe dii Timoteo chi saⁿ'ā chi cuaacu níⁿ'nyúⁿ i'téenu sa Señor Jesucristo yeⁿ'ē yú. Ní alumno yeⁿ'é. Ní tan'dúú^{cā} chi daīyā 'tíicā di. Neⁿ'é chi Ndyuūs chiida yú ndúú^{cū} Señor Jesucristo yeⁿ'ē yú tée yā dii vaadī n'dai yeⁿ'é yā ndúú^{cū} vaadī ya'ai 'iinú yeⁿ'é yā. Ní tée yā dii vaadī 'diiⁿ yeⁿ'é yā.

Ngāⁿ'á yā yeⁿe 'iiⁿ'yāⁿ chi nguéé n'daācā ngi'cueeⁿ yā

³ Dii, Timoteo, 'úú neⁿ'é chi cūnee di yāāⁿ Efesio tan'dúú^{cā} chi 'āā yaa'ví dii taachi cueⁿ'é yāⁿ'āa Macedonia ti véé 'iiⁿ'yāⁿ chi chi'cueeⁿ doctrina chi n'dááⁿ. Yaa'vi di 'iiⁿ'yāⁿ s'eeⁿ chi nguéé ngi'cueeⁿ doctrina chi n'dááⁿ. ⁴ Ní yaa'vi di 'iiⁿ'yāⁿ yeⁿe yāāⁿ miiⁿ chi nguéé 'caandiveéⁿ yā yeⁿe cuentos yeⁿ'é yā chi falsos. Ndíi nguéé ndúú 'caandiveéⁿ yā nduudu chi chi'cueeⁿ 'iiⁿ'yāⁿ ndiicú^ū. Nduudu miiⁿ ní nguéé dichíí'vē. Dámaāⁿ diiⁿ chi 'iiⁿ'yāⁿ ch'εecu cheendí yā ní nguéé nginnee 'iiⁿ'yāⁿ tan'dúú^{cā} chi Ndyuūs neⁿ'é yā. Caati Ndyuūs dichó'o yā orden chi 'iiⁿ'yāⁿ ngi'cueeⁿ yā cáāvā chi tanáⁿ'ā 'iiⁿ'yāⁿ cuuvi cu'téenu cá yā Ndyuūs.

⁵ Ní ngaⁿ'a yú tan'dúú^{cā} Ndyuūs neⁿ'é yā taachi ngi'cueeⁿ yú ndúú^{cū} vaadī neⁿ'e chí ngíicá ná staava yeⁿ'ē yú chi Ndyuūs 'āā didεεvé yā. Tanducuéⁿ'ē ní diiⁿ yú ndúú^{cū} vaanicadínuuⁿ yeⁿe yú chi ndεεve. Ní i'teenu yú Ndyuūs ndúú^{cū} núúⁿ'máⁿ staava yeⁿ'ē yú. ⁶ Naⁿ'a 'iiⁿ'yāⁿ ndaacadaamí yā yeⁿ'ē nduudu yeⁿ'é Ndyuūs ní n'giindiveéⁿ yā nduudu chi nguéé dichíí'vē. Ní n'gεecu cheendí yā. Ní cuuvi ndái yā. ⁷ 'Iiⁿ'yāⁿ s'eeⁿ ní neⁿ'é yā ca'cueéⁿ yā ley yeⁿ'é Ndyuūs naati nguéé tuumicadínuuⁿ yā nduudu chi ngaⁿ'a yā, ndíi nguéé ndúú nduudu chi ca'cueeⁿ yā 'áará chí díⁿ yā tan'dúú^{cā} chi déenu yā tanducueⁿ'ē.

⁸ S'uuúⁿ ní deenu yú chi ley yeⁿ'e Moisés ní n'dai ndúú^{ti} chi cu'téenu n'daāca yú yeⁿ'ē. ⁹ Deenu yú chi ley miiⁿ nguéé dámaāⁿ caavā 'iiⁿ'yāⁿ chi din'daacá yā naati caavā 'iiⁿ'yāⁿ chi nguéé diiⁿ yā tan'dúú^{cā} chí ngaⁿ'ā ley, caavā 'iiⁿ'yāⁿ chi nguéé n'giindiveéⁿ yā chiiⁿ chi ngaⁿ'ā ley, níicú caavā 'iiⁿ'yāⁿ chi nguéé n'daacā, caavā 'iiⁿ'yāⁿ chi idinuuⁿndi, caavā 'iiⁿ'yāⁿ chi nguéé díⁿ yā respetar Ndyuūs ndíi nguéé díⁿ yā respetar religión, ní caavā 'iiⁿ'yāⁿ chi n'giiⁿ'núⁿ yā chεεcú yā o chiidá yā, ní cáāvā 'iiⁿ'yāⁿ chi n'giiⁿ'núⁿ yā 'iiⁿ'yāⁿ. ¹⁰ Ley miiⁿ ní caavā saⁿ'ā chi caⁿ'a sa ndúú^{cū} n'daataá o n'daataá chi caⁿ'a tá ndúú^{cū} saⁿ'ā ní nguéé yeⁿ'e yā vi'i ní cáāvā saⁿ'ā chi caⁿ'a sa ndúú^{cū} saⁿ'a chi duuchineeⁿ sa ndúú^{cū} sa chi vi'i, ní cáāvā 'iiⁿ'yāⁿ chi duucú yā 'iiⁿ'yāⁿ caati cuuvi dichíí've yā táámá 'iiⁿ'yāⁿ ní cáāvā 'iiⁿ'yāⁿ chi indeē ndúú^{dú} yaadi, ní caavā 'iiⁿ'yāⁿ chi ngaⁿ'a yā chi cuaacu chiiⁿ chi ngaⁿ'a yā ní n'gai yā: “Por Dios”, chi 'tíicā, ní nguéé 'tíicā. Ní ley miiⁿ ní caavā 'iiⁿ'yāⁿ chi ngi'cueeⁿ yā nducuéⁿ'ē chi nguéé n'daācā ní nguéé tan'dúú^{cā} Ndyuūs chi'cueeⁿ yā 'iiⁿ'yāⁿ. ¹¹ Naati chuū chi ngi'cueeⁿ chi nduudu n'dai yeⁿ'e evangelio ní n'dēēve n'dai chi nanguaⁿ'āi 'iiⁿ'yāⁿ, ní yeⁿ'é Ndyuūs chi n'dai taavi. Ní Ndyuūs dichó'o yā 'úú chi caaⁿ'máⁿ nduudu miiⁿ.

Caaⁿ'maⁿ yú, gracias Ndyuūs ti ya'ai 'iinú yā s'uuúⁿ

¹² 'Úú ní ca'á gracias Señor Jesucristo yeⁿ'ē yú chi itée yā fuerzas 'úú chi díⁿ ntiⁿ'nyuⁿ yeⁿ'é yā. Ní s'neéⁿ yā 'úú tan'dúú^{cā} 'áámá 'iiⁿ'yāⁿ chi véé valor yeⁿ'é yā. Ní s'neéⁿ yā 'úú na ntiⁿ'nyuⁿ yeⁿ'é yā. ¹³ Ní vmnááⁿ vmnaaⁿ chi Jesucristo yaa'ví yā 'úú chi cuuvi yeⁿ'é yā, 'úú ní neené caaⁿ'maⁿ taáⁿ yeⁿ'e Jesucristo ní cachiicá can'daá 'iiⁿ'yāⁿ chi i'téenu yā Jesucristo ti neⁿ'é i'nuuⁿ cá'ai 'iiⁿ'yāⁿ. Ní caneé taaⁿ contra Jesucristo. Naati Ndyuūs ya'ai 'iinú yā 'úú 'áará chí díⁿ 'túú^{cā} taachi 'āā cuéé cu'teenú 'iiⁿ'yāⁿ, ní nguéé deenú dē'ē cáāvā chí díⁿ 'tíicā. ¹⁴ Ní Señor diiⁿ n'dai cá yā nduucú, ní 'úú i'teenú Jesucristo, ní neⁿ'é Jesucristo caati maaⁿ ní 'úú ní yeⁿ'é Jesucristo 'úú.

¹⁵ Ní nduudu 'cūū ní nduudu cuaacu chi Cristo Jesús ndaá yā iⁿ'yééⁿdi 'cūū chi nadanguáⁿai yā nducyaaca 'iiⁿ'yāⁿ caati idinuuⁿndí yā, ní n'dáí taavi chi nducyaaca 'iiⁿ'yāⁿ cu'téenu yā nduudú 'cūū. Ní deenú chi 'úú ní ch'εετε cá nuuⁿndi yeⁿ'é nguéé ti tanáⁿ'a yā. ¹⁶ Naati cucáávā chi véé nuuⁿndi yeⁿ'e 'úú Ndyuūs ya'ai 'iinú yā 'úú caati Señor Jesucristo ch'iⁿ'í yā 'úú tanducuéⁿ'ē vaadí n'dáí taavi yeⁿ'é yā, 'úú chi ch'εετε cá nuuⁿndi yeⁿ'é. 'Tíicā ní Ndyuūs véé paciencia yeⁿ'é yā nduucú vmnááⁿ vmnaaⁿ ní s'neéⁿ yā 'úú chi 'úú tan'dúúcā 'áámá ejemplo yeⁿ'e tanáⁿ'ā 'iiⁿ'yāⁿ chi cuayiivi caⁿ'á yā cu'téenu yā Cristo ni véé vida cueⁿ'e daāⁿmaⁿ yeⁿ'e yā. ¹⁷ Cáávā nducuéⁿ'ē chuū cueⁿ'e daāⁿmaⁿ ca'a yú Ndyuūs honra ní dich'εετε ca yú Ndyuūs chi rey chi 'áámá canee cueⁿ'e daāⁿmaⁿ ní nguéé n'gii yā. Ní maaⁿ ní nguéé cuuvi snaaⁿ yú Ndyuūs chi 'áámá n'dyáⁿ'ā Dendyuūs yeⁿ'e yú. 'Tíica rā vaa.

¹⁸ Maaⁿ ní, dii Timoteo chi tan'dúúcā daiyá, i'neéⁿ encargo 'cūū ndúúcū dii. Ní encargo 'cūū chííⁿ chi tiempo chi 'āā chó'ōo 'iiⁿ'yāⁿ profetas caⁿ'a yā yeⁿ'ē di yeⁿ'ē chi caⁿ'á di diiⁿ di. Maaⁿ ní cuchéé di yeⁿ'ē tanducuéⁿ'ē ní diiⁿ di tan'dúúcā chi diiⁿ 'áámá soldado chi nguⁿ'u n'daacā sa. 'Tíicā diiⁿ di tan'dúúcā chi profetas caⁿ'a yā yeⁿ'ē di tiempo chi 'āā chó'ōo. ¹⁹ Dii ní cu'téenu n'daacā di ní diiⁿ n'daacā di ndúúcū vaanicadínnūⁿ yeⁿ'ē di chí n'dai. Náⁿ'ā 'iiⁿ'yāⁿ ni nguéé diiⁿ n'daacá yā caati vaanicadínnūⁿ yeⁿ'é yā ní nguéé n'dai. Ní cáávā chuū nguéé i'téenu yā Señor Jesucristo maaⁿ ní canéé yā tan'dúúcā chi yaⁿ'ai yeⁿ'e Ndyuūs. ²⁰ 'Túúcā chó'ōo yeⁿ'e saⁿ'ā Himeneo ndúúcū saⁿ'ā Alejandro ní 'úú deenú chí canéé yā a cuenta yeⁿ'e yááⁿ'n'guiinūⁿ maaⁿ. Ní 'íicú cuuvi deenú yā chi 'āā ntéé cuuvi caaⁿ'máⁿ yā ní nguéé diiⁿ yā ofender Ndyuūs yeⁿ'e yú.

2

Yeⁿ'e chí cuuvi caaⁿ'maⁿngua'a yú

¹ Vmnááⁿ vmnaaⁿ ngiicá dii Timoteo chi caaⁿ'maⁿngua'a di cáávā nducyáácá 'iiⁿ'yāⁿ ní ca'a di gracias Ndyuūs cáávā nducyáácá 'iiⁿ'yāⁿ. ² Ní canee cuuⁿ'miⁿ chi caaⁿ'maⁿngua'a di cáávā saⁿ'ā reyes níicú cáávā nducyáácá 'iiⁿ'yāⁿ 'iiⁿ'ntyéⁿ'ē caati cuuvi 'cuetinee yú n'daacā ní nguéé ndúúcū vaadí 'caa'va ti 'cuetinee yú ndúúcū vaadí 'diiⁿ. Ní diiⁿ yú tanducuéⁿ'ē tan'dúúcā chi Ndyuūs neⁿ'é yā chi diiⁿ yú. Ní 'cuetinée yú n'daacā yeⁿ'e nducuéⁿ'ē ndúúcū 'iiⁿ'yāⁿ. ³ Ti chuū ní n'daacā nanááⁿ Ndyuūs ní inéé yiinū taaví yā taachí diiⁿ yú 'tíicā. Ndyuūs yeⁿ'ē yú nadanguáⁿai yā s'uuúⁿ. ⁴ Ní neⁿ'é yā chi nducyaaca 'iiⁿ'yāⁿ ninguaⁿ'ai yā ní tuumicadínnūⁿ yā chéé chí nduudu cuaacu yeⁿ'é Ndyuūs. ⁵ Deenu yú chi véé 'áámá Ndyuūs. Ní véé 'áámá 'iiⁿ'yāⁿ chi caaⁿ'máⁿ yā na lugar yeⁿ'ē yú nanááⁿ Ndyuūs. Ní 'iiⁿ'yāⁿ miiⁿ ní Saⁿ'ā chi Daiyá yā chi Señor Jesucristo yeⁿ'ē yú. ⁶ Ní Jesucristo caⁿ'á yā vida yeⁿ'e maáⁿ yā chi ch'iⁿ'i yā cáávā chi nadí'vε yā nuuⁿndi yeⁿ'ē nducyáácá 'iiⁿ'yāⁿ ní 'iicu cuuvi nadinguáⁿ'ai yā nducyaaca 'iiⁿ'yāⁿ. Chuū ní Cristo dííⁿ yā tiempo chi n'daacā 'íicú 'cuuⁿ'miⁿ yā chi Ndyuūs neⁿ'é yā chi nducyaaca 'iiⁿ'yāⁿ cuuvi ninguaⁿ'āi. ⁷ Ní cáávā chuū Ndyuūs dich'ó'o yā 'úú chi 'úú cuuvi apóstol yeⁿ'é yā. Ní 'úú ca'cueéⁿ 'iiⁿ'yāⁿ nduudu cuaacu yeⁿ'é Ndyuūs nanááⁿ 'iiⁿ'yāⁿ gentiles chi nguéé yeⁿ'ē ndaata 'iiⁿ'yāⁿ Israel. 'Úú ngaⁿ'á nduudu cuaacu yeⁿ'é Ndyuūs ní 'íicú 'iiⁿ'yāⁿ cuuvi cu'téenu yā. Nguéé ngaⁿ'á nduudu yaadi.

⁸ Neⁿ'é chi ndii nducuéⁿ'ē cuaaⁿ nducyáácá 'iiⁿ'yāⁿ cááⁿ'máⁿngua'a yā ndúúcū nuuⁿmaⁿ staava yeⁿ'é yā chi δεενε. Ní nguéé nduuvi taáⁿ yā, ndíí nguéé ndúú 'cuuⁿ'maⁿ yā. ⁹ Ní 'tiicá ntúūⁿ n'daataá canéé chí cunúu yā catecai yā chi n'daacā chi nguéé yaⁿ'āi ca chíi'vε ní nguéé neené n'dεενεé. Ní nguéé canéé chí dich'εετε yā maáⁿ yā. Ní nguéé dííⁿ yā 'aama peinada tííⁿ yā chi nguéé n'daacā. Ní nguéé snuuⁿ yā vmnaaⁿ cuerpo yeⁿ'é yā n'deeé n'dáí 'dííⁿnguāⁿ ndíí nguéé ndúú perlas. Ní nguéé cunúuⁿ yā tiinūⁿ chi yaⁿ'ai chíí'vε. ¹⁰ Naati n'daata s'eeⁿ canee chi din'daaca yā nanááⁿ 'iiⁿ'yāⁿ tan'dúúcā chi Ndyuūs neⁿ'e yā ní tan'dúúcā chi canee chi diiⁿ nducyaaca n'daataá chi cuaacu chi i'téenu yā 'iivú Ndyuūs. ¹¹ Ní n'daataá s'eeⁿ canee chi n'geeⁿ yā chííⁿ chi n'giindiveeⁿ yā ní cuneé yā chi ndiicúuⁿ yā. ¹² Nguéé neⁿ'é chi n'daataá ca'cueeⁿ yā saⁿ'ā chεeti yaacū ní nguéé cunee yā lado yeⁿ'e 'iiⁿ'ntyéⁿ'ē chi caaⁿ'maⁿ ntiiⁿ'nyuⁿ yā yeⁿ'e saⁿ'ā. Ní nguéé canéé chi

caaⁿmaⁿ n'daataá s'eeⁿ cheeti yaácū. ¹³ Caati Ndyuūs vmnááⁿ vmnaaⁿ din'dái yā saⁿā Adán ní cuayiivi miiⁿ ní din'dái yā n'daataá Eva. ¹⁴ Ní yááⁿn'giinūuⁿ nguéeⁿ chinnche'ei sa Adán miiⁿ naati chinnche'ei sa n'daataá Eva miiⁿ ní dinuuⁿndi tá. ¹⁵ De'ē chúúcā n'dai 'áámá n'daataá chi véé daiyá tá. Cuuvi nguáⁿ'ai tá nduuti chi 'áámá cunee tá ndúúcū chi i'teenu tá, ní nduuti chi dinéⁿ'e tá nducyaaca 'iiⁿ'yāⁿ. Ní ch'iⁿ'i tá chi yeⁿ'e Ndyuūs, ní diiⁿ ta cosas chi seria.

3

Yeⁿ'e tan'dúúcā chi canee chi diiⁿ saⁿā chi obispo

¹ Chuū chi ngaⁿ'á maaⁿ ní cuaacu. 'Āā du'ú nūuⁿ saⁿā chi neⁿ'e sa cuuvi sa obispo ní cundee sa cuidado yeⁿ'e 'iiⁿ'yāⁿ yeⁿ'e yaácū canee sa chi diiⁿ sa ntiiⁿnyuⁿ chí n'daacā. ² Ní cáávā chuū saⁿā chí diiⁿ sa ntiiⁿnyuⁿ yeⁿ'e obispo canee chi 'cuetinee sa n'daacā caati 'iiⁿ'yāⁿ s'eeⁿ nguéeⁿ cuuvi caaⁿ'máⁿ yā chi véé nuuⁿndi yeⁿ'é yā. Ní saⁿā miiⁿ, sáⁿ'ā chi 'áámá nūuⁿ n'daataá yeⁿ'ē sa. Ní saⁿā miiⁿ canéé cuuⁿmiⁿ chi serio sa ní diiⁿ sa cueⁿ'e daāⁿmaⁿ ntiiⁿnyuⁿ chi n'daacā ndúúcū orden. Saⁿā miiⁿ canee chi 'cuaaⁿ sa na vaacu sa 'iiⁿ'yāⁿ chi canúúⁿ yúúⁿ. Ní canee chi ca'cueeⁿ sa n'dai. ³ Saⁿā miiⁿ nguéeⁿ cuuvi 'cúú'ví sá ní nguéeⁿ in'nuuⁿ sa vaadī 'caa'va chi 'caa'va sa. Ndí nguéeⁿ ndúú neⁿ'e sa diiⁿ sa ganar tuūmī manera chi nguéeⁿ n'daacā cáávā vicio yeⁿ'e sa. Sáⁿ'ā obispo miiⁿ canee chi diiⁿ sa 'tíicā. Canee chi manso sa ní nguéeⁿ neⁿ'e sa 'cuuⁿ'maⁿ sa ndúúcū 'iiⁿ'yāⁿ, ndí nguéeⁿ ndee sa 'aama vicio yeⁿ'e tuūmī. ⁴ Saⁿā miiⁿ canee chi ngaⁿ'ā ntiiⁿnyuⁿ sa chi n'daacā na vaacu sa ní diiⁿ sa chi daiya sa 'caandiveéⁿ yā yeⁿ'ē sa ní daiya sa diiⁿ yā respetar chiidá yā. ⁵ Ní ndúúti chi 'áámá saⁿā nguéeⁿ déenu sa caaⁿ'maⁿ ntiiⁿnyuⁿ sa na vaacu sa tuu'mi ní t'áácā cuuvi diiⁿ sa cuidado yeⁿ'e dendu'ū chi yeⁿ'e yáacū yeⁿ'é Ndyuūs? ⁶ Saⁿ'ā obispo miiⁿ nguéeⁿ canee sa tan'dúúcā 'áámá saⁿ'ā chi caama i'téenu sa Jesucristo caati cuuvi nacadíinuuⁿ sa chi ch'εete maaⁿ sa ti nguéeⁿ dinuuⁿdi sa tan'dúúcā chi diiⁿ yááⁿn'guiinūuⁿ. ⁷ Ní saⁿ'ā obispo miiⁿ canee ntúūⁿ chi din'daacā sa nanááⁿ 'iiⁿ'yāⁿ chi nguεe i'téenu yā Señor Jesucristo yeⁿ'e yú caati 'iiⁿ'yāⁿ s'eeⁿ diiⁿ yā honrar saⁿ'ā miiⁿ. Ní 'íicú saⁿ'ā obispo miiⁿ nguéeⁿ cúúví cunee sa ndúúcū vaadī 'cuiinuú chi ca'a sa lugar chi nginnche'ei yááⁿn'guiinūuⁿ saⁿ'ā miiⁿ.

Yeⁿ'ē chi canéé chi diiⁿ saⁿ'ā chi diáconos

⁸ Maaⁿ ní ngaⁿ'á yeⁿ'e saⁿ'ā diáconos chi cūnnee sa ndúúcū ntiiⁿnyuⁿ yeⁿ'e yáacū. 'Tiicá ntúūⁿ saⁿ'a sa diáconos canee chí diiⁿ sa ntiiⁿnyuⁿ chi n'daacā ndúúcū orden. Ní canéé cuuⁿmiⁿ chi saⁿ'ā serio sa. Ní canéé chí diiⁿ sa cumplir chiiⁿ chi ngaⁿ'ā sa. Saⁿ'ā miiⁿ ní nguéeⁿ cuuvi 'cúú'ví sá. Ndí nguéeⁿ ndúú neⁿ'e sa diiⁿ sa ganar tuūmī manera chi nguéeⁿ n'daacā cáávā vicio yeⁿ'ē sa. ⁹ Saⁿ'ā diácono canéé chí deenu sa n'daacā n'dai nducuéⁿ'ē enseñanza yeⁿ'ē chi i'teenu sa yeⁿ'e chi Ndyuūs chi'cueeⁿ yā s'uuúⁿ. Ní canee sa ndúúcū vaanacadíinūuⁿ yeⁿ'ē sa chi deεve. ¹⁰ Saⁿ'ā diácono ní saⁿ'ā chi 'iiⁿ'yāⁿ 'āā n'diichí yā chi n'daacā chi diiⁿ sa. Ní nduuti chi nguéeⁿ véé falta yeⁿ'ē sa tuu'mi ní cuuvi diiⁿ sa ntiiⁿnyuⁿ yeⁿ'e saⁿ'ā diáconos. ¹¹ Níicú 'tiicá ntúūⁿ n'daataá yeⁿ'e saⁿ'ā diácono canee chi táⁿ'ā seria ta ní din'daacā tá. Nguéeⁿ canee chi caaⁿ'maⁿ tá yeⁿ'e 'iiⁿ'yāⁿ. Ní canee chi din'dáaca tá yeⁿ'e tanducuéⁿ'ē chi diiⁿ tá. ¹² Níicú saⁿ'ā diácono miiⁿ ní saⁿ'ā chi 'áámá nūuⁿ n'daataá yeⁿ'ē sa. Ní canee chi ngaⁿ'ā ntiiⁿnyuⁿ sá chi n'daacā na vaacu sa ní diiⁿ sa chi daiya sa n'giindiveéⁿ yā yeⁿ'ē sa. ¹³ Caati saⁿ'ā miiⁿ chi diiⁿ n'daacā ntiiⁿnyuⁿ yeⁿ'e diácono, saⁿ'ā miiⁿ diiⁿ sa ganar lugar yeⁿ'e 'iiⁿ'yāⁿ chi honrado yā. Ní véé cá confianza yeⁿ'ē sa chi cuuvi caaⁿ'maⁿ sa yeⁿ'e Señor Jesucristo tan'dúúcā chi i'téenu sa yeⁿ'ē nduudu yeⁿ'é yā.

Yeⁿ'e chi 'iiⁿ'yāⁿ nguéeⁿ deenú yā chi yeⁿ'e Ndyuūs

¹⁴ Cunee ngiinú chi ndaa nuúⁿ n'diichí dii naati maaⁿ ní chuū idinguúⁿ yeⁿ'ē di. ¹⁵ Ní nduuti chi nguéeⁿ ndaa nuúⁿ tuu'mi cuuvi tuumicadíinuuⁿ di táácā chi cuuvi 'cuetinee 'iiⁿ'yāⁿ s'eeⁿ taachi i'téenu yā ní yeⁿ'é Ndyuūs 'iiⁿ'yāⁿ s'eeⁿ. Caati nducyaaca s'uuúⁿ chi i'teenu yú Señor Jesucristo ní yeⁿ'é Ndyuūs s'uuúⁿ. Ní s'uuúⁿ ní yáacū yeⁿ'e Ndyuūs chi canduuchi, 'tíicā s'uuúⁿ. Ní s'uuúⁿ tan'dúúcā cimientu ndúúcū pilar yeⁿ'e yáacū, 'tíicā

s'uuúⁿ ti ngaⁿa yú nduudu cuaacu yeⁿé Ndyuūs nanááⁿ nducyáácá 'iiⁿ'yāⁿ. ¹⁶ Níícú mar 'áámá 'iiⁿ'yāⁿ nguéé cuuvi caaⁿ'máⁿ yā yeⁿe enseñanzas yeⁿé Ndyuūs yeⁿé yú chi nguéé ch'εεε taavi ca, enseñanzas chi Ndyuūs chi 'cueéⁿ yā s'uuúⁿ:

Ndyuūs yeⁿe yú ndaá yā na iⁿ'yeeⁿdi 'cūū ndúú^c cuerpo tan'dúú^c s'uuúⁿ. Ní ch'iⁿ'i Espíritu N'dai yeⁿé Ndyuūs chi Cristo ní cuaacu yā. Ní ángeles yeⁿé va'ai chεeti nguuvi n'diichí yā Cristo. Ní 'iiⁿ'yāⁿ candéé yā nduudu cuaacu yeⁿé Cristo nanááⁿ 'iiⁿ'yāⁿ yeⁿe tanducuéⁿé páis yeⁿé iⁿ'yeeⁿdí 'cūū. Ní 'iiⁿ'yāⁿ yeⁿe tanducuéⁿé cuaaⁿ yeⁿe iⁿ'yeeⁿdí 'cūū ní chi'téenu yā Cristo. Ní Cristo cunaⁿa ntuúⁿ yā na va'ai chεeti nguuvi.

4

Yeⁿe 'iiⁿ'yāⁿ chi nguéé 'áámá cunee yā ndúú^c chi i'téenu yā

¹ Espíritu N'dai yeⁿé Ndyuūs ngaⁿa cuaacu yeⁿé nguuvi chi cuchii taachi ngaⁿa chí naⁿ'a 'iiⁿ'yāⁿ caⁿ'a yā ndaacadaamí yā yeⁿé nduudu cuaacu ní cu'neeⁿveéⁿ yā nduudu yeⁿe espíritus chi nginnche'ei 'iiⁿ'yāⁿ, espíritus chi ngi'cueeⁿ cosas chi nguéé cuaacu. Ní yááⁿ'n'guiinūⁿ dichó'o sa espíritus. ² Ní 'iiⁿ'yāⁿ s'eeⁿ 'caandiveéⁿ yā nduudu yeⁿe 'iiⁿ'yāⁿ chi ngaⁿ'á yā chi i'téenu yā Ndyuūs yeⁿé yú, ní nguéé cuaacu. Ní caⁿ'á yā n'giindiveéⁿ yā nduudu yeⁿe 'iiⁿ'yāⁿ chi ngaⁿ'a nduudu yaadi. Níícú 'iiⁿ'yāⁿ chi nguεε n'daacā idiíⁿ yā canee yā ndúú^c vaanicadínūⁿ yeⁿé yā chi nguéé n'daacā. Ní nguéé ya'ái yā yeⁿe chi diíⁿ yā taachi diíⁿ yā cosas chi nguéé n'daacā. ³ 'iiⁿ'yāⁿ s'eeⁿ nguéé n'guuⁿ yā chi ch'iindivaacu 'iiⁿ'yāⁿ. Ní nguéé n'guuⁿ yā chi nge'e 'iiⁿ'yāⁿ tanducuéⁿé chi nge'e yú. Deenu yú chi Ndyuūs din'dái yā tanducuéⁿé chi nge'e yú. Cáávā chi nducyáácá 'iiⁿ'yāⁿ chi i'téenu yā Ndyuūs ndúú^c 'iiⁿ'yāⁿ chi deenú yā nduudu cuaacu yeⁿé yā cuuvi che'é yā tanducuéⁿé. Ní nducyaaca 'iiⁿ'yāⁿ chi che'é yā canee chi caaⁿ'máⁿ yā gracias Ndyuūs cáávā chí che'e yā. ⁴ Deenu yú chi nducuéⁿé chi din'dái Ndyuūs chi che'e yú ní n'daacā. Ní 'iiⁿ'yāⁿ nguéé canee chi cu'neeⁿ yā 'áámá lado mar 'áámá caati canéé chi cuta'á yā ní caaⁿ'máⁿ yā gracias Ndyuūs. ⁵ Caati tanducuéⁿé dendu'ú 'cūū ní n'daacā ní 'iiⁿ'yāⁿ cuuvi che'é yā chuū ti Dendyuūs ngaⁿ'á yā 'tíicā yeⁿé na libro yeⁿé yā. Maaⁿ ní ngiica yú Ndyuūs chi Ndyuūs diíⁿ yā bendecir chuū chi che'e yú.

'Iiⁿ'yāⁿ idiíⁿ ntiiⁿnyuⁿ yā chí n'dai yeⁿe Jesucristo

⁶ Nduuti chi dii, Timoteo, ca'cueeⁿ dí dendú'u 'cūū nanááⁿ 'iiⁿ'yāⁿ chi i'téenu Señor Jesucristo tuu'mi ní dichí'vε ca di Señor Jesucristo. Ní taachi ca'cueeⁿ di nduudu n'dái 'cūū yeⁿe Jesucristo ní 'cuεetinee di tan'dúú^c chi ngaⁿ'a nduudú 'cūū tuu'mi ní idiíⁿ di chi dii maaⁿ di chi n'giindiveeⁿ di nduudu yeⁿe di ní cu'téenu ca di yeⁿé Ndyuūs. ⁷ Nguéé cu'neeⁿveeⁿ di yeⁿe cuentos zonzos chi yeⁿe íⁿ'yeeⁿdí, cuentos chi nguéé ngíicá yeⁿé Ndyuūs caati nguéé dichí'vε chi caaⁿ'maⁿ yú chuū nanááⁿ 'iiⁿ'yāⁿ. Ní tanducuéⁿé chi diiⁿ di, cuen^e daāⁿmaⁿ diiⁿ di tan'dúú^c Ndyuūs neⁿ'é yā chi diiⁿ di. ⁸ Deenu yú chi taachi diiⁿ yú ejercicios cáávā cuerpo yeⁿe yú taaⁿ 'lííⁿ chuundi dichí'vε s'uuúⁿ. Níícú taachí diiⁿ yú chííⁿ chí neⁿe Ndyuūs tanducuéⁿé dichí'vε yú caati diiⁿ yú chi n'daacā cáávā s'uuúⁿ nguuvi s'eeⁿ chi canee yú iⁿ'yeeⁿdí 'cūū níícú cucáávā nguuvi chi cuchii. ⁹ Nduudú 'cūū ní cuaacu chí cuaacu, níícú nducyáácá 'iiⁿ'yāⁿ canéé chi cu'téenu yā nduudú 'cūū. ¹⁰ Ní cáávā nduudú 'cūū ní diiⁿ yú ntiiⁿnyuⁿ. Ní n'geenu yú ngii ti 'iiⁿ'yāⁿ ngaⁿ'a taáⁿ yā yeⁿé yú. 'Tíicā chó'oo yeⁿé yú caati i'teenu yú Jesucristo ní canéé ngiinu yú Ndyuūs chi canduuchi chí cuuvi nadanguáⁿ'ai yā nducyaaca 'iiⁿ'yāⁿ ní nadanguáⁿ'ai yā nducyaaca 'iiⁿ'yāⁿ chi i'téenu yā 'yā.

¹¹ Níícú dííⁿ, Timoteo, 'úú ngaⁿ'á chi canee chi ca'cueeⁿ di nduudú 'cūū. ¹² Nguéé 'cuaaⁿ di lugar chi 'iiⁿ'yāⁿ nguéé neⁿe yā dii cucáávā chi duū'vi nguuví yeⁿé di. Din'daacā di ndúú^c tanducuéⁿé chi diiⁿ di, yeⁿé chi ngaⁿ'a di, yeⁿé chi diiⁿ di. Ní dine'e di nducyáácá 'iiⁿ'yāⁿ. Ní diitu canee di ndúú^c chi i'téenu di. Ní diiⁿ di chi vida yeⁿé di ní n'daacā nanááⁿ nducyáácá 'iiⁿ'yāⁿ. Ní vida yeⁿé di canee tan'dúú^c 'áámá ejemplo. ¹³ Níícú 'naaⁿ tiempo chi 'āā cuéé ndaá nanááⁿ di 'cueeⁿ di libro yeⁿé Ndyuūs nanááⁿ 'iiⁿ'yāⁿ. Ní yaa'vi

di 'iiⁿ'yāⁿ chi 'caandiveéⁿ yā nduudu yeⁿ'é Ndyuūs. Ní ca'cueeⁿ di 'iiⁿ'yāⁿ tanducuéⁿ'ē chi yeⁿ'é Ndyuūs neⁿ'e chi ndaá. ¹⁴ Ní diiⁿ di tanducuéⁿ'ē chi cuuvi di yeⁿ'ē ntiiⁿ'nyuⁿ chi Ndyuūs tee yā dii taachi saⁿ'ā chi 'cueeⁿ nduudu yeⁿ'e Ndyuūs ngaⁿ'á yā yeⁿ'ē chi diiⁿ di. Ní saⁿ'ā chi ngaⁿ'a ntiiⁿ'nyuⁿ yeⁿ'e yáacū s'núuⁿ yā ta'a yā ná tiiⁿ di cáávā chi cho'ó yā dii chi diiⁿ di ntiiⁿ'nyuⁿ yeⁿ'é Ndyuūs.

¹⁵ Canéé chí diiⁿ di nducuéⁿ'ē chi ngaⁿ'á dii ní diiⁿ di tan'dúúcā chi 'āā 'cueeⁿ di. Ní 'íicú 'iiⁿ'yāⁿ cuuvi deenú yā chi cu'téenu ca di nguuvi nguuvi. ¹⁶ Ní díí, Timoteo, cundéé di cuidado yeⁿ'ē maaⁿ di, ní yeⁿ'ē tanducuéⁿ'ē chi diiⁿ di, ní yeⁿ'ē chi ca'cueeⁿ di 'iiⁿ'yāⁿ. Caati nduuti chi diiⁿ di 'túúcā nadinguáⁿ'ai maāⁿ di dii ndúúcū 'iiⁿ'yāⁿ chi n'giindiveéⁿ yā nduudu yeⁿ'ē di.

5

Yeⁿ'e tan'dúúcā chi cuuvi diiⁿ di ndúúcū 'iiⁿ'yāⁿ chi i'téenu yā Ndyuūs

¹ Nguéé diiⁿ di reprender mar 'áámá saⁿ'ā ndiicúū naati ca'a di consejo saⁿ'ā miiⁿ tan'dúúcā chi chiida di. Ní diiⁿ di tratar ndúúcū saⁿ'ā da'caiyāá tan'dúúcā chi saⁿ'ā s'eeⁿ ní 'díínū di. Ní canéé chí diiⁿ di nducuéⁿ'ē chi n'daacā. ² Ní diiⁿ di tratar ndúúcū n'daataá ndiicúū tan'dúúcā chi chεecu di. Ní diiⁿ di tratar ndúúcū taⁿ'ā dá'caiyāa tan'dúúcā chi ví'i di. Ní canéé chí diiⁿ di tanducuéⁿ'ē n'daacā ndúúcū 'iiⁿ'yāⁿ.

³ Ní innee di n'daataá nguá'āa chi cuaacu níⁿ'nyuⁿ véeⁿ necesidades yeⁿ'e yā. ⁴ Naati nduuti chi n'daataá nguá'āa véeⁿ daiya tá o daiya yiinu tá da'caiyāa s'éeⁿ canéé chí din'daacá yā ní canéé chí diiⁿ cumplir obligaciones yeⁿ'é yā ndúúcū 'iiⁿ'yāⁿ yeⁿ'e familia yeⁿ'é yā. Ní da'caiyāa s'éeⁿ ní canéé chí diiⁿ yā cosas chi n'daacā cáávā chεecú yā ndúúcū chiidá yā ní cáávā chi neⁿ'e ca yā chiidá yā ndúúcū chεecú yā caati chuū ní cosa chi n'daacā, ní cosa chi Ndyuūs neⁿ'é yā chi da'caiyāa s'éeⁿ diiⁿ yā. ⁵ Ní nduuti chi cuaacu níⁿ'nyuⁿ chi n'daataá nguá'āa ní dámaāⁿ ta, canéé chí i'téenu tá Ndyuūs ndúúcū confianza ní caaⁿ'maⁿ'ngua'a tá nanááⁿ Ndyuūs ndii nguuvi ndii n'gaaⁿ. ⁶ Ní nduuti chi n'daataá nguá'āa diiⁿ tá tan'dúúcā chi maāⁿ tá neⁿ'e tá, 'áará chi canduūchi tá caneē tá tan'dúúcā chi n'diī tá nanááⁿ Ndyuūs. ⁷ 'Tiicá ntúūⁿ ca'cueeⁿ di nducuéⁿ'ē chuū nanááⁿ 'iiⁿ'yāⁿ yeⁿ'e yaacū ni tanáⁿ'ā 'iiⁿ'yāⁿ nguéé cuuvi caaⁿ'máⁿ yā chi véeⁿ nuuⁿndi yeⁿ'é yā. ⁸ Nduuti chi 'iiⁿ'yāⁿ s'eeⁿ nguéé candεε yā cuidado yeⁿ'e 'iiⁿ'yāⁿ yeⁿ'e familia yeⁿ'é yā ndúúcū chεecú yā ndúúcū chiidá yā tuu'mi ní 'iiⁿ'yāⁿ s'eeⁿ ndaacadaamí yā yeⁿ'e chi i'téenu yā ní ndii cunncaá cā nguéé ti 'iiⁿ'yāⁿ chi nguεε i'téenu yā.

⁹ Cuuvi dingúūⁿ di na lista yeⁿ'e n'daataá nguá'āa ca'áámá n'daataá nguá'āa chi 'āā ngii tá 'iinu ngeεcu 'áámá nduūyū ní 'áámá nūuⁿ isaⁿ'ā nduūcū ta. ¹⁰ Ní n'daataá nguá'āa miiⁿ canee chi 'āā ch'εetinee n'daacā tá ní taaví n'daacā tá daiya tá. Ní canéé chí n'guuⁿ tá na vaacu tá 'iiⁿ'yāⁿ chi snúuⁿ yā yúúní, ní 'āā naaⁿ'nu tá ca'ā 'iiⁿ'yāⁿ chí i'téenu yā Ndyuūs tan'dúúcā costumbre yeⁿ'é 'iiⁿ'yāⁿ yeⁿ'e ndaata yeⁿ'e yā. Ní chinnee ta'ā tá 'iiⁿ'yāⁿ chi ngiitā, ní diiⁿ tá 'āā de'é nūuⁿ ntiiⁿ'nyuⁿ chi n'daacā.

¹¹ Nguéé dingúūⁿ di na lista yeⁿ'e n'daataá nguá'āa 'áámá n'daataá nguá'āa naⁿ'a chi nguéé nduuyu yeⁿ'e tá caati cuuvi neⁿ'e ta 'caandavaacu tá ní nguéé neⁿ'e tá diiⁿ tá ntiiⁿ'nyuⁿ yeⁿ'e Cristo. ¹² Ní cuayiivi miiⁿ ní n'daataá nguá'āa miiⁿ véeⁿ culpa yeⁿ'e tá chi nguéé diiⁿ tá cumplir compromiso yeⁿ'e tá chi diiⁿ tá ntiiⁿ'nyuⁿ yeⁿ'e Cristo. ¹³ Ní más cā cuuvi diiⁿ n'daataá nguá'āa s'eeⁿ. 'Íicú cuuvi 'daān'di ntúūⁿ ta taachi ngeⁿ'ē tá 'áámá va'ai táámá va'ai. Níicú nguéé dámaāⁿ chi 'daān'di tá ti neené neⁿ'e nandē tá yeⁿ'e 'iiⁿ'yāⁿ ndúúcū nduudu chí nguéé cánéé chi caaⁿ'maⁿ tá ní diyaādí ta. Ní caⁿ'a tá miiⁿ caⁿ'a tá 'muuⁿ ní diiⁿ tá cosas chi nguéé ituneeⁿ tán'ā. ¹⁴ Cáávā chuū neⁿ'é chi n'daataá nguá'āa chi da'caiyā ta 'caandivaacu tá ni taavi tá daiya tá ní caaⁿ'maⁿ ntiiⁿ'nyuⁿ tá na vaacu tá. 'Tiicā ní 'iiⁿ'yāⁿ chi nguéé i'téenu yā Ndyuūs nguéé caaⁿ'maⁿ cúnncā yā yeⁿ'ē tá. ¹⁵ Caati n'duuví n'daataá nguá'āa chi da'caiyā tá 'āā ndaacadaami tá yeⁿ'ē Cristo ní cueⁿ'e tá lado yeⁿ'e yááⁿ'n'guiinūⁿ.

¹⁶ Ní nduuti chi 'áámá n'daataá o saⁿ'ā chi i'téenu yā Jesucristo yeⁿ'ē yú ní vεε n'daataá nguá'āa chi 'iiⁿ'yāⁿ yeⁿ'é yā, canéé chí ca'á yā n'daataá nguá'āa de'ē chi neⁿ'e tá. 'Tiicā ní

nguée canée chi ca'a 'iiⁿ'yāⁿ yeⁿ'e yaācū n'daataa ngua'áá miiⁿ. 'Tíicā ní cúúví ca'a 'iiⁿ'yāⁿ yeⁿ'e yaācū tanáⁿ'ā n'daataá nguá'āa chi cuaacu níⁿnyúⁿ chi véé necesidades yeⁿ'e tá.

¹⁷ Maaⁿ ní saⁿ'ā s'eeⁿ chi ngaⁿ'a ntiiⁿnyuⁿ n'dai yeⁿ'e yaācū ndúúcu saⁿ'ā chi ca'cueeⁿ nduudu yeⁿ'e Ndyuūs ndúúcu saⁿ'ā chi candεε nduudu yeⁿ'e Ndyuūs cuuvi cuta'a sa honor chi doble yeⁿ'e 'iiⁿ'yāⁿ s'eeⁿ yeⁿ'e yaācū. ¹⁸ 'Tíicā canée nguūⁿ na libro yeⁿ'e Ndyuūs ndii cuááⁿ vmaāⁿ. Nguée cu'nūu di yaānā duutu 'yúúduu o 'itiindu chí inde'ei nuúⁿ tī nguaaⁿ trigo ní 'íicú cuuvi che'é tī yeⁿ'ē. Ní canée nguūⁿ táámá. Saⁿ'ā chi nídiin ntiiⁿnyuⁿ cuuvi cuta'ā sa chiiⁿ'vē yeⁿ'ē sa.

¹⁹ Nguée cu'téenu di 'iiⁿ'yāⁿ chi ngaⁿ'a yā yeⁿ'e saⁿ'ā chi ngaⁿ'a ntiiⁿnyuⁿ yeⁿ'e yaācū nduuti chi nguée véé 'uuví ndúú 'iinu testigos yeⁿ'é yā. ²⁰ Naati canee chi diiⁿ di reprender nanááⁿ nducyáácá 'iiⁿ'yāⁿ yeⁿ'e yaācū 'iiⁿ'yāⁿ chi nadinuuⁿndí yā. Ní 'íicú tanáⁿ'ā 'iiⁿ'yāⁿ ní dí'va'á yā. ²¹ Maaⁿ ní 'úú Pablo ngaⁿ'á ngii dii Timoteo chuū nanááⁿ Dendyuūs ní nanááⁿ Señor Jesucristo ní nanááⁿ ángeles chí Ndyuūs ndεεve yā. Diiⁿ di nducuéⁿ'ē chuū ní nguée nadacadínuuⁿ di chi 'áámá yā chi ch'εεte cá yā nguée ti táámá yā. Ní 'āā daamá nūuⁿ diiⁿ di ndúúcu nducyaaca 'iiⁿ'yāⁿ. ²² Nguée ndεεve nuuⁿ di 'áámá saⁿ'ā chi caaⁿ'maⁿ ntiiⁿnyuⁿ sa yeⁿ'e yaācū nduuti chi nguée n'diichí di saⁿ'ā miiⁿ 'naaⁿ tiempo. Ní nguée véé 'áámá parte yeⁿ'ē di ndúúcu saⁿ'ā miiⁿ taachi dinuuⁿndí sa. Diví di yeⁿ'e nducuéⁿ'ē chi nguée n'daacā ní nguée dinuuⁿndí maāⁿ di.

²³ Maaⁿ ní taachi ya'āi chεeti di nguée cu'u di dámaāⁿ nuūⁿnīⁿ caati cuuvi cu'u di 'téé vino. Ní taama vmnéⁿ'ēe chi ya'āi cuerpo yeⁿ'ē di cu'u di 'téé vino.

²⁴ Ní nuuⁿndi chi diiⁿ náⁿ'ā 'iiⁿ'yāⁿ, ní deenu yú ti n'diichi yú vmaāⁿ chi ndaā nguuvi chi Ndyuūs n'diichí yā nuuⁿndi yeⁿ'e yú. Níicú nguée deenu yú nuuⁿndi chi diiⁿ tanáⁿ'ā 'iiⁿ'yāⁿ naati cuayiivi míⁿ taachi n'diichi Ndyuūs nuuⁿndi yeⁿ'e yú tuu'mi ní snaaⁿ yú nuuⁿndi yeⁿ'é yā. ²⁵ 'Tiicá ntúūⁿ snaaⁿ yú nducuéⁿ'ē chi n'daacā chi diiⁿ 'iiⁿ'yāⁿ. Ní 'áará chí nguée inaaⁿ yú maaⁿ chiiⁿ chi n'daacā chi díⁿ yā cuayiivi ní Ndyuūs idiⁿ yā chi cadiinuuⁿ yú táácā yeⁿ'é 'iiⁿ'yāⁿ s'eeⁿ.

6

¹ Nducyaaca 'iiⁿ'yāⁿ chi i'téenu yā Jesucristo chi diiⁿ ntiiⁿnyuⁿ yeⁿ'e criado o criada ní 'áámá canée yā na ntiiⁿnyuⁿ yeⁿ'ē 'iiví yā chi esclavo yā, canée yā tan'dúúca chi véé 'áámá yugo na daandú yā. Ní 'iiⁿ'yāⁿ esclavos canee chi diiⁿ ca yā respetar 'iivi yā. Níicú 'iivi yā nguée cuuvi cunncā caaⁿ'maⁿ yā yeⁿ'e Señor Jesucristo yeⁿ'e yú ndíi nguée ndúú yeⁿ'ē chi ca'cueeⁿ yú. ² Ní saⁿ'ā esclavos chi i'téenu sa ní véé 'iivi sa chi 'tiicá ntúūⁿ i'téenu yā, canée chi diiⁿ ca sa respetar 'iivi sa tan'dúúca chi 'aama 'iivi sa chi nguée i'téenu yā. Naati canee chi diiⁿ sa servir más cā 'iivi sa chi i'téenu yā caati 'iivi sa ní hermano ndúúcu sa caati yeⁿ'é Ndyuūs nduu 'uuví yā. Ní hermanos neⁿ'e sa 'iivi sa. Tanducuéⁿ'ē dendu'ū dii, Timoteo, ngi'cueeⁿ di ní ngaⁿ'a di.

'Iiⁿ'yāⁿ chi i'téenu yā Jesucristo ní véé vaadi yeenú yeⁿ'é yā

³ Níicú nduuti chi 'áámá 'iiⁿ'yāⁿ ngi'cueeⁿ yā táámá nduudu chí n'dááⁿ ní nguée tan'dúúca nduudu n'dai yeⁿ'ē Señor Jesucristo, ndíi nguée ndúú tan'dúúca nduudu yeⁿ'é Ndyuūs chi ngi'cueeⁿ yú yeⁿ'ē chi 'cuεetinee yú n'daacā tan'dúúca chí Ndyuūs neⁿ'e yā chí diiⁿ yú, ⁴ tuu'mi ní 'iiⁿ'yāⁿ miiⁿ ní nadacadínuuⁿ yā chí maaⁿ yā ch'εεte yā, ní nguée de'ē veε deenu yā. 'Iiⁿ'yāⁿ miiⁿ ní ch'εεcu cheendí yā. Ní díⁿ yā chí náⁿ'ā 'iiⁿ'yāⁿ nguⁿ'u yā ní ngue'éi yā ní 'caa'vá yā ní ngaⁿ'a taáⁿ yā yeⁿ'e 'iiⁿ'yāⁿ. Ní 'iiⁿ'yāⁿ miiⁿ díⁿ yā chí náⁿ'ā 'iiⁿ'yāⁿ nguée véé 'viich'εεtíinūuⁿ ndúúcu tanáⁿ'ā 'iiⁿ'yāⁿ. ⁵ Ní 'iiⁿ'yāⁿ miiⁿ díⁿ yā chí nducyaaca 'iiⁿ'yāⁿ dámaāⁿ n'gεεcu cheendí yā, ní nguée n'daacā nadacadínuuⁿ yā. Ní nguée deenú yā nduudu yeⁿ'e Cristo. 'Iiⁿ'yāⁿ miiⁿ nadacadínuuⁿ yā chí díⁿ yā ganar tuumī caati chí'téenu yā ní ngaⁿ'a yā nduudu yeⁿ'e Cristo. Diví di yeⁿ'e tanducuéⁿ'ē 'iiⁿ'yāⁿ chí 'tíicā. ⁶ Deenu yú chí 'iiⁿ'yāⁿ chí i'téenu yā Jesucristo canee n'daacá yā ndúúcu chí veε yeⁿ'é yā ní yeenú yā. Chiiⁿ chí i'téenu yā ní tan'dúúca vaadi 'cuiica ca yeⁿ'é yā. 'Tíica rā vaa. ⁷ Deenu yú chí nguée de'ē veε ndεε yú taachi ch'iindiyaāⁿ yú iⁿ'yeeⁿdí 'cūū. Ní nguée de'ē veε ntúūⁿ candεε yú yeⁿ'ē iⁿ'yeeⁿdí 'cūū taachi 'cuūví yú. ⁸ Neⁿ'e chí snee

yú in'yeeⁿdí 'cūū nduuti chi véé chi nge'e yú ndúúcu catecai yú, ní ndúúcu chuū nūⁿ cānee chi yeenu yú. ⁹ Caati 'iiⁿ'yāⁿ chi neⁿ'é yā 'cuiicá yā taachi yááⁿ'guinūⁿ n'diichi neeⁿ sa 'yā cuuvi diíⁿ yā dendú'ū chi nguεε n'daacā. Ní canee yā ndúúcu vicio zonso yeⁿ'é yā chi nguεε n'daacā. Ní nguéé dichíí'vē. Ní diiⁿ chi dinuuⁿndí yā nícu diiⁿ chi caⁿ'á yā infierno. ¹⁰ Chííⁿ chí diiⁿ chi 'iiⁿ'yāⁿ dinuuⁿndí yā ní chuū. 'Iiⁿ'yāⁿ neⁿ'e cá yā tuūmī. Ní in'nuuⁿ cá yā tuūmī chi 'āā ntéé véé tiempo chi cu'téenu yā. Ní maáⁿ yā diíⁿ yā chi ya'āi n'geenu taavi yā ngii.

Yeⁿ'e chi cuuvi din'daaca yú maaⁿ chi i'teenu yú

¹¹ Maaⁿ ní dii, Timoteo, saⁿ'ā chi yeⁿ'é Ndyuūs dii, diví di yeⁿ'e nducuéⁿ'ē chuū chi nguεε n'daacā. Ní diiⁿ di nducuéⁿ'ē chi n'daacā. Dich'εεte di Ndyuūs ní cu'téenu ca di. Diné'e ca di nducyaaca 'iiⁿ'yāⁿ ní diiⁿ di nducuéⁿ'ē ndúúcu paciencia. Ní canee di ndúúcu staava yeⁿ'e di chi n'dai. ¹² Ní taachi 'cueenu di cuuvi cáávā chi i'téenu di Ndyuūs canee diitu di ndúúcu chi i'téenu di yeⁿ'é Ndyuūs yeⁿ'ē yú. Ní diitu diiⁿ di caati chi cuuvi yeⁿ'ē di vida cueⁿ'e daāⁿmaⁿ chi cuuvi cuta'a di yeⁿ'e Ndyuūs ti Ndyuūs yaa'ví yā dii chi cuuvi yeⁿ'é yā dii. Ní dii 'āā ngaⁿ'a di chi i'téenu di Ndyuūs nanááⁿ 'yaaⁿ n'dái 'iiⁿ'yāⁿ. ¹³ Maaⁿ ní 'úú yaa'ví dii nanááⁿ Ndyuūs chi testigo yeⁿ'e yú, Ndyuūs chi itée yā vida yeⁿ'ē nducuéⁿ'ē chi véé, ní nanááⁿ Jesucristo chi 'āā ngaⁿ'a yā nduudu cuaacu yeⁿ'é Ndyuūs chiidá yā nanááⁿ gobernador Poncio Pilato. ¹⁴ 'Úú yaa'ví dii chi 'caandiveeⁿ di ní diiⁿ di nducuéⁿ'ē chi ca'á orden yeⁿ'ē di. Ni nguéé n'daaⁿ orden yeⁿ'é caati nguéé neⁿ'é chi 'iiⁿ'yāⁿ caaⁿ'máⁿ yā contra yeⁿ'ē di caavā cosa chi diiⁿ di. Diiⁿ di 'tíicā ndii tiempo chi ndaa Señor Jesucristo yeⁿ'e yú táamá vmnéⁿ'ēe. ¹⁵ Nícu tiempo taachi Ndyuūs neⁿ'é yā, Ndyuūs caⁿ'á yā dicho'ó yā Jesucristo chí n'dai taavi nanááⁿ 'iiⁿ'yāⁿ taama vmnéⁿ'ēe. Ní Cristo miiⁿ maáⁿ yā ní 'áámá n'dyáⁿ'ā 'iiⁿ'yāⁿ nūⁿ chi ngaⁿ'a ntiiⁿnyuⁿ yā yeⁿ'e nducueⁿ'ē chi véé, ní Rey chi ch'εεte taavi ca nguéé ti tanáⁿ'ā reyes. Ní 'iivi yú chi ch'εεte taavi ca nguéé ti tanáⁿ'ā saⁿ'ā chi 'iivi. ¹⁶ Dámaāⁿ Ndyuūs miiⁿ ní 'áámá canduuchí yā cueⁿ'e daāⁿmaⁿ. Ní canduuchí yā ná chideεve chi nguéé cuuvi indaa mar 'áámá 'iiⁿ'yāⁿ. Ní nguéé n'diichi mar 'áámá 'iiⁿ'yāⁿ Ndyuūs miiⁿ ndíí nguéé cuuvi snaaⁿ ra yā. Maaⁿ ní cuéⁿ'e daāⁿmaⁿ canee cuuⁿmiⁿ yú dich'εεte yú Ndyuūs ti tanducuéⁿ'ē poder chi véé ní yeⁿ'é yā. 'Tíicā rā vaa.

¹⁷ Maaⁿ ní dii, Timoteo, cuuvi di 'iiⁿ'yāⁿ 'cuiica chi nguéé nadacadíínuuⁿ yā chi ch'εεte n'dái yā. Ní nguéé cunee ngiinú yā yeⁿ'e chi véé yeⁿ'e yā caati cosa chi nguéé seguro chi 'áámá cūnee ndúúcu yā. N'dáácā ca nduuti chi 'iiⁿ'yāⁿ s'eeⁿ cu'téenu yā Ndyuūs chi canduuchi ní Ndyuūs ca'á yā n'dee n'dái dendú'ū yeⁿ'e nducuéⁿ'ē chi vεε caati cuuvi cuta'a yú ní yeenu yú. ¹⁸ Nícu díí yaa'vi di 'iiⁿ'yāⁿ 'cuiica chi din'daacá yā ní diíⁿ yā n'dee tááví ntiiⁿnyuⁿ chi n'daacā. 'Íicú canee listo yā chi cuuvi ca'a yā tanáⁿ'ā 'iiⁿ'yāⁿ chi nguéé véé yeⁿ'e yā ní innee yā 'iiⁿ'yāⁿ s'eeⁿ. ¹⁹ 'Tíicā cuuvi yeⁿ'é 'iiⁿ'yāⁿ s'eeⁿ vaadi 'cuiica yeⁿ'é yā chi vida cueⁿ'e daāⁿmaⁿ chi Ndyuūs caⁿ'á yā chi ca'a yā 'iiⁿ'yāⁿ yeⁿ'é yā.

Pablo ca'á yā últimas órdenes Timoteo ti 'cuiinū carta maaⁿ

²⁰ Dííⁿ, Timoteo, cundéε di n'daacā cuidado yeⁿ'e encargo chi 'iiⁿ'yāⁿ 'āā tee yā dii. Nguéé cu'neeⁿveeⁿ di n'dee n'dái nduudu chi ngaⁿ'a 'iiⁿ'yāⁿ yeⁿ'e cosa yeⁿ'ē in'yeeⁿdí 'cūū o yeⁿ'ē nduudu chi nguéé dichíí'vē o yeⁿ'ē chi ngaⁿ'a 'iiⁿ'yāⁿ chi nduudu deenu ní nguéé 'tíicā. ²¹ 'Iiⁿ'yāⁿ s'eeⁿ ndáácadaami yā yeⁿ'ē nduudu cuaacu yeⁿ'é Ndyuūs ní maáⁿ yā ní nguéé i'téenu yā nduudu cuaacu yeⁿ'e Ndyuūs. Maaⁿ ní 'úú neⁿ'é chi Ndyuūs téé yā dii tanducuéⁿ'ē chi n'daacā. 'Tíicā cuuvi.

CARTA CUAYIIVI YEⁿE TIMOTEO

¹ 'Úú Pablo 'úú ni 'úú apóstol yeⁿe Jesucristo caati Ndyuūs neⁿ'é yā chi 'úú cuuvi apóstol yeⁿ'é yā, ní dichó'o yā 'úú. Ní chuū chi Ndyuūs díiⁿ yā ní tan'dúúccā chi ngaⁿ'a yā chi ca'a yā vida cueⁿ'e daāⁿmaⁿ nducyaaca 'iiⁿ'yāⁿ chi yeⁿ'e Jesucristo. ² 'Úú dinguún carta 'cūū yeⁿ'e di, Timoteo, chi tan'dúúccā daiyá 'tíicā dii caati neⁿ'é taavi dii. Neⁿ'é chi Ndyuūs chiida yú ndúúccū Señor Jesucristo yeⁿ'e yú tée yā dii cosas chi n'dai, ní ya'āi 'iinú yā dii, ní tée yā dii vaadī 'diiⁿ na staava yeⁿ'ē di.

Caaⁿ'maⁿ di nduudu yeⁿ'e Cristo nanááⁿ 'iiⁿ'yāⁿ

³ Maaⁿ ní ca'á Ndyuūs gracias caavā chi 'úú dichii'vé Ndyuūs ndúúccū vaanicadínūuⁿ yeⁿ'é chi n'daacā tan'dúúccā chi diiⁿ 'iiⁿ'yāⁿ yeⁿ'e yú tiempo chi 'āā ch'ó'ōo. Ní ndii nguuví ndii n'gaaⁿ taachi ngaⁿ'anguā'a, 'úú ca'á Ndyuūs gracias, ní cueⁿ'e daāⁿmaⁿ 'úú ngaⁿ'anguā'a caavā dii, Timoteo. ⁴ Nééné neⁿ'é snaáⁿ dii, Timoteo, taachi n'gaacú yeⁿ'ē nuūⁿnīⁿ nduutinááⁿ di taachi caneé 'áámá lado yeⁿ'ē di. Ní taachi cuuvi n'diichí dii tuu'mi ní yeenú taaví. ⁵ Ní n'gaacú chi i'téenu di Ndyuūs ndúúccū núúⁿmáⁿ staava yeⁿ'ē di. Vmnaaⁿ chi i'teenu di Jesucristo táⁿ'ā Loida chi chicuⁿ'u di ní táⁿ'ā Eunice chεεcu di i'téenu yā Jesucristo. Maaⁿ ní seguro caneé chi cuaacu chi dii ntúūⁿ i'téenu di.

⁶ Cáávā chi i'téenu di Ndyuūs neⁿ'é chi n'gaacu di chi cueⁿ'é daāⁿmaⁿ diiⁿ di ntiiⁿnyuⁿ chi Ndyuūs 'āā teé yā dii ndíi tiempo chi 'úú sn'duū ta'á vmnaaⁿ tiiⁿ di. ⁷ Ndyuūs nguée 'āā teé yā s'uuúⁿ 'áámá staava yeⁿ'ē yú chi 'va'ā yú naati 'āā teé yā s'uuúⁿ 'áámá staava yeⁿ'e yú chi véé poder yeⁿ'ē yú. Ní 'íicú cuuví dinéⁿ'e yú nducyaaca 'iiⁿ'yāⁿ. Ní cuuvi nadicadínūuⁿ yú n'daacā. ⁸ Maaⁿ ní nguée 'cuináaⁿ di chi caaⁿ'maⁿ di nduudu cuaacu yeⁿ'e Señor Jesucristo yeⁿ'e yú nanááⁿ 'iiⁿ'yāⁿ. Ndíi nguée ndúú 'cuináaⁿ di yeⁿ'e 'úú caati canuúⁿ vácūū cáávā chi ngaⁿ'á nduudu cuaacu yeⁿ'e Cristo. Naati n'daacā ca diiⁿ di chi chεε di yeⁿ'e nducuéⁿ'ē chi 'cueenu di cuuvi ntúūⁿ cáávā chí ngaⁿ'a di nduudu yeⁿ'e Cristo chí nadanguáⁿ'āi 'iiⁿ'yāⁿ chi n'giindiveéⁿ yā yeⁿ'e di. Diiⁿ di tanducuéⁿ'ē ndúúccū fuerzas chi Ndyuūs itée yā dii. ⁹ Ndyuūs nadinguáⁿ'ai yā s'uuúⁿ ní yaa'ví yā s'uuúⁿ chi diiⁿ yú ntiiⁿnyuⁿ yeⁿ'e yā chí n'daacā. Nguée nadinguáⁿ'ai yā s'uuúⁿ cáávā ntiiⁿnyuⁿ chi diiⁿ yú chí n'daacā. Naati Ndyuūs díiⁿ yā 'túúccā ndúúccū s'uuúⁿ ti 'tíicā neⁿ'é yā diiⁿ yā. Níicú neené neⁿ'e yā s'uuúⁿ. Ní maaⁿ ní s'uuúⁿ 'āā nduuvi daama yú ndúúccū Cristo Jesus. Níicú Ndyuūs neⁿ'e yā s'uuúⁿ cuááⁿ vmnaaⁿ chi 'āā cuée iⁿ'yeeⁿdī. ¹⁰ Maaⁿ ní Ndyuūs ch'iⁿ'í yā chí neⁿ'e taaví yā nducyaaca 'iiⁿ'yāⁿ taachi dichó'o yā Jesucristo yeⁿ'ē yú iⁿ'yeeⁿdí 'cūū. Jesucristo ní 'iiⁿ'yāⁿ miiⁿ chi nadanguáⁿ'ai yā s'uuúⁿ. Ní nduudu cuaacu yeⁿ'ē evangelio chi yeⁿ'e vida yeⁿ'e Cristo ch'iⁿ'i s'uuúⁿ chi nguée 'aama 'cuūvi yú. Níicú cáávā chi nadanguáⁿ'ai yā s'uuúⁿ cuuvi cunduuchi yú cueⁿ'e daāⁿmaⁿ.

¹¹ Níicú Ndyuūs nídeevé yā 'úú chí caaⁿ'máⁿ nduudu cuaacu yeⁿ'é yā ní dichó'o yā 'úú lado yeⁿ'e apóstol yeⁿ'é yā chi 'úú caaⁿ'máⁿ nduudu cuaacu yeⁿ'é yā nanááⁿ 'iiⁿ'yāⁿ chi nguée yeⁿ'e ndaata Israel. ¹² Níicú cáávā chi 'úú apóstol yeⁿ'é yā tanducuéⁿ'ē n'geenu ngii chi canuúⁿ vácūū. Ní nguée ngii 'cuinaáⁿ caati deenú du'ū chi Cristo chi i'teenu. Ní deenú chi cuaacu chi Cristo miiⁿ ní véé poder yeⁿ'é yā chi diiⁿ cuenta yā yeⁿ'e nducuéⁿ'ē ntiiⁿnyuⁿ chi tee yā 'úú ndíi nguuví chi díiⁿ yā juzgar nducyaaca 'iiⁿ'yāⁿ.

¹³ Dii, Timoteo, diiⁿ di ndúúccū nduudu chi serio nducuéⁿ'ē tan'dúúccā chi 'úú chí cueéⁿ dii. Ní cunee di n'daacā ndúúccū chi i'teenu di Dinéⁿ'e di nducyaaca 'iiⁿ'yāⁿ caati mááⁿ ní s'uuúⁿ ní yeⁿ'e Jesucristo s'uuúⁿ. ¹⁴ Ní cundε di cuidado chi diiⁿ di ntiiⁿnyuⁿ chi Ndyuūs teé yā dii. Ní tee di lugar chí Espíritu N'dai yeⁿ'é Ndyuūs chi canee ndúúccū yú cunee yā dii.

¹⁵ Dii ní deenu di chi nducyaaca 'iiⁿ'yāⁿ chi i'téenu yā Jesucristo chi yeⁿ'e yáⁿ'āā Asia, 'iiⁿ'yāⁿ s'eeⁿ chi canee yā nduuccū nguuví chí ch'ó'ōo, maaⁿ ní ndaacadaamí yā yeⁿ'ē 'úú. Ní nguaaⁿ 'iiⁿ'yāⁿ s'eeⁿ caneé saⁿ'ā Figelo ndúúccū saⁿ'a Hermógenes. ¹⁶ Naati 'iiⁿ'yāⁿ yeⁿ'e familia yeⁿ'e saⁿ'ā Onesíforo nguée 'cuináaⁿ yā 'úú yeⁿ'ē chí canuúⁿ vácūū. Saⁿ'ā miiⁿ

ndaa sa n'diichi sa 'úú chi nnee sa 'úú. Neⁿ'é chi Señor Jesucristo ca'á yā vaadī ya'ai yeⁿ'é yā saⁿ'ā miiⁿ ndúúcu 'iiⁿ'yāⁿ yeⁿ'e familia yeⁿ'e sa. ¹⁷ Nguéé diiⁿ saⁿ'ā Onesiforo tan'dúúca chi diiⁿ tanáⁿ'a yā caati taachi canéé sa na yāāⁿ Roma neené na'nuūⁿ sa 'úú ndíí taachi nndaācā sa 'úú. ¹⁸ Neⁿ'é chi Ndyuūs ya'ai 'iinú yā saⁿ'ā miiⁿ nguuvī chi Señor Jesucristo yeⁿ'é yú dííⁿ yā juzgar 'iiⁿ'yāⁿ yeⁿ'e iⁿ'yeeⁿdí 'cūū. Ní dii ní neené n'dai deenū di tan'dúúca chi chinnee sa s'uuúⁿ taachi snée yú na yāāⁿ Efeso.

2

'Aámá soldado yeⁿ'é Señor Jesucristo chi din'dáaca sa

¹ Díí, Timoteo, chi tan'dúúca daiyá, cuta'a di fuerzas yeⁿ'é nducueⁿ'é vaadī n'dai chi cuuvi yeⁿ'é yú caati maaⁿ ní yeⁿ'e Jesucristo s'uuúⁿ. ² Ní tanducueⁿ'é chi n'giindiveeⁿ di yeⁿ'e 'úú chi ngaⁿ'á nanááⁿ n'dee n'dái 'iiⁿ'yāⁿ, chuū ní ca'cueeⁿ di saⁿ'ā s'eeⁿ chi i'téenu sa chi 'áámá cūnee sa n'daacā ndúúcu chi i'téenu sa, ní saⁿ'ā s'eeⁿ ní cuuvi ca'cueeⁿ sa tanáⁿ'ā 'iiⁿ'yāⁿ.

³ Ní taachi canee chi 'cueenu dí cuuvi tuu'mi ní n'geenu di ngii tan'dúúca 'áámá soldado chi n'daacā sa. 'Tíicā diiⁿ di caati dii ní 'áámá soldado yeⁿ'e Señor Jesucristo. ⁴ Deenu di tan'dúúca chi 'áámá soldado chi canéé na servicio nguéé diiⁿ sa tan'dúúca tanáⁿ'ā saⁿ'ā chi nguéé canee na servicio caati canee sa diiⁿ sa cumplir tanducueⁿ'é chi ngaⁿ'a comandante yeⁿ'é sa. ⁵ 'Tiicá ntúūⁿ. 'Iiⁿ'yāⁿ chi caⁿ'á na cancha nguéé cuuvi cuta'a yā mar 'áámá premio nduuti chi nguéé dííⁿ yā cumplir reglas yeⁿ'é. ⁶ 'Tiicá ntúūⁿ. 'Iiⁿ'yāⁿ chi diiⁿ ntiiⁿ'nyuⁿ na campo yeⁿ'é yā cuuvi cuta'á yā caavā maáⁿ yā cosecha yeⁿ'é yā chi vmnááⁿ vmaaⁿ. ⁷ Dii, Timoteo, nadacádíínuūⁿ di yeⁿ'é chi ngaⁿ'á níicú Señor yeⁿ'é yú dííⁿ yā chi cadíínuuⁿ di tanducueⁿ'é.

⁸ N'gáacú dí ti Jesucristo yeⁿ'é yú ní yeⁿ'é ndaata yeⁿ'é David 'iiⁿ'yāⁿ, ní nnduuchi yā yeⁿ'é nguaaⁿ tináⁿ'ā. 'Túúca ngaⁿ'ā nduudu cuaacu chi nadinguáⁿ'āi 'iiⁿ'yāⁿ. ⁹ Níicú cáavā chi ngaⁿ'á nduudu cuaacu yeⁿ'é yā neene n'geenú ngii ní canuúⁿ vácūū ndúúcu cadenas tan'dúúca chi 'niiⁿ'núⁿ 'iiⁿ'yāⁿ naati nduudu yeⁿ'é Ndyuūs nguéé cuuvi 'cueé chiichí ndúúcu cadenas. ¹⁰ Ní cáavā nducueⁿ'é chuū 'úú cuhéé yeⁿ'e tanducueⁿ'é chi n'geenú ngii caavā 'iiⁿ'yāⁿ chi Ndyuūs nndeeve yā chi cuuvi yeⁿ'é yā 'iiⁿ'yāⁿ. Ní 'íicú 'iiⁿ'yāⁿ s'eeⁿ cuuvi cu'téenu yā Ndyuūs. Ní Ndyuūs cuuvi nadanguaⁿ'ai yā 'iiⁿ'yāⁿ yeⁿ'e nuuⁿndi yeⁿ'é yā cáavā Jesucristo. Ní 'iiⁿ'yāⁿ s'eeⁿ cuuvi ndaaca yā vida n'dai chi vida cueⁿ'e daāⁿmaⁿ.

¹¹ Nduudú 'cūū ní cuaacu chi ngaⁿ'a 'iiⁿ'yāⁿ:

Nduuti chi diiⁿ yú cuenta chi 'āā n'díí yú ndúúcu Cristo tuu'mi ní diiⁿ yú cuenta chi cunduuchi ntuūⁿ yú ndúúcu yā.

¹² 'Tiicá ntúūⁿ. Nduuti chi n'geenū yú ngii cááva yā ndúúcu nducueⁿ'é dendu'ū tuu'mi ní caaⁿ'maⁿ ntiiⁿ'nyuⁿ yú ndúúcu yā. Ní nduuti chí cueeⁿdiitu yú yeⁿ'e Cristo tuu'mi ní Cristo caⁿ'á yā caaⁿ'maⁿ yā chi s'uuúⁿ nguéé yeⁿ'é yā s'uuúⁿ.

¹³ Nduuti chi n'daaⁿ yú ní nguéé 'aama canee yú ndúúcu chi i'teenu yú yeⁿ'e Jesucristo tuu'mi ní Jesucristo nguéé n'daaⁿ yā ti 'tíica yā ní 'áámá canee yā caati Cristo miiⁿ nguéé cuuvi cueeⁿdiitú yā yeⁿ'é maáⁿ yā.

¹⁴ Maaⁿ ní dii, Timoteo, n'gaacú di yeⁿ'e nducueⁿ'é dendu'ū. Yaa'vi di 'iiⁿ'yāⁿ s'eeⁿ nanááⁿ 'iivú Ndyuūs yeⁿ'é yú chi canéé chi dííⁿ yā 'túúca. Yaa'vi di 'iiⁿ'yāⁿ s'eeⁿ chi nguéé cuuvi 'cuuⁿ'maⁿ yā ndúúcu cheendí yā caati nduudu yeⁿ'é yā nguéé dichí'vē. Nduudu s'eeⁿ dámaāⁿ diiⁿ chi tanáⁿ'ā 'iiⁿ'yāⁿ nadacádíínuuⁿ ca yā yeⁿ'e chi ch'iindiveeⁿ yā yeⁿ'e nduudu yeⁿ'é yā. ¹⁵ Ní díí diiⁿ di tanducueⁿ'é chi n'daacā chi cuuvi di caati taachi ndaa di nanááⁿ Dendyuūs cuuvi di 'cuuⁿ'miⁿ di chi n'daacā diiⁿ di ntiiⁿ'nyuⁿ yeⁿ'é yā. Ní n'daacā ngi'cueeⁿ di nduudu cuaacu yeⁿ'é Ndyuūs nanááⁿ 'iiⁿ'yāⁿ. Ní nguéé cuuvi 'cuinaāⁿ di nanááⁿ Ndyuūs. ¹⁶ Diví di yeⁿ'e 'iiⁿ'yāⁿ chi ngaⁿ'a n'dee n'dái nduudu chi nguéé dáámá ndúúcu nduudu cuaacu yeⁿ'é Ndyuūs caati nguéé dichí'vē. 'Iiⁿ'yāⁿ chi ngaⁿ'a yā 'túúca diiⁿ cá yā nuuⁿndi. ¹⁷ Níicú nduudu chi nguéé n'daacā chi 'iiⁿ'yāⁿ s'eeⁿ ca'cueeⁿ yā 'iiⁿ'yāⁿ ní ngéenu tan'dúúca chi ca'ai gangrena ní tan'dúúca chi nge'e 'áámá n'daa. 'Tíicā diiⁿ

nduudu yeⁿe saⁿ'ā Himeneo ndúúcu saⁿ'ā Fileto. ¹⁸ Sáⁿ'ā s'eeⁿ ní divíi yā yeⁿ'ē nduudu cuaacu ní ngaⁿ'a yā chi 'iiⁿ'yāⁿ nguéé nduuchí yā yeⁿ'ē nguaaⁿ tináⁿ'ā. Ní náⁿ'ā 'iiⁿ'yāⁿ 'āā ntéé i'téenu yā nducuéⁿ'ē nduudu cuaacu. ¹⁹ Naati chííⁿ chi Ndyuūs 'āā díⁿ yā mar 'áámá 'āā ntéé cuuvi nadin'núⁿ'u yā. Ní 'āā canéé nguūⁿ na libro yeⁿ'é yā ní chiichi canéé tan'dúúca 'áámá sello. 'Tíicā nduudu miiⁿ: Señor Jesucristo yeⁿ'ē yú deenú yā du'u 'iiⁿ'yāⁿ chi yeⁿ'é yā. Níicú nducyaaca 'iiⁿ'yāⁿ chi ngaⁿ'a yā chi yeⁿ'e Señor yeⁿ'e yú canéé chi divíi yā yeⁿ'e nuuⁿndi.

²⁰ Taachi caⁿ'a yú cuaaⁿ chēeti va'ai chí ch'ēte taavi ca n'diichi yú nguéé dámaāⁿ platos ndúúcu 'cuūtu yeⁿ'e 'díⁿ'nguuaⁿ o 'díⁿ'nguaeⁿ naati n'diichi yú ntúūⁿ 'cuūtu yeⁿ'ē yáⁿ'á ní yeⁿ'ē ínchēti. N'duuvi 'cuūtu 'iiⁿ'yāⁿ cuta'á yā cáávā ntiiⁿ'nyuⁿ especiales ní náⁿ'ā 'cuūtu ní 'iiⁿ'yāⁿ sta'á yā chi 'cuíi yā cosas chi nguéé dichíí'vē. ²¹ Ní taachi 'aama yú neⁿ'e yú diiⁿ yú ntiiⁿ'nyuⁿ yeⁿ'e Señor Jesucristo yeⁿ'ē yú canee chi 'cuētinéé n'daacā yú ní divíi yú yeⁿ'e tanducuéⁿ'ē chi nguéé dichíí'vē. 'Tíicā diiⁿ yú maaⁿ níicú cuuvi diiⁿ yú 'āā de'ē nūūⁿ ntiiⁿ'nyuⁿ chi n'daacā.

²² 'Tiicā ntúūⁿ. Dii, Timoteo, divíi di yeⁿ'e vicios yeⁿ'e saⁿ'ā n'gaiyāā. Cunée di n'daacā ní diiⁿ di tanducuéⁿ'ē chi n'daacā. Cu'téenu ca di Ndyuūs, dinéⁿ'e di nducyaaca 'iiⁿ'yāⁿ, ní cunée di ndúúcu vaādī 'diiⁿ ndúúcu nducyáácá 'iiⁿ'yāⁿ chi Ndyuūs nadidēevé yā yeⁿ'ē nuuⁿndi yeⁿ'é yā. Ní maaⁿ ní ngaⁿ'angua'á yā ndúúcu 'iiⁿ'yāⁿ chi yeⁿ'e Señor Jesucristo yeⁿ'e yú. ²³ Ní dii, Timoteo, nguéé diiⁿ di cuenta yeⁿ'e 'iiⁿ'yāⁿ chi n'deeⁿ n'dái neⁿ'é yā caaⁿ'máⁿ yā ndúúcu dii ndúúcu nduudu chi zonza caati nguēe déenu yā. 'Āā déenu di chi naachi 'cuiinū nduudu miiⁿ ní ndaacā vaadī 'caa'va. ²⁴ Deenu di chi mar 'áámá 'iiⁿ'yāⁿ chi dichíí'vē Señor Jesucristo yeⁿ'e yú nguéé cánéé chi 'cuuⁿ'máⁿ yā ndúúcu 'iiⁿ'yāⁿ naati canéé chí ndíicúⁿ yā ndúúcu nducyaaca 'iiⁿ'yā. Ní canee chi ngi'cueeⁿ n'dáácá yā. Ní canee chi diiⁿ yā tanducuéⁿ'ē ndúúcu paciencia. ²⁵ Ní canee chi díⁿ di componer 'iiⁿ'yāⁿ chi yáádí'yā ndúúcu núúⁿ'máⁿ staava yeⁿ'e di. Ní 'iiⁿ'yāⁿ miiⁿ canee chi cūnee ngiinú yā chi Ndyuūs n'dááⁿ yā vida yeⁿ'e 'iiⁿ'yāⁿ rebelde caati cuuvi deenú yā nduudu chi cuaacu. ²⁶ 'Tíicā ní 'iiⁿ'yāⁿ s'eeⁿ canée yā tan'dúúca chi cyaadú yā níicú cuayiivi ní canduuchí yā ní 'íicú cuuvi ngeenú yā tan'duucā chi díⁿ yā cuáⁿ'ai yā yeⁿ'e trampa yeⁿ'e yááⁿ'nguiinūⁿ. Ní nguéé preso yā yeⁿ'e yááⁿ'nguiinūⁿ chi yááⁿ'nguiinūⁿ cuuvi diiⁿ sa chiiⁿ chi neⁿ'e sa nduucú yā. Ní maaⁿ ní 'iiⁿ'yāⁿ cuuvi díⁿ yā chííⁿ chí neⁿ'e Ndyuūs.

3

Tan'dúúca chi 'iiⁿ'yāⁿ caⁿ'á yā díⁿ yā nguuvi chí cúchii

¹ Dii, Timoteo canee chi déenu ntúūⁿ di chuū. Nguuvi chi cuchii véé cosas chi ngíⁿ'i. ² 'iiⁿ'yāⁿ ní neⁿ'é yā maáⁿ yā 'iiⁿ'yāⁿ ní dinéⁿ'e taavi yā tuūmī. Ní caaⁿ'máⁿ yā chi neené n'gēete maaⁿ yā ní nacadíinuuⁿ yā chi neené n'daacā maáⁿ yā, ní nguéé n'daacā dináaⁿ yā yeⁿ'ē tanáⁿ'ā 'iiⁿ'yāⁿ. Ní ngii taaⁿ yā contra yeⁿ'e Ndyuūs. Ní nguéé n'giindiveén yā yeⁿ'ē chiidá yā ndúúcu chēcú yā. Ní nguéé ngaⁿ'a yā 'tíicā: N'diī Ndyuūs, gracias. Ní nguéé n'giindiveén yā yeⁿ'ē nduudu cuaacu yeⁿ'é Ndyuūs. ³ Ní nguéé dinéⁿ'e yā 'iiⁿ'yāⁿ tan'dúúca chi canéé chi dineⁿ'é yā 'iiⁿ'yāⁿ, ndíi nguéé ndúú ya'āi 'iinú yā 'iiⁿ'yāⁿ. Caaⁿ'máⁿ yā nuuⁿndi yeⁿ'e 'iiⁿ'yāⁿ ní nguéé 'tíicā. Ní nguéé díⁿ yā chi n'daacā caati neⁿ'é yā caⁿ'á yā ndúúcu n'daataá o saⁿ'ā chi nguéé yeⁿ'é yā. Ní neené taaⁿ yā. Ní nguéé cuuvi n'diichí yā cosa chi n'daacā. ⁴ Nééné neⁿ'e yā vaadī 'caa'va ndúúcu 'iiⁿ'yāⁿ. Nguéé 'va'a yā 'āā de'ē nūūⁿ chi díⁿ yā ndúúcu 'iiⁿ'yāⁿ Ní neené nadacadíinuuⁿ yā chi n'dēeve maáⁿ yā. Nééné neⁿ'e yā diiⁿ yā taanduvéé vicio chi véé iⁿ'yeeⁿdí 'cūū. Ní nguéé nadacadíinuuⁿ yā yeⁿ'e Ndyuūs. ⁵ Nééné n'giⁿ'i yā chi i'téenu yā Ndyuūs naati nguéé díⁿ yā chiiⁿ chi ngaⁿ'a nduudu cuaacu yeⁿ'é Ndyuūs. Díi, Timoteo, divíi di yeⁿ'e 'iiⁿ'yāⁿ chi 'tíicā.

⁶ Caati náⁿ'ā saⁿ'ā s'eeⁿ ní ngeⁿ'e yā ndúú va'ai nduu va'ai yeⁿ'e n'daataá chi nguéé diiⁿ n'daacá yā. Ní ca'cueeⁿ sa nduudu chi nguéé n'daacā. Ní n'daataa s'éeⁿ nguéé cuuvi ndaacadaamí yā yeⁿ'ē nuuⁿndi yeⁿ'é yā. ⁷ N'daataa s'eeⁿ ní nguuvi nguuví n'geeⁿ yā nduudu miiⁿ naati nguéé cuuvi tuumicadíinuuⁿ yā nduudu miiⁿ. ⁸ Ní 'iiⁿ'yāⁿ s'eeⁿ chi diiⁿ 'tíicā ní contra yeⁿ'ē nduudu cuaacu yeⁿ'é Ndyuūs. Ní tan'dúúca chi diiⁿ saⁿ'ā ngaatúū

Janes ndúúcu Jambres taachi contra yeⁿe Moisés tiempo chi 'āā chó'ōo, 'tíicā maaⁿ ní 'iiⁿ'yāⁿ s'eeⁿ nguéeⁿ n'daacā nadicádíinuⁿ yā. Ní nguéeⁿ cuaacu chi i'téenu yā Ndyuūs. ⁹ Ní 'iiⁿ'yāⁿ s'eeⁿ nguéeⁿ cuuvi 'cueeⁿ cá yā caati nducyaaca 'iiⁿ'yāⁿ deenú yā táacā idiin 'iiⁿ'yāⁿ s'eeⁿ chi tonto yā tan'dúúca chi 'tiicá ntúūⁿ deenú nducyaaca 'iiⁿ'yāⁿ taacā chi diiⁿ ngaatúū Janes ndúúcu Jambres tiempo chi 'āā chó'ōo.

Cuááⁿ ná ch'iinu ní Pablo dinguúⁿ yā carta 'cūū yeⁿe Timoteo

¹⁰ Díi, Timoteo, 'āā diiⁿ di nducuéⁿē tan'dúúca chi chi'cueeⁿ dii. Ní tan'dúúca chi 'úú caneeⁿ n'daacā, 'tiicá ntúūⁿ cunee di n'daacā. Ní diiⁿ di tanducuéⁿē tan'dúúca chi 'úú díiⁿ nducuéⁿē cáávā chi i'teenu yú Ndyuūs. 'Tíicā diiⁿ di. Ní i'téenu di tan'dúúca chi 'úú i'teenú. Ní ya'ai 'iinu di 'iiⁿ'yāⁿ ní dineⁿe di nducyaaca 'iiⁿ'yāⁿ. Ní cucheⁿ di yeⁿe nducuéⁿē. Tan'dúúca chi díiⁿ 'tiicá ntúūⁿ diiⁿ di. ¹¹ Ní deenu di tanducuéⁿē chi ch'eenú chií cáávā chi diiⁿ 'iiⁿ'yāⁿ nduucú ní táacā chi ch'eenu na yāā Antioquia ndúúcu yāā Iconio ndúúcu yāā Listra. Ní chicheé tanducuéⁿē chi ch'eenu chií naati Señor Jesucristo yeⁿe yú ní nadanguáⁿ'ai yā 'úú yeⁿe nducuéⁿē chúū. ¹² 'Tíicā ní cuaacu. Nducyaaca 'iiⁿ'yāⁿ chi neⁿ'é yā 'cuētinéⁿ n'daacā vida yeⁿ'é yā cááva Jesucristo ní caⁿ'á yā 'cueenu yā cuuvi. ¹³ Naati 'iiⁿ'yāⁿ chi nguéeⁿ n'daacā ní nginnche'éi yā 'iiⁿ'yāⁿ. Dach'εετε dách'εετε cá díiⁿ yā. Ní nginnche'éi yā tanáⁿ'ā 'iiⁿ'yāⁿ ní ndíi maáⁿ yā nginnche'éi yā 'iiⁿ'yāⁿ.

¹⁴ Naati dii, Timoteo, canee n'daacā di yeⁿe chi ch'eeⁿ di caati cuaacu níiⁿ'nyúⁿ chí deenu di chi cuaacu ní deenu di du'ú 'iiⁿ'yāⁿ s'eeⁿ chi chi'cueeⁿ di 'túúca. ¹⁵ Ndíi taachi 'líiⁿ dii chicadíinuⁿ di yeⁿ'ē nduudu yeⁿ'é Ndyuūs. Ní cáávā nduudu miiⁿ chi ca'cueeⁿ di cuuvi cadíinuⁿ di táacā cuuvi ninguaⁿ'āi di cáávā chi i'téenu di Señor Jesucristo. ¹⁶ Ní nducuéⁿē chi caneeⁿ nguūⁿ na libro yeⁿ'é Ndyuūs cucáávā Espíritu N'dai yeⁿ'e Ndyuūs ní dichíiⁿ'vē chi ca'cueeⁿ yú 'iiⁿ'yāⁿ ní cuuvi yú 'iiⁿ'yāⁿ cheⁿ chi nguéeⁿ n'daacā chi díiⁿ yā. Ní cuuvi yú 'iiⁿ'yāⁿ táacā chi cuuvi din'daacá yā. Ní ca'cueeⁿ yú táacā chi 'iiⁿ'yāⁿ cuuvi 'cuētinéⁿ n'daacá yā nanááⁿ Ndyuūs. ¹⁷ Caati 'iiⁿ'yāⁿ chi yeⁿ'é Ndyuūs ní dichíiⁿ'vε yā Ndyuūs ní cuuvi díiⁿ yā nducuéⁿē ntiⁿ'nyuⁿ chi n'daacā.

4

¹ 'Úú yaa'ví dii nanááⁿ Ndyuūs ní nanááⁿ Señor Jesucristo. 'Iiⁿ'yāⁿ miiⁿ caⁿ'á yā chi ndaa yā taama vmnéⁿ'ē tan'dúúca rey. Ní ndaa yā ní díiⁿ yā juzgar 'iiⁿ'yāⁿ chi sндуuchí ndúúcu 'iiⁿ'yāⁿ chi 'āā n'dii caatí ngaⁿ'a ntiⁿ'nyuⁿ yā yeⁿ'e nducuéⁿē naachi ngaⁿ'a ntiⁿ'nyuⁿ yā. ² Ní 'úú yaa'ví dii chi ngaⁿ'a di nduudu cuaacu yeⁿ'e Cristo nanááⁿ 'iiⁿ'yāⁿ. Ní caaⁿ'maⁿ di nducuéⁿē tiempo chi cuuvi diiⁿ di ní 'aara chi tiempo chi nguéeⁿ cuuvi diiⁿ di ní diiⁿ di. Caaⁿ'maⁿ yuudu di caati 'iiⁿ'yāⁿ cuuvi cu'téenu yā. Ní caaⁿ'maⁿ dí nanááⁿ 'iiⁿ'yāⁿ chi dinuuⁿndí yā chi 'āā ntéⁿ dinuuⁿndí yā 'tíicā. Ní ca'a di consejo 'iiⁿ'yāⁿ, ní ca'cueeⁿ di 'iiⁿ'yāⁿ. Ní diiⁿ di tanducuéⁿē ndúúcu n'dai, ní ca'cueeⁿ di nduū 'cuaaⁿ. ³ 'Tíicā diiⁿ di caati ndaa tiempo chi 'iiⁿ'yāⁿ nguéeⁿ 'caandiveéⁿ yā nduudu chí n'dai. Naati caⁿ'á yā in'nuúⁿ yā n'deeⁿ n'dái maestros chi ca'cueeⁿ yā 'iiⁿ'yāⁿ tan'dúúca chi neⁿ'é yā 'caandiveéⁿ yā. Ní tan'dúúca vaanicadíinuⁿ yeⁿ'e maáⁿ yā 'tíicā neⁿ'e yā chi ca'cueeⁿ yā. ⁴ Ní ndaacadaamí yā yeⁿ'ē nduudu cuaacu ní nguéeⁿ 'caandiveéⁿ yā yeⁿ'ē. Ní 'caandiveéⁿ yā cuentos chi nguéeⁿ n'daacā. ⁵ Naati dii ní canee chi candéⁿ di cuidado yeⁿ'é tanducuéⁿē dendu'ū tanducuéⁿē tiempo. Ní cucheⁿ di yeⁿ'e nducuéⁿē chi 'cueenu di cuuvi. Diiⁿ di ntiⁿ'nyuⁿ yeⁿ'é Ndyuūs ní caaⁿ'maⁿ di nduudu yeⁿ'é Ndyuūs chi diiⁿ chi nguaⁿ'āi 'iiⁿ'yāⁿ. Caneeⁿ chi diiⁿ di cumplir ntiⁿ'nyuⁿ chi Ndyuūs tee yā dii.

⁶ 'Úú deenú chi ca'á vida yeⁿ'é cáávā Cristo ní 'iiⁿ'yāⁿ caⁿ'á yā 'caaⁿ'nuⁿ yā 'úú. 'Āā caneeⁿ niⁿ'nuuⁿ nguuvi chi 'cuúví. ⁷ Naati deenú chí díiⁿ ntiⁿ'nyuⁿ yeⁿ'é tan'dúúca 'áámá soldado chí idiin sa caandaá n'daacā. 'Tíicā díiⁿ. Ch'iinú ntiⁿ'nyuⁿ yeⁿ'é ní 'áámá caneeⁿ n'daacā ndúúcu chi i'teenú yeⁿ'e Ndyuūs. ⁸ Cáávā chuū cunee ngiinú 'aama corona chi Señor Jesucristo chi juez chi diiⁿ nducuéⁿē chi cuaacu, caⁿ'á yā chi tée yā 'úú ndúúcu 'iiⁿ'yāⁿ chi yeⁿ'e yā, 'iiⁿ'yāⁿ s'eeⁿ chi n'daacā idiin yā. 'Tíicā cuuvi nguuvi chí Cristo ndaa yā taama vmnéⁿ'ē. Ní nguéeⁿ tée yā corona dámaāⁿ 'úú naati ca'a yā corona nducyáácá

'iiⁿyāⁿ chi neⁿé yā Jesucristo ní cūnee ngiinú yā Jesucristo ní neⁿé yā chi ndaa Jesucristo taama vmné'ēe.

Pablo ca'á yā instrucciones ca'áamá cā'aama 'iiⁿyāⁿ

⁹ Dii, Timoteo, diiⁿ núúⁿ yiiⁿnu di chi chií di n'diichi di 'úú. ¹⁰ Saⁿā Demas miiⁿ ní ndaacadaamí sá yeⁿe 'úú caati neⁿe ca sa cosas chi véé iⁿ'yeeⁿdí 'cūú ní cheⁿē sa yāāⁿ Tesalónica. Saⁿā Cresente cheⁿē sa yāāⁿ Galacia ní saⁿā Tito cheⁿē sa yāāⁿ Dalmacia. ¹¹ Dámaāⁿ Lucas canee sa nduucú maaⁿ. Ní yaa'vi di Marcos chi caⁿa sa ndúúⁿcū dii. Ní candēē di sáⁿā ndúúⁿcū di caati Marcos cuuvi cunnee ca sá 'úú na ntiiⁿnyuⁿ chi diíⁿ. ¹² 'Úú 'āā dicho'ó saⁿā Tíquico na yāāⁿ Efeso. ¹³ Ní taachi cuchii di, nandéε di cotón yeⁿé chi s'neéⁿ na vaacu saⁿā Carpo na yāāⁿ Troas. Nandéε di ntúūⁿ libros yeⁿé ndúúⁿcū caaca chi neⁿe niiⁿnyúⁿ.

¹⁴ Saⁿā Alejandro chí 'viichi cūú ní neéné n'deeε cosas chi nguéé n'daacā diiⁿ sa nduucú. Ndyuūs caⁿá yā nadí'vε yā saⁿā caavā tanducuéⁿē chi nguεε n'daacā diiⁿ sa nduucú. ¹⁵ Cundéε di cuidado yeⁿe saⁿā miiⁿ caati neené taaⁿ ngaⁿa sa yeⁿe chi ngi'cueeⁿ yú ti contra yeⁿe chi ngi'cueeⁿ yú.

¹⁶ Vmnááⁿ vmaaaⁿ taachi 'úú cheⁿé nanaaⁿ juez mar 'áamá 'iiⁿyāⁿ nguéé cheⁿe yā nduucú naati nducyaaca 'iiⁿyāⁿ divíi yā yeⁿe 'úú. 'Úú ngiicá nanááⁿ Ndyuūs chi nadach'εcú yā nuuⁿndi yeⁿe 'iis'tií. ¹⁷ Naati Señor nginneé yā 'úú ní teé yā fuerzas 'úú cáávā chi 'úú ngii ngaⁿá nduudu cuaacu yeⁿé yā nanááⁿ 'iiⁿyāⁿ chi nguéé yeⁿē ndaata 'iiⁿyāⁿ Israel, nduudu chi diiⁿ chi nnguaⁿāi 'iiⁿyāⁿ. Ní 'íicú nducuéⁿē 'iiⁿyāⁿ s'eeⁿ cuuvi 'caandiveéⁿ yā nduudu cuaacu yeⁿé Ndyuūs. Ní 'tíicā Señor yeⁿe yú nadanguáⁿai yā 'úú yeⁿe 'iiⁿyāⁿ s'eeⁿ. Ní chuū ní tan'dúúⁿcā chi ninguáⁿai yā 'úú yeⁿe cheendi 'yáíⁿyāaⁿ cuá'āa. 'Tíicā diíⁿ yā nduucú. ¹⁸ Níicú Señor Jesucristo ní nadanguaⁿai yā 'úú yeⁿe tanducuéⁿē cosas chi nguεε n'daacā chi 'iiⁿyāⁿ neⁿé yā diiⁿ yā nduucú. Ní Señor Jesucristo candéε yā cuidado yeⁿe vida yeⁿé chi cuuvi naⁿá na va'ai cheeti nguuvi naachi ngaⁿa ntiiⁿnyúⁿ yā. Señor Jesucristo miiⁿ ní dich'εεε yú 'iiⁿyāⁿ cueⁿe daaⁿmaⁿ. 'Tíicā.

'Cuiinū carta ndúúⁿcū saludos ndúúⁿcū vaadi n'dai yeⁿe Ndyuūs

¹⁹ Lado yeⁿé: N'dái yā ngaⁿá, caaⁿmaⁿ di taⁿā Prisca ndúúⁿcū isaⁿā tá chi Aquila ndúúⁿcū 'iiⁿyāⁿ yeⁿe familia yeⁿe saⁿā Onesíforo. ²⁰ Saⁿā Erasto canee sá na yāāⁿ Corinto. Ní saⁿā Trófimo chi ngiitā sa, 'úú s'neéⁿ saⁿā na yāāⁿ Mileto. ²¹ Maaⁿ ní diiⁿ núúⁿ yiiⁿnu di cuchii dí n'diichi di 'úú taachi 'āā 'cuéé ndaa tiempo chi 'iiche. Saⁿā Eubulo ndúúⁿcū saⁿā Pudente ndúúⁿcū saⁿā Lino n'dúúⁿcū n'daataá Claudia ndúúⁿcū nducyaaca vi'i yú: N'dái ndís'tií ngaⁿá yā.

²² Neⁿé chi Señor Jesucristo yeⁿe yú canee yā ndúúⁿcū dii hermano yeⁿé níicú Ndyuūs téε yā dii yeⁿē nducuéⁿē chi n'dai yeⁿé yā. 'Tíicā cuuvi.

CARTA YEⁿE SAⁿĀ TITO

¹ 'Úú Pablo chi apóstol yeⁿé Señor Jesucristo ní díⁿ ntiiⁿnyuⁿ yeⁿé Ndyuūs. Ndyuūs dichó'o yā 'úú chi cuuvi inneé 'iiⁿyāⁿ s'eeⁿ chi Ndyuūs nndεεεε yā chi cuuvi yeⁿé yā 'iiⁿyāⁿ s'eeⁿ caati cu'teenu cá yā yeⁿe religión yeⁿe yú. ² Ní cūnee ngiinú yā ndúúúú s'uuúⁿ chi Ndyuūs téé yā vida cueⁿe daāⁿmaⁿ s'uuúⁿ chi Ndyuūs caⁿa yā chi ca'a yā 'iiⁿyāⁿ chi yeⁿe yā vmnááⁿ vmnaaⁿ chi 'āā cuéé cūnee iⁿ'yeeⁿdí 'cūū. Ndyuūs miiⁿ ní nguéé cuuvi caaⁿ'máⁿ yā nduudu yaadi. ³ Ní taachi ndaa tiempo chi neⁿe Ndyuūs, Ndyuūs ch'iⁿ'i yā nduudu cuaacu yeⁿé yā cucááⁿvā 'iiⁿyāⁿ chi ngaⁿ'a nduudu cuaacu yeⁿé yā. Maaⁿ ní Ndyuūs yeⁿe yú chi nadanguáⁿ'ai yā s'uuúⁿ dichó'o yā 'úú chi ngaⁿ'á nduudu cuaacu yeⁿé yā. ⁴ Maaⁿ ní dinguúⁿ carta 'cūū yeⁿé dii, Tito. Ní cuaacu níⁿnyúⁿ díⁿ ní tan'dúúúú daiyá chi ngaⁿ'á nduudu cuaacu nanááⁿ dii, nduudu chi i'teenu yú. Neⁿé chi Ndyuūs chiida yú ndúúúú Señor Jesucristo yeⁿe yú chi nadanguáⁿ'ai yā s'uuúⁿ itée yā dii nducuéⁿ'ē chi n'dai taavi yeⁿé yā ní ya'ai 'iinu yā dii. Ní tan'dúúúú chi ya'ai 'iinú Ndyuūs 'iiⁿyāⁿ 'tiicá ntúúⁿ diiⁿ di. Ní Ndyuūs téé yā dii vaadi 'diiⁿ yeⁿé yā.

Ntiiⁿnyuⁿ yeⁿe Tito na yáⁿ'āa Creta

⁵ Ní cááⁿvā ntiiⁿnyuⁿ chi canee chi diiⁿ di 'úú chi'neéⁿ dii na isla Creta. Canéé chi dicuaacú di cosas chi nguεε n'daacā. Ní cu'neeⁿ dí 'iiⁿyāⁿ n'gεεεε chi ngaⁿ'a ntiiⁿnyúⁿ yā yeⁿé nducuéⁿ'ē yaācū na 'áámá 'áámá ciudad. 'Úú dicho'ó dii chi diiⁿ di ntiiⁿnyuⁿ 'cūū. ⁶ Ní 'iiⁿyāⁿ chi ndεεεε dí canee chi 'cuεεtinéé n'daaca yā manera chi nguéé cuuvi caaⁿ'maⁿ tanáⁿ'ā 'iiⁿyāⁿ chi véé nuuⁿndi yeⁿé yā. Ní véé 'áámá nūuⁿ n'daataa yeⁿe yā. Ní daiyá yā canéé chí i'téenu yā Ndyuūs, ní nguéé da'caiyāa chi travieso yā chi nguéé n'daacā idiiⁿ yā, ní nguéé da'caiyāa chí yaadi'yāa. ⁷ 'iiⁿyāⁿ chi díⁿ yā ntiiⁿnyuⁿ yeⁿé Ndyuūs canee chi candéé yā cuidado yeⁿe ntiiⁿnyuⁿ yeⁿé Ndyuūs. Ní cááⁿvā chuū 'iiⁿyāⁿ s'eeⁿ canee chi 'cuεεtinéé n'daaca yā. Nguéé cuuvi 'iiⁿyāⁿ chi necio yā, ní nguéé 'iiⁿyāⁿ chi nduuvu taán yā, ndíⁿ nguéé ndúú 'iiⁿyāⁿ chi ngii cuu'ví yā va ní in'nuuⁿ yā vaadi 'caa'va. Ní nguéé cuuvi 'iiⁿyāⁿ chi neⁿé yā diiⁿ yā ganar tuūmī cááⁿvā ntiiⁿnyuⁿ chi díⁿ yā chi nguéé n'daacā. ⁸ Naati 'tíicā canee chi díⁿ yā. Canéé chi díⁿ yā recibir na vaacú yā 'iiⁿyāⁿ chi canúúⁿ yúúⁿ. Canéé chi neⁿe yā chi din'daaca yā ní n'daacā nadacadíⁿnuuⁿ yā yeⁿe nducuéⁿ'ē chi caⁿ'á yā diiⁿ yā, ní díⁿ yā chiiⁿ chi cuaacu. Ní dεεεε vida yeⁿe yā, ní nguéé canee chi taamá yā ca'a yā consejo 'iiⁿyāⁿ. ⁹ Ní cundéé n'daaca yā nduudu cuaacu yeⁿé Ndyuūs chi ch'eeⁿ yā ní 'tíicā cuuvi ca'cueéⁿ yā nduudu cuaacu miiⁿ. Ní cuuvi díⁿ yā cuchéé yā ndúúúú 'iiⁿyāⁿ chi contra yeⁿe nduudu cuaacu ní cuuvi ch'iⁿ'í yā 'iiⁿyāⁿ s'eeⁿ chi nduudu cuaacu miiⁿ ní cuaacu.

¹⁰ Neene n'dáí 'iiⁿyāⁿ nguaaⁿ 'iiⁿyāⁿ judíos s'eeⁿ nguéé neⁿe yā cu'téenu yā nduudu cuaacu miiⁿ. 'iiⁿyāⁿ s'eeⁿ ngaⁿ'á yā cosas chi nguéé díchíⁿ'vē ní nginnche'élí yā 'iiⁿyāⁿ. ¹¹ Canee chi diiⁿ yú chi 'iiⁿyāⁿ s'eeⁿ nguéé cuuvi candεε yā nduudu yeⁿé yā caati ndástaⁿ'á yā vaadi cadíⁿnūuⁿ yeⁿé 'iiⁿyāⁿ. Ní díⁿ yā chi nducyaaca 'iiⁿyāⁿ yeⁿe 'áámá va'āi yeⁿé táámá va'āi cu'téenu yā nduudu yeⁿé yā. Ní ngi'cueéⁿ yā cosas chi nguéé n'daacā cucááⁿvā chi neⁿé yā diiⁿ yā ganar tuūmī manera chi nguéé n'daacā.

¹² Ní 'áámá saⁿ'ā yeⁿe isla Creta chi profeta yeⁿe yāāⁿ miiⁿ ngaⁿ'a sa 'túúúú yeⁿe 'iiⁿyāⁿ yeⁿé yāāⁿ vaacú sa. Ngaⁿ'a sa chi 'iiⁿyāⁿ yeⁿe yāⁿ'āa Creta ní nééⁿé yaadi yā, ní nééⁿé táán yā, ní nééⁿé 'daan'dí yā, ní nééⁿé n'deēe nge'e yā. ¹³ Ní saⁿ'ā miiⁿ ní ngaⁿ'a sa nduudu cuaacu yeⁿe 'iiⁿyāⁿ. Níⁿú cááⁿvā chuū canee chi yaa'vi dí 'iiⁿyāⁿ s'eeⁿ ndúúúú nduudu chεεchi caati cuuvi cu'téenu n'daacá yā nduudu cuaacu miiⁿ. ¹⁴ Ní nguéé díⁿ yā cuenta yeⁿe nduudu yeⁿe 'iiⁿyāⁿ judíos chi nginnche'élí yā 'iiⁿyāⁿ ndúúúú nduudu chi maán yā nadacadíⁿnuuⁿ yā ní ngaⁿ'a yā. Ndíⁿ nguéé n'giindiveéⁿ yā orden chi ngaⁿ'a 'iiⁿyāⁿ s'eeⁿ chi ndaacadaamí yā yeⁿé nduudu cuaacu yeⁿé Ndyuūs.

¹⁵ Ní 'iiⁿyāⁿ chi Ndyuūs didεεvé yā staava yeⁿé yā chí dεεεε nacadíⁿnuuⁿ yā dámaaⁿ yeⁿe dendu'ū chi dεεεε ní sta'á yā nducuéⁿ'ē tan'dúúúú chi dεεεε. Naati 'iiⁿyāⁿ chi nguéé

i'téenu yā Ndyuūs nadacadíínuuⁿ yā yeⁿe cosas chi nguéeé n'daācā. Ní mar 'áámá cosa ní nguéeé dεενε yeⁿe 'iⁿ'yāⁿ miⁿ. 'Tiicá ntúūⁿ ní vaanīcadíínuūⁿ yeⁿ'é yā ní nguéeé dεενε. Ní nducuéⁿ'ē chi véé na staava yeⁿ'é yā ní nguéeé dεενε. Ndíí nguéeé ndúú chi inadacádíínuuⁿ yā chí dεενε. ¹⁶ 'Iⁿ'yāⁿ s'eeⁿ ngaⁿ'a yā chi n'diichí yā Ndyuūs naati dendu'ū chi díⁿ yā ch'iⁿ'í chi nguéeé cuaacu. 'Iⁿ'yāⁿ s'eeⁿ nguéeé neⁿ'é yā 'iⁿ'yāⁿ ní nguéeé neⁿ'é yā diⁿ yā chi ngaⁿ'a 'iⁿ'yāⁿ. Nguéeé n'daacā yā. Ní nguéeé dichíí'vē chi díⁿ yā mar 'áámá cosa chi n'daācā.

2

Canéé chi ca'cueeⁿ di dendú'ū chi cuaacu

¹ Díí, Tito, nducuéⁿ'ē chi caaⁿ'maⁿ di canee chi caaⁿ'maⁿ di ndúúcu nduudu cuaacu yeⁿ'é Ndyuūs. ² Yaa'vi di saⁿ'ā ndiicúú chi ngaⁿ'a ntiⁿ'nyuⁿ yeⁿ'e yaācū naachi 'iⁿ'yāⁿ i'téenu yā Jesucristo chi canéé chí serio yā. Ní canéé chí nadacádíínuuⁿ yā n'dai ní nguéeé díⁿ yā dendu'ū chi nguεε n'daacā. Canéé chi cu'téenu yā dámaāⁿ nduudu cuaacu yeⁿ'é Ndyuūs ní dinéⁿ'e yā nducyaaca 'iⁿ'yāⁿ. Ní canéé chi cuchée yā yeⁿ'e nducuéⁿ'ē ndúúcu paciencia. ³ 'Tiicá ntúūⁿ yaa'vi di n'daataa s'eeⁿ chi ngeⁿ'e yā na yaācū yeⁿ'é 'iⁿ'yāⁿ chí i'téenu yā Jesucristo chi 'cuεetinéeⁿ n'daaca yā tan'dúúca 'iⁿ'yāⁿ dεενε chi yeⁿ'é Ndyuūs. Nguéeé caaⁿ'máⁿ yā yeⁿ'ē mar 'áámá 'iⁿ'yāⁿ chí nduudu yaadi ní nguéeé cuu'ví yā va. Ní canee chi diⁿ n'daacá yā caati tanáⁿ'ā 'iⁿ'yāⁿ cuuvi cuta'á yā ejemplo yeⁿ'ē n'daataá s'eeⁿ. ⁴ Ní 'íicú cuuvi ca'cueeⁿ yā tanáⁿ'ā n'daataá da'cáiyā tan'dúúca chi canéé chí dinéⁿ'e yā isaⁿ'ā yeⁿ'é yā ní dinéⁿ'e ntúūⁿ yā daiya yā. ⁵ Ní n'daataa s'eeⁿ cuuvi nadacádíínuuⁿ yā chεε chi n'daacā ní diⁿ yā chuū. Ní díⁿ yā nducuéⁿ'ē chi neⁿ'e Ndyuūs. Ní din'dai cá yā na vaacú yā ní n'giindiveéⁿ yā isaⁿ'ā yeⁿ'e yā. 'Tíicā ní mar 'áámá 'iⁿ'yāⁿ nguéeé cuuvi cunncáa caaⁿ'maⁿ yā yeⁿ'ē nduudu yeⁿ'é Ndyuūs.

⁶ 'Tiicá ntúūⁿ yaa'vi di saⁿ'ā n'gaiyāā chi nadacadíínuuⁿ yā n'daacā vmnaaⁿ chí díⁿ yā dε'ē vεε. ⁷ Ní díí, Tito, diⁿ di n'daacā nducuéⁿ'ē chí diⁿ di ní 'íicú 'iⁿ'yāⁿ cuuvi cuta'á yā vida yeⁿ'ē di tan'dúúca 'áámá ejemplo. Ní taachi ca'cueeⁿ di 'iⁿ'yāⁿ, diⁿ di ndúúcu núúⁿ'máⁿ staava yeⁿ'ē di ní canee di serio di. ⁸ Ní ca'cueeⁿ di ndúúcu nduudu chí n'daacā ní 'iicu mar 'áámá 'iⁿ'yāⁿ nguéeé cuuvi caaⁿ'máⁿ yā dε'ē vεε yeⁿ'e chí ngaⁿ'a di. Ní 'iⁿ'yāⁿ chí contra yeⁿ'ē di cuuvi 'cuinaáⁿ yā caati nguéeé cuuvi caaⁿ'máⁿ yā mar 'áámá contra yeⁿ'ē di.

⁹ Ní yaa'vi dí 'iⁿ'yāⁿ chí 'áámá canee chí díⁿ yā ntiⁿ'nyuⁿ, canéé chí n'giindiveéⁿ yā nducuéⁿ'ē yeⁿ'ē 'iiví yā. Ní cunee yiinú yā yeⁿ'e nducuéⁿ'ē yeⁿ'ē 'iiví yā. Ní nguéeé canee chí nguεεcútaⁿ'á yā yeⁿ'e 'iivi yā. ¹⁰ Ní nguéeé canéé chí diduucú yā yeⁿ'ē 'iivi yā naati canee chí diⁿ n'daacá yā ndúúcu 'iivi yā ní ch'iⁿ'í yā chí dámaāⁿ díⁿ yā cosas chí n'daacā cáávā 'iivi yā. Ní 'íicú ndúúcu nducuéⁿ'ē chí díⁿ yā cuuvi ch'iⁿ'í yā 'iivi yā ní 'iiví yā cuuvi caaⁿ'maⁿ n'daacá yā yeⁿ'e nduudu cuaacu yeⁿ'é Ndyuūs chí nanguaⁿ'āi yú.

¹¹ Ndyuūs ch'iⁿ'í yā chí díneⁿ'e yā nducyaaca 'iⁿ'yāⁿ. Ní ch'iⁿ'í yā vaadī n'dai taavi yeⁿ'é yā caati cuuvi nadanguáⁿ'ai yā nducyaaca 'iⁿ'yāⁿ. ¹² Níicú vaadī n'dai taavi yeⁿ'é Ndyuūs ngi'cueeⁿ s'uuúⁿ chí canee chí divíi yú yeⁿ'e nducuéⁿ'ē chí nguεε n'daacā ndúúcu nducuéⁿ'ē vicio chí véé iⁿ'yeeⁿ'dí 'cūū chí neⁿ'e yú diⁿ yú. Ní canee chí nadacádíínuuⁿ yú n'daacā yeⁿ'e nducuéⁿ'ē vmnááⁿ chí diⁿ yú. Ní 'cuεetinéeⁿ n'daaca yú ní diⁿ yú tanducuéⁿ'ē chí neⁿ'e Ndyuūs 'naaⁿ chí canee yú iⁿ'yeeⁿ'dí 'cūū. ¹³ Ní vaadī n'dai taavi yeⁿ'é Ndyuūs ngi'cueeⁿ s'uuúⁿ chí 'cuεetinéeⁿ n'giiⁿ'nu yú nguuvi ch'εεte taachi Cristo díⁿ yā cumplir nduudu chí ngaⁿ'a yā. Ní taama vmnéⁿ'ē ndaa ntúūⁿ Jesucristo yeⁿ'e yú chí Ndyuūs chí ch'εεte taavi ca chí nadanguáⁿ'ai yā s'uuúⁿ. ¹⁴ Ní ca'á yā vida yeⁿ'e maáⁿ yā chí ch'ii yā cáávā s'uuúⁿ chí nadanguáⁿ'ai yā s'uuúⁿ yeⁿ'e nducuéⁿ'ē nuuⁿ'ndi yeⁿ'ē yú. Ní nadidεεvέ yā s'uuúⁿ yeⁿ'e nducuéⁿ'ē nuuⁿ'ndi chí diⁿ yú chí cuuvi yeⁿ'é yā s'uuúⁿ. Ní 'íicú 'áámá cunee yú diⁿ yú ntiⁿ'nyuⁿ chí n'daacā.

¹⁵ Nducuéⁿ'ē chuū ní canee chí ca'cueeⁿ di. Ní ca'a di orden ti dii tan'dúúca 'iⁿ'ntyéⁿ'ē dii. Cunnee di 'iⁿ'yāⁿ chí dí'vaachí yā. Ca'a di consejo 'iⁿ'yāⁿ chí nguεε n'daacā idiⁿ yā. Din'daacá di yeⁿ'e nducuéⁿ'ē caati mar 'áámá 'iⁿ'yāⁿ cuuvi cunncáa caaⁿ'máⁿ yā yeⁿ'ē di.

3

*Ye*ⁿe chi canéé chi diiⁿ 'iiⁿ'yāⁿ chi i'téenu yā Señor Jesucristo yeⁿe yú

¹ Cúuví dí 'iiⁿ'yāⁿ chi i'téenu yā Señor Jesucristo chi n'gaacu yā chí canéé maaⁿ poder yeⁿe gobernador ndúúcū tanáⁿ'ā 'iiⁿ'ntyéⁿ'ē ní canee chi n'giindiveéⁿ yā yeⁿe yā. Ní 'āā vεε yaáⁿ yā chi diíⁿ yā nducuéⁿ'ē ntiíⁿ'nyuⁿ chi n'daacā. ² Ní nguéé canéé chi caaⁿ'maⁿ taaⁿ yā yeⁿe mar 'áámá 'iiⁿ'yāⁿ. 'Tíicā canee chi 'cuεetinéé 'diíⁿ yā ndúúcū 'iiⁿ'yāⁿ ní din'dai yā ndúúcu yā. Ní canéé chí ch'iⁿ'i yā tanáⁿ'ā 'iiⁿ'yāⁿ ndúúcū tanducuéⁿ'ē chi diíⁿ yā ndúúcu yā chi maaⁿ yā ndiicuuⁿ yā.

³ 'Tiicá ntúūⁿ s'uuúⁿ tiempo chi chó'ōo taachi tonto yú ní nguéé n'giindiveeⁿ yú nduudu yeⁿ'é Ndyuūs ní nguéé n'daacā idiíⁿ yú. Ní canee yú tan'dúúca saⁿ'a esclavo caati yeⁿe chi neⁿe cuerpo yeⁿe yú ní diiⁿ yú ndúúcū nducuéⁿ'ē vicio yeⁿe chi véé, 'tíicā diíⁿ yú. Ní diiⁿ taáⁿ yú, ní neⁿe ca yú cosas tan'dúúca chi véé yeⁿ'ē tanáⁿ'ā 'iiⁿ'yāⁿ. Ní nguéé neⁿe yú 'iiⁿ'yāⁿ. Ndíí nguéé ndúú neⁿ'é yā s'uuúⁿ. Ní nguéé neⁿe yú 'aama yú taama yú. ⁴ Naati taachi Cristo chi n'dai taaví yā ní neⁿ'é yā nducyaaca 'iiⁿ'yāⁿ ndaa yā nanáⁿ yú, Cristo chi nadanguáⁿ'ai yā s'uuúⁿ, ⁵ tuu'mi ní nadanguáⁿ'ai yā s'uuúⁿ. Nguéé nadanguáⁿ'ai yā s'uuúⁿ cáávā chi diiⁿ yú cosas chi n'daacā naati caati ya'āi 'iinú yā s'uuúⁿ ní nadanguáⁿ'ai yā s'uuúⁿ caavā chi naaⁿ'nú yā s'uuúⁿ. Ní chuū neⁿe caaⁿ'maⁿ chi ch'iindiyaaⁿ yú ndúúcū vida ngai cucáávā Espíritu N'dai yeⁿ'é Ndyuūs. Ní Espíritu miiⁿ tee yā s'uuúⁿ 'áámá vida chí ngāi. ⁶ Ní 'tíicā cuuvi cucáávā Señor Jesucristo yeⁿe yú chi nadanguáⁿ'ai yā s'uuúⁿ, Ndyuūs tee yā núúⁿ'máⁿ ch'εεε Espíritu N'dai yeⁿe yā s'uuúⁿ. ⁷ Ní cucáávā Ndyuūs ca'á yā nducuéⁿ'ē chi n'dai yeⁿ'é yā, diíⁿ yā chi s'uuúⁿ nguεε 'iiⁿ'yāⁿ nuuⁿ'ndí yú nanáⁿ yā ti didεεvé yā s'uuúⁿ. Ní maaⁿ ní diiⁿ yā aceptar s'uuúⁿ ní caⁿ'á yā chi téé yā s'uuúⁿ vida cueⁿe daāⁿ'maⁿ chi cuuvi yeⁿe yú. Ní cunee ngiiⁿ'nuⁿ yú vida 'cūū chi cuuvi yeⁿe yú.

⁸ Nduudú 'cūū chi ngaⁿ'á ní nduudu cuaacu ní 'áámá cūnee. Neⁿ'é chi diitū cunee di ndúúcū nduudu 'cūū ní diitu caaⁿ'maⁿ di va. Ní 'íicú nduudú 'cūū cūnee 'iiⁿ'yāⁿ chi i'téenu yā Ndyuūs, ní 'iiⁿ'yāⁿ s'eeⁿ caⁿ'á yā diiⁿ yā ntiíⁿ'nyuⁿ chí n'daacā. Nduudú 'cūū ní n'daacā ní dichíí'vē 'iiⁿ'yāⁿ. ⁹ Nguéé cu'neeⁿ'veeⁿ di nduudu chi nguéé dichíí'vē chi n'dee n'dái chi n'guεεcútaⁿ'ā 'iiⁿ'yāⁿ. Ní nguéé cu'neeⁿ'veeⁿ ca di nduudu chi canéé nguūⁿ yeⁿ'e 'iiⁿ'yāⁿ yeⁿ'e ndaata yeⁿ'e di. Ndíí nguéé ndúú cu'neeⁿ'veeⁿ di yeⁿ'e 'iiⁿ'yāⁿ chi nguúⁿ yā yeⁿ'ē nduudu yeⁿ'e ley. Nduudú 'cūū nguéé de'ē vεε ní nguéé dichíí'vē. Naati cu'neeⁿ'veeⁿ cá di nduudu cuaacu yeⁿ'é Ndyuūs.

¹⁰ Nduuti chi 'áámá 'iiⁿ'yāⁿ diíⁿ yā chi véé divisiones nguaaⁿ 'iiⁿ'yāⁿ yeⁿ'e yaācū yeⁿ'e 'iiⁿ'yāⁿ chi i'téenu yā Cristo, yaa'vi di 'iiⁿ'yāⁿ miiⁿ 'áámá cuuvi o 'uūvī cuuvi. Ní ndúúti chi nguéé n'giindiveéⁿ yā yeⁿ'ē di tuu'mi ní tun'dáa di 'iiⁿ'yāⁿ miiⁿ yeⁿ'e yaācū. ¹¹ Deenu di chi 'iiⁿ'yāⁿ miiⁿ nguéé n'daacā vaanicadínūuⁿ yeⁿ'e yā ní dinuuⁿ'ndí yā. Ní nuuⁿ'ndí chi diíⁿ yā ní caaⁿ'maⁿ chi condenado yā.

Pablo ca'cueéⁿ yā Tito yeⁿ'ē chi canee chi diíⁿ yā

¹² Taachi dicho'ó hermano Artemas o hermano Tíquico nanáⁿ di, diiⁿ di chi diiⁿ'núúⁿ yiiⁿ'nu di chií di naachi canéé na yáāⁿ Nicópolis caati neⁿ'é cūneé yáāⁿ miiⁿ tiempo chi 'iiche. ¹³ Cunnee di Zenas chi abogado ndúúcū Apolos chi caⁿ'á yā na yúúní. Ní ca'a di 'iiⁿ'yāⁿ s'uuⁿ nducuéⁿ'ē necesidades yeⁿ'é yā cáávā viaje yeⁿ'é yā caati nguéé diíⁿ yā falta mar 'áámá. ¹⁴ Ní yaa'vi di hermanos yeⁿ'e yú chi i'téenu yā Jesucristo chí 'cueeⁿ yā taacā chi canee chi din'daacá yā nducuéⁿ'ē tiempo ní cunneé yā 'iiⁿ'yāⁿ chi véé necesidades yeⁿ'e yā caati 'tíicā dichíí'vē vida yeⁿ'e yā.

'Cuiñū carta ndúúcū saludos ndúúcū vaadi n'dai yeⁿ'é Ndyuūs

¹⁵ Nducyaaca hermanos chi snée yā nduucú: N'dai dii, ngāⁿ'a yā. Ní díí ngaⁿ'a di: N'dai yā, nducyaaca 'iiⁿ'yāⁿ chi i'téenu yā Ndyuūs, hermanos chi dineⁿ'e yú 'iiⁿ'yāⁿ. Neⁿ'é chi Ndyuūs téé yā ndís'tií nducuéⁿ'ē chi n'dai taavi yeⁿ'é yā. 'Tíicā cuuvi.

CARTA YEⁿE SAⁿĀ FILEMÓN

¹ 'Úú Pablo, saⁿā chi canuúⁿ vácūū cáávā chi díiⁿ ntiiⁿnyuⁿ yeⁿē Jesucristo. 'Úú ndúúⁿcū hermano Timoteo idingúuⁿ 'nū carta 'cūū yeⁿē dii Filemón chi nééné neⁿe 'nū dii compañero yeⁿe yú vi'í chi dáámá idiiⁿ yú ntiiⁿnyuⁿ ndúúⁿcū ví'i. ² Ní idinguúⁿ yeⁿe 'iiⁿyāⁿ chi yeⁿe yaācū chi nduuvidaamá yā ná vacu di ní yeⁿē hermana Apia ní yeⁿē hermano Arquipo chi diiⁿ sa luchar nduucú 'nū na ntiiⁿnyuⁿ chi diiⁿ 'nū. ³ Neⁿé chi Ndyuūs chiida yú ndúúⁿcū Señor Jesucristo téé yā ndís'tiī nducuéⁿē dendu'ū chi n'dai taavi yeⁿé yā ndúúⁿcū vaadī 'diīⁿ.

Filemón dinéⁿe yā 'iiⁿyāⁿ ni i'téenu yā Ndyuūs

⁴ Cueⁿe daāⁿmaⁿ 'úú ca'á gracias Ndyuūs taachi n'gaacú yeⁿe di 'naaⁿ chi ngaⁿāngua'á. ⁵ Caati hermanos yeⁿe yú ngaⁿa yā yeⁿe di tan'dúúⁿcā chi neⁿe di Señor Jesucristo yeⁿe yú ndúúⁿcū nducyaaca 'iiⁿyāⁿ chi yeⁿé Jesucristo, ní tan'dúúⁿcā chi i'téenu di Señor Jesucristo. ⁶ 'Úú ngiicá Ndyuūs caava 'iiⁿyāⁿ chi i'téenu yā caati candē di nduudu cuaacu yeⁿé Jesucristo nanáaⁿ yā. Ní ngiicá chi cuuvi tuumicadínūuⁿ yā yeⁿe tanducuéⁿē chi n'daacā chi Jesucristo itée yā s'uuúⁿ. ⁷ Ní 'úú yeenu taaví ní véé 'viich'εtínūuⁿ yeⁿé caati dinéⁿe di nducyaaca 'iiⁿyāⁿ. Ní ca'a di consuelo 'iiⁿyāⁿ chi i'téenu yā Ndyuūs.

Pablo ngiicá yā 'áámá favor caavā esclavo Onésimo

⁸ 'Áará chí cuuví dicho'ó orden yeⁿē di caati 'úú apóstol 'úú chí candē nduudu yeⁿé Ndyuūs, ⁹ naati neⁿé di cuiitú dii cucáávā chi neⁿe yú Cristo. 'Úú Pablo 'āā ndiicúú maaⁿ ní canuúⁿ vácūū cucáávā chi díiⁿ ntiiⁿnyuⁿ yeⁿe Cristo. ¹⁰ Ní ngiicá 'áámá favor caavā Onésimo chi tan'dúúⁿcā daiyá cucáávā chi i'téenu sa nduudu cuaacu yeⁿé Ndyuūs chi 'úú ngaⁿá taachi canuúⁿ vácūū.

¹¹ Tiempo chi chó'ōo sáⁿa 'cūū 'áámá esclavo yeⁿē di. Ní chéenu sa yeⁿē di. Ní nguéé de'ē vεε dichí'vē sa dii naati maaⁿ ní dichí'vē sa dii tan'dúúⁿcā chi dichí'vē sa 'úú. ¹² 'Úú dicho'ó sáⁿa 'cūū nanááⁿ dii. Dii ní 'cuáaⁿ di sáⁿa 'cūū tan'dúúⁿcā chi maáⁿ 'úú. ¹³ 'Úú neⁿé chí cunee sa nduucú caati cuuvi sa dichí'vē sa 'úú lado yeⁿē di neⁿe chí canuúⁿ vácūū cucáávā chi idiiⁿ ntiiⁿnyuⁿ yeⁿé Ndyuūs. ¹⁴ Naati nguéé de'ē vεε neⁿé chí a fuerza canee chí diiⁿ di nduuti chí nguéé neⁿe di. Naati neⁿé chí dii cunee yīnū di. Neⁿé chí diiⁿ di 'áámá favor nduucú, nguéé 'aama cosa chí di'cuiitú dii naati cosa chí maaⁿ di neⁿe di diiⁿ di. ¹⁵ Nééné dīví sa yeⁿe di 'áámá tiempo nūⁿ caati cuuvi cuta'a di saⁿá 'cūū chí dichí'vē sa dii cueⁿe daāⁿmaⁿ. ¹⁶ Naati maaⁿ ní nguéé cuta'a di saⁿá 'cūū tan'dúúⁿcā esclavo chí 'áámá cānee sa dichí'vē sa dii naati tan'dúúⁿcā chí 'aama saⁿā n'daacā ca, nguéé ti 'aama esclavo caati maaⁿ ní Onésimo 'cūū 'áámá hermano yeⁿe yú chí neenē neⁿé 'nū. 'Úú neⁿé taavi hermano Onésimo naati dii canee chí dinéⁿe taavi ca di saⁿā. Nguéé dámaāⁿ chí saⁿā esclavo naati chí hermano yeⁿe yú ti saⁿā miiⁿ ntūūⁿ ní yeⁿe Señor Jesucristo yeⁿe yú.

¹⁷ Maaⁿ ní nduuti chí dii sta'a di 'úú chí compañero yeⁿe di tuu'mi ní 'cuaaⁿ di Onésimo tan'dúúⁿcā chí 'úú nūⁿ. ¹⁸ Ní nduuti chí vεε chí nguεε n'daacā idiiⁿ sa ndúúⁿcū di o nduuti chí can'díicu sa yeⁿe di tuu'mi ní cu'neen dí cuenta yeⁿē 'úú. ¹⁹ 'Úú maáⁿ idinguúⁿ carta yeⁿe di ndúúⁿcū ta'á ní ndúúⁿcū letra yeⁿé. 'Úú nadii'vé yeⁿē di. Nguéé canee chí 'cuuví dii ti maaⁿ vida yeⁿē di can'díicu di yeⁿé cáávā chí caⁿá nduudu cuaacu yeⁿē di. ²⁰ Maaⁿ ní dii Filemón, di'cuítu ca dii chí diiⁿ di favor 'cūū nduucú chí 'cuaaⁿ di Onésimo caati s'uuúⁿ hermanos yeⁿe yú vi'í cucáávā chí i'téenu yú Señor Jesucristo. Téé di 'viich'εtínūuⁿ na staava yeⁿé tan'dúúⁿcā hermano yeⁿe yú vi'í chí yeⁿe Cristo.

²¹ Maaⁿ ní idinguúⁿ yeⁿē di ti seguro cāneé chí n'giindiveeⁿ di nduudu yeⁿé. 'Úú ní deenú chí idiiⁿ di ní n'daacā ca idiiⁿ di nguéé ti chí ngiicá dii. ²² Ní taachi 'úú ndaá cu'neen yaaⁿ di 'aama cuarto yeⁿé. Cunee ngiinú chí Ndyuūs caⁿá yā díiⁿ yā chíiⁿ chí ngaⁿāngua'á ní cáávā 'úú ní Ndyuūs neⁿe yā chí chíí ní n'diichí ndís'tiī.

'Cuiñū carta ndúúcū saludos ndúúcū vaadī n'dai yeⁿe Jesucristo

²³ Saⁿā Epafras chi yeⁿe Jesucristo ní compañero yeⁿé ní canee sa vácūū nduucú: N'dai di, ngaⁿa sa. ²⁴ 'Tiicá ntūūⁿ hermanos Marcos ndúúcū Aristarco ndúúcū Demas ndúúcū Lucas, hermanos chi díⁿ yā dáámá ntiiⁿnyuⁿ nduucú: N'dai di, ngaⁿá yā.

²⁵ Neⁿé chi Señor Jesucristo yeⁿe yú téé yā vaadī n'dai yeⁿé yā nducyaaca ndís'tiī. 'Tiicā cuuvi.

CARTA YE^{n'E} 'II^{n'}YĀⁿ HEBREOS

Ndyuūs dichó'o yā daiyá yā chi caa^{n'}mán yā lado ye^{n'}é yā

¹ Tiempo chi 'āā chó'ōo, Ndyuūs ca^{n'}a yā n'deeē cūūví tiempo ndúúcu neené n'deeē náán taachi profetas chi candéé yā nduudu ye^{n'}e Ndyuūs nga^{n'}á yā lado ye^{n'}é yā. ² Ní maaⁿ ní tiempo 'cūū Ndyuūs dichó'o yā daiyá yā Jesucristo chi nga^{n'}á yā ndúúcu s'uuúⁿ. Ní Ndyuūs ndúúcu daiyá yā din'dái yā tanducué^{n'}ē chi véé ní Ndyuūs ca'á yā tanducué^{n'}ē chi ye^{n'}ē daiyá yā. ³ Ní daiyá Dendyuūs miiⁿ ní ngí n'gai yā ye^{n'}ē chidεεvé n'dai ye^{n'}é Ndyuūs. Ní tan'dúúca Ndyuūs miiⁿ 'āā 'tiicá nūuⁿ daiyá yā. Daiyá yā ní ndúúcu nduudu chi nga^{n'}a yā, díⁿ yā chi tanducué^{n'}ē dendu'ū snéé na lugar ye^{n'}ē. Ní cuayiivi chi daiyá yā díⁿ yā chi nadach'εεcú yā ye^{n'}e 'ii^{n'}yāⁿ ye^{n'}e nuuⁿndi ye^{n'}é yā tuu'mi ní ch'iindí yā ná va'ai chεeti nguuvi na lado tá cuaacú chiidá yā chi lado ye^{n'}e honor. Ndyuūs miiⁿ ní poder chi ch'εεte ca ye^{n'}ē tanducué^{n'}ē poder.

Daiya Ndyuūs ní ch'εεte ca nguéé ti ángeles

⁴ Ní daiya Dendyuūs ní neené ch'εεte ca nguéé ti ángeles. Ní chi duuchí yā ndúúcu chi véé ye^{n'}é yā ní neené ch'εεte ca nguéé ti ángeles. ⁵ Caati mar 'áámá vmné^{n'}ēē nguéé ca^{n'}a Ndyuūs ndúúcu mar 'áámá ángel tan'dúúca chi nga^{n'}a yā ndúúcu daiyá yā Jesucristo: Díí ní daiyá; maaⁿ ca'á vida ye^{n'}é nī.

Ní nguéé ca^{n'}a yā ndúúcu mar 'áámá ángel 'tíicā:

'Úú ní chiida di 'úú; niicu díí ní daiyá dii. ⁶ Ní taachi Ndyuūs dichó'o yā 'áámá n'dya^{n'}ā daiyá yā i^{n'}ye^{n'}dí 'cūū nga^{n'}a yā 'tíicā:

Nducyaaca ángeles ye^{n'}é Ndyuūs canéé chi dich'εεté yā daiya Ndyuūs. ⁷ Ní Ndyuūs nga^{n'}a yā ye^{n'}e ángeles ye^{n'}e yā 'tíicā:

'Úú dííⁿ chi ángeles ye^{n'}é ní tan'dúúca espíritu s'eeⁿ, 'tiicá yā. Ní dííⁿ chi ángeles dichí'íve yā 'úú. Ní tan'dúúca 'áámá nguuchi ya^{n'}ā 'tíicā ángeles ye^{n'}é. ⁸ Naati Ndyuūs nga^{n'}á yā ye^{n'}e daiya yā Jesucristo 'tíicā:

Dii Ndyuūs, trono ye^{n'}e di ní 'áámá cūnee. Ní nga^{n'}a ntiiⁿnyuⁿ di ye^{n'}ē tanducué^{n'}ē ndúúcu vaadī cuaacu.

⁹ Dii ní ne^{n'}e di cosas chí cuaacu, ní nguéé ne^{n'}e di chεε chí nguéé cuaacu. Cucáávā chuū Ndyuūs ye^{n'}e di chí chiida di ní tee yā dii vaadī yeenu taavi nguéé ti ca'a yā 'ii^{n'}yāⁿ chí ye^{n'}é nī. ¹⁰ 'Tiicá ntúūⁿ Ndyuūs nga^{n'}a yā ye^{n'}ē daiyá yā Jesucristo:

Díí, Señor, ndii cuáán vmnaaⁿ s'núuⁿ di cimientu ye^{n'}e i^{n'}ye^{n'}dí 'cūū, ní din'dái di nanguuvi ndúúcu ta'a di.

¹¹ I^{n'}ye^{n'}dí ndúúcu nánguuví ní dí'cuiinu naati díí 'áámá cūnee di. Ní tanducué^{n'}ē chuū cuuvi ndiicúū tan'dúúca catecaí yú, 'tíicā ndiicúū.

¹² Ní dííⁿ nī n'cánnduu nī nducué^{n'}ē tan'dúúca 'ii^{n'}yāⁿ dííⁿ yā chí n'cannduu yā catecaí yā. Ní n'daaⁿ di nducué^{n'}ē tan'dúúca 'ii^{n'}yāⁿ n'daaⁿ yā catecaí yā. Naati dii Jesucristo daiyá Ndyuūs 'āā daamá nūuⁿ canee di nduuyu nduuyu. Ní 'áámá cūnee di cue^{n'}e daāⁿmaⁿ. ¹³ Ndyuūs nguéé ca^{n'}á yā mar 'áámá ángel mar 'áámá vmné^{n'}ēē tan'd'úúca chí ngii yā daiyá yā Jesucristo 'tíicā:

'Cuūndī di lado ta cuaacú ndíí 'úú dííⁿ chí nducyaacá yā chí taán yā ye^{n'}ē di canéé yā maaⁿ ca'a di tan'dúúca 'áámá banco 'líí 'tíica yā chí chéé dí ye^{n'}é yā. ¹⁴ Nducyáácá ángeles ní espíritu s'eeⁿ chí dííⁿ yā ntiiⁿnyuⁿ ye^{n'}é Ndyuūs. Ní Ndyuūs dichó'o yā ángeles chí innee yā 'ii^{n'}yāⁿ na i^{n'}ye^{n'}dí 'cūū chí Ndyuūs nadinguá^{n'}ai yā.

2

Canéé chí diiⁿ yú cuidado ye^{n'}e chí Ndyuūs nadanguá^{n'}ai yā s'uuúⁿ

¹ Ní cucáávā chí Cristo nadanguá^{n'}ai yā s'uuúⁿ canéé chí candεε yú cuidado ye^{n'}é nduudu cuaacu chí n'giindiveeⁿ yú ti nguéé i'neeⁿ yú cucáávā nduudu chí n'daaⁿ ní

maaⁿ ní nguée caⁿa yú táamá yúúni. ² Nduudu cuaacu chi 'āā ngaⁿa ángeles ní nduudu chi ch'iⁿi nanáán 'iiⁿyāⁿ chi cuaacu níⁿnyúⁿ chí nduudu cuaacu. Ní 'iiⁿyāⁿ chi nguée n'giindiveéⁿ yā nduudu cuaacu miiⁿ ní véé nuuⁿndi yeⁿ'é yā 'āā cūneé yā na castigo caati 'tíicā cuuvi. ³ Ní maaⁿ ní ḡtáácā cuuvi nanguaⁿāi s'uuúⁿ yeⁿ'e castigo nduuti chi nguée diiⁿ yú cuidado yeⁿ'ē chi nadanguáⁿai yā s'uuúⁿ? Vmnaán vmnaaⁿ Señor Jesucristo ngaⁿá yā chi nadanguáⁿai yā 'iiⁿyāⁿ. Cuayiivi miiⁿ ní 'iiⁿyāⁿ chi ch'iindiveéⁿ yā nduudu miiⁿ diíⁿ yā ch'iⁿí yā s'uuúⁿ ndúúⁿcū pruebas chi nduudu miiⁿ ní nduudu cuaacu. ⁴ 'Tiicá ntúūⁿ tiempo maaⁿ Ndyuūs ch'iⁿí yā s'uuúⁿ chi cuaacu chi nduudu miiⁿ ní cuaacu caati diíⁿ yā señas ndúúⁿcū vaadi n'giinu chi ch'εεε. Ní ch'iⁿí yā poder yeⁿ'é yā ní diíⁿ yā milagros. Ní ca'a yā n'dee n'dái ntiiⁿnyuⁿ yeⁿ'é Espíritu N'dai yeⁿ'é yā 'iiⁿyāⁿ chi yeⁿ'e yā caati 'tíicā neⁿ'é yā diiⁿ yā.

Jesucristo ch'iindiyáaⁿ yā tan'dúúⁿcā 'áámá saⁿ'ā yeⁿ'e íⁿ'yeeⁿdí

⁵ Ndyuūs nguée cuuvi s'neéⁿ yā chi ángeles miiⁿ ngaⁿá yā ntiiⁿnyuⁿ yeⁿ'e íⁿ'yeeⁿdí chi cuayiivi caⁿ'á yā din'dái yā. Ní yeⁿ'e íⁿ'yeeⁿdí miiⁿ chíⁿ chí ngaⁿ'a yú. ⁶ Nguée diíⁿ yā 'tíicā. Ná libro yeⁿ'e Ndyuūs chi canéé nguūⁿ ní 'áámá yā ngaⁿ'a yā 'tíicā:

N'dii, Ndyuūs, ḡd'éⁿ chi saⁿ'ā s'eeⁿ chi snéⁿ na iⁿ'yeeⁿdí 'cūⁿ chi nan'gaacu nī yeⁿ'ē sa?

ḡd'éⁿ chi saⁿ'ā s'eeⁿ chi snéⁿ na iⁿ'yeeⁿdí 'cūⁿ chi diíⁿ nī cuidado yeⁿ'e saⁿ'ā s'eeⁿ?

⁷ Ta 'lííⁿ tiempo nūuⁿ n'dii, Ndyuūs, s'neéⁿ nī saⁿ'ā Daiyá nī chi nguée ch'εεε cá yā tan'dúúⁿcā ángeles. Ní teé nī saⁿ'ā daiyá nī chi ch'εεé yā ndúúⁿcū honra yeⁿ'é yā tan'dúúⁿcā chi saⁿ'ā rey 'tíicā yā. Ní chi'néeⁿ nī saⁿ'a miiⁿ chi caaⁿ'maⁿ ntiiⁿnyuⁿ yā yeⁿ'e tanducuéⁿ'ē chi nadin'dái nī.

⁸ Ní s'neéⁿ nī tanducuéⁿ'ē dendu'ū maaⁿ ta'á yā.

Ní 'tíicā rā va ti Ndyuūs s'neéⁿ yā tanducuéⁿ'ē dendu'ū chi saⁿ'ā miiⁿ caaⁿ'máⁿ yā ntiiⁿnyuⁿ yeⁿ'ē. Maaⁿ ní nguée inaaⁿ yú chi saⁿ'ā miiⁿ ngaⁿ'a ntiiⁿnyúⁿ yā yeⁿ'e tanducuéⁿ'ē. ⁹ Naati maaⁿ ní snaaⁿ yú chi Ndyuūs diíⁿ yā chi Jesucristo nguée ch'εεé yā tan'dúúⁿcā ángeles dúúⁿ'ví tiempo nūuⁿ. Ní Ndyuūs neene ya'ai 'iinú yā 'iiⁿyāⁿ yeⁿ'e iⁿ'yeeⁿdí 'cūⁿ chi neⁿ'é yā chi Jesucristo ch'iⁿi yā lugar yeⁿ'e nducyaaca yú. Maaⁿ ní véé dεεvé yeⁿ'e Jesucristo ní véé honra yeⁿ'é yā cucááⁿvā chí ch'iⁿi yā na cruz.

¹⁰ Ní Ndyuūs din'dái yā tanducuéⁿ'ē dendu'ū ní diíⁿ yā cuidado yeⁿ'ē. Ní n'daacā diiⁿ Ndyuūs taachi diiⁿ chi Jesucristo miiⁿ ní saⁿ'ā perfecto yā chí chichéé yā yeⁿ'e nducuéⁿ'ē chi n'geenu yā ngii. Ní Ndyuūs n'diichí yā chi n'daacā idiíⁿ yā. 'Tíicā diiⁿ Ndyuūs caati cuuvi yeⁿ'é yā n'dee n'dái daiyá yā. Ní cuuvi ca'a yā 'iiⁿyāⁿ s'eeⁿ parte chi cuuvi yeⁿ'é yā ndúúⁿcū vaadi dεεve n'dai yeⁿ'é yā. Jesucristo ní saⁿ'ā chi nadanguáⁿai yā 'iiⁿyāⁿ yeⁿ'e iⁿ'yeeⁿdí 'cūⁿ. ¹¹ Ní Jesucristo ní didevé yā 'iiⁿyāⁿ yeⁿ'e nuuⁿndi yeⁿ'é yā ní 'iiⁿyāⁿ chí ndúúⁿ'ví dεεvé yā ní tan'dúúⁿcā Jesucristo miiⁿ. Véé 'áámá nūuⁿ chiida nducyaaca 'iiⁿyā. Cááⁿvā chuū Jesucristo nguée 'cuinaáⁿ yā chi caaⁿ'máⁿ yā chí 'iiⁿyāⁿ s'eeⁿ ní v'í yā. ¹² Ní 'tíicā Jesucristo ngaⁿ'á yā ngii yā 'iiⁿyāⁿ s'eeⁿ ní canéé nguūⁿ:

N'dii Ndyuūs, 'úú caaⁿ'máⁿ yeⁿ'é n'dii nanáánⁿ hermanos yeⁿ'é ní caātá himnos chi cantos chi ngaⁿ'ā chí ch'εεé nī nanáánⁿ 'iiⁿyāⁿ yeⁿ'é nī taachi nduuvidaamá yā. ¹³ Taama vmnéⁿ'ēe Jesucristo caⁿ'a yā 'tiicā:

'Úú ní canéé confianza yeⁿ'é ndúúⁿcū Ndyuūs.

Ní táámá caⁿ'a yā:

'Muuⁿ canéé ndúúⁿcū daiyá chí Ndyuūs tee yā 'úú.

¹⁴ 'Tíicā, 'iiⁿyāⁿ yeⁿ'e 'áámá familia ní 'áámá yuūtē yeⁿ'é yā ní 'áámá yuūⁿ ntúūⁿ va. Ní 'tiicá ntúūⁿ Jesucristo miiⁿ ch'iindiyáaⁿ yā ndúúⁿcū cuerpo ndúúⁿcū yuūⁿ tan'dúúⁿcā s'uuúⁿ. Ní 'tiicá ntúūⁿ Jesucristo ch'iⁿi yā caati cuuvi di'cuiinú yā yááⁿ'guiinūⁿ caavā chí diiⁿ sa chí nducyaaca yú ní n'gii yú. ¹⁵ 'Tiicá ntúūⁿ Jesucristo diíⁿ yā chí nguée 'va'a yú yeⁿ'e tiempo chí 'cuuvi yú. ¹⁶ Cuaacu chí Jesucristo nguée ndaá yā nanáánⁿ ángeles chí chinnee yā ángeles naati nanáánⁿ 'iiⁿyāⁿ yeⁿ'e ndaata yeⁿ'e Abraham cááⁿvā chí nadanguáⁿai yā 'iiⁿyāⁿ. ¹⁷ Cááⁿvā chuū Jesucristo canéé chí ch'iindiyáaⁿ yā tan'dúúⁿcā nducyaaca hermanos yeⁿ'é yā ní 'íicú maáⁿ yā cuuvi cūneé yā chiidúú ch'εεε ca chí 'áámá

cānee yeⁿe ntiinⁿnyuⁿ yeⁿe Ndyuūs. Ní ya'ai 'iinú yā 'iiⁿ'yāⁿ. Ní 'íicú cuuví nadach'ēēcú yā nuuⁿndi yeⁿe 'iiⁿ'yāⁿ ti nadí'í'vε yā nducuéⁿ'ē nuuⁿndi yeⁿe 'iiⁿ'yāⁿ. ¹⁸ Ní Jesucristo maáⁿ yā ch'eenú yā chiī ní chichεε yā taachi ndaá yááⁿ'n'guiinūⁿ chí n'diichineeⁿ sa 'yā. Ní cáávā chuū maaⁿ ní Jesucristo cuuvi cūnnee yā 'iiⁿ'yāⁿ s'eeⁿ taachi n'geenú yā ngii ní nadanguáⁿ'ai yā 'iiⁿ'yāⁿ s'eeⁿ yeⁿe yááⁿ'n'guiinūⁿ taachi ndaa sa n'diichineeⁿ sa 'iiⁿ'yāⁿ s'eeⁿ.

3

Jesucristo ní ch'εεε taavi cá yā nguéé ti Moisés

¹ Nds'tiī, hermanos yeⁿ'ē yú chi Cristo didεεvé yā ní ndís'tiī ntúūⁿ Ndyuūs yaa'ví yā ndís'tiī chi cuuvi yeⁿ'é yā. Maaⁿ ní nadicádínūⁿ n'dai nī yeⁿ'e Jesucristo chi apóstol chi dichó'o Ndyuūs ti Jesucristo miiⁿ ní chiiduú ch'εεε cá yeⁿ'é 'iiⁿ'yāⁿ chi i'téenu yā Jesucristo tan'dúúcā s'uuúⁿ. ² Jesucristo miiⁿ 'áámá canee yā ndúúcū Ndyuūs ní dííⁿ yā tanducuéⁿ'ē dendu'ū. Ní dííⁿ yā tanducuéⁿ'ē dendu'ū chi Ndyuūs dineⁿ'é yā. Ní tan'dúúcā Moisés din'daacá yā ntiiⁿnyuⁿ chi Ndyuūs ca'a yā, 'tiicá ntúūⁿ Jesucristo din'daacá yā tanducuéⁿ'ē ntiinⁿnyuⁿ yeⁿ'ē va'ai yeⁿ'é Ndyuūs chi Ndyuūs ca'a yā. ³ Ní 'áámá 'iiⁿ'yāⁿ chi din'dái yā 'aama va'āi ní ch'εεε cá yā nguéé ti va'āi miiⁿ. 'Tíicā Jesucristo ní ch'εεε taavi cá yā nguéé ti Moisés. ⁴ Deenu yú chi véé 'iiⁿ'yāⁿ chi din'dái yā ca'áámá cā'aama va'āi naati Ndyuūs din'dái yā nducuéⁿ'ē dendu'ū chí véé. ⁵ Moisés miiⁿ dichí'í'vε yā Ndyuūs ní n'dáaca taavi idiiⁿ sa ntiiⁿnyuⁿ yeⁿ'ē vaacu Ndyuūs. Ní Moisés dííⁿ yā ntiiⁿnyuⁿ chi ngaⁿ'a yā nduudu yeⁿ'é Ndyuūs chí Ndyuūs caⁿ'a yā chí caaⁿ'máⁿ yā cuayiivi. ⁶ Naati Cristo chi daiyá Dendyuūs ní 'áámá dííⁿ yā ntiiⁿnyuⁿ ti 'iiⁿ'yāⁿ ndii tííⁿ yā yeⁿ'e vaacu Dendyuūs. Ní s'uuúⁿ tan'dúúcā vaacu Ndyuūs 'tíicā s'uuúⁿ nduuti chí canee díitu yú ndúúcū chí i'teenu yú. Ní yeenu yú ndúúcū chí cuuvi yeⁿ'e yú ndíí tiempo chí 'cuūvi yú.

Véé tiempo chí ntaavi'tuunúūⁿ 'iiⁿ'yāⁿ chí yeⁿ'é Ndyuūs

⁷ Ní chuū Espíritu N'dai yeⁿ'é Ndyuūs ngaⁿ'a yā 'túúcā naachi canee nguūⁿ na libro yeⁿ'é Ndyuūs:

Maaⁿnguuví miiⁿ nduuti chí ndís'tiī 'caandiveéⁿ nī nduudu yeⁿ'é Ndyuūs:

⁸ Nguéé dichεεchí nī staava yeⁿ'é nī chí ditaáⁿ nī tan'dúúcā chí dííⁿ 'iiⁿ'yāⁿ tiempo chí 'āā chó'ōo taachi 'iiⁿ'yāⁿ s'eeⁿ dííⁿ yā n'diichineeⁿ yā Ndyuūs ndúúcū nuuⁿndi chí dííⁿ yā na yáⁿ'āa cuuⁿ'máⁿ naachi nguéé ch'εεtinéé 'iiⁿ'yāⁿ. ⁹ Ní Ndyuūs ngaⁿ'á yā ngii yā 'iiⁿ'yāⁿ:

Tiempo chí chó'ōo na yáⁿ'āa cuuⁿ'máⁿ naachi nguéé ch'εεtinéé 'iiⁿ'yāⁿ, 'iiⁿ'yāⁿ s'eeⁿ yeⁿ'ē ndaata yeⁿ'é nī n'diichineeⁿ ntúūⁿ yā 'úú 'áará chí n'diichí yā nducuéⁿ'ē chí 'úú dííⁿ ndúúcū yā 'naaⁿ chí 'uūví ngeεcu nduuyū.

¹⁰ Ní cáávā chuū 'úú, Ndyuūs, ditaáⁿ ndúúcū 'iiⁿ'yāⁿ s'eeⁿ. Ní 'túúcā ngaⁿ'á ngii 'iiⁿ'yāⁿ s'eeⁿ: Nds'tiī, nducuéⁿ'ē tiempo nguéé n'daacā nadacadínūⁿ nī na staava yeⁿ'é nī. Ní nguéé n'diichí nī yúúní yeⁿ'é.

¹¹ Ní cáávā chí dííⁿ 'iiⁿ'yāⁿ s'eeⁿ 'úú ní nguéé canee yiinú yeⁿ'e yā ní caⁿ'a 'túúcā: Cuáácú chí 'iiⁿ'yāⁿ s'eeⁿ nguéé cuuví ndaa yā naachi canee chí ntaavi'tuunúūⁿ 'iiⁿ'yāⁿ yeⁿ'e ndaata yeⁿ'é nī.

¹² Maaⁿ ní ndís'tiī, hermanos yeⁿ'é, cundée nī cuidado chí nguéé 'áámá ndís'tiī chí nguéé n'daacā staava yeⁿ'é nī chí nguéé i'téenu nī ní nguéé divíⁿ nī yeⁿ'é Ndyuūs chí canduuchi. ¹³ Ní ndís'tiī ní yaa'ví nī ví'i nī 'áámá nī taama nī nguuví nguuví taachi maaⁿnguuví ní 'íicú mar 'áámá ndís'tiī nguéé dichεεchí nī staava yeⁿ'é nī cáávā nuuⁿndi chí nginnche'ēi ndís'tiī. ¹⁴ Ní véé 'áámá cuaaⁿ yeⁿ'ē yú ndúúcū Cristo nduuti chí s'uuúⁿ ní 'áámá canee yú ndúúcū chí i'téenu yú vmnááⁿ vmnaaⁿ yeⁿ'e Cristo ndíí tiempo chí 'cuūvi yú.

¹⁵ 'Tíicā canee nguūⁿ na libro yeⁿ'é Ndyuūs: Nguéé dichεεchí nī staava yeⁿ'é nī chí ditaáⁿ nī tan'dúúcā chí dííⁿ 'iiⁿ'yāⁿ na yáⁿ'āa cuuⁿ'máⁿ naachi nguéé ch'εεtinéé 'iiⁿ'yāⁿ tiempo chí chó'ōo taachi n'diichineeⁿ

yā 'úú chi Ndyuūs. ¹⁶ ¿Du'ú 'ii'yāⁿ chi ch'iindiveéⁿ yā nduudu yeⁿ'é Ndyuūs ní cuayiivi nduuvitaáⁿ yā? 'Túúcā diiⁿ nducyaaca 'ii'yāⁿ chi cueⁿ'é yā ndúúcu Moisés yeⁿ'e yáⁿ'āa Egipto. Nducyaaca yā nduuvitaáⁿ yā. ¹⁷ ¿Du'ú 'ii'yāⁿ chi Ndyuūs nguéé yiinú yā nduucú yā 'uúvī ngeecu nduuyu? 'Túúcā nguεε yiinú yā ndúúcu 'ii'yāⁿ chi dinuuⁿndí yā ní ch'ií yā na yáⁿ'āa cuūⁿmáⁿ naachi nguéé ch'εetinéé 'ii'yāⁿ. ¹⁸ ¿Du'ú 'ii'yāⁿ chi Ndyuūs ngaⁿ'á yā caavā maaⁿ chi duuchí yā chi 'ii'yāⁿ s'eeⁿ nguéé cuuví cundaa yā lugar naachi ntaavi'tuunúuⁿ 'ii'yāⁿ yeⁿ'e yā? 'Túúcā ngaⁿ'á yā yeⁿ'e 'ii'yāⁿ chi nguéé n'giindiveéⁿ yā nduudu yeⁿ'e yā. ¹⁹ Maaⁿ ní deenu yú ti 'ii'yāⁿ s'eeⁿ nguéé cuuvi cundaa yā lugar yeⁿ'e Ndyuūs ti nguéé i'téenu yā Ndyuūs.

4

¹ Maaⁿ ní Ndyuūs tee yā promesa s'uuúⁿ chi cuuvi cundaa yú lugar yeⁿ'é yā ní cuuvi ntaavi'tuunúuⁿ yú ndúúcu Ndyuūs. Canéé chí candεε yú cuidado caati 'aatī 'aama chéé ndis'tií nguéé cuchéé nī tanducuéⁿ'ē dendu'ú ní nguéé cuuvi cundaa nī lugar miiⁿ. ² Caati 'ii'yāⁿ yeⁿ'é Jesucristo ndéé yā nduudu cuaacu yeⁿ'é Jesucristo nanááⁿ s'uuúⁿ, 'tiicá ntúúⁿ nanááⁿ 'ii'yāⁿ s'eeⁿ chi ch'ií yā na yáⁿ'āa cuuⁿmáⁿ naachi nguéé ch'εetinéé 'ii'yāⁿ. Ní nguéé dichíí'vē nduudu cuaacu yeⁿ'é Ndyuūs nguaaⁿ 'ii'yāⁿ s'eeⁿ ti taachi ch'iindiveéⁿ yā nduudu miiⁿ nguéé s'téenu yā yeⁿ'ē. ³ Naati s'uuúⁿ chi i'teenu yú nduudu miiⁿ, s'uuúⁿ ní cuuvi ndaa yú naachi caⁿ'a Ndyuūs chi ntaavi'tuunúuⁿ yú ndúúcu yā. 'Tíicā ngaⁿ'a Ndyuūs na libro yeⁿ'é yā naachi canéé nguūⁿ:

Cáávā chi dííⁿ 'ii'yāⁿ s'eeⁿ 'úú nguéé yiinú yeⁿ'e yā. Ní cuaacú ngaⁿ'á nduudu ndúúcu maááⁿ chi duuchí. Nguéé cuuvi ndaa yā nduucú na lugar yeⁿ'é naachi ntaavi'tuunúuⁿ.

Ní Ndyuūs dí'cuinú yā ntiiⁿnyuⁿ yeⁿ'é yā taachi din'dái yā iⁿ'yeeⁿdí 'cūū. ⁴ Ní 'áámá cuaaⁿ yeⁿ'ē libro yeⁿ'é Ndyuūs naachi canéé nguūⁿ ní ngaⁿ'a yeⁿ'ē ndí chí ndεēchē nguuvi chi ntaavi'tuunúuⁿ 'ii'yāⁿ:

Ndyuūs ní ndí chí ndεēchē nguuvi ntaavi'tuunúuⁿ yā yeⁿ'ē tanducuéⁿ'ē ntiiⁿnyuⁿ yeⁿ'é yā. ⁵ Ní canee táámá vmneⁿ'ēe na libro yeⁿ'e Ndyuūs 'tíicā:

'Ii'yāⁿ s'eeⁿ nguéé cuuvi cūndaa yā ní ntaavi'tuunúuⁿ yā nduucú. ⁶ Maaⁿ ní véé n'duuví 'ii'yāⁿ chi canéé chi cundaa yā na lugar naachi ntaavi'tuunúuⁿ 'ii'yāⁿ. Naati 'ii'yāⁿ chi vmnááⁿ vmnaaⁿ n'giindiveéⁿ yā nduudu cuaacu miiⁿ nguéé s'ndaa yā ti nguéé s'téenu yā Ndyuūs. ⁷ Taama vmnéⁿ'ēe Ndyuūs s'neéⁿ yā 'áámá nguuvi ní ngaⁿ'a yā chi nguuvi ní maaⁿnguuví. Ní Ndyuūs ngaⁿ'a yā yeⁿ'ē nduudu miiⁿ cuayiivi taachí 'āā chó'ōo chuū. 'Āā 'naaⁿ tiempo nguuvi chi David ngaⁿ'a sa yeⁿ'ē. Ní 'tíicā canéé nguūⁿ na libro yeⁿ'é Ndyuūs yeⁿ'ē nguuvi miiⁿ:

Maaⁿnguuvi nduuti chi ndís'tií 'caandiveéⁿ nī nduudu chi Ndyuūs ngaⁿ'á yā: Nguéé dichεechí nī staava yeⁿ'é nī. ⁸ Ní nduuti chi saⁿ'ā Josué chi saⁿ'ā ndí tiíⁿ yeⁿ'e 'ii'yāⁿ Israel s'eeⁿ cuuvi sa ca'a sa 'ii'yāⁿ Israel s'eeⁿ chí ntaavi'tuunúuⁿ yā tuu'mi ní Ndyuūs nguéé canee chi caaⁿ'máⁿ yā taama vmnéⁿ'ēe yeⁿ'ē táámá nguuvi. ⁹ Maaⁿ ní cáávā chuū véé chí ntaavi'tuunúuⁿ 'ii'yāⁿ chi yeⁿ'é Ndyuūs. ¹⁰ Ní 'ii'yāⁿ chi s'ndaa yā naachi Ndyuūs ntaavi'tuunúuⁿ yā 'āā ntéé idiíⁿ yā ntiiⁿnyuⁿ tan'dúúca chi Ndyuūs 'āā ntéé idiíⁿ yā ntiiⁿnyuⁿ. ¹¹ Maaⁿ ní canéé chí dí'cuítu yú chi cuuvi cūndaa yú lugar naachi ntaavi'tuunúuⁿ yú ní 'aatī tanáⁿ'ā yú diiⁿ yú chi nguéé i'téenu yú tan'dúúca 'ii'yāⁿ s'eeⁿ chi nguéé chí'téenu yā.

¹² Ní nduudu cuaacu yeⁿ'é Ndyuūs ní canduuchi ní neené ditiinú. Ní vεε ca 'caāiⁿ yeⁿ'ē nguéé ti 'áámá machete chi 'caāiⁿ nduu 'uuvī lados. 'Tíicā nduudu cuaacu yeⁿ'é Ndyuūs. Ndaā na coo yeⁿ'e cuerpo yeⁿ'e yú naachi canee alma yeⁿ'e yú ndúúcu espíritu yeⁿ'e yú ndí túútē yeⁿ'e yú. Ní déénu chεε chi tumicadínuuⁿ yú ndúúcu chεε chi neⁿ'e yú diiⁿ yú chi ngiicā yeⁿ'e staava yeⁿ'e yú. ¹³ Nguéé de'ē vεε chí véé chí cuuvi cunúúⁿ n'de'ei yeⁿ'é Ndyuūs. Ndyuūs din'dái yā tanducuéⁿ'ē dendu'ú chí véé ní inááⁿ yā nducuéⁿ'ē tan'dúúca

chi canee nanáaⁿ yā. Ní canéé chí ca'a yú cuenta yeⁿe vida yeⁿe yú taachi ndaa yú nanáaⁿ yā.

*Jesús ni chiiduú ch'*εεε taavi ca yeⁿe yú

¹⁴ Jesús chi daiyá Dendyuūs ní chiiduú ch'εεε taavi ca yeⁿe yú. Ní cunaⁿa yā va'ai cheeti nguuví ní ndaa yā nanáaⁿ Ndyuūs. Ní cáávā chuū canee chí 'áámá canee yú ndúúcū chí i'teenu yú Ndyuūs. ¹⁵ Ní chiiduú ch'εεε taavi ca yeⁿe yú ya'ai 'iinú yā s'uuúⁿ taachi n'geenu yú ngii caati Jesús miiⁿ ní ch'eenú yā chii tanducuéⁿē tan'dúúcā s'uuúⁿ naati nguéé dinuuⁿndí yā mar 'áámá vmnéⁿē. ¹⁶ Ní cáávā chuū cuuvi ndaa yú nanáaⁿ trono yeⁿe Ndyuūs yeⁿe yú ndúúcū confianza ti dineⁿé yā s'uuúⁿ. Ní 'íicú Ndyuūs cuuvi ya'ai 'iinú yā yeⁿe s'uuúⁿ ní cunnee yā s'uuúⁿ taachi, véé necesidades yeⁿe yú. Ní itée yā s'uuúⁿ denduⁿū chí n'daacā n'dai yeⁿé yā.

5

¹ Tiempo chí ch'ó'ōo 'iiⁿyāⁿ chí snée yā iⁿ'yeeⁿdí 'cūū ndεεvé yā ca'áámá cā'aama chiiduú ch'εεε chí canéé chí díⁿ yā ntiiⁿnyuⁿ yeⁿé Ndyuūs cucáávā 'iiⁿyāⁿ s'eeⁿ. Ní ca'á yā ofrendas ní 'caaⁿnúⁿ yā 'iiti chí candεε 'iiⁿyāⁿ s'eeⁿ ti ofrenda caavā nuuⁿndi yeⁿé yā. ² Ní chiiduú ch'εεε ca ní dinuuⁿndí yā tan'dúúcā nducyáácá 'iiⁿyāⁿ. Ní cáávā chuū véé paciencia yeⁿé yā ndúúcū 'iiⁿyāⁿ chí tonto ní ndúúcū 'iiⁿyāⁿ chí dinuuⁿndí yā. ³ Ní chiiduú ch'εεε ca cáávā chí dinuuⁿndi yā canéé chí 'caaⁿnúⁿ yā 'iiti chí ofrenda yeⁿe maáⁿ yā cáávā nuuⁿndi yeⁿe maáⁿ yā tan'dúúcā chí díⁿ tanáⁿā 'iiⁿyāⁿ cáávā nuuⁿndi yeⁿé yā.

⁴ Ní mar 'áámá saⁿā cuuví diiⁿ sa nombrar maaⁿ sa lado yeⁿe chí chiiduú ch'εεε ca cáávā chí maāⁿ sa neⁿe sa ti Ndyuūs yaa'ví yā saⁿā chí cuuvi chíiduú ch'εεε ca chí diiⁿ sa ntiiⁿnyuⁿ yeⁿé yā tan'dúúcā chí yaa'ví yā saⁿā Aarón chí cuuvi chíiduú ch'εεε ca tiempo chí 'āā ch'ó'ōo. ⁵ 'Tiicá ntúūⁿ ch'ó'ōo yeⁿe Cristo. Cristo miiⁿ nguéé díⁿ yā nombrar maáⁿ yā chí cuuvi chíiduú ch'εεε ca. Ndyuūs yaa'ví yā Cristo chí cuuvi chíiduú ch'εεε ca. Ní 'tíicā canéé nguūⁿ na libro yeⁿé Ndyuūs:

Dii ní daiyá, 'úú ní chiida di ní cuaacu chí dii ní daiyá. ⁶ Ngaⁿa ntúūⁿ táámá ní canéé nguūⁿ na libro yeⁿé Ndyuūs 'tíicā:

Díⁿ ní daiyá ní cuéⁿé daāⁿmaⁿ canee di chíiduú ch'εεε ca. Tan'dúúcā chí tiempo chí 'āā ch'ó'ōo chíiduú ch'εεε ca chí nguuví Melquisedec 'tiicá ní ti yeⁿé ndaata yeⁿé yā. ⁷ Ní taachi Jesús canee yā iⁿ'yeeⁿdí 'cūū caⁿ'angua'á yā nanáaⁿ Ndyuūs chiidá yā ní ngaⁿa yā: N'díⁿ Ndyuūs díⁿ ní chíiⁿ chí neⁿé ní. Ní 'caī diitú yā neⁿe chí cheécú yā: N'díⁿ, Ndyuūs, cuuvi nadanguáⁿai ní 'úú chí nguéé 'cuuví nduuti chí neⁿé ní díⁿ ní 'tíicā. Ní Ndyuūs ch'iindiveéⁿ yā nduudu yeⁿe Jesús taachi ngaⁿ'angua'á yā ti dich'εεé yā Ndyuūs. Ní Ndyuūs ca'á yā fuerzas Jesús. ⁸ Ní 'áará chí Jesús miiⁿ ní daiyá Dendyuūs ch'eeⁿ yā cáávā denduⁿū chí canéé chí ch'eenú yā chíi ní ch'iindiveéⁿ yā yeⁿe nducuéⁿē. ⁹ Ní taachi Ndyuūs n'diichineéⁿ yā Jesús, Jesús miiⁿ ní díⁿ yā nducuéⁿē chí neⁿe Ndyuūs. Ní 'íicú Jesús miiⁿ cuuví yā nadanguáⁿai yā nducyaaca s'uuúⁿ chí n'giindiveeⁿ yú yeⁿe yā. ¹⁰ Ní Ndyuūs díⁿ yā chí Jesús cuuvi chíiduú ch'εεε ca tan'dúúcā tiempo chí ch'ó'ōo chíiduú ch'εεε ca chí nguuví Melquisedec, 'tiicá yā.

Véé peligro yeⁿe yú chí ngaⁿa yú chí 'āā ntéé i'teenu yú Jesucristo

¹¹ Maaⁿ ní véé cá chí neⁿé 'nū caaⁿmánⁿ 'nū yeⁿe Melquisedec chí chíiduú ch'εεε ca naati ngii n'dái caaⁿmánⁿ 'nū yeⁿe ti ndís'tiī ní nguéé ituumicadiinuⁿ ní. ¹² 'Āā ch'ó'ōo tiempo chí ndís'tiī 'āā s'téenu ní ní maaⁿ ní ndís'tiī canéé chí ca'cueéⁿ ní 'iiⁿyāⁿ naati ndíⁿ maaⁿ 'āā neⁿé ní taama vmnéⁿē chí 'áámá 'iiⁿyāⁿ ca'cueéⁿ yā ndís'tiī denduⁿū chí vmnááⁿ vmaaⁿ yeⁿé Ndyuūs. Ní ndís'tiī ní 'āā débil ní. Ní tan'dúúcā dacuá'āa chí neⁿe leche ní nguéé neⁿe comida chí ditiinú, 'tiicá ní. ¹³ Ní 'iiⁿyāⁿ chí dámaāⁿ ngi'i leche ní tan'dúúcā dacuá'āa 'tiicá yā. Ní nguéé deenú yā de'ē chí n'daacā o de'ē chí nguéé n'daacā. ¹⁴ Ní comida chí ditiinu ní che'é 'iiⁿyāⁿ n'gεεé chí 'āā deenú yā in'nuú yā ch'éé chí n'daacā o ch'éé chí nguéé n'daacā caati 'tíicā costumbre yeⁿé yā chí díⁿ yā.

6

¹ Maaⁿ ní i'téenu ca yú ní 'caandiveeⁿ ca yú cosas chi chæchi chi 'iiⁿ'yāⁿ ca'cueéⁿ yā s'uuúⁿ. Ní nguéeⁿ neⁿ'e yú 'caandiveeⁿ yú taama vmnéⁿ'ēe tan'dúucā chi ngi'cueéⁿ yā s'uuúⁿ ndii vmnááⁿ vmnaaⁿ taachi cáamá i'teenu yú nduudu cuaacu yeⁿ'é Cristo. Ní nguéeⁿ ngaⁿ'a yú táamá vmnéⁿ'ēe chi s'neeⁿ yú ntiⁿ'nyuⁿ yeⁿ'e yú chi nguéeⁿ n'daacā chí diiⁿ chi 'cuūvi yú ti maaⁿ ní i'teenu yú Jesucristo. ² Ní nguéeⁿ ca'cueeⁿ ca yú yeⁿ'ē chi ngædínuⁿ ní, ní nguéeⁿ yeⁿ'ē chi s'nuuⁿ yú ta'a yú nanááⁿ tiíⁿ 'iiⁿ'yāⁿ, ní nguéeⁿ yeⁿ'ē chi nnduuchí 'iiⁿ'yāⁿ chi yeⁿ'e Cristo yeⁿ'ē nguaaⁿ tináⁿ'ā, ní nguéeⁿ yeⁿ'ē nguuvi chi Cristo diíⁿ yā juzgar nducyaaca 'iiⁿ'yāⁿ. ³ Ca'cueeⁿ ca yú más cā yeⁿ'e chi i'téenu yú yeⁿ'e Cristo. Ní chuū ní diiⁿ yú nduuti chi Ndyuūs neⁿ'e yā.

⁴ Ní ꝑde'ē yeⁿ'e 'iiⁿ'yāⁿ chi 'āā sta'á yā dæve chi Cristo, ní sta'á yā cosas chi n'dai taavi chi Cristo ca'a yā, ní 'āā sta'á yā Espíritu N'dai yeⁿ'e Cristo, ⁵ ní deēnú yā nduudu cuaacu chí n'dai chí yeⁿ'é Ndyuūs ndúucū poder chi yeⁿ'e táamá iⁿ'yeeⁿ di chi cuchií? ⁶ Ní nduuti chi 'iiⁿ'yāⁿ s'eeⁿ ndaacadaamí yā yeⁿ'e Cristo ní dinuuⁿ ndí yā, nguéeⁿ cuuvi diíⁿ yā ndaa yā nanááⁿ Cristo chi nadach'æcú yā nuuⁿ ndi yeⁿ'é yā, tí 'iiⁿ'yāⁿ s'eeⁿ diíⁿ yā tan'dúucā chi s'neéⁿ nga'á yā daiyá Ndyuūs miiⁿ taama vmnéⁿ'ēe. Ní diíⁿ yā chi Cristo miiⁿ 'cuináaⁿ yā nguaaⁿ 'yááⁿ n'dái 'iiⁿ'yāⁿ. ⁷ Ndyuūs diíⁿ yā ndúucū 'iiⁿ'yāⁿ s'eeⁿ tan'dúucā chi diíⁿ yā ndúucū yáⁿ'āa taachi n'dee cuuvi ngeeⁿ cuūvi vmnááⁿ yáⁿ'āa ni yáⁿ'āa sta'ā nuūⁿ nī miiⁿ 'áámá 'áámá vmnéⁿ'ēe chi ngeeⁿ cúúvī. Ndyuūs ca'á yā yáⁿ'āa miiⁿ cosecha chi n'dai 'iiⁿ'yāⁿ chí ngiínú yā ndaataá. ⁸ Naati nduuti chi yáⁿ'āa miiⁿ ní ngii yááⁿ yeⁿ'ē ndúucū yaata chi nguéeⁿ dichí'vē tuu'mi ní nguéeⁿ dichí'vē. Ní Ndyuūs nguéeⁿ ca'á yā cosecha n'dai yeⁿ'ē nífcú cuayiivi 'iiⁿ'yāⁿ ní 'neeⁿ yáⁿ'a yā yáⁿ'āa miiⁿ.

Véeⁿ chi cuuvi yeⁿ'e yú chi nnee s'uuúⁿ chi 'áámá cunee yú

⁹ Maaⁿ ní 'áará chi ngaⁿ'á 'nū 'tíicā yeⁿ'e ndís'tií, hermanos, deenu 'nū chi véé cosas chi n'dai taavi ca yeⁿ'é nī ti yeⁿ'é Cristo ndís'tií ní Ndyuūs nadanguáⁿ'ai yā ndís'tií. ¹⁰ Ndyuūs dámaāⁿ diíⁿ yā dendu'ū chí cuaacu. Nn'gaacú yā yeⁿ'ē ntiⁿ'nyuⁿ chí diíⁿ nī ní táacā nnee nī hermanos yeⁿ'ē yú caati dineⁿ'é nī hermanos chi i'téenu yā Jesucristo. Ní 'tíicā ní diíⁿ nī nguuvi nguuvi. ¹¹ Maaⁿ ní neⁿ'é 'nū chi ca'áámá ca'áámá ndís'tií daamá nūuⁿ idiíⁿ ní ndúucū núúⁿ máⁿ staava yeⁿ'é nī tan'dúucā chí diíⁿ nī taachi cáamá i'téenu nī. Ní diíⁿ nī ndíí tiempo chí ch'ii nī. Ní 'tíicā cuuvi cuaacu chí véé chí cuuvi yeⁿ'é nī. ¹² Nguéeⁿ neⁿ'é 'nū chí nduuví 'daan'di nī naati neⁿ'é 'nū chí din'daacá nī tan'dúucā tanáⁿ'a cā 'iiⁿ'yāⁿ chí i'téenu yā. Ní cunee ngiínú yā yeⁿ'e vaadí n'dai chí Ndyuūs ca'á yā 'iiⁿ'yāⁿ s'eeⁿ chí Ndyuūs ngaⁿ'á yā chí cuuvi yeⁿ'é yā 'iiⁿ'yāⁿ s'eeⁿ.

¹³ 'Āā 'nááⁿ tiempo chí chó'ōo Ndyuūs diíⁿ yā 'áámá compromiso ndúucū Abraham ní Ndyuūs ngaⁿ'á yā cáávā chí duuchi maáⁿ yā chí 'tíicā caⁿ'á yā diíⁿ yā caati nguéeⁿ cá táámá 'iiⁿ'yāⁿ chí ch'æte cá yā ti Ndyuūs. ¹⁴ Ní caⁿ'a yā: Díí, Abraham, cuaacu níⁿ'nyúⁿ di'viicú dii ní diíⁿ chí cuuvi n'dee n'dái daiyá 'iiⁿ'yāⁿ yeⁿ'ē di cuaaⁿ naachi cuchií. ¹⁵ Abraham cūnee ngiínú yā compromiso yeⁿ'é Ndyuūs ndúucū vaadí ngiínú ní tunée yā compromiso chí Ndyuūs caⁿ'a yā chí ca'á yā Abraham miiⁿ. ¹⁶ Maaⁿ ní taachi 'iiⁿ'yāⁿ yeⁿ'e iⁿ'yeeⁿ dí 'cūú ngaⁿ'á yā chí cuaacu níⁿ'nyúⁿ caⁿ'á yā diíⁿ yā, ngaⁿ'á yā “Por Dios” cucáávā 'áámá yā chí ch'æte cá yā nguéeⁿ ti 'iiⁿ'yāⁿ s'eeⁿ. Nífcú taachi 'iiⁿ'yāⁿ s'eeⁿ ngaⁿ'á yā chí 'tíicā caⁿ'á yā diíⁿ yā cáávā 'iiⁿ'yāⁿ miiⁿ chí ch'æte ca tuu'mi ní nguéeⁿ véé más cā chí cuuvi caaⁿ'máⁿ yā yeⁿ'ē. ¹⁷ Ní 'tíicā Ndyuūs neⁿ'é yā ch'íⁿ'í yā 'iiⁿ'yāⁿ s'eeⁿ yeⁿ'e Abraham chí cuaacu níⁿ'nyúⁿ diíⁿ yā cumplir compromiso yeⁿ'é yā. Ní nguéeⁿ n'daaⁿ mar 'áámá nduudu yeⁿ'é yā. Ní cáávā chuū ngaⁿ'á yā cucáávā chí duuchi maáⁿ yā. ¹⁸ Ní cáávā chuū véé 'úúví dendu'ū chí nguéeⁿ cuuvi n'daaⁿ. Ndyuūs ní nguéeⁿ cuuvi cu'neéⁿ yā táámá cosa lugar yeⁿ'ē 'uuví compromiso yeⁿ'é Ndyuūs ndúucū chí ngaⁿ'á yā chí caⁿ'á yā diíⁿ yā cáávā chí duuchi maáⁿ yā. Ndyuūs nguéeⁿ cuuvi caaⁿ'máⁿ yā nduudu yaadi. Ní ndúucū compromiso yeⁿ'é yā, Ndyuūs tee yā s'uuúⁿ 'viich'ætiínūⁿ chí ch'æte yeⁿ'e yú caati s'uuúⁿ n'nuuⁿ yú Ndyuūs ní i'téenu yú 'yā ní yeⁿ'ē chí Ndyuūs tee yā chí cuuvi yeⁿ'ē yú. ¹⁹ Chííⁿ chí i'téenu yú cáávā alma yeⁿ'e yú ní tan'dúucā 'áámá ancla yeⁿ'e barco ti i'nēeⁿ diíⁿ barco chí 'āā

ntéé ínuⁿu. 'Tíicā s'uuúⁿ ndúúcu chí i'téenu yú cuuvi ndáá niiⁿnuⁿ yú nanááⁿ Ndyuūs. ²⁰ Jesucristo 'āā ndaá yā nanááⁿ Ndyuūs vmnááⁿ vmnaaⁿ yeⁿ'ē s'uuúⁿ. Ní maaⁿ ní cááva yā cuuvi ndaa yú nanááⁿ Ndyuūs. Ní maaⁿ ní Jesucristo miiⁿ ní chiiduú ch'εεte ca yeⁿ'e yú chí 'áámá cūnee ná ntiiⁿnyuⁿ miiⁿ. Ní tan'dúúca chiiduú ch'εεte ca Melquisedec chí 'áámá cūnee na ntiiⁿnyuⁿ 'āā tiicá nūuⁿ Jesucristo.

7

Yeⁿ'e Jesús chí chiiduú ch'εεte ca tan'dúúca Melquisedec chí chiiduú ch'εεte ca

¹ 'Iiⁿ'yāⁿ Melquisedec ní rey yeⁿ'é yāāⁿ Salem ní chiiduú ch'εεte ca yeⁿ'e Ndyuūs chí ch'εεte n'dai. Tiempo chí 'āā 'nááⁿ chó'ōo, saⁿ'ā Abraham ní taachi cuchí sa chí cheⁿ'e sa ná caandaá naachi ch'iⁿ'nuⁿ sa reyes, saⁿ'ā Abraham miiⁿ ndaaca sa nanááⁿ chiiduú ch'εεte ca Melquisedec ní Melquisedec di'viicú yā Abraham. ² Ní Abraham miiⁿ ní ca'ā sa Melquisedec 'áámá ndiichí parte yeⁿ'ē nducuéⁿ'ē chí divíi yā yeⁿ'e 'iiⁿ'yāⁿ yeⁿ'e reyes cucáávā caāndāa. Ní chí duuchi chí Melquisedec vmnááⁿ vmnaaⁿ neⁿ'ē caaⁿ'máⁿ rey chí yeⁿ'e vaadi cuaacu. Ní cuayiivi ní neⁿ'e caaⁿ'máⁿ rey yeⁿ'e yāāⁿ Salem, ní chí duuchí yā neⁿ'e caaⁿ'maⁿ rey yeⁿ'ē vaadi 'diiⁿ'. ³ Nguéé canee nguūⁿ chεε chí chεεcú Melquisedec, chεε chí chiidá yā ndíi nguéé ndúú yeⁿ'e 'iiⁿ'yāⁿ yeⁿ'é yā yeⁿ'e chí chiicá yā. Nguéé canee nguūⁿ yeⁿ'e tiempo chí ch'iindiyáaⁿ yā ndíi nguéé ndúú yeⁿ'e tiempo chí ch'iⁿ'i yā. Ní cucáávā chuū Melquisedec miiⁿ tan'dúúca daiyá Ndyuūs 'tiicá yā ti 'áámá chiiduú ch'εεte ca chí 'áámá cūneeⁿ na ntiiⁿnyuⁿ cueⁿ'e daāⁿmaⁿ.

⁴ Maaⁿ ní nadacadíinuⁿ nī chí ch'εεte n'dai saⁿ'ā Abraham 'cūū. Abraham ca'a yā 'áámá ndiichi parte yeⁿ'ē nducuéⁿ'ē chí divíi yā yeⁿ'e reyes taachi cuⁿ'u yā na caāndāa. ⁵ 'Tíicā ngaⁿ'ā ley yeⁿ'e Ndyuūs chí Moisés dingúuⁿ yā: Nducyaaca chíiduú chí yeⁿ'e ndaata yeⁿ'ē 'iiⁿ'yāⁿ Leví canéé chí cuta'á yā ndíichí parte yeⁿ'e nducuéⁿ'ē chí véé yeⁿ'e nducyáácá 'iiⁿ'yāⁿ chí yeⁿ'e Abraham ní yeⁿ'e 'iiⁿ'yāⁿ yeⁿ'e ndaata yeⁿ'é yā, ti 'iiⁿ'yāⁿ Leví miiⁿ ní yeⁿ'ē ndaata Abraham. ⁶ Naati chíiduú ch'εεte ca Melquisedec miiⁿ ní nguéé yeⁿ'e 'iiⁿ'yāⁿ Leví naati sta'á yā ndíichí parte yeⁿ'e Abraham. Ní Abraham miiⁿ ní saⁿ'ā chí Ndyuūs díiⁿ yā compromiso ndúúcu sa chí véé chí cuuví yeⁿ'e sa. Ní chíiduú ch'εεte ca Melquisedec di'viicú yā Abraham. ⁷ Maaⁿ ní Melquisedec chí di'viicú yā Abraham ní ch'εεte cá yā nguéé ti Abraham chí di'viicú yā 'yā. ⁸ Maaⁿ ní 'iiⁿ'yāⁿ Leví chí ita'á yā chí ndiichí parte yeⁿ'e nducuéⁿ'ē chí vεε yeⁿ'e yú, ní 'iiⁿ'yāⁿ chí caⁿ'á yā 'cuuvi yā. Naati canéé nguūⁿ na libro yeⁿ'é Dendyuūs 'tíicā chí chíiduú ch'εεte ca Melquisedec chí sta'á yā ndiichi parte yeⁿ'é 'iiⁿ'yāⁿ ní nguéé ngaⁿ'ā chí n'díi yā. ⁹ Ní chuū ní neⁿ'e caaⁿ'māⁿ chí taachi Abraham ca'á yā ndiichi parte yeⁿ'é yā chíiduú ch'εεte ca Melquisedec, maaⁿ tiempo nūuⁿ 'iiⁿ'yāⁿ yeⁿ'e Leví chí yeⁿ'ē ndaata Abraham ní 'iiⁿ'yāⁿ chí sta'á yā ntúūⁿ chí ndiichi parte yeⁿ'é yā. 'Tiicá ntúūⁿ ca'a yā chí ndiichi parte yeⁿ'é yā chíiduú ch'εεte ca Melquisedec. ¹⁰ Ní 'áará chí saⁿ'ā Leví miiⁿ 'āā cuéé 'cuundiyaāⁿ sa, Abraham miiⁿ díiⁿ yā chuū cáávā 'iiⁿ'yāⁿ yeⁿ'é yā chí 'āā cuéé 'cuundiyaāⁿ yā taachi ndaācā sa chíiduú ch'εεte ca Melquisedec cuaaⁿ na yúúni, ní ca'á yā chí ndiichi parte miiⁿ.

¹¹ Maaⁿ ní 'iiⁿ'yāⁿ s'eeⁿ yeⁿ'e ndaata Israel sta'á yā ley yeⁿ'é yā yeⁿ'ē chíiduú s'eeⁿ chí yeⁿ'ē ndaata Leví. Ní 'iiⁿ'yāⁿ Leví s'eeⁿ ní yeⁿ'e ndaata Aarón. Ní nduuti chí 'iiⁿ'yāⁿ Leví s'eeⁿ cuuvi díiⁿ yā chí nducyaaca 'iiⁿ'yāⁿ cuuvi 'cuεetinéé n'daacá yā ní nguéé nuuⁿndi yeⁿ'é yā, ¿de'ē cáávā chí neⁿ'é yā táámá chíiduú ch'εεte ca chí 'āā ví'í cā ní nguéé yeⁿ'ē ndaata chíiduú Aaron? Naati tan'dúúca chíiduú ch'εεte ca Melquisedec, 'tiicá yā. ¹² Caati naachi n'daaⁿ yā chíiduú ch'εεte ca yeⁿ'ē táámá ndaata yeⁿ'e 'iiⁿ'yāⁿ Israel 'tiicá ntúūⁿ canee chí n'daa yā ley. ¹³ Ná libro yeⁿ'é Ndyuūs 'tíicā canéé nguūⁿ yeⁿ'e Señor yeⁿ'e yú. Señor ní yeⁿ'ē táámá 'iiⁿ'yāⁿ chí nguéé díiⁿ yā ntiiⁿnyuⁿ yeⁿ'e chíiduú chí díiⁿ ntiiⁿnyuⁿ yeⁿ'ē nátai naachi 'caaⁿ'núⁿ yā 'iiti cáávā yeⁿ'e ofrenda yeⁿ'e Ndyuūs. ¹⁴ Nducyaaca 'iiⁿ'yāⁿ ní déenu yā chí Señor Jesucristo yeⁿ'ē yú ch'iindiyáaⁿ yā yeⁿ'ē 'iiⁿ'yāⁿ yeⁿ'e Judá. Ní Moisés nguéé ngaⁿ'a yā de'ē vεε yeⁿ'e 'iiⁿ'yāⁿ yeⁿ'e Judá taachi cāⁿ'a yā yeⁿ'e chíiduú yeⁿ'e ndaata yeⁿ'é yā.

¹⁵ Ní neené cuaacu ca canee taachi ndaā táámá chiiduú chí tan'dúúcā chiiduú ch'εete ca Melquisedec, 'tíica yā. ¹⁶ Ní táámá chiiduú miiⁿ nguéé díⁿ yā ntiiⁿnyuⁿ yeⁿ'ē chiiduú cáávā ley chi ngaⁿ'a chi chiiduú miiⁿ canee chi cuuvi yeⁿ'e 'iiⁿ'yāⁿ yeⁿ'e ndaata yeⁿ'e chiiduú. Naati táámá chiiduú miiⁿ díⁿ yā ntiiⁿnyuⁿ yeⁿ'ē chiiduú cáávā chi véé vida cueⁿ'e daāⁿmaⁿ yeⁿ'é yā ní véé poder yeⁿ'é yā. ¹⁷ 'Tíicā canee nguūⁿ na libro yeⁿ'é Ndyuūs naachi Ndyuūs ngaⁿ'á yā yeⁿ'e yā 'tíicā:

Díí ní 'áámá chiiduú chi cueⁿ'é daāⁿmaⁿ 'áámá cūnee na ntiiⁿnyuⁿ. Tan'dúúcā chiiduú ch'εete ca Melquisedec 'tiicá nī. ¹⁸ Maaⁿ ní ley yeⁿ'e Moisés ní nguéé ley yeⁿ'ē maaⁿ caati nguéé dichíⁿ'vē. ¹⁹ Ley yeⁿ'e Moisés nguéé cuuvi diiⁿ chi 'iiⁿ'yāⁿ 'cuεetinéé n'daaca yā chi nguéé nuuⁿndi yeⁿ'é yā. Naati maaⁿ ná lugar yeⁿ'ē ley miiⁿ véé 'viich'εetiínūⁿ chi n'daacā ca chi cuuvi yeⁿ'ē yú chi Ndyuūs tee yā s'uuúⁿ. Ní cáávā chuū ndaa yú nanááⁿ Ndyuūs.

²⁰ Ní Ndyuūs, cáávā chi duuchi maáⁿ yā, caⁿ'a yā chi díⁿ yā chi Jesucristo chiiduú ch'εete ca. Tanáⁿ'ā ca chiiduú díⁿ yā ntiiⁿnyuⁿ tan'dúúcā chi ngaⁿ'a reglas yeⁿ'e 'iiⁿ'yāⁿ nguéé cáávā mar 'áámá nombre yeⁿ'é Ndyuūs. Naati yeⁿ'ē táámá chiiduú ch'εete ca chi Jesucristo, Ndyuūs ngaⁿ'á yā yeⁿ'e Jesucristo ndúúcū chi duuchi maáⁿ yā chi canéé yā 'áámá chiiduú ch'εete ca. ²¹ 'Tíicā canéé nguūⁿ na libro yeⁿ'é Ndyuūs naachi Ndyuūs ngaⁿ'a yā yeⁿ'ē taama yā:

Señor Ndyuūs ngaⁿ'á yā ndúúcū chi duuchi maáⁿ yā ní nguéé ñ'dáaⁿ yā chi ngaⁿ'a yā. Díí ní cueⁿ'é daāⁿmaⁿ canéé dí chi dii ní 'áámá chiiduú dii tan'dúúcā chiiduú ch'εete ca Melquisedec 'tíicā dí. ²² Maaⁿ ní cucáávā chi Ndyuūs díⁿ yā chuū, Jesús ní díⁿ yā chi seguro canee compromiso yeⁿ'é Ndyuūs. Ní n'daacā ca nguéé ti chi vmnááⁿ vmaaaⁿ chi yeⁿ'é 'iiⁿ'yāⁿ s'eeⁿ. ²³ 'Tiicá dendú'ū neené 'yaaⁿ chiiduú vεe naati nguéé ch'εetinéé yā ndúúcū ntiiⁿnyuⁿ caati ch'ii yā. ²⁴ Naati Jesucristo miiⁿ nguéé ch'ii yā ti 'áámá canee yā. Ní nguéé ca'á yā táámá 'iiⁿ'yāⁿ ntiiⁿnyuⁿ chi yeⁿ'é yā. ²⁵ Maaⁿ ní Jesucristo cuuvi nadanguáⁿ'ai yā cueⁿ'e daāⁿmaⁿ nducyáácá 'iiⁿ'yāⁿ chi ndaa yā nanááⁿ Ndyuūs cáávā Jesucristo miiⁿ. Níicú Jesucristo miiⁿ canduuchí yā cueⁿ'e daāⁿmaⁿ ní ngaⁿ'angua'á yā cáávā 'iiⁿ'yāⁿ s'eeⁿ chi yeⁿ'é yā.

²⁶ 'Tíicā Jesús miiⁿ ní chiiduú ch'εete ca chi itée yā necesidades yeⁿ'e yú. Ní dεεve yā. Ní nguéé díⁿ yā cosas chi nguéé n'daacā. Ní nguéé díⁿ yā mar 'áámá nuuⁿndi. Jesucristo miiⁿ 'āā vi'í ca yā yeⁿ'e 'iiⁿ'yāⁿ chi dinuuⁿndí yā. Ní cueⁿ'é yā yaācu cá nguéé tí nanguuvi. ²⁷ Ní Jesucristo chi chiiduú ch'εete ca nguéé canéé chí díⁿ yā tan'dúúcā tanáⁿ'ā chiiduú n'gεete ca chi 'caaⁿ'núⁿ yā 'iiti nguuvi nguuvi cáávā nuuⁿndi yeⁿ'e maáⁿ yā ní cuayiivi cáávā nuuⁿndi yeⁿ'e tanáⁿ'ā ca 'iiⁿ'yāⁿ. Jesús miiⁿ 'áámá vmnéⁿ'ēe díⁿ yā chuū taachi nca'a vida yeⁿ'e maáⁿ yā taachi ch'ii yā cáávā nuuⁿndi yeⁿ'e yú. ²⁸ Cáávā ley yeⁿ'e Moisés 'iiⁿ'yāⁿ i'néⁿ yā chiiduú n'gεete ca chi 'iiⁿ'yāⁿ chi véé nuuⁿndi yeⁿ'é yā. Chó'ōo 'naaⁿ tiempo ní cuayiivi ní Ndyuūs ngaⁿ'á yā cáávā chi duuchi maáⁿ yā chi daiyá yā ní chiiduú ch'εete ca chi díⁿ yā chiiⁿ chi Ndyuūs neⁿ'é yā chi díⁿ yā. Ní 'áámá cūnee yā cueⁿ'e daāⁿmaⁿ.

8

Jesucristo ní abogado yeⁿ'ē táámá compromiso

¹ Chuū chi caⁿ'a 'nū ní ch'εete ca yeⁿ'e tanducuéⁿ'ē chi ngaⁿ'á 'nū chi 'tíicā. Chiiduú ch'εete ca yeⁿ'e yú chi Jesucristo ní véé yā ná va'ai chεeti nguuvi na lado yeⁿ'ē honor yeⁿ'e trono yeⁿ'é Ndyuūs chí canéé na va'ai chεeti nguuvi. ² Ní Jesucristo díⁿ yā ntiiⁿnyuⁿ yeⁿ'ē chiiduú ch'εete ca na yaācū na va'ai ch'εete nguuvi chi cuaacu níⁿnyúⁿ chí yeⁿ'é Ndyuūs. Ní 'iiⁿ'yāⁿ s'eeⁿ nguéé din'dái yā yaācū miiⁿ ti Señor Jesucristo maáⁿ yā din'dái yā. ³ 'Iiⁿ'yāⁿ s'neéⁿ yā ca'áámá cā'aama chiiduú ch'εete ca chi canéé chí ca'á yā ofrenda ní 'caaⁿ'núⁿ yā 'iiti cáávā nuuⁿndi yeⁿ'é 'iiⁿ'yāⁿ. Cáávā chuū Jesucristo canéé chi véé yeⁿ'é yā chi cuuví ca'a yā chi vida yeⁿ'e maáⁿ yā. ⁴ Ní ndúútí chi Cristo miiⁿ cunée yā iⁿ'yeeⁿdí 'cūū nguéé cuuvi chiiduú yā caati véé chiiduú s'eeⁿ chi nga'a yā ofrendas nanááⁿ Ndyuūs tan'dúúcā chi ngaⁿ'a ley yeⁿ'e Moisés. ⁵ Ní chiiduú s'eeⁿ ní díⁿ yā ntiiⁿnyuⁿ yeⁿ'é yā ní

diín yā tan'dúúcā ntiiⁿnyuⁿ yeⁿe yaācū chi canéé na va'ai ch'εeti nguuvi. Deenú 'nū chi diín yā copiar ntiiⁿnyuⁿ yeⁿe Ndyuūs ti taachi Moisés neⁿe yā din'dái yā yaācū chi va'ai tínnūⁿ, Ndyuūs caⁿa yā chíi yā Moisés ní ngaⁿa yā:

Dii, Moisés, candéε nī cuidado yeⁿe tanducuéⁿē chi diiⁿ di. Ní diiⁿ di tan'dúúcā chi ch'iⁿí dii taachi canee di na cuééti. ⁶ Naati Cristo chi chiiduú ch'εete ca yeⁿe yú diín yā ntiiⁿnyuⁿ chí ch'εete taavi ca nguéé ti yeⁿe chiiduú n'gεete ca yeⁿe iⁿ'yeeⁿdí 'cūū caati Ndyuūs diín yā compromiso chi Cristo canéé yā naavtaⁿā yeⁿe iⁿ'yāⁿ yeⁿe iⁿ'yeeⁿdí 'cūū ndúúcū Ndyuūs. Maaⁿ ní s'uuúⁿ cuuvi ndaa yú nanááⁿ Ndyuūs cáávā Cristo miiⁿ. Ní compromiso miiⁿ ní ch'εete ca tí yeⁿe tanducuéⁿē chí n'daacā taavi ca.

⁷ Ní nduuti chí compromiso chi vmnááⁿ vmnaaⁿ chi yeⁿe Ndyuūs ní n'daacā taavi ca tuu'mi ní nguéé canee chi diín yā ndiichí ndii 'úúví compromiso. ⁸ Naati Ndyuūs n'diichi yā chí nguéé n'daacā diín iⁿ'yāⁿ tiempo chi 'āā chó'ōo. Ní ngaⁿá yā ngii yā iⁿ'yāⁿ s'eeⁿ tan'dúúcā chi canéé nguūⁿ na libro yeⁿe yā 'tíicā:

'Tíicā ngaⁿa Señor: Tiempo chi cuchii 'úú ní diín 'áámá compromiso ngaī ndúúcū iⁿ'yāⁿ yeⁿe ndaata Israel ní ndúúcū iⁿ'yāⁿ yeⁿe ndaata Judá.

⁹ Nguεε idiín tan'dúúcā chi diín ndúúcū chiidá yā taachi diví iⁿ'yāⁿ yeⁿe yá'āa Egipto. Iⁿ'yāⁿ s'uuⁿ nguéé diín yā tan'dúúcā chí 'úú yaa'ví iⁿ'yāⁿ s'uuⁿ. Ní cáávā chuū nguéé diín cuenta yeⁿe yā.

¹⁰ Cuayivi chí chó'ōo nguuvi s'eeⁿ ní maaⁿ ní chuū chí compromiso ngaī chí caⁿá diín ndúúcū iⁿ'yāⁿ yeⁿe nación Israel. Ngaⁿa Señor: Cu'neéⁿ leyes yeⁿe na vaanicadínnūⁿ yeⁿe yā ní dinguúⁿ leyes yeⁿe na staava yeⁿe yā. Ní 'úú cuuvi Ndyuūs yeⁿe yā, ní iⁿ'yāⁿ s'eeⁿ cuuvi iⁿ'yāⁿ yeⁿe.

¹¹ Ní mar 'áámá yā canee chí ca'cueéⁿ yā iⁿ'yāⁿ yeⁿe nación yeⁿe yā 'tíicā. Ndís'tiī n'diichi ní Señor miiⁿ, caati nducyáácá yā ní n'diichi yā 'úú ndí iⁿ'yāⁿ chí ngaⁿā ntiiⁿnyúⁿ yā ndii taná'a iⁿ'yāⁿ.

¹² Ní 'úú ní nadach'εecú nuuⁿndi chí diín yā ní 'āā ntéé nn'gaacú nuuⁿndi yeⁿe yā. ¹³ Ní Ndyuūs ngaⁿa yā yeⁿe compromiso chí ngai ti caati compromiso chí vmnááⁿ vmnaaⁿ ní 'āā ndiicúū tuu'mi ní deenu yú chí dendú'ū chí 'āā ndiicúū ní 'āā nuúⁿ 'cuiinu.

9

Yeⁿe yaācū na iⁿ'yeeⁿdí 'cūū ní yeⁿe yaācū na va'ai ch'εeti nguuvi

¹ Cuáácú chí véé reglas yeⁿe compromiso chí vmnááⁿ vmnaaⁿ ndúúcū yaācū chí iⁿ'yāⁿ s'eeⁿ din'dái yā naachi dich'εete yā Ndyuūs. ² Din'dái yā yaācū yeⁿe tínnūⁿ ndúúcū 'uuvī cuartos. Cuarto chí vmnááⁿ vmnaaⁿ ní nguuvi Lugar Dεενε. Ní ch'εeti cuarto miiⁿ véé 'áámá candelero ndúúcū 'áámá mesa, ní vmnaaⁿ mesa véé pan chí ofrenda yeⁿe Ndyuūs. ³ Ná cuarto chí yaānūⁿ táámá lado yeⁿe cortina yeⁿe tínnūⁿ nguuvi Lugar Dεενε N'dai Ca Yeⁿe Ndyuūs. ⁴ Na cuarto miiⁿ véé 'áámá nátaī yeⁿe 'diiⁿnguāⁿ naachi chiiduú ch'εete ca ngíⁿí yā cúⁿúyaa. Ní míⁿ canéé 'áámá caja chí yeⁿe compromiso. Nducuéⁿē lados yeⁿe caja miiⁿ ní candúūu 'diiⁿnguāⁿ vmnááⁿ yeⁿe. Ch'εeti caja miiⁿ véé chíité yeⁿe 'diiⁿnguāⁿ ní miiⁿ snúūⁿ pan chí nguuvi maná. Ní ch'εeti caja ntúūⁿ canéé nduucu chí nanguaaⁿnu chí yeⁿe Aarón ndúúcū 'úúví tablas yeⁿe tuūu naachi canéé nguūⁿ ley chí diín Ndyuūs. ⁵ Vmnaaⁿ caja miiⁿ canéé 'uūví querubines tan'dúúcā ángeles ndúúcū ngεechí yā. Ní miiⁿ Ndyuūs canéé yā. Ní canéé 'cutí yeⁿe ngεechí yā yeⁿe vmnaaⁿ cuaaⁿ naachi Ndyuūs nadich'εecú yā nuuⁿndi yeⁿe nducyaaca iⁿ'yāⁿ. Maaⁿ ní yeⁿe chuū nguéé cuuvi caaⁿmáⁿ yeⁿe tanducuéⁿē maaⁿ.

⁶ 'Tíicā chiiduú s'eeⁿ idiín yā nducuéⁿē. Nguuvi nguuvi chiiduú s'eeⁿ ngéⁿe yā na cuarto vmnááⁿ vmnaaⁿ ní diín yā ntiiⁿnyuⁿ yeⁿe yaācū yeⁿe Ndyuūs. ⁷ Ní na cuarto chí yaānūⁿ miiⁿ chí ndii 'úúví dámaāⁿ chiiduú ch'εete ca indaa yā 'áámá vmneⁿléé nūⁿ ca'áámá ca'áámá nduuyū. Ní canéé chí candéé yā yuūúⁿ yeⁿe 'iiti chí ca'a yā ofrenda Ndyuūs cáávā nuuⁿndi yeⁿe yā ní cáávā nuuⁿndi yeⁿe taná'a iⁿ'yāⁿ. ⁸ Espíritu N'dai

yeⁿé Ndyuūs ch'iⁿí yā s'uuúⁿ chi nguéé cuuvi ndaa yú nanááⁿ Ndyuūs néⁿé chi canéé yaācū yeⁿe tínnūⁿ caati yaacu tínnūⁿ miiⁿ ní yeⁿe compromiso chi vmnááⁿ vmnaaⁿ.⁹ Ní nducuéⁿē chuū chi díⁿ chiiduú s'eeⁿ ní canee tan'dúú^{cā} 'áámá ejemplo yeⁿē tiempo yeⁿe yú. Chiiduú s'eeⁿ ní ca'a yā ofrendas nanááⁿ Ndyuūs ndúú^{cū} 'iiti chi n'giiⁿnúⁿ yā cáávā ofrendas yeⁿē nuuⁿndi yeⁿé yā. Chuū ní neⁿē caaⁿ'maⁿ chi ofrendas ndúú^{cū} 'iiti chi n'giiⁿnúⁿ yā ní ca'a yā Ndyuūs nguéé cuuvi diiⁿ chi staava yeⁿe 'iiⁿ'yāⁿ s'eeⁿ ní dεεve neⁿe chi 'tíicā chí nga'a yā ofrendas nanááⁿ Ndyuūs.¹⁰ 'Iiⁿ'yāⁿ s'eeⁿ dich'εεté yā Ndyuūs dámaāⁿ ndúú^{cū} cosas chi che'é yā ndúú^{cū} cosas chi cu'u yā ndúú^{cū} chiiⁿ chi díⁿ yā chi cuuvi dεεvé yā staava yeⁿé yā. Nducuéⁿē chuū ní reglas chi díⁿ yā ní canee chi díⁿ yā 'tíicā ndii tiempo chi Ndyuūs ñ'daaⁿ yā dendu'ū yeⁿē.

¹¹ Cristo ní 'āā ndāa yā iⁿ'yeeⁿdí 'cūū. Ní maaⁿ ní Cristo miiⁿ ní chiiduú ch'εεte ca yeⁿe dendu'ū chi n'dai taavi ca. Ní yaācū naachi Cristo díⁿ yā ntiiⁿnyuⁿ ní ch'εεte taavi ca ní n'daacā ca nguéé ti yaācū yeⁿe tínnūⁿ chi yeⁿē iⁿ'yeeⁿdí 'cūū. Ní 'iiⁿ'yāⁿ s'eeⁿ nguéé n'dái yā yaācū chí ch'εεte ca.¹² Ní Cristo ndāa yā chεeti yāacū ndí cuarto yaānūⁿ chí nguuvi Lugar Dεεve N'dai Ca Yeⁿé Ndyuūs. Nguéé sndéé yā ndúú^{cū} yuuúⁿ yeⁿe 'iiti chi chivo o daiyā vaca chi n'giiⁿnuⁿ yā naati ndúú^{cū} yuuúⁿ yeⁿe maáⁿ yā. Ní 'tíicā sndāa yā dámaāⁿ 'aama vmnéⁿ'ēe na Lugar Dεεve N'dai Ca Yeⁿé Ndyuūs cáávā nducyaaca 'iiⁿ'yāⁿ. Ní maaⁿ ní nadanguáⁿ'ai yā s'uuúⁿ chi cuuvi yeⁿé yā s'uuúⁿ cueⁿe daāⁿ'maⁿ.¹³ Cuáácú chí yuūⁿ yeⁿe itiindu ndúú^{cū} yuūⁿ yeⁿe chivo ndúú^{cū} yaiyāā yeⁿe daiya vaca chi 'āā ngiichi vmnaaⁿ nátaí ní chiiduú s'eeⁿ ch'eeⁿ ndái yā vmnaaⁿ 'iiⁿ'yāⁿ chi véé nuuⁿndi yeⁿé yā ti yuūúⁿ cuuvi nadivεεve 'iiⁿ'yāⁿ cáávā ley yeⁿé yā.¹⁴ Ní chuū ní cuaacu. Maaⁿ ní nééné n'daacā ca chi cuuvi diiⁿ yuūúⁿ yeⁿe Cristo nguéé ti yuūúⁿ yeⁿé 'iiti. Cucáávā Espíritu N'dai yeⁿé Ndyuūs chi canduuchi cueⁿ'é daāⁿ'maⁿ, Cristo díⁿ yā ofrecer cuerpo yeⁿe maáⁿ yā chi 'iiⁿ'yāⁿ s'eeⁿ 'caaⁿ'núⁿ yā 'yā cáávā ofrenda yeⁿé Ndyuūs, ofrenda chi n'daacā yeⁿē. Ní yuūúⁿ yeⁿe Cristo ní cuuvi didεεve staava yeⁿē yú yeⁿe nducuéⁿē chi nadacadíⁿnuuⁿ yú chi nguéé n'daacā. Ní 'íicú cuuvi s'uuúⁿ ní dichíⁿ'vē yú Ndyuūs chi canduuchi.

¹⁵ Cáávā chi Jesucristo díⁿ yā 'áámá compromiso chi ngai, Jesucristo canéé yā naavtáⁿ'ā yeⁿe 'iiⁿ'yāⁿ yeⁿe iⁿ'yeeⁿdí 'cūū ndúú^{cū} Ndyuūs. Ní maaⁿ ní cuuvi ndaa yú nanááⁿ Ndyuūs. Ní cáávā chi ch'iⁿ Cristo, Cristo ní cuuvi nadach'εεcú yā nuuⁿndi yeⁿe 'iiⁿ'yāⁿ chi cuneé yā mááⁿ compromiso chi vmnááⁿ vmnaaⁿ. Ní 'iiⁿ'yāⁿ chi Ndyuūs yaa'ví yā chi cuuvi yeⁿé yā, 'iiⁿ'yāⁿ s'eeⁿ cuuvi cuta'a yā chi cuuvi yeⁿé yā chi 'áámá cūnee chi Ndyuūs ca'á yā 'iiⁿ'yāⁿ cucáávā Cristo.¹⁶ Taachí 'iiⁿ'yāⁿ s'neeⁿ yā escrito yeⁿe herencia yeⁿé yā chi caⁿ'a yā ca'a yā taamá yā, 'iiⁿ'yāⁿ miiⁿ canee chi 'cuuvi yā vmnááⁿ vmnaaⁿ chi dichíⁿ'vē chiiⁿ chi canéé nguūⁿ. Chuū ní tan'dúú^{cā} 'áámá compromiso chi díⁿ yā.¹⁷ 'Iiⁿ'yāⁿ chi s'neeⁿ escrito yeⁿe herencia yeⁿé yā chi caⁿ'á yā ca'a yā taama yā, nguéé dichíⁿ'vē escrito yeⁿé yā neⁿe tiempo chi canduuchí yā. Naati taachi 'āā n'dii yā tuu'mi ní dichíⁿ'vē chuū. Ní tan'dúú^{cā} 'áámá compromiso chi díⁿ yā 'tíicā escrito miiⁿ.¹⁸ Ní 'tíicā chíⁿ chi dichíⁿ'vē compromiso chi diiⁿ Ndyuūs vmnááⁿ vmnaaⁿ nduuti chi véé yuūúⁿ ti ch'iⁿnúⁿ yā 'iiti.¹⁹ Moisés caⁿ'a sa chii sá nducyaaca mandamiento yeⁿe ley. Cuayiivi ní 'iiⁿ'yāⁿ caaⁿ'núⁿ yā 'iiti ní Moisés sta'a sa yuūúⁿ yeⁿē daiya vaca ndúú^{cū} yuūúⁿ yeⁿē chivo ní ndástaⁿ'a sa nuūⁿnīⁿ ndúú^{cū} yuūúⁿ. Cuayiivi ní sta'á sa yuūúⁿ ndúú^{cū} duūdū 'iití cuūchí ndúú^{cū} 'áámá yaatā chi duuchi hisopo. Ní s'neéⁿ yā yuūúⁿ vmnaaⁿ libro yeⁿe ley ní vmnaaⁿ yeⁿē nducyaaca 'iiⁿ'yāⁿ dendu'ū.²⁰ Ní ngaⁿ'á Moisés 'tíicā: Chuū ní yuūúⁿ chi 'áámá sello yeⁿe chí cuuví cuaacu compromiso chi Ndyuūs ca'a yā orden chi ndís'tí canee chi díⁿ nī 'tíicā.²¹ 'Tiicá ntúūⁿ Moisés s'neeⁿ sa yuūúⁿ miiⁿ vmnaaⁿ yeⁿe yaācū yeⁿe tínnūⁿ ní vmnaaⁿ yeⁿe tanducuéⁿē dendu'ū chí ituneeⁿ na ntiiⁿnyuⁿ yeⁿé Ndyuūs.²² Cuaacu chi tan'dúú^{cā} chí ngaⁿ'ā ley 'téé 'téé nguéé nducuéⁿē ní yuūúⁿ diiⁿ chi canéé dεεve nducuéⁿē. Ní Ndyuūs nguéé nadich'εεcú yā 'iiⁿ'yāⁿ yeⁿe nuuⁿndi yeⁿé yā nduuti chi nguéé ndúú^{cū} yuūúⁿ yeⁿē 'iiti chi 'caaⁿ'núⁿ chiiduú s'eeⁿ.

Jesucristo ca'á yā maaⁿ cuerpo yeⁿé yā chi 'iiⁿ'yāⁿ s'eeⁿ 'caaⁿ'núⁿ yā 'yā lado yeⁿe

ofrenda

²³ 'Tíicā nducueñ'ē dendú'ū yeⁿe iñ'yeeñdí 'cūū canéé chi ndúúví ðeeve ndúúcu yuūúñ yeⁿe 'iiti. 'Téé 'téé nduuvi ðeeve tan'dúúca ðeeve na va'ai cheeti nguuvi. 'Tiicá ntúūñ cuuvi ndaa yú na va'ai cheeti nguuvi nduuti chi ðeeve yú ndúúcu yuūúñ yeⁿe táámá yā chi Cristo chí ch'εete taavi ca nguéé ti ndúúcu yuūúñ yeⁿe 'iiti. ²⁴ Cristo nguéé cueñ'é yā sñdaa yā na 'áámá yaacū chi ðeeve taavi ca chi nin'dái sañ'ā yeⁿe iñ'yeeñdí 'cūū. Yaacū yeⁿe iñ'yeeñdí 'cūū 'tεε 'téé tan'dúúca yaacū chí ðeeve taavi ca chi cuaacu níñnyúñ chi yaacū yeñ'é Ndyuūs. Cristo cueñ'é yā sñdaa yā na va'ai cheeti nguuvi ní miiñ canee yā nanááñ Ndyuūs lado yeñ'e s'uúúñ. ²⁵ Sañ'ā chiiduú ch'εete ca yeñ'e iñ'yeeñdí 'cūū chi yeñ'e ndaata judíos chi Israel nduuyu nduuyu ndaa yā na Lugar ðeeve N'dai Ca ndíí ná yaññūñ yeñ'e yaacū yeñ'e Ndyuūs ní ca'á yā Ndyuūs ofrenda chi yuūúñ yeñ'e 'iiti, ní nguéé yuūúñ yeñ'é yā chi ca'a yā. Naati Cristo ca'á yā vida yeñ'e maáñ yā caavā ofrenda 'áámá vmneñ'ée nūñ. ²⁶ Nduuti chi Cristo canee chi díñ yā tan'dúúca chi idiíñ chiiduú ch'εete ca tuu'mi ní canéé chi 'cuūvi yā n'dee n'dái cuuvi ndíí tiempo chi Ndyuūs din'dái yā iñ'yeeñdí 'cūū ndíí chi 'cuiññ íñ'yeñ'dí. Naati nguéé díñ Cristo 'tíicā. Caati tiempo chi Ndyuūs s'neñ yā ní Jesucristo 'áámá vmneñ'ée nūñ ch'iñ yā ní ndāa yā nanááñ Ndyuūs chi nadach'εecú yā nuuñdi yeñ'e nducyaaca 'iñ'yāñ cucáavā chi ca'a maáñ yā cuerpo yeñ'é yā chi 'iñ'yāñ s'eeñ n'giiñ'núñ yā 'yā cáavā ofrenda. ²⁷ 'Tiicá ntúūñ nducyaaca 'iñ'yāñ yeñ'e iñ'yeeñdí 'cūū canee chi 'cuūvi yā 'áámá vmneñ'ée. Níicú cuayiivi ní Cristo cañ'á yā n'diichí yā nuuñdi yeñ'e 'iñ'yāñ s'eeñ. ²⁸ Ní 'tíicā Cristo 'áámá vmneñ'ée ca'á yā cuerpo yeñ'e maáñ yā cáavā ofrenda chi nadach'εecú yā nuuñdi yeñ'e nducyaaca 'iñ'yāñ. Ní taachi cañ'á yā ndaa yā taama vmneñ'ée nguéé ndaa yā cucáavā chi cañ'á yā nadíí've yā nuuñdi yeñ'e nducyaaca 'iñ'yāñ. Naati cañ'á yā nadanguáñ'ai yā nducyaaca s'uúúñ chi canéé ngiinu yú chi ndaa yā ndiichi ndii 'úúví cuuvi. Ndaa yā chi nadanguáñ'ai yā s'uúúñ.

10

¹ Ní ley yeñ'e Moisés ní tan'dúúca 'dañ'nú nūñ 'tíicā ti nguéé 'áámá cūnee. Ní nguéé dáámá dáámá ndúúcu nducueñ'ē vaadi cuaacu chi n'daacā chi cuchiñ. Ti cáavā chi ngañ'a ley miiñ 'iñ'yāñ s'eeñ nduuyu nduuyu 'caañ'núñ yā 'iiti cáavā ofrenda cucáavā nuuñdi yeñ'é yā. Ní cáavā chuū, ¿táacā cuuvi ley miiñ diíñ chi 'iñ'yāñ s'eeñ canéé n'daacā yā nanááñ Ndyuūs? ² Ti nduuti chi ley miiñ diíñ chi 'iñ'yāñ s'eeñ canee n'daacā yā nanááñ Ndyuūs ní nguéé nuuñdi yeñ'é yā nanááñ Ndyuūs, tuu'mi ní 'āā ntéé 'caañ'núñ yā 'iiti cáavā nuuñdi yeñ'é yā. Ní nguéé nadacadiñnuñ yā yeñ'e chí chidεevé yā yeñ'e nuuñdi yeñ'é yā. ³ Ní 'tíicā diíñ ley miiñ. Taachi n'giiñ'núñ yā 'iiti nduuyu nduuyu tuu'mi ní nan'gáacú yā yeñ'e nuuñdi yeñ'é yā. ⁴ Ti ndúúcu yuūúñ yeñ'e 'itííndú ndúúcu yuūúñ yeñ'e chivo 'iñ'yāñ s'eeñ nguéé cuuvi didεevé yā yeñ'e nuuñdi yeñ'é yā.

⁵ Ní cucáavā chuū taachi ndaa Cristo na iñ'yeeñdí 'cūū ngañ'á yā ngiñ yā yeñ'e nduudu yeñ'é Ndyuūs chi canéé nguñ 'tíicā:

Díí, Ndyuūs, nguéé neñ'e di chi 'iñ'yāñ 'caañ'nuñ yā 'iiti lado yeñ'e ofrenda ndíí nguéé ndúú chi ca'á yā 'iiti cáavā ofrenda yeñ'e di naati din'dái di 'áámá cuerpo yeñ'é chi ch'iindiyañ.

⁶ Ní nguéé neñ'e di ofrendas yeñ'e chi nguuchí yā cuerpo yeñ'e 'iiti nátañ, ní nguéé yeñ'e chi 'caañ'núñ yā 'iiti cáavā chi Ndyuūs nadach'εecú yā nuuñdi yeñ'é yā.

⁷ Dii Ndyuūs, 'úú ndaa iñ'yeeñdí 'cūū chi cuuvi díñ cheñ chi neñ'e di chi díñ caati 'tíicā canéé nguñ yeñ'e 'úú na libro yeñ'e Ndyuūs naachi canéé nguñ ley. ⁸ Vmnañ vmnañ ngañ'a Cristo: Dii Ndyuūs nguéé neñ'e di ní nguéé yeenú di ndúúcu ofrendas yeñ'e chi n'giiñ'núñ yā 'iiti, ní nguéé yeñ'e 'iiti chi tee yā dii. Ndíí nguéé ndúú yeñ'e chi n'giiñ'núñ yā 'iiti ní ngiichí yā yuūtē yeñ'e 'iiti cáavā chi nadach'εecú di nuuñdi yeñ'é yā. 'Tíicā ngañ'a Cristo 'áará chí 'iñ'yāñ s'eeñ díñ yā tan'dúúca chi ngañ'a ley miiñ yeñ'e ofrenda chi canéé chi ca'á yā Ndyuūs. ⁹ Ní cuayiivi ngañ'á Cristo: Dii, Ndyuūs, 'úú ndaa na iñ'yeeñdí 'cūū chi cuuvi díñ cheñ chi neñ'e di chi díñ. Maañ ní nducueñ'ē chuū neñ'e caañ'mañ 'tíicā. Ndyuūs divíí

yā 'áámá lado ofrenda yeⁿe 'iiti chi 'iiⁿ'yāⁿ s'eeⁿ ch'iiⁿ'núⁿ yā. Ní na lugar yeⁿe ofrenda miiⁿ Ndyuūs ca'á yā Cristo chí ch'ii yā. ¹⁰ Maaⁿ ní Ndyuūs didεεvé yā s'uuúⁿ cáávā Jesucristo díⁿ yā nducuéⁿē chi Ndyuūs neⁿ'é yā chi diiⁿ yā. Ní 'áámá vmnéⁿ'ee nūⁿ Jesucristo ca'á yā cuerpo yeⁿe maáⁿ yā cáávā ofrenda chi 'iiⁿ'yāⁿ s'eeⁿ n'giiⁿ'núⁿ yā 'yā cáávā nuuⁿndi yeⁿe nducyáácá 'iiⁿ'yāⁿ.

¹¹ Ca'áámá cā'aama chiidūú judío chi Israel nguuvi nguuvi díⁿ yā ntiiⁿ'nyuⁿ ní cheendii yā ní nga'á yā ofrenda dáámá daama nūⁿ neéné n'deēe cuúví 'áará chi ofrenda miiⁿ chi n'giiⁿ'núⁿ yā 'iiti nguéeⁿ cuuvi divíi nuuⁿndi yeⁿe 'iiⁿ'yāⁿ mar 'áámá vmnéⁿ'ēe. ¹² Naati Jesucristo 'áámá vmnéⁿ'ee nūⁿ ca'á yā maaⁿ cuerpo yeⁿe yā chi 'iiⁿ'yāⁿ s'eeⁿ n'giiⁿ'núⁿ yā 'yā caavā ofrenda yeⁿe nuuⁿndi yeⁿe nducyáácú 'iiⁿ'yāⁿ. Ní cuayiivi cueⁿ'é yā na va'ai chεeti nguuvi ní ch'iindí yā na lado yeⁿe honor yeⁿ'é Ndyuūs chi lado tá cuaacu. ¹³ Maaⁿ ní Jesucristo canee ngiinú yā chi ndaa tiempo chi Ndyuūs idiíⁿ yā chi nducyaaca 'iiⁿ'yāⁿ chi contra yeⁿ'é yā canée yā maaⁿ ca'á Jesucristo tan'dúúcā chi 'áámá banco 'líⁿ 'tiicá yā chi Jesucristo cuchée yā yeⁿe yā. ¹⁴ Ní cáávā chi Cristo ca'á yā cuerpo yeⁿe maáⁿ yā chi 'iiⁿ'yāⁿ s'eeⁿ n'giiⁿ'núⁿ yā 'yā 'áámá vmnéⁿ'ee nūⁿ cáávā ofrenda tuu'mi ní Cristo díⁿ yā chi dáámá cuuvi dεεvé 'iiⁿ'yāⁿ ti nadach'εεcú yā nuuⁿndi yeⁿ'é yā. Ní 'iiⁿ'yāⁿ s'eeⁿ ní yeⁿe Ndyuūs cueⁿ'e daāⁿmaⁿ. ¹⁵ Ní Espíritu N'dai yeⁿ'é Ndyuūs ngaⁿ'a ndúúcu yú chi nducuéⁿē chuū ní cuaacu. Vmnááⁿ vmaaaⁿ ngaⁿ'a Ndyuūs chuū:

¹⁶ Chuū chi díⁿ prometer chi díⁿ caavá yā cuayiivi chi chó'ōo nguuvi s'eeⁿ, ngaⁿ'a Ndyuūs. Cu'neén ley yeⁿ'é na staava yeⁿ'é yā. Ní dinguúⁿ ley yeⁿ'é na vaanicadíinūⁿ yeⁿ'é yā. ¹⁷ Ní cuayiivi ngaⁿ'á yā:

'Āā ntéeⁿ nan'gaacú nuuⁿndi yeⁿ'é yā ní nguéeⁿ nducuéⁿē chi díⁿ yā chi nguéeⁿ n'daacā.

¹⁸ Níicú taachi Ndyuūs nadich'εεcú yā nuuⁿndi yeⁿ'é 'iiⁿ'yāⁿ s'eeⁿ tuu'mi ní 'āā ntéeⁿ canéeⁿ chi ca'á yā ofrendas chi 'caaⁿ'núⁿ yā 'iiti cáávā nuuⁿndi yeⁿe yā.

Canéeⁿ chi nan'gaacu yú yeⁿ'e Ndyuūs yeⁿ'e yú

¹⁹ 'Tiicā ní hermanos yeⁿ'é maaⁿ ní cuuvi nandaa yú nanááⁿ Ndyuūs na cuarto chi Dεεve N'dai Ca na yaācū yeⁿ'é Ndyuūs ti véé 'viich'εεtíinūⁿ yeⁿ'ē yú nanááⁿ Ndyuūs cáávā yuūúⁿ yeⁿ'e Señor Jesucristo. ²⁰ Ní Jesucristo nn'guaaⁿ yā 'áámá yúúni chí n'dai ní canduuchi taachi chíi nteeⁿ yā tীনūⁿ yeⁿ'e yaācū. Tীনūⁿ miiⁿ ní neⁿ'e caaⁿ'maⁿ chi tan'dúúcā cuerpo yeⁿe maáⁿ Cristo taachí ch'ii yā, 'tiicā va. Maaⁿ ní cuuvi ndaa yú na cuarto chi yaānūⁿ nanááⁿ Ndyuūs caavá yā. ²¹ Ní Jesucristo ní chiidúú ch'εεte ca yeⁿ'e yú ní díⁿ yā ntiiⁿ'nyuⁿ yeⁿ'e yaācū yeⁿ'e Ndyuūs. ²² Maaⁿ ní canéeⁿ chí indaa yú nanááⁿ Ndyuūs ndúúcū núúⁿ máⁿ staava yeⁿ'e yú ní 'áámá canee yú ndúúcū chi i'téenu yú. Cristo miiⁿ 'āā didεεvé yā staava yeⁿ'e yú yeⁿ'e nuuⁿndi yeⁿ'e yú caati nguéeⁿ nadacadíinūⁿ ca yú yeⁿ'e castigo yeⁿ'e nuuⁿndi chi diiⁿ yú. Ní nadídeεve yā cuerpo yeⁿ'ē yú ndúúcū nuūⁿniⁿ dεεve. ²³ Maaⁿ ní diiⁿ yú chí 'áámá canee yú ndúúcū chí ngaⁿ'a yú chí i'téenu yú caati deenu yú chí Ndyuūs caⁿ'á yā díⁿ yā cumplir compromiso yeⁿ'e chí caⁿ'a yā chí téε yā s'uuúⁿ. ²⁴ Ní s'uuúⁿ canéeⁿ chí inadícídíinūⁿ yú táácā cuuvi cunnee yú 'aama yú taama yú ní dineⁿ'e yú 'aama yú taama yú ní diiⁿ yú dendu'ū chí n'daacā. ²⁵ Ní nguéeⁿ diiⁿ yú chí nguéeⁿ nduuvidaama yú chεeti yaācū tan'dúúcā chí diiⁿ náⁿ'a yā. Naati ca'a yú consejo 'aama yú taama yú caati deenu yú chí nguuvi chí ndaa Cristo taama vmnéⁿ'ēe 'āā snee niiⁿ'nuúⁿ.

²⁶ Ní nduuti chí idiiⁿ yú nuuⁿndi caati maaⁿ yú neⁿ'e yú cuayiivi chí 'āā deenu yú nduudu cuaacu yeⁿ'é Ndyuūs tuu'mi ní 'āā ntee véé taama ofrenda chí cuuvi ca'a yú Ndyuūs cáávā nuuⁿndi yeⁿ'e yú chí Ndyuūs divíi yā nuuⁿndi yeⁿ'e yú. ²⁷ Dámaāⁿ 'va'a yú neⁿ'e chí cunee ngiinū yú yeⁿ'e chí cuchii. Cristo caⁿ'á yā n'diichi yā nuuⁿndi yeⁿ'ē yú ní ndúúcū yaⁿ'ā ingiichi chí cuucu tanducuéⁿē 'iiⁿ'yāⁿ chí contra yeⁿ'é Ndyuūs. ²⁸ Deenu yú yeⁿ'e 'iiⁿ'yāⁿ chí nguéeⁿ díⁿ yā cuenta yeⁿ'e ley yeⁿ'e Moisés. Nduuti chí véé 'uuúⁿ o 'iinū 'iiⁿ'yāⁿ chí ngaⁿ'ā nduudu cuaacu yeⁿ'e falta yeⁿ'é yā tuu'mi ní ch'ii 'iiⁿ'yāⁿ miiⁿ. Ní nguéeⁿ ya'ai 'iiⁿ'yāⁿ s'eeⁿ taachi chíi yā.

²⁹ Maaⁿ ní nadacadíinūⁿ yú yeⁿ'e 'iiⁿ'yāⁿ s'eeⁿ chí nguéeⁿ díⁿ yā cuenta yeⁿ'e yuūúⁿ yeⁿ'e Cristo chí cuuvi dεεve 'iiⁿ'yāⁿ s'eeⁿ. 'Iiⁿ'yāⁿ s'eeⁿ ngaⁿ'a taáⁿ yā yeⁿ'e Espíritu N'dai

yeⁿé Ndyuūs. ¿De'ē chúúcā n'dee ca castigo véé yeⁿé 'iiⁿyāⁿ s'eeⁿ? ³⁰ Deenu yú chi Señor ní ngaⁿa yā 'tíicā: 'Úú canéé chí ca'á castigo 'iiⁿyāⁿ. 'Úú idiⁿ chi 'iiⁿyāⁿ nadí've yā chiⁿ chi díⁿ yā chi nguéé n'daacā. Chuū dendú'ū ngaⁿa Señor miⁿ: Señor miⁿ caⁿá yā n'diichi yā nuuⁿndi yeⁿe 'iiⁿyāⁿ yeⁿé yā. ³¹ De'ē chúúcā ya'āi yeⁿe yú. Nééné 'va'a yú chi ndaa yú nanááⁿ Ndyuūs chi cānduuchi chi díⁿ yā castigar s'uuúⁿ nduuti chi nguéé n'daacā idiⁿ yú.

³² Maaⁿ ní n'gaacú nī yeⁿē nguuvi s'eeⁿ chi 'āā chó'ōo chi caama n'diichí nī ní s'téenu nī Jesucristo, ní cuayiivi chi chéé nī ch'eenú nī chiⁿ yeⁿe tanducuéⁿē dendu'ū cucáavā chi díⁿ nī luchar yeⁿē chi i'téenu nī. ³³ Náⁿa nī ch'eenú nī chiⁿ ní 'cuináⁿ nī taachi 'iiⁿyāⁿ sta'á yā ndís'tiⁿ ní ngaⁿa taáⁿ yā yeⁿe ndís'tiⁿ ní ch'eⁿé yā ndís'tiⁿ nanááⁿ n'dee n'dái 'iiⁿyāⁿ. Ní taachi 'tíicā díⁿ yā ndúúcu naⁿā hermanos yeⁿe yú neⁿé nī 'cuenú nī cuuvi nduucú yā. ³⁴ Ní taachi náⁿā hermanos ch'eenú yā chiⁿ chi canéé yā vácū, ndís'tiⁿ ní ya'ái nī hermanos s'eeⁿ. Ní taachi 'iiⁿyāⁿ sta'á yā nducuéⁿē chi véé yeⁿe nī ndís'tiⁿ ní chichéé nī yeⁿe nducuéⁿē. Ní yeenú nī caati deenú nī chi véé chi cuuvi yeⁿé nī chi n'dai taavi ca ná va'ai chéeti nguuvi chí cueⁿe daāⁿmaⁿ 'áamá cūnee yeⁿe nī. ³⁵ Maaⁿ ní nguéé di'vaachí nī ti nguéé véé confianza yeⁿé nī ndúúcu Ndyuūs caati ndúúcu chi i'téenu nī cuuvi díⁿ nī ganar cosas chi n'daacā taavi ca. ³⁶ Ní ndís'tiⁿ ní canéé chi chéé nī yeⁿe nducuéⁿē ní díⁿ nī nducuéⁿē chi Ndyuūs neⁿé yā chi díⁿ nī. Ní 'íicú cuuvi cuta'á nī yeⁿe chi véé yeⁿé nī chi Ndyuūs caⁿa yā chi téé yā ndís'tiⁿ. ³⁷ Canéé nguūⁿ na libro yeⁿé Ndyuūs 'tíicā:

'Āā ntéε 'nááⁿ tiempo ní Señor chi canéé chi ndaa ní ndaa yā. Ní 'āā ntéé cuuví 'nááⁿ yā.

³⁸ Ní ngaⁿa yā 'tíicā:

'iiⁿyāⁿ chi yeⁿé ní deévé yā tí i'téenu yā 'úú ní canduuchi yā cueⁿe daāⁿmaⁿ. Ní nduuti chi 'aama yā ndaacadaamí yā yeⁿé tuu'mi ní 'úú nguéé yeenú yeⁿe yā. ³⁹ Maaⁿ ní s'uuúⁿ ní nguéé tan'dúúca 'iiⁿyāⁿ chi ndaacadaamí yā yeⁿe Cristo ní chindai yā. Nguéé 'tíicā s'uuúⁿ. S'uuúⁿ ní i'téenu yú Cristo ní Cristo nadanguáⁿai yā s'uuúⁿ.

11

Yeⁿe chi i'teenu yú Jesucristo

¹ Cáavā chi i'teenu yú Ndyuūs deenu yú chi seguro chi cuta'a yú yeⁿé chi canee ngiinu yú. Ní deenu yú chí cuuvi cuaacu yeⁿe dendu'ū chi nguéé inaaⁿ yú. ² Ní tiempo chi 'āā chó'ōo 'iiⁿyāⁿ ngaⁿá yā chi 'iiⁿyāⁿ chi díⁿ yā ntiiⁿnyuⁿ yeⁿe Ndyuūs ní n'dáaca yā nanááⁿ Ndyuūs ti i'téenu yā Ndyuūs.

³ Ní deenu yú cucáavā chi i'teenu yú Ndyuūs, chí chiiⁿ chí inaaⁿ yú ní cáavā chi Ndyuūs din'dái yā íⁿyeⁿdí ní nguéé de'ē vεε.

⁴ Ní cáavā chi saⁿā Abel ní i'téenu sa Ndyuūs, ca'a sa 'áamá ofrenda chí n'daacā ca nguéé ti saⁿa Caín miⁿ. Ní Ndyuūs n'diichí yā chi ofrenda yeⁿe Abel miⁿ ní n'daacā ca ní sta'á yā ofrenda miⁿ. Ní Ndyuūs n'diichí yā chi Abel ní n'daacā sa. Ní cáavā chi Abel i'téenu sa Ndyuūs 'áará chí ch'iⁿ saⁿā miⁿ ndíí maaⁿ ní ngaⁿa 'iiⁿyāⁿ yeⁿe vaadi i'téenu yeⁿé sa.

⁵ Cáavā chi saⁿā Enoc i'téenu sa Ndyuūs, nguéé ch'iⁿ sa ti Ndyuūs candéε yā saⁿā miⁿ na va'ai chéeti nguuvi. 'iiⁿyāⁿ yeⁿé yā 'āā ntéé ndaacá yā saⁿā miⁿ ti Ndyuūs candéε yā saⁿā miⁿ nduucú yā. Canéé nguūⁿ na libro yeⁿe Ndyuūs 'tíicā: Taachi 'āā cuéé candéε Ndyuūs saⁿā miⁿ, Ndyuūs canee yiinú yā chí idiⁿ sa. ⁶ Mar 'áamá 'iiⁿyāⁿ nduuti chí nguéé i'téenu yā Ndyuūs, Ndyuūs nguéé cunee yiinú yā 'iiⁿyāⁿ. Nduuti chí 'iiⁿyāⁿ neⁿé yā ndaa yā nanááⁿ Ndyuūs canee chí cu'téenu yā chí véé Ndyuūs. Ní Ndyuūs caⁿa yā chí ca'a yā chí véé chí cuuvi yeⁿé 'iiⁿyāⁿ chí n'nuúⁿ yā Ndyuūs.

⁷ Ní cáavā saⁿā Noé i'téenu sa Ndyuūs ní n'giindiveeⁿ sa nduudu yeⁿe Ndyuūs taachi Ndyuūs yaa'ví yā cosas chí caⁿá yā díⁿ yā. 'Áará chí nguéé inaaⁿ sa cosas miⁿ n'giindiveeⁿ sa nduudu yeⁿé Ndyuūs ní din'dái sa 'áamá arca chí barco ch'εεte ní 'íicú cuuví nanguáⁿāi 'iiⁿyāⁿ yeⁿé sa na vaacú sa. 'Túúca Noé diⁿ sa condenar 'iiⁿyāⁿ yeⁿe

iⁿ'yeeⁿdí 'cūū caati i'téenu sa Ndyuūs. Ní Ndyuūs didεεvé yā Noé chi cuuvi yeⁿ'é yā caati i'téenu sa Ndyuūs.

⁸ Ní cáávā saⁿ'ā Abraham i'téenu sa Ndyuūs, ch'iindiveeⁿ sa nduudu yeⁿ'e Ndyuūs taachi Ndyuūs yaa'ví yā Abraham. Ní yaa'ví yā saⁿ'ā chi canéé chí caⁿ'a sa táámá yáⁿ'āa chi caⁿ'a Ndyuūs chi cuuvi yeⁿ'ē sa. Ní s'neeⁿ sa yāāⁿ vaacú sa ní cuéⁿ'e sa. Ní nguéé déenu sá tíí ndíí caⁿ'a sa. ⁹ Ní cáávā chi Abraham i'téenu sa Ndyuūs, canee sa na yáⁿ'āa chi Ndyuūs caⁿ'a yā chi ca'a yā. Ní miiⁿ canee sa tan'dúúcā 'iiⁿ'yā chi canúúⁿ yúúní. Ní canúúⁿ sá va'āi tínūuⁿ ndúúcū daiya sa chi Isaac ndúúcū Jacob. Ní 'āā daamá nūuⁿ cuuvi yeⁿ'é yā yeⁿ'ē chí cuuvi yeⁿ'e Abraham miiⁿ. ¹⁰ Abraham miiⁿ ní cūnee ngíínu sa yāāⁿ chi Ndyuūs 'āā din'dái yā tan'dúúcā chi Ndyuūs nadacádíínuuⁿ yā. Yāāⁿ miiⁿ chi 'áámá cūnee cimientu yeⁿ'ē ní va'ai chεeti nguuvi.

¹¹ Ní cáávā chi Sara i'téenu tá Ndyuūs, ní ditiínú ca tá chi taavi tá daiya tá. Sta'a tá poder yeⁿ'e Ndyuūs ní ch'iindí daiya tá taachi 'āā ndiicúū ta ti i'téenu tá chi Ndyuūs dííⁿ yā cumplir nduudu chi ngaⁿ'a yā. ¹² Ní 'tíicā Abraham miiⁿ 'āā ndiicúū ca yā chi cuuvi chiidá yeⁿ'e daiyá yā. Ní n'daataá yeⁿ'é yā chi Sara miiⁿ 'āā ndiicúū ca ntúuⁿ tá. Naati ná 'iiⁿ'yāⁿ yeⁿ'é yā ichii n'dee n'dái 'iiⁿ'yāⁿ tan'dúúcā 'íⁿ'nyúⁿ yeⁿ'e nanguuvi ní tan'dúúcā yáⁿ'āa ndúuti chi véé cuaaⁿ 'diituú yíicú chi s'uuúⁿ nguéé ngii iduuche yú.

¹³ Nducyaa ca 'iiⁿ'yāⁿ s'eeⁿ ch'ii yā naati i'téenu yā Ndyuūs. Nguéé sta'á yā cosas chi Ndyuūs caⁿ'a yā chi ca'a yā naati i'téenu yā ní n'diichi chi yaⁿ'ái yā cosas chi Ndyuūs caⁿ'a yā chí ca'a yā. Ní yeenú yā. Ní 'iiⁿ'yāⁿ s'eeⁿ ngaⁿ'a yā chii yā nducyáácá 'iiⁿ'yāⁿ chi tan'dúúcā 'iiⁿ'yāⁿ chi snúúⁿ yúúní, 'tiicá yā 'naaⁿ tiempo chi snée yā iⁿ'yeeⁿdí 'cūū. ¹⁴ Ní nducyaa ca 'iiⁿ'yāⁿ chi ngaⁿ'á yā 'tíicā ch'iⁿ'i yā chi in'nuúⁿ yā táámá nación chí n'dai chí cuuvi yeⁿ'e yā. ¹⁵ Ní nduuti chi nn'gaacú yā yeⁿ'e yáⁿ'āa naachi chiicá yā tuu'mi ní cuuvi nguεεcunée yā ní ndaa yā na yāāⁿ miiⁿ. ¹⁶ Naati 'iiⁿ'yāⁿ s'eeⁿ neⁿ'é yā táámá nación chi n'daacā ca chí yeⁿ'ē va'ai chεeti nguuvi. Ní cáávā chuū Ndyuūs nguéé 'cuiináⁿ yā taachi 'iiⁿ'yāⁿ s'eeⁿ ngaⁿ'a yā 'tíicā: N'dií Ndyuūs ní Ndyuūs yeⁿ'ē yú. Ndyuūs 'āā véé yaáⁿ yā 'áámá yāāⁿ chi cuuvi yeⁿ'e 'iiⁿ'yāⁿ s'eeⁿ.

¹⁷ Ní cáávā chi Abraham miiⁿ i'téenu yā Ndyuūs, n'giindiveeⁿ yā yeⁿ'e Ndyuūs taachi Ndyuūs n'diichineeⁿ yā Abraham. Ní Abraham ní caⁿ'á yā ca'á yā daiyá yā Isaac cáávā lado yeⁿ'e ofrenda chi 'caaⁿ'núⁿ yā daiyá yā. Ní canee listo yā chi ca'á yā 'áámá n'dyaⁿ'ā daiyá yā lado yeⁿ'e ofrenda miiⁿ 'áará chí Ndyuūs ca'á yā 'áámá compromiso chi 'tíicā: ¹⁸ Díí, Abraham, cáávā daiya di Isaac 'úú ní teé dii n'dee n'dái taavi cuuvi ndaata yeⁿ'e di. ¹⁹ Ní Abraham miiⁿ tuumicádíínuuⁿ yā chi Ndyuūs cuuví nadacuéeⁿ yā 'iiⁿ'yāⁿ s'eeⁿ yeⁿ'ē nguaaⁿ tináⁿ'ā. Ní Abraham déenu sa chi Ndyuūs cuuvi nadacuéeⁿ yā daiya sa yeⁿ'ē nguaaⁿ tináⁿ'ā, naati nguéé ch'ii sa. Abraham miiⁿ candéε sa daiya sa na vaacú sa.

²⁰ Ní cáávā chi Isaac i'téenu sa Ndyuūs, ngaⁿ'a sa chi caⁿ'a sa di'viicú sa daiya sa Jacob ndúúcū saⁿ'ā Esaú. Ní ngaⁿ'ā sa yeⁿ'e cosas n'dai chi cuchii. ²¹ Ní cáávā chi Jacob i'téenu sa Ndyuūs, taachi 'āā cháā 'cuuvi sa di'viicu sa ca'áámá ca'áámá daiya yeⁿ'ē daiya José. Ní cuayivi ní dich'εεε sá Ndyuūs neⁿ'e chí sta'ā sa in'daacúú yeⁿ'ē sa. Ní yiin'diicúneeⁿ sa na in'daacúú yeⁿ'ē sa. ²² Ní cáávā chi José i'téenu sa Ndyuūs taachi 'āā cháā 'cuuvi sa ngaⁿ'a sa yeⁿ'e tiempo chi 'iiⁿ'yāⁿ yeⁿ'e ndaata Israel nan'dáa yā ná yáⁿ'āa Egipto. Ní yaa'ví sa 'iiⁿ'yāⁿ yeⁿ'e chi canéé chí dííⁿ yā ndúúcū 'iini yeⁿ'e sa taachi tináⁿ'ā sa.

²³ Ní cáávā chi i'téenu yā Ndyuūs chiida sa ní chεecu sa Moisés, taachi ch'iindiyāāⁿ Moisés miiⁿ chinuun'dé'ei yā saⁿ'ā 'lííⁿ miiⁿ na 'iinu 'iyyū. N'diichi yā daiyá yā chí Moisés miiⁿ saⁿ'ā 'lííⁿ sa neené n'dεεvéε sa. Nguéé di'vá'a yā yeⁿ'e orden yeⁿ'e rey chí canéé chí 'caaⁿ'núⁿ yā saⁿ'ā 'lííⁿ miiⁿ. ²⁴ Cáávā chi Moisés i'téenu sa Ndyuūs, ní tááchí ch'εētē sa nguéé 'cuūⁿ sa chí 'iiⁿ'yāⁿ ngaⁿ'á yā chí Moisés ní daiya n'daataa daiyá rey yeⁿ'e yáⁿ'āa Egipto. ²⁵ Naati Moisés miiⁿ neⁿ'e sa 'cueenu ca sá cuuvi ndúúcū 'iiⁿ'yāⁿ chí yeⁿ'e Ndyuūs. Ní nguéé 'cuūⁿ sa chí yeenú sa 'áámá tiempo ndúúcū vaadi yeenú chí dinuuⁿndi sa. ²⁶ Ní Moisés miiⁿ nadacádíínuuⁿ sa chí n'daacā ca chí 'cueenu sa cuuvi tan'dúúcā chí ch'eenu Cristo chíí na yáⁿ'āa 'cúú ní nguéé ti chí cuuví yeⁿ'e sa tanducuéⁿ'ē vaadi 'cuiica chí véé na yáⁿ'āa Egipto. Ní 'tíicā nacádíínuuⁿ sa caati deenu sa chí Ndyuūs caⁿ'á yā ca'a yā chí véé

chi cuuvi yeⁿe sa. ²⁷ Ní cáávā chi Moisés i'téenu sa Ndyuūs, nan'dáa sa yeⁿe yáⁿ'āa Egipto ní nguéeé 'va'a sa chi nduuvi taaⁿ rey. Ní díftu canee sa chi i'téenu sa Ndyuūs tan'dúúcā chi n'diichi sa Ndyuūs 'áará chi nguéeé inaaⁿ sa Ndyuūs.

²⁸ Ní cáávā chi Moisés i'téenu sa Ndyuūs s'neeⁿ sa orden yeⁿe 'viicu pascua chi 'iiⁿ'yāⁿ canéé chí s'neéⁿ yā yuūúⁿ yeⁿe 'iiti cuūchī na cheendī va'ai yeⁿ'é yā caati taachi ndaa ángel chi n'giiⁿ'nuⁿ yā nducyaaca da'caiyāa saⁿ'ā chi vmnááⁿ vmnaaⁿ, nguéeé cuuvi 'caaⁿ'núⁿ yā da'caiyāa chi yeⁿ'é ndaata yeⁿ'é Israel. ²⁹ Ní cáávā 'iiⁿ'yāⁿ yeⁿe ndaata Israel i'téenu yā Ndyuūs, chicho'ó yā naavtaⁿ'ā yeⁿe mar chi nguuvi Rojo ní ngiicá yā ndii yáⁿ'āa cuūⁿmáⁿ. Ní cuayiivi ní taachi cho'o 'iiⁿ'yāⁿ s'eeⁿ yeⁿe yáⁿ'āa Egipto tuu'mi ní chi'i nuūⁿ'niⁿ 'iiⁿ'yāⁿ ní nducyaaca yā ch'iī yā ti nduuvidaaⁿmáⁿ nuūⁿ'niⁿ.

³⁰ Ní cáávā 'iiⁿ'yāⁿ yeⁿe ndaata Israel i'téenu yā Ndyuūs, cheⁿe yā nuuⁿmaⁿ ndiivi cheēti yeⁿe yáāⁿ Jericó ndēēchē nguuvi. Tuu'mi ní ch'iinu miiⁿ ní chínδεενε cheēti yeⁿe yáāⁿ miiⁿ. ³¹ Ní cáávā chi Rahab i'téenu tá Ndyuūs, ní 'áará chi cueⁿe tá ndúúcū saⁿ'ā s'eeⁿ, nguéeé ch'iī tá ndúúcū 'iiⁿ'yāⁿ s'eeⁿ yeⁿe yáāⁿ yeⁿe tá chi nguéeé i'téenu yā Ndyuūs; ti n'daata miiⁿ ní sta'a tá saⁿ'ā s'eeⁿ yeⁿe Israel. Ní n'daacā idiiⁿ tá ndúúcū saⁿ'ā s'eeⁿ chi 'díííⁿ 'díííⁿ ndaá yā nguaaⁿ 'iiⁿ'yāⁿ yeⁿe tá chi cuuvi deenú yā táacā canee 'iiⁿ'yāⁿ yeⁿe tá.

³² Maaⁿ ní ¿de'ē cá cuuví caaⁿ'máⁿ ndís'tií? Nguéeé véé tiempo chi cuuví ndís'tií yeⁿe saⁿ'ā Gedeón ní yeⁿe saⁿ'ā Barac, ní yeⁿe saⁿ'ā Sansón, ní yeⁿe saⁿ'ā Jefté, ní yeⁿe saⁿ'ā David, ní yeⁿe saⁿ'ā Samuel, ní yeⁿe saⁿ'ā profetas chi candēe nduudu yeⁿ'é Ndyuūs.

³³ Nducyaaca 'iiⁿ'yāⁿ s'eeⁿ ní cáávā chi i'téenu yā Ndyuūs idiiⁿ caandá yā ní cuchéé yā yeⁿe náⁿ'ā países. Ní n'daacā ngaⁿ'a ntiiⁿnyuⁿ yā yeⁿe tanáⁿ'ā yāāⁿ. Ní tuneéⁿ yā chí Ndyuūs ngaⁿ'a yā chíⁿ chí ca'a yā. Ní dííⁿ yā chi nduūdi cheendi 'yáíⁿyāāⁿ cuá'aá. ³⁴ Ní yaⁿ'ā chi diitu n'dái ngiichi nguéeé cuuvi 'tuuví 'iiⁿ'yāⁿ s'eeⁿ chi i'téenu yā Ndyuūs. Ní n'géenu yā yeⁿe 'iiⁿ'yāⁿ chi neⁿ'é yā 'caaⁿ'núⁿ yā 'yā ndúúcū machete chi 'caāíⁿ ndúú 'uuvi lados. Ní 'áará chi duūvá yā ditiinú yā. Ní taachi diiⁿ caandá yā ní ditiinú yā chí 'caaⁿ'núⁿ yā. Ní chee yā yeⁿe n'dee n'dái soldados yeⁿ'ē enemigos yeⁿ'é yā. ³⁵ Ní cáávā chi n'daataa s'eeⁿ i'téenu yā Ndyuūs, nta'á yā tináⁿ'ā chi n'dii yeⁿe familia yeⁿ'é yā taachi 'āā nduuchí yā yeⁿ'ē nguaaⁿ tináⁿ'ā. Ní náⁿ'ā 'iiⁿ'yāⁿ ch'éenu yā chii ní ch'iī yā. Ní nguéeé 'cūuⁿ yā chi nnguaⁿ'ai yā ti neⁿ'é yā n'diichí yā táamá vida chi n'daacā ca. ³⁶ Náⁿ'a yā ní 'iiⁿ'yāⁿ s'eeⁿ duuchí yā yeⁿe yā ní ch'eⁿ'é yā 'iiⁿ'yāⁿ. Ní náⁿ'a yā ní 'iiⁿ'yāⁿ s'eeⁿ ch'ēē chiichí yā ndúúcū cadenas ní cheⁿ'é yā vácū. ³⁷ Ní náⁿ'a yā ní 'iiⁿ'yāⁿ s'eeⁿ ca'a tuūú yā 'iiⁿ'yāⁿ ní ch'iī yā. Ní náⁿ'a yā ní 'iiⁿ'yāⁿ s'eeⁿ n'deé yā nduu 'uuvi taaⁿ yā ndúúcū tierra. Ní náⁿ'a yā 'iiⁿ'yāⁿ s'eeⁿ n'giiⁿ'nuⁿ yā 'iiⁿ'yāⁿ ndúúcū machete chi 'úúvī lados 'caāíⁿ. Náⁿ'a yā ní ch'ēē chiicá yā ndíí 'muuⁿ ndíí miiⁿ ndúúcū catecai yā yeⁿ'ē 'iiti cuūchī ní yeⁿ'ē diiⁿmaⁿ chivo. Ní pobre yā ní ch'eenú yā chii. Ní nguéeé din'daacá 'iiⁿ'yāⁿ s'eeⁿ ndúúcu yā. ³⁸ Ní 'iiⁿ'yāⁿ chi ch'eenú yā chii cáávā chi i'téenu yā Ndyuūs, 'iiⁿ'yāⁿ yeⁿe íⁿ'yeeⁿdí nguéeé n'daacā ca chi cuuvi cūneé yā ndúúcu yā. 'Iiⁿ'yāⁿ chi i'téenu yā ngeⁿ'é yā 'muuⁿ ngeⁿ'é yā miiⁿ ní tan'dúúcā 'iiⁿ'yāⁿ chi nguéeé vaacú yā, 'tiicá yā. Chiicá yā yáⁿ'āa cuuⁿmaⁿ naachi nguéeé ch'ēetinéé 'iiⁿ'yāⁿ. Ní chiicá yā na cuéetí ní ná yiivi yáává yeⁿe 'iiti o yiivi yáⁿ'āa naachi 'cuēetinéé yā. ³⁹ Cáávā chi 'iiⁿ'yāⁿ s'eeⁿ chi i'téenu yā Ndyuūs, n'dai yā ndúúcū nducuéⁿ'ē chi Ndyuūs 'cūuⁿ yā chi n'geenu yā ngii ndíí tiempo chi ch'iī yā. 'Āā cuéé cuta'a yā chi cuuvi yeⁿe yā chi Ndyuūs caⁿ'a yā chi ca'a yā, ⁴⁰ caati Ndyuūs nadacádíínuuⁿ yā chi caⁿ'á yā diiⁿ yā chi n'daacā ca cááva yā ní cáávā s'uuúⁿ. 'Iiⁿ'yāⁿ s'eeⁿ nguéeé cuuvi cuta'a yā chi cuuvi yeⁿ'é yā ndíí tiempo chi s'uuúⁿ cuuvi cuta'a yú chi cuuvi yeⁿe yú.

12

Cueⁿe daāⁿmaⁿ snaaⁿ yú yeⁿe Jesús

¹ Maaⁿ ní deenu yú cáávā vida yeⁿ'ē n'dee n'dái 'iiⁿ'yāⁿ chí ch'iī yā ti ch'iⁿ'í yā s'uuúⁿ táacā cuuvi cu'teenu ca yú Ndyuūs. Ní cáávā chuū canee chi cū'neeⁿ yú tanducuéⁿ'ē dendu'ū chi di'vaachi s'uūúⁿ ndúúcū nuuⁿndi chi diiⁿ yú caati nuuⁿndi mííⁿ diiⁿ chí cuuvi

ndai yú. Ní caānu yú ndúúcu ngiīnū carrera yeⁿe vida yeⁿe yú chi Ndyuūs itée yā s'uuúⁿ.
² Ní cueⁿe daāⁿmāⁿ snaaⁿ yú Jesús ti diíⁿ yā chi cuuvi i'téenu yú 'yā. Ní diíⁿ yā chi n'daacā
 ca cuuvi cu'teenu yú. Jesucristo ní ch'eenú yā chiī taachi ch'iī yā na cruz. Ní nguée diíⁿ
 yā cuenta chi 'cuinaāⁿ yā cucáāvā chi ch'iī yā tan'dúúca chi n'giiⁿ'nuⁿ yā 'iiⁿ'yāⁿ caati
 deenú yā chi yeenú yā cuayiivi ti cuuví nadanguáⁿ'ai yā 'iiⁿ'yāⁿ. Maaⁿ ní véé yā na lado
 yeⁿe honor yeⁿe trono yeⁿe Ndyuūs.

³ Ndís'tiī, nadacadíinuⁿ nī tan'dúúca Jesucristo chi ejemplo yeⁿe yú. Ch'eenú yā chiī
 cucáāvā 'iiⁿ'yāⁿ s'eeⁿ chi dinuuⁿndí yā. Ní 'íicú ndís'tiī nguée cuuvi 'daan'dí nī ní nguée
 s'neéⁿ nī chiiⁿ chi i'téenu nī. ⁴ Ndís'tiī ní 'āā chichēε nī ndúúcu nuūⁿndí ní nguée ch'eenú
 nī chii ndí chi 'āā n'dīi nī. ⁵ ¿'Āā nguée n'gaacú ndís'tiī consejo chi Ndyuūs ca'á yā ndís'tiī
 chi daiyá yā? Canée nguūⁿ na libro yeⁿe Ndyuūs 'tíicā:

Díi, daiyá, nguée nadacadíinuⁿ nī chi nguée de'ē véε taachi Ndyuūs diíⁿ yā castigar
 ndís'tiī caati cuuvi deenú nī chi nguée n'daacā idiíⁿ nī. Ní nguée ndaacadáámí
 nī yeⁿe yā taachi diíⁿ yā castigar ndís'tiī.

⁶ Señor yeⁿe yú yaa'vineén yā nducyáácá 'iiⁿ'yāⁿ chi neⁿe yā ní diíⁿ yā castigar nducyaaca
 'iiⁿ'yāⁿ chi sta'á yā chi cuuvi daiyá yā. ⁷ Maaⁿ ní cuchēε nī castigo chi Ndyuūs
 itée yā ndís'tiī ti Ndyuūs ní chiidá nī. Taachi n'geenú nī ngiī tuu'mi ní deenú
 nī chi diíⁿ yā ndúúcu ndís'tiī tan'dúúca chi ndís'tiī ní daiyá yā. 'Tíicā diíⁿ yā.
 ¿Dú'ū daiyá yā véε chi chiidá yā nguée idiíⁿ yā castigar? ⁸ Nduuti chi Ndyuūs
 nguée diíⁿ yā castigar ndís'tiī tan'dúúca chi diíⁿ yā castigar nducuéⁿe daiyá yā,
 tuu'mi ní ndís'tiī nguée maaⁿ daiyá yā ti ndís'tiī ní daiyá yeⁿe táámá yā. Ní nguée
 daiya Dendyuūs ndís'tiī. ⁹ Ní 'tiicá ntūūⁿ chiida yú chi yeⁿe iⁿ'yeeⁿdí 'cūū diíⁿ yā
 castigar s'uuúⁿ tan'dúúca chi neⁿe yā. Ní s'uuúⁿ ní dinéⁿe yú chiida yú. N'daacā
 ca chi diíⁿ yú chiiⁿ chi neⁿe Ndyuūs chi canée na va'ai chēeti nguuvi ní sндуuchi
 yú. ¹⁰ Chiida yú chi yeⁿe iⁿ'yeeⁿdí 'cūū diíⁿ yā castigar s'uuúⁿ dúu'vī nduuyū nūūⁿ
 tan'dúúca chi tumicadíinuⁿ yā chi n'daacā caavā s'uuúⁿ. Ndyuūs yeⁿe yú ní diíⁿ
 yā castigar s'uuúⁿ ti cuáácú chí n'dai caavā s'uuúⁿ ti s'uuúⁿ ní cuuvi din'dai ca
 yú tan'dúúca chi Ndyuūs ní n'dai cá yā. ¹¹ Cuaacu chi nguée yeenu yú taachi téε
 yā castigo s'uuúⁿ naati yá'ai yú. Cuayiivi ní 'iiⁿ'yāⁿ chi tuumicadíinuⁿ yā yeⁿe
 castigo yeⁿe yā ni véé chi n'daacā yeⁿe castigo. 'Iiⁿ'yāⁿ s'eeⁿ din'daacā cá yā ní
 canée 'diiⁿ vida yeⁿe yā.

Véé peligro yeⁿe yú nduuti chi nguée n'giindiveeⁿ yú nduudu yeⁿe Ndyuūs

¹² Maaⁿ ní Ndyuūs 'āā tee yā castigo ndís'tiī ní maaⁿ ní cuta'á nī fuerzas ndúúcu ta'á nī
 ní dicuaacú nī duūⁿ'ntii'yá nī chi ndicuūnū. ¹³ Cachiicá nī ná yúúní cuaacu maaⁿ ní 'íicú
 cuuvi nanduūvā yeⁿe nī ca'a nī chi ndíi dúúvā yeⁿe nī.

¹⁴ Maaⁿ ndís'tiī ní diíⁿ nī chi 'diiⁿ 'cuēetinée nī ndúúcu nducyaaca 'iiⁿ'yāⁿ. Ní diíⁿ nī
 nducuéⁿe chi n'daacā ca caati deεve canée vida yeⁿe nī. 'Iiⁿ'yāⁿ chi nguée deεve vida
 yeⁿe yā nguée cuuvi n'diichí yā Señor Ndyuūs. ¹⁵ Cundée nī cuidado chi mar 'áámá
 ndís'tiī nguée divíi nī yeⁿe Ndyuūs ti nguée cuuvi inneé yā ndís'tiī. Ní nguée cúúví
 cunee 'aamá nī nguaaⁿ ndís'tiī chi tan'dúúca 'áámá dii'yu yaātā yaāa chi diíⁿ daño yeⁿe
 nducuéⁿe dii'yu yaātā. 'Tíicā cuuvi diiⁿ daño 'áámá nī tan'dúúca chi veneno nguaaⁿ
 ndís'tiī. ¹⁶ Candēε nī cuidado chi mar 'áámá ndís'tiī nguée caⁿ'á nī ndúúcu n'daataá o
 saⁿ'ā chi nguée yeⁿe nī. Ní nguée diíⁿ nī cuenta yeⁿe nducuéⁿe chi yeⁿe Ndyuūs. 'Tíicā
 diiⁿ saⁿ'ā Esaú ti cáāvā 'áámá comida nūūⁿ n'diicuí sá chi cuuvi yeⁿe sa ti saⁿ'ā vmnaaⁿ.
¹⁷ Ní ndís'tiī deenú nī yeⁿe saⁿ'ā Esaú taachi neⁿe sa cuta'a sa yeⁿe chiidá sa chi cuuvi
 yeⁿe sa ti saⁿ'ā daiya vmnaaⁿ, naati nguée 'cuūⁿ chiida sa. Ní Esaú chēεcū taavi sá ní
 n'nuuⁿ sa manera chi nduuvi n'daacā chi 'āā diiⁿ sa naati nguée ndaacā n'daaca sa.

¹⁸ Maaⁿ ní ndís'tiī nguée ndāa nī na yiicū chi ngiichi chi diíⁿ nī sentir ngiichi miíⁿ,
 tan'dúúcu chi diiⁿ 'iiⁿ'yāⁿ Israel tiempo chi 'āā chó'ōo. Ndíi nguée diíⁿ nī sentir maāiⁿ, ndíi
 nguée ndúú meēeⁿ, ndíi nguée ndúú 'áámá cheeⁿ cúúví díftūu. ¹⁹ Ní nguée n'giindiveeⁿ
 nī chi ch'ēεcū trompeta miíⁿ ní nguée nduudu yeⁿe Ndyuūs chi caⁿ'a yā ndúúcu 'iiⁿ'yāⁿ

s'eeⁿ. Taachí 'iiⁿyāⁿ s'eeⁿ ch'iindiveéⁿ yā nduudu yeⁿe Ndyuūs chiica yā Ndyuūs chi 'āā ntéé caaⁿmaⁿ cá yā 'iiⁿyāⁿ s'eeⁿ. ²⁰ 'Tíicā ngaⁿa yā ti nguéé cuuvi chεε yā chi Ndyuūs ngaⁿa ntiiⁿnyuⁿ yā ti 'tíicā: Ndúúti chi 'áámá 'iiti nindaá ti na yīicu 'cūū canee chi cuiutuú yā 'iiti ní 'caaⁿnúⁿ yā 'iiti. ²¹ Ní maaⁿ Moisés miiⁿ ní taachi n'diichí yā yīicu 'cūū ní ch'iindiveéⁿ yā nducuéⁿē, 'tíicā ngaⁿá yā: Nééné 'va'á ní yiin'duuvu 'úú.

²² Maaⁿ ní nguéé 'tíicā ti ndís'tiī ndaa nī 'áámá yīicū chi nguuvu Sión chi yāāⁿ yeⁿe Ndyuūs chi cánduuchi chí yāāⁿ Jerusalén chí va'ai chεeti nguuvu naachi n'dee n'dái miles ángeles snée yā. ²³ Ní nduuvidaamá yā chi dich'εεtē yā Ndyuūs. Ní miiⁿ canee nducyaaca 'iiⁿyāⁿ chi daiyá Ndyuūs. Ní chi duuchí yā canéé nguūⁿ na libro yeⁿē va'ai chεeti nguuvu. Nducyaaca nī ndaa nī nanááⁿ Ndyuūs chi díⁿ yā juzgar nducyáácá 'iiⁿyāⁿ. Ní ndís'tiī chí yeⁿē iⁿ'yeeⁿdí 'cūū ní ndaa nī nanááⁿ espíritu s'eeⁿ yeⁿe 'iiⁿyāⁿ chí dεεve ca chí Ndyuūs díⁿ yā chí nguéé nuuⁿndi yeⁿé yā. ²⁴ Ní ndaa nī nanááⁿ Jesucristo chí abogado chí canúuⁿ yā naavtaⁿā compromiso chí ngai chí yeⁿé Ndyuūs ndúúcu 'iiⁿyāⁿ. Ní ndaa nī nanááⁿ Cristo chí chingée yā yuūúⁿ yeⁿé yā cucáávā s'uuúⁿ. Yuūúⁿ yeⁿe Cristo ní n'daacā ca nguéé ti yuūúⁿ yeⁿe Abel. Ndúúcu yuūúⁿ yeⁿe Cristo, Ndyuūs nadich'εεcú yā nuuⁿndi yeⁿe 'iiⁿyāⁿ. Naati cáávā 'díínu Abel ch'iⁿ'núⁿ Abel tuu'mi ní Ndyuūs ca'a yā castigo 'díínu Abel.

²⁵ Ní cáávā nducuéⁿē chuū candéé nī cuidado chí n'giindiveéⁿ nī nduudu yeⁿe Ndyuūs chí ngaⁿá yā ngii yā ndís'tiī. 'Iiⁿyāⁿ s'eeⁿ chí nguéé ch'iindiveéⁿ yā nduudu yeⁿe Cristo taachí snée yā iⁿ'yeeⁿdí 'cūū nguéé nguaⁿái yā yeⁿē nuuⁿndi yeⁿé yā. Ní 'tεε cá s'uuúⁿ chí cuuvi nguaⁿái yú nduuti chí ndaacadaami yú yeⁿé Cristo chí canee na va'ai chεeti nguuvu ní ngaⁿá yā ndúúcu s'uuúⁿ yeⁿe chí cuchí. ²⁶ Tiempo chí chó'ōo taachi Ndyuūs ngaⁿá yā yeⁿe yīicū nuⁿu yáⁿāa. Maaⁿ ní Ndyuūs ngaⁿá yā 'tíicā: Taama vmnéⁿēe inuⁿú yáⁿāa ndúúcu nanguuvi. ²⁷ Maaⁿ ní taachi ngaⁿa Ndyuūs taama vmnéⁿēe nūⁿ deenu yú chí nducuéⁿē chí din'dái Ndyuūs ní caⁿá yā din'núⁿu yā ní divíi yā. Ní nducuéⁿē chí nguéé din'núⁿu yā ní cūnee. ²⁸ Canéé chí ca'a yú gracias Ndyuūs caati véé yāāⁿ yeⁿe yú, lugar naachi Ndyuūs ngaⁿa ntiiⁿnyuⁿ yā. Ní nguéé cuuví nuⁿu lugar miiⁿ. Canee chí dich'εεte yú Ndyuūs ní i'teenu yú Ndyuūs. Ní 'va'a yú yeⁿé yā ní díiⁿ yú tan'dúúca chí neⁿe yā. ²⁹ Ndyuūs yeⁿe yú tan'dúúca 'áámá nguuchi yáⁿā chí dituúví nducuéⁿē chí nguéé n'daacā. Tiicá yā.

13

Yeⁿé chí díiⁿ yú chí cunee yiinuú Ndyuūs

¹ Canéé chí dineⁿe yú 'aama yú taama yú caati hermanos s'uuúⁿ ní yeⁿe Cristo s'uuúⁿ. ² Nan'gaacu yú chí canee chí ca'a yú va'ái yeⁿe yú 'iiⁿyāⁿ chí canúúⁿ yúúni. N'duuvu yā ní díiⁿ yā 'túúca ní sta'á yā va'ai yā ángeles ní nguéé déenu yā chí ángeles.

³ Nan'gaacu yú yeⁿe 'iiⁿyāⁿ chí snúúⁿ yā vácūū. Díiⁿ yú cuenta chí s'uuúⁿ snuūⁿ yú vácūū nduucú yā. Nan'gaacu yú yeⁿe 'iiⁿyāⁿ chí n'geenu yā ngii na cuerpo yeⁿé yā ní díiⁿ yú cuenta chí s'uuúⁿ ní n'geenu yú ngii na cuerpo yeⁿe yú nduucú yā.

⁴ Díiⁿ yú respetar 'iiⁿyāⁿ chí n'giindivaacú yā ti nguéé dinuuⁿndí yā. 'Iiⁿyāⁿ chí n'giindivaacú yā canee chí caⁿá yā dámaāⁿ ndúúcu isaⁿā o n'daataá yeⁿé yā. Ndyuūs ní n'diichí yā nuuⁿndi yeⁿe 'iiⁿyāⁿ chí véé nuuⁿndi yeⁿé yā ndúúcu 'iiⁿyāⁿ chí n'giindivaacú yā ní caⁿá yā ndúúcu táámá n'daataá o saⁿā.

⁵ Nguéé dineⁿe yú tuūmī naati yeenu yú ndúúcu chí véé chí yeⁿe yú ti Ndyuūs ngaⁿá yā 'tíicā: 'Úú nguéé cu'neéⁿ ndís'tiī ní nguéé díiⁿ abandonar ndís'tiī. ⁶ Ní 'tíicā cuuvi caaⁿmaⁿ cuaacu yú ndúúcu confianza:

Señor ní nginnee yā 'úú. 'Úú nguéé 'va'á yeⁿe chí 'iiⁿyāⁿ cuuvi díiⁿ yā nduucú.

⁷ Nan'gaacú nī yeⁿe 'iiⁿyāⁿ n'gεete yeⁿe yaācū chí ngaⁿa ntiiⁿnyúⁿ yā nanááⁿ ndís'tiī ní ngaⁿá yā ngii yā ndís'tiī nduudu cuaacu yeⁿé Ndyuūs. Nadacadínuuⁿ nī táaca 'iiⁿyāⁿ s'eeⁿ díiⁿ yā ní n'gεetineé yā ní ch'iī yā. Maaⁿ ní candée nī cuidado chí díiⁿ nī tan'dúúca 'iiⁿyāⁿ n'gεete chí i'téenu yā Ndyuūs díiⁿ yā ti 'iiⁿyāⁿ s'eeⁿ ejemplo yeⁿé nī.

⁸ Jesucristo miiⁿ ní 'āā 'tiicá nūuⁿ tan'duucá yā 'iicu, 'tiicá ntúuⁿ yā maaⁿnguuvi. 'Āā 'tiica nuúⁿ yā cueⁿe daāⁿmaⁿ. ⁹ Cuin'diichí nī ndís'tiī. Nguéé 'caandiveéⁿ nī ndúúúú 'naⁿa chi n̄'dáán ndúúúú yeⁿē chi che'e yú. N'daacā ca chi staava yeⁿé nī canéé n'daacā chi cuuvi cuta'á nī fuerzas yeⁿē nducuéⁿē chi n'dai taavi chi Ndyuūs itée yā ndís'tiī. Staava yeⁿé 'iⁿ'yāⁿ nguéé diiⁿ aprovechar nduuti chi chiindiveéⁿ yā nduudu n̄'dáán ndúúúú yeⁿe chi che'e yú.

¹⁰ Deenu yú chi chiiduú s'eeⁿ chi díⁿ yā ntiiⁿnyuⁿ yeⁿe yaācū yeⁿé yā nguéé cuuvi che'é yā yuūtē yeⁿe nátaⁱ yeⁿe 'iiti chi ch'iⁿ'núⁿ yā cáāvā ofrenda yeⁿe yú ti ofrenda yeⁿe yú ní 'āā vi'í caā ti i'teenu yú Jesucristo. Ní Jesucristo miiⁿ ní ch'tiī yā chi lado yeⁿe ofrenda yeⁿe yú. ¹¹ Chiiduú ch'εete ca yeⁿe judíos chi Israel s'eeⁿ taachi ch'iⁿ'núⁿ yā 'iiti cáāvā ofrenda yeⁿe nuūⁿndī candée yā yuūúⁿ yeⁿé 'iiti chεeti cuarto chi nguuvi Deene naati cuerpo yeⁿé 'iiti miiⁿ ní ngiichí yā 'áámá lado yeⁿé yāāⁿ yeⁿé yā. ¹² Ní 'tiicá ntúuⁿ Jesucristo ch'tiī yā cuaaⁿ dáámí cheendi va'āi yeⁿe yāāⁿ Jerusalén ní 'íicú cuuvi deevé yā 'iⁿ'yāⁿ yeⁿe nuuⁿndi yeⁿé yā ndúúúú yuuúⁿ yeⁿe maáⁿ yā. ¹³ Maaⁿ ní caⁿ'a yú tan'dúúúú chi cueⁿe Jesús 'áámá lado yeⁿé yāāⁿ ní 'cueenu yú cuuvi tan'dúúúú chi ch'eenú yā chi ní cuuvi 'cuinaaⁿ yú tan'dúúúú chi 'cuinaaⁿ yā. ¹⁴ Caati nguéé véé 'áámá yāāⁿ chi 'áámá cūnee cáāvā s'uuúⁿ naati in'nuuⁿ yú 'áámá yāāⁿ ch'εete chi 'áámá cūnee chi véé tiempo chi cuchí. ¹⁵ Ní cáāvā chuū canee yú chi dich'εete yú Ndyuūs cucáāvā Jesucristo. Ní taachi dich'εete yú Ndyuūs chuū ní ofrenda chi canee chi ca'a yú Ndyuūs. Ní canéé chi ca'a yú gracias Ndyuūs cáāvā Jesucristo ndúúúú nduudu yeⁿé yú. ¹⁶ Nguéé cuuvi 'náāⁿ nī chi din'daacá nī ní nneé nī 'aamá nī taamá nī caati chuū ní ofrenda yeⁿé nī chi 'túúúú Ndyuūs neⁿe yā.

¹⁷ Cu'neeⁿveéⁿ nī nduudu yeⁿé 'iⁿ'yāⁿ chi ngaⁿ'a ntiiⁿnyuⁿ yeⁿé nī. Cu'téenu nī yeⁿé yā chi ngaⁿ'a yā caati 'iⁿ'yāⁿ s'eeⁿ díⁿ yā cuidado yeⁿé staava yeⁿé nī. 'Iⁿ'yāⁿ s'eeⁿ canéé chi nca'á yā cuenta nanáāⁿ Ndyuūs yeⁿé ntiiⁿnyuⁿ chi díⁿ yā. Diiⁿ núúⁿ yiiⁿnu nī chi ngaⁿ'a yā caati yeenú yā díⁿ yā ntiiⁿnyuⁿ yeⁿé yā. Ti nduuti chi nguéé díⁿ nī 'túúúú nguéé yeenú yā ní nguéé díⁿ nī aprovechar yeⁿé ntiiⁿnyuⁿ chi díⁿ yā cáāvā ndís'tiī.

¹⁸ Maaⁿ ní caaⁿ'maⁿngua'á nī cáāvā nús'uu ti nadacadiinúúⁿ 'nū n'daacā na staava yeⁿé 'nū ní neⁿé 'nū 'cuεetinée n'daacá 'nū yeⁿe nducuéⁿē dendu'ū. ¹⁹ 'Úú ngiicá ndís'tiī chi taachi ngaⁿ'angua'á nī, ngiicá nī Ndyuūs chi tée yā lugar 'nū chi niiⁿnuúⁿ nūuⁿ cuuvi nandaá ní cuneé ndúúúú ndís'tiī.

Di'viicú yā ndís'tiī ní dicho'ó yā, n'dai ndís'tiī

²⁰ Maaⁿ ní Ndyuūs ní yeⁿé vaadī 'diiⁿ, maaⁿ Ndyuūs miiⁿ nadin'duuchí yā Jesucristo yeⁿé yú yeⁿé nguaaⁿ tináⁿā chi Jesucristo miiⁿ Pastor chi ch'εete n'dai chi díⁿ yā cuidado s'uuúⁿ chi tan'dúúúú 'iiti cuūchí yeⁿé yā. Ní Jesucristo yeⁿé yú ndúúúú yuūúⁿ yeⁿé yā díⁿ yā chi 'áámá cūnee compromiso chi Ndyuūs díⁿ yā ndúúúú 'iⁿ'yāⁿ. ²¹ Neⁿé chi Ndyuūs yeⁿe vaadī 'diiⁿ tée yā ndís'tiī nducuéⁿē chi n'dai yeⁿé yā chi nguéé yeⁿé nī. Ní cuuvi n'daí nī ti ndís'tiī cuuvi díⁿ nī chiiⁿ chi neⁿé Ndyuūs chi díⁿ nī. Ní neⁿé chi Ndyuūs díⁿ yā cáāvā nducyaaca yú nducuéⁿē chi neⁿé yā díⁿ yā cáāvā Jesucristo. Caⁿ'a yú chi ch'εete ca canéé Cristo ní n'deévé ngii yā cuéⁿé daāⁿmaⁿ cueⁿe daāⁿmaⁿ. 'Tíicā. ²² Ndís'tiī hermanos yeⁿé ngiicá ndís'tiī chí cuheé nī ndúúúú nduudu chi ngi'cueéⁿ ti nguéé 'yaaⁿ idinguúⁿ na carta miiⁿ yeⁿé ndís'tiī. ²³ Yaa'ví ndís'tiī chi cadiiⁿúúⁿ nī chi Timoteo hermano yeⁿé yú 'āā ntéé canee sa vácūū. Ní ndúúúú chi niiⁿnuⁿ niiⁿnuⁿ ndaa sa nanáāⁿ 'úú tuu'mi 'úú ní candéé saⁿā taachi ndaá nanáāⁿ ndís'tiī ní n'diichí ndís'tiī.

²⁴ Maaⁿ ní caaⁿ'máⁿ nī 'iⁿ'yāⁿ chi ngaⁿ'a ntiiⁿnyuⁿ yeⁿé nī ndúúúú nducyaaca 'iⁿ'yāⁿ chi i'téenu yā Jesucristo: N'daí ndís'tiī, caaⁿ'máⁿ nī. 'Iⁿ'yāⁿ yeⁿe país Italia: N'daí ndís'tiī, ngaⁿ'a yā.

²⁵ Neⁿé chi Ndyuūs tée yā nducyaaca ndís'tiī nducuéⁿē vaadī n'dai yeⁿé yā. 'Tíicā cuuvi.

CARTA YEⁿE SANTIAGO

Santiago idingúuⁿ yā yeⁿe 'iiⁿ'yāⁿ chi s'nééⁿ 'muuⁿ s'nééⁿ miiⁿ

¹ 'Úú Santiago 'úú ni 'úú idiíⁿ ntiiⁿnyuⁿ yeⁿe Ndyuūs ní yeⁿe Señor Jesucristo. Idinguúⁿ carta 'cūū ní dicho'ó: Ndaí ndís'tiī ndúúcu 'iiⁿ'yāⁿ yeⁿe ndu'ū ndiichúúví tribus chi familias chi yeⁿe ndaata Israel chi s'nééⁿ 'muuⁿ chi s'nééⁿ miiⁿ ndii núúⁿmáⁿ íⁿ'yeēⁿdī.

Ndyuūs ca'á yā vaadī deenu 'iiⁿ'yāⁿ s'eeⁿ chi i'téenu yā 'yā

² Ndís'tiī hermanos yeⁿé, canéé chi yeenu nī taachi ndaā n'dee n'dái chi idi'vaachi yeⁿe nī. ³ Caati déenu nī chuū chi taachi ndaā n'dee n'dái chi idi'vaachi yeⁿe nī ní n'daacā idiíⁿ nī, ch'iⁿ'í nī chi i'téenu nī Jesucristo ní ch'iⁿ'i ntúuⁿ nī chi cuuvi cuchéé nī yeⁿe tanducuéⁿē ndúúcu paciencia. ⁴ Ní canéé chi candée nī cuidado chi cuchéé nī yeⁿe nducuéⁿē chi di'vaachi ndís'tiī ní cuuvi 'cuεetinéé n'daacá nī ní diiⁿ cá chí n'daaca nī. Ní 'āā véé nducuéⁿē necesidades yeⁿé nī. Ní Ndyuūs téé yā ndís'tiī cosas chi n'dai yeⁿé yā.

⁵ Ndúúti chi 'áámá ndís'tiī deenu nī chi nguéé deenu nī tuu'mi ní canéé chí caacá nī Ndyuūs chi itée yā vaadī deenu. Ndyuūs ca'a yā n'dee n'dái vaadī deenu yeⁿé yā nducyáácá 'iiⁿ'yāⁿ. Ní nguéé n'gaa'vá yā ndúúcu 'iiⁿ'yāⁿ yeⁿé chi n'deē vueltas caaca yā Ndyuūs. ⁶ Canéé chí caacá nī Ndyuūs ní cu'téenu nī Ndyuūs chi caⁿ'á yā téé yā ndís'tiī. Taachi nguéé cu'téenu nī chi Ndyuūs nguéé caⁿ'á yā ca'a yā chiiⁿ chi ngiicá nī tuu'mi ní ndís'tiī tan'dúúca nuūⁿnī'yáⁿā taachi olas yeⁿé indéé yaacū chi candée 'yúúné cuaaⁿ lácūū cuaaⁿ lácā, 'tíicā ndís'tiī. ⁷ 'Áámá 'iiⁿ'yāⁿ chi ngiica yā Ndyuūs ní nguéé cu'téenu yā chi Ndyuūs caⁿ'á yā téé yā de'ē vεε, tuu'mi ní 'iiⁿ'yāⁿ miiⁿ nguéé cūnee ngínú yā chi Ndyuūs caⁿ'á yā téé yā 'iiⁿ'yāⁿ de'ē vεε. ⁸ 'Iiⁿ'yāⁿ miiⁿ véé 'uūvi vaanicadínūuⁿ yeⁿé yā. Maaⁿ ní neⁿ'é yā diiⁿ yā 'áámá cosa, cuayiivi ní taama cosa. 'Iiⁿ'yāⁿ miiⁿ nguéé canéé yā ndúúcu 'áámá vaanicadínūuⁿ yeⁿe yā.

⁹ Ní hermano yeⁿé yú chi nguéé ch'εεε ca ní canéé chi yeenu yā taachi Ndyuūs nginneé yā 'iiⁿ'yāⁿ. ¹⁰ 'Iiⁿ'yāⁿ chi 'cuiicá yā canéé chi yeenu yā taachi Ndyuūs diíⁿ yā chi nguéé 'cuiicá yā. 'Iiⁿ'yāⁿ chi 'cuiica miiⁿ ní tan'dúúca naandā yeⁿe yaatā chi 'cuiinu, 'tiicá yā. ¹¹ Taachi can'dáā 'yáⁿā ní 'áámá 'iⁿ'nūuⁿ tuu'mi ní tí'í yaatā ní naandā yeⁿé chingééⁿ ní 'āā ntee véé naandā ti ch'iinu. 'Tiicá ntúuⁿ 'iiⁿ'yāⁿ chi 'cuiica ní 'cuiinú yā ndúúcu vaadī 'cuiica yeⁿé yā.

Canéé chí cuχεε yú yeⁿe nducuéⁿē

¹² De'ē chúúca yeenu 'iiⁿ'yāⁿ chi ichéé yā tanducuéⁿē taachi n'geenu yā ngii. Taachi chéé yā yeⁿé tanducuéⁿē tuu'mi ní Ndyuūs téé yā 'iiⁿ'yāⁿ chi canduuchi yā cueⁿe daāⁿmaⁿ. 'Tíicā Ndyuūs ngaⁿ'á yā chi caⁿ'á yā ca'a yā 'iiⁿ'yāⁿ vida cueⁿe daāⁿmaⁿ tan'dúúca chi 'aama corona yeⁿe 'iiⁿ'yāⁿ chi dinéⁿe yā Ndyuūs. ¹³ Taachi ndaā nanááⁿ ndís'tiī cosa chí diiⁿ chí di'vaachi ndís'tiī chi neⁿ'é nī diiⁿ nī chi nguεε n'daacā, nguéé canéé chí nadacadínūuⁿ nī chi Ndyuūs diíⁿ yā chuū caati mar 'áámá 'iiⁿ'yāⁿ cuuvi di'vaachi yā yeⁿe Ndyuūs chi Ndyuūs diíⁿ yā cosa chi nguεε n'daacā. Ndí nguéé ndúú cuuvi dinuuⁿndí Ndyuūs. Ndí nguéé ndúú Ndyuūs di'vaachi yā yeⁿe 'iiⁿ'yāⁿ chi diíⁿ yā cosa chi nguéé n'daacā. ¹⁴ Taachi 'iiⁿ'yāⁿ inadicadínūuⁿ yā chi maáⁿ yā neⁿ'é yā diiⁿ yā cosa chi nguεε n'daacā tuu'mi ní véé nuuⁿndi yeⁿe yā ní diíⁿ yā chi nguεε n'daacā. ¹⁵ Ní taachi diíⁿ yā chiiⁿ chi neⁿ'é yā diiⁿ yā chi nguéé n'daacā tuu'mi ní dinuuⁿndí yā. Ní taachi ch'εεε ca nuuⁿndi miiⁿ tuu'mi ní 'cuiinú ní diiⁿ chi 'cuūvi yā cueⁿe daāⁿmaⁿ.

¹⁶ Ndís'tiī hermanos yeⁿé chi neⁿ'e taaví. Nguéé ca'a nī lugar 'iiⁿ'yāⁿ chi cannche'éi yā ndís'tiī chi dinuuⁿndí nī. ¹⁷ Nducuéⁿē chi n'daacā ní δεεεε chi Ndyuūs itée yā s'uuúⁿ chiiⁿ ní ngíicá cuaaⁿ 'niiⁿnuⁿ. Chiiⁿ ní yeⁿe Ndyuūs. Ndyuūs din'dái yā tanducuéⁿē δεεεε yeⁿé nanguuvi. Ndyuūs nguéé n'daaⁿ yā tan'dúúca 'áámá 'daaⁿ'nūⁿ chí n'daaⁿ. ¹⁸ Ní Ndyuūs tee yā vida s'uuúⁿ cáávā chi i'teenu yú nduudu cuaacu yeⁿé yā. Ní diíⁿ yā tan'dúúca

chi maán yā neⁿe yā diiⁿ yā. Ní 'íicú s'uuúⁿ chi i'teenu yú, tan'dúucā 'áámá cosecha chi vmnááⁿ vmnaaⁿ yeⁿe nducuéⁿē chi din'dái yā 'tíicā s'uuúⁿ.

Yeⁿe vaadi cuaacu yeⁿé Ndyuūs

¹⁹ Maaⁿ ní ndís'tiī hermanos chi neⁿe taavi 'aama 'aamá nī canee chi 'cuεtinéé yaáⁿ ní chi 'caandiveéⁿ nī naati nguéeⁿ maaⁿ n'cheεté caaⁿ'máⁿ nī. Ní nguéeⁿ maaⁿ n'cheεte nūuⁿ nduuvi taáⁿ nī. ²⁰ 'Iiⁿ'yāⁿ chí induuvi taáⁿ yā nguéeⁿ n'daacā diíⁿ yā yeⁿe chi vaadi cuaacu yeⁿé Ndyuūs. ²¹ Ní cáávā nducuéⁿē chuū canee chí divíi nī yeⁿé tanducuéⁿē chi nguεe n'daacā chi nadacádíínuuⁿ nī. Ní nguéeⁿ diíⁿ nī cosa chi nguεe ndaacā. Ní 'caandiveéⁿ nī nduudu cuaacu chí i'téenu nī ní canee na staava yeⁿé nī. Ní ndiicuuⁿ nī. Ní véé poder yeⁿe nduudu cuaacú 'cūū chi cuuvi dinguáⁿ'ai alma yeⁿé nī.

²² Naati canéé chí diíⁿ nī chiiⁿ chi ngaⁿ'ā nduudu cuaacu miiⁿ. Nguéeⁿ dámaāⁿ chi 'caandiveéⁿ nī ní nguεe diíⁿ nī. Ní nguéeⁿ cannche'éi maáⁿ nī ndís'tiī. ²³ Nduuti chi 'áámá 'iiⁿ'yāⁿ n'giindiveéⁿ yā nduudu cuaacu miiⁿ ní nguéeⁿ diíⁿ yā chiiⁿ chi ngaⁿ'ā tuu'mi ní 'iiⁿ'yāⁿ miiⁿ tan'dúucā 'áámá 'iiⁿ'yāⁿ chi inaáⁿ yā maáⁿ yā na 'aama espejo, 'tiicá yā. ²⁴ Inaáⁿ yā maáⁿ yā tan'duucá yā 'tíicā. Ní cuayiivi nguéeⁿ nn'gaacu yā tan'duucá yā 'áará chí n'diichí yā maáⁿ yā na 'áámá espejo. ²⁵ Naati 'iiⁿ'yāⁿ chi nn'gaacú yā chiiⁿ chi n'giindiveéⁿ yā ní nadacádíínuuⁿ n'daacá yā yeⁿe ley chi nduudu cuaacu miiⁿ yeⁿé Ndyuūs, tuu'mi ní nduudu cuaacu miiⁿ cuuví nadinguáⁿ'āi 'iiⁿ'yāⁿ. Ní 'iiⁿ'yāⁿ miiⁿ canéé chí 'caandiveeⁿ cá yā nguuvi nguuvi. Ní nguéeⁿ dámaāⁿ n'giindiveéⁿ yā naati diíⁿ yā chiiⁿ chí ngaⁿ'ā, tuu'mi ní cuuvi yeenú yā ndúucū chí diíⁿ yā.

²⁶ Ní nduuti chí 'aama ndís'tiī ngaⁿ'á ní chí i'téenu nī Ndyuūs ní nguéeⁿ candéé nī cuidado yeⁿe chí ngaⁿ'á nī tuu'mi ní nginnche'ei maáⁿ nī ndís'tiī. Ní nguéeⁿ dichí'vε chí ngaⁿ'á nī chí i'téenu nī Ndyuūs. ²⁷ 'Iiⁿ'yāⁿ chí neené i'téenu yā ní didεεve staava yeⁿé yā ní nguéeⁿ véé nuuⁿndi yeⁿé yā nanááⁿ Ndyuūs chiida yú ní 'tíicā diíⁿ yā. Nginneé yā da'cáiyāa nguá'āa ndúucū n'daataá nguá'āa taachi n'geenu yā ngii. Ní 'iiⁿ'yāⁿ miiⁿ ní nguéeⁿ diíⁿ yā cosas yeⁿé iⁿ'yeeⁿdí 'cūū chí nguéeⁿ n'daacā.

2

'Cuaáⁿ nī nducyaaca 'iiⁿ'yāⁿ chí daama daamá nūuⁿ 'iiⁿ'yāⁿ

¹ Ndís'tiī hermanos yeⁿé chí maaⁿ ní i'téenu nī Señor Jesucristo yeⁿe yú chí dεεvé ngii yeⁿé yā, ndís'tiī canéé chí diíⁿ nī chí 'āā dáámá daamá nūuⁿ nducyaaca 'iiⁿ'yāⁿ nanááⁿ nī. ² N'diichí nī. Taachi ndaá 'áámá 'iiⁿ'yāⁿ nguaaⁿ ndís'tiī taachi nduuvidaamá nī ní 'iiⁿ'yāⁿ miiⁿ canúúⁿ nduu tá'a yā 'áámá chí ntá'āa yeⁿe 'dííⁿnguāaⁿ ní n'daacā catecai yā, ní 'tiicá ntūúⁿ ndaá táámá 'iiⁿ'yāⁿ chí ndaachíí yā ní ndiicūū catecai yā, ³ ní neⁿe cá nī 'iiⁿ'yāⁿ chí n'daacā catecai yā, ní ngaⁿ'á nī ngii nī 'iiⁿ'yāⁿ miiⁿ: N'diī cun'díí nī lugar chí n'daacā ca; ní ngaⁿ'á nī ngii nī saⁿ'ā chí ndaachíí: N'diī cuééndiinú nī cuaaⁿ la'tiī o 'cundií nī na yiive, ⁴ tuu'mi ní nguéeⁿ diíⁿ nī chí dáámá daamá nūuⁿ 'iiⁿ'yāⁿ nguaaⁿ ndís'tiī. Ní n'diichí nī 'iiⁿ'yāⁿ s'eeⁿ cheε chí n'daacā, ní nguéeⁿ n'daacā chiiⁿ chí nadacádíínuuⁿ nī.

⁵ Ndís'tiī hermanos yeⁿé chí neⁿé taavi, 'caandiveéⁿ nī chiiⁿ chí ngaⁿ'á. Ndyuūs ndεεvé yā 'iiⁿ'yāⁿ yeⁿé iⁿ'yeeⁿdí 'cūū chí pobre yā chí cuuvi 'cuiicá yā ndúucū chí i'téenu yā. Ní véé chí cuuvi yeⁿé yā naachi Ndyuūs caaⁿ'máⁿ ntiíⁿnyúⁿ yā ti chuū Ndyuūs ngaⁿ'á yā chí ca'á yā nducyaaca 'iiⁿ'yāⁿ chí neⁿé yā Ndyuūs. ⁶ Maaⁿ ní ndís'tiī maáⁿ nī s'néeⁿ nī 'iiⁿ'yāⁿ chí ndaachíí yā chí nguéeⁿ véé yeⁿe yā ná lugar chí nguéeⁿ n'daacā. ¿Áá nguéeⁿ 'iiⁿ'yāⁿ 'cuiica chí idi'vaachí yā ndís'tiī ní icandéε yā ndís'tiī nanááⁿ 'iiⁿ'ntyéⁿé? ⁷ ¿Áá nguéeⁿ 'iiⁿ'yāⁿ s'eeⁿ chí cunncaá ngaⁿ'a yā yeⁿé chí duuchi yeⁿe Cristo chí n'daacā? Ní Cristo yeⁿe yú yaa'ví yā ndís'tiī chí cuuvi yeⁿé yā ndís'tiī.

⁸ Nduuti chí ndís'tiī cuaacu níⁿnyúⁿ diíⁿ nī tanducuéⁿē chí ngaⁿ'a ley yeⁿé Ndyuūs chí 'tíicā canéé nguūⁿ na libro yeⁿé yā: Dinéⁿe di 'iiⁿ'yāⁿ niiⁿnuuⁿ vaacu di tan'dúucā chí neⁿe di maaⁿ di, tuu'mi ní n'daacā idiiⁿ di. ⁹ Ní ndúúti chí ndís'tiī nguéeⁿ dáámá daamá nūuⁿ dinéⁿe nī nducyaaca 'iiⁿ'yāⁿ tuu'mi ní dinuuⁿndi nī. Ní nguéeⁿ diíⁿ nī tan'dúucā chí ngaⁿ'ā ley yeⁿé Ndyuūs. Ley miiⁿ n'gini chí ndís'tiī ní véé nuuⁿndi yeⁿé nī. ¹⁰ Ní ndúúti

chi 'áamá 'iiⁿyāⁿ nguéeé diíⁿ yā chi ngaⁿā 'áamá 'líⁿ chuundi yeⁿe ley yeⁿé Ndyuūs tuu'mi ní caneeé yā tan'dúúcā chi nguéeé diíⁿ yā mar 'áamá chi ngaⁿā ley miiⁿ. ¹¹ Ndyuūs chi ngaⁿa yā 'tíicā: Nguéeé caⁿá di ndúúcū n'daataá o sáⁿā chi nguéeé yeⁿe di, Ndyuūs miiⁿ 'tiicá ntúūⁿ ngaⁿa yā: Nguéeé 'caaⁿnuⁿ di 'iiⁿyāⁿ. Maaⁿ ní nduuti chi 'aama 'iiⁿyāⁿ nguéeé caⁿá yā ndúúcū n'daataá o saⁿā chi nguéeé yeⁿe yā naati ch'iiⁿnúⁿ yā 'iiⁿyāⁿ 'āā nguéeé diíⁿ yā chi ngaⁿa ley yeⁿé Ndyuūs. ¹² Ní ndís'tií ní canee chi caaⁿmáⁿ nī n'daacā ní dīn'daacá nī tan'dúúcā chi ngaⁿa ley yeⁿé Ndyuūs ti ley miiⁿ n'diichi s'uuúⁿ. Ní ley miiⁿ diiⁿ chi cuuvi nanguáⁿāi s'uuúⁿ. ¹³ 'Iiⁿyāⁿ chi nguéeé neⁿe ya'ai 'iinú yā 'iiⁿyāⁿ 'tiicá ntúūⁿ Ndyuūs nguéeé neⁿe ya'ai 'iinú yā 'iiⁿyāⁿ s'eeⁿ taachi n'diichí yā nuuⁿndi yeⁿé yā. 'Iiⁿyāⁿ chi ya'ai 'iinú yā 'iiⁿyāⁿ ichée yā taachi Ndyuūs n'diichí yā nuuⁿndi yeⁿé nducyaaca 'iiⁿyāⁿ.

'Iiⁿyāⁿ chi i'téenu yā Ndyuūs diíⁿ yā ntiⁿnyuⁿ yeⁿé Ndyuūs

¹⁴ Ndís'tií hermanos yeⁿé, ¿de'ē dichí'vē 'áamá 'iiⁿyāⁿ chi ngaⁿá yā chi i'téenu yā Jesucristo ní nguéeé diíⁿ yā cosas chi n'daacā? ¿Áá cuuvi nanguaⁿai yā nduuti chi ngaⁿá yā chi i'téenu yā 'tíicā? ¹⁵ Maaⁿ ní nadacadínuuⁿ yú yeⁿe 'áamá hermano o hermana yeⁿe yú chi nguéeé véé catecai yā ní nguéeé véé chí che'e yā. ¹⁶ Nduuti chi n'diichi yú hermano o hermana miiⁿ ní ngaⁿa yú ngii yú 'yā: Dii cueⁿe di ndúúcū vaadī 'diiⁿ. Nan'guεεcundii di ní che'e di. Ní nguéeé ca'a yú hermano o hermana miiⁿ yeⁿe yú chí che'é yā o catecai caavā chi diíⁿ yā tapar, tuu'mi ní, ¿de'ē chí'vē chí ngaⁿa yú ngii yú hermano o hermana yeⁿe yú 'tíicā? ¹⁷ Ní 'tiicá ntúūⁿ yeⁿe chiiⁿ chi i'teenu yú Ndyuūs. Nduuti chi 'áamá 'iiⁿyāⁿ nguéeé dīn'daacá yā cáavā chi i'téenu yā Cristo tuu'mi ní chíⁿ chí i'téenu yā tan'duucā chí cosa chí n'díí.

¹⁸ Nduuti chi 'áamá yā ngaⁿá yā ngii yā s'uuúⁿ 'tíicā: Díí ngaⁿa di chí i'téenu di Ndyuūs naati 'úú idiíⁿ nducueⁿē chí n'daacā. 'Úú ngaⁿá ngii 'iiⁿyāⁿ miiⁿ: Dii ch'iⁿi di 'úú tan'dúúcā chí cuuvi cu'téenu yú Ndyuūs ní nguéeé n'daacā cuuvi diíⁿ yú. 'Úú ch'iⁿi dii chí i'teenu Ndyuūs caavā chí n'daacā idiíⁿ. ¹⁹ 'Āā i'téenu di chí véé 'áamá n'dyáⁿā Ndyuūs. N'daacā chí i'téenu di 'tíicā. 'Tiicá ntúūⁿ 'yááⁿguinūⁿ i'téenu sa ní n'duuvī sa ti 'va'ā sa. ²⁰ Díí 'iiⁿyāⁿ chí cheéⁿ chíⁿ chí nguéeé neⁿe di cu'téenu di. Nduuti chí 'áamá 'iiⁿyāⁿ i'téenu yā Ndyuūs ní nguéeé dīn'daacá yā tuu'mi ní diíⁿ yā tan'dúúcā chí nguéeé i'téenu yā. Ní vaadī i'teenu yeⁿé yā cūnee tan'dúúcā chí n'díí 'tíicā cuneeé. ²¹ Maaⁿ ní nadacadínuuⁿ nī yeⁿe tiempo chí 'āā chó'ōo yeⁿe chíida yú chí nguuvī Abraham chí yeⁿe ndaata yeⁿe yú. Ndyuūs inadach'εεcú yā nuuⁿndi yeⁿé yā cáavā ntiⁿnyuⁿ chí diíⁿ yā taachi ca'á yā daiyá yā Isaac lado yeⁿe ofrenda nanááⁿ na nátaī cáavā chí 'caaⁿnúⁿ yā daiyá yā naati nguéeé ch'iⁿi sa. ²² ¿'Áá nguéeé deenú nī chí Abraham i'téenu yā Ndyuūs ní ch'iⁿi yā 'iiⁿyāⁿ chí i'téenu yā caavā chiiⁿ chí diíⁿ yā? Ní Abraham neéne i'téenu yā Ndyuūs caavā chí diíⁿ yā. ²³ Ní chíi cuaacu chí canee nguūⁿ na libro yeⁿé Ndyuūs 'tíicā: Abraham s'téenu yā Ndyuūs ní Ndyuūs ní diíⁿ yā cuenta chí Abraham ní n'daaca yā. Ní Ndyuūs sta'á yā Abraham chí cuuvi yeⁿé yā cáavā chí i'téenu yā Ndyuūs. Ní 'iiⁿyāⁿ s'eeⁿ ngaⁿá yā chí Abraham miiⁿ ní amigo yeⁿé Ndyuūs.

²⁴ Maaⁿ ní cuuvi n'diichí nī chí Ndyuūs cuta'á yā 'iiⁿyāⁿ chí cuuvi yeⁿé yā nguéeé dámaāⁿ caava chí i'téenu yā 'yā naati 'tiicá ntúūⁿ caavā chí dīn'daacā yā. ²⁵ 'Tiicá ntúūⁿ táⁿā Rahab chí ndúúcu tá 'yaaⁿ saⁿā, Ndyuūs ní diíⁿ yā cuenta yeⁿe tá chí n'daacā tá. Ní Ndyuūs sta'á yā táⁿā chí cuuvi yeⁿé yā caava chí n'daacā diíⁿ tá. N'daata miiⁿ 'cuuⁿ tá saⁿā s'eeⁿ chí ndaā n'de'ei n'de'ei saⁿā chí Ndyuūs dichó'o yā. Ní táⁿā miiⁿ dicho'ō tá saⁿā s'eeⁿ táámá yúúni taachi véé peligro yeⁿē sa. ²⁶ Ní tan'dúúcā cuerpo yeⁿe yú taachi nguéeé caneeé espíritu yeⁿe yú ndúucū ní n'díí, 'tiicá ntúūⁿ taachi i'téenu yú Ndyuūs ní nguéeé n'daacā idiíⁿ yú, chiiⁿ chí i'téenu yú cuneeé tan'dúúcā chí n'díí.

3

Yeⁿe chíiya yú

¹ Ndís'tiī hermanos yeⁿé nguéé canéé chi cuuvi 'yaaⁿ maestros yeⁿe yaacū nguaaⁿ ndís'tiī. Deenú nī chi Ndyuūs diitu n'diichí yā nuuⁿndi yeⁿe maestros miiⁿ nguéé ti ndís'tiī. ² Nducyaacu yú idiiⁿ yú n'dee n'dái faltas. Ní nduuti chi 'áamá 'iiⁿyāⁿ nguéé caaⁿmáⁿ yā mar 'áamá falta tuuⁿmi ní 'iiⁿyāⁿ miiⁿ ní neené n'daacā. Ní cuuvi ngaⁿ'á ntiiⁿnyuⁿ yā yeⁿe nuuⁿmaⁿ cuerpo yeⁿe maáⁿ yā. ³ Cuin'diichí nī. Cu'nuūⁿ yú frenos naaⁿ 'yúúdūu ní cu'téenu tī yeⁿe yú. Ní nuuⁿmaⁿ cuerpo yeⁿe tī cuuvi diiⁿ tan'dúúcā chi neⁿe yú. ⁴ Maaⁿ ní nadacadíinuⁿ yú yeⁿe barco. 'Áará chí ch'εεε ní 'yúúné taaⁿ ngéenu ní 'iiⁿyāⁿ cuuvi diiⁿ yā manejar barco miiⁿ cáávā 'áamá yáⁿ'á 'líiⁿ yeⁿe barco miiⁿ chi canúúⁿ chεeti nuūⁿnī'yáⁿ'ā. Ní barco miiⁿ ngiicā naachi neⁿ'é yā. ⁵ 'Tiicá ntúūⁿ chiiya yú. 'Áará chí 'áamá chí 'líiⁿ chí yeⁿe cuerpo yeⁿe yú naati ngaⁿ'a yú yeⁿe n'dee n'dái cosas chí n'gεεε ndúúcū chiiya yú. Ní cuin'diichí nī ta 'líiⁿ chuundí yaⁿ'ā cuuvi caacyáⁿ'ā 'áamá icyáⁿ'ā ch'εεε. ⁶ Ní chiiya yú tan'dúúcā 'áamá nguuchi yaⁿ'ā 'tíicā chiiya yú. Ní tanducuéⁿ'ē tan'dúúcā 'áamá iⁿ'yeeⁿdi chí ndiituú ndúúcū nducuéⁿ'ē chí nguε n'daacā, 'tíicā cuerpo yeⁿe yú cáávā chiiya yú. Ní diiⁿ chí núúⁿmáⁿ cuerpo yeⁿe yú véé nuuⁿndi yeⁿe. Ní tan'dúúcā infierno chí ngiichi yaⁿ'ā 'tíicā diiⁿ chiiya yú. Ní yaⁿ'ā miiⁿ ní diiⁿ tan'dúúcā chí ngiichi nducuéⁿ'ē vida yeⁿe yú 'naaⁿ chí canee yú iⁿ'yeeⁿdí 'cūū. ⁷ Ca'áamá ca'áamá naaⁿ 'iiti chí véé iⁿ'yeeⁿdí 'cūū yeⁿe 'iiti 'yúúdūu, yeⁿe 'yaada, yeⁿe cúú, 'iiti chí snūūⁿ chεeti nuūⁿnī'yáⁿ'ā ní nducyaaca tī saⁿ'ā cuuvi diiⁿ sa amansar ní 'ā diiⁿ sa amansar 'iiti s'eeⁿ. ⁸ Naati mar 'áamá 'iiⁿyāⁿ nguéé cuuvi diiⁿ yā chí amansar chiiya maáⁿ yā. Ngaⁿ'a yú cosas chí nguéé n'daacā 'aara chí nguéé neⁿ'e yú. Ní ndúúcū chiiya yú ngaⁿ'a yú n'dee n'dái chí nguéé n'daacā yeⁿe 'iiⁿyāⁿ. Ní diiⁿ yú chí cuuvi 'cuuvi yā. ⁹ Ní ndúúcū maaⁿ chiiya yú dich'εεε yú Ndyuūs chiida yú ní ngaⁿ'a taaⁿ yú yeⁿe 'iiⁿyāⁿ chí Ndyuūs din'dái yā chí tan'dúúcā maáⁿ Ndyuūs 'tiicá din'dái yā 'iiⁿyāⁿ. ¹⁰ Yeⁿe maaⁿ cheendi ntúūⁿ yú ngaⁿ'a yú chí Ndyuūs n'daacā yā ní ngaⁿ'a taaⁿ yú ndúúcū 'iiⁿyāⁿ. Ndís'tiī hermanos yeⁿé, nguéé canéé chí cuuvi 'tíicā. ¹¹ ¿'Áá yeⁿe 'áamá nduutinaaⁿ nuūⁿnīⁿ can'dāá nuūⁿnī yaā ndúúcū nuūⁿnī yaādī? Nguéé cuuvi. ¹² Ndís'tiī hermanos yeⁿé, ¿'áá cúúví 'áamá yáⁿ'á yeⁿe n'guiidī yááⁿ nguuvi cuuvi aceitunas yeⁿe? Nguéé cuuvi. O 'aama yáⁿ'á 'líiⁿ yeⁿe uvas ¿'áá cuuvi n'guiidī yááⁿ nguuvi cuuvi yeⁿe? Nguéé cuuvi. 'Tiicá ntúūⁿ yeⁿe 'aama ndúútinaaⁿ nuūⁿnīⁿ nguéé cuuvi can'dāá nuūⁿnīⁿ diini ndúúcū nuūⁿnīⁿ yaadi.

Yeⁿe vaadī deenu chí cuaacu níⁿnyúⁿ chí vaadī deenu

¹³ Nduuti chí véé saⁿ'ā chí cadiinuⁿ sa ní chí deenu nguaaⁿ ndís'tiī canéé chí cuuⁿ'mīⁿ sa 'iiⁿyāⁿ chí cuaacu chí deenu sa ní ndiicuuⁿ sa cáávā nduudu n'dai yeⁿe sa ndúúcū ntiiⁿnyuⁿ n'daacā chí diiⁿ sa. ¹⁴ Naati nduuti chí véé vaadī nguēē chí ch'εεε ndúúcū vaadī 'caa'va na staava yeⁿe nī ní ndís'tiī ní nadacadíinuⁿ nī na staava yeⁿe nī chí caⁿ'á nī diiⁿ nī nducuéⁿ'ē caavā maáⁿ nī diiⁿ nī aprovechar, tuuⁿmi ní nguéé cuuvi nadacadíinuⁿ nī chí n'gεεε nī. Ndíi nguéé cuuvi caaⁿ'máⁿ nī nduudu yaadi chí contra yeⁿe nduudu cuaacu. ¹⁵ Ní vaadī deenú 'cūū yeⁿe nī nguéé vaadī deenu chí yeⁿe Ndyuūs naati vaadī deenú 'cūū ní yeⁿe iⁿ'yeeⁿdí 'cūū ní yeⁿe chí nadacadíinuⁿ yā ní yeⁿe yááⁿ'n'guiinuⁿ. ¹⁶ Naachi 'iiⁿyāⁿ chí dínngueé yā ní diiⁿ yā nducuéⁿ'ē caava maáⁿ yā neⁿ'é yā diiⁿ yā aprovechar, tuuⁿmi ní miiⁿ canéé 'iiⁿyāⁿ chí nguéé véé orden yeⁿe yā. Ní diiⁿ yā tanducuéⁿ'ē dendu'ū chí nguéé n'daacā. ¹⁷ Naati 'iiⁿyāⁿ chí véé vaadī deenu yeⁿe yā chí yeⁿe Ndyuūs, tuuⁿmi ní vmnááⁿ vmnaaⁿ canéé chí ch'εetinéé n'daaca yā ndúúcū vida yeⁿe yā chí δεεε. Cuayivi ní diiⁿ yā chí véé vaadī 'diiⁿ. Ní ndiicúuⁿ yā, ní amigo yā. Ní ya'ai 'iinú yā ndúúcū 'iiⁿyāⁿ ní dámaāⁿ diiⁿ yā tanducuéⁿ'ē chí n'daacā. 'Áā daamá nūuⁿ 'cuaaⁿ yā nducyaaca 'iiⁿyāⁿ. Ní nguéé nadacadíinuⁿ yā yeⁿe chí nguéé ndaacā, ní nguéé diiⁿ yā dendu'ū chí nguéé n'daacā. ¹⁸ Ní 'iiⁿyāⁿ chí diiⁿ yā chí véé vaadī 'diiⁿ ní diiⁿ yā tan'dúúcā chí cuuⁿ'nú yā ndaata yeⁿe nducuéⁿ'ē chí cuaacu. 'Tíicā diiⁿ yā. Ní n'gui'i yeⁿe nducueⁿ'ē chí cuaacu ní vaadī cuaacu.

4

Yeⁿe ndís'tiī amigos yeⁿe 'iiⁿ'yāⁿ chi nguéé i'téenu yā Jesucristo

¹ ¿Tiī ngiica cosas chi caandaá chi 'tíica nguⁿ'ú nī nguaaⁿ maáⁿ nī? Ngiiicā yeⁿe ná vaanicadínūⁿ yeⁿe maáⁿ nī ti neⁿe nī diiⁿ nī cosas chi nguéé n'daacā. ² Ndís'tiī neⁿ'é nī cosas ní nguéé véé yeⁿe nī. Ní cáavā chuū neⁿ'é nī 'caaⁿ'núⁿ nī 'iiⁿ'yāⁿ. Neⁿ'é nī dendu'ū chi inaáⁿ nī ní nguéé cuuvi cuta'á nī. Ní cáavā chuū nguⁿ'ú nī ní diiⁿ nī caandaá. Ní nguéé ndaaca nī chiiⁿ chi neⁿ'é nī ti nguéé ngiicá nī Ndyuūs de'ē chi neⁿe nī. ³ Ní taachi ndís'tiī ngiicá nī Ndyuūs de'ē chi neⁿe nī, Ndyuūs nguéé téé yā chiiⁿ chi neⁿe nī ti ngiicá nī dámaāⁿ caavā maáⁿ nī caati cuuvi yeenú nī. Ní nguéé n'daacā chi ngiica nī 'tíicā. ⁴ Ndís'tiī 'iiⁿ'yāⁿ chi nguéé 'áamá cunee nī ndúúcu chi i'téenu nī, ¿'áá nguéé deenu ndís'tiī chi taachi caⁿ'á nī ndúúcu 'iiⁿ'yāⁿ chi nguéé i'téenu yā Jesucristo ní diiⁿ nī dendu'ū chi yeⁿe iⁿ'yeeⁿdí 'cūū tuu'mi ní caneé nī enemigos yeⁿ'é Ndyuūs? 'Tiicá nī. ⁵ ¿'Áá nadacadínūⁿ ndís'tiī chi diiⁿ nī chi nguéé dichí'vē nduudu yeⁿe libro yeⁿ'é Ndyuūs naachi canéé nguūⁿ 'tíicā?: Ndyuūs s'neeⁿ yā Espíritu N'dai yeⁿ'é yā chæti staava yeⁿe yú. Ní Espíritu miiⁿ ní neⁿe ca chi s'uuúⁿ canee yú dámaāⁿ yeⁿe Ndyuūs s'uuúⁿ. ⁶ Naati Ndyuūs nginnée yā s'uuúⁿ ní itée yā s'uuúⁿ vaadi n'dai yeⁿ'é yā s'uuúⁿ. Canéé nguūⁿ na libro yeⁿ'é Ndyuūs 'tíicā: Ndyuūs nguéé caⁿ'á yā lado yeⁿe 'iiⁿ'yāⁿ chi idin'gæte maáⁿ yā naati ca'a yā vaadi n'dai yeⁿ'é yā 'iiⁿ'yāⁿ ndiicúⁿ. ⁷ 'Tíicā canee chi s'neéⁿ nī vida yeⁿe maáⁿ nī na ta'á Ndyuūs. Nguéé ca'á nī lugar yááⁿ'n'guiinūⁿ chi ngaⁿ'a ntiin'nyuⁿ sa yeⁿe ndís'tiī ní yááⁿ'n'guiinūⁿ ní cuævii sá yeⁿ'ē nanááⁿ ndís'tiī. ⁸ Ndaá nī nanááⁿ Ndyuūs ní Ndyuūs ní chí nndaa ntúūⁿ yā nanááⁿ ndís'tiī. Ndís'tiī 'iiⁿ'yāⁿ nuuⁿndí nadidævé nī vida yeⁿ'é nī. Ndís'tiī chi véé 'uūvī vaanicadínūⁿ yeⁿ'é nī, nadidævé nī staava yeⁿ'é nī. ⁹ Ndís'tiī 'iiⁿ'yāⁿ nuuⁿndí di'vaachi maáⁿ nī ní cuæcú nī ní ya'āi 'iinú nī yeⁿ'ē chi diiⁿ nī. Nguéé canee chi n'gíiⁿ'nyuⁿ nī naati canee chi cuæcú nī. Nguéé canéé chi yeenú nī naati canee chi di'vaachí maaⁿ nī. ¹⁰ Ní 'cuætinéé ndiicuuⁿ nī nanááⁿ Señor yeⁿe yú ní Señor yeⁿ'ē yú ní diiⁿ yā chi n'gæte nī.

Yeⁿ'ē chi n'diichi yú nuūⁿndī yeⁿ'e hermanos yeⁿ'e yú

¹¹ Ndís'tiī hermanos yeⁿ'é, nguéé caaⁿ'maⁿ cúnncaa nī yeⁿ'ē 'aama nī taama nī hermanos yeⁿ'e yú. 'Áā du'ú ndís'tiī chí ngaⁿ'a contra 'áamá hermano yeⁿ'e yú o n'diichi nī nuuⁿndi yeⁿ'e hermano yeⁿ'e yú, ndís'tiī ngaⁿ'a ntúūⁿ cúnncaa nī contra ley yeⁿ'é Ndyuūs ní n'diichi nī yeⁿ'e ley miiⁿ. Ní naachi n'diichí nī yeⁿ'e ley miiⁿ tuu'mi ní diiⁿ nī ntiin'nyuⁿ yeⁿ'e juez ní nguéé diiⁿ nī chi ngaⁿ'a ley miiⁿ. ¹² Dámaāⁿ vee 'áamá n'dyáⁿ'ā chi Ndyuūs chi ca'á yā ley miiⁿ ní 'tiicá ntúūⁿ Ndyuūs ní juez. Maáⁿ yā cuuvi nadinguáⁿ'ai yā 'iiⁿ'yāⁿ o cuuvi di'cuiinú yā 'iiⁿ'yāⁿ. Maaⁿ ní ndís'tiī, ¿du'u ndís'tiī chi n'diichí nī de'ē idiiⁿ táamá 'iiⁿ'yāⁿ?

Nguéé deenu yú de'ε chi cuuvi ndúúcu yú ndii cavyaaⁿ

¹³ Maaⁿ ní 'caandiveéⁿ nī nduudu chi ngaⁿ'á ngii ndís'tiī chi ngaⁿ'a nī 'tíicā. Maaⁿnguuvii o cavyaaⁿ caⁿ'á táamá yááⁿ nī caneé miiⁿ 'áamá nduūyū, ní diiⁿ negocio ní diiⁿ ganar. ¹⁴ Ndís'tiī ní nguéé de'ε vee déenu nī chi de'ε cuuvi cavyaaⁿ. ¿De'ε vida yeⁿ'e ndís'tiī? Vida yeⁿ'é nī ní tan'dúúcā 'áamá meēⁿ chi ngo'oó 'áamá nch'εēté ní n'giinu. ¹⁵ Ndís'tiī ní caneé chi caaⁿ'máⁿ nī 'tíicā. Nduuti chi Ndyuūs neⁿ'é yā chi cunduūchí tuu'mi ní diiⁿ chuū o diiⁿ cháā. ¹⁶ Naati nguéé diiⁿ nī 'tíicā. Ndís'tiī ngaⁿ'á nī yeⁿ'e cosas n'gæte chi diiⁿ nī. Ní yeenú nī yeⁿ'e nducuéⁿ'e 'cūū chi ngaⁿ'a nī chí n'gæte. Ní nguéé n'daacā chi diiⁿ nī 'tíicā. ¹⁷ 'Iiⁿ'yāⁿ chi déenu yā yeⁿ'ē chi cuuvi diiⁿ yā chi n'daacā ní nguéé idiiⁿ yā chuū tuu'mi ní dinuuⁿndí yā.

5

Yaa'ví 'iiⁿ'yāⁿ chi 'cuiica chi candéé yā cuidado

¹ 'Caandiveeⁿ ndís'tiī 'iiⁿ'yāⁿ chi 'cuiica. Cuæcú nī ní 'cuaī nī caati 'cuenú nī cuuvi dendu'ū chi díftūu chi cuchii nanááⁿ yeⁿ'e ndís'tiī. ² Vaadi 'cuiica yeⁿ'é nī ní nchōō ní

catecai n'dai nī n'dáá ní che'é tī. ³ Ní 'díí'nguāān ndúúcu 'díí'nguεε yeⁿ'é nī ní che'e yáⁿ'āa. Ní chiiⁿ chi nche'e yáⁿ'āa miiⁿ ní canéé tan'dúúca 'áámá lado yeⁿ'é testigo chi caaⁿ'maⁿ contra yeⁿ'é nī. Ní chiiⁿ chi diiⁿ tan'dúúca chi cacyáⁿ'ā cuerpo yeⁿ'é nī nduucū yaⁿ'ā. Ní vaadi 'cuiica yeⁿ'é nī ní nguáin'dai nī ní maaⁿ ní tiempo chí cuuvi 'cuiinu íⁿ'yeeⁿdi. ⁴ N'diichí nī. 'Āā cuéé nadíⁿ've nī 'iiⁿ'yāⁿ chi diíⁿ yā ntiiⁿ'nyuⁿ ní sta'á yā cosecha yeⁿ'é nī. Ní chíⁿ'vē miiⁿ canéé tan'dúúca 'áámá testigo contra yeⁿ'e ndís'tiī. 'Iiⁿ'yāⁿ s'eeⁿ ní 'caí yā contra yeⁿ'e ndís'tiī ní Señor chi ngaⁿ'a ntiiⁿ'nyúⁿ yā yeⁿ'é nducyáácá 'iiⁿ'yāⁿ 'āā n'giindiveéⁿ yā chiiⁿ chi 'caí yā. ⁵ Ndís'tiī 'iiⁿ'yāⁿ 'cuiica, maáⁿ nī ch'εetineé nī ndúúcu tanducuéⁿ'ē chi neⁿ'é nī ní yeenú nī. Ní dichεeté nī cáávā nguuvi chi 'cuuvi nī tan'dúúca chi diíⁿ nī ndúúcu 'áámá cuuchí chi cuuvi 'viiché tī nícu ndaa 'áámá nguuvi chi 'caaⁿ'núⁿ nī 'iiti miiⁿ. ⁶ Ní ndís'tiī 'āā diíⁿ nī condenar saⁿ'ā chi n'dai ní 'iiⁿ'yāⁿ s'eeⁿ n'giiⁿ'núⁿ yā saⁿ'ā. Ní nguéé diiⁿ sa mar 'áámá chi nadanguáⁿ'ai sa maaⁿ sa.

Yeⁿ'e 'viich'εetíínūuⁿ yeⁿ'e yú ní yeⁿ'e chi ngaⁿ'angua'a yú

⁷ Ní cáávā nducuéⁿ'ē ngaⁿ'á ndís'tiī hermanos yeⁿ'é canéé chí diíⁿ nī nducuéⁿ'ē ndúúcu vaadi 'diiⁿ nanááⁿ nī ní nanááⁿ Señor yeⁿ'é yú ndii tiempo chi ndaa yā taama vmnéⁿ'ēe. Cuin'diichí nī. 'Iiⁿ'yāⁿ chi diíⁿ yā ntiiⁿ'nyuⁿ yeⁿ'e campo canee chi cūnee ngíínú yā chi ndaācá n'daacā cosecha yeⁿ'e yā. Ní cūnee ngíínú n'dai yā chi cueeⁿ cuuvi vmnááⁿ vmnaaⁿ. Ní taachi cho'ōo chi cueeⁿ cúuvi cuayiivi tuu'mi ní cuta'á yā cosecha yeⁿ'e yā. ⁸ 'Tiicá ntúūⁿ ndís'tiī véé paciencia yeⁿ'é nī ní canee diitú nī ndúúcu chi i'téenu nī na staava yeⁿ'é nī caati tiempo chi ndaa Señor yeⁿ'e yú 'āā snee niiⁿ'nuúⁿ. ⁹ Ní ndís'tiī hermanos yeⁿ'é nguéé caaca nuuⁿ'ndi nī 'aama nī contra taama nī ní nguéé cuuvi n'diichi Ndyuūs nuuⁿ'ndi 'cūū chi yeⁿ'e nī. Ndyuūs chi juez ní niiⁿ'nuúⁿ nūuⁿ ndaa yā. ¹⁰ Maaⁿ ní hermanos yeⁿ'é nadacádíínūuⁿ nī yeⁿ'e tiempo chi 'āā chó'ōo tan'dúúca chi diiⁿ profetas chi candεε yā nduudu yeⁿ'é Ndyuūs ní n'dee n'dái ch'eenú yā chiī. Ní véé paciencia yeⁿ'é yā. Tan'dúúca chi diíⁿ yā 'tiicá ntúūⁿ canee chí diíⁿ nī. ¹¹ Deenu yú chí yeenú profetas s'eeⁿ taachi ch'eenú yā chiī. Ndís'tiī ní ch'iindiveéⁿ nī yeⁿ'e saⁿ'ā Job ní tan'dúúca chí véé ca paciencia yeⁿ'é sa taachi ch'eenú sa chiī. 'Āā n'diichí nī ntúūⁿ tan'dúúca Señor yeⁿ'e yú diíⁿ yā cáávā saⁿ'ā Job miiⁿ taachi ch'iinu ch'eenú sa chiī. Maaⁿ ní Señor yeⁿ'e yú ní néené neⁿ'é yā s'uuúⁿ ní néené ya'ai yā s'uuúⁿ.

¹² Ní yeⁿ'e tanducuéⁿ'ē hermanos yeⁿ'é, nguéé caaⁿ'maⁿ nī de'ē chí neⁿ'e diíⁿ nī ndúúcu nduudu “por Dios” chí caⁿ'á nī diíⁿ nī 'tíicā o nguéé caⁿ'á nī diiⁿ nī 'tíicā. Ní nguéé caaⁿ'máⁿ nī “caavā nanguuvi”, ndíí nguéé ndúú cáávā “iⁿ'yeeⁿdí 'cūū”, ndíí nguéé ndúú caavā táámá naaⁿ. Dámaāⁿ caaⁿ'máⁿ nī, “tíicā idiíⁿ” o “nguéé 'tíicā idiíⁿ” caati Ndyuūs nguéé cuuvi diíⁿ yā condenar ndís'tiī.

¹³ Ndúútī chí 'áámá cheε ndís'tiī chí n'geenú nī ngii, canéé chí caaⁿ'maⁿ'ngua'á nī Ndyuūs. Nduuti chí canee 'áámá 'iiⁿ'yāⁿ chí diyeenú, cánéé chí caatá yā chí Ndyuūs ní ch'εeté yā. ¹⁴ Nduuti chí 'áámá cheε ndís'tiī ní ngííta nī canéé chí yaa'ví nī 'iiⁿ'ntyéⁿ'ē yeⁿ'e yaacū chí cuchí yā ní 'cuεendáa yā aceite na cuerpo yeⁿ'é 'iiⁿ'yāⁿ miiⁿ chí ngííta yā ní caaⁿ'maⁿ'ngua'á yā nanááⁿ Señor Jesucristo yeⁿ'e yú cáávā 'iiⁿ'yāⁿ miiⁿ chí ngííta yā. ¹⁵ Ní taachi ngaⁿ'angua'á nī, i'téenu nī chí Jesucristo cuuvi diíⁿ yā chí nduūvā yeⁿ'e 'iiⁿ'yāⁿ chí ngiitā, ní Señor Jesucristo miiⁿ ní nadicuéⁿ yā 'iiⁿ'yāⁿ chí ngiitā ní nduūvā yeⁿ'é yā. Ní nduuti chí véé nuuⁿ'ndi yeⁿ'é yā Señor Jesucristo nadach'εécú yā nuuⁿ'ndi yeⁿ'e yā. ¹⁶ Cáávā chuū ní caaⁿ'máⁿ nī nuuⁿ'ndi chí diíⁿ nī contra hermanos yeⁿ'é nī ní cuuvi nī hermanos. Ní caaⁿ'maⁿ'ngua'á nī 'áámá nī táámá nī ní cuuvi nduūvā yeⁿ'é nī. 'Iiⁿ'yāⁿ chí n'dai taavi taachi caaⁿ'maⁿ'ngua'á yā véé poder yeⁿ'e Ndyuūs na staava yeⁿ'é yā taachi caaⁿ'maⁿ'ngua'á yā. ¹⁷ Deenu yú chí saⁿ'ā Elías chí profeta ní 'áámá saⁿ'ā tan'dúúca s'uuúⁿ 'tíicā sa. Taachi caⁿ'āngua'a sa chí chiica sa Ndyuūs chí diíⁿ yā chí nguéé cueeⁿ cuūvī tuu'mi ní nguéé cheeⁿ cuūvī vmnaaⁿ yáⁿ'āa 'iinu nduūyū canéé maⁿ'ā. ¹⁸ Ní cuayiivi miiⁿ ní caⁿ'āngua'a ntúūⁿ sa táámá vmnéⁿ'ēe chí cueeⁿ cuūvī ní cheeⁿ cuūvī vmnaaⁿ yáⁿ'āa ní chí taavi cosecha yeⁿ'ē.

¹⁹ Maaⁿ ní ndís'tiī hermanos ye^{n'}é, nduuti chi 'áamá ndís'tiī ngíí divíi nī ye^{n'}ē nduudu cuaacu ní táámá yā idiíⁿ yā chi 'ii^{n'}yāⁿ miiⁿ nanguεεcunée yā ní i'téenu yā nduudu cuaacu,
²⁰ tuumi ní canée chi cadíínuuⁿ nī chuū. 'Áámá 'ii^{n'}yāⁿ chi dííⁿ yā chi táámá 'ii^{n'}yāⁿ chi dinuuⁿndí yā nacuεεcúndii yā ní cuvíi yā ye^{n'}ē nuuⁿndi ye^{n'}é yā, tuu'mi ní 'ii^{n'}yāⁿ vmnaaⁿ nadanguáⁿai yā alma chi n'diī ye^{n'}ē taamá yā. Ní diiⁿ chi Ndyuūs nadach'εεcú yā n'dee n'dái nuuⁿndi ye^{n'}é yā. 'Tíicā cuuvi.

CARTA VMNÁÁⁿ VMNAAⁿ YEⁿE SAN PEDRO

Pedro idinguúⁿ yā carta 'cūū yeⁿē hermanos chi i'téenu yā Jesucristo hermanos chi s'nééⁿ 'muuⁿ chi s'nééⁿ miiⁿ

¹ 'Úú Pedro 'úú ní 'úú 'áámá apóstol yeⁿe Jesucristo. Ní Cristo dichó'o yā 'úú chi 'úú candéé nduudu cuaacu yeⁿe Ndyuūs. 'Úú idinguúⁿ carta 'cūū yeⁿe 'iiⁿyāⁿ chi i'téenu yā Señor Jesucristo ní nguéé chiī ch'εetinée yā na yāāⁿ yeⁿe yā tí cheⁿe 'nééⁿ 'múúⁿ cheⁿe 'nééⁿ miiⁿ yā ndii yáⁿāa yeⁿe Ponto, yeⁿe Galacia, yeⁿe Capadocia, yeⁿe Asia, ndúúⁿcū Bitinia. ² Ní idinguúⁿ yeⁿe ndís'tiī, 'iiⁿyāⁿ chi Ndyuūs ndεεve yā tan'dúúⁿcā chi Ndyuūs deenú yā chi caⁿ'a yā diiⁿ yā ndíi vmnááⁿ vmnaaⁿ. Ní Espíritu N'dai yeⁿe Ndyuūs ní nadidεεvé yā ndís'tiī cáávā chi n'giindiveéⁿ nī yeⁿe yā ní cáávā yuuúⁿ yeⁿe Señor Jesucristo chi nadidεεvé yā ndís'tiī. Neⁿ'é chi Ndyuūs tée yā ndís'tiī n'dee n'dái vaadī n'dai yeⁿ'é yā ní vaadī 'diīⁿ cuuvi ch'εete nguuaⁿ ndís'tiī.

³ Dich'εete ca yú Ndyuūs chi chiida Señor Jesucristo caati nééne ya'ai 'iinú yā s'uuúⁿ chi diíⁿ yā chi ch'iindiyāāⁿ ngai yú. Chuū diíⁿ yā caati nadacuéeⁿ yā Jesucristo yeⁿē nguuaⁿ tináⁿā. Maaⁿ ní cucáávā Ndyuūs tee yā s'uuúⁿ 'áámá vida ngai yeⁿe yú ní véé esperanza yeⁿe yú. ⁴ Ní cūnee ngiinu yú yeⁿe tanducuéⁿē vaadī n'dai yeⁿ'é Ndyuūs chi Ndyuūs ngaⁿ'á yā chi tée yā s'uuúⁿ chi cuuvi yeⁿe yú. Ní Ndyuūs nanguáin'dai yā cáávā s'uuúⁿ chiīⁿ chi cuuvi yeⁿe yú na va'ai chεeti nguuvi naachi nguéé cuuvi chōō. Ní nguéé cuuví 'cuεε, ndíi nguéé cúúví chó'ōo yeⁿ'ē. ⁵ Ní chuū chi Ndyuūs nguáin'dai yā ní cáávā ndís'tiī ti ndís'tiī i'téenu nī Jesucristo. Ní Ndyuūs diíⁿ yā cuidado ndís'tiī ndúúⁿcū poder yeⁿ'é yā 'naaⁿ chi cūnee ngiinu nī chi nadanguáⁿ'ai yā ndís'tiī chi cuuvi déenu nī yeⁿe chuū tiempo chi cuchī.

⁶ Ní canee chi yeenú nī yeⁿe chuū 'aara chi dindaachí nī duu'vi tiempo nūⁿ 'naaⁿ chi n'geenú nī ngiī n'dee n'dái cosas chí ngií. ⁷ Cáávā chi i'téenu nī Jesucristo vaadī i'téenu yeⁿ'é nī ní tan'dúúⁿcā 'díiⁿnguāⁿ, 'tíicā. Ní 'iiⁿyāⁿ canéé chi n'diichineeⁿ 'díiⁿnguāⁿ ndúúⁿcū yaⁿ'ā caati cuuvi deenú yā chi dámaāⁿ 'díiⁿnguāⁿ. Ní 'tiicá ntúūⁿ vaadī i'téenu yeⁿ'é nī 'iiⁿyāⁿ canéé chí n'diichineeⁿ yā. Ní vaadī i'téenu yeⁿ'é nī nduuti chi ichéé yeⁿe tanducuéⁿē taachi 'iiⁿyāⁿ n'diichineeⁿ yā yeⁿ'ē, tuu'mi ní cuaacu chi i'téenu nī ní 'áámá cūnee vaadī i'téenu yeⁿ'é nī nguéé ti 'díiⁿnguāⁿ chí n'giinu. Cuayiivi taachi ndaá Jesucristo tuu'mi ní dich'εeté yā ndís'tiī ní diíⁿ yā honrar ndís'tiī ní diíⁿ yā chi n'dεεvé ngiī ndís'tiī cáávā chi n'daacā ca i'téenu nī Jesucristo.

⁸ 'Áará chi nguéé n'diichí yā Jesucristo dineⁿ'é nī 'iiⁿyāⁿ. Ní i'téenu nī 'iiⁿyāⁿ 'áará chi nguéé inaán nī 'iiⁿyāⁿ. Maaⁿ ní neené yeenú nī ndúúⁿcū vaadī yeenu chi ch'εete taavi ca. Ní nguéé véé nduudu yeⁿ'é nī chi cuuvi caaⁿ'máⁿ nī yeⁿ'ē. ⁹ Ní neⁿ'é nī tunéeⁿ nī nguuvi chi Ndyuūs nadanguáⁿ'ai yā almas yeⁿe nī. Ní cáávā chuū chi i'téenu ca nī Ndyuūs.

¹⁰ Tiempo chi 'āā chó'ōo 'iiⁿyāⁿ profetas chi candéé yā nduudu yeⁿ'é Ndyuūs neené n'dai n'nuuⁿ yā yeⁿe chi Ndyuūs nadanguáⁿ'ai yā 'iiⁿyāⁿ. Ní itíinguuneeⁿ yā yeⁿe chuū. Profetas ní 'iiⁿyāⁿ chi ngaⁿ'á yā yeⁿe chi Ndyuūs caⁿ'á yā chi tée yā ndís'tiī yeⁿe chi n'dai taavi ca yeⁿ'é yā. ¹¹ Ní profetas ní neⁿ'é yā deenu yā yeⁿe tiempo 'cūū ní táácā cuuvi chó'ōo yeⁿe tiempo 'cūū taachi Cristo 'cúenú yā cuuvi ní cuchεε yā. Ní cuayiivi cuchī chi dεεvé ngiī yeⁿ'é Cristo caati Espíritu yeⁿe Cristo chi canee ndúúⁿcū profetas 'āā ch'iⁿ'í yā profetas yeⁿe chuū. ¹² Naati Ndyuūs ch'iⁿ'í yā profetas chi tiempo yeⁿe Cristo yeⁿe chi ngaⁿ'a yā nguéé cuuvi n'diichí profetas naati ndís'tiī ní 'āā n'diichí nī. Profetas ngaⁿ'á yā nduudu cuaacu yeⁿe chi cuchī naati ndís'tiī 'āā n'giindiveéⁿ nī chi 'āā chó'ōo chíⁿ chí caⁿ'a yā. Ní cáávā 'iiⁿyāⁿ chi ngaⁿ'á yā ngiī yā ndís'tiī nduudu cuaacu chi Jesús nadanguáⁿ'ai yā 'iiⁿyāⁿ ndúúⁿcū poder yeⁿ'ē Espíritu N'dai yeⁿ'é Ndyuūs. Ní Ndyuūs dichó'o yā Espíritu N'dai yeⁿ'é yā yeⁿ'ē va'ai chεeti nguuvi nanááⁿ s'uuúⁿ. Ní nducuéⁿē chuū ní ángeles maáⁿ yā neⁿ'e yā snaaⁿ yā dendu'ū.

Ndyuūs yaa'ví yā 'ii'nyā chi cuuvi ye^{n'}é yā ní n'daacā ca cuuví yā

¹³ Maaⁿ ní cáávā nducué^{n'}ē chuū nadacadínuuⁿ nī n'daacā ye^{n'}e chi ca^{n'}á nī diiⁿ nī ní 'cuētinéé n'daacá nī. Ní cunee ngiinú nī dámaāⁿ ye^{n'}e nducué^{n'}ē chi n'dai taavi chi Señor Jesucristo ca^{n'}á yā téé yā ndís'tiī taachi ndaa yā taama vmné^{n'}ēe. ¹⁴ Ndís'tiī ní 'caandiveéⁿ nī nduudu ye^{n'}é Ndyuūs ti daiya Ndyuūs ndís'tiī. Ní nguéé diiⁿ nī tan'dúúcā chi diiⁿ nī nducué^{n'}ē chi ne^{n'}e maáⁿ nī taachi 'āā cuéé n'diichí nī Ndyuūs. ¹⁵ Maaⁿ ní 'cuētinéé n'daacā nī chi nguéé véé nuuⁿndi ye^{n'}é nī caati Ndyuūs chi yaa'ví yā ndís'tiī chi cuuvi ye^{n'}é yā ndís'tiī ní dεεve yā. ¹⁶ Canéé nguūⁿ na libro ye^{n'}é Ndyuūs 'tíicā: Canéé chí diiⁿ nī n'daacá nī chi dεεve nī caati 'úú, Ndyuūs, ní dεεve 'úú.

¹⁷ Nduuti chi ndís'tiī ní nga^{n'}á nī chi Ndyuūs ní chiidá nī ní caacá nī Ndyuūs chi cunee yā ndís'tiī, canéé chi 'cuētinéé n'daacá nī ní 'va'á nī Ndyuūs ne^{n'}e chi cunee nī i^{n'}yee^{n'}dí 'cūū. Ndyuūs ye^{n'}e yú 'āā daamá nūuⁿ n'guúⁿ yā nducyaaca 'ii'nyāⁿ. Ní n'diichí yā ca'áámá cā'aama yā tan'dúúcā chi ch'εεtineé yā ndúúcū ntiiⁿnyuⁿ chi diiⁿ yā. ¹⁸ Deenú nī chi Ndyuūs nadanguá^{n'}ai yā ndís'tiī ye^{n'}e vida chi nguéé n'daacā chi sta'á nī ye^{n'}e 'ii'nyāⁿ ye^{n'}e ndaata ye^{n'}é nī. Ní n'dáácā ca deenú nī chi nadí'vē ye^{n'}e chi nadanguá^{n'}ai yā ndís'tiī. Nguéé cuái yā ndúúcū dendu'ū chí nchōō tan'duucā 'díí'nguāⁿ o 'díí'nguē. ¹⁹ Naati Ndyuūs nadanguá^{n'}ai yā ndís'tiī ndúúcū yuūⁿ chi ya^{n'}ai chí'vē ti yuūⁿ ye^{n'}e Cristo. Cristo ní ca'a yā maáⁿ yā cuerpo caavā ofrenda chi 'ii'nyāⁿ s'eeⁿ 'caa^{n'}núⁿ ya 'yā. Ní Cristo miiⁿ tan'dúúcā 'áámá 'iiti cuūchí chi nguéé n'gai tī ní nguéé dε'ε vεε ndíí ye^{n'}e tī, 'tíicā yā. ²⁰ Ní Ndyuūs ndεεvé yā Cristo chi maáⁿ yā cuerpo ye^{n'}é yā cuuvi ofrenda ndíí vmnáⁿ vmnaⁿ taachi 'āā cuéé din'dái yā i^{n'}yee^{n'}dí 'cūū. Naati maaⁿ ní nguuvi s'eeⁿ Ndyuūs ch'i^{n'}i yā Cristo nanáⁿ ndís'tiī ní caavā ndís'tiī. ²¹ Ní cucáávā Cristo miiⁿ ní ndís'tiī i'téenu nī Ndyuūs chi nadacué^{n'}ē yā Cristo ye^{n'}ē nguaaⁿ tiná^{n'}ā. Ní Ndyuūs dich'εé yā Cristo ndúúcū honor. Ní ndís'tiī 'āā i'téenu nī Ndyuūs ní cūnee ngiinú nī ye^{n'}é chi Ndyuūs ca^{n'}a yā chí téé yā ndís'tiī chi cuuvi ye^{n'}é nī.

²² Maaⁿ ní chi 'āā i'téenu nī nduudu cuaacu ye^{n'}é Cristo cucáávā Espíritu N'dai ye^{n'}é Ndyuūs 'āā didεεvé nī staava ye^{n'}é nī chi dine^{n'}é nī hermanos ye^{n'}e yú. Canéé chi dine^{n'}é taavi cá nī 'aama nī taama nī hermanos ndúúcū staava ye^{n'}é nī chí dεεve. ²³ Ndís'tiī ní 'āā ch'iindiyáⁿ nī taama vmné^{n'}ēe nguéé ye^{n'}é 'ii'nyāⁿ ye^{n'}é i^{n'}yee^{n'}dí 'cūū chí 'cuūvi yā naati ye^{n'}e nduudu ye^{n'}é Ndyuūs, nduudu chi canduuchi ní 'áámá cūnee cue^{n'}e daāⁿmaⁿ.

²⁴ Caati canéé nguūⁿ na libro ye^{n'}é Ndyuūs 'tíicā:

Tanducué^{n'}ē 'ii'nyāⁿ ye^{n'}e i^{n'}yee^{n'}dí 'cūū ní tan'dúúcā yaātā ní tanducué^{n'}ē chi n'gεεte ca ye^{n'}é 'ii'nyāⁿ ní tan'dúúcā naāndā ye^{n'}e yaātā, 'tíicā yā. Yaātā miiⁿ ní ti'i ní naandā miiⁿ ní n'geeⁿ,

²⁵ naati nduudu cuaacu ye^{n'}é Ndyuūs ní 'áámá cūnee cue^{n'}e daāⁿmaⁿ.

Ní nduudu cuaacú 'cūū ye^{n'}e evangelio chííⁿ chi candéé 'ii'nyāⁿ nanáⁿ ndís'tiī.

2

¹ Maaⁿ ní cáávā chuū diví nī 'áámá lado nducué^{n'}ē chí diiⁿ nī chi nguéé n'daacā ní nguéé canche'éí nī. Ndíí nguéé caa^{n'}máⁿ nī dendu'ū chí nguεε cuaacu. Ndíí nguéé ndúú diiⁿ ngueé nī ye^{n'}é taama 'ii'nyāⁿ. Ndíí nguéé ndúú nga^{n'}a nī nduudu yaadí ye^{n'}é 'ii'nyāⁿ.

² Ní ndís'tiī tan'dúúcā chí dacua'aá chí caama 'niindiyáⁿ ní ne^{n'}e leche, 'tíicā ndís'tiī. Dííⁿ nī ní ne^{n'}é nī leche chí nduudu n'dai ye^{n'}é nduudu cuaacu. Ní cuuvi cu'téenu cá nī ndúúcū nduudú 'cūū tan'dúúcā dacua'aá cuuvi 'cuiitá yā ndúúcū leche n'dai. ³ 'Tíicā cuuvi dííⁿ nī nduuti chí cuaacu nííⁿnyúⁿ n'diichíneeⁿ nī Señor Jesucristo chí n'dai yā.

Jesucristo ní tan'dúúcā tuū ch'εεte chí canduuchi

⁴ Ndís'tiī canéé chí ndaa nīíⁿnuúⁿ nī nanáⁿ Señor Jesucristo ti tan'dúúcā 'áámá tuū ch'εεte chí canduuchi 'tiicá nī. 'Ii'nyāⁿ ye^{n'}e i^{n'}yee^{n'}dí 'cūū nguéé 'cuúⁿ yā tuúú miiⁿ ti nadacadínuuⁿ yā chí nguéé dichí'vē naati Ndyuūs ndεεve yā tuū miiⁿ chí ya^{n'}ai chí'vē chí Cristo. ⁵ Ní ndís'tiī ntúūⁿ tan'dúúcā tuū canduuchi 'tiicá nī ti Ndyuūs 'āā teé yā ndís'tiī vida ngai. Ca'a nī lugar Ndyuūs chí cuta'á yā vida ye^{n'}e ndís'tiī ní din'dái yā ye^{n'}e cuerpo ye^{n'}e ndís'tiī 'áámá yaacū ye^{n'}e Espíritu N'dai ye^{n'}é Ndyuūs. Ní ndís'tiī canéé chí

diín nī ntiinnyuⁿ yeⁿe chiiduú yeⁿe yaacú 'cūū ní ca'á nī ofrendas nanááⁿ Ndyuūs ndúú^{cū} chi duuchi Jesucristo, ofrendas chi Ndyuūs cuuvi 'cuáaⁿ yā. ⁶ Ní 'tíicā canéé nguūⁿ na libro yeⁿe Ndyuūs cáávā chuū:

Cuin'diichí nī. 'Úú Ndyuūs cu'neén yáāⁿ Sión 'áámá tuūu ch'εεte yeⁿe cimientu yeⁿe esquina yeⁿe yaacū. Tuūu miiⁿ n'dεevé ní yaⁿ'ai chíí'vē. 'Iiⁿ'yāⁿ chi i'téenu yā Señor yeⁿe yú chi tuūu ch'εεte miiⁿ nguéé cuuvi 'cuinaáⁿ yā yeⁿe Señor yeⁿe yú. ⁷ Ní tuūu miiⁿ ní neené véé chii'vē cucáávā ndís'tiī chi i'téenu nī Cristo naati nguéé 'tíicā tuūu miiⁿ nanááⁿ 'iiⁿ'yāⁿ chi nguéé i'téenu yā. 'Tíicā canéé nguūⁿ na libro yeⁿe Ndyuūs: Tuūu mííⁿ nūuⁿ chi 'iiⁿ'yāⁿ chi din'dái yā yaacū nguéé 'cūūⁿ yā ti nadacadíinuⁿ yā chi nguéé dichíí'vē. Tuúú 'cūū nūuⁿ ní tuūu chεεte yeⁿe cimientu yeⁿe esquina.

⁸ Ní canéé nguūⁿ na libro yeⁿe Ndyuūs táámá chi 'tíicā:

Tuuú 'cūū ní diiⁿ chi cuundí ca'a 'iiⁿ'yāⁿ ni tuūu mííⁿ chiiⁿ chí cundεεve 'iiⁿ'yāⁿ. Cuaacu chí indéé ca'a yā ti nguéé n'giindiveén yā nduudu cuaacu ní Ndyuūs diín yā chi 'tíicā canee chi diiⁿ 'iiⁿ'yāⁿ s'eeⁿ.

Yeⁿe 'iiⁿ'yāⁿ chi yeⁿe Ndyuūs

⁹ Ndís'tiī ní yeⁿe 'iiⁿ'yāⁿ chi Ndyuūs ndεevé yā. Ndís'tiī ní chiiduú yeⁿe Ndyuūs chi Rey. Ndís'tiī ní yeⁿe ndaata dεevé. Ndís'tiī ní yeⁿe Ndyuūs ndís'tiī. 'Tíicā diiⁿ Ndyuūs caati ndís'tiī cuuvi caaⁿ'máⁿ nī chi ch'εεte n'dai chí diín Ndyuūs. Ndyuūs n'gai yā ndís'tiī yeⁿe na maaⁿ ní ndaá nī nanááⁿ yā ná dεévé chi n'dεevé n'dai yeⁿe maáⁿ yā. ¹⁰ Ndís'tiī ní tiempo chí chó'ōo ní nguéé yeⁿe Ndyuūs ndís'tiī naati maaⁿ ní 'tiicá nī. Tiempo chí chó'ōo Ndyuūs nguéé ya'ai 'iinú yā ndís'tiī naati maaⁿ ní 'tíicā déenu nī chi Ndyuūs ya'ai 'iinú yā ndís'tiī ti yeⁿe Ndyuūs ndís'tiī.

'Iiⁿ'yāⁿ chi 'áámá diín yā ntiinnyuⁿ yeⁿe Ndyuūs

¹¹ Ndís'tiī hermanos yeⁿe chi neⁿe taavi, 'úú idi'cuiitú ndís'tiī chí tan'dúú^{cā} 'iiⁿ'yāⁿ chí snúúⁿ yúúⁿ 'tiicá nī neⁿe chí snéé nī iⁿ'yeeⁿ'dí 'cūū ndís'tiī. Nguéé diín nī nuuⁿ'ndi tan'dúú^{cā} chí neⁿe cuerpo yeⁿe nī chí diín nī caati chiiⁿ chí neⁿe cuerpo yeⁿe nī ní cueⁿ'e daāⁿ'maⁿ contra yeⁿe chí neⁿe staava yeⁿe nī. ¹² 'Cuεetinéé n'daaca nī nguaaⁿ 'iiⁿ'yāⁿ chí nguéé i'téenu yā nduudu cuaacu yeⁿe Ndyuūs. Ní 'áará chí ngaⁿ'á 'iiⁿ'yāⁿ s'eeⁿ contra yeⁿe ndís'tiī tan'dúú^{cā} chí ndís'tiī ní 'iiⁿ'yāⁿ chí nguéé n'daacā, 'iiⁿ'yāⁿ s'eeⁿ ní cuuvi snaaⁿ yā ntiinnyuⁿ chí n'daacā ca chí idiíⁿ nī. Ní cuuvi 'caaⁿ'máⁿ yā chí ch'εεte ca Ndyuūs nguuví chí Ndyuūs ndaa yā taama vmnéⁿ'ēe ní nnguai yā cuenta yeⁿe nuuⁿ'ndi yeⁿe yú.

¹³ Canéé chí diín nī tan'dúú^{cā} chí ngaⁿ'á 'iiⁿ'ntyéⁿ'ē 'āā du'ú nūuⁿ chí véé nduuti chí saⁿ'ā rey o chí 'iiⁿ'ntyéⁿ'ē ch'εεte. Ní n'daacā canee nī nanááⁿ yā caavā chí ndís'tiī ní yeⁿe Señor Ndyuūs yeⁿe yú ndís'tiī. ¹⁴ Ní diín nī chí ngaⁿ'á 'iiⁿ'yāⁿ 'iiⁿ'ntyéⁿ'ē chí Ndyuūs s'neéⁿ yā miiⁿ caati 'iiⁿ'ntyéⁿ'ē cuuvi ca'a yā castigo 'iiⁿ'yāⁿ chí nguéé n'daacā idiíⁿ yā ní cuuvi caaⁿ'máⁿ yā chí ch'εεte 'iiⁿ'yāⁿ chí n'daacā idiíⁿ yā. ¹⁵ Ti chuū ní chiiⁿ chí Ndyuūs neⁿ'é yā chí diín nī. Ní cáávā chí ndís'tiī din'daacá nī, 'iiⁿ'yāⁿ chí zozzo yā ní nguéé deenu yā nguéé cuuvi caaⁿ'máⁿ yā de'ē vεε contra yeⁿe ndís'tiī.

¹⁶ Ní 'cuεetinéé nī tan'dúú^{cā} 'iiⁿ'yāⁿ chí canéé libre yā. Nguéé diín nī chiiⁿ chí nguεε n'daacā cucáávā chí canéé libre nī, ní ngaⁿ'á nī chí cuuvi diín nī 'túú^{cā}. N'daacā ca chí 'cuεetinéé n'daacá nī ti ndís'tiī 'iiⁿ'yāⁿ chí 'áámá canee chí dichíí'vē Ndyuūs. ¹⁷ Ní diín nī honrar nducyaaca 'iiⁿ'yāⁿ. Ní dinéⁿ'e nī nducyaaca hermanos yeⁿe yú. 'Va'á nī Ndyuūs ní diín nī honrar emperador chí 'iiⁿ'ntyéⁿ'ē.

Yeⁿe chí Cristo n'geenu yā ngii chí ejemplo yeⁿe yú

¹⁸ Ndís'tiī 'iiⁿ'yāⁿ criados chí chíí'vē, diín nī respetar patrón yeⁿe nī ní diín nī tan'dúú^{cā} chí ngaⁿ'á patrón yeⁿe nī, nguéé dámaāⁿ patrón yeⁿe nī chí din'daacā ní n'dai yā naati patrón yeⁿe nī chí nguéé din'daacā yā ní taaⁿ yā. ¹⁹ Caati n'daacā ca chí cuchεε nī taachi n'geenu nī ngii cáávā cosas chí nguéé n'daacā chí diiⁿ 'iiⁿ'yāⁿ chí contra yeⁿe nī. Ní cuchεε nī ti deenu nī chí n'daacā idiíⁿ nī. 'Tíicā Ndyuūs neⁿ'e yā chí diiⁿ nī. ²⁰ ¿De'ē ch'εεte chuū nduuti chí n'geenú nī ngii ti véé nuuⁿ'ndi yeⁿe nī ní 'tíicā castigo yeⁿe nī, ní

ichée nī? Nguéé ch'εεε chuū. Naati nduuti chi n'geenu nī ngii ti n'daacā idiín nī ni ngiinū ngiinū cuchεε nī tuu'mi ní Ndyuūs nadi'viicú yā ndís'tiī. ²¹ Ní yaa'ví yā ndís'tiī caavā chi diín nī 'tíicā. Cristo 'āā ch'eenú yā chii cáávā s'uuún ní s'neén yā 'áámá ejemplo yeⁿe yú. Ní s'uuún canéé chi 'tíica nūuⁿ diiⁿ yú tan'dúucā chi diín yā. ²² Cristo miiⁿ nguéé diín yā mar 'áámá chuundi 'liiⁿ nuuⁿndi ní nguéé chinnche'éi yā mar 'áámá. ²³ Ní taachi 'iiⁿyāⁿ s'eeⁿ ngaⁿ'a taán yā yeⁿe Cristo, Cristo miiⁿ nguéé ngaⁿ'a taán yā yeⁿe yā. Ní taachi 'iiⁿyāⁿ s'eeⁿ diín yā chi Cristo ya'ai ch'eenú yā chii nguéé caⁿ'ā cúnnaa yā yeⁿe yā. Naati cūnee ngiinú yā nanáán Ndyuūs chi cuaacu chí Ndyuūs caⁿ'á yā n'diichi yā nuuⁿndi yeⁿe 'iiⁿyāⁿ s'eeⁿ. Ní Ndyuūs diín yā cosa chi cuaacu. ²⁴ Cristo maán yā candεε yā nuuⁿndi yeⁿe yú na cuerpo yeⁿe maán yā taachi ch'ii yā na cruz. Ní 'íicú s'uuún ní cuuvi diiⁿ yú tan'dúucā chi n'dii yú yeⁿe nuuⁿndi yeⁿe yú. Ní maaⁿ ní 'cuεεtinee yú yeⁿe nducueⁿ'ē chi n'daacā. Ní 'āā nnduuvá yeⁿ'ē yú yeⁿe castigo yeⁿe nuuⁿndi yeⁿe yú cáávā chi Cristo naca'ái yā cáávā nuuⁿndi yeⁿe yú. ²⁵ Tiempo chi chó'ōo s'uuún ní tan'dúucā 'iiti cuūchī chi nindai tī 'tíicā s'uuún naati maaⁿ ní ndaa yú nanáán Cristo chi candεε yā cuidado s'uuún tan'duucā 'áámá pastor. Cristo ní candεε yā cuidado alma yeⁿe yú.

3

Yeⁿ'é 'iiⁿyāⁿ chí 'nínidívaacu chi canéé chi 'caandiveén yā yeⁿ'ē ví'i

¹ 'Tiicá ntúūⁿ ndís'tiī n'daataá chi 'nínidívaacu tá, canéé chi diín nī chi ngaⁿ'ā isaⁿ'ā yeⁿ'é nī. Ní nduuti chi isaⁿ'ā yeⁿ'é nī nguéé i'téenu sa Cristo, cuuvi cu'téenu sa Cristo cáávā n'daataá yeⁿe sa tí n'daacā n'gεεtinee tá. 'Áará chi nguéé ngaⁿ'ā ta mar 'áámá nduudu yeⁿe Cristo tuu'mi ní cuuvi cu'téenu sa Cristo. ² Caati n'diichi sa chi n'daataá yéⁿe sa yeⁿe nducueⁿ'ē chí idiiⁿ tá ní n'daacā ní diiⁿ tá respetar isaⁿ'ā tá. ³ Ní n'daataá chi n'dai tá chí véé isaⁿ'ā yeⁿe tá nguéé canéé chi sta'a tá cosas ni s'nuuⁿ tá cosas miiⁿ na cuerpo yeⁿe tá chí diiⁿ chí n'dεεvεε maaⁿ tá. Ní nguéé neené n'dεεvéé diiⁿ tá tiiⁿ tá o sta'a tá cosas yeⁿe 'diiⁿnguāāⁿ o catecai chí ya'ai chíí'vē chí snee tá chí cuuvi dich'εεté maaⁿ tá táⁿ'ā. ⁴ Naati n'dεεvéé chí yeⁿe tá canee chí cūnee yeⁿe maaⁿ tá ní canéé chí n'dεεvεε tá ndúucū espíritu yeⁿ'ē tá chí ndiicúúⁿ. Ní canee 'diiⁿ tá. Chuū ní dichí'vē nanáán Ndyuūs. ⁵ Caati tiempo chí chó'ōo 'tíicā idiiⁿ n'daataa s'eeⁿ chí yeⁿ'é Ndyuūs, n'daataa chí i'téenu ca Ndyuūs ní s'teenu tá chí ngaⁿ'ā isaⁿ'ā yeⁿe tá. ⁶ Ní táⁿ'ā Sara 'tiicá ntúūⁿ diiⁿ tá. S'teenu tá isaⁿ'ā yeⁿe tá chí nguuvi Abraham. Ní ngaⁿ'ā tá isaⁿ'ā yeⁿe tá: N'dii ní señor yeⁿ'é. Maaⁿ ní ndís'tiī cuuvi diín nī tan'dúucā chí ndís'tiī daiya Sara ndís'tiī nduuti chí n'daacā idiín nī ní nguéé 'va'á nī yeⁿ'ē mar 'áámá.

⁷ Ní 'tiicá ntúūⁿ ndís'tiī saⁿ'ā chí véé n'daataá yeⁿ'é nī. 'Cuεεtinee nī ndúucū tá ní diín nī respetar n'daataá yeⁿ'é nī. Ní diín nī honrar n'daataá yeⁿe nī tan'dúucā chí deenu nī chí n'daacā ti n'daataa míⁿ nguéé véé fuerzas yeⁿe tá tan'dúucā 'áámá saⁿ'ā. Ní 'tiicá ntúūⁿ Ndyuūs yeⁿe vaadī n'dai yeⁿ'é yā ca'a yā vida yeⁿe tá daama daama tan'dúucā chí tee yā ndís'tiī saⁿ'ā. Ní ndís'tiī saⁿ'ā diín nī 'túucā ní nguéé du'ū vεε chí di'vaachí ndís'tiī yeⁿ'e chí diín nī taachi ngaⁿ'angua'á nī.

Yeⁿ'e chí n'geenu yú ngii caavā chí n'daacā idiiⁿ yú.

⁸ Ní yeⁿ'e nducueⁿ'ē canéé chí dáámá nūuⁿ nadacadínuuⁿ nī nducyaaca ndís'tiī ní dáámá nūuⁿ nadacadínuuⁿ nī na staava yeⁿ'é nī. Dinéⁿ'e nī 'aama nī taama nī tan'dúucā chí cuáacú chí ví'í nī. Ní ya'ai 'iinú nī 'aamá nī taama nī. Ní diiⁿ chí ndiicúúⁿ nī 'aamá nī ndúucū taama nī. ⁹ Taachi 'iiⁿyāⁿ nguéé n'daacā idiín yā ndúucu nī nguéé idiín nī chí nguéé ndaacā ndúucu yā. Ní taachi 'iiⁿyāⁿ nguéé n'daacā caaⁿ'máⁿ yā yeⁿ'é nī nguéé cunncaā caaⁿ'máⁿ nī yeⁿe yā. Ndaacā ca diín nī ní caaⁿ'máⁿ nī ndúucū 'iiⁿyāⁿ s'tiī ní di'viicú nī 'iiⁿyāⁿ s'tiī. 'Tíicā Ndyuūs cuuvi di'viicú yā ndís'tiī. Ndyuūs yaa'ví yā ndís'tiī chí cuuvi yeⁿ'é yā ti diín yā 'tíicā nduucú nī. ¹⁰ Canéé nguūⁿ na libro yeⁿ'é Ndyuūs 'tíicā: 'Iiⁿyāⁿ chí neⁿ'e chí yeenú yā ndúucū vida yeⁿ'é yā ní neⁿ'é yā chí véé nduuyu yeⁿ'é yā, 'āā ntéé canéé chí caaⁿ'máⁿ yā dendu'ū chí nguéé n'daacā. Ní nguéé caaⁿ'máⁿ yā nduudu yaadi. ¹¹ Canéé chí diví yā yeⁿ'e nducueⁿ'ē chí nguéé n'daacā ní dámaāⁿ

diín yā chi n'daacā. Canéé chí neⁿé yā vaadī 'diiín ní diín yā nducueⁿé chi véé vaadī 'diiín yeⁿe yā. ¹² Señor Ndyuūs yeⁿe yú maán yā 'iiⁿ'yāⁿ chi din'daacā yā. Ní cueⁿe daāⁿmaⁿ n'giindiveéⁿ yā chi 'iiⁿ'yāⁿ s'eeⁿ ngaⁿ'angua'á yā. Ní Señor yeⁿe yú ní contra yeⁿe 'iiⁿ'yāⁿ chi nguéé n'daacā idiín yā.

¹³ ¿Du'ú 'iiⁿ'yāⁿ chi'nuucá'ai yā ndís'tiī nduuti chi ndís'tiī nducueⁿé tiempo diín nī chi n'daacā? Nguéé diín yā 'tíicā. ¹⁴ Ní nduuti chi ndís'tiī n'geenu nī ngii cáávā chi n'daacā idiín nī tuu'mi ní yeenú nī. Nguéé diín 'va'a nī yeⁿe mar 'áámá 'iiⁿ'yāⁿ ní nguéé di'yáá nī cuuvi. ¹⁵ Canéé chí dich'eté nī Cristo na staava yeⁿé nī ní 'cuaáⁿ nī lugar Cristo chi 'iiví nī. Ní canéé listo nī chi cuuvi nan'guεεcútaⁿ'á nī 'āā du'ú nūuⁿ 'iiⁿ'yāⁿ chi intiinguuneeⁿ ndís'tiī 'tíicā: Ndís'tiī de'ē cáávā chi cūnee ngíínú nī yeⁿe Ndyuūs yeⁿé nī. Ní taachi nan'guεεcútaⁿ'á nī yeⁿe yā diín nī chi ndiicúúⁿ n'dai nī. Ní diín nī respetar 'iiⁿ'yāⁿ. ¹⁶ 'Cuεetinéé n'daacā nī chi nguéé véé chi nadacadíínuuⁿ nī yeⁿe chi nguéé n'daacā chi diín nī. Ní 'iiⁿ'yāⁿ chi cunncáā ngaⁿ'a yā yeⁿe chi n'daacā chi diín nī caavā chi i'téénu nī Cristo, cuuvi 'cuináaⁿ yā cáávā chi ngaⁿ'á yā. ¹⁷ N'dáácā ca chi 'cueenu yú cuuvi cáávā cosas chi n'daacā idiín yú nduuti chi Ndyuūs neⁿé yā 'tíicā, nguéé ti cáávā cosas chi nguéé n'daacā idiín yú.

¹⁸ Cristo miiⁿ maán yā ch'eenú yā chiī chi ch'iī yā cáávā nuuⁿndi yeⁿe yú ní 'áámá vmnéⁿé ch'iī Cristo cáávā nuuⁿndi yeⁿe nducyaaca 'iiⁿ'yāⁿ, ní nguéé nuuⁿndi yeⁿé yā. Ní ch'iī yā caati cuuvi candéε ya s'uuúⁿ nanááⁿ Ndyuūs. Cuáácú ch'iī cuerpo yeⁿé yā naati espíritu yeⁿé yā nduuchi. ¹⁹ Ní espíritu yeⁿe Cristo cuayiivi chi ch'iī yā cheⁿe yā ní caⁿ'a yā nduudu cuaacu yeⁿé Ndyuūs nanááⁿ espíritu s'eeⁿ yeⁿe 'iiⁿ'yāⁿ s'eeⁿ chi n'diī. Ní espíritu s'eeⁿ ní preso yā na lugar yeⁿe espíritu s'eeⁿ. ²⁰ Espíritu s'eeⁿ ní yeⁿe 'iiⁿ'yāⁿ chi nguéé ch'iindiveéⁿ yā Ndyuūs 'áámá tiempo chi 'āā chó'ōo. Ní Ndyuūs canee ngíínú yā ní 'diiín canéé yā chi 'iiⁿ'yāⁿ s'eeⁿ ndaacadaamí yā yeⁿe nuuⁿndi yeⁿe yā 'naaⁿ tiempo chi saⁿ'ā Noé din'dái sa 'áámá arco chí barco ch'εete. Ní cheeti barco miiⁿ n'duuví 'iiⁿ'yāⁿ, dámaāⁿ niiní yā, ní nguaⁿ'ai yā yeⁿe nuūⁿnīⁿ. ²¹ Ní nuūⁿnīⁿ miiⁿ ní tan'dúúcā nuūⁿnīⁿ chi ngeédínuūⁿnīⁿ yú chi nanguaⁿ'āi s'uuúⁿ. 'Tíicā nuuⁿniⁿ miiⁿ. Taachi ngeédínuūⁿnīⁿ yú nguéé caavā chi naaⁿnu cuerpo yeⁿe yú naati cáávā chi 'áámá compromiso yeⁿe yú nanááⁿ Ndyuūs. Ní n'daacā diín yú chuū ndúúcū núúⁿmáⁿ staava yeⁿe yú. Ní Ndyuūs nadanguáⁿ'ai yā s'uuúⁿ chi i'teenu yú Cristo cáávā Cristo nducueeⁿ yā yeⁿe nguaaⁿ tináⁿ'ā. ²² Ní Cristo miiⁿ cunaⁿ'á yā na va'ai cheeti nguuvi ní maaⁿ canee yā lado yeⁿe honor yeⁿe Ndyuūs chi lado tá cuaacu. Ní Cristo ngaⁿ'a ntiínnyúⁿ yā yeⁿé ángeles ndúúcū 'iiⁿntyéⁿé ní yeⁿé poderes chi véé.

4

Canee chi dichí'vε yú Ndyuūs tan'dúúcā chi Ndyuūs tee yā fuerzas s'uuúⁿ

¹ Tan'dúúcā Cristo ch'eenú yā chiī ní diín yā sentir na cuerpo yeⁿé yā 'tiicá ntúūⁿ ndís'tiī canéé chi cuta'á nī fuerzas yeⁿé nī cáávā tiempo chi caⁿ'á nī 'cweenú nī cuuvi. Maaⁿ ní 'iiⁿ'yāⁿ s'eeⁿ chí ch'eenú yā chiī ní diín yā sentir na cuerpo yeⁿé yā 'āā ntéé neⁿé yā dinuuⁿndi yā. ² Ní ndíí maaⁿ ndís'tiī canee chi diín nī tanducueⁿé chi neⁿe Ndyuūs chi diín nī tanducueⁿé nguuvi yeⁿe nī. Ní nguéé diín nī tan'dúúcā chi maaⁿ cuerpo yeⁿé nī neⁿe chi diín nī. ³ Tiempo chi 'āā chó'ōo ní diín yú tan'dúúcā 'iiⁿ'yāⁿ chi nguéé yeⁿe ndaata Israel chi nguéé i'téénu yā Ndyuūs. Tiempo miiⁿ ní diín yú cosas chi nguéé n'daacā. Ní diín yú nuuⁿndi tan'dúúcā chi neⁿe cuerpo yeⁿe yú chi diín yú. Ní 'cuū'vi yú ní cho'o nee che'e yú taachi véé fiesta yeⁿe chi che'e yú. Ní cu'u ca yú vino. Ní s'teenu yú santo s'eeⁿ chi ídolo s'eeⁿ. ⁴ 'Iiⁿ'yāⁿ s'eeⁿ chi nguéé i'téénu yā Cristo, ¿De'ē cáávā chi nadacadíínuuⁿ yā chi ndís'tiī nguéé nduuvídaamā nī ndúúcū yā, ní nguéé idiín nī ndúúcū yā cosas chi nguéé n'daacā? Ní chííⁿ chi 'iiⁿ'yāⁿ s'eeⁿ ní cunncáā ngaⁿ'a yā yeⁿé nī. ⁵ 'Iiⁿ'yāⁿ s'eeⁿ canéé chi nga'a yā cuenta yeⁿe vida yeⁿe maán yā nanááⁿ Cristo chi diín yā juzgar nducyaaca 'iiⁿ'yāⁿ, 'iiⁿ'yāⁿ chi canduuchi ndúúcū 'iiⁿ'yāⁿ chi n'díí. ⁶ Ní cáávā chuū Cristo ngaⁿ'á yā nduudu cuaacu yeⁿe maán yā nanááⁿ espíritus yeⁿe 'iiⁿ'yāⁿ chi n'díí caati espíritus yeⁿé yā cuuvi canduuchi tan'dúúcā chi Ndyuūs canduuchí yā. Ní Ndyuūs

n'diichí yā nuuⁿndi yeⁿ'é 'iiⁿ'yāⁿ s'eeⁿ taachi ch'εetineé yā iⁿ'yeeⁿdí 'cūū tan'dúúca chi n'diichí yā nuuⁿndi yeⁿ'e nducyááca 'iiⁿ'yāⁿ chi snee yā iⁿ'yeeⁿdi 'cūū.

⁷ 'Āā cháā snee niiⁿnuúⁿ nguuví chi 'cuiinu tanducuéⁿ'ē denduⁿū. Ní cáāvā chuū 'cuεetinee n'daaca nī ní 'āā de'é ora nūūⁿ ní cuuvi caaⁿ'maⁿngua'á nī. ⁸ Ní yeⁿ'ē tanducuéⁿ'ē dineⁿ'e cá nī 'aama nī taama nī caati taachi dineⁿ'e cá nī tuuⁿ'mi ní inadīch'εécú nī nuuⁿndi yeⁿ'ē 'áámá nī taama nī. ⁹ 'Cuaáⁿ nī 'áámá nī taama nī na vaacu nī ní nguéé 'cuεecu cheendí nī. ¹⁰ Ní ca'áámá ca'aama nī ní díⁿ nī servir taamá nī ndúúcu ntiiⁿnyuⁿ chi Ndyuūs itée yā chi díⁿ nī. Ní canéé chi diiⁿ n'daaca nī ntiiⁿnyuⁿ yeⁿ'é nī chi Ndyuūs itée yā ca'aama ca'aamá nī ti Ndyuūs itée yā ndís'tiī nducuéⁿ'ē chi n'dai taavi yeⁿ'e yā. ¹¹ Nduuti chi 'áámá nī candεε nī nduudu cuaacu canéé chí ngaⁿ'á yā nduudu cuaacu yeⁿ'é Ndyuūs. Nduuti chi 'aamá nī díⁿ nī ntiiⁿnyuⁿ yeⁿ'e yaācū canéé chí díⁿ yā ndúúcu nducuéⁿ'ē fuerzas yeⁿ'é yā chi Ndyuūs ca'a yā 'iiⁿ'yāⁿ miiⁿ. Ní yeⁿ'e tanducuéⁿ'ē chí ndís'tiī díⁿ nī canéé chí díⁿ nī chi cuuvi dich'εeté nī Ndyuūs cucáāvā Jesucristo. Ní yeⁿ'é Ndyuūs chí ngí dεeve yeⁿ'e yā ní vεe poder yeⁿ'é yā tanducuéⁿ'ē tiempo. 'Tííca yā.

Canéé chi n'geenu yú ngii ti yeⁿ'e Cristo s'uuúⁿ

¹² Ndís'tiī hermanos chi neⁿ'é taavi nguéé nadicadínuuⁿ nī chi cosa chi díⁿtūū nguéé canéé chí ch'ó'ōo yeⁿ'é nī taachi 'iiⁿ'yāⁿ n'diichineeⁿ cá yā ndís'tiī chí ya'ai n'geenú nī ngii ti canéé chí ch'ó'ōo yeⁿ'é nī 'tííca. ¹³ Naati canéé chí cuuvi yeenu nī taachi n'geenu nī ngii tan'dúúca Cristo ch'eenú yā chii. Ní cuayiivi cuuvi yeenu cá nī taachi Cristo ndaa yā taama vmnéⁿ'ēe ní 'cuuⁿ'míⁿ yā chí ch'εete n'dai ngiichí yā tan'dúúca dεeve ngiichí ch'εete. ¹⁴ Nduuti chí 'iiⁿ'yāⁿ n'gaa'vá yā ndúúcu nī cucáāvā chí i'téenu nī Cristo tuuⁿ'mi ní yeenu nī. Espíritu N'dai yeⁿ'é Ndyuūs chí dεevé ngii canéé ndúúcu ndís'tiī. 'Áará chí 'iiⁿ'yāⁿ s'eeⁿ cunncaā ngaⁿ'a yā yeⁿ'e Cristo, ndís'tiī ní díⁿ nī honrar Cristo. ¹⁵ Ní nduuti chí 'áámá chéé ndís'tiī n'geenu nī ngii 'úú nguéé neⁿ'é chí 'cuenú nī cuuvi caati ch'iiⁿ'núⁿ nī 'iiⁿ'yāⁿ o ididuucú nī o nguéé díⁿ nī tan'dúúca chí ngaⁿ'ā ley yeⁿ'é Ndyuūs chí ch'εete ca. ¹⁶ Ní nduuti chí 'áámá chεε ndís'tiī n'geenu nī ngii cáāvā chí i'téenu nī Cristo nguéé cuuvi 'cuinaáⁿ nī naati canee chí dich'εeté nī Ndyuūs caati 'iiⁿ'yāⁿ ngaⁿ'a yā chí díⁿ ní yeⁿ'e Cristo dii.

¹⁷ 'Āā ndaa tiempo chí Cristo caⁿ'á yā n'diichi yā nuuⁿndi yeⁿ'e 'iiⁿ'yāⁿ ní vmnáán vmnaaⁿ caⁿ'á yā n'diichí yā nuuⁿndi yeⁿ'e 'iiⁿ'yāⁿ chí i'téenu yā 'iiⁿ'yāⁿ. Ní nduuti chí vmnáán vmnaaⁿ n'diichí yā nuuⁿndi yeⁿ'e yú, ¿táácā cuuvi yeⁿ'é 'iiⁿ'yāⁿ chí nguéé i'téenu yā nduudu cuaacu yeⁿ'é Ndyuūs cuayiivi taachi n'diichí Cristo nuuⁿndi yeⁿ'e yā? ¹⁸ Ní nduuti chí ngí'íi chí 'iiⁿ'yāⁿ chí n'dai cuuvi nanguaⁿ'ai yā, ¿dé'ē cuuví ndúúcu 'iiⁿ'yāⁿ chí nguéé n'daacā díⁿ yā ní ndúúcu 'iiⁿ'yāⁿ chí dinuuⁿndí yā ní nguéé i'téenu yā? ¹⁹ Ní 'tííca canee chí diiⁿ yú. Taachi n'geenu yú ngii caavā chí Ndyuūs neⁿ'é yā chí diiⁿ yú 'tííca, canéé chí diiⁿ yú nducuéⁿ'ē chí n'daacā. Ní canéé chí nga'a yú vida yeⁿ'e yú na ta'a Ndyuūs caati Ndyuūs din'dái yā s'uuúⁿ ní 'indεε yā cuidado s'uuúⁿ. Ndyuūs ní díⁿ yā chíiⁿ chí ngaⁿ'a yā chí caⁿ'a yā diiⁿ yā.

5

Yeⁿ'é 'iiⁿ'yāⁿ chí i'téenu yā Ndyuūs

¹ 'Úú Pedro ca'á consejo 'iiⁿntyéⁿ'ē yeⁿ'e yaācū chí snéé nguaaⁿ ndís'tiī. 'Úú 'tiicá ntúūⁿ 'iiⁿntyéⁿ'ē 'úú. 'Úú ngaⁿ'á yeⁿ'e Cristo tan'dúúca chí ch'eenú yā chíiⁿ ti n'diichí nduucū nduutinaáⁿ maáⁿ. Ní 'tiicá ntúūⁿ véε parte yeⁿ'é vaadi dεeve ngii chí Ndyuūs 'cuuⁿ'míⁿ yā s'uuúⁿ cuayiivi. ² Ndís'tiī 'iiⁿntyéⁿ'ē yeⁿ'e yaācū, idiíⁿ nī ntiiⁿnyuⁿ yeⁿ'é nī tan'dúúca 'áámá pastor chí indεε yā cuidado yeⁿ'e 'iiti cuūchī. 'Tííca díⁿ nī ndúúcu 'iiⁿ'yāⁿ chí yeⁿ'é Ndyuūs chí caⁿ'á yā yaācū naachi ndís'tiī ní 'iiⁿntyéⁿ'ē. Nguéé díⁿ nī ntiiⁿnyuⁿ yeⁿ'e nī chí canéé chí díⁿ nī naati díⁿ nī ti maáⁿ nī neⁿ'e nī diiⁿ nī caati 'tííca neⁿ'e Ndyuūs. Nguéé díⁿ nī caavā chí cuta'á nī tuūmī naati díⁿ nī ndúúcu nuuⁿmaⁿ staava yeⁿ'é nī chí n'dai. ³ Nguéé díⁿ nī ndúúcu 'iiⁿ'yāⁿ chí maaⁿ cuidado yeⁿ'é nī tan'dúúca chí ndís'tiī ní 'iivi yeⁿ'é yā naati 'cuεetinéé n'daacá nī níícu 'iiⁿ'yāⁿ cuuvi n'diichí yā ndís'tiī ní díⁿ yā tan'dúúca

chi ndís'tiī dííⁿ nī. ⁴ Ní 'íicú taachi ndaa Jesucristo chi 'iiⁿ'yāⁿ chí ndíí tīiⁿ chí ícandεε yā cuidado yeⁿ'e 'iiⁿ'yāⁿ yeⁿ'é yā tan'dúú^{cā} 'áámá pastor chi ndii tīiⁿ chí ícandεε yā cuidado 'iiti yeⁿ'é yā, tuu'mi ní ndís'tiī cuuvi cuta'á nī 'áámá corona chi nguée' 'cūiinu dεεν^vé yeⁿ'ē. Nguée' corona yeⁿ'e yaātā chi ituuvií.

⁵ 'Tiicá ntúūⁿ ndís'tiī saⁿ'ā da'caiyāā canée' chí dííⁿ nī tan'dúú^{cā} chi ngaⁿ'a 'iīⁿntyēⁿ'ē yeⁿ'e yaācū. Nducyaaca nī canée' chí ndiicuuⁿ nī ní cunnee nī 'aama nī taama nī caati canée' nguūⁿ na libro yeⁿ'é Ndyuūs 'tīicā:

Ndyuūs nguée' neⁿ'e yā 'iiⁿ'yāⁿ chi nacadínuuⁿ yā chi maáⁿ yā ch'εete yā naati ca'á yā nducuéⁿ'ē chí n'dai yeⁿ'e yā 'iiⁿ'yāⁿ chí ndiicúúⁿ.

⁶ Maaⁿ ní nducyaaca ndís'tiī ndiicúúⁿ n'dai 'cuεetinée nī maaⁿ poder yeⁿ'é Ndyuūs ti Ndyuūs cuuvi dich'εeté yā ndís'tiī tiempo chí neⁿ'é yā. ⁷ Ca'á nī nducueⁿ'ē cuidado chí díitūu yeⁿ'e nī na ta'a Cristo caati Cristo candεε yā cuidado yeⁿ'e ndís'tiī.

⁸ Canée' listo nī ní nguée' 'cuεetiyaadú nī. Cundεε nī cuidado chí n'daacā 'cuεetinée nī ti yááⁿ'n'guiinūuⁿ miiⁿ chí contra yeⁿ'e nī chíicá sá ní n'diichi sa ndii 'muuⁿ ní ndii miiⁿ. Ní tan'dúú^{cā} 'áámá 'yáíⁿ'yāⁿ cuá'á n'gai tī ní cachiicá tī ní i'nuúⁿ tī du'u chí cuuvi che'é tī 'tīicá diiⁿ yááⁿ'n'guiinūuⁿ miiⁿ. ⁹ Nguée' ca'a nī lugar yááⁿ'n'guiinūuⁿ 'cūū naati 'áámá cūnee nī ndúú^{cū} chí i'téenu nī. Ní déenu nī chí 'āā daamá nūuⁿ n'geenu yú ngii tan'dúú^{cā} nducyaaca hermanos chí s'néeⁿ yā na núúⁿ'máⁿ íⁿ'yeeⁿdī ti i'téenu yā Cristo.

¹⁰ Ní cuayiivi chí ch'eenú nī chíi duu'vi tiempo nūuⁿ tuu'mi ní Ndyuūs dííⁿ yā chí ndεεve canée' vida yeⁿ'e nī. Ní diitúú canee' nī ndúú^{cū} chí i'téenu nī Ndyuūs. Ní Ndyuūs ca'á yā fuerzas yeⁿ'e nī ní dííⁿ yā chí seguro canee' nī ndúú^{cū} chí i'téenu nī. Maaⁿ Ndyuūs miiⁿ ní teé yā nducueⁿ'ē chí n'dai. Ní maáⁿ yā yaa'ví yā s'uuúⁿ chí cuuvi yeⁿ'é yā s'uuúⁿ cáávā chí véé parte yeⁿ'e yú ndúú^{cū} dεεve ngii ch'εete yeⁿ'é yā caati s'uuúⁿ ní yeⁿ'e Cristo s'uuúⁿ.

¹¹ Caaⁿ'maⁿ yú chí Ndyuūs ní ch'εete n'dai yā ní yeⁿ'é yā véé nducueⁿ'ē poder chí véé ní cueⁿ'e daāⁿ'maⁿ cueⁿ'e daāⁿ'maⁿ 'tīicā.

'Cuiinu carta miiⁿ ní yaa'vi yā 'iiⁿ'yāⁿ chí n'daí ndís'tiī

¹² 'Tée' nūuⁿ idinguúⁿ carta 'cūū yeⁿ'ē ndís'tiī ní hermano Silvano nginnee sa 'úú. Nadicádiinúúⁿ chí Silvano miiⁿ ní hermano chí n'dai taavi. 'Úú teé consejo ndís'tiī chí seguro canee' ndís'tiī chí nducueⁿ'ē chí Ndyuūs itée yā ndís'tiī yeⁿ'e vaadī n'dai yeⁿ'é yā ní yeⁿ'é nī ti neⁿ'é yā ndís'tiī. Maaⁿ ní 'cuεetinée' n'daaca nī ní diituu canee' nī ní cuchée nī yeⁿ'e tanducueⁿ'ē chuū.

¹³ 'Iiⁿ'yāⁿ yeⁿ'e yaācū chí canee' na yāāⁿ Babilonia chí Ndyuūs didεεv^vé yā tan'dúú^{cā} s'uuúⁿ: N'daí ndís'tiī, ngaⁿ'a yā. 'Tiicá ntúūⁿ Marcos chí tan'dúú^{cā} daiyá: N'daí ndís'tiī, ngaⁿ'a sa. ¹⁴ Ndís'tiī hermanos: N'daí nī, ngaⁿ'a nī 'aama nī taama nī ti neⁿ'é nī 'aama nī taama nī ti yeⁿ'é Cristo ndís'tiī. Ní Ndyuūs téé yā vaadī 'diiíⁿ yeⁿ'é yā nducyaacá ndís'tiī chí yeⁿ'e Cristo. 'Tīicā cuuvi.

CARTA CUAYIIVI YEⁿE SAN PEDRO

Pedro idinguúⁿ yā carta 'cūū yeⁿe 'iiⁿ'yāⁿ chi i'téenu yā Cristo

¹ 'Úú Simón Pedro 'úú ní 'úú ní apóstol yeⁿe Jesucristo. Ní candéé nduudu yeⁿé Ndyuūs ti Ndyuūs dichó'o yā 'úú. Ní 'úú dichíí'vē Jesucristo. Dinguúⁿ carta 'cūū yeⁿe 'iiⁿ'yāⁿ chi 'āā i'téenu n'dai yā Jesucristo tan'dúúcā nú'suu. 'Tíicā diiⁿ Ndyuūs ndúúcū Salvador chi Jesucristo ti cuaacu yā. ² 'Úú neⁿé chi ndís'tiī cuta'á nī nducueⁿē vaadī n'dai ndúúcū vaadī 'diiⁿ chi Ndyuūs téé yā ndís'tiī, ní cáávā chi deenū n'daacá nī yeⁿé Ndyuūs chiida yú ndúúcū Jesucristo yeⁿe yú.

Yeⁿē vida yeⁿe 'iiⁿ'yāⁿ chi i'téenu yā Jesucristo

³ Ndyuūs cáávā poder yeⁿé yā 'āā tee yā s'uuúⁿ tanducueⁿē caati cuuvi 'cuētinéé n'daāca yú ní cuuvi dich'ēete yú Ndyuūs. Ní 'tíicā cuuvi diiⁿ yú ti deenu yú Jesucristo chi ch'ēete maáⁿ yā ní diíⁿ yā vaadī n'giinu. Ní Jesucristo yaa'ví yā s'uuúⁿ chi cuuvi yeⁿé yā s'uuúⁿ. ⁴ Ní Cristo 'āā tee yā s'uuúⁿ promesas chí n'dēevéé n'dai ní ng'ēete ca. Ní cucáávā promesas miiⁿ ndís'tiī ní cuuví cuta'á nī yeⁿe vida ngai chí yeⁿe Ndyuūs. Ní cuuvi nnguaⁿ'ai nī yeⁿe nuuⁿndi yeⁿē iⁿ'yeeⁿdí 'cūū, nuūⁿndī chi maaⁿ cuerpo yeⁿe yú neⁿe chi diiⁿ yú. ⁵ Maaⁿ chi i'téenu nī Jesucristo candéé nī cuidado chi n'daacā ca 'cuētineé nī. Ní taachi n'daacā ca 'cuētineé nī tuu'mi ní ca'cueéⁿ nī caati cuuvi deenu cá nī. ⁶ Ní taachi déénú cá nī tuu'mi ní ngaⁿ'a ntiíⁿnyuⁿ nī yeⁿe maaⁿ cuerpo yeⁿé nī. Ní taachi diíⁿ nī chi ngaⁿ'a ntiíⁿnyuⁿ nī yeⁿe maaⁿ cuerpo yeⁿé nī tuu'mi ní cuchēe nī yeⁿe maaⁿ cuerpo yeⁿe nī. Ní taachi cuchēe nī yeⁿe maaⁿ cuerpo yeⁿé nī tuu'mi ní diíⁿ nī tan'dúúcā chi Ndyuūs neⁿé yā chi diíⁿ nī. ⁷ Ní taachi 'āā diíⁿ nī tan'dúúcā chi Ndyuūs neⁿé yā chi diíⁿ nī tuu'mi ní dineⁿé nī 'áámá nī taama nī. Ní taachi dineⁿé nī 'áámá nī taama nī tuu'mi ní 'áámá dinéⁿe nī 'iiⁿ'yāⁿ.

⁸ Ní yeⁿē tanducueⁿē chuū, nduuti chi ndís'tiī diíⁿ nī ní n'dai n'dai diíⁿ nī tuu'mi ní cuuvi diíⁿ nī ntiíⁿnyuⁿ yeⁿe Señor Jesucristo yeⁿe yú. Ní dichíí'vē nī Señor yeⁿe yú. Ní chuū diiⁿ chi dichíí'vē chí deenu n'daāca cá nī Señor Jesucristo yeⁿe yú. ⁹ Ní nduuti chi 'áámá nī nguéé diíⁿ nī tanducueⁿē chuū tuu'mi ní ndís'tiī ní tan'dúúcā 'áámá 'iiⁿ'yāⁿ chi nguenááⁿ 'tiicá nī ti nguéé cuuvi snaaⁿ nī chí yaⁿ'ai. Ní nguéé n'gaacu nī chí nduuvi dēevē nī yeⁿe nuuⁿndi yeⁿe nī chí diíⁿ nī cuááⁿ vmnaaⁿ taachi caama i'téenu nī Jesucristo. ¹⁰ Maaⁿ ní ndís'tiī hermanos yeⁿé cáávā nducueⁿē chuū candēe cá nī cuidado chi 'aama canéé n'daaca nī ndúúcū chi i'téenu nī. Ní canee nī seguro chí Ndyuūs yaa'ví yā ndís'tiī chí cuuvi yeⁿé yā ndís'tiī. Ní ndēevé yā ndís'tiī. Ní nduuti chí diíⁿ nī dendu'ū chí 'túúcā tuu'mi ní 'āā ntéé de'ē cáávā chí diíⁿ nī nuuⁿndi. ¹¹ Ní taachi diíⁿ nī 'túúcā Jesucristo téé yā lugar ndís'tiī chí cuuvi ndaa nī naachi canee Señor Jesucristo chí nadanguaⁿ'ai yā s'uuúⁿ ní naachi cuéⁿé daāⁿmaⁿ ngaⁿ'a ntiíⁿnyuⁿ yā yeⁿē.

¹² Ní cáávā chuū 'úú cueⁿe daāⁿmaⁿ idiíⁿ chí ndís'tiī n'gaacu nī yeⁿē tanducueⁿē chuū 'áará chí deenú n'dai nī yeⁿē. Ní n'gēetinéé n'daaca nī ní n'giindivééⁿ n'daaca nī nduudu cuaacu yeⁿé Ndyuūs. ¹³ 'Úú nadacádiinúúⁿ chí n'daāca ca neⁿe chí canduuchi cá chí 'tíicā diíⁿ chí ndís'tiī cuuvi nan'gaacu nī yeⁿe tanducueⁿē chuū. ¹⁴ Señor Jesucristo yeⁿe yú 'āā ch'iⁿ'í yā 'úú, Pedro, 'tíicā. 'Āā ntéé 'nááⁿ canduuchí ní 'cuūví. ¹⁵ 'Tiicá ntúūⁿ idiíⁿ chí ndís'tiī n'gaacu nī cuéⁿé daāⁿmaⁿ yeⁿe dendu'u 'cūū taachi 'āā n'dií.

'Iiⁿ'yāⁿ n'diichí yā dēevē ngii yeⁿe Cristo

¹⁶ Chííⁿ chí nús'uu ca'cueéⁿ 'nū ndís'tiī yeⁿe Señor Jesucristo yeⁿe yú chí ndaa ntuúⁿ yā ndúúcū poder yeⁿé yā nguéé yeⁿe vaanicadínūuⁿ yeⁿe 'iiⁿ'yāⁿ yeⁿe iⁿ'yeeⁿdí 'cūū. 'Tíicā nús'uu 'āā n'diichí 'nū ndúúcū nduutinaáⁿ maáⁿ 'nū Señor Jesucristo yeⁿe yú chí neené ch'ēete. ¹⁷ Ní n'diichí 'nū chí Cristo ní neené ch'ēete yā taachi Ndyuūs chiida yú dich'ēete yā Jesucristo ní ca'a yā Cristo chí dēevé taavi ngii yā. Caati Ndyuūs chí dēevē ngii ca ngaⁿ'á yā yeⁿe Cristo ní n'giindivééⁿ 'nū nduudú 'cūū. Chuū caⁿ'a Ndyuūs: Sáⁿ'a 'cūū

chi daiyá chi neⁿe taaví ní 'úú nééné yeenu yeⁿē daiyá. ¹⁸ Ní nú'sūū maán 'nū ch'iindiveén 'nū nduudu 'cūū chi chiica yeⁿe va'ai cheeti nguuvi taachi cueⁿé 'nū ndúúcu Jesucristo na yīcū chi duuchi N'deév N'dai.

¹⁹ Maaⁿ ní cu'téenu cá 'nū chi nduudu cuaacu chi 'iiⁿ'yāⁿ profetas candée yā tiempo chi 'āā chó'ōo ní cuaacu. N'daacā ca chi ndís'tiī 'i'neeⁿveéⁿ nī nduudú 'cūū. Nduudú 'cūū tan'dúúca 'áámá chideeve chi ngii yaⁿā na 'áámá cuaaⁿ chí maāiⁿ. 'Tíicā yeⁿē, ní chideeve ní ngii ndii tiempo chi ndaá nguuvi ní can'daā 'íⁿ'nyúⁿ chi nguuvi 'yuudi chí nduudu cuaacu ní canee na staava yeⁿé nī. ²⁰ Neⁿé chi ndís'tiī vmnááⁿ vmnaaⁿ nadacadíinuⁿ nī yeⁿe chuū. Mar 'áámá nduudu yeⁿe libro yeⁿé Ndyuūs chi ngaⁿā yeⁿe 'áámá dendu'ū chi cuchii ndís'tiī nguée dámaāⁿ maán nī cuuvi deenú nī yeⁿē. ²¹ Ní nduudu cuaacu chi ngaⁿa profetas tiempo chi chó'ōo nguée ngaⁿa yā yeⁿe chi nadacadíinuⁿ yā maán yā naati Espíritu N'dai yeⁿé Ndyuūs yaa'ví yā profetas nduudu cuaacu chí caⁿa yā. Ní nduudu yeⁿé yā ngiica yeⁿé Ndyuūs ti 'áámá díⁿ yā ntiiⁿnyuⁿ yeⁿé Ndyuūs.

2

Yeⁿé 'iiⁿ'yāⁿ chi nguée ca'cueéⁿ yā nduudu cuaacu yeⁿé Ndyuūs

¹ Tiempo chi chó'ōo nguuaⁿ 'iiⁿ'yāⁿ Israel véé 'iiⁿ'yāⁿ profetas chi nguée ngaⁿa yā nduudu cuaacu yeⁿé Ndyuūs. 'Tiicā ntúūⁿ tiempo maaⁿ caⁿa n'dai maestros yeⁿe yaacū nguuaⁿ ndís'tiī chi nguée caaⁿ'máⁿ yā nduudu cuaacu yeⁿé Ndyuūs. Ní candée n'de'ei yā nduudu chi nguée cuaacu chi diiⁿ chi nguée i'téenu nī Cristo. Ní 'iiⁿ'yāⁿ s'eeⁿ caaⁿ'máⁿ yā contra yeⁿe Jesucristo chi nadanguáⁿai yā 'iiⁿ'yāⁿ. Ní chíⁿ chi díⁿ yā diiⁿ chi 'iiⁿ'yāⁿ s'eeⁿ niiⁿnuuⁿ nīⁿnuuⁿ nūuⁿ 'cuiinúⁿ maán yā. ² 'Áará chi nguée 'tíicā chiiⁿ chi ngaⁿa 'iiⁿ'yāⁿ s'eeⁿ 'yaaⁿ 'iiⁿ'yāⁿ ní 'caandiveéⁿ yā yeⁿe 'iiⁿ'yāⁿ s'eeⁿ. Ní díⁿ yā chi nguée n'daacā tan'dúúca chi diiⁿ 'iiⁿ'yāⁿ s'eeⁿ. Ní nguée n'daacā ngaⁿa 'iiⁿ'yāⁿ s'eeⁿ yeⁿe yúúniⁿ cuaacu chi evangelio chi nduudu ngai yeⁿe Jesucristo. ³ Ní 'iiⁿ'yāⁿ s'eeⁿ ca'cueéⁿ yā nduudu chi ngiica yeⁿe chi maán yā nadacadíinuⁿ yā ti neⁿé yā tuumī chi ndís'tiī ca'á nī 'iiⁿ'yāⁿ s'eeⁿ. 'Āā 'naaⁿ tiempo chi Ndyuūs 'āā n'diichí yā nuuⁿndi yeⁿé yā ní 'āā ngaⁿá yā chi 'iiⁿ'yāⁿ s'eeⁿ 'āā condenado yā.

⁴ Deenu yú chi Ndyuūs nguée nadich'εcú yā yeⁿe ángeles chi dinuuⁿndí yā naati s'neéⁿ yā cuaaⁿ chupa'ai na infierno ní s'neéⁿ yā naachi maaiⁿ. Ní dichiichí yā ángeles ndúúcu cadenas. Ní ángeles cūnee yā miⁿ ndii nguuvi chi Cristo caⁿá yā n'diichi yā nuuⁿndi. ⁵ Ní deenu yú chi Ndyuūs 'āā idi'cuiinú yā iⁿ'yeeⁿdí 'cūū ndúúcu 'iiⁿ'yāⁿ yeⁿē taachi díⁿ yā chi chee cúúvī vmnááⁿ iⁿ'yeeⁿdí ndúúcu 'iiⁿ'yāⁿ chi nguée n'daacā idiⁿ yā. Ndyuūs dámaāⁿ nadinguaⁿai yā saⁿa Noé chi candée sa nduudu cuaacu yeⁿé Ndyuūs ndúúcu táámá ndeēchē 'iiⁿ'yāⁿ. Tanaⁿa cá yā ní ch'iī yā. ⁶ 'Tiicā ntúūⁿ Ndyuūs díⁿ yā condenar 'iiⁿ'yāⁿ yeⁿe yāāⁿ Sodoma ndúúcu yaāⁿ Gomorra. Ní di'cuiinú yā yāāⁿ s'eeⁿ chi nduuví yāiyāā cáāvā chi dicho'ó yā nguuchi yáⁿā vmnaaⁿ yāāⁿ s'eeⁿ. Ní 'íicú Ndyuūs s'neeⁿ yā ejemplo 'cūū chi 'iiⁿ'yāⁿ chi cuchii cuayiivi, ní nguée n'daacā idiⁿ yā, cuuvi deenú yā táácā cuuvi chó'ōo yeⁿe yā. ⁷ Naati Ndyuūs nadanguaⁿai yā yeⁿe yāāⁿ s'eeⁿ saⁿa Lot chi saⁿā n'dai, saⁿā chi ch'eenu sa chíi caavā chi diiⁿ 'iiⁿ'yāⁿ chi nguée n'daacā. ⁸ Ní Lot miⁿ chi n'dai sa canéé sá nguuaⁿ 'iiⁿ'yāⁿ s'eeⁿ. Ní nguuvi nguuvi n'diichi sa ní n'giindiveeⁿ sa nducuéⁿē chi díⁿ yā chi nguée n'daacā. Ní n'geenu sa ngii na staava yeⁿē sa. ⁹ Ní nduuti chi Ndyuūs díⁿ yā 'túúca tiempo chi 'āā chó'ōo 'tiicā ntúūⁿ Ndyuūs deenú yā táácā chi nadanguáⁿai yā 'iiⁿ'yāⁿ chi i'téenu yā Ndyuūs yeⁿe 'iiⁿ'yāⁿ chi nguée n'daacā idiⁿ yā chí n'diichineeⁿ yā 'iiⁿ'yāⁿ yeⁿe yā. 'Tiicā ntúūⁿ Ndyuūs deenú yā táácā ca'á yā testigo 'iiⁿ'yāⁿ chi nguée n'daacā ndíi taachi ndaa nguuvi chi n'diichí yā nuuⁿndi yeⁿe nducyaaca 'iiⁿ'yāⁿ.

¹⁰ 'Tiicā Ndyuūs ca'a yā castigo 'iiⁿ'yāⁿ chi díⁿ yā nuuⁿndi tan'dúúca chi neⁿe cuerpo yeⁿé yā. Ní nguée n'giindiveeⁿ yā nduudu cuaacu yeⁿe 'iivú Ndyuūs. 'Iiⁿ'yāⁿ s'eeⁿ ní nguée 'va'á yā chi caaⁿ'maⁿ yā cosas chi nguée ndaacā yeⁿe 'iīⁿ'ntyéⁿē. Ní nguée 'va'á yā yeⁿē mar 'áámá. Ní díⁿ yā nducuéⁿē nuuⁿndi chi neⁿe yā. ¹¹ Ní ángeles nguée 'tíica yā. 'Áará chi ditiinu cá yā nguée ti 'iīⁿ'ntyéⁿē s'eeⁿ ti taachi ndaá yā nanááⁿ Señor Jesucristo

yeⁿe yú nguéé cunncáa ngaⁿa ángeles contra yeⁿe 'iĩntyéⁿē s'eeⁿ. ¹² 'Iiⁿ'yāⁿ s'eeⁿ diiⁿ yā tan'dúúca 'yúudu taáⁿ diiⁿ tī ní nguéé nadacadíínuuⁿ tī. 'Tíicā diiⁿ yā. Ní tan'dúúca 'iiti taaⁿ chi 'iĩ'yāⁿ n'nuúⁿ yā ní n'giiⁿ'núⁿ yā 'iiti, 'tíicā 'iĩ'yāⁿ s'eeⁿ. Ní cunncáa ngaⁿa yā yeⁿe dendu'ū chi nguéé ituumicadíínuuⁿ yā. Ní 'cuūví yā tan'dúúca 'áamá 'iiti taaⁿ. ¹³ Ní 'iĩ'yāⁿ s'eeⁿ ní ch'eenú yā chii caati 'āa diiⁿ yā chi tanáⁿ'a yā ch'eenú yā chii. Maaⁿ ní yeenú yā chi dinuuⁿndí yā tan'dúúca chi neⁿe cuerpo yeⁿé yā. Ní nduuti chi 'iĩ'yāⁿ s'eeⁿ caⁿ'á yā ndúúcu nī ní che'é yā ndúúcu nī taachi véé 'viicu yeⁿe nī tuu'mi ní nadacadíínuuⁿ yā chi nginnche'éi yā ndís'tiī. Ní chuū ni cosa chi cuuvi 'cuinaáⁿ yā yeⁿē.

¹⁴ 'Iiⁿ'yāⁿ s'eeⁿ taachi n'diichí yā 'áamá n'daataá neⁿé yā caⁿ'á yā ndúúcu n'daataá miiⁿ. Dámaāⁿ neⁿé yā dinuuⁿndí yā ní nginnche'éi yā 'iĩ'yāⁿ chi debil staava yeⁿé yā chi dinuuⁿndí yā. 'Iiⁿ'yāⁿ s'eeⁿ deenu n'dai yā na staava yeⁿé yā chi neⁿé yā dendu'ū chi nguéé n'daacā. Ní Ndyuūs ngaⁿa yā yeⁿe yā 'tíicā: De'ε chúú cā ya'ai yeⁿé yā ti condenado yā. ¹⁵ 'Iiⁿ'yāⁿ s'eeⁿ divíi yā yeⁿe yúúni cuaacu yeⁿe Ndyuūs ní chiiá yā yúúni chí neⁿe maáⁿ yā. Diiⁿ yā tan'dúúca chi diiⁿ profeta Balaam chi daiya saⁿ'ā Beor. Tiempo chi chó'ōo Balaam miiⁿ neⁿe sa diiⁿ sa ganar tuumī yeⁿe chi nguéé n'daacā chi diiⁿ sa. ¹⁶ Ní taachi cueⁿe sa ndúúcu burro yeⁿe sa, burro yeⁿe sa ngaⁿ'á tī ndúúcu nduudu yeⁿe 'iĩ'yāⁿ ní diiⁿ tī reponder saⁿ'ā Balaam miiⁿ yeⁿē nuuⁿndí chi diiⁿ sa. Ní 'āa ntéé diiⁿ sa nuuⁿndí miiⁿ tiempo miiⁿ.

¹⁷ Ní 'iĩ'yāⁿ s'eeⁿ ní tan'dúúca vaacu nuūⁿnī díyaāi 'tiicá yā. Tan'dúúca meēⁿ chi candéē 'yúúne taaⁿ 'tiicá yā. 'Iiⁿ'yāⁿ s'eeⁿ ní condenado yā ní caⁿ'á yā cho'ó yā naachi diituu n'dái maaⁿ. Ní miiⁿ canee yā cueⁿe daāⁿmaⁿ. ¹⁸ 'Iiⁿ'yāⁿ s'eeⁿ ní ngaⁿ'a yā nduudu n'gēte chi nguéé dichíí'vē. Ní ndúúcu vicio yeⁿe yā, ndúúcu nducuéⁿē nuuⁿndí chi neⁿe cuerpo yeⁿe yā, 'iĩ'yāⁿ s'eeⁿ ní neⁿe yā diiⁿ yā chi tanáⁿ'ā 'iĩ'yāⁿ chi 'āa nduuvideevé yā ní 'āa ntéé caⁿ'á yā ndúúcu 'iĩ'yāⁿ chi dinuuⁿndí yā ní tanáⁿ'a yā neⁿé yā nanguεcúndii ntuúⁿ yā ní dinuuⁿndí yā taama vmnéⁿ'ē. ¹⁹ 'Iiⁿ'yāⁿ s'eeⁿ chi nginnche'éi yā 'iĩ'yāⁿ ngaⁿ'á yā chi ca'á yā 'iĩ'yāⁿ s'eeⁿ chi libre yā. 'Iiⁿ'yāⁿ s'eeⁿ maáⁿ yā ní canéé yā prisioneros yeⁿe nuuⁿndí chi diiⁿ yā. Ní ca'áamá ca'aama 'iĩ'yāⁿ chi nguéé libre yā ní canéé yā maaⁿ poder nuuⁿndí ní nguéé cuuvi cucheε yā yeⁿē. ²⁰ Ní 'iĩ'yāⁿ chi i'téenu yā Señor Jesucristo yeⁿe yú ní yeⁿé yā, ní Cristo 'āa nadanguáⁿ'ai yā 'iĩ'yāⁿ yeⁿe nducuéⁿē chi nguéé n'daacā yeⁿe iⁿ'yeeⁿdí 'cūū. Ní cuayivi miiⁿ nduuti chi 'iĩ'yāⁿ nanguεcunée yā taama vmnéⁿ'ē ní diiⁿ yā dendú'ū nuuⁿndí chi yeⁿe iⁿ'yeeⁿdí 'cūū tuu'mi ní cunncáa ca canee yā nguéé ti tiempo chi 'āa cuéé i'téenu yā Jesucristo. ²¹ N'dáacā ca chi 'iĩ'yāⁿ s'eeⁿ nguéé n'diichí yā yúúni cuaacu yeⁿé Ndyuūs ti taachi 'āa n'diichí yā yúúni cuaacu tuu'mi ní ndaācādaamí yā yeⁿe ley yeⁿé Ndyuūs chi Ndyuūs ca'a yā 'iĩ'yāⁿ s'eeⁿ. ²² Ní cho'oó yeⁿe 'iĩ'yāⁿ s'eeⁿ tan'dúúca chi ngaⁿ'a 'áamá nduudu cuaacu 'tíicā: 'Yaānā nguεcunée tī che'e tī chí ndaāchi tī ní cuuchí chi 'iĩ'yāⁿ naaⁿ'nú yā chi dεεε tī ní nguεcunée tī ngeⁿe tī nguεcundāa tī nguaaⁿ nuūⁿnīⁿ ncheētí.

3

Jesucristo ndaa yā taama vmnéⁿ'ē

¹ Ndís'tiī hermanos yeⁿé chi neⁿe taaví, carta 'cūū ní ndii chíí ndii 'úúví chi idinguúⁿ yeⁿe nī. Ní na 'uuví carta chi idinguúⁿ yeⁿe ndís'tiī, neⁿé diiⁿ chi nadacadíínuuⁿ nī yeⁿe nducuéⁿē chi dεεvé n'dai. Ní teé consejo ndís'tiī chi n'gaacú nī yeⁿe nducuéⁿē chi idinguúⁿ. ² Neⁿé chi n'gaacu nī yeⁿe tiempo chi chó'ōo yeⁿe profetas chi dεεε ní ngaⁿ'a yā nduudu cuaacu. Ní n'gaacú nī yeⁿe tiempo maaⁿ yeⁿe mandamiento yeⁿe Señor chi nadanguáⁿ'ai yā s'uuúⁿ. Mandamiento yeⁿé yā ní apóstoles chi 'cúeeⁿ yā ndís'tiī.

³ Ní vmnááⁿ vmnaaⁿ nadacadíínuuⁿ nī yeⁿe chuū chí nguuvi s'eeⁿ chi 'cuiinū iⁿ'yeeⁿdí 'cūū. Véé 'iĩ'yāⁿ chi duuchinéeⁿ yā yeⁿe nducuéⁿē chi yeⁿé Ndyuūs. Ní 'iĩ'yāⁿ s'eeⁿ diiⁿ yā nuuⁿndí tan'duucā chi maáⁿ yā neⁿe yā. ⁴ Ní ngaⁿ'á yā: ¿Tíi cánéé promesa chi ngaⁿ'a chi Cristo canéé chi ndaa yā táamá vmnéⁿ'ē? Ndií tiempo chi 'āa chó'ōo taachi ch'iī 'iĩ'yāⁿ yeⁿe ndaata yeⁿe yú. 'Āa daamá nūⁿ canéé tanducuéⁿē ndíi taachi Ndyuūs din'dái yā iⁿ'yeeⁿdí. ⁵ 'Iiⁿ'yāⁿ chi ngaⁿ'á yā 'tíicā nguéé neⁿe yā diiⁿ yā cuenta yeⁿe tiempo

chi 'naaⁿ tiempo chi chó'ōo. Tiempo miiⁿ Ndyuūs ngaⁿ'á yā ní ndúúⁿcū nduudu yeⁿ'é yā din'dái yā nánguuvⁱ ndúúⁿcū iⁿ'yeeⁿdí 'cūū. Ní iⁿ'yeeⁿdí 'cūū can'daā ná nuūⁿnīⁿ. Ní iⁿ'yeeⁿdí 'cūū canee na lugar yeⁿ'ē cáávā nduudu yeⁿ'é Ndyuūs. ⁶Ní iⁿ'yeeⁿdí yeⁿ'e tiempo chi chó'ōo ní chiituú nuūⁿnīⁿ ní ndai naāⁿ yeⁿ'ē cáávā chi cheeⁿ taaⁿ cúúvī. ⁷Ní nanguuvi ndúúⁿcū yáⁿ'āa chi véé maaⁿ Ndyuūs ca'á yā orden yeⁿ'ē chi canéé chí candéé yā cuidado yeⁿ'ē ndii tiempo chi cuucu ndúúⁿcū yaⁿ'ā. Ní taachi ngiichi yáⁿ'āa miiⁿ tuu'mi ní Ndyuūs n'diichi yā nuuⁿndi yeⁿ'é 'iiⁿ'yāⁿ. Ní Ndyuūs diiⁿ yā chi 'cuiinū 'iiⁿ'yāⁿ chi nguéé n'daacā.

⁸Maaⁿ ní ndís'tiī hermanos yeⁿ'é chi neⁿ'é taavi, nguéé cuuvi naāⁿ nī chi nanááⁿ Ndyuūs 'áamá nguuvi ní tan'dúúⁿcā chi 'áamá mil nduūyū ní 'áamá mil nduūyū ní tan'dúúⁿcā chi 'áamá nguuvi. 'Tíicā canéé nanááⁿ Ndyuūs. ⁹Ní Señor Jesucristo yeⁿ'ē yú nguéé cuuvi 'naa yā yeⁿ'e chi ngaⁿ'a yā chi diiⁿ yā tan'dúúⁿcā chi nadicadínuuⁿ tanáⁿ'ā saⁿ'ā. Naati Ndyuūs ní véé paciencia yeⁿ'e yā ndúúⁿcū s'uuúⁿ caati nguéé neⁿ'é yā chi 'aama yú cuuvi ndai yú ti neⁿ'é yā chi nducyaaca s'uuúⁿ ni ndaacadaami yú yeⁿ'ē nuuⁿndi yeⁿ'e yú.

¹⁰Ní nguuvi chi ndaa Señor Jesucristo taama vmnéⁿ'ēe, nguuvi miiⁿ ndaā tan'dúúⁿcā chi 'áama duucu chi indáá n'gaaⁿ. Ní nguéé canéé ngiinu yú yeⁿ'ē nguuvi 'cūū taachi Ndyuūs nadi'tuūví yā nanguuvi yuudu n'dái 'cuεécú. Ní tanducuéⁿ'ē chi véé nanguuvi ní cuūcū ní 'cuiinū ndúúⁿcū ngiichi yaⁿ'ā chi 'iiⁿ'nuⁿ taaⁿ. Ní yáⁿ'āa ntúūⁿ va ndúúⁿcū tanducuéⁿ'ē dendu'ū ní cuūcū.

¹¹Deenu yú chi tanducuéⁿ'ē dendu'ū chí 'túúⁿcā 'cuiinu tuií. Ní ¿táácā cuuvi 'cuεetinée nī? Ndís'tiī canee chi ca'á nī núúⁿmánⁿ staava yeⁿ'é nī na ta'a Ndyuūs ní dich'εεté nī Ndyuūs. Ní 'cuεetineé nī dámaāⁿ tan'dúúⁿcā chi Ndyuūs neⁿ'é yā. ¹²'Tíicā 'cuεetineé nī 'naaⁿ chi canee ngiinu yú ndii nguuvi chi ndaā Señor Jesucristo taama vmnéⁿ'ēe. Ní diiⁿ yú nducuéⁿ'ē ntiⁿ'nyuⁿ yeⁿ'e Señor caati niiⁿnuúⁿ niiⁿnuuⁿ cuuvi ndaa yā. Nguuvi chi ndaa yā nánguuvⁱ ní cuūcū ní 'cuiinu ndúúⁿcū tanducuéⁿ'ē chi véé yeⁿ'ē. Ní 'cuiinu ntuií cáávā nguuchi yaⁿ'ā. ¹³Naati s'uuúⁿ ní canéé ngiinu yú chi snaaⁿ yú 'áamá nanguuvi chí ngāi ndúúⁿcū 'áamá iⁿ'yeeⁿdí chí ngāi naachi véé dámaāⁿ nducuéⁿ'ē chi cuaacu ní nducuéⁿ'ē ní n'daacā n'dai. 'Tíicā Ndyuūs ngaⁿ'á yā chi téé yā s'uuúⁿ.

¹⁴Ní cáávā chuū ndís'tiī hermanos chi neⁿ'é taavi, 'naaⁿ tiempo chi cunee ngiinú nī dendu'ú 'cūū candéε cá nī cuidado chi 'diiⁿ 'diiⁿ 'cuεetineé nī ní nguéé dinuuⁿndí nī. Ní 'tíicā nguéé véé culpa yeⁿ'e nī nanááⁿ Ndyuūs taachi Cristo ndaa yā. ¹⁵Diíⁿ nī cuenta chi Señor Jesucristo yeⁿ'e yú ndúúⁿcū ngiinū n'dái diíⁿ yā ndúúⁿcū yú caati neⁿ'é yā chi nanguaⁿ'ai yú. 'Tiicā ntúūⁿ Pablo, hermano yeⁿ'e yú chi neené neⁿ'e yú, 'āā dinguúⁿ yā yeⁿ'é ndís'tiī 'áamá carta ndúúⁿcū vaadī deenu chi Ndyuūs nca'á yā Pablo miiⁿ. ¹⁶Ní Pablo miiⁿ ngaⁿ'á yā yeⁿ'e nducuéⁿ'e 'cūū ndúúⁿcū vaadī deenu yeⁿ'é Ndyuūs na nducyáácá carta chí dinguúⁿ yā. Ní naⁿ'a carta yeⁿ'é yā duū'vi dendu'ú ní n'gíⁿ'i n'dái chi cuuvi déenu yú. Ní 'iiⁿ'yāⁿ chi nguéé deenu yā ndúúⁿcū 'iiⁿ'yāⁿ chi duu'vi i'téenu yā nguéé ngaⁿ'á yā nduudu cuaacu yeⁿ'e dendu'ū chi ngii ní yeⁿ'e 'tεε chi canéé nguūⁿ. Ní caavā chi ngaⁿ'á yā chi nguéé cuaacu ní diíⁿ yā chi canéé chi ntuií maáⁿ yā.

¹⁷Naati ndís'tiī hermanos yeⁿ'é chi neⁿ'é taavi, 'āā deenú nī dendu'ú 'cūū. Cundéε nī cuidado chi nguéé 'caandiveén nī nduudu yeⁿ'e 'iiⁿ'yāⁿ chi nguéé diíⁿ yā chi ngaⁿ'a ley yeⁿ'é Ndyuūs iiⁿ'yāⁿ chi candéε yā ndís'tiī lado yeⁿ'é yā ti ndís'tiī nguéé 'cuεetinée n'daacā ndúúⁿcū chi i'téenu nī. ¹⁸Maaⁿ ní ndís'tiī cu'téenu cá nī Señor Jesucristo yeⁿ'e yú chi nadanguáⁿ'ai yā s'uuúⁿ. Ní itée yā s'uuúⁿ nducuéⁿ'ē chi n'dai taavi yeⁿ'é yā ndúúⁿcū vaadī deenu yeⁿ'é yā. Ngaⁿ'a yú chi Jesucristo miiⁿ ní ch'εεte cá yā maaⁿ ndúúⁿcū nguuvi chí cúchií ní cueⁿ'e daāⁿmaⁿ. 'Tíicā cuuvi.

CARTA VMNÁÁⁿ VMNAAⁿ YEⁿE SAN JUAN

Nduudu cuaacu yeⁿe vida cueⁿe daāⁿmaⁿ

¹ Chiiⁿ chí ndii vmnaaⁿ, chiiⁿ chí ch'iindiveéⁿ 'nū, chiiⁿ chí n'diichí 'nū ndúúcū nduutináaⁿ 'nū, chiiⁿ chí n'gínú 'nū, níícū chiiⁿ chí tuu'vi 'nū ndúúcū ta'á 'nū chiiⁿ ní Nduudu yeⁿe vida cueⁿe daāⁿmaⁿ. ² Ch'iⁿi yā ní naáⁿ 'nū chiiⁿ chi vida cueⁿe daāⁿmaⁿ. Níícú n'diichí 'nū ní caaⁿ'maⁿ cuaacu 'nū, ní yaa'ví 'nū yeⁿe vida cueⁿe daāⁿmaⁿ chi canéé ndúúcū chiidá yā. Ní chiidá yā ch'iⁿi yā nús'uu vida cueⁿe daāⁿmaⁿ miiⁿ. ³ Chiiⁿ chí n'diichí 'nū ní ch'iindiveéⁿ 'nū, chíⁿ chí ngaⁿ'á 'nū yeⁿe vida caati ndis'tíi ni canee cúúⁿmiⁿ nī chí nduuvidaama nī ndúúcū nús'uu. Níícú cuaacu níⁿnyúⁿ nduuvidaama yú ndúúcū chiida yú ní ndúúcū daiya yā Jesucristo. ⁴ Cosa chuu ní dinguúⁿ 'nū yeⁿe ndis'tíi caati vaadi yeenú yeⁿe nī cuuvi cuaacu cá.

Dendyuūs ní dεεενε ngii

⁵ Chuū ní nduudu chí ch'iindiveéⁿ 'nū yeⁿe yā. Chíⁿ chí ngaⁿ'a 'nū chi Dendyuūs ní chidεεενε. Níícú mar 'áámá maāⁿ nguéé ndúúcu yā. ⁶ Ndúúti chi s'uuúⁿ ngaⁿ'ā yú chí ndiidaama yú ndúúcu yā níícú na maaⁿ cachiica yú tuu'mí nduudu yaadi ngaⁿ'ā yú, níícú nguéé idiiⁿ yú chi ngaⁿ'a nduudu cuaacu. ⁷ Nduuti chí cachiica yú na chidεεενε tan'dúúcā chí Jesucristo canee yā na chidεεενε tuu'mi ní nduuvidaama yú 'aama yú ndúúcū taama yú. Yuuúⁿ yeⁿe Jesucristo daiya Dendyuūs inaaⁿnu yā s'uuúⁿ yeⁿe tanducuéⁿe nuuⁿndi yeⁿe yú. ⁸ Nduuti chi ngaⁿ'ā yú chi nguéé nuuⁿndi yú maāⁿ yú nginnche'ei yú s'uuúⁿ ní nguéé canee nduudu cuaacu ndúúcu yú. ⁹ Nduuti chi natúmiiⁿnu yú nuuⁿndi yeⁿe yú tuu'mí Jesucristo miiⁿ ní n'dai yā ní díⁿ yā dácaā chí caaⁿ'máⁿ yā ní nguéé n'daáⁿ yā caati nadach'εεcú yā nuuⁿndi yeⁿe yú. Níícú naaⁿnú yā s'uuúⁿ yeⁿe tanducuéⁿe nuuⁿndi yeⁿe yú. ¹⁰ Nduuti chi ngaⁿ'ā yú chi nguéé nuuⁿndi yú tuu'mi ní idiiⁿ yú chí Jesucristo ngaⁿ'a yā nduudu yaadi, níícú nduudu yeⁿe yā nguéé canéé ndúúcu yú.

2

Cristo ní caaⁿ'máⁿ yā lado yeⁿe yú

¹ Ndis'tíi daiya n'gaiyáá, chuū dinguúⁿ yeⁿe ndís'tíi caati nguéé idiíⁿ nī nuuⁿndi. Níícú nduuti chí 'áámá yā díⁿ yā nuuⁿndi véé táámá yā chí Jesucristo chí neené n'dai chí caaⁿ'maⁿ yā yeⁿe yú ndúúcū Ndyuūs chiida yú. ² Níícú Jesucristo ca'á maáⁿ yā vida yeⁿe maaⁿ yā ní ch'tíi yā cucáávā nuuⁿndi yeⁿe yú. 'Iicu nguéé dámaaⁿ yeⁿe s'uuúⁿ naati cucáávā nuuⁿndi yeⁿe 'iiⁿyāⁿ yeⁿe nún'máⁿ iⁿ'yeēⁿdī.

³ Chuū chí deenu nús'uū chí n'diichí 'nū 'yā ndúúti chí díⁿ 'nū tan'dúúcā chí ngaⁿ'a ley yeⁿe yā. ⁴ Du'ū chí ngaⁿ'a chí n'diichí yā 'iiⁿyāⁿ ní nguéé díⁿ yā tan'dúúcā chí ngaⁿ'a ley yeⁿe yā tuu'mi ní nduudu yaadi chí ngaⁿ'a yā. Níícú nguéé cánéé nduudu cuaacu ndúúcu yā. ⁵ Du'ū chí n'giindiveeⁿ nduudu yeⁿe yā cuaacu níⁿnyúⁿ cánéé n'dai vaadi neⁿe yeⁿe Dendyuūs ndúúcu yā. Chiiⁿ chí deenu yú chí canee yú nduucú yā. ⁶ Du'ū chí ngaⁿ'ā chí canee nduucú yā, cánéé chí cuchiicá tan'dúúcā chí cáchiicá yā.

Ley chí ngai

⁷ Ndis'tíi vi'í, nguéé dinguúⁿ mar 'áámá ley chí ngai, tii ley ndiicúū chí 'āā canee ndíi cuaaⁿ vmnaaⁿ, ley ndiicúū ní ndúúdú chí ch'iindiveéⁿ nī ndíi cuaaⁿ vmnaaⁿ. ⁸ Dinguúⁿ táámá vmnéⁿēe ley ngai yeⁿe ndís'tíi chí cuaacu chí nduucú yā ní nduucú nī. Caati maāⁿ míⁿ 'āā cho'ōo níícú chidεεενε míⁿ ní cuaacu ní ngiichi.

⁹ Du'ū chí ngaⁿ'a chí cachiica na chidεεενε ní nguéé ngíⁿ n'diichi vi'í, tuu'mi ní 'iiⁿyāⁿ miiⁿ cáchiica núnⁿ yā na maāⁿ ndíi maaⁿ. ¹⁰ Du'ū chí neⁿe vi'í cánéé ná chidεεενε ní nguéé idiíⁿ yā chí cundεε ca'a yā yeⁿe taamá yā. ¹¹ Naati du'ū chí nguéé ngii n'diichí yā vi'í cánéé ná maāⁿ níícú cachiica ná maāⁿ, ní nguéé deenú yā tíi cuaaⁿ cachiicá yā caati chí maāⁿ miiⁿ ní nguéé díⁿ chí inaaⁿ yā.

¹² Dinguúⁿ yeⁿe ndís'tiī daiya n'gaiyáa, caati nuuⁿndi yeⁿé nī ních'εecu cáávā chi dúúchī Jesucristo. ¹³ Dinguúⁿ yeⁿe ndís'tiī chiida s'één caati 'āā n'diichí nī 'iiⁿyāⁿ ndii cuáán vmnaaⁿ. Dinguúⁿ yeⁿe ndís'tiī saⁿā ngaiyáa caati cuchéé nī ndúúcū chi nguée n'daacā. Dinguúⁿ yeⁿe ndís'tiī daiya n'gaiyáa caati 'āā n'diichí nī chiida yú. ¹⁴ 'Úú dinguúⁿ yeⁿe ndís'tiī chiida s'één caati 'āā n'diichí nī 'iiⁿyāⁿ chi canee ndíi cuaaⁿ vmnaaⁿ. Dinguúⁿ yeⁿe ndís'tiī saⁿā ngaiyáa caati ditiinú nī. Níicu nduudu yeⁿe Dendyuūs chi cánéé nduucú nī níicú cuchéé nī ndúúcū chi nguée n'daacā.

¹⁵ Nguéeé dinéⁿe nī iⁿyéⁿdī ndíi nguéeé dendu^u chi véé na iⁿyéⁿdī. Du'u chí dineⁿe iⁿyéⁿdī vaadī neⁿe yeⁿe Dendyuūs nguéeé canéé nduucú yā. ¹⁶ Caati tánducuéⁿē chi véé na iⁿyéⁿdī chi neⁿē cuerpo yeⁿe yú ndúúcū chi neⁿē nduutináaⁿ yú, níicú vaadī ingueéé yeⁿe vida yeⁿe iⁿyéⁿdī ní nguéeé yeⁿe chiida yú, tiī ní yeⁿe iⁿyéⁿdī. ¹⁷ Iⁿyéⁿdī nínchó'ōo ndúúcū taanduvéé yeⁿē ndúúcū vaadī neⁿe chi nguéeé n'daacā. Naati du'u 'iiⁿyāⁿ chi díiⁿ yā chi neⁿe Dendyuūs, 'iiⁿyāⁿ miiⁿ cunée yā cueⁿe daāⁿmaⁿ.

Yeⁿe nduudu cuaacu ní yeⁿe nduudu yaadi

¹⁸ Ndís'tiī daiya n'gaiyáa, 'āā chéé 'cuiinu hora tan'dúúcā chi ndís'tiī ch'iindiveéⁿ nī yeⁿe chí anticristo miiⁿ ní ndaa yā. 'Tiicá ntúūⁿ chi caama véé chi n'dee n'dái 'iiⁿyāⁿ ní ngaⁿá yā chi anticristo yā. Tii ní cucáavā chi s'uuúⁿ deenu yú chi 'āā chéé 'cuiinu hora. ¹⁹ 'Iiⁿyāⁿ s'eeⁿ can'dáa yā yeⁿe yú naati nguéeé yeⁿe yú 'yā. Nduuti chi yeⁿe yú 'áamá canée yā nduucú yú naati can'dáa yā ní cueⁿé yā. Ní chíiⁿ ní cuuⁿmiⁿ chí iiⁿyāⁿ s'eeⁿ ní nguéeé yeⁿe yú 'yā.

²⁰ Naati ndís'tiī ní véé yeⁿé nī chi ca'ā Espíritu N'dai yeⁿé Ndyuūs. Ní ndís'tiī nin'diichí nī tanducuéⁿē dendu^u. ²¹ Nguéeé idinguúⁿ yeⁿe ndís'tiī tan'dúúca chi nguéeé deenú nī nduudu cuaacu, ti idinguúⁿ tan'dúúca chi 'āā deenú nī ti nguéeé véé ndii 'áamá nduudu yaadi chí yeⁿe nduudu cuaacu.

²² ¿Du'ū chi yaadi míiⁿ? 'Iiⁿyāⁿ chi ngaⁿá yā chi nguéeé Jesús chi Cristo ní yaadi yā. 'Iiⁿyāⁿ s'eeⁿ chi anticristo chí caaⁿmán yā chi nguéeé i'téenu yā Dendyuūs chiida yú ndúúcū daiyá yā. ²³ Du'ū chí nguéeé i'téenu yā daiyá yā ní nguéeé canée yā ndúúcū chiidá yā. Du'ū chí i'téenu yā daiyá yā canée yā ndúúcū chiidá yā.

²⁴ Tuuⁿmi ní chíiⁿ chí ch'iindiveéⁿ nī ndíi vmnaaⁿ 'tíicā canee cúúⁿmíⁿ chí canée ndúúcū ndís'tiī. 'Tiicá ntúūⁿ ndís'tiī ní yeⁿē daiyá yā ní yeⁿe chiida yú cueⁿe daāⁿmaⁿ. ²⁵ Chuū compromiso chí díiⁿ yā ndúúcū nús'uu chí cunee yú ndúúcū vida cueⁿe daāⁿmaⁿ.

²⁶ Dinguúⁿ chuū yeⁿē ndís'tiī chí yeⁿé 'iiⁿyāⁿ chí nginnche'éi yā ndís'tiī. ²⁷ Naati chíiⁿ chí yeⁿē Espíritu N'dai yeⁿé Ndyuūs chí ndís'tiī sta'á nī yeⁿé yā, chuū canée ndúúcū ndís'tiī. Nguéeé canee cúúⁿmíⁿ chí du'ū veε iiⁿyāⁿ ca'cueeⁿ yā ndís'tiī, naati Espíritu N'dai yeⁿé Ndyuūs maán yā ngi'cuéeⁿ yā ndís'tiī nducuéⁿē dendú'ū. 'Tíicā chuū ní nduudu cuaacu, nguéeé nduudu yaadi. Tan'dúúca chí chí'cueeⁿ yā ndís'tiī, 'túúca canée diitú nī ndúúcū nduudu miiⁿ.

²⁸ Maaⁿ ndís'tiī daiya n'gaiyáa, cunée nī chí yeⁿé nī caatí taachi Cristo ndaa yā véé nduudu yeⁿē yú nduucú yā. Ní nguéeé 'cuiináaⁿ yú nanáaⁿ yā taachi ndaa yā. ²⁹ Ndúúti chí ndís'tiī déenu nī chí Cristo miiⁿ ní n'dai yā, 'tíicā ntúūⁿ deenu ndís'tiī chí du'ū chí díiⁿ chí n'daacā ch'iindiyáaⁿ táamá yeⁿé yā.

3

'Iiⁿyāⁿ s'eeⁿ chí daiyá Dendyuūs

¹ Cun'díichí ndís'tiī vaadī néⁿe chí tee chiida yú s'uuúⁿ chí yaa'vi yā s'uuúⁿ chí daiyá Dendyuūs s'uuúⁿ. Cáávā chuū chí iⁿyéⁿdī nguéeé in'diichi s'uuúⁿ caati nguéeé in'diichi Cristo. ² Ndís'tiī chí neⁿe taaví, maaⁿ ní daiya Dendyuūs s'uuúⁿ. Ní nguéeé ngii yā s'uuúⁿ táacā chí cūnee yú. Caati deenu yú taachi ndaa yā 'iiⁿyāⁿ miiⁿ ní tan'dúúca yā 'tíicā ntúūⁿ s'uuúⁿ, caati n'diichi yú 'iiⁿyāⁿ taacá yā. ³ Du'ū chí canee ngíínú yā chuū ní nadεεvé yā tan'dúúca chí Ndyuūs miiⁿ ní deεvé yā.

⁴ Du'ū chí idiiⁿ nuuⁿndi nguéeé díiⁿ yā tanducuéⁿē chí ngaⁿa ley. Níicú nuuⁿndi ní chiiⁿ chí nguéeé díiⁿ yā chí ngaⁿa ley. ⁵ Ndís'tiī déenu nī chí Dendyuūs ní ndaa yā chí

divii yā nuuⁿndi yeⁿ'ē yú. Níícú nguéé vée nuuⁿndi yeⁿ'é yā. ⁶ Du'ū chi yeⁿ'é yā nguéé idiiⁿ nuuⁿndi. Du'ū chi idiiⁿ nuuⁿndi nguéé n'diichí yā 'iiⁿ'yāⁿ. ⁷ Ndís'tiī daiya n'gaiyāa nguéé canche'éi ní mar 'áámá 'iiⁿ'yāⁿ. Du'ū chi idiiⁿ dendu'ū chí n'daacā tuu'mi ní n'dai tan'dúúcā 'iiⁿ'yāⁿ miiⁿ ní n'dai yā. ⁸ Du'ū chi idiiⁿ nuuⁿndi ní yeⁿ'e yááⁿ'guinūⁿ caati yááⁿ'guinūⁿ diiⁿ nuuⁿndi sa ndii vmaⁿ. Cáávā chuū ndaá daiya Dendyuūs cucáávā chí nadítuuví yā chí diiⁿ yááⁿ'guinūⁿ.

⁹ Du'ū chí ch'iindiyáaⁿ yā taama vmnéⁿ'ēe ní yeⁿ'e Dendyuūs ní nguéé idiiⁿ yā nuuⁿndi caati ndaata yeⁿ'é Ndyuūs canéé ndúúcu yā. Ní nguéé ngii diiⁿ yā nuuⁿndi caati ch'iindiyáaⁿ yā taama vmnéⁿ'ēe ní yeⁿ'é Dendyuūs. ¹⁰ Níícú chuū chí n'giⁿ'i chεε chí daiya Dendyuūs. Níícú n'giⁿ'i chεε chí daiya yááⁿ'guinūⁿ. Du'ū chi nguéé idiiⁿ n'daacā ní nguéé neⁿ'e vi'í, ní nguéé yeⁿ'e Dendyuūs.

Dineⁿ'e yú 'aama yú taama yú

¹¹ Chuū ní nduudu cuaacu yeⁿ'é Ndyuūs chi ndís'tiī ch'iindiveéⁿ ní ndii vmaⁿ, chi dineⁿ'e yú 'aama yú ndúúcu taama yú. ¹² Nguéé tan'dúúcā saⁿ'ā Caín chi yeⁿ'ē yááⁿ'guinūⁿ. Saⁿ'ā ch'iiⁿ'nuⁿ sá 'diinū sa. ¿Íícú de'ē cáávā chí ch'iiⁿ'nuⁿ sá 'diinū sa? 'Tíicā diiⁿ sa caati chííⁿ chí maaⁿ sa diiⁿ sa ní nguéé n'daacā. Níícú chiiⁿ chí diiⁿ 'diinū sa ní n'daacā.

¹³ Ndís'tiī vi'í, 'áá nguéé n'diichí ní chí 'iiⁿ'yāⁿ yeⁿ'e íⁿ'yeeⁿdí nguéé neⁿ'é yā ndís'tiī. ¹⁴ 'Āā cho'ō yú vaadī n'gii ní 'āā n'gεetinéeⁿ yú ndúúcu vida cueⁿ'e daāⁿmaⁿ. S'uuúⁿ déenu yú ti neⁿ'e yú vi'í yú. Du'ū chí nguéé neⁿ'e vi'í, 'iiⁿ'yāⁿ miiⁿ cánéé vaadī n'gii ndúúcu yā. ¹⁵ Du'ū chí nguéé n'diichí vi'í 'caaⁿ'núⁿ yā 'iiⁿ'yāⁿ. Níícú deenu yú chí 'iiⁿ'yāⁿ chí n'giⁿ'i nūⁿ 'iiⁿ'yāⁿ nguéé canéé vida cueⁿ'e daāⁿmaⁿ ndúúcu yā. ¹⁶ Ní ndúúcu chuū n'diichí yú vaadī néⁿ'e, caati ch'ii Jesús cáávā s'uuúⁿ. 'Tiicá ntúūⁿ s'uuúⁿ canee chí 'cuūví yú lado yeⁿ'ē vi'í yú. ¹⁷ Naati du'ū chí vée yeⁿ'ē tanducuéⁿ'ē chí vεε yeⁿ'e íⁿ'yeeⁿdí 'cūū níícú naáⁿ yā vi'í yā chí nguéé yeⁿ'é yā, ní nguéé neⁿ'e yā ca'á yā 'iiⁿ'yāⁿ, ¿táácā cūnee vaadī neⁿ'e yeⁿ'e Dendyuūs nduucú yā? ¹⁸ Ndís'tiī daiya n'gaiyāa, nguéé dineⁿ'e yú ndúúcu nduudu yeⁿ'e yú ndúúcu chí caaⁿ'maⁿ yú naati ndúúcu ntiⁿ'nyuⁿ chí diiⁿ yú ndúúcu vaadī cuaacu.

Vée confianza yeⁿ'e yú nanááⁿ Ndyuūs

¹⁹ Ndúúcu chuū ní deenu yú chí vaadī cuaacu ní ndúúcu yú. Níícú staava yeⁿ'e yú seguro canéé nanááⁿ yā. ²⁰ Ndúúti chí staava yeⁿ'e yú caaⁿ'maⁿ nuuⁿndi yeⁿ'e yú, ch'εεte cá Dendyuūs nguéé ti staava yeⁿ'e yú. Níícú déenu yā nducuéⁿ'ē dendu'ū. ²¹ Ndís'tiī chí neⁿ'é, ndúúti chí staava yeⁿ'e yú nguéé caaⁿ'maⁿ nuuⁿndi yeⁿ'e yú tuu'mi ní vée confianza yeⁿ'e yú ndúúcu Dendyuūs. ²² Nducuéⁿ'ē chí caaca yú Ndyuūs, itée yā yeⁿ'e yú caati diiⁿ yú chí ngaⁿ'a ley yeⁿ'é yā níícú idiiⁿ yú cosa chí n'daacā nanááⁿ yā. ²³ Chūū chí ley yeⁿ'é yā, chí i'teenu yú chí duuchi daiyá yā Jesucristo, ní dineⁿ'ē yú 'aama yú ndúúcu taama yú, tan'dúúcā chí ngaⁿ'á yā nduucú yú. ²⁴ Du'ū chí diiⁿ chí ngaⁿ'a ley yeⁿ'é yā canéé ndúúcu Ndyuūs, níícú Dendyuūs canee yā nduucú. Ní chuū chí deenu yú chí 'áámá cūnee yā ndúúcu yú cáávā Espíritu N'dai yeⁿ'é yā chí tee yā s'uuúⁿ.

4

Yeⁿ'e Espíritu N'dai yeⁿ'é Ndyuūs ní yeⁿ'e espíritu chí contra yeⁿ'e Cristo

¹ Ndís'tiī chí neⁿ'é, nguéé cu'téenu ní tanducuéⁿ'ē espíritu naati n'díichineeⁿ ní tanducuéⁿ'ē espíritu chεé chí yeⁿ'e Dendyuūs caati néené 'yaaⁿ 'iiⁿ'yāⁿ nguéé ngaⁿ'a yā nduudu cuaacu yeⁿ'e Dendyuūs. ² Caati 'tíicā ní cuuvi deenu ní Espíritu chí yeⁿ'e Dendyuūs 'yā. Tanducuéⁿ'ē espíritu chí ntúmiiⁿ'nuⁿ chí Jesucristo ní ndaá yā íⁿ'yeeⁿdí 'cūū ní yeⁿ'e Dendyuūs. ³ Niicu tanducuéⁿ'ē espíritu chí nguéé ntúmiiⁿ'nuⁿ chí Jesucristo ní ndaá yā íⁿ'yeeⁿdí tan'dúúcā s'uuúⁿ nguéé yeⁿ'e Dendyuūs 'yā. Chííⁿ chí espíritu yeⁿ'ē anticristo. 'Āā ch'iindiveéⁿ ní yeⁿ'ē espíritu yeⁿ'e anticristo chí cánéé chí ndaa ní maaⁿ 'āā canéé íⁿ'yeeⁿdí 'cūū.

⁴ Ndís'tiī ní daiyá yeⁿ'e Dendyuūs ndís'tiī. Níícú 'āā chichéé ní yeⁿ'e espíritu chí canéé íⁿ'yeeⁿdí 'cūū chí espíritu yeⁿ'e anticristo caati 'iiⁿ'yāⁿ chí canéé ndúúcu ní ch'εεte cá yā

nguéeé ti espíritu chi canéeé iⁿ'yeeⁿdí 'cūū. ⁵ Ní espíritu ní yeⁿ'e iⁿ'yeeⁿdí 'cūū, caavā chííⁿ chi ngaⁿ'á yā yeⁿ'e iⁿ'yeeⁿdí. Ní 'iⁿ'yāⁿ yeⁿ'e iⁿ'yeeⁿdí n'giindiveéⁿ yā yeⁿ'ē. ⁶ S'uuúⁿ ní yeⁿ'é Dendyuūs s'uuúⁿ. Du'u chí n'diichí Dendyuūs n'giindiveéⁿ yā yeⁿ'e yú. Du'u chí nguéeé yeⁿ'e Dendyuūs, nguéeé n'giindiveéⁿ yā yeⁿ'e yú. Caati ndúúcu chúū ní n'diichi yú Espíritu yeⁿ'e nduudu cuaacu ní espíritu chi nguéeé yeⁿ'e nduudu cuaacu.

Ndyuūs ní vaadī neⁿ'e

⁷ Ndís'tiī chi neⁿ'e taaví, dineⁿ'ē yú 'aama yú taama yú caati vaadī neⁿ'e ní yeⁿ'e Dendyuūs. Nducyáácá 'iⁿ'yāⁿ chi ya'āi 'íínú yā 'iⁿ'yāⁿ ní yeⁿ'e Dendyuūs 'iⁿ'yāⁿ miiⁿ, ní n'diichi yā Dendyuūs. ⁸ Du'u chi nguéeé idinéⁿ'e yā 'iⁿ'yāⁿ nguéeé in'diichí yā Dendyuūs, ti Dendyuūs ní vaadī neⁿ'e. ⁹ Níícú chuū chi ch'iⁿ'í yā nanáaⁿ yú ní vaadī neⁿ'e yeⁿ'e Dendyuūs. Níícú chuū chí Dendyuūs dichó'o yā 'áámá n'dyáⁿ'ā daiya yā iⁿ'yeeⁿdí 'cūū caati cuuvi 'cuεti nduuchi yú cáávā 'iⁿ'yāⁿ mííⁿ. ¹⁰ Níícú chuū ní chííⁿ chí canéeé vaadī neⁿ'e. Nguéeé chi s'uuúⁿ chí dinéⁿ'e yú Dendyuūs miiⁿ, ti Dendyuūs mííⁿ chí idinéⁿ'e yā s'uuúⁿ, níícú dichó'o yā daiyá yā chí ch'iⁿ'i yā lado yeⁿ'e yú cucáávā nuūⁿndí yeⁿ'e yú.

¹¹ Ndís'tiī chi neⁿ'é, ndúúti chi 'tíicā neⁿ'e Dendyuūs s'uuúⁿ 'tiicá ntúūⁿ s'uuúⁿ canéeé chí dinéⁿ'e yú 'aama yú taama yú. ¹² Mar 'áámá 'iⁿ'yāⁿ nguéeé n'diichí yā Dendyuūs. Ndúúti chí idinéⁿ'e yú 'aama yú taama yú, Dendyuūs ní canéeé yā ndúúcu yú. Níícú vaadī neⁿ'e n'daacā n'dai canéeé ndúúcu yú. ¹³ Ndúúcu chuū ní deenu yú chí canee yú nduucú yā ní 'iⁿ'yāⁿ miiⁿ nduucú yā s'uuúⁿ cáávā chí tee yā Espíritu N'dai yeⁿ'é Ndyuūs s'uuúⁿ. ¹⁴ S'uuúⁿ in'diichí yú ní ngaⁿ'a yú nduudu cuaacu chí chiida yú dichó'o yā daiya yā. Ní daiya yā nadangáⁿ'ai yā 'iⁿ'yāⁿ yeⁿ'e tanducuéⁿ'ē nuūⁿndí chí véé yeⁿ'e yā yeⁿ'ē iⁿ'yeeⁿdí 'cūū. ¹⁵ Du'ū chí intúmiⁿ'nuⁿ chí Jesús ní daiyá Dendyuūs 'yā, Dendyuūs canéeé yā nduucú yā, ní 'iⁿ'yāⁿ miiⁿ canéeé yā ndúúcu Dendyuūs.

¹⁶ Níícú s'uuúⁿ nin'diichi yú ní i'teenu yú chéé chí vaadī neⁿ'e chí Dendyuūs dineⁿ'é yā s'uuúⁿ. Vaadī neⁿ'ē mííⁿ ní Dendyuūs. Níícú 'iⁿ'yāⁿ chí neⁿ'é yā nducyaaca 'iⁿ'yāⁿ ní yeⁿ'e Dendyuūs 'iⁿ'yāⁿ. Níícú Dendyuūs canéeé yā nduucú yā. ¹⁷ Ní chuū ní vaadī neⁿ'e chí n'dai taavi chí véé yeⁿ'e yú. Níícú véé nduudu yeⁿ'e yú nduucú yā nguuvi chí ndaa juicio. Tan'dúúca 'iⁿ'yāⁿ miiⁿ 'tíicā ntúūⁿ s'uuúⁿ canéeé yú iⁿ'yeeⁿdí. ¹⁸ Vaadī neⁿ'é ní nguéeé vaadī 'va'ā. Naati chííⁿ chí n'daacā taavi yeⁿ'e vaadī neⁿ'e i'neéⁿ 'áámá lado vaadī 'va'ā ti vaadī 'va'a ngíí chí 'cuínáaⁿ yú. Du'ū chí 'va'a nguéeé canéeé vaadī neⁿ'ē n'daacā ndúúcu.

¹⁹ S'uuúⁿ ní idinéⁿ'e yú 'yā ti 'iⁿ'yāⁿ miiⁿ dinéⁿ'e yā s'uuúⁿ vmnaaⁿ. ²⁰ Du'ū chí ngaⁿ'a: 'Úú idineⁿ'é Dendyuūs, níícú nguéeé in'diichí yā vi'i yā, ní yaadí yā. Caati dú'u chí nguéeé idinéⁿ'e yā vi'i chí n'diichí yā, ¿táácā cuuvi dinéⁿ'e yā Dendyuūs chí nguéeé in'diichí yā? ²¹ Niicu s'uuúⁿ ní canee yú ndúúcu ley yeⁿ'é yā. Du'u chí idinéⁿ'e Dendyuūs, 'tiicá ntúūⁿ idinéⁿ'e yā vi'i yā.

5

S'uuúⁿ cuuvi cuchεε yú yeⁿ'e iⁿ'yeeⁿdí

¹ Nducyáácá yā chí i'téenu yā chí Jesús chí Cristo miiⁿ tuu'mi ní ch'iindiyáaⁿ yā táámá yeⁿ'é Dendyuūs. Nducyáácá yā chí dinéⁿ'e yā chíida yú, idinéⁿ'e ntúūⁿ yā 'iⁿ'yāⁿ chí daiyá yā. ² Ndúúcu chuū ní deenu yú chí idinéⁿ'e yú 'iⁿ'yāⁿ s'eeⁿ chí daiya Dendyuūs miiⁿ taachi idinéⁿ'e yú Dendyuūs ní diiⁿ yú chí ngaⁿ'a ley yeⁿ'e yā. ³ Caati chuū chí vaadī neⁿ'e yeⁿ'e Dendyuūs chí s'uuúⁿ ní diiⁿ yú chí ngaⁿ'a ley yeⁿ'e yā. Ní ley yeⁿ'e yā nguéeé cosa chí 'cuinaaⁿ yú yeⁿ'ē. ⁴ Nducyáácá yā chí ch'iindiyáaⁿ táámá ní yeⁿ'é Dendyuūs ní cuuvi cuchéε yā yeⁿ'e iⁿ'yeeⁿdí. Ní chuū chí diiⁿ chí cuchéε yú yeⁿ'e iⁿ'yeeⁿdí, ní chuū chí i'teenu yú Dendyuūs. ⁵ ¿Du'ū chí cuuvi cuchεε yeⁿ'e iⁿ'yeeⁿdí? 'Iⁿ'yāⁿ chí i'téenu yā chí Jesús ní daiyá Dendyuūs 'yā ní cuchεε yā.

Nduudu cuaacu yeⁿ'e Daiyá Ndyuūs

⁶ Ní chuū ní Jesucristo chí ndaa ndúúcu nuūⁿníⁿ ndúúcu yuuúⁿ. Nguéeé dámaāⁿ ndúúcu nuūⁿníⁿ caati ndúúcu nuūⁿníⁿ ndúúcu yuuúⁿ. Ní Espíritu N'dai yeⁿ'é Ndyuūs ngaⁿ'ā

nduudu cuaacu yeⁿe yā caati Espíritu miiⁿ ní vaadī cuaacu. ⁷ Caati 'iinu yā ngaⁿ'a yā nduudu cuaacu na va'ai chēeti nguuvi, Dendyuūs chiida yú ndúúcū Nduudu ndúúcū Espíritu N'dai yeⁿ'é Ndyuūs. Níicú naachi ndii 'iinú yā vεε 'áámá núúⁿ yā. ⁸ Véé 'iinu yā chi ngaⁿ'a yā nduudu cuaacu ná íⁿ'yeēⁿdi 'cūū ní Espíritu N'dai yeⁿ'é Ndyuūs ndúúcū nuūⁿnīⁿ ndúúcū yuuúⁿ. Ní naachi ndúú 'iinu yā ní véé 'áámá núúⁿ yā. ⁹ Ndúúti chí cu'teenu yú nduudu cuaacu yeⁿ'é 'iiⁿ'yāⁿ yeⁿ'e íⁿ'yeeⁿdí 'cūū ch'εεε ca nduudu cuaacu yeⁿ'é Dendyuūs nguéé ti 'iiⁿ'yāⁿ miiⁿ. Caati chúū chííⁿ chí nduudu cuaacu yeⁿ'é Dendyuūs, Ndyuūs ngaⁿ'á yā nduudu cuaacu yeⁿ'e daiyá yā. ¹⁰ Du'ū chí i'teenu daiyá Dendyuūs véé nduudu cuaacu ndúúcū maāⁿ. Du'ū chi nguéé i'teenu Dendyuūs, díⁿ yā chi Dendyuūs ní yaadi yā caati nguéé i'téenu yā nduudu cuaacu chí Dendyuūs chiida yú ngaⁿ'á yā yeⁿ'ē Daiyá yā. ¹¹ Níicú chuū chi nduudu cuaacu ní chuū chí Dendyuūs téé yā vida cueⁿ'e daāⁿmaⁿ s'uuúⁿ. Níicú vida cueⁿ'e daāⁿmáⁿ 'cūū ní yeⁿ'ē daiya yā. ¹² Du'ū chí i'teenu daiya yā véé vida cueⁿ'e daāⁿmaⁿ yeⁿ'e yā. Du'ū chí nguéé yeⁿ'e daiya yā nguéé véé vida cueⁿ'e daāⁿmaⁿ yeⁿ'é yā.

Ch'iīnū carta ndúúcū consejos

¹³ Chuū ní dinguúⁿ yeⁿ'e ndís'tiī chí i'téenu nī chí Cristo ní daiyá Dendyuūs caati maaⁿ ní cuuvi cádínuuⁿ nī chí véé vida cueⁿ'e daāⁿmaⁿ yeⁿ'é nī. Níicú cu'téenu nī chí Cristo ní daiyá Dendyuūs miiⁿ.

¹⁴ Ní chuū ní confianza chí véé yeⁿ'e yú ndúúcu yā. Nduuti chí s'uuúⁿ caaca yú 'yā tan'dúúcā chí neⁿ'é yā chí caaca yú 'yā 'iiⁿ'yāⁿ miiⁿ n'giindiveéⁿ yā yeⁿ'ē yú. ¹⁵ Nduuti chí deenu yú chí n'giindiveéⁿ yā yeⁿ'e yú yeⁿ'e tanducuéⁿ'ē chí caaca yú 'yā, tuu'mi ní 'āā deenu yú chí itée yā s'uuúⁿ chíiⁿ chí 'āā chíica yú 'yā.

¹⁶ Du'ū chí n'diichi chí dinuuⁿndí vi'i nuuⁿndi chí nguéé yeⁿ'e vaadī n'gii, canéé chí caacá yā Dendyuūs chí Dendyuūs ca'á yā vida cueⁿ'e daāⁿmaⁿ yeⁿ'é yā. Ngaⁿ'á yeⁿ'e 'iiⁿ'yāⁿ chí nguéé dinuuⁿndí yā yeⁿ'e vaadī n'gii. Véé nuuⁿndi chí yeⁿ'e vaadī n'gii. Ní yeⁿ'e chuū nguéé caacá chí caacá nī yeⁿ'e 'iiⁿ'yāⁿ chí diiⁿ nuuⁿndí yeⁿ'e vaadī n'gii. ¹⁷ Tanducuéⁿ'ē chí nguéé yeⁿ'e nduudu cuaacu ní nuuⁿndi, naati véé nuuⁿndi mííⁿ chí nguéé yeⁿ'e vaadī n'gii.

¹⁸ 'Āā deenu yú du'u 'iiⁿ'yāⁿ chí ch'iindiyáⁿ yā táámá ní yeⁿ'e Dendyuūs ní nguéé idinuuⁿndí yā. 'Iiⁿ'yāⁿ miiⁿ candéε yā cuidado yeⁿ'e maáⁿ yā. Ní yááⁿn'guinūuⁿ nguéé cuuvi tuneēⁿ 'iiⁿ'yāⁿ miiⁿ.

¹⁹ Déenu yú ti yeⁿ'e Dendyuūs s'uuúⁿ, ní tanáⁿ'ā 'iiⁿ'yāⁿ yeⁿ'e íⁿ'yeēⁿdí canéé yā lado yeⁿ'e yááⁿn'guinūuⁿ.

²⁰ Déenu yú ti daiya Dendyuūs miiⁿ ní ndaá yā. Ní tee yā chí cadinuuⁿ yú, ní 'íicú n'diichi yú 'iiⁿ'yāⁿ chí cuaacu yā. Ní s'uuúⁿ ní yeⁿ'é 'iiⁿ'yāⁿ chí cuaacu yā ní yeⁿ'e daiya Dendyuūs chí Jesucristo. Dendyuūs miiⁿ ní 'iiⁿ'yāⁿ chí cuaacu, 'iiⁿ'yāⁿ chí véé vida cueⁿ'e daāⁿmaⁿ yeⁿ'é yā. ²¹ Ndís'tiī daiyá cundéε nī cuidado ti nguéé cu'téenu nī santos ídolos. 'Tíicā cuuvi.

CARTA CUAYIIVI YEⁿE SAN JUAN

Yeⁿe nduudu cuaacu ní yeⁿē vaadi neⁿe

¹ 'Úú Juan chi saⁿā chi ngaⁿa ntiiⁿnyuⁿ yeⁿe yaācū idinguúⁿ yeⁿē n'daataá chí Ndyuūs ndεεve yā ndúúcū daiya yā chi cuaacu níⁿnyúⁿ neⁿé. Ní nguéé 'úú dámaáⁿ neⁿé ti 'tiicá ntúūⁿ nducyáácá yā chi n'diichí yā nduudu cuaacu. ² Ní cáāvā chi véé vaadi cuaacu yeⁿe yú ní caavā nduudu cuaacu chi canéé ndúúcu yú, 'áámá cūnee tandíí ndúúcu yú. ³ Neⁿé chi canéé ndúúcu ndís'tiī vaadi n'dai yeⁿé Ndyuūs ndúúcu vaadi ya'ai 'iinu yeⁿe yā ndúúcu 'diiⁿ yeⁿe Dendyuūs chiida yú ndúúcu Señor Jesucristo chí daiya Dendyuūs chi chiida yú. Tanducuéⁿē chuū canéé ndúúcu nī ndúúcu nduudu cuaacu ndúúcu vaadi neⁿē.

⁴ 'Āā 'áámá yeenú caati chí nindaācá daiya di chí diⁿ yā chiiⁿ chi cuaacu tan'dúúcā s'uuúⁿ chi sta'a yú ley yeⁿē chiida yú. ⁵ Maaⁿ ní idi'cuítú n'diī n'daatā chí dinéⁿe yú 'áámá yú táámá yú. Chuū nguéé tan'dúúcā chi idinguúⁿ 'áámá ley ngaī caati ley yeⁿē yú chíⁿ chí canee ndíí cuaaⁿ vmnaaⁿ. ⁶ Níícú chuū chí vaadi neⁿe ní chiiⁿ chi cachiica yú tan'dúúcā chi caaⁿmaⁿ ley yeⁿe yā. Ley yeⁿe yā ní chuū chí cachiicá nī ndúúcu vaadi neⁿe tan'dúúcā chi n'giindiveéⁿ nī ndíí cuaaⁿ vmnaaⁿ.

'Iiⁿyāⁿ chi nginnche'éí yā 'iiⁿyāⁿ

⁷ N'dee n'dái 'iiⁿyāⁿ 'āā nginnche'éí yā 'iiⁿyāⁿ na iⁿyeeⁿdí 'cūū. Nguéé natumiiⁿnúⁿ yā chí Jesucristo ní ndaá yā tan'dúúcā s'uuúⁿ. 'Iiⁿyāⁿ chí 'tíicā nginnche'éí yā, 'tiicá ntúūⁿ anticristo yā. ⁸ Cundéé nī cuidado yeⁿē maáⁿ nī ní nguéé dindai yú tanducuéⁿē ntiiⁿnyuⁿ chí diiⁿ yú ti s'uuúⁿ ní cuuvi cuta'a yú tanducuéⁿē chí yeⁿe yú.

⁹ Du'ū chí diⁿ nuuⁿndi ní nguéé 'áámá canéé yā ndúúcu nduudu cuaacu yeⁿe Cristo, nguéé yeⁿe Dendyuūs 'iiⁿyāⁿ. Du'ū chí 'aama canéé ndúúcu nduudu cuaacu yeⁿē Cristo, tuu'mí 'iiⁿyāⁿ miiⁿ ní yeⁿe chiida yú Dendyuūs ndúúcu daiyá yā. ¹⁰ Du'ū chí ndaa vaacú nī chí nguéé ngaⁿa nduudu cuaacú 'cūū nguéé 'cuaáⁿ nī chí cunée yā na vaacú nī. Ní nguéé caaⁿmaⁿ nī, n'daacā chí ndaá yā va'āī yeⁿe nī. ¹¹ Du'ú 'iiⁿyāⁿ chí ngaⁿá yā 'iiⁿyāⁿ miiⁿ chí n'daacā chí ndaá yā va'āī yeⁿé yā tuu'mi ní induuvidáámá yā ndúúcu 'iiⁿyāⁿ chí idiiⁿ chí nguéé n'daacā.

Ch'iīnu carta maaⁿ

¹² 'Áámá véé cá yeⁿé chí neⁿé dinguúⁿ yeⁿe ndís'tiī ní nguéé neⁿé dinguúⁿ na caaca 'cūū ndúúcu tinta, caati neⁿé chí n'diichí ndís'tiī ní caaⁿmáⁿ ndúúcu nī ní ndís'tiī nduucú. Níícú vaadi yeenú yeⁿe yú ní cúúví cuaacu.

¹³ Véé daiya tá yeⁿē n'daataá chí Ndyuūs indεévé yā táⁿā. Daiya tá idicho'ó yā: N'dai n'diī, ngaⁿa yā. 'Tíicā cuuvi.

CARTA NDÍÍ 'IINŪ YEⁿE SAN JUAN

Yeⁿe saⁿā Gayo chi n'dai

¹ 'Úú Juan, saⁿā chi ngaⁿa ntiiⁿnyuⁿ yeⁿe yáacū idinguúⁿ carta 'cūū yeⁿe saⁿā Gayo chi cuaacu níⁿyúⁿ neⁿe taaví saⁿā.

² Díí saⁿā Gayo chi neⁿé, 'úú neⁿé chi cáávā maaⁿ di tanducuéⁿē chi véé yeⁿē di ní n'dai taavi. Níícú véé vaadī 'viichéé yeⁿē di tan'dúúcā chi alma yeⁿe di véé vaadī 'viichéé yeⁿē. ³ Nduudu cuaacu chi neene yeenú taachi ndaā vi'í yú chi caⁿa yā nduudu cuaacu yeⁿē di chi n'daācā diiⁿ di, tan'dúúcā chi 'áámá idiiⁿ di chiiⁿ chi cuaacu. ⁴ Nguéé ch'εεte ca vaadī yeenu yeⁿé chi ch'iindiveéⁿ chí daiyá díⁿ yā chiiⁿ chi cuaacu.

⁵ Dii chi neⁿé, tanducuéⁿē chi diiⁿ di, n'daacā n'dai diiⁿ di ndúúcū vi'í yú ndúúcū 'iiⁿyāⁿ chi ngiica ná yúúⁿ. ⁶ 'Iiⁿyāⁿ miiⁿ ngaⁿá yā nduudu cuaacú yeⁿe vaadī neⁿe yeⁿe di nanááⁿ 'iiⁿyāⁿ chi snúūⁿ yaācū. Nduuti chi cunnéé dí 'iiⁿyāⁿ tan'dúúcā chi canéé chí diiⁿ di ní tan'dúúcā chi neⁿe Dendyuūs chi diiⁿ di, tuu'mi ní n'daacā idiiⁿ di. ⁷ Caati 'iiⁿyāⁿ cueⁿé yā 'muuⁿ cueⁿé yā miiⁿ cucáávā chi neⁿé yā caaⁿmán yā yeⁿe Cristo. Nguéé de'ē vεε sta'á yā yeⁿē 'iiⁿyāⁿ chi nguéé yeⁿe ndaata yeⁿé yā. ⁸ S'uuúⁿ ní canee chí 'cuaaⁿ yú 'iiⁿyāⁿ s'tíí. Níícú cuuvi cunée yā ndúúcu yú 'iiⁿyāⁿ chí idiíⁿ yā ntiiⁿnyuⁿ yeⁿe vaadī cuaacu.

Saⁿa Diótréfes nguéé n'daacā diiⁿ sa

⁹ 'Úú nidinguúⁿ yeⁿē 'iiⁿyāⁿ yeⁿe yaācū caati Diótréfes nguéé 'cuaaⁿ sa nús'uu ti néⁿé sa caaⁿmaⁿ ntiiⁿnyuⁿ sá yeⁿé yā. ¹⁰ Cáávā chuū taachi 'úú chí ndaá tuu'mi ní nin'gaacú tanducuéⁿē chí diiⁿ sáⁿā miiⁿ. Taatii caⁿā sa yeⁿe s'uuúⁿ ndúúcū nduudu taaⁿ chí nguéé n'daacā taatii 'caā'vā sa contra yeⁿe s'uuúⁿ. Ní nguéé yeenú sá ndúúcū dendu'ū. Nguéé n'guuⁿ sa vi'í yú. Ní nguéé neⁿe sa chí tanáⁿa yā chí 'cuaaⁿ yā vi'í yā. Níícú tun'dáa sa 'yā chεeti yaācū.

¹¹ Díí chí neⁿé, nguéé diiⁿ di chiiⁿ chí n'diichi di chí nguéé n'daacā. Diiⁿ di chí n'daacā. Du'ū chí din'daacā ní yeⁿē Dendyuūs. Du'ū chí nguéé n'daacā nidiiⁿ ní nguéé n'dííchí Dendyuūs.

Saⁿa Demetrio, n'daacā idiiⁿ sa

¹² Nducyáácá yā ngaⁿá yā nduudu cuaacu yeⁿe saⁿā Demetrio. 'Āā 'tiicá nūuⁿ nduudu cuaacu n'giⁿ'i vida yeⁿé yā. 'Tiicá ntúūⁿ s'uuúⁿ ngaⁿa yú ndúúdu cuaacu yeⁿe yā. Ní ndís'tií deenú ní chí ngaⁿā yú nduudu cuaacu yeⁿé yā.

Ch'iinū carta maaⁿ

¹³ Nééné véé yeⁿé chí neⁿé dinguúⁿ yeⁿe ndís'tií naati nguéé neⁿé dinguúⁿ ndúúcū tinta ndúúcū pluma.

¹⁴ Caati neⁿé n'diichí ndís'tií núúⁿ niⁿyūⁿ ní caaⁿmán ndúúcu di ní ndís'tií nduucú.

¹⁵ 'Diiⁿ canéé ndúúcū di. Amigos yeⁿe s'uuúⁿ dichó'o yā: N'daí n'dií, ngaⁿa yā. Dii dichó'o di: N'daí ndís'tií, yeⁿē amigos yeⁿe s'uuúⁿ taachi yaa'vi di 'iiⁿyāⁿ ca'áámá ca'áámá yā caavā chí duuchí Cristo. 'Tíicā cuuvi.

CARTA YEⁿE JUDAS

Judas idinguúⁿ carta 'cūū yeⁿe 'iiⁿ'yāⁿ chi Ndyuūs yaa'ví yā chi cuuvi yeⁿ'é yā

¹ 'Úú saⁿ'ā Judas ní saⁿ'ā chi dichíí'vē Jesucristo. 'Úú 'diinú Jacobo ní 'úú idinguúⁿ carta 'cūū yeⁿe 'iiⁿ'yāⁿ s'eeⁿ chi Ndyuūs chiida yú dinéⁿe yā ní didεεvé yā. Ní Cristo yaa'ví yā 'iiⁿ'yāⁿ s'eeⁿ chi cuuvi yeⁿ'é yā. Ní Cristo candéé yā cuidado 'iiⁿ'yāⁿ s'eeⁿ cáávā chi yeⁿ'é yā 'iiⁿ'yāⁿ s'eeⁿ. ² Neⁿ'é chi Ndyuūs téé yā ndís'tiī n'deeé cá yeⁿ'é yā yeⁿ'e vaadí ya'ai ní yeⁿ'é vaadí 'diiⁿ ní yeⁿ'é vaadí neⁿ'e caati cuuví 'yaaⁿ nducuéⁿē chuū nguaaⁿ ndís'tiī.

Yeⁿ'é 'iiⁿ'yāⁿ chi nguéé ngaⁿ'ā nduudu cuaacu

³ Ndís'tiī hermanos yeⁿ'é chi neⁿ'e taaví, neené neⁿ'é idinguúⁿ yeⁿ'e ndís'tiī yeⁿ'é chi Ndyuūs nadanguáⁿ'ai yā s'uuúⁿ. Maaⁿ ní cadiinuúⁿ chi canee chi idinguúⁿ carta 'cūū yeⁿ'e nī caati cuuví yaa'ví ch'εechi ndís'tiī chi canéé chi diíⁿ nī luchar n'dai cáávā chiiⁿ chi i'téénu nī Ndyuūs. Ndyuūs 'áámá vmnén'ēe ca'á yā vaadí i'téénú yeⁿ'é yā 'iiⁿ'yāⁿ chi yeⁿ'é yā. ⁴ Náⁿ'ā 'iiⁿ'yāⁿ chi nguéé yeⁿ'é Ndyuūs ní nduuvidaamá yā ndúúcu nī. Ndíí nguéé deenú nī chuū. 'Iiⁿ'yāⁿ s'eeⁿ ní nguéé n'daacā. Ní canéé nguūⁿ na libro yeⁿ'é Ndyuūs ndii cuááⁿ vmnaaⁿ yeⁿ'é yā 'tíicā: Condenado yā ni 'cuūvi yā. Ní 'iiⁿ'yāⁿ s'eeⁿ dámaāⁿ sta'á yā nduudu cuaacu yeⁿ'é Ndyuūs chi tanáⁿ'ā 'iiⁿ'yāⁿ nguéé cuuvi tuumicádíínuuⁿ yā yeⁿ'e chi maáⁿ yā diiⁿ yā chi nguéé n'daacā. 'Iiⁿ'yāⁿ s'eeⁿ ngaⁿ'á yā contra yeⁿ'e Ndyuūs yeⁿ'e yú chi 'áámá n'dyáⁿ'ā Ndyuūs chi 'iivu yú, ní contra yeⁿ'e Señor Jesucristo yeⁿ'e yú dendú'ū.

⁵ 'Áará chi 'āā deenú nī yeⁿ'é Señor 'iivú Ndyuūs taachi nadanguáⁿ'ai yā 'iiⁿ'yāⁿ Israel ní divíi yā 'iiⁿ'yāⁿ s'eeⁿ yeⁿ'e yáⁿ'āa Egipto, neⁿ'é chi ndís'tiī n'gaacú nī chuū. Cuayivi míiⁿ Ndyuūs di'cuiinú yā 'iiⁿ'yāⁿ na yáⁿ'āa miiⁿ, 'iiⁿ'yāⁿ chi nguεe s'téénu yā 'yā. ⁶ Ní n'gaacú nī yeⁿ'e ángeles chi nguéé diíⁿ yā tan'dúúcu chi Ndyuūs ngaⁿ'a ntiiⁿnyuⁿ yā ángeles miiⁿ. Ní Ndyuūs canéé chí divíi yā yeⁿ'e lugar yeⁿ'é yā. Maaⁿ ní Ndyuūs s'néeⁿ yā ángeles chi presos yeⁿ'é yā na maaiⁿ chi yáanūⁿ. Miiⁿ canee yā ndíí chiichi yā ndúúcu cadenas chi 'áámá canee ndii tiempo chi Ndyuūs n'diichí yā nuuⁿndi yeⁿ'e ángeles miiⁿ. ⁷ Ní n'gaacú nī yeⁿ'e yáāⁿ Sodoma ndúúcu yáāⁿ Gomorra ndúúcu yáāⁿ chi snéé cuaaⁿ 'diituú. 'Tiicá ntúūⁿ nguéé n'daacā idiiⁿ 'iiⁿ'yāⁿ yeⁿ'e yáāⁿ s'eeⁿ tan'dúúcu chi diiⁿ ángeles. 'Iiⁿ'yāⁿ s'eeⁿ ní cueⁿ'é yā ndúúcu n'daataá o isaⁿ'ā chi nguéé yeⁿ'é yā. Ní n'daataā nguaaⁿ n'daataá yā induuchineeⁿ tá n'daataa ndúúcu vi'i. Ní saⁿ'ā nguaaⁿ saⁿ'ā yā induuchineeⁿ sa saⁿ'ā ndúúcu vi'i. 'Iiⁿ'yāⁿ s'eeⁿ cáávā castigo yeⁿ'e yā 'áámá cunée yā cueⁿ'e daāⁿman na nguuchi yaⁿ'ā. Ní chuū nī ch'iⁿ'i s'uuúⁿ chi cuuvi chó'ōo yeⁿ'e yú nduuti chi diiⁿ yú chi nguéé n'daacā.

⁸ 'Tiicá ntúūⁿ nguuvi nguuvi saⁿ'ā s'eeⁿ n'gíinu sa tan'dúúcu chi taachi cyaadu sa yeⁿ'e dendú'ū chi cuuvi diiⁿ sa chi dinuuⁿndi sa ndúúcu maaⁿ cuerpo yeⁿ'e sa. Ní nguéé neⁿ'e sa chi Ndyuūs ngaⁿ'a ntiiⁿnyuⁿ yā yeⁿ'e sa. Ní cunncaā ngaⁿ'a yā yeⁿ'e 'iiⁿ'ntyéⁿ'ē chi diiⁿ ntiiⁿnyuⁿ yeⁿ'é Ndyuūs. ⁹ Ní nguéé 'tíicā diiⁿ ángel Miguel chí ndíí tiiⁿ taachi diiⁿ caandaá ndúúcu yáāⁿnguiniūⁿ ní ngaⁿ'a yā yeⁿ'e cuerpo yeⁿ'e Moisés. Angel Miguel miiⁿ nguéé diiⁿ yā condenar yáāⁿnguiniūⁿ miiⁿ ní nguéé cuuvi ngaⁿ'a taāⁿ yā chi yáāⁿnguiniūⁿ chi cuuvi condenado yā. Dámaāⁿ ngaⁿ'a yā 'túúcu. Señor ní diíⁿ yā reprender diiⁿ yeⁿ'e nuuⁿndi chi diiⁿ di. ¹⁰ Saⁿ'ā s'eeⁿ ní nguéé n'daacā ngaⁿ'a sa yeⁿ'e dendú'ū chi nguéé deenu sa. Ní taachi saⁿ'ā s'eeⁿ yeⁿ'e chi maaⁿ sa deenu sa ngaⁿ'a sa tuu'mí ní canee sa tan'dúúcu chi 'iiti s'eeⁿ chi maaⁿ tī deenu tī. 'Tíicā saⁿ'ā s'eeⁿ. Dendú'ū miiⁿ ní diiⁿ chi dituuví maāⁿ saⁿ'ā s'eeⁿ.

¹¹ Dε'ε chúuca ya'ai yeⁿ'e saⁿ'ā s'eeⁿ caati dámaāⁿ chi neⁿ'ē sa diiⁿ sa tan'dúúcu chi diiⁿ saⁿ'ā Caín. Ní saⁿ'ā s'eeⁿ cáávā chi neⁿ'e sa tuūmī, dinuuⁿndi sa tan'dúúcu chi diiⁿ saⁿ'ā Balaam. Ní ch'iī sa caati nguéé diiⁿ sa chi ngaⁿ'a Ndyuūs, tan'dúúcu saⁿ'ā Coré chi nguéé diiⁿ sa chi ngaⁿ'a Ndyuūs taachi nguéé ch'iindiveeⁿ sa chi ngaⁿ'a Moisés. ¹² Maaⁿ ní 'iiⁿ'yāⁿ chi 'tíicā, taachi nduuvidaamá yā ní che'é yā ní cu'ú yā ndúúcu ndís'tiī taachi véé 'viicu ná va'ai yeⁿ'é nī yeⁿ'e chi dineⁿ'é nī 'áámá nī taama nī, tuu'mi ní chuū ní cosa

chi cuuvi 'cuinaán nī. 'Ii'nyān s'ee'ngu'ée 'va'á yā ye'ē mar 'áámá. Dámaān candēē yā cuidado ye'e maán yā. 'Ii'nyān s'ee' tan'dúucā meēē chi ngu'ée nuū'nīn ye'ē chi cueen cuuvī ní tan'dúucā 'yúúné candēē 'muu'ni candēē mii' 'tíca yā. 'Ii'nyān s'ee' tan'dúucā yá'á chi ngu'ée véé n'gui'i ye'ē 'tíca yā. Ní yá'á mii' ní ngu'ée dichí'vē caati ngu'ée n'gui'i ye'ē ní n'diī tan'dúucā tiempo ye'ē 'iichēē. Ní 'ii'nyān tiicú yā yá'á mii' ndii dí'yú. 'Tíicā 'ii'nyān s'ee'. ¹³ 'Ii'nyān s'ee' ní tan'dúucā nuū'nīn'yá'ā chi ngii yú yaacu ndúucū ngii yá'ā inaa' cucáavā 'yúúné taa'. Ní nducué'ē chi ngu'ée n'daacā chi dii' yā ye'e chi cuuvi 'cuinaán yā ní tan'dúucā ngii yá'ā inaa' ye'e nuū'nīn mii' chi inaa' yú 'táacā idi' yā. 'Ii'nyān s'ee' ni tan'dúucā 'í'nyú' chi ngí'cá, 'tíca yā. Ndyuūs nguáin'dai yā 'áámá lugar ye'e 'ii'nyān s'ee' chi díftuu taavi ca maā'n ndii yaānūu' naachi canéé yā cue'e daā'ma'.

¹⁴ 'Tiicā ntúū, sa'a Enoc chí ndí' ná ndēēchē ngiini familia ye'e sa'a Adán, ní Enoc mii' cáavā Espíritu N'dai ye'ē Ndyuūs ca'a sa chii sa 'ii'nyān ye'e dendu'ū chi cuchí ye'ē yā. Ní ca'a sa 'tíicā: Cuin'diichí nī Señor Jesucristo mii' ní cuchii yā ndúucū n'dee n'dái mil 'ii'nyān chi i'téenu yā 'yā. ¹⁵ Señor Jesucristo ndaa yā chi n'diichí yā nuu'ndi ye'e nducyaaca 'ii'nyān. Ní caa'ma' yā chi condenado yā nducyaaca 'ii'nyān nuu'ndi chi ngu'ée i'téenu yā 'yā caavā nducué'ē nuu'ndi chi dii' yā ndúucū nduudu chi nga'a yā chi ngu'ée n'daacā chi contra Ndyuūs. ¹⁶ 'Ii'nyān s'ee' ní néené n'gēcu cheendí yā tan'dúucā chi 'téé nū' taán yā ní nga'á yā ye'e chi ngu'ée ne'ē yā ye'ē chi táámá yā idi' yā. Ní dii' yā chi ngu'ē n'daacā caati maán yā ne'e yā. Ní ndúucū nduudu chi n'gēete nga'á yā ye'e taamá yā chi ch'ēté yā taachi 'ii'nyān s'ee' ne'ē yā dii' yā aprovechar dendu'ū cáavā maán yā.

Judas nga'a yā ye'e chi 'ii'nyān chi ye'e Cristo canéé chí dii' yā

¹⁷ Ndís'tiī, hermanos chi neene ne'ē, maa' ní ne'ē chí ndís'tiī ní n'gaacú nī ye'e nduudu chi apóstoles ye'e Señor Jesucristo ye'e yú taacā chi ca'a yā. ¹⁸ 'Tíicā ca'a yā chí yā ndís'tiī: Taachí 'āā canéé nī'nuú' nguuví chí ndaa Señor Jesucristo taama vmné'ēē tuu'mi ní 'ii'nyān s'ee' ní diduuchineē yā ye'e nī ndúucū tanducué'ē chí ye'e Ndyuūs. Ní nducué'ē chí 'ii'nyān s'ee' ne'ē yā dii' yā chí ngu'ē n'daacā, chuū ní dii' yā. ¹⁹ 'Ii'nyān s'ee' ní diví yā ye'ē nguaa' ndís'tiī. 'Ii'nyān s'ee' ní dinuu'ndí yā tan'dúucā chí ne'e yā ní ngu'ée canéé Espíritu N'dai ye'ē Ndyuūs ndúucu yā.

²⁰ Maa' ní ndís'tiī hermanos ye'ē chí neene ne'ē, cu'téenu cá nī nguuví nguuví ye'ē vaadí i'teenu chí Ndyuūs itée yā ndís'tiī. Taachi caa'ma'ngua'á nī dii' nī ndúucū poder ye'ē Espíritu N'dai ye'ē Ndyuūs. ²¹ 'Cuēetineé nī ní dii' nī nducué'ē ndúucū vaadí ne'e chí Ndyuūs itée yā ndís'tiī 'naa' chí cūnee ngiinú nī nguuví chí Señor Jesucristo ye'e yú chí n'dai taavi ca'á yā tée yā vida cue'e daā'ma' ndís'tiī.

²² Ndís'tiī n'dee cá nga'a nī ndúucū 'ii'nyān chí ngu'ée n'daacā i'téenu yā. ²³ Ní 'tíicā nadanguá'ai nī 'ii'nyān s'ee' ye'e chí ngu'ée i'téenu yā tan'dúucā chí tun'dáa nī 'ii'nyān nguáá' nguuchi ya'ā, 'tíicā dii' nī. Ya'ai 'iinú nī ye'e taná'ā 'ii'nyān naati dii' nī ndúucū cuidado, ndí' ngu'ée cuuvi ca'a nī ndúucu yā chí dinuu'ndí nī.

Judas nga'angua'á yā ní dich'ēté yā Ndyuūs

²⁴ Maa' ní 'úú chí ne'ē ndís'tiī na ta'a Ndyuūs chí cuuvi candēē yā cuidado ye'e ndís'tiī chí ngu'ée dinuu'ndí nī. Ní Jesucristo cuuvi 'cuu'mí' yā nanáá' Ndyuūs chí dēēve ngii n'dai ndís'tiī chí ngu'ée nuu'ndi ye'ē nī. Ní neené yeenu nī. ²⁵ Dich'ēete yú Ndyuūs chí 'áámá n'dyá'ā Ndyuūs chí deenu nducué'ē ní nadanguá'ai yā s'uu' cáavā Señor Jesucristo chí 'iivi yú. Caati ye'ē yā ní véé dēvé ngii n'dai ndúucū n'gēete n'dai ndúucū poder ch'ēete n'dai ndúucū poder ye'e 'ii'nyān ye'ē yā nguuví chí chó'ōo ndúucū nguuví maa' ní cué'ē daā'ma'. 'Tíicā cuuvi.

APOCALIPSIS, NDUUDU CHÍ CH'IⁿI NDYUŪS YEⁿE JESUCRISTO

Yeⁿe chi Jesucristo ch'íⁿi yā

¹ Na libro 'cūū canéé nguūⁿ chuū chi ch'íⁿi Jesucristo. Ní Ndyuūs ch'íⁿi yā Jesucristo chuū caati 'cuuⁿmíⁿ yā 'iiⁿyāⁿ chi dichíⁿvē Ndyuūs dendúⁿū chi 'āā ntéé 'nááⁿ chi ndaa yeⁿē. Ní Jesucristo ch'íⁿi yā chuū Juan chi dichíⁿvē Ndyuūs cáávā 'áámá ángel chi dichó'o yā nanááⁿ yā. ² Juan miiⁿ caⁿ'a cuaacú yā nduudu cuaacu yeⁿe tanducueⁿē chi n'diichí yā. Chuū ní nduudu cuaacu yeⁿe Ndyuūs. Ní chuū ní nduudu cuaacu chí Jesucristo ch'íⁿi yā Juan miiⁿ.

³ De'ε chúúca yeenú 'iiⁿyāⁿ chi n'geeⁿ yā libro 'cūū chi yeⁿé Ndyuūs. Ní de'ε chúúca yeenú 'iiⁿyāⁿ s'uuuⁿ chi n'giindiveéⁿ yā nduudu yeⁿe libro 'cūū ní i'téenu yā yeⁿe chí ngaⁿā, ti ngaⁿā yeⁿe denduⁿū chí cuchii ti tiempo miiⁿ chi canee chi chó'o 'āā snee niiⁿnuúⁿ.

Juan idingúuⁿ yā yeⁿe 'iiⁿyāⁿ yeⁿe ndu'u ndéechē yaācū.

⁴ 'Úú Juan idingúuⁿ cartas yeⁿe 'iiⁿyāⁿ yeⁿe ndéechē yaācū chi snéé na yáⁿā Asia. Neⁿé chi Ndyuūs téé yā ndís'tii dendúⁿū chi n'dai yeⁿé yā ndúúcu vaādī 'diiⁿ yeⁿé yā. Ní Ndyuūs ní 'áámá canee yā tiempo chi chó'o, ní maaⁿ ní 'tíca yā, ní caⁿ'á yā ndaa yā. Maaⁿ ní neⁿé chi yeⁿe ndu'u ndéechē espíritus chi snéé yā nanááⁿ trono yeⁿé Ndyuūs, espíritus téé yā ndís'tii vaadī n'dai yeⁿe Ndyuūs. ⁵ Ní 'tiicá ntúūⁿ neⁿé chi Cristo téé yā ndís'tii vaadī n'dai yeⁿé yā, Jesucristo chi cuéⁿé daāⁿmaⁿ ngaⁿ'a cuaacú yā. Ní Cristo miiⁿ ní daiyá Ndyuūs ní 'iiⁿyāⁿ chi vmnááⁿ vmnaaⁿ nacueeⁿ yā yeⁿe nguaaⁿ tináⁿā. Ní ngaⁿ'a ntiiⁿnyúⁿ yā yeⁿe nducyáácá reyes chi véé iⁿ'yeeⁿdí 'cūū. Ní Cristo dinéⁿe yā s'uuúⁿ ní nadeēvé yā s'uuúⁿ yeⁿe nuuⁿndi yeⁿe yú ndúúcu yuuúⁿ yeⁿe maáⁿ yā. ⁶ Ní Cristo díⁿ yā chi s'uuúⁿ reyes s'uuúⁿ ní chiidúⁿ s'uuúⁿ chi dichiiⁿvē yú Ndyuūs chi chiidá yā. Maaⁿ ní vaadī dēve ngii ní yeⁿé yā ndúúcu nducueⁿē poder chi yeⁿé yā cuuvi yeⁿé yā cueⁿe daāⁿmaⁿ. 'Tíicā.

⁷ Cuin'diichí nī. Cristo miiⁿ cuchii yā nguááⁿ meēⁿ ní nducyáácá 'iiⁿyāⁿ cuuvi snaaⁿ yā ndúúcu 'iiⁿyāⁿ s'eeⁿ chi dichó'o tíicuā Cristo ndúúcu machete chi 'uūvi lados 'caāiⁿ. Ní nducyaaca 'iiⁿyāⁿ yeⁿe nducyaaca yāāⁿ yeⁿe iⁿ'yeeⁿdí 'cūū cuēcú yā taachi n'diichí yā Cristo. 'Tíica rā va. Cuaacu níⁿnyúⁿ chí 'tíicā.

⁸ Señor Ndyuūs chi véé tanducueⁿē poder denduⁿū yeⁿé yā chi 'áámá canee yā tiempo chi chó'o, ní maaⁿ ní 'tíca yā, ní caⁿ'á yā ndaa yā, Señor miiⁿ ngaⁿ'a yā: 'Úú chí 'iiⁿyāⁿ vmnááⁿ vmnaaⁿ 'úú, ní 'úú ndíⁿ cuááⁿ naachí 'cuiinu 'úú. Tan'dúúca letras A ndii Z yeⁿe alfabeto 'tíicā 'úú.

Yeⁿe chi Juan n'diichí yā Cristo chi dēve n'dai taavi yā ndii túúⁿngii 'yáⁿa yā

⁹ 'Úú apóstol Juan 'úú ní hermano yeⁿe ndís'tii. Ní caati 'úú ní yeⁿe Jesús 'úú, 'úú dáámá ch'eenú chii ndúúcu ndis'tii ní dáámá nduucú nī yeⁿē naachi Ndyuūs ngaⁿ'a ntiiⁿnyúⁿ yā, ní dáámá nduucú nī yeⁿe vaadī 'diiⁿ chí Jesucristo itée yā s'uuúⁿ. 'Úú canéé preso 'úú na isla Patmos cáávā chi candéé nduudu cuaacu yeⁿé Ndyuūs ní ngaⁿ'á nduudu cuaacu yeⁿé Jesucristo. ¹⁰ Ní taachi 'úú canee miiⁿ 'áámá domingo chó'o chí 'úú ní canee maaⁿ poder yeⁿe Espíritu N'dai yeⁿe Ndyuūs. Ní ch'iindiveéⁿ 'áámá nduudu ch'εete cuaaⁿ daamí tan'dúúca chí n'gēcú 'áámá trompeta. ¹¹ Ní 'tíicā ngaⁿ'ā ngii 'úú: 'Úú 'iiⁿyāⁿ chí vmnááⁿ vmnaaⁿ 'úú, 'úú ndíⁿ cuááⁿ naachí 'cuiinu 'úú. Tan'dúúca letras A ndii Z yeⁿe alfabeto 'tíicā 'úú. Dii, Juan, idingúuⁿ di na 'áámá libro cosa chí inaaⁿ di ní dichó'o di libro miiⁿ nanááⁿ 'iiⁿyāⁿ yeⁿe ndu'u ndéechē yaācū chí snee na yáⁿā Asia. Yāacū s'eeⁿ ní yeⁿe yāāⁿ Efeso, ní yeⁿe yāāⁿ Esmirna, ní yeⁿe yāāⁿ Pérgamo, ní yeⁿe yāāⁿ Tiatira, ní yeⁿe yāāⁿ Sardis, ní yeⁿe yāāⁿ Filadelfia, ndúúcu yeⁿe yāāⁿ Laodicea.

¹² Tuu'mi ní 'úú nan'guaacúndíⁿ ní n'diichí duⁿū chí yaāⁿ'vi 'úú. Taachi n'diichi cuaaⁿ daamí n'diichí ndéechē candeleros yeⁿe 'díⁿnguāⁿ. ¹³ Ní náávtaⁿ'a yeⁿe ndu'u

candeleros miiⁿ 'áámá yā cheendii yā tan'dúúcā 'aama saⁿā daiyá 'iiⁿyāⁿ iⁿ'yeeⁿdí 'cūū. Canúuⁿ yā 'áámá catecai chi ngeε yā chi ndaa ndii ná daandu ca'a yā. Ní ndéé chiichí 'áámá cinta yeⁿe 'dííⁿnguāⁿ cuaaⁿ 'nííⁿnúⁿ yā. ¹⁴ Ní tííⁿ yā ndúúcū yundutiíⁿ yā ní cuéē tan'dúúcā duudū 'iiti cuūchī cuéé, ní 'tiicá ntúūⁿ cuéē tan'dúúcā yāⁿ. Ní nduutináⁿ yā tan'dúúcā 'áámá nguuchi yaⁿā. ¹⁵ Ní ca'a yā tan'dúúcā cūū cuááⁿ chi ndís'tiī 'āā ngiichí nī cheeti 'áámá horno ní deεvé diiⁿ nī. Ní nduudu yeⁿé yā ní tan'dúúcā chí n'gεεcú 'yaa n'dái yíícú. ¹⁶ Ní ndεε yā na ta'a cuaacú yā ndεēchē 'ííⁿnyúⁿ. Ní na cheendí yā miiⁿ canéé 'áámá machete chi 'caāiⁿ nduu 'uuví lados. Ní núúⁿmáⁿ naaⁿ yā ngíí n'gāi tan'dúúcā chi n'gāi 'yáⁿā taachi nééⁿé ínguaaⁿ nááⁿ.

¹⁷ Ní taachi 'úú snaáⁿ 'iiⁿyāⁿ miiⁿ sndeεvé na ca'a yā tan'dúúcā chi ch'íí. Ní 'iiⁿyāⁿ miiⁿ s'neéⁿ yā ta'ā cuaacú yā vmnaaⁿ yeⁿé 'úú ní caⁿ'a yā chí yā 'úú: Nguéé 'va'a di. 'Úú chí vmnááⁿ vmnaaⁿ, 'úú ndíí cuaaⁿ naachí 'cuiinu 'úú. ¹⁸ 'Úú 'áámá canduuchí. Cuáácú ch'íí naati cuin'diichí nī maaⁿ ní 'úú canduuchí cueⁿe daāⁿmaⁿ 'tíicā. 'Úú ní ndéé llaves yeⁿe vaadi n'gii chi yeⁿe lugar naachi snéé 'iiⁿyāⁿ chi n'díí ní nguéé chí'téénu yā Ndyuūs. ¹⁹ Maaⁿ ní dii dingúuⁿ di dendu'ū chi 'túúcā chí n'diichi di ndúúcū dendu'ū chí 'tíicā ndúúcū dendu'ū chí ndaa cuayiivi. ²⁰ Maaⁿ ní 'úú n'giⁿ'í dii de'ε neⁿe caaⁿ'maⁿ ndεēchē 'iiⁿnyúⁿ miiⁿ chí n'diichi di na ta'ā cuaacú ní yeⁿe chí ndεēchē candeleros yeⁿe 'diíⁿnguāⁿ miiⁿ. Ndu'u ndεεché 'iiⁿnyúⁿ miiⁿ chííⁿ chí du'ū ndεēchē 'iiⁿyāⁿ chí ndíí tíiⁿ yeⁿe ndu'ū ndεēchē yaácū miiⁿ. Ní ndu'ū ndεēchē candeleros chí n'diichí di chííⁿ chí ndεēchē yaácū miiⁿ.

2

Juan idingúuⁿ yā carta 'cūū yeⁿe 'iiⁿyāⁿ yeⁿe yáāⁿ Efeso

¹ Díí, Juan idingúuⁿ di chuū yeⁿe 'iiⁿyāⁿ chí ndíí tíiⁿ yeⁿe yáacū yeⁿe yáāⁿ Efeso. 'Iiⁿyāⁿ chí ndéé yā ndu'u ndεēchē 'ííⁿnyúⁿ na tá'ā cuaacú yā ní chíicá yā nguaaⁿ ndεēchē candeleros yeⁿe 'dííⁿnguāⁿ, 'iiⁿyāⁿ miiⁿ ngaⁿ'á yā dendu'ū chí 'túúcā: ² 'Úú ní deenú ntiiⁿnyuⁿ chí diiⁿ di. Deenú chí díitūu n'dái diiⁿ dí ntiiⁿnyuⁿ ní véé paciencia nanáⁿ di. Ní deenú chí ichεε di yeⁿe 'iiⁿyāⁿ chí nguεε n'daācā idiíⁿ yā. Ní deenú ntúūⁿ chí ndéé di cuidado yeⁿe 'iiⁿyāⁿ chí ngaⁿ'a chí apóstoles ní nguéé 'tiicá yā. Ní dii deenu di chí 'iiⁿyāⁿ s'eeⁿ nguéé apóstoles 'iiⁿyāⁿ. Ní deenu di chí yaadi yā. ³ Ní dii véé paciencia nanáⁿ di ní n'geenu di ngii. Ní diiⁿ di n'dee n'dái ntiiⁿnyuⁿ cáávā 'úú. Ní nguéé chicúuⁿnuⁿ di yeⁿe dendu'ū. ⁴ Naati véé 'téé contra yeⁿé di. Nguéé dineⁿe di 'úú tan'dúúcā chí vmnááⁿ vmnaaⁿ dineⁿe ca di. ⁵ Ní cáávā chuū nn'gáácú dí yeⁿe chí diiⁿ di chí nguéé dineⁿe ca di 'úú ní ndaacadaami di yeⁿé. Ní dineⁿe ca di 'úú tan'dúúcā chí diiⁿ di vmnááⁿ vmnaaⁿ. Ní nduuti chí nguéé 'túúcā diiⁿ di, 'úú ní ndāa niiⁿnuúⁿ ní divíí candelero yeⁿe di yeⁿe naachi snéé. ⁶ Ní chuū chí véé favor yeⁿe di. Nguéé inee yiinu di ntiiⁿnyuⁿ chí diiⁿ 'iiⁿyāⁿ yeⁿe grupo yeⁿe Nicolaítas. Ní 'úú ntúūⁿ nguεε neⁿé chí dííⁿ yā. ⁷ 'Iiⁿyāⁿ chí véé veéⁿ yā 'caandiveéⁿ yā chí ngaⁿ'ā Espíritu N'dai yeⁿé Ndyuūs ngii 'iiⁿyāⁿ yeⁿe yáacū s'eeⁿ. 'Úú ngaⁿ'á chí 'iiⁿyāⁿ chí cuchéε yā yeⁿe dendu'ū, 'úú ca'á 'iiⁿyāⁿ s'eeⁿ chí che'é yā n'gui'i yeⁿe yáⁿ'á yeⁿe vida cueⁿe daāⁿmaⁿ chí cánéé naavtaⁿ'ā yeⁿe paraíso chí jardín yeⁿe Ndyuūs.

Juan idingúuⁿ yā carta 'cūū yeⁿe 'iiⁿyāⁿ yeⁿe yáāⁿ Esmirna

⁸ Díí, Juan, idingúuⁿ di yeⁿe 'iiⁿyāⁿ chí ndíí tíiⁿ yeⁿe 'iiⁿyāⁿ yeⁿe yáacū yeⁿe yáāⁿ Esmirna. Dendu'ū chí 'túúcā ngaⁿ'á 'iiⁿyāⁿ chí vmnááⁿ vmnaaⁿ ndii chí 'cuiinu, 'iiⁿyāⁿ chí 'āā n'dii yā ní maaⁿ ní 'āā canduuchi ntuúⁿ yā. ⁹ 'Úú deenú ntiiⁿnyuⁿ chí diiⁿ di. Deenú chí n'geenu di ngii ndúúcū dendu'ū chí cheechí n'dai yeⁿe di. Deenú chí nguéé de'ε veε yeⁿe di naati cuaacu nííⁿnyúⁿ chí 'cuiica di. 'Úú deenú yeⁿé chí 'iiⁿyāⁿ chí ngaⁿ'á yā chí judíos yā chí Israel ya ní nguéé dííⁿ yā tan'dúúcā chí 'iiⁿyāⁿ judíos yā. Ní deenú chí 'iiⁿyāⁿ s'eeⁿ nguéé n'daacā ngaⁿ'á yā yeⁿe di. Ní 'iiⁿyāⁿ s'eeⁿ ní yeⁿe yááⁿ'n'guiinūuⁿ. ¹⁰ Nguéé 'va'a di yeⁿé dendu'ū chí canee chí 'cueenu di cuuvi. 'Caandiveeⁿ di yeⁿé. Yááⁿ'n'guiinūuⁿ cutá'a sa náⁿ'ā ndís'tiī ní cu'nuuⁿ sa 'iiⁿyāⁿ vácūū caati n'diichineeⁿ sa

nducyaaca ndís'tiī. Ní canee chi 'cueenú nī cuuvi ndiichí nguuvi. Naati 'áámá canee nī ndúúcu chi i'téenu nī ndii chi 'cuūvi nī ní 'úú teé ndís'tiī 'áámá corona chi vida cueⁿe daāⁿmaⁿ. ¹¹ 'Iiⁿ'yāⁿ chi véé veén yā 'caandiveén yā chi ngaⁿ'ā Espíritu N'dai yeⁿ'é Ndyuūs ngii 'iiⁿ'yāⁿ s'eeⁿ yeⁿ'e yáacū s'eeⁿ. 'Iiⁿ'yāⁿ chi cuchéε yā yeⁿ'e tanducuéⁿ'ē dendu'ū nguéé cuuvi 'cueenú yā cuuvi yeⁿ'ē ndii 'úúví vaadi n'gii chi infierno.

Juan idingúúⁿ yā carta 'cūū yeⁿ'e 'iiⁿ'yāⁿ yeⁿ'e yáāⁿ Pérgamo

¹² Díí, Juan, idingúúⁿ di ntúūⁿ 'iiⁿ'yāⁿ ndíí tiiⁿ chi yeⁿ'e 'iiⁿ'yāⁿ yeⁿ'e yáacū yeⁿ'e yáāⁿ Pérgamo: Chuū ngaⁿ'á 'iiⁿ'yāⁿ chi véé machete chi 'uūvi lados 'caāiⁿ. ¹³ Chuū ngaⁿ'a yā. 'Úú ní deenú tanducuéⁿ'ē chi diiⁿ di. Deenú chi canee di naachi yááⁿ'n'guiinūⁿ ngaⁿ'a ntiiⁿnyuⁿ sa. Ní 'áará chí 'tíicā 'áámá canee di lado yeⁿ'é nguéé ndaacádaami di yeⁿ'e chi i'téenu di 'úú. Ní 'tiicá ntúūⁿ diiⁿ di nguuvi chi chó'ōo taachi nguaaⁿ ndís'tiī 'iiⁿ'yāⁿ s'eeⁿ ch'iiⁿ'núⁿ yā saⁿ'ā Antipas chi 'áámá caⁿ'ā sa nduudu cuaacu yeⁿ'é na yáāⁿ naachi canee yááⁿ'n'giinūⁿ. ¹⁴ Naati véé n'duuvi dendu'ū yeⁿ'e chi contra yeⁿ'ē di. Na yáāⁿ Pérgamo chi yáāⁿ yeⁿ'e di véé nguaaⁿ ndís'tiī náⁿ'ā 'iiⁿ'yāⁿ chi nguéé neⁿ'é yā s'neén yā yeⁿ'e chi i'téenu yā chi 'cueeⁿ Balaam. Ní Balaam miiⁿ 'iiⁿ'yāⁿ chí chi'cueéⁿ yā saⁿ'ā Balac táacā cuuvi diiⁿ sa chi 'iiⁿ'yāⁿ yeⁿ'e Israel dinuuⁿndí yā. Ní 'iiⁿ'yāⁿ s'eeⁿ yeⁿ'e Israel dinuuⁿndí yā taachi che'é yā dendu'ū yeⁿ'e chi 'iiⁿ'yāⁿ cáávā ofrenda ca'a yā nátai yeⁿ'e santos chi ídolos, ní taachi caⁿ'á yā ndúúcu 'aama n'daataá o 'aama isáⁿ'ā chi nguéé yeⁿ'é yā. ¹⁵ Ní 'tiicá ntúūⁿ véé nguaaⁿ ndís'tiī 'iiⁿ'yāⁿ chi nguéé neⁿ'é yā s'neeⁿ yā yeⁿ'e chi i'téenu yā chi ca'cueéⁿ yā yeⁿ'e 'iiⁿ'yāⁿ yeⁿ'e grupo yeⁿ'e nicolaítas. Ní 'úú nguéé inee yiinú yeⁿ'e chuū. ¹⁶ Ndaacadáámí dí yeⁿ'e nducuéⁿ'ē chuū. Nduuti chi nguéé diiⁿ di 'túúca ndaa nuún naachi canee di ní 'cuuⁿ'máⁿ ndúúcu 'iiⁿ'yāⁿ s'eeⁿ ndúúcu machete chi 'uūvi lados 'caāiⁿ chi canéé cheendí. ¹⁷ 'Iiⁿ'yāⁿ chi véé veén yā 'caandiveén yā chi ngaⁿ'ā Espíritu N'dai yeⁿ'é Ndyuūs ngii 'iiⁿ'yāⁿ s'eeⁿ yeⁿ'e yáacū s'eeⁿ. 'Iiⁿ'yāⁿ chi cuchéε yā yeⁿ'e tanducuéⁿ'ē 'úú ní ca'á 'iiⁿ'yāⁿ s'eeⁿ pan chi duuchi maná chi canúúⁿ n'de'ei. Ní ca'á 'iiⁿ'yāⁿ s'eeⁿ 'áámá tuūu cuéε naachi canéé nguūⁿ 'áámá chi duuchi chi ngai. Mar 'áámá 'iiⁿ'yāⁿ nguéé deenú yā chi duuchi miiⁿ, dámaāⁿ 'iiⁿ'yāⁿ chi cuta'á yā tuūu cuéε miiⁿ deenú yā chi duuchi miiⁿ.

Juan idingúúⁿ yā carta 'cūū yeⁿ'e 'iiⁿ'yāⁿ yeⁿ'e yáāⁿ Tiatira

¹⁸ Díí, Juan, idingúúⁿ di yeⁿ'e 'iiⁿ'yāⁿ ndíí tiiⁿ yeⁿ'e 'iiⁿ'yāⁿ yeⁿ'e yáacū yeⁿ'e yáāⁿ Tiatira: Daiyá Ndyuūs chi véé nduutináⁿ yā tan'dúúca nguuchi yaⁿ'ā ni ca'a yā tan'dúúca cūū cuaaaⁿ chi deévé n'dai ngaⁿ'á yā 'tíicā. ¹⁹ 'Úú deenú nducuéⁿ'ē chi diiⁿ di. Deenú chi dineⁿ'e di 'úú, chi i'téenu di 'úú, ní dichii've di 'úú. Ní véé paciencia nanáⁿ di. Deenú chi maaⁿ diíⁿ nī ntiiⁿnyuⁿ chi n'deeⁿ n'dái nguéé ti ntiiⁿnyuⁿ yeⁿ'é nī chi vmaaⁿ. ²⁰ Naati véé duū'vī dendu'ū contra yeⁿ'ē di. Ndís'tiī ní 'cuaáⁿ nī táⁿ'ā Jezabel chi ngaⁿ'a tá chi chííⁿ chi ngaⁿ'a tá ní nduudu cuaacu yeⁿ'é Ndyuūs. Nginnche'ei tá 'iiⁿ'yāⁿ chi dichíí'vε 'úú ndúúcu chí ngí'cueeⁿ tá. Ní ngaⁿ'a tá chí 'iiⁿ'yāⁿ cuuvi caⁿ'á yā ndúúcu n'daataá o isaⁿ'ā chi nguéé yeⁿ'é yā ní cuuvi ché'e yā dendu'ū chi 'iiⁿ'yāⁿ s'eeⁿ cáávā ofrenda ca'a yā nátai yeⁿ'e santos chi ídolos. ²¹ 'Úú ní ca'á lugar táⁿ'ā miiⁿ chi ndaacadaami tá yeⁿ'e chi diiⁿ tá chí nguéé n'daacā naati nguéé 'cuūⁿ ta ndaacadaami tá yeⁿ'e nducuéⁿ'ē chí diiⁿ tá chí nguéé n'daacā. Ní neⁿ'e tá chi tanáⁿ'ā 'iiⁿ'yāⁿ dinuuⁿndí yā ndúúcu tá. ²² Maaⁿ ní 'úú diíⁿ chi néené ngiitā tá miiⁿ ní nducyáácá isaⁿ'ā chi diíⁿ yā tan'dúúca chi ngí'cueeⁿ tá neené 'cueenu yā cuuvi. 'Tíicā maaⁿ ní diíⁿ ndúúcu nducyáácá yā nduuti chi nguéé ndaacadáámí yā yeⁿ'e chi ngí'cueeⁿ n'daataá mííⁿ. ²³ 'Tiicá ntúūⁿ 'úú ní 'caāⁿ'núⁿ nducyaaca 'iiⁿ'yāⁿ chí diíⁿ yā tan'dúúca chí chi'cueeⁿ tá. Ní nducyaaca 'iiⁿ'yāⁿ yeⁿ'e nducyáácá yaacū caⁿ'á yā cadíínuuⁿ yā chí 'úú chí n'diichí de'ε veε chí 'iiⁿ'yāⁿ nadicadíínuuⁿ yā ndii na staava yeⁿ'é yā. Ní 'úú nadii'vé ndís'tiī tuunu tuunu ca dendu'ū chí diíⁿ nī. ²⁴ Chuū ngaⁿ'á ngii ndís'tiī ndúúcu tanáⁿ'ā 'iiⁿ'yāⁿ chí i'téenu yā Ndyuūs ní chí snée yā na yáāⁿ Tiatira chí nguéé diiⁿ yā tan'dúúca chí ngí'cueeⁿ táⁿ'ā miiⁿ. Ní nguéé déenu nī de'ε chí nuuⁿndi s'eeⁿ chí ch'εεtε chí yeⁿ'e yááⁿ'n'guiinūⁿ. Tan'dúúca chí ngaⁿ'a náⁿ'ā 'iiⁿ'yāⁿ 'úú ngaⁿ'á chí nguéé cu'neén táámá dendu'ū chí díítūu nanááⁿ ndís'tiī. ²⁵ Naati chííⁿ chí 'āā véé yeⁿ'é nī cundéé nī cuidado yeⁿ'ē ndii 'úú nindaá nanááⁿ nī. ²⁶ 'Iiⁿ'yāⁿ chí cuchéε yā yeⁿ'e

tanducuéⁿē dendu'ū ní nguuvi nguuvi díⁿ yā tan'dúú^{cā} 'úú neⁿé ndíí cuaaⁿ ná n'giinu, 'úú ní ca'á ntiⁿnyuⁿ 'iⁿ'yāⁿ s'eeⁿ chi 'iⁿ'ntyéⁿē yeⁿe nducuéⁿē naciones. ²⁷ Ní caⁿ'a ntiⁿnyúⁿ yā yeⁿe 'iⁿ'yāⁿ s'eeⁿ tan'dúú^{cā} chiidá tee yā poder 'úú chi 'úú ngaⁿ'a ntiⁿnyúⁿ yeⁿe nducuéⁿē naciones ndúú^{cū} 'áámá nduucu cū^ū yeⁿé. Ní ndúú^{cū} nduucu cū^ū miiⁿ 'cueⁿé naciones chí chícheiyei tan'dúú^{cā} chi naciones ní 'aama vaso yeⁿe yáⁿāa chí 'cueēⁿ. ²⁸ Ní 'iⁿ'yāⁿ chí cuchεε yā yeⁿe tanducuéⁿē 'úú ní ca'á 'iⁿ'yāⁿ miiⁿ 'íⁿnyúⁿ yeⁿe nguεetiyyaⁿ. ²⁹ 'iⁿ'yāⁿ chí véé veéⁿ yā 'caandiveéⁿ yā chí ngaⁿ'ā Espíⁿritu N'dai yeⁿé Ndyuūs ngii 'iⁿ'yāⁿ s'eeⁿ yeⁿe yaācū s'eeⁿ.

3

Juan idingúuⁿ yā carta 'cū^ū yeⁿe 'iⁿ'yāⁿ yeⁿe yáāⁿ Sardis

¹ Díⁿ Juan, idingúuⁿ di yeⁿe 'iⁿ'yāⁿ ndíí tiⁿiⁿ yeⁿe 'iⁿ'yāⁿ yeⁿe yáacū yeⁿe yáāⁿ Sardis: Chuū ngaⁿ'a Cristo chí véé ndεēchē espíⁿritus yeⁿe Ndyuūs ndúú^{cū} ndεēchē 'íⁿnyúⁿ s'eeⁿ. 'Úú deenú chíiⁿ chí diiⁿ di. Ní deenú chí 'áará chí 'iⁿ'yāⁿ s'eeⁿ deenú yā dii cáāvā cosas chí diiⁿ di ti cánduuchi di naati nanááⁿ 'úú dii canéé dí tan'dúú^{cā} chí n'díí di cucáāvā nuuⁿndi yeⁿe di. ² Nandúú^{chí} dí. Cunéé diitū di ní cu'téenu ca di yeⁿe cosas chí véé caati vmnááⁿ vmaaaⁿ nguéé diiⁿ di cuidado yeⁿe nducuéⁿē. Cu'téenu ca di ní nguéé cuuvi cho'ōo yeⁿe chí véé chí yeⁿe di. Ní 'úú n'diichí ntiⁿnyuⁿ chí diiⁿ di. Ní nguéé n'daacā ca nanááⁿ Ndyuūs. ³ N'gaacú di yeⁿe chí n'giindiveeⁿ di chí 'iⁿ'yāⁿ chí'cueeⁿ yā dii. Maaⁿ ní diiⁿ di tan'dúú^{cā} chí 'cueeⁿ di ní ndaacadaami di yeⁿe chí diiⁿ di chí nguéé n'daacā. Ní nduuti chí nguéé diiⁿ di cuidado tuu'mi ní 'úú ndaá tan'dúú^{cā} 'áámá chí duucu ní nguéé cadíⁿnuuⁿ di hora chí ndaá nanááⁿ dii. ⁴ Véé duu'vi 'iⁿ'yāⁿ nguaaⁿ ndís'tiⁿ chí snée yā na yáāⁿ Sardis, 'iⁿ'yāⁿ chí nguéé dinuuⁿndí yā tan'dúú^{cā} tanáⁿ'ā 'iⁿ'yāⁿ chí dinuuⁿndí yā. 'iⁿ'yāⁿ s'eeⁿ caⁿ'á yā nduucu ndúú^{cū} catecai cuéé yā ti 'iⁿ'yāⁿ s'eeⁿ ní n'dai taavi yā chí cuuvi 'tíicā ndúú^{cū} yā. ⁵ 'iⁿ'yāⁿ chí cuchéé yā yeⁿe tanducuéⁿē nndaāca yā catecai cuéé yā. Ní 'úú nguéé nadatuūví chí duuchi yā naachi canéé nguūⁿ na libro yeⁿe vida cueⁿe daāⁿmaⁿ. Ní 'úú ní caaⁿ'máⁿ chí duuchí yā nanááⁿ chíidá ní nanááⁿ ángeles dendú^ū. ⁶ 'iⁿ'yāⁿ chí véé veéⁿ yā 'caandiveéⁿ yā chíⁿ chí ngaⁿ'ā Espíⁿritu N'dai yeⁿé Ndyuūs ngii 'iⁿ'yāⁿ s'eeⁿ yeⁿe yaācū s'eeⁿ.

Juan idingúuⁿ yā carta 'cū^ū yeⁿe 'iⁿ'yāⁿ yeⁿe yáāⁿ Filadelfia

⁷ Díⁿ Juan, idingúuⁿ ntúūⁿ di yeⁿe 'iⁿ'yāⁿ ndíí tiⁿiⁿ yeⁿe 'iⁿ'yāⁿ yeⁿe yaācū yeⁿe yáāⁿ Filadelfia. Dendu'ū chí 'túú^{cā} ngaⁿ'á 'iⁿ'yāⁿ chí dεεve taavi ca yā ní cuaacu yā. 'iⁿ'yāⁿ miiⁿ chí ndée yā llave yeⁿe David, 'iⁿ'yāⁿ miiⁿ taachi nn'guaaⁿ yā puerta mar 'áámá 'iⁿ'yāⁿ nguéé cuuvi nn'gaadí yā. Ní taachi nn'gaadí yā 'tiicá ntúūⁿ mar 'áámá 'iⁿ'yāⁿ nguéé cuuvi nn'guaaⁿ yā. ⁸ 'Úú n'diichí tanducuéⁿē chí diiⁿ di. 'Úú n'neéⁿ cucáāvā di 'áámá cheendi va'āi chí maaⁿ ní cánda'āi ní mar 'áámá 'iⁿ'yāⁿ nguéé cuuvi nn'gaadí yā cheendi va'āi miiⁿ. 'Áará chí véé duu'vi fuerzas yeⁿe di ch'iindiveeⁿ di nduudu cuaacu yeⁿé ní nguéé ndaacadaami di yeⁿé. ⁹ 'Caandiveeⁿ di yeⁿé. 'iⁿ'yāⁿ s'eeⁿ ní yeⁿe yááⁿ'guiinūⁿ ti ngaⁿ'á yā nduudu yaadi. Ngaⁿ'á yā chí 'iⁿ'yāⁿ judíos yā chí Israel yā ní nguéé 'túú^{cā} díⁿ yā tan'dúú^{cā} 'iⁿ'yāⁿ judíos yā. Cuin'diichi di. 'Úú idiíⁿ chí 'iⁿ'yāⁿ s'eeⁿ ní ndaá yā nanaaⁿ di ní caantii'yá yā nanááⁿ ca'a di ní cu'téenu yā dii. Ní 'iⁿ'yāⁿ s'eeⁿ cuuvi cadíⁿnuuⁿ yā chí 'úú ní neⁿé dii. ¹⁰ Dii ní ndεε di cuidado yeⁿe nuuⁿndi chí ngaⁿ'á yeⁿe chí cuchεε di, ní cuchéé di. Ní cáāvā chuū 'úú ndéé cuidado yeⁿe dii yeⁿe tiempo chí cuchii chí caaⁿmaⁿ ndaá cosas chí n'diichineeⁿ yā dii. Ní cosas miiⁿ ndaa yeⁿe 'iⁿ'yāⁿ chí snée yā núúⁿmáⁿ iⁿ'yeēⁿdi. Ní n'diichineeⁿ nducyaaca 'iⁿ'yāⁿ chí s'neéⁿ yā na iⁿ'yeēⁿdi 'cū^ū. ¹¹ Cuin'diichi di. Niiⁿnuⁿ ndaá nanááⁿ dii. Cundée ca di cuidado yeⁿé chí véé yeⁿe di ní mar 'áámá 'iⁿ'yāⁿ cuuvi cuta'á yā corona chí cuuvi yeⁿe di. ¹² 'iⁿ'yāⁿ chí cuchéé yā yeⁿe tanducuéⁿē, 'úú idiíⁿ chí 'iⁿ'yāⁿ s'eeⁿ 'áámá canéé yā na yaācū yeⁿé tan'dúú^{cā} 'áámá pilar yeⁿe yaācū yeⁿe Ndyuūs, 'tíica yā. Ní 'āā ntéé can'daa yā yeⁿe yaācū miiⁿ. Ní 'úú idingúuⁿ nchεεté yā chí dúú^{chí} Ndyuūs yeⁿé ndúú^{cū} chí duuchi yeⁿe yáāⁿ yeⁿe Ndyuūs yeⁿé. Ní yáāⁿ miiⁿ nguuvi Jerusalén chí ngai chí ndaā yeⁿe va'ai chεeti nguuvi

ní yeⁿe Ndyuūs yeⁿé. ¹³ 'Iiⁿ'yāⁿ chi véé veéⁿ yā 'caandiveéⁿ yā chi ngaⁿ'ā Espíritu N'dai yeⁿé Ndyuūs ngii 'iiⁿ'yāⁿ s'eeⁿ yeⁿe yaācū s'eeⁿ.

Juan idingúuⁿ yā carta 'cūū yeⁿe 'iiⁿ'yāⁿ yeⁿe yāāⁿ Laodicea

¹⁴ Díí, Juan, idingúuⁿ di yeⁿe 'iiⁿ'yāⁿ ndii tíiⁿ yeⁿe 'iiⁿ'yāⁿ yeⁿe yaācū yeⁿe yāāⁿ Laodicea: Nduudú 'cūū ní yeⁿe 'iiⁿ'yāⁿ chi nguuví yā Amén chi neⁿe caaⁿ'maⁿ chí cuaacu yā. 'Iiⁿ'yāⁿ miiⁿ chi testigo yā ní ngaⁿ'a cuaacu yā cueⁿ'e daāⁿ'maⁿ. 'Iiⁿ'yāⁿ miiⁿ ní yeⁿé yā tanducuéⁿ'ē chi Ndyuūs din'dái yā. ¹⁵ 'Úú deenú tanducuéⁿ'ē chi diiⁿ di. Ní díí canee di tan'dúúca chi nguéé ndúú 'iiⁿ'nūⁿ di ndíí nguéé ndúú 'iiche di. De'ε chúúca n'daacā cáāvā dii ndúútí chí 'iiⁿ'nūⁿ di o 'iiche di. ¹⁶ Cáāvā chi dii ní cuútū di, ní nguéé 'iiⁿ'nūⁿ di, ndíí nguéé ndúú 'iichē di, 'úú ní dííⁿ ndúúcu di tan'dúúca chi caachí dii yeⁿ'ē na cheendí ti dii tan'dúúca chi nuūⁿ'nīⁿ daaⁿ' dii, ní 'tíicā dííⁿ. ¹⁷ Díí ní 'túúca ngaⁿ'a di chi 'cuiica di ní nguéé de'ē veε neⁿ'e di ti neené n'deēe dendú'ū yeⁿ'e di véé. Naati díí nguéé deenu di chi nguéé de'ē veε yeⁿ'e di. Ní ndaachí canée di caati canée di tan'dúúca chí díí ní pobre di ní nguéé catecai di, ní ngeenáaⁿ di. 'Tíicā canée di. ¹⁸ 'Úú ní teé consejo dii. Cuai di yeⁿ'e 'úú 'dííⁿnguāⁿ chi 'iiⁿ'yāⁿ din'dái yā cáāvā nguuchi yaⁿ'ā ní 'íicú cuuvi cuaacu chí 'cuiica di. Ní cuai di catecai cuéē chí cu'nuuⁿ di cuerpo yeⁿ'e maaⁿ di ní nguéé cuuvi 'cuiiáaⁿ di caavā chí nguéé catecai di. Ní cuai di yiicū ní cu'neeⁿ di na nduutináaⁿ di ní 'íicú cuuvi snaaⁿ di. ¹⁹ 'Úú yaa'vineé nducyaaca 'iiⁿ'yāⁿ chí idineⁿ'é ní dííⁿ castigar 'iiⁿ'yāⁿ s'eeⁿ. Maaⁿ ní canée chí ndaácadáámí dí yeⁿ'e chí diiⁿ di chí nguéé n'daacā. Ní serio canee di ndii staava yeⁿ'e di. ²⁰ Cuin'diichi di. 'Úú ní canee cheendi va'āi ní 'cuai 'iiⁿ'yāⁿ. Nduuti chí 'áamá 'iiⁿ'yāⁿ 'caandiveéⁿ yā nduudu yeⁿ'é ní nn'guaaⁿ yā cheendi va'āi caavā 'úú, tuu'mi ní 'úú cho'ó cuaaⁿ chεeti va'āi ní n'diichí 'iiⁿ'yāⁿ miiⁿ. Ní che'éd ndúúcu yā ní 'iiⁿ'yāⁿ miiⁿ che'éd yā nduucú. ²¹ 'Iiⁿ'yāⁿ chí cuchεε yā yeⁿ'e tanducuéⁿ'ē dendu'ū 'úú ní ca'á lugar yeⁿ'e yā chí 'cuūndí yā ndúúcu 'úú na trono yeⁿ'é tan'dúúca chí 'úú chichεé yeⁿ'e tanducuéⁿ'ē dendu'ū ní ch'iindí ndúúcu chiidá na trono yeⁿ'é yā. ²² 'Iiⁿ'yāⁿ chí véé veéⁿ yā 'caandiveéⁿ yā chí ngaⁿ'ā Espíritu N'dai yeⁿ'é Ndyuūs ngii nducyaaca 'iiⁿ'yāⁿ yeⁿ'e yaācū s'eeⁿ.

4

Nducyáácá yā chí snée yā na va'ai chεeti nguuvi dich'εeté yā Ndyuūs

¹ Chó'ōo dendu'ū chí 'túúca ní cuayiivi ní 'úú n'diichí cuaaⁿ 'niiⁿ'nūⁿ ní miiⁿ canée 'áamá cheendi va'āi yeⁿ'e va'ai chεeti nguuvi chí canée candá'āi. Ní ch'iindiveéⁿ 'áamá nduudu chí tan'dúúca chí n'gεecu trompeta. Ní nduudu miiⁿ dáamá ndúúcu nduudu chí ch'iindiveéⁿ vmnááⁿ vmnaaⁿ. Ní nduudu miiⁿ ní caⁿ'a nduucú 'tíicā: Dii cūchεε dí 'múúⁿ ní 'úú ní 'cuuⁿ'míⁿ dii dendu'ū chí cuchii cuayiivi.

² Hora mííⁿ nūuⁿ 'úú canee maaⁿ poder Espíritu N'dai yeⁿ'é Ndyuūs ní n'diichí 'áamá trono na va'ai chεeti nguuvi. Ní Ndyuūs véé yā na trono miiⁿ. ³ 'Iiⁿ'yāⁿ chí véé yā na trono miiⁿ ní núúⁿ'máⁿ cuerpo yeⁿ'é yā naáⁿ yā tan'dúúca 'áamá tuū chí 'áamá ngíí n'gai tan'dúúca tuū jaspe ndúúcu tuū sardio. 'Tíicā cuerpo yeⁿ'é yā. Ní nuuⁿ'maⁿ ndiivií cuaaⁿ 'diituú trono miiⁿ canee 'áamá cun'gúúⁿ'dí tan'dúúca color yeⁿ'e tuū esmeralda. ⁴ Ní nuuⁿ'maⁿ ndiivií cuááⁿ 'diituú trono miiⁿ n'diichí ndiicu cuūuⁿ tronos yeⁿ'e 'iiⁿ'ntyéⁿ'ē s'eeⁿ naachi véé yā. Ní nducyáácá yā véé catecai yā chí cuéē. Ní nducyáácá yā snúúⁿ tííⁿ yā 'áamá corona yeⁿ'e 'dííⁿnguāⁿ. ⁵ Ní yeⁿ'e trono chí naavtaⁿ'ā can'dáa 'cuai ndúúcu deεve ndúúcu nduudu. Ní nanááⁿ trono miiⁿ canee ndúúcu ndεēchē yaⁿ'ā ngiichi chí ndεēchē espíritus yeⁿ'e Ndyuūs. ⁶ Ní canee ntúúⁿ nanááⁿ trono miiⁿ 'áamá cosa tan'dúúca nuūⁿ'nīⁿ'yáⁿ'ā tan'dúúca 'áamá vidrio chí ngii deεve n'dai. Ní naavtaⁿ'ā yeⁿ'e trono miiⁿ ní nuuⁿ'maⁿ ndiivií cuaaⁿ 'diituú yeⁿ'e trono miiⁿ snée cuūuⁿ 'iiⁿ'yāⁿ yeⁿ'ē va'ai chεeti nguuvi chí snée 'yaaⁿ n'dái nduutináaⁿ yā ndii cuááⁿ vmnaaⁿ yā ndii cuááⁿ daamí yā. Ní ndiituú nduutináaⁿ yā núúⁿ'máⁿ ch'εete cuerpo yeⁿ'é yā. ⁷ 'Iiⁿ'yāⁿ yeⁿ'e va'ai chεeti nguuvi chí vmnááⁿ vmnaaⁿ tan'dúúca 'áamá 'yáíⁿyāⁿ cuá'áá 'tiicá yā. Ndií chííⁿ ndii 'uuví yā tan'dúúca 'áamá itiindu 'lííⁿ 'tiicá yā. Ní 'iiⁿ'yāⁿ ndii chííⁿ ndii 'iinū miiⁿ veε naáⁿ

yā tan'dúúcā naán 'ii'yān 'tííca yā. Ní ndii chíín ndii cuūúⁿ 'ii'yān ní tan'dúúcā í'yāa chi nge'e tí na 'yúúné 'tíicā yā. ⁸ Ní nduu cuūuⁿ 'ii'yān s'eeⁿ ní véé niyaaⁿ ngēechi yā 'áámá 'aamá yā ní núúⁿ máⁿ cuááⁿ 'diituú yā ní cuaaⁿ nááⁿ ngēechi yā ní ndiitúú nduuti náaⁿ yā. Nguéé intaavi'tuunuúⁿ yā ndíí nguéé ndúú nguuví ndíí nguéé ndúú n'gaaⁿ chi caⁿ'a yā: Dē'ē chúúcā dēeve yā, dē'ē chúúcā dēeve yā, dē'ē chúúcā dēeve yā, Señor Ndyuūs, chi véé tanducuéⁿ'ē poder yeⁿ'é yā. 'Ii'yāⁿ chi canéé ndii vmnááⁿ vmnaaⁿ 'ii'yāⁿ chi maaⁿ canéé yā, ní 'ii'yāⁿ chí canéé chí ndaa yā.

⁹ Ní ca'áámá ca'áámá vmnéⁿ'ēe chi 'ii'yāⁿ s'eeⁿ dich'ēeté yā 'ii'yāⁿ miiⁿ chi véé yā na trono miiⁿ ní dííⁿ yā honrar 'ii'yāⁿ miiⁿ ní ca'á yā gracias 'ii'yāⁿ miiⁿ chi candúúchí yā cueⁿ'e daāⁿmaⁿ 'tíicā diiⁿ yā. ¹⁰ Ndu'u ndiicú cuūuⁿ 'iiⁿntyéⁿ'ē candiitín'díi yā nanááⁿ 'ii'yāⁿ miiⁿ chi véé yā na trono miiⁿ ní dich'ēeté yā 'ii'yāⁿ chi 'áámá canéé yā cueⁿ'e daāⁿmaⁿ. Ní 'ii'yāⁿ s'eeⁿ s'neeⁿ yā coronas yeⁿ'e yā nanááⁿ trono miiⁿ ní caⁿ'a yā 'túúcā: ¹¹ Díí Señor chi Ndyuūs yeⁿ'e yú, díí ní n'dai taavi di chi dich'ēeté yā dii, ní dííⁿ yā honrar dii, ní ngaⁿ'á yā chi tanducuéⁿ'ē poder ní yeⁿ'e di caati dii ní din'dái di tanducuéⁿ'ē dendu'ū chi véé. Ní cáávā chi maaⁿ di neⁿ'e di din'dái di tanducuéⁿ'ē dendu'ū, 'tíicā diiⁿ di.

5

Libro ndúúcū 'iiti cuūchī

¹ Ní n'diichí na ta'a cuaacú yā 'ii'yāⁿ chi véé yā na trono miiⁿ 'áámá libro chi tan'dúúcā 'áámá rollo caaca naachi canéé nguūⁿ cuááⁿ chēeti ndii cuaaⁿ dáámí. Ní libro miiⁿ nduudi ndúúcū ndēēchē sellos. ² Ní n'diichí 'áámá ángel chi véé poder yeⁿ'é yā. Ní yuudu n'dái 'cai yā ní caⁿ'a yā 'túúcā. ¿Dú'ū chi n'dai taavi ca chi cuuvi nn'guaaⁿ libro 'cūū ní ndiví sellos chi nduudí?

³ Naati mar 'áámá 'ii'yāⁿ yeⁿ'e va'ai chēeti nguuví ndíí nguéé mar 'áámá 'ii'yāⁿ yeⁿ'e iⁿ'yeeⁿdí 'cūū ndíí nguéé ndúú mar 'áámá 'ii'yāⁿ chi canúúⁿ maaⁿ yáⁿ'āa cuuvi nan'guaaⁿ yā libro miiⁿ ndíí nguéé ndúú cuuvi n'diichí yā libro miiⁿ. ⁴ Ní 'úú Juan neené chēecu taavi tí nguéé ndaaca yā mar 'áámá 'ii'yāⁿ chi n'dai taavi cá yā chi cuuvi nan'guaaⁿ yā libro miiⁿ ní 'cueeⁿ yā yeⁿ'ē. Ndíí nguéé ndúú cuuvi snaaⁿ yā libro miiⁿ. ⁵ Tuu'mi ní 'áámá 'iiⁿntyéⁿ'ē caⁿ'a yā chii yā 'úú: Díí nguéé cuēecu di. Cuin'díichí dí. Jesucristo chi duuchi 'yáínyāaⁿ cuá'aá, chi yeⁿ'e ndaata yeⁿ'e 'ii'yāⁿ Judá chi yeⁿ'e 'ii'yāⁿ yeⁿ'e ndaata David, 'ii'yāⁿ miiⁿ chichéé yā yeⁿ'e tanducuéⁿ'ē ní cuuví nan'guaaⁿ yā libro miiⁿ ní cuuvi cáánteⁿ yā ndu'u ndēēchē sellos.

⁶ Tuu'mi ní n'diichí chi naavtaⁿ'ā yeⁿ'e trono miiⁿ ní naavtaⁿ'ā yeⁿ'e ndu'u cuūuⁿ 'ii'yāⁿ miiⁿ ní naavtaⁿ'ā yeⁿ'e 'iiⁿntyéⁿ'ē s'eeⁿ n'diichí 'áámá 'ii'yāⁿ chi nguuví 'iiti cuūchī chi chééndii yā. Ní n'diichí chi véé seña na cuerpo yeⁿ'e yā chi 'ii'yāⁿ ch'ii'n'núⁿ yā 'yā. Ní 'ii'yāⁿ chi nguuví 'iiti cuūchī miiⁿ véé ndēēchē duuⁿníⁿ'n'íⁿ yā ní ndēēchē nduutináaⁿ yā chi ndēēchē espíritus yeⁿ'é Ndyuūs chi Ndyuūs dicho'ó yā núúⁿ máⁿ iⁿ'yeeⁿdí. ⁷ 'Ii'yāⁿ miiⁿ ní cueⁿ'é yā ní ndaá yā ní sta'á yā libro miiⁿ yeⁿ'e ta'ā cuaacú yā 'ii'yāⁿ chi véé yā na trono miiⁿ. ⁸ Ní taachi sta'á yā libro miiⁿ ní ndúú cuūuⁿ 'ii'yāⁿ miiⁿ ndúúcū ndiicú cuūuⁿ 'iiⁿntyéⁿ'ē chintii'yá yā nanááⁿ 'ii'yāⁿ chi nguuví 'iiti cuūchī miiⁿ. Ní ca'áámá ca'áámá 'iiⁿntyéⁿ'ē s'eeⁿ candēe yā arpas yeⁿ'e yā. Ní ndéé yā chiite yeⁿ'e 'díínguāaⁿ ndiituú ndúúcū cúⁿ'úyaa. Ní 'yaaⁿ'miⁿ yeⁿ'e cúⁿ'úyaa miiⁿ chííⁿ chi ngaⁿ'anguá'āa 'ii'yāⁿ na iⁿ'yeeⁿdí 'cūū, 'ii'yāⁿ chí yeⁿ'e Ndyuūs. ⁹ Ní chiitá yā 'áámá canto chí ngai chi 'tíicā:

Díí ní n'dai taavi di chi cuta'a di libro miiⁿ ní cáánteⁿ di sellos yeⁿ'ē caati 'ii'yāⁿ ch'ii'n'núⁿ yā dii. Ní dii cáávā yuūúⁿ yeⁿ'e di cáí di nús'ūū chi cuuví 'nū yeⁿ'e Ndyuūs nús'uu. Ní nús'uu ní yeⁿ'e nducyáácá raza yeⁿ'e 'ii'yāⁿ, ní yeⁿ'ē tanducuéⁿ'ē idioma ní yeⁿ'ē tanducuéⁿ'ē yááⁿ, ní yeⁿ'e tanducuéⁿ'ē nación. 'Tíicā nús'uu.

¹⁰ Ní dii ní din'dái di nús'uu ní diiⁿ di chi reyes nús'uu, ní diiⁿ di chi chiidúú nús'uu cucáávā Ndyuūs yeⁿ'e yú. Ní 'iicú cuuvi caaⁿ'maⁿ ntiiⁿnyuⁿ 'nū nanááⁿ 'ii'yāⁿ yeⁿ'e iⁿ'yeeⁿdí 'cūū.

¹¹ Ní cuaaⁿ 'nínⁿnúⁿ n' diichí ní ch'iindiveéⁿ nduudu yeⁿē 'yaaⁿ n'dái ángeles chi snée yā cuaaⁿ 'diituu yeⁿe trono miiⁿ ní yeⁿe nduu cuūuⁿ 'iínⁿyāⁿ miiⁿ, ní yeⁿe 'iínⁿtyéⁿē s'eeⁿ. Ní ángeles ní n'dee n'dái yā chi ngii yā ndiichi millares ndii chíⁿ cuuvi millares ndúúcu millares ndúúcu millares. ¹² Ní yuudu n'dai caⁿa nducyaaca s'eeⁿ:

'iínⁿyāⁿ chi nguuvi 'iiti cuūchī chi 'iínⁿyāⁿ ch'iínⁿnúⁿ yā ní n'dai taavi cá yā chi nducyaaca 'iínⁿyāⁿ dich'εεté yā. 'iínⁿyāⁿ miiⁿ sta'á yā tanducuéⁿē dendu'ū poder ndúúcu tanducuéⁿē vaadī 'cuiica ndúúcu tanducuéⁿē vaadī deenu ndúúcu tanducuéⁿē fuerzas ndúúcu tanducuéⁿē honra ndúúcu tanducuéⁿē vaadī dεεve ngíí ndúúcu chi nducyaaca 'iínⁿyāⁿ dich'εεté yā 'iínⁿyāⁿ miiⁿ.

¹³ Ní ch'iindiveéⁿ ntuúⁿ nduudu yeⁿe nducyaaca chi snée na va'ai chεeti nguuvi ndúúcu nducyaaca chi snée vmnaaⁿ yáⁿāa 'cūū ndúúcu nducyaaca chi snée maaⁿ yáⁿāa ndúúcu nducyaaca chi snée ná nuūⁿnīⁿyáⁿā, nducyaaca chi véé yeⁿe nducueⁿē chi véé ní ngiita yā 'tíicā:

Cueⁿe daāⁿmaⁿ cueⁿe daāⁿmaⁿ dich'εεté 'nū dii ní diín 'nū honrar dii. Ní caⁿa 'nū chi vaadī dεεve ngii ndúúcu poder ní yeⁿe 'iínⁿyāⁿ chi véε yā na trono miiⁿ ní yeⁿe 'iínⁿyāⁿ chi nguuvi 'iiti cuūchī.

¹⁴ Ní ndu'u cuūuⁿ 'iínⁿyāⁿ s'eeⁿ ní caⁿa yā: Tíicā cuuvi. Ní ndu'u ndiichi cuūuⁿ 'iínⁿtyéⁿē chintii'yá yā ní s'téenu yā 'iínⁿyāⁿ chi 'áamá canée yā cueⁿe daāⁿmaⁿ.

6

Yeⁿe ndēēchē sellos

¹ Cuayiivi ní n'diichí taachi 'iínⁿyāⁿ chi nguuvi 'iiti cuūchī nan'guaaⁿ yā 'áamá chée sello yeⁿe chi naachi ndēēchē sello yeⁿe libro miiⁿ. Ní ch'iindiveéⁿ nduudu yeⁿe 'áamá chée 'iínⁿyāⁿ yeⁿe chi cuuúⁿ yā chi canduuchi. Ní neené diitūu n'gai yā tan'dúúca daavi ní caⁿa yā: Cuchí di ní n'diichi di.

² 'Úú ní n'diichí ní míⁿ cánéé 'yúudūu cuéē ndúúcu 'áamá saⁿā candúu sa 'iiti miiⁿ. Ní ndεe sa 'áamá arco na ta'a sa. Ní ca'a yā 'áamá corona saⁿā miiⁿ ní can'daā sa chi 'cuuⁿmiⁿ sa. Ní diiⁿ sa chí cuchε sa yeⁿe enemigo yeⁿe sa.

³ Ní taachi 'iínⁿyāⁿ chi nguuvi 'iiti cuūchī nan'guaaⁿ yā ndii chíⁿ ndii 'úúví sello yeⁿe libro miiⁿ ch'iindiveéⁿ nduudu yeⁿe ndii chíⁿ ndii 'uuvi 'iínⁿyāⁿ chí naachi cuuúⁿ yā, ní caⁿa yā: Cuchí di ní n'diichi di.

⁴ Tuu'mi ní n'diichí. Can'daā táámá 'yúudūu chi cuá'a tī ndúúcu 'áamá saⁿā candúu sa 'iiti miiⁿ. Ní saⁿā miiⁿ sta'a sa 'áamá machete chí ch'εεte chí 'uūvī lados 'caāiⁿ chí táámá yā ca'a sa. Ní saⁿā miiⁿ ndεe sa poder chí diitiinú miiⁿ chí diví sa vaadī 'diiⁿ yeⁿe iⁿ'yeeⁿdí 'cūū ní 'íicú 'iínⁿyāⁿ yeⁿe iⁿ'yeeⁿdí 'cūū caⁿá yā 'caaⁿnúⁿ yā 'áamá yā taama yā.

⁵ Ní taachi 'iínⁿyāⁿ chi nguuvi 'iiti cuūchī nan'guaaⁿ yā ndii chíⁿ ndii 'íínú sello ch'iindiveéⁿ nduudu yeⁿe ndii chíⁿ ndii 'íínú 'iínⁿyāⁿ miiⁿ chí caⁿa yā 'túúca: Cuchí di ní n'diichi di. Ní n'diichí 'áámá 'yúudūu cuáiⁿ. Ní saⁿā chí candúu sa 'yúudūu miiⁿ ndεe sa 'áámá cūū caadi na ta'a sa. ⁶ Ní ch'iindiveéⁿ nduudu naavtáⁿā yeⁿe na cuūuⁿ 'iínⁿyāⁿ s'eeⁿ chí caⁿa 'tíicā: 'Áámá kilo yeⁿe trigo ní nditiiⁿ'yuⁿ caadi, ní 'iínⁿū kilos yeⁿe cebada ní nditiiⁿ'yuⁿ caadi. Nguéé diiⁿ di daño yeⁿe aceite, ndíí nguéé ndúú yeⁿe vino ti nduu 'uuvi naaⁿ ní nduuví n'dee n'dái.

⁷ Ní taachi 'iínⁿyāⁿ chi nguuvi 'iiti cuūchī miiⁿ nan'guaaⁿ yā ndii chíⁿ ndíí cúūu sello miiⁿ ch'iindiveéⁿ nduudu yeⁿe 'iínⁿyāⁿ chí ndii chíⁿ ndíí cuūuⁿ 'iiti miiⁿ chí caⁿa 'túúca: Cuchí di ní n'diichi di.

⁸ N'diichí ní snaáⁿ 'áámá 'yúudūu cuaaⁿ dεεvé ndúúcu saⁿā chí cundúu sa 'yúudūu miiⁿ. Saⁿā miiⁿ ní nguuvi sa vaadī n'gii. Ní cuaaⁿ daami sa cuchii taama saⁿā chí mensajero yeⁿe vaadī n'gíí chí tá'āa ní nguain'dai almas yeⁿe 'iínⁿyāⁿ chí n'díí. Tuu'mi ní 'iínⁿyāⁿ ca'á yā poder saⁿā s'eeⁿ yeⁿe 'áámá cuarto parte yeⁿe yáⁿāa yeⁿe iⁿ'yeeⁿdí 'cūū chí saⁿā s'eeⁿ diiⁿ sa caandaá s'eeⁿ. Ní 'íicú ch'iínⁿū sa 'iínⁿyāⁿ ndúúcu machete chí 'uūvī lados 'caāiⁿ ní ndúúcu 'áámá vaadī cuiicu ní ndúúcu ca'ai ní ndúúcu 'iiti taaⁿ. Ní 'tíicā saⁿā s'eeⁿ ch'iínⁿū sa 'iínⁿyāⁿ.

⁹ Ní taachi 'iiⁿ'yāⁿ chi nguuvu 'iiti cuūchī nan'guaaⁿ yā ndii chíⁿ ndii nyuⁿ'u sello miiⁿ, n'diichí mááⁿ nátaī ní n'diichí almas yeⁿ'e 'iiⁿ'yāⁿ chi n'díí. Ní 'iiⁿ'yāⁿ ch'iiⁿ'núⁿ yā 'iiⁿ'yāⁿ s'eeⁿ cáávā chi ngaⁿ'á yā nduudu cuaacu yeⁿ'é Ndyuūs ní cáávā chi ngaⁿ'a cuaacú yā yeⁿ'e Ndyuūs. ¹⁰ Ní almas yeⁿ'e 'iiⁿ'yāⁿ s'eeⁿ yuudu n'dáí 'caí yā ní caⁿ'a yā: N'dii Señor chi véé tanducuéⁿ'ē poder yeⁿ'e nī, n'dii chi dεεve ní ní cuaacú nī, ¿ndíí dε'ē tiempo caⁿ'á nī n'diichí nī nuuⁿndi yeⁿ'e 'iiⁿ'yāⁿ chi snée yā iⁿ'yeeⁿdí 'cūū ní díí nī castigar 'iiⁿ'yāⁿ s'eeⁿ cáávā chi ch'iiⁿ'núⁿ yā nú'suu?

¹¹ Ní 'iiⁿ'yāⁿ miiⁿ ca'á yā 'áámá 'áámá yā catecai cuéε yā. Ní 'iiⁿ'yāⁿ miiⁿ ngaⁿ'á yā 'tíicā: Ndís'tiī ní ntaavi'tuunúúⁿ nī 'tεε 'téé cá ndíí taachi 'iiⁿ'yāⁿ yeⁿ'e iⁿ'yeeⁿdí 'cūū 'caaⁿ'núⁿ yā tanáⁿ'ā ca 'iiⁿ'yāⁿ chi diiⁿ ntiiⁿ'nyúⁿ yeⁿ'e Cristo, 'iiⁿ'yāⁿ chi hermanos yeⁿ'é nī. Ní canéé chi 'cuūvi yā tan'dúúca ndís'tiī ch'íí nī.

¹² Ní n'diichí 'iiⁿ'yāⁿ chi nguuvu 'iiti cuūchī taachi nan'guaaⁿ yā ndii chíⁿ ndii niyaaⁿ sello miiⁿ. Ní n'diichí chi díítūu n'dáí nuⁿ'u yáⁿ'āa yeⁿ'ē iⁿ'yeeⁿdí 'cūū. N'diichí 'yáⁿ'ā miiⁿ chíí tan'dúúca chi cuáiⁿ catecai yā chi cuáiⁿ yeⁿ'e luto. Ní 'iiyū miiⁿ ní nduuví cua'āa tan'dúúca yuūúⁿ. ¹³ Ní 'ííⁿ'nyúⁿ s'eeⁿ yeⁿ'e nanguuvi ní sn'daā ndii na yáⁿ'āa. Ní tan'dúúca chi ingéε tá'a n'gui'i yáⁿ'á yeⁿ'e n'guíidii taachi ndaā 'áámá 'yúúné tááⁿ 'tíicā sn'daā 'ííⁿ'nyúⁿ s'eeⁿ. ¹⁴ Ní nanguuvi ní ch'iinu yeⁿ'ē ní nduuvu 'lííⁿ tan'dúúca chi n'gεεcu yú 'áámá caaca. Ní 'áámá 'áámá yiicū ndúúcu 'áámá 'áámá isla ní nuⁿ'u yeⁿ'e na lugar yeⁿ'ē. ¹⁵ Ní 'iiⁿ'yāⁿ yeⁿ'e iⁿ'yeeⁿdí 'cūū, reyes ndúúcu 'iiⁿ'yāⁿ chí ch'εεte ndúúcu 'iiⁿ'yāⁿ 'cuiica ndúúcu 'iiⁿ'yāⁿ comandantes ndúúcu 'iiⁿ'yāⁿ chi véé poder yeⁿ'é yā ndúúcu 'iiⁿ'yāⁿ chi 'áámá dííⁿ yā ntiiⁿ'nyuⁿ yeⁿ'e 'iiví yā ndúúcu 'iiⁿ'yāⁿ chi libre yā, nducyáácá yā chεeti núúⁿ n'de'ei yā na yiivi yáává ní nguááⁿ na tuūu yeⁿ'e yiicū. ¹⁶ Ní 'iiⁿ'yāⁿ s'eeⁿ caⁿ'a yā chii yā icyáⁿ'ā ndúúcu tuūu: Ndís'tiī icyáⁿ'ā ndúúcu tuūu, cun'dáá nduú nī vmnaaⁿ yeⁿ'e nús'uu ní cunūúⁿ n'dé'ei nī nús'uu yeⁿ'ē nanááⁿ Ndyuūs chí véε yā na trono miiⁿ ní yeⁿ'e castigo chi neené diitūu n'dai chí Jesucristo chí nguuvu 'iiti cuūchī téε yā nús'uu.

¹⁷ Caati 'āā ndaā nguuvu ch'εεte miiⁿ taachi Ndyuūs ca'a yā castigo 'iiⁿ'yāⁿ s'eeⁿ ní ¿Du'ū cuuvi cuchéé castigo 'cūū?

7

Yeⁿ'é 'iiⁿ'yāⁿ chi señalado yā yeⁿ'e tribus yeⁿ'e 'iiⁿ'yāⁿ Israel

¹ N'diichí dendú'ū chi 'túúca, ní cuayiivi 'úú n'diichí cuūuⁿ ángeles chi chééndii yā ndu'u cuuúⁿ esquinas yeⁿ'ē iⁿ'yeeⁿdí 'cūū. Ní ángeles s'eeⁿ índεenee yā ndii chíⁿ ndii cuuúⁿ 'yúúné yeⁿ'e yáⁿ'āa 'cūū. Ní 'íicú 'yúúné s'eeⁿ nguéé chéenū diitúu na yáⁿ'āa ndíí nguéé ndúú vmnaaⁿ mar 'áámá nuūⁿnīⁿ'yáⁿ'ā, ndíí nguéé ndúú vmnaaⁿ mar 'áámá yáⁿ'á. ² Ní n'diichí ntuúⁿ táámá ángel chi cuchii yā naachi can'daa 'yáⁿ'ā. Ní ndεε yā na ta'a yā 'áámá sello yeⁿ'é Ndyuūs chí canduuchi. Ní ángel miiⁿ yúúdu n'dáí ngaⁿ'a yā ndu'u cuūuⁿ ángeles chi sta'á yā poder chi ditiinú yā chí dííⁿ yā daño na yáⁿ'āa 'cūū ndúúcu ná nuuⁿnīⁿ'yáⁿ'ā.

³ Ní ángel miiⁿ ngaⁿ'á yā 'túúca: Ndís'tiī ángeles, nguéé dííⁿ nī daño yeⁿ'e yáⁿ'āa 'cūū, ndíí nguéé ndúú yeⁿ'e nuūⁿnīⁿ'yáⁿ'ā, ndíí nguéé ndúú yeⁿ'e yáⁿ'á ndíí taachi s'nuúⁿ 'nū 'áámá sello yeⁿ'e Ndyuūs na nchéetē 'iiⁿ'yāⁿ chí dichí'vē Ndyuūs yeⁿ'e yú.

⁴ Ní ch'iindiveén chí duuchi 'iiⁿ'yāⁿ chí chii sellado yā ní ngii yā 'áámá ciento 'uūvī ngeεcú cuūuⁿ mil 'iiⁿ'yāⁿ chí 'iiⁿ'yāⁿ yeⁿ'e nducuéⁿ'ē tribus yeⁿ'e ndaata yeⁿ'e 'iiⁿ'yāⁿ Israel. ⁵ 'Iiⁿ'yāⁿ yeⁿ'e tribu yeⁿ'e ndaata saⁿ'ā Judá ní ndíí yā sellado yā ndiichúúví mil. 'Iiⁿ'yāⁿ yeⁿ'e tribu yeⁿ'e ndaata saⁿ'ā Rubén ní ndíí yā sellado yā ndiichúúví mil. 'Iiⁿ'yāⁿ yeⁿ'e tribu yeⁿ'e ndaata saⁿ'ā Gad ní ndíí yā sellado yā ndiichúúví mil. ⁶ 'Iiⁿ'yāⁿ yeⁿ'e tribu yeⁿ'e ndaata saⁿ'ā Aser ní ndíí yā sellado yā ndiichúúví mil. 'Iiⁿ'yāⁿ yeⁿ'e tribu yeⁿ'e ndaata saⁿ'ā Neftalí ní ndíí yā sellado yā ndiichúúví mil. 'Iiⁿ'yāⁿ yeⁿ'e tribu yeⁿ'e ndaata saⁿ'ā Manasés ní ndíí yā sellado yā ndiichúúví mil. ⁷ 'Iiⁿ'yāⁿ yeⁿ'e tribu yeⁿ'e ndaata saⁿ'ā Simeón ní ndíí yā sellado yā ndiichúúví mil. 'Iiⁿ'yāⁿ yeⁿ'e tribu yeⁿ'e ndaata saⁿ'ā Leví ní ndíí yā sellado yā ndiichúúví mil. 'Iiⁿ'yāⁿ yeⁿ'e tribu yeⁿ'e ndaata saⁿ'ā Isacar ní ndíí yā sellado yā ndiichúúví mil. ⁸ 'Iiⁿ'yāⁿ yeⁿ'e tribu yeⁿ'e ndaata saⁿ'ā Zabulón ní ndíí yā

sellado yā ndiichúví mil. 'Iiⁿyāⁿ yeⁿe tribu yeⁿe ndaata saⁿā José ní ndií yā sellado yā ndiichúví mil. 'Iiⁿyāⁿ yeⁿe tribu yeⁿe ndaata saⁿā Benjamín ní ndií yā sellado yā ndiichúví mil.

Nducyáácá 'iiⁿyāⁿ chi véé catecai cuéé yā

⁹ Cuayiivi ní n'diichí n'dee n'dái 'iiⁿyāⁿ yeⁿe tanducuéⁿē nación, yeⁿe tanducuéⁿē raza, yeⁿe 'iiⁿyāⁿ yeⁿe tanducuéⁿē daveedi ndúúⁿcū tanducuéⁿē davaacu chi ñ'dááⁿ, yeⁿe tanducuéⁿē yāāⁿ yeⁿe tanducuéⁿē 'iiⁿyāⁿ chi véé na iⁿ'yeeⁿdí 'cūū. Ní nducyaaca 'iiⁿyāⁿ s'eeⁿ chééndii yā nanááⁿ trono miiⁿ ní nanááⁿ 'iiⁿyāⁿ chi nguuvu 'iiti cuūchī. Ní mar 'áámá 'iiⁿyāⁿ nguéé cuuvi didúúché yā. Nducyáácá yā véé catecai yā cuéé ní ndéé yā yiiⁿnyúⁿ na ta'á yā. ¹⁰ Ní nducyáácá yā 'cai yā yiicú yā ní caⁿ'a yā 'tíicā:

Ndyuūs chi véé yā na trono miiⁿ ndúúⁿcū Cristo chi nguuvu 'iiti cuūchī nadanguáⁿ'ai yā s'uuúⁿ. ¹¹ Ní nducyaaca ángeles s'eeⁿ ní ch'εεte yā núúⁿmáⁿ 'diituuⁿ yeⁿe trono miiⁿ ndúúⁿcū ndu'ū ndiicú cuūⁿ 'iiⁿntyéⁿē ndúúⁿcū ndu'u cuūⁿ 'iiⁿyāⁿ s'eeⁿ. Ní nducyaaca yā candiitⁿ'dii yā nanááⁿ 'iiⁿyāⁿ chi véé yā na trono miiⁿ ní dich'εεté yā Ndyuūs. ¹² Ní 'tíicā caⁿ'a yā:

'Tíicā va. Di'chεεte yú Ndyuūs chi dεεve ngii yā chí deenu yā tanducuéⁿē dendu'ū chi véé. Caⁿ'a yú gracias Ndyuūs. Ní diiⁿ yú honrar 'iiⁿyāⁿ. Ní nducuéⁿē poder ndúúⁿcū nducuéⁿē fuerzas ní yeⁿe yā. Ní 'tíicā canéé Ndyuūs yeⁿe yú cueⁿ'e daāⁿmaⁿ cueⁿ'e daāⁿmaⁿ. 'Tíicā.

¹³ Cuayiivi ní 'áámá 'iiⁿntyéⁿē nan'guεεcútaⁿ'a yā ní itiinguunééⁿ yā 'úú: ¿Dú'u rá 'iiⁿyāⁿ chi véé catecai cuéé yā ní tíi chiicá yā?

¹⁴ Ní 'úú ní ngaⁿ'á: N'dii, Señor, deenú nī yeⁿe yā. Tuu'mi ní 'iiⁿntyéⁿē miiⁿ caⁿ'a yā: 'Iiⁿyāⁿ s'eeⁿ ní chiica yā yeⁿe chi ch'eenu taaví yā chií ní 'āā dεεvé yā catecai yā ndúúⁿcū yuuúⁿ yeⁿe Cristo chi nguuvu 'iiti cuūchī. ¹⁵ Ní cáāvā chuū 'iiⁿyāⁿ s'eeⁿ snée yā nanááⁿ Ndyuūs chi véé yā na trono yeⁿe yā. Ní dichí'vε yā Ndyuūs ndii nguuvu ndii n'gaaⁿ na yáacū yeⁿe yā. Ní 'iiⁿyāⁿ chi véé yā na trono miiⁿ ní canéé yā miiⁿ ní candéé yā cuidado nducyaaca 'iiⁿyāⁿ s'eeⁿ. ¹⁶ Ní 'iiⁿyāⁿ s'eeⁿ 'āā ntéé cuuvi cuiicú yā, ní 'āā ntéé cuuvi yaācá yā. Ní 'āā ntéé cundāā yaⁿ'ā vmnaaⁿ yeⁿe yā ndí nguéé ndúúⁿ cuuvi cuucu 'iiⁿyāⁿ ndúúⁿcū yaⁿ'ā. ¹⁷ Caati 'iiⁿyāⁿ chi nguuvu 'iiti cuūchī chi véé yā na trono miiⁿ ní díⁿ yā cuidado 'iiⁿyāⁿ s'eeⁿ tan'dúúⁿcā chi 'iiⁿyāⁿ s'eeⁿ ní 'iiti cuūchī yeⁿe yā. 'Tíicā díⁿ yā. Ní can'dáá naaⁿ yā ní 'cuuⁿ'míⁿ yā 'iiⁿyāⁿ s'eeⁿ naachí candaā nuūⁿnīⁿ yeⁿe vida cueⁿ'e daāⁿmaⁿ. Ní Ndyuūs nadidεεvé yā tanducuéⁿē nuūⁿnīⁿ nduutináaⁿ yā.

8

Sello chi ndii chíⁿ ndí ndεēchē ndúúⁿcū incensario yeⁿe 'díⁿnguāaⁿ

¹ Ní taachi 'iiⁿyāⁿ chi nguuvu 'iiti cuūchī nan'guaaⁿ yā ní divíi yā ndii chíⁿ ndí ndεēchē sellos miiⁿ yeⁿe libro miiⁿ tuu'mi ní chó'ōo tan'dúúⁿcā maⁿ'a hora chí chií 'diíⁿ canéé na va'ai chεεti nguuvu. ² Tuu'mi ní n'diichí chi ndu'u ndεēchē ángeles chi chééndii yā nanááⁿ Ndyuūs. Ní ángeles sta'á yā 'áámá trompeta 'áámá 'aamá yā yeⁿe 'iiⁿyāⁿ miiⁿ chi ca'á yā trompetas. ³ Ní cuayiivi táámá ángel chi ndεε yā 'áámá incensario yeⁿe 'díⁿnguāaⁿ ní ndaa yā nanááⁿ nátaí yeⁿe 'díⁿnguāaⁿ ní chééndii yā miiⁿ. Ní ángel miiⁿ ní sta'á yā n'dee n'dái cúⁿ'úyaa. Ní ca'á yā cáāvā ofrenda dáámá ndúúⁿcū chi ngaⁿ'angua'á yā 'iiⁿyāⁿ chi yeⁿe Ndyuūs. Ní s'néeⁿ yā incienso nanááⁿ nátaí yeⁿe 'díⁿnguāaⁿ chi canéé nanááⁿ trono miiⁿ. ⁴ Ní 'yááⁿ'míⁿ yeⁿe cúⁿ'úyaa chí canéé na ta'a ángel miiⁿ ndúúⁿcū yeⁿe chi ngaⁿ'angua'a 'iiⁿyāⁿ yeⁿe iⁿ'yeeⁿdí 'cūū chi yeⁿe Ndyuūs ní dáámá cucheε nanááⁿ Ndyuūs. ⁵ Tuu'mi ní ángel miiⁿ sta'á yā incensario yeⁿe 'díⁿnguāaⁿ chiitú yā ndúúⁿcū nduucyaⁿ'ā yeⁿe nátaí miiⁿ. Ní chingée yā vmnaaⁿ yáⁿ'āa yeⁿe iⁿ'yeeⁿdí 'cūū. Ní ndaa daavi chi diituu n'gεεcúū ndúúⁿcū dεεve yeⁿe 'cuai ndúúⁿcū chi 'nuⁿ'u yáⁿ'āa.

Yeⁿ'e trompetas

⁶ Ní ndu'u ndεēchē ángeles chi ndéé yā trompetas ch'εetinéé yaáⁿ yā chi di'cuεεcú yā trompetas yeⁿe yā.

⁷ Ní ángel chi vmnáán vmnáan di'cuεécú yā trompeta yeⁿe yā ní chingéē vmnáan yáⁿ'āa yuūuⁿ ndúúcu nguuchi yaⁿ'ā ndístáⁿ'ā ndúúcu yuūúⁿ. Ní chiichi 'iinū parte yeⁿe yáⁿ'āa yeⁿe iⁿ'yeeⁿdí 'cūū ndúúcu 'iinū parte yeⁿe yáⁿ'á chi véé. Dáámá chiichi ndúúcu 'iinū parte yeⁿe yáⁿ'á ndúúcu nducuéⁿ'ē yaātā cueēē yéⁿ'ē.

⁸ Tuu'mi ní ndii chíⁿ ndii 'úúví ángel di'cuεécú yā trompeta yeⁿe yā ní n'diichí 'áámá cosa tan'dúúca 'áámá yiicū ch'εεté chí ngiichi chí 'áámá 'iiⁿ'yāⁿ chεécú yā yeⁿe va'ai chεeti nguūvi. Ní sndaā vmnáan yeⁿe nuūⁿnīⁿ'yáⁿ'ā. Ní yeⁿ'ē iⁿ'yeeⁿdí 'cūū ná 'iinū parte yeⁿe nuūⁿnīⁿ'yáⁿ'ā nduuvu yuúúⁿ. ⁹ Ní ch'ii 'áámá 'iinū parte yeⁿe 'iiti chí véé chεeti nuūⁿnīⁿ'yáⁿ'ā miiⁿ ndúúcu 'iinū parte yeⁿe nducuéⁿ'ē barcos chí chiica vmnáan nuūⁿnīⁿ'yáⁿ'ā ní ntuūví.

¹⁰ Tuu'mi ní ángel ndii chíⁿ ndii 'iinū miiⁿ di'cuεécú yā trompeta yeⁿe yā ní sn'daā 'áámá 'ííⁿ'nyúⁿ ch'εεte ca yeⁿ'ē nanguuvi tan'dúúca 'áámá táán yáácá chí ngiichi. Ní sn'daā vmnáan yeⁿe 'iinū parte yeⁿ'ē yíícú s'eeⁿ ndúúcu nuūⁿnīⁿ chí can'daā chí véé na iⁿ'yeeⁿdí 'cūū. ¹¹ Ní 'ííⁿ'nyúⁿ ch'εεte ca miiⁿ ní chí duuchi Ajenjo chí neⁿ'e caaⁿ'maⁿ chí yaaá. Ní 'iinū parte yeⁿe nuūⁿnīⁿ yeⁿ'e yiicū ndúúcu nuūⁿnīⁿ chí can'daā ní nduūvi Ajenjo chí yaaá. Ní neené 'yaaⁿ 'iiⁿ'yāⁿ ch'ii yā chí chí'i yā nuūⁿnīⁿ miiⁿ ti neené yaaá nuūⁿnīⁿ miiⁿ.

¹² Tuu'mi ní ángel ndii chíⁿ ndii cuūuⁿ di'cuεécú yā trompeta yeⁿe yā ní 'iinū parte yeⁿe 'yáⁿ'ā nca'ái ndúúcu 'iinū parte yeⁿ'ē 'iiyū ndúúcu 'iinū parte yeⁿ'e 'ííⁿ'nyúⁿ. Ní 'íícú 'iinū parte yeⁿ'e dendu'ū chí 'túucā ní chii maāiⁿ. Ní nguéé canuuⁿ dεεve yeⁿ'ē na 'iinū parte yeⁿ'e nguūvi. 'Tiicā ntúūⁿ n'gaaⁿ.

¹³ Tuu'mi ní n'diichí 'áámá ángel tan'dúúca 'íí'yāa ní n'giindiveén chí n'gaí yā naachi cueⁿ'e yā naavtaⁿ'ā nanguūvi. Ní ngaⁿ'a yuudú yā 'tíicā: De'ē chúúca ya'āi, de'ē chúúca ya'āi, de'ē chúúca ya'āi yeⁿ'é 'iiⁿ'yāⁿ chí snée yā na yáⁿ'āa yeⁿ'e chí cuuvi taachi tá'iinū ángeles caⁿ'á yā di'cuεécú yā trompetas yeⁿ'é yā.

9

¹ Cuayiiivi ní n'diichí ndíi nyuⁿ'u ángel miiⁿ di'cuεécú yā trompeta yeⁿ'e yā ní n'diichí 'áámá 'ííⁿ'nyúⁿ chí chiicā nanguūvi ní chiya na yáⁿ'āa. Ní 'áámá 'iiⁿ'yāⁿ ndéε yā llave yeⁿ'e abismo chí 'áámá yiive yáⁿ'āa ch'εεté chí nan'guāāⁿ yáaⁿnūuⁿ n'dái. Ní 'áámá ángel chí nguéé n'daacā ca'a yā llave miiⁿ na ta'a 'ííⁿ'nyúⁿ miiⁿ. ² Ní ángel miiⁿ n'gaaⁿ yā yiive yáⁿ'āa ní can'dáá 'yaaⁿ'miiⁿ yeⁿ'ē tan'dúúca 'yaaⁿ'miiⁿ chí can'daā yeⁿ'ē 'áámá horno ch'εεte. Ní 'yaaⁿ'miiⁿ miiⁿ chí can'daā yeⁿ'ē yiive miiⁿ ní diiⁿ chí nduūvi maāiⁿ na 'yáⁿ'ā ndúúcu 'yúúné. ³ Ní yeⁿ'e 'yaaⁿ'miiⁿ miiⁿ can'daā langostas na yáⁿ'āa. Ní 'iiti s'eeⁿ ní taán tī, ní chingaá tī. Ní tan'dúúca 'iiti dáiⁿ'āi diíⁿ tī, 'tíicā cuuvi diíⁿ tī. ⁴ Ní 'iiⁿ'yāⁿ dichó'o yā langostas chí nguéé diíⁿ tī daño yeⁿ'e yaātā chí véé na yáⁿ'āa ndúúcu mar 'áámá naaⁿ chí yaātā cueéé ndíi mar 'áámá yáⁿ'á, naati dámaāⁿ cuuvi diíⁿ tī daño 'iiⁿ'yāⁿ chí nguéé ndεε yā sello yeⁿ'e Ndyuūs ná nchεété yā. ⁵ Naati caⁿ'á yā chí yā langostas chí nguéé cuuvi 'caaⁿ'núⁿ tī 'iiⁿ'yāⁿ s'eeⁿ naati cuuvi diíⁿ tī chí 'cueenu yā cuuvi chí ya'ai cá yā chεeti nyúⁿ'ú 'ííyú. Ní diíⁿ tī chí ya'ai cá yā tan'dúúca chí ya'ai ca 'iiⁿ'yāⁿ taachi cá'a 'iiti daⁿ'āi 'iiⁿ'yāⁿ. ⁶ Ní nguūvi s'eeⁿ ní 'iiⁿ'yāⁿ yeⁿ'e iⁿ'yeeⁿdí 'cūū in'nuúⁿ yā taacā chí cuuvi 'cuūví yā tī neⁿ'e yā chí 'cuūví yā, naati nguéé cuuvi 'cuūví yā.

⁷ Ní langostas miiⁿ ní tan'dúúca 'aama 'yúúduu chí canee listo tī chí 'cuuⁿ'máⁿ tī 'tíicā langostas miiⁿ. Na tiíⁿ tī cánduūu cosa tan'dúúca corona yeⁿ'e 'dííⁿ'nguāāⁿ. Ní naán tī ní tan'dúúca náán 'iiⁿ'yāⁿ. ⁸ Ní yuūdūu tiíⁿ tī tan'dúúca yuūdūu tiíⁿ n'daataá. Ní 'diiⁿ'yuⁿ tī tan'dúúca 'diiⁿ'yuⁿ 'yáíⁿ'yāaⁿ cuá'aá. ⁹ Ní snúuⁿ cuerpo yeⁿ'é tī catecai tan'dúúca catecai cūū chí armadura cūū yeⁿ'e soldado. Ní n'géécú ngεεchi tī tan'dúúca chí n'gεecu 'yaaⁿ n'dái carros ndúúcu 'yaaⁿ n'dái 'yúúduu chí ngéenu tī ndεε tī carro yeⁿ'e tī tan'dúúca chí ngéenu tī cueⁿ'e tī neⁿ'e chí 'cuuⁿ'máⁿ yā. ¹⁰ Ní véé nduucudaⁿ'ai tī tan'dúúca nduucudaⁿ'ai 'iiti daⁿ'āi ní veε 'iini ch'εεte na nduucudaⁿ'ai tī. Ní ndúúcu 'iini ch'εεte yeⁿ'é nduucudaⁿ'ai tī chí diíⁿ tī daño chí ch'eenu yā chí chεeti nyúⁿ'ú 'ííyú. ¹¹ Ní canéé 'áámá ángel ndíi tiiⁿ yeⁿ'e 'iiti s'eeⁿ, chíⁿ chí ángel yeⁿ'ē yiive yáⁿ'āa miiⁿ. Ní

ángel miiⁿ chi duuchi Abadón na nduudu hebreo, ní Apolión ná nduudu griego chi neⁿe caaⁿ'maⁿ 'iiⁿ'yāⁿ chi nada'tuūví tanducuéⁿ'ē.

¹² Maaⁿ ní chó'ōo 'áámá vaadī ya'āi chi canéé chi chó'ōo naati véé na 'uūví vaadī ya'āi chi canéé chi cho'oó.

¹³ Tuu'mi ní ndii chíⁿ ndii niyaaⁿ ángel miiⁿ idi'cuεécú yā trompeta yeⁿ'é yā ní ch'iindiveéⁿ 'áámá nduudu chi cuchī naavtaⁿ'ā yeⁿ'e chi cuūuⁿ níⁿ'niⁿ tī chi adorno yeⁿ'ē nátai yeⁿ'e 'diiⁿ'nguāⁿ chi canéé nanááⁿ Ndyuūs naachi dich'εεté yā Ndyuūs. ¹⁴ Ní nduudu miiⁿ caⁿ'a chíⁿ ndii niyaaⁿ ángel miiⁿ chi ndéé yā trompeta yeⁿ'é yā: Dii, ángel, n'daatíⁿ di ndu'u cuūuⁿ ángeles chi snée i'yúú yā niiⁿ'nuúⁿ na yíícú ch'εεte chí nguuvī Eufrates.

¹⁵ Ní níⁿ'daatí yā ndú'ū cuūuⁿ ángeles s'eeⁿ caati cuuvi 'caāⁿ'nuⁿ yā 'iinū parte yeⁿ'e 'iiⁿ'yāⁿ yeⁿ'e iⁿ'yeeⁿ'dí 'cūū. Ní canéé listo yā hora yeⁿ'ē. ¹⁶ Ní ch'iindiveéⁿ chi chεē dúúché yā soldados chí sndúú sa 'yuūdūú chí ngii sa tan'dúúⁿ'cā 'uuvī ciento millones.

¹⁷ Ní 'tíícā n'diichí 'yuūdūú s'eeⁿ taachi 'úú, Juan, cueⁿ'é ndúúⁿ'cū espíritu yeⁿ'é. Ní 'iiⁿ'yāⁿ chí sndúú yā 'yúúⁿ'dūú s'éeⁿ véé catecaí yā chí armadura yeⁿ'e pecho yeⁿ'é yā ní color cuá'ā tan'dúúⁿ'cā chí nguuchi yaⁿ'ā ndúúⁿ'cū color cueéé nanguuvi ndúúⁿ'cū color cuaaáⁿ. Ní 'yúúⁿ'dūú s'eeⁿ ní tíⁿ tī tan'dúúⁿ'cā tíⁿ 'yáíⁿ'yāⁿ cuá'áá. Ní na cheendí tī ican'daā nguuchi yaⁿ'ā ndúúⁿ'cū 'yaaⁿ'miⁿ ndúúⁿ'cū azufre. ¹⁸ Ní yeⁿ'e 'iinū naaⁿ dendu'ū s'túúⁿ'cā chí can'daā yeⁿ'e cheendí tī ní 'áámá 'iinū parte yeⁿ'e 'iiⁿ'yāⁿ yeⁿ'e iⁿ'yeeⁿ'dí 'cūū chí 'ii yā ndúúⁿ'cū nguuchi yáⁿ'ā miiⁿ ndúúⁿ'cū 'yaaⁿ'miⁿ miiⁿ ndúúⁿ'cū azufre miiⁿ. ¹⁹ Ní chí ditiínú yeⁿ'e 'yúúⁿ'dūú s'éeⁿ canúúⁿ cheendí tī ndúúⁿ'cū nduucudaⁿ'ai tī tī nduucudaⁿ'ai tī miiⁿ ní yaaaⁿ ní tan'dúúⁿ'cā tíⁿ cúú, 'tíícā nduucudaⁿ'ai tī. Ní ndúúⁿ'cū cheendí tī ndúúⁿ'cū nduucudaⁿ'ai tī díⁿ tī daño 'iiⁿ'yāⁿ s'eeⁿ.

²⁰ Tanáⁿ'ā 'iiⁿ'yāⁿ yeⁿ'e iⁿ'yeeⁿ'dí 'cūū chí nguéé chí 'ii yā yeⁿ'e daños nguéé ndaācādaamí yā yeⁿ'e dendu'ū chí díⁿ yā chí nguéé n'daacā. Ní i'téenu yā espíritu yeⁿ'e yááⁿ'n'guiniūuⁿ ndúúⁿ'cū santos ídolos yeⁿ'e 'dííⁿ'nguāⁿ ndúúⁿ'cū santos ídolos yeⁿ'e 'dííⁿ'nguεε ndúúⁿ'cū santos ídolos yeⁿ'e cúú cuaaáⁿ ndúúⁿ'cū santos ídolos yeⁿ'e tuūu ndúúⁿ'cū santos ídolos yeⁿ'e yáⁿ'á. Dendu'ū santos ídolos nguéé cuuvi inaaⁿ, ní nguéé cuuvi n'giindiveéⁿ, ndíí nguéé cuuvi ngiicá. ²¹ Ní 'iiⁿ'yāⁿ s'eeⁿ 'tiicá ntúūⁿ nguéé ndaācādaamí yā yeⁿ'e chí n'giiⁿ'núⁿ yā 'iiⁿ'yāⁿ, ndíí nguéé ndúú yeⁿ'e ngaatu chí díⁿ yā, ndíí nguéé ndúú yeⁿ'e chí caⁿ'á yā ndúúⁿ'cū isaⁿ'ā o n'daataá chí nguéé yeⁿ'é yā, ndíí nguéé ndúú yeⁿ'e chí duucu yā.

10

Yeⁿ'e ángel ndúúⁿ'cū libro 'lírⁿ

¹ Cuayíivi ní n'diichí 'áámá ángel chí véé n'deeé n'dái poder yeⁿ'e yā. Ní chíicá yā yeⁿ'e va'ai chεeti nguuvī ní chíiyá yā. Ní véé catecaí yā yeⁿ'e meééⁿ. Ní vmnaaⁿ tíⁿ yā canéé cuuⁿ'n'gúúⁿ'ndí yeⁿ'e nanguuvi. Ní naáⁿ yā tan'dúúⁿ'cā dεεve yeⁿ'e 'yáⁿ'ā, 'tíícā ngii naáⁿ yā. Ní ca'á yā ní tan'dúúⁿ'cā columnas chí nguuchi yaⁿ'ā. ² Ní na ta'á yā ndεε yā 'áámá libro 'lírⁿ chí canda'āi. Ní ángel miiⁿ s'neeⁿ yā ca'á yā lado ta cuaacú yā vmnaaⁿ na nuūⁿ'niⁿ'yáⁿ'ā. Ní s'neeⁿ yā ca'á yā lado tá 'cuee yā vmnaaⁿ na yáⁿ'ā. ³ Tuu'mi ní yuudu n'dái 'caí yā tan'dúúⁿ'cā chí n'gaí 'áámá 'yáíⁿ'yāⁿ cuá'áá. Ní chí'íínú 'caí yā ní ndεēchē daavi ní caⁿ'ā ndúúⁿ'cū nduudu yeⁿ'ē. ⁴ Taachí chí'íínú ngaⁿ'ā ndu'ū ndεēchē daavi míⁿ 'úú ní canéé listo chí dinguúⁿ chíⁿ chí n'diichí taachi chí'iindiveéⁿ 'áámá nduudu yeⁿ'e ná va'ai chεeti nguuvī chí caⁿ'a chíⁿ 'úú: Nguéé dinguuⁿ di nduudu chí ngaⁿ'ā ndu'u ndεεche daavi miiⁿ naati canúúⁿ n'de'ei di na staava yeⁿ'e di nduudu miiⁿ.

⁵ Ní ángel miiⁿ chí n'diichí chí chééndii vmnaaⁿ na nuūⁿ'niⁿ'yáⁿ'ā ndúúⁿ'cū vmnaaⁿ na yáⁿ'āa chí'εé yā ta'a yā lado ta cuaacú yā ndíí nanguuvi. ⁶ Ní díⁿ yā 'áámá compromiso ní ngaⁿ'a yā: “Por Dios”, Ndyuūs chí canduuchi cueⁿ'e daāⁿ'maⁿ, Ndyuūs chí díⁿ'dái yā nánguuvī ndúúⁿ'cū tanducuéⁿ'ē dendu'ū chí vεε yeⁿ'ē, ndúúⁿ'cū yáⁿ'āa ndúúⁿ'cū tanducuéⁿ'ē dendu'ū chí vεε yeⁿ'ē, ndúúⁿ'cū nuuⁿ'niⁿ'yáⁿ'ā ndúúⁿ'cū tanducuéⁿ'ē dendu'ū chí vεε yeⁿ'ē. Ní ángel miiⁿ caⁿ'a yā: 'Āā ntéé tiempo chí cuuvi 'naaⁿ. ⁷ Tí nguuvī taachi ndii chíⁿ ndii

ndēechē ángeles ní tucá'a yā 'cuēcú yā trompetas yeⁿe yā tuu'mi ní chiiⁿ chi Ndyuūs cunee n'de'éei yā ní 'cuiinu. Ní Ndyuūs tucá'a yā dííⁿ yā tanducueⁿē chi ngaⁿ'a yā ngii yā 'iiⁿ'yāⁿ profetas chi dichíí'vε yā Ndyuūs.

⁸ Tuu'mi ní nduudu chi ch'iindiveéⁿ ndii nanguuvi caⁿ'a ntúuⁿ yā ndúúⁿcū 'úú táámá vmneⁿ'ēe ní caⁿ'a 'tíicā: Dii, Juan, cueⁿ'e di ní cuta'a di libro 'lííⁿ chi ngaadi chi ángel miiⁿ ndéε yā na ta'á yā, ángel chi chééndii yā vmaⁿ na nuūⁿnīⁿ'yáⁿā ndúúⁿcū vmaⁿ na yáⁿ'āa.

⁹ Ní cheⁿ'é nanááⁿ ángel miiⁿ ní caⁿ'á chíí ángel: Díí, ángel, tee di libro 'lííⁿ 'úú. Ní tee yā libro 'lííⁿ 'úú. Ní ángel miiⁿ caⁿ'a yā chiiyā 'úú: Cuta'a di ní ché'é dí libro 'lííⁿ. Ní cuuvi yaadi na cheendi di tan'dúúⁿcā n̄di'i naati nduūⁿvī yaāá ná cheēti di.

¹⁰ Tuu'mi ní sta'á libro 'lííⁿ mííⁿ chi canéé na ta'a ángel miiⁿ ní che'é. Ní chii yaadi cheendi tan'dúúⁿcā n̄di'i. Taachi 'āā ch'íínú che'é ní nduūⁿvī yaāá yeⁿe cheēti. ¹¹ Angel miiⁿ ní níⁿ'núúⁿ nūuⁿ ngaⁿ'a yā ngii yā 'úú: Díí, Juan, taama vmnéⁿ'ēe canéé chí caaⁿ'maⁿ di nduudu cuaacu yeⁿ'é Ndyuūs yeⁿ'ē n'dee n'dái 'iiⁿ'yāⁿ ndúúⁿcū 'yaaⁿ n'dái naciones ndúúⁿcū 'yaaⁿ taavi 'iiⁿ'yāⁿ chi ngaⁿ'a davaacu s'eeⁿ chi n̄'dááⁿ ní ndúúⁿcū reyes.

11

'Uuvi 'iiⁿ'yāⁿ chi ngaⁿ'a yā nduudu cuaacu

¹ Tuu'mi ní ángel miiⁿ tee yā 'aama taaⁿ nduu 'úú ti tan'dúúⁿcā 'áámá nduucu chi dicaadí yā, 'tíicā. Ní ángel miiⁿ ngaⁿ'a yā ngii yā 'úú: Cuééndii di ní dicaadí dí yáacū yeⁿ'e Ndyuūs ndúúⁿcū nátaí. Ní díduuche di cheeti yaacū 'iiⁿ'yāⁿ chi i'téenu yā Ndyuūs. ² Naati ch'uvāi yeⁿ'e yáacū na patio miiⁿ nguéé dicaadí dí miiⁿ ti chiiⁿ ní caⁿ'á 'iiⁿ'yāⁿ chi nguéé i'téenu yā Ndyuūs. 'Iiⁿ'yāⁿ s'eeⁿ ní 'caanca'a yā nducueⁿ'ē yáāⁿ miiⁿ chi yeⁿ'é Ndyuūs 'uūⁿvī ngēεcú 'uūⁿvī 'iiyū. ³ Ní ngaⁿ'á yā 'tíicā. 'Úú ní dicho'ó 'uūⁿvī 'iiⁿ'yāⁿ chi ngaⁿ'a cuaacú yā yeⁿ'é, chi caaⁿ'máⁿ yā nduudu cuaacu yeⁿ'é 'áámá mil canee 'uūⁿvī ciento ndúúⁿcū 'iinu ngēεcu nguuvi. Ní catecai yā ní 'iiⁿ'yāⁿ chi luto yā.

⁴ Ná 'uūⁿvī 'iiⁿ'yāⁿ s'eeⁿ chí ngaⁿ'a cuaacu yeⁿ'é, 'iiⁿ'yāⁿ s'eeⁿ ní tan'dúúⁿcā 'uūⁿvī yáⁿ'á yeⁿ'e olivas ndúúⁿcū 'uūⁿvī candeleros chí snéé nanááⁿ Señor chí 'iivi yeⁿ'e yáⁿ'āa. ⁵ Ní nduuti chí 'áámá 'iiⁿ'yāⁿ neⁿ'e yā dííⁿ yā daño 'uuvi 'iiⁿ'yāⁿ chí ngaⁿ'a cuaacu yeⁿ'é tuu'mi ní can'dáā nguuchi yaⁿ'ā na cheendi 'uūⁿvī 'iiⁿ'yāⁿ ní ch'iinū 'iiⁿ'yāⁿ chí contra yeⁿ'e yā. Ní 'tíicā cuuvi 'iiⁿ'yāⁿ chí neⁿ'é yā dííⁿ yā daño 'uuvi 'iiⁿ'yāⁿ s'eeⁿ, canéé chí 'cuūⁿvī yā ndúúⁿcū nguuchi yaⁿ'ā. ⁶ 'Uuvi 'iiⁿ'yāⁿ chí caaⁿ'maⁿ cuaacu yeⁿ'é ní véé poder yeⁿ'e yā chí cuuvi nn'gaadí yā nanguuvi ní 'íicú nguéé cueⁿ cúúⁿvī 'naaⁿ tiempo chí ngaⁿ'á yā nduudu cuaacu yeⁿ'é Ndyuūs. Ní cuuví yā dííⁿ ntúuⁿ yā chí nuuⁿnīⁿ nduuvi yuūúⁿ. Ní dííⁿ yā chí ndáá n'dee n'dái ca'ai yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū, ní dííⁿ yā chuū 'āā de'ée nūuⁿ tiempo taachi neⁿ'e yā. ⁷ Ní cuayiivi taachi 'cuiinu caaⁿ'máⁿ yā nduudu cuaacu yeⁿ'é Ndyuūs tuu'mí 'iiti taaⁿ chí nguuvi monstruo ní can'dáā tī yeⁿ'e yiive yáⁿ'āa ní dííⁿ caandaá tī ndúúⁿcū 'uuvi 'iiⁿ'yāⁿ s'eeⁿ. Ní cuchεε tī yeⁿ'e yā ní 'caaⁿ'núⁿ tī 'uuvi 'iiⁿ'yāⁿ s'eeⁿ. ⁸ Ní cuerpo yeⁿ'e 'uūⁿvī tináⁿ'ā s'eeⁿ cunéé na yúúⁿí yeⁿ'e yáāⁿ ch'εεte miiⁿ chí dáámá yáāⁿ miiⁿ naachi 'iiⁿ'yāⁿ ca'nééⁿnga'á yā Señor Jesucristo yeⁿ'e yú na cruz. Ní ndúúⁿcū táámá nduudu yáāⁿ ch'εεte miiⁿ tan'dúúⁿcā yáāⁿ Sodoma o yáⁿ'āa Egipto tī 'iiⁿ'yāⁿ chí nguéé n'daac ch'εεtinée yā miiⁿ. ⁹ Ní 'iiⁿ'yāⁿ yeⁿ'e yáāⁿ s'eeⁿ ndúúⁿcū 'iiⁿ'yāⁿ ndaataa s'eeⁿ ndúúⁿcū 'iiⁿ'yāⁿ yeⁿ'e n'dee n'dái davaacu chí n̄'dááⁿ ndúúⁿcū 'iiⁿ'yāⁿ yeⁿ'e 'naaⁿ naciones caⁿ'á yā n'diichi yā 'uūⁿvī cuerpo chí tináⁿ'ā yeⁿ'e 'iiⁿ'yāⁿ chí n'di chéeti na 'íínú nguuvi canéé maⁿ'a. Ní 'iiⁿ'yāⁿ s'eeⁿ nguéé 'cuaáⁿ yā chí 'iiⁿ'yāⁿ 'cuεεchi yā cuerpos yeⁿ'e tináⁿ'ā yeⁿ'e 'iiⁿ'yāⁿ chí n'díí miiⁿ. ¹⁰ Ní 'iiⁿ'yāⁿ chí ch'εεtinée yā na yáⁿ'āa ní neené cuuvi yeenú yā chí n'díí nduu 'uūⁿvī profetas. Ní dííⁿ yā 'viicu. Ní dicho'ó yā regalos yeⁿ'e 'aamá yā taama yā caati 'uuvi profetas chí ngaⁿ'a nduudu cuaacu yeⁿ'é Ndyuūs dííⁿ yā chí 'iiⁿ'yāⁿ s'eeⁿ néené ch'eenu yā chíí. ¹¹ Naati cuayiivi chí chó'ōo 'iinu nguuvi canéé maⁿ'a Ndyuūs nadacuéⁿ yā nduu 'uuvi 'iiⁿ'yāⁿ s'eeⁿ yeⁿ'e nguaaⁿ tináⁿ'ā. Ní nducyaaca 'iiⁿ'yāⁿ di'va'a yā yeⁿ'e chí n'diichi yā. ¹² Ní cuayiivi mííⁿ 'uuvi 'iiⁿ'yāⁿ s'eeⁿ ch'iindiveéⁿ yā 'áámá nduudu yuudu n'dái yeⁿ'e ná va'ai cheeti nguuvi chí caⁿ'ā: Ndís'tií, cuchée nī

'muuⁿ. Ní 'iiⁿyāⁿ s'eeⁿ ní cuchée yā na va'ai chēeti nguuvi na 'áámá meēeⁿ. Ní 'iiⁿyāⁿ s'eeⁿ chi taaⁿ yā yeⁿe yā n'diichí yā chuū. ¹³ Ní hora míⁿ nūⁿ 'nuⁿu taaⁿ yáⁿāa ní 'áámá ndiichi parte yeⁿe yāⁿ miiⁿ chi n'daā ní ndēēchē mil 'iiⁿyāⁿ ch'i yā taachi n'nuⁿu yáⁿāa miiⁿ. Tanáⁿa yā ní dí'vá'a yā ní dich'ēetē yā Ndyuūs chi canée na va'ai chēeti nguuvi.

¹⁴ Chó'ōo ndii 'uuvi vaadī yá'āi naati ní ndii chíⁿ ndii 'iinu miiⁿ ndaa núúⁿ.

Yeⁿe ángel chí di'cuēcú yā ndí ndēēchē trompeta

¹⁵ Ní ndii chíⁿ ndii ndēēchē ángel miiⁿ di'cuēcú yā trompetas yeⁿe yā ní ch'iindiveēⁿ 'naaⁿ nduudu yuudu na va'ai chēeti nguuvi chi ngaⁿā:

Maaⁿ ní Señor Ndyuūs yeⁿe yú ndúúⁿcú Cristo ní vee poder yeⁿe yā tiempo maaⁿ chi caaⁿmaⁿ ntiiⁿnyuⁿ yā cueⁿe daāⁿmaⁿ yeⁿe nducuéⁿē 'iiⁿntyéⁿē yeⁿe íⁿyeēⁿdī ndúúⁿcú naachi ngaⁿa ntiiⁿnyuⁿ yā ti nducuéⁿē ní yeⁿe Cristo maaⁿ. ¹⁶ Tuu'mi ní ndu'u ndiicú cuūⁿ 'iiⁿntyéⁿē chi vee yā na trono yeⁿe yā nanáⁿ Ndyuūs ch'ēeti ndiitin'dí yā ndúúⁿcú naaⁿ yā na yáⁿāa nanáⁿ Ndyuūs ní dich'ēetē yā Ndyuūs.

¹⁷ Ní ngaⁿa yā:

N'diī Señor Ndyuūs chi véé tanducuéⁿē dendu'ū poder yeⁿe nī, n'diī chi canée nī tiempo maaⁿ ní canée nī tiempo ndíⁿ vmnaaⁿ ní canée nī ndíⁿ tiempo chi cuchí. Teé 'nū gracia n'diī, Ndyuūs, ti n'diī ní sta'á nī poder chi yeⁿe nī chí ch'ēete n'dai. Ní n'diī ngaⁿa ntiiⁿnyúⁿ nī maaⁿ.

¹⁸ Ní maaⁿ ní ndaa tiempo chi dituūví nī 'iiⁿyāⁿ s'eeⁿ chi idituuvi yā íⁿyeēⁿdī. 'iiⁿyāⁿ yeⁿe naciones chi nguée i'téenu yā ní nduuvi taáⁿ yā ti ndaā nguuvi chi ca'á nī castigo yeⁿe 'iiⁿyāⁿ s'eeⁿ ní hora chi cuuvi n'diichí nī nuuⁿndi yeⁿe tináⁿā s'ee. Ní ca'á nī premio 'iiⁿyāⁿ profetas chi dichí'vē n'diī ní ngaⁿá yā nduudu cuaacu yeⁿe nī. Ní ca'á nī nducyáácá 'iiⁿyāⁿ chi neⁿe yā n'diī ndúúⁿcú 'iiⁿyāⁿ chi dich'ēetē yā n'diī, 'iiⁿyāⁿ chi ngaⁿa ntiiⁿnyúⁿ yā ndúúⁿcú tanáⁿā 'iiⁿyāⁿ, nducyáácá 'iiⁿyāⁿ chi i'téenu yā Ndyuūs.

¹⁹ Tuu'mi ní 'áámá yā n'guaaⁿ yā cheendi va'āi yeⁿe yáacū yeⁿe Ndyuūs, yáacū chi canée na va'ai chēeti nguuvi. Ní míⁿ canée arca chi caja naachi canée compromiso yeⁿe Ndyuūs. Ní canée chēeti yáacū miiⁿ. Ní n'diichí 'cuāi ndúúⁿcú n'dee n'dái ruido ndúúⁿcú daavi n'nuⁿu na yáⁿāa ndúúⁿcú 'aama cúúví yuūⁿ.

12

N'daataá ndúúⁿcú 'iiti dragón

¹ Tuu'mi ní véé 'áámá seña chi néené ch'ēete chi ch'iⁿi na va'ai chēeti nguuvi. N'diichí 'áámá n'daataá chi canuuⁿ tá catecai tan'dúúⁿcā yáⁿā. Ní 'iiⁿnyuⁿ miiⁿ ní canée maaⁿ ca'a tá. Ní canúⁿ tiiⁿ tá 'áámá corona ndúúⁿcú ndichuuví 'iiⁿnyuⁿ. ² Ní hora míⁿ nūⁿ ní cuuvi 'cuundiýáāⁿ daiya tá ní 'cāi yiicu tá ndúúⁿcú vaadī ya'ai chi cuuvi 'cuundiýáāⁿ daiya tá. Neené ch'eenu tá chíⁿ ní 'āā 'cuéé 'cuundiýáāⁿ daiya tá. ³ Ní níⁿnuúⁿ nūⁿ véé táámá seña chi néené ch'ēete chi ch'iⁿi nanguuvi. N'diichí 'áámá 'iiti cuá'āa chi ch'ēete ca chi nguuvi dragón. Ní véé ndēēchē tíⁿ tī ní ndiichí duuⁿniⁿniⁿ tī. Ní canduu tíⁿ tī ndēēchē coronas 'áámá 'áámá ca'áámá cā'aama tíⁿ tī. ⁴ Ní dragón miiⁿ ndúúⁿcú ndúúⁿcudaⁿai tī díⁿ tī chín'daā na 'iinu parte yeⁿe 'iiⁿnyúⁿ yeⁿe nanguuvi ní chíⁿya ndii na yáⁿāa. 'iiti dragón miiⁿ chéendii tī nanáⁿ n'daataá chí 'cuundiýáāⁿ daiya tá ní 'íicú cuuvi che'é tī daiya tá miiⁿ taachi 'cuundiýáāⁿ. ⁵ Tuu'mi ní n'daataá miiⁿ ní ch'iⁿndiyáāⁿ 'áámá saⁿā 'líⁿ. Saⁿā 'líⁿ miiⁿ canée chi diituu caaⁿmaⁿ ntiiⁿnyuⁿ sa yeⁿe tanducuéⁿē naciones yeⁿe íⁿyeēⁿdī ndúúⁿcú 'áámá nduucu cū. Ní níⁿnuúⁿ nūⁿ 'áámá yā sta'a yā saⁿā 'líⁿ míⁿ ni cunaⁿá yā ndúúⁿcú dacuá'āa miiⁿ na va'ai chēeti nguuvi naachi canée Ndyuūs chi véé yā na trono yeⁿe yā. ⁶ N'daata miiⁿ ní chéénū ta na yáⁿāa cuūⁿmaⁿ naachi nguée ch'ēetinée 'iiⁿyāⁿ ní miiⁿ nūⁿ Ndyuūs din'dái yā 'áámá lugar cáávā táⁿā miiⁿ. Ní miiⁿ Ndyuūs ca'á yā chi che'e tá 'áámá mil canee 'uūví ciento nduuyu canée 'iinū ngēecu nguuvi.

⁷ Cuayiivi ní véé 'aama caandaá ch'ēete na va'ai chēeti nguuvi. Angel Miguel chi ngaⁿa ntiiⁿnyuⁿ ndúúⁿcú ángeles yeⁿe yā 'cuⁿu yā contra yeⁿe 'iiti dragón. Ní 'iiti dragón miiⁿ

ndúúcu ángeles yeⁿé tī 'cuⁿu tī ndúúcu ángel Miguel miiⁿ. ⁸ Naati 'iiti dragón miiⁿ nguéé díⁿ tī ganar caandaá ch'εete miiⁿ. Ní 'āā ntéé véé lugar cááva tī na va'ai chεeti nguuvī. ⁹ 'Áámá 'iiⁿyāⁿ ch'εécú yā 'iiti dragón miiⁿ ndúúcu nducyaaca ángeles yeⁿé tī ndíⁿ iⁿ'yeeⁿdí 'cūū. 'Iiti dragón miiⁿ chi ch'εete ní 'iiti cúú miiⁿ ndíⁿ vmnááⁿ vmnaaⁿ chí yááⁿ'guiinūⁿ chí Satanás. 'Iiti cúú miiⁿ ní chinnche'éí tī núúⁿmáⁿ iⁿ'yeeⁿdī.

¹⁰ Tuu'mi ní ch'iindiveéⁿ 'áámá nduudu chí díitūū n'dai yeⁿe na va'ai chεeti nguuvī chí ngaⁿ'a 'tíicā: Maaⁿ ní ndaā tiempo chí Ndyuūs yeⁿe yú nadanguáⁿ'ai yā 'iiⁿyāⁿ yeⁿé yā. Ní ch'iⁿ'í yā poder yeⁿé yā chí rey yā. Ní ngaⁿ'a ntiiⁿnyúⁿ yā yeⁿe tanducuéⁿ'ē dendu'ū yeⁿe yā. Ní Cristo ch'iⁿ'í yā chí 'iiⁿntyéⁿe yā caati saⁿ'ā miiⁿ chí Satanás chí ca'a sa nuuⁿndi yeⁿe hermanos yeⁿe yú ndíⁿ ngúúvī ndíⁿ n'gááⁿ nanááⁿ Ndyuūs, 'iiⁿyāⁿ ch'εécú yā saⁿ'ā miiⁿ ndii va'ai chεeti nguuvī ndii na yáⁿ'āa. ¹¹ Ní hermanos yeⁿe yú chichéé yā yeⁿe yááⁿ'guiinūⁿ cáávā yuūⁿ yeⁿe Cristo chí nguuvī 'iiti cuūchī, ní cáávā chí ngaⁿ'á yā nduudu cuaacu yeⁿe Ndyuūs, ní cáávā chí nguéé 'va'á yā yeⁿe vida yeⁿe maáⁿ yā chí ch'iī yā cáávā Señor Jesucristo yeⁿe yú. ¹² Ndís'tiī chí canéé na va'ai chεeti nguuvī yeenú nī, naati de'ē chúúca yā'āi yeⁿé nducyaaca chí snéé na yáⁿ'āa 'cúú ndúúcu nducyaaca chí snéé na nuūⁿnīⁿ'yáⁿ'ā caati yááⁿ'guiinūⁿ ndaa sa nanááⁿ yā. Ní neené taaⁿ sa ti deenu sa chí 'āā ntéé cuuvi 'naaⁿ sa na iⁿ'yeeⁿdī.

¹³ Taachi 'iiti dragón miiⁿ ní chicadínuuⁿ tī chí 'āā candiití tī ndíⁿ na yáⁿ'āa, cheⁿe tī can'dáa tī n'daataá chí ch'iiⁿndiyáāⁿ daiya tá chí 'cueenu tá cuuvi. ¹⁴ Naati 'áámá yā ca'a yā n'daata miiⁿ 'uūvī ngεεchi tá tan'dúúca ngεεchi 'í'yāa chí ch'εete ca. Ní 'iicú cuuvi caavā tá nanguuvi ní caⁿ'a tá lugar yeⁿe tá naachi nguéé 'iiⁿyāⁿ. Ní yaⁿ'ai canee tá yeⁿe 'iiti cúú chí yááⁿ'guiinūⁿ. Ní 'iiⁿyāⁿ ca'á yā chí che'e tá 'iinū ndúuyū canéé maⁿ'a. ¹⁵ Ní cúú miiⁿ tun'dáa tī na cheendi tī n'dee n'dáí nuūⁿnīⁿ tan'dúúca nuūⁿnīⁿ yeⁿe 'áámá yíicú. Ní nuūⁿnīⁿ miiⁿ ní nduuvi yíicú chí cuuvi candēē táⁿ'ā miiⁿ tī 'tíicā neⁿe cúú miiⁿ. ¹⁶ Naati yáⁿ'āa miiⁿ chinnee n'daataá míⁿ tī n'da'ai tan'dúúca 'iiⁿyāⁿ n'da'ái yā cheendí yā ní yáⁿ'āa míⁿ chí 'i nuūⁿnīⁿ miiⁿ ní cheēnū nuūⁿnīⁿ miiⁿ chεeti yáⁿ'āa, nuūⁿnīⁿ chí 'iiti dragón miiⁿ tun'dáa tī ndúúcu cheendí tī. ¹⁷ Ní ndúúcu chuū 'iiti dragón miiⁿ neené taaⁿ n'dáí tī ndúúcu n'daataa míⁿ ní chéⁿe tī cuⁿ'ú tī ndúúcu tanáⁿ'ā 'iiⁿyāⁿ ndaata yeⁿe n'daataa miiⁿ, 'iiⁿyāⁿ chí díⁿ yā chí ngaⁿ'a mandamiento yeⁿé Ndyuūs. Ní 'áámá canéé yā ndúúcu nduudu cuaacu yeⁿe Jesucristo.

13

Yeⁿe 'uūvī 'iiti taaⁿ chí nguuvī monstruo

¹ Tuu'mi ní taachi chééndíⁿ vmnaaⁿ yáⁿ'āa ndúútī yeⁿe nuūⁿnīⁿ'yáⁿ'ā miiⁿ n'diichí chí can'daa 'áámá 'iiti chí ch'εete taavi ca yeⁿe nuuⁿnīⁿ'yáⁿ'ā. 'Iiti miiⁿ ní nguuvī monstruo ní véé ndēēchē tíⁿ tī ndúúcu ndiichi duuⁿniiⁿ'nīⁿ tī. Ní vmnaaⁿ 'áámá 'aama duuⁿniiⁿ'nīⁿ tī sndúūⁿ 'áámá corona. Ní canéé nguūⁿ ca'áámá cā'aama tíⁿ tī chí duuchi chí nguéé inee yíinū Ndyuūs. ² 'Iiti chí monstruo chí ch'εete míⁿ chí n'diichí ní tan'dúúca 'iiti chí leopardo, 'tiicā tī. Ca'a tī ní tan'dúúca ca'a oso, 'tíicā ca'a tī. Cheendí tī ní tan'dúúca cheendi 'yáíⁿyāⁿ cuá'aá, 'tíicā cheendí tī. 'Iiti dragón miiⁿ ca'á tī poder yeⁿé tī ndúúcu trono yeⁿé tī na ta'a 'iiti monstruo chí ch'εete miiⁿ chí ngaⁿ'a ntiiⁿnyúⁿ tī. ³ Ní n'diichí chí 'áámá chéé tíⁿ 'iiti monstruo chí ch'εete taavi ca ní tan'dúúca chí nca'āi 'áámá 'iiti chí n'díⁿ ní nduūvā yeⁿé tī, 'tíicā 'áámá tíⁿ tī. Ní nducyáácá 'iiⁿyāⁿ yeⁿe iⁿ'yeeⁿdí 'cūū néené cheⁿe yiinú yā yeⁿe chuū. Ní cueⁿ'é yā ndúúcu 'iiti monstruo miiⁿ. ⁴ Ní nducyaacá yā s'téenu yā 'iiti dragón miiⁿ cáávā chí ca'á tī poder yeⁿé tī táámá 'iiti chí monstruo chí ch'εete taavi ca. Ní 'iiⁿyāⁿ 'tiicā ntúūⁿ chí'téenu yā 'iiti monstruo miiⁿ. Tuu'mi ní caⁿ'a yā: ¿Du'u véé poder yeⁿe tan'dúúca 'iiti monstruo 'cūū? ¿Du'u cúúvī 'cuuⁿ'maⁿ ndúúcu 'iiti monstruo 'cūū ní cucheε ndúúcu 'iiti 'cūū?

⁵ Ní 'iiti dragón ca'á tī poder 'iiti monstruo miiⁿ chí caaⁿ'máⁿ tī dendu'ū chí ch'εete. Ní cunncaā ngaⁿ'a tī contra yeⁿe Ndyuūs. Ní di'tiinuú tī chí ngaⁿ'a ntiiⁿnyuⁿ tī 'túúca chééti 'uūvī ngεεcu 'uūvī 'iyyū. ⁶ Ní 'tíicā idiīⁿ 'iiti monstruo. Ní cunncaā ngaⁿ'a tī contra yeⁿe Ndyuūs ní ngaⁿ'a tī cunncaā contra yeⁿe chí duuchi Ndyuūs ní contra yeⁿe va'ai

chæeti nguuvu naachi Ndyuūs ch'æetinée yā ní contra yeⁿe 'iiⁿ'yāⁿ chi snée yā ndúúcu Ndyuūs. ⁷ Ní 'tiicá ntúūⁿ 'iiti dragón ca'á tī poder 'iiti monstruo miiⁿ chi díⁿ tī vaadī 'caa'va ndúúcu 'iiⁿ'yāⁿ chi yeⁿe Ndyuūs ndíⁿ chi chæe tī ndúúcu 'iiⁿ'yāⁿ s'eeⁿ. Ní ca'á tī poder 'iiti monstruo chi ngaⁿ'a ntiⁿ'nyúⁿ tī yeⁿe tanducuéⁿ'ē raza yeⁿe 'iiⁿ'yāⁿ yeⁿe tanducuéⁿ'ē yāⁿ ndúúcu yeⁿe tanducuéⁿ'ē davaacu ndúúcu yeⁿe tanducuéⁿ'ē nación. ⁸ Ní nducyáácá 'iiⁿ'yāⁿ chi snée yā na yáⁿ'āa cu'téenu yā 'iiti monstruo miiⁿ. 'Tíicā néⁿe Ndyuūs. Ní nguée canée nguūⁿ chi duuchi 'iiⁿ'yāⁿ s'eeⁿ na libro yeⁿe vida cueⁿ'e daāⁿ'maⁿ chi yeⁿe 'iiⁿ'yāⁿ chi duuchi 'iiti cuūchī. Ní 'iiⁿ'yāⁿ s'eeⁿ ch'iiⁿ'núⁿ yā Cristo ndii tiempo chi Ndyuūs din'dái yā iⁿ'yeēⁿdī.

⁹ Nduuti chi 'áámá 'iiⁿ'yāⁿ véé veéⁿ yā 'caandiveéⁿ yā nduudu 'cūū. ¹⁰ 'Iiⁿ'yāⁿ chi can'daa yā 'iiⁿ'yāⁿ chi cuuvi preso yā, 'tiicá ntúūⁿ maáⁿ yā canée chí cuuvi preso yā. 'Iiⁿ'yāⁿ chi n'giiⁿ'nuⁿ yā 'iiⁿ'yāⁿ ndúúcu machete 'uūvī lados 'caāiⁿ canée chí 'cuuvi ntúūⁿ yā 'tíicā. Ní cáāvā chuū 'iiⁿ'yāⁿ chi yeⁿe Ndyuūs canée chí véé 'viichee'tíinūⁿ ndúúcu yā ní canée chí i'téenu yā Ndyuūs.

¹¹ Cuayivi ní n'diichí táámá 'iiti monstruo chi ch'æete ca chi can'daa tī nguuaⁿ yáⁿ'āa miiⁿ. Véé 'uūvī duuⁿ'niⁿ'niⁿ tī tan'dúúca 'áámá duuⁿ'niⁿ'niⁿ 'iiti cuūchī 'tiicá tī. Ní 'iiti monstruo ndii 'uūvī indeé tī tan'dúúca 'áámá 'iiti dragón. ¹² Ní véé tanducuéⁿ'ē poder yeⁿe 'iiti monstruo chi ndii 'uuvi chí ch'æete taavi ca tan'dúúca poder yeⁿe 'iiti monstruo ch'æete ca chí vmnaaⁿ. Ní díⁿ tī chí 'iiⁿ'yāⁿ yeⁿe iⁿ'yeeⁿdí 'cūū ní cu'téenu yā 'iiti vmnáán vmnaaⁿ chi 'iiti monstruo chi naca'ái tī ní nduūvā yeⁿe tī. ¹³ Ní 'iiti chí monstruo chí ndii 'uūvī díⁿ tī vaadī n'giinu ch'æete n'dai. Díⁿ tī chí can'daa yaⁿ'ā yeⁿe nanguuvi ndíⁿ vmnaaⁿ yáⁿ'āa 'cūū ní n'dee n'dái 'iiⁿ'yāⁿ n'diichí yā chuū. ¹⁴ Ní caavā vaadī n'giinu chí díⁿ tī taachi cheendí tī nanáán 'iiti monstruo chí vmnáán vmnaaⁿ chí teé tī lugar chí díⁿ tī 'túúca, tuu'mi ní chinnche'ée tī 'iiⁿ'yāⁿ chí ch'æetinée yā iⁿ'yeeⁿdí 'cūū. Ní ca'a tī orden 'iiⁿ'yāⁿ s'eeⁿ chí din'dái yā 'áámá santo ídolo tan'dúúca 'iiti monstruo chí nca'ái tī ndúúcu machete 'uūvī lados 'caāiⁿ ní cunduuchi tī chí cuuvi santo yeⁿe yā. ¹⁵ Ní 'iiti monstruo chí vmnáán vmnaaⁿ ní ca'á tī poder 'iiti monstruo chí ndíⁿ 'uuví tī chí ca'á tī vida santo 'iiti ídolo miiⁿ. Ní 'íicú 'iiti santo tī cuuvi 'caaⁿ'máⁿ tī ní díⁿ tī chí 'cuuvi nducyáácá 'iiⁿ'yāⁿ chí nguée i'téenu yā 'iiti santo miiⁿ. ¹⁶ Ní cuayivi ní 'iiti monstruo chí ndii 'uūvī ní díⁿ tī ntúūⁿ chí nducyaaca 'iiⁿ'yāⁿ chí ngaⁿ'a ntiⁿ'nyúⁿ yā ndúúcu tanáⁿ'ā 'iiⁿ'yāⁿ ndúúcu 'iiⁿ'yāⁿ chí 'cuiica ndúúcu 'iiⁿ'yāⁿ pobre yā ndúúcu 'iiⁿ'yāⁿ chí libre yā ní ndúúcu 'iiⁿ'yāⁿ chí 'áámá dichí've yā 'iivi yā, 'iiti monstruo miiⁿ díⁿ tī chí nducyaaca yā canée chí ndæe yā 'áámá sello na ta'a cuaacú yā o nchæeté yā. ¹⁷ Ní díⁿ ntúūⁿ tī 'tíicā. Mar 'áámá 'iiⁿ'yāⁿ nguée cuuvi cuái yā o n'diicui yā nduuti chí nguée ndæe yā sello yeⁿe 'iiti monstruo ndii 'uūvī o chí duuchí tī o número yeⁿe chí duuchí tī. ¹⁸ Ní chuū ní 'iiⁿ'yāⁿ chí déenu yā cuuvi diiⁿ yā. 'Iiⁿ'yāⁿ chí déenu yā caⁿ'á yā ngaⁿ'a duuchi yā chí dúúchí 'iiti monstruo ndíⁿ 'uūvī miiⁿ tī número miiⁿ ní lado yeⁿe chí duuchi 'áámá saⁿ'ā. Ní número miiⁿ ní ngii jaāⁿ ciento canduū 'iinu ngæecu jaaⁿ.

14

Ngiitá 'iiⁿ'yāⁿ chí 'áámá ciento canée 'uūvī ngæecu cuūⁿ mil yeⁿe chí nanguaⁿ'ai yā

¹ Cuayivi ní n'diichí 'iiⁿ'yāⁿ chí nguuvu 'iiti cuūchī chí chéendii yā ná yīcū chí nguuvu Sión. Ní nduucú yā canée 'áámá ciento 'uūvī ngæecu cuūⁿ mil 'iiⁿ'yāⁿ chí ndæe yā chí duuchí yā ndúúcu chí duuchi chiidá yā chí canee nguūⁿ nchæeté yā. ² Ní ch'iindiveéⁿ 'áámá nduudu chí ngeⁿ'ē na va'ai chæeti nguuvu. Ní nduudu miiⁿ tan'dúúca chí yuūdū n'gæete chí chí yā n'dai nuūⁿ'niⁿ o tan'dúúca chí n'gæecu 'áámá daavi ch'æete; ní nduudu miiⁿ ní tan'dúúca chí n'gæecu n'dee n'dái arpas chí idi'cueēcú 'iiⁿ'yāⁿ. 'Tíicā nduudu miiⁿ. ³ Ní 'iiⁿ'yāⁿ chí n'dee n'dái miiⁿ chí snée yā nanáán trono miiⁿ ní nanáán ndu'u cuūⁿ 'iiⁿ'yāⁿ miiⁿ ní nanáán 'iiⁿ'ntyéⁿ'ē miiⁿ ní ngiitá yā 'áámá canto chí ngai. Ní mar 'áámá 'iiⁿ'yāⁿ nguée ngii n'geeⁿ yā canto miiⁿ, dámaāⁿ ndu'u chí 'áámá ciento 'uūvī ngæecu cuūⁿ mil 'iiⁿ'yāⁿ chí Ndyuūs nadanguáⁿ'ai yā nguuaⁿ 'iiⁿ'yāⁿ yeⁿe iⁿ'yeeⁿdí 'cūū. ⁴ Ní 'iiⁿ'yāⁿ s'eeⁿ chí saⁿ'ā chí nguée ngaⁿ'á yā ndúúcu mar 'áámá n'daataá ní nguée

n'giindivaacú yā. Ní caⁿa yā ndúúcu 'iiⁿ'yāⁿ chi nguuvi 'iiti cuūchī 'āā tíí nūⁿ cuaaⁿ naachi caⁿ'á yā. Ní 'iiⁿ'yāⁿ s'eeⁿ Ndyuūs yaa'ví yā chi cuuvi yeⁿe yā yeⁿe nducyaaca 'iiⁿ'yāⁿ. Ní 'iiⁿ'yāⁿ s'eeⁿ 'iiⁿ'yāⁿ chi vmnááⁿ vmaaⁿ chi ch'ii yā cáávā chi díⁿ yā ntiⁿ'nyuⁿ yeⁿ'é Ndyuūs ní yeⁿe 'iiⁿ'yāⁿ chi duuchi 'iiti cuūchī. ⁵ 'Iiⁿ'yāⁿ s'eeⁿ nguéé ngaⁿ'á yā mar 'áámá nduudu yaadi ní nguéé véé nuuⁿndi yeⁿe yā nanááⁿ trono yeⁿe Ndyuūs.

Yeⁿe chi ngaⁿ'ā 'iinū ángeles

⁶ Tuu'mi ní n'diichí táama ángel ngaá yā naavtaⁿ'ā nanguuvi. Ní ángel miiⁿ ní ndéé yā nduudu chí canéé cueⁿe daāⁿmaⁿ chi nduudu ngai chí nanguaⁿ'ai 'iiⁿ'yāⁿ. Ní ngaⁿ'á yā nduudu ngai miiⁿ nanááⁿ nducyaaca 'iiⁿ'yāⁿ yeⁿe iⁿ'yeeⁿdí 'cūū, nanááⁿ nducuéⁿ'ē naciones ndúúcu nducuéⁿ'ē tribus yeⁿe 'iiⁿ'yāⁿ ndúúcu nducyaaca davaacu yeⁿe tanducuéⁿ'ē 'iiⁿ'yāⁿ ndúúcu nducyaaca 'iiⁿ'yāⁿ chí snée yā na yáⁿ'āa 'cūū. ⁷ Ní ángel miiⁿ caⁿ'á yā ndúúcu 'áámá nduudu díⁿtūu: Ndís'tií 'va'á ní Ndyuūs, dich'εεté ní 'iiⁿ'yāⁿ ti 'āā ndaa hora chí díⁿ yā juzgar nducyaaca 'iiⁿ'yāⁿ. Dich'εεté ní 'iiⁿ'yāⁿ chí díⁿ'dáí yā nanguuvi ndúúcu yáⁿ'āa ndúúcu nuūⁿnī'yáⁿ'ā ndúúcu naachí icān'daa nuūⁿnīⁿ.

⁸ Ní n'diichí taama ángel can'dáa yā ángel miiⁿ ní ngaⁿ'á yā: Yáāⁿ Babilonia 'āā ntuūvīi. Yáāⁿ Babilonia chí yáāⁿ ch'εεte miiⁿ 'āā ntuūvīi ti 'iiⁿ'yāⁿ yeⁿe yáāⁿ miiⁿ ní díⁿ yā chí tanáⁿ'ā 'iiⁿ'yāⁿ yeⁿe nducuéⁿ'ē nación dinuuⁿndi cá yā ní caⁿ'á yā ndúúcu n'daataá ó isaⁿ'ā chí nguéé yeⁿ'é yā ti díⁿ yā nuuⁿndi tan'dúúca chí díⁿ 'iiⁿ'yāⁿ s'eeⁿ.

⁹ Ní cuayiivi ní n'diichí ndii 'iínú ángel miiⁿ can'dáa yā ángel s'eeⁿ ní caⁿ'a yuudu yā: Nduuti chí 'áámá 'iiⁿ'yāⁿ cu'téenu yā 'iiti monstruo miiⁿ ndúúcu 'iiti santo chí dáámá ndúúcu 'iiti miiⁿ ní 'iiⁿ'yāⁿ ndéé yā sello yeⁿ'é tí nchεεté yā o na ta'á yā, ¹⁰ canéé chí cuta'á yā neené taaⁿ castigo chí Ndyuūs caⁿ'á yā ca'a yā 'iiⁿ'yāⁿ miiⁿ. Ní castigo miiⁿ tan'dúúca 'áámá copa diituu ndúúcu vaadi taaⁿ yeⁿe Ndyuūs. 'Tíicā va. Ní castigo miiⁿ ní chíⁿ chí 'iiⁿ'yāⁿ s'eeⁿ cuuvi yá'ái yeⁿ'é yā ndúúcu nguuchi yáⁿ'ā ní ndúúcu tuūu chí nguuvi azufre chí nguuchi yaⁿ'ā ní cuuvi chó'ōo chuū nanááⁿ ángeles yeⁿ'é Ndyuūs ní nanááⁿ 'iiⁿ'yāⁿ chí duuchi 'iiti cuūchī. ¹¹ Ní 'yááⁿ'mín yeⁿ'ē nguuchi yáⁿ'ā miiⁿ chí castigo miiⁿ ngεε cueⁿe daāⁿmaⁿ yeⁿe lugar chí n'geenu yā ngii. Ní 'iiⁿ'yāⁿ s'eeⁿ chí n'geenú yā ngii ní i'téenu yā 'iiti monstruo miiⁿ chí ch'εεte taavi ca ndúúcu 'iiti chí santo yeⁿ'é tí. Ní ndéé yā seña yeⁿ'é chí duuchí tí na cuerpo yeⁿ'é yā. 'Iiⁿ'yāⁿ s'eeⁿ nguéé ntaavi'tuunúúⁿ yā yeⁿe chí ya'ái yā ndí nguéé nguuvi ndí nguéé n'gaaⁿ. ¹² Ní cáávā chuū 'iiⁿ'yāⁿ chí yeⁿe Ndyuūs ní n'giindiveéⁿ yā mandamiento yeⁿ'é yā ní 'áámá canéé yā chí i'téenu yā Cristo ní canéé chí véε paciencia yeⁿe yā.

¹³ Cuayiivi ní 'úú ch'iindiveéⁿ 'áámá nduudu yeⁿe va'ai chεeti nguuvi chí ngaⁿ'a ngii 'úú 'tíicā: Díí, Juan, dingúuⁿ di chuū. Dε'ε chúúca yeenu 'iiⁿ'yāⁿ chí caⁿ'á yā 'cuūvi yā tiempo 'cūū ndí tiempo chí cuchii, 'iiⁿ'yāⁿ chí i'téenu yā Señor. Ní 'tíicā cuuvi ngaⁿ'a Espíritu N'dai yeⁿ'é Ndyuūs. Ní 'iiⁿ'yāⁿ s'eeⁿ ntaavi'tuunúúⁿ yā yeⁿe ntiⁿ'nyuⁿ yeⁿ'é yā ní candéé yā ndúúcu yā yeⁿe chí díⁿ yā.

Cosecha yeⁿe yáⁿ'āa 'cūū

¹⁴ Cuayiivi miiⁿ ní n'diichí 'áámá meēⁿ cuéē. Ní 'áámá 'iiⁿ'yāⁿ véε yā vmaaⁿ meēⁿ miiⁿ ní tandúúca Jesucristo chí duuchi Sáⁿ'ā chí Daiya 'Iiⁿ'yāⁿ yeⁿe iⁿ'yeeⁿdí 'cūū. Canduu tíⁿ yā 'áámá corona yeⁿ'e 'díⁿ'nguāaⁿ ní na ca'á yā ní ndéé yā 'áámá hoz chí 'caāiⁿ. ¹⁵ Ní n'diichí táámá ángel can'dáa yā yeⁿe yaācū miiⁿ yeⁿe Ndyuūs ní yuudu caⁿ'a yā ndúúcu 'iiⁿ'yāⁿ chí véε yā na meēⁿ miiⁿ. 'Cáácá dí cosecha ndúúcu hoz yeⁿe di ti maaⁿ ní 'āā tiempo yeⁿe chí díⁿ di cosechar ti cosecha yeⁿ'ē yáⁿ'āa miiⁿ 'āā n'daacā.

¹⁶ Níⁿnuúⁿ nūⁿ 'iiⁿ'yāⁿ chí véε yā na meēⁿ miiⁿ ch'iicá yā cosecha yeⁿ'e yā chí canéé na yáⁿ'āa ní nta'á yā.

¹⁷ Tuu'mi ní táámá ángel can'dáa yā yeⁿe yaācū miiⁿ chíⁿ canéé na va'ai chεeti nguuvi. Ní 'tiicā ntúūⁿ ángel miiⁿ ndéé yā 'áámá hoz chí 'caāiⁿ. ¹⁸ Ní táámá ángel chí candéé yā cuidado yeⁿ'e nguuchi yaⁿ'ā vmaaⁿ nátaí yeⁿ'e yaācū miiⁿ can'dáa yā yeⁿ'e nátaí ní caⁿ'a yuudu yā ángel chí ndéé yā hoz chí 'caāiⁿ. Díi 'caaca di ndúúcu hoz 'caāiⁿ yeⁿ'e di duuⁿnē

'líin yeⁿe yáⁿá 'líin miiⁿ ndúú^cū n'gui'i chi uvas chi cané^e na yáⁿáa ní cuta'a di uvas miiⁿ ti n'guí'í yeⁿe 'āā n'daacā maaⁿ.

¹⁹ Tuu'mi ní ángel miiⁿ ndúú^cū hoz 'caāⁿ yeⁿe yā ch'iica yā duuⁿne 'líin yeⁿe yáⁿá chi sné^e ndúú^cū n'gui'i uvas yeⁿe chi canee vmnaaⁿ yáⁿá. Ní nta'á yā n'gui'i uvas ní s'né^e yā n'gui'i uvas miiⁿ na trapiche naachi cuta'á yā nuūⁿnīⁿ uvas miiⁿ chi vino. Ní trujal miiⁿ ní tan'dúú^cā castigo chi ch'εεε n'dai chi Ndyuūs ca'a yā chí ca'a yā 'iiⁿyāⁿ. ²⁰ Ní trapiche naachi cuta'á yā nuūⁿnīⁿ yeⁿe uvas miiⁿ cané^e 'áámá lado yeⁿe yāāⁿ miiⁿ. Ní yeⁿe trapiche can'daā n'dee^e n'dái yuūⁿ chí yaacu. Ní yuūⁿ miiⁿ tan'dúú^cā 'áámá yí^cú ch'εεε yuūⁿ chi ngii caadi 'iinū ciento kilómetros yeⁿe. Ní yaacu n'dái indáá ndii na freno yeⁿe 'yúudū.

15

Ángeles ndúú^cū tá ndεēchē yá'āi

¹ Cuayiivi ní n'diichí táámá señal na va'ai chεeti nguuvi chí ch'εεε n'dai ní cheⁿe yiinu yeⁿe. Ní vé^e ndεēchē ángeles ndúú^cū ndεēchē chi cuuvi 'nuūcá'ai chí 'cuiinu. Ní ndúú^cū ndεēchē chi cuuvi 'nuūcá'ai chí 'cuiinu, ndúú^cū chuú nūⁿ 'cuiinū tiempo chi Ndyuūs nduuví taáⁿ yā.

² Tuu'mi n'diichí 'áámá nuūⁿnīⁿyáⁿā chi tan'dúú^cā vidrio ndístaⁿa ndúú^cū nguūchī yáⁿā. Ní 'iiⁿyāⁿ s'eeⁿ chi che^e yā cuⁿu yā ndúú^cū 'iiti monstruo miiⁿ ndúú^cū 'iiti chi santo yeⁿe tī ndúú^cū 'iiⁿyāⁿ chi cané^e chi duuchí tī ní número yeⁿe tī na cuerpo yeⁿe yā, 'iiⁿyāⁿ chi iché^e yā yeⁿe 'iiⁿyāⁿ s'eeⁿ chééndii yā niiⁿnuúⁿ ná nuūⁿnīⁿyáⁿā chi vidrio miiⁿ, ní ndεε yā arpas chi Ndyuūs ca'á yā 'iiⁿyāⁿ s'eeⁿ. ³ Ní chiitá yā canto yeⁿe Moisés, chi saⁿā chi dichí'í've sa Ndyuūs. Ní chiitá yā canto yeⁿe 'iiⁿyāⁿ chi nguuvi 'iiti cuūchī. Ní 'tíicā nduudu chi chiitá yā:

Dii Señor Ndyuūs chi vé^e tanducuén^e dendu'ū poder ndúú^cū di. N'gεεε taavi ca dii ní ngeⁿe yiinu yú yeⁿe tanducuén^e dendu'ū chi diiⁿ di. Dii rey yeⁿe tanducuén^e nación ní yúúⁿí yeⁿe di ní cuaacu.

⁴ Dí, Señor, ¿du'ū ngué^e 'va'ā dii? ¿Du'ū ngué^e caaⁿmaⁿ chi dii ní neen^e ch'εεε dii ti dámaaⁿ dii chi dεεε di? Ní ndaa 'iiⁿyāⁿ yeⁿe tanducuén^e naciones nanááⁿ dii chi dich'εεé yā dii caati nducyáácá 'iiⁿyāⁿ n'diichi yā chi diiⁿ di tanducuén^e dendu'ū chi cuaacu ní n'daacā n'dai.

⁵ Ní cuayiivi ní n'diichí chi nanguaaⁿ cheendi va'āi yeⁿe yáacū chi cané^e na va'ai chεeti nguuvi, ní chεeti yaācū miiⁿ, miiⁿ cané^e cuarto chí yaānū naachi cané^e tuū ch'εεé chi cané^e nguūⁿ ley yeⁿe Moisés. ⁶ Ní yeⁿe yaācū miiⁿ can'dáā ndεēchē ángeles. Ní ndεε yā ndu'u ndεēchē chí n'nuu cá'ai yā. Ní vé^e catecai yā yeⁿe tiinūⁿ chi nguuvi lino chi cué^e ní dεεε. Ní n'dεē chiichí niiⁿnuⁿ yā ndúú^cū cinta yeⁿe 'díⁿnguāⁿ. ⁷ Núúⁿmáⁿ chεetí nūⁿ 'áámá 'iiⁿyāⁿ naachi na cuúⁿ yā ní ca'a yā ndu'u ndεēchē ángeles ndεēchē 'cuutí yeⁿe 'díⁿnguāⁿ ca'áámá ca'áámá yā 'áámá 'cuutí chi ndiitúⁿ yeⁿe castigo chi neene taaⁿ chi yeⁿe Ndyuūs chi canduuchi cueⁿe daāⁿmaⁿ. ⁸ Ní yaācū miiⁿ ndiitúⁿ 'yaaⁿmiⁿ chi can'daā yeⁿe vaadī ch'εεε taavi ca yeⁿe Ndyuūs ní yeⁿe poder yeⁿe yā. Ní mar 'áámá 'iiⁿyāⁿ cuuví cundaa yā na yaācū miiⁿ ndí taachi chó'ōo ndεēchē vaadī ya'ai chi ndéε ndu'u ndεēchē ángeles.

16

Ndεēchē 'cuutí yeⁿe vaadī ya'ai

¹ Tuu'mi ní ch'iindiveéⁿ 'áámá nduudu neene díitū chi can'daā yeⁿe yaacu miiⁿ ní ngaⁿa ngii ndu'u ndεēchē ángeles miiⁿ: Ndís'tií ángeles, cueⁿé ní ní n'daaviyaí ní vmnaaⁿ yáⁿā yeⁿe chí snúūⁿ chεeti 'cuutí yeⁿe ní chi castigo chi neen^e díitū chi Ndyuūs ca'á yā 'iiⁿyāⁿ.

² Ní ángel vmnááⁿ vmnaaⁿ cheⁿe yā n'daaviyaí yā chí snúūⁿ 'cuutí yeⁿe yā vmnaaⁿ yáⁿā ní vmnaaⁿ nducyaaca 'iiⁿyāⁿ chí ndéε yā sello yeⁿe 'iiti monstruo na cuerpo yeⁿe

yā, 'iiⁿ'yāⁿ chi i'téenu yā 'iiti santo yeⁿ'é tī. Ní can'dáā n'dúú'ví n'gεεε chi neené ya'ai na cuerpo 'iiⁿ'yāⁿ s'eeⁿ.

³ Tuu'mi ní ndii chíⁿ ndii 'uūvī ángel miiⁿ n'daaviyái yā 'cuutií yeⁿ'e yā vmnaaⁿ nuūⁿnīⁿ'yáⁿā ní nduuví yuuúⁿ tan'dúúⁿcā yuuúⁿ yeⁿ'ē 'aama tináⁿā. Ní tanducuéⁿ'ē 'iiti chi sндуuchí chεeti nuūⁿnīⁿ'yáⁿā miiⁿ ch'iī tī.

⁴ Ní ndii chíⁿ ndii 'íínú ángel miiⁿ n'daaviyái yā 'cuutií yeⁿ'e yā vmnaaⁿ yeⁿ'e yíícú ní vmnaaⁿ yeⁿ'ē naachi can'daā nuūⁿnīⁿ miiⁿ. Ní nducuéⁿ'ē nuūⁿnīⁿ miiⁿ nduuvi yuuúⁿ. ⁵ Ní niiⁿnuúⁿ nūuⁿ ch'iindiveén ángel yeⁿ'e nuūⁿnīⁿ miiⁿ chi ngaⁿ'a yā: Dii Señor, 'āā canéé dí cuáán vmnaaⁿ, ní canee di maaⁿ. Dii ní cuaacu di ti n'diichi di nuūⁿndī 'iiⁿ'yāⁿ s'eeⁿ. ⁶ Ní 'tíicā diiⁿ di caati 'iiⁿ'yāⁿ s'eeⁿ ní ch'iiⁿ'núⁿ yā 'iiⁿ'yāⁿ yeⁿ'e di ndúúⁿcū 'iiⁿ'yāⁿ chi 'áámá diíⁿ yā ntiⁿnyuⁿ yeⁿ'e di ndúúⁿcū 'iiⁿ'yāⁿ chí caⁿ'a nduudu cuaacu yeⁿ'e di. Ní maaⁿ ní dii nca'a di yuuúⁿ yeⁿ'ē nuūⁿnīⁿ miiⁿ chi cu'ú yā caati 'tíicā chi n'daacā chi cu'ú yā yuūⁿ miiⁿ cucáávā chi diiⁿ yā chí nguéé n'daacā.

⁷ Ní ch'iindiveén nduudu yeⁿ'e 'áámá yeⁿ'e nátai chi ngaⁿ'a ngii Ndyuūs, ní ngaⁿ'a: Dii, Ndyuūs, chi véé tanducuéⁿ'ē dendu'ū poder ndúúⁿcū dí, cuaacu níⁿnyúⁿ n'diichi di nuuⁿndi yeⁿ'e 'iiⁿ'yāⁿ. Ní diiⁿ di chi cuaacu ní n'dai taavi.

⁸ Ní n'diichí ndíí cuūⁿ ángel miiⁿ n'daaviyái yā 'cuutií yeⁿ'e yā vmnaaⁿ yeⁿ'e 'yáⁿā. Ní ca'á yā poder 'yáⁿā miiⁿ chi 'neen 'yáⁿā 'iiⁿ'yāⁿ ndúúⁿcū 'yáⁿā yeⁿ'ē. ⁹ Ní nducyaaca 'iiⁿ'yāⁿ ní chiichi yā ndúúⁿcū 'iiⁿ'nūⁿ taán yeⁿ'e 'yáⁿā miiⁿ. Ní neené taaⁿ ya'ai yeⁿ'é yā. Ní cunncaā caⁿ'a yā yeⁿ'e chi duuchi Ndyuūs chi véé poder yeⁿ'é yā yeⁿ'ē ndεēchē cá'ai 'cūū. Naati 'iiⁿ'yāⁿ s'eeⁿ nguéé ndaacadaamí yā yeⁿ'e nuuⁿndi yeⁿ'é yā ní nguéé dich'εεté yā Ndyuūs.

¹⁰ Ní n'diichí ndii nyuⁿ'u ángel miiⁿ n'daaviyái yā 'cuutií yeⁿ'e yā vmnaaⁿ yeⁿ'e trono yeⁿ'e 'iiti monstruo miiⁿ ní vmnaaⁿ yeⁿ'e tanducuéⁿ'ē chi ngaⁿ'á tī ntiⁿnyuⁿ yeⁿ'ē ní canéé ná 'áámá maāiⁿ. Ní 'iiⁿ'yāⁿ s'eeⁿ ní chenⁿ'enéé yā chiiya yā cáávā chi ya'ai yā. ¹¹ Ní 'iiⁿ'yāⁿ s'eeⁿ cunncaā caⁿ'a yā yeⁿ'e Ndyuūs chi canéé yā na va'ai chεeti nguuvi cucáávā chi ya'ai yeⁿ'e yā ndúúⁿcū n'duu'vi yeⁿ'é yā. Ní nguéé nandaacadaamí yā yeⁿ'e nuuⁿndi yeⁿ'e yā.

¹² Tuu'mi ní ndii chíⁿ ndii niyaaⁿ ángel miiⁿ n'daaviyái yā 'cuutií yeⁿ'é yā vmnaaⁿ yíícú ch'εεε chi nguuvi Eufrates ní nuūⁿnīⁿ yeⁿ'e yíícú ch'εεε miiⁿ nti'i. Ní n'guaāⁿ 'aama yúúⁿ ní 'iicu 'iiⁿ'yāⁿ reyes cuuvi cuchii yā cuaaⁿ naachi can'daā 'yáⁿā na yúúⁿ miiⁿ.

¹³ Tuu'mi ní n'diichí chí can'daā 'iinū espíritus yeⁿ'e yááⁿ'n'guiinūⁿ chi tan'dúúⁿcā sopo, 'tíicā espíritus. Ní can'daā yeⁿ'ē cheendi 'iiti dragón miiⁿ ní yeⁿ'ē cheendi 'iiti monstruo chi ch'εεε taavi cá tī ní yeⁿ'e cheendi profeta chi ngaⁿ'a yā chi yeⁿ'e Ndyuūs 'yā, ní nguéé ngaⁿ'a yā nduudu cuaacu yeⁿ'e maán yā. ¹⁴ Espíritus ndúúⁿcū espíritus yeⁿ'e yááⁿ'n'guiinūⁿ ní diíⁿ yā señas yeⁿ'e vaadī n'giinu. Ní cueⁿ'e yā nanááⁿ nducyáácá reyes yeⁿ'ē núúⁿmán iⁿ'yeeⁿdí 'cūū chi nadaama yā 'iiⁿ'yāⁿ s'eeⁿ chi cuuvi 'cuuⁿ'maⁿ yā nguuvi chi ch'εεε chi yeⁿ'é Ndyuūs chi véé nducuéⁿ'ē dendu'u poder yeⁿ'e yā. ¹⁵ Ní Cristo ngaⁿ'á yā. Cuin'diichí nī. 'Úú ní cuchíí tan'dúúⁿcā 'áámá chíduucu. De'ē chúúⁿcā n'dai 'iiⁿ'yāⁿ chi sндуuchí yā ní snúuⁿ yā catecai yā ní nguéé 'cúεetinée yā chi chiica yā chi yuucú yā chi 'iiⁿ'yāⁿ s'eeⁿ inaán yā ní 'íícú cuuvi 'cuináⁿ yā. ¹⁶ Ní espíritus nduuvidaami yā reyes yeⁿ'e yáⁿā na 'áámá lugar chi nguuvi Armagedón na davaacu hebreo.

¹⁷ Tuu'mi ní ndii chíⁿ ndii ndεēchē ángel miiⁿ n'daaviyái yā 'cuutií yeⁿ'e yā na 'yúúⁿé. Ní yeⁿ'e yáacū miiⁿ chi canéé na va'ai chεeti nguuvi mííⁿ can'daā 'áámá nduudu neene díítūu lado yeⁿ'e trono miiⁿ chí ngaⁿ'á 'túúⁿcā: Aā tunééⁿ nducuéⁿ'ē.

¹⁸ Tuu'mi ní véé 'cuaī ndúúⁿcū nduudu s'eeⁿ ndúúⁿcū daavi ndúúⁿcū chi diituu n'dái n'nuⁿ'u yáⁿā. Ní ch'εεε ca nguéé ti tan'dúúⁿcā chi cunee ndii tiempo chi 'iiⁿ'yāⁿ canéé yā iⁿ'yeeⁿdí 'cūū. ¹⁹ Ní yáāⁿ ch'εεε chi yáāⁿ Babilonia miiⁿ chií 'iinū taaⁿ ní nducuéⁿ'ē yáāⁿ yeⁿ'ē iⁿ'yeeⁿdí 'cūū ní sndeεεε. Ní Ndyuūs nn'gáácú yā yeⁿ'e yáāⁿ ch'εεε chi yáāⁿ Babilonia miiⁿ. Ní ca'á yā 'iiⁿ'yāⁿ chi canéé na yáāⁿ s'eeⁿ chi cu'ú yā vino yeⁿ'é yā chi vino yeⁿ'e vaadī taaⁿ yeⁿ'é Ndyuūs. Ní vino miiⁿ chi ca'á yā ní castigo chi neené díítūu.

²⁰ Ní tanducuéⁿ'ē yáⁿā islas ndúúⁿcū tanducuéⁿ'ē yīicū n'gεεε ní ndáá inaaaⁿ. ²¹ Ní yeⁿ'e

nanguuvi ní ndεεve n'dee n'dái yuūuⁿ chi neené diituú vmnaaⁿ 'iiⁿ'yāⁿ yeⁿ'e iⁿ'yeeⁿdī. 'Áámá áámá yuūuⁿ miiⁿ n'gii tan'dúúca 'uūvī ngeεcu kilos. Ní 'iiⁿ'yāⁿ yeⁿ'e iⁿ'yeeⁿdī caaⁿ'maⁿ taáⁿ yā yeⁿ'é Ndyuūs cáávā yeⁿ'e vaadí ya'ai miiⁿ yeⁿ'e yuūuⁿ ti castigo yeⁿ'ē vaadí ya'ai miiⁿ ní neéné díftū.

17

*Nuuⁿ*ndi taavi yeⁿ'e 'áámá n'daataá chi neéné caⁿ'a tá ndúúcu saⁿ'ā s'eeⁿ

¹ Tuuⁿ'mi ní 'áámá ángel naachi ndεēche yā chi ndée yā ndu'u ndεēchē 'cuutí ndáa yā nanááⁿ 'úú, ní caⁿ'a yā chii yā 'úú: Dii, Juan cuchí di nduucu ní 'úú ní 'cuuⁿ'míⁿ dii castigo chi ch'εete ca chi cuchí vmnaaⁿ 'áámá ndaataá chi véé cá saⁿ'ā yeⁿ'ē ta. N'daataá miiⁿ ní véé yā vmnaaⁿ nuūⁿnīⁿ'yáⁿ'ā s'eeⁿ. ² Saⁿ'ā reyes yeⁿ'e iⁿ'yeeⁿdí 'cūū cueⁿ'é yā ndúúcu n'daataá miiⁿ ní n'geεtinée yā ndúúcu n'daataá miiⁿ. Ní nducyaaca 'iiⁿ'yāⁿ chi snée yā na yáⁿ'āa cueⁿ'é yā ndúúcu n'daataá ó isaⁿ'ā chi nguée yeⁿ'e yā tan'dúúca chi cuuⁿ'ví yā ndúúcu vino yeⁿ'e tá yeⁿ'ē chi dinuuⁿndi cá yā 'tíicā.

³ Ní 'úú canée maáⁿ poder Espíritu N'dai yeⁿ'é Ndyuūs ní ángel miiⁿ candée yā 'úú na yáāⁿ cuuⁿ'máⁿ naachi nguée ch'εetinée 'iiⁿ'yāⁿ. Ní mííⁿ n'diichí 'áámá n'daataá candúu tá 'áámá monstruo cuá'a tī chi ch'εete ca. Ní neéné n'deēe chi duuchi chi contra yeⁿ'e Ndyuūs s'neéⁿ nguūⁿ na cuerpo yeⁿ'e 'iiti miiⁿ. Ní véé ndεεche tííⁿ tī ní véé ndiichi duuⁿniiⁿ'nīⁿ tī. ⁴ Ní n'daataá chi candúu ta monstruo cuá'a tī ní canuuⁿ tá vestido chi morado ndúúcu cuá'ā. Ní véé adorno yeⁿ'ē tá chi 'díínguāⁿ ndúúcu tuūu chi neéné yaⁿ'ai chíí'vē ndúúcu perlas. Ní ndεε tá ná ta'a tá 'aama taza yeⁿ'e 'díínguāⁿ chi diituú ndúúcu dendu'ū chi nguεε n'daacā chi nuūⁿndī vaatii ndúúcu chi dendú'ū yeⁿ'e chi cueⁿ'e tá ndúúcu saⁿ'ā s'eeⁿ chi nguée yeⁿ'e tá. ⁵ Ní canée nguūⁿ 'áámá chi duuchi ná ncheεtē tá chi canúúⁿ n'de'ei chi neⁿ'e caaⁿ'maⁿ chi 'túúca. Yáāⁿ Babilonia ch'εete chi chεεcuú nducyaaca n'daataá chi caⁿ'á yā ndúúcu saⁿ'ā chi nguée yeⁿ'e yā ndúúcu nducueⁿ'ē cosas chí nguée n'daacā na iⁿ'yeeⁿdí 'cūū chi diiⁿ 'iiⁿ'yāⁿ s'eeⁿ. ⁶ Ní 'úú chicadiinúúⁿ chi n'daata miiⁿ ní cuuⁿ'ví tá caati cu'u ta yuūuⁿ yeⁿ'e 'iiⁿ'yāⁿ chi n'dí yā ti yeⁿ'e Ndyuūs ní yeⁿ'e 'iiⁿ'yāⁿ chí ngaⁿ'á yā nduudu cuaacu yeⁿ'e Cristo. Ní taachi n'diichí chuū cueⁿ'e yiinú yeⁿ'ē. ⁷ Tuuⁿ'mi ní ángel chi ndεε yā 'úú ngaⁿ'a yā ngī yā 'úú: ¿De'ē cúví chí ngeⁿ'e yiinú dí yeⁿ'e chuū? 'Úú ní cuuⁿ'ví dii chi canúúⁿ n'de'ei yeⁿ'ē n'daataá miiⁿ ndúúcu yeⁿ'e monstruo ch'εete chi ndéé tī ndaataá miiⁿ, monstruo miiⁿ chi véé ndεēchē tííⁿ tī ní ndiichi duuⁿniiⁿ'nīⁿ tī. ⁸ 'Iiti monstruo chi n'diichí di ní 'áámá tī chi ndii tiempo vmnaaⁿ canduuchí tī naati maaⁿ ní 'āā ntéé tī, naati 'iiti miiⁿ cáámá canée chí can'daá tī na yiiné yeⁿ'e yáⁿ'āa vmnááⁿ vmnaaⁿ chi caⁿ'á ti di'cuiinú tī. Ní 'iiⁿ'yāⁿ chi snée yā na yáⁿ'āa ní nguée snée chi duuchí yā na libro yeⁿ'e vida cueⁿ'e daāⁿ'maⁿ ndí taachi Ndyuūs din'dái yā iⁿ'yeeⁿdī. 'Iiⁿ'yāⁿ s'eeⁿ ní ngeⁿ'e yiinú yā taachi n'diichí yā 'iiti miiⁿ chi vmnaaⁿ canduuchí tī naati maaⁿ ní 'āā ntéé tī. 'Āā ch'íí tī naati nnguaacunée tī ndaá tī.

⁹ Ní yeⁿ'ē chúú véé cá chi cuuvi déenu 'iiⁿ'yāⁿ. Ndu'u ndεēchē tííⁿ tī ní chííⁿ tan'dúúca chí ndεēchē yīcū ch'εete naachi n'daataá miiⁿ ní véé yā vmnaaⁿ yeⁿ'ē. ¹⁰ Ní véé ndεēchē reyes. Nyuⁿ'u reyes ní ch'íi yā. Maaⁿ ní 'áámá rey miiⁿ ní ngaⁿ'a ntiiⁿ'nyuⁿ yā yeⁿ'e 'iiⁿ'yāⁿ chi véé maaⁿ. Ní táámá rey ní canée chi ndaá yā. Ní taachi ndaá rey miiⁿ chi ndu'u chi ndεēchē nguée 'naaⁿ tiempo canée yā iⁿ'yeeⁿdī. ¹¹ Ní táámá 'iiti monstruo chi vmnaaⁿ canduuchí tī ní maaⁿ ní 'āā ntéé tī ti ch'íí tī ní 'iiti miiⁿ chi rey miiⁿ ní nduuvíáámá tī ndúúcu ta ndεēché tī. Ní cuayiivi ní rey miiⁿ caⁿ'á yā cuuvi ndai yā chi vaadí n'gii yeⁿ'e ndii 'uūvī cuuvi chi infierno.

¹² Ní ndu'u ndiichi duuⁿniiⁿ'nīⁿ tī chi n'diichi di chííⁿ chí ndu'ū ndiichi reyes chi 'āā cuée cuta'á yā poder yeⁿ'é yā naachi ngaⁿ'ā ntiiⁿ'nyuⁿ yā. Taachi cuta'á yā poder ní chi cuuvi reyes ndúúcu 'iiti monstruo miiⁿ 'áámá hora nūuⁿ. ¹³ Ní reyes s'eeⁿ ní dáámá nūuⁿ vaanicadíinūuⁿ yeⁿ'é yā. Ní ca'a yā poder yeⁿ'é yā ndúúcu fuerzas yeⁿ'e yā na ta'a 'iiti monstruo miiⁿ. ¹⁴ Ní reyes ní 'cuuⁿ'maⁿ yā ndúúcu 'iiⁿ'yāⁿ chí nguuvi 'iiti cuūchī naati 'iiⁿ'yāⁿ miiⁿ chí nguuvi 'iiti cuūchī cuchée yā yeⁿ'e reyes. Ní Señor ch'εete ca ní 'iivi nducyaaca 'iiⁿ'yāⁿ señores ní rey ch'εete ca yeⁿ'ē nducyaaca reyes. Ní 'iiⁿ'yāⁿ s'eeⁿ chi

canée yā ndúúcū 'ii'nyān mii' ní Ndyuūs yaa'ví yā 'ii'nyān s'ee' chi cuuvi ye'n'é yā. Ní Ndyuūs ndεεvé yā 'ii'nyān s'ee' chi ye'n'é yā. Ní 'ii'nyān s'ee' ní 'aama canee yā ndúúcū chi i'téenu yā Ndyuūs.

¹⁵ Ní ángel mii' ca' a yā chii yā 'úú: Nuū'nī'nyā'nā s'ee' chí n'diichī di naachi véε n'daataá chi ca' a tá ndúúcū sa' a s'ee', nuū'nī'nyā'nā s'ee' ní chí'ín chi yāān s'ee' ndúúcū n'dee' n'dái 'ii'nyān ndúúcū 'ii'nyān chi nga' a n'dee' n'dái davaacu chi n'dáán ndúúcū naciones. ¹⁶ Ní ndu' u ndiichī duu'nii'nín' tī chi véé ye' e monstruo mii', nguéé ne' e n'daataa mii'. Ní cuta' a tī nducué'nē ye' e n'daataa mii'. Ní diví tī catecai n'daataa mii' ní s'neēn tá'nā chi yuucū tá. Ní che' é tī yuūtē ye' e tá. Ní 'nee' n ya' ā n'daataa mii' ndúúcū nguuchi ya' ā. ¹⁷ Caati Ndyuūs s'neēn yā na staava ye' e reyes chi diín yā 'túúcā tan'dúúcā chi Ndyuūs ne' é yā chi diín yā. Ní ndiichi duu'nii'nín' tī nduuvidaamí tī ní ca' á tī poder ye' é tī na ta' a 'iiti monstruo mii' chi caa' ma' n ntiin'nyú' n tī. Ní 'túúcā diín tī chi cuuví cuaacu nduudu chí nga' a Ndyuūs. ¹⁸ Ní n'daataá chi n'diichī di chí'ín chí yāān ch'εεte chi caa' ma' n ntiin'nyu' n ye' e nducyaaca reyes chi snée yā ná i' nyē' ndī.

18

Yáā' n Babilonia ntuūvī

¹ Ní cuayiivi mii' ní n'diichī táámá ángel chi ngiicá yā ye' e na va' ai chεeti nguuvi ní véé poder ch'εεte ye' e yā. Ní yā' āa mii' canée dεεve ndúúcū dεεve ye' e ángel mii'. ² Ní 'cai yiicú yā ní ca' a yā: Yáā' n chi ch'εεte nituūvī, yāā' n Babilonia chi ch'εεte ní nituūvī. Ní maa' n ní ch'εεtinee espíritus ye' e yáā' n' giinūu' n ndúúcū espíritus chi nguéé n'daacā. Ní n'dee' n'dái 'yaada chi vaatī snée tī yāā' n mii', 'yaada chi ní nguéé 'iinée yiinú yā 'iiti. ³ Caati n'daataa mii' chi yāā' n Babilonia mii' ní ca' a tá vino chi vaadī taa' n ye' e tá nducyaaca 'ii'nyān ní cu' ú yā vino mii' chí'ín chi ye' e chi dinuu' ndi tá. Ní reyes ye' e i' nyee' ndí 'cūū cue' é yā na yāā' n mii' ní dinuu' ndi yā. Ní 'ii'nyān ye' e i' nyee' ndí 'cūū diín yā negocios chi 'cuiica yā cucáāvā poder ye' e vaadī 'cuiica ye' e tá.

⁴ Tuu' mi ní ch'iindiveē' n táámá nduudu ye' e va' ai chεeti nguuvi chi nga' a 'túúcā: Ndís' tiī, 'ii'nyān ye' e, nan' daa nī ye' e yāā' n mii' caati nguéé diín nī nuu' ndi ndúúcū tá. Ní nguéé cuta' á nī ye' e vaadī yā' āi ye' e tá. ⁵ Tí núú' ndí ye' e tá n'dee' n'dái chi ndaā ndii na va' ai chεeti nguuvi. Ní Ndyuūs nin' gaacu yā ye' e chi diín tá chí nguéé n'daacā. ⁶ Ní ndís' tiī diín nī ndúúcū tá tan'dúúcā chi diín tá nduucú nī. Ní ca' á nī tá'nā mii' 'uūvī vueltas ye' e chí tee tá ndís' tiī. Ní didiitú nī ndúúcū vino ye' e taza ye' e tá ndúúcū vino chi 'uūvī veces ditiinúú ye' e chi tee tá ndís' tiī. ⁷ Ní diín nī chi 'cueenu taavi tá cuuvi ní cuuvi yá' ai ye' e tá n'dee' cá tan'dúúcā chi maa' n tá dich'εεte maa' n ta tá'nā ndúúcū chi véé cá chi sta' a tá cáāvā maa' n tá. Ní 'túúcā nacadiinuu' n tá maa' n tá na staava ye' e tá. 'Muu' n canee ní 'úú véé tan'dúúcā 'aama reina véé yā. Nguéé n'daata nguá' āa 'úú. Ní nguεε 'cuenú cuuvi. ⁸ Ní yāā' n Babilonia, cáāvā chi diín tá 'túúcā, n'dee' n'dái vaadī yā' āi ní ndaā vmnaa' n ye' e tá na 'áámá nguuvi nūu' n, chí'ín chi cuuvi yá' ai ye' e 'ii'nyān s'ee'. Ní 'cuūvi yā ní cheēcu yā chi ya' ai yā. Ní cuiicu yā ní cuūcu 'ii'nyān s'ee' ndúúcū nguuchi yā' ā ti Señor Ndyuūs mii' ní véé poder ye' e yā chi ch'εεte taavi ca ní nga' á yā chi condenado yā.

⁹ Ní reyes ye' e yā' āa 'cūū chi cue' é yā ndúúcū tá ní dinuu' ndi yā ndúúcū tá, ní n'dee' n'dái véé ye' e yā ti diín yā tan'dúúcā chi diín tá. Reyes mii' cuéécú yā ní yuudu n'dái cuεεcú yā taachi snaa' n yā tá'nā mii' chi cuūcu tá ní snaa' n yā 'yaa' mi' n ye' e tá. ¹⁰ Ní 'va' á yā ye' e tá cáāvā castigo ye' e tá ní cuééndii yā ya' ai ye' e tá ní caa' má' n yā: Dε' ε chúúcā ya' áí díí, dε' ε chúúca ya' áí díí n'daataá chi yāā' n Babilonia chi ch'εεte chi véé poder ch'εεte ye' e, ti chεeti 'áámá miní'nyú' n nūu' n ndaā castigo ye' e di.

¹¹ Ní 'ii'nyān chi diín yā negocio na i' nyee' ndí 'cūū cuεεcú yā ní yuudu n'dái cuεεcú yā cáāvā yāā' n Babilonia mii'. Ní ya' ai yā cáāvā yāā' n mii' ti nguéé véé mar 'áámá 'ii'nyān chi cuuvi cuái yā ye' e mercancia chi ndεε yā. ¹² Mar 'áámá 'ii'nyān nguéé cuái yā ye' e chi ndεε yā chí 'dí' n'nguā' n ndúúcū 'dí' n'nguēε, ndúúcū tuūu chi ya' ai chí'ín vē, ndúúcū perlas ndúúcū tiinūu' n n'dai ca chi nguuvi lino, ndúúcū tiinūu' n seda, ndúúcū tiinūu' n n'dai ca

chi cuá'ā ndúucū tífínūuⁿ n'dai ca chi morado, ndúucū tanducuéⁿē clase yeⁿe yáⁿ'á chi yuūdū ngééⁿ, ndúucū cosas yeⁿe marfil, ndúucū nducuéⁿē cosas yeⁿe yáⁿ'á chi yaⁿ'ai chíí'vē ndúucū cūū cuááⁿ, ndúucū cūū, ndúucū tuūu mármol, ¹³ ndúucū canela, ndúucū especias chi yuudu ngééⁿ, ndúucū cúⁿ'úyaa, ndúucū ungüento chi nguuví mirra ndúucū perfumes chi dεεve ngééⁿ, ndúucū vino, ndúucū aceite, ndúucū harina fino, ndúucū trigo. Ní ndéé yā ntúūⁿ 'iiti s'eeⁿ yeⁿe carga ndúucū 'iiti cuūchī s'eeⁿ, ndúucū 'yuūdūu s'eeⁿ, ndúucū carros, ndúucū 'iiⁿ'yāⁿ chi esclavos. ¹⁴ Ní 'iiⁿ'yāⁿ s'eeⁿ chi díⁿ yā negocios miiⁿ ngaⁿ'á yā yeⁿe yáāⁿ ch'εεte miiⁿ: Tanducuéⁿē cosas yeⁿe chi nguéé n'daacā n'dai chi neⁿe 'iiⁿ'yāⁿ yeⁿe yáāⁿ 'āā ntéé véé. Ní nducuéⁿē chi vaadī 'cuiica ndúucū cosas chi n'dai taavi yeⁿe yáāⁿ miiⁿ 'āā ntéé véé. Ní 'āā ntéé cuuví nndaāca yā tanducuéⁿē dendu'ū yeⁿē.

¹⁵ Ní 'iiⁿ'yāⁿ chi díⁿ yā negocios ndúucū 'iiⁿ'yāⁿ yeⁿe yáāⁿ ch'εεte miiⁿ, chííⁿ chi diiⁿ chi 'cuiicā yā. 'Iiⁿ'yāⁿ s'eeⁿ cuεεtindíí yaⁿ'ái yā ti 'va'a yā yeⁿe castigo yeⁿe yáāⁿ miiⁿ. Ní cuεεcú yā ní yuudu n'dai 'cuai yā. ¹⁶ Ní ngaⁿ'a yā: De'ε chúúca ya'ai yeⁿe yáāⁿ Babilonia ch'εεte ti tan'dúúca 'áámá n'daataá chi véé vestido yeⁿe tiinūuⁿ lino chi yaⁿ'ai chíí'vē ndúucū tífínūuⁿ chi cuá'ā ndúucū morado. Ní véé adorno yeⁿe tá chi 'dííⁿnguāāⁿ ndúucū tuūu chi yaⁿ'ai chíí'vē ndúucū perlas. ¹⁷ Ní chεeti 'áámá hora nūuⁿ tanducuéⁿē vaadī 'cuiica yeⁿe yáāⁿ miiⁿ ní ch'iinu. Ní nducyaaca 'iiⁿ'yāⁿ capitanes chi ngaⁿ'a ntiiⁿnyuⁿ yeⁿe barcos ti díⁿ yā negocios cucáāvā barcos yeⁿe yā ní ndúucū nducyaaca 'iiⁿ'yāⁿ chi caⁿ'á yā na barcos, ndúucū nducyaaca 'iiⁿ'yāⁿ chi díⁿ yā ntiiⁿnyuⁿ yeⁿe barcos, nducyaaca 'iiⁿ'yāⁿ miiⁿ ní chεεtindii yaⁿ'ai yā. ¹⁸ Ní taachi n'diichí yā 'yaaⁿ'miiⁿ yeⁿe nguuchi yaⁿ'ā yeⁿe yáāⁿ miiⁿ 'cai yiicú yā: ¿Chεε táámá yáāⁿ tan'dúúca yáāⁿ 'cūū?

¹⁹ Ní 'iiⁿ'yāⁿ s'eeⁿ ní s'neéⁿ yā iyaācā vmnaaⁿ tíⁿ yā ní chεεcú yā. Ní yuudu n'dai chεεcú yā. Ní 'caí yā: De'ε chúúca ya'ai, de'ε chúúca ya'ai yeⁿe yáāⁿ ch'εεte miiⁿ. Ní nducyaaca 'iiⁿ'yāⁿ chi véé barco yeⁿe yā vmnaaⁿ nuūⁿn'iiⁿ'yāⁿ ní 'cuiíca yā cáāvā vaadī 'cuiica yeⁿe yáāⁿ miiⁿ, chεeti 'áámá hora nūuⁿ ch'iinu yáāⁿ ch'εεte miiⁿ ndúucū chi véé yeⁿē.

²⁰ Naati ndís'tiī chi canéé na va'ai chεeti nguuví ndúucū ndís'tiī chí apóstoles, ndúucū ndís'tiī chi ngaⁿ'a nduudu yeⁿ'é Ndyuūs ní ndúucū nducyaaca 'iiⁿ'yāⁿ chi yeⁿ'é Ndyuūs, nducyáácá nī yeenú nī yeⁿe yáāⁿ miiⁿ ti Ndyuūs caⁿ'a yā chi condenado yáāⁿ miiⁿ. Ní Ndyuūs díⁿ yā justicia yeⁿe ndís'tiī.

²¹ Tuu'mi ní ángel chi neené ditiinú yā sta'á yā 'áámá tuūu ch'εεte chi tan'dúúca 'áámá tuūu ch'εεte yeⁿe molino. Ní canuúⁿ yā tuūu miiⁿ na nuūⁿn'iiⁿ'yāⁿ ní ngaⁿ'á yā. 'Tíicā: Ní diitu dituuví yā yáāⁿ Babilonia chi yáāⁿ ch'εεte miiⁿ ní 'āā ntéé cuuvi n'diichí yā yáāⁿ miiⁿ. ²² Ní 'āā ntéé n'giindiveeⁿ yā na yúúní yeⁿe yáāⁿ miiⁿ música yeⁿe 'iiⁿ'yāⁿ chi di'cuεεcú yā arpas, ndúucū música yeⁿe 'iiⁿ'yāⁿ músicos, ndúucū música yeⁿe 'iiⁿ'yāⁿ chi i'tiiví yā flautas, ndúucū 'iiⁿ'yāⁿ chi di'cuεεcú yā trompetas. Ní nguéé véé 'iiⁿ'yāⁿ chi idiin ntiiⁿnyuⁿ na yáāⁿ miiⁿ. Ní nguéé n'giindiveeⁿ yā chi 'cuεεcu tuūu yeⁿe molino na yáāⁿ miiⁿ. ²³ 'Āā ntéé n'diichí yā chidεεve yeⁿe lámparas yeⁿe yáāⁿ miiⁿ. 'Āā ntéé n'giindiveeⁿ yā ruido yeⁿe 'viicú chi diiⁿ 'iiⁿ'yāⁿ chi n'giindivaacú yā. 'Áará chi 'iiⁿ'yāⁿ yeⁿe yáāⁿ miiⁿ ní díⁿ yā negocios ní ch'εεte n'dai ca poder yeⁿ'é yā nguéé ti tanáⁿ'a yā yeⁿe iⁿ'yeeⁿdí 'cūū, ní 'iiⁿ'yāⁿ yeⁿe yáāⁿ miiⁿ ní chinnche'éí yā 'iiⁿ'yāⁿ yeⁿe tanáⁿ'ā naciones ndúucū dendu'ū yeⁿe vaadī ngaatu chi díⁿ yā.

²⁴ Ní na yáāⁿ ch'εεte miiⁿ 'iiⁿ'yāⁿ nndaāca yā yuūuⁿ yeⁿ'é 'iiⁿ'yāⁿ chi ngaⁿ'á yā nduudu cuaacu yeⁿ'é Ndyuūs ndúucū yuūuⁿ yeⁿ'é 'iiⁿ'yāⁿ chí yeⁿ'é Ndyuūs ndúucū yuūuⁿ yeⁿe nducyáácá 'iiⁿ'yāⁿ yeⁿe iⁿ'yeeⁿdí 'cūū chi ch'iī yā.

19

¹ Cuayiivi miiⁿ ní ch'iindiveeⁿ 'áámá nduudu chi ch'εεte n'dai yeⁿe na va'ai chεeti nguuví chi yeⁿe neééⁿ 'yaaⁿ n'dai 'iiⁿ'yāⁿ. Ní ngaⁿ'a yā:

Aleluya. Dich'εεte yú Ndyuūs ti nadanguáⁿ'ai yā s'uuúⁿ. Ní vaadī dεεve n'gii ndúucū tanducuéⁿē poder ní yeⁿe Ndyuūs yeⁿe yú.

² Caati Ndyuūs n'diichí yā nuuⁿndi yeⁿe 'iiⁿ'yāⁿ ndúúcu nduudu cuaacu chí n'dai. Ngaⁿ'á yā chi n'daataá chi cueⁿe tá ndúúcu saⁿ'ā s'eeⁿ ní condenado tá ti n'daataa míⁿ ní diiⁿ tá chi 'iiⁿ'yāⁿ yeⁿe yáⁿ'āa 'cūū ní dinuuⁿndi yā cáávā chi nééné dinuuⁿndi tá. Ndyuūs ca'a yā castigo táⁿ'ā miiⁿ caati ngée tá yuūuⁿ yeⁿe 'iiⁿ'yāⁿ chi dichíí'vε yā Cristo taachi ch'iiⁿ'nuⁿ tá 'iiⁿ'yāⁿ s'eeⁿ.

³ Ní n'deee n'dái 'iiⁿ'yāⁿ ngaⁿ'a ntúuⁿ yā: Aleluya. Dich'εεε yú Ndyuūs. 'Yaaⁿ'miⁿ yeⁿe n'daataá miiⁿ chi cuucu yaⁿ'ā táⁿ'ā 'áámá chεε 'yaaⁿ'miⁿ yeⁿe tá chi castigo yeⁿe tá cueⁿe daāⁿmaⁿ.

⁴ Ní ndu'u ndiicú cuūuⁿ 'iiⁿ'ntyéⁿ'ē ndúúcu ndu'u cuūuⁿ 'iiⁿ'yāⁿ ch'eēndiitín'dii yā nanááⁿ Ndyuūs chi véε yā na trono yeⁿ'é yā ní nducyaaca yā ndúúcu naáⁿ yā na yáⁿ'āa chi'téenu yā Ndyuūs ní caⁿ'a yā 'tíicā: Aleluya. Dích'εεε yú Ndyuūs.

⁵ Ní ch'iindiveéⁿ 'áámá nduudu yeⁿe trono miiⁿ chi ngaⁿ'a 'tíicā: Nducyáácá nī canéé chi dich'εεé nī Ndyuūs yeⁿe yú. Ndís'tiī chi ngaⁿ'a ntiiⁿ'nyúⁿ nī ndúúcu tanáⁿ'a nī, nducyaaca nī chi dichíí'vε nī Ndyuūs ní 'va'á nī yeⁿe yā.

'Viicu yeⁿ'ē chi ch'iindivaacú 'iiⁿ'yāⁿ chi nguuvi 'iiti cuūchī

⁶ Ní táámá vmnéⁿ'ēe ch'iindiveéⁿ 'áámá nduudu yeⁿ'ē n'deee n'dái 'iiⁿ'yāⁿ tan'dúúcā chi n'gεεcú naachí 'yaaⁿ n'dái nuūⁿnīⁿ ní tan'dúúcā chi n'gεεcu diituu n'dái daavi. Ní ngaⁿ'a yā:

Aleluya. Dich'εεε yú Ndyuūs ti Señor yeⁿe yú, Ndyuūs yeⁿe yú chi véé tanducuéⁿ'ē dendu'ū poder nduucú yā 'āā ngaⁿ'a ntiiⁿ'nyúⁿ yā yeⁿe tanducuéⁿ'ē dendu'ū.

⁷ Maaⁿ ní yeenu taavi yú ní véé vaadi yeenú nanááⁿ yú ní caⁿ'a yú chi ch'εεε taavi ca Ndyuūs ti ndaā tiempo chi 'iiⁿ'yāⁿ chi nguuvi 'iiti cuūchī ní 'caandavaacú yā. Ní n'daataá yeⁿe yā 'āā véé yaaⁿ tá. N'daataá miiⁿ ní nducyaaca 'iiⁿ'yāⁿ chi 't'éenu yā Cristo.

⁸ Ní ca'á yā n'daataa yeⁿe yā 'áámá vestido chi yeⁿe lino chi yaⁿ'ai chíí'vε chi dεεε ní cuéē.

Ní tiinūuⁿ lino miiⁿ ní chííⁿ chi vida chi n'dai taavi yeⁿ'é 'iiⁿ'yāⁿ chi yeⁿ'é Ndyuūs.

⁹ Tuu'mi ní ángel chi candéε yā 'úú caⁿ'a yā chii yā 'úú. Díí, Juan, dinguúⁿ di 'tíicā: De'ε chúúcā n'dai cáávā 'iiⁿ'yāⁿ s'eeⁿ chi 'áámá 'caí yā 'iiⁿ'yāⁿ s'eeⁿ chi cuchíí yā naachi 'iiⁿ'yāⁿ chi nguuvi 'iiti cuūchī 'caandavaacú yā ní 'iiⁿ'yāⁿ s'eeⁿ che'e nguiinú yā yeⁿe 'viicu miiⁿ. Ní ángel miiⁿ caⁿ'a yā chii yā 'úú: Nduudú 'cūū ní yeⁿ'é Ndyuūs ní cuaacu.

¹⁰ Ní 'úú chiintii'yá na ca'a ángel miiⁿ chi dich'εεé ángel miiⁿ. Ní caⁿ'a yā: Nguéé 'tíicā diiⁿ di. 'Úú ntúūⁿ dichii'vé Ndyuūs tan'dúúcā díí ndúúcu hermanos yeⁿ'ē di dichíí'vε nī Ndyuūs ní ngaⁿ'a nī nduudu cuaacu yeⁿe Jesucristo. Dii, cu'téenu di Ndyuūs. Ní 'iiⁿ'yāⁿ chi ngaⁿ'a yā nduudu cuaacu yeⁿ'é Cristo ní ngaⁿ'á yā cáávā chi Ndyuūs ch'iⁿ'í yā 'iiⁿ'yāⁿ s'eeⁿ chiiⁿ chi ngaⁿ'á yā.

Yeⁿ'e 'áámá 'iiⁿ'yāⁿ chi canduú yā 'yuūdūu cuéē

¹¹ Tuu'mi ní n'diichí chi canda'āi va'ai chεeti nguuvi ní can'dáā 'áámá 'yuūdūu cuéē. Ní Cristo chi canduú yā 'yuūdūu miiⁿ chi duuchí yā ní 'Áámá N'daacā N'dai yā ní Cuaacú yā. Ní 'iiⁿ'yāⁿ miiⁿ ní dííⁿ yā tanducuéⁿ'ē chi cuaacu taachi dííⁿ yā caandaá ní n'diichí yā nuuⁿndi yeⁿe 'iiⁿ'yāⁿ s'eeⁿ. ¹² Ní nduutinaáⁿ yā miiⁿ ní tan'dúúcā nguuchi yaⁿ'ā, 'tíicā nduutinaáⁿ yā. Ní canéé n'deee n'dái coronas na tiíⁿ yā. Ní canéé nguūⁿ 'áámá chi duuchi yā chi mar 'áámá 'iiⁿ'yāⁿ nguéé n'diichí yā. Dámaāⁿ 'iiⁿ'yāⁿ miiⁿ deenú yā de'ē chi duuchí yā. ¹³ Ní catecaí yā chi canuuⁿ yā ndiituuⁿ yúúúⁿ. Ní chi duuchí yā ní Nduudu yeⁿ'é Ndyuūs. ¹⁴ Ní cuaaⁿ daamí yā ní n'dáa n'deee n'dái soldados yeⁿe va'ai chεeti nguuvi ndúúcu catecaí yā chi lino chi yaⁿ'ai chíí'vε chi cuéē ní dεεε. Ní soldado candúu ntúuⁿ yā 'yuūdūu cuéē yeⁿe yā. ¹⁵ Ní na cheendí Cristo can'daā 'áámá machete nduu 'uūví lados 'caāiⁿ. Ní ndúúcu chuū n'nuū cá'ai yā 'iiⁿ'yāⁿ yeⁿe naciones. Tuu'mi ní caaⁿ'maⁿ ntiiⁿ'nyúⁿ yā diituuⁿ yeⁿe naciones ndúúcu 'áámá nduucu cūū. Ní ngii ca'a yā lugar chi 'iiⁿ'yāⁿ s'eeⁿ sta'á yā vino chi nuūⁿnīⁿ yeⁿe n'gui'i uvas chi 'iiⁿ'yāⁿ dinde'éí yā ndúúcu ca'á yā. Ní Cristo ca'a yā 'iiⁿ'yāⁿ s'eeⁿ chi cu'u yā vino miiⁿ chi castigo yeⁿe vaadi taaⁿ yeⁿ'é Ndyuūs

chi véé tanducuéⁿē poder chi véé ní yeⁿe yā. ¹⁶ Ní canéé nguūⁿ na vestido yeⁿe yā ní na 'diiⁿ'má yā chi duuchí 'cūū: Rey ch'εετε yeⁿē nducuéⁿē reyes chi véé, Señor 'iiví yā ch'εετε yeⁿe nducyaaca señores 'iivi chi véé.

¹⁷ Ní cuayiiví nūūⁿ n'diichí 'aama ángel cheendii yā vmnaaⁿ 'yáⁿā. Ní ángel miiⁿ yuudu n'dái n'gai yā ní caⁿ'a yā chii yā nducyaaca 'iiti chi ngaá tī nánguuví: Ndís'tií 'iiti s'eeⁿ cuchíí nī ní nduuvidaamá nī chi cheⁿe nguiinú nī chi yeⁿē 'viicu yeⁿé Ndyuūs chi ch'εετε.

¹⁸ Cuchíí nī ní cheⁿ'é nī yuute yeⁿe reyes ndúú^cū yuute yeⁿē capitanes ndúú^cū yuute yeⁿe saⁿ'ā chi véé ca fuerzas yeⁿe yā ndúú^cū yuute yeⁿe 'yuūdūū ní yeⁿe nducyaaca 'iiⁿ'yāⁿ chi sндуú yā 'yuūdūū ndúú^cū yuutē yeⁿe nducyáácá 'iiⁿ'yāⁿ, 'iiⁿ'yāⁿ chi libre yā ní 'iiⁿ'yāⁿ chi esclavo yā, 'iiⁿ'yāⁿ chi ngaⁿ'a ntiinnyuⁿ ndúú^cū tanáⁿ'ā 'iiⁿ'yāⁿ.

¹⁹ Tuu'mi ní n'diichí 'iiti monstruo chi ch'εετε ca ndúú^cū reyes yeⁿe iⁿ'yeeⁿdí 'cūū ndúú^cū soldados yeⁿ'é yā chi nduuvidaamá yā ndúú^cū 'iiti miiⁿ chi díⁿ yā caandaá ndúú^cū 'iiⁿ'yāⁿ chi canduú yā 'yuūdūū cuéē miiⁿ ndúú^cū soldados yeⁿ'é yā. ²⁰ Ní 'iiⁿ'yāⁿ miiⁿ chi canduú yā 'yuūdūū cuéē miiⁿ sta'á yā monstruo miiⁿ chi 'iiti preso tī. 'Tiicá ntúūⁿ sta'á yā chi preso sa 'áámá saⁿ'ā chi ngaⁿ'a sa chi profeta sa, ní nguéé profeta sa. Naati saⁿ'ā miiⁿ díⁿ sa señas ndúú^cū vaadí n'gíinūū ní chinnche'éi yā 'iiⁿ'yāⁿ chi canéé ndúú^cū sello yeⁿ'é tī na cuerpo yeⁿ'é yā. Ní i'téenu yā 'iiti santo yeⁿ'é tī. Níicú nduu 'uuví sa chi preso sa, 'iiⁿ'yāⁿ miiⁿ sta'á yā nduu 'uuví sa neⁿ'e chi canduuchi sa ní chin'dáá nuúⁿ yā nduu 'uuví sa na nuūⁿnīⁿ'yáⁿ'ā yeⁿ'e ngiichi yaⁿ'ā chi ngiichi ndúú^cū tuūū chi azufre. ²¹ 'Áámá yā ndúú^cū machete 'uuvi lados 'caāⁿ chi canéé na cheendí yā chi canduú yā na 'yuūdūū cuéē ch'iin'núⁿ yā tanáⁿ'ā soldados yeⁿ'e 'iiti monstruo. Ní nducyaaca 'yáádá cheⁿ'é tī nducuéⁿē yuūtē yeⁿ'e soldados ní chiitu 'yáádá s'éeⁿ yeⁿ'e yúútē yeⁿ'e yā.

20

Yeⁿ'e mil nduūyū

¹ Cuayiivi ní n'diichí 'áámá ángel chi cuch'éeⁿ yā yeⁿ'e va'ai chεeti nguuvi ní ndéé yā na ta'a yā llave yeⁿ'e yiive yáⁿ'āa ndúú^cū 'áámá cadena ch'εεte ca. ² Ní ángel miiⁿ sta'á yā 'iiti dragón chi cúú miiⁿ chi canéé tī ndii tiempo chi ch'ó'ōo chi nguuvi diablo o yááⁿ'n'guiinūūⁿ chi Satanás. Ní ángel miiⁿ dichiiichí yā 'iiti dragón miiⁿ ndúú^cū cadena ch'εεte ca. Ní canéé tī 'tíicā chεeti 'áámá mil nduūyū. ³ Ní ángel miiⁿ chin'dáá nuúⁿ yā 'iiti dragón miiⁿ na yiive yáⁿ'āa naachi canee chiichí tī. Ní nan'gaadí yā cheendi va'ai yeⁿ'ē. Ní s'neéⁿ yā 'áámá sello vmnaaⁿ cheendi va'ai miiⁿ. Ní 'iiti dragón miiⁿ 'āā ntéé cuuvi cannche'éi tī 'iiⁿ'yāⁿ yeⁿ'e naciones ndíí 'cuiinu 'áámá mil nduūyū. Ní cuayiivi ní canéé chi n'daatií yā 'iiti dragón miiⁿ 'áámá tiempo 'líⁿ nūūⁿ.

⁴ Ní cuayiivi ní n'diichí tronos ní 'iiⁿ'yāⁿ véε yā na tronos. Ní 'áámá 'iiⁿ'yāⁿ ca'á yā poder 'iiⁿ'yāⁿ s'eeⁿ chi díⁿ yā juzgar 'iiⁿ'yāⁿ. Ní n'diichí almas yeⁿ'e 'iiⁿ'yāⁿ ndiitaá daandu yā ti caⁿ'a cuaacú yā yeⁿ'e Jesucristo. Ní caⁿ'a ntúūⁿ yā nduudu cuaacu yeⁿ'é Ndyuūs. 'Iiⁿ'yāⁿ s'eeⁿ nguéé chi'téenu yā 'iiti monstruo miiⁿ, ní nguéé chi'téenu yā 'iiti santo yeⁿ'é tī. Ndíí nguéé ndúú ca'a yā lugar 'iiti monstruo miiⁿ chi s'neéⁿ tī sello yeⁿ'é tī nchεeté yā o ta'á yā. Ní 'iiⁿ'yāⁿ s'eeⁿ ch'εεtinduuchí ntuūⁿ yā ní ngaⁿ'a ntiinnyúⁿ yā dáámá ndúú^cū Cristo chεeti 'áámá mil nduūyū. ⁵ Chuū miiⁿ ní vmnááⁿ vmnaaⁿ chi 'iiⁿ'yāⁿ s'eeⁿ nanduuchí ntuūⁿ yā naati tanáⁿ'ā 'iiⁿ'yāⁿ chi n'dí yā nguéé nduuchí ntúūⁿ yā ndíí chi ch'ó'ōo 'áámá mil nduūyū miiⁿ. ⁶ De'ε chúú^cā yeenú 'iiⁿ'yāⁿ chí yeⁿ'é Ndyuūs, 'iiⁿ'yāⁿ chi vmnááⁿ vmnaaⁿ caⁿ'á yā ch'εεtinduuchí ntuūⁿ yā yeⁿ'ē nguaaⁿ tináⁿ'ā. Maaⁿ ní ndii chííⁿ ndii 'úúví cuuvi 'cuūvi 'iiⁿ'yāⁿ nguéé véé poder yeⁿ'e chi tuneen 'iiⁿ'yāⁿ s'eeⁿ chi 'cuūvi yā. Ní 'iiⁿ'yāⁿ s'eeⁿ ní cuuvi chiiduú s'eeⁿ yeⁿ'e Ndyuūs ní yeⁿ'e Cristo ní caaⁿ'maⁿ ntiinnyúⁿ yā dáámá ndúú^cū Cristo chεeti 'áámá mil nduūyū.

⁷ Ní taachi ch'iinu 'áámá mil nduūyū miiⁿ n'daatií yā yááⁿ'n'guiinūūⁿ chí ndíchiichi sa ní chεεe sá yeⁿ'e yiivéé chi vácūū naachi canéé sa. ⁸ Ní caⁿ'a sa chiica sa chi cannche'ei sa 'iiⁿ'yāⁿ yeⁿ'e naciones yeⁿ'e núúⁿ'máⁿ 'iⁿ'yeeⁿdí chi 'iiⁿ'yāⁿ s'eeⁿ caⁿ'á yā lado yeⁿ'ē sa. Ní cannche'ei sa rey Gog ndúú^cū yáāⁿ Magog chi yáāⁿ yeⁿ'e yā. Ní nadidáámá sá nducyaaca 'iiⁿ'yāⁿ chi diiⁿ sa caandaá. Ní 'iiⁿ'yāⁿ s'eeⁿ ndúú^cū sa ní n'dee n'dái yā tan'dúú^cā yaⁿ'ā

ndúútii yeⁿē yíicú. ⁹ Ní 'iiⁿ'yāⁿ s'eeⁿ cueⁿé yā nuuⁿmaⁿ iⁿ'yeeⁿdī ní cuaaⁿ diituu ní nuuⁿmaⁿ ndiivi yeⁿe campamento yeⁿe 'iiⁿ'yāⁿ chi yeⁿé Ndyuūs ní yeⁿe yáāⁿ Jerusalén chi Ndyuūs neené neⁿe. Ní Ndyuūs dicho'ó yā chi chingéē nguuchi yaⁿā yeⁿē na va'ai chēeti nguuvi. Ní 'iiⁿ'yāⁿ s'eeⁿ ngiichi ndúúcū nguuchi yaⁿā miiⁿ ní di'cuinú yā. ¹⁰ Ní yááⁿn'guiinūⁿ miiⁿ chi diablo chi chinnche'ei sá 'iiⁿ'yāⁿ, 'áámá yā chin'dáánuúⁿ yā saⁿā miiⁿ ndii nuūⁿnīⁿ'yáⁿā chi ngiichi ndúúcū tuū azufre naachi 'āā chin'dáánuúⁿ yā 'iiti monstuo miiⁿ ndúúcū profeta chi nguéé caⁿa yā nduudu cuaacu. Ní 'cueenú yā cuuvi na lugar miiⁿ ndii nguuvi ndíí n'gaaⁿ. Ní cueⁿe daāⁿmaⁿ ní 'cueenú yā cuuvi.

Cristo n'diichí yā nuuⁿndi yeⁿe 'iiⁿ'yāⁿ taachi ch'iindí yā na trono cuéē yeⁿe yā

¹¹ Cuayiivi ní n'diichí 'áámá trono chi ch'ēete ní cuéē ní 'áámá 'iiⁿ'yāⁿ vée yā na trono miiⁿ. Ní na yáⁿāa ndúúcū nanguuvi cueⁿe yeⁿē nanáaⁿ yā. 'Āā ntéé mar táámá lugar naachi cuuvi cuēetineē na yáⁿāa ndúúcū nanguuvi. ¹² Ní n'diichí 'iiⁿ'yāⁿ s'eeⁿ chí n'díi yā, tináⁿā chi n'gēete yā chi ngaⁿa ntiⁿnyuⁿ yā ndúúcū tanáⁿā tináⁿā. Nducyaaca yā ní chēetindii yā nanáaⁿ Ndyuūs. Ní Ndyuūs nan'gaaⁿ yā libros yeⁿe yā. Ní nan'gaaⁿ yā táámá libro chí libro yeⁿe vida cueⁿe daāⁿmaⁿ. Ní Ndyuūs n'diichí yā nuuⁿndi yeⁿe tináⁿā s'eeⁿ yeⁿé dendu'ū chi canéé nguūⁿ na libro s'eeⁿ tan'dúúcā chí díⁿ yā. ¹³ Ní 'iiⁿ'yāⁿ chí ch'ii yā nguuaⁿ nuūⁿnīⁿ'yáⁿā ní nan'dáa yā. Ní tanáⁿā chí snuú yā na lugar yeⁿe 'iiⁿ'yāⁿ chí n'díí ní nan'dáa yā. Ní Cristo n'diichí yā nuuⁿndi yeⁿe ca'áámá ca'aamá yā tan'dúúcā chí díⁿ yā. ¹⁴ Tuu'mi ní vaadī n'gii ndúúcū lugar yeⁿē ndúúcū 'iiⁿ'yāⁿ chí n'díí yeⁿe 'áámá yā canuúⁿ yā ná nuūⁿnīⁿ'yáⁿā chí ngiichi. Ní nuūⁿnīⁿ'yáⁿā chí ngiichi miiⁿ, chíⁿ chí ndíí 'úúví vaadī n'gii ní yeⁿé 'iiⁿ'yāⁿ chí n'díí yā. ¹⁵ 'Áámá 'iiⁿ'yāⁿ chin'dáa nuuⁿ yā na nuūⁿnīⁿ'yáⁿā chí ngiichi miiⁿ nducyáácá 'iiⁿ'yāⁿ chí nguéé canee n'guūⁿ chí duuchi yeⁿe yā na libro yeⁿe vida cueⁿe daāⁿmaⁿ.

21

Yeⁿe va'ai chēeti nguuvi ngai ndúúcū iⁿ'yeeⁿdī ngai

¹ Maaⁿ ní n'diichí táámá va'ai chēeti nguuvi chí ngai ndúúcū 'áámá yáⁿāa chí ngai ti va'ai chēeti nguuvi chí vmnááⁿ vmnaaⁿ miiⁿ ndúúcū yáⁿāa chí vmnááⁿ vmnaaⁿ miiⁿ ní chó'ōo yeⁿē. Ní 'tíicá ntúūⁿ 'āā ntéé vée nuūⁿnīⁿ'yáⁿā. ² Ní 'úú, Juan, n'diichí yāāⁿ chí dēeve chí yáāⁿ Jerusalén chí ngai chí chíicā yeⁿe na va'ai chēeti nguuvi naachi canéé Ndyuūs. Ní yáāⁿ miiⁿ ní yēeve taaví tan'dúúcā 'aama n'daataá chí caama 'caandavaacu tá ní dēeve idiiⁿ tá ndúúcu tá cáávā novio yeⁿe tá. ³ Ní ch'iindiveéⁿ 'áámá nduudu ch'ēete yeⁿe na va'ai chēeti nguuvi chí caⁿa 'túúcā: Cuin'diichí nī maaⁿ. Va'ai yeⁿe Ndyuūs ní canee ndúúcū 'iiⁿ'yāⁿ s'eeⁿ ní Ndyuūs canee yā nguuaⁿ 'iiⁿ'yāⁿ s'eeⁿ. Ní Ndyuūs canee yā ndúúcū 'iiⁿ'yāⁿ s'eeⁿ. Ní 'iiⁿ'yāⁿ s'eeⁿ ní cuuvi 'iiⁿ'yāⁿ yeⁿé yā. Ní maāⁿ Ndyuūs miiⁿ ní cuuvi Ndyuūs yeⁿé yā. ⁴ Ndyuūs didēevé yā nuūⁿnīⁿ nduutinaáⁿ yā yeⁿe nduutináaⁿ 'iiⁿ'yāⁿ s'eeⁿ. 'Āā ntéé cuuvi 'cuūvi yā. 'Āā ntéé cuuvi ya'ai ca yā ní 'āā ntéé cuēecu yā. 'Āā ntéé cuuvi 'cueenú yā cuuvi ti dendú'ū yeⁿe cuááⁿ vmnaaⁿ 'āā chó'ōo.

⁵ Tuu'mi ní 'iiⁿ'yāⁿ chí vée yā na trono miiⁿ ní caⁿa yā: Ndís'tiī n'diichí nī. 'Úú ní díí tanducuéⁿē dendu'ū chí nduuví ngai. Ní 'iiⁿ'yāⁿ miiⁿ caⁿa yā chí yā 'úú: Dii, Juan, dingúuⁿ di nduudu s'eeⁿ ti nduudu s'eeⁿ ní nduudu cuaacu. Ní nducyaaca 'iiⁿ'yāⁿ cuuvi cu'téenu yā nduudu s'eeⁿ.

⁶ Cuayiivi caⁿa yā chí yā 'úú 'tíicā: 'Úú dīn'daí nducuéⁿē. 'Úú ní yeⁿe cuaaⁿ naachi ínga'ā ní ndíí cuaaⁿ ná 'cuiinu tan'dúúcā letras A ndíí Z yeⁿe alfabeto. 'Iiⁿ'yāⁿ chí yaaca yā 'úú ní ca'á nuūⁿnīⁿ chí cu'u yā tanducuéⁿē chí neⁿé yā ní nguéé nadí'v'e yā cáávā nuūⁿnīⁿ miiⁿ chí vida cueⁿe daāⁿmaⁿ. ⁷ 'Iiⁿ'yāⁿ chí cuchée yā yeⁿē tanducuéⁿē 'úú ní ca'á tanducuéⁿē chuū chí cuuvi yeⁿé yā. Ní 'úú cuuvi Ndyuūs yeⁿe yā ní 'iiⁿ'yāⁿ s'eeⁿ ní cuuvi daiyá. ⁸ Naati 'iiⁿ'yāⁿ chí 'va'a yā ndúúcū 'iiⁿ'yāⁿ chí nguéé i'téenu yā o 'iiⁿ'yāⁿ chí nguéé neⁿe yā 'iiⁿ'yāⁿ, ndúúcū 'iiⁿ'yāⁿ chí n'giiⁿnúⁿ yā 'iiⁿ'yāⁿ, ndúúcū 'iiⁿ'yāⁿ chí caⁿá yā ndúúcū n'daataá o isaⁿā chí nguéé yeⁿe yā, ndúúcū 'iiⁿ'yāⁿ chí nadiiⁿ dendu'ū yeⁿe ngaatu, ndúúcū 'iiⁿ'yāⁿ chí i'téenu yā santos chí ídolos, ndúúcū 'iiⁿ'yāⁿ chí yaadí

yā, nducyaaca 'iiⁿ'yāⁿ s'eeⁿ ní canéé chi caⁿ'á yā nuūⁿnīⁿ'yáⁿā chi ngiichi ndúú^cū yaⁿ'ā ní ndúú^cū tuū azufre. Chuū ní chiiⁿ chii ndii 'uū^vī cúú^ví 'cuū^vi yā.

Yeⁿ'e yāāⁿ Jerusalén chí ngai

⁹ Tuu[']mi ní ndaā nanááⁿ 'úú 'áámá chεε ángel naachi ndεēche yā chí véé 'cuū^tíí yeⁿ'é yā, 'cuū^tíí s'eeⁿ ndúú^cū ndεēchē vaadi ya'ai yeⁿ'e cuaaⁿ na 'cuiinu. Ní caⁿ'a yā chii yā 'úú: Díí, Juan, cuchíí dí 'muuⁿ ni 'úú 'cuuⁿ'míⁿ dii du'u chi novia chi n'daataá yeⁿ'e 'iiⁿ'yāⁿ chi nguuví 'iiti cuū^{ch}ī.

¹⁰ Ní chuū ní yeⁿ'e chi n'diichí taachi caneé maaⁿ poder yeⁿ'e Espí^ritu N'dai yeⁿ'é Ndyuūs. Angel candée yā 'úú naachi véé 'áámá yīcū ch'εete ní yaacu. Ní ch'iⁿ'í yā 'úú yāāⁿ ch'εete ní dεeve chi nguuví Jerusalén chí cuch'éeⁿ yeⁿ'e na va'ai chεeti nguuví yeⁿ'e nanááⁿ Ndyuūs. ¹¹ Yāāⁿ miiⁿ ní dεevé ngii ndúú^cū yeⁿ'é Ndyuūs chí dεevé ngii. Ní dεevé ngii yeⁿ'e yāāⁿ miiⁿ ní tan'dúú^cā 'áámá tuū chi yaⁿ'ai chíí'vē chí tan'dúú^cā tuū jaspe chí dεevé tan'dúú^cā cristal. ¹² Ní véé 'áámá ncheētī nuuⁿmaⁿ ndiivi na yāāⁿ miiⁿ ndúú^cū ndichúú^ví cheendi va'āī ch'εete yeⁿ'ē. Ní véé ndichúú^ví ángeles 'áámá 'áámá yā ní nguaindaí yā 'áámá 'áámá cheendi va'āī ch'εete miiⁿ. Ní chí duuchi chí canéé nguūⁿ vmnaaⁿ ca'áámá ca'áámá cheendi va'ai ch'εete miiⁿ ní 'áámá yeⁿ'e chí duuchi yeⁿ'e chí ndu'u ndichúú^ví tribus yeⁿ'e 'iiⁿ'yāⁿ chí Israel chí judíos. ¹³ Ní véé 'iinū cheendi va'āī n'gεete 'áámá 'áámá lado yeⁿ'ē yāāⁿ miiⁿ. Cuaaⁿ naachí can'daā 'yáⁿā vεe 'iinū cheendi va'āī. Ní cuaaⁿ na 'niiⁿ'nuⁿ véé 'iinū cheendi va'āī, ní cuaaⁿ ndiiyā véé 'iinū cheendi va'āī, ní cuááⁿ na ngiiya 'yáⁿā véé 'iinū cheendi va'āī. ¹⁴ Ní cimientó yeⁿ'e yāāⁿ miiⁿ véé ndichúú^ví tuū chí cimientó yeⁿ'ē. Ní chí duuchi yeⁿ'e ndu'ū ndichuuví apóstoles yeⁿ'e 'iiⁿ'yāⁿ chí duuchi 'iiti cuū^{ch}ī, 'áámá 'áámá chí duuchí yā canéé nguūⁿ vmnaaⁿ 'áámá 'áámá tuū miiⁿ.

¹⁵ Ní ángel miiⁿ chí ngāⁿ'a yā ndúú^cū 'úú ndée yā 'áámá tááⁿ ndúú yeⁿ'e 'dííⁿ'nguāⁿ chí dicaadí yā yāāⁿ miiⁿ ndúú^cū cheendi va'āī ch'εete miiⁿ yeⁿ'ē ndúú^cū ncheētī miiⁿ yeⁿ'ē. ¹⁶ Ní yāāⁿ miiⁿ ní cuadrada ní chí ch'ee'nuu dáámá nūuⁿ ndúú^cū chí ch'eēnūu. Ní ángel miiⁿ ní dicaadí yā yāāⁿ miiⁿ ndúú^cū nduu yeⁿ'e 'dííⁿ'nguāⁿ. Ní caadi yeⁿ'e yāāⁿ miiⁿ ní 'uū^vī mil canéé 'uū^vī cientos kilómetros yeⁿ'ē. Ní chí ch'ee'nuu miiⁿ ní chí ch'eēnūu ní chí yaacu yeⁿ'e yāāⁿ miiⁿ 'āā daamá nūuⁿ. ¹⁷ Ní ángel miiⁿ dicaadí yā nancheētī miiⁿ. Ní ngíí 'iinū ngeεecu cuūⁿ metros chí ángel miiⁿ dicaadí yā. Ní caadí miiⁿ ní dáámá ndúú^cū caadí yeⁿ'e chí caadí 'iiⁿ'yāⁿ chí snee iⁿ'yeeⁿdí 'cūū.

¹⁸ Ní ncheētī miiⁿ ní chin'dai ndúú^cū tuū jaspe. Ní yāāⁿ miiⁿ ní chin'dai yeⁿ'e dámaāⁿ 'dííⁿ'nguāⁿ puro. Ní tan'dúú^cā chí 'nááⁿ vidrio dεeve, 'tíicā yāāⁿ miiⁿ. ¹⁹ Cimientó yeⁿ'e ncheētī miiⁿ ndíí adornado ndúú^cū tanducuéⁿē tuū chí yaⁿ'ai chíí'vē. Cimientó chí vmnááⁿ vmnaaⁿ miiⁿ ní yeⁿ'e tuū jaspe, ndii chííⁿ ndii 'uū^vī miiⁿ ní yeⁿ'e tuū zafiro, ndii chííⁿ ndii 'ííⁿú miiⁿ ní yeⁿ'e tuū ágata ní ndii chííⁿ ndii cuūⁿ miiⁿ ní yeⁿ'e tuū esmeralda. ²⁰ Ndií chííⁿ ndii nyuⁿ'u miiⁿ ní yeⁿ'ē tuū ónice, ní ndii chííⁿ ndii niyaaⁿ miiⁿ ní yeⁿ'ē tuū cornalina, ní ndii chííⁿ ndii ndεēchē ní yeⁿ'e tuū crisólito, ní ndii chííⁿ ndii níiⁿ'niⁿ ní yeⁿ'e tuū berilo, ní ndii chííⁿ ndii nuuⁿ ní yeⁿ'e tuū topacio, ní ndii chííⁿ ndii ndiichi ní yeⁿ'e tuū crisoprasa, ní ndii chííⁿ ndicháámá ní yeⁿ'e tuū jacinto, ní ndii chííⁿ ndichúú^ví ní yeⁿ'e tuū amatista. ²¹ Ní ndu'u ndichúú^ví cheendi va'āī n'gεete miiⁿ ní ndiichúú^ví perlas. Ní ca'áámá ca'áámá cheendi va'āī ch'εete miiⁿ ní 'áámá perla nūuⁿ. Ní yúúⁿí ch'εete yeⁿ'e yāāⁿ miiⁿ dámaāⁿ 'dííⁿ'nguāⁿ puro ní dinááⁿ tan'dúú^cā vidrio dεeve.

²² Ní 'úú nguéé n'diichí mar 'áámá yaacū na yāāⁿ miiⁿ ti Señor chí Ndyuūs chí véé tanducuéⁿē dendu'ū poder yeⁿ'e yā ndúú^cū 'iiⁿ'yāⁿ chí nguuví 'iiti cuū^{ch}ī miiⁿ, 'iiⁿ'yāⁿ s'uuuⁿ chí Ndyuūs chí yaacū yeⁿ'e yāāⁿ miiⁿ. ²³ Ní yāāⁿ miiⁿ nguéé neⁿ'e 'yáⁿā ndíí nguéé ndúú 'iiyū chí dεeve yeⁿ'ē ti Ndyuūs chí dεeve ngii ní dεeve yeⁿ'e yāāⁿ miiⁿ, ní 'iiⁿ'yāⁿ chí duuchi 'iiti cuū^{ch}ī ní dεeve yeⁿ'e yāāⁿ miiⁿ. ²⁴ Ní 'iiⁿ'yāⁿ chí nadanguaⁿ'ai yā yeⁿ'e naciones chiicá yā ná dεeve yeⁿ'e yāāⁿ miiⁿ. Ní reyes yeⁿ'e yáⁿ'āa 'cūū ndée yā ch'εete yeⁿ'e maáⁿ yā ndúú^cū honra yeⁿ'e maáⁿ yā nduucú yā ndii yāāⁿ miiⁿ. ²⁵ Ní cheendi va'ai n'gεete yeⁿ'e yāāⁿ miiⁿ nguéé nduudi núúⁿmaⁿ nguuví. Ní 'āā ntéé véé n'gaaⁿ miiⁿ. ²⁶ Ní 'iiⁿ'yāⁿ s'eeⁿ yeⁿ'e naciones yeⁿ'e iⁿ'yeeⁿdí 'cūū ní ndéé yā yeⁿ'ē chí ch'εete ndúú^cū honor

yeⁿe naciones yeⁿé yā. ²⁷ Nguéé cuuvi cundaā na yāāⁿ miiⁿ dendu'ū chi nguéé δεενε, ndúúcu 'iiⁿ'yāⁿ chi diiⁿ yā chi nguéé n'daacā, ndúúcu 'iiⁿ'yāⁿ chi ngaⁿ'a yā nduudu yaadi. Dámaāⁿ cundaa 'iiⁿ'yāⁿ chi canéé nguūⁿ chi duuchi yā na libro yeⁿe vida cueⁿe daāⁿmaⁿ chi ndéé 'iiⁿ'yāⁿ chi nguuvi 'iiti cuūchī.

22

¹ Tuu'mi ní ángel miiⁿ ch'iⁿ'i yā 'úú 'áámá yícuⁿ δεενε naachi canéé nuūⁿnīⁿ yeⁿe vida cueⁿe daāⁿmaⁿ. Nuūⁿnīⁿ miiⁿ ní δεεné tan'dúúca cristal ní ican'daā yeⁿe trono yeⁿe Ndyuūs ndúúcu trono yeⁿe 'iiⁿ'yāⁿ chi nguuvi 'iiti cuūchī. ² Ní náávtaⁿ'a yeⁿe yúúni ch'εετε yeⁿe yāāⁿ miiⁿ ní nduu 'úúví lado yeⁿe yícuⁿ míⁿ cáta'ai yáⁿ'á yeⁿe vida cueⁿe daāⁿmaⁿ chi ngii ndu'ū ndichúúví naaⁿ n'gui'i. Ni ca'aama 'íyú ní ngii 'áámá 'áámá naaⁿ n'gui'i yeⁿé. Ní táⁿ'ā yáⁿ'á miiⁿ chíⁿ chi diiⁿ chi nduūvā yeⁿe vaadi ya'ai yeⁿe naciones. ³ 'Āā ntéé véé mar 'áámá dendu'ū miiⁿ chi Ndyuūs caⁿ'a yā chi condenado chi canéé na yāāⁿ miiⁿ. Trono yeⁿe Ndyuūs ndúúcu trono yeⁿe 'iiⁿ'yāⁿ chi nguuvi 'iiti cuūchī canéé na yāāⁿ miiⁿ. Ní 'iiⁿ'yāⁿ chi dichí'vē Ndyuūs canéé yā miiⁿ. ⁴ Ní 'iiⁿ'yāⁿ s'eeⁿ ní snaāⁿ yā naāⁿ Ndyuūs ní canéé nguūⁿ chi duuchi Ndyuūs ncheεté yā. ⁵ Ní nguéé cuuví n'gaaⁿ yāāⁿ miiⁿ. 'Iiⁿ'yāⁿ s'eeⁿ chi n'gεetinée yā miiⁿ nguéé neⁿ'é yā mar 'áámá δεενε yeⁿe lámpara ní nguéé δεενε yeⁿe 'yáⁿ'ā caati 'iivú Ndyuūs ngíⁿ δεενε yā. Ní 'iiⁿ'yāⁿ s'eeⁿ caaⁿ'maⁿ ntiiⁿnyuⁿ yā cueⁿe daāⁿmaⁿ cueⁿe daāⁿmaⁿ tan'dúúca reyes.

Tiempo taachi cuchii Jesucristo ní 'āā canéé niiⁿnuúⁿ

⁶ Cuayiivi miiⁿ ní ángel caⁿ'á yā chii yā 'úú: Nduudú 'cūú ní nduudu cuaacu. Ní 'iiⁿ'yāⁿ cuuvi cu'téenu yā nduudu miiⁿ. Señor chi maaⁿ Ndyuūs yeⁿe espíritus yeⁿe 'iiⁿ'yāⁿ profetas chi Ndyuūs ndεεvé yā, maāⁿ yā dicho'ó yā ángel yeⁿe yā chi ángel 'cuuⁿ'míⁿ yā 'iiⁿ'yāⁿ chi dichí'vē Ndyuūs dendu'ū chi 'āā canéé chi chó'ō ní 'āā snee niiⁿnuúⁿ.

⁷ Jesús ngaⁿ'á yā ngii yā ndís'tiī. 'Caandiveéⁿ nī. 'Úú ní ndaá nuuⁿ. De'ε chúúca yeenu 'iiⁿ'yāⁿ chi 'caandiveéⁿ yā nduudu cuaacu yeⁿe Ndyuūs, nduudu chi canéé nguūⁿ na libro 'cūú.

⁸ 'Úú, chi Juan, ch'iindiveéⁿ ní n'diichí dendu'ū chi 'túúca. Ní cuayiivi chi n'diichí ní ch'iindiveéⁿ chuū, candiitin'díí ná ca'a ángel chi ch'iⁿ'i yā 'úú dendu'ū chi 'túúca chi neⁿ'é i'teenú ángel miiⁿ. ⁹ Naati ángel miiⁿ caⁿ'a yā chii yā 'úú: Nguéé diiⁿ di 'tíicā. 'Úú ntúūⁿ dichii'vé Ndyuūs tan'dúúca dii ndúúcu hermanos yeⁿe di chi ngaⁿ'á yā nduudu cuaacu yeⁿ'é Ndyuūs ndúúcu nducyáácá yā chí 'caandiveéⁿ yā nduudu cuaacu chi canéé nguūⁿ na libro 'cūú. Díí, cu'téenu di Ndyuūs.

¹⁰ Ní ángel miiⁿ ní caⁿ'a ntúūⁿ yā chii yā 'úú: Nguéé cunuⁿ n'dé'ei di nduudu cuaacu yeⁿ'é Ndyuūs chi canéé nguūⁿ na libro 'cūú caati tiempo yeⁿe dendu'ū chi 'túúca 'āā snee niiⁿnuúⁿ. ¹¹ Maaⁿ ní cu'néeⁿ nī 'iiⁿ'yāⁿ chi nguεε n'daacā idiíⁿ yā chi 'tíicā diíⁿ yā. 'Tiicā ntúūⁿ 'iiⁿ'yāⁿ chi nadacadiinúúⁿ yā yeⁿe dendu'ū chi nguεε n'daacā, cu'néeⁿ nī chi 'tíicā diíⁿ yā. 'Iiⁿ'yāⁿ chíⁿ dín'daacá yā, cu'néeⁿ nī chíⁿ diíⁿ yā 'tíicā. 'Iiⁿ'yāⁿ chíⁿ 'áámá diíⁿ yā ntiiⁿnyuⁿ yeⁿe Ndyuūs cu'néeⁿ nī chíⁿ 'aama diíⁿ yā 'tíicā.

¹² 'Caandiveéⁿ nī chiiⁿ chíⁿ caⁿ'a Jesús. 'Úú ní núúⁿ nūⁿ ndaá. Ní ndéé premios chíⁿ caⁿ'á ca'á 'áámá 'áámá 'iiⁿ'yāⁿ premios chíⁿ tuneé yā yeⁿ'é ntiiⁿnyuⁿ chíⁿ yeⁿ'é yā. ¹³ 'Úú ní 'iiⁿ'yāⁿ vmnáāⁿ vmnaaⁿ ndíí naachi 'cuiinu. 'Úú ní canéé naachi chinga'ā ndíí cuayiivi chíⁿ 'cuiinū tan'dúúca letras yeⁿe alfabeto A ndíí Z, 'tíicā 'úú, ngaⁿ'a Jesús.

¹⁴ De'ε chúúca yeenu 'iiⁿ'yāⁿ s'eeⁿ chíⁿ nandεεvé yā catecai yā caati cuuvi cuta'á yā n'gui'i yeⁿ'é yáⁿ'á yeⁿe vida, ní cuuví cundaa yā cheendi va'ai yeⁿe yāāⁿ miiⁿ ní cho'ó yā cuaaⁿ cheēti va'ai cheēti nguuvi. ¹⁵ Naati cuaaⁿ daami yāāⁿ miiⁿ ch'εetinée 'iiⁿ'yāⁿ chíⁿ nguéé chíⁿ téenu yā Ndyuūs ndúúcu 'iiⁿ'yāⁿ chíⁿ ngaatu, ndúúcu 'iiⁿ'yāⁿ chíⁿ caⁿ'á yā ndúúcu ndaataá o isaⁿ'ā chíⁿ nguéé yeⁿ'é yā, ndúúcu 'iiⁿ'yāⁿ chíⁿ n'giiⁿ'núⁿ yā 'iiⁿ'yāⁿ, ndúúcu 'iiⁿ'yāⁿ chíⁿ i'téenu yā santos o ídolos ndúúcu nducyáácá 'iiⁿ'yāⁿ chíⁿ neⁿ'é yā nginnche'éi yā 'iiⁿ'yāⁿ ní ngaⁿ'a yā nduudu yaadi.

¹⁶ 'Úú Jesús idicho'ó ángel yeⁿ'é chi caaⁿ'maⁿ cuaacú yā yeⁿ'e nducuéⁿ'e cosas chi 'túúcā nanááⁿ ndís'tiī chi 'iiⁿ'yāⁿ yeⁿ'e yaācū s'eeⁿ. 'Úú ní 'iiⁿ'yāⁿ vmnááⁿ vmnaaⁿ yeⁿ'e ndaata yeⁿ'e David 'úú. 'Úú ní 'íⁿ'nyúⁿ chí ngíí dεεε nguεεtiyaaⁿ.

¹⁷ Espíritu N'dai yeⁿ'é Ndyuūs ndúúcū 'iiⁿ'yāⁿ s'eeⁿ chi yeⁿ'é Ndyuūs ngaⁿ'a yā 'tíicā: Ndís'tiī cuchíi nī. Ní 'āā du'ú nūuⁿ 'iiⁿ'yāⁿ chi n'giindiveéⁿ yā nduudu yeⁿ'é ní canéé chi caaⁿ'máⁿ yā: Cuchíi nī. Ní n'diī chí yaaca nī cuchíi nī. Cuchíi nī ndúúcū 'āā du'ú nūuⁿ 'iiⁿ'yāⁿ chi neⁿ'é yā. Cuchíi nī ní cu'u nī yeⁿ'e nuūⁿnīⁿ yeⁿ'e vida cueⁿ'e daāⁿmaⁿ. Ní nguéé de'ε vεε cūndi'i yeⁿ'é nī nuūⁿnīⁿ yeⁿ'e vida cueⁿ'e daāⁿmaⁿ.

¹⁸ 'Úú ngaⁿ'á ngíi nduudu cuaacu ca'áámá ca'áámá 'iiⁿ'yāⁿ chi n'giindiveéⁿ yā nduudu yeⁿ'e dendú'ū chi canéé chi cuchíi chi canéé nguūⁿ na libro 'cūū. Nduuti chi 'áámá yā cu'neeⁿ ca n'deēe nduudú nguéé ti chi canéé nguūⁿ na libro 'cūū Ndyuūs ca'á yā 'iiⁿ'yāⁿ miiⁿ castigo yeⁿ'e yā yeⁿ'e nducuéⁿ'ē vaadi ya'ai chi canéé nguūⁿ na libro 'cūū. ¹⁹ Ní nduuti chi 'áámá 'iiⁿ'yāⁿ divíi yā naⁿ'a nduudu yeⁿ'é Ndyuūs yeⁿ'e dendú'ū chi cuchíi chi canéé nguūⁿ na libro 'cūū, 'tiicá ntúūⁿ Ndyuūs nadivíi yā parte chi cuuvi yeⁿ'e yā yeⁿ'e libro yeⁿ'ē vida cueⁿ'e daāⁿmaⁿ ndúúcū parte chí cuuvi yeⁿ'é yā yeⁿ'e yáāⁿ chí dεεε yeⁿ'e chi canéé nguūⁿ na libro 'cūū.

²⁰ 'Iiⁿ'yāⁿ chí ngaⁿ'a cuaacú yā dendu'ū chi 'túúcā, 'iiⁿ'yāⁿ miiⁿ ngaⁿ'a yā: Cuaacu nííⁿ'nyuⁿ chí 'āā cuchii nuúⁿ. 'Tíicā cuuvi. Cuchíi nī Señor Jesucristo.

²¹ Ní maaⁿ ní Señor Jesucristo yeⁿ'e yú tée yā ndís'tiī nducuéⁿ'ē chi n'daacā yeⁿ'é yā, ní canéé yā ndúúcū ndís'tiī. 'Tíicā cuuvi.